

Q

Q

PATROLOGIÆ

CURSUS COMPLETUS

SIVE
BIBLIOTHECA UNIVERSALIS, INTEGRÆ, UNIFORMIS, COMMODA, ŒCONOMICA,
OMNIUM SS. PATRUM, DOCTORUM SCRIPTORUMQUE ECCLESIASTICORUM

QUI
AB ÆVO APOSTOLICO AD INNOCENTII III TEMPORA
FLORUERUNT;

RECUSIO CHRONOLOGICA

OMNIUM QUÆ EXSTITERE MONUMENTORUM CATHOLICÆ TRADITIONIS PER DUODECIM PRIORA
ECCLESIE SÆCULA,

JUXTA EDITIONES ACCURATISSIMAS, INTER SE CUMQUE NONNULLIS CODICIBUS MANUSCRIPTIS COLLATAS,
PERQUAM DILIGENTER CASTIGATA;
DISSERTATIONIBUS, COMMENTARIIS LECTIONIBUSQUE VARIANTIBUS CONTINENTER ILLUSTRATA;
OMNIBUS OPERIBUS POST AMPLISSIMAS EDITIONES QUÆ TRIBUS NOVISSIMIS SÆCULIS DEBENTUR ABSOLUTAS
DETECTIS, AUCTA;
INDICIBUS PARTICULARIBUS ANALYTICIS, SINGULOS SIVE TOMOS, SIVE AUCTORES ALICUJUS MOMENTI
SUBSEQUENTIBUS, DONATA;
CAPITULIS INTRA IPSUM TITULUM RITE DISPOSITIS, NECNON ET TITULIS SINGULARUM PAGINARUM MARGINEM
SUPERIOREM DISTINGUENTIBUS SUBJECTANQUE MATERIAM SIGNIFICANTIBUS, ADORNATA;
OPERIBUS CUM DUBIIS TUM APOCRYPHIS, ALIQUA VERO AUCTORITATE IN ORDINE AD TRADITIONEM
ECCLESIASTICAM POLLENTIBUS, AMPLIFICATA;
DUOBUS INDICIBUS GENERALIBUS LOCUPLETATA : ALTERO SCILICET RERUM, QUO CONSULTO, QUIDQUID
UNUSQUISQUE PATRUM IN QUODLIBET THEMA SCRIPSERIT UNO INTUITU CONSPICIATUR; ALTERO
SCRIPTURÆ SACRÆ, EX QUO LECTORI COMPERIRE SIT OBVIUM QUINAM PATRES
ET IN QUIDBUS OPERUM SUORUM LOCIS SINGULOS SINGULORUM LIBRORUM
SCRIPTURÆ TEXTUS COMMENTATI SINT.
EDITIO ACCURATISSIMA, CÆTERISQUE OMNIBUS FACILE ANTEPONENDA, SI PERPENDANTUR : CHARACTERUM NITIDITAS
CHARTÆ QUALITAS, INTEGRITAS TEXTUS, PERFECTIO CORRECTIONIS, OPERUM RECUSORUM TUM VARIETAS
TUM NUMERUS, FORMA VOLUMINUM PERQUAM COMMODA SIBIQUE IN TOTO OPERIS DECURSU CONSTANTEM
SIMILIS, PRETII EXIGUITAS, PRÆSENTIMQUE ISTA COLLECTIO, UNA, METHODICA ET CHRONOLOGICA,
SEXCENTORUM FRAGMENTORUM OPUSCULORUMQUE HACTENUS HIC ILLIC SPARSORUM,
PRIMUM AUTEM IN NOSTRA BIBLIOTHECA, EX OPERIBUS AD OMNES ETATES,
LOCOS, LINGUAS FORMASQUE PERTINENTIBUS, COADUNATORUM.

SERIES SECUNDA,

IN QUÆ PRODEUNT PATRES, DOCTORES SCRIPTORESQUE ECCLESIE LATINÆ
A GREGORIO MAGNO AD INNOCENTIIUM III.

Accurante J.-P. Migne,

BIBLIOTHECÆ CLERI UNIVERSÆ,

SIVE

CURSUM COMPLETORUM IN SINGULOS SCIENTIÆ ECCLESIASTICÆ RAMOS EDITORE.

PATROLOGIA BINA EDITIONE TYPIS MANDATA EST, ALIA NEMPE LATINA, ALIA GRÆCO-LATINA. — VENIUNT
MILLE ET TRECENTIS FRANCIS SEXAGINTA ET DUCENTA VOLUMINA EDITIONIS LATINÆ; OCTINGENTIS
ET MILLE TRECENTA GRÆCO-LATINÆ. — MERE LATINA UNIVERSOS AUCTORES TUM OCCIDENTALES,
TUM ORIENTALES EQUIDEM AMPECTITUR; HI AUTEM, IN EA, SOLA VERSIONE LATINA DONANTUR.

PATROLOGIÆ TOMUS CX.


S. THOMAS CANTUAR. ARCHIEP. HERBERTUS DE BOSEHAM, S. THOMÆ CANTUAR. CLERICUS.
GILBERTUS FOLIOT. EX ABBATE GLOCEST. PRIMUM EPISC. HEREFORD., DEINDE LONDON.
ALANUS TEWKESBERIENSIS ABBAS.

EXCUDEBATUR ET VENIT APUD J.-P. MIGNE EDITOREM,
IN VIA DICTA D'AMBOISE, PROPE PORTAM LUTETIÆ PARISIORUM VULGO D'ENFER NOMINATAM,
SEU PETIT-MONTROUGE.

1834

8030





SÆCULUM XII

S. THOMÆ

CANTUARIENSIS ARCHIEPISCOPI ET MARTYRIS

NEC NON

HERBERTI DE BOSEHAM

CLERICI EJUS A SECRETIS

OPERA OMNIA

JUXTA EDITIONEM V. CL. J. A. GILLES, LL. D., ECCLES. ANGL. PRESBYTERI
ANNO 1843 OXONII DATAM

ACCEDUNT ET EJUDEM REVISIONE

GILBERTI FOLIOT

EX ABBATE GLOCESTRÆ EPISCOPI PRIMUM HEREFORDIENSIS, DEINDE LONDONIENSIS

NEC NON

ALANI TEWKESBERIENSIS ABBATIS


EPISTOLÆ

ACCURANTE J.-P. MIGNE

BIBLIOTHECÆ CLERI UNIVERSÆ

SIVE

CURSUM COMPLETORUM IN SINGULOS SCIENTIÆ ECCLESIASTICÆ RAMOS EDITORE



TOMUS UNICUS

VENIT : 8 FRANCIS GALLICIS.



EXCUDEBATUR ET VENIT APUD J.-P. MIGNE EDITOREM
IN VIA DICTA D'ANBOISE, PROPE PORTAM LUTETIÆ PARISIORUM VULGO D'ENFER NOMINATAM
SEU PETIT-MONTROUGE

1854

8838

ELENCHUS

AUCTORUM ET OPERUM QUI IN HOC TOMO CXO CONTINENTUR.

S. THOMAS CANTUARIENSIS ARCHIEPISCOPUS ET MARTYR

Vita S. Thomæ ab auctoribus contemporaneis scripta.	Col. 1-363
Hymnus de S. Thoma.	369
Documenta historica de S. Thoma.	371
Epistolæ S. Thomæ.	435
Epistolæ variorum ad S. Thomam et alios.	671

GILBERTUS FOLIOT, EX ABBATE GLOCESTRIE EPISCOPUS PRIMUM HEREFORDIENSIS, DEINDE LONDONIENSIS.

Epistolæ.	745
Epistolæ variorum ad Gilbertum et alios.	977

HERBERTUS DE BOSEHAM, S. THOMÆ CANTUAR. CLERICUS A SECRETIS.

Vita S. Thomæ.	1073
Liber Melorum.	1293

ALANUS TEWKESBERIENSIS ABBAS.

Epistolæ.	1675
-----------	------

EPISTOLA DEDICATORIA

Viro spectatissimo et reverendo fratri Willelmo WHEWELL, collegii Sanctæ Trinitatis Cantabrigiensi magistro, cæterisque amicis suis qui in eodem collegio socii conversantur, Joannes A. GILES, humilis eorum servus et consacerdos, salutem et debitum grāti animi obsequium.

Magnorum virorum vitam et acta posteritati tradere, eorum præcipue est, qui æquales illorum sive ætate sive familiaritate, omnia certo sciendi quæ scripto exararent occasionem nacti sunt. Inter illos tot tantosque viros quos Anglia celeberrimos protulit, pauci sunt qui cum Thoma Becket, sancto Cantuariensi archiepiscopo et martyre possint comparari. Cujus vitam et gesta cum quindecim lhand minus, imo fortasse plures, plene descripserint, mirari possumus hæc scripta jam pluribus sæculis in codicibus manuscriptis latere nec jam in lucem prolata esse. Horum ego scriptorum opera edendi et quam accuratissima in mundum proferendi aggressus laborem, intra muros vestri collegii, viri egregii, subsidium nactus sum, quod susceptum laborem lenivit, expedit et jam ad finem perduxit. Cujus subsidii liberrime mihi commodati, gratam mentem habens, ad pedes vestros librum meum depono, obnixius deprecans ne sine patrocinio vestro post septingentos annos fama Thomæ, quæ diu sopita est, reviviscat et iterum reflorescat. Valeat fraternitas vestra!

Dat. London. Kal. Jul. A. D. 1845.

EPISTOLA DEDICATORIA

ALTERA

VOLUMINI EPISTULARUM S. THOMÆ CANTUARIENSIS PRÆFIXA

Venerabili patri et domino Ashurst TURNERO, Cicestrensi episcopo, Joannes Allen GILES humilis ejus parochianus, salutem et obedientiam canonice debitam.

Mos, Pater, fuit patribus nostris, ut is, qui scriptis suis mundo se commendare vellet, nequaquam suis innixus viribus, sed secundum ordinem jam multis sæculis observatum auctoritate diocæsani sui, sulcus sic in publicum prodiret. Quem ordinem servare volens, etsi in episcopatu tuo satis brevi tempore consilutus, ad pedes paternitatis tuæ librum meum depono; librum sane, si ad materiam spectas, quovis pretio pretiosiorum, quippe qui epistolas continet sancti Thomæ Cantuariensis, in illa Ecclesia, pro qua martyrium passus est, nunc primum vulgatas. Cujus vitam et merita, quoniam in alio libro a me nuper edito satis patet, in præsentia discutere supersedeo; nec enim verba mihi libet nunc multiplicare: satis fuisset epistolas illas me primum inter Anglos edere, nisi id accessisset, sub paternitatis tuæ prælatione edidiss.

J. A. GILES.

*East Dene, juxta Eastbourne,
in com. Sussex. Id. Sept. A. D. 1845.*

J. A. GILES PRÆFATIO.

I.

RECENSENTUR VARIORUM ELUCUBRATIONES DE VITA ET REBUS GESTIS S. THOMÆ.

Thomæ Cantuariensis archiepiscopi Vita ex variis coætanorum colligitur testimoniis, quæ eo ordine recenseri possunt:

Primo loco, Epistolæ, tum archiepiscopi ipsius quum variorum ejusdem ætatis, de quibus infra;

Secundo, memoranda quæque ex coævorum Chronicis, Matthæi Parisii scilicet, Bromptoni et cæterorum, collecta;

PATROL. CXG.

Tertio, Vitæ ipsæ ad tunc temporis etiam exaratae, de quibus prolixius in tomī primi principio dis-
seritur.

Nunc brevius satis erit meminisse complures etiam Thomæ Vitas a cœtaneis esse descriptas,
quarum :

I. VITA SANCTI THOMÆ, AUCTORE EDUARDO GRIM. — Monachus erat ille Grim, qui Thomæ ab exilio Can-
thariam redeunti obviis fuit; ejusdem tunc primum cum sceleris illis, qui mox cum necaturi erant,
colloquentis assecla; occumbenti etiam testis et fidelis utique, sed cheu! inutilis adiutor. Opus quod sub
nomine ejus hic datur in tribus Britannici Musei codicibus inventum est [Ar. 27, Vesp. E. X. Vitell. c. xii];
quorum quidem unus exemplar, a Galeo exscriptum, in Cantabrigiensi Sanctæ Trinitatis Collegio nunc
asservatur. Quam Vitam ab Edwardo Grim descriptam esse declarant hæc verba quæ de martyris historiæ
præfixa sunt : *præciso eodem ictu brachio hæc referentis. A Surio quidem abbreviatur et edebatur in*
Actis Sanctorum ; cujus etiam fragmenta nonnullas *Passionum* illustraverunt.

II. VITA EJUSDEM, AUCTORE ROGERIO DE PONTINIACO. — Accipitur ex ms. codice quodam regiæ bibliothecæ
Parisiensis [n° 5615] cujus exemplar etiam, inter Galei mss. codices, in Sanctæ Trinitatis Collegii biblio-
theca, Cantabrigiæ invenitur. Quis fuerit auctor ex opere ipso omnino latet; in prologo vero refertur
archiepiscopo, tunc Pontiniaci degenti vitam, monachum quemdam ministrasse, quum ex alias præmissis
Rogerium quemdam, monachum nempe, et Thomæ Pontiniaci ministrantem, exstitisse videamus, qui
non multo post, domini sui, jam de medio sublato, ipse scripturus erat historiam. Rationi ideo admodum
consentaneum ducimus suum auctori opus restituere. Videres quoque ad calcem Parisiensis ms. codicis,
sub rubrica *Hæc quæ sequuntur in alia legenda sunt* : « Quis quod sequitur sine lacrymis, etc., » nisi ad
aliam Vitam, auctore Joanne Sarisberiensi, referenda essent. Quæ excipit *Prologus in visiones*, breve
scilicet compendium de miraculis Thomæ, alias quoque et multo prolixius enarratis. Et in his verbis ex-
plicit tomus : *Explicit Vita et passio, miracula et signa sancti Thomæ Cantuariensis archiepiscopi anno Do-*
mini millesimo quadringentesimo sexagesimo quarto per me Lodewinum Confluentiæ fratrem hujus domus, in
crastino Lucie virginis et martyris.

III. VITA EJUSDEM, AUCTORE WILLELMO FILIO STEPHANI. — Pretiosissima inter omnes, a Sparkio evulga-
hatur in *scriptoribus Historiæ Anglicanæ*, fol. Lond., 1725. Quis nomine ac dignitate fuerit et quomodo ad
plenam nefarii hujus certaminis, in quo Thomas oppressus est, notitiam auctor pervenerit, ipse nos in
proœmio commonitos esse voluit. In parte prima laudatur ea Londini urbis sub Henrico II descriptio,
quæ doceat lectorem simul et magnopere alliciat. Idem opus in *Lelandi Itinerario* multo splendidius excu-
sum, sed copiosius minime. Utrumque nos equidem unum cum altero collatum, ad usus nostros, accurat-
issime redeginus : compluribus insuper additis, quæ ex dato a Dulci [Douce] Oxoniensi universitati ms.
codice omnia deprompta sunt.

IV-V. VITA EJUSDEM, AUCTORIBUS ALANO DE TEWKESBERIA ET JOHANNES SARISBERIENSIS. — Duæ archiepiscopi
Vitæ in Bodleianæ bibliothecæ mss. codicibus existant, ita compositæ indeque typis excusæ, ut nil propo-
siti in Alano esse constet, nisi quæ desunt in brevi nimis compendio Joannis Sarisberiensi, omnia ipse
sufficiat. Quod quidem Joannis opus non tantum ad collectionem fol. quandam, pervetustam sane, quæ
Acta sanctorum nuncupatur, pro parte accedit; sed et in compluribus mss. codicibus in-erit in integrum.
Quamobrem nos illud accuratius, collatis inter se Bodleianæ ms. cod. [n° 937], Dulcis [n° 287], nec non
variis locis e *Quadrilogo* depromptis, typis mandare volumus. Cum autem Bodleiano illi n° 937 copiosa
epistolarum series innectatur, concedas necesse est, si modo illis consentias quæ in Alani Vita principio
Epistolarum præmittuntur, Alanum, non Joannem, ut dicunt, has collegisse epistolas, veluti a Thoma et
cœvis ejus descriptas. Quod semel admissum tuetur et confirmat singularis illa Bodleiani ms. cod. n° 937
vetustas, nec pluribus equidem impar, talis saltem, quæ post Alani tempora initium sumpsisse non ha-
beatur.

VI. VITA EJUSDEM, AUCTORE WILLELMO CANTUARIENSIS. — Desideratur nimis, vel unum quodlibet, Vita
hujus exemplar. Quapropter pro virili sua enixus est Editor ut, quæ loca passim in *Quadrilogo* usurpata
fuissent, ipse colligeret et collecta ita recenseret ut argumento omnia consentirent. Contextum vero ut
reviseret emendaretque, fragmenta illa contulit codici ms. Duacensi n° 810 : citius quidem, sed attente
satis, ut scriptorem transcriptoremve in recensendis nominibus auctorum et operibus minime fidum inve-
nerit. Inde lectorem ipse admonitum velit plura equidem sub Willelmi hujus Cantuariensis nomine fuisse
laudata quæ ad eum nullo pertinere modo comprobantur. Auctoris ipsius nulla quasi memoria. Utrum sit
idem ac ille Cantuariensis prior qui litteras quasdam ad Gilbertum Foliot direxisset dicitur [vol. II, p. 471],
hoc etiam incertum.

Unum fortasse restat certi ac singularis pretii, inter tot levia verba, monumentum, id est specimen
quoddam sermonis, prout ratio temporum rerumque ferebat, Anglice instituti.

VII. VITA EJUSDEM, AUCTORE E. DE EVESHAM. — Præfatis exceptis et de translatione martyris [a. 1220]
capitulo quodam superaddito idem est Vita hujus atque *Quadrilogo* secundi argumentum. In Britannici
Musei ms. codice, unico et perantiquo illo [Cott. Vesp. B. xiv, fol. 33], opus continetur ab E [lia] Evesha-
mensi exscriptum et Henrico Croylandensi abbati dicatum, ad id temporis, ut apparet, quum de transla-
tione martyris quam maxime ageretur (1). Veniam igitur condonet mihi lector, si totum ipsum corpus
operis omisisse videar, qui omne quod desiderandum foret admisi, præfata scilicet et cætera omnia
quæ in capitulo superaddito digesta sunt.

VIII. VITA EJUSDEM, AUCTORIBUS HENRICO ABBATE ET ROGERIO MONACHO CROYLANDIÆ. — E folio ms. codice
copioso vere, in Regia Bibliotheca Parisiorum, n° 5372. Præmittitur præfatio una, quam altera excipit :
illa quidem, auctore Henrico Croylandensi abbate, ad opus Langtoni Stephano dicandum; hæc autem
Croylandensi quodam monacho, nomine Rogerio, qui, et si ab Henrico eodem, ut opus iterum jam typis
mittendum castigaret atque augeret se jussum esse dicat, nil novi tamen, se ipso auctore additum fuisse pro-
fiteretur, nisi verba quædam, pauca nimirum et in id unum argumenti intenta ut Epistolæ quarum hic etiam pars
magna accedit, temporum ordine recenseret. Quod opus, sic descriptum, haud aliter nos evulgandum esse cu-
ravimus; quippe cui cum Lupi *Quadrilogo* ac Vitam auctore Eveshamensi contulerimus, idem, quasi
verbatim adeoque ex tribus constare invenimus, ut, exceptis epistolis et colligentis Rogerii verbis, nihil
omnino supersit. Causa est igitur cur totius libri summam, nisi præfata ejus et quasi specimen quoddam
sermonis, in quantum a Lupi editis maxime distat, dimiserimus. In præfatis autem videres, ad calcem,

(1) Nescitur equidem collector iste : nisi ego in vetusto quodam libro ejus nomen me fugit id comper-
tum habuerim. Vitam scilicet quamdam archiepiscopi ab Elia Eveshamensi esse descriptam.

primum hoc opus ad ultimos Richardi regis annos excusum fuisse; idemque iterum a. D. 1213, Joannis regis 14.

IX. VITA EJUSDEM, AUCTORE ANONYMO, QUI SE DECIMUM APPELLAT. — Seu ex variis excerpta, ut fateatur collector ipse. Præfata insunt quæ in historiis illustrando et qui sint earumdem auctores demonstrando haud minoris quam priora momenti apparent. Vita autem ipsa brevis, in duode viginti scilicet capitibus descripta. Occurrit duobus Regiæ Bibliothecæ Parisiorum mss. codicibus n° 5371 et 5373; sed a Quadrilogo quamvis multum in dicendo discrepet, non nobis tamen, quæ huic nostræ collectioni suppeteret, digna satis inventa est.

X. VITA EJUSDEM, AUCTORE BENEDICTO ABBATE PETRIBURGENSE. — Ex Cantuariensi monacho Petriburgensis abbas, ille Benedictus omnibus ipse quæ digessit, Thomæ ideo passioni, testis oculatus evasit. Cujus autem argumentum cum totum singillatim non exstiterit, sed ex variis quæ in Quadrilogo passim habentur locis depromendum esset, textus igitur Quadrilogi ms. codici in Oxoniensi C.C.C. bibliotheca præservato a nobis collatus est. Benedictus de Vita Henrici II regis luculenter egisse videtur. Idem de Thomæ miraculis. Quod ultimum opus in illam miraculorum collectionem, refertissimam vere, immergendum ivit quæ in Lotithisense bibliotheca, in Parisiensi, Bruxellensi superest, nec non in Bodleiana, nisi copiosa multo minus. Cæterum ista miracula, quia ad historias authentice probandas minime pertinent, nullo negotio dimittimus, quippe quæ quo magis inquiras, eo magis a proposito dissonant (2).

XI. PASSIO EJUSDEM, AUCTORE ANONYMO LAMBETHIENSIS. — In Lotithisensis bibliothecæ ms. codice fol. sæculo XIV exarato. Inest eidem illa Miraculorum amplissima collectio de qua modo disserebatur. Deest vero auctoris nomen; deest etiam argumenti principium ut ex abruptis ejusdem appareat. Quo tempore absoluta fuerit nulli ratione posita, nullo die vel anno, statuat quisque ut sibi libuerit. Opus ipsum, ut et sit, ad hanc illam ætatem, cujus judicia et sensus de vita moribusque martyris tam diserte amplexum est, pulchre pertinere videtur. Quod etiam auctor, quisquis sit, confirmat et ipse, quum occumbenti martyri testem oculatum se esse declaraverit.

XII. PASSIO EJUSDEM, AUCTORE ANONYMO. — Tractatus brevis, e ms. cod. Bodleiano n° 509, fol. 15, quem Parisiensi ms. cod. n° 5278 collegimus, excerptus.

XIII. PASSIO SECUNDA. — Alii Passio brevis, primum in Gregorii (sancti) operibus, ad calcem edita, Voss. 4º, Mogun. 1604, e cod. ms. lectionario Basilicæ S. Petri in Urbe. Colligebatur textus Par. ms. cod. n° 5308.

XIV. PASSIO TERTIA. — Duobus prioribus non absimilis. Edebatur e Paris. ms. cod., [n° 3414].

XV. PASSIO QUARTA. — Item e Paris. cod. ms. [n° 5269].

XVI. PASSIO QUINTA. — Edidit primum (dom.) Martenius in *Thesauri anecdotorum*, t. III, p. 1737. Quam utique auctore Edwardo Grim, descriptam esse concludas necesse est, si modo rubricæ ad calcem positiæ a-sentias, ubi supra laudati hujus hæc verba: *præciso vero eodem actu hæc referentis brachio*. Sed quicunque in his animadvertendis sese, vel leviter, implicari permiserit, is admodum contraria admittet: passionem videlicet istam non tanta vetustate antiquissimam esse quanta faciebant; imo nihil aliud esse ac congeriem quendam, quæ, lectionaria, ut dicunt ad usum Ecclesiæ, sicut alia ejusdem pretii opera, undecunque inconsulte nec indigeste minus exaggerata fuerit. Nos excusimus, collato textu Martenii cum ms. codice Valencenensi et Parisiensi n° 5281. Sed et alia ejusdem invenias exemplaria, Bruxellense scilicet, n° 7959, Montense et Londinense e Mus. Britan.

Duo accedunt ad illas quinque Passiones: una, v. g. in Burgundiana Bruxellorum bibliotheca asservata, quæ incipit: *In Anglia*, etc.; altera inter Fulmani transcripta, in C. C. C. Oxoniensis. Sed cum ne mirum quidem momenti sint, satis est, et plus quam satis fortasse dicere, ea vel pauca, de passionibus istis explicuisse.

XVII. VITA EJUSDEM, [Quadril. I]. — Multo majoris est pretii illa collectio. Edebatur Parisii, 4º 1495 sub hoc titulo: *Vita et processus S. Thomæ Cantuariensis super libertate ecclesiastica*; sed ab omnibus fere *Quadrilogus* nuncupatur. Totum hoc opus ex variorum fragmentis constat; quorum uno vel duobus excerptis, idem est ac *Quadrilogus* secundus. Cujus igitur, collatis inter se codicibus, illa tantum ex uno vidimus, quæ in altero desunt, nisi illa ipsa in aliis libri hujus nostri locis inventa fuerint.

XVIII. *Vita sancti Thomæ Cantuariensis archiepiscopi et martyris, ab anonymo quodam scriptore ex aliorum scriptis compilata*. — Sub hoc titulo Vita inseritur jam a Lupo edita, seu *Quadrilogus* secundus. Nec mirum si auctori cuique fragmenta, quæ sua sunt, restituere nequeas, cum hoc tantum generatim collector ipse dicat ab Alano, Herberto, Willelmo Cantuariensi et Joanni Sarisberiensi materiam suam accepisse; quibus addas Rogerium nam plurima ipse tertii libri argumento sufficit. Opus, nedum recentius, prius typis excusum fuisse quam *Quadrilogum* nomine primum nobis videtur. Sed ut liquidius res innotescat, dicam quo rerum ordine hæc opera omnia collecta fuerint.

Escripitoribus Vitæ archiepiscopi primus accedit, ut videtur, Guerneus de Ponte Maxentii, a quo poema quoddam anno post mortem Thomæ quinto de eadem re conditum est. Quod equidem, in Britannico Museo asservatum, nos, ad veterem Normannicum sermonem illustrandum, mox typis mandaturi sumus. Sed quia perpauca nimirum poemata sunt qui in re historica enucleanda valeant, a presenti proposito nostro illud ipsum secludere decernimus.

Constat suam navasse operam Herbertum anno post Thomæ obitum quinto. Ad quid vero temporis Joannes Sarisberiensis, Edwardus Grim, Rogerius Pontiniacus, Willelmus Cantuariensis, Benedictus Petriburgensis et Willelmus Stephani filius scripserint, suam quinque, Thomæ archiepiscopi Vitam subobscurum est, si non penitus in incerto. Hoc tantum animadvertas, Edwardum Grim scilicet quum prius vita functus esset quam Herbertus ipse rei litterariæ se immiscuerit, priorem idcirco in Vitam Thomæ archiepiscopi enarranda exstissee.

Summ deinde breve compendium eo edebat Alanus Tewkesberiensis modo, ut Joannis Sarisberiensis desiderata suppleret qui et Epistolis Thomæ utrumque opus præmisit. Quæ omnia, si ad quasdam Herberti de Bosham animadversiones attendas, sic collecta sunt et descripta, auctore Alano e Joanne Sarisberiensi, a. D. 1185.

Sequitur Lotithisensis ille scriptor qui rebus gestis testis oculatus exstitit et quidquid descriperit, ex seipso descripsit. Illic excripsit alii duo: quorum unus, Lansdowniensis ms. codicis [398] auctor, etsi nil tanti ponderis exegerit ut a nobis restitueretur in integrum, ea tamen antiquitate se commendat quæ

(2) Subinfer Anglicano. Falso enim concluditur, quia præmittitur falso. Miracula equidem, etsi supernaturaliter, tamen ut in oculis complurium perfecta, ad authentica pertinent, ergo ad propositum. — Ed. P.

eum ipsum Thomæ coetaneum fuisse probet; alter vero, Paris. ms. cod. anonymus auctor, cujus præfata usurpamus, sibi, tum juveni. Edwardum Grim jam senescentem occurrisse asserit. Ipse ideo inter coævus Thomæ deputandus foret, nisi omnia quæ exscripsit a seipso ex Variosorum historiis collecta esse fateretur. Quorum ideo nihil, præfatis exceptis, ad nos pertinere arbitramur.

Hæc de coetaneorum scriptorum serie, quam sequitur altera, id est quasi coetaneorum. Siquidem tempore translationis Thomæ [a. D. 1220] cum celebrasset martyrium Stephanus Langtonius, multis æmulantibus et scriptitantibus, pullulaverunt Thomæ Cantuariensis archiepiscopi Vitæ. Plurima equidem sunt istius generis opera, sed adeo similia, ut, prologo excepto et locis quibusdam in dicendi modo solum inter se discrepantibus, idem ubique invenias. Inde utrum temporis ordine præcesserit Ælias Eveshamensis an Croylandensis Rogerius; an collector Quadrilogi primi, an secundi, illud omnino ignoratur. Quod si absolute contendas, res non parvi negotii est, momenti vero minimi. Quamobrem id nobis eo magis placet quo verisimilius esse videtur, omnibus idem, autographum scilicet vel exemplar, adfuisse; quod, ut quisque suum faceret, dum in præfatis et locis quibusdam vel etiam mendis desudaverint, frustra utique conati sunt. Nam si cunctis mens eadem furandi non deerit, nullus equidem voti sui compos exstitit. Cæterum, ut finem faciamus, lectorem volumus admonitum nos Quadrilogum primum in colligendis verbis semper secutos fuisse. Hunc autem excudendum ab omnibus locis illis disjungimus quæ sibi varii auctores tam sæpe laudati vindicabant. Ideo nihil apud ipsum hic invenies quod ad collectorem ipsum pertinere non videatur. Quamvis, si omnia sibi constarent et cuique suum redderetur, multo minoris etiam momenti haud dubie remaneret. Aliter, nil proprii habet Quadrilogus secundus, nisi forte totum illud opus quod *Gesta post martyrium* nuncupatur. Cujus autem sit istud, utrum collectores ipsius qui de rebus gestis post Thomæ obitum digressus est, an Herberti de Bosham qui in libro Melorum eadem ratione temporum nactus est argumentum idem? Sub iudice lis est. Videas tandem excerpta omnia quæ, latente auctore vel codice, ad fontem referri non possunt, uncinis tamen esse insignita perinde ac si locum quempiam suum in mss. codicibus nunc deperditis vel ignotis haberent.

XX. Hactenus de Vitæ Thomæ; quas excipit Hymnus ex Atrebatensi ms. cod. [nº 557] excerptus et sic completur tota biographorum series.

DOCUMENTA HISTORICA :

XX. *Causa inter Cantuariensem archiepiscopum et episcopum Londoniensem* — Accipitur a ms. cod. Cavei in Gilberti Foliot epistolis (Bodl. e Mus. 249), ubi occurrit; sub nº 176; sed neque ex titulo neque ex auctoris nomine constat. In quo agitur de Londoniensi episcopo excommunicato A. D. 1169.

XXI. *Capitula concilii Alexandrii tertii habiti Turonis*. — Turonensis Concilii A. D. 1163 celebrati recensentur acta et decreta. Occurrunt in ejusdem Bodleianæ ms. cod. [e Mus. 249 fol. 251].

XXII. Qua jurandi formula juris se alligaverit Girardus Pucelle, antipapæ partes derelicturus, explanatur. Inest Lupi Epist. lib. xv, nº 176; sed hic melius documentis historicis.

XXIII. Sequentia apud Lomithis. biblioth., in uno quodam Warthonii scriptorum, ex antiquissimo ms. codice ed. Hæc animadvertit Warthonius :

Primus, inter Angliæ reges Henricus IV, sancto illo chrismate unctus est, quod de cælo descendit in ampulla lapidea, inclusa aquilæ aureæ [sic]. De quibus ritibus disseritur satis in Walsinghamii Hist. 4º ipso statim initio, nec non in aliis hist. ab eodem laudatis. [Vid. Selden. Tit. Hon. p. 153 ms. cod. in biblioth. Cott. Idem est, ut videtur, ac ille quem legas ad calcem tertii tom., in operibus Joannis Tinnuthiensis, apud Lomith. bibl. cod. ms. fo. nº 12, de cujus infra.]

XXIV. Accipitur hoc fragmentum e vol. III novissimi Thomæ Epist. ms. codicis in quinque vol. fol. digesti, in Trin. Coll. Cantabr. bibl. nunc asservati. Duo transcripta ejusdem hujus vol., insunt quæ argumento quidem concinunt usque ad verbum apostolicam, verum a proposito sub finem discedunt et in alienarum epistolarum sententias declinant. Unde translatorum erravisse et finem fragmenti ipsius deesse credere est.

XXV. SUMMA CAUSÆ, etc. E Dulcis ms. cod. [287] in Bodleiana bibliotheca asservatum. Videas, si modo Thomæ Vitæ, auctore Fitz Stephano hoc documentum conferas, Vitæ illæ ipsæ excerptum quoddam inesse, ab argumento maxime dissonans. Quod mendum Editor ad calcem tomi cum animadvertieret, ipse tamen excerptum ad suum referre locum minime potuit. Porro SUMMA CAUSÆ parte illa quæ de prima nuncupatur, occurrit sub nº 164 in Epistol. Gilberti Foliot e Cavei ms. cod. [apud Mus. 249]; parte autem secunda, id est de compromissione, invenitur in Epist. 12, lib. 1 Thomæ epist. a Lupo ed. Verum Clarendoniensis decreta sexdecim dimittebat, quia alias evulgata fuerant. Sic et nos. Tertia pars seu De exilio etc., accedit nº 158 in Cavei ms. cod.

XXVI. DE JURAMENTIS, etc. Invenitur in ms. cod. supradicto Trin. coll. Cantabr.; item in cod. Brit. Mus., Tit. D, XI : art. 8.

XXVII. E Cavei ms. cod. nº 178; Dulcis nº 64.

XXVIII. E Lomithiensis ms. cod. [136] nº 5, cum Parisiensis cod. 5372 nº 47 coll.

XXIX. E Claud. B II, lib. II, ep. 150; Bodl. 947, nº 176, part. III.

XXX. E Paris. ms. cod. 5572.

XXXI. E Claud. B II, Epist. excipit illas quæ hisce verbis incipiunt : Non ignorant.

XXXII. Stephani Langtonii sermo, e Lupi ed. translatus.

XXXIII. Tractatus de promissione beati Thomæ martyris, videlicet quod talis esset sibi successurus, qui ecclesie Pontiniacensi recompensaret pro liberalitatibus sibi tempore sui exilii impensis. F. Martenii Thesaur., vol. III p. 1873, post B. Edmundi historias; parvi equidem pretii, sed numerus ipse.

XXXIV. Excerptum e cod. Mus. Britan. Reg. 15. E. VI.

XXXV. Hæc de documentis et completur tomus, edito ad calcem fragmento quodam Vitæ archiepiscopi in Lansdownensi ms. cod. descriptæ. Asserit auctor eo tempore se vixisse vitam de quo deinde ipse deseruit.

Hactenus igitur hæc de variis Vitæ et Documentis historicis. De Heriberto Boshamensi dicendum nobis erit infra. Videas tantum, cum una typis ambo mandarentur, materiem cujusque eo digestam fuisse modum, quem, nisi colliget textus et elucidet, intelligi minime potest. Nunc ad epistolas Becqueti transcamus.

II.

EPISTOLÆ S. THOMÆ.

E testimoniis cunctis magni istius discipuli, quo Henricum II inter et Thomam Cantuariensem archiepiscopum tam diu dimicatum est, plurimi sunt momenti virorum illorum Epistolæ, qui tam funestæ rei pars aliqua, vel minima, ipsi fuerunt. Quorum utique autographa plura, ut ex ipsis passim accipias, ab archiepiscopo fidei Vaticanæ bibliothecæ nec non forte locorum aliorum demandata sunt. Earundem vero epistolarum, cum plurima exemplaria inveniantur, nullum pretiosius quam illud quod in Vaticana bibliotheca quoque superest. Jamdudum equidem Epistolæ multæ in *Historia quadripartita* seu *Quadrilogo*, Parisii, a. 1495 ed. excusæ fuerant, cum vim totam, id est quingentas vel sexingentas epistolas, quas omnes in Vaticana invenerit, edidit Lupus, Bruxellis a. 1682 sub hoc titulo *Vita et Epistolæ sancti Thomæ*. Nam sancti epistolis Vitam præmittebat editor ex Variorum scriptis depromptam et totum opus eo nuncupabat nomine quo prius, id est *Quadrilogum*. Omnia illa iterum in Lupi fol. editione invenies. Præterea exstant in *Rerum Gallicarum et Francicarum scriptoribus* trecentæ circiter Thomæ et coævorum epistolæ, quas ex duobus Regiæ Biblioth. Paris. primus vir clarissimus D. Bouquetus edidit.

Quod si ad nomen subscribentis cujusque attendas, occurrunt in primis Alexandri papæ epistolæ plurimæ; Joannis Sarisberiensis deinde, nonaginta ferme; Gilberti Foliot, quinque vel sex; Arnulphi Lexoviensis, multo plures; Henrici II regis, paucissimæ. Cum autem Arnulphi ac Gilberti Foliot epistolæ cum aliis eorundem operibus singillatim ederentur, e re litteraria minime visum fuit bis in idem repetere. Item de Joannis Sarisberiensis epistolis. Verum, his exceptis, alia omnia hic invenies quæ ab editoribus cunctis hucusque collata fuerint. Videtis modo materiem sic ad argumentum fuisse redactam, ut pars una Epistolarum Gilberti Foliot Collectioni insereretur; pars altera, Thomæ. Quod equidem in proëmio ad Gilbertum jam notavi. Sed hic vere bis repetita placent, ne quid ex antehac editis apud nos desiderari existimes.

Sub finem tomi adest epistolarum index, ita ordine alphabetico digestus, ut hanc novissimam cum prius editis, imo cum mss. cod. conferre possis editionem; nisi vero Arnulphi Joannisque Sarisberiensis epistolas, quippe quæ sigillatim editæ sunt, ad suum peculiarem locum requiras.

Sic colligebatur Epistolarum editio illa nostra, refertissima vere, utpote quæ tam plurima tunc primum in lucem adduxerit: nullis exceptis, ut diximus, nisi quæ ad Arnulphi Joannisque Sarisberiensis opera pertinent et in hisce libris, a nobis quoque editis, inveniuntur.

Hanc seriem Epistolarum universam, ut Alanus Tewkesberiensis primum, sic deinde Lupus pro ratione temporum instituit; verum difficultates plurimas, si non errores in eo chronologico ordine reprehendes. Quapropter, ut in Gilberti Foliot Epist., ita aliam secuti sumus viam. Quum enim quid scriptum sit et quo auctore scriptum præsertim inquiras, in eo dignitatis vel gradus ordine propalamus litteras, ut res tibi liquido innotescat. Legas igitur in utraque collectione Thomæ vel Gilberti Foliot primum, ut illius de quo agitur, epistolas; deinde vero SS. Pontificum, cardinalium, archiepiscoporum, et sic deinceps usque ad ultimum in ecclesiastico ordine novissime positum. Quod si adsint plures ejusdem dignitatis vel gradus scriptores, tunc alphabetice, nomine sedis vel abbatiæ, vel prioratus, vel etiam parochiæ colligendi sunt: Cantuariensis, verbi gratia, Eboracensis, Moguntinensis, etc. Postponimus tandem, ut decet, laicos omnes scriptores, reges scilicet, reginas, primates, equites, etc. Et sic, simplici intuitu, quisquis es, epistolam quamlibet si appetas, cito nactus es. Qui fortasse, dum in minimis quidem, sed levius attendis, rem ad votum perfecte non deductam esse senties; verum attentius intueri, quæso: videas enim idem, verbi gratia, nomen variis in locis posse usurpari. Quia autem adeo copiosissima est collectio, ut rudis nimium indigestaque moles habeatur, nisi quo fuerint scripta eodem ordine omnia commemorarentur, index annexit secundus qui rem chronologicam ipsam pulchre patefacit.

Colligebatur opus cum plurimis mss. codicibus de quibus in notis largius disseritur. Qui sint et unde sint satis erit hic meminisse:

- 4 scilicet in Bodleiana Oxoniensi bibliotheca;
- 2 in S. Joan. coll. bibl. Ox.;
- 2 in C. C. C. bibl. Cant.;
- 1 in Trin. cur. bibl. ejusdem loci;
- 1 in Lomith. bibl. Londin.;
- 6 in Mus. Brit.
- 3 in Reg. bibl. Paris.

VITÆ S. THOMÆ TABULA CHRONOLOGICA.

1116. — In terra sancta captus Gilbertus Becket inservit Amurath, cujus filia christianum servum Mathilda deperit.
1117. — Fugit Gilbertus et Londinum repetit, comitante Mathilda; quam, modo nuptam, deinde relinquit, iterum cruce signatus.
1118. — Natus est Thomas Becket. Eadem nocte Gilberti domus incenditur.
1121. — Redit Gilbertus.
- 1130-35. — Ad id temporis, Thomas prioris Mertonensis tutelæ demandatur alumnus.
1139. — Obiit Mathilda.
1140. — Apud Parisios studiis vacat Thomas Becket.
- 1144-45. — Osborni Octonumini [sic] clerico fungitur officio. Non multo post ad Theobaldi archiepiscopi curiam accedit, ubi diaconus, deinde archidiaconus ordinatus Oxfordii et S. Mariæ ad rivos [Strand] beneficia, Beverleiacum dominium, nec non alia privilegia obtinet.
- 1155 [al. 58]. — In cancellarium eligit eum atque recipit rex Henricus. Pacem regni Thomas reformat.
1159. — Inter Tolosanum comitem et Francorum regem bellum deservit.
1160. — Ad Francorum regem delegatus accedit Becket.
1161. — April. 16, obiit archiep. Theobald.
1162. — In archiepiscopum eligitur Thomas. Westmonasterii, feria quinta ante in albis confirmata electione, Cantuariæ, in albis, ordinatur presbyter, mox a Vincestriensi Henrico in archiepiscopum consecrandus. Ipse dicat Readinensem abbatiam et præest S. Edwardi, cognomine confessoris, corporis translationi, quæ equidem, eo procurante, splendidissime celebrata fuit. Privilegia, non jure irrogata, revocantur.
1165. — Concilio Turonensi adest. Quia Ecclesiæ reformat pacem, regem a se alienat.
1165. — Kal. Octobris concilium usurpat Westmonasterii Henricus rex. Abest Joannes Sarsberiensis exsul.
1164. — Celebratur Clarendonense concilium. Ter fugæ consulit incassum Thomas Becket.
1164. — Pridie Non. Octobris seu feria tertia, usurpat Northamptonense concilium; aufugit archiepiscopus iii Id. (feria tertia) ac Flandriis perlustratis papam Senonæ adit; quo jubente, Pontiniacum pergit, ibidem commoraturus.
1165. — Annum quiete perducit Pontiniaci.
1166. — Fautores quosdam regis excommunicat; quam excommunicationem, Vezelæ, regi ipsi minatur.
- 1167, 68, 69. — Per hos tres annos, dum subtile undequaque conversantur et fide ficta ad Romanam sedem appellant, Londinensem et Sarsberiensem episcopos Thomas vinculis innodat excommunicationis. Tum rex, ad componendam pacem inter omnes, apud Montmirail, Montem Martyrum et alibi cum schismatico imperatore Frederico consilium init.
1170. Freitvillæ, tandem conceditur ut archiepiscopus sedem suam repetat; quod tamen per nonnullos menses, semper reluctante rege, non efficit.
1170. — iv Non. Dec. cum denuo redisset archiepiscopus, vix quatuor hebdomadis tum Londini quum Cantuariæ exemplis, a quatuor equitibus idem, in sua ipsa Cantuariæ metropolitana ecclesia, P. M. hora quarta, iv Kal. Januarii trucidatur, ac die sequenti in ecclesiæ ejusdem crypta tumulatur.
1221. — Translatio Thomæ, cujus reliquiæ, astantibus Henrici III rege, primatibus et totius regni clero, in splendidissima capsâ deponuntur.

SANCTI THOMÆ

CANTUARIENSIS ARCHIEPISCOPI ET MARTYRIS

VITA PRIMA

AUCTORE EDUARDO GRIM.

PROLOGUS.

Profectores artium sæculi proprios singuli conatus habent, quibus ad altiora conscendant, et quid emolumenti ferat perfectio disciplinæ, quam professi sunt, infatigabili perpendentes intuitu, dum ex finis proventu conatus sui leniunt inclementiam, quasi quodam animati compendio viæ robustius ad proposita consurgunt. Et hi quidem, ut transitoriam quandoque coronam consequantur, quos labores, quæ certamina subterfugiant, quibusve nonnunquam subduntur injuriis vel quid reputant impossibile? Sed horum profecto laboris industriam qui mundo militant, cum mundo perire nullus ambigat, nemo aliud affirmare conetur. Cum igitur nostra sit causa dissimilis, quibus Christus proponitur via, laborum finis æterna promittitur vita, quanta, quæso, inter varios ac multiplices mundi casus opus est vigilantia! Non nos a proposito vitæ remissioris lenocinia labefactent: non revocent a recto tramite laboris incommoda viæ, quibus felici commercio pro caducis æterna, pro terrenis cœlestia præparantur. Et ad hæc quidem ut alacrior aspiret Christiana devotio, sinistra perversorum æmulatione contempta, illorum gradiamur via, innitatur vestigiis, quorum astruit fidem conversatio sancta, commendat vitam consummatio felix et gloriam nobis virtutum insignia clamant. Neque enim Christianæ professionis est ab his vivendi formam contrahere, quos vel opus invalidum reddit infames, aut imperfecta voluntas compellit a proposito relabi. Verum si te quæcunque infirma anima ad correctioris vitæ vias temporis ut assolet interjectu veterum minus accendit auctoritas, ubique consulit, ac medetur indevotioni nostræ misericors providentia Salvatoris. Ut si veterum facta fastidimus, vel hunc pudeat imitari nolle quem licuit intueri. Auctor igitur humanæ salutis, dum multorum refrigerante charitate et abundante malitia, quasi minus curasse creditur temporalia, sicut semel assumptæ humanitatis exhibitione, visitavit et fecit redemptionem plebis suæ, sic per suos invisibilis operatione majestatis quos redemit ad meliora incessanter invitat. Ac ne tanti muneris exsors videatur hic noster dies, novus in medium procedat

A Christi miles, et martyr egregius beatus Thomas sanctitatis spectaculum, justitiæ norma, incentivum patientiæ, virtutis exemplar, assertor invictissimus veritatis. Sed quid mihi, inquis, cum martyrio? quid cum miraculis quæ non humanæ viribus efficaciam tribuenda sunt, sed Deo? Bene: non nos tibi martyrium, nec miracula proponimus imitanda, sed vitam considera martyris plenius, contemplare mores, mirare hominem, inter omnes mundi divitias, et quidquid pretiosum æstimatio habet humana, tantam animi tenuisse constantiam, ut nec prospera illum ad amorem mundi mollescerent, nec adversa quævis ab amore Conditoris, ut primum sensibus ejus cognitio sese veritatis infudit, aliquatenus retardarent. Unde fundatus et ipse supra firmam petram, jure cum Apostolo proclamabat: « Quis me separabit a charitate Christi? » Passus siquidem tribulationes multas et malas, exilium dignitatis, privationem rerum omnium, proscriptionem et, quod altius insedit animo et vehementer afflixit, charorum lacrymas et desolationem; sed hæc universa alta mente transcendens, devotior in dies reddebatur, nequaquam similis insipienti cui psalmus impropere quoniam confitebitur tibi cum benefeceris ei. Pie igitur parere cupientes quorundam devotioni, qui gesta martyris pretiosi plenius nosse solliciti sunt, quæ ad nostram pervenire notitiam, illorum scilicet reiutu, qui viventi familiariter adhæserant, vel nos ipsi perspeximus, ipsius de quo loquimur patrocinantibus meritis stylo perstringere satagemus, præmonentes lectorem, minime consonare veritati, quidquid hinc alii vel scripserunt, vel scripturi sunt, quod huic narrationi nostræ probetur esse contrarium. Plane ad hæc agenda, etsi minus dignos nos pro materiæ dignitate non levis nos addicat præsumptio, sensusque confundat inopia, sed rursus amor erigit trepidantem, invitat devotio, et animant non mediocriter ad loquendum profluentia ab ubertate domus Dei stillicidia gratiarum: quibus per hunc famulum suum Salvator faciem terræ nos desinit irrigare. Etenim si sileamus nos, solum in laudem martyris mutorum lingua, et quam accepta Creatori fuerit illius et vita et mors, virtutes lo-

quatur. Nostræ igitur devotioni lineas rectitudinis nunquam in scribendo excedere, per beati Patris nostri merita gloriosa, spiritus veritatis inspiret, ut pura ac fide plena prosequatur oratio quod pia agredimur intentione.

Electus igitur ante mundi constitutionem in Christo sanctus Thomas ortu suo felici Britanniarum caput Londonias illustravit. Pater ejus Gilbertus, cognomento Beket, mater vero Mathildis fuit: ambo generis ac divitiarum splendore suis nequaquam concivibus inferiores; quibus e regione morum ingenuitate et piæ conversationis innocentia longe excellentius præminebat. Justitiæ quidem actionibus insistentes, sine crimine et querela, ut traditur, conversati sunt, ut ex iis tanquam Zacharia et Elizabeth novum se lætetur Anglia suscepisse Joannem. Nec hunc immerito pro modo suo Joannem dixerim, cui quanta cum Joanne fuerit convenientia penitentiae, labor et amor indicat veritatis, pro qua usque ad mortem decertans, nec sub gladio quidem trepidavit, quominus testimonium redderet veritati. Sed hæc sequens sermo loquatur. Nunc autem, ut paulo altius seriem repetamus historiæ, de visionibus breviter intuendum est, per quas futuram credimus sanctæ sobolis excellentiam præfigurari.

DE VISIONE MATRIS SUÆ.

Previ ergo intervallo postquam concepit mater, vidit in somniis in sinum suum universam aquam Thamensis fluminis influxisse. Quo illa muliebri metu perfusa ac suspicata laborem quempiam peregrinum, quem vulgus consuevit interpretari per aquarum exuberantiam, audivit econtra a sapiente interpretationem divinitus inspiratam: unde meruit non mediocriter consolari. « Nasciturus, inquit, ex te reget populos multos. » Et alter quidam, in nullo dissidens a prioris sententia, adjecit quod fluenta gratiarum esset accepturus, quibus natale solum instar fluminis irrigaret, commemorans illud evangelicum: « Qui credit in me, fluent de ventre ejus flumina aquæ vivæ. »

Secundo autem Cantuariam venisse se visum est mulieri. Ubi cum ecclesiam Christi cum cæteris, qui aderant, inciperet ingredi, in tantum ejus venter intumuit de puero quem conceperat, ut nullus ei ad aliquod ostiorum pateret ingressus. Qua visione mulier quasi quæ indigna videretur ingressu ecclesiæ, tristis admodum et turbata permansit, usquedum evacuavit visio tertia mœstitiâ præcedentis.

Instante etenim partus tempore, visum est matri de cælo in suum gremium splendoris insoliti duodecim sidera cecidisse. Unde mulier magnifice confortata pendit magnum quiddam de nascituro hac visione figurari. Sed et nos ex his, quæ per fidem suum Dominus operatus est, dignitatis futuræ supereminentem gloriam æstimantes, ipsum in futuro examine cum illis duodecim electis cæli luminaribus, judicaturum esse orbem terrarum credimus et confitemur.

Rursum vero cum in cunis jacuisset infantulus,

nudum hunc mater conspexit in somniis. Unde indignata adversus nutricem: « Cur, inquit, non tegis infantem? » Cui nutrix: « Optime, domina mea, cooperitus est purpura pretiosa et plicata. » Surgunt illico mater et famula, molliuntur explicare pallium, ut diligentius inde parvulum operirent. Cujus latitudinem cum nec thalami paterentur angustiae, nec amplior aula, sed et platea longe angustior appareret, ad Smedefeld, qui locus amplus est in civitate, ut vel ibi suis satisfacerent votis, ambæ pariter, ut visum fuerat, festinarunt. Cumque de loci latitudine securitatem sibi promittentes cœptis insisterent, vox ad illas illapsa de supernis intonuit, dicens: « Incassum conamini, purpura hac Anglia tota minor est, nec ejus poterit comprehendere latitudinem. » Ad hanc vocem evigilat mater, memor quidem quid viderit, sed ad quid prorsus ignara. Nos vero, quibus intellectum fides oculata revelat, purpuram pretiosam sanguinem interpretamur martyris innocenter occisi, quo perfusus in passione jacuit et velatus, nunc vero per tot terrarum regna exterasque nationes extensus est, secundum quod præcedens visio figuravit.

Tradunt propinqui quod die, qua ad has mundi natus est tenebras hic noster parvulus, egressus ignis de domo paterna partem plurimam civitatis incendit. Et tu sane, si diligenter advertas, a die qua ingressum meruit æterni luminis martyr noster, quanta in ædificandis seu restaurandis ecclesiis, vestientis altaribus ferveret devotione, quam liberalis in pauperes, quam prompta operibus injustitiæ renuntiare, punire peccata per penitentiam, quam denique prona ad omne opus pietatis exemplo martyris informata exstiterit, accensam de illo fateberis et tu non solum Londoniarum urbem, sed universam plane civitatem Dei quacunque nomen illius auditum est. Jamque lucerna super candelabrum positum est, ut qui ingreditur lumen videant. Jam quod a Salvatore promittitur electis, in isto cernimus adimpletum: Qui vicerit sicut ego vici, faciam illum columnam ignis in templo meo. Et jam gratias supernæ providentiæ columnam tenemus, intueamur lucernam; qua ivit ingrediamur, ne forte offendamus ad lapidem pedem nostrum, quia qui ambulat in tenebris, nescit quo vadat. Sed jam nunc ad ordinem historiæ revertamur.

Ubi tenera admisit ætas, litterarum primordiis puer traditur imbuendus. Quibus decursis, ad artes missus multa in brevi comprehendisse memoratur. Quam docilis, quantæque fuerit etiam in teneris annis industriæ ac vivacitatis ætas fortior comprobavit: quin jam factus vir uberes messuit sapientiæ fructus, in quibus adhuc junior desudavit. Sed nequaquam diu scholis intendere sinebat variatio rerum. Parentes nimirum, ut prælibavimus, primi quondam inter suos divitiis et gloria sæculi, sed frequentibus incendiis cæterisque infaustis incursum rerum non mediocriter attenuati, minorem noscuntur in instruendo filio diligentiam adhibuisse.

Quam profecto attenuationem, imo sobriam quamdam et honestam mediocritatem, ipsorum justificationi militasse nullatenus dubitare permittitur, cum dicat sermo divinus : Ego quos amo arguo et castigo. Ut videlicet caminus tenuitatis exureret, quidquid de mundi pulvere per opulentiam contraxerit. Sed et filii desolationem geminavit interitus genitricis, quæ eo tempore viam universalem ingressa, destitutum pene propriisque expositum consiliis filium dereliquit : pater quippe jam senuerat, nec ad filii sumptus sufficere poterat substantia quæ remansit. Sed nec ipse diutius matri fertur superfuisse.

In illius autem domo vir nobilis et dives admodum, Richerius de Aquila, veniens ad civitatem hospitio se suscipere consuevit. Cui Thomas associatus, aliquanto tempore illius consiliis et prudentiæ se commisit. Jam enim puerilibus annis evolutis, optimis coepit pollere moribus, ingenio clarus, acceptus eloquio, vultu mista gravitate jucundus, venustus aspectu, forma satis elegans, gratum sese omnibus et amabilem exhibebat. Jamque commune videndi iter ingrediens, his animum dabat, quibus illa solet ætas intendere, canum cursu ac velocitate aviumque volatu ac rapina ludicra delectabatur. Sed in his atque similibus mundi vanis ac variis oblectamentis, integrum et immune servatur vas electionis ab his, quibus tenera præsertim solet juvenus infestari. Ad præsagium vero futuræ constantiæ fertur adolescentis animo tam pertinaciter inhæsisse amorem veri, quamvis adhuc secularia sectaretur, ut vix aut nunquam joco vel serie quidquam protulerit contrarium veritati. Quam perfecte id ipsum impleverit postquam factus est vir, sequentia declarabunt. Itaque ad prænominatum divitem a scholis rediens, et varias adhuc seculares curiositates, nunc venatu, nunc avium captura, quibus maxime pascetur animus juvenilis, pro libitu nunc domi cum patre, nunc rure cum divite morabatur. Factumque est ut in hunc modum dimissis sibi scholaribus studiis proponeret renuntiare.

Die vero quadam accidit ut ad ripas eunte Thomas simul cum divite, motam de flumine anatem accipiter insequeretur, secutusque divertentem in flumine cum ipsa pariter mergebatur. Quod videns adolescens, miseratus accipitem jam perituro, equo destitit, seque in gurgitem ut avem eriperet præcipitavit : sed priusquam avem contingeret, raptus ipse intra alveum fluminis, et nunc mersus sub aquis, nunc undarum vi impellente levatus periclitari coepit, et penitus periisse putabatur ab intuitibus, dum nullus adesse potuit qui manum porrigeret pereunti. Denique ad molendinum, quod tunc forte molebat, aquæ tractu perlatus, ubi primo aquæ exitibus propinquavit, stetit rota nec se movit semel, quousque vivus quidem sed vehementer afflictus adolescens extractus est. Sed fovit afflictum medica manus Salvatoris, quem inter undas desperatum protexit ne exstingueretur lucerna futurus in Israel, cujus

A morte pretiosa tanta cernimus beneficia provenisse.

Rursus vero Osbernus Octo-numini cognomine, vir insignis in civitate et multarum possessionum, cui carne propinquus erat, detentum circa se Thomam fere per triennium in brevendis sumptibus redivisus suis jugiter occupabat.

Jamque pedem porrexit in semitas sæculi, jam ad honores aspirare, effundere animum in exteriora, et vanas mundi amplitudines ambire coepit. Et ad hæc quidem consequenda multas illi occasiones et animi sapientia, quæ pollebat, et honestas vitæ offerebat. Singularis namque et supra annos enituit in viro matura quædam senectus, sapientiæ canities, consiliorum ac morum quædam jocunditas, gravitas, ut merito in admirationem et amorem sui converteret universos. Sed didicit tunc, quod postmodum fatebatur, non esse in homine viam ejus sicut nec vitam, sed a Domino dirigi gressus hominis ; aliud nimirum disponebat ipse, aliud atque aliter operata est in ipso divina dispositio. Siquidem, ut facilius ei ad honores pateret promotio, invitatus a quodam ministro domus archiepiscopi Theobaldi, illo ductu divinæ gratiæ adveniens, quali decuit honore susceptus est. Ubi ludis et levitate postposita seniorum sapientumque sermonibus ad meliora semper animum informabat. Cognitaque in brevi vivacitate viri per verba prudentiæ, ac si per scintillulas quasdam jugiter erumpente secundum quod Sapiens ait, sermo hominis annuntiat de eo, consiliis archiepiscopi negotiisque, et causis publicis et privatis interesse jubetur.

C Nam sensu pervigil, providus in consilio, in responsione prudens, sermone disertus ac temperatus, intras et egrediens ad imperium domini sui, verbis et opere nulli inferior, domino suo carus et gratus omnibus apparebat, ut malevolum se magis probaret quisquis in viro tanta dona gratiæ non diligeret. Denique tantam invenit gratiam in oculis archiepiscopi, adeoque illius animum sedulis sibi devinxit obsequiis, ut palam fateretur archiepiscopus quod neminem ante tam integrum sibi in omni negotio tantæque fidelitatis invenisset. Sed hostis humani profectus videns, nec sine invidia tabescente, tantam in adolescente industriam animi, ingenii acumen, in moribus honestatem, quibus facilem illi prævidit accessum ad summos honores, si ut coepit inoffenso curreret pede, æmulum ei suscitavit Rogerum archidiaconum Cantuariæ, quem de Ponte episcopi cognominabant, qui donec ultimum cælo spiritum redderet Thomas, tunc quidem conceptum virus in ipsum, quibus potuit modis effudisse cognoscitur. Interim autem, ut a curia illum amoveret, nunc apertis conviciis, nunc joci irrisoriis aggressus est : denique clericum cum ascia sive securi faceta contumelia crebrius appellavit cognomento videlicet illius, a quo ad curiam archiepiscopi fuerat invitatus, et revera Thomas securim accepturus erat opportuno in tempore, vel potius gladium Petri, quo ipsum Rogerum cum complicibus a cætu sanctorum præcidit, quin nec cibum signandi facultatem habebant sicut regi con-

questi sunt, sed hæc alias. Interim vero vir prudentia præditus nequaquam his sive similibus movebatur, quominus obsequiis archiepiscopi pervigil inhaereret, audiens a sapiente quia melior est patiens viro forti, cum e diverso audiat, ille qui profert contumelias insipiens est, sed nec divinum poterit infirmare consilium humana malitia. Inter hæc autem venerandæ memoriæ Willelmo Eboracensi beatitudinis æternæ suscepto finibus, prælibatus Rogerius ope et industria archiepiscopi Theobaldi substituitur a quo secundum morem inungitur et consecratur, archidiaconatum vero Cantuariæ Thomæ donavit, cui, ut jam dictum est, nequaquam similem se crederet habiturum virum, per omnia bonum et fidelem in omni domo sua; nec mora intervenit, etiam præposituram Beverlaci archidiacono suo obtinuit, ecclesias quoque et redditus alios multipliciter accumulavit. Vir autem liberalis animi secundum monita sapientiæ, melius esse arbitrans nomen bonum quam thesauros plurimos, ad augmentum famæ et nominis ampliationem divitias studuit detorquere, ne quando pecuniæ parcens parcitatis nævo splendorem nominis obfuscaret. Quid autem moras innectimus? nullas ipse passus est ad superiora progrediens, neque enim in humili potuit morari loco, flamma vivacitatis, quæ pectus illud impleverat sublimitas animi, et quod amplius est mirandum, in tanta sublimitate integritas vitæ.

Adducuntur igitur habitis ampliora, potiora prioribus, et emulatus crescunt honores. Volens namque archiepiscopus sublimius munere virum, regiæ illum majestati commendat, quanta polletet virtute relexens, animi sapientiam, providentiam consiliorum, et quæ his excellunt, fidum prædicat et veritatis amatorem, facile regi inspiratum est commendatum habere quem propria satis merita commendabant, cui et cancellariam suam sine mora concessit. Novus itaque exigitur super Ægyptum Joseph, præficatur universis regni negotiis post regem secundus, augentur honores, prædia, possessiones, et divitiarum splendor ac mundi gloria multiplicatur, sequuntur ex more innumeri mancipiorum greges, stipantur electorum catervæ militum, nec cancellario prorsus quam regi minor comitatus adhæsit, ita ut nonnunquam corripere rege quod regis hospitium vacuasset. Larga nimis ac liberali manu tam proprios quam regni redditus profudit in militum stipendiis et donariis profuturum, sed et regi fidus et integer animo ac tuque permanens, illius ad honorem et gloriam omnia reservavit. Rex e contra tantum illi honoris, tantum illi lectionis et libertatis quantum nemini unquam hominum impendisse cognoscitur, quod tempore posteriori rex ipse sæpenumero commemoravit. Quæcunque statuit, quæcunque mutavit, quæcunque sancivit, quocunque dominatio regis attingit, quasi pro lege tenebatur. Sed ut semel et secundo, vix sæculo nequam, quanta ejus infelicitas, quam sit conditio miserabilis, quis confideret? videas si attentius intuearis, quia quanto pene in sæculo persona potentior, tanto prouior ad peccatum, quanto diutius tanto dete-

Arior, quanto sublimior tanto proclivior ad ruinam, et rursus quanto firmiter in terrenis, tanto infirmius ad divina consurgit, et a vera sapientia remotior, quo prudentior in humanis, cum sapientia carnis inimica sit Deo, et prudentia mors; nam quanto quis mundum amplectitur, arctius eo mundi fumo caecatus, delinquentiæ nocte vehementius astringitur, et fortius retinetur. Accedit hostis humanæ naturæ, annator mali, invidiæ auctor, innocentie præco, invadens homini locum beatitudinis, unde per propriam nequitiam irrecoverabiliter lapsus est: volens igitur innocentiam deperire, iter obsedit quo itur ad patriam sedens in insidiis sicut leo in spelunca sua, ut interficiat innocentem, tendit laqueos, compedes inicit, hæmum operit esca, ut qui fuerit avidus escæ hamo juguletur, facile nonnunquam sternit iter ad honores, favet ad fastigium conscendenti, ut possessionis jure teneat in sublimi, cui in planioribus non poterat propinquare. Sanctus Thomas ante cancellariam quam innocenter, quam sine querela priora tempora transegerat in imo positus, sermo superior explanavit; nunc autem locatus in sublimi quantæ audaciæ, quantæ fuerit præsumptionis difficile dictu. Quantis enim necem, quantis rerum omnium proscriptionem intulerit, quis enumeret: valida namque stipatus militum manu civitates aggressus est, delevit urbes et oppida, villas et prædia absque miserationis intuitu voraci consumpsit incendio, et inimicis domini sui undecunque insurgerent, intolerabilem se exhibebat. Denique quem anquam timebat offendere ut regis satisfaceret votis, pareret imperiis? Sed in his omnibus (licet aliter aliqui æstimaverunt) corpore castus, corde humilis, sed inter humiles, nam inter potentes potentior ipse ac sublimior apparebat: nullus eo discretior, nemo munificentior nec ipso prudentior habebatur, pauperibus absque æstimatione necessaria ministrabat, sed ita omnia dona gratiæ exteriori fastu velabantur, ut nemo nisi pro sæculi pompa hunc ipsum, etiam cum archiepiscopus esset, putaverit accitasse. Tantam quoque gratiam adeptus est a rege et regno universo, ut hos solum beatos reputaret opinio, qui in ejus oculis complacere et regis consiliario et cancellario obsecundare in aliquo potuissent. Ut hinc uberius Redemptori personet gratiarum actio, et vox laudis, quod tam misericorditer eripuit mundo, quem tot nexibus novimus obligatum. Et hæc dicta sufficiant de vita qua mundo vixit; abhinc vero qualiter mundana omnia mente calcaverit ipso duce nostra dirigatur oratio.

Sortitus est interea finem temporalis vitæ Theobaldus archiepiscopus, et sedes vacavit a præsule. Rex autem arbitratus cancellarium suas per omnia sequi voluntates, ut ante, et imperiis obtemperare, ipsi archiepiscopatum dedit, sed aliquandiu differitur negotium, donec a conventu consensum extorqueat, qui liberam ab antiquo solet habere vocem in electione pontificis, nam illo reclamante nulli regum licuit intrudere quemquam propria auctoritate. Igi-

tur, ut conventus sibi inclinaret assensum tres episcopos destinavit Cantuariam, et cum eis Ricardum de Luci virum nobilem et praefectum patriae. Cancellarium quoque misit in Angliam pro diversis negotiis, et praesertim ut filio suo, jam tunc coronando in regem, fidelitatem et subjectionem acciperet ab universis et juraretur in regem. Episcopi vero transmissis mari venientes Cantuariam salutaverunt conventum ex nomine regis, et in capitulo coram omnibus Ricardus vir magnae facundiae allegans causam pro qua missi sunt. « Hoc, inquit, mandat vobis rex, diutius hac Ecclesia orbata pontifice non mediocriter ovis imminere periculum, unde ipsius sciatis esse voluntatem, ut liberum etiam nunc sicut pridem habeatis in electione pastoris arbitrium, persona tamen talis provideatur, quae tanto sufficiat oneri, digna sit honore et regi complaceat. » Ad quem prior, « Dominus, ait, universitatis auctor, qui suam Ecclesiam sibi proprii sanguinis effusione comparavit, acceptum sibi, utilem nobis, et qui universae Ecclesiae suae forma sit virtutis, exemplum justitiae, dignetur providere pastorem; et regi gratias, qui Ecclesiam hanc dignitate, quam obtinuit tanto tempore, non privavit. » Responso autem ab omnibus adjungunt nuntii, « Cum propria sit omnium vestrum voluntas regiis parere mandatis, consultius est ut talis eligatur, qui libere causam Ecclesiae nostrae tueatur, et qui nobis valeat in omnibus erga regiam majestatem, nam si talis eligatur qui regi non placeat, in schismate eritis et discordia, sub tali pastore dispersionem non refugium habituri, cum e regione non modicum promotionis vobis accessisse experiemini, si in quo regi complaceat eligatur. » Coacto igitur in partem saniori consilio, cum legatis cominus de electione tractatum est, et invocato spiritu Dei per quem rectores justa discernunt, cancellarius in pastorem eligitur et patronum, cum voto omnium acclamatione, ut divinitus inspiratum fuisse nemo dubitet. Approbant electionem nuntii regis, asserentes regem facile assensurum fore, nec esse in regno aptiorem sive honestiorem quempiam ad hunc honorem. Quid multa? cogitur Londoniis solemne concilium, eligitur cancellarius a clero et populo, confirmatur electio, et placuit universis, solo Londoniensi episcopo reclamante; sed clamante tugha voce Dei et non hominis, siluit ille et digitum ori suo imposuit; praesentatur electio regis filio coronando adhuc, consensit ille et gratum habuit. Wintoniensis autem praesul vir grandaevis et prudens, concionem et eos praesertim, quibus rex vices suas commiserat in hoc negotio, ut quidquid facerent, ratum foret, his affatus est verbis. « Vir iste, inquit, quem communi consensu eligimus in patronum, cancellarius et primus patriae thesaurus regis et redditus regni in manu habuit, et ut diversa posebant negotia tractavit. Verum ne cui in posterum pateat exactioni vel calumniae, quasi qui pro libera magis voluntate quam regni commodo dissipaverit bona domini sui, liberum eum et absolutum ab omni

A reclamatione suscipimus. Incongruum enim videtur, ut patrem sibi faciat sancta Ecclesia vel patronum, qui pecunie probatur esse mancipium, et qui humanae servitutis obnoxius sit necessitati. » Ad quem ministri regis: « Ex ore, inquit, regis liberum eum clamamus ab omni calumnia et exactione nunc et in omne tempus. » Et ita contraxit ad tempus iniquitas os summi, et conticuit calomniator, videns et invidens ab ea se, quam conceperat, decidisse spe. Perductus igitur Cantuariam, solemniter ut decuit devotione, a conventu et civitate susceptus, et inthronizatus, et more canonico consecratus est. Celebrata autem ordinatione, et singulis in sua reversis, venerabilis quoque archiepiscopus mox in seipsum reversus, et ad Dominum totus conversus, est, et quod dictum mirabile est, non citius est sacramentaliter sacra delibutus unctione, quam animus ipsius re ac virtute sacramenti multipliciter videlicet Spiritus sancti gratia debriatus, ex integro etsi non habitum illico sed animum immutavit, imo non illius hoc fuit sed mutatio dextrae Excelsi. Processu vero temporis ne ex honore superbi-erit, onere et iugo Dei carnis insolentiam enervare diversis poenitentiae laboribus elegit, et tam ordinem quam habitum canonici regularis suscepit, et susceptum ita mirifice pariter cum officio archiepiscopi conservavit, ut quamvis quilibet de se praesumat, in alterutro tamen saepe deficiat, cum ipse utrumque et quaedam his difficiliora perfecte consummaverit. Interim autem vir altioris ingenii oculus mundi, qui semper nequam est, latere volens, quod in corde ipsius plantaverat divinus amor donec videret altius fixa radice mundi turbines non timeret, novella plantatio, nequaquam statim mutavit habitum. Sed orto inter monachos murmure quod contra morem in veste saeculari frequentaret chorum, corripuens illum ex domesticis quidam retulit: astitisse sibi personam vultu terribilem, et verbis minacibus imperasse: « Vade, die cancellario (tacito nomine archiepiscopi praeter nimiam indignationem) ut sine cunctatione commutet habitum, quod si contempserit, ibo illi in adversum omnibus diebus vitae suae. » Quod audiens venerabilis vir, amarissime lacrymatus est, et tunc quidem pauca locutus haec dicenti, tacitus secum considerat quid egerit, qualis fuerit, et quod onus suscepit, onus plane in omnibus attendens potius quam honorem; videns nempe se animarum obnoxium rationi, divinitus inspiratus erexit se circa se, et tali secum deliberatione congregitur.

Anima mea, quid agimus? quam pro commissis ovis reddimus rationem, qui viximus negligenter, aut quid pro alienis dicturi, qui propriis gravamur excessibus? Hactenus mundo viximus, militavimus pro terrenis, habes jam quas concupisti, vanas celsitudines, perituram cum mundo divitiarum gloriam, jam potita cordis tui desiderio; num his ampliora ambire, num altius conscendere niteris? Ad inferni novissima nos potius ista celsitudo reducet,

si non consultius agamus, redimentes tempus et dimidiantes dies, dum patientia Dei ad pœnitentiam nos invitat, ne sicut fur in nocte veniens dies illa terribilis secum rapiat imparatos, nec jam sit qui eripiat. Fuerit ignorantie et juvenilis animi quod anteriora tempora transeginus sub contemptu, sed abhinc nullum penitus residet excusationis umbraculum, ignorantie velamen auferitur. Nam si nos propria nequaquam coegit in melius, saltem commissorum nobis cura sollicitet, ne perditæ viuentes et ipsi pereamus, et multis simul materia mortis, perditionis causa. Igitur quod solum restat amplectamur refugium, salutiferam Salvatoris intenta aure percipiamus vocem, et pium imitemur exemplum dicentis : « Qui vult venire post me abneget semetipsum sibi, et tollat crucem suam et sequatur me. » Quid enim proficit homo, si lucretur mundum universum, anime autem suæ detrimentum patiatur, et seipsum perdat? Propterea ut ex nobis proficiant quorum nobis committitur cura, luceat lux nostra coram hominibus, ut videant opera nostra bona et glorificent patrem. Et ut nobis prosit quod facimus, indefesso nisu contendamus per angustam portam cœlestis atrii latitudinem intrare, ne si tarde quaesierimus ingressum, jam clausa janua mereamur audire, « Nescio vos. »

His et similibus quotidie imo et continue ad congressum spiritualis militiæ vir sanctus armavit animum, et propositum solidavit. Præventus siquidem inspiratione divinæ gratiæ, et jam terrena omnia sub se videns et contemnens, animo ad cœlestia conscendebat. Nec moratus arrepto spiritualis zeli mucrone secuit nodum necessitatis antiquæ, qua vinciri videbatur catenus, et serius exactor sibi semetipsum mactavit Deo hostiam vivam, sanctam Deoque placentem. Siquidem attenuato victu gulæ jugulat appetitum, irruentes in animum illicitos motus sacræ lectionis et orationis assiduitate reverberat, reprimat insolentiam naturalis incendii, somno brevior, et vestis molliorem asperiore commutavit cilicio, et ut multa præteream, carnem suam crucifigens cum vitis et concupiscentiis, totum se redegit infra metas necessitatis, et ab eo qui fuerat totus alter efficitur. Quidquid honestum, quidquid sanctum, quidquid justitiæ fuit, et fecit et docuit, et quæcunque his contraria a se funditus elongavit. Et quidem ab exordio ordinationis suæ, tantum divinæ dilectionis et devotionis sanctæ, tantum etiam zeli contra omnem injustitiam concessit, ut nulli personæ, cujuscumque esset dignitatis, pepercerit, quæ quidquam contra traditam sibi a Domino justitiæ normam præsumpsisset, sed nec regis obsequiis seu voluntati contra Regis omnium voluntatem, nec minis nec amore victus obtemperare ulterius acquievit.

Quis autem hominum digne sufficit admirari inestimabilem divinæ miserationis intuitum in tam subita et tam perfecta mutatione mentis humanæ? Prorsus mirabilis Deus in sanctis suis, commendat in

homine divitiis bonitatis suæ, qui, cum sit peccator et inimicus justitiæ, reconciliat eum sibi secundum multitudinem misericordiæ suæ, non hominem sed vitia hominum insectatur, revocat recedentem, aversum redire facit, et ad se convertit contemptorem, inspirat affectum pœnitentiæ, odire facit quidquid amaverat, et facile efficitur quod impossibile videbatur. Undique sanctorum exempla nos excitant, hinc quidem lapsorum pœnitentium, hinc vero justorum qui lapsi non sunt. Et quidem ut surgere conetur qui forte ceciderit, sanctorum nobis proponitur casus, justorum vero perseverantiam legimus, ne quando a proposita professione labamur. Et ne desesse causemur exempla, proponitur nobis forma perfecta pœnitentiæ venerabilis archiepiscopus et martyr Christi sanctus Thomas. Qui quidem postquam graviter se deliquisse sequendo sæculi ponipas, multa imo innumera contra Dei voluntatem et imperium, ut regi mortali servaret fidem, præsumpsisse consideravit, conversus pœnituit, et percussit femur suum. Quidquid videlicet carnale, quidquid fluxum senserat in se, largo lacrymarum imbre diluit, et piæ amoris incendio amara cordis cremavit, et grave sibi bellum indicens, exegit a seipso per pœnitentiam, quidquid se meminit commisisse per culpam, et quæ prius tanto amplexus est desiderio, hæc conversus ad amorem Dei opportune importune prædicat contemnenda, et terreni regis postposita voluntate et obsequiis, summum sibi conciliare Regem vigiliis sacris, jejuniis et orationibus, et sanctarum meditatione lectionum, elemosynarum quoque liberali largitione festinabat. Tot namque pauperibus necessaria vitæ, tam in cibis quam vestibus, quotidie ministrabat, ut licet multitudo infinita mendicantium ad eum conflueret, ex paucitate potius eorumdem quam voluntate cohibendi manum, largiri cessabat, reminiscens illius prophetici : Dispersit, dedit pauperibus, justitia ejus manet in sæculum sæculi.

Ut autem in hunc modum dispergere et pauperibus dare nullam dispersio frequens parturiret inopiam, possessiones Ecclesiæ studiosius retinere, et dispersas revocare satagebat. Prædia quoque Ecclesiæ a prædecessoribus suis minus juste donata, his qui vel sæcularis potentiæ favore seu affinitate aliqua conjuncti fuerant, auferre nisus est, et pristinum jus Ecclesiæ reformare. Clericorum etiam qui de curia regis erant, cum deprehendisset incuriam, ecclesias ac possessiones quæ ad ecclesiasticam jurisdictionem pertinent, tanta auctoritate vindicabat, et postmodum vindicabat ut sacrilegi et rerum Ecclesiæ invasores sociatis sibi quibusdam episcopis, regem et omnem ejus familiam adversus sanctum Dei exasperent, protestantes quod regias consuetudines ac donationes exinanire disposuisset, et secundum regulas canonum cleri pariter et plebis vitam coarctare et moderari.

Advertens quoque rex solito sibi indevotionem apparere archiepiscopum, et contemptum se suspicatus ab eo, quem supra omnes homines adamaverat, cre-

sciente paulatim amaritudine, et subintrante odio, a cordis illum secreto et consiliis suis efficit alienum. Adhuc sine mora fratrum accusator, incensor odii, concordiæ persecutor, haud ignarus regis commotionis, quippe qui perambulat terram, et circuit eam querens quem devoret, et in suam redigat possessionem. Itaque auget odia, præparat semina discordiarum, jurgiorum ministrat fomitem, et comparatis viribus sanctum aggreditur archiepiscopum, ut vel eum dedecore ejiciat a proposito, si adversitate victus legi consentiat injustitiæ, vel si in sententia persistit, infami illum murmure maculet, et quod penitus evacuare non valet meritum, saltem illud minuat impatience. Rursum vero regis animum tum per se occulta intrinsecus inspiratione, tum extrinsecus per nequitie suæ ministros, contra patrem spiritua-
lem et pastorem animæ suæ accendit ira, armavit malitia, et lethali tandem odio induravit. Admovit deinceps odiorum materiam, et quasi ex ratione sufficientes composuit causas dissidii. Denique episcopos et principes regni, regisque ministros et domesticos venenosis infecit affatibus, ut videlicet partem archiepiscopi sancti infirmiorum faciens, et ipsum facilius obrueret, dum solus in stadio decertaret, cæteras quoque, dum contra divinam justitiam regis faverent presumptionibus, traheret ad perditionem.

Hæ sunt astutiæ Satanae, hi circuitus anguis lubrici, qui non latatur nisi cum mala fecerit, et iter obstruit quo itur ad Dominum. Sed Christi miles invictus, ac si turris erecta in Jerusalem contra faciem Damasci, quamvis solus in certamine, non Satanae, non satellitum ejus expavit assultus, confidenter canens cum propheta : Dominus fortitudo mea, Dominus firmamentum meum, et refugium meum, et liberator meus; et Dominus mihi adjutor, non timebo quid faciat mihi homo. Præmonitus autem a Salvatore, quoniam beati qui persecutionem patiuntur propter justitiam, modicum aestimabat quidquid pro justitiæ vel veritatis assertione posset mundus vel diabolus irrogare secundum apostoli sententiam dicentis : « Non sunt condignæ passionibus hujus temporis ad futuram gloriam quæ revelabitur in nobis. » Igitur ut ad narrationis ordinem revertamur, initium inimicitarum inter sanctum Thomam archiepiscopum et regem, quantum creditur, hoc fuit.

DE CONSUETUDINIBUS QUAS REX VOLUIT CONSCRIBERE FISCO.

Commorante rege in prædio suo apud Wodstoke, præsentem archiepiscopum et primis patriæ, inter alia movetur questio de consuetudine quadam quæ in Anglia tenebatur. Dabantur de hida bini solidi ministris regis qui vicecomitum loco comitatus servabant, quos voluit rex conscribere fisco et redditibus propriis associare. Cui archiepiscopus in faciem restitit, dicens non debere eos exigere pro redditibus; nec pro redditu, inquit, dabimus eos, domine rex, salvo

A beneplacito vestro. Sed si digne nobis servierint vicecomites, et servientes vel ministri provinciarum, et homines nostros manu tenuerint, nequaquam eis deerimus in auxilium. Rex autem egre ferens archiepiscopi responsionem, « Per oculos Dei, ait, dabuntur pro redditu, et in scriptura regis scribentur; nec dignum est ut contradicas, cum nemo tuos contra voluntatem tuam gravare velit. » Prævidens archiepiscopus et præcavens ne per ipsius patientiam consuetudo indueretur, unde posterius gravarentur : « Per reverentiam oculorum, quos jurasti, domine mi rex, non dabuntur de tota terra mea, et de jure Ecclesiæ ne unus quidem denarius. » Silius rex, libera pontificis objectione percutus, sed regis indignatio non quievit, nam tacito interim de laicilibus, quæ contra archiepiscopum minus facere viderentur, in clerum convertitur furor, et in Ecclesiæ ministros indignatio se dilatat, quorum contumelia in archiepiscopum specialiter redundaret.

DE NOVO NOCENDI GENERE ARCHIEPISCOPO.

Novo autem præmeditato nocendi genere subintroducitur contra clericum Philippum de Broji nomine ab olim consopita calumnia, siquidem de morte nullitis cujusdam fuerat appellatus, sed in audientia Lincolnensis episcopi cum ventilata fuisset causa, ecclesiastico jure purgatur, et soluta controversia liber a parentibus clamatus est. Rursum vero minister regis, ad cujus providentiam illud pertinebat negotium, volens clericum deperire ex antiquo odio, causam revocavit in medium, et calumniam homicidii reiteravit. Clericus autem ut vir ingenuus, dolore tactus et indignatione, conviciis vicecomitem aggressus est, qui cum regi detulisset illatam sibi a clerico contumeliam, gavisus, ut creditur, rex accepta occasione serviendi in clericum, conceptam commotionem refudit in Philippum. Et facta questione de clerico in præsentia archiepiscopi, protestatur rex, quod plenaria flet justitia et de homicidio pariter et de convicio, nec statit penitus solutio facta. Archiepiscopus vero infra curiam suam et tuitionem Ecclesiæ clericum recepit, ut ibi pro se loquatur, et respondeat calumnianti. Missis igitur a rege episcopis aliisque ordinis utriusque, qui clericum judicarent, negat ille homicidium, asserens non debere cogi ulterius super eo responsum reddere, nec haberi in legibus causam revocari in medium, quam purgatio sollemnis terminaret, et pax iuncta cum adversariis sepelivit : « Quod autem regis ministrum dehonefasti, animi victus amaritudine, fateor, inquit, sed plenam pro maledicto polliceor emendationem, tantum rationis metas correptio non excedat. — Et nos, inquit, decernimus ut biennio maneat sub manu regis præbenda tua, et possessiones, omniaque quæ in redditibus habes ad nutum ipsius eroganda pauperibus. » Adjungunt adhuc nuntii quod nudus astaret ministro regis, laicali more, et ipsi offerret arma pro injuria, et in illius viveret subjectione; paruit clericus judicio, lætus quidem

evasisse se, quam rex minabatur, sententiam mortis. Rex ex adverso volens hominem mortis subisse iudicium, injuriam causatur fieri sibi, et euriæ suæ præjudicari, episcopos quoque detulisse personæ propter archiepiscopum, nec secundum æquitatis considerationem judicasse calumniatur, et secutus per oculos Dei, ait, jam mihi jurabitis quod justum iudicium judicastis nec pepercistis viro quia clericus est. Quibus jurare paratis, nescius quid ageret, vel quo se verteret præ furore, communicato tandem consilio cum filiis Belial, qui ipsum incitabant adversus sanctum archiepiscopum, alias atque alios exstruxit machinas, et palam faciens quod corde conceperat, convocatos ad se episcopos omnes, qui adfuerant, præsentibus archiepiscopo et principibus regni his eos sermonibus affatus ait :

« Ne nobis imperantibus tepescante justitia malorum insolentia se dilatat, voluntatis mea est, et consilii, ratio quoque id ipsum astruit, ut consuetudines et legitima quæ traditurus sum, et quæ sancivit avus meus, a vobis confirmentur, ad pacem populi custodiendam, salva ordinis vestri professione. » Respondent una voce pontifices : « Vestris legibus obtemperamus. » Quibus ille : « Legibus, ait, regni volo obediat, et eas confirmetis, quæ ad ordinis salvationem noscuntur instigui. » Rursus episcopi idem quod prius responsum reddunt. Et rex in iram conversus, ut vel minis flecteret quos prece non potuit, jurat terribiliter, nullum eis patere diffugium, omnimodis oportere, ut leges regni, quæ pro pacis custodia traditæ sunt, episcopi quoque confirmet et custodiant. Addiditque quoniam tempore avi sui et priorum regum istæ quas nunc traditurus erat leges, custoditæ sunt ab archiepiscopis et episcopis quos sanctorum numero novimus sociatos, ut nec mirum nec magnum videatur episcopis, qui nunc sunt, si prædecessorum suorum et sanctorum maxime sequantur vestigia. At venerabilis archiepiscopus suspectum habens pacis nomen, ne forte lateret sub melle venenum, sciensque non esse tutum in lubrico ponere pedem, et tenebris circumfusum proximare periculo, constanter respondet regi, nullis se velle legibus obtemperare, quæ divinis perhibentur legibus adversari, cæterisque idem dicentibus, conventus ille inimica quadam hinc inde contentione solutus est.

Luxoviensis autem episcopus volens sibi conciliare regis animum, quem aliquandiu infensum habuit, de transmarinis ad regem per idem tempus advenit; pace vero redintegrata probans quo spiritu ductus est, loquitur placentia regi potius quam utilia, materiam ministrat decipiendi fratrem, vincendi archiepiscopum, modum describens quo id compendiosius efficeretur. Domine, inquit, ut archiepiscopus a conceptu cordis sui facile reflectatur, prius episcoporum aliqui revocentur, qui vestras foveant partes et instituta confirmet, et sic demum illius infirmata persistencia, levare manum solus contra multitudinem non audebit, dum enim coepiscoporum constantia

roboratur et fulcitur assensu, invincibilis perseverat. » Factum est ut suggestit.

Tres statim de numero episcoporum absque arcu vel gladio, sine grandi ac gravi congressu capiuntur inermes, imo quod verius est, ipsi projectis in terram armis bellicis hosti dedere manus, et quod impropere scribit dominus papa, quasi arietes non habentes cornua, abierunt absque fortitudine ante faciem subsequenti. Fuerunt autem qui traducti fuerant in partem regis, Cicestrensis episcopus Hilarius, Rogerius Eboracensis, et episcopus Londoniensis. Ab his error regis, etsi non initium forte, firmamentum tamen non mediocre et incrementum sumpsisse creditur. Ab his ergo disseminata sunt zizania, creverunt semina nequam horum industria in cordibus cæterorum; promittunt itaque observatos se regis consuetudines, ut cæterorum nemo formidet idem facere, quod ab his qui inter cæteros eminebant initium est. Spondet rex quod non quereretur citra ordinem quidquam; ut horum securitas alios inclinaret, quod absque cunctatione factum est. Horum igitur non consiliis sed insidiis et fallacia armatus, rex aerius insurgit in archiepiscopum; siquidem et ipsi tanquam gladium exacerunt linguas adversus Christum Domini, de pharetra malitiæ venenata in illum spicula contorquentes, et nunc minis nunc blanditiis pulsantes pectus validum ut interficerent innocentem. Unde et prænominatus Hilarius primo quidem familiariter monet sanctum, ut domini sui regis consentiat voluntati, et confirmet leges, priorem illi promittens amicitiam et domesticum fieri regis, ut ante. Sanctus autem archiepiscopus ad hoc ait : « Me nunquam perveries, non me latet dominum Eboracensem et te, frater Hilari, manus dedisse regiis traditionibus, ut exemplo vestri alii subsequantur, sed ærtius esto quoniam incassum conaris me vestri reatus participio maculare. » Itaque durius aggreditur sanctum, « Quid, inquit, in sermonibus domini nostri regis intelligitis, ut caveamus et nos? spondet rex quoniam nihil quæret quod ordinem dedecet, et quis aliud audeat suspicari? Sed et invitum te faciet observare statuta regni, si placuerit, dum subjectionis jure sub illius potestate vivis. » Archiepiscopus autem : « Vos, ait, videritis si expediat adimplere quæ spopondistis : ego nulla ratione consentio. »

Veniens interea de transmarinis vir quidam magnæ apud omnes æstimationis, tunc quidem abbas de Eleemosyna missum se a domino papa Alexandro, cujus et apices secum deferabat, asseruit. Forma vero litterarum erat ut archiepiscopus regis consentiret voluntati, et sic sociarentur in pace. Abbas etiam in periculo ordinis monet ut quod dominus papa mandavit hoc faciat, et ipse in culpa sit, si in aliquo archiepiscopus oberraverit; tantum paci consentiat. Litteras quoque cardinalium abbas habuit, in quibus mandabant securitatem accepisse a rege, quod non quærat aliud ab archiepiscopo, nisi ut verbo tantum statutis assentiat quæ traditurus est, quatenus publice

honoraretur coram potentibus regni cum simul fuerint nec contra ordinem suum exigerentur ab eo consuetudini consentire. Adjunxit etiam abbas sicut erat potens in persuadendo, regem nullatenus velle vinci, nec decere, annuat ille regi et pax erit, regnumque illi subjiçietur ut ante, et omnia quæ regis sunt illius erunt, nec veniet in memoriam omnis illa commotio. » Cæterum vestram, inquit, personam rex supra omnes homines honoravit, et tu ei quanta nemo unquam fidelitate servisti. Proinde ne per quem debuit sumpsisse fomentum, per te solvatur vinculum dilectionis, et ne quod tantis comparasti sudoribus tantaque devotione, commotione brevi depereat. » Quid plura? non cessavit abbas usque dum persuasibilibus humanæ qua pollebat sapientiæ verbis, seductum archiepiscopum secum duxit ad regem; facile quippe creditum est viro, qui tantæ videbatur auctoritatis. Instante igitur abbate cum cæteris, qui ad idem convenerant, promittit archiepiscopus regi quod avitas consuetudines in fide servabit, nihil de eo ulterius auditurum se confidens, ut promissum fuerat, nec dolum suspicatus post factam securitatem. Quod audiens rex: « Ut sponsioni, inquit, tuæ fidem demus, dignum est ut publica audientia hæc fatearis, universis siquidem notum est, in quantis mihi contrarius existiteris, publicis regni legibus contradicens. Et nunc convochemus ad diem certum ego quidem optimates et primos regni, tu vero episcopos et clerum; ut te coram multitudine consentiente, cæterorum nemo legibus nostris audeat refragari. » Igitur castro regio Clarenduna coacto solemnî concilio, propositis capitulis tenendarum consuetudinum, super facta sponsione rex archiepiscopum convenit. Volo, inquit, ut secundum pactionem publice profitearis quod pollicitus es. Sanctus vero archiepiscopus pœnitentia ductus, quod tenere consuetudinem concesserit, sub qua certum est Ecclesiæ libertatem periclitari, graviter ingemuit pro sponsione. Et considerans non levem hac occasione confusionem ecclesiasticæ paci emergere, elegit incidere in manus hominum et regis motum incurrere, quam derelinquere legem Dei; nec minas metuit cujusquam hominum, quo magis a recto tramite deviare, postquam ab hoc lapsu resipuit. Animadvertit nimirum vir sanctus hoc esse studium regis et molitionem, ut Ecclesiæ libertas in jus regium redigeretur. Et ut palam fiat hoc fuisse consilium regis et voluntatem, sex tantum capitula tunc factæ et traditæ constitutionis huic operi inseruimus, quorum auctoritatem sanctus ipse in epistola sua condemnavit. Sunt autem hæc.

1. Quod non appelletur ad sedem apostolicam sine licentia regis.

2. Quod non liceat archiepiscopo et episcopo exire de regno, et venire ad vocationem domini papæ sine licentia regis.

3. Quod non liceat episcopo excommunicare aliquem qui teneat de rege in capite, sine licentia regis,

4. Quod non liceat episcopo coercere aliquem de perjurio vel laica fide.

5. Quod clerici trahantur ad sæcularia iudicia.

6. Quod laici, seu rex, seu alii, tractent causas de decimis vel ecclesiis.

Viderint hi qui adhuc hodie nimis pertinaciter restitisse regi calumniantur sanctum archiepiscopum, si justum fuit inter hæc et multa in hunc modum patientiam exhibuisse, et non magis illud exclamasse propheticum: « Zelus domus tuæ comedit me; » legerat profecto, quoniam qui consentit peccantibus et alium peccantem defendit, maledictus erit apud Deum et homines, corripieturque correptione severissima. Rex vero postquam vidit archiepiscopum pœnitere de promissis, et ab eo quod pepigerat resiliire, seipsum ultra non ferens, præ nimia indignatione, minas jaculatur inordinatas, quod ipsorum videlicet curvabit cervices, et si facillas non defuerit extollentiam conquassabit. Sed nec minæ nec monita sanctum a sententia deducere, nec regiæ poterant humiliare voluntati, pulsatur tamen, ut quandoque vel tædio victus consentiat.

Duo siquidem ex his qui ipsum utcumque sequebantur adhuc, Salesbiriensis scilicet et Norwicensis episcopi in multa anxietate et mœrore supplicant, ut ipsorum causæ compatiatur archiepiscopus. « Tanta, inquit, in nos innovato vestri causa antiquo odio regis indignatio inflammatur, ut in periculum nostri capitis tota hæc convertatur malitia, nisi hodie pacem feceris. » Idem hortantur qui de consilio regis erant consules duo, ut scilicet provideat sibi, miseretur Ecclesiæ, et de suis curam habeat. Adjungunt terrentes quoniam nisi in ea die pacem faceret cum rege, in tantum se et tam inauditum prolapsuros fore piaculum, ut rex et regnum universum quasi gens sine consilio ut sine lege ab omnibus in circuitu subsannarentur. Sanctus vero archiepiscopus quasi miles invictus inter medios hostium cuneos festinans ad palmam, quem preces non moverant, nec minis cedere dignabatur, sed quoniam omnia in bonum cooperantur electis, iste tentandus erat adhuc ut post lapsum fortius insurgeret in adversarium.

Duo igitur milites Templi, magni ambo nominis, nec animi virtute, ut creditur, inferiores, videntes iram regis implacabilem fore, si regiæ voluntati non consentiat archiepiscopus, ipsum iisdem quibus anteriores, conveniunt verbis dicentes: « Quandiu sic agis, domine, quod Ecclesiæ sanctæ, quam regendam suscepisti, non compateris? da honorem regiæ majestati, et sopitis irarum stimulis unum eritis sicut a principio; sin alias, gravi clerum et Ecclesiam universam ac lacrymabili exposuisti jacturæ. » Securos præterea et certificados se astruunt, quod nihil exigit rex, quod archiepiscopum dedecet vel contra ordinem sit, et quod ita futurum sit se consentiat, se ipsos suamque legalitatem audacter interponunt. Denique ne incredulus existat promissis, concedant

ut ipsi sine remedio et sine pereant si sit in conscientia regis fallacia aliqua sive dolus contra archiepiscopum, nisi ut in publica tantum audientia honoretur, et coram cunctis concedat quod contradixit. Asserunt regem nullo modo velle vinci, ne villior appareret, et ceteri regis scita audacius præterirent quibus archiepiscopum cognoscerent refragari. Sanctus vero archiepiscopus fratrum lacrymis, quos veritatis ac fidei noverat æmulatores, non modice motus, et e regione sanctam Ecclesiam considerans præcipit proximare, si non regis animum leniret assensus: « Vestris, inquit, cedo consiliis, et regis annuo voluntati. » Et spopondit cunctis audientibus quod in fide bona servaret leges et consuetudines regni. Rex confestim quasi raptò hoc sermone ex ore archiepiscopi: « Audistis, inquit, quid archiepiscopus sui gratia spoponderit, volo ut aliis episcopis injungat quod ipse concessit. — Concedo, » ait. Nec mora in medium assensere omnes. Rex igitur dicto ad archiepiscopum: « Semper mihi adversarius es, » ad optimates consequenter et consiliarios sic locutus, adjunxit: « Tenentes episcoporum sponsonem super legum regni custodia, provida tractemus examinatione negotium, ut quando opus sit de legibus inter nos iterare sermonem. Cum summa itaque diligentia leges avi mei Henrici regis recordatæ et conscriptæ publice coram omnibus recitentur, ne novum aliquid tradidisse quisquam nobis præsumat imponere. » Consummato autem negotio secundum regis edictum: « Volo, ait, ut sigillo archiepiscopi signetur hoc scriptum et confirmetur. » Sanctus vero archiepiscopus tum primo dolum, quem fuerat suspicatus, advertens interposita fide quam Deo debuit: « Non hoc fiet, respondit, quando in hoc vasculo spirat hæc anima. » Nam domestici regis, dato consentiendi consilio, securum fecerant archiepiscopum, quod nunquam scriberentur leges, nunquam illarum fieret recordatio, si eum verbo tantum in audientia procerum honorasset, et quia rex ex toto cederet voluntati archiepiscopi, et omnis utrinque malevolentia conquiesceret. Nunc ficta se pactione seductum videns, ad animam usque tristabatur, et cautius providere sibi in posterum deliberabat. Rex autem et consiliarii, aliud schema excogitantes, partito instar chirographi scripto prænominato medium archiepiscopo contradunt. Quod accipiens invitus quidem, sed defensionis intuitu, suis ista locutus est: « Scio, inquires, dammandum fore quod fecimus, si non opus reprobum sana intentio excusaret; hinc maxime illorum experiemur fallaciam, patebunt doli, et laquei nudabuntur, ut amodo frustra expandant rete suum coram oculis pennatorum, hactenus quidem funes extenderunt in laqueum, ut nos præcipitarent, sed nunc omnis illorum detegitur fraus, ut facile jam caveamus. »

Solutò tandem in hunc modum concilio, abiit vir sanctus in viam suam, tristis quidem et iratus supramodum sibi, quod tam enormi malitiæ consensum dedit. Nam regi quidem et ex parte paruit, et

A regis tamen irreparabiliter animum amisit. Errorem autem nequaquam passus impune præterire, se ipsum ab officio missæ suspendit, et tenuit in sententia quousque a domino papa absolveretur. Interea Ebrensis episcopus de transmarinis ad regem venit ut regi archiepiscopum reconciliaret. Rex autem cum interminatione: « Verba, inquit, sunt: omnibus inde diebus quoad vixerimus ambo, loqui poteris, nex pax erit ulla, nisi a papa impetret archiepiscopus, ut sigillo suo leges regni mei consignet et sanciat auctoritate. » Instante episcopo, per eundem scripsit sanctus archiepiscopus domino papæ, ut dignaretur sua auctoritate et sigilli impressione regias traditiones confirmare. Papa vero perpendens illico quod hanc petitionem archiepiscopus summa B constrictus necessitate fecisset, scriptum cum indignatione quadam a se repulit et reprobavit. Quo cognito, rex ægre ferens irritum fieri consilium suum, ira vehementiori inflammatur in archiepiscopum, totum illi ascribens quod abusionibus suis dominus papa non consensisset.

Ab illo ergo die convocat consiliatores qui loquuntur quod libeat magis quam quod deceat, multiplicat ingenia et instaurat machinas, nec curæ fuit quo id fieret modo, tantum archiepiscopi curvaret constantiam et minueret auctoritatem. Hoc autem sensere domestici, ut si Eboracensi archiepiscopo posset impetrare a papa regni legationem, facile dominum Cantuariensem hoc modo quassaret. Transmissis ad papam duobus clericis, multa instantia laboratum est ut effectum consequeretur voluntas regis, sed hoc post alia legatis responsum est, quoniam Elboracensis inferioris omni tempore fuerit dignitatis et auctoritatis quam Cantuariensis Ecclesia; et « Erit, adjunxit, quoad vixero. » Referunt nuntii protestantes quia nisi regem postulata legatione placasset, archiepiscopus capitis sententia puniretur. Et papa quidem, hoc audiens, ex animo suspiravit. Considerans autem, ut vir sapientissimus, leviori nonnunquam consentiendum noxæ, ut perfecte gravior evitetur, legationem quidem transmittit regi, sed penitus potestatem interdicat gravandi quemquam sive promovendi Eboracensem contra dominum Cantuariensem. Instabant nuntii affirmantes non esse in conscientia regis hac occasione velle gravare quemquam, sed ut hac permissione contradicentem humiliet archiepiscopum, et devotiorem efficiat regie majestati. Super omnia autem ne in regis injuriam infames ordinatorum ausus actionesque insolecant, cum regi perspexerint non deesse facultatem gravandi archiepiscopum, sub cuius tuitione clerici temerare leges publicas non verentur. Sed nuntii aliam quam dictum est nulla ratione poterant extorquere legationem, quam tamen in publicis conventibus ostendens, divulgari fecit potestatem obtinuisse se a domino papa, qua posset archiepiscopi præsumptiones refrenare, cum, sicut dictum est, omnem cum permissa legatione nocendi sive promovendi aliquem auctoritas apostolica potestatem ade-

merit. Hinc sane cum nec ratione nec quasi apostolica auctoritate gravare posset archiepiscopum in propria persona, in subjectis persequitur, et vultu tristiori quod animo gerebat odium lethale prætendens minis fecit, quod opere non valebat; ordinatos et Ecclesiam Dei quacunq̃ue potuit occasione, ut archiepiscopum irritaret, opprimere non cessavit. Quantas habuerit lites, quantas pertulerit a rege et ministris regiis injurias pro defensione ecclesiasticæ libertatis, quantas ab invasoribus rerum Ecclesiæ sub occasione regie commotionis contumelias passus sit, omittimus enarrare.

Sed et ordinatorum inordinati mores inter regem et archiepiscopum auxere malitiam, qui solito abundantius per idem tempus apparebant publicis irretiti criminibus, quos regis consilium et voluntas decrevit publicis regni legibus debere subijci, sed archiepiscopus libera auctoritate reclamavit. Voluntas siquidem regis erat ut secundum leges quas avitas appellavit, ordinati in furto, homicidio, vel etiam proditiōe deprehensi, primo qui'vem ordinibus ex-poliati, postmodum privationi membrorum pro modo delicti traderentur; siebatque lethale spectaculum et lugendum omnibus sæculis. Cerneret de ordine sacerdotum, diaconorum, et inferioris gradus, trahi ad concilia, ibi contra sacros canones a laicis condemnandos morti, sive membrorum contumelia deturpandos, sive in carcere regis miserabiliter retrudendos. Sed sanctus archiepiscopus dolens conservos suos, pro quibus Christus mortuus est, tantis ascribi indignitatibus, et in hoc considerans libertatem Ecclesiæ deperire, ipsorum in se suscepit miseras, causam egit, et pro ipsis quibus potuit viribus repugnavit. Spondet regi quod in curia ecclesiæ pro clericis respondebit, et juri eos exhibebit pro quacunque calumnia. Rex autem perseverans in sententia, asserit neminem eorum qui in custodia sunt egressurum, nisi degradati et tortoribus traditi pœnas persolverint quas meruerant. Econtra vero archiepiscopus, quia non sicerit, respondit: « Nunquam, ait, degradabo, nunquam Dei ministros laicali justitiæ exponam, peccantes secundum Dei leges et Patrum decreta corripiam, nec quantum in me est, Ecclesiæ dignitates, quas per tot sæcula ad nos usque sanctorum transmisit auctoritas, deperire permit-tam. »

Cum itaque secundum quod mente tractaverat, ordinatos comprimere nequaquam liceret regi, renitente archiepiscopo, his sermonibus conquestus ad optimates causam suam contra archiepiscopum allegavit. « Juravi quod justitiam et pacem tenerem in regno commissio mihi, dispositione divina, eosque qui injuste viverent justo judicio secundum merita condemnare, et id quidem hactenus feci, sacerumque pro viribus, si non archiepiscopus nos et regnum sua pertinacia perturbaret; auctoritate namque sua protegit homicidas, tuetur fures et sacrilegos, et ad se refugientes suscipit inimicos justitiæ, pacem præstans his, qui regni pacem confundunt. Et quidem

A juste clericos insequimur, quibus in omni scelere et flagitiis nequiores vix quisquam invenietur, si diligenter attendatur, unde et ad majorem contemptum de custodia publica, de carceribus reos extrahit et absolvit, et sub interdicto Christianitatis curie mæne subducit, ne debita in eos exerceatur justitia. Denique quid nos, quid regnum universum valet, si justitiæ leges deperierint? pereunt plane si pepercero. Sed nec parcam si prævaricati fuerint. Clerici et comprehensi tradantur mox justitiæ exactoribus, et ordinibus privati secundum leges justitiæ pœnis sub-jaceant. » Addidit quoque quomodo avus suus suo in tempore secundum communes regni leges corripuit ordinatos, quando et sancti fuerant archiepiscopi pariter et episcopi: « Eapropter prædico, inquit, malo suo et confusio fore, si his archiepiscopus contradixerit, quæ tot sanctos patienter portasse cognovimus. » Quo dicto, cum ira et indignatione nimia sanctus archiepiscopus nihil subtrahens veritati consequenter ad regis objectionem respondit: « Si placuisset, domine rex, emendatus dixisses, nam ego nec homicidas nec fures tueri soleo, sed persequi. Verum nefas duxi et pro crimine reputo, mancipatos divino cultui laicis legibus ad contemptum sanctæ matris Ecclesiæ condemnari, ordinum videlicet privatione confundi et corporaliter perire. Nulla hoc docuit lex, nec ratio consentit ut simplex prævaricatio duplicem sustineat ultionem, nulla me ratio ab hac sententia revocabit. Cum prolapsi fuerint, et in lethali crimine comprehensi, tali conditione priventur ordinibus, ut deinceps a membrorum læsione immunes mancant; si post degradationem ad suum vomitum denno revertuntur, vivi si placet absorbeantur, affigantur patibulis et inaudita mul-
C tentur pœna.

« Quod asseritur avum vestrum vel alium quemlibet in clericorum necem sævisse, subita quadam præsumptione et semel id factum fuisse cognovimus; sed incongruum valde est, ab his sumi exempla justitiæ, qui quidquid propria elegerant libertate, pro legibus affirmabant. Denique cum in regem descripsisset Salomonem sanctus David, contra regis propositum coronando et consecrando Adoniam interfuit sacerdos Abiathar, pro quo schismate et temerario ausu suspensum quidem ab officio, pristina ac paterna legimus dignitate privari, sed membrorum nequaquam pertulisse jacturam. Indignum proinde videtur ut pro simplici commissio duplicem iudex homo exigit ultionem, cum iudex omnium Dominus neminem, ut scriptum est, « bis iudicet in idipsum. » Sed et quæ poterit unquam ordinato vehementior irrogari confusio, quam si fuerit degradatus? nullum ei majus infertur opprobrium. Igitur cum ad hoc divina dispensatione assumptus sim, ut meo patrocinio et tuitione Ecclesiam Dei protegam et ordinatos, ab hoc proposito non me nisi mors separabit. » Viso itaque quod immobilis staret archiepiscopus in sententia, ut nec regiis in aliquo præsumptionibus acquiesceret, nec ordinatos sineret tractari cum de-

decore, rex totus incanduit ira, et rupto tandem A silentio in hæc verba prorupit: « Humiliabo, inquit, superbiam archiepiscopi et ibi merito pertinaciæ consumam, unde ad tantum fastigium sublimavi. »

Plura sub hac lite tempora transierunt, conante quidem rege ad conculationem ecclesiasticæ libertatis archiepiscopum a sententia revocare, archiepiscopo e contra pro defensione cleri modis omnibus repugnante. Et revera jam solus id agere visus est, episcoporum destitutus consortio; qui omnes pene abeuntes retro regem secuti sunt, et qui remansisse credebantur, compressit timor regis ne libere loquerentur mala quæ sibi, et sic solum in certamine reliquerunt, et sine solatio, sed humano; nam solus esse non potuit, cum quo iustitia dimicavit. Cæteri vero gloriam hominum diligentes non Dei, dum terga verterent viso præliorum apparatu, hostibus auxere virtutem et cornu dederunt peccatori, gladium quippe verbi Dei nudare, formidantes illic trepidaverunt timore, ubi non fuit timor. Sed Deus quoque dissipabit ossa eorum qui hominibus placent, quia qui hominibus placere volunt Christi servi non sunt. Cur autem archiepiscopum destituerint, dominus papa causam aperit, scribens ad episcopos quia scilicet maiorem homini quam Deo reverentiam exhibebant. Viderint ipsi quid dicturi, quid acturi sint in iudicio Dei, qui regi loquentes placentia, faventes errori ipsum faciunt deviare, quem præsertim corripere conveniret, ne ejus exemplo audacius cæteri deliquissent, quando autem vel errare se crederet, cum uno tantum reclamante, universitas aliorum consensisset errori, et factus est secundum prophetam, « sicut populus sic sacerdos? » Quinimo ad sui ordinis contumeliam solus episcoporum consensus sufficeret, si non insuper adversus virum Dei consiliis nequam regis animum armavissent.

DE CONSPIRATIONE EPISCOPORUM CONTRA ARCHIEPISCOPUM.

Sanctus igitur archiepiscopus considerans episcopos unanimi pene omnes contra se conspirasse consensu, nec regis indignationem ulla posse ratione leniri, nec in his omnibus aliquod pacis apparere vestigium, suam ad tempus præsentiam subtrahere deliberavit, videlicet ut eo subtracto qui materiam commotionis ministrasse creditur, dum regis usurpationibus non faveret, rex saltem desolata Ecclesiæ compateretur. Simul et alia causa egrediendum patria decrevit, ut auctoritate et auxilio domini papæ, quem adire disposuit, oppresso regi in aliquo subveniret. Assumptis itaque paucis secum navem conscendit, et primo quidem prospere spirantibus auris, cum jam ducerentur in altum, nautæ mutuo loquebantur dicentes: « Quid agimus, transportantes de regno inimicum regis? insipienter operamur; nos et tota nostra progenies perpetua proscriptioe exheredabimur. » Ad archiepiscopum quoque locuti affirmant quia in tali vento nemo posset applicare quo jusserat, tum

ille placide satis respondit: « Si etiam venti proposito nostro contrarii sunt, Domini volu-:as fiat, et vos portum tenete quem dominus assignabit, » et statim in Angliam reducere. Sanctus vero recognovit postea et suis confessus est, nec dum fuisse voluntatis Dei ut tunc transfretasset, adhuc illi certamen grave reservatum et tentationes per quas transiret ut probatior appareret; quod factum est. Rex autem, audito quod navem conscendisset archiepiscopum, tristis mansit et anxius, donec reversum cognovit, timuit namque vehementer ne eunte illo ad dominum papam, regnum sub interdicto maneret.

DE CONCILIO NORTHANTONIÆ.

Castro igitur Northamptonia solemne statuens B celebrare concilium, omnes qui de rege tenerent in capite, mandari fecit; citatus est et archiepiscopus. Ante illud sane concilium quidam de domesticis regis et potens apud regem, clamabat in curia archiepiscopi possessionem, quæ de jure Ecclesiæ fuerat ab antiquo; cum autem, reclamante iustitia, calumniam suam miles prosequi non valebat, regi negotium intimavit conquestus quod jus suum archiepiscopus injusto tulisset iudicio, et falsam fuisse curiam archiepiscopi, et in regis injuriam redundasse iuratione interposita derogavit. Rex vero, qui occasiones quærebat adversus archiepiscopum, mandavit ut occurreret militi responsurus de violentia; qui cum adesse non posset gravi retentus infirmitate, missis qui regi responderent, excusavit diem. Rex vero penitus nullam excusationem suscipiens, ipsum publicam audientiam subterfugisse suspicatus est, hac igitur causa quantum ad negotii superficiem spectat, sanctus præsul Northamptoniam, quasi super his iudicandus, ante tribunal Cæsaris citatus est. Re autem vera et intentione, ut ex fine colligitur actionis, quatenus publice lacessitus et a sententia deductus, vel regi consentiat super legum regni susceptione et custodia, vel si pertinacius resistat, sententiam accipiat damnationis. Adfuit igitur, ut dictum est, et incontinenti regem adiit submissius, orans ut pro communi utrorumque commodo et salute, dominum papam adeundi licentiam dignaretur concedere, qua postulatione rex in iram versus respondit, quod nequam sicut speravit aliret: « Prius, inquit, responsurus es quod ad meam citationem supersedisti venire. » Ad quem archiepiscopus: « Non sic, ait, loquatur dominus meus, morbus detinuit et excusavit. » Sed nec humili rex excusatione delinitus nec morbo, jubet ocus iudicium fieri et decerni quæ sententia feriat pro contemptu. Iudicatur quingentas libras dandas esse regi in satisfactionem supersessionis. Recitato iudicio sanctus ingemuit, videns in loco iudicii iniquitatem. Conanti autem contradicere iudicio, reclamatur ab omnibus, suggeriturque ut ira postposita in hoc saltem studeat placere sibi regis animum. Annuit tandem, hac sperans via finire posse motam controversiam. Exit-

gitor dare obsides qui respondeant pro pacta pecunia. Quibus inventis, revocatur in medium causa militis unde contentio orta est. Videns sanctus quia occasionem quærent, unde illum in aliquo accusarent, asserit cum summa libertate, quod nemini inde respondere habeat extra curiam Ecclesie, cum nequaquam miles probare potuerit quod in curia archiepiscopi quidquam sibi contra iustitiam iudicatum sit, juratio siquidem qua falsare nisus est iudicium Ecclesie, nec usitata fuit, nec legitima; unde intulit quod nulla cogeretur ratione extra curiam suam super hoc negotio respondere. Et miles quidem, qui sanctum archiepiscopum gravare non timuit, et manum mittere in christum Domini, eodem anno amissis duobus filiis quos disposuit de Ecclesie patrimonio hæredare; ipse quoque vitam perdidit et possessionem.

Rex autem, ut vidit hæc ad archiepiscopum accusationem non proficere, alia excogitavit. Jubet ut rationem reddat archiepiscopus eorum quæ tempore cancellarie custodienda suscepit, et qualiter et in quibus ea dispensaverit non cunctetur edicere. Turbatus primo archiepiscopus inopinatæ questionis novitate, respondet tandem non decere talia revocari in causam, quæ pridem absolutione solemniter fuerant terminata. Jurat ille oculos Videntis omnia, audire se velle pro omnibus his rationem in crastino. Causante archiepiscopo induciarum angustias, ac dicente nec legitimum esse nec rationi consentaneum, ut sub tanta celeritate pro tali negotio respondeatur, jurat iterum rex, sicut ante, quod nulla fiet excusatio, nec longiores dabuntur induciæ, sed in crastino respondebit. Sanctus igitur, expensa in litibus die et jam advesperascente, receptus hospitio, et gravi mox tactus dolore splenis, lecto decubuit, noctemque sine cibo et insomnem ducens, miserabili decoctus dolore, vix diem præstolatus est. Solebat hoc modo vexari, sed nunc anxius solito, turbato nimirum sanguine post iras diurnas et litigia.

Adsumt ministri regis, qui sanctum urgerent ad concilium; excusat ille, prætextat morbum, et indicem anxietatis sudorem ostendit; ad curiam se iturum, cum transierit vehementia ægritudinis, pollicetur. Jurat rex terribiliter: Venire illum oportet, nulla erit excusatio; quantoque anxius querebatur archiepiscopus, eo plures rex nuntios misit qui ipsum curiæ præsentarent. Suspensus denique ne forte affectata esset infirmitas ut audientiam declinaret, duos mittit de nobilioribus et primis regni, consulem Leycestrie et Cornubiæ, qui renuntiarent regi, ne simulationis suæ archiepiscopus tempus conetur redimere. Astant comites viro sancto, dicunt oportere eum absque mora et excusatione curiæ præsentari. Sanctus vero quantis premeretur angustiis indicavit. Urgent comites, ille supplicat, illos adjurans per nomen Salvatoris, ut vel illius diei concedantur induciæ: « Cras, inquit, vita comite, auditorus quid domino regi placeat, vel in sella portatus assistam. » Datis induciis, ea tamen

A conditione quam sanctus interposuit, comites reversi sunt. Die eodem dictum est ei pro certo quosdam ex regalibus in ejus necem conspirasse, et a rege prælocutum fuisse, quod si ad curiam iret, vel capite plecteretur vel redigeretur in carcerem. Expavit pro tristi nuntio, et toto contremuit corpore, ut postea confessus est, minus quidem mortem quam vincula metuens, ne videlicet libertas loquendi pro causa Ecclesie adimeretur, et hoc non solum tunc sed et semper timuisse eum certum est. Confessus vero timorem suum religioso ac timenti Deum, admonitus est, ut mane processurus ad curiam in honorem beati martyris Stephani hostiam salutarem offerat Salvatori, ne die illo noceret illi inimici malitia. Paruit ille, et expletis cum multa devotione et lacrymis salutaribus sacramentis, solam sanctam circumdans humeris, sub habitu tamen exteriori, dextram sancta: crucis vexillo munivit, crucem propriis manibus bajulans, ne a se passionis suæ elongaretur exemplum.

DE INGRESSIONE ARCHIEPISCOPI.

Martyr ergo nobilis solo Deo comitatus ingreditur ubi consedere pontifices et ex principibus nonnulli, rege residente cum domesticis in interiori conclavi, nam ea die sese mutuo non viderunt rex et archiepiscopus. Ingressus itaque sella remotiore consedit crucem tenens. Ad quem Londoniensis episcopus accedens, hortatur ut crucem deponat; ne quasi nudato ense videatur super dominum regem intrasse: « Hoc, inquit, modo accenditur ira, discordia cumulat, et exasperatur regis animus: » cui cum persuadere non posset verbis, vi crucem extorsisset ei de manu, si non utrisque manibus vtiliter eam vir Domini delineret. Eboracensis quoque, eadem repetens quæ a superiore objecta sunt, hortatur et ipse ut crucem deponat: « Tu, inquit, ingrederis armatus super dominum regem, sed certus esto quod dure incidit ensis regius, et iam contra te exsertus est, si non consilium egeris. » Tunc sanctus archiepiscopus humili usus affatu, ne daretur occasio insidiantibus: « Scio, ait, quod regis incidit gladius, sed carnem; nam crux ipsam pertransit animam, et spirituales transverberat potestates; absit a me quod obijciis! ne quando gladium portem contra dominum regem: crux enim pacem portat, non gladium, quæ in cælis sunt, et quæ in terra pacificans, et ego pacem volo, nec crucem dimitto: »

Decrevit autem rex revocare in medium criminationes quæ superius motæ sunt contra clericos, ut inde archiepiscopum accusaret; sed proceres dehortati sunt, ne forte si adversus ordinatos calumnia moveretur, episcopi cum archiepiscopo suos singuli tuerentur: « Alia, inquit, questio proponenda quæ specialiter ad archiepiscopum respicere videatur. » Interim nuntiant viro sancto ab his qui consilio regis interfuerant, quod nisi consulat sibi, eadem die vel plecteretur capite vel in carcerem et vincula retruderetur, sicut hesterno audierat. At venerabi-

lis archiepiscopus pro se quidem intrepidus, sollicitus autem et anxius pro causa desolata Ecclesiae et pauperum Christi, quibus qualemcumque videbatur protectionis umbram obtendere, si quod illi pateret evadendi refugium attentius consideravit, et paululum deliberans, cum neminem prorsus videret, qui verbum loqueretur, quo regis erga ipsum deferresceret furor, stantibus circa se episcopis et proceribus, sedem apostolicam appellavit, quod solum videbatur reis esse remedium: « Nam hæc curia, adjuvxit, qualiter Ecclesia gravetur inquit. » Stupentibus illis ad subitam appellationem et frementibus in eum, Londoniensis, stimulante, ut creditur, conscientia, ut sibi remittatur appellatio, deprecatur. Ad quem sanctus archiepiscopus: « Nec te, inquit, absolvo nec quempiam cæterorum, sed in vi obedientie ex auctoritate Dei et domini papæ injungo omnibus in commune, ut plenariam justitiam exigatis de homine qui in me manum miserit, quicumque fuerit ille. » Et adiungens imperavit sub anathemate et in periculo ordinis et animæ ipsorum ne parcerent. Wintoniensis vero, commotis omnibus pro illata appellationis sententia, volens paci consulere, timensque lethale quiddam oriri circa archiepiscopum, his eum verbis adhortatus est: « Redde igitur archiepiscopatum, ait, in manum et misericordiam regis, si forte hoc modo adversum vos et nos pariter vestri causa regis indignatio detumescat, aliter vero mortiferum video tumultum, nec ullum paci locum vel concordie reservari. » Ille contra cum interminabili juratione protestatur quia nunquam archiepiscopatum redderet, donec ipse tenere potuerit: « Non ea, inquit, conditione suscepi ut reddam, sed ut pro eo meipsum impendam. » Exhinc nonnulli pontificum perpendentes quod necem archiepiscopi moliretur et maturaret consilium regis, tristes turbatique et præsertim pro facta appellatione, qualiter ipsum eriperent de manu regis et præsentis periculo collocauti sunt, et ideoque quos malitiæ ministros noverant existisse a principio et incentores discordiæ, Eboracensem videlicet, Londoniensem, Cicesterensem (necdum enim Salesbiriensem prænominati duo sociaverant sibi), his sermonibus allocuti sunt: « Novit universitas vestra quod ab initio ordinationis archiepiscopum fueritis insecuti, neque enim inter vos integer unquam fuerit amor vel societas; nunc ergo si, tacentibus vobis, occidatur, ad vestram specialiter infamiam respicit et opprobrium, rex quoque perennem portabit maculam, universi nos ordinis et officii suspendium irreparabile sustinebimus. » Denique communicato invicem consilio idem omnes sensere, ut si permittente rege, contra archiepiscopum appellarent præsentiam domini papæ, hac ipsum arte a præsentis liberarent periculo et a sede depositum perpetuo silentio condemnarent. Adeunt regem ut sui ipsius et ipsorum neenon et totius regni misereatur, ne tanto ac tali facto, ipse et tota ipsius posteritas violeatur opprobrio sempiterno. « Nostræ, inquit, committatur curæ ac sol-

licitudini hæc causa archiepiscopi, ipsum vestræ humiliabimus voluntati, sempiternum illi de cætero silentium imponentes. » Annuit rex media conditione tali; pontifices nil cunctati, astantes archiepiscopo, præsentiam domini papæ appellabant et ipsi, quod jubente eo regis traditiones pro lege tenendas susceperint et confirmaverint, quas ipse post factam sponsonem contrarias ecclesiasticis institutis combatatur astruere. Sanctus vero archiepiscopus lætus quidem appellationem amplectitur, nihil æque desiderans quam ut audientia concederetur. Sed adhuc instabat commotio regis, et intantum exacerunt illum membra Zabuli, consilarii nequam, ut missis militibus mandaret, ut rationem redderet incontinenti triginta millium librarum quas tempore cellarie suæ, absque conscientia regis et eorum qui super negotia regni fuerant, profligavit. Vir autem Domini libere quidem respondit ad hæc, nequaquam decere super his facere quæstionem, quæ, teste populo, legitime terminata sunt: « Electus, inquit, ad hunc honorem ex ore domini mei regis, liberum me ab omni exactione in posterum clamavit potestas publica, quod nec vobis excidisse debet, sed nec latet dominum meum quod in regni negotiis et obsequiis illius universa expenderim, si dignatur advertere, unde et hinc in causam ingredi nulla me constringit ratio. »

Audita responsione hac, rex in iram versus et more suo Dei oculos protestatus: « Homo, inquit, meus est et subjectionem debet, et mihi rationem non reddet? amplas de meo hereditates habet et respondere continuit; decernatur ocius cui subiaceat sententiæ pro contemptu. — Non hinc, aiunt, tantum judicandus est; nam gravior ejus presumptio contemptusque intolerabilior est, quod curiam Domini sui falsitatis arguere contendit dum aliter interpellat iudicium. » Et quidam de ordine episcoporum, qui hic nominandi non sunt, huic feruntur interfuisse consilio. Itur ad iudicium, ubi iustitia locum non habuit, ubi justus opprimitur, condemnatur innocens, addicitur æquitatis amator nemine resistente seu contradicente. Quid familia Pilati, quid milites Herodis, quid Neronis malitia nequius excogitavit? Nihil hic legi, nihil relinquitur æquitati. Denique ut libera daretur delinquendi licentia, nemine reclamante decretum est, ut redactus in vincula, in carcerem retrudatur velut perturbator et proditor communis pacis.

DE DUOBUS CONSULIBUS.

Mittuntur mox consules duo, qui in superioribus jam tertio nominati sunt ad virem Dei venisse, qui ex ore regis et principum datam sententiam archiepiscopo recitarent. Sanctus vero archiepiscopus cum a multis et super multis causis impeteretur, ne stans sacerdotis personam inhonoraret, residendo, quod ei divinitus inspiratum est, mirifice respondit, majorem scilicet a minoribus non debere ad iudicium vocari, neque eorum sententia ligari. « Ordo, inquit, confunditur, si pastorem ovis feriat, si dis-

cupulus magistrum, si filius parentem verberet; A num expectasset, absque retractione in carcerem neque enim ita pretiosius est aurum plumbo, sicut sacerdotalis dignitas regia potestate. » Ad legatos quoque dixit, quia nequaquam iudicium audiret, post factam appellationem. Ad quem nuntii : « Quo, inquit, modo decretum publicum subterfugies, declinabis sententiam? hereditates amplas de rege tenes, et in regis curia non respondebis, non auscultabis iudicium? » Hæc autem omnia objicientes cum indignatione quadam respiciens sanctus : « Non est, ait, hereditas, quod teneo, nec de rege, sed de Deo, cui in elemosynam data sunt quæ possideo. Et vobis præcipio per reverentiam divini nominis et sacramentorum Christianæ fidei, ne in me hodie feratis sententiam, nec iudicium faciatis. » Laici vero qui de concilio regis erant et circumsteterant, et suffraganei episcopi, imo refraganei, cum hæc dicentem et sedem apostolicam appellantem nihilominus condemnaverunt. Itaque athletam Domini a concilio malignantium recedentem aggrediuntur undique maledictis et conviciis clamantes : « Ecce proditor abit. » Denique cum in aulam venisset, ubi vulgus circumsedet et nonnulli ex regalibus ministris, adeo graviter offendit pedem, ut vix seipsum retineret a lapsu. Quid hunc animi habuerit, quando omnem evadendi perdidit confidentiam, nec ipse postmodum referre potuit qui hæc passus est, timens ne discerneretur. Continuo namque, secundum quod scriptum est : « Quia in adversis non se abscondit inimicus, » exclamavit Robertus de Broc : « Proditor regis abit, proditor regis abit, » cæteris conclamantibus et, impetu facto, contorta stramina et levia quæque, quæ occurrerant, jacentibus ex omni parte. Clamor deinde probrosus insurgit et non minus tumultuosus, quam si quatuor civitatis partes ignis vel hostium insultatio invasisset. Ut autem suggestum est regi ad perpetuum illi futurum opprobrium, si infra curiam suam sineret conculcari archiepiscopum ac discerpi, clamatum est ex ore regis, ut liberum paterentur abire. Vir autem Domini nemini quidquam respondens, stupens vero ac tremens ne forte retineretur, declinata jam die ad vesperam hospitio se recepit, ubi cum de tam numerosa familia sua non amplius quam sex servientes invenisset, cæteris ob metum et minas regaliū dispersis quo sibi quisque tutum putabat, introductis pauperum turbis cum ipsis refecit. Deinde servientibus qui aderant lectum suum in oratorium beati Andree (apud monachos enim hospitatus est) deportare jussit, et de retro majus altare componere ac si illic propter refugium quiescere disposuisset.

Profunda autem incumbente jam vespera sumptis secum duobus fratribus, quibus ante propositi sui secretum aperuerat, et famulo fideli, cum vehemens imbrium inundatio et tempestas hiemalis de illorum protectione neminem prorsus sineret esse sollicitum, per portam æquilonalem, cæteris omnibus diligentius obseratis, soli quatuor elapsi sunt. Nam pro certo accepit vir Domini a dicentibus, quod si diem crasti-

num expectasset, absque retractione in carcerem truderetur. Tota autem nocte iter agentes, erumpente tandem aurora, Lincolniam ingressi apud civem, Jacobum nomine, notum fratribus, latitabant. Sed et sanctus sumpto habitu conversi et nomine mutato frater Dermannus appellatus est. Inde cymba brevi transvecti Semplingeham diebus aliquot pausaverunt. Inde quoque resumptis jam viribus grangiis Chikestrande recepti, opiatas ibi latebras reperunt. Et ut clarescat quam sancta, quam pia vir sanctus intentione illam inierit fugam, idem hospitium fidelis sui Salvator multis miraculis processu temporis illustravit. Inde etiam assumpto canonico sacerdote, noctibus ambulantes, diebus vero latitantes locis opportunioribus, donec demum ad portum B Sanwicum perventum est, unde latenter in navicella transmissi, applicant in arena retracto mari, portum publicum devitantes. Incedentibus autem illis per arenam aliquandiu ac festinantibus corruit in terram sanctus archiepiscopus insolita vestium calceamentorumque grossitudine præpeditus, erectus vero manus elevans et inspiciens ingemuit graviter, magistra præmonitis experientia, quam non sit sperandum in incerto divitiarum, quam fallax, quam fugitiva sit omnis vite præsentis gloria. Pro copia namque, quæ illi pro voto aderat paulo ante, eorum fortium ac pretiosorum vix inventum villisimum, jumentum conductum feno capistratum et sine sella, ut in Christi paupertate, et ipse jam pauper factus, pro Christo incipiat gloriari. Quanta autem trepidatio! quantave sollicitudo fugientes occupaverit! ne subito comprehensi redeerentur, quis referet? Denique ad augmentum formidinis apud sanctum Audomarum cum jam ulterius occultari non possent, Ricardum de Luci reperiunt, qui pro responso quodam ad comitem missus est.

Miles igitur, ut cognovit, aggreditur archiepiscopum, hortatur ut secum redeat, reconciliabit eum regi. Excusat ille, negat reditum, nec se committere audet militi, sciens regis animum implacabilem cum semel amittitur; papam potius adibit, filius deinceps ope et consilio reversurus. Tumet miles et minatur, et ne in illum confidat interdicit ulterius, sed magis ut inimicum devitet. Ad hæc archiepiscopus : « Non minas, inquit, non impropria merui, sed fidem mihi et subjectionem debes. » Ad comitem mittit vir Dei ducatum postulans et liberum per Flandriam transitum. Minatur comes, et archiepiscopus ad dominum suum conversus, qui non deseruit sperantes in se, nec misericordiam amovit a genere justorum, ipso duce et episcopo Tavernensi auxiliante, nocte eadem liberatus est de ore leonis et de manu bestie, et regem declinavit et comitem et Flandriam pertransivit immunis. In crastino autem remandavit sociis ut properantes post ipsum, Suessionem venirent.

Cognita autem ac publicata fuga archiepiscopi, transmisit rex legatos suos ad regem Gallie ne pateretur archiepiscopum in regno suo recipi nec habere

refugium. Astrunt sic convenisse ambobus in reconciliatione mutua, ut si ejus eorum fugitivus in regno alterius comprehenderetur, tentus mox redderetur domino suo, et nunc, inquit, potentissimus post regem nocturnus exiit et fugitivus. Rege autem dissimulante primo, et quasi quid vel unde loquerentur ignaro, dixerunt nuntii quoniam archiepiscopus Thomas, cum rationem super interrogatis reddere non valeret, ad indicium damnatæ conscientie, judicium domini sui subterfugiens, furtim de regno egressus est. Quibus rex ait: « Vidi Thomam archipræsulem, novi optime cancellarium, nec latet quanta cum devotione, nec ad oculum nec in facie sed in fide servierit regi, cui digna famulatus recompensatio redditur, ut nec cum ipso pacem, nec hic patiar rex invenire refugium. Digne, inquam, reddidit famulatum, quod de regno suo fugatum etiam in alieno persequitur. » Ad quem legati: « Hostis, inquit, et adversarius exstitit regno vestro archiepiscopus, quem tu eris, et tuam ipsius non semel molitus est mortem, et de regno Francie non modicum domini sui subiecit imperio. » Rex autem interposita juratione: « Si mihi, inquit, ita ad votum deservisset, nequaquam ingratus existerem, et nunc si scirem ubi esset, festinus occurrerem venienti. » Drant nuntii ut hoc saltem faciat pro rege Angliæ vice dilectionis alternæ, scribat contra archiepiscopum papæ, ne et ipsum ad gravamen regis et regni otios circumveniat. Abeunt nuntii et rex illico per fidelem scribit domino papæ, quatenus paternam quam ipsi semper impenderat dilectionem, Thomæ quoque Cantuariensi archiepiscopo dignetur impendere, ipsumque tueatur, ne quavis occasione quemquam audiat adversus justitiæ sectatorem. Parat interim sanctus archiepiscopus ad papam proficisci appellationem suam prosecuturus, sed nuntii regis prævenerunt. Mox etenim rex audito responso regis Galliarum, direxit ad papam Eboracensem archiepiscopum, Wigornensem, Exoniensem, Cicestrensem episcopos, aliasque personas nobiles et nominatas; porro astantes domino papæ causam regis argute satis et eloquenter allegant, existimantes posse se pectus illud sapientiæ plenum circumvenire sermone composito. At papa sanctissimus veritatis utrobique vestigia servans, inordinate et durius justo calumniantem sanctum archiepiscopum, unum de prælatis his arguit et confudit: « Frater, inquit, tempera te, ne maledicas proximo tuo, neque enim maledicentem archiepiscopo patienter ausculto. » Prosequuntur legati, dicentes ex nomine regis, ut ad pacis et concordie reformationem inter ipsum et archiepiscopum, et divinarum legum redintegrationem cardinales duo a sede apostolica mittantur in Angliam, quibus perfecta ligandi ac solvendi potestate concessa, nemo audeat refragari, nulla contra ipsos appellatio fiat, sed ratum sit quicquid fecerint, et per ipsos transgressio omnis emendetur. Papa autem sanctissimus considerans statim fraudem latere in verbis, respondet, hanc potestatem nulli conce-

Adendam cardinalium, ut locum papæ obtineat, nec per ipsum, intulit, quidquam contra rationem cardinalibus concedetur. Tale reportantes responsum legati regis in Angliam reversi sunt, non expectato archiepiscopo qui quarto abhinc die Senonas venit.

Advolutus autem ad pedes domini papæ causam adventus sui non ignoranti quidem exposuit, et oblationis vice chirographum regis utraque tenens manu extensum obtulit, et super genua erectus ait: « Domine Pater, hæc causa, hæc tota mea culpa est, pro qua ab Ecclesia mea pulsus exsilium patior. Istæ leges, quarum gratia implacabilem sentio iram regis, istæ traditiones quas in regno suo tenendas proposuit rex, et juramento confirmandas, ut ad posteros transmittantur; his ergo statutis contra divinas et apostolicas leges assensum præbere detestans, solum ac solum præsentis vestræ refugium inventurus adventi. » Et ut mihi pro certo dictum est, jus archipræsulatus sui in manu domini papæ resignans exposulavit ut aliquem doctiorem et fortiozem de Anglorum Ecclesia in eorum metropoli episcopum constitueret cardinalem. Sanctus autem papa elevans filium, amplexatur, osculatur, lacrymas lacrymis immiscens, et Deo gratias referens, quod virum tam humilem spiritum, pastorem tam sollicitum in salute ovium, advocatum tam constantem in causa, imo in multis causis, Dei invenisset. Dignitatem ergo, quam refutaverat, quia neminem ad hoc onus fortiozem esse cognoscebat, dominus papa reddendam esse decrevit, renitenti etiam et invito.

LECTA autem in audientia scriptura, quam archiepiscopus obtulerat, quo tenderet, quem esset habitura finem, quam contraria foret divinis legibus et ecclesiasticis institutis si teneretur, evidenti ratione et eleganti eloquio per singula verba vir sanctus probavit. Sed causam regis tueri conatus est contrariis objectionibus Willelmus de Papia cardinalis, alii quoque de cardinalibus multa pro rege locuti sunt, cumque medium plene diei occupasset alterna contentio, nec haberet quid ulterius objiceret pars adversa, juxta dominum papam sanctus, ipso præcipiente, resedit, mirantibus universis qui adfuert super prudentia illius et constantia responsonum ejus. Imperat apostolicis animæquiores esse, debitum tanto labori solatium repromittens. Scriptum quoque quod lectum est et auctoritatem illius, et quicumque illi assensum præberent, perpetuo condemnavit anathemate. Sanctus autem archiepiscopus post moram mensis unius circa apostolicum ab eo missus Pontiniacum abbati commendatur et fratribus, qui curam illius habeant in omnibus quæ necessitas deposcit humana, quod prona quidem mente compleverunt.

Rex autem postquam in tuto stationis portu locutum agnovit archiepiscopum, ubi nec illius feritate moveretur nec minis, in parentes fugitivi furor regis debacchatus est. Illi, quorum se Deus dicit

patrem et iudicem, orphani, viduæ, pupilli, innocentes et ignari penitus discordiæ cuiusquam viri inveterati, mulieres cum pendentibus ad ubera parvulis, clerici, laici, cuiuscunque essent ætatis et sexus, de cognitione archiepiscopi, et quidam familiares ejus, ut ex hoc amplius contristaretur, miserabili proscriptione nudati facultatibus universis de toto regno jussi sunt exulare, et servientes illius in vincula conjici ac teneri. Archiepiscopatus revocatur in manus regis, et Ranulfo de Broc ministro regis, ob veteres inimicitias quas exercuisse cognoscitur adversus virum Dei, traditur observandus. Qui totius inventor malitiæ et discordiæ fomes inter regem et archiepiscopum, omni hoste ferocior, clericos archiepiscopi cum parentibus absque ulla miseratione, ubicunque inventi fuissent, insecutus exterminavit. Igitur quid facerent miseri? quo se verterent tantæ calamitatis inventuri remedium? num archiepiscopum peterent, qui peregrinis mendicabat ovis desolatus et exsul? ipsum adiere tamen, qui materia exstitit miseriorum ut putabant. Sed martyr fortissimus quid animi habuisse creditur, cum suos cerneret advenire prius quidem opulentos et divites, nunc vero sui causa nudos et inopes? Quos putamus fudit lacrymarum imbres? quæ suspiria traxit quum videret pendentes ad ubera matrum parvulos tam dira propter se et inaudita deportatione damnari? Grave quidem in mœnore suorum creditur pertulisse martyrium, qui in barbarorum quoque afflictione et miseria compassionis et misericordiæ visceribus affluebat, auxilium dolorem quod unde suorum relevaret inopiam, minime suppetebat. Nec quisquam nostram hanc dicat esse sententiam, multas potius elegisset mortes, quam tantam suorum cernere desolationem, cujus causa a principio ipse creditur exstitisse. Sed humilium consolator Deus, humilium sui propter se et propter justitiam nequaquam deseruit, in hac desolatione, nam rex Francorum, inspirante Deo, et principes regni larga manu contulere viro sancto unde et sibi et suis omnibus abundabat. Sed nec ipse surdus auditor Domini acies suas cohortantis et dicentis: « Beati qui persecutionem patiuntur propter justitiam, » ad tolerantiam accendit animum. Totus denique ad divinum conversus et cœleste solatium, potuit e facili persuadere sibi, quod per multas tribulationes oportet introire promissam beatitudinem. Et consideratis sanctorum vestigiis, damna rerum temporalium, æternorum amore, patienter amplectitur, reminiscens quoniam Abraham dictum est: « Egredere de terra tua et de cognitione tua, » sicut terram, ita et cognitionem suam postponendam Ecclesiæ honori penitus destinavit. Audiens interea rex quod episcopos Angliæ dominus papa mandasset, Clarenduniam coegit concilium, ubi juramentum exegit a pontificibus ne quis eorum pro quavis appellatione patria egrederetur, nemo mandatum domini papæ susciperet. Et quidem in hunc modum episcopi promiserunt, a laicis vero juratum est. Clamatum est

PATROL. CXC.

A ex ore regis quod si quis pro quocunque negotio sedem apostolicam appellasset, omnia quæ illius essent scriberentur ad opus regis et ipse traderetur in carcerem. Proh pudor! ubi tunc timor Dei? ubi reverentia legum? ubi pontificalis honor? omnes judicium regis et præsentiam appellabant. Causas Ecclesiæ tractabat populus qui ignorabat legem Dei. Nusquam decreta Patrum, nusquam audi um est Evangelium, silentium ibi sumpsit divina lex, conticuit ratio, præsumptio sola obtinuit principatum, pauperes spoliuntur ecclesiis, vestiuntur nummosi. Oblatio illa fidelium, quæ *nummus Petri* dicitur, quia Petri specialiter debebatur hæredibus, detinebatur cum censu publico reponendus. Portus et littora maris arctius servabantur, ut si quis mandatum aliquod detulisset, suspendio statim vel aliqua dira morte periret. Plures tamen eo tempore dominus papa direxit epistolas quibus prælatorum arguebat errata, et suspensionem minabatur officii si non resipiscerent.

Per idem quoque tempus Eboracensi archiepiscopo scripsit hæc: « ALEXANDER, servus servorum Dei, Eboracensi archiepiscopo et universis Angliæ episcopis salutem et apostolicam benedictionem. Illius dignitatis et, » etc. (*Vide indicem epistolarum alphabeticum.*)

Episcopi autem, si dicere licet, quod ipsi facere non formidabant, prævaricationi junxere contemptum. Nam cum filium suum coronari rex vellet, coronationis officium Eboracensis implevit, junctis sibi Gilberto Londoniensi, et Salesbiriensi Jocelino, contempta auctoritate et postposita reverentia domini Cantuariensis ad quem de antiquo jure regum inunctionem certum est pertinere. Ubi nulla ex more de conservanda Ecclesiæ libertate mentio facta est, nulla cautio data est, sed juramentum potius interponitur, ut regni consuetudines quas avitas dicunt, sub quibus dignitas periclitatur Ecclesiæ, illibatas debeat conservare. Hæc in epistola domini papæ scripta sunt, in qua a pastoralis officio suspendit episcopos, qui coronationi huic irregulariter interfuere. Et quidem plures interfuerant, sed in prænominatis tribus pendebat negotium et per ipsos operatum est. Illi præsumptionis hujus ministri, auctores erroris, ut regis satisfacerent voluntati, parent prævaricationibus, non ordini suo honorem, non mandatis apostolicis obedientiam exhibentes, patienter ferebant divinæ legis proscriptionem. Imo ut quod verius est fateamur, ipsi libertatem Ecclesiæ subvertere nisi sunt, consiliis suis commoventes regis animum adversus virum sanctum; concordiam persuadentes inutilem esse regno, inhonestam regi, nihil magis formidantes quam pacem, sicut sanctus ipse ad papam scribens testatus est.

Suspensi igitur ab officio et contemptus sui merito, quidem vinculo anathematis processu temporis innodandi, nec sic cessarunt sanctum in exilio verborum spiculis, quem aperto quominus opere non poterant; irritare. Pari siquidem tres ipsi conspiratione

federati quæcunque de scripturis, quæcunque de A exemplis præcedentium poterant perscrutari, coacerabant sibi, quibus suam ipsorum et regis causam corroborare contra sanctum archiepiscopum conati sunt, dicentes : Quæ vestro pater in longinquo, etc. (*Vide indicem epistolarum alphabeticum*).

Hæc inserere huic opusculo libuit, ut pauca de multis colligens lector intelligat illos in exilio et desolatione sua sanctum archiepiscopum sensisse adversarios, a quibus debuit sperare solatium. Vir autem Domini in persona Londoniensis episcopi rescripsit hæc.

Mirandum et vehementer stupendum, etc. (*Vide indicem epistolarum alphabeticum*.)

Plura sanctus prænominatis tribus scripsit in hunc modum : multis quoque et frequentibus illum pulsare mandatis ut hinc inde perpendatur, illi quidem quantæ devotionis ad justificandum opera regis, sanctus vero quantæ constantiæ in assertione veritatis exstiterit. Tunc etiam ipsi pariter sicut cæteri omnes qui coronationi filii regis interfuerant, missis a domino papa epistolis suspensi sunt.

DE COMMORATIONE SANCTI APUD PONTINIACUM.

Sanctus vero Thomas commoratus Pontiniaco, quo illum dominus papa commendavit, ut prælibatum est, corpori suo multas et graves ac soli Deo cognitæ tribulationes indixit, memor quippe Dominicæ commotionis : « Nesciat sinistra tua quid faciat dextra tua, » quidquid sanctæ religionis, quidquid devotionis in se sensit, quantum in ipso fuit, teste conscientia occultavit. Ex eo igitur tempore olerum esu et grossioribus contentus epulis, et quæ levioris essent sumptus, delicatiora quæque furim sibi subtrahere, nescientibus qui considebant, et indigentibus infirmis ministrare fecit. In annem quoque, qui per officinas monasterii decurrit, latenter descendens, et supra virtutem fragilitatis humanæ moratus quantas cruce corpori ex illa frigoris injuria intulerit, ut concupiscentiarum stimulos, qui adhuc vivere videbantur, in eo contereret, sequens infirmitas declaravit. Nam non multo post una faciem in tumorem versa usque ad interiores fauces computruit, et in morbum quem fistulam dicunt tumor excrevit. Diutius autem hac passione laborans non sine multa molestia et dolore extractis inde duobus ossibus demum sanatus est. Nocte vero quadam orationis et genuum curvationis fatigatus instantia, ubi sopori traditur, videt in somnis quasi, orta inter ipsum et regem contentione gravi, solus ipse in præsentia domini papæ et cardinalium causam suam expositurus astaret, cardinales autem qui causam regis tuebantur non mediocriter moti, quod contra regem tam constanter ageret archiepiscopus, facto impetu in illum oculos illi effodere digitis ac discerpere moliti sunt; clamavit papa, sed cardinalium clamor et tumultus invaluit, et clamantem apostolicum obmutescere fecit; deinde egressis illis, alios ad se videt ingredi quasi carnifices destinatos ad ipsum cum solus esset, qui quidem terribiles

aspectu et furore pleni archiepiscopum aggressi capitis ejus summitatem quantum occupavit latitudo coronæ gladiis extractis abraserunt, ita ut pars abrasa in frontem cecideret. Turbatus vir Domini novitate visionis horrendæ, alta cordis consideratione non sine causa hæc ostensa fuisse perpendens, magis magisque se ipsum divinis mancipavit obsequiis, et ad omnium tolerantiam injuriarum solidavit.

QUOMODO REX AMOVIT EUM A PONTINIACO.

Ut autem cognovit rex quod in tuto locatus archiepiscopus nullius egeret eorum quæ usus deposcit humanus, nec illi nec snorum cuiquam posset inferre gravamen, quandiu Pontiniaco consisteret, inde eum amovere molitus est; sed quoniam id efficere per regem Galliæ non potuit, quippe qui veri ac totius bonitatis amator summo semper archiepiscopum venerabatur affectu, et contra adversarios suis sustentabat auxilium, ad alias se convertit machinas. Scripsit ad abbatem Cistercii, cui subjectionis jure Pontiniacum sicut et cætera domus ejusdem ordinis obtemperant, quod suum in ordine et totius regni sui hostem publicum tenebat, certusque esset abbas quod si vel ibi remanere vel alias in ordine refugere permitteretur archiepiscopus, universos ejusdem ordinis monachos, qui in suo regno invenirentur, ad ipsum sine contradictione transmitteret. Sanctus vero archiepiscopus, ut hæc audivit, mandante Cisterciensi abbate placide ac benigne respondit : « Absit, inquit, a me transgressio hæc, ut mei causa patiar tot viros virtutis, tot animas innocentes in desolationem venire, tot loca, tot monasteria tantis conquistis sudoribus in solitudines redigi sempiternas, nam meam, inquit, levabit inopiam, « qui suscitavit a terra inopem, et de pulvere erigit pauperem, » et vobis rependat vicem Pater misericordiarum et quæ mihi exhibuistis retribuatur officia charitatis. »

Itaque mandavit regi Francorum, qua arte eum de Pontiniaco deposuisset rex Angliæ, paratum se suscipere dicens quæ pridem oblata fuerant. Siquidem cum primo fugitivus ab Anglia venisset ad regem Ludovicum, obtulit illi rex et multis precibus adjuravit, ut circa se maneret, quomodo vel ubicunque potius elegisset, quod tunc quidem renuit, ne quis objiceret quod ad injuriam domini sui regis Angliæ obligasset se regi Francorum, quasi potentiori; consilio domini papæ Pontiniacum elegit, parciore victu et vita sobria delectatus. Rex vero mandatum archiepiscopi cum omni devotione suscipiens Pontiniacum festinus occurrit, ingressusque monachorum capitulum gratias abbati et fratribus egit qui Franciam honorarunt in tanti hospitis susceptione, et « Nunc, ait, ne pro beneficiis aliquo vestrum offensam regis odiumque pro subventionem sustineat, mecum veniat. » Conversi ad lacrymas monachi singulorum patrem et solatium singulare queruntur abire, et ad mentem revocantes, quanta cum mansuetudine et humilitate inter ipsos et quasi unus ex ipsis commoratus fuerit, quem præsentem dilexerant, abeun-

tem luctu et suspiriis prosequuntur. Inde profectus A cum suis postquam ibidem duos annos transegit, in ultiores partes Galliarum, ad sanctam scilicet Columbam, cœnobium grande monachorum in vicino situm Senonis civitatis, transportatus est. Ubi officiosissime susceptus ab officialibus regis, qui præmissi fuerant, quatuor ibidem annos provisione regia sustentatus exegit; perfacile fuerat illi hoc spatio cum episcopis sive archiepiscopis, et offerebatur a plurimis, demorari, sed ignem supernæ dilectionis quem Salvator misit in ossibus illius, quo totus jam aestuabat, tutius in silentio fovere, cupiens vir sanctus vitabat publicum, et semotus a turbis et tumultibus utrumque tempus diei et noctis maxime sacris occupavit meditationibus, orationique et compunctioni lacrynarum, quibus abundantius exuberavit, nec ab hoc studio cessavit, nisi cum familiaris rei cura cogeret vel negotium quod non posset vitari.

QUOMODO REX TENTAVIT CIRCUMVENIRE SANCTUM.

Sed hanc pacem et propositum venerabilis archiepiscopi videns, et invidens patris adversarius, et per cuius invidiam mors intravit in mundum, et rursus adversus ipsum instigat regem consiliis impiorum, quibus ascribendam esse discordiam amplius quam regi, et sanctus scripsit, et nos credimus, suggerens indecorum et ignaviæ imputandum fore, si quietum permetteret remanere qui tantas in regno suscitasset inquietudines. Rex igitur cum in nullo nocere posset viro Domini, nisi consensisset rex Francorum, ipsum circumvenire tentavit hoc modo. Transmittit filium suum jam coronatum in Galliam, ut filio regis qui patri successurus erat in regnum, homagium faceret et fidelitatem sponderet. Mittuntur munerum diversæ species, dantur domesticis et consiliariis regis pretiosa quæque, et tandem occurrunt sibi reges de pace et concordia in posterum locuturi. Ubi vero de his tractatum est, firmatis pactionibus, juratur in medio quod ex illa die firmam servarent amicitiam et fidem, et in hoc maxime quod neuter eorum alterius inimicum susciperet nec susceptum post hanc conventionem usquam in regno sineret demorari. Concessa in hunc modum conventionem, aliud sine mora rex Angliæ ordinavit, colloquium, quo sibi reges occurrerent. Cui cum rex Francorum a consilio suo non permetteretur adesse, irritos fieri videns conatus suos, rex Angliæ mandavit regi, quod violata conventionem quam alterna iuratione firmaverant et suum et regni hostem publicum detineret et tueretur. Ad quem remandavit rex Franciæ quod nulla in conventionem de archiepiscopo mentio facta est, unde nec violatæ conventionis deberet nec posset argui. Ut autem cognovit vir Domini quod etiam de Francia eum expellere conaretur rex Angliæ, scripsit illi quatenus persequi desineret servum suum, et tantos incassum expendere labores, adjiciens sibi et suis omnibus multa plura suppetere, providente Deo, quam vitæ necessitas poposcisset, ut neminem jam præter omnium dominatorem foraudare cogeretur, impleta in ipso promissione ve-

ritatis qua dicitur: « Primum querite regnum Dei et justitiam ejus, et hæc omnia subjicientur vobis. » Quam sollicitè regnum Dei quæsierit, quale et a quo inter labores exsilii sui solatium habuerit subjiciendum putavimus, ut videat lector talem merito conversationem martyrio consummari.

In primis, ut accepimus, nullus eum dies reperit dormientem, raro quievit in lecto, nisi gravis infirmitas immineret. Deinde primus ei labor ecclesiam ingredi, divinis interesse laudibus, cum summa devotione et reverentia sanctorum mysteriorum celebrare solemniam, post expletionem vero horarum regularium solus in oratorium suum ingressus et clauso ostio intra cubiculum orans Patrem in corde contrito et humiliato, oratione et lacrymis, seipsum hostiam vivam, sanctam Deoque placentem quotidie obtulit Creatori. Sancti familiares, qui pia curiositate arcum illius perscrutati sunt, quid inclusus et solitarius egerit, ex suspiriis et crebris gemitibus perpendebant. Inde circa horam refectionis egressus cum pauperibus et familia se refecit. A nullo quidem abstinuit cibo, humanum in omnibus favorem fugitans, sed revera de omnibus cum summa sobrietate sumpsit, sciens non esse cibum in vitio, sed concupiscentiam reprimendam. Surgens a mensa non otio, non fabulis, non levitate, sed lectione sancta pascebat esuriem animæ, sive de necessariis tractabat, sive de instructione loquens domesticos exhilarabat. Et hic erat ordo diei, nisi inevitabile negotium aliquid immutaret. Nocte vero cum lectus, ut archiepiscopum decuit, mundis et pretiosis componeretur vestibus, ipsum in eo quiescere suspicantibus universis, sanctus in oratorio suo solitudinem habens nocturnum silentium in oratione pernoctavit. Deinde suscitans capellanum, quem solum secum habuit in thalamo quo jacebat, cum totum sanctitati impendisset diem, ut dignior corona censeretur quam verbere, reverso cilicio quo induebatur, flagellum obtulit, et dorsum humili devotione flagellandum exhibuit, quod cum primo capellanus facere trepidasset, adjuratus in vi obedientiæ sanctum cadere usque ad sanguinem non cessavit, et ipse qui cadebat miseratione victus corpore nonnunquam lassaretur. Ubi autem capellanus ad lectum rediit, nequaquam ille a corporis injuria quievit, unguibus illud discerpens et lacerans, et in hæc verba inter singultus et suspiria prorumpens: « Miser ego et omnium infelicissimus miserorum, utquid natus sum? cur in hanc veni miseriam? » Post hæc autem tertiam plene noctis partem, secundum æstimationem ejus qui interesse meruit, in genuum curvatione et oratione expendit. Et cum jam nimia totius corporis fatigatio cogeret ad quietem, solo procumbenti, posito ad cervicem lapide, tantum molestiæ intulit vestis aspera ac vermium multitudo, ut sopor tenuissimus turbaret potius quam reficeret. Horum testis et relator exstitit venerabilis Robertus de Meritona capellanus sancti archiepiscopi, qui plene omnia vel ab eo didicit vel ipse vidit, quæ neminem

præter ipsum scire voluit, qui et fidem dederat, quod nulli hominum donec superesset archiepiscopus, horum aliquid revelaret. Testatus est idem, quod a die ordinationis suæ sanctus nullam sinebat præterire diem, quo non quinquies aut quater vel ad minus ter in die graviter caderetur. His sanctæ conversationis exercitiis, hoc divino amoris stimulo, vir sanctus seipsum mundo mortificans carnis quotidie cruciavit affectus, concupiscentias jugulavit, et solam Salvatoris præsentiam perferre sitiens, cum Propheta cantabat: «Sitiivit anima mea ad Deum fontem vivum, quando veniam et apparebo ante faciem Dei.

QUOMODO SALVATOR BONO THOMÆ APPARUIT.

Inter hæc autem, dum quadam die post missarum sollemniam prostratus coram altari, præ nimio fervore spiritus supra se raptus, solito vigilantius intendere orationi, manifesta ei visione Salvator apparuit dicens: «Thoma, Thoma, in tuo sanguine magnificabis Ecclesiam meam.» Cui ille: «Quis es, Domine, qui me visitasti? — Ego, inquit, frater tuus sum, et Salvator, qui Ecclesiam meam glorificabo in tuo sanguine.» Tum ille: «Utinam autem sic fiat, ut locutus est Dominus!» Hoc ille non mediocriter animatus oraculo, magis de die in diem ad amorem cælestis patriæ suspirabat, cupiens dissolvi et esse cum Christo.

QUOMODO REX FRANCIE VOLUIT REFORMARE PACEM INTER REGEM ET ARCHIEPISCOPUM.

Rex vero Francorum instantius egit ut pacem inter regem et archiepiscopum reformaret, et frequentia inter reges super hoc colloquia fuerunt. Sed et domini papæ mandata in conciliis quibus reges convenerant lecta sunt, quibus regem corripuit, primo quidem patienter ac paterne satis, ad posterum cum nequaquam patientia leniretur, cum interminatione vindictæ mandavit, quatenus consopita omni malitia et remissis hinc inde querelis cum archiepiscopo suo rediret in pacem. Dissimulavit rex aliquandiu et statutum pacis diem mutando negotium prolongavit. Sanctus itaque scripsit hæc regi in concilio apud Chinum.

DE DESIDERIO LOQUENDI CUM REGE ANGLIÆ.

«Desiderio desideravi videre faciem vestram,» etc. (Vide indicem epistolarum alphabeticum.)

Perlecta epistola venerandi pontificis rex, nec hinc quidem contradicere nec annuere volens, in diem certum terminavit responsum. Tandem vero convenientibus in unum rege et archiepiscopo, et per dominum papam et regem Francorum reformata pace ut putabatur, donatis alterutris querelis sine ira et indignatione et omni malitia, restitutum se promisit rex quæ ablata fuerant, et quæ ad archiepiscopatum pertinere probarentur. Ipsi quoque et suis omnibus redeundi licentiam, et pacem stabilem condonavit. Sanctus autem memor desolati gregis, qui per absentiam pastoris a via recta deviarat, ut sine offensa pacis osculum porrigeret universis, de

A clericis suis præmisit unum qui vice ipsius absolveret, si qui forte his qui in sententia fuerant in aliquo communicassent. Qualiter vero redierit, vel quid causæ exstiterit quod non statim rediit post pacem factam, sanctus ipse post reditum suum domino papæ scribens exponit.

Epistola beati Thomæ ad dominum papam.

«Reverendo patri et domino in Christo charissimo Alexandro, summo pontifici, Thomas Cantuariensis Ecclesiæ minister humilis salutem, et omnimodam cum summa devotione obedientiam. Quam iustis, quam honestis conditionibus,» etc. (Vide indicem epistolarum alphabeticum.)

DE REVERSIONE BEATI VIRI AD CANTUARIAM.

Hoc igitur ordine sanctus Thomas, septimam jam exsilii sui vertente brumam, reversus Cantuariam, tanto ferventius, tantoque devotius ad futuram et veram festinabat vitam, quanto in hac nil sibi præter tentationes et pericula restare certum habuit. Nam etsi pax illi fortassis arrisisset exterior, adeo jam pridem grave sibi ipse indixerat bellum, ut inter mundi delicias posito asperioris eremi molestia vel potius martyrium non deesset. Sed e regione, quod vehementius pie volentem vivere perurgebat, cum his, qui oderunt pacem et veritatem, pacificus habitans in se expertus est Salvatoris sententiam, quoniam inimici hominis domestici ejus. Nam cui præ cæteris inniti ratione dicente debuerat, adversus ipsum archidiaconus suus legatione functus est, qui regis filio persuaderet quod coronam illi minuire moliretur archiepiscopus, vel penitus, si processus daretur audacie, proposuisset auferre. Ad palliandam quoque propriæ adinventionis malitiam, inimici iustitiæ virum Dei calumniati sunt, leoninæ feritatis stimulis agitata de exilio repedasse, ut regis propositum et instituta dissolveret, cum ex fine clauerit agmina illum lenitate mitescere, quando instar agni non reluctans neque reclamans cervicem obtulit percussori. Interim vero vir magnanimus ad futurum in brevi certamen sanctæ devotionis exercitiis animum roboravit, instabat orationi, lectioni sanctæ, et prædicationi, adeoque intentus in his exstitit, et elemosinarum erogatione profusus, ut quibus in transmarinis sancta illius conversatio innotuerat mirarentur.

Brevi autem intervallo ante Domini Salvatoris natale, regis filium, cui jam regis nomen imponebatur, adire volens super Ecclesiæ negotiis, inter sacras ferias familiariter locuturus, Londonias profectus est. Necdum urbem ingressus est, et ecce quidam de regalibus occurrit denuntians ei, ex regis nomine et mandato, ne procederet, nec civitates regias, villasque, vel oppida ulterius Ingrediretur. Expavit primum vir sanctus et obstupuit, inopinata denuntiatione turbatus, et hæc regis nuntio respondit: «Quid promerui quod et te quoque exterior inimicum? quid peccavi quod mihi talia refers? a teipso hæc loqueris? — Nequaquam, ait nun-

tius, de proprio ista corde composui, sed sic mandatur tibi a domino rege; pacem ille iniit tecum et tu primus rupisti fœdera pacis, et pactum prævaricatus es, qui domesticos regis et pontifices ab Ecclesia segregasti, et militum manu per urbes regias armatus incedis, unde tibi mandat rex, ut ad sedem tuam redeas, injuncto officio diligentiam adhibeas, nec usquam progrediaris. Pluraque minis interpositis nuntio prosequente, sanctus ait: « Pacem ego putavi nec aliud suspicatus sum, sed video, non est pax in qua confidam. » Instabat nuntius sic omnimodis a rege fuisse mandatum affirmans. Sanctus igitur ex verbis et mandato regis certissime, quod postmodum accidit, notavit opus, et tanto quidem alacrior, tantoque ad omnem voluntatem Dei promptior factus est, quanto ex his quæ audierat jam proximare se præsensit ad palmam. Quanto autem fervore fidei, quanto desiderii cœlestis inflammatus amore redierit, ac si auditus quæ quidem poterant terrere consolatus, testem tenemus gratiam sanitatum quæ per illud iter cœlitus monstrabatur, postquam ad superos sanctus martyr ascendit. Nam ubi restitit parvulis imponens manus, diversa laborantibus ægitudine salus restituta est.

Reversus itaque cum summa animi devotione ac puritate sacram Salvatoris celebrat nativitatem, alacriter suis commemorans non esse in homine viam ipsius. Die vero nativitatis Dominicæ, finito jam sermone ad populum, terribili sententiâ damnavit unum de regalibus, qui pridie cæsis servientibus archiepiscopi, equos nihilominus ad ipsius contumeliam turpius decaudavit, cujus etiam propinquum carne, nec mente quidem mitiorem Ranulfum de Broch, malitiæ totius incontinentem, simili malavit pœna, qui in homines archiepiscopi ac parentes bestialiter debacchatus est. Tres quoque pontifices cui sententiæ subjacerent, ne quis communicaret talibus, populo palam fecit, qui ecclesiæ Christi Cantuariæ contra majorem statuta inunctionem regum subtrahere non formidarunt. Ad postremum autem: « A Jesu Christo, inquit, maledicti sint, et a cœtu sanctorum deleatur illorum memoria, quicunque inter me et dominum meum regem odium aut discordias seminabunt. » Sed quos semel armavit malitia adversus Christum Domini, nequam veriti sunt terribilis sententiæ prolationem. Denique pontifices prænominati cum se regis indignationi committere, quam Dei judicio et Ecclesiæ delegissent, oculis transmissis mari regem adeunt, et se regis inclinantes vestigiis, querula satis et quæ durum licet animum flecteret oratione sua, ipsorum suspensionem deploraverunt, allegantes qualiter cum ipsis egerit dominus Cantuariensis, cujus industria et ingenio ad regis et regni dedecus a sacerdotali penitus separantur officio, ut nec signandi panem habeant facultatem. Adjiciunt accusantes quod majus aliquid audebit adhuc, si istam rex patienter portaverit præsumptionem. Talibus circumventus rex, et velut amens effectus, nec se

A capiens præ furore, nescius quid objiceret, hæc iteratis vicibus dixisse fertur: « Inertes ac miseros homines enutrivisti et erexi in regno meo, qui nec fidem ferunt domino suo quem a plebeo quodam electo tam probrose patiuntur illudi. » Dixit et e medio secedens colloquium pariter et locum familiarem petiit, si quod forte concepto furori daret solitudo solatium, ubi liberius sermo sævientis haustum virus evomeret. Quod verbum milites quatuor genere quidem conspicui et de domestica regis familia excipientes, funeste illud, et alia prorsus quam a rege prolatum fuerat intentione interpretati sunt. Nec moram passi, ipso nimirum excitante qui homicida fuit ab initio, in necem innocentis unanimiter conspirarunt, facilitatem quoque tribuit ad perpetrandum, qui facinus inspiravit. Egressi namque, rege penitus ignorante, navemque conscensi ad votum spirantibus auris transportantur in Angliam, portu Canum appulsi, canes ipsi extunc et miseri non milites appellandi. Ut autem innotuit regi milites abiisse, suspicatus malignum aliquod, post illos misit ut citius reverterentur. Sed tanta velocitate transvecti sunt ut minime revocari vel a nuntiis comprehendi possent ante piaculum perpetratum. Nam quod contra propositum regis ac voluntatem fuerit illa maledicta præsumptio, satis clauit ex consequentibus. Cum enim nuntiata fuisset passio venerandi pontificis, tanta ejus animum præoccupavit confusio, turbavit mœstitia, absorbit pariter et possedit horror facinoris inauditi, ut nullus hæc sermo sufficiat explicare. Decevit siquidem, ut post innotuit, aut carceris illum custodia, aut alio quolibet modo corripere ut a sententiâ revocaret. Sed nonnunquam malis bene utens providentia Dei, inde sublimius dilectum suum honoravit, unde hunc humiliatum credidit humana malitia. Invalida etenim sunt hominis ingenium et calliditas contra consilium divinitatis. Placuit nempe Salvatori ab hac miseria per martyrium eripere quem dignum martyrio fecerat fidei plenitudo.

Igitur præfati non jam milites, sed miseri ac miserabiles, ubi primum applicuere, sociatis sibi regis officialibus jam ab archiepiscopo anathematis sententiâ prædamnatis, militum manum satellitumque de provincia contraxerunt, ex ore regis et nomine mentientes in dominum suum. Facile persuasum est scelus, illis affirmantibus quod ex mandato regis ad hoc negotium advenissent. Jamque concervati in unum, promptique ad omnem impietatem, quinto demum die post Christi nativitatem, crastino autem sanctorum Innocentium, adversus innocentem conveniunt. Hora jam refectionis expleta sanctus quoque jam tunc cum domesticis in interiorem domum a turba secessit, de negotiis tractaturus. Turba autem foris in atrio præstolante, soli quatuor cum satellite uno ingressi sunt. Occurrit illis cum honore, quasi domesticis regis, et bene notis, invitantur ad mensam, edentibus adhuc qui archiepiscopo ministrarunt. Respuunt cibum, sanguinem potius sitien-

tes. Igitur imperantibus illis, nuntiatur archiepiscopo viros quatuor venisse qui vellent cum ipso loqui ex parte regis, quo innuente introducti cum diutius in silentio consedissent, sanctum archiepiscopum nec salutaverunt quidem nec alloenti sunt. Sed nec ipsos vir magni consilii statim ut ingressi sunt salutavit, ut secundum Scripturæ sensum : « Ex verbis tuis justificaberis, » ex ipsorum interrogatione internam animi discerneret voluntatem. Post moram vero conversus ad illos et diligentius singulorum considerans vultum pacifice salutavit. Sed infelices, qui cum morte sædus inierant, salutantem continuo maledictis aggressi, et flicte ut Deus illum adjuvet imprecati sunt, ad quod verbum amaritudinis et maliitæ vir Dei incredibili rubore perfunditur, haud ignarus jam nocendi studio venisse viros. Igitur qui primus videbatur et cæteris promptior ad placulum filius Ursi spirans furorem in hæc verba prorupit : « Habemus, inquit, aliqua tibi dicere ex mandato regis, si vis tibi coram multitudine recitari, dic. » Cognito autem archiepiscopus unde vel quid essent dicturi : Hæc, inquit, non privatum, non in cubiculo, sed in publico proferenda sunt. » In tantum autem in necem pontificis arsere miseri ut, nisi clericos ostiarius revocasset (omnes enim egredi jusserat), archiepiscopum ipsum hasta crucis quæ propius stabat, ut postea confessi sunt, confodissent. Regressis autem qui exierant, ipse qui supra his verbis contra virum Dei calumniam exorsus est : « Rex ait, inter vos pace reformata liberum te, querelis omnibus consopitis, ad propriam sedem ut poposcisti remisit, et tu econtrario prioribus injuriis contemptum adiciens, violato pacis fœdere, superbe adversus dominum tuum tibi ipsi in malum operatus es; nam quorum ministerio regis filius coronatus est, et regni sublimatus honore, pertinacis animi timore ductus suspensionis sententia condemnasti, ministros quoque regis, quorum consiliis et prudentia tractantur negotia regni, vinculo anathematis innodasti, ut ex his manifestum sit, quoniam filii regis coronam auferres, si facultas adesset; jam enim molitiones tuæ et instantia, ut ad effectum perduceres quod contra dominum tuum excogitasti, omnibus innotuere. Super his igitur in præsentia regis responsurus si venire dignaris edicito, ad hoc enim missi sumus. » Ad quem archiepiscopus : « Voluntatis meæ, Deum testor, nunquam fuit ut domino meo filio regis coronam auferrem, vel minuerem potestatem, cui tres potius coronas optarem, et amplissima terrarum regna conquirere cum ratione et æquitate juvarem. Sed nec indignari justum est dominum regem, ut obijcitis, si ne per urbes et oppida homines mei comitati sunt, et occurrunt, quos præsentia meæ solatio jam septem annorum proscriptio defraudavit. Et nunc quidem, ubi domino meo placuerit, satisfacere præsto sum, si in aliquo forte deliqui, sed urbes suas et oppida villas quoque ne ingrederer comminando denuntiavit. Cæterum nequaquam a me sed a domino papa pontifices ab officio suspensi sunt. » — Per te, inquit

vesani, illi suspensi sunt, et tu eos absolve. — Non nego, ait, quin per me factum sit, sed supra me est et meæ prorsus non congruit dignitati quos dominus papa ligavit absolvere, ipsum adeant in cujus redundat injuriam, quod me et matrem suam Ecclesiam Christi Cantuariæ contempserunt. — Nunc igitur, aiunt carnifices, hoc est præceptum regis, ut de regno et terra, quæ ipsius subjacet imperio, cum tuis omnibus egrediaris, neque enim pax erit tibi vel tuorum cuiquam ab hac die, qui pacem violasti. » Ad hæc ille : « Cessent, inquit, minæ vestrae et jurgia conquiescant, confido in regem cæli qui pro suis in cruce passus est; quoniam ab hoc die nemo inter me et Ecclesiam meam mare videbit, non veni ut furem, hic me reperiet qui quæsierit. Sed nec dominum regem deceret mandare talia, sufficere contumelia quæ mihi et meis a ministris regis illata est, etsi non minaretur in posterum. — Hæc, inquit, mandavit dominus noster rex et hoc probabimus, nam qui regiæ debueras majestati deferre et regis examini differre vindictam, ministros regis ac domesticos, furentis animi secutus sententiam, de ecclesia turpiter ejecisti. » Quibus athleta Christi in fervore spiritus erectus contra calumniantes ait : « Quisquis sanctæ Romanæ sedis instituta, vel Christi Ecclesiæ jura violare præsumperit, et non venerit ultro satisfaciens, quisquis illo fuerit, non parcam, nec morabor ecclesiastica censura corripere delinquentem. » Prosilunt milites hoc sermone perculsi, responsionis constantiam ulterius non ferentes. Accedentes vero propius : « Tibi, inquit, denuntiamus quod in capitis tui periculum locutus es. — Num me, ait, venistis occidere? universorum judici commisi causam meam, unde nec minis moveor, neque enim gladii vestri promptiores sunt ad feriendum quam animus meus ad martyrium; quærite qui vos fugiat, me enim pede ad pedem in prælio Domini reperietis. » Illis ergo in tumultu et contumeliis exeuntibus, bestialiter exclamavit quem Ursu merito cognominavimus : « Ex parte regis vobis edicimus tam clerici quam monachi, ut hominem istum comprehendatis et teneatis, ne fuga lapsus evadat, donec rex de corpore ejus plenam justitiam fuerit consecutus. » Abeuntes igitur in hæc verba vir Dei ad ostium usque prosecutus exclamat et ipse : « Hic, hic reperietis, » posita super cervicem manu ac si locum præmonstrans ubi fuerant percussuri.

Reversus autem ad locum ubi sederat prius, suos consolabatur in Domino, et ne timerent hortatus est, et ut nobis visum est qui adfuimus, ita imperterritus residebat, qui solus quærebat perimendum, tanquam ad nuptias illum invitaturi venissent. Nec mora, redeunt carnifices in loriceis cum gladiis securibusque et bis acutis, et cæteris utensilibus commodis ad scelus quod animo conceperant peragendum. Cumque obserata ostia reperissent, nec pulsanlibus aperiretur, secretiori quodam aditu per pomerium ad ligneum obstaculum divergentes scin-

dunt, cedunt, et diruunt. Quo fragore terribili ac temultuoso tremefacti, servientes ac clerici fere omnes, velut oves ante faciem luporum, hac illaque dispersi sunt. Acclamantibus autem qui remanserint ut in ecclesiam fugeret, memor ille promissi prioris, metu videlicet mortis non se fugituum carnis interfectores, fugam renuit, non enim in tali casu fugiendum erat de civitate in civitatem, sed dandum magis subjectis exemplum ut mallet unusquisque gladiis succumbere quam videre legis divinæ contemptum, et sacrorum canonum subversionem. Simul etiam, qui ab olim martyrii flagrabat amore, implendi illud occasione ut videbatur adepta, ne differret ipse, vel penitus auferret sibi, si in ecclesiam fugeret, formidavit. Insistunt monachi dicentes non decere ipsum vespertinis deesse laudibus quæ jam tunc celebrabantur in ecclesia. Mansit ille immobilis minoris reverentiæ loco, felicem illam ac multis præoptatam suspiriis, multa devotione quæsitam, consummationis suæ horam expectare deliberans, ne, sicut dictum est, ædis sacræ reverentia et impios arceret a proposito et sanctum cordis sui desiderio defraudaret. Certus namque quod ab hac miseria migraret post martyrium, postquam ab exilio reversus est, multis audientibus dixisse fertur: « Habetis hic dilectum Deo ac vere sanctum martyrem Ellegum, alium vobis divina misratio providere non morabitur. » O sinceram et securam conscientiam pastoris boni, qui in gregis sui causa ac defensione non propriam mortem differre voluit cum valeret, nec vitare tortorem, ut pastoris sanguine satiata luporum rabies ovibus abstinere! At ubi nec ratione nec precibus persuaderi potuit ut in ecclesiam refugeret, invitum ac renitentem arripiunt monachi, trahunt, portant, et impellunt, nec attendentes quanta conviciando opponeret, ut ipsum dimitterent, in ecclesiam usque perducunt; ostium vero per quod iter erat in claustrum monachorum multis ante diebus diligentius obseratum, cum jam tortores a tergo insisterent, omnem prorsus evadendi fiduciam abstulit: currens tamen unus, ubi primum seram contigit, non sine multa omnium admiratione tanta facilitate extraxit ac si glutino cohesisset. Postquam autem intra fores ecclesiæ monachi se receperant, jam dicti milites quatuor cursu rapidissimo post terga secuti sunt. Aduit inter illos subdiaconus quidam, eadem qua milites armatus malitia, Hugo Malus-Clericus merito suæ nequitiae cognominatus, qui nec Deo nec sanctis reverentiam exhiberet, quod sequens factum probavit. Intranti vero monasterium sancto archiepiscopo omissis vesperis quas Deo libere inceperant, occurrunt monachi glorificantes Deum quod patrem suum, quem extinctum audierant, vivum cernerent et incolumem. Valvas etiam ecclesiæ repagulando hostes a nece pastoris arcere festinant, ad quos conversus athleta mirabilis imperat ecclesiæ januas aperiri: « Non decet, inquit, orationis domum ecclesiam Christi turrem facere, quæ, etsi

non claudatur, suis sufficit ad munimen: et nos patiendi potius quam pugnando triumphabimus hostem, qui et pati venimus, non repugnare. » Nec mora, gladiis evaginati, ingrediuntur domum pacis ac reconciliationis, solo quidem aspectu et armorum strepitu non modicum horrores cernentibus ingerentes. Turbatisque qui aderant ac tumultuantibus, jam enim qui vespertinis intenderant laudibus ad lethale spectaculum accurrerant: in spiritu furoris milites exclamaverunt: « Ubi est Thomas Beketh proditor regis et regni? » Quo non respondente, instantius vociferati sunt dicentes: « Ubi est archiepiscopus? » Ad hanc vocem intrepidus quidem et, ut scriptum est « Justus quasi leo confidens absque terrore erit, » occurrit e gradu quo delatus fuerat a monachis metu militum, et satis audibili sermone respondit: « Ecce adsum non regis proditor, sed sacerdos; quid me quæritis? » et qui se eos non timere jam antea dixerat, adjunxit: « Ecce præsto sum in nomine ejus pati, qui me sanguine suo redemit, absit ut propter gladios vestros fugiam, aut a justitia recedam. » Quo dicto, divertit in dextram sub columna hinc habens altare beatæ Dei genitricis et perpetuæ Virginis Mariæ; illinc vero sancti confessoris Benedicti, quorum exemplo et suffragiis crucifixus mundo et concupiscentiis ejus, tanta animi constantia ac si in carne non esset, quiddam carnifex inferebat, sustinuit ac superavit. Quem insecuti carifices: « Absolve, inquit, et communioni restituë quos excommunicasti, et cæteris officium redde qui suspensi sunt. » Quibus ille: « Nulla, ait, satisfactio præcessit, nec eos absolvam. — Et tu, inquit, modo morieris suscipiens quod meruisti, » et « Ego, ait, pro Domino meo paratus sum mori, ut in meo sanguine Ecclesia libertatem consequatur et pacem, sed meis, sive clerico sive laico, in nomine Dei omnipotentis interdicto ne in aliquo noceatis. » Quam pie suis, quam prudenter sibi providit martyr egregius, ne videlicet lederetur proximus, innocens opprimeretur, ne gloriam propterantis ad Christum proximi casus tristior offuscarer. Decuit plane ducis sui militem martyrem Salvatoris inherere vestigiis, qui cum quæreretur ab impiis: « Si me, inquit, quæritis, sinete hos abire. » Igitur facto impetu manus sacrilegas iniecerunt in eum, durius illum contractantes et trahentes, ut extra fines ecclesiæ aut jugularent aut vinctum inde asportarent, sicut postmodum confessi sunt. Sed cum facile a columna non posset moveri, una ex ipsis aerius insistentem et accedentem propius a se repulit lenonem appellans, dicensque: « Non me contingas, Reinalde, qui fidem ex jure debes et subjectionem; insipienter agis cum tuis complicibus. » Miles vero pro repulsione terribili totus incanduit, ensemque vibrans contra sacrum verticem: « Nec fidem, ait, nec subjectionem tibi debeo contra fidelitatem domini mei regis. » Cernens igitur martyr invictus horam imminere, quæ miseræ mortalitati finem imponeret, paratam sibi et promissam

sua a Domino coronam immortalitatis jam proximam fieri, inclinata in modum cervicæ orantis, iunctis pariter et elevatis sursum manibus Deo et sanctæ Mariæ et beato martyri Dionysio suam et Ecclesiæ causam commendavit. Vix verbum implevit et metuens nefandus miles ne raperetur a populo, et vivus evaderet, insiliit in eum subito et summitate coronæ quam sancti chrisomatis unctione dicaverat Deo abrasa, agnum Deo immolandum vulneravit in capite, eodem ictu præciso brachio hæc referentis. Is etenim, fugientibus tam monachis quam clericis universis, sancto archiepiscopo constanter adhesit et inter ulnas complexum tenuit, donec ipsa quam opposuit præcisa est. Ecce simplicitatem columbæ, ecce serpentis prudentiam in hoc martyre, qui corpus percutientibus opposuit, ut in caput suum animam scilicet vel Ecclesiam conservaret illasam, nec contra carnis occisores, quo magis hac necessitate careret, cautelam vel insidias machinatus est. O pastorem dignum, qui ne oves laniarentur, seipsum luporum morsibus tam confidenter opposuit! et quia mundum abjecerat, mundum eum volens opprimere nescius sublimavit. Deinde alio ictu in capite recepto adhuc quoque permansit immobilis. Tertio vero percussus martyr genua flexit et cubitos, seipsum hostiam viventem offerendo dicens submissa voce: « Pro nomine Jesu et Ecclesiæ tuitione mortem amplecti paratus sum. » At tertius miles ita procumbenti grave vulnus inflixit, quo ictu et gladium collisit lapidi, et coronam quæ ampla fuit ita a capite separavit, ut sanguis albens ex cerebro, cerebrum nihilominus rubens ex sanguine, illius et rosæ coloribus virginis et matris Ecclesiæ faciem confessoris et martyris vita et morte purpuraret. Quartus miles supervenientes abegit ut cæteri liberius ac licentius homicidium perpetrarent. Quintus vero non miles, sed clericus ille qui cum militibus intraverat, ne martyri quinta plaga deesset, qui in aliis Christum fuerat imitatus, posito pede super collum sancti sacerdotis et martyris pretiosi, horrendum dictu, cerebrum cum sanguine per pavimentum spargens cæteris exclamavit: « Abeamus hinc, milites, iste ulterius non resurget. »

Sed in his omnibus incredibilis constantiæ virtutem exhibens martyr insignis nec manum nec vestem, ut est infirmitatis humanæ, opposuit percussori, nec percussus verbum protulit, nec clamorem edidit, nec gemitum, nec sonum cujuscunque doloris indicem, sed caput quod inclinaverat gladiis evaginatis immobile tenuit, donec confusus sanguine et cerebro tanquam ad orandum pronus, in pavimento corpus, in sinum Abrahæ spiritum collocavit. Erectus nimirum supra se ad amorem Conditoris et supernæ dulcedini totus intendens, leve duxit quidquid doloris, quidquid acerbitalis inferre potuit cruentus carnifex. Et quam intrepide, ubi de sua salute principaliter et fide certaretur, esset iste martyr pugnaturus, qui pro aliorum tuitione ut videlicet secundum paternæ traditiones, et Eccle-

sia scita, res ecclesiasticæ tractarentur, seipsum tam viriliter, tam devote obtulit occisioni. Ut enim pace martyrum loquar, propriam singuli principaliter agebant causam cum dæmoniis immolare et idola colere cogerentur, iste vero aliorum salutem pretioso sanguine suo mercatum venit, existimans majorem hoc non esse charitatem quam animam ponere pro amicis suis. Pro mirabili ergo constantia hunc ei honorem divinitus collatum credimus, quod non Judæos, non paganos, non ignobiles quosque sed Christianos nobilissimos ac potentes victoriosa morte triumphare concessum est. Denique cumulatior honor, quod militis sui martyrium, ino natale martyris, ita sui Salvatoris clementia continuavit, ut salva concivium suorum prærogativa, nec possit esse conjunctius nec ulterius protelari. Sed et loci martyrio deputati celsitudinem quis metiatur? ipsa domus Christi, cunabulum regis pridie nati, recenti martyris cerebro et sanguine depingitur, ut ex hoc facto et persecutorum immanitas, et martyris eminens dignitas figuretur. Itaque Dei sacerdos a sæculo migrans oculis nascitur quarto Kalendas Januarii, anno ab incarnatione Domini ac Salvatoris nostri 1171, die proxima post solemnitatem Innocentium, ut qui diu innocenter vixerat et innocenter occisus est, proximo post Innocentes tempus celebre sortiretur.

Consummato autem per martyrium venerabili pontifice, infelices illi et cæteris homicidis immaniores cum exultatione et tripudio, quasi qui regis adversarium prostravissent, insigne regium conclamantes, ad palatium ecclesiæ reversi, et per ades et officinas archiepiscopi discurrentes quidquid optimum in auro, argento, vestibus, et vasis pretiosis invenerant, libros etiam et ecclesiæ chartas et privilegia, cum cæteris quæ numerare longum est, non minus cupidi quam crudeles deprædati sunt. Nec his satiata crudelis impietas, cum non haberet in quo per martyrium coronato noceret ulterius, ipsum in clericis et clientibus, parentibus quoque persequi non cessavit. Comprehendit quos potuit potestas publica et diversis contumeliis affectos facultatibus spoliavit, qui per ignotas provincias miseræ ac mendici pastore percusso dispersi sunt. Quid Judæo, quid hic Christi crucifixoribus relictum sit, lector attendat. At ubi insonuit triste nuntium de morte pontificis, turbatur civitas, curritur ad spectaculum. Quis stupor intuentium, quis luctus? quanta fuerit lamentatio intuentium, quis explicet? Nemo tamen palam ausus est profiteri quia malum est, metu ministrorum regis qui discurrebant, tum quia nec monachorum maxima pars nec cæterorum quispiam de persona quidem, quam si unus quilibet cecidisset e turba, aliter opinati sunt præter quod in ecclesia gestum tam inauditum scelus horrorem intulit universis. De persona dixerim, nobis enim audientibus calumniatus est quidam habitus nostri ac tonsuræ, quod nequaquam loco martyris habendus esset, qui merito pertinaciæ suæ occisus est.

Sed fidelis sui providentia Salvatoris et vite puritatem, et causa quam fuerit justa, quæ sola martyrem facit non pœna, multimoda miraculorum gloria non distulit innotescere mundo, qui tanta cum sollicitudine quoad vixit in carne cognitionem sui negavit mundo. Siquidem die tertia postquam consummato jam non mortalitatis metu, subiit in Sancta sanctorum perenniter in cœlis victurus cum Christo venerandus Christi martyr et pontifex, missa de supernis lux nova lumen mundi restituit nomen martyris invocanti.

MIRACULUM PRIMUM.

Uxor etenim militis cujusdam de Sussexia, cui oculus cæcitatem vehementia diuturni languoris intulerat, audiens hoc modo occubuisse dominum Cantuariensem, divinitus inspirata in hos illico voces erupit : « Sancte martyr Christi Thoma, tibi me devoto, si mihi subveneris in hoc periculo, cum devota oblatione locum tuæ requitionis abibo. » Vix verba complexit et optato diu lumine eadem hora potita in brevi de residuo morbo perfecte convaleuit. Verum hoc, sicut alia nonnulla, tunc quidem sub silentio premebantur quasi non crederetur eis, quousque multiplicitate miraculorum omnis adversantium cessit impietas, et obstructum est os loquentium iniqua. Ipsa quoque nocte beatæ consummationis illius quasi missarum solemnium celebraturus pontificalibus indutus apparuit cuidam ex familiaribus, altaris conscendens gradum. Quod cum secunda ac tertia nocte eadem visio apparuisset, adjecit is qui hoc viderat sanctum interrogare, dicens : Domine mi, nonne mortuus es ? ad quem sanctus : « Mortuus, inquit, fui, sed surrexi. » Tunc ille : « Si vere surrexisti et inter martyres computandus es, ut credimus, quare teipsum non manifestas mundo ? » Tunc sanctus archiepiscopus : « Lumen, inquit, porto, sed non potest propter nebulam interpositam apparere. » Lumen plane ; nam ut taceamus interim lumen illud ineffabile, gaudium videlicet Domini sui in quod mox ut hinc exiit intrasse credendus est, lumen erant illa lucis opera, quibus vivens vir sanctus abundantius exuberabat, lumen fuit martyrrium et illud maxime, quamvis adhuc nebula persecutionis interjecta non luceret. Sed hæc in testimonium tetigisse sufficiat, ut hinc lector intelligat quam pretiosa fuerit in conspectu Domini mors sancti archiepiscopi, quam sub tanta celeritate miraculorum gloria commendavit, quod raro de aliquo sanctorum legimus.

In crastino autem cum adhuc corpus sacrum in ecclesia servaretur humandum, matutinus adfuit quidam de regis satellitibus et hæc ore sacrilego palam prosecutus ait : « Juste perit proditor iste, opus plane eximium et dignum præconio, quod de medio sublatus est, qui regis filio coronam præripere conabatur. » Deinde ad monachos conversus : « Tollite, ait, et hunc humo recondite quantocius

ne compareat, sed dispareat memoria illius de terra, qui sic operatus est adversus dominum suum regem, aut equis illum discernere faciam, et in fetentem puteum projiciam, porcis et canibus devorandum. » Hinc turbati omnes ac perterriti ne forte faceret secundum quod minabatur impius ille et complices ejus, quorum impia et invida mens nec forte morte quidem sancti poterat satiari, si non etiam mortuus cum dedecore tractaretur, in crypta illum recondere festinarunt. Prius tamen ut moris est, corpus mundissimum martyris lavandum expoliantes, sub habitu canonici regularis eum in habitu et ordine monachorum tam secreto diu reperiunt exstitisse, ut etiam hoc suos lateret familiares ; ad ultimum carni proximum inveniunt cilicium sic bestinuculis oblitum, ut levius isto pristinae diei fuisse martyrrium quivis judicaret, et hostes majores minoribus minus nocuisse, et quod a nullo sanctorum præsumptum esse cognovimus, femoralibus cilicinis ita stricte cruribus insutis usus fuerat, ut alveolus a poplite supra in longum sub sutura cilicii verniculis scaturiens extenderetur, quibus inspectis inopinatæ religionis compuncti miraculo monachi mox in hæc verba prorumpunt : « Videte, videte, quoniam hic vere monachus est, et nos nescivimus eum. » Qui gemitus, quæ suspiria, quam largi lacrymarum imbres omnium qui aderant interceperint verba, referri non potest. Quibus tamen jam tunc non modicum consolationis accessit, cum, qualis a nullo hominum præter paucissimos familiares credi potuit, vitæ sanctitas et insolitus penitentia rigor apparuit, ut ex eo jam nemini daretur ambigere martyrrium promeruisse coronam, ejus vita martyrii merito non careret. Recondito igitur in crypta venerando corpore cum quo decuit honore et reverentia, sanguinem sacrum, quem de pavimento susceperant cum cerebro extra tumulum collocarunt, superna inspiratione præcavescentes, ne cum corpore clauderetur, ejus haustu saluberrimo tanta in brevi beneficia collata sunt, ut si scriberentur per singula, fidem excederent infirmorum. Hic est enim fratrum amator et populi Israel, hic est qui multum orat pro populo, et pro civitate sancta Jerusalem, ejus triumpho lætatur cælum, ejus passionibus sancta in fide confirmatur Ecclesia, ejus meritis et interventu cæci vident, claudi ambulant, leprosi mundantur, mortui resurgunt, et pauperes resonant gloriam Christo, qui electo suo in prima vocatione dedit fidem, in passione constantiam, et tandem consummato per martyrrium plenitudinem gratiarum et laudem et gloriam nominis sui qui est cum Patre et Spiritu sancto Deus benedictus in sæcula. Amen.

EXPLICIT PASSIO SANCTI THOMÆ MARTYRIS.

Abhinc autem viduata pastore mater Ecclesia mœrens, et amaro animo, injustum patris diebus multis lugebat exitium, illi quidem congaudens qui ad sempiternum transivit gaudium, sed pro sui ipsius desolatione sollicita, quæ debita pontificis pro-

tectione careret. Denique per anni circulum, decem tantum exceptis inde diebus, contigit in ea divina laus, et missarum solemnitas cessaverunt, quousque per pretiosum martyris sui sanguinem visitavit plebem suam oriens ex alto, et sit ipse consolationis causa, cujus mors principium creditur ministrasse morori. Interim vero committitur cura archipræsulatus inimicis justitiæ ad conculcandum potius quam custodiendum, ad perdendas animas, non lucrandas. Hinc pauperes opprimuntur, violantur Ecclesiæ jura, contra vetitum coguntur sacerdotes tremenda celebrare mysteria, silebant canones, decreta Patrum nec audiebantur quidem, nullus rationi, nullus æquitati locus, id solum eligitur quod suggerit avaritia, et cui facultas major, hic melior æstimatur. Denique ne regi displiceret malitia ministrorum, de oblatione fidelium, de pauperum refrigerio census regius cumulatur, et quæ specialiter Dei sunt contra Salvatoris sententiam redduntur Cæsari; sed nequaquam impune feret, quisquis divinæ legis integritatem præsumperit temerare. Veniet quandoque qui judicabit in justitia pauperes, et arguet in æquitate pro mansuetis terræ, qui nunc clamant in tribulatione sua ad Dominum, et vide si non in ipsa præsentis ultione inestimabilis quidam appareat circa genus humanum divinæ miserationis intuitus, ut dum videlicet exterius admonentur adversa mens interior facinoris commissi facilius admoneatur, et sic redeat prævaricator ad cor secundum quod psalmus ait: « Imple facies eorum ignominia, et quærent nomen tuum, Domine. »

Igitur cum de terra clamaret ad Dominum sancta mater Ecclesia dicens: « Vindica, Domine, sanguinem servi tui qui innocenter effusus est, » subito et contra spem omnium pax universa confunditur, suscitantur seditiones, et bellum oritur intestinum, filius insurgit in patrem, pater in filium, et regnum in seipsum divisum celerem sui ipsius desolationem minabatur, et quidem juste ubi prælocuta fuerat mors innocentis. Normannia hostili gladio traditur ferienda, quam tantus mox belli furor invasit, ut non ecclesiis, non ministris ecclesiasticis etiam inter sacra missarum solemnitas parceretur. Nam altaribus adstantem in veste sacra sacerdotem accepimus ab impiis jugulatum, multaque alia horrenda nimis et inaudita tunc temporis perpetrata fuisse relatum est. Anglia proinde contremuit et commota est a facie future cladis, quam jam jamque suis cerneret cervicibus imminere. Obsessa siquidem hostibus circumfusa in gyro, intus vero mortiferis plena seditionibus, ut nusquam tuta fides, nulli crederetur amico; dum iste patris, alter filii causam contenderet justiore; nihil jam nisi generale quoddam discidium exspectabat. Sed ne martyris sui gloriam tristiore redderet sanguis effusus; pro cujus morte iram intulit, quod nulli venit in dubium, ejus denuo meritis pace reddita, liberavit populum suum de manu hostili, qui non vult mortem peccatoris, sed ut convertatur et vivat. Quis unquam crederet

tanti sceleris auctores ad poenitentiam reservari, nisi ut hinc quoque Christus sanctum suum magnificaret? Unde jam nunc cernere est ipsos etiam ejusdem adversarios propensiori studio devotionis mortuum venerari, quam viventem fuerant persecuti.

Denique conscius sibi rex ipse sanguinis innocentis, etsi non ab ipso nec per ipsum, causa tamen commotionis quam in ipsum habebat, effusi, ostenso per visionem non esse aliud iter obtinendæ pacis, nisi placato et reconciliato martyre, in cujus ultionem tanta rerum confusio regnum jam universum præoccupavit, ut absque sanguine multo nemo pacem speraret, posita interim extollentia regali, corde contrito et humiliato, ad tumbam pretiosi martyris de præsumptione veniam postulaturus adventit. Quod dum properaret et jam civitati proximus esset, ut palam faceret quam devotione servebat erga sanctum Dei, quanto pro his quæ in ipsum commiserat poenitiæ turbaretur affectu, ab ecclesia beati patris nostri Dunstani quæ prior occurrit ingredientibus urbem, ad ecclesiam majorem ubi beati martyris corpus quiescit, nudis pedibus et veste communis incedens et flens, ubicunque asperior apparuit via per medium civitatis ascendit, non itineris inclementiam, non pedum teneritudinem, non vulgi hinc inde spectaculum, sed animæ consideravit periculum, et conscientie læsionem.

Moris quidem fuerat conventum regibus festive procedere, et nonnulla reverentiæ obsequia solemniter exhibere, sed hæc universa sibi prohibebat impendi, qui magis luctu quam lætitia pascetur, dicens: « Versa est in luctum cithara mea, et organum in vocem flentium. » Veniens igitur ad ecclesiæ fores procedit et oravit, ingressus vero locum martyrii ubi sanctus occubuit, rigavit lacrymis et osculatus est. Dicta autem confessione astantibus coram episcopis cum tremore multo ac reverentia ad tumbam accessit, ubi totus prostratus corpore ac mora non modica, orationi intentus, quos singultus ediderit, quæ suspiria, quam largo lacrymarum imbre marmor ipsum perfuderit, æstimari non potest. Postquam vero diutius oratum est, monachis et multitudini quæ convenerat pro rege satisfaciens, Londoniensis episcopus his verbis exorsus ait: « Quoniam aliter opinari nonnullos notum est, quam se habeat gestorum integritas ante Deum cui nuda et aperta sunt omnia, et coram Christo Domini quem hic veneratur in fide et veritate et in præsentia fraternitatis vestræ, pura confessione, recognoscit dominus noster rex quod nec ipso jubente nec sciente quidem, venerabilem archiepiscopum maligni homines occiderunt, ut autem cognovit occisum, tantam animi contraxisse mœstitiā, quod prospeximus tunc præsentem, quantam nunquam pro quovis eventu passus est. Super verbo autem, quod ira præventus protulit, unde materiam ipsum occidendi sumpsisse creditur profana temeritas, et quia viventem adeo pertinaciter insecutus est, cui-

pabilem sese clamat et veniam precatur pro vestro A
 iudicio per omnia satisfactorus. Ea propter uni-
 versitatis vestrae adesse sibi suffragium supplicat,
 quatenus in conspectu Domini ac Salvatoris nostri
 qui « cor contritum et humiliatum » non spernit, et
 beato martyri Thomæ humilis illius accepta sit pœ-
 nitentia. In integrum hodie restituit dignitates et
 jura hujus ecclesiæ quæcunque a retroactis tempo-
 ribus, sive in hoc, sive in aliis ubique terrarum regnis
 Ecclesia catholica liberius cognoscitur habuisse. Sed
 et de propria ratione triginta librarum redditus offert
 in munus martyri, quatenus vobis intercedentibus
 immemor injuriarum propitiis fiat. Omnem insuper
 malevolentiam ex corde remittit omnibus, qui ipsum
 in causa venerabilis archiepiscopi offendisse videren-
 tur et universos qui de ipsius advocacy erant, sive
 clericos, sive propinquos, sive servientes, quos
 aliquando supra quam debuit, contristavit in aliquo.
 In priorem hodie gratiam recipit et dilectionem. »
 Talia prosequente episcopo, ut cessavit loqui, rex
 universa benigne concessit, et rati fore in posterum
 protestatus est. Post hæc autem exteriori exutus
 veste scapulis et capite inclinato in unam fenestra-
 rum tumuli humili prorsus devotione, adeo ut in
 luctum converteret universos, primo quinquies cæ-
 sus a prælati, postmodum a monachis LXXX et eo
 amplius, ter a singulis cæsus, et sic solemniter ab-
 solutus est. His ita gestis, nuda humo residens, nudis
 nec lotis saltem post lutum pedibus, jejunos quoque
 ut venerat, neque enim quidquam sibi pœnitentiæ
 dolor sinebat indulgere quietis, noctem totam orando
 transegit, demisso vultu ac totius gestu corporis satis
 insinuans, hoc illius opus, hanc esse mentis immu-
 tationem qui respicit terram et facit eam tremere.
 Neque facile reperitur in aliqua historia Christiani
 temporis aut humilior isto principe in pœnitentia,
 aut devotior aliquis exstitisse. Et ne cui in dubium
 veniat per beati martyris Thomæ merita mutatam
 divinæ sententiam severitatis, quam inspiravit, regis
 satisfactione placari, evidens hujus rei jam tunc
 monstrabatur indicium. Nam quo die rex Cantua-
 riam venit super his quæ in sanctum deliquerat sat-
 isfactorus, comes Flandrensis, qui cum immenso
 exercitu oram maris obsederat ut in Angliam re-
 pentinus irrumperet, mutato repente consilio re-
 versus est. In crastino nihilominus, sicut postea
 computatis diebus inventum est, comprehenso in
 acie Scottorum rege qui et ipse Norihanhumbrales
 Anglos vastare aggressus est et prædari, omnes in
 brevi conticuere hostes, et pacem regni turbantes
 humiliati sunt. Et sicut in ultionem sanguinis inno-
 center effusi ira Dei in regem pariter et regnum
 regis interveniente reatu descevit, sic rursus humi-
 liato regi, martyre mediante venerabili, repropitiata
 divinitas et hostes subegit, et uberiolem pacis gra-
 tiam reformavit. Hinc nos tibi, martyr insignis,
 fructum laborum, et laborem manuum immolamus,
 orantes et sicubi nostra lineas veritatis excessit ora-

tio, tua sancta Intercessione et meritis indulgentiam
 consequamur et vitam. Amen.

Insimulatione quorundam, quorum est discordias
 serere inter fratres, antequam prioratum Cantuariæ
 suscepisset, dominus Benedictus offensam regis in-
 currit, adeoque in virum profecit perversorum ma-
 lignitas apud regem, ut nisi beati Thomæ reverentia,
 cujus se monachus tuitione specialiter advocabat
 regis impetus infregisset, supra quam regiam dece-
 ret majestatem furor regis in hominem desceiret.
 Est nempe criminosa mentis, cum ipsa virtutes non
 appetat viros virtutis si non datur opere vel sermo-
 nibus insectari. Quæ quidem invectio non regis ani-
 mum odio habentis mala, sed eorum mordet mali-
 tiam quorum suggestionem rex in Benedictum ira-
 cundia creditur concepisce calorem. Beatus igitur
 Thomas, cujus martyrium et miracula vir iste, de
 quo loquimur, eleganti stylo transmisit ad posteros,
 vice famulatus exhibiti purgatum infamia qua vene-
 rat in suspicionem, quasi secus incensum, quam se
 habeat professionis suæ norma, hac arte reconcilia-
 vit regi. Cum enim adepto jam prioratu, compulsus
 a suis propter Ecclesiæ negotia, diu regem secutus
 nequaquam sese auderet ingerere ob metum et mi-
 nas regis, ostensa cœliis visione, qua tumebat ad-
 versus innoxium regis feritas delinitur. Nam vidit
 in somnis quasi per pontem incederet magnum
 valde et elevatum, cumque ad medium fluminis
 pervenisset quod rapido subitis volumine decurrebat,
 soluto repente tabulatu cui pes regis innitebatur,
 ipse illico per medium lapsus foramen suspensus
 hærebat brachiis, mox totus in patentem inferius
 voraginem ruiturus, cui nullum prorsus solitudo
 loci suffragium spondidisset. Igitur post conatus
 plurimos cum jam viribus cepisset destitui nec hu-
 manæ subventionis spes ulla resedit, memor quo-
 niam Domini est salus mellifluum, Domini ac Sal-
 vatoris nomen crebris inelamavit, matris quoque
 Mariæ nomen ingeminans, et universos patronos
 invocans, cum nemo pereunti succurreret : « Sub-
 veni, inquit, martyr Christi, sancte Thoma, suc-
 curre, ne memineris injuriarum extremi temporis,
 quem in primordiis supra omnes homines adamavi. »
 Vix verba finivit et ecce Benedictus prior festinus
 accurrens, sciscitanti cur vel unde veniret, hæc
 regi respondit : « Quem invocasti in fide, sanctus
 archiepiscopus ut te eripiam misit me, et porrigens
 illi manum, ereptum de loco mortis et lacu miseriæ
 statuit super pontem, et visio non comparuit. » Evigi-
 lans autem rex et horrore turbatus visionis insolite
 reliquum noctis sine somno transegit, tantamque
 membris omnibus vexationem horrendus animi
 stupor infudit, ut vix circa medium diei præ nimio
 dolore de lecto surgeret. Igitur, ut prior adfuit,
 exponitur visio, nec minor prorsus Deo et pretioso
 martyri Thomæ persolvitur actio gratiarum a rege,
 quam si vita illi de vero periculo redderetur. Testatus
 namque est quod pro nullo quamvis inestimabili
 pondere pecuniarum in eundem recideret visionis

horrorem. Et ne quis hæc casu accidisse, et som-
num non mirandum esse contendat, nos e regione
tanto illud sublimius quanto subtilius est venèra-
mur, tantoque magnificentius et majori fatemur
attollendum præconio, quanto per hoc non a morbo
quolibet caro mox moritura sed victura in perpe-
tuum ab odii lethalis abyssu anima suscitatur. Rex
siquidem, quem pridie quam hæc videret, tum per
ministros publicæ functionis, tum per seipsum
aperita verborum contumelia fuerat insecutus, hunc

A correptus ab illo, qui respicit terram et facit eam
tremere, in familiarem recipit gratiam, et pro qui-
buscunque postulavit prona mente largitus est; ut
in hac mutatione dextræ Excelsi, ipse laudetur et
adoretur, in cuius manu corda sunt regum, qui
cum sit in sanctis suis mirabilis, ad laudem et glo-
riam nominis sui, cuius sit meriti martyr noster
egregius, subtili admodum ac multiplici miraculo-
rum indicio declaravit. Aliter alii hinc dixerunt sed
sic fuit visio.

SANCTI THOMÆ

CANTUARIENSIS ARCHIEPISCOPI ET MARTYRIS

VITA SECUNDA

AUCTORE ROGERIO DE PONTINIACO.

PROLOGUS.

Quoniam apud omnium fidelium mentes pretiosis-
sini martyris Thomæ, Cantuariensis archiepiscopi,
passio veneranda singularem obtineat reverentiam
et devotionem, multorum tamen movet animos,
quod de ejus vita et actibus nusquam plena repe-
riatur historia, maxime cum lucerna ista non sub
modio latuerit, sed in evidenti super Ecclesiæ can-
delabrum posita, non tantum occidentalium partium
angustias, verum etiam totius orbis latitudinem
splendore suo irradiaverit. Pro ignorantia enim
veritatis nonnullos de beato viro non solum diversa,
sed etiam contraria sensisse cognovimus, quorum
ignorantiæ necessaria quidem sed tamen temeraria
et nimis forte præsumptuosa diligentia consulendum
æstimavimus, ne et falsitas illis fiat in devotionis
detrimentum et posteris in erroris seminarium.

Porro aliquid de beati viri vita et factibus pre-
tiosæ quæ mortis ejus triumpho vir illustris, Joannes
Salesberiensis, claro quidem et fideli sed admodum
succincto edidit eloquio; in quo, etsi devotioni fide-
lium plurimum profuit, ad plenum tamen minime
satisfecit, compendiario, ut ipse asserit, utens ser-
mone, ne illa scilicet quæ tunc temporis notissima
et vulgata habebantur diffusius et expressius prose-
quens, non tam necessarius quam superfluous videret-
ur. Sane si hoc eidem Joanni facere placuisset,
nullos procul dubio utiles vel melius illo id efficere
potuisset, cui et dicendi facultas erat incomparabi-
lis, et rerum gestarum certissima inerat notitia;
quippe, qui ab ineunte ætate beato viro socialiter
adhæserat, et in persecutionibus comes individuus

B exstiterat. De his et quibus post mortem Dominus
sanctum suum mirificavit, eumque non tantum
cælis sed et terris pretiosæ mortis merito vivere
declaravit, vir venerabilis Benedictus Cantuariensis
ecclesiæ prior copiosam texuit relationem unde
evidenter agnoscitur quam sit pretiosa in conspectu
Domini mors sancta ejus, quem tantis virtutum et
miraculorum indicis incessanter commendare non
desinit.

Denique nos etiam qui beato viro tempore exsilii
sui ministravimus, quique sacra manuum ejus im-
positione officium sacerdotale suscepimus, ea, quæ
de ipso minus dicta sunt, ne temporis vetustate
penitus pereant a memoria, stylo quidem rudi et
inculto, sed veritate plenissima adnotare curavimus,
nihil omnino inserentes, nisi quod vel ipsi vidimus
et audivimus, vel certissima ac fidelissima eorum,
qui interfuerunt, relatione cognovimus. Si cui ta-
men vilitas forte et abjectio dictaminis sorduerit,
veritas tamen lacrimoso tecta schemate non vile-
scat.

Thomas igitur civitate Londoniarum parentibus
secundum civilem statum eminentissimis oriundus
fuit. Patri nomen erat Gilbertus, mater vero ejus
Mathildis vocabatur. Quæ, quamvis ultra civilem
conditionem generis excellentia claruisse visa sit,
eam tamen multiplex morum honestas et religionis
ac devotionis eleemosynarumque assiduitas multo
magis venerabilem et commendabilem faciebant.

D Hæc quodam tempore cum concepto fetu gravida
se de nocte sopori dedisset, visum est ei quasi Ta-
mesis fluvius, qui Londonias præterfluit, totus in

ventrem suum per os influeret. Expergefacta plurimum de visione mirata est, nec otiosum reputabat quod præter solitum ita sibi contigisset. Virum quemdam religiosum et literatum super visione consultura adiit, qui licet somnia non curanda didicisset, nec muliebres visiones multi penderet, reverentiam tamen matronæ sciscitantis attendens respondit, quod in Scriptura sacra aqua populos significaret, mirarique se quidnam sibi vellet quod aquas, hoc est populos, in ventrem influere vidisset, ignarus nimirum futurorum quæ hodie in Ecclesia Cantuariensi palam est videre. Corrupta igitur a viro illo et edocta ne deinceps somniis, quæ multos errare fecerunt, crederet, reversa est ad propria.

Nec multo post elapso tempore, iterum visum est ei quiescenti quasi Cantuariam orationis gratia advenisset: cumque ad ecclesiam quasi jam ingressura accederet, subito, ut ei videbatur, ita venter ejus intumuit, ut vix per majoris ecclesiæ januas se ingredi posse putaret. Postquam tamen cum difficultate ingressa est, in tantam tamque diffusam magnitudinem venter illius, ut ei videbatur, intumuit et excrevit, ut totus ecclesiæ spatia occuparet. Evigilans et recordans somni vehementer obstupuit et expavit; non tamen ad conjectorem suum supra memoratum redire præsumpsit, verita ne ab eo curiositatis argueretur. Diluit igitur conservans ista in corde suo. Impleto autem tempore pariendi, peperit filium. Die festo beati Thomæ apostoli puer natus est, eodemque die post vespas baptizatus Thomæ nomen accepit. Exinde diligenter enutritur, habens nutricem quæ maternis in puerili ministerio parceret laboribus, ut ipsa ejus mater interim orationibus et solitis pietatis operibus licentius insistere posset.

Quadam vero nocte cum mater de filio sollicita obdormisset, visum est ei quasi puer nudus et absque operimento in cunabulis jaceret, unde, ut sibi videbatur, vehementer commota nutricem de negligentia et incuria vocibus asperioribus increpabat. Nutrix vero puerum et diligenter obvolutum et fascia curiose astrictum dicebat, quin imo et pallium holosericum rubrum, miri splendoris et operis, ei suppositum asserebat.

Visum est matri quasi festina accurreret, cognitura utrum nutrix tam de puero quam de pallio vera testaretur. Cumque secundum verba nutricis invenisset, mirata est plurimum pulchritudinem et splendorem pallii, volensque venustatem mirifici operis certius et plenius considerare, cepit illud ex parte nutricis adjuvante velle explicare; sed brevitatis ipsius cameræ explicare penitus non sinebat. Egrediuntur in majorem domum, quæ et ipsa sua brevitate hoc fieri non patiebatur. Inde in plateam exeunt, sed et ipsa nihilominus modica parte pallii explicata tota visa est occupari. Unde majori videndi desiderio anxie tandem extra civitatem in campum qui dicitur Smedhefell egrediuntur, ut vel saltem ibi in maxima campi patentis latitudine decorem

A et magnitudinem pallii pro voto inspicere possent. Cumque modis omnibus in explicatione pallii laborarent, et ipse etiam campus sua brevitate eas jam concludere et coartare videretur, audiunt vocem dicentem frustra eas et incassum niti, quum nec tota Anglia pallii illius magnitudinem comprehendere sufficeret. Hæc non dicimus quasi per muliebres visiones viri magnificentia velimus astruere; sed ne ea quæ contigisse constat, saltem in hujusmodi suppressere videamur.

Sed nec divinæ pietati indignum videtur, et pie et religiæ matri de filii futura magnificentia et gloria hoc modo innotescere, cum de hujusmodi multa in Scripturis contineantur exempla.

Cum autem puer ad annos dociles pervenisset, B litterarum studiis a matre traditur. Jam enim etiam in tali ætate præ cæteris coævis suis quiddam splendoris et gratiæ in ejus vultu et moribus eminebat. Verum quia non prius quod spirituale sed quod carnale est, qualiter primævæ ætatis tempora transegerit, procuramus, nihil more laudantis vel aliquem commendare satagentis apponentes, sed simplicem veritatem simplici et fideli sermone breviter adnotantes. Crescente itaque corpore roboris augebatur simul et intelligentia mentis, tantaque ei inerat ingenii et memoriæ vivacitas, ut et facile audita caperet, et quæ semel didicisset, sine difficultate quando et quoties volebat, recoleret. In sententiis quoque difficillimis elucidandis et in quæstionum perplexarum enodationibus multos viros graves et doctos C acumine felici ingenii præcedere videbatur. Sed et ipsorum corporalium sensuum mira ei inerat perspicacitas et subtilitas, quod nos quoque in majori ejus ætate multoties probavimus, ita ut vix aliquid in ejus præsentia licet longiuscule et submisce dici posset, quod non audiret, si aurem apponere voluisset. Similiter etiam nihil quod odoratum irritare poterat, quod non statim quamvis remotum vel fetidum nares ejus offenderet vel odoratum demulceret: et unde ista nisi de gratia, quæ etsi necdum spiritualiter, corporaliter tamen in eo ista usque ad multorum admirationem operabatur?

D Hospitabatur in domo patris sui miles quidam nomine Richerius de Aquila, vir quidem secundum sæculum nobilis et honorabilis, canum tamen et avium exercitationi fere semper intentus. Hunc Thomas adhuc puer, cum per dimidium annum a scholis vacaret, ad talia negotia procedentem libenter frequenterque sequebatur, plurimumque talibus occupationibus delectabatur, indeque hujusmodi traxisse creditur consuetudinem, cui etiam in majori postea ætate, quoties vacabat, operam impendebat. Contigit autem ut memoratus miles quadam die ad simile negotium more solito exiret, et Thomas eum equo sedens sequeretur, eratque iis transitus per quemdam fluvium rapidissimum in quo erat pons parvus et arctus, qui tantum pedestres transmittere posset. Erat quoque non longe inferius molendinum, ad quod iste fluvius, ripis hinc inde

congestis ne efflueret, magno cum impetu præceps A
vergebat. Miles autem compendii causa periculum
contemnens transivit pontem prior: quem Thomas
tutus et capuciat, quippe qui nihil infortunii su-
spicabatur, e vestigio subsequitur. Et ecce, cum ad
pontis medium venisset, subito pes equo labitur et
puer cum ipso equo in medium fluminis prolabitur.
Excipitur igitur ab aquis et violento undarum im-
petu ab equo disjunctus ad inferiora rapitur, jam-
que molendino, tam a rota conterendus, quam ab
aquis suffocandus, approximabat. Dum hæc age-
rentur, et Thomas in confinio mortis constitutus
videretur, homo, qui molendinum curabat, nihil
penitus de his quæ agebantur sciens, aquam subito
a rota exclusit. Miles autem et qui eum comitaba-
tur, magnis et miserandis clamoribus puerum secus
ripam sequebantur, quorum vocibus molendino jam
quieto et a strepitu cessante auditis: homo præfa-
tus tandem de molendino admirans quid vellet egre-
ditur, et Thomam in mediis fluctibus conspicatus,
injecta celeriter manu semivivum eum et vix palpi-
tantiem ad terram extraxit. Nullus hoc casu con-
tigisse crediderit, et non potius divinam providen-
tiam tam subitam et inopinatam subventionem pe-
riclitanti puero et futuro Ecclesiæ suæ antistiti
misericorditer procurasse.

Mater vero ejus, cognito quod acciderat, non tam
de periculo doluit, quam de mirabili et inopinata
ejus liberatione gavisæ est; exinde de futuris spem
colligens, quod non frustra eum divina misratio tali
modo a morte eripuerit.

Consueverat autem ipsa ejus mater venerabilis
certis temporibus filium suum ponderare, appositis
ei panibus et carnibus et vestimentis, nummis etiam
et aliis speciebus quæ usibus essent pauperum ne-
cessaria, et ea omnia egenis distribuere, per hæc
eum divinæ pietati et beatæ semper virgini Mariæ
protectione attentius satagens commendare. Nam et
ipsa, inter opera pietatis quæ et diligenter et indesi-
nenter exercebat, præcipuam devotionem circa beatæ
Virginis memoriam semper habebat, docebatque
sollicite filium suum, sicut ipse referre solebat, ti-
morem Domini, et ut beatam semper virginem Ma-
riam speciali devotione amplecti et venerari satageret,
eamque tanquam vitæ et actuum suorum gubernatri-
cem atque patronam incessanter invocaret, eique
post Christum spem suam committeret. Cum autem
Thomas annum ætatis vicesimum primum implevis-
set, mater, quæ sola, ut erudiretur, instabat, defuncta
est, et exinde circa studia Thomas se remissius cœpit
habere.

Paternam igitur domum quasi vacuum et desola-
tam sublata matre fastidians, ad quemdam Lundren-
sem cognatum suum, qui non solum inter concives,
verum etiam apud curiales grandis erat nominis et
honoris, se contulit, apud quem ferme per triennium
consistens plurima bonæ indolis experimenta his
qui tunc eum nosse poterant præstilit.

Luxuriam namque, scurrilitatem, et avaritiam

tanto studio et execratione detestatur, ut illis, qui-
bus talia placent, omnino se odibilem et ingratum
fecisset, nisi superexcellens ejus mansuetudo et li-
beralitas etiam ipsis, quibus in hac parte displicebat,
eum amore dignum præstitisset. Nihil enim ex his
quæ habere poterat curans aut reservans, universa
in usus et voluntates sodalium suorum liberali munifi-
centia dispertiebat, jam talibus præludiis infor-
mante eum gratia ad illum, qui postmodum in eo
claruit, mundanarum rerum contemptum et erga
pauperes miserationem.

Interdum autem cum inter sodales confabulationis
fieret occasio, verba habebat communia et quasi
amatoria, ne ab hujusmodi quoque hominum genere
omnino extorris et inhumanus haberetur, cum tam-
B men in castitatis puritate esset admirandus. Faciebat hoc ex industria, qua plurimum callebat,
frontem juxta sapientis consilium præterdens aliis
non dissimilem, cum intus essent vere omnia dissi-
milia.

Eo tempore vir reverendissimus Theobaldus de
Beccensi monasterio assumptus, Ecclesiæ Cantua-
riensi et merito et dignitate præsidebat: vir quidem
per omnia laudabilis et magnificus, et tam in sæcu-
laribus quam ecclesiasticis negotiis experientissimus.
Hujus quidam officialis, cum commissorum sibi causa
agendorum Londonias frequentare et in domo patris
Thomæ hospitalitatis gratia ex longo tempore diver-
tere consuevisset, Thomamque ab infantia plenius
cognovisset, videns eum jam juvenem elegantem et
tam litteris instructum quam prudentia et moribus
ornatum, cœpit ei suadere ut una secum ad domini
sui Cantuariensis curiam proficisceretur. Sed Tho-
mas reputans se non tam officiosum quam præsum-
ptorem habendum si se non vocatus ingereret, iterum
distulit; donec supradicti viri suasionem plenius cer-
tificatus, tandem cum competenti et honesto apparatu,
ipso comitante, pontificis se reverendis aspectibus
præsentavit. Quem vir altioris prudentiæ intuitus,
et ex occurso faciei sensatum intelligens, gratanter
et honorifice suscepit: secumque manere præcepit.
Exinde Thomas in curia familiariter conversatus,
brevi tempore in tanta a pontifice habitus est gra-
tia, ut nullum illi familiariorem, nullum, ut putabat,
D haberet chariorem. Siquidem vir sapiens, mansuetu-
dinis illius et prudentiæ sinceritate celeriter cognita,
eum consiliis suis indesinenter adhibebat: et negotia
ei sua frequenter committebat: experiensque illum
et in consiliis prudentem et in negotiis strenuum ac
fidelem, ætiori sibi eum dilectionis et familiaritatis
vinculo conjungere satagebat, verumtamen non
absque invidia.

Erat namque quidam tam pontificali familiaritate
quam ecclesiastica dignitate sublimis, nomine Ro-
gerius de Ponte, episcopi Cantuariensis archidiacono-
nus, qui non æquanimiter Thomæ tantam in curia
gratiam sustinebat. Hic non solum apud se intestina
invidiæ peste tabescebat: verum aliquoties palam
in contumelias et impropria erumpebat, ita ut The-

man clericum Baillehache plerumque vocitaret: sic enim cognominabatur vir ille, cum quo ad curiam venerat. Nec fuit momentaneus et transitorius hujus livor invidentiæ, sicut postmodum rei probavit eventus. Thomas tamen nihilominus in solita se continens mansuetudine, gratia proficiebat apud Deum et homines. Interim autem, quantum licuit, juri civili et sacris canonibus studium adhibuit; ut per hæc in causis petorandis seu decidendis instructor haberetur, et ecclesiasticarum rerum notitiam plenius consequeretur. Exstitit causa, qua Cantuariensis antistes Theobaldus Romanam Ecclesiam visitare disponderet, profectusque est, ut dignum erat, cum honesto et copioso comitatu, assumpto etiam secum Thoma, de cujus prudentia et fidelitate præcipue confidebat. Nec immerito, nam in ipso itinere et negotio suo eum sibi in multis necessarium expertus est. Reversus autem prospere, et de Thomæ præstantia certior factus, majori eum dignum reputans, primo illi ecclesiam de Oxforda contulit. Postea vero aliquoties ecclesiasticorum negotiorum causa eum Romam direxit; in omnibus ejus industriam merito collaudandam experiens. Ea tempestate Willelmus Eboracensis archiepiscopus vitæ termino et pontificali officio feliciter expleto, beato fine quievit.

Eboracensi itaque sede vacante, Theobaldus Cantuariensis antistes et totius Angliæ primas, modis omnibus satagit, qualiter archidiaconum suum Rogerium de quo paulo ante meminimus eidem sedi præficeret, quatenus per hoc et dignitati Ecclesiæ Cantuariensis et honori suo et in clerico suo prospiceret, et Thomæ ad majora viam aperiret. Nec frustratus est a proposito suo: nam memorato Rogerio cum conniventia regis in Eboracensi sede substituto et consecrato, absque mora archidiaconatum Cantuariensis ecclesiæ et præposituram Beverleix, quæ Rogerius obtinuerat, cum aliis ecclesiis pluribus Thomæ assignavit.

Thomas igitur, his adeptis, non jam privato morum genere contentus, ad majora atque clariora evidentioraque virtutum argumenta se sustulit: redditus suos in usus et necessitates indigentium misericorditer abundeque dispertiens; et reliqua quæque, nam et illud pro tempore omittere non oportebat, in quoslibet mira libertate et honorificentia profundens. Archiepiscopus vero cernens circa Thomam suum minime errasse judicium, imo spe majora provenisse, plurimum ejus magnificentia delectabatur. Ipse vero Thomas cum in omnibus et ab omnibus magnificus haberetur, nullam tamen inde concipiens insolentiam, solito majori humilitate et reverentia pontifici suo in omnibus obtemperabat.

Eo tempore, anno scilicet ab incarnatione Domini millesimo centesimo quinquagesimo quarto, Henrico Gaufridi Andegavensis comitis et Mathildis imperatricis filio in avitum regnum succedente, vari per Angliam tumultus et novarum rerum studia orie-

bantur: eratque in Ecclesia regni illius non modica trepidatio: tum propter suspectam regis ætatem, tum propter collateralium ejus circa ecclesiasticæ libertatis jura notam malignitatem. Nec frustra, sicut rei exitus indicavit. Cantuariensis autem antistes tam de præsentis sollicitus quam de futuro timidus, aliquod remedium malis, quæ imminere timebantur, opponere cogitabat: visumque est ei, si Thomam regis posset inserere consiliis, maximam exinde quietem et pacem Anglicanæ Ecclesiæ posse provenire. Sciebat enim eum magnanimum et prudentem: qui et zelum Dei haberet cum scientia, et ecclesiasticam libertatem totis affectibus æmularetur. Ascitis igitur ad se Cantuariensis antistes Philippo Baiocensis et Arnulfo Lexoviensi episcopis, quorum consiliis rex in primordiis suis innitebatur, cepit de Thomæ prudentia, strenuitate, et fidelitate, atque morum laudabili et admirabili mansuetudine inferre sermonem, memoratisque episcopis secundum voluntatem et suasionem archiepiscopi annuentibus, Thomas regiam ingressus curiam cancellarii nomen officiumque suscepit. Exinde qualiter geminum virum gesserit, ecclesiasticum scilicet et curialem, non est facile explicare. In primordiis tamen suis tantos æmulatorum assultus pertulit, tantaque delatorum laceratus est protervia, ut sicut ipse pontifici suo et aliis amicis suis familiari conquestione fateri solitus erat, a curia recedere disponderet, si absque opprobrio et infamiæ nota id fieri posset. Verum rex fide illius et industria citius cogni a, tanta cum dilectione charissimum habuit, ut neminem aliquando æque dilexisse putetur. Omnibus itaque ei creditis, rex juvenilibus exercitiis operam dabat, Thomas vero vices ejus et negotia strenue et potestative exsequens, nunc princeps militiæ loriceatus exercitum præibat, nunc vacans ab expeditionibus jura populis dictabat. Solo namque nomine a rege differens regnum universum pro voluntate disponebat: principibus et magistratibus ad ejus nutum subjectis: certissimeque scientibus hoc solummodo regi gratum fore quod Thomas expedire judicasset. Et licet rex jam animo concepisset, quod postmodum opere declaravit, interim tamen Thomæ præsidio tutus et quietus manebat Ecclesiæ status: ipso in omnibus pravam regis voluntatem et collateralium ejus clandestinas machinationes caute et quasi ex oculo, ne suspicioni pateret, frustrante. Neque enim facile erat eo tempore aliquid fieri, quod Thomæ sententia non approbasset. Ad ampliorem quoque dilectionis commendationem tradidit ei rex filium suum primogenitum Henricum, injungens ei ut hominia et fidelitates regni Anglorum ei fieri faceret: sciens procul dubio tantum negotium per nullum melius quam per illum effectui mancipandum: sicut et factum est. Nam rege in Normanniæ partibus commorante, Thomas, convocatis comitibus et omnibus majoribus regni, regis mandatum, nullo contradicente vel resistente, effectui mancipavit, mirantibus quamplurimis quoniam id non facile absque tumultu nec

Ipsa rege presente posse fieri putabatur. Quamvis igitur in secularibus negotiis esset occupatissimus, non tamen ea quæ Dei sunt obliviscatur vel negligebat. Nam circa pauperes ita pietatis et misericordiæ visceribus affluebat, ut in hac parte eum homines sæculares superstitiosius potius quam religiosum reputarent. Introducebatur ad mensam ejus quotidie pauperum magna multitudo: quibus tanta victualium apponebatur copia, quæ etiam divitiis sufficere posset. Quocunque vero transiret, nunquam manus ejus vacabat a munere, dummodo esset qui peteret: omni namque occurrenti et elemosynam postulanti manum misericorditer porrigebat. Patebat ad eum incunctanter accessus miseris et oppressis: et causa viduæ ingrediebatur ad eum, faciebatque studiose judicium inopis et vindictam pauperum. Sequebatur autem eum tanta militum et diversi generis hominum multitudo, ut in comparatione multitudinis aliquoties domus regia pene quasi vacua maneret, et rex ipse quasi vacuus degere videretur. Sed quamquam favori populari supra modum deditus videretur, fervebat tamen in eo fidei pietas et zelus ecclesiasticæ libertatis, castitatisque puritatem, quam ab ineunte ætate conceperat, vigilantem semper studio conservabat: sciens procul dubio quia, etsi omnia ei pro tempore et potestate licerent, non tamen omnia expedirent. Et licet ei mundus et quicquid mortalis vitæ lenocinia continent in omnibus applaudere videretur, nihil tamen eum aliquando fecisse constat, quod castitatem ejus in aliquo læderet vel minueret. Cognovimus certe ab his qui ei per viginti et eo amplius annos in ministerio familiariter assisterunt, quod nihil hujusmodi aliquando comperissent in eo; quin potius medicis suadentibus ut in hac parte nature suæ condescenderet, asserentibus quod hoc et ætati ejus et complexionem congrueret, plurimumque ei ad conservationem sanitatis conferret, respondere solitum, istiusmodi medicinam sibi penitus esse contrariam, quæ tam corpus quam animam potius sædaret quam juvaret.

Per idem tempus defuncto Cantuariensi archiepiscopo Theobaldo, rex ei Thomam successorem dare disposuit: credens eum tanto honore dignissimum et ad suam utilitatem atque voluntatem in omnibus paratissimum. Thomas namque ex industria circa personas et res ecclesiasticas quasi severissimum se exhibebat; ut tali occasione omnem a se suspicionis notam excuteret, et regis voluntati, quam intime noverat, melius sub hac palliatione conveniret. Credens itaque rex propositum suum adversus Ecclesiam per eum potissimum posse impleri, quippe quem sibi in omnibus fidelissimum et ad voluntates suas pronissimum expertus fuerat, irrevocabiliiter disposuit ut Ecclesiæ Cantuariensi præficeretur antistes.

Nissis igitur duobus episcopis et cum iis magnate quodam fidelissimo sibi, Richardo scilicet de Luci, dedit iis in mandatis ut Cantuariensem conventum super electione pontificis convenirent. Qui venientes

A Cantuariam, capitulumque ingressi, regis primum benignitatem et devotionem multiplicibus verbis extulerunt; deinde Richardo de Luci, ut mandata regis iis proponeret, injunxerunt. Tunc Richardus, « Quoniam, inquit, sic placet dominis nostris episcopis, ut nos vobis regis voluntatem intimeamus, noveritis certissime quod dominus noster rex, sicut ab ipsis melius audistis, studiosissimus est circa ea quæ Dei sunt, et circa sanctam Ecclesiam maximam et præcipuam gerit devotionem: præcipue autem circa Ecclesiam præsentem Cantuariensem, quam specialem in Domino matrem suam filialis dilectione humiliter et fideliter recognoscit. Quapropter, ne ex diutina pastoris absentia in aliquo forte turbetur vel gravetur, sciatis ab ipso liberam vobis electionis datam licentiam: ita tamen ut personam tanto oneri et honori congruam eligatis. Non enim vos latet quod dominus noster rex in tali negotio nihil attendere consuevit, nisi quæ Deo credit esse placita et sanctæ Ecclesiæ utilia. Vobis itaque de cætero incumbit et omnino expedit, ut talem eligatis, cujus patrocinio secundum Deum et secundum homines gaudeatis. Si enim rex et archiepiscopus grato dilectionis vinculo sibi invicem cohæserint, seseque mutuo amicebilitate confoverint, non est dubium quin interim felicia sint tempora, quin status Ecclesiæ jucundus et quietus perseveret. Sin autem, quod absit! res in contrarium cesserit, quot exinde sequantur discrimina, quæ perturbationes, qui labores et tumultus, quot denique damna rerum et pericula animarum, vestram non puto latere sanctitatem! »

Cumque Richardus finem dicendi fecisset, et ipsi episcopi ejus orationem laude dignam approbassent, prior Cantuariensis primum Deo gratias, deinde regi grates immensas pro sua erga se benevolentia et sollicitudine cum debita reverentia retulit: sicque ad nutum episcoporum nominatis et ad se vocatis quibusdam monachis natu et prudentia majoribus egressus est foras. Cumque consedisset et de verbo quod audierant tractare cœpissent, visum est iis nihil circumdici vel statui posse sine episcoporum et ipsius consilio Richardi, qui utique regis voluntatem optime noverant: ex qua totam electionis summam pendere oportebat. Vocaverunt itaque D regios legatos, Bartholomæum videlicet Exoniensem episcopum, et Hilarium Cirestrensem, et Richardum. Qui cum venissent, et cum iis multum denique super proposito negotio contulissent, tandem omnes unanimiter, tam monachi quam episcopi, una voce eademque sententia cellarium in pastorem et episcopum animarum suarum elegerunt. Monachi vero aliquandiu hæsitaverant in electione, non quia Thomam virum esse virtutis ignorarent, sed quia religionis habitum non præferbat, cum usque ad illa tempora fere semper Ecclesia Cantuariensis viros vita et habitu religiosos habuerit pontifices. Sanctus namque Augustinus, beati et apostolici papæ Gregorii monachus, qui genti Anglorum fidem Christi prædicavit, Cantuariensem et alias plures in par-

tibus illis ecclesias sub regulari et monastica disciplina ordinavit et instituit, quoniam consuetudines maxime in electione pontificis Cantuariensis ecclesia præ cæteris diligentius hactenus observaverat. Verumtamen solum illud quod in electi sui moribus horrebant, cæterarum virtutum et gratiarum, quæ in eo clarius eminebant, consideratione compensantes, corde bono et animo volente eum unanimes elegerunt. Episcopi itaque, quos ad hoc rex destinaverat, diem apud Londonias priori et monachis Cantuariæ assignaverunt, quo ea quæ de electionis celebritate restabant, publice coram omnibus episcopis et abbatibus regni totius in præsentia regis junioris consummarentur. Jam enim ei rex pater suus regnum disposuerat, et sicut superius dictum est, hominibus et fidelitates regni per manum cancellarii sui ei fieri fecerat. Scripserat etiam ei rex de electione Cantuariensis ecclesiæ, significans quia, quidquid in ejus præsentia factum fuisset, ipse quoque concederet et confirmaret, ac per omne tempus ratum haberet.

Memorati igitur episcopi ex mandato regis universos episcopos et abbates regni; sed et conventualium ecclesiarum priores, necnon et comites atque proceres, omnesque regis officiales, ad præfixam diem Londonias convocaverunt. Cumque die statuto simul omnes convenissent: prior Cantuariensis formam electionis apud Cantuariam ex voluntate et mandato regis, præsentibus episcopis, quos ad hoc ipsum rex direxerat, celebratam, in præsentia et audientia omnium episcoporum cum reverentia prolapavit: seque sancto inspirante Spiritu, Thomam regni cancellarium in archiepiscopum concorditer et canonice elegisse. Episcopis quoque, qui apud Cantuariam missi a rege electioni interfuerant, tam electionis formam quam electi personam multipliciter commendantibus, assentiunt universi, et Deum tam votis quam vocibus consona gratulatione benediciunt.

Solus tamen inventus est Gilbertus Foliot, episcopus Londoniensis qui obloqueretur et submurmuraret; qui tamen videns unanimum omnium assensum suamque singularem malitiam nihil posse obtinere, et ipse pariter assensit. Eratque vir ille grandævus et multum litteratus, habituque monachus; qui, ut ferebat opinio, ad archiepiscopatum ex diu aspiraverat. Accedunt igitur omnes simul episcopi ad regis junioris præsentiam, assensum illius, favorem et gratiam in sua electione postulantes: quibus ipse cum multa exsultatione applausit, favit et assensit. Magistratus quoque officiales regni, nam et ad ipsos rex pater super electione scripserat: « Cum devotione et immenso gaudio electionem acceptaverunt et laudaverunt. » Henricus autem Wintoniensis episcopus non minus genere quam prudentia et religione clarus, ad regem puerum sic locutus est: « Dominus, ait, cancellarius electus noster multo jam tempore in domo regis patris vestri et in omni regno summum obtinuit locum, habituque in dispositione

A sua regnum, nec aliquid in tempore suo in regno acitatum est, nisi ad suum arbitrium; unde eum liberum et absolutum ab omni nexu et ministerio curiali, ab omni etiam querela et calumnia, omni-que penitus occasione, Ecclesiæ Dei et nobis tradi postulamus, quatenus ab hac hora et deinceps emancipatus et expeditus quæ Dei sunt libere exsequatur. Cognovimus enim regem patrem vestrum vices suas in hoc negotio vobis delegasse, gratumque et ratum habiturum, quidquid a vobis inde fuerit constitutum. Gratam habuit rex hujusmodi petitionem, Thomamque grater, secundum postulationem Wintoniensis episcopi, liberum et absolutum ab omnibus ecclesiastico ministerio contradidit. Ipse vero Thomas a principio, ex quo sermonem de sua promotione egressum comperit, modis quibus potuit, obviavit, ne res ad effectum veniret: sciens indubitanter duobus dominis concorditer non posse servire, quorum voluntates longe ab invicem discreparent: et quisquis Cantuariensis episcopus fieret, cito Deum aut regem infensum esse habiturum. Verumtamen, Deo aliter disponente, et Henrico Pisano præbyterum cardinali et apostolicæ sedis legato, monacho vero ordinis Cisterciensis procurante et modis omnibus instante, eumque ad susceptionem regiminis cohortante et animante; tandem ejus electio qualem breviter memoravimus exitum habuit.

Episcopi igitur condito inter se consecrationis die apud Cantuariam conveniunt: simulque cum eis abbatum et religiosorum et clericorum nobiliumque terræ illius multitudo infinita: tanti pontificis consecrationi et missarum atque benedictionum primitiis cupiens interesse. Ipse quoque Thomas cum maximo virorum religiosorum et aliarum venerabilium personarum comitatu ad diem occurrit, processeruntque venienti obviam cum gaudio et honore multo episcopi cum monachis et clero, populi-que multitudine innumerabili: tantaque fuit occurrence devotio et exultatio ut verbis nequeat explicari. Cumque vox lætitiæ et exsultationis undique personaret, Thomas tamen ad ista animum non apposuit: sed cum magna humilitate et contritione lacrymis ubertim fluentibus pedes accessit, plus cogitans de onere sibi imposito quam de honore impenso. Ordinatus est itaque et consecratus pontifex, imponente ei manum viro venerabili Henrico Wintoniensi episcopo. Is quippe inter coepiscopos tam religione quam genere eminebat; erat enim monachus et frater Stephani Blesensis qui regnum Anglorum post Henricum regem seniores ferme per viginti annos obtinuerat. Willelmo namque Notho successit filius ejus, cognomento Rufus, qui sanctum et illustrem virum Anselmum Cantuariensem archiepiscopum de regno suo expulit; cui Willelmo Rufo, in venatione occupato, et a quodam milite sibi charissimo non tam casu quam divina, ut creditur, voluntate sagitta perempto, successit Henricus frater ejus, qui fuit pater Matildis imperatricis;

huic autem Henrico magnifico et potentissimo regi A successit præfatus Stephanus Blesensis, frater Wintoniensi episcopi et illustrissimi comitis Theobaldi senioris. Stephano vero adhuc superstitie et regnante, supervenit Henricus Matildis imperatricis filius, accepitque regnum. Cujus regni anno octavo Thomas est consecratus Cantuariæ antistes.

Consecratus autem studium et diligentiam propensorem exhibere curavit, qualiter vita et moribus tanto gradui conveniret: moxque, divina cooperante gratia, mutatus in virum alterum, veterem hominem cum actibus suis exiit, novumque induit in iustitia et sanctitate, celans tamen iterum hominibus propositum suum soliti habitus honestate; cilicio namque ad carnem indutus, lectioni et orationi indesinenter instabat: eripiens et subrahens se quantum poterat negotiis sæcularibus, ut spiritualibus studiis liberius et efficacius vacare posset. Quoties tamen causis aliquibus eum interesse officii necessitas deinceps, miram exhibebat in audiendo patientiam, in inquirendo seu discutiendo diligentiam, in iudicando quoque iustitiam. Tam munus quam personarum acceptione prorsus postposita corripiebat cum magna libertate delinquentes, durius autem semper divites et potentes: paratum ad ulciscendum se omnem inobedientiam, non solum verbi sed et operis attestatione, quoties expediebat comprobans, opera autem misericordiæ et pietatis, quæ dum adhuc esset cancellarius diligenter exercuerat, multipliciter auxit et cumulavit: decimis omnibus, quæcumque eum aliqua ratione alicubi contingebant, usibus pauperum deputatis. Viduis et orphanis atque infirmantibus lectoque decumbentibus egenis multa beneficia conferebat, eorumque quamplurimis quotidiana victus et vestitus stipendia perpetuo deputaverat. Prædecessor ejus piæ memoriæ Theobaldus prædecessorum suorum elemosynas pietatis studio duplicaverat; Thomas vero liberali æmulatione etiam duplum illius studuit duplicare. Introducebatur ad mensam ejus quotidie pauperum magnus numerus; et præter illos qui ad mensam ingrediebantur alios tredecim pauperes omni die circa vesperam faciebat secretius introduci, singulisque eorum post pedum abluitionem et deosculatorem, post copiosam refectionem, quatuor argenteos largiebatur. Quod si quando forte propter majorem aliquam occupationem manibus propriis perficere impediabatur, per servientes suos impleri faciebat. Inferebatur ad mensam ejus quotidie ferculorum et potionum varia copia, ut per hoc et patriis moribus congrueret, et de reliquiis abundanter solaretur egenos. Varia etiam auri et argenti supellex mensam ejus et onerabat et honestabat; non quidem ad divitiarum ostentationem, sed pro more gentis et patriæ consuetudine. Ipse vero quantum ad se nihil nisi usum necessarium in hujusmodi reputabat: sic utens vasis aureis et argenteis quomodo fictilibus. Vestis adhuc ei erat in exterioribus ut prius, splendida scilicet, pretiosa

et honesta. Unde monachi Cantuarienses qui in cæteris quidem omnibus de felicitate vitæ et actuum illius in Domino gaudebant et gloriabantur, de hoc solo scandalizari et submurmurare videbantur: unus autem ex ipsis habens familiaritatem cum illo, secreta eum allocutione super hoc reverenter convenit: referens ei visionem quam cuidam monacho religioso et servo Domini super hac re demonstrare dignatus fuerat. Apparuit, inquit, Dominus cuidam religioso et sancto viro, dicens ad eum: Vade, dic archiepiscopo ut absque dilatione vestes mutet, nam quandiu id facere distulerit, me sibi placatum habere non poterit. Hæc audiens archiepiscopus motus est in lacrymas; propositum tamen suum ista sibi referenti monacho minime revelavit. Parvo itaque interjecto tempore vestes pretiosas et coloratas cum pellibus variis et peregrinis penitus a se abiciens, super cilicium quo ad carnem induebatur, pellicias agninas bysso tantum munda cooperatas induit; indesinenter satagens qualiter in conscientia apud Deum, et non in hominum æstimatione, religionis sibi meritum collocaret, et in exterioribus ecclesiastico ministerio conveniret. Amiciebatur quoque pallio pullo, id est nigro, parvi pretii solo tenuis defluente. Quod agninis pellibus munebatur. Vita igitur et veste religionisque et sanctitatis exemplo factus forma gregis ex animo, totum se ministerio, cui Deo vocante addictus erat, impendere firmiter apud se statuit. Quid autem venerandus antistes ageret et quomodo se haberet, regem latere non potuit: præsertim æmulis ejus, nam et ipsi non deerant, vitam illius curiosius explorantibus, et regi cuncta quamquam aliter renuntiantibus. Singularem namque eum et superstitiosum potius quam religiosum dicebant, tegisque animum subdolis et malignis delationibus vehementer sollicitabant. Rex autem callide dissimulabat: nolens eum inimicum lucrari gratis quem necdum in aliquo sibi contrarium expertus fuerat. Quoties vero occasio se offerebat, cum multa eum reverentia et honore excipiebat, multisque obsequiis et blanditiis demulcebat. Sciebat namque viri magnanimitatem et prudentiam, nolebatque ei propter clandestinas delatorum suggestiones præpropere adversari.

Contigit eo tempore in quodam celebri conventu ut Thomas ad clerum et populum, rege præsentem, sermonem faceret: fuitque ei sermo de regno Dei Christi quod est ecclesia et de regno temporalis: deque coronis eorumdem regnorum sacerdotali videlicet et regali: simul etiam de gladio spirituali et materiali. Cumque sub hac occasione de potestate ecclesiastica et sæculari multa mirabiliter disseruisset, erat enim facundissimus, rex ejus verba per singula notabat, intelligensque quod dignitatem ecclesiasticam cuilibet excellentiæ seculari longe immensum præferret, non æquo animo accepit. Sensit namque ex verbis illius quantum ab opinione sua archiepiscopus abesset:

cum ecclesiam nihil prorsus habere vel posse, A
 nisi quantum ipse ei indulgeret, persuasum haberet. Exhinc jam quæ in corde regis latebant qualiter in apertum prodierint, qualiter etiam venerandus antistes pro domo Domini se murum opposuerit: quantave constantia regio furori se pro tuendo ecclesiasticæ libertatis jure objecerit consequenter dicendum est. Tyranni namque, qui regnum obtinuerant, jura ecclesiastica annihilaverant penitus: quorum adhærens vestigiis rex iste Henricus totius ecclesiasticæ dispositionis et ordinationis summam sibi usurpaverat, nam et episcopatus et abbatias quibus volebat conferebat, jamque ipso præcipiente et constituyente, sicut populus sic sacerdotes et clerici indifferenter ad sæcularia judicia trahebantur.

Prima igitur occasio, qua archiepiscopi propositum et constantia regi innouit, talis fuit. Erat consuetudo in partibus illis ut rex ad abundantiorē cautelam et custodiam regni sui, per singulos comitatus regni, vicecomitem unum de fidelibus suis constitueret, consueverantque comites et barones eidem vicecomiti, regio videlicet ministro, duos solidos de singulis dimensionibus terræ suæ quas patrio nomine hidas vocant, annuatim ab hominibus suis facere dari; quatenus tali servitio et beneficio eos a gravaminibus et calumniis hominum suorum cohiberent: videns autem rex quod duo illi solidi de singulis hidis si in unum conferentur immensum efficere possunt cumulum, sunt namque plura hidarum millia, voluit eos suis usibus et rebus applicare. Quapropter convocatis apud Wodestocke episcopis et proceribus regni, cepit rex de præfata pecunia suis redditibus connumeranda verbum in medium proferre. Cumque ad hunc sermonem universi obmutuissent, solus archiepiscopus cum magna libertate satis modeste respondit: « Domine, inquit, non decet excellentiam tuam alienum beneficium ad tuos usus, retorquere, præsertim cum duo illi solidi, non necessitate nec debito, sed gratia potius tuis ministris conferantur. Nam si vicecomites vestri pacifice et modeste se ad homines nostros habuerint, libenter quidem dabimus: sin autem, non dabimus, nec cogi jure poterimus. » Ad hæc rex cum furore: « Per oculos, ait, Dei, protinus irrotulabuntur; tali verbo usus propter rotulos illos, in quibus regii redditus annotati continentur, sed tu ipse bene super hæc meæ voluntati assentire deberes. » Tunc archiepiscopus: « Per oculos, inquit, per quos jurasti, nunquam de terra mea me vivente dabuntur. » Sentiens igitur rex archiepiscopum sibi palam adversari, ægre nimis accepit.

Nec multo post tempore facta est iterum inter eos contentio vehemens, pro quodam canonico nomine Philippo de Broc, qui super interfectione ejusdem militis, a quibusdam fuerat impetitus. Is enim cum coram episcopo suo super objecto sibi homicidio sufficienter respondisset, et deficientibus in causa

adversariis, ipse ad innocentiam suam certius comprobendam se sacramento purgasset, iterum eum in causam revocare nitebatur quidam Simon, filius Petri, quem rex in partibus Pedefordiz, ubi idem Philippus morabatur, judicem constituerat. Philippus autem de causa jam finita et ordine judiciario terminato, iterum respondere noluit, præsertim ante laicam justitiam: quinimo ipsum Simonem pertinacius instantem cum indignatione a se repulit, multis eum afficiens conviciis et contumeliis. Rege itaque apud Londonias constituto, accessit ad eum memoratus Simon, retulitque ei omnia quæ sibi Philippus intulerat. Quibus auditis, rex in furiam versus, solito suo more per oculos Dei terribiliter jurabat, sic se habere convicia illa militi suo illata, ac si sibi ipsi intulisset Philippus. Quapropter absque mora eum judicari præcepit; archiepiscopus autem cum præsens esset, et hæc audiret: « Nequaquam, ait, ita fiet. » Nam clericorum judices laici esse non possunt. Quidquid autem iste vel alius quilibet de clero excesserit, in ecclesiastica debet emendari curia. Quapropter quidquid est illud quo rex læsum se queritur, vel miles ejus, Cantuariam veniat vel mittat, indeque plenam justitiam ex ecclesiastica auctoritate reportabit. Rex vero vehementer irascens et multa dicens, tandem, licet invitus quosdam episcopos et proceres ad diem sibi ab archiepiscopo constitutam Cantuariam transmisit, qui cum venissent, Philippum de veteri querela homicidii instanter impetebant. Cumque causam ecclesiastico judicio terminatam iterari non debere judicatum fuisset, ventum est tandem ad contumelias regio militi illatas. Quod cum Philippus minime inficiari dignaretur, erat namque vir magnus et de magno genere, adversarii ejus prosilientes in medium: « Judicium, inquit, de evidenti et non negata injuria postulamus. » Et cum Philippus se ad spontaneam satisfactionem offerret, nihilominus tamen eum judicari oportuit. Diffinitum est igitur ut Philippus per biennium præbandam suam in manu regis admitteret, et rex iterum de redditibus ejus quod vellet faceret; ipse vero ante militem, nudum se secundum morem patriæ satisfactorius offerret. Revertentibus autem qui missi fuerant et quod gestum erat conferentibus, rex honorem suum læsum sibi abjudicatum esse respondit. Episcopi vero cum se juste judicasse dixissent excepto quod Philippum ultra quam meruisset, pro pace et honore regis gravassent, rex magis inardescens: « Per oculos, ait, Dei, vos ipsi mihi jurabitis, quod verum expresseritis judicium. » Sed nimis longum erit, si per singula prosequi voluerimus, quæ vel a rege improbe vel ab archiepiscopo constanter dicta seu facta sunt: quapropter iis omissis, ad communem ecclesiæ causam accedamus.

Emersit igitur sermo super veterum regum abusionibus quas rex consuetudines regni dicebat, procurantibus et ad hoc ipsum regem enixius impellentibus archiepiscopi æmulis, Rogerio videlicet Eborac-

cense archiepiscopo; et quibusdam aliis filiis Belial, quos ad perturbationem sanctæ ecclesiæ antiquus hostis suscitaverat; convocatisque rex universis regni episcopis exigere cœpit ab eis ut consuetudines regis Henrici avi sui perpetuo observandas confirmarent. Venerabilis vero antistes Thomas, qui verbum istud futurum quandoque jamdudum præsen-
 serat, ad hæc regi respondit: « Ecclesia sancta a sanctis apostolis et apostolicis proceribus ab exordio fidei Christianæ edocta et instituta, consuetudines vitæ et disciplinæ Christianæ in eorumdem sancto-
 rum Patrum canonibus et decretis plenissime habet expressas; præter quæ nihil novum, Domine mi rex, expedit tibi, imo vel licet exigere, nec nobis concede-
 re. Si quidem nobis, qui licet indigni pro prioribus surreximus, non jam novas institutiones credere, sed veteribus humiliter obedire et reverenter indicitur. » — « Nequaquam, ait rex, expostulo; sed ea tantum quæ prædecessorum meorum regum tempo-
 ribus in regno constat observata, mihi quoque volo concedi, meisque temporibus observari. » Existit-
 runt et illis temporibus archiepiscopi tunc meliores et sanctiores; qui ista viderunt et consenserunt nul-
 lamque difficultatem vel controversiam de his ali-
 quam regibus sui temporis intulerunt. Ad hæc archie-
 piscopus: « Si qua, inquit, a pristinis regibus contra ecclesiasticæ institutionis cœnœm præsumpta
 sunt, et aliquanto tempore violenter timore regum
 observata, non consuetudines, sed abusiones dicendæ
 sunt: pravissimum usum abolendum potius quam
 propagandum Scripturæ testimonio edocemur. Quod
 vero sanctos illorum temporum episcopos tacuisse et
 non declamasse asseris, viderint ipsi quare tace-
 rint; erat enim forte tunc *tempus tacendi*; nulla ta-
 men nobis hoc eorum exemplo ingeritur auctoritas,
 qua in ecclesia nobis divina dispensatione commissa
 aliquid contra Deum et ordinem nostrum atque offi-
 cium fieri minime assentiamus. Verumtamen in qui-
 buscunque salvo ordine nostro voluntati tuæ et bene-
 placito concordare et consentire poterimus: paratos
 nos et obsequentes habebis. » Rex igitur furibundus
 et per oculos Dei suo more jurans: « Nulla, ait, pe-
 nitentia de ordine vestro fiet mentio, sed absolute et
 expresse meas mihi consuetudines concedetis et con-
 firmabitis. » Archiepiscopus vero nihil nisi salvo or-
 dine suo et jure ecclesiastico se aliquando concessu-
 rum nihilominus constanter et libere asseruit. Rex
 igitur ad præsens ab intentione sua frustratus, post
 non multum temporis apud Northamptoniam positus
 archiepiscopum ad se vocavit, volens ejus animum
 tentare, si quo forte modo eum posset flectere, et
 ad suam voluntatem inclinare. Cumque archiepis-
 copus ad locum appropinquasset et ejus adventus in-
 notuisset regi, nescitur qua calliditate rex quosdam
 obviæ misit qui dicerent: « Rex in oppido cum
 multis est positus, et tu nihilominus cum maxima
 multitudine advenisti: nec sufficit locus ut ambos
 vos capiat, quapropter mandat rex, ut hic eum ex-
 spectes. Adest enim ipse tecum locuturus. » Cumque

A in agrum divertisset pontifex, statim sine mora rex
 advenit, cui occurrens debito eum salutationis ho-
 nore prævenire curavit. Sed cum propter lascivien-
 tium equorum, quibus insidebant, hinnitus et recal-
 citationem ad se invicem accedere non possent, tan-
 dem mutatis equis in parte seorsum simul ambo
 constituerunt. Tunc rex ad episcopum ita exorsus
 est: « Nonne, ait, ego te ex humili et paupere in ma-
 ximum honoris et excellentiæ culmen extuli? Pa-
 rumque id mihi visum est, nisi et patrem regni te
 constituerem, et etiam mihimet ipsi te præferrem.
 Quomodo ergo tot beneficia, tantaque meæ circa te
 dilectionis indicia, omnibus notissima, tam subito
 tibi a mente excidere potuerunt, ut non solum in-
 gratus, verum etiam in omnibus contrarius mihi
 existas? » Et episcopus: « Absit! inquit, domine
 mi: non sum inmemor beneficiorum tuorum, quæ
 non quidem simpliciter tu, sed Deus tribuens omnia
 per te mihi conferre dignatus est: quapropter absit
 ut ingratus vel in aliquo voluntati tuæ contrarius
 existam, dummodo tu divinæ voluntati concordem.
 Scit enim dignatio tua quantæ fidelitatis tuæ ex-
 stiterim, a quo temporalem tantum præstolabar re-
 muneracionem: quanto magis omnipotenti Deo, a
 quo et temporalia bona accepimus et æterna spera-
 mus, fidele et sincerum ministerium nos exhibere
 necesse est. Tu quidem es dominus meus, sed ille
 et meus et tuus est Dominus, cujus voluntatem præ-
 terire ut tuæ acquiescam, nec tibi nec mihi expedit:
 in tremendo namque ejus examine ambo ut unius
 Domini servi judicandus sumus, ubi neuter nostrum
 pro altero poterit respondere, sed unusquisque se-
 cundum facta sua, excusatione cessante, recipiet.
 Est enim dominis temporalibus obtemperandum, sed
 non contra Deum, dicente beato Petro: *Oportet obe-
 dire Deo magis quam hominibus*. Tunc rex ad ista:
 « Nolo, inquit, mihi modo ut sermocineris: nonne
 tu filius fuisti cujusdam rustici mei? » Et archie-
 piscopus: « Revera, inquit, non sum atavis edi-
 tus regibus, sicut nec beatus apostolorum princeps
 Petrus: cui Dominus claves regni cœlorum et totius
 Ecclesiæ principatum conferre dignatus est. » Ve-
 rum est, ait rex, sed ille pro Domino suo mortuus
 est. » Venerabilis vero antistes respondit: « Moriar
 et ego pro Domino meo, cum tempus advenerit. »
 Tunc rex: « Tu, inquit, nimis assigeris et inniteris
 scansilibus tuis. » Et archiepiscopus: « In Domino,
 ait, confido et innitor. Quia *maledictus homo qui
 spem suam ponit in homine*. Verumtamen quidquid
 tu mihi dixeris et ego tibi respondero: ad honorem
 tuum et beneplacitum, salvo ordine meo, sicut olim
 ita et nunc paratus sum. Sed et super his quæ ad
 honorem tuum et salutem animæ tuæ spectant, ego
 potius consulendus eram, quem toties tam fidelem
 et utilem in consiliis expertus es, quam illi qui quasi
 sub obtentu honoris tui de me, qui eos non læsi,
 gratuita succensi invidiæ flamma vindictam expetere
 satagunt. Quem enim infra sacros ordines adhuc
 constitutum fidelem tibi fuisse ut credo non negabis,

multo magis sacerdotii officio sublimatum me tibi in omnibus fidelem æstimare debuisti. » Cumque multa verba salubria dilectionis et fidei plena archiepiscopus perorasset, rex tamen vehementer instabat; ut verbum illud, scilicet salvo ordine nostro, penitus omitteretur. Quod cum minime obtinere potuisset, archiepiscopo inflexibiliter in sententia persistente, ab invicem discesserunt.

Per idem tempus Arnulfus Lexoviensis episcopus mari transito ad regem quem offenderat venit, cupiens si quomodo posset eum sibi placabilem facere. Cumque per omnia eum demulcens ei placentia loqueretur, etiam contra archiepiscopum ei consilium dare non timuit; dixit enim ad regem: « Controversia quæ inter te et archiepiscopum vertitur difficilis est et vix finienda; impossibile namque est archiepiscopum tibi subijci, quandiu unanimes et in eadem cum eo sententia suffraganei sui fuerint, quapropter si omnes ab eo avellere non poteris, saltem aliquos de numero eorum tibi quoquo modo applicare satage: quo facto non facile pars reliqua subsistere poterit. Faventibus enim tibi episcopis, si solus archiepiscopus in sententia pertinaciter perstare decreverit, non solum non obtinebit, verum etiam suspensionis litteras, procurantibus episcopis, facile incurrere poterit. » Tali igitur instructus rex consilio, vocavit ad se apud Glocestriam quos flexibiliores inter episcopos credidit, Rogerium scilicet Eboracensem et Lincolnensem episcopum, egitque cum eis quatenus ad confirmationem suarum consuetudinum parati essent, promittens se nihil ab eis exacturum, quod eorum ordini obviaret. Cesserunt itaque illi duo spondentes regi secundum quod voluit. Nec multo post rex Hilarius Cicestrensem episcopum suæ parti sociavit. Quo facto, venit idem Hilarius ad archiepiscopum apud Lenthiam; cepitque ei suadere quod persuadere non potuit, quatenus scilicet regi ad voluntatem faveret, asserens ei multum hoc per omnem modum expedire. Erat namque mirabilis in litteratura, habens verba multa polita et suasoria. Archiepiscopus vero qui non quæ sua sed quæ Jesu Christi erant quærebat: « Absit, inquit, ut tali commercio terreni regis gratiam redimam, exponendo ei Ecclesiam quam rex cælestis sanguine proprio comparavit: tu autem et Lincolnensis cum Eboracense, utinam non impune, venales, vel potius quantum in vobis est irritas feceritis ecclesiasticas sanctiones: promittentes regi vos ejus consuetudines servaturos, quæ sanctorum canonibus Patrum usquequaque noscuntur adversari. Verumtamen quidquid nos feceritis vel alii forte sint facturi, me in tam horrendam præsumptionem nunquam consortem habebitis. » Ad hæc Hilarius: « Rogo, inquit, te quod est hoc tam horrendum tamque grande malum; quod tu solus in hoc facto vides et intelligis: et nullus alius tecum? Rogavit nos rex ut in hoc verbo ei deferremus, eumque honoraremus; promittens etiam ipse nobis, quod nunquam hujus concessionis causa aliquid a nobis exquireret quod

A ordini nostro resultet. Estne, quæso, hoc tam grande malum tamque enormis præsumptio dominum suum honorare? » Et archiepiscopus: « Non est enim malum, quinimo bonum, dominum suum honorare, dummodo Deus non inhonoretur et Ecclesia sancta non perturbetur, neque periclitetur: illud autem certissime noveritis: quod rex a vobis exigit quidquid ei promisistis; vos autem ut stet in promissis eum cogere non potestis. »

Per idem tempus Alexander papa in Francia constitutus misit quemdam Cisterciensis ordinis abbatem, nomine Philippum de Eleemosyna, virum magni nominis et auctoritatis, qui inter regem et archiepiscopum pacem, si possibile esset, reformaret. Venit igitur abbas ille in Angliam et sociatis sibi episcopo Herefordense, nomine Roberto de Melidino, et Joanne Windochinense comite, venit ad archiepiscopum apud Herges, porrexitque ei idem Philippus litteras apostolicas, et quorundam cardinalium scripta, in quibus continebantur verba exhortatoria, quatenus se modestum et flexibilem archiepiscopus regis voluntati exhiberet. Commemorabatur etiam in litteris illis, quod status ecclesie propter schisma turbidus esset et nubilus; cavendumque summo opere ne tempestas, quæ caput Ecclesie occupaverat, etiam per membra diffunderetur et ita nulla esset requies. Esse interim necessariam dispensationem, nec expedire ad præsens ut ecclesiastici rectores debitam severitatem exercerent; sed multa dissimulanda, nonnulla etiam pro tempore essent toleranda. Multa in hunc modum continebantur in litteris illis quibus episcopus et abbas una cum comite socio viva voce addiderunt, quod rex eos in verbo veritatis certificasset se nunquam ab archiepiscopo quidquam requisitum quod ordini ejus vel voluntati contrarium foret. Regem vero hac intentione tam pertinaciter egisse, eo quod turpe ei videretur ab archiepiscopo vinci, nec posse ab eo extorquere, ut saltem verbatenus eum honorare dignaretur. Rogabant igitur et suadebant memorati viri modisque omnibus instabant, quatenus una cum eis archiepiscopus ad regem veniret, et simplici tantum verbo ejus voluntati faveret, omisso verbo illo, scilicet *salvo ordine nostro*; quo facto, plenam apud regem pacem et gratiam tam ipse quam universa Ecclesia Anglicana consequeretur, et mentio quæ de consuetudinibus fuerat regni introducta, penitus in perpetuum aboleretur. Erat autem idem abbas de Eleemosyna tantæ opinionis et famæ, cui facile fides haberetur, unde archiepiscopus, tam domini papæ et cardinalium consiliis quam ipsius abbatis et eorum qui cum illo venerant verbis inductus et promissionibus credulus, una cum eis ad regem profectus est. Inventam autem regem apud Wodestochæ venerabilis pontifex cum multa mansuetudine allocutus est, proponens ei in exemplum sanctos regni illius reges, quos non solum fides et pietas Deo fecit acceptos verum etiam plures ex eis martyrii corona reddidit gloriosos: exhortans et suppliciter rogans, ut ei ipse eorum

exemplis et vestigiis inhæreret, tyrannorumque deletis et in perpetuum damnatis abusionibus sanctorum regum meritis et collegio sociari satageret. « Et ne quid, ait archiepiscopus, offendiculum bonæ voluntati tuæ, si eam tibi Dominus inspirare dignatus fuit, per me opponi videatur, scias quod consuetudines regni bona fide servabo, tibi que de cætero, ut decet et iustum est, per omnia in bono obtemperans ero. » Tunc rex ad eum: « Omnibus, inquit, notum est quam pertinaciter te in hoc verbo exhibueris, et quantum honorem meum in tua contradictione læseris; quapropter, si ut decet me honorare decrevisti, coram omnibus emendari et recognosci necesse est, quod honori meo in hac parte detractum ab omnibus scitur. Mitte igitur et convoca episcopos et abbates et cæteros omnes qui in ecclesiasticis honoribus sunt eminentiores; et ego ex parte mea convocabo universos majores regni, quatenus in presentia et audientia omnium ad honorem meum sermo iste recognoscatur. » Cum igitur tempore statuto universi apud Clarendonam convenissent, cœpit rex instanter exigere ut sermo predictus de observatione consuetudinum ab archiepiscopo recapitularetur. Sentiens autem archiepiscopus rem longe distare ab eo quod ab abbate de Eleemosyna acceperat: regemque a pravo proposito in nullo mitigatum, sed magis stabiliendis et confirmandis consuetudinibus illis execrandis toto animo insistere, elegit potius de se solo regi occasionem calumniæ dare, quam ecclesiæ causam penitus in discrimen mittere. Dissimulavit itaque ^C avertit se quantum potuit, ne aliquam ibi recognitionem seu concessionem faceret. Quod postquam regi innotuit, amens et furibundus effectus, non jam consilio sed gladio utendum decrevit, alterum Saulem se sacerdotibus Domini mox futurum comminans, nisi voluntas sua statim sine mora impleteret. Nec mora, fit nota regis indignatio: turbantur mox omnia: tumultuantur universi, discurrunt regii clientes; prætendentes facies solito truculentiores: seseque jam ad facinus quasi præparantes. Fiunt illico omnia horrois et formidinis plena. Nec mirum, ira enim regis sicut rugitus leonis. Stant interim sacerdotes Domini, quasi grex paratus ad victimam, pavidi nimis et tristes: solus archiepiscopus persistens vultu hilari et iuvando eos consolabatur, dicens talia decere veros Ecclesiæ sacerdotes; qui autem in clero qui convenerant obscurioris erant famæ et nominis, huc illucque diffugiunt subducentes se periculo quod jam jamque imminere timebant. Erant autem inter episcopos duo episcopi Joscelinus scilicet Salesberiensis et Rogerus Norwicensis, quos rex diversis de causis exosos habebat. Norwicensis enim qui regem consanguinitatis propinquitate contingebat, nec ætate esset juvenis, religiosus tamen et ecclesiasticæ libertatis æmulator erat, regemque de excessibus suis liberius increpando ejus iram incurrerat; Salesberiensis vero aliis de causis eum

^A sibi infensum reddiderat. Hi duo ad archiepiscopum accedentes voce flebili ut eorum miseretur rogare cœperunt dicentes quod nisi ipsa die plenam cum rege pacem faceret, etiam si forte aliis parceret, sibi minime parcendum quin occiderentur. Archiepiscopus vero timiditati et pusillanimitati eorum blanda consolatione occurrens in sententia permansit immobilis. In ipsa hora accesserunt ad eum duo comites de majoribus et de nobilioribus regni, Willelmus videlicet Leicestrensis et Reinaldus Cornubiensis avunculus regis, monentes et rogantes obnixè quatenus sui ipsius et eorum qui cum ipso adveniant miseretur dicentes regem vehementissime iratum et commotum atque ad ultionem sui contemptus jam exerto gladio paratum. « Dum etiam, inquit, qui amici et fideles tui sumus ut miserearis obsecramus, quia nisi hodierna die regi plenarie satisfeceris, scelus inauditum propriis manibus necessitate inevitabili explere nos convenit. » Et archiepiscopus: « Non est, inquit, magnum nec inauditum si pro ecclesiasticis sanctionibus nos occumbere contingat, cum hoc nos innumera sanctorum turba et verbo docuerit et exemplo: Domini tantum voluntas fiat. » His itaque repulsis et recedentibus, accesserunt ad eum duo templarii qui et ipsi secundum modum suum magni erant nominis et opinionis, quorum unus dicebatur Richardus de Hastings magister Templariorum totius regni, alter vero vocabatur Hostes nihilominus et ipse in curia nominatissimus. Isti duo ante archiepiscopum steterunt: et ita cum singulibus et lacrymis eum allocuti sunt: « Quare, domine, ita inexorabilis es in causa sanctæ Ecclesiæ, quæ hodie procul dubio grave et hactenus inauditum est passura discrimen, nisi voluntas regis fuerit adimpleta? Certissime enim scimus quod rex nec artem nec dolum erga te cogitat, sed grave nimis et intolerabile ei videtur, si in hoc verbo visus fuit a te superari; quapropter modis omnibus rogamus, et bona fide monemus et consulimus ut regi verbo tenus satisfacias: nunquam mentionem auditurus de cætero de consuetudinibus illis, quas quantopere refugis et detestaris, sed mox ut regem in communi audientia verbo tantum honoraveris, omnis indignatio et inimicitia obliterabitur; et plena pax et dilectio inter te et ipsum reformabitur. Hæc tibi in verbo veritatis fideliter promittimus et de hac re nosmetipsos fidejussores et obsides damus: animasque nostras æternæ damnationi obnoxias obtestamur, si rex a te deinceps contra voluntatem tuam vel ordinem tuum aliquid requisierit. » Motus itaque archiepiscopus eorum fletibus verbisque cum tanta protestatione prolatis, videns etiam regem cum suis ad scelus cædisque patracionem paratum: collocutus prius cum episcopis super his quæ audierat: una cum ipsis ad regem accessit et ita ei locutus est: « Si de jure proprio, domine mi rex, inter nos controversia verteretur, statim absque ulla contradictione dicto citius me vestræ voluntati

cessisse noveritis; nunc vero cum de ecclesiasticis negotiis nobis interim, Deo auctore, commissis sermo quidem gravis et periculosus mutuo ventiletur, non debet excellentiæ tuæ mirum vel indignum videri si in Dei causa aliquantulum scrupulosior fuerim, sciens quod redditurus sim ei rationem villicationis meæ, qui non parcat delinquenti. Jam vero de prudentia et mansuetudine tua spem habens meliorem libenter ad postulata consensio consuetudinesque regni bona fide me servaturum dico. » Vix verbum de ore pontificis exierat et rex alta voce respondit : « Audistis universi, quæ mihi archiepiscopus sui gratia concesserit, restat nunc ut episcopi, ipso imperante, idem faciant. » — « Volo, ait archiepiscopus, ut sicut ego ita et ipsi honori vestro satisficiant. » Tunc surgentes episcopi annuerunt. Solus Jocelinus Salesberiensis episcopus communiter cum aliis non assensit, sed residentibus aliis, quæsiit ab archiepiscopo utrum id ipsum facere deberet, dicente vero archiepiscopo sic oportere, assensit. Movens autem rex caput, impropèravit Salesberiensi, qui semper contrarius sibi exstitisset. Archiepiscopus itaque, quamvis secundum quod a memoratis templariis audierat controversiam terminatam æstimaret, adhuc tamen trepidus et velut in pendulo constitutus, rei exitum præstolabatur incertus. Ait igitur rex : « Ad omnium credo pervenisse audientiam, concessum mihi esse ab archiepiscopo et episcopis, ut leges et consuetudines regni mei de cætero firmiter teneantur et observentur. Ne igitur deinceps inter nos iteretur contentio vel contradictio; surgant prudentiores et antiquiores procerum et foras cum clericis meis egressi recorderentur legum et consuetudinum avi mei regis Henrici, easque diligenter conscriptas mihi cum omni celeritate afferant. » Nec mora factum est ut imperavit, consuetudinesque descriptas et in medium allatas jussit rex legi. Quibus lectis, dixit iterum rex : « Ecce hæc sunt quæ mihi concessa sunt. Quapropter ne deinceps super his quæstio oriatur, vel nova forte emergant placita, volumus ut archiepiscopus his sigillum suum appendat. » Ad hæc archiepiscopus. « Per Deum, inquit, omnipotentem nunquam, me vivente, sigillum meum his apponetur. » Tunc ad aliud commentum se clerici et officiales regis convertunt. Chirographum, rege jubente celeriter efficiunt; quod per medium juxta morem scindentes : partem unam archiepiscopo porrigunt. Et archiepiscopus : « Accipio quidem, inquit, non tamen vel consentiens vel approbans, sed ad cautelam et defensionem Ecclesiæ, ut videlicet hoc indicio cognoscamus, contra quæ nobis agendum sit. Cognitis namque laqueis et muspulis quæ nobis obtinentur, cautiore Deo annuente erimus. » Illis dictis, iratus surrexit et abscessit. Et quamvis ad liberationem cleri qui convenerat, ita fieri necessarium fuit; archiepiscopus tamen de excessu suo, quo quidem deceptus deliquerat, consolationem non recipiens, gravissimam sibi metipsi prenitentiam indixit; seque ab officio altaris suspendit,

A donec missis ad papam Alexandrum nuntiis qui ei rei gestæ ordinem et modum intimarent, ab eo absolutionem mereretur. Admiratus etiam dominus papa zelum illius et constantiam, litteras consolatorias honoris et dilectionis plenas ei transmisit.

Post hæc venit ad regem apud Porcestriam Rotroldus Ebroicensis episcopus, cupiens inter regem et archiepiscopum pacem et concordiam reformare. Rex autem, uno modo tantum possibile esse respondit, si videlicet tam ipse quam archiepiscopus impetrare possent quatenus dominus papa bulla propria consuetudines suas roboraret et confirmaret. Accessit itaque Ebroicensis episcopus ad archiepiscopum rogans instantèr et consulens quatenus domino papæ super hoc negotio scriberet. Archiepiscopus vero, cavens ne aliquam justam malignandi occasionem daret regi, sciensque certissime preces suas quantum ad effectum nihil profuturas regi, scripsit et rogavit apostolicum super confirmatione consuetudinum juxta regis et episcopi voluntatem. Dominus vero papa, intelligens petitionem illam non de voluntate sed de necessitate processisse, abnuvit illico, et legatos qui ad hoc missi fuerant ab spe impetrandi repulit. Quod ubi regi innotuit, vehementiori indignatione accensus, crebra cum suis agebat consilia, quid sibi agendum esset : visum est ei tandem, quod si legationem Angliæ Rogerio Eboracensi archiepiscopo, beati viri æmulo a domino papa obtinere posset, facile archiepiscopum posse subjugari et consuetudines suas firmiter stabiliri. Duos igitur ex clericis suis, Joannem scilicet de Oxenefordia, et Gaufridum, cognomento Ridellum, pro obtinenda legatione ad dominum papam direxit, quos dominus papa nec auditu dignos æstimavit, dicens : « A tempore beatissimi papæ Gregorii, quo procurante gens Anglorum fidem Christi suscepit, nusquam legitur vel recolitur usque ad præsens Cantuariensem ecclesiam Eboracensi fuisse subjectam; et idcirco a nobis minime fieri debet, quod prædecessores nostros necdum fecisse cognoscimus. Constat namque Cantuariensem Ecclesiam dignitate et primatia cæteras regni illius ecclesias antecellere; justumque non esse ut quæ prima est secundaria efficiatur; Joannes autem de Oxenefordia, magna fretus calliditate, D flexis ante papam genibus, juravit quod nisi rex in reditu eorum de petitione sua gauderet, archiepiscopum procul dubio periclitari de vita. Timens autem dominus papa suspectamque nimis habens regis malitiam, necessaria usus pro tempore dispensatione, legationem ipsi regi contulit, ita tamen quod nec Eboracensi eam assignare, nec aliquem legationis auctoritate posset gravare. Litteras namque alias secreto direxit in Angliam : quæ mox regem legatione spoliarent, si potestate legationis uti vel quemquam gravare tentasset. Rex autem litteras, quibus ei legatio conferebatur, accipiens, hujusmodi legationem non multipendit; litteras tamen ipsas multis ostendit, seque legatum innotuit, ut archiepiscopum de sua legatione terreret. Tandem vero cum aliquan-

diu litteras illas inutiliter detinuisse, missis nuntiis A
legationem domino papæ cum indignatione reddidit,
et litteras ipsas ei remisit. Post hæc rege Ecclesiam
et ecclesiasticos viros solito acrius infestante, et archiepiscopo nihilominus constanter resistente inten-
tor mali diabolus querelam gravem adversus Eccle-
siam suscitavit, officialibus namque regis cuncta
infatigabiliter pugnantis et sollicitius investigan-
tibus, reperti sunt quidam de clero diversorum cri-
minum rei, quos tenentes vinculis et carceribus
mancipaverunt. Erant autem quidam ex eis sacer-
dotes; alii vero diaconi et diversorum ordinum cle-
rici, quos constabat in furtis et homicidiis esse sce-
leratissimos. Sed nec tales laicæ justitiæ deferendos
venerandus antistes arbitratus est, quinimo eos a
rege constanter requirebat sub anathemate interdi-
cens; alii vero eos extra curiam ecclesiæ judicare
presumeret. Se autem paratum ut eos ad justitiam
exhibeat, et de eis secundum canones et decreta
judicet. Tandem necessitate rationis compulsus rex
consentit ut redderetur quidem archiepiscopo, ita
tamen ut et ipse eos meritis exigentibus exordina-
tos suis ministris condemnandos traderet. At vero
archiepiscopus duplici modo non eos esse puniendos
dicebat, sed sufficere eis ad penam si exordinaren-
tur. Si autem postea in sceleribus deprehenderentur,
tunc ad se non pertinere quo eos iudicio condem-
naret. Diu diversisque modis pertracta est hæc con-
tentio, sed brevitatis causa plura narrare vitamus.
Tandem cum rex et archiepiscopus cum multitudine
episcoporum et procerum de ipsa querela cognitari
convenissent, intelligens rex beatum virum de jure
ecclesiastico flecti omnino non posse, iratus minari
ei cepit, dicens: « Ego te humiliabo, et restituam
te in loco ubi te inveni. »

Dumque in dies singulos vexationes et gravamina
intolerabilia circa Ecclesiam Dei multiplicarentur,
nec esset jam spes ulla quietis et pacis, necessarium
æstimavit venerabilis pontifex dominum papam, qui
tunc temporis in Francia morabatur, super his con-
sultare. Et parata paucis scientibus profectione et
navigio, apud Romenellum mare ingressus est. Et
cum jam magnum maris spatium emensus fuisset,
locuti sunt ad invicem seorsum nautæ, dicentes: Quid
est quod agimus? Inimicum regis, quem usque ad
mortem odit et persequitur, de manibus illius educi-
mus, et putamus hoc regem posse latere? Nequa-
quam; quapropter certum est nos contra animas
nostras agere. Accesserunt itaque ad archiepisco-
pum, dicentes difficilem nimis esse navigationem
ventumque contrarium, nec posse se sine discrimine
vitæ terram quam petebant attingere; archiepi-
scopus vero, audiens imminere periculum, et non
intelligens dolum, jussit se reponi ad litus unde
exierat.

Nec multo post tempore, ut pervenit sermo ad re-
gem quod archiepiscopus mare ingressus fuisset et
pene transfretasset, vehementer anxius est, time-
bat namque ne forte, si ad dominum papam posset

A attingere, ipsum anathemati et regnum ejus inter-
dicto supponeret. Quapropter ne simili de cæ-
tero casui subjaceret, edicto publico prohibuit, ne
quis sine litterarum suarum testimonio transfreta-
ret. Fecerat quoque rex novam constitutionem suis
ut sibi videbatur utilitatibus profuturam: unde uni-
versi proceres regni valde gravati submurmurando
ingemiscebant. Erat autem hujusmodi quod consti-
tutum fuerat: « Si quis in curia cujuslibet domini
sui causam habens, videret post primam vel secun-
dam placiti diem non sibi in negotio prospere nec
pro voto succedere, licebat ei inde recedere et ad
superioris domini curiam convolare, prius tamen ter-
tia manu præstito sacramento: quod injuste a causa
dilatus fuisset. » Contigit autem ut quidam ex pro-
ceribus terræ nomine Joannes Marescallus causam

B habens in curia domini sui archiepiscopi, hujus no-
vellæ constitutionis auctoritate sacramento dato ju-
diciū declinasset; et a curia recessisset, sacra-
mentum tamen non secundum morem super textum
evangeliorum vel sanctorum reliquias præstiterat,
sed super libellum quem troparium vocant, quem
ipse sibi ex industria exhiberi fecerat. Hic itaque
Joannes, sciens omnem occasionem adversus archie-
piscopum regi fore gratissimam, accessit ad eum
asserens archiepiscopum sibi in justitia defuisse:

« Et ideo, inquit, quia fidelis vester sum; » rex igitur
accepta occasione archiepiscopum vocari jussit,
mandans ut responsurus occurreret de eo quod pro-
ceri suo justitiam in curia sua denegasset, sed archie-
piscopus cum forte eo tempore infirmaretur et

C ad diem nullatenus occurrere posset, rationabilem
impossibilitatis suæ excusationem regi mandare cu-
ravit. Rex autem, qui occasiones malignandi adver-
sus eum quærebat, nullam excusationem quin ades-
set se recipere respondit. « Adhærens igitur huic
occasioni rex edicto publico convocavit episcopos et
abbates, comites etiam et proceres, et omnes offi-
ciales suos, omnesque omnino qui alicujus essent
auctoritatis vel nominis: die designato apud Nor-
thantōnam. Mandavit etiam ut archiepiscopus oc-
casione remota adesset. Vir igitur Domini, die præ-
fixa instante, cum ad locum prænominatum appropin-
quasset, servientes sui qui eum illic præveniant

D obviam ei fuerunt dicentes regios ministros omnia
hospitia illius occupasse. Siquidem et hoc ipsum rex
fieri præceperat in contumeliam ejus. Substitit igitur
venerandus antistes, mandavitque regi se ultra non
progressurum, quo usque hospitia sua vacuari jus-
sisset. Nec mora jubente rege supervenerunt ser-
vientes archiepiscopi, regiamque familiam cum fe-
stinatione de hospitibus suis expulerunt. Ipse vero
archiepiscopus in monasterio Sancti Andree apud
monachos hospitatus est. Facto mane, venit ad cu-
riam; capellamque ingressus ubi rex missam audi-
turus advenerat, eum cum debito honore salutavit.
Sedensque juxta regem humiliter et reverenter ei
suggessit quatenus ad dominum papam excurrendi
sibi licentiam concederet: habenti multa de con-

silio animæ suæ ei intimanda. Abnuī illico rex, A impossibile fore dicens ut vel ipse vel alius transfretandi licentiam impetraret. Confestim itaque post missam jubet rex archiepiscopum respondere de eo quod ab eo vocatus ad diem non venisset. Respondit archiepiscopus regretitudine detentum se fuisse, excusationemque suam tempore competenti juxta morem regi denuntiassse; rex autem excusationem illam audisse quidem se non negavit; sed eam minime se recepisse respondit: quapropter eundem contemptu statim judicari imperavit. Egre diuntur mox ad iudicium, quos rex ipse iudices ex nomine designabat, decernuntque ut archiepiscopus quingentas argenti libras hac de causa regi persolvat. Quod ubi relatum est archiepiscopo, iudicium sprevit et irritum habuit, dicens se neque a rege neque a quoquam eorum judicari posse, cum ipse iudicandi de eis a Domino potestatem accepisset, non illi de ipso. Cum igitur quod injuste iudicatum fuerat, iuste dissolvere et cassare vellet, fregerunt eum sermonibus et suasionibus quidam ex amicis et familiaribus suis, dicentes: « Regem pro causa pecuniaria non esse gravius exacerbandum; si forte vel sic quod volebat assecutus quiesceret. » Acquiescens igitur vir Domini eorum consiliis, statim quod iniquo iudicio exactum fuerat, fidejussoribus præstitis solvit, sed nihil ad mitigationem tyrannici furoris profuit. Nam statim incontinenti alia querela inducitur de supradicto Joanne Marascallo; cui incuria archiepiscopi justitia negata fuisse dicebatur. Respondit archiepiscopus se ei in justitia nequaquam defuisse, sed ipsum Joannem in causa sua penitus Jecesse, jusque suum probare non potuisse, præstitoque contra morem sacramento iudicium subterfugisse. Cumque in hac causa se nihil obtinere posse rex intellexisset, ad alia se convertit. Tempora administratæ cancellariæ revocantur in medium, et ut rationem de reditionibus regni archiepiscopus reddat, rex instantem exigit. Negat archiepiscopus ad ista respondere se debere cum ab iis omnibus liber prorsus et expeditus tempore electionis suæ a curia secessisset. Variis igitur querelis et contentionibus protrahitur dies in vespertum, rege satis improbe instante et a proposito non recedente. Tandem mandavit ei rex ut occasione cessante mane paratus esset ad objecta respondere; vir autem Domini præter jus esse et morem respondit ut quis in crastino de recenti querela placitare cogeretur. Sed rex a proposito non recedens terribilibus vocibus et juramento negotium jam ultra differri non posse vociferabatur. Soluta tandem concilio revertantur singuli ad propria. Sed et archiepiscopus in suo se recepit hospitio. Et ecce citra noctis medium cum vir Domini post anxietatem et laborem quieti se dedisset, vehemens dolor lateris eum arripuit, et tota nocte illa cum diei sequentis parte non modica graviter afflixit. Frequenternamque ita pati consueverat, sed et tunc propter anxietatem, quam die præterita pertulerat, dolor ejus renovatus est. Mane facto, mittuntur a rege qui archiepiscopum

vocent ad curiam; responsum est quod infirmaretur et venire non posset. Quo audito, rex solito terribilius intonans oculos Dei crebro jurabat, nullam occasionem vel agritudinem ei ad excusationem proficere, quominus sui præsentiam exhiberet. Iterum igitur mittuntur a rege duo comites, Robertus scilicet Leicestrensis et Rainaldus Cornubiensis, qui eum ad curiam venire compellant: vel certe utrum vere ægrotet cognoscant. Putabat enim rex quod dilationis causa agritudinem simulasset. Venientes autem ad eum præfati comites cum multa reverentia mandatum regis ei intimaverunt; sed cognoscentes dem gravi dolore vexari usque in crastinum ei inducias concesserant. Quibus ait archiepiscopus: « Ne quis me occasiones vel subterfugium ex industria querere æstimet; cras, Deo volente, si vita comes fuerit, præsens adero; etiamsi serotino me gestari oportuerit. » Ipso autem die intimatum est beato viro a duobus proceribus qui amici et fideles ejus erant, occulti autem propter metum regis, quod si se in crastino curiæ committeret; procul dubio capiendus esset, et aut oculis erutis aut lingua abscisa carceri mancipandus, aut certe ex abrupto occidendus. Hoc audiens vir sanctus totus, nec mirum, intremuit, surgensque sine mora ante altare se prostravit, ibique cum multa devotione et lacrymis diutissime stratus permanens omnipotenti Domino causam Ecclesiæ suæ attentius commendavit. Inde consurgens misit et vocavit quemdam virum religiosum, cum quo cum super statu suo collocutus, tale ab eo consilium accepit. « Mane, inquit, consurgens antequam procedas ad curiam, missam de beato Stephano protomartyra solemniter celebrabis. Ibi que ante sacrosancta Dominici corporis et sanguinis mysteria, causam sanctæ suæ Ecclesiæ Jesu Christo commendabis simulque etiam et beatæ semper Virginis Mariæ et ipsi beato Stephano necnon et beatissimo apostolico nostro Gregorio et sancto Ellego cæterisque sanctæ Cantuariensis Ecclesiæ patronis: quod cum feceris confidens de Dei misericordia et sanctorum patrocinis securus procede, et fiducialiter age: neque enim tuum est negotium sed Dei, qui tibi in omnibus aderit. Scimus enim quam facillime te ab omni periculo eximere possis, si velis, et non solum regem non habere iratum, verum etiam placatum et ad omnes voluntates tuas paratum. Unde indubitanter credimus divinum tibi non defuturum favorem; cuius intuitu humanam gratiam contempsisti. »

Fecit itaque vir Domini secundum quod vir ille religiosus eum docuerat: et celebrata summo mane cum devotione missa de beato Stephano pontificali-busque sicut erat indutus, ad curiam ire disposuit; sed dissuadentibus suis sacerdotalia deposuit ornamenta. Solito itaque modo indutus stolam tantum collo et humeris innexuit, sicque ascenso equo et cruce, quæ eum semper ex more præcedebat, in manu dextera sumpta, cepit velle ire. Cumque multos haberet socios mensæ, habebat enim in comitatu ferme quadraginta clericos in litteratura nominatis-

simos : exceptis capellanis suis et viris religionis, A vix tamen in hoc articulo inventus est unus qui eum sequeretur. Egreddenti itaque de hospitio suo et dextera manu crucem bajulanti, occurrit plebis innumera multitudo, quorum pars maxima ubertim lacrymas fundens benedictionibus illius se supplex humiliabat. Eratque videre pium et miserandum spectaculum, qualiter plebs devota pastoris sui quasi ad agonem properantis vestigia stipatim ejulando prosequeretur. Jam enim apud universos percrepauerat quod ipsa die easset occidendus; appropinquante itaque eo ad castellum, in quo rex erat, cum magna festinatione portæ patuerunt, nec minori celeritate eo ingressu iterum clausæ sunt, et vectibus immissis diligenter obseratæ. Prosiluit mox et concurrunt undique procerum et militum, diversique generis hominum multitudo, quæ convenerat, spectatura virum inestimabilis constantiæ; ipsis etiam qui ei inimicabantur, obstupescuntibus et mirantibus ejus magnanimitatem atque confidentiam. Ad januas igitur regis equo desiliens, uno tantum se comitante clericis, crucem manu bajulans, aulam ingressus pertransiit, et in ulteriorem domum pervenit. Porro rex cum familiaribus suis in remotiori camera consistebat. Venerunt itaque ad archiepiscopum quidam ex episcopis, e quibus unus erat Gilbertus Folioth Londoniensis episcopus, qui sic locutus est : « Domine, inquit, archiepiscope, malum habes consilium quod ita evaginato gladio ausus fuisti ad regem ingredi. Noveris procul dubio et ipsum regem suum adversum te exemisisse gladium, illumque in te cum multa indignatione vibrare : quapropter quando ita vos ad invicem habueritis, spes nulla pacis esse poterit : meo igitur usus consilio, crucem de manu tua deponas. » Et archiepiscopus : « Crux, inquit, protectio fortis est, et signum pacis : et ideo eam minime depono. » Item Londoniensis ad eum : « Ego, ait, decanus tuus suum et debeo tibi ministrare : trade eam mihi. — Nequaquam, ait archiepiscopus, eam dimittam : non est enim mihi oneri. » Tunc Londoniensis, injectis manibus, voluit eam vi de manibus illius extorquere, sed archiepiscopo viribus prevalente, non potuit eam evellere. Tunc Wigorniensis episcopus ad Londoniensem : « Cessa, inquit, ab irreverentia tua, et dimitte domino nostro archiepiscopo crucem suam, non est enim nimis bonus qui portet crucem domini sui. » Et Londoniensis ad eum : « Et tu, inquit, contra teipsum locutus es; nam verbum, quod ex ore tuo modo jaculatus es, gravior lues. » Eboracensis vero archiepiscopus qui his intererat et præsens astabat, ait ad Cantuariensem : « Ne dominus rex gravis adversum te inflammetur et exacerbetur, meo consilio gladium tuum, hoc est crucem tuam, de manu tua depones; nam gladius regis multo acutior est quam hic tuus. » Cui venerandus antistes respondit : « Gladius regis carnali quidem viget acumine, mens autem spirituali, nec debet rex ex hoc indignari, si crucem Domini mei et sui in manibus tenuero, sed

magis placari. » Ut autem cognovit rex archiepiscopum venisse, cepit cum suis disponere quam ei calumniam primo objiceret, visumque est ei primo agendum de clericis quos in homicidiis et furtis aliisque sceleribus deprehensos superius diximus. Sed dictum est ei de consilio, quia si inde aggressionis faceret exordium, statim omnes episcopi, qui ei modo favebant, audito hoc verbo, ab eo resiliunt et cum archiepiscopo starent : quippe cum causa clericorum omnibus episcopis esset communis. Quapropter aliunde agere statuit. Rex enim et archiepiscopus seorsum et non in uno loco constituti erant; mediatoresque verbi inter eos erant episcopi, qui frequenter huc illucque discurrebant. Variis itaque querelarum et objectionum assultibus rex iniquus venerandum antisitem tota die appetere non cessavit; at ille, sancto se confortante Spiritu, universas ejus objectiones et cavillationes validioribus rationum et assertionum responsionibus cludit et confutavit. Interim nuntiatum archiepiscopo a quibusdam amicis et fidelibus suis qui erant de consilio regis, quia rex jam de morte ejus tractaret. Ipsi etiam episcopi, cognoscentes quod rex agere diserneret, vultu lugubri et demisso ad virum Dei venerunt nihilque penitus dicentes velut stupidi et amentes cum circumsteterunt. Tunc vir venerabilis, ex eorum vultus immutatione certior factus de his quæ sibi nuntiata fuerant, ait ad eos : « Sentio me a curia ista, vobis tacentibus et non reclamantibus, modis inauditis prægravari, et causam Ecclesiæ in detrimentum vergi, qua necessitate magna coactus ad dominum papam appello. » Tum Londoniensis episcopus : « Me, inquit, rogo ut ab hac appellatione relaxes. » Cui archiepiscopus : « Nec te, inquit, nec alium absolvo; sed in periculo animarum vestrarum et ordinis vestri in communi omnibus præcipio, quatenus, ut dicitur, si ego occisus vel captus fuero, nemini parcentes debitam justitiam faciatis. » Wintoniensis vero episcopus anxius nimis et pavidus archiepiscopo dixit : « Obsecro, domine, ut verbis meis, quæ tibi bona fide dicturus sum, acquiescas. Archiepiscopatum in manu et dispositione domini regis reconsigna; hoc enim videtur necessitas domini regis reconsigna; hoc enim videtur necessitas inevitabilis ad præsens exposcere, donec ex gratia et indulgentia ejus honori tuo restituaris. » Archiepiscopus vero ad eum : « Frustra, inquit, tale mihi consilium dedisti; nam episcopatum et vitam una dies eademque hora terminabit. » Ad ista Hilarius Cicestrensis episcopus subintulit : « Utinam, inquit, fieres et remaneres Thomas tantum absque alia dignitate! » Igitur episcopi, quibus mens sanior erat, convocantes Eboracensem archiepiscopum et Londoniensem atque ipsum Cicestrensem episcopos dicunt eis : « Si contigerit archiepiscopum nobis presentibus capi vel occidi, quid restat nobis, nisi ut ab officiis et honoribus nostris ignominiose projecti perpetuo anathemati et opprobrio quod nulla delebit oblivio, subjiciamur? si autem nobis hoc timemus, quid de illis fiet, quibus ut dicitur

procurantibus et instigantibus tantum nefas patrari contigerit : monemus igitur ut pari consilio videamus et decernamus : qualiter eum ab instanti periculo valeamus eripere. » Cumque aliquandiu qualiter id fieri posset ad invicem tractassent, tandem simul omnes regem adeuntes, dixerunt ei : « Prospicientes, domine, honori tuo, quem in negotio isto periclitari timemus, rogamus ut nobis copiam agendi cum archiepiscopo concedas : habemus namque multa, quæ ei juste obijciamus ; maxime illud quod cum in præsentia vestra apud Clarendonam præcepto obedierit, nos ad observationem consuetudinumstrarum compulerit ; nunc autem, sibi ipsi contrarius, ne eas observare debeamus contradicit. Quapropter si tibi videtur et si placet, ad dominum papam eum appellare decrevimus. » Et ait rex : « Placet. » Regressi igitur ad archiepiscopum ad dominum papam appellaverunt. Et archiepiscopus : « Audio, inquit. » Rex, etsi appellationem fieri permisisset, a proposito tamen quo eum interficere decreverat, non destitit. Mittens namque ad eum milites suos, jubet ut rationem reddat de negotiis et redditibus regni, maxime autem de triginta millibus libris argenti quas tempore cancellariæ de pecunia regia minus caute expendisse a quibusdam deferebatur. Archiepiscopus vero regem sæpe de omnibus rationem audisse respondit : nec jam se ad ista quæ ad se non pertinebant respondere debere, præsertim cum tempore electionis suæ ex mandato regis coram filio ejus et officialibus regni ab omni ratione administrationis suæ, et ab omni omnino occasione quæ inde quomodo emergere posset, absolutus fuisset : « Sic ut, inquit, vos ipsi vidistis et audistis. » Quæ ejus responsio postquam regi renuntiata est, furore et iracundia plenus, dixit ad suos : « Iste homo meus est ; et rationem mihi reddere non dignatur ! » Et dixerunt qui ei assistebant : « Est, domine, et alia causa qua eum jure gravare poteris ; nam, cum homo tuus sit, ut dicis, et jure fidelitatis honorem tuum per omnia et in omnibus conservare teneatur, ipse tamen, spreto honore tuo et reverentia contemptoque judicio curiæ tuæ ; ad aliam curiam appellare præsumpsit : unde si judicari meretur, tuum est decernere. » — « Patet, inquit rex, quia de omnibus his vindicandus est. » Misit igitur statim eum festinatione qui eum judicarent. Relatum est autem de judicio quod capi debeat archiepiscopus et carceri mancipari, donec de objectis sive obijcendis regis voluntati in omnibus satisfaceret. Jubente itaque rege, Robertus comes Leicestrensis et Rainaldus Cornubiensis archiepiscopum adeunt, formam judicii ei ex parte regis intimaturi ; locutus est igitur comes Leicestrensis archiepiscopo, dicens : « Audi judicium quod tibi in curia regis judicatum est, quodque rex ipse per nos tibi mandat. » Tunc vir sanctus torvo eum intuens vultu : « Ego, inquit, nullius judicium audiam, quippe qui jam ad dominum papam appellavi. » Et comes ad eum : « Et quomodo, inquit,

A potest averti quin judicium regis audias ? homo enim regis es ; et villas atque castella possessionesque infinitas de eo in feodo et baronia tenes. Et idcirco judicium in curia ejus audire et sustinere te oportet. » — « Absit, inquit archiepiscopus : nihil prorsus in feodo et baronia de eo teneo, sed quidquid habet Ecclesia, in perpetua libertate possidet, non in feodo vel baronia, vel in aliqua terrenæ dominationis subjectione. » Nam quidquid Ecclesiæ Dei a regibus antiquis seu modernis collatum est, perpetua elemosyna est, libera prorsus et immunis ab omni terreni principatus nuncupatione vel subjectione, sicut etiam ipse rex in suis privilegiis declaravit et confirmavit. Quapropter auctoritate et paternitate qua nos vobis divina ordinatio lege Christianitatis prætulit et præfecit, interdiciamus, ne de me judicium faciatis, vel factum retractetis. » Respondit comes Robertus : « Absit a me ut tantæ auctoritatis imperium contra animam meam transgrediar, sed potius silentium mihi indicens amodo taceo, teque quantum ad me liberum relinquo. » Et conversus ad comitem Rainaldum, dixit : « Audis archiepiscopali imo divina auctoritate silentium mihi impositum ; amodo tu quæ restant proseguere, et quæ a rege definita sunt edicito. » Et ille : « Quod mihi, ait, injunctum non est non præsumam. Tu autem si qua dicere volueris, dicito ; quia in hac causa ego tibi penitus deficio. » Dixit ergo iterum archiepiscopo comes Robertus : « Obsecro, domine, ut expectes donec responsio tua renuntiatur. » Et archiepiscopus ad eum : « Ergone, inquit, captus sum ? » Et comes ad eum : « Nequaquam, ait, domine, per sanctum Lazarum ; » sic enim conseruat idem comes jurare. Recedentibus itaque comitibus et regredientibus ad regem, dixit archiepiscopus : « Recedo et ego, nam hora præterit ; » et, elevata cruce, quam manu tenebat, cepit abire. Cumque aviam ingressus fuisset, multitudo militum et diversi generis hominum, quæ ibi convenerant, cepit viso eo clamare et improprie atque contumeliosis vocibus ei insultare, garrula et injuriosa procacitate vociferantes. Cum vero paululum surda aure processisset, et ad ligna quæ ad præparationem ignis forte in medio jacebant pedem offendens paululum nutasset : vox insultantium vehementius extollitur, quæ etiam a procul positis posset audiri : occurrens quoque viro Dei quidam Randulfus de Broco : « Ut proditor, inquit, recedis. » Quem reverendus antistes responsione indignum reputans pertransibat. Comes quoque Hamelinus frater regis notus casu occurrens ei, velut proditorem eum recedere dicebat. Cum vir sanctus : « Si liceret, inquit, ut miles essem, propria manu te mentitum probarem. » Tandem ascenso equo ad portam castelli pervenit, quam diligenter obseratam reperiens, stupefactus et perterritus substitit. Sed quidam e famulis suis, nomine Petrus de Mortorio, fasciculum clavium eminus dependentem conspiciens, celeriter claves arripuit ; et quod quasi miraculum quibusdam

visum est, inter tam multas claves illam, quam A volebat et quæ necessaria erat, absque mora et impedimento reperiens, portam cum celeritate nullo contradicente vel resistente aperuit. Exeuntem autem de oppido beatum virum populus, qui rei exitum præstolabatur, gaudens excipit: supplex benedictionem exposcit. Ipse vero dextera lævaque benedictionem incessanter fundens, retardantibus eum aliquantulum turbis, tandem ad monasterium, in quo hospitabatur, pervenit. Statim igitur ante altare in orationem se prostravit, ubi cum aliquandiu lacrymans orasset, mox ut ab oratione surrexit, utrum adhuc nona esset quæsit: audiens autem quod hora præterisset, nonam simul et vespas decantavit, et illico mensam poni iussit. Cumque ex maximo suo comitatu vix decem præsto essent, pavore namque territi universi diffugerant, imperavit iterum refectorium monachorum pauperibus impleri, eisque ciborum copiam apponi: postea sedit ipse cum suis ad mensam satis morose, seque hilarem et affabilem eis exhibuit. Interim autem, dum adhuc sederet ad mensam, iussit lectum suum in ecclesiam deferri, ibique locum quietis sibi parari. Sublatus est itaque lectus ejus, cunctis videntibus, in ecclesiam, et ibi retro majus altare locum dormituro paraverunt. Positus est etiam ibi, ipso disponente, quidam minister familiaris, qui volentes accedere prohiberet, dicens archiepiscopum diurno labore fatigatum non esse inquietandum. Ipse vero vir Domini surgens a mensa in loco secretiori se cum paucis recepit; tractans diligenter quid in articulo instantis necessitatis pro causa Ecclesiæ Dei commodius fieri posset. Constans enim erat quod, si crastinum expectaret diem, procul dubio capiendus esset et carceri mancipandus: quatenus rex ita levius delinquere videretur si sub carceralis custodiæ mora aliqua occasione quasi rege nesciente juglaretur. Et quamvis vir sanctus pro libertate ecclesiastica mori paratus esset, ne tamen causa Ecclesiæ in suo casu pariter occumberet, non quidem evadere mortem sed interim differre consilium habuit. Mutabatur dies iterum in noctem, siquidem usque in crepusculum cœna protracta fuerat et vocavit ad se vir Domini duos conversos religiosos quos in comitatu suo habebat, quorum unus vocabatur Robertus de Cava, alter vero Scilmannus, et quemdam famulum suum proprium, nomine Rogerium de Brai, strenuum valde et fidelem; et his tribus tantum consilium, quod de protectione sua inierat, secretius intimavit: præcipiens ut sine mora parati essent. Ad majorem quoque cautelam, ne scilicet de sua protectione suspicio aliqua saltem in suos oriretur, nullum de suis equis ducere secum statuit, sed quatuor equos aliunde sibi exhiberi fecit. Procurantibus itaque præfatis tribus quos ad hoc negotium quasi fideiores vir Domini prælegerat, adducti sunt statim quatuor dextrarii optimi et prælecti: et extra januam domus, ac si hospitem essent, usque ad horam com-

petentem sub familiari custodia sunt detenti. Sed et ipsum tempus et hora beati viri fugæ quasi divinitus adminiculari et cooperari videbatur. Nam tantæ inoriorum vehementia tota nocte illa erupit, ut nullus ostium domus suæ egredi præsumeret. Tantos etiam tenebrarum horror tam ex nubium et imbrium densitate, quam ex naturali noctis caligine invaluerat ut nec in medio positus quis videri posset. Cum autem omnes portæ oppidi diligenter observarentur, exploratum est per quam portarum competentius et tutius vir Domini elabi posset. Inventum est vero quod nondum ad aquilonarem portam custodia adesset. Æstimantibus igitur universis quod archiepiscopus in loco quem ei in ecclesia post altare paratum cognoverant quiesceret, ipse B cum præfatis tribus sociis ascensis equis per medium castrum ad portam aquilonarem gressum dirigit: fueruntque ei divino notu tenebræ noctis pro velamento: et aquarum vehemens inundatio equorum celabat strepitum sicut nullo penitus sentiente per portam septentrionalem egressus est.

Tota igitur nocte illa negotium fugæ accelerans, tandem appropinquante die Lincolnium pervenit. Tantum autem laborem ipsa nocte ex abundantia pluviarum pertulerat, quod pondus aquarum non sustinens cappam suam alleviationis causa bis antequam dilucesceret præcidi fecerit. Ingressus vero Lincolnium apud quemdam civem, cui nomine erat C Jacob, qui fratrum qui eum comitabantur familiaris erat, hospitatus est. Mane autem facto, Wintoniensis episcopus, ignorans quod acciderat, cum archiepiscopo locuturus advenit. Cui occurrens Osbernus beati viri camerarius, qui ipsa nocte lectum ejus in ecclesia custodierat, et interrogatus ab eo quidnam ageret archiepiscopus: « Bene, inquit, agit, nam sero præterito a nobis recessit et nescimus quo abierit. » Quod cum episcopo in aure dixisset, ille altum trahens suspirium lacrymisque suffusus: « Cum Dei, inquit, benedictione! » Rex autem ut archiepiscopum recessisse cognovit, illud se intelligens, interna-que cordis anxietate tactus, ex nimia indignatione et furore obmutuit, sed post paululum respirans: « Nondum, ait, finivimus cum isto. » Tunc mittens D celeriter iussit omnia ubique maris littora diligenter observari. Ipse vero Thomas apud Lincolnium in domo Jacob die ipso secreto permansit. Et ut melius tutiusque secundum quod imminens necessitas exposcere videbatur posset latere, tunicam conversi induit, et calceamenta grossiora pedibus suis aptavit, iussique sociis ut eum de cætero non Thomam vocarent, sed Christianum. Et hoc quidem elegantissime, ut scilicet et mutatio fieret in nomine, et veritatis assertio maneret in nuncupatione. Circa crepusculum vero naviculam ingressus est, et tota nocte per fluvium navigando ad domum quamdam religionis quæ dicitur Sempignebam pervenit. Ibi aliquot diebus in granchiis ejusdem domus delitescens, tandem clam nocturnis horis ad mare properavit. In

transitu vero suo apud Chikesand reperit quemdam capellanum, nomine Gilebertum, virum religiosum : ejusdem videlicet ordinis, cujus erant et fratres qui erant cum eo : quem secum venire præcepit. Cum autem ad mare pervenisset, et ibi circa littus paucis diebus latuisset, paratum sibi tandem a quodam sacerdote navigium nocte conscendit, et prospera divino nutu fretus navigatione, cum adhuc magna noctis pars restaret, in partibus Flandriæ, non quidem in portu aliquo sed in sabulo, propter cautelam applicuit. Exigebat igitur necessitas ut pedes iter faceret ; quem laborem insuetum et intolerabilem graviter ferens, sæpius in littore lubrico et arenoso vacillans corruerat. Comes vero itineris videntes tantum virum insolito labore fatigari, jam enim sæpius corruendo manus læserat et vulneraverat, non se facile a lacrymis continebant ; die autem facto apparuit eis puer quidam, cui occurrentes rogabant ut equitaturam quamlibet eis salva mercede sua quæreret et adduceret. Qui currens in proximam villam, et multam ibi moram faciens, multum eos sollicitos ac pavidos reddidit, ne forte explorator esset aut delator. Tandem tamen rediit adducens in manu jumentum instratum, cui tantum pro freno funis ex feno confectus a collo dependebat. Sed quoniam necessitas non eligit, nec quod vult facit, superjecta eidem jumento cappa beatum virum desuper sedere fecerunt, talique equitatura per duo fere milliaria usus est. Tolerabilius vero et honestius æstimans, si pedes incederet, iterum cœpit cum suis ambulare, cumque quemdam vicum ingrederetur, videns eos quædam mulier mirata est, venerabilemque virum diligentius intuens, et nescio quid speciale magnificumque in ejus vultu perpendens, labori illius compatiens, et volens ei beneficium præstare, festina cucurrit in domum suam ut baculum quæreret, quem ei ad sustentandum porrigeret. Arripiens autem verum quoddam fumo et fuligine sordidum, nec non et adipe piscium, qui ex eo dependebant, madidum atque confectum ei porrexit. Cujus ille circa se benevolentiam non spernens, quasi pro magno munere gratias egit. Et quod oblatum fuerat suscepit. Cum vero paululum processissent, stabat miles quidam in foribus domi suæ accipitrem manu tenens, qui videns quatuor viros religionis habitum præferentes præterire et diligentius intuens eos, ait ad circumstantes : « Unus ex istis aut archiepiscopus est Cantuariensis, aut ei simillimus. » Cui respondit frater Scailmannus : « Verene aliquando tu vidisti Cantuariensem archiepiscopum ita gradientem ? » Pervenerunt autem ad fluvium, ubi repta navicula usque Clarum Mariscum navigio pervenerunt. Abbas autem et fratres loci illius cognoscentes venerandum antistitem inestimabili gaudio repleti sunt, eumque cum omni honore et reverentia officiosissime susceperunt. Mansit igitur occultus apud eos paucis diebus. Interim quidam ex clericis suis quibus ipse a Northamptona fugiens ut se sequeretur mandaverat, ad eum venerunt.

A Interim venit Richardus de Luci ad Flandrensem comitem, missus a rege Anglorum. Ille audiens archiepiscopum apud Clarum Mariscum morari, siquidem jam de eo sermo circumquaque percrepauerat, accessit ad eum suadens diligenter quidem, sed frustra, quatenus una secum in Angliam ad regem reverteretur, sed intelligens ex responsionibus beati viri se inaniter laborare, cœpit ei minari, dicens se de cætero futurum inimicum. Cui cum vir sanctus diceret : « Homo meus es, et talia mihi loqui non debes ; » ille contra : « Hominium, inquit, meum tibi reddo. » Cui iterum archiepiscopus : « Tu, inquit, illud a me mutuo non accepisti. » Misit itaque venerandos antistes duos abbates ad comitem Flandrensem, petens ut ei conductum præbeat, donec transeat terram ejus. Comes vero, qui regis Anglorum erat consanguineus et partes ejus fovebat, respondit consilium se supra hoc habiturum ; addens etiam se satis potentem, qui unum archiepiscopum in sua dominatione et terra detineat. Quo audito, archiepiscopus suspectam habuit hujusmodi responsionem ; timens ne forte comes aliquid erga se violenter ageret ut exinde gratiam sibi majorem apud regem pararet. Quapropter retulit verbum istud ad Milonem Carvanensem episcopum qui tunc forte visitationis gratia ad eum venerat. Erat enim idem Milo de Anglia oriundus, vir prudens valde et magnificus ; quique archiepiscopum summa devotione et intima dilectione colebat. Communi igitur amborum consilio et industria protractum est consilium inter eos usque in noctem, cumque jam nox esset, et tenebræ cuncta occupassent, surgens episcopus cœpit velle recedere ; quem archiepiscopus præeuntibus cereis usque ad portam persecutus est. Tunc jussit archiepiscopus luminaria admovei et quasi aliquid secretius cum episcopo locuturus paululum a circumstantibus avulsus est, sicque ascenso equo albo quem ei episcopus præparaverat, una cum eodem Carvanum usque nocte ipsa pervenit : in crastino mandavit suis ut ei apud Suessionem occurrerent. Tali itaque modo Fländriensis comitis minas evasit et usque Suessionem sine impedimento cum suis, Deo protegente, pervenit. Cognito igitur rex Anglorum quod archiepiscopus in Franciam pervenisset, misit nuntios ad regem Francorum Lodewicum, Gilbertum videlicet Folioth Londoniarum episcopum, et Richardum de Ivelcestria, qui erat clericus regis, et unum ex summis regni iudicibus, Willelmum quoque illustrem comitem Arundelli, qui venientes ad regem Francorum apud Compendium inventientes ita ad eum locuti sunt : « Meminisse, inquit, potest excellentia tua, domine rex, quod cum pax inter te et dominum nostrum regem Anglorum postremo reformata esset, hoc inter cætera constitutum fuisse, ut si quis ex hominibus vestris tam hinc quam inde, aliqua occasione diffugiens, in regnum alterius deveniret, continuo sine contradictione requisitus domino suo redderetur. » Et ecce nunc Cantuariensis

archiepiscopus, iudicium domini sui regis declinans, elanculo et de nocte furtivus aufugit et in terram tuam pervenit. Rogat itaque obuixe fidelis tuus et amicus dominus noster rex ne in sui contumeliam et pactionum injuriam, præfatum archiepiscopum in regno tuo recipias vel detineas. Ad hæc piissimus rex Francorum Lodewicus: « Pactiones, inquit, de quibus dicitis non recolo, quanquam etsi ita constitutum fuisse constaret, nihil hoc ad archiepiscopum quominus eum libenter videamus et grater suscipiamus et honoremus; cum ipse inter homines regis vestri reputandus non sit, est enim potius dominus regis et patronus. Accedit etiam ad hoc imo et superexcedit quod mansuetudo regni nostri omnibus oppressis patet ad refugium, nam hoc nobis et pietas animi indicit, ut regnum nostrum libertatem quam sonat in nomine exprimere debeat operis attestatione. Pervenit enim ad nostram audientiam quam injuste et quibus de causis rex vester venerabilem virum oderit et persequatur, unde non miramur si vir discretus, tam vitæ suæ quam Ecclesiæ Dei causæ prospiciens, regis furorē declinaverit, et sub nostræ protectionis alas confugerit. Quapropter si scissem ubi inveniendus esset, jampridem ei cum debito honore occurrissem. » Tunc Willelmus comes Arundelli ad ista regi respondit: « Ignoras forsitan, o rex, quod archiepiscopus, quem tanto studio honorare decernis, semper tibi infestus fuit. Ipse enim est, cujus calliditate et ingenio multoties regnum tuum motum et turbatum est. Ipse namque terras tuas vastavit et oppida cepit, regnumque tuum et dominationem ex parte non modica detruncavit. » At rex ad eum: « Nihil, ait, dicis quominus mihi charus et honorabilis videatur; fecit enim juxta tuam sententiam quod debuit, nam fidelitatem quam domino suo secundum tempus debuit, sinceriter in omnibus et per omnia adimplevit. Fecissetque mihi similia si meus fuisset. Sed ecce pro tantis beneficiis quæ mihi, ut dicitis, inferendo damna, regi vestro contulit, quali eum remuneratione dignum æstimavit. Nunquid ut redderet ei mala pro bonis? Et a propriis effugaret qui ei aliena subjugasset? » Item locuti sunt nuntii ad regem dicentes: « Rogat etiam rex Anglorum amicus tuus quatenus domino papæ mandare digueris, ne archiepiscopo ad gratiam et familiaritatem suam accessum indulgeat, neque mendaciis illius fidem adhibeat. » Indignatus autem rex super improbitate sermonum illorum: « Ego quidem, inquit, mandabo, sed non juxta petitionem vestram. » Vocansque rex fratrem Franconem domini papæ camerarium, qui forte tunc apud Compendium præsens erat: « Domino, inquit, meo papæ Alexandro mea ex parte dicito: quatenus si tanti sum apud ejus sanctitatem cui gratiam aut beneficium præstare velit, archiepiscopum Cantuariensem, cum in præsentiam ejus venerit, benigne suscipiat, nullamque adversus eum injustam querelam audiat vel admittat. » Regressis igitur nuntiis et quod gestum fuerat referentibus,

A illico rex Anglorum alios nuntios ad dominum papam sub celeritate destinare curavit, qui archiepiscopum in curia prævenirent et domini papæ cardinaliumque animos ab eo averterent. Hæc autem sunt nomina eorum qui missi sunt. Rogerus Eboracensis archiepiscopus, Gilbertus Foliot episcopus Londoniensis, Wirecestrensis quoque episcopus et Bartholomæus Exoniensis atque Hilarius Cicestrensis episcopi; Richardus etiam de Ivelcestria et Joannes de Oxenefordia clerici regis; Willelmus quoque comes Arundelli et Guido Rufus, Hugo etiam de Gundovilla et Rainaldus de Sancto Valerico, atque Henricus filius Giroldi familiarissimus regis; et alii etiam, quorum nomina ignoramus. Ili omnes Senonas venientes et præsentiam domini papæ adeuntes, multa de beato viro quibus causam ejus deprimerent in medium protulerunt; quæ quidem probare non potuerunt, fuitque eorum allegatio tam injuriosa et contumeliosa ut cuidam episcoporum acrius instanti papa diceret: « Frater, tempera te: palam est quod virum innocentem gratis oditis et prosequimini. » Fuit autem summa legationis eorum ut dominus papa ad petitionem regis duos cardinales cum plenitudine potestatis in Angliam dirigeret, qui inter regem et archiepiscopum appellatione remota dijudicarent. Asserebant etiam quod rex in multa humilitate et devotione ad satisfactionem paratus esset, si in aliquo forte excessisset; porro rex hoc faciebat insidiosè, sciens cardinalium iudicia non esse gratuita, seque facile quod volebat mediante pecunia obtenturum si sub cardinalium iudicio sibi agere liceret. Quod dominum papam non latuit: unde et hujusmodi petitioni minime acquiescere voluit, licet multum obnixè cardinales instarent, ut regis petitio effectum consequeretur. Willelmus namque Papiensis, qui unus erat ex majoribus cardinalibus, regi per omnia favebat cæterisque cardinales ut regi faverent induxerat, sed non gratis. Repulsi igitur ab spe impetrandi, regii legati celeriter regrediuntur. Nam episcopis, qui hac legatione fungebantur, non erat tutum archiepiscopum quem in proximo venturum audierant, in curia expectare. Quarto deinde die venit Senonas archiepiscopus, convocatisque clericis suis, quisnam eorum causam ejus in præsentia domini papæ competentius posset explicare, cepit inquirere. Et, quamvis essent inter eos decretorum legisque periti quamplures, et in perorando eloquentissimi et exercitatissimi, nullus tamen inventus est qui hoc negotium aggredi præsumeret. Timebant enim regem, scientes certissime cum latere non posse, quis eorum in curia pro archiepiscopo allegasset. In crastino vir sanctus, habens fiduciam in Domino, venit ad curiam tenens in manu chirographum illud, in quo regis consuetudines continebantur, quod eum apud Clarendonam in defensionem ecclesiasticæ libertatis de manu regis suscepisse prædiximus. Cumque in præsentiam domini papæ venisset et ad pedes ejus se prostravisset, chartam

ipsam explicatam et expansam ante pedes ejus posuit, dicens: « Ecce, Pater sancte, consuetudines regis Anglorum, canonibus et decretis et etiam ipsorum terrenorum principum legibus adversæ, pro quibus exsilium sustinere cogimur; ut eas sanctæ paternitati tuæ ostenderemus et consilium super eis haberemus, advenimus: Jubeat igitur, si placet, sanctitas tua eas legi et audiri. Quisquis enim ista audierit, mirum est si non tinniant ambæ aures ejus, audiens a Christianis contra legem Christianitatis agi et damnatis sanctorum Patrum venerandis institutis novas et inauditas veterum tyrannorum præsumptas abusiones in Ecclesiam Dei introduci. » Hæc cum genibus flexis dixisset, jubente apostolico surrexit et stetit in medio circumstante eum turba clericorum suorum. Cumque ad præceptum domini papæ consuetudines illæ legerentur, et qui legebat primum pronuntiasset capitulum, cœpit venerandus antistes contra propositum capitulum mirabiliter disserere, et regis in hoc intentionem plenius elucidare et de tegere; ostendens et convincens ex decretis et legibus, in quibus et quantis quod pronuntiatum fuerat, sanctorum Patrum canonibus obviaret, quantumque discrimen Ecclesiæ Dei immineret, si rex quod intendebat obtineret. Similiter fecit ad singula capitula domino papa eum libenter audiente et assertiones ejus diligenter per singula notante. Cardinales tamen, qui accepta a rege pecunia partes ejus fovebant, multam vexationem beato viro in sua causa præstiterunt, præcipue Willelmus Papiensis, qui præ cæteris regi erat amior et familiarior; hic enim beatum virum modis omnibus impedire satagens, ad singula insurgens; seque ei objiciebat multa proponens, et multa inquirens, quæ vir venerabilis sicut fila aranearum sine difficultate et hæsitatione vel solvebat vel convincebat. Putabat enim iste Willelmus quod archiepiscopus oratione uteretur aliena et non propria; et quia si posset eum a traniente sui sermonis deflectere, continuo eum irrisioni et confusione habendum. Sed et ipse intelligens Willelmum sibi ex directo obniti, aliquoties eum reciproco sermonis excursu ita suis intricavit et illaqueavit objectionibus ut omnibus manifestum fieret, quod non solum propriis uteretur viribus et disertitudine; verum quod insuperabilis esset ingenii et eloquentiæ. Cumque tam in expositione causæ suæ quam in contentione cum adversariis pars magna diei consumpta fuisset, erant enim sexdecim capitula consuetudinum illarum, ad quæ stando responderat, admirans tandem dominus papa ejus magnificentiam atque præstantiam, vocavit eum ad se, jubensque eum juxta se sedere, ait: « Bene veneris, frater charissime. » Cumque congaudens eum bene venisse sæpius repetisset, gratias ei agere cœpit, quod tantum onus tanque arduum negotium sibi assumpsisset, quod videlicet Ecclesiam Dei tam periculosis temporibus, contra tyrannorum assultus tueri præsumpsisset. Ipse quoque venerandus antistes cum debita humilitate et reverentia domino papæ

A multiplices gratias retulit, quod eum tanto honore dignatus fuerit. Tunc dominus papa consuetudines illas perpetuo damnavit, et observatores atque ex-actores earum æterno anathemati subdidit. Vir igitur Domini aliquanto tempore in curia demoratus tandem cum licentia et consilio domini papæ Pontinicum se contulit, ibique per biennium ferme stetit. Pontiniacenses vero de adventu tanti hospitis supra modum gavisi sunt, gratias agentes ei quod ad eos declinasset, maxime autem domino papæ qui eos tanto hospite honorare dignatus fuerat: exinde in multo charitatis et devotionis fervore archiepiscopo et suis omnia necessaria tam in victu quam vestitu omni tempore quo apud eos mansit abundantissime procuraverunt. Ipse vero vir reverendissimus quam B sancte, quam religiose se ibidem habuerit referre super sedemus, ne et fratribus nostris notum ingeramus et brevitatis metas excedamus. Illud tamen silentio prætereundum non est quod inter cætera sanctæ æmulationis studia etiam habitum monachilem ibidem concupivit et accepit. Misso autem ad dominum papam tunc temporis Senonis commorantem secretius nuntio et habitum religionis sibi ab eo fieri, benedici et transmissi postulavit et impetravit; don quo papa ita inter cætera rescribente: « Misimus tibi, frater dilecte, habitum, non qualem volumus sed qualem habuimus. » Cognoscens vero rex Anglorum in quanto honore a domino papa venerandus pontifex susceptus fuisset et quod in Pontiniaco locum sibi mansionis delegisset, cum jam in ipsum desævire non posset, in suos inaudito crudelitatis genere debacchatus est. Præcepit namque ut ubicunque aliquis de cognatione ejus vir vel mulier inveniri potuisset, exhereditatus et spoliatus bonis propriis a regno pelleretur, exacto prius ab eo sacramento quod Pontiniacum contristandi archiepiscopi gratia proficisceretur. Tunc expulsi sunt senes pariter et juvenes ad cognationem illius pertinentes, necnon et mulieres cum pueris et lactentibus in exsilium ire coactæ sunt. Reditus quoque archiepiscopales et totum archiepiscopatum rex propriis usibus addidit: constituto super negotia episcopatus quodam viro laico sceleratissimo, nomine Randulfo de Broc; qui et ipse adversum virum Dei semper pro posse inimicitias exercuerat. Cum autem archiepiscopo hæc omnia innotuissent, in multa constantia magnanimiter accepit, parvipendens damna terrena, suorum exsilia, dummodo Ecclesia Dei quandoque pacem consequeretur. Igitur archiepiscopus lectioni et orationi cæterisque sanctæ conversationis studiis propensius insistens per biennium Pontiniaci quievit. Sed nec ibi eum diutius quietum manere regis Anglorum malignitas passa est. Excogitans namque callide qualiter etiam inde ejicere posset, misit quosdam abbates ordinis Cisterciensis ad generale capitulum ordinis improperans eis bona quæ ordini contulerat; deinde eorum ingratitudinem exprobrans quod scilicet in contumeliam sui archiepiscopum sus episcopi sent, et necessaria ei jam multo tempore minis-

trassent. Quo cognito, archiepiscopus præcavens ne sui causa aliquod detrimentum ordo incurreret, ad regem Francorum Ludovicum qui eum multoties multis et instantissimis precibus ad se venire rogaverat, venit: Senonisque apud sanctam Columbam reliquum tempus exsilio sui rege omnia necessaria ministrante peregit. Igitur rex Anglorum, convocato concilio episcoporum et procerum apud Clarendonam, exegit ab eis sacramentum quod nullus eorum solatium aliquod archiepiscopo præstaret aut mandatum ei dirigeret, vel certe litteras ab eo missas susciperet. Addidit etiam ad sacramentum quod nullus litteras seu nuntios domini papæ susciperet, vel ad eum in aliquo negotio appellaret, sed ad regis præsentiam. Constituit quoque ne quis absque licentia ipsius et litteris transfretaret. Posuit etiam ad singulos maris portus custodes qui neminem transire permitterent, et de transmarinis partibus venientes diligenter scrutarentur, ne quis litteras domini papæ vel archiepiscopi in regnum ejus inferret. Constituit præterea ut si quis cum litteris deprehensus fuisset, veluste quassataque naviculæ impositus in altum pelagus duceretur ibique solus cum ipsa navicula sine remo fluctibus committeretur. Episcopis vero sacramentum modis quibus poterant præstare detractantibus, rex tandem multum diuque exoratus indulsit, ut verbo tantum promitterent, laici autem juraverunt: Tali calliditate usus est rex quoniam audierat quod dominus papa universos episcopos regni ad se vocare disposuisset. Clauso igitur regno iterum universos apud Londoniam rex adesse imperat; ubi cum convenissent cepit rex agere de consecratione filii sui et cum murmurantibus episcopis et ad invicem colloquentibus et dicentibus illicitum hoc esse ut in absentia archiepiscopi tale quid præsumeretur, cum ad illius singularem dignitatem regis inunctionem pertinere nullus ambigeret, inventi sunt tres episcopi, Rogerius videlicet Eboracensis et Gilbertus Londoniensis atque Jocelinus Salesbiriensis, qui propter ejus absentiam minime differendum dicerent seque paratos esse ut in hoc voluntatem regis exsequerentur. Igitur, rege dilationem non differente, consecratus est filius ejus memoratis tribus episcopis quæ ad celebritatem consecrationis pertinebant prosequentibus, cæteris nec subterfugere valentibus, nec manum apponere volentibus. Exinde diversis modis agitata est causa Ecclesiæ Cantuariensis. Nec tamen ad effectum pacis venire potuit, licet rex Francorum Ludovicus in pluribus colloquiis quæ interim cum rege Anglorum habuit multum institerit qualiter pax et concordia inter regem et archiepiscopum reformaretur; ipse etiam dominus papa mittens aliquoties legatos suos, regem ad pacem Ecclesiæ Dei paterna affectione et litteris provocabat et verbis; sed nihil proficiebat, intelligens quod nonnisi manu forti cum ipso agendum esset: scripsit ei tandem mandans et exhortans, rogans et præcipientes quatenus Ecclesiæ Cantuariensi, quæ jam multo tempore ex absentia pastoris labo-

averat, pacem redderet et cum archiepiscopo concordiam faceret. Alias etiam litteras secretius misit posuitque in manu cujusdam episcoporum Franciæ in quibus de interdicto regni Anglorum expressa continebatur sententia, quatenus videlicet si rex contemneret admonitionem apostolicam, continuo regnum ejus interdicto supponeretur. Quod regem non latuit. Condixeruntque inter se reges colloquium de pace Ecclesiæ tractaturi. Occurrerunt autem ad colloquium fere omnes episcopi Franciæ et Normanniæ, maxime illi quibus pondus hujus negotii dominus papa specialiter imposuerat. Tandem igitur vix et post multa facta est pax inter regem et archiepiscopum rege omnes omnino querelas et jura ecclesiastica in libertate canonica dimittente. Verum tamen osculum pacis rex archiepiscopo porrigere recusavit. Dispositum est autem ut in crastino in celebratione missæ archiepiscopus a sacerdote pacem accipiens regi porrigeret; sed rex hujusmodi consilium callide illudens mox ut ingressus est ecclesiam præcepit ut pro defunctis missa ageretur in qua pacem minime dari sciebat. Hoc solum suspitioni patuit et argumento fuit, quod non in vero corde rex cum archiepiscopo pacem fecisset. Ipse vero archiepiscopus reversus Senonas cœpit disponere redditum suum ad propria misitque ante faciem suam Cantuariam magistrum Joannem Salesburiensem qui postea Carnotensis episcopus fuit ut synodum solemniter celebraret, et eos qui excommunicatis communicaverant injuncta penitentia absolveret. Igitur vir Domini primo die septimi anni exsilio sui egressus est de Senonensi urbe ad sedem propriam reversurus, accepto a rege Anglorum in conductu quodam clerico ejus nomine Joanne de Oxenfordia.

Cumque in finibus Flandriæ ad mare venisset in loco qui dicitur Witsand, cognovit ibi quod tres illi episcopi qui coronationem regis junioris sicut prædictum est sibi indebite usurpaverant, apud Doveram ei occurrissent ejusque ibi præstolarentur adventum; ipse vero citius accito puero nomine Osberno tradidit ei in manu litteras domini papæ præcipientes ut celesiter mari transito litteras ipsas tribus prædictis episcopis apud Doveram constitutis porrigeret. Quas cum episcopi accepissent et ex tenore earum se excommunicatis cognovissent, vehementer animo consternati reversi sunt; archiepiscopus vero paratis navigiis mare ingressus est prospereque navigans cum Angliæ appropinquasset, noluit apud Doroberniam applicare ne forte excommunicati illi adhuc ibi essent quorum vitabat occursum; divergit autem ad alium portum qui dicitur Santwits qui locus suus erat proprius ibique applicuit. Tres vero proceres, Raynaldus scilicet de Garennia et Gervasius de Cornhilla et Randulfus de Broc, qui cum præfatis episcopis Doveram venerant, archiepiscopo apud Santwits occurrerunt habentes in proposito ut ei si forte in aliquo possent adversarentur. Conquesti sunt autem quasi ex parte regis quod clericos

Francigenas in regnum adduxisset, dicentes oportere eum fideiussores vel obsides pro eis dare ne quid forte mali in regno machinarentur. Ipse vero, quamvis eos responsione indignos reputaret, respondit tamen cum voluntate et licentia regis se eos adduxisse, nihilque ex iis quæ illi fieri exigebant se facturum. Spreis igitur verbis eorum et cavillationibus, profectus est Cantuariam. Processerunt autem ei obviam in letitia et exultatione monachi cum clero et populo universo, eumque gaudentes et Deum magnis vocibus collaudantes in locum suum introduxerunt. Circa viginti vero dies ante nativitatem Domini Cantuariam ingressus est. Ipsisque diebus solito propensius orationi et eleemosynarum largitioni instabat, faciebat quoque iustitiam iis qui iniquo oppressi fuerant iudicio, personarumque acceptione prorsus postposita, nulli contra iustitiam parcebat, sed in multa libertate spiritus iuste quod justum erat prosequabatur. Clericos etiam regis qui laica auctoritate ecclesias occupaverant admonebat et eas pristinis possessoribus restituebat. Interim episcopi illi quos apostolica auctoritate apud Doroberniam excommunicatis paulo ante memoravimus, mare celeriter transeuntes regem adierunt prostratique pedibus ejus satis invidiosa et maligna relatione qualiter cum ipsis egerit Cantuariensis archiepiscopus insinuaverunt, asserentes non esse pacificum ingressum ejus in regnum; ad dentes etiam non tam eum fecisse ipsorum causa quam in contemptum regis. His auditis, rex furibundus in penetralia sua ingressus est circumstantibusque militibus et ministris ignaviam eorum vehementer eis cepit improperare, quod scilicet illud sibi a vilissimo clerico tanto jam tempore patienter tulissent. Erant autem inter astantes quatuor milites quorum hæc sunt nomina: Raynaldus filius Ursionis, Willelmus de Traci, Hugo de Maurvilla, et Richardus Brito, qui cognoscens verbum regis ex multa animi indignatione prolatum credentesque quod quicquid de archiepiscopo fieret gratum ei foret, jam de animadversione in virum Dei cogitare cœperunt. Collocuti sunt igitur mutuo sicque pari consensu a curia, nemine sciente, recesserunt, itaque in Angliam cum magna festinatione direxerunt. Venientes autem in fines Cantuariæ congregaverunt turbam militum secum, dicentes regis esse voluntatem et præceptum ut archiepiscopus vel capiat vel interficiatur. Milites vero veritatem ignorantes et regem timentes, simul cum eis Cantuariam profecti sunt; veneruntque illic quinto die a nativitate Domini circa horam nonam cum jam archiepiscopus a mensa surrexisset; quatuor autem milites qui cæteris ducatum præbebant, relictis aliis extra, venerunt ante palatium archiepiscopale ingressique aulam, servientes qui ad mensam ministraverant, adhuc comedentes reppererunt. Videns autem eos et cognoscens quidam Willelmus filius Nigelli, occurrit eis, salutavitque eos et allocutus est; qui cum audisset ab eis quod cum archiepiscopo

A loqui vellent, ingressus est cameram ubi archiepiscopus cum monachis et clericis suis colloquens sedebat, insinuans ei stare foras quatuor milites de familia regis, qui cum eo loqui desiderarent: et archiepiscopus: « Fac, inquit, eos venire; » et statim iste Willelmus introduxit eos: cumque ingrederentur, vir Domini attentius loquebatur cum quodam monacho et non respexit eos. Ipsi vero nemini quidquam locuti directo gressu usque ante pedes viri Dei venerunt, ibique nec ipsi archiepiscopo aliquid sederunt dicentes. Ingressus fuerat cum eis quidam sagittarius nomine Randulfus, qui et ipse post eos in pavimento sedit. Expleto tandem vir Domini colloquio convertit se ad eos, et videns eos tacentes in tentissime intuitus est eos. Tandem fertur eos salutasse. Dicunt tamen quod non omnes, sed solum Willelmum de Traci expresso nomine salutaverit. Ipsi vero salutationem ejus non curantes, nec quidquam penitus respondentes, sese mutuo respexerunt; fertur tamen Raynaldus filium Ursionis quasi ex contemptu dixisse: « Deus te adjuvet. » Vir autem Domini videns facies eorum alteratas ipsosque perseverantes in taciturnitate mirabatur in aspectu eorum. Tandem Raynaldus filius Ursionis irato vultu erupit in vocem, et ita locutus est: « Verba, inquit, mandat tibi rex per nos de partibus transmarinis; dic utrum ea velis audire secretis an in omni audientia. » Et archiepiscopus: « Sicut, inquit, vultis. » — « Imo, ait Raynaldus, sicut tu vis. » Tunc præcipiente eo egressi sunt clerici extra domum in aliam cameram nullusque suorum remansit præter ostiarium. Raynaldus itaque cœpit proponere quædam quasi mandata regis, sed statim in initio sermonis intelligens vir Domini quo tenderet et quid dicturus esset: « Verba, ait, ista non sunt occultanda. » Dixit ad ostiarium: « Dimitte ostium et revoca eos qui egressi sunt, neque enim debeo eos a consilio meo separare. » Dum autem solus esset in camera cum militibus, occasione solitudinis cogitaverunt eum interficere; sed cum non haberent gladium nec aliud quid unde id perficerent, cum baculo crucis quæ ex more semper ante eum erat eum prosternere meditabantur. Hoc postea ipsis confitentibus ita fuisse innotuit. Regressis itaque clericis in cameram, cœpit iterum Raynaldus verbum proponere et dicere: « Mandat dominus rex se tecum pacem bonam et plenam corde perfectio fecisse, te autem eam non bene servasse; nam per civitates suas et castella cum multitudine armatorum te transisse audit: necnon et archiepiscopum Eboracensem cum episcopis qui in coronatione filii sui ei obsecuti sunt excommunicasse et alios plures de suis fidelioribus de ecclesiis expulisse. Omnia ista non carent suspitione, quin potius manifestum est te filii sui coronam velle auferre, teque ei in omnibus et per omnia adversari. Scire igitur vult dominus noster rex utrum de his responsurus coram illius ingredi velis. » Tunc archiepiscopus: « Habes, inquit, amplius aliquid dicere? si habes dic: » — « Prius,

ait Raynaldus, audiemus responsum tuum. » — A venistis, sed Deum facio clypeum meum. » Percutiensque manu sua crebro cervicem propriam: « Hic, ait, hic me inveniatis. » Tunc egressi sunt n. l. i. e. s. archiepiscopo vehementer comminantes, et præcipientes ex parte regis ut diligenter servaretur ne forte effugeret. Ministris etiam quos in aula repererunt, ex nomine regis terribiliter comminati sunt dicentes quia quisquis cum archiepiscopo remaneret, regis inimicus et morte dignus haberetur. Audiens autem vir sanctus minas eorum, surrexit et usque ad ostium cameræ secutus est eos, comminante sibi militi dixit: « Quid dicis? dic, dic. » Illi vero non attendentes verbum illius pertransierunt. Reversus itaque vir sanctus ad suos, sedit supra lectum suum. Cui Joannes Saresbiriensis: B « Hæc, inquit, consuetudo tua semper fuit et est, ut quod tibi soli videtur illud semper et dicas et facias. » Et vir sanctus ad eum: « Quid vis, ait, domine Joannes? » et Joannes: « Consilium, inquit, tuum debuisses vocasse, sciens certissime quod milites isti nihil aliud quærant adversum te, nisi tantum occasionem ut te morti tradant. » Cui vir sanctus: « Omnes, inquit, mori habemus, nec timore mortis a justitia flecti debemus: paratior sum pro Deo et justitia Ecclesiæque Dei libertate ad mortem excipiendam, quam illi ad inferendam. » — « Nos, inquit Joannes, peccatores sumus et nondum ad mortem parati, neminemque video qui gratis mori velit præter te. » Et ille inquit: « Domini voluntas fiat. » C Interim egressi milites armis se munierunt inermem aggressuri. Ceteri enim milites, qui foris expectabant, dum illi cum viro Dei loquerentur, sub tunicis suis loricati venerant. Quod cum nuntiatum fuisset ei dixerunt monachi ad eum: « Domine, veni in ecclesiam, nam homines isti vel ad captionem vel ad interfectionem tuam se præparant. » Et ille ait: « Non timeo eos: hic expectabo quicquid Deo placuerit. » Milites vero jam parati cum terrore et strepitu ad januas aulae accesserunt, quas obseratas reperientes nulla vi, quanquam id totis viribus tentaverunt effringere potuerunt. Erat autem cum eis quidam Robertus de Broco qui omnes aditus et diverticula domus noverat: qui ait ad eos: « Sequimini me, introducam enim vos alia via. » Eo igitur ducente venerunt per pomarium et usque ad cameram pervenerunt. Sed cum nec ibi ingressum invenirent, ascendit prædictus Robertus per deambulatorium, quod ibi de veteri tunc renovabatur, ut aperiret ostia; quos adesse sentientes qui intus cum viro Dei erant, omnes fugerunt præter aliquot monachos et unum clericum cui nomen magister Edwardus. Hi apprehendentes venerabilem virum, adhuc enim sedebat, ceperunt eum reluctantem et renitentem atque contradicentem inter manus suas ad ecclesiam portare. Circumspicientes autem viderunt curiam plenam armatis et pomarium viasque quibus ad ecclesiam pergebatur, præoccupatas militibus et obstupuerunt. Tunc diverterunt ad aliud ostium secretius quod multo tempore clausum et

obseratum nulli transitum præbuerat. Præcucurrit autem unus ex monachis volens tentare si forte se-ram viribus effringere posset, sed mox ut eam te-
 gigit, divino nutu, mirante ipso et omnibus qui ad-
 erant, ita in manus ejus collapsa est ac si ostio
 minime adhæsisset. Tunc monachus: « Apprehen-
 dite, inquit, eum et apportate. » Qui accipientes eum
 cœperunt portare nec dimiserunt donec in ecclesiam
 eum introduxerint. Substituerunt tamen antequam
 in ecclesiam venirent; his in claustrum, et semel in
 capitulo. Nam ipse irascens eis reluctabatur et ela-
 bebatur de manibus eorum nolens se portari ab eis.
 Ingresso igitur viro Dei in ecclesiam, respicientes
 monachi viderunt milites jam ingredi claustrum:
 clausurunt contra eos januas ecclesiæ; videns au-
 tem vir Dei claudi januas dixit: « Per sanctam
 obedientiam præcipio ut sine mora aperiantur:
 non enim debemus facere castellum de domo Dei. »
 Iterum arripuerunt monachi virum Dei, et cœpe-
 runt eum per gradus in chorum deducere. Quibus
 ipse ait: « Dimittite me, et recedite: nihil hic ha-
 betis facere: permittite Deum secundum voluntatem
 suam disponere de meo negotio. » Interim venerunt
 milites in ecclesiam terribiliter clamantes et vocife-
 rantes: « Ubi est Thomas proditor regis? » Vir au-
 tem Domini ad ista nihil respondit. Clamaverunt
 igitur iterum et dixerunt: « Ubi est archiepiscopus? »
 Tunc vir sanctus: « Et sacerdos, inquit, et archie-
 piscopus sum: et si me queritis, ecce invenistis. »
 Hæc dicens descendit obviam eis de gradibus quos
 ascenderat, divertensque in partem ecclesiæ aqui-
 lonarem, ibi ad murum prope altare beati Benedicti
 substitit. Accedentes igitur ad eum quatuor milites
 memorati, et quidam clericus quem secum adduxe-
 rant cui nomen Hugo Malus clericus: dixerunt ei:
 « Absolve celeriter episcopos regis, quos excommu-
 nicasti. » Quibus ille: « Non faciam, inquit, aliud
 nisi quod jam dixi et feci. » Tunc cœperunt ei minari
 mortem. Quibus ille respondit: « Minas vestras non
 timeo, nam mori pro Deo paratus sum; verumta-
 men homines meos dimittite neque contingatis eos. »
 Injecerunt igitur manus in eum, cœperuntque eum
 fortiter trahere, nitentes eum imponere humeris
 Willelmi et de ecclesia ejicere. Sed vir sanctus fir-
 miter stabat in gradu suo nec loco moveri potuit,
 magister namque Edwardus, qui solus ex omnibus
 suis eum eo remanserat, validissime eum contra eos
 retinebat. Cumque Rainaldus filius Ursionis qui pri-
 mus injecerat manus in eum, vehementius instaret,
 excutens se vir Dei impegit eum a se: ita quod fere
 corruit super pavimentum, dicens illi: « Recede hinc,
 homo meus es: contingere me non debes. » Et Ray-
 naldus ait: « Nec fidem nec hominum tibi debeo,
 contra fidelitatem regis. » Videns igitur Raynaldus
 quod a loco moveri non posset, timensque ne a po-
 pulo qui ad audiendas vespas convenerat eriperet-
 ur, evaginato gladio jam percussurus appropinquavit.
 Videns vero vir sanctus martyrium suum imminere
 jamque cominus stare percussorem: junctis mani-

bus, operuit oculos suos caputque inclinans percus-
 sori dedit. « Deo et beato Dionysio sanctoque Effego
 me commendo! » hæc cum dixisset, accessit Raynal-
 dus et percussit eum ex obliquo fortiter in capite
 amputavitque summitatem coronæ ejus pileumque
 dejecit. Lapsus est ensis supra lævam scapulam,
 inciditque omnia vestimenta illius usque ad nudum.
 Magister vero Edwardus qui juxta virum Dei stabat,
 videns ictum imminere, jecit brachium econtra quasi
 eum protecturus, quod fere penitus abscissum est.
 Tunc accessit Willelmus de Traci, grandique ictu
 percussit in capite, qui tamen adhuc minime ceci-
 dit. Item percussit idem Willelmus enixius, et ad
 illum ictum corruit vir sanctus pronus in pavimen-
 to. Richardus vero Brito jam in pavimento
 prostratum percussit, fregitque ensem suum per me-
 dium ad lapidem oppositum. Dum hæc agantur Hugo
 de Maureville in abigendo populo qui imminabat oc-
 cupatus erat, et ita contigit quod manu sua non per-
 cussit eum. Hugo vero Malus clericus omnium homi-
 num sceleratissimus accedens ad jacentem posuit
 pedem supra collum ejus, gladiumque defigens in
 capite spargebat cerebrum ejus supra pavimentum,
 clamans et dicens: « Eamus, mortuus est enim prodi-
 tor. » His igitur gestis, egrediuntur milites de eccle-
 sia per viam qua venerant, gladios habentes in ma-
 nibus et vociferantes: « Regales, regales. » Dimise-
 rant autem interim in camera archiepiscopali Robert-
 um de Broco, et quosdam alios ad custodiendam rerum
 quæ ibi erant. Quo iterum reversi, statim fregerunt
 arca et scrinia, accipientes aurum et argentum et
 vestes et libros, etiam privilegia et universa quæ ibi
 reperta sunt: diriperunt quoque etiam equos omnes
 et universa omnino quæ in donibus archiepiscopali-
 bus usui apta invenire potuerunt. Monachi vero emissa
 multitudine populi de ecclesia clausurunt ostia: col-
 ligentesque super pavimentum fusum sanguinem et
 cerebrum novi martyris reposuerunt in vasa. Tule-
 runt quoque corpus sanctissimum et exposuerunt ante
 majus altare ubi et pernoctavit, circumsedentibus
 monachis in magna tristitia et mœrore: subposuerunt
 autem et vasa ad susceptionem sanguinis defluentis:
 non ignorantes pretiosissimum esse martyris sangui-
 nem qui pro Dei amore et Ecclesiæ libertate fusus
 fuerat. Mane facto, venit quidam ostiarius regis
 Robertus scilicet de Broco, missus a Randulpho de
 Broco qui convocatis monachis dixit: « Terra vacuata
 est a proditore, qui sicut vivus ita etiam et mortuus
 meruisset inhoneste tractari. Nunc igitur tollite
 eum de medio, et projicite in locum ubi nesciatur,
 alioquin noveritis eum vilissime per pedes extra-
 hendum et per frusta discerptum porcis et canibus
 projiciendum. » Timentes igitur monachi acceperunt
 corpus sanctum et exuerunt illud vestimentis suis.
 Cumque vestimenta illa, quæ usus necessarius exi-
 gere vibebatur, sustulissent: invenerunt subtile ha-
 bitum monachi, id est cucullam, et sub cuculla ad
 carnem cilicium asperissimum, demum etiam sub fe-
 moralibus lineis femoralia cilicina nihilominus as-

perrima. Ipsa quoque vestimenta ita arte quadam et modis aptata erant ut facile possent exui et indui propter disciplinam. Crebro siquidem flagellabatur; ipsa etiam die qua passus est, tertio flagellatus asseritur. Passus est autem ab incarnatione Domini millesimo centesimo septuagesimo primo, quinto die a nativitate Domini, feria vero tertia. Dicendum etiam quod feria tertia natus est et baptizatus idem vir beatissimus; feria tertia de Northamptona fugit, feria tertia mare transiit, feria tertia nihilominus in reditu suo transfretavit, et feria tertia sicut predictum est martyrio coronatus occubuit. Porro monachi videntes virum beatissimum omnia sancti-

tatis et religionis insignia in oculis suis habentem inestimabiliter gavisi sunt, et admirantes dicebant mutuo: « Ecce vere monachum et vere eremitam; ecce vere martyrem, qui non solum in morte sed et in vita tormenta passus est. » De dolore igitur quem de morte illius conceperant, inenarrabiliter consolati gaudentes et exsultantes in Domino securique de patrociniis ejus eum cum maximo honore et alacri devotione in crypta abditissima sepelierunt. Ubi crebra et innumera sanitarum et miraculorum beneficia per ipsius merita fidelibus conferuntur. Præstante Domino nostro Jesu Christo, qui cum Patre et Spiritu regnat sancto in sæcula. Amen.

SANCTI THOMÆ

CANTUARIENSIS ARCHIEPISCOPI ET MARTYRIS,

VITA TERTIA

AUCTORE WILLELMO FILIO STEPHANI (1).

PROLOGUS.

Ad Dei omnipotentis gloriam, et perpetuam beati Thomæ memoriam, et ad omnium legentium vel audientium profectum et ædificationem, ipsius boni archipræsulis et martyris Thomæ vitam et passionem, ego Willelmus, filius Stephani, scribere curavi: ejusdem domini mei concivis clericus et convictor; et ad partem sollicitudinis ejus oris ipsius invitatus alloquio, fui in cancellaria ejus dictator; in capella, eo celebrante, subdiaconus; sedente eo ad cognitionem causarum, epistolarum et instrumentorum quæ offerebantur, lector; et aliquarum, eo quandoque jubente, causarum patronus: concilio Nor-

thamptoniæ habito, ubi maximum fuit rerum momentum, cum ipso interfui; passionem ejus Cantuariæ inspexi; cætera plurima, quæ hic scribuntur, oculis vidi, auribus audiavi, quædam a consociis didici relationibus.

Plato rem publicam oratione formavit; situm Africae in historia sua Sallustius descripsit, occasione Pænorum Romanis rebellium, et Romanorum ad eos subjugandos sæpius transmissorum; et ego situm et rem publicam Londoniæ occasione beati Thomæ.

(1) Libellis Ed. Grim et Rogeri Pont. e mss. Paris. et Lond. transcriptis et nunc primum vulgatis, nihil nec notarum nec variantium hic adjiciam. At Will. fil. Stephani textum, editum olim a Sparkio, totum contuli cum cod. ms. qui in biblioth. Bodl. [Douce sub n. 287] servatur: et pleraque quæ in eo codice habentur, in codice Sparkii ommissa, ut suspectæ auctoritatis uncinis inclusi. Codex Doucianus

C in initio imperfectus est, scilicet ubi occurrit famosa ista urbis Londoniæ descriptio; quocirca usus sum editione istius tractatuli, quæ in Lelandi Itinerario impressa est. Præter ea quæ codex Doucianus indubie meliora habet, pauca sunt quæ ne pereant, imo ne meo judicio nimis fidere cogantur lectores, textui subjeci.

DESCRIPTIO

NOBILISSIMÆ CIVITATIS LONDONIÆ

Inter nobiles orbis urbes, quas fama celebrat, civitas Londoniæ, regni Anglorum sedes, una est,

quæ famam sui latius diffundit, opes et merces longius transmittit, caput altius extollit. Felix est aeris salubritate, Christiana religione, firmitate munitionum, natura situs, honore civium, pudicitia matronali, ludis etiam quam jucunda et nobilium est secunda virorum: quæ singula semotim libet inspicere.

Ibi siquidem emollit animos hominum clementia cœli, non ut sint in Venerem putres, sed ne feri sint et bestiales, potius benigni et liberales.

Est ibi in ecclesia Beati Pauli episcopalis sedes: quondam fuit metropolitana, et adhuc futura creditur, si remeaverint cives in insulam: nisi forte beati Thomæ martyris titulus archiepiscopalis, et præsentia corporalis, dignitatem illam Cantuariæ, ubi nunc est, conservet perpetuam: sed cum utramque harum urbium sanctus Thomas illustraverit, Londoniam ortu, Cantuariam occasu; ipsius sancti intuitu, cum justitiæ accessu, habet altera adversus alteram, quod amplius alleget. Sunt etiam, quod ad Christianæ fidei cultum pertinet, tum in Londonia tum in suburbio, tredecim majores ecclesiæ conventuum, præter minores parochianas centum viginti sex.

Habet ab oriente arcem palatinam, maximam et fortissimam, cujus et area et muri a fundamento profundissimo exsurgunt; cemento cum sanguine animalium temperato: ab occidente duo castella munitissima; muro urbis alto et magno, duplatis heptapylæ portis, intercontinuate, turrato ab aquilone per intercapedines. Similiterque ab austro Londonia murata et turrata fuit; sed fluvius maximus piscosus, Thamesis, mari infuso refluoque, qui illac allabitur, mœnia illa tractu temporis abluit, labefactavit, deiecit. Item sursum ab occidente palatium regium eminet super fluvium eundem, ædificium incomparabile, cum antemurali et propugnaculis, duobus millibus ab urbe, suburbio frequenti continuante.

Undique extra domos suburbanorum horti civium arboribus consiti, spatiosi et speciosi, contigui habentur.

Item a borea sunt agri, pascuæ, et pratorum grata planities, aquis fluvialibus interfluis; ad quas molitorum versatiles rotæ citantur cum murmure jocosum. Proxime patet ingens foresta, saltus nemorosi, ferarum latebræ, cervorum, damarum, aprorum, et taurorum sylvestrium. Agri urbis sationales non sunt jejunæ glareæ, sed pingues Asiæ campi,

Qui faciant lætas segetes,

et suorum cultorum repleant horrea

Cerealis mergite culmi.

Sunt etiam circa Londoniam ab aquilone suburbanorum fontes præcipui, aqua dulci, salubri, perspicua, et per claros rivo trepidante lapillos: inter quos Fons Sacer, Fons Clericorum, Fons sancti Clementis nominatiores habentur; et adeuntur celebriore accessu et majore frequentia scholarum et urbanæ

A juventutis in serotinis æstivis ad auram exeuntis. Urbs sane bona, si bonum habeat dominum.

Urbs ista viris est honorata, armis decorata, multo habitatore populo; ut tempore bellicæ cladis, jubente rege Stephano, bello apti ex ea exeuntes ostentui haberentur, et viginti millia armatorum equitum, sexaginta millia peditum æstimarentur. Cives Londoniæ ubicunque locorum præ omnibus aliis civibus ornatu morum, vestium et mensæ lautioris spectabiles et noti habentur. Habitatores aliarum urbium cives, hujus barones dicuntur. Eis est finis omnis controversiæ sacramentum.

Urbis matronæ ipsæ Sabinæ sunt.

In Londonia tres principales ecclesiæ scholas celebres habent de privilegio et antiqua dignitate. Plerumque tamen favore personali alienius notorum secundum philosophiam plures ibi scholæ admittuntur. Diebus festis ad ecclesias festivas magistri conventus celebrant. Disputant scholares, quidam demonstrative, dialectice alii; hi rotant enthymemata, hi perfectis melius utuntur syllogismis. Quidam ad ostentationem exercentur disputatione, quæ est inter colluctantes; alii ad veritatem, ea quæ est perfectionis gratia. Sophistæ simulatores agmine et inundatione verborum beati judicantur; alii paralogizant. Oratores aliqui quandoque orationibus rhetoricis aliquid dicunt apposite ad persuadendum, curantes artis præcepta servare, et ex contingentibus nihil omittere. Pueri diversarum scholarum versibus inter se contrixantur; aut de principiis artis grammaticæ, vel regulis præteritorum vel supinorum, contendunt. Sunt alii qui in epigrammatibus, rhythmis et metris, utuntur vetere illa triviali dicacitate; licentiâ Fescennina socios, suppressis nominibus, liberius lacerant; lædorias jaeculantur et scommata; salibus Socraticis sociorum, vel forte majorum, vitia tangunt; vel mordacius dente rodunt Theonino audacibus dithyrambis. Auditores,

Multum ridere parati,

Inqeminant tremulos naso crispante cachinnos.

DE DISPOSITIONE URBS.

Singulorum officiorum exercitores, singularum rerum venditores, singularum operarum suarum locatores, quotidiano mane per se sunt locis distincti omnes, ut officiis. Præterea est in Londonia supra ripam fluminis, inter vina in navibus et celis viniis venalia, publica coquina. Ibi quotidie pro tempore est invenire cibaria, fercula, assa, pista, friza, elixa, pisces, pisciculos, carnes grossiores pauperibus, delicates divitibus, venationum, avium, avicularum. Si subito veniant ad aliquem civium amici fatigati ex itinere, nec libeat jejunis expectare, ut novi cibi emanant et coquantur,

Dant famuli manibus lymphas, panesque canistris.

Interim ad ripam curritur, ibi præsto sunt omnia desiderabilia. Quantalibet militum vel peregrinorum infinitas intravit urbem, qualibet diei vel noctis hora, vel ab urbe exitura, ne vel hi nimium jejurent,

vel alii impransi exeant; illuc, si placeat, divertunt, et se pro modo suo singuli reficiunt. Qui se curare volunt molliter, acipenserem, vel Afram avem, vel attagenem lonicum non querant, appositis, quæ ibi inveniuntur, deliciis. Hæc equidem publica coquina est, et civitati plurimum expediens, et ad civilitatem pertinens. Hinc est quod legitur in Gorgia Platonis, juxta medicinam esse cocorum officium, simulacrum et adulationem, quartæ particulæ civilitatis. Est ibi extra unam portarum statim in suburbio quidam planus campus re et nomine. Omni sexta feria, nisi sit major festivitas præceptæ solemnitatis, est ibidem celebre spectaculum nobilium equorum venationum: spectaturi vel empturi veniunt, qui in urbe adsunt, comites, barones, milites, cives plurimi. Juvat videre gradarios succussatura nitente suaviter ambulantes; pedibus lateraliter simul erectis, quasi a subalternis et demissis: hinc equos, qui armigeris magis conveniunt, durius incedentes, sed expedite tamen, qui quasi a contradictoriis pedes simul elevant et deponunt: hinc nobiles pullos juniores, qui nondum freno assueti,

Altius incedunt, et mollia crura reponunt.

Illi summaris membris validis et vegetis: hinc dextrarios pretiosos, elegantis formæ, staturæ honestæ, micantes auribus, cervicibus arduis, clunibus obesitis. In horum incessu spectant emptores, primo passum suaviorem, postea motum citatiorem, qui est quasi a contrariis pedibus anterioribus simul solo amotis et admotis, et posterioribus similiter. Cum talium sonipedum cursus imminet, et aliorum forte, qui similiter sunt in genere suo ad vecturam validi, ad cursuram vegeti, clamor attollitur, vulgares equos in partem ire præcipitur: sessores alipedum pueri tres simul, aliquando bini ex conducto, et bini certamini se præparant, docti equis imperitare, indomitum lupatis temperant frenis ora: hoc maxime præcavent, ne alter alteri cursum præcipiat. Equi similiter pro modo suo ad certamen cursus illius attollunt; tremunt artus, moræ impatientes, stare loco nesciunt; facto signo, membra extendunt, cursum rapiunt, agilitate pervicaci feruntur. Certant sessores laudis amore, et spe victoriæ, equis admissis subdere calcarea, et nec minus eos urgere virgis, et cedere clamoribus. Putares omnia in motu esse, secundum Heraclitum, et falsam omnino Zenonis sententiam, dicentis, quoniam non contingit moveri, neque stadium pertransire. Parte alia stant seorsim rusticorum peculia, agrorum instrumenta, suæ longis lateribus, vaccæ distentis uberibus,

Corpora magna bouum, lanigerumque pecus.

Stant ibi aptæ aratris, trahis, et bigis equæ: quarundam ventres fetibus protument; alias editi fetus obeunt, pulli lasciviores, sequela inseparabilis. Ad

hanc urbem, ex omni natione quæ sub cælo est, navalia gaudent insitiores habere commercia.

*Aurum mittit Arabs; species et thura Sabæus;
Arma Scythes; oleum palmarum divite silva
Pingue solum Babylon; Nilus lapides pretiosos;
Seres purpureas vestes; Galli sua vina;
Norwegi, Russi, varium, grysiæ, sabelinas.*

Urbe Roma, secundum chryzonicorum fidem, satis antiquior est. Ab eisdem quippe patribus Trojanis hæc prius a Bruto condita est, quam illa a Remo et Romulo: unde et adhuc antiquis eisdem utuntur legibus, communibus institutis. Hæc etiam similiter illi regionibus est distincta; habet annuos pro consulibus vicecomites; habet senatoriam dignitatem, et magistratus minores; eluvies et aquæductus in vicis; ad genera causarum deliberativæ, demonstrativæ, judicialis, loca sua, fora singula; habet sua diebus statutis comitia (2). Non puto urbem esse, in qua sint probabiliores consuetudines, in ecclesiis visitandis, ordinatis Dei honorandis, festis feriandis, elemosynis dandis, in hospitibus suscipiendis, in desponsationibus firmandis, matrimoniis contrahendis, nuptiis celebrandis, conviviiis ornandis, convivis hilarandis, etiam in exsequiis curandis et cadaveribus humandis. Solæ pestes Londoniæ sunt immodica stultorum potatio, et frequens incendium. Ad hæc omnes fere episcopi, abbates, et magnates Angliæ, quasi cives et municipes sunt urbis Londoniæ; sua ibi habentes ædificia præclara, ubi se recipiunt, ubi divites impensas faciunt, ad concilia, ad conventus celebres in urbem evocati, a domino rege, vel metropolitano suo, seu propriis tracti negotiis.

DE LUDIS.

Amplius et ad ludos urbis veniamus, quoniam non expedit utilem tantum et seriam urbem esse, nisi dulcis etiam sit et jucunda: unde et in sigillis summorum pontificum, usque ad tempora ultimi Leonis papæ, ex alia parte bullæ, sculpto per impressionem piscatore Petro, et supra eum clave, quasi manu Dei de cælis ei porrecta, et circa eum versu,

Tu pro me navem liquisti, suscipe clavem.

Ex altera parte impressa erat urbs, et scriptura ista, Aurea Roma. Item ad laudem Augusti Cæsaris et Romæ, dictum est.

Nocte pluit tota, redeunt spectacula mane:

Divisum imperium cum Jove, Cæsar, habes.

Londonia pro spectaculis theatralibus, pro ludis scenicis, ludos habet sanctiores, representationes miraculorum, quæ sancti confessores operati sunt, seu representationes passionum, quibus claruit constantia martyrum. Præterea quotannis, die quæ dicitur Carnilevaria, ut a puerorum Londoniæ ludis incipiamus; omnes enim pueri fuimus: scholarum singuli pueri suos apportant magistro suo gallos gallinaceos pugnaces, et totum illud antemeridianum datur ludo puerorum vacantium spectare in scholis suorum pugnas gallorum. Post prandium vadit in suburbanam plantitiam omnis juvenus urbis ad lu-

(2) *Commercia*, eod. Douc.

nam pilæ celebrem. Singulorum studiorum scholares suam habent pilam; singulorum officiorum urbis exercitores suam fere singuli. Majores natu, patres, et divites urbis, in equis spectatum veniunt certamina juniorum, et modo suo juvenantur cum juvenibus; et excitari videtur in eis motus caloris naturalis, contemplatione tanti motus et participatione gaudiorum adolescentiæ liberioris. Singulis diebus Dominicis in quadragesima, post prandia, exit in campos « juvenum recens examen » in equis bellicosis, in equis certamine primis; quorum quisque

Aptus et in gyros currere doctus equus.

Erumpunt a portis catervatim filii civium laici, instructi lanceis et scutis militaribus: juniores hastilibus, ferro dempto, præfureatis, simulacra bellicient, campestria prælia ludunt, et agonisticam exercent militarem. Adveniunt et plurimi aulici, rege in vicino posito, et de familiis episcoporum, consulum, et baronum ephebi; nondum cingulo donati militiæ, gratia concertandi. Accerit singulos spes victoriæ; equi feri adlinniunt, tremunt artus, frenos mandunt; impatientes moræ stare loco nesciunt; cum tandem sonipedum rapit ungula cursum, sessorum adolescentes, divisi agminibus, hi præcedentibus instant, nec assequuntur; hi socios consequuntur, dejiciunt et prætervolant. In feriis paschalibus ludunt quasi prælia navalia: in arbore siquidem mediænna scuto fortiter innexo, navicula, multo rema et raptu fluminis cita, celsa in puppi stantem habet juvenem scutum illud lancea percussurum; qui si scuto illi lanceam illidens frangat eam, et immotus persistat, habet propositum, voti compos; si vero lancea integra fortiter percusserit, in profluentem amnem dejicitur: navis motu suo acta præterit. Sunt tamen hinc inde secus scutum duxes naves stationariæ, et in eis juvenes plurimi, ut eripiant percussorem flumine absorptum, cum primo emersus comparet, vel summa rursus cum bullit in unda. Supra pontem, et in solariis supra fluvium, sunt qui talia spectent, multum ridere parati. In festis tota æstate juvenes ludentes exercentur, arcu, cursu, saltu, lucta, jactu lapidum, amentatis missilibus ultra metam expediendis, parmis duellionum. Puellarum citharæ choro ducit usque imminente luna, et pede libero pulsatur tellus. In hieme singulis fere festis ante prandium, vel apri spumantes pugnant pro capitibus, et verres fulmineis accinti dentibus addendi succidiæ, vel pingues tauri cornupetæ, seu ursi immanes, cum objectis depugnant canibus. Cum est congelata palus illa magna, quæ mœnia urbis aquilonalia alluit, exeunt lusum super glaciem densæ juvenum turmæ: hi ex cursu motu captato citatione, distantia pedum composita, magnum spatium latere altero prætenso perlabuntur. Alii quasi magnos lapides morales de glacie sedes sibi faciunt;

A sessorum unum trahunt plurimi præcurrentes, manibus se tenentes. In tanta citatione lubrici motus aliquando pedibus lapsi cadunt omnes proni. Sunt alii super glaciem ludere doctiores, singuli pedibus suis aptantes, et sub talaribus suis alligantes ossa, tibias scilicet animalium, et palos ferro acuto supposito tenentes in manibus; quos cum aliquando glaciei allidunt, tanta rapacitate feruntur, quanta avis volans, vel pilum balistæ. Interdum autem magna procul distantia, ex conducto, duo aliqui ita ab oppositis veniunt; concurrunt; palos erigunt; se invicem percutiunt; vel alter vel ambo cadunt, non sine læsione corporali; cum post casum etiam vi motus feruntur ab invicem procul; et qua parte glacies caput excipit, totum radit, totum decorticat. Plerumque tibia cadentis, vel brachium, si super illud ceciderit, confringitur; sed ætas avida gloriæ, juvenus cupida victoriæ; ut in veris præliis fortius se habeat, ita in simulatis exercetur. Plurimi civium delectantur, ludentes in avibus cæli, nisis, accipitribus et hujusmodi, et in canibus militantibus in silvis. Habentque cives suum jus venandi, in Middelsexia, Hertfordsira, et tota Chiltre, et in Cantia usque ad aquam Crayæ. Londonienses, tunc Trinovantes dicti, Caium Julium Casarem, qui nullas nisi sanguine fuso vias habere gaudebat, repulerunt. Unde Lucanus:

Territa quæsitis ostendit terga Britannis.

Civitas Londonia peperit aliquot, qui regna plurima, et Romanum sibi subdiderunt imperium; et plurimos alios, quos mundi dominos virtus exivit ad deos, ut fuerat in Apollinis oraculo Bruto promissum:

*Brute, sub occasu solis, trans Gallica regna,
Insula in oceano est undique clausa mari;
Hanc pete, namque tibi sedes erit illa perennis
Hic fiet natis altera Troja tuis.
Hic de stirpe tua reges nascentur; et ipsi
Totius terræ subditus orbis erit.*

Et temporibus Christianis nobilem illum edidit imperatorem Constantinum, Helenæ reginæ filium, qui urbem Romam, et imperialia insignia omnia Deo donavit, et beato Petro, et Sylvestro papæ Romano, cui et stratoris exhibuit officium, et se non amplius imperatorem, sed sanctæ Romanæ Ecclesiæ defensore gavisus est vocari; et ne pax domini papæ, occasione præsentiae ejus, sæcularis strepitus tumultu concuteretur, ipse ab urbe domino papæ collata omnino discessit, et sibi civitatem Byzantium ædificavit. Londonia, et modernis temporibus, reges illustres magnificosque peperit, imperatricem Matildem, Henricum regem tertium, et beatum Thomam archiepiscopum, martyrem Christi gloriosum.

.... *Quali non candidiorem
Terra tulit, nec quo fuerit devinctior alter*
omnibus bonis totius orbis Latini.

VITA ET PASSIO SANCTI THOMÆ

ARCHIEPISCOPI ET MARTYRIS

EDITA A MAGISTRO WILLELMO FILIO STEPHANI.

Beatum Thomam, antequam exiret de ventre, no-
vit Dominus et prædestinavit; et qualis quantus-
que futurus esset, matri per revelationem declaravit.
Siquidem illa prægnans adhuc vidit per somnium,
quod archiepiscopalem Ecclesiam Cantuariensem
totam in utero haberet: eumque in lucem editum
obstetrix in manibus tollens, ait: « Archiepiscopum
quemdam a terra elevavi. » Dum in cunis jaceret
infantulus, una nocte visum est matri suæ, quod
nutricem alloqueretur, quæstam quod puer cooperto-
rium non haberet: cui nutrix: « Imo, domina, opti-
mum habet. » Cui illa: « Ostende mihi. » Nutrix
illud afferens et ostendens, et totum explicare vo-
lens, nec valens, ait: « Tantum est, quod non
possum in hoc thalamo totum evolvere. » Cui mater:
« Intra in aulam, et ibi explica. » Nutrix hoc facere
elaborans, ait: « Sed nec hic queo totum expli-
care. » Mater mirata, ait: « Exi a domo in plateam
fori modo vacantis, ibi nimirum poteris. » Sed nec
ibi nutrix potuit, et dixit: « Tantum est cooperto-
rium, quod finem ejus nequeo invenire; videtur
operire totam Angliam explicationi ejus angustam,
et ultra extenditur. »

Igitur Thomas natus est ex legitimo matrimonio,
et honestis parentibus; patre Gilberto, qui et vice-
comes aliquando Londoniæ (3) fuit; matre Matilda;
civibus Londoniæ mediastinis, neque fenerantibus,
neque officiose negotiantibus, sed de redditibus suis
honorifice viventibus.

Quod patri suo fuerit aliquod indicium de eo di-
vinitus revelatum, hinc scimus: puerum eum pater
in religiosa domo canonicorum Mertonix, priori Ro-
berto, aliquandiu nutriendum commiserat. Venit
aliqua die pater filium videre: introducto puero
coram priore et patre, pater procidens filium pronus
adoravit. Indignatus ob hoc prior, ait illi: « Delire
senex, quid agis? Procidis ad pedes filii tui? quod
honoris ei facis, tibi ille facere deberet. » Cui pater
in secreto ait: « Domine, scio quid facio: erit iste
puer magnus coram Domino. »

De pueritia ejus.

Annis igitur infantix, pueritiæ et pubertatis, sim-
pliciter domi paternæ et in scholis urbis decursis,
Thomas adolescens factus studuit Parisiis: reversus,
receptus est in partem sollicitudinis reipublice Lon-

A doniensis, et vicecomitum clericus et rationalis
effectus; ubi laudabiliter se habens, didicit pruden-
tiam hujus sæculi, qua postmodum probe noverat
communis Ecclesiæ Anglorum, et publica totius
regni egregie et munifice tractare negotia: quem-
admodum,

*Cervinam pellem postquam latravit in aula
Militat in silvis catulus*

Quomodo venit ad curiam Theobaldi archiepiscopi.

Subinde prodeuntibus annis et meritis, adhæsit
Theobaldo bonæ memoriæ Cantuariensi archiepisco-
po, per duos fratres Bolonienses, Baldinum archidia-
conum, et magistrum Eustachium, hospites plerum-
que patris ejus, et familiares archiepiscopi, in ipsius
B notitiam introductus: et eo familiaris, quod præ-
fatus Gilbertus cum domino archiepiscopale de pro-
pinqvitate et genere loquebatur; ut ille ortu Norman-
nus, et circa Tierriaci villam de equestri ordine,
natus vicinus. Horum, inquam, et patris introductu
archiepiscopus sui gregis scripsit Thomam; postea
fortem expertus bonumque. Ad villam de Tierges
(4) primum venit ad curiam archiepiscopi, cum uno
solo armigero, Radulpho de Londonia.

Ipsa nocte sequente visum est hospitæ suæ, quod
super tectum ecclesiæ sederet ille, et totam vesti-
mentis suis dependentibus cooperuisset ecclesiam.
In crastino sompium viro suo narravit illa, et in-
terpretata est, quod alter illorum juvenum, adhuc
enim ignorabat uter esset Thomas, ecclesiæ illius
villæ esset futurus dominus.

De nobilitate clericorum curiæ.

In curia illa archiepiscopali magni et apprime lit-
terati clerici erant; quorum plurimos ad episcopatus
Angliæ, Rogerum vero de Ponte Episcopi ad archi-
episcopatum Eboraci ipse archiepiscopus postea
promovit. Horum respectu Thomas minus litteratus
erat; sed longe quidem altior est ratio morum quam
litterarum: et ipse studuit moralitati et prudentiæ
intendere; ut inter eos adhuc inferior litteris, mo-
ribus conspiceret et acceptior appareret: postmodum
enim litteratissimus fuit.

De persecutione Rogeri postea archiepiscopi.

D Rogerus ille Thomæ successibus et favoris ejus
primitiis invidens apud archiepiscopum, bis obti-

(3) *al. Lond. om. ed. Spark.*(4) *Harwe ed. Spark.*

mittit, quod a curia jussus est semigrare. Thomas vero A et cura; ut vacantes archiepiscopatus, episcopatus, abbatias et baronias, cadentes in manu regis, ipse suscipiat et conservet; ut omnibus regis adsit consiliis; ut etiam non vocatus accedat (5); ut omnia sigilliferi, regii clerici sui manu signentur, omnia cancellarii consilio disponantur: item ut, suffragantibus ei per Dei gratiam vitæ meritis, non moriatur, nisi archiepiscopus aut episcopus, si voluerit. Inde est quod cancellaria emenda non est.

Intellecta mox ipsius industria, mittebat eum archiepiscopus aliquoties Romam pro negotiis Ecclesiæ Anglorum; ubi, Domino favente, sapienter se gerens, in plurimam summorum pontificum et sanctæ Romanæ Ecclesiæ gratiam receptus est.

De statura illius et moralitate.

Erat siquidem placido vultu et venusto; statura B procerus; naso eminentiore et parum inflexo; sensibus corporeis vegetus; eloquio comptus; ingenio subtilis; animo magnus; virtutum iter jam altius ingrediens, omnibus amabilem se exhibens; oppressis et pauperibus erat compatiens; elatis resistens; sociorum promotioni intendens, honorum omnium venerationi; munificus et æcetus; fallere vel falli præcavens; statim prudens huius sæculi filius, lucis futurus.

Qualiter primum crevit in redditibus.

Primum redditum habuit de dono Joannis Wigorniensis episcopi, ecclesiam videlicet Beatæ Mariæ Littoream. Postmodum, de donatione archiepiscopi, ecclesiam de Ottefordia. Postea habuit præbendam Londoniæ in ecclesia Sancti Pauli, et aliam C Lincolnæ.

Tunc, impetrata a domino suo archiepiscopo transfretandi licentia per annum studuit in legibus Bononiæ, postea Autissiodori. Processu temporis et meritum ejus, ordinavit eum archiepiscopus diaconum, et fecit Cantuariensis ecclesiæ archidiaconum: post episcopos et abbates, in ecclesia Anglorum hic primus et dignior est personatus, et ei valebat centum libras argenti.

Qualiter factus est cancellarius.

Consecrato igitur, per manum ejusdem archiepiscopi, secundo Henrico rege Anglorum; commendatione et obtentu archiepiscopi, et hortatu atque nobilis Henrici Wintoniensis episcopi, regis D factus est Thomas cancellarius, quasi omnibus aliis præelectus: vir industrius, animo magna volvens, multarumque et magnarum rerum experiens; cujus obsequii et honoris vices ita operosus exsolvit ad Dei laudem, et regis honorem, et totius regni utilitatem; ut in incerto sit, utrum aliquis nobilior, magnificentiior, et regi utilior fuerit, in pacis et bellicis negotiis.

Cancellarii Angliæ dignitas est, ut secundus a rege in regni habeatur; ut altera parte sigilli regii, quod et ad ejus pertinet custodiam, propria signet mandata; ut capella regis in ipsius sit dispositione

et cura; ut vacantes archiepiscopatus, episcopatus, abbatias et baronias, cadentes in manu regis, ipse suscipiat et conservet; ut omnibus regis adsit consiliis; ut etiam non vocatus accedat (5); ut omnia sigilliferi, regii clerici sui manu signentur, omnia cancellarii consilio disponantur: item ut, suffragantibus ei per Dei gratiam vitæ meritis, non moriatur, nisi archiepiscopus aut episcopus, si voluerit. Inde est quod cancellaria emenda non est.

De pace reddita Angliæ, reiectis Flandrensibus.

Et cum tempore regis Stephani regnum Angliæ profanis decertatum odiis guerræ tempestas involvisset; bellica undique elades descevisset; in unaquaque fere tertia villa speluncæ latronum, hostilia videlicet castra, firmata essent; exhereditaque fuissent nobiles indigenæ; et alienigenæ Flandrenses, et maricolæ (6) viri Cantiam, et plurimam regni partem, occupassent; cumque diuturnitate guerræ fere vicennalis ita turbata essent omnia, ut impossibile videretur Flandrenses ejici, et regnum in statum pristinum et antiquam dignitatem et pacem reformari, maxime novo rege adolescente; miseratione Dei, consilio cancellarii, et cleri et bonorum regni, qui pacis bonum volebant, infra tres primos menses coronationis regis, Willelmus de Ipra, violentus incubator Cantiae, cum lacrymis emigravit: Flandrenses omnes, collectis impedimentis et armis, ad mare tendunt: castella omnia per Angliam corruunt, præter antiquas pacis conservandæ turres et oppida: corona Angliæ, revocatis defectionibus, redintegratur: exhereditatis jura paterna restituuntur: desilvarum latibulis ad villas prodeunt latrones; et communi gaudentes pace teneri, conflant gladios in vomeres, lanceas in falces. Territi a furcis fures, similiter agriculturæ, aliarumve artium mechanicarum sunt exercitatores. Pax ubique est; clypei importantur, caulæ exportantur: exeunt securi ab urbibus et castris ad nudinas negotiatores, ad creditores repetendos Judæi.

Hujus cancellarii industria et consilio, adnitiibus ordinatis Dei, et comitibus et baronibus, nobile illud regnum Angliæ, tanquam ver novum, renovatur, ecclesia sancta honoratur, vacans episcopatus, vel abbatia, honestæ personæ sine simonia donatur: rex, favente Rege regum, in omnibus negotiis suis prosperatur: Angliæ regnum ditatur; pleno replet illud copia cornu: colles culti sunt; valles abundant frumento, pascuæ pecoribus, ovilia quoque balantibus.

Cancellarius Thomas regni sedem, palatium Londoniæ, prius fere ruinam, reparari facit; mira celeritate tantum opus perficiens intra quoddam Pascha et Pentecosten, tot fabris lignariis, et aliis operariis tantæ instantiæ motu et sonitu operantibus, ut vix

(5) *Se inærat* cod. Douc.

(6) *Maricola* ed. Spark.

alter alterum proxime admotum posset audire lo-
quentem.

Cancellarii summus erat, in clero, militia et populo regni, favor. Omnes vacantes parochianas ecclesias villarum et castrorum posset habere: nullus enim ei advocatus negare auderet, si rogare vellet; tanta tamen animi magnitudine vicit ambitionem, ut pauperibus sacerdotibus et clericis perquirendi ecclesias illas locum tollere præoccupando dedignaretur. Magnanimus magna potius perquirebat, scilicet præposituram Beverlaci, et donationem præbendarum de Hastings a comite Augensi; et turrim Londoniæ cum servitio militum addictorum; castellariam Eye, cum honore septies viginti militum; et castrum Berkhamstedie.

Ludebat plerumque, sed perfunctorie, non dedit opera, in avibus cœli nisis et accipitribus, et canibus venaticis, et in calculis bicoloribus.

Insidiosorum ludebat bella laironum.

De honore et mensa domus cancellarii.

Cancellarii domus et mensa communis erat omnibus cujuscunque ordinis indigentibus ad curiam regis venientibus, qui probi vel essent, vel esse viderentur. Nulla fere die comedeat absque comitibus et baronibus, quos ipsemet invitabat. Jusserat quaque die, novo stramine vel feno in hieme, novis scirpis vel frondibus virentibus in æstate, sterni hospitium suum, ut militum multitudinem, quam scamma capere non poterant, area munda et lecta reciperet, ne vestes eorum pretiosæ, vel pulchræ eorum camisia, ex area sorde maculam contraherent. Vasis aureis et argenteis domus ejus renitebat, ferculis et potibus pretiosis abundabat; ut si quæ esculenta vel poculenta commendaret raritas, emptores ejus nulla eorum comparandorum repellere deberet charitas. Summe tamen sobrius erat in his, ut de divite mensa dives colligeretur elemosyna. Et quod a confessionis ejus auditore, Roberto, venerabili canonico de Meritona, audivi; ex quo cancellarius factus est, nulla eum polluit luxuria. Super quo et rex ipse diurnas ei et nocturnas tendebat insidias: sed tanquam vir timoratus et a Deo prædestinatus munditiæ carnis intendens, lumbos præcinctos habebat. Et quidem vir sapiens regni moderamini, et tantarum curarum publicarum et privatarum intentus occupationi, rarius illecebris talibus attentabatur. Quoniam,

Otia si tollas, periere cupidinis arcus.

Vir pudicus cancellarius, osor turpitudinis et impudicitiae, quemdam clericum suum magnæ prosapiæ, Ricardum de Ambli, pro eo quod cujusdam socii sui, dum longinquo aberat in transmarinis, uxorem seduxerat et accubuerat; facta ei persuasionem quod vir ejus in fata concessisset; a domo et amicitia sua projecit, et in turri Londoniæ incarcerationum et in compedibus diu afflictum, teneri fecit.

(7) Confirmavit ed. Spark.

Qualiter nutrebat filios nobilium.

Cancellario, et regni Angliæ et regnorum vicinorum magnates liberos suos servituros mittebant, quos ipse honesta nutritura et doctrina instituit, et cingulo donatos militiæ, ad patres et propinquos cum honore remittebat; aliquos retinebat. Rex ipse, dominus suus, filium suum, hæredem regni, ei nutriendum commendavit: quem ipse cum coætaneis sibi multis filiis nobilium, et debita eorum omnium sequela, et magistris, et servitoribus propriis, quo dignum erat honore, secum habuit.

In qua tamen tantorum sæcularium honorum pompa ipse sæpe disciplinam secretam, nudato ad flagella dorso, recipiebat; cum erat in vicinia Londoniæ, a Radulpho priore Sanctæ Trinitatis; in vicinia Cantuariæ, a Thoma presbytero Sancti Martini. Humilis erat humilibus, elatis ferus et violentus; quasi innatum erat ei:

Parcere subjectis et debellare superbos.

Cancellario homagium infiniti nobiles et milites faciebant; quos ipse, salva fide domini regis, recipiebat; et ut homines suo patrocinio eos ulteriore forebat.

Transfretaturus interdum sex aut plures naves in sua habebat velificatione; nullumque, qui transfretare vellet, remanere sinebat: appulsus gubernatores suos et nautas ad placitum eorum remunerabat. Nulla fere dies effluebat ei, qua non ipse aliqua magna largiretur donaria, equos, aves, vestimenta, auream vel argenteam suppellectilem, vel monetam. Sic nimirum scriptum est, quidam erogant propria et semper abundant; alii rapiunt aliena,

Et curtæ semper abest rei;

tantamque habebat cancellarius donandi gratiam, ut amor et deliciæ totius orbis Latini reputaretur. Ut cuique erat ætas, ita quemque facetus adoptabat.

Dei omnipotentis instinctu, et cancellarii suæ, dominus rex vacantes episcopatus et abbatias non diu retinebat, ut fisco suo patrimonia crucifixi inferrentur (quod postea fecit; quod amplius absit ab eo); imo sine magna mora honestis illas dabat personis, et secundum Deum.

Iterum cancellarii consilio dominus rex canonicalem ecclesiam Meritona, ubi morantes Deum mererentur, in gratiam et familiaritatem recepit; et eam a presbyterio susceptam sumptibus suis consummavit (7), et perpetuis ditavit redditibus: ibique aliquando, cum religioso conventu, pœnitentiæ triduanas ante diem Paschæ celebrabat excubias. Post nocturnum vero obsequium, quod dicitur tenebrarum, seil est lucis, die parascève usque ad horam nonam, vicinarum villarum pauperes, orationum gratia, visitabat ecclesias, pedes incedens, in cappa absconditus, uno solo comitatus socio, viarum duce.

Item cancellario Thoma suggerente, pauperes Angligenas morantes in Galliis, quos fama celebrabat bonos, vel monachum in religione, vel magistrum in studio, rex revocabat, et tales in regno suo plantabat personas; ut magistrum Robertum de Meliduno in episcopali ecclesia Herefordiæ; Willelmum monachum Sancti Martini de Campis in abbazia Ramesciæ.

Ita ob ipsius dotes virtutum, animi magnitudinem, meritorum insignia, quæ animo ejus inhæserant, cancellarius regi, clero, militiæ, et populo erat acceptissimus. Pertractatis seriis, colludebant rex et ipse, tanquam cœtanei pueruli, in aula, in ecclesia, in consessu, in equitando. Una dierum coequitabant in strata Londoniæ, stridebat deformis hiems: eminus aspexit rex venientem senem, pauperem, veste trita et tenui, et ait cancellario: « Videsne illum? » Cancellarius: « Video. » Rex: « Quam pauper, quam debilis, quam nudus! Nunquidne magna esset elemosyna dare ei crassam et calidam cappam? » Cancellarius: « Ingens equidem, et ad hujusmodi animum et oculum, rex, habere deberes. » Interea pauper adest: rex substitit, et cancellarius eum eo. Rex placide compellat pauperem, et quærit si cappam bonam vellet habere. Pauper nesciens illos esse, putabat jocum, non seria agi. Rex cancellario: « Equidem tu hanc ingentem habebis elemosynam; » et injectis ad capicium ejus manibus, cappam novam et optimam de scarleta et grysis qua indutus erat, rex cancellario auferre, ille retinere laborabat. Fit ibi motus et tumultus magnus: divites et milites, qui eos sequebantur, mirati accelerant scire quænam esset tam subita inter eos causa concertandi: non fuit, qui diceret: intentus erat uterque manibus suis, ut aliquando quasi casuri viderentur. Aliquandiu reluctatus cancellarius, sustinuit regem vincere, cappam sibi inclinato detrudere, et pauperi donare. Tunc primum rex sociis suis acta narrat: risus omnium fugens: fuerunt, qui cancellario cappas et pallia sua porrigerent. Cum cappa cancellarii pauper senex abit, præter spem locupletatus, lætatus, et Deo gratias agens.

Aliquotiesque ad hospitium cancellarii rex comedeat, tum ludendi causa, tum gratia videndi quæ de ejus domo et mensa narrabantur. Rex veniebat aliquando equo admissio in hospitium cancellarii sedentis ad mensam; aliquando sagitta in manu, rediens venatu, vel iturus in nemus: aliquando bibebat, et viso cancellario recedebat; aliquando saliens ultra mensam, assidebat et comedeat. Magis unanimis et amici nunquam duo alii fuerunt temporibus Christianis.

Fuit aliquando gravi tentus infirmitate cancellarius Rothomagi apud sanctum Gervasium. Venerunt eum duo reges simul videre, rex Francorum, et rex Anglorum, dominus suus. Tandem dispositus ad sanitatem et convalescens, una dierum sedit ad ludum scaccorum, indutus cappa manicata. Intravit eum

A visitare Aschetinus, prior Legecestræ, veniens a curia regis, qui tunc erat in Gasconia; qui liberius eum allocutus, ausu familiaritatis, ait: « Quid est hoc quod cappa manicata utimini? Hæc vestis magis illorum est, qui accipitres portant; vos vero estis persona ecclesiastica, una singularitate, sed plures dignitate; Cantuariæ archidiaconus, decanus Hastingsæ, præpositus Beverlaci, canonicus ibi, et ibi; procurator etiam archiepiscopatus; et, sicut rumor in curia frequens est, archiepiscopus eritis. » Cancellarius respondit, inter cætera, ad verbum illud: « Equidem tres tales pauperes agnosco in Anglia sacerdotes, quorum cujuslibet ad archiepiscopatum promotionem magis optarem quam meam: nam ego, si forte promoverer, ita dominum meum regem

intus et in cute novi,

necesse haberem, aut ipsius gratiam amittere, aut Domini Dei, quod absit, servitium postponere: » quod et post ita contigit.

Rex Angliæ ad suam transfretationem navem suam propriam solet habere. Cancellarius ei fieri fecit non unam solam, sed tres simul naves optimas, et omnibus necessariis instructas, ut nihil deesset; et eas regi domino suo dono dedit.

Venerunt aliquando in Angliam nuntii regis Norwegiæ: quo audito, cancellarius misit obviam eis, qui eos ad curiam domini regis duceret, et eis sumptus necessarios, nomine cancellarii, ministraret.

C Nicolaus archidiaconus Londoniæ incidit semel in offensam regis, unde domus ejus, familia ipsius expulsa, ex regis præcepto serata, et regi subhastata fuit. Non destitit bonus cancellarius, quin ipsa die archidiaconum regi reconciliaret, et ad possessionem revocari suam impetraret.

Eodemque modo officiosus fuit quandoque episcopo Cenomannensi, et Giloni archidiacono Rothomagensi: nam cum in schismate Romanæ Ecclesiæ hæc Octavianus et imperator Fredericus qui eum fovebant: inde catholicus papa Alexander consilio suorum cardinalium nuntios suos misissent ad regem Francorum, et regem Anglorum tunc transmarinum; illi autem, convocatis episcopis plurimis et summis regnorum suorum, apud Novum Forum, cum congregati essent, nuntios illos et rationes eorum audituri, et de merito electionis eorum, utriusque obedientiæ se subderent, tractaturi: placuissetque tandem eis Alexandri electio quæ justior eis et sanctior non immerito visa est; pro eo quod archiepiscopus Rothomagensis Hugo eam approbavit, et per Gilonem nepotem et archidiaconum suum suffraganeis suis recipiendam mandavit; rex vehementer commotus, domos archidiaconi dirui præcepit, quoniam in ipsum archiepiscopum grandævum, et virum magnanimum palam exandescere rex veritus est. Tunc domino regi supplex ait cancellarius: « Domine mi rex, equidem domus illa quam ruere præcipitis, archidiaconi Gilonis est; sed hospitium meum est. » Et hujusmodi dixit apposite ad persuadendum, ut tandem a rege delinito et suaso, archidiaconi pacem

cum domus ipsius integritate obtineret. In crastino A
 audivit rex, quod episcopus Cenomannensis Alexan-
 drum papam recepisset exemplo domini Rothoma-
 gensis, et nuntius ejus obedientiam promississet papæ
 servandam. Rex iratus est, quod ejus sine jussu et
 licentia et sententia hoc fecisset. Marescalli regis,
 commotione ejus vel forte præceptione intellecta, ad
 hospitia episcopi vadunt, chamis succisis, equos eji-
 ciunt, sarcinas episcopi in vicos exportant, eum hospi-
 tio privant; a curia episcopus turpiter recedere com-
 pulsus est. Facit rex breves scribi, ut domus ejus
 Cenomanni diruantur. Signatas breves rex in manu
 tenens, et ostendens publice, ait astantibus: « Equi-
 dem Cenomannenses audient de episcopo suo rumo-
 rem. » Omnis clerus, qui aderat in tanta duorum
 regum curia, doluit; cancellarius supra omnes: B
 Intelligens autem regem in tanta ira frustra com-
 pellendum et rogandum, præcepit cursoribus regis,
 bajulis litterarum illarum, ut non festinarent; et
 cum itinere duorum dierum Cenomannis venire
 possent, non illuc venirent, nisi quarto die, acquie-
 verunt illi. In crastino ad dominum regem episco-
 pos ire suasit cancellarius pro Cenomannensi ro-
 gaturus: ierunt aliqui, regem inexorabilem invene-
 runt; ierunt alii, suggerente cancellario, repulsam
 passi sunt. Tandem cancellarius ipse regem adiit,
 pro episcopo oravit; in crastino similiter: instantia
 cancellarii rex compulsus, tandem acquievit; pu-
 tans jam, quod domus episcopi vel tota vel magna
 ex parte corruisset. Statim litteras regis de pace
 episcopi cancellarius misit præfecto Cenomanni per
 nuntium proprium, cui et in amicitia suæ obser-
 vantia injunxit, ut die vel nocte non quiesceret pes
 ejus, donec Cenomannum veniret. Ille continuato
 diplomate Cenomannum venit, intactis domibus
 episcopi, ipso die, quo priores nuntii domini regis;
 qui tamen prius venerant, et litteras regis de do-
 mibus episcopi diruendis ostenderant. Et hoc qui-
 dem d. lo bono cancellarii se delusum rex postea
 gavisus est; sicut legitur in Timæo de illa nuben-
 tium saluberrima sortis fraude.

Quinquaginta duos clericos cancellarius in obse-
 quio suo habebat: quorum plurimi in suo erant
 comitatu, curabant episcopatus et abbatias vacan-
 tes, aut ejus proprios honores ecclesiasticos.

Deliberavit quandoque rex Anglorum cum can-
 cellario, et aliis quibusdam regni sui magnatibus,
 petere a rege Francorum filiam ejus Margaretam
 matrimonio copulandam filio suo Henrico. Placuit
 consilium. Hæc siquidem regum et magnorum viro-
 rum magna est confœderatio.

Hæc res et jungit, junctos quoque servat amicos.

Ad tantam petitionem tanto principi faciendam quis
 mittendus erat, nisi cancellarius? Eligitur: assen-
 titur. Igitur cancellarius rem, personas, et officium

A suum attendens, et se tantæ rei committens, juxta
 illud poeticum:

*Metre quod andes; nuptialiter se instruit,
 Qui nuptias mittitur conciliare futuras.*

Parat ostendere et effundere luxus Anglicani opu-
 lentiam; ut apud omnes et in omnibus honoretur
 persona mittentis in misso, et missi sua in se. Cir-
 citer ducentos in equis secum habuit de familia sua,
 milites, clericos, dapiferos, servientes, armigeros,
 nobilium filios, militantes ei, et armis omnes instru-
 ctos (8). Omnes isti, et omnis eorum sequela, novo fe-
 stivo fulgebant ornatu vestium, quisque pro modo suo.
 Habuit etiam viginii quatuor mutatoria vestimen-
 torum (9), omnia fere donanda, et in transmarinis
 relinquenda, et omnem elegantiam varii, grysi, et
 pellium peregrinarum, palliorum quoque et tapetum,
 quibus thalamus et lectus episcopi hospitio recepti
 ornabantur. Habuit secum canes, aves omne genus,
 quo reges utuntur et divites. Habuit in comitatu
 suo octo bigas curules; unamquamque bigam quatu-
 que equi trahabant, dextrariis corpore et robore
 similes: quisque equus suum sibi deputatum habe-
 bat fortem juvenem nova tunica succinctum, euntem
 cum biga; ipsaque biga suum veredum et custodem.
 Duæ bigæ solam cervisiam trahabant, factam in
 aquæ decoctione ex adipe frumenti, in cadis fer-
 ratis, donandam Francis, id genus liquidi plasmatis
 mirantibus, potum sane salubrem, defecatum, colore
 vineo, sapore meliori. Habebat cancellarii capella
 bigam suam, camera suam, expansam suam, coquinam
 suam; portabant alia esculentorum et poculentorum
 aliquid; alia dorsalia tapeta, saccos cum vestibus
 nocturnis, sarcinas et impedimenta. Habuit duode-
 cim summarios. Octo scrinia cancellarii continebant
 suppellectilem, auream silicet et argenteam; vascu-
 los, cullulos, pateras, ciphos, cuppas, urceolas,
 pelves, salina, cochlearia, cultellas, paropsides. Alia
 coffræ et cliellæ cancellarii continebant monetam,
 æs plurimum quotidianis ejus impensis et donis
 sufficiens, et vestes ejus, et libros aliquot et hujus-
 modi. Unus summarius capellæ sacra vasa, et alta-
 ris ornamenta, et libros portabat, cæterorum præam-
 bulus. Quisque summariorum suum habebat agaso-
 nem, qualem et qualiter decuit instructum. Quæque
 etiam biga habebat canem alligatum vel supra vel
 subtus, magnum, fortem et terribilem; qui ursum
 vel leonem domiturus videretur. Sed et supra
 quemque summarium erat vel simia caudata, vel

humani simulator simius oris.

In ingressu Gallicanarum villarum et castrorum,
 primi veniebant garciones pedites

(fruges consumere nati

quasi ducenti quinquaginta, gregatim euntes sex
 vel deni, vel plures simul, aliquid lingua sua pro

(8) *Equis ad speciem venustis, ad vecturam validis
 et militum ejus dextris trahabantur et scuta et arma
 portabantur, addit cod. Douc.*

(9) *Muricibus Tyriis iteratas vellere lanas, plures
 testes holosericas, add. cod. Douc.*

more patriæ suæ cantantes. Sequebantur aliquo intervallo canes copulati et leporarii in loris et laxis suis, seu quo alio dignentur nomine, cum concurrebantur et sequacibus suis. Post modicum stridebant ad lapides platearum illæ bigæ ferratæ, magnis coriis animalium consutis coopertæ. Sequebantur ad modicam distantiam summarii agasonibus, positus genibus super clunes summariorum, equitantibus. Aliqui Franci a domibus suis egressi ad tantum strepitum quærebant, quis veniret, ejus esset illa familia? Aiunt illi, quod cancellarius regis Anglorum ad dominum regem Franciæ missus veniret. Dicunt Franci: « Mirabilis est ipse rex Anglorum, ejus cancellarius talis et tantus incedit. » Sequuntur ad aliquam interapedinem post summarios armigeri, militum portantes scuta, et trahentes dextrarios: inde, alii armigeri; dehinc ephēbi; deinde, qui aves portabant; postea, dapiferi, et magistri, et ministri domus cancellarii; deinde milites et clerici, omnes bini et bini equitantes; postremo, cancellarius, et aliqui familiares ejus circa eum.

Appellatus in transmarinis, statim præmiserat domino regi Francorum cancellarius mandans quod ad eum veniret. Venit per castrum Medlenti. Rescripserat ei rex Francorum, quod occurreret ei Parisiis, et qua die. Rex itaque volens cancellarium procurare, sicut nobilitatis et consuetudinis Gallicanorum regum est omnem mortalem ad curiam Franciæ venientem, quandiu in curia fuerit, procurare; edicto Parisiis dato prohibuerat ne quis aliquid cancellario, vel suis emptoribus venderet. Quo præcognito, cancellarius præmiserat suos ad fora vicina, Lamaci, Corboili, Pontis Isarei, Sancti Dionysii; qui sibi emerent panes, et carnes, et pisces, vina, et cibaria, in abundantia, mutato, suppressisque nominibus, habitu. Et cum Parisiis domus Templi hospitium habiturus ingrederetur; occurrerunt ei sui dicentes, quod hospitium omnibus bonis instructum ad moram triduam inveniret, quaque die mille hominibus procurandis. Equidem in divitiis regis Salomonis legitur quot animalium carnes quotidianis ejus impensis sufficerent; et equidem una die, anguillarum unum solum ferculum cancellarii centum solidis sterlinguorum emptum fuit: quod omni patriæ notum etiam loco proverbii multo tempore multis in ore erat de aliis ejus ferculis et impensis sileo. Ex hoc uno intelligi potest, quod mensa cancellarii sumptuosa et sufficiens fuit.

Qualiter eum dominus rex Francorum et nobiles illi Franci honoraverunt; qualiter ipse vicissim eos; et præterea qua comitate suscepit scholares Parisienses et magistros scholarum, et cives scholarum Angligenarum creditores, dicere non sufficio. Legitur de Hannibale, quod, post interfectum Hasdrubalem, Romam nuntios miserit, dicens eis: « Ite, et omnem mortalem explete pecunia. » Idem forte legit et curavit cancellarius, omnem nobilem Francum ba-

ronem, militem, servitorem regis, vel reginæ regie Francorum, magistros scholarum, scholares, civium nobiliores, muneribus suis explebat. Omnia sua vasa aurea et argentea donavit, omnia mutatoria vestimentorum: illi pallium; illi cappam griseam; illi pelliciam; illi palefridum; illi dextrarium: quid plura? Supra omnem hominem suam gratiam adeptus est. Legatione sua feliciter functus est: propositum assecutus est: quod petiit, ei concessum est. In reditu suo Guidonem de la Val, regis Angliæ impugnatorem, patriæ stratiæque publicæ depredatorem, cepit, et coniectum in vincula apud castrum Novi Fori incarceravit. Hoc modo se cancellarius Thomas in pacis studio et tempore habuit, quid de eo in bellicis negotiis occupato loquar?

B *Qualiter cancellarius regi servierit in sua guerra de Tolosa.*

In exercitu et obsidione Tolosæ, ubi tota Anglia, Normannia, Aquitania, Andegavis, Britannia, Scotia, in præsidium regis Angliæ, militarem manum, et fortitudinem bellicam emisit; cancellarius de propria familia lectam manum militum septingentos milites habebat. Et quidem, si ejus paritum esset consilio, urbem Tolosam, et regem Franciæ, qui favore sororis comitissæ Constanciæ se imminerat, sed et improvide sine exercitu et manu forti, invassissent et cepissent; tantus erat regis Anglorum exercitus. Sed vana superstitione et reverentia rex tentus consilio aliorum, super urbem, in qua esset dominus suus rex Franciæ, irruere noluit, dicente in contrarium cancellario, quod personam domini rex Francorum ibi deposuisset, eo quod supra pacta (10) conventa hostem se ei posuisset. Non multo post, vocata et congregata venit in urbem militia regis Francorum; et rex Angliæ, cum rege Scotiæ et omni exercitu suo, inopsvoti et inefficax propositi rediit; capta tamen prius urbe Cadurecio, et plurimis castellis, in vicina Tolosæ, quæ erant comitis Tolosæ, et suffraganeorum ejus, vel quæ comes Tolosæ regis Angliæ fautoribus prius abstulerat. Ad quæ omnia retinenda, post reditum regis Angliæ, comitibus omnibus reensantibus, solus cancellarius cum sua familia, et solo Henrico de Essexia, constabulario et barone regis, remansit. Et postea tria castra munitissima, et quæ inexpugnabilia videbantur, ipsemet lorica indutus et galea, cum suis in manu forti cepit. Sed et Garonnam cum militari manu transit supra hostes; confirmataque in regis obsequium tota illa provincia, gratus et honoratus rediit.

Item qualiter se habuit in guerra Francorum.

Postmodum autem in guerra regis Francorum et domini sui regis Anglorum in Marchia, ad communem terminum terrarum suarum inter Gisorcium et Triam et Curceles; cancellarius, præter propriæ familiæ septingentos equites, alios mille ducentos stipendarios milites habebat, quatuor millia servientium, per unam quadragenam. Et cuique mili-

(10) Pacta om. c. spars.

quaque die, dabantur ad equos et armigeros procurandos tres solidi illius monetæ; ipsique milites omnes ad mensam cancellarii erant. Ipsemet clericus cum esset, cum valente milite Francorum Engelramno de Tria, e regione subditis equo calcaribus veniente armato, lancea demissa et equo admissis congressus, ipsum equo dejecit, et dextrarium laceravit. Et in toto regis Anglorum exercitu semper primi erant milites cancellarii, semper majora audebant, semper præclare faciebant, eo docente, ducente, eo hortante: canere eductui, canere receptui, in lituis suis ductilibus, quos in exercitu suo proprios, sed universo hinc inde exercitui habebat notissimos. Unde ipse hostis etiam et expugnator regis Francorum, et terræ ipsius in igne et gladio depopulator, in magnam pervenit gratiam ipsius regis Francorum et magnatum totius Galliæ, suffragantibus ei meritis fidei præstantis et nobilitatis suæ notissimæ: quam gratiam postmodum tempore opportuno sibi rex exhibuit. Virtus quippe et in hoste laudatur.

De electione cancellarii in archiepiscopum.

Interim diem suum postremum clausit archiepiscopus Theobaldus. Statuit ergo rex Anglorum cancellarium suum in archiepiscopatum promovere, intuitu meritorum personæ; confidens, quod sibi ad placitum et nutum, ut cancellarius fecerat, archiepiscopus obsequeretur. Præcedente itaque notaque omni clero Angliæ regis voluntate, quod solum electionis illius meritis derogavit (11), cancellarius archidiaconus Cantuariæ, ejusdem ecclesiæ archiepiscopus unanimiter eligitur. Solus Gilbertus Herefordiæ, qui et postea translatus est in Londoniam, habitu monachus, vinum vel carnem non gustans, quod potuit, dissuasit: ut putabatur, non bene zelans electionem, sed male electum: aspirare enim et pro se laborare credebatur. Postmodum enim dixit, mirum fecisse regem, qui de homine sæculari, et de milite quodam facerat archiepiscopum.

Anno gratiæ millesimo centesimo sexagesimo secundo, octava die Pentecostes, ecclesiæ Cantuariensis festa die, die videlicet sanctæ Trinitatis, in ipsa metropolitana ecclesia congregatis suffraganeis episcopis omnibus, per filium hæredemque regis Henrici secundi Henricum, et per Ricardum de Luci, aliosque magnates Angliæ, qui aderant ex parte regis tunc transmarini, beatus Thomas, liber et ab omni querela sæculari solutus et quietus, Ecclesiæ Cantuariensi est redditus et repræsentatus, et per manum Henrici venerabilis episcopi Wintoniæ, archiepiscopus ordinatus. Papa Alexander tertius ei pallium misit per clericum ejus Joannem Salesburiensem. Archiepiscopus contra illam fasciam pectoralem et humeralem suscipiendam devotus, pronus et nudus pedes ivit. Mysterium siquidem grande est, illud insigne, illud archiepiscopi singulare. Pallium pro aurea lamina est institutum, in qua summus pontifex in lege nomen Domini tetragramma-

ton in fronte sua præferebat inscriptum. Duæ lineæ propendentes sunt duæ leges, Christi passionem præferentes, spinulæ sunt clavi, quibus corpus Christi cruci figitur. In ordinatione sua, unctione misericordiæ Dei visibili et invisibili perfusus, exiit sæcularem hominem, et Jesum Christum induitur: evacuavit, quæ erant sæcularia cancellarii; satagens, quæ sunt boni archiepiscopi.

Itaque omni custodia excubabat animum suum. Sermo ejus seriè erant ad ædificationem auditorum: opera ejus, misericordiæ et pietatis: sententiæ ejus, justitiæ et æquitatis. Cilicio usque ad poplites asperissimo et vermibus scaturiente, et parco cibo carnem edomabat, et consueto potu aquæ, in qua coctum erat feniculum. Vinum tamen prægustabat, et dabat considentibus; et carni appositum aliquid comedeat; sed pane reficiebat. Omnia tamen munda mundis; et in culpa non est cibus, sed appetitus. Verberibus disciplinalibus frequenter dorsum nudum exponebat. Proxime supra cilicium habuit habitum monachalem, quoniam monachorum erat abbas Cantuariensium; supremo, canonicalem, ut clericis conformaretur. Stolum tamen, jugum Christi suave, circa collum et diebus et noctibus habebat. Facies ejus exterior similis erat multitudini, intus omnia dissimilia. Sancti Sebastiani et sanctæ Cecilie imitator, quorum ille sub absconso chlamidis Christi militem gerebat absconditum: illa cilicio carnem domans, desuper auratis vestibus tegebatur. In esu et vestitu religiosior studebat esse quam videri. Orationi intentus, Spiritui creatori spiritum suum creatum reconciliare, et quodam modo unire vacabat. Dei et hominum quasi quidam interpres, commendabat oratione Deo homines, prædicatione Deum hominibus. Sacre lectioni deditus, suum in divina pagina habebat eruditorem. Interdum post prandium cum sociis conferebat, audiens et interrogans eos. Usus est convictoribus viris religiosis, clericisque honestis et litteratissimis. Familiam habuit similiter electam, bonorumque virorum receptui et venerationi devotam. In dandis erat elemosynis munificus, mittens hospitalibus donibus, et pauperibus collegiis, interdum quatuor vel quinque marcas, interdum annonam et carnes.

Cum enim piæ memoriæ Theobaldus, prædecessor ipsius, statutas prædecessorum suorum elemosynas duplicare consuevit, hic religiosa æmulatione etiam duplum ejus censuit duplicandum. Ad hujus pii operis observantiam, omnium, quæ ex quocunque titulo percipiebat, decimas consecrabat. In secretiori cellula tredecim pauperum pedes curvatis genibus quotidie abluebat, in memoriam Christi; singulis eorum, post plenam refectionem victualium, quatuor argenteos largiens: quod si forte aliquando, raro tamen, in propria persona gerere prohibebatur, hoc diligentissime per vicarium faciebat impleri. Solitarius agens usque in miraculum lacrymis sui-

(11) Verba quod s. e. i. m. d. om. ed. Spark.

fundeatur : et sic in altaris versabatur officio , ac si præsentialiter in carne geri cerneret Dominicam passionem. Reverentissime divina sacramenta tractabat , ut intentum fidem et mores ipsa contrectatio informaret.

Amplius : vagos et egenos in domo sua reficiebat , contra hiemem multos vestiebat. Cantuariæ ple- rumque in claustrum se recipiebat , et sicut unus manachorum ibi sedentium sedebat studens in aliquo libro diutius : post ibat visitare monachos infirmos , ut eorum audiret et impleret desideria. Erat oppressorum consolator , viduarum maritus , pupillorum adjutor. Erat præterea humilis et affabilis mansuetus , se effluentibus severus. Contra injustitiam et insolentiam potentum quasi turris erecta in Damascum firmabatur , neque ipsius regis preces vel litteræ cuiquam apud eum prodesse poterant , nisi cum iustitia.

Pudore bono nunc maxime repletus fuit , qui jam pridem etiam cancellarius metas pudicitie non excessit. Alter quodammodo Moyses erat , tabernaculum Domini crebro intrans et exiens ; intrans tempore accepto ad Dei contemplationem , exiens ad piam erga proximos actionem. Alter Jacob nunc copulabat sibi Liam fructu secundam ; nunc autem Rachelis pulchrioris hærebat amplexibus. Erat quasi unus angelorum Dei , qui per scalam , cuius summities cælos tangebant , nunc descendebat ad sublevandas necessitates hominum , nunc ascende- bat ad divinæ majestatis et supernæ claritatis intuitum : suspensus a terrenis et transitoriis sum- mopere intendebat in cœlestia. Vacabat virtutibus , quæ vitam et præsentem beatificant , et promerentur æternam. Aderat ei primo regina ratio , quæ ut domina ancillis , ita illa cupiditatibus et pravis animi motibus imperat. Itaque ductu rationis progressus est in virtutem ; quæ sese diligens aspernatu- r , contraria , et a se oriens , rursus ad se revertitur , et omnia sua complexa nihil quærit aliunde. Aderant ei virtutis species quatuor : prudentia , quæ eum reddidit discretum in rerum cognitione , persona- rum , loci , temporis æstimatione , in pravorum fuga , in appetendorum electione ; iustitia , qua Deo et cui- que quod suum erat , conservare studebat ; fortitudo , quæ eum in adversis vindicans , a malorum præ- sentium ægritudine et futurorum metu protegebat ; temperantia , quæ eum in prosperis nihil immoderate facere permittens , a libidine omni , et a cupi- ditate rerum temporalium revocabat , et insolenti non sinebat alacritate gestire. Hæc est quadriga (12) Aminadab ; hæc est diatessaron prima ; hæc est in homine summa harmonia : hic est in homine dul- cis ille et suavis concentus , qui Dei etiam aures replet , et inducit hominem in vitæ beatitudinem , quæ est , secretis malis omnibus , cumulata bonorum complexio.

Hac vitæ beatitudine affectus et beatus effectus

A archiepiscopus Thomas curabat , constanter , sple- dide , graviter , honeste agere omnia ; ad sapientie cuncta referre arbitrium ; sibi imperare ; sapientie stare iudiciis , non populi ; fortunæ non timere insi- dias ; contra adversa septum , munitum , et inexpu- gnabilem se gerere ; non sibi , sed omnibus ejus auxilio indigentibus se natum credere , maxime autem ecclesiæ suæ , quam regendam suscepserat ; in terris divina contemplari , Jesum Christum imitari natum , et missum ad passiones , ipsumque vere diligere , et ejus observare mandata ; suam et com- missarum sibi animarum salutem quærere. Hinc factum est , ut consecraretur apud Deum gratiam , apud homines gloriam solidam quietem et expres- sam , consentiente laude bonorum virorum , voce in- corrupta de eo bene judicantium : hæc quidem re- sonat virtuti , tanquam echo voci ; tanquam imago exemplari. Et quia gloria recte viventium comes est , bonis viris sicut nec appetenda , ita nec est respuenda , sed Deo attribuenda. Siquidem ait Apo- stolus : « Nam etsi voluero gloriari , non ero insi- piens ; veritatem enim dicam. » Hanc tamen glo- riam timuit et sprexit Thomàs , ne forte subreperet elatio , scriptum esse attendens , quantumlibet ju- stus , nunquam tamen sit securus. Est alia quedam falsa et vana gloria , quam appetunt homines su- perbi et vani , divites et hypocritæ : adumbrata scilicet imago gloriæ , cui nulla virtutis , quæ laudetur , subest soliditas ; sed videtur similitudo quedam apparens quidem specie , non existens autem in re. Et sicut boni veræ laudis gloriam metunt , ita mali falsam gloriam appetunt ; vel etiam si quid re- cte fecerint , appetentes inde laudem vel præmium , eo ipso amittunt et nomen et meritum.

Gloriosus archiepiscopus Thomas contra spem regis et omnium ita sæculum deseruit , ita repente mutatus est mutatione , quæ est dexteræ Excelsi , ut omnes mirarentur.

De tentatione diaboli per malos et injustos homines facta.

Antiquus hostis talem in Ecclesia Domini erectam columnam , talem supra candelabrum Dei accensam lucernam invidit. Inimicus homo seminat zizania. Primo ei regis tollit benevolentiam , quasi indigne D ferre rex debeat , quod , qui eum primo cancellarium , post archiepiscopum fecerat ; nunc et a suo se re- trahit obsequio , et in pluribus ei contradicit. Regis familiares regi placere quærentes , et ejus prurien- tes auribus , archiepiscopo detrahebant , et eum gra- tis odio habebant.

Præterea quidam aulici , clerici regis , timentes potius ecclesiis suis aliquibus , quas male acquisie- rant , sub archiepiscopi iustitia destitui , quam aliis incardinari , vel ad majora beneficia ejus tempore provehi ; et per se et per episcopos aliquot regem et suos adversus archiepiscopum incitare et commo- vere intendebant. Nihil iam ab eo vel dici vel fieri

(12) Auriga ed. Spark.

poterat, quod non malitia infelicitum hominum depravaret. Adeo quidem ut regi persuaderent, quod si archiepiscopi potestas procederet, regia dignitas esset procul dubio peritura; et nisi sibi et hæredibus suis prospiceret, is demum futurus erat rex, quem clerici eligeret, et quam diu placeret archiepiscopo regnatura.

Nimirum ophthalmia vel lippitudine laborantibus inimica est lux; et justus injustis gravis erat ad videndum, et contrarius erat operibus illorum. Ipse soli Deo, et nemini, nisi in Deo, placere quærebat; illi magis regis terreni auribus faciebant insidias. Amicus Dei inimicus mundi constituitur. Moratum [morigeratum *ed. Spark.*] morosi persequuntur.

Hæc prima infestationis archiepiscopi causa. Adduntur regi et regalibus in hac dissensione plurimi episcopi, timore amittendi terram, et terrena, quæ possidebant. Destituitur eorum consilio et auxilio archiepiscopus. Accessit indignationi regis et militiæ regni, quod castrum Tunebregiæ, et totum illum honorem, pridem a Cantuariensi alienatum Ecclesia, a comite de Clara Rogero revocare intendebat, quia secundum decreta prædecessoribus et æconomis ecclesiæ prædia licuit colere et augere, non minorem vel alienare. Illi autem comiti de Clara fere omnes nobiles Angliæ propinquitatem ad hærebant, qui pulcherrimam totius regni sororem habebat, quam rex aliquando concupierat. Tamen prius a rege petita obtinuerat archiepiscopus licentiam revocandi prædia Ecclesiæ Cantuariensis, a prædecessoribus suis male alienata, vel a laicis occupata. Item Ecclesiam de Eynesfordia cuidam clerico Laurentio archiepiscopus donaverat. Ejus siquidem est tam baronum suorum quam monachorum Cantuariensium vacantes in villis donare ecclesias. Dominus villæ Willelmus de Eynesfordia reclamans, homines Laurentii expulit; archiepiscopus eum excommunicavit. Rex statim archiepiscopo scripsit, ut eum absolveret. Respondit archiepiscopus, non esse regis præcipere quemquam absolvi, sicut nec excommunicari. Rex contendit, de regali sua esse dignitate, quod non excommunicetur, qui de eo in capite teneat, ipso inconsulto. Tandem ad regem mitigandum, qui jam in eum excandescibat, et non nisi per nuntios ei loquebatur, archiepiscopus Willelmum absolvit. Et ait de eo rex apud Windsoram: « Nunc ei inde gratiam non habeo. »

Præterea diu ante, tempore scilicet Theobaldi archiepiscopi, adversus clerum Angliæ generaliter rex aliqua conceperat; quorundam clericorum insolentia provocatus.

(15) Unde aliquando in concilio dominus rex quædam satis dura proponere cepit. Primo enim conquestus est de archidiaconorum violentia, quod aliorum delicta in sua verteret lucra, quod peccatorum pretia exigant.

(15) Unde aliquando usque ad sit, col. 130, lin. 33, om. cod. Donc., sed habet in alio loco, ubi sub nomine summa causæ occurrunt. Habet etiam alius

A Et de his suos supra modum lux exerceant, cum tamen peccantibus debitam correctionem non impendant: dixitque se velle, ne archidiaconi quemquam quantumcunque infamem super aliquo crimine conveniant, præter officialis sui conscientiam. Moxque ad aliud sermonem vertens; « cogito, inquit, cogitationes, pacis moveorque multum pro bono pacis, quæ in regno meo, clericorum malitia perturbatur, qui rapinas et furta perpetrant, et homicidia plerumque. Peto igitur et volo, ut tu, domine Cantuariensis, et coepiscoporum tuorum consensu clerici in maleficiis deprehensi vel convicti vel confessi exauctorentur illico, et mox curiæ meæ lictoribus tradantur, ut omni defensione Ecclesiæ destituti, corporaliter puniantur. Volo etiam et peto, ut in illa exauctoratione, de meis officialibus aliquem interesse consentias, ut exauctoratum clericum mox comprehendat, ne quæ ei fiat copia corporalem vindictam effugiendi. »

B Ad hæc, dominus Cantuariensis, cum super petitionis hujus responso, nec usque mane impetrare posset inducias, secessit in partem cum episcopis suis. Moxque hinc inde allegatum est: episcopi dicebant secundum leges sæculi, clericos exauctoratos curiæ tradendos, et post poenam spiritualem corporaliter puniendos, quoniam quo digniores sunt privilegio, eo deteriores judicantur in delicto; et quo deteriores in delicto, eo graviore sunt afficiendi supplicio. Non ergo mirum, inquit, si privationem ordinis sequatur supplicium corporis. Id ipsum etiam non solum legibus, sed etiam authenticis probant exemplis; Levitas Veteris Testamenti proponentes in medium, quos reos forte flagitii lege prohibiti, sequebatur mors corporis; vel juxta similitudinem eriminis, multatio in membris.

C Dominus vero Cantuariensis sacris canonibus consentiens, in contrarium allegabat, asserens omnino injustum fore, et contra canones, et contra Deum, si ob unius punitionem delicti, duo quis subeat judicia. « Nec enim Deus judicat bis in idipsum. » — « Quod enim, inquit, judicat Ecclesia, aut justum est aut injustum: sed non dabis injustum, erit ergo justum. Quod cum non contineat absolutionem, continet damnationem. Si ergo damnatur reus, cum exauctoratur, non debet aliud judicium inchoari ad ejusdem condemnationem peccati. » Ad hæc quoque cavendum est, inquit, nobis, ne nostro consensu opprimatur et pereat libertas ecclesiæ, pro qua, exemplo summi sacerdotis nostri, ex officio tenemur usque ad mortem certare. Nondum autem usque ad mortem restitistis.

D Ad hæc episcopi pereuntem Ecclesiæ libertatem nullum periculum asserere Ecclesiæ dicebant. « Sed, aiunt, potius nunc expedit, ut pereat, ne toti pereamus. Faciamus ergo quod rex petit; alioquin peribit fuga a nobis, et non erit, qui requirat animas

codex (Lambeth. n. 132, f. 205) quem leviter inspexi. At procul dubio sensum interrumpunt et in libro Willelmi male locata sunt.

nostras. Regi vero consentientes, hereditate possidebimus sanctuarium Dei, et in possessionibus ecclesiarum nostrarum securi dormiemus. Malitiæ etiam temporis hujus multa indulgenda sunt. » Hoc enim dictum est propter schisma, quod tunc fuit in Romana Ecclesia; erat namque apud Alemanniam quidam antipapa. Hæc dicebant episcopi, tanquam dei malitia sua non sufficiat, nisi et ipsa augeatur per malitiam episcoporum.

Ad hæc dominus Cantuariensis zelo domus Dei succensus: « Video, inquit, vos vestras meritas sub specie sustententiae consolari, et dispensationis vestræ prætextu, sponsæ Christi libertatem suffocari. Et quis vos fascinavit, o insensati pontifices? Quid prudenti vocabulo dispensationis manifestam iniquitatem vestram contegitis? Quid vocatis dispensationem, totius Ecclesiæ Christi dispendium? Rebus vocabula serviant; non cum rebus pervertantur vocabula. Quod autem dicitis, malitiæ temporis multa fore indulgenda; assentior certe, sed non ob id peccata accumulanda esse peccatis. Potens est Deus Ecclesiæ suæ conditionem facere meliorem, quamvis non efficiamini deteriores. Nunquid impotens est Deus subvenire sanctæ Ecclesiæ, nisi per vitia doctorum Ecclesiæ? Arbitror vos compati infirmitatibus Christi, quasi impotens sit sponsam suam erigere, nisi sensibus nostris adjuvetur. Revera tentat vos Deus. Queso namque quando se debent episcopi offerre discrimini? Nunquid in tranquillitate et non in discrimine? Erubescitis certe fateri, quod in tranquillitate. Restat ergo, ut cum in Ecclesia est perturbatio, pastor Ecclesiæ opponat se periculo. Nec enim majoris meriti fuit olim episcopis, in suo sanguine Ecclesiam Christi fundare, quam nostris temporibus pro Ecclesiæ libertate sanguinem fundere. Et ego quidem, Deo teste, affirmo, non esse nobis tutum a forma illa recedere, quam a sanctis patribus nostris accepimus. Nec nos quemquam morti debemus exponere, cum etiam iudicio sanguinis nobis non licet interesse. »

Hæc verba mox ad regem relata sunt. Videns illico quam plures Ecclesiæ, non dico columnas, sed arundines, vento agitari et trepidare, audito quod non per omnia voto regis essent parituri. Et certe statim ante minas cessissent, nisi domini Cantuariensis constantiam persensissent. Videns autem rex, quod in verbo illo, ubi voluit proficere, non valuit, citius ad alia se convertit, sciscitans ab eis si consuetudines suas regales essent ei per omnia servaturi. Dominus vero Cantuariensis cum consilio locutus: « Etiam, inquit, in omnibus; salvo tamen per omnia et in omnibus ordine nostro. » Et cum postea id ipsum rex a singulis ex ordine quereretur, erat quidem tunc vox illa in ore omnium. Cum vero diutius instaret, volvens et revolvens, si consuetudines suas regales absolute et absque apposita ordinis sui salvatione, simpliciter omnino se ei

A servaturum promitteret dominus Cantuariensis; a Christi vicario, quod voluit, obtinere non valuit. Turbatus est ergo rex vehementer, et omnis Jerosolyma cum illo: subitoque in illa spiritus vehementia exiliens, Londonia discessit universis negotiis suis infectis, et ratiociniis pendentibus. Videres tunc murmur in populo, commotum omem in clero. Episcopi turbati et tremuli, regem alientem sunt prosecuti; metuentes, se non prius regem inventuros, quam audirent, se omnia bona sua perdituros. Moxque operati sunt cum rege occultam conventionem, omni mentione Dei et ordinis sui postposita: et tam facile regis petitioni assensum præbuerant, ut viderentur consensisse tantum quantum (14) ille petisse; adeo ut qui inter eos æstimabantur scientiores, ad opprimendam Ecclesiæ libertatem fierent proniores. Cantuariensis autem solus præsul resedit, considerans ad dextram et ad sinistram; nec fuit qui cognosceret eum. Requirebat in fratribus solatium, at illi abierunt retro, et jam cum illo non ambulabant. Pacem denique peccatorum videns, et sibi undique imminere discrimen: « Unum, inquit, locutus sum; quod terreni regis regales nullatenus servare consuetudines, nisi salvo in omnibus ordine meo. Ob id offensam regis incurri; ob id episcopi mei dereliquerunt me; ob id totius orbis oculos offendi. Sed quid? Velit, nolit mundus: ego cum mortali paciscens homine, nullo unquam tempore Dei mei et ordinis mei immemor ero, Deo volente. Absit a me, ut cujusquam mortalis metu vel gratia, Deum inveniar contempsisse! Si angelus de cælo venerit, et tale mihi consilium dederit, anathema sit. »

Fuit siquidem rex aliquoties Eboraci ubi ad eum quidam Burgensis suus de Scardeburghe accessit, questus quod quidam decanus abstulerat ei viginti et duo solidos, uxorem ipsius in capitulis plurimis vexans, et deferens sine alio accusatore ream adulterii: contra quam consuetudinem rex legem prohibitionis ediderat. Jussu regis decanus ille evocatus et coram rege conventus, præsentem archiepiscopo suo, et episcopo Lincolnensi, et Dunelmensi, et Joanne tunc Eboraci thesaurario, postea episcopo Pictavensi, respondit edoctus, quod a diacono quodam et alio laico fuerat illa accusata. Et cum neganti ei sua fuisset adjudicata purgatio, ut mitius tractaretur, hunc virum ejus archidiacono suo dedisse viginti solidos, et sibi duos. Cum hæc decanus ille coram rege testium astipulatione ibi presentium probare non posset, exegit de eo rex iudicium, dicens quod archidiaconi et decani regni sui habitatoribus hoc modo plus pecunie per annum extorqueant, quam ipse recipiat. Ierunt cum clero illo et barones ejus ad iudicandum. Tandem Joannes thesaurarius dixit sibi videri pecuniam esse reddendam Burgensi, et decanum archiepiscopi sui subiiciendum misericordiae, de officio suo. Ad hæc Richardus de Luci: « Quid ergo domino regi

(14) Ante quam ed. Spark., nescio an melius.

judicabit, in ejus iste incidit constitutionem? » A quorum unus erat thesaurarius Eboracensis, et alter Joannes : « Nihil, quia clericus est. » Richardus : « Huic sententiæ non adero. » Et relictis illis, ad regem cum aliis baronibus rediit. Clerus postmodum cum hac intrat sententiâ, quæ ab eodem Joanne formatore pronuntiata, rex aversus, ad archiepiscopum Theobaldum, diem præstituens, provocavit : et falsam esse sententiâ iratus oppido dixit. Sed infra diem, nuntiata sibi morte Gaufridi fratris sui, transfretans appellationem non est persecutus.

Item, erant regis justitiarum itinerantes aliquando apud Dunstapulam : orta est aliqua altercatio inter Simonem filium Petri et quemdam canonicum Bedfordiæ Philippum de Brois. Questus est postea Simon regi quod eum Philippus, in obsequio ipsius et magna audientia, turpiloquio inhonorasset. Coram archiepiscopo Philippus super hoc a rege redargutus, cum negare non posset, respondit se conviciis provocatum calore iracundiæ dixisse, non animi judicio. Exegit rex judicium. Clerus ad regem mitigandum decrevit, per annum beneficio præbendæ suæ simul et regni inhabitatione Philippum privandum. Ita factum est; nec tamen regi satisfactum est.

Prima distantia regis et sancti Thomæ pro quodam clerico, qui in Wirecestriæ territorio dicebatur accubuisse filium ejusdam probi hominis, et pro ea ipsum patrem occidisse. Hunc clericum rex voluit judicio curiæ laicæ examinari et judicari. Archiepiscopus renitebatur, et clericum illum in custodia episcopi fecit custodiri, ne regis justitiæ traderetur. Alia, pro clerico, qui, in ecclesia ipsius archiepiscopi, quæ in Londonia est et dicitur ecclesia Beatæ Mariæ in foro, furatus est calicem argenteum, quem comprehensum rex voluit judicio sæculari judicari. Archiepiscopus judicio Ecclesiæ fecit eum exauctorari, et ex abundantia ad regem mitigandum cautelarari.

De concilio apud Clarendon habito.

Itaque rex, conceptis pridem aliquibus adversus clerum communiter, et nunc adversus Thomam archiepiscopum personaliter, crescentibusque de die in diem stimulatione inimica simulatibus, statuit de regalibus suis dignitatibus tractare. Convocatur generale concilium, et congregatur apud Clarendoniam. Rex proponit et scribit dignitates et consuetudines, quas avitas et in regno Angliæ esse debere dixit. Robertus archidiaconus Oxenfordensis, qui et postea episcopus Herefordensis, et Jordanus archidiaconus Cicestriæ, domestici clerici domus archiepiscopi, et quidam alii, intellecta domini regis ira, quæ adversus eum graviter concepta quotidianis augebatur incrementis, accepta licentia discesserant ab eo. Rex etiam statim a principio, ex quo iram adversus eum altius conceperat, procuravit longius ab eo amovere duos probos et honestos clericos nutritos ab adolescentia de bonis ipsius archiepiscopi,

A quorum unus erat thesaurarius Eboracensis, et alter canonicus Sarum, et uterque Joannes dictus erat, ne in opportunitatibus suis archiepiscopus illorum consilio vel auxilio uteretur. Alterumque eligi et ordinari episcopum Pictavensem; alterum vero exulare jussit. Sed et episcopum Herefordiensem Gilbertum propius ascitum oblinuit a domino papa transferri in Londoniensem episcopum, sicut putabatur, ut ejus contra archiepiscopum uteretur consilio.

Consuetudinum illarum plura capitula erant de libertatis ecclesiasticæ conculatione, de cleri omnimoda oppressione : ut clericus accusatus de furto, vel rapina, vel hujusmodi, primo veniat in curiam regis. Item, ut pro quocunque crimine non excommunicetur comes, vel baro, vel officialis regis, rege inconsulto. Item ne appellationes fierent ad dominum papam, nisi post licentiam auditam in foro ecclesiastico coram decano, archidiacono, episcopo, archiepiscopo, et tandem in curia regis. Ne ad dominum papam iter arriperent episcopi, vel alii clerici vocati ab eo, vel appellati, vel appellantes ad eum, nisi per licentiam regis. Ne omnis controversia de fidei vel sacramenti transgressione sit in foro ecclesiastico; sed tantum de fide adacta, pro nuptiis, vel dote, vel hujusmodi, quæ non debent fieri nisi in facie Ecclesiæ. De aliter dato fidei sacramento, ut de debitis, vel sic, statuit rex causam esse in foro laico. Item ut episcopi adsint omnibus sæcularibus judiciis regis, præterquam judicio sanguinis, et aliis in hunc modum, quæ palam cum sacris canonum constitutionibus dissonantiam resonabant. Sed scriptæ nunquam prius fuerant, nec etiam omnino fuerant in regno Angliæ hæc consuetudines. Et etiam si fuissent, ne de antiquitate et usu potius quam de jure niteretur, rex, in illis spuris statutis firmandis, attendere debuisset, quia Dominus dicit : « Leges meas custodite. » Item illud : « Væ qui condunt leges iniquas ! » Item nusquam invenitur Dominum dixisse : « Ego sum consuetudo ; » sed dixit : « Ego sum veritas. » Item consuetudinis ususve longævi non tanta est auctoritas ; ut aut rationem, ut ait imperator paganus, vincat aut legem. Imo, revelatione facta aequitatis et veritatis, cedat usus rationi ; ut in decretis scripserunt sancti patres : quorum ergo contra rationem et ecclesiasticam libertatem statuit et scripsit rex Christianus. Sed archiepiscopus Thomas, integer vitæ scelerisque purus, alias non poterat attentari. Imo exquisitissimo dolo et arte maligna hoc ei procuratum est, ut vel has traditiones corroborans incideret in manus Dei, vel respuens incideret in manus regis : et condemnaretur turbato regiæ majestatis, inimicus coronæ, et occideretur. Dicebaturque hoc commentum fuisse Rogeri archiepiscopi Eboracensis, et Gilberti Londoniensis, ab Joannis episcopi Sarum. Nam et postmodum super hoc a domino papa severissime redarguit, se purgaverunt in facie hominum, præstitis sacramentis Hilario tamen prius obito, exquirat rex assen-

sum cleri, in his statutis firmandis. Proponitur tandem archiepiscopo, et contradicentibus episcopis delictum a regis interpretibus, tanquam regi coronam regni auferre velit, si hæc decreta confirmare contradixerit. Archiepiscopus adniventibus episcopis diu restitit, diu contradixit. Tandem ultimi nuntii regis venerunt, lacrymosis verbis expresse ei seorsim tracto significantes, quid futurum erat, si non acquiesceret. Timore mortis, et ut regem mitigaret, acquievit ad tempus, assensu et in verbo veritatis stipulatione, et sigillorum suorum impressione. Archiepiscopus, et ille Eboracensis, et omnes episcopi, statuta illa firmaverunt servanda regi legitime, sine dolo malo, et in bona fide. Rex eadem postea decreta transmisit domino papæ confirmanda; quæ ipse lecta et intellecta reprobavit, expavit, damnavit.

Archiepiscopus Dei electus, post casum fortior erectus, spiritum resumpsit, pœnituit, et se ipsum austerioribus alimentis et indumentis gravius cœpit affligere, et se ab officio altaris suspendit, donec per confessionem et condignos pœnitentiæ fructus a Romano pontifice absolutus, meruit relaxari. Vere pœnituit, quia, quantumcunque in eo erat, errata revocare et corrigere parat: cœpiscopis revocare concessa vel nolentibus, vel regis timore, qui incubuit super eos, non audentibus. Ad familiare regis domicilium, lapideo muro circumseptam indaginem de Wodestoke, ubi audierat esse regem, iter agit archiepiscopus, aliquid ei locuturus; sed a janua repulsus redit Cantuariam. In maritima apud Rumeneye, villam suam, archiepiscopus recedere deliberans, ut regis iram ad tempus declinaret, his attentavit mare; sed ventum vel nullum habuit vel contrarium. Quod auditum, regis iram maxime inflammavit.

De concilio apud Northamptonam habito.

Unde rex postmodum aliud generale edicit concilium; locum designans apud Northamptonam. Octava sancti Michaelis, feria tertia, concilii dicta dies aderat; ipsa die venimus Northamptonam. Regem ea die non vidit archiepiscopus: quia rex circa rivos aquarum et fluentia in avibus cœli ludens veniendo, Northamptonam sero intravit. Crastino mane, dicta missa et horis, archiepiscopus ad curiam venit, ad castrum regis: in cameram primam intromissus, sedit regem expectans, qui tunc missam audiebat: cui venienti venerabiliter assurgens, vultum exhibuit constantem, placidum, ad osculi consuetam Anglis gratiam offerendam veraciter recipiendam paratum si rex præoccuparet. Ad osculum non est receptus. Primam sumpsit archiepiscopus loquendi materiam, de Willelmo de Curci, qui unum hospitiorum suorum occupaverat; petebatque a rege, ut illud sibi vacuari præciperet: præcepit. Secundus sermo ejus fuit, quod ad vocationem ipsius, pro verbo, quod ei moverat Joannes Marecallus, venerat. Siquidem Joannes petebat ab ar-

chiepiscopo terram unam, membrum quoddam villæ archiepiscopalis de Pagaham. Et aliquot diebus pro causa illa sibi designatis, cum breve regis in curiam archiepiscopi venerat: ubi cum non proficeret, nullo siquidem jure munitus, quod tunc lex erat; probavit tandem defectum curiæ archiepiscopi, sed super librum troporum extractum de sub pallio suo: causantibus justitiariis curiæ archiepiscopi, quod neque librum ad hoc, neque talem attulisse deberet. Reversusque ad regem, litteras citationis archiepiscopi in curia regis ei responsuri emeruerat: præstituta liti die exaltationis sanctæ crucis. Ad diem autem illum archiepiscopus non venerat; sed miserat regi quatuor milites, cum litteris suis et vicecomitis Cantuariæ pariter attestantis injuriam Joannis, et imperfectum probationis ejus. Sed quid? Indigne ferens rex, quod ab eo citatus archiepiscopus in propria persona non venerat, hoc, si vellet, allegaturus, male tractavit nuntios ipsius, molestus eis in ira et iniuriis; tanquam qui contra regis citationem, in curiam ejus excusationem falsam et minus utilem attulerant: et tandem datis vadibus, eos vix relaxavit. Et aliam diem, ad instantiam prædicti Joannis, rex pro eadem causa præfixit, litteris suis ad vicecomitem Cantuariæ de archiepiscopo citando emissis. Nec tunc enim, nec diu ante, ei scribere voluerat; quia eum salutare nolebat. Nec aliam per litteras sibi directas solemnem et primam, ut antiqui moris erat, habuerat archiepiscopus ad concilium citationem. Dixit, inquam, archiepiscopus se ex mandato regis pro causa Joannis venisse; ad quod rex ait: Joannem esse in ejus servitio Londoniæ; venturum autem in proximo, et tunc de eorum causa cognosceret. Erat siquidem et Joannes ille cum thesaurariis et cæteris fiscalis regalis, numismatis, pecuniæ, et publici aeris receptoribus Londoniæ, ad quadrangulam tabulam, quæ dicitur Calculis bicoloribus, vulgo Scaccarium; potius autem est regis tabula pummi albicoloribus: ubi etiam placita coronæ regis tractantur. Eo die inter regem et archiepiscopum nil amplius actum est: sed dixit rex ei, ut ad hospitium iret, et in crastino ad causam suam reverteretur. Rediit. Secunda die, consentientibus episcopis, comitibus, et baronibus Angliæ omnibus, Normanniæ pluribus, præter Rophensem episcopum, qui nondum venerat, et quemdam alium; archiepiscopus læsæ majestatis coronæ regiæ arguitur. Quia, scilicet, ut supra narratum est, a rege citatus pro causa Joannis, neque venisset neque idonee se excusasset. Archiepiscopi depulsio nullum locum habuit; allegata Joannis supradicta injuria, et jurisdictione hujus causa sua propria, et curiæ suæ integritate. Rex exegit judicium. Archiepiscopi ratio nulla est approbata. Visum est omnibus ex reverentia regiæ majestatis et ex assuetudine ligii homagii, quod domino regi archiepiscopus fecerat, et ex fidelitate et observantia terreni ejus honoris, quam ei juraverat, quod parum esset defensus vel excusatus, quia citatus a rege neque venerat, neque corporis infirmitatem, vel necessariam,

quæ differri non posset, ecclesiastici officii administrationem per nuntios allegaverat : condemnandumque eum dixerunt in pœnam pecuniariam omnium bonorum suorum mobilium ad misericordiam regis. De proferendo iudicio distantia fuit inter episcopos et barones, utrisque alteris illud imponentibus, utrisque se excusantibus. Aiunt barones : « Vos episcopi debetis pronuntiare sententiam ; ad nos non pertinet hoc : nos laici sumus, vos personæ ecclesiasticæ, sicut ille ; consacerdotes ejus, coepiscopi ejus. » Ad hæc aliquis episcoporum : « Imo vestri potius est hoc officii, non nostri ; non enim est hoc iudicium ecclesiasticum, sed sæculare. Non sedemus hic episcopi, sed harones. Nos harones et vos barones pares hic sumus. Ordinis autem nostri rationi frustra innotimini. Quia si in nobis ordinationem attenditis, et in ipso similiter attendere debetis. Eo autem ipso quod enim episcopi sumus, non possumus archiepiscopum et dominum nostrum iudicare. » Sed quid ? Rex, hæc audita de pronuntiando controversia, motus est ; et controversari super hoc desitum est. Dominus Wintoniensis impositus dicere, tandem et invitus pronuntiavit. Archiepiscopus autem, quia sententiæ vel recordationi curiæ regis Angliæ non licet contradicere, sustinuit, consilio episcoporum ; adacta ad mitigandum et honorandum regem solemnem in manum ipsius missione, quasi concessionis iudicii, ut moris est ibi : et omnibus episcopis datis vadibus, præter Gilbertum illum Londoniensem, qui rogatus pro eo spondere noluit : quæ eum singularitas notum fecit.

Post, eadem die, conventus est archiepiscopus de trecentis libris perceptis de castellaria Eye et Berchamstede. Archiepiscopus, litis declinatione præmissa, ut qui ad hoc citatus non fuit, ait, non ut in lite, se hanc pecuniam et multo plurem misisse, ad reparationem palatii Londoniæ et castrorum prædictorum, ut cernere erat. Rex noluit esse auctor ejus, quod hoc per eum factum esset. Exigit iudicium. Archiepiscopus gratia regi reddere acquiescens pecuniam hanc, quoniam omnino nolebat, ut quantalibet pecunia esset irarum inter eos causa, semotim laicos fidejussores comitem Gloucestræ et Willelmum de Einesfordia, et tertium quemdam, homines suos, interposuit. Sub hoc fine die illa discedebant.

Die tertia, Cerei conditione [certi conditione *cod. Douc.*], convenitur archiepiscopus per internuntios, de quingentis marcis, ex causa commodati in exercitu Tolosæ, et aliis quingentis marcis ex causa fidejussionis regis pro eo, erga quemdam Judæum ibidem. Item convenitur actione tutelæ de omnibus perceptis ab archiepiscopatu vacante, seu aliis episcopis et abbatibus tempore cancellariæ ejus vacantis : statuiturque super his omnibus regi rationem exponere. Respondit archiepiscopus, se non ad hoc venisse paratum vel citatum. Super hoc si con-

A venire deberet, loco et tempore, domino suo regi, quod juris esset, faceret. Exegit rex ab eo super hoc cautionem fidejussoriam. Dixit ille, se oportere super hoc habere consilium suffraganeorum et clericorum suorum. Rex sustinuit. Ille discessit, et ex illa die amplius ad hospitium ejus non venerunt eum videre barones, ut alii milites, intellecto regis animo.

Quarta die, ad hospitium domini archiepiscopi venerunt omnes ecclesiasticæ personæ illæ. Cum episcopis semotim, cum abbatibus semotim, super hujusmodi tractatum habuit, consilium captavit. Consilio nobilis Henrici Wintoniæ episcopi, ordinatoris ejus, qui ei ad hoc auxilium validum promisit, tentatum est, si regem pecunia possent delinire : et obtulit ei duo millia marcarum. Rex noluit. Fuerunt aliqui de clero qui dicerent archiepiscopo quod, pro debito officii suscepti, Ecclesiam Dei tueretur, personam suam et dignitatem attenderet ; regem honorificaret in omnibus, salva Dei et ecclesiastici honoris reverentia ; nihil adversi esse quod timere deberet, cum ei nullum crimen, nulla turpitudine imponeretur. Cantuariensi Ecclesiæ redditus fuerat liber a cancellaria et omni regis sæculari querela ; cum qualibet etiam abbatia vacans monachum alienum abbatem sibi electum recipere nolit, nisi immunem ab omni obedientia abbatis ejus sibi dimissum. Aliis, secreto regis aure et mente inclinioribus, longe alia mens erat, dicentibus, Dominus rex ei in ira molestus est.

C Ex certis signis animum regis interpretamur hunc esse, quod dominus archiepiscopus super omnibus, et super reddendo archiepiscopatu, omnino miseræ ordiæ regis se supponat. Inter quos et Hilarius Cicestrensis in partem regis inclinior, ait ei : « Utinam posses esse non archiepiscopus, et remanere Thomas. » Hic etiam alias dixit de eo : « Omnis plantatio, quam non plantavit Pater cœlestis, eradicabitur. » Quasi diceret, quia electionem ejus regis declarata voluntas præcessit. De quo archiepiscopus, postea in exsilio suo, alicui dixit : « Et hic inter fratres locum obtinuit Judæi proditoris. » Postmodumque, ante revocationem et pacem archiepiscopi, quasi a Deo percussus, expiravit. Iste Cicestrensis persecutus, pro se et aliis quibusdam complicitibus suis, ait : « Ex convictu et familiaritate cancellariæ, regem melius nostis quam nos. Indubitatum est nobis, contendendo an cedendo melius vincatur. In cancellaria ei, et in pace et in guerra, probe et laudabiliter officiosus, non sine invidia (15) tamen, laudem invenistis : qui vobis tunc inviderunt, nunc regem accendunt adversus vos. Quis de tanto rationio, de tam incerta pecunia posset spondere pro vobis ? Dicitur, regem dixisse, quod non amplius in Anglia simul eritis, ille rex, vos archiepiscopi. Ad misericordiam ejus relinquere omnia tutius est ; ne forte, quod absit ! vos tanquam cancellarium et rationalem suam, pro pecunia sua conventum, tan-

(15) Et sine invidia ed. Spark.

quam reum repetundarum et fidejussoribus carentem retineat, vel manum in vos mittat; unde Ecclesia Angliæ dolorem, et regni facies contrahat ruborem. »

Dicebat aliquis, « Absit ut sic sibi et corporis sui salutem consulat, et Cantuariensem Ecclesiam, quæ eum sibi elegit, inhonoret! Nullus hoc suorum fecit antecessorum; et tamen persecutiones in diebus illis passi sunt. Præterea beneficium archiepiscopale, villas et huiusmodi in manu domini regis forte posset, salvo jure Ecclesiæ, refutare ad tempus; suum officium vero nequaquam. » Ita in varias consulti distrahebantur sententias; aliis sic, aliis vero non sic.

Quinta dies, quæ et Dominica erat, tota consiliis dedita est. Vix reficiendi hora respirare licebat. Archiepiscopus ab hospitio non discessit.

Sexta die, languor repente ut sit ortus, eum moratus est, quo minus ad curiam iret. Siquidem renes ejus frigore et dolore contemnerunt: oportuitque cervicalia calefacere, et vicissim apponere. Quo audito, rex misit omnes comites suos, barones plurimos, responsum captati consilii querens ab eo, et proponens, velletne de reddenda ratione receptorum, tempore cancellariæ, de vacantibus ecclesiis fidejussoriam præstare cautionem, et super hoc curiæ suæ stare iudicio. Respondit per episcopos archiepiscopus, quod scilicet ei pro corporis adversa valetudine, in crastino ad curiam veniret, facturus quod deberet. In crastino mane, ad quoddam altare sancti Stephani protomartyris celebravit missam, *Etenim sederunt principes.* Illius missæ cantationem statim insidiantes ei regis delatores ei nuntiant, maligne interpretantes, quod pro se, quasi altero Stephano protomartyre, contra regem et suos iniquos eum prosequentes, archiepiscopus illam missam celebraret. Post ad curiam vadit. Obiter præcedenti eum ait Alexandro crucis suæ bajulo: « Melius egissem, si in nostris instrumentis venissem. » Proposuerunt enim, quod nudis pedibus incedens, et revestitus, et crucem bajulans, ad regem intraret, ei pro pace Ecclesiæ supplicaturus. Sed ab hoc proposito eum clerici sui averterunt, neque quod crucem tollere vellet. Intraturus in aulam castri, cum equo descendisset, crucem, quam præviam bajulaverat Alexander Wallensis, in manibus accepit. Aderat ibi ad ostium ante episcopus prædictus Gilbertus Londoniensis; cui Hugo de Nunant, quidam archidiaconus Lexoviensis, qui cum archiepiscopo venerat et de domo ejus erat; Domine præsul Londoniensis, ut quid sustines, quod crucem ipse bajulat? Episcopus: « Bone homo, semper fuit stultus, et semper erit. » Omnes enim archiepiscopo ingresso viam cedebant. In cameram se recepit; loco solito sedit; episcopi juxta eum, Londoniensis propius. Qui aderant, obstupere omnes, et in eum oculi omnium intendeabant. Episcopus Londoniensis suadebat, ut crucem uni clericorum suorum traderet. Paratum eum dice-

bat, quasi vellet totum regnum turbare. « Crucem, ait Londoniensis, in manibus tenetis; si modo rex gladium suum accipiat, en bene ornatum regem, bene ornatum archiepiscopum. » Archiepiscopus: « Si fieri posset, meum, inquit, esset semper eam in manibus propriis ferre: nunc autem scio quid faciam. Equidem ut pacem Dei conservem, personæ meæ et Anglorum Ecclesiæ. Dicis ut libet, tu si hies, aliter sentias. Si autem dominus rex, ut dicis, modo gladium acciperet, hoc utique signum pacis non esset. » Forte memor erat archiepiscopus, in quam arcto res fuerat apud Clarendonam, quando, erumpentibus lacrymis, nuntii regis ad eum venerunt.

Vocati ad regem omnes episcopi, multam ibi introitus moram faciunt; et cum eis Rogerus ille archiepiscopus Eboraci, qui ultimus ad curiam veniebat, ut conspectior ingrederetur, et de consilio illo regis esse non videretur: qui et suam e regione anticrucem sibi præferri faciebat,

quasi pila minantia pilis.

Prohibitum etiam a domino papa, litteris sibi emissis, ne in provincia Cantuariensi crucem antesignans ejus ferret: sed accepta prohibitione de falsa domini Cantuariensis suggestionem, appellationem interposuerat, qua se tutum gerebat. Nec mirum, si dolor, et gemitus, et coarctio cordis obsedissent archiepiscopum: nam audierat, quod ea die, vel per sententiam qualemcunque caperetur, vel si hoc evaderet, facta contra eum pravorum conjuratione, occideretur, congressus. quasi rege nesciente. Interim silentio ait archiepiscopo suus in divina pagina magister Herbertus: « Domine, si forte miseriam manus impias in vos, in promptu habeatis excommunicationis in eos ferre sententiam; ut tamen spiritus salvus fiat in die Domini. » Cui Willelmus filius Stephani, qui ad pedes archiepiscopi assidebat, aliquantulum clare dixit, ut audiret archiepiscopus: « Absit hoc ab eo! non ita fecerunt sancti apostoli et martyres Dei, cum caperentur et raperentur sublimes: potius, si hoc contigerit, oret pro eis et ignoscat, et in sua patientia animam suam possideat! Si enim eum pro causa justitiæ et libertatæ ecclesiasticæ pati contigerit, præstante Domino anima ejus erit in requie, memoria in benedictione. Si sententiam in eos proferret, videretur omnibus, quod ex ira et impatientia, hoc quod posset, in ultionem sui fecisset. Et procul dubio contra decreta ageret; ut scribit beatus Gregorius Januario archiepiscopo: « Nil te ostendis de celestibus cogitare, sed terrenam te habere conversationem significas, dum pro vindicta propriæ injuriæ, quod sacris regulis prohibetur, maledictionem anathematis in- » vexisti. » Joannes Planeta (16) hæc audiens, lacrymas erumpentes laborabat retinere. Similiter et Radulphus de Diceto, archidiaconus Londoniensis, postea decanus, plurimum ea die ibi lacrymans est. Archiepiscopus talia audiens, conferebat in

corde suo. Post modicum, idem Willelmus filius A Stephani volens loqui archiepiscopo, et a quodam marescallo regis, qui cum virga sua astabat, prohibitus, dicente, quod nullus ei loqueretur; post intervallum, intendens in archiepiscopum, erectione oculorum et motu labiorum, signum fecit ei, quod crucis suæ exemplum, et crucifixi, quam tenebat, imaginem respiceret, et quod in oratione esset. Archiepiscopus signum illud intellexit bene, et fecit sic, confortatus in Domino. Quod, post plures annos, archiepiscopus in Galliis exsul apud sanctum Benedictum supra Ligerim, eidem Willelmo ad dominum papam eunti, inter ceteram angustiarum suarum recordationem memoravit.

Sed, rex Christiane, quid agis? Ratione Baronie et possessionis in curia tua laica judicare facis B filium patrem, subditus archiepiscopum, ovis pastorem, cum in curia laica nec minimus clericus respondere teneatur obnoxius? Ais: non sed rex baronem. Ad quod: « Majus est in te quod Christianus es, quod ovis Dei es, quod filius adoptionis Dei es, quam quod rex es. Et in illo majus est, quod archiepiscopus, quod vicarius Jesu Christi quam quod baronius est. Attend. status. Minoris est ejus possessio quam ejus ordo, sed præjudicat majori, dignius indigniori. Ergo fortior et efficacior debet esse ordo, ut eum a foro tuo eximat, quam baronia et possessio ut eum ibi obnoxium retineat. Et, si alius attendas ipsam ejus possessionem, non est ejus aed Ecclesie. Fuit secularis: data Deo facta est ecclesiastica. Absorpta est in ea secularitas a titulo divini juris. Unde nec ratione ejus seculari judicio tenetur archiepiscopus obnoxius. Itaque nec ratione personæ nec ratione rei quam possidebat, tenetur judicio curiæ judicandus. Archiepiscopus reservandus est judicio solius papæ; papa solius Dei. Si quid habebas adversus eum quod concordie et charitatis interveni non posset mitigari, domino papæ segregasse debueras: juri ab eo avocatus nuntiis nostris episcopis et clericis ibi responderet: vel a latere domini papæ in regnum vestrum impetrasses mitti legatos cum judicariæ potestatis plenitudine. » Episcopus Herefordensis, magister Robertus de Melidono, qui amplius quam quadraginta annos Parisiis docuerat dialecticam et divinam paginam, una dierum in quodam consensu episcoporum aliquot, et plurium clericorum lacrymabilem questionem proposuit: « Si contingat, inquit, quod absit! dominum archiepiscopum in hac causa pro libertate Ecclesiæ occidi, nunquid martyrem eum habebimus? Pro matre fide occumbere est esse martyrem. » Ad quod aliquis: « Procul dubio si quid, quod absit! ita contingeret, dicendum esset eum martyrii coronam gloriosissime adeptum. Non sola fides est causa martyrii, sed plures sunt causæ, veritas, libertas Ecclesiæ, charitas patriæ vel proximorum, quaque sufficiens causa, dum Deus sit in causa. » Beatus Joannes Baptista de fidei articulis cum He-

rode vel Herodia de non tractaverat, sed pro veritate occubuit, quia dixit: « Non licet tibi habere uxorem fratris tui. » Similiter et iste dicit: « Non licet tibi, rex, Ecclesiam hac opprimere servitute, ut constitutionibus tuis, quæ sunt contra canones, ecclesiastici viri ordinati Dei teneantur obnoxii. » Item, septem fratres, inspectante et hortante matre ut starent viriliter, martyrii genera diversa passi sunt, quia de esu carnis porcinæ mandatum Dei et observantias patrum noluerunt prævaricari. Beatus quoque Lanfrancus archiepiscopus sanctum Anselmum, tunc abbatem, consuluit de sancto Alphago, si inter martyres Dei esset habendus, proponens quod ideo ab alienigenis hostibus, Angliam navigio ingressis, esset occisus, quia aurum quod illis et hominibus Cantuariensis Ecclesiæ indixerant, noluerit dare. Beatus Anselmus: « In illo præcipuus est habendus, qui pro vitæ suæ defensione vel prolongatione noluit filios et proximos suos vexari in æris quod hostes indixerant, solutione. Pro libertate quidem et salute proximorum occubuit. Majorem hac charitatem nemo habet, quam ut animam suam ponat quis pro amicis suis. Et titulus innocentie, ubi nullum certamen præcessit, martyrem facit. Unde et Abel dicitur primus coronatus in martyrio. Sane etiam paganorum hæc sana fuit sententia:

... acerba fata Romanos agunt
Scelusque fraternæ necis:
Ut immeritis fluxit in terram Remi
Sacer nepotibus cruor. »

C Deus bone, quam multi clericorum et militum, qui aderant, veras et luculentas de contemptu mundi proferebant sententias, cum solus ibi crucem tenens sedebat archiepiscopus et omnes suffraganei episcopi ejus, et comites et barones ad regem evocati essent, et elongati ab eo! Dicebat aliquis: « O sacculum captiosum! cujus tanquam maris tranquilli, quamvis aliquando serena sit superficies, intus tamen tempestates habet absconditas. » Alius aliquis: « Omnium rerum vicissitudo est. Amor Domini feudum (17) non est. O honores mundi! in quibus etiam quæ sperantur timenda sunt. »

Episcopi introrsus cum rege colloquentes, inter cetera dixerunt ei, quod ipsa die cum venissent ad archiepiscopum, male tractationis redarguti sunt ab eo, quod scilicet nuper eum inimicitius tractassent cum baronibus, et severius justo judicassent, et inaudito more, quoniam, etsi pro una absentia, quam supersisam regis dicunt, non tamen contumacia judicari deberet, non deberent eum condemnasse ad misericordiam regis, in penam pecuniariam omnium bonorum mobilium. Hoc enim modo destrui posset Cantuariensis Ecclesia, si rex immisericors eum obdurare vellet. Et ipsis episcopis baronibusque captiosum tale in tali casu posset esse judicium. Sed constitutum esse in singulis comitatibus summam unam pecuniæ, condemnatis in penam pecuniariam ad misericordiam regis solvendam. In Lou-

(17) Feudum om. ed. Spark.

donia siquidem centum solidi constituti sunt. In Cantia, quæ mari propius admota, piratas a littore Angliæ habet arcere, et primum sibi ictum in bellis contra hostes alienigenas vindicat; quo majus est ei onus, major est ei data libertas: et ibi quadraginta solidi constituti sunt taliter condemnatis. Ipseque domicilium et sedem suam habens in Cantia, saltem ad legem Cantia judicari et taxari deberet. Dicebant etiam episcopi, quod adhuc ipsa die, infra decem dies datæ sententiæ, eos ad dominum papam appellaverat; et ne de cætero eum judicarent pro sæculari querela quæ de tempore ante archiepiscopum ei moveretur, auctoritate domini papæ prohibuerat.

Motus rex, misit ei comites suos et barones plurimos, querere ab eo, si hujus appellationis et prohibitionis se gereret auctorem; maxime cum homo ejus ligius esset, tenereturque ei et communi sacramento et speciali apud Clarendonam stipulatione in verbo veritatis, quod regales suas dignitates in bona fide, sine dolo malo et legitime conservaret. Inter quas, hæc una est, ut episcopi ejus omnibus adsint judiciis, præterquam iudicio sanguinis. Querere etiam ab eo, si vellet cavere, datis vadibus, de ratiocinio cancellariæ reddendo, et super hoc curiæ ejus stare iudicio. Ad quod ille, respecta crucifixi imagine, animum et vultum firmans et residens, ut suam archiepiscopi conservaret dignitatem, luculentam et æqualem, ut nec in uno verbo subsisteret, orationem habuit hujusmodi:

« Viri fratres, domini regis comites et barones, ego equidem domino nostro regi, ligio, homanagio, fidelitate et sacramento astrictus sum: sed sacramentum maxime sacerdotale comites habet justitiam et æquitatem. Honori et fidelitati domini regis teneor, tam devota quam debita subiectione, propter Deum, obsequium in omnibus præstare, salva Dei obedientia, et dignitate ecclesiastica, et personæ meæ honore episcopali, litem declinans, ut qui neque ad exponendum ratiocinium, neque ad causam aliquam, præterquam ad causam Joannis, vocationem habui, neque alii in causa responsioni faciendæ vel iudicio audiendo, teneor hic obnoxius. Fateor et recolo, me plurimas administrationes et dignitates a domino rege suscepisse; in quibus ei fideliter deservi, citra et ultra mare: et etiam, redditibus meis propriis omnibus in servitio ejus expensis, gaudeo quod æris plurimi debitorem me creditoribus obligavi. Cum autem ex permissione divina, et domini regis gratia, archiepiscopus electus consecrari deberem, ante consecrationem a rege immunis dimissus sum, et Ecclesiæ Cantuariensi redditus, liber, quietus et solutus ab omni regis querela sæculari, licet modo hoc in ira diffiteatur; quod probe plurimi vestrum noverunt, omnesque ecclesiasticæ regni hujus personæ. Vosque hujus veritatis conscios oro et obtestor, ut domino regi hæc suggeratis, contra quem, etiamsi est licitum, non est tutum testes no-

(18) Arnulfum ed. Spark.

minare: nec modo opus est, quia non litigo. Post consecrationem, disposui honorem et onus susceptum opera et opere excolere, et Ecclesiæ Dei aliquatenus prolesse, cui conspiciebar præesse. Quia in re si non datur prodire, si nequeo proficere, restante adversitate, non domino regi, non alii cuiquam, sed principaliter peccatis meis id imputo. Potens est Dominus augere gratiam cui et cum voluerit.

« De reddendo ratiocinio fidejussores dare non possum. Omnes episcopos, et opitulares amicos meos, jam hic obligavi: neque ad hoc cogi debeo; quia mihi hoc adjudicatum non est. Neque in causa sum ratiocinii, quia ad causam illam non vocatus fui, neque aliquam habui ad causam citationem, præterquam ad causam cum Joanne Marescallo. Quod autem de prohibitione facta hodie episcopis seu appellatione, mihi instatis, recognosco equidem me coepiscopis meis dixisse, quod pro una absentia, non tamen contumacia, severius justo me condemnaverunt, et præter morem et exemplum longe retro vetustatis. Unde et eos appellavi, prohibens ne de sæculari querela temporis ante susceptum archiepiscopium, me iterum, hac pendente appellatione, judicent; et adhuc appello; et tam personam meam quam Cantuariensem Ecclesiam sub Dei et domini papæ colloco protectione. »

Finierat: proceres alii cum silentio ad regem revertebantur, verba ejus pensculantes et examinantes. Alii dicebant: « Ecce prohibitionis ex ore ejus audivimus blasphemiam. » Aliqui baronum et stipulatorum lateris regii, oborto collo incedentes, et obliquis oculis respicientes eum, loquebantur inter se aliquantulum clare, et ut ipse audiret: « Rex Willelmus, qui subegit Angliam, novit clericos suos domare. Ipsum fratrem suum Odonem, Baiocensem episcopum, rebellem sibi cepit. Stigandum Cantuariensem archiepiscopum, nigranti injectum pateo, perpetuo carceri damnavit. Pater etiam domini nostri regis Goffridus, comes Andegaviæ, qui et Normanniam in manu forti sibi subdidit, Arnulfum (18) Sagiensem electum et plures clericorum ejus fecit ejurari, et emuchatorum ante se in pelvi afferri membra; quia citra assensum ejus electioni Sagiensis Ecclesiæ de se factæ, assensum præbuit, et se electum gerebat. »

Rex, responso archiepiscopi accepto, instat episcopis, præcipiens et obtestans per homanagium et fidelitatem sibi debitam et juratam, ut simul cum baronibus de archiepiscopo sibi dicent sententiam. Illi se excusare cæperunt, per interpositam archiepiscopi prohibitionem. Rex non acquievit; asserens quod non teneat hæc ejus simplex prohibitio contra hoc quod Clarendonæ factum et juratum fuerat. Econtra regi ingerunt episcopi, quod apponere, et in quo super eos manum aggravare possit archiepiscopus, si ab eis prohibitioni et appellationi paritum non fuerit: et pro bono regis et regni, velle et de-

here prohibitioni factæ acquiescere. Tandem rege A
auso, episcopi captato consilio suo, ad archiepiscopum intrant. Flebat Robertus Lincolniensis, et quidam filii lacrymas vix continebant. Tunc præfatus Cicestriensis sic orsus est : « Domine archipræsul, salva gratia vestra, habemus quod de vobis plurimum queramus. Plurimum nos episcopos vestros offendistis; in angiportu magno nos inclusistis, quasi inter malleum et incudem nos misistis, hac prohibitione vestra; cui si non paruerimus, inobedientiæ, si paruerimus, constitutionis et offensæ regis vinculis illaqueamur. Nuper enim apud Clarendonam vobiscum congregati, a domino rege conventi fuimus de observandis regalibus suis dignitatibus; et ne forte hæsitare possemus, ipsas de quibus loquebatur consuetudines suas regales scriptas nobis ostendit. Tandem illis spondimus assensum, promissimus observantiam; vos primo loco, nos suffraganei vestri postmodum, ex vestro præcepto. Ad hæc cum super hoc exigeret a nobis dominus rex cautionem juratoriam, et per sigillorum nostrorum impressionem, diximus sufficere sibi debere pro sacramento sacerdotali, quod dicebamus ei, in verbo veritatis, regales suas illas dignitates nos observaturos in bona fide, sine dolo malo, et legitime. Dominus rex persuasus acquievit. Quo contra nunc nos venire compellitis, interdicens, ne ei, quod de nobis exigit, adesse possimus iudicio. Ab hoc gravamine, et ne quid ad lationem nostram addatis, domini papam appellamus, et hac vice prohibitioni vestræ prestamus obedientiam. »

Archiepiscopus : « Quod dicitis, audio, et Deo proptio appellationis prosecutioni adero. Clarendonæ autem nihil concessum est a me, vel a vobis per me, nisi salvo honore ecclesiastico. Ut enim vos ipsi dicitis, has tres ibi retinimus determinationes, in bona fide, sine dolo malo, et legitime; per quas solvæ sunt Ecclesiis nostris dignitates, quas e jure pontificio habemus. Quod enim contra fidem Ecclesiæ debitam et contra leges Dei est, non potest in bona fide et legitime observari; item, non est Christiani regis dignitas, ubi ecclesiastica, quam observandam juravit, perit libertas. Ad hæc, easdem quas dicitis dignitates regales scriptas, dominus rex summo pontifici confirmandas transmisit; et reportatæ sunt ab eo potius improbate quam approbatæ. Exemplum nobis dedit in doctrinam, ut et nos ita faciamus, parati cum Ecclesia Romana recipere quæ recipit, respuere quæ respuat. Præterea si lapsi sumus Clarendonæ, caro enim infirma, spiritum resumere debemus, et in virtute Spiritus sancti contra hostem antiquum eniti; qui utrumque procurat, ut et qui stat cadat, et qui cecidit non resurgat. Si sub stipulatione in verbo veritatis ibi concessimus vel juravimus injusta, notis quia illicita jurantes nullo jure obligantur. »

Redeunt ad regem episcopi, et ejus pace a judi-

cando archiepiscopum excusati a baronibus submoti seorsum sedent; nec minus a comitibus et baronibus suum exigit rex de archiepiscopo iudicium. Evocantur quidam vicecomites et secundæ dignitatis barones, antiqui dierum, ut addantur eis et adsint iudicio. Post aliquantam moram [ad archiepiscopum] redeunt proceres. Comes Legecestriæ Robertus, qui maturitate ætatis et morum aliis prominebat, quibusdam aliorum imponens ut pronuntiarent, renitentibus cepit negotium Clarendonæ habitum articulatim commemorare, ut superius fecit; at archiepiscopo minus (19) hilaris Hyllarius Cicestrensis episcopus, quasi inde manifesta erat regis majestatis lesio, et promissionis in verbo veritatis ibi factæ transgressio: dicebatque archiepiscopo, quod suum audiret iudicium. Sed non plura passus, ait archiepiscopus : « Quid est quod facere vultis? Venistis me judicare? non debetis. Iudicium est sententia lata post controversiam. Ego hodie nihil dixi, ut in causa. Ad nullam causam huc vocatus fui, præterquam ad causam Joannis, qui mecum non est expertus. Ad hæc me judicare non potestis. Ego qualiscunque pater vester sum; vos autem proceres palatii, laicæ potestates, sæculares personæ. Judicationem vestram non audiam. » Reredunt proceres. Post intervallum surgens archiepiscopus, et crucem suam bajulans, ostium petebat, quod tota die obstrictissime observatum, quasi ultro apertum est ei. Aliquis maliloquus prosequens, eum ut perjurum regis exire dixit; aliquis tanquam proditorem eum recedere, et domini sui regis iudicium asportare.

O quantum sustinuit in illa die in spiritu martyrium! sed felicior rediit a conspectu concilii; quoniam dignus habitus est pro nomine Jesu compati. Ille in aula hominibus plena ad fascem lignorum non visum sibi offendit, sed non cecidit. Ad ostium, ubi equi sui erant, venit. Suum ascendens, magistrum Herbertum, qui equum proprium, propter pressuram nimiam, tam cito habere non poterat, secum ad hospitium transvexit, ad monasterium sancti Andree. Facta oratione ante altare, crucem postea secus aram Beatæ Mariæ deposuit. Sedit, et domestici ejus circa eum: tunc ait ei Willelmus filius Stephani : « Ista equidem, ista fuit amara dies. » Cui ille : « Ultima erit amarior. » Et post modicum, suos hortatus, ait : « Quisque vestrum in silentio et pace sua se habeat. Amare verbum de ore vestro non exeat. Nulli maledico quidquam respondeatis. Sinite eos conviciari. Superioris personæ est hoc pati; inferioris, hoc facere. Ut illi suarum linguarum, ita nos nostrarum aurium domini simus. Non mihi maledicatur; sed ei qui, quod mali dicitur, in se recognoscit. »

Rex, audito ipsius archiepiscopi discessu, et quod eum sui aulici turpiloquio prosequerentur, rogatus a Roberto de Melidono Herefordiensi episcopo vel

(19) *Ut superius fecit, et minus cod. Dom.*

forte ab aliquo alio edoctus, dum adhuc non per-
 rexisset, misit, præcipiens, ut post eum voce præ-
 conia per vicus clamaretur, ne quis eum turpiliquio
 vel nuncio læderet, ne quis omnino ei, vel alicui
 suorum, in aliquo molestus esset articulo. Archiepi-
 scopus ille sero inter suos, ubi solebat, comedit.
 Post cœnam, milites ejus omnes qui aderant, red-
 dito ei hominagio suo, et impetrata licentia, cum
 lacrymis ab eo discesserunt. Postea tres episcopos,
 Walterum Roffensem, capellarium suum, et duos
 quos ordinaverat, Robertum Herefordiensem, Roge-
 rum Wigornensem, misit regi archiepiscopus,
 querere ab eo licentiam et conductum præstari sibi
 in crastino recessuro. Regem illi invenerunt hilarem;
 sed distulit in crastinum mane eis respondere. Respon-
 so nuntiorum accepto, archiepiscopus moram illam
 responsi regis aliquid sibi afferre periculi veritus est.

Nox erat: hora ad complendum dicta. Dixit sociis
 archiepiscopus se velle in ecclesia vigilare. Unam
 quidem præteritarum noctium in vigiliis et oratio-
 nibus pernoctaverat in ecclesia cum clericis suis,
 facta afflictione, positisque precibus, ad invocatio-
 nem uniuscujusque sancti vel sanctæ in litania sua
 nominatæ. Aiunt ei quidam de clericis suis: « Vo-
 lumus et nos vobiscum in ecclesia vigilare. » Ille:
 « Ne utique: nolo vos vexari. » In noctis intempe-
 stæ silentio tertius recessit, nullo clericorum, nullo
 militum suorum comitatus. Quod cum in crastino
 rex et omne concilium cognovissent, captato quid
 factu opus esset consilio, omnes possessiones Can-
 tuariensis Ecclesiæ archiepiscopo in pace remanere
 dimisit, nullo ejus officialium amoto, quia in appel-
 latione hinc erant. Et qui causas istas prose-
 querentur, ad dominum papam misit incontinenti
 post eum ad calces ejus, archiepiscopum Eboracen-
 sem et episcopos quatuor, Gilbertum Londonien-
 sem, Hilarium Cicestreensem, Bartholomæum Exo-
 niensem, Rogerum Wigornensem, et comites duos
 et barones duos, clericos domesticos domus suæ
 tres. Reliquum diei et concilii insumitur in tra-
 ctando de copiis pedestribus in Walliam rebellem
 et regem Resim sœderifragum ducendis: scribitur-
 que a singulis personis, tam ecclesiasticis quam
 sæcularibus, in regis rogantis auxilium promissa
 bellatorum peditum multitudo. Solvitur concilium.

Crastino mane nuntii tot et tanti ad portum
 maris Doveram tendunt, ocius accelerantes, et pu-
 tantes quod archiepiscopus eos prævenire deberet.
 Archiepiscopus inter timoratos Dei et suos necessa-
 rios latitando, et nocturnum quandoque iter agendo,
 a decimo quinto die post sancti Michaelis, usque ad
 secundam diem mensis Novembris in Anglia est
 moratus; usque dum navis, cujus gubernatori et
 nautis se crederet, sibi pararetur. Eademque die,
 commemorationis scilicet fidelium defunctorum, et
 ipse et nuntii contra eum missi transfretaverunt:
 illa ad Portum Magnum, multa tamen acti tempe-

A state, ut Londoniæ episcopus capam et cucullam
 exueret, appulsi sunt; archiepiscopus secretius ad
 Graveningas. Inde pedes ivit, et pauper cum duobus
 tantum conservis usque ad quoddam horreum Ci-
 sterciensium monachorum de Claro Marisco. Magni-
 tudine tamen animi spretor erat fortunæ modo rin-
 gentis, ut prins ridentis. Obiter, agnovit eum ali-
 quis, et dixit: « Hic quidem est ille olim cancella-
 rius Angliæ, modo Cantuariensis archiepiscopus. »
 Respondit: « Solentne sic ire Cantuariæ archiepi-
 scopi? » In villula quadam conduxit equum, cum
 ulterius pedes ire non posset; quem ascendit absque
 sella. O Jesu bone, multæ quidem sunt tribulationes
 justorum et passionis hujus temporis, nec tamen
 condignæ præmiis, quæ reservas tuis ad tempora
 retributionis? Ecce hic servus tuus archiepiscopus
 reliquit omnia: et pauper, et inops et indigus
 secutus est te. Pace sanctorum omnium dixerim,
 si tantum quisque Deo immolat, quantum pro ipsius
 amore relinquit, non facile invenitur, qui Thomam
 antecedit. Nam pro Christo et Ecclesiæ libertate,
 sua et suos contempsit; contempsit clericorum,
 officialium, suorum propinquorum proscriptionem.
 Quid amplius? contempsit mundum, contempsit et
 se ipsum. Sed hæc omnia vir Dei in multa patientia
 sufferebat, malens non modo rerum, sed et salutis
 subire jacturam, quam justitiam Dei et Ecclesiæ
 libertatem absque subventionem vel saltem reclama-
 tione periclitari.

C Ventum est ad horreum illud. Inde cymba
 vectus est ad Clarum Mariscum. Inde ad sanctum
 Audomarum. Ubi ab abbate sancti Bertini et con-
 ventu, piis erumpentibus lacrymis, cum gaudio
 uberius suscipitur. A Philippo filio Tierrici illu-
 stri comite Flandriæ rogato, conductum ei et secu-
 ritate eundi ad dominum regem Francorum, præ-
 stare, cum debita compassione et veneratione sus-
 ceptus (20), desiderata impetravit. Moram aliquam
 faciens cum abbate Sancti Bertini, suos consacer-
 dotes et clericos et læceri agminis sui aliquid ibi
 expectabat. Ibi equi, capella, vestimenta et omnia
 necessaria sibi et suis, qui ad eum ibi venerunt,
 munificentia comitis, liberalitate abbatis et vicina-
 rum personarum ad plenum ministrantur. Ibi Ri-
 cardus de Luci nuntius regis Anglorum a domino
 rege Francorum rediens, ei, facta prius multa per-
 suasione repatriandi, hominagium suum reddidit.
 Inde cum prosequeretur iter ad dominum regem
 Franciæ, jam quadraginta equos ad præbendam
 suam habebat. Significato clericis suis, quos plures
 in Galliis habebat, ejus adventu, festinant et addun-
 tur ei. Occurrunt undique ei ad Stratam venerabiles
 personæ Galliarum Ecclesiæ. Ipse etiam archiepi-
 scopus Rhemensis frater regis Francorum Henricus,
 episcopi, abbates, archidiaconi, præpositi Ecclesia-
 rum, qui tanto exsuli debita veneratione aggra-
 tulantur, et ei se et sua liberaliter exponunt, et re-

cipere necessaria a quadam devotæ charitatis incipere compellunt.

Innotuit adventus ipsius domino regi Francorum Ludovico Ludovici regis filio, qui pie in domino et compassus est contumeliam passo et congaudebat elapso. Tandem rumor hic domino papæ Alexandro tertio divulgatus est; qui erat Senonis. Schisma siquidem erat in sancta Romana Ecclesia, prohi dolor! et Fredericus strenuus, si Deum amaret, imperator cum tota sequela omnium terrarum suarum schismaticos unum, alium et tertium fovebat. Sed et nuntiorum regis Angliæ adventus domino papæ innotuit; qui, debita compassione condolens archiepiscopo exsuli, et congratulans pro libertate Ecclesiæ decertanti scripsit ei, quod pausaturos et respiraturos seorsum secederet, donec ad eum vocatus veniret. Pietate mota universa Gallia archiepiscopo compatiebatur; et contra regis Anglorum nuntios spiritus omnium incitabatur, maxime contra episcopos. Quod intelligentes omnes, Eboracensis archiepiscopus et quatuor episcopi et alii comitem Arundelli Willelmum de Albenni ducem suum faciunt; et interrogati obiter cujus esset tanta familia, tantus comitatus, dicunt comitis Arundelli; suppressis nominibus episcoporum, pro pudor! veniunt tandem ad dominum papam. Affluxere undique quicunque ad curiam domini papæ venire poterant, de regno Franciæ, de Burgundia, videre et audire tot et tantos nuntios regis Anglorum; quod genus cause haberent, quid essent dicturi facturive. In Consistorio celebri archiepiscopus Eboracensis et omnes episcopi præter Rogerum Wirgorniersem; sed et comes Arundelli et Reginaldus de sancto Walerico, isti omnes coram domino papa locuti sunt. Omnium fere erat una sententia de commendatione illustris regis Anglorum, tanquam catholici principis, devoti filii et benefactoris domini papæ, et sanctæ Romanæ Ecclesiæ pro parte sua patroni, honesti viri, amatoris pacis, magnifici principis, veneratoris personarum ecclesiasticarum, et donatoris ecclesiarum regni sui secundum Deum et sine simonia. Et si modo esset inter eum et archiepiscopum suum distantia, non esse culpam regis. Deus pacis et dilectionis, adnigente domino papa et Ecclesia Romana, cum placeret ei, ipsam bene sedaret, et nubilum eorum serenaret. Aliquis eorum, inter cætera, regis Anglorum potentatus et divitias diligenter commemorabat. Nullus omnino contra personam archiepiscopi, vel quod eam vel causam regis et ejus tangeret, aliquid dicebat. Singulis eodem modo respondit dominus papa: «Placet nobis regem Anglorum esse talem, tam bonum. Utinam augeat in eo Deus incrementa virtutum.» Erant ibi ad pedes domini papæ in uno consessu tres vel quatuor clericorum archiepiscopi, quos valentes pro domino suo loqui dominus papa repressit, dicens non esse opus, cum adversus archiepiscopum nihil diceretur.

Comes Arundelli efficacius cæteris et magis retho-

rice, prosequente omni favore, locutus est, et omne tulit punctum. In secreto domini papæ auribus immurmurabant de archiepiscopi depositione, tentantes papam maximis promissis; tandem etiam adjecto quod denarium annuum beati Petri, qui nunc a solis ascriptis glebæ, nec tamen ab omnibus datur in Anglia, rex faceret et confirmaret in perpetuum, ab omni habitatore terræ, ab omni domo a qua fumus exit in urbibus, castris, burgis, villis donari; cresceret quidem Romanæ Ecclesiæ redditus in Anglia annuus, præter quod modo est, ad mille libras argenti. Sed cum dominum papam immotum et rigidi servatorem honesti invenirent, ut eis jussum fuerat ultra triduum non morari in curia, neque archiepiscopum ad causas prosequendas expectare, accepta licentia et benedictione redeunt.

Cum ecce una dierum ex altera parte fluminis ejusdam, vident plures quam trecentos in equis de comitatu archiepiscopi ad dominum papam euntes; consilioque communi remittunt unum clericorum regis, Widonem decanum de Waltham, videre et audire, quomodo acceptus debeat esse in curia Romana ipsius Cantuariensis adventus. Cantuariensi archiepiscopo Senonum appropinquanti obviam exiit in equis magna pars cardinalium, ad eum cum gaudio recipiendum.

Dominus papa intranti ad se ei assurrexit in osculo et lacrymis et brachiis eum paterna miseratione suscipiens, et plurima eum veneratione et exhortatione consolans. Ad vigiliam sequentis Natalis Domini, rex Anglorum nuntios suos apud Merlebergam recepit, et quemdam nuntium proprium domini papæ. Rex vero propositi sui inefficax jubet, in crastino natalis, statim archiepiscopum omnibus possessionibus destitui, et Ecclesiam Cantuariensem, cum omnibus terris et accessionibus ejus, et omnes ecclesias et redditus omnium clericorum ipsius, in manum suam recipi; omnesque propinquos archiepiscopi et clericos seu laicos de ipsius familia proscribi, et a regno suo ejici. Secundo die natalis, veniunt Londoniam apparitores et officiales regis inter quos quidam Randulphus de Brock,

scelere ante alios immanior omnes.

D cui etiam laico crudelissimo et archiepiscopi inimicissimo, sanctam illam Ecclesiam Cantuariensem, primariam Anglorum sedem custodiendam, imo potius destruendam commisit. Iste cum aliis quibusdam regii mandati est exsecutor: faciunt imperata et pejora imperatis. Evocati extra urbem, apud Lambetham, in ipsa domo archiepiscopi, jurant in exsilium omnes ejus propinqui in urbe Londonia inventi, ad primum ventum a terra venientem, a portu maris, et a natali solo exituri, et ad ipsum archiepiscopum directo itinere ituri, scilicet ut et ipsi caro ejus carnem ejus macerent, doloribus ejus dolores addant; et quot suorum pro ipso ejecti ei appareant, tot animam ejus ejectionis eorum gladii pertranseant. Non tam evulvulus bonorum jucundus esse potest.

quam molesta discessio. Emigrant utriusque sexus propinqui ipsius, et infantes, in cunis alii, alii pendentes ab uberibus. Omnes etiam inventi clerici ejus et servientes similiter; sed et qui eum vagum in Anglia a facie regis et profugum una nocte hospitio susceperant. Sed quid? nobilis illa Gallia miserata omnes recepit: rex ipse Francorum aliquos, archiepiscopi, episcopi, abbates, priores, comites, barones, præpositi, castellani, singuli aliquos. Sanctimoniales femineum sexum et cunabula recipiunt. Partiti sunt nobiles viri inter se inopes Jesu Christi eo exsules, boni archiepiscopi lacerum agmen, familiam desolatam, nec quisquam eorum egeus erat inter illos nobiles Francos, beneficentia et communio non oblitos. Qualibus hostiis promeretur Deus.

Bonus exsul, servus Jesu Christi Thomas archiepiscopus in secreto confessus domino papæ, se peccasse, quod præcedente voluntate regis Anglorum electus est; item quod Clarendonæ consensit in ipsius decreta, decretis divinis contraria; dicitur archiepiscopatum in manum domini papæ refutasse, quasi ob hæc eo indignum; dominumque papam ita triduo sustinuisse, posteaque ei resignasse. Intellectaque in confessione vita archiepiscopi et poenitentia interire et durior, eum in ulteriorem et sincerio rem dilectionem admisit, sciens eum virum justum et sanctum, et ad summum perfectionis, gratia Dei, et domesticarum virtutum ententem suffragiis.

Post aliquantam cum domino papa moram factam, archiepiscopus de consilio et voluntate ejus Pontiniam moraturus descendit, ad abbatiam scilicet Cisterciensis ordinis monachorum, qui ei et clericis suis plurimis et familiæ necessariæ, in necessariorum administratione hospitales fuere et liberales. Archiepiscopus, toto tempore sui exsilii fere septennis vacans poenitentia suæ excolendæ, conscientia mundandæ, vitæ sanctificandæ, post missarum celebrationem et divinorum contemplationem, etiam studio litterarum et maxime divinæ paginæ operam dabat; libris etiam conscribendis et perquirendis a domino papa privilegiis. In quarumcunque Ecclesiarum omnibus armariis nullum audiebat in Galliis esse antiquitatis vel approbatæ auctoritatis librum, quem transcribi non faceret, nullum privilegium quod Ecclesiæ suæ non perquireret, ut omni retro tempore optimis voluminibus et privilegiis Ecclesia Cantuariensis ita ditata et nobilitata non fuerit, sicut tandem eam refersit. Archiepiscopus exsilii sui et suorum necessitatem æquanimitè ferre studuit, bonis omnibus suis destitutus, et alienæ misericordiæ manum expectans; anteponebat exsilii libertatem domesticæ servituti, patienter tulit. Jactabat in Domino curam suam, et ipse eum enutrit. Dedit ei Dominus gratiam in conspectu omnis carnis. Archiepiscopi exsulia eadem quæ Teveri fuit sententia, patria est, ubicunque homini bene est: eademque Nasopis,

Omne solum forti patria.

O Anglia, quanti æstimanda es, ex qua boni et

religiosi pelluntur; cum bonis prælatis debita negatur libertas, emigrandi seva imponitur necessitas? Albucius æquissimo animo Athenis exsul philosophabatur. Id ei non accidisset, si in republica quiescens, Epicuri legibus paruisset. Archiepiscopo exsuli cum nuntiabatur alicujus vel nepotum vel propinquorum ipsius mors, non movebatur; cum alicujus clericorum suorum, nuntiorum ad dominum papam, male dissimulabat; ibi consolabatur communi necessitate ferendæ conditionis humanæ, vitam omnibus metendam esse ut fruges, reddendam esse terræ terram, hic propriam cujusque virtutem collaudabat, fatum deplorabat.

[Clericorum ejus alii cum eo coexsules extra solum natale erant. Illorum patres, matres, fratres et ditiores propinqui post eos coacti sunt jurare in exsilium et quod archiepiscopo se representarent. Alii remanserunt eum non secuti; quorum Willelmus de Salesberia sacerdos captus et in castro Crotentus est anni dimidio. Tres ditiores de redemptione constituerunt; Stephanus de Elratoria centum libras: post alia vice Aluredus de Wathemeste centum libras: Turstanus de Cromdon centum mareas, et etiam uno die integro in uno et sordido latronum carcere fuit Londoniæ. Alii vagi et profugi habitabant in Anglia, quorum propinquis et amicis diu fuit eos videre formidolosum; cum eis loqui periculosum; eos hospitio vel cibo juvare nefas. Pro eo exsulis ejus junioribus vel inedia manus immerito proscriptis plurimi Franci pia compassione regem rogaverunt. Rex Francorum, aliquibus, imperatrix regis Angliæ mater aliquibus, comes Flandrensis aliquibus, alii quidem episcopi et comites Galliæ aliquibus.]

Willelmus filius Stephani per orationem unam quam fecerat, et regi in capella de Bruhulla dederat, pacem habuit. Hæc autem est illa oratio, propria domini regis Anglorum.

Rex cunctorum sæculorum, rex arcis etheriæ, Rector poli, rector soli, regum Rex altissime: Qui et maris dominaris, conturbas et excitas, Et cum placet, stratum jacet; motum ejus mitigas. Tu creasti, tu formasti, cælos, terras, maria: Quæ fecisti, condidisti, tu gubernas omnia.

Omne bonum tuum donum, Omnipotentissime. Cuncta grata tua data, dominorum Domine.

De beatitudine bonorum.

Hos coronas atque donas gloria multiplici, Qui in mundo, corde mundo, vita vivunt simplici. Hi beantur, coronantur in superlunaribus Quorum mentes sunt ferventes igne sancti Spiritus.

De malis penis malorum.

Peccatorum adjutorem qui non ponit Dominum Exaltatum, elevatum, super cedros Libani; Infernalem, Gehennalem demergis in clipeum, In Averni, in inferni tenebroso carcere Habes clausos reos ausos te Deum contemnere Ibi rei, jussu Dei, pro forma sententiæ

Lugent, rigent, ardent, strigent, et torquentur un- A
[dique.]

Ibi metus, ibi fletus, ibi stridor dentium.
Ibi pœne omnes plene vocibus gementium.
Ilic dolores acriores aliis doloribus,
Ilic tortores nequiores aliis tortoribus.

Recognitio et adoratio Dei.

Dens meus, ego reus tibi me humilio.
Dens vere, miserere adoptivo filio.
Supplex tuus, servus tuus, Deus clementissime,
Te adoro, et imploro tuæ donum gratiæ.
Rex cœlorum, me Anglorum dictum regem suscipe.
Regem rege, sua lege qui se nequit regere.
Est regnare ministrare toto tibi animo,
Obedire et servare tuo sub imperio.
Tuus miles actus viles declinem peccaminum.
Incentiva rediviva exstinguam libidinum.
Falsa læta consueta divitem excelsum. *

Accusatio sui.

Non procuro corde puro quod te Deum diligam :
Parvi pendo, vix attendo, quomodo me habeam.
Hujus lucis in caducis rebus nimis glorior :
In peccatis supra satis immorans immorior.
Aberravi et peccavi, fateor, mi Domine.
Temeravi, violavi justa castimonie.
Putuerunt, putruerunt cicatrices criminum
Æstimati simulati in lacum descendendum
Honestatis, castitatis legem fregi tutius
Est sopita mea vita in malis diutius.
Me immundum non secundum peccata corripias;
Qui elatos vulneratos hos et hos humilias :
Sed correcto et respectu tua, Deus, gratia,
Te laudare et amare da mihi cœlestia.
Emundare, emendare quæ commisi omnia.
Spem salutis, rem virtutis, vitæ innocentiam,
Castitatis, puritatis dona mihi gratiam.

Oratio contra iram.

Cum in ira mente dira interdum efferveo :
Deus care, moderare in me, quod non valeo.

Contra cupiditatem.

Nec sit cura mihi jura cuiquam sua tollere
Vel suorum vicinorum terminos revellere.
Licet censu, armis, sensu me queant devincere
In bragnani, in pagani regis est apicibus,
Quod habemus, possidemus, quæcunque non cupi-
[mus,

Urbes illas, castra, villas, nisi prius capiam
Non abesse vel deesse eas mihi sentiam.
Regum turres pauperum res simili interitu
Opum plenus et egenus æquo cadunt obitu.

Pro adibus oratio.

Regni sedes da hæredes meos post me scandere.
Et pacatum regni statum te tutante regere.

Pro clero suo.

Neum clerum da sincerum fas et jus eligere,
Et devota mente tota te Deum diligere.
Vivant ita bona vita ut tibi complaceant;
Nobis normam atque formam vivendi se præbeant.

Pro populo suo.

Populique meo cuique commissi regimini
Dirigantur et subdantur tuo moderamini.
His intende, hos defende, his te præbe clypeum,
Sceptrum tuum, regnum tuum, dominaris gentium.
Aufer bella et flagella tua iracundiæ
Nobis parce, hostes arce, pacem nobis tribue.
Est humana virtus vana : scis quid est in homine.
Nam in parvis nostris armis non salvamur, Domine.
Sæpe visa et confusa se gratis auxilii
Retro vadit, in se cadit vis experts consilii,
Sed de throno tuo dono virtus adest cœlica,
Per quem datur, procuratur de hoste victoria.

Pro frugibus terræ.

Nostra sata decuplata nos fruge lætificent :
B Nostra culta messe multa copiam multiplicent.
Sic utamur sic fruamur bonis temporalibus
Ut lætemur, jucundemur tecum in cœlestibus.

Pro defunctis suis.

Et meorum propinquorum miseratis animas
Has absolve et evolve delictorum maculas.

Pro vivis et defunctis.

Vivis cunctis et defunctis, Domine, fidelibus
Da pacatam et beatam vitam in cœlestibus.

Amen !]

Circa primum elapsum exilii sui annum, cum jam
deseruisse deberet regis exandescencia, scripsit ei
bonus archiepiscopus exhortatorias litteras illas :
« Desiderio desideravi, » etc. *Vide indicem epistola-
rum alphabeticum.*

C Aliqui religiosi viri Franciæ regem Anglorum in
Northmanniam et partes illas reducem pro archiepi-
scopo rogabant : sed eum inexorabilem inveniebant.
Plurimas scripsit archiepiscopus epistolas coepiscopis
suis ; interdum omnibus communiter, aliquando
semotim singulis ; ut spiritum Dei resumerent, ei
pro domo Dei, terreno abstracto timore, murum se
opponerent. Gilbertus Londoniensis ei sæpius re-
scripsit ; sæpius pro causa illa etiam domino pape
persuadere intendens, regium sanguinem cum vice-
rit, vinci, ut in partem regis papa ferretur inclina-
tor, et ne asperum quid adversum regem loqueretur,
occasione archiepiscopi, ne forte in schismate illo
generali, rex cum omnibus terris suis, parti adversæ,
D cum imperatore apostatam fovente, adderetur ; et
tunc in threnos, ut verbo ejus utar, dominus papa
totus ire posset. Satis invenirentur, qui episcoporum
regis Angliæ ecclesias et baculos de manu et obedi-
entia idoli reciperent.

Hic idem episcopus proscriptorum clericorum
archiepiscopi redditus et ecclesias custodiendas de
manu regis receperat : et cum plurimis eorum con-
solationem plurimam potuisset impune impendisse,
vel palam dispertiens et donans sua pauperibus
clericis et destitutis, vel saltem sub absconso chla-
midis eorum animas confortans, neque Laurentius
fuit neque Sebastianus. Robertus Uscarl clericus
ejus et officialis in redditibus ecclesiarum illarum
colligendis, frugi homo ecclesias ad minorem dabat

pensionem, ut majorem perciperet sibi propter firmas donationem, et xenia inde majora ei provenirent, quæ regis fisco non inferrentur. Archiepiscopus autem excommunicaverat omnes, qui vel bona Cantuariensis Ecclesiæ vel ecclesias seu bona clericorum suorum propria temeritate vel regis occuparent auctoritate. Illi autem, prohi dolor! non se gerebant excommunicatos: posteaque in flore juventutis suæ plurimi ita obierunt, ut ille Robertus et Nigellus de Salcavilla, regis sigilliferi: aliqui autem excommunicatorum archiepiscopi in carne sua gravi ulcere vulnerati, quasi percussi a Deo expiraverunt; ut Robertus vicearchidiaconus Cantuariensis et sacerdos de Chierlewa.

Episcopus autem Londoniensis ecclesiarum illarum curam suam, a domino papa plurimum redargutus, circa anni finem, regi resignavit. Archiepiscopus, inquam, suos suffraganeos litteris emissis studiosissime exhortabatur, ut ei et Cantuariensi matri Ecclesiæ suæ in unitate adhaerent, ne rex eorum conniventia vel dissimulatione ita in Cantuariensem desæviret Ecclesiam, et ita legibus iniquis clerum Angliæ opprimeret.

[Ibi apud Pontiniacum cum quadam die missam idem beatus Thomas celebrasset, et post missam ante altare prostratus in orationibus, fletibus et gemitibus, sicut mos illi erat, aliquandiu moraretur, audivit vocem: « O Thomas, Thomas! » Et ille: « O Domine, quis es? » Et Dominus ad eum: « Ego sum Jesus Christus, Dominus tuus et frater tuus: Ecclesia mea in sanguine tuo glorificabitur et tu gloriaris in me. » Post modicum exsurgens, et inde iturus, qui solum se putabat hoc audisse, vidit abbatem loci qui erat ei a secretis prope astantem, et eum expectantem sub quadam ecclesia: illius columna. Et cum cognovisset eum hoc audisse, exegit ab eo ut nemini diceret se superstitē. Post archiepiscopi martyrium ille hæc revelavit.]

Leges etiam illas Clarendonæ scripto damnavit, et omnes, qui eis consenserant, ab earum observatione absolvit. Rex his et huiusmodi motus archiepiscopum submovē fecit a Pontiniaco; timentibus monachis, ne omnes sui ordinis, quos in terris suis rex Angliæ infinitos habebat, a terris suis ejiceret, si archiepiscopum quasi inimicum regis amplius retinerent.

In capella domini regis, in cantico illo festivo, Christus vincit, non dicebant, archiepiscopo, cum ventum esset ad illum versum: sed archiepiscopus, pax, salus et vita. Item dominus Londoniensis episcopus ad preces solemnes, post sermones suos vel in synodis suis, ad clerum, vel diebus festis, ad populum; cum non erat spes pacis regis, et archiepiscopi, non nominabat archiepiscopum, ut oratio fieret ab Ecclesia ad Deum pro eo: cum rumor erat de eorum concordia, tunc faciebat de archiepiscopo memoriam; quod multi auditores notabant. Similiterque post fecit, cum reges Anglorum, pater et filius, erant concordēs, dicebant in oratione ad missam:

Da regibus nostris; cum vero discordes, dicebat: Da regi nostro, scilicet seniori regni possessori, triumphum virtutis tuæ scienter excolere, etc. Nec deerant qui talia sæpe notabant.

Tunc eum piissimus et Deo dignus Ludovicus rex Francorum, quod quidem a principio voluerat, et sancto Thomæ obtulerat, in suam curam recepit, et ei de reditu suo Senonico ad exhibendum se donavit nummos, annonam, vinum, quantum servientes ipsius volebant accipere: sed et xeniis et muneribus eum frequenter coluit, et in propriæ visitationis præsentiā; dicebatque aliquando ei vel ejus clerici grates sibi exsolventibus: « Non reddatis mihi gratiam; nunquam alicui vel aliquibus panem meum dedi, unde mihi ita gratum fuisset. » Sed et ille archiepiscopus Senonensis Wilhelmus, filius comitis Theobaldi nepotis senioris Henrici regis Angliæ, frater reginæ et trium comitum Franciæ, ætatem juvenulismorum gravitate transgrediens, qui meritorum favore, duas nobiles habere meruit ecclesias, Senonensem titulatam et Carnotensem commendatam, archiepiscopum in vera coluit dilectione; et omnis clerus et militia Galliæ. Extra urbem Senonicam opud sanctæ Columbæ morabatur.

Jam dominus papa regi Anglorum sollicitus scribere cœpit pro eo, tanto tempore elapso, ut expirasse jam debuisset, si mortale fuisset odium et indignatio. Post multas suavissimasque exhortationes epistolares, nuntios aliquos mittebat. Ita alternando, regem revocare a mentis calore intendebat. Cum autem pulsanti ei non speriretur, aliquando, sed temperate, minas addebat, diligenter ei ingerens, quod diutius eum supportaverat, patientia eum ad emendationem provocaverat; amplius eum ita sustinere non posse, contra animæ suæ salutem. Interdum etiam et archiepiscopo consilium dabat et licentiam animadvertendi in rebelles sibi filios suos: etiam et archiepiscopum honoravit et exaltavit legatione et primatu Angliæ, ut quantum deerat illi in possessionem suarum amissione, suppleretur ei in dignitatum accessione; et quod minus habebat in redditibus, recuperaret in honoribus.

Episcopo Londoniensi misit litteras domini papæ de sua legatione et suas proprias tanquam legatus utraque præceptorias, ut episcopis Angliæ eum case domini papæ legatum tanquam ejus decanus denuntiaret, et quas singulis scribebat episcopis litteras mittebat. Episcopus hanc obedientiam recusavit. Item eundem episcopum aliquando prius evocaverat litteris ad eum directis commonefaciens, mandans et præcipientes ut ad eum veniret, et tanquam ejus suffraganeus et Cantuariensis Ecclesiæ professor eum consilio et auxilio in causa Ecclesiæ juvaret. Episcopus noluit. Idem episcopus quondam excommunicatum archiepiscopi Alanum de Nova Villā Hierosolyma iturum absolvit citra Domini papæ vel ipsius archiepiscopi consentiam, juratum tamen quod obiter domini papam adiret, et ab eo pacis tentiæ injungendæ susceperet remedia.

Episcopus Wigorniensis Rogerius evocatus et statim aequi archiepiscopum, et cum patre et domino suo in consilio, et auxilio in causa Ecclesiæ, et impetrata semel transfretandi licentia, quasi studiorum causa quorum ætate junior erat morabatur in transmarinis interdum ad curiam regis quod ei cognationi fuit conjunctissimus. Hujus laus celebris, hæc est præclara memoria, qui solus inter episcopos Angliæ, ausus est et voluit patri exsuli coexulare, cum paupere paupertatem tolerare, pro libertate stare Ecclesiæ, et in die nubis et caliginis regi in erratis resistere. Quisquis amico in errore resistit, sit resipiscens amicus jucundior. Archiepiscopus pro inobedientiæ sæpius correptum et vocatum archidiaconum suum Galfridum Ridellum tandem excommunicaverat. Significaverant quod hoc regi id tamen dissimulanti et non curanti. Henricus episcopus Wigorniensis qui multo post ad curiam venit, a rege benigne susceptus est. Quippe cum libenter audebat, licet ejus non acquiesceret consilio. Una diem intraverunt in capellam; rex missam erat auditorus: loco suo stetit. Episcopus interius in loco suo: non multo post intravit archidiaconus Cantuariensis. Episcopus eo viso exivit. Rex miratus est: causam tamen intellexit et in ira fervore stimulante aclus est. Misit tamen nuntium statim reditum dicere ei cur exisset. Cum episcopus plane causam dixisset, misit iterum post eum rex qui diceret ei, quod a terra ejus oculus exiret. Episcopus misit pro sociis pro hominibus suis ut eum sequerentur et statim recessit regique nuntiavit quod jam pedem habebat in strepa vel orbem tenente pedem, seu quo alio dignatur nomine, a terra sua exiturus et abiit. Sui collectis sarcinis et impedimentis eum jam sequebantur. Post magnum intervallum cum rex iratus in verba contumeliæ et minarum prorumperet, fuit qui diceret ei: « Domine, quid fecisti? Episcopum conjunctissimum tibi fide et sanguine a terris tuis eliminasti. Si dicere fas est, non bene fecisti. Præterea archiepiscopus obsequium acceptissimum et desiderantissimum ei addidisti. Dominus papa non prius animadvertendi in te nimis justam et evidentem causam habuit, nunc utetur occasione non quærita sed oblata. Tuis te das dolorem amicis, gaudium inimicis, qui proscris inno-centem, expellis episcopum. » His et hujusmodi rex suavis et revocatus misit qui equum urgens calcibus episcopum revocaret. Noluisset episcopus redire. Rex denuo misit alios in dextrariis agillimis, et tertios nuntios, inter quos et comitem unum, qui episcopum vel delinitum recocarent, vel renitentem coactumque reducerent. Rediit, et regi deliberius locutus est. Et eo in curia morante, nunquam archidiaconus ille capellam intravit, neque episcopo præsentis regis se ingessit præsentia. Sed et Herefordiensis episcopus similiter a domino archiepiscopo litteris evocatus ad mare venit ut transfretaret, sed transfretare prohibitus, altius indoluit, et cum rediisset ad propria, in illa doloris vehementia

etiam correptus infirmitate suffocatus efflavit extremum. Dominus archiepiscopus una Dominica Palmarum post processionem et sermonem episcopum Londoniensem pro trina inobedientiā revocatum sed irrevocabilem in multa præsentia religiosorum et fidelium Dei apud Claram Vallem excommunicavit, et quosdam alios in Anglia vel in curia regis commorantes pro causis quas in litteris suis quæ habentur manifestabat. Quosunque enim excommunicabat archiepiscopus, in litteris emissis eorum crimina exprimebat et excommunicationis rationes et leges vel decreta subungebat, ut appareret ex iracundiæ calore vel ex præcipitii vel inimicitiarum causa eum nihil agere severitatis, qui super eorum excessibus potius movebatur pio affectu paternitatis. Rumor statim in Anglia venit: fama

Mobilitate viget viresque acquirit eundo.

Episcopus Londoniensis audito statim in urbem ad cathedralem ecclesiam venit: convocat canonicos et clerum urbis Londoniensis, abbates quoque et priores et personas vicinarum ecclesiarum; rumorem talem de se publicat, se excommunicatum prædicat, et tamen se excommunicatum non gerebat, mirantibus sapientibus. Nec multo post convocat synodum generalem, eadem prædicabat, sed ei nullo adversario respondente, quasi quia absens et defensus et non vocatus fuerat. Sed qui archiepiscopi litteras trine citationis vel alias vocationis deferret, non facile inveniretur, quippe chaos magnum non tantum maris et terrarum sed regis iræ et minarum inter eos firmatum erat. Nec potuit solemnitas ista citationum per nuntium fieri, ubi nuntius non audebat suum vel archiepiscopi nomen profiteri. Insuper et se non obnoxium vel subjectum Cantuariensi archiepiscopo vel Ecclesiæ contendebat. Pridem fuisse se dicebat Herefordiensem episcopum et nomine illius episcopi Cantuariensi Ecclesiæ professum, sed modo illa obedientia solum, quia ad Londoniensem Ecclesiam translatus fuerat et Londoniensis episcopus nullam Cantuariensi Ecclesiæ professionem fecerat. Ad hæc se archiepiscopum esse debere ex Chronicorum ratione asserbat. Siquidem temporibus Britonum, ante subactam ab Anglis insulam, sedes quidem metropolitana Londonia fuit. Ita declamabat; sed causa assistata est nullo adversario. Eo audito et sibi relicto, quisque rediit ad propria.

Ipse se non gerebat excommunicatum. Fuit tamen qui ei in secreto diceret rumoribus credi oportere et non oportere. Nondum audierat vel viderat litteras sententiæ in eum date, et pro solis rumoribus ita extra se rapiebatur et in tantum se jactabat periculum animæ super inobedientiā laboris super talis causæ de archiepiscopo prosecutione. Exspectaret donec litteras sententiæ datæ audiret, si effugere non posset nec audiret. Et interim Catholicum se gerens tunc consilio uteretur. Norunt episcopi et justitarii Angliæ quod quærebatur qui tales litteras in Angliam portarent: faciunt portus marinos districtissime observari. Et prior Cantuariensis Ecclesiæ ab Ecclesia

recedit. Episcopus Roffensis similiter. Londoniensis A episcopus similiter et decanus, ne inter regem et archiepiscopum fluctuantes et in neutram partem fidi, sed tales litteras venientes ad se recipiant.... eam voraginem non cadant; si non recipiant absorbeat eos Charybdis. Unum juvenem non literatum, sed laicum invenit archiepiscopus, qui sententiæ hujus litteras, periculo multo se exponens, sed pro Deo mori non veritus, in Angliam detulit. In celebri festo die ascensionis Dominicæ cum quidam vicarius, Vitalis nomine, homo timoratus et honestus sacerdos celebraret ad magnum altare episcopalis ecclesiæ Sancti Pauli in Londonia et cum cantaretur offerenda et sacerdos ille hostiam panis et vini obtulisset et calicem composuisset, adest Berengarius et positus genibus, porrexit sacerdoti litteras quasi oblationem suam. Ille attonitus et ad oblationem primo manum extendit et recepit. Ait ille: « Non est hic hujus sedis episcopus, sed neque decanus: video te hic ministrum Jesu Christi: tibi ex parte Dei et domini papæ trado hic litteras archiepiscopi Cantuariensis de sententia data in episcopum hujus Ecclesiæ, et litteras etiam ejusdem ad decanum, ut ipse et clerus hujus Ecclesiæ hanc observent sententiam. Et tibi dico Dei auctoritate ut præter hanc missam amplius non celebres, donec episcopo suas, et decano suas litteras ostendas. » Hæc dixit et abiit inter densas turmas populi, ut moris est, post evangelium die festo ad propria recedentes, siquidem mane ad parochianas ecclesias missas suas audivit. Factum est murmur aliquod ab illis qui altari propius aderant admoti, querentibus a sacerdote si interdicta esset in urbe divinorum celebratio. Cumque respondisset sacerdos: « Non, » siluit populus et ab his ille quæsitus non est. Sacerdote prosequente missæ celebrationem, ab officialibus quidem regis in urbe et extra ad transitus viarum ille tacite et sollicitè quæsitus, sed minime inventus est. Idem Berengarius postea ad Eboracum venit cum litteris domini papæ amaras historias continentibus, et tamen indemnis evasit. Episcopus Londoniensis et decanus post dies aliquot in urbem veniunt; in ecclesiam clerus urbis et civium majores natu evocantur. Ibi in publico omnium aspectu sacerdos ille, Vitalis, acta narrat episcopo: suas offert litteras, quarum tenor hic erat [Excessus v.], decano etiam offert suas, quæ hæc continuabant [Vest. n. d. la. pr. q. f.] et utraq[ue] litteræ in publico lectæ sunt.

Extunc episcopus communi consilio excommunicatum se gessit et regi acta significat. Rex ei rescribit in hunc modum [Audi vi gr.]. Episcopus transfretavit, et per domini regis interventum et suis mediantibus nuntiis absolutionem impetravit sibi dari ab extraordinaria potestate R. Rotomagensis, et R. Exoniensis, quibus eum absolvendi a domino papa est delegata potestas. Rediit et quidam episcopi et nuntii domini regis et sui cum eo qui a domino papa venerant, et prædicatum est publice in ecclesia cathedrali eum esse absolutum.

In regis Anglorum offensam Jocelinus Saleshe-
rensis episcopus incidit: ad gratiam ejus captan-
dam, decanatum Salesburie cuidam clerico regis
Joanni Oxeneford donaverat; prius tamen prohibitus
litteris domini papæ, ne alicui personæ honorem illum
donaret citra conscientiam et consensum canonicorum
suorum. quorum quidam de majoribus Ecclesiæ,
coexsules erant archiepiscopi. Unde auctoritate do-
mini papæ, archiepiscopus illum excommunicavit.
[Et hoc fecit etiam beati Anselmi prædecessoris sui
quarti roboratus exemplo, qui in exilio positus apud
Cluniacum comitem Melenti excommunicavit, quo
consiliario rex Anglorum Willelmus secundus uteba-
tur contra libertatem electionis episcoporum et abba-
tum, sibi usurpans donationem beatorum.] Episco-
pum Londoniensem propter trinam inobedientiam in
litteris notatam, eadem involvit sententia: non vo-
catum tamen, absentem et indefensum. Unde et ipse
Londoniensis postea ausus est publice et in synodo
contendere, quod enim illa non teneret sententia.
Sed qui archiepiscopi litteras trinæ citationis, vel
alias asperum quid intonantes, in Angliam deferret,
non inveniretur. Aliquos etiam barones et clericos
laterales regis suis ex causis propriorum excessum,
excommunicavit, et publice excommunicatos denun-
tari præcepit. Sic nimirum ante leonem cauli ali-
quando verberantur. Hujus sententiæ in Angliam
portitor vix repertus est. A rege Angliæ missum
est, ut absolverentur, ad dominum papam: spem
paciæ jam promittebat. Rescripsit papa, ut absolve-
rentur, et ab alio quam ab archiepiscopo, extraordi-
narie satis; sed ut regem mitigaret. [Aliquoties rex
Anglorum barones suos aliquot a domino archiepiscopo
excommunicatos, missis nuntiis ad dominum
papam, impetravit absolvi, quasi pro metu mortis
significans ei quod eos contra hostes Walenses in
exercitu esset ducturus. Hac occasione apud eccle-
siam S. Trinitatis in Londonia aliquando plurimi
fuerunt absoluti.] Et archiepiscopo etiam ad tem-
pus organum detraxit, et potestatem ligandi regem
vel suos, ut vel sic regem victorem faceret, et ad
consilium Dei et suum inclinaret. Spe illa diu sus-
pensus, et tandem delusus dominus papa, cum oleum
suum eorum non sanaret infirma, iterum resolvit os
archiepiscopi, iterum attentat vinum infundere.
Rex iratus jussit denarium sancti Petri annum in
Angliā retineri sibi. Iterum jubet, subtilius præca-
vens tandem, ut nullus in Angliam transfretaturus
recipiat, nisi habeat regis litteras; ne forte aliqua
interdicti sententiam, quam sciebat archiepiscopum
habere, in Angliam deferret. Ex parte sua, Londo-
niensis et ceteri episcopi Angliæ, ne quid interdicti
in personas illorum vel in regnum archiepiscopus
statuat, annum fere totum includentes, appellationes
faciunt et scribunt archiepiscopo, et non prosequun-
tur. Evoluta anno appellationes renovant et archi-
episcopo significant, eludentes ejus potestatem hu-
jusmodi frustrationibus. Noluerunt intelligere, quod
appellatio hominum est adinventio, de jure civili est:

introducenda est ad repellenda injusta gravamina, imminenda possessionibus nostris vel corporibus. Unde etiam beatus Paulus, corpori suo timens, cum caperetur, ait: « Casarem appello. » In talibus habet locum, Appello; nec videtur sapientibus catholicis, quod extendi debeat ad tollendam obedientiam, ad evacuandam maiorem potestatem ecclesiasticam, ad elidendam excommunicationem, quæ non de jure humano, sed ab ore Jesu Christi est introducta, potestatem hanc dantis apostolis suis, ubi dicit: « quæcunque ligaveritis in terra, erunt ligata et in cælo; quæ solveritis, soluta. » Absit enim ut jus humanum præjudicet juri divino, et quod humanæ est adinventionis annihilat illud quod divinæ est constitutionis!

Interea plurimi episcoporum Angliæ de medio facti sunt, ut præter archiepiscopatum Cantuariensem, sex in Anglia rex in manu sua haberet vacantes episcopatus. Alii quidem senio confecti agebant in extremis, alii mortui.

Sua pro parte, dominus rex Francorum et optimates Galliarum, sæpius hortatu domini papæ, sæpius proprio spiritu, dolorem regis et regni Angliæ attendentes, regem pro honore pacis conveniunt. Tandem consensus rex Angliæ archiepiscopum Cantuariensem ad colloquium eorum evocari. Plurima inter eos habita sunt colloquia; sed sufficiet de aliquibus aliquid breviter dicere.

Colloquio ad Planicas, cardinales Willelmus Papiensis, et Otto, et archiepiscopus Rothomagensis maxime archiepiscopum tentaverunt. « Vetus est, inquit, de providentia querela, et de his scriptis regis consuetudinibus inter reges et archiepiscopos Angliæ semper materia est corrigendi: hoc est caput querelæ, hæc malorum omnium origo. Et cum dicas te pacem Ecclesiæ tuæ supra omnia diligere, et has execreris consuetudines, modo parebit, modo certum dabis indicium. Pax Ecclesiæ in manibus tuis est. Visne renuntiare archiepiscopatu, si rex consuetudinibus? » Ille: « Non hæc æqua lance librantur. Ego, enim, salvo honore Ecclesiæ meæ et personæ meæ archiepiscopatu renuntiare non possum. Inauditus enim est hoc de antecessoribus meis. Regis honor et animæ ejus salus salva magis est in renuntiando quam in retinendo consuetudines: quod exinde patet, quia dominus papa eas damnavit, et vos cum Ecclesia Romana. » Cum in hoc eum sermone capere non possent, ut renuntiaret, quæsierunt, si coram eis contra regem super querelis habitis vellet litigare. Et simulabant se habere, quam tamen non habebant, plenitudinem potestatis in causa. Respondit: « Ita; si tamen prius integre restitueretur. » Aiunt: « Illud esse impossibile. » Ille: « Sibi vel Ecclesiæ Dei non aliter expedire. » Tunc episcopi Angliæ totum annum includentes, quindecim diebus minus, faciunt appellationem, quam cardinales domino papæ scribunt.

Colloquio apud Munt-Mirail, ita bene ei per inter-nuntios pacis promittebat rex Angliæ, quod fere in-

A ductus est omnino se voluntati regis supponere, ut rex ita vicisse videretur. Aderant in illa sententia archiepiscopi Rhemensis, Senonensis, Rothomagensis, rex Franciæ, episcopi et abbas de Monte Dei, de ordine Chertusæ: et quod de consuetudinibus scriptis Clarendonæ non loqueretur. « Quæ enim, aiunt, necessitas loquendi super his? Scripto vestro, auctoritate domini papæ, eas damnastis, et ab earum observatione omnes, qui assensum præstiterant solvistis. » In crastino colloquio semper retinuit: « salvo honore Dei, et libertate Ecclesiæ. » Mirabantur omnes prænominati. Rex Angliæ ait: « Omnes hæc aberunt determinationes. Hic nihil erit sophismatis. » Mediatoribus supradictis suadentibus hæc relinquere, cum non acquiesceret, quasi desperati discesserunt, relicto eo tanquam consilii eorum desertore. Ipse ad socios suos se recipiens, dixit inter cætera: « Deum ea die fecisse summum sibi honorem, unde maxime Deo gratificari habebant, qui, quod omnes postponebant alii, retinuerant honorem Dei in omnibus salvum fore. » Sed plurimi soriorum ejus, reditum in terram nativitatis suæ desiderantes, quod pax non procederet, et quod a rege offerente ei reditum et restitutionem, ille in his determinationibus inhæret, moleste ferebant.

In redeundo a colloquio illo, in ipso comitatu regis Francorum, forte proxime ante archiepiscopum, quidam clericus ejus Henricus de Hoctuna equitabat: equus ejus offendit præceps: ille clare, ut audiret archiepiscopus, ironice ait equo suo: « Progredere, salvo honore Dei et sanctæ Ecclesiæ et ordinis mei. » Archiepiscopus ægre ferens, tacuit. Post intervallum, secedens in partem cum clericis suis, ut equi respirarent et stillarent, ait eis: « Dilecti socii, necum omnia passi, ut quid contra me ita sentitis et loquimini? Reditus et restitutio nostra minimum quidem est; libertas Ecclesiæ, de qua rex non loquitur, longe pluris est. Pacem tandem recipiam, qua meliorem non potero; sed nunquam ita curias nundinas vidistis. » Tamen postmodum in sententiam boni archiepiscopi Thomæ, omnes præfati viri consenserunt, errorem suum damnaverunt, eum virum sanctum, et fortem Dei athletam probaverunt, et in ipsius amplius confœderati et confirmati sunt dilectione.

Colloquio apud Montem Martyrum, cum rex Angliæ orationum gratia ad sanctum Dionysium venisset, et pallium optimum et quater viginti aureos oblationem super altare posuisset; ubi et a rege Franciæ et omni clero et militia, qui ei occurrerant, honorifice susceptus est; post, cum de pace ejus et archiepiscopi tractaretur; et archiepiscopus super solitis articulis tentatus et interrogatus, semper idem inveniretur et petitionem suam in schedula scriptam regi mitteret, ut suæ Ecclesiæ Cantuariensis jura, et sibi et clericis hominibusque suis ablata, et fraternam pacem et clero Angliæ libertatem restitueret, ipseque ei tanquam domino et regi fidelis foret, et devotus in omnibus, salvo honore Dei et sanctæ

Ecclesiæ et ordinis sui : his non acquiescens rex ad satisfaciendum auditoribus obtulit super causa eorum tractanda, stare iudicio cleri Franciæ, vel scholarium Parisiensium ; sed de præcedente restitutione facienda non loquebatur. Et recessit reginam et Philippum regis filium visurus Parisios, quasi ita spreto archiepiscopo et rupto colloquio ; quod archiepiscopus inter cætera moleste tulit, dicens quod forte ter vocaretur antequam amplius ad colloquendum veniret. Cum discordes hoc modo digrederentur ab invicem, effluxere dies. Tandem hoc domino papæ nuntiatum est, quod concordia non procedebat.

Aliquod colloquium habendum erat apud Pontem Isare ex conducto. Die dicta, adfuerunt archiepiscopus Senonensis et episcopus Bethleemita : rex Anglorum illuc venire noluit ; sed mandavit eis per nuntium illorum conventus, quod si vellent venire Gisorcium, loqueretur eis. Ita delusa est eorum fatigatio, et expectatio archiepiscopi. Rex, comites et magnates Franciæ aliquando regem Angliæ convenerunt pro clericis archiepiscopi maioribus, qui cum eo remanserant, ut saltem eis redditus suos restitueret. Si pro sua promotione archiepiscopo serviebant, hoc mirum non erat. Non eos contingebat causa ipsius et archiepiscopi, quod ipsi duo inter se delirabant, clerici illi immerito plectebantur. Rex Angliæ acquievit, ut ad eum clerici illi accederent, salvo itu, statu, redditu. Venerunt Andegavum ad Pascha sancta Dominica in albis : siquidem ibi rex festinus comederat pascha. Una dierum sedit inter familiares suos clericos illos auditurus. Primus ad eum vocatus intravit Joannes de Salesberia : a rege salutato prius petiit pacem, et beneficiorum suorum ecclesiasticorum restitutionem, quoniam regis offensam sciens in nullo meruerat, et paratus foret regi esse devotus, subditus et fidelis, sicut domino suo terreno, salvo ordine suo. Dictum est ei pro rege ; quod in terra regis natus, et nutritus suos ibi propinquos haberet, et de bonis terræ regis in magnam frugem multarum probitatum et divitiarum adoleverat ; et oportere eum sicut regni regis indigenam regi esse fidelem contra archiepiscopum et omnes homines ; propositaque est ei forma sacramenti si jurare vellet, quod regi fidelis foret de vita et membris suis, et honore suo terreno conservando contra omnes homines, et nominatim, quod consuetudines suas scriptas et regales suas dignitates legitime conservaret, quicquid faceret dominus papa vel archiepiscopus vel episcopus suus. Ille omnia alia concedens, in archiepiscopi consuetudinibus hæsit, dicens, se nutritum ab adolescentia de bonis Cantuariæ Ecclesiæ, et juratum esse in domini papæ et archiepiscopi sui obedientiam ; neque posse Cantuariæ Ecclesiæ vel domino suo archiepiscopo deesse, neque posse quarumlibet consuetudinum observantiam suscipere contra dominum papam et Ecclesiam Cantuariæ ; sed, cum domino papa et archiepiscopo se ait paratum recipere,

PATROL. CXG.

A quæ ipsi prius reciperent, respnere, quæ respnerent, rex non acquievit. Ille jussus recessit. Vocatus intravit magister Herbertus de Boseham. Rex suis ait de eo : « En videbitis quemdam superbum intrare. » Ipse quidem statura ut erat procerus et forma venustus, etiam satis splendide erat indutus, habens, de quodam panno viridi Autisiodorensi, tunicam et pallium, ab humeris more Alemannorum dependens, ad talos demissum, ornatum decenter contingentibus suis. Præfata regis salutatione, sedit. Conventus est simili modo, quo Joannes, respondera cœpit similiter Joanni fere ; sed hæsit archiepiscopo et fidelitate, et consuetudinibus illis scriptis. Archiepiscopum de vitæ honestate et regis fidelitate plurimum commendavit, dicens : illum solum esse regis fidelem, qui regem non permittit errare, ubi potest revocare : nam qui regi loquitur ad placitum, et ejus errorem, si quidem est, dissimulat, et quem taciturnitas addicit, regi fidelis non est, fidem præterit, jurata mentitur. Ideoque ait ; se non posse regi illam veram fidelitatem jurare, nisi vellet regi comes inseparabilis adhærere, et eum, ubi esset juste corripiendus, corripere : sciebatque regem hujus esse instituti et animi, quod eum non audiret nec toleraret. De consuetudinibus ait, quod dixerat Joannes ; et adjecit, mirum sibi videri, quod rex scribi illas fecerat. « Sunt enim, ait, et in regnis aliis aliquæ malæ consuetudines contra Ecclesiam Dei, sed non scriptæ ; ideoque quia scriptæ non sunt, spes est major, quod inspirante regibus Deo exterminentur. » Rex eum volens capere in sermone, ait : « Et quænam sunt malæ consuetudines in regno domini nostri regis Francorum ? » Herbertus : « Consuetudines telonei et pasagii, quæ etiam a clericis et peregrinis exiguntur. » Item, obente episcopo, bona domus, æs, omnia mobilia, etiam fenestræ et ostia exportantur, et regis fiunt. Item forte similes vel aliæ aliquæ malæ consuetudines sunt, sed non scriptæ in regno regis Alemannorum. Rex : « Quare in nomine dignitatis derogas ei, non vocans eum imperatorem Alemannorum ? » Herbertus : « Rex Alemannorum est ; sed ubi scribit, scribit imperator Romanorum semper Augustus. » Rex ait : « Proh pudor ! magna siquidem indignatio. Quid hic filius sacerdotis regnum meum perturbat, et pacem meam inquietat ? » Herbertus : « Ego minime ; sed neque filius sum sacerdotis, quia non fui genitus in sacerdotio, licet postea sacerdos fuerit pater meus ; neque filius regis est, nisi quem pater rex genuerit. » Tunc ait quidam de assidentibus baronibus, Jordanus Tarsun : « Equidem cujuscunque filius sit, vellem dimidium terræ meæ dedisse, ut filius meus esset. » Quod etiam verbum rex amare accepit et siluit. Post pauca, jussit Herbertum abire ; recessit. Philippus de Calva, natu Londoniensis, qui duobus annis ante exsilium archiepiscopi Turonis studuerat, divinam paginam audiens, et leges docens, apprime lectionis, et eloquentissimus sed ægrotatus ; eoque neque præsentiam archiepiscopi comitabatur, neque Romam mit-

tebatur, neque regis et ejus distantie se immiscebat; A facta sunt ibi; habuitque bonos intercessores, qui dicerent regi, cum dixisse, cum audisset se occasione archiepiscopi bonis suis in Anglia destitutum: Deus bone, quid a me querit ille bonus hoc rex? Rex itaque suasus, ne nihil gratie faceret, huic sacramentum propositum remisit, pacem suam dedit, restitutionemque bonorum suorum concessit, et surgens ad alia se convertit negotia. Tandem hoc domino papæ significatum est, quod concordia non procedebat. Habuit item a domino papa archiepiscopus auctoritatem dandæ sententiæ in personam regis, sed melius patientia et commotionibus eum ad poenitentiam et satisfactionem revocare intendebat. Quo audito, rex misit domino papæ nuntium Reginaldum Lombardum, ut cum domino papa ageret, vel de transferendo archiepiscopo ad alium titulum archiepiscopalis ecclesiæ, cum de depositione ipsius toties frustra tentatus dominus papa, semper immobilis, et pecuniæ spreto, inventus est; vel de revocanda potestate illa commissa archiepiscopo animadvertendi in eum; vel de dilatione dandæ sententiæ, sub spe pacis et reconciliationis archiepiscopi, quam domino papæ rex permisit. Et quidem ultimum illud Reginaldus ille a domino papæ insperavit. Iterum et iterum dulcibus alloquiis et exhortationibus regem dominus papa compellat: « Non proficiens hac via, minatur securim ad radicem arboris ponendam. » Quod procul dubio rex intelligens, jurare facit omnem Angliam a laico duodecim vel quindecim annorum supra, contra dominum papam et archiepiscopum, quod eorum non recipient litteras, nec obedient mandatis; et, si quis inventus foret litteras eorum deferens, traderetur potestatis, tanquam coronæ regis capitalis inimicus. Tamen hoc sacramentum apostasiæ nobilis quædam domina filia Baldewini de Reivers (21-22) viriliter agens et zelum habens obedientiæ Dei neque juravit neque aliquem hominum suorum jurare permisit. Archiepiscopus Eboracensis similiter libere fecit. Alii episcopi, qui in Anglia remanserant, pro dolor! in parochiis suis sacramentum illud jurari permiserunt. Archiepiscopus, hoc audito, tanto compatiens errori et apostasiæ, missis clam litteris ad aliquos timoratos Dei, omnes qui inviti juraverant, a sacramento absolutos pronuntiavit. Rex facit portus maris districtissime observari. Interim in Angliam revertitur, et filium suum Henricum apud Londoni imponente ei manum archiepiscopo Eboracensi, supradicto Rogerio, præter spem et opinionem omnium fere totius regni, subito fecit coronari. Archiepiscopus Cantuariensis ad hunc casum oculos direxerat Providentiæ, et a domino papa litteras obtinuerat, in Sabbato dominicæ coronationis illius Eboracensi et Londoniensi oblatus, ne ipsi vel alii episcopi Angliæ citra eum non ad hoc revocatum

ei coronando manum imponent; quia Cantuariensis Ecclesiæ hæc debebat esse coronatio. Nec minus pridie festum sanctorum Viti et Modesti coronatur. Rex statim retransfretat, sed prius cum filium suum rex Angliæ disposuisset coronari, dixit hoc idem Wigorniensis tunc transmarino, transmarinus præcipiens ut repatriaret, et cum episcopis, qui pauci admodum supererant in Anglia, cognati sui adesset coronationi. Nec tamen significavit ei quod per manus impositionem Eboracensis vellet eum coronari. Episcopus sperans meliora, concessit, et ad maris portum Diepam venit. REX in Angliam venerat. Regina, quæ in Normannia remanserat, et Ricardus de Humet justitiarius Normannorum, litteras miserrunt episcopo Wigorniensis ad portum prædictum ne transfretaret; alias etiam litteras præposito et transvectoribus naves habentibus, ne episcopum illum in Angliam transveherent nec transfretare permetterent. Sane intelligebant quod episcopus ille per Eboracensem manus coronando impositurum, non permetteret illum coronari in provincia Cantuariensi, vivente Cantuariensi archiepiscopo; cujus dignitatis esse debebat regem novum consecrare. Ita transfretare prohibitus, episcopus remansit in Normannia. Post coronationem illam, rex statim ut dictum est, retransfretavit in Normanniam. Trans Falesiam, Wigorniensis (23) episcopus, ad tria millia extra Falesiam ad eum venit. Rex ei se vultuosum ostendit, et statim in verba prorupit contumeliæ, dicens: « Nunc patet te proditorem esse; præceperam tibi ego ipse, quod coronationi filii mei adesses, et tibi diem prædixeram, adesce noluisti; in quo, quod neque me, neque filii mei diligas promotionem, plane ostendisti. Equidem patet, quod inimico magis faveas, et me meosque odio habeas; sed reductus episcopatus tui amplius tibi non remanebunt. Eripiam eos a manibus tuis, quia et episcopatu et omni beneficio indignum te probasti. Vere Roberti boni comitis avunculi mei filius nunquam fuisti, qui me et te in castro illo nutrit, et nos ibi, et prima elementa morum et litterarum doceri procuravit. Episcopus, de sua securus innocentia, regi simpliciter et modeste acta narravit, quomodo ad portum usque venisset, et quomodo, ne D transfretaret, litteras prohibitionis accepisset. Rex non credulus illi, et vehementissime accensus ait: « Regina est in castro illo Falesiæ, et forte Ricardus de Humet vel adest vel in proximo aderit, laudasne illos auctores? » Episcopus: « Reginam nimis, ne forte si reverentia vel timore vestri verum suppressim, adversum me amplius exandescas. Si vero verum confiteatur, adversus illam nobilem dominam irreverenter insanias; non est mihi tibia tanti ut pro hoc unum verbum amarum ab ore vestro audiat; malo sic factum esse, quam me coronationi adfuisse, quæ quidem injusta, et contra Deum fuit, non ratione coronati, sed præsumptione coronato-

ris; et si adfuissem, illum ibi eum coronasse non A sustinuissem. Dicis me non fuisse filium comitis Rogeri, nescio; matris meae vel filius fui, cum qua totius consulatus, et honoris jus hereditatemque pater meus suscepit; sed vos facto condignae retributionis non ostenditis, quod pater meus, ille comes Rogerus, avunculus vester fuit, quod vos honore condigno enutrierit, quod pro vobis regem Stephanum sexdecim annis impugnans et inimicum impugnatoremque sustinens tandem pro vobis in bello captus fuerit. Si haec et huiusmodi patris mei obsequia ad animum revocassetis, non ita fratres meos in exanitionem et exterminium redequistis. Fratrī mei comitis tenuram et honorem mille militum, quem avus vester, rex illustris Henricus patri meo integrum dedit, vos feudo ducentorum et B quadraginta militum decurtastis. Alium juniolem fratrem meum R. strenuum, ut dicitur, militem, ita inopem et opis indigum esse sustinuitis, quod pro paupertate, relicta saeculari militia et vita, hospitali Hierosolymitano se in perpetuo servitutum donavit, et schema habitumque suscepit. Vestros domesticos propinquos, et amicos sic nostros beare bene meritos sic consuevistis munerare. Quid mihi minas et mala intentatis, quod episcopatus mei beneficiis me spoliare velitis? Ut libet moveor? non moveor, vestra sint, si vobis non sufficiunt, quae ab archiepiscopatu et sex episcopatibus vacantibus et pluribus abbatibus, C injuste certe et animae vestrae periculo recipitis, et in usus vestros saeculares redigitis, eleemosynas patrum vestrorum, honorum regum, et patrimonialia Jesu Christi. » Haec et huiusmodi dicta sunt in audientia omnium, qui regi hinc inde lateris stipatores coequitabant; et ait sociis suis quidam miles de Aquitania, qui episcopum ignorabat: « Et quis iste qui sic loquitur? » Dictum est ei quod esset episcopus. Ille contra: « Equidem feliciter actum est cum rege, quod sacerdos est ipse. Si miles esset, duo jugera terrae regi non relinqueret. » Alius autem quidam intendens regi placere, amarius episcopum objurgavit. Quod rex audiens, et indigne ferens, conversus ad illum, maximo eum turpiloquio debonestavit, inter caetera dicens: « Putasne, pessime, si quae volo dicam cognato et episcopo meo, liceat ideo tibi vel alii cuiquam eum verbis inhonorare, aut minis D insectari? Equidem vix manus contineo ab oculis tuis; tibi et aliis contra episcopum nefas sit mutire. » Ventum est ad hospitium. Post prandium rex et episcopus secreti et placide collocuti sunt, et de pace archiepiscopi. Aliqua vice factus fuerat tumultus magnus in Anglia a iustitiariis regis imponentibus quasi crimen quibusdam abbatibus, et personis ecclesiasticis in Anglia, quod archiepiscopo exnili regis ut dicebant inimico, pecuniam numeratam transmississent. Et quidem episcopo Wintoniensi hoc non audebant objicere, qui frequenti visitatione et opportuna auri et argenti transmissione, pio com-

(24) *Mox* ed. Spark.

passionis affectu domini sui archiepiscopi, quem ordinaverat, propulsaverat inopiam. Eorum autem quibus hoc obiectum fuerat, alii, qui tamen hoc facerent, timore incumbente super eos se hoc fecisse negaverunt, ut pacem haberent, eam pecunia sua emerunt. Aliquis ausus est palam dicere: « Et quid nos arguitis opus fecisse misericordiae inopi et exsuli, et patri nostro de pecunia nostra donasse? Non est religiosus nec satis Christianus qui calamitosum negligit, afflicto non compatitur, pauperis non misereatur. Dicitis eum regis esse inimicum; nos nescimus, nec credimus. Et tamen si esset nobis inimicus, inimicum diligere jubemur propter Deum; esurientem cibare, et potare sitientem. » Dictum fuit aliquem dixisse vel scripsisse regi Anglorum de archiepiscopo: « Ut quid tenetur exclusus? melius tenebitur inclusus quam exclusus. » Satisque dictum fuit intelligenti. Unde et rex ad colloquium de pace festinavit, et ibi omnia prius negata, quae ab eo petebantur, concessit. Prius tamen filio suo ita subito coronato, propter aliquod consequens, quod potuit contingere; et si quid mali contigisset, non deberet propter eum puniri regnum, cuius ipse rex non esset. Istud fuit arcana non enarrabile fibra regis Anglorum, novit Deus, « qui scrutatur renes et corda; » non ego. Sed qui ante rem, in re, post rem, operibus crediderunt, hoc de eo intellexerunt. Item de concordia et pace archiepiscopi rex Francorum et nuntii domini papae regem Anglorum subito compellant, quoniam dominus papa tantos regis excessus, tantam archiepiscopi et suorum coexsulum miseriam, nec non laborantis Anglicanae Ecclesiae dolores ulterius dissimulare non valuit nec voluit.

Acquievit rex (24) rogari in ipsa aetate. Igitur sexto anno exsili archiepiscopi Thomae nondum completo, pridie beatae Mariae Magdalene congregantur apud Fonteveral (25) archiepiscopi Rhemensis, Senonensis, Rothomagensis, Tyrensis, et dominus rex Francorum, et episcopus Nivernensis, et abbas de Grosso Monte, loco domini papae, et episcopus Pictavensis, et fere omnes episcopi Normanniae; commites et magnates fere omnes Galliae ad pacem inter regem Angliae et archiepiscopum Cantuariensem reformandam. Nullus episcoporum Angliae ibi fuit D praeter Rogerum Wigornensem. Ipsa die ad hospitium regis Francorum veniens rex Anglorum, cum secreto collocuti essent, post pauca jocando dixit rex Angliae: « Et crastina die habebit pacem suam latro vester; et quidem bonam habebit. » Rex Francorum: « Quis, inquam, latro pro sanctis Franciae? » Rex Anglorum: « Ille noster Cantuariensis archiepiscopus. » Rex Francorum: « Ulinam esset ita noster quomodo vester est; honor vobis erit coram Deo et hominibus, si ei pacem bonam feceritis, et nos vobis gratiam habebimus. » Haec in audientia dicta sunt, secretius quae voluere locuti sunt. In crastino exeunt omnes ad colloquium illud. Rex

(25) *Freiteville* ed. Spark.

Francorum non ascendit : forte ita convenerat inter eos, prece regis Angliæ promittentis ei se omnia sine eo factorum, quæ postulaverat. Siquidem fatigaverat prius regem Anglorum pro archiepiscopo precibus multis. Et quoniam nunc ad colloquium hoc in terra regis Francorum rex Angliæ venerat, acquievit rex Francorum colloquio et concordia huic spiritui magis et auctoritate adesse, corporaliter abesse, et regi Angliæ propriæ libertatis et liberalitatis lora laxare ; ut sui juris magis esse videretur ; cum rex eum Franciæ neque prece neque præsentia oneraret, et conspectio in eo appareret misericordia, pace, et gratia sua archiepiscopo reddita, cum suæ ibi relictus esset voluntati, et nulli subjectus necessitati : sapienti siquidem dominorum preces præcepta sunt.

Cum plurimi plurima hinc inde dixissent pro bono pacis et gratiæ eorum resarciendæ, et rex acquievisset omnibus articulis pacis et libertatis Ecclesiæ, et gratiæ, et restitutionis reddendæ Cantuariensi Ecclesiæ, et personæ archiepiscopi, et restitutionis terrarum et ecclesiarum faciendæ clericis seu omnibus pro archiepiscopo spoliatis, et donationis ecclesiarum archiepiscopatus, quæ interim vacaverant, archiepiscopo relinquendæ ; siquidem rex clericis suis eas donaverat ; nolens bonus archiepiscopus latere regem aliquid, quod postea posset inter eos offendiculi vel scandali causam generare sapientis siquidem est ; nec fellere nec falli velle hujusmodi habuit orationem : « Domine mi rex, omnia quæ mihi fecistis beneficia promotionis primæ et secundæ, et venerationis plurimæ, sæpe ad memoriam revocans, grata et accepta fero, et in omnibus agens gratias, tanquam regi et domino terreno debitor vobis sum et obnoxius, salvo Dei honore et sanctæ Ecclesiæ ; et nunc potissimum, quia me modo ad pacem et gratiam vestram revocatis et recipitis : verum inter omnes malorum articulos, quos in ira et indignatione vestra sustinui, proscriptionis, spoliationis et ejectionis mei et meorum, vel cujuscunque oppressionis Ecclesiæ Cantuariensis ; unum est quod me plus movet, et quod intactum incorrectumve omittere neque possum neque debeo ; scilicet, quod filium vestrum per Eboracensem archiepiscopum in parochia Cantuariensi coronari fecistis, et hæc dignitate regem sacrandi Ecclesiam Cantuariensem spoliastis, quæ vos unctione misericordiæ Dei unxit in regem, et quæ inter omnes dignitates suas hanc sibi habuit peculiarem, propriam et specialem, a tempore longæ retro vetustatis, ex quo primum beatus Augustinus sedem metropolitanam Cantuariæ constituit. » Ad hæc rex : « Accepi quidem et didici, quod inter cæteras regales regni mei dignitates, hæc quidem una est, quod si rex Angliæ filium suum vivens in regem promovere voluerit, ubicunque et per cujuscunque civitatis archiepiscopum vel episcopum voluerit, licet ei hoc facere. Et atavus meus rex Willelmus, qui subegit Angliam, ab archiepiscopo Eboracensi sacrationem suscepit et coronam Londoniæ. Et avus meus rex Henricus per manum episcopi

A Herefordiensis. » Ad hæc archiepiscopus : « Equidem verum est, quod reges illos illi coronaverunt ; sed in illorum coronamentis Cantuariensis Ecclesiæ dignitas non est imminuta : nam cum regem unxit Willelmum Eboracensis ille, quasi vacabat sedes Cantuariæ. Stigandus enim, qui tunc Cantuariensi præesse videbatur Ecclesiæ, archiepiscopus non fuit ; pallium a sancta Romana Ecclesia nunquam susceperat ; et, vacante Ecclesia Cantuariensi, in clero Angliæ major eminebat et proprius impellebat archiepiscopus Eboracensis. Cum vero coronari deberet rex Henricus, sanctus Anselmus Cantuariæ archiepiscopus erat ; sed longinquo aberat exsulans apud Cluniacum. Quoniam autem mora revocationis ejus maxime posset esse regni periculo,

B ne interea guerra oriretur super faciem terræ ; subiit in locum et officium archiepiscopi absentis unus suffraganeorum ejus, ille Herefordiensis, patris salvans ei dignitatem. » Rex ad hæc : « Bene potest verum esse. Ego quod dixi, in causa contra Cantuariensem Ecclesiam non dico ; ipsa me sacravit, ipsius ubique volo salvam fore dignitatem. Si quid in eam commisi, pro me paratus sum corrigere domini papæ et Ecclesiæ Romanæ arbitratu. Et vobis liceat ab archiepiscopo Eboracensi et episcopo Angliæ Cantuariensi Ecclesiæ et vobis illatas expostulare injurias. » Satisfactum est archiepiscopo, et pro hac responsione et concessione regi gratiam redditurus, equo descendit, ad pedes regis se inclinaturus. Quod rex intelligens, ocius equo desiliit,

C et archiepiscopum amplexatus elevavit, eum recipiens vultu hilari, fronte læta, et pacem spondente et gratiam sibi referente. Ascensuro præbuit obsequium, orbem tenens, quo pes ejus dexter teneretur, Ab omnibus bonæ voluntatis hominibus, qui aderant, piæ erumpebant lacrymæ. Tunc rogatus est rex dare ei osculum pacis : nam diu prius, cum inter eos de concordia tractaretur, reversione et restitutione, et omnibus hujusmodi articulis a rege concessis, sed solo osculo negato, pax diu hæserat ; dicente rege, se aliquando jurasse in ira, quod eum nunquam oscularetur. Unde consultus dominus papa regem a tali si fecerat, sacramento absolvit : et ei injunxit in animæ suæ salutem, quod eum in bona

D pace oscularetur. Rex ait : « In terra mea centies ejus osculabor os, manus et pedes ; centies ejus audiam missam ; sed modo differatur. Non loquor captiose. Honor mihi est, ut in aliquo mihi deferre videatur : et in terra mea osculum dare, de majore videbitur gratia et benignitate, quod hic fieri videretur de necessitate. » Assensu omnium archiepiscopus acquievit. Lætati sunt universi, clerus, militia, populus, omnis ætas, omnis ordo, qui hæc viderunt et audierunt. Postea soli dominus rex et archiepiscopus, seorsum diu secreto usi sunt consilio. Solvitur conventus. Convenerat inter regem et archiepiscopum, quod in Galliam rediret archiepiscopus suis benefactoribus gratias referre, et domino papæ, nuntio et scripto suo : acceptaque

licentia, et compositis ad repatriandum rebus, ut A regem rediret, qui vel in propria, si fieri posset, præsencia eum in Angliam reduceret; vel cum eo archiepiscopum Rothomagensem mitteret, ut rediens postliminio, cum multa veneratione, susciperetur: et interea, rege præcipiente, ut possessiones ablatae ei et singulis restituerentur destitutis. De pace archiepiscopi scripsit rex in hæc verba [. . .] (26) Celebratur restitutio clericis archiepiscopi; non tamen satis plenaria: sed neque ipsi archiepiscopo. Rex, ut supra dictum est, donaverat in dissentione vacantes quasdam ecclesias archiepiscopi: et secundum formam pacis revocat donationes illas et archiepiscopo relinquit. Intrañt in possessiones earum officiales clericorum, quibus archiepiscopus illas donaverat. Sed non multo post per officiales regis hi expelluntur, et reintrant quibus eas rex dederat. Præterea, redditus, et pensiones maneriorum archiepiscopatus, ad proximum terminum sancti Michaelis, non archiepiscopi sed regis officiales recipiunt. Sapientes plurimi hæc taciti considerabant, et aliquid notabant. At archiepiscopus statim miserat nuntium suum gratiam referens, de pace, domino papæ, et sanctæ Romanæ Ecclesiæ, et scripserat ei formam pacis, et concessionem regis de ulciscenda coronationis injuria, et forte nuntium illum expectabat. Et interea conventibus religiosis et opitularibus amicis suis, semotis singulis per Galliam gratias referre, et ab eis licentiam accipere vacabat. Ipsi autem nobiles Galli eum et suos, equis, vestibus, et omnibus necessariis sufficientissime instruxerunt, ut quos foverant exsules, cum honore remitterent repatriantes. Regi Francorum in accipiendo ab eo licentiam dulcissime, et affectuosissime, cum omni gratiarum actione, inter cætera dixit: « Nos inuis in Angliam ludere pro capitiibus. » Rex Francorum ait: « Ita mihi videtur. Equidem, domine archiepiscope, non dato tibi osculo pacis, si mihi crederes, te regi tuo non crederes. Remane: rege Ludovico vivente, non tibi vina, cibi, Galliæ opulentia deerit. » Ille: « Fiat voluntas Dei. » Cum lacrymis extremum vale sibi invicem dixerunt. Similiter et episcopo Parisiensi eum deosculanti inter cætera dixit: « Vado in Angliam, mori. » In Angliam, cuidam religioso et honesto sacerdoti Richardo de Halliwell, quidam serviens de curia regis peccata confessus, inter cætera dixit; se manibus suis impressisse sigillo litteras missas in Angliam, ut occideretur archiepiscopus; et Nigellum de Saleavilla eas scripsisse lacrymantem; addidit etiam, se hoc confessum fuisse alicui episcopo Angliæ, et ab eo satisfactionem sibi injungi postulasse. Episcopus ille illi: « Et quid! Præceptum domini tui fecisti; et tanquam nihil mali commisisset nihil ei inunxit. »

(26) Epistolæ quarum hic illic mentio facta est, in locis suis inter epistolas S. Thomæ et Gilberti Foliot, inveniantur. In codice A omnino abfuerunt,

Una dierum Reginaldus de Warennâ intravit capitulum canonicorum de Suthwercha, quibus ipse familiari dilectione, et fraternitatis eorum communicatione, et plurima devinctus erat beneficiorum collatione, et inter cætera cum loqueretur de hoc mundo immundo, de facinorosum malitia, de vitiis, quæ a patrum nostrorum nobilitate degenerans, audet et apponit præsens corruptior ætas, ait eis: « Obsecro, orate Deum pro me instantius; necesse est, in proximo forte audietis in Angliâ fieri, quæ a sæculo non sunt facta vel audita; et quoad me, contra me et meam voluntatem; sed non sum mei juris. » Abhorruerunt canonici, qui hæc audierunt, nescientes quid vel de quo diceret; donec Reginaldo illo servato innocente a sanguine justî hujus, res tandem per alios facta est. Rex Anglorum interm archiepiscopo litteras scripsit revocationis per Hugonem clericum, dicens, illam ejus moram in Gallia sibi esse suspectam; festinaret ergo in Angliam redire archiepiscopus; paratis omnibus, ad regem ex conducto revertitur. Primum venit ad eum apud Turonem, ibi nec rex, nec rogatus, osculum dedit; nec archiepiscopus rogavit, ne festinus nimium et præproperus videretur.

Iterum ad curiam venit apud Ambeise. Rex ipsa die adhuc missam erat auditurus. Nigellus de Saleavilla, regis clericus et sigillifer, et cui unam de bonis ecclesiis archiepiscopi rex donaverat, quam modo timebat amittere, regi nuntiat archiepiscopum esse in capella; et forte tam tempestive et ante missam venisse, ut ei ad missam osculum pacis ferat; sed, si dominus rex velit, fraudari posse archiepiscopum osculo. Rex: « Quonam modo? » Ille: « Dicat sacerdos missam pro fidelibus defunctis. » Rex acquievit, et factum est ita. Post illam missam dictum est, ut assolet in veneratione dominæ nostræ perpetuæ virginis Mariæ, *Salve, sancta parens*: quo dicto sacerdos textum Evangelii osculatus est, et accedenti ad eum, et osculanti archiepiscopo tradidit regi deferendum; quo osculato, archiepiscopus regi ait: « Domine modo in terram vestram ad vos veni, date et mihi pro tempore, et loco, et conducto, pacis osculum. » Rex: « Alia vice satis habebis; » quam repulsam, et archiepiscopus, et omnes taciti notaverunt. Rex et archiepiscopus die illa diu soli locuti sunt. In ultimo autem concordie tenore pactus erat rex Rothomagensem contra eum venire, et omnia ejus debita creditoribus solvere, et de cætera pecunia archiepiscopi percepta satisfacere, et ibi eum ad osculum recipere, et eum in Angliam comitari, vel Rothomagensem cum eo mittere ad filium suum regem, suppleturum, si quid deesset plenariæ redintegrationis archiepiscopi vel snorum. Ibi a rege Anglorum cum ultima vice, licentia petita, discessit.

nisi in tenuibus membranæ laminis intra paginas libri insertis exscriptæ essent.

Rex ait ei: « Vade in pace, sequar te, video te Rothomagi, vel in Anglia, quam citius potero. » Archiepiscopus: « Domine, dicit mihi animus, quod sic discedo a vobis, quasi quem amplius in hac vita non videbitis. » Rex: Habes me proditorem? » archiepiscopus: « Absit a te, domine. » Et inde discedens archiepiscopus ex voluntate regis venit Rothomagum. Ibi autem solummodo per nuntium regis, itineris sui ducem, decanum Saresberiensem accepit. Regis erat excusatio quo minus in Angliam veniret cum eo; quia rex Francorum homines ejus Arvernos pararet expugnare. Audito a decano Saresberiensis ad quid venisset, ait illi archiepiscopus: « O quanta rerum mutatio! » Archiepiscopus Cantuariensis: « Ita secure deberet tibi ducatum præbere, et paulo securius, quam tu ei, in Angliam ituro. » Archiepiscopo autem Rothomagensi, per quem supradicta inter eos convenerant, dixit: « Ubi sunt hæc inter regem et me conventa? Quare in propria persona non adest rex? Quid est de nostræ pacis osculo? quid de pecunia? Creditores meos adduxi. Rex non stat verbo suo. » Interrogatus item a Cantuariensi Rothomagensis, si regis de comitandis eum in Angliam accepisset mandatum, ait: « Nequaquam; » prosequeretur eum tamen ex dilectione, si vellet, sed non oportere. Omnia in tuto esse ait. Pax ejus et securitas, in tanta auctoritate, et tantorum præsentia formata et firmata erat. Ibi archiepiscopus Rothomagensis ei trecentas libras monetæ suæ dono dedit. Ad mare Flandriæ vadit archiepiscopus, solo ductatore comitatus decano Saresberiensis Joanne prædicto, conferens hæc omnia in corde suo, et maxime pactum sibi in concordia deesse sibi osculum pacis. Sed tamen in Spiritu sancto securus cæptum iter agit, pro Deo et Ecclesia non timidus mori. Jam autem acceperat nuntium, et litteras exhortationis a domino papa, ut ad Ecclesiam suam intrepidus redeat, et ministerium suum impleat; sed et litteras severissimæ justitiæ de præsumpta novi regis Angliæ coronatione, suspensionis quidem archiepiscopi Eboracensis et omnium episcoporum, qui coronamento aderant; præter quam solius Bortholomæi Exoniensis; sed et litteras in excommunicationem revocationis episcoporum Londinensis et Saresberiensis, quippe alia prius vice fuerant excommunicati. Cum his de justitia litteris nuntius præmittitur, qui Eboracensem et Londiniensem transfretare parantes tempestive apud Cantuariam invenit. Lectis de sententia fulminante domini papæ litteris, in quibus et hoc unum verborum erat: « Implemus facies vestras ignominia, » concidit in terram vultus eorum.

Ad portum Wytsand jam erat archiepiscopus; serena erat cœli facies et maris, navis archiepiscopi parata, aliæ aliquæ naves transfretabant. Archiepiscopus exspectabat. Dicunt ei aliqui de clericis suis coeussilibus, quibus natale solum desiderio erat: « Domine, ecce jam Angliam videmus: plurimorum transfretantium vela tument. Quare non ascenditis

navem? Nunquid nos eximus sicut Moyses, qui terram promissionis vidit quidem, sed non intravit? Ille, inter cætera: « Ut quid festinatis? non effluent quadraginta dies ab ingressu vestro in terram, malletis esse ubicunque terrarum, quam in Anglia. » Jam paratum erat, et forte aliquem ab Anglia nuntium acceperat, quod si apud Doveram intraret appulsus, obvios eum accipientes grassatores inveniret, qui subito peragerent rem; et quod ad mare accessissent Eboracensis et Londinensis ad conflmandum magis tam acclerati ausus opifices, ut de illorum in vicino positorum præsentia et securitate audientiores redderentur. Navim ingressus sacerdos Dei bonus Thomas, gubernatorem hortatur portum Sandwici petere, quoniam ille portus suus erat, et homines sui de ipsius lætarentur adventu. Igitur Kalendas Decembris feria tertia apud Sandwicum appulsus est; quod audientes statim regis officiales, vicecomes Cantuæ Gervasius de Cornhelle, et Reginaldus de Warena et milites eorum plurimi sub capis et tunicis loricati, advolant in egressum ejus a navi, sed viso et audito Joanne loco regis ejus ductatore, discedunt qui armati audiebantur; sed ne nihil ageretur, vicecomes, et Reginaldus inter cætera verba quærent si alienigena aliquis cum eo veniret, ut secundum legem a rege promulgatam exigant ab eo litteras regis de ingressu suo in Angliam, vel saltem sacramentum de fidelitate regis, forte et ut eum provocarent, vel seditionem suscitant, talia loquebantur; sed frustra. Ibi archiepiscopus pacificum esse ingressum suum, pacifice respondit; et non cum eo venisse nisi homines pacis, clericos suos et domesticam familiam suam. Sane venerat eum eo quidam archidiaconus Senonensis, qui ei exsulanti et suis multa contulerat beneficia: hunc clericum sibi adhæsisse dicebat. Exactiones hujusmodi, vel litterarum, vel sacramenti, ab eis debere et solere exigi, de quibus verisimile esset, quod infirma regni explorare venissent. Inauditus esse quod a Cantuariensis archiepiscopi clericis talia exigenterent, nec ab eo inciperent. Res hoc modo quiescit, nisi quod postea dixit ei vicecomes, quod in igne, et gladio terram intraverat; regem volebat decoronare; archiepiscopum Eboracensem et omnes episcopos excommunicaverat, pro servitio regis: et nisi in brevi maturum super hoc captaret consilium, futurum aliquid, quod melius posset remanere. Ad talia archiepiscopus respondit; se non pro rege coronamentum retractare; quippe qui ei quatuor talia regna, si posset secundum Deum, libenter perquirere vellet; sed pro illis, qui contra Deum, et Cantuariensis Ecclesiæ dignitatem, hanc sacrationem injuste usurpaverant, nec hoc erat in terram ignem et gladium mittere, debitam peccatis episcoporum justitiam exercere. Mortem ei non minaretur quis, paratus enim venerat collum extendere pro justitia et veritate. Scripsit statim de ingressu suo in Angliam domino papæ. Nuntiatur Ecclesiæ Cantuariæ, et ubi, appulsus esse dominum archiepiscopum. Hila-

rati sunt oppido omnes a maximo usque ad minimum. Ornatur facies templi. Induuntur sericis, et vestibis pretiosis. Parant epulum multiplex, lectisternia capacissima. Recipitur cum processione celebri archiepiscopus. Resonat ecclesia canticis et organis; atria classicis; urbs undique lætitia uberior.

Sermonem in capitulo dixit luculentissimum incipiens ab hoc versu : « Non habemus hic manentem civitatem, sed futuram inquirimus. » Duo archidiaconi, scilicet Galfridus Ridel Cantuariensis, et Ricardus Pictavensis, familiares regis, et de consilio ejus; sed quos archiepiscopus promoverat ad locum in quo eminebant; qui etiam homines ipsius erant; jam in Cantiam venerant, ad regem illac transfreturi. Audito autem quod archiepiscopus appulsus Cantuariæ esset, lora statim diverterunt, ad occidentalis maris portus tendentes. Quod iter malum signum fuisse visum est pluribus. Archiepiscopus Eboraci, et episcopus Londini, et Saresburie per clericos suos nuntios archiepiscopum alloquuntur, quod in pace non venisset, sed in igne, et flamma, coepiscopos suos omnes conculcans, et ponens scabellum pedum suorum; non citatos, non auditos, non judicatos; sed suffraganeos ejus dicebant occurrisset ei ad mare, ut in processione cum ecclesia Cantuariæ eum reciperent; sed indui erant præter spem et meritum quasdam tunicas nigras, et dissidentes, quibus exui, antequam ad eum venirent, necesse habebant, si ei placeret. Ille inter cætera, dicebat pacem peccatorum video non esse pacem, et huc usque in his absentiae meae diebus episcoporum nostrorum [aliqui] ferant quæ ad pacem eis videbantur, sed a domino papa bellum missum esse bonum, ut rumpatur pax mala. Adsit regula peccatis, quæ poenas irroget æquas. Item non est pax vera nisi hominibus bonæ voluntatis. Putabat Jerusalem, deliciis affluens, et nimis sibi indulgens, sibi esse pacem; sed flevit eam Dominus misertus, quia divini ultionis imminerebat ei severitas, abscondita ab oculis ejus. » Item episcopi dicunt, quod non vocati fuerunt, non auditi in jure; sane, non omnia causæ cognitionem desiderant. Ubi manifesta sunt crimina, non indigent disquisitione, sed potius debita correctione. Ad hæc respondit : « Sententia hæc suspensionis, seu excommunicationis, non est mea sed domini papæ : neque nostrum est de ejus sententia disputare. Probe intelligo tentativa esse et capiosa, quæ per vos nuntios proponunt episcopi; ut si constiterit me non venisse cum potestate eos solvendi, me legatum infirmum in hac parte parvi pendant; ei eum hac potestate, absolutionem suam per laicam potestatem a me extorqueant. Eis non insidit. Illi meum sanguinem sitiunt. Utinam bibant; et bibent. Et cum tandem sanum dedisset resipiscendi et satisfaciendi consilium, non acquieverunt, sed appellaverunt. Voluit Londinensis, postea sicut dicebatur optimam partem eligere sibi, ut a legato et archiepiscopo suo poenitens humiliatus et juri stare

A juratus absolveretur; sed forte, ne solus relinqueretur in certamine, non sustinuit Eboracensis, qui confusus in thesauris pecuniæ, dicebat aliquando, se habere papam et regem cum servitiis suis. Consilium dedit ut regem transmarinum simul adirent, significarent ei universa.

Bonus archiepiscopus Thomas post octo dierum moram in sede, præmittit nuntium domino regi juniori, significans quod eum tanquam regem et dominum suum veniat videre. Adduxerat quidem secum tres pretiosos equos dextrarios, miræ velocitatis, elegantis staturæ, formæ venustæ, ingredientiæ altius, crura mollia reponentes, micantes auribus, tremantes membra, stare impatientes, amictos operatoris, distinctis floribus et coloribus, quos ei, novo domino, novum xenium donare destinaverat. Diligebat enim ipsum admodum, ut modo dominum suum regem, quem puerum in domo, et curia sua ipse cancellarius patris sui regis prius nutrierat.

C Episcopus, et ecclesia Roffensis eum, una die, procedentes obviam cum debita veneratione suscipiunt. Londoniæ tertiam habuit processionem, ad ecclesiam canonicorum regularium beatæ Mariæ in Suthwerca; exieratque ab urbe in occursum ejus ab exsilio revertentis, infinita multitudo clericorum, virorum, ac mulierum, in lætitia magna, laudantium et benedicientium Deum de ipsius desiderata repatriatione; per se congregati pauperes scholares, et clerici ecclesiarum Londinensium in occursum ejus, circiter ad tria millia egressi ab urbe : archiepiscopo viso et appropinquante ad eos cœperunt canere altissime et serenissime : *Te Deum laudamus*; ut et ipsi præ gaudio flentes, fere omnes auditores ad pietatis lacrymas provocarent; quorum ipse devotioni et exultationi in Domino congaudens, capite inclinato gratiam habuit, et injecta in loculum elemosynarum suarum palma, eis monetam extractam plena compassione et manu fecit distribui. Ad canonicalem ecclesiam de Suthwerca, ubi in domibus episcopi Wintoniensis erat hospitio recipiendus, cum tandem venisset et descendisset, canonici religiosi cum omni gaudio, et facta processione ad ostium ecclesiæ ei obviantes, ipsorum et multorum piis irrumpentibus lacrymis, canere cœperunt responsorium : *Benedictus Dominus Deus Israel*; et infinita ibi multitudo, cleri, populi, omnis ætas, omnis ordo gaudio uberiore, et voce sonora, canticum gratiarum et lætitiæ communis prosecuta est. Ibi, et inter cæterum strepitum quædam fatua et inverecunda et dicax, quæ curiis et conventibus publicis se ingerit, Matildis clamabat, et repetebat aliquoties : « Archiepiscopo, cave a cultello! » ut omnes mirarentur quidnam prodigiosum ipsa audisset, quod ad cautelam ei, sub tali verborum involucro, significabat. Ibi in hospitio episcopi Wintoniensis supranominati Henrici moram unius diei faciens, nuntium regis junioris accepit in crastino Jocelinum, fratrem reginæ, de Arundello, quod volebat rex eum ad se venire, neque eum per urbes et

castra regni ire, sed rediret potius Cantuariam, et in sede sua moraretur, inde ne exiret. Admiratus est archiepiscopus, intellexitque de spiritu regis illius junioris talia non procedere; et quæsit a Jocelino, si a pacis suæ communione et fiducia eum submotum esse rex ei denuntiaret. Ille: « Quod ego dixi mandavi tibi; » et exiens vultuosus vidit quemdam civem Londinensem, notum suum, obvium sibi, hominem divitem, cui et dixit: « Nunquid et tu venisti ad inimicum regis? redi ocius, consulo tibi. » Ille: « Si inimicum regis eum habetis nos nescimus; audivimus et vidimus regis transmarini litteras de pace et restitutione istius; si aliud quid latet, clam nobis est. » Et ista fuerant, ante rem, prænuntia signa malorum.

In crastino venit, qui diceret ei Cantuariam redituro, quod Randolphus de Broc onerariam navem ejus, cum vino suo appulsam, ei abstulerat, rudentes succiderat, anchoras tulerat, nautas, alios ceciderat, alios incarceraverat apud castrum Pevensseye. Mittit illico ad regem juniorem abbatem sancti Albani, et priorem de Dovera, nuntians quænam circa eum agerentur; jubente rege restituta est navis. Archiepiscopum Thomam redeuntem Cantuariam, aliqui militum suorum comitati sunt, ne forte, tot concurrentibus, et crebrescentibus signis malis, aliqui gareiones ab insidiis, secus stratam, in eum irruerent; quinque omnino militum scuta, dextrarii et lanceæ in ejus fuerunt comitatu. Statim nuntiatum est regi transmarino, quod in exercitu grandi, et armato loriceis et galeis regnum perambulet, urbes expugnare, et filium ejus a regno expugnare. Primo sero reditus ejus Cantuariam versus, apud Wrotham, venit ad eum quidam sacerdos Willelmus nomine, pauper et habitu religiosus, qui tunc celebrabat apud Chidingston. Hic ad secretum soliloquium archiepiscopi, quod rogaverat admissus, ait ei: « Domine, ecce assero vobis reliquias sancti Laurentii, et sancti Vincentii, et sanctæ Cecilie, ex præcepto sancti Laurentii, qui mihi in visione nocturna apparuit, et has, quas apud me habebam, horum sanctorum reliquias esse dixit. » Archiepiscopus: « Frater, et quomodo scis has horum sanctorum esse reliquias? » Willelmus: « Domine, ita et ego in visione mea quæsi vi a beato Laurentio signum aliquod, dicens quod alias mihi non crederetis; et beatus Laurentius dixit mihi pro intersigno, quod nuper in sinum vestrum manum injecistis, et cilicium quo proximo carni vestræ utimini discissum invenistis, et apud vos deliberans utrum illud refici faceretis, an aliud novum indueretis, post modicum injecta manu, illud integrum invenistis. » Ad hæc, archiepiscopus, inter cætera: « In virtute Spiritus sancti, in vi obedientiæ, tibi præcipio, ne cui dicas, me superstitie. » Sacerdos: « Fiat; » et subjunxit: « Pauper sum: in aliena ministro ecclesiæ; cogitate de me. » Archiepiscopus: « Infra quadrimum natalis Domini veni ad me, et providebo tibi. » Discessit ille.

Randolphus de Broc, et Gervasius de Cornhella, regis officiales, statim una dierum mala male dissimulantes, quasi ex ore regis præcipientes, fecerunt evocari, et citari priores ecclesiarum, et cives nominationes urbis Londoniæ, et nomina quorumcumque exeuntium obviam archiepiscopo clanculo scribi fecerant, ut ad curiam regis venirent cavere datis vadibus iudicio curiæ regis stare, quia in occursum archiepiscopi processerant, inimici regis, ut aiebant; priores tamen, et personæ ecclesiasticæ non venerunt. Cives plurimi, qui venerant, dicta die, responderunt se non videre litteras regis, quæ ita eos citari vel cavere præciperent, sed neque justitiorum. Erant regis cives, et fideles, non eis obnoxii; ad regis imperium facerent, quod deberent; res ita remansit. Nec enim in hoc peccaverant, sed potius præstiterant Deo obsequium justitiæ, cultum autem suo archiepiscopo legato, tam debitam quam devotam honorificentiam. Venit bonus Thomas Cantuariam, recedunt ad propria illi quinque milites; et ipse cum solis sacerdotibus et clericis et familia domestica ibi remanet. Familia illa infamis Randolphi de Broc, ei vicinantes apud castrum Saltwode, nocturnas illi ad exitus viarum undique circa Cantuariam tendebant insidias: et ut eum ad impatientiam provocarent, et, homines ejus ad rixam, in ejus indagine sine licentia venabantur, et cervum capiebant: amplius; archiepiscopi proprios canes in silvis ejus militantes capiebant et retinebant. Amplius: una dierum ante natalem Domini, quidam Robertus de Broc, qui quondam clericus fuerat, et postea monachus in vestibus albis, sed post apostata et ad sæculum transfuga, summarium archiepiscopi ab una villarum ecclesiæ cum procuratore ipsius Cantuariam tendens in strata regia obviam habuit, et unum equum per manum Joannis de Broc nepotis sui fecit tota cauda curtari, in dedecus archiepiscopi. Sed Dei desiderator Thomas, currus et auriga Ecclesiæ Anglorum, patiens tam in prosperis quam in adversis, præcipue virtutis domicilium, omnia hæc recolens præcurrentia martyrii sibi imminents signa, animum firmans ad exitum suum de Egypto, de die in diem, se præparat, in elemosynis profusior, in oratione devotior, in omni cura animæ suæ sollicitior. Aliquoties etiam inter loquendum cum clericis suis, dicebat; causam hanc sine sanguinis effusione non posse terminari, et se in causa Ecclesiæ usque ad mortem staturum. Quod sui non intelligebant, verba putantes; sed postea hujusmodi recoluerunt verba, qui viderunt opera. Et domino papæ scripsit archiepiscopus, non imminere sibi nisi mortem et gladium, supplicans ut pro eo Dominum Deum attentius deprecetur.

Venientes versus curiam transmarini regis hinc Eboracensis et Londinensis et Saresberienensis, inde archidiaconus Pictavensis, siquidem archidiaconus Cantuariæ in mari laboraverat et nondum venerat, eunti forte videre archiepiscopum Tyri regi obviavit, et quæ jam rex audierat de excommunicatione

seu suspensione episcoporum, sicut dicebatur, acta A
narrant, Cantuariensi archiepiscopo totum imputant,
reum deferunt lesæ majestatis; accusant absentem,
indefensum; id tamen verentes, ne quandoque voca-
retur, et audiretur, in hoc crudeliores summis sa-
cerdotibus Judæorum, Jesu Christi mortem machi-
nantibus, eo quod illi licuit pro se respondere in
publico, huic ejus discipulo Thomæ nequaquam.
Causam inquam eorum, quæ erat ecclesiastica, ante
oculos principis sæcularis offerunt, querimoniis suis,
regem nimis credulum illis incitant, in hominem
recentis pacis suæ, in archiepiscopum sanctum Dei.
Geminantur mala cum falso. Nuntiatum est regi,
quod archiepiscopus in militum armatorum manu
forti regnum perambulat. Quæsiuit rex ab Eboracensi,
Londoniensi et Saresberienensi consilium. Ebo- B
racensis: « Quære consilium a baronibus et a mili-
tibus tuis: nostrum non est, dicere, quid facto opus
est. » Tandem ait unus: « Equidem, domine, Thomas
superstite non habebis dies bonos, nec regnum pa-
catum, nec tempora quieti. » Rex itaque tantam ex
hoc adversus eundem archiepiscopum indignatio-
nem, amaritudinem, et turbationem concepit, et ita
cum vultu et gestu ostendit, quod ejus commotionem
intelligentes et ei placere quærentes quatuor dome-
stici sui barones Reginaldus Ursonis filius, Willel-
mus de Traci, Hugo de Morevilla, Ricardus Brito,
ut dicebatur, jurati in mortem archiepiscopi, a curi-
z recedunt, diversos maris portus petunt. Mira res!
duce diabolo, bonorum omnium antiquo hoste, circa C
eamdem horam diei unius ad familiam illam de Broc
apud castrum Saltwode congregantur, in crastino
postquam a curia regis archiepiscopum interfecituri
discesserant. Rex in camera sua suos allocutus est
barones, questus eis de archiepiscopo, quod quasi
tyrannus terram suam esset ingressus, quodque pro
servitio suo omnes episcopos et archiepiscopum
Eboracensem suspendisset, et quosdam excommu-
nicasset, quod totum regnum turbasset, quod fi-
lium suum, et eum corona, et diademate regni in-
tenderet privare, quod supra eum perquisisset le-
gationem, quod privilegium quoddam a summo
pontifice obtinisset sibi et episcopis de donatio-
nibus ecclesiarum, sublata et comitum et baro-
num et ipsius etiam regis advocazione. Primus D
respondit comes Legecestriæ: « Equidem, domine,
amicissimi sibi fuerunt ipse archiepiscopus, et
dominus pater meus comes, sed pro vero habeatis,
quod postquam a terra, et dilectione vestra disces-
sit archiepiscopus, neque meum vidit nuntium, nec
ego suum. » Engelgerus de Bobun, quidam invete-
ratus dierum malorum, et patruus Sarisberien-
sis episcopi, qui excommunicatus characterem bestię
habebat in fronte, ait: « De tali homine, nescio
quemodo vindicare possitis, nisi si patibulo appen-
datur, virgis rigentibus in funem intortis, actus in
crucem. » Willelmus cognomento Malus Vicinus,
nepos Eudonis comitis Britannię, tertius fuit, qui
loqueretur. « Olim, inquit, Jerosolymis redii, Ro-

mam transii, et pontificibus Romanis ibi hospitem
meum, inter ceterum sermonem, interrogans, au-
divi quod aliquis papa ibi interfectus fuit propter
insolentiam et proterviam intolerabilem. » Finitis
his, statim misit rex Willelmum comitem de Magna
Villa, Seierum de Quinci, Ricardum de Humet, post
illos quatuor in Angliam. Fama fuit ut archiepis-
copum caperent. Comes Willelmus et Seierus usque
ad portum maris venerunt, sed non transfretave-
runt. Ricardus ad alium portum tendens transfreta-
vit. Rex filius erat Wintonię; misit Ricardus ad
magistros ejus Hugonem de Gundevilla et Willel-
mum filium Joannis, ut clam rege cum militibus do-
mus regiæ Cantuariam irent. Ipse circa maritimam
insidiabatur, ut si forte archiepiscopus fugæ præsi-
dium attentaret ad aliquem portum maris, capere-
tur; quod et faciebant in transmarinis comes Wil-
helmus et Seierus, ut si forte transfretasset, ibi ca-
peretur.

Mira res et stupenda accidit. Nam illi quatuor
barones superius nominati, Reginaldus Ursonis fi-
lius et ejus socii, qui diversos maris portus petive-
rant, duce diabolo, bonorum omnium hoste anti-
quo, circa eandem horam diei unius in Angliam
apud castrum de Saltwode, ad familiam de Broch
congregantur: tamen ante adventum eorum beatus
archiepiscopus, de imminente occisorum ejus in-
gressu certissime fuit edoctus, et magis conforta-
batur in Domino, viriliter agens et induens se ar-
maturam Dei, ut fortiter stare posset in die Domi-
ni: sed secretum habuit ne in tanto festo tumultus
fieret; quantum in eo erat.

Nocte Dominicæ nativitatis legit evangelicam le-
ctionem, librum generationis, et missam noctis ce-
lebravit. Ante magnam missam in die, quam et ipse
celebravit, sermonem luculentum fecit in pulpito ad
populum, sumpta inde materia, circa quam pluri-
mum versatus est, quod in terra est pax hominibus
bonæ voluntatis. Et cum de sanctis patribus Can-
tuariensis Ecclesiæ, qui ibi sunt confessores, loque-
rentur, ait, unum eos habere martyrem archiepi-
scopum sanctum Elphegum; possibile esse, ut et
alterum in brevi ibi haberent. Sed et post tam pro-
brosam injuriam de equo pauperis coloni sui cur-
tato in obsequio Cantuariensis Ecclesiæ, sententia
excommunicationis innodavit Robertum de Broch,
sicut ei prius denunciaverat per nuntios, invitans
eum ad satisfactionem: ipseque contumax ei renun-
tiat per militem quemdam, David de Ruminel,
quod si eum excommunicaverit, faceret sicut ex-
communicatus. Alios quoque duos ecclesiarum de
Herges et Thierlewda violentos incubatores, qui of-
ficiales ejus venientes non acmiserant, eadem in-
volvit sententia. Die quoque Sancti Stephani ma-
gnam missam celebravit: sed et die Beati Joannis
apostoli et evangelistæ. Ipso die emisit secreto in
Galliam duos clericos suos magistrum Herbertum
et Alexandrum Gualensem crucis suæ bajulum, ter-
tium Gillebertum de Glanvilla ad dominum papam

iturum. Misit duos alios Ricardum capellanum et Joannem Planetam ad episcopum Norwici absolvere ad tempus excommunicatos sacerdotes de terra comitis Hugonis, qui excommunicatis scienter divina celebraverant, accipiendi prius a sacerdotibus illis securitate, quod infra annum ad dominum papam irent, vel pro omnibus communiter duos ex se mitterent, penitentiae satisfactionem ab ipso papa accepturi.

Jam memor archiepiscopus sacerdotis sui Willelmi, qui ad eum venerat apud Wrotham, eum per Willelmum Beivin notum ejus queri fecerat, si forte in curia vel in urbe inveniretur. Et non invento eo, chartam fecit scribi, in qua donavit et confirmavit illi capellam de Penesherst, subscripta excommunicatione, si quis illam ei auferre praesumeret. Et chartam illam tradidit Willelmo Beivin, tradendam sacerdoti, quando eum videret. Quis hunc non fuisse martyrii sui praescium dicit? Per chartam illam postea sacerdos ecclesiam suam in pace habuit a rege juniore; qui dixit, audita charta et miraculo, se nolle in sancti archiepiscopi incidere excommunicationem.

[Jam vero evocati aderant ad castra circa Cantuariam, Dove, Rophe, Saltwode, Blechingee, milites deputati custodiis castrorum illorum: forte ut se includendo infra ecclesiam Cantuariensem archiepiscopus et sui se vellent retinere. Illorum militum in vicino positorum adveniens quicunque multitudo obsidione eos expugnarent forte si fugere vellet bonus archiepiscopus, quacunque veniret, in hostes incideret. Forte si ad ultionem detruncationis ejus zelo Dei cives Cantuarienses vel vicini populi in grassatores illos vellent insurgere iniqui illi vel ad aliquod castrorum illorum haberent refugium. Vel se defensuri a castris illis illico sibi mitti peterent militare praesidium].

Quinto igitur natalis die, praedicti quatuor barones regis cum suis omnibus et cum illa familia de Broch a castro Saltwode Cantuariam veniunt. Aditi sunt ad eos milites plurimi, quos de castellis et vicinia Cantuarie, quasi ad servitium regis, edicto evocaverant, quorum quasi duodecim, cum illis quatuor ad curiam archiepiscopi, suaviter directo tendunt; aliis interea indicentibus per urbem praefectis et majoribus civitatis, et ex parte regis praecipientibus, ut omnes cives armati cum eis veniant ad domum archiepiscopi ad servitium regis. Cumque civitas eorum furem admirata contradiceret, statim praecipunt, ut in pace se habeant, non se moveant, quicquid audiant vel videant. Haec erat istorum opera, ut vel civitatis habitatores eis ad facinus suum adderentur, vel si minus, non eos impedirent, neque pro archiepiscopo suo decertarent.

Praeambuli illi praedicti barones et milites in thalamum interiorem ad archiepiscopum introducunt. Hora diei erat quasi decima. Comederat archiepiscopus, sed adhuc comedebat servitorum familia. Introeuntes eos ipse salutatione praevenerit: responsio

eorum aut nulla fuit aut obscura. Inter clericos et monachos, ante eum consederunt. Reginaldus Ursonis filius sic orsus est: « Mittit nos ad te dominus rex transmarinus, ut excommunicatos in ingressu tuo in Angliam episcopos absolvas, suspensos, officio suo restituas, et postea ad filium suum regem, quem decoronare intendis, eas Wintoniam, de tanto excessu satisfactorius, et judicio curiae ipsius pariturus. » Archiepiscopus: « Ego quidem excommunicatos hos non excommunicavi, suspensos non suspendi; sed dominus papa litteris suis, hoc modo filios suos corripiens, et male meritos puniens: archiepiscopum Eboracensem, quia me absente et non vocato nec sciente nec consentiente, in praedictum ecclesiae meae, debitam Ecclesiae Cantuarie et mihi, novi regis coronationem in parochia mea, etiam ipsius domini papae litteris prohibitus usurpavit: episcopos, quia, cum sint Cantuariensis Ecclesiae suffraganei et professi, hoc sustinuerunt, pro jure suae matris Ecclesiae non reclamantes. De sententia autem domini papae non est meum retractare; ligatos ejus non potest minor potestas solvere. Verumtamen cum in archiepiscopo nulla sit mihi solvendi, sicut nec ligandi potestas, suffraganeis meis Londoniensi et Saresburiensi concessi requisitus, quod eos anathemate ab solverem, et alios omnes suspensos restituerem, si modo vellent vel cum humilitate invocare misericordiam, vel cum data securitate ecclesiastico stare iudicio; sed reaverunt qui me convenerunt. Adhuc ad id paratus sum. Domini regis novi coronatio firma, stabilis et inconvulsa permaneat; et salva coronati dignitate, dominus papa punit coronatoris injuriam; quod is qui non debuit et ubi non debuit nostri praeccepit officii dignitatem: et pro silentio et sufferentia sua, nostri plectuntur episcopi. Et totum istud de permissione domini regis est, et de ejus licentia concessa mihi in die pacis nostrae. Neque regem novum ideo quero exheredare, quin potius ei multa regna mundi salvo si fieri posset possidentium jure, optarem. Ad ipsum nuper iter arripueram, non ei satisfactorius, qui in nullo eum offendi, sed promotioni ipsius domini mei debita veneratione congratulaturus. Sed apud Londoniam ejus nuntium et preceptum suscepi reversionis, quod doleo. » Tunc illi in minas statim laxis habenis proruperunt. Ille ait: « Miror equidem quod sic obstrepitis, quod minas et mala intentatis. Scitis quod recepit me dominus rex, in die Magdalene, ad pacem et gratiam suam; et aliquot vestrum ibi praesentes vidi; et quantum intellexi, placuit vobis, et cum litteris et conductu regis, terram ingressus sum. » Tunc ait ei magister Joannes Saresburiensis: « Domine, loquimini secretius super verbo isto. — Non expedit, ait archiepiscopus. Talia proponunt et postulant, quae omnino facere non possum nec debeo. » Reginaldus Ursonis: « A quo ergo habes archiepiscopatum? » Ille: « Spiritualia a Deo et domino papa; temporalia et possessiones a domino rege. » Reginaldus: « Nonne totum te a rege ha-

bere recognoscis? Ille: « Nequaquam; sed habemus reddere, quæ sunt regis regi, et quæ sunt Dei Deo. » Reginaldus et alii, quasi aliquid mirum dixisset, amplius fremebant et accendebantur, et stridebant dentibus in eum.

Sed Thomas justus, quasi leo confidens absque terrore erat, paratus pro justitia et libertate Ecclesie suæ usque ad mortem agonizari, pro anima sua; et ait: « Frustra mihi minamini: si omnes gladii Angliæ capiti meo immanent, ab observatione justitiæ Dei et obedientia domini papæ, terrores vestri me dimovere non poterunt. Pede ad pedem me reperietis in Domini prælio. Semel recessi timidus sacerdos; redii in consilio et obedientia domini papæ: amplius in sempiternum non eam deseram. Si licet mihi in pace fungi sacerdotio meo, bonum est mihi; si minus, fiat de me voluntas Dei. Præter hæc, nostis quid inter ine et vos sit; unde et magis miror, quod audetis archiepiscopo in domo sua minari. » Hoc autem dicebat, commemorans quod Reginaldus ille et Willelmus de Traci et Hugo de Norvilla, ejus dum adhuc cancellarius erat, propria deditioe homines facti sunt, salva fide regis, quisque trium ipsius jus imperiumque susceperat, genibus minor. Illi, unde mansuescere deberent, jam furentes, et præ ira se non ferentes, aiunt: « Nihil quidem inter nos est contra regem. » Ait Reginaldus: « Bene audemus archiepiscopo minari, et plus facere: recedamus. » Stabat autem ibi magna pars familie archiepiscopi, cum clericis et multis et militibus aliquot, qui affluerant; auditio quod altius loquerentur. Quos intuens Reginaldus, ait: « Dicimus vobis ex parte regis, cujus homines et fideles estis, ut ab homine isto recedatis. » Forte sicut socii eorum in urbe de civibus, ita et hi introrsum de familia metuebant, ne pro domino suo decertarent, ne contra eos insurgerent. Cumque omnes immoti starent, contrarium statim dat Reginaldus ille præceptum: « Præcipimus vobis, ut hominem istum custodiat, ne recedat. » Archiepiscopus: « Facilis sum custodiri: non recedam. » Illi grassatores inter ceteros intuentur militem quemdam dapiferum archiepiscopi, Willelmum filium Nigelli, qui a camera sua quadam de quodam ratiocinio accurrerat. Hunc apprehensum abducunt, dicentes: « Venies nobiscum. » Miles ille archiepiscopo: « Domine, vides quid de me faciant? » Archiepiscopus: « Video. Hæc quidem vis eorum est et potestas tenebrarum. » Et exsurgens archiepiscopus, eos nondum thalamo egressos sequebatur passibus paucis, ut militem suum sibi dimittant, rogans satis modeste. Illi obstinati recedunt, et obvium sibi quemdam alium militem archiepiscopi, Radulphum Morin, similiter capiunt secum educentes, et per medium aulae et atrii ad sequelam suam procedentes, terribilibus oculis et minis omnia penetrant, et clamant: « Arma, arma, viri. » [Interea in quadam magna domo cujusdam Gilberti, quæ erat e regione januæ archiepiscopi, omnis manus hostilis congregabatur. Qui

tandem, accepta significatione, erumpentes uno impetu, intraverunt januam archiepiscopalem eis apertam, et statim acclusam, et vociferantes terribiliter clamabant: « Regales milites! Regales! Regales! » Quidam enim socii eorum, præmissis notioribus suaviter, ne ad strepitum janua clauderetur, infra archiepiscopi januam erant: janitorem archiepiscopi amoverant, suum admovent, ne quis de urbe ad archiepiscopi auxilium ingrederetur; ne quis de rebus archiepiscopi aliquid exportaturus egrediretur. Ante januam clausam, postico tantum aperto erant infra atrium aulae, in equis Willelmus filius Nigelli, ad prandium homo et miles archiepiscopi, modo contra eum, huic addictus est officio, et Simon de Criol, quidam miles abbatis Sancti Augustini vicinus. Reginaldus in ipso proaulo seorsum se armat, et scutellarium archiepiscopi Robertum Tibiam compulsi sibi auxilium præstare et obsequium. Reginaldus ille cuidam fabro lignario gradus quosdam ibi reparanti securim abstulit.

Nos interim domino archiepiscopo in eodem thalamo commorati, recordabamur conferentes eorum dicta et minas, cum archiepiscopi responsis; sentiebamus diversi diversa: alii, non esse timendum; ebrii venerant: impransi talia non dicerent. Nativitas Domini est; pax regis nobis pacta est. Alii aiunt, timendum esse ne minas opere compleant. Multa prævisa erant signa crudelitatis. Interea audimus a parte ecclesie clamorem lacrymabilem utriusque sexus et omnis fere ætatis hominum, compatiuntium nobis tanquam ovibus occisis, qui in urbe eos armatos, et ad archiepiscopum, edicto dato, properantes viderant. Audimus hinc nostros homines per gradus cursim in ecclesiam per medium aulae descendere, fugientes a facie armatorum aperta eis janua atrium introeuntium. [Osbertus et Algar et quidam alii servientes archiepiscopo, viso quod irruerent armati, ostium aulae clausurunt, et repagula aulae firmaverunt. Quod videns Robertus de Broch cepit securi diruere parietem quemdam: et illac ingressus per interiora domus, aula ostium illis parricidis aperuit; et illos, qui ostium aulae obfirmaverant, gravissime cecidit et vulneravit.] Audimus etiam nos clerici introrsum cum archiepiscopo ictus illos Roberti de Broch parietem diruentis. Quid nisi timor et tremor venerunt super nos monachos, clericos et socios archiepiscopi? Ecce completum est, quod superius sanctus Dei dixerat: « In brevi malent esse ubique terrarum, quam in Anglia. Sed bonus ille Thomas contemptor mortis erat: quippe quæ est sanctis viris portus, et ad aternitatem ingressus, et æternum nihil mali sentienti receptaculum. Insuper et securum se sanctus homo gerebat, quasi gaydens, se nactus honestam causam moriendi pro justitia et libertate et causa Ecclesie suæ; et quasi cupiens dissolvi et esse cum Christo. Tanta ei erat libertatis ecclesiasticæ charitas, ut eam non occasu suo, sed resurrectione et salute ipsius metiretur. Tunc monachi, qui plurimi aderant, dicunt

ei : « Domine, intrate in ecclesiam. » Ille : « Absit ! ne timeatis : plerique monachi plus justo timidi sunt et pusillanimes. » Illi non acquiescunt. Alii eum injectis manibus erigunt, et vim ei faciunt. Alii persuadent eundem esse, quia monachi vespas dicerent, et ille horam nonam et vespas esset auditurus. Jubet ergo crucem Domini proferri. Quidam clericus ejus, Henricus Autissiodorensis eam bajulat. In claustrum monachorum cum venissemus, voluerunt monachi ostium post eum occludere. Ille agrefrens sustinuit, et lento passu postremus vadit, omnes agens ante se, quasi oves pastor bonus : equidem timor, quem charitas Dei foras miserat, ejus nec in gestu nec in incessu poterat notari : tam procul aberat ab omni ejus continentia exteriori, quam a mentis arce interiori. Semel quidem super dexteram oculos retorsit : forte, si videret illos regales vestigio ejus imminentes ; forte, ne aliquis relictus pesulum ostii obderet.

Intratum est in ecclesiam ipsam. [Monachi ecclesie pro tali et tanto tumultu, tam pavidi quam attoniti, relictis et non percantatis vespas, Domino archiepiscopo in ecclesiam intrante, a choro exeunt ei obviam : gaudentes et Deo gratiam habentes quod eum vivum cernunt et recipiant, quam jam detruncatum audierant. Et cum alii præ gaudio vel timore fierent, alii hoc, alii illud suaderent, ut Petrus Domino dicens : « Propitius esto tibi, » ille pro Ecclesie Dei libertate et causa non timidus mori, jussit eos abire et a se recedere : utique ne impedirent passionem ejus, quam futuram prædixerat et imminere videbat.] Iturus ad aram superius, ubi missas familiares et horas solebat audire, jam quatuor gradus ascenderat, cum ecce ad ostium claustrum, qui venerat primus, adest Reginaldus Ursonis loriceatus, ense evaginato, et vociferans : « Nunc huc ad me, homines regis. » Nec multo post adduntur ei tres prædicti socii ejus, similiter loriceis connecti corpora et capita, præterquam oculos solos, et ensibus nudatis. Plurimi etiam alii sine loriceis, armati, de sequela et sociis suis ; et aliqui de urbe Cantuariæ, quos coactos secum illi venire compulerant. Die illo et quadriduo post ad vicina castra Dovræ, Hastings et cæterorum, ut prædictum est, erant milites habentes custodias.

Ad portus transmarinos regis erant domestici ; comes Willelmus ad Witsant, Saierus de Quinci alibi, forte si mare attentasset archiepiscopus, ap- pulsus hic vel ibi caperetur. Visis illis, inquam, armatis, voluerunt monachi ostium ecclesie obsistere ; sed bonus homo fiduciam habens in Domino, et non expavescens repentino terrore irruentes potentias impiorum, e gradibus descendit regressus, prohibens ne ostium Ecclesie clauderetur, et dicens : [« Absit ut de ecclesia Dei castellum faciamus] permittite intrare omnes ecclesiam Dei intrare volentes : fiat voluntas Dei. » Archiepiscopo a gradibus descendente versus ostium, ne clauderetur, tunc Joannes Saresberiensis et alii ejus clerici omnes, præter

A Robertum canonicum et Willelmum filium Stephani et Edwardum Grim, qui novus ad eam venerat, præsidia captantes, et se in tuto collocare curantes, relicto ipso, petiverunt alii altaria, alii latibula.

Et quidem si vellet archiepiscopus declinare, et se fugæ præsidio liberare, optime uti posset, non quæsit, sed oblata occasione temporis et loci. Vespas erat. Nox longissima instabat. Crypta erat prope, in qua multa et pleraque tenebrosa diverticula. Item erat ibi aliud ostium prope, quo per cochleam ascenderet ad cameras et testudines ecclesie superioris : forte non inveniretur, vel interim aliquid fieret. Sed nihil horum voluit. Non declinavit, non percussoribus supplicavit, non murmur edidit ; non quærimonia in tota sua agonia fecit ; sed extremam horam, quæ imminabat, pro Christo et causa Ecclesie patienter expectans, fortitudine et constantia mentis, corporis et sermonis, qualem de aliquo martyrum majorem nunquam audivimus usus est, donec totum consummaretur. Ecce jam illi spiculatores furia injecti, præter spem apertum cernentes cursu ostium intrant ecclesie. « Quo, quo scelesti ruitis ?

Quis furor, o miseri ! quæ tanta licentia ferri ! » Unus illorum monachis dixit, qui cum eo astabant : « Ne vos moveatis. » Et quidem quasi confusi et attoniti, a reverentia vultus ejus illi grassatores primo retulerunt pedem, visò archiepiscopo. Postea clamavit aliquis : « Ubi est ille proditor ? » Archiepiscopus suam in patientia animam possidens, ad verbum illud non respondit. Aliquis alius : « Ubi est archiepiscopus ? » Ille : « Ecce ego, non proditor, sed presbyter Dei ; et miror quod in tali habitu ecclesiam Dei ingressi estis. Quid placet vobis ? » Unus grassator : « Ut moriaris : impossibile est ut vivas ulterius. » At ille : « Et ego in nomine Domini mortem suscipio, et animam meam et Ecclesie causam Deo et beatae Mariæ et sanctis hujus ecclesie patronis commendo. Absit, ut propter gladios vestros fugiam ; sed auctoritate Dei interdico, ne quempiam meorum tangatis. » Aliquis eorum bisacutam et gladium simul habuit, ut in securi et bisacuta, si eis obsistaretur, ostium deicerent ecclesie ; sed retento gladio, bisacutam, quæ adhuc ibi est, deposuit.

Quidam eum cum plano ense cædebat inter scapulas, dicens : « Fuge ; mortuus es. » Ille immotus perstitit, et cervicem præbens, se Domino commendabat ; et sanctos archiepiscopos martyres in ore habebat, beatum Dionysium et sanctum Elphegum Cantuariensem. Aliqui dicentes : « Captus es ; venies nobiscum ; » injectis manibus, eum ab ecclesia extrahere volebant, nisi timerent quod populus cum esset erepturus de manibus eorum. Ille respondens : « Nusquam ibo ; hic facietis quod facere vultis, et quod vobis præceptum est. » Quod poterat, renitebatur ; et monachi eum retinebant : cum quibus et magister Edwardus Grim, qui et primum a Willelmo de Traci in caput ejus vibratum gladii ictum brachio objecto excepit : eodemque ictu et archiepiscopus in capite inclinato, et ipse in brachio graviter est

vulneratus. « O, ut ait sanctus Basilius, bestiarum A feritas in Dei virtute mansuescit; humana rabies nec ferarum mitescit exemplo! »

Archiepiscopus a capite defluum cum brachio detergens et videns cruorem, gratias Deo agebat, dicens: « In manus tuas, Domine, commendo spiritum meum. » Datur in caput ejus ictus secundus, quo et ille in faciem concidit, positus primo genibus, conjunctis et extensis ad Deum manibus, secus aram, quæ ibi erat, sancti Benedicti; et curam habuit vel gratiam, ut honeste caderet, pallio suo coopertus usque ad talos, quasi adoraturus et oraturus. [Super dextram cecidit, ad dextram Dei iturus.] Eum procumbentem Ricardus Brito percussit tanta vi, ut et gladius ad caput ejus et ad ecclesiæ pavimentum frangeretur, et ait: « Hoc habeo pro amore domini mei Willelmi, fratris regis. » Hic siquidem Willelmus appetiverat conjugium comitis de Warenna; sed archiepiscopus contradixerat, quoniam hic Willelmus ex matre imperatrice Mathilde, ille comes Warenne Willelmus ex patre rege Stephano, consobrinorum fuerant filii. Unde Willelmus frater regis Henrici inconsolabiliter doluit; et omnes sui archiepiscopo inimici facti sunt.

Quatuor omnino habuit ictus sanctus archiepiscopus, omnes in capite; et corona capitis tota ei amputata est. Tunc videre erat, quomodo artus spiritui famulabantur. Nam sicut nec mente, ita nec membrorum objectu vel dejectu morti visus est depugnare; quia mortem excepit magis ex Dei desiderio voluntariam, quam de gladiis militum violentam. Quidam Hugo de Horsea, cognomento Malus Clericus, sancti martyris procumbentis collum pede comprimens, a concavitate coronæ amputatæ, cum mucrone cruorem et cerebrum extrahebat. O triste spectaculum! O crudelitas inaudita, eorum qui Christiani esse debuerant! Sed peiores sunt, qui sub nomine Christiano opera agunt paganorum, quam qui aperte et ex errore patrum traditionum sunt infideles. O vere felicem et constantem sanctum Dei martyrem Thomam! Occidi potuit, sed flecti non potuit. Et quidem, sicut quondam Christo patiente in proprio corpore, ita et eodem nunc patiente in milite suo Thoma, avertit sol oculos, abscondit radios, obtenebravit diem, ne videret scelus hoc; et horrida tempestas cælum contraxit; subiti ruerunt imbres, intonuit de cælo. Postea rubor aeris magnus emicuit, in effusi sanguinis signum, in flagitii horrorem, in ultionis severitatem superventuræ his, qui ita immane se effecerunt, et hoc piaculari se depraverunt, et qui mortis hujus causa exstiterunt, exosa et exuta omni naturæ humane mansuetudine.

[Tam veloces pedes eorum ad effundendum sanguinem: tam impia corda; tam torvos oculos; tam crudeles dextræ, tam cruentes gladii. Scelus hoc omnes audientes et attendentes illud exempli raritate transmittit, horrore reverberat, singularitate percellit, immanitate frustratur. Occiderunt filii

A patrem in utero matris suæ: equidem floribus Ecclesiæ nec lilia desunt, nec rosæ et in beati Thomæ passione cum sævo extrahitur mucrone et cerebro candens et sanguis rubens. Vera nempe et certissima signa, quod ovium Christi pastor et pro eis animam poneret archiepiscopus et agonista, confessor et martyr, duplicem stolam a Domino percepturus, et de archiepiscopatu fideliter administrato candidam et de martyrio feliciter consummato purpuream.

In vita habuerat columbæ simplicitatem operum innocentia, serpentis astutiam sancta prudentia. Eadem hæc et in morte retinuit. Columba, morti non repugnavit. Occisoribus nihil impediti procuravit: serpens, percussoribus corpus exposuit: non caput sed animam suam vel Ecclesiam conservavit. Etiam per visiones et presagia ejus mors est pluribus revelata. Magister Radolphus Londoniensis ecclesiæ canonicus et sacerdos, vir magnæ honestatis, in divina pagina doctor præcipuus, vidit per somnium, quod ipse intuitum figens in sole, videret in corpore solis episcopum episcopalibus ornatum. Item visum est honestæ cuidam mulieri, quod videret lunam de cælo cadentem, et quorundam gladiatorum gladiis totam detruncari.]

Exsaturati pio cruore, quem impii sitierant parricidæ, exeunt, et quendam Francigenam puerum archidiaconi Senonensis, eo quod plangeret archiepiscopum, gravi inflicto vulnere cruentant. Interea alii deprædationi vacant: totam domum archiepiscopi perambulant: thalamos rimantur, clitelas et scrinia frangunt: vasa aurea et argentea, monetam et aureos, bullas domini papæ, annulos, libros, pallia pretiosa, ex quibus cappæ, tunicæ, dalmaticæ, in ornatum ecclesiæ fieri deberent, tollunt. Clericorum cameras intrant; eorum vestes, libros, argentum, sarcinas, cum omni suppellectili asportant. A stabulis alii equos abducunt, ut nihil omnino de rebus archiepiscopi vel clericorum sen familiæ ipsius relinqueretur, quod in manibus raptorum incidisset. Estimo pluris erant ablata et rapta ibi quam duo millia marcarum. Quæ omnia, ut crucifixo Jesu Christi vestimenta ipsius, ita hæc inter se partiti sunt illi scelerati. Sed privilegia et bullas domini papæ inventas transmarino regi miserunt, in hoc regis gratiani captantes: in cæteris ejus perfidi, ejus infideles, ejus perjuri. Nam, si non ecclesiæ, saltem regis debuerant esse omnia quæ fuerant archiepiscopi discedentis intestati. O mors inaudita! O facinus execrabile! Occisores isti omnibus aliis sanctorum martyrum interfectoribus detestabiliores. Nam et Domini nostri Jesu Christi crucifixo simplicitate hominem putantes et dicentes solventem Sabbata, paternas eorum traditiones evacuantem, Filium Dei se facientem, cum esset Mariæ et putaretur ab iis fabri filius, legis Mosaicæ zelum habentes, suspenderunt eum in ligno, non intelligentes quem ita tractarent. « Si enim cognovissent, nunquam Filium Dei crucifixissent. » Unde et ipse Dominus

orat pro iis dicens : « Pater, ignosce illis, quia nesciunt quid faciunt. » Aliorum etiam sanctorum apostolorum martyrum occisores contra suam non hoc agebant conscientiam, infideles, idololatæ et pagani, fideles Christi in iter agebant exterminii, putantes se in hoc Deo gratificari, ut prædixerat discipulis suis dicens : « Venit hora ut omnis qui interficit vos, arbitretur obsequium se præstare Deo. » Sed grassatores isti beato Thomæ conchritiani erant, et ejus filii et ejus homines. Conchritiani, inquam, sacramentis, sed non re sacramentorum. Ejus filii sed filii perditionis. Ejus homines, sed omnem exuti humanitatem. Ad hæc etiam apud paganos et Judæos magna erat sacrorum et locorum et temporum reverentia.

..... veto quisquam fasit oletum.

..... pueri sacer est locus : extra

Mejite,

in pagano scriptum est, cum triste bidental reverendum est et venerabile.

Dies quoque festos feriabatur paganus, et natalem suum meliore numerabat lapillo. Judæus similiter Sabbata sua et festivitates alias : et intra urbem sanguinem humanum fundi non sineret : unde et extra portam passus est Dominus. Isti autem gladiatores sanctum archiepiscopum gladiis transverberaverunt tempore sanctissimo, quinto natalis Domini die, loco sanctissimo totius Angliæ, in prima sede metropolitana ecclesiæ S. Trinitatis, quæ et plurimorum sanctorum ibi quiescentium extollitur patrocinio, et religiosorum monachorum ibi Deo servientium incolitur habitatu. Occisus est a talibus, tali tempore, tali loco, talis persona, Pater spiritualis totius regni, ipsius Cantuariensis Ecclesiæ archiepiscopus, totius Angliæ primas, apostolicæ sedis legatus, servus Christi Jesu, sanctorum Patrum imitator, et sequipeda, vir religiosus,

Virtutis veræ custos rigidusque satelles,
curans melior esse quam videri, sancti Spiritus habitaculum, virtutum sanctarum domicilium.

Passus est hac causa pro justitia quidem et veritate et Ecclesiæ libertate. Nam leges defendens ecclesiasticas et regis evacuans contrarias, ad tempus regis sui terreni iræ locum dans et Ecclesiæ suæ causam Deo commendans, in exilio longo proscriptione sæva sui et suorum, calicem multarum hausit passionum : aspera multa pertulit adversus rerum innumerabilium undas. Nullum genus supplicii vel adversitatis deprecatus est. Ad ultimum anno septimo revocatus, pacta sibi pace sed male servata, quasi incarcerationis est jussus a sede sua non exire, ubi post paucos dies requisitus militibus se obtulit, et, ut dictum est, gladiis cæsus calicem bibit martyrii sui, non auditus in jure, non judicatus, quia in judicando eo nulla causa mortis inveniretur, quod probe noverunt qui hoc ei procuraverunt] ejus æmuli mali filii ipsius, fratres Herodiadis crudelissimæ, quæ similiter quondam beatum Baptismam Joannem pro veritate primo

A fecit incarcerationi ; et post, non auditum, non judicatum procuravit decollari. O feliciter factum, reum, quem sic videmus absolutum.

[Diu quidem ibi jacuit fere solus et derelictus a clericis et monachis et cæteris cunctis, nec etiam adhuc ablato lumine ad sanctas ejus exsequias Osbertus cubicularius ejus cum quodam cultello de propria sua scidit camisia, unde semiputatis capitis ejus reliquum contegeret.]

Cum cognitum esset recessisse occisores, adsunt circa sanctum archiepiscopum sui clerici et monachi, servientes et de urbe infiniti. Solvitur silentium, et latius erumpunt omnes in gemitus et lamenta, quæ prius, incumbente sicariorum timore, continuerant. In noctem plurimam fletus et ejulatum producunt.

B Placuit tandem feretro superpositum corpus domini archiepiscopi per medium chorum ante altare inferre, cranii vacuitate cooperta cum lineo mundo, pileolo desuper astringente. Ille etiam adhuc animi dulcedinem et constantiam in vultu præferebat. Item ibi fletur plurimum. Frater Robertus sacerdos et canonicus religionis domus de Meritona, vir honestus, qui et ei a primo die ordinationis suæ capellanus et comes inseparabilis adhæserat, post commendationem veræ religionis et honestatis domini archiepiscopi, cujus ipse erat conscius, ut confessionis ejus auditor, inter cætera ostendit monachis, quod prius omnes ignoraveramus, quod in cilicio esset archiepiscopus, iniecitque manum in sinum ejus, ostendens proximam carni ejus cilicium, et supra cilicium, habitum monachalem. Quoniam enim monachorum Ecclesiæ illius Cantuariensis erat abbas, cum clericus esset electus, et ipse sub absconso chlamidis canonicalis, Christi et beati Benedicti monachum gerebat absconditum. Tunc vero monachi gaudio spiritali admodum hilarati, extollunt in cælum mentes manusque magnificantes Deum : convertunt luctum in gaudium spirituale, lamenta in voces lætitiæ ; et de utroque martyrio ejus, et viventis voluntario et occumbentis violento, ad oculum edocti, ad terram precipitantes, pedes ejus et manus osculantur ; eum sanctum Thomam invocant, omnes eum sanctum Dei martyrem gloriosum protestantur. Omnes accurrunt, visuri illum in cilicio, quem cancellarium viderant in purpura et bysso.

Post modicum quidam monachus Ecclesiæ Arnaldus aurifaber, et aliqui cum eo, ad locum martyrii ejus redeunt : sanguinem ejus et cerebrum per aream ecclesiæ effusum, mundissime in pelvim recolligunt ; et ne conculcaretur locus ille pedibus transeuntium, scamna portabilia transponunt. Vigilia noctis illius pia, sancta et sobria fuit. Tantum commendationem animæ in silentio dicunt monachi.

Crastino mane rumor perstreptit in ecclesia, quod paravissent familia illa de Broch cum suis complicibus eum ab ecclesia extrahere, dolentes quod ipsum in ecclesia trucidassent ; quod timentes monachi, ocius accelerant sanctum corpus illud

sepelire et sepulcro inferre. Adfuit illi obsequio A abbas de Boxlea et prior de Doura, vocati prius ab archiepiscopo, quia eorum consilio priorem, qui in Cantuariensi non erat ecclesia, unum de monachis voluit facere. Deceverunt ipsum non esse lavandum aliter quam lous erat in sanguine suo; et amotis distributisque ejus quotidianis vestibus superioribus, sepultus est in ipso, in quo inventus est cilicio, et familiaribus interius cilicinis, exterius lineis, et in eisdem caligis, et in ipso quo erat habitu monachali: et supra hæc, in ipso eodem in quo ordinatus fuit vestimento, alba quæ Græce poderis dicitur, superhumerali simplici, chismaticæ, mitra, stola, mapula; quæ omnia reservari præceperat, forte in diem sepulture suæ: supra quæ habuit archiepiscopaliter tunicam, calmaticam, casulam, pallium cum spinulis, calicem, chirothecas, annulum, sandalia, pastorem baculum; quo consuetum est more, quo dignum est honore.

Rex filius, audita morte sancti Thomæ, vehementissime contristatus et corde percussus, tetendit manus in cælum et oculos cordis et corporis ad Deum: dicens: « Proh dolor, sed, Deus, tibi gratias ago, quod clam me factum est hoc, et quod nullus meorum ibi fuit. » Nam illi quatuor infelices grassatores pegerant rem antequam supradictus Hugo de Gundevilla et Willelmus filius Joannis venissent Cantuariam. Peractis compositisque omnibus ad sepulturam pertinentibus, sine missa, quia ecclesia in ingressu armatorum violata erat, in marmoreo sarcophago novo, in crypta ante duo altaria, sacrum corpus archiepiscopi multo ploratu conclamati reconditur.

Statim autem post tumulationis obsequium, in ipsa nocte et in ipsa hebdomada, divinæ virtutis adfuit operatio, et tanti martyrii condigna declaratio: [Siquidem unus civium Cantuariensium, qui martyrio ejus inter cæteros spectator adfuit, sanguinis ipsius aliquid emisisse suæ intinxit. Habebat enim domi suam uxorem jam pridem paralyticam. Quæ cum a viro suo domum reverso de passione et constantia sancti martyris ex ordine didicisset, quod quidem in tumultu et silentio lacrymis et narrantium voce incondita audierat, cumque sanguinem sanctum in viri veste oculis aspiceret: fide ad Dominum devota, spe ad salutem erecta, voto ad martyrem supplica, petivit lavari et recipi in aqua sanguinem, ut hauriret salutem. Ita factum est, et illa illico curata est. Hoc fecit Deus primum signorum pro martyre suo statim in ipsa nocte. Hinc credo, Deo inspirante tractum fuisse, ut in aqua aliquid sanguinis sancti Thomæ contingeretur; et illud sanguinis et aqua mistum peregrinis S. Thomæ distribueretur in ampullis stanneis reportandum ad infirmorum suorum salutem. Vidi ego in phialis plurimis inscriptum monostichon:

Fertur in ampullis aqua Thomæ sanguine mista:
Et quidem operante Deo ad fidelium votum, et suffragante sancto martyre et promerente fide, cui nihil

est impossibile, illud aqua mistum non solum infirmis infinitis profuit ad curationem, sed et aliquibus morientibus, ne morerentur: plus credit, sed sanum credi, aliquibus profuit mortuis ut resurgerent redivivi. A passione ejus nocte quarta, ex qua Sabbatum illuxit, revelatum est cuidam clerico Londoniensi, quod quidam sacerdos Londoniensis Willelmus de Capella, qui obmutnerat, iret ad sepulcrum sancti Thomæ et ibi curaretur. Et factum est ita. Cuidam viro religioso in nocturna revelatione ostensus fuit Jesus Christus crucifixus in ea parte cryptæ ubi beate Thomæ repositus erat mundanus homo. Vere quidem; quia ipse in singulis martyribus suis patitur, qui beato Petro Romanam ad martyrium eunti occurrit, et querenti Domino: « Quo vadis? » respondet: « Venio Romanam iterum crucifigi. » Erat aliqua mulier, anachorita, laica, quæ litteras non didicerat; nihil eloquii Latini noverat, præter aliquos psalmos et orationem Dominicam et Symbolum. Hæc in illa novitate illius martyrii diebus et noctibus condoles, anxia, et aliquando in extasi posita, una dierum misit monachis Cantuariensibus scripta verba hæc dicta sibi a venustissima Domina quadam, quæ sibi in visu noctis apparuit: « Noli flere pro archiepiscopo: caput ejus in gremio Filii mei requiescit. » Initia miraculorum hæc, ut Thomam martyrem sanctum Deus revelaret: siquidem sanctus ille, cujus vita virtutibus, mors miraculis declaratur.

Sed de miraculis ejus in Anglia sacerdotum et bonorum virorum testimonio declaratis, et in capitulo Cantuariensis Ecclesiæ publice recitatis magnus codex conscriptus exstat, præter alia quæ longe lateque in Gallia, in Hibernia, et ubique terrarum operatus est sanctus Thomas, quibus memorie commendandis deficit qui scriberet.]

Sed imminentibus in die illis de Broch, et ad parietes hospitiorum Cantuarie de nocte stantibus, ut loquentem bona de archiepiscopo sublimem raperent, et ad tribunal judicii sui pertraherent; primo magnalia Dei non nisi in silentio loqui audebant fideles, donec a Deo in virtute Spiritus sancti, percipiebant ibi gratia sanitatum et concursus populorum ut charitas foras mitteret timorem: dicentibus insidiatoribus, qui prius ac pontes et transitus viarum conscribebant eum vivum vel martyrio consummatum visitantes: « Nihil est quod agimus: Non est consilium contra Dominum. Ecce tota Anglia ad illum abit. » Ibi siquidem Deus, ad nominis suis gloriam, ad Ecclesiæ suæ consolationem, ad fidei nostræ corroboracionem, sanguinem innocentem, qui effusus est, de pavimento ecclesiæ ad eum clamasse ostendit, ita miraculorum gratia martyrem suum glorificans et causam ejus justificans. Cæci visum receperunt, contractis membrorum lineamenta extensa et directa sunt, surdis auditus redditur, paralytica membra glutinantur, demoniaci liberantur, evadunt incarcerationi. Plurimæ aliæ infirmitates, cancri, hydropsis, fistulæ, tumorum

epitassæ strangalidesve curantur. Leprosi septem infra primum annum ibi sunt mundati. Sed et mortui plures per Angliam sunt resuscitati, infusa in eorum ora aqua beati Thomæ sanguine mista, quam in phialis stanneis ad peregrinationis suæ signum et infirmorum suorum remedium, fideles Christi ad pectora sua dependentem inde reportant, et in ecclesiis suis pro reliquiis sanctis suspendunt, nutu quodam divino, ut ubique gentium beati Thomæ martyris gloria inferatur, et in omni Ecclesia pro libertate Ecclesiæ sanguis ejus ad Deum clamare videatur. Et justo quidem Dei contigit judicio, ut ubi superabundavit iniquitas, supra quam de aliquo passo apostolo vel martyre auditum sit, ibi supra cujuslibet sancti gloriam miraculorum superabundet gratia, Domino operante, et fide Christiana, cui omnia possibilia sunt, suffragante. [Quæ quidem omnia digna et pia sunt credi de sancto Domini: ipsa confirmat auctoritas Jesu Christi dicentis de sancto suo: «Opera quæ ego facio ipse faciet, et majora horum faciet.»] Sed et in strata, ubi steterunt pedes ejus, dum parvulos ablatis consignaret, non deest fidelibus Christi gratia virtutum operatrix, ubi fidelium vicinorum devotio capellas exstruit,

Jurandasque suum per nomen construit aras.

In maris periculo summo constituti, eo patrocinante liberati, ad ipsius sepulcrum gratias agere redierunt, et miraculi tanti et ereptionis suæ signum reliquerunt.

Multis (27) illa anima sancti Thomæ martyris ita affectuose, ita gratiose, in omnium piarum animarum, in omnium hominum bonæ voluntatis inhæsit desideriis et dilectioni, ut a pueris, qui colludentes in viis ejus narrant passionem, cantant gloriam, perficiunt laudem, usque ad senes decrepitos, gaudentes se ad hæc Dei magnalia videnda durasse superstitibus; omnis ætas, omnis ordo eum veneretur, ejus requirat patrocinatum, ejus habeat amorem in corde, nomen in ore; ejus habeat memoriam in gloria, gloriam in memoria.

Excitavit in Dei devotionem, quæ in Anglorum mentibus jampridem tepuerat, et in pia desideria vitæ melliorandæ, peregrinationis sanctæ, et elemosynæ faciendæ, omnem Angliæ habitorem, et comites et barones, et vicina undique regna, pere-

grinis ejus, priusquam ad sepulcrum ipsius accedant, peccata confitentibus et se discalceantibus, ut de tanto utriusque sexus concursu, et tam pia visitationis ejus instantia, inter magnalia Dei hoc unum sit de maximis.

Vir sanctitate et gratia plenus, martyr Dei, terra marique celeberrimus, promptus in opportunitatibus adjutor, ut credere pium est, eo ampliore a Deo honoratur signorum frequentia, quo amplior in ipsius detruncatione sævit malitia. Dum pro libertate et causa Ecclesiæ, ipse Christi minister a Christianis, sed nomine tantum, archiepiscopus a filiis, dominus ab hominibus suis, in pace sibi pacta, in Ecclesia Dei sancta metropolitana sua, et in sancta Domini nostri Jesu Christi nativitate, crudeliter est in corona capitis transverberatus.

[Sanctorum innocentium S. Thomas martyr mente innocens et vita innocuus comes est et socius, et ipse sub altare Dei occisus, unus quidem fratrum illorum de quorum implendo numero innocentes acceperunt responsum sustinendi modicum tempus. Unde et congrue ad sanctorum Innocentium translatus gloriam illorum memoriæ suam continuat memoriam. Sed et de Domino Jesu Christo et beato Thoma apostolo et de hoc beato Thoma martyre aliquis clericus non improbabiliiter intellexit et dixit beatus Thomas apostolus passus in India fide illuminavit orientem. Hic beatus Thomas martyr passus in Anglia totum illuminavit occidentem. Jesus Christus passus est Hierosolymis, et extremitatem mundi lux communis, lux vera, illuminans omnem hominem venientem in hunc mundum, quasi medio termino conjuncturus extrema: et quæ est locorum eadem est contemplatio festivitatum eorum; Nativitatem Domini mediam, quinto die festivitatem apostoli præcedente, martyris consequente.

De tempore passionis sancti Thomæ martyris quidam hoc distichon edidit:

*Annus millenus centenus septuagenus
Et primus, primas quo cadii ense Thomas]*

Ipse pro pace, libertate et unitate Ecclesiæ, et pro omnium fidelium salute vivorum, requie defunctorum, intercedat apud Deum, qui in martyribus suis victoriosus et omnibus sanctis suis exstat gloriosus per infinita sæcula sæculorum. Amen.

(27) *Dulcis* cod. Douce. Ubi Douce in margine adnotavit multis legi in col. Cotton. Jul. A. xi Mus. Britan.

SANCTI THOMÆ

CANTUARIENSIS ARCHIEPISCOPI ET MARTYRIS,

VITA QUARTA ET QUINTA

AUCTORIBUS JOANNE DECANO SALISBURIENSI ET ALANO ABBATE
TEWKESBURIENSI (28).

PROLOGUS ALANI.

Honor et gloria beati martyris Thomæ per se satis A
elucescit ubique terrarum, cujus splendor orbem
illuminans quatuor mundi climata in ipsius excitat
devotionem. Ad ipsius memoriam undique concurrir.
Sexus, ætas, conditio omnis se devovet ad ejus
obsequium. Fama pervolans, in idipsum attrahit
barbaras etiam nationes, quibus sitibunde quæren-
tibus viri vitam et conversationem, martyrii insuper
causam et occasionem, satisfacere possunt quæ
scripsit super hoc vir vitæ venerabilis et eximie
virtutis, ipsius martyris clericus et exsiliî comes,
tribulationis quoque per omnia particeps, postea
vero Carnotensis episcopus, Joannes Salisburien-
sis, qui Christi athletam et ipsius agonem bre-
viter et succincte depinxit. Verum quia id operis
rem ipsam pertingens, rei formam non explicat
per omnem modum, placuit et oportuit illi scri-
pto epistolas succedere, in quibus continetur series
et ordo universorum, ut qui desiderat et ad id suf-
ficit, totum habeat, si quis vitam viri, modum ex-
siliî, causæ processum, vel ipsius rei requirit exitum.
Epistolæ vero vario et disperso per schedulas col-
lectæ corpus rediguntur in unum, sicut pro modo
suo fieri potuit, singulæ locum suum retinentes et
ordinem. Si tamen generales, quæ minus ipsum ex-
primunt negotium, quædam videantur aliter positæ,
quoad rei seriem non multum attinet. Sane si quis
exquisitas et discussas plenius ipsas epistolas dili-
gentiori manu poterit reformare in melius, non erit

qui invidet. Distinctæ sunt vero per partes secun-
dum processum negotii. Quarum prima pars con-
tinet ab initio exsiliî usque ad adventum Wil-
helmi et Ottonis cardinalium. Quid, quando, ubi,
vel per quos actum fuerit, per ipsas epistolas ple-
nius innotescet. Secunda pars ab illis cardinalibus
usque ad Gratianum et Vivianum. A quibus tertia
pars usque ad Simonem priorem de Valle-Dei et
Bernardum de Corilo. Ab illis etiam quarta pars
usque ad Rotrocum Rotomagensem archiepiscopum
et Bernardum Nivernensem episcopum: denum
etiam Willelmum Senonensem, nunc Remensem
archiepiscopum. Quinta continet concordiam et
passionem ipsius martyris et canonizationem et
Ecclesiæ Christi reconciliationem.

B In quibus sedulus lector et devotus viri Dei ima-
ginem inveniet plenius depictam. Insuper operum
ejus vestigia si libet perscrutari, ibi inveniet digito
Dei fabricatam armorum copiam. Ibi poterunt sa-
cerdotalis dignitas et auctoritas episcopalis in suæ
militiæ speculo sese recognoscere, ut obsequium
reddant Cæsari debitum, et Deo honorem. Nec opus
erit amplius longius evagari, ut quærat quis, quo-
modo Ecclesiæ libertas debeat defensari. Per epis-
tolas ipsius martyris iter recenseat, et statim oc-
curret quid qualiter fuerit agendum. Joannis itaque
opus primo perlegatur, per quod iter aperiatur ad
cætera quæ sequuntur.

(28) De opere Alani, quod nunc primum integrum
exstat, non dubitabit lector qui recte illud una
cum brevi tractatu Joannis Sal. interserto conjun-
xerim. Præterea mihi opus relegenti non dubium
manet Alanum fuisse, non Joannem Saresburiensem,
qui primus epistolas sancti Thomæ in unum corpus
coegit. Alani libellus separatim exstat in codice qui
apud l'Hôtel Soubise Parisiis conservatur, sed re-
centioris ævi et cum additamentis nonnullis. In
quadrilogo Lupi duo tantum fragmenta sunt, quæ
in opere Alani nondum comparant. Utrum ea recte

C Alanum habeant auctorem, incertum valde est.
Quorum secundum quidem inter epistolas a Lupo
editas locum epistolæ 87 in libro quinto sibi usurpat,
et unam varietatem habet quam hic dabo col. 000,
epistola 87, l. 10, habet *Dominicam*, proximam vide-
licet ante ascensionem Domini.

Præter Vitam S. Thomæ, exstant Alani duo ser-
mones, nullius pretii, in codice Bodleiano servati:
etiam in cod. Cantab. epistolæ quædam, ut puto,
omnes ad sanctum Thomam spectantes. Quas mihi
curæ erit transcribere et in lucem proferre.

PROLOGUS JOANNIS SALISBURIENSIS.

Sacrosanctam Ecclesiam jugiter impugnat hostis antiquus, sed qui ipsam cruore proprio redemit Dei Filius, eam sanguine membrorum suorum in veram asserit et provehit libertatem; in quibus præminent gloriosus apostolorum chorus, et sanctorum martyrum purpuratus exercitus, quorum doctrina compacti, quorum exemplo roborati, quorum sanguine velut cemento et quasi glutino quodam consolidati sunt vivi lapides in edificio corporis Christi, ut proficiens Ecclesia dilatetur et crescat numero fidelium, et virtute in templum sanctum in Domino. Sed cum omnes martyres prærogativam habeant gloriæ sempiternæ, titulus tamen illorum illustrior est cæteris, et corona clarius radiat, qui duplici honore digni doctorum funguntur officio, forma gregis ex animo facti, et tempore necessitatis ponentes animam pro ovibus suis. Sicut enim stella a stella differt in claritate, sic in resurrectione

A sanctorum singuli in ordine suo justi fulgebunt ut sidera: et qui ad vitam erudiant multos, erunt ut firmamenti splendor in perpetuas æternitates. Quibus jure et merito sanctus Cantuariorum archiepiscopus Thomas associandus est, ut qui exstitit pro Christo socius tribulationis et patientiæ, sit eis in ipso cohæres consolationis et gloriæ. Cujus ut merita clarius elucescant, summam conversationis ejus succinctus et admodum brevis sermo percurrat. Nam gestorum ejus seriem nosse, si cui forte in voto est, a magnis, quæ ab illo et de illo scripta sunt, voluminibus erit mutuanda. Ut constet ad commendationem gratiæ Dei, quæ « ubi vult spirat, » quam brevi intervallo variarum occupationum expleverit tempora multa, indicant hoc epistolæ ejus, et scripta aliorum, plena et digna relatu, quæ tam præsentibus quam posteris, si diligenter inspiciantur, ad virtutem poterunt animare.

INCIPIT VITA SANCTI THOMÆ, AUCTORE JOANNE SALISBURIENSI.

Prædictus igitur beatissimus Thomas Londoniensis urbis indigena, parentum mediocrium proles illustris, a primis adolescentiæ annis gratia multiplici ditatus est. Erat enim statura procerus, decorus forma, ingenio perspicax, dulcis et jucundus eloquio, et venustate morum pro ætate amabilis, tantoque rationis vigeat acumine ut prudenter inauditas et difficiles solveret quæstiones, adeoque felici gaudebat memoria ut quæ semel in sententiis aut verbis didicerat, fere quoties volebat, posset sine difficultate proferre. Quod multi litteratiores assequi non valentes, tantam mentis alacritatem, præsertim in homine variis occupationibus dedito, miraculis ascribebant. Sic enim nutrix gratia futurum prosequeretur antisitem, ut ei in collationibus aut cursu sermonis, ut dici solet, ad manum necessaria ministraret.

Ab ineunte autem ætate, sicut referre solitus est, didicit a matre timorem Domini, et beatam Dei genitricem Mariam, tanquam duce viarum suarum, et vitæ patronam, dulcius invocare, et in illam post

C Christum totam jactare fiduciam. Publice mendicantibus pleno compatiiebatur affectu et subveniebat effectum, ut cum beato Job dicere posset: « Ab initio coaluit mihi miseria, et pietas de utero matris meæ egressa est mecum. »

Liberalium, vero disciplinarum scholas egrediens ad curarum se transtulit occupationes, et in seriis earum et nugis, prout ferebat spiritus, cito prævaluit: et sic commilitones et cœtaneos suos facile antecessit. Licet autem studiis, prout ætatis urgebant stimuli, juvenilibus ageretur, vigeant tamen in eo fidei zelus et magnificentia animi. Erat tamen supra modum captator auræ popularis et quod de beato Britio Turonensi legitur, de ipso non dubitaverim affirmandum, quod, etsi superbus esset et vanus et interdum faciem prætenderet insipienter amantium et verba proferret, admirandus tamen et imitandus erat in corporis castitate.

Cum vero in curiis procerum plurima contra honestatem cleri geri conspiceret, et convictum eorum proposito, cui addictus erat, perniciosius ad-

versari, instinctu potius gratiæ et ducatu quam consilio amicorum aut interventu, se ad patrem piæ recordationis Theobaldum Cantuariensem archiepiscopum contulit, et promerente industria in brevi inventus est dignus ut familiarissimus ejus inter paucissimos ascriberetur. Quot autem et quantos ibi pro Ecclesia Dei labores pertulerit, quotiesque pro expediendis necessitatibus ecclesiasticis apostolorum limina visitaverit, quam felici exitu, quæ sibi injuncta fuérant, expedierit, nequaquam dictu facile est, præsertim compendiarie non singula exprimitur, sed colligenti summam rerum et causam martyrii ejus exponere gestienti.

Ut vero in causis perorandis et decidendis et populis instruendis a Deo prædestinato facilitas pararetur antistiti, juri civili operam dedit, et quo per experientiam rerum facilis dispensationis ecclesiasticæ usum consequeretur, a præfato archiepiscopo sanctæ Cantuariensis Ecclesiæ, a cujus uberibus coaluerat, archidiaconus institutus est [ut sic, Deo ordinante, tempore suo, gradu suo, locoque suo, archidiaconus in archiepiscopum promoveretur].

Post modici temporis intervallum, cum dux Normanniæ et Aquitaniæ Henricus Gaufridi comitis Andegavensis et Mathildis imperatricis filius, regi Stephano in regnum Angliæ successisset, elaboratum est ab antedicto archiepiscopo, ut archidiaconus suus regni cancellarius efficeretur. Erat enim ei suspecta adolescentia regis, et juvenem et pravorum hominum, quorum consiliis agi videbatur, insipientiam et malitiam formidabat; et ne instinctu eorum insolentius ageret jure victoris, qui sibi videbatur, etsi aliter esset, populum subegisse, cancellarium procurabat in curia ordinari, cujus ope et opera novi regis, ne sæviret in Ecclesiam, impetum cohiberet, et consilii sui temperaret malitiam, et reprimeret audaciam officialium, qui sub obtentu publicæ potestatis et prætextu juris, tam Ecclesiæ quam provincialium facultates diripere conspiraverant.

In primis autem cancellariæ suæ auspiciis tot et tantas variarum necessitatum difficultates sustinuit, tot laboribus attritus est et tot afflictionibus fuit oppressus, tot insidiis appetitus, tot laqueis in aula expositus a malitia inhabitantium in ea, ut eum, sicut archiepiscopo suo et amicis sub lacrymarum testimonio referre solitus erat, sæpe in dies singulos tæderet eum vitæ suæ, et post vitæ æternæ desiderium super omnia optaret, ut absque nota infamiæ posset a curiæ nexibus explicari. Licet enim ei mundus in omnibus lenociniis suis adulari et applaudere videretur, nec conditionis nec oneris sui immemor erat, qui quotidie hinc pro domini sui regis salute et honore, inde pro necessitate Ecclesiæ et provincialium tam contra regem ipsum quam contra inimicos ejus contendere cogeatur et variis artibus varios eludere dolos. Sed hoc præcipue perurgebat quod indesinenter oportebat eum pugnare ad bestias curiæ et velut cum Proteo, ut dici solet, negotium gerere, et quasi in palæstra exercitari. Nam fere ad omnem

auram, nisi eum gratia et industria conservarent, ruina et præcipitum imminebant.

Fungens autem cancellarii officio in palatio regis, tantam in oculis ipsius invenit gratiam, ut eum post decessum præfati Cantuariensis archiepiscopi primæ Britanniarum sedi præfici procuraret, quo totam facilius Ecclesiam regeret Anglicanam.

In multis enim expertus magnanimitatem ipsius et fidem, tanto quoque fastigio bene sufficientem credidit, et ad suas utilitates facile inclinandum, et ad nutum ipsius in negotiis ecclesiasticis et sæcularibus universa gesturum; si vero dies suos mors immatura præcideret, hæredibus suis tutorem fidelissimum providebat. Vir enim experientissimus, et bene solitus plus quam facile dici posset futura metiri, tantæ curæ periculum satis acute ponderavit, utpote qui longo usu didicerat, quid sedes illa haberet oneris, quid honoris. Noverat etiam moras regis et officialium ejus improbitatem et pertinaciam, et in curia illa quam efficax esset delatorum malitia. Ex quibus veracissime colligebat quod, si oblatum subiret officium, Dei gratiam amissurus esset aut regis. Non enim Deo adhærere poterat regis moribus obsequens, aut regem non habere inimicum, ei sanctorum præferens leges.

Itaque aliquandiu regi et alijs eum promovere volentibus reluctatus est, sed electio divina tantum prævaluit, ut suadente et inducente et instanter urgente venerabili viro Henrico Pisano, presbytero cardinali, et sedis apostolicæ legato, desiderio regis acquiesceret et consiliis amicorum. Maluit enim periclitari apud regem quam desolationem Ecclesiæ, quæ multis subiacebat periculis, ulterius prorogari: firmiter in animo suo statuens, aut eam de tantæ servitutis miseria liberare, aut ad imitationem Christi animam ponere pro ovibus suis. Potestas enim publica, Ecclesiæ privilegium adferens, causas indifferenter ecclesiasticas, sicut mundanas, ad suum revocabat examen: et conculcabatur ut populus, sic et sacerdos.

Ergo quem Deus sibi præfegerat antistitem futurum et martyrem, licet quidam æmulorum in primis promotionem ejus, contra divinæ dispositionis consilium, impedire conati sint, unanimiter ab omnibus electus est.

Consecratus autem statim veterem exiit hominem, cilicium et monachum induit, « carnem crucifigens cum vitiis et concupiscentiis suis. » Recolens etiam quam susceperat doctoris et pastoris officium; prædicationis munus implebat; quidquid temporis subtrahere poterat urgentioribus negotiis, orationi et lectioni fere semper impendens. Solitarius agens usque in miraculum lacrymis suffundebatur, et sic in altaris versabatur officio, ac si præsentia in carne geri cerneret Dominicam passionem. Reverentissime divina sacramenta tractabat, ut intuitum fidem et mores ipsa contractatio informaret. Manus suas excutiebat ab omni munere, et a domo sua sordes avaritiæ prorsus eliminabat.

Erat quoque providus in consiliis, et in ventilatione A
causarum diligens et modestus auditor, in interro-
gationibus subtilis: in responsionibus promptus,
justus in judiciis, et personarum prorsus acceptione
deducta, juris per omnia rectissimus executor. Sub
honestate vestium Christi militem, ne merita vana
gloria minueret, studiosius occultabat, ut juxta sa-
pientis edictum frons ejus conveniret populo: cum
intus essent fere omnia dissimilia. Nec in palatium
ad mensam ingrediebatur, nisi pauperibus præin-
ductis, et ad hoc ditius et refertius nobilitari men-
sam voluit, ut ex reliquiis plenius et gratius conso-
laretur egenos. Ostiatim mendicantium nullus ab
ejus januis vacuus rediit. Lares agrorum et debili-
um per suos diligentius scrutabatur, et beneficiis visi-
tabat, quamplurimos eorum quotidiano victu vesti-
tisque sustentans. Cum enim pie memorie Theo-
baldus prædecessor ipsius statutas prædecessorum
storum elemosynas duplicare consueverit, hic
religiosa emulatione etiam duplum ejus censuit dupli-
candum. Ad cujus pii operis observantiam, omnium
quæ ex quocunque titulo percipiebat, decimas con-
secravit. In secretiori cellula tredecim pauperum
pedes curvatis genibus quotidie abluebat, in me-
moriâ Christi singulis eorum post plenam refe-
ctionem victualium quatuor argenteos largiens.
Quod si forte aliquando, raro tamen, in propria per-
sona gerere prohibebatur, hoc diligentissime per
vicarium faciebat impleri. Religiosos viros tanta
reverentia excipiebat, ut credi posset se in eis di-
vinam præsentiam aut angelos venerari. In exer-
cenda hospitalitate et aliis liberalitatis operibus sic
pollebat, ut quidquid erat in facultatibus ejus, com-
mune patrimonium omnium honorum credi posset.
Et quamvis domus ejus pro more gentis utensilibus
pretiosis et gerendorum variis instrumentis nobili-
taretur, divitias tamen et opes et omnem mundi
supellectilem pro Christo contemnebat, ut stercore;
transitoriis potius utens ad expediendas necessitates,
quam fruens ad explendas concupiscentiæ voluptates.
In cibis et potibus temperantiam medium tenuit, ne
prorsus abstinens argueretur superstitionis, aut im-
modice sumens crapula gravaretur. Notam enim
criminosi et hypocritæ fere pariter vitans, id opti-
mum jejunii genus arbitratus est, sobrietatis tenere
mensuram. Et quidem in veste pretiosa spiritu
pauper, in facie læta corde contritus, in mensa laeta
penuriam eligens, nonnunquam ventre magis vacuus
quam refectus, sæpius magis refocillatus quam ple-
nus, semper enim sobrius permanens, se cohabi-
tantibus conformabat, apostolum sequens qui salu-
berrima dispensatione omnibus omnia factus est, ut
lucrifaceret universos. Liberabat pauperem a po-
tente, ut qui revera erat datus a Domino pauperum
pater et mœrentium consolator. Arguebat libere
quarumcunque vitia potestatum, sciens quod ubi spi-
ritus Domini, ibi consequenter est etiam libertas.
Pensabat tamen vir discretus mores hominum quos
arguebat aut monebat, ne sanctum daret canibus

aut margaritas spargeret ante porcos. Et quia cum
cælestis docebat unctio, sive litteratis sive illittera-
tis colloquebatur: mirum in modum eruditus et
eloquens apparebat, et prædicatio ejus tam pondere,
sententiarum quam puritate verborum placens erat
et efficax. Post epulas autem et somnum ubi neces-
sitas poscebat exactum, denuo præter pensum
horarum, aut negotiis, aut scripturis, aut honestis
colloquiis insistebat, otium summopere fugiens, ne
viderent eum hostes, et deriderent Sabbata ejus.
Quod autem nocturno somno sine grandi dispendio
corporis deducere poterat, lacrymis et orationibus
indulgebat, et meditationibus sanctis, castimoniam
sectans in corpore, servans in corde pudicitiam, mo-
destiam in sermone, in opere justitiam ut quos erat
B eruditurus verbo, sanctitatis suæ potentius move-
ret exemplo. Hæreticos schismaticosque infatigabi-
liter expugnabat, et nunquam induci potuit, ut cum
excommunicatis communicaret. Quisquis sanæ doc-
trinae adversabatur, eum sibi hostem futurum in
Christo non dubitabat. Justitiæ quoque zelo fervens,
quod suum erat cuique servare nitebatur, persona-
rum prorsus et munerum acceptione deducta.

Videns autem hostis antiquus tantum virum Ec-
clesiæ Dei plurimum profuturum, invidit, et ne spe-
rata pace terra diutius frueretur, multos et magnos
elegit discordiæ concitatores: per quos in corde
regis et curialium odii seminarium sparsit. Orta
siquidem his procurantibus questione super regni
consuetudinibus et jure ecclesiastico, filios perditio-
nis in perniciem sancti viri excitavit qui subver-
tere moliebantur Ecclesiæ libertatem. Sed cum omnes
opprimerentur, Cantuariensis Ecclesia ipsum magis
angebat, cujus potestati honori et utilitati plurimum
derogabatur, insurgentibus in eum primum Rogero
Eboracensi archiepiscopo, deinde proceribus multis,
et his qui fidelitate et beneficiis Ecclesiæ tenebantur
obnoxii et ipso rege prohibente sæpius et pertinacius
ne in subditos culpis exigentibus canonicam justitiam
exerceret. Potestas enim laica in res et personas
omnium pro libito ecclesiastico jure contempto, ta-
centibus aut murmurantibus episcopis, potius quam
resistentibus usurpabat. Conatus est ergo rex archi-
episcopum promissis et blanditiis ad suum inclinare
consensum. Sed vir Domini, fundatus in petra et
solidatus, nec blanditiis emolliri potuit, ut a cultu
justitiæ devia-
D ret, nec minis terri-

Hanc itaque mutationem dexteræ Excelsi maligna
interpretatione conati sunt impii offuscare, super-
stitioni ascribentes, quod vitam duceret arctiorem.
Zelum justitiæ crudelitatem mentiebantur: quod
Ecclesiæ procurabat utilitates, avaritiæ attribuebant:
contemptum mundani favoris dicebant esse vena-
tionem gloriæ: curialis magnificentia fingebatur
elatio; quod divinitus edoctam voluntatem seque-
batur in plurimis, nota supercilii inurebatur; quod
antecessorum metas in tuendo jure sæpe videtur ex-
cedere, temeritatis arbitrabantur indicium. Nihil
jam ab eo vel dici vel fieri poterat, quod non mali-

cia infeliciū hominū depravaret; adeo quidem, ut regi persuaderent, quod, si archiepiscopi potestas procederet, regia dignitas esset procul dubio peritura; et nisi sibi et hæredibus suis prospiceret, is demum futurus esset rex, quem clerus eligeret, et quandiu placeret archiepiscopo, regnāurus.

Convenientibus autem episcopis et proceribus, ex mandato regis, ad expediendas regni necessitates, orta forte contentio est inter regem et Ecclesiam, quæ protracta diutius, instigante diabolo, magis ac magis augebatur in dies. Et quia episcopi cum archiepiscopo suo unanimiter omnes in eo erant proposito, ut regi in his quæ Dei sunt devotissime parerent, nec aliquam facerent promissionem aut obligationem cum eo inirent, nisi quatenus possent salvo ordine suo, multimodis procuratum est ut inita Ecclesiæ unitas scinderetur, per quosdam pontifices qui fidei et religionis columnæ videbantur, ut aut cum iis perverteretur archiepiscopus, aut si solus staret, facile contereretur. Nitebantur plurimi supplantare virum Dei; sed hostes familiares perniciosissime perurgebant. Recolit vir invictæ constantiæ, hominem cui Deus assistit non esse solum, et eo inspirante securus ascendit ex adverso opponens se murum solidissimum pro domo Israel, qui nec minis frangi poterat nec blanditiis emolliiri. Maluit enim pauper pauperem sequi Christum, quam derelinquere legem Christi, quo consolante adjutus est pauperum compatiens brevī numero.

Cum vero post innumeras vexationes et injurias tandem apud Clarendonam regia voluntate episcopi et proceres convenissent, exegit rex instantius ut regni consuetudines quas secundum assentationem procerum avus suus observasse videbatur, publice recenserentur, et expresso et absoluto omnium episcoporum assensu firmarentur, nulla omnino conditione adjecta. Quod archiepiscopi et episcopi attendentes, quantum licuit impedire aut saltem differre conati sunt, metientes periculum quod hinc inde inevitabiliter imminabat. Si enim vitii pravitate inolitū consentirent, sequebatur sine dubio fidei salutisque discrimen. Si vero adversarentur, pro Ecclesiæ et incolumitas vitæ certis erat objecta periculis. Nec justa timendi causa deerat, cum secundum Salomonem: Sicut fremitus leonis, ita et ira regis. Pondus autem belli in archiepiscopum versum est, sine ejus tanquam sine capitis sui consilio nihil audebant episcopi et ei ut acquiesceret consulere formidabant. Is autem de quorundam episcoporum, quibus dispendium membrorum et salutis ab antiquo regis odio impendere videbatur, magis quam de propriis licet plurima et gravissima imminerent, anxiebat periculis, et tam pro instanti necessitate quam pro suavisibilibus magnorum virorum religionis habitum proferentium verbis deceptus, petitionem regis verbatenus fieri annuit. Et sic et ipse et episcopi, quibus timebatur, licet cum dispendio causæ, corporis evasere periculum. Sed episcopus in hac liberatione corporum ruinam metuens animarum, scipsum aus-

terioribus alimentis et indumentis gravius corpū affligere, et se ab officio suspendit altaris, donec per confessionem et dignos poenitentiae fructus a Romano pontifice absolutus meritis relaxari.

Porro nec sic regis quievit indignatio, sed minis et terroribus ampliorem intentabat sævitiam, nisi consuetudines, quas contra Ecclesiam nitebatur inducere, archiepiscoporum et episcoporum auctoritate firmarentur et scriptis. Cujus conatibus quia confessor Christi, futurus martyr, se opponere ausus est, multis interim appetitus damnis, contumeliis laceratus et affectus injuriis, tandem Northamptonam jure iniquo tractus, se licet per iniquam sententiam in quadam causa pecuniaria satis patienter sustinuit condemnari, et regi judicatum solvi sufficientissime cavit. Inde in eum non ad hoc utique citatum sub prætextu de commissis sibi tempore administratæ cancellariæ negotiis reddendæ rationis alias calumnias intorserunt, quibus contra jus et fas adeo vexatus est, ut eum oportuerit adversus episcopos, ne eum injusto judicio condemnarent, ut sic regi blandirentur, sedem apostolicam appellare, et ab eis tandem sit ad domini papæ audientiam appellatus.

Proceres tamen, licet adversus eos processerit appellatio, et sub anathemate prohibiti sint in patrem et judicem suum ferre sententiam, nihilominus tamen in eum, nec confessum nec convictum, sed privilegium Ecclesiæ et suum duntaxat protestantem et invocantem publici juris auxilium, præsumperunt, ad cumulum damnationis suæ, non tam dictare sententiam, quam concepti furoris insaniam vomere. Quam cum in publicum proferre vellent, vir sanctus crucem Christi, quam manu tenebat et quam jugiter circumferebat in corde et corpore suo in altum erigens, a funesta discessit curia, succellamantibus impiis eum capiendum ut proditorem, et merito suspendendum et ut titulum Domini sui fidelis servus agnosceret, fore undique audiebat: « Crucifige, crucifige eum. » Ipse autem transiens per medium illorum ibat.

Cum autem se in hospitium recepisset, duo magni et fidelissimi proceres ad eum in ipso noctis conticinio accesserunt, vultu miserabiles et lacrymosi, tundentes pectora sua, et confitentes ac protestantes per tremendum judicium Dei, quod indubitanter sciebant viros magnos, et malefactis insignes, utpote multis pollutos facinoribus, in illius necem conspirasse, et se ad eum occidendum mutuis invicem astrinxisse juramentis. Ne ergo causa Ecclesiæ, quæ nondum plene innotuerat, in morte ejus pateretur occasum, eadem nocte fugam aggressus est, et uno duntaxat fratre sibi ferente solatium, diebus delitescens et noctibus iter peragens, post diem decimum sextum ad portum Sandvici pervenit, et cum potiores vectores non haberet ad manum, in fragili cymbula a duobus sacerdotibus transvectus est in Flandriam, paucis aliis navigium potius impediens quam aliquam solatii vel auxilii ferentibus opem. Actus ergo in exsilium Christi confessor, a domino papa Alexandro Senonis honorifice susceptus est, et

ab eo in monasterio Pontiniacensi commendatus est. Sed rex Anglorum episcopos et proceres suos ad Romanam destinavit Ecclesiam, multa promittens dummodo legati mitterentur, qui causam Cantuariensis archiepiscopi, quam instantissime remitti postulabat, omni appellatione remota definirent. Videbatur enim quod cardinales flecti possent, et testimonium copia in omni causæ articulo facillime procurari. Sed, cum se in hac petitione redeuntibus nuntiis didicisset fuisse repulsum, ecclesiam et omnia bona archiepiscopi et suorum præcepit confiscari; et quod in nullius historię serie legitur, totam cognationem ejus et omnes qui eum familiaritate aut quovis titulo contingebant, proscriptos addixit exilio sine delectu dignitatis, aut ordinis, conditionis aut fortunæ, ætatis aut sexus. Nam et mulieres in puerperio decumbentes, et parvuli vagientes in cunis, in exilium acti sunt. Processit ulterius furor immanis et piis auribus horrenda crudelitas. Cum enim Catholica etiam pro hæreticis et schismaticis et perfidis Judæis oret Ecclesia, prohibitum est ne quis eum vel orationum suffragiis adjuvaret. Ministri quoque publicæ potestatis omnes adultos jurare cōgebant, quod Pontinacum contristandi archiepiscopi causa peterent. Ibi enim se vir sanctus diu jejunis et orationibus mace-
 ravit, orans jugiter pro Ecclesia; pro rege et regno Anglorum, donec eum inde rex per abbates Cistercienses, qui de terra sua ad capitulum generale convenierant, proturbare curavit. Sed antequam inde progrediretur, divina revelatione confortatus est, cœlitus sibi ostenso iudicio, quod ad Ecclesiam suam rediturus erat cum gloria, et inde post martyrii palmam migraturus ad Dominum. Et sicut beata Virgo, cujus animam in Filii passione doloris gladius transverberavit, plus quam martyr legitur exstitisse, sic et Christi confessor dum in se et suis multa, magna et inaudita et longa supplicia pertulerit, meritum et coronam martyrii gloriosius illustravit. Timens autem occasione sui juris sanctis imminere dispendium, sponte discessit, et ad Francorum christianissimum regem Ludovicum se contulit, qui eum reverenter excipiens, donec pax reformaretur, humanissime necessaria ministravit. Sollicitavit etiam summum pontificem in virtute amoris et sub impensi protestatione obsequii, ne ulterius dilationes frustratorias prorogaret: sicut regnum Francorum diligebat et honorem apostolicæ sedis. Miseratus etiam Anglicanæ Ecclesiæ desolationem, Willelmus Senonensis venerandus antistes, sedem apostolicam petiit et a Romana Ecclesia impetravit, ut rex Anglorum omni appellatione cessante subiceretur anathemati et regnum interdicto, nisi pax Cantuariensis Ecclesiæ redderetur. Interim procurantibus his, qui Ecclesiæ pacem oderant, Rogerus Eboracensis archiepiscopus in provincia Cantuariensi post prohibitionem domini papæ contra dignitatem Cantuariensis Ecclesiæ et antiquam consuetudinem, Henricum filium regis coronare præsumpsit, assistentibus sibi suffraganeis nec protestantibus jus Dorobernensis Ecclesiæ. Multi-
 plicatis ergo injuriis et perversis hominibus patientiæ Christi semper abulentibus, magis ac magis in regem et suos multiplex et certa et citra comminatio procedebat. Instabatque peremptorius dies, ut sententia ulterius differri non posset. Arcatus itaque rex severitate canonica, tandem acquievit ut pax Anglicanæ Ecclesiæ reformaretur. Regna itaque gavisa sunt, cunctis credentibus negotium potius veraciter agi quam concipi simulate; sed quid ageretur a quibusdam rei exitus declaravit. Pontifex enim Christi ex fide sua metiens alios, de contrahentibus secum meliora sperabat. Et licet multi dissuaderent ne redire præsumeret, nisi pax certius firmaretur, periculum tamen metuens animarum, ad Ecclesiam suam rege sibi præstante conductum, septimo exilii anno reversus est et a clero et populo receptus tanquam angelus Domini. Cum vero dominus papa præfatus jam dicti Eboracensis et episcoporum qui ei assisterant præsumptionem, sancto Thoma conquiritur audisset, tam Eboracensem archiepiscopum quam faventes ei episcopos ab episcopali suspendit officio, et Gilbertum Londoniensem et Jocelinum Saresburiensem in sententiam anathematis revocavit. Quæ severitas, in sancti Thomæ ingressu publicata, regem amplius exacerbavit et linguas toxicatas detrahentium efficaciores reddidit ad nocendum. Iterum ergo damnis, iterum atrocioribus injuriis supra modum et numerum athleta Christi affectus est et edicto publico prohibitus ecclesiæ suæ septa exire. Quisquis ei vel alicui suorum faciem hilarem prætendebat, hostis publicus censebatur. Sed hæc omnia vir Dei in multa patientia sufferebat, malens non modo rerum, sed et salutis subire jacturam quam justitiam Dei et Ecclesiæ libertatem absque subventionem vel saltem reclamationem periclitari. Pace omnium sanctorum dixerim, si tantum Deo quisque immolat, quantum pro ipsius amore relinquit, non facile invenitur, qui Thomam antecedit. Nam pro Christo sua et suos contempsit, contempsit mundum, contempsit et se ipsum. Et quia stylus ad confessoris properat passionem, cujus auctores et causa ex multis et magnis patent indiciis, in ea mihi non censui diutius immorandum; præsertim cum jam fere per orbem Latinum ex relatione plurimorum sit nota et divulgata materia. Hoc tamen in tanto divinæ dispensationis munere silendum esse non credidi: quod ad Dei et martyris sui gloriam universi mirantur, quia sic omnes circumstantiæ concurrerunt in agone pontificis, ut patientis titulum perpetuo illustrarent et persequentium revelarent impietatem, et nomen sempiterno macularent opprobrio. Si enim personas hinc inde intueri et metiri placuerit: occurrit hinc religiosus archiepiscopus, Britanniarum primas, sedis apostolicæ legatus, iudex incorruptissimus, utpote nec acceptor personarum, nec munerum, assertor ecclesiasticæ libertatis, et quasi turris erecta in Jerusalem contra faciem Danasci, malleus impiorum, sed pauperum et merentium consolator. Viderit qui voluerit quis

e regione procedat. Et si causa martyrem facit, A quod nulli rectum sapienti venit in dubium, quod justus, quid sanctius causa ejus? qui opes et omnem mundi gloriam, qui amicorum et totius cognationis affectionem pro Christi amore contemnens, exsilium subiit, se et suos omnes exposuit periculo et paupertati, qui pro lege Dei sui tuenda et evacuandis abusionibus veterum tyrannorum certavit usque ad mortem, nec in aliqua obligatione postquam semel lapsus est captus insidiantium dolo, induci potuit ut aliquid eorum quæ exigebantur ab ipso promitteret: quin in omnibus adjiceret honorem Dei et honestatem Ecclesiæ salvam fore. Nec ad modicum et quasi ad horam credens et in articulo tentationis recedens adversa perpessus est; sed exsilium et acerbam proscriptionem in annum septimum protelavit, tanta quidem virtute constantiæ regia via incedens et Christi et apostolorum sequens vestigia ut invictus ejus animus nec fortunæ sævientis impetu posset frangi, nec blanditiis emolliiri. Sed et ubi sit immolatus advertite. Certe in Ecclesia, quæ caput regni est, et aliarum omnium mater in Christo, coram altari, inter consacerdotes et manus religiosorum, quos armatorum carnificum tumultus fecerat ad stupendum et miserabile spectaculum concurrere. Qui ergo seipsum a multo tempore exhibuerat hostiam vivam, sanctam, Deo placentem, qui carnem suam in orationibus et vigiliis, jejuniis et asperioris usu cilicii conviciis et concupiscentiis crucifixerat, qui dorsum, quod soli familiares ejus noverant, tanquam Christi puerulus exponere consueverat ad flagella, qui Christi corpus et sanguinem solitus erat offerre in altari, coram altari prostratus effusus manibus impiorum obtulit proprium. [Cui unquam martyrii titulus extitit gloriosior?]

Nec licuit ministris Satanæ in immolatione discipuli et servi, quod præambulis eorum in crucifixione magistri et Domini. Christus enim, ne fœdaretur civitas, ne pollueretur Sabbatum, et judicio licet iniquo prædamnatus, qualemcunque allegandi pro se acceperat facultatem, et ab urbe eductus extra portam crucifixus est, ministerio utique gentilium, qui Deum non noverant, et auctoritate publicæ potestatis, his reum deferentibus quorum legem visus est impugnare, discipulo, filio perditionis, proditoris perfidiam procurante. At iste non modo in urbe, sed intra ecclesiam, non tempore profano, sed die quem nativitatis Dominicæ solemnitas consecrabat. Et omni jure decuit ut natalis ejus, qui innocenter et sanctissime vixerat, natalem sanctorum Innocentium sequeretur. Et quidem, ut creditur, necem ipsius traditores procuravere discipuli, sacerdotum principes formaverunt, tanto in malitia Annam et Caipham, Pilatum et Herodem amplius præcedentes, quanto diligentius præcaverunt, ne in judicium traheretur, ne conveniretur ab accusatoribus, ne appareret ante faciem præsidis, ne privilegio sacri loci vel temporis, aut dignitatis, aut gradus, aut reformate pacis et datæ securitatis condi-

tionis sacrilegas manus evaderet, non gentilium, non hostium, sed eorum qui legem Dei profitebantur et amicorum fidem. Sane mira Dei, cuncta sapienter et salubriter ordinantis, dispensatione contigit, quod qui hæc tam male, tam imprudenter permisit fieri, eadem non est passus abscondi, ut hic etiam temporaliter impleatur quod veritas protulit: « Nihil scilicet esse occultum, quod non reveletur. » Nam, quod de signifero proditorum Juda sermone celebri vulgatum est, pari jure trahendum est ad complices suos, eo quod de similibus rebus idem constet esse judicium, ut Christianis omnibus ex fide liqueat, quod cœli revelabunt iniquitatem ipsorum, et adversus eos terra consurget. Quis autem fidelium audeat dubitare, quod Deus auctores et perpetratores tanti sacrilegii aut converteret aut contereret?

Passurus autem in ecclesia, ut dictum est, coram altari Christi martyr, antequam feriretur, cum se audisset inquiri a militibus, qui ad hoc venerant in turba clericorum et monachorum vociferantibus: « Ubi est archiepiscopus? » occurrit iis ex gradu quem ex magna parte ascenderat, vultu intrepido dicens: « Ecce ego: quid vultis? » Cui unus funestorum militum in spiritu furoris intulit: « Ut modo moriaris: impossibile enim est ut amplius vivas. » Respondit archiepiscopus non minori constantia verbi quam animi, quia (quod omnium martyrum pace ex animi mei sententia fidenter dixerim) nullus videtur isto constantior fuisse: « Et ego pro Deo meo paratus sum mori, et pro assertionem justitiæ et Ecclesiæ libertatis. Quod si caput meum queritis, prohibeo ex parte omnipotentis Dei, et sub anathemate, ne cuiquam alii, sive monacho, sive clerico, sive laico, majori vel minori, in aliquo noceatis, sed sint immanes a pœna sicut exstiterunt a causa; non enim illis, sed mihi imputandum est, si qui eorum laborantis Ecclesiæ causam susceperunt: mortem libenter amplector, dummodo Ecclesia in effusione mei sanguinis pacem consequatur et libertatem. » Quis isto constanter, quis videtur in charitate ferventior? qui dum pro lege Dei sui persecutoribus se offerebat, in id solum sollicitus fuit, ne commissi sibi gregis in aliquo detrimentum pateretur. Verba ejus nonne Christum exprimere videntur in passione dicentem: « Si me queritis, sinite hos abire? »

His dictis, videns carnifices eductis gladiis, in modum orantis inclinavit caput, hæc novissima proferens verba: « Deo et beatæ Mariæ et sanctis hujus ecclesiæ patronis, et beato martyri Dionysio commendo me ipsum et Ecclesiæ causam. »

Cætera quis sine suspiriis, singulibus et lacrymis referat? Singula prosequi pietas non permittit quæ carnifices immanissimi, Dei timore contempto, et tam fidei quam totius humanitatis immemores, commiserunt. Non enim sufficit iis sanguine sacerdotis et nece profanare ecclesiam et diem sacratissimum incestare, nisi corona capitis, quam sacri chrismatibus unctio Deo dicaverat, amputata, quod et dictu

horribile est, funestis gladiis jam defuncti ejicerent cerebrum et per pavimentum cum cruore et ossibus crudelissime spargerent, immaniores Christi crucifixoribus qui ejus crura, quem obisse viderant, sicut adhuc viventium, non censuerunt esse frangenda. Sed in his omnibus cruciatibus, invicti animi et admirandæ constantiæ martyr, nec verbum vel clamorem emisit, non edidit gemitum, nec brachium aut vestem opposuit ferienti, sed caput quod inclinatum gladiis exposuerat donec consummaretur tenebat immobile. Denique in terram procidens recto corpore, non pedem movit aut manum scariis insulantibus se in strage proditoris pacem patriæ prodidisse. Carnifices autem non minus cupidi quam crudeles, inde tam in regiæ potestatis quam diviniæ majestatis injuriam ad ecclesiæ palatium redeunt, universam suppellectilem et quidquid in scriniis aut clitelis archiepiscopi et suorum potuit inveniri, sive in auro, sive in argento, aut vestibus, aut variis ornamentis, aut libris, aut privilegiis, aut aliis quibuscunque scriptis aut equitaturis, insatiabili avaritia et stupendo ausu diripientes, ea, ut libuit, inter se diviserunt, imitatores eorum facti, qui inter se Christi vestimenta partiti sunt, licet eos quodammodo præcedebant in scelere. Et ut pontifici jam per martyrium coronato, hominum gratia auferretur, omnia scripta, quæ sacrilegus prædo subripuit, ad regem in Normanniam transmissa sunt. Sed nutu divino contigit quod quanto magis athletæ fortissimi gloriam offuscare nitebatur humana temeritas, tanto amplius eam Dominus illustrabat in ostensione virtutis et miraculorum manifestis indiciiis. Quod viri impij qui eum insatiabiliter oderant intuentes, inhibuerunt nomine publicæ potestatis, ne miracula quæ fiebant quisquam publice publicare præsumeret. Cæterum nris frustra obnubilare desiderat, quod Deus clarificare disponit. Eo enim amplius percipere miracula, quæ videbantur impiis studiosius occultanda. Homo videt in facie: solus Deus est qui renes et corda scrutatur. Nam cum beati martyris corpus sepulture tradendum esset, et de more pontificalibus indueretur, quod admodum pauci familiares ejus noverant, inventum est cilicio pedunculis et

A vermibus referto involutum: ipsaque remora ejus interiora usque ad poplites cilicina, quod antea apud nostrates fuerat inauditum, reperta sunt.

Quis referat quos gemitus, quantos lacrymarum imbres sanctorum cœtus qui aderat in revelatione sic adumbratæ religionis emisit? Et quis quod sequitur sine lacrymis referre poterit vel audire? Ecclesia quidem quæ sacro cruore violata fuerat, vel potius consecrata, se non tam sine hæsitatione et deliberatione multa propter metum impiorum ad protestandam injuriam Dei, suspendere ausa est a divinis; sed tantus terror ex signis patentibus provinciales invasit, ut nullus omnino aut perarns, qui auderet a divinis cessare pro exhibitione justitiæ aut pro humanitatis officio debitum in Christo defunctis munus solemniter exhibere. In his omnibus persecutorum non quievit furor dicentium corpus proditoris inter sanctos pontifices non esse humanum, sed projiciendum esse in paludem viliozem vel suspendendum patibulo. Unde sancti viri qui aderant vim sibi timentes inferri eum in crypta, atque quam satellites Satanæ, qui ad sacrilegia perpetranda convocati fuerant, convenirent, ante altare sancti Joannis Baptistæ et sancti Augustini Anglorum apostoli in sarcophago marmoreo sepepellerant.

Ubi ad gloriam omnipotentis Dei per eum multa et magna sunt miracula catervatim confluentibus populis, ut videant in aliis et sentiant in se potentiam et clementiam ejus, qui semper in sanctis suis mirabilis et gloriosus est. Nam et in loco passionis ejus, et ubi ante maius altare pernoctavit humanus, et ubi tandem sepultus est, paralytici curantur, cæci vident, surdi audiunt, loquuntur muti, claudi ambulant, leprosi mundantur, evadunt febricitantes, arrepticii a dæmonio liberantur, et a variis morbis sanantur ægroti, blasphemi a dæmonio arrepti confunduntur. Et quod a diebus patrum nostrorum non est auditum, mortui resurgunt, illo hæc et plura, quæ referre perlongum est, operante, qui solus est super omnia benedictus in sæcula Deus. Amen.

Ita explicit tractatus Joannis Salisburiensis de Vita sancti Thomæ

INCIPIT VITA EJUSDEM SANCTI

PER ALANUM, PRIOREM CANTUARIENSEM, POSTEA ABBATEM TEWKESBURIENSEM.

Gloriosus Dei martyr Thomas, qualis, cujus vite D sic passus fuerit angustias, ipsius martyris clericus et conversationis, quantas etiam pro libertate Eccle- et familiaris, postea Carnotensis episcopus magister

Joannes Saresberiensis eleganter descripsit. Quia vero quaedam ibi juxta brevitatem historiae ex industria omissa sunt, quæ si apposita fuerint legentis et audientis poterunt excitare devotionem, maxime cum ea pertineant ad epistolarum quæ sequuntur explanationem, ea duximus summam adicere quæ a concilio de Clarendona, usque ad discessum domini papæ Alexandri de Francia et ipsius martyrii consummationem juxta historiae veritatem dicuntur contigisse. Cætera suis in locis epistolæ ipsius plenius persequuntur.

Dum igitur beatus Thomas apud Clarendonam, ad suggestionem fratrum suorum, invitatus pro certo in verbo sacerdotali promississet se cum cæteris consuetudines, quas Avitas vocant, ad nutum regis observaturum, ad mentem sedulo revocavit, quanta ex his potuerint contra ecclesiasticam libertatem oriri dispendia. Eoque recedente a regis curia, obiter inter familiares ipsius orta est murmuratio, his, ut assolet, suggerentibus sic fieri oportere propter temporis instantiam, aliis indignantibus ecclesiasticæ libertatis auctoritatem ad unius hominis libitum deperire. Inter quos unus acrius institit dicens: « Publica potestas perturbat omnia; in ipsum Christum delirat iniquitas; synagoga Satanæ profanat sanctuarium Dei; sederunt principes et convenerunt in unum adversus Christum: nemo tutus qui diligit acuitatem; mundo iudice soli sapiunt et venerantur hodie qui principi obsequuntur ad libitum: Concussit hæc tempestas etiam columnas ecclesiæ: et dum pastor desipuit, oves dispersæ latitant sub lupo: de cætero, quis erit locus innocentiae, quis stabit ex adverso, vel quis triumphabit in prælio, principe devicto? » Hæc quidem is murmurabat qui crucem ferebat ante archiepiscopum: cæteri obmutuere præ angustia. Et adjecit audacius assumens parabolam in hunc modum: « Quorsum, ait archiepiscopus, hæc, fili? quid, inquit, virtutis sibi retinuit, qui conscientiam prodidit et famam? Te ipsum, inquit, id respicit, qui hodie omnino prodidisti conscientiam et famam, Deo odibili et honestati contrario exemplo in posterum relicto, cum manus tuas Deo sacratas ad execrandas consuetudines observandas extenderes, et in confusionem libertatis ecclesiasticæ cum nefariis Satanæ ministris communicares. » Ingenuit igitur archiepiscopus et suspirans ait: « Pœniteo et graviter meum perhorrescens excessum, me ipsum indignum iudico de cætero ad eum accedere in sacerdotio, de cujus ecclesia tam vile contraxi commercium: silebo itaque sedens in mœnore, donec me visitaverit oriens ex alto, ut per ipsum Deum et dominum papam merear absolvi. »

Statimque proinde nuntium destinavit ad sedem apostolicam. Innotuit interim id ipsum regi, quod archiepiscopus ab illa supradicta compromise vellet resiliere: in eo præcipue dum palam restitit, ne scriptum illarum consuetudinum, sicut conductum fuerat, suo sigillo corroboraret. Exinde rex aspera-

tus gravioribus et exquisitis cepit archiepiscopum vexare exactionibus, ita ut palam fieret intelligentibus, sanguinem ejus et vitam requiri.

Id igitur pertimescens fugam consuluit et veniens ad manerium suum Aldintonam nomine, cæteris dormientibus secreto se subripuit, duobus tantum comitatus, inventoque navigio mari se commisit. A vento vero contrario diu fatigatus, vix est diluculo cum vita ad terram reversus. Denique comperta ejus discessio familiares ejus et famulos singulos dispersit. Cæteris tamen unus audacior, veniens Cantuariam, in cameram ipsam archiepiscopi sequenti nocte se recepit. Et post cœnam sollicitus cepit constrictari de casu et angustia domini sui. Plurima itaque parte noctis transacta, volenti quiescere: « Vade, inquit puer, et claude ulterius ostium aulae, ut securius dormiamus. » Veniens autem illuc puer accenso lumine, aperto ostio, vidit archiepiscopum in angulo sedere et solum. Quo viso, territus aufugit, putans se phantasma vidisse. Eo suggesto, clericus ille nullatenus voluit fidem adhibere, donec in sua persona verum probaret. Et veniens, sicut dictum est, sic et invenit. Convocatis igitur ad se archiepiscopus quibusdam fratribus Ecclesiæ Cantuariensis, exposuit iis quid sibi acciderit, et quod nondum fuerit voluntas Dei ut recederet.

Recreatus igitur breviori cœna quievit: mane autem facto irruerunt ministeriales regis, ut archiepiscopo fugiente confiscarent omnia; sed audita et visa ejus præsentia confusi siluerunt.

Proinde aggravabat rex manum suam in archiepiscopum, eum citari faciens peremptorie, ut die statuto regi responderet de his, quæ sibi fuerint obiecta.

Adveniente termino veniunt, et vocati facta quoque concione apud Northamptonam dominus noster trahitur in causam. Seorsum itaque in conclavi sedentibus domino Cantuariensi, cum coepiscopis suis, ex edicto regis seris objectis, ne pateret exitus, propositum est ex parte regis adversus dominum Cantuariensem, quod cum haberet vacantes episcopatus, abbatias et multos redditus domini regis per annos plurimos in manu sua, nullam ei super his reddidit rationem, quam modo sibi rex requirit exhiberi. « Super his, inquit Cantuariensis, prudentiores volumus consulere, et de consulto respondere. » Dum igitur medium silentium tenerent ad invicem, domino Cantuariensi id requirente, Gilbertus Londoniensis episcopus, decanus utique Cantuariensis Ecclesiæ et idcirco post Cantuariensem in consilio primus: « Si, pater, inquit, recolis unde te dominus rex sustulerit, quid tibi contulerit, considerata temporum malitia, quam ruinam Catholicæ Ecclesiæ et nobis omnibus paraveris, si in his regi resistere volueris: non solum archiepiscopatu Cantuariensi, sed in decuplo si tanti fuisset cedere deberes. Et forsitan, si hanc in te rex viderit humilitatem, te in universum resti-

tuet. » — « Satis, inquit Cantuariensis, innotuit quid A
consulto responderis. »

Deinde Henricus Wintoniensis episcopus subintulit : « Hæc, ait, forma consilii Catholicæ Ecclesiæ penitus perniciose nos omnes obligat et confundit. Quod si archiepiscopus noster et totius Angliæ primas nobis id reliquerit exemplum, ut ad nutum et comminationem principis auctoritati et curæ animarum sibi commissæ quisque episcopus debeat cedere, quis erit de cætero status Ecclesiæ, nisi ut nulla agantur de jure sed omnia confundantur pro libitu, et sic erit sacerdos sicut et populus ? » Hilarius itaque Ciceretrensis episcopus, nam et ipse gloriosus in verbis, subjunxit : « Nisi, inquit, temporis instantia et Catholicæ Ecclesiæ perturbatio aliud exigere, standum utique esset verbis sententiæ. Verum ubi nutat canonum auctoritas, plurimum subtrahendum est aeveritati, ut in eo perficiat dispensatio, quod posset destruere severa correctio. Censeo igitur cedendum regiæ voluntati, sed ad tempus, ne præpropere procedamus id statuere, unde sequatur durior retractatio. » Nec sine rubore episcopus deinde Lincolnensis Robertus, simplex quidem homo et minus discretus : « Patet, inquit, vitam hominis istius et sanguinem queri, et necessario alterum horum erit, aut archiepiscopatu aut vitæ cedendum. Quis ergo fructus de archiepiscopatu proveniet, si proinde vitæ cessarit ? nec id video. » Exoniensis autem episcopus Bartholomæus ait : « Palam est quoniam dies mali sunt, et si possumus sub dissimulationis umbra hujus tempestatis impetum pertransire illasi, id præcipue procurandum est, sed nec ad id de facili perveniendum, nisi subtrahatur plurimum severitati. Temporis instantia id requirit, maxime cum non sit generalis sed personalis hæc persecutio. Satis est igitur unum caput in parte periclitari, quam totam Anglicanam Ecclesiam inevitabili discrimini exponere. » Wigorniensis episcopus Rogerius requisitus et ipse quid id sentiret, ita temperavit responsum, ut et negando palam faceret quid animi haberet. « Nullum, ait, in hac parte dabo consilium, quia si dixerò a Deo susceptam animarum curam ad regiam voluntatem et comminationem oportere relinquere, contra conscientiam meam et in capitis mei condemnationem loquetur os meum. Si sentiam regi resistendum, ecce qui sui sunt, audiunt per quos id ipsum innotescit regi, statimque ejiciat extra synagogam, et erit sors mea de cætero cum publicis hostibus, et condemnatis. Idcirco nec hoc dico, nec illud consulto. »

His ita gestis, sederunt aliquandiu sub silentio : nec erat qui amplius his aliquid adjiceret. Et arte quesita ut pateret eis exitus, inclusi enim erant : « Volo, inquit dominus Cantuariensis, loqui cum duobus comitibus, qui cum rege sunt. » Quos et nominavit. Vocati illi apertis ostiis introierunt propteranter, credentes aliquid audire, quod regiam satiare voluntatem. Astantibus his ait archiepiscopus : « Super

his, de quibus nos dominus rex convenit, contulimus. Et quia non habemus ad præsens eos, quibus res ipsa magis innotuit, ideo usque in crastinum petimus indicias, tunc responsuri, sicut Deus nobis inspiraverit. » Ad hæc regi deferenda missi sunt Londoniensis et Roffensis episcopi. Londoniensis autem sub vulpe latens injunctum sibi pervertit negotium, dicens regi archiepiscopum apud eum postulare inducias ad præparanda instrumenta, quasi statuto die rationem redditurus super objectis, ut sic magis obligaretur archiepiscopus ad executionem regiæ voluntatis. Directi sunt igitur duo comites ad archiepiscopum postulas ex parte regis deferentes ; si tamen ratum haberet, quod ex parte sua per episcopos fuerat regi suggestum. Quo audito, ait archiepiscopus se id in mandatis non dedisse, neque id, quod regi suggestum fuerat, ratum habere ; sed die sequenti, Deo auctore se venturum et sicut datum fuerit desuper, responsurum. Erubuit ergo Londoniensis, dum videret se incidisse in laqueum quem jecerat ad patrem suum decipiendum. Soluta itaque concilio ea die discesserunt ab invicem, multitudo vero militum, et aliorum qui cum domino Cantuariensi illuc convenerant, regio metu perterrita secessit in partem, et amplius cum eo non stetit. Quo comperto, circuire sepes et vicos, et ad se vocari pauperes, claudos et debiles, dicens per talem militiam provenire posse celerem victoriam, quam per eos qui tempore tentationis turpius recesserunt.

Impleta est igitur domus ejus discumbentibus, et peracta dies illa cum lætitia in Domino, nulla mentione palam habita de perturbatione pristina.

Sequenti vero die, summo diluculo, percussus est dominus noster passione iliaca, nam et ea multoties vexabatur, eatenus quod non potuit se de lecto erigere. Unde longiori mora interposita, ut crederetur ab invidis ad curiam regis nolle descendere : missi sunt qui eum citarent ærius ad respondendum. « Dum, inquit dominus Cantuariensis, quieverit ista passio, crastino die, Deo auctore, apparebo. » Transeunte vero die illa et nocturnis vigiliis cum summa devotione demum peractis mane consurgens ad missarum solemniam, sacris pro more indutus vestibus et per beati martyris Stephani merita divinum sibi invocans auxilium, introitum missæ jussit inchoari : *Et enim sederunt principes, etc.*, totumque officium cum ad id pertinentibus complevit devotius, ministrantibus regis, qui ibi aderant, id tacite considerantibus, quibus visum est rem ipsam aliquid portendere speciale. Is siquidem annus centesimus erat et ea dies secundum annorum curricula qua Normanni Angliam intraverunt. Expleto itaque ministerio, amoto ab humeris pallio cum infula, ceteris indutus vestibus sacris, cappa clericali super injecta, processit ad regis curiam. Intraturus cameram regis, ibi enim rex præstolabatur ad ostium ipsum, crucem bajulat propria manu, sequentibus episcopis et id aliter quam decuit interpretantibus.

Occurrit autem Robertus Herefordiensis inquit : « Pater, sustine, ut ego vice capellani crucem deferam ante præsentiam vestram : sic enim condecet : » Archiepiscopus ait : « Justus est me ipsam deferre, sub cujus protectione tutus maneo, et ejus viso vexillo non est mihi dubitandum, sub quo principe militem. » Londoniensis ad hæc : « Si viderit rex te armatum intrare, gladium suum fortiores exeret in caput tuum ; et tunc videbis, quid proderunt tibi arma tua. » Archiepiscopus inquit : « Hæc Deo committimus. » Et Londoniensis : « Stultus hactenus fuisti, et ab hæc stultitia, ut video, de cætero non recedes : » et processum est. Audiens autem rex archiepiscopum armatum venire, obliito vel deposito gladio illo de quo dixerat Londoniensis, citius recessit in conclavem ulteriorem ; sedente hic seorsim archiepiscopo solo cum suis et paucis episcopis ex adverso, et loco et animo adunatis.

Denique vocati sunt episcopi ad regis consilium Cantuariensi sub jugulo relicto. Protrahitur tempus dum queritur innocentis damnatio. Cantuariensis vero firma facie induit constantiam. Exiens Rogerius Eboracensis archiepiscopus ait clericis suis quos ibi invenit, erant enim ibi magister Robertus, Grandis cognomine, et Osbertus de Arundel : « Recedamus hinc, non oportet nos videre quæ hic habent fieri cito de Cantuariensi. » Magister Robertus ad hæc : « Non, inquit, hinc recedam, donec videro quid Dei voluntas super his judicaverit : si pro Deo et ejus justitia dimicaverit is usque ad sanguinem, pulchrius vel melius vitam finire non poterit. » Recedente itaque Eboracensi archiepiscopo a camera regis, veniens Bartholomæus Exoniensis episcopus præcedit ad pedes domini Cantuariensis et ait : « Pater mi, miserere tui ; miserere et nostri : omnes enim hodie perimus odio capitis tui. » Exiit namque edictum a rege, ut qui amplius cum Cantuariensi staret, publicus hostis judicaretur in capite puniendus. » Dictum est etiam quod Jocelinus Saresburiensis episcopus, et Willelmus Norwicensis episcopus, qui adhuc restiterunt, traherentur statim ad supplicium in membris mutilandi, qui et ipsi pro salute sua Cantuariensem rogabant. Inspiciens igitur Cantuariensis in Exoniensem episcopum : « Fuge hinc, ait, quia non sapis ea quæ Dei sunt. » Exierunt denique a consilio regis omnes simul episcopi cum tumultu ad Cantuariensem. Quorum unus eloquens, Hilarius Cicestrensis episcopus, prorumpens in vocem ait : « Quondam noster fuisti archiepiscopus, et tenebamur tibi obedire, sed quia domino regi jurasti fidelitatem, hoc est vitam, membra, terrenam dignitatem sibi per te salvam fore, et consuetudines, quas ipse repetit conservandas, et tu niteris eas destruere, præcipue cum spectent ad terrenam ejus dignitatem et honorem, idcirco te reum perjurii dicimus, et perjuro archiepiscopo de cætero non habemus necesse obedire. Nos itaque et nostra sub domini papæ protectione ponentes, te ad ejus præsentiam appellamus super his responsurum. »

Et diem statuit. Archiepiscopus inquit : « Audio. » Subtrahentes se ipsi seorsim sedere ex adverso, diutius in summo silentio. Tandem a rege processerunt comites, barones, et plurima turba ab archiepiscopo, quorum primus Robertus comes Leicesteræ ait : « Mandat tibi rex, ut venias redditurus rationes super objectis, sicut pridie promissisti te facturum. Atioquin audi judicium. » Archiepiscopus inquit : « Judicium ? » Et surrexit dicens : « Imo, filii comes, et tu prius audi. Non te latet, filii, quam familiaris domino regi, et quam fidelis secundum statum hujus mundi fuerim. Cujus rei gratia placuit ei, ut promoverem in archiepiscopum Cantuariensis Ecclesiæ, Deus scit, me id non volente. Nota enim mihi fuit infirmitas mea. Et magis pro suo, quam pro Dei amore acquievi. Id satis hodie palam est, dum Deus et se mihi subtrahit, et ipsum regem. Verumtamen in mea promotione, dum electio fieret præsentem Henrico, regis filio et hærede, cui et hoc ipsum mandatum fuit, quæsitum est : qualem me redderent Cantuariensi Ecclesiæ ? Et responsum est : Liberum et quietum ab omni nexu curiali. Sic igitur liber et absolutus super his, a quibus sum liberatus, nec teneor nec volo de cætero respondere. » Comes inquit : « Et hoc aliter se habet, quam Londoniensis regi suggererat. » Adjecit archiepiscopus : « Adhuc, filii comes, id attende. Quanto dignior est anima quam corpus, tanto magis Deo et mihi teneris obedire, quam terreno regi. Nec lex nec ratio permittit, ut filii patrem judicent vel condemnent. Unde regis, et tuum, et aliorum declino judicium, sub Deo a solo domino papa judicandus, cujus coram vobis omnibus præsentiam appello, Ecclesia Cantuariensi, ordine et dignitate mea, cum ad hæc pertinentibus, sub Dei et sua protectione positus. Nilominus vos, fratres et coepiscopi mei, quia magis homini quam Deo obeditis, ad domini papæ audientiam et judicium voco : et sic Catholice Ecclesiæ et apostolicæ sedis auctoritate munitus hinc recedo. »

Abeuntem illum prosequuntur curiales et invidi contumeliis et injuriis traditorem illum et perjurum acclamantes. Et autem venienti ad ulteriorem portam, clausa est janua, nec potuit exire, nullo ibi invento custode. Et dum res ageretur in metu et dubio, nutu Dei contigit claves plurimas in fasciculo pendere a muro, quas arripiens familiaris quidam archiepiscopi, unam post alteram attentavit, donec aperiret januam.

Exeuntibus illis occurrit multitudo morbo regio laborantium pauperum et infirmorum, acclamantium et dicentium : *Benedictus Deus, qui eripuit et salvum fecit servum suum a facie inimicorum suorum.* Putabatur enim jam fuisse extinctus. Præcedente igitur et subsequente turba pauperum, cum clero et populo, in gaudio et lætitia perducitur ad hospitium [ad ecclesiam videlicet Beati Andreæ religiosorum monachorum conventuale monasterium]. Videns autem exultationem plebis sequentibus se dixit :

« Quam gloriosa processio nos conducit a facie tribulantis. Sinite pauperes Christi, et nostræ tribulationis participes, omnes intrare nobiscum, ut epulemur in Domino ad invicem. » Et impleta sunt domus et atria circumquaque discumbentium.

Inter epulas accesserunt Londoniensis et Cicerensis episcopi ad mensam, dicentes se viam pacis invenisse. Requirente archiepiscopo sub quali forma, inquit : « Quæstio pecuniaria agitur inter te et regem. Si igitur nomine pignoris duo maneria vestra, Otford et Muncheaham, regi assignaveris ad tempus, credimus quod inde pacatus et maneria resignabit, et pecuniam remittet, et gratiam suam tibi citius restituet. » Ad hæc archiepiscopus : « Heccliam manerium fuit quondam Cantuariensis Ecclesiæ, ut accepi, quod rex modo tenet in dominio. Et licet ad ejus restitutionem Cantuariensi Ecclesiæ competit rei vindictio, tamen id fieri his temporibus omnino non spero. Nihilominus antequam vel cuiuslibeturbationis sedandæ, vel recuperandæ regiæ gratiæ causa, antiquo juri, quod in illo manerio Cantuariensis Ecclesiæ habere dicitur, renuntiarem, cuiuslibet periculo vel discrimini caput istud opponerem. » Et caput tetigit. Indignantibus ergo episcopi regressi sunt, hæc regi renuntiantes : et accensa est in his regis indignatio.

Missi sunt etiam duo episcopi ad regem petere salvum conductum domino Cantuariensi in redeundo ad ecclesiam suam. Ait rex se in crastino familiares suos super hoc consulturum, et sic ex consulto responsurum. C Intelligens itaque Cantuariensis moram sibi periculosam esse, et per eam sibi parari posse insidias, cepit cogitare de fuga, jussitque in ipsa nocte in ecclesia Sancti Andræ parari sibi lectum inter duo altaria. Quo accedens cum litania, et singulorum sanctorum nomina pronuntians singulas fecit genuflexiones. Quo completo, proinde fatigatus strato se projecit, capessendæ quietis simulans occasionem.

Deinde secreto se subtrahens et per posticum exiens, uno familiari et fideli comitatus socio, disparuit. Mane autem facto subitus rumor et sinister de clandestina archipræsulis fuga hos, qui ei adhæserant invadens, omnes compulsi latitando sibi consulere. Verumtamen publico edicto denuntiaturum est neminem in Cantuariensem manus injicere. Dum igitur ista turbatio circumquaque discurreret. Archiepiscopus, ut diximus, clam de nocte fugiens, fratrem unum de ordine de Simplingeham secum habens, viæ ducem, versus aquilonem ad nobilem illam civitatem Lincolniam tendebat; sciens et prudens nimium carpens, non viam, ut ita cautius, si qui post mitterentur persecutores, effugeret insidias, et declinaret. Et nocte venit ad pagum, qui dicitur Gramam, et viginti quinque circiter milliariibus a Norhantona distantem. Ubi postquam modico indulsit somno, in crastino arripiens iter venit Lincolniam, circiter viginti quinque milliaria, hospitatus in civitate, in

A domo ejusdam felonis. Est ibi aqua, quæ fuit per civitatem intrans, ad locum quemdam solitarium in medio aquarum situm, qui dicitur Eremitorium pertingens ad donum de Simplingeham; per aquam venit millia circiter quadraginta. Ubi propter loci solitudinem, et propter difficultatem accessus, eo quod in medio aquarum sit, per tres dies securus latuit, ad iter, quod restabat vires reparans. Una vero dierum cum frater, qui ipsi ministrabat, videret solum sedentem in mensa, et pulmentariis vesci, compunctus lacrymas continere non potuit. Et continuo exivit, ne inter epulas virum Dei lacrymæ effusæ perturbarent. De eremitorio venit ad sanctum Botulfum, decem milliaria. Et inde ad locum venit, qui dicitur Haverolot, ad Simplingeham pertinentem. Deinceps vero nocte solum proficiscebatur, veritus deprehendi. Jam siquidem versus orientem ad Cantiam tendebat, ubi a populo terræ facie magis cognitus erat. Nocte itaque ibat, et die latitabat, octo dierum conficiens, noctibus iter, donec ad Cantiam perveniret, ad pagum supra mare situm, qui dicitur Estere, ubi transfretare disposuit. Ibi quidem mansit eo cautius quo securus eo quod pagus ille esset proprius, de mensa sacri conventus sedis suæ metropolitanæ, octo tantum milliariibus distans. Latuit autem lux mundi futura in pago hoc usque ad diem animarum. Ubi facto in pariete foramine, fuit enim prope ecclesiam, audivit missarum solennia cum plebe id ignorante presbytero etiam sacramenti perceptione perfruente. Quidam autem clericus hujus rei conscius osculum pacis ad archiepiscopum deferrebat : recedenti quoque post servitium populo nec id scienti episcopalem devotius pontifex impertivit benedictionem.

Demum vero procurato transitu cum angustia sæpius huc illucque depulsus vix tandem in summo dispendio Flandriæ appulit. Pedes igitur quia sic oportuit, et indutus veste alba et monachili cappa super scapulas posita, in tempestate, pluvia et luto, non ex solito, iter peragit, et dum pertransiret obiter accidit juniores stare et eorum aliquem accipitrem tenere in manu. Visaque ave Cantuariensis eo intendit, memor pristinæ conditionis et oblitus exsilii. Quo viso inquit unus : « Ni fallor, ecce hic est Cantuariensis archiepiscopus. » Alter ait : « Fatuus es, quid opus est Cantuariensi archiepiscopo ut sic incedat? » Expavit Cantuariensis, timens detegi et forte timor ille hujus vanitatis culpam ipso tempore potuit diluere.

Veniens autem usque Celarum Mariscum oppido fatigatus quievit. [Verum quoniam per crebros et profundos maris jactus fatigatus erat, upote in modica scapha transvectus, diu pedes ire non potuit. Unde post modicum iter reclinavit in terra, non valens procedere, et dixit fratribus qui cum eo erant : « Hinc non recedam, nisi vehar a vobis, aut quæeratis mihi vecturam. » Et quæsierunt ei jumentum pro uno argenteo : et quidem hoc non frenum, sed tantum

prolectam circa collum habebat. Et posuerunt vestimenta super dorsum, et eum desuper sedere fecerunt.] Deinceps paulisper procedens hospitatus est apud cellulam quamdam beati Bertini prope ipsam albatiam. Ubi occurrerunt ei quidam familiares, qui jam exierant de Anglia. Et eum inde deducetes navigando, erat enim illis iter per aquam, usque ad sanctum Bertinum properabant. In eundo vero ait quidam: « Domine, fatigatus es ex itinere et venturi sumus hodie ad eximiam humanitatis viros qui plurimum congratulabuntur tibi in Domino quod illusus evasisti: fac igitur charitatem iis, ut in adventu tuo hodie comedant pinguis. » — « Quarta, inquit dominus Cantuariensis, est feria et oportet nos hodie a talibus abstinere; » et subtulit alter: « Domine, forsitan non abundant piscibus et oportebit nos eis condescendere. » — « Domini est, inquit Cantuariensis, id providere. » Inter loquendum igitur ad notum Dei exiliens de aqua grandis piscis projecit se cum impetu in gremium viri Dei. Piscis, inquam, quam Brenham vocant et factus est eis transitus ille jucundus in laude Dei. Ductus itaque ad sanctum Bertinum et illic comiter exceptus duxit ibidem suos expectare. Interim rerum statum exagitabat horrida perturbatio unoquoque sibi in consulente, et ad regis voluntatem querente occasiones quomodo christum Domini perderent. Directi sunt igitur ad dominum papam a regis latere Eboracensis archiepiscopus, Londoniensis, Cicesterensis, Exoniensis, Wigorniensis, Luxoviensis, episcopi, et cum iis comitum et baronum multitudo copiosa in magno apparatu in donis et muneribus quibus pro viribus iudicium perverterent et sapientum oculos excæcarent. Hoc siquidem modo credebant curiam Romanam in hac parte quandoque vacillantem inclinari posse ad id quod quærebant. Dederant enim quidam pontifices contra Cantuariensem hoc consilium. Sane in eorum adventu hinc timor publicæ perturbationis quæ ex ira regis posset oriri, inde spes quæstus quam plures cardinalium nutare compellit, et facta est inter eos dissensio, dum diceretur ab his Cantuariensem ecclesiasticæ libertatis defensorem, et ideoque justam fovere causam: ab illis pacis et unitatis perturbatorem et ideo ejus præsumptionis impetum potius D refrenandum quam fovendum. Eo usque etiam invaluit inimicorum suggestio, quod nuntii domini Cantuariensis, præmissi enim erant eximie virtutis et sententiæ viri, nec promeruerunt a cardinalibus vel in osculo recipi. Angustiantur et illi videntes causam domini sui imminere discrimini.

[Eadem tamen die in vespera ad dominum papam habentes accessum, ipsum nomine archipræsulis, tanquam patrem et dominum, qua decebat devotione et humilitate, salutaverunt, dicentes quod illi essent duo tantum, qui evaserunt de calore domus Rechap, et ad Sanctitatis Sux pedes venerant, ut nuntiarent ei, quod filius Joseph adhuc viveret, sed non dominaretur in terra Aegypti, quin potius ab Aegyptiis

A oppressus fere fuisset et exstinctus. Enarraverunt itaque libenter audienti, et paterno compatiendi affectu, filii sui archipræsulis, pessimas angustias et dolores, pericula etiam in pugna illa apud Norham-tunam ad bestias, pericula in falsis fratribus, pericula in fuga, pericula in via, pericula in mari, in ipso etiam portu pericula, laborem, egestatem, ærumnam, et ad declinandas insidias habitus sui et nominis mutationem. Et audiens hæc pater omnium patrum, commota paternæ pietatis viscera super filio, et paternum non valens dissimulare affectum, lacrymatus est. Et ita compunctus inquit eis: « Dominus vester in carne adhuc vivit, ut dicitis? Magis tamen jam sibi in carne vivens martyrii gloriam vindicat. » Et quia jam valde sero erat, nuntios B ex itinere fatigatos, data benedictione et consolatione apostolica, ad hospitium citius remisit.]

In crastino tamen sedente domino papa pro tribu-nali, facto consessu cardinalium, advocata concione, adsunt etiam nuntii Cantuariensis, ut vel finem viderent. Consurgentibus igitur ex adverso nuntiis regis, primus, et cæterorum signifer, in hunc modum inchoat Londoniensis: « Pater, ad vos spectat Catholicæ Ecclesiæ cura et sollicitudo, ut qui sapiunt per vestram foveantur prudentiam ad exemplum morum, et qui desipiunt apostolica auctoritate corripantur et corrigantur, ut sapiant. Sed apud vestram sapientiam non creditur sapere, qui in sua sapientia confidens, et fratrum concordiam, et Ecclesiæ pacem, regisque devotionem perturbare contendit. Nuper siquidem in Anglia orta est dissensio inter regnum et sacerdotium ex levi et minus utili occasione, quæ facilius potuisset extinguï, si adhibita ei fuisset moderata curatio. Verum quia dominus Cantuariensis suo et singulari in hac parte, et non nostro usus consilio, acrius æquo instituit, non considerata temporis malitia, quod vel quale dispendium ex tali impetu posset provenire, et sibi et fratribus suis contextit laqueos. Et si ei in proposito suo noster favisset assensus, jam res ipsa ad deteriorem calculum devenisset. Verum quia nostram conniventiam, sicut nec debuit, ad id quo tendebat, habere non potuit, visus est in dominum regem, et nos, imo in totum regnum, temeritatis suæ culpam retorquere. Quocirca ad decolorandam mutæ fraternitatis infamiam, vim nemine inferente, vel minas intentante, fugam inivit, sicut scriptum est: Fugit impius nemine persequente. » Ad hæc dominus papa inquit: « Parce, frater. » Et Londoniensis: « Domine, parcam ei? » Et dominus papa: « Non dico, frater, quod parcas ei, sed tibi. » Ad hanc igitur apostolicam vocem et tubam sensus Londoniensis infatuatus est a Domino, ita demum quod amplius nutire non potuit. Exceptit illum proinde sermonem facundus Hilarius Cicesterensis episcopus, magis de sua confidens eloquentia, quam de justitia et veritate: quod ex post facto innotuit. « Domine pater, inquit, interest beatitudinis vestræ,

quod perperam actum est in perniciem universitatis, ad pacis et concordie debitum statum citius revocare, ne unius hominis immoderata præsumptio multorum stragem et Catholicae Ecclesiae scissuram possit procreare. Id parum attendit dominus Cantuariensis, dum relicto maturiori consilio se solum consuluit, et sic sibi et suis, regi et regno, populo et clero graviores labores procrearet et angustias. Et certe virum tantæ auctoritatis id non decuit, nec oportuit, nec aliquando oportuebat. [Ita grammaticizabat Hilarius Cicerstensis dicendo : Oportuebat.] Insuper suos, si saperent, non oportuebat sibi in talibus præbuisse assensum. » Audito igitur, qualiter facundus ille grammaticæ prosiliret de portu in portum, soluti sunt in risum universi. Inter quos unus prorumpens in vocem inquit : « Male tandem venisti ad portum. » In quo verbo episcopum illum ita infatuavit Dominus, quod de cætero factus est mutus et elinguis.

Eboracensis autem, priorum ruinam attendens, animi impetum studuit temperare. « Pater, inquit, mores Cantuariensis et studia nemini innotuere plusquam mihi. Et id animi ejus novi propositum ab initio, ut quod semel arripuerit ex sententia, ab eo facile non possit avelli. Quare facilius credi oportet ipsum in hanc obstinationem de sua levitate de more incidisse. Et aliam non video viam ad ejus correctionem, nisi ut vestra discretio ad id efficiendum manum apponet graviorem. Intelligenti satis dictum puto. »

Episcopus Exoniensis subjunxit : « Pater, non oportet multum in his immorari. Causa ista in Cantuariensis absentia non habet terminari. Petimus igitur legatos, qui inter dominum regem et Cantuariensem possint causam audire, et audiam definire. » Et subiecit. Nec post eum aliquis episcoporum amplius addidit. Id autem videns comes de Arundel, stabat enim in ordine suo cum multitudine militum, postulat audientiam. Et facto silentio inquit : « Domine, quod locuti fuerunt episcopi, nos illitterati penitus ignoramus. Ideo oportet nos edicere, quomodo possumus, ad quod sumus missi : non ad hoc utique ut contendamus, vel cuiquam faciamus contumelias, in conspectu maxime tanti viri cujus nutui et auctoritati se de jure totus inclinat mundus, sed ad hoc procul dubio venimus, ut domini regis nostri devotionem et amorem, quem circa vos gerere consuevit, et adhuc gerit, in præsentia vestra et totius Romanæ Ecclesiæ vobis præsentemus. Per quos, inquam ? Per majores et nobiliores, quos habere potuit in omnibus terris subjectis sibi, hoc est, per archiepiscopos, episcopos, comites et barones. His superiores in sua potestate non invenit : et si invenisset, utique destinasset ob reverentiam vestram, et sanctæ Romanæ Ecclesiæ. His adjicimus, quam Paternitas Vestra satis experta est in novitate suæ promotionis, domini regis fidelitatem et devotionem, dum se ipsum, suos, et sua

omnia vestræ penitus exposuit voluntati : et pro certo sub catholica fidei unitate, quam habes in Christo regere, ut credimus, fidelior eo non est, vel Deo devotior, seu ad eam, ad quam assumptus est, pacis conservationem moderatior. Nihilominus et dominus Cantuariensis archiepiscopus in suo gradu et ordine æque instructus, in his, quæ ad eum pertinent, providus et discretus, licet ut quibusdam visum est nimis acutus. Et nisi ista, quæ nunc est inter dominum regem et dominum archiepiscopum esset dissensio, regnum et sacerdotium mutuo congraderent ad invicem paci et concordie sub principe bono, et pastore optimo. Est igitur hæc nostra supplicatio, ut ad tollendam istam dissensionem, et ad pacis et amoris reformationem velit Vestra Gratia invigilare attentius. » Hæc itaque comes eleganter, sed in sua lingua proposuit, ita quod communiter ab omnibus plurimum commendaretur ejus modesta discretio.

His etiam dominus papa invigilanter intendens respondit : « Scimus, fili comes, et memoriter recolimus ex quanta devotione rex Angliæ plurima et largiora nobis contulit beneficia, cui data opportunitate quantum poterimus in desiderio animæ habemus præ meritis respondere. Sed quia legatos postulastis, habebitis et legatos. » Osculato pede domini papæ proinde recesserunt credentes se obtinuisse in causa, eo quidem quod spem sibi dabant cardinales posse corrumpi ; ideo ex consilio rediit Londoniensis inquirens a domino papa in qua potestate venirent cardinales. « In debita, inquit dominus papa. — Imo, ait dominus Londoniensis, id petimus ut possint causam decidere, appellatione remota. — Hæc est, inquit dominus papa, gloria mea, quam alteri non dabo, et certe cum judicandus fuerit, a nobis judicabitur quia nulla permittit ratio, et eum in Angliam remittamus ad adversarios et inter inimicos judicandus. »

Hæc audiens pars adversa, frustrata spe quam acceperat, recessit indignans quid receperit in responsis domino regi renuntiatura.

His ita gestis Senonis, ibi enim dominus papa fuit, et illis redeuntibus, dominus Cantuariensis cum suis accessit ad curiam, tepide quidem exceptus a cardinalibus, quorum nares odor lucri quæstus causa infæcavit, ad domini tamen præsentiam est intromissus [qui venientem ad se paterna suscepit benignitate, super vexatione ipsius multimoda, et peregrinatione tam periculosa et dura paterne compatiens]. Dumque hæc et illa verbo tenus ibi agerentur, demum recepit in mandatis in crastinum exsilii sui causas coram fratribus exponere. Sequenti ergo die demandatur sibi præsentiam coram domino papa exhibere, et dum quæreretur inter sodales, quis eorum causam hanc exponeret, singulis sese excusantibus, verbi pondus apud archiepiscopum resedit. Doctus igitur a Deo, et per se impræmeditatus, dum primus a domino papa sederet, et pro-

pler reverentiam vellet surgere, jussus residendo causam edisserere, sic incipit : « Licet non multum sapientes, nec tamen usque adeo sumus fatui, ut regem Angliæ, suos et sua pro nihilo relinqueremus. Nam si vellemus suæ per omnia placere voluntati, in sua potestate vel regno non esset qui nobis non obediret pro libito. Et dum sub hac conditione ei militavimus, quid fuit quod nobis non successit ad votum? Ex quo vero aliam ingressi sumus viam, et facti sumus memores professionis et obedientiæ, quam pro Deo suscepimus, quem ad nos habuit, tepuit profecto prior affectus. Adhuc autem si ab isto proposito vellemus resilire, ad ejus recuperandam gratiam nullius personæ egeremus interventu. Verum, quia Cantuariensis Ecclesia sol solet esse occidentis, et in nostris temporibus offuscata est claritas, quodlibet tormentum, sed et mille mortis genera, si tot occurrerent, libentius exciperemus in Domino, quam sustineremus sub dissimulatione his diebus mala, quæ patitur. Porro ne videar curiose vel obtentu vanæ gloriæ hæc inchoasse, expedit ut oculata fide constet de affectu. » Et producens scriptum, in quo continebantur consuetudines illæ, de quibus contendebatur, cum lacrymis inquit : « Ecce quæ statuit rex Angliæ contra libertatem Ecclesiæ Catholicæ. Si hæc licet dissimulare sine dispendio animæ, vos videritis. »

Quibus perlectis moti sunt omnes usque ad lacrymas. Nec ii se continere poterant, qui prius pro viribus adversabantur, communi voce Deum laudantes, dum vel unum sibi reservavit, qui pro Ecclesia Dei in illa tempestate ausus fuit ex adverso ascendere. Et qui ante videbantur super hac causa varie disceptare, jam in unam convenere sententiam, in persona Cantuariensis archiepiscopi universali Ecclesiæ succurrendum. [Verum dominus papa, lectis et relectis, et diligenter et attente auditis et cognitis singulis consuetudinibus, acerrime motus statim excaudit in archipræsulem, arguens eum et dura increpans, quod in illarum non consuetudinum, sed tyrannicarum usurpationum assensu ipse; ut ibi confessus est, cæterique episcopi sacerdotio suo renuntiaverint, et Dei Ecclesiam ancillaverint: asserens multo satius omne sustinuisse discrimen, quam tantis legis Dei subversionibus præbuisse assensum. Et

adhuc esses in Anglia, a nobis quæsisisti et inventi de clementia nostra absolutionis beneficium. Unde et dignum est, ut nos tibi indulgeamus, aut in tuis adversis clementiæ nostræ consolationem et gratiam præ cæteris personis ecclesiasticis tanto plenius et affectuosius sentias, quanto pro libertate Ecclesiæ, et pro fide et devotione vestra majora reliquisti, et graviora perpeusus es. » Et ita vir apostolicus archipræsulem primo paterna severitate objurgans, et maternæ consolationis dulcedinem reparans tunc dimisit.

Postera vero die in secretiori thalamo cum domino papa cardinalibus residentibus, adfuit et dominus Cantuariensis, hæc inquit : « Patres mei et domini, mentiri nemini licet alicubi, nedum coram Deo et vestri præsentia, unde volens sed et gemens fateor, quod has Anglicanæ ecclesiæ molestias mea miserabilis culpa suscitavit. Ascendi in ovile Christi, sed non per ipsum ostium, velut quem non canonica vocavit electio, sed terror publicæ potestatis intrusit. Et licet hoc onus suscepimus invitum, tamen ad hoc me induxit humana, et non divina voluntas. Quid igitur mirum, si mihi cessit in contrarium. Verum si ad regis comminationem, ut coepiscopi mei pernasere instantius, renuntiasset episcopalis auctoritatis mihi indulto privilegio, ad principum votum et voluntatem catholicæ Ecclesiæ perniciosum relinqueretur exemplum. Distuli igitur usque ad vestri præsentiam. Nunc autem recognoscens ingressum meum minus canonicum, et timeus proinde exitum mihi provenire deteriorem, videns etiam vires meas oneri impares, ne gregi inveniar præesse ad ruinam, cui datus sum qualitercunque in pastorem, in manu tua, pater, archiepiscopatum Cantuariensem resigno. » Et flevit cum singultu, sed et dominum papam et omnes qui aderant flere compulit.

Imo et hæc audiens quis poterit se continere a fletu? Seorsum igitur archiepiscopo sedente cum suis in hoc verbo scandalizatis, nimirum qui jam cœperant desperare, dominus papa super his cum cardinalibus cœpit conferre. Hinc inde varia et diversa est orta sententia. His visum est oblata occasione regis iram sedari posse facilius, dum in alia persona ecclesiæ Cantuariensi conciliaretur, et beato Thomæ possit alias competentius provideri. Hi siquidem erant ex pharisæis. Aliis autem qui apertos habebant oculos visum est in diversum. Quasi is qui pro tuenda Ecclesiæ libertate summo periculo et discrimini, non solum divitias et gloriam, dignitatem et auctoritatem, sed et vitam exposuit, ad regis libitum deberet suo jure privari: sicut forma fieret aliis in consimili causa regibus resistendi, si ei sua justitia servaretur illasa. Sic eo cadente caderent universi episcopi, ut nullis futuris temporibus auderet quis obviare principis voluntati: et sic vacillaret status catholicæ Ecclesiæ, et Romani pontificis deperiret auctoritas. « Expedit igitur, inquit, hunc restitui etiam invitum, et ei, qui pro nobis dimicavit, omnimode succurrendum. » Placuit omnibus hæc sententia, præterquam pharisæis.

Vocato igitur beato Thoma cum suis, dominus A papa hæc ait ex sententia : « Nunc demum, frater, nobis liquet, quem habuisti et habes zelum pro domo Domini, quoniam sincera conscientia te ipsum statuisti murum ex adverso. De tuo ingressu cum puram feceris confessionem, resignatione facta, qua potuit et debuit dilui culpa delicti, jam secure de novo poteris de manu mea pontificalis officii curam recipere, dum te in integrum ducimus restituendum. Et merito, quem multiplici genere tentationis virum probatum novimus, providum et discretum, Deo et hominibus carum, nobis et sanctæ Romanæ Ecclesiæ per omnia fidelem. Et sicut nostræ persecutionis factus es particeps et consors individuus, ita tibi, Deo auctore, in nullo deesse poterimus, quandiu in hoc corpore vitalis duraverit spiritus. Verum hæcenus deliciis affluens, ut de cætero discas esse, quod debes, pauperum consolator, nec id doceri poteras, nisi docente religionis matre, ipsa paupertate, pauperibus Christi te duximus commendandum, huic, inquam, abbati Pontiniacensi (erat enim ibi præsens ex conducto), et suis fratribus educandum. Non, inquam, educandum splendide, sed simpliciter, ut decet exsulem, et Christi athletam, inter quos cum paucis et necessariis, reliquis sociis per amicos divis, oportet te ad tempus conversari, donec aspiraverit dics consolationis, et tempus pacis desuper ad nos descenderit. Interim autem forti animo esto, et his qui pacem perturbant resiste viriliter. »

Accepta itaque benedictione, beatus Thomas cum paucis familiaribus, cæteris, ut dictum est alias destinatis, Pontiniacum ingressus, iudicavit se non digne curam pastorem de manu apostolica accepisse, nisi etiam et habitum religionis reciperet : nimirum qui in episcopali sede primogenitos filios suos monachos haberet regere, et a prima fundatione Cantuariensis Ecclesiæ ipsius pastores et episcopos didicerit fere omnes monachos fuisse, nec secundum veterum historiarum aliquam regni scissuram vel translationem accidisse, nisi dum quis alterius professionis Cantuariensi Ecclesiæ præfuerit. Missis igitur proinde nuntiis, remisit ei dominus papa habitum monachalem, quem ipse benedixit, de laneo utique panno grosso et crudo. Unde et nuntiis injunxit dicens : « Dicite domino Cantuariensi, quod habitum ei misimus, qualem habuimus, non qualem vellemus. » Pontiniacensis vero abbas, dum cum paucis beatum Thomam illo indueret habitu seorsim et secreto, astans etiam ibidem quidam familiaris, is utique qui pridie illud problema proposuit apud Clarendonam, scilicet : Quid virtutis sibi retinuit, qui conscientiam prodidit et famam, dum vidit in ipso habitu capucium minoris quantitatis, quam ut toti congrueret, ait : « Fuit tamen id serio factum, utrum regulariter nescio. Liqueat tamen dominum papam minus congrue adnasse cucullæ capucium. » Subridens autem beatus Thomas inquit : « Provide, ne et tu possis iterato mihi illudere, sicut fecisti pridie. » Et ille : « Ubi et quando, domine ? » Et archiepiscopus inquit : « Nudiustertius,

dum sacris vestibus induerem ad missarum solemniam, et zona præcinctus viderem suffarcinatus, requisivisti : Unde posteriora mea inflata fuissent ? Si igitur a scapulis dependens capucium majus et ibi prætenderet formam inflationis, nihilominus posses deridere gibbosum. Idcirco cautius mihi est contritalium insultationes provisum. » Utebatur revera archiepiscopus cilicio a nudicollo usque ad poplites clam ipsius etiam familiaribus ; et dum cingeretur arctius, rigor cilicii se extendebat, et videbatur grossior, qui fuit macilentus, sed jucundus facie.

Discurrentibus interim hinc inde nuntiis ad pacis reformationem, tandem placuit utroque dominum papam et regem statuto die et loco ad invicem convenire, ut per mutuum eorum colloquium via pacis possit facilius inveniri. Rex ait ad id se venturum, sed in archiepiscopi absentia ; quia eo præsentem demandat nec domini papæ faciem se visurum. Domino papæ archiepiscopus significat nulla ratione regis tui colloquio sine sui præsentia, cui mores illius hominis noti fuissent : « Sed et citius poterit, ait, apostolica circumveniri religio ex varietate verborum regis, si non adsit sedulus interpres, qui regis mentis propositum ex ipsius animi possit latebris elicere : et si rex infirmiora domini papæ prænoverit, exitus viarum suarum obstruet offendiculis. » Quo accepto, moderata responsione regi renuntiat dominus papa hoc inauditum a sæculis, Romanam Ecclesiam ad alicujus principis nutum quemquam a suo conductu rejicere, maxime pro iustitia exsultantem ; sed et id privilegii et auctoritatis esse indultum apostolicæ sedi, ut exsulis et oppressis subveniat, etiam contra principum iras, et violentos impetus malignorum. Indignantes igitur nuntii recesserunt, hæc regi nuntiaturi. Dominus vero papa Romam reversurus iter ingreditur, quem prosequens archiepiscopus usque Bituricum. Ubi accepta licentia et benedictione regreditur Pontiniacum, amplius domini papæ faciem in carne ista non visurus.

Hæc itaque prosecuti sumus historialiter a concilio de Clarendona usque ad domini papæ recessum de Francia, ad ea quæ interim facta sunt dilucidanda, quia epistolæ interea scriptæ non ita expresse rem gestam explicant. Subsequentibus vero epistolæ singulæ suis locis ita sunt manifestæ usque ad exitum totius negotii, quod minus videantur egere historiali adminiculo, eo excepto quod factum est in regum colloquio, quando Domini Cantuariensis causæ executio a domino papa Simoni priori de monte Dei et Bernardo de Corilo commissa est. Alias enim turbata est pacis reformatio, quia noluit Cantuariensis verbum hoc sub silentio, « salvo ordine meo » præterire, aliquando quia noluit rex osculum dare Cantuariensi sub pacis fœdere : sicut per epistolas suis in locis ordinatas plenius innotescit. Ibi autem sic accidit. Suggestum fuit regi Angliæ dominum Cantuariensem suo se arbitrio omnino velle committere ideoque gratius ejus præsentiam ibi acceptabat.

Igitur multis utriusque regni ad id convenientibus ad pedes regis Angliæ procidit dominus Cantuariensis dicens : « Totam causam, unde inter nos orta est dissensio, tuo committo arbitrio, honore Dei salvo. » Audito hoc verbo, rex statim excanduit inquires regi Franciæ : « Domine rex, attende, si placet. Quidquid Cantuariensi isti displicuerit, dicet honori Dei esse contrarium, et sic sua et mea omnia sibi vindicabit. Sed ne videar honori Dei, vel sibi in aliquo velle resistere, hæc offero. Multi fuerunt reges in Anglia ante me majoris vel minoris auctoritatis, quam ego sum. Multi fuerant ante eum archiepiscopi Cantuariæ, magni et sancti viri. Quod igitur antecessorum suorum major et sanctior fecit antecessorum meorum minimo, hoc mihi faciat et quiesco. » Acclamabatur undique : « Satis rex se humiliat. » Dum archiepiscopus aliquantulum subticisset, rex Franciæ adiecit : « Domine archiepiscopo, vis esse major sanctis viris? vel melior Petro? Quid dubitas? Ecce pax præ foribus. » Ad hæc archiepiscopus regi Franciæ ait : « Verum est, antecessores nostri multo me meliores fuerunt, et majores. Singuli autem suis temporibus, etsi non omnia se adversus Deum extollentia, quædam tamen resecarunt. Et si omnia radicibus tunc exstirpassent, quis nunc adversum nos ignem tentationis hujusmodi excitaret? Quo cum illis probati, digni inveniamur etiam cum illis, laude et gloria. Multo melius nobis Deo consulente actum est, ut sicut in eorum sorte et numero laboravimus, ita et illorum laboris et præmii simus participes. Nec si aliquis eorum forte tepuit vel excessit in aliquo, ejus in hoc temporis vel excessus exemplum sequi tenemur. Petrum etenim Christum negantem arguimus, sed Petrum usque in capitis sui periculum Neronis impetum arguentem omnibus modis commendamus. Sane quia Petrus ei consentire noluit in eo, quod et dissimulare sine animæ suæ periculo non potuit, idcirco inimicorum victor in carne occubuit. Ex talibus pressuris catholica surrexit et crevit Ecclesia. Patres nostri passi sunt, quia noluerunt nomen Christi subicere, et ego, ut hominis gratia mihi restitueretur, Christi honorem deberem suppressere? Absit! ait. » Insurrexerunt itaque magnates utriusque regni, imputantes arrogantiam archiepiscopi impedimentum pacis : uno inter alios comite palam protestante, quia archiepiscopus utriusque regni consilio et voluntati resistit, de cætero neutrius dignus erit auxilio, sed ejectum ab Anglia Francia non recipiat.

Soluta colloquio non sine multorum murmure, rediit ad propria, coexsulibus Cantuariensibus in summa desperatione positis. Consequenter autem rex Franciæ post singula hujusmodi colloquia ad Cantuariensis hospitium descendere consolationis obtentu et reverentiæ. Tunc autem eum nec per se nec per suos vel respexit. Tres igitur dietas in regis Franciæ comitatu ita transit quod nec ad eum rex vel alius ex sua parte accessit, et cum in talibus

A negotiis dominus Cantuariensis solitus fuit a regia liberalitate procurari, post illud colloquium et per id quod diximus spatium exinde nihil omnino sibi fuit exhibitum. Aliquando enim in transeundo Senonum archiepiscopus, aliquando Pictaviensis episcopus, vel aliquis alius super ejus miseria afflictus eum exhibuit ut mendicem, quod plurimum suos perterritum quasi jam omni humano auxilio destitutos.

Tertia vero die peracto illius itinere, dum sedentes in hospitio super his confabularentur ad invicem et secum quærerent quo possent divertere, dominus Cantuariensis jucundo vultu, quasi nihil adversitatis habens, et ad omnes fortunæ impetus invincibilis, moderato risu condolentibus alisit dicens : « Solus impetor, et me cedente non erit qui vos persequatur acrius, nec adeptis amicorum beneficiis, vos qui destituat amplius. Confortamini igitur, et nolite expavescere. » Cui inquirunt : « Miseremur tui magis, dum nescimus quo possis divertere, vir tantæ auctoritatis, a summis et ultimis derelictus amicis. » Archiepiscopus inquit : « Deo nostri curam commitimus. Et ex quo utriusque regni nobis præcluditur aditus, nec ad Romanos latrones consolationis gratia nos expedit recurrere, quippe qui miserorum spolia et sine delectu diripiunt : alia est nobis via procedendum. Audivimus siquidem circa Ararim fluvium Burgundiæ usque ad partes provinciæ liberaliores esse homines. Ad hos ego et unus mecum pedites ibimus, qui visa afflictione nostra forsitan nostri miserebuntur, victualia ministrantes ad tempus, donec nos visitaverit Deus. Potens est Deus et in ultimo miseriæ calculo suis adesse : et infideli deterior est, qui de Dei desperat misericordia. » Et statim adfuit præ foribus Dei miseratio. Accurrit enim quidam serviens regis Franciæ, qui diceret : « Dominus rex vos ad curiam vocat. » Ad hoc ait unus eorum : « Ut ejiciamur a regno. » Archiepiscopus inquit : « Non es propheta, nec propheta filius, noli vacillare sinistra. »

Venientes ergo invenerunt dominum regem cum tristi vultu sedentem, et non assurgentem de more archiepiscopo. Quod factum est in principio triste præsagium. Considentibus illis et adhuc tepide vocatis, diutius facto silentio, rex inclinato capite quasi dolens et invitatus cogitaret ut eos de regno ejiceret, et illis id ipsum timentibus, obortis lacrymis prosiliens cum singultu projecit se ad pedes archiepiscopi, obstupentibus his qui adherant. Archiepiscopo vero se inclinante ad erigendum regem, vix tandem rex ad se reversus præ angustia ait : « Vere, domine mi pater, tu solus vidisti. » Et suspirans præ mœrore repetiit : « Vere, pater mi, tu solus vidisti. Nos omnes cæci fuimus, qui contra Deum tibi dedimus consilium ut in causa tua, imo Dei, ad nutum hominis honorem Dei remitteres. Pœniteo, pater, et graviter pœniteo. Ignosce ergo, et ab hac culpa me miserum absolve. Sed et Deo et tibi me ipsum et regnum meum expono, et ab hac hora promitto, quod tibi vel tuis non deero, quandiu Deo auctore

v. xero. » Rege igitur absoluto, dataque ei benedictione archiepiscopus Senonis ingressus est cum suis in gaudio, ubi eum rex Franciæ regaliter exhibuit usque ad regressum ejus in Angliam.]

Quo audito, rex Angliæ regi Franciæ demandat se mirari plurimum quomodo vel qua ratione de jure posset contra eum fovere archiepiscopum, cum in ipsius regis præsentia ipse se ita humiliarit, ad omnem paratus justitiam, nec per ipsum steterit, quominus archiepiscopus pacem haberet, quam ipse arroganter et contumeliose rejecit. Quocirca ait regem Franciæ tali de cætero in suo regno non debere præstare subsidium, in sui fidelis ignominiam et ruborem. Ad hæc rex Franciæ inquit nuntiis : « Ite regi vestro nuntiantes, quod si rex Angliæ consuetudines avitas quas vocant, licet minus, ut dicitur, legi divinæ congruas, tamen ut ad regiam dignitatem spectantes non sustinet abrogari, multo minus mihi licet jus illius liberalitatis subvertere, quod cum corona regni mihi jure competit hæreditario. Consuevit siquidem Francia ab antiquis temporibus omnes miseros et afflictos, maxime pro justitia exsultantes recipere, et donec pacem habuerit, fovere et tueri. Cujus honoris et excellentiæ gratia, Deo propitio, me vivente ad nullius personæ suggestionem in Cantuariensis exsilio derogabitur. »

Hæc itaque idcirco hic exposuimus, ne series epistolarum interrumperetur, cum ventum fuerit ad

A eum locum ubi epistolæ idem tangunt sed obscurius. Hoc est in quarta parte, ubi prior de Monte-Dei et Bernardus de Corilo domini papæ mandati fuerunt executores designati. Reliquæ vero omnes epistolæ ordine suo et loco rem gestam lucidius declarant, ut ad legentis intelligentiam per se satis sufficiant. Præmittuntur tamen quædam epistolæ quarum obtento, dum contentio ageretur inter regem et beatum Thomam et archiepiscopum Eboracensem, cognito et perspecto quod Cantuariensis prosperitas de facili vinci non potuit : studuit Eboracensis archiepiscopus regis animum adversus Cantuariensem exasperare. Unde et avitis illis consuetudinibus conservandis facilius cessit, ut sic regiam gratiam sibi conciliaret in Cantuariensis confusionem. Ascivit etiam sibi in socium Gilbertum Londoniensem episcopum, qui et ipse diutius aspiraverat ad archiepiscopatum Cantuariensem. Quocirca dum exquisitis dolis et insidiis frustra conatus est Cantuariensem dejicere, sategit propensius, sed versute, si quo modo posset a Cantuariensi Ecclesia Londoniæ pallium transferre. Isti ergo duo cæterorum signiferi et totius perturbationis incentores his de causis, ut dictum est, regis animum induxerunt, ut has quæ sequuntur consuetudines contra ecclesiasticam libertatem statueret et statutas in regno Anglorum promulgaret.

Ita explicuit opus Alani de Vita sancti Thomæ, prout separatim habetur in codicibus manuscriptis. Sunt, vero duo alia fragmenta, in Quadrilogo Lupi reperta, quibus in opere præcedente non bene locum dare potui. eorum prius ad legationem super Angliam a domino papa concessam; secundum vero ad penitentiam regis Henrici spectat.

FRAG. I. De legatione apostolica. Obtinuerat siquidem a viro apostolico apostolicæ sedis legationem super Angliam, et quidem ad cautelam, ut videlicet firmior et magis authentica ecclesiastica quævis sententia haberetur, si deinceps ab eo aut in regnum, aut in regni personas ferretur. Et in primis quosdam de aulicis clericis, qui ratione ordinis seu beneficii ecclesiastici obligati sibi fuerant, et obedientiam exhibere tenebantur distinctissime citavit, ut ad ipsum venire non differrent. Quibusdam etiam in virtute obedientiæ sub ordinis sui et beneficii periculo nonnulla præcepit, sed non venerunt ii, nec paruerunt illi. Unde appellationi non deferens ipsos publice anathematizavit, et anathematizatos denunciari fecit. Et non solum de aulicis clericis, sed et de laicis aulicis : et ob varias causas. Quosdam quia invasores, quosdam tanquam rerum ecclesiasticarum violentos detentores. Et non solum ex his et illis, sed et aliquos etiam ex ipsis propter inobedientiam manifestam, et maxime quia inter regem et ipsum totius dissensionis incentores existerant, quam et fovere in dies non desistebant.

De anathematizatis sic Londoniensis et Saresburiensis primi erant. Anathematizavit etiam Joannem de Oxenfordia, et Richardum de Iwelcestria, qui in hæresim damnatam inciderunt, præstando

C juramentum schismatis. Richardum etiam de Luci et Joselinum de Baillolio, qui pravitatum illarum auctores et fabricatores exstiterunt. Ranulphum etiam de Broc, qui bona Ecclesiæ Cantuariensis, hominesque tam clericos quam laicos cepit, et in captione detinuit. Hugonem quoque de Sancto Claro, et Thomam filium Bernardi, qui bona ejusdem et possessiones absque conniventia sua occupantes detinuerunt. Omnesque qui de cætero in possessiones et bona Ecclesiæ contra voluntatem suam et consensum manus violentas extenderant. Et hi quidem anathematizati ex aulicis de magis familiaribus et consiliariis regis erant. Unde et fere jam quotquot in aula erant, aut nominatim excommunicati erant, aut excommunicatis participando, quos evitare nec poterant nec licebat, adeo ut vix in capella regis esset, qui in missa pacis illud osculum sacramentale regi offerret, nisi excommunicatus ex nomine, vel ex participatione.

FRAG. II. De penitentia regis. Rex autem et legati primo conveniunt apud Gorham, die Martis ante Rogationes, ubi invicem recepti sunt in osculo pacis. In crastino venerunt Saviniacum, ubi archiepiscopus Rothomagensis, et multi episcopi et proceres conveniunt. Cumque ibidem de pace Domini tractatum esset, quam rex secundum mandata eorum

absolute jurare renuit, rex ab eis cum indignatione recessit in hæc verba: « Redeo in Hiberniam, ubi multa mihi incumbunt. Vos autem in pace ite per terram meam, ubi vobis placuerit: et agite legationem, sicut vobis injunctum est. » Sicque ab eis discessum est. Tunc cardinales, habito arctiori consilio, revocarunt episcopum Lexoviensem, et archidiaconum Pictaviensem, et archidiaconum Saresberiensem, et per eos laboratum est, quod sexta feria sequenti rex et cardinales apud Abrincas conveniunt, ibique omnino conventum est inter eos, ita quod rex, quidquid ex parte cardinalium ei propositum est, benigne suscepit et concessit. Sed quia rex filium suum voluit adesse, ut quæ pater permetteret, ille etiam asseveraret, terminus ei dilatus est usque ad sequentem Dominicam proximam, videlicet ascensionis Domini. Tunc in publica audientia rex manu sua tactis sacrosanctis Evangelis juravit, quod nec mandavit nec voluit quod archiepiscopus Cantuariensis interficeretur; et quod audita morte ejus plus inde doluit, quam lætatus est. Addidit etiam ex propria voluntate, quod de morte patris vel matris suæ nunquam tantum doluit. Juravit etiam, quod quantamcunque pœnitentiam ei cardinales injungerent pro satisfactione, plenarie exsequeretur. Dicebat enim coram omnibus se intelligere, quod causa esset mortis archiepiscopi, et quidquid factum fuit, propter eum factum esset, non quia ipse mandaverit, sed quia amici et familiares videntes turbationem vultus ejus et oculorum, cognoscentes etiam dolorem cordis, et sæpe audientes querula verba ejus de archiepiscopo, injuriam ejus absque conscientia ipsius ulcisci parabant. Et ideo cum omni humilitate et devotione ad omnia, quæ legati juberent, se expositum asserebat.

Tunc injunctum est ei a legatis, quod inveniret decentes milites per annum integrum sumptibus suis, videlicet unicuique militi trecentos aureos in terra Hierosolymitana contra paganos, secundum dispositionem Templariorum.

Secundo, quod prava statuta de Clarendune, et

A omnes malas consuetudines, quæ in diebus suis in ecclesias Dei inductæ sunt, penitus dimitteret. Si quæ autem fuerunt malæ ante tempora sua, illas juxta mandatum domini papæ, et consilio religiosorum virorum temperaret.

Tertio, quod Ecclesiæ Cantuariensi omnem suam integritatem in terris et in aliis rebus restitueret, sicut fuit anno, antequam archiepiscopus iram regis incurreret. Et quod omnibus, quibus offensus fuerat propter archiepiscopum, pacem et amorem redederet, et possessionum suarum plenitudinem.

Quarto, quod si necesse esset, et dominus papa ei mandaret, iret in Hispanias ad liberandam terram illam a paganis.

B Injunxerunt etiam ei secretius jejunia et eleemosynas, et alia quædam, quæ ad communem audientiam non pervenerunt.

Ad hæc omnia rex benignissime assensum præstitit, ita quod coram omnibus diceret: « Ecce, domini legati, corpus meum in manu vestra est. Scitote pro certo, quia quidquid jusseritis, seu proficiscendo Hierosolymam, sive Romam, sive ad Sanctum Jacobum, vel quidquid id sit, paratus sum obtemperare. » Unde fere cuncti, qui aderant, videntes humilitatem et devotionem ejus, vix poterant lacrymas continere. His expletis, ne quid ad boni consummationem deesset, deduxerunt eum legati ex propria regis voluntate extra ostium ecclesiæ, ibique flexis genibus, non tamen exutis vestibus, neque

C verberibus appositis, est in ecclesiam introductus. Et ut aliqui de regno Francorum hæc ita processisse cognoscerent, statuerunt quod archiepiscopus Turonensis, et suffraganei ejus coram rege et legatis presentiam suam exhiberent apud Cadomum prima die Martis post ascensionem Domini.

Quod rex juravit, filius ejus manu sua firmavit in manu domini Alberti cardinalis, se ex parte sua observaturum, et si rex pater morte vel alia causa manifesta prædeditus pœnitentiam prædictam complere non posset, quod ille perficeret.

ADDITAMENTA DUO

Ad libellos Alani Teok. et Joannis Salisb., quorum prius in cod. msto biblioth. Mus. Brit. sub numero addit. 11506, f. 66: posterius in alio cod. ejusd. bibliot. (addit. 10050) occurrit.

ADDIT. I

Quin ad stabilendam hujus historiæ fidem certo quodam argumento hic inserendum visum est vetus controversia divi Thomæ pro Ecclesiæ libertate fragmentum.

Quinta die Natalis Domini circiter horam vespertinam, dum archiepiscopus cum clericis suis resideret in thalamo, Willelmus de Tracy, Reginaldus filius Ursi, Hugo de Morevilla, Ricardus Brito, de Normannia venientes tanquam foris invecti, subito tha-

D lamum irruerunt, denuntiantes ex parte regis moram in Normannia facientis, ut episcopos Angliæ suspensos officio restitueret, excommunicatos absolveret. Quibus respondit non esse judicis inferioris, ut superioris sententiam solvat et quod nulli hominum liceat infirmare quod apostolica sedes decreverit. Attamen si Londoniensis et Saresberiensis episcopi suo mandato se parituros juramento firment, eos pro pace Ecclesiæ et reverentia domini regis absolvet. Illi ira incandescentes et scelus nefarium quod in mente conceperant ad effectum

perducere properantes cum impetu recesserunt. Archiepiscopus vero, monentibus clericis suis et hora diei vespertina urgente, majorem intravit ecclesiam, vespertas decantaturus. Quatuor itaque nefandi satellites supradicti, interim militaribus armis induti et vestigio subsequenti sunt archiepiscopum. Qui cum venissent ad ecclesiam, ostia ipsius ecclesiæ (sicut præceperat archiepiscopus), invenerunt aperta. « Neque enim, ait, Ecclesiam Dei quæ cunctis universaliter debet esse refugium turbato ordine commutabimus in castellum. » Turbis undique confluentibus, prædicti quatuor ecclesiam irreverenter ingressi, ceperunt clamare : « Ubi est proditor regis ? Ubi est proditor regis ? Ubi est archiepiscopus ? » Cum autem archiepiscopus nomen audisset archiepiscopi, a tercio gradu presbyterii vel quarto, quem jam conscenderat, lis obviam regressus est dicens : « Si queritis archiepiscopum, ecce me in promptu habetis, » quibus acerrima proponentibus ait : « Ego mori paratus sum, vitæ præferens assertionem justitiæ, libertatem Ecclesiæ; rogo tamen ut mei non sint obnoxii pœnæ, sicut nec fuerunt incitatores causæ. » Dum autem nefandi satellites strictis insurgerent gladiis, ait : « Deo et beatæ Mariæ et sanctis hujus ecclesiæ patronis et beato Dionysio commendando me ipsum et Ecclesiæ causam. » Immolatus itaque coram altari, lethale vulnus accepit ea corporis parte quam olei sacri perfusio specialius Domino consecraverat, et qui pro libertate cleri toties caput exposuit et oculos erexit ad cælum, inclinato capite percussus occubuit.

Robertus de Broc et sui complices archiepiscopi suppellectilem, clericorum vestes et ministrorum, officinarum etiam utensilia diriperunt. Equos omnes quos in stabulo repererunt dominico datos in rapinam celeriter abduxerunt. Corpus autem archiepiscopi quod a dextris sancti Benedicti decubuerat in pavimento ante majus altare sub ipsius diei crepusculo deportatum est. Ubi quod ad notitiam cubicularii solius devenerat astantibus venit in lucem. Licet enim archiepiscopus habitum monachalem, quem a tempore multo satis occulte susceperat, canonicali habitu suppressisset, carnem attritam cilicio femoralibus ciliciis edomare curabat. Et ut breviter aliqua complectamur, quæ divinitus ordinata concurrerant, quæ archiepiscopus ob tuendam Ecclesiæ libertatem, labores, exilium, propinquorum proscriptionem, mortem etiam sustinere decreverat; ut negotium tale suo Marte discurreret, die Martis recessit a curia regis apud Normanniam, ut superius diximus. Die Martis transfretavit, exilium sibiurus in Gallia. Consilio domini papæ revertens in Angliam die Martis appulsus est. Die Martis occubuit manibus impiorum confossus. Sequenti die Mercurii summo mane nefandus rumor increbruit quod nefandi carnifices archiepiscopi corpus abstrahere a sacro loco condixerant et canibus decerpendum vel avibus extra muros projicere. Abbas itaque de Boxeleia, prior et conventus Cantuariensis Ecclesiæ

A prudentum consilio statuerunt ut id maturiori traderent sepultura, quod nec aquis abludendum aliquibus videbatur, præsertim cum longa abstinencia fuerit clarificatum, abstersum cilicio, proprio purificatum in sanguine.

Postquam rex Anglorum appulit in Normanniam, statim cum festinatione accessit ad dominum Albertum et Theodwinum cardinales, et apostolicæ sedis legatos ad partes illas a domino papa transmissos. Post longos tamen et inmensos tractatus primo habitos apud Saviniacum, apud Abrincas in præsentia legatorum juravit dominus rex mortem gloriosissimi martyris Thomæ nec voluntate sua nec conscientia perpetrata fuisse, nec suo artificio perquisitam. Sed quam malefactores ex verbis quæ iracundiæ calore succensus minus caute protulerat, occasionem sumpserant virum sanctum interficiendi, cum omni humilitate absolutionem ab iis petiit et impetravit. In facie igitur Ecclesiæ solemniter absolutus, juxta voluntatem et mandatum cardinalium promisit quod ab instanti festo Pentecostes usque in annum tantam pecuniam daret, unde ad arbitrium fratrum templi ducenti milites ad defensionem terræ Hierosolymitanæ per annum perquirerentur. Promisit etiam quod licebit appellationes libere fieri, et quod consuetudines quæ suis temporibus contra libertatem Ecclesiæ fuerant introductæ revocabuntur in irritum, et quod possessiones Cantuariensis Ecclesiæ quæ post egressum sanctæ recordationis archiepiscopi fuerant ei ablata restituerentur in integrum. Et quod clericis et laicis utriusque sexus, qui pro archiepiscopo Thoma de regno exierant, cum pace regis libere redire licebit et bona sua recipere, et hoc totum promittere et facere ex parte domini papæ regi injunctum est in remissionem omnium peccatorum suorum.

Rex filius regis idem quod pater suus juraverat et promiserat, juravit et promisit. Et de hac re hactenus.

ADDIT. II.

Miles quidam nobili genere ac dives Walternus nomine de Enicurt, percussus lepra, Cantuariam venit: acceptaque licentia a priore, tribus noctibus sepulcrum sancti Thomæ frequentavit. Cui in somnis D sanctus apparuit, et caput ejus utraque manu amplexatus est ac disparuit. Miles vero evigilans ab eo qui fuerat omnino alium se sentiens, gratias egit Deo et ejus sancto martyri, et mane monachorum capitulum ingressus, audientibus eunctis, se toto corpore melioratum clara voce asseruit, acceptaque fratrum societate, in sua gaudens et exultans est regressus.

Mulier quædam ejus oculi diutina caligaverant cæcitate, oculos linivit sanguine sancti, lumenque recepit.

Alia mulier languore gravi biennio pressa, lectulum foverat : quæ modicum sanguinis sancti Thomæ aque immiscuit, quæ hausta continuo totam morbi sui materiam evomuit.

Cæcus et mutus natus, eadem usus medicina, cum A oculorum acumine integram perfectamque recepit loquelam.

Cæcus quidam in civitate Cantuariæ bene notus quem et ipse vidi, panniculo sanguine martyris in-
tincto oculos fricuit, eademque hora est illuminatus.

SANCTI THOMÆ

CANTUARIENSIS ARCHIEPISCOPI ET MARTYRIS

VITA SEXTA

AUCTORE WILLELMO CANTUARIENSI.

(Hujus tractatus fragmenta tantum habemus, ea scilicet quæ in Quadrilogo exstant.)

FRAG. 1. Thomas Londoniensis urbis indigena, B parentum mediocrium proles illustris, quasi ex miricis cedrus excrevit, et majores radice sua ramos expandit. Quem secundum utrumque hominem multiplici naturalium gratia bonorum bonitas ditavit divina, ut in ministerium magnum vas videretur excisum, et ex naturæ beneficiis futurus prædicaretur antistes. Nam sermone jucundus erat et modestus, quem blandum pueri, comem juvenes, gratum senes mirarentur. Procerus ad elegantiam, morigeratus ad exemplum, prudens ad sapientiam, facie juvenilem venustatem præferebat, et virilem gravitatem. Postquam vero litterarum studiis traditus liberales artes attigit, quatenus lascivia ætatis et angustia temporis permisit, in illis profecit.

FRAG. 2. Matre vero defuncta, sibi patrique relic- C tus, quem incendia crebra attenuabant, vicesimum secundum ætatis annum otio impendit. Et tandem uni civium vice tabellionis adhæsit. Liberalium denique disciplinarum scholas egressus, ad curiales se transferens occupationes, cœpit in florem secularis prudentiæ pubescere, et fructum discretionis polliceri.

FRAG. 3. Qui videntes eum in necessitatibus expediendis prudenter agentem, et in consilio providum, cum eo sociale fœdus inierunt, condicentes, ut de impetendis sibi ecclesiasticis beneficiis suffragium suum communicarent. Erant autem tres: Rogerius Neustriensis, Joannes Cantuariensis, Thomas Londoniensis. Itaque primas pauca agebat, quibus D omnes vel unus ex istis non interesset.

FRAG. 4. Quomodo cancellarius factus est. Succedente itaque post modicum Henrico, duce Normanniæ et Aquitanie, Stephano Anglorum regi in regnum, elaboratum est ab antedicto archiepiscopo, suspectam habente novi regis adolescentiam, quem pravorum hominum consilia pervertere moliebantur, ut archidiaconus suus regis collateralis et cancellarius efficeretur, cujus ope et opera novi regis, ne sæviret in Ecclesiam, impetum coliberet, et consilii

sui temperaret malitiam, et reprimeret audaciam officialium, qui sub obtentu publicæ potestatis, et prætextu juris, tam Ecclesiæ quam provincialium facultates diripere conspiraverant. Cernebat quippe pontifex juvenem, ejus mores et industriam in variis jam rerum eventibus expertus fuerat, in agendis strenuum, in consiliis fidum, in dubiis securum, in adversis magnanimum, in apparatu magnificentum, in largiendo munificum, ad jussa promptum, in obsequio sedulum, in omni denique opere providum et circumspectum. Unde et talem aulam dignum, et aulæ gratum futurum, nec immerito arbitrabatur, sperans exinde nihilominus eo procurante inter regnum et sacerdotium deinceps pacis gratiam et unitatis vinculum firmitus observari. Agente igitur et procurante pontifice Thomas aulam ingreditur, et tribuente rege officium cancellariæ suscepit.

FRAG. 5. Qualis fuit in cancellaria. Archilevita igitur aulam ingressus, et in aula, ut diximus, cancellariæ officio mancipatus, levitiam pro tempore exiit, et cancellarium induit. Regis siquidem se conformans moribus, pariter nugis vel seriis intendere, pariter venari, et idem prandendi, dormiendique tempus observare satagebat. Ad hæc curiales facetias amplecti, numerosa clientela gaudere, gloriam quærere, popularis auræ flatibus delectari. Nam, ut de suppellectili taceam, frenis utens argenteis, spumosis thesaurum lupatis inferebat, mensas et expensas comitum antecedeat, ut ex altero parum archidiaconi videretur reminisci, ex altero maleficiis putaretur uti. Verumtamen licet ei mundus in omnibus lenociniis suis adulari et applaudere videretur, tamen quod rarius accidere solet, in affluentia rerum mirandus et imitandus erat corporis castitate, ut secundum vanitatem et castitatem derisorem beati Martini Bricium videretur exhibere. Et quia tempus admonet, libet interim quod occurrat expedire. Erat in villa Staffordiæ usque regales delicias mulier pulchra, ad quam rex consuetudinem habuisse dicebatur. Quæ quia cancellario eo loc-

adventanti xenia trans mittebat sæpe et multa, æstimabat oppidanus, qui eum hospitio susceperat, quod mulier eum provocaret ad amplexum, novumque sibi procuraret amatorem, quæ prope contemptum, minus solito fruebatur amore. De quo volens certiorari, in tempeste noctis silentio, sumpta lucerna, clam ad hospitis sui cubiculum ingressus est. Quem videns immotum, suspicabatur quod ad eam transisset. Et extollens lumen vidit ante lectum virum procumbentem, pedesque et tibias discooper tum, qui post geniculationes et orationes lapsus fuerat in somnum : et factum est, ut religiosus inveniretur, qui luxuriosus putabatur, fors an ostendente Domino terneritatem nostram, qui facile judicamus hominem, nescientes quid sit in homine.

FRAG. 6. *Quibus obsequiis regis gratiam sit adeptus.* In omnibus autem lenociniis mundi blandientis, et prosperitatis aridentis applausu memor Thomas conditionis suæ, et oneris sibi impositi, quotidie, hinc pro domini sui regis salute et honore, inde pro necessitate Ecclesiæ et provincialium contra bestias curiæ pugnavit, et quatenus regia severitas et reverentia permisit, contra regem contendens, tanquam quodam futurorum præ sagio sub pacis tempore dimicabat in acie.

FRAG. 7. Rex autem videns enim officium suum prudenter agentem, et fidelissimum sibi, primæ sedi Anglorum præficere cogitavit, credens ipsum tanti quidem, honoris fastigio bene sufficientem, quem toties magnanimum in magnis periculis expertus erat, speransque suis hæredibus ad adeundum regnum eum profuturum, si se fatalis dies rebus humanis immature eximeret, se vero per eum ecclesiastica, ut sæcularia, negotia pro libitu gesturum, si vita diuturniori frueretur.

FRAG. 8. Solus tamen episcoporum Londoniensis oblocutus est. Sed qui nullis juvabatur studiis, et sua, non quæ Jesu Christi, quæsisse videbatur, ea facilitate sententia plurimorum convinci meruit, qua contradicere præsumpsit.

FRAG. 9. Consecratus igitur beatus Thomas, ut eum sacramento rem sacramenti consequeretur, veterem hominem renovare disposuit. Unde tanquam jam transformatus in virum alterum, factus est abstinentior, vigilantior, frequentior in oratione, sollicitior in prædicatione : æstimansque rectum renovationis progressum a se ipso incipere, tunc recte se aliis dominari posse, si sibi ipsi prius didicisset imperare, corpus suum servituti subiciens docuit ancillari, spiritum dominari, habituque monachali cum cilicio suscepto, spiritualem hominem, quem sub honestate tamen vestium oculis hominum eximebat, meritis implebat. Paucisque consociis sub lorica fidei militabat, gaudens quod in triplici veste triplicem personam gereret : exteriori clericum exhiberet, interiori monachum occultaret, intima eremitæ molestias sustineret; gaudens quod exteriori mundum falleret, interiori fratribus suis se conformaret, intima motus illicitos temperaret. Nam

A a quodam cœnobita Cantuariensis Ecclesiæ sanctissimæ conversationis acceperat, cui Dominus in visione locutus fuerat, quod si monachum indueret, Dominum in negotiis propitium et coadjutorem mereretur. Gaudensque, quod per hujus habitus suspensionem duorum prædecessorum suorum vitaret excidium : Stigandi scilicet et Elfsni, ex quibus Stigandus in clericali habitu apostolica censura dignitate privatus vitam in carcere finivit, alter autem Alpino frigore congelatus, et scissi jumentis stercore pedes involutus, non est permissus sacra patrum monachorum sede non monachus insidere.

FRAG. 10. Et inde seminarium sumpsit : nam cum primas onere pastoralis curæ premeretur, mittens regem rogavit cancellarium sibi providere, quia ipse vix uni, ne dum duobus officiis poterat sufficere. Secundam vero causam iræ dedit : nam publicæ potestatis ministri per regionem Anglicanam de consuetudine sibi de singulis hidis, ut verbis comprovincialium utar, pecuniam colligunt, tanquam laboris mercedem, quem tuitioni patriæ impendunt. Quam pecuniam cum rex tanquam redditum nitetur in fiscum redigere, obstitit primas, dicens non oportere pro reditu computari, quod suo et aliorum arbitrio daretur. Sed et tertium fuit, quod iram regis accendit.

FRAG. 11. Accidit post modicum episcopum Lexoviensem reconciliandi gratia regem ex transmarinis ad misse. Nam ab amicitia ejus exciderat : cui, fors an ut recuperaret gratiam, quam perdididerat, consilium dedit, utinam non in læsionem nominis sui, ut ad se partem cleri converteret, ne prævalerent adversus eum, dum simul quasi conserta acie starent, et communicato consilio atque suffragio sibi subvenirent. Igitur elaboratum est, ut in ita unitas Ecclesiæ scinderetur, et in partes regis episcopi converterentur, quatenus et archiepiscopus converteretur, aut si solus staret facile contereretur. Conversis igitur episcopis, quibus ab antiquo regis odio dispendium membrorum et salutis imminere videbatur, conversi sunt et alii, qui domum suam super arenam posuerant, et fluminis impingentis impetum non sustinebant.

FRAG. 12. Sed et quadam die præsul Herefordiensis Robertus, et comes Vendomiæ, abbasque de Eleemosyna super prædictis consuetudinibus cum primæ sermonem diutius habuerunt. Asserebat autem abbas se a Romano pontifice directum qui regis eum voluntatibus obtemperare persuaderet, dicens dominis cardinalibus dominum regem jurando cavis se, quia nihil in præjudicium Ecclesiæ postularet, sed honorari coram optimatibus suis duntaxat exoptaret, et per hoc postulationibus ejus vel umbratilem et qualemcunque consensum sufficere ad reformationem pacis. Si quid sic præsumeretur, dominum papam sibi malle imputari, quam pacem non reformari. Non credimus ambigendum viros bonos bonum ecclesiasticæ pacis optasse, minus tamen cauti parum attendebant,

quia in modestia postulationis rex excederet, et in A
locum presumptionis germina promissionis degenerarent.

FRAG. 13. De vocatione archiepiscopi apud Clarendonam. Rex igitur regni et sacerdotii, ut videbatur, pacem zelatus, sed sibi et archipræsuli suo minus providens, apud Clarendone regnum convocavit universum. Quo cum præsules et procures convenissent, exegit rex instantius, ut promissa sibi solverentur. Verum archiepiscopus, licet regi assentire promississet, suspectam tamen habens regis promissionem, et quia frequenter principes ad indebita manus extendunt, modum ignorantes, elegit potius apud regem, quam in lege Dei periclitari, aeneumque serpentem conterere, priusquam pravitas in populo Dei pullularet. Itaque quamvis exsilium vel carcerem metueret, Deum tamen pluris aestimans ex adverso ascendit. Ille minatur, iste refragatur; ille delirat, iste tacita prece suspirat. Interea episcopi Salesberiensis et Norvicensis, quos ab antiquo odio prena manebat, timentes sibi ex impacati temporis occasione, verbis lacrymabilibus archiepiscopum exorabant, quod sui miseretur cleri, quod animi pertinaciam relaxaret, ne ipse carcerem, clerus exterminium, ipsi capitis damnationem incurrerent. Sed et comites duo, potentissimi in regno, ipsum aggressi dicebant, quod nisi ille voluntati regis acquiesceret, ex regis jussione ipsi ad violentiam cogendi erant, quæ regi, sibi que perpetuam eroga-
ret infamiam. Vir igitur invictæ constantiæ, et in petra Christi fundatus, nec blanditiis emollitus, nec terroribus concussus, tandem a gremio veritatis, et sinu matris avellitur, cujus libertati adhærebat. Et ne victor in lite per superhiam tumesceret in mente, inde deerescens unde proficere deberet, derelinquit ad horam sibi, ut cadat, post casum resurgat; cadens humanam fragilitatem agnoscat, resurgens circa se divinam miserationem intelligat. Sic, ne quis, de virtute sua confidat, princeps apostolorum Petrus, et David sanctus ceciderunt. Non tamen cadendi proponimus exemplum, sed si ceciderit quis resurgendi. Cecidit siquidem Petrus, sed respiciente in eum Domino, fletus amarissime fortior resurrexit. Cecidit David, sed propheta eum redarguente, lapsus culpam plene pœnitendo delevit, et pœnam evasit. Sic beatus Thomas tentationi relinquitur ad horam, ut postmodum fragilitatis propriæ memor, fortior resurgat ad pugnam. Igitur cum tertio per Richardum, magni nominis virum, qui templo Hierosolymitano tunc præerat, sibi cavere moneretur et clero misereri, non tulit seorum supplicationes, non geneculationes. Nam tanquam in ipsius verticem vibratos gladios viderent, plangere videbantur, et tanquam funus præsens futurum facinus lugebant. Unde potius super clerum, quam super se motus miseratione, annuit de consilio illorum regiæ voluntati parere. Primus igitur ante omnes archipræsul in prætacta forma se obligat, quod videlicet regias consuetudines foret observa-

turus bona fide, verbo illo suppresso, scilicet, salvo ordine suo. Et quasi juratoriam adjiciens cautionem, hoc se facturum in verbo veritatis spondit: peccatum peccato adjiciens.

Et id ipsum in eadem forma singulatim universi pontifices jurarunt. Et incontinenti facta obligatione in forma hac, per quasdam regni procures, qui has nosse debuerant, facta est regiarum consuetudinum recognitio, et sicut publice, ita et expressim recensentur. Verum cum pleræque jam fuissent expressæ, et multo plures, ut videbatur, forent exprimendæ adhuc, archipræsul interlocutus est, dicens se nec esse ex antiquioribus regni, ut pristinas regni constitutiones sciret, nec in archipræsulatu diu fuisse: unde et dicebat se nescire de his. Et præterea quia inclinata esset jam dies, tantum negotium differendum in crastinum. Placuit sermo, et in sua se receperunt hospitia, in crastino revertentes in id ipsum. Et quæ pridie intermissæ fuerant consuetudines regiæ, recognitæ sunt et expressæ, et in scriptum chirographi modo confectum redactæ, et regiarum consuetudinum nomine censitæ. Quarum tamen multæ, ut perhibebatur, nequaquam regiæ, sed odio archipræsulis ad ancillandam Ecclesiam evomitum emulationis et invidiæ virus: ipso etiam rege ignorante, quod homines inter ipsum et archipræsulem suum hac astutia dissensionis zizaniæ seminare intenderent. Nec enim rex, qui adhuc juvenis, sicut nec archipræsul novus, pristinas regni consuetudines nisi ex aliorum relatu cognoscebat. C Quales vero hæ regiæ consuetudines fuerint, si quis plenius scire desiderat, eas in fine hujus historiæ scriptas inveniet.

FRAG. 14. Qualiter archiepiscopus ad se reversus facti pœnituerit. Scriptis igitur consuetudinibus, et ad formam chirographi redactis, postulat rex ab archiepiscopo et coepiscopis, ut ad cautionem majorem et firmitatem sigilla sua appendant. Verum archipræsul, etsi vehementer contristatus, dissimulat tamen, regem contristare tunc nolens. Et caute quidem de plano non negabat, sed differendum adhuc dicebat. Etsi parati essent ad faciendum, dicebat, tamen propter negotii magnitudinem decere dilationem vel modicam, cum juxta sapientem absque consilio nihil faciendum grave, et exinde post deliberationem aliquantulum ipsum et episcopos alias super hoc decentius requirendos. Scriptum tamen dictas consuetudines continens recepit, præmeditatus quidem et provide, ut causam videlicet suam secum scriptam haberet. Aliam vero scripti partem suscipit Eboracensis archiepiscopus. Rex vero ipse tertiam, in regni archivis reponendam, et sic a curia recedens versus Wintoniam archipræsul proficiscitur.

FRAG. 15. Et pœnitentia ductus, quod temerarie consensisset illicitis, quamvis ex magnorum virorum persuasionem culpam excusaret, quamvis ex cleri causa causam suam justificaret, tamen a se ipso, tanquam pro seipso commisisset, pœnas exegit, jejunio et

asperitate vestimentorum se affligens, et se interim ab altaris officio suspendens.

FRAG. 16. De zelo archipræsulis pro dignitate Ecclesie. Interea elaboratum est ab episcopo Ebroicensi, ut rex et archiepiscopus in gratiam revocarentur. Rex autem ad gratiam sine suarum legum confirmatione compelli non poterat, non attendens legislatorem dicentem : « Vae qui condunt leges iniquas, et scribentes scripserunt injustitiam, ut opprimant pauperes in iudicio et vim faciant humilibus populi Dei ! » Unde cum episcopus ad pacem instaret et archiepiscopus Ecclesie profectum desideraret, qui sine pace provenire non poterat, mittit ad Romanum pontificem, tanquam rogans consuetudines illas confirmari. Quæ tam subita viri mutatio, quæ tanta constantis inconstantia, ut modo rogaret enormia confirmari, ad quorum consensum prius non potuit inclinari ? Nimirum maioris arbitrio reliquit, quod per se non præsumpsit, ut a se culpam transferret, et domino suo satisfaceret, sed beati papæ religio circumveniri non potuit, qui regis et archipræsulis certamen ex ordine cognovit.

Archipræsul itaque fultus apostolica auctoritate et exhortatione, sicut erat spiritu fervens, mox excussit se, cum prophetico sarculo evellens, destruens, dissipans, et eradicans quidquid in horto Domini male plantatum reperisset. Non quiescebat manus ejus, non parcebat oculus. Quidquid etiam pravum, quidquid asperum, quidquid distortum, non jam cum prophetico sarculo, sed in evangelica securi deficiens ; regias quidem et ecclesiasticas consuetudines bonas conservans, alias vero in Ecclesie detrimentum, vel cleri dedecus introductas, tanquam spuria quædam vitulinana rescans, ne mitterent radices altas. Et tanquam de silvestri nimis silva et veprosa, sic nitebatur pro viribus quidquid asperum, incompositum, indecorum, obviurnve foret, totum de populo suo delere et extirpare, ut faceret prava in directa, et aspera in vias planas.

FRAG. 17. Videns itaque rex, quia in his, quæ tentabat, non procedebat, ad id ex consilio malevolorum diverfit, ut ad æmulum domini Cantuariensis legationem apostolicæ sedis transferret. Quod cum missis nuntiis postulasset, et non impetrasset, eo quod ab antiquo Cantuariensis Ecclesia legationis privilegio gaudere dignoscitur, cognovit et conjecit Romanus pontifex, cum ex nuntiorum protestatione, tum ex nota curilium crudelitate, quod vindicandum esset in archiepiscopum, nisi regi permetteretur de voluntate sua legationem cuiquam suorum conferre. Unde litteras censuit regi dirigendas, quasi legationem et legationis officium concederent, et gravamen archiepiscopo inferre prohiberent. Igitur qui missi fuerant, cum sanctitatem viri ad aliud inclinare non possent, cum umbratili et vana legatione reversi sunt. Quam rex suscipiens gloriabatur, ut fertur, in nominis umbra, tanquam in archiepiscopum potestatem accepisset.

Sed nec in his finibus lis et ira subsidebat, sed pro-

gressa est super alterutrum sine mensura caput. Rex enim clericos homicidas, fures, latrones, sicarios, aut aliis flagitiis deditos, ad sæculare iudicium trahebat, ut confessi vel convicti de crimine, officio suo privarentur, privati curiæ traderentur. Archiepiscopus vero, quid cui iudici liceret in causis considerans, nihil invenit quod habeat in ecclesiastica causa criminali potestas sæcularis, quæ de divinis rebus definire non potest, juxta constitutionem illam : Si crimen ecclesiasticum est, tunc secundum canones ab episcopo suo causarum examinatio et pœna procedat, nullam communionem aliis iudicibus habentibus in huiusmodi causis. » Hæc et his similia considerans archiepiscopus, clericos infames non nisi apud ecclesiasticos iudices permittebat conveniri, ubi convicti propriæ dignitatis officio spoliarentur, non mutilarentur ; quia non iudicat Deus bis in id ipsum, vel ne forte duplici pœna multati, laicis infamibus conditione viderentur inferiores. Sed si post degradationem relaberentur in consimile flagitium, secundum publicas leges a sæculari iudice punirentur. Non enim decebat, ut dicebat, quamvis inordinatos, inordinate iudicari. Hæc et huiusmodi iram regis accendebant. Et jam ira præceps ferebatur, et per diuturnitatem temporis invalescens in odium vergebat. Quapropter episcopi non reminiscens se super gentes et regna ad evellenda vitiorum plantaria constitutos, non modo non sumpserunt scutum fidei, ut starent pro domo Domini in die belli, sed et posuerunt corpus suum in terra, ut fieret via transeunti. Nihilominus tamen vir Dei, acceptæ potestatis memor, Deo sibi relictus, immobilis permanebat. Egerat in altum acies radices suas : et licet defluentibus foliis ramisque suis, tamen ad turbinem ventorum dejici non poterat.

FRAG. 18. Sub tanta, inquit, partis utrinque dissonantia pax perpetuum relegatur. Nec spes quidem gratiæ poterit æstimari.

FRAG. 19. Ille autem gaudens ibat a conspectu concilii, quoniam dignus habitus est pro nomine Jesu contumeliam pati. Hamelinum tamen comitem et Ranulfum quemdam, præ cæteris ei maculam proditiōis improperantes, tanquam mentientes refellit, vicissim improperans, quod refellere non poterant, alterum garcionem et spurium, nec viri reprehensione dignum ; alterius vero cognatum, quod in sua minime cognatione contigisset, ob crimen laqueo suspensum.

FRAG. 20. Ecce fugitivus ericius, de quo diaconus quidam vidit in visione. Nam rege Anglorum cum universitate suorum archiepiscoporum, episcoporum, comitum, procerum, abbatum, et priorum, in loco qui dicitur Waberghe, exsilii ericius de medio eorum, tanquam tumultu venantium excitatus. Quem cuncti videntes agitare cœperunt, vociferationibus et insultationibus insectantes. Ipse autem multitudinem præcurrens, non in directum, sed per flexuosos calles ad mare festinabat, portans in dorso

suo librum intitulatum, Actus apostolorum. Nemo autem eorum, qui sequebantur, erat sine vitio corporis, sed aut cæcus, aut luscus videbatur, aut claudus, aut labiis, aut naso mutilatus. Cumque tandem venisset ericius ad mare, misit se in illud, et ulterius non emersit. Quod videntes, qui eum persecuti fuerant, reversi sunt. Et ecce suborta est nebula densa et tenebrosa, occupans faciem terræ, quam sequebatur imber sanguinis. Divertit autem rex in salam regiam fundatam in prædicto loco, et sedit in ea indutus veste candida, lineæ, et lata, caudisque vulpinis tanquam sero caput cinctus. Non cessabat autem sanguis super eum distillare, quia domus, utpote deserta in loco deserti, sarta tecta non habebat, per quæ dependentes caudas vulpinas defluebat in sinum ejus. Cumque sinum et sinuosa vestis ejus volumina impleisset, refluere cœpit et os ejus etiam abundans implevit.

FRAG. 21. Et paululum progressus quosdam de more gentis illius armatos obviam habuit. Quibus percunctantibus an ipse esset Cantuariensis archiepiscopus, verbo respondit: « Siccine Cantuariensis phaleratis incedit? » Et non est agnitus ab iis, quamvis de se ipso testimonium perhiberet.

FRAG. 22. Contigit eodem tempore Ricardum de Luci, familiarem regis, peregre redeuntem, ad eundem locum devenire. Qui audito archipræsulis egressu a Britannia, accessit ad eum, promittens se ei gratiam regis redditurum, si rediret. Præsul vero se non credebat ei, timens laqueos quos evaserat. Ille vero, quem reducere non potuit, diffiduciatum dimisit, et debitam domino patrique suo reverentiam non exhibuit.

FRAG. 23. De proscriptione totius cognationis archiepiscopi. Rex autem cum redeuntibus nuntiis se in suis petitionibus dilicisset repulsum, res omnes archiepiscopi suorumque confiscari præcepit; totam ejus cognationem, omnes qui eum familiaritate vel quovis titulo contingebant, proscriptos addixit exilio. Non infanti vagienti, non decrepito seni, non in puerperio mulieri decubanti parcebatur. Processit ulterius furor inanis, et piis auribus horrenda crudelitas. Nam compulsi sunt adulti jurare, quod contristandi causa archiepiscopum, ubicunque reperiretur, expeterent. Prohibitumque est ne pro eo oraret Ecclesia, quod pro hæreticis et schismaticis facere consuevit. Quotidie igitur ad eum nova exsulum confluebat multitudo: nisi quod plerique a præfato juramento auctoritate apostolica absoluti in Flandria remanserint. Hi præsertim qui propter ætatis vel sexus infirmitatem, et multam, quæ tunc erat, inclementiam temporis absque multo sui dispendio ad archipræsulem, sicut juraverant, proficisci non valebant. Cæteri vero quotidie glomerati veniebant ad eum ejulantes et plangentes, quod essent sic a natali solo expulsi, bonis suis proscripti, et ab amicis et proximis suis elongati. Et ita quotidie virum Dei movebant. Quanta igitur anxietate, putas, premebatur, cum assidue præ oculis haberet,

A quorum miseræ causa erat, et quibus præter compassionem parum vel nihil conferre poterat, nimirum inter incudem et malleum versabatur, et tot in se persecutiones exceperat! Hinc ante martyrium martyr factus est, ante fustiones latomorum angulari lapidi conquadatus, ante fornacem ex ære in argentum, ante molam ex palea in frumentum transformatus, et citra fracturam alabastri nardi suavitatem redolevit. Vir itaque apostolicus, et fratrum potentatus, nationes et regna, audientes hæc mox obstupuerunt, et factum admodum profanantes, archipræsuli et tali ac tantæ ejectorum turbæ totis pietatis visceribus compassi sunt. Unde archiepiscopus, eo quod tantam turbam secum ferre non posset, ipsos per diversas nationes et provincias, ac diversas personas cum litteris suis supplicatoriis trans mittebat. Qui omnes ab eis, ad quos missi sunt, tum tantæ malitiæ odio, tum favore mittentis, benigne suscepti sunt. Omnibus itaque sic propitiante Domino provisum est in brevi, ut inter ipsos egena nullus esset, plurimi etiam feliciter in exilio quam in patria degerent.

FRAG. 24. Quomodo archiepiscopus cœpit arctius vivere. Verum, etsi proscriptis Deo miserante sic provisum fuerit, archipræsul tamen attendens in tanta proscriptorum multitudine suum aggravatum exsiliū, et pœnam exasperatam, disposuit una et pœnitentiæ suæ aggravare restrictionem, ut præter illud, quod quotidie portabat, cilicium, et crebras, quas flagellatus furtivas accipiebat disciplinas, ipse quoque districtius solito viveret. Unde et uni fratrum, qui ipsi in mensa ministrare consueverat, una dierum instillavit secretius, ut inter alios lautiores cibos, quibus uti solitus erat, caute quidem, ita ut nullus adverteret, quotidie conventuales sibi apponeret cibos, quibus solis uti disposerat. Quod ut cautius fieret et secretius mensa ipsi soli seorsim a suis ponebatur quotidie. Et ita quidem per aliquot dies solis pulmentariis aridis et insipidis, juxta quod Cisterciensis ordinis regularis institutio habet, vescebatur. Verum per aliquot tempus sic se mortificans, sic contra solitum vivens, post aliquot dies gravi decretus valetudine decubuit. In deliciis enim a primæva ætate enutritus, absque salutis detrimento grossioribus uti non poterat. Verum ad cujusdam familiaris sui admonitionem, cui ægritudinis suæ causam hanc, nec tamen sine importunitatis instantia, secretius judicavit, congruis sibi alimentis, sobrietate comite, utebatur. Unde Deo favente, in brevi restitutus est incolmis.

FRAG. 25. Quomodo rex archiepiscopum amoverit a Pontiniaco. Invidit ergo tantis profectibus, qui zizania superseminat in agro Dominico, et quia vir Dei de tribulatione profecerat, et ipso machinatione sua corruebat, bile majori motus hospitem, tanquam de loco crevisset, hospitio proturbare contendit. Cujus instinctu, ut credi fas est, direxit rex Anglorum litteras ad generale istud capitulum Cisterciense, ordinis eorum plurimum commi-

natus, si ulterius adversarium suum apud se retinerent. Quod cum archipræsuli nuntiatum fuisset, habito cum suis consilio mox respondit nulla ratione se velle, quod sui occasione ordo læsionem ullam caperet, vel modicum aliquid damni hospitibus suis eveniret, qui in tam arcto et sibi et suis tantam exhibuisset humanitatem. Et addidit, quod quocunque diverteret, ubicunque caput suum reclinaret, ab eis [se citissime amoveret]: « Domine, inquit, si placet, mihi et coexulibus meis providente, qui volueres cœlipsis et vestia lilia. » Misit igitur ad gloriosum illum Francorum regem Ludovicum nuntium, qui de recessu suo a Pontiniaco, et causam recessus ei nuntiaret. Quod cum audisset rex, plurimum admiratus est, et mox suis, qui aderant, totum retulit quod audierat. Et iterando sic omnibus audientibus inquit: « O religio, o religio, ubi es? Ecce enim, quos credebamus sæculo mortuos, sæculi minas timent. Et pro rebus caducis, quas se propter Deum contempsisse profitentur a Dei opere, quod cœperant, convertuntur retrorsum, Dei causam et Dei causam exsulantem ejicientes a se. » Et convertens sermonem ad eum, qui missus fuerat, inquit: « Saluta dominum tuum archipræsulem, et fiducialiter ipsi meo nomine nuntia, quod si mundus, et etiam qui videntur mundo mortui eum deserant, ego tamen eum non deseram, sed quantacunque rex Anglorum etsi dominicus homo meus sit, adversus ipsum molliatur et exerceat, ego tamen suscipiam propter Deum exsulantem, et propter justitiam adversa patientem. Nuntiet ergo nobis ad quemcunque ditionis nostræ locum divertere mauerit, et paratum inveniet. » In brevi igitur reverso eo, qui missus fuerat, archipræsuli nomine regis reportata sunt hæc. Qui ad complendum cum suis peregrinationis suæ tempus residuum, præclaram illam et regiam civitatem Senonis, a Pontiniaco duodecim miliaribus distantem, elegit, tum propter loci plurimam commoditatem, tum propter civium laudabilem moralitatem, et devotam et præsertim advenis dapsilitatem, dulcemque affabilitatem, et jucundam socialitatem. Biennio ergo peregrinationis suæ Pontiniaci jam expleto, a Pontiniaco discessit.

FRAG. 26. De discessu a Pontiniaco, et revelatione martyrii sui. Cumque itaque territorium Senonense petens, vale jam se deducentibus facturus esset, erupit in lacrymas, quas increpans venerabilis abbas loci inquit: « Quid agis? Miror virum invictæ constantiæ femineam in molliem degenerare. Nunquid rei familiaris necessitas majores expensas exposcit? An comitatus rarior, et famulatus minor lacrymas istas excutit? Si quid tua poscit indigentia quod nostra facultas supplere possit, ostendatur, et fiet. » Respondit igitur archiepiscopus: « Nihil istorum, sed quæ de me sunt, finem habent. Dominus servo tuo vitæ finem, finisque modum in visu præteritæ noctis præstendere dignatus est. Gladium spiculatoris subterfugere non potero. » Subridens abbas

A inquit: « Ergo martyrio interibis? Quid escuente, temulento, et martyri? Non bene conveniunt, nec in una sede morantur calix vini quem potas, et calix martyrii. » Archiepiscopus inquit: « Fateor, corporeis voluptatibus indulgeo, bonus tamen Dominus, qui justificat impium, indigno dignatus est revelare mysterium. »

FRAG. 27. Beato igitur Thoma Senonis sic residente, rex Anglorum indignissime ferens, quod in petitionibus suis ipse repelleretur a quo suus protegeretur adversarius, presbyterorum bona, per dioceses Cantuariensem decedentium, et vacantes ecclesias occupavit, et pro voluntate personas instituit, et se ab Alexandro papa, quem jam Dominus, Romanæ miseratus Ecclesiæ, in sedem suam revocarat, abalienavit. Unde dolorem suum in fide vindicaturus, clericos duos, Joannem videlicet de Oxenefordia, et Ricardum de Iwelcestria, misit ad imperatorem Alemanniæ Fredericum, qui coacto consilio de pace Romanæ Ecclesiæ tractabat, mandans, quod si nomen et obedientiam Alexandri papæ abjuraret, participem se schismatis haberet cum episcopis et archiepiscopis suis. Ille cum schismatis fautores haberet, de consilio Coloniensis archiepiscopi, qui Octaviano extincto successorem jam suscitaverat consensit. Jurantibus itaque cum imperatore optimatibus, et episcopis quibusdam volentibus, quibusdam obtreçantibus, et usque in lacrymas penitentibus, nuntii quoque regis ex persona ipsius in consimilem formam jurarunt. Et tanquam si minus adhuc peccavisset, rex portus diligentissime custodiri præcepit, feralia in eos statuentis edicta, qui vel papæ mandata, vel litteras in Angliam deferrent, vel delatas reciperent. Præcepit etiam publice, et compulsi per vicos, per castella, per civitates, ab homine sene usque ad puerum duodennem beati Petri successorem Alexandrum abjurare. Omnibus igitur capiti suo renuntiantibus sic, revelabantur ex multis cordibus cogitationes. Tunc erat videre miseriam, Dathan et Abiron quamplures per fines Anglicanos passim emergere, et in lateribus aquilonis Luciferum sedere.

FRAG. 28. De appellatione pontificum contra archiepiscopum. Post modicum tempus convenientibus ad urbem Londoniam ex mandato regis episcopis et abbatibus nonnullis, visum est contra archiepiscopum appellari. Timebatur enim, ne ipse in enormia, quæ per regnum præsumebantur, manum correctionis extenderet. Appellarunt itaque primi Londoniensis et Saresberiensis, provocationis et prævaricationis fonites. Exoniensis ad appellandum cogi non poterat. Episcopus vero Rossensis per simulatam, ut dicebatur, infirmitatem excusavit suam absentiam. Sicut et suam Wintoniensis, per litteras dicens: « Vocatus a summo pontifice nec appello, nea appellare volo. » Et ex ambiguitate nominis putabatur ad summi pontificis, id est, domini papæ vocatus audientiam. Ipse vero summum pontificem, summum judicem intelligebat, ad cujus tribunal jam

jamque trahebatur examinandus, tanquam qui in multis diebus processerat, et vitæ metis appropinquaverat.

At archiepiscopus regem sæpe paterna charitate commonuit, tum per scripta, tum per viros, qui pro sua reverentia meruerant audiri, ut ab ecclesiasticæ libertatis oppressione desisteret. Sed et eundem super eodem Romano pontifice per Rothomagensis archiepiscopum, et per imperatricem quondam Romanorum, matrem ejus, et per Herefordensem, et Londoniensem multa prece sollicitavit. Dumque singulis circa mandata suam diligentiam adhibentibus, Herefordensis ipsum usque in fines Walliarum ductantem exercitum cum litteris prosequerentur, nihil impetrarunt, nisi ut archiepiscopus repatriaret ultro, sicut ultro abscesserat. Credebatur tamen Londoniensem minus fideliter mandata prosecutum, quia cum domino papæ rescripsisset super executione mandati sui et responsione regis, ecclesiasticæ severitatis animadversionem, quam in prævaricatores intendebat, dehortari non erubuit, ut Ecclesia Cantuariensis perpetuum sui pastoris exilium, suumque lugeret Anglicana naufragium. Sed successor apostolorum et columna Ecclesiæ non movebatur. Noverat siquidem quis esset qui loquebatur. Unde eum modo non auditur sed et archiepiscopi, et ecclesiæ, cui præsidebat, juris et dignitatis providebat indemnitati, sicut ei ante exilium promiserat dicens: « Sane indubitanter credere te volumus, et firmiter tenere, quod nunquam in animum nostrum, Deo volente descendet, ut te vel ecclesiam tuam alicui personæ velimus in ecclesiasticis tuesse, nec nisi tantum Romano pontifici obedire. » Nam, quia audierat Eboracensem archiepiscopum crucem suam in stipite elationis extulisse, et contra consuetudinem per provinciam Cantuariensem deferre, prohibuit ne id de cætero facere præsumeret. Eboracensis igitur a temeritatis ausu prohibitus, et in cruce sua cruciatus, associatis sibi Londoniensi et Saresberiensi, una cum episcopis Angliæ congregatis, sicut dictum est, appellavit adversus Cantuariensem, scriptamque ei appellationem et appellationis terminum innovit. Ille vero in omni patientia et mansuetudine rescribens, et increpans, et objurgans animos inquietos, ecclesiasticæ pacis unitatem retorquere frustra satagebat. Oportebat enim pati Christum Deum, et iniquitates Amorrhæorum compleri.

FRAG. 29. *De legatis missis a domino papa.* Interea ad instantiam regis missi sunt a Romano pontifice legati duo. Quorum unus erat Willelmus presbyter cardinalis, regis amicissimus, qui, sicut ipse archiepiscopus de eo dicit, potius elegit esse malleator clericorum, principibus obsequendo, quam regum offensio divinam gratiam consequendo. Alter diaconus cardinalis Otho nuncupatus. Et plus avaritiæ quam justitiæ studiosi, et nisi delegarentur a domino papa, potius relegatione, quam legatione digni.

A Acceperunt autem piam potestatem decidendi quæstiones, quæ vertebantur inter regem et archiepiscopum, et debitum eis finem imponendi, remoto appellationis obstaculo. Archiepiscopus vero sciens regis amicissimum alterum, et instantem ab ipso petitum, alterum autem ex aliis causis suspectum habens, recusavit utrumque. Dicebat enim nequam se Willelmi jurisdictioni in causa debere subijci, qui regis instantia potius mittebatur, quam ipse coactus et missus veniebat: et quia non erat juri consentaneum subire ejus judicium, qui de sanguine suo sibi commercium facere quærebat, et de pretio nomen et gloriam. Adeo autem recusabat, ut excommunicationi subijci mallet, quam ejus judicium subire in aliquo extra curiam Romanam. Nam ad judicariam potestatem obtinendam super eum multiplici laboraverat ingenio. Dominus papa tamen considerans malitiam temporis, ut mitigaret potentiam eorum, qui turbare poterant Ecclesiam, ad tempus eis potestatem judicariam duxit concedendam. Unde cum in Franciam venissent, lætabat Willelmus, se in damnum et confusionem domini Cantuariensis venisse ad faciendam voluntatem regis. Hinc Gallicana verebatur Ecclesia: et qui bonum pacis exspectaverant, dejectione Cantuariensis audita deiciebantur. Sed qui confusionem intendebat, confusus et inutilis factus est, minus exsecrata fronte ventilando metuendus adversario. Nam ante cognitionem causæ ab officii suscepta potestate reciderunt scribente rege Francorum domino papæ, quod maximum ingereretur Ecclesiæ scandalum, si defensor Ecclesiæ innocens deponeretur, et inde damnum dignitatis efficeretur, unde præmium promotionis promerendum esset. Unde dominus papa, quamvis in medio Charybdidis et Scyllæ constitutus: hinc enim rex Angliæ donis et promissis, et minis instabat, inde rex Franciæ precibus et admonitionibus obstabat. Hinc turbatio Ecclesiæ, si reprimeretur arrogantia, inde infamiæ nota si damnaretur innocens. Sententiam suam revocavit, scribens legatis, ne ordine judicari inter regem et archiepiscopum præsiderent, sed plenè inter eos paci componendæ omnimodis intenderent, ita quod archiepiscopo et Ecclesiæ suæ antiqua jura integra et illibata servarent, nec in terra regis aliquid magnum facerent, vel in regnum ejus, si eos intrare vellet, intrarent, nisi archiepiscopus regi primitus integre reconciliaretur, quia super his sibi et illis plurimum detraheretur, et ipse communi voce cunctorum sinistra detractioe laceraretur. Quæ cum in mandatis accepissent, legationis tamen reliquias prosequentes, regem aditum tanto minus lætificaverunt, quanto minus potestatis habuerunt: qui jam sciebat, et gravissime ferebat, quod potestas eorum exspirasset ex parte. Sed ne nihil ageretur, ad colloquium archiepiscopum vocarunt, et præfixum est tempus et locus.

Igitur conveniunt, hinc exsul cum exsulis suis,

in e legati, adjunctis sibi archiepiscopis, episcopis, et abbatibus quamplurimis. Nocte vero proxima ante colloquium archipræsul vidit somnium, sicut ipse suis mane secum ad colloquium euntibus retulit, quod videlicet propinaretur ei venenum in calice aureo. Et quidem accidit sic. Alter quippe cardinalium, præfatus videlicet Willelmus, elegantis eloquii, et verba habens persuasibilia, pacis quidem suaves et blandos sermones ei obtulit: et videbantur in superficie bona verba et pacifica, quæ tamen si quis interius aspiceret, ecclesiastica paci et libertati non modicum derogabant. Unde et singula fere, quæ a cardinalibus de pace proponebantur, archiepiscopo et suis suspecta erant, metuentibus capi in sermonibus, qui molliti et melliti erant, et tamen ipsi nihilominus jacula. Diutius igitur et inaniter protracto colloquio, tandem infecta pace, imo etiam absque omni spe pacis per ipsos deinde faciendæ, archiepiscopus et legati ab invicem discesserunt, legatis quidem ad regem confestim revertentibus. In Cenomannia vero, in civitate ipsa Cenomannis, nonnullæ personæ regni jam convenerant: et videntes sic pacem nequaquam per cardinales posse fieri, in audientia ipsorum suas appellationes renovarunt, pro rege, pro regno, pro personis propriis, et pro ecclesiis suis ad sedem apostolicam reappellantes. Post aliquantum vero temporis cardinales, a rege multum honorati, et ambiosis onerati donis, archiepiscopi et Ecclesiæ pace infecta, ad Romanam reversi sunt Ecclesiæ.

FRAG. 50. Archiepiscopus vero audiens novas et sciens enormitates cum veteribus, quæ in pessimos fructus exereverant, per diocesim suam quotidie pullulare, sciens a propheta maledictum, qui gladium a sanguine prohibuerit, et qui opus Dei negligenter fecerit, ne non amputatis putridis ramis vinea Domini corrumpetur, accinxit se, et falcem ecclesiasticæ severitatis in multos exercuit.

FRAG. 51. Hinc enim ingrati tudinem timens, regem respiciebat qui in se beneficia congesserat, dum schisma Romanorum declinaret, illinc periclitantem Ecclesiam dum transgressionem impunitam relinqueret. Tentaturusque si vel adhuc sine incisione vulneribus medicari posset et citra rigorem severitatis regis emollire duritiam, missis duobus viris literatis et discretis, altero subdiacono et notario suo, altero Romanæ curiæ advocato, rogavit attentius ut archiepiscopo archiepiscopatum suum cum sua gratia redderet.

FRAG. 52. Sub ea tempestate rex Anglorum orandi gratia profectus est in Gallias, ubi rogatus a rege Francorum, et regni optimatibus, apud Montem Martyrum, divinæ majestatis intuitu, sanctorumque quos adorare venerat memorias, archiepiscopo suo gratiam suam reddere, omni deposita simultate, quamvis primo conquereretur quod sibi non occurrisset, concessit ut in pace et securitate repatriaret, possessiones et archiepiscopatum suum reciperet, et

A eo jure et libertate teneret, quo prædecessores sui tenere consueverant.

FRAG. 53. Rex autem Anglorum cito post supradictum colloquium in Angliam transfretavit. Imminente vero solemnitate beati Joannis Baptistæ, sub prætextu ordinandi regni convocatis regni proceribus, primogenito filio suo regni sui commisit habendas. Et erant qui dicerent, quia successuro sibi rex præcaverit hæredi, asseverantibus aliis, quia in odium archipræsulis, et in læsionem dignitatis Ecclesiæ Cantuariensis hoc fecerit. Imposuit autem ei manum archiepiscopus Eboracensis in Cantuariensi diocesi, in ecclesia videlicet beati Petri apud Westmonasterium, contra dignitatem Ecclesiæ Cantuariensis et antiquam consuetudinem, assistentibus sibi et suffragantibus præsulibus Londoniensi, Sarresberiensi, et Rossensi, nec jus Ecclesiæ Cantuariensis protestantibus, ad cujus dignitatem et jus regum Anglorum coronatio ab antiquo pertinere dignoscitur. Post coronationem celebrato convivio, rex regi, pater filio dignatus est ministrare, et se regem non esse protestari. Pœnituit eum dicti processu temporis et facti, didicique rei comprobatione, non tantum Cantuariensem Ecclesiam læsasse, quantum in vindictam eorum, quos persecutus est, adversarium sibi ipsi de suo femore suscitasse.

Audiens hæc archipræsul in primis vix credidit. Ipse siquidem tanquam vir providus, et cui de suis adversariis suspecta erant omnia, a Romano pontifice literas impetraverat, ad Eboracensem archiepiscopum et alios Anglorum episcopos ante coronationem directas, quibus auctoritate apostolica in virtute sanctæ obedientiæ erant inhibiti, ne in præjudicium archiepiscopi Cantuariensis, qui pro justitia exsulabat, regis filio diadema imponerent. Et directas has sibi literas quidam episcoporum ante coronationem susceperunt. Alii de mandato præmunii recipere noluerunt. Unde et contra inhibitionem apostolicam coronationi interfuerunt. Sed modicum attendere libeat, quam profana unctio, quam odiosa, quam inimica fuerit hæc consecratio; si tamen consecratio, magis quam execratio dici debeat apostolica benedictione destituta, imo in transgressionem contra virum apostolicum facta; quæ etiam ex mero odio, ira, et indignatione processit: odio patris spiritualis a patre carnali excogitata. Probant hæc lugubres, et omnibus post futuris sæculis detestandi, qui ex hac consecratione provenerunt, eventus; sacerdotum videlicet suspensio et anathematizatio, archipræsulis occisio, semel et iterum inter patrem et filium rebellio, et in fine egregii illius pueri consecrati sic in adolescentia omnibus post futuris sæculis præmature mortis detestanda preventio. Unde et plangendum, et exclamandum: « O mors tua, Henrice, o mors quem dira! Quam dura et quam amara memoria tua, quæ talem et tantam mundi gloriam, dum adhuc ordiretur, succidisti! Quam inconsiderata, quam inhumana, quæ tam certam, ut putabatur, mundi spem, dum adhuc fructus in flore

esset tam præclaro, una et brevi flatus tui vehementia exsufflasti! Sit mors tua ille, qui mors mortis est, ut vel per te transeat ad vitam, qui non sibi, sed mundo sperabatur victurus. » Plura quidem de acibus Henrici hujus, etsi ætas tenera, strenuus tamen, et de modo ejus exitus a vita inseruissim hic, nisi quia quam scribendam suscepimus lex historie obviat. Igitur ad cœptum ordinem revertamur.

FRAG. 34. *De suspensione episcoporum.* Sciens itaque tandem pro certo sanctus Thomas coronationem factam sic, per nuntios suos, quatenus pax processerit, et in quibus finibus steterit, et de coronatione facta, Romano pontifici totum et verbo et scripto intimavit, humillime et lacrymabiliter supplicans, ut vel nunc se excuteret excussorum filius, et in falsos fratres maxime insurgeret, qui tanta læsione patris sui, propter ipsos exsilium et proscriptionem sustinentis, et matris suæ Cantuariensis Ecclesiæ, tam manifesti erant etiam apostolici mandati transgressores. Vir autem apostolicus audiens universa, et quæ et qualiter fuerant gesta, et in regem et in episcopos vehementer motus est, et archipræsuli multo plus quam prius paterno compassus est affectu. Sollicitavit etiam eum rex Francorum in virtute amoris, et sub impensi protestatione obsequii, ne ulterius dilationes frustratorias prorogaret, sicut regnum Francorum diligebat, et honorem apostolicæ sedis. Miseratus etiam Anglicanæ Ecclesiæ desolationem Willelmus Senonensis antistes sedem apostolicam petit, et a Romano pontifice impetravit, ut rex Anglorum, omni appellatione cessante, subjeceretur anathemati, et regnum interdicto, nisi Cantuariensi Ecclesiæ pax redderetur.

FRAG. 35. Et ait rex ad archiepiscopum : « Optas, ut dicis, in Gallias repedare, sed arbitror expellere tibi necum dies aliquot commorari, ut palam videatur quod nondum existimatur. Sciunt omnes inimicitias nostras, pax invita paucis innotescit. » Archiepiscopus inquit : « Ingratus non immerito reputabor, si benefactoribus meis vel vale non fecero. Ibo et revertar. »

FRAG. 36. Una vero dierum deambulans archiepiscopus in littore maris cum suis, dum qualitatem elementorum, sicut transfretaturis moris est, consideraret, Milonem quemdam Bononiæ decanum advenientem prospexit. Quem tanquam ad nauticum exigendum properantem subridendo prior occupavit. Et inquit Milo : « Non ad nauticum exigendum, sed ad mandatum deferendum festinamus. Hæc tibi mandat dominus meus comes Bononiensis : provide tibi. Parati sunt qui quærunt animam tuam, portus trans marinos obsidentes, ut exeuntem te a navi rapiant et trucident, vel in vincula coniciant. » Cui archiepiscopus : « Crede, filii, nec si membratim decerpendus sim, ab incepto itinere desisterem. Non metus, non vis, non cruciatus de cætero revocabit ulterius. Sufficiat Dominicum gregem pastoris sui absentiam luisse septennem. Hanc vero extremam petitionem a meis obtinere votis omnibus exposco, nihil est

A enim quod magis hominibus debeat, quam ut anprema voluntas, postquam aliud velle non possint, adimpleatur, quatenus ad Ecclesiam, a qua arecor vivens, vel mortuum ferre non graventur. »

FRAG. 37. Conspiraverant siquidem adversus archiepiscopum vel ex aliena voluntate, vel ex propria malignitate cum prædictis episcopis Reginaldus de Warennæ, vicecomesque Gervasius, et Ranulphus de Broc, quem pridem anathematizaverat, et cum armata manu litus obsidebant.

FRAG. 38. Et ingressus monasterium toto corpore prostratus formam humilitatis exhibuit. Deinde fratres omnes, a minimo usque ad maximum, cum lacrymis in osculo pacis suscepit. Nam quia quosdam ex eis excommunicatis communicasse audierat, cum peregre esset, per magistrum Joannem Saresberiensem et coxsulem mense uno præ se præmissum fratri Thomæ venerabili viro potestatem solvendi injunxerat, ut quod contagionis in grege fratrum ex scabie schismaticorum contractum fuerat, antidoto reconciliationis eraderet.

FRAG. 39. Fertur enim dixisse Eboracensem : « Octo millia librarum numerate pecuniæ, Deo gratias, adhuc apotheca nostra reservat, quæ si tanta dispendia necessitas exegerit, ex asse demolienda erit ad reprimendam contumaciam Thomæ, dissipandamque arrogantiam, quæ major est quam fortitudo ejus. Ne, quæso, fratres, religionem vestram circumveniat. Adeamus potius dominum regem, qui usque in hodiernum diem causam, quæ inter nos et illum diutius veritur, fideli patrocínio consecutus est, et de cætero, nisi per nos steterit, ad consumptionem expedit. Si resilieritis adhærentes ei, quem habet adversarium (nunquam enim post tantas inimicitias, et inexorabiles redintegrabitur gratia) nos de ratione tanquam transfugas judicabit. Et si districte egerit vobiscum, de juris æquitate a vestris possessionibus vos dejiciet. Quid ergo facturi estis? Dicite, quibus in terris, inopes rerum familiarium, mendicabitis? Si vero e converso steteritis cum quo stetistis, quid amplius facturus est qui vos damnavit? Fecit quod potuit in vos : sententiam per oravam suggestionem extorsit. »

FRAG. 40. Et ait Eboracensis : « Domine rex, mihi soli mutire permittitur, duobus sociis meis his, quibus aqua et igni interdictum est, confabulari nemo potest, nisi sententia damnationis eadem qua feriuntur, et ipse colloquens involvat, quam ingratulus ille, permixtæ reversionis immemor, in illos et omnes coronationi filii tui consentientes effudit. Nunc autem patria potius præcavens ne de cætero proscribatur, multo comitatu equitum peditumque præeuntium et subsequendum stipatus incedit, circueiunt et quærens, ut in præsidia recipiatur. Non nos, domine rex, usque adeo vexationes assidue movent, non labores frangunt, non damna enormia sollicitant, quæ pro minimo ducimus, dummodo tibi domino regi fide servata placeamus, sed frequentes exactiones, sed officii nostri mutilata digni-

tas, sed famæ periclitantis diminutio. Quasi flagitium perpetraverimus, spectaculum facti sumus, reique judicamur, cum de puritate conscientiæ non dubitemus. » Respondit rex : « Si omnes excommunicationi subjacent coronationi filii mei consentientes, ego, per oculos Dei, non excludor. » Sed intulit Eboracensis : « Equanimiter ferenda tempestas est, quam declinare non potes, ut ex quieta mente et modestia tolerantia læcessitus et passus injurias videri merearis. Quod facile fieri potest, si dissimulare potes inpræsentiarum irrogata, et injuriantem quasi securum dimittis ad tempus. »

FRAG. 41. Cujus vero efficaciæ fuerit in eo sententia, inpræsentiarum absolvemus. Cum enim præfatus Robertus in domo sua, quam de nemoribus archiepiscopi pro voluntate sua passim succisis in Cantuaria construxerat, quibusdam communicantibus ei convivium fecisset, canes panem, quæ manus ejus contractaverat, recusabant, qui de manibus aliorum quidlibet porrectum avidè sumebant : mittentibus cunctis et reliquias ejus fragmentis aliorum commicentibus ab utrisque tanquam tactu contaminatis visi sunt canes abstinere.

FRAG. 42. Et adjecit : « Unus homo, qui manducavit panem meum, levavit contra me calcaneum suum. Unus homo, beneficiis meis insultans, dehonestat totum genus regum, totum sine vindice conculecat regnum. Unus homo qui manticato jumento et claudio, primo prorupit in curiam, depulso regum stemmate, videntibus vobis fortunæ comitibus, triumphans exsultat in solio. »

FRAG. 43. Quorum nomina hæc sunt. Primus, Reginaldus, nullius, sicut asseverabant, sceleris metuens, et ab Urso patre belluinam feritatem trahens. Secundus, Hugo de More-Villa, mortis scilicet, vel mortium Villa. Quocunque modo dicatur, mortis virum exprimit. Hujus uxor, ut fertur, cum juvenem quemdam Lithulfum nomine ardentè amaret, et ille stuprum recusaret, exquisita muliebri versutia, petiit, ut vel educto gladio coram se ludentis speciem agens, admitteret equum suum. Quod cum faceret, propria voce exclamavit ad præeuntem virum : « Huwe of Moreville, war, war, war, Lithulf haveeth his swerdlydrawen... » Quod Latine sonat : « Hugo de More-Villa, cave, cave, cave, Lithulfus eduxit gladium suum. » Quamobrem juvenis innoxius, tanquam qui ad fundendum sanguinem domini sui manum extendisset, morti addictus, et aqua ferventi decoctus, martyrium complevit. Quid de genimine viperarum speremus? Nunquid de tribulis uram, aut de spina ficum colligimus? Si arbor mala fructus bonos facere non potest, teste veritate, consequens est ut ex radice mala et virosa germen innocuum non surgat. Tertius, Willemus de Tracy, qui quamvis in congressu militari sæpe fortiter fe-

cerit, tamen ejus conversationis fuit, ut exigentibus peccatis ad parricidium vel aliud flagitium devolveri meruerit. Quartus Richardus Brito, qui ob pravitatem vitæ ex Britone brutus effectus est : dumque præliatur in ecclesia, pro nomine tironis notam traditionis incurrit.

FRAG. 44. Unde satellites Satanae, cælum terramque suo sceleri putantes arridere, prouiores et animosiores effecti, in blanditiis elementorum sibi blandiebantur. Abierat Ranulfus de Broc in occursum eorum, totaque commota regione maritima, multo milite stipatus adventabat.

FRAG. 45. Præcurrebant jam per medium fratrum vespas cantantium duo pueri, plus terrore quam voce hostilem invasionem nuntiantes.

FRAG. 46. Valvis igitur apertis, ecce lictores per scrutato palatio Ecclesiæ, conglobati per claustra ruunt. Ex quibus tres in lævis secures, unus bisacutum deferēbat, omnes vero in dextris gladios acutos vibrabant.

FRAG. 47. Quibus verbis sicarius percussus duos vel tres passus resiliit, similis factus illis, qui in passione Domini, Domino dicente ego sum, abierunt retro et ceciderunt in faciem suam.

FRAG. 48. Accelerans igitur Ursides de primo ictu referre tropæum, et de festina proditione sua lucrum prosiliit, et toto conamine suo capiti protenso vultus inferre nitens, clerici cujusdam brachio gladio grave vulnus inflixit.

FRAG. 49. Hic autem qui percusserat, exclamavit tanquam devicto hoste triumphans : « Percute, perente. » Protinus quidam stantes adhuc ad orationem dispersi sunt, secundum illud evangelicum : « Percutiam pastorem, et dispergentur oves gregis. » Non enim levem omnibus timorem Dominus incussit, sed magnum, et qui posset cadere in quemvis etiam constantissimum. Timens autem clericus ille post vulnus vulnera, post gravia graviora, ad altare proximum divertit, quo plures ex fratribus vite metuētes confugerant, nescientes a quo percussus fuerat. Sed de auctore vulneris inde conjicimus, quod Willelmus de Traci cooperatoribus suis apud castrum Salvode, quantum quisque sævisset in martyrem referentibus, scelusque suum jactantibus, dixerit se etiam brachium Joannis Saresberiensis præcidisse. Sed et unus de fratribus, circa patrem studio compassionis obversatus, ictum pertulit. Verrum oratio boni pastoris obtinuit, ut grege non diminuto, ipse solus occumberet. Unde plano gladii percussus caput autonitum reportavit.

FRAG. 50. Servata namque vultus venustate in morte specie tenus quamdam exhibebat hilaritatem et sanctitatem, quam gerebat in mente, ut non exspirasse videretur, sed vivido colore clausis oculis et ore potius somnum capere.

SANCTI THOMÆ

CANTUARIENSIS ARCHIEPISCOPI ET MARTYRIS

VITA SEPTIMA

AUCTORE E. DE EVESHAM.

Venerabili domino et patri Henrico Dei gratia abbati Croylandie, E. humiliter dictus monachus de Evesham, salutem in salutis auctore.

Virorum illustrium et præsertim sanctorum vitam et exitum litteris tradere, satis et provide majorum nostrorum sanxit auctoritas. Hinc enim et Deus laudatur, qui gloriosus est in sanctis suis, et posteri ædificantur laudabili præcedentium exemplo provocati. Inter hos quasi quidam Lucifer in fine dierum istorum malorum, tanquam in fine cujusdam tenebrosæ et tædiosæ noctis, effulsit beatus neomartyr Thomas, cujus vita quam fuerit laudabilis et mors quam pretiosa, virorum authenticorum, qui super his scripserunt testantur volumina. Qui quoniam plures erant, nec poterat fieri quin alicui aliquid deesset, quod alter forte haberet, jussit paternitas vestra ut in scriptis singulorum codicibus ea tantum ab unoquoque exciperem et excerpta seriatim ordinarem quæ ad historiam de martyre continuandam sufficerent. Tale aliquid ex ipsis evangelis legimus factum ab eo qui nobis ex quatuor unum fecit. Nam et hic quatuor fuerunt auctores, Joannes epi-

scopus Carnotensis, Alanus abbas Trekesbiriensis, Willelmus subprior Cantuariensis, et magister Herbertus de Boseham. Benedictus enim abbas Burgi de fine tantum et de his quæ post finem contigerant scripsit.

Hærebam, fateor, ad jussionem vestram, et licet commendabile esset, opus tantum cum viribus me- tiens manum continui; sed impulit cunctantem dignatio vestra una mecum opus aggrediens.

Jussus igitur et auxilio vestro pariter fretus, parvi ut potui: vos, an vobis satisfecerim, judicate; cæteri, ut volunt, æstiment. Si quis melius ordinare poterit, non invidebo. Ego quidem exemplo dedi, et quasi viam ostendi. Opusculum illud in tres partes divisum est: prima primordia viri sancti et cætera usque ad exsilium continet; secunda in exilio gesta; tertia martyrium et quæ post martyrium gesta sunt. Ut autem sciatur quid de unoquoque assumptum sit, ubicunque stylus variatur, nomen auctoris capitulo illo prænotatur. Valeat paternitas vestra in Domino

(Ita explicit prologus; sed ipsum opus idem est cum Quadrilogo a Lupo edito; quocirca, quoniam de isto Quadrilogo infra dicturi sumus, festinemus jam ad translationem beati Thomæ, quum idem E. de Evesham, quicunque fuerit, qui hanc Vitam compilavit, ad finem operis sui adjecit.)

INCIPIT TRANSLATIO BEATI THOMÆ MARTYRIS.

Anno quinquagesimo passionis gloriosissimi martyris Thomæ Cantuariensis archiepiscopi, venerabilis pater Stephanus successor ejus, quartus scilicet ab eo, et conventus Ecclesiæ Cantuariensis, corpus pretiosi martyris prænominati transferre satagentes, omnia quæ ad tantam solemnitatem credebant esse necessaria studiosissime procurabant. Præmissis siquidem ut decet jejuniis et orationibus, jam dictus archiepiscopus et Ricardus episcopus Salesberiensis et Ecclesiæ Cantuariensis conventus, quinto Kalendas Julii in principio noctis, in crypta, ubi corpus beati martyris jacebat, sicut constituerant, convenerunt, et postquam aliquandiu vacaverant orationi, lapidem

marmoreum, quo sepulcrum martyris tegebatur, amoveri fecerunt. Omnibus itaque qui aderant inventibus, inventum est illud organum quondam Spiritus sancti in vestibus sacerdotalibus, licet ex vetustate pro parte consumptis, et cæteris insignibus quæ summi sacerdotis decuerant sepulturam.

Lacrymantibus igitur præ gaudio cunctis et orantibus, monachi ad hoc deputati, corpus pretiosum manibus assumentes, archiepiscopo in capsâ rependum tradiderunt. Cæteris itaque cæptis orationibus insistentibus, archiepiscopus a prædictis fratribus corpus excipiens, totum in feretro suis manibus collocavit, exceptis paucis ossiculis, quæ extra

capsam retinuit, magnis viris et ecclesiis ad honorem ipsius martyris distribuenda. Corpore siquidem per manus archiepiscopi decenter disposito, capsâ firmissime clavis ferreis obseratur, et manibus monachorum ad locum honestum et feretrum deportata, usque ad diem translationis solemniter faciendæ secretius et conservata.

MIRACULUM. Celebrandæ translationis instante die, confluit populus innumerabilis Cantuariam, ut et martyri debitum honorem impendat et ejusdem suffragia in suis necessitatibus consequatur. Interant siquidem huic solemnitati venerabilis pater Pandulfus, apostolicæ sedis legatus, Stephanus Cantuariensis, Willelmus Remensis archiepiscopus, Henricus rex Angliæ cum omnibus suis et proceribus, episcopi quoque, abbates et priores, ceterique viri ecclesiastici diversarum regionum, quos singillatim enumerare prætermittimus, ne multitudo fastidium inferat auribus audientium. Populus autem tantus ad hoc festum confluerat, ut civitas Cantuariensis et villæ vicinæ cum adjacentē regione multitudinem vix capere potuissent.

MIRACULUM. Instabat hora tertia Nonarum Julii, cum rex, archiepiscopi, episcopi, abbates, principes et magnates, qui convenerant, præfatum thesaurum de crypta, ubi reconditum erat, ad altare sancti martyris bajulantes, in conspectu populi in loco ad hoc præparato reposuerunt, et hunc ibidem securissime obsignantes, quod de die supererat in laudibus martyris et lætitia cordis in Domino deduxerunt. Quod igitur devotio fidelium martyri debuit fideliter impendit. Sed et martyr suæ gratiæ solatia suis fidelibus non subtraxit, nam cum archiepiscopus et conventus ceterique fideles et præcipue Londonienses opes suas et operam effunderent ut honori martyris nihil deesset, quod per eorum industriam posset explicari, ipse martyr quasi inesse devotis rependens, præambulis, comitantibus et sequentibus signis et miraculis totam solemnitatem suæ translationis adornavit.

MIRACULUM. Modicum tempus ante translationem beati Thomæ restat venturum, et ecce mulier quædam Kembella filiolum unam tantum habebat superstitem de quatuor, quos de viro suo susceperat, quæ graviter incipiens ægrotare et in gremio matris mortua est. Mulier ergo filiam plangens lacrymis et gemitu modum excedere videbatur. Accurrens autem matrona nobilis vidua quidem, illius videlicet domini villæ, mota plangentis lacrymis et morte puellæ docta divinum auxilium invocare, arripuit filiam et ad matrem ejusdem subsidium invocans defunctæ mensuravit et surrexit puella. Mater et ejus cum candelam fecisset, et eam ad sanctum Thomam mittere cogitaret, puella rursus ægrotavit, et ut mater testata est, iterum expiravit. Illa vero recolens se minus gratam et devotam martyri exstitisse, vovit se puellam ad sanctum Thomam ducturam si eam secundo de mortuis revocaret. Gloriosus igitur martyr rigorem justitiæ temperans,

A per gratiæ suæ lenitatem puellam mortuam iterum vivam matri resignavit.

MIRACULUM. Quidam vir Devisis cum multis aliis orationis causa limina beati Thomæ in ipsius translatione volens visitare, ad pontem Bransfordiæ prope Londonias venit. Circa medium igitur pontis obvians carro, in aquam projectus est. Ille vero non immemor sui sanctum Thomam jugiter invocavit, petens ne suum peregrinum perire permitteret. Quinquies igitur ad aquæ fundum immersus et toties ad aquæ summitatem reversus ad aridam rejectus est. Qui cum magna admiratione contestatus est, se nec in ore, nec in naribus, vel in auribus aliquam aquæ molestiam sensisse. Eundem quoque virum alius quidam comitans pallium amisit in eodem loco ubi prior in aquam ceciderat, et in annem pannum submersum non potuit hactenus quisquam invenire. Miles quidam de comitatu Northamptoniæ viduam quamdam duxit in uxorem; cujus filius, puer triennis, quem de viro suo priore suscepit, ante militem jam dictum prandentem quadam die stans ad mensam de manu militis buccellam carnis ore suscepit. Puer autem morsellum glutire volens, strangulatus et mortuus est. Mater igitur primum suspectum habens militem de morte filii sui, clamans et lacrymans pluries geminando homicidam appellavit. Miles vero quamvis sanam habens conscientiam, tamen quia victus erat primum vehementer confessus est et surgens argenteum super puerum complicit, vovens se puerum ad sanctum Thomam ducturum, si eum vita redonaret. Paululum igitur post votum illis quid Dominus facurus esset expectantibus de gutture pueri buccella carnis quæ vitæ viam præcluserat, in os resiliit. Puer vero paulatim reviviscens ad plenum per merita martyris est vitæ redditus et amicis.

MIRACULUM. Miles quidam comitis Elugi, Robertus nomine, cum filio suo duodenni Robertulo nomine, iter arripuit versus Cantuariam, ut beati Thomæ limina orationis causa visitaret. Qui ingressus mare apud Wythsand fere usque ad medium maris prospere navigavit. Ille vero prædictus filius ejus somno gravatus ut vel urinam vel quidpiam faceret, ad proram navis perrexit; et dum incaute staret, in mare lapsus est. Quod cum vidisset pater, exclamavit dicens: « Sancte Thoma, miserere mei, et conserva mihi filium meum; » puer vero in mare paululum mersus et statim ad superficiem aquæ reiectus ait: « Sancte Thoma, si vis, potes me adjuvare. » Interim navis impulsu venti a loco ubi puer cecidit avulsa est, quantum arcus bis vel ter sagittam jaceret posset. Tunc nautæ ad clamorem militis velum dimiserunt et navem licet cum difficultate ad quærendum puerum retrorserunt. Elapso itaque unius horæ spatio vel sicut miles ipse protestatus est, quantum posset in equo moderate ambulando duas lingas vel tres Gallicas perfecisse, ad puerum pervenerunt, invenientes eum sedentem super aquas et nihil mali habentem, excepto quod

in casu suo parum aquæ salis hauserat. Cum autem puer vidisset navem a se recedentem, nimio dolore et desperatione vitæ absorptus, ut dolorem cordis morte corporis terminaret, caput mersit in

A mare, ut citius interiret. Assumptus igitur puer in navem, hæc patri sciscitanti retulit, adiectique quodcum se ipsum mergere vellet, quidam episcopus eum, ne mergi posset, supportavit.

SANCTI THOMÆ

CANTUARIENSIS ARCHIEPISCOPI ET MARTYRIS

VITA OCTAVA.

Auctoribus Henrico abbate et Rogerio monacho Croilandæ.

EPISTOLA HENRICI ABBATIS

AD STEPHANUM LANGTON CANT. ARCHIEP.

Reverendissimo patri et domino in Christo dilectissimo sancto Stephano Dei gratia Cantuariensi archiepiscopo, totius Angliæ primati et sanctæ Romanæ Ecclesiæ cardinali, devotus filius suus H. . . permissione divina abbas Croilis, salutem et tam devotam quam debitam in omnibus reverentiam.

Si mihi, prout adjacet velle, suppeteret et posse, sanctam paternitatem vestram quam in Christo sinceræ dilectionis amplector affectu. . . Exigit enim et gradus vestri sublimitas et vitæ vestræ sanctitas, ut ab omnibus omnis vobis impendatur honor ac reverentia, corde magno et animo volenti. Vos namque tanquam novus Beseleel tabernaculum Domini mysticum, id est sanctam Ecclesiam, insigniter edificatis et ornatis. Unde divinæ gratiæ gratias exsolvimus uberes et devotas, quæ nobis in persona vestra idoneum procuravit archipræsulem ac primatem habentem juxta penes se cum tintinnabulis sacræ prædicationis malogranata fructuosæ operationis. Doctrina vero, cujus prærogativa præminetis ad bene vivendum, efficaciter vos informat et sobrie et juste et pio juvamine. Opera siquidem vestra, reverendissime Pater, testimonium perhibent de vobis quod beatissimo martyri Thomæ prædecessori vestro conformes fueritis et sitis, non solum per expressam morum similitudinem, verum etiam per exilii cæterarumque molestiarum fortem et æquanimam perpersionem. Unde credendum est quod sicut participes exstitistis tribulationum, sic eritis et consolationum, et sicut compassi estis, ita favente Domino et conregnabitis. In hujus rei argumentum fidei nostræ solidati spei anchoram insistentes, et gloriæ gloriosi martyris, qua gaudet in celis, in terris adijcere quodammodo volentes, lucernam corporis ejus super candelabrum ponere statuistis, ut de sub modio terræ translatus luceat apertius his qui ad eandem gloriam suspirant. Hinc est quod et par-

B vitam meam inter alios ad illam gloriosam translationem nostri gratia litteratorie dignati estis invitare. Unde dignationi ac dominationi vestræ devotissimas rependo gratiarum actiones, et quia non ambigo quin insigni solemnitate multi multas ut dignum est facturi sint oblationes ad honorem sanctissimi martyris et ob reverentiam vestri, ego aliquid pro modulo meo cupiens offerre librum ad sanctitatem et magnificentiam ejusdem martyris apud vos compilatum excellentiæ vestræ dignum duxi destinare. Cujus quidem compilationis modum necnon et totius voluminis seriem prologus subscriptus evidenter declarat, qualiter videlicet ipsa compilatio sumpta sit ex scriptis quinque historiographorum, contineatque gloriosi martyris originem et vitam, studia et gesta, exilium et agonem, passionem et canonizationem : qualiter etiam ex epistolis dicti martyris quas videlicet vel ille aliis, vel alii illi vel pro illo vel contra illum vel alii scripserunt, locis competentibus congruenter insertis præfata compilatio non modicæ robur habeat auctoritatis. Licet ergo pretiosi martyris vita et passio luculenter a nobis tradita sit, fortassis memoriæ litterarum hoc tamen volumen, cum vobis vacaverit, plenius inspectum, ut opinor, habebitis acceptum. Humiliter igitur et devote vestræ supplico sanctitati, quatenus librum hunc ad laudem et gloriam beatissimi martyris necnon ad ædificationem fidelium studiose et ut credo, fructuose compositum, vice munusculi dignanter suscipere velit. Cujus primarium ac primiciale usum vestræ reservam paternitati rogans affectuose quatenus eidem si placet correctionis vestræ limam apponatis, ut sic deinceps aliis acceptior fiat et gratior ad legendum. Cum sicut ex sapientia vestra commendationem, ita ex excellentia vestra non mediocrem apud posteros assequi meruerit approbationem : ad honorem martyris et multorum utilitatem. Bene valeat in Domino sancta paternitas vestra.

[*Inter epistolam Henrici abbatis et Rogerii monachi, qui opus in secundam editionem ampliavit, codex Parisiensis habet notam quæ sequitur.*

Incipit prologus in Vitam sancti Thomæ archiepiscopi Cantuariensis et martyris, ex diversis opusculis excerptam : scriptus anno Domini millesimo quadringentesimo undecimo, finitus in profesto Lucie Virginis per me Joannem Waning de Almania.

Serve pie Dei, recordamini mei !]

EPISTOLA ROGERII

SIVE PROLOGUS IN VITAM S. THOMÆ.

Amantissimo domino suo et patri, Henrico, Dei gratia abbati Croylandiæ suus Rogerius humilis ejusdem loci monachus, quod domino et Patri. Gloriosum gloriosi martyris Christi Thomæ triumphum eo specialius sancta veneratur Ecclesia, quo se per ejus sanguinem nobiliter recolit triumphasse. Ab apostolorum etenim temporibus, quod pace sanctorum omnium dictum sit, non est in unius hominis morte major aut utilior Ecclesiæ Christi collata victoria. Ipse enim licet Anglicanæ duntaxat Ecclesiæ videretur propugnare, universalis tamen Ecclesiæ causam egisse ex post facto probatur. Quoniam ex quo locum tabernaculi sui dilatavit, et in superbiam sæculorum posita est civitas Dei de qua gloriosa dicta sunt, gloriam secuta est æmulatio, cœpitque partes ejus laica potestas, quasi alter Ismael nunc palam nunc occulte deprimere. Hinc est illa vetus et inveterata inter regnum et sacerdotium de investitura quæstio : hinc aliæ quas enumerare longum esset controversiæ, quæ omnes aut fere omnes in hujus novi Zachariæ martyrio aut sopitæ sunt aut sedatæ. Hujus igitur sancta et vero Deo digna tametsi per se satis emineat luceatque omnibus qui in domo sunt lucerna super candelabrum erecta, conati sunt tamen plures, quasi oleum camino addendo, suis eam scriptis reddere clariorem. Et in hoc multorum et magnorum sudarunt ingenia, ut quæ viderunt et audierunt, posterorum memoriæ bona fide manderent, de vita viri, de moribus, de exilio pariter et martyris fide plena et relatu digna relinquentium volumina. [Id attendens, prudens et vigilans discretio vestra, ne in diversis de eodem auctoribus reperiri vel reprehendi aliquid posset dissonum aut prolixitate vel inculcatione tædiosum, speciali quadam in martyrem devotione, dudum ex diversis diversorum voluminibus compendiosam excerptiorem et dulce quodam et gratum confici fecit temperamentum. Ubi sic omnium elegantiora omnia in unum compacta sunt corpus, ut et historiæ veritati nihil detraxatur et brevitati nihilominus consulatur. Sed quoniam restabant epistolæ ab ipso viro Domini, vel ad eum vel de eo a viris authenticis scriptæ, advertit prudentia vestra, quod si ipsæ locis competentibus prædicto insererentur compendio, exhinc et plurimum auctoritatis historiæ et non parum utilitatis procuraretur legentibus, placuitque id muneris parvitati meæ imponere, quod pro imponentis reveren-

tia reverenter assumens, ut potui, consummavi, con-
summatumque vestræ discretionis examini committo, ut si quid in hac parte laudabiliter actum fuerit, vestrum sit qui jussistis : sin aliter, quod timeo, hoc imperfectioni meæ imputetur. In quo lectorem benevolum monuerim et moneatur, sicubi epistolæ non integras offenderit, sed recisas vel forte intercisas. Noverit enim hoc de industria factum, ut quando res plures epistolæ tenor complectebatur, reliquis omissis illa tantum capitula assumerentur, quæ rem ipsam, quæ tunc in manibus erat, contingere viderentur. Verum, quia tot epistolarum insertio prolixitatem non generare non potuit, recreationis gratia, ut habeat lector ubi ex intervallo respiret, opus ipsum in septem libros secundum processum negotii distinguitur.

Primus viri beati mores et actus usque ad exilium continet. Septimus, qui et ultimus, de reditu ejusdem et his quæ post exilium gesta sunt contextitur. Quidquid mediis illius temporis, quod in exilio egit, scilicet sex annorum et mensis unius acta compenditur, vestro brevitatis gratia breviter tetigistis, nonnulla ibi ommissa hic adjicere, necnon et aliter ibi posita transmutare quadam rerum seriatim explicandarum necessitas coegit. Primus ergo et secundus necnon et ultimus historica narratione res gestas plenius explicant. In reliquis quoniam crebro interveniunt epistolæ, minus laborat historia. Et quoniam ad singulos rerum gestarum articulos prætitulatum auctoris nomen in margine supra charaxatum habet compendium, placuit idem in opere præsentem observari, ut si quid in questionem venerit sit fides penes auctores. Fuerunt autem quinque magister Joannes Saresberiensis postea Carnotensis episcopus, Alanus Teokesberiensis, Willelmus subprior Cantuariensis, Benedictus abbas Burgi et magister Herebertus de Boscham, qui post omnes alios ab aliis ommissa adjiciens stylo veraci quæ vidit et audivit hæc testatus est.

His ergo fides adhibeatur : hi interseritis epistolæ loquantur. Nam de meo nihil interveniet nisi forte pro continuatione vel epistolarum insertionem breve aliquid adjici necessitas compulserit. Facta est autem prima illa compilatio hortantibus votis pariter et cooperantibus apud Croylandiam anno regis Ricardi ultimo, et hæc ejusdem compilationis adjectio itidem apud Croylandiam anno regni regis Joannis quarto decimo, qui fuit annus ab incarnatione Domini juxta Dionysium millesimus ducentessimus tertius decimus.

[*Duo vel tria folia hic desunt in codice Parisiensi : quæ reliqua sunt, omnia cum quadrilogo Lupi satis congruere videntur, ideoque quatuor tantum capitula una cum conclusione operis, quæ cum ante dicto quadrilogo non congruunt, ex hoc libro excerpti.*]

Pro capitulo XI habentur sequentia.

Itaque archiepiscopus ad dominum papam Senonis venit ; tepide quidem exceptus a cardinalibus. ad

domini papæ præsentiam est intrinmissus, qui venientem ad se paterne suscepit benignitate, super vexatione ejus multimoda et peregrinatione tam periculosa et dura paterne compatiens. Post aliquot vero dies placuit archipræsuli de suo et suorum consilio totius dissensionis inter regem et ipsum in Anglia et exitus sui a terra causam domino papæ et cardinalibus exponere. Nec tamen dominus papa adhuc hoc ab ipso requisierat, exspectans forte quod archipræsul tanquam providus non requisitus hoc faceret; placuit itaque archipræsuli sic. Nam, etsi per proprios nuntios fuisset prius significata totius mali origo et causa, et sparsim per alios hinc inde commeanes relata, consultius tamen videbatur, ut ipsemet causæ suæ merita exponeret, et gestorum referret veritatem, et quas in ipsum præfati regis Angliæ nuntii imprimere conati sunt, ipsemet per se ipsum dilueret notas. Igitur post aliquot dies adventus sui ad curiam domino papæ, venerabilibus viris cardinalibus præsentibus, non quidem publice in consistorio, sed in thalamo secretius grata quadam et succincta brevitate enarravit: grata inquam, utpote eloquentia cujus modesta erat et elegans et lingua semper inoffensa; dumque primus a domino papa sederet et propter reverentiam vellet surgere, jussus residendo dicere, peroravit et producents scriptum, etc.

Inter capitula XI et XII insertum est quon sequitur.

QUALITER SAPIENTIBUS CURIÆ EUM SUPER GESTIS SUIS ARGUMENTIBUS SATISFECEIT.

Verum in crastino die a quibusdam cardinalibus et plerisque aliis de curia viris magnis et eruditis qui in scripturis multum poterant (talibus quippe curia abundare et florere consuevit), archipræsul tanquam familiaribus suis et faventibus sibi benigna quadam et amabili est asperitate objurgatus, quod diebus illis tam malis tempore videlicet schismatis et inter ruinas Ecclesiæ, contra principem suum, contra potestatem tantam se erexerit: parendum potius tempori et sustinendum dicebant, cum hora esset tunc et potestas tenebrarum, quando Petrus gladium suum non exserere sed jubetur reponere. Et sicut addebant, zizania ab inimico homine superseminata evangelicis servis nequaquam tunc colligenda, ne forte eradicando ea eradicarent simul et triticum. Unde et juxta patrisfamilias præceptum usque ad tempus [messis] utraque simul sinuntur crescere. Quod et idem ipsum est magistri consilium, qui propter dierum malitiam tempus redimendum suadet: « Redimentes, inquit, tempus, quia dies mali sunt. » Et propheta similiter: « Ideo, inquit, prudens in tempore tacebit, quia tempus malum est. » Agilis vero his et hujusmodi, archipræsul, qui tanquam providus a magnis et sapientibus curiæ hæc sibi in curia obijcienda arbitrabatur, unde et cum suis pertractaverat super hoc et sermones suos in judicio jam disposuerat, secundum sapientiam et gratiam sibi datam mox respondit ad objecta prudenter et obijciendis satisfecit sufficienter.

A *Quæ sequuntur, spectant ad colloquium quod deinde habuit sanctus Thomas cum papa, et ad commorationem quam apud Pontiniacenses fecit.*

Cumque ad aliquod monasterium Cisterciensis ordinis declinare decrevisset archiepiscopus, elegit inter cætera Pontiniacum in Burgundia situm, eo quod præfatæ civitati Senonis, in qua dominus papa propter schisma morabatur tunc, vicinum erat, solum per duodecim leucas distans: et adhuc quia amplæ erant et abundantes monasterii facultates et multa charitas in erogando. Unde ad ejus petitionem dominus papa abbatem loci et potiores de fratribus vocans eis virum Dei Thomam commendat exhibendum. Qui, tum ex domini papæ relatu, tum ex celebritate famæ viri cognati probitate, Deo gratias agunt, quo inspirante palastrita suus talem locum velut quamdam agonis palastram elegit. Cum igitur tres circiter septimanas in curia egisset, apostolica licentia et benedictione accepta Pontiniacum profectus est cum tanta alacritate et jucunditate a toto comœatu susceptus, quantum hostiæ coelitus missæ vix impendere possent. Qui omnem humanitatem ei et suis exhibentes, præter institutionem ordinis et esum carniū et alia quædam animo prompto et voluntario indulserunt. Et quidem supra quam dicere nunc tempus sit, apparuit benignitas et humanitas ordinis circa illos. Tertio igitur quartove adventus ejus die ingressus capitulum, causam Ecclesiæ quam agebat, Deo et ipsorum orationibus commendavit.

C *Quantum excerptum est de ira regis.*

QUALITER REX TAM IN IPSUM PAPAM QUAM IN SANCTUM THOMAM EXCANDUERIT.

Verum dum in multa quiete et otio erudiretur et exercitaretur apud Pontiniacum archipræsul cum suis, ecce post dies aliquot venit ab Anglia rumor sinister et duri nuntii bajulus. Rex enim Anglorum a redeuntibus cum in se omnibus petitionibus contra archiepiscopum didicisset repulsum et adversarium suum, ut dicebat, a sede apostolica non solum foveri sed exhiberi comperisset, primo in dominum papam, deinde in archiepiscopum vehementer excanduit et in utrumque quantum potuit et ira suggestit, ultionem exercuit, potestate jubens regia, ut denarius sancti Petri per Angliam in fiscum conferretur et ut omnes archiepiscopi suorumque possessiones confiscarentur, necnon et omnis ejus cognatio omnesque qui eum familiaritate vel quovis titulo contingebat exsilio addicerentur, sicut litteræ ejus testantur. [Vide litteras de hac re scriptas.]

Ejecti sunt itaque proscripti hi et illi, cognatio et cognitio simul, in unum dives et pauper, sapiens et insipiens, vir et uxor, juvenes et virgines, senes cum minoribus, parvuli in cunabulis et ad matris ubera pendentes. Processit ulterius furor inimicus, et piis auribus horrenda crudelitas. Nam cum quotidie ab ecclesia pro archipræsule suo exsultante oratio fieret, edicto inhibatum est publico, ne id pro illo de cætero fieret quod pro hæreticis et schisma-

tis etiam pro perfidis Judæis facere Ecclesia consuevit. His vero omnibus perpetrandis et huic executioni pœnali, quidam aulicorum satellitum mero archipræsulis odio præfectus est, qui inveterato odio archipræsulem oderat. Ad exsequendum malitiæ opus talis est præelectus ut archipræsul eo amplius exacerbaretur et de quo satis fidebatur quod nec unum pœnarium mandatorum ista præteriret. Rاندulfus cognomento de Broc hic erat, qui etiam de suo super adiecisse creditur ultra mandatum dolorem super dolorem apponendo.

CONCLUSIO OPERIS.

Sed ut ad martyrem redeamus, exemplo principum consuebant ad tumbam hujus neomartyris nostri juvenes et virgines, senes cum junioribus et ipsi inter alios et præ aliis, qui causa quacunque ab ipso adhuc vivente dissidebant. Quotidie illud propheticum adimpleri videres: « Venient ad te qui detrahebant tibi et adorabunt vestigia pedum tuorum. » Felicem se judicabat quisquis aut sanguinis

aliquid aut vestium ejus memoriale posset acquirere. Et primo quidem sanguinem aqua mistum adventantibus dispertiebant monachi, sed cum ille multitudini sufficere non posset, aqua ejus reliquiarum contactu sanctificata in ampullis stanneis per universum orbem portabatur; factumque est quasi insigne peregrinorum beati Thomæ ut unus quisque ampullam suam reportaret. Constituebantur oratoria; erigebantur altaria; ut vix etiam in transmarinis civitatem reperias aut oppidum, quod non beati Thomæ habeat memoriam. Nam in Anglia quot ecclesie, tot fere in ejus honorem erecta sunt altaria. Videbatur memoriam martyris sequi virtutum operatio, ut non jam in loco passionis tantum vel a dæmoniis vel a variis mundarentur ægroti languoribus: sed passim ubi vel reliquie habebantur vel ubi pedes ejus steterunt, ipso nimirum ad sancti sui gloriam faciente mirabilia, qui mirabilis est in sanctis suis. Cui honor et gloria, laus et imperium per omnia sæcula sæculorum. Amen!

Serve pie Dei, recordamini mei

SANCTI THOMÆ CANTUARIENSIS ARCHIEPISCOPI ET MARTYRIS VITA NONA

AUCTORE ANONYMO QUI SE DECIMUM APPELLAT.

Jesus Christus, heri et hodie ipse, et in sæcula manens, quæ a prima origine profunda caligine mortalibus incomperta sunt, in diebus nostris revelavit condensa usque ad cherubin gloriæ obumbrantia propitiatorium, imo usque ad ipsam supereminentem scientiæ charitatem Christi; nobis enim, inquit, revelavit Deus per Spiritum sanctum dum paulatim et quasi gradatim mundo innotescit manna absconditum, mel silvestre, multitudo dulcedinis ejus, benignitas scilicet et humanitas Salvatoris nostri quæ ab initio per prophetarum oracula, in fine vero per martyrum constantiam et miracula, non sophistica non phantastica, ut infidelium plebique sensere, fuisse comprobatur. Fuit olim falsitas in cœlo reperta: post hæc nobis veritas de terra est exorta, veritas quæ est Christus. Christo denique in carne passo velum templi scissum est, evelata sunt mysteria et beato Thoma per martyrium consummato, fractum est alabastrum, et locus Dei illi est Ecclesia catholica impleta est ex ore unguenti. O unguentum in capite quod descen-

dit in barbam a Christo in Thomam, in barbam Aaron! Ecce sacerdos magnus de populo barbaro. Ecce vere Israelita sæculi populique sui honor et gloria a lateribus Aquilonis, ut illustret Occidentem totum Orientem. Quocirca operæ pretium duxi diversa quidem nec adversa quæ de ipso scripta sunt volumina, in unam compingere historiam tam moderate repressam, ut nec prodiga sit in ea copia nec damnosa concinnitas, ut saltem varietas ipsa legentium fastidio medeatur, donec studiosus efficiatur, antea fastidiosus. Hoc enim modo apud Tullium statuarius ex virginum formis aliis atque aliis excogitatum singulari venustate legitur exculpisse simulacrum. Sanctus quoque Hilarius de synodis edidisse libellum ex variis ingenii excellentissima quæque suis interserens: non operis, ut ipse ait auctor sed ordinator. Sic et ille triperitæ compiler historiarum: « De auctoribus, inquit, singulis deflorata colligimus. » Ad commendationem gratiæ Dei spiritus veritatis nos inspiret, quo sine nil altum mens concipit, ut pura et fide plena prosequa-

tur oratio quæ pia pro viribus aggredimur intentione. Certo certius est penes eos esse constantiam veritatis quos imitati sumus, inter quos brachii coram martyre immolando præcisi præcellit dextera, quæ nobis ista reliquit transcribenda. Vidi hominem puerulus senem. Volentibus igitur et valentibus præcedentium opera legere, prout quisque operæ digessit tractatum, libellus iste nullum facit præiudicium. Illis curæ fuit in narratione ordinanda ac per hoc ornanda nonnulla de competentibus omittere: mihi vero simpliciter historiæ texere veritatem, et sic etiam ab aliis omissa repetere operæ pretium visum est, cum reperiantur kata Leucam de gestis quædam et verbis Domini a reliquis intacta capitula, quæ fidei nostræ sunt validissima propugnacula. Cum vero sit difficile lineas insequi alienas nec alicubi excedere, si et hic contingat a narrandi serie leviter exorbitare, veniam dabit ignorantia culpæ. Verum quia ingenui pudoris plenum est, ut Plinius ait, fateri per quos perfectis, in præcæm breviter arbitror recensendos primos hujus operis auctores.

Dignitate prior est, quia episcopus, Joannes Carnotensis; secundus Herbertus de Bosan doctor et ipse insignis. Sequens vero Edwardus cognomento Grim, in martyris immolatione, ut diximus, brachio mutilatus. Sed et quartus nihilominus ejusdem nominis Edwardus. Alii quoque vita et eruditione clarissimi, Benedictus scilicet et Alanus abbates, eorumque abbreviator abbas de Clai. Monachi vero Willermus atque Rogerus, quorum prior Cantuariensis, Pontiniacensis erat alter, viri sancti pro Christo exsultantis in Pontinaco minister. Quibus fidem non habere infidelis est.

Pos tales decimus ego vindemiator acinos et decidentia grana collegi, ut quasi ex myrrha et aloe pigra conficiatur, habeatque in aceto passionum Christi ubi buccellam suam intingat Ruth Moabitica ex ipsius beati martyris epistolis, velut apis e flosculis mel plus quam Atticum dulcedinis habens eliciens. Ad hoc enim locis illas per historiam opportunis duximus inserendas, ut et scriptis coronetur suis qui quod jussit hoc gessit, et ut ab ipso mutuetur omnis ordo gradus conditio, hinc quod imitetur inde quod miretur, cum sit mirabilis in singu-

lis, in mirabilibus singularis. Styli remedio restituendi sunt mundo quibus dignus non erat mundus et beatorum martyrum diligentius audienda certamina, ut qui Christi calicem bibimus nacta feliciter occasione pro Christo sanguinem fundere parati simus.

[Post multa similia, quæ omisimus, expliciti prologus verbis quæ sequuntur.]

His etiam accedit quod a viro egregio abbate scilicet Ægidio de Alna, territorii Leòdinensis, ut scriberem sum rogatus, qui mihi hanc prætexuit dicendi seriem: expostulans ut adnotato in margine auctoris nomine intituarem quis hoc quis illud enarret, et de communi quid singuli sibi specificent operis e regione parathesis nomen loquatur opificis, maxime ubi excellentiora tractantur. Quæ igitur ex Francorum, Flandrensium, Anglorum, Britonum, Scotorum atque sub occiduo sole Hibernensium armariis exactissima diligentia indagatis non celanda accepi, communico universis, sancto martyri ad gloriam, lectori ad gratiam, mihi ad veniam. Nihil hic quod non prosit aut delectet ut credimus; ideoque ut memoriæ facilius inhiereat certo prænotata numero in capitula duodeviginti opus omne distinximus: singula fere omnium qui materiæ huic ante nos styllum applicuerint, recensentes virorum duntaxat illustrium, quorum nostris obtutibus est collata facultas. Personam denique propriam post paululum inter anonyma, ut ait Ecclesiastes, oblivione delendam paginis expressius inserere posteris ad notitiam supersedimus, metuentes illud Jeremiæ: « Recedentes a te in terra scribentur, quia in libro vitæ censi minus sunt solliciti, dummodo quod optant obtineant; hoc est ut vocentur Rabbi, cum sola sit voluntas in crimine, dicente Deus: Nolite in sublime attolli. » Sed hactenus hæc, etsi prolixè non tamen supervacue prælibata, præcæm vice sufficientiant. Non enim commendatione privata eget virtus religione publica consecrata, cujus lux et laus evidens, cujus fama non occidens, licet sub occidente.

[Post hæc incipit tractatus de Vita sancti Thomæ, quem, quoniam ex aliis scriptoribus compilatus esse videtur, prætermisimus.]

SANCTI THOMÆ

CANTUARIENSIS ARCHIEPISCOPI ET MARTYRIS.

VITA DECIMA

AUCTORE BENEDICTO ABBATE PETRIBURGENSI

(*Hujus tractatus fragmenta tantum exstant, a Lupo in secundo Quadrilogo edita.*)

FRAG. 1. *Qualiter milites ad archiepiscopum acce-*
derunt et eum convenerunt. Die igitur natalis Domini
quinto, sedente archipræsule in thalamo suo circa
horam diei undecimam, considentibus hinc et inde
clericis et monachis nonnullis, de negotiis et utili-
tatibus cum archiepiscopo agentibus, ecce satellites
quatuor prænominati, cum patre suo Satana a facie
Domini egressi, thalamum archipræsulis ingressi
sunt. Salutati, ut moris est, a nonnullis in introitu
considentibus, resalutatis eis, sed voce submissa,
usque ad archiepiscopum progrediuntur. Et consi-
dentes ante pedes ejus in terra, ipsum nec suo nec
regis nomine salutantes, utpote a quibus longe erat
salus, mors et perditio prope, venenum aspidum,
quod sub labiis gerebant, ut postea impetuosius
erumperet, per moram aliquantulam compresserunt
silentio, innocentissimo Christo Domini nihilominus
tacente.

Cum ita sub silentio, non sine considentium ad-
miracione, modicum temporis intervallam attrivis-
sent, Reginaldus filius Ursi, mente potius ursinus
quam genere, sic sanctum affatus est: « A domino
nostro rege de partibus transmarinis ad te directi,
regia tibi mandata deferimus. Volumus igitur scire,
utrum ea malis secretius, an publice dici. » At vir
Dei nec prospera mundi sperans, nec adversa reformi-
dans, simplici et supplici voce respondit, dicens:
« Hoc vestro arbitrio, vestraque relinquo voluntati. »
Reginaldus ait: « Secretius ergo dicantur, iis qui præ-
sentes sunt interim absentatis. » Sanctus vero, nec
suorum multitudine confusus, nec solitudinem veri-
tus, omnibus suis indixit egressum. Quibus egressis
et solis illis quatuor satellitibus in thalamo cum
archiepiscopo remanentibus, accurrens ostiarius os-
tium patefactum dimisit, ut qui extra Jani conse-
derant, ad dominum suum, christum Domini, oculos
reflectentes, tam ipsum quam illos Dei inimicos
intueri valerent. Cumque Reginaldus prædictus
regia quædam explicuisset mandata, et vir Dei pru-
dentissimus luce clarius perpendisset, quod nec pacis

A nec alicujus boni speciem prætenderent, recolens
etiam illius evangelici quodam præsentio futuro-
rum, Jesus non credebat semetipsum eis, eo quod
ipse nosset omnes, accersito ostiario, tam clericos
suos quam monachos, qui forte ibi aderant, laicis
omnibus exclusis, adesse præcepit. Quibus ingressis,
ait sanctus ad satellites: « Ecce, domini, quæ vestra
placent voluntati potestis his præsentibus loqui. »
Reginaldus ad hæc: « Ex quo ea in publicam potius
venire delegisti, quam secreta teneri, et nos nihilo-
minus ea, tuæ super hoc satisfaciennes voluntati, præ-
sentibus publicabimus. Mandatum tibi a domino
rege deferimus, qui in partibus commoratur trans-
marinis, ut ad filium suum novum regem cismari-
num pergas, facturus ei quod domino et regi facere
debes. » Sanctus ait: « Et quid est quod ei facere de-
beo? » Et Reginaldus: « Hoc in tuam potius debet
venisse notitiam, quam nostram. » At ille inquit: « Si
illud scirem, me profecto nullatenus id ignorare di-
cerem; verum existimo me prorsus ei fecisse, quid-
quid ei facere debeo. » Reginaldus contra: « Nequa-
quam: multa adhuc facienda, multa sunt corrigenda. »
Asseverante igitur archiepiscopo se nescire quid erga
majestatem regiam emendare deberet, nisi illud eorum
benevolentia, quæ utique nulla erat, ediceret,
ait Reginaldus: « Cum te rei hujus penitus confitearis
ignarum, nos tibi quid agere debeas explicabimus:
Mandat tibi dominus rex noster, ut ad filium suum
regem, in finibus cismarinis commorantem, quanto-
cius eas, fidelitatem ei interposito juramento factu-
rus, et quæ in regiam peccasti majestatem emen-
daturus. » Respondit vir Domini, et ait: « Unde illi
fidelitatem tactis sacrosanctis debeo confirmare? aut
in quo majestatis regiae reus effectus sum? » Satelles
autem posteriori questionis parte, quam solvere nul-
latenus poterat, omissa, sic denodavit anteriorem:
« De baronia, quam de domino meo rege tenes, exigitur
a te cum juramento confirmata fidelitas. Et de
clericis quos in terram suam adduxisti, si in terra sua
remanere voluerint, securitatis uramentum nihilo-

minus exigitur. » Archiepiscopus ad hæc : « De baronia domino meo regi, quidquid jus aut ratio dictaverit, facere paratus sum. Verum omni ambiguitate remota pro certo teneat, quod nec a me, nec ab aliquo clericorum meorum juramentum aliquid poterit extorquere. Multa super modum extorta sunt, et jam perjuri et excommunicati nimirum videntur excedere. Sed jam plurimos, Deo gratias, tam a crimine perjurii, quam anathematis vinculo colligatos absolvi, reliquos cum Dominus annuerit, ab eisdem periculis ejecturus. » Reginaldus inquit : « Intelligimus quod nihil eorum, quæ tibi proposuimus, facturum sis. Præterea præcepit dominus rex, ut episcopos suos a te absque licentia sua vel excommunicatos vel suspensos tam a damnationis, quam a silentii absolvas sententia, tam super his, quam super aliis quæ tibi volet objicere, juri pariturus. »

Et archiepiscopus : « Episcopos quidem nec suspendi nec anathematizavi, sed dominus noster papa, cui dignoscitur esse a Domino collata potestas. Si super his causam volueritis instaurare, inter vos et ipsum causa versetur : Mea nihil interest super his vobis respondere. » Reginaldus dixit : « Etsi id in propria persona non feceris, per te tamen et tuo factum est instinctu. » Et Sanctus inquit : « Si dominus papa nimiam ecclesiæ meæ inique illatam respiciens injuriam vindicaverit, fateor mihi non displicere. » Impietatis autem filius, qui huc usque totis institerat viribus, quibus captiose loquens prudentissimum agnum Dei vel in sermone caperet, vel contra Dei et Ecclesiæ, cujus propugnator erat invincibilis, honorem a statu relictitudinis averteret, eum vidisset quia ante oculos pennati frustra rete jecisset, convictiosis eum insimulationibus aggreditur, dicens : « Hoc tibi placere manifestis probas indiciis, quod in regiæ majestatis dedecus atque despectum, episcopos suos ab episcopalibus arces, et a sanctæ matris Ecclesiæ sequestras liminibus, eo quod dominum nostrum novum regem, ad quem de jure spectat hæreditas, utpote regis filium et regiæ, signum etiam in humero ferentem imperii, ausi fuerint coronare. Et cum adversus hanc ejus exaltationem insurgens rex talem præsumpseris, credibile satis est, verique simillimum, quod coronam suam velis subripere, et regno invaso rex terræ nominari et esse. Sed, annuente Deo, nequaquam usque ad dignitatis regiæ nomen proficies. » Sanctus autem non immemor sententiæ, qua dicitur : *Vir iracundus suscitatur rixas, sapiens autem mitigat suscitatas* : amaricato satellitis animo mitis responsi apposuit medicinam, dicens : « Nequaquam, Reginalde, nequaquam ad regis nomen vel dignitatem aspiro, nec coronam suam ab eo avellere cupio ; tres ei potius vel quatuor coronas tales, si mihi pro voluntate facultas responderet, libenter impositurus. Nec æstimo quemquam, solo patre suo, domino meo rege excepto, in mundo esse, qui tenerius me illum diligit, vel plus ei boni exoptet. Quod hoc ei, vita comite, si Dominus annuerit, opere comprobabo. Porro super episcopis, quos a me vel

A per me suspensos asseritis vel excommunicatos, pro certo noverit vestra discretio, quidquid actum est, regio actum consensu atque consilio. Cum enim in festo beatæ Mariæ Magdalænæ, reformata inter nos pace, in pristinam gratiam me recepissem, et super injuriis et violentiis mihi meisque illatis, maxime vero super episcopis, qui in matris suæ Cantuariensis Ecclesiæ despectum, quod mei erat officii usurpare non timuerunt, querimoniam apud ipsum deposuissem, ille sua gratia ut a domino papa juris et æqui vindictam qualemcumque possem impetrare concessit, adeo ut non solum ad consensum inclinari, sed etiam spondere mihi dignaretur auxilium. » Exclamans autem Reginaldus, tam facili curialitatis vacuus, quam furore plenus, inquit : « Audi, quid B est tu dicis ? Inexemplificata et inaudita proditio : si dominus rex episcopos suos excommunicandi vel suspendendi tibi contulisset licentiam, qui præcepto suo filii sui coronationi interfuere. Porro nunquam ei in mentem venit. Te vero immensi mali noveris auctorem, qui dominum nostrum regem tali proditione insimulas. » Archiepiscopus inquit : « Reginalde, Reginalde, nequaquam regem proditoris accuso. Verumtamen reformata inter nos concordia, et habitæ inter nos conventiones nequaquam ita latenter factæ sunt, quoniam archiepiscopi, episcopi, viri multi sublimes, viri valde religiosi quingenti etiam et eo amplius milites eis interfuerint, easque audierint. Sed et tu ipse, domine Reginalde, interfuisti. » Respondit veritatis inimicus, et dixit : « Vere C neque ibi præsens adfui, nec hæc vidi, vel audivi. » Sanctus autem, utpote tam in verbo quam in voce temperatissimus, suppliciter et simpliciter affirmans ait : « Imo Deus scit ; certus sum enim, quia te viderim ibi. » At ille rursus, quod ibi non fuisset pejerando, seque pejerando inficiatus ait : « Mirum est et inauditum, quod domino nostro regi tantæ proditionis notam imponis. Nec hoc poterit de te ullatenus suslinere, nec nos, qui homines ejussumus fideles, ulterius sustinebimus. » Exclamaverunt autem tunc et alii milites, in minas easdem prorumpentes, per plagas Dei iterum atque iterum jurantes, quod eum supra modum sustinuissem. Turbati sunt igitur insipientes corde, et iniquitatem in ex- D celso locuti : convitia convitiis, minas minis accumulantes.

Vir autem Domini, qui non solum minis et convitiis venerat affligi, sed et caput gladiis pro tuenda libertate Ecclesiæ libenter exponere, juxta illud ethici,

Dum furor in cursu est, currenti cede furori,

mitius respondit dicens : « Ex quo in fines istos cum Dei regisque plenaria pace per ipsorum conductum deveni, multas satis comminationes, multa opprobria, multa damna sustinui. Verbi gratia, de hominibus meis captis, et rebus eorum violenter ablati ; de equis meis, quos Robertus de Broc mutilavit cauda ; de vinis meis, quæ Ranulphus de Broc violenter detinuit, quæ etiam dominus rex per me-

dium terræ suæ transmarinæ deduci fecit in Angliam. Aliis etiam injuriis et opprobriis multis affectus sum, cum dominus noster rex filio suo regi tam per breviam, quam nuntiorum viva voce mandaverit atque præceperit mihi meisque firnam pacem haberi. Et super omnia hæc mihi comminari venistis. Noveritis quia talia valde moleste fero. »

Reginaldus ad hæc : « Si quis aliquid forte præsumpserit, quod in tuam videbatur redundare injuriam, quare non illud exposuisti, et quidquid jós dictaret aut ratio, reportasses? » Archiepiscopus inquit : « Apud quem querelam meam deponerem? » Et satellites : « Apud regem cismarinum. » Archiepiscopus inquit : « Amice, satis conquestus sum, satis illatas mihi injurias exposui, satis ad satisfactionem impetrandam incassum laboravi. Præterea tot mihi in dies cumulantur injuriæ, tot et tam tediosis malis affligor, tot in auribus meis tam noctibus quam diebus pauperum morum hominum resonant querimoniarum, quod ad singulas necessitates singulos nequeam nuntios invenire. Sed et injurias meas quamvis exposuero, juris mihi et rationis beneficium denegabitur. Rex enim cismarinus, ejusque justitiæ, ex domini regis in finibus transmarinis commorantis pendentes consilio, nihil eo faciunt inconsulto : mihi juris et æquitatis, meis transfretandi et regem adjuvendi copia denegatur. Unde et male nimis mecum agitur. Verum ex quo nec hinc nec illinc recti quidquam seu justitiæ invenio, ego qualem potest et debet archiepiscopus exercebo, pro nullo mortalium id dimissurus. » Ad hanc vocem unus illorum exclamavit : « Minæ, minæ : etiamne totam terram interdicto subicies, et nos omnes excommunicabis? » Et alius : « Sic mihi Deus sit propitijs, nequaquam id efficiet : multos supra modum in anathematis vincula coniecit. » Illis igitur exsistentibus, et iræ et convitiis frena laxantibus, chirothecas contorquentibus, brachia furiose jactantibus, et tam gestibus corporum quam vehementia clamorum manifesta insanitæ indicia dantibus archiepiscopus etiam surrexit. Jam vero præ nimietate tumultus et confusione nemo facile noverat discernere, quæ verborum venena quisque illorum in Christum Domini spargeret.

Tandem vero filii Belial ad monachos, qui forte aderant, conversi, his eos verbis in proprium et totius patriæ patrem armare, casso licet labore, copati sunt : « Ex parte domini regis præcipimus vobis, ut hunc hominem ne quoquam divertat, diligenter custodiatis, rursus illum regi, cum ei placitum fuerit, representaturi. Eundemque sermonem iterum iterumque replicantibus respondit pius pater pro filiis : « Quid est hoc? Nunquid me fuga labi velle putatis? Nec pro rege, nec pro aliquo viventium fugam inibo. Non veni ut fugerem, sed ut græssantium rabiem et impiorum malitiam expecitem. » — « Vere, inquit satellites, vere, volente Deo, non effugies. » Nec administraverat verbum istud viro sanctissimo in regis despectum inflata superbia, sed in virtutis exemplum fundata in Chri-

sto perfecta que constantia : illis itaque in tumultu maximo et contumellis egredientibus, plurimumque comminantibus, secutus est eos archiepiscopus usque ad ostium thalami, Hugonem de Morevilla, qui cæteris sicut nobilitate generis, ita et virtute rationis debebat præeminere, ut secum reversus loqueretur, inclamitans. Verum illo, reliquisque, utpote qui jam seipsos præ furore capere non poterant, cum superbia et indignatione abeuntibus, reversus vir Domini resedit, et de hujusmodi regis mandatis, ac satellitum contumeliosis verbis coram suis conquestus est. Unus autem clericorum suorum, videlicet magister Joannes Saresberia, vir litterarum multarum, eloquentiæ magnæ, profundique consilii, et quod his majus est, in Dei timore et amore fundatus, conquerenti tale dedit responsum : « Domine, inquit, res nimis admirabilis est, quod nullius admittis consilium. E quæ necessitas fuit tantæ excellentiæ viro ad ampliorem malignorum illorum exacerbationem surgere, et post eos ad ostium usque procedere? Nonne satius esset, communicato cum his, qui præsentibus sunt, consilio, mitius eis dedisse responsum, qui tibi quidquid possunt machinantur mali, et ut te ad iracundiam provocatum in sermone saltem, capiant? » Sanctus autem, qui pro justitia et libertate Ecclesiæ ad mortis angustias, tanquam ad quietis delicias suspirabat, inquit : « Consilium jam totum acceptum est. Novi satis quid agere debeam. » Et magister Joannes : « Utinam, annuente Deo, bonum sit! »

Egressi igitur milites profani, et ad socios et complices suos in curiam accelerantes, et se velocius armantes, reversi sunt in loriceis, cum gladiis et securibus, arcibus et sagittis, et bisacutis, et cæteris instrumentis, vel ad seras et ostia demolienda, vel ad excogitatum flagitium mancipandum effectui. Precurrentes vero aliqui ad archiepiscopum clamabant : « Domine, domine, armant se. » At ille : « Quæ cura? sinite armare. » Erat in detestanda illorum societate perditionis ille filius Robertus de Broe, quem, ut diximus, propter scelorum suorum enormitatem die natalis Domini anathematizatum, a communione fidelium præsciderat vir sanctus, qui introitus et exitus curiæ noverat universos, utpote qui dum exsularet archiepiscopum, sub domino suo Randulpho de Broc totius archiepiscopatus habuerat custodiam. Dum igitur ostium aule occupare festinarent, præventibus famulis exclusi sunt. Cumque ostio clauso et objectis obicibus, prorsus eis denegatus esset introitus, ducatu præfati Roberti ad gradus quosdam secretiores, per quos de thalamo exteriori in pomærium erat descensus, quantocius diverterunt, proximaque fenestra demolita, etiam ostium reserarunt. Cumque fortissimo Dei athleteæ præcurrentibus famulis undique acclamatum esset ut fugeret, ille cui nihil vilius erat quam mortem timere pro Christo, nec loco nec animo motus est. Instantibus etiam tam clericis quam monachis, et oppido illum ad fugam hortantibus, nihilo-

minus sedebat intrepidus, nesciens cum his, qui ad tempus credunt, in tempore tentationis recedere. Monachi vero, qui forte pauci aderant, seram ostii, quod ad Ecclesiam per claustrum docebat, confringentes, patrem suum, licet invitum, educere satagebant, honestiorem ei discedendi causam proponentes, horam videlicet esse, qua eum in ecclesia vespertinas laudes oporteret exsolvere. Tunc Sanctus, Dominicum illud præceptum etiam ad litteram non immemor observare : « Qui vult venire post me, abneget semetipsum, et tollat crucem suam, et sequatur me, » crucem præferri sibi præcepit. Egressus autem cum a comitantibus accelerare cogeretur, quasi fugam erubescens gradum fixit. Instantibus autem nihilominus monachis, et ut procederet oppido compellentibus, sive quia irreverentius solito, sive ut suos confirmaret et consolaretur, hæc eis verba sæpius replicabat : « Quid est hoc, domini, quid formidatis? » Cumque ad ostium claustrum appropinquassent, et nec illud confringere possent, nec clavem præmanibus haberent, ecce cellerarii duo Cantuariensis Ecclesiæ, Ricardus et Willelmus, qui audito tumultu et collisione armorum per viam claustrum illo properabant, ostium idem, avulsa sera, venienti archiepiscopo patefecerunt.

FRAG. 2. De ingressu archiepiscopi in ecclesiam. Audito igitur armorum superventu, quidam ex fratribus ad orationem adhuc persistebant, quidam timentes diverticula petebant. Quibusdam vero subvenire volentibus, exivit quidam ex fratribus dicens : « Ingredere, pater, ingredere, mane nobiscum, ut si necesse est una compatiatur et glorificemur. Exanimatos absentia tua præsentia, consoletur. » Respondit : « Ite, divinæ servitutis pensum implete. » Et subsistens ad ostium inquit : « Quandiu tenebitis introitum, non introibo. » Cedentibus illis ingressus monasterium substitit in limine, repellensque populares circa se quasi ad spectaculum constipatos, inquit : « Quidnam metui gens ista? » Responsum est : « Armatos in claustrum. — Ad ipsos, ait, exeo. » Prohibentibus autem fratribus eum exire, cepit circa limen observari, et cum procedere moneretur, et ad Sancta sanctorum se conferre, ut deferretur ei ex reverentia loci, non acquievit.

Tumultuantibus interea clericis, quibusdamque fratribus vectem ferreum obducentibus inquit : « Abite, pusillanimes, sine miseros et cæcos delirare : præcipimus in virtute obedientiæ, ne ostium claudatis; non enim decet ecclesiam incastellari. » Omissis igitur vespertis accurrunt quidam monachorum, pastoremque suum, licet renitentem, introducetes, clausis ecclesiæ valvis hostes festinant excludere. Regressus autem pater sanctus : quantocius increpabat eos dicens : « Dimittite meos intrare. » Et accurrens ostium aperuit, et hos et illos a valvis removens, suos qui deforis luporum morsibus relictii fuerant, sacratissimis manibus suis trahebat in ecclesiam, dicens : « Introite, introite citius. » Ut dicere posset cum Domino : « Ques dedisti mihi, non

perdidi ex eis quemquam. » Tandem vero florum suorum instantia violenter inde abstractus, hostibus jam prope positis ostia patefacta reliquit, ne impedito illorum itinere ejus impediretur martyrium, quo se scierat et prædixerat futurum esse beatum. In finibus enim transmarinis adhuc positus duobus abbatibus, Pontinaci scilicet et Vallis-Lucentis, sicut præscripsimus, passurum se esse martyrium, et in ecclesia occidendum manifeste prædixerat. Utrique etiam prædixerat in Angliam se esse iturum, non tam propter domini papæ præceptum, quam propter martyrii sui revelationem.

FRAG. 3. Et cum vir Domini illam mortis horam satis declinasse potuisset, si vellet, intrantibus in monasterium prædictis satellitibus, et aliis : « Ubi est ille proditor? » aliis : « Ubi est archiepiscopus? » vociferantibus, sciens Sanctus in spiritu omnia, quæ ventura erant super eum, occurrit iis e gradibus, quorum aliquos jam conscenderant, vultu intrepido dicens : « Ecce ego non proditor, sed archiepiscopus; » Dominum videlicet imitatus, qui quærentibus se Judæis processit obviam, dicens : « Ego sum. » Accedens autem primus illorum dixit sancto : « Fuge, mortuus es! » Ait sanctus : « Nequaquam fugiam. » Sacrilagus autem satellites manu in eum conjecta, pileumque mucrone dejiciens, inquit : « Veni huc, captus es. » At sanctus : « Hic mihi facietis quæ facere vultis; » palliique sui laciniam de manu ejus excussit.

FRAG. 4. Et ad alterum loricatum, quem gladio nudato appropinquare videbat, conversus dixit : « Quid est, Reginalde? Multa tibi contuli beneficia; et ad me in ecclesiam armatus accedis? » Nonne his verbis videbatur imitator Christi Christum exprimere Judæis dicentem : « Tanquam ad latronem existis cum gladiis et fustibus comprehendere me? » Cui satellites spiritu furoris plenus inquit : « Jam scies; mortuus es. »

FRAG. 5. Et inclinato capite secundi vulneris præstolabatur adventum. Secundo vero vulnere capiti ejus inflicto, recto corpore quasi ad orationem prostratus in terram corruit. Tertius autem plurimam testæ portionem amputando vulnus præcedens horribiliter ampliavit. Quartus autem ab uno eorum quod ferire tardaret correptus, in idem vulnus in manu gladium vibravit, gladioque in pavimento marmoreo confracto, tam cuspidem, quam gladii sui capulum reliquit ecclesiæ. Satisque veritati congruum esse videretur, quod non nihil res ista portenderit. Quid enim gladii adversariorum confractio, nisi potestatis adversæ defectionem veram, et triumphaturæ per sanguinem martyris, Ecclesiæ signare videtur victoriam? Nec sufficere videbatur eidem filio Satanae in Dei sacerdotem tantum perpetrasse flagitium, nisi etiam, quod dictu horribile est, injecto in sanctissimum caput ejus gladio, jam defuncto cerebrum ejiceret, et per pavementum crudelissime spargeret, sceleris ejusdem participibus clamans : « Mortuus est, quantocius eamus hinc. » Unle ti-

muisse illos conjici potest, ne supervenientes aliqui de sancti martyris militibus vel famulis domini sui sanguinem vindicarent. Exeuntes autem de monasterio, sicut in prælio fieri solet, in insignis victoriae signum clamabant: « Regales milites, regales! » Alii autem insultabant dicentes: « Voluit esse rex; voluit esse plus quam rex; modo sit rex, modo sit rex. » Et in hoc similes illis, qui Domino in cruce pendenti insultabant, prætereuntes et capita sua moventes, et inter cætera dicentes: « Dixit enim, quia Filius Dei sum. »

FRAG. 6. Cui unquam martyrii titulus exstitit glorioſior? Cum enim singuli martyrum singulas causas agentes singulare ob salutem propriam certamen interint, iste universalis Ecclesie causa suscepta contra principes et tyrannos, contra Ecclesie sanctæ mercenarios potius quam pastores decertans, ut eam evinceret, satellitibus de corpore suo triumphum reportare permisit. Illos alterius sectæ homines, istum Christicolæ et filii proprii peremerunt.

FRAG. 7. De spoliis et vestimentis quæ partiti sunt milites inter se. Iniquitatis igitur operarii, non minus cupiditatis siti laborantes, quam sanguinis innocentis effusione inebriati, ad palatium archiepiscopi cum complicitibus suis quantocius recurrerunt. Et aliis a stabulo equos violenter extrahentibus, aliis famulos illius cædentibus, aliis revolventibus omnem domus suppellectilem et cliellas, et scrinia demolientibus, quidquid auri vel argenti, vestium aut variorum ornamentorum inventum est, inter se pro voluntate propria diviserunt. Sic enim divinæ placuit pietati, potenter et sapienter disponenti omnia, ut eorum, qui Christi vestimenta partiti sunt, imitatores effecti passionem servi passioni Domini plenius assimilarent: quatenus manifesta rerum similitudine cunctis innotesceret fidelibus, ita eripiendam esse Ecclesiam per sanguinem martyris a servitute mundi, sicut per mortem Christi redempta est a potestate diaboli. Porro scripta omnia et privilegia, quæ malitiosi illi repperunt, filio perditionis Raulpho de Broc tradita sunt, ad regem in Northmanniam transferenda; ut ea videlicet, quæ regni sui consuetudinibus viderentur adversari, et vel universalis Ecclesie libertati vel Cantuariensis Ecclesie patrocinari dignitatibus, pro libitu suo aut comminueret, aut nunquam videnda recluderet. Et milites quidem hæc fecerunt.

FRAG. 8. Elevato autem sancto corpore de terra, ut in figura ostenderet, quia malis malleus esset futurus, et quia quocunque præterquam ad pœnitentiam diverterent, nequaquam ultionis ejus sententiam possent evadere, inventa sunt sub eo malleolus ferreus et bisacuta a parricidis illis derelicta, quæ corruens, quasi vindicata sibi in illos potestate, occupaverat. Et cum cruor ad instar diadematis, forsitan in signum sanctitatis, capiti circumfusus jacuisset, facies tamen a cruore prorsus immunis apparuit, excepto tractu quodam gracili, qui a dextra frontis parte in faciem sinistram per transversum nasi de-

scenderat. Cum quo etiam signo multis postea nihil inde prorsus scientibus per visionem apparuit, qui non aliter illud referendo descripserunt, quam si corporeis id oculis inspexissent. Jacente autem adhuc in pavimento in sanguine alii oculos suos liebant, alii vasculis allatis, quam poterant, partem subripiabant, alii certatim præcisas vestes intingebant: nec sibi quisquam postea visus est satis fuisse beatus, qui non de pretioso illo thesauro quantulamcunquo reportasset portionem. Et quidem conturbatis et confusis omnibus, licuit singulis quidquid libuit. Pars autem cruoris, quam Ecclesie dimiserant, in vas mundissimum mundissime collecta in ecclesia reponitur conservanda. Pallium ejus et pellicia exterior, sicut erant cruore infecta, pauperibus pro anima ipsius minus discreta pietate collata sunt: satis quidem felicibus, nisi ea statim inconsulte vendentes parvum eis pretium prætulissent.

FRAG. 9. Transacta est igitur nox illa lamentabiliter, in dolore, in gemitibus, atque suspiriis, et nec ad momentum vel conscia lætitiæ vel mœroris ignara, diem malitia majore suspectum adduxit.

FRAG. 10. Qualiter sancti martyris corpus deductum sit ad tumulandum. In crastino vero multa rursus armatorum manu extra civitatis mœnia congregata, divulgatum est undique majoris eos activitatis intentione confluisse, videlicet ut sancti martyris corpus a gremio sanctæ matris Ecclesie violenter abstractum vel per totam civitatem equis distraherent, aut patibulo suspenderent, aut in frusta vel minutias conscissum in paludem, vel in quemlibet locum viliorē, quem nec nominare decet, in majorem Dei et Ecclesie despectum projicerent, dicentes corpus proditoris non esse inter sanctos pontifices sepeliendum. Monachi igitur tam sibi quam sancto timentes, ne vel ipse vilius tractaretur, vel ipsi pretiosum thesaurum amitterent, eum cum summa festinatione sepelire studuerunt. Unde nec eis sacratissimum ejus corpus lavare nec balsamo, sicut moris habet sancta Cantuariensis Ecclesia, licuit refovere. Quod non tam humana nequitia, quam divina pietate creditur evenisse. Cui enim proprii sanguinis unctionem procuraverat Dominus, quæ erat necessitas odoris vilioris unguenti? Exeuntes autem eum vestibus exterioribus, et pontificalibus induentes, corpus ejus cilicio, non minus aliunde quam sui duritia molesto, involutum, et quod a nullo sanctorum exemplificatum legimus vel audivimus, ipsa ejus femoralia interiora usque ad poplites cilicina, habitumque super indutum monachalem, flammam videlicet et cucullam reppererunt. Respicientes vero ad invicem, et in aspectu sic occultatæ religionis supra quam credi potest obstupefacti, multiplicata pii doloris materia multiplices renovantur in lacrymas. Quid putandum est in homine isto fuisse cupiditatis, quid proditoris? Nonquid ad regnum aspiravit terrenum, quem constat sæculi deliciis tam occulte prætulisse cilicium? Nonquid regie majestatis proditor fuit, et non potius proditus, qui etiam

proditoribus suis, proditoris filii, nec credem voluit, cum posset, nec resistere? Poterat enim fraudem et rabiem hostilem, si vellet, vel prudenter declinare, vel vi repulisse majori, ut potens, ut præscius, ut præmunitus. Ut potens, quia hostes, quamvis decuplati venissent, posset, si voluisset, repulisse centuplicatus. Ut præscius, quia cum die nativitatis Dominicæ verbi Dei panem populo ministrasset, ait inter cætera: « Non alia de causa rediisse se ab exilio, nisi ut vel eos a iugo inflictæ sibi servitutis exueret, vel inter eos et pro eis mortis pateretur supplicium. » Sed et abbatibus transmarinis ut prædictum est, passionis suæ fecerat mentionem. Porro sicut super his divina pietate edoctus, sic et humana sedulitate præmonitus et præmunitus est. Qua in re licet plurimorum benevolentia meritum sibi dicatur acquisisse, de duobus tamen constare certum est. Ricardum enim Cantuariensis Ecclesiæ cellerarium, miles quidam sibi familiaris eundem sanctum Domini tertiæ diei vesperam non visurum sub fidei interpositione certificavit; contra fidem tamen, qua in patris sui necem homicidii illis fuerat obligatus: maluit enim fidei, qua tenebatur eis, incurrere si quod erat periculum, quam sub silentio tam detestabilis homicidii reatum. Quod cum Ricardus prædictus illi beatissimo Dei servo retulisset, subridens respondit: « Minæ sunt. » Verum a cive Cantuariensi, Reginaldo nomine, certior effectus, quod jam in Angliam applicuissent, qui in ejus mortem conspiraverant, seu pro illorum nequitia delenda, seu pro pace Ecclesiæ necdum adepta vehementer illacrymatus ait: « Paratum me ad mortem invenient: faciant quod facere volunt. Scio quidem, fili mi, et certus sum pro arma me moriturum.

A Verumtamen extra ecclesiam meam non me occident. » Nonne et his verbis non solum passionis suæ, sed et modi et loci præscius fuisse comprobatur? Sed quia non erat regnum ejus de hoc mundo, si enim esset, ministri ejus utique decertassent, ut non traderetur eis, elegit calicem Domini sponte cum hilaritate bibere, quam vel constantiæ prioris virtutem inertis fuga maculare, vel in defensionem sui pugnatos in arma vocare. Illum videlicet in hoc imitatus, qui duodecim legiones angelorum, quas ad sui defensionem a Patre suo impetrare potuit, noluit implorare. Nec ullius martyris passionem facile credimus inveniri, quæ passioni Dominicæ tanta similitudine respondere videatur.

B FRAG. 11. Passus est autem egregius Dei athleta Thomas Cantuariensis Ecclesiæ archiepiscopus, totius Angliæ primas, et apostolicæ sedis legatus, anno ab incarnatione Domini millesimo centesimo septuagesimo, vitæ vero ipsius anno quinquagesimo tertio, quarto Kalendas Januarii, feria tertia, hora quasi undecima, ut dies quintus Dominicæ nativitatis ad miseriam ejus fieret natalis ad gloriam, præstante eodem Domino nostro Jesu Christo, cui cum Patre et Spiritu sancto honor, et virtus, et imperium est per infinita sæculorum sæcula. Amen.

Hæc quæ præcedunt e quadrilogo Lupi excerpta, Benedicti præ se nomen ferunt auctoris. Utrum vero ea, quæ istius quadrilogi compilator sub nomine DE GESTIS POST MARTYRIUM adnecit, Benedictum an alium auctorem habeant, equidem nescio. Omnia ea infra in isto quadrilogo sum editus, nisi, quod valde suspicor, in opere Herberti de Boscum, cujus exemplar perfectum spero in meas manus brevi perventurum, reperta fuerint.

PASSIO SANCTI THOMÆ

CANTUARIENSIS ARCHIEPISCOPI ET MARTYRIS,

AUCTORE ANONYMO LAMBETHIENSI.

QUONIAM vero multi sermonis prolixitatem et obscuritatem abhorrent, ideo succincta et levi oratione perstringatur de martyrio sanctissimi Thomæ Cantuariensis archiepiscopi, quod me præsentem, qui hæc refero, et aliis quam plurimis actum Deo teste dignoscitur. Et quia hoc subito referre, nulla præmissa præfatione, esset non lotis manibus ad mensam accedere, idcirco præcedentia vitæ ipsius prælibentur. Beatus qui audierit verba hujus lectionis, et ea conservaverit ad incentivum martyrii, ut si forte res exigit, paratior sit dare animam vel salutem pro nomine Jesu contumeliam pati.

I. QUALITER ORTUS SIT.

Inter Angliæ municipia, vicos et civitates, Londonia melior et major habetur. Ad hanc, postquam facta est sub ditione Normannorum, quamplures indigenarum Rothomagi et Cadomi, quæ nobiliora Normanniæ loca sunt, de transtulerunt, incolæ civitatis esse delegentes, eo quod mercimoniis aptior et refertior erat quæ frequentare consueverant. Ex horum numero fuit Gilbertus quidam cognomento Becchet, patria Rothomagensis, inter cæteros, genere, strenuitate, facultatumque possibilitate bene nominatus. Honestam siquidem, sed ex burgensibus ori-

ginem duxit, et in commerciorum exercitio vir industrius, domum propriam pro vitæ genere satis honorifice rexit, inter concives suos non solum sine querela conversatus, sed etiam boni viri testimonio notus. Habuit autem uxorem nomine Roesam, natione Cadomensem, genere burgensium quoque non disparem, corporis compositione decentem, sed moribus decentiorem, domulque suæ bene præpositam, et sibi sub Dei timore fideliter subditam.

II. PRÆSAGIUM ORTUS EJUS.

Hæc cum de ipso semel haberet in utero, pro foribus Cantuariensis Ecclesiæ se per somnium repperit, et quasi progrediens ut intraret, præ tumentis uteri grossitudine vix ingredi potuit. Præsagium hoc utique fuit futurorum: filium siquidem inter viscera tunc gestabat, cujus plane futuram magnitudinem utri dilatatio præsignavit. Jam autem magnus et tamen nondum natus, in Cantuariensem portabatur Ecclesiam, quia clarus in palatio, sed adhuc parturiendus Christi servitio, sublimandus erat in pontificalem ejusdem Ecclesiæ cathedram. Vix etiam præ magnitudine potuit intronizari, quia multum ad ipsum ejus in sæculo fastigium suspirantibus invidis vix primo promovendus, vix postmodum exsul restituendus, et demum arcto passionis ingressu sanctorum Ecclesiæ numero fuit aggregandus. Hæc autem ex sequentium serie plenius et distinctius patent.

III. DE PRIMITIVA EJUS NATIVITATE.

Itaque suo post somnium tempore natus est hic eleganti specie filius. Quem nutu divino patrini Thomas vocaverunt, ut nomen ei non deesset apostoli, qui vitam apostolicam habiturus erat et finem. Mox autem, ut natus est, parentes eum ecclesiasticæ militiæ servitio devoverunt, et post infantilis decursum ætatis, litteralibus rudimentis imbuendum tradiderunt.

Acer igitur ingenio, tenacisque memoriæ, sicut crescebat ætate, proficiebat eruditione, citoque scholarium meliores æquiparasse potuerat, si qua cœperat celeritate discendi sciendorum tramitem pergrasset. At postquam magistri metum evasit et sui juris effectus est, ut juveniliū levitas ferebat annorum, lubricis discursibus instituit, et seriis discendorum omissis, sæcularium ineptiis meditationum inhæsit, aucupum et venatorum exercitiis deditus, curialiumque vanitates et nœnias amplexatus. In his tamen nihil turpiter notabile gessisse repertus est, quia cujusque rusticitatis notam cavens, et urbanitatis doxam captans, inter urbaniores etiam primus haberi semper enisus est.

IV. QUALITER FACTUS SIT CANTUARIENSIS ARCHIDIACONUS.

Quem autem in sublimiorem columnam Ecclesiæ gratia divina providerat erigendum, hunc ad subcundum ecclesiastici jugum obsequii demum convertit. Et quia futurum in Anglia luminare majus

sub modio latere non decuit, in celebriorem Angliæ curiam militaturum transvexit. Acciri siquidem sedit eum in comitatum Theobaldi Cantuariensis archiepiscopi Angliæque primatis, quasi ut ipso conversationis experimento fieri disceret ejus imitator, cujus futurus erat successor. Extunc igitur evacuans plurima quæ parvuli fuerant, juveniles lapsus virili maturitate redimere studuit, et seriis curiæ quæ magna tractabat operam dans, innatam industriam mox exercuit, in agendis Domini sui reperiens et prudens consultor et strenuus exsecutor. Ob hoc ejus familiaritatem sibi magis magisque concilians, inter primos etiam assessorum ipsius locum adeptus est. De magnæ quoque probitatis indicio multis gradatim auctus Ecclesiæ beneficiis: tandem etiam Cantuariensis factus est archidiaconus. Item gratia divina scalam et occasionem pontificalis ei procurabat ascensus. Jam enim quanto superior et major erat in ecclesia sua, tanto propinquior ad suscipiendam ejusdem gubernationem fiebat.

V. QUALITER FACTUS SIT REGIS CANCELLARIUS.

Et quoniam ad hujus rei complementum præcipue cooperari poterat regis assensus, divinitus etiam procuratum est, ad faciliorem promotionis viam, ut ejus fieret a secretis. Cum enim non multo post, Stephano rege defuncto, nepotem regis Henrici primi Henricum secundum in regem Angliæ de successione hæreditariæ jure sublimari contingeret, præ cæteris regni personis ecclesiasticis obtinuit etiam dictus archidiaconus novi regis constitui cancellarius. Et tantum quidem principem talis apocriarius optime decuit. Erat enim pulcher facie et decorus aspectu, consilio discretus et promptus, eloquio purus et expeditus, naturalique quadam gestus excellentia reverendus: tanta denique magnificentiæ gloria cæteros curiæ magnates antecedens, quantum et officii singularitate præcellens. Quibus apud regem amoris privilegium et inter consiliarios primatum emeruit, quotidie proficiens atque succrescens, donec vehementer magnus effectus est. Gubernabat enim omnia quæ regis erant, et ad oris ejus imperium universas subditorum intendebat.

VI. QUALITER FACTUS SIT CANTUARIENSIS ARCHIEPISCOPUS.

Interim archiepiscopo Theobaldo rebus humanis exemplo, deferendi locum honoris dilecto suo rex se nactum esse gavisus est. In multis enim expertus magnanimitatem ejus et fidem, tanto quidem fastigio bene sufficientem credidit, sed et ad suas utilitates facile semper inclinandum, et si dies suos mors immatura præcideret, hæredibus suis futurum fidum tutorem præcipue cogitavit. Unde totis enitens viribus non prius destitit, quam apud Angliæ clerum obtinuit eum in archiepiscopum subrogari.

VII. FACTI REPREHENSIO.

Nonnullis tamen id circa promotionem ejus vi-

sum est minus canonicum, quod ad eam magis ope-
rata est regis instantia quam cleri vel populi vota.
Præsumptionis quoque vel indiscretionis fuisse voca-
tum est, quod qui remum tenere vix idoneus vide-
batur, primum gubernaculi locum suscepit, præser-
tim in ecclesia, cui conventus in habitu religionis
deservit, cujus etiam præsul religionis professor esse
consuevit. Ipse vero vix etiam clericum veste gestuve
profiteus, magis autem mutatoris mollium inter
aulæ delicatos delicatius nitens, magis etiam sæcula-
ria sapiens, tam sanctum tantæ dignitatis fastigium
non horrens renuisse, sed ultroneus ascendisse cre-
ditur; aliter quidem quam vel amicus Dei Moyses,
vel sanctificatus ab utero Jeremias. Hic enim cum
ad prophetandum Jerusalem etiam a Domino mit-
teretur, verecunde respondit, « a a a, Domine Deus :
nescio loqui, quia puer ego sum. » Ad populi quo-
que sui ducatum electus quamvis a Domino Moyses,
onus tamen expavescens ait : « Quis ego sum, ut
vadam ad Pharaonem et educam filios Israel de
Ægypto? » et iterum : « Obsecro, Domine, non sum
eloquens, mitte quem missurus es. » De sanctis quo-
que Novi Testamenti frequentius legitur, quod ad
episcopatus officium proveci sunt, magis compulsi
quam spontanei. Beatus enim Gregorius etiam a
fuga retractus est, et invitatus in sede Romana loca-
tus. Beatus item Ambrosius satis reluctans, et ut
repelleretur crimina de se confitens, tandem impe-
ratoris Valentiniani jussu pontificatum recepit. Bea-
tus quoque Martinus religiosa civium calliditate
circumventus et captus, non nisi coactus et tristis
consecratus est. Horum igitur exemplo, quod se
tanquam indignum et imparem melius excusasset
cancellarius, plurimi judicaverunt, aliter actum ab
ipso mordaciter accusantes.

VIII. APOLOGIA EJUS.

Ut autem veritas non negetur, tanquam multo-
rum peritus et solitus bene futura metiri, tantæ
curæ periculum satis prævidit et ponderavit. Haud
dubium enim, quin noverit celsitudinis illius pariter
honorem et onus. Qualiter scilicet sicut totius ec-
clesiæ regni fieret caput, sic et in caput suum ec-
clesiasticum omnis redundaret excessus. Qualiter
etiam consueta delicias abdicare, veteremque pro-
sus hominem oporteret exuere, si debitam officii
semitam vellet incedere. Qualiter item futurus esset
opprobrium hominum et abjectio plebis, si tepe-
sceret in eo vigor ecclesiasticæ correctionis, aut si
hic ut decebat procederet, multorum offensæ suc-
cresceret : demum aut regem dilectum dominum
suum amissurus esset aut Deum. Nec enim merere-
tur cum Deo regnare, regis motibus obsequens,
aut posset cum rege gaudere sanctorum Dei leges
præponens. Hæc procul dubio prævidens et in animo
sæpius volvens ac revolvens, his arctatus et territus,
sublimationis arduum satis horruit, satis animo fu-
git : satis etiam se contra regis instantiam excusando
declinare tentavit, non dissimulans aut ei celans,

A qualiter sublimatum se vel Dei vel ejus gratia pri-
vari contingeret. Quanto magis autem reluctabatur,
tanto rex vehementius circa id votum exarsit, adeo
de probitatis illius singularitate bene sentiebat, adeo
de fide et devotionis ejusdem circa se plenitudine
confidebat. Cui procul dubio necesse fuit obsequi,
vel ipsum indubitato proscriptionis et odii subiacere
discrimini. Sed et diebus eisdem Henricus Pisanus,
Ecclesiæ Romanæ presbyter cardinalis, in Norman-
nia legationis exercebat officium. Cujus consilium
et instinctus ad hoc etiam diligentius accessit, ut
munus tam instantè oblatum pro Christi Ecclesia
non respueret, nec occasionem tam honestam sper-
neret, quæ liber ab humano, Dei deinceps vacare
posset obsequio. Demum cum ad præficiendum sibi
B metropolitanum clerus Angliæ convenisset, in hunc
unanimitè et instantè tam matricis Ecclesiæ quam
suffraganeorum præsulum postulationes convenisse
reperitæ sunt, et licet sicut evenire solet in talibus
æmuli quidam non parum suspiraverint, nihil tamen
palam propositum est quod rem vel præpediret vel
differret. Talibus itaque nequens ille non vinci,
jactavit cogitatum suum in Domino, justeque re-
putans ejus fore decretum quod ita studium urgebat
humanum, elegit melius in Dei manus incidere,
totum se misericordiæ illius committens et subdens.
Ut etiam de sequenti ejus vita passionisque constan-
tia demum apparuit, ea præsertim intentione non
recusavit id oneris, ut pro liberatione tunc in Angli-
a male periclitantis Ecclesiæ studium suum et operam
C daret. Contra Ecclesiæ namque leges in disponendis
ecclesiasticis rebus ut laicis, plus agebat manus
regia quam censura canonica; personis etiam ec-
clesiasticis indebitarum exactionum et concussio-
num onere multiplici sæpius fatigatis. Sed et ejus
enormitatis ipse, quia regis ab eo videbatur pendere
consilium, suaser et laudator ab æmulis dictus est.
Verius autem ipsa per se regis animositas hæc usur-
pabat, qui de latæ gloriæ potestatis elatus, et juve-
nilis voluntatis impetu ductus, se regem æstimare
nesciebat, nisi quos ad regimen habebat commissos,
haberet etiam ad arbitrium subditos, et tribunalis
imperium in clericos pariter extenderet ut in laicos.
Huic etiam animositati vires dabat suorum favor et
D stimulus familiarium, in exaltationis ejus applausu
cupientium ei placere quærentiumque quæ suæ erant,
non quæ Jesu Christi. Videbatur enim iis, in qui-
bus regis crevisset potestas, sui quoque fastus cum
lucro simul amplianda sublimitas. His igitur omni-
bus obviare, cancellario soli tutum non fuerat, sed
nec censoris ad corrigendum personam gerebat,
cui manebat necessitas obsequendi, non auctoritas
arguendi. Proptereaque cum potestas esset et hora
tenebrarum; prudentius in medio navigaverat; usur-
pationes magis dissimulans quam suadens; magis
sustinens quam laudans. Zelo tamen domus Dei
nonnunquam ingemuerat; interdum etiam talium
dissuasor esse præsumperat, ea tamen qua decuit
modestia, ne regis offensam incurreret. Gratia vero

promotionis oblata, vidit utique si fierent preces Ecclesie, quod exinde principaliter tentus ei subvenire pro eadem compellere regem et justius deberet et liberius posset. Propter ipsam itaque se periculo subdens, gratiam illam non repulit, sed clero potente, regeque urgente vel invitatus admisit. Tanquam enim volaverit ad eum unus de seraphin, et calculo quem forcipe tulerat de altari labia ejus tetigerit; quærenti deinde Domino quem mitteret, respondit: « Ecce ego; mitte me. » Proposuit namque quod exinde in medio populi polluta labia habentis non sileret, non quiesceret, et si privilegio amoris opitulante non posset, vi saltem rationis Ecclesie liberationem apud regem evincere laboraret.

IX. QUALITER VIXERIT IN ARCHIEPISCOPATU.

Hoc igitur ut melius et potentius obtineret, priusquam sublimatus est, non acquievit carni et sanguini, nec sæculi delicias aut pompas lucrave captavit, sed novum hominem induens, religionis tramitem fortiter et firmiter ingressus est. In primis enim summopere declinans a malo, dierum etiam priorum excessus multiplici remedio redimere studuit quotidie cum perendinaret, matutinale tempus in profusis orationibus et uberibus lacrymis agens, et deinde confessione sacerdoti facta, dorsum ad flagella ponens. Post hæc devote missam vel audiens vel sæpius celebrans, et horas antemeridianas complens, aut causis audiendis aut agendis propriis intendebat in propriorum ordinatione providus, in causarum decisione promptus et justus, post avaritiam non declinans, et post munera non abiens, pius oppressorum consolator et velox injuriantium ultor. Si quando vero vacabat a negotiis, totus lectionibus aut necessariis cum suis collationibus insistebat.

Quotidie quoque quandoque secretius poterat, in secretiori cellula lavandis tresdecim pauperum pedibus genua curvare consuevit, ad exemplum famosissimæ peccatricis, in Christi memoriam lacrymis eos rigans et capillis tergens, humiliterque deosculans: singulis etiam quatuor argenteos donans. Quod pietatis opus per vicarium expleri curabat, si forte sibi met explendi commoditas deerat. Demum ad mensam grandis nobilisque curiæ cœtu vallatus et præinductus viginti sex pauperibus accedebat. Sicut autem domum decuit archiepiscopalem, et ipsa copiosis ac splendidis necessariorum apparatibus affluens erat. Inter ipsas vero ciborum potuumque delicias; hoc ille semper temperantiæ medium tenuit, ut nec prorsus iis abstineret, ne superstitiosus notaretur, nec immodice sumeret, ne crapula gravaretur. Cæteris enim exterius se sicut in habitu sic et in victu conformans, et inter eos jucundus et hilaris; intus tamen dissidere curabat, iuxta illud viri sapientis: « Frons populo nostra conveniat, intus autem omnia dissimilia sint. » Et quidem in veste pretiosa spiritu pauper, in facie læta corde contritus, in mensa lauta

penuriam eligens, nonnunquam ventrem magis vacuum quam refectus, et sæpius magis refocillatus quam plenus, semper autem sobrius permanebat. Cavens enim inusitatum et superstitiosum jejunium, ut et vitaret nomen hypocritæ, optimum id jejunii genus arbitratus est sobrietatis tenere mensuram. Ad hoc etiam ditiores et refertiores mensas habere satigit, ut ex reliquiis plenius pauperibus subveniret. Magna siquidem ei cura pauperum erat, et præter hoc quod ostiatim mendicantium nullus ab ejus januis vacuum rediit: ipse lares ægrorum et debiliū pauperum diligentius per suos scrutabatur et eleemosynis visitabat quam plurimos etiam quotidianō victu vestitūque sustentans. Cum vero decessor suus statutas decessorum suorum eleemosynas

B duplicare consueverit, hic eum in religiosa superaddendi liberalitate secutus, ejusdem etiam duplum duplicandum censuit, in hujus pii operis observantia permanens, et ad id etiam omnium quæ possidebat decimas conferens. Post epulas autem et somnum ubi necessitas poscebat exactum, denuo præter pensum horarum, aut negotiis aut scripturis aut honestis colloquiis insistebat, otium summopere fugiens, ne viderent eum hostes et deriderent sabbata ejus. Nocturni quoque somni tempore lecto decumbens, amplius vigiliis indulgebat, tunc potissimum, solo Deo teste, jacturas prioris ætatis plangens, et multa lacrymarum ubertate deplorans, orationique vehementius instans, interdum etiam meditationibus

C sanctis incumbens. Hic ei fuit quotidianæ post archiepiscopatum cursus vitæ: talibus præhabitis sæculi delicias castigationem purgabat angustiis. Hæc in eo mutatio dextera Excelsi. Nitens quippe forma gregis fieri quem regendum susceperat, assuecebat jugum Domini suave et onus ejus leve, castimoniam sectans, humilitatem tenens, in sermone modestiam, in opere justitiam, servans, ut quos eruditurus erat verbo, potentius sanctitatis suæ mone-

ret exemplo. Sive laicis autem sive litteratis loquebatur, mirum in modum eruditus et eloquens apparerebat, pondereque sententiarum et puritate verborum ejus prædicatio placens erat et efficax. In quo palam est quod eum docebat unctio: non enim ab homine acceperat neque didicerat, quippe qui studiis litteralibus modicum tempus et operam dederat.

D Zelo quoque justitiæ circa subditos fervens, sine personarum acceptione temporalique mercede quod suum erat cuique servare nitebatur. Angebat eum præsertim sollicitudo ecclesiæ sibi commissæ, ejus in plurimis obviabatur utilitati, derogabatur honori, detrahebatur potestati. Cui quædam juris sui vis procerum quorumdam negabat, cui præter debitum Eboracensis ecclesiæ se parem gerebat, cui magna ex parte quod oportebat in subditos ex prohibitione regia non licebat. In ejus etiam aperte redundabat injuriā, quod laica potestas in ecclesiarum ejus res aut personas usurpabat. His igitur contraire, cæterorumque reformationem quærere, quanto plus super iis auxiabatur, tanto majus ei

studium erat. Ob hæc etiam arctius sanctioris vitæ viam incessit, quo et melius hos ejus conatus gratia divina dirigeret, et major ad obtinendum auctoritas esset.

**X. QUALITER PRIMO BLANDITIIS EUM SUBVERTERE
TENTAVERIT DIABOLUS.**

Hanc autem in eo mutationem intuitus, admodum admiratus est malignus, ut quem viderat inter cæteros delicias et glorias sæculi vehementius sequi solitum, hunc hæc omnia tam vertere stupelet in contemptum, et humilitatem abjectionis assuescere, quem putaverat in elationis tumorem magis extolendum de culmine. Potius tamen hoc ex bili procedere reputans, quasi fastidiret habita, quia pro libito non poterat uti potestate percepta, deinceps satis amplioris spe nominationis ipsum allicere studuit. Jam autem acrius immiserat in corda malevolorum ejus, ut actibus et moribus ejus audentius et impudentius detraherent; et quibus vere carpebat arctam quæ ducit ad celos viam, magis ei verterent ad invidiam. Interpretati sunt enim in superstitionem quod viam habebat arctiorem; in crudelitatem, quod zelabat justitiam, in cupiditatem, quod ecclesiæ suæ quærebat utilitatem, in austeritatem, quod hominum postponebat favorem, in gloriæ venationem, quod nobilis curiæ magnificentiam sectabatur, in elationem, quod in agendis sæpius mentem propriam sequebatur; in præsumptionem, quod in ecclesiasticis antiquorum metam excedere nitebatur. Denique vix aliquid boni visus est agere, quod non in sinistram partem retorserint; et cum multi fuerint, ad persuasionem potius multitudine quam veritate vicerunt. Hinc igitur multorum odium et consequenter etiam apud aures regis crebras detractationes incurrit: apud quem denum insonuit, quod studio dilatandæ potentæ suæ canones etiam præferre proponeret contra regis dignitates, et hujus rei indicium fore quod omnes regni meliores sibi juramento constringeret, quod etiam adeo prælationem suam in majoribus et minoribus regni poni paret, ut dixisse palam videri potuerit: « Exaltabo solum meum et ero rege superior. » Hinc itaque regi malæ suspicionis initium; hinc iræ seminarium; hinc doloris impatientia, quia quem sibi suisque patrem et patronum mensus fuerat; hunc verius adversarium ex multis jam non formidare non poterat.

Cum autem in transmarinis tunc ageret, « Transfretabo, inquit, et videbo utrum clamorem qui ad me venit, opere compleri propositum sit. » Nec multo post veniens et occurrentem eum habens, non irati mox aut vultum ostendit aut mentem expressit, sed alliciendum primo blanditiis censuit. Arctius siquidem eum et familiaris charum habebat, de quo et dixerat: « Inveni virum secundum cor meum. » Præ cæteris enim fidum et necessarium in agendis suis sæpe probaverat. Super tuendo quoque regni sui statu antiquo, potissimam in eo spem fixerat. Hanc

igitur spem prorsus rumpere consiliumque ejus declinare vel amorem exuere, nec statim potuit nec congruum duxit, sed magis a delinimentis exorsus est. Officiosissimæ namque salutationis et osculi more permissio, magnam ei deinceps reverentiam exhibere, multumque honoris ejus honori deferre curavit. Commentus enim est malignus, ut ad tanti principis humiliactiones melius frangeretur et promissorum ejus magnitudine facilius caperetur. Habito vero largioris colloqui loco, rex non acerbe sed benigne, non dominantis fastu, sed amici spiritu, de ipso sibi significata recoluit, suppliciter et humiliter monens, ut contra se cæpta corrigeret, ut conatibus noxiis abstinere, ut pacem et gaudium secum sectans, voluntati suæ non repugnaret. Optabat enim et agebat, ut ecclesiasticorum status in regno suo redigeretur ad aviti temporis modum: tunc autem nihil vel parum in eo consueverat Romanæ sedis censura: tunc enim magis ad regis arbitrium etiam in ecclesiasticis quæque gerebantur, præsentibus tamen temporis illius archiepiscopis, sed propriam tenentibus pro consuetudine regni mensuram.

Hoc itaque juste sibi vindicare credebat, quod sui decessores obtinuerant. Nihil enim, sicut ei suadebatur, contra legem Evangelii vel apostolorum vel prophetarum vel sanctorum dignitatis suæ jura faciebant: ideoque licite zelandam credebat eorum observantiam, nec ob contrarias imperatorum vel episcoporum constitutiones abolendam. Sed et ab eadem subditos priores reges habuerant, quorum etiam plures indubitata sanctitatis memoria veneratur. Non minus autem et salutis et honoris archiepiscopo suo sicut dicebat, et optabat et manere posse putabat; voto quoque sibi multum fore jurans ut et sublimius et felicius iis ipse præsideret, et ad hoc ope consilioque se pro viribus adfuturum promittens; gloriam quippe suam præcipue fore, si et is quem creaverat non minus gratiam apud Deum et homines obtineret, et in eo divinam sententiam electionis suæ concordare probaret. Præsertim enim detestans et declinare volens Romanæ curiæ supercilium et ambitionem archiepiscopo soli suos ad iudicium subditos fieri nitebatur: consequenter et sibi subdendos esse metiens, et quosdam etiam de clero dyscolos aut infidos pro arbitrio reprimendos conjiciens. Quis enim in regno præpedire posset in quo regis et archiepiscopi nix concurrent? Ecce quantum ei potestatis in ecclesiasticis procurabat fastigium.

Adhuc etiam instanter et pertinaciter ei supplicabat, ut et in laicalibus regni sui regimen et curam susciperet, quo melius et securius ipse transmarinis intendere posset, ut etiam fili sui regis futuri custodiam et magistratum gereret, ne quid ad dominatum ei deesset. Videbat quippe quod sine fraudatoris nota non posset in regis dignitatibus ejus sustinere facturam, cujus tutelam subiisset. Videbat et dum utriusque gladii potestas illi cederet, neuter sibi decederet. Ecce quantis eum sollicitabat, quantis agebat, quantis pene vincebat: quibus etiam dege-

ner, et pusillanimis inaudesceret, nec nisi perfectissimus vinci nequiret.

Ille vero, sicut altioris erat consilii, regie voluntati nec statim annuit, nec palam obviavit, habens tamen in corde fixum, se neutrum secuturum. Cum regni namque negotiis Ecclesiæ curam bene regere nec possibile nec tutum ducebat, quia « nemo potest dominis servire duobus. » Aviti quoque temporis statum in ecclesiasticis pati, palam ordinis et animæ periculum continebat, quia non nulla vigor ecclesiasticus adjecerat, et ipse fidelitatem Romanæ Ecclesiæ juraverat, quam nequaquam servaret, si censuram statutorum ejus contemneret. Itaque responsionem ita temperavit, ut ad regni regimen obsequium opis et consilii sui pro viribus obtulerit, dum tamen qui plurimum erat in onere novo noviciis, illuc alterum regiminis onus specialiter non subire. Quantum autem ad regis dignitates ei iura, se firmiter servaturum promisit, quæ Cesaris erant Cesari, dum tamen et quæ Dei erant Deo redderet. In hujusmodi responsione sæpe conventus et importune sollicitatus, immutabilis permanebat.

XI. QUALITER DIABOLUS EUM INJURIIS POSTEA AGGRESSUS SIT.

Cujus in bono firmum radicatumque propositum malignus ut vidit, invidit, et quem non poterat sæculi pompis, exinde subvertere cogitavit injuriis. Putaverat quidem eum in illarum quæ fiebant adversus Ecclesiam usurpationum consensu sibi fuisse subdendum. Putaverat enim magis adulationi regie quam timori divino cessurum. Putaverat magis pacem et gloriam sæculi quam cæli captaturum. Jam autem cernebat potestatis magnitudinem ei esse virtutis causam : quippe per honoris occasionem, probabatur ire « de virtute in virtutem. » Propterea deinceps ad hoc fraudis suæ commenta convertit, ut vel eum deiceret, vel metu defectionis subiceret. Quorum effectum nullo modo se facilius potiturum arbitratus est, quam si persecutorem ei crearet, quem habuerat suæ sublimationis auctorem. Rege siquidem inimico facto, tanto majores ei suscitandos adversarios reputabat, quanto plures se metu regis inviderant subditos. Imo vix aliquem ei deinceps obsequio putabat astiturum, cui regem viderent adversum. Per regie quoque molem potentie, citam et facilem ejus metiebatur defectionem. Cum igitur ad voluntatem suam sicut speraverat rex eum mobilem non haberet, cepit malo suspicionis amplius in dies moveri, nec nisi captionem in verbis ejus arditari.

XII. DE ORTU CONTENTIONIS INTER IPSUM ET REGEM.

Non multo post autem episcoporum, abbatum et procerum cœtum Londoniæ colligi contigit, ob negotia regia, pacisque regni firmanentum. Inter cæteras verò quæ propositæ sunt illic querimonias, accusati sunt archidiaconi super subditos non prælationis tenere modestiam sed exercere tyrannidem, calumniis fatigare laicos et indebitis exactionibus

A clericos. De cleri quoque numero producti sunt quidam variis flagitiorum criminationibus impetiti. Tales enim præcipue dicebantur regni turbare pacem novisque facinorum immanitatibus debacchari, securitate per ordinis privilegium evadendi. Correctionem igitur horum rex instanter ab episcopis flagitabat. Amplius autem institit, ut in clericos publicorum criminum eos de ipsorum consilio sibi liceret, quod avitis diebus factum sua curia recolebat; tales enim deprehensos et convictos aut confessos, mox degradari, sicque pœnis publicis, sicut et laicos subditum usurpatum est. Hoc idem sibi licere cum instantius rex postularet per episcopos decerni, substiterunt quidem ipsi diutius caventes admittere, quod legi divinæ videbatur obviare. Dicit enim Naum propheta : « Non judicabit Deus bis in idipsum. » Contra Deum itaque bis judicandos censuisse videri poterant, si post degradationem inconvictis pœnam mortis aut mutilationis infligi consensissent. Cavit hoc prudentissimus et rectissimus judicum rex Salomon. Cum enim Abiathar sacerdos reus mortis appareret sicut et Joab, quia contra Salomonem declinasset post Adoniam fratrem ejus ut rex fieret, non tamen sicut Joab, sic et Abiathar Salomon morte punivit, sed a sacerdotio tantum amovit dicens : « Vade in Anathor, agrum tuum : es quidem vir mortis, sed hodie te non interficiam, quia portasti arcam Domini coram patre meo David. » Talibus itaque cum archiepiscopo moti pontifices, ad regis arbitrium legem ponere dubitarunt, præsertim ne trahi posset in præjudicium et calumniam innocentium, ut vel ad purgationem urgerentur vel nocentium sorti subderentur. Hinc itaque contentionis exordium. Hinc enim arbitratus rex archiepiscopum cum episcopis in insidiis sibi sedere, regiarumque dignitatibus consuetudinem velle contraire, primum ira non parum excaudit, et deinde provisionem de servandis illis extorquere prosiit. Illi vero, tractatu seorsim diutius habito, volentes regis iram sedare, cautam putaverunt procurasse responsionem, dum ordine suo salvo petitionem fieri concesserunt. Additionem autem, quam providerant ad cautelam, pars regis interpretata est ad captionem, et super ea detrahenda diutius certatum est, sed episcopis unanimiter subsistentibus tunc obtentum non est. Unde soluto conventu terribiliter efferatus rex et minax abscedens, exinde pontificalium concussionibus rerum officiales suos gravius insistere jussit.

Cujus molestiæ metu quidam pontificum postmodum abiire retrorsum, et sanctam resistendi desistentes unanimitatem, secuti sunt regis voluntatem. Exinde et cæterorum eandem molestiam formidantium nutare constantia cepit ut acciderit in iis quod veritas ait : « Omne regnum in se divisum desolabitur. » Sed et ipsius archiepiscopi non nihil turbatus est vigor dum videt præsertim ad injuriam suam perniciosius Ecclesiam periclitari, seque coepiscoporum ope destitui, totam etiam contentionis causam et onus in se retorqueri. Jam autem regie privilegium

familiaritatis amiserat : jam solita vultus serenitas in nubilum ei versa fuerat, jam amore foras misso, paulisper odium succrescere cœperat. Multi quoque qui prius eum sequi solebant, jam non cum eo palam ambulabant regis declinantes offensam. Exinde conatus ejus verti cœpit in derisum, potestas in contemptum, honor in nihilum, et secundum gloriam ejus multiplicata est ignominia ejus. Ecce quantis eum malignus aggressus est scandalis, quia subdicere nequiverat blandimentis ! Perplexis itaque testiculorum Leviathan nervis interceptus, quid ageret, quid eligeret, quo se verteret, ignorabat. Impendentium malorum utrum utilis declinaret, non patebat. Si regi condescenderet, aderat evidentior ordinis et animæ periculum. Si perseveranter resisteret, enorme timere poterat Ecclesiæ damnum. Inter hæc si consilium petebat a subditis, non erat qui sane undique respondere sufficeret. Si vindictam emulabatur in peccantibus, non erat qui secum ad justitiam stare confideret. Ecclesiastica siquidem parum tunc prævalebat censura, prætextu schismatis Alemanni, quod Ecclesiam Romanam satis presserat et depressoerat. Contra beatum enim papam Alexandrum alio quodam viribus imperatoris in idolum apostolicæ sedis erecto, sub ejus apostasi Italia tota gemebat, orthodoxo clero partim metu subactio, partim sedibus suis pulso, pesteque cupiditatis alio substituto. Quod dum et in aliis provinciis timebatur, erat quidem remissior prælatorum Ecclesiæ vigor, et principum sæculi præsumptio promptior.

Ejusdem schismatis intuitu suaserat in initio Gilbertus tunc Londoniensis episcopus, paulisper regi cedendum, ut in apostatas et malefactoris clericos durius aliquid ei liceret, sed ad contradicendum prævaluit sententia cæterorum, Herefordensem prius idem episcopatum habuerat et murmur multum fuerat in populo de claritate nominis et voluntate regis eum in archiepiscopum fuisse subrogandum. Erat enim inter ecclesiasticas Angliæ personas fama celebrior, tanquam habitu vitæque, sicut videbatur, religionis professor, sed et eloquio scientiæque præstantior censebatur. Quem rex libenter audiebat et audito eo multa faciebat. Postquam autem in cancellario suo magis ei complacuit ut archiepiscopatum susciperet, volens et huic aliquid honoris deferri per apostolicæ sedis auctoritatem impetravit eum ad cathedram Ecclesiæ Londoniensis transferri. Post archiepiscopalem enim erat hæc in regno majoris dignitatis sedes, et facilius hinc vocatus poterat interesse tractandis tam Ecclesiæ quam regni negotiis. Id ipsum autem ipsius archiepiscopi præsertim actum et impetratum est consilio, qui plurimum de illius religione prudentiæque confidens et bene sperans, fidum eum collegam et strenuum adiutorem in ecclesiastica sustentatione futurum arbitratus est, sed aliter postmodum expertus est.

XIII. QUALITER DEBUIT SEDATA ESSE CONTENTIO.

Eo igitur mediatore post malum contentiois expatrol. CXC.

ortum ad pacis reformationem sæpe usus, aliis etiam regem interpellantibus, demum obtinuit ad colloquium posse recipi, consequenterque pro sedanda controversia novum apud Clarundonam coegere conventum et artius inire consilium. Rege vero pristinam promissionem immutabiliter et pertinaciter exigente, pro bono pacis in hoc tandem resedit archiepiscopi coepiscoporumque consensus, ut additionis cujuslibet captione sublata regiarum omnium consuetudinum observantia, sicut posebantur, in Domini verbo promitterent. Hoc enim sine peccato sineque periculo fieri posse prætractaverant, consuetudinum nomine bonas tantum intelligendas censes, quia male non propriæ consuetudines, sed verius abusiones dicantur. Bonæ quoque non sint, nisi quæ legibus Ecclesiæ non dissentiant. Hoc itaque sensu custodiam omnium licite promissam credentes et eo rectius quia generaliter omnium, non expressim aliquarum, expressa enim nocent, nec expressa non nocent : regi quidem omnino satisfacerunt et assessoribus ejus, verborum magis usum quam proprietatem sequentibus.

XIV. INVECTIO IN EPISCOPOS.

Nunquid autem non commiserunt in simplicitatem divinæ Scripturæ quæ tradit quod quacunque arte verborum quis juret, Deus ita hoc accipit, sicut illa cui juratur intelligit ? Nunquid et minus sanæ tuæ prospexerunt, cum apud laicos exinde credi cœpit et dici pastores Ecclesiæ regis abusionibus assensisse ? Melius autem tunc venisset in mentem Eleazari memorabilis fortitudo, qui dum ad legis prævaricationem per Antiochi satellites urgeretur, suavis ab amicis ut carnibus licitis vescens, porcinas se manducasse simularet et evaderet, ait : « Non est dignum ætatem meam fingere, ut multi adolescentium arbitrati Eleazarum ex annorum transisse ad vitam alienigenarum et ipsi propter meam simulationem decipiantur, et per hoc maculam et execrationem ætati meæ conquiram. » Et his dictis tractatus ad supplicium, elegit magis fortiter mori quam simulatione cum aliorum perniciem turpiter periclitari. Sensissent idem eum eo pontifices et adhuc etiam tunc honestius curassent in simplicitate cordis resistere, quam irreligiosius verbis evadere. Quid enim violentius et urserat ut succumbere necessarium fuerit ? Certe nihil adhuc fuerat sævitius actum sed minis. Nihil etiam morte vel carcere dignum tractabatur. Sed nec ab hæreticorum perfidia vel paganorum sævitia periculum impendebat. Dei fideles Ecclesiæ filii, patribus suis potius litem quam persecutionem intenterant. Quippe non sanguinem sitiebant, sed jus regium vindicabant. Quibus audenter et perseveranter restituisse decuerat. Qui melius contradictionis constantia vinci potuerant. Tunc enim pontifices firmiter et simul dixissent : « Oportet magis timere Deum quam homines. Oportet magis honorare Dei sponsam Ecclesiam quam terrenam potestatem. Oportet magis illius prospicere libertati, quam ho-

minum stare consuetudini. » Nec enim honoris integritas imperatori servatur, ubi quid Augusti juri detrahitur. Tunc etiam in corde fortiter reputassent, quod vapor esset ad modicum pariturus aut nebula cito transitura. Quod si secundum minas sequeretur concussionum immanitas, tunc melius ascendissent ex adverso, et posuissent se murum pro domo Domini ut starent in prælio. Tunc liberis sacerdotum vocibus potestati contraissent et adversus mala, ratione ac monitis minisque decertassent. Tunc aculeis severæ coercionis tam discrete quam districtæ pupugissent, ut nec torpescerent nomine patientiæ, nec sævirent obtentu diligentiae. Concordem autem omnium et constantem vindictæ censuram, nec regnum tulisset diutius, nec violentia præpedisset, quia toti collegio patrum et pastorum regni tutum non esset obviare. Nihil etiam in omnes durius fuisse præsumendum, justissime credendum fuerat; sed nec in eorum aliquos, si particularem injuriam statuissent, communem reputandam. Nec enim rex inter reges terræ gloriosior tantæ tyrannidis elogio notari perpetuo voluisset, ut Christi gregem et legem abdicasse diceretur, ut etiam schismaticorum cedendo partibus apostasiæ sæculis omnibus notabili ignominia nomen ejus fuscaretur. Quod etiam si juste timeri potuit, attamen satius fuerat mala tunc dissimulasse severitatisque disciplinam temperasse quam periculosa promissionis præjudicium incidisse. Nam et ubi multorum strages jacet, aliquid severitati detrahere peccatum non est, dum tamen qui præest, non approbet reticendo, nec exasperet insultanter arguendo. Taliter enim sustinenti non imputat Deus aut peccata sua, quia non fecit, aut aliena, quia non approbavit, aut negligentiam, quia non tacuit, aut superbiam, quia in unitate permansit. His autem aut non prospectis aut contemptis, videntur omnino deviasse pontifices, facti tanquam caues muti non valentes latrare, tanquam non pastores sed mercenarii, dum tacuerunt et cesserunt etiam cum umbram lupi tantum viderint, non veritatem.

XV. DE CONTENTIONIS RESUSCITATIONE.

Magis autem eos involvere curavit malignus, quia de capite suum archiepiscopum quem impedire studebat, ipsi potius expedire quærebant. Mox enim velut de simulationis merito, majus omnis contentions incidere discrimen. Per ipsos enim curiæ proceres recognitas e vestigio consuetudines rex in scriptum redigi fecit et sigillis episcoporum et archiepiscopi confirmari postulavit ad removendam exinde super iis dubitationem et litem. Expressa sunt autem quæ plane statutis ecclesiasticis repugnabant. Quorum, ne præterita nesciantur, quædam sunt hæc, videlicet:

Quod non appelletur ad apostolicam sedem in aliqua causa, nisi de regis licentia.

Quod nec archiepiscopus nec episcopus aliquis exeat de regno vel abbas, nec etiam ad domini papæ vocationem veniat, nisi de regis conscientia.

A Quod non liceat aliquem excommunicare qui teneat principaliter de rege, nisi eo præconsulto.

Quod clerici veniant ad vocationem regis et iustitiæ suæ pro qualibet causa.

Quod apud iudicem Ecclesiæ non conveniatur aliquis laicus super lesa fide vel perjurio de pecunia.

Planum igitur erat his Ecclesiæ libertatem et potestatem satis imminui. Quæ si confirmarent episcopi, palam Ecclesiam impugnant: si non confirmarent, nec regis iram evaderent. Sic in arcto positi, demum ad postulandas inducias transierunt, factaque sunt novissima pejora prioribus. Pars enim regis manifestam deceptionem interpretata est cum refugerent firmare scripto quod censebantur polliciti juramento. Rex itaque, vehementer exandescens, et minis terribiliter intonans, plane videbatur in eorum aliquos zelo crudelitatis exarsurus, nonnullis etiam suorum ad hoc eum acriter incenditibus. Nec justa timendi causa deerat, cum secundum Salomonem: « Sicut fremitus leonis, sic et ira regis; » et iterum: « Sicut rugitus leonis, sic et terror regis. »

XVI. DE LAPSU ARCHIEPISCOPI.

Præsertim autem in archiepiscopum onus belli versum est, sine cujus tanquam capitis sui consilio præsules nihil præsumebant, cui etiam ut cederet consilium dare formidabant. Is vero tanquam homo non moveri non poterat. Magis tamen quam de sua, super quorundam episcoporum et suorum salute sollicitus angebatur, in quos tanquam regi suspectos justius timebatur sæviendum et eo certius, quia de constantia cæterorum ad vindictam bene præsumi non poterat. Cum itaque graviorum malorum signa paterent, hic maligno prævalente, hic carni ratione cedente, demum succubuit et regis petitionem fieri verbo tenus annuit. Ad hoc enim inclinatust est, præsertim quorundam sibi regique familiarium stimulum promissioneque deceptus, qui suaserunt regem ulterius non processurum, si tantum vicisse videretur, hic igitur erga cæteros se reputavit obtinuisse postquam viciit in capite. Imo tanquam parvi duxit omnium exinde consensum, confidens et Romana quoque sede prætextu temporis impacati confirmationem eorumdem leviter impetrandam, quam et postea petiit sed nequaquam obtinuit.

XVII. DE POENITENTIA EJUS.

Acrior autem dolor archiepiscopum, ut evasit, invasit, et de lapsu tanquam Dei flagello tactus et in meliora provocatus, ad inchoatæ sanctitatis augmentum longe plus operæ postea dedit, circa mala cavenda studiosior et in operibus virtutum frequentior. Ut etiam fortius veteres excessus puniret et assuetas delicias desuesceret, horrendo cilicio subtus ac carnem astrictus est. Ornatu quoque mutatorum veteri deposito, desuper vestibus nec ambitiosis nec abjectis, ac tamen mundis et clericalibus, ubi cæpit in his etiam, dum somnum caperet, sæpe quiescere solitus, noctibus etiam sæpius humo

decumbens quam lecto, carnemque multis castigans inedia. Præsertim vero sui lapsus æger et impatiens, fortior et audentior contra præsumptiones regias deinceps esse curavit. Exemplis enim et auctoritatibus advertit non esse servandum quod male promiserat. Sanctus quippe rex David juravit per Dominum quod occideret Nabal, virum stultum, sed quod juramentum non implevit, major pietas fuit. Juravit etiam impius Herodes quod Herodiadis filiae quod peteret non negaret, sed quod petenti caput Joannis dedit, major impietas exstitit. Decernit enim lex divina non esse servandum juramentum, quo malum incaute promittitur. Ut autem quod timide promiserat potentius infirmaret, ad curiam etiam Romanam ob indulgentiam petendam transire sapius nisus est, sed contrarius assidue ventus eum a mari rejectum transfretare passus non est. Adversabatur enim malignus bonis ausibus ejus, et quem cernebat de lapsu melius animatum, in adversorum deteriora censebat impellendum.

XVIII. DE CAUSA FUGÆ EJUS.

Demum et arctius eum implicare volens, novam ei decipulam intentavit. Vocatus enim ad tertium apud Northamptonam conventum, regia contentione profligatus est, ut de fiscalium, quæ cancellarius gesserat, ratiocinio satisficeret. Liber tamen et absolutus Ecclesiæ traditus fuerat cum electus est, in consensu filii regis et procerum, quibus a rege de transmarinis tota sublimationis cura mandata est. Sed et litteris regis id domino papæ mandatum est, cum pallium ei postmodum a sede Romana petitum est. Non minus autem super iisdem rex iratus tunc aut ratiocinium aut curiæ suæ vel saltem episcoporum judicium flagitabat. Ratiocinium inire igitur propter manifestam calumniam juste sibi videbatur archiepiscopus recusare. Super hoc etiam causam in curia regis ingredi, tutum non ducebat, ne per capitis factum amplius derogaretur privilegio clericorum. Clericis enim pulsatis apud Ecclesiam tantum respondere debere per leges et canones obtentum est. Sed et de episcopis specialiter scriptum est, quod de iis nunquam nisi Ecclesia judicare debet. Sed nec episcoporum suorum arbitrio se subdere cogebatur, sacris canonibus præcipientibus semper ubi est major auctoritas eundem esse et in omnibus contrariis ad potioris sedis judicia dirigi. Potius autem eps declinandos censuit ut suspectos. Auxilium enim suum jam ei subtraxerant, ut dum magis regi faverent, melius paci suæ prospicerent. Suadebant etiam ut regis prorsus accederet voluntati, tanquam ut si se vinci permitteret, melius vinceret. At principis mores et propositum interius ipse noverat et Ecclesiæ suæ damnum sui que præjudicium jure formidabat.

XIX. DE FUGA EJUS ET EXCUSATIONE FUGÆ.

Inter hæc igitur, dum omni destitutus auxilio mole curiæ graviter urgeretur, aliquid sibi formidabile metuens, ob refugium crucis suæ cœpiit esse

A gestator et deinde cum, ut dicebatur, immineret sententia durior, apostolicam per appellationem audientiam eligens inter contumelias et minas abscessit. Rex enim famæ suæ consulens et curiæ regis pacem violari nolens, etiam contra quorundam rabiem ei suisque parci præceperat. Nocte vero sequenti cum a fidelioribus regis accepisset quod sibi carcer immineret aut gladius, clam exiens habitu mutato cum paucis, in regni remotiora diverſit, ut cautius insecutores eluderet. Prudenter enim apertis livori esse cadendum et dandum insanæ locum, quod fecisset et Jacob in fratre suo Esau, et David in pertinacissimo inimicorum Saul fecisset, et Athanasius Alexandrinorum episcopus toto orbe sub persecutore Constantio profugus, ut adversus Arianos pro fide catholica servaretur. Fecisset et apostolus Paulus per fenestram in sporta submissus ut præpositi Damascenorum manus evaderet et Ecclesiæ dilatandæ superesset. Fecisset demum et ipse Christus, vel cum ab Herodis insidiis deportatus est a parentibus et latuit in Ægypto, vel cum volentibus eum lapidare Judæis abscondit se et exiit de templo. Tantis itaque munitis exemplis, secutus est etiam illud quo discipulos suos ipse Christus instruxit dicens: « Cum vos persecuti fuerint in unam civitatem, fugite in aliam. » Nec mercepit notam meruit, qui videt lupum venientem et fugit, quis non est ei cura de ovibus. Nec enim gregem commissum, cum nec in eum quispiam furor moliretur, in periculo deseruit, sed seipsum discrimini quod soli specialiter capiti suo parabatur, prudenter exemit. Nec multo post ad aptum maris locum occulte rediens, navi conscensa, prospere navigavit in Flandriam: inde viam carpens ad dominum papam Alexandrum, qui tunc Senonis residebat. Quem petebat, ut iudicem haberet, ut etiam periculose promissionis peteret veniam, et præsertim Ecclesiæ reformaret statum. Eorum enim quæ jam in ecclesiasticis enormiter patrabantur patientia, post promissionem non nisi damnabilis erat, quæ præter eam pro necessitate temporis potnerat esse venialis. Manifestum namque probat promissio consensum, quem necessitas habet excusatum. Dirigebat autem gressus ejus Omnipotentis misericordia, cui quanto firmitus in temptationibus tantis hærebat, tanto minus in eum maligni conatus jam poterat.

XX. QUALITER DIABOLUS EUM POST HÆC DELICERE NISUS SIT.

Nondum tamen eum persequi desisteat, apertas jam ad omnimodam ejus dejectionem vires apponens. Acris enim inflammatus per eum deinceps ejus malivoli defractionumque et calumniarum occasionem melius nacti, potentius in ejusdem odium regem incenderunt, in tantum etiam prævaluerunt, ut ille de conversione sic aversi prorsus exinde desperatus et dolore cordis tactus intrinsecus tandem dixerit: « Punitet me fecisse hominem; » et iterum: « Delebo hominem quem creavi, » nec ultra se continens misit post eum multorum et magnorum

comitatum archiepiscoporum et episcoporum, comitum et baronum, ut ad criminationes tantorum nequiret subsistere. Voluit itaque Dominus suscitatum ei deinceps esse tanquam alterum Adad Idumæum: qui eum colaphis cæderet ne extolleretur, et quasi quodam stimulo carnis moneret ne magnitudine virtutum altius saperet, et aliorum vitiis elatum se in excelso crederet constitutum. Præsertim autem præsules Eboracensis et Londoniensis in ejus dejectionem cum rege conspirasse dicti sunt; Eboracensis quidem tanquam æmulus ejus ob paritatis contentionem, Londoniensis autem tanquam eum in archiepiscopatu prælatum sibi suspirans, et jam iterum ad eundem, ut dicebatur, aspirans. Romanam igitur intrantes curiam, archiepiscopi nondum tamen præsentis imprudentiam et præsumptiones constanter et unanimiter accusarunt, multorum ei calumniam impingentes et ut in regnum remitteretur postulantes quasi melius ibi discutiendus et palam convincendus. Ad hoc enim ille copiam legatorum petierunt, qui causam illic audirent, et sine provocationis obstaculo terminarent. Abscesserunt autem inexcusati, quia decisionem tanti negotii religiosa domini papæ prudentia nulli nisi sibi servare tutum aut congruum duxit; sed nec canonicum videbatur ut archiepiscopus in provinciam remitteretur, unde justo metu diffugerat, et ubi ei vix aliquis assisteret, imo magis omnes ad regis nutum obviarent.

XXI. DE AFFLICTIONE EJUS PER REGEM.

Turbatus igitur hinc plurimum rex et indignatus, exinde benevolentiam suam et visitationis regni domino papæ subtraxit. Universas quoque possessiones archiepiscopi nec non et clericorum ejus eorum usui detractas sub manum et potestatem suam redegit. Præter hæc autem et sui quique cum eorum parentela, bonis etiam proscripti, regnum exire compulsi sunt, orphanis et viduis, pupillis et innocentibus, totiusque contentionis prorsus ignaris, ad exsilii miseriam sine miseratione coactis. Quem enim dejicere non prævalebat, damnis saltem et afflictione suorum atterere malignus exiade nisus est.

XXII. DE SOLATIO EJUS PER DEUM.

Bonus autem Deus qui bonis omnia cooperatur in bonum. Quod enim procuratum est in destitutionis ejus opprobrium, hoc palam ei versum est in solatium, et unde videbatur conterendus, inde magis est roboratus, ex suorum secum expulsionem fortior et apud externos ex proscriptione gratiosior. Ipsum quidem vel nihil vel parum damna tanta movebant aut caro aut sanguis, nec eorum intuitu vel minimum a recto tramite flecti potuit. Unde quanto minus hæc curabat, tanto plus ei gratiæ gratia Dei procurabat, ut ipse rex et magnates Franciæ necessaria certatim ei suisque providerint.

A XXXIII. DE INDULGENTIA DOMINI PAPÆ CIRCA EUM.

Sed et dominum papam per inspirationem divinitatis suæ veritatem edocuit. De ejus ille prudentia sanctitateque postmodum indubitatis instructus indicibus, et culpæ, si quam in sublimatione contraxerat, abolitionem et sequentis lapsus veniam ei pius et pronus indulsit, decernens etiam eum de suæ sedis auctoritate commissum deinceps regere episcopatum, adjiciensque legationis in Angliam officium. Quo tamen eminente titulo nequaquam ipse vel in minimo mutatus intumuit, sed initam virtutis inflexe gradiens viam, ad honorem Ecclesiæ Dei que servitium gratiæ cujuslibet occasionem trahebat, eorum quæ perperam in Angliā gerebantur, emendationem fortius exinde zelans. Toto tamen anno potestatis suæ censuram continuit, pie prætentans et expectans, si forte patientia delinquentes ad poenitentiam adduceret. Interim autem et causæ suæ quantis poterat viribus adminicula conquirere laboravit. Regis quippe mores familiarius noverat, ex his multum præsumens, quod ceptum non dimitteret, nisi in manu forti.

B XXIV. CONTRA QUORUNDAM REPREHENSIONEM EJUS EXCUSATIO.

Plurimi tamen objecerunt quod si de religionis veritate niteretur, non tunc resedisse debuerit inter capitales inimicos Domini sui nec inde vindictæ procurasse molestias, quamvis exemplum David contra sit, qui fugiens Saul dominum suum, allophylo se tradidit, malens etiam hostibus quam invidiis subjacere. Sed nec hic ad hostium se transtulit participium, magis autem apud Pontinicum in religiosa Cisterciensium monachorum domo primum delituit, ut ibi gravius peccata puniret, et melius Dei misericordiam impetraret. Cumque diutius propter regis offensam Cistercienses eum fovere non auderent, subvenit ei deinceps Ludovici pii regis Francorum sancta liberalitas in metropoli Senonis ipsi suisque necessaria quælibet abunde magnificeque ministrans. Apud quem tamen inimicandi voto studiove non substitit, sed cum alibi propter latam domini sui potentiam habere non posset ubi caput reclinaret, ab ipso collectus misericorditer est, quamvis nec in hoc juste foret reprehendendus, si in ecclesiasticæ subsidium censuræ, terrenæ quoque potestatis implorasset auxilium. Nam et ut sancti censent, ab imperatoribus defensores juste postulanti et delegantur adversus potentias divitum, quorum molestiis Ecclesia fatigatur. Ut tamen hoc non egerit contra dominum suum, magis obtinuit radicatus circa eum charitatis affectus, quo non potuit non etiam persequenti deferre, vel et suo periculo parcere.

D XXV. DE ZELO EJUS.

Non tamen parum interim comedebat eum Ecclesiæ zelus; sed et plurimum incendebat impendens susceptæ dignitatis onus. Cogitabat enim et mente sæpius revolvebat illud Augustini, quod nihil est in

hac vita difficilior, laboriosior, periculosior episcopi officio, sed apud Deum nihil beatius, si eo modo militetur quo noster imperator jubet. Sciebat se prophetam esse constitutum et tenere clavum in navi, quam secula tempestate concuti non ignorabat. Certum enim habebat laicos perditionis filios et ad facinus quodlibet proniores, Ecclesiae suae rebus incubare, direptionibusque et oppressionibus earum insistere, servientes quoque suos in vincula coniectos tenere, sed et personas ecclesiasticas calumniis et angustiis infestari, contraque canones ad saeculare iudicium pertrahi: palam etiam sancta conculcari necnon et suos suorumque redditus res utique destinatas usibus pauperum, male distribui jam in stipendia militum. Magistrum itaque navis inter tot et tantas procellas dormire diutius tutum non erat. Magis autem ad evadendum periculum laborare pro viribus oportebat.

XXVI. DE PRIMA COERTIONE EJUS.

Ad hoc igitur magnis saepe supplicationibus, commotionibus, comminationibus regem flectere studens, sed non praevalens, demum post expectationem annuam in nundinali conventu populorum apud Vezelai regium super memoratis consuetudinibus scriptum publicavit et damnavit, in earumdem exactores, observatores, iisque consentientes generaliter et in quosdam regis familiares, excessuumque consultores aut executores, specialiter anathema depromens. Cum enim per patientiam tempestati cedendo nil tanto tempore proficisset, exinde reluctantando, procellarumque fluctus frangendo procurandum remedium more strenui remigis censuit. Nec enim apud regem vel majoris offensae discrimen vel gravioris pressuræ turbationem formidabat, reputans quidem magis necessariam fortitudinem quam in tempestate, nunquam magis utilem constantiam quam in persecutione. Sub persecutoribus quippe per meticulosos Ecclesia saepe decrevit, et per fortes athletas assidue crevit. Quod etiam presignatum est per illam arcam Noe, quæ quanto per diluvium magis efferebatur, tanto sublimius et ipsa ferebatur. In regios itaque contra famam et salutem ejus consultores primo manum exseruit. Sed et velut id propositi gerens ut securim poneret ad radicem, solemniter etiam ipsum vocavit regem, tanquam in eundem quoque nominatim ad diem statutum anathema dictaturus, nisi ceptum corrigeret et omitteret.

XXVII. DE COHIBITIONE COERTIONIS ET CAUSA COHIBITIONIS.

Ausum autem istum præpedivit interveniens ex parte regis ad dominum papam appellatio. Potestatem autem ejus deinceps paulisper papa cohibuit. Suggestum enim ei fuerat quod melius patientia vinceret. Consiliosum quoque visum est ut et adhuc prætextu schismatis lenius ageret. Scriptum namque recolebat cum quisquam fratrum in tali peccato fuerit deprehensus, ut anathemate dignus habeatur,

A fiat hoc ubi periculum schismatis nullum est. Regem autem contentione occasione ad dilatacionem schismatis per schismaticos multis et magnis sollicitationibus fortiter esse sollicitatum et cito vincendum rumor publicus erat. Melius igitur eum adhuc tunc benignitate supportandum quam severitate præcidendum papa censuit. Nec minus ob hoc et excommunicatos ejus fideles absolvi curavit. Hanc autem moderationis providentiam eo levius tulit archiepiscopus, quo minus jam neglector officii de superioris cohibitione potestatis videbatur.

XXVIII. DE RATIONE COERTIONIS.

Et æmuli quidem ejus retorserunt in temeritatis notam severitatis constantiam. Hac tamen agendum B juste crediderat, postquam vincendi per patientiam spes non erat. Scriptum enim legerat: « Crimina quorumlibet undecunque claruerint si non fuerint leni patientiæ medicamento sanata, velut igne quodam piæ increpationis urenda sunt et curanda. » Quod si nec æquanimitè sustinentis et pie increpantis medela processerit, qui diu portati et salubriter objurgati corrigi noluerint tanquam putridæ corporis partes ferro debent excommunicationis abscondi. Sed et regem tanquam familiaris notum, et in multis saepe probatum, nequaquam diutius vel in se vel in suis duriores censuram portaturum bene confidebat. Nequaquam enim correptionis impatientem ad apostasiæ detestationem excellentiæ suæ gloriam redacturum indubius erat. Sensit fortassis aliter dominus papa tanquam hominis mores minus expertus, longiusque remotus et rumoribus motus, ideoque rigori paulisper detraxit.

XXIX. QUALITER SÆPE LABORATUM EST AD PACIS REFORMATIONEM.

Ne tamen undique destitutum filium suum et pro se exsulem relinqueret, non multo post magni nominis viros Ecclesiae suæ cardinales a latere suo transmisit, ut his mediatoribus de reconciliatione regi potentius suaderetur. Post initum autem et diutius tractum de pace tractatum, illis tandem infecto negotio recedentibus, denuo pars regis ad appellationis subsidium convolvit. Cujus persequendæ necessitas per dominum papam postea remissa est, et adhuc dilatio data, donec directis aliis de Francia viris religiosis, de pace rursus tractatum est, sed nihil profectum. Habitum est autem post hæc cum rege Franciæ colloquium: ubi circumstante multorum episcoporum et comitum procerumque corona, postulatus rex archiepiscopo pacem concessit, dum tamen sibi servaret quæ debilissimo regum antecessorum sanctissimus priorum archiepiscoporum servaverat. Et hæc quidem justissima concessio visa est et insperata toti circumstantium cœtui. Voluit autem archiepiscopus addi: « Salvo Dei et regis ipsius honore. » Quod rex tanquam superfluum renuit vel captiosum, favoremque cunctorum obtinuit, cum contra eorum consilium archiepiscopus quod offerebatur recusavit. Ecce qualiter omnimodam ejus

destitutionem procurabat malignus, dum illud solatii quod ab Ecclesia Franciæ solum ei supererat, detractum iri nitebatur. Sed nec vel hoc metu flecti potuit, ut quamvis multæ magnorum instantiæ cederet. Vidit quippe non videntibus falsi captionem in verbis, quia sanctissimus archiepiscoporum forte mala servaverat regibus sicut et bona, quorum generaliter postulabatur, sed annuenda non erat observatio: maxime cum rex addiderit, sicut sibi promissum est, recoleus non præcipientibus aliis consuetudinem, de quibus erat contentio, promissionem. Unde igitur videbatur destituendus, inde lætior factus, tanto deinceps apud hospites suos gratiam meritis ampliorem, quanto repertus est et contra captionem prudentior et contra tantorum suasionem invictior. Palam enim exinde visus est magis Dei spiritum duci quam favorem hominum sequi.

XXV. QUALITER ET QUAE FIDUCIA COERTIO DEÏUO SECUTA EST.

Jam autem non nihil virum vis schismatis amiserat, jamque plurimum furor ejus detumuerat; quia princeps ejusdem imperator, ab Italia expulsus, satis minor existeret, et Ecclesiæ Romanæ vigor magna ex parte revaluerat. In transmarinis quoque populis suis et clero schismatis regem augmentum aggredi non posse sine discrimine maximo, manifeste cernebatur et ob hoc etiam ejusdem excessus in Angliā juste putabatur facilius reprimendus. Hinc itaque fiduciam sumens et nutritus archiepiscopus, cum ad votum sermo pacis non procederet, et post longam jam expectationem plurimum tæderet dilationis, periculumque cresceret, debitam ultionis severitatem ulterius minime protelandam judicavit. Adhuc tamen personæ regiæ censuit deferendum, sublimitatis ejus reverentiæ condescendens et apostolicæ cōhibitionis mandatum sequens. Saltem autem in fegni majores et regi familiares manum extendit, quorum scilicet consiliis rex agebatur et ministeriis ad concussiones utebatur, quamvis et hæc etiam vice prius sibi appellatione prospexissent. Sed frustratoria videbatur toties interposita provocatio. Per dominum quoque papam inhibitu fuerat provocationis remedium.

XXVI. QUOD CANONICA ET JUSTA COERTIO.

Quos etiam licet absentes et incitatos, digne tamen plectendos censuit, tanquam manifestos et indubitatos notorii regis delicti fautores et patronos. In manifestis quippe judiciariis ordo non requiritur, sed reus tanquam operis evidentiā de malo confessus, juste innox percellitur. Hinc et quosdam etiam episcopos, videlicet Londoniensem et Saresberiensem, similiter anathemate licet igno-
fantes et non vocatos innodavit. Cum his quidem et ceteros officii sui neglectores deprehenderat et nutriendos pestilentiam, dum necessariam non adhibere disciplinam. Negligere enim cum possis perturbare perversos, nihil aliud est quam fovere,

A nec caret scrupulo consensionis occultæ qui manifesto facinori desinit obviare. Sed et eosdem auxilio suo defuisse repererat contra statuta sanctorum. Nam ut scriptum est: « Ad hoc præordinavit Deus omnes qui summo sacerdotio funguntur, ut injustitias removeant et presumptiones abscedant et præsertim in sacerdotio laborantibus subveniant. A quorum auxilio qui se subtraxerit, magis schismaticus quam sacerdos esse probatur. » Inter ceteros autem Londoniensem et Saresberiensem non solum auxilio defuisse, sed et adversarios in causa Dei fuisse palam expertus est. Londoniensis quippe totum litis onus in se suscipere non dubitaverat, archiepiscopi pro justitia mandatis obviāns, eaque velut schismaticis cavendi prætextu declinans et adversus obedientiam bonum omniumque malorum potentius remedium, semper opponens appellationis impedimentum. Velut quoque sociam in hoc Ecclesiā Angliæ traxit, quæ verius reclamare non audebat. Manifeste vero Saresberiensem sociam et adiutorem in omnibus molitionum et appellationum diffugiis habuit, ad eludendam justitiam in causa regis tam notorie injusta multiplicem legatorum et induciarum artem cum eo procurans.

XXVII. QUOD DURIOR POTUISSET ESSE DE JURE COERTIO.

Quos ob hoc non solum anathemate sed et depositione dignos fuisse, ratione constabat et exemplis. Similiter enim et in tutores quosdam notorii criminis Lotharii imperatoris animadversum esse legitur. Ait namque Nicolaus papa: « Scelus quod Lotharius rex in duabus feminis Theberga et Gualdrada commisit, omnibus manifestum est. Sed et dudum episcopos Theugaldum et Guntarium in tali facto eum habuisse tutores et fautores pene totus orbis ad apostolicam sedem confluentem referebat. Igitur decernente nobiscum sancta synodo, depositi ab officio sacerdotali, excommunicati atque a regimine episcopatus alienati indubitanter existunt. » Idem ad Lotharium: « Ita, inquit, corporis tui motibus consensisti et te ipsum in lacum miserie projecisti, ut qui fueras positus ad gubernationem populorum, effectus sis ruina multorum. Probat hoc Theugaldi et Guntarii dudum episcoporum legitimus casus, qui pro eo quod te

D minime competenter erudierunt, quinimo quia prævaricationem tuam tegere argumentis suis et sub quadam justitiæ specie fucatis adinventionibus æquitatem obruere studuerunt, nostra sunt auctoritate depositi et ab omni presbyteratus et episcopatus regimine regulariter sequestrati. » Cum igitur et in prænominationis episcopos similiter jure vindicandum fuisset, satis tamen iis pepercit archiepiscopus, cum tantum ad anathematis sententiam substituit, tanquam noluerit ut omnino dejicerentur, sed magis terrerent et respicerent regemque consequenter territum respicere facerent. Et eorum quidem laboribus et expensis modestia domini papæ tunc usque pepercerat, prosequendarum appellationum necessitatem iis remittens, quatenus ad huius benignitatis

compensationem eorumdem ope pax levius et maturius sequeretur. Ipsos autem nec ea remissione movit, nec decrecentis fiducia schismatis excitavit, aut crescentis apud eos scandali dolor animavit, ut post tanti temporis spatium sacerdotalem resumerent firmitatem et contra tantas enormitates reclamarent. Imo et eos abusus patientiæ reddiderat non modo securiores, sed etiam ad tergiversandum acriores. Quoniam ergo sal infatuatum ad nihil aliud valet nisi ut foras projiciatur et ab hominibus conculcetur, digne demum ab Ecclesia per anathema cum cæteris regis consiliariis ejecti sunt, ut catulis ita coram leone castigatis, deterberet ira leonis et qui deviarat in consulto calor et ætatis terrore victus rediret ad viam sanitatis et salutis. Secuta vero deinceps est tanto ejus implacabilior ira, quanto major tristitiæ causa. Nec enim poterat non reputare suam suorum confusionem pro se præsertim inflictam.

XXXIII. QUALITER ADVERSUS QUORUNDAM DETRACTATIONES EXCUSATUR ARCHIEPISCOPUS.

Nec deerant qui palam archiepiscopum hostem et regni turbatorem arguerent et tanquam in odientem odium regis inflammarent. Nihil tamen egerat ut sæviens aut odians sed regem ut filium charissimum castigare volens, et ut dominum unicum diligens, ejusque per omnia bonum ardentissime querens. Nec enim omnis qui verberat inimicus est sicut nec omnis qui parit amicus. Meliora vero sunt vulnera amici quam oscula inimici. Melius etiam est cum severitate diligere quam cum lenitate decipere. Decipere quidem qui malum ejus foverunt, qui periculum de negligentia correctionis auxerunt. Vere vero dilexit qui de periculo doluit, qui obviare curavit, qui vel invitum liberare satagit. Charitas enim erat, quæ veterem illum timorem foras jam miserat, quæ formidinem offensionis expulerat, quæ periclitantis salutem utilius pensabat, quam iram cavebat. Si prius, sicut a multis exprobratum est, fugerat ut homo, at jam libere reclamare, fortiterque resistere promptus erat, spiritum sacerdotis assumpto. Regiam enim censure viam constantius incedebat, velutque non terreni lucri sectator aut personarum acceptor, sed rectitudinis indeflexus æmulator, tanquam resistentibus exinde nolens in aliquo parcere se d gerebat.

XXXIV. DE PROPECTU EJUS IN DIEBUS EISILII.

Sed et tanto jam exsilii tempore non minimum personæ suæ contulerat. Divinæ quippe legis et decretorum lectioni totis interim insistens viribus, damna priorum dierum et occupationes curiæ studii vehementia compensavit, ut ad susceptæ dignitatis exercitum longe doctior factus sit. Nec minus et accerrima pœnitentia non tamen publica sed occulta prioris temporis lapsus purgare stituit, ut jam septennali pœnitentiæ tempore, quo maximorum etiam criminum venia quæritur fere completo, quanto mundior, tanto securior et ad extorquendam

A etiam a delinquentibus pœnitentiam ardentior esse repertus sit.

XXXV. DE AFFLICTIONE PER REGEM AUCTA.

Ad hunc autem ejus zelum petulantium in Anglia taurorum tumor magis intumuit. Mox enim aucta est tempestas, restricta est observatis portibus navigandi facultas, secuta quoque est susceptionis et observationis mandatorum archiepiscopi vel domini papæ pro eo per Angliam abjuratio. Sic enim malevolorum suaserat malitia, quo vel schismatis vis obtineret vel saltem metus ejus remedium ad regis et regie partis arbitrium procuraret.

XXXVI. DE PACIS DEMUM PER DOMINUM PAPAM REFORMATIONE.

Quasi vero pro foribus schismatis imminere cœpit B augmentum et in deterius malum videbatur iturum, nisi demum ad iteratas regis supplicationes inclinatum fuisset apostolicæ sedis moderamen, ut remedium provideret. Laboraverat quidem et paulo ante dominus papa precibus, monitis, minis, ad reconciliationem litteris et mediatoribus novis a latere suo transmissis, regem sicut decuerat interpellans. Pacis autem impedimentum fuerat, quod rex reditum et potestatem debitam archiepiscopo concedebat, salva regni sui dignitate. Volebant autem mediatores etiam addi salva libertate Ecclesiæ. Quæ quia non videbantur posse convenire, nec de pace consentire potuerunt, jam autem scandalum ultra non sustinens, additionem illam verborum utrinque dominus papa censuit amovendam et novis interventoribus negotii curam delegans, pacis modum et formam præscripsit, eam regi multa precum et monitionum benignitate suadens et remissionem etiam peccatorum in præmium statuens. Et etiam citius animus ejus molliretur, gratiam absolutionis episcopis suis præconcessit. Quibus ille demum victus pacem et gratiam suam archiepiscopo reddidit, et sicut mediatores postulabant concessit ut ipse suique redirent et propria cum integritate recuperarent, sicut tribus mensibus ante discessum habuerant, eaque fungeretur ipse potestate quam largitur auctoritas sacræ Scripturæ. Tunc etiam per mediatores eosdem absolutionem receperunt cæteri regis fideles, qui fuerant in anathemate positi.

XXXVII. DE MEDIA QUADAM INJURIA ARCHIEPISCOPI.

Parum tamen ante hoc principali prærogativæ Cantuariensis Ecclesiæ plurimum fuerat derogatum. Nam cum de jure, sicut dicebatur, antiquo solius archiepiscopi Cantuariensis esset novum regem coronare, captata quidem ejus absentia, præsul Ebora-censis tanquam parem se faciens, obtinuit ut filium regis in regem patris voluntate sublimatum consecraverit. Hoc autem in provincia non sua sed Cantuariensi, scilicet apud Londoniam, quam ejusdem provinciæ civitatem haberi constabat. Astiterunt etiam coronationi ministerium præbentes Cantuariensis metropoleos suffraganei præsules per quos potissimum ille pertinens ad archiepiscopum suum præcipue potestatis circa regis creationem honor

Jam abolitus videbatur, et non minus deinceps ad quemvis alium pro principis arbitrio devolvendus. Ob hoc igitur Ecclesiæ suæ damnum enorme dolore cordis intrinsecus tactus archiepiscopus, qualiter super dolorem vulnere suorum additum sit, domino papæ scripserat pacis omnino desperationem allegans. Hinc et rescriptum ante pacem acceperat : quo præsul Eboracensis tanquam alieni juris præsumptor ab episcopali suspensus est dignitate, maxime quia terminos suos transgressus usurpavit in alterius provincia præsertimque propter justitiam exsulantis, quod sibi nec de ratione nec de sanctorum Patrum constitutionibus poterat competere. Nec minus et aliud rescriptum impetraverat, quo suffraganeos ejus acerba satis increpatione confutatos, quia contra consuetudinum pravitatem sacerdotaliter reclamare post tantam expectationem neglexerant, imo et in præjudicium Ecclesiæ metropolitane coronationi filii regis ministerii sui favorem prohibiti præstiterant, similiter ab episcopali dignitate papa suspendit. Insuper et quosdam eorum, videlicet Londoniensem et Saresberiensem, velut tanto magis culpabiles quanto majori prius absolutionis et remissionis gratia respectos, in anathematis sententiam revocavit. Ex quo patens est, et in archiepiscopo rectum justitiæ zelum præcessisse, quam ita postmodum Petri vicarius in quosdam episcopos extendit, manum aggravans, et in priores innovavit, quamvis prius eandem ex dispensatione laxasset. Pace vero, sicut dictum est, interim inita, curam tamen abolitionis predictorum non egit archiepiscopus, quia nec de auctoritate pacis erat securus. Nec enim implebantur quæ promissa fuerant; sed et multa contra pacis ténorem denno patrabantur. Sibi quippe suisque aliorum non fiebat restitutio, sed et eorum diminutio distractioque satis damnoxa per regis officiales accidebat, quasi sic maligno dissuadente reditum, ut martyrii propositum præpediret.

XXXVIII. DE REDITU EJUS ET REDITUS NECESSITATE.

Iustante tamen rege postmodum et emendationem omnium pollicente, redire maturavit in Angliam. Hoc etenim etiam domini papæ cardinaliumque consilium fuerat. Præsertim autem de tantis quibus vexabatur Ecclesia scandalis motus est ut rediret, et tanquam strenuus ac fortis athleta pro suis ovibus animam poneret. Jam enim tempus suum venisse credebat. Satis enim jam apparebat quis esset; satis etiam mundo veritas causæ suæ patebat. Potuerat quidem et ante fugam personæ suæ martyrio prospexisse, sed digna subventum non esset Ecclesiæ detrimento, quia mors ejus parum profuisset ad remedium, nisi vitæ causæque suæ procurasset auctoritatis suffragium. Nam et ob hoc in Ecclesiarum specula Franciæ Ecclesia libentius reöderat ut illinc instructor consilio, munitior auxilio, cum opus foret, majoris pondere nominis sortior ibederet ad pagnam et potentior esset ad victoriam. Jam igitur cum plurimum satisfecisset voto, nec

A dignum nec tutum reputabat tam periculose laborantibus subtilis se pacis et securitatis extra regnum delictis ulterius indulgere. Præsertim autem quia per se tota concessio sæviebat, periculoseque vacillabat Ecclesiæ status, exemplo David compunctus jam dicebat : « Grex iste quid peccavit? fiat, Domine, manus tua in me. » Jam attendebat consolationem Isaïæ ad Achaz : « Noli, inquit, timere, et cor tuum ne formidet a caudis titonium fumigantium. » Jam assumpserat audaciam Mathathïæ dicentis : « Ne timueris a verbis viri peccatoris, quia gloria ejus, stercus et vermis, hodie extollitur, et cras non invenietur. » Jam zelabat baptistæ Christi censuram, ut regi dicere non timeret : « Non licet tibi habere uxorem fratris tui; non licet maculare Sponsam Christi. » Si prius itaque fugerat exemplo Christi, exemplo Pauli cæterorumque nonnullorum Christi sequacium, captans tempus magis idoneum, et majus Ecclesiæ commodum, jam utique cum tempus monebat, scilicet post vitæ sanctioris cursum, publicatamque causæ justitiam et inter urgentia gravius Ecclesiæ scandala negligentibus etiam nimis periculose ministerium debitum coepiscopis suis fixit ut rediret et exemplo Christi missis a principe obviam procedens diceret : « Quem queritis? si me queritis, sinite meos abire. » Jam enim paratus in mortem ire vel carcerem, capiti suo vel corpori promptus erat non parere, si tuta aliter Ecclesiæ salus esse non poterat. Et quidem velut præscius caput se daturum, nonnullis id ita futurum prædixit. Testificata est enim hoc post ejus agonem ultorum et magnorum fideque dignorum recordatio. Sed et literæ ejus comparuere postmodum, quas in reditu suo domino papæ scripserat, humiliter et devote gratias ei referens quod causam suam tam potenter et immobiliter foverat, obnixque supplicans ut paternæ defensionis solatium continuare dignaretur Ecclesiæ suæ pro qua, sicut addidit, certus erat quod mori pergebat.

XXXIX. DE TEMPORE REDITUS EJUS ET DE CAUSA NOVÆ TURBATIONIS.

Venit igitur anno jam exsilii septimo, post tractam scilicet tanto tempore satis importabilem pœnitentiam, post auctam etiam sibi plurimum in ecclesiasticis eruditionem et post conquisitum undique sanctitatis et sapientiæ nomen. De Romanæ quoque sedis indultu præter legationis apicem, debitam primatus in Anglia dignitatem jam obtinebat. Prius autem quam navem scanderet, prædictas litteras domini papæ transmisit. Quas primi receperunt præsules Eboracensis, Londoniensis, Saresberienensis, qui tunc in adverso littore ventum prosperum expectabant, ut ad regem ex ejus mandato transfretarent; qui trans mare morabatur, quatenus eorum consilio novi in vacantibus Angliæ sedibus episcopi ponerentur, Ecclesiarum etiam vacantium personis velut ad electiones faciendas illuc evocatis

XL. QUALITER DE TEMERITATE NOTATUS SIT

Visum est autem nonnullis, quod incircumpecte

litterarum vindicta post pacem usus est, quæ tantum pro pacis desperatione fuerant date, quarum etiam missionis dominus papa causam expresserat, scilicet quod pro archiepiscopo postulans præter inanem pompam verborum nihil eatenus reportaverat. Cum igitur non jam causa subesset, prudentius, ut iudicatum est, etiam litteræ suppressæ fuissent, aut super episcoporum absolutione pro pacis firmitate dispensationem providisset, ne alioquin indignum pace videretur, qui pacem minime sectaretur. Iuris enim sui reformationem, ut censuerunt, melius in dies securiores distulisset.

XLII. DE NOVA TURBATIONE.

At jam nequius, aliquid in eum machinabatur maligni versutia. Quem enim nec prosperis seducere nec adversis contereere poterat, magis autem ex omni tentatione proficere cognoscebat: victoriam jam ei devolvere nitebatur ad necem velut id agens, ne sub ejus alis Ecclesia respiraret, et ut in persecutorum ejus scelere sibi compensaret quod in eum non prævalebat. Ipso igitur suggerente velut in regis injuriam redundare, quod in transmeantes ad eum episcopos actum est, mox magnus novæurbationis ortus est motus. Secuta est enim fidelium regis indignatio vehemens et officialium ejus animositas vix se continens, futuræque calamitatis evidens indicium. In ipsius etiam impulsu militum et satellitum factus est ad mare concursus, vindictamque præcipitasset furentium impatientia, nisi conductus ei a rege præstitus eorum frenasset insaniam. De providentia quoque retributionis divinæ nobilior eum exitus et major manebat gloria passionis.

XLIII. DE RECEPTIONE EJUS ET ESTIMATIONE.

Inter hæc autem constans et intrepidus cum ypanti magnifica sedem suam intravit et cum ingenti gloria gratulationis exceptus, redditus sui solemnitate satis splendidam habuit. Secutum est exinde murmur multum in regno, dicentibus aliis quia justus est et magni cordis, aliis non, sed seducit seipsum et temere agit. Quid enim periculosius aggredi potuit quam tam formidabilem super corona tanquam non recte data vindictam? Aut in quo regni decus deformari plus potuit quam ut ei detractum esset totum pontificalis honoris obsequium?

XLIII. EXCUSATIO EJUS.

At ut se veritas habet, imminens detrimentum injuriæ dissimulare non poterat. Post detractam enim sibi creandi novi regis prærogativam procurabatur etiam ad confusionem majorem ut sine sui ministerio præficiendorum suffraganeorum consecratio proveniret. De quibus etiam creandis præter sui consilium tractatus habendus tunc fuerat. Nam et ob hoc dum redibat in regnum, extra regnum etiam vocati sunt conventus vacantium sedium et nullæ judicii sui partes forent, quinimo et in sui præjudicium majus, æmuli sui præsulis Eboracensis omnia consilio fierent. Cui dum Londoniensis et Saresheriensis elegerunt sociari, plane

A videbantur et in perniciem suam conspirasse. Contra canones item fieri parabatur, quia dum de regni consuetudine non manebat Ecclesiis eligendi libertas sed obsequendi necessitas in præficiendis non electio nisi palliata, sed regis voluntatis præceptio tantum expectabatur. Evidens itaque sibi periculum et apertum non observandæ pacis indicium imminabat: propterea coercionis litteras digne censuit præmittendas, ut ligatis adversariis minor esset nocendi facultas, et dum intendere sibi necesse haberent ejus præjudicio vacare non possent. Præterea de dignitatis suæ præsumptoribus ante reditum regi conquestus, assensum ejus obtinuerat ut jus suum licite persequeretur. Sed et ne pacis turbator notaretur, quamvis etiam sibi periculosum, B esset absolvere quos dominus papa ligaverat, iis tamen absolutionem obtulerat, dummodo consuetum et debitum juramentum præstarent, quod super excommunicationis causa vel suo vel apostolico parerent arbitrio. Postulantes autem ut prorsus liberi dimitterentur, præsertim ob pacem jam secutam et regis ad quem tendebant honorem, in-exauditi sicut non obediens abscesserunt.

XLIV. DE CONSTANTIA EJUS.

Ipse tamen interim cum in diesurbationis vis cresceret, non eo segnius aut timidius domui suæ disponebat, et ecclesiasticorum quali decebat eminentia curam agebat, ecclesiasticæ libertatis intrepidus et constans assertor et quasi turris erecta in Jerusalem contra faciem Damasci. Ut novum quoque regem apud Wintoniam visitaret, Londonias usque processit, ubi tam a clericis quam a laicis honorifice receptus aut visitatus, apud malevolos sibi multum invidiæ visitatoribusque suis non parvi periculum odii citavit. Ibidem autem regis novi mandatum procurantibus malevolorum quibusdam accepit, ut per civitates et villas regias migrare caveret, et in propriis se contineret. Sicque reversus in sedis suæ domibus Cantuariæ sibi moram elegit. Et tamen in omnibus his non est aversus rigor ejus, sed adhuc manus ejus extenta. Nam immobile tenens tuendi juris Ecclesiæ sententiam et tanquam rigidi servator honesti severitatis viam incedens nec ad dextram declinabat nec ad sini-

D stram.

XLV. QUALITER REPREHENSUS SIT EJUS CONSTANTIA ET QUALITER EXCUSETUR.

Quamquam plurimi censuerunt, quod consultius etiam tunc ad mansuetudinis et modestiæ semitam aliquandiu divertisset perque patientiæ moderamen parumper deviasset, minora tolerans et deteriora devitans, ut pax Ecclesiæ quæ vix adhuc fores erat ingressa, per ejus ingressum non esset egressa. Sed velut de vitæ munditia bene securus et fortiter honoris Ecclesiæ zelo succensus, pristinaeque promissionis præjudicium præcavens, promptum se gessit exsequi quod eminentiam Sponsæ Christi decebat, et paratum intrepide pati quicquid imminabat. Nec enim jam poterant reformari nisi per vi-

gorem rigoris, quæ perperam in ecclesiasticis usurpata fuerant per dissolutionem lenitatis. Ideoque magis etiam curandum erat, ut medicina modum excederet, quo et potentius abusionum immodestia cederet. Sic enim contrariis contraria curantur. Sic et dum lignorum tortuosa diriguntur in alteram partem reflexio non timetur. Sed et apostolicæ sedis legati nomen et dignitatem contra regni consuetudinem sine regis consensu gerens, de magnæ auctoritatis statera quæque ponderabat. Hinc etiam malevolis suis furoris et odii stimulus acrior, hinc grassandi in res ejus immanitas amplior, hinc injuriarum pulsatio crebrior. Attamen in omnibus his non est aversus rigor ejus, sed adhuc manus ejus extensa, gladium spiritualem in quosque meritos exerebat. Fuere siquidem qui damni dedecusque molestiam ei sæpius Ecclesiæque suæ contra jus et fas inferre præsumperunt, ut dum ob hoc eos ecclesiastica censura puniret, amplius in eum malevolorum ira tumesceret et demum potentiorum perficeret audacia, quod horum non prævalebat insania, sicut et contigit.

XLVI. DE PASSIONIS EJUS CAUSA ET MODO.

Interim enim memoria veterum inflammatus et novorum gravaminum molestiam non sustinens persequentium furor, concilium inivit ad reprimendos ipsius conatus ut eum captum in carcerem traherent. Sic enim domini sui regis iram sedandam arbitrati sunt, et de transmarinis properantes quidam de curia nobiles regique familiares, tanquam ad facinus dirigente maligno, sine omni tam impedimento quam mora, quinto natalis die Cantuariam advecti sunt, auxiliis sibi latenter ab incolis loci et malevolis archiepiscopi conquisitis. Quem eadem die post prandium, quando familia consuevit abesse, tanquam visitare soli venientes, magis autem id agentes ut explorarent an improvisum præoccupare quirent, mox et facile tanquam præclari notissimi-que curiæ regis juvenes in interiorem etiam cameram admissi sunt, ubi cum clericis et monachis suis colloquia postmeridiana pro amore Dei præsul habebat. A quo benigne digneque suscepti, postquam de viæ suæ prosperitate dominique regis salute requisiti responderunt, injuste temereque latas in benevolos regis sententias mordaciter accusare transierunt. Adversus quos cum ipse se justis rationibus excusare niteretur, illi velut more pertesi, contumeliis et iniis succlamantes exiire velociter, quosdam etiam de domesticis archiepiscopi per nominis regii protestationem secum educentes violenter, ut operi conceptio facilius exitus esset. In omnibus tamen his non est rigor ejus aversus, sed ex tunc mens ipsius his quæ Jesu Christi sunt magis intenta nec in modico movebatur. Et se quidem sic agebat, quasi nihil fieri reputans nisi ad terrorem, propositum tamen gerens ad sustinendum quidquid inferretur.

Factus est interim satellitum in atrium ejus con-

A cursus et armatorum fragor non minimus, ita ut justo timore percussi domus archiepiscopalis custodes januas ad concurrentium impetum clauserint et obstruxerint, quatenus malum quod imminerebat vel differrent vel arcerent. Tumultu vero strepituque motus ac territus clericorum monachorumque circumfusorum archiepiscopo cætus vix ei suadere potuerunt, imo vix impulerunt, ut in ecclesiam se conferret. In nullo tamen territus erat, sed velut omnino securus, imo sic agens, quasi martyrii dilationem remunerationis suæ diminutionem reputaret. Post quem cum valvas obserassent, mox eas aperiri fecit dicens: « Absit ut ecclesiam Dei castellum faciamus! » et utique satis poterat divertisse si vellet, et manus impiorum evasisse, sed nimis indecans planeque periculosum censuit ulterius cedere, præsertim cum publice jam insonuisset quod venerat per Ecclesia caput dare. Substitit autem eadem die post auditam mane missam usque ad prandii tempus in capitulo monachorum, ubi duobus ecclesiæ religiosioribus monachis sua peccata cum summa contritione dicitur esse confessus et ad satisfactionem obediens pro eorum arbitrio factus. Hanc enim humilitatis cautelam jam diutius assueverat ut ubicunque religiosi cujusquam copiam haberet, ejus se consilio subderet. Transibat igitur, ut subsisteret ante altare majus, et in ipsa sede sua certamen si necesse foret consummaret, ibique suum pro Christo fundaret sanguinem, ubi et Christum immolare consuevit ad sui mundiæ salutem. C Agmine vero coacto, malefactores cum non eum in domo propria comprehendere sicut optaverant, imo nec domum ingredi possent, duce quodam filio Belial Roberto de Broc, qui nequius et ardentius in eum et ejus res fidelesque semper debacchaverat et ob hoc anathema erat, rupta fenestra quadam irruerunt et per claustrum monachorum quamvis iis prohibentibus et reluctantibus ingressi sunt.

Cum autem vociferarentur: « Ubi est archiepiscopus? » erat enim ex vespera locus obscurior ut ipsum secernere non mox possent, occurrit iis ex gradibus, quos partim accenderat, dicens: Ecce ego: quid vultis? Unoque proclamante militum: « Ut moriarius, nec enim esse potest ut ulterius vivas, » D constanter respondit: « Et ego pro Deo et Ecclesia mea paratus sum mori. » Venerant autem in loriceis et galeis ensibusque nudatis. Quibus perterriti subito dilapsi sunt huc illucque cum cleris monachi, tanquam et hic iterum impleto quod scriptum est: « Percutiam pastorem et dispergentur oves. » Nisi sunt autem primo comprehensum eum abducere. Quod fieri posse desperantes, cum sequi designans solo tamen verbo reluctaretur, timentesque ne supervenientibus auxiliis ereptus denuo regnum exiret, velut ad facinus præcipitante diabolo cedis in ipsum furia mox exarserunt. Cum ergo percutiendus esset, prosluit unus ex clericis Edwardus nomine cognomento Grim, ac velut æmulatus beati Petri fidentiam ut magistrum defenderet, obvolutum pallio

brachium levatis ensibus attonter objecit, ut archiepiscopo suo parcerent clamans. Cujus ausum quamvis pium tanquam tamen minus rectum prohibuit Christi pontifex : et velut illius prohibitionis memor qua Petro Dominus ait, cum servo pontificis amputasset auriculam : « Mitte gladium tuum in vaginam, calicem quem dedit mihi Pater, non bibam illum ? — Desine, inquit, frater, non hanc defensionem vult Dominus. » Interim autem clerico miles funestus non perpercit, sed in eum primo deserviens brachium quod objecerat fere per medium gladio secuit, et ex ictus vehementia perturbatum velut exanimem solo stravit. O quam laudabilis qui patri suo promptus compati solus inventus est ! O quam et felix, si et commori deo ei datum fuisset ! Promeruisse siquidem et ipse martyris nomen et primum, si tamen animam pro magistro ponens, animum præsertim defendendi causam ejus subiisset. Sane vero creditur divinitus procuratum ut evaderet ne laudis debitæ gloria vir sanctus, cujus principaliter agon erat, fraudaretur, solisque discipuli meritis virtutes miraculorum secutas malevolorum perversitas deputaret. Tunc athleta fortis ad carnifices : « Si caput, inquit, meum vultis, ex parte Dei per anathema prohibeo ne quemquam meorum tangatis, quia nihil imputandum est illis quod egerim ; » quasi licet non verba, tamen sensum responsi Dominici sequens : « Si me queritis, sinite hos abire. » Deinde signo crucis se muniens, et junctis in modum orantis ad Deum manibus, contra gladios imminentes caput inclinans, stetit immotus, hæc ultima verba proferens : « Deo et sanctæ Mariæ et hujus Ecclesiæ sanctis beatoque Dionysio commendo me et Ecclesiam meam. » Diabolico vero præcipitatus impulsu furentium impetus, mox eum gladiis appetiit tanto nequius quanto minus præmunitum et improvisum, et nec judicatum nec discussum, constantem tamen et velut in nullo turbatum. Nec enim vel adhuc aversus est rigor ejus, sed collo tunc extento grandes super benedictam et chrismate sacram coronam fortiter ictus excepit. Quid multa ? prohi dolor ! Christum Domini, benedictum Dei, ante altare sancti Benedicti die quinto natalis Christi crudellum immanitas capitis cum cerebri summitate præcisa truncavit et stravit, ut mira Dei providentia mortem ante mortuorum coarchiepiscoporum sepulturas excepit, nec resistens, nec conquerens, nec obmurmurans, nec ingemiscens, sed se post ictus aliquot velut ad orationem in pavimento distendens, ut et hic quoque non fuerit aversus rigor ejus, sed ex tunc anima ipsius celo prorsus intentata, terribilioris vindictæ metum juste reliquerit. Utionem siquidem injuriarum Ecclesiæ tanto fortius zelatus recte creditur, cum migravit, quanto passionis sensu acrior fuit ; suas autem tanto lætius ferens, quanto certioris retributionis spem habens. Cursum enim consummaverat fidemque servaverat, et de reliquo repositam sibi coronam justitiæ digne confidebat. Tunc unus ex militibus et ipse

A filius Belial, inter scolestos cæteros sæculis omnibus scelere detestabilior, in residua capitis jam exanimis testa cerebri residuum cum ensis mucrone scrutatus ejecit et solo sparsit, non tam ne mortis in jam mortuo dubitatio resideret, quam ut sibi sævitiae deementia satisfacerei.

XLVII. INVECTIO IN CARNIFICES.

O quam dura crudelitas ! o quam dira rabies ! o quam stupenda scelerositas, quæ sacras illas sacrati verticis partes tam irreverenter et tam atrociter, tanque execrabiliter rimari præsumpsit. Immanitatem sceleris audius refugii, mens non capit et explicare sermo non sufficit. Cujus memoriam singularis et singulariter nefandus casus non patietur exstingui, cujus commemoratio recentem horrorem stuporem recolentibus semper faciet excitari. Non autem contenti speculatores eadem nefandam consummasse, sed prædonum etiam more grassati, tam cupiditate degeneres quam scelere detestabiles ignobili facto consequenter se probarunt. Post facinus enim impletum in ecclesiæ palatium irrumpentes, angulos omnes domorum perscrutati sunt, universamque suppellectilem et quidquid in scriniis aut manticiis aut clitellis vel ipsius archiepiscopi vel suorum potuit inveniri, tam in auro vel argento quam in pannis et vestibus, sed et libros et equos et sarcinas omnes insatiabilis avaritiæ violentia sibi vindicarunt, sicut nec ditioribus sic nec pauperioribus archiepiscopalis curiæ quidquam præter vestitum quotidianum relinquentes.

XLVIII. DETESTATIO FACTI.

Factum igitur ipsum tam perniciosum quam detestabile fuit. Si enim hoc fecerint in viridi, quid exinde timendum non erat in arido ? Cujuslibet etiam et quantumlibet scelerosi, domus Dei quælibet asylum esse consueverat. Si vero mater Ecclesiarum regni, si titulum et nomen habens non alicujus sancti, sed sanctorum omnium Domini, si magnis munita privilegiis, si multis reverenda sanctorum reliquiis, patris et pastoris sui tutamen esse non potuit, ubi deinceps alicui refugium sperandum fuit ? Quis vero patroribus sceleris relictus est veniæ locus ? Si sanguis Abel in agro lapsus, si sanguis Zachariæ inter templum et altare fusus clamant ad Dominum de terra, quanto terribilius intonat quo et ipsum coram altari tam dire tamque profane maculatum est sanctorum sanctum ! Vere tunc ibi plus quam Dohech et emissarii regis Saul, quia tanto magis execrandi carnifices, quanto sacratio nostri temporis pontifex quam Abimelech et domus ejus tota. Sed nec id illos excusat, quod tanquam sceleratum et domini sui proditorem se perimere sibi suaserunt. Primum enim de proditione non constabat, sed et retroacti temporis omnia per interventum pacis et veniæ fuerant deleta. Deinde nec vel in scelerosum christum Domini sic sævire, nisi sacrilegium, imo nisi sacrilegium parricidium esse poterat et tanto magis, quanto locus sacratio diesque celebrior et persona sublimior. Scelerosus enim et reprobus

erat Saul et tamen sanctus David, quem etiam persequabatur, valde corde compunctus est, quia præscriberat oram chlamidis ejus, et ait : « Propitius sit mihi Dominus, ut non mittam manum in eum quia christus Domini est. » Et iterum ad Amalechitam qui se illum occidisse confessus est : « Sanguis, inquit, tuus super caput tuum : os enim tuum locutum est adversum te dicens : Ego interfeci christum Domini. » Quanto magis igitur morte digni sunt, imo nec etiam morte plandi ; qui sæviunt in eum qui non solum christus est Domini, sed etiam facit christum Domini, videlicet qui regem ipsum et sacerdotem constituit, qui sacramenta quæque conficit, qui Christum etiam Regem omnium regum in altari consecrare non metuit.

XLIX. EXAGGERATIO SCALERIS.

Et profecto sceleris quantitatem longe exaggerat passi sanctitas. Sanctitatem autem plane convicerunt primo indicia magnarum presumptionum, deinde crebra per eum post mortem miracula. Cum enim sepeliendus vestibus suis nudaretur ut ad funus curaretur, horrendo cilicio repertus est a scapulis usque ad lumbos totus insutus et desuper habitum monachi tanquam monachorum pater habens, exteriusque schema canonici præferens. Ita nihil ei religiosi habitus defuit. Quod etiam mirabilis et inauditum prius fuit, femoralia quoque cilicina sub lineis propius ad carnem habebat. In ciliciis item tanta pediculorum multitudo repere visa est, ut paulo rariorum locum obsitum quam vacuum fecerint. Quorum etiam, quamplurimi penetrata jam pelle carni profundius inherere prospecti sunt. In hoc torculari paucis admodum consciis, sicut et ipsi testati sunt, septennium jam totum exegerat, tot diebus ante mortem sepultus et vermium cibus. Vere mira beati viri fortitudo, quæ carnem assuetam delictis ita subditam contumeliis post purpuram et byssum sudario damnavit mortuorum. Vere magnus terrenorum contemptus, ubi vir tantæ potestatis et honoris, tantæ se fecit utilitatis. O quanta suspiria, quantus luctus omnium ! quanta præcipue lamenta monachorum ad illorum cum patuere conspectum ! Quis enim a lacrymis temperaret ? Quis etiam a laudibus Creatoris abstineret ? Quis non compateretur afflicto ? Quis non gratularetur tantis malis erepto ? Quis gratias non ageret Deo, qui tantam dedit perseverantiæ gratiam ? Quis recte discredere retributionem secutam ? Vere siquidem gestaverat crucem in corpore, cum vitis et concupiscentiis tanto tempore crucifixus. Vere consummaverat et crucem in capite demum in eo tam crudeliter plexus. Nec potuit juste præsumi, nisi quod fideliter Christum secutus, felici esset a Christo mercede donatus.

L. QUARE MOX DEBUIT MARTYR JUDICARI.

Nec enim nisi martyrum unus de pretiosæ titulo mortis credi debuit et censeri, tantoque major quanto causa mortis singularior. Occumbere siquidem pro Christi fide vix aliquis nisi male credulus refugit ; occumbere vero pro statutis Ecclesiæ vix nisi chari-

tate perfectior appetit. Quod ergo rarius est et difficilius, recte quoque censendum est gloriosius. Nam in modico fidelis, et in majoribus fidelis est. Illiusce quoque gloria passionis illustratus est, quo inter natos mulierum non surrexit major. Quia enim zelavit legem, dicens Herodi : « Non licet tibi habere uxorem fratris tui, » capite cæsus inter maximos martyrum factus est. Martyres etiam præclaros censet et laudat Ecclesia Machabæos, quia pro legibus patriis fortiter usque ad mortem dimicarunt. Non aliter igitur et hic nisi inter præcipuos martyrum numerandus fuit, ut per similem tuendæ libertatis ecclesiasticæ causam parem nactus prædicaretur et gloriam.

LI. DE CONTRARIO MALEVOLORUM JUDICIO.

Fuerunt autem qui dicere præsumperint eum magis vanæ gloriæ voto, magis vindictæ propriæ studio laborasse : nec sine typo superbiæ, quamvis sub umbra justitiæ decertasse. Scriptum est autem quod causa martyrem facit, non pœna, quia Veritas ait : « Beati qui persecutionem patiuntur propter justitiam. » Sicut autem non pœna, sic nec causa sola. Primum enim fatuus est justitiæ zelus non secundum scientiam. Præcepit enim Apostolus omnibus sapere non plusquam oportet, sed sapere ad sobrietatem. Deinde rectus non est præter modum. Ait enim Salomon : « Noli esse nimis justus : est enim justus qui perit in justitia sua. » Non prodest etiam martyrii pœna præter charitatem. Nam, ut ait Apostolus : « Si distribuero in cibos pauperum omnes facultates meas, et si tradidero corpus meum ita ut ardeam, charitatem autem non habeam, nihil mihi prodest. » Quippe cum odio proximi non potest inesse dilectio Dei. « Qui enim non diligit proximum quem videt, Deum quem non videt, quomodo potest diligere ? » Sine dilectione quoque Dei non acquiritur habitatio cæli, sicque nec evaditur pœnalis horror inferni. Medium enim nihil est : ait enim qui mentiri non potest : « Qui mecum non est, contra me est. » Aut Babylonix satellitem, aut Jerusalem oportet esse concivem. Sed nec in hoc sæculo sine radice charitatis vera virtus est, vel in moribus optimis. Simulationem virtutis plurimi quidem habent, sed non veritatem. Sæpe namque, teste beato Gregorio, vitia se esse virtutes mentiuntur, ut tenacia, parcimonia, effusio, largitas, crudelitas, zelus justitiæ, remissio, pietas videri velint. Ex his igitur multi pertinaciter argere nisi sunt, et in archiepiscopo non virtutis veritatem, non martyrii mercedem esse potuisse, tanquam in multis pomposus, elatus, cupidus, crudelis et terribilis apparuerit, et id præsertim suis inexpertum non fuerit. Ubi namque tot vitiorum agmen inest, virtutem comitivam habere non potest. Simul enim inesse non possunt virtus et vitium. Nam et Augustino teste quia radix omnium malorum est cupiditas et radix omnium bonorum charitas : ambæ simul esse non possunt. Nisi una radicitus evulsa fuerit, alia plantari non potest. Ubi quoque superbia regnat, humilitas locum non

habet. Ubi crudelitas est, iustitiæ rectitudo non est. Ubi gloriæ vanitas reperitur, mercedis spes non relinquitur. Nec igitur sicut intulerunt super talium fundamentum martyrii consurgere potuit ædificium. Sed et quanto major eum comitatus est populi favor, tanto plus metuendum esse responderunt ne dictum illi sit: « Amen dico tibi, recepisti mercedem tuam. »

LII. QUID VERIUS JUDICANDUM FUERIT.

Magis autem, ut se veritas habet, post initæ dies penitentiae nullum in eo crudelitatis aut cupiditatis opus nisi mendaciter argui potuit, pretiosi vero temporis culpas, si quæ fuerunt, per penitentiam deletas esse bene credi deuit. Sed nec pompæ vel superbiæ terroris vitio laboravit, sed humilitatem intus tenens, exteriusque contemptum præcavens, honoris quem gestabat honorem ponderabat et ingenio suo dignitatis auctoritatem augebat. Præsertim enim ut doxam quam sequi consueverat fugeret, magis ad conscientiam quam ad hominum gratiam sibi consultum esse nitebatur, inde sæpius aliquid durius in facie præferens, semper autem in opere quæ Jesu Christi sunt sequens, in tantum etiam bona quibus pollebat abscondens, ut nemo turpitudines suas plus caverit propalari quam suas ipse virtutes. De quibus etsi palam non constiterit, at tamen in dubiis benigniora præferenda fuerunt, ut ea facta quæ dubium erat quo animo fierent, in meliorem partem trahi deberent. Quod enim scriptum est: « Ex fructibus eorum cognoscetis eos, » de manifestis dictum est, quæ non possunt bono animo fieri: sicut stupra, furta, blasphemiae. Sunt autem media, quæ per se bona sunt, ut virtutum opera, quia et bono et malo animo fieri possunt: ut pascere pauperem, vestire nudum, de quibus temerarium est judicare, maxime ut condemnemus; et talium quidem multa circa vitam et finem archiepiscopi contigit apparere, quæ quanto plura magisque miranda fuerunt, tanto melius de ipso suadere debeuerant. Siquidem cum ante promotionem suam tanquam unus excellentium enitisset sæculo, non minus etiam postmodum inter præcipuos orthodoxorum eminere studuit militans Christo. Nesciebat enim nisi maximorum unus esse, quemcumque sortitus esset ordinem vitæ. Mox igitur post promotionem ingressus arctam vitæ viam, et tanto semper gradiens arctiorem, quanto tentationibus magis arctatam; Ecclesiæ suæ sollicitudine notabilis exarsit, canonicarumque traditionum æmulator abundantius exstitit. Quas si postposuisset, si magis hominibus placere delegisset, si majoris eorum statuta fecisset, regis quidem et omnium quæ regis erant, tanto potentior quanto sublimior magister et rector permansisse potuerat. Sed velut recolens illud tentatoris: « Hæc omnia tibi dabo si procidens adoraveris me, » magis amplexatus est illud Christi: « Dominum Deum tuum adorabis, et illi soli serves. » Velut etiam cavens illud Anacleti pape: « Nihil est illo pastore miserius qui luporum faulibus gloriatur et elegit abjectus esse in domo

A Dei magis quam dominari in tabernaculis peccatorum. » Quis hæc negare, cum indubitata fuerint, potuit, aut et sine secuto testimonio miraculorum in partem meliorem interpretari non debuit? Audenter itaque statuta defendit Ecclesiæ quæ regie potestati derogabant. Hinc igitur odium cupit et crevit, hinc persecutio sævit, hinc demum miserabilis illo nefandæ trucidationis casus evenit. Non autem a plebeis et vilibus aut etiam fortunæ mediocris hominibus, sed a præclaris curiæ viris et regni processibus patratus esse noscitur, ut quamvis funeste, tamen honorifice completus cernatur, et in eodem opere mirabiliter et ignominiam actionis et gloriam passionis plurimum auxerint concurrentia, simul percussorum nobilitas, loci sanctitas, temporisque solemnitas. Sed et in hoc illud notabile mirabilius est quod inter hujus Thomæ passionem et apostoli Thomæ natalem dies natalis Christi medius fuit. Hinc enim quintus dies velut ad quintum festum successisse, sicut et inde quintus præcessisse reperitur, quasi quorum non dissidentium nomine, non dissimilium passione, natales non inæqualiter distant a Christi festo, nec ipsi dispariliter distent a Christo. Sed quis eum apostolo comparare præsumat? et tamen ait sanctus Augustinus: « Puto quod sine ulla contumelia Cyprianus episcopus apostolo Petro comparatur, quantum ad martyrii coronam attinet. » Cæterum magis vereri debeo ne in Petrum contumeliosus existam. Quis enim nescit illum apostolatus apicem cuilibet episcopatu præferendum? Sed si distat cathedrarum gratia, una est tamen martyrum gloria. Circa quem igitur mala nulla paluerunt, nonne quæ visa sunt bona iustius in partem meliorem trahi decuerat? Admodum siquidem ejus causa commendabilis, admodum vita laudabilis, admodum finis mirabilis exstitit, et in honoris quidem introitu si qua fuit culpa, plane tamen eam excusavit et expiasset credenda fuit singularis exitus gloria. Plane igitur et censendum erat ei per gratiam concessum in cælis, ad quod viribus elaboraverat semper in terris, scilicet in numero commanentium locum obtinere præclarum.

LIII. QUOMODO VERE MARTYR APPARUIT.

Pressus autem et cæcatus veteris odii nube malevolorum intuitus rem cum circumstantiis suis ut oportuit non attendit, et ad quod majorum metus obstitit, minorum fides inclamare primo formidavit. Murmurabat tamen ut audebat præconia Dei auxilia populi, donec erupit et tenebris testimonium veritatis et demum apud incredulos etiam majores miraculis enituit quod murmur minorum præsonuit. O quantum distant humana supernis judiciis! Et nos quidem vitam ejus putaveramus insaniam, cum meta decessorum non contentus, cum præter solitum et contra suorum consilium Ecclesiæ jura lælatus, cum gratia vel metu non flexus, cum damna vel mortem non veritus, regi restitit in facie, cui præter Angliam pars major regni Galliani parebat, ad cujus etiam nomen reges et gentes circumqua-

que tremebant, cui quoque prope subditum ibat quidquid impetebat. At quanto hic adversarius major, tanto fortior ejus impugnator, et ex sequentibus athleta justior, vereque inter filios Dei computatus apparuit. Apparuit utique de magnitudine virtutum quæ secutæ sunt ad ejus sepulcrum, et ad eum locum, in quo cæsus est, et in quo primum ejusdem feretrum stetit, demum et ad multas primo regni, deinde mundi partes, in quibus ipsius auxilium imploratum est. Ex quibus quia signa sunt infidelibus non fidelibus, divina pietas id egisse erodenda est, ut causæ illius justitia certius incredulis appareret et vel hoc metu poenitentibus æmulis fortius Ecclesia respiraret. Cujus profecto gloriam contigit exinde longe multiplicari super illatam injuriam. In brevi namque rei gestæ fama non solum intimos et ultimos angulos Angliæ penetravit, sed et multos exterarum gentium populos percurrit. In tantum etiam urbes, oppida, vicos et ipsa malalia permovit ubique per Angliam, ut a minimis usque ad maximos pauci substiterint qui non ad visendum et honorandum præclari martyris tumultum venerint. Illuc ordinatos et laicos, pauperes et divites, populares et nobiles, patres ac matres cum filiis, dominos cum famulis, idem devotionis spiritus traxit. Stratæ quæ Cantuariam ducunt, tanto tabernaculis et pergulis exercentium commeanantiumque agmine pressæ sunt, ut ubique fere tanquam nundinantium densitas cerneretur. Noctes vix minus quam dies, hiemesque vix minus quam æstates, viantium iter retardarunt, et asperiori tempore quanto durius tanto dulcius habebatur, visitationis votum implere, quia ubi erat accessus laboriosior et remunerationis spes amplior. Fractus est pariter et tantus ex remotis ac transmarinis regionibus illuc peregrinorum concursus, ut hi perparum ab indigenis numero frequentissime distarent, et ut testati sunt viri magni fideque digni qui loca sancta per orbem visitarant, nec ad beati Petri sedem, nec ad majoris Jacobi vel alicujus sancti memoriam, imo nec ad gloriosum illud Christi sepulcrum, tam continue, vel in hominibus celebritas major, vel in donariis perspecta est veneratio clarior. Miraculum certe cæteris miraculis quamvis certis, et claris certius et clarius illud enituit, quod tot nationum tot homines in unum tantæ devotionis studium convenerunt. Quis autem illud ad Christi sponseque suæ præsertim exaltationem unanimis mirabile tot eordibus inspirasse credatur, nisi qui mirabilis in sanctis suis est, et unanimes habitare facit in domo? Quis illam venerationis magnificentiam operatus censeatur, nisi qui servos suos gloria et honore coronat et relinquendis pro se simplum restituit centuplum? Vere gloriosus athleta noster eum Domino suo super occasum ascendit, quia de passione qua propter justitiam occubuit, indifferenter major in hominum opinione surrexit. Deus enim illum exaltavit et dedit ei nomen super omne sanctorum nomen, ut eorum interium nominibus intermissis, in hujus

A nomine juraretur, in hujus nomine supplicaretur, et eleemosynas ob amorem ejus peterent indigentes et tribuerent abundantes. Quod etiam majus est, cum metropolis, in qua passus est, ecclesia Sanctæ Trinitati titulata sit, velut eam sibi pretio sui crucioris evicerit, Deo in hac parte martyri suo cedente, magis illius nomine censi cepit, in tantum ut non parvi delicti reum se crederet, si quis Cantuariam pergens vel inde rediens, non ad sanctum Thomam se pergere, vel a sancto Thoma redire nominatim fateretur. Peregrinationis suæ signum primi quidem est soli vel a Christi sepulcro vel a sancto Jacobo revertentes, hi cochleas, illi palmarum spatulas referre consueverunt. Susceperunt et a sancto Thoma redeuntes tertium sed longe pretiosius signum velut jugum martyris suave et onus ejus leve, ampullam videlicet stanneam in pectus a collo dependentem plenam aquæ benedictæ stilla sacri crucioris immistæ. Cujus quanta fuerit virtus et efficacia circa innumeros male se habentes in locis terrarum innumeris ab homine non potest edisseri. Cujus igitur gloriæ credi debet in cælis, cui tantum honoris dignatio Dei conferre curavit in terris, et in ipsius profecto martyrii declaratione deprehenditur, quod ad Deitatis suæ fidem magister et caput ejus Dominus noster Jesus Christus jam passus prærogavit. Ut enim in ecclesiastica legitur historia, cum per omnem locum fama loqueretur de Christo, Pilatus Tiberio principi gesta ejus refert, et qualiter jam Deus esse crederetur a plurimis. Tiberius eadem retulit ad senatum: Senatus sprevisse dicitur eo quod auctoritatem suam prævenerit vulgi sententia. Quid igitur in hoc actum esse credatur nisi ut christianitatis secta magis Dei quam hominum opus esse cerneretur? Voluit enim ratio divina fidem Christi magis inesse de inspiratione sua, quam de auctoritate Romana, ne alioquin causarentur invidi sibi illatam vim esse credendi, ne causarentur idipsum et malevoli martyris nostri, cum in primis ab apostolica sede petatum sit ut in Catalogo sanctorum poneretur, obtentum tamen non est. Obtentum autem est per virtutem divinam ut celebratione publica superexcellentem martyris nactus sit honorificentiam, et honoris quidem excellentia præteritis etiam sancti loci dignissime compensabat injurias, imo supra confusionem de cæde nefaria longe plus gratulationis accessit de sequentium operum gloria. Provenit et Ecclesiis ecclesiasticisque personis tempus optatum, quo vexationum ausu represso, pax iis altior et honor ob honorem martyris plenior reddebatur. Digna quoque spes erat impletum iri, quod vir Deo plenus adhuc vivens sæpe prædixerat, Ecclesiam scilicet Dei sola sanguinis effusione liberandam. Quod et suo sanguine fieri vehementer optaverat, nec orare destiterat et jam indicii plurimum erat, eum exaudiri pro sua reverentia. Demum enim et potentiores ipsius æmulos inter cæteros regni proceres et comites in lacrymis et gemitibus ante sacrum mausoleum prostratos devote supplicare ve-

niamque petere gestorum metus et admiratio compulit. Summæ siquidem amentię foret tot et tam evidentiā Dei magnalia non attendere, cumque vox populi vox sit Dei, consono tantorum et tam multorum testimonio dissonare. Sed et ipsius regis illustris ac pii cor potentius tetigit ille, in cuius manu corda sunt regum. Et ut Ecclesię Romanę legatis pareret, ab Hibernia, quam subjugabat, per Angliam mira celeritate transiliens in Normanniam, coram eis et clero suo transmarino primum innocentiam suam super nefanda cęde juramento purgavit, famę suę volens esse consultum. Deinde vel in hoc se reum proflens quod occasionem sceleri dederit ira sua tam eminens, illud imperii culmen humillimę poenitentię subdidit, magnum et grave satisfactionis onus ad legatorum arbitrium subiens et perperam in Anglia

A pręsumptorum emendationem promittens. Vicit, plane vicit et extorsit occisus Sponsę Christi defensor egregius, quod nec monitis nec minis, nec ecclesiasticę censurę terroribus obtinere potuit vivus. Virtutum igitur, quę meritis ejus ascriptę sunt, series et varietas melius ex eorum scriptis patebunt, quibus ea videre probare datum est. Nobis enim martyris sanctitatem et causę ejus justitiā martyriq; veritatem et declarationem notitię memorięque tradere magis cordi fuit, ut esset posteris unde cavere monerentur talem ulterius movere questionem. Quod qui non caverit, multum ei profecto timendus erit, quem zelus domus suę comedit, Jesus Christus Dominus noster, cui est cum Patre et Spiritu sancto honor et imperium per omnia sæcula sæculorum. Amen.

PASSIO SANCTI THOMÆ CANTUARIENSIS ARCHIEPISCOPI ET MARTYRIS AUCTORE ANONYMO

Digne, fratres, hujus diei præclara festivitas, fide-
lium devotione frequentata, sollemnis agitur et cele-
bris, in qua patris nostri et patrię protectoris
invictissimi athletę Thomę mors in conspectu
Dei efficitur pretiosa, et victoria coram angelis et
hominibus dignoscitur gloriosa.

Hodie namque spectaculum factus Deo, angelis
et hominibus, pro lege Dei sui viriliter certavit
usque ad mortem et in sacra fidei constantia per-
manens, triumphali morte insignis et proprio san-
guine laureatus, terrę corpus resignans, beatam
animam cum ineffabili gaudio cęlo intulit. Congrue
igitur mors talis dicitur natalis, quę gignit ad vi-
tam. Vita quippe pręsens misera est et mortalis:
et mors illa beata et vitalis. Pervenit itaque glo-
riosus martyr noster ab hac mortali vita per hanc
vitalem mortem ad vitam vitalem. Hodie namque
multiplici meritorum gloria adornatus cęlesti patria
terreni carceris commutavit exsilium, de labore trans-
iit ad requiem, de mundo ad Patrem.

Hodie beato Thomę a fidelibus honor et reve-
rentia exhibetur in terris; in cęlis collata est cum
angelis beatitudo et gloria, gaudium de novitate,
securitas de æternitate. Hinc terra marique potens,
Christoque conregnans, mirandis mortales lætificat
signis et mirificis coruscare in terra non desinit
miraculis. Verum quod omnino decet ut patrem
pii filii non degeneres imitari satagant, expedit
succincte et simplici sermone evolvere quę in vita
tanti pontificis præcesserint meritorum insignia,

C quorum prærogativa tanta perfuitur beatitudinis
gloria tantave excellit miraculorum potentia.

Dormiente igitur cum patribus suis in senectute
bona felicitis memorię Theobaldo archiepiscopo,
Thomas Cantuariensis Ecclesię archidiaconus in
archiepiscopum et primatem totius Anglię in no-
mine sanctę Trinitatis solemniter eligitur, et post
modicum consecratur. Erat autem piis mentibus
spes firma et fiducia in Domino, quod idem conse-
cratus, utriusque hominis habitu mutato, moribus
melioratus præsideret. Probatissimum siquidem te-
nebatur, sedem illam sedem sanctorum esse, san-
ctum recipere aut facere, vel citius et facile indignum
abjicere. Quod et in beato Thoma misericorditer
impletum est. Promotus ergo electus Dei pontifex,
D sacręque unctionis sanctificatione delibutus, e vo-
stigio rem sacramenti est adeptus, et multiplex
Spiritus sancti gratia repletus. Ambulans enim in
novitate vitę novus homo mutatus est in virum al-
terum, cujus omnia in melius conversa sunt. In
tanta autem gratia sacravit præsulatus sui primor-
dia, ut indutus (sed clanculo) monachi sehemate,
monachi adimpleret opus et meritum. Et qui exem-
plo Baptistę cum constantia zelum justitię perfecte
conceperat in corde, parificare ei quoque studuit in
veste poenitentię. Rejecta namque sindone qua
hactenus dum mollia regum blandirentur uti con-
sueverat, cilicio aspermo super nudum vestiebatur.
Addidit etiam femoralia cilicina, ut arctius carnem
mortificaret, et spiritum vivificaret. Ille autem

sicut et alia spiritualis vitæ exercitia superductis A
aliis vestibus, paucis admodum consciis, et oculis
et notitiæ hominum eximebat, quia non ab homine
sed a Deo gloriam quærebat. Jam tunc vir illustris
justificationes Dei ingrediens esse cepit in absti-
nentiâ amplior, in vigiliis crebrior et in oratione
prolixior, in prædicatione sollicitior. Commis-
sum sibi a Deo pastorale officium cuncta diligentia exse-
quebatur, ut cleri vel Ecclesiæ jura nullatenus per-
mitteret mutilari. Tantam autem compunctionis
gratiam habere consuevit inter orationum secreta
vel missarum solemnia, ut eruditis ad fletum oculis
ipse totus in lacrymis efflueret et arsenium in hujus
gratiæ titulo repræsenteret. Sciens quoque quod
misericordia mitiget judicium, et piety vitæ quæ
nunc est et futuræ habeat permissionem, adeo su-
per afflictos et pauperes gestabat misericordiæ vi-
scera, ut egentes in elemosynæ benedictionibus præ-
venire solitus esset. Abjectiores eorum, quos reli-
gionis efferebat opinio, notos et familiares habebat,
et ut ab iis esurire et sitire justitiam disceret, se-
cretiorum eorum colloquio crebrius fruebatur. Erga
tales Christi servos et milites elegit vir misericors
in veste ciboque liberalis esse et largus, qui sibi in
utroque decrevit esse moderatus et parcus. Quid
enim negaret Christo, proprium sanguinem fusurus
pro Christo? Quoniam poscenti debebat pallium
vel tunicam, supererogare studuit et carnem pro-
priam. Sciebat enim carnis propriæ nunquam fore
proligum, quem alicujus rei temporalis constaret
esse avarum. Hæc est fragrantia vestimentorum
nostri Jacob, sicut odor agri a Domino benedicti.
Hæc sunt mutatoria magni sacerdotis nostri. Hæc,
inquam, est mutatio dextræ Exoelsi. Hactenus pius
Dominus qui pauperem facit et ditat, humiliat et
sublebat, servum suum cumulare divitiis et am-
pliare honoribus voluit, de cætero adversis tentare
disposuit. Tentando an se diligeret probavit certius,
sed gratiam donavit uberius. Fecit enim cum
tentatione proventum ut posset sustinere. Conside-
rans itaque lividus hostis novum pontificem, novum
hominem, tam multiplici virtutum gratia vernare,
machinatus est tentationis uredinem immittere, quo
jam exortum germen meritum posset suffocare.
Nec mora: qui separat hominem a Domino suo, D
amicum a proximo, inexorabiles discordias inter
regem et archiepiscopum seminavit. [Orta interim
procurantibus viri Dei imo Dei adversariis quæ-
sitione super consuetudinibus regni et jure eccle-
siastico, et super his contentione diutius protracta,
proposuit rex, accito concilio, secundum assenta-
tionem procerum avitas regni consuetudines, et eas
archiepiscopi et suffraganeorum auctoritate firmari
et scriptis pertinaci exegit instantia. In quo adeo

invaluit ut urgente instanti periculi metu juran-
tibus episcopis, archiepiscopis et ipse præstito
sacramento verbo tenus et invitus petitionem regis
fieri annueret. Sed resumpto post modicum spiritu,
et post casum fortior, consuetudines illas illicite
concessas contra libertatem Ecclesiæ confirmare
constanter negavit (29).]

Hujusmodi incrementis irarum et discordiæ virus
adeo grassabatur, ut accitum ad illud concilium
omnes fere calumniis et accusationibus insurgerent
in pontificem et probrosis insultationibus impeterent.
Cumque vix inveniretur qui ei loqueretur vel faceret
bonum, sed omnia cederent in contrarium et mora
certum traheret periculum, facta appellatione ini-
quitati cessit clamque paucis comitatus recessit, mare
adiit, transfretavit. Ibat autem per viam suam gau-
dens et exultans; quia dignus habitus est pro justi-
tia a concilio contumeliam pati. Aditoque beatis-
simo papa Alexandro qui ea tempestate in Franciam
venerat, negotiosa quædam sicut et ante proposuit,
tum de salute animæ suæ, tum de oppressionibus
Ecclesiæ quam regendam susceperat, diligenter ex-
posuit. At cum pater et pastor universalis, adventus
coepiscopi sui causam ex integro cognovisset, de
tanta et tali columna in domo Dei erecta gratias
egit. Exultabat quoque uberius, quod lucerna tam
mirifice ardens et lucens inventa sit, ad occiduas
mundi tenebras illuminandas. Suscepit eo tem-
pore christianissimus rex Francorum Ludovicus
venerabilem archiepiscopum in magnam gratiam, et
postulante papa, ei cum suis in omni liberalitate
necessaria ministrabat. Jam enim redditus domini
Cantuariensis jussi sunt confiscari. Exsulans ergo
beatissimus Thomas in summa humilitate pristinæ
gloriæ suæ in qua irrepserat expiavit superbiam, et
omnes animi motus redegit in honestatem et sæculi
contemptum. His atque aliis virtutum odoribus ex-
acerbatus iniquus exactor diabolus furorem suum in
parentes, cognatos et familiares sancti pontificis ex-
acuit et proscriptionem eis cum enormi crudelitate
excitavit. Jam tunc videre erat spectaculum mise-
rabile utriusque scilicet sexus, diversæ ætatis et con-
ditionis, viros ac mulieres, maritos cum parentibus,
cum prægnantibus lactentes quoque exulare et in
augmentum doloris et confusionis ante pii patris
præsentiam lugubres et desolatos exhiberi. Sanctus
vero præsul cum veteranorum deportationem conspi-
ceret et parvulorum, quorum adhuc alimenta in ma-
ternis pendebant uberibus, alius ipsius animam gla-
dius pertransivit compassionis, adeo ut ipsam ex toto
sibi vindicaret vis doloris. Sic ergo fit martyr ante
necem, post futuro martyrio coronam adepturus du-
plicem. Sed nec sic abstractus est vel illectus. Nam
perfectus in charitate abduci blanditiis, seduci falla-

citatus, quasi quibusdam regni consuetudinibus
observandis, quas veritati et rationi obviare testa-
batur, cautionem daturus, negavit et auctoritate sua
periculis opposita, imo exposita, pro tuenda liber-
tate ecclesiastica sententiam minabatur. »

(29) Pro iis quæ uncinis hic includuntur, codex
Paris. habet sequentia: « Cumque regis ira sugillan-
tium facibus accensa et exagitata in dies magis
incandesceret, multi optimatum regni qui sereno
tempore videbantur amici, facti sunt archiepiscopo
in Satan. Denique ad curiam apud Northamptoniam

cūis, frangi nescivit adversis. Concuti potuit palmas A vineæ celestis sed non avelli.

Perseverabat itaque paratior ad tentationes, præstolans in patientia divinæ propitiationis respectum et conversationis merito omnium sibi conciliabat gratiam. Regi quidem Francorum in consiliis erat acceptissimus, principibus regni et ecclesiarum Patribus admodum familiaris, omnibus ut dignum erat habebatur reverendus. Quippe consilium Thomæ expetibile ut Chusi, jucunda societas ut Jonathæ, opus zelans justitiam ut Phinees. Crescebat autem fama adeo in dies bonitatis ejus inter alienigenas innocenter conversantis, ut ab indigenis regni non simpliciter archiepiscopus, sed sanctus archiepiscopus nominaretur.

Exsulans ergo beatissimus pater cum suis, jam fere sex annos explevit, quibus in virum perfectum creverat, cum toto eo tempore inter ipsum et regem Anglorum pax nullatenus posset reformari sed magis deformata videretur. Denique placuit omnium dispositori Deo sui Thomæ recompensare merita et longos labores consummare victoriosa martyrii palma. Regis ergo sententiam mutavit in melius et mediantibus tam domini papæ paterna exhortatione, et regis Francorum et plurium episcoporum consilio, quam etiam principum supplicii interventu, archiepiscopum recepit in gratiam et ad suam redire concessit Ecclesiam.

Inchoante autem anno septimo, cum jam Deo vir esset amabilis spiritualibus exercitiis sanctificatus et septiformi Spiritus sancti gratia perfectior, ad sedem suam quantocius repedare festinabat. Noluī enim pater pius Cantuariensem Ecclesiam diutius desolatam relinquere vel quam ut creditur in spiritu viderat certaminis sui gloriam protelare, aut alibi moriendo sedem propriam martyrii sui honore privare. Transito itaque mari, archipræsul et futurus martyr in magna gloria et honore præcipue a monachis cum soleinni processione quasi angelus Domini susceptus est, in ecclesia sua omnibus præ gaudio illacrymantibus et cum gratiarum actione clamantibus : « Benedictus qui venit in nomine Domini. » Omnibusque in pacis osculo receptis, familiariter commorans inter eos, conversatione sua et exhortationis verbo omnes ædificabat.

Acceptis post modicum in mandatis ne officium suum exsequendo Angliam peragraret, resedit in sua pontifex Ecclesia, intrepidus expectans horam qua a Deo perciperet martyrii coronam. Præmunus siquidem a multis sciebat quod brevis foret ejus vita et mors in januis. Ibi quasi tunc vivere cœpisset, exactum vitæ tempus spiritualibus exercitiis redimere satagebat. Sciensque quod vita præsens via est et militia, ut esset sanctus corpore et spiritu, vitis expeditus, succinxit se ad cursum virtutibus armatus, accinxit ad pugnae conflictum. Cursum ergo consummando cucurrit non quasi in incertum bene certando, non quasi aerem verberans. Prodiat tunc

fere ejus cogitatio et sermo de fine hujus viæ et vitæ miseria.

Vix per mensem pater in ecclesia sua moram fecerat, et ecce quinta Dominicæ nativitatis die veniunt Cantuariam quatuor milites, imo Satanae conducti satellites : viri quidem generis præ eminentia conspicui, sed enormis sceleris ausu militiæ gloriam et stemmatis titulum perpetua ignominia mox damnaturi. Hi ergo introeuntes ad archiepiscopum, quia non est directa in manu eorum salus ex concepta malitia salutationis elogium prætermittentes, cum fastu et superbia alloquuntur. Accipiunt redduntque minas, minis adjicientes responsum. Denique probra et contumelias post se relinquentes exierunt, continuoque revertentes, claustrum monachorum B irruperunt cum multa armorum sequela et ipsi armati. Jam præcesserat eos præsul cum modestia et gravitate in oratorium, suadentibus monachis, imo compellentibus propter diem solemnem ad peragendam vespertinam synaxin, cum eos a tergo respiceret in medio claustrum armatos. Arcere eos de templo debuit propria malignitas : sed nec facinus dissuasit solemnitatis reverentia, nec a sanguine cohibuit patriarchæ innocentia. Usque adeo occupavit et excæcavit eos impudenda patiendi facinoris voluntas, ut nec militiæ jacturam recogitarent, nec ullius discriminis haberent æstimationem. Præcipientes ergo et stupidi insequentes archiepiscopum, extractis gladiis intrant ecclesiam furiose clamantes : « Ubi est proditor ille ? » Nemine vero respondente ingeminant illi : « Ubi est archiepiscopus ? » C Sciens itaque beatus Christi confessor et mox futurus martyr, priore nomine se falso impeti, alterum vero sibi pro officio competere, a gradibus obviam illis procedens : « Ecce, inquit, adsum. » In tanta autem se exhibebat constantia ut nec animus ejus pavore nec corpus horrore concuti videretur. Cui statim injicientes manus milites eum tenuerunt, ut extra ecclesiam ad peragendum propositum traherent. Sed timentes undique concurrentium utriusque sexus multitudinem, ne forte voto infecto eriperetur, facinus accelerarunt. Cumque unus ex iis extendens vihraret gladium in caput archiepiscopi, brachium cujusdam qui astabat clerici fere absceidit, et ipsum D pariter in capite vulneravit christum Domini. Extenderat enim idem clericus brachium suum super caput patris, ut ferientis acciperet vel potius illideret ictum. Stabat autem justus pro justitia patiens, velut agnus innocens sine murmure, sine querimonia, et se ipsum holocaustum offerens Domino, sanctorum patrocinia implorabat. Et ne quis funestorum satellitum intacto præsule in scelestus argui posset, secundus et tertius gladios suos vertici constantis athletæ atrociter illiserunt, confrégerunt, et Spiritus sancti victimam solo tenus præcipitaverunt. Quartus plusquam ferali, imo furiali crudelitate debacchatus, jam prostrato, jam expiranti, coronam rasilem absceidit, testam capitis dissipavit, et mucrone vertici intruso cerebrum cum sanguine

super pavimentum lapideum effudit. Discolor in A
mista utriusque substantia bifarie discreta martyris merita pie intuentem docere videbatur. Candebat namque in cerebro byssus innocentiae; rubebat in sanguine purpura martyrii. Utroque martyr Thomas quasi veste nuptiali decenter adornatus, cœlestis mensæ conviva dignus efficitur. Sic noster beatissimus et invictus martyr Thomas virtute constantiae adamantinus, cœlestis ædificii lapis pretiosus, gladiatorum conquadratus ictibus angulari lapidi Christus in cœlis est conjunctus.

Consummatus ergo noster Abel in martyrii gloria, in brevi explevit tempora multa. Cujus vitam innocentem et mentem causæ merito in conspectu Dei pretiosam, innumera prædicant miracula, quæ non solum loco requietionis ejus, sed et in diversis nationibus et regnis mirifice exhibentur. Suspirantes ergo post eum, fratres, sequamini per semitas veritatis et justitiæ, ut perveniamus cum eo ad regnum lucis et gloriæ, in qua regnat Deus per infinita sæcula sæculorum. Amen.

PASSIO ALIA SECUNDA

Gloriosi martyris Thomæ, fratres charissimi, nalem celebrantes, quia totius vitæ et conversationis ejus insignia recolere non sufficimus, passionis ejus modum causamque succinctus sermo percurat.

Beatus igitur Thomas, Cantuariensis archiepiscopus, sicut prius in cancellariæ et archidiaconatus officio in rebus gerendis incomparabiliter exstiterat strenuus: ita et post susceptum officium pastoris supra humanam æstimationem factus est Deo devotus. Consecratus enim, repente mutatus est in virum alium. Cilicium clam induit: femoralibus etiam usus est usque ad poplites cilicinis: et sub vestis clericalis honestate habitum celans monachalem, carnem prorsus coegit servire spiritui: Deo studens, omnium virtutum exercitio, sine intermissione placere, sciensque se speculatorem positum in domo Domini, ministerium sibi traditum studiose complevit. Jura et dignitates Ecclesiæ, quas sibi potestas publica usurpaverat, resarcire et in statum debitum revocare conatus est. Unde gravi quæstione super jure ecclesiastico et regni consuetudinibus, inter ipsum et Henricum regem Anglorum exorta, coacto concilio, propositi sunt consuetudines illæ, quas idem rex tam archiepiscopi quam suffraganeorum suorum scripto roborari pertinaciter exegit. Negavit constanter archiepiscopus, manifestam in iis asserens libertatis ecclesiasticæ subversionem. Affectus est igitur contumeliis immensis, damnis gravioribus attritus, et innumeris lacessitus injuriis. Tandem morte sibi intentata, quia causa Ecclesiæ nondum plene innotuerat, et personalis videbatur persecutio, cedendum censuit esse malitiæ. Actus ergo in exilium, a domino Alexandro papa tertio Senonis honorifice susceptus est; et in monasterio Pontinlacensi studiose commendatus.

[Lect. 2.] Consecrantur interim in Anglia ejus archiepiscopi reditus, vastantur prædia, possessiones diripiuntur; et excogitata novo supplicii genere,

B tota simul proscribitur Thomæ cognatio. Omnes etiam amici ejus et familiares, vel quicumque eum quocunque titulo contingebant, sine delectu conditionis seu fortunæ, dignitatis aut ordinis, ætatis aut sexus, pariter relegantur. Nam et senes et decrepiti, vagientes in cunis, et mulieres in puerperio decubantes, in exilium acti sunt. Quotquot autem discretionis annos attigerant, tactis sacrosanctis jurare compulsi sunt, quod mari transito statim Cantuariensi archiepiscopo se præsentarent, ut vel compassionis gladio confossus, conceptum animi rigorem ad regis voluntatem inflecteret; sed vir Dei manum suam mittens ad fortia, exilium, damna, contumelias et opprobria, parentum et amicorum proscriptionem pro Christi nomine patienter sustinuit, nulla prorsus fractus aut immutatus injuria. Tanta denique fuit confessoris Christi constantia, ut omnes coexsules suos docere videretur: quia

Omne solum fortè patria est.

[Lect. 3.] Audiens autem rex immobilem ejus constantiam, directis per abbates quosdam Cisterciensis ordinis, ad capitulum generale comminatoriis, eum a Pontiniaco proturbari curavit. Timens autem B. Thomas, occasione sui, viris sanctis imminere dispendium, sponte recessit. Sed antequam inde progrediretur, divina revelatione confortatus est, osiense sibi cœlitus indicio, quod ad Ecclesiam rediturus esset cum gloria, et per martyrii palmam migraturus ad Dominum. Projuratum a Pontiniaco excepit Christianissimus Francorum rex Ludovicus, in eumque se humanissime, donec pax reformaretur, exhibuit. Sæpius tamen et ipse licet incassum pulsatus est, ne regis Anglorum proditori alii vel humanitatis beneficium impenderet. Processit nimis furor immanis et piis auribus horrenda crudelitas. Cum catholica etiam pro hæreticis et schismaticis et perfidis Judæis oret Ecclesia, prohibitum est ne quis eum orationum suffragiis juvaret. Sex

igitur annis continuis exsulans, variis et innumeris afflictus injuriis, et quasi lapis vivus in structuram cœlestis ædificii, multimodis tonsionibus atque pressuris est quadratus: et quo magis impulsus est, ut caderet, eo firmius et immobilius stare probatus est. Neque enim aurum tam anxie examinatum exuri potuit, vel domus supra firmam petram fundata convelli.

[LECT. 4.] Denique tum summo pontifice, tum rege Francorum procurante, reformandæ paci constituti sunt dies plurimi, quam quia Dei servus non nisi honore Ecclesiæ salvo, et salva ejus honestate suscipere voluit, discordes ab invicem discēsserunt. Miseratus tandem summus pontifex Anglicanæ desolationem Ecclesiæ, propositis comminatoriis vix tandem extorsit, ut pax Ecclesiæ redderetur.

Cavisa sunt ergo regna, quod rex archiepiscopum recepisset in gratiam, aliis credentibus negotium veraciter agi, aliis aliud concientibus. Igitur exsiliū sui septimo anno rediit pastor in Angliam, ut vel oves Christi a luporum morsibus liberaret; vel pro grege sibi credito se ipsum impenderet. Suscipitur a clero et populo, cum gaudio inestimabili, illacrymantibus omnibus et dicentibus: « Benedictus qui venit in nomine Domini. » Sed post dies paucos, iterum damnis et injuriis supra modum et numerum affectus est; et edicto publico ecclesiæ suæ septa exire prohibitus. Quisquis ei vel alicui suorum faciem hilarem prætendebat, publicus hostis censebatur. In omnibus his non est fractus animus ejus, sed adhuc ad Ecclesiæ liberationem manus ejus extenta. Quinto vero Dominicæ nativitatis die, veniunt Cantuariam alicui quatuor, viri quidem præclari genere, sed malefactis famosi. Et ingressi, pontificem verbis contumeliosos aggrediuntur, lacessunt conviciis, tandemque minas ei graviter intentant. [LECT. 5.] Respondit vir Dei modeste, juxta quod ratio exigebat, ad singula; adjiciens sibi multas et Ecclesiæ Dei illatas injurias esse, et non esse qui errata corrigeret, dissimulare se de cætero nec posse nec velle, quin curæ pastoralis officium exerceret.

Turbati sunt igitur ad hæc verba insipientes corde, et iniquitatem in excelso locuti, exierunt continuo. Quibus egressis, processit pontifex in ecclesiam, ut laudes Christo vespertinas exsolveret.

Sequuntur a tergo gladiis exsertis Satanæ satellites loricati, armatorum manu multa sequente, adiutū ecclesiæ monachis præcludentibus, accurrens Dei sacerdos, et hostia Christi mox futurus, hostibus ostium reseravit: « Non est, inquit, ecclesia ut castrum obseranda. » Irrumpentibus illis, et aliis ubi sit proditor, aliis ubi sit archiepiscopus, furibunda voce querentibus, processit iis obviam Christi confessor intrepidus. Intentantibus ei mortem: « Et ego, inquit, pro Dei Ecclesia mortem libenter suscipiam, sed ex parte Dei præcipio ne meorum cuiquam noceatis. » Christum videlicet imitatus, in passione dicentem: « Si me queritis,

sinite hos abire. » Irruentes igitur in pastorem lupi rapaces, in patrem proprium degeneres filii, in hostiam Christi crudelissimi lictores, consecratam capitis coronam: funestis gladiis amputaverunt: et Christum Domini solo tenus præcipientes, cerebrum cum sanguine, quod dictu quoque horrendum est, per pavimentum crudelissime sparserunt. Sic itaque granum frumenti palea, sic vineæ custos in vinea, dux in castris, pastor in caulis, cultor in area cæsus est: sic justus ab injustis occisus, domum luteam cœlesti palatio commutavit.

Ultima vero martyris verba, quæ præ confusione clamoris discerni vix poterant, juxta propius astantium assertionem, hæc fuerunt: « Deo et beatæ Mariæ, S. Dionysio, et sanctis hujus ecclesiæ patronis meipsum commendo, et Ecclesiæ causam. » In omnibus autem cruciatibus, quos invictissimus Dei athleta pertulit, non clamorem emisit, non gemitum edidit, non brachium aut vestem ferienti opposuit, sed caput quod inclinatum gladiis opposuerat, donec consummaretur, tenens immobile, quasi ad orationem prostratus, obdormivit in Domino.

[LECT. 6.] Regressi vero viri scelerati in sancti pontificis palatium, quidquid pretiosum potuerunt invenire, sibi diviserunt. Mæror ingens super innocentis morte et direptione suorum, tenebat omnes et infinita animi tribulatio: ut passionem ejus Dominicæ passioni magis assimilarent, fecit tamen repente cum tentatione proventum divina clementia: et per visiones quasdam, futuris quasi prælucens miraculis, martyrem in proximo signis glorificandum, redituram post mortem lætitiā et turbam languidorum, beneficiorum gratiam innuit esse consecuturam. At vere sanctus iste glorificandus erat: pro Ecclesia certans, in ecclesia passus est in loco sacro, Dominicæ nativitatis tempore, inter sacerdotes et manus religiosorum, quatenus in agone pontificis sic omnes circumstantiæ concurrerent et persequentium revelarent impietatem et eorum sempiterno macularent opprobrio. Post mortem vero martyris, adeo in persecutores ejus ultio divina desævit, ut in brevi sublato de medio non comparent. Et alii quidem sine confessione et viatico subito rapti sunt; alii digitos vel linguas proprias dentibus frustatim decerpentes; alii, sanie defluentes, et toto corpore tabefacti, et torsionibus inauditis ante mortem cruciati; alii, paralysi dissoluti; alii, amentes effecti; alii cum insanis expirantes, manifesta reliquerunt indicia, quod injustæ persecutionis et excogitati parricidii pœnas exsolverent. Gaudeat igitur virgo mater Ecclesia novum martyrem reportasse triumphum; gaudeat novum pro sui liberatione Zachariam immolatum in templo. Gaudeat novi Abel sanguinem pro se contra viros sanguinum clamare ad Dominum. Vox enim sanguinis effusi, vox cerebri funestorum satellitum gladiis dispersi et mundum similiter et cœlum celebri clamore replevit. A clamore namque sanguinis hujus commota est et contremuit terra; sed et virtutes cœlorum motæ

sunt adeo ut quasi in ultionem sanguinis innocentis surgeret gens contra gentem et regnum adversus regnum, imo ut regnum in se ipsum fieret divisum, terroresque de cœlo et signa magna fierent. Sed ut palam fieret mundo, quia Dominus sanctum suum magnificavit, primo martyrii sui tempore, multis cepit martyr miraculis coruscare : cœcis visum, claudis gressum, surdis auditum, mutis loquelam restituens. Deinde leprosos mundans, paralyticos consolidans, hydropisin et omnia morborum incurabili genera curans, mortuos resuscitans : demoniis etiam et elementis omnibus mirabiliter imperans ; ad inusitata quoque et inaudita signa potentie sue manum extendit. Nam et oculis et membris genitalibus privati, meritis ipsius nova

A membra meruerunt suscipere. Quidam autem qui sancti miracula depravare præsumpserunt, repente percussi, coacti sunt ea prædicare vel inviti. Denique adversus omnes temulos suos usque adeo martyr prævaluit, ut universi qui detrahebant ei, venientes venerantur, et adorarent ad sepulcrum ejus.

Passus est autem athleta Dei egregius Thomas, anno ab incarnatione Domini, secundum Dionysium, millesimo centesimo septuagesimo quarto, Kal. Januarii, feria tertia, hora quasi undecima, ut Domini natalis ad laborem ejus fieret natalis ad requiem. Ad quam nos perducere dignetur idem Deus et Dominus noster Jesus Christus, qui cum Patre et Spiritu sancto, vivit et regnat per omnia sæcula sæculorum. Amen.

PASSIO TERTIA.

Cum de reformanda pace inter regem Angliæ et dominum Cantuariensem diutius ageretur, rex nuntiis ad dominum papam directis promisit se formam pacis quamcumque dominus papa proscriberet observaturum. Statuit igitur dominus papa ut rex archiepiscopum plene in gratiam suam reciperet, et omnia sibi ablata ditioni ejus libere tenenda restitueret, datis nihilominus obsidibus, rege videlicet Franciæ et comite Flandriæ et quibusdam aliis, de servanda in posterum pace. Verum cum hæc agerentur, rex Angliæ filium suum jam coronari fecerat, fretus auctoritate quarumdam litterarum, quas a domino papa cum primum partes Gallicanas intraret, obtinuerat, quarum hæc contentia fuit : placere domino papæ ut filius regis Angliæ coronaretur : nec hoc contra dominum Cantuariensem erat, cujus juris erat coronare regem Angliæ. Eboracensis quoque archiepiscopus filio regis manum imposuerat, quarumdam litterarum fretus auctoritate quas rex a domino papa impetrarat, quarum hæc erat contentia : Eboracensem habere licentiam coronandi regem si sedes Cantuariensis vacaret. Omnibus his in hunc modum peractis, Cantuariensis archiepiscopus regem sua recepturus adivit. Quem rex satis amice, non tamen in osculo suscipiens, promisit se illi omnia sua restitutum, quod tamen non implevit ; nam de immobilibus quædam restituere renuit. Quod cum Cantuariensis iterum curiæ Romanæ significasset, dominus papa regi durius quam prius scribens, præcepit archiepiscopo omnia sua restitui. Obtinuit quoque litteras secretas archiepiscopus, quarum hæc contentia : Si infra spatium quadraginta dierum archiepiscopo sua non restituerentur, et rex excommunicationi subjaceret et terra sua suspensa esset. Accepit præterea alias litteras, videlicet excommunicationis in duos episcopos Angliæ et suspensionis

B in Eboracensem archiepiscopum et plerosque alios. Rex autem acceptis litteris paræ promisit se archiepiscopo omnia restitutum. Verum die constituta qua archiepiscopus restitui debebat, rex in propria persona archiepiscopo ducatum præbiturus, quod tamen promiserat, non occurrit, sed unum clericum qui archiepiscopum conduceret transmisit. Igitur archiepiscopus transfretare parans, auditv episcopos Angliæ ad occurrendum sibi colligi, timensque aliquibus appellationibus ab iis fatigari, præmisit litteras excommunicationis in quosdam, suspensionis in alios, quas, ut diximus, a papa impetraverat. Dehinc in porta Angliæ se recipiens, præfatos episcopos collectos invenit. Qui cum ab eo absolvi et ab eo restitui postularent, archiepiscopus eos in hunc modum mississime allocutus est : « Si in humilitate condigna matri vestre vos repræsentaveritis, quantum possumus, imo supra id quod nostri juris est, misericordiam vobis exhibebimus. » Quod illi non acceptantes regem potius transfretantes adierunt. Archiepiscopus vero, cœpto gradiens itinere, in civitate sua honorifice susceptus est : ibique missarum solemnium celebrans, quosdam qui in eum peccaverant excommunicavit, potestate sua libere utens. Dehinc collecto comitatu, filium regis adire paravit : quod audiens ille præcepit, ut ad sua regressus suis contentus esset finibus. Ipse tamen archiepiscopus, Londonias adiens, et ibi missarum solemnium celebratis, quosdam excommunicavit. Inde Cantuariam rediens ordines ibi celebravit, et festum Nativitatis, multo populo stipatus, solemniter peregit. Interea episcopi præfati, regem adeuntes, quidam se excommunicatos, quidam suspensos conquesti sunt. Unde rex, vehementissime commotus, neminem injurias suas ulcisci velle conquestus est. Quatuor igitur milites nobiles et regi familiares, sive his tantum verbis

excitati, sive aliud præceptum accipientes, eadem die iter arripientes, et versus Angliam transfretantes, secunda die post festum Innocentium, collecta etiam in via tanta multitudine, quæ patrando facinoris sufficeret, Cantuariam venerunt. Archiepiscopus, circa horam nonam ejusdem diei, relictus epulis cum clero suo resedit. Introeuntes autem cum festinatione ad eum, quatenus episcopos Angliæ absolveret, ex parte regis præceperunt, minasque mortis, si non faceret, addiderunt. At ille: « Nunquid hujus legationis litteras affertis? » et adjecit: « Si in humilitate debita se sanctæ Ecclesiæ præsentaverint, absolutionem accipient. » Illi vero deducta archiepiscopo regis gratia abierunt, non longe ab ostio domus recedentes, imo in ipsa episcopali curia se armantes redire paraverunt. Quod videntes, qui circa episcopum erant, quatenus tutiora loca monasterii peteret oraverunt. At ille: « Non decet, inquit, fratres mei, ecclesiam peccatorum sanguine pollui, sed potius expectandum hic; quidquid imminet, patienter ferendum est. » At illi vi eum rapientes, monasterio intulerunt. Ipse vero ad altare Beati Benedicti, quod erat in introitu ecclesiæ, per gradus quosdam se contulit. Interea milites post tergum illius ostia claustrum irrumpentes, extractis gladiis usque ad episcopum pervenerunt. Archiepiscopus vero per aliquot gradus iis occurrens, suisque vitam postulans, et pro suis occisoribus orans, « Libenter, inquit, quantum mea fragilitas patitur, mortem suscipiam. » Dehinc inclinato capite plenus confessione, primum mortis ictum excepit, animamque Deo reddidit: corpus vero exanime ad terram concidit. Primus vero tortorum verticem capitis ei præcidit: aliis duobus ipsum in caput ferientibus, quartus gladio in caput profundius injecto, cerebrum illius effossum per pavimentum sparsit. Dehinc monachi ejusdem ecclesiæ cerebrum et sanguinem effusum colligentes, etiam raso pavimento cerebrum capiti imposuerunt, pannis quoque circumligaverunt. Etiam, sicut veridica hominum relatione didici, corpus diu mortuum se le-

mans, signo crucis vivificavit et se et astantes consignavit, rursusque ad terram concidit. Dehinc monachi vestes ejusdem auferentes, desubtus asperrimum cilicium invenerunt, et carnem ejus dire laceratam et vermibus plenam. Quod videntes etiam quidam ex malefactoribus percusserunt pectora sua. Inventæ sunt etiam sub eo litteræ quas nocte præcedentis Dominicæ diei a quibusdam familiaribus regis acceperat, de instanti ejus morte. Interea sicut iterum veraciter percepimus, cæcus quidam, qui de familia sua fuerat, accurrens, in sanguine occisi oculos proprios tangens, visum recepit. Audivimus etiam quod adhuc vivente archiepiscopo quidam Londoniensis sacerdos, qui multo tempore usum linguæ perdidit, vidit in visione quod si lingua sua sanguine archiepiscopi tangeretur, continuo solveretur. Eadem visio cuidam familiari suo de præfato muto sæpius revelata est. Unde, ambo consurgentes Cantuariam adierunt, jamjamque civitati appropinquantes, archiepiscopum esse occisum audierunt. Ulde magis confirmati, civitatem introeuntes, de sanguine occisi sibi dare petierunt. Indequè lingua muti tacta soluta est. Cujus missam postea audientes plurimi, quod factum fuerat, notis nostris retulerunt. Monachus etiam quidam ejusdem ecclesiæ pernoctans in oratione in crypta, in qua præfatus archiepiscopus inter alios quosdam martyres sepultus est, vidit primum de martyribus sepultis ibidem missam celebrantem: dehinc accenso thymiamate turbam archiepiscopi circumlustrantem. Quod cum sæpius vidisset, et tandem in publico retulisset, missi sunt quinque de conventu qui tumbam aperirent, et aperientes invenerunt admirabilis odoris fragrantiam et articulos manuum quasi adhuc viveret flexibiles: quod deinde universus conventus accurrens cognovit. Narrantur et alia plurima miracula ibidem fieri. Ego vero quod verius scire potui scripto commendare curavi. Aderat quidam, cum prædicta scripsissem, asserens unum de occisoribus archiepiscopi in insaniam versum proprium filium interfecisse.

PASSIO QUARTA.

Beatissimus Thomas Cantuariensis archiepiscopus, reformata, ut videbatur, pace cum venerabili Henrico Anglorum rege, per dominum papam Alexandrum et regem Francorum Ludovicum et archiepiscopos et alios quamplures, ad Ecclesiam suam Deo volente repedavit et ita orationibus et prædicationibus, elemosynis, vigiliis, jejuniis intentus exstitit, ut etiam illi quibus in Gallicis partibus sua religio nota fuerat, mirarentur. Sed necdum per mensem in Ecclesia sua resedit, et ecce quatuor satellites ex transmarinis partibus venientes, quorum

nomina ad signum miserabilis militiæ suæ referenda credimus: Ricardus Brito, Reginaldus filius Ursonis, Hugo de Morevilla, Willelmus de Tracy; eum in hunc modum affati sunt: « Mandatum a rege et domino nostro asserimus ut ad filium suum regem pergas, facturum quodei facere debes, et juri pariturus, si in aliquo adversus eum deliquisti, et episcopos excommunicatos, Londoniensem scilicet Gilbertum Foliot et Salesberiensem Jocelinum, communioni restituas et cæteris qui suspensi sunt reddas officium. » Archipæsul vero, columbinam habens sim-

plicitatem et serpentis prudentiam, respondit : « Mandatum a rege novo suscepi, ne per civitates et oppida sua commearum, nec ad eum venirem. Præterea supradictos episcopos notum est non a me excommunicatos vel suspensos esse sed a domino papa quoniam in mea diocesi absque meo consensu hunc novum regem, cui Dominus conferat gratiam salutarem, consecrare et coronare præsumperunt. Præcedat ergo satisfactio eorum absolutionem. » Sed hoc dicto, præfati sceleris ut bruti sensus homines non habentes intelligentiam, in minas statim proruperunt. Illis ergo in tumultu et contumeliis exeuntibus sanctus præsul respondit : « Quærite qui timeat minas vestras; non enim gladii vestri sunt promptiores quam animus meus ad martyrium. Quærite qui vos fugiat; me enim pede ad pedem in prælio Domini reperietis. » Nec mora : redeunt in loriceis cum gladiis et securibus et bis-acutis et cæteris uteasilibus commodis ad scelus, quod in animo conceperant, patrandum. Sed præcavescentes famuli, obserato ostio, ignorante hoc archipræsule, eos excluderunt. Filii autem Satanæ, duce patre eorum, ad ligneum obstaculum divertentes scindunt, findunt et diruunt. Ex fragore autem nimio et terribili nimirum clerici more suo fere exanimis facti sunt, sed archiepiscopus, qui solus quærebatur perimendus, cæteros qui vano timore perterriti sunt consolabatur in Domino, et ut nobis videbatur ita imperterritus sedebat tanquam venissent ad nuptias eum invitaturi. Et cum a suis esset acclamatum ut in monasterium fugeret, ille, qui se ante non fugituum carnis interfectores promiserat, viriliter implet promissum. Sed cum ei diceretur quod hora exigente et festo, deceret ipsum in ecclesia vespertinum officium celebrare, tandem et vix surgens crucem suam sibi præferri præcepit. Mutato ergo ordine præsul qui præcedere debebat, pastoris more cogentis oves in caulam incesso temperato clericos sequitur properantes.

Intranti monasterium omissis vesperis, quas Deo libere incoeperant, occurrunt monachi : gratias agentes Deo, quod patrem suum, quem jam extinctum esse audierant, vivum cernerent et incolumem. Et hoc dicentes valvas ecclesiæ repagulando, hostes a nece sui pastoris arcere festinant. Revertens autem pater sanctus, hos et illos a valvis removet, ne impedito itinere hostium, ejus impediretur martyrium, quod et scierat et prædixerat sibi ad præsens immine- re. Intran- tibus ergo illis et vociferantibus a tergo illius : « Ubi est regis et regni proditor, et falsus præsul? » is qui se eos non timere prædixerat revertitur dicens : « Ecce adsum, non regis proditor sed Dei sacerdos. Quid me quæritis? Ecce præsto sum in nomine ejus pati qui nos sanguine suo redemit. Absit ut propter gladios vestros fugiam, aut a justitia recedam! » Hæc eo dicente, ipsi manus sacrilegas in eum quantocius iniecerunt, trahentes eum ut extra ecclesiam incoepum sacrilegium possent adimplere. Sed tentus ab uno ex clericis suis facile

A inde moveri non poterat. Quidam igitur ex præfatis filiis Leviathan, elevato gladio quem tenebat, clerici prædicti brachium fere amputavit, eodemque ictu agnum Deo immolandum percussit, patrem proprium in matris utero perimens, diem circa undecimam horam exstinguens. Ecce serpentis in hoc martyre prudentiam, qui corpus percutientibus opposuit ut caput suum, id est ecclesiam sive animam suam illæsam conservaret. Ecce simplicitatem columbæ, quia nec etiam contra hostes et caruis occisores insidias vel clausuram aliquam machinatus est. O pastorem dignum, qui ne oves laniarentur, se ipsum luporum morsibus tam confidenter opposuit! Et quia mundum abjecerat, mundus eum volens opprimere nescius sublimavit. Deinde alio ictu in capite recepto B martyri genua flexit et cubitos, se ipsum Deo hostiam viventem offerens. At tertius ita procumbenti grave vulnus impressit, quartus coronam, quæ ample erat latitudinis, ita a capite separavit ut sanguis albens ex cerebro et cerebrum rubens ex sanguine, lilii et rosæ coloribus, virginis et matris ecclesiæ faciem in confessoris et martyris morte decorarent. Et sic Dei sacerdos a sæculo migrans, cœlis nascitur quarto Kalendas Januarii, anno ab incarnatione Domini millesimo centesimo septuagesimo. In crastino autem monachi, ut moris est corpus mundissimi lavandum exspoliantes, sub habitu et ordine monachorum tam privato diu exstitisse reperiunt, ut etiam hoc suos lateret familiares. Ad ultimum carni proximum C inveniunt cilicium sic pediculis obsitum, ut levius isto pristinae diei fuisse martyrium quivis judicaret, et hostes majores minoribus minus nocuisse. Et quod a nullo sanctorum hactenus factum esse cognovimus, femoralibus cilicinis tam stricte crucibus insutis usus fuerat, ut alveus a genu supra in longum sub sutura cilicii vermiculos scaturiens in modum aquæ bullientis extenderetur. Sequenti vero Sabbato per visionem cuidam clerico Londoniæ revelatum est quod sacerdos quidam ejusdem civitatis ad tumultum apostoli Anglorum confessoris et martyris suffragantibus meritis, sermonem perditum recuperaret. Quod ita factum est. Scio etiam quendam virum sanctum in eadem parte cryptæ qua archiepiscopus tumulatus est, angelo monstrante D vidisse ut credebatur Christum crucifixum. Quædam etiam inclusa sanctissima quæ nec Latinum noverat sermonem, nec Gallicum, monachis Cantuariæ in brevi post mortem archiepiscopi mandavit, se a muliere pulcherrima accepisse sed non intellexisse hoc Latinum : « Noli flere pro archipræsule tuo quia caput ejus in sinu Filii mei requiescit. »

Puerulo contracto gradiendi gratiam a martyre mendicanti et capite supra sarcophagum reclinato casu obdormienti, astitit sanctus pater ita inquam : « Quid jaces super me? sanitatem non habebis : nihil tibi facturum sum : discede. » In his verbis expegefactus est, et tam nobis quam matri suæ non absque multa cordis contritione quod audierat enarravit. Certusque de incommutabilitate sententiæ, in locum

aliud transponi se fecit; hortantibus tamen nobis ut precibus incumberet, acquievit, sed tempus absque sanitatis emolumento consumpsit. Apparuit etiam et alius super tumbam dormienti et ait: « Quid hic jaces? Mandavit tibi archiepiscopus quia minime sanitatem consequeris. Salutem tibi peccatum admittit, antequam nascereris admissum. Nec ideo credimus filium portasse iniquitatem parentum, sed potius voluisse Dominum flagellare parentes in filio ut corporale filii detrimentum parentibus moris fieret supplicium. » Post paucos autem dies ab hac puer ille luce migravit. Famularum paternæ domus seducta consilio Thomæ filia de Yffelo Salerna nomine, caseum matri suæ subripuit eisque contradidit. Mater caseum casu advertit sublatum; impetit commissam puellam: neganti comminatur. Minis non proficiens apponit et verbera, asserens eam usque ad exhalationem spiritus flagellandam, nisi reatum confiteatur in crastino. Erat autem Sabbatum in die illa. Tum illa futuri mali magis sollicita quam dolens præteriti, noctem subsequentem fere totam duxit insomnem, flens et ejulans ac dicens: « Sancte Thomas, consule mihi, sancte Thomas, adjuva me: adjuva me, sancte Thomas: consule mihi, sancte Thomas. » Mane vero cum matrem suam ad ecclesiam profectam cognovisset, egressa perrexit ad puteum aquæ in puteum se ipsam præcipitatura: quatenus, si mortem declinare non posset, saltem genus mortis mutaret. Ad puteum autem appropinquans videbat juxta se quasi mulierculam quamdam comitantem et vim faciebat quæ quærebat animam suam, impingens eam ad præcipitium et dicens: « Vade, vade, introibis, introibis. » Super puteum tandem consedit et manibus ob ora putei pendens, ejus instinctu qui de deorsum est, misit se præcipitem voce magna proclamans: « Deus omnipotens consulat mihi et sanctus Thomas. » Et cecidit in abyssum et non est collisa, quia Dominus supposuit manum suam. Audivit enim eam et vocem ipsius et descendit cum illa in foveam, et assumpsit eam de aquis multis ne absorberet eam profundum abyssi, neque urgeret super eam puteus inferni os suum. Immersa itaque tertio vel quarto totidemque vicibus emersa, cum respirans clamasset: « Sancte Thomas, adjuva me, » impulsu quodam divino, totum puellæ corpus usque ad pedes de aquis expulsum est, et statuit Deus vel martyr, imo Deus et martyr super baculum quemdam pedes ejus, et alium baculum in manus ejus tremulas administravit. Super alterum igitur in superficie aquæ consistens, alteri contra putei parietem porrecto innitebatur, ignorans prorsus et

A qualiter super baculum venisset et quis secundum baculum manibus ejus imposuisset. Hoc autem constans habemus atque certissimum quod ante dies paucos puteum eundem juvenis purgaverat: qui vero nec virgulam nec baculum sed neque festucam in isto reliquerat. Audivit etiam puella dum ita staret vocem consolantis se eademque consolationis verba sæpius replicantis. « Noli timere, filia, bene sursum venies; filia, noli timere. » Testatur etiam se personam loquentis prope se stantem vidisse lino candissimo vestitam. Et hæc quidem ita in puteo gesta sunt. Audierat autem puellæ corruentis vocem quispiam de familia in campo vicino constitutus, qui et puellam super puteum sedentem vidit, et admiratus increpavit. Currensque juvenem in domo dormientem vocavit ex nomine, Salernam in puteum corruisse ingeminans. At ille quasi per somnium vigilans, et audiebat vociferantem et somnium excutere non valebat. Videbat enim coram se quasi quemdam hominem deformem, statura proceram, vultu terribilem, clavam grandem tenentem in manibus et incessanter dicentem: « Si surrexeris mortuus es; si te moveris, occidam te. » Tandem vero importunitate clamantis excitatus ad puteum cum puero cucurrit: in puteum descendit sed metu præcipitii tanti correptus exivit. Stabant itaque ambo super infortunio anxii: et quid facto opus esset ignari. Tunc alter ad alterum: « Festina, inquit, equumque ascendens ad ecclesiam propterea et dominæ nostræ miserabile infortunium quod accidit manifesta. » Qui ascenso equo acceleravit et post moram plurimam non solum dominam sed et parochiam totam quæ ad ecclesiam ut eo die moris est confluxerat, secum reduxit. Demissus est juvenis in abyssum putei per funem, et ipsa interim super baculum remanente puella extrahitur vociferans et dicens: « Metimini me ad sanctum Thomam, » volens scilicet ut ad mensuram longitudinis corporis ejus candela fieret quam martyri pro ereptione sua offerret. Extracta autem illæsa inventa est, sed frigore pene usque ad mortem afflicta. Dicebatque: « Ecce modo mecum fuit in puteo, modo abiit: — Quis, inquit, tecum fuit? » Et illa: « Beatissimus martyr Thomas in vestitu candido: et sic et sic mihi in puteo locutus est. » Et benedixerunt omnes qui stabant martyrem Domini qui facit omnia quæcumque vult in cælo et in terra, in mari et in omnibus abyssis. Profunditas putei talis est a superficie terræ usque ad aquam centum quinquaginta pedes. Altitudo aquæ sexaginta pedes.

PASSIO QUINTA.

Ad laudem beatissimi martyris Thomæ et fidelium ædificationem, opus impar scientiæ meæ aggredior; verumtamen ex conscientia referens quod me præsentem actum, Deo teste, dignoscitur. Sed quoniam ejus subito referre martyrium esset quasi non lotis manibus ad mensam accedere: idcirco præcedentia vitæ ejus prælibentur. Beatus qui audierit verba lectionis hujus, et ea conservaverit ad incentivum martyrii, ut si forte rex exigat, paratior sit

A pro nomine Jesu contumeliam pati.

(2.) Prosequamur itaque personam martyris, causam martyrii, persecutorum tyrannidem, et patientis constantiam, locum et tempus passionis, ut ex omnibus his circumstantiis, et frequenti miraculorum testimonio appareat pseudofratribus nostris, quanta beatitudine et laude Christus militem et martyrem suum in cælis coronandum, et in terris glorificandum prædestinavit.

Explicit Prologus.

INCIPIE PASSIO EJUSDEM.

Itaque cum primo Henricus secundus Anglorum monarchiæ et interjacentibus transmarinis etiam partibus multis præsideret, beatus iste martyr ex Londoniæ civibus non infimis oriundus, Cantuariæ archidiaconatum sub Theobaldo archipræsule regibat, qui quoniam eloquentiam, quam a natura habebat, summæ prudentiæ maritaverat, vultu pulcher et amabilis, mitis aspectu, opere justus, cultu venustus, corpore procerus, et rebus agendis omnino aptus videbatur, in brevi a præfato rege in tantam familiaritatem est admissus, ut per diversas regiones se beatos reputarent, qui ei ut consiliario et cancellario domini sui obsecundare potuissent. (3.) Et quamvis in regis palatio nullus eo potentior, nullus munificentior, discretior nullus haberetur: ipse tamen hæc dono gratiæ ita temperabat, ut inter potentes sublimior, et inter homiles humilis spiritu dignosceretur.

Inter hæc archipræsul Theobaldus viam universæ carnis ingressus, Ecclesiam Cantuariensem orbatam pastore reliquit. Congregato ergo clero ad electionem, consensu regio, præfatus Thomas in archiepiscopum eligitur et consecratur, sed quod mirabile est dictum, non citius est sacra unctione delibutus, quam animus ipsius re sacramenti, multiplici videlicet Spiritus sancti gratia est refertus.

Statim enim postquam initiatus est, ne ex honore superbiret, onere et jugo Dei carnem suam refricare delegit, ordinem enim et habitum canonici regularis suscepit, et susceptum ita mirifice pariter cum archiepiscopi officio conservavit, ut quamvis quilibet de se præsumens in alterutro sæpe deficiat, ipse tamen utrumque nec non et quædam his difficultiora consummaret. (4.) Raptus itaque ad contemplationem, vigiliis, jejuniis, orationibus, lectionibus

B assiduus, ita corpus enervavit, ut ipse licet ætate juvenis, vita tamen et ordine presbyter a se cancellario nimis alteratus videretur, et cum totum diem sanctitati impendisset, ut dignior corona quam verbere merito censeretur, ad ultimum, quod vix sine mœrore dicimus, reverso cilicio quo induebatur, ut Christi parvulus, dorsum alicui sancto familiari flagellandum exhibebat. Et quia decebat pastores a contemplatione ad consolationem infirmitatis nostræ descendere, unde Jacob non solum ascendentes, sed etiam descendentes angelos per scalam vidit, et idem non solum Rachel quæ pulchra erat facie, sed Liam quæ et lippa erat, per quam activa vita designatur, sibi in uxorem copulaverat, ideo cum oportuit angelum et pastorem istum ad carnales et oves suas descendere, nunc carnem earum corporali cibo exhilarabat, nunc verbo prædicationis animas confortabat, ut veræ signum dilectionis Dei in eo deprehendi posset, secundum illud evangelicum: « Si diligis me, pasce oves meas. » (5.) Et vere in hoc pastore lux orta est nobis, qui assidue ante lucis ortum ab oratione surgens, linteos se præcinxit, et pelvim cum aqua sacratis gerens manibus, tredecim pauperibus in secretiori loco congregatis flexis genibus pedes deosculans lavit et detersit, unicuique erogans quatuor argenteos, ut sic primitias operis diurni Deo, quem expressius imitabatur, sanctificaret, quotidie etiam tot pauperibus vitæ necessaria tum in cibis tum in vestimentis ministrabat, et in ministrando prædicabat, ut licet multitudo infinita medicantium ad eum conflueret, potius tamen ex paucitate eorundem, quam ex voluntate cohibendi manum largiri cessaret. Reminiscens illius prophetici: « Dispersi, dedit pauperibus, » non uni totum, sed partes mul-

tis, ut in exultatione meteret quod hic seminare, A erogavit. Quanto res mobiles dispergendas et dandas pauperibus considerabat, tanto attentius immobilia, ex quibus hæc percipiuntur, retinere, et dispersa revocare satagebat : unde prædia ecclesiæ suæ a prædecessoribus suis minus juste donata his qui nimia potestate præditi vel affinitate ipsis conjuncti erant, auferre nititur, et pristinum jus ecclesiæ reformare, quoniam æconomo ecclesiæ ecclesiastica prædia colere et augere, non negligere nec minuire licet.

(6.) Clericos etiam qui de curia regis erant, cum eorum deprehenderet incuriam, et cætera omnia quæ ad ecclesiasticam jurisdictionem pertinent, ita sibi vindicabat, et postmodum judicabat, ut sacrilegi et rerum ecclesiasticarum invasores cum quibusdam B episcopis, et simili schemate clericis, regem et omnem ejus familiam adversus sanctum dominum exasperarent : protestantes quod regias consuetudines exaninire disposuisset, et secundum regulas canonum cleri et plebis coarctare vitam et moderari.

Sed nunc ad episcopos, imo, ut verius dicam, Epicuros noster sermo convertatur. Utquid, miseri, in Petrum et Ecclesiam ejus, imo in vosmetipsos vos armastis ? Ecclesia inter varias mundi procellas non deficiet, donec veniat sponsus ejus, imo vestrae in præsentem cathedræ ab eo subvertentur, qui vendentes et ementes de templo eliminavit, ut non episcopi, sed magis canes impudici ab eo et membris ejus reputemini : et utinam hanc ignominiam vestram alias major confusio non sequeretur ! Respicite ergo, miseri, et doleatis depositi, qui in honorem positi hominem non Deum adiutorem vobis imposuistis. (7.) Imitemini itaque Loth, qui primo secutus est angelum in Segor, deinceps in montem ascendit, et sint vobis sal et condimentum cibi spiritualis mulier illa quæ retrospecti in salem conversa est. In tantum membra Zabuli regem exacerunt, ut sanctus præsul Northamptoniam quasi ante tribunal Cæsaris judicandus citaretur. Die statuta, cum ei pro certo intimatum esset, quosdam in necem ipsius conspirasse, quia interiorem hominem veste sacerdotali juxta hoc quod dicitur : « Sacerdotes induam salutari, » jam pridem induerat, nunc exteriorem indumento sacerdotis superficiali sub birro secretius munivit, crucem propriis manibus bajulans, ne a se suæ passionis elongaretur exemplum. Martyr ergo nobilis, solo Deo comitatus, cum a multis et super multis causis impeteretur, ne stans sacerdotis personam inhonoraret, residendo, quod ei divinitus revelatum est mirifice, respondit, majorem scilicet a minoribus non debere ad judicium vocari, neque eorum sententia ligari : ordo enim confunditur, si ovis pastorem feriat, si discipulus magistrum, si filius verberet parentem : non enim ita pretiosius est aurum plumbo, sicut sacerdotalis dignitas regia potestate. Laici vero et suffraganei ejus episcopi, imo magis refraganei, cum hæc dicentem, et sedem apostolicam appellantem nihilominus condemnaverunt.

Itaque adversus athletam Domini a concilio malignantium recedentem clamor probrosus et non minus tumultuosus insurgit, quam si quatuor partes civitatis ignis vel hostium insultato invasisset ; et licet illud de Threnis Jeremiæ, merito declarare posset : « O vos omnes qui transitis per viam, attendite et videte, si est dolor sicut dolor meus, » qui pugno, ut prosim iis qui me persequuntur. Ipse tamen crucem bajulans, Crucifixo gratias agebat, et ibat gaudens a conspectu concilii, quoniam dignus habitus est pro nomine Jesu hanc contumeliam pati.

Igitur vir sanctus clam, ut potuit, paucis comitatus, appellationem suam prosequens, sanctissimum papam Alexandrum tertium Senonis invenit, et ad pedes ejus se provolvens, causam sui adventus non B ignoranti exposuit, et ut pro certo relatum est, pallium sui archipræsulatus in manu domini papæ resignans, exposulavit ut aliquem doctiorem et fortio-rem de Anglorum Ecclesiæ in eorum metropoli episcopum constitueret cardinalem. Sanctus autem papa elevans filium suum, amplexatur, osculatur, lacrymas lacrymis immiscens, Deo referens gratias, quod virum tam humilem spiritu, pastorem tam sollicitum in salute ovium, advocatum tam constantem in causa, imo in multis causis Dei invenisset. Dignitatem ergo quam refutaverat, quia neminem ad hoc onus fortio-rem esse cognoscebat, dominus papa reddendam decrevit renitenti etiam et invito. Ventilabatur itaque inter ipsum et regem contentio ; rege avitas consuetudines confirmare volente, secun- C dum quas cleri in creatione pontificis libera non expectaretur electio, nec plebis cui dabatur episcopus, ut canones prædicant, expetito vel consensus, sed hæc omnia ad nutum, et voluntatem regis fierent, ipso annulum et baculum dante pontificalem. Igitur qualescunque etiam non intelligentes plebis linguam, cui prædicabantur, Moysi cathedram, omni canonum calcata reverentia, occupantes, inordinatos et indoctos sibi similes presbyteros ordinabant : unde plebs non habens a quibus legem et mandata Domini exquireret, proclivius ad vitia, utpote nec verbo, nec exemplo docta, præcedentibus suis signiferis cater- vatim ad ima descendebat.

Animadvertant ergo animarum occisores contra D legem inthronizati, qui non dignitatem, sed nomen episcoporum vulnerato capite matris Ecclesiæ violenter sunt adepti, quod non Mathias imperatoris vel regis judicio, sed apostolorum libera sortis electione in locum Judæ prævaricatoris ascitus est. Recordentur etiam Gregorii veridicam sententiam, quod nisi potestates sic acquisitas prius abdicaverint, et se acerrima humiliaverint poenitentia, procul dubio potestatibus dæmonum cum laicis, qui eas tradunt, in perpetuum tradendi sunt. Archiepiscopus vero hanc et multas alias consuetudines, quas enumerare longum esset, veritati per electos Dei manifestæ constanter prædicabat refragari, veritatique manifestæ cedere consuetudinem oportere. Invenitur enim Christus aliquando dixisse :

« Ego sum veritas, » sed nunquam dixit : ego sum A
 consuetudo. Et ita altercatio sub hoc Marte inter
 has personas per septem annos agitata regnante
 piissimo rege Ludovico filio regis Ludovici supra
 Francorum nationem, et procurante præfatum archiepis-
 copum : qui a rebus Ecclesiæ penitus erat
 proscriptus, nec non et clericos qui cum eo erant,
 quo usque ad gratiam sæpe dicti regis redirent, et
 consuetudines supra quibus lis orta fuerat, se non
 impugnatos promitterent. Sed cum nec propter
 proscriptionem sui vel clericorum suorum sanctus
 sacerdos in aliquo flecteretur, jussi sunt tam ma-
 jores quam parvuli de cognatione sua utriusque
 sexus, nec non et quidam familiares ejus, ut magis
 ex his contristaretur, exulare. Sanctus vero martyr
 Dei cum parvulorum deportationem cognosceret,
 quorum adhuc alimenta in maternis pendebant uberi-
 bus, ita contristatus est, tanquam si ipsius animam
 pertransiret gladius; sed reminiscens quoniam
 Abrahæ dictum est : « Egrederere de terra et de
 cognatione tua, » sicuti et terram ita et cognationem
 postponentem Ecclesiæ honori penitus proposuit.
 Sed nec illud prætereundum est, quod fida relatione
 cujusdam ex sociis et principibus exsilii ipsius accepi,
 qui ita gestum esse, ut retulit, oculata fide se com-
 prehensisse, Deum et reliquias ipsius martyris in
 Ecclesia, quam passionē sua contristavit, et sepul-
 tura veneratur, nobis quamplurimis testatus est.
 Cum apud cōnobium quod in regione Francorum
 nominatur Pontiniacus, divinarum Scripturarum
 meditationi martyr sanctus se mancipasset attentius,
 assidente illo quem hujus relationis auctorem lau-
 davimus, ecce quidam ex fratribus, qui jam per tres
 annos lectum tenuerat, nescio qua labe adeo infla-
 tus, ut cutis extensa exsangue corpus et macilentum
 vix complecti posset, annulum ostii excutens, ad
 sanctum Domini intrinmissus est. Infirmus igitur
 confestim ad pedes domini prostratus, ait : « Do-
 mine, per visionem relatam est mihi, quod debeam
 vobis confiteri, ut mandato homine interiore a
 peccatis, contactu sacratæ manus vestræ exterior ab
 hoc turgiditatis dolore sanetur et curetur. » Sanctus
 autem sacerdos primæ petitioni libens paruit, a
 secunda se excusans, tandem victus lacrymoso pe-
 tentis gemitu, utrique satisfacit : nec mora, impleto
 quod rogaverat, æger ad pedes sancti volutabatur,
 spumans tanquam epileptico morbo, subito in terram
 allisus, deinde in modum retortæ vel serpentis se
 reflectens, cum immensa insanie underim ranas par-
 vulas evomuit, et evestigio sospitati integerrimæ
 restitutus est. Mira res? quanto magis eam oculiuit,
 tanto magis clariori sidere virtus martyris emicuit.
 Confluebant enim ad eum cum pauperibus ægrotan-
 tes, ut ex fragmentis panis et leguminum quibus vir
 sanctus vescebatur, a fame et infirmitate liberaren-
 tur. Inter alios adest miles quidam, deferens filiam
 suam, quam jam languor continuus per annum et
 dimidium extenuaverat. Quæ quam cito reliquias
 fragmentorum quæ de manu archipræsulis ceciderant

degustasset, Deo et exsuli sancto gratias agens,
 sospes cum patre remeavit ad propria. Inter tot
 martyria quæ martyr iste antequam trucidaretur
 passus est, illud credidi referendum, quod cum una
 vice fœdus pacis toties ruptum redintegratum inter
 regem Franciæ et regem Anglorum videbatur, con-
 venit inter eosdem reges, ut archipræsulis exsilium
 tandem pacis remedio sub hac forma finiretur, si
 finem suæ altercationis examini clericorum Franciæ
 et Normanniæ committeret, quidquid ipsi inde de-
 cernerent observaturus. Sed vir sanctus metuens
 ne causa Dei in promptum incideret periculum, (con-
 siderabat enim, quod utriusque regni consuetudines,
 tum ex contumacia, tum ex ignorantia juris sæpe
 decretis obloquerentur) adjecit quod se censuræ
 prædictorum subjiceret, salva tamen dignitate Ec-
 clesiæ et ordinis sui, et cum hoc verbum sanctitatis
 nec per reges, nec per episcopos, nec per suos fa-
 miliares, ab ejus ore avelli posset, Francigenæ et
 sui familiares erga eum vehementius consternati
 sunt. Ibat ergo et revertebatur per aures sancti sermo
 iste creberrimus, et jam ab his prolatus qui habitum
 religionis prætendunt exterius : Nunc apparet super-
 bia et protervitas, nunc emergit proditio in lucem,
 quam in subversionem domini sui et regni ejus archiepis-
 copus diutius molitus est.

O quantus dolor! O quam miseranda suspiria
 athletam Domini cruciabant! O quam ex intimo pro-
 cedebant lacrymæ, cum conspiceret quod undecun-
 que de necessariis fierent sibi inimici! Sed retinens
 illud propheticum : « Dominus mihi adjutor, non ti-
 mebo quid faciat mihi homo, » solus se opposuit
 contra omnes murum pro domo Domini constantius
 asserens quod nec mors, nec vita separaret eum ab
 hoc verbo, quin salva scilicet dignitate Ecclesiæ et
 ordinis sui pax, si futura esset, firmaretur.

Reformata tandem, ut credebat, pace per domi-
 num papam et Franciæ regem, et archiepiscopos,
 volente Deo, ad ecclesiam suam venerabilis pontifex
 repedavit : et ita orationibus, prædicationi, elemo-
 synis, vigiliis, jejuniis, cæterisque bonis operibus
 intentus exstitit, ut ii etiam quibus ante sanctissima
 religio ejus nota fuerat mirarentur, sed necdum in
 ecclesia sua per mensem resedit, et ecce quatuor
 satellites diaboli ex transmarinis partibus propere
 venientes, quorum nomina ad signum miserabilis
 militiæ referenda credidimus. Richardus Brito, Hugo
 de Moravilla, Reginaldus Ursus, Willelmus de Traci,
 in hunc modum affati sunt : « Mandatum tibi a rege
 et domino nostro asserimus, ut ad filium suum no-
 vum regem pergas facturus quod regi facere debes,
 et juri in suo examine pariturs, si in aliquo adver-
 sus eum deliquisti; episcopos etiam excommunicatos,
 Londoniensem scilicet Gilbertum Foliot, et Salisbe-
 riensem Jocelinum communioni restituas, et cæteris
 qui suspensi sunt reddas officium. » Archipræsul vero
 respondit : « Mandatum a novo rege suscepi, ne per
 oppida et civitates ejus commearer; sed me a collo-
 quio et conspectu ipsius tanquam indignum omni-

modo subtraherem: præterea episcopos supradictos notum est, non a me excommunicatos, vel suspensos, sed a domino papa, quoniam in mea diœcesi, me inconsulto, hunc novum regem, cui Dominus conferat gratiam salutarem, consecrare et coronare præsumperunt. Præcedat ergo satisfactio eorum absolutionem. » Sed hoc dicto, præfati milites, non milites, et ejusdem sceleris consortes, ut bruti sensus homines non habentes intelligentiam, in minas proruperunt. Illis ergo in tumultu et contumeliis exeuntibus, sanctus præsul respondit: « Quærite qui timeat minas vestras. Non enim gladii vestri sunt promptiores quam animus meus ad martyrium: quærite qui vos fugiat. Me enim pede ad pedem in prælio Domini reperietis. » Et ecce ille quem merito Ursum cognominavimus, bestialiter exclamavit dicens: « Ex parte domini regis vobis edicimus, tam clerici quam monachi, ut istum hominem comprehendatis et teneatis, donec rex de corpore ejus plenam consecutus fuerit justitiam. » O quam stupendum, quam stolidum et miserabile edictum, ut clerus patrem servaret ad pœnam, pro cujus tuitione fidelissima immarcescibilem Rex cœlorum ei jam præparaverat coronam! Ex confinio hujus edicti ortum est et aliud lamentabile: præconis enim vox horrida per plateas increbuit: « Armate vos viri, armate vos, invadite domum archiepiscopi. » Indignum est enim, ut in communi nobis vivat, qui communionem primates nostri regni indigne privavit. Nec mora redeunt in loriceis evaginati gladiis quatuor canes aulici, quos prædiximus, necnon et bucellarii cum bisacutis et utensilibus cæteris commodis ad scelus quod in animo conceperant parientum. Sed præcavescentes famuli, obserato ostio, ignorante hoc præsule, eos excluderunt. Filii autem Satanæ duce patre eorum ad lignea obstacula divertentes, cædunt, scindunt, diruunt, ex fragore autem nimio, et terribili strepitu, nimium clerici more suo fere exanimati facti sunt. Archiepiscopus vero qui solus quærebatur perdendus, cæteros qui vano timore perterriti erant consolabatur in Domino, et ut nobis videbatur, ita imperterritus residebat, tanquam venissent ad nuptias eum invitaturi, et cum a suis fuisset undique exclamatum, ut in monasterium fugeret, ille qui ante promiserat se carnis interfectores minime fugituro, viriliter implet promissum. Non enim erat in tali casu fugiendum de civitate in civitatem, sed dandum subjectis exemplum, ut unusquisque mallet mori in bello quam videre mala gentis suæ et sanctorum canonum subversionem.

Sed cum ei diceretur, quod, hora exigente et festo, deceret eum in ecclesia vespertinum celebrare officium, tandem surgens et ad crucem maturans, sibi crucem præferri præcepit. Mutato ergo ordine, sacerdos et præsul qui præcedere debebat pastoris more cogentis oves in caulam, incesso temperato clericos equitur properantes. Intranti monasterium, omissis vespersis, quas Deo libare cœperant,

A occurrerunt monachi, gratias agentes Deo quod patrem suum quem extinctum audierant, vivum cernerent et incolumem: et hoc dicentes valvas ecclesiæ repagulando hostes a nece pastoris sui arcere festinant. Revertens autem pater sanctus hos et illos a valvis removel, ne impedito itinere hostium, ejus impidiretur martyrium. Intransibus ergo carnificibus et vociferantibus: « Ubi est ille regis et regni proditor et falsus præsul? » Is vero, qui se eos non timere prædixerat, revertitur, dicens: « Ecce adsum, non regis proditor, sed sacerdos. Quid me quæritis? ecce præsto sum nomine ejus pati, qui nos sanguine suo redemit. Absit ut propter gladios vestros fugiam, aut a justitia recedam! » Accelerans igitur quidam præ cæteris plenus scelere, bisacutam sacro pectori imposuit, proh dolor! comminans quod sanctissimum cor illius extraheret; sed temperans ab ictu, una cum cæteris manum violentam injecit, trahens eum, ut extra Ecclesiam creptum sacrilegium et inextinguibile nefas possent adimplere. Sed cum inde facile amoveri non posset, quidam ex præfatis filius Leviathan, elevato gladio quem tenebat, agnum Deo immolandum in capite percussit, præciso vero eodem ictu hæc referentis brachio, patrem proprium in matris utero perimens, diem circa undecimam horam diei exstinguens. Ecce serpentis in hoc martyre prudentiam, qui corpus percutientibus opposuit, ut caput suum, id est ecclesiam, sive animam suam illæsam conservaret. Ecce simplicitatem columbæ, qui nec etiam contra carnis occisores insidias vel clausuram aliquam opposuit, verum claudi monasterium prohibuit, quod religionis jure omnibus catholicis patere debere sanctorum instituta patrum sanxerunt. O pastorem dignum, qui ne oves laniarentur, seipsum luporum morsibus tam confidenter exposuit! sciens nimirum indignum esse coronam, quem in tali articulo mortis timor fugam inire compellit. Quid non faceret? quibus turbinibus se non exponeret, vas virtutum stabilitate tam solidum, tribulationibus et pressuris tam excoctum, et vigiliis et jejuniis tam exanimatum, disciplinis assiduus confriatum, quod merito ad summi regis delicias propinandas ad thronum gloriæ deportaretur? reliquerat enim mundum pro Christo, quem cum flore suo in tantum despexerat, ut cuncta æque tanquam peripsema reputaret. Quod videns mundus vehementer indoluit, et contumaci sibi ferale bellum indixit, et advocans principem adiutorem suum: « Veni, inquit, opprimamus virum istum justum, quoniam contrarius est operibus nostris. » Sed miro modo actum est, ut qui scintillam luminis in occiduis terræ partibus, et in uno tantum angulo radiantem satagebat exstinguere, luminare magnum, quod ab occidente usque in orientem fulgura accendit, et opprimere volens sublimavit. Deinde alio ictu in capite recepto, martyr genua flexit et cubitos, se ipsum hostiam viventem Deo offerendo, dicens: « Pro nomine Jesu et Ecclesiæ tuitione libenti animo mortem amplecti paratus sum. » Et subsequutus adjunxit: « Deo, et

beatæ Virgini Mariæ, et sancto Dionysio, omnibus A
martyribus committo causam Ecclesiæ. » Quo dicto,
tertius funestorum militum, ita procumbenti grave
in cervicem vulnus impressit. Quartus, quod dictu
est horrendum, coronam, quæ amplæ erat latitudi-
nis, ita a capite separavit, ut sanguis albens ex ce-
rebro et cerebrum rubens ex sanguine lilii et rosæ
coloribus virginis et matris Ecclesiæ faciem in con-
fessoris et martyris morte purpuraret. O nefandis-
simi hominum, quos nec ploranda sanguinolentæ
matris pietas, nec miranda patris probitas lenire
potuit, quin infra ipsius sacratum capitis cerebrum
venarentur et funderent! Quibus patris, et rece-
dentibus carnalibus reliquis, Reginaldus Ursi filius,
utpote omnibus aliis crudelitate superior, ejus cere-
brum quod remanserat effodit, et per pavimentum
deiecit; ne ei quinta plaga deesset, qui in aliis
Christum imitatus est. Ut enim salva pace marty-
rum loquar, ipsi propriam principaliter agebant cau-
sam, cum eis diceretur: « Sacrifica Jovi, respue
crucifixum: » iste vero aliorum salutem suo pre-
tioso sanguine mercatum venit, ut insigniti sacro
charactere Christi, secundum scita Ecclesiæ rege-
rentur: autumans majorem non esse charitatem,
quam ponere animam suam pro amicis suis. Quam
intrepide ubi de sua salute et fide ageretur esset
martyr iste pugnaturus, qui pro aliorum tuitione
non tractus, non ductus, se ipsum minavit ad occi-
sionem! Pro mirabili ergo constantia credimus ho-
norem divinitus ei esse collatum, quod non Judeos,
nec paganos, sed Christianos disertos et feroces
morte victoriosa debellavit. Sed quis loci martyrio
deputati celsitudinem metiri posset? Ipsa domus
Christi, locus in quo viaticum nostræ salutis sole-
bat immolari, cunabulum regis pridie nati recenti
martyris cerebro depingitur, ut ex hoc facto perse-
cutorum crudelitas et martyris eminens dignitas
figuraretur.

Itaque Dei sacerdos a sæculo migrans, cœlis na-
scitur iv Kalendas Januarii, anno ab incarnatione
Domini 1171, die proxima post solemnitatem Inno-
centium: ut qui diu innocenter vixerat, post inno-
centes tempus celebre sortiretur: magna regis nati
clementia, qui militis sui martyrium, imo natale
martyris, ita suo continuavit, ut nec ei posset con-
civium salva suorum prærogativa esse conjunctus,
nec ulterius protelandum. In crastino autem mona-
chi, ut moris est, corpus mundissimum martyris
lavandum exspoliantes, sub habitu et ordine mona-
chorum tam privatim diu reperiunt existisse, ut
etiam hoc suos lateret familiares. Ad ultimum carni
proximum inveniunt cilicium sic bestiunculis obsi-
tum, ut levius isto pristinae diei fuisse martyrium
quivis judicaret, et hostes majores minus minoribus
nocuisse. Et quod a nullo sanctorum factum esse
cognovimus, femoralibus cilicinis a longo tempore
ita stricte cruribus insutis usus fuerat, ut alveolus
a poplite supra in longum sub sutura cilicii vermi-
culis scaturiens extenderetur.

Magnificetur Deus noster, qui non est passus lu-
cernam Ecclesiæ diutius latere sub modio, sed ad
confusionem infidelium et schismaticorum, eam po-
suit super candelabrum, ut ingredienti lumen vide-
rent, et aperte cognoscerent, quod non sit Ecclesia,
sed schismatis contumelia, quam martyr iste res-
puebat, et infidelitas aliud sentire de Deo, quam ipsa
prædicabat. In solemnitate enim protomartyris Ste-
phani proxima, antequam de martyrum commilitio
nobilissimus martyr iste censeretur, sacerdos Ra-
dulfus nomine personatum gerens in ecclesia qua-
dam beatæ Mariæ Londoniis, ad epulas cujusdam
divitis de parochia vocatus sua, dum inter pranden-
dum loqui vellet, instrumenta loquelæ frustratus
obmutuit. Igitur postquam medici vires tyriaci de-
lusas experti sunt: ille qui obmutuerat mœstus de
mensa surgens domum repedavit. Postea vero cum
mortui martyris exsequiis et divinis obsequiis pa-
rentatum est, cuidam clerico Radulfo fratri ipsius,
in cujus domo presbyter sermonis usu privatus fue-
rat, psallenti matutinas beatæ Virginis et Matris
Christi, dum circa canticum trium puerorum mo-
raretur, apparuit vir vultu venerabilis, ita ut ex
ipsius splendore licet circa mediam noctem domus
splendere videretur, dicens: « Radulfe, ex parte
Dei dic Radulfo presbytero ut si ore non possit, sal-
tem scripto cum vera poenitentia peccata primo
confessus adeat novum martyrem, apostolum An-
golorum et confessorem, ut per ejus merita perditæ
recuperet damna loquelæ. » Deinceps cum presbyter
huic obtemperasset mandato, non est defraudatus
beneficio. Ego istud miraculum confidentius refero,
quia cum post martyrium domini mei Cantuariæ
lectum doloris tenerem, et postea cum venirem Lon-
donias, ita esse factum a civibus accepi: necnon et
presbyterum, cui hoc contigerat, satis aperte lo-
quentem, bis allocutus sum, et Radulfum satis cre-
dibilem cui vigilanti præfata visio apparuerat. Scio
etiam quod cum medicus fere per annum de conso-
lidatione brachii mei desperaret, nocte quadam
astitit mihi ille venerabilis martyr et comprehen-
dens brachium madida panniculi teda linei involvit,
dicens: « Vade, sanus es. » Postea vero panniculo
aqua benedicta et sanguine ipsius intincto brachium
involvi; donec gratia Dei et martyris mutua conso-
lidatione ossa ossibus adhæserunt. Perhibet conso-
lidationis testimonium ipsius ejusdem brachii manus
dextra: quæ vobis hæc scripsit legenda. Multa etiam
alia operatus est Dominus ad indicium dilectionis
beati martyris nostri, leprosos, ut nos vidimus,
mundando, dæmonia fugando, hydropicos, paraly-
ticos, surdos, mutos, cæcos et claudos, necnon et
aliis languoribus laborantes curando, in quibus
fidei Cantuariensis Ecclesiæ testimonium, sub cuius
aspectu et notitia hæc aucta esse noscuntur præsto-
lamur. *Explicet Martyrium beati Thomæ Cantuarien-
sis archiepiscopi editum a magistro Euvardo.*

VITA ET PASSIO SANCTI THOMÆ

CANTUARIENSIS ARCHIEPISCOPI ET MARTYRIS,

AUCTORE ANONYMO.

(Iste libellus editus fuit [Parisiis anno Domini 1495.]

INCIPIT PROLOGUS IN VITAM, PASSIONEM ET PROCES-
SUM SANCTI THOMÆ CANTUARIENSIS ARCHIEPISCOPI
ET MARTYRIS SUPER ECCLESIASTICA LIBERTATE.

Professores artium, etc. (Vide Vitam S. Thomæ
auctore Edwardo Grim, col. 1 usque ad Pie igitur
etc. col., 2.)

Pie igitur parere cupientes quorundam devotioni,
qui gesta martyris pretiosi plenius nosse solliciti
sunt, operam dedimus ut quatuor historiographorum
labores et studia, magni videlicet Hereberti de Bo-
seham, Joannis Carnotensis, Willelmi Cantuariensis,
et Alani abbatis Theuskesberie, qui martyris pre-
tiosi stylo luculento universa depinxerant utpote
qui per totum imperiosæ nobilitatis suæ tempus
pariter et abjectæ humilitatis sancto familiaris
adhæseret, sub unius narrationis serie historialiter
texeremus : id sum: moperæ præcavescentes ne de substan-
tia negotii sive de veritate totius rei gestæ, a pri-
mordio perfectæ virilis inchoationis usque in diem
quo pro Deo suo et Ecclesiæ libertate per martyrium
cursum vitæ consummavit, quidquam per silentium
deperiret. Sane uti plerisque videtur, Herebertus
qui singula dicere potuit ex scientia utpote qui ea
quæ vidit et audivit testatur, amore [magistri] justo
prolixior metas compendii excessit. Joannes vero
publicæ potestatis turbine moto, succincta utens veri-
tate citra perfectum calamum extorsit : reliqui etiam
duo quia non plene satisfacere rei gestæ summam
scire sitientibus studendi nauseam ministrarunt et
fastidium nihilominus studiosis generarunt. Opus
igitur Domino largiente, aggredientes, licet difficile,
sed ut credimus, posteris acceptabile, brevitate com-
petenti studuimus consulere delicatis : et veritate
plena satisfacere studiosis. Nec tamen adeo prolixita-
ti detraximus gratia complacendi, ut aliquid de
necessario contingentibus omittamus : haud quod
cupidos plenæ historiæ fraudare velimus vel in mo-
dica veritate. Nimis enim est absurdum ut quis de
præconiis cujuscunque dicat prætermittendum, cujus
mores et opera proponit ad imitandum. Nimis, in-
quam, absurdum est in parte edificiū diruere, cujus
consummationis finem perfectum intendit magnifice
propalare. Gloriosi igitur martyris meritis et ora-
tione patrocinantibus ad laudem ipsius et gloriam qui
sanctis suis virtutem præstat in via et præmia largi-

A tur in patria, præsentī operi indulsimus ad horam,
ut et compendiosa prolixitas et tædiosis tollat fasti-
dium, et studiosis lectoribus majorem provocet ap-
petitum. Nostræ igitur devotioni linea rectitudinis
nusquam aberrando per beati patris nostri merita
gloriosa Spiritus veritatis inspiret, ut quod pia ag-
gredimur intentione, pura fide plena [prosequatur
oratione.

Explicit prologus in Vitam et passionem sancti Thomæ
martyris : et incipit quadrilogus in Vita, passione
et processu ejusdem martyris.

CAPITULUM PRIMUM.

DE VITA ET MORIBUS PARENTUM SANCTI THOMÆ.

Electus igitur ante mundi, etc., usque ad veritatem
[eadem quæ habentur apud Edwardum Grim., supra,
col. 3.].

CAPITULUM II.

DE ORTU MIRABILI BEATI THOMÆ.

Nunc autem, ut paulo altius sermonem historiæ
repetamus, non abs re duximus in principio inseren-
dum de conjugio patris ac matris admirandam satis
utique rei gestæ meditantibus veritatem, ut exinde
videlicet facile advertatur quanta cura ac pietate a
solis ortu et casu, genere et conditione tam di-
versos congregavit in unum prædestinatio mirifica
Salvatoris, de quorum sane progenie sponsam suam
Ecclesiam per mundum universum triumphaliter sub-
limari et decorari prætendit.

Præfatus igitur Gilbertus ætate juvenis crucem
Dominicam causa pœnitentiæ votivæ arripuit Jero-
solymani iturus, quemdam de familia sua Ricardum
nomine secum assumens, ipso solo pro serviente con-
tentus. Quo tandem prospere pervenientibus, inter
Christianos et gentiles insidiis habitis : loca sancta
orationis causa cum aliis ingressus est. Sed cum
licuit redire, omnes visitantes pariter capti sunt et
catenati atque in carcere cujusdam Amiraldi præ-
clari principis paganorum detenti, ut singulis diebus
qualemcunque sibi victum laboribus impositis quo-
dammodo compararent. Qui Gilbertus per annum
integrum et dimidium in captivitate Sclavorum, more
serviens, cum honoratior cæteris atque præstantior
haberetur, in oculis Amiraldi præ omnibus gratiam
et favorem invenit in tantum ut frequenter coram eo

sed tamen in vinculis ad mensam veniret, discumbentes visitaret, invicem de terrarum notiis ac gentium diversarum moribus rite conferrent. Multa etiam ob gratiam ipsius collata sunt suis beneficia conceptivis, procurante insimul privatim in quantum licuit filia ejusdem Amiraldis puella curiali admodum et decora unica patris sui, quæ utique miro affectu ipsum Gilbertum prout patebit inferius diligebat. Quadam autem die nacta opportunitate puella liberius loquendi cum eo inquisivit ab eo de qua terra et civitate existerit oriundus, de fide ei de religione et conversatione Christianorum, et quæ foret credentium spes et sæculorum præmia futurorum. Qui cum responderet quod Anglicus esset et Londoniarum civitatis incola, atque inquisita de fide Christi prout melius noverat exposuisset, consequenter et ipsa ab eo sciscitavit dicens: « Num mortem libenter pro Deo tuo et fide Christi quam profiteris conservanda intrepide exciperes? » — « Libentissime, inquit, pro Deo nostro moriar. » Quo audito, puella mox quasi verbi ex virtute tota mutata profitetur se Christianam fieri ipsius ob causam, dummodo ipsam in conjugem accipere in sua fide sponderet. Tacuit attamen ille secum deliberans, et timens nimirum fallaciam, acquiescere statim noluit promittendo precibus insistenti, imo tergiversando de die in diem prorogavit, nolens cito præstare consensum. Cumque puella affligeretur vehementer et in dies ob dilationem, ut moris est mulierum, plus anxie efficeretur, Gilbertus interim cum suis conceptivis de fuga cogitans post annum et dimidium nocte quadam diruptis catenis et carcere aufugerunt, totumque noctis residuum quousque Christianorum fines attingissent concitati peregerunt. Mane autem facto, cum præpositus operum more solito ut eos ad opera mitteret consueta carcere fracto non reperisset, in manu valida ipsos insequitur, donec Christianorum terminis obstantibus omni spe jam fraudati reverterentur, non parum irati. Puella verò hæc audiens memorata ex illa hora de protectione sua et fuga post ipsos illico cogitavit et ipsa. Cumque super hæc diebus ac noctibus mire cogitativa efficeretur, et in meditatione exardesceret cautius evadendi, nocte quadam universis somno depressis, sola nullo sciente secum assumpto modico quidem ad viaticum necessario, ut expeditius iter ageret satis difficile attendendum, multiplices se tradidit discrimini fugiendi, nihil curans de universis hæreditario jure sibi pertinentibus, sufficientiam divitiarum sibi reputans desiderium suum complere pro voto. O mirandam nimis hujus mulieris tam audaciam quam amorem tanta difficultate et ardua præsentis! Non hæsitavit, cum esset tam ingentis substantiæ gloria nobilitanda paterna, irrecuperabiliter eadem carere, non trepidavit fragilis et delicata paupertatem penalem subire, nec per tot terrarum spatia et naufragantis maris innumera periculorum genera dubitavit sola discurrere, dum unius hominis tam remoti et ignoti amorem quæret, cum etiam nec de vita ipsius vel inventionem

A securitatem haberet, imo necdum secunda de conjugio et si quæsitus hominem reperiret. Proficiens igitur pertransiit prospere paganismum ex cum quibusdam peregrinis et mercatoribus repatriantibus qui linguam ejus noverant versus Angliam navigabat. Cumque transcursis omnibus periculis obiter obviantibus Angliam applicuisset atque a suis comitibus jam dissociata fuisset, nihil aliud interrogare pro itinere noverat nisi tantum: Londonia, Londonia. Quo tandem perveniente quasi bestia erratica per plateas civitatis incedens et obviantes quosque explorantis more circumspectans, derisui habebatur omnibus et maxime pueris intendentibus in eam et per vicos incedentibus ob spem ipsius habitum et linguam simul admirantibus. B Contigit vero quod sic per plateas et vicos incedens contra domum præfati Gilberti, ubi manebat, in solemniori scilicet et frequentiori civitatis foro, ubi nunc in honorem sancti Thomæ hospitalis domus constructa est, casu fortuito deveniret. In qua quidem divulgatum est quod quadam juvenula mulier quasi idiota pueris eam et aliis sequentibus et irridentibus evagaretur. Audiens autem Ricardus serviens Gilberti superius memoratus quasi ad spectaculum cum cæteris et ipse accurret. Qui cum propius accedens eam agnosceret, statim cum summa festinatione recurrit ad dominum suum, narrans ei secreto hanc filiam Amiraldis fuisse ad quam admirationis causa intuendam hominum copia confluebat. Quo audito, supra modum admirans nec credere valens, eo quod impossibile ut sic eveniret omnino videretur, dominus Ricardo non potuit fidem dare, donec ipso in juramento diutius persistente minus incredulus aliquantulum redderetur. Cogitans tandem causam adventus ipsius, arbitratus est tamen consultus ei alibi providendum quam eam secum in domo propria retinendo, jussit Ricardo ut ad quamdam matronam viduam ei vicinam eam adduceret, quæ ipsam tanquam filiam suam in omnibus exhiberet. Quem cum videret puella et ipsum agnosceret, mox quasi mortua cecidit jacens in exstasi resupina. Cumque ab illa mentis alienatione expergefata ad se reversa resideret, ad dictam matronam Ricardus eam sicut dominus ejus imperarat adduxit. Gilbertus vero de adventu puellæ secum pertractans cepit animo fluctuare per diversa, et cogitationes concipiens invicem repugnantes, incidit in mentem ejus episcopum Londoniensem consulendum adire apud Sanctum Paulum, ubi quadam die sex episcopi aderant super arduis regni negotiis vel Ecclesiæ tractaturi. Quibus coram positus, cum rei gestæ veritatem superius memoratæ per ordinem exponeret, mox Cicestrensis episcopus præ cæteris prophetice prorumpens in vocem, indubitanter asseruit hanc invocationem non humanam sed potius fuisse divinam, et necessario magnifici operis prolem edituram, ejus sanctitate et labore universalis esset Ecclesia ad Christi gloriam sublimanda. Concordantibus et cæteris qui aderant

episcopis in hanc sententiam et ut idem Gilbertus A
puellam, dummodo baptizari vellet, duceret in uxorem, adducta est statuta die in crastino in Ecclesiam Beati Pauli dictorum episcoporum in praesentia, ubi et baptisterium competenter existit praeparatum in quo debueral baptizari, Cumque interrogaretur in medio posita, prout mos exigit Ecclesiae, per sapiedictum Ricardum communem eorum interpretem si vellet baptizari, respondit: « Hujus rei causa a valde remotis huc adveni, dummodo Gilbertus velit mihi in conjugio copulari. » Baptizatur igitur puella, sex episcopis grande cum solemnitate baptismi agentibus sacramentum, eo quod praelari sanguinis esset femina imo vocatione clarior admodum et divina. Gilberto traditur mox ab episcopis in conjugium cum celebritate, conjugali breviter de fide Catholica prius instructa. Quam cum ad propria duceret, prima nocte in unum concordiae nocte sanctum Thomam futurum Cantuariensem archiepiscopum et martyrem genuerunt. In crastino vero Gilbertus tanto ad terram sanctam afflicebatur desiderio revertendi, quod suspiriis agitata magis assidue quam frequenter vultum tristitiae praetenderet insuetum. Cogitat interea uxoris suae juvenulae tenerum sexum fragilem, aetatem lubricam, linguam etiam patriae ignotam et ob ista nimirum pericula non parva per absentiam suam eidem posse de facili provenire. Uxor vero ipsius cum vultum illius secus quam heri et nudiustertius animadverteret in diversa mutatum, metuebat vehementer et cogitabat, ne forte ipsa esset causa. Institit igitur precibus diebus ac noctibus, sciscitando tantae tristitiae veritatem, nec aliquando destitit donec patefacta plane fuerant quae latebant. Gilbertus igitur precum instantia fatigatus cum desiderium suum uxori reserasset, illa vero utpote magnae spei mulier et in fide Christi roborata non solum voto viri sui annuit, imo rogavit et hortabatur ut quid concepisset in mente quo complacere suo crederet Creatori, nulla de se habita consideratione tam prompte exsequeretur quam devote, et adjecit: « Spero, inquit, firmiter et de Deo meo tantum confido qui ad agnitionem sui nominis me vocavit, quod te etiam absente me non deseret sed sicut et priusquam ipsum agnoscerem ab omni D
tactam periculo conservabit: tantum pro solatio peto Ricardum mihi relinquo, eo quod lingua mea melius eruditus necessitatibus meis ceteris potius noverit ministrare. » Quibus auditis, Gilbertus admodum laetus effectus parat sibi necessaria. Ordinatque quae uxori suae et familiae competeabant quam citius poterat Hierosolymam profectus est ubi per tres annos et dimidium moram faciens postea repatriavit. Invenitque Thomam filium suum admodum forma decorum et cunctorum in oculis intuentium gratiosum.

CAPITULUM III.

DE VISIONIBUS MATRIS EJUS PER QUAS FUTURAM CREDI-MUS SANCTAE SOBOLIS EXCELLENTIAM PRAEFIGURARI.

Brevi ergo intervallo, etc., usque ad figuravit [eadem et haec quae apud Edwardum Grim reperias, supra, col. 3-4.]

CAPITULUM IV.

QUALITER SE HABUERIT IN JUVENUTE.

Jam puerilibus annis evolutis, optimis coepit polere moribus, ingenio clarus, acceptus eloquio, vultu juxta gravitatem jucundus, venustus aspectu, forma satis elegans, gratum sese omnibus et amabilem exhibebat. Quem etiam secundum utrumque hominem multiplici naturalium gratia bonitas ditavit divina, ut in mysterium magnum vas videretur excisum, et ex naturae beneficiis futurus praediceretur antistes: quemadmodum visio caelestis puerum adhuc plenius intimavit.

Nam, dum aliquo tempore febre corripereetur, et ipsa invalescente ardens jam sensim per omne corpusculum ex intims sudor erumperet, visa est domina quaedam statura procera, vultu placido et aspectu decora, in lecto decumbenti astitisse, et puero de sanitate pollicita confortato, duas claves aureas tradidisse sibi in manu in haec verba: « Thomas, » inquit, « haec sunt claves paradisi, quarum tu adhuc es habiturus custodiam; » et, his dictis, disparuit.

C Tempore autem quo pater ejus in religiosa domo Mertoniae cum priori Roberto aliquandiu nutriendum tradiderat, venit quadam die pater filium visurus: introductoque puero coram priore pater procidens pronus adoravit. Indignans vero prior ait illi: « Quid agis? procidis ad pedes filii? quod ei facis ille facere tibi deberet. » Cui pater in secretis ait: « Domine, ne mireris, scio ei quid facio: erit quidem puer iste magnus coram Domino. » Expavit nimirum pater tam mirifica de filio sibi divinitus revelata, quae tamen praed admiratione sub sigillo silentii censuit occultanda. Postquam vero litterarum studiis traditus liberales artes attigit, quatenus lascivia aetatis et angustia temporis promisit, in illis profecit.

Ab ineunte autem aetate, sicut referre solitus erat, didicit a matre timorem Domini et beatam Dei genitricem tanquam ducem viarum suarum et vitae patronam dulcius invocare: et post Christum in illam totam fiduciam jactare.

Matre vero defuncta, sibi patrique relictus vicesimum secundum aetatis annum otio impendebat. Parisiis vero per aliquot tempus studens, reversus, receptus est in partem sollicitudinis reipublicae Londoniensis, ubi laudabiliter se habens didicit prudentiam hujus lucis, qua postmodum probe noverat communia Ecclesiae Anglorum et publica totius regni negotia manifeste tractare, venitque ad virum quem-tam in civitate genere insignem et multarum pos-

sessionum præcipuum cui firmiter adhæsit : varias sæculi sequens curiositates nunc venatu nunc avium captura quibus maxime pascetur animus juvenilis. Pro libitu nunc domi cum patre, nunc rure cum divite morabatur. Factumque est ut in hunc modum dimissis sibi scholaribus studiis præpropere renuntiaret. Die vero quadam accidit ut ad ripas eunte Thoma simul cum divite, motam de flumine anam accipiter insequeretur, secutusque divertentem in flumine cum ipsa pariter mergebatur. Quod videns adolescens, miseratus accipitrem jam peritum, equo desiliit, seque in gurgitem ut avem eriperet præcipitavit; sed priusquam avem contingeret raptus ipse intra alveum fluminis, et nunc mersus sub aquis, nunc undarum vi impellente levatus periclitari cœpit, et penitus periisse putabatur ab intuitibus, dum nullus adesse potuit qui manum porrigeret per-eunti. Denique ad molendinum, quod tunc forte molebat, aquæ tractu perlatus, ubi primo aquæ exitibus propinquavit, stetit rota nec se movit semel, quousque vivus quidem sed vehementer afflictus adolescens extractus est. Sed fovit afflictum medica manus Salvatoris, quem inter undas desperatum protexit ne exstingeretur lucerna futurus in Israel, cuius morte pretiosa tanta cernimus beneficia provenisse.

Ad curiales itaque se transferens occupationes, cœpit in florem sæcularis prudentiæ pubescere, et

A fructu discretionis pollere. Tanto namque rationis vigeat acumine, ut prudenter inauditas et difficiles solveret quæstiones; adeoque felici gaudebat memoria, ut quod semel in sententiis aut verbis didicerat, fere quoties volebat posset sine difficultate proferre: quod multi litteratores assequi non valentes, tantam mentis perspicacitatem, præsertim in homine variis occupationibus dedito, miraculo ascribebant. Nimirum dispensatio divina, quem vocabat ad majora, ita erudiebat et exercebat in minoribus, quasi in quibusdam futurorum præparatoriis ut in collationibus aut sermonibus (ut dici solet) ad manum necessaria haberet. Ad præsagium etiam futuræ constantiæ ferunt adolescentis animo tam pertinaciter adhæsisse amorem veri, quanvis sæcularia sectaretur, ut vix aut nunquam joco vel serio quidquam protulerit contrarium veritati: et quam perfecte id ipsum impleverit, postquam factus est vir, sequentia declarabunt.

(Post hæc quadrilogus iste prior fere ad verbum concordat cum secundo quadrilogo, de quo posthac dicturi sumus. At pro tribus quinque libros completitur; quorum quartus De Gestis post martyrium est; quintus epistolas quasdam circiter 70 continet. Quod dixisse sufficiat de hac compilatione. Liber ipse, quo continentur hæc, jam rarus factus, satis magni pretii æstimatur et venditur. Est in bibliotheca Sancti Audomari liber ms. de Vita S. Thomæ, qui idem fere est cum primo quadrilogo edito, et præter ea paucula de obsidione Tolosæ ex opere Willelmi filii Stephani excerpta habet.)

VITA SANCTI THOMÆ

CANTUARIENSIS ARCHIEPISCOPI ET MARTYRIS,

AB ANONYMO QUODAM SCRIPTORE EX ALIORUM SCRIPTIS COMPILATA.

[Edit. Bruzellis 1632.]

INCIPIT VITA B. THOMÆ MARTYRIS

ET ARCHIEPISCOPI CANTUARIENSIS,

De plurium narratione collecta, magis extensa, quam sit infra, quam scribi fecit dominus Petrus Rogerii, Gregorius papa XI.

Post summi favoris dote vestitos præclaros pugiles, qui auspiciato pugilari a cunis, ubi vagiit, usque mucronem, quo occubuit, Thomæ depinxerunt universa, si in opus simile pygmæam manum extendam ad calamum, erga benevolos deprecantur præsumptionem imperiosæ vires amoris in martyrem. Porro Joannes Saresberiensis, magister Herbertus de Bosaham, Willelmus Cantuariensis, Alanus abbas Teokesberiensis, quatuor veredarii de linificæ linguae quadriga, per quatuor mundi climata nostri aurigaurant agonem athleteæ, et vernantis purpura eloquii excellentis inaurantes materiæ majestatem per se

C commendabilem potentia plus placendi festinant historiam. At hic contractæ frontis imaginari mihi videor objecta: « Quid igitur consummato opere tibi sumis operis, consumis operam, fessoque milite campo nudato, serus præliator cassas ducis excubias? Quid sumpto bravio gigante sopito, inane se nanus præcingit ad stadium? Quid cygneo illo tubis ductilibus decantato, fragili modulari paras avena, cum nec de dicendis aliquid omissum, nec quidquam de dictis limari timeatur? »

Paucis, oro, sustineat sugillator meus, si forte nævum temeritatis queat eluere professio veritatis. Historiographos superiores relegenti occurrit hinc mater tædii extensa prolixitas, hinc exprimendæ veritatis noverca succincta brevitatis. Heribertus, utpote qui per singula dicere potuit ex scientia, qui quæ vidit et audivit testatur, amore magistri extra

metas actus compendii, cum nihil linquit intactum, A narrationem protelat in immensum. Joannes, potestatis publicæ turbine mota procella, citra perfectum stylum excussit. Reliqui duo nec satisfacere rei gestæ summam sitienti nec fastidiosi lectoris evaserunt supercilium. Hinc mihi studium opus compendiarè sumptuosum, brevitate consulere delicatis, nec studiosos fraudare veritate; ob id vel maxime cum dicatioribus, Heriberto scilicet et Willelmo, diffusioris silvæ percurrere opaca; cum castigatioribus, Joanne videlicet et Alano, contractioris hortuli sinum ingressus, ex omnibus micantiores mihi flores congesti, excerptiorisque functus officio aliena respersi codicem redolentia: de totius structura fabricæ nihil mihi approprians præter rudem schedulam, fundamenti locum vindicantem.

Sed et ne in aliquo liber furti oblitteretur calumniæ, auctores domesticos gerit in margine pagina peregrina, ut de communi quid singuli sibi specificent operis, e regione locatùm nomen loquatur opificis. Sane quia sine fili catena in vestem non conveniunt commissuræ, nec sine cæmenti federe lapides levantur in murum. ansas tantum cortinis innexui, tabulisque inserui incrustaturas, quibus firmiter cohæreant, quæ hujus contingant lectum fœderis. Ut autem in spatiosi campi latitudinem transvolandam equus admissus, si ad horam lora retrahas, pede parum feriato novum ardentius fervet ad cursum, ita et nos, ut lectori subinde a cœpto respiranti demum hilarior renascatur aviditas lectionis, in tres partes opus distinguimus.

Prima a puero ad exsilium extenta instar synopsis minutissimæ fidem mentis serit in hortulo, quæ primum præ parvitate resupina pompæ secularis fefellit intuitum, sed postea altiore evadens in arborem, avibus cœli requiem ministravit et umbram.

Secunda sub exilio triturræ textit acerbiter, ubi spe requiei, quam sibi præparavit in horreo, ab area resiliere triticum supersedit.

Tertia in passione supereminentiore aggressa viam Apostoli, ut Christum lucrificeret, propriæ vitæ factus prodigus, cruoris probavit profluvio, quod nec gladius, nec mors eum separare prævaluit a charitate Christi. Ibi nutantem Ecclesiæ libertatem in statum evehens firmiorem, sui objectu sanguinis imminentem jam repellit ruinam; et quod nos infirmiores, etiam ad nomen lupi trepidantes, eventu diximus impossibile, ipse leoni occurrens factu facile suo monstravit exemplo: quod scilicet, « Bonus pastor animam suam dat pro ovibus suis. »

Verum si in opusculi hujus laniationem edax exacuit livor mordacium, unum quod objiciam mutuo sumpsi responsum:

Omnibus invidas, livide. nemo tibi.

(Ita prologus: quæ inde sequuntur, videlicet capitula norem libri primi nihil nisi excerpta sunt e libellis Joannis, Alani, Herberti et Willelmi Cant. Post

PATROL. CXG.

ea sequitur cap. x, ubi inveniuntur multa quæ mihi videntur hiatus supplere qui in Herberto de Bosham est, ad cap. 7 lib. iii Vitæ S. Thomæ, infra.

Vel ideo, ne aliorum, ut plerumque contingebat, eum traheret occupatio. Quod cum contingebat, tunc quidem per unum fratrem, ad quem pertinebat de egenis, hoc ipsum adimplebatur. Vel ideo certe sub nocte, quod nequaquam foret sub luce tam devota vacatio. Et verè tunc devota vacatio, et devotissima. In eo noctis vacans devotio. Cerneret quippe pontificem in profunda noctis silentio, quasi lucem in tenebris, singulorum pedibus advolutum, a singulis orationem petere, et plorare per singulos. Et velut aquarum exitus lacrymæ deducebantur per oculos, adeo ut lacrymis plus quam aqua singulorum pedes lavari viderentur. Secundum vero fiebat

convivium, non jam in furto noctis factum, sed diluculo. Ecce enim egredientibus e cœlesti convivio illis tredecim, quibus pontifex præcinctus ministraverat, ingrediuntur alii duodecim, quibus discumbentibus frater ille, qui ad usus pauperum portabat loculos, vice pontificis, humiliter et devote singulorum pedes lavans, ministrabat, sine argenteis quidem, sed in cibis abunde. Tertium vero in processu lucis circa horam diei tertiam fiebat convivium, centum ex iis qui dicuntur præbendarii, pauperibus introductis. Quibus duo fratres, ad quos de egenis pertinebat, ministrabant. Et quidem triplex mensa pontificis per singulos dies has quotidie tres mensas ponentis, quasi quotidie tres missas celebrantis: primam in nocte, secundam in aurora, tertiam sub luce plena. Revera in hoc mysticè, unctione magistra, edoctus, ut ita videlicet tribus mensis his, tanquam tribus missis, Deo gratis hostilis, nova Salvatoris nativitas suam in ipso novitate, tanquam nativitate roboraret, ut, quem sub peccati jugo vetusta servitus tenuerat, nova Christi nativitas liberaret, et ita novus homo novum hominem Christum indueret.

Igitur post synaxim decantatam, evangelico illo convivio, in quo, ut diximus, ipsemet ministraverat, soluto, brevis somni ob sensus reparandos sopore prægustato, cæteris adhuc dormientibus, solus ipse ad sacros codices manicabat. Et ad aperienda secum sacræ Scripturæ mysteria uno duntaxat snorum, aliquantisper, ut sibi visum est, in his exercitato, accito, tanquam apertis cœli cataractis, summo mane in alimoniam spiritus manna cœlestis refectionis colligebat. Hic erat discipulus, qui testimonium perhibet de his, et vidit et scripsit hæc, scilicet magister Heribertus de Bosham. Per Scripturarum quippe tot profunda et opaca, sicut ipse confitebatur, si absque duce ingrederet, semper metuebat errorem. Unde et in planis intelligentiæ suæ testem, et in obscuris semper me suæ inquisitionis ducem expelebat. Verum finis collatione mox excludebatur, qui accitus fuerat, et solus pontifex in conclavi suo remanebat inclusus, tanquam in sponsi cellam vinariam introductus, ad quem nulli nulla ex causa, etiam usque ad diei tertiam, ullus erat accessus. Ecce Thomas,

qui etsi manum jam ad fortia miserit, et sicut prælatione, ita et quadam operum altitudine virtutum condescenderit speculam, tamen in Scripturarum via, tam humiliter, tam simpliciter gradiebatur, ut in hac, nec eruditorem præcurreret, nec præsumeret de se. Unde hic, qui inter vepres et spinosa sæculi a longo tempore jam inveteratam ruditerat contraxerat, adeo est in brevi eruditus, adeo cœlesti illo manna, quod in mane per singulos dies colligebat, refectus, ut et aliis jam eructaret quod gustavit, et super omnem aquam nunc in clero, nunc in populo semen verbi Dei seminaret. Tanto etiam Scripturarum amore ferebatur, ut sæpissime inter viandum deflexo in partem equo, accito supra memorato discipulo, in via sacræ eruditioni intenderet, hoc sæpius iterans: « O, inquit, si mihi daretur, ut sæculi curis et causis semotis, in otio et quiete hujusmodi possem intendere! Quam fructuosam, favente Domino, his impenderem operam! Et quam studiose perditū temporis repararem facturam! » Schedulas in manicis suis laxis complicare consueverat ædificationis aliquid non spernendum continentes, ut ita legendo semper promptius penes se haberet quod diceret. Illud etiam non tacendum, sed quasi extollendum præconio, quod semper secum habuerit multos et magnos viros, omni morum et vitæ honestate præditos, et scientiæ eruditione præclaros, in Scripturarum planis promptissimos, in mysteriis exercitados, in sacra vero collatione fructuosos, adeo ut inter istos quotidie quivis sapiens sapientior fieret. Quod multum pontificis proposito et desiderio favebat. Cum enim vacaret, non modicum ex his sapientia et scientia proficiebat in dies. Quorum eruditorum catalogum, favente Domino, circa ultimam totius historie hujus calcem seriatim, et singulorum ex ordine ponendo nomina, ordinabimus.

CAP. XI. *Qualis fuerit in officio altaris.* Ille igitur diei jam tertia egrediebatur pontifex de conclavi suo, sacerdotali ministerio sacra cœlestia consecraturus. Illos vero nunc pertranseo dies, quibus ipse solum intererat. Non enim conficiebat hoc diebus singulis: quod, ut ipsemet confitebatur, non negligentia, sed reverentia faciebat. Et quia inter bonos sacerdotes et sanctos in hoc observantia variat. Quidam enim singulis, alii vero certis diebus conficiunt. In conficientibus quidem videre mihi videor grande conversationis sanctæ argumentum, in aliis vero reverentiæ et humilitatis indicium. Scripta vero canonica, sicut nec jubent, nec inibent, nec dissuadent aut suadent ut sacerdos quotidie offerat, sed hoc testantur quod una die semel offerre sufficiat, quemadmodum et semel oblatus est Christus. Illum vero valde felicem prædicant, qui in die una digne celebret. Illos autem impræsentiarum, nec memoratu dignos, non Christi, sed mammonæ sacerdotes prætereo, qui propter oblationum quæstum, unam Christi et semel oblatam hostiam quotidie non semel, sed libentius iterum non tam consecrant, quam dilaniant, Filium Dei quæstui habentes et

A ostentui. Contemptis igitur his, ad magnum sacerdotem nostrum revertamur, inter illos reverendos Altissimi sacerdotes numerandum, qui quotidie venerunt et reverenter offerre. Igitur mox ut beatus Thomas parabat se ut offerret, et mystica illa et sacerdotalia indumenta offerebant ministri, mox in primo visu, necdum etiam his ornatus, totum se concussit et effudit. Effudit, inquam, cor et excussit adeo, ut quidam lacrymarum fons emanaret a capite. Cum vero sacerdotalibus jam ornatus, altari, pro suis et populi delictis prius oraturus, et post oblaturus, astaret, adeo humiliatum erat cor ejus et contritum, ut inter sacra deprecatoria cum lacrymis singultus magis ponerentur, quam verba. Qui etiam ob vanas et vagas cordis cogitationes reprimendas inter celebrandum, dum ministri in ea missa, quæ catechumenorum dicitur, spiritualibus intenderent canticis, semper aliquem ethicum in manu tenere consueverat. Et frequentius ea hora habebat in manibus quemdam orationum libellum, quem unus prædecessorum suorum, vas catholicum, hæreticorum baculus, malleus tyrannorum, Scripturarum armarium, Evangelii tuba et columna justitiæ, beatus Anselmus stylo sicut salubriter punitivo, vel punitive salubri et eleganti ex intimis sanctæ devotionis suæ medullis exceperat. Hunc, inquam, habebat ibidem ab oratione ad lectionem se excipiens. Deinde vero totum hoc speciale orationis genus, quod missa dicitur, festinanter semper consummare consueverat: In missæ introitu dicta una collecta sæpius, interim tribus, pluribus vero, aut vix, aut nunquam. Et primaria quidem institutio fuit, ut una tantum diceretur, ut sicut est epistola una, evangelium unum, et collecta esset una. Postea vero processu temporis plures sunt addite, quæ tamen secundum formam canonum, numerum septenarium non excedunt. Hanc autem in hoc speciali orationis genere brevitem, et in sacramentali carnis Agni immaculati esu festinantiam, propter illum verebatur Domini transitum, eductus a Domino sacerdos hujusmodi observabat, juxta quod in lege scriptum est: « Et comedetis festinanter: » est enim phase, id est *transitus Domini*. Comedebat itaque festinanter propter immissiones per angelos malos, perniciosum scilicet vanarum cogitationum superventum, in sacramentali Dominici corporis perceptione, non tardus, non morosus, non nova præterquam in canone constituta sunt adjungens, verum ea præsertim hora profundissimas tanquam ex intimis pietatis visceribus lacrymas profundeabat et singultus, tanquam attacta Christi vulnera tota intima cordis excutens viscera, et effundens. Huic tantæ devotioni testimonium perhibere poterunt, quotquot sæpius publice offerenti astabant. Manus etiam suas excutiebat hic vir ab omni munere, et a domo sua sordes avaritiæ prorsus eliminabat.

(Secundus hiatus, quem in libello Herberti ad cap. 9 libri in Vita S. Thomæ, infra, invenies, videtur mihi ex sequentibus suppleri posse.)

Et mox cum nobili illo eruditorum suorum catalogo discubiturus procedebat in publicum. Et discumbens in medium a dextris eruditos suos, monachos vero et religiosos statuit a sinistris: milites vero, ceterique potentes separatim semper et per se discumbabant seorsim; ne videlicet ipsos non intelligentes molestaret lectio, quæ quotidie in mensa pontificis ab initio usque ad finem discubitus personabat.

(*Festinemus jam ad librum secundum qui incipit his verbis :*)

CAP. I. Quid sit gestum in curia, cognita archiepiscopi fuga. Expeditis in superioribus his, ex quibus dissensionis inter regem et archiepiscopum orta est materia, quantisque et quibus injuriis appetitus, contumeliis lacessitus, et furoribus concussus, compulsus sit beatus Thomas fugæ præsidium querere ad exsilii ejus historiam, et in exsilio gestorum ordinem expediendum procedamus...., etc....

Explicit liber secundus.

INCIPIT LIBER TERTIUS.

Post fidei et spei viriliter jam transcurra stadia, in quibus beatus Thomas et summæ constantiæ et eximie patientiæ in exemplificatum sæculis postfuturis et argumentum exhibuit et exemplum, ad super eminentioris viæ, charitatis scilicet diffusioris, sudorem attentius contemplandum accingamur, per cujus ad metam perventum æternæ mercedis a summo iudice præ participibus suis percepit bravium. In charitatis siquidem latitudine semitarum sic direxerat Deus gressus ejus et pedes perfecerat, ut nec minis persequentium territatus Dei sui dilectione aliquatenus deviauerit, nec promissis blandientium emollitus naufragantis matris Ecclesiæ vel fratrum proximorum iustis provecibus studere omiserit, quin potius charitatis ardore succensus et pro lege Dei sui certavit usque ad mortem, et tandem animam suam pro ovibus sibi commissis posuit. Sed hæc studioso lectori subtilius perscrutanda relinquentes, cæptum historiæ ordinem prosequamur. Verum, ut passionis et triumphus sancti viri veritati certior fides habeatur, in hac particula testem quintum quatuor supradictis addimus, piæ videlicet memoriæ Benedictum, postea multa ejus probitate promerente abbatem sancti Petri de Burgo, qui ipsa die qua martyr victor occubuit, inter familiares illius familiaris illi assistens, quæ vidit et audivit, veraci stylo testis fidelis ex ordine singula digessit... etc.

GESTA POST MARTYRIUM.

[*Librum tertium excipit tractatus qui titulum præfert Gesta post martyrium, cujus magna pars ex Herberti de Boscama Libro Melorum excerpta est. Quæ hic damus, nescio unde veniant.*

CAP. I. Quomodo rex facinus doluerit, et conatus fuerit se expurgare. Cum audisset rex Anglorum gladiis suorum occubuisse beatum Thomam, post paucos dies misit clericos suos ferentes litteras, qui Cantuariam venientes congregatis fratribus dixerunt:

A Infortunium, fratres, quod penes vos accidit, eatenus dominum regem contristavit, ut ab introitu ecclesiæ per triduum abstinuerit, cibumque a die qua audivit, usque in tertiam, præter lac amygdalarum, non sumpserit, consolationem non admiserit, nec in publicum prodierit, sciens in suam redundare infamiam quod suorum actum sævitia, nec facile posse persuaderi quin videatur animam ejus quæsisse, quem toties doluerit suis obviassse decretis, quem solum senserit in regno suo sibi impedimento fuisse, quo minus res ecclesiasticas ordinaret. Res quidem detestanda expleta est, et facinus inauditum, tantoque minus ejusmodi conscius fuisse credendus est, quanto magis eum in innocentia servasse usque in hodiernum diem dubium non est. Unum est, quod mordet ejus conscientiam. Cum enim omnes qui coronationi filii sui interfuerunt, excommunicatos acceperisset, dolorem suum dissimulare non poterat, quia jam fomitem omnem irarum et inimicitiarum sub inita pace sopitum putabat, vocatisque necessariis suis de roscitata injuria querimoniam deposuit, qui ejus compassi sunt dolori, eoque vehementius moti sunt, quod eum persequeretur ille quem promoverat. Unde eo nesciente vindicaturi ejus injurias, ac per hoc placere ei putantes, a curia latenter recesserunt quatuor illi qui flagitium perpetraverunt. Quod cum audisset, sciens eos ferocissimos, omniumque nequissimos, qui infra terminos regni sui continentur, veritus ne quid ageretur quod in regiam redundaret infamiam, evestigio misit expeditissimos, qui portus præoccupantes filiorum Belial insaniam prohiberent. At illi velut aspirantium obsequio ventorum in miseriam suam transierant, præter conscientiam ejus expletes, quod in perpetuum oblivioni non tradetur. Die enim qua facinus expletum est, apud se præsentem eos esse putabat. Hoc, fratres, missi sumus vobis intimare, ne de tanti principis serenitate sinistram quid suspicemini, sed si quid culpæ contraxit in eo quod aliquid dixisse videtur quod ad facinus aggrediendum grassatores invitaverit, vestris orationibus convenit expiari. Et nunc corpus jubet honeste tradi sepulturæ, ut apponatur ad patres suos. Non enim mortuum persequitur, licet viventem infestum habuerit, sed quidquid in se deliquit, animæ remittit. Non retro vexationes attendit, non irrogatarum sibi ut regi reminiscitur injuriarum.

Posset quibusdam per hæc regis innocentia purgata videri, nisi regiam serenitatem regionum obloquia satellitum suspectam reddidissent. Siquidem cum Willelmus de Mandevilla de transmarinis partibus Cantuariam venisset, inquit: « Si primatem invenissem, super his quæ spectant ad regiam dignitatem, distincte convenissem; et siquidem secundum beneplacitum postulatis acquievisset, pax fieret; sin autem pertinaci contumacia refragari præsumpsisset, procul dubio compellendus erat ut cederet. » Sed et alii similiter minabantur, quod si

ausu temerario proditorem regis occuluissent monachi, omnes latebræ eorum ad unum stipitem inflammate corruissent, ut vel victi capite plectendum exhiberent quem regis reum majestatis in propriam perniciem protexissent. Nonnulli vero prohibebant eos lugere seditiosum illum, qui totum regnum conturbaverat, ne cum eo pariter traherentur ad luctum. Et hæc et his similia regiam conscientiam reddebant suspectam.

De poenitentia regis. Divulgato igitur tam æthali facto undique, mox ut ad regem Angliæ pervenit, afflictus est, ut supra diximus, afflictione magna. Et in nominatissimo illo Normandiæ oppido, quod Argentolium dicitur, per quadraginta dies sedit mœrens. Quo toto illo poenitentiali dierum numero acerbiorum multo plus quam mortuorum luctum fecit, lugentium cibos comedit, equum non ascendit, nulla jurgantium causa, nulla agendorum consultatio, nulla pulsantium querela ingrediebatur ad eum, nulla tot terrarum regendarum sibi cura proponebatur, quasi omnia tunc postponenti præ dolore. Sedebat quippe solitarius, super hoc quod acciderat ingemiscens semper et dolens, et sæpe et sæpius iterans: « Heu, heu accidisse, mihi! » Et quidem poenitentis regis hæc erat salutis providentia. Mox enim in primo sacrilegii auditu viros magnos et industrios ad Romanum pontificem Alexandrum destinavit, ab ipso tanquam summo Ecclesiæ patrono et patre omnium consilium quærens quid agendum, et sicut credibile est, humiliter in quo excesserit confitens. Verum quia confessio, sicut nec per scripta, nec per personas interpositas fieri solet aut debet, et viva vox consentis, quo plus augeat devotionem, eo plus habet virtutis, vir apostolicus a latere suo duos cardinales misit, præ memorie magistram Theodwinum Portuensem episcopum, et Albertum sanctæ Romanæ Ecclesiæ cancellarium, viros certe omni religionis sanctitate et scientia præditos, qui et ipsos regni ob supradictas causas anathematizatos vel suspensos canonice absolverent, et regis postulantis saluti providerent. Itaque ad regis et totius Ecclesiæ consolationem hi missi sunt. In quorum adventu absolutionem, quam non meruerant, de clementia domini papæ, et eorum qui missi fuerant, obtinuerunt.

CAP. VIII. *De morte Henrici regis junioris, archiepiscopo præstensa per visum.* De morte vero pueri Henrici regis junioris, archiepiscopi præstensa spiritualiter, hic tacere non possumus. Cum esset archiepiscopus adhuc in Gallia Senonis civitate peregrinationis suæ una noctium post decantatum nocturnum, ut pausaret, in lectum suum se recepit. Verum, sicut ipse confessus est, curis et cogitationibus se tunc, ut solent, ingerentibus, somno indulgere non potuit. Inter alia vero de domino rege Anglorum, de ejus magnitudine, de ejus prosperitate in filiis, in divitiis et latissimis potentatibus cogitatio subit. Super his diutius cogitans, et præsertim

de filiis, et inter filios potissimum de primogenito ipsius Henrico, quem præ cæteris diligebat, et de quodam alio. In crastino tamen, sicut referebat, se pro certo scire nesciebat, de quo aliorum cogitasset tunc, an de Ricardo tunc comite Pictavorum, an de Galfrido Britannici comite. Cum igitur de rege patre et de filiis cogitaret sic, desiderabat scire quid futurum esset de his, et quales circa hos dispositiones Altissimi. Et cum aliquandiu cogitaret sic desiderans, inter cogitandum hæc cepit quasi dormire. Et ecce facta est ad eum vox, per ipsam vocem versu quodam hexametro sibi expresso. Versus autem hic erat:

Mors tulit una duos, tulit altera, sed male patrem.
Nec arbitretur quis versum hunc quasi a dormitante aliquo casu compositum, quam etiam vigilanter vigilans non componeret, utpote qui versificandi, nec etiam sub scholari disciplina artem tetigerat vel in modico. Versum vero auditum sic suis in crastino retulit, et gemebundus adjecit: « Proh! dolor, Henricus noster, antequam pater vel fratres sui, morietur! » Et vere in morte Henrici, proh! dolor, et unde dolor, archiepiscopi vaticinii sui fine nimis verus propheta probatus est. Pariter et in Galfridi morte archiepiscopi vaticinium adimpletum est; post Henrici mortem quinto, sextove anno ante patrem mortuo sic hoc et illo. Et quod accedit miraculo vaticinium plus commendans: « Mors tulit una duos. » Vere una mors, quia eadem mortis species, ambobus fratribus his morbo dysenterico interemptis. Bene quidem et sancte de medio sublati, ut qui interfuerunt, testati sunt. De patris vero morte, de qua etiam prædictus versus vaticinari visus est, supersedemus dicere, quoniam fere toti mundo nimis nota est, et eam legentibus, et maxime eam scientibus plangenda est, quod tantus talisque princeps tali modo, et tam subito de mundo migravit. Pro quo ab omnibus pie credentibus orandum est, ut sicut pacificus et pacis amator erat, ab eo qui pacis auctor est et amator, pacem et requiem consequatur sempiternam.

CATALOGUS ERUDITORUM B. THOMÆ.

D (*Iste tractatus ex opere Herberti verbatim desumptus est.*)

CAUSA EXSILII ET MARTYRII B. THOMÆ MARTYRIS.

Huic etiam libello nostro inserere studuimus funestum illud et famosum decreti chirographum, consuetudines videlicet illas regias, apud Clarendonam promulgatas. Quas ideo hic interserimus, ut legant sæcula futura post, et hinc cognoscant quam justa, quam perspicua fuerit gloriosi neomartyris Thomæ, primo exsili, et postea martyrii causa.

CAPITULUM I. *De adlocutione, etc.* [vide apud eundem Herbertum.]

Aliæ constitutiones. Hæ sunt constitutiones quas A constituit rex Henricus in Normannia, proscripto beato Thoma, et mandavit iustitiis suis, Ricardo de Luci, et duobus archidiaconis, Galfrido Ridel archidiacono Cantuariorum, et Ricardo archidiacono Pictaviensi, et omnibus principibus et populis Angliæ juranda et servanda contra papam Alexandrum et Thomam archiepiscopum. Harum latores fuerunt Winierus presbyter et capellanus, et Walterus de Grimesbi vicecomes.

CAP. I. Si quis inventus fuerit litteras ferens domini papæ vel mandatum, aut archiepiscopi Cantuariensis, continens interdictum Christianitatis in Angliam, capiatur, et de eo sine dilatione iustitia fiat sicut de traditore regis et regni. [*Codices Bodleiani habent* capiatur et retineatur donec rex vel iustitarius voluntatem suam de eo præceperit.]

CAP. II. Nullus clericus vel canonicus vel monachus, vel conversus vel alicujus religionis homo permittatur transfretare vel redire in Angliam, nisi de transfretatione sua habeat litteras iustitiæ, vel de reditu suo litteras domini regis. Si quis aliter inventus fuerit agens, capiatur et retineatur.

CAP. III. Nullus ferat mandatum aliquod domino papæ vel Cantuariensi: et si inventus fuerit qui tulerit, capiatur et retineatur, nec ullus appellet ad dominum papam neque ad Cantuariensem. Nec aliquod placitum teneatur ex eorum mandato, nec aliquod mandatum eorum in Angliam ab ullo homine recipiatur. Et si quis tenuerit, vel receperit vel tractaverit, capiatur et retineatur.

CAP. IV. Generaliter quoque interdictum est, quod nullus ferat aliquod mandatum clerici vel laici domini papæ vel archiepiscopi. Si talis inventus fuerit, capiatur et incarceretur.

CAP. V. Si episcopi, vel clerici, vel abbates, vel laici sententiam interdicti tenuerint, sine dilatione de terra ejiciantur, et tota eorum cognatio, ita quod de catallis suis nihil secum ferant, sed omnia in manu regis saisiantur.

CAP. VI. Et catalla omnium domino papæ vel archiepiscopo faventium, et omnes possessiones eorum, et omnium eis pertinentium, cujusunque gradus, vel ordinis, vel sexus, vel conditionis sint, capiantur, et in dominico domini regis confiscantur.

CAP. VII. Omnes clerici, qui redditus habent in Anglia, sint submoniti per omnes comitatus, ut infra tres menses veniant in Angliam ad redditus suos sicut eos diligunt, et deinceps in Angliam redire: et si non venerint ad præscriptum terminum, redditus eorum in manu regis saisiantur.

CAP. VIII. Et denarii beati Petri non reddantur ulterius apostolico, sed diligenter colligantur, et servantur in thesauro regis, et expendantur ad ejus præceptum.

CAP. IX. Londoniensis et Norwicensis episcopi sint in misericordia regis, et submoneantur per vicecomes et bedellos, ut sint coram regis iustitiis ad rectum faciendum regi et iustitiis ejus de eo quod contra statuta de Clarendune interdixerunt ex mandato papæ terram comitis Hugonis, et excommunicationem, quam dominus papa in ipsum fecerat, per suas parochias divulgaverunt sine licentia iustitiarum regis.

Proximum locum habent epistolæ quatuor quarum initia sunt: Sciatis hunc esse, etc., Gaudendum, etc., Redolet, etc... Quia vice be. etc... *Inde veniunt prologus Alani qui incipit Honor, etc., et prologus Joannis qui incipit Sacrosanctam, etc. Quibus omnibus adjecta est nota sequens.*

Horum actorum ac epistolarum collector his prologis subjungit sancti Thomæ vitam scriptam a Joanne Saresberiensis, et ex aliis supra laudatis ejusdem vitæ descriptoribus quædam circa gloriosi martyris certamen collectanea, quæ juvent ad intellectionem epistolarum. Ipsorum corpus exstat in superioribus, ideoque non sunt hic repetenda.

Collector concludit.

PROLOGUS ET INITIUM

VITÆ S. THOMÆ

Quæ in Museo Britann. inter codices Lansdownianos n. 398 servatur.

INCIPIT PROLOGUS.

Nota dicturus sum, et communi assertionem comprobata: et quæ in conscientia et fidelium probatibus quibus epistola nostra dirigitur, imo qui

D epistola Christi sunt per fidem non scripta amento, sed spiritu, certius et evidentius faciunt argumentum, quam in codicillo nostro. Sed utinam

veritatem nostram ita condit Apicius, ut omnibus proficiant ad ædificationem quæ dicturus sum, singulis placeant ad imitationem beati Thomæ pontificis et martyris, charitatis, humilitatis, patientiæ quæ exempla supposita. Neque enim panegyricum falere intendimus, sed historiam nudam retexere; non hodieporicum depingere, sed rem gestam simpliciter explanare. Non fucare abjecta, non palliare despecta, sed rerum veritati magis intendere quam sermonum venustati. Quidquid enim dicere potero, minus erit a laude martyris, nedum Dei in martyre glorificati. Ut ergo a primo exordiar ovo, ne principium faciam ubi non est principium, nec artificialiter juxta poetam :

*Nunc jam dicam nunc jam debentia dici
ita dictis dicenda cohæreant*

*Ne primum medio, medium nec discrepet imo,
dietisque fidem faciens veritas semper comitetur
rationem. Sicut enim iniquum est blasphemare
sanctos vel derogare, ita contra veritatem aliquid
addere inacceptum est. Memoriam ergo præcipui*

A martyris Thomæ silentio perire nolui, sed officio litterarum calami studio, scripturarum manibus, doctrinæ lingua, scientiæ oculis, posteritati commendam. Et licet ejusdem sancti vitam a doctioribus officiosissime tractatam non ambigam, amore tamen ipsius compulsus, offero et ego quod possum. A veritate autem nequaquam exorbitare disponentem, non sugillet aliquis personam suam aliter hic insertam prospiciens, quam ipse vellet. Quippe qui ante malus fuit, forsitan correctus est. Qui autem nondum corrigitur futurus est fortassis quod iste est. Si ergo de sancto martyre pro veritate historiæ prout actum est disseram, non succenseant nec excandescant aliqui de iis etiam interseri quod verum est. Decet namque, sicut in ecclesiastica B dicitur historia, scriptorem omnia veritati postponere. Sed si qui hujus sancti martyris vitam melius tractaverint, nullum facimus in hoc opusculo præjudicium, sed cedamus doctioribus ignoscantque qui legerint imperitiæ nostræ studioque dent veniam totum offerenti quod potuit, licet voluntatem suam implere nequiverit.

INCIPIT VITA.

Igitur beatus archipræsul et martyr Thomas, mediocribus Londoniarum civibus ortus, ita gradatim ascendit juxta sæculi dignitatem, ut a paupere scholari in archidiaconum profecerit, deinde cancellarius regis effectus, in archiepiscopi dignitatem sublimaretur, ut ostenderetur horum profectu graduum in carne magnum profectum virtutum futurum in mente. Qui ideo a paupere ita sublimatur a Domino, ut tanto plus amaret, quanto de nihilo magnificatus est, vel ideo quia juxta Pauli sententiam stulta mundi elegit Deus ut confunderet sapientes, infirma, ut confunderet fortes, ignobilia et contemptibilia et ea quæ non sunt, ut ea quæ sunt destrueret. Quid hoc stulto propter Christum sapientius? quid hoc infirmo fortius? quia quod stultum est Dei sapientius est hominibus, et quod infirmum est Dei fortius est hominibus. Sed iste stultus Christi et infirmus, quare fortius hominibus et sapientius. In puerili ætacula adhuc subditus, neque multis profuit neque obfuit, quia adhuc impotens fuit. Nondum mirabilis in aliqua gratia quamvis jam præventus a magnifica gratia. Qualiter enim in ipso latuit lumen sub modio, pace ipsius sancti intimabo. Sicut enim grata est quies post laborem, sicut placet refectio post esuriem, sicut radiat dies post tenebras, ita clarescunt exempla bonorum præfatione et collatione antecedentium malorum. Quis Paulo sævior? quæ Magdalena dissolutior? Et tamen alter vās electionis Domini et doctor gentium exstitit, altera veræ, imo miræ

C poenitentiae exemplum fuit. Ille minimus apostolorum in numero, maximus in gratia; illa apostolorum apostola. Quis ergo desperet? Neque præsumat quisquam; respiciat malus Paulum et Mariam: timeat bonus judicis sententiam. Nec hoc dico quia beatus Thomas aliquando malus fuerit vel perperus exstiterit, sed quia bonum quod egit aliquando inchoaverit nondum enim beato Thomæ futuro Petro per fidem dixit Jesus: « Sequere me, » nondum futuro per spem: « Sufficit tibi gratia mea; » nondum futuro Joanni per charitatem: « Sic volo ut maneat donec veniam. » Adhuc onagrum dimisit liberum in deserto, et Dominus resedit super pullum asinæ qui erat sine jugo. Sed veniet dies illa in qua tibi, Thoma, dicetur: « Cum esses junior, cingebas te et ambulabas ubi volebas: in proximo autem est ut alius te cingat et ducat quo tu non vis. » Sed jam historiam prosequamur.

D Pater et mater ejus justi ambo coram Deo, in fide stabiles, in spe perseverantes, in charitate ferventes, in elemosynis affluentes, in hospitalitate prævenientes, Domini timentes, et omnes homines propter Christum honorantes, parci admodum sibi, et juxta facilitates suas cæteris affluenti largitate profusi, in sermone providi. Quis enim unquam dives vel pauper sine difficultate regnum cælorum introivit? Neque enim coronabitur, nisi qui legitime certaverit. Regnum siquidem Dei vim patitur, et violenti rapiunt illud. Et si justus vix salvabitur, impius et peccator ubi parebunt? Ut ergo copiosa esset beati

Thomæ rei familiaris renuntiatio, crevit possessio.

Promoto enim archidiacono Cantuariæ, universo clero postulante, populoque acclamante archiepiscopoque Theobaldo acquiescente, imo præligente, beatus Thomas quasi qui bonis polleret moribus, in archidiaconatum feliciter subrogatur. In quo summo opere studuit sicut et in priore conversatione secretum suum omnes latere, oculis vero summi Dei patere, soli Deo serviendum esse, dicens cum Moyse, diligens et contestans sine intermissione testimonium conscientiæ propriæ et non alienæ, nulli unquam alii quam sibi plus credens de se, dicens cum Isaia : « Secretum meum mihi, secretum meum mihi. » Vere sunt sibi ut tuum tibi ut omnium sibi. Unusquisque enim sibi vivit vel sibi moritur juxta illud : « Gloriam meam alteri non dabo. » Sed nec pœnam possum. Consulens ergo sibi beatus Thomas et seipsum consulens, in archidiaconatu suo, soli Deo et sibi manifestari studuit, sibi tamen displicere ut placeret Deo, recolens illud Apostoli : « Si adhuc hominibus placerem, Christi servus non essem. » Sine offensa conversans in se, sine querela ad proximos. Quippe primus perfectionis gradus est custodia sui, secundus misericordia proximi, tertius charitas Dei ; primus innocentia, secundus beneficentia, tertius diligentia. Sed quia homo videt in facie, Deus autem intuetur cor, qui solus novit corda hominum intelligens, juxta Psalmistam, cogitationes de longe, et secundum alium : « Scrutans corda et renes, » quoniam beatus Thomas in quantum potuit mundo latere disposuit ; alius intus fuit, alius extra apparuit. Non paries dealbatus, non fermento Phariseorum corruptus, non sepulcro mortuorum assimilatus, non in agno lupus, non sub vulpe versutus, sed se suæque dissimulans esse maluit bonus quam videri, parvipendens dici malus ; nam et Dominus est Samarita, demonium habens. Videns autem Dominus constantiam famuli sui, probavit eum adhuc certius, sed gratia donavit abundantius. Jam enim illum toti mundo exposuit, divitiis circumvallavit, deliciis tentavit, honoribus ampliavit. Et qui fecit. Non est combustus in igne, non est submersus in amne. Qui cum per talia tentavit, faciens etiam cum tentatione proventum ut sustineret, ab omnibus inconcussum custodivit. Jam enim affabilitate beati Thomæ et industria, liberalitate et curialitate cognita et comperta, ut qui esset hilaris in vultu, mitis in alloquio, humilis in obsequio, providus in consilio, discretus in judicio, fidelis in commissio, ad palatium regis Henrici videlicet secundi, ipso rege postulante, archiepiscopoque invito præsentante, ascriptus est. Ibi denuo ad commendationem futuræ gloriæ dico, sæculo militare plus solito potuit, sed Christo maluit. Cancellariusque effectus utæque tabellæ signifer, in tantam amicitiam regi conjunctus est ut voluntatem regis in animo suo portaret, ore regis loqueretur, regni negotia ipse dispoueret, promoveret quos vellet, deponeret quos

vellet, quidquid juberet fieret, quidquid prohiberet deficeret ; etsicent virgo ad hoc naturaliter idonea ipsum rhinocerotæ constringeret loro suo et duceret quo vellet. Eaque propter magnam invdiam magnatorum contra se excitavit. In tanta autem potestate posito, tanta gloria et dignitate prædito, pristina remansit humilitas, innata adhæsit libertas et cognata liberalitas. Semper comes castitas et consors charitas. Individuæ ei comites singulæ virtutes, sexaginta videlicet fortes ex fortissimis Israel, ambientes lectum pacifici nostri, inimicusque ensis super fratrem suum propter timores nocturnos. Semper veritas in ore ipsius erat, semper falsitas aberat. Et si fortassis aliquando tentaretur carnalibus deliciis, sed nec est abstractus nec illectus. Quasi enim secundus Samson, omnium peccatorum vincula ex odore ignis, id est Spiritus sancti, dissolvit, factoque impetu in hostes pessimos, scilicet vitia, persecutus est Amalech usque ad interfectionem. Non pepercit gladius Aot : utraque manu utentis pro dextra. Cumque beatus Thomas tantæ esset potestatis, suspendit eum Deus a tumultu cuiuslibet mortiferæ actionis. Sed quia nemo sine peccato est, nec etiam infans, cujus vita est unius diei super terram : si quid in eo fuit purgandum, nihil tamen cremandum. Si cuius enim opus arserit, detrimentum patietur. Si quid in eo examinandum, nihil damnandum. Si quid fortasse egerit, in quo esset vanitas et præsumptio spiritus, nihil tamen in quo esset blasphemia Spiritus sancti, id est malitia. Et licet in carne vivebat, sed non secundum carnem militabat. Nec solum a criminibus et a magnis flagitiis, sed etiam a minoribus quasi vas electionis abstinerebat. Consilium ejus ut Cusi, melius quam Achitophel societas ut Jonathæ, opus ut Abisai. Opera autem ejus quæ fecit, quam discrete se habuit in pace, quam potenter in bello, quanta in hostes regis machinatus est, quanta in regno disposuit, quanta extra regionem acquisivit nonne hæc scripta sunt in notitia singulorum ? His ergo supersedeamus, quia ad alia anhelamus.

Et quia supra me est quod tractabitur, majoris studii pandenda sunt vela, laxandus sinus mentis et invocanda majestas Trinitatis. Dormiente itaque cum patribus suis Theobaldo Cantuariensi archiepiscopo, metropolitana Ecclesia, pastore orbata, lamina aurea nulli luxit in fronte, rationale non est visum in pectore, superhumera non gestatur in humeris, siluerunt tintinnabula et cætera ornamenta pontificalia involuta sunt. Sed quandiu desse non poterat cui primatia Anglorum et legatia sanctæ et apostolicæ sedis succederent, et in quem totius Christianitatis Angliæ regis respicerent, nec poterant filii Sponsi diu jejulare ne perirent : totus clerus totusque conventus juxta ecclesiastica decreta et sancita canonum et Cantuariensis Ecclesiæ privilegia dignum sibi perfici a rege postulaverunt pastorem. Gavisus ergo rex quoniam locum sublimandi quem amavit invenit, archidiaconum Cantua-

riensem et suum cancellarium in pastorem proposuit, commendavit, suscipi monuit et præcepit. Et quoniam videbatur minus religiosa esse persona, ut quæ in sæculari habitu hucusque latuerat, nec unquam habitum religionis induerat, et ideo ad tantum gradum minus idonea, libenter respuerent, si auderent. Sed quia regis et domini voluntati adversa fronte resistere tutum non est, solemnem electioni episcoporum et ipsi annuerunt. Inthronizatus autem indebitum honorem quem minus canonicè adeptus erat, in manibus summi pontificis Alexandri canonice postea et voluntarie, sicut sequentia declarabunt, dimisit, resignatumque et roboratum vix coactus et apostolica auctoritate constrictus recepit,

[*Hic incipiat prima lectio.*] Promotus ergo et initiatus sacræque unctionis sanctificatione et consecratione delibutus ita profecit, ut eatenus vixisse pro nihilo diceretur, et quasi hucusque semper moreretur et nunc vivere incœpisset; ita tempus vitæ amissum redimere satagebat. Itaque subito totius perfectionis culmen arripuit, quasi in crastino moreretur. Ubique prius abundavit delictum postmodum superabundavit et gratia, ut diceres Spiritum sanctum in specie columbæ in eum descendisse et mansisse apud eum. Meminensque illud Platonium, Imo Christianicum, scilicet veram philosophiam esse meditationem mortis, et illud Hieronymi: facile hæc omnia contemnit, qui se semper cogitat moriturum, non altum sapuit sed timuit. Cumque de sæculari sapientia et mundana philosophia, utpote in liberalibus artibus a primævo tempore imbutus, gloriari posset, nihil tamen inter mortales scire didicit, nisi Jesum Christum et hunc crucifixum. Crucifixoque affixus in cruce, priora membra sua mortificavit cum vitiis et concupiscentiis dicens cum Apostolo: «Mihi mundus crucifixus est, et ego mundo.» Et item: «Vivo ego, jam non ego; vivit vero in me Christus.» exuensque vetustam tunicam, et veterem hominem cum actibus suis, induit novum, qui secundum Deum creatus est, in spiritu et sanctitate veritatis, ambulansque in novitatem vitæ novus homo effectus est, mutatus in virum alterum, vere alterum, quia alteratum, cujus omnia in meliora conversa sunt. Jam enim superbia, si qua infulsit, expulsa asciscit humilitatem. Superfluitas proscripta ingerit parcitatem, prodigalitas eliminata inducit frugalitatem, luxus, si quis inerat, abstinentiam, si qua libido continentiam, si qua effeminatio severitatem, si qua vanitas maturitatem, si qua curiositas quietem, si qua inconstantia stabilitatem, immoderatio temperantiam, omnis illicitus motus animi honestatem, et omnis inutilis concupiscentia sæculi contemptum.

[*Lectio secunda.*] Jam erat affabilior in colloquio, hilarior in dato, serenior in vultu, parcior in cultu, moderatior in sumptu, sedulior in oratione, propior in contemplatione, sollicitior in predicatione, in tribulatione patiens, in miseriis compatiens, in misericordiis prævalens, in elemosynis affluens, in ira-

A cundia tardus, in remissione primus, in verecundia promptus, in mansuetudine totus, in subveniendo pius, in fide firmus, in spe certus, in charitate perfectus. Hæc est mutatio dextræ Excelsi; hæc sunt mutatoria, quibus induitur Jesus sacerdos magnus filius Josedech, præcipiente Domino. Hæc est mutatio habitus Thamar sedentis in bivio. Hæc est mutatio vultus David impingentis et procidentis ad portas civitatis coram Achis. Hæc est fragrantia vestimentorum valde bonorum Esau quibus induitur non Esau sed Jacob, assimilata odori agri pleni benedicti a Domino. Debebantur siquidem Esau. sed accepit ea Jacob, unde et a patre benedicitur. Amisit Esau primogenita sua quæ promeruit Jacob. Hoc est quod Apostolus ait: «Bonus odor sumus Deo.» Habens ergo archipræsul noster et martyr unctionem a sancto, accepit oleum gaudii pro luctu, pallium laudis pro spiritu mœroris. Proficiscensque per bivium litteræ Pythagoricæ ramum subversum et inclinatam contemnens per erectum et in cœlum usque tendentem iter arripuit dicitque cum Apostolo: «Non habemus hic manentem civitatem, sed futuram inquirimus:» et iterum: «Nostra conversatio in cœlis est.» Cumque ex relictis suis multa privata posset exercere negotia, omnia tamen fratrum communioni impendebat, juxta illam sententiæ Actuum apostolorum qua dividebatur unicuique prout opus exigebat.

Nil proprium dicens quod puncto mobilis horæ

Nunc prece, nunc pretio, nunc vi nunc morte
[suprema

C *Permutet dominos et cœcat in altera jura.*

Sedulo in mente et opere recolebat illam Apostoli sententiā: «Oportet episcopum irreprehensibilem esse, castum, sobrium, prudentem, ornatum moribus, pudicum, hospitalem, non vinolentum,» etc. et talem se exhibebat.

[*Lectio tertia.*] In tanta subditorum sollicitudine positus, summæ vigilantia magnaue opera sollicitabatur arguendo, increpando, obsecrando ne quis periret, ne lopus rapax veniens oves diriperet, sed ascendens ex adverso opposuit se omnibus hostibus murum pro domo Israel, et in certamine viriliter agonizabat, ecclesias sustentabat jura ecclesiastica auctoritate sua confirmabat, amissa vindicabat, ablata revocabat, diminuta restituebat, impios et rebelles anathematis sententiā coercerat. Invidit autem diabolus tantæ felicitati ejus et proœctui, et membra sua invidiæ facibus accensa et exagitata in suggillationem viri Dei excitavit. Quæ derogabant ei in angulis, obloquebantur in cubiculis, insidiabantur quibus poterant modis dracones in abscondito, leones in aperto. Sedebant in insidiis cum divitibus in occultis, ut interficerent innocentem. Sed quid fecit agonista noster? Zelus domus Dei comedit eum: incendit eum, absumpsit eum, et ideo opprobria exprobrantium ceciderunt super eum. O quam ferveas et quam sancta zelotypia sancti qua perfectam illam unam amicam, unam columbam, unam uni Sponso et ipse minister unus sociaret, et ipse in thalamo

admissus cum utroque et amoris et complexus conscius epithalamium caneret et diceret: «Ecce tu pulchra es et decora, ideo introduxit te Rex in cubiculum suum.» Et itidem de Sponso: «Amicus tuus candidus et rubicundus.» Hoc ergo zelo zelatus populum Dei optavit anathema esse a Christo pro fratribus suis cum Apostolo et deleri a libro Dei cum Moyse, ut populi dimitteretur offensa. O quanta de Dei misericordia præsumptio! optabat pro Christo separari a Christo. Pro Christo nolle habere Christum, deleri a libro vitæ ut tenacius scriberetur in libro vitæ! Revolvensque illam sententiam Apostoli: «Qui episcopatum desiderat, bonum opus desiderat,» cum primo honorem sitiret, non laborem: nunc e regione opus, non opulentiam; onus, non extollentiam desideravit. Proponensque se exemplum in se retorquebat B

illud Apostoli: «Imitatores mei estote, sicut ego Christi.» Sicque nihil docuit quod non fecisset, sicut ordo docendi postulat, sed versa vice quod ordo non postulat, multa erubuit docere quæ non erubuit facere, militans Deo in occulto, sed non ad occultum, imo ad hominum et angelorum commune spectaculum. Jam enim quod egit occulte in cubiculo, quod abscondit etiam in mentis secretario, super lecta prædicatum est.

[*Lectio quarta.*] Interea regnante gloriosissimo rege Anglorum Henrico secundo, quievit terra a prædonibus, pax et securitas erat a latronibus, evigilavit justitia, restaurabantur sanctorum ædificia. Canticum et jubilatio audiebantur in clero, etc.

(*Hæc ex ista Passione excerpta in præsentis sufficiant; cætera si quis legere velit, in ipso codice requirat.*)

HYMNUS DE SANCTO THOMA

ARCHIEPISCOPO CANTUARIE.

Lanreata novo Thoma,
Sicut suo Petro Roma,
Gaude Cantuaria,

Imo tota sit devota,
Pia laudum solvens vota,
Militans Ecclesia.

Thomas iste, dum tnetur
Legem Dei, promeretur
Iram regis Angliæ.

Ergo pulsus urbe cedit,
Et transcurso mari credit
Sese regi Franciæ,

Qui gratanter et condigne,
Tam devote, tam benigne,
Sicut patrem visitat.

Ibi velut novus tyro,
Thomas in fervore miro
Regi regum militat.

Tandem pace reformata,
Pace dolis palliata,
Regressus ad propria,

Jura servans Deo servit,
Inde sævit et protervit
Hostis arte varia.

Nunc ut vulpes frauventia,
Nunc ut tigris violenta,
Tentat omnes aditus.

Nunc minatur, nunc blanditur,
Ille nihil emollitur,
Idem manens penitus.

Rex compertus non moveri
Virum assertorem veri,
Nec frangi propositum,

Oves armat in pastorem,
Cohortatus ad cruorem
Cohortem satellitum.

Ergo neque parricide
Tam infande quam inside
Libertatis ut patronum
Tollant et usurpent thronum,
Ruunt in ecclesiam:

Præsul orans in secreto
Palam prodit hoste spreto,
Nec turbatur quies mentis
Turbæ metu sævientis,
Sed procedit obviam.

Sancti caput sacerdotis
Exoptatum mille votis
Sanctæ matris gremio

Ferrum bibit, cruor manat,
Et ibidem cæcum sanat
In tumultu medio.

Quid loquamur quæ sequuntur?
Per se satis eloquuntur
Ubique miracula,

Dæmon cedit, mors obedit,
Desperatis salus redit,
Lepræ fugit macula.

Angulose rex Anglorum,
Regem nescis angelorum
Universa singulorum
Ponderantem merita

Quisque metet id quod serit,
Impunitum nihil erit,
Nec capillus ullus perit,
Nedum ipsa capita,

Clери gemma, clare Thoma,
Motus nostræ carnis doma
Precum efficacia,

Ut in Christo vera vite
Radicati, veræ vitæ
Capiamus præmia. Amen.

DOCUMENTA HISTORICA

QUÆ

AD SANCTUM THOMAM CANTUARIENSEM
PERTINENT.

I.

CAUSA INTER CANTUARIENSEM ARCHIEPISCOPUM

ET EPISCOPUM LONDONIENSEM.

Archiepiscopus dicit se publice excommunicasse Londoniensem episcopum, ex justis et notoriis causis: scilicet tanquam incentorem schismatis, manifestumque turbatorem ecclesiasticæ pacis, et reum inobedientiæ jugis. Assertit enim eum, schismatis occasione, quosdam Ecclesiæ rebelles et ecclesiasticarum libertatum oppressores manifeste fovisse, canonesque ac mandata sua de coerendis et puniendis illis palam hactenus contempsisse. Propter hæc velut manifesta, sicut ait, et notoria, nec etiam ordinem judicium in ejus excommunicatione servandum putavit, sed, licet absentem, ignorantem et indefensum, licet inauditum, licet nec citatum nec communitum, iuste tamen et canonice, sicut allegat, damnavit, tanquam operum evidentia de crimine suo confessum. Scribit enim Ambrosius: « Manifesta accusatione non indigent. » Item Stephanus papa: « De manifesta, » inquit, « et nota plurimis causa non sunt querendi testes. » Sicut de fornicatore Corinthio sanctus exposuit Ambrosius: « In aliis quidem non est iudicis sine accusatore damnare, quia Dominus Judam, cum esset fur, quia non est accusatus, minime abiecit. Cognito autem prædicto opere fornicatoris, pellendum eum de cœtu fraternitatis Apostolus censuit. Omnes enim crimen sciebant; publice namque novercam suam loco uxoris habebat. In qua re nec opus erat, nec tergiversatione aliqua crimen tegi poterat. De quo Apostolus: *Absens, inquit, facie, præsens autem auctoritate Spiritus qui nusquam deest, jam judicavi ut præsens, eum qui hoc admisit, tradi Satanæ in interitum carnis.* » Juxta quod item Nicolaus papa ait: « Quæ Lotharius, » inquit, « rex fecit, accusatione non indigent. Manifesta sunt opera carnis, quæ sunt fornicatio, immunditia, » etc. Dimiserat siquidem uxorem propriam, et aliam superinductam publice tenebat; sicque, licet nec accusatus nec citatus, canonice tamen excommunicatus est.

A Similiter itaque, quamvis præter ordinem judicium, recte tamen a se damnatum Londoniensem episcopum assertit archiepiscopus; tanquam schismatis studio manifestum pacis ecclesiasticæ perturbatorem, et publice, opere contemptus, ipsorum canonum et suorum mandatorum inexcusabilem transgressorem.

Quod enim pacem ecclesiasticam manifeste perturbavit, hinc arguit: quod, cum dominus rex contra sacras leges et canones ac Ecclesiæ libertates plurima sibi de consuetudine regni servanda publice in concilio suo commemoraverit, et ab episcopis exegerit, idem episcopus, ut asserit, factus ibidem tanquam canis mutus non valens latrare, non ascendit ex adverso nec posuit se murum pro domo Domini, ut staret in prælio; sed etiam, quod longe deterius est, prætextu schismatis Romanæ Ecclesiæ, regi condescendum suadere palam enisus est, coepiscoporum animos ipse potissimum enervans quos potissimum et debuit et potuit ad contradicendum animare, sicut inter eos potestate primus et auctoritate præcipuus. Quod eum affirmat fecisse, non ob aliud quidem, nisi ne gratiam regis amitteret, quam tunc præ cæteris obtinebat, cum econtra sic ait Anacletus: « Nihil sit illo pastore miserius, qui luporum laudibus gloriatur, quibus si placere voluerit, atque ab his amari delegerit, erit hinc ovis magna perniciës. » Itaque, sicut prosequitur, per episcopi conniventiam rex factus audacior, et ad exigenda, quæ non decuit satis, ardentior, cum aliquandiu cæteri substitissent, ipsis deinceps offensus, durus, terribilis, et in multis adversus esse cœpit. Eundem autem episcopum in uberiorem satis familiaritatem admisit. Sic igitur infert indubitabile palam esse, quod Ecclesiæ pacem turbaverit. « Facientis enim, » ut ait Joannes papa, « procul dubio culpam habet, qui, quod potest corrigere, negligit emendare. » Scriptum quippe est: « Non solum qui faciunt, sed

etiam qui consentiunt facientibus, participes judicantur. Negligere enim, cum possit quis deturbare perversos, nihil aliud est quam fovere: nec caret scrupulo consensionis occulte, qui manifesto facinori desinit obviare. » Item Innocentius: « Error cui non resistitur approbatur, et veritas cum minime defensatur, opprimitur. » Item Gregorius: « Consentit erranti, qui ad resecanda quæ corrigi debent non occurrit. »

Deinde, sicut prosequitur archiepiscopus, cum formidabili metu et multis oppressionibus dominus rex in exactis obtinisset, idem archiepiscopus non multo post metus instantiam reversus ad cor, et dolore cordis tactus intrinsecus, nec sui vel suorum reveritus pericula vel damna, ubi exsilium subiit, ibi acerrimam de promissis contra dominum et Ecclesiam penitentiam agens, post sui suorumque proscriptionem, et post expectationem annuam, in eorumdem promissorum exactores, observatores, eisque consentientes, generaliter et publice sententiam anathematis dedit. Quam ut per Angliam denuntiaret, in vi obedientiæ mox episcopo Londoniensi, suffraganeorum episcoporum decano, scripsit et injunxit; mandans eisdem et aliorum quorundam, quæ secundum Deum erant, executionem, in virtute similiter obedientiæ. Qui, sicut ait, nihil mandatorum implens, sed tergiversationibus quibusdam aperte subterfugiens, sicque operis evidentiā crimen suum manifeste confessus, aperte sententiam excommunicationis incurrit. Canonum siquidem violatores et eis consentientes, sub anathemate constituit Adrianus papa dicens: « Generali decreto constituimus, ut exsecrandum anathema fiat, et velut prævaricator fidei catholice semper apud Deum reus existat, quicumque regum, vel episcoporum, aut potentum deinceps, Romanorum decreta pontificum in quoquam crediderit vel promiserit violanda. » Item Damasus papa: « Violatores canonum graviter a sanctis Patribus judicantur, et a sancto Spiritu, cujus instinctu dictati sunt, damnantur: Quia Spiritum sanctum blasphemare non incongrue videntur, qui contra eosdem sanctos canones aliquid vel agunt vel loquuntur, vel facere volentibus consentiunt. » Item Gregorius: « Nulli fas est vel velle, vel posse transgredi apostolicæ sedis præcepta. Sit ergo ruinæ suæ dolore prostratus, quisquis apostolicis voluerit contraire decretis; nec locum deinceps inter sacerdotes habeat, sed extorris a sancto ministerio fiat. Non de ejus iudicio quisquam postea curam habeat. Damnat a sancta et apostolica Ecclesia sua, inobedientia atque præsumptione, a quoquam esse non dubitatur, qui non solum præfatæ sanctæ Ecclesiæ jussionibus parere debuit, sed etiam aliis, ne præterirent, inculcare. Sitque alienus a divinis et pontificalibus officiis, qui noluerit apostolicis obedire præceptis. »

Hunc etiam reatum, ut archiepiscopus addit, sibi palam episcopus auxit, cum mandata sua, de prosequendis quæ secundum Deum erant, tam contu-

aciter tamque frustratorie declinavit, et manifeste subterfugit. Unde tanquam notorie reus, statim, ordine judiciario prætermisso, non indigne nominatim est excommunicatus.

Episcopus contra: Sententiam excommunicationis in se quamvis de facto latam, de jure tamen tenere negat, velut aperte contra jus et ordinem legum et canonum datam. Multoties siquidem, etsi de facto detur, nullatenus tamen apud Deum, vel apud homines ligat: veluti si quis excommunicetur ut compellatur ad malum; verbi gratia ut schismaticus aut hæreticus fiat aut permaneat. De talibus enim ait papa Gelasius: « Cui est illata sententia, deponat errorem, et vacua est: si injusta est, tanto eam curare non debet, quanto apud Deum et ejus Ecclesiam neminem iniqua sententia gravare potest. Ita ergo se ea absolvi non desideret, qua se nullatenus ligatum videt. » Si quis item vel majorem, vel parem sibi, vel alterius parochianum excommunicet; patet quod nullum eorum aliquatenus excommunicatio tenet; scribit enim Calixtus papa: « Nullus alterius terminos usurpet, nec alterius parochianum excommunicare præsumat. » Quare talis excommunicatio nec rata erit, nec vires ullas habebit, cum nullus alterius iudicis, nisi sui, sententia tenebitur: ubi sicut in concilio, apud Compendium, pro communi utilitate statutum est: « Cum alter episcopus alterius parochianum, causa deprædationis excommunicaverit: item et qui a prælato suo in causa qualibet ad majorem audientiam appellat, jam ejus jurisdictioni quantum ad causam illam non subiaceat. » Et ideo sicut nec judicari, sic nec etiam excommunicari, propter eam, ab illo deinceps potest, aut debet. Ut enim decrevit Sixtus papa: « Quoties episcopi se a comprovincialibus suis, vel a metropolitano prægravari putaverint, aut eos suspectos habuerint, mox Romanam appellent sedem, et interim eos nullus excommunicare præsumat. Quod si aliter a quoquam fuerit præsumptum, nil erit, sed viribus carebit. » Moris etiam quandoque fuit, in excommunicationis sententia, sicut et in aliis, ut eam suspenderet appellatio, post etiam mox interposita. Siquidem in Digesto scriptum est: « Integer status esse debet provocatione interposita. » Ergo etsi abstinere ordine quis jussus sit, et provocaverit, potest interim participare, cum sit hoc constitutum, et sit juris, ne quid pendente appellatione moveatur; juxta quod et adhuc obtinet, ut, si quis clericorum ab officio fuerit suspensus, et appellaverit, interim pro suspensio non habeatur; sicut nec degradatus pro degradato, nec de beneficio privatus, pro privato. Secus autem ideo forte jam obtinet in excommunicatione, quia secum habet sui executionem; quia mox eliminat ab Ecclesia, et loquendi jus tollit. Provocari non potest ab executione sententiæ, propterea nec ab excommunicatione. Quamvis autem sequens appellatio non suspendit excommunicationem, procul dubio tamen præcedens eam impedit ne fieri possit. Licetque de facto subsecuta fuerit,

ipso jure tamen eam infirmat, et irritam facit; quia A
 pristinum statum prorsus integrum appellanti custo-
 dit. Item excommunicationem contra censuram et
 ordinem canonum factam nullius esse momenti con-
 stare debet. Ordo quippe servandus est: sic enim
 statuit Adrianus papa: « Nemo suspendendus est a
 communione, nisi evocatus ad causam minime oc-
 currerit. » Item in concilio Parisiensi: « Nemo præ-
 propriè vel præpostere scilicet nec commonitus, nec
 convictus, est judicandus. » Item Augustinus: « In
 episcoporum concilio constitutum est, nullum cleri-
 cum, qui nondum convictus est, suspendi a commu-
 nione debere, nisi ad causam suam examinandam se
 non præsentaverit. » Item: « Nos quemquam a com-
 munionem prohibere non possumus, nisi aut sponte
 confessum aut convictum. » Itaque cum excommu-
 nicatur qui nec convictus est, nec confessus, imo
 nec auditus, imo nec citatus, imo nec commonitus;
 talis siquidem excommunicatio nihil viriū habere
 recte credi debet, veluti contra canones vel ordinem
 ecclesiasticum facta. Sicut et « prolatam » ut in
 codice legitur, « sententiam contra solitum judi-
 ciorum ordinem, auctoritatem rei judicæ non ob-
 tinere certum est. » Item: « Ea quæ statuuntur ad-
 versus absentes, non per contumaciam scilicet, de-
 nuntiationibus nequaquam ex more conventos, judi-
 cæ rei firmitatem non obtinere. » Quod utique
 multo ferventius in excommunicatione tenendum
 est; quæ quanto terribilior immaniusque præcipi-
 tat, scilicet in diaboli potestatem, in ipsam etiam
 æternæ mortem, tanto magis contra ordinem non
 est præcipienda: præsertim in episcopum, qui nec
 excommunicari nec etiam audiri debet nisi in syno-
 do: sicut testis est Julius papa: « Nullus episcopus, »
 inquit, « nisi in legitima synodo pulsatus, audiatur,
 vel judicetur, vel damnetur. » Item Zephirinus
 papa: « Quilibet episcopus non prius audiatur, vel
 judicetur, vel excommunicetur, quam regulariter
 vocatus sit ad suorum conventum episcoporum, et
 per eos ejus causa rationabiliter discernatur. » Item
 Hyginus papa. « Nullus metropolitānus, absque cæ-
 terorum omnium comprovincialium instantia, de
 causis episcoporum aliquid agat, quia irritæ erunt,
 aliter actæ, quam in conspectu omnium ventilatæ. »
 Item Calixtus papa: « Si quis metropolitānus, nisi
 quod ad suam solummodo propriam parochiam per-
 tinet, sine concilio comprovincialium omnium epi-
 scoporum, agere tentaverit, irritum erit et va-
 cuum. »

In crimine quidem notorio, quod et præter ordinis
 observationem recte detur excommunicationis sen-
 tentia, sicut allegat archiepiscopus, nec diffidetur
 episcopus. Crimen autem notorium in se prorsus
 diffidetur, scilicet ecclesiasticæ perturbationis et in-
 obedientiæ. Pacem enim Ecclesiæ, sicut affirmat,
 nullatenus turbare studuit, sed, quantis consiliis et
 auxiliis potuit, fovere et augere laboravit. Nec oc-
 casione schismatis in aliquo malignatus est contra
 Ecclesiam. Sed ne schismatis malum etiam Angliam

occuparet, sicut sæpius ruit, ob domini papæ et Ecce-
 lesiæ Romanæ fidelitatem, non superbe, non conten-
 tiose, non nimis severe agendum sensit et egit: tole-
 rabiliorem reputans in quibusdam dissimulationem,
 et ad tempus patientiam, quam separationis augere
 perniciem, ipsius etiam sanctæ Romanæ Ecclesiæ,
 quæ diebus his pleraque dissimulavit et sustinuit,
 secutus exemplum, et documenta sanctorum. Ait
 enim Urbanus papa: « Ubi multorum strages jacet,
 subtrahendum est aliquid severitati. » Item Augus-
 tinus: « Ubi per graves dissensionum scissuras, non
 hujus aut illius hominis est periculum, sed populo-
 rum strages jacent, detrahendum est aliquid severi-
 tati, ut, majoribus malis sanandis, charitas sincera
 subveniat. » Idem: « Cum quisquam fratrum et
 Christianorum in Ecclesiæ societate constitutorum,
 in tali peccato deprehensus, ut anathemate dignus
 habeatur: fiat hoc ubi schismatis periculum nul-
 lum est. » Idem: « Non potest salubris esse cor-
 rectio, nisi cum ille corripitur, qui non habet so-
 ciam multitudinem. » Et infra: « Consilia separatio-
 nis et inania sunt, et perniciosæ, atque sacrilegæ:
 quia impia et superba sunt, et plus perturbant infir-
 mos bonos, quam animos malos. » Hæc itaque,
 sicut ait episcopus, ipse secutus, si quid contra
 Ecclesiam exactum vel actum novit, non mox consen-
 sionis culpam contraxit, vel pœnam meruit, si non
 restitit, si non defensavit, si non vindicavit, cujus
 hoc officium fuit. Non enim quidquam timide, vel
 malitiose quidquam omisit, sed utiliter et consilio
 quædam dissimulans, quædam sustinens, sæpius
 etiam dominum regem intrepide, sed benigne, con-
 venit; multis etiam terrendo, (sed non commovito);
 ponens, sicut instruit Augustinus, ante oculos Dei
 judicium; terrens cruentam conscientiam, et sim-
 plicem suadens pœnitentiam. Multa multoties vel
 non fieri, vel corrigi, modestia supplicationis obti-
 nuit, quæ nullatenus impetrasset, si devium conten-
 tionis et severitatis incessisset. Cui non debet in
 vitium deputari, vel ad odium retorqueri, si domini
 regis gratiam sibi quæsitit aut servavit; præsertim
 cum apud eum nulli nocuerit, et multis sæpe præ-
 fuerit. Quod multo levius, et plenius archiepiscopo,
 tanquam specialius dilecto, potuisset evenisse, si mo-
 destiæ et humilitatis viam voluisset elegisse. Non
 itaque, sicut infert episcopus, officii sui neglector, vel
 canonum contemptor, aut violator fuit; quia, si quid
 forte tunc egit necessitate, non tamen voluntate.
 Violatores autem canonum definit Damasus papa
 « qui contra eos non necessitate compulsi, sed vo-
 luntarie faciunt vel facientibus consentiunt. » Et,
 sicut ipse ait, nec mala fecit nec malis consensit,
 sed, quatenus licuit et utile credidit, quantum po-
 tuit obviavit, implens illud prophætæ: « Recedite,
 exite, et immundum ne tetigeritis. » « Quid est, »
 ait Augustinus, « tangere immundum, nisi consen-
 tire peccatis? Quid est autem inde exire, nisi fa-
 cere quod pertinet ad correctionem malorum, quan-
 tum pro ejusque gradu atque persona salva pace

feri potest? Displicuit tibi quod quisque peccavit? non tetigisti immundum. Redarguisti? monuisti? corripuisti? adhibuisti etiam, si res exegerit, congruam, et, quæ non violet, disciplinam? Existi inde. Hoc est immundum non tangere, et voluntate non consentire, et ore non parcere. » Idem : « Neque consentientes sitis malis ut approbetis, neque negligentes ut non arguatis, neque superbientes ut insultanter arguatis. » Item : « Quisquis vel, quod potest, arguendo corrigit, vel, quod corrigere non potest, salvo parvis vinculo excludere non potest, æquitate improbat, firmitate supportat : omnino liber, prorsus securus, penitus est alienus. » Item : « Ita, quis malis sociatur, si mali aliquid cum eis committit, aut committentibus favet : si autem neutrum facit, nullo modo sociatur. Porro, si addat tertium, ut justus in misericordia corripiat, vel, si eam personam gerit, et ratio conservandæ pacis admittit, etiam coram omnibus arguat; removeat, vel ab aliquo gradu honoris, vel ab ipsa communione sacramentorum, plenissime officium implevit. Ubi autem cætera impediuntur, illa duo retenta semper incorruptum custodiunt; scilicet ne faciat malum, nec approbet factum. » Ex his itaque se non solum a reatu consensionis malorum excusatum probat episcopus, sed etiam manifestum in se modestiæ providentiæque præfert indicium, dum mala melius tulit, quam si etiam foras extulerit, et per hoc imminens schismatis argumentum impedit.

Plus etiam dicit, quod exactionibus domini regis non mox vel condescendit, vel condescendendum suasit; sed, cum coepiscopis, non minori periculo, nec impari sollicitudine substituit, donec, aliquandiu post, communiter, ob sedandam regis iram et vitandam Ecclesiæ turbationem non minimam, placuit ut regias consuetudines promitterent generaliter omnes, non expressim aliquas (quia expressa nocent, non expressa non nocent) : consuetudines etiam nomine tamen bonas intelligentes. Cum autem dominus rex, quales voluit, post expressisset, et in scriptum rede-gisset, id sigillis archiepiscoporum et episcoporum confirmari petens instanter et urgens graviter post multam et integro die cum episcopis protra etiam hæsitacionem, tandem archiepiscopus sine cæteris solus succubuit, et acquievit. Ipse viderit, si digne metum aliquem honori Dei et ordini suo præ-tulerit; si fidem etiam domino papæ et Ecclesiæ Romanæ servaverit, ad quam arctius de speciali juramento tenetur. Viderit etiam si, post Scyllæam voraginem, non etiam Charibdim inciderit, cum omnem promissionem regi deinde ruperit. Horum omnium se participem et reum negat episcopus, in centoremque schismatis, et perturbatorem pacis Ecclesiæ, tam vere quam probabiliter diffinitur.

Ab inobedientiæ quoque crimine se non minus excusat.

Quidquid enim mandatorum archiepiscopi vidit non lædere statum Ecclesiæ, diligenter, ut asserit, exsecutus est, magis ex officio suo, quam ex obedi-

tiæ debito; quippe ut ad quam se ei non teneri constanter affirmat. In cæteris vero, quorum exsecutio poterat schismatis malum augere, substitit; tum quia necessarium fuit, tum quia ad exsequendum se teneri non credidit; et, licet si ex abundanti, tamen ut undique plenius muniretur, semper ante mandatorum susceptionem, contra cuncta Ecclesiæ regni-que ac sui gravamina dominum papam appellavit, ejus audientiam eligens. Cumque trans mare postea coram legatis apostolicæ sedis appellationem prosequi præstio esset, sed non esset qui vel contradiceret vel judicare vellet, incontinenti denuo cum præsentibus coepiscopis appellationem innovavit. Quam dominus papa, per litteras ipsorum et legatorum sibi nuntiatam postmodum ipsis remisit; et eos ab ejus persecutione prorsus absolvit; pacemque ac inducias contra archiepiscopum, quousque in gratiam regis rediret, per litteras suas indulgit. Cum autem interim rumor insonuisset de novis quibusdam minis et molitionibus archiepiscopi, ne posset episcopus, sicut ante, aliquo modo quasi præventus innodari, mox iterum publice provocavit, et omnino recusans ac declinans archiepiscopum, tanquam ex manifestis causis jure sibi suspectum, audientiam domini papæ præelegit. Sic igitur, ut inferi, etsi teneri ei obedi-re, non tamen aliquatenus inobediens potest de-prehendi; præsertim cum non frustratorie, sed juxta necessitatem semper præveniens appellatio, sibi contra crimen inobedientiæ remedium foret et excusatio : præsertim etiam cum eandem appellationem prosequi nunquam subterfugerit, nec adhuc subterfugere velit.

Sed nec etiam obedire quidquam omnino se debere sentit et asserit. Siquidem ex professione quam Theobaldo, bonæ memoriæ archiepiscopo, fecit in Herefordiensi civitate, se tentum non esse dicit, nisi dum Herefordiensis episcopus existerit; quod cum esse desiit, omnino per dominum papam liber et absolutus desiit, et ex ea professione teneri, tanquam tacite, licet non expressim, ad tempus facta, scilicet dum inde maneret episcopus. Cujus rei fortissimum argumentum esse, quod utique non teneretur, si alterius provinciæ fieret episcopus. Sæpius promissionibus conditiones quædam inesse tacite intelliguntur, quamvis non exprimantur, veluti cum dos alicui, propter certam matrimonii spem, absolute promittitur. Non minus enim subest tacita conditio, scilicet ut ita demum promissio teneat, si nuptiæ sequantur. Item, ut in Digesto est, cum inter locatorem et conductorem convenit, ne conductor inter tempora locationis de fundo expellatur; quamvis nihil exprimatur de solutione pensionis, tamen verisimile est ita convenisse de non expellendo conductore, si pensionibus pareat ei, ut oportet, colat. Cum autem, ut adjungit episcopus, ad Londoniensem sedem translatus professionem archiepiscopo minime fecerit, nihil equidem ei debere dicit, scilicet nec suo, etiam Londoniensis Ecclesiæ nomine. Semel enim liberatus, nec per eam in po-

testatem recidit, sicut nec de jure fori filius familiæ, cum extraneæ personæ filius adoptivus sit, secum tamen patrem adoptivum in potestatem trahit. Magis autem per eam ipsam liberatam dici convenit: præsertim cum de jure non filia, sed mater Cantuariensis Ecclesiæ sit; sicut et a prima constitutione Ecclesiæ in Anglia, diebus quinquaginta duorum apostolicorum fuisse perhibetur, et in scriptis authenticis legitur: sicut etiam beatus Gregorius, in ea Christianitatem renovans, censuit et ordinavit ut deinceps esset prout ejusdem scripta testantur; quamvis secus obtinuerit, occasione paganitatis quæ mox Londoniæ nequirit exstirpari. Propterea sedes archiepiscopalis præter ordinem esse cœpit, et hæc tenus manet, Cantuariæ: ubi primo renovata est, et inde paulatim per Angliam propagata, reclamantibus tamen assidue Londoniensibus episcopis. Sic igitur bona fide, justisque rationibus se liberum proclamans episcopus, velut semel per auctoritatem apostolicam manumissus et exemptus, nec unquam deinceps novæ subjectionis servituti suppositus, et inobedientiæ se reum in nullo probat, tanquam nec obedientiæ debitorem.

Si replicat archiepiscopus quod saltem tanquam apostolicæ sedis legato sibi tenebatur obedire, contra id episcopus oppositæ appellacionis et recusacionis obstaculum objicit: qui se solum domino papæ deinceps subjectum fuisse manifeste convincit. Addit etiam quod jure legationis nondum habet archiepiscopus jurisdictionem in Anglia. Siquidem Romanæ sedis legatus ut legatus Cæsaris est, scilicet præses vel corrector provinciæ vel proconsul. Sic autem in Digesto est: « Proconsuli jurisdictio, scilicet contentiosa, prius non competit quam in provinciam venerit. » Item: « Præses in provinciæ homines tantum imperium habet, et hoc, dum in provincia est. » Nec igitur, ut infert episcopus, potest aliquatenus archiepiscopus ut legatus in Angliam advertere, cum nec in ea sit, nec in eam post tempus legationis venerit.

Sic itaque concludit episcopus sententiam excommunicationis in se latam nullatenus tenere: tum quia prius præter ordinem lata est, cum in se nihil notorium criminis sit, tum quia prius appellavit, tum quia de archiepiscopi jurisdictione non sit.

Archiepiscopus ad hæc: Quamvis, inquit, prædicta in episcopo notoria non sint, quia tamen publice de eo dicuntur et creduntur, ob ea juste damnatus est; et præter observationem ordinis iudiciali: maxime quia in multis libertas et dignitas Ecclesiæ, per ejus, sicut ipsemet loquitur, dissimulationem et patientiam periclitata sit. Quem ob hoc etiam extra ordinem poni iustum et utile fuit, ut alii rebelles et turbatores Ecclesiæ magis terreantur, et respiciant, cum sibi dubitare non debeant inferendum quod tanti nominis et potestatis viro jam viderint illatum. Sæpius enim contra strictum rationis tenorem, et institutionis solitum ordinem, necessitatum varietas multa fieri suadet et urget. Quia, sicut ait papa Innocentius: « Aliud est ordo

A legitimus, aliud usurpatio quod fieri tempus impellit. » Sed Silvester papa similiter in quosdam adversarios suos animadvertisse legitur, sicut ipsemet scribit. Ait enim: « Usiliarius Patricius mandavit me ad se pacifice venire, et pro quibusdam ecclesiasticis dissitationibus in palatium principis, ad primum et secundum velum retinuit omnem clerum et populum, qui mecum veniebat, nisi me solum et Vigilium diaconum meum—me vero vi retentum miserunt in exsilium, in quo sustentor pane tribulationis et aqua angustiae. Ego tamen non dimisi, nec dimitto propterea officium; sed cum episcopis, quos congregare potui, eos qui talia erga me egerunt anathematizavi. » Idem Vigilio: « Habeto cum his, qui tibi consentiunt, plenæ damnationis sententiam; sublatumque tibi nomen ministerii sacerdotalis agnosce, sancti Spiritus iudicio, et apostolica a nobis auctoritate, damnatus. » Ad hujus igitur exemplum, quod de crimine, quamvis non notorio, tamen sibi manifesto et indubitato, rectissime, quamvis extra ordinem, damnaverit episcopum, congrue sibi videtur archiepiscopus allegare; quasi de jure facere potuerit et fecerit, præsertim cum et domini papæ vice fungatur, cujus etiam legatus est.

Episcopus contra: Non exemplis, inquit, sed legibus iudicandum est; nec quid factum sit Romæ, sed quid fieri debuit, attendendum est. Licuit quidem semper et licet domino papæ contra jus strictum sæpius agere, maxime cum necessitas postulet. C Quamvis enim legibus vivat, legibus tamen solutus est. Et sicut Christus in se sacramenta nostra complevit, non aliqua sui necessitate, sed nos ad imitandum provocandi voluntate: sic etiam dominus papa sæpe canonibus obtemperat, non quod necesse habeat, sed ut ejus auctoritas et exemplum alios ad obtemperandum urgeat. Sæpius etiam eis non stat. In ejus siquidem potestate est sicut novos condere, sic et veteres moderari, vel temperando vel aggravando, nonnunquam etiam eorum censuram penitus omittendo, vel contra faciendo. Quam utique potestatem solus accepit, et sibi soli continue retinet, et, cum vices suas sæpius aliis credat, in partem quidem vocat sollicitudinis, non in plenitudinem potestatis. Quibus etiam si quandoque laxius indulget, non tamen eatenus ut liceat eis aliquid vel extra metas antiquitatis, præsertim quas auctoritate Veteris et Novi Testamenti tenentur observare. Nam nec etiam domino papæ licet has transgredi, sicut est testis Zosimus papa: « Contra Patrum, » inquit, « statuta aliquid concedere vel mutare nec hujus sedis potest auctoritas. » Apud nos inconcussis radicibus vivit antiquitas, cui dicta Patrum sanxere reverentiam. Et peccata quidem semper, etiam a primo hominis peccato, semper antiquitas est, ut criminis reus damnetur, sed deinde, qui confessus, vel convictus, vel citatus fuerit. Nam et Adam est non prius damnatus, quam citatus et commonitus, cum dictum est ei: « Adam,

ubi es? » nec prius quam confessus, cum ait : « Mulier dedit mihi et comedi. » Mala quoque Sodomæ sicut scribit Evaristus papa : « Nolit Dominus audita prius judicare, quam manifeste cognosceret : cum tamen omnia nuda et aperta sunt oculis ejus. Unde ait : *Descendam et videbo utrum clamorem opere compleverint.* Cujus exemplo monemur ne ad proferendam sententiam unquam præcipites simus, aut temere indiligenterque discussa quoquo modo judicemus, dicente veritatis voce : *Nolite judicare, et non judicabimini.* Sed nec aperte traditur, quod adversus hæc aliquid egerit papa Silvester in Usiliarium et Vigilium.

Contra ordinem igitur quem etiam tam diligenter Deus ipse servavit, et ex se servandum docuit, quem etiam tam immobiliter servandum auctoritas sanctorum tradit, nunquid quod archiepiscopus egit etiam legatus obtinere debet? et non magis irritum esse? præsertim cum et simul accusator et judex non potuerit. De suspecto siquidem ait Nicolaus papa : « Quia suspecti et inimici judices esse non debeant, et ipsa ratio dictat, et multis probatur exemplis. Quoniam quid gratius dare quis inimico potest, quam si ei ad impetendum, quem lædere forte voluerit. » Et infra : « Hinc Justinianus imperator pius legibus suis promulgasse dgnosci-
tur dicens : Liceat ei, qui suspectum judicem putat, antequam lis inchoetur, eum recusare, ut ad alium recurratur. Ita quodam modo naturale est suspectorum judicem insidias declinare, et inimicorum judicium velle fugere. » Idem : « Anastasius etiam Pirenorum episcopus tertio vocatus, quia non occurrit, a patriarcha suo condemnatus exstiterat. Sed solum quia, cum vocaretur ad synodum, quod inimicus esset ipse qui judicabat, clamavit, a sancta Chalcedonensi synodo ad sententias illatas examinandus reservatur, sed quasi pro nihilo habita condemnatione priori. » Quod item non debeat idem accusator esse, simul et judex, testis est Augustinus dicens : « Quis sibi utrumque audet assumere, ut cujusquam ipse sit accusator et judex? » Item Fabianus papa : « Nullus unquam præsumat accusator simul esse, et judex, vel testis; quoniam in omni judicio quatuor personas semper necesse est esse : scilicet judices non idem sint, sed per se accusatores, per se judices, per se accusati. » Sicut igitur infert episcopus, ejus qui contra præcedentia omnia, tam manifeste, tam indiscrete, tam præcipitanter egit, quid nisi verborum inanis prolatio et in ventum jactatio putanda est, ut nec nomen sententiæ mereatur?

Archiepiscopus addit etiam item quod cum intra diuinam expectationem, multis sæpe supplicationibus, comminationibus, dominum regem flectere studuisset, nec prævaleret, et demum in hoc esset ut securim poneret ad radicem, cum ulterius parcere nec posset nec deberet, episcopus in regis causa tam indubitanter et notorie injusta se primum adversarium, et eatenus vehementem defensorem

A opposuit, ut ipse etiam contra justitiæ prosecutionem appellaverit. Sic consensum notorium in crimine notorio palam et inexcusabiliter ostendens : et ex hoc, quin excommunicatione, quamvis præter ordinem facta, juste firmiterque teneatur, negare nullatenus valens.

Episcopus e contra : Non solem se, sed Ecclesiam Angliæ totam, illius appellationis interpositionem consuluisse, secumque fecisse, respondit; non malis consentiendo, non mala defendendi proposito, sed ob Ecclesiæ Romanæ fidelitatem, suique pacem : scilicet præpediendo nimiam nimisque periculosam archiepiscopi severitatem, ne schismatis augetur discrimen, quod etiam cum enormi Ecclesiæ damno secuturum fuisse dubitari non poterat, si conatus archiepiscopi processissent : quando etiam constat humilitate patientiæ melius vicisse potuisse, et jam acerbatis multiplicatione satis periculosius regem exacerbasse. Si replicat archiepiscopus quod non eo minus, sed etiam magis notorius est mali consensus, quod in socia deprehenditur multitudine : contra episcopus magis præpeditorem schismatis probabiliter constituitur; et mali consensus prorsus diffiluitur. Sed et id post secundam et etiam tertiam demum correptionem fieri debet, sicut et Dominus in Evangelio præcipit dicens : « Si peccaverit in te frater tuus, corripue eum inter te et ipsum; si non audierit te, adhibe tecum unum aut duos; si eos non audierit, dic Ecclesiæ : quod si nec Ecclesiam audierit, sit tibi velut ethnicus et publicanus. » Nihil igitur, sicut concludit episcopus, virium habere sententia non indignè censetur, quæ nihil etiam ordinis prorsus observare reperitur.

Archiepiscopus ad hæc determinat : Tunc quidem ordinem omittendum non esse, cum servari potest; cum autem non potest servari, pro servato tamen per interpretationem habendus est. Nam et alias etiam apud Deum factum est, quia fieri non potuit, pro facto tamen nihilominus accipitur; ut in eo qui baptismi seu pœnitentiæ sacramentum desiderat, nec implere potest.

« Huic enim, » sicut ait Cassiodorus, « Votum pro opere reputatur, scilicet propter impossibilitatem. Sed et apud homines regula juris est, in omnibus causis id pro facto accipi, in quo quis alium perhorrescit quo minus fiat; ut in codice dicitur de eo qui propter vim vel metum non appellat : nihilominus enim res jure appellationis agitur. Similiter itaque, sicut infert archiepiscopus, jure processisse dicit, in causa contra episcopum, quamvis non in synodo sua, quamvis sine commonitione vel citatione præmissa. Synodum etenim alienam habuit qui suam habere non potuit. Sed et pro citato et præmonito probat habendum, qui se magis etiam obtulisse debuit, ut cujus fama plurimum laborabat; quem etiam multis ex causis satagere vel commonere nequivit : primo quidem, quia magnum chaos terrarum inter se et ipsum sit; deinde, quia jamdudum apud externas gentes peregrinus et exsul, eorumque elemosynis

sustentatus, neminem ad faciendas citationes vel ammonitiones officialem habere possit, nisi forte qui se gratis et pro Deo tantum obtulerit; tertio, quia, cum aliqui quandoque missi per regis ministros capti, verberati, male tractati, incarcerati, periculoque membrorum aut mortis subditi sunt; ceteri, justo metu præditi, legationem tam formidabilem subire deinceps ausi non sunt. Sic igitur, ut concludit, legaliter et canonice tanquam contra citatum et præmonitum episcopum, sententia processit, et firmiter obtinet.

Episcopus econtra : Non semper quod fieri debet pro facto habendum, respondit; cum fieri propter vim vel metum non potest. Namque et alias, ut in Digestis scribitur, in jure proditum est, deprehensione fieri manifestum furem. Cæterum, si cum tibi furtum facerem, abscondisti te ne te occidam, etiam si vidisti furtum fieri, attamen non est manifestum. Cum etiam, propter metum, testamentum non facis, litem non contestaris, rem non evincis, reum non accusas; non tamen vel testamentum factum, vel litem contestata, vel res evicta, vel quis accusatus. Habet etiam similibus multis similiter. Denique quod dicitur propter metum aut vim omisum pro facto accipi, non de his accipitur quæ lex fieri jubet, sed de his quæ ad remedium indulget; ut sunt appellationes, præscriptionum interpretationes; nam hæc, si propter vim vel metum omittuntur, pro factis tamen accipiuntur. maxime si quis eas facere non ausum publice protestetur. Propterea quidem archiepiscopus ordinem etiam ammonitionum et citationum observasse potuit, hinc plane vincitur, quia multo fortius excommunicationis faciendæ præparatoria præmissæ timere non debuit, quia jam factæ denuntiationis, passim et publice per Angliam post mittere non dubitavit, scilicet litteras suas de evitandis excommunicatis per nuntios suos ardentem præsentans, in episcoporum synodis, in publicis ecclesiarum conventibus, in procerum etiam consessibus. Cum itaque, sicut episcopus infert, ordo nullatenus vel servatus vel pro servato sit, patet quod excommunicatio, facta præter ordinem, excommunicationis nomine digna non sit.

Archiepiscopus instat et aliter adhuc. Contra crimen, inquit, notorium appellari non potest. Nam in codice est: « Eis qui aperte manifesteque convicti sint, appellationis beneficium denegatur. » Item: « Observandum est ne quis eorum qui manifestam violentiam commiserint, audiat appellans. » Item in Digestis: « Constitutiones quæ de recipiendis appellationibus loquuntur, locum non habent in eorum personis, quos damnari publice interest. » At, ut assumit quin in rege contra Deum et ejus Ecclesiam pericolosissima sit et manifesta transgressio, manifesta etiam circa sui et suorum spoliationem innocentiumque proscriptionem violentia, nec ipse diffiteri potest; quæ certe palam operum evidentia testatur, super quibus etiam tam consona totius mundi detestatione vincitur. Unde, sicut infert, tan-

quam aperte manifesteque convictus, nec in eis appellans audiri debet, maxime cum ipsum ob ea puniri publice intersit, ut et ipse respiscere compulsus salvetur, et Ecclesiæ status reformetur. Itaque, sicut addit, in ejus causa prorsus excluditur appellatio, si nec episcopus nec aliquis pro eo vel appellare potest, vel appellans audiri debet; præsertim cum in Digestis est: « Non liceat in aliena causa cuiquam appellare. » — « Nisi forte, » sicut ibidem excipitur, « quibus mandatum est, vel negotium alienum gerunt; quod mox reus ratum habeat. » At, ut assumit, hic nec mandari nec ratum haberi potest: quod nec fieri debet. Solent item, sicut et indignum est, audiri appellantes quorum interest: « Sed hos, » sicut et ibidem est, « verum est propriam causam defendere. » Propriam autem causam eam esse palam est, cujus emolumentum vel damnum ad aliquem suo nomine pertinet, ut cum procurator victo venditore, vel e converso; vel creditor, victo debitore, vel e converso. Causa vero regis, ut assumit, nec episcopi nec alterius quidquam interesse facit, ut intercessionem interponant; imo potius patrocinium ad corrigendum communiter Ecclesiæ tota fidelium adhibere debet. Quia publice interest potius tantum malum coerceri, quam, vel sub alicujus necessitatis palliatione, foveri. Non itaque, sicut concludit, in tam detestandi negotii parte aliquem, vel ab ipso rege, vel ab episcopo, vel ab alio quovis appellatio fieri potest vel facta recipi debet.

Episcopus econtra respondit, et regem et se, vel quemvis, nomine regis juste provocare potuisse: maxime quia dominus rex nunquam se justitiæ subtraxerit, imo semper obtulerit; sed et instantem et satis anxie postulare non deserit sibi iudices contra archiepiscopum delegari; coram quibus etiam prius satisfacere pollicebatur, dummodo securus esset, sibi postmodum satisfactorum iri: cum inter hæc, contra leges et canones, archiepiscopus in eum et accusator et iudex esse niteretur, contra tam manifestum gravamen, et rex et ejus nomine quivis justissime potuit appellare. Præterea licet etiam rex appellare pro se dedignaretur, non eo minus tamen id alii fuerat indulgendum, sicut et indulgetur in causa damnandorum. Nam ut in Digestis est: « Non tantum ei qui ad supplicium ducitur provocare permittitur, verum alii quoque nomine ejus; non tantum si ille mandaverit, verum quisquis alius provocare voluerit. » Nec distinguitur utrum necessarius sit necne; creat enim humanitatis ratio omnem provocantem audiri debere: ergo, etsi ipse acquiescat sententiæ; nec queritur cujus intersit. Quid ergo si restat, qui damnatus est, perire festinans? adhuc putem differendum supplicium? Si hoc itaque, sicut argumentatur episcopus, admittitur in causa periculi corporis contra pœnam temporalem: quanto fortius admitti debet, ubi periclitatur etiam ad mortem æternam animæ, scilicet in anathematis causa. Quanto siquidem corpore dignior est anima, tanto potentius ei

subveniri debet. Item quod episcopus et alii congrue A provocare potuerint et iuste provocaverint, hinc, ut idem ait, palam est; quia sui plurimum, imo totius Ecclesiae, simul interfuit, scilicet ne schisma dilataretur, quin etiam contra gravamina propriae causae iuste provocaverit ipse, non potest, inquit, negari.

Archiepiscopus addit et item, sibi legationem esse concessam, et animadversionis in rebelles et turbatores Ecclesiae potestatem indultam, remoto appellationis obstaculo, proptereaque nec appellationem sequentem, vel praecedentem impedisse jam factam anathematis ultionem, vel eam ullatenus infirmare.

Episcopus contra: Quamvis, inquit, sine provocationis obstaculo, non tamen contra leges et canones ipsi mandata est executio. Nam, quamvis etiam liberam et generalem jurisdictionem ex mandato suscepit; non tamen ex hoc consuetum et legitimum jurisdictionis ordinem transgrediendi facultatem habuit: sicut argumento est illud in codice.

« Si quando talis concessio imperialis processerit, per quam libera testamenti factio concedatur, nihil aliud videri principem concedere, nisi uti habeat legitimam et consuetam testamenti factionem: neque enim credendum est Romanum principem, qui jura tuetur, hujusmodi verbo totam observationem restitutorum multis vigiliis excogitatum atque inventam velle subverti. » Similiter itaque, sicut infert episcopus, quamvis dominus papa legationem etiam generalem et liberam archiepiscopo dederit, si forte dedit; non tamen contra legitimum et consuetum juris ordinem ei facere quidquam permisit. Qui si contra fecit, sicut utique fecisse supra probatum est, tamen etiam ipso jure cassum et irritum non eo minus est, quia legatus est, vel quia provocatio prohibita est. Item et, sicut addit episcopus, quamvis contra animadversionem archiepiscopi per dominum papam prohibita sit appellatio; non eo minus tamen sibi provocare licitum fuit. Nam et alias, ut in Digestis est: « Cum a principe appellandi nec facultas, nec fas sit, interdum et ipsius sententiam suspendit appellatio. Cum enim praeses provinciae deportandi quem in insulam, vel decurionem puniendi jus non habeat; debet tamen eum adnotare scilicet bonis ejus descriptis, quem deportandum vel puniendum putat: sic deinceps principi scribere, missa plena opinione scilicet quare deportandum vel puniendum sentiat; ut ita princeps aestimet an sequenda sit ejus sententia, demumque in insulam deportando, vel decurioni, poenam assignet. » Potuerunt itaque, sicut ibidem dicitur, appellare, non solum quando praeses principi scribit, sed etiam quando princeps de insula, seu de poena rescribit. Quid enim si praeses mendacis apud principem oneraverit eum, quem deportandum vel puniendum laborat. Recte itaque dicitur humanitate suggerente ut, et hoc, et illo tempore, non frustra provocent, quia non adversus principem, sed adversus judicis calliditatem, provocant. Quorum etiam status inter-

esse jubetur, provocatione interposita. Ergo, et si abstinere ab ordine decurio jussus sit, scilicet per principem et provocaverit, poterit interim participare; cum sit hoc constitutum, et sit juris, ne quid pendente appellatione innovetur. Itaque, sicut infert episcopus, sicut a principe non sit appellandum, nonne similiter et episcopo, quem archiepiscopus per se punire de canonum censura prohibetur, licere deberet, etiam si dominus papa cum ad archiepiscopi suggestionem degradasset, appellatione tamen obviare, statumque sibi integrum retinere? Multo fortius igitur, etsi non dominus papa, sed per dominum papam archiepiscopus in ipsum, etiam sublato provocationis obstaculo, similiter advertisset, sequens tamen idem appellationis remedium ipsi subveniret; quanto magis et praeventiens, ne quid fieri posset, impediret. Et hoc igitur in excommunicationis etiam sententia non minus obtinere debere concludit episcopus, non solum si generaliter in quos animadvertendi, sed etiam si specialiter excommunicandi se potestas archiepiscopo, non obstante appellatione, concessa fuerit. Item, ut addit, quamvis appellatio, velut inhibita, sententiam infirmare non posset, infirmat tamen eam praemissa toties contra archiepiscopum tanquam domini papae postulata cognitio. Nam et utrumque decernit Sixtus papa: « Dum, » inquit, « episcopi Romanam Ecclesiam appellaverint, aut ab ea se audiri poposcerint, nullus eos interim excommunicare praesumat. Quod si aliter a quoquam fuerit praesumptum, nil erit, sed viribus carebit. » Juxta quod, etiam Anastasii Pirenorum episcopi depositionem non tenuisse supra memoratum est.

Archiepiscopus post haec ad specialia quaedam transit. Dicit enim se dudum corripuisse episcopum, quod filios sacerdotum contra canones ad sacros ordines promoveret; et inter ceteros unum ad sacerdotii gradum, in ecclesia quadam in qua ipsum patri successisse cognovit: quod incontinentiam etiam clericorum in episcopatu suo, non solum non correxerit, sed etiam pretii interventu sustinuerit. Et ob hoc se mox etiam mandatum subdedisse commemorat, nisi de tantis excessibus iudicio coepiscoporum satisfaceret. Quod cum, inquit, facere neglexerit, jure in eum tanquam in praemonitum et aperte contumacem anathematis ultio facta est, nec, appellationis occasione, rata non esse debet. Nam, ut dictum est: « Per contumaciam condemnatus, si appellat, non auditur. »

Episcopus econtra, se de contumacia nititur excusare, quia nec, ut archiepiscopo, tanquam non subjectus, nec ut legato, tanquam suspecto et recusato, tenetur obedire; sed soli domino papae: maxime postquam ad eum appellaverit, et ipsius audientiam elegerit. Contumaces autem, ut in Digestis est, non judicantur, nisi qui obedire deberent et non obsequuntur, id est qui ad jurisdictionem ejus, cui negant obsequi, pertinent.

Sed et plane negat episcopus clericorum inconti-

mentiam muneris interventu permisisse, vel eorum A correctionem neglexisse. Quin imo, sicut notum esse respondit, sæpius omnes communiter in synodis, et seorsum in capitulis diligenter commonuit: omnibus etiam, ut decuit, sæpius publice comminatus est, et nonnullos demum digne corripuit, et emendavit. Si vero prorsus vitium extirpatum non est, ait non imputandum sibi, sed magis delinquentium multitudini, vixque, vel nunquam, abolendæ consuetudini. Quod enim a multis peccatur, multum est præsertim id malum, cui tam invincibiliter ex prima damnatione peccati subiaceat genus humanum. Quod item reprehenditur filios sacerdotum ordinasse, nec huc usque quidem confitetur concessum. Omnes quidem administrare nequaquam ignorabat prohibitum esse, sed nec omnes poterat rejicere; proptereaque quod decuit et potuit fecit. Scilicet archidiaconos suos, quibus plenior est notitia clericorum, et quorum officii est eos præsentare, diligenter adjuravit, et eis districte præcepit, ne quem contra canonum censuram admitterent, vel præsentarent. Si quid igitur contra minus canonice fieri contingit, in archidiaconos, inquit, magis redundare convenit. De filio quoque sacerdotis quem in ecclesia reperit a prædecessore suo prius institutum, et diaconum ordinatum, posteaque per se cuidam archiepiscopi clerico ad annum canonem gravem satis, de ecclesia solvendum, ex transactione quadam dicit obligatum, et quia de residuo secum capellatum sustentare non poterat; ipsum quidem se promovisse fatetur in presbyterum: præsertim quia non alias cum indignum, sed boni testimonii satis agnovit. Si minus itaque vel in hoc vel in alio diligens fuit, etiamsi archiepiscopo tenebatur obedire, non tamen contumax et ejus mandati contemptor, ut ait, convincitur, quod iudicio coepiscoporum, prout mandavit non satisfecit; quod nec illud subterfugit, nec coram illis, sine accusatore præsentem, quem difficietur excessum corrigere cogebatur. Si quid vero deliquit, domini papa censuram in nullo refugit: quod, sicut auctor est canonum, ita et ultor est transgressionis eorum.

Archiepiscopus demum ait: Quod etiam sententia, quamvis non legitima vel illicita, tamen liget, teste Parisiensi concilio in quo legitur sic: « De illicita excommunicatione lex Justiniani imperatoris, quam probat et servat, decrevit ut nemo presbyter excommunicet aliquem, antequam causa probetur, propter quam canones hoc fieri jubent. Si quis autem adversus eam aliquem excommunicaverit, ille quidem, qui excommunicatus est, majoris auctoritate sacerdotis, ad gratiam sanctæ communionis redeat. Is autem, qui non legitime excommunicaverit, in tantum absteineat a sancta communione tempus, quantum majori sacerdoti visum fuerit. » En, inquit, excommunicatio quamvis illicita, vel non legitima, tamen tenet; adeo quidem ut per majorem sacerdotem ad communionem redire, id est absolvi, debeat, qui sic excommunicatus fuerit. Et hoc igitur

tur etiam in episcopo tenendum consequenter concludit. Item, ut addit: Si prius non tenet sententia, jam tenet cum contemnetur. Nam, ut ait Gregorius: « Sententia pastoris, sive justa, sive injusta sit, timenda est vel tenenda, ne hic qui subest, et injuste forsitan ligatur ipsam suæ obligationis sententiam ex alia culpa mereatur. Is igitur, qui sub manu pastoris sui judicatur, timeat reprehendere, ne, etsi injuste ligatus est, ex ipsa tumida reprehensionis superbia, culpa quæ non erat, fiat. Si igitur, saltem ex sequenti scilicet contemptus culpa, vere ligatum probat episcopum; eatenus etiam, ut quamvis injusta sit sententia, tamen omnimodo vitandus sit. Sicut est in concilio Sardicensi in quo legitur sic: « Si episcopus forte iracundus, quod non esse debet, cito et aspere commoveatur adversus presbyterum sive diaconum, et eum de Ecclesia ex terminare voluerit; providendum est ne innocens damnetur, aut perdat communionem. Et idcirco habet potestatem, is, qui abjectus est, ut episcopos finitimos interpellet, et causa ejus audiat et diligenter tractetur. Ille vero episcopus, qui juste vel injuste eum abiecit, patienter accipiat ut negotium discutatur, et vel probetur ejus sententia pluribus, vel emendetur. Tamen, priusquam omnia diligenter et fideliter examinentur, eum, qui fuit communione privatus, ante cognitionem, nullus debet præsumere ut communioni societ. Qui etiam, si communicare præsumperit, et officium suum agere, gravius ex decretis puniendus arguitur. Nam in concilio Antiochene est: « Si quis episcopus damnatus a synodo, vel si presbyter aut diaconus a suo episcopo, et ausi fuerint aliquid de ministerio sacro contingere, nullo modo liceat eis nec in alia synodo spem restitutionis, aut locum satisfactionis habere. » Item in concilio Martini papæ: « Si quis episcopus in concilio excommunicatus fuerit, sive presbyter aut diaconus ab episcopo suo, et post excommunicationem præsumperit sive episcopus ille sive presbyter aut diaconus facere oblationem vel matutinum vel vespertinum sacrificium in officio suo agere, sicut prius; non liceat ei, nec in alio concilio spem reconciliationis habere, nec ultra reconciliari. » Item in concilio Africano: « Placuit universo concilio ut, qui excommunicatus fuerit, pro suo neglectu, sive episcopus sive quilibet clericus, et tempore suæ excommunicationis, ante audientiam communicare præsumperit, ipse in se damnationis iudicetur protulisse sententiam. Ex his igitur omnibus, sicut concludit archiepiscopus, non solum vere excommunicatus convincitur episcopus, sed etiam contemptu suo prorsus deponendus.

Episcopus econtra: Sententiam illicitam vel non legitimam dici determinat injustam, scilicet ex causa, ut cum subest culpa propter quam infertur, vel ex animo, vel cum minore culpa quam deceat forte, per iracundiam vel ignorantiam infertur, juxta illud Agathensis concilii: « Episcopi, si, sacerdotali moderatione postposita, innocentes aut minimis cau-

sis culpabiles excommunicare præsumperint, a vicinis episcopis commoneantur. » Tales etenim, ut episcopus prosequitur, sententiæ cum ordinatim dantur, nec per appellationem impediuntur, quamvis injustæ sint, tamen utique ligant, scilicet apud Ecclesiam, quamvis non semper apud Deum. Nam et e converso sæpius tenentur apud Deum, cum tamen non fiunt apud Ecclesiam. Ut enim ait Origenes: « Exit a civitate, a fide, a charitate; per hæc exit de castris ecclesiæ, etiam si voce episcopi non abjiciatur. Si aliquis econtra non recto iudicio foras mittitur, sed si non egit, si non meretur, nihil læditur. Interdum enim qui foris mittitur intus est, et qui foris est intus retineri videtur. » Timendam tamen et tenendam vel iniustam sententiam, secundum Gregorium, latetur episcopis, nec contemnendam, ne forte, si contemnatur, ex ipsa, sicut addit Gregorius, timida superbia reprehensionis, culpa quæ non erit fiat; scilicet ut deinceps etiam

A apud Deum ex contemptu teneatur, qui prius apud Ecclesiam de pastoris tantum iudicio tenebatur. Hoc igitur est, sicut distinguit episcopus, ubi sententia, sicut de facto, sic de iure quidem aliqua est, licet injusta. Ubi vero, quamvis de facto, nulla tamen de iure, velut quæ datur contra juris ordinem contra appellationem, contra rationem subditam, ibi quidem verè etiam injusta, sicut recte sentit episcopus, vel est, vel dici potest; nec etiam, si non servatur, vel ex contemptu convalescit. Quia quæ ab initio non valent sententiæ tractu temporis convalescere non possunt. Idemque qui contra eam communicaverit, vel non minus officium suum fecerit, prorsus in nullo reus est, nec pœnis præmissorum canonum ullatenus subiacet. Sic igitur integrum sibi statum iure defendit, nec excommunicatum, nec absolvendum se vere probat episcopus, imo nec prorsus ex aliquo vel prius, vel post facto, reum.

II.

CAPITULA CONCILII ALEXANDRI TERTII HABITI TURONIS.

CAP. I. Quoniam enormis quædam consuetudo in quibusdam locis contra sanctorum Patrum constitutiones invaluit, ut sub annuo pretio sacerdotes ad ecclesiarum regimen statuuntur, ne id fiat, modis omnibus prohibemus. Quia dum sacerdotium sub huiusmodi mercede venale disponitur, ad æternæ retributionis præmium consideratio non habetur.

CAP. II. Non satis viriliter avaritia in populo arguitur, si ab his qui in clero constituti sunt, et præcipue qui contempto sæculo religiosorum nomen præstiterunt, et regulam modis omnibus non cavetur. Prohibemus igitur, ne ab his, qui ad religionem transire voluerunt, aliqua pecunia requiratur: neve prius aut capellanæ quælibet monachorum aut clericorum annua distractione vendantur, neque ab eo, cui regimen ipsarum committitur, pro illarum commissione ullum pretium exigatur. Hoc autem simoniacum esse sanctorum Patrum auctoritas inanimè declarat. Unde quisquis hoc de cætero præsumperit, tam qui dederit, tam qui accepit, partem secum simoniæ non dubitet habiturum. Pro sepultura quoque chrismatis et olei perceptione nulla cuiquam pretii exactio intercedat: neque sub obtentu alicujus consuetudinis reatum suum aliquis tueatur, quia, diuturnitas temporis non minuit peccata sed augeat.

CAP. III. Quia in quibusdam episcopatibus decani quidem vel archipresbyteri ad agendas vices episcoporum seu archidiaconorum et terminandas causas ecclesiasticas sub annuo pretio statuunt, quod ad sacerdotii gravamen et subversionem iudiciorum non est dubium redundare, id ulterius fieri districtius prohibemus: quod qui fecerit, removeatur a

Domino. Episcopus quoque cum hoc in sua diocesi sustinuerit, et ecclesiastica iudicia sua patitur dissimulatione subverti, canonica districtione plectatur.

CAP. IV. Non magnopere antiqui hostis invidia infirma membra Ecclesiæ præcipitare laborat, sed manum mittit ad desiderabilia ejus et electos quosque nititur supplantare, dicente Scriptura: « Es de ejus electis. » Multorum siquidem casum operari se putat, ubi pretiosius aliquod membrum sua calliditate detractum. Inde nimirum est quod se in angelum lucis more solito transfigurans, sub obtentu languentium fratrum consulendi corporibus et ecclesiastica negotia fidelius pertractandi regulares quosdam ad legendas leges et confectiones physicas ponderandas de claustris suis educit. Unde ne sub occasione scientiæ spirituales viri mundanis rerum actionibus involvantur, et in interioribus ex eo ipso deficient, ex quo se aliis putant in exterioribus providere, de præsentis assensu concilii statuimus, ut nullus omnino post votum religionis, post factam in aliquo religioso professionem, ad physicas legesve mundanas legendas permittatur exire. Si vero exierit, et ad claustrum suum infra duorum mensium spatium non redierit, sicut excommunicatus ab omnibus evitetur, et in nulla causa si patrocinium præstare tentaverit, audiat. Reversus autem, in choro, capitulo, mensa et cæteris, ultimus fratrum semper existat, et nisi ex misericordia forte apostolicæ sedis, totius spem promotionis amittat.

CAP. V. Quamvis grave nimis et divini dignum animadversione iudicii habeatur quod laici quædam quod sacerdotum est, in ecclesiasticis rebus usur-

pant, majorem tamen incutit formidinem ac dolorem, quod fomitem sui erroris in ipso Deo dicuntur aliquoties invenire, dum quidam fratrum et coepiscoporum nostrorum aliorumque praelatorum ecclesiarum decimas eis et ecclesiarum dispositionem indulgent, et in devia mortis compellunt, qui prædicatione ipsorum ad vitæ viam fuerant revocandi. De quibus dicit Dominus per prophetam: *Peccata populi mei comedunt, et ad iniquitatem provocant animas eorum.* Unde statuimus, ut quisquis alicui laico in sæculo remanenti ecclesiam decimamve concesserit, a statu suo, tanquam arbor quæ inutiliter terram occupat, succidatur, et donec emendat suæ ruinæ jaceat dolore prostratus.

CAP. VI. Majoribus ecclesiarum beneficiis in sua integritate manentibus indecorum nimis esse videtur, ut minores clericorum præbendæ recipiant sectionem. Idcirco ut, sicut in magnis ita in minimis quoque membris suis firmam habeat Ecclesia unitatem, divisiones præbendarum aut dignitatum permutationes fieri prohibemus.

CAP. VII. Plures clericorum et quod merentes dicimus eorum quoque qui præsens sæculum professione vocis et habitu reliquerunt, dum communes usuras quasi manifestius damnatas exhorrent, commodata pecunia indigentibus possessiones eorum in pignus accipiunt, ut provenientes fructus percipiunt ultra sortem. Idcirco generalis concilii decernit auctoritas, ut nullus a modo constitutus in clero vel hoc vel aliud usuræ genus exercere præsumat. Et si quis hæcenus alicujus possessionem data pecunia sub hac specie in pignus accepit, deductis expensis si sortem suam de fructibus inde percepit, absolute possessionem restituat debitori. Si autem aliquid

A minus habet, eo recepto, possessio libere revertitur ad dominum. Quod si post hujusmodi constituta in clero quispiam exstiterit quod detestandis usurarum lucris insistat, ecclesiastici officii periculum patiat, nisi forte beneficium ecclesiarum fuerit, quod redimendum ei de manu laica hoc modo videatur.

CAP. VIII. In partibus Tolosæ damnanda hæresis dudum emersit, quæ more canceri paulatim se ad loca vicina diffundens, per Guasconiam et alias provincias quam plurimos jam infecit. Quæ dum in modam serpentis infra suas revolutiones absconditur, quanto serpit occultius, tanto gravius Dominicam vineam in simplicibus demolitur. Unde contra eam episcopos et omnes Domini sacerdotes in illis partibus commorantes vigilare præcipimus, ut sub interminatione anathematis prohibere, ne ubi cogniti fuerint illius hæresis sectatores, receptaculum eis in sua terra aut præsidium impertiri quisquam præsumat. Sed neque in venditione aut emptione aliqua cum eis communio habeatur, ut solatio saltem humanitatis amisso, ab errore viæ suæ respiscere compellantur. Quisquis autem contra hæc venire tentaverit, tanquam particeps iniquitatis eorum, anathemate feriat. Illi vero si deprehensi fuerint, per catholicos principes custodiæ mancipati, omnium bonorum amissione multentur. Et quoniam de diversis partibus crebro in unum latibulum conveniunt, et præter consensum erroris nullam cohabitandi causam habentes in uno domicilio commorantur, talia conventicula et investigentur attentius, et si inventi fuerint, canonica severitate vetentur.

III.

JURAMENTUM MAGISTRI GIRARDI PUCELLE

ET ALIORUM A SCHISMATE REDEUNTUM.

Ego Girardus refuto et anathematizo omnem hæresim extollentem se adversus sanctam Ecclesiam Catholicam, et præcipue schisma et hæresim Octaviani et Guidonis Cremensis. Ordinationes quoque

D eorum irritas esse pronuntio, et a modo ut antea obediens et fidelis ero domino papæ Alexandro ejusque successoribus Catholicis. Sic me Deus adjuvet, et hæc sancta Dei Evangelia.

IV.

NARRATIO THOMÆ ARCHIEPISCOPI CANTUARIENSIS

De ampulla olei sancti, quo reges Angliæ ungi debent in coronatione, sibi divinitus ostensa.

Quando ego Thomas Cantuariensis archiepiscopus exsul ab Anglia fugiebam ad Franciam, veni ad papam Alexandrum, qui tunc Senonis erat, ut ei ostenderem consuetudines malas et abusiones quas

rex Anglorum in Ecclesiam introducebat. Una autem nocte, cum essem in ecclesia Sanctæ Columbæ in oratione, rogavi Reginam virginum, ut daret regi Anglorum et hæredibus suis propositum et voluntatem

tem emendandi se erga Ecclesiam et quod Christus A pro sua misericordia ampliori dilectione ipsum diligere faceret Ecclesiam. Statim apparuit mihi beata habens in pectore istam aquilam auream, et in manu sua tenens parvam ampullam lapideam; et accipiens aquilam de pectore suo, ampullam inclusit et aquilam, cum ampulla in manu mea posuit, et hæc verba per ordinem mihi dixit: «Ista est unctio, de qua ungi debent reges Anglorum, non isti qui modo regnant seu regnabunt, quia maligni sunt et erunt, et propter peccata sua multa amiserunt et amittent. Sunt autem reges Anglorum futuri, qui unguentur unctione ista, benigni et pugiles Ecclesiæ erunt. Nam isti terram amissam a parentibus pacifice recuperabunt, donec aquilam cum ampulla habeant. Est autem rex Angliæ futurus, qui post unguetur unctione ista, qui terram amissam a parentibus, scilicet Normanniam et Aquitaniam, recuperabit suis. Rex iste erit maximus inter reges, et est ille qui ædificabit multas ecclesias in terra sancta, et fugabit omnes paganos a Babylone, et in eadem plures ecclesias ædificabit, et quotiescunque rex portabit aquilam in pectore, victoriam habebit de inimicis, et regnum ejus semper augmentabitur. Tu autem futurus es martyr.» Et tunc rogavi beatam virginem ut ostenderet mihi ubi custodirem tam pretiosum sanctuarium. Quæ dixit mihi: «Est vir in civitate ista, Willelmus monachus Sancti Cypriani Pictavensis, ejectus injuste ab abbate suo de abbacia, qui rogat papam ut abbatem suum compellat, ut eum in abbatiâ reducat. Trado tibi aquilam cum ampulla, ut eam ad civitatem Pictavensium portet, et in ecclesia Sancti Gregorii, quæ est juxta ecclesiam Hilarii, eam abscondat in capite ecclesiæ versus occidentem sub lapide magno. Ibi invenietur tempore opportuno et erit unctio regum Anglorum.

Capi... paganorum erit causa inventionis istius aquilæ. Et hæc omnia sibi tradidit inclusa in quodam vase plumbeo.

PROPHETIA ANTIQUA CIRCA DICTAM AMPULLAM ET REGIBUS ANGLIÆ, ETC.

(Ista prophetia transcripta est anno Domini 1407 in festo Sancti Matthiæ de una schedula valde vetusta, qd Fyshborne.)

Anno a creatione mundi sex millibus, quingentis lxxxvii annis, lilium regnans in nobili parte mundi movebitur contra semen leonis, et veniet in terram leonis, et stabit in agro inter spinas regionis illius. Tunc Filius hominis veniet ferens tres feras in brachio, cujus regnum est in terra lunæ. Cum magno exercitu transibit aquas, et ingreditur in terram leonis carentis auxilio, quia bestia regionis suæ pellem suam dilaceraverunt. Illo anno veniet aquila a parte orientali, alis extensis sub sole, cum multitudine pullorum suorum, in adiutorium Filii hominis. Illo anno multa castra destruentur: terror magnus erit in mundo; et in quadam parte leonis erit bellum inter plures reges. Illa die erit diluvium sanguinis et lilium perdet coronam, de qua postea Filius hominis coronabitur. Per quatuor annos sequentes sient in mundo prælia multa inter fidem tenentes, et major pars mundi destruetur. Caput mundi erit in terram declinatum. Sed Filius hominis cum aquila prævalebit. Tunc erit pax in toto orbe terrarum et copia frugum. Et tunc Filius hominis admirabile signum sumens transibit ad terram promissionis, quia primo causæ promissa tunc adimpleta permanebunt.

Aquila est imperator; Filius hominis est rex noster; lilium est rex Franciæ; leo est dux Burgundionum et dictus rex noster habet dictam aquilam cum ampulla.

V.

COLLOQUIUM INTER CARDINALES ET ARCHIEPISCOPUM.

Hæc est actio, quæ celebrata est inter dominum Cantuariensem et regem Anglorum, inter Gisortium et Triam in præsentia cardinalium, Willelmi de Papia cardinalis presbyteri Sancti Petri ad Vincula, Odonis diaconi cardinalis Sancti Nicolai de carcere Tulliano.

Dominus Cantuariensis, in octavis beati Martini, advenit de Burgundia in regionem Wolcasinum ad Triam oppidum ad colloquium cardinalium qui a rege Anglorum a Cadomo occurrerent archiepiscopo ad Gisortium. Consederunt pariter inter Gisortium et Triam duo illi cardinales cum archiepiscopo Rotomagensi et multi alii ex parte regis: archiepiscopus quoque Cantuariensis sedis apostolicæ tunc nuntius legatus et cum eo exules ejus Joannes Salesberiensis cum Herberto de Boseham, Lombardus de Placentia, Alexander Wallensis, Goufridus prior de

D Pantencia et Garinus canonicus, Robertus et Gilbertus canonici capellani Cantuariensis, Joannes Cantuariensis, Alanus, Ricardus, Henricus et multi alii. Cæperunt cardinales multa proponere de charitate domini papæ et sollicitudine multa qua cruciabatur quotidie, pro procuranda pace et securitate domini papæ, Cantuariensis et suorum. Inde de suo adventu de urbe Romana, et laboribus et periculis itineris sui quod fecerant, exeuntes ab urbe mense Martio jam medio et pervenientes in Northmanniam mense Novembrio; deinde de magnitudine regis Anglorum et de necessitate Ecclesiæ Romanæ, quæ multa beneficia habere solebat de rege et regno ejus, quibus tunc carebat, occasione discordiæ hujus. Deinde de malitia temporis, deinde de amore et beneficiis quibus rex Angliæ providerat

Cantuariensi, et de honore quem ei semper exhibuit. His subjunxerunt querelas et injurias, quibus rex a Cantuariensi se lxxsum esse conquerebatur, imponens ei inter cætera, quod ei excitaverat guerram regis Francorum : ad ultimum quæsierunt consilium : quomodo indignationem tanti principis placare possent, quia, inquit, sine multa humilitate et moderatione et magni honoris exhibitione, remedium tantis periculis adhiberi non poterit.

Hæc autem dicebant consulto, ut animum ejus terroribus frangerent, vel ad indignationem provocarent : quo vel minus sapienter vel minus humiliter responderet. Dominus vero Cantuariensis in omni humilitate et mansuetudine spiritus, sereno vultu, radiantibus oculis, et rosea facie, lingua Latina, facundissime et disertissime primum gratias agit domino papæ de charitate et sollicitudine quam habebat erga se et coæsules suos : mirante omni multitudine, quæ aderat, super prudentiam et responsum ejus. Ad singula enim quæ illi proposuerant, seriatim et eodem ordine respondet, rationibus veris et probabilibus, querelas regis evacuans et injurias Ecclesiæ et damna intolerabilia patenter exponens. Et quia humilitatem et delationem honoris ab eo exigebant, respondit se libentissime omnem humilitatem exhibiturum, et honoris et reverentiæ domino suo regi quantumcumque posset salvo honore Dei, et libertate Ecclesiæ, et personæ suæ honestate et possessionibus ecclesiarum. Et si iis videretur aliquid adjiciendum, rogavit cardinales ut consilium darent,

A dicens se habere propositum acquiescendi salva libertate conditionis, professionis et ordinis. Responderunt illi se non venisse ut ei, sed ut enim consulerent et reconciliationis tentarent viam. Quæsierunt dehinc cardinales ab archiepiscopo, an in sua provincia vellet promittere observantiam consuetudinum Clarendoniæ, id est Cleri-Damni : quibus, secundum quod rex eis persuaserat, muneribus magnis datis et majoribus promissis, reges Anglorum audierant usos fuisse antecessorum suorum archiepiscoporum temporibus : et sic opitis omnibus querelis in gratiam redire et repetere sedem suam et administrationem et pacem sibi et suis. Ad hæc respondit archiepiscopus, nullum prædecessorum suorum ab aliquo regum ad hanc professionem fuisse arctatum : neque se Deo auctore promissurum unquam ut observet consuetudines quæ Dei legibus patenter adversantur : quæ sedis apostolicæ convellunt privilegium ; quæ Ecclesiæ perimunt libertatem ; quas dominus papa Senonis in illorum et multorum præsentia condemnavit : « Et ego, inquit, domini papæ secutus auctoritatem, quasdam earumdem consuetudinum cum observatoribus suis anathematizavi, sicut in multis jam conciliis catholica Ecclesia fecisse dignoscitur. Ideo ipsum scriptum regiarum consultationum quas apud Cleri-Damnum statuisset dignoscitur, cum pravitatibus quæ in eo continentur in irritum duxi ac quassavi : præsertim eo quod non appellatur ad sedem apostolicam. » (Vide quæ diximus in præfatione).

VI.

SUMMA CAUSÆ INTER REGEM ET THOMAM.

De prima manifesta inter dominum Cantuariensem et dominum regem discordie causa.

Henricus, nobilis rex Anglorum, dux Normanniæ et Aquitaniz et comes Andegaviæ, venit Londoniam Kalendis Octob. anno Verbi incarnati 1163, et archiepiscopus Cantuariensis Thomas et Eboracensis Rogerius et omnes episcopi Angliæ. Sola autem et summa causa concilii fuit, ut metropolitanus Cantuariensis totius Angliæ primas esse solemnius monstraretur ; cui solus in hoc Eboracensis obviavit : cum ecce præter spem omnium, rex Anglorum quædam satis dura proponere cœpit.

Primo enim conquestus est de archidiaconorum violentia, quod aliorum delicta in sua verterent luctera, quod peccatorum pretia exigant, et de his suis supra modum luxu exerceant, cum tamen peccantibus debitam correctionem non impendant : dixitque se velle, ne archidiaconi quemquam quantumcumque infamem super aliquo crimine conveniant, præter officialis sui conscientiam. Moxque ad aliud sermonem vertens : « Cogito, inquit, cogitationes pacis, moveorque multum pro bono pacis, quæ in

regno meo clericorum malitia perturbatur, qui rapinas et furta perpetrant, et homicidia plerumque. Peto igitur et volo, ut tuo, domine Cantuariensis, et coepiscoporum tuorum consensu clerici in maleficiis deprehensi vel convicti vel confessi exauctorentur illico, et mox curiæ meæ licitoribus tradantur, ut omni defensione ecclesiæ destituti, corporaliter puniantur. Volo etiam et peto, ut in illa exauctoratione, de meis officialibus aliquem interesse consentialis, ut exauctoratum clericum mox comprehendat, ne qua ei fiat copia corporalem vindictam effugiendi. »

Ad hæc, dominus Cantuariensis, cum super petitionis hujus responso nec usque mane impetrare posset inducias, secessit in partem cum episcopis suis. Moxque hinc inde allegatum est : episcopi dicebant secundum leges sæculi clericos exauctoratos curiæ tradendos, et post penam spiritualem, corporaliter puniendos, quoniam quo digniores sunt ex privilegio, eo deteriores judicantur in delicto ; et quo deteriores in delicto, eo graviore sunt afficiendi supplicio. « Non ergo mirum, inquit, et

privationem ordinis sequatur supplicium corporis. » A Id ipsum etiam non solum legibus, sed etiam authenticis probant exemplis; Levitas Veteris Testamenti proponentes in medium, quos reos forte flagitii lege prohibiti, sequebatur mors corporis; vel juxta similitudinem criminis, multatio in membris.

Dominus vero Cantuariensis sacris canonibus consentiens, in contrarium allegabat, asserens omnino injustum fore, et contra canones, et contra Deum, si ob unius punitionem delicti, duo quis subeat judicia. « Nec enim Deus judicat bis in idipsum. » — Quod enim, inquit, judicat Ecclesia, aut justum est aut injustum: sed non dabis injustum, erit ergo justum. Quod, cum non contineat absolutionem, continet damnationem. Si ergo damnatur reus, cum B exactoratur, non debet aliud judicium inchoari ad ejusdem condemnationem peccati. Ad hæc quoque cavendum est, inquit, nobis, ne nostro consensu opprimatur et pereat libertas Ecclesie: pro qua, exemplo summi sacerdotis nostri, ex officio tenemur usque ad mortem certare. Nondum autem usque ad mortem restitistis. »

Ad hæc episcopi pereuntem ecclesie libertatem nullum periculum asserere ecclesie dicebant; sed, aiunt, Potius nunc expedit, ut pereat, ne toti pereamus. Faciamus ergo quod rex petit; alioquin peribit fuga a nobis, et non erit, qui requirat animas nostras. Regi vero consentientes, hæreditate possidebimus sanctuarium Dei, et in possessionibus ecclesiarum nostrarum securi dormiemus. Malitiæ C etiam temporis hujus multa indulgenda sunt. [Hoc enim dictum est propter schisma, quod tunc fuit in Romana Ecclesia: erat namque apud Alemanniam quidam antipapa.] Hæc dicebant episcopi, tanquam diei malitia sua non sufficiat, nisi et ipsa augeatur per malitiam episcoporum.

Ad hæc dominus Cantuariensis zelo domus Dei succensus: « Video, inquit, vos vestras inertias sub specie sustentie consolari, et dispensationis vestre prætextu, sponsæ Christi libertatem suffocari. Et quis vos fascinavit, o insensati pontifices? Quid prudenti vocabulo dispensationis manifestam iniquitatem vestram contegitis? Quid vocatis dispensationem, totius Ecclesie Christi dispendium? D Rebus vocabula serviant; non cum rebus pervertantur vocabula. Quod autem dicitis, malitiæ temporis multa fore indulgenda; assentior certe, sed non ob id peccata accumulanda esse peccatis. Potens est Deus Ecclesie sue conditionem facere meliorem, quamvis non efficiamini deteriores. Nunquid impotens est Deus subvenire sanctæ Ecclesie, nisi per vitia doctorum Ecclesie? Arbitror vos compati infirmitatibus Christi, quasi impotens sit sponsam suam erigere, nisi sensibus nostris adjuvetur. Revera tentat vos Deus. Quæso namque, quando se debent episcopi offerre discrimini? Nunquid in tranquillitate et non in discrimine? Erubescitis certe fateri, quod in tranquillitate. Restat ergo,

ut cum in Ecclesia est perturbatio, pastor ecclesie opponat se periculo. Nec enim majoris meriti fuit olim episcopis, in suo sanguine Ecclesiam Christi fundare quam nostris temporibus pro Ecclesie libertate sanguinem fundere. Et ego quidem, Deo teste, affirmo, non esse nobis tutum a forma illa recedere, quam a sanctis patribus nostris accepimus. Nec nos quemquam morti debemus exponere, cum etiam judicio sanguinis nobis non licet interesse. »

Hæc verba mox ad regem relata sunt. Videns illico quamplures Ecclesie, non dico columnas, sed arundines, vento agitari et trepidare, auditio quod non per omnia voto regis essent parituri. Et certe statim ante minas cessissent, nisi domini Cantuariensis constantiam persensissent. Videns autem rex, quod in verbo illo, ubi voluit proficere, non valuit, citius ad alia se convertit, sciscitans ab eis, si consuetudines suas regales essent ei per omnia servaturi. Dominus vero Cantuariensis cum consilio locutus. « Etiam, inquit, in omnibus; salvo tamen per omnia et in omnibus ordine nostro. Et cum postea id ipsum rex a singulis ex ordine quæreret, erat quidem tunc vox illa in ore omnium. Cum vero diutius instaret, volvens et revolvens, si consuetudines suas regales absolute et absque apposita ordinis sui salvatione, simpliciter omnino se ei servaturum promitteret dominus Cantuariensis; a Christi vicario, quod voluit, obtinere non valuit. Turbatus est ergo rex vehementer, et omnis Jerosolyma cum illo: subitoque in illa spiritus vehementia exsiliens, Londonia discessit universis negotiis suis infectis, et C ratiociniis pendentibus. Videres tunc murmur in populo, commotionem in clero. Episcopi turbati et tremuli, regem abeuntem sunt persecuti; metuentes, se non prius regem inventuros, quam audirent se omnia bona sua perdituros. Moxque operati sunt cum rege occultam conventionem, omni mentione Dei et ordinis sui postposita: et tam facile regis petitioni assensum præbuerunt, ut viderentur consensisse antequam ille petisse, adeo ut qui inter eos æstimabantur scientiores, ad opprimendam Ecclesie libertatem fierent proniores. Cantuariensis autem solus præsul resedit, considerans ad dextram et ad sinistram; nec fuit qui cognosceret eum. Requirebat in fratribus solatium; at illi abierunt retro, et jam cum illo non ambulabant. Pacem denique peccatorum videns, et sibi undique imminere discrimen: « Unum, inquit, locutus sum; quod terreni regis regales nullatenus servare consuetudines, nisi salvo in omnibus ordine meo. » Ob id offensam regis incurri: ob id episcopi mei dereliquerunt me; ob id totius orbis oculos offendi. Sed quid? Velit, velit mundus: ego cum mortali paciscens homine, nullo unquam tempore Dei mei et ordinis mei immemor ero, Deo volente. Absit a me, ut ejusquam mortalis metu vel gratia Deum inveniar contempsisse! Si angelus de cælo venerit, et tale mihi consilium dederit, anathema sit. »

*De compromissione et consensu archiepiscoporum et A
omnium episcoporum super consuetudinibus regni.*

Anno ab Incarnatione Domini millesimo centesimo sexagesimo quarto, papatus Alexandri anno sexto, illustrissimi regis Anglorum Henrici II anno undecimo in præsentia ejusdem regis facta est hæc recordatio vel recognitio cujusdam partis consuetudinum, et libertatum, et dignitatum antecessorum suorum, videlicet regis Henrici avi sui, et aliorum, quæ observari et teneri deberent in regno. Et propter dissensiones et discordias, quæ emergerant inter clerum et justitias domini regis, et barones regni, de consuetudinibus et dignitatibus regni, facta est ista recordatio vel recognitio coram archiepiscopis, et episcopis, et clero, et comitibus, et baronibus, et proceribus regni. Et eandem consuetudines recognitas per archiepiscopos et episcopos, et comites et barones, et per nobiliores et antiquiores regni, Thomas sanctæ memoriæ Cantuariensis archiepiscopus, et Rogerus Eboracensis archiepiscopus, et Gilbertus Londoniensis episcopus, et Henricus Wintoniensis episcopus, et Nigellus Eliensis episcopus, et Willelmus Norwicensis episcopus, et Robertus Lincolnensis episcopus, et Hilarius Cicestrensis episcopus, et Jöselinus Saresberiensis episcopus, et Ricardus Cestrënsis episcopus, et Bartholomæus Exoniensis episcopus, et Robertus Herefordensis episcopus, et David Menevensis episcopus, et Rogerus Wigorniensis electus, concesserunt, et in verbo veritatis viva voce firmiter promiserunt tenendas et observandas domino regi et hæredibus suis, bona fide, et absque malo ingenio, præsentibus istis: Roberto comite Legecestræ, Reginaldo comite Cornubiæ, Conano comite Britanniarum, Joanne comite de Augo, Roberto comite de Clarend., comite Gaufrido de Mandavilla, Hugone comite Cætrenci, Willelmo comite de Arundel, comite Patricio, Willelmo comite de Ferrariis, Ricardo de Luci, Reginaldo de sancto Walerico, Rogerio Bigot, Reginaldo de Warennis, Richerio de Aquila, Willelmo de Braiosa, Ricardo de Cambilla, Nigello de Mowbray, Simone de Bello-Campo, Humfrido de Boun, Mattheo de Herefordia, Waltero de Mednana, Manasse Biseth Dapifero, Willelmo Malet, Willelmo de Curci, Roberto de Dunstanvilla, Joselino de Baillo, Willelmo Lanvalis, Willelmo de Caisneto, Gaufrido de Ver, Willelmo de Hastings, Hugone de Morevilla, Alano de Nova Villa, Simone filio Petri, Willelmo Malduit Camerario, Joanne Malduit, Joanne Mariscallo, Petro de Mara, et multis aliis proceribus et nobilibus regni, tam clericis quam laicis.

Consuetudinum vero et dignitatum recognitarum quædam pars in præsentis scripto continetur. Cujus partis capitula hæc sunt:

CAP. I. De advocacione, etc. (*Vide hæc sedecim constitutiones apud Herbertum de Bosham, infra.*)

Facta est autem prædictarum consuetudinum et dignitatum recordatio regiarum a præfatis archiepiscopis, et episcopis, et comitibus, et baronibus, et

nobilioribus et antiquioribus regni, apud Clarendonam, quarta die ante purificationem Sanctæ Mariæ perpetuæ virginis, domino Henrico filio regis cum patre suo domino rege ibidem præsentem.

De exsilio et proscriptioe domini Cantuariensis et propinquorum ejus.

Thomas igitur, Deo dignus archiepiscopus Cantuariensis, juxta sanctorum Patrum instituta, quæ ad ecclesiam suam juxte pertinere cognovit, congregata conservare et dispersa revocare satagens, prædixit Ecclesiæ a prædecessoribus suis minus juste donata vel dimissa, variis tunc de causis, his qui nimia potestate præditi vel affinitate ipsius conjuncti erant, revocare et pristinum jus Ecclesiæ reformare nitentur, quoniam œconomus Ecclesiæ ecclesiastica prædia colere et augere, non negligere nec minuire licet. Clericos etiam qui de curia regis erant, cum eorum deprehenderet incuriam, et cætera omnia quæ ad ecclesiasticam jurisdictionem pertinent, ita sibi vindicabat, ut sacrilegi et rerum ecclesiasticarum invasores, cum quibusdam episcopis, et simili schemate clericis, regem et omnem ejus familiam adversus sanctum Domini exasperarent, et in tantum exaceruerent, ut post compromissionem illam factam apud Clarendonam, circa proximum Sancti Michaelis festum, præfatus archiepiscopus Northamptonium quasi ante tribunal Cæsaris judicandus citaretur. Die statuta, cum ei pro certo intimatum esset quosdam ex regalibus in mortem suam conspirasse, quia interiorum hominum veste sacerdotali, juxta hoc quod dicitur: «Sacerdotes ejus induant salutare», jam pridem induerat, nunc exteriorum indumento sacerdotis superficialiter sub birro secretius munivit, crucem propriis manibus bajulans, ne a se suæ passionis elongaretur exemplum. Archiepiscopus igitur nobilis, solo Deo comitatus, cum ab universis et super multis causis impeteretur, ne stans personam sacerdotis oneraret, residens, quod ei divinitus inspiratum est, mirifice respondit majorem scilicet a minoribus suis non debere ad judicium vocari, neque eorum sententia ligari. Ordo enim confunditur, si pastorem ovis feriat, si discipulus magistrum, si filius patrem verberet. Non enim ita pretiosius aurum est plumbo, sicut sacerdotalis dignitas regia potestate sublimior. Laici vero suffraganei sui, imo jam nunc magis refraganei, cum hæc dicentem et sedem apostolicam appellantem nihilominus condemnaverunt. Sed vir sanctus clam ut posuit paucis comitatus, appellationem suam proseguens, sanctissimum papam Alexandrum tertium Senonis invenit, et ad pedes ejus se provolvens, causam sui adventus non ignoranti exposuit. Posteaque, ut pro certo cognitum est, juri archiepiscopus sui in manu domini papæ resignavit, exostulans ut aliquem doctiorem et fortiorem de Anglorum Ecclesia in eorum metropoli constitueret cardinalem. Sanctus autem papa elevans filium suum amplexatur, osculatur, lacrymas lacrymis immiscens, Deo referens gratias, quod virum tam humilem spiritu,

pastorem tam sollicitum in salute ovium, advocatum tam constantem in causa, imo in multis causis Dei iavenuisset. Dignitatem igitur, quam refutaverat, quia neminem ad hoc onus fortiozem esse cognoscebat, dominus papa reddendam ei decrevit, renitenti et invito. Ventilabatur itaque inter ipsum et regem contentio, rege consuetudines regni sui, ut assererat, confirmare volente, archiepiscopo imo Ecclesia Romana reclamante, quod illæ consuetudines veritati per electos Dei manifestatæ in multis casibus obloquerentur, veritatiq; manifeste cedere consuetudines oportere. Invenitur enim Christus aliquando dixisse: « Ego sum veritas, » sed nunquam dixit: Ego sum consuetudo. Et ita altercatio ista sub hoc Marte inter has personas agitabatur, regnante felicissimo rege Ludovico filio Ludovici regis supra Francorum nationem et exhibente præfatum archiepiscopum, quia rebus Ecclesiæ suæ penitus erat proscrip- tus, necnon et clericos qui secum morabantur, qui similiter possessionibus suis privati erant, quousque ad gratiam sæpediti regis redirent, et consuetudines, super quibus lis orta fuit et adhuc per appellationem suspensa, se non impugnaturos promitterent.

Nam in eos rex talia promulgaverat edicta, singulis Angliæ vicecomitibus sic mandans: — « Præcipio tibi quod si aliquis laicus in baillia tua Romanam curiam appellaverit, eum capias et firmiter custodias, donec voluntatem meam præcipiam; et omnes redditus et possessiones clericorum archiepiscopi saisias in manum meam, sicut Randulphus de Broch et

et alii ministri mei tibi dixerint, et omnium clericorum qui cum archiepiscopo sunt, patres et matres, fratres et sorores, nepotes et neptes ponas per salvos plegios et catalla eorum donec voluntatem meam inde præcipiam. Et hoc breve tecum afferas cum submonitus fueris. »

Singulis vero episcopis scripsit sic: — « Nostis quam male Thomas archiepiscopus operatus est adversum me et regnum et quam male recesserit. Et ideo mando tibi quod clerici sui qui circa ipsum fuerunt post fugam suam et alii clerici qui detraxerunt honori meo et honori regni, non percipiant aliquid de redditibus illis, quos habuerunt in episcopatu tuo nisi per me, nec habeant aliquod auxilium nec consilium a te. Teste Ricardo de Luci apud Merlebergam.

Sed cum nec propter proscriptionem sui vel clericorum suorum sanctus sacerdos in aliquo flecteretur, iussi sunt tam maiores quam parvuli utriusque sexus de cognatione sua, necnon et quidam familiares ejus ut magis ex his contristaretur exulare. Prætaxatus vero archiepiscopus cum parvulorum deportationem cognosceret, quorum adhuc alimenta in maternis pendebant uberibus, ita contristatus est tanquam ipsius animam pertransisset gladius. Sed reminiscens quoniam Abrahæ dictum est: « Egredere de terra et de cognatione tua, » sicuti et terram ita et cognationem suam postponentem Ecclesiæ honori penitus destinavit, quia contra Dominum nulli hominum aliquod debetur.

VII.

DE JURAMENTIS CONTRA ROMANAM ET CANTUARIENSEM ECCLESIAM PUBLICE PER ANGLIAM PRÆSTITIS.

Anno ab Incarnatione Dominica 1069, rex Henricus jurare facit omnem Angliam, a laico duodecim vel quindecim annorum supra, contra dominum papam Alexandrum et beatum Thomam archiepiscopum, quod eorum non recipient litteras neque obediunt mandatis, et si quis inventus foret litteras eorum deferens, traderetur potestatibus tanquam coronæ capitalis inimicus regis. Archiepiscopus, hoc audito, tanto compatiens errori et apostasiæ, misit litteras, quæ sequuntur (*vide epist. S. Thomæ, col. 5.0*), ad quosdam timoratos Dei ut cæteros absolvant.

Capitula vero constitutionum, quas rex Henricus eodem anno in Normannia constituit et iustitiis suis,

Ricardo de Luci et duobus archidiaconis Galfrido Ridell Cantuariensi et Ricardo Pictaviensi, omnibusque principibus et populis Angliæ juranda et servanda contra dominum papam et archiepiscopum mandavit, continentur in prima parte epistolarum cum capitulis dignitatum regiarum et consuetudinum avitarum, quæ apud Clarendonam in præsentia domini regis ab archiepiscopis, episcopis, et baronibus et nobilioribus et antiquioribus regni recordatæ sunt et confirmatæ.

(*Has constitutiones in Normannia anno 1169 promulgatas vide in Quadrilogo secundo.*)

VIII.

FRAGMENTUM AD FISCUM PERTINENS.

Dicetis super sacramentum vestrum quid vicecomites vel bailivi eorum ceperint quoquomodo de sin-

gulis hundredis, singulis villatis, singulis hominibus postquam rex transfretavit. Dicetis quot et quas ter-

ras vicecomes vel bailivi eorum emerint vel invadaverint. Dicetis quid et quantum vicecomes vel bailivi eorum dederit iustitiis errantibus. Dicetis quid actum sit de catallis fugitivorum, qui propter assisas de Clarenduna fugerunt. Dicetis, si aliquis fuit retatus et postea præmio relaxatus et reversus. Dicetis quid datum sit ad filiam regis maritandam, et cui traditum sit. Dicetis si vicecomes vel bailivi eorum vel domini villarum aliquam pacem fecerint vel faciant cum hominibus gravatis ne querimonia coram rege vel iustitiis veniret. Dicetis de admerciatis si quis relaxatus fuerit et per quem. Dicetis si aliquis est qui homagium non fecerit domino regi

A vel filio suo. Dicetis de dominiis domini regis, si sie sunt ut rex præcepit antequam rex transfretavit. Dicetis de his qui habent aliquam bailiam de rege in custodia, sive de archidiaconatibus; sive de episcopatibus, sive de abbatibus vel de aliqua eschaeta, quid ipsi vel bailivi eorum ceperint, vel quid in bailia illa acquisierint. Dicetis quid forestarii vel bailivi eorum ceperint de forestis domini regis, et si aliquem relaxaverint, qui retatus fuerit de foresta. Dicetis quid domini villarum vel seneschalli eorum ceperint præter rectam consuetudinem. Dicetis quid et quantum archidiaconi vel decani ceperint injuste et sine iudicio.

IX.

DE SCHISMATIS INNOVATIONE.

Hoc est iusjurandum quod juravit Joannes Sil. et Henricus de Oxenfordia apud Coloniam, cujus occasione juramenti schisma jam fere emortuum revixit in Alemannia, et ipse cum socio Ricardo de Ilcestre hæresi damnata involutus est, sicut in Anglia etiam participatione illius grandis et insignis schismatici Coloniensis Reginaldi excommunicationis sententiam contraxerunt.

Cum clerum plurimum et principes suos ad concilium suum in hac solemnitate Pentecostes imperator adunasset, Sabbato et secunda feria tractatum est de pace et concordia inter nos et ipsum reformanda. Ad hæc superveniens Coloniensis electus in medio omnium protestatus est: « Domine imperator, concilia quæ adversus papam Alexandrum huc usque captasti ad destitutionem ejus, nihil tibi profuerunt, nihil ei nocuerunt. Nam et de nostris plurimi ei obediunt et adhærent, sicut dominus Moguntinus et alii. Sed si mihi et consilio meo acquieveritis, in promptu erit et Alexandri dejectio et papæ nostri Paschalis exaltatio. En ego acquisivi parti nostræ quinquaginta episcopos cum archiepiscopis suis et plures numero de dominatione regis Angliæ, qui papæ Paschali adhærebunt et nobis, si vos Alexandri obedientiam et eo decedente cujusque de parte ejus electi abjuraveritis. Inque certitudinem hujus rei ecce præsentibus adsunt duo nuntii regis Anglorum parati in persona domini sui jurare, quod ratum habebit et jurabit quod vos hic jurabitis super hoc et statuatis. » Placuit imperatori forma consilii, et se nomen Alexandri et obedientiam in perpetuum abjuraturum promisit. Cumque clerus de sententia et consensu interrogaretur et instantius conveniretur, ait Magdeburgensis et plurimi alii; quoniam futura incerta sunt et plerumque quem eligunt principes, abjicit Deus, et quem populus approbat, improbat Deus, temerarium esse hujusmodi sacramentum et se prius regalia relicturum quam ita juraturum. Ait imperator eum oportere et regalia retinere et cum eo ita jurare. Cumque jam exandesceret ira imperator, Magdeburgensis ad mitigandum vel differendum rem ait: « Si dominus Coloniensis,

B qui hujusmodi consilium et sacramentum inducit, primus omnium abjuraverit Alexandrum et juraverit quod ordinationem suam et consecrationem a Paschali recipiet, de secreto animi sui certiores nos reddet: omnem scrupulum suspicionis præve a mentibus nostris auferet: nosque sic in hujusmodi sententiam et sacramentum facilius inducet. » Acquisivit imperator. Cumque Coloniensis ita primo jurare jussus detrectaret, et etiam usque ad lacrymas reniteretur, vehementer accensus imperator ait: « En apparet quod tanquam proditor operatus sis adversum me et animam meam. En apparet quod sanum consilium dedit mihi Moguntinus defuncto Octaviano dicens quod cum Dominus, eo mortuo, me a periculo maximo jam liberasset, caverem mihi ne me iterum periculo consimili involverem. Unde tibi missis mandatis scripsi ne me inconsulto de substituendi pontificis electione quidquam tractares, tu vero clam me auctoritate tua istum elegisti et *Te Deum* laudamus per te decantasti. Parasti nobis foveam; primus modo incidis in eam. » Sicque Coloniensis primus et absolute juravit in supradictam formam. Postmodum imperator obedientiam vestram et cujusque de parte vestra electi abjuravit: hoc sane retento et determinato quod si contigerit et vos et Paschalem decedere et utraque pars in unam personam eligendam concorditer conveniret, liberum sit ei assentire et eam recipere. Tunc Coloniensis adjecit ita, si de consensu vestro fuerit celebrata electio, et addidit quod faceret principes suos jurare et eos qui aderant, et eos qui aberant, in partibus suis et provinciis suis, in consimilem formam et quod ipso decedente imperatore non prius alium imperialibus insigniebunt, quam ipse substituendus idem præstet sacra-

mentum abjuratiōis. Tunc juravit dux Saxonum et marchio Albertus, quidam comes palatinus frater imperatoris et quidam sororius ejus. Magdeburgensis archiepiscopus tandem et cum lacrymis abjuravit, hoc adjecto, quandiu regalia retinebit et si omnes qui aberant idem jurent. Postmodum Bru-

nensis duoque alii suffraganei ejus juraverunt et nuntii regis Angliæ in personam ejus. Duo episcopi excusati per absentiam archiepiscopi sui non juraverunt, sed dilatum est eorum et cæterorum, qui aberant, sacramentum usque ad octavas Petri et Pauli.

X.

GRADUS COGNATIONIS INTER REGEM ET REGINAM.

Hanc computationem præsentaverunt Pictavienses cardinales, quando sanctus Thomas exsulabat, sed non sunt auditi.

Sic computati sunt gradus cognationis inter regem Anglorum et reginam. Willelmus rex Anglorum et Robertus comes Moritonii uterini fratres fuerunt. De Willelmo natus est Henricus; de Henrico Ma-

thildis imperatrix; de Mathildi rex Henricus. Item de Roberto comite nata est Beatrix comitissa Pictaviensis; de Beatrice Willelmus comes; de Willelmo comite Alienoris regina.

XI.

REVOCATIO ARTICULORUM QUOS REX HENRICUS SECUNDUS VOLUIT ECCLESIAM ANGLICANAM OBSERVARE.

In Dei nomine, Amen! Anno Domini 1173, coram venerabilibus in Christo patribus et dominis, domino Alberto divina dignatione tituli Sancti Laurentii in Lucina et Theodwino tituli Sancti Vitalis presbyteris, cardinalibus, et apostolicæ sedis legatis, priore et conventu Ecclesiæ Cantuariensis ac aliis quampluribus regni Angliæ personis, in Ecclesia conventuali Sanctæ Trinitatis Cantuariensi congregatis. Nos Henricus Dei gratia rex Angliæ, dux Normannorum poenitentiam a vobis dominis legatis auctoritate apostolica in remissionem peccatorum nostrorum injunctam, humiliter et devote perficere volentes, in litteris scriptis publice et palam revocamus, abdicamus, renuntiamus et resignamus omnes illas malas consuetudines, contra illas antiquas libertates Ecclesiæ Anglicanæ per nos nequiter inductas, easque et earum singulas pro nobis et hæredibus nostris totaliter dimittimus in perpetuum, pro quibus beatus Thomas nuper Cantuariensis archiepiscopus usque ad mortem decertavit. Præterea ad honorem omnipotentis Dei, beatæ Mariæ Virginis et omnium sanctorum, ac in remissionem peccatorum nostrorum, concedimus pro nobis et hæredibus nostris, quod Ecclesia Cantuariensis ac omnes aliæ ecclesiæ Anglicanæ sint libere, et habeant

omnes libertates illasas, sicut habere consueverunt ante coronationem nostram. Et quod omnes ecclesiæ in regno nostro Angliæ per nos vel hæredes nostros de cætero fundandæ gaudeant omnibus et singulis libertatibus prædictis. Ita quod occasione vocationis earumdem, vel alicujus earum, temporalia earundem ecclesiarum per nos vel hæredes nostros concedenda minime in manus nostras seu heredum nostrorum capiantur seu saisentur; et si aliqua occasione præmissa capiantur seu saisentur, volumus et concedimus per præsentem quod sine dilatione integre restituantur et liberentur, nulla inde exactionis alicujus ratæ ratione præmissa per nos vel hæredes nostros ab iisdem vel ab aliqua earumdem aliququaliter exigenda vel præcipienda. Protestamur etiam et promittimus bona fide pro nobis et hæredibus nostris ad auxiliandam, corrigendam, emendandam et dilatandam prædictam revocationem, abdicationem, renuntiationem, resignationem nostram forma meliori, ad honorem Dei et Ecclesiæ, ad nos vel hæredes nostros ad hoc per archiepiscopum Cantuariensem seu per aliquem prælatorum regni nostri porrecta, qui pro tempore fuerint ac hoc debite fuerint requisiti. Acta sunt hæc anno Domini supradicto.

XII.

HÆC SUNT CAPITULA PURGATIONIS

Quam præstitit Eboracensis quarta manu juratorum, quorum unus fuit magister Vacarius.

Quod ipse consuetudines avitas, super quibus vertebatur controversia inter regem et dominum Cantuariensem, nec scripto nec juramento firmaverat.

Quod ipse nec opere nec sermone, nec per se nec per interpositam personam, scienter aliquid machinatus est, quod dominum Cantuariensem in mortem traheret.

A Quod litteras domini papæ in Angliam destinatas de inhibitione coronationis filii regis nec recepit nec vidit, nec aliquid fieri fecit, quo minus eas videret vel reciperet.

Quod ipse in coronatione filii regis debitum iuramentum recepit integre, nec aliquid omisit quod in coronatione regis Angliæ præstari solet.

XIII.

STEPHANI LANGTON

ARCHIEPISCOPI CANTUARIENSIS

TRACTATUS DE TRANSLATIONE BEATI THOMÆ.

1. Translationis beati Thomæ memoriam annuæ devotionis studio recolentes ante mentis oculos statuamus, quod debellatoribus Ecclesiæ primitivæ dicitur per prophetam, ut nostræ servitutis debitum fidelius persolvamus, et ad ministerium nostrum implendum validius accingamur. Ait siquidem Zacharias: « Bibentes inebriabuntur quasi vino, et replebuntur ut phialæ, et quasi cornua altaris, et salvabit eos Dominus Deus eorum in die illa, ut gregem populi sui, quia lapides sancti elevabuntur super terram. » Nulli vero videatur indecens aut indignum, quod agere volentibus diem festum bellatores proponimus in exemplum. Necessarium est enim, ut solemnia celebrantes sint ad spirituale prælium expediti, ne dum sanctorum merita venerantur, inimicorum jaculis vulnerentur. Quod bene significat ille bellator egregius, Judas videlicet Machabæus, qui sancta mundare disponens et templum Domini dedicationis officio renovare, ordinavit viros, qui pugnarent interim adversus eos qui erant in arce.

2. Hujus exemplo solemnius insistentes, contra malignos spiritus in arce superbix residentibus viriliter dimicemus. Qui peccati venenum festivitatis vino miscentes interficiunt infelices, qui sollemnium obtentu negotium ventris agunt, et spirituale gaudium exultatione carnali corrumpunt. Imitemur ergo, charissimi, Matthiam et filios ejus, qui cum fidelibus Antiocho resistentibus provide statuerunt, ut contra gentes, quæ tempore Sabbatorum in eos insurgunt, unanimiter dimicarent. Nos namque pru-

B denter et fortiter hostibus resistamus, qui Sabbata nostra perturbant, et iniquis subreptionibus machinantur. ut spirituale gaudium, in perniciem trans-eat animarum, quod ad earum remedium est statutum. Si enim lætitiæ frena laxantes prætextu lætitiæ, lasciviam amplectamur, et abjecte cingulo disciplinæ viri ecclesiastici fuerint dissoluti, hostes ecclesiam intuentes ejus Sabbata deridebunt. Cum igitur in psalmo legamus, quod in justorum tabernaculis vox exultationis resonet et salutis, si justis esse volumus, attente curemus, ut si apud nos fuerit vox exultationis, eadem sit et salutis. Nec exultatio salutem excludat, aut temporale gaudium dolorem perpetuum introducat.

C 3. Tota mentis intentione vitemus, ne juxta Thadæi testimonium Dei nostri gratiam in sanctorum gloria constitutam in luxuriam transferamus. Quoniam in judicium sunt præscripti, et damnationis titulo jam notati, qui temeritatis hujus audaciam attentare præsumunt. Dies enim festos quos in hac vita lætitia prosequitur, inhonestæ vitæ terminus juxta verbum propheticum in lamentationem convertet et luctum. Quis namque miretur, si Domino servire cogantur in pœnis, qui eum coegerunt in suis servire peccatis, juxta quod conqueritur per prophetam qui suam et sanctorum gloriam ad voluptatem retorserunt et culpam? Modum autem et formam sollemnitatibus celebrandis scriptura præscribit, quæ cujusdam festivitatis celeberrime gaudia prosequens asserit omnem secundum faciem

sanctorum fuisse jucundum. Qualis vero sit ista solemnitas, Apostolus docet dicens: « Fornicatio, et omnis immunditia, aut avaritia, nec nominetur in vobis, sicut decet sanctos, aut turpitudine, aut stultiloquium, aut scurilitas, quæ ad rem non pertinet, sed magis gratiarum actio. » Vir enim sanctus, licet in Jericho conversetur, faciem tamen euntis in Hierusalem non amittit, quia licet eum in mundo detineat conversatio corporalis, faciem tamen retinet ad cœlestia suspirantis.

4. Bellatores itaque primitivos, sicut diximus, imitemur, quorum probitas nos invitat, ut in diebus festis hostes fortiter impugnemus. Sermo propheticus ludans ait: « Bibentes inebriabuntur, quasi vino, et replebuntur ut phialæ, et quasi cornua altaris, » etc. Hæc verba non solum præliatores primos indicant, sed et sanctorum solemnia celebrantes reformant. Tria namque notantur in his verbis, propter quæ salubriter statutum est, ut Ecclesia solemniter celebret festa sanctorum. Prima causa est gaudium, ut in Domino gaudeamus eorum beatitudini congaudentes, quos ipse pie dilexit, excellenter ornavit, stola gloriæ induit, et magnifice coronavit. Gaudium autem notat prima clausula verbi prophetici supra præmissi. Secunda causa est exemplum, ut nos qui sanctorum merita recensemus, in sensu bonorum operum eorum vestigiis insistamus, et eos mentis gressibus imitemur, de quorum patrocinio gloriamur. Secunda clausula supraposita denotat hanc causam. Qui enim pro virium facultate sanctorum operibus se conformant, congrue vasis sacris et altaris cornibus conferuntur, ut sequentia declarabunt. Tertia causa est subsidium, ut qui de sanctorum meritis gratulantur, de eorum patrocinio gloriantur. Nec eis in auxilio sancti desint, sed obsequium sibi factum vicissitudine grata compensent. Hanc tertiam causam notat tertia clausula verbi præmissi. Viatorem ad superna tendentem, et per festivitatem annuam ad continuam suspirantem refrigerant ista tria. Quoniam ab exemplo deducitur, a subsidio sustentatur, a gaudio refovetur. Exemplum enim obtinet vicem ducis, subsidium adjutoris, et ne solatium ei desit, gaudium his duobus assistit.

5. Quid autem magis expedit viatori, quam ut iter ejus sit certum, securum, et lætum? Ad quæ omnia sufficiunt ista tria: « Quoniam exemplum certitudinem, subsidium securitatem, gaudium lætitiæ administrat. » Ecce quanta suavitas ex observantia festivitatum emanat, quæ per gaudium, de quo diximus, indicatur. Ecce qui fructus de solemnitatibus colliguntur, si pia devotione fuerint observatæ, quos subsidium et exemplum superius expressa designant. Unde cum propheta sanctos lapides super terram elevandos dixisset, insinuans per hoc verbum sanctorum corpora gloriose de tumulis transferenda, quantum translationis gloria sit fructuosa fidelibus, mox declarare volens adjungit: « Quid enim bonum ejus est; et quid pulchrum

A ejus, nisi frumentum electorum et vinum germinans virgines? subsidium et exemplum, quæ de solemnibus oriuntur, sicut superius est ostensum, frumentum indicat electorum. Sicut enim in area tritatur, ut granum a palea separetur, sic in Ecclesia discussa sunt gesta sanctorum, ut excussa palea vanitatis tam sancta sit eorum memoria, quam sollemnis, et grana sine paleis reservantes eorum adjuvemur auxiliis, et informemur exemplis. Frumentum etiam in horreo mundo reponitur, ut servetur, nec absque munditia cordium possunt votiva solemnia, prout decet, observari. »

6. Gaudium autem sanctum, quod festivitatis est annexum, per vinum germinans virgines indicatur. Vinum namque spiritualis lætitiæ munditiæ germinat virginalem, quia castitatem nutrit et servat. Sed vinum lætitiæ secularis generat aut germinat meretrices, quia libidinem, incitat et inflammat. A festivitatis ecclesiasticis sit alienum hoc vinum, in quibus est vinum aliud propinandum. Unde Dominus per prophetam eunuchos ejus Sabbata custodire testatur. Illos, inquam, eunuchos, « qui, » sicut in Evangelio ipse dicit, « semetipsos propter regna cœlestia castraverunt. » Hi sunt qui pro cœlestis regni desiderio turpitudinem noxiæ voluptatis a sua carne resecant et abscindunt. Notandum autem quod egregie solemnitatum utilitas commendatur, dum ad eam sublimiter extollendam bonitas et pulchritudo junguntur. Sic nempe fratrum concordiam commendavit Psalmista, cum ait: « Ecce quam bonum et quam jucundum habitare fratres in unum! » Sic etiam Christianæ devotionis obsequium in timore divino consistens et obsevantia mandatorum, vir sapiens laudat dicens: « Nihil melius quam timere Deum, et nihil melius quam respicere in mandatis illius. »

7. Tria superius memorata, scilicet gaudium, subsidium, et exemplum, quæ festivitatis, ut diximus, sunt annexa, notavit Dominus per prophetam dicens: « Filios advenæ, qui adherent Domino ut colant eum, omne custodientem Sabbatum ne polluat illud, et tenentem fœdus meum, adducam eos in montem sanctum meum, et levabo eos in domo orationis meæ. Holocausta eorum et victimæ eorum placebunt mihi super altare meum. » Advenam sacra Scriptura populum gentilem appellat. Unde populo Judaico dictum est: « Advena qui tecum versatur, in terra ascendet super te, eritque sublimior, tu autem descendes et eris inferior. » Hoc autem est evidenter impletum in populo Judaico et gentili. Nos igitur advenæ filii sumus omnes, qui de gentibus orti sumus. Evidenter autem cultus divini modum et formam expressit sermo propheticus, cum de colentibus Deum ait: « Qui adherent Domino, ut colant eum. » Scriptum quippe est: « Qui adheret Domino, spiritus unus est. »

8. Docet autem Dei cultores, ipsum in festivitatibus venerantes, esse spiritum et non carnem, quoniam

spiritualem lætitiā, non carnalem exigit cultus Dei. Econtrario de equis Ægypti, per quos potentes sæculi designantur, dicitur per prophetam : « Equi eorum caro, non spiritus. » Sunt enim plerumque mundi potentes ad spiritualia segnes et tardi, sed ad carnalia veloces et prompti, et impletur in eis illud propheticum : « Attendi et auscultavi, nemo quod bonum est loquitur, nullus qui super peccata sua agat penitentiam, dicens : Quid feci? Omnes conversi ad cursum suum quasi equus impetu vadens ad prælium. » Recte vero subiungitur : « Omne custodientem Sabbatum, non polluat illud et tenentem, fœdos meum. Qui enim festivitatem divino cultui deputatam aliqua transgressione violat, fœdus cum Domino initum non observat. » Antiquitas autem fœdus effusione sanguinis firmabatur. Nos igitur in festis eorum, qui sanguinem suum pro Christo fuderunt, fœdus quod cum Domino nostro contraximus, toto mentis desiderio confirmemus. Legitur quod quando populus Israel fœdus cum Domino Josue mediante percussit, ipse pergrandem lapidem in sanctuario statuit, quem hujus negotii testem fecit. In sacra Scriptura per lapides plerumque sancti martyres designantur, sicut sequentia declarabunt. Lapis ergo pergrandis in sanctuario Domini erigitur, cum alicujus martyris magni reliquiæ in Ecclesia sublimiter exaltantur.

9. Cum igitur hodie recolamus, qualiter lapis grandis in sanctuario sit erectus, id est Thomas martyr gloriosus de tumultu elevatus, ad hunc lapidem cordis dirigamus intellectum, et deligere studeamus in eo nostræ mentis affectum, ut devotionis nostræ testis esse possit et velit. De his autem, qui sinceris mentibus Deum colunt, dicitur consequenter : « Adducam eos in montem sanctum meum et lætificabo eos in domo orationis meæ, holocausta eorum et victimæ eorum placebunt mihi, sicut altare meum. » Quibus verbis primo notatur exemplum, secundo gaudium, tertio suffragium. Quæ tria superius sunt expressa. Sanctorum enim exemplum nos in montem Domini, æternæ scilicet beatitudinis sublimitatem adducit. Exemplum namque, sicut diximus, ad superna tendentibus viam rectam exhibet vice duceis. Unde dicitur per Psalmistam : « Emitte lucem tuam et veritatem tuam, ipsa me deduxerunt et adduxerunt in montem sanctum tuum et in tabernacula tua. » Quid rectius lucis nomine, qua Dei gratia figuratur, sine qua nihil lucidum, nihil serenum, sed omnia tenebrosa?

10. Veritas autem est conversatio sancta justorum. Impiorum namque vita vanitas est et mendacium, veritas autem vita bonorum. Unde dicitur per prophetam : « Pacem et veritatem diligit. » Justus quippe pacem cum proximo, veritatem diligit in seipso. Deducunt namque lux et veritas virum justum, eum in montem et in tabernacula adducentes : quia prævia Dei gratia per sanctorum exempla regnabimus in patria, proficiemus in via. Mons siquidem, in quo civitas ædificatur, ad patriam; taber-

naacula, quæ sunt viatorum, referuntur ad viam. Spirituale vero gaudium, quod festivitatis annuis est annexum, exprimitur evidenter, cum subiungitur : « Lætificabo eos in domo orationis meæ. » In holocaustis et victimis, de quibus additur consequenter, sanctorum suffragia denotantur. Victimæ enim et holocausta pro vobis offerimus, cum eorum merita, qui per fidem regna vicerunt, et seipsos in odorem suavitatis ei obtulerunt, pro nobis Domino præsentamus, ut eorum precibus ejus offensam placare possimus.

11. Nunc verbum propheticum ab initio propositum perscrutemur. « Bibentes inebriabuntur quasi vino, » etc. Frequenter in sancta Scriptura per comestionem et potum spiritualis lætitiæ designatur. Hinc Ecclesiastes ait : « Omnis homo qui comedit et bibit et videt bonum de labore suo, hoc donum Dei est. » Bona de laboribus suis videt, qui in sanctis operibus se exercet, et laboris sui fructum constituit præmium sempiternum. De quo scriptum est : « Bonorum operum gloriosus est fructus. » Est autem spirituale gaudium vitæ laudabilis condimentum. Convenienter enim exsultant, qui laboribus fructuosus et honestis insudant. Hinc apostolus Petrus ait : « Communicantes Christi passionibus gaudete. » Non enim eum exsultare decet, qui passionis imitationem abhorret : « Quia non erit consors Redemptoris in gloria, qui non fuerit consors ejus in pœna. » Quia testantis Apostolo, qui non compatitur non conregnabit. » Est autem passionis consortium, quia gustantibus amarescit, spirituali lætitiæ dulcorandum. Unde Domino dicitur per prophetam : « Occurristi lætanti et facienti justitiam. » Dominus enim quasi promptus auxiliator occurrit ei, qui cum gaudio carnem suam cum vitiis et concupiscentiis crucifigit.

12. Cum ergo comedit homo et bibit, et de labore suo bona percipit, hoc donum Dei est juxta testimonium Salomonis. Dominus enim solus est, qui mentem afflictam exhilarat, et patientis animum inter tormenta lætificat. Qualiter autem comedat et bibat, qui bonis operibus vigilanter insistit, sententia quæ præcedit, evidenter aperit et ostendit. Præmittitur enim istud : « Cognovi, quod non esset melius, nisi lætari, et bene facere in vita sua, comedere, et bibere, et collatari. » Idem enim est de laboribus bona videre, quod bene facere in hac vita. Spirituale quoque gaudium notans in Canticis Sponsus ait : « Comedite, et bibite, et inebriamini, charissimi. » Sicut per cibum et potum spiritualis lætitiæ, sic per inebriationem abundantia talis lætitiæ denotatur. Dicit ergo patenter, gaudeant et exsultent quicunque Domino per amicitiam sunt conjuncti. Plenius tamen gaudeant, qui per altiore charitatis amicitiam ei familiarius appropinquant. Quid tamen admonitionem istam præcedat, sollicitè perpendamus. Postquam enim dixerat, messui myrrham meam cum aromatibus meis, comedi favum cum melle meo, bibi vinum cum lacte meo, conse-

quenter amicos ut comedant, charissimos autem ut A inebrientur, invitat.

13. In horto suo Dominus cum aromatibus myrrham meli, cum in Ecclesia recipit corporum disciplinam bonorum operum admistione conditam. Mellis nomine contemplatio figuratur. Et rei convenit hæc figura, cum sit mellidius supernorum aspectus. Contemplationem mellis contulit, qui ait : « Sicut qui mel multum comedit, non est ei bonum, ita perscrutator majestatis comprimetur a gloria. » Favus est dulcedo mentis interna, contemplationi supernorum adjuncta. Favum ergo cum melle suo comedit dominus, quia gratum est ei contemplationis obsequium, cum dilectione cordis oblatum. Mordax est vinum et vulnere corporis curativum. Unde per vinum compunctio figuratur. Quæ cum sit intus pungitiva, spiritualium vulnere est medela. Per lac, quo simplices et parvuli nutriuntur, cordis simplicitas intelligitur. Gratanter ergo cum lacte Dominus vinum bibit, quia dolorem illum acceptat, quem ei cordis simplicitas commendat.

14. Post ita premissa sequitur competenter : « Comedite, amici, » etc. Decenter enim exsultant, qui talibus obsequiis Deum placent. Quoniam autem inebriatio, sicut diximus, spiritualis lætitiæ notat abundantiam, recte qui Dominum in sanctorum memoria venerantur, inebriandi dicuntur, ut aperte notetur, quod sancti lætitia debeant abundare. Notandum autem, quod nobis ebrietas animum, quem exhiberat, a temporalibus alienat. Unde scriptum est : « Qui inebriat, ipse quoque inebriabitur. » Qui enim aliorum animos exhortatione salutis separat a terrenis, ipsius animus avelletur ab eis, ejus operante clementia, qui in fortitudine victos educit. Unde Dominus per prophetam ait : « Si convertens convertam ad te, et ante faciem meam stabis. Et si separaveris pretiosum a villi, quasi os meum eris. » Hinc etiam per eundem prophetam dicitur : « Factus sum quasi vir ebrius, et quasi homo madidus a vino, a facie Domini et a facie verborum sanctorum ejus. » Inebriat intuentem facies Creatoris, quia contemplantis animum a transitoriis rebus eripit, ad bona sempiterna deducit. Inebriat etiam auditores divini sermonis auditus, quia terrenorum amorem verba sancta depascunt, et desiderium æternorum accendunt. Unde D vivis carbonibus comparantur, qui cibaria, paleamque consumunt. Spiritualis autem lætitia, sicut ebrietas mentem supernis inserit, a terrenis avertit. Inebriantur hoc modo, qui nostram matrem venerantur, ut cœlestibus intendentes fugitiva bona despiciant, et permanentia concupiscant.

15. Rursum ebrietas doloris sensum adimit, adeo quod ebrius etiam cum dolenda sustinet, hilarescit; unde vocem ebrii vir sapiens ita format : « Verberaverunt me, et non dolui, traxerunt me, sed non sensi. » Hinc etiam Jeremias sub persona carnalis hominis loquens ait : « Inebriavit me absinthio. » Cujus verbi sensum aperiens beatus Gregorius sic exponit : « Ebrius quod patitur nescit. » Absynthio

ebrius est, qui amaritudines mundi tolerat, et tamen quid patitur, ignorat. Fuerunt ergo tanquam ebrii bellatores Ecclesiæ primitivæ, qui cum interna lætitia corporum tormenta vicerunt, et juxta verbum Apostoli : « Rapinas bonorum suorum cum gaudio susceperunt. » Spiritualis autem jucunditas, similiter ut ebrietas tristitiæ sensum tollit; et mentibus persecutione pulsatis, hilaritatem sanctam infundit.

16. Qualis autem exsultatio sanctorum festivitatem debeat comitari, declaravit Psalmista cum ait : « Exsultationes Dei in gutture eorum et gladii ancipites in manibus eorum. » Humani generis inimicus illis confidenter tendit insidias, quos sæculi gaudii invenit irretitos. Profundius enim infirma sua discutit dolens animus, quam exsultans. Nisi namque tentator callidus tempus lætitiæ tentationi congruere cognovisset, nequaquam filiis et filiabus Job in domo primogeniti fratris sui vescentibus, ipse concussis angulis domus totam beati viri progeniem exstinxisset. Quoniam igitur plerumque, sicut diximus, mentem in tentationis laqueos exsultationis aditus introducti, valde necessarium est, ut dum exsultatio guttur occupat, manus gladium apprehendat. Illum, inquam, gladium, quem Apostolus nominat, Dei Verbum. Opus autem est, ut gladius in manu portetur, quia parum est Dei verbum in corde versari, nisi quis illud studeat operibus implere. Manus igitur gladium apprehendat, ut quod corde sentitur, bonorum operum testimonio confirmetur. Unde beatus Job ait : « Arcus meus in manu mea instaurabitur. » Arcus instauratur in manu, cum instrumentum pugne cœlestis, de quo jacula mittuntur in hostes, bonæ conversationis adjutorio roboratur.

17. Præsens igitur festivitas, sic lætitiæ recipiat blandimentum, ut severitatem gladii non excludat. Qualis etiam lætitia debet esse festivitatis sanctorum annexa, manifeste demonstrat quod dicitur per Psalmistam : « Servite Domino in timore, et exsultate ei cum tremore. » Cum timore serviendum est Domino, quia sic exsultatio timore debet acui, sicut timor exsultatione condiri. Decet enim, ut si servitii spiritualis occasio sæcularem lætitiæ introducat, timoris magisterium eam premat, ut in refectioe sacra dulcedinis simul et acriminis serviat condimentum. Quod etiam alibi monstravit aperte Psalmista, cum ait : « Deduc me, Domine, in via tua, ingrediar in veritate tua, lætetur cor meum, ut timeat nomen tuum. » Per viam Domini ambulat, qui sapienter ei ministrat. Ministrans autem Domini veritatem ingreditur, cum ejus ministerium ad cœlestia retorquetur. Ministerii vero modus aperitur, cum dicitur : « Lætetur cor meum, ut timeat nomen tuum. »

18. Eleganter expressit, qualiter in obsequio Domini sit gaudendum, qui lætari petit, ut timerent. Talis enim debet esse lætitia, ut timorem Domini nullatenus minuat, et talis esse timoris custodia, quæ spirituales lætitiæ non excludat. Unde postquam Psalmista præmiserat : « Servite Domino in

timore, » recte coniungit : « Et exsultate ei cum tremore. » Cum enim Ecclesie filios oporteat salutem suam cum timore et tremore, sicut dicit Apostolus, operari; necesse est, ut cum exsultatio foris adest, ejus ingressum timor interiorius moderetur, ne tota veniens ad cor intret, et ad immoderatum ejus ingressum infirmatio suffocetur. Hoc autem periculum timor et tremor excludant, videlicet ut mens mala quæ possunt accidere, sollicitè pertimescat, et corpus mentis obsequio se reverenter addicat.

19. Sequitur : « Replebuntur ut phialæ, et quasi cornua altaris. » Per phialas et altaris cornua, nobis est insinuata justitiæ duplex forma, variis considerationibus observanda. Sancta namque conversatio, ut ita dixerim, nunc ab angusto tendit in latum, phialæ figuram exprimens, quæ fundum habet angustum, sed patulum os et amplum : et dum in altum ascendit, paulatim in latitudinem se diffundit. Ita justitia, dum proficit, paulatim incrementum suscipit, et in bonis operibus dilatatur. Interdum autem sanctitas progreditur in acutum, sicut altaris cornua sumunt initium a latitudine, sed deinceps se coarctant, itaque in acumine terminantur.

20. Assimilatur his cornibus justitia consummata, quæ cum perfectionem fuerit assecuta, per humilitatis modestiam se constringit, cum in meritum excellentia prius fuerit dilatata. Attendit enim Verbum Sapientis viri dicentis : « Quanto magna est potentia Dei solius, et ab humilibus honoratur. » Hac consideratione vir justus, quanto magis in perfectionem se erigit, tanto per humilitatem amplius se subternit, ne superbia de se sentiat, et per præsumptionem præcipitatus corruat, aut per inanem gloriam evanescat.

21. Qualiter justitia proficiens dilataetur, Salomon docet dicens : « Justorum semita quasi lux splendeat procedit, et crescit usque ad perfectum diem. » Justitia namque cum incipit, primo tenui luce clarescit. Sed cum perfectionem attigerit, claritatis suæ radios circumquaque diffundit. Hinc per Psalmistam dicitur : « Viam mandatorum tuorum cucurri, cum dilatasti cor meum. » Et iterum : « Et ambulabam in latitudine, quia mandata tua exquisivi. » Hinc etiam in Proverbiis ad Filium Patris ait : « Viam justitiæ monstrabo tibi, ducam te per semitas requiritatis, quas cum ingressus fueris, non arctabuntur gressus tui, et currens non habebis offendiculum. » Justitia namque festinans ad præmium, nec angustia coarctatur, nec offendiculo præpeditur, quia Dominus ei contraria dissipat, et ejus impedimenta complanat. Hinc etiam cum profectus David Scriptura sacra describeret, ait : « David proficiens, et semper se ipso robustior erat, domus autem Saul decrescens quotidie. » Justus enim per incrementa meritorum ascendit, injustus autem per malorum operum decrementsa decrescit.

22. Qui autem profectui virtutum insistit, quasi semetipsum proficiendo transcendit. Carnis enim corruptelam deserit, et spirituale fastigium potenter

accingit. Nonne super semetipsum excreverat is, qui ait : « Vivō ego, jam non ego, vivit autem in me Christus ? » Nonne super se ascendere videbatur, cum dicebat : « Quæ retro sunt obliviscens, ad ea quæ sunt priora me ipsum extendo ? Quod de virtutis incremento prædiximus, videlicet, quod justitia proficiens dilatatur, fuit evidenter in templi fabrica figuratum. Superius namque tabulatum in templo majorem latitudinem obtinebat, inferius vero minorem. Nam infimum tabulatum quinque cubitos latitudinis habuit, medium vero sex, superius autem septem.

23. Tabulata, quibus templi parietes decorantur, sunt fideles Ecclesie, qui eam vestiunt et ornant, sicut dicitur ei per prophetam : « Vivō ego, dicit Dominus, quia omnibus hiis velut ornamēto vestieris, et circumdabit tibi eos quasi sponsa. » Bene autem tabulata viros Catholicos indicant, quorum corda charitas dilatavit, disciplina cœlestis excidit, simplicitas complanavit. Huic sensui bene congruit, quod tabulata fuerunt in superioribus latiora, quia fidelium mentes ad temporalia se constringunt, et ad cœlestia se expandunt. Similiter autem templum, quod Ezechielii fuit ostensum, superius fuisse latius perhibetur. Qui autem templi nomine figuretur, docet ille qui ait : « Nescitis quia templum Dei estis ? » Et si suave videtur hoc verbum, pungiturum est valde quod sequitur : « Si quis templum Dei violaverit, disperdet illum Deus. »

24. De templo etiam superius memorato legitur audisse propheta : « Tu autem, fili hominis, ostende domui Israel templum, ut confundantur ab iniquitatibus suis. Confundantur namque salubriter peccatores cum eis proponitur in exemplum vita justorum. In hoc enim speculo maculas suas agnoscunt, et eas lacrymando diluunt, et poenitentiae lamenti abstergunt. Eleganter autem hoc templum superius fuisse latius memoratur, quia, sicut diximus, corda justorum coarctantur in infimis, et dilatantur in summis. Sunt enim corda bonorum thuribulo valde similia, quod cum sit clausum inferius, superius est apertum. Secundum hanc similitudinem pie mentes ad terrena se claudunt, et aperiunt ad superna. Hoc quia in Apocalypsi legitur, Angelum tenuisse thuribulum, quod sanctorum orationibus erat plenum. Illorum namque cordium angeli sunt custodes, de quibus orationum fumus ascendit, quarum odore Dominus demulcetur, et suavitate placatur.

25. Nunc Scripturæ testimoniis ostendamus, quomodo perfecta justitia, cum consummata fuerit, se constringit, et quæ dilatatur in imo, quomodo coarctatur in summo. Quod arca Noë figuravit expresse : scilicet eam superius unus cubitus consummavit. Quid per arcam Noë melius, quam Ecclesia figuratur, quæ sinu mentis expanso Spiritus sancti flatum accipit, cujus impulsu sæculi fluctus secat, et ad vitæ portum tota cordis intentione festinat ? Hæc dilatatur in imo, et coarctatur in summo, quia quæ latitudinem et longitudinem inferius habuit,

postquam in virtutis exercitio se diffudit, dum retributionem supernam attendit, opera sua despicit, et ea tanquam modica perpendit, sub humilitatis custodia se comprimit, et inflationem noxiam virtutis pede restringit. Hæc esse sollicite facienda Salvator ostendit, qui discipulis suis ait : « Cum omnia bene feceritis, semper dicatis : Servi inutiles sumus. » Qui omnia bene facit in bonis operibus se dilatat. Sed qui postea se servum inutilem reputat, per humilitatis modestiam se coarctat. Hinc rursus ad sponsam in Canticis sponsus ait : « Venter tuus sicut acervus tritici, vallatus liliis. »

26. Plerumque ventris nomine mens significatur, eo quod cogitationes in mente sicut cibaria digeruntur in ventre. Unde dicitur per prophetam : « Ventrem meum doleo, ventrem meum doleo. » Quem autem dolorem plangeret, mox aperuit, cum subiunxit : « Sensus cordis mei turbati sunt. » Fuit ergo prophetæ plangenti mentis tribulatio dolor ventris. Hinc etiam de impio scriptum est : « Uterus ejus præparat dolos. » Constat autem, quod carnalis uterus dolos præparare non potest, sed uterus dolos præparans est animus fraudis machinamenta pertractans. Venter itaque, sponsæ signanter, acervo tritici comparatur, qui cum sit latus in imo, tamen est angustus in summo. Quia fidelis anima prius in bonorum operum exercitio se diffundit, demum post contemplationem cælestium in se redit, et per humilitatem, ut diximus, se constringit.

27. Bene autem acervo tritici comparatur, quia, palea vanitatis excussa, meditationis sacræ thesaurum, quasi grana tritici in horreo conscientiæ congregat et servat. Ille autem acervus liliis dicitur esse vallatus, quia fidelis animus undique munditia castitatis est cinctus. Nec solum lilio, sed liliis vallari dicitur, quia veræ castitatis geminus est effectus; videlicet, ut et cor complectatur et corpus. Unde per byssum retortam et duos turtures figuratur in lege. Præmissis consonat, quod Sapientia de se dicit : « Ego quasi cypressus in monte Sion. » Intelligitur autem hoc verbum, sicut de capite, sic de membris, ut una sit vox capitis et membrorum. Cypressus pulcherrimam comam habet, cujus summitas surgit in comam. Est ergo vir justus quasi cypressus, quia coma pulcherrima est conversatio speciosa. Dicitur autem esse quasi cypressus in monte Sion, quoniam in contemplationis vertice constitutus cælestium consideratione se premit, et dum intra mentis se sinum colligit, sub humilitatis custodia se constringit.

28. Mundanus autem usus hujus rei manifestum ostendit exemplum. Nam et avis domestica, aliis avibus capiendis assueta, se premit, cum prædam conspiciat, quam ardentem appetit, et ad quam dirigendam sese sentit. Quis ergo miretur, si mens in humilitate se comprimat, dum prædam beatitudinis considerat, ad quam inhianter aspirat? Per phialas igitur et altaris cornua, sicut diximus, figurantur viri spirituales, divini prælii bellatores, et virtutum

PATROL. CXc.

A ornamentis instructi, tanquam armatura cælesti. Dicuntur autem phialæ a phialui, quod est vitrum in Græco, quia propriæ vasa vitrea vocantur vasa phialæ. Unde de luxuriose bibentibus dicitur per prophetam : « Bibentes in phialis vinum. » Luxuriæ namque non sufficit ut gustui placeat vini sapor, nisi visum quoque demulceat ejus color. Unde Salomon in Proverbiis cohíbere volens luxuriam istam, ait : « Ne intuearis vinum, quando flavescit, et cum splenduerit in vitro color ejus. » Quod autem periculum sit annexum consequenter ostendit : « Ingitur blande et in novissimo mordebit, ut coluber, et quasi regulus venena diffundet. » Regulus aves volantes inficit, coluber autem latibula quærit et colit. Bene ergo vinum colubro comparatur et regulo. Colubro, quia libidinem provocat, cujus turpitudine quærit abscondi. Regulo vero, quia vinum immoderate sumptum viros magnos interdum enervat, qui duabus alis, abundantia scilicet et potentia, volare poterant ad superna, si recte dirigerent iter suum.

29. Licet autem phialæ dicantur vasa vitrea, phialæ tamen erant aureæ, quæ jubente Domino fuerant in tabernaculo præparatæ. Hoc autem bene congruit viris justis, ut sint quasi vitrei, et tamen in veritate sint aurei. Videlicet ut sint quasi debiles, tamen vere sint fortes. Tales voluit esse justos, quæ sicut dictum est supra, discipulis suis ait : « Cum omnia bene feceritis, semper dicatis : servi inutiles sumus. » Fortis est utique, qui omnia bene facit, sed debilem se reputat, qui inutilem servum se vocat. Nonne vas aureum fuit ille, qui plus omnibus laboravit, tamen quasi vas vitreum se exhibuit, qui se nec dignum apostolatus nomine judicavit? In hoc autem vitri similitudinem habeant viri justi, ut solis radium et claritatis lucem admittant, venti tamen flatum excludant, videlicet ut gratiam recipiant, sed noxiæ tentationi resistent. Sunt autem phialæ oblationi libaminum reputatæ. Spirituales ergo viri replentur ut phialæ, si sacrarum cogitationum et piarum intentionum oblationibus cum bonorum operum studiis copiose redundent. Sciendum tamen quod liquida libamina dicebantur. Decet autem quod liquida sint oblationes justorum. Quod utique fiet, si per devotionis ardorem animus liquefat. Unde dicitur per Psalmistam : « Effundo in conspectu tuo orationem meam. » Effundi potest oratio, si fuerit lacrymosa, sed nequaquam effunditur, si per cordis duritiam fuerit congelata. Dicebantur etiam libamina, quia ministri degustando probabant, utrum essent ad offerendum idonea. Sic Domino ministrantes cogitationes suas et intentiones debent quasi gustando discutere, ne quid in eis occurrat, quod Domino debeat displicere.

30. Replentur etiam ut altaris cornua viri sancti. Super altaris cornua sanguis hostiæ ponebatur, unde et eo repleti dicuntur. Hæc igitur solemnia celebrantes velut altaris cornua sanguinis aspersione replentur, quia martyrem venerantes passionis ejus

memoria imbuuntur. Illorum autem mentes memoria martyris imbuunt, quorum conversatio fortitudinis ejus formam in se ostendit. Imitantur enim martyrem, quibus licet non sit datum pati pro Christo, pro ejus tamen amore labentia cuncta despiciunt, carnem affligunt, et ad promerenda cœlestia se potenter accingunt.

31. Nobis itaque, qui speciali martyris protectione gaudemus, præcipue congruit, ut nos in ejus obsequio specialiter affligamus, dicente Scriptura: « Qui transfert lapides affligetur in eis. » Lapidum nomine martyres figurari sequentia declarabunt. Lapidem ergo transferunt, qui translationi martyrum obsequia suæ devotionis impendunt. Qui scilicet eorum reliquias de locis humilibus elevat, ut sublimius et solemnius cum debita veneratione reponant. Nos igitur lapidem pretiosum transtulimus, cum translationi martyris obsequium quale potuimus, exhibere curavimus. Ut itaque supra positum scripturæ verbum impleatur in nobis, ob venerationem ipsius, qui se pro Domino hostiam obtulit, carnem nostram Domino viventem hostiam immolemus, ut a nobis concupiscentias noxias et prava desideria reseceamus. Sic itaque Domino largiente servitutis nostræ mysterium impleamus, ut pro modulo suo capiti membra respondeant, et Patrem Filii pro viribus studeant imitari.

32. De viris quoque justis additur consequenter in verbo prophetico, quod suscepimus exponendum: « Salvavit eos quasi gregem populi sui. » Illum namque populum Dominus elegit ad salutem, qui cum ratione vigeat, per quamdam tamen similitudinem se gregi conformat. Decet enim, ut fideles Domino servientes per sapientiam et discretionem sint populus, per mansuetudinem et simplicitatem sint greges. Unde dicitur per Psalmistam: « Nos populus et oves pascuæ tuæ. » Populus sunt et oves, qui sunt prudentes ut homines, et simplices velut oves. Hinc iterum per Psalmistam dicitur: « Qui deducis velut ovem Joseph. » Vir justus per vias rectas deducitur ad superna, cum in bonis operibus proficit quasi Joseph; Joseph enim interpretatur *augmentum*. Et tamen ut ovis nec simplicitatem deserit, nec mansuetudinem derelinquit, viri sancti Creatori dedicati taliter ad patriam deducuntur, quia profectui vigilantiter insistant, pastorique suo simpliciter et humiliter acquiescant. Unde religionis eminentiam bene significat turris gregis, de qua legitur in Scriptura. Per gregem enim humilitas, per turrim altitudo significatur. Quid est igitur turris gregis, nisi sublimis humilitas, aut humilis altitudo? Quarum utramque status religionis observat, quia sublimitas est in opere laborantis, et humilitas in æstimatione laboris. Unde Balaam castra filiorum Israel videns ait: « Quam pulchra tabernacula tua Jacob, et tentoria tua Israel, quasi valles nemorosæ! » Per castra filiorum Israel religionis acies figurantur, quæ vallibus nemorosis egregie comparantur, quia vallis est humilis, nemus altum. Quid est igitur vallis nemorosa, nisi depressa

A sublimitas, aut humilitas exaltata? Quam conversationis formam religiosi bene conservant, quia sunt in cordibus suis humiles et in operibus suis excellentes.

33. Sequitur in verbo prophetico: « Salvavit eos Dominus Deus eorum, quia lapides sancti elevabuntur super terram ejus. » Salutem ergo fidelium operatur sanctorum lapidum elevatio super terram. Quod Lapidum nomine sancti martyres designantur, qui solidi fuerunt in constantia, fortes in justitia, duri contra tormenta, testatur ille qui ait: « Quos imbres montium rigant, et non habentes velamen amplexantur lapides. » Montium imbres rigant, quos viri tam scientia, quam vita sublimes verbis pariter et exemplis informant. Velamine autem carent, qui bonorum operum ornamenta non habent. Sunt namque virtutum opera quasi vestes, quibus anima decenter ornatur, et pudendorum actuum seditas operitur, ne a superbo iudice videatur. Unde scriptum: « Beatus qui custodit vestimenta sua, ne nudus ambulet; » et Apostolus Corinthiis scribens ait: « Scimus quoniam si terrestri domus nostra hujus habitationis dissolvatur, domum non manu factam habemus in cœlis. » Et paulo post addit: « Si tamen vestiti, et non nudi inveniamur. » Ducitur namque vestitus ad regna, sed nudus ejicitur ad tormenta. Hinc iterum scriptum est: « Nonne vestimenta calida sunt, cum perflata fuerit terra austro? » Austro terra perflatur, cum Spiritus sancti gratia repletur. Unde sponsus ait in Canticis: « Surge aquilo, veni auster, perfla hortum meum et fluent aromata illius. » Rectissime potest dici hortus Domini quies claustrum, in quo doctrina cœlestis inseritur, sancta conversatio propagatur, vitiorum frutices succiduntur. Dominus igitur est rogandus, ut ab horto suo flatus aquilonis excludat, ut ad eum libere flatus australis accedat, quia claustralibus incumbit orare, quod Dominus inimici insidias repellat ab eis, et Spiritum sanctum requiescere faciat super eos. Facit autem aromata fluere flatus austri, id est Spiritus sancti gratia procurante per laudabilis famæ præmium ad eos, qui foris sunt, odorifera claustralium opera derivantur, quatenus exempla iustorum confundant, impios autem convertant. Est itaque Spiritus sanctus auster et ejus inspiratio flatus austri. Opera vero bona, sicut diximus, per vestimenta signantur. Facit itaque vestimenta calida flatus austri, quia virtutum opera reddit devotione ferventia cœlestis inspiratio cor illuminans et inflammans, quoniam ab austro veniunt lux et calor. Quos igitur montium imbres rigant, et non habentes velamen lapides amplexantur, quia peccatorum sarcina prægravati, cum fuerint doctrinis salubribus eruditi, vel propria calamitate compulsi, martyrum reliquias venerantur, ut eorum nuditas sanctorum intercessionem legatur.

34. Rursus de lapidibus istis scriptum est: « In præruptis silicibus aquila commoratur. » Per aquilam vir contemplativus intelligitur, qui suæ mentis intuitum justitiæ in sole deligit, qui sublimia vo-

lando penetrans, considerationi supernorum intendit. « Præruptum autem est, ut dicit beatus Gregorius, cuius pars cecidit, pars subsistit. » Præruptis ergo silicibus recte martyres comparantur, quorum corpora per martyrium ceciderunt, spiritus autem in celestibus requiescunt, et sicut de viris sanctis canitur, reddentes terræ corpora, beatas cælo animas intulerunt. In præruptis ergo silicibus aquila commoratur, quia contemplativi martyrum obsequio deputati in eorum memoria requiescunt, et eorum venerationi et imitationi se totos impendunt. Alioquin nequaquam in silicibus commoratur aquila, nisi martyribus servientes, tam mente quam corpore servitutis suæ debitum studeant exhibere. Nequaquam commoratur in silice, qui psallit aut cantat coram martyre, mens autem ejus vagatur exterius in sæculi vanitate.

35. Sunt ergo lapides sancti, sicut ostendimus, martyres Jesu Christi. Super terram ergo sancti lapides elevantur, cum reliquiæ martyrum de tumulis transferuntur. Notandum autem, quod non tantum super terram ejus sancti lapides elevandi dicuntur, quia sanctorum reliquiæ non solum superius elevantur, sed in Ecclesia, quæ terra Domini appellatur, eorum elevatio reverenter impletur. Ex hoc salutem Dei populo proveniente sermo propheticus, quem proserui sumus ostendit. Speremus igitur et nos, quod martyris nostri translatio, quam solemniter celebramus, nobis in præsentem veniam peccatorum, et salutem perpetuam nobis apud Dominum obtinebit percipiendam post hujus vitæ decursum. Roboraverunt autem valde spem istam quædam signa, quæ misericordia Dei vobis ostendit, quando translatio facta fuit. Provisum namque fuerat ab his, qui martyrem transtulerunt, ut feria tertia transferretur, quia feria tertia passus fuit, ut talis dies ejus gloriæ deserviret, qualis ejus passioni ministerium suum impendit. Sed in Christo testatur præter humanam providentiam accidisse, Dei gratia taliter procurante, quod anno quinquagesimo passionis ipsius, venerabile corpus ejus gloriam translationis accepit. Quid autem nobis per istum insinuat eventum? Quinquagenarii nobis virtus indicat, quem remissionis numerum esse constat, quod nullus sacræ paginæ lector ignorat. Ex hoc igitur quod anno quinquagesimo transferri voluit, spem certam nobis tribuit, quod nisi per nos steterit, remissionis nobis gratiam obtinebit.

36. Aliud autem accidit, quod humana deliberatio nullatenus ordinavit. Bissextilis siquidem fuit annus translationis, in quo est plenus dierum numerus et perfectus, ut ex hoc eventu speremus, quod martyris intercessio dies nostros in præsentem complebit in bono, et perducet nos ad dierum plenitudinem in futuro.

37. Contigit et illud memorabile, quod ad martyris gloriam procurante Domino creditur accidisse. Martyr enim fuit ea die de terra translatus, quæ rex Henricus, cujus tempore passus est, fuit in terra

sepultus, ut impleretur hoc mox quod legitur in Scriptura: « Mons cadens defluit, et saxum de loco suo transfertur. » Montes sunt, qui terram plenam altitudine sua transcendunt, et in sublimitate cacumen suum attollunt. Montes itaque sunt reges et principes, qui terrarum dominium obtinent, et sublimiores sunt cæteris eminentia potestatis. Mons ergo magnus cecidit, cum regem mortuum sinus terræ suscepit. Defluente igitur monte saxum est de loco suo translatus, quia regis corpore in terra deposito, martyris corpus est honorifice sublevatum. Miracula quoque varia translationis tempore martyr fecit, per quæ favorem suum translationem exsequentibus et venerantibus adesse monstravit.

38. Ad translationis corporis beatissimi Thomæ meritis gloriam declarandam, parabolam evangelicam ad memoriam revocemus: « Nemo lucernam accendit, et in abscondito ponit, neque sub modio, sed super candelabrum, ut qui ingrediuntur lumen videant. » Quod beatus martyr, cujus solennia celebramus, lucerna fuerit ardens et lucens, cælum et terra testantur. Ardens, inquam, sanctitatis exemplo, lucens documento salutifero. Dominus hanc lucernam accendit, cum electum suum in apicem eximie prælationis erexit. Hanc etiam lucernam emunxit, cum martyrem suum exsilio diuturno, contumeliis, damnis et injuriis innumeris affligi permisit. Fuit enim hæc tribulationum immensitas tantumquam emunctorium hujus lucernæ, quia quod beatus vir purgandum habuit, fornacis hujus flamma consumpsit. Dominus hanc lucernam exstinxit, cum servum suum martyrio consummavit. Sed dum corporaliter eam exstinxit, spiritualiter eam magis accendit, quia sanctitatis ejus titulum post mortem ipsius crebris miraculorum testimoniis illustravit. Lucernam ergo suam Dominus nequaquam abscondit, quia martyris sui gloriam virtutum assertionem monstravit. Aliquando tamen sub modio latuit hæc lucerna, sed eam Dominus opportuno tempore revelavit. Cum mensura quædam modius appellatur, recte per modium potest tumulus designari, qui se mortuo commensurat, et se corpori tumulando conformat. Sicut autem modio mensuratur annona, quæ indigentibus erogatur, sic de tumba martyris largitas divini muneris sæpe provenit infirmis. Latuit igitur lucerna sub modio, quando martyr requievit in tumulo. Sed eam de latebris nunc eductam supra candelabrum Dominus exaltavit, quia martyris reliquias de tumulo reverenter assumptas in loculo pretioso martyris usibus deputato sublimiter collocavit. Capsam enim martyris quid rectius dixerim quam candelabrum luminis, quæ lumen illud egregium, quod ad se tam corde, quam corpore venientes illuminat, intuentibus representat? Ad hanc ergo lucernam, charissimi, totis mentibus accedamus, et ei vitæ nostræ maculas præsentemus, quia ut dicit Apostolus: « Omnia quæ arguuntur, a lumine manifestantur. » Si igitur ad claritatem hujus luminis accedamus, malum quod in nobis prius videre nequivimus,

ejus beneficio cognoscimus. Ad memoriam reveco-
mus quod in Evangelio scriptum est : « Omnis qui
male agit, odit lucem, et non venit ad lucem, ne
arguantur opera ejus. » Fugiamus tamen istud exem-
plum, et quod sequitur imitemur : « Qui autem facit
veritatem, venit ad lucem, ut manifestentur opera
ejus, quia in Deo sunt facta. »

39. Rursum, ut translationis fructum et gloriam
plenius indicemus, illud Scripturæ testimonium at-
tendamus : « Homo sanctus in sapientia manet sicut
sol, stultus ut luna mutatur. » Sapiens, in Proverbiis
notificans stultum, ait : « Stultus transilit et confi-
dit. » Stultus enim est, qui mandata transgreditur, et
tamen sibi de impunitate blanditur. Specialiter
autem stultus est, evangelica veritate testante, qui
super arenam ædificat domum suam. Arena est
temporalis abundantia, quia sterilis est et gravis.
Sterilis Salomone dicente : « Qui amat divitias, fru-
ctum non capiet ex eis. » Gravis, Apostolo teste, qui
ait : « Qui divites volunt fieri incidunt in desideria
multa, inutilia, et nociva, quæ mergunt hominem
in interitum et perditionem. » Illic etiam Salomon
ait : « Vidi cuncta, quæ sunt sub sole, et ecce uni-
versa vanitas, afflictio spiritus. Vanitas sterilitatem
inducat, afflictio spiritus gravitatem. Stultus ergo
super arenam ædificat domum suam, quia terreno-
rum amator figit in temporalibus desideriis mentem
suam. Hic autem ut luna mutatur. Cum mundana
mutabilitas lunæ nomine designetur, bene stultus
dicitur ut luna mutari, quia mundanam vicissitu-
dinem imitatur, quem extollunt prospera, frangunt
adversa. Homo vere sanctus in sapientia manet ut
sol. Justum est, ut Domino servientes omnes sint
sancti. Unde Moysi dictum est : « Loquere ad
omnem cœtum filiorum Israel, et dices ad eos :
Sancti estote, quia ego sanctus sum, Dominus Deus
vester. » Specialiter tamen sancti sunt, qui contem-
plationi cœlestium sunt addicti. « Sanctus enim, ut
ait Beda, Græce dicitur *ἅγιος* *agios*, quod sonat,
extra terram. Sancti ergo sunt, qui a temporalibus
separati in cœlestibus conversantur. Unde dicitur
per Prophetam : « Sanctus Israel Domino primitiæ
frugum ejus. » Sicut interpretatio nominis indicat,
Israel est supernorum inspector et cœlestium con-
templator. Sunt autem primitiæ frugum in agro Do-
mini, qui cœlestibus sunt intenti, quia superna fer-
ventius concupiscunt, quanto sæpius eorum con-
sideratione se pascunt. Est autem sanctus homo ut
sol, qui calidus est, et fervet animo, lucet exemplo.
Manet autem in sapientia sanctus, sed eam cito
deserit homo stultus, si interdum eam assumit.
Unde scriptum est : « Quoniam aspera nimium est
sapientia indoctis hominibus et non permanebit in

A illa excors. » Econtrario dicitur viro isti : « In
omni animo tuo accede ad illam, et in omni virtute
tua serva vias ejus. Investiga illam, manifestabitur
tibi, et continens factus ne derelinquas eam. »
Quod homo sanctus beatus martyr fuerit, Dominus
ipse patenter ostendit. Quem amaritudine pressura-
rum a dulcedine temporalium ablactatum Dominus
ad mensæ suæ delicias invitavit, et ei beatitudinem,
ad quam aspirare debuit, patefecit. In sapientia vero
mansit, quia dum vixit, fideliter Deo servivit; no-
vissime vero pro eo vitam suam impendit. Fuit
autem ut sol, qui sanguinis sui radiis sanctam Ec-
clesiam illustravit.

40. Elevationem igitur hujus solis solemniter ve-
neramus, cum translationem hujus martyris sinceris
mentibus celebramus. Quod igitur scriptum est : ser-
vorum ejus congregatio diligenter attendat : « Ele-
vatus est sol, et luna stetit in ordine suo. » Luna lu-
men trahens a sole est hæc congregatio, quæ ab
exemplo martyris vivendi formam assumit. Luna
igitur in ordine suo stet, quoniam elevatus est sol,
id est martyri servientes ab ordinis sui regula non
declinent. Sed patronum suum in sublimi positum
coram oculis suis videant, et eum in bonis operibus
adjectorem confidenter expectent. Qualiter autem
ad observantiam ordinis prosit sublimitas solis,
colligitur ex subjectis. Sol enim elevatus in altum,
ministrat abundantiam luminis et caloris. Spere-
mus itaque quod sol noster de tumultu elevatus aer-
vis suis lumen tribuet, quod ab eis tenebras igno-
rantie nocivæ repellat, calorem etiam conferet, qui
mentes eorum ad amorem divini cultus accendat.
Faciens etiam abundantia luminis, quod servetur
honestas, et quæ turpitudinem, si fieret, revelaret.
Unde nihil sustinet inhonestum. Abundantia vero
caloris efficit, ut secundum ordinem cuncta fiant.
In his autem duobus religionis summa consistit, ut
ab his, qui religioni colla supponunt, juxta verbum
Apostoli, honeste et secundum ordinem cuncta fiant.
Sol item elevatus in altum attrahit guttas maris.
Unde sol justitiæ de se dicit : « Ego si exaltatus
fuero a terra, omnia traham ad me ipsum. » Tan-
quam sol, qui mundum illuminat, de se dicat : « Ego
cum elevatus fuero super terram, attraham innu-
meras maris guttas. » Prodest itaque viris justis
gloria translationis, quia solis elevatio lunam in
ordine suo servat. Prodest et peccatoribus hujus
mundi, quia sol cum fuerit elevatus, guttas at-
trahet aquæ salis, quibus peccatores rectissime
comparantur, tum propter brevitatem et salsugi-
nem vitæ mortalis, tum propter amaritudinem
peccatorum.

XIV.

TRACTATUS DE PROMISSIONE BEATI THOMÆ MARTYRIS,

VIDELICET

Quod talis esset sibi successurus, qui ecclesiæ Pontiniacensi recompensaret pro liberalitatibus sibi tempore sui exilii impensis

1. Qui gubernationem huiusmodi Deo attribunt, A valent, pro parte studuimus fideliter adnotare. Si recte sentiunt, quia nec folium quod vento rapitur, ejus excedit potentiam; nec ipse ventus, qui de thesauris ejus producitur, fandi habet potentiam contra ipsius imperium. Quamvis enim homines, utpote animales, quædam huius mundi opera admirentur, quasi absque gubernatoris magisterio contra rectitudinis ordinem corruptibiliter defluant et excurrant, ut exclamare valeant cum propheta, dicentes: « Quare via impiorum prosperatur, bene est his qui perverse agunt? » tamen nequaquam est pertinaciter asserendum quidquam in hoc mundo fieri, nisi Deo gubernante, aut aliquoties permittere; cum enim ipse sit causa prima et principalis influens super omnia causata fluxu ordinatissimo et serenissimo, certum est quod illa quæ ab ipso causam accipiunt, ad finem bonum rectissime ordinantur.

2. Mala autem incausalia sunt, nec habent rectum ordinem neque finem. In quantum enim a bono deficiunt; in tantum ad nihil tendunt, et non est in eis nisi privatio boni quod nihil ponit in re, sicut claudicatio in homine vel equo nihil ponit nisi privationem recte ambulandi. Quamvis igitur ratio reddi non possit de omnibus, quare hoc vel illud fiat, manet tamen apud Deum de omnibus certa causæ redditio, nobis quidem occulta, ei autem qui lucem habitat inaccessibilem manifesta. Hinc est quod sacri expositores atque doctores conati sunt per mysticas expositiones et allegoricas significationes de rebus mirabilibus probabiles reddere rationes, quorum innumerabilia sunt exempla, de quibus uno posito plura possunt intelligi si oportet. Ponamus ergo illius maximi doctoris beati Gregorii unum exemplum, et sit totius sequentis materiæ fundamentum. Ait enim super Evangelium beati Joannis, ubi de resurrectione Domini agitur, in hunc modum: « Cum discipulis consternatis fuit nuntiatum Dominum de monumento fuisse sublatum, tunc, inquit, currebant duo simul, et ille alius discipulus præcurrit citius Petro. » Quid, ait beatus Gregorius, quid, fratres, quid cursus iste significat? ex interrogatione sua volens alicujus significationis magnum elicere argumentum. Huic interrogationi volo aliquid annectere nequaquam pro nostro tempore negligendum. Quamvis enim incuria hominum neglectu suo multa prætereat, quibus optata successibus præbere debuit incrementa, nos tamen ea quæ digna sunt relatu comperimus, ne obliterari

quidem colendæ occurrit memoriæ recolendum, quod beatus Thomas Cantuariensis archiepiscopus atque primas exilium eligens maluit exulare, quam Cantuariensem Ecclesiam cui præfuit ancillare. Egressus igitur ab Anglia venit Pontiniacum, et ibi sex annis, ut dicitur, exilii jura perpassus, in visione admonitus, ubi ante aram beati Stephani in contemplatione prostratus, ut laboris sui bravium æternæ felicitatis coronam perciperet, redire in Angliam est hortatus. De qua visione sanctus pontifex, et statim martyr post futurus, factus hilarior, ad promissam sibi victoriæ coronam oculus properavit. Quem fratres ipsius monasterii vultu lugubri, et pene, 'ut erat, funebri lacrymabiliter subsequentes suppliciter exorabant, ne eos desereret, ne eos ipsos tantæ spei solatio destitueret, ne ipsos tanquam orphanos relinqueret, sed apud ipsos vel omnino maneret, vel si sic oporteret, quanta posset celeritate rediret. Ad quod pius Pater brevi se sermone absolvit dicens: « Sic fieri oportere, nec divinis jussionibus contraire. » Sed hoc fore sciendum quod graves expensas et largos sumptus, quos monasterium tempore suæ necessitatis præbuerat, aliquis successorum suorum sufficienter recompensaret, quod fratres monasterii illius multæ simplicitatis, tunc quasi intelligere non poterant; sed subsequens res probavit eventus, sicut legitur de discipulis Jesu Christi, ut dicitur: « Hæc non cognoverunt discipuli ejus primum; sed postquam resurrexit a mortuis, tunc cognoverunt, et hæc fecerunt ei. » Ita verissime non cognoverunt fratres monasterii Pontiniacensis quid beatus Thomas vellet dicere per hæc verba; sed postmodum cognoverunt quod de his diceret, sicut in sequentibus apparebit. Eo enim passo et martyrio coronato, et miraculis coruscantibus declarato, quod justam causam fuerat persecutus, aliis et aliis substitutis, jam excesserat memoriam factum verbum illud martyris ore prolatum, sed congruo tempori reservatum.

3. Post aliquos enim dicti martyris successores tandem in Cantuariensem Ecclesiam instituitur per apostolicæ sedis providentiam, magnus ille et famosus doctor Ecclesiæ, videlicet dominus Stephanus de Langtone Romanæ Ecclesiæ cardinalis, qui accepto pallio et litteris ad suum propositum necessariis, nuntiis in Angliam ante præmissis, subsequi properabat. Sed veniens in partes Galliæ, a præmissis nuntiis ad se redeuntibus responsum accepit, quod

rex Angliæ pro eo quod alium instituere decreverat, eum admittere recusabat : super quo licet sæpius per apostolicæ sedis litteras et legatos rex fuisset admonitus, tamen in suo proposito perstitit induratus : sique præfatum archiepiscopum Stephanum ad Pontiniacense monasterium contigit accedere, ad finem causæ per sex annos instar beati Thomæ martyris in exsilio expectare. In tantum enim invaluit regis commotio, quod tota Angliæ propter hoc ecclesiastico supposita existit interdicto. Quin imo, invalescente contradictionis procella, plures ex episcopis Anglicanis pro devotione et obedientia de ipso regno oportuit secedere, et ad archipræsulem suum se transferre. In cuius rei argumentum unus ex ipsis videlicet Wigorniensis episcopus apud Pontiniacum postmodum est sepultus. Timor autem erat archipræsuli ne præfatum monasterium tantorum præsentia gravaretur, sed gaudium erat fratribus, quod tot et tantos pro causa tam nobili suscipere meruerunt. Postquam vero procellosa tempestas post nubilum conquievit, præfatus antistes cum honore debito vocatur in Angliam, ex quo sibi et sui ortum est gaudium, sibi autem soli magnæ sollicitudinis et angustię incitamentum. Pensabat autem vir prudens largos sumptus sibi et suis exhibitos recompensare ; sed unde tunc temporis compensaret nec habuit, nec unde habere posset de facili non invenit. Quantum ergo ad hoc tristis abiit ! Sed hanc tristitiam postmodum nobili compensatione redemit. Nam, postquam honoris sui plenitudinem est adeptus, quinquaginta marcarum redditus Pontiniacensi monasterio in perpetuum delegavit. Tunc credebatur impletum quod a beato Thoma, ut superius est expositum, fuerat prophetatum sibi successorem aliquem post ipsum debere substitui, qui satisfaceret pro utroque, verum licet hæc opinio aliquantisper duraverit, et videretur a multis quod sic omnino ante promissum tunc fuisset solutum, nec esset qui contrarium autumaret, tamen aliter videmus impletum.

4. Nam, mortuo eodem archiepiscopo, et apud Cantuariam in pace sepulto, post aliquantum temporis beatus Edmundus cathedram archiepiscopalem suscepit, non sponte, sed invitus. Cathedram Cantuariensem elegit suscipere non humana ambitione, sed divina, ut credimus, dispensatione qua suscepta quod clam latebat in pectore, postmodum luculentius prodibat in messe. Erat enim quasi quædam lucerna sub modio posita : sed postquam super candelastrum est elata, tunc certe patuit his qui in domo Dei ambulant confiderent. Nam in diebus suis placuit Deo, et inventus est justus, et pro zelo justitiæ, nec regem pertimuit, nec regni majores, nec etiam domesticos, quos rex allexerat in persuasionibus effrenatis tempus redimere volentes, exaudivit ; sed potenti virtute accinctus, murum pro domo Domini se posuit, et malens instar prædecessorum suorum affligi pro populo Dei in exilio quam temporalis peccati habere jucunditatem in patria.

A Se igitur subtraxit ab Angliæ, et monasterium Pontiniacense est ingressus quasi muro inexpugnabili circumseptus ; et in abscondito faciei Domini a conturbatione hominum veluti in tabernaculo Domini conquievit. Sed ex hac quiete intimum dulcedinis elegit Dominus evocare famulum suum ad statum interminabilem quietis æternæ.

5. Mortuus est itaque in ætate bona, mente secunda, spe certa, consummatione beata, sepultura suæ locum eligens, ubi ipse et antecessores sui antea aliquando fuit degens. Verum quia nunquam post aurum abiit, nec in pecuniæ thesauris speravit, non habuit unde Pontiniacensi monasterio retribueret, pro omnibus quæ retribuit illud sibi. Ne tamen videretur ingratus, fecit quod potuit, et decem marcarum redditus priori pensioni quam dominus Stephanus assignaverat, adjecit. Et sic iterum credebatur impletum quod supra a beato Thoma meminimus repromissum. Sed certe largius scit providere Dei benignitas quam sperare audeat humana infirmitas. Non enim sine causa dictum est a Domino : « Qui reliquerit domum vel fratres propter me, centuplum accipiet in præsentem, et vitam æternam in futuro. » Adeo enim benignus et largus est noster paterfamilias, quod non solum dilectores suos remunerat in futuro, sed etiam bene utentibus præstat præmia in præsentem, unde quod dilecto suo in vita defuit, ipse prædilectus et diligens, in dilectoris sui morte supplevit. Nam coruscantibus miraculis, ad ejus excubias ægri veniunt et sanantur,

C munera deferuntur, et quæ ad mundi luxum deputata fuerant in auro et lapidibus pretiosis, ad tumbarum sacri pontificis dedicantur. Videres ibi regales fibulas coruscare, aurea discriminabilia emicare, monilia insertis gemmis pretiosissimis quodammodo scintillare, gemmas de diversis pretiosis lapidibus annulos radiare, et diversarum imaginum species quasi sanctum Domini adorare. Sed et promiscui sexus et vulgi oblationes veluti quasdam miantias et forte apud Deum maximas quasi in gazophylacium Domini comportare. Et sic certe absque omni dubio oculo ad oculum hodie videmus impletum quod voce prophetica beati Thomæ martyris olim fuerat prælibatum, nam in duplum vel in quadruplum credimus restitutum quod circa sacros pontifices plura liberalitate fuit depensum. Et hæc potuit esse una ratio et non minima quare sit divina providentia, ut beatus pater Edmundus se pro se ac pro suis antecessoribus quasi obsidem daret, et solvendo charitatis seu hospitalitatis debitum, civiliter tamen indebitum se et illos liberaliter liberaret ; et putandum quod fratres domus ipsius hoc debitum recipiant, ut debitum a donatoribus tanquam donum omnia convertentes ad ipsum beati Patris feretrum adornandum.

6. Nunc igitur convertere aliquantulum, o lector, si vis simpliciter oratione fore contentus, et dic cum B. Gregorio verba ipsius ad tuum referens intellectum. Quid, fratres, cursus iste significat ? An casu

gestum ere¹itis quod electus ille Domini B. Thomas A juris ecclesiastici maximus propugnator, excurrrens de Anglia in Pontiniacense monasterium se locavit, et per sex annorum curricula ibidem aliasque perendinans in Domino militavit; et tandem rediens cursum suum felici martyrio consummavit. Nulliusne considerationis existit quod successor ipsius magnus ille Stephanus cardinalis consummatus in archiepiscopum, antequam ingrederetur in Angliam, eam pro libertate fere consimili apprehendens, antecessoris sui vestigia subsecutus, tot annis ibidem commoratus, et tandem ad propria revocatus, in pace apud Cantuariam est sepultus? Nunquid a mysterio charitatis vacare credimus quod tantorum etsi non inferior successor B. Pater Edmundus in patria sua laudabiliter conversatus, absens et nesciens ad apicem metropoleos sublimatus, tandem indutus lorica justitiæ pro justitia exulans apud sæpeditum monasterium in assuetis sanctæ vitæ operibus aliquandiu conversatus, ibidem tumultus, et postmodum ad locum honori suo congruum est translatus? An hoc totum quod circa tam eximios tres, videlicet patriarchas sive primates, quod idem est in re, sed diversum in nomine, casui vel fortunæ, et non patiens ascribi debeat dispositioni divinæ? Voluitne ea fieri pro nihilo qui dixit de duobus passeribus comparatis dipondio, quod nec alter cadet super terram sine Patre nostro cui est cura de omnibus? Nunquid major cura est illi de duobus passeribus quam de tribus pontificibus? de quibus primus exiens de finibus suis post exilium est regressus et martyrio consummatus. Secundus antequam patriam ingressus exilium est perpassus, et tandem in sua sede locatus, ibidem etiam est mortuus et sepultus. Tertius vero inthronizatus in pace exulans sine pace temporis, in exilio quesivit pacem pectoris et invenit, et ab hac transivit ad pacem æternitatis. Est ergo in omnibus tribus multa conformitas, et inter se discreta diversitas, de quibus licet aliquid ratione subnixum quod significet, cogitare et probabiliter cogitatum calamo licet humili exarare, et qui dictum causari voluerit, habeat licentiam cancellandi, vel materiam ipsam in meliorem formam et habitum transformandi.

7. Doctor gentium, Apostolus sanctus, Patres D Veteris Testamenti in catalogo sub quodam epilogo ponens, nominatim expressis aliquibus aliis a justitiæ operibus designatis, tandem concludit et dicit quod tales per fidem vicerunt regna. Fides enim testimonium accepit ab operibus, ab opere operante magis quam ab opere operato; unde sic concludit in fine: « Et hi omnes testimonio probati sunt. » Patres etiam Novi Testamenti testimonio fidei probati sunt, quia testes facti sunt usque ad mortem, unde in laude Innocentium dicitur quod testimonium reddiderunt Domino Jesu Christo etiam non loquentes; et idcirco a Græco vocabulo, quod sonat *testis*, martyr vel martyres sunt vocati. Unde non incongrue quaeri potest quomodo B. Thomas martyr

proprie dici possit, cum pro fide martyrium non acceperit, ut videtur. Constat enim regem Angliæ sub quo passus est, et similiter illos a quibus passus est Christianos fuisse ac fideles, saltem fide informi, nec agebatur ad hoc ut jam dictus præsul aliquem articulum fidei cogeretur defendere, aut aris idolorum thura imponere. Sed erat quæstio inter regem et præsulem de quibusdam juribus, quæ unus injuriam, alter justitiam, æstimabat. Quæ quidem quæstio salva fide utriusque et moveri poterat et finire. Sed ad hoc satis congrue respondetur, quod est fides articulorum, et est fides sacramentorum, et est fides catholicæ dignitatis et ecclesiasticæ libertatis. Pro fide articulorum in symbolis expressorum astiterunt sancti in agone certaminis contra principes, sed paganos. Pro fide sacramentorum et potestate clavium constituerunt doctores Ecclesiæ contra hæreticos atque schismaticos a fide devios. Pro fide ecclesiasticæ libertatis pugnatum est et pugnant hodie fortes ecclesiarum prælati contra principes et tyrannos nomine tenus Christianos. In hac igitur ultima acie fortes facti sunt in bello B. Thomas, dominus Stephanus, et sanctus Edmundus, et suo testimonio probaverunt, quod non minus est testis qui defendit ecclesiasticam libertatem, quam is qui propugnat articulate fidei Christianitatem. Alioquin non diceret Dominus improprianter malis Ecclesiarum rectoribus per Ezechielem: « Non opposuistis vos murum pro domo Domini, ut staretis in prælio contra ascendentes ex adverso. » C Magna enim potestate munivit Dominus vicarium suum, videlicet B. Petrum, cum tradita ei potestate clavium, ligandi scilicet atque solvendi, statim adjecit pollicens, quod portæ inferi contra hanc auctoritatis potentiam minime prævalerent. Poras inferi hæreses voluit intelligi et tyrannicas potestates.

8. Secundum ergo præceptum legis divinæ qua dicitur: « In ore duorum vel trium testium stabit omne verbum, » manifestum est quod per hos testes tres eximios probata est peroptime causa atque defensio ecclesiasticæ libertatis, et pro indicio demonstrativæ probationis, ratio poscebat ut duo saltem ex tribus in Cantuariensi ecclesia, cujus causa agebatur, in monumentum victoriæ duo testes legitimæ probationis non solum vivi, sed et defunctorum corpora remanerent, ut essent quasi titulus triumphalis suffraganeos suos ad similia provocandi, et in spe certaminis victoriam obtinendi, nec oportebat ut tertius adderetur qui dispensatione divina ad ampliandum ecclesiastici honoris titulum utiliter ad alias servabatur. Non est enim in præjudiciale Cantuariensi Ecclesiæ quod corpus B. Patris Edmundi ibidem cum aliis minime requiescit, quia ex hac causa nihil deperit, nec honor ejus inde vilescit. Imo bene rem intuiti, certum quod tam personæ quam loco ex hoc plurimum honoris accrescit. Manet autem ejus memoriale quod non derelinquatur in sæcula, quod talis fuit Cantuariensis archiepiscopus, et qui illius sedis patronus fuit et defensor in terris, et procul-

habio eorum qui credenda crediderint est pius intercessor in cœlis. Sed posito quod corpus ejus inhumatum fuisset in Anglia, quid honoris et gratiæ protot beneficiis tantis patribus et successive exsilibus Gallia tunc haberet? Anglia quidem tunc læta foret, sed Francorum patria, in qua fulserunt tam præclara miracula, tractum modici temporis tam celebrem memoriam aboleret. Nunc autem dispensatione divina, ut credimus, melius est provisum, ut unum regnum gaudeat, se talem Deo genuisse devotum, et tantum habuisse patronum; et aliud regnum similiter tali sibi collatum cœlitus fore donum, retinere scilicet thesaurum, vas, inquam, corporis sui omni lapide pretiosius.

9. Est et aliud memorabile et considerabile in hoc facto. Prædecessores sui B. Thomas et dominus Stephanus fuerunt ad suam ecclesiam solemniter revocati, utrum vere, an fictitio, nos facti ignari existimus, et melius rei probavit eventus. Sanctus Christi Domini confessor Edmundus non fuit aliqua solemnitate debita adhibita revocatus. Quomodo ergo venisset invitus, vel potius impudicus, qui pudicitia tam mentis quam corporis fuit hominum reputatione et rei Christianitate conspicuus? Fecit ergo quod debuit, et ultro se, ne fontem daret in frontibus, non ingressit, sed eorum loco et patria se subtraxit, qui ut ipsum possent retrahere libenter ad tempus cum ipso extra patriam exsulerent, et exilium post vitam sustinerent, quod inviti in vita cum ipso sustinuisse volebant. Providit ergo Deus melius, et sine ipsis consummaretur in patria, in qua non erat eis calumniandi vel insultandi larga data licentia, quæ ipsius patris vitam atque miracula facile suffocasset, si ejus corporis præsentiam in patris ipsius patria habuisset. Unde provisum est ut illis detraheretur detractionis materia, et Dominus sanctum suum per hoc proveheret ad majora. Exstant enim ipsius miracula miraculosa tam in Anglia, cui præfuit, quam in Francia quam adivit.

10. Alia, et ut videtur, uberior nunc ratio occurrit, quare separationem dictorum patrum Dei dispensatio sic providit. Certum est quod in Anglia B. Edmundi regis et martyris refulgent miracula pretiosa, quibus patria illa mirificæ decoratur, et Deus in sancto suo mirabilis prædicatur. Posito autem et constante quod beatus confessor Christi Edmundus locum sepulture suæ fuisset in illa regione sortitus, ex æquivocatione nominis, saltem apud imperitos fuisset miraculorum attributio obumbrata, et per consequens forsitan diminuta. Et quamvis inter sanctos nulla sit prorsus dissensionis materia, quin potius gaudium et exsultatio, sicut de bono proprio de alterius prælatura: vulgus tamen ignarum facile contentionis materiam assumeret, et de sanctorum miraculis et meritis plusquam ratio exigeret, disputaret. Subtracta est igitur controversiæ calumnia, et magis relucent miracula ab uno ad alium relata. Et hoc nescio an in spiritu quasi videtur, quod Dei confessor Edmundus, ut regi Ed-

A mundo cum quadam reverentia sanctis congrua, regnum cederet, in quo prius ille pie regnaverat, et per martyrii gloriam tempus et locum præanticipaverat, ut quierat prior loco et tempore, ei cederetur charitatis honore. Et est verisimile, quod si tam piuum regem B. præsulis Edmundi tempora habuissent, quod nequaquam de illa patria excessisset. Quin imo videtur ipso facto quod præsul martyrem honoravit, cum locum, ut dictum est superius, ei cessit. Nam æquivocationis ab eo sortitus est vocabulum, et non casualiter, sed secundum divinæ prædestinationis eventum. Nam ut in ejus legenda diffusius enarratur, mater S. præsulis cum ipsum gestaret in utero veniens ad tumbam B. martyris, motus vitales primum sensit in parvulo quem gestabat in utero, et infans Edmundus nondum Edmundus videtur motu suo martyrem salutasse, et per hoc communis vocabuli gratiam impetrasse. Jam vivus mortuum salutavit, et moriens viventi in cœlo martyri locum dedit. Qua in re quid aliud est pensandum, nisi quod factum est a Domino factum esse credatur, per quem quidquid in vivis agitur, aut mortuis, ordinatione rectissima sive occulta seu etiam manifesta, per Dei providentiam dispensatur.

11. Sed et hoc in fine credimus adnectendum, quod ratio superius posita exigebat B. Thomam martyrem in Dorobernensi Ecclesia tumulari, ad cujus gloriam est provisum, ut tantus doctor et pontifex cardinalis et primas tandem ei succederet, qui de loco sepulture ipsius sanctum corpus ipsius laudabiliter et condigne transferret, et Scripturarum super translatione ipsa monumenta relinqueret, sicut hodie in Cantuariensi Ecclesia reperitur, quod videlicet præfatus dominus Stephanus archiepiscopus B. Thomæ martyris corpus de crypta in qua statim in morte ipsius collocatum fuerat, propriis manibus ad superiora supremi altaris loca transposuit, et præsentem rege Anglorum et fere cunctis pontificibus et principibus, aliisque regni optimatibus, in aureo et gemmato quasi stellato solio collocavit, et modum translationis et ordinem luculento sermone descripsit, et cum eo quem prudenter descriperat in Domino obdormivit. At B. præsul Edmundus similem non in loco, sed in modo, omnino habere meruit sepulturam, et translationis etiam modum consimilem et consimilibus indicis gloriosum. Sepultus est enim in Pontiniacensi ecclesia cum gloria et honore, sicut superius est narratum. Sed postquam Domino complacuit sanctum suum amplius sublimare, ut excellentior locus ipsum exciperet, et celebritatis ejus memoriam duplicaret, tunc, inquam, auctoritate apostolica est provisum, ut ad hujus translationis gloriam commendandam, cardinalis Albanensis episcopus, antea Rothomagensis archiepiscopus, et non solum ipse, verum etiam Tusculanus episcopus, similiter cardinalis, cum pluribus archiepiscopis et episcopis advenirent, et coram Francorum rege illustri, et quasi coram tota familia procerum regni Franciæ translationis obsequium devotissime celebrarent.

Similitudo igitur permaxima est in istis, quod A utraque translatio de mandato summi pontificis per cardinales hinc et inde, per archiepiscopos et episcopos utrobique, per reges et utriusque regni principes, et per multitudinem fidelium populorum cum omni veneratione, qua fieri decuit et oportuit et potuit, ut completa, ut ipso facto quasi digito potuit demonstrari, quod Deus et non homo ad honorem sanctorum suorum et ad excitandum devotionem

in sanctis gloriosum et admirabilem et superlaudabilem et superexaltabilem in omnibus et ex omnibus et prae omnibus praedicari. Cui est honor et gloria, imperium et potestas per infinita saecula saeculorum. Amen.

Explicit tractatus de promissione beati Thomae martyris facta Pontiniacensibus.

XV.

EXCERPTUM E COD. REG. MUSEI BRITAN. 13 E. VI.

Omissis omnibus quae vel in iuventute, vel in archidiaconatu vel in praepositura, vel in officio cancellariae Thomas egerit, de quo scribere proposuimus, discordiam inter Henricum regem Anglorum Matildis imperatoris filium, et eundem promotum in Cantuariensem archiepiscopum protractam diutius, sub certis capitulis breviter cum tali signaculo de denotatis fine laudabili concludamus.

Thomas creatus archiepiscopus regis resignavit sigillum.

Archiepiscopus ad postulationem regis distulit archidiaconatum Cantuariensem transferre.

Clarenbaldus sine professione querebat benedictionem accipere, regem habens fautorem.

Comes de Clara Rogerus homagium facere noluit archiepiscopo, rege consentiente.

Willelmus de Ros regem non archiepiscopum agnovit ut dominum.

Willelmus Einesfordie dominus Laurentium expulit ab ecclesia, quem excommunicavit archiepiscopus, rege non certiorato.

Nuntii regis consuetudines, quas avitas vocant, a domino papa roborari non impetraverunt.

Ab archiepiscopis et episcopis confirmatae sunt regni consuetudines.

Philippus de Broc canonicus Bedfordiae, propter maleficium est expulsus a regno.

Joannes Mareschaldus archiepiscopo pro manerio quodam adversarius instructus est in curia regis.

Archiepiscopus adversus episcopos appellavit et D ab iis appellatus est.

Archiepiscopus tractus in causam ante legatos Willelmum Papiensem et Joannem Neapolitanum, ablatorum petiti restitutionem, sed non impetravit.

Rex archiepiscopo dare signum pacis in osculo penitus abnegavit et abjuravit.

Archiepiscopus post pacem factam in Angliam rediens, plures armatos occurrentes invenit.

Quae circa personam archiepiscopi die Martis qualiter evenierint invenietur.

Willelmus Senonensis archiepiscopus, domino papae litteras dixerit.

B Ab episcopis concurrentibus Ecclesia Cantuariensis reconciliata fuit.

Thomas archiepiscopus canonizatus est a domino papa Alexandro.

Quoties inter archiepiscopos Cantuarienses tibi Thomas protomartyr in Anglia Normannorum temporibus inter legendum occurrerit, toties ejus vitam laudabilem, actus eximios, exilium, passionem, in morte constantiam, post transitum ab hac luce caelestem ad patriam crebra miraculorum insignia, sub silentio non praeteras.

1172 clero totius provinciae Cantuariorum generaliter Londoniae convocato, praesente Henrico filio regis et regni iustitiariis, Thomas Cantuariorum archidiaconus et regis cancellarius, nemine reclamante, solemniter electus est in archiepiscopum. Electionem factam sine aliqua contradictione recitavit Henricus Wintoniensis episcopus apud Westmonasterium in refectorio monachorum, quarta feria ante Pentecosten. Electus autem Sabato Pentecostes ordinatus est in presbyterum in Ecclesia Cantuariæ a Waltero Roffensi episcopo, in ordinationibus et in dedicationibus faciendis Ecclesiae Cantuariensis vicario. Sequenti die Dominica consecratus est ab Henrico Wintoniensi episcopo, vice Londoniensi Ecclesiae tunc vacantis, episcopo Londoniensi Ricardo secundo rebus humanis exempto, quod ad jus suum spectare dicebat Walterus Roffensis episcopus, sed non obtinuit.

Nuntius ad dominum papam directis, quem a Gallias descendente Willelmus de Monte Pessulano tanquam dominum ligium suum receperat honorifice, celeri relatione perlatus est, quod suffraganei Cantuariensis Ecclesiae sibi pastorem elegerant, qui concurrentibus omnium votis jam a propria synodo fuerat consecratus. Acceptum fuit verbum istud in auribus domini papae. Litteris igitur episcoporum, litteris etiam prioris et conventus Sanctae Trinitatis, litteris quoque regis in medium recitatis, sub audientia cardinalium in consistorio postulatione facta, facilis et jucundus juxta petitionem ab omnibus datur assensus. Pallium itaque cum ea gravitate, cum ea remotione, cum ea solemnitate qua consueverant nuntiis est commissum,

quod Thomas archiepiscopus in sede Dorobernensi conditionibus solitis involutus, et sacramento constrictus, ab altari majore suscepit. Postquam autem induit vestes summis sacerdotibus, Domino disponente, collatas, habitum sic mutavit, ut mutaret et animum. Nam curiæ curis interesse non approbans, ut eximeretur a curia, vacans orationi, superintendens Ecclesiæ suæ negotiis, nuntium in Normanniam regi direxit, renuntians cancellariæ, sigillum resignans. Quod altius in cor regis ascendit, in se solum causam resignationis tam subitæ retorquentis. Audierat namque quod Maguntinus archiepiscopus in Teutonica sub rege, quod Coloniensis archiepiscopus in Italia sub imperatore, nomen sibi vindicent archicancellarii. Qui nec promiscuis actibus æstimant turbari rerum officia si gestant in dextra baculum pastorem, et ad expediendas regni vel imperii necessitates et pacem Ecclesiæ procurandam propensius accingantur, dummodo cancellarius curiæ sinistro lateri sigillum allateret nunc regis nunc imperatoris, qui dicitur protonotarius.

Thomas Cantuariorum archiepiscopus obvian regi

veniens, cum rediret in Angliam, receptus est in osculum, sed non in plenitudine gratiæ, sicut vultus statim aversus omnibus qui convenerant, patenter ostendit.

Thomas ex archidiacono Cantuariensi sumptus ad archiepiscopatum, ad instantissimam regis petitionem diutius distulit archidiaconatum transferre. Transtulit tandem ut rex petivit, sed gratiam regis ad tempus subtractam, ut videbatur sibi postmodum redintegratam non ad plenum agnovit.

Clarembaldus abbas electus Sancti Augustini benedictionem ab archiepiscopo Thoma querebat accipere, sed in ecclesia propria, sed sine professione, sed spe cuiusvis in posterum subjectionis prorsus ademptæ. Cum autem rex se verbis hujusmodi non opposuerit, partibus antiquitatis in finibus stare persuadens, et eas omnibus modis quibus id fieri potuisset inducens, alteram inclinatio videbatur in partem.

Capitula quæ sequuntur quarre infra in hoc codice anno 1173, etc., etc., etc.

SANCTI THOMÆ CANTUARIENSIS ARCHIEPISCOPI EPISTOLÆ.

EPISTOLA PRIMA.

AD PAPAM ALEXANDRUM.

Litteræ consolationis, quas vestra nobis dignata est paternitas destinare, magnum quidem mediocriter anxio afferre possent remedium: aut si saltem nostra circa unum aliquid figeretur angustia, spem nonnullam respirandi possemus ex eis concipere. At quoniam de die in diem malitia invalescit, multiplicantur injuriæ, non nostræ, sed Christi, imo quia Christi, eo magis nostræ, succedentibus sibi invicem more fluctuum procellis, solum nobis videmus imminere naufragium. Nec aliud consilium superesse, nisi ut ipsum quasi dormientem in navi pro viribus nostris excitantes dicamus: *Domine, salva nos, perimus*. Et hoc sane aptiorem malignandi nacta est iniquitas occasione, quod statum sanctæ Romanæ Ecclesiæ infirmiore conspicit, ut vere liqueat, quod quidquid in caput, sive bonum sive malum, sive dulce sive amarum defluit, per barbam descendens, nec oram vestimenti relinquit inta-

ctam. Eripitur Jesu Christo, quod sanguine suo comparavit. In ipsam ejus sortem potestas secularis manum extendit. Adeo ut nec sanctorum Patrum sanctiones, nec statuta canonum, quorum apud nos etiam nomen exosum est, nec clericis quidem patrocinari valeant modo, qui ab hac jurisdictione huc usque speciali privilegio fuerunt exempti. Et quoniam enarrare vel prosequi scripto, quæ patimur, longum esset et tædiosum, ad vestram mittimus paternitatem magistrum Henricum, fidelem et familiarem vestrum et nostrum, in cujus ore posuimus singula, seriatim prout vidit et audivit, vobis exponenda. Et si placet, credite, tanquam si nos loquentes audiretis viva voce. Hoc tamen sciatis, quoniam, si fieri posset, multo libentius vos in persona visitaremus nostra, quam in alia. Loquimur vobis sicut Patri et domino: et quod dicimus, summo silentio petimus occultari. Nihil enim nobis tutum est, cum omnia fere referantur ad regem, quæ nobis in conclavi vel in aurem dicuntur. Væ nobis, qui in hæc servati sumus tempora, quorum diebus accesserunt

hæc mala! Qui in priori statu tanta potiti fuimus A libertate, quam modo dura et pessima servitute re- compensamus? Fugissemus saltem, ne in directionem patrimonium Crucifixi dari videremus; sed quo, nisi ad eum, qui nostrum refugium et virtus est, ignora- mus. De Wallensibus, et Oweno, qui se principem nominat, domine, provideatis, quia dominus rex super hoc maxime motus est et indignatus. Charis- sime Pater et domine, bene valete.

EPISTOLA II.

AD EUMDEN.

Causa Thomæ ante dominum papam.

Ad audientiam tuam, Pater sanctissime, confugio, ut qui Ecclesiæ libertatem tanto tui discrimine redemisti, eam vel solam vel maximam meæ persecu- tionis causam attendas, quod exemplo tuo usus sum. Dolui enim statum Ecclesiæ labefactari paululum, et jura ejus in avaritiam principum dissipari, et occurrendum credidi morbo venienti. Et quo plus illi Domino meo, cui post Deum cætera debeo, me sciebam obligatum, eo tutius iniquis ejus instigatio- nibus arbitrabar resistendum, donec obtinuerunt illi, et serenitatem ejus offuscaverunt mihi. Exinde, ut mos est apud principes, criminationes et calumnias injecerunt in occasionem persecutionis meæ, et ego ejici malui quam subscribere. Accessit etiam his malis, quod vocatus sum coram rege tanquam laicus, ut satisfacerem, et unde mihi suffragia speraveram, sum destitutus. Animadverti enim dominos et con- fratres nostros episcopos istos pro aulicorum arbitrio in me paratos animadvertere. Ita cunctis incur- santibus fere suffocatus ad tuæ pietatis audientiam, quæ nec in extremis agentes negligit, respiravi. Sub quo demonstraturus asto me nec ibi fuisse judican- dum, nec ab illis. Nam quid aliud esset, patres mei, nisi vestra vobis jura subtrahere? Quid aliud quam spiritualia temporalibus submittere? Semel natum hoc exemplum esset ad multa. Ideoque credidi fir- mius resistendum, quod affectus proclivior nocendi nasceretur, si prius debilitatem agnoscerent. At in- quient, reddenda erant Cæsari quæ Cæsaris erant. Sed, etsi in pluribus obtemperandum sit regi, in illis tamen obtemperandum non est, quibus efficitur, ne rex sit. Non essent illa Cæsaris, sed tyranni, in quibus, etsi non pro me, pro seipsis ei resisterent. Nam si illi extremum reservatur judicium, qui potens est judi- care corpus et animam, nunquid extrema erit inter homines et summa potestas ei qui judicat secundum spiritum? Si justam foverent causam, quid me im- petebant? Quid me arguunt, si ad eum appellavi, apud quem mentiri vel non licet, vel non expedit? Aut injuste in me causabantur, aut de justitia vestra diffidebant. Dupliciter enim confundebar, si coram sanctitate vestra convincerer. Nec miror tam laicos in clerum hujusmodi machinari conscriptionem, sed dominos et fratres meos non solum hujus factionis conscios, verum etiam prolocutores exstitisse ad- miror. Nam quid eorum persecutionem metui, pro quibus tantis occuribus me opposueram? Obtinuis-

sem, si voluissent illi. Sed male caput agili, si a membris destituitur, quin etiam si oculi linguam contra caput assumant. Si bene prævidissent, in se perniciem machinabantur, et eorum usi sunt princi- pes auxilio in eorum servitute. Quæ hæc tanti odii causa fuerat, ut pro me exstinguendo seipsos ex- stinguere? Ita dum spiritualia pro temporalibus negligunt, deficiunt in utrisque. Quid quod me etiam reclamantem, et audientiam vestram appellantem, patrem suum in præjudicio damnare ausi sunt? Quid si eandem in universam Ecclesiam cum of- fenso nobis principe conspirationem fecerunt? Et te, Pater sanctissime, suspicio ita poterat attingere. At, inquit, regi tenebantur ex debito Domini. Sed illi corporaliter, mihi spiritualiter. Cui potius teneri potuerunt quam sibiipsis? Nonne potius corporalium damnum quam spiritualium negligendum fuit? In- quunt rursus, hoc tempore principem non fuisse provocandum. Quam subtiliter in suam servitute argumentantur? Imo ipsi provocant, qui excessibus suis alas præbent, et suffragium. Qui eviasset enim ille, nisi acquievisset illi. Et quo tempore magis constantia exigitur quam inter persecutores? Nonne familiares ex persecutionibus comprobantur? Si semper succumbant, quomodo obtinebunt? Necessè est aliquando resistant. Condescende ergo, Pater sanctissime, in fugam meam et persecutionem, et me aliquando magnum fuisse reminiscere tempore tuo, et propter te injuriis lacescitum. Utere rigore tuo, coerce eos, quorum instinctu nomen hujus per- secutionis erepsit. Nec domino regi horum aliquid imputetur, qui hujus machinationis est minister potius quam rector.

EPISTOLA III.

AD EUMDEN.

Venerande Pater et domine, quantum Cantuarien- sis Ecclesia beati Augustini, qui eam tam moribus quam lapidibus fundavit, ejusque successorum vitæ excellentia ac morum prærogativa meruerit exaltari, prudentiam vestram minime latere existimamus. Sane sub eorum sana dispositione et provida dispen- satione, primaria dignitate atque primatus honore, multorum privilegiorum attestatione, decorari obti- nuit. Siquidem inter omnes occidentales Ecclesias tam dignitate claruit, quam erga sacrosanctam Ro- manam Ecclesiam tam fide quam devotione præsti- tit. Profecto a suæ matris sanctæ Ecclesiæ Roma- næ sinu, etiam schismatis tempore ingentibus tribu- lationibus ad id ipsam mergentibus, avelli nunquam potuit. Cæterum nostris temporibus, in quos fines sæculorum deveniunt, crebris adversitatis tursioni- bus agitata servituti incipit subijci. Nam ecce, qui velut filius ejus tanquam matris ubera ab ineunte fere ætate suxisse dignoscitur, ipsius undique latera concutit, cujus suffragiis ad eum honorem, quo nunc fruitur, ipsum sublimatum fuisse constat. Do- minum Eboracensem archiepiscopum loquimur, qui cum omnem reverentiam saepe fide Ecclesiæ impen- dere deberet, eam pristina dignitate privare molit-

tur. Cum enim in universa provincia nostra antiqua libertate potiremur, temporibus nostris, quod non ante qualibet occasione usurpatum est, sicut ipse optime novit, contra crucem crucem erexit, cruci crucem opposuit, Christum significans esse divisum, crucis scandalum suscitavit. Cumque ipse a nobis fraterna charitate admonitus desistere nollet, sanctitatis vestre litteras, quibus ne id faceret inhiberetur, ei porreximus. At vestrum contemnens mandatum, nihilominus crucem bajulavit. Qui tamen post quatuor pluresve dies nos ad audientiam vestram super falsa suggestionem appellavit, sancti Lucae diem appellationi præfigens. Ad quem, Domino disponente, in promptu ei plenissime responsuri occurremus. Verum si urgentissima causa impediens præsentiam vestram adire non poterimus, Odonem subpriorem Ecclesie nostræ, procuratorem in præsentia causa, et in omni incidenti questione constitutum, nos ratum habituros, quicquid fecerit, firmiter promittentes. Valeat et vigeat semper sanctitas vestra, Pater charissime.

EPISTOLA IV.

AD RUNDEN.

Abstitit Ecclesie patientia rex Angliæ, et tanta immanitate in sponsam Christi jugiter sævit, ut Petrus, ejus fidei et zelo illa commissa est, gladium cogatur educere, et persecutorum Christi in virtute sancti Spiritus malitiam cohibere. Iterato enim rapitur Christus, et ad crucem trahitur, discipuli dispersuntur, qui tamen ad impetum turbine non alijecerunt omnino fidem, aliis iterum machinantibus quomodo Filium Dei prodant in osculo pacis, et sub juris obtentu et reverentia legis justitiam subicere valeant, et Deum legitime impugnare. Quia memores officii nostri, et iudicium Dei, in quo nulli parceretur culpæ, formidantes, pro justitia mutire ausi sumus, dati sumus in opprobrio multis, expositi pro Christo periculis omnibus tanquam signum ad sagittam. Tandem addicti exsilio cum omnibus nostris, clericis et laicis, mulieribus et parvulis, pusillis et majoribus, ut nec reverentia Ordinis, nec conditio sexus, nec ætatis misericordia quidquam iræ detraheret aut furori. Multi eorum jam in exilio mortui sunt: quos quoniam innocenter pro justitia patiebantur, confidimus ad requiem convolasse, et cum electis laborum suorum recepisse mercedem, plurimi vero adhuc expectant misericordiam Dei, in fame et siti, in frigore et nuditate. Alii tenentur in vinculis: inter quos capellanus noster sacerdos religiosus, qui de conscientia et consensu regis remanserat in Anglia ipso post illam, quam dicunt, appellationem mandante tenetur afflictus in carcere. Hæc omnia sustinuit, tentantes an per patientiam mansuetudinis nostræ possemus aliquo modo mitigare sævitiam ejus. Sed quanto plura patimur, tanto magis crudescit immanitas, ut publice fateatur se nullo modo posse placari, nisi ei ad nutum exponatur Ecclesia et de consensu nostro recipiantur ab omnibus con-

suetudines, immo perversitates sue, non modo canonibus et legibus adversæ, sed Evangelio Christi penitus inimicæ. Quia ergo non acquiescimus, et prædicamus Deo potius obediendum quam homini, querit animam nostram ut cum ea auferat Ecclesie libertatem, et in regno suo sedis apostolicæ privilegia usquequaque convellat.

Hoc proposito nuper in capitulo Cisterciensi proximo denuntiavit inimicitias toti Ordini, et quod omnes domos eorum exterminabit a terra sua, nisi Cistercienses me exsulem et proscripsum pro domino, et fidelitate Ecclesie Romanæ, et cleri libertate, ejiciant a monasterio Pontiniacensi, invito abbate loci et fratribus, qui pro reverentia precum vestrarum, et Christianissimi regis Franciæ et optimatum Gallie interventu, benignissime et liberalissime plurimam mihi et meis, quod eis rependat Altissimus, humanitatem exhibuerunt, et adhuc, si licuerit, exhibere parati sunt. Et licet tribuemur et conteramur soli cum parvulis nostris, qui fidem divitiis et deliciis præstulerunt, pro libertate totius Ecclesie, tamen ad subversionem justitiæ et libertatis, quorundam episcoporum citra mare et ultra nititur consilio, qui præ cæteris sapientes sunt ut faciant mala, et eloquentes ut dedoceant legem. Hi sunt os ejus, hi calamus, horum freti auxilio fautores ejus gloriantur, quod nos nostris confodiant jaculis, et spoliis oppriment. Habent fiduciam, quod Jordanis influat in ora eorum. Verumtamen respondebit eis justitia sua, et nos per misericordiam Dei Petrus, cum quo et pro quo dimicamus, in fortitudine brachii vestri expediet. Annuntiavimus impio sæpius impietatem suam, ne sanguis ejus requiratur de manibus nostris. Minas intentastis et vos, ut vel sic evitaret laqueum damnationis. Sed ipse obsurdens ad omnem Domini vocem, se ipsum præcipitavit in laqueum, dum violentas manus injecti in sacerdotem. Leges impugnastis, imo et Evangelii, quantum in ipso est statuta convellit. Suam ponit schismatis cum schismaticis portionem, quibus communicat, et cum eis varias et nefarias contrahit obligationes, et anathematis sententiam sciens et prudens incurrit. Novit enim et ipse, quod qui violentas manus in clericos injicit, facto ipso excommunicatus est. Nonne facientis culpam habet in talibus, qui fieri mandat, imo compellit? David legitur interfecisse Uriam, sed gladio filiorum Ammon. Achab arguitur et punitur effudisse sanguinem Naboth, quod ministerio impiorum factum est nomine ejus, et ratihabitione convincitur placuisse.

Placeat itaque dignationi vestre tantis mederi morbis, et nostræ, imo Ecclesie Dei afflictioni prospicere, ut severitate justitiæ absolutionem querere compellatur, qui temeritate sua, et contemptu legis, et potestate in caput suum, operum pravitate anathematis condemnationem intorsit. Episcopus Londoniensis honorem usurpavit in Anglia contra morem antiquum et perpetuam æquitatem, ut gloriatur in provincia nostra nihil mandari posse aut statui,

nisi per ipsum, aliis non æquanimiter ferentibus Pharisæicum hoc ejus supercilium. Dissimulavimus primo, exinde corripuimus hunc tumorem, sed quia ad perniciem indurescit, eum diu sine correctione non poterimus sustinere. Cohibeat Dominus linguam Londoniensis a malo, et labia Lexoviensis ne loquantur dolum, ad interitum ejus cui ministrant consilia, et etiam suum. Joannes de Oxeneford sanctitatis vestre præsumit apparere conspectibus, et quasi re bene gesta, et schismaticis de schismate perpetrando, quod exinde convaluit, præstito juramento, iteratis dolis apostolicam sedem appetit, ut quam perjurio nequivit subvertere, impura purgatione et frandibus exquisitis decipiat. Qui nisi characterem bestię reportet in fronte, timemus ne quidquid honoris reportaverit sibi, in confusionem sedis apostolicę, et totius Ecclesię ignominiam, et confortationem schismaticorum convertatur. Cætera posuimus in ore nuntiorum nostrorum, quibus, si placeat, fidem habeat majestatis vestrę dignatio, et provideat ne innocentia nostra periclitetur in adventu domini Willelmi Papiensis, per quem persecutores nostri palam gloriantur se operaturos nostram depositionem. Ignoramus tamen an in hac venturus sit potestate, sed certum habemus, quod nisi cogamur a Majestate vestra, nullius nos, nisi sanctitatis vestrę, credemus judicio. Meminisse potestis, si placeat, qua fide nobiscum, qua charitate nobiscum ambulaverint quidam, qua sinceritate procuraverint preces regis Anglię, justificantes causam hominis Ecclesiam persequentis, adversus quem terra clamat exigentibus culpis, et cœli revelabunt, nisi quia velatę non sunt et occultę iniquitates ejus. Absit ab Ecclesia Dei, ne illa compleantur, quę presbyter, clericus memorati amici nostri et domini, nuper promisit regi Anglię; scilicet ut causam, quę inter nos vertitur, legatus ad regis definiat voluntatem. Frater sacerdotis, qui tenetur in vinculis, expediet cætera. Miseremini, si placeat, nostri, et eorum, imo totius Ecclesię Dei.

EPISTOLA V.

AD EUNDEN.

Amantissimo Patri et domino ALEXANDRO Dei gratia summo pontifici, THOMAS Cantuariensis Ecclesię minister humilis, debitam et devotam obedientiam.

Satis superque sustinui, Pater amantissime, correctionem regis Anglię expectans, nec ullum omnino patientię meę fructum obtinui, quin potius detrimentum et exterminium auctoritatis et libertatis Ecclesię Dei, dum incaute sustineo, cumulaui. Conveni eum multoties per nuntios religiosos et idoneos, et ad debitam satisfactionem frequentius invitavi. Litteris etiam, quarum transcripta vobis misi, divinam ei severitatem et ultionem, nisi resipisceret, intentavi. Ipse vero magis ac magis proficit in deterius, conculcans et deprimens Ecclesiam Dei, sed et personam meam, et eos qui mecum exsulant, adeo persequens, ut etiam beneficia servo-

rum Dei, qui nobis Dei et vestri causa victualia provident, minis et terroribus suis auferre conetur. Scripsit enim abbati Cisterciensi, ut sicut abbatias ordinis, quę in ipsius potestate sunt, diligit, ita nos a beneficio et familiaritate ordinis faciat alienos. Quid multis? Eo usque sub patientia nostra tam ipsius regis, quam officialium ejus profecit impietas, ut si multitudo virorum, quantumlibet religiosorum, rem vobis ut est, interpositis etiam juramentis assereret, miror si vel sic eorum assertioni credulitatem aliquam vestra sanctitas adhiberet. Hęc igitur cum anxietate cordis attendens, et periculum tam regis quam meum considerans, perniciosas illas non tam consuetudines quam pravitates, quibus perturbatur et confunditur Anglicana Ecclesia, publice condemnavi, tam observatores quam exactores earum, fautores etiam et consiliatores et adiutores, quicunque fuerint, sive clerici sive laici, generaliter excommunicationi subjiciens. Scriptum etiam et auctoritatem scripti, quo perversitates illę fuerant confirmatę, cassavi: et episcopos nostros a juramento, quo ad observationem earum violenter stricti fuerant, relaxavi. Et hęc sunt, quę in scripto illo specialiter condemnavi:

Quod non appelletur, pro causa aliqua ad sedem apostolicam sine regis assensu.

Quod non liceat episcopo excommunicare aliquem, qui teneat aliquid de rege, absque licentia ipsius.

Quod non ponatur terra ejus vel officialium suorum sub interdicto sine ejus licentia vel officialium suorum.

Quod non liceat episcopo excommunicare aliquem de perjurio vel fide læsa.

Quod clerici vel viri religiosi trahantur ad sæcularia judicia.

Quod laici, seu rex seu alii, tractent causas de ecclesiis vel decimis.

Quod non liceat archiepiscopo vel episcopo venire ad vocationem domini papę absque licentia regis.

Et alia in hunc modum. Nominatim etiam excommunicavi Joannem de Oxeneford, qui communicavit schismatico et excommunicato illi Reginaldo Coloniensi, quique contra mandatum Domini et vestrum usurpavit sibi decanatum Saresberiensis Ecclesię, et in curia imperatoris, quale ipse audistis, præstitit juramentum.

Similiter etiam Ricardum de Iwelcestre, denuntiavimus excommunicatum, eo quod incidit in eandem hæresim damnatam, communicando illi nominatissimo schismatico Coloniensi solemniter, et publice machinando et fabricando omnia mala cum schismaticis et Teutonum illis in perniciem Ecclesię Dei et maxime Ecclesię Romanę, quique præstitit juramentum de contrahendo matrimonio cum duce Saxonum. Et una Ricardum de Luci, et Jocelinum de Baillolio, qui regię tyrannidis fautores, et hæreticarum illarum pravitatum fabricatores exstiterunt.

Randolphum etiam de Broc, et Hugonem de Sancto Claro, et Thomam filium Bernardi, qui possea-

iores et bona Ecclesie Cantuariensis absque licentia et consensu nostro usurpaverunt.

Omnes, inquam, istos anathematis vinculo innodavimus. Verum in personam regis nondum sententiam dedimus, daturi forsitan per misericordiam Dei celerius, nisi resipuerit, et ex his quæ fecimus, apprehenderit disciplinam. Ut ergo, beatissime Pater, apostolicæ sedis auctoritas, et Ecclesie Dei libertas, quæ in partibus nostris tota fere peritit, utrumque valcant restaurari, necesse est et modis omnibus expedit, ut quod a nobis gestum est, ratum omnimodis habeatis.

EPISTOLA VI.

AD EUNDEM.

Amantissimo domino, et Patri sanctissimo ALEXANDRO, Dei gratia summo pontifici, THOMAS Cantuariensis Ecclesie minister humilis, miser et miserabilis exsul, salutem, et contra sævitiam principum semper animi constantiam.

Solliciti de statu et prosperitate vestra optaveramus jam pridem certum salutis nuntium audisse de vobis et de confratribus nostris, quid egerit etiam vobiscum, et cum Ecclesia sua Dei magnificentia. Insonuit enim auribus nostris, et toti Gallie verbum, quod noviter factum esse dicitur a Domino. Videlicet illum Fredericum schismaticum, ignominiose humiliatum, factum sine honore coram populo et gente. Verum quoniam rumoribus credi oportere, et non oportere fas est, paternitatem vestram affectuose sollicitamus, ut recurrentibus litteris et nuntio per vos citissime audiamus et congaudeamus, si fecerit vobiscum Deus, quod facere consuevit sperantibus in se, non ponentibus carnem brachium suum, non habentibus fiduciam in principibus, in quibus non est salus. Si egerit vobiscum, sicut egit cum Ezechia de Sennacherib, retorquens poenam in ipsum, qui moliebatur demoliri ipsum Ezechiam cum universa gente sua. Si sic se rei habet eventus, sicut fama divulgavit, benedictus Deus, qui novit facere misericordiam cum servis suis. Ecce quanta Dei potentia, quam magna ipsius misratio: *Nisi enim ipse custodierit civitatem, frustra vigilat, qui custodit eam.* Non est a sæculo audita virtus Dei manifestior, si recte pensetur quid evenit, iustitia ipsius iustior, qua contrivit ipsos fabricatores huius malitiæ, tantæ persecutionis auctores, consumpsit etiam eos morte famosissima. Ipsum etiam utinam iam et principem viventem dederit in opprobrium omni populo, in derisum omni transeunti, ut ab omnibus digito monstretur, et fiat de ipso quasi celebre proverbium in ore vulgi dicentis: *Ecce homo, qui non posuit Deum adiutorem suum.* Si confusus in potentia sua defecit in ipsa vanitate sua, cui satius fuisset, et gloriosius ad homines moriendo succubuisse impugnando suos adversarios, quam vivendo fieri despectui cunctis, et in derisum. Hæc Dei virtus et fortitudo brachii ipsius. Quis ergo audeat de cætero habens Christi vices in terra obsequi voluntati

A principum in confusionem Ecclesie non puniendo delinquentes? Audeat, qui voluerit, non ego, ne transferatur in me poena delinquentis, ne iudicer culpabilis ex dissimulatione vindictæ, ne transeam in culpam, qui culpam non admisi. Satis credo dictum esse domino meo in parte ista. Qui sapienter investigabit opera Dei, qui diligenter attendet ipsius magnalia, prudenter intelliget, quid de cætero opus sit. Præterea noscet sanctitas vestra accidisse nobis quod verebatur, quod prædicabamus lucidum esse de presumptione et insolentia domini Willelmi Papiensis, sicut ex litteris nobis statim in adventu suo transmissis potestis pendere, a quo magis sperabamus juxta tenorem mandati vestri ad dominum regem Francorum, et ad nos emissi, solatium de consolatione pacis, quam confusionem de questionum decisione inter regem Anglorum et nos. Non enim ipse est, cujus in hac causa subijci debeamus dilationi. Præsertim cum instantia regis magis cogerit vos ad ipsum mittendum, quam ipse coactus, et missus venerit a vobis. Credimus quidem non esse juri consentaneum, nos ejus subire iudicium vel examen, qui querit sibi facere commercium de sanguine nostro: de pretio, utinam non iniquitatis, querit sibi nomen et gloriam. Proinde supplicamus paternitati vestræ affectuose, si ei cura est de nobis, ut evacuetur potestas ejus, si quam tamen habet, circa nos et negotia nostra: transferatur malleus iste a nobis, qui potius elegit esse malleator clericorum obsequendo principibus, quam regum offensio consequendo gratiam divinam. In his vero et aliis, si placet sanctitati vestræ, quælator præsentium vobis manifestabit, intuitu pietatis et exsili nostri petimus suppliciter a vobis exaudiri. Compatiatur miseriæ nostræ diuturnæ vestra serenitas, cujus finem omnes expectant. Resumat vires præceptoris auctoritas, exerat gladium beati Petri, ulciscatur Christi et suorum injuriam. Sentiant manus Petri graves, qui eas contempserunt pro tempore dissimulantes, ut vel sic respiceret libertas Ecclesie, quæ tanto tempore languit depressa, et gaudeat mundus gloriolicans Deum, qui fecit vobiscum misericordiam suam, quatenus re-urgat per vos navicula Petri, quæ ab omnibus fere credebatur submersa, expiret tyrannorum præsumptio, quæ videbatur obtinuisse. Multa sanctitati vestræ circa materiam istam habere scribere, sed, ne fiam vobis sermone longo molestus, finem facio optans audire et videre de vobis, quod desiderat anima mea. Verumtamen unum solum adjicio, quod nequaquam silentio prætereundum est. Credebat forte dominus Willelmus cum rege suo tractu temporis delusisse auctoritatem vestram ex fortuitis casibus. Sed Domino vertente casus adversos in melius deludetur ipse, qui vos sperabat delusum; per Dei misericordiam incidet in æqueum, in quem optando sperabat vos et nos incidisse. Valeat sanctitas vestra, et, ut bene sit nobis, vigeat in tempora longa.

EPISTOLA VII.

AD EUNDEM.

Miseriarum cumulus, et dolorum acerbitas nostrum, et coexsulantium nobis corda perculerat, et Christianissimum regem et optimates regni Francorum compassione Ecclesie, datæ, ut videbatur in adventu Joannis de Oxeneford, in manus eorum, qui quærent animam ejus, ut auferant eam, gravissimo læserat scandalo, ut exulceratus animus quæretur fidem, et veritatem subiatas esse de terra. Sed quod pietati vestræ retribuatur Pater misericordiarum, sanctissime Judex, amantissime Pater, et Ecclesie Dei fidelissime custos, secundum multitudinem dolorum in cordibus nostris consolationes vestræ lætificaverunt animas nostras. Jam enim spe salvi facti sumus, et Christianissimus rex Gallie, et regnum ejus apostolatus vestro, quem Deus optatum faciat, et in tempora longa protendat, innumeras agerentes gratias, totam indignationem suam retorquent in illos, qui se de maiestate vestra juramenti sui triumphasse gloriabantur. Rex enim ipse, postquam dignationis vestræ excusatorias recepit litteras, prudentiæ, justitiæ, sanctitatis et beatitudinis vestræ gloriam prædicat et extollit, et malitiam et fraudes eorum, qui falsis rumoribus scandalizaverant Ecclesiam Gallicanam, obloquentibus gaudent: exponit, et interdum invitus adversæ parvis, si forte adsunt, ingerit auribus. Amplius tamen lætatus est post vestrorum colloquium legatorum, quos reverenter admittens, ab eis, sicut ipse fatetur, didicit illos non venisse, ut libertati Ecclesie præjudicent aut nobis, sed componat inter regem Angliæ, et nos, et si fieri potest, inter ipsum et Ecclesiam faciant pacem. Et utinam Deo auctore prosperentur in via ista, in qua nos promptissimè ad honorem Dei, et libertatem Ecclesie habebunt adiutores. Et vocati ab eis ad colloquium ad diem decimum in terrarum confiniis, cum tunc, ut ex conscientia loquamur, non nisi tres equos in domo nostra haberemus, obtinimus nobis adijci septem dies, quibus coexsules nostros, qui miserabiliter dispersi sunt, possemus convocare, utpote necessarios ad solatium itineris peragendi, et consilium verbi tractandi. Quibus vix tam brevi termino, et tanta rerum penuria convenire valentibus, in octava beati Martini dominis vestris legatis occurrimus inter Gisortium et Triam, Christianissimo rege, destinatis ad hoc ministris, quod ei in misericordia uberi retribuatur Deus, nos et proscriptos Christi coexsules nostros undique confluentes, liberaliter et benignissime exhibente. Et sicut vobis ab aliquibus intimatum est, persecutores nostri sedulo procurant, ut itineribus et sumptibus vexemur, et expensarum onere, et tædio, regi Francorum, qui nobis inter alios pauperes Christi eleemosynam suam erogat, onerosi reddamur et odiosi. Viderentur enim magnum malitiæ suæ recepisse compendium, si nos exturbare possent de habitaculo cœlitus præparato, et præriperent solatium eleemosynæ principis, sicut

A excusserunt subsidium ordinis Cisterciensis. Veni cum dominis nostris solus archiepiscopus Rothomagensis, episcopi et abbatibus provincie nostræ, quos rex evocasse voluerat, retentis Rothomagi. Proposuerunt ergo nobis ab initio duritiam regis, malitiam temporis, necessitates et calamitates Ecclesie, quæ fere ubique terrarum, excepta Francia, impugnatur, et vix tolerabilibus colliditur procellis, adijcienes multa de magnitudine principis et potentia de amore et honore, quem Ecclesie Romanæ exhibuit, de familiaritate, et gratia, et beneficiis, quæ in nos exercuit, exaggerantes etiam querelas et injurias, quibus se a nobis et nostris læsum esse conqueritur, dicens quod ei procuravimus guerram regis Francie, et comitis Flandrensis. Suaserunt, ut multa humilitate, et plenæ devotionis et moderationis exhibitione studeremus placare indignationem ejus, si forte aliqua ratione posset tanta feritas mansuescere, et immoderata asperitas mitigari. Quæsierunt et consilium a nobis, qui eum consuevimus nosse plenius, qualiter possent illius duritiam emollire. Nam et ad illos se exhibuit durior, ex quo didicit, quod non licebat eis, juxta promissiones Joannis de Oxeneford, in nos pro voluntate ejus contra Deum et jura omnia condemnationis ferre ententiam. Quid autem episcopis suis audientibus dixerit, verbo nuntii. Deo propitiante, quam scripto commodius intimabitur auribus vestris. Nos vero gratias agentes dignationi vestræ, quæ a Deo de pace Ecclesie et nostræ, quæ est gloria Dei et vestra, sollicitatur, suspiciones, quibus non rex notare molitur, rationibus veris et probabilibus evacuavimus, et ipse rex Francie die sequenti, quatenus ad ipsum spectat, in præsentia cardinalium sub religione juramenti purgavit innocentiam nostram, quæ sicut Imperator cordium et Judex novit, ab hac culpa immunis est. Neque enim adeo hebetes sumus, et tardiores ad credendum legi, prophetis, et Evangelio, ut in articulo tantæ necessitatis relictis spiritualibus telis, et munimentis apostolicæ disciplinæ, carnalia credamus arma, præsertim sacerdotibus, corripienda. Novimus enim non esse in principibus confidendum, et quod maledictus est, qui ponit carnem brachium suum. Et ne tale quid de nobis probabiliter fingi posset, a colloquio regis nos ipsos diu suspendimus, donec tandem ab ipso evocati accederemus, ut ei præsentaremus excusationis nostræ litteras, et domino Ottoni legato, qui ob hanc causam nobis Papiam clericum suum miserat, impetremus transitum et conductum. Habebat enim rex legationis hujus suspectum eventum, tum quia rex Angliæ impetraverat; tum quia memineral, ut dicit, se alia vice læsum ab eis, quando vos nuper in patrem et dominum receperat, tum quia glorificationem Joannis de Oxeneford, et similibus molestissime audiebat. Excusatione autem nostra gratanter admissa et transitu impetrato, reversi sumus ad habitaculum paupertatis nostræ, in patientia præstolantes salutem Domini. Et quia humilitatem et mo-

derationis exhibitionem, quibus tantus princeps A placaretur, a nobis domini vestri legati exigebant, respondimus nos libentissime et devotissime ei tanquam domino et regi nostro omnem humilitatem, et obsequium et devotionem ad illorum consilium exhibuituros, salvo honore Dei et apostolicæ sedis, et libertate Ecclesiæ, et honestate personæ nostræ, et possessionibus Ecclesiarum. Et si eis videretur aliquid adjiciendum his, aut demendum, aut immutandum, rogavimus ut dicerent nobis, quia in nostra voluntate erat illis obtemperare, quatenus conditionis et professionis nostræ necessitas pateretur. Dicentes autem se super hoc certum non habere consilium, nec venisse tunc ut nobis, sed ut et nos consulerent, tentando quæsierunt, ut verbis domini Wilhelmi utamur, quia non sumus meliores quam patres nostri, an vellemus in præsentia eorum regi promittere nos observaturos omnes consuetudines, quibus usi fuerant antecessores ejus temporibus decessorum nostrorum, et ita sopitis hinc inde querelis omnibus, si tamen hoc impetrare possent, quod facile non credebant, recipere sedem nostram, et redire in gratiam ejus. Nos vero respondimus neminem decessorum nostrorum ad hanc professionem ab aliquo regum fuisse arctatum, neque nos Deo auctore unquam profitebimur observantiam illarum consuetudinum, quæ Ecclesiæ Dei perimunt libertatem, sedis apostolicæ convellunt privilegium, et legi Dei patenter adversantur, a quibus nos Senonis in eorum, et multorum præsentia per vestram misericordiam absolvistis. Adjecto, quod a memoria nostra Deo miserante non excidet verbum apostolico ore dignum, quia ante deberemus cervices nostras spiculatori feriendas exponere, quam talibus pravitatibus consentire, et turpi commercio rerum temporalium, aut aviditate vivendi curam sic relinquere pastorem. Lectæ sunt in præsentia eorum reprobatæ illæ consuetudines, quarum aliquas condemnaveramus, imo et ante nos ab initio cum observatoribus suis catholica Ecclesia in multis conciliis anathemate condemnavit. Quærivimus ergo, an non modo eas observare, sed etiam dissimulare liceat sacerdoti sine periculo ordinis et salutis. Ad hæc adjecimus nos regi fecisse fidelitatem salvo ordine nostro, et eam ei libenter servabimus, ita quod fidem Deo debitam irritam non faciamus. Intulit ergo unus, quem ab initio, ut scitis, habuimus, et debuimus habere suspectum, quod melius esset nobis omnino cedere, quam Ecclesiam sic vexari. Et circa hoc susceptorii sermones multiplicati sunt, quos viva vox commodius referet. Retulimus itaque inferenti, quod ob hanc causam non cedemus, quia et exemplo perniciosum esset, et proficeret in ruinam ecclesiasticæ libertatis, et fortasse in fidei Christianæ dispendium. Quis enim auderet mutire de cætero? Quis pastoribus simili modo cedentibus ascenderet ex adverso, ut se murum opponat pro domo Israel? Addidimus nec vos, nec aliquos apostolicos viros Ecclesiam Dei talibus exemplis informasse. Nonne pastoribus fugientibus, sicut

historiarum fide celebre est, tota Ægyptus ad idololatriam rediit, ubi ab initio maxime religio vigeat? Hinc alio progressi quæsierunt an illorum vellemus stare iudicio super his quæ vertuntur inter nos et regem. Et quidem si refugeremus iudicium, causam regis justificare videremur, et nostra fortasse apud plerosque læderetur opinio, cum tamen illum, qui adversarius exstitit, non debeamus, si placet, habere iudicem, nec alicui ad hoc tuti esse possimus, nisi in præsentia vestra. Nostra siquidem et nostrorum proscriptio, et aliorum vexatione, et damnis sic rex ille terruit et territavit universos, ut nullus, eo sciente, audeat nostri meminisse in bonum. Habita horum omnium contemplatione sic temperavimus responsionem, ut nec diceremus nos detractare iudicium, nec tam discriminose nos immergeremus litigio. Diximus enim nos et nostros sede, administratione, et bonis omnibus spoliatos, cum ad omnia fuerimus restituti, libenter, ubi, et quando debemus, vestrum, aut cuius, aut quorum de mandato vestro oportuerit iudicium subire. Iustitiam enim nec volumus nec volumus declinare. Interim nulla nos ad litigandum ratione compelli, nec paupertatem nostram ad hoc sufficere, nec liberalitatem serenissimi regis sine molestia ad hoc posse pretendi, ut nos et coexulantes pauperes Christi nummis suis, quibus ad præsens indiguit, exhibeat diu in domibus alienis. Nam ubi victualibus abundat, expensæ nostræ facilius tolerantur. Processerunt ad tertiam questionem disciscipulantes an episcoporum, qui appellaverant contra nos, litem sub eis iudiciis vellemus excipere, sed respondimus nos vestrum super hoc non recepisse mandatum, nec inopiam nostram ad tantos sumptus, et lites esse idoneam. Hoc autem agebatur ab adversariis nostris, sicut didicimus ab his, quos res latere non poterat, ut sub quacunque occasione nostram possent in præsentia legatorum notare personam, et sic quamcunque lesionem ingerere. Coniungunt enim quod nullus provincialium nobis auderet assistere contra regem, et sic viderentur nostram procurasse ruinam. Rex autem solos illos evocavit, qui nobis ab initio huius turbis adversantes, et incentores tantæ malitiæ esse noscuntur, videlicet Eboracensem archiepiscopum, et episcopos Londoniensem, et Cicestrensem, accito cum eis et Wigorniensis, ut velamento ejus aliorum malitia palliatur. Cæterum, sicut vestra potest meminisse discretio, isti, qui nunc regis voluntati acclamant præ cæteris, et sicut publice notum est, sitiunt sanguinem nostrum, litteris suis in petitione pallii nostri et electionis formam, et personam nostram multis laudum præconiis extulerunt. Nunc autem veritati contradicentes et sibi, se ipsos mentiendi et adulandi audacia contemptibiles reddiderunt, dum ad nutum principis velut servi comici, modo aiunt, modo negant. Hi sunt, Pater, qui dant cornua peccatori, et si non satis insanit, insigant illum, subijcientes pulvinar cæcæ, et caput vitii languidum in cervicalis

molitū faciant obdormire. Cum itaque etiam illi, A qui debebant et videbantur esse columnæ Ecclesiæ, consilio, auxilio, auctoritate, obsequiis, et sumptibus contra eam et nos animent, et arment divinæ legis et parvitalis nostræ persecutores, non est nobis tutum aut possibile subire iudicium, nisi in præsentia sanctitatis vestræ, et sub vestro ipsius examine. Licet enim de sinceritate alterius legatorum sperare debeat Ecclesia, et nos de eo confidamus, præsertim in his quæ Dei sunt, tamen non est homo præter vos, cui hanc causam Domini committere audeamus. Alterum vero legatum talem faciat Deus, qualem salutis suæ esse expedit et qualem esse decet Romanæ Ecclesiæ presbyterum cardinalem. Veremur autem ne contingat quod, si reminisci placet, prænovimus eventurum, si forte B prudentiam, eloquentiam et auctoritatem domini Willelmi cum potestate et voluntate dura regis Angliæ accideret convenire. Veremur ne tales nobis formato consilio porrigantur petitiones, quarum nobis molestus sit auditus, effectus impossibilis, aut displicens Deo, et mundo odiosus. Et quia vobis omnium ecclesiarum sollicitudo incumbit, circumferite, si placet, oculos in occidentem, attendite, et videte qualiter ibi tractetur Ecclesia; indicet vobis dominus Otto, quem spiritu Dei agi credimus, quid viderit et cognoverit de Ecclesia et provincia Turonensium, quid de Anglicana audierit, quid expertus sit in Normannia, et credimus vos dicturos cum lacrymis : *Quia non est dolor, sicut C dolor iste.* Ut enim de Cantuariensi et Turonensi Ecclesiis taceamus, quas tractat, ut audistis, et utinam plenius sciretis, septem episcopatus vacantes, in provincia nostra et Rothomagensi, jam a multo tempore tenet in manu sua, nec aliquos ibi patitur ordinari pastores. Clerus regni datus est satellitibus suis in conculcationem et prælam. Si ista, Pater optime, dissimulamus, quid in die iudicii respondebimus Christo? Quis Antichristo resistet venienti, si tantam patientiam vitiorum et criminum jam accommodamus præambulis ejus? Talibus enim dissimulationibus insolescunt potestates, reges gentium transeunt in tyrannos, ut Ecclesiæ nullum jus, nullum privilegium nisi de eorum arbitrio censeant relinquendum. Sed beatus, qui tenet, et allidit parvulos ad petram. Nam si Judas ex mandato legis non exterminat Chananaeum, ei in hostem et stimulum perpetuo coalescit. Confortare, Pater, et esto robustus, plures nobiscum sunt, quam cum illis. Contrivit Dominus malleum impiorum Fredericum, percussurus et alios in brevi, nisi resipiscant, et cum Ecclesia Dei pacem habeant. Et ut tandem faciamus finem, vestri oris duntaxat expectamus iudicium, aut illius qui spiritum principum auferre consuevit, et liberare pauperem a potente. Nuntiorum vox plura supplebit, quæ scripto non credidimus committenda. Hoc certum habeat vestra serenitas, quia, si voluissenus a principio pravis consuetudinibus acquiescere, non esset alicujus cardinalis, imo

PATROL. CXC.

nec hominis alicujus necessarius interventus. Frustra quoque nobis, auctore Domino, Siculorum aut Hungarorum proponuntur exempla, quæ nos in die iudicii minime excusarent, si tyrannorum barbariem præferremus apostolicis institutis, et sæcularium insolentiam potestatum crederemus potius formam esse vivendi, quam testamentum æternum, confirmatum sanguine et morte Filii Dei. Ut igitur prædicta omnia sine lacrymabili concludam, attendat sanctitas vestra, si iste debet esse fructus laboris et operis, ac exsilii nostri, ut judicemur nudi, miseri, privati omnibus bonis, ac subeamus causarum angustias, eo quod ausi sumus nos opponere ferocissimo oppressori Ecclesiæ in defensionem libertatis ipsius, qui expectabamus in dies de solatione nostra solatium, de exacta miseria gaudium, de injuria Christi dignam a Deo, et a vobis in oppressores Ecclesiæ ultionem. Nonne sufficere poterat his, qui quærunt animas nostras, quod quosdam morte afferunt ex nostris; paupertas quoque et calamitas nostra, in qua vix agimus vitam, alienis elemosynis viventes, nisi auctoritate legationis istius, quæ nunquam fuisset, trahamur et protrahamur per annos et annos, a dolore in dolorem, a miseria in confusionem; jus etiam nostrum et justitia convertatur in ruinam nostram et miserorum nostrorum? Deus bone, quis erit hujus doloris finis? Exsurge, Deus judica causam tuam, vindica sanguinem servorum tuorum, qui nequiter extincti sunt, et aliorum, qui intolerabiliter afflicti deficiunt, cum sit nemo qui de manu inimicorum nostrorum, præter dominum papam, et perpaucos secum, velit nos eripere. Vivat et valeat sanctitas vestra in tempora longa, ut vivamus et convalescamus nos et miseri nostri.

EPISTOLA VIII.

AD EUNDEN.

Amantissimo domino, et Patri sanctissimo ALEXANDRO, Dei gratia summo pontifici, THOMAS miseræ Cantuariensis Ecclesiæ humilis, ac miser, et miserabilis exsul, debitæ subjectionis famulatum, et per omnia de præcipuis Ecclesiæ inimicis triumphare.

D Celebre proverbium est : *Quod redimi potest, sive temporis productione, sive aliis, non timeatur.* Est et aliud quippe celebrius : *Facilius est vitare discordem, quam declinare fallacem.* Inde est quod celsitudini vestræ notificamus, qualiter dominus noster rex Angliæ, fallaciis et falsis promissionibus suis, cum videremur esse in januis pacis, sicut etiam ab omnibus suis sperebatur et credebatur, noviter nos decepit occasione quorundam nuntiorum suorum a majestate vestra redeuntium, qui jactabant et simulabant se obtinuisse a vobis, ad regis petitionem et instantiam, mandatum et auctoritatem in deprecationem Cantuariensis Ecclesiæ irreparabilem, et nostram, quod Deus avertat, et coexsulam nostrorum ruinam. Decepit utique nos hac vice,

sicut e. sēp.us, nec solum nos, sed et viros reli-
giosos portantes nobis ex parte sua verba pacis,
quæ sanctitati vestræ per latorem præsentium in-
timanda commisimus, nec non archiepiscopum Ro-
thomagensē, et Sagiensem episcopum, mittentes
nobis de conscientia et voluntate ac mandato suo
litteras, quarum transcriptum vobis transmittimus.
Verumtamen quidquid de nobis fecerit, utinam
serenitatem vestram blandis et inanibus promissis
væ hac vice non deluserit, sicut gloriatur pluries
se fecisse, ut protractione temporis contingat ino-
pinatē, quod nunquam videant ejus oculi aut audiant
aures. Et quoniam multoties opportune, importune
prudentiam vestram sollicitavimus, multoties pul-
savimus ad aures serenitatis vestræ, ut auctoritatē
beati Petri huic tanto malo, tantæ persecutioni
severitatis censura finem debitum imponeretis; nec
adhuc, peccatis nostris exigentibus, exauditi sumus,
ad salutem Anglicanæ Ecclesiæ, ad revelationem
depressionis nostræ et nostrorum, quæ in dies
adversum nos ex patientia et expectatione vestra,
quæ utinam delusoriis promissionibus ulterius non
fallatur, exercetur durior et acerbior, in tantum
ut vix amodo spirare valeamus. Nec est nobis inter
nostros quisquam, qui de cætero velit se huic pe-
riculo supponere, subjicere tanto discrimini, præ-
sertim cum multos de illis in hujus negotii prose-
cutione mors amara comprehenderit. Mittimus
sanctitati vestræ latorem præsentium, qui intuitu
pietatis et sola liberalitate sua suscepit negotium
aestrum ad vos perferendum benigne, utinam ef-
ficaciter. Hunc petimus, si placet, sicut desideratis
ab eo exaudiri in ultima necessitate vestra, qui dat
salutem regibus, qui auferit spiritum principum, si
cura est vobis de vita nostra et salute, a benignitate
vestra benigne recipi, et benignius exaudiri
super his, quæ postulamus a serenitate vestra per
ipsum, qui effecti sumus proscripti et miseri, non
ut securius vivamus et quietius, declinando tanti
persecutoris importunitatem, sed ut vigeat Ecclesia
Dei, et valeat temporibus posteris efficacius respi-
rare in libertatem. Feliciter namque dura et gravia
sustinentur ad tempus, ut feliciora succedant. Et
quidem si de rege nostro jam diu nobis fuisset
creditum, jam pridem, sicut pro certo credimus,
per Dei misericordiam obtinuisset Ecclesia, et vos
de ipso victoriam, atque exemplo illius in cæteris
principibus gloriam et honorem. Sors namque ty-
rannorum hæc est, ut *qui terret, plus ipse timeat.*

EPISTOLA IX.

AD EUNDEM.

Amantissimo domino et Patri sanctissimo ALEXAN-
dro, Dei gratia sanctæ Romanæ Ecclesiæ summo
pontifici, THOMAS Cantuariensis Ecclesiæ minister
humilis, miser ac miserabilis exsul, salutem, et
inter omnia pericula firmam et veram obedien-
tiam.

Mittimus sanctitati vestræ latorem præsentium

A pro conditione sua nobis admodum familiarem,
pro ingenti capacitate, ut credimus, fidelem. Eum,
si placet, pro nobis et de nobis benigne exaudiat
clementia vestra, prout decet et expedit miseræ
nostræ, quæ jam amicis nostris desperatione facta
est tædiosa, utinam non odibilis; vobis, unde
magis dolemus, sicut plures judicant, dissimulatione
manifesta non utinam contemptibilis; inimicis no-
stris etiam compassione miserabilis. Exsurge, Do-
mine, et noli tardare amplius. Illumina faciem
tuam super nos, et fac nobiscum secundum miseri-
cordiam tuam, et cum miseris nostris præ nimia
pressura deficientibus, salva nos, quia perimus.
Non confundamur inter homines, non insultent no-
bis adversarii nostri, imo Christi et Ecclesiæ, non
fiat fortuna nostra in derisum genti et populo, quia
nomen tuum invocavimus super nos. Non nobis,
Domine, non nobis, sed in nomine Domini Jesu
Christi, fac tibi grande nomen, repara gloriam
tuam, revela famæ tuæ nomen, quæ in reversione
illius excommunicati et perjuri schismatici, Joan-
nem de Oxenford loquor, falsa illius prædicatione
in partibus Galliæ vehementer est depressa. Novit
Deus quia non mentior, et si mihi non creditur,
queratur ab his de Gallia, qui honorem vobis ma-
gis affectant, qui amplius optant Ecclesiæ proven-
tum. Famæ, dico, quæ hactenus apud homines vi-
guit inculpata, quæ inter omnia pericula servata
est illæsa, quæ cæteris perditis sola intemerata re-
mansit, quæ ubique locorum sana habebatur et
celebris. Resumat itaque vires præceptoris aucto-
ritas, reformet nobile factum, prius commendabile,
sed male postea denigratum, ut sentiat garrulus
ipse se falsa sparsisse, prædicasse mendacia. Ex-
periat severitytem, qui remissionem demeruerat;
perferat ultionem, qui abusus est benignitatis, ut
agnoscat mundus eum reperisse Christi vicarium
fundatum in firma petra, non facile mobilem, non
baculum arundineum, sicut maligni submurmurant,
sed æquitatis et justitiæ observatorem, non acce-
ptorem personarum, nemini parcentem in iudicio, de
juris æquitate fideliter et æque dispensantem regi
pariter ac privato. Valeat sanctitas vestra, ut va-
leamus et nos, et miseri nostri.

EPISTOLA X.

AD EUNDEM.

Amantissimo domino, et Patri sanctissimo
ALEXANDRO, Dei gratia summo pontifici, THOMAS
Cantuariensis Ecclesiæ humilis minister, miser ac
miserabilis exsul, cum suis exsulis salutem et
omne bonum.

Mittimus sanctitati vestræ latores præsentium
fideles nostros, duos videlicet de miseris et coxsuli-
bus nostris, quos tamen ad præsens possumus, et
sicut possumus, ut per eos audiat et intelligat
certiori et miserabili relatione, quæ circa nos noviter
acta sunt his diebus, miserationum etiam nostrarum
et nostrorum angustias, quæ quidem immanes sunt.

Et suscipimus a sanctitate vestra, si placet, celeriter debitam et diu dilatam oppressionis Ecclesiæ et nostræ liberationem; dolorum etiam nostrorum per manum misericordiæ vestræ levamen, ne immaniter et multipliciter depressi deficiamus in tribulatione ista, quæ non fuit a diebus dolorum districtior. Protracti enim sumus jamdiu, et sicut novit excellentia vestra, trahimur, etiam et protrahimur, non minus crudeliter quam inique, per tempus et tempora in miseria et dolore, ut vel sic infra longi temporis metas afflictione deficiat anima nostra, exstinguamur attriti, deficiamus penitus exacti miseriarum angustiis, exspiret interim auctoritas vestra, quod absit! quæ per Dei misericordiam contra iniquorum desiderium, contra malignantium fraudem relevatura est miseriam nostram et aliorum, antequam finiatur. Inclina igitur, domine, aurem tuam, et audi; aperi oculos tuos, et vide, si fuit iniquitas sicut ista; attende diligentius, si est dolor, sicut dolor noster et nostrorum, qui dati sumus in direptionem, nisi subito subveniat nobis per manum vestram Dei misericordia. Facti sumus in subsannationem et derisum his, qui in circuitu nostro sunt, auctoritate legatorum vestrorum, qui utinam non magis enormiter quam presumptuose egissent circa nos et Ecclesiæ negotia. Si enim hæc facta sunt nobis ab ipsis in viridi, quid flet in arido, si duratura est ista legatio, quæ nunquam fuisset? Suspende-
runt ipsi nos, quantum in eis est, ab omni auctoritate, quam habebamus in ecclesiis Angliæ et personis, quod nunquam gratia Dei et vestra ad alicujus principis vel alterius instantiam factum est a vobis, nec flet per Dei misericordiam, sicut ex certa promissione indulsit nobis vestra sublimitas. Utquid, domine, tribuisti legationem homini, de cujus introitu attendisse debuerat dominus mens, ut salva pace ejus loquar, quis deberet esse futurus legationis hujus fructus, pensasse etiam ejusdem exitum, cujus anima tota effusa fuit ab initio, et est in ruinam ecclesiasticæ dignitatis, et vestram, ut vel sic fiat principi gratus? Domine, domine, ad te sunt oculi nostri ne pereamus. Adjuva nos, domine, et fac nobiscum secundum promissiones tuas, quæ utinam non in vanum lætificaverint animas nostras. Sustinuimus enim ad vestræ celsitudinis mandatum. Sustinuimus, inquam, pacem, et non venit. Expectavimus per manuum opera legatorum vestrorum bonum, et ecce nobis major afflictio, turbatio ferventior. Miserere ergo nostri, domine, miserere nostri, cum sit nemo post Deum qui pugnet pro nobis, nisi tu solus cum fidelibustuis. Miserere, inquam, nostri, ut misereatur vestri Deus in districto examine cum redditurus fueris rationem villicationis vestræ. Non est enim ad quem habemus refugium post Deum, nisi ad te, cum etiam ipsi opponant se nobis favore hominum, qui introitu pietatis et justitiæ, ob reverentiam etiam sacrosanctæ Ecclesiæ Romanæ, nobiscum stare debuerant, et pugnare pro nobis. Exhaustis siquidem sumptibus et vexationibus innumeris, non est nobis certe

A de cætero quo prosequamur vexationum istarum vel minimam. Succurrat itaque nobis et Ecclesiæ nostræ, si placet, celeriter tua sublimitas, et imponat finem huic malitiæ, ne protrahatur ulterius, quoniam tempus est. Vix enim est, ut etiam præ nimis angustiis spirare valeamus: accelera ergo ut sentiamus gratiæ tuæ beneficium antequam moriamur. Valeat et vivat in tempora longa dilecta nobis et super omnia post Dei amorem necessaria tua sancta benignitas, ut tua munificentia incipiamus et nos reviviscere, qui jam incepimus mori. Præterea nōscat discretio vestra, quod tribus diebus, antequam supervenirent nobis mala ista, exierant nuntii a nobis cum litteris nostris, quibus nuntiabamus sanctitati vestræ, qualiter a legatis vestris discesseramus. Scribebat enim vobis rex Francorum Christianissimus et regina, et quidam de principibus et episcopis regni sui, quidamque minores amici vestri, lætantes et glorificantes Deum, gratiasque Deo et vobis agentes, eo quod manifestum erat ex adventu legatorum vestrorum, sicut id ipsi domino regi ore ad os insinuaverant, falsa esse ac mendacissima, quæ Joannes ille orator de Oxeneford, et alii nuntii regis prædicaverant de gravamine et dejectione nostra futura per legatos. Unde scandalum ineffabile ortum erat in toto regno Francorum, et apud omnes ad quos noster ille pervenerat præterquam apud adversarios Ecclesiæ et nostros. Sed versa est cithara ista in luctum, et lætitia ista in mœrorem, factusque est error iste pejor priore. Petimus itaque, ut placeat sanctitati vestræ super-
venienti morbo celerem adhibere medicinam, quantum fiat omnibus in manifesto, sicut rei veritas se habet, contra conscientiam vestram et mandatum ista fuisse præsumpta. Valeat iterum sanctitas vestra et in æternum.

EPISTOLA XI.

AD EUMDEN.

Amantissimo Patri et domino ALEXANDRO, Dei gratia summo pontifici, Thomas Cantuariensis Ecclesiæ minister humilis, miser ac solito miserabilior exsul, salutem et debitam in omnibus, etiam in adversis, obedientiam.

Remittimus sanctitati vestræ latorem præsentium, qui fidelius et diligentius negotii sui miseriam, et qualiter cum ipso et cum fratribus suis occasione litterarum vestrarum in regno Angliæ actum sit, vobis exponet: ad quorum relevamen, nisi citius per manum vestram divina subveniret clementia, subversa est penitus illius ordinis conditio. Sentiant ergo ipse et fratres sui, si placet, sibi preces nostras profuisse, quorum injusta vexatio apud sanctitatem vestram digne facit eos exaudibiliores. Et utinam dominus meus altius attendat, ac firmius apponet animo, in quantum et in quam irrevocabilem confusionem Anglicana nuper venerit Ecclesia in omni ordinis genere, qui in eodem regno habitat, ex inaudita et illa miserabili indulgentia, quam gloriatur, quorum-

dam amicorum suorum de curia interventu, qui utinam magis essent amici Dei et Ecclesie, quam sui, magis affectarent divina gaudere gratia, quam favore principum, regis nostri, utinam non persecutoris Ecclesie, extorsisse industria. Quæ etsi creditur a vobis de facili posse revocari in irritum, exstat tamen impetrati facinoris exemplum, in tantum ut si ad præsens impetratis gaudere valeat, residet tamen apud ipsum et successores suos obtenti beneficii origo, ejus impetrandi sibi perpetuo ac successoribus suis nacta opportunitate concepit audaciam, qui nec ausus sperare est aliqua sui vel amicorum suorum arte debitam pro excessibus suis contra se et complices suos evadere posse sententiam. Verum unum est, quod nos miserabiliter consolatur, ut salva pace vestra dixerim, quia sic novit Ecclesia Romana beare amicos suos et fideles. Melius tamen consolatur eam Deus, quam sibi providerit, et Ecclesie Anglicanæ ac nobis, ac miseris nostris in parte ista. Scio quidem, unde magis doleo, quia nunquam avi senio crimen obruitur, nunquam scelus oblivione repellitur, verum exempla fiunt, quæ facinora esse destiterunt. Valeat et vigeat sanctitas vestra, et citius, si placet, dignetur miseriam nostram sublevare, ut saltem vivere valeamus, qui utcumque vivendo perimus. Novit Deus, quod immerito.

EPISTOLA XII.

AD EUNDEM.

Sanctissimo domino et Patri charissimo, ALEXANDRO Dei gratia summo pontifici, THOMAS Cantuariensis Ecclesie minister humilis, salutem, et omnem cum devotione obedientiam.

Ad pedes majestatis vestræ confugiunt miseri nostri, qui nutu divino reservati esse creduntur, ut fratrum suorum crudeliter interemptorum cladem deplorare valeant, et jam fere pereuntis Ecclesie miserias exponant in auribus vestris. Jam enim rarus est, qui etiam cum magna difficultate inter tot pericula et mortes audeat prosecui necessitates nostras, cum alii incarcerati, alii capti, alii flagellati, alii mortui diebus fere singulis audiantur. Et rex Anglorum, qui tantorum malorum causa esse dignoscitur, non modo impunis remaneat, sed gaudeat in confusione Ecclesie, et in periculis rideat alienis; cum diu, si Spiritu Dei ageretur, mansuetudo vestra, in multa patientia sustinens, debuerat ad penitentiam provocasse. Sed ille, dum peccata peccatis et minora majoribus cumulat, sibi videtur thesaurizare iram, et temeraria provocatione accelerare vindictam. Toto quinquennio in Ecclesiam debacchatus est, et ego, quod sine timore non eloquor, Christum in membris fere quotidie video crucifigi, profanari sancta, lacerari et conculcari Ecclesiam, cui custos a domino fueram deputatus, et notandum cum Petro exserui gladium verbi Dei, ut Malchi sevientis auriculam amputarem. Quoties lego zelum Phinees, Eliæ, Matathie, filiorumque ejus, quoties menti meæ fervor apostolicus occurrit, quo-

lies sanctorum Patrum, qui se principibus et potestatibus murum opposuerunt pro domo Domini, gesta revolvō, toties ingemisco periculum meum, et miseræ animæ, animæ scilicet meæ timeo justam ex dissimulatione injusta et indebita patientia condemnationem. Cum enim facientes et consentientes comparentur in crimine, et qui potestate divinitus accepta non corrigit quæ non ambigit corrigenda, consentientis cadat in culpam, tremendum mihi video imminere judicium, qui tantas enormitates tandiu remissione, quod vereor, nimia pertuli subditorum. Nam beatus, qui talium parvulos nascentes exstinguit, aut natos, quam cito tenentur, allidit ad petram. Vereor, Pater, ne sanguinem illius, et commalignantium sibi de manu mea requirat Dominus. Timeo ne proscriptorum suorum, et in causa Ecclesie laborantium usque ad mortem, neces multas exigit durus iudex, cum scriptum sit; quoniam maledictus est, qui gladium cohibet a cruore. Nam, ut ait Salomon: *Qui delicate nutrit serum, postea illum sentiet contumacem.* Et hoc quidem crebris Ecclesia et certissimis sentit experimentis. Si quis enim primos ejus cohibuisset impetus, si quis instigantium ad mala et furorem procurantium perculisset temeritatem, nequaquam tot et tantas pestes arbores pestiferæ germinassent. Nam tenerorum vitia citius abolentur, et cum diuturnitate invaluerint, quodammodo transeunt in naturam. Et certe tanta fuerat reprimenda presumptio, tum sui ipsius corripienda enormitate, tum quia totum orbem Latinum pernicioso corrumpit exemplo. Audiat, quæso, clementia vestra per dominum Gratianum subdiaconum vestrum, cui ex re nomen esse credimus, eo quod tanquam filius gratiæ causam Ecclesie fideliter et prudenter in omni modestia et sinceritate studuit procurare. Audiat, inquam, qualiter in occidente nostro, nisi citius Deo propitio subveneritis, occidat Ecclesia; et tandem misereatur, et tantis miseriis debitum imponat finem. Si enim expectaveritis ut nuntii regis et malitiæ fautores non habeant mendacia quæ prætendunt, et nobis et vobis, et illis vita deficiat. Et in districto examine cogetur quilibet nostrum sine personarum acceptione sui operis reddere rationem. Ecce nunc dicit se non a me exigere rationem administrationis cancellariæ suæ, nec pecuniam quam tunc acceperim aut promiserim, sed id solum petit, quod me tempore archiepiscopatus mei dicit accepisse de rebus suis. Sed Deo propitiante cunctis apud nos notum est, quod ei jam super hoc reddita ratione non teneor. Item dicit se non controversatum esse de consuetudinibus suis, quas tamen mutato duntaxat verbo sibi servari petit nomine dignitatum. Et ego quidem dignitates regni libenter servabo, sicut sæpius obtuli, salvo ordine meo et fidelitate Ecclesie Romanæ. Sed ut novam juramenti formam in Ecclesiam Dei inducam, auctore Deo, et pietate vestra mihi prospiciente, nulla necessitate induci potero. Nam quod a me nunc obtinebit,

ab omnibus episcopis et Ecclesia tota indubitanter A
exigit. Observationem canonum, sed nec Evangelii
mandata se impleturos aliqui jurare compelluntur;
certe nec tutum esset: et episcopi ad observan-
tiam consuetudinum vel dignitatum arctabuntur,
inaudito exemplo, juramenti necessitate? Forma
fidelitatis exigit in ecclesia Gallicana et Anglicana,
ut prælati ecclesiarum principibus jurent se serva-
turos eis fidem, in indemnitate vitæ, membrorum,
honoris terreni, *salvo ordine suo*: et hæc forma
etiam reprobis consuetudinibus ejus inserta est. In
hac forma juravi, sic me jurasse publica profitebor,
et hac debet esse contentus: nec ego in hac parte
transgrediar temere terminos a Patribus constitutos.
Instat etiam, ut mihi et meis ablata, imo Ecclesiæ,
non restituantur aut satisfaciatur, dicens majores suos,
quorum mensuram in persecutione Ecclesiæ implet
aut supergreditur, multos de meis fugasse majoribus,
quibus nihil unquam restituerunt. Sed ne trahatur
ad consequentiam, citius providendum est, ut per-
niciēs deleatur exempli. Nam qui posteris relinquit
erroris exemplum, eos merito in culpam impulsisse
convincitur. Sicut Jeroboam filius Nabath legitur
fecisse peccare imitatore suum sceleris Israel. Quis
autem dimittit peccatum, si ablata non restituantur
aut satisfaciatur? Utique omni sollicitudine procurandum
est, ut sicut ille auctoritatem criminis a decessoribus
trahit, sic idem posteris suis relinquat exemplar
correctionis. Alioquin verendum est, ne ille succes-
soribus suis fiat Jeroboam, et ego, si de cætero a
debita cessavero correptione, meos velut alter Heli,
aut potius sacerdos excelsorum, in ruinam damna-
tionis præcipitem. Nec me quisquam detrectare con-
cordiam, dummodo fiat in Domino et sine læsione
Ecclesiæ, mentiat. Quia non sum adeo vécors, ut
quæ in temporalibus maxima et hominibus gratis-
sima sunt, tanta facilitate contemnā, nisi quia
pro his nolo dispendium facere æternorum. Nemo
dom me accusat in contemptu, suum in appetitu
vanæ quietis aut mundanæ suppellectilis tueat error-
rem; quia Deus, qui irrideri non potest, revelabit
in brevi, quando ante tribunal ejus astabimus om-
nes, qua mente quis vixerit. Illum conscientia in-
spectorem et testem habeo, illum exspecto judicem,
quem contra requiritatem nullus fallit astutia, nec vi-
ribus flectit. Recolite, pater, quanta vos ille mise-
ratione respexit, quomodo vestros, imo Ecclesiæ ad
gloriam nominis sui protriverit inimicos, et cum eo
exsurgite in adiutorium ejus, qui in membris suis
injuste proseribitur, torquetur, conspuitur et cruci-
figitur. Audite, si placet, miseros nostros, et preces,
quas per eos vobis porrexit, et adhuc porrigit Can-
tuariensis Ecclesia, clementis exaudite, ut a patre
suo post tantas miseras consolationem debitam se
gaudeat recepisse. Conterite persecutores ejus, et
eos, quos Satanæ tradidimus in interitum carnis,
quorum nomina vobis exprimentur, si ad vos vene-
rint aut miserint, excommunicatos, donec Ecclesiæ
Dei satisfaciatur et nobis, haberi faciat. Nuntii vo-

bis, quæ fuerant dicenda, supplebunt, licet cumu-
lum miserationum Ecclesiæ Anglicanæ non sufficiant,
prout necessitas exigit, explanare. Valeat semper
et vigeat sanctitas vestra.

EPISTOLA XIII.

AD EUMDEN.

Sanctissimo domino et Patri charissimo ALEXAN-
DRO Dei gratia summo pontifici THOMAS Cantuarien-
sis Eccles. min. sal. et om. cum summa devotione
obedientiam.

Quæ acta sunt a magistro Viriano de negotio Ec-
clesiæ Dei, et nostro post recessum domini Gra-
tiani, et quam sollicitie, sanctitati vestræ breviter
intimare curavimus. Quod ipse vero moram fecerit
B in Francia aliquam post socii sui recessum, in con-
fusionem opprimientium Ecclesiam creditur accidis-
se, ut justitia Ecclesiæ, quam multi pravitate actu
nitebantur offuscare, in conspectu omnium gentium
declararetur. Studuit quidem præfatus filius vester
morem homini gerere, ut vocatus ab ipso, sicut
asserit, litteris suis et multa instantia ipsum incli-
naret ad pacem. Cujus ex multis et magnis promissio-
nibus spem indubitam accepit, et eo usque
Christianissimi regis et procerum Franciæ convin-
ceret malitiam et duritiam ejus. Quantum vero la-
boraverit, ut regum et nostri colloquium uniretur,
quantam operam et diligentiam reformandæ paci
ibidem adhibuerit, quam instantem universos et
singulos, quos ad hoc idoneos esse credebat, solli-
citaverit, verbis exponere non sufficimus. Et nisi
præsentem fuisset, vix possemus fidem referen-
tibus adhibere. Quia ergo in mora ejus justitia Ec-
clesiæ amplius per Dei misericordiam, qui non
derelinquit sperantes in se, sicut nobis videtur, et
omnibus qui interfuerunt, manifestata est, majestati
vestræ profusis genibus supplicamus, quatenus ipsum
ad sinum clementiæ vestræ redeuntem paterna ple-
tate recipiatis.

EPISTOLA XIV.

AD EUMDEN.

Apostolicæ sedis auxilium sæpe cogimur implo-
rare, qui in contemptum Dei, et vestram, pater,
injuriā, multis, magnis, et continuis torquemur
afflictionibus, contumeliis dehonestamur, et provo-
camur injuriis. Quæ vero personam lædunt, minus
revocantur ad animum, sed species impietatis est,
tantam et tam manifestam Christi injuriā sub
inani pretextu patientiæ dissimulare. Loquar ergo
semel adhuc ad dominum meum in conspectu Dei
pro Ecclesia ejus, quæ parvitati meæ commissa
est, faciens verbum, ne sanguis ejus, cujus languor
jam ascendit ad summum, et damnatio eorum, qui
eam cruciant et exstingunt, taciturnitati meæ possit
ascribi. Et quidem si clamorem illius, quem in an-
gustis suis emisit per os meum, ab initio vestra
pietas exaudisset, collidens ad petram parvulus Ba-

lylonis, et parturientis malitiæ germina comprimens, nequaquam in tantam impietatem persecutoris nostri temeritas excrevisset. Sed divina mansuetudo vestra, quæ suo merito et universalis Ecclesiæ precibus Spiritus sancti gratiam possidet ampliorem, postponens tenuitatis meæ consilium, vasa iræ in multa et longa patientia censuit supportanda, ut delinquentes filios paterna benignitas ad pœnitentiam provocaret. Quod etsi ad præsens totam Ecclesiam Dei non mediocriter læserit, probabile tamen est hoc a Spiritu sancto, qui consilia vestra regit, et opera dirigii, fuisse procuratum, ut iniquitas, quæ multis et exquisitis dolis latere gestiebat, patientia vestra semper abutens, revelata facie prodiret in publicum, et opprobria Ægypti videntibus cunctis detegerentur. Siquidem Joannes de Oxenford, et omnes alii tantæ impietatis ministri, cum a sede apostolica gloriosi, et quasi de justitia triumphantes reverterentur, dederunt cornua peccatori, et auctores et incentores hujus erroris, quasi per se non satis insanirent, impunitatis et gloriæ suæ calcaribus coeperunt acrius instigare. Venenatos tamen animos, aut potius venenosos, non oportuerat amplius toxicari, nec Archithophel aut Judam temporis nostri excitari, aut animari ad facinus. Ex abundanti tamen illi, quos tali legatione fungentes vestra pietas adoptavit in filios, et honoribus sublimavit, Ecclesiæ Anglorum, facti sunt in arcum pravum, ut misera Cantuariensis Ecclesia, aliarum tamen omnium in insula mater, upote quæ illas generavit et educavit in Christo, merito dicere possit: *Filii matris meæ pugnaverunt contra me, et mei proprii, quos genui et exaltavi, conculcaverunt, et vulneraverunt me, et adhuc exquirunt animam meam, ut auferant eam.* Non utique quod de vestra liberalitate, quæ pia fuit, aut illorum promotione, quæ sperabatur utilis, contristetur, sed dolet quod vobis infideles sunt, et perniciosissimi, et manifestissimi persecutores Ecclesiæ. Ipsi enim sunt qui sævitiam domini regis instigant et accendunt, et modis omnibus elaborant, non modo ut mihi omnis reverentia subtrahatur, hæc enim pridem jam impleverunt, sed ut meum et coexulantium mihi, qui jam pauci sunt, eo quod plures a facie persequentis in fata concesserunt, nomen deleatur de terra. Præceperatis autem tum aliis, tum maxime episcopo Londoniensi, ut pacem Ecclesiæ, quod ut creditur facile posset, adhibita diligentia studeret reformare. Sed ille ex quo audivit, quod debitum animadvertendi in malefactores Ecclesiæ mihi vestra gratia restituerat, et contulerat facultatem, statim per se et complices suos commovit et conturbavit terram, timens sanandas esse contritiones ejus, quæ per eum fuerat conturbata. Neque id in occulto, sed passim. Et quo manifestior esset ejus iniquitas, Londoniæ in celeberrimo loco, ubi ad ratiocinia publica tractanda totius regni officiales convenerant. Debuerat ei sufficere, quod tandiu sustinuit eum clementia vestra, quod sententiam anathematis ex causa inobedientiæ et aliorum scē-

lerum, quæ manifesta sunt, incurrerat alias impunitus, sed ab impunitate conceperat cujuscunque præsumptionis audaciam, habens fiduciam quod Jordanis influeret in os ejus. Nam ab ejus consilio dependent tam Saresberiensis episcopus, hactenus inobediens et rebellis, quam Randulphus de Broc, qui Cantuariensi Ecclesiæ incubat, et alii depopulatores nostri. Unde exigente ratione juris, et urgente stimulo conscientiæ, quæ nos de tanta taciturnitate in tanto periculo Ecclesiæ vehementer accusat, eundem Londoniensem et Saresberiensem episcopos, et præfatum Randulphum cum aliis, quorum nomina superius scripta sunt, ex justis et manifestis causis publice excommunicavimus, citantes adhuc alios, qui factionis et seditionis eorum noscuntur participes existisse. Quos auctoritate Domini nisi resipuerint, vinculo anathematis innodabimus et apostolicæ majestatis compellemus adire tribunal, caractere bestiæ designatos. Provideat itaque sanctitas vestra Ecclesiæ libertati et paci, quia si nobis hac vice credideritis, omnia ad vestrum libitum componentur, et oculo ad oculum videbimus, quia superbientis et parvulus terrentis Moab arrogantia major est, quam fortitudo. Approbate, si placet, quod facimus et vos ipsi, quod necessitas exigit, manum apponite, conterite audaciam et malitiam impiorum; ne si, quod absit, illi prout hactenus fecisse visi sunt prævaluerint, salus Ecclesiæ conteratur et pereat. Ad hæc supplicamus, ut petitiones nostras, et quas dudum porreximus, et quas modo porrigimus, jubentis effectui celeri prosequente compleri, quia ex sententia animi nostri omnes ad honorem vestrum spectant, et Ecclesiæ proficiunt ad utilitatem.

EPISTOLA XV.

AD EUNDEM.

Ecclesiæ pacem, quam jugi sollicitudine pietas vestra procurat, illi præ cæteris magis impediunt, quos oportebat tum pro debito officii sui, tum pro mandati vestri reverentia, in reformatione ejus amplius laborare. Luget ergo Ecclesia, quod decoloratur et denigratur a filiis; et quia spolia ejus diripiunt, qui custodes illius fuerant instituti. Nam si Gaufridus archidiabolus noster, et Reginaldus Saresberiensis, et Joannes de Oxenford, nomine et quæstus decanus quondam in Christo excellentis Ecclesiæ, ministerio autem et cultu satellites curiæ, itemque complices eorum, regis animum non pervertissent, Ecclesiæ pax, ut creditur, jam esset ad nuntiorum vestrorum adventum reformata. Nam qui ministrant arma iniquitati, fere omnes apud nos clerici sunt, quorum aliqui de vestra familiaritate et sedis apostolicæ privilegio gloriantur, ut dicant se quidquid fecerint, nulli nisi Romano pontifici responsuros. Quæ gloriatio, si vera est, et Ecclesiæ Romanæ decolorabit famam, et totius Ecclesiæ, quod absit, in brevi subvertetur honestas, dum omnes ad omnia privilegiorum provocabuntur exemplis. His facile est sumptibus ex rapinis ministratis frequentes iterate

discursus, et ut sibi, cum ignoti et inopes ante fuissent, faciant nomen et quæstum, crebra curiarum sollicitatione procurantes, quantum in eis est, ut Ecclesia nunquam habeat pacem. Qua de causa nunc ad vos properare dicuntur Reginaldus de Saresberia, et Ricardus Barre, qui cujus fidei et modestiæ sint, auctore Domino, nuntiis vestris referentibus audietis in brevi. Interim certum habeat vestra paternitas, quod nominatim excommunicatis scienter communicaverunt, adeo ut præfatus Ricardus se contulerit ad Gaufridum archidiaconum nostrum, quem excommunicatum noverat, ut illius patrocinetur errori, et illi et aliis excommunicatis passim communique. Quocirca supplicamus sanctitati vestræ ut cum ad vos venerint, sic eos tractetis ut participes anathematis, nec eorum sollicitationes admittatis ante reditum nuntiorum vestrorum. Nam si delusores istos vel hac vice durius tractaveritis, pacem, Deo propitio, pro voto facietis.

EPISTOLA XVI.

AD EUNDEM.

Longanimitatis vestræ divitiis, imo et divinæ copiam bonitatis contempsit hactenus rex Angliæ, ignorans aut dissimulans, quod eum patientia vestra studuit ad penitentiam revocare. Ad preces et commotiones obscuravit, gloriatus ad ignominiam sedis apostolicæ, et in contumeliam beati nominis vestri, quod ei privilegium indulgissis, quo quandiu voluerit, tutus erit adversum nos, et Ecclesiam Cantuariensem, licet illam et nos atrocius persequatur, et ut facilius rem falsam et incredibilem persuadeat universis, rescripta litterarum, quas ei contra nos, et utinam non contra vos, indulgissis, per Alemaniæ, Franciam, Angliam, et diversas provincias adjacentes ventilari facit. Sic vestram remunerat benevolentiam, has mansuetudini rependit gratias, ut fiant semper novissima ejus atrociora prioribus. Sed auctore Deo, quod utinam ab initio credidissetis, nunc in conspectu omnium declarata est justitia nostra, et causa exsilii et proscriptionis, et quo tota ipsius vergat intentio. Nuper enim in secundo colloquio, audientibus Christianissimo rege et cunctis qui hinc inde aderant, confessus est post comminatorias vestras, quas sæpius refutaverit, vix tandem recepit, quod nihil aliud a nobis quærir, nisi observantiam consuetudinum suarum, quas sicut vidistis, et adhuc potestis intueri, divinæ legi constat et sacris canonibus penitus adversari. Ad instantiam vero Christianissimi regis, et religiosorum quos miseratis, adhibitis multis intercessoribus, ut taceret consuetudines, mutavit quidem verbum, sed non mutavit propositum. Exegit enim, ut profiteamur in verbo veritatis simpliciter et absolute nos facturos, quod fecerunt antecessores nostri, et hac sola via, ut dicebat, poterimus habere Ecclesiam nostram et pacem in regno, sed nondum tamen gratiam ejus. Quod quidem ideo adjicit, quia nos auctoritate rescripti vestri putat officii debiti potestate esse

A privatos, donec velit nos in suam gratiam revocare. Cum vero nobis religiosi viri, Simon prior de Monte-Dei, et frater Bernardus hanc ejus petitionem proposuissent, respondimus non esse plene in conscientia nostra, quid fecerint antecessores nostri, licet aliquos eorum ex scriptis authenticis pro causa simili noverimus exulasse, et tandem obtinuisse, ut sicut reges, quæ sibi crediderant competere, jura vendicabant, ita quæ Dei erant, Deo redderentur. Nos autem paratos esse ad omne obsequium ejus, etiam ultra quam fecerint antecessores, salvo ordine nostro. Cæterum novas, et præter formam Ecclesiæ, quæ a nullo antecessorum nostrorum præstitæ sunt, inire obligationes, nobis esse illicitum: tum quia perniciosum esset exemplo, tum quia vos ipse, quando in urbe Senonensi nos ab illarum Deo et Ecclesiæ odibilium consuetudinum observantia et obligatione per vim et metum extorta absolvistis, specialiter, increpatione gravi præmissa, et quæ auctore Deo ab animo nostro nunquam excidet inhibuistis, ne nunquam ulterius nos alicui in causa simili obligemus nisi salvo honore Dei et ordine nostro. Adjecistis etiam, si placet reminisci, quod nec pro capite, nisi salvo honore Dei et ordine suo, se debeat episcopus obligare. Promisimus itaque viris religiosis, quod si rex mandatum vestrum impleret, restituendo nobis gratiam suam et pacem, et Ecclesiam cum his quæ nobis et nostris abstulit, ei et liberis suis, salvo honore Dei et ordine nostro, totis viribus studebimus inservire; sed sine auctoritate vestra nobis illicitum esse diximus mutare formam ecclesiasticam, quam occidentalis tota tenet Ecclesia, et quæ etiam in reprobis illis consuetudinibus quæ sunt nostri causa exsilii, patenter expressa est. Ibi siquidem continetur, quod electi debent ante consecrationem regi jurare, quod ei fideles erunt, circa vitam, membra, et honorem terrenum, salvo ordine suo. Uquid ergo nos soli in captiosa obligatione quæ a nobis exigitur, honorem Dei et indemnitate ordinis cogimur relicere? Quis enim Christianus unquam hoc a Christiano exegit? Religiosorum instantiam responsionum varietate delusit: et modo aiens, modo negans, dimisit querulos, quod eis opera perierat et impensa. Simulavit tamen episcopos Angliæ se evocaturum, ut eos consulat. Sed in veritate nuntiorum, quos ad vos destinavit, præstolatur adventum. Nam ut ab eis, quibus oportet haberi fidem, vere didicimus, gloriati sunt, quod sicut fecerunt alia vice, promissis aut minis, quod rex desiderat, contra nos a vobis impetrabunt. Incredibile tamen est, quod apostolica sedes compellat aliquem reticere honorem Dei, aut prohibeat salvandi ordinis facere mentionem. Et profecto si nuntios ejus confusos, ut justum est, remisistis, liberabitis Ecclesiam Dei, et sedis apostolicæ famam. Agatis ergo, si placet, viriliter, quia si terrere volueritis impium, indubitanter credimus quod Ecclesiæ pacem, et pereuntem animam Deo reddetis. Experti estis quid apud eum mansuetudo profecerit.

Nunc aia aggredimini via et procul dubio in rigore justitiæ citissime triumphabitis. Exigite quod nobis ablatum est usque ab novissimum quadrantem, ne tantæ rapinæ impunitas apud coetaneos et posteros divulgata tam illi, quam successoribus præstet audaciam similiter delinquendi. Nam si cognoverimus poenitentem, ut viam satisfaciendi velit ingredi, vestro præeunte consilio, juris poterimus temperare rigorem prout Ecclesiæ Dei, nostris et futuris temporibus viderimus expedire. Alioquin perseverans in crimine, et tantum in Ecclesia faciens scandalum, quo jure absolvetur? Deo siquidem vinculis impoenitentia ligatus est, et Lazaro deterius et acrius compeditus. Nam si res ablata reddi potest, et non redditur, non agitur poenitentia, sed flagitur. Unum est quod plurimum affectat, et in quo, propitiante Deo, mentitur iniquitas sibi, quia si luctum, quod Deus avertit, Ecclesiæ Catholicae videret, incumbe-
 C anter Ecclesiam Anglicanam, sed et omnem, quæ in ejus potestate est, subjeceret legibus suis. Hoc autem vobis certum sit, quod ea quæ a nobis exigit, servare non possumus, et apostolicæ sedi fidem et debitam obedientiam. Illic enim sibi invicem adversantur. Hoc etiam rogamus attentius, ne malefactores et excommunicatos nostros, si forte ad vos venerint aut miserint, in præjudicium nostrum faciatis absolvi, quia si alia vice non esset factum, Ecclesia jam pace debita frueretur. Sane si nos compulerit, quod Deo propitiante nec pro temporali vita facturus est, ad hanc obligationem, non enim excidit a memoria nostra quid vobis et Ecclesiæ Romanæ in receptione pallii juraverimus, non modo episcopos, sed et clerum universum similiter obligabit tanto fretus exemplo. Et quidem facile est, ut impunitam ejus audaciam alii principes imitentur. Quod autem a nobis exigit, nec a militibus, nec a rusticis exigitur in terra nostra.

EPISTOLA XVII.

AD EUNDEM.

Si causam nostri, Pater sancte, malitia adversariorum apud vos non denigrasset exsilii, credimus indubitanter, quod rex Angliæ tandiu et tam invovne non abuteretur patientia vestra. Sed ecce, Deo propitiante, ipsius persecutoris nostri testimonio
 D veritas declarata est. Nuper enim, cum ad pedes ejus flexis genibus in omni humillitate implorarem coram rege Christianissimo, archiepiscopis, episcopis, comitibus, proceribus et omnibus qui aderant, professus est se nihil aliud a me querere, nisi ut consuetudines regni sui, quas antecessores nostri suis principibus servaverunt, conservare, et hoc tanquam sacerdos et episcopus absolute et præcise, sicut nuntii nostri vobis fideliter exponunt, repromitterem in verbo veritatis. Placeat itaque sanctitati vestræ latere præsentium, fideles nostros et proscriptionis nostræ participes, qui omnibus interfuerunt, clementer audire, et Anglicanæ Ecclesiæ jam in extremis agentî, nisi dextera Dei et vestra

A subveniat, celerem conferre medicinam. Posuimus enim verba nostra in ore eorum. Gloriatum autem rex Angliæ, quod ei privilegium contulistis, quod licet in sedem nostram redierimus, omnis potestas nostra evacuata est, donec eam nobis restitui velit. A sæculo inauditum est apud nos, quod aliquis episcopus se principi seculari obligare cogatur ulterius, quam ad conversationem eorum, quæ continentur in forma fidelitatis. Veremur ergo, ne si, quod absit! et Deo auctore semper aberit, a nobis ulterior cæperit obligatio, perniciēs exempli alios inficiat principes, et non modo coetaneos nostros, sed successores nostros involvat. Et quidem planum est, quod si petita consuetudines prævaluerint, auctoritas apostolicæ sedis in Anglia penitus evanesceat,
 B aut erit minima. Quod sicut ex majorum scriptis et relationibus seniorum publice notum est, pridem contigisset, nisi Cantuariensis Ecclesia se principibus pro fide sedis apostolicæ, et Ecclesiæ libertate studuisset opponere. Rarus enim illi Ecclesiæ præfuit, qui non aut gladium subierit pro justitia, aut pertulerit molestias exsilii, aut proscriptionis injuriam. Unde mirum est, et omni stupore dignum, quod apostolicæ majestatis potius, quam nostri nominis persecutor se in causa tali plures apud vos gloriatur invenisse et habere fautores. Nec vos oportet de cætero vereri, ne transeat ad schismaticos, quia sic eum Christus in manu famuli sui regis Francorum subegit, ut ab obsequio ejus non possit amplius separari.

EPISTOLA XVIII.

AD EUNDEM.

Ecclesiæ persecutor et noster abutitur patientia vestra, nesciens aut dissimulans quod eum vestra benignitas in multa mansuetudine sustinet, ut habeat spatium poenitendi; et si, quod absit! in furora persisterit, vestra, qua condemnabitur, justitia manifesta sit in conspectu omnium nationum. Nam quoties nuntii ejus a vestra redeunt sanctitate, fit insolentior, et in Ecclesiam Dei crudelius sævit, et ab impunitate, qua diu elatus est, majorem concipit audaciam delinquendi, quasi non manifesta sint opera ejus provocantia judicium inexorabile in caput suum. Siquidem Joannes de Oxenford, quasi non
 D satis insaniret homo, cum in reditu suo amplius instigavit, nobisque subtraxit obedientiam et reverentiam provinciæ nostræ: excommunicatos sine juramento et satisfactione fecit absolvi. Quia justitia, viderit Deus et judicet. Secutus eum Joannes Cum in se majora gloriatus est impetrasse. Et ut Christianissimum regem et optimates regni Francorum a nostra et coexulantium nobis subventionem retraheret, peragrans Franciam, et in Burgundiam irrumpens, in ecclesiis et nobilium domibus disseminabat se certum esse de nostra cita dejectione, dicens tamen se tempus et modum reticere, quia revelare secretum sedis apostolicæ non audebat. Qui vero nunc novissime redierunt, jactitant indulgentiam regi dilatio-

nem, et potestatem nostram a vobis esse suspensam A
ut nec in ipsum, nec in aliquam personam terræ
sue justitiæ manum ex quacunque causa possimus
extendere. Abbas etiam S. Augustini gloriosus est,
quod benedictionis munus suscepisset a vobis, si
tutum fuisset, ut tonderetur. Et utinam, quod in
vicinia sua nondum creditum, benedictione fieret
dignus. Nec reticent se, nisi petitiones eorum pro-
moverentur, inimicitias Ecclesiæ catholicæ denun-
tiasse, et a curia recessisse cum indignatione, sed
fratrum vestrorum, qui columnæ videntur Ecclesiæ,
sedulitate et diligentia ad curiam fuisse revocatos.
Hæc in compitis prædicant, ut eorum magnanimitas
innotescat. Et fortasse ut nationum principes
ad similia proycocentur. Et quidem, pater sancte,
officii nostri potestas facile suspendi poterit. Sed B
dextra Dei, quæ jam capita deprimit tyrannorum,
cobiberi non potest. Timent fideles vestri, ne dum
exercendæ justitiæ meliora tempora expectatis,
optima elabantur. Nam in areto positi sunt. Et qui
terret, plus ipse timet. *Confortare*, inquit Dominus,
et esto robustus, ne timeas a facie eorum. *Quia tecum*
sum. Jactitationibus nuntiorum regis non crederetur,
nisi quia cardinalis in eadem opinione est, et
nos verbo et litteris fecisset certiores. Misimus
ergo dilectissimum filium vestrum, fidelissimum
vobis, et per omnia nobis probatum, participem
tribulationis nostræ, magistrum Lombardum, qui
miserias nostras, et partis adversæ malitiam plenissime
novit, et ea quæ in Ecclesia Gallicana dicuntur
de his quæ contra nos fiunt, fidelissime referet. Si placet,
ipsum sicut nos ipsos audite: quia fidelior vobis et Ecclesiæ,
nobisque commodior non potuit inveniri. Audite ergo, si placet,
hunc conscientiæ nostræ testem, miseriarum Ecclesiæ
inspectorem, assertorem veritatis, amatorem justitiæ,
et apostolicæ sedis affectu et devotione filium
probatissimum, quem mittimus, ut saltem per eum
solatium conferatur Ecclesiæ Anglicanæ, quæ sic
attenuata et afflicta est, ut de cætero necessitates
suas nuntiorum discursibus exponere nequeat,
sed Deo soli cogatur exponere, et committere causam
suam. Persecutores Ecclesiæ expectant et desiderant,
quod eis divina subtrahat miseria, videre fidelium
luctum in transitu vestro dolorem, ut post dies vestros
Ecclesiam subijciant servituti, nemine contradicente. Eo enim
tendunt, quas contra Deum et justitiam implorant dilationes.
Sed divina discretio vestra, Pater sanctissime, studiosius
providebit, ut ante exitum vitæ tantas puniat enormitates,
ne de injuriæ Dei dissimulatione cogatur in die judicii
reddere rationem.

EPISTOLA XIX.

AD EUMDEM

Anima mea, pater, in amaritudine est, qui cum mi-
seris coexsulibus meis, ex quo per litteras vestras,
quibus nos, ut placuit, suspendistis, opprobrium
hominum factus sum, et abjectio plebis. Et quod

acerbius urit animam meam, Ecclesia Dei iniquo-
rum est exposita voluntati. Magnis viris, Flandrorum
comiti, et aliis regni summatibus persecutor Eccle-
siæ et noster certam pacis nostræ spem dederat, sed
in reditu nuntiorum suorum vestra fretus auctorita-
te nobis omnem reconciliationis præcludit viam. Illi
ergo, et alii amici nostri quid facerent, sic facio
vestro quasi clava Herculeæ percussi et repulsi?
Utinam quæ super hoc episcopi, et proceres, et
plebes utriusque regni loquuntur, audiret auris vestra,
et oculus videret scandalum, quo repleta est Ecclesia
Gallicana. Quid de cætero non sperabit homo ille,
qui per homines solis criminibus, aut aliis maculis
insignes sic circumvenit habentes clavem scientiæ,
et dispensatores æquitatis subvertit, et vanis territis
comminationibus, et impellit sedis apostolicæ majes-
tatem? Non est enim dubium, quin vos Joannes de
Oxenford deceperit, impune tamen. Et certe primo
decipi, præsertim in re tanta, incommodum est.
Quod licet dissimuletur, tota ætate nostra cum dolore
sentiet Ecclesia Anglicana. At ille venerabilis abbas
S. Augustini, qui quondam monachus fugitivus, et
suis excommunicatus meritis, ecclesiam, cui nunc
præest, dilapidat et incestat, et alii nuntii regis
nunc vestram longe deterius deceperunt sanctitatem.
Ecce enim rex ille, qui nihil aliud nisi moriem
vestram desiderat aut nostram, voti compos effectus
est, sperans, quod Deus avertat, sub hujus dilationis
tractu horum alterum eventurum. Sed monetis, ut
interim patientiam habeamus. Non attenditis, pater,
hoc *Interim*, quam sit dispendiosum Ecclesiæ, et
quantum vestræ detrahat honestati. Interim episco-
patus et abbatias vacantes in propriis abusus redigit
nec in illis patitur ordinari pastores. Interim in omnes
parochias, ecclesias, et loca venerabilia, et totum
clerum irrevocabili furore debacchatur. Interim
tam ipse, quam alii persecutores Ecclesiæ licitum
coæquant libito. Quis interim ovium Christi curam
geret, et eas excutiet a faucibus luporum, qui jam
non circumeunt, sed caulas ipsas ingressi mordent,
lacerant, et occidunt nemine reclamante? Cui enim
pastorum non præripuistis vocem? Quis episcoporum
non est in nostra suspensione suspensus? Nam sicut
sine exemplo, ita et sine merito facta est, et tam
illi, quam aliis principibus, et vestro tempore, et
post dies vestros præbebit audaciam conculcandi
Ecclesiâ, proscribendi innocentes, denuntiandi
inimicitias Ecclesiæ Romanæ, nisi connivendo vel
dissimulando communicet, et auctoritatem præstet
iniquitatibus eorum. Ecce enim præ manibus habent
vestræ dispensationis exemplum, nec dubium est,
quin tam ab ipso, quam a posteris ejus nisi citius
occurrat dextera vestra, trahatur ad consequentiam,
et quasi in privilegium redigatur, ut pro quocunque
scelere nec in regem, nec in personas regni, nec in
terram liceat excommunicationis aut interdicti sine
auctoritate sedis apostolicæ promulgare sententiam.
Et profecto sic processu temporis poterit ab hoc ex-
emplo malitia convalescere, ut nec ipse Romanus

pontifex in toto regno inveniat, qui ei contra regem aut principes velit aut audeat obedire. Hoc est enim quod agitur ab illis, hoc est quod nostro causam dedit exsilio. Nec enim est, sicut quosdam dominos nostros, fratres vestros audio susurrare, quod mihi imputari debeat visitationes Angliæ, quæ decessorum vestrorum tempore solebant fieri, vobis esse subtractas. Mihi potius, et Christi pauperibus, co-exsilibus meis, fuerat imputandum, quod vobis aliquid reservatum est in terra illa. Legatur, si placet, libellus reprobarum consuetudinum, quas contra Ecclesiam vindicat, et nostri exsilii causa sent, et plene videbitis, quomodo antequam proclamarem, appellans ad vos ora præcluserit, quomodo sine juratoria cautione personas ecclesiasticas transfretare prohibuerit, quomodo suffocaverit electionum jura, quomodo omnia iudicia tam ecclesiastica quam mundana traxerit ad examen curiæ suæ, quomodo in eisdem consuetudinibus omnem ecclesiasticam jugulaverit libertatem. Quis vestro aut decessorum vestrorum tempore appellans ad Ecclesiam Romanam præce vel pretio, vel jure contra eam justitiam potuit obtinere? Appellationem decessoris sui luit adhuc Exoniensis episcopus, ecclesiam de Boseham suæ Ecclesiæ contra omnem justitiam subtractam dolens. Saresberiensis episcopus, cui se nunc favere simulat propter inobedientiæ crimen, castrum de Divisis et alias possessiones Ecclesiæ suæ multas amittit, quia ipsum ad faciendam restitutionem juramenti religione arctatum decessorum vestrorum Anastasii et Adriani litteris ausus est convenire. Non sufficiet dies, si volueris similia, quæ contra singulas ecclesias regni præsumpta sunt, percurrere, cum aliis hoc modo possessiones ablatae sint, et omnibus in commune perempta libertas, ut nec spes liberationis alicui relicta sit. Legatur, inquam, Deo reprobis ille libellus; et videant domini nostri fautores regis, quid privilegii, quæ prerogativa reservetur eis in terra ejus. Sed dicunt fortasse odio nominis mei confectum esse libellum. At certe ab initio susceptæ potestatis libertatem Ecclesiæ quasi jure hæreditario persequitur. Nunquid eram archiepiscopus, quando pater ejus nuntios beati Eugenii terram suam intrare prohibuit? Nunquid eram archiepiscopus, quando Gregorius S. Angeli diaconus cardinalis, tyrannidem hujus prævidens, persuasit domino Eugenio, ut Eustachium filium regis Stephani coronari non permitteret, dicens facilius posse teneri arietem per cornua, quam cauda leonem? Hæc vobis historia nota est. Et quas litteras impetraverit tunc, qui nunc Eloracensis est, et Ecclesiæ persequens cum rege illo nomen meum, imo ecclesiasticam libertatem conatur extinguere. Nunquid eram archiepiscopus, quando rex ob injuriam appellationis ecclesiam de Boseham in episcopum Loxviensem transtulit, qui eam grammatica sua et lexo placitandi contra justitiam Exoniensis Ecclesiæ tueretur? Sed et Cisterciensis episcopus quid profecit adversus abbatem

A de Bello, qui privilegiis apostolicis fretus, cum ea nominasset in curia, et abbatem denuntiasset excommunicatum, eidem incontinenti coram omnibus communicare compulsus est sine omni absolutione, et eum recipere in osculo pacis? Sic enim placuit regi et curiæ, quæ ei in nullo contradicere audebat. Et hoc, sanctissime Pater, contigit tempore decessoris vestri nostri. Qui vero odio mei mala hæc omnia contigisse loquuntur, dicant si noverint, quis in regno ejus tempore suo sit de eo, vel de his quibus patrocinari voluit, auctoritate sedis apostolicæ justitiam consecutus? Certe, quod meminerim, nec unum proferent, multosque poterunt nominare, qui odio Romani nominis sub eo periclitati sunt. Achardus abbas S. Victoris, electus in episcopum Sagiensem, quare non permissus est ordinari? Quia electionem ejus confirmaverat summus pontifex Adrianus. Quare permisit rex, ut idem postmodum fieret episcopus Abrincensis? Plane quia nulla voluntatem ejus præcessit electio. Similiter et Frogerius in Ecclesiam Sagiensem non electus, sed intrusus est, et ego nondum promotus eram. Nec ambigo, quin iam inter nos super libertate Ecclesiæ fuisset extincta contentio, nisi in Ecclesia Romana voluntatis suæ, ne pervertitatis dicam, patronos reperisset. Retribuat illis Deus, prout Ecclesiæ suæ et illis expedit, et dijudicet inter nos potentissimus et æquissimus Judex. Utique non esset mihi necessarium patrocinium illorum, si Ecclesiam Dei voluissem exponere, et acquiescere voluntati ejus. Siquidem florere poteram, et regni divitiis et deliciis abundare, timeri, coli, et honorari ab omnibus, et meis in voluptate et gloria mundi providere pro libitu. Sed quia me indignum et miserrimum peccatorem, florentem tamen in sæculo præ cunctis conterraneis meis, ad Ecclesiæ suæ regimen vocavit Dominus, ipsius gratia præeunte et cooperante, elegi aliectus esse in domo ejus, et exsilium, et proscriptionem, et extremam miseriam finire cum vita, quam facere dispendium ecclesiasticæ libertatis: et traditiones hominum, præsertim iniquas, præferre legi Dei. Faciant hoc, qui sibi longos dies pollicentur, et de suorum conscientia meritum præstolantur tempora meliora. Ego enim certus sum, quoniam breves dies mei sunt, et si tacuero impio iniquitatem suam, sanguis ejus requiretur de manu mea ab illo, cui non suffragante hominis patrocinio de commissis et omissis rationem redditurus sum. Ibi aurum et argentum non proderit, nec munera, quæ excecant etiam oculos sapientum. Astabimus in brevi ante tribunal Christi, per cujus majestatem et tremendum judicium vos, sicut patrem, et dominum, et summum in terra judicem obtestor, ut Ecclesiæ suæ et mihi justitiam exhibeatis de his, qui quærent animam ejus, ut auferant eam. Nec patiamini diutius eam tam contumeliose conculcari pedibus impiorum. Adeo attenuatus sum et afflictus, ut qui aliena quadra et Christianissimi regis sustentor alimonia, non possim de cætero vobis instare per nun-

tios, quibus quid porrigam, omnino non habeo. A
Placeat itaque majestati vestræ, Cantuariensis Ecclesie finire miseriam, et quæ nuper in utroque regno emeruerunt, et pullulant, et malignantibus præbent audaciam delinquendi, tollere scandala, sanctitatis vestræ puerum absolvendo, et scribendo Christianissimo regi, et Ecclesie Gallicanæ, quod nisi rex Angliæ commonitiones vestras audierit, et nobis pacem et ablata cum Ecclesie libertate restituerit, extunc nos in eum et terram suam nostri officii potestatem exercere conceditis, et sententiam, quam Domino auctore feremus, vultis ab omnibus episcopis inviolabiliter observari.

EPISTOLA XX.

AD EUNDEM.

Quot angustias ac tribulationes, multas et malas, pro libertate sanctæ Dei Ecclesie tuenda in diuturno cum copiosa et innumera Christi pauperum multitudine exilio, jam fere per septennium laborantes miserabiliter sustinuerimus, vestra, Pater sanctissime, plenius noscere debet prudens discretio, a cuius animo de facili non possumus credere, quod sustinuerimus, elabi. Sed vestræ potius, Pater charissime, debet radicatus inherere memoriæ cum quo etiam, domine mi charissime, scilicet cum rege Anglorum fere usque ad mortem in agone contenderimus vestra plenius novit experientia, qui, sicut et nos, ipsius versutias et deceptiones rerum experientia, didicistis. De nostris quidem vel de alienis, qui pro Ecclesie nostræ et nostris ad vos de cætero velit transire negotiis, in diuturno exilio adeo extenuati vix aliquem, imo veraciter nullum reperimus. Unde, domine et Pater charissime, sanctitati vestræ pro-voluti genibus, pro Ecclesia Anglicana, pro nobis, et pro vita nostra temporali supplicamus, quatenus et Ecclesie occidentali, et vitæ nostræ, ne turpiter a tyranno prostrati corruamus, in petitionibus, quas sanctitati vestræ per magistrum Lombardum et nuntios nostros, quos ad eum et ad paternitatem vestram direximus, nos benigne et plenarie in eis exaudiat, et ad subsidium Ecclesie Dei, et vitæ nostræ in posterum nobis quantocius mittere dignemini. Præsentium siquidem latorem, virum honestum et religiosum, sanctitati vestræ destinavimus, D supplicantes et rogantes attentius, quatenus eum vice nostri benigne suseipiat, et ea, quæ vestræ paternitati per eum communicanda domino Ostiensi et magistro Lombardo significamus, sicut Dei Ecclesie occidentali, et præcipue Cantuariensi, cupitis esse prospectum pariter et vitæ nostræ, prout petimus, omnino et plenarie exaudientes, citius adimpleta nobis remittere per nostrum nuntium vestra paternitas dignetur. Si magister Lombardus præsens fuerit, penes eum literæ istæ remaneant; sin autem, apud dominum et patrem nostrum dominum Ostiensem, vel filium gratiæ Gratianum. Valeat sanctitas vestra, Pater sanctissime, in tempora longiora.

EPISTOLA XXI.

[AD EUNDEM.]

Trecensis comes Ecclesiam Sancti Stephani a jurisdictione episcopi et matricis Ecclesie subiectione conatur eximere. Voluntatem vero ipsius posse non credimus adimpleri, nisi majori Ecclesie quid ei jure communi competit auferatur; et privilegium quod ei vestra benignitas recte contulit, non sine suspitione injuriæ devocetur in irritum, et cum animarum periculo peccandi libertas in ulteriorem licentiam porrigatur. Scitis enim, ut arbitramur, pro parte qui mores in illa civitate dominantur; qui præ ceteris ibi floreant homines, quibus si modicum id timoris et verecundie quod nunc ab episcopali auctoritate de vicino imminet subtrahatur, verendum est ne in infamiam Ecclesie Romanæ, et quod magis timendum est, in periculum salutis eorum qui hanc emancipationem quærent ant faciunt, criminibus ab impunitate detur audacia et consequenter totius honestatis et religionis eversio. Ad hæc ei non una subtrahetur ecclesia, sed ita mutilabitur potestas episcopalis ut vix aliquam enormitatem in tota civitate valeat emendare. Nam ad illius ecclesie sanctum, illico confugient universi, ubi iis publicæ potestatis gratia patrocinabitur, et apostolicæ sedis munimine protegentur. Et ex animi sententia loquamur, illi episcopo justius fuerat adiutores vicinos provideri ut illa area ab immun-ditiis purgaretur, quam ipsum debilitari ne curam animarum pro debito officii valeat exercere. Vix enim his diebus ad hoc unus episcopus qualibet religiosus sufficiet. Utique talis emancipationis apud nos exemplum nec auditur nec legitur, et utinam semper alienum sit a sanctitate temporis vestri! Sperabatur quod devotionem episcopi, qui vobis officiosus semper exstitit et fidelis et quem scitis habitare inter struthiones et scorpiones, velletis alio modo consolari et confortare, ut ad cervices inimicorum Christi comprimendas gladium columbæ validius extendere posset, et incredulos revocare ad prudentiam iustorum, et quidem quidquid alii loquuntur, confidimus adhuc quod potius episcopo vires dabit, ut in his quæ Dei sunt valeat confortari, quam ut Ecclesie suæ in tantam animarum perniciem auferatis, quod ipsa toto tempore decessoris huius episcopi dignoscitur possedisse. Supplicamus itaque majestati vestræ quanta affectione possumus, ut sæpe dicto episcopo suam in prælibata causa iustitiam servetis illæsam, et in quibus expedire videbitis necessitati ipsius et utilitati Ecclesie, petitiones ejus jubeatis effectui mancipari. Novit Deus nos ipsa scripsisse magis contemplatione famæ vestræ et honestatis Ecclesie, quam antedicti favore episcopi vel odio comitis, quem teste Deo et conscientia nos ut nobilem virum et amicum nobis sincera in Christo charitate diligimus: et eum in aliis ubi Ecclesia non lædatur, nec periclitetur fama vestra, desideramus et petimus a vobis exaudiri in Domino. Vobis, pater

fidelitatis et, quod magis est, veræ charitatis vinculo tenemur astricti : nec salva conscientia silere possumus ubi quid in honoris vestri dispendium cernimus et credimus attentari. Quæcunque in magnis rebus geritis, posteritati per sibi succedentia sæcula consecrantur quia simul ac in notitiam Ecclesiarum veniunt, inseruntur annalibus et seriem insigniunt eboricorum. Hæc si minus vestram moverint sanctitatem, quod tamen credibile non est, saltem rationi vestræ divini iudicii timor occurrat ex eo proveniens omni jure quod in omnibus fere sic emancipatis Ecclesiis languet disciplina regularis, tepescit religio, crebrescunt vitia, viget enormitas, quia vicinis pontificibus subtracta est auctoritas correctionis et Romanus pontifex procul est ut videat vel audiat in Ecclesiis suis frequenter emergentes excessus : quos tandem si forte audierit, quod plerumque de causa non liquet, cognitionem et correctionem aliis et interdum negligentibus aut alias corruptis prout liberit mandat, et sæpe circa majora vel propria occupatus minoribus et alienis vacare non potest, et interim pereunt animæ de quibus rediturus est in districto examine rationem.

EPISTOLA XXII.

AD EUMDEM.

Illustri Flandrorum comite et viro clarissimo Roberto cancellario ejus, præposito Sancti Audomari, sæpe preces pro nostra et nostrorum necessitate relevanda porrexit vestra dignitas, quas illi semper devote suscipere curaverint et magnifice adimplere. Nam ut de nobis ad præsens taceamus, quibus illorum benignitas in tot angustiarum articulis, et tam longa proscriptionis et exilii acerbitate nunquam defuit, quotquot de rostris ad illorum clementiam confugerunt, tanta ad iis humanitate recepti sunt, tanta liberalitatis indulgentia recreati, ut non tam pauperes, exsules et proscriptos viderentur suscipere, quam in familiaribus suis venerari Dominum majestatis. Sed licet præfatus comes et nobilitate generis et quod magis est, virtute animi et pacis et justitiæ cultu et militaris exercitii gloria et amplitudine principatus et affluentia divitiarum, alios post Christianissimum regem regni principes antecedit : devotio tamen quam habet ad apostolicam sedem, reverentia quam ecclesiis et viris ecclesiasticis exhibet, liberalitas quam exercet in sanctos : pietas quam desolatis Christi membris impendit præposito maxime ascribenda sunt ; qui Domino suo salubria et honesta præstat consilia, cujus arbitrio præcipue non solum domus comitis, sed tantum optime regitur principatus. Nam ab ejus decreto pendet omnium administratio, et si quid adversus Ecclesiam præsumptum est, ad juris formam patienter et provide revocatur. Laudandus est ergo Dominus, qui talem consiliarium prælegit : laudandus et ille qui per vias rectas iter Domini dirigit. Uterque vobis fidelis est et devotus, ut in toto regno, quod ex animi sententia dicimus, pariter ne-

queant inveniri similes illis, qui tanta devotione et efficaciæ vestris per omnia cupiant inservire mandatis. Ili sanctitati vestræ petitionenculam porrigentes nostris se credunt, quod et nos de vestra pietate præsumimus, posse suffragiis adjuvari, qui si grandem rem petissent a vestra majestate, digni sunt exaudiri. Petunt enim et nos quanta possumus supplicatione cum iis, quatenus præposito donetis præbendam in ecclesia Sancti Martini Turonensis, quod filio vestro christianissimo regi gratum fore non dubitamus et eidem ecclesiæ credimus profuturum. Nam multas necessitates ejus potenter expedit et fretus viribus amicorum de ipsis potentum faucibus, auctore Deo frequenter excutiet prædam. Pulsat ad ostium vestrum ut introducatur per apostolicam manum furtivum Simonis posticum adhibita cautione declinans, quo multi subripere non erubescunt nec formidant. Patet enim hæc via quæ plurimis et jam usn pariter et vetustate trita est, sed vir justus et timoratus non incedit per eam ; hanc præbendam, Pater, non uni dabitis personæ sed multis : in quibus sumus et nos, quia quod in antedicti præpositi bonis invenitur commune proscriptorum Christi patrimonium est nec auferbit quisquam eo vivente in tota terra comitis quidpiam machinari quod aut Ecclesiæ laedit aut vestram debeat offendere sanctitatem. Uno ergo et modico beneficio tantum comitem et totum id quod potest obligabit vobis et præpositum de fideli vestro facietis emptitium.

EPISTOLA XXIII.

AD EUMDEM.

Venerabilis vir et virtutum radiis Gallicanam illustratus, Deo, ut speramus, juvante Ecclesiam, dominus Senonensis ad sedem apostolicam sicut intelleximus accedere desiderabat a sanctitate vestra gratiam consecrationis ex proposito recepturus. Sed devotissimus filius vester christianissimus rex Francorum hinc pericula itineris metuens, inde regni necessitates patenter exponens, præsentibus episcopis provincie Senonensis et optimatibus regni, electi suspendi consuluit iter, consecrationem ejus potius fieri quam differri, sicut ab iis qui præsentibus fuerunt, accepimus. Tractus itaque et quodam modo compulsus quadam violentia charitatis et publicæ necessitatis instinctu, a propria Synodo consecratus est, rege et regina et primoribus regni presentibus, qui Ecclesiæ et regno dicebant incolumitatem subtrahi, si tanti viri consilio et auxilio destituerentur vel ad horam, præsertim in tanta collisione regnorum et machinationibus Teutonum qui sub prætextu simulatæ utilitatis jam fere extincti schismatis fraudulentibus promissionibus conantur incendia renovare. Utinam, pater, vidissent oculi vestri quam prudenter, quam efficaciter molimina eorum nuper evacuerit dominus Senonensis. Nam plurimi procerum et etiam quidam magni nominis quos ad præsens tacemus, exaudiri vota Teutonum et iniri

cum iis fœdera consulebant. Et quia schismaticorum machinamenta non cessant, quin regem Christianissimum crebris legationibus et magnis promissis sollicitent, et plurimum tam episcoporum quam procerum fidem evertere nituntur, non est ei nec aliis recte sentientibus visum tutum esse, ut tantæ fidei et prudentiæ virum a se maxime sub hac tempestate discedere patiatur. Placeat itaque sanctitati vestræ quod de jam dicto Senonum salubriter, ut publice speratur, factum est, gratum habere et hominis fidelissimi vobis et Ecclesiæ Dei perutilem tam debiti pallii munere quam privilegiorum collatione honorare personam, quæ quanto plus potestatis a vestra majestate recipiet, tanto efficacius apostolicæ sedis poterit honori et utilitatibus inservire. Nam quanto major fuerit, tanto magis per eum videbit Ecclesia Romana in regno Francorum.

EPISTOLA XXIV.

AD EUNDEM.

Testatur vir eloquentissimus oratoris in eo maxime promoveri successus, si prænoverit judicis, auditorumque personas, et pro qualitate eorum sermonis moderetur officium. Hanc sententiam ad multa alia probabiliter arbitror dilatandam, præsertim cum nemo debeat ignarus esse conditionis ejus, cum quo contrahit, et sibi maxime, si secus spem aut opinionem acciderit, imputare debeat, qui commune negotium de proprio maluerit arbitrio committere fortunæ manibus, quam vires ejus et eventum promereri, inspectis tum aliis circumstantiis, tum præcipue qualitate consortis. Quod, pater, si vestra discretio in causa Ecclesiæ et regis Anglorum ab initio attendisset, nequaquam in tantas calamitates incidisset Anglicana Ecclesia, nec Gallicana, quod sine dolore non loquimur, tam pernicioso attentaretur aut opprimeretur exemplo. Præmonuerunt tamen vos multi fideles nostri, quod rex Anglorum expugnari quidem austeritate facilius potest, sed nulla mansuetudine, nullis obsequiis aut beneficiis emolliiri. Blanditur his quos timet, hos colit obsequiis quos rebus aut moribus, aut honestioris famæ titulo privare desiderat. Sed momentibus tunc credere noluistis. Si publica omnium attestatio vera non movit, saltem ipsa experientia vel nunc persuadeat et compellat mutare sententiam, ut persecutori Ecclesiæ respondeatis pro merito, et qui divinam et apostolicam contemnit auctoritatem, sentiat prophetam esse in Israel, et zelum Petri nondum a sede apostolica exulasse. Nam si Ecclesiæ inimicus est et schismatis incensor, debet puniri et conteri. Si amicus, propter obsequia castigari et emendari oportet. Sed proverbium est: *Timeri Danaos et dona ferentes*. Utiq; nuntii regis Anglorum quodammodo Danai sunt, et si non consortio generis, arte tamen et imitatione Sinonis. Hi vobis satisfactionem promiserunt, ut Ecclesiæ Dei calamitatem protenderent, et exilium nostrum. Impetraverant ut adhuc rex ille per archiepiscopum

A Rothomagensem, et episcopum Nivernensem conviretur, quasi jam satis conventus non fuisset, et malitia ejus non provocasset judicium. Clamant enim contra illum cæli et terra, et soli, qui lateribus vestris assident, non audiunt cardinales. Sed certe quisquis obsurdescit hic, audiet in judicio verbum asperum: *Ite, maledicti, in ignem æternum*. Præfatus archiepiscopus et episcopus mandati vestri formam excedentes, dilaciones indulgent, regis obtemperant voluntati, et sive errore sive dolo, sicut ex litteris quas vobis mittimus, potestis advertere, perpetuant Ecclesiæ calamitatem.

Londoniensis episcopus, quem pro voluntate vestra præcepistis absolvi, et qui sicut contra justitiam, ita et contra formam, quam expressistis, absolutus est, Ecclesiæ pacem et nostram impedit, et prævio Eboracensi archiepiscopo, et assistentibus sibi clericis regis, quos benignius recipere et efficacius consuevistis audire, molitur contra professionem suam, ut coronato contra Deum per manum jam dicti Eboracensis filio regis, Cantuariensis Ecclesia nunquam habeat pacem. Inhibueratis quidem, ne fieret, sed illi econtrario gloriantur se obtinuisse a vobis, ut fiat, sive manu Eboracensis archiepiscopi, sive cujuscunque episcopi ministerio rex voluerit. Et quia hoc detrectant episcopi provinciæ nostræ, Sagiensis episcopus, signifer eorum, qui Deum non verentur, se hoc, si alii defuerint, de familiari mandato vestro gloriatur esse facturum. Jam ex hac causa transfretavit. Spinis sepiat, quoniam aliunde non est auxilium, Dominus vias ejus. Cætera posuimus in ore latoris præsentium, in quo vobis, quanta possumus, affectione supplicamus, ut in negotiis nostris ei fidem habeatis, et petitiones, quas sanctitati vestræ per eum mittimus, celerius, quoniam id Ecclesiæ necessitas et nostra postulat, jubeatis effectui mancipari. Quidquid autem agant, sciatis quod neque mors, neque vita, nec præsentia, nec futura, per gratiam Dei separabunt nos a charitate, obedientia, et obsequio vestro, quia indubitanter scimus, quod spiritus vester non requiescit in eis, qui ab acceptione personarum et munerum, favore suo patrocinantur injuriis, et ponunt cum impiis portionem, sacrilegum videntes, et currentes cum eo. Nomen vestrum sit benedictum in sæcula, et Ecclesiam, pro qua vos oportebit reddere rationem, celerius et efficacius consoletur.

EPISTOLA XXV.

AD EUNDEM.

Serenissimo domino et patri charissimo ALEXANDRO Dei gratia summo pontifici, THOMAS S. Cantuariensis Ecclesiæ minister humilis, salutem et omnem cum summa devotione obedientiam.

Miserationis oculo respexit Deus Ecclesiam suam, et tandem tristitiam ejus in letitiam commutavit. Nec dubium, pater, quia si nobis vera dicentibus ab initio fuisset creditum, cornua retunderentur eorum, qui ventilabant, conterebant, et variis pla-

gis vulnerabant Ecclesiam, ut exterminata prorsus libertate ejus et evacuata auctoritate divinæ legis vigerent consuetudines aut potius abusiones veterum tyrannorum, Romanus pontifex nesciretur in Anglia; et sponsæ Christi privilegia sine reparationis spe deleterentur. Ecce enim ad novissimas litteras vestras, quibus domino regi Anglorum innouit, quod ei ulterius non parceretis, sicut nec pepercistis Frederico dicto imperatori, cum intellexisset terram ejus amotis omnibus subterfugiis interdicto subjiciendam esse, et episcopos, si qui forte non obediunt, suspendendos, et excommunicandos, illico nobiscum pacem fecit ad honorem Dei, et maximam, ut speramus, Ecclesiæ utilitatem. Nam de consuetudinibus, quas tanta pertinacia vindicare conseruat, nec mutare præsumpsit. Nullum a nobis vel aliquo nostrorum exegit juramentum. Possessiones quas occasione dissensionis hujus Ecclesiæ nostræ abstulerat, prout eas in chartula expresse-ramus, nobis concessit, pacem, et securitatem, et redditum omnibus nostris promisit et osculum, si tamen vellemus eum eatenus perurgeti, ut non modo in omnibus articulis victus appareret, sed ut per- jurs diceretur ab his, qui audierant ipsum jurasse, quod non erat nos ea die in osculo recepturus. Nos autem habito plurimorum sapientium consilio, et maxime domini Senonensis, qui pacem nostram ceteris sollicitius et efficacius procurabat, cum ipso ad colloquium regis accessimus, quem Deo faciente, qui omnes illos amoverat, qui sanctitatem vestram variis dolis circumvenire soliti sunt, adeo mu- tatum invenimus, ut quod sine circumstantium admiratione non contigit, animus ejus in nullo videretur a quietis consiliis abhorre- re. Nam ut nos procul adventantes conspexit, a circumfusa turba exsilens occurrit properus, et capite detecto nos in salutationis verba prorumpere gestientes salutatione prævenit, et habitis paucis sermonibus, solis nobis præsentibus cum domino Senonensi, nos, illo diver- tente, stupentibus universis, traxit in partem, et diu tanta familiaritate collocutus est, ut videri posset, nunquam inter nos aliquam fuisse discordiam. Om- nes fere, quotquot aderant, lætissima admiratione stupentes, plurimorum genis lacrymarum imbre ma- dentibus, glorificabant Deum, et benedicebant bea- tam Magdalenam in cujus solemnitate rex con- versus est a viis pristinis, ut toti terræ suæ lætiti- am reformaret, et Ecclesiæ redderet pacem. Corripui- mus eum adhibita moderatione; quam oportuerat adhi- beri, vias quibus incesserat et pericula quæ undique imminabant patenter ostendimus. Rogavi- mus et monuimus ut rediret ad cor, ut dignos fru- ctus pœnitentiæ faciens, et Ecclesiæ, quam non me- diocriter læserat, manifesta boni compensatione sa- tisfaciens, purgaret conscientiam, et redimeret fa- mam. Nam ab iniquis consiliariis potius, quam a propriæ voluntatis instinctu grave utriusque dispen- dium patiebatur. Cum autem hæc omnia non modo patienter, sed et benigne audiret, et emendationem

A promitteret, adjecimus sibi necessarium esse ad salutem et liberis suis, ad incolomitatem et indem- nitatem concessæ divinitus potestatis, ut in eo san- ctæ Cantuariensi Ecclesiæ matri suæ diligentius sa- tisfaceret, in quo eam nuper gravissime læserat. Nam filium suum contra jus antiquissimum Ecclesiæ nostræ fecerat enormiter coronari, usurpatione ar-chiepiscopi Eboracensis, qui contra vetustissimam consuetudinem, et post prohibitionem vestram, et etiam in aliena provincia, consecrationem hanc ex-sequi caeca nimis et temeraria ambitione præsum- psit. In quo ille paululum reluctans, protestatus tamen ante se nihil proponere vel propositurum esse animo contendendi, Quis, inquit, coronavit regem Willelmum, qui sibi Angliam subjugavit, et reges succedentes? Nonne Eboracensis, aut alius episco- pus, prout illi placebat, qui coronandus erat in re- gem? Ad quæ nos, quod ex celebri gentis nostræ claret historia, respondimus, quod eo tempore quo Anglia capta est a Normannis, Cantuariensis Eccle- sia proprium non habebat antistitem, sed quasi captiva tenebatur a quodam Stigando, qui illam si- cut et Wintoniensem, et Londoniensem, et Wigor- niensem, et Eliensem ecclesiam publicæ potestatis et amicorum viribus contra inhibitionem Romani pontificis occupaverat, apostolicæ sedis communione carens et gratia. Unde et de mandato ejus a præfato rege captus in carcere diem obiit. Qua necessitate tunc, quod nec ante, nec post lectum est vel audi- tum, archiepiscopus Eboracensis, qui clarior erat opinionis, illi regi coronam imposuit. Lanfrancus vero filium ejus regem Willelmum, cognomento et colore Rufum, consecravit in regem præsentem Tho- ma Eboracensi archiepiscopo, nec in eo sibi officio aliquid vindicante. Post cujus obitum cum sanc- tus Anselmus Cantuariensis archiepiscopus exsula- ret, ex eadem causa qua et nos, unus suffraganeo- rum Cantuariensis Ecclesiæ scilicet Girardus He- refordensis, vice archiepiscopi sui tunc absentis regem Henricum, non contradicente archiepiscopo Eboracensi, consecravit. Revertente autem ab exsi- lio beato Anselmo, accessit ad eum rex Henricus, tradens ei diadema, et rogans ut eum coronaret, nec imputaret illi quod ipsum necessitate regni præpe- dien- tie non expectaverat. Fatebatur enim coram omnibus hanc esse Cantuariensis Ecclesiæ dignita- tem, ut Anglorum reges inungat et consecret. Ex hac quidem satisfactio- ne placatus sanctus archiepi- scopus approbavit quod a suffraganeo suo factum fuerat, et regi coronam inposuit. Quare ergo tunc siluit Eboracensis archiepiscopus, et sibi Cantua- riensis Ecclesiæ suffraganeum præferri sustinuit? Nunquid Thoma senior, qui Eboracensem regebat Ecclesiam, et Lanfranco Cantuariensi de litteris et amicorum copia intumescens multos labores texuit, et ecclesiam suam ampliavit in plurimis, hic obmu- tasset, pauperi cedens episcopo, nisi sibi de archi- episcopi Cantuariensis primatu et dignitate consta- ret? Deinde post triginta et sex annos regem Ste-

phanum, prædecessorem vestrum, a decessore nostro Wilhelmo fuisse consecratum, præsentem Turstano Eboracensi archiepiscopo, nec se immiscere negotio, aut contradicente, certo certius est. Quo post novem et decem annos in fata collapsa, bonæ memoriæ Theobaldus Cantuariensis archiepiscopus, qui pro vestra promotione cum suis omnibus labores innumeros, damna irreparabilia, et pericula plurima inmemoratu et relatu horrenda sustinuit, et regnum quod in aliam familiam jam transierat avi vestri liberis restituit, vos inunxit et coronavit in regem, præsentem isto Eboracensi Rogerio qui nunc est, et ut scitis, nec cooperante nec contradicente, nec aliquid agente, nisi eo modo, quo minimus episcoporum, sacris indutus vestibus audiens intererat solemnitati.

Cur ergo tantâ facilitate animi, aut potius consiliariorum vestrorum pravitate, matrem vestram Cantuariensem Ecclesiam, sine causæ cognitione, jure antiquo spoliastis, quod plus quam octoginta annis inconcussa possedisse dignoscitur? Nunquid perpetuare voluistis inimicitias inter Ecclesiam et liberos vestros? Aut si tantum præsumptionis Eboracensi archiepiscopo fuerat indulgendum, ut novo regi munus consecrationis impenderet, cur provinciam suam excedens invasit nostram? Cur tam ipsum, quam suffraganeos nostros in crimen inobediendiæ impulistis? Receperant enim inhibitionem domini papæ, ne hoc in absentia nostra aliquo modo præsumerent. Denique si substitutionem filii et consecrationem properabatis impleri, cur eos, quos ab ore summi pontificis nominatum, et a nobis excommunicatos esse constabat, a tanti sacramenti solemnitate non curastis excludere? Nunquid consecratio sine participio execrationis non videbatur implenda?

His et pluribus aliis ad hunc articulum pertinentibus, quæ epistolæ brevitatis non admittit, diligenter et modeste propositis, rogavimus attentius, ut hujus læsionis nostræ jacturam pro amore Dei, et salute sua, et liberorum indemnitate repararet, et tantæ præsumptionis emendaret excessum. Ille vero ne de mandato vestro, quod pridem obtinuerat, adversus hanc petitionem nostram tutum esse respondit, et super hoc litteras protulisse, quibus constitit episcopis celebraturis hoc munus sibi indultum esse, ut filium suum faceret a quocunque vellet episcopo coronari. Ad quod ei respondentes supplicavimus, ut reduceret ad animum quando et quare litteras impetrasset, quibus suum et episcoporum defendere nitebatur excessum. Constabat enim eas, quando Cantuariensis Ecclesia vacabat, eoproposito fuisse impetratas, ne Eboracensis archiepiscopus, si præfatam Cantuariensem Ecclesiam diutius vacare contingeret, ad innovandi regis coronationem præ cæteris provinciæ nostræ episcopis auderet aspirare. Et ut, domine mi rex, hæc fidelius et familiaris recolatis, nonne tunc palam solebatis asserere, quod filium vestrum malletis decolari, quam ut sæpe dictus Eboracensis capiti ejus hæ-

reticas manus imponeret? Certum vero est, quod priori mandato per posterius derogatur. Esto ergo, quod tunc tales litteras impetraveritis, nostræ vero, quia posteriores sunt, illis debuerant derogasse, unde constat vobis, et aliis sapientibus, cujus momenti habendum sit quod contra jus usurpatum est, præsertim cum regis consecratio, sicut et alia sacramenta, de jure causam habeat, et totam substantiam nanciscatur. Neque hæc dicta videantur, quod degradari velimus filium vestrum, aut in aliquo minorari, quia successus ejus et ampliationem gloriæ exoptamus, et ad eam laborabimus modis omnibus in Domino, sed ut indignationem omnipotentis Dei et sanctorum, qui in Cantuariensi Ecclesia requiescunt, et graviter injuriati sunt, a nobis et ab illis pariter arceatis. Quod fieri posse non credimus, nisi per condignam satisfactionem; quia a sæculis inauditus est, quod aliquis Cantuariensem Ecclesiam læserit, et non sit correctus aut contritus a Christo Domino. Subintulit ergo rex vultu hilari et voce jucunda: Si filium meum diligitis, duplici jure facitis quod debetis. Nam et ego vobis illum dedi in filium, eumque, ut meminisse potestis, recepitis de manu mea. Et ipse vos tanta affectione diligit, ut aliquem inimicorum vestrorum recto lumine nequeat intueri. Eos enim jam continuisset, nisi obstitisset reverentia et timor nominis mei. Sed scio quod vos gravius de eis, etiam quam oporteat, ulciscetur, quam cito tempus et occasionem acceperit. Nec dubito quin Ecclesia Cantuariensis nobilissima sit inter omnes ecclesias Occidentis, nec eam jure suo privari volo, quin potius juxta consilium vestrum dabo operam ut et in hoc articulo relevetur, et pristinam in omnibus recuperet dignitatem. Illis autem, qui me et vos hactenus prodiderunt, Deo propositio sic respondebo, ut exigunt merita proditorum. Cum ergo equo desiliens me humiliarem ad pedes ejus, ille arrepto scansili me coegit ascendere, et visus illacrymari, ait: Quid multa? Domine mi archiepiscope, restituamus nobis invicem veteres affectiones et alter alteri quod potuerit bonum exhibeat, et præcedentis odii prorsus simus immemores. Sed mihi, queso, coram his, qui procul aspiciunt, honorem exhibeat. Et transiens ad illos, quia paucos ibi quos lator præsentium indicabit, videbat amatores discordiæ, et odii incentores, ait, ut tam illorum quam omnium, ne quid mali dicerent, ora præcluderet: Si ego, cum archiepiscopum ad omne bonum paratum inveniam, ei ricissim bonus non fuero, tunc ero nequior cæteris hominibus, et mala quæ de me dicuntur, vera esse probabo. Nec aliud consilium honestius aut utilius crediderim, quam ut ipsum studeam benignitate præcedere, et tam charitatis quam beneficiis superare.

Sermonem regis cum summa gratulatione fere quotquot aderant, exceperunt. Misit ergo ad nos episcopos suos, qui monerent, ut petitionem nostram coram omnibus faceremus. Et si quorundam ex ipsis consilio credidissemus, in arbitrium ejus contulissemus prorsus et nos et totam causam Ecclesiæ. Nam ab initio usque nunc a Scribis et Phariseis suis

egressa est iniquitas, et de auctoritate seniorum invaluit, qui debuerant regere populum. Sed benedictus Deus, qui non permisit, ut in consilium illorum transiret anima nostra, et Ecclesiæ libertatem aut justitiam Dei exponeremus cujuscunque hominis voluntati. Illis autem dimissis, habita deliberatione cum domino Senonensi et Christi pauperibus sociis peregrinationis et proscriptionis nostræ, in eo firmavimus propositum, ut nec quæstionem consuetudinum nec damnorum quæ Ecclesiæ nostræ intulerat, nec usurpatæ consecrationis querelam, nec ecclesiasticæ libertatis aut honoris nostri dispendium aliquo modo conferremus in arbitrium ejus. Et sic accedentes ad regem et suos, cum omni humilitate rogavimus per os domini Senonensis, qui verbi nostri bajulus erat, ut nobis gratiam suam restitueret, pacem et securitatem tam nobis quam nostris, Cantuariensem Ecclesiam et possessiones ejus, quas exceptas in chartula legerat, et ut misericorditer emendaret quod contra nos et Ecclesiam nostram fuerat in filii sui coronatione præsumptum: promittentes ei amorem et honorem, et quidquid obsequii regi et principi potest ab archiepiscopo exhiberi in Domino. Ille verbum acceptans annuit, et nos et nostros qui aderant, recepit in gratiam suam. Et quia non præceperatis, ut ipse nobis et nostris ablata restitueret, neque a nobis poterat impetrari aut poterit Deo auctore, ut ea remittamus, juxta mandatum vestrum repetitio eorum dilata est, non sublata. Nam si præcepissetis eo vigore, quem in novissimis litteris expressistis, ut restituerentur, haud dubium quin satisfecisset, et posteris dedisset exemplum toti Ecclesiæ Dei et maxime apostolicæ sedi perpetuo profuturum. Tandem itaque nobiscum multa et diu conferens, cum nos duo soli fere usque ad vesperam colloqui essemus, secundum morem familiaritatis antiquæ, in hoc convenimus, ut eo discedente rediremus gratias Cacturi christianissimo regi, et aliis benefactoribus nostris, reversuri ad ipsum rebus compositis, et aliquandiu moraturi circa eum antequam redeamus in Angliam, ut omnibus innotescat in quantum familiaritatem et gratiam nos receperit.

Expectabimus autem in Francia donec redeant nuntii nostri, quos ad recipiendas possessiones nostras destinavimus, quia non est in animo nostro, ut redeamus ad ipsum, quandiu de terra Ecclesiæ passum pedis abstulerit. Nam in restitutione possessionum facile advertemus, qua sinceritate agatur nobiscum. Nec tamen veremur quin impleat quod promisit, nisi eum præpediant consiliarii, quos depravatæ conscientiæ stimulus quiescere non permittit. Hi siquidem ne comprehendantur in operibus manuum suarum, errores suos impunitate donari moliantur, auctoritate et consortio regis majestatis. Hi nos in sortem Balaamitarum conantur impellere, ut vivificantes animas, quæ non vivunt, criminosos in scelere deprehensos absolvamus sine poenitentia et confessione erroris. Quam utique potestatem Deus, nec alij indulsit, nec retinuit sibi. Nisi acquie-

verimus, pacem et concordiam cum domino rege initam machinantur infringere. Sed, Deo auctore, nec sic nos inducent, ut sedem ponentes ex adverso Altissimi, gloriemur inaniter nos aut vivificare quos mortificat aut mortificare quos ille vivificat. Certum enim est quæcunque pastoris sententiam jure veracissimo non tenere, si divino judicio reprobatur. Nos tamen sub ipso discere nos ro, sive paci invidens, sive amicis et familiaribus prospicere volens, ad instantiam, sicut dicitur, Gaudfredi Cantuariensis archidiaconi, Lexoviensis episcopus satis argute et instanter, rege, episcopis et proceribus præsentibus, sollicitavit circa articulum istum; dicens oportere, ut quemadmodum dominus rex fideles nostros in gratiam receperat, ita nos omnes, qui cum illo steterant, in gratiam reciperemus. Cui respondimus, hic, si placeret illi, distinctionem necessario admittendam. Nam in eis, quorum advocacionem susceperat, erant homines diversæ conditionis, et alii nocentiores, alii minus, alii in communione Ecclesiæ, alii excommunicati, contactu et participatione anathematis aut sententia, alii in summi pontificis constitutionem inciderant, et sine auctoritate ejus absolvi non possunt, alii ex variis causis a nobis vel ab aliis pastoribus suis justo sunt anathemate condemnati. Proinde in personis et causis tam dissimilibus ratio juris et æquitatis vetat idem esse judicium. Nos autem ad omnes, quantum in nobis est, pacem et charitatem habentes, domini regis audito consilio, ad honorem Ecclesiæ Dei, suum, et nostrum, necnon et salutem illorum, quibus reconciliatio quæritur, negotium Deo propitio moderabimur, ut si quis eorum, quod absit! pace caruerit, reconciliationis expers, hoc sibi, non nobis debeat imputare. Cum autem ad hæc præfatus Gaudfredus archidiaconus, adhuc excommunicatus, sicut inceptor discordiæ ita et contemptor justæ sententiæ, tumidius responderet, dominus rex, ne suborientia hinc inde verba causas odii et sopitæ inimicitiae fomitem instaurarent, nos de turba extrahens, rogavit ne curaremus quæ dicerentur a talibus, et ut pacato animo et tranquillo ei licentiam et benedictionem dantes, cum gratia Dei et sua rediremus ad hospitium nostrum.

Postea vero accepimus, quod venerabiles viri, dominus Rothomagensis et episcopus Nivernensis, quos inter nos et dominum regem jusseratis esse mediatores, et qui de pace nostra solliciti existerunt, episcopo Sagiensi transeunti in Angliam dederunt in mandatis ut excommunicatos nostros absolveret, sed incertum est, an ei formam quam illis dederatis, præscripserint, aut si præscripta est, an eam sit idem episcopus secutus. Verumtamen nec illis mandare licuit, nisi quatenus potestatem a vobis acceperunt, nec ille aliquid egit, si fines, quos præscriperatis, excessit. Unde si placet, necesse est, ut si aliter absoluti sunt, præcipiatis eos sententia, qua tenebantur, arctari, donec secundum Ecclesiæ formam jurent, ut ante jusseratis, se vestro

mandato parituros, et illis, qui taliter absolvi meruerint, in virtute obedientiæ iungatis, quatenus mandatum, quod eis ex parte vestra faciemus, inviolabiliter observent, vel ad vos infra terminum, quem præfigetis, accedant, ut audiant vestrum præceptum, subjecta pœna, nisi paruerint, ut in pristinam sententiam sublato appellacionis obstaculo reponantur. Neque hæc dicimus, Deo teste, vindictam expetentes, cum scriptum esse noverimus: *Non quæres ultionem, nec memor eris injuriæ civium tuorum*, sed, ut Ecclesia correctionis exemplo possit per Dei gratiam in posterum roborari, et pœna paucorum multos ædificet. Nam, ut Spiritus sanctus auctor est, *flagellato pestilente sapiens eruditur*. Nec vigere poterit apostolicæ sedis auctoritas, nisi percellantur et hi, qui laicorum patrocinio abutentes, excommunicati aut prohibiti præsumpserunt divina celebrare. Quid enim solus episcopus, quantumlibet Ecclesiæ Romanæ devotus, poterit, si ab obedientia ejus ad nutum potentum recesserint sacerdotes et clerici sui? Nihil enim est, quod Ecclesiam magis debilitet, quam quod apostolica sedes talia, cum emergunt, facile præterit impunita. Hæc dicentes scimus nobis in his exsequendis, si placuerit vobis, magnos, Deo tamen propitio vincibiles, imminere labores. Sed prælegimus arctam et angustam viam sequi, quæ ducit ad vitam, quam latam et spatiosam, quæ per illecebras sæculi trahit ad inferos. De mandato vestro damnorum nostrorum ad præsens tacita est repetitio. Placeat serenitati vestræ, qualiter vos hic procedere oporteat a latore præsentium exaudire et injuriam corrigere, quæ nobis et Ecclesiæ nostræ illata est in coronatione filii regis, alio contra morem antiquum et mandatum vestrum invadente jus nostrum et provinciam nostram. Necessitas nos coegit excedere modum sciendi, timor et reverentia de dicendis plura reprimere compulerunt, sed apostolica dignatio et clementia paternæ mansuetudinis immoderationi, si placeat, veniam dabit, et quæ dicenda fuerant, a latore præsentium solita pietate exaudiat, et petitiones, quas per eum porrigimus, celerius jubeat adimpleri.

EPISTOLA XXVI.

AD EUMDEE.

Ex quo, Pater, in auribus regis Anglorum conminationis apostolicæ tuba personuit, et tam sibi quam terræ suæ severitatem Ecclesiæ credidit imminere, nobiscum pacem fecit, promittens firmiter, quod de tota mandati vestri continentia non iota præteriret aut apicem, quin eam penitus adimpleret. Cum autem sic declinasset turbinem sententiæ imminenti, in quibusdam articulis a pactione resiliit, subtrahens nobis adhuc quasdam possessiones Ecclesiæ, quas decessor noster in omnibus diebus vitæ suæ inconcusse possedit, et nos exinde, donec in Anglicanam Ecclesiam tempestatis hujus procella surrexit. Promittit tamen interdum, cum super

PATROL. CXC.

A earum restitutione convenitur a nobis, quia si expectaverimus ei devotionem pristinam exhibentes, quod ita satisfaciet nobis, ut nulla justæ conquestionis relinqueretur occasio. Ceterum promissionibus fidem demunt, et noti mores hominis et operis non exhibitio, quia nihil adhuc ab eo præter verba potuimus impetrare. Quod ut vobis evidentius constet, latorem præsentium et litteras, quas a procuratoribus, qui negotia nostra in Anglia expedire debuerant, ad sanctitatis vestræ præsentiam curavimus destinari: interim quantum in nobis est, modis omnibus caventes rescindere pacis initæ conventionem, licet conscientiam nostram remordeat, quod damna Ecclesiæ Dei, et Christi pauperibus, et pro justitia Dei exsulantibus, et proscriptis, sacerdotali non exquirimus auctoritate. Timemus enim supra modum exempli perniciem cœtaneis, nisi divina pietas medeatur, et posteris nocituri. Sed quia nobis sic faciendum esse majestatis vestræ et dominorum nostrorum, qui circa vos sunt, prudentia censuit, pro bono pacis siluimus et silemus, nihil divini juris, quod inspectore cordium teste in auribus vestris et Ecclesiæ dicimus, impœnitentibus remittentes aut remissuri. Scimus autem, quod in extremo examine districtus judex non præteribit irrequisita, ad quem lacrymabiliter quotidie clamat concussa et lacerata Ecclesia: *Domine, vim patior, responde pro me*. Cum ipsa et pro ipsa clamamus et nos, juxta consilium et mandatum vestrum, amplectentes interim pacis umbratilis occasionem, donec aspiret dies, et evanescentes inclinentur umbræ. Captabimus autem gratiam hominis, quantumcunque salva libertate et honestate Ecclesiæ, poterimus, et testimonio conscientiæ nostræ experimentum facturi, an vel sic valeat ad mansuetudinem revocari. Nisi nobis clementia vestra litteras, quas ad correptionem et correctionem tam Eboracensis archiepiscopi, quam coepiscoporum nostrorum certum est conceptas et dictatas a Spiritu sancto, et quæ regis excessus auctoritate, quæ successorem Petri et vicarium Christi decet, redarguant. Sed quia timemus, ne tenera viri præpotentis aures verbum mordax exulceret, et nuper initam pacem impediatur, sanctitati vestræ tota devotione prostrati supplicamus, quatenus detracta mentione excessuum regis, et enormitatis præstiti juramenti, et consuetudinum perversarum, et non exactæ cautionis in coronatione novi regis, eandem sententiam in præfatum archiepiscopum et episcopos infligatis, eo quod in provincia nostra, nobis pro justitia et libertate Ecclesiæ exsulantibus, coronationem hanc exercere præsumpsit cum omnibus constet, quod Ecclesia nostra per multos annos coronandi regis possessionem habuit, et quod ea non debuerit sine judicio spoliari. Sic enim ad gloriam Dei, et honorem apostolicæ sedis speramus præsumptionem tantam facile et commode posse puniri, et paci Ecclesiæ nullum ex hoc afferri impedimentum. Necessarium quoque dicimus, ut domino regi scri-

batis affectuose, quia ad hoc in specula totius Ecclesiæ Dominus sedem apostolicam ordinavit, ut omnium fidelium causas examinet, et pro merito in retributione pœnæ aut præmii respondeat universis. Ideoque neminem debere turbari, si ea dicente, quilibet in sinu colligat causam suam, ne coram angelis et hominibus ex causa indisciplinationis mittatur in ignem æternum. Regi plurimum detulistis, sed licet ei peperceritis, dissimulare non audetis excessus et crimina sacerdotum. Ad hæc quia veremur, ne pax recens ex variis causis impediri valeat aut turbari, suspensionem aut excommunicationem episcoporum nostrorum, qui ad Dei et vestrum honorem, quod in verbo ejus dicimus omnia pro viribus ex conscientia referemus, si placet committatis arbitrio, excipientes, si visum fuerit, et vestro iudicio reservantes archiepiscopum Eboracensem, qui malorum omnium inceptor et caput est. Et quanquam Londoniensis episcopus signifer totius hujus seditionis, ne schismatis dicamus, exstiterit, rogamus, ut nobis tam illi, quam Saresberien- si episcopo liceat misereri, si sine schismatis instauratione juxta mandatum vestrum puniri non possunt. Et quia præcepistis, ut in verbo hoc juxta consilium Christianissimi regis Francorum procederemus, reprimendo vel ostendendo litteras vestras, sicut proredimus de consilio ejus, moneatis, ut speciales litteras impetremus a vobis de suspensione Eboracensis sine læsione regis, et alias de excommunicatione duorum episcoporum, et tertiis de omnium suspensione episcoporum. Hoc etiam impetrato, ut singulis utamur, prout tempus exegerit et necessitas causæ. Fluctuat enim, licet ad portum venisse videatur, Ecclesia Anglicana. Et nisi rex ei promissæ pacis conditiones impleverit, necesse habet, ut adversus insidias malignantium, et persecutorum incursus, muniat armis et protectionis consolationis vestræ. Quod quidem ita fiet, si litteris vestris præceperitis venerabili fratri nostro domino Meldensi, et probatæ religionis viro B.... abbati S. Crispini Suessionensis, quatenus regem conveniant, ut possessiones Ecclesiæ, et damna nostris et nobis illata restituat, secliturs severitatem ecclesiasticam exercendam in ipsum et terram suam, nisi mandatis vestris optemperaverit. Et si nec sic duxerit acquiescendum, conferte nobis, si placet, auctoritatem, quam domino Rothomagensi contulistis, et episcopo Nivernensi, aut etiam ampliore, quia quanto ille potentior et ferocior est, tanto ad ipsum vincendum et reprimendum arctiora vincula magis necessaria sunt et durior baculus. Præterea quiaurbationibus hujusmodi seminarium et fomes exstitit, quod Eboracensis Ecclesia matri suæ S. Cantuariensi Ecclesiæ subtraxit obedientiam, redintegrare, si placet, Ecclesiæ Anglicanæ unitatem, præcipiendo, quatenus omni appellatione et occasione remota, Eboracensis archiepiscopus et ecclesia sua nostræ jure primatus obediat. Quod si decessorum vestrorum vestigia volueritis imitari, liquet faciendum esse registris eorum diligenter inspectis. Neque hoc,

A quod Deus novit, quarimus ad gloriam nostram, qui utinam pastorale non suscepissemus officium! procul dubio morte æterna aut plurimis plenum angustis; sed ut in diebus nostris et vestris frequenter emergentium schismatum præcidatur occasio, et Anglicanæ Ecclesiæ perpetua vestro beneficio pax reddatur. Hæc vobis dicimus coram illo, qui utriusque nostrum iudex est, et cui tenemur de omnibus reddere rationem. Ille vobis inspiret, et doceat quid potissime facere debeatis.

Audistis agonem nostrum, sed, ut nostratum pro-
verbio dici solet, *solus ille, cui vicinatur ignis, sentit ardorem*. Credimus nos in Angliam profecturos, ad pacem, an ad penam, nobis incertum est; sed divinitus ordinatum, quæ sors nos exceptura sit. B Ideoque paternitati vestræ commendamus animas nostras, gratias agentes vobis et apostolicæ sedi super omnibus consolationibus, quas vobis et nostris in tanto necessitatis articulo ministravit. Præterea noveritis indubitanter, quod venerabilis frater noster Bartholomeus Exoniensis episcopus a culpa præsumptæ coronationis immunis est, et sub hac tempestate ab adversariis Ecclesiæ propter justitiam nulla sustinuit.

EPISTOLA XXVII.

AD EUND.

Venerabili patri et domino in Christo charissimo ALEXANDRO Dei gratia summo pontifici THOMAS Cantuariensis Ecclesiæ humilis minister salutem et omnimodam cum summa devotione obedientiam.

C Quam justis et quam honestis conditionibus cum domino nostro rege Anglorum pacem fecerimus, ad vestram notitiam tam ex nostra, quam multorum intermeantium relatione credimus pervenisse; et qualiter idem dominus noster resiliit a pactis et promissionibus suis. Quod tamen non tam illi credimus imputandum quam sacerdotibus Baal et falsorum filii prophetarum, qui totius discordiæ incentores ab initio exstiterunt. Sed horum omnium primicerii sunt Eboracensis ille et episcopus Londoniensis, qui quondam, cum essetis Senonis, a vobis redeuntes, domino rege nondum adito vel audito, nos in curia clementiæ vestræ pedibus assistentes possessionibus nostris spoliare non timuerunt, cum illis indubitanter constaret nos duarum appellationum causas apud vos exercere, utpote qui appellati eramus ab archiepiscopo Eboracensi et tam illum quam coepiscopos nostros appellaveramus ab iis itidem appellati. Cum ergo hi Balaamitarum signiferi, nos cum domino rege pacem fecisse audissent, associatis sibi Saresberien- et aliis complicibus suis, circuierunt mare et aridam, ut initam pacis rescinderent unitatem, per se et per alios domino regi et suis suadentes concordiam regno inutilem et inhonestam esse, nisi donationes Ecclesiarum nostrarum, quas rex fecerat, stabiles manerent et nos cogeremur regni consuetudines, super quibus inter nos est orta contentio firmiter observare. Adeoque profecerunt

in perversitatibus suis, ut eorum instinctu dominus A rex omnes redditus nostros et nostrorum post pacem in festo beate Mariæ Magdalene factam usque ad festum beati Martini abstulerit, tunc demum nobis reddens domos vacuas et horrea demolita. Clerici tamen sui, scilicet Gaufridus Ridel archidiaconus noster et Nigellus de Saccavilla duas ecclesias nostras, quas de manu laica acceperunt, adhuc detinent occupatas : et ipse plures Ecclesiæ nostræ possessiones, quas se in pacis reformatione promiserat redditurum, nobis et Ecclesiæ nostræ reddere contradicit. Et licet aliter, quam ipsum decrederet, contra pacta sua, ut pluribus notum est, versaretur, nos tamen enormia damna Ecclesiæ et irreparabilia videntes, et præcaves graviora, nostro et dominorum cardinalium præeunte consilio, ad Ecclesiam nostram laceratam et conculcatam redire decrevimus, ut si eam non possemus erigere et reformare, saltem cum ipsa pereuntes, confidentius pro ipsa præsentem spiritum redderemus. Quod cum illi nuntii nostri certius didicissent, ambiguum est, quid veriti consilium iniverunt cum officialibus regis, et sceleratissimo illo filio perditionis Randolpho de Broc, qui in Ecclesiam Dei publicæ potestatis abutens viribus jam per septem annos licentius debacchatus est. Decreverunt ergo, ut armata manus portus maris, ad quos nos venturos suspicabantur, militum et satellitum custodia et diligentia observaret, ne terram possemus intrare, quin omnem suppellectilem nostram curiosius perscrutarentur, et omnes litteras, quas intravimus a maiestate vestra, nobis auferrent. Sed nutu divino contigit, ut machinamenta eorum nobis per amicos innotescerent, quæ impudentia eorum ex nimia præsumptione non patiebatur esse abscondita. Nam satellites, quos prædiximus, armati littora circumbant, gressus suos dirigentes, prout eis jam dicti Eboracensis, et Londoniensis, et Saresberiensis episcopi dictabant. Elegerant enim ad executionem hujus malitiæ, quos nobis noverant maxime esse infestos : scilicet Randolphum de Broc, Raginaldum de Warene, Gervasium Cantie vicecomitem, qui palam minabantur se, si forte præsumeremus applicare, nobis caput amputaturos. Saepè dicti vero episcopi Cantuariam venerant, ut si satellites publicæ potestatis non insanirent satis, eos amplius instigarent. Itaque consiliis eorum diligentius exploratis, una die antequam mare ingrederemur, præmissæ sunt litteræ vestræ ; sed et illæ, quibus Eboracensis suspendebatur, et Londoniensis et Saresberiensis revocabantur in sententiam anathematis, eis traditæ sunt. Die sequenti navem ascendimus et in Angliam pervenimus navigatione felici, adducto nobiscum ex mandato domini regis Joanne decano Saresberiensis, qui armatos, quos prædiximus, vidit, non sine dolore et rubore accelerantes ad navigium nostrum, ut adventantibus vim inferrent. Præfatus ergo decanus timens, ne si quid nobis aut nostris mali inferretur, in domini regis redundaret infamiam, obviam processit armatis,

denuntians eis ex parte domini regis, ne nos aut nostros lederent, quia hoc esset ipsum regem, cum quo pacem feceramus, nota prodicionis incurrere, persuasitque eis, ut ad nos accederent inarmati. Illi tamen, quia Simonem Senonensem archidiaconum nobiscum adduxeramus, qui amicos, quos habet in Anglia decreverat visitare, exegerunt ab eo juramentum fidelitatis, quo se regibus nostris contra omnes homines obligaret, nec vos excipientes, nec alium. Sed nos non permisimus, ut talis obligatio præstaretur, veriti ne clerus regni ad simile juramentum cogeretur auctoritate exempli, si domestici nostri obligationes hujusmodi præstitissent. Quod utique in dispendium sedis apostolicæ, ut auctoritas ejus evacuetur aut minuat, in regno molitur saepe dictus Eboracensis et Londoniensis et Saresberiensis, et complices sui. Officiales vero qui juramentum exegerant, pauciores erant, quam ut nos possent contra voluntatem nostram in eo loco ad aliquid cogere, eo quod populus redditui nostro gaudens, si vires pararentur, fortior erat. Inde ad Ecclesiam nostram venientes, cum magna devotione a clero et populo recepti sumus, licet intrusi adhuc violenter incubent ecclesiis nostris, in quibus in omni peste et vexatione Ecclesiæ præcipui sunt Gaufridus Ridel, archidiaconus noster, et Nigellus de Saccavilla clericus ejus ; quorum alter, scilicet Gaufridus, occupat ecclesiam de Otteford, alter, videlicet Nigellus de Saccavilla, ecclesiam de Herges, quas cum fructibus perceptis nobis et clericis nostris quorum sunt, ex mandato vestro reddere debebant. Præcepisti enim domino Rothomagensi et episcopo Nivernensi, ut eos absolverent accepto secundum morem Ecclesiæ sacramento, et præciperent auctoritate vestra nobis ecclesias cum fructibus resignari. Postquam vero ad Ecclesiam nostram venimus, incontinenti nos adierunt officiales regis, denuntiantes ex parte ipsius, sicut eos dominus Eboracensis, et Londoniensis, et Saresberiensis episcopi informaverant, ut si penosos episcopos et excommunicatos absolveremus, quia quod contra eos factum fuerat, in injuriam regis redundabat, et in eversionem consuetudinum regni, promittentes episcopos provincie nostræ post absolutionem venturos esse ad nos, et juri se salvo honore regni libenter parituros. Nos autem respondimus non esse judicis inferioris, ut superioris sententiam solvat, et quod nulli hominum licet infirmare, quod apostolica sedes decreverit. Quia tamen illi instantius perurgebant, et minabantur dominum regem, nisi eis acquiesceremus, mira et stupenda facturum, diximus eis, quod si Londoniensis et Saresberiensis episcopi jurarent coram nobis in forma Ecclesiæ, se vestro mandato parituros, nos pro pace Ecclesiæ et reverentia domini regis cum consilio ipsius, et domini Wintoniensis, et aliorum fratrum nostrorum, subjiceremus periculo, et faceremus quidquid salva reverentia vestra, et eos tanquam fratres in Christo charissimos diligeremus, et in omni mansuetudine et humilitate tractaremus. Quod cum episcopis ab

intermeantibus referretur, respondit Eboracensis, quærens seditionis consortes, et schismatis incentores, juramenta hujusmodi, nisi de voluntate regis non debere præstari, præsertim ab episcopis, quia erat contra dignitatem principis et consuetudines regni. Ei vero ex parte nostra responsum est, quod idem episcopi antea a nobis excommunicati fuerant, et non nisi præstato juramento, cum nos multis sollicitationibus interpellassent, absolvi meruerant. Et si nostra sententia sine juramento episcoporum solvi non debuit, multo minus vestra, quæ longe fortior est, et incomparabili nobis et mortalibus cunctis auctoritate subnixæ. Ad quam responsionem, sicut nobis retulere qui præsentis aderant, episcopi adeo moti sunt, ut decreverint venire ad nos, et secundum morem Ecclesiæ recipere absolutionem, non ducentes tutum, ut pro conservandis regni consuetudinibus Ecclesiæ se opponerent, et impugnarent apostolicas sanctiones. Sed homo pacis inimicus et Ecclesiæ turbator Eboracensis dissuasit, consulens ut potius adirent dominum regem, qui eis semper patrocinatus est, et nuntios mitterent ad novum regem, qui persuaderent ei, quod eum deponere volumus, cum nos, Deo teste, si ipse Ecclesiæ profluturus est, mallemus eum non modo unum regnum possidere, sed amplissima et plura regna terrarum. Hujus vero legationis signifer est archidiaconus noster, nam Eboracensis et duo præfati episcopi citius transfretarunt, ut quod Deus, avertat, circumveniant dominum regem, et adversus Ecclesiam exacerberent iram ejus. Fecerunt autem evocari senas personas vacantium ecclesiarum, ut consilio eorum contra canones coram rege, in alieno regno, fratribus suis absentibus, celebrent electionem episcoporum provincie nostræ. Quod si sic electos noluerimus consecrare, videntur sibi habere causam seminandi discordiam inter nos et dominum regem. Nihil enim est, quod magis timeant, quam pacem Ecclesiæ, ne forte videantur opera eorum, et corrigantur excessus. Cætera plura supplebit nuntius, quæ ne tedium pareret, schedulæ non censuimus inserenda. Vos, si placet, preces nostras clementer audite. Valeat in æternum sanctitas vestra, charissime Pater.

EPISTOLA XXVIII.

AD EUNDEM PRO FRATRIBUS DE NOVO BURGO.

Quanta mala sanctis viris fecerit, et jugiter faciat Eboracensis archiepiscopus, tum a multis, tum a presentium latoribus discretionem vestram credimus audivisse. Auget audaciam hominis quod hactenus omnia pro libitu gessit, impune credens universa licita quæ videt inulta. Nec credit judicem esse in Israel, qui super tot tantis et tam manifestis excessibus nunquam venire visus est in iudicium, aut mirabilem suorum reddere rationem. Confidit in multitudine divitiarum quas supra modum congegavit, augens,

Si potuit, recte, si non quocunque modo rem.

Pauperibus his qui urgente necessitate, sicut a viris plenis fide didicimus, ad sedem apostolicam confugerunt, nunc demum dentes et ungues infixit, nec desistet quin spoliet, mactet et perdat, nisi iis clementia domini papæ et nostra subveniat, et quia vestræ virtutis est et consuetudinis liberare pauperem a potente et egenum a diripientibus eum, causam presentium pietati vestræ attentius commendamus, rogantes quatenus illum apostatantis angeli imitorem dejiciatis et eliminatis, ne polluat ulterius sanctorum Sancta. Ecclesiæ Dei nulla major potest evenire calamitas, quam si in eam insurgant, qui ei pro debito officii debuerant patrocinari, et pro ipsa in articulo necessitatis ponere animas suas. Sensit hoc ab annis pluribus Ecclesia Anglicana, in qua vix invenitur iniquitas quæ non egressa sit a senioribus, qui videbantur regere populum, et ab his qui Ecclesiæ beneficiis nutriti proveci sunt et ditati; adeoque jam impudentissimus error invaluit, ut pontifices Evangelium erubescant, et gloriantur se carnificium exercere, non tamen pecora immolantes, sed fratres suos pro quibus Dei Filius immolatus est Christus. Nec timeant ut requirantur hæc ab iis, sperantes in multitudine divitiarum suarum et præsumentes de familiaritate sæcularium potestatum. Nam si quis Patrum velit imitari vestigia, et in operibus suis episcopi faciem conetur exprimere, statim non modo contemptui, risui, sed et plurimis periculis patet: cæteris tamen omnibus graviora sunt quæ a falsis fratribus inferuntur. Quis eorum signifer sit, quis fuerit inter regnum et sacerdotium auctor discordiæ, quis exstiterit rancoris et totius perversitatis incentor, perspicuum est ab operibus suis, sed quia nos causa illa contingit, injurias et damna Ecclesiæ Dei et nobis et nostris illata illius reservamus examini, qui ait: *Mihi vindictam et ego retribuam*, et vestro quem constituit dominum domus sue et principem omnis possessionis sue. Interim vero causam fratrum de Novo Burgo et clericorum qui cum ipsis ad pedes majestatis vestræ confugiunt, paternitati vestræ at entius commendamus, rogantes quatenus eos, sicut a viris probatæ fidei accepimus, injuste oppressos dignatio miserationis consoletur. Nisi enim pietas vestra subveniat, religiosi domibus, prout vobis viva voce plenius referent, excidium imminet, nec diu stare poterunt ante faciem tribulantis. Iterato enim contra Altissimum se Lucifer erexit; ponens sedem suam ab aquilone, ibidem Christum mutilaturus, quia totum occupare non potest imperium, nisi vicarius Petri occurrat in Spiritu et virtute Eliæ conentens malleum universæ terræ.

EPISTOLA XXIX.

AD OMNES CARDINALES.

Venerabilibus dominis suis, et Patribus, universis episcopis, presbyteris, diaconibus, sanctæ Romanæ Ecclesiæ Dei gratia cardinalibus, THOMAS, eadem gratia Cantuariensis Ecclesiæ minister humiliss,

tiser ac miserabilis exsul, salutem, ac debitum per A omnia famulatum.

Misero verba facere grata haud est facile, miserabili servare modum in dicendo, sane difficile. Detur ergo, petimus, indulgentia misero, miserabili venia. Credimus vos, Patres sanctissimi, divina inspirante gratia, ad hoc in summo fastigio constitutos, ut removeatis injustitias, præsumptiones abscindatis, laborantibus in sacerdotio benigne subveniatis, opprobriisque et calamitatibus eorum nullatenus locum exhibeatis, sed oppressis gravatisque feratis auxilium, calumniantes reprimatis durius, opprimentes gravissime puniatis. Non enim perturbare perversos, non resistere persequentibus Ecclesiam, nihil aliud est quam fovere. Consentire namque videtur occulte, qui manifesto facinori non obviat. Intelligimus inde non aliter vobis licere, quam ut omnes conatus vestros huic causæ nostræ, quæ inter regem nostrum et nos, imo inter vos et ipsum præcipue versatur, in qua universalis salus infestatur Ecclesiae, officiosissime de cætero impendatis. Inieratis cum ipso certamen, erat vobis jam in limine victoria, si non religionis vestræ circumvenisset auctoritatem, sicut creditur et peritis, prædicatur a transeuntibus, affirmatur ab his, qui regis intima noverunt arctius, captiosa calliditas, falsa spes pacis, quæ potius extorquetur a tyrannis præparatione certaminis, quam legationis litatione. Præparatione enim belli pax obtinetur. Digna certe pœna huic miserationis vestræ viscera claudi, qui libertatem Ecclesiæ quærit extinguere. Decet ergo vos esse vacuos ab omni offensa, ab aliena gratia penitus liberos, si recte tractatis aliena negotia, si loquimini veritatem in populo; si diligitis, qui facitis judicium in gente. Dominus enim dicit: *Diligite justitiam, qui judicatis terram.* Ipsa utique ubique diligenda, ubique est observanda. Sola enim ipsa operatur pacem, et conservat. Unde Isaias: *Erit opus justitiæ pax.* Et David in Psalmo: *Justitia et pax osculatae sunt.* Amant enim se hæc duo cateuus, ut qui facit justitiam, pacem inveniat, nec aliter. Sic ergo agite, sic observate justitiam, quibus judicandi potestas credita est, ut cum venerit justus Judex, reddens unicuique juxta merita sua, pro bene observata justitia digna vos mercede remuneret.

Quid plura? Hæc in summa reduco vobis ad memoriam, quoniam serius parva scintilla fuit in Alexandria, sed quia dissimulante justitia non est statim oppressa, ejus totum orbem fere flamma populata est. Et, ut veniamus ad rem, dicite, Patres sanctissimi, qua conscientia dissimulatis injuriam Christo illatam in me, imo certe in vobis, qui Christi vicem gerere debetis in terra? Nonne causa mea similis vestræ est, imo penitus vestra? An simulatis vos ignorare, quod rex Anglorum occupavit, et singulis diebus occupat possessiones ecclesiasticas, libertatem Ecclesiæ subvertit, extendit manus suas in christos Domini, passim et sine delectu in clericos,

alios incarcerationando, alios truncando, aliis eruendo oculos, cogendo alios ad duellum, alios ad examinationem ignis vel aquæ, episcopos etiam non servare metropolitano suo obedientiam, minores clericos prælatis suis non obedire, non habere se excommunicatos, cum rite fuerint excommunicati; imo, quod deterius est, omnimodam tollit Ecclesiæ libertatem, ad instar grandis illius schismatici oppressoris vestri, qui quærit funditus eviscerare Ecclesiam. Si hæc sunt impune a rege nostro, quid fiet ab ejus hæredibus? Quid sustinebitur a successoribus vestris? Attendite, quoniam crescunt quotidie mala, crescunt occasiones et ingenia malorum. Deus bone, facietne ista impune? Non hac via Christus incessit, non apostoli, quorum imitatores esse debetis, et nos vobiscum. Quare receditis a viis Domini, in quo est vobis fiducia? Verendum est ne, quod absit! contritio et infelicitas sit invisi vestris, ne viam salutis non agnoveritis, quod non sit timor Domini in vestris oculis. Quis eripiet vos de manu tribulantis? Quis liberabit vos de belluæ faucibus, quæ jam in januis est, ut vos absorbeat, omnes, si non Deus ipse? Certe non argentum, non aurum, non humana gratia, non favor principum. Nolite ergo, nolite confidere in principibus, nec in filiis hominum, in quibus non est salus: *Maledictus enim qui confidit in homine, qui ponit carnem brachium suum.* Facite, domini mei, facite aliis, quod vobis desideratis a Christo fieri, ut evadatis periculum, quod est e vicino. Eadem enim mensura remetietur vobis, qua ipsi mensi fueritis. An nescitis, quoniam argentum vestrum projicietur foras, aurum vestrum erit in sterquilinum, argentum et aurum non poterit vos liberare in die furoris Domini. Nolite ergo, nolite thesaurizare vobis iram in die iræ, sed thesaurizate vobis thesauros in cælo, resistendo oppressoribus, subveniendo oppressis. Alioquin judicet inter vos et me, et coessules meos, orphanos, viduas, infantes in cunabulis, cæterosque omnes clericos et laicos Deus ipse, apud quem non est personarum acceptio: requirat ipse sanguinem mortuorum meorum de manibus vestris, et vindicet simulationem istam, qui sedet in Excelso justus Judex, considerans dissimulationes vestras et injustitias, redditurus unicuique vestrum, prout gesserit mecum, sive bonum, sive malum.

Exposuistis quippe nos, equidem immeritos, signum ad sagittam, ut nec jacula jaculantis, undique in nos pressi, valeamus elidere, nec evadere possumus, nisi in potenti manu Dei, jacentium sagittas. Fecistis nos opprobrium omni transeunti, subsannationem vicinis nostris, derisum his, qui in circuitu nostro sunt: utinam non vos ipsos! Deus bone, quis erit de cætero vigor in membris, si capitis ipsius robur emarcuerit? Jam certe clamitatur in plateis, prædicatur per civitates et vicos, quia non sit justitia Romæ de potentibus. Utquid sepius vias nostras spinis? Cur objicitis nobis offensionis lapidem? Quid tollitis nobis omnem nostram auctoritatem, ne via-

dicemus injuriam Christi, ne redimamus damna dierum nostrorum, quibus nemo succurrit, ne compensemus Ecclesiæ jacturam, prout nunc possumus, ecclesiastica saltem censura, ne silentio conualescat inconcussa impunitas, sed prodeat in lucem tantæ concussionis auctoritas, tam affectatæ præsumptionis ultio merita, ut appareat tempore postero, tam enormia, tam detestabilia, nullatenus impune, sed immerito attentata fuisse. Certum tenete, expectatio ista plurimum habet periculi, salutis nihil. Alias curandus est is morbus, si non eo per dissimulationem vestram vultis infici reges universæ terræ. Dulcis enim est omni tyranno amara servitus Ecclesiæ, nec tolli facilis, si non sit ei citissime ipsa sua dulcedo amara severitate justitiæ. Eo jam perventum est, ut æquatur rex noster etiam Siculus, imo certe præcedat. Curritur undique a clericis Angliæ ad suam curiam, fiunt curiales capellani, sub obtentu isto astringuntur jurisjurandi necessitate, ut vel sic in terra sua liberius obtineat de cætero, quod hoc tempore de voluntate sua pro jure constituit. Itur cursim in dispendium Ecclesiæ non reparabile, cum sit nemo, qui currenti non cedat, qui redarguat delinquentem efficaciter, qui puniat ejus utiliter excessum. Quid erit nobis et vobis ulterius in terra illa, si celerius non occurratur huic tanto periculo, si non retundatur aerius hujus tam enormis novitatis periculosa præsumptio, vos ipsi judicetis. Disposueram certe animam meam in hac parte liberare, viriliter subvenire periculo, si non hujus facti me, sicut credimus, immerito æstimassetis indignum. Indulgeat Deus hoc facientibus. Erat mihi quippe cum ipso facilior ad pacem accessus, si, quod absit! siæ vobis Ecclesiæ discrimina dissimulare curassem. Verum, quidquid mecum egeritis, quidquid agatis, per misericordiam Dei nihil sit a me sine vobis, nihil in præjudicium Ecclesiæ, si vita comes mihi succurrit. Hanc viam elegi, hanc, Christo duce, non mutabo sententiam, hæc est enim mihi via salubris. Hæc vobis scribo, non ad indignationem aliquam, novit Deus, qui scrutator est cordium, sed ad cautelam, ne veniat super vos dies Domini, sicut fur, dies ultionis qui nemini parcat. Credite ergo mihi fideli vestro per omnia, dilectissimi domini, resumite vires, accingimini gladio verbi Dei potentissimi, exerite gladium beati Petri, injuriam Christi vindicate et suorum, nulli parcat oculis vester, facite judicium et justitiam sine dilatione omni patienti injuriam. Hæc est via regia, hæc est via quæ ducit ad vitam. Hac vobis incedendum est, ut sequamini vestigia Christi, vestigia apostolorum, quorum estis vicarii. Non simulatione, non ingenio regenda est Ecclesia, sed justitia et veritate, quæ se observantem liberat ab omni periculo. Hoc facite, et habebitis pro certo Deum adiutorem, nec timeatis vobis de cætero quid faciat vobis homo. Bene valete, ut bene sit nobis, et toti Ecclesiæ.

EPISTOLA XXX.

AD ALBERTUM PRESBYTERUM.

THOMAS Cantuariensis archiepiscopus ALBERTO presbytero cardinali, salutem et debitam reverentiam.

Nil nobis hac tempestate jucundius dari posset, quam vestræ copia præsentis, ut de statu nostro conferre possemus ad invicem, et vestræ discretionis consilium reportare, quod in omnibus vivax et efficax sumus experti. Jucunda, inquam, nobis esset hujusmodi collatio, quia perquam necessaria. Paucos enim vel nullos apud nos reperimus, qui puræ veritatis tramite non claudicantes incedant, quasi non magis quæ sua sunt quærant et curent, quam quæ Jesu Christi, studentes potius terreno regi placere, quam cælesti displicere formidantes. Loquimur nobis tanquam speciali patrono et amico fidelissimo, non verentes animum nostrum vobis aperire medullitus, ut tamen quod dicimus, ad aliam non transeat audientiam, in fide et dilectione suppliciter obsecrantes. In tot et tantis apud nos sanctæ Ecclesiæ libertas impugnatur, ut vix ad videndum sufficere possimus vel audiendum. Emergant quotidie nova, et prioribus inaudita sæculis exiguntur. Imponitur silentium legibus, et regula canonum a sorte Domini penitus exclusa, novis legibus subjiciuntur clerici, et pro voluntate laicæ potestatis agitantur. Scimus quia dominum regem tenere diligitis et fideliter, ideoque manifestius vobiscum loquimur, ut acrius condeleatis. Difficile et longum est omnia scripto complecti, ideoque magistrum Henricum, fidelem et familiarem vestrum et nostrum, ad vos transmittimus, qui secundum quod vidit et audivit, rerum seriem gestarum vobis plenius exponet. Cui, si placet, credite tanquam nobis. Si tamen fieri posset, mallems in propria persona nostra vos visitare, et vivas a vobis audire et reddere voces, quam aliter. Nullum, nisi Deus dederit, nobis adest consilium, quia inter barbaros nobis esset melius servire, quam hæc mala diebus nostris in sancta Ecclesia videre. Valete, charissime domine.

EPISTOLA XXXI.

AD EUNDEM.

Utinam, dilecte mi, aures vestræ sint ad ora nostratum, et audiant illa, quæ in ignominiam Ecclesiæ Romanæ cantantur in compitis Asealonis! Aliquid consolationis novissimi nuntii nostri videbantur a sede apostolica retulisse in litteris domini papæ, sed earum auctoritas evacuata est missis a latere litteris, ut in perniciem Ecclesiæ Satanas absolvereitur. Soluti sunt enim apostolico mandato Londoniensis et Saresberienensis episcopi, quorum alter incentor schismatis, et totius malitiæ artifex, ab initio dignoscitur exstitisse, et tam Saresberiensem, quam omnes, quos potuit, in crimen inobedientiæ impigisse. Nescio quo pacto pars Domini

semper mactatur in euria, ut Barabbas evadat, et A
Christus occidatur. Auctoritate curiæ jam in finem
sexti anni proscriptio nostra, et Ecclesiæ calamitas
protracta est. Condemnantur apud vos miseri, exsules,
innocentes, nec ob aliud, ut ex conscientia loquar,
nisi quia pauperes Christi sunt et imbecilles,
et a justitia Dei recedere noluerunt: absolvuntur
e regione sacrilegi, et homicidæ, raptores, impœniten-
tes, quos mundo reclamante, nec a Petro, si
præcideret, apud Deum absolvi posse, libera voce,
Christo auctore, pronuntio. Ait enim in Evangelio
secundum Lucam: *Si peccaverit in te frater tuus, increpa illum; et si pœnitentiam egerit, dimitte illi. Et si septies in die peccaverit in te, et septies in die conversus fuerit ad te, dicens, pœnitet me, dimitte illi.* Nunquid otiosa sunt verba Christi, quibus ait: *Si pœnitentiam egerit, si conversus confiteatur, dicens, pœnitet me?* Nequaquam de otiositate verbi reddi-
turus est in die iudicii rationem, sed potius eos damnaturus, qui contra formam, quam dedit, iniquos sine confessione et pœnitentia vanis absolutionibus
justificare præsument, et vivificare animas, quæ non vivunt. Certe si res ablata reddi potest, et non reddi-
tur, non agitur pœnitentia, sed fingitur. Profecto Spiritus sanctus, ut scriptum est, effugiet fictum, quoniam ipse veritas est, et non figmentum. Obliget se, qui audet, nec venturi iudicis formidet sententiam. Raptores, sacrilegos, homicidas, perjuros, sanguinarios, et schismaticos impœniten-
tes absolvat; ego quæ Ecclesiæ Dei ablata sunt, impœniten-
ti nunquam remittam. Nonne nostra, aut potius Ecclesiæ spolia sunt, quæ nuntii regis cardinalibus et curiali-
bus largiuntur et promittunt? Quæ iniquitas mani-
festa est, si illa, quæ in Ecclesiam Dei apud nos exercetur, occulta est? Nos Ecclesiæ libertatem tueri non possumus, quia sedes apostolica proscriptionem nostram jam in finem sexti anni protraxit. Viderit Deus, et iudicet. Sed pro ea mori parati sumus. In-
surgant qui voluerint cardinales, arment non modo regem Angliæ, sed totum, si possunt, orbem in perniciem nostram, ego Deo propitiante nec in vita, nec in morte ab Ecclesiæ fidelitate recedam. Causam suam de cætero committo Deo, pro quo exsulo proscriptus, ille medeatur, ut novit expedire. Non est mihi ulterius propositum vexandi curiam: eam adeant, qui prævalent in iniquitatibus suis, et triumphata justitia, et innocentia captivata, in confusionem Ecclesiæ redeunt gloriosi. Utinam via Romana non gratis peremisset tot miseros innocentes! Quis de cætero audebit illi regi resistere, quem Ecclesia Romana tot triumphis animavit, et armavit exemplo pernicioso manante ad posteros? Valeat semper sanctitas vestra, nostri memor ante Deum.

EPISTOLA XXXII.

AD EUNDEM.

Interemptorum pro causa Domini, etc. Vide epistolam similem ad Hyacinthum cardinalem directam.

EPISTOLA XXXIII.

AD EUNDEM ET THEODWINUM.

THOMAS Cantuariensis archiepiscopus ALBERTO ET THEODWINO cardinalibus.

Ecclesiæ molestias et innocentium afflictiones, miseria eorum, qui zelum Dei habent, tanto vobis acerbiores esse non dubitamus, quanto vos pro certo novimus institutis apostolicis familiaris et dulcius adherere. Et quidem Ecclesia Dei stare non poterit, si in ruinam ejus proni sunt, quibus incumbit illius procurare salutem. Si enim pastores amore aut odio, cupiditate aut neglectu, spe aut metu temporalium, locum suum deserant, aut viliis cedant, restat ut eorum candelabrum moveatur, et populo fiant in laqueum et ruinam. Unde ut coram Deo loquamur, quem iudicem expectamus, et invocamus ut iudicet causam suam, licet dominum nostrum regem Angliæ plurimum dilexerimus, et ex totis viribus ante impositum sacerdotium ad nutum servierimus, sine conscientia tamen criminis, ex hoc ei in injuriam Dei et conculcationem Ecclesiæ nolentes consentire, pro Deo nos opposuimus, malentes ipsum offendendo revocare ad veniam, quam adulando præcipitare in gehennam. Causa quam contra nos exercet, inter ipsum et Deum est, quia nos nihil aliud ab eo quærimus, nisi quod Ecclesiæ suæ æterno testamento pro ea in suscepta carne immortalis reliquit Deus. In fide ergo et charitate Christi, ipso teste Christo, supplicamus vobis, ut exsurgatis nobiscum in auxilium Ecclesiæ naufragantis, et auctoritate, et prudentia vobis collata occurrere homini huic, cui nullorum successuum copia sufficit, si Ecclesia Dei gaudet libertate. Si nobis aut nostris non creditis, interrogate de moribus hominis Gallicanam, et Turonensem Ecclesiam, Aquitanos quoque et Normannos, et Romipetas de regno Anglorum confluentes, et profecto non erit aliquid, in quo de sinceritate causæ nostræ possitis ambigere, nisi sponte obtenebraveritis oculos, ne quod verum est, valeant intueri. Confidimus in vobis abundantius, præsertim in causa Dei, et ad vestrum, prompti sumus obsequium. Et quod nos non possumus, supplebit Deus, remetiens, in qua mensura nobis mensi fueritis. De nobis autem pro certo teneat, quia satius ducimus mortem incurrere temporalem, quam promereri æternam, et extremas pro Christo subire miseria, quam miseræ servitutis angustias perpetuare. Nam hujus controversiæ exitus trahetur ad consequentiam temporum futurorum, ut aut perpetuis, quod absit! ærumnis luceat Ecclesia, aut perenni gaudeat libertate. Nec esset cardinalis vel cujusquam hominis necessarius interventus nobis aut nostris, si regi ab initio voluissemus in his, quas apud cleri damnum statuit, non consuetudinibus, sed pravitatibus consentire, et absque ulla ordinis nostri salutatione apposita simpliciter et absolute subscribere. Ergo si ille in tantis iniquitatibus statuendis, Romana Ecclesia consentiente aut dissimulante, prævaluerit, quis contra eum audebit mutire de cætero? Quis de matu-

hæredum ejus excutiet, quod tanta non virtute, sed A
pertinacia pater obtinuit? Quis alios principes, æque
nobiles et potentes, prohibebit similia vendicare?
Malorum enim exempla citius rapiuntur, et posteri
relictis majorum vitis rarisime ad exercitia vir-
tutis assurgunt. Si vestri laboris et nostri fructus
est, ut principes Ecclesiam subjiciant servituti, et
nos conterant, quia ausi sumus zelare legem Dei,
justitiam protestari, et eis ex adverso ascendere pro
domo Israel, rarus admodum vel nullus de cætero
erit, qui non sequatur omnino principum voluntatem,
qui Romanæ Ecclesiæ fidem servet, qui decreta
sedis apostolicæ revereatur, qui summi pontificis
mandatis obediat, qui non ipsam Dei legem con-
temnat, ut fabulam, ut verba sine veritate et fructu.
Causam itaque Ecclesiæ vobis specialiter committi-
mus, quos columnas Ecclesiæ stabiles esse confidi-
mus. Ad eorum enim auxilia in necessitate recur-
rendum est, qui et auctoritatem justitiæ et volunta-
tem miserationis implendæ a Domino acceperunt.
Nec ignorare vos credimus, quoniam eorum, quæ
contra Deum vel secundum Deum feceritis, men-
suram bonam, et confertam, et coagitatam, et
superfluentem refundet justus Juxda in sinus ve-
stratos. Amen.

EPISTOLA XXXIV.

AD BERNARDUM PORTUENSEM EPISCOPUM.

THOMAS Cantuariensis archiepiscopus BERNARDO
Portuensi episcopo, salutem et debitam reveren-
tiam.

Hortatur nos, et loquendi præstat fiduciam san-
ctitatis vestræ nota constantia, ut quæ sancta Ec-
clesia in nobis, et aliis membris suis, in Anglorum
regno patitur, vestræ discretioni curemus innotescere,
sperantes a vobis sanum reportare consilium,
et necessariam tanto dolori medicinam. Verum at-
tendentes hujus nostræ calamitatis seriem nec facile
nec tutum esse paginæ mandari, mittimus ad vos
magistrum Henricum, fidelem et familiarem vestrum
et nostrum, ut fida relatione, prout vidit et audivit,
universa vobis exponat, dictis ejus fidem adhiberi,
tanquam nostris, postulantes. Vos autem, domine,
juxta datam vobis a Deo sapientiam, secundum quod
de statu nostro cognoveritis, consilii vestri solatium
nobis, imo et toti Anglorum Ecclesiæ impartiri non
differatis; quoniam in arcto positi sumus, nec ullum
præter Deum, et sanctæ Romanæ Ecclesiæ auxilium
expectamus. Valeat, et subveniat nobis sanctitas
vestra.

EPISTOLA XXXV.

AD EUNDEM.

THOMAS Cantuariensis archiepiscopus BERNARDO
Portuensi episcopo.

Consolationis vestræ verba animo gaudente re-
cepimus, sed ab adverso receptis incontinenti litte-
ris, quas rex Angliæ in lesionem nostram, et apostoli-
cæ sedis confusionem facit in utriusque regni
compitis et conventibus publicari, versa est in lucum

cithara nostra, et gaudium nostrum transit in
mœrorem. Nam benefactoribus nostris onerosi red-
dimur et tædiosi, ex quo in desperationem pacis
nostræ missi sunt, audito quod persecutor Ecclesiæ
et noster, qui nos spoliis nostris impugnât contra
justitiam Dei, prævaluit in comminationibus suis,
et vanitate, et malitia multa. Viderit Deus, et judi-
cet inter me et ipsum, et alios quorum patrocinio
usus est, ut possit licitum libito coæquare. et in
Ecclesiam Dei impune debacchari, nemine recla-
mante. Si Dei voluntas est, ut in exilio pro liber-
tate Ecclesiæ moriamur, odoretur sacrificium, quia
decrevimus mori potius quam ad qualecunque
mundi pretium distrahere Ecclesiæ libertatem. Ab-
sit enim a nobis, ut regi impio vendamus hæredita-
tem patrum nostrorum, quam legem Dei esse Scri-
ptura sacra docet in Spiritu! Verum quia sancta
Cantuariensis Ecclesiæ, quæ nunc fere destructa
est, a multis diebus patrocinium impendistis, sup-
plicamus sanctitati vestræ, quatenus ei nunc, velut
in extremis agenti, celerem feratis opem. Ut dominus
papa suspensionem, quam nobis inflixit, solvat, aut
terminum coerctet, scribens etiam regi Francorum
et Ecclesiæ Gallicanæ patentibus litteris, quod nisi
rex Anglorum juxta commonitionem et comminatio-
nem suam nobis pacem et ablata cum Ecclesiæ
libertate restituat, exinde nos in eum et terram
suam officii nostri potestate uti concedat, et senten-
tiam, quam in malefactores Ecclesiæ et nostros
tulerimus, ratam habendam esse decernat, et præ-
cipiat ab omnibus terræ suæ episcopis inviolabiliter
observari, donec satisfacere compellantur. Præterea
precamur attentius, ut Ecclesiæ Cantuariensi in
miseriæ suæ solatium impetretis plenam reforma-
tionem primatus sui, et ut præcipiatur archiepi-
scopo et Ecclesiæ Eboracensi, ut nobis obedientiam
tanquam primati suo exhibeant. Cum enim ejusdem
primatus per vos confirmationem obtinuerimus, ho-
nor erit vobis et gloria, si plenum robur obtineat
confirmatio a vobis impetrata. Ut autem charitas
vestra aliquod habeat tribulationis nostræ solatium,
noveritis quod Christianissimus rex fortunam no-
stram reputat suam. Valete.

EPISTOLA XXXVI.

AD EUNDEM.

Missi sunt ad regem Angliæ nuntii multi, quo-
rum omnium fuit labor infructuosus. Et quomodo
novissimis istis, D. Gratiano et Viviano, opera et
impensa perierit, si placet, ab ipsis referentibus
potestis audire. Rex et sui nunc, ut semper, im-
pedierunt pacem, cum ego et coxsules mei nuntiiis,
sicut dominus Senonensis et episcopi, qui præsentem
aderant, audierunt, usquequaque obtemperaverimus.
Et adhuc quidem, quantum salvo ordine meo et fide-
litate Ecclesiæ Romanæ potero, regis et regni digni-
tates conservare et augere paratus sum. Sed auctore
Deo nova et perniciose fidelitatis forma exemplo mei
in Ecclesiam Dei nunquam inducetur. Peto autem,

ut mihi et meis ablata restituat aut satisfaciat, quæ gratis et absque causa resident penes ipsum. Nam et nuntiis et aliis pluribus palam confessus est, quod de toto tempore cancellariæ nec pecuniæ nec administrationis exigit rationem. Nec me tantum perturbant damna rerum, quantum perniciæ exempli, quod coetaneos et posteros facile impinget in errorem et ausum similia attentandi, si pestis hæc impunita et irrequisita remanserit. Cætera, ne scripturam protrahendo vobis fastidium generetur, in ore pauperum Christi, qui diriguntur ad vos, posita sunt, quos, si placet, audite et exaudite pro Christo, cujus negotium prosequuntur, et date operam et diligentiam, ut Ecclesiæ debitam consequi valeat libertatem. Si vero præambulos Antichristi Londoniensem episcopum et Gaufridum Ridel ad curiam venire contigerit, sic eos tractate, sicut Antichristi membra tractari decet a christo Domini.

EPISTOLA XXXVII.

AD BOSONEM.

THOMAS Cantuariensis archiepiscopus, Bosoni cardinali.

Indubitanter credimus, et verum est, neminem esse in curia, qui plenius vobis noverit, quantam fidem, obedientiam, et devotionem Cantuariensis Ecclesia sedi apostolicæ consueverit exhibere. Nam, ut taceamus de aliis decessoribus nostris, quorum doctrina, virtutibus, et exemplis illustratur Ecclesia, qui jam miraculis, Deo meritis eorum respondente, coruscant, novissimus decessor noster, vester quidem amicus, et Romanæ Ecclesiæ devotissimus filius, bis a sede propria pro fide et obedientia exclusus est, rege Stephano hoc in eo persequente, quod contra prohibitionem ejus vocatus a domino papa Eugenio ad concilium Remense venerat, cæteris episcopis domi contra obedientiam remanentibus, exceptis tribus, qui de mandato regis venerunt, ut aliorum absentiam excusarent. Alia autem, ut scitis, causa persecutionis ejus exstitit, quod contra prohibitionem Romanorum pontificum filium regis Eustachium noluit coronare. Quem aliorum episcoporum in tota insula nostra vidistis aut legistis se pro tuenda libertate Ecclesiæ, pro conservandis institutionibus Patrum, pro reverentia et obedientia sedis apostolicæ, præter Cantuarienses, se opposuisse principibus? Et nostra quidem ætate nec unus exstitit; et si veteres revolvantur historiae, nullus occurret. Cantuariensium vero alii pro lege Dei fuderunt sanguinem; alii fundendum persecutoribus obtulerunt. Si vero consuetudines, aut potius abominaciones, quæ exiguntur a nobis, decessoris nostri tempore viguissent, se, rege prohibente decessor noster ex causa obedientiæ non exposuisset naufragio, nec ei summus pontifex gratias, quas devotione meruerat, in pleno concilio retulisset: *Eo quod, ut verbis ejus utamur, natando potius, quam navigando ad concilium venerat.* Si perversitates hæc viguissent, utique post prohibi-

tionem apostolicam coronasset filium regis, quoniam hoc fieri oportere decreverat curia ejus. Nam et quosdam eorum, qui nos persequuntur, ille rex habuit hujus fomitis incentores.

Nonne recolitis quomodo ille, qui nunc Eboracensis est, Romam profectus sit, regis illius et procerum procurans negotium; ut quia Cantuariensem archiepiscopum non poterant flectere, saltem prohibitionis apostolicæ solutionem a domino papa Eugenio impetrarent? Sed quid nota revolvinus, præsertim in auribus vestris, qui tenetis memoriter illius temporis gesta, et fidem ac devotionem Cantuariensis Ecclesiæ non modo lectione librorum, sed visu et auditu plenissime didicistis? Hæc vobis devota semper exstitit, et auctore Deo nostris temporibus ipsius ad vos devotio non tepescet. Siquidem justum est, ut potius augeatur, cum a tempore Guidonis Pisani familiaritatem, personaliter contraxerimus, et nobis mediantibus amicitiam inieritis cum decessore nostro. Nobis autem propositum est, ut pro ætatis processu charitas invalescat, et si opportunum fuerit, cumulentur obsequia. Unde dilectioni vestræ supplicamus attentius, quatenus hæc ad domini papæ notitiam reducat, ut cum cæteris aut præ cæteris dominis et amicis nostris impetretis ab eo, ne tradat bestiis Ecclesiam semper Deo et sedi apostolicæ famulantem, et nos cum illa in brachio extento eripiat de manibus eorum, qui quarunt animam nostram, ut auferant eam, et in depressione nostra totius Ecclesiæ perimant libertatem. Nam et rex Stephanus ab antecessoris nostri persecutione non destitit, antequam piæ recordationis dominus Eugenius, omni cessante appellationis obstaculo, in caput ejus anathematis, et in terram interdicti sententiam præcepit ab omnibus episcopis auctoritate apostolica exerceri. Lupus enim ab ovili facile non arceatur, nisi clamore canum terreatur et baculo.

EPISTOLA XXXVIII.

AD GRATIANUM PROTONOTARIUM.

THOMAS Cantuariensis archiepiscopus GRATIANO, Impiorum molimina gratiæ filiis in finem nocere non possunt; quia Deus eos supra vires tentari non patitur, ad electorum utilitatem cuncta dirigens, et de singulis eventibus rerum profectum mirabiliter eliciens gloriosum. Et quidem fidem vestram respexit Dominus, qui moram magistri Viviani, et quidquid post recessum vestrum gessit in Francia, convertit in gloriam nominis vestri, vos in Deum constituens Pharaoni. Ex quo enim dominus rex Anglorum cognovit, quod cum domino Senonensi, cujus zelum timet supra quam dici possit, ad curiam revertebamini, et vos promptos animadvertit ad justitiam exercendam, illico per se et per suos præfatum Vivianum sollicitare studuit, ut rediret, promittens se ad honorem Dei et utilitatem Ecclesiæ per eum pacem esse facturum, si ille procuraret, ut cum eo colloquium haberemus. Dicebat enim

se hanc illi velle impendere gratiam, eo quod mo-
rigerum senserat sibi, cum tamen magis absentia
vestra, quam præsentia ejus, gratiæ Dei coopera-
retur, et perurgeret ad pacem. In spe ergo pacis,
sicut plenius innoteseet ex litteris vocationis no-
stræ, accessimus ad colloquium, in quo quid actum
sit, ex his quæ subscripsimus domino Senonensi et
sociis nostris, facile discretio vestra perpendet. Ti-
memus enim, ne si cuncta retexamus, prolixitas
orationis fastidium generet, præsertim cum certum
teneamus diligentiam vestram circa plurima occu-
patam. Sed sicut non potest *Æthiops* mutare pel-
lem, aut pardus varietates suas, sic fallaciam et
frandem exuere nesciunt, qui ab initio vitæ usque
ad ætatem maturiorem docuerunt linguam suam
loqui mendacium, et ut inique agerent, laborave-
runt.

Ut ergo magistri Viviani verbis utamur, hoc in
tantarum promissionum summa inde reperit, quod
rex ille præ cunctis mortalibus sophistice vivit et lo-
quitur, ut Deo et hominibus debeat esse odibilis. Ces-
sit tandem præfatus magister in sententiam vestram;
et sicut ab eis accepimus, quibus fides adhibenda est,
fallaciam regis apud S. Dionysium patenter arguit,
et sicut audivimus, pecuniam, quam ei recessuro
miserat, accipere recusavit, detestans duplicitatem
et malitiam ejus. Ei quoque rescripsit increpatorias,
exhortatorias, et comminatorias litteras, sicut nobis
significatum est, quarum exemplum vobis jussimus
præsentari. Quicumque verò familiaritatis initæ vi-
derunt exitum, aut Vivianum loquentem audierunt,
publice protestabantur solum ex omnibus, qui ad
regem Anglorum missi fuerant, sapere Gratianum.
Si Vivianus in curia consonaverit istis, ibidem illo
auctore, velit, nolit, nominis vestri titulus clarius
elucescet. Si partem, quam apud nos detestatus est,
fovere ausus fuerit, dignus est cum proditore Christi
ignominiosam suspendii subire damnationem. Spe-
ramus autem de illo viciniara salutem et honestati,
quia quantum deprehendere potuimus, et qui nobis-
cum erant, et sicut indubitanter a multis accepi-
mus, laudabiliter in extremis versatus est. Rei series
vobis innotescet ex ordine. Vos, si placet, necessi-
tates nostras et honestatem Ecclesiæ adhibita dili-
gentia promovete. Nam si dominus papa, et Ecclesia
Romana extenderit manum suam in retribuendo,
nobis citissime quies dabitur, et auctoritas Ecclesiæ
Romanæ, tam in Anglia, quam in cismarinis terris
regi Angliæ subditis, inflorescet.

EPISTOLA XXXIX.

AD EUNDEM.

THOMAS Cantuariensis archiepiscopus, GRATIANO
cardinali (30).

Gratias habemus benignitati vestræ multimodas
super his, quæ nobis a mero dilectionis fonte prolata

(30) Notabit lector Gratianum inter cardinales
positum esse. Quod inde factum est quod Gratiani
nomen in quibusdam manuscriptis cardinalis titulus

A per latorem præsentium mandare curastis. Sciturus
pro certo, quod si ad nos venissetis, sicut desidera-
bamus, omnimodum vobis honorem, quem posse-
mus, cum exactissima diligentia, tum intuitu personæ
vestræ, quam plurima dilectione amplexamur, tum
intuitu devotionis, quam erga sacrosanctam Roma-
nam Ecclesiam habemus, vobis utique exhibuisse-
mus, breviorumque etiam in partibus nostris trans-
itum et tutiorem habuissetis, si ad nos venissetis,
quanquam æmuli et invidi nostri, quasi ad detri-
mentum nostrum, ne mutuo simul frueremur collo-
quio, aliter vobis persuaserint. Quo siquidem nobis
nequissime defraudato plurimum dolemus. Rogamus
tamen attentius cum quanta supplicatione possumus,
quatenus de cetero, si placet, sub quadam dilectio-
nis prærogativa personam nostram, sed et Ecclesiam
Cantuariensem pietatis intuitu familiarem vobis
habeatis, et patrocinium nobis in opportunitatibus
nostris diligenter pro loco et tempore præstetis,
miseratus saltem tribulationum et angustiarum
nostrarum, quas pro parte aliqua, quanquam minima,
jam novistis. Sciturus absque omni ambiguitate, quia
neque mors, neque vita, neque instantia aliqua
poterit nos separare a fidelitate domini papæ et
Ecclesiæ Romanæ; etsi forte prius ipsa, quod absit,
prorsus nobis defuerit. Valet, latorique præsentium,
si placet, fidem habete super his quæ vobis ex
parte nostra plenius viva voce intimaverit.

EPISTOLA XL.

AD EUNDEM.

Nullus præter vos ab Ecclesia Romana pro causa
Ecclesiæ missus est ad regem Anglorum, qui eam
non lacerit, et cornua non dederit peccatori. Vos
autem illam erexeratis, ut pax in brevi necessari-
sequeretur, nisi resumtis a curia viribus convales-
set iniquitas. Videbatur quidem nuper aliquid solatii
recepisse in litteris domini papæ, sed auctoritas
earum, antequam porrigerentur, evanuit, missis e
regione litteris, quibus Satanas solutus est, ut
liberius sæviat in Ecclesiam Dei. Absolutis enim,
de mandato domini papæ, Londoniensi et Sares-
buriensi episcopis, omnes animati sunt, ut regis se-
quantur voluntatem, qui ita fautores suos, quamli-
bet criminosos, expedit, qui de sede apostolica sic
triumphat, cujus nuntii contra Deum et justitiam
ejus semper redeunt gloriosi. Bonorum contra con-
sternantur corda, cum tam patentem et tantam ini-
quitatem videant in viis suis jugiter prosperari. Ecce
quomodo punita est injuria vobis illata, et nuntiis
domini papæ, ecce quomodo fidelitas nostra remun-
nerata est, et Ecclesiæ Dei repressa calamitas.
Ecce quomodo vindicatum est, quod Angliam nuper
extortis juramentis ab obedientia domini papæ con-
atus est separare. Dei quidem miseratio est, quod
adheret. At Gratianus, ut puto, nunquam cardina-
lis fuit.

non potuit, quia malitia ejus ex contingentibus nihil omisit. Exsilium et proscriptionem nostram jam per sex annos protraxit curia: Innocentes, miseri, pro libertate Ecclesiæ gratis in itinere perierunt, et persecutores Ecclesiæ spolia nostra cardinalibus et curialibus promittunt et largiuntur, et sic Barabbas dimittitur, et crucifigitur Christus. Creditores exhausti sunt, et si quos movebat miseria exsilii nostri, visis his quæ sunt a domino papa, mittuntur in desperationem. Sed et hæc in monte Dominus videbit, et judicabit fines terræ majestas illa terribilis, quæ aufert spiritum principum. Nos per gratiam ejus, sive vivi, sive mortui, ipsius sumus et erimus parati pro libertate Ecclesiæ exsilium, proscriptionem, et omnia mundi incommoda, quandiu ipsi visum fuerit, sustinere. Utinam inveniamur digni, qui persecutionem pro justitia patiamur! Certe ob hanc causam non modo cardinalibus, qui Ecclesiæ auctoritate Ecclesiam impugnant, nos, ut Domino placuerit, torquendos exponimus, sed, etsi totus mundus, quod absit! insurgat, ab Ecclesiæ fidelitate quam professi sumus, Deo miserante, non recedemus. Cui de cætero curæ sit et nostri misereri, et Ecclesiæ, quam apostolica sedes exponit, tueri libertatem. Nos ex proposito curiam non vexabimus, sed causam cedemus illis, quorum ibi acceptatur iniquitas, et qui venalitatem ejus prædicant, et cantant in plateis. Parentes autem reticemus quid, quibus ex causa mercimonii hujus donatum est, quid promissum. Nec dubium quin aliqui eorum, qui triumphatores redierunt, se non triumphasse maluerint. Vos autem, qui Ecclesiæ patrocinium in tanto periculo suscepistis, in honore perseverate proposito, non nostri, qui nihil posse permittimur, contemplatione, sed illius qui vestrum procul dubio in retributione uberi remunerabit obsequium, et nobis dabit, ut secundum quod volumus et debemus, dilectioni vestræ conlignam officii vicem rependere valeamus. Interim vestri memores erimus ante Deum, et vos, si placet, affectione simili meminiretis nostri.

EPISTOLA XLI.

AD EUNDEM.

THOMAS Cantuariensis archiepiscopus, domino GRATIANO.

Experientiam rerum matrem et nutricem esse, philosophiæ celebris apud antiquos et vera sententia est, et ipsius Apollinis testimonio comprobata. Nec immerito, cum expertus quisque de rebus, in quibus versatus est, possit fidelius judicare, et inexpertus de rebus incognitis sit plerumque vana et fraudulenta imaginatio. Quæ idcirco præmiserim, ut vel nunc animadvertatur, quanto periculo Ecclesiæ et meo, aut potius apostolicæ sedis, cujus privilegia non sine multo et ejusdem discrimine tueri aggressus sum, dominus papa mihi experto credere noverit, qualiter sibi et Ecclesiæ Dei agendum esset cum domino rege Angliæ. Ecce enim ut facta est

A vox nuperrimæ comminationis apostolicæ in auribus ejus, qua constitit ipsum reponendum esse in conditione Frederici dicti imperatoris, et terram ejus subjiciendam esse interdicto, et mandati prævaricatores episcopos suspendendos et excommunicandos, illico ad honorem Dei et Ecclesiæ, ut ex conditionibus insertis pacto concipi debuit, utilitatem, pacem fecit, cujus formam ex litteris domino papæ missis planum est intelligere. Nec dubium, quin infra duos primos exsilii nostri annos eam fecisset, si eum ab initio hac via aggressus esset dominus papa, aut quos ad ipsum destinavit in primis habuissent spiritum nostrum, quid enim rex potuisset in illos, cum perpetuo verum sit: *Nec speres aliquid, nec extimescas, exarnaveris impotentis iram?* B Aut quid tentavit in vos, quem nec prece, nec pretio, nec blanditiis, nec minis, aut quibuscunque sollicitationibus deflectere potuit a via recta? Verum quia Romana Ecclesia, quod pace omnium in aure vestra dixerim, posuit firmamentum suum formidinem, aut res captat, aut personas accipit, et auctoritate, qua præeminet, iniqua gerentibus non occurrit, propterea flagella Dei gravia, et toti mundo vix portabilia veniunt super eam, ut instabilis facta fugiat a facie persequentis, et in tribulationibus vix subsistat. Sed apud quem rectius ista deplorem, quam apud eum, qui a præfatis vitiis per gratiam Dei immunis solis miseris compassus est, et solatium tulit, et tanto regi et omnibus complicibus C suis in faciem restitit, eo quod erat reprehensibilis, et gratis et nimis impugnabat Ecclesiam? Et quia strenuitas vestra Cantuariensem Ecclesiam protexit in adversis, par est et merissime consentaneum æquitati, ut se patrocinio et voluntati vestræ subdat in prosperis.

Vestrum erit quod placuerit dictare prece vel jussu, quia in nostro, mei dico et meorum proposito est, vestris obtemperare mandatis. Ex sinceritate ergo conscientiæ vestrum affectamus obsequium, ad vos latorem præsentium destinamus, tam ipsum quam petitiones, quas per eum domino papæ porrigimus, dilectioni vestræ affectuosius commendantes. Hoc autem certo certius sit, et per vos innotescat domino nostro, quia si in omnibus articulis causæ nostræ, aut potius suæ, eundem rigorem exercuisset, regem ad satisfaciendum de omnibus facile potuisset urgere. Quæ scienter hic, et de industria reticentur, nuntius, Deo propitio, viva voce supplebit. Provideat etiam vestra discretio, ut urgentiores et efficaciores litteræ, quas dominus noster pro Ecclesia regi Anglorum transmisit, registro inserantur; quia posteris magnum incitamentum virtutis est, quoties eos animaverint exempla majorum. Ad negotium vero nostrum spectantes, litteras quas accepimus, remittimus vobis, ut si forte editorum exemplaria desint, ea mutua possitis a transcriptis.

EPISTOLA XLII.

AD HENRICUM PISANUM PRESBYTERUM.

THOMAS Cantuariensis archiepiscopus, HENRICO presbytero cardinali.

Si vobis aliter locutus fuero, quam animæ meæ, in me ac vos æque videbor injurius, et neutri satis fidus. Nam quod sæpe expertus sum, salus mea et Anglicanæ Ecclesiæ incolumitas de vestro post Deum pendet consilio. Licet autem affectus sit plurimus ad vos, et in vobis confidentia multa, verba tamen multiplicari non expedit, quorum paucitas sufficit sapienti, præsertim cum et opem ferre necessitatibus amicorum soleat charitas non rogata. Ex litteris, quas domino papæ mittimus, et nuntii relatione, qui frater est religiosi sacerdotis incarcerati, in quo calculo causa nostra, imo certe vestra, et totius Ecclesiæ Dei versetur, facile advertetis. Vestra erit de cætero providentiæ tantis obviare morbis, tam sceleratos et pestiferos consilio et auxilio prævenire, et evacuare conatus. Distulimus in regem anathematis, quam mernerat, et continuis jugiter provocat injuriis, ferre sententiam; sed ipse, dum manus violentas injicit in sacerdotes Christi, ecclesias possessionibus spoliatur et libertate, in caput suum intorsit anathema. Canon enim nec potestatem excipit nec primatum, sed pariliter peccantes pari condemnationis pœna percellit. Nisi forte leges ecclesiasticas civilibus comparandas censeatis et vos, quæ sicut Anacharsis conqueritur, araneorum assimulantur telis, quæ muscas imprædiunt et retinent, sed disruptæ volatilia grandiora transmittunt. Hoc est enim quod iudicibus ecclesiasticis impropèrat Dominus, ut fere cum gentilibus dicant:

Et tantum miseris irasci numina possunt?

Sed non ita lex Domini, quæ ultionem inchoat a sanctuario suo, et in eos, qui præsent, potissimum exercet iudicium, et potentes dicat potenter puniendos. Cum Midianitis fornicatus legitur Israel, et principes pœna criminis percelluntur. Ait enim Dominus: *Tolle cunctos principes populi, et suspende eos contra solem in patibulis.* Et cum animam, quæ peccaverit, iustitia mori decernat, ut nec pater filii, nec filius iniquitatem patris portet, qua transpositione divinæ legis efficitur, ut potestates comedant usam acerbam, et obstupescant dentes privatorum, ut potens solvatur in crimine, et innocentia pauperis supplicio addicatur? Fidem, quæso, nuntiis habeatis, et operam detis et diligentiam, ne presbyter clericus Willelmi Papiensis promissionem veram nuper fecerit regi Angliæ, pollicens ei quod dominus suus, legatione accepta, causam Ecclesiæ, quam fovemus, ad regis diffinet voluntatem. Certum vero sit, quod nos personam nostram vel causam Ecclesiæ non credemus nisi iudicio domini papæ, cui Ecclesia Anglicana statit, aut cadet. Statit autem per misericordiam ejus, in quo fundata est, et cuius est redempta sanguine. Meminit vestra discretio, qua sinceritate quidam nobiscum ambulaverint, ut

A illorum iudicium ex justa causa possumus declinare. (*Vide etiam epistolam, quæ incipit: Satis superque etc., ad Conradum Mog. arch. una cum Sabino, Henrico et Hyacintho cardinalibus directam.*)

EPISTOLA XLIII.

AD HUGONEM CARDINALEM DE BONONIA.

THOMAS Cantuariensis archiepiscopus HUGONI cardinali de Bononia.

Gratias agimus dilectioni vestræ super amore, quem nobis et nostris semper exhibuistis, desiderantes ut devotioni vestræ valeamus, auctore Domino, pro meritis respondere. Et, quia ex præcedentium exhibitione bonorum de vestra gratia plenam fiduciam obtinemus, rogamus attentius, quatenus contra persecutores ecclesiasticæ libertatis et sedis apostolicæ hostes, qui apud nos Dei auxilio jam fere consumpti sunt, exurgatis in adiutorium nobis; quia fidelium spes est salutem Ecclesiæ esse in januis, si dominus papa totius malitiæ incentorem episcopum Londoniensem et complices suos, quos exigentibus culpis excommunicavimus, severitatis apostolicæ corripuerit gladio. Nec oportebit graviorem ulterius exercere vindictam, si nos permiserit pestilentiam membrorum curare languorem, et patrida, quæ curam non admiserint, rescare. Valeat.

EPISTOLA XLIV.

AD HUMBALDUM OSTIENSEM EPISCOPUM.

THOMAS Cantuariensis archiepiscopus, Humbaldo Ostiensi episcopo, salutem et promptum cum reverentia famulatum.

Sanctitati vestræ, quam in templo Dei columbam veneramus immobilem, dignum duximus aperire, quot et quantis oppressionibus Ecclesia Dei laboret in partibus nostris, et quam periculosam tam in nobis, quam in aliis membris suis ærurnam sustineat. Ad hoc vobis plenius intimandum mittimus magistrum Henricum, fidelem sanctæ Romanæ Ecclesiæ filium, nostrumque familiarem, rogantes ut verbis ejus fidem adhibeatis, tanquam ex ore nostro procedentibus. Necessaria nobis est vestri consilii festinata responsio, et cum de die in diem super nos indebitarum exactionum, imo sacris canonibus et ordini nostro penitus adversantium, invalescat insolentia, ad vos post Deum confugimus, aliud refugium non habentes. Valeat memor nostri sanctitas vestra.

EPISTOLA XLV.

AD EUMDEM ET HYACINTHUM.

THOMAS Cantuariensis archiepiscopus, Humbaldo episcopo Ostiensi et Hyacintho cardinalibus.

Nos alii verbis, sed vestra rebus et operibus benignitas consolatur. Doluistis vicem nostram, et calamitatem Ecclesiæ, et pauperum Christi coexistantium nobis angustias sic habuistis, ut vestras. Præmia fraternæ charitatis et veræ compassionis fructum vobis in illa die retribuet justus Iudex, qui misericordibus in gratia uberi misericordiam pollicetur. Non abiistis post aurum, quo nuper ad

lesionem nostram, et apostolicæ sedis confusionem capti sunt quidam, quorum patrocinio receptis litteris apostolicis, quas lectitari facit in utriusque regni compitis, rex Anglorum se de Romana Ecclesia gloriatus est triumphasse. Nec immerito. Voti siquidem compos effectus est, et nunc in Ecclesia Dei, nemine contradicente, pro libito debacchatur, sperans, quod Deus avertat, dominum papam vel me pro voto suo interim moriturum. Nihil enim est, quod magis desideret, quam alterutrum mortem. Invitatis ad patientiam, sed hanc jam quadriennio habuimus in passionibus maximis expositi cum coexsilibus nostris, in fame et siti, in frigore et nuditate, ad omnem impetum fortunæ sævientis. Quis enim coexsulantium infirmatur, et ego non infirmor? Quis scandalizatur, et ego non uror? Sed quod gravius cruciat, Ecclesiam in miserabilem redigi servitutem, sine mœrore nec videre nec eloqui possum. Patior itaque, sed invitus, quia compator, et utinam compatiantur domini nostri cardinales, qui omnes patientiam prædicant, sed alii de virtutis conscientia, alii ad culpæ suæ dissimulationem. Novit utique Dominus qui sint ejus, et Ecclesia jam sentit ex parte, qui non sint ejus. Nam rex Anglorum prædicat, qui sui sint, nec tacitum est quod et quibus erogatum sit aurum, sed munera ejus spolia nostra, spolia pauperum Crucifixi, imo ipsius Christi spolia sunt, imo minima portiuncula spoliolum. Quid ergo eis qui tyrannorum manibus Christum spoliant respondebit in illa die, quando vivos et mortuos judicabit, singulis et universis testimonium conscientia perhibente? Nec hæc dicta credantur, quod alius patientiæ terminus esse debeat, quam corona, vel quia nos exsules et proscripti Christi in causa ejus non disponamus ante mori, quam vinci, sed quia necesse habemus nostro et aliorum dominorum, et amicorum consilio in tantis angustiis sublevari. Nam qui nostræ potestatis suspensionem in arbitrium regis Anglorum contulit, scilicet donec redeamus in gratiam ejus, nobis omnem pacis præcludit viam. Invitaverat nos per comitem Flandrensem ad colloquium suum, sed cum ei nuntii sui rescriptum hoc apostolicum porrexissent, adeo elatus est, ut Deum et homines pari furore contempserit, sed præ cæteris Romanos. Placeat itaque dilectioni vestræ, quam Deus necessitati Cantuariensis Ecclesiæ patrocinari disposuit, impetrari a domino papa per vos et alios amicos Dei, ut aut suspensionem hanc solvat, aut terminum coarctet scribens regi Francorum, etc.

EPISTOLA XLVI.

AD EUMPEM.

THOMAS Cantuariensis HUMBALDO Ostiensi episcopo.

Clarissimi oratoris præclara sententia est: quod primo decipi incommodum, secundo omnino stultum; tertio, turpe. Sed utinam nuntii regis Anglorum, dolis et minis armati, sedis apostolicæ religio-

A nem ter quaterque non elusissent, si tamen de circumventionem queri possunt, qui scientes et prudentes per dissimulationem criminis publice peccantibus delinquendi audaciam præstiterunt. Quomodo enim potuit Ecclesia Romana, quæ in universum orbem providentiæ suæ oculos circumducit, et ad quam provinciarum negotia referuntur, ignorare, quod lippis et tonsoribus notum est, quod in plateis prædicatur, quod cantatur in compitis Ascalonis? Proscriptionem meam et meorum jam quinquennio pertuli, ad vos tam Ecclesiæ quam proprias deploravi injurias, coexsulantium mihi funera in Christo, pro quo passi sunt, dormientium partim vidistis, et plura audistis. Et tamen regis Anglorum, ejus in depressionem Ecclesiæ et sanctorum conculcationem manus extenta est, furor nondum cohibetur a vobis. Ubi quæso, pater, vestri sacerdotii zelus, quo se patriarchæ, prophætæ, apostoli, et apostolici viri principatibus et potestatibus opposuerunt pro domo Domini, stantes in prælio in die discriminis, et per fidem regna vincentes? Nunquid hæc scripta sunt, ut fabulæ sint narrantium, non exempla morum et forma vivendi? Hæc enim predicatorum voluntur in ore, sed, quod sine rubore et dolore non eloquor, quod vita vincit, non habentur in corde; aut certe, si retinentur in conscientia, quasi quædam in animo scribuntur justissime eorum, qui bona docent et non faciunt, damnationis argumenta.

C Et quidem mihi præ cæteris timeo, ne sanguis Ecclesiæ tandiu, et tam atrociter, et palam afflicta, et adhuc inultæ, cito requiratur a me: eo quod in brevi stabimus omnes ante tribunal Christi, sine acceptione personarum reddituri rationem de operibus et dissimulationibus nostris. Sed regem, quod ratio exigebat, ut convinceretur malitia ejus, voluistis sæpius commoneri, et commotus est per litteras et nuntios extraneos, per subdiaconos, per cardinales vestros, per episcopos, per abbates, et nunc tandem in fine anni quinti quasi peremptorio edicto per dominum Gratianum, et magistrum Vivianum, et semper facta sunt novissima ejus deteriora prioribus. Referet hoc dominus Gratianus, qui in tanta sinceritate et maturitate versatus est in hoc negotio, ut Dei et hominum magnam gratiam debeat meruisse. Nec per eum stetit, nec per nos, quod pax reformata non est. Sed quia rex modo ait, modo negat, et versibilibus Protea vincit, Gaufridus quoque archidiaconus jam fere factam impedit viam, persuadens regi, ut nulla ratione componeret, nisi extorta obligatione servandarum consuetudinum, quas ut facilius obtineat, favorabiliore nomine nuncupat dignitates. Ego vero concedo, et gratum habeo, ut salvo ordine meo valeant et vigeant omnes regis et regni dignitates. Sed ut observantiam earum jurem, non acquiesco. Quippe qui nec canones, nec Evangelii mandata me impleturum jurare præsumo, nec populum terræ juramento hujusmodi video coarctatum. Laborat adhuc, ut ablata restituere, vel pro his satisfacere non compellatur, quod evidenter

injustum est, præsertim cum ipse palam confessus sit, quod ei de administratione cancellariæ non teneor. Nuntii supplebunt plura, quos, si placet, clementer audire, et petitiones nostras more solito promovere dignemini. Valeat dominus, et Pater meus.

EPISTOLA XLVII.

AD EUNDEM.

THOMAS Cantuariensis archiepiscopus Ostiensi episcopo Humbaldo, postea papæ.

Sæpe quidem cogimur in vestræ sanctitatis auribus ærumnas nostræ miseræ deplorare; quia illæ supra numerum et modum multiplicatæ sunt. Et præter vos nullus est, vel admodum rarus, qui nos consoletur in tanta tribulatione, aut spem solatii repromittat. Taceantur ad præsens, quæ sustinimus funera propinquorum, sacerdotum Christi cædes et vincula, feralis edicti atrocitas, quo sævitiæ Herodiana sine miseratione conditionis, ordinis, ætatis, et sexus exterminavit et proscriptis omnes, qui ex quacunque causa venerant in suspicionem, quod ad nos essent habituri charitatem, aut servaturi Deo et Ecclesiæ ejus fidem. Et ut diuturnitate cruciatus circa cruoris invidiam Herodis vinceretur immanitas, vagientium cunas relegavit, a matrum seu nutricum sinibus avulsit parvulos lactentes et sugentes ubera. Nam quo magis protrahitur, acerbior est vis doloris, et quantalibet pœna in momentum contracta mansuescit. Sufficere debuerat persecutori nostro, quod hactenus impune torsit Ecclesiam, quod nos et nostros sic afflixit exilio et proscriptione quinquennii, expectantes ut eum patientia nostra ad pœnitentiam provocaret. Antiquæ, si placet, revolvantur historie, veterum tyrannorum recenseantur gesta, nascentis Ecclesiæ percurrantur annales, nec facile occurret in omnibus persecutoribus ejus, qui sic unum hominem fuerit persecutus, ut tantam innocentium stragem tot exquisitis artibus studuerit adimplere. Cum ergo ipsorum testimonio tam evidens sit propositum ejus, qui licet, ut dictum est, tanta aviditate sitiatur sanguinem nostrum, avidius tamen appetit Ecclesiæ perimere libertatem, et auctoritatem apostolicæ sedis a sinibus suis exterminare; mirabile est in oculis omnium sapientium timentium Dominum, qua ratione eum tandiu Romana Ecclesia sustinuerit, qua patientia audierit tot injusta et enormia postulantes, cum illa divinitus instituta sit eradicare et disperdere omnem potestatem et altitudinem extollentem se in injuriam et contumeliam Christi.

Parcere subjectis, et debellare superbos,

fuit gentiliū eminentia Romanorum: et certe Christi doctrina superbos humiliat, et exaltat humiles. Ecce, inquit, constitui te super gentes et regna, ut evellas, et destruas, et disperdas, et dissipas, et ædificas, et plantes. Nunquid apud Petri successores, Christi vicarios, debet esse acceptio personarum?

Hæc utique non est apud Deum, qui unicuique tam principi quam plebeio respondet ad meritum. Quæram gloria est apud Deum, vel apud homines, pauperioribus jura decernere, et potentiores a maximis flagitiis et multis nulla juris auctoritate coercere? Certe vera justitia potentes potenter punit, et in his qui præsent, gravissimum exercet judicium. Quis unquam Romano pontifici sciente et vidente tanta licentia abusus est Ecclesiarum bonis, quanta nunc abutitur rex Anglorum? Ecce jam quinquennio possedit episcopatum nostrum, et omnium nostrorum bona: item Lincolniensem, Bathoniensem, Herefordensem, Eïensem episcopatus redegit in usus proprios. Landavensis Ecclesiæ possessiones fere omnes distribuit militibus suis. Bangorensem, quæ jam fere decennio episcopum non habuit, non patitur ordinari. Quid de abbatibus dicetur, quas detinet? Nam illarum numerus incertus est. Et hoc quidem se licenter facere gloriatur jure consuetudinum, quas Ecclesia Romana, ut omnium vestrum pace dictum sit, ab initio publice debuerat condemnasse cum auctoribus et observatoribus suis, tanquam Deo inimicas et contrarias perpetuæ legi. Si eis, Pater, voluissemus dedisse locum, nihil prorsus dispendii nobis provenisset aut nostris. Et adhuc si cedere voluerimus, ad omnem familiaritatem et gratiam regis, et totius regni dominium expeditissima patet via. Sed absit! ut propriæ utilitatis commercio publicam prodamus Ecclesiæ libertatem, sedis apostolicæ privilegium convellamus ab Ecclesia, et pro temporalium compendio subeamus dispendium æternorum. Et quia nolumus Ecclesiam dejicere, dejectionem nostram rex querit a vobis. Quia legem Dei transferre nolumus, ut ei succedat iniquitas tyrannorum, querit ut nos citra necessitatem, præter utilitatem, contra auctoritatem ad aliam Ecclesiam transferamur. Quia vero vocantem ad iniquitatis consortium sequi nolumus, petit nos evocari a vobis, ut in transitu possit nostri sanguinis cum iniquitatis suæ consortibus quaecunque exercere commercium.

Quid enim aliud sibi vult, quod Mediolanenses, Cremonenses, et Parmenses in exterminium nostrum mercede corruptos sollicitat? Quid Papiensibus aut aliis Italiæ civitatibus nocuimus unquam, ut nostrum exilium procurarent? In quo læsimus sapientes Bononiæ, qui nec sollicitati precibus et promissis, perniciæ nostræ, quam causam audierant, voluerunt dare consensum? Certe nos Robertum de Bassevilla non proscrisperamus, et tamen sollicitationibus inductus est, ut nostram apud vos perpetuaret proscriptionem. Dolo tamen postea cognito, pœnitentia ductus rogavit, ne ipsius injusta petitio audiretur. Ricardus Syracusanus electus, corruptus accepta spe Lincolniensis episcopatus, persecutores nostros juvit opibus, armavit consilio, viribus roboravit. Nam et ipsi regi Siculo, intra ejus fines modo constititis, ut cum caperent in perniciem Ecclesiæ et

nostram, filiam regis Angliæ copulandam in matrimonium promiserunt. Nonne frangentes panem, et familiam leoninam, et gentem latronum et alios Romanos potentissimos, quasi castra conductitia adduxerunt, ut non tam flecterent, quam frangerent Ecclesiam Romanam? Sed et pacem imperatoris et Saxonum reprimunt. Et quod omnes Romanos data pecunia inducent, ut faciant fidelitatem domino papæ, dummodo in nostra dejectione regis Angliæ satisfaciat voluntati. Patet quam securum transitum, quam jucundum convivium nobis diligentia hominis præparabit. Profecto non satis curabat, unde satisfaceret creditoribus nostris, unde sociis, si quis tamen inveniri posset, ad procinctum itineris necessaria ministrarentur, unde sumptus itineris procederent, et solatia proscriptæ multitudinis, quæ post quinque exsilium egeas et afflictæ erat in tantis calamitatibus deserenda. Eadem sane diligentia procurantium hæc, quoniam regis nomen in hanc suspicionem deducendum esse non credimus, poterant hospitum utensilia toxicari, et difficile est vitam servare incolumem, cui insidiatur is, qui jus habet in familiam totam. Et ne in hac parte schedula protrahatur et verba, quoad vita comes fuerit, nos pro nulla unquam vocatione tot et tantis periculis ingeremus. Nam si quis ex quacunque causa mortem non detrectat, vitam facilius poterit ferro vel laqueo terminare.

Nuper autem misit idem rex nuntios suos, episcopum videlicet Sagiensem, et Gaufridum Cantuariensem archidiaconum, ad Christianissimum regem sollicitans eum precibus et promissis, ut nos ejiceret de terra sua. Sed vir Deo plenus respondit se hoc jus hæreditarium ab antecessoribus contraxisse, et semper fuisse consuetudinis regni Francorum, ut omnes pro iustitia exsultantes benigne recipiat, et eis debite humanitatis solatia impendat. Et dixit se nunquam tam laudabilem hæreditatem, et Deo gratam ex causa qualibet deserturum. Adjecit etiam, quod nos receperat de manu domini papæ, quem solum in terris habet dominum, et ideo nec pro imperatore nec pro rege, nec pro aliqua mundi potestate dimissurum, quin foveat nos et causam nostram, quandiu necesse fuerit quoniam Deus nobiscum est, et pro tuenda lege ipsius tot injurias et damna sustinemus. Hoc responso confusus dimisit, et nobis, quod ei Deus retribuatur, solito benignior et liberalior est, licet benignus et liberalis semper exstiterit. Dicit autem se probaturum in causa nostra sinceritatem et vigorem Ecclesiæ Romanæ, et veritatem domini papæ, ejus fidem et constantiam in eo commendat plurimum, quod regem Angliæ in petitionibus injustis ab eo, gaudet esse repulsum. Si tamen vera sunt, quæ audivit a rumigerulis, et dominus papa perseveraverit in eo quod ei promisit nobis. Sunt in parte adversa, qui nos ablatorum restitutionem petere dissuadeant, et si forte de pace agendum fuerit, omnia perfunctorie pertransire, non attendentes quam periculosum esset exemplo,

A cum lucro succensa cupiditas hinc animari possit, ut prohibitu releget et proscribat episcopos, et tandem in gratiam Ecclesiæ redeat, si quacunque jactura illius qualemcunque fecerit pacem. Nam hujusmodi dissimulatio cupidas incendit potestates, et perversis hominibus præstat audaciam delinquendi. Meliusque nobis esset non fuisse natos, quam in Ecclesiam induxisse pestem tam perniciosi exempli: præsertim cum illi facile sit damna rerum immunitatibus, privilegiis, et possessionibus incultis, et aliis beneficiis nostro præeunte consilio ex parte maxima compensare.

B Neque hoc, si dominus papa nobis astiterit, difficile est extorqueri. Quia licet prætendat minas, totus terrore concutitur, ex quo contumaces episcopos, et alios malitiæ suæ complices, et satellites iniquitatis, Satanæ tradi vidit in interitum carnis. Nam si isti contriti fuerint, citius et facilius perdomabitur, et fulgura ejus in pluviam convertentur. Expertis credite, qui novimus hominis mores, qui portavimus pondus diei et æstus, nec adhuc pro Domino et Ecclesiæ libertate formidamus congressum, credite, inquam, quia ejus ingenii homo est, ut non possit nisi suppliciis emendari. Et quia totius malitiæ ejus incenitor episcopus Londoniensis, qui nuper in tantam prosiliit impudentiam, ut dixerit se Cantuariensi Ecclesiæ, cui professionem fecit, nullam, ex quo translatus est, debere obedientiam; gloriatur etiam, quod cathedram archiepiscopalem ad Ecclesiam Londoniensem transferri faciet: necesse est tantæ iniquitatis caput conteri, ut Anglicana Ecclesia convalescat. Opposuerunt se illi nuper scissuram Ecclesiæ molienti fratres et coepiscopi nostri, ad quos subvertendos de cismarinis partibus regis officiales attraxit, ut per eos affligantur, qui cum ipso recipere characterem bestiae non acquieverint. Placeat itaque dignationi vestræ, quam in Cantuariensis Ecclesiæ patronatum dominus suscitavit, hæc ad mentem domini papæ reducere, et pro more vestro confirmare in subventionem Ecclesiæ fratres vestros, et impetrare, ut per nostrarum tolerantiam passionum acquirat apostolica sedes Anglicanæ Ecclesiæ libertatem. Nam mori prælegimus in exsilii acerbitate pro Domino, quam videre Ecclesiam execrandis tyrannorum traditionibus profanari, et divinæ legis evacuari vigorem. Date veniam, quia verba protrahere protracta cogit necessitas, et nonnulla pars solatii est in aure dulcissimi Patris et piissimi domini proprias effundere calamitates. Siquidem:

Dulce loqui miseris, veteresque reducere questus.
Et ut hæc sæpius ad memoriam reducat, vestris provoluti pedibus affectuosius imploramus. Valeat semper sanctitas vestra, nostri memor ante Deum.

Hæc sunt nomina excommunicatorum, qui incorrigibiles et contumaces inventi, denuntiati sunt secunda denuntiatione: Gaufridus Cantuariensis archidiaconus, Robertus vicarius ejus, Ricardus de

Ivelcestre, Ricardus de Luci, Willelmus Giffard, Adam de Cheringis.

EPISTOLA XLVIII.

AD EUNDEM,

THOMAS Cantuariensis archiepiscopus, Ostiensis episcopo.

Sicut ad locum, unde exeunt, flumina revertuntur, ut iterum fluant, sic ad agendas pietati vestræ gratias flexis genibus mentis debemus accedere, ut per vos in ministerio Ecclesiæ robaremur, qui a vestra miseratione post Deum vires accepimus, ne caderemus in manu hostili. Amici nostri et proximi nostri steterunt contra nos, persecutorum gladios acuentes, et ut nos confunderent et contererent, etiam sub ipsis facti sunt in arenam pravam. Sed fides vestra in camino tribulationis nostræ et pressura Ecclesiæ semper examinata clarescit, et charitas non querens quæ sunt, sed quæ Jesu Christi, a Patre misericordiarum obtinuit pacem, quam mundus dare non poterat, aut sperare. Nos enim ad dominum nostrum regem Angliæ in humilitate debita accedentes, cum eo fecimus pacem cuius tamen tota substantia subsistit in spe, sed quæ auctore Deo non confundet. Nam ut res sequatur, qui cœpit, ipse perficiet. Instabant aliqui eorum, etiam qui columnæ Ecclesiæ videbantur, ut nos et totam causam Dei conferremus in arbitrium ejus, sed a nobis, Deo propitio, nec obtentum est nec obtinebitur, ut quæstionem damnorum, quæ Ecclesiæ Dei et nobis illatæ sunt, aut querelam consuetudinum, imo potius abusivum, aut divinæ legis, velint, nolint principes fidelibus observandæ custodiam in arbitrium hominis conferamus. Quantalibet enim potestas divinitus ordinata minor est eo, qui instituit eam, et impænitentibus peccata dimitti non posse perspicui et perpetui juris est. Et si res ablata ab eo, qui solvendo est, non reddatur, constat poenitentiae veritatem non exhiberi, sed exerceri figmentum malitiæ mendacio palliatæ, aut, ut verius dictum sit, bis pollutæ. Error siquidem pristinus perseverat, et nova fraude calcatus cumulat. Cætera supplebit nuntius, quem et petitiones, quas per eum domino papæ porrigimus, paternitati vestræ desideramus attentius commendari et promoveri.

EPISTOLA XLIX.

AD HYACINTHUM DIACONUM.

THOMAS Cantuariensis archiepiscopus, HYACINTHO cardinali diacono, salutem et cum summa devotione reverentiam.

Inundaverunt mala super capita nostra, contumellis et injuriis supra modum afficimur, saturati sumus opprobriis: et qui insurgunt in nos forte vivos deglutissent nos, nisi quia ad summi consilii angelum et sanctam Romanam Ecclesiam confugimus, in qua post Deum spei nostræ summa consistit, a qua si, quod Deus avertat, ceciderimus, omni consilio destituti, quid nobis agendum sit, penitus ignoramus. Ut igitur eorum, quæ patimur,

A seriem plenius cognoscatis, mittimus ad vos magistrum Henricum, fidelem et familiarem nostrum et vestrum, ex cujus relatione status nostri miseriam pendere poteritis. Et, si placet, credite ei in his, quæ ex parte nostra vobis dixerit, tanquam si ex ore nostro audiretis. Non differat, quæso, vestra discretio suum nobis aperire consilium, quoniam in arcto positi sumus, et a vobis, in quo maximam habemus fiduciam, tanquam amico nostro præcipuo et patrono, solatium expectamus. Valeat, et compatiatur nobis sanctitas vestra.

EPISTOLA L.

AD EUNDEM.

THOMAS Cantuariensis archiepiscopus, HYACINTHO diacono cardinali.

Ecclesiam Anglorum et nos posuimus in manibus vestris, ut profectus noster ad vestram, de cujus ope nitimur, gloriam rectissime referatur, et desolatio nostra ad vestrum spectet dispendium, qui nos et nostræ vestræ affectione promptissima devovimus voluntati. Persecutores Ecclesiæ eatenus in malitia processerunt, ut ultra progredi nequeant, sed velint, nolint deficient in se ipsis, nisi eis Ecclesia Romana in perniciem suam dederit vires. Fulmina eorum in tonitrua convertentur, et turbo ventositatis hujus facile solvetur imbre. In brevi futurum est, auctore Deo, ut viceritis, dummodo citam et certam possitis expectare victoriam. Mementote Pompæi vestri, quem Cæsar itidem vester insuperabilem esse dicebat, si tam bene sciret vincere, quam bene noverat pugnare. Egerat primo rex Angliæ, ut ad sedem apostolicam nulla fieret appellatio, suam schismatis cum schismaticis posuit portionem ministerio, imo perjurio Joannis de Oxeneford, qui nunc vestris audet apparere conspectibus; sed eo nunc perductus est, ut coactus sit confugere ad sedem Petri, et domini papæ invocare nomen, quod ante inhibuerat invocari. Et quidem ad Ecclesiam Romanam recte confugeret, si declinaret injuriam, non inferret; si devotionem præstaret Ecclesiæ, et non ipsius quæreret subversionem; si non plus noceret fictas amicitias et falsum spondens obsequium, quam nocuerit manifestum professus inimicum. Ecce dulcissime Pater et Domine, modo apparebit, qui viri sitis. D Reducite ad mentem, quoniam

*Fistula dulce canit, volucrum dum decipit auceps:
Ne vos decipiant animi sub vulpe latentes.*

Si quid unquam vestri contemplatione compendii in dispendium Ecclesiæ feceritis ad preces ejus vel munera, ipsemet in confusionem vestram, et apostolicæ sedis opprobrium, more suo præconabitur istud, et quod nunc sæpe et multis dicere consuevit, scilicet omnia Romæ esse venalia, tunc passim prædicari faciet super tecta. Utinam solus audissetis, quæ locutus sit de legatis illis quos recepit et etiam de illo quem simulat se amare, et quem denuo dicitur petisse legatum! Solus, inquam, ut probra solutioris linguæ stultorum et credulorum

non infecissent aures. Benigne, si placet, suscipite nuntios nostros, per quos cetera audietis. Et compatiimini sacerdoti, quem post illam, quam dicunt, appellationem capi violenter fecit, et coniecit in carcerem, cum postea non debuisset contra nos aut nostros aliquid innovare, si appellati sumus, imo qui eo præsente appellavimus, et jam biennio expectantes sententiam postulamus. Advertite qualiter ecclesias possessionibus et libertate spoliaverit, qua immanitate nos persequatur et nostros pro libertate Ecclesiæ, pro fidelitate sedis apostolicæ patientes, et paratos pati adhuc pro viribus, quas nobis Deus contulit. Presbyter, clericus Willelmi Papiensis, nuper promisit regi Angliæ, quod ad voluntatem ejus definiat dominus suus causam istam, accepta legatione. Sed certum sit, quod nos nec personam nostram nec causam Ecclesiæ credemus ei, cujus affectionem ad nos et regem pridem satis experti sumus. De vultu domini papæ judicium istud prodicit, cui Ecclesiæ stat aut cadit. Stabit autem per misericordiam Dei, et auxilium et consilium vestrum.

EPISTOLA LI.

AD EUNDEM.

THOMAS Cantuariensis archiepiscopus, HYACINTHO cardinali.

Quanto magis de vestræ sinceritatis dilectione confidimus, tanto confidentius in negotiis nobis et ecclesiæ nobis commissæ emergentibus ad vos, sicut ad unicum et extremum suffragium recurrimus. Inde est, quod de vobis, sicut de amico specialiter dilecto, indubitam obtinentes fiduciam sinceritatis dilectionis vestræ ad memoriam reducimus, vos dignanter nos et ecclesiam nostram, imo vestram potius, sub vestra protectione admisisse, dignitates cujus et jura illibata servare nunc temporis necessarium est, et plurimum nobis et vobis expedit operum exhibitione demonstrare. Exhibitio enim operis, probatio est dilectionis. Nos igitur dilectionem vestram modis quibus possumus attentius exoramus, quatenus dignitates, libertates, et jura Ecclesiæ nostræ intacta et illibata conservari, studio et prudentia vestra sollicite procuretis. Sed de his hacenus.

Ecce, domine mi, litteras domini Papiensis, quas in initio adventus sui, non penitus pompositatis gloria carentes, nobis destinavit, has equidem poteritis inspicere, nec eas, ut credimus, nota cujusdam jactantiæ invenietis omnino carere. Ejus vero adventum sperabamus nobis consolationem conferre et pacem qui potius nobis contulit desolationis augmentum, quam consolationis auxilium. Jactitat enim dominum papam ipsum in terram regis Angliæ misisse principaliter ad terminandas quæstiones, quæ inter nos et regem vertuntur, sicut Ecclesiæ Dei viderit magis expedire. Non credebamus, nec penes curiam Romanam hoc promeruimus, ut ipsius subjiceremur arbitrii judicio, quem curiæ universitas nobiscum pariter bene novit nostrum esse inimicum et ecclesiæ nostræ, necnon et hostem plusquam manifestum. Sed nos ut vobis veraciter dicimus ipsius in æter-

num declinabimus judicium. De cetero omnem in vobis spem et fiduciam nostram secundo post Deum ipsum penitus projicimus, attentius rogantes, ut cum per eum pacem et reconciliationem aliquam nullatenus speremus, sollicitudinem prudentiæ vestræ ita efficaciter adversus eum apud dominum papam exhibeatis, quatenus personis, tam cisnariis, quam transmarinis, litteris suis firmiter præcipiat, et in virtute obedientiæ injungat, ut sententiam quam in regem et terram ipsius rationabiliter promulgabimus, firmiter teneant et observent. Præterea partes vestras diligentius interponatis, ut confirmationem primatiæ nostræ, quam in primo adventu nostro Senonis dominus papa nobis concessit, per vos obtineamus. Valete et memores esote nostri, B sicut sumus et vestri, et latorem præsentium, quanto maturius poteritis, et expedire, et ad nos transmittere, ecclesiæ statum, domini papæ, et vestrum nobis significantes, procuretis. Iterum valete.

EPISTOLA LII.

AD EUNDEM.

THOMAS Cantuariensis archiepiscopus, HYACINTHO cardinali.

Interemptorum pro causa Domini et Ecclesiæ libertate sanguis clamat ad Dominum; et miseri, qui residui sunt, omnes ad sanitatis vestræ confugiunt pedes in miseriis istis. Quot et quanta ab impiis Anglicana Ecclesia toto quinquennio isto pertulerit, soli illi noverint, qui experti suffi, quorum primus ego cum miseris coexsulibus meis proscriptis Christi Jesu. Ipse, cujus expugnatur hæreditas, lex conculcatur, profanantur sancta, sic causæ suæ cito propitius adsit, sicut conscientia meæ fidelissimus testis assistit, et pro innocentibus contra persecutores et oppressores eorum, quam promisi, ferat sententiam. Commonitus est rex Anglorum per litteras, per nuntios, per abbates, per episcopos, per subdiaconos curiæ Romanæ, per cardinales, et nunc tandem quasi peremptorio edicto, per dominum Gratianum, et magistrum Vivianum, qui quatenus profecerint, referente domino Gratiano, qui fideliter, modeste, et in omni sinceritate in hoc negotio versatus est, et nunc festinat ad vos, potestis audire. Non enim D stetit per nos, quo minus pax reformaretur, sed per illum qui confidit in potentatu suo, in divitiis Ecclesiæ, cujus impune diripit spolia, in dolositate suorum, et familiaritate quorundam vestrorum, quos hactenus in perversitatibus protegendis habuit defensores. Nam quod mundus sentit, dolet, ingemiscit, nullus adeo iniquam causam ad Ecclesiam Romanam desert, quin ibi spe lucri concepta, ne dixerim odore sordium, adiutorem inveniat et patronum. Sed et hoc in monte Dominus videt, ante cujus tribunal citius omnes astabimus, de operibus et conscientis responsuri. In quo vero calculo nunc causa nostra resederit, si placet, audite: rex acquiescit, ut ego et mei redeamus ad nostram, domus scilicet vacuas, honorem Dei servaturi, salvis digni-

tatibus suis, quarum nomine pravas illas intelligit consuetudines, quas audistis, et quas constat lege divina et auctoritate Ecclesiæ Romanæ esse damnatas. Nos autem admittimus, ut salvo honore Dei et fidelitate Ecclesiæ Romanæ, regni valeant et vigeant dignitates, quæ sub mensura divini honoris cohibendæ sunt. Non enim ad illarum formam coarctandus est honor Dei. Sed ille non acquiescit, nisi absolute profiteamur sub religione juramenti observantiam dignitatum, quod nondum fecit nec minimus de populo terræ. Nec ad hoc alicubi arctatus est clerus, ut se vel sacros canones vel Evangelii mandata juret observaturum. Certe nec tutum esset, quia in multis offendimus omnes. Detrectat ablata restituere vel satisfacere, cum tamen et præfatis nuntiis domini papæ et aliis palam professus sit, quod de tempore cancellariæ non teneor illi. Hanc tamen detentionis injustæ præterdit rationem quod antecessores sui nostris, quos sæpe fugaverunt, redeuntibus nihil restituisse reperiuntur. Sed hoc falsum esse convincitur ex historiis, et attestatiōe vivorum.

Nunquid ergo cohibendus non est, qui majorum violentias et impietates usurpat pro lege? Utique si, quod absit! in isto prævaluerit, pessimum iniqui compendii cunctis gentibus, et sæculis relinquit exemplum. Releget ergo, et proscribat quot et quantos, et quandiu voluerit, et cum redierint, petitiones eorum hoc exemplo, imo jam lege excludet. Nam Deum testem invoco in animam meam, quod me magis movet perniciēs exempli, quam temporalium jactura rerum. Cum itaque novas et indebitas exigit obligationes, cum tam perversas sub nomine dignitatum vindicet consuetudines, non persuadeat vobis quispiam, quod ego pacis generem impedimentum, sed ille qui Dei subvertit legem et totam turbat Ecclesiam. Quidquid potero facere salvo ordine meo, et sine perniciē exempli, libenter faciam pro recuperanda gratia ejus, et pace mea. Sed absit, ut scilicet faciam contra Deum pro quiete momentanea, et non tam perituris quam pereuntibus bonis! Hæc diligentius scripsi paternitati vestræ plura tamen de necessariis, ne scripta fastidium generarent, in ore nuntiorum posita sunt, quos, si placet, ut consuevistis in benignitate recipite, et causam Ecclesiæ foveat ut vestram, quoniam Dei causa est. Et ego et parvuli mei sumus et erimus semper vestri.

Similiter domino Alberto presbytero cardinali.

Item domino Theodwino presbytero cardinali.

EPISTOLA LIII.

AD EUNDEM.

THOMAS Cantuariensis archiepiscopus, HYACINTHO cardinali.

Si laborantem agricolam oportet primum post red-
ditas Deo primitias edere, justissimum est, ut vestram
charitatem, quæ in sublevatione sanctæ Cantuarien-
sis Ecclesiæ fere jam pereuntis, plus et diutius jam

laboravit, et quod magis est, fidelius et efficacius,
laboris sui ab ea in omni gratiarum actione et ex-
hibitione obsequii percipere fructus. Nam cum alio-
rum amicorum fere omnium fides esset exinanita,
vos illorum animos a pusillanimitate in spem ere-
xistis, solidastis manus dissolutas, genua debilia ro-
borastis, et attentius auditor verbi, verus Christi
discipulus, consors apostoli, hæres Petri, fratres
vestros, qui ad cultum justitiæ, et patronatum Ec-
clesiæ præordinati erant, exemplo confirmastis et
verbo. Expetierat enim Satanas Ecclesiam Roma-
nam in tribulatione vestra, sicut et nostra, ut eam
eribraret sicut triticum, et suos probaret, et con-
vinceret infideles. Sed Christus de ipsa tentatione
proventum operatus est lætum, et utilem fidelibus
universis, sed vobis, qui alios superastis in fide, præ
cæteris gloriosum. Nos enim per gratiam Dei et ve-
stram, cum domino rege Anglorum fecimus pacem,
ad honorem Dei et Ecclesiæ, ut speramus, utilita-
tem, cujus formam lator præsentium vobis exponet,
quem desideramus vobis attentius commendari, et
petitiones, quas habet in manibus, qua consuevistis
industria, promoveri.

(Vide etiam epistolam, quæ incipit: Satis superque,
etc., ad Conradum et alios directam.)

EPISTOLA LIV.

AD JOANNEM CARDINALEM JOANNIS ET PAULI.

THOMAS Cantuariensis archiepiscopus, JOANNI car-
dinali Joannis et Pauli.

Discretionem vestræ non exstat incognitum, quanta
sinceritate fidei, obedientiæ devotione, et exhibitione
obsequiorum Cantuariensis Ecclesiæ præ cæteris om-
nibus totius insulæ nostræ sedi apostolicæ semper
adhæserit, nec ab ejus unquam, sive prosperorum
blanditiis, sive turbinibus adversorum, potuerit fide-
litate divelli. Hæc vestro solebat gaudere patrocini-
o, et a vobis decessoris nostri tempore in tribulatione
expectare solatium, et in opportunitatibus suis ve-
stro consilio instrui, et auxilio roborari. Vobis de-
vota erat, suisque connumerabat successibus, si da-
batur facultas obsequendi, si ex merito suo vobis
officiosa videbatur in aliquo. Nos quoque ipsi, qui
ejus, dignatione divina, licet indigni, gerimus admi-
nistrationem, sæpe, quod memori mente recolimus,
operam dedimus et diligentiam, ut vestræ voluntati
et vestrorum usibus serviretur: et utinam non exci-
disset a memoria vestra! Sed quia in hac parte vide-
tur obliuiosior, quam expediret nobis, rogamus ut sal-
tem fratri nostro, quem officii vestri non credimus
esse immemorem, credatis de nostra ad vos devo-
tione. Si autem vobis in persona nostra post ade-
ptum episcopatus gradum non servivimus, utique
nobis voluntas non defuit, sed facultas. Sperabamus
de vobis, præ multis, nostrum non auferentes, etsi
differentes obsequium. Deceveramus nos, quod dif-
ferebatur, cum accessione devotionis et obsequii
amico et domino benigne præstolanti multiplices
refusuros. Unde miramur supra modum, quis vos

ab amore Cantuariensis Ecclesiæ et protectione nostra averterit, præsertim in causa Dei, quæ si periclitaretur, quod absit: totius Anglicanæ Ecclesiæ libertas deperiret, Romanæ sedis auctoritas arceretur ab Anglia, et ad nutum regis procederent universa. Si voluissemus ei ab initio in consuetudinibus, quas petit, consentire, nec vestro nec alterius interventu ad ipsum indigeremus. Vos videritis, an ad verba juratoris insignis, cujus fraudes, Deo propitiante, detectæ sunt, tam cito fuerit recedendum ab amico, tam facile Cantuariensis Ecclesiæ contemnendum obsequium. Illa tamen nec sic repulsa et læsa recedet a vobis, neque nos, si placuerit vobis, a vestro desistemus obsequio, quin accepto tempore honori vestro et vestrorum studeamus devotius inservire. Hac itaque voluntate et conscientiæ securitate confisi rogamus attentius, quatenus Cantuariensem Ecclesiam se vobis offerentem non abiciatis, non deseratis causam Dei, quæ indubitanter est in manibus vestris, ne et vos deserat Deus, qui et de vobis, in quo iudicio judicaveritis, iudicabit. Experiatur nunc Cantuariensis Ecclesia veteris amici fidem, quia qui amicum in necessitate deserit, non illius amicus est, sed fortunæ. Unde vobis tanquam amico et domino fideli intimamus, quia non tantum vobis proderit illius juratoris et similium amicitias colere, quantum oberit, si Cantuariensis Ecclesiæ projiciatis obsequium. Nam servile ingenium est, quod duntaxat supplicis emendatur.

EPISTOLA LV.

AD EUNDEM.

Venerabili fratri, et utinam amico, domino JOANNI Neapolitano, Dei gratia sanctæ Romanæ Ecclesiæ presbytero cardinali, THOMAS eadem gratia Cantuariensis Ecclesiæ minister humilis, miser ac miserabilis exsul, salutem, et sic transire per bona temporalia, ut æterna non demereatur.

Verbum evangelicum est: *Qui non est mecum, contra me est, et qui non colligit mecum, dispergit.* Et nunc quidem quæ fuit unquam adversus sublimitatem vestram nostra iniquitas, quæ parvitas nostræ indevotio, ut non fieret nobis tempore tribulationis nostræ benigna vestra solertia, non faceret nobiscum vestra benevolentia, imo quod durius est, destititit aggravari manus vestra super exulis et proscripti importunitates ac molestias, non contuenerit opera vestra et industria semper accepto tempore miseri hominis augere miseriam? Non debuit certe talis testimonium conscientiæ fieri gloria vestra. Parcat itaque de cætero, si placet, parcat, quæso, et nunc tempus est ut parcat, cessetque indignatio vestra infortunati hominis exaggerare infortunium, et innocentiam lacerare. Nam et si quando fuim felix, pro modo temporis didici et nunc esse infelix, nec felicius est infelici, quam nosse sortem suam. Præterea quomodo unquam potuit a memoria vestra excidere, quod petitione domini regis Francorum in virgulto suo apud Au-

relianum, præsentem comite Theobaldo, suscepit nos vestra discretio de manu ipsius propria protegendum, ac de cætero fovendum adversus omnes homines, excepto domino papa? Quorsum evanuit ista susceptio? Non equidem credimus extunc temporis culpa ipsius regis aliqua excidisse, scimusque pro certo ex parte nostra nullum erga vos intercessisse delictum, quo debuerimus et gratiam vestram demeruisse, et promeruisse offensam. Hæc hactenus.

Cæterum ut veniamus ad rem, accedit Londoniensis cum multa acceleratione ad curiam, sicut dicitur, suavis a vobis, ut nemine de nostris ibi nuntiis invento, paucisque amicis, nunc blandis adulationibus, nunc promissionibus innumeris, nunc minis ac terroribus suis ac regis, ibi consequatur gratiam unde magis meruit recipere poenam, inde absolutionem extorqueat, unde magis meruit reportare condemnationem. Nec prætendat quisquam vestrum hanc esse sedem misericordiæ, quæ frequentius pietatis intuitu consuevit misereri peccantibus, quam corripere delinquentes. Verum respondemus vobis. quod dicit Scriptura: *Amant se iustitia et pax catenus, ut qui facit iustitiam, inventat pacem, et non aliter. Iustitia etenim et pax invicem osculatæ sunt.* Unum tamen est quod petimus super omnia, nunquam a mente vestra fieri alienum, quoniam semper protrahitur avaritia latentium indagatrix lucrorum, manifestæque prædæ avidissima vorago, neque habendi fructu felix, et cupiditate quærendi miserrima. Videte ergo, si placet, ne vos decipiat versuti hominis artificiosa malignitas, palliata religio, illicita curiositas, promissio vana, munera, quod absit, quæ excæcant oculos, et vim auctoritatis inclinant. Quorum finis interitus, quorum fructus pulvis et cinis, quæ exsufflata in ventum facile evanescent. Ne inhonesti lucri captura invitatus, scelus, quod vindicari debet in homine isto, auctoritate vestra tegatis.

Quid plura? Spiritus sanctus faciat vobiscum, ut ministerio vestro et confratrum vestrorum reveleetur filius perditionis, convertatur iniquitas ipsa in caput suum. Dissipet Deus consilium Achitophel, et statuat eum contra faciem suam, ut recipiat in curia ista quod gessit inique, et reportet inde quod dignum est, ubi solet et debet exeri gladius beati Petri ad vindictam malorum, laudem vero honorum. Quatenus sit inde gloria in celis coram Deo et angelis ejus, et fiat pax in terra bonæ voluntatis hominibus.

Valeat semel et semper vestra dilectio, ut inde sit melius nobis et miseris coexsulis nostris, præsertim in instanti negotio.

EPISTOLA LVI.

AD EUNDEM.

THOMAS Cantuariensis archiepiscopus, JOANNI Neapolitano cardinali titulo Joannis et Pauli.

Sancta Cantuariensis Ecclesia diu et familiariter et patrocínio vestro gavisa est; et adhuc in spæ vestræ miserationis et consolationis exsultat. Unde

ad aliorum dilectionis vestre fiducialius transmittit miseros suos, qui fratrum suorum pro fide et libertate Ecclesie interemptorum neci superstitis relictis sunt. Sanguis interemptorum clamat ad Dominum, adversus persecutores et oppressores Ecclesie, et utinam non contra me, et contra illos qui se nobiscum opposuisse debuerant pro legibus paternis et domo Domini. Audite, si placet, et intelligite a nuntiis, qui nuper missi sunt, quanta evidentia duplicitatis et pravitatis convicta sit duritia regis Anglorum, et in quibus finibus Ecclesie causa resederit. Nunc enim, ut semper, stetit per regem, quominus pax reformaretur. Ego enim quatenus potero, salvo ordine meo, et fidelitate Ecclesie Romanæ, dignitates ejus fovendas et augendas libens admitto, sed non aequiesco, ut nova et perniciosa fidelitatis forma exemplo mei in Ecclesiam inducatur. Ablata mihi et meis, aut satisfactionem omni jure repeto, ne pernicies exempli, si tam manifesta rapina irrequisita remaneat, variatur in legem, et tam posteris quam cunctis nostris præstet audaciam similiter delinquendi. Vos itaque, si placet, exsurgete in adiutorium jam fere deficientis Ecclesie, et persuadete domino papæ, et fratribus vestris, ne diutius tam manifestam injuriam Christi dissimulent, cui nobiscum sine personarum acceptione reddetis in brevi cunctorum operum rationem. Nam opportunitas sæpe, dum expectatur, elabatur. Et culpæ particeps est, qui quod potest corrigere, negligit emendare. Nuntii supplebunt cætera, quos si placet, pro Christo audiat in causa Christi. Et si forte Londoniensis episcopus et Gaufridus Ridel ad Ecclesiam Romanam venerint, eos velut antichristi membra tractate, qui jam mysterium iniquitatis suæ operatur in illis. Valeat sanctitas vestra.

EPISTOLA LVIII

AD EUNDEM.

THOMAS Cantuariensis archiepiscopus, JOANNI presbytero cardinali Neapolitano.

Fraternitatem vestram in Christo convenio, ut Anglicanæ Ecclesie assistatis pro Christo. Hoc enim mihi a vobis promissum indubitanter et gratanter recolo, quod mihi consilium, auxilium et patrocinium firmissime promisistis, ubicunque et contra quemcunque mihi iustitia suffragaretur. Nunc autem in quo calculo mea, imo Anglicanæ Ecclesie causa consistat, ex nuntiis domini papæ, domino Gratiano et magistro Viviano, et a venerabili Petro Carnotensi archidiacono potestis audire, et plane, si placuerit, cognoscetis quod non ego, sed rex et sui, more solito, pacis impedimento attulerunt. Nam dignitates ejus, quantum salvo ordine meo et fidelitate Ecclesie Romanæ licuerit, servare paratus sum et augere, sed novam et perniciosam fidelitatis formam in Ecclesiam, Deo propitio, nunquam inducam. Ablata quidem mihi et meis restitui, aut Ecclesie satisfieri peto, quia nunc auctore Deo constat, quod ex nulla, vel injusta causa resident penes ipsum.

A Nuntiis enim domini papæ, et pluribus aliis palam confessus est, quod de toto tempore cancellariæ nec pecuniæ nec administrationis illi debeo rationem. Agite ergo, si placet, ut tollatur exempli pernicies, quæ cœtaneos et posteros occupabit, si, quod absit! tam manifesta rapina et injuria Christi remanserit impunita. Jam enim convicta est duritia ejus, nec est quare debeat ulterius supportari, nisi qui fovet aut dissimulat errorem, in se ipsum alieni criminis provocet ultionem. Ego et coeules mei, imo Ecclesia Anglicana, pro ejus libertate persecutionem patimur, et proscripti variis torquemur injuriis, Deo de cætero committimus causam nostram, aut, ut rectius dixerim, suam, ut ipse, in ejus conspectu in brevi sine acceptione personarum, sine suffragio numerum stabimus reddituri de actibus et voluntatibus rationem, dijudicet inter nos, et persecutores et oppressores Ecclesie, et ad gloriam nominis sui promissionis, qua parvulos suos in præsentia corporis consolatus est, citius exhibeat veritatem. Interim de promissione vestra et charitate præsumens, affectuosius supplico, quatenus miseros nostros præsentium portitores benignius exaudiat, et causam Christi promoveatis pro Christo, si autem ad Ecclesiam Romanam venerint episcopus Londoniensis et Gaufridus Ridel, sic illos tractate, ut tractari debent, qui seminant inter fratres discordiam. Cantuariensis Ecclesia suum vobis præsentat obsequium, quod promptissima devotione vobis et vestris impendat, cum vestro patrocinio, quod speramus, eruta fuerit a tribulatione malorum et dolore.

EPISTOLA LVIII.

AD EUNDEM.

THOMAS Cantuariensis archiepiscopus, JOANNI cardinali titulo Joannis et Pauli.

Audivit Ecclesia Gallicana vos in causa Ecclesie Anglorum mutasse sententiam, ut a patrocinio persecutorum, quos per ignorantiam fovebatis, credendo his, qui spem suam mendacium posuerunt, vestra discretio præ cæteris transiret in consortium illorum, qui patroni fuerant veritatis. Audivit, inquam, et lætata est valde, quoniam hæc est mutatio dextere Excelsi et Ecclesie Dei ad libertatem, et nomini vestro proficiet ad gloriam sempiternam. Sermo gratus in auribus omnium, sed gratissimus nobis et Ecclesie Cantuariensi, quæ semper vestro consueverat gaudere patrocinio, et se vestram in gratiam rediisse lætatur. Justum est ergo, ut ad obsequium vestrum revertatur et cultum. Et nos propensio rem operam dabimus et diligentiam, ut vestris devotissime jussionibus obsequatur. Fuimus enim vestri, et vestri esse desideramus, prout quidem ad obsequium si rex Anglorum, quam corde gerimus, officiosam expedit voluntatem. Nec dubium, quin a persecutorum nostrorum, quo vobis noxiores fuerint, patrocinio desistatis, quoniam iniqui, avari sunt, et fabri mendaciorum: in omnibus negotiis circumvenientes amicos, et credulos sibi. Et cum eos deceperint aut

leserint, solvuntur in risum, et quasi de hostibus triumphantes, de sua sapientia glorientur. Valeat semper chara nobis in Domino vestra fraternitas. Valete.

EPISTOLA LIX.

AD MAINFREDUM.

THOMAS Cantuariensis archiepiscopus, MAINFREDO cardinali, qui captus fuerat apud Anconam.

Gratias agimus Deo, qui vos ad consolationem Ecclesie sue eripuit de ore Leonis, et de manu bestie liberavit, et de omni expectatione Cremensis hæresiarchæ, et Frederici, et totius plebeculæ schismaticorum. Sensimus, ut ex animi nostri sententia loquamur, absentie vestre damna, qui ad petitionem regis Angliæ, nostro non præcedente merito, suspensi sumus, diè restitutionis nostræ, ut jactitat, collata in arbitrium ejus. Domine mi, si fuissetis hic, vigor ecclesiasticus, ut spes est, non ita mortuus esset aut languidus, nec illi regi, nec complicibus suis, satellitibus Satanae, collata auctoritas in Ecclesiam interim debacchandi. Sed nunc certum est, quod his perversitatibus toto conatu, quoniam timetis Dominum, et diligitis decorem domus ejus, studebitis obviare. Placeat itaque dilectioni vestre impetrare a domino papa, ut suspensionem solvat, aut terminum coarctet, scribens regi Francorum et Ecclesie Gallicanæ patentibus litteris, quod nisi rex Anglorum juxta commotionem suam et comminationem nobis pacem, et ablata cum Ecclesie libertate restituat, exinde nos in eum et terram suam officii nostri potestate uti concedat, et sententiam, quam in malefactores Ecclesie et nostros tulerimus, ratam habendam esse decernat, et præcipiat ab omnibus terræ sue episcopis inviolabilem observari, donec satisfacere compellantur. Præterea precamur attentius, ut Ecclesie Cantuariensi in miserie sue solatium impetretis plenam reformationem primatus sui, ut præcipiatur archiepiscopo et Ecclesie Eboracensi, ut nobis obedientiam tanquam primati suo exhibeant. Cum enim ejusdem primatus per vos confirmationem obtinuerimus, honor erit vobis et gloria, si plenum robur obtineat confirmatio a vobis impetrata. Ut autem charitas vestra aliquod habeat tribulationis nostre solatium, noveritis, quod Christianissimus rex fortunam nostram reputat suam.

EPISTOLA LX.

AD OTTONEM TITULO SANCTI NICOLAI DE CARCERE TULLIANO DIACONUM.

THOMAS Cantuariensis archiepiscopus, OTTONI tit. S. Nicolai de carc. Tulliano diacono cardinali.

De vestre sinceritatis dilectione et fidei integritate multiplices vestre gratiarum actiones referimus, sicut ei de quo indubitanter confidimus, et quem inter amicos nostros nobis charissimum et præcipuum reputamus. Memores quidem existimus, quod litteris benignitatis vestre nobis multas grates retulistis; quia regem Francorum pro vobis ita diligenter interpellavimus, et quam potuimus ad negotium vestrum

effectui mancipandum operam adhibuimus. Indubitanter vero sciatis, quia penes regem et alios amicos nostros non solum in hoc, sed et in omnibus quæ poterimus, quantum divina gratia nobis indulerit, consilium et auxilium ad honorem vestrum efficaciter impendimus. Memoriter enim tenemus et semper tenebimus, quoniam ex quo nostri notitiam habuistis, propter regum amorem, aut principum favorem nullatenus nos voluistis deserere, aut pro alicujus emolumenti cupidine nos a dilectione vestra alienare. Sicut autem vobis per magistrum Papiensem significavimus, talis hora fuit, qua, ut litteras vestras reciperet, pro magnitudine pecuniæ regem nollens interpehasse, tum pro pudore quem habuimus, tum pro tergiversatione quam ex ipso rege perpendimus.

De eo quod causa legationis, vel sicut legatus terram suam ne ingrederemini vobis interdixit, fecit quod voluit, nec deberetis idcirco irasci, quia sicut discretio vestra melius novit, non mirum debet videri, si is qui facilis est in dicendo, facilis sit in mutando. De pace nostra faciendi non possumus non admirari, quæ protractu temporis videtur protelari, et juxta quorundam opinionem, quasi quodammodo enervari. Cujus rei causa dilectionem vestram propensius exoramus, quatenus ad eam reformandam inter nos et regem adeo diligentem et efficacem operam studeatis adhibere, ut ab omnipotenti Domino condignam possitis retributionem recipere, et nos de cætero efficacie vestre teneamur omni tempore obnoxiores permanere. Valeat sanctitas vestra in longa tempora.

EPISTOLA LXI.

AD EUMDEM.

THOMAS Cantuariensis archiepiscopus, OTTONI cardinali.

Audito adventu magnitudinis vestre, proscriptorum Christi coexulantium nobis exhilaratus est cœtus, et quasi ad consolationem Ecclesie et cleri liberationem de cœlo missus sit angelus, exultavit, et gratias egit omnis Ecclesia sanctorum. Et licet multis suspectus sit collega vester, dicentibus quod acceptor est personarum et munerum, et domini regis intimus fautor, ut ei velit in omnibus patrocinari, et nos, imo Ecclesiam Dei confodere, et jugulare spoliis nostris: nominis tamen vestri, virtutum rectius dixerim, clarescit opinio, ut angelum Domini cum Moyse, id est, Spiritum sanctum in lege prævium habeatis, qui custodiat vos semper, et Deum recentem habere non patiat, ut verbo Dei aut munus, aut personam præferatis, aut causam. Non est, inquit propheta, *Deus in conspectu ejus, inquinata sunt viæ ejus in omni tempore*. Unde et vos per vias mundas, et vias planas iturum esse Ecclesia Anglicana non ambigit; quia per vias rectas iter habiturum indubitanter confidit. Nec veretur, ne in prostitutionem justitiæ accipiat suppellectilem nostram, qui scitis, quod pecuniam sic acquisitam non

Iicet mittere in corbonam, quia pretium sanguinis est. Utique

Non habet eventus sordida præda bonos.

Insultant nobis quamplurimi, et præcipue nostri, imo Ecclesiæ adversarii, dicentes recte contra nos missum esse cardinalem Sancti Petri ad Vincula, ut ministerio ejus Petrus denno vinculetur, cum tamen ego interim credam, quod familiaritas, quam cum domino rege in nostra depressione contraxit, ad Ecclesiæ proficiet liberationem, et salutem regis, et gloriam Dei. Unum tamen est, quod plurimum veor, ne quis fratrum, de quibus Apostolus queritur, egrediens a facie Domini collectas pridem agrestes coloquintidas immisceat pulmentario prophetarum, ut sensum divinum agrestibus porcorum, id est voluptuose viventium, subruat cibis, et mentem legis imaginatio vitæ subvertere moliat. Sed cum ab uno de filiis prophetarum mortem esse in olla vir Dei audierit, farinam grani, quod pro nobis in terra mortuum est, ut multum fructum afferat, in ollam projiciet, ut innata malitia germen bonis de cætero nocere non possit. Ego vos arbitror virum Dei nobis a Domino destinatum, qui desolatam in Anglia lætificet Sunamitidem, et potentem Syrum curet a lepra, et Gieztas adherentes ei debita crimini condemnatione percellat. Si his amotis gloriosum nostrum regi revocaveritis, illico, ut spes est, poenitebit, fatebitur culpam, et humiliter satisfaciens Ecclesiæ restituet libertatem, et pacem, et nobis omnibus ablata cum integritate, securitate et gratia. Nec ultra contendet de conservandis consuetudinibus, quas, ut taceam damnationem, quam eis perpetuæ leges infligunt, dominus papa Senonis de unanimi fratrum consilio, vobis, ut opinor, audientibus, condemnavit, nec exigit juramenta, quæ salva fide et religione observari non possunt. Sed hæc vobis plenius innotescunt, cum episcopus videritis Balaamitas, non omnes dico, sed plurimos, qui vana vident et stulta, nec aperiunt unde ad poenitentiam debeat provocari. Ili contra nos, imo contra Ecclesiam loquuntur sedentes in porta, et psallit in nos etiam, qui non bibit vinum. Quia ergo in vos omnium oculi directi sunt, honori Dei et paci Ecclesiæ, si placet, insistite, et præscribite quid nos facere oporteat, ut Ecclesia Dei debita gaudeat libertate. Nihil enim est, quod salva conscientia et honestate fieri possit, quod non libentissime faciamus pro recuperando amore domini regis. Chaos inter nos firmatum est, ut nullus nostrum ad vos valeat pertransire, etiamsi velit, et sumptus habeat. Valeat semper dominus meus, et proscriptorum misereatur.

EPISTOLA LXII

AD EUMDEM.

Dominus Cantuariensis, OTTONI cardinali.

Gratias, non quas debemus, sed quantas interim possumus, agimus dilectioni vestræ, quæ pro nobis, imo pro Ecclesia Dei multa sustinuit, et nos pro viribus consolata est in omni tribulatione nostra. Con-

fessus est nuper rex Anglorum coram rege Christianissimo, archiepiscopis, episcopis, proceribus et omnibus qui aderant, quod nil aliud quærit aut quæsit a nobis nisi observantiam consuetudinum, quarum plures apostolicæ sedis convellunt majestatem et Ecclesiæ præjudicant libertati. Qualiter autem res processerit, latores presentium plenius indicabunt. Et quia nolumus in consuetudinum suarum verba simpliciter et absolute jurare, discessit indignatus, non sustinens honoris Dei vel ordinis nostri vel divini juris aliquam fieri mentionem. Supplicamus itaque bonitati vestræ de qua, sicut de nobis ipsis confidimus, quatenus nobis assistatis in causa Domini, et necessitatem nostram imo Ecclesiæ Dei, quam a nuntis audietis, sicut nostra et omnium spes est, apud dominum papam expedire studeatis.

AD SABINUM EPISCOPUM.

(*Vide epistolam ad Conradum Moguntinum et alios directam, quæ incipit: Satis superque, etc.*)

EPISTOLA LXIII.

AD THEODWINUM.

Interemptorum pro causa Domini, etc. (*Scripsit est epistolæ quam ad Hyacinthum cardinalem direxit.*)
(*Vide etiam epistolam aliam quæ incipit Ecclesiæ mol., etc., ad Albertum et Theodwinum missam.*)

EPISTOLA LXIV.

AD WILLELMUM PAPIENSEM.

THOMAS Cantuariensis archiepiscopus WILLELMO Papiensi salutem et contra principum insolentiam fortitudinem.

Litteras celsitudinis vestræ nuper accepimus, speciem mellis in initio propinantes, venenum in medio, oleum in fine. In quibus continetur vos ad partes istas nunc temporis descendisse ad terminandas quæstiones inter dominum regem Angliæ et nos, prout expedire videbitis. Non credimus vos ad hæc venisse, nec certe vos ad hoc suscipimus, multis ex causis, quas loco et tempore opportuno manifestabimus. Verumtamen si quid boni et pacis per manum vestram nobis acciderit, Deo gratias et vobis. Valeat celsitudo vestra, ut inde nobis sit melius.

EPISTOLA LXV.

AD EUMDEM.

Venerabili domino, et amico de meritis diligendo WILLELMO, Dei gratia tituli Sancti Petri ad Vincula presbytero cardinali, et apostolicæ sedis legato, THOMAS eadem gratia Cantuariensis Ecclesiæ minister humilis, salutem, et contra principum insolentiam fortitudinem

Gratias habemus dilectioni vestræ, quod litteris celsitudinis vestræ parvitatem nostram nuntandem visitare dignatus estis, quæ quidem ex præsentis temporis statu pensatur a multis, non ex præterito. quam Deus in tuturo de misericordia sua, cum voluerit, et dignum judicaverit, erigere poterit in meliorem. Quod dicitis, sicut videtur multis, vos in varia proposita circa dilectionem nostram esse distractum, hoc factum fuisse utilitatis nostræ causæ ne haberemini suspectus a rege, quo minus fieret

devotus Romanæ Ecclesiæ, minusque benignus ad faciendam nobiscum pacem, novit Deus, qui inspector est cordium, ipseque rei manifestabit effectus. Si vero nunc temporis descendistis in terram suam, prout litterarumstrarum habet continentia. ad decidendas quæstiones, quæ inter nos et ipsum vertuntur, sicut magis expedire videritis Ecclesiæ, hoc certe possibile est. Verumtamen credimus nos pro certo nosse, ad quid veneritis, et ad quid debeamus suscipere. Unde est quod discretionem vestram quam plurimum exhortatam cupimus esse in Domino, ut sic vos in hoc negotio habeatis, ut inde sit honor Deo, relevamen Ecclesiæ, gloria vobis in populo et gente. Si vero aliquid boni et pacis nobis et Anglicanæ Ecclesiæ per operam vestram et industriam acciderit, gratias Deo, et vestræ sollicitudini. Et utinam pio compassionis attendatis affectu, quanta nos et Ecclesia Anglicana sustinuerimus gravamina, et adhuc sustineamus, quantumque lædatur universalis Ecclesia in nostro gravamine. Ad hoc quidem negotium universorum respiciunt oculi, ipsiusque finem exspectant, in quo vel sumet sibi cornua principum insolentia, vel quod dignius est, sustinebit defectum. Et utinam magis patiaturs defectum, quam ex adventu vestro resumat vires. Valete, et ut nobis sit melius et Ecclesiæ, valete semper.

EPISTOLA LXVI.

AD EUNDEM.

Venerabili domino et fratri in Christo charissimo WILLELMO, Dei gratia tituli Sancti Petri ad Vincula presbytero cardinali, et apostolicæ sedis legato, THOMAS eadem gratia Cantuariensis Ecclesiæ minister humilis, salutem, et contra principum insolentiam animi fortitudinem.

Ex litterarumstrarum tenore perpendimus et vos illustrissimi domini nostri regis Francorum meram obtinuisse gratiam, et oblenta gaudere. Quod quidem gratum habemus et tenemus acceptum, eoque amplius, quod in hac parte nec instantia vestra, et aliorum amicorum nostrorum frustrati sumus, et quod petebamus, nostrum successit ad votum. Unde sicut sua residet in animo nostro gratia grata, petimus ob ipsius amorem et reverentiam, cuius, sicut dicitis, circa nos et negotium nostrum sollicitudo non modica est, quod retribuat ei, qui facere potest, bonorum retributor altissimus. Sit nobis vestra gratior impensa, quam quidem, etsi a multis retro temporibus affectuose affectavimus, nunc pro certo domini Carnotensis, et magistri P..... Papiensis interventu effectuosius imploramus, ut gaudere debeamus de impetrata, et sentiat Ecclesia, quæ nobiscum vexatur nimis injuriose, et nos cum ipsa de benevolentia vestra provectum, et ex propectu recipiamus quod justum est. Scimus equidem et firmum tenemus, quoniam sicut paria delicta mutua compensatione abolentur, sic vicissitudines gratiarum devotione mutua connectuntur. Satis credimus dictum esse

A sapienti. Præterea de pace futura, cuius spes melior vobis promittitur, omnipotenti Deo, dummodo fiat Ecclesiæ comodo et nostro. Quod utinam altius attendatis, et animis vestris inseratis argutius, errantes ne vana spe deludamini, et falsis promissionibus sollicitudo vestra evacuetur. Revera verum est, quoniam sapiens dissimulat in tempus. Sed proverbialiter dicitur: *Dum exspectatur tempus, fugit, labitur e manibus, nec redit ad votum.* Et medicus: *Dum dolet, accipe.* Ego vero dico vobis, quod opto non facile transeat aures nostras, nec lubricè labatur ab animo vestro, fortunam præsentem, quæ nuda vestris paret conspectibus, pressis manibus tenete utimini ea pro tempore, lubrica enim est, nec invita teneri potest. Hæc hactenus. B Cæterum de adventu vestro Parisiis triduo ante, si placet, nobis renuntiate, ut si forte equitaturas invenire poterimus, quæ apud nos hoc tempore propter guerram tenuiter habentur, discretionis vestræ loco congruo occurramus, et fruamur desiderato colloquio vestro. Sin autem, quod absit! mittamus vobis aliquem familiarium nostrorum, qui reddunt nobis statum vestrum, et quo divertere disponatis. Valete nostri non immemor, ut melius sit inde nobis et miseris nostris.

EPISTOLA LXVII.

AD EUNDEM.

Venerabili domino et fratri WILLELMO, Dei gratia sanctæ Romanæ Ecclesiæ cardinali presbytero, THOMAS eadem gratia Cantuariensis Ecclesiæ minister humilis, ac miserabilis exsul, salutem, et sic agere ut vivat in Domino.

Non credebam me tibi venalem proponendum emptoribus, ut de sanguine meo comparares tibi compendium de pretio iniquitatis, faciens tibi nomen et gloriam. Alias tibi curandus esset provenus, si non status tui nimis periculosi oblitus, fortunæ ludibria pensares dissimiliter. Sed forte ut id ageres efficacius, fortunam meam præsentem in consilio habuisti, cuius dum tristitia spectas, lætiora quandoque sperare debueras. Alternæ enim sunt rerum vicissitudines, et sicut de successibus prosperis lapsus est facilis, sic et in contrarium. Nec prudentiam tuam latere credo, licet hoc experimento non senseris, nihil esse tam firmum, cui non sit periculum e vicino, sic et versa vice. Hæc idcirco tibi scribo, ut subitos fortunæ casus diligentius de cætero examines, examinatos observes, observatis indulgeas. His certe casibus exponenda non fuerat Petri navicula, quæ, etsi sæpius concuti, convelli non novit; quæ, etsi pluries facta fluctibus, non submersa consurgit. Hujus itaque si veri piscatoris, si optimi gubernatoris verus vis esse discipulus, nauta bonus, sicut serenitatis gratiam multoties tibi fecit aura serena, sic impetuoso turbini, invalescenti tempestate omnes ingenii tui vires, teipsum etiam animo forti sub omni discrimine opposuisse debueras. Si enim de manu ejus

gratanter suscepisti pacifica, cur non patienter tolerabis adversa, forte ad momentum expiratura? Sic et magister ille Petrus Princeps apostolorum resistendo principibus, non cedendo, sed dissipando pacem iniquitatis sanguine suo, nomen meruit in terris, et in cœlis gloriam. Sic crevit vigor Ecclesie, cum crederetur exstingui. Hæc etiam in summa tibi opto, sic agas feliciter, ut vivas in Domino. Vale, ut ei inde melius valeam.

EPISTOLA LXVIII.

AD EUNDEM.

THOMAS Cantuariensis, WILLELMO Papiensi.

Festinat ad reditum dominus Gratiarius, qui cum magistro Viviano ad hoc destinatus est ad regem Anglorum, sicut indubitanter accepimus, ut duritia ejus, si nobis pacem non reformaret, manifestius convinceretur. Qualiter autem in negotio processum sit, ex nuntiis referentibus, auctore Deo, plenius audieritis, et si placet, magistrum Petrum Carnotensem archidiaconum, virum quidem litteris et honestate conspicuum, interrogate; quoniam et ipse mansuetudinem et modestiam præfati regis expertus est, et qua devotione Romanam veneretur Ecclesiam. Sed et vos ipsi præsentibus audistis et vidistis, quomodo premit Ecclesiam, et mores hominis rerum experientia familiaris didicistis. Quid ergo amplius ad convincendam duritiam ejus pro Ecclesia desideratis testes? Ipsi enim, prout credimus, ab ore hominis audistis, et operis publicatione, ut speramus de vobis, inviti vidistis blasphemiam. Unde ad serenitatis vestræ patrociniū fiducialius recurrit misera Ecclesia Anglicana, supplicans ut ei feratis opem, ne in hac tribulatione deficiat. Reducite, si placet, ad animum, quomodo me et causam Ecclesie receperitis de manu Christianissimi regis Francorum, qui superstitibus miseris nostros secure confugere præcepit ad pedes elementæ vestræ. Nam magna pars proscriptorum Christi, pro fide et libertate Ecclesie agonizantium, de mundo sublata est, et apud Patrem misericordiarum sanguinis sui, qui injuste effusus est, implorat ultionem. Illa, ut confidimus, assistit vultui Dei, nos qui residui sumus, adventum aut vocationem Domini præstolantes, interim quanta possumus supplicatione clamamus ad vos, ut vestra intercedente industria justitiam suam Ecclesia consequatur et pacem. Quanam juris consequentia residebunt apud regem sine satisfactione impune bona Ecclesie, quæ diripuit, cum ille, sicut nuntiis domini, papæ et pluribus aliis palam confessus est, de toto tempore cancellariæ, cujus aliquando simulabat debere rationes, nunc nihil exigat, sed hoc prætendat, quod sui meis antecessoribus, quos sæpe fugaverunt, nihil redeuntibus reddiderunt. Hoc tamen, ut pace ejus dictum sit, ex multis rationibus constat non esse verum. Sed ne perniciēs exempli vertatur in legem, omnibus modis occurrendum est. Nomine dignitatum damnatas nititur consuetudines instaurare. Sed ut

A omnem pravæ suspicionis occasionem a me amoveam, quatenus potero, salvo ordine meo et fidelitate Ecclesie Romanæ dignitates ejus libenter observabo, et eas in Domino multiplicare curabo et augere. Sed absit, ut exemplo mei nova faciendæ fidelitatis forma in Ecclesiam inducatur, præsertim pernicioſa! Nec vos latere creditur, quanta me immanitate persecutus sit Londoniensis episcopus, totius hujus discordiæ incensor, cui, si placet, tanquam inobedienti et excommunicato vos pro domo Domini opponatis, quoniam in depressione illius et Gaudredi Ridel, ut spes fidelium est, cessabit tempestas. Cætera posita sunt in ore nuntiorum, quos, si placet, benigne recipite, et causam Christi, quam portant pro Christo, promovete. Valeat sanctitas vestra.

EPISTOLA LXIX.

AD EUNDEM.

Venerabili domino et Patri charissimo WILLELMO, Dei gratia S. R. E. presbytero cardinali, THOMAS eadem gratia Cantuariensis Ecclesie humilis minister, salutem, et sinceræ devotionis obsequium.

Nobis in aure sanctitatis vestræ verba multiplicare non expedit, cum sinceritas vestra prona sit in patrociniū veritatis, et malitia partis adversæ latere nequeat ante oculos sapientis, et ignominiosum reputet charitas amicum pro libertate Ecclesie diutius afflictum consolatione debita non recreare. Hæc de vobis est fiducia Christianissimi regis, hæc nostra, qui per ipsum rediimus in gratiam vestram. Hæc spes fidelium prædicantium gloriam nominis vestri. Hæc igitur animati et roborati supplicamus attentius, quatenus juxta quod promissistis domino regi Francorum, viriliter exurgatis in auxilium Ecclesie et nostrum, et ecclesiasticæ libertatis et apostolicæ sedis hostes data divinitus sapientia conteratis. Facile enim est, si Romana Ecclesia jam paratam decreverit acceptare victoriam, ut fugiant et dispereant inimici a facie ejus. Nam territi latebras quærunt, et nesciunt quo se vertant.

EPISTOLA LXX.

AD EUNDEM.

THOMAS Cantuariensis archiepiscopus WILLELMO Papiensi cardinali.

Veritas obumbrari quidem, sed exstingui non potest, et lux post tenebrarum molestias gratius accipitur. Utinam et vobis ab initio constituisset, quod nunc ex ipsius persecutoris nostri testimonio omnibus notum est! Nuper enim coram rege Christianissimo, archiepiscopis, episcopis, comitibus, proceribus, et omnibus qui aderant, publice professus est hanc solam esse causam exsilii et proscriptionis nostræ, quod nolebamus ei consuetudines observare, quas antecessores nostri consueverant decessoribus ejus. Adjecit etiam constanter, quod nihil aliud quidquam quærebat a nobis, nisi ut hoc simpliciter et absolute promitteremus ei in verbo veritatis, ita scilicet, ut non adjiceremus: *Salvo ordine nostro, vel*

honore Dei, vel aliquid eorum, quæ honestatis et conscientię possent incolumitatem tueri. Et quia nolumus absolute promittere consuetudines, quarum aliqua sedis apostolicę auctoritatem evacuant, et Ecclesię perimunt libertatem, discessit rex pace infecta. Supplicamus itaque dilectioni vestrę, quatenus patrocinium Cantuariensis Ecclesię, imo iustitię indefatigatę suscipiatis. Et sicut nobis benignitas vestra promisit in discessu vestro, pro libertate Ecclesię et persona nostra, qui ad obsequium prompti sumus, stare, ut decet honestatem vestram, non gravemini, sed et opponatis vos his, quos veritati et iustitię constat hactenus fuisse oppositos, et nuntiis nostris in his, quę vobis ex parte nostra proposuerint, indubitanter credatis.

EPISTOLA LXXI.

AD EUMDEM.

THOMAS Cantuariensis archiepiscopus, WILLELMO Papiensi.

Iustum est, ut Ecclesia Cantuariensis, quę post Deum vestra et paucorum amicorum industria et labore venit ad portum, vobis et vestris in omni devotione et exhibitione obsequii se obnoxiam recognoscat. Nam inter præcipuos et primos amicos et dominos vobis ascripsimus, quod Dei præeunte auxilio erepta est a tribulatione malorum et dolore. Transistis pro ea maria, penetrastis et superastis Alpes, in partibus nostris pugnastis ad bestias, et in ipsa curia, ubi validius et acrius expugnabamur, sæpe et diu portastis pondus diei et æstus; et tandem quia labor vester erat in Domino, sapienter et viriliter triumphastis. Sensimus hoc nuper in concordia, quam inivimus cum domino rege Anglię, cuius formam, si placet, a latore præsentium audiat, et petitiones, quas per eum domino papę porrigimus, solita bonitate promoveatis, habeatisque hominem attentius commendatum.

EPISTOLA LXXII.

AD UNIVERSOS ECCLESIE FILIOS. CHARTA PROTECTIONIS ET LIBERTATIS ECCLESIE CHRISTI CANTUARIENSIS CONCESSA.

THOMAS Dei gratia Cantuariensis archiepiscopus et apostolicę sedis legatus, omnibus ad quos præsens scriptum pervenerit, salutem et benedictionem.

Præteritorum casus temporum idcirco litterarum memorię commendantur, ut per transacta mala vel præsentia futura cautius valeant evitari. Ad omnium igitur notitiam volumus pervenire, quod sancta Cantuariensis Ecclesia, a cuius uberibus coaluimus, quę nos auctore Deo, licet indignos, in id quod sumus promovit, in odium capitis nostri, multis calamitatibus et anxietatibus variis usque in septennium pressa est, quod fere tota novit Latinitas, et adhuc minis et damnis innumeris quotidie fatigatur. Quę cum sol esse soleat occidentis, et in nostris temporibus ejus offuscata est charitas, quodlibet tormentum, sed etiam mille mortis genera, si tot occurrerent, li-

berius exciperemus in Domino, quam sustineremus sub dissimulatione his diebus mala quę patitur. Nos itaque, licet parati sumus pro pace illius et indemnitate caput et corpus persecutoribus exponere, et ne pereat vel quid modicum perdat, perire, quidquid de nobis contingat, indemnitati tamen ipsius in futurum prospicere volentes, ipsam Ecclesiam cum omnibus personis, terris et tenementis suis, pertinentiis et proventibus, libertatibus quonque et dignitatibus suis, sub Dei protectione et curię Romanę et nostra ponimus, prohibentes ex parte Dei, sub perpetuo etiam anathemate, ne quis iura Cantuariensis Ecclesię absque consensu totius capituli monachorum Cantuariensis, aliquo integumento vel causa alienare præsumat. A sæculis enim inauditum est, quod aliquis Cantuariensem Ecclesiam læserit, et non sit contritus vel correctus a Christo Domino. Raptores igitur et alienatores possessionum, dignitatum et rerum, et detentores, consentaneos quoque et participes, et quicunque secreta capituli malitiose revelaverit alicui hominum, usque ad condignam satisfactionem perpetuo anathemate condemnamus, nec volumus pati ut aliquis alterius professionis vel ordinis secretis capituli misceatur. Ea quoque specialiter, quę ad dilectos filios nostros monachos ejusdem Ecclesię pertinent, videlicet: villas, possessiones, earumdemque villarum et possessionum ecclesias et exenia cum pertinentiis et proventibus, sicut in suis continetur munimentis, iis in perpetuum confirmamus. Officialium quoque suorum et servientium ponendi vel amovendi, omniumque quę ad eos pertinent, tam intus quaz, extra, liberam concedimus et confirmamus in perpetuum disponendi libertatem, sicut iis melius et utilius visum fuerit de communi consilio capituli sui. Quatenus, sicut easdem habemus in possessionibus nostris, secundum chartas regum, libertates, similem habeant in portionibus potestatem, salva nobis et successoribus nostris regulari disciplina.

Adjicimus ad hæc auctoritate qua fungimur, et indulgemus, ut in malefactores Ecclesię, si semel et secundo commoniti noluerint emendari, suspensionis, excommunicationis et anathematis ferant sententiam. Et ut liceat iis omni tempore contra omnia gravamina sedem apostolicam appellare. Et, quia minantur adversarii quod sedem metropolitanam vel primatis Anglię, quę a tempore beati Gregorii per sanctum Augustinum in Cantuaria statuta est, alias velint transferre, sub perpetuo prohibemus anathemate, ne quis hominum aliquo integumento vel causa unquam hoc attentare præsumat. Prohibemus etiam ne episcopi Cantuariensis Ecclesię suffraganei, vel abbates alibi consecrentur quam in Ecclesia Cantuariensi, cui tenentur ex professione et debita subjectione, nisi de communi consensu totius capituli monachorum Cantuariensium, nec chrisma vel oleum per Cantuariensem provinciam dividendum aliunde quam ab Ecclesia Cantuariensi, aliquo tempore percipiatur. Volumus etiam et obsecramus.

Ad gravamina sedem apostolicam appellare. Et, quia minantur adversarii quod sedem metropolitanam vel primatis Anglię, quę a tempore beati Gregorii per sanctum Augustinum in Cantuaria statuta est, alias velint transferre, sub perpetuo prohibemus anathemate, ne quis hominum aliquo integumento vel causa unquam hoc attentare præsumat. Prohibemus etiam ne episcopi Cantuariensis Ecclesię suffraganei, vel abbates alibi consecrentur quam in Ecclesia Cantuariensi, cui tenentur ex professione et debita subjectione, nisi de communi consensu totius capituli monachorum Cantuariensium, nec chrisma vel oleum per Cantuariensem provinciam dividendum aliunde quam ab Ecclesia Cantuariensi, aliquo tempore percipiatur. Volumus etiam et obsecramus.

in Domino, ut monachi Cantuariensis Ecclesiæ A suffraganeis ejusdem Ecclesiæ, episcopis, scilicet et abbatibus, omnem reverentiam exhibeant et honorem. Ipsi quoque episcopi monachos Cantuariensis Ecclesiæ in vera quæ Deus est diligant charitate. Dignum siquidem est et consonum rationi, ut qui eidem Ecclesiæ Cantuariensi debita tenentur ex professione simul et subjectione, veram adinvicem observare debeant dilectionem, salva nobis et successoribus nostris debita reverentia et auctoritate. Clericis quoque et laicis, qui coexules nostri facti sunt et participes laboris, omnia jura sua, redditus et ecclesias confirmamus et obsecramus in Domino, ne quis iis injuriam vel molestiam faciat. Si quis autem hominum hujus nostræ confirmationis paginam infringere vel Ecclesiam Cantuariensem in aliquo vexare vel diminuire voluerit, vel dilectis illis nostris, monachis aliquam inferre voluerit molestiam, æternam Dei et nostram habeat maledictionem, nisi ante mortem cum restitutione ablatorum condignam fecerit restitutionem. Omnibus autem diligentibus et foveantibus eam, Dei Omnipotentis optamus gratiam et sanctorum omnium, qui in Ecclesia Cantuariensi requiescunt societatem et nostram donamus benedictionem. Amen!

EPISTOLA LXXIII.

AD SUFFRAGANEOS CANTIÆ PROVINCIÆ.

THOMAS Dei gratia Cantuariensis Ecclesiæ minister humilis venerabilibus fratribus suis, Londoniensi, cæterisque totius Cantiae provincie episcopis, sic transire per bona temporalia, ut non amittant æterna.

Fratres mei dilectissimi, quare non consurgitis mihi adversus malignantes? Uiquid non statis mecum adversus operantes iniquitatem? An ignoratis quoniam dissipabit Dominus ossa eorum qui hominibus placent? Confundentur, quoniam Dominus sprexit eos. Satis novit discretio vestra, quoniam error, cui non resistitur, approbatur: et veritas, cum minime defensatur, opprimitur. Videturque, testante Gregorio, consentire errori, qui ad rescanda, quæ corrigi debent, non occurrit. Inde est quod dominum regem Angliæ satis superque sustinimus, nec ullum ex eo sustentia nostræ assuta est Ecclesia Dei compendium. Periculosum et intolerabile de cætero nobis visum est tantos illius, officialiumque suorum circa Ecclesiam Dei et ecclesiasticas personas excessus, ut hactenus, impunitos relinquere: præsertim cum sæpissime nuntiis et litteris, modisque aliis, prout decebat, studuerimus eum a perverso proposito suo revocare. Et quoniam vix ab eo auditi sumus, nullatenus tamen exauditi, scriptum illud, in quo illæ, non consuetudines, sed potius pravitates, quibus perturbatur et confunditur ad præsens Anglicana Ecclesia, continentur, ipsiusque Scripti auctoritatem, invocata Spiritus sancti gratia, publice condemnavimus et cassavimus. Universos etiam observatores, exactores, consiliatores,

seu defensores earum excommunicavimus. Omnesque vos episcopos a promissione, qua contra institutionem ecclesiasticam ad earum observationem tenebamini, auctoritate Dei et nostra absolvimus. Qnis enim dubitat sacerdotes Christi, regum et principum, omniumque fidelium patres et magistros censi? Nonne miserabilis insanix esse cognoscitur, si filius patrem, discipulus magistrum sibi conetur subjugare, et iniquis obligationibus illum potestati suæ subicere, a quo credit se non solum in terra, sed etiam in cælis ligari posse et solvi. Proinde ne in hujus sententiæ commissum incidamus, auctoritatem ipsius scripti, ipsamque scriptum cum pravitatibus, quæ in eo continentur, in irritum duximus et cassavimus. Præsertim his: Quod non appelleretur ad sedem apostolicam super aliqua causa, nisi licentia regis. Quod non liceat archiepiscopo vel episcopo exire de regno, et venire ad vocationem domini papæ, sine licentia domini regis. Quod non liceat episcopo excommunicare aliquem, qui teneat de rege in capite, sine licentia regis, vel terram ipsius vel officialium suorum sub interdicto ponere. Quod non liceat episcopo coercere aliquem de perjurio vel fide læsa. Quod clerici trahantur ad sæcularia judicia. Quod laici, seu rex seu alii, tractent causas de ecclesiis vel decimis. Et alia in hunc modum.

Denuntiamus etiam excommunicatum, et ex nomine excommunicamus Joannem de Oxeneford, qui in hæresim damnatam incidit, præstando juramentum schismaticis, quo schisma jam fere emortuum in Alemannia revixit; communicando etiam illi nominatissimo schismatico Reginaldo Coloniensi; et quia contra mandatum domini papæ et nostrum Saresberiensis Ecclesiæ decanatum sibi usurpavit. Quod quidem factum, tam juri contrarium, quam Ecclesiæ Dei exemplo perniciosum, penitus cassavimus, et revocavimus in irritum, præcipientes episcopo Saresberiensis et capitulo in virtute obedientiæ, et in periculo ordinis sui, ne de cætero visis litteris nostris ex eo facto eum decanum haberent.

Similiter et Ricardum De Ivelc. denuntiamus excommunicatum, et excommunicavimus, eo quod in eandem hæresim damnatam incidit, communicando eidem Reginaldo Coloniensi schismatico; machinando etiam et fabricando omnia mala cum schismaticis et Teutonicis illis in perniciem Dei et Ecclesiæ, et præsertim Ecclesiæ Romanæ ex pactis contractis inter dominum regem et ipsos.

Excommunicamus etiam Ricardum de Luci, et Jocelinum de Baill., qui pravitatem illarum auctores et fabricatores exstiterunt.

Radulphum etiam de Broc, qui bona Ecclesiæ Cantuariensis, quæ alimenta de jure sunt pauperum, occupavit et detinet, hominesque nostros, tam clericos quam laicos, cepit, et in captione tenet.

Hugonem quoque de sancto Claro, et Thomam filium Bernardi, qui ejusdem Ecclesiæ Cantuariensis

bona et possessiones absque conniventia nostra occupaverunt, et tenent.

Omnesque etiam qui de cætero in possessiones et bona Ecclesiæ Cantuariensis contra voluntatem nostram et consensum manus violentas extendent, eadem excommunicationis sententia innodavimus, juxta illud papæ Lucii: *Omnes Ecclesiæ raptores, atque suarum facultatum alienatores a liminibus ejusdem matris ecclesiæ anathematizamus, damnamus atque sacrilegos esse judicamus. Et non solum eos, sed etiam eis consentientes, quia non tantum qui faciunt rei judicantur, sed etiam qui facientibus consentiunt. Par enim pœna et agentes et consentientes comprehendit. Et alibi dicit Scriptura: Qui consentit peccantibus, et alium peccantem defendit, maledictus erit apud Deum et homines, corripieturque in reprobatione sævissima. Et iterum: Si quis peccantem defendit, acrius quam qui peccavit corceatur.*

Sane in domini regis personam ferre sententiam adhuc distulimus, expectantes si forte divina inspirante gratia respiscat; in proximo tamen laturi eam, nisi citius respuerit. Et inde est quod fraternitati vestræ mandamus, atque in virtute obedientiæ præcipimus, quatenus viros prætaxatos, qui a nobis excommunicati sunt vos quoque, prout decet, excommunicatos et habeatis, et denunciari faciatis, juxta illud decretum Honorii papæ: *Curæ sit omnibus episcopis excommunicatorum omnia nomina tam vicinis episcopis, quam suis parochianis pariter indicare, eaque in celebri loco posita præ foribus ecclesiæ cunctis venientibus inculcare, quatenus in utraque diligentia excommunicatis ubique ecclesiasticus aditus denegetur, et excommunicationis causa omnibus auferatur.* Tibi autem, frater episcopo Londoniensis, in vi obedientiæ injungimus, quatenus litteras præsentis alii venerabilibus fratribus et coepiscopis nostris omnibus de provincia nostra manifestes et ostendas. Valet in Christo, et pro nobis orate instanter.

EPISTOLA LXXIV.

AD EOSDEM.

THOMAS Dei gratia Cantuariensis Ecclesiæ minister humilis et apostolicæ sedis legatus venerabili fratri GILBERTO Lon. ep. cæterisque Cantix provincie episcopis universis salutem.

Si curamus esse quod dicimur, et nostri nominis, qui appellamur episcopi et pontifices, nosse volumus significationem, oportet nos jugi sollicitudine considerare et imitari vestigia illius, qui pontifex in æternum a Deo constitutus se ipsum pro nobis Patri obtulit in ara crucis, et de summa cælorum specula omnium actus et actuum intentiones jugiter speculatur, tandem unicuique relditurum secundum opera sua. Vices enim illius in terris gerendas suscepimus, adepti sumus gloriam nominis, honorem dignitatis, fructusque laborum spiritualium temporaliter possidemus, apostolis et apostolicis viris in ecclesiarum fastigiis succedentes, ut nostro ministerio peccati et mortis destruat imperium, et in fide

et profectu virtutum coalescens ædificium Christi crescat in templum sanctum in Domino. Et quidem episcoporum multus est numerus. Qui docendi et pasceudi sollicitudinem et instantiam diligentiorum promissimus in consecratione, et verbis quotidie profitemur, sed utinam fides pollicitationis de testimonio operis convalescat! Messis utique multa est, nec ad eam colligendam et congregandam in horreum Domini unus sufficeret aut pauci. Ex quo lego divina cœpit agi populus Dei in Hebræorum duntaxat gente consistens, judices oportuit multiplicari, et esse plures correptores vitiorum, et morum correctores, quia legislator solus tantæ multitudinis onera non poterat sustinere. Electi sunt itaque, mandante Domino, septuaginta seniores, et adducti ad ostium tabernaculi, quod præfigurabat Ecclesiam. Acceperunt a Deo partem spiritus Moysi, per quem lex intelligitur, ut prophetarent, et populi examinarent et deciderent causas: majoribus tamen reservatis, et referendis ad examen illius, cui totius legis erat credita dispensatio. Et si Scripturas perscrutemur attentius, inveniemus hos Hebræorum præpositos exstitisse, quos ab exactoribus Pharaonis in Ægypto legimus flagellatos, adeo ut tædio affecti, et variis attriti suppliciis nomina sua coram Ægyptiis fetere quererentur. Quia tamen patientiam habuerunt, et Moysi obtemperantes acquieverunt verbo Dei, hoc præeunte gratia per fidem et jugem laborum experientiam meruerunt, ut cum Moyse præficerentur populo, cujus salutem procuraverant: et qui studiose audierant, doctores ex discipulis redderentur.

Sed et in initio nascentis Ecclesiæ, sicut beatus docet Apostolus: *Christus celos ascendens, ut adimpleret omnia, quosdam quidem dedit apostolos, quosdam prophetas, alios evangelistas, alios pastores et magistros, ad instructionem sanctorum in opus ministerii, in ædificationem corporis Christi.* Neque enim omnia uni committenda erant officia, sed unumquodque membrum suo donandum erat officio, ita tamen ut caput, in quo velut in arce et quodam capitolio virtutum omnes congeruntur sensus, et universis et singulis provideret, et ei vicissim omnia famularentur pro ratione suæ conditionis. Doctor gentium, qui gloriatur se non ab homine, neque per hominem Evangelium didicisse, sed instructum esse a Christo, post annos quatuordecim ascendit Hierosolymam, et cum Ecclesiarum principe de fide contulit, ne forte in vacuum curreret vel cucurrisset. Et ut plurimum patet exemplis, singula Evangelii flumina ad mare, unde orta sunt, redeunt, ut iterum fluant. Siquidem fons paradisi unus est, sed in plura rescinditur flumina, ut undique irriget terram.

Quis Romanam Ecclesiam caput omnium Ecclesiarum et fontem catholicæ doctrinæ ambigit esse? Quis claves regni cælorum Petro traditas esse ignorat? Nonne in fide et doctrina Petri totius Ecclesiæ structura consurgit, donec occurramus omnes Christo in virum perfectum, in unitate fidei et agnitione Filii

Dei? Necesse quidem est multos esse qui plantent, multos qui irrigent, quoniam hoc exigit processus verbi, et dilatatio populorum, cum et antiquus populus, cui unum sufficebat altare, plures ex necessitate magistros habuerit, nedum modo in concursu et affluentia gentium, quibus Libanus non sufficit ad succendendum, et animalia non modo Libani, sed nec totius Judææ sufficerent ad holocaustum. Sed quicumque sit qui rigat aut plantat, Deus nulli dat incrementum, nisi illi qui plantavit in fide Petri, et doctrinæ ipsius acquiescit. Sane ad eum maxima populi judicia referuntur, a Romano examinanda pontifice, et dispositi sub eo matris Ecclesiæ magistratus, quatenus in partem sollicitudinis acciti sunt, creditam exercerent potestatem. Ut sacerdos, quod in plebe sibi commissum expedire non potest, ad episcopum referat, qui negotia supra se ad archiepiscopum reducit aut ad primatem, a quibus quicquid maximum fuerit, Romano pontifici reservatur. Ordinem hunc Petrus docuit: hunc usque modo catholica servavit Ecclesia, nec unquam, auctore Domino, quidquid molliatur iniquitas, subvertetur.

In regno autem Anglorum, quod sine dolore multo ad mentem reducere, aut sine lacrymis dicere non valemus, multum præsumitur adversus Petrum. Sedis apostolicæ, quantum in perversis potestatibus est, attentatur et periclitatur auctoritas, dum illi, quos necessitas pro compendio poenitentiae, vel remedio causæ, aut visitationis debito compellit ad dominum papam iter arripere, ab itinere suo præpediuntur, spoliantur, tractantur atrocius, et transfretate prohibentur, vel ab his qui occasiones querunt ut faciant mala, coacti ideo illicita de præpediendis clericis et poenitentibus præstiterunt sacramenta. Manus itaque violentas injicientes in clericos facto suo anathematis condemnationem incurrunt. Inde est, quod nos sanctæ Romanæ Ecclesiæ auctoritate utentes, fraternitati vestræ apostolicæ auctoritate in virtute obedientiæ, in periculo ordinis vestri præcipiendo mandamus, quatenus de cætero hoc fieri inhibeatis, et eos qui in clericos manus violentas injiciunt, publice excommunicatos denuntietis, et per episcopatum vestrum denunciari faciatis, et conterminalibus coepiscopis vestris, ut hoc ipsum in episcopatibus faciant suis, domini papæ et nostra præcipiatis auctoritate.

* Ad hæc eodem modo, et sub eadem interminatione præcipimus, ut his qui appellantes, aut poenitentes, ad dominum papam vel ad nos tendentes, impediunt, aut redeuntes a domino papa vel a nobis, denuntietis quoniam sententiam anathematis incurrunt: tam hi qui hæc faciunt in propria persona, quam regis officiales, qui ad hoc faciunt compellant alios. Illos autem, qui coacti de transeuntibus impediendis juramenta illicita præstiterunt, ab hoc juramento absolvimus, ut a tanta iniquitate desistant postmodum, et de commissis poenitentes discant potius Deo quam homini de cætero obedire. Si quis

A autem ecclesiæ suæ justitiam promovens, et apostolicæ sedi fidem servans, dispendia reformidat, meminerit, quoniam Ecclesia virtutes, quam momentaneas opes longe tutius et utilius thesaurizat. Christus, qui Ecclesiæ Romanæ præsidet, omnes adversarias cohibet potestates. Et qui potentes potenter punit, omnem decrevit puniri inobedientiam. Non humiles tamen adducens in iudicium, sed gloriosos terræ humiliat Ecclesiæ ministerio, adversus quam nec portæ inferi prævalebunt.

Pudeat vos, dilectissimi, iniqua exercere judicia, ut juxta quod nobis insultant proceres regni, si pauper offendit in minimo, illico a nobis et offitibus nostris ab Ecclesia excludatur; si dives committit crimina, non conveniatur vel verbo, ut in sic decernentes possit illud ethnicum retorqueri:

Et tantum miseris irasci numina possunt.

Provideat vobis et ecclesiis vestris, ne si hanc injuriam Romanæ Ecclesiæ ulterius dissimulaveritis, merito videamini adversus eam cum impiis conspirasse, et appellantium præclusisse vias. Nec de dispendio ejus vestrum queratis compendium. Memento potius, quomodo salvi facti sunt patres nostri, quomodo et quibus tribulationibus Ecclesia creverit et dilatata sit: quas procellas evaserit navis Petri, quæ Christum habet vectorem. Qualiter ad coronam pervenerint, quorum fides ex tribulatione clarius elucescit. Sic Moyses meruit populi principatum; sic septuaginta iudices assecuti gratiam prophetalem; sic David sublinatur in regem; sic apostoli constituti sunt iudices orbis. Sic omnium sanctorum turba processit, ut perpetuo verum sit, quia non coronatur, nisi qui legitime certaverit, et de deliciis sæcularis exsilii nullus sit omnino transitus ad delicias regni. Tibi autem, frater Londoniensis, damus in mandatis et in virtute obedientiæ et in periculo ordinis vestri apostolica auctoritate præcipimus, quatenus præsentibus litteras aliis fratribus et coepiscopis nostris comprovincialibus adhibita celeritate et diligentia ostendas, et quod in his continetur districte observari facias. Vale!

EPISTOLA LXXV.

AD EOSDEM.

D THOMAS Dei gratia Cantuariensis Ecclesiæ minister humilis venerabilibus fratribus suis, universis Cantuariensis provincie Dei gratia episcopis, si tamen universi scribunt, salutem, et id agere quod nondum agunt.

Fraternitatis vestræ scriptum, quod tamen de prudentiæ vestræ communi consilio non facile credimus emanasse, nuper ex insperato suscepimus. Cujus continentia plus videtur habere mordacitatis, quam solatii; et utinam magis esset emissum de pietatis studio, de charitatis affectu, quam de obedientia voluntatis. Charitas enim non querit quæ sua sunt, sed quæ Jesu Christi. Erat quippe de jure officii vestri, si veritatem habet Evangelium, quod quidem habet, si recte agitis ejus officium, si fideliter ejus

negotium geritis, cujus representatis figuram, magis eum timere, qui potest animam et corpus mittere in gehennam, quam qui potest corpus occidere : magis Deo obedire quam hominibus, patri quam domino : ejus exemplo, qui factus est Patri obediens usque ad mortem. Mortuus itaque est ipse pro nobis, nobis relinquens exemplum, ut sequamur ejus vestigia. Commoriamur ergo et nos ei, ponamus animas nostras pro liberanda Ecclesia a jugo servitutis, et oppressione tribulantis, quam ipse fundavit, cujus comparavit libertatem sanguine proprio, ne si secus egerimus, merito comprehendat nos illud evangelicum : *Qui amat animam suam plus quam me, non est me dignus*. Optime nosse debueratis, quoniam si justum est, quod præcipit imperator, ejus debetis exsequi voluntatem; si vero contrarium, respondere : *Quoniam oportet nos magis obedire Deo quam hominibus*. Unum vobis dico, ut salva pace vestra loquar, multo tempore silui, expectans si forte inspiraret Dominus vobis, ut resumeretis vires, qui conversi estis retrorsum in die belli. Si forte saltem aliquis ex omnibus vobis ascenderet ex adverso, et opponeret se murum pro domo Israel, simularet saltem inire certamen contra eos, qui non cessant quotidie exprobrare agmini Domini. Expectavi, non est qui ascendat. Sustinui, non est qui se opponat; silui, non est qui loquatur; dissimulavi ego, non est qui vel simulatione certet. Reposita est mihi de reliquo querela: actio, ut merito clamare habeam : *Exsurge, Deus, judica causam meam*. Vindica sanguinem Ecclesie, quæ eviscerata est, quæ facta est oppressione exanimis. Superbia enim eorum, qui oderunt ejus libertatem, ascendit semper, nec est de cætero qui faciat bonum, non est usque ad unum.

Utinam, fratres dilectissimi, is esset nobis affectus in defensionem libertatis Ecclesie, qui paret et propinatur nobis in ejus confusionem litteris vestris, ut credimus, minus legitime appellatoriis! Verum fundata est ipsa supra firmam Petram, nec est qui eam possit evellere, etsi concutere. Ut quid ergo quaeritis me confundere? Imo vos ipsi in me : imo et me vobiscum; hominem qui suscepi omne in me periculum, sustinui tot opprobria, toleravi tot injurias, expertus sum etiam proscriptionem pro omnibus vobis. Expediebat quidem unum affligi pro ecclesia ista, ut vel sic excutiatur a servitute. Discutite mente simplici causam istam, examine negotium, diligenter attendite quis ejus debeat esse finis, ut deducta majestate imperii, postposita penitus personarum acceptione, quarum Deus acceptor non est, faciat ipse vobis intelligere, quid est quod egeritis, quidque quod intenditis agere. Auferat ipse Deus velamen de cordibus vestris, ut cognoscatis quid agere debeatis! Dicat ex omnibus vobis qui noverit, si unquam post meam promotionem alicujus vestrum tuli bovem aut asinum, si alicujus pecuniam, si alicujus causam inique judicavi, si alicujus vestrum dispendio comparavi mihi compendium : reddo quadruplum. Si vero non est quod offenderim, ut quid

A me solum derelinquitis in causa Dei? Quare vos ipsos vobis ipsis opponere curatis in causa ista, qua nulla specialior est Ecclesie?

Nolite, fratres, nolite vos ipsos et Ecclesiam Dei, quantum in vobis est, confundere, sed convertimini ad me, et salvi eritis. Dominus enim dicit : *Nolo mortem peccatoris, quantum ut convertatur, et vivat*. State mecum viriliter in prælio, apprehendite arma et scutum, et exsurgete mihi in adjutorium. Accingimini gladio verbi Dei potentissimi ut simul omnes fortius et validi valeamus una resistere pro officii nostri debito adversum malignantes, adversum operantes iniquitatem, adversum eos qui quaerunt tollere animam Ecclesie, quæ est libertas, sine qua nec viget Ecclesia, nec valet adversum eos, qui quaerunt hæreditate sanctuarium Dei possidere.

Festinemus ergo simul omnes id agere, ne ira Dei descendat super nos, tanquam super negligentes pastores et desides. Ne reputemur canes muti, non valentes latrare. Ne exprobetur nobis a transeuntibus : *A senioribus Babylonis egressus est iniquitas*. Revera si me audieritis, scitote quoniam Dominus erit vobiscum, et cum omnibus vobis in cunctis viis vestris ad faciendam pacem, et defendendam Ecclesie libertatem. Alioquin judicet Deus inter me et vos, et Ecclesie confusionem requirat de manibus vestris. Quoniam velit, nolit mundus, necesse est ipsam stare firmiter in verbo Domini, in quo fundata est, donec veniat hora ejus, ut transeat de hoc mundo ad Patrem. Judicabit Deus de eo, quod reliquistis me solum in certamine, nec est qui velit mecum ascendere ad pugnam ex omnibus charis meis. Scilicet adeo, ut cogitet quilibet vestrum vel dicat : *Vae soli, quia si ceciderit, non habet subleuantem se!* Sed reposita est mihi hæc spes mea in sinu meo, quoniam solus non est, cum quo Dominus est, qui cum ceciderit, non colliditur; supponit enim ipse Dominus manum suam.

Ut itaque veniamus ad rem, dicite, fratres mei, exciditne a vestra memoria, quid ageretur mecum, et cum Ecclesia Dei, dum adhuc essem in Anglia? Quid in exitu meo, quid post exitum, quid etiam agatur diebus istis? Quid maxime apud Northampton, cum iterum judicaretur Christus in persona mea ante tribunal præsidis, cum aretaretur Cantuariensis ob injurias sibi et Ecclesie Dei passim illatas, et sine delectu, Romanam audientiam appellare, et bona sua, quæ male dicimus sua, cum sint bona pauperum, patrimonium crucifixi, quæ potius ei sunt commendata, quam donata, sub Dei ponere protectione et Ecclesie Romanæ? Quis unquam, etsi aliquando injuste proscriptum divina declaravit clementia, vidit, audivit Cantuariensem judicari, condemnari, cogi ad fidejussionem in curia regis, a suis præcipue suffraganeis? Ubi est inventa ista juris vel canonum auctoritas adversa, imo perversitas? Ut quid enormitas ista non parit vobis erubescitiam, erubescitiam non immittit confusionem, confusio non elicit penitentiam, penitentia non

exculit satisfactionem coram Deo et hominibus? Ob
tot quidem et tantas Deo et Ecclesiæ ejus illatas
injurias in me, et mihi propter Deum, quas susti-
nere non debui salva conscientia mea, nec sine
discrimine vitæ meæ potui emendare, nec dissimu-
lare sine animæ periculo, elegi potius declinare ad
tempus, ut habitarem salubrius in domo Domini
quam in tabernaculis peccatorum, donec completa
esset iniquitas, revelarentur corda iniquorum, et
manifestarentur cogitationes cordium. Ita tot inju-
riarum illatio fuit causa appellationis meæ. Hæc fuit
ocasio recessus mei, quem dicitis inopinatam, qui
magis secundum ea quæ proponebantur adversum
me, et quæ agebantur mecum, si veritatem loqui-
mini qui novistis, debuisset fuisse inopinatus, ne
impediretur præscitus. Sed Domino vertente casus
adversos in melius, prospectum est domini nostri
regis honori et suorum, ne quid fieret in me in ipsius
ignominiam et generationis suæ. Melius etiam con-
sultum est his, qui suspirabant in necem meam,
qui sitiebant meum sanguinem, et qui aspirabant ad
fastigium Ecclesiæ Cantuariensis, ut vulgo dicitur
et creditur, in nostram perniciem, utinam minus
ambitiose quam avide! Appellavimus et appellati
sumus, rebus Ecclesiæ Cantuariensis, nostrisque,
et nostrorum, sicut juris exigit ratio, in tuto ma-
nentibus, nostram prosecuti sumus appellationem.

Si nobis discedentibus, et in discessu nostro tur-
bata sunt, prout dicitis, sibi imputet qui causam
dedit, qui hoc procuravit. Facientis procul dubio
culpa hæc est, non recedentis; persequentis, non
declinantis injurias. Damnum enim dedisse videtur,
qui causam damni dedit. Quid plura? Præsentavi-
mus nos curiæ, nostras et Ecclesiæ exposuimus
injurias, adventus nostri causam et appellationis
exposuimus: non adfuit qui nobis responderet vel
in aliquo. Expectavimus, nec venit qui nobis ali-
quid officeret. Nulla adversum nos reportata sen-
tentia antequam veniretur ad regem; nobis adhuc
de more expectantibus in curia, si forte nobis ali-
quid opponeretur, ad nostros accessum est officia-
les, interdictum est eis, ne in aliquo super tempo-
ralibus nobis obedirent, ne nobis vel nostris quid-
quam ministraretur ab ipsis contra mandatum regis
et conscientiam; te, frater Londoniensis, cum Ri-
cardo de Ivelcester, et Eboracensi, sicut dicitur,
dicante sententiam. Festinatum est inde ad domi-
num regem; viderit ipse, in caput ejus convertatur,
qui hoc dedit consilium. Sine judicio, sine ratione,
post appellationem, nobis etiam adhuc in curia mo-
rantibus, spoliata est Ecclesia, spoliati sumus et
nos cum nostris, proscripti et ipsi clerici cum laicis,
viri cum mulieribus, mulieres cum infantulis in
cunabulis. Addicta sunt fisco bona Ecclesiæ, patri-
monium crucifixi; pars pecuniæ conversa in usus
regios, pars in tuos, frater Londoniensis, si vera
sunt quæ audivimus, et tux ecclesiæ. Quam, si ita
est, exigimus a te, præcipientes tibi in virtute obe-
dientiæ, quatenus infra quadraginta dies post ista-

A rum susceptionem litterarum, quicquid inde tulisti,
vel in usus ecclesiæ tux conversum est, remota
omni occasione et dilatione, infra tempus prænomi-
natum nobis integrum restituas. Iniquum enim est
et juri valde contrarium ecclesiam ditari de alterius
ecclesiæ incommodo. Si laudas auctorem, scire de-
bes super rebus ecclesiæ ablatiis eum legitime non
posse præstare auctoritatem, qui violentiam facit
injuriæ.

Quo ergo jure perverso, quo canonum ordine
transposito poterunt se tueri raptores sacrilegi, bo-
norum ecclesiasticorum invasores, non restituti
ablatiis ecclesiæ? Opponentne appellationis obstacu-
lum? Absit! Quæ nova, imo quæ juri contraria in-
troducitis in ecclesias istas? Videte quid agatis
B Certe cudetur in vos faba ista; et in ecclesias ve-
stras, si non melius vobis prospexeritis. Periculosa
enim ageretur cum Ecclesia Dei, si raptor sacrile-
gus, alienorum bonorum invasor, maxime Ecclesiæ,
tutus esset adversus eam appellationis auxilio. Fru-
stra enim juris implorat auxilium, qui juri non obtem-
perat, imo qui est juri contrarius; suntne istæ injuriæ,
quas addimus injuriis, labores quos, laboribus adjici-
mus quia ista et alia enormia, quæ fiebant et quæ sunt
in ecclesia ista, non sustinimus, quia gravati ap-
pellavimus, quia recessimus a curia, quia ausi
sumus super injuriis Ecclesiæ et nostris conqueri,
et super his omnibus non tacemus, quia ista para-
mus corrigere? Periculose ecce affligitur, cui sal-
tem conquerendi solatium denegatur. Vos amici
C mei, qui altiora sapitis inter alios, qui geritis vos
aliis prudentiores, quoniam solent filii hujus sa-
culi prudentiores esse filiis lucis, ut quid decipit a
fratres vestros et subditos? Quare inducitis eos in
errorem istum? Quæ auctoritas, quæ scriptura con-
tulit hanc principibus prærogativam in ecclesiasti-
cis, quam vos vultis eis conferre? Nolite, fratres,
nolite jura regni et Ecclesiæ confundere. Discretæ
quidem sunt potestates istæ, quarum unam vim et
potestatem sortitur ex altera. Legite Scripturas, et
invenietis quot et qui periere reges, qui visi sunt
sibi sacerdotale officium usurpare. Provideat ergo
vestra discretio, ne ob istam pressuram divinam vos
aterrat injuriæ. Quam, si venerit, non effugietis
D de facili.

Consultite etiam domino nostro regi, qui ejus
comparatis gratiam Ecclesiæ dispendio, ne, quod
absit! pereat ipse, et domus ejus tota, sicut periere
qui in consimili deprehensi sunt delicto. Si vero ab
hoc incepto non destiterit, quæ animi con-
scientia non puniemus ista, quæ puritate conscientiæ ista
dissimulabimus? Dissimulet quidem qui hanc habet
dissimulandi auctoritatem, non ego, ne veniat in
animam meam ista dissimulatio! Innotuit litteris
vestris, imo aperte dicitis me regno reclamante,
Ecclesia etiam suspirante et ingemisciente, fuisse
promotum. Scitis quid dicat veritas? *Os quod men-
dacium scienter loquitur, occidit animam.* Verba
vêro sacerdotis semper comitem debent habere ve-

ritatem. Deus bone, nunquid non erubesceret aliquis de plebe ista dicere? Consulite conscientias vestras, advertite formam electionis, consensum omnium ad quos spectabat electio, assensum principis per filium suum, et per eos qui ad hoc missi sunt. Filii etiam cum omnibus primatibus regni. Si aliquis eorum contradixit, si reclamavit vel in aliquo, loquatur qui noverit, dicat qui est conscius. Si vero inde turbatus fuerit aliquis, non dicat pro sua molestia toti regno et Ecclesiæ factam fuisse injuriam. Litteras quoque domini regis et omnium vestrum diligentius attendite, postulantes nobis cum multa instantia pallium, et obtinuisse. Sic se habet rei veritas. Verum si quem torsit invidia, si quem afflixit ambitio, si cui tam pacifica, tam legitima, tam sine contradictione facta electio dolorem et amaritudinem impressit animi, eatenus ut ob hoc machinetur et velit turbare omnia, indulgeat ei Dominus et nos, eo quod culpam suam minime taceat, suamque animi indignationem in conspectu omnium publice confiteri non erubescat.

Dicitis me de exili sublatum ab ipso in gloriam. Non sum revera.

..... atavis editus regibus

Malo tamen is esse, in quo faciat sibi genus animi nobilitas quam in quo nobilitas generis degeneret. Forte natus sum paupere tugurio? Sed, cooperante divina clementia, quæ novit facere misericordiam cum servis suis, quæ eligit humile ut confundat fortia, in exilitate mea, antequam accelerem ad ejus obsequium, satis copiose, satis abundanter, satis honorifice, sicut ipsi novistis, prout quis abundantius inter vicinos meos et notos, cujuscunque conditionis fuerint, conversatus sum. Et David, de post fetantes assumptus, constitutus est ut regeret populum Dei, cui aucta est fortitudo et gloria, quoniam ambulavit in viis Domini. Petrus vero de arte piscaria electus, factus est Ecclesiæ princeps, qui sanguine suo meruit pro nomine Christi in cælis habere coronam, et in terris nomen et gloriam. Utinam et nos similiter faciamus! Successores enim Petri sumus, non Augusti. Novit Dominus, quo intuitu nos ipse desideraverit sublimari. Respondeat ei sua intentio, et nos respondebimus ei pro officii nostri debito, fidelius per misericordiam Dei in severitate, quam qui blandiuntur ei in mendaciis. Meliora enim sunt verbera amici quam fraudulenta oscula inimici.

Impingitis nobis ingratitude notam per quamdam insinuationem: credimus, quia nullum peccatum criminale est quod importet infamiam, nisi processerit ex animo. Unde si quis homicidium invitatus commiserit, etsi homicida dicatur et sit, non tamen homicidii reatum incurrit. Sic dicimus: etsi domino nostro regi obsequium debeamus jure Domini, si teneamur ad reverentiam præstandam jure regio, si hominum sustinuimus, si filium paterno affectu convenimus si in conventum non auditi et dolentes, necessitate officii censuram severitatis exercemus,

A plus credimus nos pro ipso facere et cum ipso quam contra ipsum: plus ex eo promereri gratiam quam ingratitude notam vel penam. Sæpiissime certe beneficium confertur invito. Unde commodius ejus prospicitur indemnitati, qui etsi non alias; urgente necessitate revocatur a perpetratione delicti. Præterea defendit nos ab ingratitude nota pater noster et patronus, qui est ipse Christus. Jure paterno tenemur ad ejus obedientiam, qua non observata puniemur justa exhereditationis pœna. Potest enim pater exhereditare filium ex justa causa. Ipse enim dicit: *Si non annuntiaveris impio iniquitatem suam, et moriatur in delicto suo, sanguinem ejus de manu tua requiram.* Ergo, si delinquentem non convenimus, si non audientem non corripimus, si pertinacem non coercemus, committimus in mandatum, et tanquam inobedientiæ rei jure exhereditamur. Jure patronatus, quia ejus sumus liberi; quoniam, cum essemus servi peccati, facti sumus liberi justitiæ per ejus gratiam, obligamur ei ad reverentiam et obsequium. Unde quoniam nemini, nisi salva ejus fide, tenemur obnoxii, si sit contra eum in dispendium Ecclesiæ pertinaciter, merito, si non punimus commissum pro ea parte sollicitudinis, in quam vocati sumus, collatum revocabit a nobis ob ingratitude ipse solus beneficium, ex quo vere apparebimus ingrati.

Proponitis nobis periculum Ecclesiæ Romanæ, jacturam temporalium. Periculum quidem nostrum et nostrorum, nec sit mentio de periculo animarum. C Intentatis etiam comminatorium de recessu domini regis, quod absit, a fidelitate et devotione Romanæ Ecclesiæ! Absit, inquam, ut unquam domini nostri regis devotio et fides ob temporale commodum vel incommodum a fidelitate et devotione discedat Ecclesiæ! Quod quidem criminale et damnable esset in privato, nedum in principe, qui multos secum trahit post se. Absit etiam, quod quis ejus fidelis hæc unquam cogitare debeat, nedum dicere supinus aliquis, nedum episcopus! Videat itaque discretio vestra, ne oris vestri verba inficiant aliquem, vel plures, in animæ suæ dispendium et damnationem, ad instar calicis aurei, qui dicitur Babylonis, interius et exterius veneno illiniti, de quo cum quis biberit, non timeat venenum, cum viderit aurum, et sic in publicum veniat vestri operis effectus. Ille enim, qui non fallitur, opus furtivum producit in lucem, et machinationes denudat iniquas. In tribulatione quidem et sanguinis effusione consuevit Ecclesia crescere et multiplicari. Proprium enim est Ecclesiæ, ut tunc vineat cum læditur, tunc intelligat cum arguitur, tunc obtineat cum deseritur. Nolite ergo, fratres, super ipsam flere, sed super vos ipsos, qui facitis vobis nomen, sed non grande ex hoc facto et dicto in ore hominum; qui provocatis in vos Dei odium et universorum; qui paratis innocentem laqueum; qui auditis novas et ingeniosas rationes in subversionem libertatis Ecclesiæ. Fratres, per misericordiam Dei in vanum laboratis. Stabit enim ipsa Ecclesia, etsi sæpius concussa, in ea fortitudine et firmitate, in

qua firmiter fundata est, donec veniat generale dissidium, donec filius ille perditionis surgat, quem non credimus de partibus occidentalibus ascensurum, nisi perverse mutatus fuerit ordo rerum, et series Scripturarum. Si vero de temporalibus agatur, plus timere debemus animæ periculum quam temporalium. Scriptura vero dicit: *Quid prodest homini totum mundum lucrari, animæ vero suæ sustinere dispendium?* Periculum itaque nostrum et nostrorum penitus abjicimus. Non enim timendus est ille, qui corpus perdit, sed qui corpus et animam.

Arguitis nos super suspensione venerabilis fratris nostri Saresberiensis episcopi, et excommunicatione Joannis illius schismatici ex decani, prius, ut dicitis, inflicta pœnaliter, quam de cognitione processa legitime, quam de ordine judiciorum canonice prodita. Respondemus, quoniam utrumque istorum notavit iusta pœnæ sententia, illum suspensionis, excommunicationis istum. Si perfecte tenetis negotii seriem, si recte attenditis iudiciorum ordinem, non erit, ut credimus, hæc vestra sententia. Hoc quidem habet auctoritas, quæ vos latere non debet, quoniam in manifestis et notoriis non desideratur ista cognitio. Pependite diligentius, quid actum sit a Saresberiensis super decanatu post domini papæ prohibitionem et nostram, sub excommunicatione factam, et tunc rectius intelligetis, si de manifesta inobedientia suspensio recte sequitur. Unde beatus Clemens: *Si praelatis suis non obdierint cujuscunque ordinis universi, omnesque principes tam inferioris quam superioris ordinis, atque reliqui populi, non solum infames, sed etiam extorres a regno Dei, et consortio fidelium, et a liminibus sanctæ Dei Ecclesiæ alieni erunt.*

De Joanne de Oxeneford dicimus, quia diversis modis excommunicantur diversi: alii lege eos denuntiantes excommunicatos, alii sententia notati, alii communicatione et participatione excommunicatorum. Illum vero, quoniam incidit in hæresim damnatam communicando schismaticis, et domini papæ excommunicatis, reatumque et maculam excommunicationis in se contraxit, quæ pestis more lepræ inficit et intingit, consimilique pœna facientes et consentientes confundit, et quoniam contra domini papæ mandatum expressum, et nostrum sub anathemate, decanatum Saresberiensis excommunicatus usurpavit, desuaviavimus et excommunicavimus, et excommunicatum firmiter tenemus. Et quod de eo factum est in decanatu, et super decanatu, cassavimus, et cassatum tenemus, sicut et dominus papa jam ipsemet cassavit auctoritate octavæ synodi, cujus hæc est sententia: *Si quis palam vel absconse cum excommunicato locutus fuerit, aut junctus communione, statim in se contrahit excommunicationis penam.* Et concilium Carthaginiense dicit: *Qui communicaverit cum excommunicato, si clericus est, deponatur.* Videat ergo discretio vestra, ne quis vestrum cum eo communicaverit. Calixtus enim papa dicit: *Excommunicatos quosque a sacerdotibus*

A nullus recipiat ante utriusque partis examinationem justam, nec cum eis in oratione, aut in cibo, aut potu, aut osculo communicet, aut Ave eis dicat. Quia quicumque in his vel aliis prohibitis scienter excommunicatis communicaverint, juxta apostolorum institutionem simili excommunicationi et ipsi subiacerunt. Ille est ordo canonicus, non canonibus, ut credimus, incognitus, sed auctoritate canonum fultus.

Et ne miremini, si quandoque condemnatur absens, legite Paulum, qui absens publice fornicantem cum noverca sua non convictum testibus, non confessum, etiam absentem, cujus crimen omnes sciebant, et non arguebant, sicut nos istius, quem non de jure defendit regia potestas, ejecit a cotu fidelium, et judicavit eum tradi Satanz in interitum carnis, ut spiritus salvus fieret, sicut et nos istum. Cæterum quoniam hoc tempore in partibus illis [multa hujusmodi, et satis gravia, in absentia nostra sunt enormia, quæ de cætero, licet absentes corpore, præsentem tamen auctoritate, salva animi nostri conscientia præterire nec debemus, nec possumus incorrecta, tibi frater Londoniensis, qui nosse debueras illud Gregorii septimi: *Si quis episcopus fornicationi presbyterorum aut diaconorum, vel crimini inceptus, in sua parochia, pretio, precibusve, sive gratia interveniente consenserit, vel commissum auctoritate sui officii non impugnaverit, a suo suspendatur officio; illudque Leonis: Si qui episcopi talem consecraverint sacerdotem, qualem esse non liceat, etiamsi aliquo modo damnum proprii honoris exaserint, ordinationis jus ulterius non habebunt, nec ulli unquam sacramento intererunt, quod immerito præstiterunt: quoniam in istorum sententiam canonum, sicut pro certo audivimus, deliquisti dupliciter, mandamus tibi, et in virtute obedientiæ mandando injungimus, quatenus, si ita est, infra tres menses post istarum susceptionem litterarum, venerabilium fratrum vestrorum coepiscoporum consilio de tanto excessu sic studeas te offerre correctioni et satisfactioni, ne cæteri tuo exemplo in consimile delictum incidant, et nos pro negligentia tua debeamus tibi severius mandatum proponere.*

Opponitis nobis contra metum gravaminum non remedium per appellationem, sed impedimentum, quo minus, sicut intelligimus, exerceamus adversum malefactores, et invasores bonorum ecclesiasticorum, disciplinæ censuram ecclesiasticæ; ne in dominum nostrum regem, vel terram suam, in personas vestras et ecclesias, aliquid statuamus eo ordine, quo progressi sumus contra Saresberiensis, sicut dicitis, et ejus decanum. Absit a nobis, ut aliquid in eum vel terram suam, vel in vos et ecclesias vestras inordinate statuerimus vel statuamus! Sed quid est, si eo delinquistis modo, vel consimili, quo jam deliquit Saresberiensis, nunquid hæc appellatione potestis suspendere auctoritatem nostram, ne in vos vel ecclesias vestras severitatis disciplinam exerceamus, si delicti enormitas hoc

exiget? Adverte diligentius, si hæc legitima appellatio, et quæ sit hæc appellationis forma? Scimus quoniam omnis appellans aut suo nomine appellat, aut alieno. Si suo, aut a gravamine quod ei inferitur, vel quod timet sibi inferri. Certum tenemus, quod nullum vobis gravamen, Deo gratias, a nobis illatum est, unde debeatis ad appellationis confugere remedium. Nec credimus vos ad præsens habere causam adversum nos aliquam, quæ specialiter vestra sit. Si contra metum gravaminum, ne quid de cætero statuum in vos vel ecclesias vestras, videatis si sit iste metus qui debeat cadere in homines constantissimos, si hæc sit appellatio quæ debeat suspendere omnem auctoritatem et potestatem nostram, quam habemus in vos et ecclesias vestras. Creditur vero a sapientibus, credimus et nos eam nullius esse momenti, tum quia formam appellationis habere non videtur, tum quia rationi consentanea non est, imo totius juris penitus auxilio destituta.

Si alieno appellastis nomine, aut domini regis, aut alterius. Si non alterius, domini regis. Si domini regis, certe nosse debuerat discretio vestra, quoniam introductæ sunt appellationes ad propulsandam injuriam, non ad inferendam: ad sublevandos oppressos, non ad amplius opprimendos. Unde si quis non confidentia iustæ causæ, sed causa affrendæ moræ, ne contra eum feratur sententia, appellaverit, huiusmodi appellationem non esse recipiendam. Quis enim erit Ecclesiæ status, si subversa ejus libertate, si rebus ejus occupatis ac detentis, episcopis a propria sede expulsis, vel non pacifice cum omni securitate omniumque ablatorum restitutione admissis, raptores, occupatores, invasores, ne coercentur, libere appellaverint, et se defendeant per appellationem? Quæ erit ista Ecclesiæ destructio? Videte quid agatis, quidque dicatis. Nonne vicarii Christi estis, nonne vices ejus in terra geritis, nonne vestrum est convenire, corripere, coercere malefactores, ut vel sic desistant Ecclesiam Dei persequi? Utquid non nimis est, si ipsi sævierint in Ecclesiam, nisi et nos pro eis vobis ipsis et Ecclesiæ in perniciem opponatis? Quis unquam dividit hæc mirabilia? Et audietur et prædicabitur in omni populo et gente, suffraganeos Cantuariensis Ecclesiæ, qui cum metropolitano suo ob defensionem Ecclesiæ, ejusque libertatis, haberent vivere et mori, omniaque sustinere dispendia, velle ad mandatum regium, quantum in ipsis est, suspendere potestatem ipsius et auctoritatem, ne severitatis disciplinam exerceat in delinquentes adversus Ecclesiam. Unum certe scio: duorum personam simul gerere non recte potestis, appellantium et appellatorum. Vos estis qui appellastis, vos estis adversum quos appellatur. Nonne una est Ecclesia, et vos de corpore ejus estis? En certamen satis legitimum, satis canonicum, ut qui membra sunt Ecclesiæ, ineant certamen cum capite suo, quod est Christus. Timeo, fratres, ne, quod absit! dicatur de

PATROL. CXG.

A vobis: *Isti sunt sacerdotes, qui dicunt: ubi est Dominus? Et tenentes legem nescierunt eam.* Præterea discretionem vestram latere non credimus, quoniam non solent audiri appellantes, nisi quorum interest, aut quibus mandatum est, aut qui negotium gerunt alienum. Interestne vestra, ut non coercentur delinquentes adversus Ecclesiam? Absit! Imo certe contrarium. Si vero qui subvertit Ecclesiæ libertatem, qui bona ipsius invadit et occupat, ac in suos convertit usus, in sui defensionem minime super hoc auditur appellans, et multo minus pro eo appellantes. Ergo nec domino regi suffragatur a vobis pro ipso edita, nec videtur vobis prodesse pro ipso appellatio emissa. Unde si in hoc casu appellare non potest, nec mandare, sic nec vos super hoc ab ipso mandatum suscipere. Adjicimus etiam vos in parte ista nullatenus ejus gerere posse negotium. Nemo enim episcoporum alterius contra se negotium gerere potest, maxime in oppressione Ecclesiæ, cujus ipse defensor est: et præsertim cum generaliter laudatur Ecclesiæ conditio. Ergo si nec vestra interest appellare, nec super hoc mandatum valetis suscipere, nec alienum gerere negotium, nec auditur appellatio vestra, nec de jure tenetur.

Estne igitur ista devotio, et consolatio vestra, fraternæ charitatis affectus metropolitano vestro, pro vobis omnibus exultanti, a fraternitate vestra exhibitus? Indulgeat vobis Deus hanc inclementiam. An ignoratis, fratres, quod chaos magnum in fraudem legis et canonum inter nos et vos firmatum sit, ut non possit aliquis de vestris sine discrimine capitis, vel captionis, vel truncationis membrorum, ad nos transire, etsi de nostris aliqui liberius possent, si vellent, ad vos transinere? Et ideo miramur, quem ordinem exigitis, ubi nullus ordo circa nos, vel circa ecclesias vel ecclesiasticas personas, sed horror, qui utinam sempiternus non sit, et injuria observantur, cum spoliati simus, et nostri? Quorum quidam, tam clerici quam laici, capti redempti sunt post appellationem nostram factam apud Northamptonam, et vestram adversum nos. Cum etiam post istam, quam dicitis; appellationem edictum generale sit propositum, sicut dicitur, ut nemo de nostris inventus sit in terra Anglicana, qui non capiat: nemo vestrum vel aliorum amicorum nostrorum litteras nostras vel nuntios audeat suscipere. Et hæc reverentia appellationi debita, exhibita, et observata, infra cujus tempus, si justa est, nil innovari oportet: vos ipsi videritis. Quo ergo jure, quo ordine desideratis a nobis litteras vestras et nuntios benigne suscipi et audiri? Non hoc ideo dicimus, quidquid nobiscum agatur et cum nostris, ut quidquam circa personam domini regis vel terram suam, circa personas et ecclesias vestras unquam inordinate fecerimus, vel per Dei misericordiam facturi simus.

Credebamus quidem, si recte intelligitis, si cupitis utiliter Ecclesiæ subvenire, de nimis ordinata et oga patientia magis a vobis culpa, quam de severitate

mora commendari. Mora enim trahit ad se periculum, quia nimis ordinata patientia plus habet remissionis quam commendationis, plus vitii quam virtutis. Et inde est, quod breviter vobis dicimus et asserimus constanter, dominum nostrum regem nullatenus fore injuste gravatum, si adversus eum, a domino papa et a nobis ipsis legitime litteris et nuntiis ac sæpiissime conventum, satisfacere eum possit nolentem, severitatis censura processerit. Non enim injuste gravatur, quem jus punit legitime, Et ut omnia brevissimo sine concludam, certum tenete, quoniam raptores, invasores, occupatores honorum Ecclesiæ, ejusque libertatis subversores nec tueri juris auctoritas, nec appellatio defendit. Præterea, fratres, si cupitis ei prodesse, prout justum est, quod et nos cupimus, novit Deus qui scrutator est cordium, procurate ei subvenire illo modo, quo non offendatis in Deum, non in Ecclesiam, non in ordinem vestrum. Quo etiam expeditius et salubrius animæ suæ periculum, quod jam in foribus est, valeat evadere. Hæc ideo diximus, si inspirante ei divina clementia, de consilio vestro satisfecerit Ecclesiæ, gaudebit ipsa de filii sui reversione, et cum gratiarum actione et devotione multiplici parata fuit, et est semper eum suscipere : gaudebimus et nos.

Judicium vero vestrum, quo dicitis eum satisfacere volentem, paratum etiam satis dare, si super aliquo de libertatibus Ecclesiæ inter ipsum et nos, sicut dicitis, orta est contentio, quod quidem satis miramur, si alicui vestrum hoc est in dubium, cum toti fere mundo sit notum, quoniam non est consentaneum rationi, imo penitus juri contrarium, si non suscipimus imo quia non suscipimus, in quo delinquimus? Estne causa ista sufficiens, estne preemptoria, quo minus sæpiissime et canonice conventus, non satisfaciens, injurias superaddens injuriis, severitate divina corceatur? Absit! Scimus enim vos nulla ratione in hac causa iudicis officio inter ipsum et nos fungi posse. Tum quia adversarii ejus estis, et esse debetis in ea ob defensionem libertatis Ecclesiæ, cujus partis defendendæ, officii vestri necessitate, cura vobis commissa est, et sollicitudo credita : quam si negligeretis omittitis, si periculose dissimulatis, vos ipsi videritis. Tum quia non legimus superiores ab inferioribus metropolitanos maxime a suis suffraganeis, judicari posse. Tum quia nobis et Ecclesiæ quidam vestrum suspecti sunt : utinam non omnes : diversis rationibus, quas in præsentem tacemus.

Audiat itaque dominus meus postulationem fidelis sui, consilium episcopi, patris exhortationem, ut beneficiat ei Deus, et augeat dies ejus, et annos illiorem ipsius in tempora longa! Permittat Ecclesiam suam in pace et libertate sub ipso, tanquam sub rege Christianissimo, Ecclesiam Romanam uti jure et libertate in terra sua, quam habere debet, et habet in cæteris regnis! Restituat Cantuariensi Ecclesiæ et nobis jura sua et libertates, et omnia ablata cum pace et securitate nostra, ut libere et quiete possimus Deo militare sub ipso, et ipse debeat obsequio

A nostro uti, prout ei placuerit, salvo honore Dei et Ecclesiæ Romanæ, et ordine nostro! Istæ sunt dignitates regis, leges optimæ, quas petere debet rex christianissimus et observare, quibus gaudere debet, et sub ipso florere Ecclesia. Istæ sunt leges obtemperantes legi divinæ, non derogantes, quas qui non observaverit inimicus Dei constituitur. *Lex enim Domini immaculata, convertens animas.* De legibus enim suis dicit Dominus : *Leges meas custodite.* Et propheta : *Vae qui condunt leges iniquas, et scribentes scripserunt injustitias, ut opprimerent pauperes in judicio et vim facerent causæ humilium populi Dei.* Non erubescat ergo dominus meus redire ad cor, humiliari in cordis contritione et humilitatis mansuetudine coram Domino, satisfacere ei et Ecclesiæ ipsius de illatis injuriis! Cor enim contritum et humiliatum Deus non despicit, sed amplectitur sincerius. Sicut et sanctus David, qui cum peccasset, humiliavit se coram Domino, petivit misericordiam, et obtinuit veniam. Sic et rex Ninivæ et civitas tota, cum interminata esset subversionis severitas, quoniam in cinere et cilicio humiliavit se Domino, mutata sententia meruit ultionis censuram contritione cordis et lacrymarum compunctione redimere.

Non hæc, fratres, vobis scribimus, ut facies vestras confundamus, sed ut, lectis litteris nostris et intellectis, valeatis et velitis officii vestri necessitates fortius et validius exercere. Opto vos de cætero semper melius agere, ut sit vobis pax celerior, et amplior libertas Ecclesiæ. Orate pro nobis, ut non deficiat in tribulatione fides nostra, sed et secure possimus dicere cum Apostolo : *Quia neque mors, neque vita, neque angeli, neque aliqua creatura poterit nos separare a charitate Dei, quæ subjecit nos tribulationi, donec veniat qui venturus est, qui faciet nobiscum misericordiam suam, et ducet nos in terram promissionis, terram fluentem lacte et melle, quam non dabit nisi diligentiibus se.* Valete omnes semper in Domino, et instantius oret, petimus, pro nobis tota Anglicana Ecclesia.

EPISTOLA LXXVI.

AD OMNES EPISCOPOS ANGLIÆ.

D THOMAS Dei gratia Cantuariensis archiepiscopus et sedis Apostolicæ legatus, venerabilibus fratribus et amicis in Christo charissimis, omnibus episcopis per Angliam et Walliam constitutis, salutem, et in his quæ Dei sunt, felici perseverare proposito.

Ad nos iterato perlatum est verbum absconditum, et sæculis omnibus abscondendum, scilicet quod nobiscum de pace cum domino nostro rege tractatur, et in injuriam sanctæ Cantuariensis Ecclesiæ et nostram spudetur ei, ut per manum venerabilis fratris nostri Eboracensis archiepiscopi filium suum faciat coronari. Nos quidem ex conscientia nostra ad reformationem pacis in Domino nos semper obtulimus, parati etiam nunc domino regi et filio suo debitum honorem et reverentiam in Christo per omnia exhibere : et si

nomino regi placuerit, pro debito officii nostri inungere et coronare in regem, sicut antecessor noster ipsum dominum nostrum, cujus incolumitatem Deus ad honorem suum et utilitatem cleri et populi in omni prosperitate per longa tempora tueatur, dignoscitur consecrasset. Unde major et evidenter injuria matri nostræ Cantuariensi Ecclesiæ irrogaretur et nobis, si hoc alius cuiuscunque instinctu usurpare præsumeret. Prohibet hoc auctoritate, qua cunctis præminet, summus pontifex, sicut ex litteris ejus, quas vobis mittimus; potestis advertere, et ei qui hoc attentare præsumperit, si quis tamen est, periculum honoris, officii, et beneficii patenter imminere denuntiat. Nos etiam ipsius auctoritate freti universitati vestræ in virtute obedientiæ, in periculo ordinis et beneficii sub anathemate præcipiendo mandamus, ut hoc nullus vestrum attentet, nec attentanti assistat, sed apostolica auctoritate quilibet vestrum exquisita diligentius opportunitate inhibeat præsumptori, ne hoc usurpet, et a communione illius absteineat. Valete semper, dilectissimi fratres in Christo.

EPISTOLA LXXVII.

AD FILIOS ECCLESIE PER CANTIAM CONSTITUTOS.
CHARTA DE LIBERTATIBUS ECCLESIE.

THOMAS, Dei gratia Cantuariensis archiepiscopus, Anglorum primas et apostolicæ sedis legatus, omnibus sanctæ matris Ecclesiæ fidelibus per parochiam nostram Cantie constitutis, salutem.

Cum ecclesiarum jura nostræ jurisdictioni subditarum sollicite debeamus conservare, eademque minere præsumentes festina et digna animadversione punire, majori tamen vigilantia Ecclesiam Cantuariensem, qui nos divina præfecit misericordia, ejusdemque libertates ac dignitates, ab antiquo ei jure competentes, integras et illasas nos convenit conservare. Unde universitati vestræ, clericis tamen specialius, auctoritate qua fungimur inhiibemus, ne quis ullum ex parochianis suis vel alium quemlibet, qui in cimiterio Cantuariensis Ecclesiæ se sepeliri petierint, vel amici sui pro eo, impedire præsumat. Clericus etiam, in cujus parochia defunctus erit, usque ad Ecclesiam corpus defuncti comitetur. Quod si noluerit, monachi libere defuncti corpus ad Ecclesiam obsequiis rite peractis deferant et sepeliant. Porro eadem quoque auctoritate inhibitu esse sancimus, quod si quis in prædicta ecclesia vel infra ambitum murorum, ecclesiam et curiam nostram et monachorum, cui gentium homicidium vel furtum fecerit, sanguinem fuderit, personam quamlibet dicto vel facto injuriaverit, vel alicui illicitum commiserit, ne quis archidiaconus, decanus vel præpositus, ullave justitia ecclesiastica seu secularis se intrromittere præsumat. Soli enim personæ archiepiscopi et monachis ecclesiæ nostræ correctionem et satisfactionem delictorum in memoratis locis contingentium reservanda esse constituimus. Quod si quis hanc nostram constitutionem infringere præsumperit, vel veniæ contravenire attentaverit, Dei omnipotentis indigna-

tionem et nostram procul dubio se noverit incursurum!

EPISTOLA LXXVIII.

AD OMNES QUI CONT. D. PAPAM JURAVERUNT.

THOMAS Cantuariensis archiepiscopus, omnibus in Auglia constitutis, qui contra dominum papam Alexandrum juraverunt.

Scialis, charissimi, quod ex multa tribulatione et angustia cordis scripsimus, non quidem ut vos contristemus, sed ut intelligatis, quantam charitatem habeamus abundantius in vobis. Testis enim mihi est Deus, quomodo cupiam vos omnes in visceribus Christi Jesu. Unde cognitis, quæ tam corporis proxime quam animæ vestræ periculo, et ad ipsius quidem Dei injuriam vestris inaudita temporibus gesta sunt, non modicum contristamur, et confundimur propter vos. Patet siquidem fama vulgante, qualiter dominum papam, qui ipsius Christi imaginem gerit, et me pariter, qui licet indignus, pater tamen et episcopus animarumstrarum sum constitutus, abjuraveritis. Hoc enim præ cæteris, quæ in exemplum justiiudicii Dei jam pluribus annis sustinimus, nobis ad incredibile pressuræ nostræ augmentum accessit. Illud quippe tam detestabile, tam flagitiosum juramentum, quantum jam general scandalum mundo, offensam Deo, vobis culpam, nobis afflictionem! Præpositos siquidem a Deo abjurare, ipsius qui præpositos constituit injuria est, et non nostra, qui præficimur, sed potius ejus, qui præfecit, inhonoratur potestas, et evacuat obedientia. Quod profecto vitium, vobis confidentur dico, sed lacrymabiliter propter vos, idololatriæ par et simile est, ut ait propheta: *Quasi peccatum ariolandi est repugnare, et quasi scelus idololatriæ nolle acquiescere.* Unde et statuto veteris legis tales tanquam veri idololatriæ corporalis mortis reportabant sententiam. Vos autem fecisse videmini, quod deterius est, qui non solum repugnatis, sed etiam repugnatos vos juramento firmatis. Illud denique quale est, oves pastores abjicere? Profecto qui pastores suos deserunt, jam lupus invasit. Et nisi pastor, quem abjuraverunt, nunc protegat, depascet eas in finem: multa Scripturarum testimonia et sanctorum exempla in vestri detestationem delicti possent induci.

Verum tanti excessus enormitas etiam extremæ intelligentiæ hominibus claret. Si tamen non spontanei, sed inviti accessistis, in parte quidem excusatur peccatum, sed non excusatur omnino. Satijs enim fuisset corpus ipsum perdere, quam juramentum tam execrabile perpetrasset. Unde filii mortis universi vos, quæ juxta quod propheta ait de populo suo: *Et vos plaga inimici percussi estis, castigatione crudeli.* Verum ad manifestandam sollicitudinem quam pro vobis habemus ad Deum, vulneri tam saevo fomentum, quod solum nunc superest, adhibere curavimus, et de tam illicito juramento poenitentes, illos præsertim qui non spontanei, sed coacti juraverunt, vice beati Petri, apostolorum principis, et Romani pontificis, et nostra absolvimus; venerabili-

bus fratribus nostris diocesanis episcopis, et etiam minoribus sacerdotibus, ubi sedes episcopales vacare contigerit, vices nostras in exteriori satisfactione jam dictis poenitentibus injungenda committentes, omnes id scite volentes, vos tali juramento nequam esse obnoxios, nec ut pareatis obligari, ne instar Herodis sub prætextu pietatis efficiamini impii, et juramento excusetis scelus ipso deterius, juxta quod quidam ait: *Non est observandum juramentum, quo malum incaute promittitur*. Et item: *In malis promissis rescinde fidem. In turpi voto muta decretum. Quod incaute rovisi ne facias*. Et multa, quibus nunc supersedeo, his consonantia sunt.

In fine autem obsecro vos ego victus in Domino; obsecro quidem vos tanquam filios mihi semper in Christo amplectendos, ut digne ambuletis vocatione, qua vocati estis, ut ipsius Christi primo fidem tenentes, postea ipsius obediatis præpositis, subjacentes eis: *Ipsi enim pro vobis vigiliant, quasi rationem pro animabus vestris reddaturi*. Scire autem volo vos, fratres, quia et juramenta illicita, et cætera enormia multa, quæ pravis suggestionibus in oppressione justitiæ et veritatis circa nos facta sunt, ipsa favente veritate magis evenient ad ipsius profectum. Veritas enim claudi et ligari potest, vinci vero non potest, quæ et suorum paucitate contenta est, et multitudine hostium non terretur. Spiritus autem consilii et sapientiæ det vobis id ipsum sapere in alterutrum, ut unanimes uno ore honorificetis pastores et episcopos animarum vestrarum, quos constituit ille magnus pastor ovium in sanguine æterni testamenti Jesus Christus, et per charitatem Spiritus sancti, ut patri vestro jam naufraganti orationis vestræ manus porrigatis, ut liberet ab infidelibus, prohibentibus etiam, ne in ecclesia pro me in carcere fiat oratio, quæ tamen commune fidelium et infidelium suffragium est.

Gratia Domini nostri Jesu Christi sit cum omnibus vobis, quia male præstito juramento respueritis, et condigne et humiliter poenitueritis. Cæteros vero Deus aut cito convertat, aut temporaliter affligat, quousque respuerint, et condignam poenitentiam egerint.

EPISTOLA LXXIX.

AD SUFFRAGANEOS SUOS.

Thomas Cantuariensis archiepiscopus, suffraganeis suis.

Gratias ago Deo meo, cui nunc servio in vinculis meis, quod obedientia vestra jam in Dei ecclesiarum orbe divulgata est. Hæc est nunc gloria mea, quod nunc habitamus in unum rejecto illo infelicissimo Juda, velut putridissimo membro amputato, per quem in nostro corpore tantum scandalum venit, qui velut jumentum inquitum in junctura non traherat, sed unitatis nostræ turbabat juvendum. Unde gloriam illi dantes, qui virtute sua Catholice sue columnas confirmavit, rogamus vos, fratres amantissimi, per adventum Domini nostri Jesu Christi, et nostræ congregationis in ipsum, ut non cito moveamini a nostro

A sensu, neque terreamini, neque per ipsum, neque per sermonem, neque per epistolam tanquam ab Ecclesia missam. Hæc ideo dixerim, quia multi venient, et certe scio neque dubito, quod aliqui jam venerunt, qui velut pestilens ventus adducti mendaciorum aurugine terram corrumpunt. Sunt enim isti prophetæ Baal, missi ut decipiant populum, et in religiosa mendacia dictorum facilius fidem inducant. A prophetis Hierusalem ista egreditur pollutio supra terram. Ecce enim professionis nostræ sunt, qui persequendo nos movent pedes suos, et non quiescunt, qui epistolas mendacio plenas in orbem dirigunt, aures audientium polluunt, et linguis suis nos toto orbe consecrantur. Facti enim divitiarum servi, ad dominorum nutum, a quibus se sperant accepturi.

B vos, comitorum instar servorum, modo ajunt omnia, modo negant. Verum dolorem id temperat, quod jam pridem mater nostra interiorum hanc viscerum passionem sustineat. Unde et Dominus ipse hujusmodi prophetis, qui etiam sub statu veteris legis pauci non erant, comminatur in propheta: *Ecce, inquit, cibabo eos absinthio, et potabo felle*. A prophetis enim Hierusalem egressa est pollutio super terram, neque ab ista aegritudine penitus sanabitur, donec is venerit, qui sanabit omnes languores, et removabit ut aquæ juventutem suam. Vos quidem, fratres, nolite audire prophetas istos. Radulphus vero Landavensis qualisqualis archidiaconus, et Ricardus Barre dicuntur principes prophetiæ. Nolite, inquam, credere. Propheta quippe vaticinii sine monstrabitur. Et sciatis indubie quod in brevi nec in longos profecto dies, Domino faciente, sermones vani in tempore visitationis peribunt. Cum enim jam particularis discessio venerit, et revelatus fuerit homo peccati, filius perditionis, de instantia Domini diei nulla quæstio est. Vos autem state et confortamini in Domino, ne dies ille tanquam fur vos comprehendat. Ecce enim dedit vos Deus hodie in civitatem munitam, et in columnam ferream, et in murum æneum super omnem terram, regi terræ, et principibus ejus, et populo terræ. Si bellaverint adversus vos, non prævalebunt, quia Dominus erit vobiscum. Unde nos de obedientia vestra non minimum confidentes, firmiter vobis injungimus, et in

D virtute obedientiæ præcepti nostri auctoritate inhibemus, ne in novas obligationes juramenti, seu etiam pollicitationis a vobis exactæ declinetis. Alioquin vos, quod Deus avertat, in inobedientiæ reatum prolapsos adducet Dominus cum operantibus iniquitatem. De cætero, fratres, orate, ut rumoribus falsiloquorum oppressis, et multiplicis fraudulentæ dolis, veritas Dei currat, et clarificetur per nos, et libere mur ab importunis et malis hominibus, qui jamdum veritatem Dei in mendacio detinuerunt. Et Deus patientiæ et solatii det vobis id sapere in alterutrum, secundum Jesum Christum, ut onera nostra invicem portantes, unanimes, et uno ore honorificemus Patrem Domini nostri Jesu Christi, et sponsam ejus matrem nostram, sanctam et apostolicam Ecclesiam.

EPISTOLA LXXX.

AD CLERICOS ET LAICOS CANTIE.

THOMAS Cantuariensis, clericis et laicis per Cantiam constitutis.

Noverit universitas vestra, dilectissimi fratres, quod nos ex justis et manifestis causis publice excommunicavimus Gilbertum Londoniensem episcopum, Randolphum de Broc, et alios quorum nomina superius scripta sunt. Denuntiamus ergo vobis, sicut charissimis filiis et fratribus nostris, ut ab eorum communione, donec respiciant et condigne satisfaciant, prorsus abstinere. Præterea noveritis quod vos a subjectione et obedientia Gaufredi archidiaconi et Roberti vicarii ejus absolvimus; et prohibemus, ne iis obedientiam aut reverentiam exhibeatis, donec super crimine inobedientiæ condigne satisfaciant nobis et Ecclesiæ Dei, quam plurimum læsisse noscuntur; nec eorum exactiones sustineatis ulterius. Non turbetur cor vestrum in his, neque formidet, quia, Deo propitiante, contra malignantium tergiversationes et appellationum subterfugia sedis apostolicæ munimine tuti sumus.

EPISTOLA LXXXI.

AD CLERICOS CANTIE.

THOMAS Dei gratia Cantuariensis archiepiscopus, et apostolicæ sedis legatus, omnibus clericis per Cantiam constitutis, et in Christiana communione degentibus, salutem, et *Deo potius quam hominibus obedire.*

Novit vestra discretio pro parte, quot et quantas injurias Ecclesiæ Dei et vobis et nobis intulerit dominus rex Anglorum, et quandiu ipsum et suos in multa patientia sustinuerimus, expectantes ut eum nostra mansuetudo ad poenitentiam provocaret. Nunc autem quia ille domini papæ et nostra patientia semper abusus est, et in periculum animæ nostræ redundabit si tantas Christi injurias ulterius dissimulaverimus, universitati vestræ in virtute obedientiæ, sub anathemate, in periculo ordinis et beneficii, apostolica auctoritate et nostra præcipiendo mandamus, quatenus, nisi prædictus dominus noster rex infra purificationem beatæ Mariæ Ecclesiæ Dei et nobis debitam satisfactionem exhibuerit, extunc penitus a divinorum celebratione cessetis, excepto baptismo parvulorum, poenitentia, et viatico, quod pro necessitate conficiendum est, clausis ecclesiæ januis, et laicis personis exclusis, sine campanarum pulsatione et solemnitatibus, quas tempore quietis et lætitiæ exercere Ecclesia consuevit. Præterea Gaufredum Ridet et Robertum vicarium ejus, Ricardum de Ivelcestria, Willelmum Giffard, Ricardum de Luci, Nigellum de Saccavilla, et Adam de Cheringis excommunicatos et evitandos esse sub eadem interminatione denuntiare præcipimus: et ne quis parochianorum vestrorum Roberto vicario, quem beneficio ecclesiastico privavimus, deinceps obediat, auctoritate domini papæ et nostra prohibemus; et ne exactionibus, quas exercere solitus est, ulterius acquie-

A scant. Ad hæc nisi Joannes decanus Saresberiensis, et Wido decanus Walthamensis, et Joannes Cumin, et Radulphus Landavensis archidiaconus, et Wilmus alumnus comitis Hugonis, infra nativitatem Domini Ecclesiæ Dei, quam læserunt, et nobis satisfecerint, publice denuntietis eos tanquam excommunicatos extunc esse vitandos. Omnes autem, qui ecclesias vel ecclesiastica beneficia de manu laicorum accipiunt, qui clericos et ecclesiasticas personas ad inobedientiam compellunt, qui domini papæ nuntios et nostros, ne Ecclesiæ necessitates prosequantur, impediunt, qui ad evitandam legitimam correctionem, ut justitia ecclesiæ opprimatur, ad sæculi confugiunt potestates, qui traditiones hominum et potentum usurpationes sive abusiones divinæ legi præferendas prædicant, aut præferri compellunt, et sacerdotes alienæ ordinationis, qui post exitum nostrum sine auctoritate nostra præsumpserunt, sive concessionem usurpantium vices nostras habuerint, sive non, in episcopatu nostro divina celebrare, nisi postquam hæc eis denuntiatio innoverit, a tanta præsumptione destiterint; illos etiam qui eos de cætero admiserint in ecclesiis suis, hoc, inquam, omnes excommunicatos esse publice denuntiare præcipimus. Ne timeatis, dilectissimi filii, a multitudine vel facie eorum, quia plures nobiscum sunt quam cum illis, vobisque cito de cælo dabitur consolatio, sanctis omnibus procurantibus apud Deum, ut adversarius Ecclesiæ ad gloriam nominis sui mature convertat aut conerit. Perseverantiam fidei et obedientiæ vobis divina gratia largiatur, sine qua, ut nostis, coronam justitiæ nullus assequitur.

EPISTOLA LXXXII.

AD DECANOS CANTIE.

THOMAS Cantuariensis archiepiscopus, decanis Cantie.

Novit dilectio vestra, quomodo in perniciem Ecclesiæ dominus rex, sedis apostolicæ patientia et nostra semper abutens, deteriora præcedentibus malis semper adjecerit. Inde est quod vobis in virtute obedientiæ, in periculo ordinis, officii et beneficii præcipiendo mandamus, quatenus infra quindecim dies a susceptione præsentium in ecclesiis jurisdictionis vestræ omnia divina, præter baptismum parvulorum et poenitentias morientium, prohibeatis officia celebrari, hujus interdicti sententiam, quantum in vobis est, faciatis ab omnibus inviolabiliter observari. Ad hæc sub eadem interminatione præcipimus, ut procuretis, quomodo litteræ nostræ conventui Cantuariensis Ecclesiæ præsententur.

EPISTOLA LXXXIII.

AD WILLELMUM SUBPRIOREM ET CONVENTUM CANTUARIENSEM.

THOMAS Dei gratia Cantuariensis archiepiscopus, totius Angliæ primas, et apostolicæ sedis legatus, dilectissimis in Christo filiis, WILLELMO subpriori, et ODONI, et cæteris fratribus, qui in sancta Cade-

tuariensi Ecclesia Domino famulantur, salutem, et pacem, quam sicut mundus nescit, ita solam Christus agnoscit.

Quot et quanta pro honore Dei, pro libertate Ecclesie, pro sedis apostolicæ reverentia, et privilegiis ejus conservandis huc usque parvitas nostra pertulerit, vestra quidem non potest ignorare nec dissimulare debet fraternitas, quæ licet nostris et Christi pauperum nobis in ipso coexsulantium necessitatibus, ut oportuit, nondum communicaverit, tamen acerbitatem exsilii, proscriptionis injurias, contumelias detractorum, persecutorum atrocitates, dolos insidiantium, tyrannorum vires in personam et domum nostram solutius, acrius, et pertinacius effusas, ex relatione multorum audivit, et partim oculata fide conspexit. Ceterum in omnibus his gravissima fuere nobis pericula, quæ periculum a falsis fratribus, prætendentibus pacis officia, et obsequia pietatis, et clam tendiculas operantibus. Tendebant laqueos et acuebant ut gladium linguas suas, et aliorum machinas erigebant, ut nobis et nostris prorsus de coetu viventium deletis, sanctæ Cantuariensis Ecclesie titulum abolerent, et ei auferrent honoris et præminentie gloriam, quam sanctorum, qui in ea requiescunt, constat sanguine, et laboribus multis et magnis acquisitam. Retribuet illis Dominus secundum opera eorum, et secundum nequitias ad inventionem ipsorum. Horum incentor et signifer exstitit ab initio Londoniensis ille, qui primus scidit Anglicanæ Ecclesie unitatem in perniciem ecclesiasticæ libertatis et nostram. Regis et officialium suorum animos armavit et manus; deinde fratri et amico nostro Eboracensi archiepiscopo assistens et coherens, quosdam de fratribus nostris exquisita calliditate circumvenit, ut contra matrem suam, cui ad fidem et obedientiam ex professione tenebantur astricti, domino papæ pro antedicto archiepiscopo, qui ex quo a Cantuariensi Ecclesia in archiepiscopatum promotus est, ei semper quantas scivit et potuit, tetendit insidias, scribebant, quatenus ei liceret crucem suam salutiferæ crucis æmulam, quia in stipite elationis posita est, per provinciam nostram deferre, ut ad parilitatem Ecclesie Cantuariensis quodammodo videretur accedere.

Parcat illis Deus, qui circumventi sunt, et eos qui circumvenerunt, aut compulerunt simplices et infirmos fratres, ad honorem suum aut convertat, aut conerit. Reticeamus ad præsens, quod moralius esset enarrare, quot et quantis, et quibus sollicitationibus et machinamentis exsilium et proscriptionem nostram, cum jam dicto archiepiscopo, et Ricardo de Luci, et Ricardo tunc Pictaviensi archidiacono, præsentem nuntio domini papæ, dictavit, et fecit jam protelari in annum quantum, et tyrannorum ministerio Christi pauperes innocentes compellat vivere miserabiliter relegatos, ne propriam injuriam prosequi videamur. Hæc fecit ille Cantuariensis Ecclesie filius, verus utinam. Hæc fuit

A exhibitio fidei sacerdotis, et episcopi professi fidem et reverentiam. Hæc opera fratris, amici, familiaris, adherentis lateri et ordini nostro, qui emergentibus Ecclesie necessitatibus nobiscum primus fuit in concilio sacerdotum. Diu, dilectissimi, tacuimus, et eo usque dissimulavimus in periculis et criminibus tam manifestis ut sanctis habentibus spiritum Dei, et viris discretis videretur patientia nostra ignavia et remissionis potius nomine digna, quam virtutis. Ille autem quid fecit? Errorem ejus, ne furorem dixerimus, quo mentis malitiam patefecit, inviti loquimur, neque vos patienter audietis, qui alterum Absalon in sanctæ civitatis subversionem plane cognoscetis armari, ut hereditatem vestram et sanctorum, quibus vestra clarescit ecclesia, gloriam transferat ad Aquilonem. Similis illi, qui usurpatione gloriæ, non conformitate bonitatis Altissimo voluit cœquari. Gloriatur enim, quod cathedram episcopalem Londoniis statuet, et quod Ecclesie Cantuariensi nullam debet obedientiam, quia ex quo translatus est, nec iteravit professionem. Quid ad hæc turbamini, et cogitationes ascendunt in corda vestra, ut lacrymas nequeat lesa pietas continere? Scimus enim, quia nullus vestrum est, aut admodum rarus, et eidem patriciæ comparandus, si quis tamen ad hanc vocem non ingemiscat, cujus animum non exulceret et pertranseat vis doloris, et qui corde et visceribus extractis non mallet præmori, quam videre quod præsumptuosus ille minatur. Sed nota divino contigit, ut se proderet iniquitas ejus, et qui præcipitare decrevit innocentes, debitam properet ad ruinam, et cum auctore suo pro usurpatione gloriæ irreparabilem excipiat casum. Quis enim contra sanctorum sedem Ecclesiam Cantuariensem, a sæculis tam immaniter insurrexit, et non est præcipitatus ex alto? Quot et quantos persecutores vestros præcipitavit Dominus ante faciem vestram? Itaque consolamini, fratres, experti quod major sit arrogantia Moab, quam iortitudo ejus; et si prope est ex quo diuturnos tumultus exercet, ut in nocte vastetur et conticescat. Sed nunquid vos, quibus fere præ cæteris tanta paratur injuria, dissimulabitis ulterius, et a vindicta, quoniam Deus suæ ultor injuriæ et nostræ læsionis, cum his qui terram Merob inhabitant, continebitis manus? Sed tenetis quod scriptum est: *Maledicta terra Merob*, dixit angelus Domini. Et illum quidem jam apprehendit maledictio, quoniam culpis exigentibus traditus est Satanæ in interitum carnis, et characterem bestie insignitus, a fratribus et coepiscopis, qui rectum sapiunt, evitatus, ne eos ex participatione lepræ macula damnationis inficiat. Accingimini ergo filii potentes, et estote parati contra subversionem ecclesie vestræ in prælium. Si quis Domini est, jungatur nobis, et quicquid conatibus ejus favet animo, manifeste cohæreat illi. Amodo namque duobus dominis servire non poteritis, aut episcopis obedire, quia Dominus ventilabrum judicii sui misit in terram, ut grana a

paleis discernantur. Qui vero illi cohæserint, Deo propitiante similes ei erunt in interitum carnis, facti in combustionem et cibum ignis. Nulli enim de cætero parcemus, quin pro modo culpæ exerceatur et ratio vindictæ. Unde quia universitatem veatram, quod Deus novit, sincera charitate diligimus, et pro jure matris nostræ S. Cantuariensis Ecclesiæ, ut præsens indicat dies, si res exigit, decrevimus animas ponere, vobis consulendo, monendo, et in virtute obedientiæ præcipiendo mandamus, quatenus duos de fratribus vestris quos ad hoc, vestro communicato consilio, necessarios decrevimus, præparetis, ut sufficienter instructi cum nuntiis nostris possint occurrere homini tam maligno: et ex rescriptis privilegiorum nostrorum dominum papam et curiam Romanam sufficienti præmunire, et in auditorio ejus expugnare, et proterere publicæ salutis hostem. Nunc enim apparebit, qua fide, qua devotione, quo zelo quisque vixerit hactenus, et militaverit ecclesiæ suæ. Dissimulavimus culpas eorum, qui excommunicatis nostris communicaverunt, licet nomina eorum pro magna parte teneamus expressa, sed de cætero nisi cautius egerint, dissimulationi non erit locus. Excommunicati vero sunt, quorum nomina subscribuntur, inferius, nobisque tam de justitiæ, quam de clementia sedis apostolicæ indultum est, ut nullius appellationis obtentu differamus in eos rigorem ecclesiasticum exercere. Nam dominus papa cognita malitia adversantium, quæ per se patens est, et justitia nostra, quæ cunctis liquet, ita procul dubio in causa nostra procedit, sicut in fratris aterni necessitate judicat procedendum.

Eramus ad consolationem vestram ampliora dicturi, sed consulta ratione substitimus, interim expectantes et orantes, ut fiat omnium nostrum cor unum et anima una in Domino, ne aliquis quæ sua sunt querat, sed quæ Jesu Christi, et quod publicæ utilitati expediat, et libertati Ecclesiæ et dignitati in posterum. Confortamini pusillanimes, quia prope est ut videatis gloriam Dei, et confusionem et ignominiam eorum, qui Ecclesiam Dei persequuntur. Non confidat quis in mundana suppellectili, vel satellitum familiaritate, quia

Non habet eventus sordida præda bonos.

Et infidelium nulla est fides. Et ne a nobis districtius exigatur, si eorum qui Ecclesiam persequuntur, et quos, ut pœnitentiam agerent, in multa patientia jam fere toto quinquennio supportavimus, magnas et manifestas culpas ulterius dissimulaverimus, fraternitati vestræ denuntiavimus nos publice excommunicasse Gaufridum Cantuariensem archidiaconum, et Robertum ejus vicarium, Ricardum de Iwelcestre, Willelmum Giffar, Ricardum de Luci, Adam de Cheringe, et item eos qui officia vel beneficia ecclesiastica contra sacrorum canonum institutionem de manu laica acceperunt, vel ea usurpaverunt propria temeritate. Similiter et illos qui dominici papæ nuntios vel nostros, ne Ecclesiæ necessitas

A les prosequantur, impediunt: Vobis ergo auctoritate domini papæ et nostra mandamus, quatenus eos tales habeatis in archiepiscopatu nostro et haberi faciatis, quales haberi solemniter excommunicatos sacrorum canonum disciplina præscribit.

EPISTOLA LXXXIV.

AD EOSDEN.

THOMAS Dei gratia Cantuariensis archiepiscopus, et sedis apostolicæ legatus, dilectis in Christo filiis, WILLELMO subpriori, et toti conventui Cantuariensis Ecclesiæ, salutem, et in fidei et obedientiæ virtute constantem perseverantiam.

Lamentati sumus quinquennio cum propheta stupentes præ dolore et admiratione, quomodo dominus gentium, provinciarum princeps, et quondam numerosa filiorum sobole, et populorum affluentia gloriosa, et, quo gloriosior, et illustrior est Britanniarum mater, nutrix et propagatrix in Christo, tandiu in solitudine, miseramque in servitutem redacta sit, ut nec libertatis audeat meminisse, nec ad quod fundata est, gentibus edisserere legem Christi, et publicare ecclesiasticas sanctiones. Supervacaneum erit referre, præsertim vobis, qui præsentes vidistis, et audistis atroces injurias, et quæ sine miseratione et omni reverentia juris adversus Deum et Ecclesiam præsumpta sunt. Sperabatur quod nostra dominum regem patientia posset ad pœnitentiam provocare: sed, quod sine lacrymis enuntiare non possumus, immanitas ejus ab impunitate semper ascendit, et ex dissimulatione factus est inhumanior. Timemus ergo ne sanguis ejus, et jam fere deficientis ecclesiæ de manu nostra merito requiratur, si tantus excessus remanserit ulterius impunitus, et irrequisitus a nobis. Nam et Heli ob id periisse describitur, quod filiorum videns et increpans culpas, uti maluit affectione et mansuetudine patris quam severitate et auctoritate pontificis.

Ne ergo nos ex criminis dissimulati consensu justitia reos damnationi deputet ante Deum, vobis in virtute obedientiæ, sub anathemate, in periculo officii, gradus et beneficii, apostolica et nostra auctoritate præcipiendo mandamus, quatenus nisi infra purificationem beatæ Mariæ virginis Ecclesiæ satisfecerit, et tam illi quam his qui pro ea exsulant aut proscripti sunt, debitam reddiderit pacem, a divinis cessetis officiis, excepto quod exclusis laicis sine solemnitate campanarum et ecclesiasticæ lætitiæ signis, voce demissa canonicus mos viris religiosis indulget. Nec timeatis eos, qui interdum a Domino permittuntur ad majorem coronam electorum corporaliter sanctos affligere, et in animas nihil possunt quia in hoc consilatorio patenter judicabit Dominus quos in futuro debeat coronare. Illos autem qui ecclesias et ecclesiastica beneficia contra canonicas institutiones accipiunt de manu laicorum, qui clericos pœnis aut terroribus ad inobedientiam compellunt, qui domini papæ nuntios et nostros, ne Ecclesiæ necessitates prosequantur, impediunt, qui tra-

ditiones hominum divine legi præferendas docent, A et usurpationes sive abusiones potentum cognuit Christianæ religionis institutionibus anteponi, et nominatim Gaufridum Cantuariensem archidiaconum, et Robertum v. carium ejus, Ricardum de Ivelcestre, Wilelmum Giffard, Nigellum de Saccavilla, Ricardum de Luci, Thomam filium Bernardi, Adam de Cheringis publice excommunicavimus. Quod si nec in subditorum poenis excessus correxerit rex Angliæ, exinde personæ ejus, quod inviti dicimus, in dispendium salutis nostræ, sicut hactenus fecimus auctore Domino, non paremus. Nam miseratio talis impietas esse convincitur, cum scriptum sit, quod qui virgæ parci, odii filium. Ad hæc eadem auctoritate sub eadem interminatione præcipimus, ut Joannem decanum Saresberiensem, Widonem B decanum Waltham, Joannem Cumin, Radulphum Landavensem archidiaconum, Wimarium presbyterum alumnum comitis Hugonis, a die Nativitatis Dominicæ tanquam excommunicatos evitatis, nisi Ecclesiæ Dei quam læserunt, et nobis satisfactionem debitam curaverint exhibere. Verbum Dei luceat in cordibus et operibus vestris, ut timorem Dei præferentes humano, vobis acquiratis coronam gloriæ, et exemplum obedientiæ et fortitudinis feliciter ad eos vos transmittatis et posteros.

Similiter Ricardo priori, et capitulo Dovræ, et Cantuæ monasteriis.

EPISTOLA LXXXV.

AD EOSDEM.

THOMAS Cantuariensis archiepiscopus, WILLELMUS subpriori et conventui Cantuariensi.

Quot et quantas persecutiones jam per sex annos gratis pertulerit Ecclesia Anglicana, tanto certius agnoscitis, quanto acerbius ipsa rerum experientia pro magna parte sensistis. Quia ergo dominus rex, dum in multa patientia sacræ Romanæ Ecclesiæ et nostra provocatur ad poenitentiam, non modo non corrigitur, sed semper adjicit deteriora prioribus, ne sanguis ejus et compereuntis Ecclesiæ requiratur a nobis, universitati vestræ in virtute obedientiæ, sub periculo ordinis et gradus præcipiendo mandamus, quatenus in Ecclesia Cantuariensi cessetis infra quindecim dies a susceptione præsentium ab omnibus divinis, excepta poenitentia morientium et D viatico, quod januis clausis, et laicis exclusis, sine campanarum pulsatione et omni solemnitate lætitiæ confici religionis favor exposit. Præcipimus autem, ut auctoritate nostra de hujus specialis mandati tenore utentes, omnibus decanis per archiepiscopatum constitutis denuntiatis in virtute obedientiæ, in periculo ordinis, officii et beneficii, quatenus in omnibus ecclesiis jurisdictionis eorum hujus interdicti sententiam, quantum in eis est, faciant inviolabiliter observari. Vos Deo potius quam hominibus obediens gratia Dei custodiat.

Similiter abbati de Faversham, et aliis abbatibus, et prioribus per archiepiscopatum constitutis, nisi quod non tenentur aliquid præcipere decanis.

EPISTOLA LXXXVI.

AD GAUFREDUM RIDEL ARCHIDIACONUM CANTUARIENSEM.

THOMAS Dei gratia Cantuariensis archiepiscopus GAUFREDO Ridel archidiacono Cantuæ.

Expectavimus tempore longo fidelitatem tuam, devotionem, et obedientiam. Sed quia fidelitas tua parum nobis huc usque attulit emolumenti, devotio minus exhibuit gratiæ, obedientia nihil tibi comparare debuit meriti, mandamus tibi, et in virtute obedientiæ, ac in periculo ordinis tui et possessionum tuarum præcipimus, quatenus post susceptionem litterarum nostrarum infra quadraginta dies conspectui nostro te repræsentans, servaturus domino fidem, patri devotionem, obedientiam archiepiscopo tuo, ut vel sic discas officii tui necessitates exercere, Cujus utinam digne emolumenta senseris.

EPISTOLA LXXXVII.

AD EUNDEM.

THOMAS Dei gratia Cantuariensis Ecclesiæ minister humilis, et apostolicæ sedis legatus, GAUFREDO inobedienti, archidiacono Cantuariensi, consultius sibi prospicere propter inobedientiam.

Misimus tibi jam pridem præceptorias sub interminatione poenæ, sub dilatione quadraginta dierum, quatenus infra eosdem ad nos venires, satisfactorius nobis pro officii tui debito. Mittimus nunc correptorias, et merito punitorias, si non veneris responsurus nobis de inobedientia, satisfactorius de communicatione excommunicatorum nostrarum, excepturus de utroque quod meruisti. Hujus rei exsequendæ damus tibi diem peremptorium, quadagesimum equidem a præsentatis tibi litteris nostris, sive fraude tua minus a te receptis, sive presumptione refutatis. Veni, ut evadas poenam pro non veniendo. Accelera, ut lætetur Ecclesia de conversione tua. Ne confundaris, ut sentias commodum de confusione, ut convertaris, sit tibi quod meruisti.

EPISTOLA LXXXVIII.

AD EUNDEM.

THOMAS Cantuariensis archiepiscopus, GAUFREDO archidiacono Cantuariensi.

Justum est ut ei, qui in manifesto inobedientiæ crimine perseverat, a subditis obedientia subtrahatur. Et qui scienter communicat his quos excommunicatos esse non ambigit, se ipsum ex nefanda participatione eorum condemnationi immergit. Nos autem miramur supra modum, qua temeritate præsumas in clericos et parochianos Ecclesiæ Cantuariensis magisterium gerere, et nostrum videlicet episcopale officium, investituras ecclesiarum faciendo, et tradendo curam animarum, quam ipsis archidiaconis sanctorum Patrum decreta subtrahunt, exercere, et plebanas ecclesias onerare variis exactionibus, præsertim cum te publice excommunicaverimus, sicut ipsum Londoniensem, Ranulphum de Broc, et reliquos quorum nomina superius scripta sunt. Clericos quoque et parochianos nostros

ab obedientia et reverentia tua prorsus absolvimus, donec memor fidei et juramenti quod nobis præstitisti, cum satisfactione condigna redeas ad obedientiam nostram. Prohibemus autem auctoritate domini papæ et nostra, in virtute obedientiæ, in periculo salutis et ordinis, ne de cætero te immittas de archidiaconatu nostro, donec a nobis absolvi merearis. Hoc autem tam tibi quam omnibus notum sit, quod omnes investituras ecclesiarum, quæ in absentia nostra factæ sunt, auctoritate domini papæ et nostra in irritum revocamus, et tibi interdiciamus, ne parochianos Ecclesiæ Cantuariensis tua communione, contamines. Et quidem, Deo propitiante, contra malignantium tergiversationes et appellationum subterfugia, sedis apostolicæ munimine tuti sumus, subicientes et illos anathemati, qui ex mandato domini regis, aut propria temeritate nostra vel nostrorum occupaverunt bona, aut in proscriptionem innocentium, aut pauperum Ecclesiæ Christi depopulationem, conciliis, aut delationibus, aut dolis ipsius regis animum investigaverunt. Et item eos, qui nuntios domini papæ et nostros, ne prosequantur Ecclesiæ necessitates, impediunt. Præcipimusque eos a participatione fidelium abstinere, donec respiciant et condigne satisfaciunt.

EPISTOLA LXXXIX.

AD GUNTHERIUM.

THOMAS Cantuariensis archiepiscopus, GUNTHERIO dilecto suo.

Rediens ad nos Gilbertus canonicus, quem miseramus ad curiam, indicavit nobis Magistrum Herveum super negotiis nostris nihil hactenus effecisse, sed spei bonæ promissionibus detineri. Ecce autem tempus et locus, in quo, favente Deo, prædicta negotia facile poterunt consummari. Dominus enim et amicus noster Moguntinus electus magnus est modo, sicut esse debet, in oculis domini papæ, et facillime nunc ab eo, quicquid petierit, impetrabit. Scripsimus igitur ei, ut ipse apud dominum papam pro nobis sit, postulans instantem ab eo, ut negotia nostra celerius ad finem debitum perducantur. Nec enim scimus quid superventura dies pariat. Instet igitur, et cum omni sollicitudine curam gerat vigilantia tua, ut dum memoratus amicus noster, dominus electus Moguntinus, præsens est, negotia nostra, prout Magistro Herveo dictavimus, effectui mancipentur. Diligenter autem observa, ne ad notitiam Willelmi Papiensis, sive Joannis Neapolitani negotia ipsa perveniant. Et ne forte negotiorum qualitas memoriam tuam effugerit, petitio nostra est, ut dominus papa nobis et Ecclesiæ nostræ pristinam primatus ex integro restituat dignitatem, et præcipiat firmiter atque constituat, ut Eboracensis archiepiscopus, remota appellatione, crucis honore præ se ferendæ deposito, jure primatus nobis et ecclesiæ nostræ subjectus sit, nec ullatenus de cætero prædictum crucis honorem in provincia nostra sibi audeat usurpare. Præcipiat quoque nihilominus at-

que constituat, ut remota similiter appellatione, abbas S. Augustini nobis professionem faciat, et in ecclesia nostra, si fieri potest, vel alibi benedictionem pastorem de manu nostra recipiat. Ut igitur ad ista nobis impetranda præfatum dominum et amicum nostrum, dominum Moguntinum, totis viribus impellere studeas, et volumus et rogamus. Si enim, quod absit! præsentis temporis opportunitatem vacuum abire permiserimus, nunquam forsitan huic similem nancisci poterimus.

EPISTOLA XC.

AD JOANNEM CANTUARIENSEM CLERICUM SUUM.

THOMAS Dei gratia Cantuariensis Ecclesiæ minister humilis, JOANNI Cantuariensi, salutem.

Quomodo de novo facti sumus opprobrium vicinis nostris, subsannatio et illusio his, non modo qui in circuito nostro sunt, verum etiam omnibus fere gentibus utriusque regni, et Francorum et Anglorum, et forte imperii, qualisque fama, ne dicamus infamia, et scandalum circumvolat per aures et ora omnium in dominum papam, unde magis dolemus, Deus novit, quam de propria persona, et in totam curiam graviter invehendum, et insultantium, et opprobria inexpressibilia improperantium, ex subscriptis aliquatenus poteris pendere, et domino papæ, et amicis, si qui tamen sunt, secretius intimare. Ecce Joannes de Oxeneford, et alii regis nuntii a curia redierunt, extolles se supra id quod dicitur, aut quod colitur Deus; dicentes se impetrasse in curia quicquid desideraverunt: videlicet, quod rex exemplus sit a potestate omnium episcoporum, præterquam domini papæ, quoad excommunicationis innovationem; et quod habiturus sit legatum quem petivit, Willelmum scilicet Papiensem, qui inimicus noster est plus quam manifestus, cum plenitudine potestatis in omnem terram regis, ut ædificet, et plantet, et præsertim eradicet, et evellat, omni remedio appellationis sublato, et maxime ad decidendam principalem, quæ inter regem et nos vertitur, causam; et omnes incidentes, omni exceptioni, omne de cætero, ut dicitur, præjudicium allaturas. Et cum hac pompa, cum hoc fastu rediit Joannes de Oxeneford in Angliam. Et cum applicuisset in portu quodam, invenit ibi prope fratrem nostrum, Herefordensem episcopum, auram prosperam ad transfretandum, fortim saltem expectantem: quia palam non poterat, prohibitus a ministerialibus regis ex parte regis, et litteris ejus. Quo invento, inhibuit ei primo ex parte regis ne transiret, deinde ex parte domini papæ. Episcopo autem quærente, sicut nuntius suus, qui ad nos postea venit dominum suum excusaturus, nobis retulit, utrum super hoc litteras domini papæ haberet? dixit, se habere, quibus inhibebat dominus papa ei et aliis episcopis Angliæ, ne venirent ad vocationem nostram, neque in aliquo nobis obediunt, quousque veniret legatus de latere domini papæ, a rege impetratus, qui et causam super appellatione

quam fecerant, et causam etiam principalem inter regem et nos, et omnes alias incidentes cum plenitudine potestatis, remoto omni appellationis obstaculo, terminaret. Cumque instaret episcopus, ut litteras inspiceret, dixit se non habere prae manibus quia miserat eas cum impedimento suo usque in Wintoniam, quæ distat a portu Hamtonæ per duodecim milliaria. Misit itaque episcopus, habito consilio cum suis, Wintoniam cum Joanne Magistrum Edwardum clericum suum, virum probum, ut credimus, et fidelem, qui vidit litteras una cum Londoniensi episcopo, similiter transfretare volente. Qui Londoniensis, visis litteris, prorupit in vocem gratulabundus dicens : *De cætero Thomas meus non erit archiepiscopus.* Adjecit etiam Joannes : Quia privilegiata erat persona, ne de cætero posset a vobis excommunicari, nec etiam conveniri nisi in præsentia domini papæ, et liberam se habere potestatem donandi decanatum Saresberiensis Ecclesiæ cui vellet, et in omnibus immunitam et suspensam esse nostram dignitatem et jurisdictionem usque in adventum legati venturi. Hæc omnia mandavit vobis episcopus per capellanum suum, canonicum regularem, virum religiosum, quem miserat ad nos, excusaturum, quare non venerit ad vocationem nostram. Vocaveramus enim eum semel, et secundo et tandem tertio, cum preceptorio edicto, quatenus infra purificationem nobis exhiberet præsentiam suam, inquam vir magnæ auctoritatis, et familiaris regi, tractaturus de pace inter regem et nos, si quo modo fieri posset.

Hæc omnia paratus erat canonicus jurare, se ita accepisse ab ore episcopi, nobis ex parte ejus significanda. Quæ si vera sunt, tunc procul dubio suffocavit, et strangulavit dominus papa, non modo personam nostram, sed et se, et omnes ecclesiasticas personas utriusque regni : imo etiam utramque Ecclesiam, tam Gallicanam quam Anglicanam. Quid enim exemplo hoc pessimo non audebunt ceteri principes terrarum adversus ecclesiasticas personas ? Ad quem recurrent ? Quomodo confidere poterunt de Ecclesia Romana, quæ nos pro ipsa stantes et usque ad sanguinem decertantes, ita deseruit, et destituit ? Quid erit, si manentibus his inaudiis, et detestandis privilegiis, et emancipationibus tam personæ regis quam aliorum, sub quocunque prætextu contingat, quod Deus avertat, ut decedat dominus papa, vel ut in urbe turbata fuerint omnia ?

Certe transferentur hæc in heredes, nec poterunt avelli a manibus eorum. Et quod deterius est, alii principes hoc exemplo similia extorquebunt privilegia, et emancipationes ab Ecclesia, veli noli ipsa ; et sic peribit omnis Ecclesiæ libertas, et episcoporum jurisdictionis aique potestas, cum non sit qui eohibere possit, vel coercere tyrannorum flagitia, quorum tota intentio est, hodie grassari in Ecclesiam Dei, et ejus ministros ; nec desistent, quousque eos, sicut et alios, in servitutem redegerint. Quis tamen erit finis, adhuc nescimus. Verum id scimus, quia supra mo-

dum gravamur, sive vera sint, sive non, quæ proponuntur. Non enim obediunt nobis, nec respiciunt nos in aliquo sicut solent, vel episcopi, vel abbates, vel alii de clero Angliæ, jam quasi certi super depositione nostra. Verum securus sit dominus papa, quod nulla ratione intrabimus terram regis litigaturi, nec stabimus iudicio inimicorum nostrorum, et præsertim Papiensis, qui non sitit, nisi sanguinem nostrum, ut attineat sedem nostram, quæ revera, ut accepimus, ei promissa est, dummodo a nobis possit liberari. Est et aliud, in quo gravamur, quia nobiles viri tam proceres, quam episcopi, et alii prælati de regno Francorum, jam quasi desperati de nobis, coexsules nostros quos misericorditer sustentabant, nobis remiserunt, qui frigore et fame de cætero peribunt, sicut et quidam jam perierunt. Hæc omnia domino papæ diligenter insinua, ut remedium aliquod contra hæc mala nobis provideat, sicut petimus ; si quid zeli Dei in eo remansit, quod adhuc speramus, et utinam spes non confundatur. Vale, et quam citius poteris, nuntium nobis istum remitte, per quem de his et aliis certioresmur, utpote in arcto constituti, si vera sunt, quæ proponuntur.

EPISTOLA XCI.

AD ALEXANDRUM ET JOANNEM FIDELES SUOS.

THOMAS Cantuariensis archiepiscopus, ALEXANDRO et JOANNI fidelibus suis, salutem.

Ante discessum vestrum innouit vobis, nos misisse canonicum regularem de S. Joanne ad dominos cardinales cum transcripto litterarum domini papæ de excommunicatis nostris sub juramento absolvendis in hanc formam, ut omnia nobis et nostri ablata restituerent ; alioquin in eandem, in qua prius fuerant, reponerentur sententiam. Postea vero ipsas litteras domini papæ ipsis cardinalibus per dominum Osbertum subdiaconum curiæ misimus, ad quas per præfatum canonicum nobis responderunt, quod predicti excommunicati, quorum nomina eis in schedula expresseramus, ex regis mandato et ejus auctoritate reditus nostros et nostrorum perceperant, et ideo non posse, dum in terra ejus moram facerent, in illos justitiam exercere : adjicientes etiam nomen nostrum ipsi regi adeo esse odiosum, ut nec ipsi nec alii auderent de nobis cum eo loqui, nec eum super his, quæ ad nos spectant, aliquo modo convenire. Dixit etiam dominus Otho ipsi nuntio secretius, quod etiam apud vos secretum sit, nemini præterquam domino papæ et fidelioribus amicis nostris revelandum, quia pro nihilo mandaret eis dominus papa aliquid hujusmodi, quod esset contra regem, quem dum moram facerent in terra sua, nec pro ipso papa, nec pro alio eum aliqua ratione offenderent. Et ideo omnimodis expedit, imo plus quam necessarium est, ut omnem quam poteritis, operam adhibeatis, et pro viribus apud dominum papam efficiatis, quatenus sæpe dicti cardinales revocentur, et a terra tota ipsius regis sub pænæ interminatione exire compellantur. Sed et de Londo-

niensi et Saresberiensis memoriter teneatis, et efficere satagatis, quod vobis injunximus. Litteras etiam domini regis pro nobis, et litteras cardinalium, quas per prætaxatum canonicum nobis miserunt, et litteras domini Ottonis privatas, quas et apud vos privatas esse volumus, domino papæ duntaxat ostendendas, per latorem præsentium vobis mittimus.

Ad hæc significatum est nobis per aliquem, quia juxta quod Wilhelmus Papiensis suggessit regi, et forte aliis, nisi præsensisset de voluntate domini papæ nos posse transferri, id nunquam rex in quo modo est, propositum arripuisset, nec in eo stetisset. Verum sciat dominus papa et alii amici nostri, quod et eis constanter et firmiter proponatis, quia permitteremus nos potius interficere, Deus novit, qui scrutator est cordium, quam pateremur nos a matre nostra Cantuariensi Ecclesia cum vita avelli, cum nos enutrierit et exaltaverit in id quod sumus. Unde et pro nihilo ad id operam darent, quia citius quodvis subiremus discrimen. Adjiciatis etiam, quia si non esset aliud, nisi quod auferat homo ille possessiones ecclesiæ nostræ, et aliarum ecclesiarum in terra illa, malleamus, Deus scit, mori quavis morte, quam turpiter vivere, ipso nec impune ferente, et debitam a nobis penam, nisi forte satisfecerit, non reportante.

EPISTOLA XCII.

AD EOSDEM.

THOMAS Cantuariensis archiepiscopus, JOANNI et ALEXANDRO clericis suis.

Quæ in colloquio regum in octava S. Martini apud S. Dionysium habito gesta sunt, plenius agnoscetis ex rescripto litterarum, quas domino Senonensi transmisimus. Sed quia verebatur fastidium, nonnulla quæ ibi desunt, ei domino et amico nostro per vos communicanda litteris præsentibus curavimus exarare. Nam sic ei res facilius innotescet, cum viva voce referre possitis plurima, quæ litteris illis minime censuimus inferenda. Exegerunt a nobis dominus Rothomagensis, et episcopus Sagiensis, qui pacis reformandæ mediatores esse debuerant, quatenus exprimeremus immobilium nomina possessionum, quas nobiscum Ecclesiæ Cantuariensi restitui petebamus, ad quod respondimus nos, qui tanto tempore absentes fuimus, et caruimus omnino gentis et terræ nostræ commercio, scire non posse, quas terras dominus rex aut officiales ejus alienaverint aut distraxerint, sed omnes nobis restitui volebamus, quas antecessor noster bonæ memoriæ Theobaldus archiepiscopus habuit, quoad vixit, et nos ipsi, quando ad regimen Cantuariensis Ecclesiæ accessimus, et postea quando profecti sumus ad concilium Turonense, et semper, antequam rex nos et Ecclesiam persequeretur.

Et præter istas petivimus et petimus terram, quam Henricus de Essexia tenebat de nobis, quia illo ex tali causa exheredato, in dominium et proprietatem Ecclesiæ redire debuit, sicut illæ quas de rege tene-

bat, ad illum redierunt. Fendum quoque Wilhelmi de Ros nobis abstulit, contra juramentum quod regi Stephano præstitit, quando eum adoptavit in filium, et accepto hominio ejus ipsam regni instituit heredem. Juravit enim tunc solemniter et publice, quod terras, quas rex Stephanus, dominus et adoptionis jure pater suus, Ecclesiis contulerat, eis perpetuo conservaret. Abstulit etiam nobis terram de Mundeham, quam contra Deum et salutem suam, et omnem æquitatem Joanni Mareschallo contulit, qui ntu divino, ut scitis, beatissimo Anselmo suam vindicante injuriam, cum liberis suis, quos prædæ futuros successores opinabatur, post paucos dies defunctus est. Hæc autem tres possessiones, scilicet Henrici, Wilhelmi, et terram quam Joanni contulit, expresse petivimus et petimus, malentes exulare perpetuo, quam istis ablatis dispendiosam Ecclesiæ facere pacem. Mediatores autem nos in bona spe terrarum restituendarum verbis ponere nitebantur, sed circa mobilia, quæ abstulit, loquebantur tepidius, quamvis Sagiensis, et Magister Vivianus nobis mille marcas, si pax procederet, restituendas assererent. Hoc enim se dicebant accepisse ex ore ejus. Nos autem exegimus medietatem ablatorum ad necessarios usus, domini papæ vel religiosorum consilio de residuo parituri. Quia super omnia perniciem veremur exempli, et salutis nostræ timemus, pariter et illius: nostræ quidem, si tantum sacrilegium dissimulatione foverimus; illius vero, si non restituat cum solvendum sit, aut satisfaciatur de ablatis, quia in tali casu constat prorsus non dimitti peccatum, si non restituatur ablatum. Sunt autem variae species compensationum, quas et ille implere sufficit sine magno sui dispendio, et nos parati recipere. Nam ut ei remittamus, impenitenti præsertim, quod Ecclesiæ Dei abstulit, divina nos protegente clementia, nullis unquam machinationibus obtinebit. Si tamen poenituerit, et de parte satisfecerit, nos eum de reliquo pro devotione, quam exhibebit Ecclesiæ, et charitate, quam ad nos habebit, supportabimus in omni patientia. Quia tam Romanæ quam Anglicanæ Ecclesiæ expedit, ut aliquid habeat penes se, quod ei tumultus et seditiones molienti recte possit opponi. Alioquin quisquis eum prorsus expedit, immanitatem ejus armabit ad ecclesiam jugulandam. Nunc autem in eo calculo constitutus est, et imminet sibi et terræ suæ sententiam adeo timet, ex quo dominum Senonensem et Gratianum illum, cujus memoria in utroque regno in gloria et benedictione est, cognovit ad curiam proficisci, ut nihil domino papæ negare audeat quicquid simulet et minetur, si in terras ejus cismarinas aggravare decreverit manum suam, et nuntios ejus confusos remiserit. Nec oportebit, ut sententia sortiarum effectum, quia sola comminatio facillime quicquid intentatum fuerit, obtinebit. Misit nuper in Angliam Gaufridum Ridellum, ut torqueat personas ecclesiasticas, et ad inobedientiæ crimen nefariis obliget sacramentis. Is cum Ricardo Pictaviensi archidia-

colo, et aliis officialibus regni, præcepit ex parte regis, ut omnes episcopi Londoniæ convenirent, præstaturi cautionem de servando edicto regis, ne quis nuntium aut litteras domini papæ vel nostras, inconsulto rege recipiat; ne pareat interdicto, si fuerit promulgatum; ne sententiam anathematis in aliquem fidelium regis ferre præsumat. Sed nullus episcoporum vel abbatum præter illum emissarium S. Augustini, in illo conciliabulo officialium comparere voluit, eo quod prælegerunt incurrere publicæ potestatis offensam, si eam declinare nequiverint, quam derelinquere legem Dei. In primis ergo dominus Wintoniensis publicæ protestatus est, et solemniter prædicat se mandatis apostolicis, et Ecclesiæ Cantuariensis, cui ex professione fidem et obedientiam debet, cum omni devotione, quoad vixerit, per omnia pariturum: et ut idem faciant, clericis suis indicit. Imitatur eum episcopus Exoniensis, ad omnem promptus obedientiam, et se in religionum collegio recepit, donec transeat iniquitas. Norwicensis vero prohibitus ex parte regis, præsentibus officialibus, excommunicavit comitem Hugonem, et alios, prout sibi fuerat imperatum: et descendens a pulpitio, cambucam, baculum scilicet pastorem, super altare posuit, dicens se visurum, quis in terras vel res ecclesiæ suæ manus extenderet. Ingressusque claustrum cum fratribus vivit.

Cestrensis vero similiter exsequi paratus est imperata, et ut ab officialibus tutus sit, secessit in illam partem episcopatus sui, quam Wallenses inhabitant. Ex quo perspicuum est dominum papam ad gloriam Dei et perpetuum honorem apostolicæ sedis in Angliā triumphare, ut ibi floreat et fructificet auctoritas ejus, si in vigore perseveraverit, nec rejecerit coronam sibi divinitus præparatam. Nescit enim impietas quo se vertat, et semper, ut sui perhibent, habet ante oculos dominum Senonensem, et filium gratiæ Gratianum. Ad cujus gloriam plurimum proficit mora, quam fecit Vivianus, qui nunc tandem dolos expertus est illusoris, et malitiam ejus, et fraudes varias non destitit apud nos in compitis prædicare. Quod cum in Ecclesia Romana fecerit, si tamen fides in homine est, etiam testimonio ejus amplius justificabitur dominus Gratianus in operibus suis. Vos autem et per vos et per dominum Hyacinthum elaborate, ut secundum quod promisit confutet nuntius illusoris sui. Et si hoc fecerit, et vobiscum fideliter ambulaverit, litteras, quas pro eo scribimus, porrigatis domino papæ. Quia sicut pro certo didicimus, nunc in recessu regem perfidiæ constanter arguit, et famam, quam prius læserat, ex magna parte redemit. Si vero voluerit ingredi duabus viis, quod tamen non credimus, quia pecuniam dicitur respuisse, et litteras retineatis, et ne nocere valeat, estote solliciti. Sollicitaverunt nos quidam ex conscientia et mandato regis, ut ad ipsum in Normanniam proficiscamur: nec hoc detrectamus implere, si nobis in confinio terrarum, ut promissum est, occurrerint, qui nobis et nostris

A sufficiant præstare securitatem. Vos autem instate, ut dominus papa inhibeat, ne novam, et præter morem Ecclesiæ Gallicanæ et Anglicanæ præstemus cautionem, ne a forma, quam regi scriptam misimus, dominus papa recedat; ut partem concedentem ablatorum nobis restitui præcipiat; ut terreat regem metu interdicti in terris eismarinis; ut regi Anglorum diligentius scribat, quatenus nos recipiat in osculo pacis; et jubeat in aliis litteris, ut terras ablatas, quas prænominaimus, sine quibus pax esse non potest, Ecclesiæ Cantuariensi restituat. Item prohibeat ne aliquem, nisi præstito secundum morem et formam Ecclesiæ juramento, ab anathematis vinculo præsumamus absolvere. Quoniam inter jura consuetudinum, quas vendicat B contra Deum, si credatur expertis, manifeste cognoscitur hoc fere esse perniciosissimum. In quo si a præsumptione sua ceciderit, non magnopere, ut speramus, ne sapius confundatur, insistet cæteris. Ad hæc ut dominus papa christianissimo regi de consolatione nostra gratias agens, scribat exhortatorias et animatorias, interserens in eis quantum sit crimen sacrilegii, Ecclesiæ bona diripere, et sine justa causa personas ecclesiasticas exquisitis occasionibus fraudare suis bonis, et quod peccatum sine poenitentia et satisfactione, præsertim cum tempus adest et rerum copia suppetit, non dimittitur. Quoniam si res ablata, cum reddi possit, non redditur, phantastica poenitentia est, et non vera C quæ proficiat ad salutem, sed accumulat damnationem.

Mittimus vobis petitionem, quam porreximus regi, a qua nullo modo recedatis, nisi possitis meliorem causam, et litteras quas misimus magistro Viviano, et quas ille, ut accepimus, misit Anglorum regi. Quo plenius instructi negotium Ecclesiæ possitis commodius promovere. Si garrulorum quispiam præsumat arguere, quod terram ejus nolumus ingredi, nisi nos recipiat in osculo pacis, Robertus de Silliac redeat in mentem ejus, quem nec pacis osculum publice datum, nec fides corporaliter regi Franciæ præstita fecit esse securum: nostræque cautelæ, nisi rationis expertus sit, ut credimus, illico veniam dabit. Nos et vos dirigat Dominus, ut faciamus in omnibus D ipsius voluntatem, et sive per prospera sive per adversantia nobis, debitam ecclesiæ suæ restituat libertatem. Hæc Patri nostro domino Ostiensi, et cætera quæ Senonensi archiepiscopo scripsimus, significabitis ex parte nostra, deinde ex consilio ejus reliquis amicis nostris, qui expectant et procurabunt redemptionem Israel.

Lexoviensis episcopus, nos, ut scitis, persequitur, amici tamen indutus nomine, et Simonis sui, quem sub episcopi professione vivendo semper expressit, formam imitatus, dantis arma Danaïs in Amazones, et Amazonibus tela in Danaos ministrantis, ut suæ quieti provideat, nunc viris ecclesiasticis in sæculares, nunc sæcularibus in ecclesiasticos arma ministrat. Inspicite litteras, quas modo pro Londo-

niensi episcopo, ejus merita nostis, scribit, et ad mentem reducite, quæ nobis consuevit dare consilia, et alterum plane videbitis. Sinouem inter Danaos et Dardanos discurrentem. Nam et iste, si virtutem nominis attendatis, Si non est, fovens est, et non in sinu suo: lingua concinnat dolos, et ex abundantia cordis fere semper in amicorum causis et negotiis fidei voluit, terit, et replicat *Sic et non*. Presbyter clericus domini Papiensis idem perseveravit in causa nostra, qui fuit ab initio. Quod quid sit, non latet, ut credimus, dominum Gratianum. Nam et illi, dum præsens esset, astitit, et regi postea semper adhasit.

EPISTOLA XCIII.

AD EOSDEM.

THOMAS Cantuariensis archiepiscopus, ALEXANDRO et JOANNI nuntiis suis.

Solliciti estote circa negotium nostrum, et contra adversarios nostros cautulam et continuam vigilantiam habeatis, præsertim adversus illum spurium, fornicarium, et ecclesiasticæ pacis inimicum, sacerdotis filium, Reginaldum de Saresberia, qui personam nostram, in quantum potest, diffamat ubique, et d'urpat, dicens nos proditorem esse, et sibi fidem nostram dedisse quod patrem ejus non læderemus in aliquo. Quod utique ipsi non plus, quam cani faceremus. Dicit etiam, quod si dominus papa decederet, faceret nos deleri de libro vitæ, jactitans curiam Romanam ita venalem esse, ut intervenientibus muneribus quid velit, possit impetrare. Suggestit etiam regi Anglorum hujusmodi petitiones facere domino papæ, ut alicui episcopo in Anglia committeret auctoritatem coronandi filium ipsius regis, et consecrandi episcopos, ut vel sic dominum papam deciperet. Cui cum respondisset rex se, ut credebat, a domino papa petitiones illas non posse impetrare, respondit Reginaldus: Dominus papa ut stolidus et fatuusaget, nisi petitionibus tuis satisfecerit. Rogamus ideoque dilectionem vestram, de qua sine dubio confidimus, ut cum Hugotone Romano amico nostro, qui de Francia Romam profectus est, et cæteris amicis nostris et vestris pro nobis, sed et pro justitia et libertate Ecclesiæ viriliter stetis, et ad hoc vigilantem tota intentione laboretis, ut ille commentor fraudis, machinator doli, flector falsitatis, sua pravitatis opinione frustratus undique confundatur, et ita ejus iniquitas per vos delegatur et in eum redundet, ut debeat se ad curiam venisse, et a suæ iniquitatis teste, quem assidue gerit in pectore, merito torqueri dignoscatur. Nam sicut bene novistis, si dominus papa petitionibus regis in hac parte, quod Deus avertat, aliquo modo acquieverit, sciat indubitanter auctoritatem Ecclesiæ Romanæ in Anglia in perpetuum perituram, ita ut auctoritatis apostolicæ aliquis ibi mentionem facere non audeat. Si vero dominus papa, prout sibi expellierit, nuntios ejus confutatos et proposito suo frustratos dimiserit, sciat nos in proximo, per misericordiam Dei, pacem habituros. His enim duobus

articulis, videlicet coronationi filii sui, et consecrationibus episcoporum insistit rex Anglorum, et valde arcebitur ad pacem nostram faciendam, si constantiam domini papæ viderit. Inter cætera vero cavetis, ne cum prænominato Hugotone in presentia cardinalium sive aliorum aliqua verba super negotio nostro habeatis, sed cum opportunitatem habueritis, secretius cum ipso de executione negotii tractetis. Ita quidem ut non possit deprehendi vos aliquam cum ipso familiaritatem habere.

EPISTOLA XCIV.

AD ROGERIUM EBORACENSEM ARCHIEPISCOPUM.

THOMAS Dei gratia Cantuariensis Ecclesiæ minister humilis, et sedis apostolicæ legatus, venerabili fratri ROGERIO Eboracensi archiepiscopo, et sedis apostolicæ legato, salutem et utriusque viæ successus.

Discretio vestra plenius novit, quod Deus in eos vindex est, qui acceptæ gratiæ immemores retribuunt mala pro bonis, et eos, quos exigentibus meritis colere et venerari debuerant, accepta occasione nocendi, lædere non formidant. Quot autem et quanta bona a S. Cantuariensi Ecclesiâ acceperitis, et qualiter illa vos promoverit ad summum sacerdotii gradum, in auribus reverentiæ vestræ non necesse est replicare; tum quia fere omnibus notum est, tum quia incredibile est quod hæc a pietatis vestræ memoria possint excidere. Et quidem adhuc eadem mater vestra parata est, quandiu vestræ visum fuerit sanetitati, amoris et reverentiæ cultu prosequi, quod cepit in vobis, optans et orans sibi ab eminentia vestra rependi vicissitudinem pietatis. Nec stabit per nos, quin solliciti simus servare vobiscum unitatem spiritus in vinculo pacis. Et licet simus exsules et proscripi pro Domino, speramus quia, illo propitiante pro quo patimur, vobis poterimus obsequii vicem reterre in Domino. Percipimus autem susurrii venas, quod sinceritatem vestram quidam in injuriam S. Cantuariensis Ecclesiæ animare et armare nituntur, ut filio domini regis, cujus vias Deus dirigat in beneplacito suo, diadema imponatis, et ipsum contra fas promoveatis in regem. Quod quia contra dignitatem Cantuariensis Ecclesiæ, si forte, quod absit, præsumeretur, esse manifestissime constat, hoc tam vobis quam omnibus episcopis Angliæ dominus papa, sicut ex litteris ejus, quas vobis transmittimus, perspicuum est, interdicit: et nos, ne ab aliquo attentetur, auctoritate apostolica prohibemus, super hoc adversus omnem animam hoc molientem appellantes, diemque præfigimus purificationem S. Mariæ. Et ne quis eorum, qui jurisdictioni nostræ metropolitico aut legationis jure subjecti sunt, huic temeritati assistat, in virtute obedientiæ, et sub anathemate penitus inhibemus.

Similiter omnibus episcopis Angliæ.

EPISTOLA XCV.

AD EUNDEM.

THOMAS Dei gratia Cantuariensis archiepiscopus, et apostolicæ sedis legatus, venerabili fratri et amico

Rogatio, Dei gratia Eboracensi archiepiscopo, et A sedis apostolicæ legato, salutem, et pastorales excubias feliciter adimplere.

Quantis calamitatibus diutius afflictā sit Mater nostra, a cuius uberibus coalescimus, et quæ utrumque nostrum auctore Deo in id quod est, promovit, sancta Cantuariensis Ecclesia, fraternitatem vestram latere non potest, præsertim, cum totus fere Latinus orbis contritiones ejus hactenus contra fas et æquum, et supra omnem modum invaluisse cognoverit. Expectaveramus correctionem domini regis, quem clementia summi pontificis et patientia nostra, et divini iudicii, quod maxime fidelis anima reveretur, timor, debuerant ad penitentiam provocasse. Sed ille Dei misericordia et hominum patientia quoad causam hanc semper abutens, damna damnis indesinenter adjecit, et atrocissimas injurias gravioribus cumulavit injuriis. Ne ergo sanguinem ejus in compereuntis Ecclesiæ ob nimiam patientiam et injustam dissimulationem de manibus nostris requirat Dominus, fraternitati vestræ litteras apostolicas destinamus, rogantes et obsecrantes in Domino Jesu Christo, et unitate charitatis, et fœdere pacis ecclesiasticæ, et auctoritate domini papæ, per fidelitatem, quam sedi apostolicæ debetis, denuntiantes, quatenus infra quindecim dies a susceptione præsentium per totam provinciam vestram, quæ in potestate præfati regis est, omnia divina, præter baptismam parvulorum et penitentias morientium, prohibeatis officia celebrari, et ab omnibus subditis vestris interdicti sententiam quantum in vobis est, C faciatis inviolabiliter observari. Ne vos, quod absit, cum his qui in scelere suo perituri sunt pœna damnationis involvat. Porritori vero istarum prospicite, sicut vobis et ordini vestro cupitis esse prospectum. Fraternitatem vestram per vias rectas deducat Altissimus, et faciat participem illorum, quibus in Evangelio promissum est regnum cœlorum.

EPISTOLA XCVI.

AD CONRADUM MOGUNTINUM ARCHIEPISCOPUM ELECTUM.

Thomas Cantuariensis archiepiscopus, CONRADO Moguntino electo, se et quod sibi.

Rediit nuntius noster, quem miseramus ad curiam. Adhuc pendent negotia nostra, et spei bonæ promissionibus detinentur. Verum quoniam in hujusmodi negotiis dilatio periculose nonnunquam admittitur, ad specialem amicum nostrum nos convertimus, ut ipse pro nobis sit, et pro parte nostra laboret, enixius implorantes. De ejus persona si forte, quod absit, dubitatis, cui loquimur ipse est; vos, inquam, specialis et unicus, præcordialis et intimus amicus noster in Domino, cui negotia nostra cum tota fiducia commendamus, orantes, si tamen apud talem amicum precibus opus est, ut ea promoveret, et ut in præsentia tua ad finem debitum perducerentur, modis omnibus instare dignemini. Ecce enim tempus et locus, in quo petitiones nostræ repulsam nullo modo patientur. Sicut ergo vitam et

animam nostram diligitis, ita petimus ut pro nobis et ecclesia nostra sollicitus esse curetis, postulantes instanter a domino papa, ut in recompensationem omnium laborum nostrorum, quos ambo pro fide et unitate sanctæ Romanæ Ecclesiæ sustinemus, nobis et Ecclesiæ nostræ pristinam primatus restituat dignitatem. Juxta quod vobis præscripsimus, et clerici nostri Hervens et Guntherius vobis præscribent. Rogamus præterea, ut nos de statu vestro erga dominum papam, et dominos cardinales, et ipsorum erga vos, per nuntium vestrum, si ipse moram feceritis, celerius certificare curetis. Sciat is autem quod de nostris nihil audivimus. Valet.

EPISTOLA XCVII.

AD EUDMUM ET SABINUM, HYACINTHUM ATQUE HENRICUM CARDINALES.

Dominus archiepiscopus CONRADO Moguntino archiepiscopo et SABINO episcopo, JACINTHO et HENRICO sanctæ Romanæ Ecclesiæ cardinalibus, salutem et promptam ad obsequium voluntatem.

Satis superque sustinui, domini patres, correctionem regis Angliæ expectans, nec ullum omnino patientiæ meæ fructum inveni. Exsecutus sum circa eum et nuntii et litteris et modis aliis quidquid debui, sed ipse, patientia et sollicitudine mea semper abutens, magis magisque procedit in deterius, conculecans et deprimens Ecclesiam Dei, meamque personam inexorabili odio persequens interim, ut abbati Cisterciensi jam scripserit, ut sicut abbatias ordinis sui quæ in ipsius potestate sunt diligit, ita nos et coexules nostros a beneficio et familiaritate ordinis alienet. Cum igitur excessus et impietas ipsius et ministrorum ejus difficile quidem explicari, sed difficilius credi possit, periculum tam meum quam ipsius attendens, perniciosas illas non tam consuetudines quam pravitates, quibus perturbatur et confunditur Anglicana Ecclesia, scriptum etiam et auctoritatem scripti quo fuerant confirmatæ, publice condemnavi, tam observatores quam exactores et paternos earum fautores, etiam et consiliatores seu adjutores, quicumque fuerint sive clerici sive laici, generaliter excommunicans et episcopos nostros a juramento, quo ad earum observantiam violenter astricti fuerunt, absolvens. Sunt autem hæc quæ in scripto illo specialiter condemnavi. Quod nec appelletur ad sedem apostolicam qualicumque de causa absque assensu regis. Quod non liceat episcopo excommunicare aliquem, qui teneat aliquid de rege in capite, vel terram ejus vel officialium suorum sub interdicto ponere absque licentia ipsius regis. Quod non liceat episcopo coercere aliquem de perjurio vel fide laxa. Quod clerici vel viri religiosi trahantur ad judicia sæcularia. Quod laici seu rex seu alii tractent causas de Ecclesiis vel decimis. Quod non liceat archiepiscopo vel episcopo venire ad vocationem domini papæ sine licentia regis, et alia in hunc modum.

Nominatim etiam excommunicavi Joannem de

Oxeneford qui communicavit schismatico et excommunicato illi Reginaldo Coloniensi, qui contra mandatum domini papæ et nostrum, usurpavit sibi decanatum Saresberienſis Ecclesiæ, et in curia imperatoris pro schismate renovando præstitit juramentum. Similiter et Ricardum Ivelchester denuntiavimus excommunicatum et excommunicavimus eo quod incidit in eandem hæresin damnatam, communicando p̄minatissimo schismatico illi, machinando etiam et fabricando omnia mala cum schismaticis et Teutonicis illis in perniciem Ecclesiæ Dei, et maxime Ecclesiæ Romanæ ex pactis contractis inter regem Angliæ et ipsos : et Ricardum de Luci et Jocelinum de Baill., qui regiæ tyrannidis fautores et hæreficarum illarum pravitatum fabricatores exstiterunt : Randalphum de Broc et Hugonem de sancto Claro, et Thomam filium Bernardi, qui possessiones et bona Ecclesiæ Cantuariensis absque licentia et consensu nostris sibi usurpaverunt. Excommunicavimus etiam omnes, qui de cætero in possessiones vel in bona Ecclesiæ Cantuariensis manus contra voluntatem et assensum nostrum extendunt. Ipsum tamen regem nondum personaliter excommunicavimus, expectantes adhuc correctionem ejus, quem tamen excommunicare non diffitemur, ni celerius resipuerit.

Unde dilectionem vestram instantius precor et moneo, ut constanter in hac parte vos habeatis, dominum papam studiosius commonescentes, ut quod a nobis factum est, ratum habeat, alioquin et auctoritas apostolica minuetur ultra modum in partibus illis, et libertas Ecclesiæ, quæ jam ex maxima parte deperit, tota sine dubio deperibit. Ecce enim crescent hæredes ipsius regis, qui paternæ crudelitatis imitatores existent, nisi pernicioſa genimina cum immenso vigore severitatis ecclesiasticæ fuerint radicitus amputata. Ego autem multo magis vellem non solum usque ad sanguinem, sed usque ad ipsam mortem resistere, quam in Ecclesia Dei tam flagitiosa piacula diutius impunita relinquere. Scitis autem dominum Rothomagensen et quosdam alios regi in faciem dixisse, nullum ex eis contra mandatum domini papæ communicatorum, quin potius sententiam, si in eum et terram ipsius lata fuerit, ad jussionem domini papæ firmiter observabunt. Scimus autem et certum habemus, quod obstinatio regis citissime frangeretur, si in terram ejus cismarinam districta sententia poneretur.

EPISTOLA XCVIII.

AD EUNDEN.

Dominus Cantuariensis, C. Moguntino archiepiscopo.

Omnia nostra ideo vestra reputamus, quia nos ipsi omnino vestri sumus. Sufficere debet hoc ad persuasionem. Petimus itaque ut nostræ prospiciatis necessitati, quam ex rescripto litterarum quas domino papæ mittimus facile advertetis. Illud enim mittimus vobis, non minus de vobis confidentes quam

A de nobis : quia de vestris negotiis æque solliciti sumus ac nostris.

Ecce Joannes ille schismaticus de Oxeneford, qui perjurio suo nostrum, quantum potuit, procuravit exilium, sedem apostolicam appetit, ut eam circumveniat et subruat æquitatem. Rogamus ut respondeat ei iniquitas sua, et domi sentiat esse Petrum, qui quidquid iterato dejiceret eum coram regibus et principibus ausus est impugnare. Discat prophetam esse in Israel qui tempore accepto justitias judicet. Presbyter clericus domini Papiensis regi Anglorum nuper promisit quod dominus suos legatione accepta causam, quæ inter nos et ipsum vertitur, ad voluntatem ejus deflueret, et de nostra depositione jam gloriantur palam hostes Ecclesiæ persecutores nostri et imo Christi. Nos autem nisi inevitabilis necessitas cogat, nullius excipiemus judicium nisi domini papæ, magis Ecclesiæ subversionem Anglicanæ et Romanæ confusionem timentes quam nostram. Vigilate igitur apud dominum papam et Cardinales ut saluti suæ prospiciant coram Deo et honori coram hominibus. Nam quidquid in alterutra parte fecerint, memoriale erit in sæculum sæculorum.

EPISTOLA XCIX.

AD EUNDEN.

Animæ suæ dimidio, salutem, quam sibi, et ampliore, quam sibi sit minima.

Inter optimam conscientiam et durissimam fortunam constitutus ignoro, quomodo et animo meo et tempori parcam. Angit me animi mei amaritudo periculo meo dicere quod sentio, urget me temperis importunitas periculo Ecclesiæ silere quod non debeo. Deus bone, quo me veriam? Utrobique certe periculum est. Ad dicendum etiam sine periculo non sufficio, dicendo cum Ecclesiæ discrimine deficio, tacendo cum ipsa pereor. Verum ne Ecclesiæ periculo peream, et ego dolendo dico rem dolendam nimis. Capta est urbs inclitya, quæ jam fere totum subegerat orbem, subversa humana gratiæ aviditate. Et quæ gladio perire non poterat, occidentali veneno infecta succumbit. Proh dolor! Ipsius occasu sit undique dispendium libertatis Ecclesiæ compendio temporalium. Itur in ipsius ruinam per anfractus divitiarum : prostituta est ut fornicaria, quæ multorum libidini patet in platea, fornicantur cum ea quilibet potentum, ut subacta cedat ambitioni concipiens iniquitatem, et pariens pressuram immeritis. Væ nobis! Quid faciemus? Urbis ruit auctoritas, et cervix nostra quomodo non flectetur? Exclusis filiis admittuntur privigni, ut bonis maternis utantur extranei, quibus alendi erant legitimi hæredes. Et quæ benigne in sinum suum susceptura erat oppressos, in visceribus charitatis curatura languentes, opprimentes elevat, mole gravaminum conterit depressos. Quo erit nobis refugium de cætero, si non præstita satisfactione meruerint inde absolvi, unde amplius erant condemnandi; si exterserint tanquam re bene gesta remissionem, qui meruerant ulionem; si re-

portaverint de indulgentiâ gloriâ, qui conscii de A merito expectabant penam? O utinam non me reperisset sors ista supersitens, ne viderem mala gentis nostræ, et sanctorum; nisi quia, ut Scriptura dicit, necesse est amore justitiæ temporaliter multa pati justos mala. Haberet tamen aliquid solatii, si radice amaritudinem compensaret dulcedo fructuum. Solent enim dura principia meliori fine concludi. Verum ne quid desit ad coronam, hac tempestate cedit nobis in contrarium, ut qui dura sentimus initia, evanescat spe boni, more contrario expectemus duriora. Exclui enim sumus a sinu matris, clausa sunt nobis patris viscera, detraxit immeritus beneficii spolia, tulit male conscius rem bene conscii, comprehendit piger bene currentis braviuq, rapuit puniendus legitime certantis coronam. Ego vero miser in quo deliqui, quid mali promerui? Si supra opinionem hominum devotionem exhibui, si contra voluntatem amicorum fidem servavi, si relictis omnibus devotionis affectu, contemplatione fidei nudus, et abjectus cum meis miseriis secutus patrem meum et dominum, exposui me omni periculo, eritne ista confusionis nostræ retributio, restauratio perditorum, radice amaræ dulcedine fructuum compensatio? Annon erunt ista de cætero in ore vulgi remunerationis iniquæ proclamatio? Vident Deus, examinet ipse, judicet hanc juris æquitatem. Res miranda nimis, res admiratione stupenda, cuditur jus nomini, imo, ut verius dicam, juri contrarium, justitiæ et æquitatis perimens auctoritatem. Transit in jus persecuti persecutoris temeritas, ut excipiat prænam de victoria donandus, reportet gloriâ merito inglorius, vincat vinciens. Nunquam fuisset ista legatio tantorum ministra malorum, in tot exsulum fabricata perniciem miserorum, totius Ecclesiæ peremptura compendium. Certe nec si se ruperint, poterunt me avellere Christo juvante a tramite justitiæ, a liberatione servitutis Ecclesiæ, pro ea parte sollicitudinis, in qua vocatus sum, a charitate Dei, quæ nos subiecit tribulationi, donec veniat justus iudex, qui æqua lance dispensabit utrique, juveni pariter et seni, regi ac privato, omnibus æque prout quisque meruerit. Hunc expeto iudicem, hunc injuriarum nostrarum ultorem expeto, sultus optima conscientia, securus devotione sincera, solidatus in fide vera, certus amore justitiæ sustinentes injuriam nulla debere ratione confundi; zelo vindictæ confringentes cornua persequentium Ecclesiam spe remunerationis æternæ nullatenus posse privari. Hæc animæ meæ scribo dimidio, ut sentiat amici dolentis angustias, patientis pellat dolores, pereuntis pressuras tollat. Non est enim dolor, sicut dolor meus. Traditus namque prædicator in manus inimicorum, proditus ad voluntatem invidorum, lacerandus dentibus malignorum, perimendus natus meorum iudicio persecutorum. Res nefanda nimis, si crudelitate horribilis, sui malignitate odibilis, sui facilitate contemptibilis, sui iniquitate damnabilis in æternum. Suffecisse debuerat, Papiensibus Italiam subvertisse,

nisi et orbem cum Ecclesiæ libertate sui cura perimerent. Habere vobis scribere plura, si non confectus injuriis, et contumeliis affectus timerem dolorum meorum relatione mentis vestræ turbare quietem, exaggerare sollicitudines, infestare jucunditatem, quam expedit mihi valere, ne peream. Valeat ergo pars sana mei, ut convalescat ægrota. Festinet mihi subvenire, ne tota depereat, ut inde recipiat in terris gloriâ, et in cælis coronam. Valeat iterum et semper, habeatque fidem, si placeat, huic nuntio, cæterisque per Dei misericordiam in brevi venturis.

EPISTOLA C.

AD EUMDEM.

B Animæ suæ plus quam dimidio THOMAS Cantuariensis Ecclesiæ miserabilis exsul, salutem, et solatium, deducta miseria, cujus semper expertes amicos esse desidero.

Consoletur vos Dominus in omnibus angustias vestris, qui vicem meam et coxsulantium mihi doluitis ut vestram, et, quod rerum experientia didici, proscRIPTIONIS et multimodæ miseriæ stimulos studuistis ab Ecclesiâ Dei, et pauperula domo nostra totis viribus propulsare. Suspensionem nostram in utriusque regni compitis quasi voce præconia jactat rex Angliæ, et in testimonium confusionis meæ, quo me reddat magis onerosum et odiosum hominibus, litteras apostolicas profert. Gloriat et terminum sibi datum, donec me recipere velit in gratiam, quod, si lienerit, facturus est ad Kalendas Græcas, id est nunquam. Monetis ut interim patienter feram, virtutem patientiæ magnis laudibus prædicatis, et non cogitatis non deesse, qui de latere illud comicum ingerat: *Omnes, cum valemus, recta consilia ægrotis damus*. Tu autem si hic sis, aliter sentias. Quis enim jugulatur doloris expers, nisi stupidus et insensatus? Sed et hoc, quoniam ita necesse est, quandiu Domino visum fuerit, sortem animum tolerare jubebo: non autem ego, sed gratia Dei mecum. Sinceritatem quoque, et amicitias, et diligentiam dominorum cardinalium commendatis: et ego quidem de quibusdam eorum non diffido, præsertim in causa Dei, et Ecclesiæ Romanæ, potius quam mea vel meorum. Retribuat illis Deus bona, quæ faciunt et facturi sunt proscriptis exsilibus Christi. Alios autem revocet, ut sentiant id ipsum in Domino, nec ad subversionem justitiæ, et ignominiam sedis apostolicæ, et suam damnationem munera capient, facientes ex calumnia questum, et sequantur retributiones. Sed et illi se mihi et meis compati scribunt. Ethicus vero subridens ex adverso respondet: *Omnes compatiuntur, nemo succurrit*. Et quidem recte. Opera enim, quæ ipsi faciunt, testimonium perhibent de eis. Consulitis ut modis omnibus elaborem mihi pacem reformare tyranni, persecutoris et tortoris Ecclesiæ. Sed viam pacis præcluserit mihi Ecclesiæ Romæ, et quidam cardinalium, quorum ille, a-

jaetitat, consiliis agitur. Nuper enim, data spe pa-
eis, me per comitem Flandrensem jam secundo
fecerat ad colloquium evocari, cum sui et cardina-
lium suorum nuntii a domino papa redeuntes, et
suspensionis meæ litteras porrigentes, ei dederunt
cornua, quibus possit, quoad voluerit, et pacem
rejicere, et interim Ecclesiam Dei tanquam aucto-
ritate sedis apostolicæ ventilare. Scribitis quod in
dispendium Ecclesiæ Romanæ laborat fortuna re-
scindere potentissimarum civitatum Italiæ unitatem.
Quare hoc, anime mi, credis accidisse, nisi quia
Deo liberatori vestro non condignas agitis gra-
tias, sed queritis quæ vestra sunt, quasi manus
vestra excelsa, et non Dominus anni præteriti ma-
gualia gesserit? Nec pro nobis hoc dixerim et aliis,
qui recta gradiuntur via, sed pro his, qui Eccle-
siam Dei persecutoribus exponunt, et lucra sectan-
tur. Et quia Cantuariensis Ecclesia fere destructa
est, et ego et coæsules mei attenuati et afflicti
supra modum precor attentius, ut adhibitis amicis
impetretis a domino papa, ut in solatium miseriæ
reformet primum Ecclesiæ Cantuariensis, etc.

EPISTOLA CI.

AD EUMDEM.

Animæ suæ dimidio, salutem quam sibi.

Desiderio magno exspectabamus in dies audire
nuntium salutis de domino papa, de vobis et de
fratribus vestris. Expectavimus, nec venit qui bo-
num afferret aut certum nuntium. Et quoniam animo
desideranti nihil satis festinatum est, mittimus ad
vos datorem præsentium ut recurrente littera aut
per eundem citissime cognoscamus utrum, sicut
fama divulgante apud nos in pluribus disseminatur
locis, magnificaverit Dominus facere misericordiam
cum Ecclesia sua et vobiscum, dissipando et conte-
rendo persecutores Ecclesiæ suæ et vestros. Quod
quidem certius credendum credimus, quoniam solet
ipse terribilis esse apud principes terræ et terribi-
lis in consiliis super filios hominum, qui militant
adversus eum et impugnant Ecclesiam; et nunc, ut
credatis verbis Psalmistæ dicentis : *Nolite confidere*
in principibus nec in filiis hominum, in quibus non
est salus : tempus est ut postposito favore princi-
pum, prætermissa fiducia quam habebatis in homi-
nibus, ei soli firmiter de cætero adhæreatis, qui
non dereliquit sperantes in se; in eo solo spem po-
natis, qui novit dissipare consilia principum, in ipso
faciatis virtutem, quoniam si fidem ei servaveritis,
ad nihilum deducet omnes inimicos Ecclesiæ et ves-
tros. Facite ergo judicium amodo et iustitiam omni
petenti, omni patienti injuriam ut, sicut ad desideria
vestra liberavit vos Dominus ab instanti periculo
quod jam erat in foribus ab oppressione tribulantis,
subveniatis et vos injuriam sustinentibus, reprimen-
do constanter tyrannorum sævitiam, puniendo
delinquentes. Sic exaltabitur Dei Ecclesia, resur-
get ipsis vigor, qui multo jam tempore languet
depressus. Hoc facite, ut gaudium sit vobis coram

PATROL. CXI.

A Deo et angelis, honor et gloria in populo et gente,
revelamen Ecclesiæ. Hoc haecenus. Cæterum ut co-
gnoscat is nobis jam accidisse quod verebamur, quod
prædicabamus jam quasi in manifesto esse de præ-
sumptione domini Willelmi Papiensis et ipsius in-
solentia, videte litteras suas statim in adventu suo
ad nos transmissas, in quibus ipse gloriatur, sicut
ipsi pendere potestis eum nunc temporis in ter-
ram regis Angliæ descendisse ut cum domino Odone
decidat quæstiones quæ vertuntur inter ipsum re-
gem et nos, prout magis videbit expedire Eccle-
siæ. Præterea mandavit domino regi et suis in
damnum nostrum et confusionem se venisse ad
faciendum voluntatem suam. Si in viridi hæc facit,
quid faciet in arido? Nunquam fuisset auctoritas
ista, unde generatur scandalum populo, dispendium
Ecclesiæ, nobis confusio, qui potius solatio egeba-
mus, ut qui jam triennio cum tot generibus homi-
num exsillii sustinivimus incommoditatem, alienis
cum rubore vivimus elemosynis : nec credebamus
eum venisse ad decidendas quæstiones inter regem
et nos, nec sic a domino papa et a vobis hoc intel-
lexeramus, sed ad pacem nostram faciendam, si quo
modo permitteret eam Deus fieri opera ejus et in-
dustria, quod tamen minime credimus, cum ipse
totus sit regius et paratus omnimodis ad gratiam
suam consequendam et quocunque modo rem. Multo-
ties vero proposueramus domino papæ et vo-
bis, et adhuc firmiter proponimus, nunquam per
Dei misericordiam in aliquo nos subituros ejus ju-
diciū vel examen, qui de sanguine nostro sibi
querit facere commercium, de prelio, utinam non
iniquitatis, querit sibi nomen et gloriam. Petimus
ergo ne addatur dolor dolori nostro et discrimen
discrimini, quatenus si aliqua dilectioni vestræ
cura est de nobis, per vos et per amicos vestros in
aliquod desolationis nostræ solatium evacuetur ejus
potestas circa nos et negotia nostra, si quam tamen
habet, quod non facile credimus, quia, novit Deus,
ante permitteremus nos excommunicari et manere in
excommunicatione usque ad diem obitus nostri,
quam extra curiam Romanam subiremus ejus ju-
diciū vel examen in aliquo. De plano enim contra
canones est ejus subdi ditioni, qui ob gratiam regis
inimicus noster fuit et est, sicut patet et a lippis et
tonsoribus, quique ad hanc potestatem obtinendam
super nos multiplici laboravit ingenio. Semper
recusavimus eum judicem apud dominum papam
per nuntios nostros et adhuc recusamus et omni tem-
pore recusabimus. Efficiat ergo benigne et constanter
solicitude vestra quod petimus. Valete semper ut nos
bene valeamus et experiamur, si placet, in hac peti-
tione nostra et in aliis quas vobis transmisimus,
benevolentiam vestram et desiderii nostri fructum.

EPISTOLA CII.

AD FULCONEM DECANUM ET CAPITULUM REMENSE.

Dominus Cantuariensis, Fulconi decano Remensi,
totique capitulo,

Quoniam in corpore, et de corpore Christi consi-

tuti, alter alterius membra sumus, mutuis obsequiis nobis invicem deservire, piaque necessitudine alter alterius onera portare debemus: tanto nimirum affectuosius, quanto firmitus ad idem præter catholicæ communionis vinculum speciali quoque clericalis professionis nexu tenemur astricti. Ut præsertim quando nos adversis dispensatio supernæ miserationis erudire decrevit, casibus ingruentibus occurrant fraternæ charitatis cum hilaritate solatia: tanto promptius atque gratantius exhibenda, quanto comprehenduntur esse et imminente necessitate magis debita, et fervente tribulatione opportuniore. Inde est, quod possessionibus nostris pro voluntate principis atque domini nostri in præsentiarum destituti, præsentium latorem magistrum Philippum de Calcia, clericum nostrum, morum conversatione et litterarum notitia commendabilem, qui quoniam inter procellas, quæ excanduerunt, nobis, sicut debuit, adhæret, rebus suis est expoliatus, serenitatis vestræ charitati transmittimus, attentius obnixusque regantes, quatenus intuitu Dei, amorisque nostri, atque obsequiorum gratia, ei, dum instantis exilii necessitas ingruerit, in necessariis, prout ipsum decet, ipsi provideatis. Nos enim, quod ei boni feceritis, velut nobis impensum, feremus: et secundum quod pro loco et tempore patuerit occasio, prono promptoque affectu pariter et effectu, mutua benedictionum exhibitione, debita cum devotione respondebimus. Valeat et vigeat charitas vestræ fraternitatis.

EPISTOLA CIII.

AD EUNDEM FULCONEM.

THOMAS Cantuariensis archiepiscopus, Fulconi decano Remensi.

Audita promotione vestra plurimum exhilarati sumus, non dubitantes factum esse a Domino, cuius opus est unire fidelium voluntates, ut eorum sit cor unum et anima una, quod de vobis tanto laudabilius, quanto unanimius fecit Remensis Ecclesia. Qui ergo tot animorum vota direxit in eligendo, ille vobis in ministrando gratiam largiatur, ut sicut eam honorum omnium fontem et fomitem prædicastis, sic ad gloriam Dei eandem præventricem et adiutricem in omnibus operibus sentiat. Optamus hoc vobis, et pro vobis oramus, licet indigni simus pro alio exaudiri, qui propria non sufficimus delere commissa. Verumtamen de misericordia ejus præsumimus qui pro impiis mortuus est, quod ad preces consentientium peccatorum (sic); qui ut diffidentes revocaret ad veniam, et fugientes traheret ad salutem, persecutores et hostes quadam violentia charitatis, manente tamen arbitrii libertate, urgeret ad gratiam, dorsum posuit ad flagella, crucis ignominiam suscepit et pœnam, et ex his quæ passus est, scholam rectæ fidei et veræ virtutis instituens, persuasit mundi pericula pro veritate gratanter amplectenda, et electis nullum esse cum mundi voluptate commercium. Hinc et nobis amplior est fiducia, quia

A parvitas nostræ misericorditer preces admittet, pro quo persecutionem patimur, dati in opprobrium et derisum hīs, qui ignorant Deum, versi in tedium etiam hīs, quibus nondum fuimus onerosi.

Dispersi sumus cum exsullibus nostris in omnem ventum, solique sunt miseriæ nostræ participes, qui ab Apostolo didicerunt communicare necessitatibus pauperum Christi, quibus etsi pro merito suo et voto nostro non sufficimus rependere quod merentur, certissimum est, quod mercedem optimam consequentur cum accessione gratiæ et gaudii in misericordia uberi. Contrahunt enim cum eo debitor, qui et centuplum cum æterna gloria reddere consuevit, et calicem aquæ frigidæ irremuneratum relinquere dedignatur. Ceterum quia nos adhuc flagellantis patris verbera comprimunt, et persecutoris nostri nondum mansuescit immanitas, rogamus attentius, ut in vestris et sanctorum, qui vobis noti sunt orationibus nostri memoriam exsilii haberi faciatis, ut nos pro cuius lege contendimus in agone, sine peccato conservet, ne deficiat fides nostra, et persecutores nostros, si prædestinati sunt, convertat, et expediat ecclesiam suam. Hoc ipsum per vos deposcimus ab Ecclesia Remensi, quam sincera diligimus charitate, agentes ei gratias de honore et amore, quem nobis exhibuit in coexsilibus nostris, magistro Philippo, Radulpho, et aliis, quorum necessitatibus communicasse dignoscitur. A vobis autem hoc specialiter cogitur nostra necessitas postulare, quatenus adolescentem latorem præsentium, sororis nostræ filium, exhibeatis in domo vestra, et litteris insistere compellatis in scholis grammaticorum, ut vestris necessitatibus et vestrorum provideat pauperum pater et iudex orphanorum,

EPISTOLA CIV.

AD ROTRODUM ROTHOMAGENSEM ARCHIEPISCOPUM.

THOMAS Cantuariensis archiepiscopus, Rotrodo archiepiscopo Rothomagensi.

Sicut novit vestra prudentia, multo jam tempore correctionem domini regis exspectavimus, nec ullum adhuc in eo diligentiae vel sustententiae nostræ fructum invenimus. Unde et congrue, licet cum interno mentis dolore, dicere cogimur: *Sustinuimus pacem, et non invenimus; quasivimus bona, et ecce turbatio.* Discrimen ergo tam nostrum, quam regis ipsius attendentes, si excessus tantos impunitos, ut hactenus, vellemus relinquere, damnavimus nuper atque cassavimus scriptum illud, in quo hæreticæ illæ pravitates continentur. In irritum duximus præsertim hæc: *Quod non liceat episcopo* etc. Ut superius in epistola ad Moguntinum directa et in plerisque aliis continetur usque: *ni resipuerit.* Omnes, inquam, istos vinculo anathematis innodavimus. Quos etiam volumus et rogamus, ut et vos excommunicatos denuntietis. Excommunicavimus etiam omnes, qui in possessiones et bona Cantuariensis Ecclesiæ absque voluntate et assensu nostro de cætero manus extendent.

EPISTOLA CV.

AD EUNDEM.

THOMAS Cantuariensis archiepiscopus Rothomagensi archiepiscopo.

Meminit vestra discretio, qualiter ex mandato nuntiorum domini papæ, juramento præcedente, nostros excommunicatos absolveritis, scilicet Gaudredum Cantuariensem archidiaconum, Nigellum de Sacca-villa, et Thomam filium Bernardi, concepta spe pacis Ecclesiæ, quæ per hanc dispensationem credebatur citius provenire. Nos autem id æquanimiter interim sustinentes, in omni mansuetudine fidem promissionis expectavimus usque ad terminum, quem dominus papa præfixerat nuntiis, ut redirent. Et quia pax secuta non est, præfatos Gaudredum, Nigellum, Thomam, elapso termino publice excommunicavimus, vobisque secundum sacrorum canonum institutiones denuntiamus, ut eos per provinciam vestram, prout ecclesiastica disciplina præscribit, tanquam excommunicatos faciatis a cunctis fidelibus evitari. Ediximus etiam more canonico, quatenus Joannes decanus Saresberiensis, et Guido decanus de Waltham, et Joannes Comin, et Radulphus archidiaconus de Landaf, et Wimarus presbyter infra octavam beati Martini satisfaciant Ecclesiæ Dei, quam læserunt, et nobis, quia tunc, auctore Deo, eos excommunicabimus, nisi interim satisfecerint. Excommunicavimus etiam illos, qui nuntios domini papæ aut nostros, ne Ecclesiæ necessitates prosequantur, impediunt.

EPISTOLA CVI.

AD EUNDEM.

THOMAS Cantuariensis archiepiscopus, Rothomagensi archiepiscopo et ejus suffraganeis.

Sacrorum canonum auctoritate præcipitur, ut quilibet episcopus excommunicatorum suorum nomina denuntiet vicinis episcopis; qui suis parochianis indicent, ut ipsis excommunicatis aditus ecclesiasticus ubique præcludatur, et excusationis causa omnibus auferatur. Nam qui etiam illis, qui se conqueruntur iniuste ligatos, ante utriusque partis justam examinationem scienter communicaverint in oratione, aut cibo vel potu, aut osculo vel etiam Ave dixerint, aut sermonis commercium exercuerint, nisi qui ad eorum conversionem debeat pertinere, juxta sacram canonum institutionem, cui ex proposito impium, et pertinaciter obviare hæreticum est, excommunicationi simili subiacebunt. Scienti constitutiones Ecclesiæ loquimur et tenenti, qui zelum legis habens docet eum præteriri, qui corpus et animam potest mittere in gehennam. Nec diffidimus, quin apostolicæ sedis decreta, quorum observationem in ipsa consecratione professio pontificis exprimit, sæcularium potestatum præferatis edictis. Nec persuaderi potest, quod humanus dies prudentiam sanctitatis vestræ possit impellere, ne contemplatione ejuscunque damni vel commodi imminuentis, velit cum aliquibus criminosis iniqui-

A tatis inire consortium. Audivimus autem, et quasi certum tenemus, quod excommunicati nostri, quos ex justis et manifestis causis, urgente necessitate officii, et persuadente ratione juris excommunicavimus, ad provinciam vestram frequenter accedunt. Unde nostrum et vestrum præcaventes periculum, eos secundum Ecclesiæ normam nominibus propriis curavimus designare, ne ex eorum participatione labem damnationis commissa vobis Ecclesia contrahat.

Hæc autem sunt eorum nomina: Gilbertus Londoniensis episcopus, etc. Denuntiamus ergo vobis ex parte domini papæ et nostra, quatenus, prout canonum censura præscribit, eos studiosius evitatis, et per provinciam vestram denuntiatione publica faciatis a cunctis fidelibus evitari. Sunt et alii solemnii vocatione citati a nobis, quos auctore Deo in die Dominicæ ascensionis excommunicabimus, nisi interim condigne satisfacere curaverint Ecclesiæ Dei, quam læserunt, et nobis: sunt Gaudredus Ridel Cantuariensis archidiaconus, Robertus vicarius ejus, Ricardus de Ivelcestre, Ricardus de Luci, Adam de Cirringis, et Willelmus Giffard. Eos quoque simili sententia condemnavimus et excommunicavimus, qui bona Cantuariensis Ecclesiæ et clericorum nostrorum sive ex mandato domini regis, sive ex propria temeritate occupaverunt, aut qui in proscriptionem innocentium, aut depopulationem pauperum Ecclesiæ Christi malignis consiliis et delationibus, et versutiis ejusdem domini nostri regis animum instigaverunt, aut nuntios domini papæ et nostros, ne prosequantur Ecclesiæ necessitates, impediunt, donec respiciant, et condigne satisfaciant. Nec se quisquam fraudulentia verborum, aut prætextu subreptæ absolutionis, aut innocentie conetur excusare; quia impoñentes aut persistentes in scelere, aut voluntate peccandi, non apostolus, non angelus, non quæcunque potestas potest absolvere coram Deo, qui eos iudicii severitate condemnat, quos Ecclesia Satanz tradit. Diu, et utinam non nimium, tantas Christi injurias et contumelias dissimulavimus, expectantes ut patientia nostra fructum penitentiae operaretur in illis; sed quia superbia et impietas eorum ascendit semper, de cetero potestate divinitus collata utemur, Deo propitiante, sedis apostolicæ auctoritate muniti contra appellationum subterfugia, et malignantium tergiversationes.

EPISTOLA CVII.

AD EUNDEM.

THOMAS Cantuariensis archiepiscopus, Rothomagensi archiepiscopo.

Gratias agimus dilectioni vestræ, quæ nostri curam gerit; sed utinam vestra sollicitudo in illa, quam dicitis, episcopi Londoniensis absolutione mandatum domini papæ non excessisset! Scitis enim, quid vobis in communi negotio sine collega licuerit: præsertim cum ille nondum conventus fuerit, nec constabat quod ille, si conveniretur, non posset ad-

esse, qui nec conventus est, cum tunc demum alteri vestrum aliquid in hac causa licuerit, si alter adesse non posset. Hanc enim conditionem dominus papa inserit, quam constat non existisse, ut exinde fortasse constet sapientibus, an aliquid actum sit deficiente conditione. Sed quid ista protrahimus? Vos scitis quid egeritis, et nos Deo auctore, quid vobis competat, non ignoramus. Quod autem præcipitis esse secretum, quomodo secretum esse valeat? Procurent qui possunt: si qui tamen. Quia antequam mandatum vestrum reciperemus, apud vos cantabatur in compitis, et apud vos ipsius Londoniensis diligentia divulgatum est, qui in civitate nostra et in ecclesia solemniter divina celebravit.

EPISTOLA CVIII.

AD CAPITULUM ROTHOMAGENSE.

Venerabilibus fratribus G..... decano, archidiaconis, et toti clero, et populo Rothomagensi, THOMAS Dei gratia Cantuariensis Ecclesiæ minister humilis, salutem, et utriusque vitæ successus.

Ad vestram credimus pervenisse notitiam, qualiter dominus Gratianus et magister Vivianus nuntii domini papæ, excommunicatos nostros, scilicet Gaufredum, Ridel, Nigellum de Sacavilla, Thomam filium Bernardi, concepta spe pacis absolvi fecerint, accepto prius ab eis juramento, quod mandato eorum stare deberent; et quia post absolutionem eorum pax, ut debuit, secuta non est, imo per aliquem eorum qui absoluti fuerant, ut dicitur, impedita, præfati nuntii domini papæ infecto negotio redeuntes, dederunt in mandatis venerabilibus Patribus, Rothomagensi et Burdigalensi archiepiscopis, præcipientes auctoritate domini papæ et sua in virtute obedientiæ, quatenus præfatis Gaufredo, Nigello, et Thomæ denuntiarent in virtute Juramenti, quod præstiterant, ne fruerentur collatæ sibi absolutionis beneficio, nisi infra festum beati Michaelis tunc imminens esset pax Ecclesiæ reformata; sed se gererent excommunicatos, ex quo constaret eis nos in illos anathematis tulisse sententiam. Quia ergo infra terminum illum Ecclesia non obtinuit pacem, sed illius sunt auctæ et multiplicatæ injuriæ, sæpius dictos Gaufredum, Nigellum, et Thomam anathematis vinculo innodavimus, vobis et aliis ecclesiis secundum canonum instituta denuntiantes, ut caveatis illorum communionem, quousque mereantur absolvi. Siquidem vobis non est incognitum, quod qui scienter excommunicatis communicare præsumit, se ipsum laqueo similis damnationis astringit. Morem quoque canonicum exsequentes denuntiavimus Joanni decano Saresberiensis, Guidoni decano Waltham, Joanni Cumin, Radulfo Landavensi archidiacono, Wimaro presbytero, quatenus Ecclesiæ Dei, quam læserunt, et nobis infra octavam beati Martini satisfaciunt, quia nisi interim satisfecerint, eos extunc auctore Domino excommunicabimus. Excommunicavimus etiam omnes illos, qui nuntios domini papæ et nostros, ne Ecclesiæ necessitates prosequantur, impediunt. Toto jam quin-

A quennio molestias exilii, proscriptionis injurias, et multiplices nos et nostros persequentium, et patientiam provocantium stimulos in multa mansuetudine sustinimus, sed injuriam Christi, et tantas Ecclesiæ lacerationes non audemus ulterius sustinere, nec nostræ, quod absit! desidiæ vel negligentia merito debeat imputari, quia ex dissimulatione reus convincitur ante Deum, qui pro debito officii culpas non reprimat aut arguit subditorum. Si vero dominus rex, et quicumque nos læserunt, in reformatione ecclesiasticæ pacis debitum honorem Deo reddiderint, et charitatis officia studuerint adimplere, nos per gratiam Dei singulis sinceræ charitatis affectione jungemur, et sua in Domino jura cuique curabimus illibata servare; sed regi operosius et efficacius, tanquam Domino amantissimo, et omni jure cæteris in mundanis omnibus præcellenti. Solum Deum, et quæ Dei sunt, illi et suis, si permiserit, censemus præferendum, et voluntati ejus sic obtemperamus in omnibus, ut solus ordo collatus a Domino, qui sine dispendio salutis, divinæ legis, et Christianæ institutionis prævaricationes non admittit, nobis permaneat illæsus et illibatus. Det vobis Deus cor, ut colatis eum, ipsius fideliter implendo voluntatem, et habendo memoriam nostri in orationibus, elemosynis, et Deo placitis operibus vestris. Illud ethicum ad mentem reducite: *Quia mors æquo pede pulsat regum turres, et pauperum tabernas.*

C Similiter scriptum est omnibus episcopis Normanniæ, ut archiepiscopo; et capitulis, ut Rothomagensi.

EPISTOLA CIX.

AD WILLELMUM SENONENSEM ARCHIEPISCOPUM.

Reverendo Patri et amico charissimo, WILLELMO. Dei gratia Senonensi archiepiscopo, THOMAS Cantuariensis Ecclesiæ minister humilis, quidquid devotio potest exsulis et proscripti.

D Impossibile est ut animus quiescat impij, quem conscientia stimulus semper exagitat, perpetuumque timorem incutit, ne per singula momenta recipiat quod meretur. Sic æstuantem jugis sollicitudo premit, et dum omnes homines, etiam bene promeritos et amicissimos, suspicionibus lacerat, ex propria culpa perfidiæ putat aliis deesse, quam in conscientia non habet fidem. Sic rex Anglorum, audita profectione vestra, suæ conscius iniquitatis, et veritus zelum legis, et perseverantiam virtutis, quam habetis et exercetis in Domino, supra modum timet ne in terram ejus cismarinam sanctitati vestræ legatio committatur, quia in tota Ecclesia Gallicana ei alius non occurrit, per quem malitia ejus reprimi possit aut conteri. Sed nec in Ecclesia Romana veretur aliquem, sicut sui testantur, præter dominum Gratianum. Quia si gloriatio ejus vera est, quotquot alii ad ipsum ex quacunque causa accesserint, ad nutum ejus, et interdum non sine nota sinistra opinionis, convertibiles inventi sunt. Quia ergo dominum Gratianum in comitatu vestro redire didicit, adeo turbatus est, ut animi motum dissimulare

nequiverit, dicens quod per vos cogendus erit ad pacem, aut cum magno sui suorumque dispendio perpetuam ignominiam subiturus.

Evocavit itaque magistrum Vivianum per suas, et domini Rothomagensis, et Gaufredi Ridelli litteras. Eique, sicut idem Vivianus in publica plurimorum audientia confessus est, corporaliter fidem dedit, quod in pace Ecclesiæ reformanda domini papæ mandatum et ipsius consilium sequeretur. Fecit et litteras signari sigillo suo, quas ostendit quibus voluit, promittens in illis, quod pro amore domini papæ nobis redderet Cantuariensem Ecclesiam, et possessiones ablatas nobis et nostris, et pacem et securitatem, ut ad tractandum pacis verbum, quam vestro et domini Gratiani metu, quidquid alius gloriatur, querere videbatur, præfatum Vivianum validius perurgeret. Sed de ablatis non faciebat aliquam mentionem, nisi quod innuebat, quod si illius in reformatione pacis sequeremur arbitrium, nos collocaret in capite regni, et nulla ratione pateretur egere. Revocato autem magistro Viviano, et verbis ejus habente fidem, simulata devotione profectus est ad sanctum Dionysium, re autem vera, ut faceret quod pene fecit, id est ut regem Christianissimum circumveniret. Convenit enim inter eos in colloquio apud S. Dionysium, ut ei alendum et instituendum traderet Ricardum filium suum, et ut comitem S. Egidii Turonas evocaret, eidem Ricardo responsurum super comitatu Tolosano. Siquidem locus ille prudenter commodissimus visus est, ubi subsidiarii partium tutissime conveniant, et litigantium natales libere protestentur. Et qui jus dicturi sunt, quam ratio exegerit partem, alteri sine trepidatione vel aliqua cunctatione condemnent.

Nos ad illud colloquium compulerunt accedere dominus rex Franciæ, et magister Vivianus, et alii sapientes, ut nobis Parisiis constitutis, et illo apud S. Dionysium existente, posset de vicino pax nostra commodius tractari. Ubi cum illum sæpe dictus Vivianus instantius et diligentius conveniret, ut impleret promissionis fidem, resiliit more suo, et talem se Viviano exhibuit, ut ad nos rediens pluribus assidentibus palam dixerit, quod hominem adeo mendacem se vidisse vel audisse non poterat recordari. Sed et ipsi præsentī, multis audientibus, sicut ab eis post accepimus, quæ fuerant dicenda non tacuit. Imo dupliciter ejus patenter arguens, ex magna parte, quam prius læserat, redemit famam, conquerens quod adeo captus fuerat dolis ejus. Quod quidem vobis ideo intimamus, ut si ad Ecclesiam Romanam rediens partes illusoris fovere præsumperit aut fraudes oculere, rei veritatem domino papæ et cardinalibus vestra dilectio possit fidelius intimare. Nam, sicut nutu divino contigit, ut re strenue gesta rediret dominus Gratianus, et ut vos, quem Deus firmissimam columnam, ut persæpe loquimur, in Ecclesia sua posuit, et qui mores hominis plenius nostis, ad sedem apostolicam acciperetis iter; sic ejusdem nutu creditur accidisse, ut Vivianus, quidquid ha-

beret in animo, ad illustrandam justitiam Ecclesiæ et dilatandam gloriam Gratiani, remanserit in Francia; ut rex Anglorum per fautorem suum hominibus, quos decipere consuevit, amplius innotescat, et fallacia verborum dominum papam et curiam, ei huc usque nimis credulam, de cætero minus solito circumscribat.

Cum vero præfatus Anglorum rex a S. Dionysio recedens prope montem Martyrum transitum faceret, illuc occurrimus, petentes ab ipso per venerabiles viros, dominum Rothomagensis et episcopum Sagiensem, et alios quosdam, qui se verbo ingesserant, quatenus nobis pro amore Dei et domini papæ, et nostris gratiam suam, pacem, securitatem, possessiones et ablata restitueret, offerentes nos paratos esse exhibere illi quidquid archiepiscopus principi debet. Ille autem respondit se ex animo libenter remittere ex parte sua offensas et querelas, si quas contra nos habuerat: et de his, quæ proponere vellemus adversus eum, paratum esse stare iudicio curiæ domini sui regis Francorum, vel iudicio Ecclesiæ Gallicanæ, aut scholarium Parisiensium. Quo audito, respondimus nos curiæ domini regis, si ei placeret, aut Ecclesiæ Gallicanæ non recusare iudicium, malle tamen, si illius sederet animo, cum illo amicebiliter componere, quam litigare. Et si ecclesiam et possessiones nobis et nostris vellet restituere, et gratiam, et pacem, et securitatem præstare nobis in osculo pacis, parati eramus hæc recipere, postulantes ut mobiliū ablatorum medietatem Ecclesiæ redderet ad solvenda nostra et nostrorum debita, ad sarta tecta reficienda, ad instruenda prædia, et reparandas varias Ecclesiæ necessitates, quæ ad summum calamitatis officialium suorum depopulatione et fraude perducta est. Et ne vota nostra modum viderentur excedere, et ut pacta ad declinandam lubricitatem hominis in scripturam redacta fidelius tenerentur, ei petitionem, quam vobis scriptam mittimus, ad nuntiorum suorum arbitrium castigatam et temperatam fecimus offerri, ut omnibus innotesceret nos nullam pacis, quæ Ecclesiæ Dei tolerabilis sit, detrectare conditionem. Sed ille, audito scripto, et ab omnibus propter nimiam modestiam approbato, materna respondit lingua: sic anfractus verborum, quod familiare habet, invertens, ut simplicioribus videretur universa concedere, cautioribus autem perversas, et non ferendas immiscere condiciones. In uno tamen consentiunt universi, quod nos in osculo pacis recipere non acquievit. Subtulit ergo Christianissimus princeps, quod pro tanta quantitate auri, quantus ipse est, non consuleret ut terram ejus, nisi prius accepto publice pacis osculo, ingrederemur. Et comes Theobaldus adjecit, quod stultissima præsumptio esset multis circumstantium sibi invicem dicentibus et reducentibus ad animum, quid Roberto de Silliaco acciderit, quia nec ipsum osculum ad pacis et securitatis custodiam satis firma cautio videretur: Sed nec istud responsum suum nobis per præfatos

episcopos pacis, ut sperabatur, mediatores, aut per alios significare curavit; imo nobis præsolanibus responsionem versus Medontam deflexit iter. Allatus est autem ei in via dominus Philippus, benedictus filius Christianissimi regis, quem, ut aiunt, qui attulerant, subtristis vidit, tenuiter allocutus est, et eum festinatione dimisit. Deus tamen præelecti pueri sui inspiravit animam, et linguam formavit, et direxit, ut cum astantium admiratione festinantem ad discessum moneret et rogaret, quatenus diligeret regem et regnum Franciæ, et ipsum, quia per hoc Dei et hominum gratiam consequeretur. Comitatus est autem eum dominus rex Franciæ usque Medontam, et inde usque prope Paciæ, expectans ut juxta conductum traderet Ricardum filium suum. At ille se hoc facturum promisit in colloquio Turonensi, in quo manifeste deprehenderunt dominus rex et sui, quod res cum eis agebatur in dolo. Et sicut ex consequentibus signis visum est, in minori charitate discesserunt ab invicem, quam ab initio convenissent. Nec creditur colloquium illud, quod ille captat, esse futurum, quia machinatio hæc multis patet impedimentis. Nos sine responso ejus ad loca consolationis nobis divinitus provisa reversi sumus, spem nostram projicientes in eum, qui non deserit sperantes in se, et dilectionis vestræ solatium præsolantes. Rex autem Angliæ ad magistrum Vivianum postea nuntium misit, et viginti marcas, ut aiunt, rogans ut se iterum intromitteret de pace reformanda. Sed ille, sicut pro certo accepimus, et pecuniam respuit, et respondit ei litteris, quarum dilectioni vestræ exemplum mittimus. Nec est quod ipsum ad pacem tantopere urgeat, quantum metus ille, quem de vestra et D. Gratiani protectione concepit. Nec Vivianum captat ob aliud, nisi ut vestras et Gratiani non incidat in manus. Nobis etiam relatum est, quod Ægidium Rothomagensem archidiaconum, et Joannem de Oxeneford, et Joannem Saggiensem misit ad curiam ut impediatur ne vobis in terram suam legatio concedatur, aut aliud quod ei vel comiti Flandriæ possit esse molestum. Vos nuntiorum personas pro parte novistis, sed fortasse plenius nostri, qui nostri gratia vobiscum sunt. Cum ergo de vestra sinceritate et domini Gratiani, quam expertus est, fide tantus hominem illum timor invaserit, luce clarius est, quod si eum dominus papa ab initio terruisset auctoritate summi pontificis potius quam sustineret pia mansuetudine patris, jam Ecclesia Dei a multis diebus serenata fuisset, et detumuisset furor hominis, qui fugientes et imbelles sine miseratione persequitur, et viriliter resistentibus cedit. Miseriæ nostræ conditionem pro parte, quia fastidiosum esset recensere singula, deplojavimus in auribus vestris: vestræ dignationis et charitatis erit impetrare a domino papa ut Ecclesiæ Dei et nobis, et miseris nostris, expedientem et se dignam provideat pacem, quia in eum oculi omnium directi sunt, expectantes quid facturus sit in causa ista. Si raptor ablata non restituerit aut

A satisfecerit, si novam et præter Ecclesiæ morem a nobis obligationem extorserit, præsertim auctoritate summi pontificis, pernicios exempli non delebitur in sempiternum, sed a nobis transferetur in alias nationes. Quid autem minus exigi potuit, quam id quod de suorum arbitrio contracta et castigata continet subscripta petito? Sane, si dominus papa vel nunc tandem nuntios ejus confusos remiserit, et in terras ejus cismarinas aggravare proposuerit manum suam, nihil volet præcipere, quod non sine difficultate et mora valeat obtinere. Nam procures Ecclesiæ favent, solique clerici, quam venenosis consiliis seminaverunt, furoris pertinaciam rigant exhortationibus, et instigationibus fovant et promoveant. Quorum alii in Angliā debacchantur in tormentis Ecclesiæ, alii vero crebris discursionibus nunc apostolicam sedem, nunc adversus Ecclesiam publicas orbis Latini sollicitant potestates. Quod autem sine dolore et stupore non dicimus, sæculi potestates ad tanti flagitii consortium nequeunt inclinare, sed in Ecclesia Romana semper inveniunt aliquos, quos scelerati propositi se gloriantur habere consortes.

EPISTOLA CX.

AD WALTERUM ALBANENSEM EPISCOPUM.

THOMAS Cantuariensis archiepiscopus, WALTERO Albanensi episcopo.

Ociosum est in auditu ejus verba prætereundum, qui ex paucis multa perpendere consuevit, et magistra charitate amicis justa petentibus non deesse. Quod in multis et magnis frequenter experti, ad sinum clementiæ vestræ latorem præsentium, cum omni fiducia destinamus, tam ipsum quam petitiones, quas per eum domino papæ porrigimus, sanctitati vestræ affectuosius commendantes, et rogantes attentius, ut eas dilectio vestra solita bonitate studeat promovere. Audietis, si placet, ab ipso, qualiter cum domino rege Anglorum fecerimus pacem ad honorem Dei, et, ut speramus, Ecclesiæ utilitatem, et dilatandam apud Anglos auctoritatem apostolicæ sedis. Nuntius supplebit cætera, quæ hic scienter et de industria reticentur.

EPISTOLA CXI.

AD GAUFREDUM AUTISSIODORENSEM EPISCOPUM.

D THOMAS Cantuariensis archiepiscopus, GAUFREDO Autissiodorensi episcopo.

Secutus fidem vestram potius quam rationem meam, non sine labore mei et meorum, quos de diversis locis evocaveram, accessi usque Pontisarram, cum omni humilitate reformandæ pacis, quæ sperabatur, acceptans occasionem. Ubi receptis litteris vestris, quibus me et meos innotuisse delusos, persuasus sum, ne de cætero credam omni spiritui, et ne tam facile coeulsules meos, Christi pauperes et proscriptos, affligam amplius discursibus vanis et sumptibus magnis. Et si mihi credidissetis vera dicenti, utrique nostrum utilius esset prospectum. Nunc autem insipiens factus sum: quis me coegerit, quis induxerit, plenius scitis. Nec hæc

dicō, quod vobis impensæ Deo sollicitudinis non habeam gratiam, sed ut uterque nostrum de cætero cautius negotietur, et verba meminerit esse verba. Si ergo aliud audieritis, ne miremini. Et quia fidem vestram secutus sum, offerens me ad omnem conditionem pacis in Domino, precor ut qualiter mecum actum sit et agatur, per vos innotescat domino Cisterciensis, qui reconciliationis hujus, ne delusionis dicam, vobiscum est institutus procurator. Expedit enim honestati vestræ et illius, ut veritas pluribus innotescat. Valet.

EPISTOLA CXII.

AD DAVID BANGORENSEM ARCHIDIACONUM.

THOMAS, Dei gratia Cant. archiep. et apos. sedis legatus, DAVID dicto archidiacono Bangorensis Ecclesie, salutem et cordis oculos salubriter aperire.

Mater tua, Bangorensis Ecclesia, ab annis multis lugebat proprio viduata pastore, et qui eam consolari debuerant, acerbiores inimici facti sunt inter angustias. Quorum tu præambulus et signifer esse diceris ab his, qui et matris Ecclesie miseras ingemiscunt et bona illius in abusus filiorum et filiarum suarum queruntur esse conversa; et quod intolerabilius est, ordinationem Ecclesie tuis machinationibus lacrymabiliter asserunt impediri. Unde, quia tantæ presumptionis excessus ulterius dissimulare nec possumus nec debemus, tibi in virtute obedientie præcipiendo mandamus, quatenus ad nos, omni excusatione cessante, juxta mandatum apostolicum infra quatuor menses post harum susceptionem litterarum accedas, nostris monitis et præceptis in Domino pariturus, aut exinde, si neglexeritis, officio et beneficio ecclesiastico irreparabiliter privandus, et si nec sic respueris, Satanæ tradendus in interitum carnis. Siquidem apostolicum nos oportet implere mandatum, et naufragantis Ecclesie periculis maturius subvenire. Te monitis obtemperantem in beneplacito suo gratia Dei custodiat.

EPISTOLA CXIII.

AD EUNDEM.

THOMAS Cantuariensis archiepiscopus, Bangorensi archidiacono.

Grate suscepimus litteras dilectionis tuæ, et gratias inde tibi referimus. Sed hæc esse poterit summa occasio, qua tibi majores et uberiores gratiarum actiones referre habebimus, si te circa pacem Ecclesie Dei, et clericorum disciplinam sollicitum audierimus. De eligendo vero episcopo hæc tibi et fratribus tuis mandamus, ne de aliquo fiat electio vel nominatio, donec visis litteris nostris et nuntio consilium nostrum super hoc negotio audieritis. Nos enim, prout Dominus concesserit, ad pacem Ecclesie Dei et vestram modis omnibus studium adhibere curabimus. Audivimus clericos vestros ad alienas provincias ordinationis causa migrare, quod utrum verum sit scire cupientes, per fidelitatem, qua nobis teneris, præcipimus, ut nos inde certos reddas. De præsen-

tium autem latore, qui ad vos per multa pericula venit, hæc tibi mandamus et præcipimus, ut ecclesiam suam et decimas plenarias eum in pace habere facias, et ab injuriis et violentiis, quas ei decimarum causa inferi Arthurus de Chargis, immunem facias, eumque de cætero ab ejus inquietatione cessare compellas. Quod si facere contempserit, infra purificationem beatæ Mariæ suam nobis præsentiam satisfactorum exhibeat.

EPISTOLA CXIV.

AD EUNDEM ET CANONICOS BANGORENSES.

THOMAS Cantuariensis archiepiscopus archidiacono, et canonicis Bangorensibus, salutem quam meruerunt.

Perlatum est ad aures nostras, vos in Deum, et nos, et Ecclesiam Cantuariensem, matrem vestram, gravissime et sine meritis deliquisse. Quia, sicut nobis assertum est, machinamentis Arthuri et sociorum suorum consilium pariter et assensum vestrum in damnum Cantuariensis Ecclesie, quæ mater vestra est unanimiter præbuitis. Nec, ut credimus, tam detestabile factum, tam nefandum facinus aliquatenus factum fuisset, nisi vos consilium et assensum in eo dedissetis. Sed tibi, David, loquimur: a memoria tua non debuit ullatenus excidisse, quod noster juratus es, similiter et Cantuariensis Ecclesie, nec tu aut canonici Bangorensis Ecclesie debuissent consensisse, ut episcopus Ecclesie suæ, si quis tamen ibi esset, in Hiberniam ivisset, et ibidem sacramentum recepisset, quasi a novo metropolitano sibi constituto. Et idcirco mandando tibi præcipimus, et in periculo beneficiorum et ordinis injungimus, ut tu cum filio tuo, et tribus aut quatuor de majoribus et potioribus personis Ecclesie, mediante quadragesima, nostro te conspectui repræsentares, responsurus et satisfactorus de his et aliis, quæ tibi obijciuntur. Nihilominus universitati vestræ præsentium significatione præcipiendo mandamus, et in periculo beneficiorum et ordinis vestri vobis injungimus, quatenus infra præscriptum terminum vos nobis repræsentetis. Nos enim de episcopi vestri electione vobiscum tractabimus. Prohibemus etiam vobis apostolica auctoritate et nostra, ne de electione episcopi interim aliquid faciatis, aut quendam eligatis.

EPISTOLA CXV.

AD EOSDEM CANONICOS.

Quia Ecclesiam Dei liberam esse decet, et præsertim in electionibus celebrandis obtinere debet unanimis fratrum, non violentia potestatis, vos a juramento, quod contra bonos mores et sacrorum canonum disciplinam Owenus Wallensium princeps dicitur extorsisse, ut nullum scilicet vobis in episcopum nisi de ipsius eligeretis arbitrio, dominus papa clementer absolvit, præcipiens ut quem vobis assignaverimus, omni appellatione et contradictione postposita, pontificem recipiatis. Inde est quod universitati vestræ in virtute obedientie præcipi-

endo mandamus, quatenus juxta quod vobis nuntii nostri intimaverint mandatum apostolicum cum omni diligentia exsequamini; scituri quod si neglexeritis, in personas vestras anathematis, et in ecclesiam et loca quæ inhabitatis interdicti sententiam, auctore Domino, proferemus. Valete.

EPISTOLA CXVI.

AD BATHONIENSEM CLERUM ET POPULUM.

Vobis, dilectissimi fratres, etc. (*Vide infra similem epistolam ad clerum et populum Cicestrensem directam.*)

EPISTOLA CXVII.

AD HILARIUM CICESTRENSEM EPISCOPUM.

THOMAS Cantuariensis archiepiscopus, Cicestrensi episcopo.

Quia dominum regem Angliæ satis superque sustinimus, nec ullum ex eo sustentiam nostræ fructum percepimus, periculosum et intolerabile nobis omnino visum est tantos illius et officialium ejus excessus jam ex hoc, ut hactenus, impunitos relinquere: præsertim cum et nuntiis, et litteris, et modis aliis studuerimus, nec potuerimus eum a perverso proposito revocare. Proinde scriptum illud, in quo illæ non consuetudines, sed potius pravitates continentur, quibus perturbatur et confunditur Anglicana Ecclesia, publice damnavimus et cassavimus, et ipsius scripti auctoritatem. Universos etiam observatores et exactores earum, consiliatores et adjutores, seu defensores excommunicavimus: et episcopos nostros a promissione, qua tenebantur ad observationem earum, absolvimus. Auctoritatem etiam scripti, et ipsum scriptum, et quæ in ipso continentur, in irritum duximus. Et præsertim hæc: *Quod non liceat episcopo, etc.* Ut supra (*in epistola ad Moguntinum archiepiscopum directa et in aliis*) usque: *Nisi resipuerit.*

Unde est, quod mandamus vobis, et in virtute obedientiæ præcipimus, ut eos qui a nobis excommunicati sunt, vos quoque, prout decet, excommunicatos et habeatis, et denunciari faciatis, juxta illud decretum Honorii papæ: *Curæ sit omnibus episcopis excommunicatorum nomina tam vicinis episcopis quam suis parochianis pariter indicare eaque in celebri loco posita præ foribus ecclesiarum cunctis venientibus inculcare, quatenus in utraque diligentia excommunicatis ubique ecclesiasticus aditus denegetur, et excommunicationis causa omnibus auferatur.*

EPISTOLA CXVIII.

AD CLERUM ET POPULUM CICESTRENSEM.

THOMAS Dei gratia Cantuariensis archiepiscopus, et apostolicæ sedis legatus, priori et ROBERTO archidiacono, et toti clero et populo Cicestrensi Ecclesiæ, Christianam communionem habentibus, salutem, et Deo potius quam hominibus obedire.

Vobis dilectissimi fratres, esse non potest incognitum, quod et atrocitate criminis et temporis diuturnitate jam fere totum Latinum replevit orbem. Tacèantur ad præsens, quas vidistis et doluistis, inno-

centium proscriptiones, sileatur bonorum Ecclesiæ confiscatio inaudita, atrocitatem suppliciorum, concussionem pauperum, quæ referri nequeunt, animus et lingua dissimulet, tantum publicæ libertatis, et salutis nostræ, qui Christi tam patentes injurias nimis diu siluimus, et exempli perniciem non curavimus, ut oportebat, delere publice, pariter defleamus. Luctus enim communis esse debet, ubi exhonoratur Dominus ac redemptor, et judex omnium Christus; ubi libertas Ecclesiæ perimitur; ubi publica salus in periculo est. Lugent Ecclesiæ pastoribus destitute; sine sacramentorum plenitudine decedunt parvuli; ecclesiarum et virginum consecratio cessat; non est in populus multis qui criminosos confitentes excipiat ad consolationem; non est qui publice poenitentes absolvat ad veniam; non est qui errantium delicta debita correctione redarguat; qui causas possit examinare et finire majores; qui promoveat quos necessitatibus suis desiderat Ecclesia promoveri, nisi forte conductus quis alienus episcopus, aut coactus, lege Domini prohibente, falcem mittere in alienam messem. Ubi vero majores Ecclesiæ pontifices suos habent, et in minoribus necessaria provisæ sunt subsidia sacerdotum, ab officiis suis publicæ potestatis edicto et violentia suspenduntur, cum in majores personas, aut quantulumcunque beneficii aut officii a domino rege habentes, eis curam pastorem exercere non liceat, nisi venia impetrata.

Hæc autem quantum divinis obviunt institutis, et universorum saluti derogent, verbis astruere supervacuum est, cum res ipsa tardioribus etiam perspicua sit, nedum vobis qui sensus habetis exercitatos in lege Domini. Plurima, ne simus onerosi, consulto reticemus, quæ quisquis fidelium non attendit, cæcus est; qui non dolet, caret sensu, qui proficiat ad salutem. Dum commonitus est dominus noster rex per litteras, per nuntios, per episcopos, per abbates, per subdiaconos curiæ per clarissimos cardinales, ut tam male præsumpta corrigeret, plenum in multa amaritudine ecclesiæ dolentis et languentis effluxit quinquennium, et non est inventus qui causam apud ipsum relevaret ex omnibus charis ejus. Quodque magis dolendum est et stupendum, quod sine gravi mœrore non recolimus aut dicimus, quidam de clarioribus episcopis infideles inventi sunt, et arma iniquitatis ope auxilii et consilii persecutoribus contulerunt.

Si recolatis, dilectissimi, quæ in injuriam Christi, et in depressionem Ecclesiæ, nostramque et nostrorum contritionem sub hac tempestate gesta sunt, juste, ut credimus, mirabimini, quod tam patienti animo potuimus hæc omnia tolerare, præsertim cum a multo tempore, sicut multi noverunt, plenam habuimus potestatem reprimendi et coercendi persecutores nostros. Quorum tamen tanta fuit immanitas, ut antiqui mitius egerint in confessores Christi, quorum si priscas revolvatis historias, cognatos et amicos nequaquam hædebant, nisi ex publica confessione consortes haberentur et tituli. Quia ergo nec diutur-

nitatē patientiæ, nec multa humilitatis exhibitione A præfati domini nostri ira deferuit, sed ab impunitate pertinacior et atrocior factus est, tantos excessus ejus irrequisitos ulterius prætermittere non audemus. Nam dissimulatio culpæ comparatur assensui; et facientes et consentientes pari pœna lex divina condemnat. Inde est quod vobis, dilecti filii, decane, archidiaconi, et qui archidiaconorum geritis vices, in virtute obedientiæ, sub anathemate, in periculo dignitatis et ordinis, apostolica auctoritate et nostra præcipiendo mandamus, quatenus, nisi sæpēdictus dominus rex infra purificationem beatæ Mariæ memoratas enormitates debita satisfactione correxerit, et Ecclesiæ debitam cum libertate et dignitate reddiderit pacem, extunc prorsus cessetis a divinis, et ea per totum episcopatum vestrum penitus in omnibus ecclesiis eadem auctoritate, et sub eadem interminatione celebrari prohibeatis; excepto baptismo parvulorum, et penitentia, et viatico, quod clausis januis, et laicis personis exclusis, confici licet sine campanarum pulsatione, et solemnitate cantus et lætitiæ, quam in diebus jucundis consuevit Ecclesia exercere. Nec timeatis eos, qui interdum a Domino permittuntur ad majorem coronam electorum corporaliter sanctos affligere, et in animas nihil possunt, quia in hoc confessorio patenter judicabit Deus, quos in futuro debeat coronare.

Illos, autem, qu. ecclesias et ecclesiastica officia vel beneficia contra canonicas institutiones accipiunt de manu laicorum, qui clericos pœnis aut terroribus ad inobedientiam compellunt, qui domini papæ nuntios et nostros, ne necessitates Ecclesiæ prosequantur, impediunt, qui traditiones hominum divinæ legi præferendas docent, et usurpationes sive abusiones potentum cogunt Christianæ religionis institutionibus anteponi, et nominatim Cantuariensem archidiaconum Gaufridum, et Robertum vicarium ejus, Ricardum de Iwelcestre, Willelmum Giffard, Nigellum de Sacea-Villa, Ricardum de Luci, Thomam filium Bernardi, Adam de Cheringis publice excommunicamus. Quod si nec in subditorum pœnis excessus suos correxerit rex Anglorum, exinde personæ ejus, quod inviti dicimus, in dispendium salutis nostræ, sicut hactenus fecimus, auctore Deo, non parcemus. Nam miseratio talis impietas esse convincitur, cum scriptum sit: *Quod si virgæ parci, odit filium*. Ad hæc eadem auctoritate, et sub eadem interminatione præcipimus, ut Joannem decanum Saresberiensem, Guidonem decanum Waltham, Joannem Cumin, Radulphum Landavensem archidiaconum, Wimarum Presbyterum alumnum comitis Hugonis a die nativitatis Dominicæ, tanquam excommunicatos evitetis, nisi infra Ecclesiæ Dei, quam læserunt, et nobis satisfactionem debitam curaverint exhibere. Verbum Dei luceat in cordibus et operibus vestris, ut timorem Dei præferentes humano, vobis acquiratis coronam gloriæ, et exemplum obedientiæ et fortitudinis feliciter transmittatis ad posterum.

In eandem formam clero et populo Lincolnensi.

Et clero et populo Bathoniensi.

EPISTOLA CXIX.

AD RICARDUM COVENTRENSSEM EPISCOPUM.

THOMAS Dei gratia Cantuariensis archiepiscopus et apostolicæ sedis legatus, venerabili fratri Ricardo Coventrensi episcopo salutem.

Scripturamus vobis et aliis fratribus nostris ut suspenderetis denuntiationem excommunicatorum nostrorum, donec innotesceret a nuntiis domini papæ qui ad reformationem pacis Ecclesiæ venerant, si possent eam juxta formam quam dominus papa præscripserat, impetrare a domino rege. Sed quia dominus rex mandatis apostolicis non acquiescit, et nuntii infecta pace revertuntur, vobis in virtute obedientiæ præcipiendo mandamus, quatenus præfatos excommunicatos nostros, scilicet Gaufridum Cantuariensem archidiaconum, Robertum vicarium ejus, Ricardum de Iwelcestra, Willelmum Giffard, Joannem Cumin, Nigellum de Saccavilla, Ricardum de Luci, Adam de Cheringis, Thomam filium Bernardi, denuntietis excommunicatos esse et eos per parochiam vestram, prout canonum censura præscribit, præcipiatis ab omnibus fidelibus evitari. Similiter denuntiate excommunicatos esse, qui ecclesias aut officia vel beneficia ecclesiastica contra sacrorum canonum institutionem de manu laicorum accipiunt, et qui nuntios domini papæ vel nostros, ne Ecclesiæ necessitates prosequantur impediunt, et qui personas ecclesiasticas divina celebrare contra prælatorum suorum obedientiam cogunt. Quia omnes ipsos justo anathemate catholica et apostolica damnat Ecclesia. Vale.

EPISTOLA CXX.

AD HUGONEM DUNELMENSEM EPISCOPUM

THOMAS Cantuariensis archiepiscopus, H. Dunelmensi episcopo.

Noverit vestra fraternitas, quod nos ex justis et manifestis causis, urgente necessitate officii, et ratione juris persuadente, publice excommunicavimus Gilbertum Londoniensem episcopum, et Jocellinum Saresberiensem, et reliquos, quorum nomina superius scripta sunt. Denuntiamus ergo vobis auctoritate domini papæ et nostra, ut eos, prout canonum censura præscribit, denuntiatione publica faciatis per episcopatum vestrum a cunctis fidelibus evitari. Non turbetur cor vestrum in his, neque formidet, quia contra tergiversationes malignantium et appellationum subterfugia, Deo propitiante, sedis apostolicæ munimine muniti sumus. Hæc sunt nomina excommunicatorum: Ranulphus de Broc, etc.

EPISTOLA CXXI.

AD ÆCIDIUM EBROICENSEM ELECTUM.

THOMAS archiepiscopus Cantuariensis, Æcidio Ebroicensi electo.

Exhortationis vestræ litteras ea devotione suscepimus qua comperimus scriptas, intuentes eas ex charitatis adipe prodiisse et formatas spiritu discre-

tionis et singulas apices præferre timorem Dei. Quia autem, ut scribitis, os iniqua loquentium cum ampliori solito licentia dilatur apud vos, vetus quidem apud nos querela fuit, sed detractorum numerosior populus, et excogitata detractationis simenta quæ gratis diu protulimus, frontem nostram assiduitate patientiæ validius attriverunt, nobis ad animum reducentibus quod in filios prophetarum totus Israel linguas exacuit et ubique domus exasperans est. Sed nunquid ideo Deuteronomium a tabernaculo Domini sacerdotes ejicient, inferentes altare Damasci cum profanis ritibus nationum? Uti- que non fiet sine enormi periculo prophetarum, ut recedente ab iis spiritu sancto cogantur a mulieribus divinam inquirere voluntatem. Manet quidem præ- latus Ecclesiarum dura provincia, ut Deo et homi- nibus placere non possint, et Apostolus, ut ipse de se testatur, si hominibus placuisset non fieret ser- vus Christi. Unde, si sub tanto onere timetis et in- gemiscitis, non miramur; sed metum relevat conso- latio Scripturarum, cum constet quia Bezeleel vix decennis tabernaculum illius operosioris diligentiae et magnificentioris impensæ, quod Ecclesiam tanta varietate circumdatam præfigurat, Deo mandante construxit, et David de post setantis electus est ab illo, qui nascentis Ecclesiæ jaciens fundamenta, in- firma mundi elegit ut fortia quæque confunderet, et ignobiles extulit, ut in judicio sedeant cum princi- pibus et senatoribus terræ.

Vos tamen non dubitamus et sanguine generosum esse quod ad mundi gloriam spectat, et confidimus vitam vestram sicut litterarum et facundiæ, ita et virtutum titulis longe clarius illustrari, et utinam manus nostras extendere possimus ad os vestrum, id est quod monetis operibus adimplere. Ad quod petimus orationum vestrarum suffragiis adjuvari, votum habentes bona nostra, si qua sint, vobis apud Deum et homines prodesse sicut nobis. Dominum vero regem sincere diligimus et ei et liberis suis per omnia serviemus in Domino, fidelius obsequentes quam illi qui ponunt pulvillum sub omni cubito et cervical subiciunt omni capiti impinguentes illud oleo peccatoris. Et quidem sic esse dies Domini qui instat declarabit. Vos interim nos vestri dilectores ut consuevistis diligite, quia, Deo auctore, apud nos charitas vestri nec tepuit nec tepescet. Valete

EPISTOLA CXXII.

AD NICELLUM ELIENSEM EPISCOPUM ET RIC. ARCHIDIA-
CONUM SUUM.

THOMAS Dei gratia, etc. venerabili fratri NICELLO, eidem gratia episcopo Eliensi, et RICO archidiacono suo, salutem, et dirigere prudenter in futura pros- pectum.

Sacrorum canonum disciplina præscribit, ut epi- scopi excommunicatorum suorum nomina compro- vincialibus denuntient, ne una ovis morbida gregem fidelium contaminare possit. Nos autem ex speciali mandato domini papæ comitem Hugonem anathe-

A matis vinculo innodavimus, et præcipimus ut sen- tentiam, quæ ex summi pontificis processit arbi- trio, faciatis prout canonicis edictis decretum est, in omnibus episcopatus vestri ecclesiis publicari. Secuti quoque auctoritatem sedis apostolicæ, quam habemus præ manibus, excommunicavimus Gilber- tum Londoniensem, et Jocelinum Saresberiensem episcopos, Randulphum de Broc, et cæteros ut su- pra. Præcipimus itaque vobis in virtute obedientiæ, et in periculo dignitatis et ordinis, quatenus tam præfatum comitem, quam jam dictos episcopos, et cæteros prænominatos, faciatis per totam diocesium vestram publice denuntiari excommunicatos, et a cunctis fidelibus, prout ecclesiasticæ doctrinæ vigor exigit, evitari. Quod si unus vestrum, quacun- que B impediende necessitate, non potest exsequi, alter id modis omnibus, sicut honorem et officium diligit, exsequatur. Tu vero, fili archidiacone, tibi diligen- tius in hac parte provideas, ne a te districtius exi- gatur, si sub prætextu infirmitatis episcopi, manda- tum domini papæ et nostrum minus fuerit adimple- tum, aut ecclesia, quæ nunc, ut fama est, ex tuo pendet arbitrio, tua culpa perniciem contrahat, aut enorme dispendium patiatur. Valete in Domino.

EPISTOLA CXXIII.

AD ROBERTUM HEREFORDENSEM EPISCOPUM

THOMAS Dei gratia Cantuariensis Ecclesiæ humilis minister, venerabili fratri ROBERTO, eadem gratia Herefordensi episcopo, salutem et per omnia bene- facere.

C Si litteræ nostræ fraternitatis tuæ excitare sol- licitudinem, utinam nec affectu desidem repetissem, nec circa officii suscepti effectum minus vigilem. Elegi ego abjectus esse anathema pro omnibus vobis, opprobrium hominum et abjectio plebis, ne videre in mala sanctorum, et dissimulare in injuriam gentis nostræ, expectans si quis forte ex omnibus vobis zelans legem Dei, Ecclesiæ libertatem saltem affe- ctans, exiret post me et veniret, ut non daremus cornua peccatoribus. Et ecce tu, quem credebam mihi a Domino datum esse, ut mecum ædificares, evelleres, et plantares, propinas mihi stimulum in ruinam, solatium in desolationem, prædicans humi- liationem, imo defectionem, annuntians bonum, cum D undique sit perturbatio, in perniciem Ecclesiæ et clericorum. Et cum deberes animi vacillantis firmare constantiam, sustinere mecum congressum ad de- fendendum patrimonium Crucifixi, ad reprimendos et expugnandos hostes Ecclesiæ, instillare auribus meis, inspirare animo meo, ut obsecrarem instan- tius, arguerem arctius, et increparem durius. Quod si me non audirent, exclamare certe debueras contra me: Exsurge, quare obdormis? Exere gladium beati Petri, vindica sanguinem servorum Christi, qui effu- sus est, injurias Ecclesiæ, quæ in nobis et nostris fiunt tota die.

Exciditne a memoria tua, quantis sim afflictus injuriis, quibus contumeliis affectus, cum in persona mea contra omnem auctoritatem, contra omnem juris

formam, iterum judicaretur Christus ante tribunal principis? Non revoco certe ad animum propriæ personæ injuriam, etsi Ecclesiæ. Attende diligentius, altius in corde tuo repone, quid ageretur ante exitum meum, quid in exitu, quid postea, quid etiam agatur singulis diebus in terra illa circa Dei Ecclesiam, et ejus ministros. Qua animi constantia dissimulare potes tu, de quo sperabatur, quod esses redempturus Israel, a servitute liberaturus Ecclesiam? Et nunc quia tanto tempore tacuisti, doleo super te, frater, fili mi primogenite. Timeo ne succedat tibi, qui tollat tua primogenita, et auferat primogeniti benedictionem: quod absit a te! Verumtamen etsi hactenus nimium siluisti, resume vires, fili charissime. Clama, ne cesses, exalta vocem tuam contra eos, immitte eis timorem, mitte contritionem, exerce satisfactionem, ne ira Dei descendat super eos, et tota gens pereat, vel, quod absit! majores in gente. Ultio enim divina jam in januis est. Hæc tibi scribo, non ad confusionem tuam, sed ad cautelam, ut sultus auctoritate Dei et nostra, de cætero valeas et velis officii tui necessitates fortius et validius exercere. Illoc unum in summa scire te volo, per misericordiam Dei non extorquebitur a me Ecclesiæ confusio. Præterea gratias tibi ago, quod vel nunc visitasti me, et solatio tuo confortasti. Quid plura? Unum est, quod sine multa animi mei amaritudine sustinere non valeo. Fleo siquidem super dilectissimo domino nostro rege. Timor enim et tremor venerunt super me, et contexerunt me tenebræ, eo quod videam domino meo regi tribulationem et angustiam imminere. Nec mirum. Commovit enim Ecclesiam Dei, et conturbavit eam, ostendens clero suo dura, et potans eum vino erroris. Propterea dicit ei Dominus: *Ubi sunt nunc sapientes consiliarii tui, qui deriderunt tibi consilium insipientes? Qui dicebant: Filius sapientium tu es, filius regum antiquorum, quorum consuetudines observandæ sunt in Anglia. Quas qui non observaverit, non est amicus Cesaris. Hostis est coronæ. Reus judicio.* Sed certe, quod magis est, amicus est crucis Christi. Quoniam vix his qui condunt leges iniquas, et scripserunt injustitias, ut opprimerent pauperes in judicio, et vim facerent causæ humilium populi Dei; ut essent Ecclesiæ et viduæ præda eorum, et clericorum, aliorumque diriperent bona. Quid facient in die visitationis et calamitatis de longe venientis? Ad cujus confugient auxilium, et ubi derelinquent glorias suas, ne incurventur sub vinculo, et cadant cum interfectis? Ubi sunt nunc sapientes ejus? Procedant, annuntient ei, et indicent quid cogitaverit Dominus exercituum super Angliam. Stulti facti sunt sapientes ejus, emarcuerunt principes ejus, deceperunt Angliam, angulum populorum. Dominus immiscuit in medio ejus spiritum vertiginis. Errare fecerunt Angliam in opere suo, sicut errat ebrius, vomens et tremens. Et non erit Angliæ opus, quod faciat caput et caudam. Quia comedierunt Jacob, et locum ejus desolaverunt. Et dixerunt: *Hereditate possideamus sanctuarium Dei, expro-*

A brando sacerdotibus et principibus ejus. Quo confugietis a manibus nostris, aut in quo est vobis fiducia? Quare recessistis, et obstitistis præceptis nostris? O quam inanes cogitationes istæ, quam pessimæ operationes in conspectu Domini! Videt quidem, quoniam vanæ sunt. Ipse enim irridebit sic cogitantem, sic operantem, prospiciens quod prope veniat dies ejus, et jam in januis sit. Et dicitur: *Ecce homines, qui non posuerunt Deum adiutorem suum, sed speraverunt in multitudine divitiarum suarum, et prævaluerunt in vanitatibus suis. Sed frustra hæc faciunt. Non relinquet Dominus Ecclesiam suam, clerum suum sine defensore, sine ultione gravissima. Fundata est enim supra firmam petram: petra autem est ipse Christus, qui eam proprio sanguine suo fundavit. Certe si non ista emendaverint, non ferenet ea impune, quoniam conculcaverunt Sancta sanctorum, domum Dei, sacerdotes ejus injuriis affliciendo, verbisque probrosis. Hi sunt, quibus ipse Dominus ait: Dii estis et filii Excelsi omnes; et alibi: Qui vos odit me odit; qui vos spernit, me spernit; qui tangit vos, tangit pupillam oculi mei. Revertantur ergo ad cor, abjiciant mala ista a se, agant pœnitentiam cum summa humilitate. Alioquin verendum, quod absit! ne cito veniat Dominus noster, adducens super eos et terram eorum gladium retributionis et ultionem gravissimam. Ecce veniet Dominus noster et non tardabit et salvabit nos. Ipse equidem nunquam derelinquit sperantes in se. Propheta enim dicit: Spera in Domino et fac bonitatem et pascaris in divitiis ejus. Et alibi: Exspecta Dominum, et viriliter age; confortetur cor tuum et sustine Dominum; citoque liberaberis de laqueis renantium et a verbis asperis. Et, ut cætera omnia debito fine concludam, quoniam ostendit nobis Dominus, quæ et quanta oporteat nos pati pro nomine suo et pro defensione Ecclesiæ, necesse habemus, ores tu et tota Ecclesia tibi commissa instanter pro nobis, ut quod nostris meritis non valemus, tua et sanctorum virorum intercessione, qui in dictione tua sunt, sustinere valeamus, et ob id gratiam sempiternam consequi mereamur. Valeat confortare. Valeat et tota Anglicana Ecclesia, et confortetur in Domino, ut et nos bene valeamus.*

EPISTOLA CXXIV.

AD EUMDEN.

THOMAS Cantuariensis archiepiscopus, ROBERTO Herefordiensi et ROGERIO Wigorniensis episcopis.

Et ratio juris et fidei ac honestatis vestræ sinceritas et sacrarum jure exercitium litterarum nobis facile persuadent, quod nullius turbinis impetus charitatem vestram a fide et obedientia sanctæ Romanæ Ecclesiæ poterit separare: ad quam cum ex institutione Filii Dei, Ecclesiam in se petra solidissima fundantis, omnis anima teneatur, arctiori quidem vinculo astrictus est ordo pontificum, qui in consecratione de observatione legis divinæ et sacrorum canonum, et de obedientia mandatorum sedis apo-

stolica, et eorum a quibus munus consecrationis accipiunt, verbo et scripto specialiter proflentur. Sed et nos Ecclesie Romanæ pro comprovincialibus nostris non ambigimus obligatos, cum illa utriusque vestrum electionem procreaverit, et nostro ministerio consecrationem. Unde etiam vos personæ nostræ magis oportet esse obnoxios, nedum apostolicæ sedi, cui fidem et obedientiam solus infidelis, aut hæreticus, aut schismaticus subtrahit. De vestra itaque fide et obedientia plenissimam fiduciam obtinentes, fraternitati vestræ litteras apostolicas mittimus, ut vobis et per vos aliis fratribus vestris innotescat, quoniam dominus papa nobis vices suas commisit in regno Anglorum.

Loquimur scientibus et docentibus legem, et quos non credimus esse de numero eorum, qui tenentes legem Dominum nescierunt: et non in fraudem Scripturæ, quæ solvi non potest, sed propriæ salutis quærent, ut impugnando fidem fideles videantur, et habeantur jurisperiti, cum perdentes se et alios perdidierint jura, et putentur filii esse obedientiæ, cum qualicunque prætextu inobedientiam suam potuerint colorare; sed frustra. Quia non est sapientia, non est consilium contra Dominum, qui jam testimonio patenti operis cœpit revelare consilia cordium, et parvulos suos jugiter consolatur, nec permittit eos tentari supra id quod possunt. Clamat terra adversus impios, et cœli revelabunt iniquitatem eorum. Consolamini itaque, consolamini, dilectissimi, dicit Dominus, quia in proximo est, ipso auctore, liberatio vestra. Et nisi fides vestra deleverit, salus nobis in januis est, et jam præ foribus ecclesiarumstrarum pulsatur, ut admittatur. Interim vobis in virtute obedientiæ apostolica auctoritate præcipiendo mandamus, quatenus adhibita celeritate et diligentia procuretis, ut fratres nostri et coepiscopi conterminales vestri, Wintoniensis videlicet, et Bathoniensis, Saresberiensis, Cestrensis, Exoniensis, Menevensis, vestra sedulitate cognoscant nobis legationis officium, sicut ex litteris domini papæ patet, esse commissum. Sed ante eas fratri nostro episcopo Londoniensi cum litteris nostris a vobis eadem auctoritate ostendi præcipimus, ut ipse eam et comprovincialibus et Dunelmensi ostendat. Quia in periculum vestrum, imo et aliorum omnium vertitur, nisi hoc domini papæ et totius Ecclesie negotium fidelius et diligentius geratur.

EPISTOLA CXXV.

AD EUNDEM.

THOMAS Cantuariensis archiepiscopus, ROBERTO episcopo Herefordensi.

Pervenit ad aures nostras querimonia, quod canonici de Brumfeld circumventionem quadam et dolo facti sunt monachi in monasterio de Gloucestria: quodque possessiones et bona Ecclesie hæc occasione translata sunt ad prædictum monasterium. Canonici etiam quidam ipsius Ecclesie, qui iter arripuerat veniendi ad nos, ut super tam enormi facto

A nobis conquereretur, sicut accepimus, captus est et incarcerationatus. Super qua re fraternitati vestræ mandamus, quatenus rei veritatem simul cum Wigornensi episcopo diligentius inquiratis et investigetis, eamque nobis insinuare litteris vestris non differatis. Damus etiam vobis in mandatis, atque in vi obedientiæ præcipimus, quatenus a præsentium litterarum susceptione infra duos menses, omni excusatione et occasione remota, iter veniendi ad nos arripiatis. Habemus enim de magnis et arduis Ecclesie negotiis tractare vobiscum, ad quæ expedienda plurimum indigemus vestra præsentia. De cætero noverit fraternitas vestra, quod nos damnavimus atque cassavimus scriptum illud, in quo hæreticæ illæ pravitates continentur, et in irritum duximus quæ in eo scripta sunt. Et præsertim hæc: quod non liceat episcopo excommunicare, etc.

EPISTOLA CXXVI.

AD GODEFRIDUM LANDAVIENSEM EPISCOPUM.

THOMAS archiepiscopus Cantuariensis, GODEFRIDO Lanelvensi episcopo.

Apostolicis sine contradictione et mora parendum est institutis, et cum omni celeritate et diligentia mederi convenit languoribus et periculis animarum. Inde est quod mandatum apostolicum exsequentes fraternitati vestræ mandamus quatenus juxta præceptum domini papæ redeatis ad Ecclesiam cui vos præfecit Dominus, aut ipsam resignando curam ejus cedatis alteri qui auctore Deo præesse valeat et prodesset. Alioquin Ecclesiam illam non sustinebimus ulterius pastore proprio viduari; sed ordinationi illius juxta quod in mandatis accepimus intendemus. Valet.

EPISTOLA CXXVII

AD EUNDEM.

Vestra fraternitas ignorare non debet quod privilegium meretur amittere, qui concessa sibi abutitur potestate. Vos autem, sicut accepimus, in alienis episcopatibus Ecclesiarum vacantium alienas oves solvere præsumitis et ligare, et petitione laicorum aut aliorum quibus sacramentorum dispensatio non incumbit ecclesias dedicatis et exercetis alia quorum non accepistis ab apostolica sede vel matre vestra Cantuariensi Ecclesia potestatem. Quod tanto credibilis videtur quanto certius constat vos sine speciali mandato Romani pontificis dudum quod minime licebat, quantum in vobis fuit, absolvisse excommunicatos nostros non observato tenore litterarum domini papæ. An hoc recte feceritis, vestra discretio providebit, quoniam oportebit super his reddere rationem. Nam persistentes in scelere et voluntate peccandi qui Ecclesiarum bona diripiunt et iis incubant violenter, nec ipse Petrus coram Deo posset absolvere. Ne ergo cujuscunque instinctu de cætero similia præsumatis, prohibemus in virtute obedientiæ, in periculo dignitatis et ordinis, ne curam pastorem et episcopalem officium extra proprium episcopatum ulterius exerceatis; sed ea sitis potestate con-

tenti, quam vobis Ecclesia contulit in ordinatione vestra. Hoc autem vobis non interdiximus qui ad preces coepiscoporum vestrorum quibus communicare licuerit, vices eorum cum necessitas exegerit in rebus licitis impleatis; sed vos ab ecclesiarum vacantium et episcoporum qui excommunicati sunt officio præcipimus abstinere et curam pastorem exercere quatenus facultas adfuerit in proprio episcopatu.

EPISTOLA CXXVIII.

AD LINCOLNIENSEM CLERUM ET POPULUM.

Vobis..... (*Vide similem epistolam ad Cicerones directam.*)

EPISTOLA CXXVIII.

AD GILBERTUM HEREFORDIENSEM POSTEA LONDONIENSEM.

THOMAS Dei gratia Cantuariensis Ecclesiæ humilis minister, venerabili fratri G. eadem gratia Herefordiensi episcopo, salutem.

Quam sit nobilis et famosa præ cæteris regni hujus civitatibus civitas Londoniæ, nulli nostrum incognitum est; in qua videlicet ob publica regni negotia et domini regis conversatio et procerum regni soleant frequentiores esse conventus. Inde est, quod Ecclesia Londoniensis suo jamdudum orbata pastore, talem sibi desiderat episcopum subrogari, qui civitatis ipsius excellentiæ honestæ vitæ merito, litterarum scientia, rerum quoque prudentia secularium adæquetur. Magna itaque super hoc deliberatione habita, convenerunt in hoc unanimis cleri postulatio, voluntas domini regis et nostra, ordinatio quoque apostolica, ut ob communem regni utilitatem et Ecclesiæ necessitatem, ad Ecclesiæ Londoniensis regimen transferri et in ea curam et sollicitudinem pastorem gerere debeatis. Suscepto igitur in hoc domini papæ mandato, ipsius vobis auctoritate injungimus, quatenus postulationi Londoniensis Ecclesiæ, quæ de vestra ad eam translatione in præsentia domini regis et nostra unanimi totius cleri assensu celebrata est, assensum præbere non differatis, et ad ejus regimen tanto devotius et maturius accedatis, quanto ipsa tantæ personæ consilio et gubernatione dignoscitur indigere. Ad hoc fraternitatem vestram commonemus attentius, ut ad quod trahit vos obedientiæ necessitas, vestræ quoque dilectionis contemplatio affectuosius invitet, ut quem nobis sinceræ dilectionis conjungit affectus, loci quoque vicinia ad nostras et Ecclesiæ Dei necessitates commodius valeat exhibere. Valete.

EPISTOLA CXXIX.

AD GILBERTUM LONDONIENSEM.

T. Dei gratia Cantuariensis Ecclesiæ minister humilis, venerabili fratri GILBERTO quondam Dei gratia Herefordiensi, nunc vero eadem gratia Londoniensi episcopo, salutem.

Noli graviter ferre, dilecte in Domino frater, quod tibi majus onus imposuimus, quod te ad majoris ecclesiæ curam vocavimus, confidentes id divina miseratione salubriter fuisse provisum. Hoc mores tui,

A hoc nota religio, hoc sapientia data desuper, hoc opus bonum, quod in Herefordiensi Ecclesia operatus es promeruerunt, ut dicatur tibi: « Amice, ascende superius: super pauca fuisti fidelis, merito supra multa constitueris. » Non homini rudi et inexperto navigationis sicut ex humilitate scribis, navim Petri commisimus, verum illi qui jamdiu exercitatus in flumine, amodo debet eandem in alto gubernare. Lucerna accensa, quæ quasi sub modio abscondebatur, jam super candelabrum posita est, ut longè lateque luceat in domo Domini. Cantuariensi Ecclesiæ, quæ in regno Anglorum est sicut caput in corpore, Londoniensis familiarius adhæret præ cæteris, ad quam te Deo auctore transtulimus, ut e vicino matris tuæ Cantuariensis Ecclesiæ, cui debes omne quod potes, nobiscum possis onera sustinere. Præterea, cum dominus papa tibi specialiter curam animæ domini nostri regis commiserit, ubi te sedere magis decet quam in regia urbe, quo crebrius propter negotia publica veniens, frequenter tuis instruat colloquiis et consiliis solidetur. Venire ergo ne formides, quo virtus tua te vocat, quo Dominus præcipit, de ope nostra et auxilio, quanta debetur amico et coadjutori, consolationem percepturus. Credimus siquidem hanc esse mutationem dexterae Excelsi, eamque a divinæ dispositionis fonte emanare, non modo ut Ecclesia Cantuariensis in negotiis suis fortius tanto nitatur auxilio, verum etiam ut imperfectum nostrum, quod in multis videmus, tua beatitudine suppleatur. Utinam si fieri posset, priori die Dominico Londoniam venisses, ut tuum adventum digno susciperemus honore, ubi tunc præsentem aderamus. Nunc autem, quoniam negotia nostra illinc nos avulsere, archidiacono nostro vices nostras commisimus, adjuncto etiam illi domino Roffensi, [si] præsens adesse poterit. Valeat in Christo fraternitas tua, dilectissime frater.

EPISTOLA CXXIX.

AD EUNDem.

THOMAS Dei gratia Cantuariensis Ecclesiæ minister humilis venerabili fratri GILBERTO eadem gratia Londoniensi episcopo magis in Christo gloriari quam in sæculo, amplius sperare in Domino quam in mundi amplexibus.

Licet tibi jam diu et plura scribere debuerimus, quoniam materia multa est; eligimus ad præsens dicendi compendium, ut inter hæc initia brevibus tibi, quod sentimus, aperiamus. Nulla forsitan pro nobis, vel pauca, sed aliqua tibi de te, et pro te in instanti mandare curamus, reducendo tibi ad memoriam, qua conscientia sustinueris, qua animi patientia dissimulaveris injuriam Deo illatam in nobis, nobis propter Deum, tibi etiam in nobis, dum traheretur iterum ante tribunal principis, cum iterum pararetur Dominus Jesus crucifigi in nobis. An ut tua, te et tuos servares illæso ab onere confiscationis, ac incommoditate exilii? Certe non sic se Christus servare voluit, cum etiam animam suam

pro suis poneret, quorum ipse frater et caro est, nobis relinquens exemplum, ut et nos similiter faciamus. Non sic apostoli, qui non timuerunt fidem Christi et nomen protestari coram principibus et potestatibus sæculi, in vitæ suæ discrimen et carnis. Hæc tibi dicimus de radice charitatis, non de rancore aliquo, ut vel sic revocetis ad animum, et de conscientie macula, vitioque patientiæ, si tamen in ea vitium esse potest, quam certius, ut pace tua dixerimus, credimus debere dici de more loquendi remissionem vel negligentiam, penes te confundaris commodius, de sustinentia non parum exemplo damnosam, et apud Deum ac homines effectuosius repares famæ tuæ integritatem, affectuosius pœnitendo de hujus patientiæ vitiose commisso. Hujus rei gratia hortari te cupimus, ne gloriam mundi quasi stantem aspicias, ne plas tibi, aut pro te, aut pro tuis tua diligas, quæ revera non tua, sed Christi pauperum esse debent, et sunt, ut ad verum veniatur; et sic te et tua, ea tua quæ sic dicimus, perdas, ne blandiens præsens prosperitas sui finem tibi abscondat, et adversitas sine fine succedat. Alternæ enim sunt rerum vicissitudines, facilisque de successibus prosperis lapsus est in contrarium. Ne lætitia temporalis luctum tibi æternum, et operiat quem parit, et pariat quem operit. Ne mors longe a te esse putetur, et præoccupet improvidum, et vita, dum expectatur, deserat male conscium. Sicut scriptum est: *Cum dixerint, pax et securitas, tunc subitus venit interitus, tanquam in utero habentis, et non effugient.* Hæc nos tibi scripsisse credas ad majorem cautelam, ut habita tecum ratione præteritorum, præsentium, et futurorum, sic corrigas errata, ut de correptis gaudeas, et de gaudio tuo fraterna tibi charitate congaudentes, fructum gaudii et nos consequamur sentiendo, et sentiamus consequendo. Valete.

EPISTOLA CXXX.

AD EUNDEM.

THOMAS Dei gratia Cantuariensis Ecclesiæ humilis minister GILBERTO eadem gratia episcopo Londoniensi, quod semel hoc iterum, sic transire per bona temporalia, ut non amittat æterna.

Mirandum et vehementer stupendum, virum prudentem, sacris litteris eruditum, præsertim religionem habitu præferentem, adeo manifeste, ne dicam irreverenter, et timore Dei postposito, aversari veritatem, justitiæ resistere, et ad omne fas nefasque confundendum, statum sanctæ Ecclesiæ, quam ipse fundavit Altissimus, velle evertere. Veritus est quæ dicit: *Portæ inferi non prævalent adversus eam.* Non sani igitur capitis esse dignoscitur qui intentat ei ruinam: homini similis montem magnum fune circumligatum tentanti dejicere. Sed nunquid ira vel odio defervui, ut exacerbatus jaculari compellar hujusmodi verba in fratrem meum, et collegam, et coepiscopum meum? Absit. Sed de litteris tuis, quas mihi per archidiaconum tuum destinandas accepi, talia collegi. Neque enim de spinis uvas, aut ficus de tribulis colligere potui.

Ut clareat, an ita sit, proponamus eas, et continentiam earum in lucem proferamus. Finis collatus principio similitudinem scorpionis conformat: illud blandiens ad nos ingreditur, ille pungens nos acerbè, silentium nobis imponere machinatur.

Quid enim aliud est primo recognoscere debitam nobis subjectionem, et subjectioni coherentem obedientiam promittere, deinde ne obedire debeas, ad appellationem convolare? Nunquid apud me sunt, *Est et non*, dicit Apostolus. Sed neque apud apostoli deberent esse discipulum. Necessario acceperunt discipuli a Domino potestatem calcandi super serpentes et scorpiones. Habitat enim Ezechiel et hodie cum scorpionibus. Et illud vide quo sensu dixeris: *Ad appellationis remedium confugimus.*

Christi sequelam te dicis: in hoc dicto secus inveniris. Omnium enim malorum nostrorum efficax, imo efficacissimum remedium commendavit nobis Christus obedientiam, non solum verbo, sed evidentissimo exemplo factus obediens Patri suo usque ad mortem. Et tu qua fronte appellas remedium obedientiæ impedimentum? Quod non remedium, sed detrimentum rectius habet nominari. Sed et qua fiducia hoc præsumis? Sperasne te habiturum defensorem ad non obediendum illum, qui vindicandi in omnem inobedientiam et officium accepit et præceptum? Male est hoc sperare de eo, et in ipsum graviter offendere. Poterant te retardare ab hujusmodi præsumptione, quas jam passus es, prima et secunda repulsio. Viva quippe vox tua primum, et deinde litteræ tuæ ad persuadendum compositæ expertæ sunt quam firmiter stiel, quam sit vicarius Petri, quem non precibus, non donis, nec comminationibus, vel promissis movere potuisti. Sed tertio attendendus est, ut Domini sui exemplo tertia attentatione triumphum reportet.

Porro ut nihil deesset gravaminis, defixisti terminum tuæ appellationi anni fere spatium. Nec misertus es nostri exsillii, vel laboris sanctæ Ecclesiæ, sponsæ Christi, quam ipse sibi suo sanguine acquisivit. Et ut hæc omittam, non omittenda tamen, providere debueras, cui te favere dicis, domino nostro regi, qui, quandiu sic ager in nos, vel in Ecclesiam Christi, nec ad bella procedere, vel in pace degere sine animæ suæ periculo poterit. Ad reliqua transeamus. Quædam commemoras turbata esse in discessu et ex discessu nostro. Timeanturbationis hujus auctores et consiliarii, ne et ipsi turbentur. Magnis me laudibus extollis quasi de bono principio meæ peregrinationis. Et quidem sapientis est famam non negligere, et discreti est nulli magis de se quam sibi credere. De injuriis insimulor, quasi illatis domino nostro regi. Sed quia nullam designas ex nomine, nec ego scio cui respondere debeam. Quia igitur superficie tenuis accusor, superficie tenuis in hac parte me excuso. Hoc tamen interim accipe responsum: Quia nullius mihi conscius sum, nec propterea justificatus sum. De comminatorio minaris, quod nos in eum com-

misimus. Quis pater videt filium aberrare, et tacet? Quis virga non percutit, ne gladium incurrat? Desperat pater de filio, quem comminatione non corripit vel flagello. Absit autem ut tecum sentiamus dominum nostrum regem, impatientem correptionis, ad exterminationem apostasie lapsurum. Non enim Patris cœlestis plantatio eradicabitur.

Navem concutit sævissima tempestas. Clavum teneo, et ad somnum me vocas. Congeris et stavis ante oculos nostros beneficia nobis a domino nostro rege collata, et de exili me commemoras ad summa provectum. Ut autem his aliquantisper respondeam, in insipientia mea tamen, de quam exili putas! Si tempus, quo me in ministerio suo præstituit, respicias, archidiaconatus Cantuariæ, præpositura Beverlaci, plurimæ ecclesiæ, præbendæ nonnullæ, alia etiam non pauca, quæ nominis mei erant possessio tunc temporis, adeo tenuem, ut dicis, quantum ad ea quæ mundi sunt, contradicunt me fuisse. Quod si ad generis mei radicem et progenitores meos intenderis, cives quidem fuerunt Londonienses, in medio concivium suorum habitantes sine querela, nec omnino infirmi. Sed ut aliquando, mundi tenebris semotis, judicemur a lumine veritatis, quid gloriosius, nasci de mediocribus vel etiam infirmis, an de mundi magnatibus et honoratis, cum dicat Apostolus: *Inhonestiora membra corporis nostri abundantiori circumdamus honore?*

Stemmata quid faciunt?

ait gentilis poeta. Quid habet dicere Christianus, episcopus, litteratus et religiosus? Sed fortassis de exiguitatis meæ memoria notam confusionis mihi objicere voluisti. Confundere vero patrem, quantum cedat in reatum, ipse videris ex præcepto, quod de honorando patre accepisti.

Pro gratia vero regis nobis commendanda, commemoratione beneficiorum ejus non multum fuit laborandum. Testem enim Deum invoco, nihil sub sole me gratia ipsius et salutis præponere: tantum salva sint quæ Dei sunt et sanctæ Ecclesiæ. Non enim aliter poterit feliciter regnare vel secure. Esto, quia ita est, multo sunt plura, et etiam ampliora, quam tua explicet oratio, beneficia ejus erga me. Debuine pro his omnibus, vel etiam si centumplicarentur, Ecclesiæ Dei libertatem exponere? Quanto minus pro famæ meæ, quæ sæpius a vero deviarat, conservatione. Si minus in aliis egi, in hoc nec tibi nec alii parco, nec angelo, si descendit de cœlo, sed statim, ut audiero talia commoventem, audiet ex me: *Vade retro, Satana, non sapi quæ Dei sunt.* Absit a me ista dementia. Avertat a me Deus dementia istam, ut aliquatenus persuadear aliquibus tergiversationibus inire commercium de Christi corpore, unde ego Judæ venditori, et Dominus meus Judæis assimiletur emptoribus Christi.

De promotione vero mea, quam scribis factam matre domini regis dissuadente, regno reclamante, Ecclesia, quoad licuit, suspirante, hoc tibi respon-

A deo: quod regni reclamationem non audivimus, sed potius acclamationem. Dissuasio vero genitricis domini nostri, si qua fuit, usque ad publicum non prodit. Potuit autem fieri aliquas ecclesiasticas personas ad eandem promotionem, ut solet, aspirantes suspirasse, cum se sentirent ab ea, quam conceperant, spe decidere: qui et hodie fortassis, in ultionem sui casus, præsentis dissensionis auctores sunt et consiliarii. Sed *væ illi, per quem scandalum venit.* Prætaxatis vero obstaculis, et aliis, si qua fuerunt, divina prævaluit dispensatio, ut est hodie cernere. Exigor itaque ab ea, quæ ipse est, justitia nulli omnino eum postponere, qui me statuit in gradu isto sua miseratione.

Illud etiam quod ad justificandum dominum regem B videris proposuisse, judicavi non prætereundum leviter, vel absque discussione. Et utinam a justitia non dissentiret, et nostra adversus eum minus justa appareret querela! Dicis ipsum ad satisfaciendum semper fuisse paratum. Hoc te confidenter dicere, hoc te asseris prædicare. Sustine igitur paulisper, et ad interrogata responde. Illud quod dicis: paratum ad satisfaciendum, quo sensu intelligis? Illos, quorum se Deus dicit patrem et judicem, orphanos, pupillos, viduas, innocentes, et omnino quæ nos movet controversiæ ignaros, vides proscribi, et tacer, clericos exterminari, et non reclamationes; alios bonis suis spoliari et contumeliis affici, et non contradicis; servientes meos in vincula conjici et teneri, et obmutescis; matris tuæ Cantuariensis Ecclesiæ bona diripi, et non reastis; me patrem tuum gladiis cervici meæ jam jam imminentes vix evasisse, et non doles. Sed quod deterius est, cum persecutoribus meis, et in me Dei et Ecclesiæ ipsius, et hoc non in occulto, stare non erubescis. Estne hoc satisfacere, perpetrata mala non corrigere, et malis deteriora de die in diem adicere? Sed fortassis illud in contrarium intelligis, ut satisfacere sit voluntati impiorum deservire, secundum illud: *Inebriabo sagittas meas sanguine.*

Sed dicis mihi: *Pater mi, de quibus me calumniaris, absolve me paucis. Tunica mea timeo.* Verum est, filii mi, et nimis verum quod respondes. Et ideo gladium non habes. Quod enim scribis ipsum paratum stare judicio regni sui, quasi condigna satisfactio sit hæc; quis est in terra, vel etiam in cœlo, qui de divina dispositione præsumat judicare? Humana judicantur, divina penitus inconcussa relinquuntur. Quanto melius, frater mi, illi salubrius, tibi securius intimares ei, et persuadere modis omnibus elaborares voluntatem Dei de conservanda pace Ecclesiæ suæ, de non appetendis his, quæ concessa non sunt ejus administrationi, de honorandis sacerdotibus Dei: nec qui sint attendat, sed ejus servi sint.

In Saresberiensem episcopum, et Joannem de Oxeneford, non decanum, ut dicis, sed decanatus invasorem, me præjudicio abusum calumniaris. Sed meminisse debuisti quædam manifesta præcedere ad judicium. Et motum te dicis. Quidni?

Luccalegon trepidat, paries cum proximus ardet.

Et utinam bene noveraris ab eo, in quo non bene A fecisti! Sciat ergo et intelligat, te intimante, dominus meus, quia qui dominatur in regno hominum, sed et angelorum, duas sub se potestates ordinavit: principes et sacerdotes. Unam terrenam, alteram spiritualem; unam ministrantem, alteram præmi-nentem; unam cui potentiam concessit, alteram cui reverentiam exhiberi voluit. Qui vero his vel illis de suo jure subtrahit, Dei ordinationi resistit. Non indignetur itaque dominus noster deferre illis, quibus summus omnium deferre non dignatur, deos appellans eos sæpius in sacris litteris. Sic enim dicit: *Ego dixi: Dii estis*, etc. Et: *Constitui te Deum Pharaonis*. Et: *Dii non detrahes*, id est sacerdotibus. Et de eo qui juraturus erat, loquens per Moysen, ait: *Applica illum ad deos*, id est ad sacerdotes. Nec præsumat dominus noster judices suos velle judicare. Terrenis enim potestatibus non sunt commissæ claves regni cælorum, sed sacerdotio. Inde scriptum est: *Labia sacerdotis custodient scientiam, et legem requirunt ex ore ejus, quia angelus Domini exercituum est*. Paulus etiam dicit: *Nonne angelos judicabimus? Quanto magis homines?*

Illud etiam, te suggerente, commemoretur domino nostro, dignum memoria et imitatione, quod in ecclesiastica Historia legitur de Constantino imperatore, cui, cum oblata fuissent scripto actiones contra episcopos, accusationis quidem libellos accepit, et accusatores convocans, in eorum conspectu eosdem incendit, dicens: *Vos dii estis a vero Deo constituti, sit et inter vos causas vestras disponite. Quia dignum non est, ut nos homines judicemus deos*. O magnum imperatorem! O discrete regnantem in terra! Quæ aliena sunt non usurpantem, et regnum æternum in celo promerentem. Studeat itaque dominus rex tantum, tam discretum, tam felicem imitari principem, cujus et memoria laudabilis frequentatur in terris, et vita perpetua ac gloriosa habetur in cælis. Alioquin timeat, quod in Deuteronomio Dominus minatus est dicens: *Homo quicumque fecerit in superbia ut non exaudiat sacerdotem aut judicem, morietur*. Ad hoc enim vocatus est, et in hoc ipsum temporalis regni pax et magnificentia, de qua nos communes, ministratur ei de celo. Alioquin non salvatur rex per multam virtutem suam, nec si subdantur ei regna, et inclinentur nationes.

Sed hæc hactenus. Quosunque autem prætaxatarum habuisti conscriptores litterarum, quod tibi responsum est, noverint sibi esse responsum. De cætero, fratres, vos commonefacio, rogo et obsecro, ut vos non separent schismata, nec obnubilent similitudines, sed sit vobis in Domino cor unum et anima una. Et audiamus illum qui dicit: *Pro justitia agnoscere pro anima tua, et usque ad mortem certa pro justitia. Et Deus expugnabit pro te inimicos tuos*. Non obliviscamur illum districtum judicem, ante cujus tribunal constitutos sola nos veritas judicabit, amoto timore et fiducia omnis terrenæ potestatis. Valeat in Domino sanctitas vestra.

EPISTOLA CXXXI.

AD EUNDEM GILBERTUM ET ALIOS EPISCOPOS ANGLIÆ.

THOMAS Cantuariensis archiepiscopus, GILBERTO Londoniensi, et omnibus episcopis Angliæ.

Mittimus vobis litteras domini papæ, quibus præcipit sub anathematis interminatione, ut clericis nostris universa cum integritate reddantur, quæ eis ablata sunt, cuicumque commissæ sint ex mandato regis. Inde est quod nos sub eadem interminatione vobis apostolica auctoritate præcipiendo mandamus, quatenus infra duos menses post harum susceptionem quidquid exinde recepistis, nobis restitui faciat, ne vobis juxta quod dominus papa comminatur, eveniat. Præcipimus etiam, ut parochianos vestros, qui eorum redditus aut bona abstulerunt vel receperunt, ad restitutionem eorum similiter compellatis.

EPISTOLA CXXXII.

AD EUNDEM.

THOMAS Cantuariensis archiepiscopus, GILBERTO Londoniensi episcopo.

Meminimus nos juxta constitutionem sanctorum Patrum vobis denuntiavisse, quos propter injurias sanctæ Romanæ Ecclesiæ, et Cantuariensi, et aliis ecclesiis in regno Angliæ illatas excommunicavimus, et in virtute obedientiæ præcepisse, ut eos tanquam excommunicatos per episcopatum vestrum saceretis evitari, et hoc ipsum denuntiaretis fratribus et coepiscopis vestris. Quod si injunctum obedientiæ munus ad honorem Dei et Ecclesiæ Romanæ, et utilitatem Ecclesiarum, et salutem vestram, ut fieri oportuit, fideliter implevistis, charitati vestræ congratulamur in Domino. Sin autem, dolemus quidem, non tam pro læsione nostra, quam pro domini papæ, et sedis apostolicæ injuria, et vestra: quod ad honorem suum et nobis salubriter Deus avertat incommodum. Licet enim plerisque remissa videatur manus et lenta indignatio summi pontificis, certe tamen efficax est et gravis, et exigentibus meritis insanabile vulnus interdum infligere consuevit. Non est enim sub sole, qui de manu ejus possit eruere. Solus infidelis, aut qui eum errore superat hæreticus, aut schismaticus apostolicis obtreclat obedire mandatis. Scienti legem loquimur, et qui publice docet obedientiam omnibus victimis præferendam, ut non oporteat sapientem moveri, et præsertim in religione nutritum, et religionis exercitationibus tritum, quæ affectiones virtutum, aut virtutes actionum obedientiam comitentur. Moliri potest quis fraudem contra animam suam, sed verbum Dei veritate, quam substantialiter habet, defraudari non potest, dicens: *Væ illis, qui justificant impium, et dicunt bonum malum, et ponunt tenebras lucem*. Et nunc quidem dicit illis *Væ*; sed in brevi *Væ* acerbissimum inferet: potentes quidem potenter puniens, et judicium durissimum exercens in eos, qui

innitiliter præsunt, et impio impietatem annuntiare A nam, qui vestra doctrina erudiendus et exemplis detrectant. Tunc autem qui fideliter obediunt, informandus erat ad vitam.

triumphantes feliciter coronabit, et interim adversus injustitiam decertantes multipliciter consolatur.

Rogamus igitur et obsecramus in Domine Jesu, ut, quoniam mala adversus Ecclesiam multiplicantur in terra, et culpis nostris exigentibus nimis invaluerunt, exurgatis in adiutorium Ecclesiæ Dei, et gladium verbi, qui vobis creditus est, exeratis in virtute Spiritus sancti ad viadictam malorum et bonorum solatium, ne eum sine causa portetis et vos. Quos autem segniores vel tepidiores videritis ad iustitiam faciendam, erigatis et animetis, vobisque dictum intelligatis a Christo in articulo passionis suæ, quoniam ab impiis iterum cruciatur : *Et tu aliquando conversus confirma fratres tuos.* Vos B autem nos ad liberationem Ecclesiæ habebitis adiutores et prævios, et in his, quæ ad honorem Dei pertinere noverimus, in nullo deerimus vobis, quatenus nobis vires divina clementia ministrabit. Sed et dominus papa debitam opem libenter impendit, et nobis jam, ut iniquitati possimus efficacius obviare, vices suas commisit in regno Angliæ, sicut ex litteris ejus, quas vobis transmittimus, potestis advertere. Mandamus itaque fraternitati vestræ, et in virtute obedientiæ, et in periculo ordinis vestri, apostolica auctoritate precipimus, quatenus eas fratribus et comprovincialibus vestris episcopis, et Dunelmensi episcopo ostendatis adhibita caleritate et diligentia, et easdem postmodum nobis restitui faciatis. Prædicta eadem auctoritate, et sub eadem interminatione jubemus, ut horum portitoribus, qui domini papæ negotium gerere dignoscuntur, debitum exhibeatis honorem, et eorum sic provideatis indemnitati, sicut honori vestro vultis esse prospectum.

EPISTOLA CXXXIII.

AD EUNDEM.

THOMAS Dei gratia Cantuariensis archiepiscopus, et apostolicæ sedis legatus, utinam vero fratri, GILBERTO Londoniensi episcopo, declinare a malo, et facere bonum.

Excessus vestros, dum licuit, supportavimus : et utinam mansuetudo patientiæ nostræ, quæ nobis ultra modum damnosa exstitit, in totius Ecclesiæ perniciem non redundet ! Sed, quia patientia nostra semper abusi estis, et neque dominum papam, neque nos in verbo salutis vestræ voluistis audire, sed obduratio vestra in deteriora semper excrevit, nos urgente necessitate officii et ratione juris persuadente, ex iustis et manifestis causis, anathematis sententia percellentes vos excommunicavimus, et a corpore Christi, quod est Ecclesia, donec condigne satisfaciatis, amputavimus. Præcipimus ergo in virtute obedientiæ, et in periculo salutis, dignitatis et ordinis, quatenus prout Ecclesiæ forma præscribit, ab omni communione fidelium abstineatis, ne vestra participatio gregem Dominicum contamine ad rui-

PATROL. CXI.

EPISTOLA CXXXIV.

AD EUNDEM.

THOMAS Dei gratia Cantuariensis archiepiscopus, et apostolicæ sedis legatus, GILBERTO Londoniensi episcopo, utinam vero fratri, declinare a malo, et facere bonum.

Vestra debuerat meminisse prudentia, quanta vos affectione mater vestra Cantuariensis Ecclesia semper dilexerit, quanta diligentia sedis apostolicæ gratiam vobis conciliare studuerit, honori vestro et utilitati, tanquam salutis propriæ, semper invigilans ; vos autem accepta facultate nocendi, adversus utramque calcaneum erexistis, et eis tanquam clavus in oculo, et sagitta in latere tanto perniciosius nocuistis, quanto minus cavebatur impietas religionis tecta velamine, et perfidia professionem fidei fallacius et fraudulentius impugnabat. Vos sæpe commonuimus, et utinam ad salubrioris verba consilii et exhortationis non intumisset, aut obduruisset cor vestrum. Scripsit vobis summus pontifex, ut paci reformande inter Ecclesiam et regem diligentiam impenderetis ; sed, sicut publice notum est, per vos adversus Ecclesiam vehementior est excitata turbatio. Et quidem multa et magna ad condemnationis vestræ iudicium præcesserunt, nisi sedes apostolica fraternitatem vestram in multa mansuetudine supportasset. Nos autem, licet gravissime læsi, molimina vestra contra Ecclesiam et nos, quandiu licuit, dissimulavimus, ut cunctis rectum sapientibus et habentibus zelum legis, excessisse modum videatur patientia nostra. Sed quia novissima vestra semper inventa sunt deteriora prioribus, et ulterius dissimulare non licuit, vos ex iustis et manifestis causis anathematis sententia percellentes, a corpore Christi, quod est Ecclesia, donec condigne satisfaciatis, tanquam membrum putredinis resecaimus. Præcipimus ergo in virtute obedientiæ, in periculo salutis, dignitatis et ordinis, quatenus prout Ecclesiæ forma præscribit, ab omni vos communione fidelium abstineatis, ne vestra participatio Dominicum gregem contamine ad ruinam, qui vestra doctrina erudiendus et exemplis informandus erat ad vitam.

EPISTOLA CXXXV.

AD EUNDEM.

THOMAS Dei gratia Cantuariensis archiepiscopus, et apostolicæ sedis legatus, GILBERTO Londoniensi episcopo, utinam vero fratri, respiscere a malo, et Deo potius quam hominibus obedire.

Licet studia vestra, quibus ex proposito perniciem Ecclesiæ et nostram pro viribus hactenus procurastis, fidelium communionem demeruerint, et salutationis alloquium, nos tamen, quæ ad salutem vestram quam Deo teste cupimus, indubitanter credimus pertinere, vobis pro debito officii nostri sollicita charitate proponimus, reducentes ad animum

quod qui terram Austri inhabitant, cum panibus A
etiam fugienti monentur occurrere. Et quod Christi-
stus, qui pastor et forma pastorum est, non justos
venit, sed peccatores per pœnitentiam reformare,
quam sicut ille nunquam reprobatur veram, sic semper
aspernatur et damnatur fictam, utramque examinans
ex contritione cordis, et convincens ab operibus
suis. Nam arbor ex fructu cognoscitur, et opera
cujusque testimonium perhibent de eo. Sicut ergo
inobedientiam vestram et contumaciam, ut cetera
parcentes interim taceamus, ulterius præterire non
potuimus nec debuimus impunitam, sic conversio-
nem vestram et condignos obedientiæ fructus cha-
ritate promptissima acceptabimus, omnium quæ
contra nos commisistis, amplius non recordaturi,
si de pœnitentiæ sinceritate et condigna satisfactione
constiterit. Ad quam vos affectione paterna revo-
cantes, monemus et exhortamur in Domino, ut po-
natis cor super vias vestras, et opera digna episcopo
de cætero faciatis, ne nos in executione vindictæ
pro contumacia compellamur ad ulteriora procedere.
Ad hæc vobis in virtute obedientiæ, in periculo gra-
dus et ordinis præcipiendo mandamus, quatenus
nobis sine dilatione remittatis litteras domini papæ
super legatione nostra, quas vobis misimus, per vos
fratribus et coepiscopis nostris communicandas. Et
si eas, ut oportuit, communicastis, bene fecistis.
Sin autem, procul dubio noveritis, quoniam et illa-
rum suppressio districtius requiratur a nobis. Cor
pœnitens vobis divina misericordia largiatur. Si
resipueritis, et ad satisfactionem festinaveritis, par-
eat vobis Deus, et celerius convertat.

EPISTOLA CXXXVI.

AD EUND.

THOMAS Dei gratia Cantuariensis archiepiscopus, et
apostolicæ sedis legatus, venerabili viro GILBERTO Lon-
doniensi episcopo, coram facie sua fideliter ambulare.

Calamitates matris vestræ S. Cantuariensis Eccle-
siæ tanto plenius agnovistis, quanto eas ab initio
vicinius et planius inspeixistis, corpore præsens, ani-
mam non animo. Expectavimus toto jam fere sex
annorum curriculo pœnitentiam domini regis, sed
ille, quod sine dolore non loquimur, adeo misericor-
dia Dei et sacræ Romanæ Ecclesiæ patientia semper
abusus est, ut novissima ejus fierent in dies dete-
riora prioribus. Ne ergo ex nimia dissimulatione tam
illius, quam pereuntis Ecclesiæ sanguis in districto
examine requiratur a nobis, vobis præeunte aucto-
ritate domini papæ, in virtute obedientiæ, in periculo
ordinis, honoris et beneficii præcipiendo mandamus,
quatenus infra quindecim dies a susceptione præsen-
tium per totum episcopatum vestrum, omnia divina,
præter baptismum parvulorum et pœnitentias morien-
tium, prohibeatis officia celebrari, et ab omnibus
subditis vestris interdicti sententiam, quantum in
vobis est, faciatis inviolabiliter observari. Et ut lit-
teras domini papæ, quas vobis mittimus, fratribus
et coepiscopis vestris, et vacantium ecclesiarum ca-

pitulis communicetis, et ab eis inspectas nobis re-
mittere non differatis: portitori etiam harum pro-
spicientes, sicut vobis et ordini vestro cupitis esse
prospectum. Quæ nisi fideliter adimpleveritis, vobis
perpetuæ damnationis sententiam noveritis irrefra-
gabiler imminere.

Eodem modo Saresberiensis.

EPISTOLA CXXXVII.

AD CLERUM LONDONIENSEM.

THOMAS Dei gratia Cantuariensis archiepiscopus,
et apostolicæ sedis legatus, decano, archidiacono,
et clero Londoniensi, salutem, et a communione
excommunicatorum fideliter abstinere.

Vestram latere non debet prudentiam, quod fere
B totus Latinus orbis agnovit, quam inique, sumpta
opportunitate ex causa schismatis generalis, Gilbertus
Londoniensis episcopus, frater noster, utinam
verus, in causa Ecclesiæ versatus sit, et pacem ejus
studuerit perturbare. Supportavimus enim eum in
multa patientia hactenus, qua ille semper abutens,
jugis inobedientiæ crimen multiplicans excessibus
incurribiliter cumulavit. Nos igitur, cui dissimu-
lare non licuit, eum urgente necessitate officii, et
ratione juris persuadente, publice excommunicavi-
mus, et vobis præcipimus in virtute obedientiæ, et
in periculo ordinis et salutis, ut communione ejus,
sicut Christi fideles decet, prorsus abstineatis. Simi-
liter eos sub eadem interminatione præcipimus evi-
C tati, quorum nomina inferius scripta sunt. Simili
quoque sententia, Deo auctore, eos qui a nobis so-
lemniter citati sunt, nisi interim satisfecerint, con-
demnabimus in die Ascensionis Domini, scilicet
Gaufridum Cantuariensem archidiaconum, et Ro-
bertum vicarium ejus, Ricardum de Ivelcestre, Ri-
cardum de Luci, Willelmum Giffard, Adam de Chere,
et eos qui ope vel consilio domini regis, vel man-
dato, vel propria temeritate, nostra vel clericorum
nostrorum bona occupaverunt, et eos qui ope vel
consilio domini regis animum adversus libertatem
Ecclesiæ, et innocentium proscriptionem, et depopu-
lationem instigasse noscuntur, et qui nuntios do-
mini papæ et nostros, ne prosequantur Ecclesiæ
necessitates, impediunt. Non turbetur cor vestrum,
neque formidet in his, quia et contra tergiversatio-
nes malignantium et appellationum subterfugia, Deo
propitio, sedis apostolicæ munimine tuti sumus.
Hæc sunt nomina excommunicatorum: Jocelinus
Saresberiensis episcopus, comes Hugo, Radulphus
de Broc, Thomas filius Bernardi, Robertus clericus
de Broc, Hugo de S. Claro, Letardus clericus de
Norflee, Nigellus de Sacca-Villa, Ricardus frater
Willelmi de Hastinga, qui ecclesiam nostram de
Manech etiam occupavit. Valet.

EPISTOLA CXXXVIII.

AD STEPHANUM MELDENSEM EPISCOPUM.

THOMAS Cantuariensis archiepiscopus, Meldensi
episcopo.

Merito dixerim cum propheta: *Vae mihi, quia*

iacui! Quia vulneris mei et doloris non revelavi molestiam illi, qui præ cæteris mihi et coexsulibus meis, Christi proscriptis, in regno Francorum consuevit adhibere medicinam, et necessariae consolationis fomenta. Sed tanti silentii culpam probabilis error excusat, quia vester ab amicis reditus exspectabatur, et sperabatur in dies. Nutu vero divino crediderim accidisse, ut vos tam diu morari tum causæ necessitas, tum sanctæ Ecclesiæ Romanæ voluntas compulerit, ut ex longa conversatione et familiaritate contracta virtus vestra clarius elucescat, et de cætero possit egenis, quorum primus ego, efficacius opitulari apud apostolicam maiestatem. Et jam quidem misera Ecclesia Anglicana experta est in multis necessitatibus pietatis vestræ subsidium, et unde vobis gratias agit, quotquot redeunt, vos eam sollicitudinem gerere perhibent in negotiis nostris, quam exerceretis in propriis, aut forte ampliorem. Quocirca fiducialius ad vos, quanta possunt devotione, parvuli Christi confugium, et sancta Cantuariensis Ecclesia provolvitur pedibus vestris, ut intercessionum vestrarum suffragio ipsam et omnes coterminas ejus eripatis a laqueo mortis, quam sub honestæ pacis velamine persecutor noster intentat. Eo enim perductus est ad instantiam domini Gratiani, ut quod anno præterito respuerat, pro amore et prece domini papæ nunc admittat, honorem Dei scilicet salvum fore. Sed incontinenti adiecit: *Salvis dignitatibus suis*. Quorum nomine damnatas pridem, et perpetuo damnandas disponit consuetudines obtinere. Ea enim mens est mihi principis, ut tunc demum vigeat honor Dei, si dignitatibus, quas vindicat non refragetur. Alioquin illæ præjudicent. Gratianus autem intulit, quod ille salva libertate Ecclesiæ regni libertatibus potiatur, sed ad nomen libertatis Ecclesiæ, quod ante sibi in exactis conditionibus fuerat inaudium, pius rex Franciæ vehementer excanduit, et nomen hoc vix potuit sustinere. Jactitant sui restitutionem ablaturum nullam Ecclesiæ faciendam, eo quod antecessores sui, ut mentiuntur, nihil unquam restituerunt archiepiscopis et episcopis, quos ex pari causa saepenumero fugaverunt. Et certe eo constantius petenda est, et petetur a nobis, quia malorum exempla citius invalescunt, et auctore Deo, quoad licuerit, declinabimus ad posteros tantæ enormitatis et sceleris transferre et perpetuare perniciem.

Conatur idem rex formam fidelitatis, quam clerici principibus facere consueverunt, evertere, non admittens in ultima clausula se obligantis ordinem salvum fore, sed *honorem Dei*. Quia persuasus est, ut aiunt, a grammaticis suis, quos in læsionem Ecclesiæ ascivit, quod honor Dei non minuetur, si clerici passim appellare et appellationes prosequi non permittantur; si ad singulas vocationes domini papæ vel legatorum episcopi vel alii vocati non accedant; ad quod tamen ex ordinis sui necessitate tenentur. Supplicamus itaque sanctitati vestræ, quatenus domino papæ persuadeatis, ut in dispendium

A ecclesiasticæ libertatis nullam admittat pacem, neque nos compellat a damnorum repetitione desistere, neque tritam fidelitatis exemplo nostro faciat mutari formam. Nam quod semel obtinuerit, præsertim auctoritate Ecclesiæ Romanæ, sibi et liberis suis volet esse perpetuum. Ad hæc latores præsentium magistrum Godefridum, et magistrum Walterum, nuntios venerabilis fratris nostri Trundenensis archiepiscopi, ea, si placet, benignitate foveat et recipiat, quas nos et nostros vestra charitas recipere consuevit. Valeat semper sanctitas vestra, et has mentis angustias et domino Ostiensi et domino Hyacintho communicare dignetur.

EPISTOLA CXXXIX.

AD EUMDEM.

THOMAS Cantuariensis archiepiscopus STEPHANO Meldensi episcopo, salutem, et modicum id quod devotio potest exulis et proscripti.

Dilectioni vestræ super consolatione, quam nobis et nostris semper exhibuistis, non sufficimus reddere gratiarum debitas actiones. Reddet autem, qui potest, pro cuius honore persecutionem patimur, Christus. Et nos, si quid unquam potuerimus, ad vestrum et vestrorum, ut iustissimum est, promptum obsequium. Poterimus autem, propitiantie Deo, qui Ecclesiæ suæ iustitiam semper illustrat, et nunc, sicut a venerabili Patre domino Senonensi, et magistro Petro Carnotensi archidiacono potestis audire, malitiam et duritiam regis Angliæ manifestissime denudavit: filio gratiæ Gratiano secundum fidem suam, et in ea sinceritate, quæ causam tractavit Ecclesiæ, respondeat Deus. Quia apud eum acceptio personarum vel munerum nihil potuit, sed fideliter et prudenter ad honorem Dei et Ecclesiæ Romanæ usquequaque versatus est. Agite ei, si placet, gratias, et merita partium ab ipse diligenter audite. Nuntios nostros ad clementiam serenitatis vestræ dirigimus, quos si placet in causa Christi audite ut nos ipsos, et date operam ut dominus papa miseriam nostram ad gloriam Dei et honorem suum celerius consoletur. Oramus instantem, quatenus potest devotio miseri peccatoris, ut Deus prosperum faciat iter vestrum, et felices vobis ad optanda largiatur successus.

EPISTOLA CXL.

AD NIVERNENSEM EPISCOPUM.

THOMAS Cantuariensis archiepiscopus Nivernensi episcopo, sub alterius nomine propter insidias.

Dirigat Dominus gressus vestros, ut in causa Ecclesiæ, cuius executio vobis pro parte commissa est, non declinetis ad dexteram vel sinistram, sed via regia incedatis, ut nec sollicitationibus, nec minis, nec exquisitis dolis prævaleat adversus prudentiam et sinceritatem vestram, cuius tendiculas nullus unquam evasit, qui cum ipso contraxerit. Et nisi fallor, vobis pugnandum erit ad bestias, cum ipse episcopus abbates et viros discretos, perducturus sit, ut per

eos expugnet constantiam vestram, si præsenserit quod vos promissis et blandiloquio circumvenire non possit. Quia ergo multiplices illius prodigii fucos non est facile deprehendere, quidquid dixerit, quamcunque figuram inducat, tam ipse quam omnia ejus vobis suspecta sint, et fallaciæ plena esse credantur, nisi quorum fidem manifesti operis exhibitio comprobabit. Si vero senserit quod vos aut promissis corrumpere valeat, aut minis detertere, ut aliquid oblineat contra honestatem vestram et causæ indemnitate, illico apud eum prorsus vestra evanescet auctoritas, et eritis tam illi, quam suis in contemptum, in fabulam, in derisum. Sin autem viderit quod vos a proposito flertere nequeat, furorem simulabit in primis, jurabit et dejerabit, Proteum imitabitur, et tandem revertetur in se, et nisi per vos steterit, exinde semper eritis in Deum Pharaoni. Homo inter cætera quibus innotuit, familiaribus et vicinis, in eo maxime gloriatur, quod explorator morum est, bonorum insidiator, delusor et derisor, ut si forte verbum incantius alicui elabatur, statim adhibitis testibus quasi sub prætextu injuriæ suæ vel erroris alieni, fugam parat, ut recte recedere videatur. Cum ergo convenietur, erit in omni re adhibenda modestia, a multiloquio abstinendum. Articuli causæ summam colligantur, insistendum diligentius, ut respondeat ad proposita, quoniam ex consuetudine dyscolus est. Super omnia fugiendæ dilationes, quas ille semper consuevit inducere, et vos, urgente mandato apostolico, admittere non potestis: nec expedit ut consilium nostrum alicui innotescat, quia scorpiones sunt, qui faciem præferunt amicorum. Commodissimum vero videtur exordium a litteris, quas eis dominus papa transmisit, quibus testatur sibi per litteras et nuntios regis significatum esse, quod rex archiepiscopo Cantuariensi concesserat, ut ad ecclesiam suam in omni securitate redeat, et sui omnes ad sua, habituri possessiones suas omnes, sicut eas melius habuerunt, dum in gratia regis essent. Secundus articulus est, ut eundem archiepiscopum in osculo pacis recipiat: quæ forma sollemnis est in omni gente et in omni religione, et citra quam nusquam pax antea dissidentium confirmatur. Nec tam vicario filii regis osculo videretur archiepiscopus pacem recepisse a rege, quam in filii ejus gratiam rediisse. Quod verbum si semel audiretur in turba, patens est, quam facilis malignandi adversus pacem initam daretur occasio. Et si archiepiscopo, quod absit! secus accideret, rex sub prætextu negati osculi crederetur exemptus infamiae.

Redeat in mentem Robertus de Silliaco, et alii qui per manum Christianissimi regis cum eo pacem fecerunt, quibus si nec osculum publice datum, nec tanti mediatoris reverentia veram contulit pacem, nec mirabimini cur memoratus archiepiscopus publicæ religionis solemnem exigat cautionem. Cuiusque præmissorum articulorum rex noluit acquiescere, vos, si vultis, ut vobis in causa succedat,

accipite licentiam incontinenti, et nisi mandato domini papæ acquiescens vos revocaverit, redire citius non differatis. Si autem acqleverit, exprimate nomina possessionum, sicut vobis in chartula exprimuntur, nec admittatis delisiones et fabulas ejus quibus Ecclesiam conabitur mutilare bonis suis; quia dum passum pedis auferet, pacem cum archiepiscopo inire non poterit. Mavult enim proseribi perpetuo, quam eo consentiente vel in minimo proseribatur Ecclesia. Quod si et hic detrectaverit et vos oblatam redeundi occasionem accipiat. Tertius articulus earundem litterarum est, ut mille marcas per Vivianum promissas archiepiscopo incontinenti restituat, ut habeat unde possit apparatu suo et suorum necessariis providere. Quas si se promississe inficiatur, reducite ei ad memoriam, quod eas similiter apud Montem Martyrum promisit episcopus Sagiensis, qui nullo modo mandati fines excederet. Si pertinacius detrectat hanc pecuniam reddere, frontem vestram sentiat, sua, quamvis nimis attrita sit, duriorum. Et antequam ab hoc desistatis articulo, reditum tanta procuretis instantia, ut omnes vos indubitanter credant transfecturos. Si tamen demum apparuerit quod nullo modo possit evinci, vos quasi regi condescendentes, hac petitione dilata et pecunia nulla ratione remissa, formam pacis, quæ in prioribus articulis præmissa est, recipiat. Scitis enim ex litteris, quas vobis dominus papa transmisit, quod nullam remittendæ pecuniæ habetis auctoritatem, qui etiam pace facta tenemini ipsum convenire super integra restitutione ablatorum, et pravis consuetudinibus abolendis. Nam ut in litteris ad regem missis expressum est, vos ad executionem pacis misit dominus papa, et ut per vos melioretur conditio Ecclesiæ, et archiepiscopus et sui in nullo lædantur. Nullam enim in hac parte habetis potestatem.

Quartus articulus est de absolutione excommunicatorum, in qua vobis duplex cautela necessaria est. Primo, ut nulla ratione id faciatis, nisi certa spe pacis et reconciliationis accepta. Secundo, ut nullum, nisi juramento solemniter et publice præstito, juxta mandatum apostolicum, absolvatis. Nec enim aliter eos potestis absolvere. Sed quomodo certam concipietis spem ab homine lubrico, ejus verba et juramenta eandem vim habent, et pari sunt lance pensanda? Difficile quidem est, si tamen induci posset, ut aliqui magnatum regni plures, aut saltem unus, mandato ejus jurarent, quod formam pacis fideliter et sine malo ingenio rex exsequeretur, et ipsi si fidejussores existerent, posset hæc aliqua imago certitudinis interim credi. Verumtamen si ei persuaderi non potest, ut jam dictas præstari faciat cautiones, exigatur, ut patentibus litteris sigillo suo munitis hoc scribat archiepiscopo, et item aliis: in eundem modum domino papæ, et vobis similiter tertius ne quid ex contingentibus omissee videamini, et nimia facilitate certi fuisse de promissione hominis, cui vix unquam sine periculo

creditor. Præterea possessiones Ecclesiæ tradat vobis, amotis satellitibus suis, et per vos ministris archiepiscopi. Hæc enim, licet securæ pacis non sint satis certa indicia, quia et contra scripta sua facile venire consuevit, et ministros archiepiscopi eadem qua solitus est, injuria posset ejicere, tamen quia spem firmiter obligationis obtinent, utcumque certam spem videntur polliceri: et diligentiam vestram, si impetrata fuerint, quidquid exinde contingat, a vitio levitatis poterunt excusare.

Quod si rex ista, scilicet attestationem scriptorum, et possessionum cessionem facere noluerit, restat, ut vos certam spem concipere non debeatis, nec ad absolutionem excommunicatorum procedere. Nam, etiamsi absoluti essent, tenemini ex mandato apostolico reponere eos in anteriorem sententiam, si pax, quod absit! secuta non fuerit. Et si hominem recte novimus, ab istorum absolutione exordietur, dicetque se neminem auditurum, nihil boni facturum, antequam absolvantur familiares sui. Dum hoc obtineat, fortasse modestiam simulabit, promittet grandia, et quasi sub specie religionis, quo innocentior credatur, peccata confitebitur, aliquas conscientie maculas detegat, quas tamen emendicatis aut ementitis virtutibus continuo diluere possit. Ex quo vero obtinuerit, inveteratam duritiam induet, et qui humiliter orabat, exinde nulla humanitate poterit exorari. Hæc ita esse persuaudeant Gratianus et Vivianus, quibus se fide corporaliter præstita obligavit, quod illorum consilium de pace cum archiepiscopo facienda sequeretur, si excommunicatos absolverent. Quibus absolutis ita ab universis, quæ promisit, resiliit, ac si nec verbum cum eis habuisset. Quocirca et qui absoluti fuerant, in priorem excommunicationem reducti sunt, eo quidem justius, quo nequius pacem, cujus spe fuerant absoluti, studuerunt modis omnibus impedire.

Præcaveatis itaque, ne prosiliatis ad absolutionem, nisi certi de pace secutura, et ut cum eam feceritis, si tamen facturi estis, juramentum, secundum quod vobis præscriptum est, recipiatis ab absolvendis, denuntiantes eis, quod nisi exhibitam consecutione operum impleverint cautionem, omni excusatione et appellatione postposita in pristinam excommunicationis sententiam reducantur. Interim autem communionem eorum sollicitius evitetis, ne quod offendiculum detis infirmis, et vituperari faciatis ministerium vestrum, et impiis animatis ad contemptum ecclesiasticæ disciplinæ, causæ Dei non mediocre dispendium generetis. Si forte exegerit rex, ut archiepiscopus in terram suam redeat, possessiones suas et pacis osculum præsentialiter recepturus, procurete, ut quod in absentia ejus fieri potest, domos et possessiones suas Ecclesiæ ministri recipiant, qui possint redeunti necessaria præparare. Et ut aliqui de magnatibus terræ, quod episcopos quosdam libenter facturos esse non ambigo, veniant ad archiepiscopum ex mandato regis, qui ei con-

A ductum et securitatem præstent, ut sine impedimento possit inter eos reconciliatio, prout ipsam antea formaveritis, adimpleri. Alioquin archiepiscopus, nisi causa cognita et securitate accepta, nullum ejus inibit colloquium. Et si, quod de prudentia et constantia vestra credi non debet, rex vos circumvenerit aut compulerit, ut in læsionem Ecclesiæ aut proscriptorum Christi mandatum apostolicum excedatis, vobis certo certius sit, quod archiepiscopus nihil eorum quæ sic gesseritis, ratum habebit, nec contra conscientiam suam alicujus mortalium consilio acquiescet. Comitem Hugonem vobis nulla ratione licet absolvere, quia nihil ei cum causa ista. Ad hæc cavete, ne vos dilationibus protrahat ultra mandatum domini papæ, quia nullæ sunt hic partes vestræ. Cum vobis fuerit transfretandum, litteras originales, quas recepistis, non deferatis vobiscum, sed transcripta, quia insidias in littore posuit et exploratores gravissimos, qui litteras hujusmodi præripere consueverunt. Vos enim originalia recepistis, et ipsi regi denunciavit dominus papa, quod vos missurus erat: nec tenemini, sed nec expedit, ut ei tam cito innotescat, quidquid vobis datum est in mandatis. Et quia incertum est, an metu sententiæ imminens vobis aliquo cito redeundi paraturus sit impedimentum, necesse est, si placet, et si vultis, ut oportet, causæ prospicere, quatenus scribatis episcopis cismarinis juxta conceptionem litterarum domini papæ, præcipiendo, ut per parochias suas divina prohibeant celebrari, ex quo terminus regi indultus elapsus fuerit, easdemque litteras vestras committat is domino Senonensi, qui, cum res exegerit, procurabit, ut vestrum mandatum ecclesiis publicetur. Hoc etiam apud regem plurimum valere poterit, si sibi persuasum fuerit, quod necessitas immineat cismarinis episcopis, mandatum apostolicum, quidquid vobis accidat, exsequendi. Sane quotiescunque vobis cum præfato rege ex quacunque causa fuerit contrahendum, redeant in memoriam vestram fratres templi et xenodochii Hierosolymitani, cardinales et nuntii domini papæ, Carthusienses et Grandimontani, Cistercienses et episcopi terræ suæ, quos omnes in variis contractibus, dum propriæ voluntatis quocunque modo malitiam adimpleret, etsi hoc plerumque non mernerint, notari tamen fecit infamia. Si quæserit, an de rebus ablatis et illatis injuriis pacem sit perpetuo habiturus, si archiepiscopum, ut dictum est, revocaverit, intimare ei, ut nec vobis nec alii credat se citra penitentiam ab aliquo hominum posse absolvi, aut veniam promereri. Nam in Evangelio secundum Lucam ait Dominus: *Attendite vobis, si peccaverit in te frater tuus, increpa illum, et si penitentiam egerit, dimitte illi, etsi septies in die peccaverit in te et septies in die conversus fuerit ad te, dicens pœnitet me, dimitte illi.* Pœniteat ergo, si vestro vel alieno fructuosam desiderat pacem, quia, ut ait Apostolus, *nulli contra veritatem aliquid licet.* Nec omnino dimittitur peccatum, nisi, cum facultas

adsit, restitatur ablatum. Aut enim verba Christi A
superfluent, aut conversio, pœnitentia, et vera confessio, necessaria sunt ad veniam promerendam.

EPISTOLA CXXII.

AD WILLELMUM NORWICENSEM EPISCOPUM.

THOMAS Dei gratia Cantuariensis archiepiscopus, et apostolicæ sedis legatus, venerabili fratri W..... eadem gratia Norwicensi episcopo salutem, et in Spiritu sancto gladium Petri adversus persecutores Christi fideliter exercere, et feliciter exercere.

Se ipsum ad pœnam criminis obligare dignoscitur; quisquis divinitus accepta potestate perversis hominibus dat audaciam delinquendi ex dissimulatione vindictæ. Nam sanguis iniquorum de manu negligentis aut dissimulantis sacerdotis exquiritur. Spinæ et tribuli, sicut Scriptura docet, nascuntur in manu temulentæ. Ne nos igitur ex dissimulatione manifestorum criminum reatus involvat, et in perniciem Ecclesiæ convincat nimium siluisse, comitem Hugonem, præcedente tamen mandato summi pontificis, vinculo anathematis innodavimus, præcipimusque ut eum per episcopatum vestrum publice faciatis excommunicatum denuntiari, et subtrahi sibi, prout ecclesiastica disciplina præscribit, fideli participationem. Ad hæc meminisse potest vestra fraternitas, quoniam diu Londoniensis episcopi dissimulavimus culpas, qui, ut cætera taceantur, utinam tam impudens schismatis non fuisset incensor: nec in subversionem ecclesiasticæ libertatis et juris animasset publicam potestatem, et ministros ejus armasset. Freti itaque sedis apostolicæ auctoritate eum publice excommunicavimus: episcopum quoque Sarisberiensem ex causa inobedientie et contemptus; et alios, quorum nomina subscripta sunt, ex variis et justis causis. Excommunicati sunt ergo Thomas filius Bernardi, Radulphus de Broc, Robertus de Broc clericus, Hugo de S. Claro, Letardus clericus de Norfice, Nigellus de Sacca-Villa, et clericus frater Willelmi de Hastings, qui ecclesiam nostram de Monechete occupavit. Præcipimus autem auctoritate apostolica et nostra, in virtute obedientiæ, et in periculo salutis et ordinis, ut eos per totam diocesis vestram faciatis publice denuntiari excommunicatos, et communionem eorum jubeatis ab omnibus fideliter evitari. Valete in Dominum

EPISTOLA CXLII.

AD EUMDEM.

THOMAS Cantuariensis archiepiscopus, WILLELMO Norwicensi episcopo.

Quod nobis chara fraternitas vestra significavit in absolute nobilis viri Hugonis comitis, omnia solemner et ex ordine juxta mandatum nostrum fore completa, non modicum gratulati sumus. De ove quippe perdita gaudio magno gavisi sumus, quod humeris pii pastoris per avia deserti sit reportata ad gregem. Quod vero adjecistis ad omnipotentem Deum vos erigere manus, qui his ultimis diebus

A terram respicere dignatus est, pariter et anima mea magnificat Dominum, qui magnifice egit nobiscum, statuens procellam nostram in auram, et motum fluctuum mitigans. A quo etiam nunc desideranter id oramus, ut mereamur videre vos antequam abeat et avoletis ab hac regione mortalium in illam æternorum, ubi sunt concives vestri et domestici Dei. Speramus siquidem, quod ex præsentia vestra non modicum impartietur pusillanimitati nostræ gratia spiritualis ad confirmandos nos, quia benedictus Deus, qui in his diebus posuit vos columnam domus suæ immobilem. De clericis illis interdictis, pro quibus illustris comes Ilugo nobis scripsit, nihil in præsentiarum mutare statuimus, sed sic volumus eos manere, donec favente Domino nos ipsi veniamus, B vestro super his et aliis Ecclesiæ negotiis consilio fruituri. Verum tamen huic præsentium bajulo propter mittentes reverentiam, proprio etiam ipsius compatiens labori, evangelizandi usum indulgemus, baptizandi quoque et tribuendi vaticum, si tamen ultima vitæ cogat necessitas. Valete.

EPISTOLA CXLIII.

AD EUMDEM.

Gratias agimus Domino Jesu Christo, qui nunquam sperantes in se deserit; sed solitæ suæ pietatis gratia misericorditer dignatur visitare, et a miseriarum calamitatibus poterit eripere. Inde siquidem est quod ad vestram cupimus pervenire notitiam, nos in die beatæ Mariæ Magdalene cum domino nostro C Henrico illustri Anglorum rege, ad honorem Dei et ecclesiæ suæ, ad honorem regis pariter ac nostrum, honestam ac bonam pacem fecisse. Quod quidem vobis designavimus, quatenus de pace nostra facta consolationem non modicam habeatis, et de reditu nostro in præsentiarum gaudere possitis. Valeatis diu et semper, quem videant oculi nostri priusquam moriamur.

EPISTOLA CXLIV.

AD JOANNEM PICTAVIENSEM EPISCOPUM.

Venerabili fratri, et amicorum suorum in Christo charissimo JON. Dei gratia Pict. epis. THOMAS eadem gratia Cantuariensis Ecclesiæ minister humilis, salutem, et se totum.

D Charissime, utquid fecistis nobis sic? Utquid nos et vos strangulastis? Ecce dedistis homini illi occasionem detrahendi, et nobis et vobis malignandi adversum nos. Ecce animal cupidum gloriæ et nimis pronum in perniciem Ecclesiæ divulgari faciet et proclamari per plateas et in facie Ecclesiæ, quod nos absolute et præcise consilio suo submerimus tacita omni conditione, nulla vel honoris Dei vel ordinis nostri habita mentione, quæ tunc procul dubio nulla ratione tacenda sunt, cum id potissimum agatur, ac id prorsus intendatur, ut in ignominiam et confusionem Ecclesiæ taceantur; quod apostatandi genus est plus quam manifestum. Non autem hoc modo vel sub hac forma a nobis a Stampis recessistis, si bene recoli-

tis. Scitis, si placet, quia diximus vobis in discessu mutuo, quod huic duntaxat articulo insisteretis, quatenus homo ille juxta mandatam domini papæ nobis gratiam suam et pacem restitueret, et ecclesiam nostram in libera nostra dispositione nobis dimitteret. Et cum quærens a nobis, utrum vellemus recipere diem colloquii cum eo, si vellet nobiscum loqui, respondimus quia nullum diem loquendi cum ipso recipere, priusquam mandato domini papæ respondisset, ac etiam satisfecisset; verum postea libenter veniremus ad diem, et faceremus quicquid, salvo honore Dei et ordine nostro, facere possemus. Hoc modo, charissime, ab invicem discessimus. In his, si placeret, finibus stetisse debuissetis cum sciatis optime, nemo melius, quia ulterius nulla ratione procedere audeamus, nihil amplius secundum Deum facere possumus vel debeamus. Unde et vos, dimidium animæ nostræ, scire volumus, quia non est nobis consilium, sed nec quidem videtur tutum, vel diem recipere vel ad colloquium ejus venire, quousque mandatam domini receperit, et etiam si ei visum fuerit, idem effectui mancipaverit, ne forte quod absit! nobis dantibus occasionem frustratoriae dilationis, merito etiam imputari possit et nobis, quominus ipsius papæ mandatam mandetur executioni, quod nullatenus nobis dignoscitur expedire. Bene semper valete.

EPISTOLA CXLV.

AD FRIGERIUM SAGIENSEM EPISCOPUM

THOMAS Cantuariensis archiepiscopus, FRIGERIO Sagiensi episcopo.

Gratias, quas pro tempore licet, referimus dilectioni vestræ, quæ nostri gerit sollicitudinem, et Cantuariensis Ecclesiæ, a cujus uberibus coaluimus, officiosam rependit charitatem. Utinam illa quandoque possit, Deo propitiante, et nos per illam, vestrum candelabrum promovere, et vicem condignam reddere miserationi, quam cum paucis electis pro Domino nobis et nostris exhibetis afflictis. Et quidem de gratia Dei non diffidimus, quæ semper Cantuariensem protexit Ecclesiam, et tam cultores quam persecutores ejus consuevit beare vel punire pro merito. Nam licet Christus ejus sit benignus et patiens, tamen fortis et justus et certe redditor est. Et cum vobis in multis teneamur obnoxii, in eo maxime nos emernistis, quod vestro, ut scripsistis, intervntu dominus rex indignationem suam nobis remisit ex animo. De ejus quoque et sapientium, qui circa eum sunt, prudentia confidentes indubitanter speramus, quod contra matrem suam Cantuariensem Ecclesiam, quæ ipsum et antecessores suos promovit, nihil faciet contra salutem animæ suæ, et in perniciem filii, quem Dominus ab omnibus tueatur adversis. Scripsistis autem nuper, ut vobis et domino Tyrensi, redeuntibus a rege Francorum, Parisiis occurreremus. Et licet diem non præfixeritis, ut oportuit, nos tamen parati eramus iter arripere, quando vos audivimus in Normanniam rediisse.

A Substitimus ergo stupentes, quod nihil nobis significare curastis, vel de reditu vestro, vel de itinere nostro. Nunc autem scribitis similiter, ut vobis redeuntibus occurramus, nec diem item designatis, quasi aut nos vestrum reditum possimus divinare, aut abundemus expensis, ut sine onere amicorum, qui nobis et nostri sæpe necessarii sunt, morari et exspectare vos valeamus in domibus alienis. Inde est, quod vobis occurrere non possumus in incertum, licet proni simus, cum fructus itineris nostri apparuerit, ad dominum regem accedere, et ipsius, in quibuscunque secundum Deum et Ecclesiæ honestatem poterimus, obsequi voluntati. Valeat semper, et prosperetur in Domino chara nobis vestra fraternitas.

EPISTOLA CXLVI.

AD JOCELINUM SARESBERIENSEM EPISCOPUM.

THOMAS Dei gratia Cantuariensis Ecclesiæ minister humilis venerabili fratri suo JOCELINO, eadem gratia Saresberiensis episcopo, visis litteris nostris statim respicere a malo, et de cætero constantius facere bonum.

C Celebre proverbium est: *Facilius est vitare discordem, quam declinare fallacem*. Inde est, quod quamvis propter fallentium argutias, propter animi tui debilitatem, propter propositum tibi corporis tui et tuorum discrimen videaris aliquatenus excusabilis apparere, non ideo minus ratum habemus te graviter commisisse in domini papæ contemptum, merito incidisse in interdicti nostri sententiam, rem talem egisse, pro qua totus mundus habet clamare post te. Eo maxime quod contra domini papæ mandatam expressum, ne in Ecclesia Saresberiensis absque canonicorum ejusdem, exsultantium pro nobis et nobiscum, consensu et conscientia, nec per te, nec per clericos tuos, decanus ibidem constitueretur: contra nostram etiam prohibitionem, subanathemate factam, decani noviter in ecclesia tua abusive creati intrusionem confirmaveris; cujus occasione juramenti, sicut vulgo celebre est, schisma jam fere emortuum revixit in Alemannia, quo credimus eum ipso jure hæresi damnata involvi, qui participatione illius grandis et insignis schismatici, Coloniensem loquor, excommunicationis in se provocavit sententiam auctoritate decreti Leonis: si quis hæreticæ communionis contagione se maculaverit, hoc in magno beneficio habeat, si adempta omni spe promotionis, in quo invenitur ordine permaneat. Unde quoniam novimus scienti fraudem minime fieri posse, et esse iniquum, omnique canonico juri contrarium, rem tam detestabilem, tum propter factum, tum propter personam, Ecclesiæ tuæ, rem ipsam tam incommodam, aliis exemplo tam perniciosam, ratam et firmam nullatenus posse manere, quoniam ipso jure non teneat, apostolica auctoritate et nostra, qua fungimur, ipsam electionem, imo intrusionem, de Joanne de Oxeneford in decanatum factam, tuamque super hoc ipso confirmationem et assensum in irritum revocamus, et totum

factum ipsum quassamus penitus. Et quia contra A
communem Ecclesiæ formam, contra mandatum domini papæ, sicut prædiximus, lapsus ipse in hæresim damnatam, excommunicatus participatione excommunicari, ausus est decanatum ipsum recipere, ne temeritas invadentium impunita succrescat, in virtute obedientiæ tibi et canonicis tuis in periculo ordinis vestri mandando præcipimus, ne de cætero visis litteris nostris ex hoc facto eum decanum habeatis; quoniam et tibi ad præsens excommunicatum denuntiamus, et ut eum talem denunties, firmiter injungimus. Præterea ne ex hoc commisso, quo in te severiorem provocasti sententiam, transeas impunitus, auctoritate Dei et nostra ab officio episcopali et sacerdotali te suspendimus, præcipientes ut a die susceptionis litterarumstrarum infra duos menses veniendi ad nos iter arripias, satisfactorius Deo et nobis de tanto excessu, de injuria tam perspicua. Ex quo resipueris et emendaveris delictum, sit tibi vale.

EPISTOLA CXLVII.

AD EUNDEM.

THOMAS venerabili fratri JOCELING, Saresberiensis salutem.

Noverit Deus quam sincera dilectione et charitate personam vestram amplexati sumus, quantumque honorem vestrum et profectum in Christo affectavimus et procuravimus. Vos autem econtra, ut pro certo accepimus, quod tamen non sine dolore scribimus, in contemptum domini papæ et nostrum, et forte in proprium dispendium vestrum et ordinis C periculum et manifeste agitis nec suspensionis sententiam, quam ob inobedientiam in vos exercuimus aliquatenus observatis. Quod quam detestabile sit et exemplo etiam perniciosum, vestram minime credimus latere prudentiam. Unde et scire vos volumus quia nisi errata corrigatis et de duplici jam inobedientia maturius satisfaciatis, nos ulterius minime dissimulare poterimus quin tantos excessus gravius puniamus. Miramur etiam admodum quod scitis Willelmum capellanum nostrum in parochia vestra incarcerationum teneri in vinculis, nec inde justitiam aliquam hucusque exercuistis. Unde et fraternitati vestræ in virtute obedientiæ, apostolica auctoritate sub anathematis interminatione præcipiendo mandamus, quatenus ipsemet a divinorum celebratione cessetis et totam parochiam vestram cessare faciatis, quandiu idem Willelmus in vinculis vel captione tenebitur, nec ante interdictum solvatis quousque saepe dictum Willelmum a captione noveritis esse solutum, sedique apostolicæ et nobis et ipsi super tam enormi flagitio fuerit plenarie satisfactum. Vale.

EPISTOLA CXLVIII.

AD EUNDEM.

Calamitates matris Ecclesiæ, etc. (Vide similem epistolam ad Gilbertum Londoniensem directam.)

EPISTOLA CXLIX.

AD CAPITULUM SARESBERIENSE.

THOMAS Dei gratia Cantuariensis Ecclesiæ minister humilis universo Saresberiensis Ecclesiæ capitulo scientiæ et consilii spiritum.

Super prudentia vestra non satis possumus admirari, quo ausu, imo qua temeritate quemdam ipso jure excommunicatum, utpote qui in damnatam hæresim incidit, illum etiam qui juramento suo in Alemannia perpetrato, sicut scitur ab omnibus, schisma renovavit, in decanum Ecclesiæ vestræ elegeritis, Joannem dicimus de Oxeneford, inconsultis etiam illis, qui nobiscum propter justitiam et Ecclesiæ libertatem exsulant. Præsertim cum sine ipsis ne id fieret, specialis inhibitiō Romani pontificis ad vos pervenerit. Et nostra pariter processit, nescio tamen si ad vos usque pervenerit. Propterea, quod circa decanatum minus consulte actum est, imo contra omnem juris ordinem, quassamus penitus, et revocamus in irritum, mandantes vobis quod jam dictum Joannem excommunicatum habemus, et vobis excommunicatum denuntiamus, apostolica auctoritate et nostra inhibentes, ne jam prænominatum Joannem pro decano habeatis, nec ei obedientiam seu reverentiam decano debitam exhibeatis. Præcipimus etiam sub ordinis et beneficiorum vestrorum periculo, quatenus post susceptionem harum litterarum infra duos menses vos conspectui nostro præsentetis, satisfactorii super injuria et contemptu domini papæ, et nostri. Valete.

EPISTOLA CL.

AD RICARDUM SYRACUSANUM ELECTUM.

THOMAS Cantuariensis archiepiscopus, RICARDO Syracusano electo

Humanitas vestra nos provocat ad audiendum, et nostris collata beneficiorum exhibitio nos vobis et vestris multipliciter reddit obnoxios. Hoc ergo officiorum ingressi commercium, urgente necessitate præsertim, cum benigno creditore contrahere non veremur, sperantes in Domino, quod nostra misericorditer debita et vobis solvet et aliis, qui se timentes, cum expedit, ab omni articulo necessitatis absolvit. Recepistis coexsules et consanguineos nostros, sed procul dubio ipsum recepistis in illis, qui se fideliter promittit redditurum, quidquid uni pauperum suorum fuerit erogatum. Vobis in his contrariorum vestrorum consiliis gratiam, gloriam promeruitis apud posteros, et nos emptitios vestros constituistis. Et quia nobis ad præsens colloquium divina dispositio subtrahit, latori præsentium sic a vobis credi postulamus, ut nobis, cujus fidei creditum est, quod nequaquam litteris censuimus committendum. Est enim vir litterarum eruditione conspicuus, præditus morum gratia, monasticæ religionis sanctitate præsignis, et inter probatos Cluniacenses appetendæ perfectionis exemplar. Is Cluniacensis Ecclesiæ necessitates, et Christianissimi regis, et nostra mandata procurat. Et cum illum præ-

debita reverentia receperitis, in illo, cuius minister est, et sanctissimum principem recipietis, et nos. Unum tamen est, quod in aure vestra secretius consuluisse, rogasse et obtinuisse desideramus, ut nobilis viri Stephani, Panormitani electi, revocationem diligenter procuretis apud regem et reginam, tum ob causas quas in præsentī de industria reticemus, tum ut præfati regis et totius regni Francorum gratiam vobis æternaliter comparetis. Valet.

EPISTOLA CLII.

AD EUNDEM.

THOMAS Cantuariensis archiepiscopus, RICARDO electo Syracusano.

Multam nobis consolationem dilectionis vestræ litteræ attulerunt, quæ vestræ, quam plurimum exoptamus, salutis indices, eloquii venustatem fidei sinceritatem, prudentiæ gratiam præferebant, et quod his omnibus majus est, singuli apices fervore suo ad amore Dei et honestatis cultum, non modo tepentem, sed et frigescentem animam poterant inflammare. Ex illis autem patenter innotuit, quod nec fortunæ temeritas, nec distantia locorum, nec temporis tractus exinanire potuit, imo nec infirmare, quam nec aquæ multæ prævalent extinguere, charitatem. Preces enim, et illas affectuosas, porrexistis pro nobis amico vestro domino Willelmo Papiensi: et utinam non incassum. Sed ille, si posset licitum libito consequere, nobis esset clavus in oculo, et sagitta in latere, mortificans animas, quæ non moriuntur, et vivificans illas, quæ rejecerunt et projecerunt vitam. Parcat illi Deus et consortibus suis, ne in extremo examine noster et coexistum nostrorum, imo et ecclesiæ sanguis de manibus eorum requiratur, eo quod dederint cornua peccatoribus, et quantum in eis est, profanandam gentibus et conculcandam exposuerunt legem. Sed quid ista revolvimus, nisi ut Ecclesiæ compatiamini, et nobis apud Deum et Ecclesiæ Romanam, si forte fuerit opportunum, præbeatis orationum suffragia? Facit contra eos testimonium majus Joanne, quia opera quæ faciunt, testimonium perhibent de eis. Ecclesiæ quidem liberabitur, et nos, quandiu placuerit Deo, libenter exsiliū naufragium patiemur, dispersi in omnem ventum cum miseris nostris, quorum unus est lator præsentium G.... sororis nostræ filius, quem ubi auxilio vestro eguerit, tanto vobis securius commendamus, quanto de vestra dilectione magis confidimus, agentes, Deo gratias, quod nos tanti fecit, ut pro eo totus sanguis noster et nostrorum exquiratur ad pœnam.

EPISTOLA CLII.

AD ROGERIUM WIGORNIENSEM EPISCOPUM.

THOMAS Dei gratia Cantuariensis archiepiscopus et apostolicæ sedis legatus, venerabili et amico charissimo ROGERIO eadem gratia Wigorniensis episcopo salutem et intimæ dilectionis affectum.

A memoria tua non credimus excidisse, nos anno præterito litteris et nuntio, quatenus ad nos venires,

tibi in mandatis dedisse, et in virtute obedientiæ firmiter præcepisse, tu vero mandatis nostris non obtemperasti, quia nondum ad nos venisti. Noverit itaque tua dilectio nos multis de causis intervenientibus tibi detulisse, et ut dilectio Filio pepercisse, tum quia novimus te matri tuæ Cantuariensi Ecclesiæ devotum esse admodum et fidelem, tum propter generis tui nobilitatem, tum etiam propter religionem personæ tuæ pariter et honestatem, tum etiam quia te totis cordis affectibus sincere diligimus. Et ideo iterato tibi mandato præcipimus, et in periculo ordinis tui, et in virtute obedientiæ firmiter injungimus, ut ex quo in partes cismarinæ venisti, ab eis non recedas, priusquam ad nos venias, et nobiscum loquaris. Habemus enim tibi multa dicere. De cætero nihilominus tibi mandando præcipimus, ut de negotio quod inter te et Eboracensem vertitur, pariter et de omnibus excommunicatis sancti Oswaldi, et totius parochiæ ejusdem, nec prece nec pretio, vel propter minas alicujus, nec interventu etiam ipsius regis, aut cardinalis, sive cujuslibet alterius personæ, sine consilio et conscientia nostra aliquid facias, aut excommunicatos illos, sive aliquem illorum absolvas.

EPISTOLA CLIII.

AD EUNDEM.

Venerabili fratri ROGERIO Wigorniensis episcopo et salutem, et eum præimere, qui potest et corpus et animam perdere in gehennam.

Dilectionis vestræ litteras diligenter inspeximus: consilium, quod necessitati nostræ vestra discretio fideliter ex proposito ministravit, libralis hinc inde rationibus, adhibita deliberatione perpendimus ex fraternæ charitatis dulcedine provenire, conjicientes quod fides vestra ulterius cohiberi non poterit, quin in conspectu principum, sicut viri generosi nobilitatem et religiosi pontificis zelum decet verbum Dei libere prosequatur. Agimus itaque gratias devotioni, congratulamur prudentiæ, propositum quo dominum regem pro nobis, imo pro causa Dei, solito vigilantius et instantius convenire decrevistis, plurimum approbamus, rogantes ut, quod in hac parte promittitis, citius aggrediamini, facia is frequentius, et nihil ex contingentibus omittentes, studiosius impleatis. Spes enim est, quod fideliter evangelizanti verbum adjiciet Dominus virtutem multam. Siquidem fidelis est in omnibus verbis suis, qui hoc pastoribus Ecclesiæ repromisit. Et quidem credibile est, nec aliud nobis persuaderi potest, quod si vos et alii fratres nostri eum ab initio, prout justum fuerat, convenissetis, nequaquam tantum in perniciem ecclesiæ pravorum consiliis licuisset. Sed quia nullus fuit aut rarus, quod sine rubore et gemitu non eloquimur, qui eum statueret contra faciem suam, et revocaret a consilio impiorum, res in id discriminis et infortunii delapsa est, ut se nequaquam putet ex quacunque causa corripiendum, qui se in tantis præsumptionibus et tam manifestis im-

pietatis recolit a nullo fuisse correptum. Nos autem ipsi diu siluimus, et utinam animæ meæ nimium tantas Christi injurias dissimulanti non esset ex conscientia dicendum: *Væ mihi, quoniam tacui!* fuimus patientes cum Ecclesia Romana, quæ eum tanquam delicatum filium et tenellum in multa mansuetudine supportabat, ut patientia ejus nobilem, quod decens fuerat, animum ad penitentiam provocaret. Utinam non semper abusus esset patientia ejus et nostra, Et ne quid eorum, quæ gerenda videbantur a nobis, omissum dici possit, coram Christianissimo rege et optimatibus totius regni Franciæ humiliavimus nos, prostrati ad pedes ejus, causam totam quæ inter nos vertitur, salvo honore Dei in ejus arbitrium conferentes. At ille ut audivit honoris divini mentionem, adversus innocentiam nostram vehementer excaudit, et proponens quod voluit, utique quod non debuit, quoniam, ut pace ejus dictum sit, res aliter se habebat, in contumeliam supplicia implorantia misericordiam, et cum omni devotione obsequium offerentis, famam nostram, quod ei remittat Deus, ut nos de ipso loco exsilii perturbaret, suis adinventionibus studuit onerare.

Audivimus omnia patienter, sperantes indignationem ejus mitigandam fore, si acerbitatem, quam mente conceperat, sine contradictione penitus effluisset; præsertim cum domini papæ majestas interveniret, præfati regis et optimatum Franciæ diligentius intercedens adesset præsentia, et sanctissimi viri Carthusienses et Grandimontani, quos vel solos oportuerat pro sua reverentia exaudiri, misericordiam exactissime implorarent, denuntiantes ei familiares et expressius quod oculata fide perceperant, nobis a domino papa restitutam et collatam animadvertendi in eum, et terram suam, et malefactores Ecclesiæ plenariam potestatem. In omnibus tamen his non est aversus rancor ejus sed usque in hodiernum diem permanet manus ejus extensa, in depopulationem Ecclesiæ crudescit amplius. Sed nec ipsum latet, quod nobis potestas restituta est cum hoc ex litteris apostolicis, quas in secundo colloquio recepit, certissime teneat. Verbum præterea, quæ continentur in illis litteris, nobis alia indulta sunt, quibus, auctore Deo utemur contra eum et alios Ecclesiæ persecutores, nisi ei reddiderit pacem. Et ea quidem innotescere poterunt, sicut desideratis, in brevi, si in voluntate Dei fuerit, ut colloquamur; aut aliquis e vestris ad nos transiens, cum illo communicari oporteat. Expectamus enim emendationem illius, quem potius ex alieno instinctu, quam spiritu proprio credimus tam immaniter in ecclesiam deservire. Eos ergo pro parte tradidimus Satanæ in interitum carnis, ex justis et manifestis causis, urgente necessitate officii, et ratione juris persuadente, ut in pœna membrorum sanetur caput, et ab inferni laqueis extrahatur, quibus se ipsum, dum Ecclesiam persequitur, incessanter astringit. Reliquos autem, sicut vobis denuntiatum est, Deo disponente ana-

A themate simili condemnabimus, nisi interim condigna satisfactione sententiam declinaverint imminuentem. Ipsi enim regi detulimus hactenus, et in spe pacis adhuc differre disponimus, nec eum anathemati subjiciemus, aut regnum interdicto, dum hoc cum indemnitate salutis et salva constitutione sedis apostolicæ dissimulare licuerit.

Quod autem rogastis, ut vobis liceat excommunicatis communicare, quasi ut per hanc Dei offensam sit expeditior via ad gratiam regis et pacem Ecclesiæ reformandam, tanquam non sit a Deo, sed per humanam astutiam redintegranda, mirum est quomodo venerit in animum sapientis, præsertim episcopi, quem oportet habere zelum legis, qui dissuadentem audivit Apostolum: *Ne mala faciamus, ut proveniant bona*. Quæ est societas luci ad tenebras? Quæ conventio Christi et Belial? Quis consensus templo Dei cum idolis? Quæ participatio fidei cum iniquitate? Sed timetis regem. Deus certe fuerat prætimendus. Paupertas horri est, et proscriptionis injuria. Sed tales Christus confessores agnoscit eos, qui pro justitia persecutionem patiuntur, beatos esse denuntians, non eos qui croceis induti sunt, qui primos habent recubitus, qui salutationes excipiunt clariores, qui epulantur quotidie splendide, quibus mundus blandiens adlatur, ad singula eorum dicta vel facta clamans: *Euge, euge. Si hominibus place-rem, ait vas electionis, Christi servus non essem*. Quoniam qui hominibus placere desiderant, confunduntur. Edicta fortasse recolitis, quibus publicus hostis censetur, qui contra regis voluntatem præsumit aliquem, ex quacunque causa, sententia anathematis condemnare. Sed nunquid excidit a memoria quod sacerdoti denuntiatur Spiritus sanctus: *Quod nisi annuntiaveritis impio iniquitatem suam, sanguinem ejus de manu tua requiram?* Nonne qui corripientem non audit Ecclesiam, ut ethnicus habendus est et publicanus? Sed obijciatis quod tempora mala sunt, quasi ea bonus non disposuerit Deus, et beati non sint, qui faciunt judicium et justitiam in omni tempore. Ne timeatis, ubi non est timor, frater amande: quia plures nobiscum sunt, quam cum illis. Et qui dat jumentis escam ipsorum, et corvorum pullis, cultores suos in necessitate non deseret, et ut paucis nostrum expediamus consilium, consulite legem et prophetas, consulite Evangelium et Apostoli verba, sanctorum Patrum revolvite sanctiones, et horum omnium erit auctoritate perspicuum, quod sine dispendio salutis et ordinis non potestis excommunicatis communicare. Christus est qui denuntiat, quod *nemo potest duobus dominis servire, Deo et mammonæ*. Et profecto si ponamus corda nostra super vias nostras, et conscientias nostras subtilius excutiamus, maxima pars sacerdotum hoc in offensione potentum formidamus, ne nobis divitiæ subtrahantur, aut fallax, momentanea et umbratilis gratia. Neque hæc dicta videantur, quasi cultricem mammonæ suspicemur nobilitatem vestram, quam constat præ honestate semper contempsisse

divitias, sed ut promptam obedientiam fidei vestræ, si tamen verbis incitari potest, ut in charitate amplius ferveat, exhortatione proposita reddamus promptiorem. De vestra igitur sinceritate plenam fiduciam obtinentes, precipimus in virtute obedientiæ, et periculo salutis et ordinis, quatenus ante denuntiationis excommunicatos evitetis, et per episcopatum vestrum, prout canonum censura præscribit, denuntiatione publica faciatis a cunctis fidelibus evitari. Scitis quod melior est obedientia quam victimæ, et non acquiescendi voluntas idololatriæ comparatur. Contra tergiversationes adversantium muniti et tuti sumus. Nec dubium quod in brevi per gratiam Dei, veritas nos liberabit et vos. Persecutor jam quinquennio depopulatur Ecclesiam, proscrit innocentem, addicit clerum, sacerdotum, imo et pontificum, ne legem Dei loquantur, ora concludit; ecclesiasticæ potestatis, ne crimina puniantur, iura cohibet et exstinguit, et a nobis, ut in tanta Christi contumelia sileamus, exigitur? Silent et silebunt profecto mercenarii, sed quisquis Ecclesiæ pastor fuerit, procul dubio jungetur nobis. Si ulterius dissimularem, timendum fuerat, ne ultor injuriarum Dei gladius in capita nostra merito convertatur. Nec moveamini, si non dispensamus ad preces vestras, quod dispensari non potest, quia nec Romanus pontifex hanc habet auctoritatem. Qui, quamvis excommunicatos licenter absolvat, novit tamen participationem eorum sibi jure perpetuo interdictam. Impenitentes autem et persistentes in scelere et voluntate peccandi, non apostolus, non angelus licenter absolvit. Valete.

EPISTOLA CLIV

AD EUNDEM.

THOMAS Dei gratia Cantuariensis archiepiscopus, et sedis apostolicæ legatus, venerabili fratri ROBERTO, Wigorniensis episcopo, salutem, et pium in futura prospectum.

Inspectis litteris, quas nuper ab Anglia recepimus, potestis advertere, quam malitiose Londoniensis episcopus, qui nobis ab initio sedis in insidiis quærebat animam nostram, ut auferat eam, nunc adversus matrem suam et nostram, sanctam Cantuariensem Ecclesiam, calcaneum erigat, et ei primogenituræ sortem, gloriam et nomen præripere molitur. Restiterunt ei nuper coram regis officialibus, quos in persecutionem Ecclesiæ excitabat, laudabiliter fratres nostri, seque ab illius communione suspendentes per parochias suas edicto publico præceperunt eum a cunctis fidelibus evitari. Et hoc quidem fecit primus venerabilis frater noster Norwicensis episcopus in synodo proxime habita, deinde Cestrensis in episcopatu suo, et D. Wintoniensis, et Cicestrensis statim die sequenti, postquam litteras nostras receperant. Quia ergo nobilitatem et religionem vestram decet præ cæteris ornare Ecclesiam, honorificare ministerium vestrum, et pro matris, quæ vos in episcoporum consortio generavit, salute stare fortiter

A usque ad sanguinem, fraternitatem vestram, quam nobis ex accepta consecratione tenetur amplius, et de qua magis ex conscientia virtutis et sanguinis generositate confidimus, rogamus, monemus et exhortamur in Domino, quatenus vestræ matri, cuius tam impudenti scelere salus appetitur, in tanta necessitate fideliter assistatis, et alterius Absalon vos opponatis impietati. Provideat etiam sinceritatis vestræ discretio, et charitas in Christo plurimum amplectenda, ut juxta tenorem præcedentium mandatorum, tam præfatum episcopum quam alios, qui vobis excommunicati esse denuntiati sunt, evitetis? et sicut fratres et coepiscopi nostri fecerunt, prout canonum sancit auctoritas, a fidelibus per episcopatum vestrum faciatis edicto ecclesiastico evitari. Et quia ad apostolicam sedem parricidalis hujus sceleris est atrocitas referenda, domino papæ scribite, qualiter filium pro salute matris contra fratrem Ismaelitam et sanguinarium scribere decet, quia licet cruorem propriis manibus non effundat, tamen nostrum et Christi pauperum sanguinem sitit. Et eum quidem suis consiliis effundit, sed abutens ministerio tyrannorum. Cætera in ore latoris præsentium posita sunt, quem in his, quæ vobis ex parte nostra dicet, audiat ut nos. Scribunt pro Cantuariensi Ecclesiæ episcopi Gallicani, sicut ex litteris domini Parisiensis potestis audire, sed vos scribetis expressius, qui tenemini arctius, et amatis ardentius. Hoc autem exprimat in litteris, quas mittitis ad dominum papam, qualiter præfatus Londoniensis receptis litteris apostolicis, quas ei de reconciliatione nostra fraternitas vestra transmisit, malignatus est, non modo nullum pro pace Ecclesiæ apud regem faciens verbum, sed secus faciens, et procurans seditionem, per se et regis officiales instituit, ut episcopi, abbates, et universi ecclesiarum prælati, suo et subditorum nomine adversus mandatum apostolicum appellarent, cum tamen nobis indultum sit appellationibus hujusmodi non deferre. Sed Deo providente melius, evacuata est malitia ejus, non consentientibus ei viris religiosis, nec pro metu officialium, nec pro mandato publicæ potestatis, cuius in inferendo vim prætendebat auctoritatem. In hac sui necessitate fidei vestræ experimentum faciet ecclesia, et eximie virtutis Deo et hominibus gratissimum tam præsentibus quam posteris relinquitis exemplum. Nec vos terreant aut moveant blanditiæ vel minæ seduciorum, cum certum sit, quod spes impiorum peribit, et pariet confusionem, et qui timet pruinam, irruet super eum nix, Deum vero præmentibus nihil expeditum deest.

EPISTOLA CLV.

AD EUNDEM.

THOMAS Dei gratia Cantuariensis archiepiscopus, et apostolicæ sedis legatus, venerabili fratri et amico ROBERTO Wigorniensis episcopo, salutem, et perseverantem in fidei zelo, et sincera charitatis fervore profectum.

Vir illustris Robertus comes Gloucestræ, pater

vester, cum plures haberet filios, vos ampliori præ cæteris affectu traditur dilexisse, eo quod vos in senectute genuerit, et totum, prout in dolis pollicebatur, prudentiæ suæ et virtutum fomitem Dei cooperante gratia transfudit in sobolem, quam utpote pretiosissimum ab ineunte ætate Domino consecravat. Intueamini, quam prudens, quam fidelis, quam magnanimus, quam constans fuerit ille, qui florentis, pugnacis, gratiosi, generosi regis, et opulenti, ejusdemque Normannorum ducis, et Boloniæ comitis vires aggressus oppressit. Et non modo regno privatum, sed et captivum conjecit in vincula, adeoque fortunam indignantem habita fidei et virtutis ratione contempsit, ut pro reparandi sacramenti religione nulla exhorruerit subire pericula, et tandem captus incarcerationi maluerit, quam soror ejus et domina juris sui dispendium pateretur. Qui, licet invidia fortunæ captus fuerit, vinculatus tamen judicio sapientium tantus habitus est, ut liberationem ejus commutandam et emendam censuerint rege et regno. Contemplatio viri clarissimi vobis adjiciat animos, et eum qui vos generosi sanguinis titulo illustravit, cunctaneis et posteris representate moribus et virtute. Huc accedit colendæ virtutis nobilior titulus, pontificalis apex, qui sicut episcopale officium fideliter adimplentes, ampliori gloria et honore coruscantes illustrat, sic timidos et ignavos abjectiori vililitate reddit inglorios. Sal enim infatuatum ad nihilum utile est, sed tanta abiectione vilescit, ut nec stercoribus comparetur, quibus agrorum infecunditas propulsatur. Nam, ut ait martyr Cyprianus: *Episcopus si timidus est, actum est de eo. Actum*, inquit, quia cum ipsum timor mundanus infecerit, superest ut ad omnia salubriter agende inutilis redatur. Charitas ergo timorem hunc expellat, ut populi ducem expediat, quia deficientis timore ducis exhortatio nequaquam militum potest animos ad fortia roborare. Et quidem nutu divino credimus accidisse, ut vos ad propulsandam matris vestræ, sanctæ scilicet Cantuariensis Ecclesiæ, injuriam diebus his contingat transfretare, quo præsentialiter resistere possitis eis, sicut nobis promisistis, qui eam gratis diutius effligerunt, et adhuc sine causa querunt animam ejus, ut auferant eam. Quod ut Dei præeunte gratia commodius facere valeatis, vos litteris domini papæ, tanquam armis bellicis, præmuniendos esse decrevimus, ut fratrum nostrorum corda possitis efficacius in Domino confirmare. Rogamus itaque et obsecramus in Domino Jesu Christo, et in virtute obedientiæ, et in periculo officii, honoris, et beneficii præcipimus, quatenus litteras apostolicas, quas vobis mittimus, ostendatis venerabili fratri nostro Rogerio Eboracensi archiepiscopo, et aliis fratribus et coepiscopis nostris, et inhibeatis auctoritate domini papæ, ne præfatus Eboracensis filio domini regis consecrationis munus dare, aut coronam, si hoc ab eo petiit fuerit, præsumat imponere. Sub eadem interminatione præcipimus, ut similiter hoc inhibeatis episcopis Londoniensi et

A Saresberienſi, et cæteris, si quis hoc ausus fuerit attentare. Hoc autem, Deo teste et judice, non in domini regis, aut filii sui, aut cujuscunque vel Ecclesiæ vel personæ ex conscientia nostra mandamus injuriam. sed ex necessitate, qua cogimur Ecclesiæ Cantuariensis jura pro viribus conservare. Parati enim sumus, si domino regi placuerit, filium suum coronare pro debito officii nostri, et utique honorem debitum et reverentiam exhibere. Non vacillet in his implendis, frater charissime, fides vestra, quia fidelis est Deus, qui vos supra vires tentari non patietur. Confidite ergo in ipso, qui vicit mundum, et meminere, quoniam qui timet pruinam, irruet super eum nix, et qui declinat arma ferrea, frequenter incidit in arcum æneum. « Degeneres animos timor arguet, » et fortiter ausos juvabit gratia, gloria coronabit. Quidquid agant alii, nobis persuasum est, quod constantiam vestram nullius turbinis impetus franget, quod quæ de ore vestro processerunt, et tam vestro quam episcopi Lexoviensis scripto continentur, et sub utriusque charactero impressa sunt et expressa, non erunt irrita. Absit enim, ut generosus sanguis sit animæ degenerantis habitaculum, ut per vos tituli patrum obliquerentur, ut quæcunque trepidatio mentis aut ignavia operis evincat patris, qui vos omnibus liberis prætulit, errasse judicium, et antiquæ charitatis excludat affectum. Nam ut pie creditur a fidelibus, ille feliciter in Deo, quam in liberis vivit, et studiosis operibus aut reprobis gratiam ejus promereri potestis aut demereri.

EPISTOLA CLVI.

AD HENRICUM WINTONIENSEM EPISCOPUM.

THOMAS Dei gratia Cantuariensis Ecclesiæ humilis minister, venerabili fratri HENRICO, Dei gratia Wintoniensi episcopo, scientiæ et consilii spiritum.

Quanto vobis compatiatur affectu, is optime novit, qui scrutator est cordium. Scimus quidem quam multa sint et magna, quæ vos turbent et moveant, et quam nulli vel pauci sint, qui spiritum vestrum roborant, et in hac tempestate confirmant. Sed viriliter agite, confortetur cor vestrum, ne inimici nostri prævaleant, et dolis et circumventionibus suis vos involvant. Capite potius vulpes, quæ vineam demoluntur. Inter colubros siquidem et tortuosos itinere incedentibus necessaria est serpentina astutia. Hæc vobis loquimur ut fratri, et dilecto in Christo.

Verum habemus aliquid adversum vos, in quo ob excessum vestrum non modicum tristati sumus. Si quidem pro certo accepimus, quod crucem vestram auream ab Ecclesia vestra alienaveritis, quod satis improvide et contra omnem canonum censuram factum interpretamur. Alienationes siquidem hujusmodi prorsus a canonibus inhibentur. Propterea vobis mandamus, et mandantes in virtute obedientiæ præcipimus, quatenus infra quadraginta diem post litterarum nostrarum susceptionem, præfatum

erucem ad Jus ac dominium Ecclesiæ, cui Deo auctore præsidentis, studeatis modis omnibus revocare. Quod si non effeceritis, ad præsentiam nostram a quadragesimo illo die infra duos menses, super causa alienationis factæ satisfactorius venire non differas. Valeat fraternitas vestra

EPISTOLA CLVII.

AD HENRICUM WINTONIENSEM EPISCOPUM.

THOMAS Dei gratia Cantuariensis archiepiscopus, et apostolicæ sedis legatus, venerabili fratri et amico charissimo, HENRICO Dei gratia Wintoniensi episcopo, salutem, et perseverantem in defensione matris Ecclesiæ zelum.

Vestra discretio non potest ignorare quæ sub oculis vestris, imo in conspectu circumjacentium remotarumque gentium, adversus Ecclesiam in regno Anglorum præsumpta esse noscuntur. Et quod sine timore divini iudicii non eloquimur, verendum est, ne dissimulatio nostra culpas auxerit præsumptorum, et impunitas aluerit audaciam delinquentium. Quinquennium jam exegimus exsules, et proscripti: innocentes, sine miseratione ætatis et sexus, sine reverentia conditionis aut ordinis, privati bonis, adducti exsilio, variis et atrocibus injuriis affecti sunt; sancta profanantur, bona diripiuntur Ecclesiæ, sacerdotes prohibentur implere legem Domini, et quas professi sunt exercere canonicas sanctiones. Et sub prætextu regis dignitatis pravitates obtinent, quas pridem sancti Patres in diebus suis, et in nostris sedes apostolica condemnavit. Sæpe commonitus est dominus rex, ut ista corrigeret, per episcopos, per abbates, per subdiaconos curiæ, per cardinales; et nunc tandem quasi peremptorio edicto per dominum Gratianum subdiaconum et notarium apostolicæ sedis, et magistrum Vivianum urbis veteris archidiaconum, ut aut per istos præsumpta corrigeret, aut in se et in terra sua, quam meruerat, animadversionem justitiæ sentiret. Ipsi vero ab eo non modo exauditi non sunt, sed in venerabili viro magistro Petro Carnotensi archidiacono, et aliis nuntiis, quos ad eum in verbis pacificis miserant, graves injurias exceperunt. Siquidem in omni mansuetudine domini papæ, et diuturnitate patientiæ nostræ, et exhibitione humilitatis, non quievit, aut mitigata est immanitas ejus, sed ab impunitate ferocior in deteriora semper excrevit. Ne ergo nos ulterior dissimulatio malitiæ consensisse convincat, et ante districti iudicis oculos, apud quem non est acceptio personarum, damnationi reos adducat, tantos excessus irrequisitos amodo præterire non possumus, nec audemus. Inde est, quod fraternitati vestræ in virtute obedientiæ, sub anathemate, in periculo dignitatis et ordinis, apostolica auctoritate et nostra præcipiendo mandamus, quatenus, nisi infra purificationem beatæ Mariæ dominus rex Ecclesiæ Dei et nobis ablata restituere, et proscriptos innocentes debita juris redintegratione revocare studuerit, et sacras Ecclesiæ sanctiones vigere permiserit, et clerum et

A populum, ut iustum est, sanctæ Romanæ Ecclesiæ obedire, extunc per totum episcopatum vestrum in omnibus ecclesiis omnia divina prohibentis officia celebrari, excepto baptismate parvulorum, et penitentia, et viatico, quod presbyteri clausis januis sine campanarum pulsatione, et omni solemnitate jucunditatis ecclesiasticæ pro necessitate salutis conficere permittuntur. Et si nec sic in flagello populi præfatus dominus noster rex antedictos excessus debita satisfactione correxerit, noveritis, et ei irrefragabiliter denuntiatis quoniam personæ ejus, quod inviti dicimus, cum pericula salutis nostræ, ut hactenus fecimus, ulterius auctore Domino non parcemus. Sub eadem quoque interminatione præcipimus, quatenus eos excommunicatos esse publice denuntiari faciatis, qui ecclesias, et ecclesiastica officia et beneficia, contra sacrorum canonum institutionem de manu laicorum accipiunt; qui clericos contra prælatorum suorum inhibitionem divina celebrare compellunt; qui nuntios domini papæ et nostros, ne Ecclesiæ necessitates prosequantur, impediunt; qui Ecclesias ad honorem Dei non patiuntur regulariter ordinari; qui divinæ legis institutionibus traditiones aut consuetudines hominum anteponendas prædicant, aut violenter compellunt anteferri. Sed ex nomine Gaufridum Cantuariensem archidiaconum, Robertum vicarium ejus, Ricardum de Iwelcestre, Willelmum Giffard, Nigellum de Sacca-Villa, Ricardum de Luci, Thomam filium Bernardi, Adam de Cheringis, quos pridem excommunicavimus, edicto canonico publicatis cunctis fidelibus esse vitandos. Ad hæc si Joannes decanus Saresberiensis, et Guido decanus Waltham, Joannes Cumin, Radolphus Landavensis archidiaconus, Wimarus presbyter, alumnus comitis Hugonis, Ecclesiæ Dei, quam læserunt, et nobis infra diem Nativitatis Dominicæ non satisfecerint, eos extunc excommunicatos esse publice denuntiatis. Confortamini in Domino, et in potentia virtutis ejus, quia fidelis est, nec vos supra vires tentari patietur. Sed ex quo cum Josue secundum legem sacerdotalibus insonueritis tubis, omnes munitiones hostium diruet et dissipabit ante faciem vestram. Probabitur autem hic, qui Christi sacerdotes sint, qui servi Belial. Dirigat in beneplacito suo Deus opera vestra, et Ecclesiæ suæ pacem sua virtute et gratia, vestroque ministerio reformare dignetur.

Waltero Roffensi episcopo sic, ubi habetur, *per episcopatum vestrum, per totam Cantiam*. Sicut Henrico, Wintoniensi, sic Norwicensi, Cicestrensi, Exoniensi, Wigornensi, Dunelmensi. David Meneviensi vero, et Nicolao Landavensi, et Godefrido Lavenensi sic: *Per totam terram ejus, quæ in episcopatu vestro est, in omnibus Ecclesiis*.

EPISTOLA CLVIII.

[AD EUNDEM.]

Venerabili domino, et tum provectione ætatis et morum sanetitate, tum consecrationis munere charissimo Patri HENRICO Dei gratia Wintoniensi epi-

scopo. THOMAS ejusdem miseratione Cantuariensis archiepiscopus, et sedis apostolicæ legatus, salutem, et beati certaminis cursum feliciter consummare.

Sinceritati vestræ, Pater amande, quatenus pro tempore licet, gratiarum referimus actiones super honesto et pleno sapientiæ, maturitatis, et divini timoris consilio, quod nobis in spiritu fortitudinis vestra charitas per præsentium latorem nuper exhibuit; et super solatio, quod necessitatibus nostris vestra sæpius pietas ministravit. Sic, Pater, decet virum sanguine generosum, et clarum atavis regibus, sed cultu virtutis et religionis exhibitione clarissimum, generis exornare nobilitatem. Sic debet Christi sacerdos et pontifex vitam consummare, ut vivens honorificet ministerium suum, et Ecclesiam Christi post fata ædificet, et relicto probitatis exemplo posteris, sua vel perfectiores faciat imitari vestigia. Memoria talium perpetua benedictione vigebit in generationibus sæculorum, et claritas eorum ut firmamenti splendor, in æternitatem fulgebit. Quia ergo talentum consilii et fortitudinis, præ cæteris conterraneis et cœtaneis, vobis inter innumera charismatum dona contulit Spiritus sanctus, paternitatem vestram, quanta possumus affectione, exoramus, ut confirmare munerit fratres vestros, et eos animare et roborare studeat, tam exhortationibus quam exemplis. Nam juxta Salomonem: *Frater qui adjuvatur a fratre, quasi civitas fortis et inexpugnabilis*. Et certe opera vestra de cætero debent esse sortium armatura. Et justum est, ut quod alii laudabiliter egerint, vestris, Pater titulus ascribatur. Quid enim poterunt operari, nisi quod provectionem sapientiæ, ætate et gratia videbunt operantem? Et quidem quod quidam eorum jam erecti sunt, et ut audivimus et speramus, contra membra Satanz nobiscum stare disponunt, vestris imputant meritis, qui quod nuper actum est, audierunt. Nec est quod vos in diebus istis vereri oporteat, cum vestram conditionem nobilitas, prudentia, copia rerum et amicorum, et ætatis reverentia a lesione, quæ potest in dissimili statu manentes infestare, defendant. Siquidem nonnulli fortasse, qui vobis crederent non esse parcendum, vestris, quos in hac tempestate verentur offendere, procul dubio parcent in vobis, et a domo vestra flagellum suspendet impius, ne quod promeruit propinquorum vestrorum ministerio veniat super eum. Cætera non exaranda litteris latoris præsentium fidei commissa sunt, vestris duntaxat auribus intimanda. Quem, si placet, ut probatæ veritatis fratrem admittetis et audietis. Valeat sanctitas vestra, Pater amande, et creationem suam, nostram parvitatem loquimur, in orationibus suis Deo commendare meminerit.

EPISTOLA CLIX.

AD EUNDEM.

Ad sanctorum gloriam, et reproborum damna-

tionem necesse est scandala provenire, ut tribulationibus probentur electi, qui probati per patientiam, coronam gloriæ acquirunt sibi, et aliis proficiunt per exemplum. *Sed vix illi, per quem scandalum venit!* Quia ergo Londoniensis episcopus non parcit a scandalis, et inter cætera patentiæ malitiæ opera, postquam Satanz traditus est, etiam contra matrem suam et vestram, S. Cantuariensem Ecclesiam, tam impudenti audacia et parricidalis impietate calcaneum erexit, ut dicere ausus sit se ei, ex quo translatus est, nullam debere subjectionem aut obedientiam exhibere, et ad cumulum damnationis suæ adjecit, quod cathedram archiepiscopalem Londoniam transferri faciet, fraternitatem vestram, de qua plene confidimus, quanta possumus affectione

rogamus, quatenus pro matre vestra defensionis clypeum opponatis filio Belial, qui præ cæteris allophyllis tanquam alter Goliath de Geth solus, auctore Domino, de castris incircumcisorum progredi non erubuit, nec timuit universalitatem filiorum Cantuariensis Ecclesiæ provocare ad certamen, dum matris eorum sanguinem sitit, et catholicæ pacis deserit unitatem. Scripserat domino papæ pro fratre nostro Eboracensi archiepiscopo, sollicitans eum etiam attestazione mendaci et mendosa, ut eum pateretur crucem deferre per provinciam nostram, nescio quid enolumenti sibi suspicans eventurum, si odio personæ nostræ Ecclesiam, cui ex professione fidem et obedientiam debet, quocunque læsisset modo. Sed Christus, qui Cantuariensem a

prima fundatione inter turbines varios et magnas multasque procellas rexit et fovit ecclesiam, misericorditer operatus est, ut in pleno consistorio per testes omni exceptione majores revelaretur falsitas et iniquitas ejus. Deo autem in primis gratias agimus, deinde vobis, et cæteris fratribus nostris, qui nos, ut oportuit, ex quo eum constitui anathemate condemnatum, ab illius participatione suspendistis, et tam illum quam cæteros excommunicatos nostros per episcopatum vestrum edicto publico jussistis evitari. Claruit hic fides vestra, constantia virtutis effulsit, quæ publicæ potestatis et officialium minas, æquæ ut blanditiis, mandatis Dei censuit postponendas. Liberastis conscientias vestras, famam

purgastis, dum tam verbo veritatis quam fortitudinis exemplo docuistis, quod *Deo potius quam hominibus oportet obedire*. Certum itaque habeat sinceritas vestra, quandoquidem tanta charitas Dei per Spiritum sanctum diffusa in cordibus vestris testimonio clari operis processit in publicum, servilli timore depulso et excusso, quod Deus cito Satanam conteret sub pedibus vestris, et de certamine proventum educet gloriosum. Et quidem tanto citius et gloriosius, quanto ferventius et constantius in incepta perseverabitis veritate. Unde vos oramus et obsecramus in charitate Dei, et obtestamur per fidem, per obedientiam, per sinceritatis affectionem, quam matri vestræ Cantuariensi Ecclesiæ debetis, quatenus ad tuendam di-

gnitatem et jura Cantuariensis Ecclesie, cui professionem exhibuistis, contra præfatum episcopum exurgatis in adiutorium nobis, et domino papæ scribatis et curiæ testimonium veritatis, quale filios pro matris iustitia reddere decet. Nam qui illud subtraheret in articulo tanti discriminis, procul dubio infidelis habendus esset, et infideli deterior, in quem jus exigeret usque ad interfectionem omnes fideles irruere. Nec tamen res ista quidquam potest habere periculi, cum veritas perspicua sit, et ut dici solet, lippis et tonsoribus patens. Sed quia maledictus est, qui gladium revocat a cruore, et pestilens flagellandus est, ut erudiatur sapiens ad salutem, se ipsi legis subiecit maledicto, quicumque parricidæ cum lapide non occurrat et gladio. Videtur namque præstare consensum, qui cum possit, non arguit aut impedit talia committentem. Et ne a nobis districtius exigatur, si eorum qui Ecclesiam persequuntur et quos ut pœnitentiam agerent, in multa patientia jam fere toto quinquennio supportavimus, magnas et manifestas ulterius dissimulaverimus culpas, fraternitati vestræ denuntiamus nos publice excommunicasse Gaufridum Cantuariensem archidiaconum, et Robertum vicarium ejus, Ricardum de Iwelcestre, Wilhelum Giffard, Ricardum de Luci, Adam de Cheringis, et item eos qui officia vel beneficia ecclesiastica contra sacrorum canonum institutionem de manu laica acceperunt, vel ea usurpaverunt propria temeritate. Similiter et illos, qui domini papæ nuntios aut nostros, ne Ecclesie necessitates prosequantur, impediunt. Vobis ergo auctoritate domini papæ et nostra mandamus, quatenus eos tales habeatis, et in episcopatu vestro haberi faciatis, quales haberi debere solemniter excommunicatos sacrorum canonum disciplina præscribit. Valeat semper in Domino vestra fraternitas et nos et causam Dei, quæ in manibus nostris est, sanctorum orationibus commendare meminerit. Valete.

EPISTOLA CLX.

AD EUNDEM.

THOMAS Cantuariensis archiepiscopus, HENRICO Wintoniensi episcopo.

Ut aliquid simile loquamur Apostolo, gratias agimus Deo, qui odorem notitiæ suæ per vos manifestat in omni loco. Quoniam sicut fama vulgante didicimus, fides vestra in articulo tempestatis hujus enituit, et charitas abundantius effulsit, in columna virtutis ostensa, et exhibita auctoritate pontificis. Nam adversus filios diffidentiae, viros Belial, in quibus Satanas mysterium iniquitatis patentius operatur, cum nuper Ecclesiam scindere voluissent, et extortis juramentis attentarent obedientiæ et fidei virtutem extinguere, vos ex adverso ascendentes opposuistis murum pro domo Israel, et audaciam eorum resististis in spiritu et virtute Helix, et corda eorum qui pavebant, in clero viriliter, ut oportuit, erexistis, ut Deum hominibus prætimerent, et vestigia patrum sequerentur in Christo. Ille vobis in his adiutor

Astitit, qui perseverantiam vestram coronabit in cælo, et hic in brevi consolabitur, subiciens eos pedibus vestris, qui adversus Dominum de permissa sibi momentanea potestatis indulgentia fallaciter gloriantur. State ergo in eo quod cœpistis, et quam jam promerulstis coronam fidei intermissione nolite rejicere, quibus anchora per gratiam Dei firmiter hæret in portu consolationis et pacis. Provideat, ne vos interim circumveniat inimicus, ne adversus apostolicam sedem, vel matrem vestram S. Cantuariensem Ecclesiam vobis consentientibus præsumatur, quod et illi laborem, et vobis jacturam et pœnitentiam valeat in posterum generare. Accepimus enim, quod quidam malitiosi homines domino regi persuadere nituntur, ut in injuriam matris vestræ Cantuariensis Ecclesie, et læsionem nostram, filium suum, quem Deus et ab hoc infortunio et ab omnibus malis liberet, per manum venerabilis fratris nostri Eboracensis archiepiscopi in regem faciat coronari. Quod quia contra dignitatem Cantuariensis Ecclesie esse dignoscitur, dominus papa litteris suis, quas vobis et aliis fratribus nostris transmittimus, tam præfato archiepiscopo quam omnibus episcopis Angliæ interdicat. Et nos si aliud, quod absit idem archiepiscopus aut alius attentare præsumperit, ne vos aut aliquis de fratribus nostris, aut his qui nobis, sive ex officio legationis, sive jure metropolitico subjecti sunt, assistere audeat, apostolica et nostra auctoritate in virtute obedientiæ, et sub anathemate penitus inhibemus, appellantes adversus omnem animam, quæ se tantæ præsumptioni attentaverit immiscere, diemque præligimus purificationem sanctæ Mariæ.

EPISTOLA CLXI.

AD EUNDEM.

THOMAS Cantuariensis archiepiscopus, HENRICO Wintoniensi episcopo, salutem et in via mandatorum Dei promereri bravium supernæ vocationis.

Fraternitatem vestram latere non possunt calamitates, quæ jam per sex annos Anglicanam Ecclesiam affligerunt, sed præcipue matrem vestram Cantuariensem Ecclesiam, ejus, sicut ex charitate debetis miseris compati, sic ex necessitate officii et exhibita professione vos oportet ipsius obedire mandatis. Expectavimus pœnitentiam domini regis, sed ille, quod sine mœrore non possumus eloqui, adeo misericordia Dei, et sacræ Romanæ Ecclesie, et nostra patientia semper abusus est, ut novissima ejus in dies Ecclesie Dei fierent deteriora prioribus. Ne ergo sanguis ejus et compereuntis Ecclesie requiratur a vobis, fraternitati vestræ in virtute obedientiæ, in periculo ordinis, honoris et beneficii præcipiendo mandamus, quatenus infra quindecim dies a suspensione præsentium, per totam diocesim vestram omnia divina, præter baptismum parvulorum et pœnitentias morientium, prohibeatis officia celebrari, et ab omnibus subditis vestris interdicti sententiam, quantum in vobis est, faciatis inviolabiliter observari;

portitori prospicientes sicut vobis et ordini vestro cupitis esse prospectum. Alioquin vos ipsos exinde ab episcopali et sacerdotali officio noveritis esse suspensos. Deo potius quam hominibus obedientem reverentiam vestram coronet Pastor pastorum, et Princeps principum immarcescibili æternæ gloriæ corona.

Eodem modo omnibus episcopis Angliæ et Guallie.

EPISTOLA CLXII

AD ROBERTUM PRÆPOSITUM ARCENSEM.

THOMAS Cantuariensis archiepiscopus, ROBERTO præposito Arcensi.

Si verum est quod audisti, dominum papam latere non potest, et per nuntios nostros, quos in dies singulos expectamus, super hoc confidimus certiorari in brevi. Et perfecto honorem domini et amici nostri ita desideramus, sicut salutem animæ propriæ. Honore siquidem maximo a Christo dignissimus est; cui ad gubernandum imperium adest nobilitas, generi prudentia suffragatur, delinquentes coercet rigore justitiæ, subditos obtemperantes juri mansuetudinis moderatione gubernat, Ecclesiam veneratur et protegit, in ministris suis suscipit Christum, et universorum gratiam benignitate provocat, et obsequiis et beneficiis obligat affectiones. Non sævit in subditos, nec occasiones justitiæ prætextu querit, quibus cruciei pauperes, exhauriat et spoliât copiosos. Hæc fuit quondam nobilium generositas Augustorum, quam iste præter conterminalium et coætorum morem exerceat, qui saluberrime et honestissime novit, et consuevit.

Parcere subjectis, et debellare superbos.

Prompto igitur et prono animo, si Deus opportunitatem dederit, operam dabimus et diligentiam, ut fiat ei in beneplacito Domini secundum desiderium tuum. Sed vellemus ut res ordine suo rite procederet, ut gradus honoris debitus non deesset ascendentem, qui medius est inter habitum et optatum. Satis dictum credimus sapienti. Tu interim ut diligenter audias et exaudias quæ tibi per magistrum Robertum clericum nostrum significata sunt, petimus affectuose, rogantes affectuosius, ut colloquio regis et comitis, quod speratur, a nobis revertens valeas interesse.

EPISTOLA CLXIII.

AD CLEREBALDUM ELECTUM ET FRATRES SANCTI AUGUSTINI.

THOMAS Cantuariensis archiepiscopus CLEREBALDO electo, et fratribus S. Augustini.

Quanto majorem cum S. R. Ecclesia contraxistis familiaritatem, tanto ad reprimendas et ulciscendas injurias ejus viriliter debetis insurgere, et qua fide illi adherere, operis testimonio comprobare. Nec dubium est in illius redundare injuriam, quod ipsa prohibente tot et tanta, et tandiu adversus Anglicanam Ecclesiam, et nos, et nostros præsumpti sunt, cum dominus rex sæpe per episcopos, per ab-

bates, subdiaconos curiæ, per cardinales, quos vel pro sua reverentia oportuerat exaudiri, commonitus sit, et semper facta sint novissima ejus atrociora prioribus. Quia ergo verendum est ne nos ulterior dissimulatio reos damnationi obliget ante Deum, apud quem non est personarum acceptio, et qui potentes potenter punit, vobis in virtute obedientiæ, sub anathemate, in periculo dignitatis et ordinis, domini papæ, cujus vice fungimur, et nostra auctoritate præcipiendo mandamus, quatenus, nisi infra Purificationem beatæ Mariæ præfatus dominus noster rex Ecclesiæ Dei et nobis condignam satisfactionem exhibuerit, extunc a divinatorum celebratione cessetis, excepta pœnitentia, et viatico, et his quæ religionis favore locis venerabilibus indulget sacrorum canonum dispensatio, januis clausis, exclusis personis laicis, sine campanarum pulsatione, et solemnitatibus, quas in tempore quietis et lætitiæ consuevit Ecclesia exercere. Ad hæc Gaufridum Cantuariensem archidiaconum, et Robertum vicarium ejus, Ricardum de Ivelcestre, Nigellum de Sacca-villa, Willelmum Giffard, Ricardum de Luci, Adam de Cheringis, quoniam publice excommunicati sunt, præcipimus a cunctis fidelibus evitari, quia qui scienter excommunicato communicat, se ipsum pari anathemate ex immunda participatione condemnat.

Similiter conventui Malmesberiensi, et Laurentie abbati Westmonasterii, abbati S. Albani, et S. Edmundi, sic: extunc prorsus a divinatorum celebratione cessetis, et in cunctis ecclesiis, quæ ad vestram jurisdictionem pertinent, omnia divina prohibeatis officia celebrari, excepto baptismo parvulorum, et pœnitentia, et viatico.

EPISTOLA CLXIV.

AD EOSDEM.

THOMAS archiep. Cant., CLAREMBALDO viceabbati Sancti Augustini et fratribus ejusdem loci.

Quanto sacrosanta Romana Ecclesia monasterium vestrum ampliori donavit gratia, tanto diligentius ipsius debetis obedire mandatis. Unde de vestra obedientia spem certam concipientes, vobis auctoritate domini papæ et nostra, in virtute obedientiæ, in periculo honoris, officii et gradus, præcipiendo mandamus, quatenus infra quindecim dies a susceptione præsentium abstineatis ab omnibus divinis, excepta pœnitentia morientium et viatico, quod januis clausis et laicis exclusis, privatim fieri necessitas exposcit, et religionis impetrat favor. Sub eadem quoque interminatione præcipimus, ut in omnibus locis jurisdictionis vestræ ecclesiasticæ faciatis, quantum in vobis est, hujus interdicti sententiam inviolabilem observari.

Similiter Westmonasterii, Sancti Albani, Sancti Edmundi et Malmesberiensi abbatibus:

EPISTOLA CLXV.

AD ARTHURUM DE BURGIS ET COMPLICES EJUS

THOMAS Cantuariensis archiepiscopus ARTHURO de Burgis et complícibus suis.

Relatum est nobis, Arthure, te in nos pariter et A Ecclesiam Cantuariensem, matrem tuam, gravissime et sine meritis deliquisse. Tu enim, ut nobis suggestum est, cum tuis complicitibus in Hiberniam ire præsumpsisti, et ibidem falsa prædicatione tuorum et tua machinatus es, ut clerici et episcopi Gwalliæ ordines et sacramenta reciperent, quasi a novo metropolitano sibi in Hibernia constituto. Veraciter scias, quoniam immoderate deliquisti machinando talia, et veniendo in damnum Cantuariensis Ecclesiæ, matris tuæ. Et ideo mandando tibi præcipimus, et in periculo ordinis tui et beneficiorum tuorum tibi hermiter injungimus, ut tu cum Laurentio, et Jacobo, et Hueteridio in purificatione beate Mariæ nostro te conspectui repræsentares, satisfactorius Deo, et nobis, et Ecclesiæ Cantuariensi, matri tuæ, super his et aliis, quæ tibi obijciuntur.

EPISTOLA CLXVI.

AD RICARDUM PRIMUM ET CAPITULUM DE DOVERA.

Lamentati sumus, etc. *Vide similem epistolam ad conventum Cantuariensem directam.*

EPISTOLA CLXVII.

AD SIMONEM PRIOREM DE MONTE DEI ET BERNARDUM DE CORILO.

THOMAS, archiepiscopus, SIMONI, priori de Monte Dei, et BERNARDO de Corilo.

Mandatum domini papæ dilectio vestra suscepit, quatenus regem conveniretis, ut nobis ecclesiam nostram et gratiam suam restituat, nos autem parati fuimus, sicut præsentibus vidistis, ponere nos omnino ad honorem Dei et suum in misericordia Dei et sua. Non placuit ei hæc forma, nisi nos obligaremus ad observationem consuetudinum, quas antecessores nostri suis servaverant. Promissimus ergo quod eas libenter servaremus, quatenus possemus *salvo ordine nostro*: et quod quicquid secundum Deum poterimus, pro recuperanda gratia ejus devotissime faceremus. Noluit acquiescere nisi absolute promitteremus nos illas consuetudines servaturos. Quod quidem omnino non licuit, quia aliquæ earum a sede apostolica condemnatæ sunt. Parati vero sumus, si placuerit illi, juxta mandatum apostolicum recipere ecclesiam et sedem nostram cum gratia sua. Et recolite quod dominus papa, qui vobis in virtute obedientiæ mandati sui executionem injunxit, non præcepit nos aliquibus promissionibus obligari. Supplicamus ergo sanctitati vestræ, ut obedientiam domini papæ exsequi non gravemini, sed eam, sicut sanctos viros decet, studeatis implere,

EPISTOLA CLXVIII.

AD FRATREM NICOLAUM DE MONTE ROTHOMAGENSIS.

THOMAS Cantuariensis archiepiscopus, fratri NICOLAIO de Monte Rothomagensi.

Novit fraternitas tua, quam patienter sustinuerimus damna, injurias et contumelias nobis et nostris illatas a dilectissimo domino nostro, illustri rege Anglorum. Ipse autem abusus patientia nostra, ad sanctissimæ matris suæ prorupit injurias, sponsam loquimur cru-

PATROL. CXC.

fixi: et illam non est veritus ancillare, pro cujus liberatione Filius Dei Deus morte turpissima voluit condemnari. Monuimus eum affectu patris, sæpius fide domino debita supplicavimus, corripuimus eum auctoritate pastoris; ipse autem in persona nostra patrem suum itidem fidelem contempsit et pastorem; et ne quid de cætero veritati subtractum sit, quod Ecclesiæ periculosius et ei perniciosius est, illum, cujus gerimus vicem, aprexit Christum. Habeantur hæc vana, et contemnat, ut solet, si Filius Dei Ecclesiæ non dicit pastoribus: *Qui vos spernit, me spernit; et qui tangit vos, tangit pupillam oculi mei*. Processit ulterius sollicitudo nostra, ut ei pro pace Ecclesiæ summus pontifex devotas preces ageret, sed non est exauditus. Exhortationes adhibuit, et **B** surdum reperit auditorem. Increpationes adiecit: contemptæ sunt. Tandem apostolica tuba comminationes intonuit, sed nec sic potuerunt fides et ratio excitari. Ne quid autem omitteremus ex contingentibus, rex Francorum, qui ei est amicus et dominus, omnem adhibuit operam et diligentiam, sed nec ille pro sua reverentia meruit exaudiri. Ad colloquium ejus accessimus, sed nec ad conspectum ejus sumus admissi, neque nostri nonis aut causæ Dei permisit fieri mentionem. Misimus ei postea nuntios venerabiles viros, et litteras patentes, ut peterat, in quibus expressa erat et justitia Ecclesiæ, et nostræ petitionis sententia, sed noster et eorum labor, quantum in eo est, cessit in cassum. Secuti **C** eramus fidem dominæ imperatricis, sicut tu nosti, et ipsa ignorare non debet, sed nos usquequaque delusit. Quia ergo hæc patientia nostra Ecclesiæ Dei perniciosa est, sed perniciosior illi, cujus novissima sunt in dies deteriora prioribus, nobis autem perniciosissima, quos oportebit ante tribunal sponsi non modo de operibus propriis, sed etiam de sanguine ejus et afflictione sponsæ reddere rationem, pro certo noveris, et dominæ imperatrici intimes, quod in personam ejus et terram in brevi, imo in brevissimo, vita comite et Deo auctore, exeremus gladium Spiritus sancti, qui omni gladio ancipiti penetrabilior est, ut sit in ruinam indurata carni, et sopito, imo extincto spiritui in salutem. Persuadeas ergo dominæ nostræ ut nos de cætero habeat excusatos in eo, quod ultra **D** dissimulare non licet: sciatque pro certo, quod si revixerit filius ejus, et consilium matris recipiat audiens vocem Dei, nos ad honorem Dei et voluntatem suam paratos inveniet. Interim morientem filium pariter, et eodem lugemus affectu, qui salutem ejus et honorem, Deo teste, consensu desiderio optamus pariter et oramus. Hæc cum dolore, lacrymis, singultibus, et suspiriis loquimur, tanquam viscera nostra de clastro pectoris acerbitate ferri extracta, ardore cantherii inuramus. Quod et Deus scit, in cujus injuriam exercere ulterius non debemus impiam pietatem, ei in terris matrem, patrem, sororem præferendo, vel Dominum. Non est dolor sicut iste dolor, sed charitas Dei, et utilitas et honor ejus qui curatur, nos urget, ut hunc forti animo sufferamus. Valeat.

Saluta et sollicita fratres nostros, ut nobis im- A
petrent spiritum consilii et fortitudinis, orantes pro
domino rege, ut ei adsit spiritus poenitentiae et pieta-
tis, quatenus pax ejus Ecclesiae Dei et nobis reformetur in Domino.

EPISTOLA CLXIX.

AD SILVESTRUM LEXIOVIENSEM THESAURARIUM.

Suus sibi salutem, et animi constantiam.

Si grandia loquitur, si magnalia sparsit, qui juris-
jurandi commercio miranda novit inducere, haud
mirandum erodimus, nec rei admiratione cedendum.
Satiis enim est alieno scelere nos perire, quam metu
nostro. Tu vero certum tene, quidquid mentiatur
juratoris famosa dolositas, quidquid minetur tortoris
austeritas captiosa, quia per misericordiam Dei neque
mors, neque vita, neque angeli, neque alia creatura
poterit nos separare a charitate Dei, quae subiecit nos
tribulationi. Sed nec ipse Papiensis, donec com-
pleatur iniquitas, donec evanescat conditionis nostrae
pressura. Ad cujus congressum incipiant saltem
apparere vestigia libertatis, et ut eodem studio, quo
ipsa parabatur deleri penitus, quo libertas funditus
credebatur exstingui, vestigia se praebeant eminens-
tiora, resurgat fortior ipsa libertas. An ignoras ar-
bores magnas diu crescere, una hora extirpari?
Stultus est, qui fructus earum expectat, nec atten-
dit casum. Sit itaque tibi solatio, quia inimici Domini,
mox ut honorificati fuerint et exaltati, deficientes
quemadmodum fumus deficient. Expecta parumper,
quid insibilis eis sibilus auræ lenis, in quo Do-
minus: et *Adhuc pusillum, et non erit peccator.* C
Quæretur locus ejus, et non invenietur. Hæc hactenus.

Cæterum si absolendi sunt, vel jam absoluti ex-
communicati nostri, constat eos esse vel fuisse ex-
communicatos. Sequitur ergo eis scienter commu-
nicantes contraxisse in se maculam excommunica-
tionis. De cætero, quid inde proveniat, ipsi viderint.
Unam scias, non tulit gratis beneficia ipsa Joannes.
Habet aliquid compensationis, quod pro certo audi-
vimus a redeuntibus de curia: renuntiatum esse per
ipsum ex parte regis consuetudinibus regis, quas
petebat a nobis rex sibi concedi et confirmari. Hoc
optamus ministerio tuo pervenire ad aures regis, et
comprovincialium tuorum, tacito tamen me auctore.
Sed nec te ipsum patiaris inde laudari auctorem, ut
vel sic de presumptione sua confundatur garrulus
ipse, et de gloriæ suæ vanitate reddatur inglorius.
Tu autem confortare, et esto robustus, quia per
misericordiam Dei propior est nostra salus, aut cen-
suræ vigor, quam mentiatur falsa crudelitas, quam
sibi blandiatur adulatio deceptoria. Valete.

Valeat et tecum Nicolaus noster. Expectate
finem gaudentes, qui cuiusque rei solet esse pars
potissima, nnde sortiatur sibi quisque certum ex-
pectationis suæ experimentum. Valote iterum, et
semper.

EPISTOLA CLXX.

AD CANONICOS PANTANEÆ.

Salutem, et in fortitudine patientiæ consolationem
Domini fiducialiter expectare.

Non turbetur cor vestrum, dilectissimi, neque
formidet, quia Deo propitio salus Ecclesiae et pax
vestra in januis est, prioremque vestrum, qui per
nos incolumis et lætus transitum fecit, voti compo-
tem recipietis in brevi. Interim non deficiat vestra
fides, quia quod prudentiam vestram tenere memo-
riter constat, *væ* perpetuum his denuntiat, qui
sustinentiam perdiderunt, et in fide perseverantibus
corona gloriæ reposita est in sinu Patris misericor-
diarum, qui superbos humiliat, et exaltat humiles.
Nec est de ejus auxilio diffidendum, si patientibus
plerumque pro voto non exhibetur, quia sicut Apo-
stolus docet, patientia per tribulationis angustias
probat, et clarius enitescit, virtusque proficiens
nobilitatur generosa sobole meritorum, quibus au-
gustiore gloria coronatur in præmio. Est autem
procul dubio Christianus infideli deterior, qui sic
Deum justitiæ suæ et misericordiæ, et veritatis pu-
tat immemorem, ut Ecclesiae et pauperum Christi
tortores suspicetur evadere posse judicium Dei, et
lacrymas contra promissum veritatis perpetuandas
in oculis sanctorum. Accipiant quidem impij inter-
dum a Domino potestatem momentaneam in filios
gratiæ, et eorum ministerio purgentur, aut proben-
tur, aut custodiantur. Sed beatus Job, exemplar
patientiæ et virtutis, exemplum fidelibus et argu-
mentum datus est, quod diu non relinquet Dominus
virgam peccatorum super sortem justorum. Si ergo
Satanitarum spiritus accepta potestate intumuit con-
tra vos, si a loco, in quo morum conversionem
et stabilitatem Deo promisistis, perturbare conatur,
constantia vestra in Domino nequaquam sibi credi-
tam deserat stationem, sed expectet salutare Do-
mini, et clypeum patientiæ, sicut decet sanctos,
terroribus et minis confidenter opponat. Prohibe-
mus autem auctoritate domini papæ et nostra in
virtute obedientiæ et periculo salutis et ordinis ve-
stri, ut nulla ratione recedatis ab ecclesia et domi-
bus vestris, nisi vis atrocior, et inexorata necessitas
invitos et coactos extraxerit. Nos autem ex speciali
mandato domini papæ comitem Hugonem solemniter
excommunicavimus, et præcipimus in virtute
obedientiæ, et periculo salutis et ordinis vestri,
quatenus denuntiatorias nostras venerabilibus fra-
tribus nostris Willelmo Norwicensi et Nigello Eliensi
episcopis tradatis, ut sententia, quæ ex sedis apo-
stolicæ procedit arbitrio, robur debitum consequatur.
Cavete autem modis omnibus, ne in absentia
prioris vestri compositionem vel aliud faciatis, quod
in damnum Ecclesiae valeat redundare.

EPISTOLA CLXXI.

AD GILBERTUM DE SEMPLINGHAM.

THOMAS Cantuariensis archiepiscopus, GILBERTO de
Semplingham, salutem et in spiritu mansuetudinis
congregare dispersos Israel.

Nos vobis alia vice scripsisse meminimus, ut fratres nostros, qui occasione juramenti servandæ professionis, quod nulla, sicut audivimus, religionis alienius institutio exigere consuevit, dispersi sunt, revocaretis, remisso tanti scandali juramento, et eos ea moderatione de cætero tractaretis, quæ culpas cohibere et purgare sufficiat, et patrem et pastorem deceat animarum. Hoc ipsum præcipit et dominus papa, cujus non obedire mandatis maximi sceleris instar est, et idololatriæ crimini comparatur. Sed, sicut fratrum vestrorum indicat quærimonia sæpius iterata, nostrum contempsistis aut dissimulastis mandatum, nec de Ecclesia curastis adhuc tantum scandalum amovere. Scitis tamen, quod Dominus, cujus essentia veritas est, et verba vita, ei *Væ* denuntiat imminere, *per quem scandalum venit*. Inde est, quod fraternitati vestræ, quam, sicut Deus novit, sincera in Christo diligimus charitate, iterata præceptione mandamus, in virtute obedientiæ jubentes, quatenus fratres vestros revocare et congregare studeatis, et unitatem pacis reformare in domo Domini, ne nos ex mandato apostolico aliquid in vos durius statuere compellamur. Rogamus etiam, monemus, consulimus, et Christi vice et qua præeminemus auctoritate præcipimus, ut sic zeli, quem habetis in Domino, rigorem temperetis, quo laboris nostri fructus valeat permanere, et ne post dies vestros tanti laboris opera pereat et impensa. Nam, ut nositis, qui nimis emungit, elicit sanguinem, et immoderatio noverca salutis est. Precamur etiam, ut præsentium laboribus, si deliquerunt in aliquo, misericordiam impendatis, et peregrinationem nostram sanctorum, qui vobiscum sunt, orationibus commendati

EPISTOLA CLXXII.

AD EUNDEN.

THOMAS archiep. Cant. GILBERTO, canonicis, fratribus et sororibus et omnibus ordinis de Semplingham.

Quantum te, frater Gilberte, in persona tua omnesque ordinis de Semplingham hactenus dilexerimus et adhuc diligamus, novit Deus, nosti et tu, Gilberte; novit etiam ordinis universitas. Nos enim teste conscientia, ordinem et ordinis universitatem spiritualius præ omnibus aliis ordinibus semper dileximus, fovimus et manutenuimus. Et idcirco quanto magis vos diligimus, tanto magis perturbamur et dolemus cum talia a vobis et ordine vestro oborta fuisse audimus quæ non solum oculos hominum offendunt, sed etiam ipsum Deum. Non enim credebamus, cum vos ita specialiter præ cæteris dilexerimus, vos aliquid magni in ordine vestro facere debuisset, nisi de consilio et conscientia nostra. Pervenerunt autem ad aures domini papæ, pervenerunt et ad nos quondam maxima scandala, quæ et ab ordine et ab domibus ordinis vestri oborta sunt, quæ etiam per maximam orbis partem ignominiose sunt divulgata. Itaque ad hæc scandala corrigenda, et omnino per Dei misericordiam ab ordinis universi-

tate extirpanda, noscat universitas vestra dominum papam nos constituisse et ut ea corrigamus et ordinem et domos ordinis in melius ordinemus, in mandatis nobis dedisse. Et idcirco tibi, frater Gilberte, mandando præcipimus et in virtute obedientiæ, in periculo possessionum necnon et sub sententia anathematis firmiter injungimus, quatenus litteras domini papæ et nostras condigna reverentia suscipias et eas coram ordinis tui universitate legi facias. Nihilominus tibi sub anathemate præcipimus quatenus infra terminum a domino papa litteris suis tibi constitutum quæcunque tibi mandaverit, omni occasione et excusatione remota diligentissime labores perficere. Quod nisi feceris, nos juxta mandatum a domino papa susceptum, volente Domino manus operi apponemus, et sicut litteris suis nobis mandavit omnia Deo cooperante studebimus adimplere diligenter et perficere. Veruntamen si de consilio tibi mandando præcipimus, ut te in Purificatione beatæ Mariæ nostro conspectui repræsentares responsurus et satisfactorius domino papæ et nobis de inobedientia et aliis quæ tibi de ratione poterunt objici, nisi omnia juxta tenorem litterarum domini papæ et infra terminum tibi ab eo constitutum opere complexeris.

EPISTOLA CLXXXII.

AD MAGISTRUM VIVIANUM.

THOMAS Dei gratia Cantuariensis Ecclesiæ minister humilis, et apostolicæ sedis legatus, magistro VIVIANO fideli suo, et sanctæ Romanæ Ecclesiæ advocato, salutem et per omnia recte sapere et intelligere.

Habita ratione legationis tibi commissæ et negotii crediti, utinam ex accessu tuo ad dominum regem Angliæ nihil deperisset de substantia negotii, in nullo derogatum fuisset auctoritati te mittentis, nihil attentatum, dictum, aut actum dispendio, et nostro. Quatenus enim in hoc facto partes se extenderint tux, cum semel functus sis officio tibi commissio, sive bene sive male, præstitit temporis præfinitio ad legationem explendam te scientem jura, professum legibus, satis per omnia cautum reddere debuerat. Vide ergo ut prudenter sapias, et prudenter incedas, ne fias in fabulam et magnatibus in derisum. Verum si auctoritate propria novum sortitus es ac recens legationis officium, pareat cujus interest, et inde sustineat onus, ad quem spectabit emolumentum, me autem in nullo obligat jurisdictio. Et quidem quod dicis te habere socium in labore camerarium summi et magni cardinalis, presbyterum loquor gerentem domini sui personam, non minus admiror consortis istius presumptionem, quam personæ principalis in hac parte sollicitudinem. Et si cujus id actum est periculo, curam sui habeat, quomodo cautius possit ejus presumptionis vitare periculum. Satis credo dictum esse sapienti. Gratias habemus tamen sollicitudini tux, quam geris super pace nostra et nostrorum, utinam non minus prudenter quam sollicitè. Sed timco ne ar-

gutiis et verborum anfractibus, cum quibus tibi res agitur, pereat, quod absit! opera tua et industria, et sic lædatur sollicitudo laborantis. Cæterum quod hortaris nos, ut descendamus ad colloquium regum, quod habituri sunt die Dominica proxima apud S. Dionysium, qua certitudine, qua spe pacis, qua ratione, cum tanta instantia hoc feceris sicut ex mandato tuo intelligere non possumus, sic te ad nostri vocationem tam facilem fuisse plurimum miramur. Verum ob reverentiam S. Romanæ Ecclesiæ, et tui dilectionem, licet in incertum, ut timemus, ad tuam instantiam die Veneris per Dei misericordiam apud castrum Corbolii tibi occurreremus, ut citius audiamus per os tuum, quem laboris et operis tui fructum consequi debeamus, et tu quid honoris et gloriæ. Vale, et provideat tibi Deus, ne capiaris in regis muscipula, quam secum contrahentium vix aliquis potuit evadere.

EPISTOLA CLXXIV.

AD R. ABBATEM ET WILLELMUM PRIOREM DE VALLE.

Venerabilibus fratribus R. abbati, et WILLELMO priori de Valle, THOMAS Cantuariensis Ecclesiæ minister humilis, salutem.

Meminisse potest vestra dilectio, quod sicut in transitu magistri Gerardi clerici, et amici nostri, turbati fuimus, ita per vos, audita reversione ejus, admodum exhilarati sumus. Ei ergo, per te, dilecte frater prior, et per clericum nostrum magistrum Joannem familiarem ipsius, dedimus consilium, quod, Deo teste, honori et utilitati suæ pro tempore magis credidimus expedire. Ipse vero motum animi sui sequi præferens, ad domini regis Anglorum est conversus obsequium, obligans se, sicut pro certo accepimus, fidelitatis et juramenti vinculo. Et utinam sic versetur ibi, ut nec Deum offendat, nec lædat famam! Novit ille, cui de operibus et verbis, et ipsius animæ motibus reddituri sumus in districto examine rationem, quoties per litteras et nuntios, et quanta affectione institerimus summo pontifici, ut nobis eum revocandi licentiam daret, excusantes recessum ejus sub prætextu licentiæ, quam se memoratus Girardus dicebat a sede apostolica impetrasse. Sed dominus papa se hanc dedisse constanter inficiatus est. Tandem vero redierunt nuntii nostri ab apostolica sede, qui nobis revocandum licentiam attulerunt, et formam juramenti præscriptam, quo præstito præcipitur absolvi, et in pristinum reponi statum. Rogat etiam dominus papa Christianissimum regem Francorum, ut ei exinde gratiam suam restituat, et in terra sua, more solito, manere permittat. Mittimus vobis et juramenti formam, et apostolicarum rescripta litterarum, rogantes attentius, ut hæc ad notitiam ejus venire faciatis, et consulatis ei, quatenus salutis et honestati suæ provideat, et testimonium conscientiæ et tremendum judicium Dei, sæculi pompis et bonis mundanalibus anteponat. Nos autem, si mandatum domini papæ voluerit adimplere, ipsum ut filium charissimum recipiemus, et fraterna tractabimus charitate. Si vero id recu-

averit, rogamus ut et hoc nobis vestra diligentia innotescat.

EPISTOLA CLXXV.

AD MAGISTRUM LOMBARDUM.

THOMAS Cantuariensis, magistro LOMBARDO.

Mittimus ad vos latorem præsentium, pauperem clericum, qui de quadam paupere domo est monialium in Anglia Deo servientium, qui vobis diligentius viva voce miseras et mala sua exponet quæ vos volumus domino papæ pariter cum malis et damnis nostris et Ecclesiæ Cantuariensis, quanto sollicitius poteritis, exponere. Qualiter autem rex Angliæ, dum apud nos fuissetis, Ecclesiam Anglicanam, et præcipue Cantuariensem bonis suis et possessionibus spoliaverit, et eam funditus destruere conatus sit, bene novit vestra discretio. Nunc autem de novo in ignominiam nostram, et ad nostræ confusionis augmentum, per sedem nostram, et per omnes episcopatus vacantes amplissimam communiter extorquere exactionem, quod et per omnes ecclesias regni sui, tam magnas quam etiam parvissimas, fieri præcepit: scilicet interventu episcoporum concessit eis pariter et abbatibus, et minoribus clericis per singulas ecclesias hanc fieri per seipsos exactionem, ut effecta, quidquid exinde perciperent, eidem regi et suis omnino assignarent. Præterea nemora, et villas, et omnes possessiones Cantuariensis Ecclesiæ omnino destruit, alienat, et confundit. Ad hæc autem litteras suspensionis nostræ, quas dominus papa, sicut ei placuit, quamvis non promeruerimus, illi regi transmisit, per totum regnum suum, nec non specialiter per omnes ecclesias, tam parvissimas quam magnas, publice ad confusionem nostram divulgavit. Hoc quidem vobis veraciter dicimus, quod et domino papæ, quanta poteritis sollicitudine, et amicis nostris intimetis. Latoris præsentium negotium, quantum justitia patitur, amore Dei et nostro moveatis.

EPISTOLA CLXXVI.

AD QUendam AMICUM.

THOMAS Dei gratia Cantuariensis archiepiscopus, dilecto suo N...., salutem et sinceræ dilectionis affectum.

Noscat dilectio tua nos, divina favente gratia, sanos et incolumes, et omnia fore prospera. De tuæ quidem dilectionis sinceritate admodum plenariam spem obtinentes atque fiduciam, tibi mandamus, quatenus per latorem præsentium, vel per alium, quæ matri tuæ sanctæ Cantuariensi Ecclesiæ et nobis, sollicitius inquirens, noveris expedire, absque dilatione maturius procures significare.

EPISTOLA CLXXVII.

AD HENRICUM II, REGEM ANGLIÆ.

HENRICO regi Angliæ, THOMAS Cant. arch.

Duplicis rationis consideratio nos hortatur, ut ea, quæ vobis expedire cognoscimus, regiæ majestati prompto et fideli animo suggeramus. Cum sublimitati vestræ sincerissima dilectione connectimur, et extremi retributionem judicii interioris oculi lumine

contemptamur, videmus profecto, quantum nobis imminet, et ea quæ ad gloriam terreni honoris pertinent, prompta vobis exhortatione suggerere, et ab eo quod vestræ salutis renititur, officiosissima vos sollicitudine revocare. Maxime quia si is, cui loqui ex officio datum est, in alienæ salutis discrimine salutifera monita non deprimat, seipsum reum sanguinis fratrum constituit, dum eum, cui necessarium consilium negat, in pravitate viæ suæ mortifera taciturnitate relinquit. Ne autem hoc nostris forsitan adinventionibus ascribatis, prophetæ vobis verba describimus, quibus dicitur: *Si dicente me ad impium, morte morieris, non annuntiaveris ei, ut convertatur a via sua mala, ipse quidem in iniquitate sua morietur, sanguinem autem ejus de manu tua requiram.* Nos igitur hac prophetica, imo divina comminatione perterriti, et regis celsitudini vestræ fidelis dilectionis fœdere copulati, studuimus semper vobis intrepida commonitione consulere, quod vestræ salutis, quod gloriæ, quod ipsi penitus terreno honori omnimodis putavimus expedire. Specialiter autem in novissimo colloquio vestro, cum licentiam a vobis reditus sumeremus, pia sollicitudine nos vobis exposuisse meminimus, quod quidquid super aliis capitulis vestræ potestatis licentia faceret, illud indignum penitus, et ab omni ratione videbatur extraneum, et non solum humana censura damnable, sed et divino putabatur judicio judicandum, quod occasione Cantuariensis archiepiscopi tot alios, viros et mulieres, clericos et laicos, parvulos et pro-
Cfectos, totius omnino regis offensionis innoxios, a propriis cogebatis sedibus exulare: maxime cum dicant nonnullos eorum eundem archiepiscopum nulla penitus sanguinis propinquitate contingere. Et quoniam his clementer auditis vera nos dicere dignanter vos recognovistis, et inde mihi responsum, bonum post modicum promisistis, miramur, quod nihil ex hoc postea ex vestri parte suscepimus, quamvis hoc ipsum vestris magnis occupationibus imputemus. Rogamus autem, ut juxta datam nobis verbi vestri fiduciam, vestrum circa illos relaxetis edictum, et quod inde feceritis, fidelis amici auribus non celetis.

EPISTOLA CLXXXVIII.

AD EUNDEN.

Reverendissimo domino suo HENRICO, Dei gratia illustri Anglorum regi, duci Northmannorum, comiti Andegaviæ et duci Aquitanix, THOMAS eadem gratia Cantuariensis Ecclesiæ humilis minister, salutem, et per omnia bene facere.

Loqui de Deo valde quietæ et liberæ mentis est. Inde est quod loquar ad dominum meum, et utinam ad omnes pacificum. Obsecro, domine mi, ut cum animi patientia sufferatis aliquid commonitionis, conferentis per gratiam Dei, quæ nunquam vacua est, ad animæ vestræ salutem, et meæ liberationem. Angustix mihi sunt undique. Tribulatio enim et angustia invenerunt me inter duo gravissima et timenda constitutum, et inter duo constituta gravissima

A timidum. Silentium loquor et commonitionem. Si autem siluero, mors mihi est, nec effugiam manus Domini dicentis: *Si non annuntiaveris delinquenti delictum suum, et moriatur in peccato suo, sanguinem ejus de manu tua requiram.* Si commonuero, timeo ne non effugiam domini mei, quod absit! indignationem. Ne accidat mihi, quod sapiens ille dicit: *Cum is, qui non placet, ad intercedendum accedit vel mittitur, verendum est, ne irati animus od deteriora provocetur.* Quid ergo faciam? Loquar, an sileam? Utrobique certe periculum. Verumtamen quoniam tutius est incidere in hominis indignationem, quam in manus Dei viventis, confusus de misericordia Altissimi, in cujus manu corda sunt regum, et quo voluerit inclinabit ea, et utinam in partem meliorem, loquar ad dominum meum, quia semel cepi. Multoties enim bona præstantur invitis, maxime cum potius eorum utilitati consulitur quam voluntati. In terra vestra captiva tenetur filia Sion, sponsa regis magni, oppressa a multis, afflicta ab his qui a tempore longo olerunt eam, a quibus honoranda potius esset, quam affligenda: maxime a vobis, habita vobiscum recordatione beneficiorum singulorum, quæ vobis contulit Deus in initio regni vestri, in medio, et fere usque modo. Solvite eam, et permitte eam conregnare sponso suo, ut benefaciat vobis Deus, et incipiat statim convalescere regnum vestrum, et auferatur opprobrium de generatione vestra, fiatque pax summa in diebus vestris. Credite mihi, dilectissime domine, serenissime princeps. Patiens enim retributor est Dominus, longanimis expectator, sed gravissimus ultor: audite me, et benefacite. Si autem, verendum est, quod absit! ne accingatur gladio super femur suum Potentissimus, et veniat in manu valida cum militia multa liberare sponsam suam non sine grandi plaga de oppressione et servitute tribulantis. Si vero me audieritis, quoniam necesse habet Dominus in hoc instanti obsequium vestrum experiri tanquam strenui militis sui, benefaciet vobis Deus, et addet gloriam gloriæ vestræ in progeniem filiorum et filiarum vestrarum usque in tempora longa. Alioquin vereor, quod Deus avertat, ne non deficiat gladius de domo vestra, donec veniat qui ulciscatur de plano suam et suorum injuriam

D Altissimus; sicut nec de domo Salomonis, a quo, licet eum Dominus elegisset, et contulisset tantam sapientiam et pacem, ut diceretur ab hominibus: *Hic est filius sapientiæ et pacis*, quoniam tamen recessit a via Dei, et ambulavit in iniquitate super iniquitatem, scidit Deus regnum ejus, et dedit illud ejus servo, maxime quia non quæsit subito post delictum placare Dominum, sicut et David pater ejus, qui statim post offensam humiliavit se Domino, emendavit culpam, pelivit misericordiam, et obtinuit veniam. Utinam et vos cum Dei gratia similiter faciatis. Hæc vobis ad præsens scribo, cætera in ore latoris præsentium, viri religiosi, et magnæ opinionis, fidelis etiam, ut credimus, vestri, posuimus, quibus, quæso, si placet fideliter credatis. Potius

tamen desideramus cum gratia vestra benigno vestro uti colloquio. Bene valeat semel et semper dominus meus.

EPISTOLA CLXXIX.

AD EUDÆM.

THOMAS Cantuariensis archiepiscopus, HENRICO regi Angliæ.

Desiderio desideravi videre faciem vestram, et loqui vobiscum. Multum quidem propter me, sed maxime propter vos. Propter me, ut visa facie mea reduceretis ad memoriam servitia, quæ, dum agerem in obsequio vestro, exhibui vobis devote et fideliter juxta animi mei conscientiam. Sic Deus me adjuvet in examine ultimo, quando omnes astabimus ante tribunal ipsius, recepturi prout gesserimus in corpore, sive bonum sive malum. Et ut moveremini pietate super me, quem oportet mendicando vivere inter alienos, licet tamen Dei gratia cum abundantia victualia ad sufficientiam habeamus. Estque nobis consolatio multa, quod dicit Apostolus: *Omnes qui volunt pie vivere in Christo, persecutionem patiuntur.* Et Propheta: *Non vidi justum derelictum, nec semen ejus querens panem.*

Propter vos ex tribus causis, Tum quia dominus meus estis; tum quia rex meus; tum quia filius meus spiritualis. Eo quod dominus, debeo vobis, et offero consilium meum et obsequium, quodcumque debet episcopus domino secundum honorem Dei et sanctæ Ecclesiæ. Eo quod rex, teneor ad reverentiam vobis et communionem. Eo quod filius, officii ratione ad castigationem teneor et coercionem. Corripit enim pater filium, nunc blandis, nunc asperis, ut vel sic revocet eum ad benefaciendum. Nosse debetis vos Dei gratia regem esse. Primo, quia vos ipsum regem, vitamque vestram debetis optimis informare moribus, ut vestri exemplo ceteri provocentur ad melius, juxta illud Sapientis: *Componitur orbis regis ad exemplum.* Secundario alios, hos demulcendo, alios puniendo potestatis auctoritate, quam ab Ecclesia accepistis, tum sacramento unctionis, tum gladii officio, quem gestatis ad malefactores Ecclesiæ coercendos. Inunguntur enim reges tribus in locis: in capite, in pectore, in brachiis. Quod significat, gloriam, scientiam, fortitudinem. Qui antiquis temporibus justificationes Dei non observabant, sed prævaricati sunt mandata ejus, his sublata est gloria, scientia, fortitudo, et eorum generatio; exemplo Pharaonis, Saulis, Nabuchodonosor, Salomonis, aliorumque quamplurium. Qui vero post delictum suum cordis contritione humiliaverunt se Domino, his gratia Dei accessit cum omnibus supradictis abundantius et perfectius. Sicut David, Ezechix, aliisque quamplurimis.

Christus fundavit Ecclesiam, ejusque comparavit libertatem sanguine proprio, sustinendo flagella, sputa, clavos, mortis angustias, nobis relinquens exemplum, ut sequamur ejus vestigia. Unde et dicit Apostolus: *Si compatimur ei, et conregnabimus. Si commorimur, et conresurgemus.* Ecclesia enim Dei

A in duobus constat ordinibus: clero et populo. In clero sunt apostoli, apostolici viri, episcopi, et ceteri doctores Ecclesiæ, quibus commissa est cura et regimen ipsius Ecclesiæ, qui tractare habent negotia ecclesiastica, ut totum redigatur ad salutem animarum. Unde et Petro dictum est, et in Petro aliis Ecclesiæ Dei rectoribus, non regibus, non principibus: *Tu es Petrus, et super hanc petram ædificabo Ecclesiam meam, et portæ inferi non prævalerunt adversus eam.* In populo sunt reges, principes, duces, comites et aliæ potestates, qui secularia habent tractare negotia, ut totum perducant ad pacem et unitatem Ecclesiæ. Et quia certum est reges potestatem suam accipere ab Ecclesia, non ipsam ab illis, sed a Christo, ut salva pace vestra loquar, non habetis episcopis præcipere, absolvere aliquem vel excommunicare, trahere clericos ad secularia examina, judicare de ecclesiis vel decimis, interdicere episcopis ne tractent causas de transgressionibus fidei vel juramenti, et multa in hunc modum, quæ scripta sunt inter consuetudines vestras, quas dicitis avitas. Dominus enim dicit: *Leges meas custodite.* Et iterum per prophetam: *Vae! qui condunt leges iniquas, et scribentes scripserunt injustitias, ut opprimerent pauperes in iudicio, et vim facerent causæ humilium populi Dei.*

C Audiatur itaque dominus meus, si placet, consilium fidelis sui, communionem episcopi sui, et castigationem sui patris. Nec cum schismaticis aliquam de cetero habeat familiaritatem vel communionem, nec cum eis aliquo modo contrahat. Notum est enim toti fere mundo, quam devote, quam honorifice dominum papam receperitis, quantum Romanum Ecclesiam foveritis et honoraveritis; quantum etiam dominus papa et Romana Ecclesia personam vestram dilexerint, honoraverint, atque etiam in quibusque secundum Deum potuerunt, vos exaudiverint. Nolite ergo, domine, si salutem animæ desideratis, eidem Ecclesiæ, quod suum est, aliqua ratione subtrahere, seu in aliquo ei citra justitiam contraire. Imo eandem ei permittatis in regno vestro habere libertatem, quam et in aliis regnibus habere dignoscitur. Memorque sitis professionis quam fecistis, et posnistis scriptam super altare apud Westmonasterium, de servanda Ecclesiæ Dei libertate sua, quando consecratus estis et inunctus in regem a prædecessore nostro. Ecclesiam etiam Cantuariensem, a qua promotionem et consecrationem accepistis, in eum statum restituitis et dignitatem, in quibus fuit temporibus prædecessorum vestrorum et nostrorum, possessionesque ad ipsam ecclesiam et nos pertinentes, villas, castella, et prædia, quæ pro voluntate vestra distribuistis, resque omnes ablatas, tam nostras, quam clericorum nostrorum, et laicorum, in integrum nobis restituatis. Permittatis etiam nobis, si placet, libere, et in pace, et cum omni securitate redire in sedem nostram, officioque nostro libere uti, sicut debemus et ratio exigit. Et nos vobis, tanquam domino charissimo et

regi, fideliter et devote pro viribus nostris servire parati sumus, in quocunque potuerimus, salvo honore Dei et Ecclesiæ Romanæ, et salvo ordine nostro. Alioquin pro certo sciat, quia divinam severitatem et ultionem sentietis.

EPISTOLA CLXXX.

AD EUNDEM.

Domino suo et amico HENRICO, Dei gratia illustri regi Anglorum, duci Northmanniæ, comiti Andegaviæ, et duci Aquitaniæ, THOMAS eadem gratia Ecclesiæ Cantuariensis humilis minister, suus olim temporaliter, nunc autem multo magis in Domino, salutem, et veram cum emendatione pœnitentiam.

Expectans expectavi, ut intenderet vobis Dominus, et conversus ageretis pœnitentiam recedens a via perversa, et absunderetis a vobis latera vestra prava, quorum, ut creditur, instinctu et consilio jam fere lapsi estis in profundum, sed vereor, quod absit! ne in profundum illud de quo dicitur: *Pec- cator, cum venerit in profundum, contemnet*. Et licet huc usque frustra sustinuerimus, tacite considerantes, et expectantes affectuosissime, si veniret nuntius, qui diceret: *Filius tuus rex, dominus tuus, jam diu dolo circumventus, tractus in perniciem Ecclesiæ, inspirante divina clementia in abundantia humilitatis magnæ festinat ad liberationem Ecclesiæ, ad omnem satisfactionem et emendationem*; non tamen omnipotentem supplici devotione singulis diebus interpellare cessamus, ut quod diu voto celebravimus de vobis et pro vobis, celeri et fructuoso consequamur effectum. Et ecce inde est, quod Ecclesiæ Cantuariensis, cui Deus nostrum sacerdotium, licet indignum, vobis res humanas huius regni regentibus, ad præsens deputavit, nos cura constringit, eo maxime quod adhuc exsiliū incommodeitate detineamur, majestati vestræ commonitorias, exhortatorias, correptorias destinare, ne excessum vestrorum, si qui sunt, qui revera sunt unde non minus dolemus, illorum maxime dico, qui circa Ecclesiam Dei, et personas ecclesiasticas a vobis passim nulla habita dignitatis seu personæ reverentia aguntur, nimis dissimulato existam, ne nimis negligens in animæ meæ discrimen appaream. Facientis procul dubio culpam habet, qui quod debet corrigere, negligit emendare. Scriptum quippe est: *Non solum qui mala faciunt, sed etiam qui consentiunt, participes judicantur*. Consentiant quidem, qui eum possint et debeant, non resistunt, vel saltem redargunt: *Error enim, cui non resistitur, approbatur*; et veritas, cum minime defensatur, opprimitur. *Nec caret occultæ societatis scrupulo, qui desinit obviare manifesto facinori*. Sicut enim, serenissime princeps, parva civitas prærogativam regni præsentis non minuit, sic regia vestra potestas religiøsæ dispensationis mensuram minime concutere debet vel mutare. Semper vero de jure effectum est, sacerdotali concilio de sacerdotibus judicia provenire. Nam qualescunque pontifices, etsi errore humanitus accedente, non tamen contra religionem fidei ulla-

tenus excedentes, nullatenus videntur a potestate seculari posse vel debere percelli. Boni quidem et religiosi principis est, ecclesias contritas et con- scissas restaurare, novasque adificare, sacerdotes Dei honorare, et cum summa tueri reverentia, adinstar felicissimæ recordationis et pii principis Constantini, cum ad eum deferretur quæstio cleri corum, dicentis: *Vox a nemine judicari potestis, sæcularium scilicet iudicium, qui solius Dei iudicio reservamini*. Et sanctos apostolos, eorumque successores, sub divina testatione constitutos, præcepisse legimus non debere persecutiones fieri, nec fluctuationes, nec invidere laborantibus in agro Domini, nec a suis expelli sedibus æterni regis dispensatores. Quis enim dubitet sacerdotes Christi, regum et principum, omniumque fidelium patres et magistros censi? Nonne miserabilis insanix esse dignoscitur, si filius patrem, discipulus magistrum sibi conetur subjugare, et iniquis obligationibus illum potestati suæ subijcere, a quo credere debet non solum in terra, sed etiam in cælis se ligari posse et solvi? Si rex bonus estis et Catholicus, et vultis esse, quod credimus, quodque magis optamus, ut salva pace vestra dixerim, filius estis Ecclesiæ, non præsul, discere vos convenit a sacerdotibus, non eos docere; sequi vos convenit sacerdotes in ecclesiasticis, non eos præcedere.

Habetis potestatis vestræ privilegia, quæ administrandis legibus publicis a Deo consecutus estis, ut ejus beneficiis non ingratus contra dispositionem cœlestis ordinis nihil usurpetis. Sed ut salubriori fruamini ingenio, his quæ contra eam malitioso ingenio et consilio magis forsitan quam animo vestro minus bene usurpatis, cum omni humilitate et multimoda satisfactione citissime cedatis, ne manus Altissimi adversum vos extenta mittat in vos, quasi ad signum, sagittas. Tetendit enim arcum suum Altissimus, ut sagittet in aperto vos nolentem pœnitere. Nec erubescatis, quidquid suggerant vobis maligni, quidquid submurmurent prodoctores, non vestri tantum, sed Dei, humiliari sub potenti manu Dei. Ipse quidem est, qui exaltat humiles, et superbos dejecit; qui in suam et suorum ultionem aufert spiritum principum. Quoniam terribilis est: et quis resistet ei? Non debuisset excidisse a memoria vestra, in quo articulo vos Deus repererit, quantumque promoverit, honoraverit, sublimaverit, in liberorum susceptione beatificaverit, solumque regni vestri firmaverit, in invidiam omnium inimicorum vestrorum amplis possessionibus ditaverit, adeo ut huc usque cum admiratione omnes fere proclamaverint: *Hic est quem elegit Dominus*.

Et vos quid ei retribuetis, vel retribuere poteritis pro his omnibus, quæ vobis fecit? An ad eorum instinctum et instantiam, qui circa vos persequuntur Ecclesiam virosque ecclesiasticos, et semper prout potuerunt sunt persecuti, reddetis mala pro bonis, oppressiones, tribulationes, injurias, afflictiones ecclesiis et ecclesiasticis personis? Nonne

isti sunt, de quibus dicit Dominus? *Qui vos odit, me odit. Qui vos spernit, me spernit. Qui vos tangit, tangit pupilam oculi mei.* Certe, etsi relictis omnibus, quæ possidetis, tollatis crucem vestram, et sequamini Dominum nostrum Jesum Christum, vix erit, aut non erit, ut fidelis et gratus acceptorum ab eo beneficiorum retributor appareatis. Inquirete Scripturas a scientibus, et invenietis quod Saul, licet electus fuerit a Domino, quoniam a viis ejus recessit, perit ipse, et domus ejus tota. Ozia quoque regis Juda, cujus nomen late divulgatum est, et procul egressum, propter crebras sibi a Domino collatas victorias, adeo cor elevatum est in suum interitum, eo quod ubique auxiliaretur ei Dominus, et corroborasset illum, ut aperta Domini reverentia usurpare sibi voverit, quod sui officii non erat, sed sacerdotum, id est adolere incensum super altare Domini. Et ob hoc a Domino lepra percussus est, et per manus sacerdotum ejectus a templo Domini: et sic mansit usque ad diem mortis suæ, plenus lepra, ob quam ejectus fuerat e templo Domini. Multique alii reges, sancti viri immensarum divitiarum, quoniam ambulaverunt super se in mirabilibus mundi, præsumentes rebellare Deo, in suis mysteriis perierunt, et ad ultimum nihil divitiarum suarum invenerunt in manibus suis. Rex quoque Achaz, quoniam et ipse officium sacerdotale usurpavit, similiter a Domino lepra percussus est. Oza quoque, etsi rex non esset, quoniam arcam Domini tetigit, et tenuit nutantem ad præceptum bobus recalcitrantibus, quia ad eum non pertinebat, sed ad templi ministros, indignatione divina percussus, juxta arcam Dei corruit mortuus. Rex, proverbialiter celebre est; castigatus de alterius infortunio melius sibi prospicit. *Nam tua res agitur, paries dum proximus ardet.* Ad sacerdotes, rex dilectissime, suos voluit Deus quæ Ecclesie suæ sunt disponenda pertinere, non ad potestates sæculi. Quas, si fideles sint, Ecclesie suæ sacerdotibus voluit esse subjectas. Non vobis igitur vendicetis jus alienum et ministerium, quod alteri deputatum est, neque contra eum contendatis, a quo omnia sunt constituta, nec contra illius beneficia pugnare videamini, a quo vestram consecutus estis potestatem. Non a legibus publicis, non a sæculi potestatibus, sed a pontificibus et sacerdotibus omnipotens Deus Christianæ religionis clericos voluit ordinari et discuti. Christiani reges subdere debent executiones suas ecclesiastica præsulibus, non præferre. Scriptum quippe est nunquam de sacerdotibus nisi Ecclesiam judicare debere: nec esse humanarum legum de talibus ferre sententiam. Obsequi debere principes Christianis statutis Ecclesie, non suam potestatem præponere: episcopis caput principes subdere, non de episcopis judicare. Duo quippe sunt quibus principaliter regitur mundus: auctoritas sacra pontificis, et regalis potestas. In quibus tanto gravior est pondus sacerdotum, quanto et de ipsis regibus in divino sunt reddituri examine rationem. Nosse certe debueratis ex illorum

A vos debere pendere judicio, non illos ad vestram posse redigi voluntatem. Plurimi namque pontificum, alii reges, alii imperatores excommunicaverunt. Et si speciale aliquid de personis principum inquiratis, beatus Innocentius Arcadium imperatorem excommunicavit, quia consensit sanctum Joannem Chrysostomum a sua sede expelli. Sanctus etiam Ambrosius pro culpa, quæ aliis sacerdotibus non adeo videbatur gravis, Theodosium magnum imperatorem excommunicavit, et ab ecclesia eiecit. Qui tandem satisfactione condigna meruit absolvi. Et multa alia in hunc modum. David etiam cum adulterium et homicidium commisisset, missus est ad eum propheta Nathan a Deo, ut eum redargueret et corrigeret. Correptus est, et citissime correctus. Rex enim, deposito diademate capitis sui abjectaque majestate imperiali, non erubuit humiliari ante faciem prophetae, peccatum suum confiteri, veniam postulare de commissio. Quid plura? Pœnitentia ductus misericordiam petiit, et obtinuit veniam.

Et vos, filii dilectissime, serenissime rex, reverendissime domine, ad exemplum excellentissimi David, regis piissimi, de quo dicit Dominus: *Inveni virum secundum cor meum*, corde contrito et humiliato convertimini ad Dominum Deum vestrum, exactamque de excessibus vestris agito pœnitentiam. Corruistis enim et errastis in multis, quæ adhuc taceo, expectans si forte inspiraverit vobis Dominus, ut dicatis cum propheta: *Miserere mei, Deus, secundum magnam misericordiam tuam, quoniam multum tibi peccavi, et malum coram te feci.* Juxta est enim Dominus his qui recto sunt corde, et humiles spiritu salvabit. Hæc ad præsentem, domine mi, vobis scribo, cætera silentio præteriens, expectans donec videam, utrum sermo meus capiat in vobis; si reportaverit mihi a vobis dignos fructus pœnitentia, et audiam a nuntiantibus, et congaudeam dicentibus: *Filius tuus rex mortuus fuerat, sed revixit. Perierat, et inventus est.* Quod si me non audieritis, qui solitus fui ante majestatem corporis Christi in abundantia lacrymarum et gemitibus non minimis orare pro vobis, certe ibidem clamabo contra vos, et dicam: *Exsurge, Deus, judica causam tuam.* Memor esto impropriorum tuorum, et injuriarum, quæ a rege Anglorum et suis tibi et tuis sunt tota die. Ne obliviscaris ignominiarum Ecclesie tuæ, quam tuo fundasti sanguine. Vindica, Domine, sanguinem servorum tuorum, qui effusus est. Vindica, Domine, servorum tuorum afflictiones, quarum infinitus est numerus. Superbia eorum, qui te et tuos oderunt et persequuntur, in tantum ascendit, ut ulterius non valeamus eos sustinere. Rex, quidquid agant vestri, hæc omnia de manibus vestris requirentur. Dammum enim dedisse videtur, qui causam damni dedit. Ipse revera Filius Altissimi, ni resipueris, ni cessaveris ab infestatione ecclesiarum et clericorum, et nisi contineritis manus a conturbatione hominum, ad gemitus compeditorum, ad voces clamantium ad se veniet in virga furoris sui, quoniam

jam tempus est judicare adversum vos justitias in æquitate et severitate spiritus sui. Ipse enim novit auferre spiritum principum, et terribilis est apud reges terræ.

Non vobis hæc dicimus, ut faciem vestram confundamus, vel provocemus vos ad majorem indignationem et iram, sicut forsitan maligni, qui circa vos sunt, qui die et nocte insidiantur animæ vestræ, et nituntur avertere animum vestrum a nobis, pravis et iniquis suis suggestibus submurmurant. Det illis Deus secundum opera sua, et secundum nequitiam adinventionum ipsorum. Sed ut vos reddam cautiorem ad provisionem animæ vestræ et curam, et ad vitandum periculum, quod jam in foribus est. Et quia nostra specialiter interest providere animæ vestræ, utpote cujus cura et sollicitudo nobis commissa est, cujusque reddituri sumus rationem in districto examine, hæc audite benigne et facite, et ultimum servitio nostro, prout vobis placherit, dummodo Deum non offendamus, nec operemur agendo vel dissimulando in dispendium animæ vestræ et nostræ. Quid enim vobis proderit totum mundum lucrari cum animæ vestræ periculo? Attendite ubi sint imperatores, ubi reges et alii principes, ubi archiepiscopi et episcopi, qui nos præcesserunt. Ipsi quidem laboraverunt, et alii in eorum labores introierunt. Quid ulterius? Sic transit mundus, et ejus gloria. Memorare ergo novissima tua, et in æternum non peccabis. Et si peccaveris, in vita penitebis. Valeat mihi chara gratia vestra, si in vera humilitate et festinata penitentia conversi fueritis ad Dominum Deum vestrum. Valeatis sic iterum et semper.

EPISTOLA CLXXXI.

AD EUNDEM.

Dilectissimo domino suo HENRICO, Dei gratia regi Anglorum, duci Normannorum et Aquitanorum, et comiti Andegavia, THOMAS eadem gratia sanctæ Cantuariensis Ecclesiæ minister humilis salutem, omni tempore perseverare in bono, ac reniti viriliter suggestionibus malignis, et pravis quæ facile corruptunt bonos.

Breviloquio utimur ad vos, ne in multitudine sermonis efficiamur amplius tædiosi: qui utinam essemus vobis magis accepti, sicut ad dominum nostrum dilectissimum. Novit hoc ille, qui scrutator est cordium, quidquid inimici nostri aliter ac falso murmurent ac susurrent; et certe, ut verius dicam, magis vestri quam nostri. Hortamur vos itaque adhuc ex parte omnipotentis Dei, et in virtute Spiritus sancti adjuramus, et in remissionem peccatorum vestrorum a vobis requirimus gratiæ vestræ, et pacis veræ, et securitatis bonæ nobis et nostris sine malo ingenio restitutionem; et similiter Ecclesiæ Cantuariensi in ea plenitudine et libertate, in qua eam melius et plenius habuerunt decessores nostri et nos, postquam facti sumus archiepiscopus: et possessionum, et ecclesiarum, et præbendarum ad eandem ecclesiam pertinentium, quæ vacaverunt,

A postquam orta est dissensio ista inter vos et nos; et similiter nostris, ut aub dominio vestro ita libera eis valeamus frui et uti, sicut melius et liberiori usi sunt eis antecessores nostri, et nos post nostram promotionem; et gaudere debeat Ecclesia de nostra reversione, quæ multis ex causis periculo animæ vestræ et nostræ, sicut credimus, tanto tempore caruit præsentia nostra, et dolere potuit de absentia incommodo. Hoc facite, benigne domine mi, et corde jucundo ac hilari, quatenus concedat vobis Deus, et hæredibus vestris, et restituat illam pacem, quam desiderat cor vestrum ad salutem animæ vestræ, et populi vobis commissi a Domino. Et nos pro certo parati sumus et erimus ad omne obsequium vestrum ferventius ac devotius, quam unquam ante fuerimus; dummodo non offendamus in Deum, neque in ordinem nostrum.

De mobilibus autem ablatis Ecclesiæ Cantuariensi, et nobis, et nostris, secure vobis affirmamus coram Deo et toto mundo, etiam si præsens esset, quia nullo modo, nulla ratione dimittitur peccatum, nisi restituatur ablatum, si habuerit qui abstulit vel auferri fecit, unde restituat. Unde beatus Augustinus: *Si res ablata cum reddi possit, non redditur, non agitur penitentia, sed simulatur. Et alibi: Illud fidentissime dixerim eum, qui pro homine ad hoc intervenit, ne ablata restituat, et eum qui ad se confugientem, quantum honesta poterit, ad restitutionem non compellit, socium esse fraudis et criminis. Nam hujusmodi hominibus misericordius opem nostram subtrahimus, quam impendimus. Hoc certum tenete, hoc verissimum esse, nulla ratione dubitate. Et si quis vobis in contrarium prædicaverit, etiam si angelus de cælo, anathema est, et sit, et erit, quandiu in hac sententia perseveraverit. Videte ergo, domine mi charissime, quomodo in hac parte caute ambuletis, ne detentio rei male acquisitæ, quæ non est nisi cinis et vermis, impellat vos, quod absit, in impenitentiam, et subiciat discrimini, quod a vobis purgari non potest, nec oratione, neque jejuniis.*

Præterea nosse debet vestra discretio, quoniam, etsi omnes episcopi sancti non sint, loca tamen sanctorum obtinent: qui, etsi vitæ merito non clarescant, esse tamen debent eorum imitatores, quatenus eis contulerit divina clementia. Inde igitur, quoniam sancti viri pro lege Dei sui certaverunt usque ad mortem, et a verbis ac minis persecutionum se non timuerunt, ille enim amplius timendus est, qui potest animam et corpus mittere in gehennam, necesse habemus et nos, prout Deus nobis inspiraverit, leges suas custodire, fovere ac defendere. Nec hoc nobis imputandum ad superbiam vel malignitatem, sed ad nostri necessitatem officii. Sic enim ait Dominus: *Leges meas custodite.* Et iterum in Evangelio: *Si quis solverit unum de mandatis meis minimis, et docuerit sic homines, minimus erit in regno cælorum.* Satis credimus dictum esse sapienti, et idcirco postulamus a vobis, sicut a domino charissimo, in nomine Domini nostri Jesu

Christi audiri et exaudiri benigne, quatenus audiat et exaudiat vos Deus in districto examine, et recipiat inter electos suos, quando neque fortitudo, neque potentia, nec imperium, nec divitiæ, nec leges sæculares vel consuetudines poterunt juvare quemquam, nec aliud quidquam, nisi divina clementia, et præcedentium operum fructus. Quod utinam omni die firmissime resideat animo vestro, nec unquam mentem vestram excidat. Illius rei consilia-
rios libenter admittat, et audiat dominus meus, et exaudiat semper, ut benefaciat ei Deus, et augeat ei et ejus heredibus vitam et pacem in tempora longa. Nec prætereant temporaliter impuniti, qui dolis suis et fraudibus exquisitis nisi sunt bonum domini mei propositum pervertere et perturbare, quod infra septem annos regni sui de exhibendo honore ecclesiis et ecclesiasticis viris multa, ut credimus, animi devotione conceperat. Valeat dominus meus in æternum. Et ut melius sit inde Ecclesiæ Dei et nobis, vivat in tempora longa.

EPISTOLA CLXXXII.

AD EUNDEM HEN. II.

THOMAS Cantuariensis archiepiscopus HENRICO regi Angliæ.

Regia potest meminisse nobilitas, quoniam vobis obtuli in præsentia domini regis Francorum, et plurimorum qui aderant, quod ad honorem Dei et vestrum paratus eram me ponere omnino in misericordia Dei et vestra, ut sic pacem et gratiam vestram promererer. Non placuit vobis, domine, hæc forma verborum, nisi promitterem observationem consuetudinum, quas antecessores nostri observaverant vestris. Concessi ergo quod ea servarem, quatenus possem salvo ordine meo, et si aliquid amplius vel expressius promittere scirem in Domino, paratus fui, et sum adhuc pro recuperanda gratia vestra. Et quod vobis nunquam libentius servivi, quam adhuc facere paratus sum. Et quia nondum placuit vobis ista recipere, supplico majestati vestræ, ut meminertis obsequiorum meorum, et beneficiorum, quæ mihi contulistis; quia ego memor sum me debere ex juramento servare vobis vitam et membra, et omnem honorem terrenum, et quidquid potero secundum Deum pro vobis, sicut pro charissimo domino, facere paratus sum. Et Deus scit, quod nunquam vobis libentius servivi, quam facturus sum, si placuerit vobis. Valeat semper dominus meus.

EPISTOLA CLXXXIII.

AD EUNDEM HEN. II.

THOMAS Cantuariensis archiepiscopus regi Angliæ.

Novit inspector cordium, animarum iudex, et vindex culparum Christus, in quantâ animi puritate et sinceritate amoris vobiscum fecerimus pacem, credentes quod simpliciter et bona fide nobiscum ageretur. Quid enim, serenissime domine, aliud concipere debebamus ex verbis vestris, quæ vel arguendo, vel mulcendo nobis vestræ benignitatis

A communicabat humanitas. Litteræ vestræ, quas ad dominum nostrum regem, filium vestrum, destinatis, ut nobis et nostris omnia, quæ habueramus antequam recederemus ab Anglia, restituerentur, quid aliud quam benevolentiam, pacem et securitatem omnimodam prætendebant? Sed ecce, quod Deus novit, nobis pro honoris vestri periculo, quam pro utilitatis vestræ dispendio gravius reputamus, rerum exhibitio non simplicitatem prætendit aut bonam fidem. Nam restitutio, quam nobis et nostris fieri præcepistis, dilata est in diem declinum sub obtentu Ranulphi, quem consiliarii domini nostri, filii vestri, interim conveniendum, ut mandatum vestrum impleatur, censuerunt. Qui sint illi, et quomodo, et qua fide, res gesta sit, vos, cum placuerit, inquiretis. Nobis autem persuasum est hæc fieri in dispendium Ecclesiæ, et salutis vestræ et honoris, nisi diligentius corrigatur a vobis. Nam præfatus Ranulphus interim in bona Ecclesiæ debacchatur, et victualia nostra in castrum de Saltwode etiam nunc palam congerit, et sicut accepimus ab his qui id vobis, si placuerit, probare parati sunt, multis audientibus gloriatus est, quod non diu gaudebimus de pace vestra, quia non comedemus panem integrum in Anglia, antequam ille, ut minatur, nobis auferat vitam. Scitis autem, serenissime domine, quia culpæ particeps est, qui cum possit corrigere, negligit emendare. Et quid præfatus Ranulphus possit, nisi vestræ voluntatis fretus et armatus sit auctoritate? Quid litteris domini regis filii vestri responderit super hoc negotio, scribentis ad ipsum, audiet et judicabit beneplacito suo discretio vestra. Et quia sicut nunc ex perspicuis apparet indicis, S. Cantuariensis Ecclesia Britanniarum mater in Christo, perit odio capitis nostri: ne illa pereat, sed evadat, tam sæpe dicto Ranulpho, quam complicitibus suis Ecclesiæ persecutoribus caput pro ipsa, Deo propitio, exponemus, parati pro Christo non modo mori, sed et mille mortes et omnia tormenta excipere, si ille per gratiam suam dignatus fuerit patientiæ largiri vires. Ad vos, domine, redire proposueram, sed me miserum ad miseram Ecclesiam necessitas trahit: ad illam vestra licentia et gratia rediturus, et fortasse ne illa pereat, periturus, nisi vestra pietas aliam nobis consolationem celerius præstare dignetur. Sed sive vivimus, sive morimur, vestri sumus, et crimus semper in Domino: et quidquid nobis contingat et nostris, benefaciat vobis Deus et liberis vestris.

EPISTOLA CLXXXIV.

AD EUNDEM.

Hoc petimus a domino nostro rege juxta mandatum et consilium domini papæ quod pro amore Dei et domini papæ et honore sanctæ Ecclesiæ ac salute sua et heredum suorum, et nos recipiat in gratiam suam, et concedat nobis et omnibus qui nobiscum et pro nobis exierunt de regno, pacem suam et plenam securitatem de se et suis sine malo ingenio et reddat nobis Ecclesiam Cantuariensem in ea plenitudine et

libertate in qua eam melius habuimus, postquam facti sumus archiepiscopus, et possessiones omnes ad tenendum et habendum ita libere et quiete et honorifice, sicut Ecclesia et nos eas libere et honorificentius tenuimus et habuimus, postquam promoti sumus in archiepiscopum; et similiter nostris, et omnes ecclesias et præbendas ad archiepiscopatum pertinentes, quæ vacaverunt postquam exivimus de terra, ut faciamus de eis sicut de nostris, prout nobis placuerit, similiter habere permittat, et nos facilemus ei quicquid archiepiscopus debet regi et principi suo, salvo honore Dei et ordine nostro.

EPISTOLA CLXXXV.

AD LUDOVICUM REGEM FRANCORUM.

Dilecto domino suo Ludovico, Dei gratia illustrissimo regi Francorum, THOMAS Cantuariensis Ecclesiæ minister humilis, salutem et utriusque vitæ beatitudinem.

Susceptis et lectis vestræ sublimitatis litteris, manifesta percepinus vestræ liberalitatis et dilectionis erga nos indicia. Quanquam, ut verum fateamur, ad obtinendum quæ sponte offeritis, merita non præcesserint, scimus quidem et certi sumus quod propriæ ingenuitatis vestræ ductu plurimum nos dilexistis. Ipse, qui omnium honorum est retributor, vobis retribuatur; et nos quidem pro facultate nostra parati sumus, et secundum Deum et secundum homines, omnibus quibus poterimus obsequiis vestræ benignitati respondere. Verum, cum semper vestram experti simus in nobis liberalitatem, nunc tandem eam pleniorē et gratiorē comperimus, cum nos in desolatione nostra per litteras vestras visitare dignati fuistis; et nobis, si oportuisset, vestræ consolationis refugium exposuistis. In verbo isto acquiescitis vobis si quid residuum erat cordis nostri, et totum illud vobis obnoxium reddidistis, et spem nostram roborastis. Non est enim homo mortalis, præter dominum meum regem Angliæ, in quo magis confidamus quam in vobis, de bono et honore et subsidio, si nobis oportuerit, licet nunquam meruerimus. Verumtamen inter dominum meum regem et nos verbum acritatis est de pace, et speramus quod Deus inclinabit animum ejus et averget vias ejus a nobis. Vos autem, si vobis placet, si contigerit cum eo loqui, arguite eum quod ipse unquam credidit aliquid sinistrum de homine qui tantum et tam fideliter ei servivit, et qui eum semper vero affectu dilexit, et cui ipse tantum honorem contulit. Vos autem, charissime domine, imperate nobis, si quid unquam ad honorem vestrum et placitum facere possimus, quia non est homo in mundo, qui libentius illud faceret quam nos.

EPISTOLA CLXXXVI

AD EUNDEM.

Domino suo Ludovico, Illustri Francorum regi, THOMAS Cantuariensis Ecclesiæ minister humilis, salutem et cum obsequio dilectionem.

Ad vestræ serenitatis notitiam credimus perve-

nisse, inter clerum et barones Angliæ, occasione quarundam consuetudinum regis et regni, coram domino rege subortam fuisse contentionem. Cumque magna in nos et episcopos nostros eorum hac occasione succresceret indignatio, tandem, Deo propitiante, ita inter nos composuimus, quod pax utrinque reformata est, et domini regis gratia, qui ob hanc causam adversus nos aliquantulum motus fuerat, nobis in integrum restituta. Præterea, peccatis nostris exigentibus, majorem in nos domini regis indignationem excitavit fama quædam, quæ nos eum apud dominum papam et vos diffamasse nuntiavit et Ecclesiæ sanctæ persecutorem et oppressorem impie confinxit. Quod, domine, sublimitati vestræ satis notum est, si hoc de domino nostro rege vobis mandavimus; et sicut nostis, precamur ut nostram et nostrorum innocentiam erga dominum regem diligenter excusetis. Quia neque nos ista de domino nostro diximus, neque si aliqui forte dixerunt, auctoritatem iis præstamus. Quia neque verum est eum talem esse, neque videtur dici potuisse. Hoc etiam vos scire volumus, quod dominus rex, quantumcunque motus fuerit, non minus personis ecclesiasticis honorem et reverentiam exhibuit, nec occasione hujus indignationis in personas ipsas vel ecclesiasticas possessiones manum misit. Si quid aliud vobis, domine, nuntiatum est, a veritate sciatis alienum, et, sicut supra dictum est, inter dominum regem et clerum suum nullam (Deo gratias) superesse discordiam, sed sopita omnium controversia, pacem ex integro reformatam. Valere.

EPISTOLA CLXXXVII

AD EUNDEM.

Amantissimo domino suo Ludovico, Dei gratia illustri Francorum regi, THOMAS, eadem gratia Cantuariensis Ecclesiæ minister humilis, salutem ab eo qui dat salutem regibus.

Considerantibus nobis ex accidentibus statum vestrum et regni vestri tempore vestro præ aliis felicitis, magis ac magis in dies videtur retributor omnium bonorum Deus prosperare vias et actus vestros, dans etiam vobis semper per magnam misericordiam suam de inimicis vestris triumphare et vincere. Nec mirum, quia diligentibus Deum omnia cooperantur in bonum. Et ecce, Domine in Christo charissime, fidelis vester abbas Pontificiensis promotus est communi assensu cleri et populi in archiepiscopum Lugdunensis Ecclesiæ, consecratusque a domino papa die Dominica ante instans festum beati Laurentii apud Montem Pessulanum. De quo profecto confilimus per gratiam Dei, tanquam de charissimo amico nostro, quia ipse tum pro amore vestro, tum pro nostro, semper quoad vixerit fidelis vobis erit, civitatemque suam et partes illas, sicut justum est, vobis et regno vestro pro viribus subiciet et subjugabit. Bene valete in Christo, charissime.

EPISTOLA CLXXXVIII.

AD MATHILDEN IMPERATRICEM.

THOMAS Cantuariensis archiepiscopus, MATHILDI imperatrici.

Gratias agimus Deo, qui nobilitatem vestram insignibus virtutis magis illustravit quam generis: et quam sanguine clarissimam extulit in orbe Romano, bonis operibus clarificare non desinit in mundo. Nam ab Oriente in Occidentem magnum est nomen vestrum in Domino, et elemosynas vestras narrant ecclesie sanctorum. Quamvis enim Deo plurimum placeant subsidia temporalium, quæ ei erogatis in membris suis, et tamen minus placere non credimus sollicitudinem pacis et libertatis ecclesiasticæ, quam tanto, ut fama est, zelatis affectu, ut cum Apostolo dicere valeatis: *Quis infirmatur, et ego non infirmor? Quis scandalizatur, et ego non uror?* Unde nos, qui ratione humanitatis et beneficii vestri merito nos vobis obnoxios esse recolimus, pro salute vestra, et filii vestri gloria, temporali pariter ac æterna, de pace Ecclesiæ fiducialius loquimur in auribus vestris, rogantes attentius, et obsecrantes in Domino, quatenus eum diligentius conveniatis, ut ea devotionis sedulitate pacem procuret Ecclesiæ, qua sibi, hæredibus suis et terris suis per merita sanctorum pacem Dei desiderat procurari. Nam unde plurimum contristamur, divulgatum est ab Oriente usque in Occidentem, quod ecclesias regni sui intolerabiliter affligit, et exigit ab eis inaudita quædam et inconsueta. Quæ si quæsierint, quærere tamen non debuerunt antiqui reges. Potest autem fieri, ut in tempore suo, cui multam Deus contulit sapientiam tanta afflictio utique valeat tolerari. Sed forsitan post dies ejus tales sunt regnaturi, qui devorare Ecclesiam cupient toto ore, et indurati cum Pharaone dicent: *Nescio Dominum, et Israel non dimittam.* Meminerit, quæsumus, ad preces et exhortationes vestras, quomodo eum extulerit Deus ultra titulos nobilium patrum, et ultra terminos majorum suorum, et præter eorum spem dilataverit terminos ejus. Quid proderit ei apud Dominum, si ad hæredes transmittat peccata sua, et quasi adversarios Dei et Ecclesiæ constituat in testamento? Quid prodest antecessoribus ejus modo, si iste sumpta occasione ex delictis eorum Deum quasi hæreditario jure offenderit? Aliis erat, serenissima domina, Deus placandus obsequiis, alia munera pro salute majorum et peccatorum redemptione offerri oportebat. Non placent Deo sacrificia de rapina, nisi forte Patri placere possit, ut ei Filius immoletur. Si resipuerit, Pater misericordiarum adhuc est promptus ad veniam: procul dubio iudicium facturus sine misericordia in eos, qui non exercent misericordiam. Potens est, et potentes potenter punit. Terribilis, et aufert spiritum principum, ut fortioribus instet fortior cruciatus. Tetendit arcum suum, et paravit illum, et in eo posuit vasa mortis, jaculaturus in brevi, nisi sponsam suam, pro cuius amore mori dignatus est, liberam esse permiserint, et privilegii

A ac dignitatibus, quas sanguine suo ei comparavit in cruce, sustinuerint honorari. Debetis autem, si placet, in eo revocando, et matris diligentiam adhibere, et dominæ auctoritatem: ut quæ ei regnum et ducatum multis laboribus acquisistis, et ad eum hæreditaria successione jura transmisistis, quorum occasione nunc premitur et conculcatur Ecclesia, proscribuntur innocentes, et pauperes intolerabiliter assignantur. Nos quod possumus pro salute vestra et illius, animo libenti facimus, Dei misericordiam precibus, quibus possumus, jugiter implorantes: si fiducialiter graturi, si pace ecclesiis reddita ad auctorem et benefactorem suum Deum prompta devotione relierit. Nec pudeat eum coram Deo humiliari per penitentiam, cum antiquis regibus, quorum memoria in benedictione est, nihil magis ad gloriam ascribatur, quam penitentiae titulus, regia divinæ zelus, veneratio sacerdotii, et fidelissima virtutum custos humilitas. Talibus enim hostis domini Ezechias, Josias, et Constantinus Domino placuerunt, et gloriam assecuti sunt apud homines a generatione in generationem.

EPISTOLA CLXXXIX.

AD OWENUM REGEM WALLIÆ.

THOMAS Cantuariensis archiepiscopus, OWENO regi Walliæ.

Gratias vobis plurimas referimus, quod inter bellorum discrimina, et hostilem inimicorum inquietationem, Ecclesiæ Dei, sicut ex litteris vestris didicimus, curam et diligentiam impendere non omittitis. Verum non mediocriter insedit animo illud, quod in litteris vestris legimus, videlicet ubi dictum est, quod ex jure non debeat nobis subijci ecclesia de Bangor, licet hoc ob dilectionem, qua vobis tenemur, dissimulemus. Quod autem postulastis, ut nostro assensu et licentia in ecclesia eadem ab alio quam a nobis episcopus consecratur, omnino non acquiescimus nec aliquando acquiescemus. Mittemus vobis nuntium nostrum, aut certe aliud, quod litteris modo nolumus commendare, sicut per præsentium latorem vobis mandamus. Interim autem vobis mandamus, ut per vestram diligentiam prædicta ecclesia, honoresque Ecclesiæ in pace permanent, nec aliqua fiat electio, vel honorum Ecclesiæ transmutatio. Quod si fieret, nos in irritum ducemus.

EPISTOLA CXC.

AD EUNDEN.

THOMAS Dei gratia archiepiscopo Cantuariensis, OWENO Wallensium principi, salutem, et ei devotum exhibere obsequium, cui servire regnare est.

Cui plura committuntur a Domino, ei tenetur de pluribus reddere rationem qui sicut fideliter obsequentes felici remuneratione glorificat, sic indevota potenter horrenda nimis ultione percellit, ut cum afferatur deficienti solatium, tamen et miseriis non subsistant. Sed inter omnia quæ illi exhibentur obsequia nil gratiosius acceptat quam si sponsæ pro qua sanguinem fudit, debitus a fidelibus reddatur honor, et cum nil gravius punit quam si illa in con-

specu ejus contumeliosis afficiatur injuriis. Hoc ex te ipso, dilecte fili, potes agnoscere, sciens quanta acerbitate mariti vindicent contumelias, si forte sub eorum aspectu conjugibus inferuntur. At Christi Domini tui quoniam fidelis es, sponsa est Ecclesia Bangorensis quæ, sicut nosti, jam fere decennio, proprio viduata pastore, machinationibus eorum, qui ei compati et providere debuerant, super desolatione sua ante sponsi oculos lacrymabiliter ingemiscit. Unde quia te sincera charitate diligimus et honorem tuum in Domino eupimus promoveri, dilectioni tuæ rogando, consulendo et in remissione peccatorum injungendo suademus, quatenus juxta mandatum domini papæ præfatam ecclesiam benigne patiaris debita pastoris provisione a tantis miseris relevari. Nec contra hoc cujuscunque admittas consilium, ubi tantum periculum vertitur animarum. Si vero te cujuscunque clerici sive laici sive viri sive mulieris consilio quod ecclesiam secundum canones ordinari impediatur obligasti, nos te ab illa seu promissione seu obligatione apostolica et nostra auctoritate absolvimus: prohibentes in periculo animæ tuæ ne illi quicunque sit contra salutem tuam de cætero acquiescas. Præterea mandamus quatenus litteras domini papæ quas suppressi fecisti, Ecclesiæ cui nituntur et nobis restituas; et clericum qui eas deferrebat quem nos ab obligatione qua ipsum ne deferebat arctasti absolvimus, ad nos ut debuit sine omni impedimento venire patiaris. Detulimus hactenus et deferimus tibi et tanquam dilecto filio ubi secundum Deum poterimus, deferre disponimus. Sed nisi apostolicis et nostris mandatis, præsertim in his, quæ ad salutem tuam pertinere noscuntur acquieveris, ulterius tibi deferre vel parere non poterimus quin quæ Deus præcipit et apostolica sedes instantèr injungit, sollicitius exsequamur.

EPISTOLA CXCI.

AD EUENDEM.

THOMAS Cantuariensis archiepiscopus, OWENO Walensium principi.

Novit Inspector cordium et judex animarum quod honorem tuum et salutem sicut filii in Christo charissimi cujus cura nobis adeo juncta est, sincera in Domino charitate diligimus et tibi desideramus et oramus summum bonum evenire sicut et nobis, et quanto nobis in te dilectio major est, tanto tibi quæ ad salutem tuam et honorem pertinent, studiosius intimamus. Recole ergo, fili, quanta bona fecerit tibi Dominus, et ei de honore de successibus quos tibi contulit condignas ipsius præeunte clementia gratias age, ut qui juventutem tuam et virilem ætatem consolatus est in adversis et erexit et direxit ad prospera, maturitatem tuam beato fine et exitu glorioso consummet et labores tuos quiete remuneret et gloria sempiterna. Deus enim est qui se glorificantes glorificat et contemptores suos reddit ignobiles. Scimus te virum esse discretum et qui boni et mali, æqui et iniqui præmia rationis libramine noveris ponderare et qui te crebra meditatione me-

A mineris moriturum; et ut rerum experientia docet, juvenes cito moriuntur et facile, sed impossibile est ut qui senes sunt, diu vivant. Ponamus autem ut senum contra morem vita diutius protendatur, certe vivendo deficiunt, et mors non intellecta sensim per universa membra corporis et sensus hebetationes obrepit. Nam

Singula de nobis anni prædantur euntes

et ipsas, quibus ante gaudebamus voluptates eripiunt. Sed cum omnium tam justorum quam peccatorum finis sit unus et communis interitus, horum tamen et illorum gravis in ipsa morte differentia est. Si quidem pretiosa est in conspectu Dei mors sanctorum ejus quæ de miseria exeuntes ad æternam adducit gloriam; mors autem peccatorum est pessima quæ prævaricatores legis impenitentes trajicit in gehennam, ubi subter eos sternetur tineæ, operimentum erunt vermes, et vermes quidem qui non moriuntur, sicut ignis non exstinguitur in sæcula. Quid ergo prodest, fili, si mundum lucretur quis universum quem vix ad momentum poterit retinere et hos cruciatus et præmia laborum animæ suæ acquirat. Quia vero te super omnes coetaneos tuos in gente tua extolli et honoravit misericors Dominus, in multa patientia te expectans, et multis tam beneficiis quam periculis provocans, ad poenitentiam nobilitatem tuam rogamus, monemus et exhortamur in Domino et in remissionem peccatorum tibi injungimus, quatenus apostolicum mandatum de relinquenda cognata tua et ordinatione Bangorensis Ecclesiæ benignius audias et diligentius exsequaris, ut fructum obedientiæ, quam salubriter exoptas, tibi et semini tuo cumulet et multiplicet Deus et temporaliter et in æterna retributione justorum. Alioquin dimittere non poterimus quin illud prout nobis injunctum est, impleamus. Si cognatam tuam diligis, abundas opibus, quibus ei poteris utiliter et honeste providere: diligas ut cognatam, non ut uxorem, quia satis esse debet quod te Deus hactenus et Ecclesia ejus in tam manifesta culpa et multo scandalo et pernicioso exemplo sustinuit delinquentem. Amodo enim tantum scandalum non poterit sustineri, et necesse est ut ecclesia, suo diutius viduata pastore, proprium episcopum recipiat, qui, auctore Domino, salutem procuret animarum. Valere.

EPISTOLA CXCL.

AD MATHILDEN SICULORUM REGINAM.

Serenissimæ dominæ et in Christo charissimæ MATHILDI, illustri reginæ Siculorum, THOMAS divina dispensatione Cantuariensis Ecclesiæ minister humilis salutem, et sic temporaliter regnare in Sicilia, ut cum angelis æternaliter exsulet in gloria.

Licet faciem vestram non noverimus, gloriam tamen non possumus ignorare, quam et generosi sanguinis illustrat claritas, et multarum magnarumque virtutum decorat titulus, et famæ celebritas numerosis præconiis reddit insignem. Sed inter cæteras virtutes, quas cum illis auditoribus gratanter amplecti-

mur, liberalitati vestræ debemus, et qua nunc possumus devotione, gratias referimus ampliores, quæ cœssules nostros, proscriptos Christi, et consanguineos nostros, fugientes ad partes vestras a facie persecutoris, consolata est in tribulatione sua, quæ profecto magna pars veræ et Deo gratissimæ religionis est, si pro iustitia patientibus clementia ferat solatium, si pauperibus opulentia suffragetur, si sanctorum necessitatibus absoluta potestatis communicet amplitudo. Talibus enim hostiis promeretur Deus, exhilarescit et dilatatur gloria temporalis, et omnium honorum gratus conciliatur affectus. His meritis inter alios specialiter tamen promeruitis et nos, qui totum id quod sumus et possumus, ad vestrum devovimus obsequium. Cujus devotionis primitias, quas pro tempore potuimus, excellentiæ vestræ nuper obtulimus preces vestras apud regem Christianissimum promoventes, sicut pendere potestis ex precibus ejus dilecto nostro illustri regi Siciliæ porrectis, et ex verbis venerabilis prioris Crispiniacensis, quem et eruditio litterarum, et vitæ sinceritas, et integritas famæ bonis omnibus amabilem et commendabilem reddunt. Est enim vir probatissimæ conversationis, sanæ doctrinæ, et quantum ad humanum spectat examen, perfectæ pro tempore sanctitatis, quem tanta reverentia a sublimitate vestra desideramus et petimus exaudiri, quanta totam Occidentalem Ecclesiam, si vestris pedibus assisteret, audiretis. Et hoc quidem tum pro suæ personæ reverentia, tum pro merito et auctoritate Cluniacensis Ecclesiæ, cujus procurat necessitates, quæ in orbe Latino dignoscitur a diebus patrum nostrorum in monastica religione perfectionis gloriam quasi propriam possédisse. In cæteris, quæ vobis ex parte nostra dixerit, ei, si placet, credatis ut nobis. Valete.

EPISTOLA CXCH.

AD STEPHANUM CANCELLARIUM REGIS SICILIÆ.

THOMAS Cantuariensis archiepiscopus, STEPHANO cancellario regis Siciliæ.

Probabile quidem est, quod vos pro salute et consolatione multorum in locum nobilitati vestræ et meritis congruum erexit Dominus, ut facultas rerum possit respondere virtuti, et voluntas nata, aut potius data a Domino, indigentibus subvenire, gratum sortiatur effectum. Ad vos itaque multi concurrunt, sed nullum sine consolatione audivimus redeuntem. Novus lucifer ab oriente resplendet in orbem occidentum, et suæ claritatis radios in auspiciis publicæ felicitatis vibrat, et omnes contritos corde confortans persuadet instare tempora meliora. (Sed nunquid Ecclesia Dei lætitiæ publicæ fructu sola privabitur? Nunquid frustrabitur spe sua, quæ vos aluit, pro qua majorum sanguine generosus, et propria virtute nobilis, pater vester se toties exposuit gladiis, et in confessione Christi, ut spes fidelium est, in pace consecutus est palmanum martyrii? Verum inter omnes ecclesias sancta Cantuariensis magis affligitur, nec est dolor, sicut dolor ejus. Omnes amici ejus dereli-

querunt eam : imo et persequuntur inter angustias. Si quis legis defensor est, regis censetur inimicus. Disperguntur, proscripti sumus. Crimen nostrum est assertio ecclesiasticæ libertatis. Eam namque profiteri, læsæ majestatis reatus sub persecutore nostro est. Ille enim solus fidelis creditur, cui religionis contemptus placet, qui divinam persequitur legem, cui grata est contumelia sacerdotum, qui carnificinas veterum tyrannorum velut justitiæ sacrarium veneratur. Quia mutire ausi sumus pro domo Domini, exsulamus cum omnibus cognatis et amicis nostris, quorum unus est filius sororis nostræ. Quem vestræ celsitudinis liberalitate, ubi necesse habuerit, tanto affectuosius petimus sublevari, quanto nos et alios, qui pro Domino patimur, justum est de nobilitate vestra spem concipere firmitorem. Rogamus etiam, ut eidem credatis in his, quæ vobis ex parte nostra dicet, et apud Ecclesiam Romanam causam Dei et nostram, si forte fuerit opportunum, promoveatis.

EPISTOLA CXCV.

AD ROBERTUM COMITEM LEICESTRIÆ

THOMAS Dei gratia Cantuariensis Ecclesiæ minister humilis, dilecto in Christo filio, et amico, nobili viro ROBERTO comiti Leicestriæ, salutem cum benedictione.

Expectabam litteras consolationis tuæ, tanquam amici charissimi, verba satisfactionis, tanquam devotissimi Ecclesiæ filii, et vere penitentis. Sed quia neque littera consolationem nuntiat, ne verba satisfactionem insinuant, affectu paterno reduco tibi delictum tuum [ad animum, ut vel sic immissa tibi a Deo pœnitentia, excutiat a te satisfactio ad animæ tuæ conferens salutem, quam, teste conscientia mea coram Deo loquor, opto tibi pariter ut et mihi. Habet mater tua Cantuariensis Ecclesia affectione materna queri de te, et cum principibus tuis. Habeo et ego pater tuus in Christo, sponsus illius qualiscunque. Primo, de illata nobis injuria. Secundo, de non revocata. Tercio, de pœnitentia morosa. Forte dissimulatis injuriam, non revocatis illatam, et quod periculosius est, unde magis doleo, tardius quam oporteat acceditis ad pœnitentiam, sine qua nemo nocens absolvitur. Rejcta filiali pietate itum est in viscera matris a filiis, nullo habito humanitatis intuitu, spreta etiam reverentia ac devotione, qua patribus tenentur filii, contra omnem juris formam, contra omnem ecclesiasticam auctoritatem, contra etiam ipsas suas ipsius regni consuetudines, quas dicunt avitas, quarum occasione perniciose turbata sunt omnia; quarum incommoditatibus concussa est duriter, et ad tempus depressa libertas Ecclesiæ, quæ per Dei gratiam nullius ingenio poterit convelli; quarum angustis Christo inferendo injuriam per dispendium Ecclesiæ itur in ruinam. Detracta sunt spolia patris, judicatus et condemnatus est pater a filiis, et cum iniquis deputatus. Estne auditum a sæculo, quod actum est temporibus istis in terra ista? Cantuariensem judicari, condemnari, cogi ad præstandam fidei jussionem, quem et aliquando pro-

scriptum injuste divina declaravit sententia. Tradita est revera terra in manus impiorum, quorum nondum completa est malitia. Commissa est enim eis virga Assur, virga furoris Domini, in correptionem et coercionem clericorum, cujus quoque expleto officio, quod jam per misericordiam Dei quasi in limine est, verendum est, ne, quod absit, ira Domini in contrarium conversa, furore ipsius gravius accenso in suam et suorum ultionem injuriæ, conerant ipse Dominus et disperdat de civitate sua omnem operantem iniquitatem, pariter juvenem cum sene. Nec mirum. Non enim est hoc tempore qui faciat bonum, non est usque ad unum. Quis unquam patrem et matrem afflixit contumeliis, injuriis affecit, addixit pœnis, et non incidit in maledictum, quod processit de ore Altissimi? *Qui maledixerit patri aut matri, sit ipse maledictus.* Et si hæc maledicti pœna, non erit malefacti severior? Erit utique. Convertimini ergo, filii dilectissimi, celerem agite pœnitentiam, ne, quod absit! ultio divina, quæ jam in januis est, irruat super vos et super filios vestros. Exciditne a memoria vestra, quod dicit Scriptura: *Ibunt in exterminationem usque in tertiam et quartam generationem, qui hæreditate querunt sanctuarium Dei possidere?* Christus enim fundavit Ecclesiam, eique comparavit libertatem sanguine proprio. Quis ergo est qui hujus commercii pretium redigere querat in servitutem, judicare alienum servum? Domino suo cadere debet, aut stare. Si vero huic morbo, ne veniat in gente periculum, cupitis subvenire, occurrere animæ vestræ periculo, saluti etiam serenissimi principis vestri et Domini consulite. Vobis forsitan querentibus de subveniendi modo, respondeo certe saluti principis et vestræ satis et prudenter esse consultum, si cum humili pœnitentia, cum supplici satisfactione recesserit ab injuria Christi et Ecclesiæ. Sunt ista decentia principem, sunt et comparantia gratiam divinam, sunt et conservantia sibi honorem et generationi suæ. Sunt et verba ista plena humilitatis, et, ut arbitror, affectus ejus, quem regi suo debet sacerdos, timens de proprio et principis sui periculo, optans ei salutem, quam et sibi, tum ratione beneficii, tum officii necessitate. Valete.

Præterea nuntios nostros, si placet, benigne suscipe, audi benignius, et cum ipsis negotium Dei et Ecclesiæ suæ in remissionem peccatorum tuorum, quatenus opportunus se tibi obtulerit, efficacius promove. Valete iterum, et semper.

EPISTOLA CXCV.

AD HUGONEM COMITEM.

THOMAS Cantuariensis archiepiscopus, HUGONI comiti.

Lectis charitatis vestræ sermonibus, canonicorum quoque litteris inspectis, quibus se liberalitatis vestræ quotidiana beneficia experiri attestabantur, adeo exhilaratus est spiritus meus, quod omnia interiora mea laudem germinaverunt, illum prosequens multiplicium gratiarum actione, de cujus munere venit tam fructuosa, tam salubris et præ-

clara conversio vestra. Ista quippe vobismet in cœlis gloriam, nobis in spiritu lætitiæ, sed et toti regno suavissimum exempli præstat odorem. Ita ut ceteri crucis Christi inimici, a vobis discere valeant, si velint, diaboli jugum excutere, et post nos currere in odorem unguentorum vestrorum. Inde etiam est, quod nos deinceps omni tempore vestro et vestrorum honori et profectui, favente Domino, studiosius intendemus, utpote qui in nostræ pacis initio, ante etiam quam terram ingrederemur, mandatum nostrum et consilium non minus magnifice, quam benigne consummastis, cæteris similiter faciendi vos ipsum præbens exemplar. Verumtamen non modicum nos arctat pro sacerdotibus illis inobedientibus tam vigen precum vestrarum instantia.

Novit quippe discretio vestra, charissime filii, quia sicut humilis paupertas remuneranda est, ita superbia punienda. Clerici vero illi pauperes, sicut scribitis, quam contumaciter, quam superbe inobedientes exstiterint et repugnaverint, attendatis, si placet, et vos ipsi, nec dubito, precibus denegabitis locum, si delinquentium pensetis excessum. Isti enim sunt, qui in manifesta inobedientia persistentes, in ipsum pugnaverunt Deum, mundo fecerunt scandalum et plactum. Insuper totum corpus Christi detestabili quadam exempli perniciæ polluentes, qui, ut jam diximus, in manifesta inobedientia persistentes, corpus Christi conficere, et alia etiam divina celebrare præsumperunt. Ad quod ministerium homines, etiamsi angelicam induerent puritatem, adhuc procul dubio forent indigni. Sed non pergitur nunc istorum exagitare flagitia, ne cogamur eorum exasperare supplicia. Et pro certo, nisi pro vestræ intercessionis mihi admodum acceptæ reverentia stetisset, infructuosæ arbores securi ad radices posita omnino succiderentur. Verum quos propria damnat in æternum iniquitas, postulationis vestræ gratia non modicam misericordiam consequuntur. Sic tamen volumus eos manere, donec sicut speramus, proxime veniamus, et videamus vos in interdictorum absolutione vestra, quantum secundum Deum poterimus, desideria completuri. Huic vero præsentium bajulo ob reverentiam vestram, et dilectionem, quam charam habemus omnimodis, et acceptam, interim evangelizandi usum indulsimus, baptizandi quoque et tribuendi viaticum, si tamen id ultima mortalium cogat necessitas.

EPISTOLA CXCVI.

AD DILECTAM FILIAM SUAM IDONEAM.

THOMAS Dei gratia Cantuariensis archiepiscopus, et sedis apostolicæ legatus, dilectæ filiæ suæ IDONEÆ, salutem, et perseverantem in virtute obedientie et justitiæ zelo vigorem.

Infirma mundi elegit Deus, ut fortia debellaret, intumescensque contra Deum audaciam Holofernis, viris deficientibus, ducibus exanimatis, et sacerdotibus fere deserentibus legem, femina virtus extinxit. Esther electa est ut exulantis et condemnatæ Ecclesiæ salutem procuraret, titubantibus apo-

stolis, fugientibusque, et quod magis est, in perfidiam lapsis, Dominum passioni addictum sancte persecutæ sunt mulieres, et quod amplioris est fidei manifestum indicium, etiam mortuo sunt fideliter obsecutæ. Unde et meruerunt angelorum visu et alloquio confortari, et percipere Dominicæ resurrectionis primitias, et latentibus discipulis et fere desperatione submersis, Redemptoris gloriam et Evangelii gratiam nuntiare. Speramus autem te in illarum Deo auctore transituram esse consortium, quarum Christi zelo succensa apprehendis exemplum; quia spiritus charitatis, qui a corde tuo timorem expulit, per gratiam suam faciet, ut tibi, licet ardua videantur, quæ necessitas Ecclesiæ fieri constantius et instantius exigit, non modo possibilia, sed et facilia sint credenti. Hac ergo de fervore, quem habes in domino, spe concepta, tibi mandamus, et in remissionem peccatorum injungimus, quatenus litteras domini papæ, quas tibi mittimus, venerabili fratri nostro Rogerio Eboracensi archiepiscopo tradas, si fieri potest, præsentibus fratribus, et coepiscopis nostris; aut si eos præsentibus habere nequiveris, hoc ipsum facias in præsentia eorum, quos adesse contigerit. Et ne originale scriptum possit aliqua tergiversatione supprimi, transcriptum ejus legendum circumstantibus tradas, et eis, prout plenius te nuntius instruet, mentem aperias litterarum. Laori tuo, filia, præmium grande proponitur remissio peccatorum, fructus immarcessibilis, et corona gloriæ, quam tandem beatæ peccatrices, Magdalena et Ægyptiaca deletis totius anteactæ vitæ maculis, a Christo Domino receperunt. Aderit tibi mater misericordiæ, filium, quem pro mundi salute edidit, Deum et hominem rogatura, ut tui sit dux, comes, et patronus

itineris. Et qui inferni claustra dirumpens dæmonum contrivit potestatem, licentiam coarctavit, ne tibi nocere valeant, manus cohibeat impiorum. Vale sponsa Christi, et cum cogites semper esse præsentem.

EPISTOLA CXCVII.

AD COMIT. WAREN.

T. Dei gratia Cant. arch. Anglorum primas et apostolicæ sedis legatus, dilectæ filiæ M^{re}. comitissæ Warenne, salutem.

Pervenit ad aures nostras religiosorum fratrum Lewensis Ecclesiæ monachorum stupenda querimonia, quod cum ipsi ex antiqua donatione comitum Warenne videlicet avi et patris Willelmi viri tui et sui ipsius etiam antequam dotem tuam consecuta fuisses, de omnibus dominiis comitis decimationem denariorum semper inconcussæ tanquam ecclesiæ suæ dotem possederint, tu post perceptam dotis tuæ investituram iisdem fratribus ipsam decimationem quæ ad dotem tuam spectabat subtraxeris. Quod si ita est, vehementer admiramur, cum eorum quæ Deo et Ecclesiæ suæ in elemosynam collata esse noscuntur, nihil doti tuæ vindicare debeas nec possis. Crudele enim est et sacrilegio proximum quod super divinum altare semel devote oblatum est, iterum repetere, et ad sæcularia transferre. Proinde tibi salubriter consulimus et in Domino admonemus quatenus, sicut vis jus tuum tibi a Deo libere conservari, ita jus suum cum integritate monachis relinquant et nullatenus datam iis denariorum decimationem dotis tuæ retineas. Alioquin iis in justitia deesse non poterimus cujus debitores omnibus existimus.

VARIORUM AD S. THOMAM EPISTOLÆ ET ALIOS.

EPISTOLÆ CXCVIII-CCCXIX.

ALEXANDRI PAPÆ III ad S. Thomam, ad Cantuarienses, ad Rogerium Eboracensem, ad Henricum Remensem, ad Rotrodum Rothomagensem, ad Willelmum Senonensem, ad Turonensem episcopum, ad episcopos et clericos Angliæ, ad Joannem decanum Aurelianensem, ad Aversanum episcopum, ad Bangorensen clericum et populum, ad Hugonem Dunelmensem, ad Robertum Herefordensem, ad Gilbertum Londoniensem, ad Stephanum Meldensem, ad Bernardum Nivernensem, ad Jocelinum Saresburiensem, ad Trecentensem episcopum, ad Rogerium Wigorniensem, ad Clerembaldum S. Augustini electum et monachum, ad abbatem et fratres Pontiniacenses, ad Cistercienses, ad abbatem de Claromarisco, ad Simonem priorem de Monte-Dei et Bernardum de Corilo, ad Henricum regem Angliæ, ad Ludovicum regem Franciæ, ad regem Scotiæ, ad comitem Henricum, ad Philippum comitem Flandriæ, ad R. filium Henrici, ad Joannem Cumin.

(Vide in ALEXANDRO III ad annum 1181).

EPISTOLA CCCXX.

ROTHODI ROTOMAGENSIS, ARCHIEP. AD HENRICUM PRESBYT. CARDINALEM.

Rothobus Rothomagensis archiepiscopus, HENRICO presbytero-cardinali.

Pro domino rege Anglorum omnem exhibemus

D securitatem, quod imperatori nec per se, nec per nuntios juramentum præstitit aut promissionem, quod schismatico adherere velit, ecclesiam relicurus: imo certi sumus quod in illis qualibuscunque de matrimonio pactionibus, licet Teutonici super hoc laborarent per triduum, nihil unquam conce-

dere voluit, nisi præeunte in omnibus fidelitate domini papæ, et ecclesiæ, et regis Franciæ. Ipsi vero litteris vestris mandavimus domina imperatrix et nos, ut ab hac nota quam citius se excuset. Nos quidem cum Rothomagi essemus, et illic essent nuntii imperatoris, de illis audivimus, sed eos non vidimus. Domina imperatrix, cum eam videre summo opere requirerent, respondit quod propter episcopos non auderet. Nec eam viderunt. De ea nulla apud vos habetur dubitatio, quod aliquo modo vacillaverit. Imo fortitudine accincta de hujusmodi verbis satis admiratur. Nuntium, quem ad nos direxistis, ad eam direximus: ipse vobis referet quæ audit. Postquam autem nuntii domini regis ab imperatore reversi fuerint, omnem rerum veritatem sollicite inquisitis vobis significare non differemus. Ex verborum tenore perpendere potestis dictorum falsitatem, quia quinquaginta episcopos, quos exhiberet, rex non habet. Nos vero detrimentum Ecclesiæ nec sustinere, quantum in nobis est, posuimus, nec videre. Super his domino papæ, quod vobis videbitur, significabit.

EPISTOLA CCCXXI.

EJUSDEM AD REGEM ANGLIÆ.

ROTHODUS Rothomagensis archiepiscopus, regi Angliæ.

Formam verberam, quam reliquistis nobis, a legatis nequivimus impetrare propter determinationes, quæ tam a vobis, quam ab ipsis hinc inde multipliciter et ambigüe ponebantur. Eos autem abrupte, et sine spe pacis recedere, nec honori vestro nec utilitati congruere videbatur. Cum igitur inter nos plurima tractarentur, verbum incidit, in quo dignitati vestræ et honori vestro non derogatur in aliquo. Nec Cantuariensi aliqua in futurum litigii materia comparatur. Est autem verbum hujusmodi, ut concedatis pro amore Dei et domini papæ archiepiscopum redire in Angliam, et archiepiscopatum suum ita integre habere faciatis, sicut habuit antequam exiret, et illis qui cum eo vel propter eum egressi sunt, similiter sua. Placuit autem nobis brevitatis et simplicitatis hujus verbi, quia nullis artibus aut suspitionibus videbatur involutum. Unde vobis consulimus et laudamus, ut vestrum ad hoc accommodare non dubitetis assensum.

EPISTOLA CCCXXII.

EJUSDEM AD ALEXANDRUM PAPAM.

ALEXANDRO papæ, ROTHODUS Rothomagensis archiepiscopus.

Evocati a domino nostro rege, etc. *Vide in Alexandro III.*

EPISTOLA CCCXXIII.

EJUSDEM AD THOMAM CANTUAR.

THOMÆ Cantuariensi archiepiscopo, ROTHODUS Rothomagensis archiepiscopus.

Scimus prudentiæ vestræ notum esse, quod melior est obedientia, quam victimæ, et quod idololatriæ scelus est nolle acquiescere: ei præsertim, cui debe-

atur omnis obedientia in Ecclesia præsentis. Et qui cogendi habet potestatem dominus papa, nobis et venerabili fratri nostro Nivernensi episcopo certam præscripsit formam, juxta quam absolveremus venerabilem fratrem nostrum Londoniensem episcopum. Et mandato additum est, quod si uterque nostrum adesse non posset, alter nihilominus ab eo requisitus eum absolveret. Nos itaque requisiti ab eo die Paschæ, juxta formam mandati eum absolvimus, auctoritate domini papæ vobis injungentes, quatenus hoc ita penes vos secretum observetur, sicut ex rescripto litterarum domini papæ, quod vobis mittimus, discretionis vestræ manifestius apparebit. Valete.

EPISTOLA CCCXXIV.

WILLELMI SENONENSIS AD REGEM ANGLIÆ

WILLELMUS Senonensis archiepiscopus, regi Angliæ.

Significavit nobis vestra serenitas, ut nuntiis domini papæ absque juratoria cautione excommunicatos absolvere de consilio nostro liceret. Nos autem nec a domino papa super hoc auctoritatem habemus, nec ipsis consulere audemus, ut mandatum domini papæ transgrediantur, vel ut contra consuetudinem Romanæ Ecclesiæ in aliquo negotio procedant. Salva gratia sua, ipsi in nos culpam refundere non debuerant, qui mentem domini papæ plenius cognoverunt. Nos enim nobis succedere judicamus, si honorem vestrum in aliquo promovere, vel utilitatem procurare valeamus.

EPISTOLA CCCXXV.

EJUSDEM AD GRATIANUM ET VIVIANUM.

WILLELMUS Senonensis archiepiscopus, GRATIANO, et VIVIANO legatis.

In admirationem ducimur non modicam, quod onus questionis, quæ super excommunicatorum absolute veritur, ita in nos transfundere voluistis, quod sicut ex tenore litterarum domini regis Angliæ accepimus, sub umbra consilii nostri eidem regi propeveritis, vos posse a nota transgressionis excusari. Non enim in eo debuistis in nos culpam refundere, in quo nostram nemo valet incrustare sinceritatem. Verum quia in tam intima devotione et vinculo adeo indissolubili domino papæ et Ecclesiæ Romanæ stricti sumus, ut nec sentire, nec quidquam consulere debeamus, ex quo Ecclesiæ honori derogari, vel opinionis suæ integritas violari videatur, discretionis vestræ nihil aliud audemus respondere, nisi quod nec fines mandati domini papæ transgrediamini, nec in præsentis articulo quidquam velitis statuere, quod ecclesiasticæ sanctioni, et Ecclesiæ Romanæ, imo generali totius Ecclesiæ consuetudini videatur refragari, vel ad perniciosi exempli consequentiam in posterum valeant derivari, nisi forte aliud ex voluntate domini Cantuariensis acceperitis. Angelus consilii et fortitudinis sit vobiscum.

EPISTOLA CCCXXVI.

EJUSDEM AD ALEX. PAPAM.

ALEXANDRO papa, WILLELMUS Senonensis archiepiscopus.

Adhuc, Pater, pietati vestrae, etc. *Vide in Alexandro.*

EPISTOLA CCCXXVII.

EJUSDEM AD EUNDEM.

ALEXANDRO papa, WILLELMUS Senonensis archiepiscopus.

Scelerum mater impunitas, etc. *Vide ibid.*

EPISTOLA CCCXXVIII.

EJUSDEM AD EUNDEM.

Domino papa, archiepiscopus Senonensis, salutem, et omnem cum summa devotione obedientiam.

Qualiter in secundo regum colloquio, etc. *Vide ibid.*

EPISTOLA CCCXXIX.

EJUSDEM AD EUNDEM.

ALEXANDRO papa, WILLELMUS Senonensis archiepiscopus.

Audiat, sanctissime Pater, etc. *Vide ibid.*

EPISTOLA CCCXXX.

EJUSDEM AD EUNDEM.

ALEXANDRO summo pontifici, Senonensis Ecclesie minister humilis, spiritum consilii et fortitudinis cum omni obedientie famulatu.

Inter scribendum hæc, etc. *Vide ibid.*

EPISTOLA CCCXXXI.

EJUSDEM AD EUNDEM.

Sanctissimo domino ac Patri ALEXANDRO, Dei gratia summopontifici, WILLELMUS Senonensis Ecclesie humilis minister, salutem et debitam cum omni devotione obedientiam.

Vestro apostolatu, Pater sancte, etc. *Vide ibid.*

EPISTOLA CCCXXXII.

MATTHEI SENONENSIS THESAURARI AD EUNDEM.

ALEXANDRO papa, MATTHEUS Senonensis thesaurarius.

Omnis quidem fidelis anima necessitate juris subijcitur apostolicæ majestati, etc. *Vide in Alexandro III ad an. 1181.*

EPISTOLA CCCXXXIII.

PETRI CELLENSIS POSTEA ABBATIS S. REMIGII AD THOMAM CANCELLARIUM.

Domino et amico suo charissimo THOME cancellario regis Angliæ, frater PETRUS Cellensium abbas, se et sua.

Quem fortuna non extollit propria, magis pro humilitate quam pro sublimitate est admirandus. Gloria vobis cum prosperitate (ut accepi ab his qui viderant et noverunt) ambitiosius quam contentiosius contendit; nec confundit aliquando superata, nec unquam inolescit de victoria. Credit gloria prosperitati, sed gloriöse sed prosperæ. Quælibet obtineat, humilitatem seu moderationem non am-

A putat. Gloria accedit sed non superbia; prosperitatis venit sed non effusa. Inde est quod de nule tantæ sublimitatis ad latibulum nostræ paupertatis misistis quia venire non potuistis. Rogastis de familiaritate et amicitia. Quod rogastis si admittetur, admirationi procul dubio habendum esset pro rogantis et rogati fortuna. Quæ enim proportionalitatis habitudo inter abbatem Cellensem et cancellarium regis Angliæ? Pene non est comparatio, ubi non est existimationis adaptatio. Secundum post regem in quatuor regnis quis te ignorat? Primum in miseriis fratrum nostrorum quis me non reputat? Dicam de compendio quia quantum de vobis excellentiora, tantum de me sentio et scio viliora. Nullo ergo modo ad ingressum amicitie manum **B** porrigo. Sed si vel de grege accidentalium amicorum fuero, bene mecum fecisse dignationem vestram æstimabo. Primitias autem illas non mitto, quia ampliorem gratiam facere propero. Non habebam sermones illos magistri G. sed quæro: et statim scriptorem cum omni instantia huic operi ad opus vestrum designo. Vale.

EPISTOLA CCCXXXIV.

EJUSDEM AD EUNDEM.

Domino et Patri charissimo THOME archiepiscopo Cantuariensi et apostolicæ sedis legato, F. PETRUS Cellensis qualiscunque minister, se ipsum.

Facti sumus sicut consolati in consolatione sanctitatis vestrae tam affectuosa, tam pia, tam plena **C** dulcedine et charitate. Reddat vobis Spiritus Paracletus consolationem suam, qua misericorditer respicere voluistis desolationem nostram. Suscitavit siquidem corda nostra etsi non emortua, jam tamen elanguida susceptio litterarum vestrarum. Dominis et amicis nostris hanc vestram dignationem et consolationem ostendimus, et in spe divina et consilio eorum, martyrem vestrum peregrinari ad vos destinavimus. Excipite illum: et quia vix in terra sua habet ubi reclinet caput suum, interim sub umbraculo vestro militet, et stipendia ad nos condigna reportet. Confidimus equidem in bonitate Dei et in liberalitate animi vestri, quam jam prægustavimus, quia quamvis in baculo suo transeat mare vestrum, tamen sit reductor in turmis multarum benedictionum. Discretionis sanctitatis vestrae fratres nostros **D** et nuntios disponendos committimus. Dominum quoque et confratrem in omni oratione et beneficio omnium nostrorum vos annumeramus. Valet.

EPISTOLA CCCXXXV.

AD EUNDEM.

Domino et Patri charissimo THOME venerabili Cantuariensi archiepiscopo, F. PETRUS abbas S. Remigii, ex toto corde devotissimam salutem.

Sollicito revolvens animo quam potius materiam assumam, cum vobis scribere volo, vix occurrit: non deficiente quid dicatur, sed reverentia ejus comprimente manum cui dicatur. Nihil enim dignum vestri animi fortitudine dicere possum: nihil addere

constantissimæ tolerantie vestræ : nihil denique docere omnia a longe prospicientem atque fines rerum et causarum futurarum plenissime demetientem animum. Feni atque palarum acervum atquid anteponebam præsepio cui adhæret vos adipe et pinguedine opulentissima saginatus et satius? Equidem hoc unum mihi ad ministerium aliquod impendendum in obsequio vestro non indigne reservatum reperio, si muscas abigere possem vestram sanctitatem oblatione invidiosa pungere volentes, vel saltem interpretatione perversa denigrare sinceritatem fidei vestræ insistentes. Planæ muscæ istæ morientes quæ in Ægypto abundantes Pharaonem regem Ægypti tanquam virum muscarum circumdant, Domino opitulante non perdet suavitatem unguenti. Servabitur namque in diem sepulture Jesu, et prædicabitur in generatione et generatione quod archiepiscopus Cantuariensis murum se opponens pro domo Israel vestigia sanctorum antiquorum imitatur, dum Christum in cruce nudum pendentem nudus sequitur. Quo modo igitur cum Abraham potero abigere easdem muscas contaminare volentes illibatam Domini sacrificium, nisi facto ventilabro de authenticis scripturis quo vel feriantur vel saltem effugiantur? Dicunt enim, non debet archiepiscopus tam instanter sua repetere a rege Angliæ ut dimittat reconciliationis pacem pro amissa pecunia. Falluntur specie veri vel adulatione falsi. Qui specie veri decipiuntur, instruendi sunt: qui adulatione falsi, repellendi. Simplicitas enim revocanda est; malitia prorsus abijcienda. Certe pensandum est in omni tam contractu quam actu quid propter quid faciendum vel quid dimittendum sit. Pensanda etiam sunt tempora et diversi status temporum, secundum quos mutantur merita causarum. Nam in primitiva Ecclesia sola patientia locum habuit ut auferenti tunicam dimitteretur et pallium. Alius enim erat et alibi, id est extra Ecclesiam qui persequabatur: alius et alibi, id est intra Ecclesiam qui patiebatur. Modo vero jam adulta Ecclesia, non licet filiis Ecclesiæ quod aliquando licuit inimicis. Decet enim matrem corrigere filium, sicut decuit pupillo tolerare adversarium. Distinctus namque saphiris legitur venter sponsi; ut quemadmodum ante passionem suam dixerat Jesus: *Qui non renuntiaverit omnibus quæ possidet, non potest meus esse discipulus*, et similia; sic in passione dicat apostolis: *Qui non habet gladium vendat tunicam, et emat*. Verba quidem bona, verba consolatoria non immerito exigeret causa justa in oculis Dei, in oculis autem insipientium dubia et infirma; nisi virtus patientiæ omnem transcenderet consolationem; et plus gauderet de consolatione quam malleus feriens proficeret de percussione. Ferrum ferro acuitur et de malitia regis Angliæ virtus vestra invincibilis clarius illustratur. Quo fortius premit oliva torcular, eo profusius oleum producit. Candelabrum ductile de auro purissimo non facit Beseel in tabernaculo Domini nisi productis laminis contritione

limi et mallei. Nondum contritus est malleus universæ terræ; adhuc necessarius est ut suppleat quæ desunt passionum Christi in corpore vestro. Sed quem moneo? quem exhortor? cui calcaria adhibeo? sine dubio qui freno indiget: qui paratus est plus ambulare quam via extendatur; qui etiam metus velociter transcurrere nullis retardatur periculis. Procul enim odoratur bellum. Exsilium reputat patriam; quia *omne solum forti patria est*. Sine labore laborat, sine fame esurit; sine dolore patitur, sine amaritudine felle et absinthio cibatur. Vir est in millibus unus. Cum gigantes gemunt sub aquis, ipse ridet et irridet fortunam cum inversione rotæ suæ. Vale.

EPISTOLA CCCXXXVI.

EJUSDEN AD ALEXANDRUM PAPAM.

ALEXANDRO PAPÆ, PETRUS abbas sancti Remigii. Stylum cohibere poterat apostolicæ contemplatio majestatis, etc. *Vide in Alexandro*.

EPISTOLA CCCXXXVII.

C. LANTONIENSIS PRESBYTERI AD ALEXANDRUM PAPAM.

ALEXANDRO summo pontifici domino reverentissimo et Patri suo sanctissimo, C. Lantoniensis Ecclesiæ presbyter, salutem et debitam in omnibus obedientiam.

Scriptum est: *Simplicitas iustorum*, etc. *Vide ibid.*

EPISTOLA CCCXXXVIII.

SIMONIS PRIORIS DE MONTE DEI ET ENGELBERTI PRIORIS DE VALLE S. PETRI AD ALEX. PAPAM.

ALEXANDRO PAPÆ, SIMON prior de Monte Dei, et ENGELBERTUS prior de valle S. Petri.

Ad illustrem regem Angliæ cum fratre Bernardo de Corilo nuper profecti sumus, etc. *Vide in Alexandro*.

EPISTOLA CCCXXXIX.

EORUMDEM AD EUNDEN.

ALEXANDRO PAPÆ, SIMON prior de Monte Dei, et ENGELBERTUS prior de valle S. Petri.

Juxta mandatum sanctitatis vestræ, etc. *Vide ibid.*

EPISTOLA CCCXL.

EJUSDEN AD ALBERTUM CARDINALEM.

ALBERTO cardinali, SIMON prior de Monte Dei. Desiderio desideravimus ego et fratres nostri aliquid audire de vobis, sed divinitus a multo tempore nobis subtrahita est consolatio ista. Erit autem maximi instar muneris, si placuerit ut sollicitudinem nostram de statu vestro certificetis. Admodum namque desideravimus prosperum eventum vestræ legationis audire. Noster autem est, qualem consuevistis audire. Peccatores enim sumus, et utinam condignos fructus pœnitentiæ Deo per gratiam ejus potius, quam per merita nostra valeamus offerre. De cætero dilectioni vestræ supplicamus attentius, quatenus domino Cantuariensi, quem constat pro justitia exulare, auxilium et consilium impendatis. Quia, sicut præsentem domino rege Francorum, et

omnibus qui colloquio interfuerunt, rex Angliæ confessus est, quod hæc sola causa est exsilii et proscriptio-
 nis ejus, quod consuetudines noluit absolute promittere, quas justitiæ Dei et Ecclesiæ libertati constat esse contrarias. Præterea gloriatur idem rex se privilegium habere a domino papa, quo potestas domini Cantuariensis suspensa est, quandiu rex ei voluerit subtrahere gratiam suam. Valete.

EPISTOLA CCCXLI.

A. SANCTÆ OSITHÆ MINISTRI AD ALEX. PAPAM.

Domino et Patri reverendo ALEXANDRO summo pontifici, A. Ecclesiæ sanctæ Osithæ minister humilis, sinceræ orationis affectum et debitæ subjectionis obedientiam.

Nonne, Pater semper diligende, etc. *Vide in Alexandro.*

EPISTOLA CCCXLII.

ABBATIS RAMESIENSIS AD ALEXANDRUM PAPAM.

ALEXANDRO papæ, abbas Ramesiensis.

Quoties optimis viris testimonia deferuntur, etc. *Vide ibid.*

EPISTOLA CCCXLIII.

WILLELMI RAMESIENSIS AD ALEXANDRUM PAPAM.

Domino et reverendo patri ALEXANDRO Dei gratia sanctæ apostolicæ atque catholicæ Ecclesiæ summo pontifici, frater WILLELMUS sancti Benedicti Ramesiensis Ecclesiæ servus indignus, obedientiam cum debita reverentia.

Quantis tribulationibus Ecclesia Dei primitiva etc. *Vide ibid.*

EPISTOLA CCCXLIV.

NICOLAI DE MONTE ROTHOMAGENSIS AD THOMAM CANTUARIENSEM.

THOMÆ Cantuariensi archiepiscopo, frater NICOLAUS de Monte Rothomagensis.

Super negotio vestro nos minus fuisse sollicitos, quia nondum a nostra parvitate litteras accepistis, minime, si placet, vestræ paternitatis arbitretur magnitudo. Nihil enim eo usque scribendum estimavimus, quod vestram concederet audire sanctitatem. Satis enim etiam apud vos credimus esse cognitum, puerum qui regi litteras tradidit, in arcto fuisse positum, digitis ad oculos eruendos appositis usque ad effusionem sanguinis, et aqua calida per os injecta, donec confisteretur se litteras a magistro Herberto accepisse. Sed necdum a vinculis absolvitur, cum tamen rex a matre mandatum acceperit, ut abire permitteretur. In octava autem, ut accepimus, sancti Martini rex et comes Theobaldus Turonis habebant colloquutionem. In festo vero sancti Andreæ venturus est ad nos, ut una cum Flandrensis colloquatur. Sed et hoc de Anglia accepimus, quod Lincolnensis episc. et comes Gaufridus debitum carnis persolverint. Dicitur quoque quod Ricardus de Luci jam, ut Hierosolymam vadat, signum sibi crucis imposuerit.

De cætero pro certo sciatis, quod nullus apparet, nisi coram rege de vobis vel unum verbum audeat

A proferre. Sigillum suum a magistro Walthero, quia puerum, qui litteras attulerat, non retinuit, abstulit: quod postea tamen archidiacono reddidit. Archidiaconus autem eorum domino Rothomagensi et pluribus aliis dicens se missurum nuntium ad vos, in Assumptione beatæ Mariæ virginis appellavit. De mandato vero domini papæ super rege conveniendo dominus Rothomagensis cum suffraganeis nihil palam fecit: forte secretius alloquens regem. Sed nec hoc lateat vestram sanctitatem, quod magister domus infirmorum Cantuariensium, in partes nostras veniens, retulit nobis Londoniensem omnia reddidisse scaccario regis, quæ de redditibus vestrorum clericorum acceperat. Sed et hoc nobis nuntiavit, quod prior Cantuariensis monachum quemdam in custodia posuerat, quia de processione exierat, clamans et exprimens, quia vobis et non regi faverent. Sed et serviens Scailman, cum captus fuisset, evasit, et in monasterio Sanctæ Trinitatis per aliquot dies latitans, tandem liberatus, quo diverterit, ignoramus. Audivimus autem et de militibus regis, readificare et munire volentibus Basinwerth, quod a Wallensibus subito supervenientibus plurimi sint interempti, plerique vero sauciati. Valeat sanctitas vestra.

EPISTOLA CCCXLV.

EJUSDEM AD EUNDEN.

Idem eidem archiepiscopo.

C Molestie ferimus, et ultra quam dicere possimus condolemus, quod ad vos eo usque venire non potuimus. Sed est causa multiplex et magna. Debito namque tanto sumus obligati, præcipue pro domo, quam emimus anno præterito, quod quasi singulis diebus, ut terminum differamus supplicando, nos oporteat ingredi civitatem, eo quod pecunie non sufficiamus solvere quantitatem. Sed et in arcto sumus ex alia parte, eo quod rex et sui Rothomagi morentur. Unde si nos interim absentaremus, ne sibi innotesceret, formidaremus. Durum enim verbum est in auribus ejus et execrabile, quod de vobis etiam aliqua mentio fiat. Nec apparet qui de nobis bene loquatur, vel in ejus conspectu facere etiam mentionem audeat. Longe vero melius nobis novistis, quod in arcto sit, et quo se vertat non novit. Hinc enim ei regnum Francorum adversatur. Hinc pavet Pictavienses, hinc Wallenses formidat, ex alia parte Britones habet suspectos; suos timet, nusquam securus. Nec mirum, quem Ecclesia non protegit, si plures ruat in hostes. Verum si se locus et opportunitas obtulerint, quam citius fieri poterit, alter nostrum, vel ego, vel magister Herbertus vestram præsentiam adibit, et quod interim sciri poterit, plenarie vobis apportabit. Hoc tamen interim vobis innotescat, quia quam pacem a rege Francorum habere poterimus, recipere minime differemus. Valeat in perpetuum sanctitas vestra.

EPISTOLA CCCXLVI.

EJUSDEM AD EUNDĒM.

THOMÆ Dei gratia Cantuariensis Ecclesiæ archiepiscopo, frater NICOLAUS de Monte Rothomagensi salutem cum totius devotionis effectu.

Quantæ compassionis visceribus adversitates Ecclesiæ Dei, quas magnanimitas vestra sustinere decrevit, parvitas mentis nostræ apud se suscipiat et pertractet, nec scriptura sufficienter exprimere, nec viva voce plenarie pronuntiare minus facunda lingua valeret, sed de nostro affectu, qui quantumlibet est, vester est, quia illum abjectum et minus utilem in conspectu Dei esse cognoscimus, tacere melius duximus, quam plura loqui. Verum id, licet excellentiæ vestræ non incognitum, silentio præteriri non oportet, quod vestræ sublimitati sit ipsa commemoratione gratissimum, quod menti perturbationum fluctibus impeditæ sit magnæ securitatis indicium, quod humeros delicatos, quos suppositis ad portanda onera virorum, suæ virtutis efficacia reddat talibus fasciculis aptiores: Ecclesia pauperum Christi, quos humilitatis vestræ mansuetudo adoptavit in filios, quos apud Deum magnitudo fidei vestræ voluit habere patronos, quos in ratione dati et accepti munificentia sibi fecit obnoxios, ipsa siquidem tota sui spiritus intentione suspensa, a Domino noctibus ac diebus impetrare festinat, ut Ecclesiæ suæ vestris temporibus tranquillam tribuat libertatem. Postulat autem in fide, nihil hæsitans. Summa igitur ope et alacri studio quod inchoastis opus perficite, nec in aliquo vacilletis. Siquidem Deus tantum vobis contulit honorem, tantamque felicitatem, ut operi vestro testis sit in cælo Jesus Christus, testis in corde conscientia. Et quod paucis et raro solet accidere, hoc vobis ad exhortationis et exhilarationis cumulum accessit, quod totius multitudinis devotio præbet in Deo vobis auxilium. Et universi populi sermone super his quæ agitis bonum flagrat testimonium. Sed de his hactenus.

Joannes de Oxeneford, qui ex consilio episcoporum vestrorum ad curiam reversus, et a curia veniens, per dominam imperatricem transitum fecit, ut eam contra vos exasperaret, sicut antea tam ipse quam alii fecerant, malitiam, quantum potuit, inculcavit. Siquidem quia opus vestrum verisimiliter reprehendere non potuit, intentionem calumniatus est, asserens universa, quæcunque facitis, mentis elatione, studioque dominationis inchoata. Ecclesiasticam etiam libertatem, quam defensatis, non ad animarum lucrum, sed ad augmentum pecuniarum episcopos vestros intorquere, tam ipse quam alii nuntii regis affirmant. Et licet necdum propter novitatem prælationis a vobis id esse factum consentiant, tamen ad idem vos anhælere contendunt. In Angliā namque delinquentium culpæ apud episcopos accusatorum non muletantur injunctione pœnitentiæ, sed datione pecuniæ. Item quod Deus in causa non sit operis vestri, dicunt eam inde debere cognoscere.

A scere, quod ab initio archiepiscopatus vestri non religiosos vobiscum, sed litteratos nobiles congregastis. Et eos dedecorosa appellatione nuncupant, quam silere melius puto. Item ecclesiastica beneficia non Dei contemplatione, sed servitii vestri occasione, etiam his, quorum turpitudine publice nota est, vos asserunt contulisse. Item asserunt quod non propter regias consuetudines, sed propter causam pecuniariam discessistis. Hæc in vos malitiose conficta tum propter cautelam, tum propter exasperationis dominæ occasionem cognoscendam vos ignorare non decuit.

Tertia die post recessum eorum ad imperatricem venimus, quæ litteras vestras per tempus aliquantulum suscipere distulit, et satis aspere in nos locuta est, quod ad vos perreximus, ex quo nobis notum fuit vos esse in curia. Nec enim credebat quod tam cito ad curiam pergeretis. Tamen non destitimus, sed ea vice et altera, bonæ, quæ potuimus, quasi nolenti ingessimus. Tertia vice post pauca verba litteras vestras benigne, sed occulte suscepit. Ita quod id clericos suos latere voluit, et eas nobis legendas injunxit. Quibus auditis, in primis excusavit se, quod de vobis aspera verba vel mihi vel aliis privatim et publice dixisset, vel etiam domino regi mandasset. Asseruit namque, quod filius ejus totum, quod de ecclesiasticis agere volebat, ab ea celasset, eo quod cognovisset ipsam potius ecclesiasticæ libertati, quam regis voluntati favere. Nunc vero litteras suas ad filium suum direxerat per quemdam de clericis suis, mandans illi, quatenus totum quod in mente haberet de statu ecclesiarum vel personarum vestrarum, sibi per litteras significaret. *Et tunc, inquit, cognita ejus voluntate, si perpendero laborem meum posse esse fructuosum, studebo pro posse et ecclesiasticæ paci et suæ.*

Post hæc verba recedentes ab ea, ad dominum Lexoviensem litteras vestras detulimus apud manerium suum Nonant, juxta Baiocum. Benigne nos suscipiens, secreta litteras vestras suscepit, et ea quæ a vobis injuncta fuerant, et si qua bona ipsi excogitare potuimus, libenter amplexus est, id in verbo veritatis affirmans, quod ab eo tempore quo ad curiam primo missus est, licet corporaliter contra vos steterit, mente tamen et consilio pro vobis stetit. Et hoc ipsum nobis in eo itinere cum eo de negotio vestro loquentibus non ex vestra parte, nec enim mandaveratis, se facturum promiserat. Privatim siquidem ad dominum papam et causam vestram et personam, quantum potuit, commendavit. Legatos regis ea sola postulare laudavit, quæ non impediri posse cognoverat. Nunc ergo pro certo cognoscite, quod si dominus rex communicarit ei consilium suum, ad libertatem Ecclesiæ et pacem vestram pro posse laborabit. Nec enim vestro labori minori affectione compatitur, quam si tota hæc adversitas Ecclesiæ suæ vel personæ occasione vobis incumberet. Ipsum siquidem socium haberetis infra breve tempus, si non esset oneratus ære alieno.

Nunc ergo consilium ejus est, ut ita caute vobis provideatis in expensis, ne multas pecunias in brevi effundatis: si tamen multas habetis, quod regis familiares affirmant. Si non habetis, cavete ne plurimis innotescat. Consilium enim acceperant adversarii vestri citra mare consilium dare regi, ne reditus vestros ad præsens attingeret, sed ministris vestris interdiceret, ne inde quidquam haberetis. Si ergo viderint quod velitis et possitis absque redditibus diutius sustinere, facilius et citius pax reddetur Ecclesiae. In his festivis diebus litteras vobis per nuntium proprium mittet. Et nunc misisset, si in manerio scriptorem habuisset, cui secretum hoc vellet injungere. Item mittit in Angliam familiarissimum sibi Randalvum de Ardena, per quem omnibus indagatis quæ in curia fiunt vel deliberantur, quidquid inde cognoverit, vobis per litteras significabit.

Reversi ad dominam imperatricem, quæ injunctis, ex ordine cuncta narravimus iterato. Consuetudines regis verbo narravimus, quia magister Herbertus perdidit schedulam. Hoc etiam adjunximus, quod consuetudinum quedam contra fidem Jesu Christi, aliæ fere omnes essent contra libertatem Ecclesiae. Propter quod timendum erat ei et filio suo de æterno periculo, et etiam temporalis. Tunc vero præcepit nobis mittere ad vos propter consuetudines illas. Volente Deo, ea ipsa die reperta est schedula, et die sequenti, omnibus ejectis a thalamo a conspectu suo, præcepit nobis eas Latine legere et exponere Gallice. Mulier de genere tyrannorum est, et quædam approbat. Sicut est illud de non excommunicandis justitiis et ministris regis sine licentia ejus. Ego tamen alia exponere volebam, nisi de hoc prius disceptarem, ostendens evangelicum præceptum, quod dicitur ad Petrum: *Dic ecclesie*, etc. Non: *Dic regi*, et alia multa. Quam plurima capitulorum improbat. Et hoc modis omnibus ei displicuit, quod in Scripturam redacta essent, sive quod episcopi eoacti forent, ut aliquam promissionem facerent de ipsis custodiendis. Hoc enim a prioribus factum non est. Post multa igitur verba cum ab ea vehementer inquirerem, quæ posset esse prima pacis occasio, hanc ei indicavimus, et assensit: si forte fieri posset, ut dominus rex mitteret se in consilium matris suæ, et aliarum rationabilium personarum, quæ taliter rem moderarentur, ut cessante promissione et scriptura antiquæ regni consuetudines observarentur, adhibito tali moderamine, ut nec per iudices sæculares libertas Ecclesie tolleretur, nec ita episcopi abuterentur ecclesiastica libertate. Scitote, quod domina imperatrix in defensione filii sui versuta est, eum excusans tum per zelum justitiæ, tum per malitiam episcoporum, tum in deprehendendo origine conturbationis Ecclesie rationalis et discretæ. Dicit enim quedam in quibus ejus sensum et laudavimus et adjuvimus. Episcopi clericos indiscrete ordinant, qui nullis ecclesiis titulatur. Ex quo fit, ut ordinatorum multitudo paupertate et otio ad turpia facta prolatur. Non enim timet per-

A dere Ecclesiam, qui nulli titulus est. Non timet pœnam, quia illum Ecclesia defensabit. Non timet episcopi carcerem, qui mavult impunitum transire conversum, quam pascendi vel custodiendi sollicitudinem abhibere. De ordinatione illius qui ecclesie non titulatur, quod irrita sit ad injuriam illius qui eam fecit, testatur synodus Chalcedonensis, una de quatuor, quas Gregorius sicut quatuor evangelii libros tota devotione complectitur. Hoc et alii plures canones. Item uni clerico quatuor evangelii aut septem ecclesie tribuuntur aut præbende cum sacri canones ubique manifeste prohibeant ne clericus in duabus ecclesiis connumeretur. Hujus iterum prave consuetudinis occasione quantæ de dationibus et præsentationibus ecclesiarum controversiæ nascantur, attendite. Super hac re locuta est domina imperatrix occasione Ricardi de Iwelcestre. Verum taceant episcopi, qui hoc faciunt suis parentibus, quod laici sibi servantibus. Item quod multas pecunias suscipiant episcopi propter peccata apud eos excusatorum, satis canonibus non consentit. Quia licet pœna sacrilegii sit pecuniaria, non tamen semper erit; sed quibuscunque personis ad quas sacrilegii querimonia pertinet, juste persolvitur. Quia ergo ex his et similibus nascitur ecclesiastica perturbatio, mirandum valde est, cur securis episcopalis iudicii non ad radicem arboris, sed ad ramusculos adhibeatur. Divina siquidem dispensatione actum est, ut ex tali radice fructus amaritudinis publice nasceretur. Quapropter libertatem Ecclesie propter Deum diligitis: quod prædicta vobis displiceant, verbis et factis ostendite. Et si litteras ad dominam imperatricem miseritis, id ipsum ex aliqua parte significate. In verbo veritatis vobis dicimus, quod amore rectitudinis et salutis animæ nostræ, quæ prædicta sunt, scripsimus. Si quæ insipienter dicta sunt, date veniam. Et sint occulta quæ diximus. Festinantius ad vos mittere non potuimus. Siquidem eo tempore, quo consuetudines coram domina imperatrice legimus, cum omni festinantia litteras i-tas præparavimus, vobis mittendas. Nunc rogamus attentius, ut litteras vestras nobis dirigatis, statum vestrum et propositum continentes. Quidquid injunxeritis, fideliter exsequemur. Iterato veniam postulamus, et de prolixitate, et de audacia.

EPISTOLA CCCXLVII.

EJUSDEM AD EUNDEM.]

THOMÆ Cantuariensi archiepiscopo NICOLAUS de Monte Rothomagensi.

Vehementer gavisus sumus, ex quo per litteras vestras nobis innotuit, quod institutiones pravas, ad quarum observantiam princeps noster Anglorum episcopos voluit obligare, publico anathemate condemnastis. Cum enim vobis non sit incertum, paucos ad præsens inveniri, qui vel resistent pravitatibus, vel eos, quos excommunicastis, publice devitent, scimus quod non in humanis auxiliis, sed in eo fiduciam executionis sententiæ posuistis, qui dedit po-

testatem talem hominibus. Ad quem respiciens A Moyses non virtute corporis, nec armatura potentiar, sed verbo eum, qui se vexabat, subiecit. Siquidem excellentius in sincerius inchoastis, quam si in ipsam regis personam dedissetis sententiam. Condemnando namque prædictas pravitates, citra liberationem Ecclesiæ Dei omnem vobis redeundi editum obstruxistis. Proinde frater G.... qui litteras vestras deferre debuerat, non venit, et ob hoc eas domino Rothomagensi coram puero, latore præsentium, legimus et tradidimus. Qui eas quo animo, quo vultu suscepit, puer ex parte cognoscit. Quod a communione se subtrahat eorum quos excommunicastis, nec dixit, nec negavit. Quod eos publice non denuntiaret, asseruit dicens hæc ideo vos mandasse, quia plures exsilii socios velletis habere. Quod litteras vestras suscipere non debuisset, affirmat, quoniam ipso adveniente, vos ejus præsentiam devitastis. Intelleximus etiam ab ore ejus, quod ad infirmendam sententiam, seu quæ data est, seu quæ dabitur a vobis, parati erunt probare ipse Rothomagensis, Lexoviensis et Sagiensis, quod propter hoc ad vos pergebant, ut vobis offerrent omnem satisfactionem, eorum iudicio, quos æquum est judicare inter vos et regem.

Nostræ itaque parvitati visum est, si id vestræ discretionis, et eorum qui vobiscum sunt, congruum videatur, quatenus litteras vestras domino Rothomagensi et prædictis episcopis dirigatis, in quibus eis significetur, quod paratus fuistis, estis et eritis, redire ad sedem vestram, et subire iudicium, quodcumque archiepiscopus Cantuariensis juxta canonum censuram subire debuerit; si tamen ipsi impetrare potuerint a rege, ut habeatis in primis redeundi securitatem, domina imperatrice et domino Rothomagensi interponentibus partes suas, secundum quod dominus papa censuit. Item si ecclesia in integrum restituatur, tum ad libertatem, in qua erat aliquando, priusquam querela mota est inter vos et regem, quando scilicet episcopi non erant obligati ad observantiam pravitatum, tum ad ea quæ postmodum ablata sunt a vobis et vestris. Rogetis etiam illos, quod si impetrare non possint a rege id, quod fieri canonica dictat auctoritas, ne habeat illos adjuutores in Ecclesiæ detrimentum, quibus acquiescere non vult in his, quæ spectant ad charitatis iudicium. Hæc illis mandand credimus, priusquam in regem sententia detur: non quod horum quidquam faciant, sed ne his quæ a vobis gesta sunt vel gerentur, quoquo modo obviare. Et si ad eos litteras miseritis, earum transcriptum nobis mittite. Præterea dominus Rothomagensis imperatrici conquestus est, quod ei hujusmodi litteras tradiderimus. Totum quoque quod agitis, aut extollentie imputat, aut iræ. De nobis pro certo sciatis, quod excommunicatis a vobis nec in salutationis verbo communicabimus. Unde vobis supplicamus attentius, quatenus nobis rescribere digne-
mini, an in quibusdam sicut in oratione et saluta-

tione, an his, et in omnibus aliis, a regis communione debeamus abstinere, si in eum sententiam dederitis, ut nec ab eo quidquam accipere, nec eum in celebratione missæ liceat nominare. Qualecunque enim terrenum commodum vel periculum credimus postponendum, ut quantum in nobis est, totum quod convenit censure districtiois ecclesiasticæ, compleatur. Litteras, quas Cicestrensi episcopo mitterebatis, apud nos tenemus expectantes, ut pro certo cognoscamus, ubi moram faciat, vel si forte parilibus nostris appropinquaverit, ut ei ipsas tradamus. Præterea tam in curia regis, quam apud nos plures asserunt, quod cancellariam Francorum regis habere debetis. Alii quoque conjectant, quod in festo sanctæ Mariæ Magdalænæ in regis personam sententiam proferetis. Domina imperatrix audiens, in quos sententiam dederatis, quasi ludo id accipiens, eos pridem excommunicatos esse respondit. Post hæc cum ex parte Ricardi de Ivelcestria salutaretur nihil respondit.

De rumoribus curiæ pauca scimus, nisi quod barones de episcopatu Cenomanensi pacem cum rege fecerunt. De Britonibus necdum quisquam, sed in vigilia apostolorum erat rex cum exercitu ad quatuor leucas de Felgeres. Cum abbas de Derbi redierit, plura scientes vobis mandabimus. Radolphus de Hospitali veniens ab Anglia dixit nobis, quod episcopi convenientes circa festum sancti Joannis appellaverint contra vos ad *viri Galilæi*, eo quod episcopum Saresburiensem absque eorum consilio suspendistis, et quia in dominum suum regem dare sententiam minati estis. Archidiaconus vero vester nititur, quantum potest, habere licentiam transfretandi. Necdum tamen litteras vestras accepit. Per canonicum regularem fratrem Adam, qui propter zelum justitiæ vos diligit, scribere poteritis, quod vestræ placuerit paternitati, quoniam absque mora ad nos reversurus est. Valeat sanctitas vestra

Hoc pro certo sciatis, quod episcopi vestri, etiam Herefordensis, contra vos dura loquuntur: quod Anglicanam Ecclesiam et Romanam conturbatis. Concilium quoddam habituri sunt in octavis apostolorum episcopi et omnes abbates apud Northamptonam.

EPISTOLA CCCXLVIII.

HENRICI ABBATIS STRATFORDIENSIS AD ALEXANDRUM PAPAM.

Patri suo et domino summo pontifici ALEXANDRO, frater HENRICUS monasterii de Stratfordia dictus abbas et humilis ejusdem loci conventus debitam Patri obedientiam et pro incolumitate vestra jugem coram Domino devotionis et orationis instantiam.

Apostolo, domine, scilicet docente, didicimus, etc. Vide in Alexandro.

EPISTOLA CCCXLIX.

S. ECCLESIE TRINITATIS LONDON. AD ALEXANDRUM PAPAM.

Venerando Patri ALEXANDRO, Dei gratia summo pontifici, S... Ecclesiæ sanctæ Trinitatis Londo-

niensis servus humilis, salutem et debitæ subjectionis A obedientiam.

Cum apud summum iudicem, etc. *Vide ibid.*

EPISTOLA CCCL.

WILLELMI ECCLESIE S. TRINITATIS LOND. PRIORIS AD EUMDEM.

Patri suo et domino summo pontifici ALEXANDRO, frater WILLELMUS Ecclesie S. Trinitatis Lond. claustrarius prior et humilis ejusdem loci conventus, debitam patri charitatem et humilem in omnibus obedientiam.

Apostolica doctrina, etc. *Vide in Alexandro.*

EPISTOLA CCCLI.

ERNISI ABBATIS ET R. PRIORIS S. VICTORIS PARIS. AD ROBERTUM HEREFORDIENSEM.

ROBERTO Herefordiensi episcopo, ERNISIUS abbas, et R. prior sancti Victoris Parisiensis.

Magnam de promotione vestra concepit ecclesia nostra lætitiā, et spe non modica hilarati sunt auditores vestri, tum universi scholares animati ad amorem litterarum, et cultum virtutum, vestri laboris et successus exemplo. Nos autem idcirco gavisi sumus quia vos præ cæteris amabamus et Ecclesiam Anglorum, quam præter charitatem, quam habemus ad omnes ecclesias, quadam speciali affectione natura suadente diligimus, vestra confidebamus eruditione proficere, et religione provocari ad divinæ legis cultum, et contra adversa roborari vestræ prædicationis officio, et virtutis exemplo. Nunc autem supra modum dolemus, quod neque desideria nostra de vobis impleta sunt, nec preces nostras pro vobis Dominus exaudivit. Et utinam essent aures vestræ ad ora scholarium, et religiosorum suspiria audiretis, ut sic erigeretur spiritus vester, qui divitiarum pondere dicitur opprimi, et amore episcopandi, et dilectiarum affluentia infirmari. Nam, ut aiunt illi, confirmaverunt vos divitiæ, quas in schola et frequenti verborum commercio consuevistis canigenas appellare. Speciosum tunc depingebatis episcopum verbo, quem ex voto nostro doctrina nunc exprimeretis et vita. Nunquid tunc fungebamini vice cotis

acutum

Reddere quæ ferrum valet, exors ipsa secandi?

Mirum est si non tinniunt aures vestræ a confabulatione scholarium, detractatione amulorum, et amicorum querelis. Adversus patrem vestrum et consecratorem, eundemque pro justitia, et libertate Ecclesie exultantem, nuper appellastis cum aliis, qui subversionem justitiæ quærunt et suam eversionem, et ponendo cum impiis portionem, unde vehementer dolemus, famam vestram plurimum denigrastis. Nunquid enim litteras appellatorias non vidistis, quas episcopi ad archiepiscopum suum transmiserunt? Certe si non vidistis, stultum fuit, et pace vestra veritatem loquatur charitas, non examinatum de re tanta, et quæ ad Ecclesiam Romanam perferenda est, signare testimonium. Si autem vi-

distis eas, qua conscientia, qua fronte, ausi fuistis asserere, et ut scribitis, cum omni fiducia prædicare, quod falsum esse novit, non modo vicinia tota, sed fere Latinus orbis? Prædicatis enim, quem sic scribitis, et ut de vestra potissimum utatur auctoritate, signatis Scripturam cum episcopo Londoniensi, quod rex vester, et si interdum ut homo deliquerit, omnes excessus suos corrigere paratus est, et in omnibus obtemperare justitiæ, et si non credatur ei, etiam satisfactionem offert, et adjicitis: *Quoniam diligit corripientes se, et increpantes libenter auscultat.* Sed qui hoc verum esse putat, quid credet esse falsum? Noti sunt enim mores hominis, ut vos talia prædicantes oporteat quærere peregrinum, sed extra Latinum orbem. Vos autem qui justitiam ejus astruitis, quam innocentiam allegatis in ejectione mulierum, et parvulorum innocentium poscriptione? Sed hæc, et his similia Dominus judicabit, et facientem, et consentientes pari poena percellet. Cogitatis interim quam sententiam tunc accepturi sint episcopi, qui modo tantis patrocinantur injuriis. Hæc sincera charitate, dulcissime Pater, scripsimus vobis, ut meminereis doctrinæ vestræ, officii vestri, desiderii nostri, et divini iudicii, ut redimatis famam vestram, et Ecclesiam, quæ in manibus vestris collabitur, studeatis erigere. Vestri fuimus, sumus vestri, et Deo propitio, semper erimus, prompti ad honorem et obsequium vestrum

EPISTOLA CCCLII.

C PRIORIS S. VICTORIS PARIS. ET R. ABBATIS S. AUGUSTINI AD ALEXANDRUM PAPAM.

ALEXANDRO papæ, prior Sancti Victoris et R. . . . abbas quondam S. Augustini.

Sanctis viris, etc. *Vide in Alexandro.*

EPISTOLA CCCLIII.

WILLELMI RADINGENSIS ABBATIS AD ALEXANDRUM PAPAM.

Beatissimo Patri et domino A. Ecclesie catholice Dei gratia summo pontifici, filiorum suorum extremus frater WILLELMUS abbas Radingensis indignè dictus, commissam sibi navem Petri ad portum tranquillitatis indemnem dirigere.

Quoniam sanctitati vestræ, etc. *Vide ibid.*

EPISTOLA CCCLIV.]

D WILLELMI AD HUGONEM DUNELMENSEM.

Venerabili Patri et domino Dei gratia illustri Dunelmensi episcopo H., suis WILLELMUS, salutem et felices ad vota successus.

Miseranda rumorum novitate turbatus multoque acrius afflictus quam ea novi mentis vestræ serenam tristitiæ nubilo caligare, rerum eventus sollicitus exploro, ut si quos vestris auribus offerendos comperero vobis scripto mediante significem. Noveritis itaque archiepiscopum Rothomagensensem et episcopos Wigornensem, Eboracensem et Lexoviensem, et clericos Raginaldum Lombardum, Ricardum Barre, Magistrum Henricum de Northampton, et plerosque alios ipso die conversionis beati Pauli Senonas ve-

uisse ut animum archiepiscopi Senonensis, qui ibidem eadem die omnes suffraganeos suos ad exsequendum mandatum domini papæ convenerat vel precibus lenirent, ne sententiam interdicti in terra regis pronuntiaret, vel ipsam sententiam appellatione suspenderent, qui nec precibus eorum acquiescens, nec appellationem eorum attendens, expositis in medio litteris sententiam continentibus et appellationis remedium excludentibus, toti terræ regis in partibus transmarinis indixit. Sed non fuit a Rothomagensi recepta sententia : dicebat enim non Senonensi soli, sed utrique eorum litteris illis ad utrumque directis, ferendæ sententiæ auctoritatem et potestatem fuisse collatam. Adjecit etiam mutatum esse casum. Præceperat enim dominus papa, ut si Cantuariensis archiepiscopus captus teneretur, prænominata sententia executioni mandaretur. Ad hæc duo in hunc modum respondit Senonensis. Ad primum, quia, etsi ad utrumque essent litteræ directæ, tamen in eis continebatur quod si alteruter a sententia ferenda et exsequenda desisteret, reliquis utrique injunctam præceptionem effectui nanciparet. Ad secundum vero, quoniam si minori casu domini Cantuariensis injuriam dominus papa hac pœna decrevit esse ferendam, multo fortius in casu majori et tam detestabili, hoc idem voluit esse faciendum, facta tamen appellatione omnes prædicti Romam profecti sunt, excepto Lexoviensi. De domino rege Francorum hoc vobis duxi nuntiandum quoniam proxima die Jovis post conversionem beati Pauli profectus est ad colloquium inter ipsum et imperatorem, petitione ipsius imperatoris habendum Dominica qua cantabitur *Invocavit in confinio regni et imperii* versus Meschisi ubi speratur de reformanda unitate et pace ecclesiastica esse tractandum et inter ipsos tum conjugii, tum aliis pacis fœderibus, amicitiam esse firmandam. Inter innumera, quæ fama imo veritate docente didici quoniam cætera vel modica vel vobis arbitrator manifesta, sola prædicta ad vestram audientiam deferenda decrevi. Vale.

EPISTOLA CCCLV.

LUMBARDI AD ALEXANDRUM PAPAM.

Reverendo Patri ac domino ALEXANDRO, Dei gratia summo pontifici, Lombardus ejus clericus fidelis, obedientiæ famulatur.

Cum vestræ sanctitatis puer, etc. *Vide ibid.*

EPISTOLA CCCLVI.

THEOBALDI BLESSENSIS AD EUNDEM.

Reverendissimo domino suo et Patri ALEXANDRO, summo pontifici, THEOBALDUS Blesensis comes, et regni Francorum procurator, salutem, et debitam cum filiali subjectione reverentiam.

Vestræ placuit majestati, etc. *Vide ibid.*

EPISTOLA CCCLVII.

W. MONACHI EP. AD GILBERTUM.

Reverentissimo Patri et domino, et in Christi visce-

ribus honorando, venerabili G. Londoniensi episcopo frater W. Adelelini filius, suus filius et monachus, sancti Spiritus gratia illustrari, et ejus fortitudine in omnibus roborari.

Quid mihi gaudii, quid jucunditatis status incolumitatis et prosperitatis vestræ conferat, quid doloris, quid mœroris econtra adversitas si quæ emergerit animæ meæ ingerat, solus ille novit qui inspector est cordium. Sed spero, confido in Patre misericordiarum quod procellam convertet in auram et omnes adversantes et malignantes vobis conteret sub pedibus vestris. Mi Pater, non antribus obstrepat, non animum offendat, quod vester ex intimo cordis prodit filius. Testor Jesum et angelos ejus me nihil more adulantium sed pro testimonio dicere.

Dum spiritus hos artus regit, dum hujus vitæ fruimur commeatu, spondeo, promitto, polliceor, semper vos mea lingua resonabit, vobis mei dedicabuntur labores, vobis desudabit ingenium. Præterea sanctitatis vestræ scripta tam lætus accepi, quam avidus et ante ea desideraveram. Legi ea et sententiarum verba quæolvebam in ore, scintillas sentiebam in corde, quibus et concaluit cor meum intra me, sed nondum in meditatione mea exarsit ignis. O quantus in vestris meditationibus exardescit ignis, e quibus hujusemodi evolvant scintillæ ! Benedicti vos a Domino, qui me in benedictionibus dulcedinis tantæ prævenire dignatus es ut daretur mihi vobis primum scribentibus fiducia rescribendi, scribere quidem ad vos jampridem gestienti, sed non præsumenti. Timeo dicere sed tamen dicam, quoties vestra scripta relego, quædam mihi ante oculos præsentis vestræ versatur imago, qua sitiienti animæ meæ totius perfectionis summam prædicare videtur. Hinc est quod eloquia vestra tam ardentem diligo, quid ipsa uberius animam meam refocillare videntur. Mitte, dulcissime Pater, quæ nondum misistis quia abundantius habebitis si habuero. Memor sit pater filii, quia filius patrem nunquam potest oblivisci. Sapienti sat dictum est. Vivat, valeat dominus meus, et gloria mea et exaltans caput meum.

EPISTOLA CCCLVIII.

MAGISTRI VIVIANI AD THOMAM CANTUAR.

THOMÆ Cantuariensi archiepiscopo, magister VIVIANUS, salutem et de instanti negotio ad honorem Dei et Ecclesiæ victoriam.

Ut cum domino Turonensi vel ejus nuntiis ad curiam, auctore Deo, festinantissime reverteremur, Turonis declinavimus, et quarto Kalendas Novembris litteras regis Angliæ, archiepiscopi Rothomagensis, et Cantuariensis archidiaconi, per priorem abbatiæ de Beccis, et quemdam alium nobilem virum accepimus, quarum transcriptum beatitudini vestræ mittimus, supplicantes ut non acquiescatis suggestioni alicujus clerici, etiamsi primatiæ fulget dignitate præclara, si in apertis litteris regis, quod honori vestro expedit, prout sæpenumero

propositum est, non recipiatis. Et rogamus ut festinantissime cursorem vel clericum aliquem ad nos usque mittatis, per quem voluntatem vestram nobis, si placet, aperiatis, nec tantum deferatis magistro Gratiano, ut honorem charissimi amici vestri, principii defensoris in Ecclesia Romana, penitus in persona nostra conculcentis.

EPISTOLA CCCLIX.

EJUSDEM AD EUNDEM.

Reverendo Patri suo et domino charissimo THOMÆ Dei gratia Cantuariensi archiepiscopo apostolicæ sedis legato, VIVIANUS utcumque dictus magister sanctæ Romanæ Ecclesiæ advocatus, et ejus honoris et suorum prolocutor fidelissimus, cum gaudio et gloria in continenti redire ad propria.

Benedictus Deus et Pater Domini nostri Jesu Christi, qui disjunctos parietes suggestione pravorum indissolubili jam charitatis vinculo unire contra multorum opinionem paratus est. Ad præsentiam regis revocati accessimus, et ea divina cooperante gratia invenimus, in quibus honor Dei et Ecclesiæ in nullo violatur. Si ergo nuntium Christianissimi regis Francorum, et domini Rothomagensis jam recepistis, sicut indubitanter credimus, gaudemus. Ita enim fuit statutum. Et si magister Joannes Saresheriensis, clericus vester, charissimus socius noster, ad vos rediit, sicut speramus, quoniam nuntium recepit, lætamur. Quidquid tamen, reverende Pater, fuerit, rogamus, et rogando ex parte Domini papæ et Romanæ Ecclesiæ consulimus, ut omni occasione postposita ad conoquium, quod inter duos reges apud S. Dionysium prima Dominica post festum S. Martini celebrabitur, desideratissime occurratis. Quoniam illic auctore Deo angelicum accipietis hymnum: *Gloria in excelsis Deo, et in terra pax domino Cantuariensi*. Magister et presbyter camerarius summi et maximi cardinalis Willelmi, fidelissimus vester, vos sicut proprium dominum salutatur, et nobiscum est in labore socius, et gerit personam domini sui, et quædam secreta domini regis portat, quæ ad exaltationem vestram omni modo spectant. Est præterea, quod nos, cum præsentemur, exponemus, quod vobis consulit, ut omnino ad colloquium properanter accedatis, quia regem et ejus filios juxta vestrum arbitrium habebitis. Nos properamus ad serenissimum regem Francorum, et diplomate, ut vos videamus, utimur, et illico simul ad statutum colloquium accedatis. Omnes vobiscum in exilio positos sincerissime salutamus. Optamus ut charissimus socius noster magister Longus, more suæ gentis, in hoc negotio prudenter sapiat.

EPISTOLA CCCLX.

EJUSDEM AD ALEXANDRUM PAPAM.

Beatissimo Patri et domino ALEXANDRO, Dei gratia universalis Ecclesiæ summo pontifici, VIVIANUS ejus sanctitatis servus devotissimus, debite subjectionis obsequium.

Quod statum nostrum, etc. *Vide in Alexandro.*

EPISTOLA CCCLXI.

EJUSDEM AD EUNDEM.

ALEXANDRO papæ, magister VIVIANUS, Operam omnem adhibuit, etc. *Vide ibid.*

EPISTOLA CCCLXII.

EJUSDEM AD HENRICUM REGEM.

Serenissimo domino HENRICO, Dei gratia Anglorum regi, magister VIVIANUS, S. R. ecclesiæ advocatus, salutem, et salubri consilio acquiescere.

Quantum pro honore vestro laboraverim, quantum diligentiam adhibuerim, ut ad gloriam Dei et vestram, pacem cum Ecclesia faceretur, novit Deus, et prudentia vestra ignorare non debet. Nam tantum pro vobis institui, quod multorum et magnorum amisi gratiam, et fabula factus sum detractorum. Unde miror, quod me, quem in vestra utilitate et honore noluistis audire, quasi pecunia corruptum reddere voluistis infamem. Sed quia vos obsequiis cepti colere, et ab amicis non facile recedere consuevi, precor et modis omnibus consulo, ut redeatis ad cor, et petitionem, quam vobis scriptam misit D. Cantuariensis, charta vestra confirmetis, hoc adjecto, quod eum recipietis in osculo pacis, eique mittatis, et revocetis ipsum, antequam terra vestra subijciatur interdicto, et illi feriantur anathemate, quorum nomina in libello damnationis eorum concepta sunt. Nam et plurimi sunt, et vobis pernecessarii, et tempus breve est. Quare autem vos rogare noluert quidam, discretio vestra facile perpendet, si veros pensaverit amicos, et fidem hominum. Præterea de mobilibus, quæ abstulistis, ea moderatione respondeatis archiepiscopo, ut et liberalitas vestra coram hominibus amplius elucescat, et conscientia tanti criminis restum diluat ante Deum, et idem archiepiscopus et sui, quoad vixerint, vobis et hæredibus vestris fideliores et devotiores debeant permanere. Si autem me vel hac vice noluertis audire, sera erit penitentia. Nec dicatis ulterius vobis quod imminet, non fuisse prædictum.

EPISTOLA CCCLXIII.

LAURENTII ABB. WESTMONASTERIENSIS AD ALEXANDRUM PAPAM.

ALEXANDRO papæ, LAURENTIUS abbas Westmonasterii.

Veritatis assertio, etc. *Vide in Alexandro.*

EPISTOLA CCCLXIV.

MAGISTRI WILLELMI AD THOMAM CANTUARIENSEM.

THOMÆ Dei gratia Cantuariensi archiepiscopo, et apostolicæ sedis legato, magister WILLELMUS, filius Ricardi Bonhart, nihil infra posse, sed supra.

Ut desint vires, tamen est laudanda voluntas. Hac quoque contentos auguror esse deos.

Auribus ad plura occupatis verbum facio abbreviatum, dum ad notiā vestram referre dignum duxi, quomodo Berengarius in die Ascensionis tradidit litteras vestras in ecclesia Beati Pauli, Lecto evangelio missus ille ad altare accessit, et manui

sacerdotis, nomine Vitalis, aestimantis se ab eo oblationem accepturum, litteras vestras me astante et vidente intrusit, et manum cum litteris firmiter tenuit, precipiens ei ex parte domini papæ et vestra, quod unas litteras traderet episcopo, et alias decano, et ne missam celebraret, antequam litteræ essent lectæ. Super his Willelmum de Norhallis in testimonium adduxit, qui legit evangelium in die Ascensionis, injungendo ei etiam ex parte vestra, ne astaret missæ similiter, et subdiaconum nomine W. Hög, donec litteræ essent lectæ. Post hæc Berengarius ad populum conversus voce clamosa dixit : *Scitote episcopum Londoniensem Gilbertum excommunicatum esse a Thoma Cantuariensi archiepiscopo, et apostolicæ sedis legato. Quo audito, plures eum retinere parati, contumelias illi intulerunt. Sed hunc feci discedere, ne tumultus fieret in populo : et hominibus catervatim egredientibus illum mea cooperui cappa, et sic ab ecclesia ductum usque ad hospitium, a quo egressus fuerat, comitatus sum. Hujus facti testes habeo ipsum Berengarium, et Ricardum nepotem Willelmi de Cap.... et filium Willelmi Wannoc. Contra prohibitionem, ex parte vestra factam sacerdos noluit celebrare missam, neque Willelmus de Norhallis astare. Willelmus nuntiavit hæc Nicolao archidiacono, qui respondit dicens : Sacerdos cessaret a comestione, si nuntius dixisset ei ex parte archiepiscopi, ne comederet ? Et celebrata esse missa non lectis litteris, nisi clanculum, ut audiui. Quod ut episcopo Londoniensi, Siebbehuthæ existenti, notificatum est, in Sabbato post Ascensionem Domini proximo clerum Londoniensis Ecclesiæ convocari fecit, et multis præhabitis consiliis inter episcopum, et decanum, et archidiaconum, et canonicos, tandem consederunt. Imperio itaque episcopi adfuit Vitalis sacerdos cum litteris vestris, et rem gestam ordine retulit, et litteras episcopo missas tradidit, et alias decano. Episcopus malignitatis amaritudine exasperatus, contractis superciliis, vix verbis exeuntibus, litteras legit, et sententiam sibi a vobis illatam his capitulis coram omnibus attentavit. Primum capitulum de Veteri Testamento sumptum est : Adam in paradiso peccavit, non statim damnavit eum Deus, sed deamulavit ut faceret copiam sui. Post vocavit eum dicens : Adam. Tercio increpavit, dicens : Ubi es ? Item secundum capitulum de Novo Testamento. In Evangelio dictum est Petro : Si peccaverit in te frater tuus, corripe eum privato. Postea coram duobus vel tribus. Tercio dic Ecclesiæ. Tunc demum habere eum incorrectum, sicut ethnicum et publicanum. Item dixit : Ne dicat archiepiscopus : Non potui citare Londoniensem episcopum. Constat potuisse. Quia qui potuit quod majus est, scilicet excommunicare, potuit quod minus est, scilicet citare. Item dixit : Solius papæ est privilegium, ab eo non posse appellari ; a cæteris omnibus potest appellari : et appellatione tutus per invocationem sanctissimi nominis sanctæ Trinitatis elido ejus factum ad firmam*

A Petram, supra quam fundata est Ecclesia. Item dixit : In omni casu criminali quatuor esse debent, accusator, accusatus, testes, et iudex. Hæc omnia confundit odio mei, dum solus accuset, testetur, et iudicet. Unde constat, si posset, materiali gladio caput amputaret. Item dixit : In alienam segetem mittit sulcem. Quia nec in personam meam, nec in ecclesiam meam potestatem habet. In personam, quoniam nunquam ei nec professionem, nec obedientiam feci ; nec Cantuariensi Ecclesiæ nomine istius ecclesiæ scilicet Ecclesiæ Londoniensis. In ecclesiam, quia Ecclesia Londoniensis repetit, quod diu paganorum irruptione ablatum est, scilicet archiepiscopatum debere esse Londoniæ, quod nos probabimus. Et appellationem prius factam innovamus. Item dixit : Quod si verum est, quod dicit, se habere illam potestatem a domino papa jure legationis, nec ea in me manus extendere potest, quia nondum recepit se in fines illos, in quibus esse debet legatus. Decanus, et archidiaconus, et omnes canonici, et omnes presbyteri Londonienses appellationem fecerunt. Sed canonici S. Bartholomæi, et S. Martini, et S. Trinitatis noluerunt facere aliquam appellationem. Tunc ad ultimum decanus fecit legere litteras sibi missas secundo. Quæ nunc scribo, ante Ascensionem facta fuerunt apud Westmonasterium. Episcopus Londoniensis convocavit episcopum Exoniensem, Ricardum de Iwelcestre, abbatem de Westmonasterio, Widonem Ruffum, episcopum Saresberiensem, et barones scaccarii. Præmandavit episcopo Exoniensi episcopum Londoniensis, ne offerret ei osculum pacis : quod non renuit tamen. Nam osculatus est eum Exoniensis. Respondentibus omnibus ad eos habuit episcopus Londoniensis sermonem, multimodis ad hoc nitens rationibus, ut episcopum Exoniensem in appellatione secum stare faceret. Sed quasi murus inexpugnabilis adversus expugnatores libertatis Ecclesiæ exstitit. Cui mentionem facienti de sententia eis illata a vobis, episcopus Saresberienensis respondit sic : Si Buinardus archiepiscopus vel stultus archiepiscopus meus præcepit mihi aliquid facere quod facere non debeam, nunquid faciam ? Quod absit, quod memoriæ commendetur, ut ei pœna inde reddatur. Semper enim scelera, dum non resecantur, incrementum, et in augmenta facinorum prosiliunt, dum secuta impunitate peccatur. Valete, et Angelum magni consilii consulite, ut ejus instinctu honesta et utilia in omnibus negotiis vestris faciatis.

EPISTOLA CCCLXV.

HERVEI CLERICI AD THOMAM CANTUAR.

Modestissimo domino suo THOMÆ, Dei gratia Cantuariensi archiepiscopo, suus HERVEUS, salutem, et sinceræ charitatis obtentum.

Est unde respirare possit ac debeat animus tuus, hæcenus enormitate rerum concussus. Convalescit enim et reintegratur aliquandiu languens, et impudenter lacerata sponsa Christi sacrosancta, et religionis mater Ecclesia, quæ te suo regeneratum ex sinu, alimentis quoque suis affluenter educatum, sponsi

tandem favore et gratia in eminenti suæ sollicitudinis specula collocavit antistitem: ubi quia te vigilem, dum, et conformem languoris et lesuræ suæ consortem invenit, reformationis, quam pro Christi accipit clementia, merito non relinquit extorrem. Hoc enim in se continet maternæ pietatis jus et privilegium, ut filiorum fletus convertat in risum, eos amplectendo propensius, quorum favorabiliores agnoscit fletus. Quid favoris tibi parturiverit oppressio, quam pertulisti novit longe lateque per diversos mundi tractus diffusa catholica sanctitatis religio: omnis, ut arbitror, lingua novit et natio, quot in locis favor hilaris tui colit memoriam, ubi potestas duplicata nullam fecisset notitiam. Plus tibi profuit nata turbatio, quam profuisset quietis continuatio. Olim insoleus et erāneus amicorum copia fortunatus credebaris, donec sua sors nubila detraxit, et te manifestis errasse monstravit indicis. Nam quos aridentis fortunæ longa tempora promiserant immotos, hos mutatae sortis momentum levī turbine discussit, et suos esse docuit, non tuos. Et talium tamen confidentia, elatio forsitan est et insolentia. Hæc eliminavit et his similia non infructuosa sortis adversitas, insolentiam humilitatione, errore discretionem commutans, instructionem suis circumquaque te reddens aculeis. Quæ, quamvis paucos sinceræ fidelitatis ostenderet amicos, eos tamen a fallacibus et fortuitis distinguens, cautionis et experientiae plurimum solertiæ tuæ thesauris accumulavit. Te tibi quoquo solito notiorē exhibuit, et quomodo de domestico cordis tui vigore confidas, experimentis edocuit. Sane quam æventis fortunæ nondum attentata scrutiniis mens molliter illusa et arroganter sibi blandita spondederat constantiam: quantam qualemque repereris, dum flagitiosa factorum injuria, auræque vitalis immineret jactura, ipsa tibi fida describas memoria, qui melius nosti. Notitiamque tui et tuorum ne parvi pendas, quam obtulit examinatrix adversitas. Porro multipliciter examinatur reverenter approbat, et veneratur te nostræ conversationis hominum pars potissima. Is præsertim, cujus præemineas est auctoritas, qui te speciali prærogativa inter probatissimos sanctæ matris Ecclesiæ filios plenæ devotionis et charitatis amplectitur brachiis, et in omnem destinat venerationem. Exinde tibi spes surgat, erigatur mens pressa molestiis, respirent præcordia sepulta doloribus: pax in januis est. Succidit Deus arborem, quæ fructus faciebat amaros. Cujus ex radice novella licet plata surrexerit, rore tamen cœli non adjuta, nec radices agit, nec ramos diffundit, nec incrementum recipit, sed arescit. Marcescens modo folium, quod induit, jam oneri sibi est, non honori. Vix stanti terra relinquatur, quam se inutiliter occupasse publice clamatur. Ipse quidem cujus ope pullulavit et stat hæc marcida planta, incolis infestus et indigenis in propria plurimum defensione laborat. Exstat oriens ex alto supremus paterfamilias, insipidae succisor arboris, qui suos

A inducturus agricolas hoc plantationis genus radicitus eveilet, nec impunitum ejus præteribit auctorem. Dominus exercituum faciet hæc. Cujus ira cum exarserit in brevi, beati omnes qui confidunt in eo. Confidenter igitur hilarescat anima tua, nec confusionis quidquam in tuis visceribus resideat. Dominus Deus noster, et qui non deserit sperantes in se. Ortæ pridem tempestatis horror auræ levioris intervallo detumuisse videri poterat, cujus si redi-viva caligine nubila nondum cessant, frustra fulgurationes et ceraunia superasti, si residuo orcellarum leviori motu submergeris. Rate navigas integra, remis acriter insurge, portus prope est, ad quem tunc applicabis, cum disposita tibi divinitus sorte contentus omnem emergentem rerum statum B in dilectione Christi tibi profuturus posueris. Sciimus enim, quoniam diligentibus Deum omnia cooperantur in bonum. Præteritas delicias ne doleas amissas, nec futuras mundi verearis molestias: præsentis facile transcurres varietates:

*Non est, crede mihi, sapientis dicere: Vivam.
Sera nimis vita est crastina: vive hodie.
Omnen crede diem tibi diluxisse supremum:
Gruta superveniet, quæ non aperabitur hora.*

Si quadraginta dierum, nec ulterius, quasi canonicam vivendi dilationem, qui occidit et vivere facit, Deus tibi prætaxasset immutabiliter, sane nullas in barbariam fugas attentares: salubrius ad commissæ tibi sinum Ecclesiæ, et ad sanctorum decessorum tuorum suffragia confugeres, compunctionibus et orationibus ibidem invigilans. Parum etiam plebis strepitum, vel potentum iras abhorreres. Nec cujusque temeritatem punire contenderes: aliquid supremo judici judicandum reservares. Salubriter rebus et domui tuæ disponens, de crastino supremæ diei non multum sollicitus, malignantium tumultus in contemptum deduceres. Instruit Scriptura dicens: *Quasi morientes, et ecce vivimus.* Hujus igitur instructionis norma communis, vagas et turbatrices impatientiæ tuæ curas a corde relegans, speciosissimam et excellentem dignitatis tuæ sedem jugi conversatione, officioque debito, quasi mortis sub articulo, studeas honorare. Ubi sanctorum loci suffultus patrocinio, quatenus inculcata moderatio D permiserit, plenam postulantis justitiam exhibeas intrepidus. Si quando regia sublimitas te evocaverit, pareas et reverenter accedas: verbo lenitatis et patientiæ nunquam destitutus ingeniose cuncta modificare satagas. Sicubi grassantis malitiæ refragata fuerit impunitas, caute sedens ad prætaxatum sanctorum recurras præsidium. Postremo si ad compositam felicitatem aspiras, æquo animo tolere oportet quidquid intra aream fortunæ geritur. Perspecta poterit prodèssè pagina, si non contemnitur, cujus monita sinceræ fidei sunt cognita, licet minus matura, quæ, quamvis canis elatrasset, prudentis tamen viri non offenderent intuitum. In quibus nimirum ejus rei veniam expostulo, quod pluralitate vocabulorum non debitam expremo reverentiam,

quam non Latinitatis regula, sed adulatrix lingua A creavit. Contemplatione modernæ malitiæ hæc utique, serene domine, vobis suggerenda disposui, quam si serena suppresserent tempora, mutaretur forsitan in aliquibus suggestio. Hac interim excitata celsitudinis vestræ prudentia alacriter exsurgat, et de bono semper procedat in melius. Valeat et in longum extendatur vitæ vestræ sanitas et sanctitas, charissime domine. Item et in perpetuum vale.

EPISTOLA CCCLXVI.

EJUSDEM AD EUNDEM.

THOMÆ Cantuariensi archiepiscopo, HERVEUS clericus.

Juxta tenorem litterarumstrarum, secretius B scriptum professionis, illud distincte legendo, domino papæ ostendi, nullo cardinalium præter dominum Mainfredum præsentem, in hospitibus autem suis domino Ostiensi, domino Hyacintho, et Ottoni, et etiam domino Portuensi, cui negotia vestra de consilio et mandato domini papæ communicata sunt, idem scriptum exposui. Quod autem circa negotia vestra, quæ forsitan jam peracta credebatis, præsentem nuntium vobis mitti desiderastis, modo id fieri non potuit, quia nondum illa obtinere potui. Non quia dominus papa vel amici vestri cardinales in ullo se a bonæ promissionis prosecutione retrahant, vel negligentiores se ostendant, fervent enim in dilectione vestri, et quod bene promiserat, dominus papa melius se executionum adjecit; sed quia in circumventionem et attractionem domini Portuensis, solerti adhibita cautela, et omni importunitate, ut oportuit, exclusa, quindecim dierum operam impendi, et hoc effeci, ut ipse primus inter amicos vestros apud Clarum Montem super petitionibus nostris dominum papam interpelleret. Dominus autem papa de industria paterna, ut ipsum præcipue Portuensem, et alios etiam ad instantiam provocet, gravem, durum, et quasi non satis exorabilem se prima facie prætendit. Et hæc est protelationis causa, per misericordiam Dei nobis in posterum profutura. Plurimum autem placet Ostiensi, quod talem industriam adhibet dominus papa. Cum autem effectui mancipari permiserit Deus desideria vestra, quantum mihi Deus annuerit, cautelam abhibebo, ut ad vos transferantur. Porro de consilio domini papæ est, ut si rex Franciæ victualia sua vobis honeste obtulerit, recipiatis non solum panem et vinum, sed etiam carnes: a tribus comitibus ad cautelam nihil palam accipiendum putat. A comite autem Glandrensi optimum credit oblata recipere, si tamen litteris suis vos vocaverit et invitaverit, ne quid palliatur. Quod tamen dominus papa non potest vereri propter generositatem et bonam indolem hominis illius, cujus intercessionem vobis profuturam sperat. Valeat dominus meus in perpetuum.

EPISTOLA CCCLXVII.

HUGONIS AD EUNDEM.

Domino suo THOMÆ Cantuariensi archiepiscopo, snus Hugo, salutem.

Dominum merito dixi, cui servire et volens vomii, et ex voto proposui. Utinam tamen dominus meus et diligentius attenderet, et sincerius diligeret eos, qui eum diligunt in veritate. Multi enim discipulorum speciem prætendunt, et debitam filiis benedictionem præveniunt, quamvis mercenarii nomine debeant nuncupari, paternæ benedictionis gratiam non merentes. Hi etenim sunt qui cito diligunt, sed citius contemnunt. De quibus dicitur: *Statim credunt, sed in tempore tentationis recedunt*. Hi sunt qui palam rident, intus derident; palam loquuntur, clam obloquuntur; in occulto sibilant, in manifesto obtemperant. De quibus dicitur: *Populus hic labiis me honorat, cor autem eorum longe est a me*. Hi sunt qui cum prosperitate fœdera pasciscuntur; qui prædam, non hominem sequuntur; non hominis, sed fortunæ; temporis, non personæ amici. Si enim adversitatis horror ingruerit, statim trepidant, vehementer desperant, ad antiquæ statum gloriæ profundius suspirantes. Si autem vel tenuis prosperitatis aura resulserit, subita quadam prurigne dissoluti, vento omni velocius agitantur, quærentes quæ sua sunt, non quæ Jesu Christi. Tales sunt qui ad ollas carnum in Ægypto suspirant, qui populum Domini in castris deserere non formidant. Tales forte cum David ad amplexus Bethsaber festinant, nobis cum Uria intrare domum nondum fas esse videtur, donec populus Domini debita victoria perfruat. Magis enim reputo gloriosum de mola assumi, quam de lecto, et pilis cameli cum Joanne vestiri in deserto, quam in domo regia mollioribus insigniri. Felicius enim esse constat pro Christo occumbere, quam terreno principi militare. Quidquid igitur cæteri agant, quocunque præcipiti voluntate ferantur, ego tamen minime eorum, quos rex odit gratis, tecum semper ero; et si oportuerit me mori tecum, non renegabo. Verum orare te concedet, ut non deficiat fides mea. Quoniam si sola voluntate mihi non defueris, ego tibi totis viribus præsens ero. De cætero gratias ago domino meo, quod consilium pueri sui super re grandi dignatus est sciscitari. Interim ergo differo consilium, quia puer sum. Sed utinam dominus meus prius a rege Anglorum nuntium receperit certiore, quam ad extraneum principem frena convertat. In proximo enim videbitis gloriam Domini, et splendor ejus obumbrabit vobis. Quoniam regis nostri, regis, inquam, jam benignissimi, Domini cor fecit placabile, et faciem reddidit mitiorem. Quod igitur vobis placuerit, mihi semper mandate. Pro vobis enim paratus sum et in carcerem, et in mortem ire. Et certe nihil mihi videbitur onerosum, quod a vobis fuerit imperatum. Constanti itaque animo esio, et confortamini, quia veniet Dominus, et non tardabit, nec vos deseret in tempore superborum sine adiutorio

Dominus Deus noster, qui personam vestram semper A
conseruet incolumem.

EPISTOLA CCCLXVIII.

NUNTII SUI AD EUMDEM.

Venerabili Domino suo, suus ille, in iis quæ Dei
sunt, semper proficere.

In fine litterarum, quas vobis nudius tertius misi,
si tamen vos eas recepistis, contentum est, quod rex,
quibusdam irarum igniculis inter ipsum et dominum
papam accensis, vestro imo Dei instinctu venerit ad
curiam, ipsisque seorsim colloquentibus, quidquid
rancoris conceptum fuerat, per gratiam Dei extin-
ctum est. Discordia etiam, quæ inter Henricum Pi-
sanum, et Joannem Neapolitanum, et Willelmum de
Papia, quisque enim istorum eodem spiritu vexaba-
tur, pullulaverat, specie tenus sopita est, rege me-
diante. Quidam etiam alii, prius discordes, per eum
concordes facti sunt, ita ut eo inde discedente multi
dicerent: *Homo iste venit pacem mittere, non gla-*
dium. Die autem tertia post ejus discessum ego et
frater Franco, verbo nobis secretissime commisso,
ad eum missi sumus. Cumque Parisios venissemus,
magistrum Rogeri Eboracensis nuntium invenimus,
qui jam rumoribus repleverat civitatem, quod scilicet
rex Angliæ apud Vigorniam de equo ceciderat,
et quod graviter in dextro brachio læsus fuerat. De
duro etiam responso, quod rex ibi per proprios ipsius
nuntios ante Gualensibus fecerat, et aliis multis, quæ
aliquis nostrum, qui tanquam exsules facti sumus,
nullatenus præsumeret. Veniens Sylvanectum ad
regem inveni quendam apud eum servientem, qui ei
duos canes nomine vestro præsentaverat. Ipse, tan-
quam vir discretus, et de amico sollicitus, timebat
ne alicujus æmulorum vestrorum malitia factum es-
set, ut per litteras ab eo impetratas, vel per aliqua
intersigna occasio malignandi posset haberi, ideoque
ipsum tanquam exploratorem, donec ego ad eum
venissem (sciebat enim me in brevi venturum) apud
se detinebat. Ego quidem, licet eum ad plenum non
cognoscerem, quia tamen multa ab eo audiebam
de modo vestra inter signa mihi satis nota, et ne si
aliquid mali, quod in mente regis erat, ei inferretur,
verbum ad aures inimicas transiret, datis ei a rege
viginti solidis ipsum abire permisi. Misit rex vobis
litteras, suas dilectione magna et consolatione ple-
nas, quas etiam latori præsentium propter quædam,
quæ in eis continentur, non sum ausus committere,
sed eas apud me retinui.

Expletis itaque domini papæ negotiis, pro quibus
missus eram, reversus quam festine potui ad eu-
riam, sine omni difficultate a domino papa obtinui,
quod nullus nuntius instinctu illius æmuli vestri ab
eo obtineret, quod aliquo modo vobis posset obesse,
et quod ipse honori et utilitati vestræ pro posse suo
in omnibus provideret, pro quo ego vice vestra
pedem ejus deosculatus sum. Petitiones ejus secreto
factæ fuerunt hujusmodi. Prima, quod dominus
papa cogeret electum episcopum sancti Andree de

Scolia venire Eboracum pro consecratione sua:
et si non veniret, quod archiepiscopo liceret eum
suspendere sed non potuit obtineri. Alia, quod
absolute duceret in irritum, quidquid prædecessores
Willelmus et Henricus, et omnes alii distraxerunt
vel alienaverunt de fundo Eboracensis Ecclesiæ.
Quod quidem hoc modo obtentum est, quod ei liceat
legitime revocare, quidquid injuste, et sine assensu
Romani pontificis vel privilegio distractum a præde-
cessoribus suis. Tertia, quod ipse non compellatur ad
ordinandum vel beneficium ecclesiasticum conferen-
dum aliquibus, qui fuerint geniti vel nati ab aliquibus,
in sacris ordinibus constitutis. Et hoc obtentum est.
Quarta, quod ei liceat redimere a laicis advocaciones
ecclesiarum. Quod necdum potuit obtineri. Aliæ fue-
runt, de quibus nullam feci mentionem: nullius enim
momenti erant. Nos autem verebamur, ne aliquid
magis sublateret: *Latet enim anguis in herba.* Dis-
simulabat namque nuntiis se in brevi recessurum,
eum tamen non ita esse apud hospites ejus depre-
hendissem.

De servitio ejus scribere vobis aliquid certum non
potui. Cum enim jam per quindecim dies moram
fecisset in curia, dominus papa nihil adhuc recepe-
rat, nec aliquis cardinalium, nisi forte Neapolita-
nus, quem fere solum habebat propitium: qui usque
ad mortem dolere videbatur, quoniam ei ad nutum
non succedebat. Utrum vero ipse servitium attule-
rit, incertum erat. Ego tamen, cum a rege rediis-
sem per Parisios, exploravi ab hospite ejus de statu
ipsius, et accepi quod cum tres haberet equos, ilat
oneratus. Quod quidem sive sit, sive non sit, nobis
parum curandum est. Nos enim per gratiam Dei juxta
portum sumus, et de faucibus leonis eripuit nos
Dominus. Eisdem diebus Willelmus de Papia, semel
in palatio trahens me in partem, quæsit utrum
de vobis aliquid audissem. Cumque ipsi respondis-
sem: *Non, cum multa et consueta solemnitate dixi:*
Non amplius turbidam faciem geras, sed lætitiæ na-
tali diei debitam agas. Quia dominus archiepiscopus
cum rege confederatus est, et pacem ejus obtinuit.
Quod quidem a quo habuisset, per eum non potui
cognoscere. Postmodum vero die secunda subdeca-
nus Bajocensis, et quidam ejus canonicus secreto
mihi retulerunt, quod apud Lexovias hospitati cum
episcopo Lexoviensi, litteris et viva voce mandavit
episcopum per eos Willelmo Papiensi, et Joanni
Neapolitano, quod ipsi pro certo scirent pacem
factam esse inter eos et dominum regem. Hoc uti-
que quid sibi vellet significare, quod eis sic man-
datum est, et ab eo qui in eadem damnatione cum
eis fuerat, incertum erat. Cumque hoc domino papæ,
Hyacintho, et aliis amicis nostris per me innotesce-
ret, mirum omnibus videbatur. Omnes tamen de
pace vestra tanquam de sua lætabantur. Dicebatur
autem a quibusdam nuntium illum majora his velle
querere, sed quia super hoc nullum apparebat ar-
gumentum, et dominus papa nos omnino esse secu-
ros præceperat, ea vobis scribere supersedi. Porro

si aliquid aliud emergerit, quam citius poterimus, A
sublimitatem vestram non latebit.

Verbum illud de filio Osberti archidiaconi jam
omnium aures replevit : et abhorrent universi. Nos
autem Deo et vobis gratias referimus, quod qui-
cunque a vobis veniunt, consonant. Et quæ nos in
aure de honestate vestra, ipsi prædicant super tecta.
Cancellarius imperatoris veniens Viennam, archi-
episcopus quamplures convocavit, primoque milites
ad opus imperatoris ab eis quasivit. Postmodum
de receptione Guidonis Cremensis, quem imperator
repperat, instantissime singulos convenit. Ibi que
spe et desiderio suo privatus est. Quidam autem
eorum ipsum Guidonem coram eo excommunicare
parati fuerunt. Ipse vero, cum non posset juxta
votum suum proficere, indixit comiti Henrico collo-
quium suum se velle cum eo habiturum. Comes
autem, cum hæc vobis scriberem, transierat Parisiis,
ut regem super hoc consuleret. Sed quid factu-
rus esset, nos adhuc ignorabamus. Plura vobis scrip-
sissem de statu Ecclesiæ, de Lombardorum reele-
vatione contra imperatorem, de sacramento quod a
Romanis generaliter factum est papæ Alexandro, et
aliis, nisi quia paginæ prolixitas prohibebat. Time-
bam etiam aures, tot et tantis occupatas negotiis,
offendere. Conservet vos Deus nobis et amicis vestris
incolumen. Equitaturæ defectus, quem patior, pote-
rit vobis esse damnosus. Nisi enim archidiaconus
Saresberiensis, qui de omnibus negotiis ad vos
spectantibus pro posse suo sollicitus est, mihi sub-
venisset, quibusdam, quæ satis utiliter sum prose-
cutus, de necessitate supersedissem. Domus meæ,
et rerum mearum, si placet, reminiscamini. Duritia
enim rusticorum tanta est, quod nisi auctoritas
vestra intervenierit, ipsi in nullo mihi parent. Unde
expedit mihi, ut ipsis et ministris vestris super hoc
litteras vestras dirigatis.

EPISTOLA CCCLXIX.

NUNTII SUI AD EUNDEM.

Amantissimo domino suo, suus ille, salutem, et
bene semper valere.

Per misericordiam Dei, quæ sperantes in se non
deserit, factum est, ut eadem die, qua dominus papa
de morte Octaviani certificatus est, venerint ad
curiam nuntii domini regis R. et H. Ili autem, tantæ
humilitatis speciem ex parte regis prætendentes,
una voce et litteris verbis eorum consonantibus
dominum papam, et aliquos cardinalium adeo mo-
visse visi sunt, quod, sicut ex relatione quorum-
dam, qui nobis favent, didici, ipsi vix lacrymas
continebant. Post multas igitur allegationes, quali-
ter scilicet, et quo affectu ipse eum receperit,
quantam reverentiam ei semper exhibuerit, et quan-
diu vivet exhibebit, et in hunc modum, multas
reddiderunt domino papæ litteras de legatione,
quas archidiaconus vester minus honeste, et dum
apud vos eram in Anglia, impetravit. Conditionem
vero ipsam, sub qua eas ipse obtinuit, dominus

rex per istos nuntios per se factam vel quæsitam
fuisse penitus ipse negavit. Dominus vero papa
cum tanto affectu, et ita avide eas recepit, tan-
quam si aliquid desideratum ei oblatum fuerit, ut et
quidam ei assidentes plurimum mirarentur. In hoc
itaque articulo qualem ego me exhibuerim, quid
super hoc a domino papa mihi commissum sit,
salva fide mea vobis significare non potui, donec
nuntii a curia recessissent. Postmodum vero nuntiis
illis cum multa festinatione se velle redire simulan-
tibus, tres illi cardinales, qui vos modis omnibus
persequuntur, Neapolitanus scilicet, et Portuensis, et
Papiensis, cum magna instantia conati sunt a do-
mino papa obtinere litteras generales de legatione,
vel saltem easdem, quæ redditæ fuerant, ad miti-
gandam regis indignationem absolute. Quod cum
neutrum possent (dominus enim papa super hoc
securum me fecerat, quod scilicet nunquam am-
plius ad manus ejus redirent, et secreto mihi com-
miserat) ad negotium abbatis sancti Augustini con-
versi sunt. In quo qualiter processum sit, ex litteris
sociorum nostrorum cognoscetis. Vestra itaque in-
terest vobis viriliter providere, et gratiæ Dei, quæ
ultro se vobis offert, non deesse. Valeat paternitas
vestra.

Nuntii regis coram domino papa me esse specia-
lem inimicum ejus denunciaverunt : et non expe-
dire mihi pro toto auro Arabiæ, quod ipse haberet
potestatem mei. Sed nec sic poterit terreri fides
mea, ut cum Petro possim dicere : *Paratus sum*
tecum in mortem et in carcerem ire.

EPISTOLA CCCLXX.

NUNTII SUI AD EUNDEM.

Venerabili domino et Patri charissimo THOMÆ,
Dei gratia Cantuariensis archiepiscopo, et Anglorum
primati, fidelium suorum minimus, salutem et felici-
ces ad vota successus.

Noverit vestra paternitas Octavianum schisma-
cum, quem sibi in caput erexerant, et schismatis
principem Belial, quarta feria post octavas Paschæ
obiisse in urbe Lucensi, et sepultum esse in mona-
sterio extra civitatem. Cum enim canonici majoris
ecclesiæ, et regulares canonici sancti Fridiani ei
sepulturam negassent, præligentes a suis migrare
sedibus, quam admittere corpus schismatici, quem
credunt in inferno esse sepultum, a satellitibus im-
peratoris et familia propria ad miseros monachos
cadaver illud perlatum est. Capella vero ipsius, et
quidquid aliud habebat, et equi, quoniam aliud non
habebat, qui urgente inopia non nisi ex raptu vixe-
rat a multo tempore, ad imperatorem perducti
sunt. Imperator autem hoc cognito vocavit ad se
Papiensem episcopum, qui in monasterio Beati Mi-
chaelis apud Clausam exsulabat; sed quid facturus
sit, adhuc incertum est. Alii autem dicunt, quod
aliud velit ei substituere. Alii quod ad catholicam
redibit unitatem. Præterea urbes Italiæ minus solito
promptæ sunt in obsequium ejus, adeo quod Pa-

pienses et Cremonenses, per quos Italiam domuit et A contrivit, ei in faciem resistant, denuntiantque ei, quod ab eo recedent omnino, nisi deponat tyrannidem, et civiles induat mores, ut liberi esse possint, sicut in diebus aliorum imperatorum.

Octavianus autem quindecim diebus antequam moreretur, freneticus effectus est continue, et in tantam versus insaniam, ut nec Dei nec sui memor esset. Audierat quidem dominus papa de morte Octaviani a fidis et veris relatoribus, et velut alter David persecutorem suum deflevit extinctum, et cardinales de morte illius exultantes durius increpavit. Hoc autem recte, eo quod iactura animæ irreparabilis est, ubi culpa per pœnitentiam non deletur. Nec meminimus a sæculo, quod hæresiar- ches vel auctor schismatis, nisi coactus et invitus, B pœnitentiam egerit. Si revolvatis historias, ita credo verum esse constabit, quælibet autem sacrificia, nisi voluntaria fuerint, reprobat Deus. Dum in curia sermo iste crebresceret, ecce nuntii domini regis advenerunt, litteras a sede apostolica impetratas restituentes. Vix eas reddiderant, cum in continenti aliæ litteræ ab Italia venerant, et fere pariter porrectæ sunt, exponentes diligenter et de morte Octaviani, et de his quæ in Italia gerebantur. Dicitur itaque, non modo domino papæ ab Italis, sed et regi Francorum a Gallis de partibus Apuliæ redeuntibus, quod imperator quintana laborabat, et impe- C ratrix in puerperio fecit abortum. Unde factum est, ut tota Gallia ad obsequium domini papæ devotius conversa sit, et Ecclesiam Romanam ad minas hominum minus moveri oporteat. Et ut pro certo acceperimus, domini Eboracensis legatio omnino ex- spiravit, subilata omni spe convalescendi.

Memoratus itaque dominus sic legatus Anglorum existit, ut nec annuus, nec mensurinus fuerit, aut dialis, qui in legatione sua nec annum, nec men- sem, nec diem habuerit. Sed nescio quo pacto nuntii recedentes ab apostolica sede, licet his qui eos præcesserant, minores sint, se pro Augustiniani obtinuisse jactitant, quod majoribus negatum est, et adversum nuntios vestros curiam inflam- masse. Et sibi patuisse dolos, quos Gaufridus Ridel et Joannes de Oxeneford contra dominum regem exercuerunt, ut exilio et omnium bonorum pro- scriptione digni sint, si citra consensum et auctori- tatem regiam talia præsumpserint. Dicunt etiam quod quidam cardinalium litteris suis domino regi significant ad excusationem sui, quam malitiose Gaufridus et Joannes inceserint, et quam præsum- ptuose vestri nuntii semper et ubique detrahunt regi. Super his nihil mihi significaverunt socii nostri morantes in curia, sed ea per extraneos didici. Ve- rumtamen quidquid contra innocentiam vestram malignorum perversitas molitur, rogo et consulo, ut quantumcunque secundum Deum poteritis, vobis domini regis gratiam acquiratis et conservetis; quoniam ita Ecclesiæ Dei expedit. Nec video quo- modo possitis utiliter præesse, quandiu rebus ita

manentibus rex vobis in omnibus adversabitur. Præsertim cum Ecclesia Romana a vobis non nisi verba recipiat, et dispendium, quod aliunde patitur, imputet vobis et sibi, quæ vos pro voluntate regis non patitur conculcari. Nunc autem facile ex hac occasione monasterium beati Augustini sibi, nisi præcaveritis, retinebit omnino, quia credibile est, omnes sibi malle quam alteri. Nec video, quomodo istud evitatis, nisi per regem, cui probabiliter per- suaderi fortasse poterit, quod longe melius est, et honestius illi, et tolerabilius vobis, ut vestram pro libitu conculcet personam, quam sic ecclesiam mu- tilet et pessundet. Ecclesia vero Cantuariæ in quo meruit iram ejus? Nunquid digna est affligi et conteri, quia vos elegit, et sibi præfecit? At ille, si causam recte examinat, hoc sibi, non ecclesiæ imputabit. Sane melius esset in quacunque cella salvaretis animam vestram, quam ut vestri odio vestra et omnes aliæ ecclesiæ conterantur, et clerus in ea, cui in diebus nostris addictus est, servitute remaneat. Forsitan et humiliatione vestra hu- jusmodi, quam vobis Dominus inspirabit, movebitis regem, si ea dixeritis loco et tempore, et ea mo- destia, et contemptu recium, et constantia, quam causa desiderat. Si enim vere placatum habueritis, omnia hæc auctore Domino facillime conquiescent. Et si hoc aliter fieri nequit, rogo et omnibus modis consulo, ut eum amplius frequentetis. Nec in eo vos deserere credatis pastoris officium, si vel hanc unam animam retinueritis in cultu Dei, ex cuius arbitrio, Domino sic disponente, pendunt animæ infinitæ. Nam ut ait ethicus: *Componitur orbis regis ad exemplum.* Et Salomon ait, *quod qualis est rector civitatis, tales erunt et habitantes in ea.* Quid verba multiplico? Precum et consilii mei summa est, ut quantumcun- que potueris, dum tamen secundum Deum, regis benevolentiam comparetis. Et tamen socii vestri, quos familiares habuistis, habetis et habebitis, quandiu Deus permiserit, me vobis contraria con- sultare mentiuntur, dicentes quod ego vos instiga- bam, ut a domini regis obsequio recederetis, et quod nullum militem honoraretis. Novit Deus, et vos novistis, quia semper consului vobis, ut debi- tum regi præstaretis obsequium, et vestram quoad D Deum et homines servaretis honestatem.

EPISTOLA CCCLXXI.

AMICI SUI AD EUNDEM.

Reverendo domino et Patri Thomæ, Dei gratia venerabili Cantuariensi archiepiscopo, suus ille pro- prius, in tribulatione patientiam non deserere.

Legitur Constantii principis temporibus quosdam minus spirituales episcopos, propriis prætermis- sis ecclesiis, curiæ frequenter interfuisse, turpi adu- latione Cæsarem delinisse, regis potius quam evan- gelicis edictis paruisse, in principum amplius quam Domini adjutorio confidisse. At contra Martinus, incomprehensibilis meriti Turonensis episcopus, tabernacula peccatorum pro se declinans, com-

missam sibi Dei sui domum, licet sæculo abjectus, A
devotius inhabitabat. Si quando tamen eum a prin-
cipe prætaxato accessiri contingeret, severitatis ei
tam verba quam vultum exhibebat, inhonestas co-
episcoporum suorum blanditias argnebat, indiscreti
principis excessus cohibebat, præferens animo hu-
mana carere gratia sublimium vitia coercendo,
quam a superno favore excidere delinquentium er-
rata confovendo. Et ecce tempora Constantii reno-
vata jam cernimus. Hodie namque quamplures
nostræ pastores Ecclesie a finibus terræ currunt
audire et facere voluntatem Salomonis. Insufficiens
nimirum et modicum arbitrantur copiose Dei gra-
tie dono adimpleri, nisi et contingat regiis consi-
liis adhiberi. Civilis etiam atque domestica vetus
illa Machabæorum plaga eventu consimili nostram
hodie perturbat Ecclesiam. Cum enim Antiochus
furia in Domini sacerdotes nuper invectus sancta
in Hierosolymis conculcare, Hebræos a patriis le-
gibus revocare, magistratum templi dignitates hu-
miliare disponeret, ecce aliqui progressi ex Israel,
viri utique pestilentes, cladis proximæ ingruentiam
expavescentes, aut certe pontificis summi prioratui
invidentes, regis indignationem remissa satis humi-
litate prævernerunt, quæ sibi ad pacem forent in-
tentius expetierunt, fœdum cum eo fœdus merue-
runt, prælati sui devotioni tacite detrahentes. Sed
qui locum suum in pace constituit, dissipet eos qui
bella volunt. Et qui reprobat consilia principum,
consilia Achitophel, consociorumque ejus adversus
David innocentem infatuet. Et quicunque cum
Chore, Dathan, vel Abiron in hujus militantis Ec-
clesiæ castris sanctum Domini Aaron irritare præ-
sumperit, Dathan et Abiron sententia percellantur,
ut cælo vacui, terra absorbeantur. Quatenus ergo
animum ab exquirenda cæli voluntate longius amo-
verunt justum et innocentem persequendo, eo ter-
rentis affectibus profundius obruantur inconvenientia
exerendo.

Hæc idcirco dixerim spiritu anxius, quoniam
cum Stephanus noster, gratia plenus, fratribus et
contribulibus suis verbum vitæ infatigabilis admi-
nistraret, cum nihil morte dignum, nihil crimine
notandum opere perpetrasset, impii super eum ja-
cturam fecerunt; ut ecce inimici filii hominis, gla-
diis accincti, et ad nocendum præparati, trans
mare, perque terras a sæculari potestate diriguntur,
ut eandem citius evellant, arborem utique fructuo-
sam, quam plantavit, et ut immerito humiliet,
quem merito exaltavit; utque quam provide con-
tulit, improvide fidelis sui dignitatem imminuat.
Quid igitur agat mitis et innocens Dei athleta, ex-
tenti in se gladii nescius et ignarus? Quorsum ef-
fugiet consilio malignantium obsessus? Restat ut
ad tolerantiam animatus, tanquam aries de grege
electus, charitatis pinguedine saginatus, Domino
sese immolandum exhibeat. Restat ut capitis sui
imitator effectus sine murmure, sine contradictionis
obstaculo, varias iniquorum patiatur injurias, pa-

PATROL. CXV.

tiensque non comminetur, imo etiam pro injurian-
tium scelere deprecetur. Stet igitur Moyses in con-
fractione coram divinæ majestatis intuitu, sedulo
pro fratribus interpellans, qui vitulum conflatilem,
vitulum utique auro plenum, absque ejus conscien-
tia nuper adoraverunt.

Verumtamen articulo tribulationis elapso, ac
tempore retributionis accepto, eos-lem in criminis
ultionem districtius puniat, quos fraterna prius
compassione pie desseverat, quatenus juxta quod in
maledictione seminaverant, de maledictione operis
sui fructum metant: sicque proveniat, ut Joseph
adversitatis probatus examine, gratiam tandem
Pharaonis adeptus, principum Ægypti fratrumque
suorum cum gloria dominetur, quorum fuerat in-
vidia contristatus. Unde quandoque et ipsi tribula-
tionibus intercepti merito se talia pati commemo-
rent, quoniam in fratrem suum absque culpa exi-
gente peccaverunt. Miro namque et subtili modo
convicaneit Joh amicum subvertere nitebantur, dum
quidam de sacerdotibus nostris principem sacerdo-
tum magis formidolose quam sincere nuper conve-
niendum adiere, incorruptum corrupti, azymum
fermentati, arte qualibet persuadere attentantes,
ut se quoque fermentari assentiret, qui utique fer-
menti non novit acridinem. Ad Joannem igitur ab
Hierosolymis sacerdotes accesserunt, quis et cujus
fuerit integritatis explorantes, sed eo arundine
vento agitata non invento, inutiles et inglorii reces-
serunt. Siquidem qui sic missi fuerant, erant ex
Phariseis. Utinam et invenerint prophetam in
Israel, qui principis sui lepram ejiciens, ne et ipso
lepram participet, oblatam auri vel vestium, imo
et regni totius copiam exsecratur. Rex itaque Balac
cum fautoribus suis Balaam munere vel pollicita-
tionibus corrumpendum expetiit, ut conclusum
Dei populum hostibus tam operis quam oris expo-
neret maledictioni, ejus quidem regitur bene-
dictione.

Sed ecce plus quam Balaam, imo nequaquam
Balaam hic, qui nec prece, nec pretio, minime ap-
positis pauperum animas bestiis tradere compelli
potuit, ex quo semel super his olim intellexit dic-
tum: *Paſce oves meas*. In Daniele itaque, juvene
regis Babylonii statuam non adorante, fidem admi-
ror, quam in senibus et contribulibus suis nequa-
quam invenio. O si filii nostri Aaron gentibus non
commiscerentur, si gentium opibus non contami-
narentur, si ordinis sui dignitatem indivisi tueren-
tur, quam libere, quam tranquille fœderis taber-
naculum cum ejusdem ministris in medio Amor-
rhæorum inconcussi regerent et circumducerent!
Sed quoniam remissi et indisciplinati filii Heli pro-
pria ignavia in certamine corruerunt, ecce capta
est ab allophyliis arca Dei, et pro hostium voluntate
ac dispositione circumagitata, filiisque retrorsum
alienatis, multiplicata est in eis ruina. Sed qui-
cunque sint seniorum Israel mandatorum trans-
gressione polluti, stet Phinees noster solus a Dei

sui mandatis non devians, crebrisque lacrymis iram cœli placare non desinat, donec imminens Ecclesiæ cesset quassatio. Et utinam reputetur ei ad justitiam a generatione in generationem usque in sempiternum. Amen.

EPISTOLA CCCLXXII.

AMICI SUI AD EUMDEM.

THOMÆ Cantuariensi archiepiscopo, quidam amicus suus.

Sciat hunc esse tenorem mandatorum, quæ Henricus rex in Angliam misit. Scilicet ut omnes portus cautissime custodiantur, ne litteræ interdictionis ullatenus illuc deferantur. Et si aliquis regularis illas attulerit, pedibus truncetur; si clericus, oculus et genitalia amittat; si laicus, suspendatur, si leprosus, comburatur. Et si aliquis episcopus ejus interdictum metuens recedere voluerit, nihil secum deferat præter baculum. Vult etiam ut omnes scholares repatriare cogantur, aut beneficiis suis priventur; et qui remanserint sine spe remeandi remanebunt. Et presbyteri, qui cantare noluerint, genitalia amittant; omnesque rebelles sibi omnibus beneficiis priventur. Vale.

EPISTOLA CCCLXXIII.

Difficile est ibi consulte agere, ubi ratio respuit, justitia conculcatur, ubi summus pontifex contemnitur, et reverentia plus spurcissimis hominibus quam Deo exhibetur. Debueram siquidem sic et egeris. Hoc facillimum erat dictu sed difficillimum effectum, tum quia omnes personæ mutuam sibi operam præbent, tum quia etc. Estimabam ergo esse securis et minus periculosum æstuantis iræ gurgitem cum baculo humilitatis attentare, quam temeritatis vel impetus ausu in profunditatis gurgite totum corpus immittere. Habui etiam et aliam hujus rei considerationem, qua nolui patris mei verenda irreverenti fronte detegere. Consultius igitur ut mihi videtur agitur, si sub fruticis domicilio, dum tempestas immurmurat, sedeatur, quia Deo propitio post hujus aeris intemperiem serenitatis gratia subsequetur. Adverte igitur quod causæ nostræ intentio, magna ex parte cassetur, eo quod in subito facta sit accentuum permutatio.

EPISTOLA CCCLXXIV.

EPISTOLA FRATRIS R. AD FRATRES G. R.

G. . . G. R. dominis et dilectis in Christo fratribus, frater R., spiritu consilii et fortitudinis abundare.

Benedictus Deus qui, licet vestris exigentibus meritis sero, respexit tamen ut visitaret sedentes in tenebris, ut dissiparet saccum miseriæ vestræ, ut converteret luctum in gaudium, ut post lacrymarum potum inopinatè vino lætitiæ longi mœroris tristitiam exhilararet. Audivi equidem et lætatus sum, in his quæ dicta sunt mihi, et exultavi ut magnificaret anima mea Dominum, verumtamen multo uberius propter vos quos dilexit, sed in Domino. Ex eo namque nostræ dilectionis causa et per eum in ipso

A contractæ est. Hinc est enim quod ea in quibus vos propter Deum devotius invigilare conueor, jucundiori animo et uberius benignitatis affectu valde arctius amplector. De oppressione siquidem et desolatione vestra quantum doluerim, frequenti gemitus mei querela innotuit. Vestræ etenim calamitatis ærumnam, meam duxi. Quam si minus præsens corpore, animo tamen nunquam absens sustinui: verumtamen divinæ miserationis gratia, qui prius timui, sperare jam cœpi. Quis enim injusta timeat causa præsertim quam tot et tanta sovent patrocinia? Quisve domino papæ ex apostolicæ sedis auctoritate jubente, regia etiam potestate protegente, tantorum judicium diligentia pie et iuste ac benigne per omnia consulente diffidat? Quis etiam in tam discreto, tam necessariæ emendationis principio, de jucundo et prospero exitu desperet? Studiosa igitur solummodo diligentia res eget, ut rationabiliter susceptum piæ æquitatis opus ad affectum perseverantia perducatur. Accingimini ergo et estote forti animo, videbitis enim Domini auxilium super vos, ut expulso dissipatore, possessionum ecclesiæ vestræ status in melius reformetur. Jam enim mihi videre videor semen Jacob de tribu Ephraim et de domo Manassæ, virum scilicet ecclesiæ vestræ curam susipientem, qui supplantatis adversariis vitæ vocatis possessionibus fructificet et in reformando religionis decore invigilet, et oblitus ea quæ retrò sunt in anteriora se extendat: celestia studiose quærens et temporalia discrete administrare non omittens. Veniet, inquam, veniet, donante Domino, dilectissima dies illa, ut misericordiam Dei videamus, ut causa desiderati boni perfectio fructu gaudeamus. Cavete igitur in causa beati Petri vobis tam diligenter a beati Petri vicario injuncta, ne vel negligentius aliquid remittatis vel vehementius exaggeretis: ne sit vel periculosa negligentia, vel suspecta vehementia, et domus vestræ non reveletur oppressio, si vestras persequendo injurias aut vestro servire commodo aut ultionis inæstuarie desiderio videamini. State ergo viriliter agentes nec terrore vel blanditiis a rectitudinis statu declinantes, sed secundum scientiarum zelum Dei tenentes simpliciter et recte gradientes, nec vel pusillanimitè fracti vel enerviter emolliti.

D Scio enim nec ambigo, quin vestram in multis simplicitatem tam caput mali hujus quam membra ipsius circumvenire laborent. Sed quia et falli inutile et fallere turpe, non immerito voluit Dominus filios sanctæ matris Ecclesiæ et serpenti assimilari et columbæ. Attendite ergo super his et vobis in posterum et Ecclesiæ vestræ consulite, quia tanto gravius deiciemini, quanto non erat ulterius locus resurgendi, si vos post domini papæ præceptum et paternorum tantorum contemptum mutabilitatem animorum in suæ perversitatis inclinaverint affectum. Mei igitur consilii hæc est mens et definitiva sententia, ut nulli spiritui in aliud quam quod agendum suscepistis credatis, ne si iterum causam reformare oportuerit, vos in ea aut pro ea stare ne-

quaquam possitis et vos pariter periculo capitis et famæ detrimento subiaceatis. Si autem appellare compulsi fueritis, aut ipse subterfugium quaerens appellaverit, et in hac quoque parte cautela opus est. Periculosum namque maxime est cum eo iter communicare, quorum affines et propinqui sanguini nostro possint insidiari. Verum a legatis vobis iudicibus de facultatibus ecclesiæ vestræ proferenda causa ecclesiæ tanto itinere necessarios sumptus vobis dari postulantes, et eorum muniti litteris quæ dicuntur apostolis quanto citius poteritis ad dominum papam proficisci ne differatis. Valet.

EPISTOLA CCCLXXV.

NUNTII SUI AD THOMAM CANTUARIENSEM.

THOMÆ Cantuariensi archiepiscopo, nuntius suus.

Comitem Flandrensem non inveni: et in eo quærendo divortia facere mihi periculosum, et vobis non expedire credebam. Rex Franciæ apud Suessiones cum multo gaudio me et quod ei per me missum est, recepit, et in continenti priorem Sancti Medardi Suessionensis, discretum et magnæ auctoritatis virum, ad dominum papam cum litteris suis destinavit, quibusdam etiam ei viva voce injunctis, ad negotium nostrum spectantibus quæ scriptoris fidei committere non erat tutum. Cum igitur ab eo discederem, manum meam tenens in sua, in verbo regio promisit, quod si vos ad partes suas transire contingeret, non sicut episcopum vel archiepiscopum vos reciperet, sed tanquam in regno socium se vobis exhiberet. Eodem modo Suessionum comes multis interpositis juramentis assererat, quod comitatuum Suessionensem et ipsius redditus universos in usus vestros converteret. Et, si regressus meus per eum fieret, se vobis per litteras suas significaturum dicebat. His itaque, prout potui, procuratis, una cum prædicto priore per terram comitis Henrici, tum quia via brevior, tum quia securitatem præstabat ejus societas, ad curiam festinavi. Verumtamen prior per duos dies, antequam ego in conspectu domini papæ comparuissem, regis litteras præsentavit, et super his, quæ ei viva voce injecta fuerant, pertractavit. Deinde cum et ego accessissem, cum suspirio, et non sine lacrymis a domno papa receptus sum. Ipse enim quæcunque in concilio acta sunt, de persecutione Ecclesiæ, de constantia vestra, qui episcopi vobiscum steterint, quomodo a vobis exiit, qui de nobis non erat, de judicio quod factum est de clerico, et omnia fere quæ in secreto commissa fuerant, antequam ego venissem, et tota curia audierat, et per plateas prædicabantur. Nobis itaque in partem secedentibus, singula capitula, sicut memoriale nostrum continebat, diligenter ei exposui. Ipse vero Deum, qui talem ecclesiæ pastorem contulerit, sine intermissione magnificabat. Tota etiam curia fortitudinem in vobis commendat, cujus illa se ipsam omnibus modis invenit expertem. Tanta etenim animi imbecillitate omnes laborant, ut minus Deum timere, quam hominem vi-

deantur. Eo enim quod in Tuscania Radicoforum cum fratre et nepotibus domini papæ, et quædam alia castra cum parentibus et cardinalium capta sint a Teutonicis, quod Joannes Cumin tandiu apud imperatorem moratur, quod comes Henricus ad dominum papam venire noluerit, quod a rege Angliæ nuntium aliquem a longo tempore non receperint, aliisque multis in idipsum concurrentibus adeo terrentur, ut tempore isto principem aliquem, et maxime regem Angliæ, nullatenus in aliquo audeant offendere, nec Ecclesiæ Dei, quæ ubique terrarum periclitatur, si possent etiam, attentarent subvenire. Sed hæc hactenus.

De petitionibus vestris quid actum, et quomodo in eis processum, per litteras priores domini Pictaviensis, qui per gratiam Dei adventum meum per unum diem prævenerat, et tanquam amicus in negotiis vestris sollicitè et fideliter laboravit, liquido cognoscetis. Papa namque iram regiam omnibus modis declinans, vobis et Eboracensi litteras mittit, non præceptorias, sed de firmanda et tenenda pace inter vos hortatur utrumque. Fratrem vero quemdam de templo ad vos dirigit, ut utrumque vestrum conveniat, et utrique ex parte domini papæ viva voce præcipiat, quod nulla inter vos deinceps habeatur contentio de cruce ferenda, neque de alio, donec Ecclesia Romana per Dei misericordiam tranquillitatem pacis obtineat. Ut ad hæc et ad alia, si quæ interim inter vos exoriantur, decernenda sufficiat. Eboracensi vero, ne interim eam in diocesi vestra ferre præsumat. Hoc quidem cum multa difficultate obtinere potuimus. Similiter Londoniensi scribitur; sed unde spiritus elatus citius intumescat ad superbiam, quam excietur ad virtutem. Hac itaque consideratione voluit dominus papa transcriptum earum ad vos transmitti, quatenus eo inspecto, si non vobis et Ecclesiæ judicetis expedire, ipse apud vos remaneret.

De professione autem faciendi, a domno papa et domino Pictaviensi multoties disputatum est. Ad ultimum tamen obtinuimus, quod si ipse super hoc requisitus negaret vobis, tunc demum cogeret eum, et faceret eam exhiberi. Quod vobis plenius per posteriores litteras domini Pictaviensis innoscet. Quæ autem priores, quæ posteriores, in earum subscriptionibus apparebit. De negotio sancti Augustini nihil omnino potuimus impetrare. Ipse enim privilegia, monasterio a Romanis pontificibus indulta, asserit se vidisse, et eis contraire, sicut dicit, est decretis Patrum et ecclesiasticis institutis auctoritatem non exhibere. Novissime nobis petitionem illam facientibus, ut scilicet ipse vos ad se venire præciperet, et super hoc vobis litteras dirigeret, cum dolore et multa animi afflictione visus est respondisse; Absit, inquit, prius finiantur dies nostri, quam nos videamus eum sic exire, et ecclesiam suam sic desolatam relinquere. Conservet vos Deus in omnibus viis vestris. Apud Clarevallium, Cistercium, et Pontiniacum, intercessionem domini papæ, oratur

assidue pro vobis, et pro ecclesia vobis a Deo commissa. Significet mihi dominus meus de statu suo quam cito poterit, ut saltem in visitatione sua consoleretur anima mea,

EPISTOLA CCCLXXVI.

INIMICORUM THOMÆ AD PAPAM ET CARDINALES.

ALEXANDRO papæ, et omnibus cardinalibus, inimici THOMÆ Cantuariensis archiepiscopi.

Medicinæ potius tempus est, quam querelæ, etc. *Vide in Alexandro III papa, ad an. 1181.*

EPISTOLA CCCLXXVII.

AMICI CUIUSDAM AD THOMAM CANTUAR.

Domino ac Patri, suus ille, degener quidem, et ignaviæ suæ merito derelictus, Christo sic compati, ut et congreget.

Super his quæ inspectis sanctitatis vestræ litteris inquirenda cognovimus, plerosque prout oportere credebamus, quanta potuimus diligentia convenimus, et inter cæteros ac præ cæteris quo fiducialius, eo instantius illum, quem te alterum credebamus. Et cum quidem eundem atque in eodem reperimus. Auditis siquidem ille quæ in litteris continebantur, lacrymis suffusus oculos, post singultus et multas de moribus et conversatione Censorini nostri querimonia, exploratam sæpius super hoc mentem ejus reperisse dicebat vehementer aversatam, et revocari difficilem, utpote cujus auribus susurrones illi jugiter et instanter malitiæ suæ virus insibilant: et ne quid audiat, quod animos ejus ab obstinatione cœptæ malignitatis emolliat, indesinenter invigilant. Ad hoc totis nisibus elaborantes, quatenus in tantum vestri odium exasperetur, ut nullius interventu placiti vel personæ in gratiam qualiscunque concordie possitis convenire. Nec existimant se posse feliciter vivere, quousque certissime se id effecisse compererint. Inter quos odiosus ille Ricardus de Luci, proprii cognominis inimicus, præ cæteris hos necit laqueos. In tantum, ut et ipsum plerumque, cui placere nititur, offendat, dum vehementius, et irreverentius vestram personam, actus, et consilia denigrare molitur. Unde aliquando Censorinus ipse odio nugarum, quas audiebat ab illo, ad eum, quo hæc docente cognovimus, divertens mirari se dicebat, quod non verebatur homo ille tot fabulosa texere, quæ nec ipse viderat, nec certo auctore didicerat. Dum vero postmodum de statu rerum eidem amico vestro colloqueretur, in hunc incidere sermonem, visusque est aliquantulum animo fluctuare, quantum ille conjicere potuit, tanquam puderet eum acrius cœpisse, quod facile nequiret ad libitum terminare. Vereri præterea videbatur cum Walensibus congreddi, ne forte circa eos occupatam transmarini, Flandrenses videlicet et Galli, turbare satagerent, atque idcirco, si vel levem, dummodo honestam, transfretandi haberet occasionem, velle se transmarinas adire partes, ut cum illis ibi pace firmata, istos securius debellaturus adiret. Suspensum tamen esse adhuc, nec certum super hoc dicebat eum habere

A consilium. Atque ideo illi vestro videbatur, si vocaret eum litteris, vel per directum ad hoc legatum dominus papa pro imminetibus Ecclesiæ periculis, atque pro Antiochenæ urbis nuper ad eum perlata calamitate, atque de aliis hujusmodi cum eo sermonem habiturus, antequam Romam rediret, facile ad illas partes accederet, et super hoc, unde nunc neminem vel audire dignatur, neque indecorum, sed honestum ei esset, tanti patris monitis acquiescere, hancque solam et singularem pacis inter vos reparande superesse viam. Sed cavendum summopere, ne quid ab eo causa vestra fieri videatur, maxime antequam eos, Domino largiente, convenire contingat. Incolumem vos Ecclesiæ suæ conservet, pro quo patimini. Si quid posset ad vestræ sanctitatis libitum B nostræ parvitatis operula, rescripto doceamur, effectuosa devotione parituri. Valeat in Domino semper paternitas vestra.

EPISTOLA CCCLXXVIII.

AMICI CUIUSDAM AD EUNDEN.

THOMÆ Cantuariensi archiepiscopo, quidam amicus suus.

Nuntium vestrum, qui ad dominum venerat Nicolaum, non vidi, sed puerum ipsius Nicolai suscepi, ut vobis per illum aliqua ad referendum digna, et ad sciendum utilia nuntiarem. Igitur post egressum pueri vestri a me, qui jam diu ad vos reversus est, illud primo concepi, quod rex die quadam, cum esset apud Cadomum, et de negotio suo, quod habebat cum rege Scotiæ, sollicito pertractaret, contra Ricardum de Humez, qui pro rege Scotiæ aliquatenus loqui videbatur, in verba ignominiosa prorupit, et eum proditorem manifeste appellavit. Rex itaque solito furore succensus pileum de capite projecit, balteum discinxit, pallium et vestes, quibus erat indutus, longius aljecit, stratum sericum, quod erat supra lectum, manu propria removit, et quasi in sterquilinio sedens, cœpit straminis masticare festucas. Die vero sequenti, cum esset in prato juxta capellam, et Ricardus de Ivelcestre ad eum accedere vellet, templarii ei obviam properantes, cum pilea de capitibus abstulissent, et osculum ei statim obtulissent, nisi rex pluribus videntibus eos removisset, dicens nolle eos excommunicato osculum dare. Post hæc cum rex apud Toycam accessisset, episcopus Lexoviensis venit ad eum, postulans et supplicans sub prætextu paupertatis licentiam egrediendi de terra, ut qui ære premitur alieno, saltem per annum posset respirare; ut cum redisset liber a debitis, ad locum religionis facilius posset migrare. Rex ergo intuens in eum ait: *Vere facies vestra immutata est, plusquam scitis, et diutius, ut mihi videtur, laborem ferre non potestis. Sed tamen propter penuriam nunquam de terra mea exibitis. Ego enim loquar creditoribus vestris, et aliquibus vos juvabo modis, et a vexationibus et fatigationibus immunem faciam et quietum. De suo igitur nihil spondit, sed penes alios eum juvare promisi.*

Post hæc rex ad colloquium suum cum comite

Flandriæ accessit, ubi gesta sunt quæ vos scitis. Ibi enim rex mille libras Matthæo comiti Boloniæ per annum se daturum spondidit. Ibi nuntius domini papæ captus est, qui adhuc tenetur in vinculis et carcere. Ibi magistrum Heribertum Dominus eripuit de manibus quærentium eum. Qui certe pro negotio tam modico tantum non debuerat subisse periculum. Stultum est enim ibi esse audacem, ubi effectum operis nec magnæ gloria laudis, nec multi emolumenti gratia comitatur. Cum autem rex Rothomagum fuisset reversus, accito archiepiscopo et episcopo Lexoviensi, de captione portitoris litterarum domini papæ, et de indignatione, quam contra clericum Gaufrédi Ridel conceperat, quia litteras vestras susceperat et nuntium non detinuerat, tractare cœperunt illi duo, et regem aliquatenus super his increpare. Tunc etiam archiepiscopus mentem litterarum, quas olim a domino papa pro vobis susceperat, regi cœpit apertius explanare, et eum more suo leniter increpare, donec rex se totum scire dixit, quidquid litteris continebatur, et minas hujusmodi modicum formidare.

Dum hæc geruntur, magister Reginaldus, clericus decani Turonensis, ad regem accessit, multis occasionibus sollicitè quærens, qualiter de facto isto eum posset honestius increpare, et suam ad plenum cognoscere voluntatem. Rex vero prosperitatem domini papæ et serenitatem status curiæ subsannans, eum de talibus vix loqui permittibat. Post hæc rex ad Cadomum reversus est, et episcopus Lexoviensis ad eum accedens, ut licentiam egrediendi plenius haberet, a rege attentius interrogatus est, quantum deberet, et quantis indigeret. Cumque episcopus ducentas marcas, si remaneret, sibi necessarias inculcasset, rex se tantum argenti non habere asseruit, sed tamen nocte eadem ei sexaginta marcas remisit. Utinam ergo imminutam principis pecuniam non accepisset, quem amodo credet se illa emisse, quem viderat indigere : et eo tanquam instrumento ad complendam suæ iniquitatis malignam utetur. Rex enim ei forsitan magis credet, et ipse illi, ut timeo, in infidelitate erit fidelior.

In his etiam diebus Alfredus, clericus episcopi Herefordensis, ad regem venit, asserens episcopum suum, et dominum Rogerium, secundum tenorem vestri mandati de terra exituros, et ad vos in proximo venturos, nisi regis auxilio et consilio remanerent. Rex ergo de domino Rogerio plurimum conquestus, prohibitione usus est pro consilio, dicens eos non posse cogi ad exeundum, quos remedium appellationis juvare poterat ad remanendum. Adjecit etiam eos posse exire, sed reverti non posse. Et hæc quidem apud nos gesta sunt. De cætero sciatis, quia in octava beati Martini rex cum comite Theobaldo apud Turonum loqui debet, ibique quingentas libras, quas ei per annum promiserat, de præsentī solvet, et de futuro mentietur. Dominica vero sequenti apud Chinnum erit colloquium cum Pictavis, et aliis terris adjacentibus. Post hæc in festo sancti Andrea erit

A Rothomagi, ut in octava occurrere possit comiti Flandrensi, ibique comiti Boloniæ mille libras se daturum per annum promittet pro pace et concordia inter eos, nihilque aliud se facturum propter eum constanter asseruit et juravit. In his ergo omnibus rex fluctuat et incertus est, et de futuri temporis casibus sperans, in hoc solum fortitudinis suæ posuit firmamentum, si forte dominus papa universæ carnis viam intraret, aut vobis, quod absit, humanitus quid contingeret.

Vos igitur, dum tempus habetis, extendite manum retributionis, et illud scriptum esse sciatis, quia *retribuet Dominus abundanter facientibus superbiam*. Eos itaque qui contra Deum se erigunt, vestræ severitatis sententia puniat. Et caput colubri tortuosum B virga directionis amputate, ut Satanas sub pedibus vestris conculcetur velociter : nisi enim in manu forti et brachio excelso Ecclesia Dei pacem non habebit. Nec nisi rugitu patris leo iste poterit excitari, qui totus in infidelitatis suæ perfidia obdormivit. Eia igitur, arcum intendite, sagittas immitte, donec infirmetur. Quoniam impium est ibi esse pium, ubi Dei pietas annullatur, et fides periclitatur. Male enim fidelis est, qui fidei jura non servat, et quem contra fidem agere videmus, profecto infidelem appellamus. Agite ergo, et amplius nolite silere, quoniam taciturnitas nutrit assensum, et delictum subditorum sæpe per silentii torporem retorquetur in pastorem. Vocate ergo quos potestis, et compellite exire de medio Babylonis. Quoniam melius est mori vobiscum in bello, quam videre mala gentis suæ pariter et sanctorum. Vocate, inquam, et statim sentiant judicem, qui audire contempserint pastoris vocationem. Valeat in multis dies sanctitas et sanitas vestra. Me autem vestrum esse semper credatis, et ad omnia, quæ vobis placuerint, præparatum. Valete iterum, et semper.

EPISTOLA CCCLXXIX.

AMICI SUI AD PAPAM.

ALEXANDRO papæ, quidam amicus suus.
Imperator, cum principes suos ad curiam, etc. *Vide in Alexandro III.*

EPISTOLA CCCLXXX.

AMICI CUIUSDAM AD THOMAM.

Dominum et Patri suus se.

Ferventis et indubitati pignus exstat amoris etiam in exilium corpore et animo comitari amicum. Profecto novimus plerosque domi amicis mente coeoxsulare. Sed nec nullos audivimus, animo et corde domi relicto, corpore duntaxat amicorum compati exilio. Commendabiliorem quidem compatiendi modum verus amicus ille vester sibi elegit dominus Wigornensis, qui exilii vestri viam prosecutus, tenere vobis compassus, ad sedem suam nec oculos corporis reflexit, nec ad potestatis terrenæ blandimenta vel minas cordis constantiam inclinavit. Iste siquidem solus inventus est, qui simul corpore et spiritu patris sui molestias comportaret, et prælati sui reve-

rentiam deliciis et divitiis anteferebat. Quanto igitur firmius ipsius fidelitatis apparet argumentum, tanto vobis tutius esset et utilius, ipsum eundem tanquam contra mundi pericula in loco graviore opponere firmamentum, ubi tempore congruente, et principe quandoque mitigato opportunitatem concedente, vestri haberet memoriam et mentionem. Mihi itaque videretur consultius, et vobis expedientius, quod prædictus amicus vester ad vocationem sui principis repatriaret, et illum charitatis vigorem, quo vos amplectitur, ibidem exercebat. Ibi enim id exercendi materiam copiosam inveniret. Hic vero quo ad præsens mihi occurrit in mentem, non aequè vobis poterit subvenire, nec voluntatem, quam erga vos gerit, ostendere. Bene valeat dominus meus.

EPISTOLA CCCLXXXI.

CUIUSDAM FAMILIARIS AD EUNDEM.

Dominò suo, suus, ad omnia salutem, quam sibi. Proxima quinta feria post octavam Sancti Martini venerunt cardinales ad Beccense monasterium, sequenti die Lexovium, tertia die ad Sanctum Petrum super Divam, quarta id est Dominica, quæ præcedit Adventum Domini, venerunt Argenteon. Eadem die occurrit eis rex per duas leucas, hilarem eis vultum exhibens, et utrumque cardinale comitatus est usque ad hospitium suum. Sequenti die, id est, secunda die, post missam satis mane vocati venerunt ad regem, et intraverunt in cameram ad consilium cum archiepiscopis, episcopis, et abbatibus qui admissi sunt. Cum autem quasi sub spatio duarum horarum moram fecissent intus, egressi sunt cardinales, et rex cum eis usque ad ostium capellæ exterioris, et ibi in eundo dixit dominus rex hoc verbum, publice, et etiam ipsis audientibus cardinalibus: *Utinam nunquam amplius videat oculus meus aliquem cardinalem!* Cum tanta autem festinatione dimittebat eos, quod cum hospitium eorum satis vicinum esset, non fuerunt expectati ut venirent equi eorum proprii, sed traditi sunt eis ad exeundum equi, qui ante capellam casu proximi inventi sunt. Et exierunt cardinales cum quatuor comitantibus ad plus. Remanserunt autem archiepiscopi, episcopi, et abbates cum rege, et intraverunt cameram ad consilium, ubi cum moram fecissent usque ad horam fere vespertinam, venerunt ad cardinales, et omnium eorum facies videbatur esse turbata. Cum aliquantum more fecissent apud cardinales, reversi sunt ad hospitium. Crastina die cum apud regem moram fecissent usque ad horam sextam, venerunt ad cardinales, et postea ad regem reversi sunt, et postea ad cardinales, responsa hinc inde secreta portantes. Sequenti die, id est, in vigilia sancti Andreae, rex summo diluculo surrexit, et exivit ludere in canibus, et avibus cæli, sicut creditum et æstimatum est, de industria sui faciens absentiam. Ea ipsa die satis mane convenerunt ad capellam regis, et statim ad cameram: ibi absente rege habita deliberatione exierunt ad ecclesias, iuxta quam cardinales ho-

spitia habebant. Ubi cum cardinales sedissent, vocati ut audirent quæ ab eis proponerentur, assidentibus hinc inde Rothomagensi et Eboracensi archiepiscopis, Wigornensi, Saresberiensis, Bajocensi, Londoniensi, Cicestrensi et Engolismensi episcopis, abbatibus quampluribus, clericorum et laicorum ampla multitudo, surrexit Londoniensis, et eum turbatæ mentis esse, insipida et parum venusta oratio argumento fuit. Et sic exorsus est: Vos audistis, quod perlatæ sunt litteræ domini papæ ad nos, et eas præ manibus habemus, in quibus significavit nobis dominus papa, quod quando evocati a vobis essemus, vobis occurreremus, causasque, quæ inter dominum regem et dominum Cantuariensem vertuntur, et inter nos episcopos Angliæ et eundem Cantuariensem, vobis cum plenitudine potestatis esse commissas. Inde est, quod audito vestro adventu in partes has, occurrimus vobis, paratissimi et promptissimi vestræ sententiæ stare, et intendere actionem vel respondere. Idem etiam dominus rex offert, quod quamcunque sententiam inter eum et dominum Cantuariensem dictaveritis, eam ratam habebit. Cum itaque nec per dominum regem, nec per vos, nec per nos etiam stat, quominus præceptum domini papæ adimpleatur, imputetur secundum quod imputari debet. Sed quoniam, ut præcipienter omnia agit, archiepiscopus percussit subito et etiam antequam minetur, suspendit, excommunicat antequam commoneat, ideo per appellationem prævenimus subito et precipitem ejus sententiam. Appellationem prius fecimus, et eam innovamus modo, et hac appellatione se includit tota Anglia. Deinde explicuit causam vestram et domini regis. Quod rex sibi exigit a vobis quadraginta quatuor millia marcarum argenti, rationem redditum, qui vobis erant commissi, quando fuistis cancellarius, et quod vos respondeatis non fuisse vos implicitum rationiis, quando promotus fuissetis ad honorem archiepiscopatus, et si fuissetis implicitus, hoc ipso tamen, quod promotus fuistis, absolutus fuistis. Et ibi derisit vos Londoniensis dicens vos credere: quod sicut in baptismo remittuntur peccata, ita et in promotione relaxantur debita. Retulit etiam propter quæ pericula ipse, et alii episcopi Angliæ appellaverunt, scilicet propter depressionem suam, et ecclesiarum suarum, et propter discessionem etiam a Romana Ecclesia. Recederet enim rex forte a Romana Ecclesia, si parerent interdicto vestro. Retulit etiam quomodo diffamatis eum propter decreta sua. Et ibi publice protestatus est, regem relaxare hoc interdictum de appellatione, et ratione pauperum clericorum hoc instituisse, nunc autem cum ingrati essent, hoc irritare. Et item si civilis esset causa, coram civili iudice contenderent; si autem ecclesiastica, allegarent forum suum, et coram suo iudice contenderent. Tandem dixit vos indebitam servitutem ab eo exigere, quod scilicet debet deferre breves vestros per Angliam, et huic officio non sufficere al quadraginta cursores. Aliud

etiam gravamen, quo affligitis eum, proposuit, quod A
exemistis a potestate ipsius fere quadraginta eccle-
sias. Dabant enim censum aliquando monasterio
Sanctæ Trinitatis vel Sancti Augustini, et statim
emancipabatis eas a potestate ipsius. Habebatis
etiam decanum vestrum in Londoniensi urbe, qui
insidiatus est ei, et coram quo oportet causas præ-
dictarum ecclesiarum decidi. Et his se gravaminibus
plus afflictum, quam aliquem alium episcopum dice-
bat. Episcopus etiam Saresberiensis in hac appel-
latione se posuit, et episcopum Wintoniensem.
Saresberiensis tamen dicebat se audivisse, quod vos
excommunicaveritis eum, sed se, statim cum au-
civit, appellasse, et tunc etiam appellare. Clericus
etiam archidiaconus Cantuariensis ibi appellavit,
et monachus Cantuariensis Ecclesiæ contra vos. B
Facta itaque appellatione petierunt appellatorios a
cardinalibus, et dati sunt eis appellatorii, sicut
creditur. Discesserunt autem cardinales a rege tertia
feria post *Ad te levavi*. Sed in discessu cum multa
humilitate petiit rex cardinales, quod pro eo inter-
cederent apud dominum papam, ut liberaret eum a
vobis omnino, et incontinenti coram cardinalibus et
aliis lacrymatus est, et dominus Willelmus cardi-
nalis visus est lacrymari. Dominus Otto vix a ca-
chinno se potuit abstinere. Summa autem negotii
hæc est, quod dominus Willelmus Papiensis mittit
quemdam clericum suum, qui cognatus creditur
magistri Lombardi, cum festinatione ad dominum
papam, et rex mittit duos nuntios, scilicet quem-
dam Londoniensis episcopi, qui vocatur magister C
Henricus Pinchin, et cum eo Reinaldum filium Sa-
resberiensis episcopi. Præterea Sabbato ante se-
cundam diem Dominicæ Adventus a cardinalibus,
qui erant apud Ebroicas, egressi sunt magister
Jocelinus Cicestrensis, et cantor Saresberiensis,
venturi ad vos, ut denuntient factam esse contra vos
appellationem a personis Angliæ. Ferunt etiam lit-
teras: cardinales in forma ista salutant vos, et
vocant apostolicæ sedi legatum, et in fine litterarum
suarum vobis domini papæ auctoritate præcipiunt,
ut nullum interdictum in regnum Angliæ vel perso-
nas de cætero ponatis. Dominus Otto mandat do-
mino papæ secreto, quod depositionis vestræ nec
auctor erit nec consentiens, quamvis rex nihil
aliud petere videatur, nisi caput vestrum in disco.
Valet.

EPISTOLA CCCLXXXII.

AMICI AD AMICUM.

Amicus amico: verba domini Cantuariensis cum
legatis inter Gisortium et Triam.

Quia te super statu Ecclesiæ et impetratæ legationis
eventu sollicitum esse non ambigo, ad tuam et alio-
rum Deum timentium consolationem hæc tibi suc-
cincta brevitate censui prescribenda. Noveris itaque
dominum Cantuariensem, et nonnullos de coexsulibus
suis, in octava beati Martini inter Gisortium et
Triam accessisse ad colloquium legatorum. Cum vero

illi multa proposuissent de charitate domini papæ et
sollicitudine nostri, quam attentius gerit de labori-
bus ipsorum et itineris periculis, de magnitudine
principis et necessitate Ecclesiæ, de malitia tempo-
ris, de amore et beneficiis, quibus dominus rex præ-
venerat Cantuariensem, et de honore quem ei sem-
per exhibuit, adjecerunt etiam querelas et injurias,
quibus rex se læsum esse a Cantuariensi conquiritur,
imponens ei et inter cætera, quod ei excitave-
rat guerram regis Francorum, quærentes consilium
quomodo tantam indignationem placare possent;
quia sine multa humilitate, et moderatione, et exhi-
bitione honoris noverant tantis periculis remedium
adhiberi non posse. Cantuariensis vero in omni
humilitate et mansuetudine spiritus, post gratiarum
actionem domino papæ et illis debitam, respondit
ad singula, rationibus veris et probabilibus querelas
regis evacuans, et injurias Ecclesiæ et damna into-
lerabilia patenter exponens. Et quia humilitatem
et delationem honoris ab eo exigebant, respondit se
omnem humilitatem exhibiturum et honoris et reve-
rentiæ quantumcumque plus posset: *Salvo honore
Dei, et libertate Ecclesiæ, et honestate personæ suæ,
et possessionibus Ecclesiæ*; et si eis aliquid videretur
adijciendum, aut demendum aut immutandum, ro-
gavit ut ei consilium darent, habens acquiescendi
propositum, salva conditione professionis et ordinis.
Illis autem dicentibus se non venisse ut ei, sed ut eum
consulerent, et reconciliationis tentarent viam,
item quæsitum est ab archiepiscopo, an in præsen-
tia legatorum vellet promittere observantiam con-
suetudinum, quibus decessorum suorum tempore
reges usi sunt, et sic sopitis omnibus querelis redire
in gratiam regis, et recipere sedem suam, et ad-
ministrationem, et pacem sibi et suis. Ad hæc
archiepiscopus respondit: *Nullum decessorum suo-
rum ab aliquo regum ad hanc professionem fuisse
arctatum, neque se, Deo auctore, promissurum ui-
quam ut observet consuetudines, quæ legi Dei paten-
ter adversantur, sedis apostolicæ convellunt privile-
gium, Ecclesiæ perimunt libertatem, quas dominus
papa Senonis in illorum et multorum præsentia con-
demnavit, et ipse postea domini papæ secutus au-
ctoritatem, quasdam earum cum observatoribus suis* D
*subjecit anathemati, sicut in multis conciliis Eccle-
sia catholica fecisse dignoscitur. Item interrogatus
est, an, si non confirmationem, saltem dissimula-
tionem et tolerantiam vellet repromittere aut non
facta altrinsecus aliqua mentione consuetudinum,
sedem suam recipere et pacem. Respondit archie-
piscopus, quod nostræ gentis proverbium est: Quod
taciturnus spiritum præterdit contentis, et cum
rex sibi videatur in possessione consuetudinum esse,
et ad eas observandas injuste et violentè cogat Ec-
clesiam, si sic taciturnitate impetrata cessaret con-
cursio, auctoritate maxime legatorum interveniente,
statim sibi et aliis videretur obtinuisse in causa ista.
Adjecit etiam, se malle perpetuo exulare, et pro-
scribi, et, si Deus ita disposuit, pro justitiæ defen-*

sione mori, quam in salutis suæ dispendium, et A præjudicium ecclesiasticæ libertatis hanc ineat pacem. Deus enim est qui in tali causa tacere prohibet et sacerdotes, qui dissimulantibus gehennam præparavit, ubi nulla erit dissimulatio poenæ. Lectus est et libellus abominationum illarum, et quæsitum a cardinalibus, an a Christianis talia liceat observari, ne dum a pastoribus dissimulari. Progressi sunt ad aliam quæstionem sciscitantes an vellet eorum iudicio stare super his, quæ inter ipsum et regem vertuntur. Ille autem de causâ se sinceritate confidere respondit, et cum ipse et sui, qui a tempore multo destituti sunt, plene fuerint ad omnia restituti, habita ratione causarum, rerum, et temporis, juri libenter paritutum, et se nec posse, nec velle declinare, quin, ubi, et quando, et quomodo debeat, B subeat iudicium ejus, vel illorum, cujus, vel quorum iudicio dominus papa eum stare deberet decreverit: interim se et suos ad litigandum urgeri non posse, nec paupertatem suam ad hoc sufficere, cui etiam victualia desunt, nisi Christianissimi regis Francorum vivat expensis. Noluit enim prima facie declinare iudicium, etsi aliquem eorum jure optimo posset habere suspectum, ne causam regis iustificare videretur, nec se liti immergere, antequam ad omnia sit restitutus, ut possit causam sufficienter instruere, ut quemlibet divitem adversarium non formidet, innitens gratiæ Dei. Procedentes hinc quæsierunt, an sub eis iudicibus vellet respondere episcopis, qui contra eum appellaverant, quia præ- C sentes erant. Archiepiscopus vero memor litterarum, quibus ei præsentata est illa qualiscunque, vel nulla potius appellatio, concepta, ut ibi perhibetur, sub nomine omnium comprovincialium episcoporum, et abbatum, et personarum regni in provincia Cantie degentium, et certus quod isti non convenerant Rothomagus, et quamplurimi eorum hujus fuerant appellationis ignari, et multis, qui noverant, displicebat, utpote justitiæ, quantum in ejus auctoribus erat, elusio potius, quam appellatio, respondit similiter uper hoc nullum domini papæ se recepisse mandatum, et cum illud receperit, consulto responsurum et facturum quod ratio dictaverit. Cæterum paupertatem suam et snorum ad itineris sumptus et lites non esse idoneam, et clementiam Christianissimi regis hoc sine molestias pati non posse, ut liberalitas ejus, quæ exsultantes episcopos decrevit humanissime consolari, eum et coæsules suos sæpe et diu exhibere cogatur in domibus alienis. Nam ubi est copia victualium, facilius est procurare expensas. Die autem sequenti Christianissimus rex legatos admittens ad colloquium, sub religione juramenti purgavit innocentiam domini Cantuariensis, perhibens ei testimonium, quod ei consilium semper dederat, ut pax servaretur salvo honore utriusque regis, et populi utrinque debita quiete gauderent. Rogavit archiepiscopus legatos, ut aliquid Ecclesiæ consilium darent, et si alicubi excederet, rectiorem ostenderent viam. Illi autem zelum quem habet in Domino approbantes, ei compassi sunt, sed de proposito ejus

non dixerunt aliquid immutandum. Sic data benedictione ad invicem ab invicem discesserunt, et statum est, et auctore Deo stabitur in finibus istis donec Ecclesia convalescat, et persecutores ejus aut convertantur, aut pereant. Illa rogavit pro te, et rogare non cessat, ut non deficiat fides tua, et tu, quandocunque opportunitas fuerit, conversus ad illos, confirma fratres tuos. Hæc illis ostendes, ad quos missus es, lapsos erige, stantes robora, ut firmi sint. Plures enim sunt patroni et defensores Ecclesiæ, quam impugnatores. Eam non deseret in tribulatione, qui pro liberatione ejus posuit animam suam. Causam sancti non deserent, pro qua veriti non sunt sanguinem suum dare. Hanc omnium celestium virtutum tuetur exercitus: et majestas, quæ Satanam conterit sub pedibus suis, de membris ejus, ministris nequitiae, ut spes fideliū est, et promissio Patrum, cito, facile, et feliciter triumphabit.

EPISTOLA CCCLXXXIII.

CUIUSDAM AMICI AD THOMAM.

THOMÆ Cantuariensi archiepiscopo, quidam amicus.

In die Assumptionis beatæ Mariæ apud Argentum perlatæ sunt litteræ domini papæ ex parte nuntiorum, et perlectis illis satis turbatus est rex. Crastina die misit obviam nuntiis Joannem decanum Saresberiensem, et Reginaldum archidiaconum. In vigilia beati Bartholomei venerunt nuntii ad Danfront. Adventum quorum cum audisset Gaufredus Ridel, et Nigellus de Saeca-Villa, exierant de Danfront cum subita festinatione. Quare exierint, vobis satis notum est. Ipsa die cum jam sero factum esset, venit rex de nemore, et divertit ad hospitium nuntiorum, priusquam ad suum, et eos cum multo honore et reverentia, et humilitate suscepit et salutavit. Et dum stans adhuc cum eis loqueretur, ecce ad ostium ejusdem hospitii venit dominus Henricus filius regis, et multi pueri cum eo, unusquisque cum cornu venatorio buccinantes, sicut solet, de capione cervi, quem totum eis donavit. Quod fecerunt ut aut faret hospes. En ad populum phaleras. Crastina autem die circa horam primam venit rex ad hospitium nuntiorum, et intraverunt cum eo cameram Sagiensis et Redonensis episcopi. Post aliquam moram admissi sunt Joannes decanus Saresberiensis, et Reginaldus archidiaconus. Et paulo post archidiaconus Landavensis. Et stantes usque ad horam nonam colloquebantur aliquando in pace, aliquando autem in rixa et tumultu. Intentio domini regis fuit, quod clerici excommunicati non jurarent. Aliquantulum ante occasum solis exiit rex multum iratus, et querens graviter de domino papa, quod nunquam in aliquo audierit eum. Et cum quadam contumacia dixit rex: *Per oculos Dei ego faciam aliud.* Et Gratianus gratiose respondit: *Domine, noli minari. Nos enim nullas minas timemus; quia de tali curia sumus, quæ consuevit imperare imperatoribus et regibus.*

Tunc convocati sunt omnes barones et monachi albi, qui præsentes erant, et omnes fere de capella: et dominus rex rogavit, ut tempore opportuno testificarentur pro eo, quanta et qualia obtulerat, restitutionem scilicet archiepiscopatus et pacis. In fine visus est aliquantulum pacificatus ab eis discedere, et certæ responsionis diem assignavit octavam. Ad quam diem convocati episcopi venerunt Rothomagensis et Burdegalensis, casu Cenomanensis, et omnes episcopi de Normannia. Wigornensis die, qua hæc agebantur et quæ dicenda sunt, non venerat, sed crastina die venturus sperabatur, et venit. Pictaviensis synodo, quam tenebat, occasionem prætendebat non veniendi, sed post synodum se continuo venturum mandavit. Prædie Kalendas Septembris Baioci obtulerunt nuntii domino regi litteras domini papæ, precatórias de restitutione vestra, et de pace. Dominus vero rex proposita narratione omnium rerum, quas adversus vos solet proponere, dixit: *Si quid de homine isto fecero pro precibus domini papæ, multas mihi debet habere grates.* Crastina die cum nuntiis convenerunt omnes episcopi ad locum quemdam, qui vocatur Le Bur. Et statim ex quo venerunt nuntii, intravit dominus rex parcum, et omnes episcopi cum eo, et illi tantummodo, qui vocati erant ex nomine. Et statim habuit dominus rex consilium cum nuntiis solis, petens ab eis quod clericos suos absolverent sine iuramento. Quod cum nuntii se facturos instanter negarent, dominus rex ad equum suum cucurrit, et ascendit, et audientibus omnibus juravit, quod nunquam in vita sua audiret neque dominum papam, neque alium de pace et restitutione vestra. Quo audito, archiepiscopi et episcopi, quotquot erant, ad nuntios venerunt, et supplicaverunt eis, quod pro amore Dei hoc facerent. Ipsi vero cum summa difficultate concesserunt. Quo facto, descendit dominus rex, et iterum cum eis habuit consilium. Et cito post convocatis omnibus quotquot in parco erant, incepit dominus rex narrationem suam, et dixit quod volebat eos scire, quod vos per eum de Anglia non existis, et quod vos multoties revocaverat, ut veniretis satisfacere super his quæ adversus vos habuit, et noluitis. Sed modo ita se habet res, quod ipse prece et præcepto domini papæ archiepiscopatum vobis integre redidit et pacem, vobis et omnibus qui de terra sua pro vobis exierunt. Istam pacis concessionem fecit dominus rex circa horam nonam, et post hæc valde lætus remansit, et quasdam alias causas in præsentia sua tractari fecit. Quibus pertractatis iterum venit ad nuntios, petens ab eis quod ipsi irent in Angliam, causa absolvendi excommunicatos, qui ibi sunt. Quod cum instanter negarent se facturos, iratus est rex, et petiit iterum quod alter illorum saltem iret, alter remaneret, vel quod unum clericorum suorum mitterent, et ipse illi clerico reditus daret antequam rediret. Quod cum iterum Gratianus, qui ut speramus, filius est gratiæ, denegaret, dominus rex ab eis iratissimus recessit, et

audientibus illis dixit: *Facite quod vultis, ego nequa vos, neque excommunicationes vestras appetitor, vel dubito unum eorum.* Et post istud verbum equum suum ascendit ut recederet. Sed secuti sunt eum archiepiscopi et episcopi, quotquot erant, et dixerunt ei quod male locutus erat. Postea vero descendit, et cum eis verbum habuit. Cujus consilii summa fuit, quod ipsi omnes scriberent domino papæ, et quod audientibus illis obtulerat vobis pacem, et paratus erat facere omne præceptum domini papæ, et quod per nuntios stetit, quominus fieret. Deinde cum in faciendis litteris non nihil temporis perdidissent, cum multoties quasi iratissimus ab eis discessisset, accesserunt ad eum et episcopi dicentes, quod isti nuntii haberent, et ostendissent jam mandatum domini papæ, quod omnes facerent quidquid ipsi nuntii præceperint. Respondit rex: *Scio, scio, interdicit terram meam. Sed nunquid ego, qui possum capere singulis diebus castrum fortissimum, non potero capere unum clericum, si interdixerit terram meam?* Verum cum aliqua ad voluntatem suam se facturos promississent, cessavit omnino tempestas, et ipse rediit ad eor, et dixit: *Nisi hac nocte pacem feceritis, nunquam de cætero ad hunc punctum venietis.* Postea cum aliquantum in verbo isto laborassent, convocatis omnibus dixit: *Oportet me facere multum pro prece domini papæ, qui dominus et pater meus est, et ideo reddo ei archiepiscopatum suum, et pacem meam, et omnibus qui pro eo extra terram sunt.* Tunc nuntii et omnes alii gratias egere. Et tunc rex adiunxit: *Si quid modo minus feci, eras consilio nostro supplebo.* Crastina die, id est, Kalendis Septembris convenerunt ad eundem locum circa horam meridianam, et cum de absolutione excommunicatorum diutius esset tractatum, ut scilicet non jurarent, eo decursum est, quod Gaufredus Ridel, et Nigellus de Sacca-Villa, et Thomas filius Bernardi, extenta manu ad evangelia coram posita dixerunt in verbo veritatis se facturos mandatum nuntiorum. Tunc petiit ut a nuntiis, quod ecclesiæ vestræ omnes res, quotquot dominus rex interim donavit, penes eos residerent, quibus a rege donate sunt. Sed, sicut audivimus, eo decursum est, ut libere ad vestram redeant donationem. Postea hoc actum est, ut formam pacis, quam concesserat rex, episcopi scriberent, et multa intentione agebat hoc dominus rex, quod alter nuntiorum in Angliam transfretaret ad absolvendum excommunicatos. Et cum discessissent, jam tertia hora noctis fere elapsa, rex dixit, quod in forma pacis scriberetur: *Salva dignitate regni sui.* Sed Gratianus, ut audivimus, instanter negavit se ulla hoc concessurum ratione. Et in isto verbo stant adhuc, redituri die nativitatis beatæ Mariæ Virginis apud Cadomum, ut hoc ipsum plenius confirmant. Lexoviensis operam dedit ut regi blandiretur, Rothomagensis ut Deo et domino papæ. Valet.

EPISTOLA CCCLXXXIV.

EJUSDEM AMICI AD EUNDEM.

THOMÆ Cantuariensis archiepiscopo, quidam amicus.

Hæc est forma, in qua conveni regem: tentavi quomodo possem archiepiscopo persuadere, quatenus super verbis illis, quæ pacem inter vos ruperant, supponeret se consilio domini Rothomagensis, et Cenomanensis, et Sagiensis, et meo, cæterorumque episcoporum qui colloquio interfuerant, aut si ei aliquis illorum suspectus esset, illum amoveret, et quemcumque alium episcopum vellet, loco illius reciperetis, dummodo de regno vestro esset, et juxta consilium illorum verba illa omnino tolleretis aut n-utaretis in certam formam, quod omnem omnino dubitationem excluderetis. Archiepiscopus vero mihi respondit, quod neque domini Rothomagensis consilium, neque meum, neque alicujus mortalium adeo illi exstitit fructuosum aut honorabile, sicut vestrum, neque ex alicujus mortalis consilio tantum honoris fuerat assecutus. Et propterea, si vobis placeret, quod eum in consilium vestrum reciperetis, ille se consilio vestro submitteret, ita ut vos primum honori regni vestri et vestro prospiceretis, et consequenter ipsi, ne adversus dominum papam, cui astrictus est, offenderet, nec Ecclesiam, cui prodesse debet, læderet. Congruum autem esset, ut consilium illud, priusquam conveniretis, ita determinaretur et certificaretur, quod nihil superesset quæstionis, quando vos simul conveniretis, ne forte tunc minus honeste ab invicem discederetis, sicut nuper fecistis. Ipse vero rex benignius hoc verbum recepit, quam existimabam, et adjecit: quod ipse in primis in consilio, quod daret, honorem Dei observaret, et deinde suum et regni sui, et vobis ita prospiceret, quod quantum rationabiliter posset, personam vestram non læderet. Sed certificationem verborum dixit inter vos fieri non posse, dum ipse et vos in tam remotis locis essetis. Oportet autem vos ad locum vicinum sibi venire, unde inter vos nuntii, qui hæc tractarent, de propius et facilius discurrere possent. Placuisset autem ei, ut ipse Turonum, et vos apud majus monasterium essetis. Aut si hoc non vultis, ipse Turonum, et vos apud Choise, ubi scilicet dominus papa cum regibus colloquium habuit, paulo ultra Blesium. Dies quoque præfixa est in cathedra beati Petri, ita tamen ut octo diebus ei prius in Normannia significem, utrum diem observare velitis.

EPISTOLA CCCLXXXV.

AMICI AD AMICUM.

Amicus amico. De absoluteione episcoporum

Dominus Cantuariensis concessit in præsentia nostra, et domini Trecentis, et quorundam aliorum, nuntiis domini papæ, domino Gratiano et magistro Viviano, pro bono pacis, ut hac vice absolverent excommunicatos suos ad tempus, accepto ab eis juramento, quod: tibi mandato ipsius Cantuariensis, si hoc aliquo modo efficere poterant, sin autem,

A suo. Et ipsi versa vice promiserunt domino archiepiscopo in veritate, quod si non fuerit pax subsequenda inter regem et ipsum ante recessum eorum, qui non protraheretur ultra festum beati Martini, ab eodem festo reponent eos in eandem sententiam, in qua fuerunt, nec dimittent propter aliquam appellationem factam vel faciendam ab illis, vel ab aliquo alio pro ipsis, nisi infra viginti dies a prædicto festo, si tamen tanto tempore moram fecerint, domino Cantuariensi satisfecerint de his, pro quibus ab eo excommunicati sunt. Et si ante memoratum festum recesserint, similiter reponent eos in eandem sententiam a die recessus sui, nisi, sicut prædictum est, satisfecerint eidem Cantuariensi. Verentur enim ipsum, qui pro Ecclesiæ libertate per tanti temporis spatium exilium jam sustinuit, ad intolerabilem injuriam provocare. Qui juxta sententiam domini papæ in paucis vexatus, in multis profecit, sicut creditur ab his, qui ejusdem Cantuariensis intima noverunt.

EPISTOLA CCCLXXXVI.

AMICI AD AMICUM.

Amicus amico. De nominibus excommunicatorum.

Gilbertus Londoniensis episcopus, et Jocelinus Saresberiensis episcopus. Gaufridus Ridel, Cantuariensis archidiaconus, Ricardus de Ivelcestria, Pictaviensis archidiaconus, Nigellus de Sacca-Villa, Ricardus de Hastings, nepos Ricardi de Hastings, Letardus nepos Theobaldi archiepiscopi, Robertus de Broc, Robertus frater Wilhelmi de Einesforde, Robertus vicarius Gaufredi archidiaconi Cantuariensis, ille qui tenet Ecclesiam de Chere, ille qui tenet Ecclesiam de Hele, Ricardus de Luci, Hugo de S. Claro, Thomas filius Bernardi, Randulphus de Broc, Wilhelmus de Essedesforde, Robertus pincerna Theobaldi archiepiscopi, Alanus de Reclingis, Wilhelmus de Becco, ille qui tenet terram de Mundeham, de manerio de Pagaham, quam rex abstulit Ecclesiæ Cantuariensi propter Joannem Mareschallum, si est alius, qui teneat eam quam rex. Ille qui tenet terram de Lese, de manerio de Ottefordis, quam tenuit Joannes frater Wilhelmi de Eynesdord, si est alius qui tenet eam præter regem, Joannes Cumin, Guido Ruffus, qui tenetur, sicut cæteri supradicti, quidquid percepit de redditibus thesaurarii Lexoviensis, ipsi Cantuariensi restituere. Ipsi sunt qui tenent possessiones ecclesiasticas et laicas Ecclesiæ Cantuariensis, et domini Cantuariensis, quas vult et petit cum omni integritate sibi et suis restitui. A Londoniensi vero, quidquid percepit de redditibus clericorum suorum, petit sibi restitui. Si qui vero sunt alii, qui receperint possessiones ecclesiasticas sive laicas de manu regis, vel de ipsius concessione, pertinentes ad Ecclesiam Cantuariensem, excommunicati sunt, donec illas easdem possessiones Ecclesiæ Cantuariensi et domino Cantuariensi archiepiscopo restituant, et omnia inde percepta. Præterea excommunicatus est ab eodem archiepiscopo Wi-

marus, qui fuit clericus comitis Hugonis, Adam de A
Cheringis, Willelmus Giffard.

EPISTOLA CCCLXXXVII.

LUDOVICI AD HUMBALDUM ET HYACINTHUM CARDINALES.

LUDOVICUS rex Franciæ, HUBALDO Ostiensi episcopo
et JACINTHO cardinalibus.

Dilectioni vestræ uberes gratias referimus pro
archiepiscopo Cantuariensi, cujus negotium tam pie
ac perseveranter, amore Dei et nostro fovistis. Quod
si finem debitum ministerii ac patrocinii vestri obse-
quio consecutum non fuerit, non minus tamen lau-
dis, non minus gratiæ sollicitus diligentia vestræ
favor promeruit. In regno nostro propalatus est sermo
scandalum generans, subortum est murmur, quod de
facile sedari non potest. Recolitur ubique cum ad-
miracione, quod dominus papa contra dominum Can-
tuariensem litteras patentes regi Angliæ, inanis glo-
riæ cupido, nuper indulsit, in quibus os et manus
Cantuariensis suspenditur, in quibus ei potestas
omnimoda tam in regnum Angliæ, quam in regni
personas inhibita est, donec gratiam regis ad plenum
fuerit consecutus. Non habemus dominum papam
accusare vel in manifesto arguere, quia dominus
est; sed quæ ipsius opinionem denigrant, omnino
silere non possumus. Et quid imperatori, aut aliis
schismaticis, qui nobis insultant, sufficienter ha-
beamus respondere, nisi nos vestra vel domini papæ
discretio super hoc instruxerit, invenire non va-
lemus.

EPISTOLA CCCLXXXVIII.

AMICI CUIUSDAM AD THOMAM CANTUAR.

THOMÆ Cantuariensi archiepiscopo, quidam ami-
cus.

Licet vestræ discretionis paternitatem litterarum
solatio sæpius non visitaverim, vos inde mirari nulla-
tenus decet, cum vix aliquis aut fere nullus ad vos
a curia processum habeat, cui secreta litterarum
indicia committi possint; et cum vobis plures litteras
destinaverim, quæ ad præsentiam vestram, sicut pro
certo didici, nunquam pervenerunt. Sciatis quippe
me circa negotia vestra sollicitum et vigilantem pro
possibilitatis meæ viribus existisse, et ad eorum
promotionem diligenter intendisse, præcipue per
magistrum Waltherum, qui præ omnibus specialiter
pro eisdem negotiis promovendis apud dominum
papam efficaciter laboravit, et ipsa conscribendo ad
desideratum finem, Deo volente, perduxit. Sicut
enim in litteris et transcriptis sub bulla clausis, quæ
a domino papa vobis diriguntur, evidenter videre
potestis, petitiones vestræ debitum sortitæ sunt effe-
ctum. Cæterum Londoniensi firmiter injunctum est
a domino papa, ut sententiam quam in eum de-
distis, firmam et inconvulsam observet, nec a Ro-
thomagensi et Lexoviensi, quibus super hoc iterato
scribit dominus papa, nisi forte ab eisdem post su-
sceptionem priorum litterarum ipsius, quas inde su-
sceperunt, præstito secundum Ecclesiæ formam jura-
mento sit absolutus, absque domini papæ mandato

ullatenus absolvatur. Confortamini ergo et con-
stanter agatis, et tanquam supra firmam petram
fundatus ad quorumlibet ventorum exsufflationes
nolite moveri, aut aliquo modo terreri vel turbari,
nec ut moris vestri est, quoslibet per vos transeun-
tes secretorum vestrorum interpretes constituitis,
ut magis de justitia, quam de multitudine confidere
videamini; quia ubi multitudo, et præcipue in tali-
bus, creberrimæ solent confusiones emergere, et im-
pedimenta plurima provenire. Secretum sit apud
vos quod scribo de Londoniensi, cum nihil de illo
vobis scriptum sit. Propter malignantes dico: ne
dicar secreta revelare. Cum vero Deus vos in statum
pristinum reduxerit, quod in proximo spero adfu-
turum, estote memor magistri Waltheri et mei, si
placet, ne pro multitudine ad vos respicientium a
vestra memoria elabamur, quia tunc forte præsen-
tes non erimus.

EPISTOLA CCCLXXXIX.

AMICI CUIUSDAM AD EUNDEM.

THOMÆ Cantuariensi archiepiscopo, quidam ami-
cus.

REX proxima Dominica die Londoniis debet esse,
eoque archiepiscopum Eboracensem, omnesque Ang-
liæ episcopos, et barones ad diem illam ex omni-
bus terræ partibus convocavit. Sane ea die corona-
bit filium regis Eboracensis, uxore ejus, filia scilicet
regis Francorum, apud Cadomum derelicta, et
quasi repudiata in contumeliam patris et contem-
ptum. Coronabitur certe puer ille, quem diximus, et
quando diximus, nisi Dominus mare clauserit navi-
gare volenti, vel manus contraxerit Eboracensi, vel
nisi rex Francorum aliquo prohibitionis modo inhi-
buerit. Puer enim properat ad mare, et a patre ex-
spectatur in adverso littore. Et de mandato regis,
Baiocensis et Sagiensis cum puero vadunt. Ricardus
de Humet non ibit. Regina Cadomi morabitur, do-
nec gaudii hujus certitudinem acceperit. Litteræ ergo
domini papæ super prohibitionem consecrationis
hujus, diu est quod mare transierunt, sed inutiles
prorsus effectæ: in manu illius, cui traditæ sunt,
perierunt, nec alicui ostensæ, nec ullatenus propa-
latæ. Quid igitur prosunt, quæ sic occultantur, per
quas nec instans coronæ impositio, nec personæ un-
ctio cessabit? Certissime enim sciatis hoc sine dila-
tione futurum, et, si non auderet Eboracensis, ma-
nus tamen cruentas apponeret carnifex Sagiensis.
Hoc autem fit contra vos, ut nec diutius liceat etiam
sperare de pace, cui non solum pax differtur, sed
tota spes pacis et reconciliationis aufertur. Dixit
enim nobis Ricardus de Ivelcestre, qui pro accele-
rando transitu pueri venit altera die usque Cado-
mum, et statim reversus est cum illo; dixit, in-
quam, ille quod pacem vestram omnibus modis dif-
ferret, et si aliter non posset, non solum domino
papæ, sed etiam ipsi Deo inobediens rex ante usque
ad mortem existeret, quam vobiscum pacem habe-
ret. Nolite ergo sperare in iniquitate, nec templaria

illis credite, qui non ambulant in simplicitate, sed regis potius, quam vestram voluntatem exsequi cupientes, vobis nihil aliud quam mendacia de rege et patre mendacii afferunt, ut decipiant. Quidquid enim rex agit vobiscum, dolus est et nequitia. Sed ut pace vestra loquar, stultum decipit verbis inanibus, ut interim sibi magis provideat, et de tractu temporis contra vos majores insidias paret, et laqueos præparet fortiores. Quid igitur facies, hominum miserrime, si tibi fuerit sub temporis brevitate subtractum, ad quod tantis temporibus suspirasti? si per alium rex fuerit effectus, qui non nisi per te regnare debuerat? Imo quid facies, si inimicus tuis regem tibi consecraverit inimicum, ut contra te in patriæ auxilium quanto junior, tanto fortior manus insurgat? Verum quid faciet rex ipse Francorum, cuius ita filia contemnitur, cui regnum aufertur, cuius speranda posteritas condemnatur? Cur enim ejus filius, qui adhuc ei fortasse nascetur, regni gloriam consequeretur, si ipsa modo coronæ indigna judicatur? Forsitan non movebitur rex ille nimium justus, nec suum, filique contemptum vindicabit. Sed magis in sua justitia peribit. Moderate loquor in Christum Domini, sed tamen pro nihilo ei coronam Franciæ deseret, qui coronam Angliæ tam facile auferet. Unicum ergo et singulare ei et vobis remedium est, ut sine omni dilatione ad reginam et ad Ricardum de Humei nuntios mittat, qui ex sua parte prohibeant ne fiat, et si factum fuerit, ab utroque cum diffidia separentur. Sic enim territi Ricardus et regina mittent ad regem, et regis impediatur voluntas. Nuntius enim regis Francorum vel vester, nullus posset ad regem nostrum accedere. Et si litteras domini papæ deferret, mitteretur in carcerem; si vestras traderetur in mortem, si regis Franciæ teneretur honeste, sed non procederet, donec negotium ad aures regis perveniret. Currite ergo statim ad regem, et advocate Senonensem, ut aliquod opponatur obstaculum huic operi, quod in personæ regis contemptum, et in causæ vestræ præjudicium noscitur agitari. De cætero sciatis Thomam, novum archidiaconum Bathoniensem, nuper a rege ad archiepiscopum Rothomagensensem venisse, et a Nivernensi episcopo transeundi inducias impetrasse usque adsequentem Dominicam. Publice enim Thomas ille clamavit, et multi alii quotidie clamant regem in proximo esse venturum: quod penitus est falsissimum. Per episcopatus ergo, et abbatias, et per domos regias, usque ad Montem S. Michaelis formidino gradu Nivernensis incedit, et qui in terra sua quindecim esset contentus, apud nos triginta sex equitaturas adducit. Dicitur ergo, quod magis sitit pecuniam regis, quam pacem regni; magis lucrum suum, quam commodum vestrum. Et res satis manifestis indicibus declaratur. Sexta enim feria post octavam Pentecostes venit Cadomum, unde tunc filius regis exierat, cum quo Nivernensis optime, si vellet, transire potuisset. Sed dicitur ei regem cito esse venturum, aut navem regiam venturam propter

A ipsum. Et sic homo ille, mores gentis nostræ penitus ignorans, fallacis capitur, nec in manu ejus verbum Domini prosperatur. Verum, si astutias istas intelligeret, si concito gradu ad mare properaret, porteret archiepiscopum præire, et istum regis responsum expectare. Et si omnino vellet transire, navem quidem et instrumenta navis inveniret, sed gubernator nullus appareret. Singuli enim fugerent, vel se nihil scire dicerent, vel ventum penitus esse adversum jurarent. Stultus ergo fuit, qui veniendi per vos voluntatem habuit, qui propter Flandriam ire disposuit. Statim ergo litteras regis, et litteras Senonensis, et nuntium vestrum ad Nivernensem dirigite, ut cum omni celeritate reginam Cadomi morantem conveniat, quatenus ei transitum paret. B Quæ si noluerit ob manifestam impossibilitatem, idem episcopus ad vos revertatur, facturus citius quod facturus est. Nolite enim de cætero parcere, sed totum spiritum effundite, totum gladium evaginate, quoniam non respiciet vos oculus regis usque in sempiternum. Respiciat autem super vos et super oves pascuæ suæ oculus pietatis divinæ, et magis de principibus victoriæ gloriam, quam principum pacem non veram, Ecclesiæ suæ conferre dignetur. Valete. Et si adversitas increbuerit, nolite timere, quia Dominus supponit manum suam.

EPISTOLA CCCXC.

COEXSULUM BEATI THOMÆ AD ALBERTUM CARDINALEM.

C Sanctissimo domino, et Patri charissimo ALBERTO Dei gratia S. R. E. presbytero cardinali, miseri Cantuarienses totum id modicum quod relictum est exsulibus et proscriptis, sinceræ fidei et veræ dilectionis affectum.

Quantum sit innocentis conscientie bonum, nesciunt qui sinceritatem conscientie perdiderunt. Nec veretur alienam funestis infestare consiliis, qui semel relictâ verecundia, in turpitudinis suæ defensionem præclaros viros desiderat habere consortes erroris. Utinam hæc domini papæ sanctitas, cum Ecclesiæ confusione, et infamia curiæ, non esset in nostris experta periculis, eorumque saluti pariter et honestati repugnantia consilia sapientie et auctoritatis, qua cunctis præeminet, vigore ab initio reprobasset. Qui persuadere ausi sunt, ut innocentium proscriptionem per sex annos derisorii dilationibus protelaret. Certe quisquis et quantuscunque fuerit ille consultor, illico audisse debuerat: *Vade retro Satana, quia non sapis ea quæ Dei sunt.* Nec persuadebitur mundo, quod suasores isti Deum saperent, sed potius pecuniam, quam immoderato avaritiæ ardore sitiunt, olfecerunt, ideoque prædonibus et sacrilegis adherentes consensu, consiliis instruente, armantes patrociniis, insurrexerunt in pauperes Christi, acceptantes munera, secuti retributiones. Nec possunt illorum latere nomina, quæ tum evidentiâ operis manifestat, tum relatio nuntiorum partis adversæ, tum attestatio litterarum, quibus gloriantur apud regem Anglorum, se pro eo

stetisse viriliter, et quod illis tacentibus erat credibile, persuasisse domino papæ, ut præfati regis immanitatem in tanta patientia sustineret. In quo timendum est, ne seductus sanctus erraverit nimis, adeo ut quod in Ecclesiam Dei deliquit, etiam cum voluerit, nequeat emendare. Sic solet Deus talia pierumque punire delicta, ut qui divinitus oblata gerendorum opportunitas non utitur, eadem illi in perpetuum auferatur. Scrutanti legem loquimur et scienti, qui quod dicitur, sibi familiaribus clarum habet exemplis. Et tamen ut culpam suam, quam sic magis auget, purgare curia videatur, in nuntios nostros retorquet, quod Ecclesiæ Dei, de tam manifestis injuriis et damnis justitia non sit exhibita. Ergo quasi re bene gesta consulunt, ut sapientiores mittamus, ac si per se non sit patens injuria, damna sint vel pauca vel modica, sæpe non sit prædo commonitus, nuntiis nostris illatæ non sint atrociores injuriæ, diu, imo nimis et ultra omnem modum, et contra æquitatem non sit expectata correctio. Non sunt in nobis, pater, sapientes illi, quos quærent, non potentes aut divites, quos semper contra Ecclesiam Dei et nos habere locum videmus in curia, ut assidue redeant cum triumpho. Vix sustentamur aliena stipe, et fere, nisi nos gratia conservaret, ab Ecclesia Romana attriti, qui soli in orbe occiduo pro illa dimicamus, deserere cogimur causam Christi, et Ecclesiæ contemnere libertatem. Potuit ab initio in solum regem Anglorum, et nostræ proscriptionis, et deprædationis Ecclesiæ culpa refundi, qui per se, et satellites suos, sine miseratione ætatis et sexus, sine reverentia dignitatis aut ordinis, circiter quadringentos innocentes addidit exsilio, Cantuariensem cum omnibus possessionibus et bonis suis confiscavit ecclesiam, bona vacantium sedium occupans, non permisit in eis episcopos et abbates regulariter ordinari. Dici non potest, quot animæ sine confirmationis sacramento excesserint, quot criminosi sine pœnitentia et absolutione decesserint, quot sacre virgines optata consecratione fraudatæ sint, quot causæ cum ecclesiarum et injuste oppressorum dispendio expiraverint, quanta injustitia totam possederit Angliam, quanta perditionis animarum janua Satanæ sit aperta, pastoribus ovium Christi aut in exsiliis actis, aut coactis obmutescere et silere a bonis, aut illectis ut præberent sub prætextu religionis et dispensationis arma iniquitatis peccato, et ipsos serpentes et antiqui serpentis membra perniciosius consiliis toxicarent. Tantas et tam patentes Christi injurias sæpe, imo continue per sex annos prosecuti sumus in auditoriis vestris, parati in ipsa malorum novitate, cum adhuc essetis Senonis, et nuntii regis adessent, appellationes prosequi, quæ vel a nobis vel contra nos fuerant institutæ. Non placuit ut audiremur tunc, quando nobis adhuc aliquid, etsi modicum, suberat facultatis, et amicis et adiutoribus non nihil spei. Longum erit, et vobis, ut timeamus, tædiosum, si retexamus quoties nos obtulerimus ad agendum, nec placuit ut

A audiremur, et adversariis nostris, oppressoribus Ecclesiæ, facta est, ut scitis, non prosequendæ appellationis indulgentia. Interim si pater noster, dominus Cantuariensis vellet ablata remittere, et perniciosum compositionis inenudæ coactaneis et posteris præbere exemplum, pacem facere, vobis non interponentibus partes vestras, cum rege potuerit, et redire in gratiam familiaritatis antiquæ. Sed absit hæc lues a mentibus nostris, ut pro quolibet temporali emolumento jugulemus animas nostras, insaniabili plaga conscientias vulneremus, et nefando voluptatis aut avaritiæ mercimonio vendamus Ecclesiæ libertatem, et posteros pravo corrumpamus exemplo. Faciant hoc, si volunt, alii, aut potius nullus faciat, quia nos non ita instituti sumus a sanctis Patribus, qui Cantuariensem Ecclesiam roxerunt in laboribus multis, et tandem mercedem laborum receperunt a Domino. Idem, qui auctor propositi, conscientia nostræ testis est Deus, quod dominus Cantuariensis prælegit in exsilio mori, quam perniciosam Ecclesiæ vel probrosam inire concordiam. Et si hoc, quod absit, attenuaret, rarus est inter nos, si quis tamen, qui deinceps illius posset dominium aut consortium sustinere. Nobiscum de pace Ecclesiæ, mediantibus amicis, tractabatur, cum Joannes de Oxenford Romam proficiscens, et manifesto, multis justificatus, perjurio rediit triumphator, et ab apostolica sede, furenti, quasi per se non satis insaniret, cornua attulit peccatori. Ab ea die proscriptio nostra, quæ antea soli regi et suis poterat imputari, Ecclesiam Romanam dissimulatione vel consensu auctorem habuit, cum persecutori, in malitia perduranti, sit indulta dilatio, et quodammodo licentia præstita incubandi ecclesiis, et torquendi innocentes. Et nobis, si quid solatii videbatur esse porrectum, statim missis e latere nuntiis aut litteris impidebatur, ne votivum aut debitum sortiretur effectum. Nobis etiam tacentibus, rerum eventus ita esse convincti. Ecce enim cum pax nostra, sicut multi noverunt, esset in januis, et Ecclesia solatium, ut putabamus, efficax a sanctissimo Patre Romano pontifice accepisset, supervenientes nuntii regis abstulerunt pacem, et absolutis excommunicatis nostris, etiam spem reconciliationis visi sunt præclusisse. Siquidem denuntiaverunt eis, et aliis adversariis Ecclesiæ, ut si libuerit, sex annorum appellationes, quas toties prosecuti sumus, et interdum obtinuimus, prosequantur in festo beati Lucae, scituri quod nullum eis honoris, officii, beneficii, aut famæ dispendium generabitur ex hoc, quod tanto tempore excommunicati fuerunt. Unde in eo, maxime apud nostrates, justitia viget ecclesiastica, quod qui per annum excommunicationem sustinent, notari solent infamia. Sed ecce ab hujus novitatis exemplo, et quasi apostolico privilegio, quod continetur in litteris, solutus est ecclesiasticus vigor. Quid ergo superest, nisi ut nullius momenti sit apud provinciales sententia, quam sine omni pœna vident tam facile posse

dissolvi? Juraverunt tamen, ut dicitur, se staturos A mandato domini papæ, sed præcipitur esse absconditum. Deus bone! Quid rei est, quod quæ contra Ecclesiam fiunt, licenter prædicantur in foro, ut trahi possint ad consequentiam; et si quid pro Ecclesia sit, cuius exemplum possit esse laudabile, et prodesse in posterum, illud apostolica sedes jubet abscondi? Cum ergo sic apud vos, prævalentibus fautoribus regis aut potius malitiæ, aut pecuniæ amatoribus, causa Christi tractetur, cur a nobis exigitur, ut mittamus nuntios sapientes, quasi vos ipsi non debueritis tam justam causam, tam manifestam defendere, etiam tacentibus universis? Ad hoc enim estis in mundi cardine constituti, ut liberetis pauperem a potente, ut iustitiam decernatis et faciatis inter filios hominum. Nos sane viros honestos et litteratos credebamus, quos via Romana absorbuit. Quæ tamen nobis utilitas in sanguine eorum? Nunquid mittimus plures ut et ipsi moriantur, ut innocentium minuatur numerus vel annulletur, et tyrannus, illis exstinctis, licenter dominetur Ecclesiæ nullo contradicente? Si appellationes prosequendæ sunt, quare cum nascebantur, aut nondum exspiraverant, non sunt examinatæ? Satis enim fuerat nobis eas tunc expediri, aut saltem denunciare nobis, ut aliquid aliud negotii ageremus, quo vitam nostram possemus utcumque transigere, et causam suam Deo committeremus expediendam? Spoliati et nudi sumus. Satis hactenus delusionibus huiusmodi fatigatis consultius esse credimus, ut vitam in orationibus, quam in litibus finiamus, domesticis exemplis edocti, ne de cætero non modo opera et impensa nobis periclitetur, sed et anima: Christus, cui eam committimus, Ecclesiæ suæ deinceps sit patronus et causæ. Sed fortasse dicit aliquis, quoniam pro honore pacis, et quæ præmissimus gesta sunt, et toties indulta dilatio, et dispensandi ratio admissa est. Utique si pax expectatur a Deo, peccatis, et his quæ contra legem fiunt, procuranda non est. Si a Deo futura non est, nec est Ecclesiæ necessaria, nec alicui utilis. Bonorum nostrorum non indiget Deus, sed certe peccatorum nostrorum minus, ad expediendam iustitiam et misericordiam suam, et fortasse tandiu dilata est pax, quia non via Domini, sed humana procurabatur astutia. Excessimus modum, sed urget nos necessitas, quæ nec modo, nec regulæ necessitate arcetur. Et Spiritus sanctus qui in vobis est, persuadebit, ut necessario excedentibus indulgeatis et compatiamini. In summa pietatis vestræ genibus provoluti supplicamus attentius, ut hæc omnia intimetis domino papæ, et persuadeatis ei, ne de cætero circumventoribus credat, qui amore sordium affecti ipsum conantur inducere, ut in lectione nostra animam suam perdat, et causam Christi.

EPISTOLA CCCXCI.

FORUNDEN AD GRATIANUM.

GRATIANO Romanæ Ecclesiæ subdiaconi, coexsules beati Thomæ martiris.

Ei consultissime vulneris deteguntur incommoda, qui compatitur aut medetur: nec in necessitate quisquam potius adeundus est eo, qui ipsam consuevit fideliter expedire. Et quidem Anglicanæ Ecclesiæ gravissima necessitas est, et a multis diebus jam fere insanabilis plaga, cui medelam plurimi promiserunt, sed jam fere sex annorum prorsus elapso curriculo, præter vos non fuit ab Ecclesia Romana descendens, qui adjuvaret. Quærebant alii fortasse quæ sua sunt, et Christi postposuerunt gloriam, et Ecclesiæ honestatem. Sed vos ab homine illo, qui corruptibili auro, et argento, et variis lenociniis mundanæ suppellectilis contrahentes corrumpere consuevit, nihil præter sinceritatem conscientiæ retulistis. Nec vos peniteat hunc Ecclesiæ Dei gratis præstitisse laborem, nec vos arbitremini modicam jam suscepisse mercedem, cui duplex virtutis fructus redditus est: in conscientia alter, alter in gloria. Sed utrumque perseverantia multiplicabit, et dum Anglicana in Christo spirabit Ecclesia, merito recolet se vobis esse obnoxiam. Scitis quam miserabiliter lacerata et conculcata sic hactenus, quam variis delusionibus, et quoties ipsius sit impedita iustitia, quam sæpe solatia debita, quæ sibi collata videbantur, ab apostolica sede missis e regione litteris aut nuntiis, et indultis adversæ parti dilationibus subtracta sint: quomodo quidem de dominis cardinalibus, et decurialibus amicis, afflictæ vulneribus vulnera influxerunt, ut jam non sit dolor, sicut dolor ejus. Poterant hæc ab initio regi Anglo- C rum imputari et complicibus suis, qui horum omnium in injuriam Dei causa et artifex est, cui si antequam curia justificasset illum, qui schismatis conciliator fuerat, vellemus ablata remittere, et in lationem Ecclesiæ perniciosum compositionis dare exemplum, pacem medianibus amicis, cessante opera sedis apostolicæ eramus habituri. Sed absit, ut pro Deo cæpta, sic contra Deum finiatur causa, ut pro quocunque emolumento Christi titulum distrahamus et Ecclesiæ libertatem. Testis est inspector cordium, quod dominus et pater noster mori mallet, et nos ei consepeliri, tantum morientes in Domino. A diebus autem Joannis de Oxeneford, non modo a præfato rege, sed et ab Ecclesia Romana vim patimur, quæ usque in finem sexti anni datis dilationibus protraxit D exsilium nostrum, et persecutores Ecclesiæ, qui spoliis nostris corrupti sunt, et alios corrumpunt, cum triumpho remittit et gloria. Illi autem redeuntes regem, quasi per se non satis insaniret, instigant, et illos qui Ecclesiæ decreverant adherere, minis et terroribus, et exquisitis dolis transire faciunt in adversam figuram. Experti sumus hoc tum sæpe, tum maxime modo, quando novissimi nuntii redierunt, quia regem pronum ad concordiam ab ipso revocaverunt introitu pacis, suadentes ut suos prosequi patiatur appellationes in festo beati Luca, quæ variis subterfugiis interpositæ sunt, etiam post inhibitionem a domino papa factam, quia contra voluntatem suam, si perseveraverit, nihil facere

compelletur. Interim absoluti sunt qui excommunicari meruerant hujus schismatis incentores, et spoliatores nostri, indulto sibi privilegio, ne quod dispendium honoris, officii, beneficii, aut famæ contrahant ex hoc, quod anathematis vinculo tandiu innodati fuerunt. Quod quam recte et salubriter Ecclesiæ factum sit, viderit Deus et judicet. Sed dicitur eos jurasse, quod stabant mandato domini papæ, idque præcipitur occultari, ne forte innotescat aliquid pro Ecclesia gestum, quod ad ipsius pertineat honestatem, cum econtra publice prædicetur in foro, si quid in perniciem ejus præsumptum est aut indultum. Cum ergo pars nostra ab initio prosecuta sit appellationes omnes, et singulis annis obtulit diffugiente parte adversa, et illa plus profecerit in malitia sua, quam nos in innocentia et justitia nostra, quis sani capitis audebit suadere, ut hæc ulterius præstigia consecemur? Quæ est utilitas in tot laboribus, et expensis, et sanguine innocentium, qui pro testamento Dei animas posuerunt? Utique non est nobis tanti novis delusionibus vexari in curia sine fructu, ut nos qui residui sumus, velimus sine causa morientium esse consortes, sed Deo causam suam potius committimus dirigendam. Si quis enim nostrum conventus fuerit, ut ad curiam iter arripiat, olim quod vulpes agroto cauta leoni respondit :

*Quia me vestigia terrent
Omnia te adversum spectantia, nulla retrorsum.*

Et iter hoc, donec spes profectus aliunde luceat, detestabitur. Vestris itaque pedibus provoluti supplicamus attentius quatenus sanctissimo patri et pastori Ecclesiæ, domino papæ, per vos omnia hæc innotescant, et persuadeatis ei, ne se deinceps circumveniri tam facile patiat : et si eum oculus vel pes aut manus ulterius appetat scandalum, quicumque ille sit, a consilii sui corpore ipsum resecare non pigritetur. Quia melius est, ut amputato auctore scandali sine eo vitam promereatur æternam, quam ab eo se patiatur pertrahi, quod absit ! in gehennam.

EPISTOLA CCCXII.

FIDELIS CUJUSDAM EPISTOLA AD THOMAM CANTUAR.

THOMÆ Cantuariensi archiepiscopo, suus fidelis.

Transacta Dominica rex apud Londonias filium suum cingulo militiæ donavit. Eundemque statim Eboracensis in regem inunxit. Ibi rex filiis suis terras suas divisit, cunctis admirantibus, quid de cætero sit facturus. Adventum suum in Normanniam quotidie facit prædicari, ut magis timeatur. Sed non veniet, quandiu pacem regis Francorum habuerit. Mandavit etiam Ricardo de Humes quod filium regis Francorum cum regina Cadomi morantem vestibus, equitaturis, et familia decenter instrueret ad transfretandum, quando ipse mandaret. Hoc autem factum est, ut audiat rex Francorum, et ab indignatione, quam de contemptu filiae concepit, aliquantisper quiescat. Non enim mandatum est, ut statim eat, sed preparari jubetur, ut quando rex miserit pro ea, ire non differat. Forte ergo consecrationem

A puellæ, sicut et pueri furari nituntur. Sed si etiam palam fieret, videte ne a vobis aliquo modo inunctione quoque pueri nolite nimium turbari, sed vobis imputate, qui litteras non misistis, quæ poterant consecrationem impedire. Nolite igitur super regem, aut super episcopos vestros aliquam sententiam dare, quandiu de pace vestra tractatur, sed patienter sustinere, donec veniat dies lætitiæ et pacis, vel dies iræ et indignationis. Credo tamen quod per Nivernensem pax vestra non fiet, quoniam Senonensis pacem cum rege Anglorum amplius querit, quam vestram. Plurimum enim affectat loqui cum rege, et dixit mihi manifeste, quod si osculum rex vobis vellet indulgere, in omnibus aliis satis illi esset parcendum. Me etiam increpavit quod ita loquebar de vobis et contra regem, et ut certe cognovi, pax vestra in manu sua non poterit prosperari. Ob hoc enim recessit ab eo archidiaconus Bituricensis, fidelissimus vester, et episcopus ille apud Maantam moratur, expectaturus ibi adventum regis Anglorum per quindecim dies : et post, si rex non venerit, reversurus ad mare per Normanniam, ut procurationem regiam habeat, quam lucusque susceperit, et moram faciat longiorem. Reginam tamen, et Ricardum de Humes convenit ipse, ut naves solverent, et viam maris sibi aperirent, quam non solum ei, sed omnibus propter eum fecerant inhiberi. Ipsi autem noluerunt. A manifesto igitur contempta et defectu episcopus debuit dies computare, sed noluit. C. I. eo cum regina familiare colloquium habuit, et inducias dedit, quas illa voluit, utpote qui regis gratiam et Senonensis cum rege pacem potius, quam vestram dicitur affectare. Videte ergo, ne quis vos seducat, ne in morte vestra gratiam reconciliationis inveniant, qui sunt inimici ad invicem. Videte etiam, cui verbum vestrum commisistis : et si vobis bene videtur de illo, certe aliter vobis videtur, quam omnibus aliis, qui vident illum. Præterea properate et loquamini cum illo Nivernensi, adhibito Senonensi, ut statim verbum sibi commissum exsequatur, vel omnino dimittat, neque per Normanniam, imo per Flandriam iter suum disponat. Interim autem ad nullam sententiam procedatis, nisi forte super D Eboracensem ponere possetis. Dominus Vigornensis, fidelissimus Ecclesiæ Cantuariensis filius, nondum transfretavit, sed honori Ecclesiæ et libertati omnino intendit. Valeat dominus meus, et voluntatem suam et statum mihi servo suo prolixius scribat. Valeat in æternum et ultra.

EPISTOLA CCCXIII.

AMICI CUJUSDAM AD JOANNEM SARESBERIENSEM.

JOANNI Saresberienti, quidam amicus.

*Segnius irritant animum demissa per aurem,
Quam quæ sunt oculis subjecta fidelius.*

Si de his igitur, quæ auditu solo didici, minus luculentam fecero narrationem, veniam peto. Constantia enim veritatis et manifestior quæstorum a

vobis expositio est penes illos, qui rem gestam conspexerunt. Novit autem dilectio vestra dominum Rothomagensis et Nivernensem episcopum a domino papa ad regem Anglorum pro transactione inter prædictum regem et dominum Cantuariensem formanda transmissos fuisse legatos. Arripiens igitur iter Nivernensis ad mandatum domini papæ, deferens secum transactionis formam a domino papa dictatam cum comminatoriis ad eundem, in Neustriam usque pervenit. Conveniens itaque Rothomagensis paratus erat transfretandi inire laborem. Erat enim rex Angliæ, ut etiam vestra novit dilectio, tunc temporis in Anglia. Rex igitur auditis his Nivernensi obviam misit, mandans et monens, ne casus subiret marinos, sed ipsius adventum in Normannia patienter præstolaretur. Erat enim in præsentiarum in fines illos remeaturus. Regressum ergo Rothomagensis et Nivernensis diligenter convenientes; communitorias domini papæ, pacis faciendæ formam continentes illi obtulerunt, quorum sermo hoc denuum sine resedit. Spopondit rex prætaxatis legatis se ad nutum et voluntatem domini papæ sine fuco simultatis restitutum domino Cantuariensi pacem suam, ecclesiam suam, possessiones ecclesiæ suæ in integrum, gratiam etiam suam, licet de præcepto apostolico ad gratiæ restitutionem non cogeretur, unum vehementer laborans excipere de his quæ dominus papa mandaverat, osculum videlicet, quoniam huic publice in conspectu Francorum apud Montem Martyrum abjuraverat. Reversi sunt ergo Rothomagensis et Nivernensis ad dominum Cantuariensem Senonis, feria quinta, ut recolo, hebdomadæ præcedentis festum Magdalene, nuntiantes illi quæ penes regem invenerant, et ut ibi pariter diem reconciliationis faciendæ assignarent. Inter agendum autem hæc rex Franciæ, et rex Angliæ diem colloquii statuerant, feriam videlicet secundam ante festum Magdalene, in limitibus suis inter Firmitatem, oppidum scilicet in pago Carnotensi, et Fretivalle, castrum videlicet in territorio Turonensi. Dominus vero Senonensis intrin consilium dederat Cantuariensi, quatenus una secum, et cum Rothomagensi et Nivernensi, regum adiret colloquium, adiciens inter ipsum et regem suum, dum tanta locorum intercapedine disjungerentur, nequaquam posse componi. Dominus autem Cantuariensis, licet in principio renitens injussus ad colloquium accedere, consilio Senonensis demum acquievit, profectique sunt pariter ad colloquium, Cantuariensis, Senonensis, Rothomagensis, Nivernensis. Convenerunt igitur reges in unum ad tempus colloquio præfixum, rebusque suis secunda et tertia feria ante festum Magdalene tractatis, nullam de Cantuariensi fecerunt mentionem, ita etiam ut clerici ipsius a colloquio secunda die ad dominum suum revertentes nuntiarent ei reges finito negotio suo recedere, vehementerque expaverunt, ne qui ad colloquium non invitati accesserant, reverterentur confusi. Intercesserant tamen interim solita diligentia pro

A Cantuariensi ad regem Angliæ Senonensis, Rothomagensis, Nivernensis, concessitque illis tandem rex se in festo Magdalene Cantuariensi collocuturum, et omnia ad præceptum domini papæ eidem reintegraturum, solo osculo excepto, ad cuius concessionem apud Montem Martyrum, nec etiam regis Franciæ precibus potuit inclinari. Adjecit etiam et juramento sancivit se in hujus negatione nullas Cantuariensi prætere insidias, et Deum sæpius testando Senonensem super ordinis sui periculum interposuit fidejussorem. Dicitur etiam recedentibus secretis instillasse, se, etsi invite, osculum prius daturum, quam pace infecta ipse et Cantuariensis recederent discordes. Reversus itaque Senonensis ad Cantuariensem, indicavit ei quam et qualem B dulcedinem cum in vultu, tum in verbis regis invenerat, rogans et monens ne in osculi exactione paratam domini sui amitteret dilectionem, multisque interpositis adjecit etiam, quod et rex ipse eidem prius publice promiserat, regem, cum in suas possessiones veniret, illum cum pacis osculo et maxima gratiarum actione recepturum. Consilio igitur Senonensis dominus Cantuariensis tanquam paratus etiam animam pro ovis suis ponere condescendit, et sero facto nuntiatum est regi domini Cantuariensis responsum. Mane autem redeunte in festo Magdalene, summo diluculo rex ad limites usque prius inter ipsum et regem Francorum colloquio assignatos, quos et Cantuariensi, ut convenirent, assignaverat, cum infinita suorum multitudine processit. Cantuariensis autem serior egressus, comitante illum Senonensi et comite Theobaldo, concurrentibus etiam catervatim Francis, qui cum rege suo ad colloquium venerant, ad limites pervenit assignatos. Rex autem, ut Cantuariensem venientem cognovit, a multitudine circumstantium erumpens, illi occurrit, præveniensem Cantuariensem salutavit. Finitis ad invicem salutationibus, datis dextris et amplexibus, secesserunt in partem rex, Cantuariensis, et Senonensis. Cantuariensis autem regi suo de injuriis sibi et Ecclesiæ suæ illatis conquerens, sermone usus est vehementer commotivo, et ut revertens Senonensis testatus est, materiæ tali admodum cognato. Deinde soli duo, rex scilicet et Cantuariensis, in partem sedentes, de secretis suis multo diei spatio D disservierunt, adeo ut quampluribus astantium tædiosa fieret tam diutina mora colloctionis. Conquestus est autem ibi Cantuariensis de læsione dignitatis Ecclesiæ suæ, maxime in novi regis coronatione, enumeratis quot et quæ prædicta Ecclesia regi contulerat, maxime cum de regni corona inter ipsum et regem Stephanum fieret disceptatio. Rex autem causam coronationis supradictæ assignans, tum statum regni, tum iram quam in Cantuariensem exercuerat, promisit se omnia correcturum ad voluntatem domini Cantuariensis, adiciens filium regis Franciæ nondum coronatam ab ipso coronandam, filium etiam suum denuo ab illo coronam suscepturum, cum recognitione dignitatis ad Ecclesiam Can-

tuariensem pertinentis. Ad hæc promissa Cantuariensi regi suo gratias agens ab equo descendit, seque ad pedes illius humiliavit. Rex autem cum festinatione equum linquens, Cantuariensis equum reascendens ascensorium, quod vulgo strivarium dicitur, tenuit. Sic igitur reversi sunt rex ad suos, Cantuariensis ad Francos. Rex autem, non inito alio consilio, publice nuntiavit se cum Cantuariensi pacem fecisse ad honorem Dei et suum. Convocatis igitur hinc inde astantibus restituit Cantuariensi pacem suam, gratiam suam, ecclesiam suam et possessiones ecclesiæ suæ in integrum. Processerunt etiam coexsules domini Cantuariensis, qui adfuertant, et ad pedes regis se humiliaverunt: rex autem, sua singulis restituens, suam benigne pacem concessit eis et gratiam: his ita gestis voluit dominus rex, ut Cantuariensis secum statim in Northmanniam veniret, tum spatiandi causa, tum ne occultaret concordiam diuturnitas dissensionis. Promisit etiam Cantuariensi et suis sufficientem necessariorum administrationem. Cantuariensis autem, quia absque licentia a rege et Ecclesia Francorum accepta, sine læsione nominis sui recedere non poterat, revertendi ad ipsum inducias expetivit. Jussit igitur rex interim Cantuariensem ad possessiones suas et suorum recipiendas aliquem clericorum suorum in Angliam transmittere, ita tamen ut prius ad illum legatus veniret, receptisque litteris suis ad filium suum, et ad cæteros regni custodes securus transfretaret. His itaque executis, rex, requisita a domino Cantuariensi benedictione, recessit. Quia igitur amico nostro, sed amicissimo et in omnibus voluntati vestræ devoto magistro Hereberto legatio hæc injuncta est, rogo quatenus vestra oratione ad Deum intercedente adjutus tutior incedat. Valete, memor mei.

EPISTOLA CCCXCIV.

NUNTII SUI AD THOMAM CANTUAR.

Domino suo charissimo sui salutem, et fidele servitium.

Mandatum vestrum, juxta quod potuimus, adimplevimus, litteras vestras Willelmo de Einesfordia, et Willelmo filio Nigelli liberavimus, et eos quacunque poena usque Londoniam attraximus, simul cum Turstino et Osberto. Et cum litteras domini regis, quas apud vos habuimus juniore regi Angliæ ostendere parati essemus, nullus istorum quibus id mandastis, coram rege apparere ausus est. Consilium enim a quibusdam acceperant, qui eos, ne starent nobiscum in negotio, penitus declinaverant. Nos vero quibus incumbet negotiū, accepto nobiscum solo Roberto sacrista Cantuariensi audacter, et cum omni diligentia, consultis tamen Willelmo filio Aldeli, et Radulpho filio Stephani, accessimus ad regem in camera sua apud Westmonasterium, die lunæ proxima post festum beati Michaelis, residentibus cum ipso rege comite Reinaldo, archidiacono Cantuariensi, archidiacono Pictaviensi, Willelmo de S. Joanne, et multis aliis. Comes autem Reginoldus

PATROL. CXV.

A audita pace, similiter et plures alii, sed non omnes. Deo inde coram rege gratias devote reddiderunt. Perfectis vero litteris, nobis amotis consilium inde rex se capturum respondit. Tunc vocato Walthero de Insula, et cum eodem habito consilio, revocati sumus, et presentibus nobis archidiaconus vester Cantuariensis in hæc verba respondit: Dominus rex mandatum et præceptum domini sui patris accepit et inde consilium habuit. Respondit igitur sic: Radulphus de Broc, et ministri ejusdem Radulphi similiter cum aliis ministris terras, et possessiones archiepiscopatus, et res, ecclesias, et redditus clericorum archiepiscopi diversis in locis præcepto regis patris habuerant; et quoniam nisi adhibitis præfatis ministris instauramentum cum B manerio archiepiscopi veraciter sciri et inquiri non poterit, diem presentis mandati plenius exsequendi ponit et assignat vobis dominus rex diem Jovis crastinam beati Calixti papæ. Quidam autem delationem istam audientes et de pace firma penitus desperantes, malam pacis esse significationem constanter asserunt; quidam vero redditum termini hujus habere volunt: quod potius credendum est. Sunt itaque omnes vestri, quos in Anglia invenimus, ita de pace desperati, quod neque litteris domini regis, quas extra sigillum pendentes ostendimus, neque nobis, qui paci factæ interfuimus, et voce viva juramento affirmamus, credere nolunt, nec possunt. Quidam vero nostrum, cum dominus rex de Londonia versus Windlesores iter faceret, in via accessimus ad eum, et ex parte vestra cum C omni humilitate et diligentia salutavimus; ipse vero benigne nobis respondit, et multo vultum alacriorem nobis ostendit in via, quam coram justitiis suis prius ostenderat. Consulunt autem vos secreto per nos amici nostri multi, quod circa dominum regem moram faciatis, si quo modo fieri potest, donec plenius gratiam ejus et bonam voluntatem adipisci mereamini. Fere tamen omnes, cum quibus locuti sumus, ita personam vestram diligunt, et accessum, et præsentiam vestram ita concupiscenti animo desiderant, quod vos vix crederetis, sed timor ipsos dissimulare cogit, quasi non diligant. Domine, audivimus, et a quodam familiari, D quondam vestro, pro certo didicimus, scimus etiam quia verum est; dominus rex Angliæ per Waltherum de Insula, et per brevia sua per eundem in partibus illis transmissa submonuit Rogerium Eboracensem, dictum archiepiscopum, Gilbertum Londoniensem, Jocelinum Saresberiensem episcopos, et de omnibus ecclesiis, quæ vacant in Anglia, quatuor vel sex personas, clericos, ut episcopos suos secundum ejus voluntatem, et prædictorum episcoporum consilia eligant, et eosdem secundum voluntatem suam, et istorum consilium electos summo pontifici ad detrimentum Ecclesiæ Cantuariensis, et vestri confusionem, quod Deus avertat, consecrandos destinant. Inde siquidem est, quod adventum vestrum in Angliam tantum cupiat: et in

confusione personæ vestræ ita frequenter et improbe persistat. Videmus autem hujus machinationis diabolicæ nimis certa, et omnibus regionem illam inhabitantibus credibilia indicia. Episcopus enim ille dictus Londoniensis, sed non verus episcopus, jamdiu in partibus Beverlaciensibus moram fecit, et quasi beatum Joannem ibidem adoraturus, falsam peregrinationem simulavit, ut inde similis domino suo, et pastoris sui operibus detrahat, et ipsum non aliter, quam cruentis manibus jugulare machine-tur. De his omnibus, domine venerande, vobis providere diligenter studeatis, et ut secundum consilium, quod a Deo desuper datum vobis fuerit, cura pervigili, animo discreto, infestationes vobis insidiantium Dei auxilio, qui non derelinquit sperantes in se, valide excutere possitis. De cætero, domine, quam citius litteræ domini regis visæ et auditæ fuerunt, audivimus dicere, quod rex et archidiaconi statim nuntium quemdam ad regem in Normanniam transmiserunt, sed quid mandaverint, penitus ignoramus. Idcirco latorem præsentium cum maxima festinatione ad vos mittimus, ut quod audivimus et didicimus, vobis significemus. Eumdem ergo vel alium nos sine dilatione ad nos mittere

non differatis et nobis super his voluntatem vestram et placitum plenius renuntiatis, quia sicut iste ore vobis dicere poterit, soli sine capite, et auxilio sumus. Nullus enim, quem nobis proposuistis, mandato vestro, neque præcepto obedire ausus est, præter Robertum sacristam, qui quantum scivit et potuit, in negotio operam adhibuit. Cum vero, si forte evenerit, die nobis statuta restitutionem rerum vestrarum fecerint, sicut audiemus et intelligemus, in continenti vobis renuntiabimus. Valeat dominus noster. Lator iste secreto quædam vobis ore recitabit, quæ, ut pro vero credantur, abominabilia sunt: et tamen vera sunt. Non est opus, domine, ut pluribus ista revelata sint, sed si placet, sepulti sint sermones, cum solus ea audieritis. Hoc sæpe et sæpius, domine, vobis memoriæ committimus, ne in Angliam venire festinetis, nisi puriorem gratiam domini regis adipisci possitis. Non est enim homo in Anglia, nec etiam solus inter omnes, de quibus confidebatis, qui non omnino de pæcc desperet, et colloquium nostrum, et habitum circa eosdem, qui vobis consulere deberent et de quibus maxime confidebamus, vitant omnes communiter et fugiunt. Valete.

GILBERTI FOLIOT

EX ABBATE GLOCESTRICÆ

EPISCOPI PRIMUM HEREFORDIENSIS DEINDE LONDONIENSIS

EPISTOLÆ

ET VARIORUM AD IPSUM ET ALIOS.

Nunc primum e codicibus mss edidit J. A. GILES, LL. D. Eccles. Angl. presbyter, et colleg. C. C. Oxon. olim socius.

(Oxonii et Londini 1845, 8°, 2 vol.)

TO THE
RIGHT HONOURABLE SIR JAMES GRAHAM,
ONE OF HER MAJESTY'S
PRINCIPAL SECRETARIES OF STATE,
BY WHOSE READY KINDNESS THE EDITOR WAS ENABLED
THUS EARLY TO PLACE BEFORE THE PUBLIC
THIS FIRST AND COMPLETE COLLECTION OF THE
LETTERS OF GILBERT FOLIOT,
BISHOP OF HEREFORD AND LONDON,
AND THE RIVAL OF THOMAS BECKET,
THESE VOLUMES ARE MOST RESPECTFULLY DEDICATED.

C. C. C. Oxford, Jan. 1845.

PRÆFATIO.

Ex epistolis in causa dissidii Henricum II inter et S. Thomam Becketium scriptis, plurima Gilbertum Foliot, virum scientia et pietate, non minus ac in rebus ad regni regimen spectantibus peritua conspicuum, auctorem agnoscunt.

Eminentissimus ille vir, tempore opportuniore, altissimam tam Ecclesie quam reipublice dignitatem conscendere, longeque suos coarctatos fama gloriæ præcellere potuisset, sed illi accidit ut sublimiore Thomæ Becketi ingenio vinceretur, qui ad sedem metropolitani Cantuariæ prælatus, ob hanc rem, ut non raro fieri solet, odio invidiæque non levem in modum patuit.

Foliotiana stirps duce Willelmo conquestore Angliam adiit. Gilbertus ipse in celeberrimo Cluniacens monasterio educatus fuerat, ubi a teneris annis scientia viteque austeritate eminuit. Anno 1139, cura et ope Milonis, Glocestrensis civitatis quæstitoris, necnon et Roberti Bathoniensis, Herefordiensis episcopi, beati Petri Glocestriæ electus et promotus ut abbas. Opulento huic præpotentique monasterio novem annos præfuit, atque anno 1147 vel 1148, ad Herefordiensem episcopalem sedem, defuncto Roberto Bathoniensi vacantem sublati est. Ibi scientia, pietate et ascetica disciplina, in qua suos omnes contemporaneos præterisse perhibetur, majorem adhuc famam sibi comparavit. « Non apud suum ordinem tantum, sed et apud eximiam notabilitatis seculares viros magna pollebat auctoritate. Eo suggerente, ut probabilius videtur, Leicestriensis comes comitissaque monasticæ vitæ se dederunt. Cum Reginaldus a S. Warlerico Osneiensis monachos opprimeret, Herefordiensis episcopus, etsi ad suum officium id non pertineret, oppressorem redarguendum curavit. » Elapsi aliquot annis, anno scilicet 1161 vel 1163, ad sedem Londinensem translatus est; sed, ut modo patebit, ejus promotio magnis chronologiis difficultatibus intricata hæret. Ex permultis ejus epistolarum locis, quæ nunc prima vice prelo subjiciuntur, clare patebit quod G. Foliotus, non obstante ejus adversus Becketum oppositione, non infamam Ecclesiam in generali, sive in speciali sedis Cantuariensis privilegiorum, opinionem fovebat. Quod si factum istud historicum æque et ab omni partium studio aliena mente discutere velimus, argumenta quæ ex utraque quæstione parte subministrari queunt multa cura nobis ponderanda sunt; sed antequam volumina hæc prodirent, ejusmodi methodus ad investigationem rei qua nulla alia in Anglica historia asperior lubricosiorque invenitur, sine dubio adhiberi nullo modo poterat. Reformatio enim, quæ in Ecclesia trecentis ab hinc annos contigit, procul dubio omnium animos adversus Thomam Becketum et causam quam tuebatur deflectere omni cura et modo enixa est, ideoque, ea de causa, indebito favore ii omnes qui regis partes contra illum susceperant potius sunt, inter quos prima fronte astant Rogerus archiepiscopus Eboracensis, et Gilbertus Foliotus, Londinensis episcopus; sed odium quod in Becketi nomen ceciderat, et favor qui adversarii ejus proditus fuerat, si non omnino indebita, at saltem non æque ponderatis quæ in utramque partem adduci poterant argumentis, pariter profusa fuerant. Quæ hic nunc prodeunt volumina clarissimam diem in controversiam inter corvales episcopos exortam effundere inveniuntur, magnique lectorem refert meminisse has epistolas magnæ auctoritatis continere argumenta, quæ produci poterint ab iis qui Henrici regis adversus archiepiscopum Cantuariensem partes susceperunt. At vero, cum Gilberti personam et epistolas a celeberrima ejus pars magna fuit, causa separare non juvat, pauca istæ observationes sufficientem ad præsentem collectionem afferent introductionem, amplioremque de hoc investigationem procrastinabimus, donec tota argumentorum series, editis Becketi et eorum qui ejus partes susceperunt epistolis, completa fuerit.

Nunc igitur superest ut lectorem moneamus ex qua auctoritate epistolæ istæ, velut genuina Gilberti Folioti scripta, nunc edantur.

In Bodleiana bibliotheca quidam adest manuscriptus codex (e Mus. 249) circa annum 1200 exaratus, qui pliusquam quadringenas epistolas complectitur; hoc fundamento præsens stat editio. Quadraginta fere harum epistolarum in alio manuscripto, qui in Britannico Museo (Reg. 8 A xxi) servatur, reperire est. Alius exstat in cathedrali bibliotheca Herefordiæ; sed eum inspicendi facultas usque modo non affuit, quippe quod bibliotheca recentem restaurationem subiit, et quamvis decanus summa diligentia illum, inter incomposita volumina, inquisierit, codex epistolas continens de quibus nunc agitur, nondum inventus est. Nonnisi tamen paucissimas continere epistolas supponitur, at nullam quæ in Cavi ms. non exstat.

Istud magni momenti volumen, quod Oxoniensi Universitati a Cavo concessum est, jam plurimorum litteratorum et antiquariorum notitiam non effugit, sed tam amplæ collectionis transcribende immanis labor omnes usque modo ab illa prelo subjicienda deterruit. Denique tamen, propter peculiare quæ editori occurrerunt opportunitates, integer ille code. cum, cunctis quæ in illo continentur, in lucem prodebit, tam paucis sparsis erroribus quam pleraque opera ex uno tantum originali manuscripto in lucem prodeuntia. Attamen, cum Epistolæ absque ullo ordinationis studio in eo jacent, nunc sibi eas in ordinem illum reducere qui melius hujus editionis proposito conveniret. Quædam harum epistolarum jam antea prelo subjectæ sunt, plures bis et etiam ter in Cavi ms. repetitæ; unde quot separatæ epistolæ prædictas codex complectatur asserere admodum difficile est, quod de Becketi epistolis pariter observandum. Quamobrem lectori, si certus fieri cupit in qua voluminis parte epistola quæque inveniatur, consulendus est index qui ad finem tomi apponitur.

In disponendis epistolis illas primo attulimus quæ a Gilberto Folio dum Glocestriæ abbas esset, ab an. 1139 ad an. 1148 scriptæ fuerunt; deinde sequuntur illæ quæ post annum 1148, dum Herefordiensis episcopus; tertio tandem referuntur quas post suam ad sedem Londinensem promotionem scripsit. Quædam exstitisse diu videtur opinionum diversitas quoad tempus quo ultima hac dignitate investitus fuit. Sunt qui asservuerint hoc non contigisse antequam rex Becketo infensus, Gilbertum Londinum in odium archiepiscopi Cantuariensis accesserit; sed inconsiderata procul dubio est hæc assertio, quippe quod Foliotus cum tardissime in mense Aprili, 1163, episcopus fieri debuerit, priusquam rex et Becketus inter se contenderent; sed ista quæstio adeo intricata est, ut editor illam tunc temporis discutere non audeat. Satis sit dicere quod si factus est episcopus Londini mense Aprili 1161, epistolas 145 et 412 hujus collectionis a Theobaldo scriptas esse oportet; si vero anno 1163, conversio ab amicitia ad inimicitiam inter ipsum, Becketum et regem, locum habere debuit in fere incredibili temporis intervallo. In prima et secunda hujus collectionis epistolarum parte nullus alius in iis edendis ordo servatus est quam generalis classificatio de qua superius. In tertia parte, epistolæ dispositæ sunt secundum ordinem et gradum eorum ad quos ascribuntur, exempli gratia: 1^o ad papam; 2^o ad cardinales; 3^o ad Ecclesie filios in genere; 4^o ad archiepiscopos, episcopos, decanos, abbates, et diversarum dioceseon, servato ordine alphabetico; 5^o tandem ad reges, laicos et alios; sed sub unoquoque ex his capitibus nulla ordinationis cura habita, ea de ratione quod, cum omnes istius collectionis epistolæ, maximi quamvis in seipsis momenti, præcipue commendat earum cum Becketi epistolis connexio, utrasque in indice chronologico conjunximus ad calcem voluminis.

Cavi tamen ms. multas continet epistolas ab aliis Gilberti Folioti contemporaneis scriptas, quarum quædam in prima et secunda hujus collectionis parte, Folioti epistolis immixtæ occurrunt; sed in tertia

parte omnes ejusmodi epistolæ ad calcem remotæ fuerunt ubi secundum eundem ordinem qui pro Gilberti his epistolis adhibitus est, dispositæ sunt.

Præterea in Becketi epistolarum manuscriptis quinque vel sex inveniuntur ab episcopo Londinensi scriptæ, et una tantum in Wilkins *Conciliis*, quæ omnes in præsentem collectionem translatae sunt, præter alias quæ in Cavi ms. forte non exstant. Uno verbo, ut nihil omittatur, regula ista servata fuit qua disceat lectori quid sibi exquirendum sit, tam in his voluminibus quam in accedentibus seriebus quæ Becketi epistolas complectuntur.

Collectio hæc omnes Gilberti Folioti epistolas continet, altera vero collectio omnes Becketi epistolas; sed illæ epistolæ quæ ab Alexandro papa, ab Henrico rege aut ab aliis scriptæ sunt, inter utramque collectionem divisæ fuerunt, reperienturque plures in præsentis collectionis fine, cæteræ vero in fine collectionis quæ Becketi epistolas continet.

Harum epistolarum auctor duo alia opera composuisse supponitur, videlicet *Commentarium in Cantica canticorum*, et *Homiliarum* collectionem. Amorum istorum operum manuscripti codices in Britannico museo et alibi occurrunt, quorum prius prelo subjectum est; sed neutrum sive ex parte meriti, sive ex alio fonte aliquo modo dignum habitum est quod in hanc collectionem admitteretur, etsi dedicatoriæ epistolæ vel præfationes excerptæ sunt atque propriis convenientibusque locis in his voluminibus disponuntur (1).

Catalogus pontificum et regum, necnon et Anglicorum episcoporum cum Gilberto Folio contemporaneorum, quem hic exaravimus, lectorem laboriosa ad alia opera referendi cura liberabit. Cum tamen multarum epistolarum inscriptiones in Cavi ms. initialem tantum litteram dant nominis ejus ad quem scribantur, si lector iustus de causis aliquam particularem epistolam alii ascribendam, et non juxta titulum affixum satius duxerit, editor se reum confiteri in materia erroris tam evidenter obnoxia, non dubitabit.

(1) *Præfatio in Cantica*. est epist. 212; *Præfatio in Homilias*, epist. 329. Utamque alias cum operibus exegeticis Gilberti dabimus. EDIT. PATR.

CATALOGUS REGUM ET PONTIFICUM

Qui cum Gilberto contemporanei fuerunt.

1. REGUM ANGLIÆ.

Stephanus regnavit ab an. 1155 ad 1154.

Henricus II, rex Angliæ, regnavit ab an. 1154 ad 1188.

2. PONTIFICUM MAXIMORUM.

Celestinus II. 1145 ad 1144.

Lucius II. 1144 ad 1145.

Eugenius III. 1145 ad 1155.

Anastasius IV. 1155 ad 1154.

Adrianus IV. 1154 ad 1159.

Alexander III. 1159 ad 1181.

Lucius III. 1181 ad 1185.

3. PONTIFICUM ECCLESIAE ANGLICANÆ.

CANTUAR. ARCHIEP. Theobaldus 1158 ad 1161. Thomas 1162 ad 1170. Ricardus 1174 ad 1183.

S. Asaph. episc. Galfridus Monum. 1151 ad 1175. Adam 1175 ad 1189.

Bangor. episc. Mauritius 1159 ad 1162. Willelmus 1162 ad 1171. Guido 1177 ad 1188.

Bathon. episc. Robertus 1156 ad 1174. Reginaldus 1174 ad 1191.

Cicestr. episc. Selfridus 1125 ad 1132. Hilarius 1148 ad 1172. Joannes 1174 ad 1180. Selfridus II. 1180 ad 1204.

Licif. et Cov. ep. Walterus 1149 ad 1161. Ricardus 1162 ad 1182. Girardus poella 1182 ad 1184. Hugo Nunant 1186 ad 1199.

S. David. ep. David 1148 ad 1176. Petrus 1176 ad 1189. Galfridus 1189 ad 1198.

Elfen. ep. Nigellus 1155 ad 1169. Galfridus Ridel 1174 ad 1189. Willelmus 1189 ad 1197.

Exon. ep. Robertus 1128 ad 1150. Robertus 1150 ad 1159. Bartholomæus 1161 ad 1181.

Glocest. ep.

Meret. ep. Robertus 1151 ad 1148. Gilbertus 1148 ad 1161. Robertus Melid. 1161 ad 1167. Robertus Fol. 1174 ad 1186.

Landav. ep. Uctredus 1159 ad 1148. Galfridus 1153 ad 1154. Nicolaus 1154 ad 1185. Willelmus 1185 ad 1188.

Lincoln. ep. Robertus 1147 ad 1167. Walterus de Const. 1183 ad 1184.

London. ep. Ricardus 1152 ad 1161. Gilbertus Foliot 1161 ad 1187. Ricardus 1189 ad 1198.

Norw. ep. Everardus 1121 ad 1150. Willelmus 1151 ad 1173. Johannes 1175 ad 1200.

Roffens. ep. Walterus 1147 ad 1182. Walleranus 1185 ad 1184. Gilbertus 1185 ad 1214.

Salisb. ep. Rogerius 1107 ad 1159. Jocelinus 1142 ad 1184. Hubertus 1189 ad 1195.

Winton. ep. Henricus 1129 ad 1171. Ricardus 1175 ad 1189. Godfridus 1189 ad 1204.

Wigorn. ep. Simon 1125 ad 1150. Aluredus 1150 ad 1158. Joannes 1158 ad 1163. Rogerius 1164 ad 1179. Baldwinus 1180 ad 1184.

EBORAC. ARCHIEP. Turstanus 1119 ad 1140. Henricus 1147 ad 1153. S. Willelmus 1153 ad 1154. Rogerius 1154 ad 1181.

Carlisle ep. Ethelwulfus 1183 ad . . . Bernardus 1157 ad 1186.

Cestr. ep. iidem qui Licif. et Cov. ep.

Dunelm. ep. Galfridus 1128 ad 1140. Willelmus 1143 ad 1152. Hugo 1153 ad 1189.

EPISTOLÆ GILBERTI FOLIOT.

EPISTOLA I.

AD B. CERNELEIENSEM ABBATEM.

Charissimo fratri suo B. Cerneleicensi Dei gratia abbati, frater G. Glocestrie dictus abbas, consolationis et consilii spiritu semper refoveri.

Fortunam vestram plangitis, et deploratis incommoda, quæ et ipsi pari mœstitia plangeremus, nisi bonis omnia cooperari in bonum ipso Domini Spiritu doceremur. Sed quia certum nobis est, quoniam his qui ex proposito vocantur ad vitam, ideo in omnibus quæ de manu Domini accipimus, gaudemus et gratias agimus, attendentes in his quæ prospera sunt bonitatem, in adversis disciplinam, in utrisque scientiam, quoniam flagellat Dominus omnem filium quem recipit (*Hebr. xii*), et bonus pater si non virga visitat iniquitates in ira, tamen misericordias non continebit. Unde si inter incudem et malleum gemuistis hactenus, gemitis iste vobis erit pro cantu, cum tanquam vos mundum in omnem voluntatem opificis summi formatum auro purior quod per ignem probatur, post crebras Domini concussionem enitescetis, et fortitudinis et constantiæ, et laboris, et tolerantis præmia ab ipso cui obedistis reportabitis. Quia vero conversa est hæreditas vestra ad alienos, et mentiti sunt vobis filii alieni inveterati dierum malorum, claudicantes semper a semitis bonis, abeuntes retro post Satanam, eligentes magis in nobis Christum persequi quam sequi per vos, utile non arbitror ulterius solo stelli mandare semina, porcis spargere margaritas (*Math. vii*), fetorem sentire de proximo proditorum. Exiens itaque de Ægypto, in proximo futuro concilio absolutionem a domino papa postulabitis et, dante Domino, impetrabitis, incontaminata vita, fama in omnibus permanente illæsa, spiritu a Domino serviendum promptissimo, qui eduxit quasi lumen iustitiam vestram, et iudicium vestrum deducet tanquam meridiem, cui notas fecisti vias vestras, et sperastis in eo et ipse faciet (*Psal. xxxvi*). Ipse, dante Domino, adero, et coadjutor existam. Unum tamen obsecro, ut nec corde, nec corpore discedatis a nobis, sed sit nobis una bonorum communio, charitas una, individua vitæ societas, ut ubi vitæ bonæ tirocinia transegistis, perfectionis ornamenta reponatis, et jam pene omnem expertus fortunam mundum et quæ sua sunt contemnatis, et ipsum de sublimi jam ipso altior irideatis. Valete. De itinere certior, vere tamen iturus, vobis certiora mandabo.

EPISTOLA II.

AD

Potera me cohibere silentio, si non animum meror impulsisset, at instantis pondus injuriæ me in lamenta ire compellit. Prædie ex quo recessisti a

A nobis auditis pejora percepimus. Referebat frater Herefordia reversus, charum illum nostrum quem digne virum nominem Herefordiensis Ecclesiæ decanum lacessitum injuriis piis bonorum civium, persecutum lacrymis urbem exisse. Angariatus in se, dispendia rerum tulit e facili. Leviter enim in scelus est protracta impietas. Confracta sunt domus, apothecæ diruptæ, sublata vasa, distractæ pecuniæ, supellex undique dissipata. Sed quid ista? Nunquid ita ardens illa habendi sitis exstincta est? Non hanc hujus naturam passionis agnovimus. Verum cupiditas plus novit accendi remedio. Itur in ultiores injurias, transitur in villas, devenitur in horrea, excutuntur annonæ, deportantur stramenta, aporiatur ecclesia, muniuntur castella. Proh quanta maligna-

B tus est inimicus in sancto (*Psal. lxxiii*)! Prorumpat Ecclesiæ fletus, erumpat ejulatio, threni deducantur in medium, cithara ejus convertatur in luctum, et organum in vocem fletuum. Saræ dominatur Agar (*Gen. xvi*); quæ libera erat facta est ancilla, et filia principia facta est sub tributo. Datur ei pro crispanti crine calvitium, in cilicium stola gloriæ ejus, et pectoralis fascia commutatur. In sanctuarium Chaldaeus ascendit, licenter operatus est malum, gloria Domini deputatur in nihilum. Stant lacrymæ in maxillis filiorum; quis absterget eas? Desolata est facies filiarum Sion; quis easdem consolabitur? Sic ascendente superbia, quis jam erit miseriæ [finis], quæ injuriarum futura satietas? Quis obstabit sceleri? quo præsidente compescetur iniquitas? C Nempe capitis interest corpori providere. Ad ipsum spectat partis ejusque molestia. Hoc in alto situm est ne fallatur intuitu, sed infima quæque visu liberior collustret. Forma rotundior, eminens statio, sensus impressi, dignitatis ecclesiasticæ ministerium; certa quædam ratione depingunt. Te, Pater, ista respiciunt, te lenimen sibi lamenta deposcunt. Si tenes baculum quo sustentas, non cessit virga qua corrigas. Juxta prophetam, *gladius exacutus est, ut splendeat limatus est* (*Ezech. xxi*). Stet in manu percutientis et vindicantis opprobria agminum Dei Israelis. Audisti atheum improperantem Domino, et manus tuas ad prælium et digitos ad bellum non aptasti? Nunquid citra necessitatem strenuus ad D belli discrimen inanescas? Absit hoc a tua gloria, ne tale sortiatur laus tua dispendium, consensum cum possis et debeas non ulcisci. Et quidem debes; quia pastor es. Potes; quia gladium portas. Portas quidem gladium, et omnis armatura fortium ipsa te munit. Si quæris expendium, succinctus lumbos in area Domini perstitisti; si lorica desideras, iustitiam induisti ut gigas; si galeam, spem communem præstolaris; si gladium, sermo Dei vivus et efficax

(Hebr. iv), et ipse de ore tuo devorabit carnes; si clypeum, impugnantibus te fides orthodoxa furabitur; si calceamenta, Patrum redundamus exemplis. Procedat miles in castra, prælia Domini bellaturus, procedat, et agat cum fiducia. Poterit hostis in lapide de torrente et vertigine fundæ prosterni. Sed rerum sorte dispendia peritimescis, ne multiplicatis incommodis coacervet hostis injurias. Pius timor, sed magna constantia; nam si pro justitia pauca amiseris, sacrificium est quod fecisti. Si cuncta raptor abstulerit, holocaustum est quod libasti. Denique nulla cadit æstimatio in virtutem: hæc tanto pretiosior est, quanto tibi rerum temporalium damno majore constiterit. Thesaurus absconditus et margarita cælestis bono negotiatori jure cesserunt, quia venditis omnibus illam sibi comparavit. Tibi quoque virtus adjudicabitur, si tibi magno constiterit. Virtus granum sinapis est; quo magis atteritur, eo fortius inardescit (Marc. iv). Hæc pulvis pigmentarius est, quo magis pilo tunditur, eo efficacior ad salutem. Si prophetam advertimus, sub umbra quercus, populi et terebinthi non bene thymiana accenditur. Umbra terebinthi est, totum quo in infimis delectamur. Sub palpebra diluculi, illucescente sole, cum magna dies aspiraverit, inclinabitur hæc umbra quia vanitas est. Beatus homo, cui fit ipsa vanitas virtutis occasio. Ideo justus ut palma florebit (Psal. xcxi), quia stringitur ejus appetitus ad infima, scilicet in superna dilatatur. Ideo justus Domini ut lampas accenditur, quia renuens consolari in infimis aperit os suum et desursum attrahens spiritum totius in superna illucescit. Age ergo, pastor insignis, excutienti tibi pallium, projice et tunicam. Si tibi vepres tollimus, tu gregem pasces in liliis; ubi etiam virtuti, quam secuta est, totus applaudet.

EPISTOLA III.

AD HENRICUM WINTONIENSEM EPISCOPUM, A. S. LEGATUM.

Patri suo et domino H. Wintoniensi Dei gratia episcopo et sanctæ sedis apostolicæ legato, frater G. ecclesiæ Beati Petri Glocestriæ dictus abbas, totius obedientiæ et charitatis obsequium.

Quoniam discretioni vestre, in Christo amabilis Pater, sollicitudo Ecclesiarum Dei laudabili circumspeditione commissa est, ideo super his, quæ inter dominum Herefordiensem et dominum Milonem, ejusdem civitatis comitem acta sunt, quædam, quæ ad nos spectant, vestræ diligentie designamus. Dissensionis itaque inter eos, multis emergentibus causis, res eo tandem producta est ut dominus Herefordiensis comiti ipsi suisque, toti etiam civitati Herefordiensi divina interdixerit sacramenta. Unde comes, non minus pietate quam necessitate compulsus, tam nobis quam multis aliis astantibus, sese ipsi præsentavit ecclesiæ, primum data in manu canonicorum sponione, postmodum textu super altare posito, se die assignata in præsentia episcopi et ecclesiæ ipsius adfuturum, et quidquid ecclesiastica jurisdictione decretum foret, impleturum sub Ecclesiæ testimonio repromisit. Statuto die utroque præsentem, res in

A medium deducta est, et aliquorum petitione domini etiam episcopi assensu in diem alterum est dilata: sic tamen ut, si rem item differri imperibulum officiorum necessitas ulla compelleret, id ante contestatæ actionis diem denuntiaretur alterutri. Præpediente necessitate, quæsit vi comes inducias actioni: verum id dominus episcopus non ex condicto actum esse reputans, severitati nihil detrahens, sententiam promulgavit: cumque litteris, ab auctoritate vestra susceptis, dominum Wigornensem in ecclesiis Glocestriæ eamdem ferre sententiam instanti submonitione compelleret, comes, tum per directos litterarum suarum apices, tum per honestas et idoneas personas, sese plenariæ satisfactioni offerens, secundum placitum domini Wigorniensis locum sibi et tempus exsequendæ et implendæ justitiæ postulavit addici. Et ne tergiversationis aut duplicitationis cuiuspiam haberetur suspectus, dominum abbatem Teochesberie, priorem etiam Lantonensem et me ejusdem permissionis implendæ fidejussores allegavit. Verum tam ejus humilitate, quam nostra omnium fidejussione, parvi habita, nihilominus sententia in nos data est. Unde cum apud nos vivis interdicantur monasteria, mortuis sepultura, divina quoque intermittantur officia, multipliciter ligamur in pœna, qui non tenemur in culpa. Vestræ igitur erit diligentie rem, si nimis aggravata est, ex animi modestia temperare, cum juxta papam Stephanum pulsationem hujusmodi ultra provincie terminos nequaquam progredi, sed intra provinciam audiri et a comprovincialibus terminari oporteat, nisi forte, quod hic infime actum est, ad sedem apostolicam fuerit appellatum. Vestram etiam nequit latere prudentiam tunc multum fore detrahendum severitati; cum subversiones ecclesiarum et strages imminent populorum; sicut eidem vehementer est incumbendum, cum sic correcti simplices sunt meliores, non cum exasperati mali redduntur nequiores. Valeat et in perpetuum illibata conservetur vestra sublimitas.

EPISTOLA IV.

AD SIMONEM WIGORNIENSEM EPISCOPUM.

Patri suo domino SIMONI Wigornensi Dei gratia episcopo, frater GILBERTUS ecclesiæ Beati Petri Glocestriæ dictus abbas, cum pietate fructus operari justitiæ.

Compellit me charitas et debita vobis suadet obedientia, ut quod ad honorem vestrum conservandum vel aliquatenus ampliandum spectare cognovero, hoc vobis, cum opportunum fuerit, et præsens suggeram et absens scripto commoneam. Instant prope tempora periculosa et dies mali supervenerunt nobis (II Tim. iii), in quibus manu inimici hominis superseminata zizania messem bonam pene suffocare prævalent aut comprimere (Matth. xiii). Nec tamen gentilitas est in qua sumus, sed omni gentilitate pejor inhumana crudelitas, cui totum quod libet licet, totum viluit quod honestum est, nil amplectens desiderio quod Christianæ simplicitati et sacris legibus

obviare non constet. Nempe, ut audita taceamus, vidimus anteacta hebdomada ecclesiam sanctæ Dei genitricis apud Solutres mirabili modo disruptam, tectum ejus manu sacrilega convulsum, in parietibus ejus nunquam ædificata propugnacula immissos satellites impietatis deservire promptissimos. Vidimus, inquam, et doluimus, locum sanctuarii sine honore, ecclesiam Dei turpiter contaminatam et ausu temerario in domicilium Satanz commutatam. Hujus etiam occasione malitiæ quidam illos expugnare adorsi sunt. Istis itaque in ecclesiam istam lapides, tela, faces jacentibus, aliis resistentibus, non sine sanguinis effusione et multa hominum læsione biduum ibi miserabile confectum est. Scimus adhuc lupos intra parietes ejusdem ecclesiæ in ipso ovili Domini latitantes, et in gregem Domini simplicem et innocuum laniantes, aliter fugari non posse, quam si bonus pastor adveniens eos sonitu buccinæ et latrato canum terreat, dissipet et disperdat. Hortor itaque paternitatem vestram consulendo vobis charitate qua debeo, ut cum honestioribus et eruditioribus clericis vestris locum flagitii festinanter adeatis, et commissam vobis Ecclesiam primo purgari, deinde reintegrari faciatis. Vel si monitionem vestram manus sacrilega minus auderet, actores et adjuutores scelestis scientibus et videntibus ipsis gladio Domini feriatis, ut dum in futuro concilio hujusmodi tractabuntur excessus, honor sit vobis coram simul discumbentibus opposuisse vos murum pro domo Israel, et illatas sibi contumelias repulsi viriliter aut vindicasse. Vale.

EPISTOLA V.

AD COELESTINUM PAPAM.

Patri suo et domino, summo Dei gratia pontifici COELESTINO, frater G. ecclesiæ Beati Petri Glocestriæ dictus abbas, totum quod obedientiæ et obsequii valet humilis et prompta devotio.

Fidelis Dominus in omnibus verbis suis (*Psal.* cxliv), qui quod Ecclesiæ repromisit, incessanter operari non desinit; ipse ad stabiliendam fidem et confirmandam spem, promisit se usque ad consummationem sæculi Ecclesiæ non deesse, et juxta verbum suum nobiscum manens in sæcula (*Matth.* xxviii), sanctus in opere et promisso verax indubitata fide agnoscitur. Nuper animos omnium nostrum nubilosa caligo confuderat et ad decessum domini et Patris nostri honorandæ memoriæ Innocentii fugerat dilectus a nobis super montes Bethel et ad supernorum colles aromatum aliquandiu declinaverat. Sed dum vos in ipso apostolatus culmine ejusdem loco suscipimus, ipsam in vobis dilecti præsentiam reamplēctimur et cum omni gratiarum actione et tota animorum alacritate veneramur. Obscuratum nobis fuerat aurum et immutatus color optimus (*Thren.* iv); sed ecce magis rutilat festinus ornatus Ecclesiæ, totum nobis convertens in gaudium et lætitiā et solemnitate præclaram. Noctem mundo fecerat sol, aversus in tenebras; sed, reassumpta claritate, totum quod tenebrarum erat, radio gratissimæ lucis

A illuminat. Hærebant lacrymæ in maxillis nostris, et intra præcordia dolor æstuebat inclusus, dum in ipso rerum culmine ad tantum casum dissensionis schisma pio timebamus pavore contingere. Sed subitum infortunium subita etiam fortuna secuta est, et sicut unus Deus, una fides, unum baptisma (*Ephes.* iv), sic unus pastor in terris totam moderatur Ecclesiam, qui cunctas charitate compaginans, omnes Ecclesiæ partes una facit pietate gaudere. Vestræ igitur curæ et prudentiæ nos et nostra committimus, et quantum pia præsumit devotio pro domino et amico nostro Nigello Eliensi episcopo serenitati vestræ supplicamus, ut ea qua filios amplecti charitate non destititis ipsum suscipiatis et necessitatibus ejus pie subveniendo cæteros filios vestros arctiori vobis charitatis vinculo astringatis. In æternum conservetur incolumis vestra sublimitas, in Christo dilecte Pater.

EPISTOLA VI.

AD THEOBALDUM CANTUARIENSEM ARCHIEPISCOPUM.

Patri suo et domino THEOBALDO Cantuariensi Dei gratia archiepiscopo, frater G. ecclesiæ Beati Petri Glocestriæ dictus abbas, totum quod pacis, quod gratiæ, quod salutis.

Gratias ago benevolentie vestræ, in Christo dilecte Pater, quæ me dignata est et filium nominare et amicum reputare; et ut fierem suscepti comes itineris, mihi voluit etiam in expensis providere. Gratulor equidem, si venit tempus et a Domino C opportunitas data est, qua possit Ecclesia vestra de manu suffocantis eripi et quocunque modo, quocunque labore in libertatem dignitatis antiquæ restitui. Novit inspector cordium Deus quam promptus forem huic exsequendo negotio, nisi Ecclesiæ cui alligatus sum, timerem undique emergenti periculo: sed noverit sanctitas vestra equidem usque ad diem hanc non irriti vehementius tempestas in nos. Hodie contra comitem Herefordiæ, cujus sitis in omne quod habemus excanduit, causam multo sudore distringimus: et ipsum, quem si absentes essemus, nostræ sperabamus Ecclesiæ protectorem, præsentis experimur infestissimum hostem. Episcopalia jam contra ipsum arma acimus, et contra ipsum et omnes suos velut in procinctu astamus; aliorum D infestantium nos non est numerus, contra quos hi ferrum tenentes, hinc lapidem, pugnamus et via proficimus. Habebit itaque excusatum hac vice me filium vestrum paterna benignitas, quem vobis ad præsens necessitas subtrahit, non voluntas. Erunt omni die lacrymæ meæ in maxillis meis, donec reditum vestrum et successum audiam et redeunti Patri lætus occurrā. Interim oratione prosequar Dominum meum, cui si absens ero corpore, in omni negotio præsens spiritu et affectu mentis astabo. Vale.

EPISTOLA VII.

AD EUMDEM.

Patri suo et domino THEOBALDO Cantuariensi Dei

gratia archiepiscopo, frater G. ecclesiæ beati Petri Glocestriæ dictus abbas, pie complendo senarium, Sabbata Sabbatorum feliciter adipisci.

Habui, dilecte Pater, a vestra sublimitate com-
monitorium, ut ante diem Natalem Domini me vestro
præsentarem conspectui, paratus suscepto a vobis
itineri et labori. Et eo quidem erga vos animo sum,
ea charitate devinctus, ut propter vos leve repu-
tem totum quod minari potest, difficultas itineris,
aut vexatio corporis, vel urgens auctoritas obviæ
potestatis. Sed sunt præter hæc instantia mea
quotidiana innumera, quæ me vinculis non solum
ligatum tenent, sed etiam velut immobilem reddunt,
quibus explicandis cum nullo modo sufficiam, ar-
duum mihi est, ut ad præsens maiora attentare oræ-
sumam. Vale.

EPISTOLA VIII.

AD UCTREDUM LANDAVIENSEM EPISCOPUM.

Patri suo et domino U. Landaviensi Dei gratia
episcopo, frater G. ecclesiæ Beati Petri Glocestriæ
dictus abbas, apto rationis moderamine sibi credita
dispensare.

Dilectioni vestræ rogatus litteras mitto, quas
misisse debueram non rogatus. Nequit vestram la-
tere prudentiam, quin pax domus Dei sit ordinata
imperandi obediendique concordia cohabitantium.
Et quin eadem recte administretur, cum majorum
pio prudentique consilio filiorum paret humilis et
prompta devotio. Quod si prælatorum iustis impe-
riis subditorum obedire contemnit audacia, non est
dubium quin in prælatorum omnium redundet inju-
riam, quod in unius contemptum fuerit ignominiose
convulsam. Vestram ideo rogamus benevolentiam,
consulendo etiam charitate qua debemus, ut erranti
ovi pastoris exhibeatis officium, et fratrem illum
inordinate ambulantem, qui ecclesiam de Stringuen
contra abbatis sui et totius Ecclesiæ suæ voluntatem
occupare præsumpsit, ad pacem et obedientiam re-
vocetis, et ne totus intereat, ipsum tanquam ovem
de ore leonis ereptam pastoralis humero ad caulas
gregis reportetis. Periculosum namque est aliquem
Ecclesiæ communicare beneficiis, nedum sacramen-
tis, qui adversus eos, quibus obedire oportet, contu-
max invenitur aut rebellat. Monita salutis mansuetæ
sustinebit humilitas, vel si pertinax exstiterit, vir-
gam vigilantem adhibeat charitas, ut et inobedientia
compscatur et zelo vestro, qualiter rebellionem re-
munerari oporteat, omnibus intimetur. Valete.

EPISTOLA IX.

AD ROBERTUM HEREFORDIENSEM EPISCOPUM.

Patri suo et domino R. Herefordiensi Dei gratia
episcopo, frater G. ecclesiæ Beati Petri Glocestriæ
dictus abbas, sagenam missam in mare plenam bo-
nis piscibus ad litus usque pertrahere.

Experta mihi toties tua, dilecte Pater, munificen-
tia me et hoc ipso gratiæ sibi reddit debitorem, quod
nuper directis xenis me pascere simul dignata est,
et docere. Perfectum munus æstimo, quod corpori
in refectionem est et animæ nihilominus in saginam.

A Infelices epulæ, ubi totum corpus assumitur, et spi-
ritus in nullo reficitur. Verum me longe aliter epu-
lari, tui ratio muneris introspecta persuadet. Misisti
mihi pisces, sed duos, majorem unum, minorem al-
terum, ejusdem generis utrumque bonum. Quæ om-
nia interiorem hominem meum tot replent ferculis,
quod erudiunt documentis. Nam primo omnium,
quia pisces misisti, mihi piscatorem illum magnum
ad memoriam revocasti. Illum, inquam, piscatorem,
quem Dominus vocatum de navi, non solum homi-
nes piscari voluit, sed ob promptam fidei confessio-
nem, apostolico etiam culmini prærogavit. Suggestis
animæ meæ suis indesinenter præsentare conspecti-
bus, eo quod me diu jactatum fluctibus hamo suæ
piscationis extraxerit, et in magna monachorum
B urbe suorum collegio deputaverit. Quod tamen non
ita dixerim, ac si de conversione vel conversatione
jam mihi securus sim, cum ignoret homo, amore sit
dignus an odio (*Eccli. ix.*), et unicuique omnia in
posterum reserventur. Non enim in sancto loco
fuisse, sed magis in sanctitate perstitisse, laudabile
est. Frustra enim currimus, si non comprehendi-
mus. Et bene inchoata principia, consummatio sola
remunerat. Unde et filii Israel, post exitum de
C Ægypto et maris transitum, quia corde non sto-
terunt, tentati sunt et perierunt (*Joan. vi.*). Quem
res ista non moveat? Ad nos respicit hæc parabola:
Ægypto enim exire est, a cæcitatibus et ignorantibus
tenebris in lucem fidei pervenire. Maris transitus
est, virtute baptismatis a vetustate peccati in novi-
tatem gratiæ respirare. In deserto perire est, post
acceptam notitiam veritatis et gratiæ, peccatorum
servituti succumbere, et in his vitam finire. Non
enim qui egreditur, delicias statim accipit repro-
missas. Nam Jordanis ille famosissimus, virga Do-
mini percussus, in se divisus est et quæ a sinistris
erant aquæ, impetu suo in mare prolatae sunt, quæ
vero a dextris, in unum collectæ, sese sursum ex-
tulerunt (*Psal. cxiii.*). Virga Domini est totum quo
percutimur. Quidam enim corpore, alii spiritu fati-
gantur, sed filii dexteræ omnia cooperantur in bo-
num. Qui sive adversa de manu Domini suscipiant,
sen prospera, a gratiarum actione non recedunt,
sed sursum levantes cor, in cælum principale men-
dis extollunt. Qui vero a sinistris sunt, hi ad tempus
credunt, sed tempore temptationis recedunt. Qui vero
virgæ levem non ferentes ictum, cito perlabuntur et
effluunt, admistiquæ salsugini vertigine miserabili
demerguntur et pereunt. Unde mihi de corporali
sanctorum collegio gloriari non permittitur, nisi
studia sanctorum charitas in me sollicita consideret
et imitetur. Istud mihi pio suggestis ipse consilio,
dum pisces mihi dirigis extractos de profundo, sed
mortuos, docens prudentissime, ut caveam ne de
profundo sæculi extractus, opus mortis incurram.
Nam longe aliter suæ piscationis opus noster piscator
exercet. In peccato mortuos, piscari novit ad
vitam. Unde qui extractus moritur, intra sagepæ
ipsius ambitum non tenetur. Quod vero duos misisti,

magnum unum, parvum alterum, sua mihi significatione jucundum est, et ipsa mittentis intentione jucundius. Principis apostolorum labores mihi mysticos representas. Ipsum bis piscationi dedisse operam, evangelica lectione cognoscimus. In prima, ob multitudinem copiosam rete scissum est (*Luc. v*); in secunda plenum magnis piscibus ad litus usque pertractum (*Joan. xxi*). Prima piscatio omnium vocatio est; secunda est electorum invita introductio. Unde primo recte rete rumpitur, quia a gratia in qua vocati sunt, plurimi elabuntur, et culpis exigentibus in aeternum reprobandur. Secundo rete non rumpitur, quia Dominus electos suos ad vitam omnes pertrahet, et non est qui aliquem de manu ejus eripiat (*Psal. xlix*). Efficaci me admonitione instruis et informas, ne velut rupta sagena piscis elapsus vage peream, sed magnis illis piscibus centum et quinquaginta tribus vitæ qualitate conformis, ad electorum formam, vitam moresque componam. Quod si tui sensus arcanum altius intelligerem, fortasse conicerem dono piscium, mihi pisces evangelicos ad mentem reduci, torporemque meum ad lectionis studium arctius amplectendum occasione hac a tua prudentia non medioeriter instigari. Illi namque panes, unde populi saturantur et implentur cophini, legis libri quinque sunt, et duo pisces prophetiæ et psalmi (*Matth. xiv*). Nam vita degunt, dum profundum pisces inhabitant. Quod si extrahuntur ad lucem, morientes exstinguuntur a lumine. Sic ante Salvatoris adventum tenebrosa in nubibus aeris, obscura erat doctrina in prophetis. In profundo hoc, suo modo prophetia vivebat, dum quod venturum erat præloquendo promittebat. Sed, promissione completa, et orbem Christo irradiante plenius, prophetia in lucem extracta, et quodammodo extracta est, in promissorum completa veritas amplius promissione non egeat. Unde Dominus, lex et prophetæ usque Joannem (*Luc. xvi*). Sic mihi necitis involuera, et me undequaque spiritaliter exerceri desideras, dum hinc obscuritate prophetica ad lectionem me protrahis, illinc ipsa psalmodum suavitatem tanquam alterius piscis oblectamento, ad orationem me laudemque compellis. Jam restat quod intelligam cur pisces quos misisti generis ejusdem esse decrevist. Unitatem mihi pacemque commendas. Binarius enim in bono est, sed ipse in malo reperitur. Binarii bonum est dilectio Dei et proximi, bonum ipsius est quod ad prædicandum discipuli missi sunt bini et bini (*Marc. vi*). Nam charitas ad minus inter duos est, habet idem sua infortunia. Immunda enim animalia in arcam missa sunt bina et bina (*Gen. vi*). Nam quia primus defuit ab unitate binarius, totum quo pax scinditur aut dissipatur concordia, merito illi assignatur. Unde persuades mihi illum sequi, qui in sancto est, qui inhabitare facit unius moris in domo, ne distrahar iracundia, vel inflammem odio, sed pace ad omnes et charitate servata, varietates et schismata studeam declinare, et unius generis pisces, fratres videlicet

A unius observantiæ charitatis et fidei in domo Domini congregare. Sub eodem intellectu Moysi a Domino dictum est: Altare mihi facies de lapidibus non sectis, quos ferrum non tetigit (*Exod. xx*). Lapidibus secti sunt, qui licet politi scientia, a fratrum tamen societate dividuntur schismate vel discordia. Ex quibus altare Domino non construitur, quia de vita eorum gratum Domino nil offertur. Ex lapidibus vero non sectis altare Domino construitur, quia ex his qui per fidem in unitate solidantur, Christi corpus adimpletur. Quod vero utrumque bonum dixerim, tale est. Pisces mundi sunt, qui squamas habent et pennulas. Squamæ sibi conjunctæ sunt, corpus undique contegentes. Unde et virtutes significant, quæ omnes sibi in radice charitatis conjunctæ, interiorem hominem polymita quadam et talari veste tegunt, muniunt et exornant. Pennulæ contemplationis alta significant. His enim pisces de profundo elevantur, et super aquas quasdam quasi saltus faciunt, licet item naturali pondere ad easdem relabuntur. Quid his pennulis nisi conatus animæ designatur, quibus quandoque in summum illud bonum et invisibile lumen erigitur, et de interna illa dulcedine aliquid gustare nititur, licet ipsa corporali sarcina, cui alligata est, retardetur? *Corpus enim quod corrumpitur, aggravat animam, et deprimit terrena inhabitatio sensum multa cogitantem* (*Sap. ix*). Hæc mihi de tui ratione muneris ad tempus occurrunt, quæ cum optato conspectu perfruemur et alloquio, plenius ipse edocebis, de cætero, si placeat advertas. Mandasti mihi per tui muneris latorem nuntium, ne torquerer invidia, ne tabescendo defleerem, ne de concessa tibi felicitate et copia talium et tantorum piscium, arida mea siccitas augetur. Verbo mones ne invidiam, sed facto ad invidiam trahis. Quid mirum si marcescer invidia, cui vicini diutius extensa late potentia stagni jacentis opaculum interdicit? Invidiam jubes tollere, faciendi stagni concessa licentia, hanc ipse poteris exstirpare. Experimentum erit amici non modicum, sed diu torqueri non permiseris, cujus opem morbi a te dependere cognoscis. Valete.

EPISTOLA X.

AD R. PRIOREM ET FRATRES MALVERNIE.

D Domino R. priori et fratribus, qui cum eo sunt Malvernæ, G. ecclesiæ Beati Petri Glocestriæ dictus abbas, amantium se non penitus oblivisci.

Consilus de benevolentia, non quam merueram, sed quam sperabam de vobis, quemdam propinquum et familiarem nostrum direxi ad vos, preces cum humilitate porrigens, ut quod in ecclesia de Estlethe habebatis, ei de vobis habendum benevola charitate concederetis, facta tamen super sacramenta fidelitate non fraudandi vos ab eo commodo non quod modo habebatis, sed quod de Ecclesia ipsa in tempore tranquillæ pacis habueratis. Vos tamen rem altius inspicientes, et beneficium, quod diu inter manum dantis hæsit, ingratum esse non curantes amicum, qui etsi magna rogaret, ex merito charitatis

audiri debuerat, imo dico non audistis, sed dilato A consilio, quos ad vos miseram, ad nos vacuos remisistis. Egredere fero non quod imperfectum est quod rogabam, sed quod de amicis minus solito sperare compellor. Rogabam equidem cum fiducia quod amantium me petitioni non negarem. Rogabam unde certe rogari debueram. Rogabam ne commodum Ecclesiæ vestræ eo populo displiceret si per nos illud in parte aliqua ministrari contingeret. Et quia magna repulsa est, cum negatur amico quod modicum est, rem vobis ante oculos pono, ut ex ipsa iudicetis quantum est quod rogaverim, et quam modicum quod negastis. Cum vero de Ecclesia illa partem, quæ nos contingit, ad plenum persolvero, ministro altaris ministerii sui mercedem adimplevero, episcopali auctoritati de his quæ sunt penes B illam respondero, emolumentum, quod his omnibus superesse contigit, vix tanti est ut de hoc amicus ab amantibus se repulsam pati debuerit. Unde si consilium vestrum mutari placeret in melius, haberetis me de re modica gratiæ magnæ debitorem, et clerico, illi, cui rem hactenus concessistis, vel ad votum satisfacerem, vel adversus eum vos in omni audientia ad plenum excusabiles redderem. Rogo mihi per præsentium litem litteras vestras voluntatis indices remittatis. Vale.

EPISTOLA XI.

AD LUCIUM PAPAM.

Patri suo et domino, summo Dei gratia pontifici Lorio, frater G. Beati Petri Glocestræ dictus C abbas, pacis et salutis incrementa.

Quantis miseriæ sit concussa turbinibus Salesberiensis Ecclesia, serenitatem vestram, dilecte Pater, æstimo non latere. Cujus sollicitudinis interest Ecclesiarum omnium non solum detrimentis compati, sed etiam commodis providere. Hæc, jamdiu proprio viduata rectore, dum fluctuaret in incertum, tum perversorum hominum incursione, tum suorum circa Patris electionem non unanimi voluntate, ad desolationem ultimam pervenisset, si non ei Dominus dignum sibi famulum electum, ut speramus, antistitem vitæ commendabilis et gratiæ, Jocellum condignum sanctitatis vestræ filium, in Patrem pastoremque prærogasset. Hunc, quantum humillimi non dicam filii sed servi præsumit devotio, D sublimitati vestræ commendari præoptamus, quem dignum commendatione cognovimus, utpote qui ante vocationem suam studiis honestatis incessanter incubuit, et jam, sibi non sumens honorem, sed vocatus, ut speramus a Domino, episcopalem cathedram merito vitæ laudabilis honorare non desistit. Ille irruentes in ecclesiam suam impetus viriliter sustinet aut repellit, et in quibus sibi forte non sufficit, a benevolentia vestra manum sibi auxilii consiliique porrigi humilitas nostra præsumendo desiderat et exposcit. Ejus igitur canonicum magistrum R. de Meisi, virum vita moribusque commendabilem sanctitati vestræ commendamus. Et quoniam ipsum adversus dominum Azonem Salesberjensem deca-

num præsens negotium suscepisse cognovimus, beatitudini vestræ de hoc ipso supplicamus, ut eundem in causa justitiæ et veritatis sustentetis et Salesberjensis Ecclesiæ honori et utilitati paterna gratia provideatis. Valeat sublimitas vestra, in Christo dilecte Pater!

EPISTOLA XII.

AD HANONEM BORDESLEIÆ.

Raro suo dilectori HANONI Bordesleie abbas.

Memor tuæ dilectionis et benignæ petitionis, qua me aliquid scribere vel dictare postulasti, tandem pareo, et si quid datur otii, libenter ilipsum studio tuæ benignitatis impendo. Nam, cum tibi auditum fuerit me pro creditæ mihi dispensationis officio verbum exhortationis aliquoties habuisse cum fratribus, cœpisti et ipse præsens exhortari, ut si quid mihi Dominus de Spiritu suo in Scripturis revelasset munificentia, non ingratus stylo illud exciperem, et quod gratis acceperam, aliquorum ædificationi profuturum gratus ipse publicarem. Affirmas enim multiformem gratiam simplicis verbi Dei, non uno tantum modo pia mentibus intimandam, sed variis tractandam esse doctrinæ schematibus. Verum, sicut ipsos corporum sensus, per quos ad intelligentiam nobis via est, diversos inter se variosque natura constituit, sic verbum Dei variis tractandum esse doctrinæ schematibus, et nunc annuntiatione, nunc Scripturæ subministratione, ad pia corda trajicendum, donec formetur Christus in nobis et simus omnes docibiles Dei (Joan. vi). Adnectis insuper eorum, quæ in ecclesia velut declamationis modo pronuntiantur, velut cum sonitu deperire memoriam, nisi Scripturæ velut quodam retinaculo teneantur, et sicut interventione visus redintegrantur memoriæ legentium animis ingerantur. Quantum replicas illud Sapientis eloquium: « Aurum melius dispersum rutilat quam signatum; » nihil a vilibus [lapidibus] gemmæ differunt nisi publicetur. Sententia quoque distributa suscipit incrementum, et avarum dignata possessorem, nisi publicetur, elabitur. Postremo, ne quid habeat excusatio diverticulum, desiderium nostram vehementer illa Domini voce perterrens: *Serve nequam* (Matth. xviii), quare non posuisti pecuniam meam ad mensam, multa quidem sic colligis ut torporem excutias, repellas ignaviam, et me, vix ausum hactenus prodire in publicum, de latibulo silentii in lucem eloquentiæ trahas. Impetiosa me charitate perurges. Unquam me in vos vis, ut non sit quod respondeam, nisi me vel non posse quod exis, vel amico nolle præstare quod possim. Horum quodcumque dixerim, eo animo es, ut aut doli me arguas, aut injuriæ. Utrumque ve-reor, et dum aurea me charitatis compede vinctum tenes, facio quod captis hodie mos est, dum de pretio requiruntur et timent, totum spondent quod exactor vult. Sic ego, ne charitatis damna sustineam, ne minus in Christo diligar, negare tibi nil audeo. Verum ea quæ tuis tantum auribus hucusque commiseram, jam nunc examini tuo oculisque introspi-

cienda committo. Scio quanta amplecteris gratia quidquid est illud quod offero, et quod duo minuta, quæ amicus dat, magni faciet apud te quia non ex abundanti sed ex modico dat.

EPISTOLA XIII.

AD JOCELINUM SALESBERIENSEM EPISCOPUM.

Patri suo et domino JOCELINO Dei gratia episcopo, G. suus ecclesiæ Beati Petri Glocestriæ dictus abbas die quotidie prosperari in gratiam.

Rogati sæpius ut super negotio fratrum Cerneliæ vestræ sublimitati scriberemus, id hucusque distulimus, attendentes non eatenus processisse negotium, ut super hoc nobis scribere duceremus opportunum. Nam qui eidem incubabat Ecclesiæ, multa licet accusatione pulsatus, tamen quadam expectatione aliquatenus hærebat, et pastorem quam susceperat curam nondum ea qua oportebat solemnitate refutabat. Sed jam nunc, ut audivimus, ipsius celebrastis exsequias, et securi ad radicem arboris infructuosæ jam posita, eandem, quæ inutiliter stabat, laudabili, ut fama est, severitate succidistis. Unde quia fructuosum jam arborum locum præparastis, rogamus, rogamus, inquam, et optamus, ut quod nobis digne reputatur ad justitiam, laudabili consummatione perducatur ad gloriam. Fratres quidem Cerneliæ, venientes ad nos, secum etiam sub ecclesiæ suæ sigillo litteras afferentes, communi, ut aiunt omnium fratrum electione, unum e fratribus nostris sibi in Patrem pastoremque dari petierunt et dimitti. Et ipsum quidem, quem eligunt honore dignum speramus et gratia, utpote virum cui et ad doctrinam scientia et ad honestatem mores exuberant, regendis animabus rebusque tenendis idoneum. Quem nisi laudabilem crederemus, vobis utique commendare nolumus. Sed de re ista nihil nisi ex vestræ voluntatis arbitrio statuentes, rogamus, si placet, vestrum nobis aperiri consilium, si petitioni huic vos præbere veltis assensum. Jussioni vestræ voluntas nostra deserviet. Quod si honorificentiam Ecclesiæ nostræ hac ipsa electione quodammodo prælibatam vestra stabiliret auctoritas, nos in immensum gratiæ debitorem, et ad vestræ deservendum voluntati per omnia promptiores haberetis. Vobis spiritum optamus adesse consilii, qui vos dirigat, opusque vestrum placita sibi moderatione disponat. Vale.

EPISTOLA XIV.

AD JOCELINUM SALESBERIENSEM EPISCOPUM.

Patri suo et domino J. Salesberiensis Dei gratia episcopo, G. suus ecclesiæ Beati Petri Glocestriæ dictus abbas, cum gaudio et exultatione fructus reportare justitiæ.

Communi, dilecte Pater, lamentatione in aures sanctitatis vestræ nostra deploramus incommoda, deprecantes humiliter ut malefactores nostros vestra vel revocet admonitio vel coerceat disciplina. Joannes de Merleberga et Walterius de Pincheum nos humiles amicos vestros infestare non desinunt, et solatia peregrinationis nostræ violenta manu diripere, et in pravitate usus expendere non erubescunt.

A Patienter pondus dici et æstus hucusque portavimus (*Matth. xx*), sperantes tandem malignorum hominum rabiem vel posse expleri vel cosilem ad legitimos iramites salubri cujuscunque persuasionis converti. Sed quia juxta Sapientiam: Quem Deus desperavit, homo corrigere non potest (*Ecclesi. vii*), rogamus ea qua de vobis bene speramus fiducia, ut quos revocare admonitio sancta non valet, de manu vestra virga pastoralis humiliet. Noverit præterea sanctitas vestra prædictos illos duos, in nummis et nummorum pretiis, nobis plusquam ducentas marcas abstulisse, et possessiones nostras quæ circa eos sunt, pene ad nihilum redigisse. Optamus itaque nos illius roborari spiritu, qui dixit: *Confidite, ego vici mundum* (*Joan. xvi*), qui inimicos suos omnes ponet scabellum pedum suorum (*Psal. cix*), per quem in interitu malignorum ridebimus et subsannabimus (*Prov. i*), cum illis quod merentur acciderit. Illius gladium non frustra portatis, sed, ut allophylos non solum cum seme Gad in stiva aratri, sed etiam cum Aoth in ore gladii seriatis (*Judic. iii*). Non hebetetur in manu vestra gladius ejus qui, juxta prophetam, *excucutus est, ut splendet limatus est* (*Ezech. xxi*). Vobis undique virtutis occurrit occasio. Refrigescit charitas, refrigescunt scandala. Ad vos tanquam ultores scelerum undique clamat Ecclesia. Exseratur itaque, rogamus, *sermo Dei ille virus et efficax, per tingens usque ad divisionem animæ ac spiritus, compagum quoque ac medullarum* (*Hebr. iv*), ut in convivio illo magno gloria sit vobis, coram simul discumbentibus, opposuisse vos murum pro domo Israel et ejus injurias vel repulisse viriliter aut vindicasse. Valete.

EPISTOLA XV.

AD B. CERNELIÆ ABBATEM.

Dilecto fratri suo filioque charissimo B. Cerneliæ Dei gratia abbati, frater G. Glocestriæ dictus abbas, viriliter agere et confortari in Domino (*I Cor. xvi*).

Viri boni est non extolli prosperis nec incommendis frangi. Hoc quidem ipse nosti: hanc ipse tibi formam induisti. Unde ergo ne propter alicujus minas, vel propter instantem et urgentem inopiam cito terrearis, aut de tuo sensu movearis. Si procella aliqua adversus te surrexerit, fante sancto Spiritu, cito statuatur in auram et silebunt fluctus ejus (*Psal. cvi*). Si premit inopia, in timore pio semper obediens Domino et ipse non derelinquet sperantes in se (*Psal. xvi*). Memento quam simpliciter ambulaveris; memento quod non cupiditati sed soli obedientiæ et veritati tua vela commiseris. Habe coram oculis quod cui militas obedientiam præ omni acceptat holocausto. Ambula simpliciter et ibis confidenter. Clamabimus omnes ad Dominum, et ipse aperiet manum suam et implebit vos benedictione (*Psal. cxliv*). Non invenis in domo tua vel intus consilium vel extra possessionem. Domus tua penes te est: in ipsa habes unctionem Spiritus quæ docebit te de omnibus (*Joan. xiv*). Habes et filium charissimum

Jocelinum, quem, quia timet Dominum, sano credimus abundare consilio. Dominum Hugonem diximus ad te, qui tibi diligenter obediet et devoto famulatu assistet. Si quem vel quos de nostris plus volueris, his ipsis equis quos placuerit de tuis, sive juvenes sive senes, mittere ad nos et de nostris impetrabis quos voles. Negotia tua nostra reputabimus. Adversa sustinere potes, sed solus habere non potes. Unum sumus et semper unus in Domino (*Galat. iii*), et serviemus ei humero uno. Cætera si desunt solatia, unum tamen deesse non potest. Domus tua quocunque labore vel consilio proficere de die in diem potest, sed in deterius ire non potest. Malum tanquam in summo est, quo procedat non invenit, bonum tuum quotidianos poterit habere proventus, benedictio tua si differtur, non aufertur. Nosti quod abbatem episcopi non facit benedictio, sed fratrum communis electio. Sarcinam hanc in humeros beati principis apostolorum Petri imponemus, facies nostra confundi non poterit. Minister apostolorum et nuntius ipse direxit te. Nuntiabimus illi quod audimus de te, de quo per omnia speramus obtinere, ne plantationem primam quam in hoc regno plantavi, dextera ejus cujuscunque labore vel industria in ignominiam sui patiatur evellere. Vale, et divitiæ si affluant, noli cor apponere (*Psalm. lxi*). Si paupertas exusserit, obedi et patientiam habe. Nosti illud Sapientis: «Suas habet paupertas sancta divitias.» Honesta etiam res læta est paupertas, et eadem non est paupertas, si est læta.

EPISTOLA XVI.

AD J. APOSTOLICÆ SEDIS LEGATUM.

Patri suo et domino J. sanctæ sedis apostolicæ Dei gratia legato, frater G. Glocestriæ dictus abbas, debitam Patri charitatem et obedientiam.

Instanti, Pater, necessitate, compellimur ut de quod multum confidimus, vestræ nobis munificentia auxilium requiramus. Causa inter dominum Landaviensem episcopum et fratrem nostrum J. priorem ecclesiæ Sancti Michaelis, in ipsa Landaviensi diocesi constituta, nuper exorta est, de corpore cujusdam domine M. scilicet de Londoniis, quæ in novissimis agens, viro suo parentibusque simul astantibus, sacerdote etiam, cujus erat parochiana, idipsum volente et requirente, sese in manu predicti prioris loco nostro humandam extrema voluntate concessit. Tempore enim prædecessoris istius, domini scilicet Urbani episcopi, in ipsa ecclesiæ nostræ dedicatione pater istius et mater, hæc etiam ipsa et eorum tota progenies se eidem loco nostro nullo reclamante in ipsa episcopi præsentia concesserunt. Suscepta et non multo post defuncta et in ecclesiam nostram imo et suam allata est. Inde in nos plus justo domini Landaviensis iræ succensuit, et de ecclesia nostra corpus efferri et in suam etiam a nostris deferri præcepit. Jussioni huic prior apostolicam obtendit auctoritatem, quæ ecclesiis nostris fratrum suorum et sororum humanda corpora signata privilegii ratione concedit. Unde, quasi profanum ali-

A quid prior ipse nominasset, statim a communione suspensus est, et ecclesiæ nostræ interdictæ. In quo prior se gravi sentiens, ad Adæ diem in tua misericordia ad vestram appellavit audientiam. Sub hoc vestræ supplicamus benevolentia, ut ecclesiis nostris divina concedatis officia, quia præfixa die vestræ, vita conjuncte assistemus presentia, sententia, quam decernet vestra jurisdictio, promptis animis parituri. Valeat dominus meus dilectissimus.

EPISTOLA XVII.

AD EUGENIUM PAPAM.

Patri suo et domino, summo Dei gratia pontifici E. frater G. Glocestriæ dictus abbas, obedientiam et debitam Patri charitatem.

B Id modicum, dilecte Pater, quod sumus amicorum nostrorum charitati negare non possumus, et communis pietas exigit, ut alter alterius onera portantes (*Galat. vi*) operam vobis vicariam consilii similiter et auxilii impendamus. Unde licet apud majestatem vestram nulla nos merita commendent, nec penes vos gratiam nobis ullam servitia vel impensa locaverint, ex charitate tamen audemus, ut qui nec pro nobis digni audiri simus, ad paternam misericordiam pro alio interpellaturi pie presumendo irrumpamus. Clericus vero dilecti filii vestri domini Cantuariensis archiepiscopi magistri R. de Ponte episcopi vestrum adit urgente necessitate præsidium, ut ad tuenda ea quæ canonice possidet a vestra imploret serenitate patrocinium. Rogamus C itaque ad genua sanctitatis vestræ corde prostrati, ut de fonte justitiæ procedat et pietas, et eum, quem apud apostolicam majestatem commendari dignum credimus, tam vita quam scientia, suscipiatis in gratiam et in justis postulationibus suis clementer exauditis remittatis. Sublimitatem vestram diu sibi suisque incolumen conservet excelsa Majestas.

EPISTOLA XVIII.

AD EUNDEN.

Patri suo et domino summo pontifici E. frater G. Glocestriæ dictus abbas, æternæ vitæ gloriam feliciter adipisci.

Necessitati, dilecte Pater in Domino, reluctari non possumus, quin charitati, quæ nobis de fraternis cordibus potenter imperat, obediamus: hæc est quæ nos magis delitescere cupientes, producit in medium, ut ad audientiam vestram cui ad præsens assistere non valeamus, veritatis verba mitamus. Illic est quod viri illustri et honesto Scripturarum etiam tam divinarum quam sæcularium apprime erudito magistro, scilicet Godefrido, negare nequimus quin sublimitati vestræ, quæ de ejus negotio vidimus et audimus, testemur. Willelmo itaque Cunnin multis exigentibus causis vinculis anathematis irretito, cum jam plus anno integro sub eodem vinculo perstitisset, cumque eum omni ecclesiastico beneficio generalis concilii jurisdictio spoliasset, dominus Wigorniensis consilio religiosorum

virorum prædictum Godefridum archidiaconatu suo investivit, Ecclesiæque suæ archidiaconum religiosa devotione constituit. Scimus eum in eodem officio religiose perstitisse, et quæ ad curam ejus spectabant prudenter et discrete ministrasse. Scimus etiam episcopum eidem Ecclesiæ, si vobis placet, necessarium et in eo non solum istud, imo et multo amplius salvum esse beneficium. Decernat in hoc consideratio vestra ut semper habeat incrementum gloria vestra concipiantque bonam spem, qui recurrunt ad vos, obtinendi consilium pariter et auxilium in his unde recurrunt ad vos. In longitudinem dierum vos protegat omnipotens Dominus, in Christo Pater.

EPISTOLA XIX.

AD JOANNEM PRIOREM S. MICHAELIS.

G. Dei gratia abbas Glocestriæ dilecto filio suo JOANNI priori Sancti Michaelis, salutem.

Litteras vobis directas domino Landaviensi deferetis. Si vos audierit, gratias illi [dabis], si vero perstiterit in proposito apostolica ipsi auctoritate resistetis. Apostolicum enim privilegium habemus præ manibus ut liberos quosque, qui se locis nostris sepultura dederunt, libere suscipiamus. Quod si super hoc perstiterit et vos in interdicto tenuerit, audientiam domini legati adhibitis testibus appellatis et ei hujus actionis diem Adæ in tua misericordia nominabit. Valete.

EPISTOLA XX.

AD B. CERNELIÆ ABBATEM.

Dilecto fratri suo filioque charissimo B. Cerneliæ Dei gratia abbati, frater G. Glocestriæ dictus abbas, salutem mentisque constantiam.

Singulis quæ nobis litterarum inscriptione mandastis respondere ad tempus omittimus, quia negotii nostri finem qualem disposuerit Dominus cito nobis imminere cognoscimus. De ipso tamen largitore honorum Domino meliora semper expectamus, ut qui bona contulit nobis dona multiplicet et gratiam in qua prævenit nos subsequenti etiam cumulare non desinat. Ipse vix nostrum, si quid in præsentem est convertit in gaudium, et si liveni oculo in aliquo perstrinxit nos, exitum lætitiæ consummabit. De cætero noveritis me vita comite et sospitate hac proxima Dominica venturum Wintoniam ad dominum legatum. Quo vobis mandamus mandandoque pariter injungimus, ut nobis occurrere nulla omnino occasione prætermittas. Vale.

EPISTOLA XXI.

AD UCTREDUM LANDAVIENSEM EPISCOPUM.

Patri suo et domino Landaviensi Dei gratia episcopo frater G. Glocestriæ dictus abbas, salutem et debitam reverentiam.

Curæ et labori vestro quem, ut res vestræ apud vos crescerent, impendistis, gratias agimus. Nos hoc ipso vobis obnoxios gratiæque debitores exhibemus. Injuriam vobis nullam vel a nobis vel a nostris fratribus inferri nec volumus nec probamus. Corpus quod repetitis apostolicam minuendo aucto-

ritatem de ecclesia, in quam allatum est, sibi quæ extrema voluntate concessum expelli jubere non præsumimus. Unde rogamus dari nobis, si placet, hanc veniam, simulque solitiæ munificentie dono superimpendi gratiam ut nobis mortuorum eadavera quæ nobis ex ratione competunt, non negetis et a nobis nostrisque omnibus honorem quem possumus obsequiumque debiti famulatus obtineatis. Valete.

EPISTOLA XXII.

AD THEOBALDUM CANTUARIENSEM ARCHIEPISCOPUM.

Patri suo et domino, Cantuariensi Dei gratia archiepiscopo et totius Angliæ primati THEOBALDO frater G. Glocestriæ dictus abbas, humilem ex charitate non ficta obedientiam.

Rogamus benevolentiam vestram, in Christo dilecte Pater, ut excusationem, quam ad præsens necessitate prætendimus, ipsi suscipiatis, et de mandato vestro si quid minus agimus, paterna hoc nobis charitate remittatis. Absit enim ut quid audeam in præsentia vestra confingere, qui summum mihi solamen æstimen una vobiscum dies hujus incolatus individua vitæ conjunctione transigere. Sed his qui circa nos sunt, satis superque notum est, quomodo nuper irruerint Wallenses in nos, et quod trans Sabrina fluvium potissimum habebamus, totum fere usque in ipsas Walliæ profunditates abegerunt. Unde necesse est mihi hac ipsa Dominica, qua Londoniæ convenietis, colloquio regum Wallensium interesse in Glamorgan, vel plusquam trecentarum marcarum damnum irrecuperatorie sustinere. Quia ergo in tota terra cordis vestri ad plenum dominatur charitas, dabitis filio exoranti hanc veniam, ut paterna licentia ad præsens urgenti et instanti plurimum Ecclesiæ nostræ necessitati deserviam. Valeat dominus et Pater meus dilectissimus.

EPISTOLA XXIII.

AD EUMDEN.

Patri suo et domino Cantuariensi Dei gratia archiepiscopo, et totius Angliæ primati T. frater G. Glocestriæ dictus abbas, obedientiam humilem et de toto corde dilectionem.

Ad agendum quod imperastis, quamplures amici nostri jam semel et iterum tertioque convenimus, ut causam domini abbatis Radingensis et fratrum ejus adversum dominum Rodericum cæterosque beati Dionysii monachos plenius audiendo decerneremus. Causa itaque deducta in medium ad hunc finem usque perducta est. Conquerebantur Radingenses ecclesiam suam de Stantonâ parochia de Camora quæ terra quædam est beati Dionysii injuste spoliata fuisse. Asserebant vero prædictam ecclesiam de Stantonâ in terra illa de Mora parochialia jura tam in spiritualibus quam in temporalibus continue et quiete triginta et eo amplius annis habuisse. Hujus rei testes producebant in medium quamplures monachos, sacerdotes et clericos multos, honestos etiam laicos non paucos probationi prædictæ possessionis, si iis adjudicaretur paratissimos. Postula-

bant itaque Radingenses probationem suam suscipi A
seque in possessionem induci. Sed dominus Rodericus et qui cum eo stabant e contrario perorabant. Aiebant vero super hac re Radingensium nec debere probationem suscipi nec ipsos oportere possessione prædicta aliquatenus investiri. Hanc parochiam in integrum de jure beati Dionysii esse dicebant, et ad ecclesiam suam de Teintona non nova quadam usurpatione, sed antiqua et longi temporis proscriptio-
ne pertinere. Constanter asserebant ecclesiam suam de Teintona a prima fundatione sua plusquam sexaginta annis prædictam possessionem continue et quiete possedisse, se etiam adhuc in ipsa actionis dis eadem possessione investitos in ipsa tanquam sua consistere. Assertionis etiam suæ testes producebant dominum abbatem de Egvesham et conventus ejus partem non medicam, aliosque sacerdotes clericos et quamplures laicos probationi promississimos. Quoniam igitur in causis hujusmodi melior est affirmantis et possidentis quam solummodo rep-
tentis conditio, probationem possessionis suæ postulabat dominus Rodericus suscipi seque deinceps inconcussam si justum foret dimitti. Cum itaque de singulis cum domino Herefordiensi, decano Londoniensi, archidiacono Oxoniæ, cæterisque aliis viris qui convenerant decerneremus, nulla data sententia, prior Radingensis se ab archidiacono Oxoniensi et abbate de Egvesham, nescimus in quo gravari conquerens, audientiam domini papæ appellans injunctæ nobis finem imposuit sollicitudini. Unde, ne vestram quæ penes nos acta sunt possint
latere prudentiam, vobis ista transcripsimus, quem munitum per omnia et esse semper incolumem præoptamus. Vale.

EPISTOLA XXIV.

AD SIMONEM WIGORNIENSEM EPISCOPUM.

Patri suo et domino S. Wigornienti Dei gratia episcopo frater G. Glocestriæ dictus abbas, salutem.

Vobis sæpe scribere et benevolentiam vestram frequenter interpellare negotia nos multiplicata compellunt. Unde vero inquietationibus nostris speramus et exspectamus solatia, ibi sæpe plangimus et nostra manifestamus incommoda. Quidam ministrorum vestrorum, sicut a multis audivimus in commissio sibi officio ministrans pessime, Algodus decanus clericos nostros odiose persequi et affligere ex credita sibi dispensatione non desistit. Qui quanto celebriores et sacratiores cernit imminere festivitates quasi nocendi nactus opportunitatem ecclesias nostras interdicit et clericos nostros in suis ordinibus ministrare defendit. Unde vestram rogamus pia semper præsumptione dulcedinem ut clericum nostrum B. de Colna in ordine suo diebus istis ministrare concedatis et statuto sibi die, si vos ad hoc vacare non poteritis, totum quod in illum ille e contrario dictus Algodus jaculari poterit coram archidiacono vestro terminari jubeatis. Nos vero illius suspectum habemus judicium cujus ma-

nifestum scimus odium, et si vestræ placeret discretioni clericos nostros talem judicare oporteret, quem vitæ commendaret honestas : qui ex arce prudentiæ judicaret incestuosos, non ex stratu molliiæ Domini sacerdotes offenderet. Vale.

EPISTOLA XXV.

AD EUGENIUM PAPAM.

Patri suo et domino summo Dei gratia pontifici E. frater G. Glocestriæ dictus abbas, unam quam petunt a Domino feliciter obtinere.

Quod missis litteris majestatem vestram, dilecte Pater, interpellare præsumimus : hinc persuadet charitas, hinc humilitas expavescit. Plus tamen eligimus apud Patrem de pietate corripui, quam apud dominos et fratres nostros dilectissimos de sprete charitate damnari. Ideo sublimitati vestræ preces humiles supplicantis affectu porrigimus, ut venientem ad vos dominum Lincolnensem episcopum qua decet bonitatem vestram gratia suscipiatis et in suis eum postulationibus justis audiat. Cui vero et ad doctrinam scientia et ad honestatem mores exuberant, dignum est apud Patrem totum quod gratiæ, quod pietatis est, experiri. Optamus ut erga eum vox illa Domini convalescat : *Eum, qui venit ad me, non ejiciam foras* (Joan. 6), ut qui currit post gratiam, comprehendat gratiam, et qui festinat ad Patrem, Patrem se gaudeat invenisse. Accendantur virtutes amore quamplurimi, cum honestatem condigne munerari viderint apud vos, et virtuti suam nec minui nec deesse mercedem. Conservet vos in longa tempora, qui non dormit, custos Israel (Psal. cxx).

EPISTOLA XXVI.

[AD SIMONEM WIGORNIENSEM EPISCOPUM.]

Patri suo et domino S. Wigornienti Dei gratia episcopo, frater G. Glocestriæ dictus abbas, obedientiam debitam et quam potest charitatem.

Directis litteris preces vestræ sublimitati porreximus, ut causam, quæ in Wimundum clericum nostrum intendebatur, usque ad reditum nostrum ex sola gratia differetis. Hoc tamen altiori prov-
d-ntia aliter actum est, et est ei purgatio objecti criminis per manum septimam adjudicata. Unde vestram ex amore præsumendo rogamus benevolentiam, ut sententiam hanc ea qua potestis misericordia temperetis, et qua debeatis ratione levigetis. Scitis vero in causis etiam secularibus quantum cavari soleat, ne qui iudex est, sese accusatorem exhibeat, nisi forte, cessante accusatore, ad hoc ipsum publica alicujus infamatio compellat. Quod si judici quandoque contigerit, in hoc ipso non jam accusator, sed famæ publicæ prolocutor existit, nec iudicis sibi tollit officium, persequenti famæ vocis impendendo suffragium. Sed in causa hac aliter res est. Scimus vero quid vicini clament, quid ore multorum populus attestetur. Femina vero illa, de qua Wimundus arguitur, non ipso cogente vel suadente, sed fratre ipsius Eilwino presbytero perurgente, in obsidem pro marito suo concessa atque directa est. Cumque illo mitteretur, opem illi debitam Wimundus non sub-

traxit, sed, prout suppetebat facultas, benigne contulit. Post etiam fratrem suum maritum scilicet ejusdem usque ad inimicitias persecutus est, ut ejusdem redemptioni effectivæ operam daret. Quid ergo si mulier illa morte præventa est? Nunquid luet qui non meruit? Sed quis unquam perit innocens? Vel Ecclesiæ judicio recti quando deleti sunt? Siclericus Beati Petri prædictæ mulieri, cum in obsidem mitteretur, sua dando subvenit, si maritum ejus de ipsa redimenda commonuit, si eidem fratri ejus Eilwino suggestit, quid aliud judicabitur, nisi quod animam suam magna ex parte liberavit. Vestram itaque supplicando rogamus beatitudinem, ut in præsentis negotio oculi vestri videant æquitatem (*Psal.* xv) et eum qui a nemine accusatur, quem infamia nulla persequitur, qua soliti estis gratia suscipiatis, et vestræ fulgore præsentis ex hilaratum remittatis.

EPISTOLA XXVII.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, frater G. Glocestriæ dictus abbas, pie complendo senarium Sabbata Sabbatorum feliciter adipisci.

Gratiarum, dilecte Pater, de toto corde non sufficimus actioni, quod vestra nobis munificentia sinum jampridem benevolæ charitatis aperuit et ut ipso rerum argumento cognoscimus, suorum etiam numerè plenius assignavit. Et quidem sic est, non quia meruimus nos, sed quoniam sic complacuit vobis, ut eo ipso quo in amicitiarum gratiam admisistis in meritum nos ampliori quodam jure semper possideatis in integrum. Habetis vero multiplicis gratiæ debitorem quem collata nobis beneficia satis obligant, et penes vos nulla merita commendant. Sed, quia præteritorum exhibitio certa nobis est et futurorum expectatio, audemus plurimum et pia semper charitate præsumimus, ut sublimitati vestræ etiam pro cognato nostro et amico charissimo R. de Beaumis preces ex affectu porrigamus, quatenus eum in ecclesiæ ipsius beneficia admittatis quam sibi Ciestrensis plena donatione concessit, et ab auctoritate vestra donationis astipulatione confirmari precibus etiam porrectis exposcit. Et quidem illum R. vestra nobis plurimum commendaret oratio, si non eundem in publicas jamdiu gratulationes susceptum fama omnibus ostendisset, utpote virum, cui et ad doctrinam scientia et ad honestatem mores exuberant, virum Deo dignum occupari servitio, simul et beneficiis ampliari, ut unius elegantia operis et nobis gratiam virtuti etiam vestræ gloriam impendatis.

EPISTOLA XXVIII.

AD EUMDEM.

Patri suo et domino T. Dei gratia Cantuariensi archiepiscopo et totius Angliæ primati, frater G. Glocestriæ dictus abbas, in regione luminis optato ad votum perfrui desiderio.

Placuit sublimitati vestræ, dilecte Pater in Domino, dominum et Patrem nostrum dominum Wi-

gorniensem responsurum quibusdam, quæ sibi obiecta sunt, ad audientiam vestram evocare. Nec minus illi complacet jussioni et voluntati vestræ devote in omnibus obedire. Unde in omni timore Domini et cordis humilitate venit ad judicem, spe tamen bona et tota charitatis plenitudine festinat ad Patrem. Nec est quod in judicio Patris formidet filius, cum intus apud Patrem sit, qui pro ipso pulsat et exorat affectus. Ne tamen in causæ præsentis inspectione vester caligetur oculus, quod nobis inde notum est discretioni vestræ notificamus. De statu Wigorniensis Ecclesiæ vos hoc ipsi decrevistis, ut ob redintegrandam tam episcopi quam Ecclesiæ suæ dignitatem prior ipse qui fuerat ad tempus restitueretur et infra præscriptum diem substituto altero

Ecclesiæ ipsius necessitudini consuleretur. Cumque a vobis ad Ecclesiam suam dominus episcopus, vestræ pariturs voluntati remearet, quidam e fratribus Ecclesiæ suæ vestræ dispensationis ignari, restitutionem prioris sui moleste plusquam oportuit sustinentes, res ipsius ecclesiæ statim, ut fama est, distrahere cœperunt et male, ut clamant populus, impletis marsupiiis abscesserunt. Quod quale sit, satis ipsis indicabitur. Res vero ecclesiæ sibi commissas infami venditione distrahere malum fuit; a facie Patris in nullo persequentis, sed consilium a vobis utile reportantis, fugam repentinam arripere multo pejus. Quod vero a vobis decretum fuerat, nec una dignari auditione multo pessimum. Quod vero capios se conqueruntur et dum ad vos pro Ecclesiæ suæ utilitate festinarent, male in itinere detentos, omnes fere testantur apud nos dominum episcopum hoc et cum fieret ignorasse et factum etiam cum rescivit paternam charitate pertractasse. Credendum etiam plus æstimo episcopo uni et veritati quam iratæ monachorum turbæ et contumaci. Qui, etsi eosdem ab inordinato revocasset vel detinisset itinere, in hoc culpa vel nulla vel permodica existisset. De hoc tamen evocatos audiat. De cætero scimus dominum episcopum priorem suum a prioratu amovisse, sed ob tumultuantium fratrum inquietudinem nondum quemquam substituisse. Quod ideo divinitus actum æstimo, ut vos supremam operi bono manum imponatis, et filiæ vestræ idoneum providendo pastorem ad voluntatem vestram et ejus utilitatem consulatis. Vestris monitis Wigorniensis acquiescet Ecclesia quibus dominum episcopum juxta placitum vestrum pariturs non ambigimus. Conservet incolumitatem vestram in longa tempora, qui non dormitat, custos Israel (*Psal.* cxv).

EPISTOLA XXIX.

AD OSBERNUM.

Frater G. Glocestriæ dictus abbas, dilecto filio suo Osberno, non trepidare ubi non est timor (*Psal.* li).

Moneo te, fili charissime, ædificare et plantare, et terram tuam eo vomere quo tu scis exercere et diligenter excolere. Satis hactenus spinas et tribulos genuit (*Gen.* iii), sed, sicut bene cœpisti, si la-

bori bono et exercitio instanti incubueris, scio, A scio quod fructu bono non fraudabit te Dominus. Volo vero vasa omnia domus tuæ salva et munda custodias, et ipsam domum tuam qua poteris supellectile munda et honesta munias et exornes. Laudo etiam te seras portarum tuarum confortare, domum tuam vallo bono et muro inexpugnabili circumdare, ne scilicet gens illa quæ, sicut tu dicis, hirsuta fronte et torvis oculis respicit, irrumpat in eam et omnes labores tuos et sudores impetu uno diripiat. Nolo vasa transmigrationis sint apud te, nec quod in aliquo pretendas transmigrationis habitum, sed stabilitatis in terra vestra quam dedit vobis Dominus Deus et mansionis diuturnæ propositum. Dices vero amicis nostris Wallensibus vos de hoc quod audierant nihil penitus illis inconsultis acturos. Videmus vero gentem vestram timorem Domini et reverentiam sanctuarii parvipendere, et illos audimus Deum et loca sancta et personas consecratas Domino diligenter honorare. Propter hæc omnia durum est nobis illis qui fere non curant vos magis inseri et ab his qui vos venerantur avelli. Vale et noveris nos malle stationarium vel progressionarium te esse quam retrogradum.

EPISTOLA XXX.

AD JOCELINUM SALESBERIENSEM EPISCOPUM.

Patri suo et Domino J. Salesberiensis Dei gratia episcopo, frater G. Glocestriæ dictus abbas, apto rationis moderamine sibi credita dispensare.

Sciat vestra sanctitas, in Christo dilecte Pater, nos fratri nostro Bernardo persuadere non posse ut sub aliqua ejuscuque pecuniæ reddendæ conditione benedictionem suam vel a vobis vel aliunde suscipiat. Hoc vero, licet malum fortasse non sit, C menti tamen simplici scrupulum generat, ut aliquid a puritate minus suis sibi habere videatur introitus. Unde vestræ supplicamus benevolentia ut animi vestri severitatem paulisper deflectatis ad nos, et his pecuniæ repetendæ conditionibus omissis, paululum post datam simpliciter benedictionem quidquid exigendum iudicabitur exigatis. Ego vero erga sanctitatem vestram me vinculo fidejussoris ad plenum obligo, quod post ipsam benedictionem quidquid de his omnibus sibi adjudicabit Ecclesia, obediens et humilis et devotus implebit. Si post istam benedictionem ejus voluntas distulerit, nil restat aliud nisi ut in commissa sibi domo voluntatem domini papæ sedulus præstator expectet. Vale.

EPISTOLA XXXI.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, frater G. Glocestriæ dictus abbas, totum quod potest humilis et prompta devotio.

Humilitatem charitas non repellit. Unde, quia Willelmum Cumini humilitatem vidimus, audere cœpinus ut apud sublimitatem vestram pro illo interpellemus. Quod si ab unitate recessit Ecclesiæ, ipso qui tentat instigante, ad eandem jam redit, ipso qui vivificat Spiritu sancto revocante. Unde ad thronum misericordiæ vestræ pia tamen presumptione

pulsamus, ut si eum testimonio magnarum et religiosarum personarum de ea in qua inieperat culpa satis fecisse cognoscitis, a communione suspensum teneri non permittatis. Dominus vero Wigorniensis nisi per vos in communionem non recipit quem auctoritate vestra a communione privavit. Rogamus itaque vestri animi moderationem ut quem de Ur Chaldeorum ad Jerusalem suspirasse gaudetis (Gen. xv), intrare volenti portas ejus obserari non sinatis, ne cui etiam calceamenta stolam pariter et annulum indulsit pietas cœlestis, ipsum nudatum turpiter ad siliquas remittatis.

EPISTOLA XXXII.

AD R. PRIOREM ET FRATRES CERNELIÆ.

Dilectis in Christo fratribus, R. priori ceterisque B Cerneliæ, frater G. Glocestriæ dictus abbas, militando prudenter assequi gratiæ donativum.

Movet nos aliquandiu erga vos et jamdiu erga domum vestram, a vobis habita et exhibita charitas, ut quod nondum præsentia corporali potuimus, missis saltem litteris vos ultra visitare non differamus. Gratias igitur vestræ per omnia referentes sanctitati nos vobis in omnia gratia spirituali profitemur obnoxios, qui et de vobis jamdiu bene sperare cœpistis, et quod in donis summum est et præcipuum nos profectus vestri et incrementi spiritualis in Domino participes esse voluistis. Nam quanta charitatis plenitudine benevolentiam vestram superextendatis in nos, hinc datur intelligi, quod cum toto orbe terrarum Ecclesia Dei clara meritorum laude titulisque gloriosis longe lateque resplendeat, vestræ tamen complacuit sollicitudini ut Ecclesiæ vestræ nos ætiori quodam dilectionis vinculo jungeretis, et de ipsa vobis patrem pastoremque elegeretis. Quod quidem non ita scribimus, tanquam de infula vel cathedra loci vestri, vel in nobis vel in nostris gloriantes, sed gratam per omnia habentes unitatem spiritus quæ inter nos mediante quodam vinculo charitatis et pacis firmo et indissolubili constituitur. Nam cum de imminenti vobis negotio recurreretis ad nos, equidem vobis charitate non ficta subvenimus, et de corpore nostro vobis non tanquam saucium aliquid vel putridum membrum abjiciendo projecimus, sed corporis nostri partem sane meliorem et commodiorem licet in dispendium nostri, plena tamen vobis pietate concessimus. Nam, si quod sanctum est, quod honestum, quod doctrinæ sanæ, quod bonæ famæ, quanto speramus amore concupistis, habetis procul dubio, habetis in Patris adoptione unde et Domino gratiarum referatis actiones, et nobis sitis in immensum gratiæ debitores; habetis nempe virum, cui ad doctrinam scientia et ad honestatem mores exuberant; habetis in cujus vita et moribus vobis plene virtus illucescet; habetis cui humiliter obediendo quod arripuistis iter virtutum virtutis assequendo premium gloriose consummabitur. Sed sunt in vobis fortassis aliqui quos in appetitum sui nondum plene virtus allexit, imo sunt ut tristic audio, qui virtu-

tis opus quanto laboriosius est, tanto odiosius aspernuntur. Sunt etiam qui ab eo quem in Patrem elegimus et assumpsistis impudenter aversi, jam retrorsum abierunt, nec jam vocem ejus audientes, sed alienum nescio quem sequentes, non solum ipsi non obediunt, sed et ipsum nefariis, ut fama est, visibus eradicare et explantare moluntur. Nunquid sic nostra debuit remunerari benignitas? Nunquid hoc nostra meruit prompta vobis deservire voluntas? Audite, charissimi, et quod ex charitate loquimur, aure charitatis advertite. Timeo, timeo ne forte vos urgeat veniens ex alto sententia. Scitis vero quod juxta merita subditorum disponitur, et vita rectiorum et sicut cum sancto sanctus est Dominus, ita etiam cum perversis merito perversus invenitur (*Psal. xvii*). Bonis equidem pie disponit et qui suspirant ad vitam, his Patrem præstatur et pastorem quo ducantur et pertrahantur ad vitam. Pharaoni jamdudum Israëlæ servierant, et civitates illi de latere et luto construxerant: sed ex quo cœpit illis servitus Ægyptiaca displicere, clamaverunt ad Dominum et iter trium dierum, Moyse ducente, profecti sunt (*Exod. viii*). Volentibus ad vitam ingreſsi merito præesse conceditur, propter quem pateat ingressus ad vitam. Secure pronuntio, si filiis Israel Pharaonis adhuc placuissent opera, nec clamassent ad Dominum, nec adhuc salvatorem habuissent. Justitiæ regula est, ut qui justus est, justificetur adhuc; et qui in sordibus est sordescat adhuc (*Apoc. xxi*). Sic qui cæci sunt ut a cæco ducantur expostulant, sententia cœli est, ut pariter in foveam cadant (*Matth. xv*). Nec quidem hoc dicimus de majori et meliori parte vestri diffidentes, sed mirantes equidem et indignantes quod illos qui vos conturbant inter vos dominari et principari permittitis. Audio illum non dico carnalem sed carnem Adelardum demigrasse Cantuariam, Romam inde forsitan profecturus. Sed quid si Romam venerit? Sentiet axis onus, et ad tantum pondus curia forsitan inclinabitur. Vetus ista querela est, et inter carnem et spiritum ab ipsis Ecclesiæ cunabulis vehementer agitata. Jamdiu est, quod caro concupiscit adversus spiritum et spiritus adversus carnem (*Galat. v*). Nos vero ambulabimus adversus carnem et carnis opera recidemus. Audiat, advertat carnis opera et faciem suam dominus Adelardus intelligat. Nam opera carnis hæc sunt, fornicatio, immunditia, impudicitia, luxuria et quæ hujusmodi sunt (*ibid.*). Qui sectatur hujusmodi nulla sibi erit cum vestro commillione communio. Nec tamen hæc dicimus tanquam fratrem vestrum persequentes in aliquo vel demum talia suspicientes; persequimur vitia, non personas. Aspera dicimus, optantes ipsi meliora. Vano seducitur fortassis intuitu. Romam æstimat velut arundinem omni posse spiritu agitari. Romæ scimus veritatem obscurari posse, nunquam tamen, si fuerit agnita, reprobari. Thronus ille justitia est, equitatem sedes illa judicat. Nec causa ista est quæ in lucem venire erubescat. Nihil in aure diximus quod super tecta prædicari nolumus.

PATROL. CXG.

A In innocentia ingressi sumus, et sperantes in Domino non infirmabimur (*Psal. xxy*). Rogamus itaque, dilectissimi, ut unanimi studeatis et paci, et Patrem vestrum per omnia, sicut decet filios honorantes, illi quam oportet reverentiam et nobis quam sperabamus charitatem, non tantum labiis sed corde potius exhibeatis: habetis unum, quem si corde suscipitis et honoratis, in uno illo nos omnes integre possidebitis. Quod si faciem ab illo avertetis, quo spiritus impetu ducimini, nulli dubium relinquetis. Filio nostro fratrique charissimo nequaquam deesse poterimus, sed vestros cum illo incursus toto animi sustinere tentabimus. Adversa nempe sustinere poterit, sed solus habere non poterit. Sed avertat hoc Dominus ut societatis vestræ jucunda principia exitus habeant tam amarissimos, et ipse qui est initium et finis, principia vestra jucundo fine concludat. Et si vestra nos dignos amicitia creditis, nos quoque amicos vestros et per omnia benevolos æstimat.

EPISTOLA XXXIII.

AD ROBERTUM SANCTÆ SED. APOSTOL. CANCELLARIUM.

Magistro suo charissimo dominoque meritis honorando, ROBERTO sanctæ sedis apostolicæ cancellario, frater G. Glocestriæ dictus abbas, reverentiam debitam et de corde toto dilectionem.

C Exsultavit cor meum in Domino, dilecte Pater in Domino, et spiritali sum jucunditate perfusus, quia de cœlo respexit Dominus, et vestræ memor humilitatis gratiam donavit pro gratia, et a vobis dignè servatam hæctenus honestatem morum et elegantiam condigna munificentia suæ gloria munera. Invitatus ad nuptias locum elegeratis obtinere novissimum, sed in vobis bene patri complacuit ut evangelicum illico tandem ipse personaret: Amice, ascende superius (*Luc. xiv*), gloriamque vobis pariter et honorem præ ducementibus aliis exhiberet. Mirabar equidem et rem tacitis attendebam, cui Dominus nova sua pariter et vetera reservasset, quia congesta totius honestatis insignia sic in anum cummulasset. Et licet innumeris vitæ vestræ decor et doctrinæ suavitas illuceret, et in sui imitationem mirabiles multorum appetitus accenderet, majus tamen aliquid animo somniaham lucenque tantam, etsi non sub modio reconditam (*Luc. xi*), ab eminentiore tamen quodam loco fulgoris sui beneficia præstituram Ecclesiæ spe quadam certa concipiebam. Teneo quod volebam; video quod sperabam, ut jam magna prædicem opera Domini exquisita in omnes voluntates ejus (*Psal. cx*). De quo magna operare potui, magna videre jam merui, et quem dilexisse justitiam et odio habuisse iniquitatem (*Psal. xlv*) non dubito in consilio justorum et congregatione sanctorum a beato summoque pontifice totius æquitatis jura dictare totus applaudo. Hinc est quod gratiarum non sufficimus actioni, quod Patrem nostrum Cant. exhilarastis, quod Ecclesiam ejus in dignitatem pristinam reformastis, ut quæ mutila faci-

Inredebant, hinc archiepiscopatus gloria, illinc soliti primatus honore jam plena luce refulget. Et divinitus actum est ut de fonte justitiæ ipsa vestra promotione procederet et pietas in nos. Rogamus benevolam et benignam nobis semper gratiam vestram, et pro Domini Jesu reverentia suppliciter exoramus ut nostro Arnaldo manum misericordiæ porrigatis et vestræ fretum pietatis auxilio lætum ad propria remittatis. Scitis quam indecens sit et importunum clericum bonum in publicas jamdiu gratulationes susceptum, jam nunc emendicatis elaborare suffragiis, et diebus vitæ suæ novissimis insolita præter morem inedia prægravari. Confido de Domino meo magistroque charissimo ut cordis sui locum misericordiæ semper aperiat, et tam huic quam ceteris Salesburiensis Ecclesiæ clericis, jam instante necessitate et vehementer argente tempestate, subveniat. Conserve omnipotens Dominus magistrum et dominum meum in tempora longa Ecclesiæ suæ profuturum.

EPISTOLA XXXIV.

AD SIMONEM WIGORNIENSEM EPISCOPUM.

Patri suo et domino S. Wigornienſi Dei gratia episcopo, frater G. d. ab., bella Domini cum fiducia præliari.

Quod palam est et multorum divulgatum notitiæ testibus aut argumentis evincere citra necessitatem est. Unde, si promptum serviendi vobis habuimus animum, argumentis non approbo de quo nullum aut fere nullum dubitare non dubito. Equidem si vobis in magnis servire nequivimus, sedulam tamen dedimus operam, ut in minimis saltem in subsidiari vobiscum actione staremus. Ideo nostra, si placet, merebatur humilitas et in vos buccusque continuata charitas, ut vices nostras quas adversus H. et R. de Calderi sublimitati vestræ commiseramus, prudentia vestra aliquanto fuisset diligentius exsecuta. Scitis vero et multorum constat testimonio dominum archiepiscopum vobis palam prohibuisse ne quis illum absolveretur, nisi vobis ecclesiastica satisfactio exhiberetur. At illos ad satisfaciendum nobis nullo adhuc commonitorio induxistis, nihilominus tamen absolvistis. Palam est et luce clarius quid consequatur expositis. Dicam, salva pace vestra et gratia, dicam quod hoc ipso nec domino archiepiscopo obedientiam, nec nobis quam speramus amicitiam, nec ordini vestro vel officio honorem exhibuistis aut reverentiam. Equidem molles istæ et remissæ facilesque nimis misericordiæ auctoritatem vestram in opprobrium et commissam vobis justitiam deducunt in nihilum. Anno quidem spectavimus integro ut in episcoporum conventu malefactores nostros anathematis vinculo teneremus. Sed quam facile labor noster evanuit! Inflavit buccas dominus H. et sonare tubæ. Ad unum Spiritus inflati sonum, quid dicam? Expavit episcopus, pro pudor, ad ejus minas expavescere, ejus dedignandus erat et gladius! Jam toties læsi ad quem de justitia nobis exhibenda curremus? Nunquid nobis facile est circumire provincias, dominum archiepiscopum

A sollicitare, convocare concilium et a multis expectare quod unus item possit gratia vano quodam favore remittere? Equidem post susceptum onus hoc in quo laboro sustinens nil mihi molestius accidit, nil amarius. Pudet vero me similiter et poenitet, quod cucurri in incertum; pugnavi, sed quasi aerem verberans (1 Cor. ix), et post damna similiter et labores insultant mihi inimici mei et jam prorsus effrenati tutam nacti peccandi licentiam ad injurias item faciendas imperiosa voce nos provocant. Hæc itaque vestræ duximus communicanda notitiæ, ut qualitercunque res hæcenus acta sit, vestro, si fieri potest, reformetis consilio ut et vobis honor augeatur et causæ vestræ si non ad plenum in aliquo saltem provideatur.

EPISTOLA XXXV.

AD G. PRIOREM ET CONVENTUM HEREFORDIENSEM.

Frater G., dilectis suis dilectoribus GUAR. priori et fratribus qui cum eo sunt Herefordiæ, bonum bene consummare principium.

Libentius vos ipse visitassem quam ad vos litteras nuntiosve dirigerem; sed quia impediunt negotia multiplicata quod vellem, litteras interim nostras vice colloquii habeatis, ut pensetis ex his quid de nostra erga vos charitate æstimare debeatis. Non est credendum omni spiritui; quidam vero spiritus ex Deo non sunt (1 Joan. iv). Unde si charitatis nostræ sinceritatem impius homo supersemilians zizanias offuscare conatur, discretio nobis, spirituum necessaria est, ut non circumferamur omnivento doctrinæ vel facile acquiescamus errori (Ephes. iv); sed probantes semper potiora solidemus in Christo charitatem, in quem anchora nostræ spei projecta est. Frustra namque credimus et speramus nisi invicem diligamus. Attendamus illud Apostoli: *Charitas nunquam exiit* (1 Cor. xiii); verbum breve, sed fecunda sententia. Illic plane conjungitur nos aut in Christo non dilexisse, aut leviter a charitate non excidisse. Non vero in Christo diligit qui facile promovetur ad odiurn.

EPISTOLA XXXVI.

AD EUGENIUM III. PAPAM.

Patri suo et domino Dei gratia pontifici EUGENIO, frater G. Glocestriæ dictus abbas, in decore virtutum delicias regibus ministrare.

Cum in singulorum commoda vestræ se, dilecte Pater, diligentia charitatis exerceat, fortasse minus in sui admiratione suspenditur et quæ ad innumeros beneficiorum immensitate diffunditur intra proprii iudicii terminos arcta humilitatis regula cohibetur. Quanto tamen gratiarum imbre mentem vestram divinitatis unda perfuderit, hinc datur intelligi quod in vehemens sui desiderium non paucos de ultimis terræ finibus virtutis vestræ fragrantia sanctique nominis suave redolens opinio jam pertraxit. Scimus vero multos multa animi alacritate festinare ad vos, ut jam dicant singuli, clement universi: *Trahe nos post te, curremus in odore unguentorum tuorum* (Cant. i). Inter dominum A.... Lincolnienſem

episcopum tanta docet a maiestate vestra veneratione suscipi, quanta scimus eum ad vos charitate perducere; perhibent vero ejus vite testimonium bonum familiares ejus viri probate religionis et gratiæ, qui cum eo quo familiarius conversantur, tanto magis de ejusdem honestate gloriantur in Domino. Scimus quoque Dominum flagello tribulationis ipsum jamdiu aliquatenus attigisse, ut si quid in eo fuit scoræ, jam ad purum excoctum sit, et si quid in excessu mediocri vaga regni Angliæ aliquandiu permisit licentia, jam penes eum evacuatum est, et perfecte probatur. Hoc quod verum credimus, præcipuo veritatis amico denuntiamus, ut non pigeat vos filium vestrum in gratia suscipere, cui dignum est honorem et gratiam exhibere. Valeat sublimitas vestra, in Christo dilecte Pater.

EPISTOLA XXXVII.

AD J. LEGATUM.

Patri suo et domino J. sanctæ sedis apostolicæ Dei gratia legato, frater G., salutem et de toto corde dilectionem.

Litteras dignationis vestræ, dilecte Pater, domino Salesberienſi direximus, ut quem statuistis abbatem Cerneliæ, loco eidem episcopali confirmaret benedictione. Quod ipse quo animo vel qua industria nescimus hucusque differens, in ipsum, sicut a multis audivimus post discessum vestrum vexationes et argumenta multiplicat. Quod utinam absit a vestra gloria ne tale sortiatur laus vestra dispendium, ut plantatio vestra sic evellatur et vestrarum opus manuum in ignominiam vestri deleatur! Quapropter honori vestro supplicamus et gloriæ, ut directis jurisdictionis vestræ litteris dominum Salesberienſem commoneatis, ut ultra illum quem ei statuistis diem benedictionem ejus non differat; et quod si veræ religionis amator est, animo grato, voluntate promptissima jam fecisse debuerat vestra salutem auctoritate jam secundo communis ulterius explere non differat. Rogamus ut in opere vestro non confundatur facies vestra, sed incrementum semper habeat gloria vestra, ut sciant omnes quod manus tua hæc et tu, Domine, fecisti eam (*Psal. cvm*). Valeat dominus meus et Pater dilectissimus. Sicut præcepistis, jam venissem ad vos, nisi de die in nos iteratæ calumniæ me non impeditum solummodo, sed et compeditum gravissime detinuissent.

EPISTOLA XXXVIII.

AD THEOBALDUM CANTUAR. ARCHIEP.

Patri suo et domino Cantuariensi Dei gratia archiepiscopo et totius Angliæ primati, T. frater G. Glocestriæ dictus abbas, salutis gaudium et obedientiæ famulatum.

Adhuc etiam, domine, incubus ille Cerneliæ, quod sui juris non est, audacter occupat, et qui inde expulsus est, ad aliena limina pro defectu justitiæ mendicat. Dominus vero Salesberienſis expulsi abbatis inopiæ extremæ ipsius Ecclesiæ desolationi fortasse compatitur, sed nec abbati inopi, nec Ecclesiæ jam ruenti aliqua ejus miseratione

A subvenitur. Mandati vestri litteras devote suscipit, vestro tamen obedire mandato alia nescio quâ consideratione omittit. Justitiam itaque, quam alias non invenimus, a vestra jam paternitate requirimus, ut Scotum illum inobedientem vobis manifeste contumacem et improbum, si placet excommunicetis et Ecclesiam ipsam quam diu incubuerit interdicatis. Quod si deinceps comiti Glocestriæ de ejiciendo excommunicato vestro præceperitis, scimus quod nobis obedire non differet, verum domino Salesberienſi obedientiæ formam sine mora obediendo præscribit. Vale.

EPISTOLA XXXIX

AD EUNDEM.

B Patri suo et domino Cantuariensi Dei gratia archiepiscopo et totius Angliæ primati, T. frater G. Glocestriæ dictus abbas, salutis et gaudii plenitudinem.

Quia fortis est ut mors dilectio (*Cant. viii*), sicut uni præjudicare non possumus, sic alteri reluctari non valemus. Hinc est, dilecte domine, quod id quod vultis me quoque velle necesse est. Sed quia redeuntes a vobis qui mihi sic alii vero sic loquuntur, precor ut mihi litteras vestræ voluntatis indices per hunc fratrem nostrum mittatis, et quod de me vestro sederit arbitrio ea, qua præstis et potestis potestate injungatis. Eo vero erga vos animo sum, ea vobis charitate devincens ut in quo sanctitati vestræ me obedire et placere cognovero, totum leve reputem quod mihi minari potest vel difficultas itineris vel urgens auctoritas obviæ potestatis. De cætero frater B. abbas Cerneliæ ad sedem apostolicam appellavit. Cum ergo sua omnia in protectione domini papæ esse oporteat, a suis tamen persecutoribus non minus nunc quam ante diripiuntur. Unde rogat per me et de hoc precor vestra sit exorata paternitas, ut Ecclesiam suam in protectione domini papæ et vestra suscipiatis et ipsam domino A. archidiacono custodiendam committatis, ut et huic ad dominum papam adeundum scilicet quod res habet necessaria conferat, et si quem in loco ipso domino servire cognoverit, ipsi cura diligenti provideat. Itineris nostri diem, si placet, notificetis, quem si usque ad festum sancti Michaelis differri placeret, eos qui nobiscum ituri sunt, fortasse magis paratos haberetis. Valete.

EPISTOLA XL.

AD ROBERTUM LINCOLNIENSEM EPISCOPUM.

Venerabili domino fratrique charissimo ROBERTO Dei gratia Lincolniensi episcopo, G. Herefordiæ minister, gaudia pacis et salutis.

Pro anima mihi res est, et sunt oculi mei ad vos ut impleatis in necessitate hac desiderium meum. Regis ira adversus abbatem Glocestriæ et Ecclesiam malevolorum consilio vehementer incanduit; et nisi voluntati ejus abbas ipse infra breve spatium obtemperaverit, terras ipsius Ecclesiæ omnes, quæ in sua potestate sunt, rex sibi sumere et Ecclesiæ ipsi alienare comminatur. Unde quanta de vobis spe-

ramus confidentia, preces benevolentiae vestrae porrigimus, ut opponatis vos murum pro domo Israel (*Ezech. xiii*), et regis iram mitigando, abbatem et Ecclesiam ipsam reconciliare domino regi, et negotium istud juxta possibilitatem Ecclesiae terminare studeatis. In hoc positi estis a Domino, ut per vos bene provideat his qui infra sunt, et quod per se aut per Herefordiensem nequit, per Lincolnensem obtineat Glocestrensis. Ad plene explicandum affectum vestrum multa foret opus litterarum prolixitate. Sed stylum duo comprimunt, quia sapiens docetur paucis et amico suadetur e facili. Sit vobis a dextris Dominus ut in hoc et in omnibus gratiam vobis comparari studeatis. Miles militavit aliquandiu non Deo sed Satanæ. Servivit vero excommunicatis vestris mense integro, postquam ipsos excommunicatos esse cognoverat. Nolentes itaque excommunicatum vestrum absolvere nisi per vos, rogamus ut quod in eum iustitia dictaverit, misericorditer prece vestra temperetur.

EPISTOLA XLI.

AD EUGENIUM PAPAM.

Patri suo et domino, summo Dei gratia pontifici Eugenio, frater G. Glocestriæ dictus abbas, obedientiam humilem, et debiti famulatus obsequium.

Cum suspiret, dilecte Pater, ad vos Ecclesiarum totius Angliæ facies admodum desolata, una tamen est Malmesmeriensis Ecclesia, cui nisi cito subventum fuerit, nil jam sibi solatii superest, nisi quod est in adversis pessimum, felicem aliquandiu existisse. Nam, sicut ovicula lupi faucibus deprehensa, quo evadat non invenit, sic ipsa castelli quod in ejus fundo simul et atrio situm est, angustata moribus, et habitatoribus afflicta, totum fere quod facultatis terrenæ, perdidit, et quod religionis apud se fovebat et ordinis, evanuisse penitus ingemiscit. Vix est quod ejus calamitati jam possit adjici, cuius et locus in extremam desolationem datus est et filii in dispersionem. Ubi enim a sancti Patris Aldelmi tempore laus Dei resonabat, illic hodie armata satellitum turba et in omnem, in quam conducitur impietatem, promptissima cohors militum debacchatur. Restat igitur dilecto fratri nostro et ejusdem Ecclesie abbati domino Petro, vestri pietate consilii Ecclesiam suam et ab infestationibus jam dictis erui, aut ad ipsam penitus non reverti. Si juxta prophetæ vocem, *gladius Domini exacutus est, ut splendeat limatus est*, stet, optamus, in manu percutientis et vindicantis opprobria agnitionum Dei Israel (*Ezech. xxi*). Nil equidem misericordius vestra nobis posset charitas exhibere quam in partes nostras quempiam dirigere, qui ea quæ Dei et vestra sunt, zelo sciret congruo pertractare. Conserve incolunitatem vestram in longa tempora, qui non dormitat, custos Israel (*Psal. cxx*), in Christo dilecte Pater.

EPISTOLA XLII.

AD JOANNEM DE CANT.

Sedulo majestatis apostolicæ defensori, domino

A Joanni de Cant., frater G. Glocestriæ dictus abbas, sales si placet suos intra fines modestiæ modo laudabili colibere.

Quod imitatus apostolorum paternarum traditionum cæteris contribulibus tuis amplius et perfectius æmulator existis, letus audio, zelusque tuus bonus ut incrementa semper excipiat, ampla charitate desidero. Verumtamen, si qua penes nos acta vel dicta sunt, quæ ad dominum papam usquequaque pertineant, nolo te, frater, commoveri super hoc, nolo tui Sabbatipacem delicatam aliquatenus exinde perturbari. Ad dominum namque papam appellavimus, et ad ejus nomen tota nobis controversia conquievit. Nomen pacis in commune protulimus, et ad ejus flagrantiam nobis pacifica sunt universa.

B Ne tamen nomen gratiarum in nostrum tantum commodum, et in ipsius injuriam assumpsisse videamur, nuntii nostri jam in hoc ipso sunt, ut domino papæ litteris nostris intimemus, quid a nobis actum sit, et ad ipsum quatenus appellatum. Appellationis itaque vinculum, quod ipsi inneximus, non ipsi sicut æstimas præsumendo solvere, sed domino papæ præsentare curavimus, ut de manu vestra suscipiat unde nos trahat si noluerit, vel si ejus sederit arbitrio nos remittat. Nobis ipsi etenim si jusserit assistere gloriosum, et si permiserit ab agendo quiescere, tutum erit. Non nobis itaque, non nobis, sed nomini suo dabit gloriam (*Psal. cxiii*), et disperio (*sic*) suo quod volet, cui obediemus in omne quod volet.

C Cum ergo zelum plane tuum approbem, in hoc tamen discretissimo nostri sæculi viro minime conformaris, quod tibi rumor vagus auctoritas est, et certam reputas ex opinione sola scientiam. Si qua infirmamur in parte, te, clarissime, infirma terræ nostræ exploraturum minime æstimabam. Sed ejus gladius fortasse hic est, qui non pacem mittere venit, sed gladium (*Matth. x*). De cætero, quod adnectis redundare in curiam, me magistro W. Senecam meum bis negasse, benigne consulo, ut in quibus audacter provocas, provideas et prudenter. Qua enim facie me bis negasse contendis, quod diutino labore conscriptum domino et amico poscenti ipse jamjam defero, vel transmitto? Vides ergo, Joannes, quos in vanum conatus dederis, amicum quam sine causa provocaveris, quem si foro loro injusto pertraxeris, quomodo non mihi in meis fatigationibus et expensis condemnaberis, qui innocuum ad damna requiris? Neve ergo liquasse culicem et camelum deglutisse videaris (*Matth. xxiii*), meæ, quæso, si qua forte est, negligentia paulisper oblitus, ad magna te convertas. Refrigescit enim charitas et abundant scandala, et late circa regionem Jordanis oriuntur germina, quæ falce apostolica recidere judici proveniret ad gloriam, impetenti ad coronam. In his, quæso, te exerceas; in his ingenium occupes tuum, et quibus exosa lux est, beneficia lucis impertire. In talibus enim tibi poterit gratia collocari, nec fortasse deerit, in cujus possis nomine baptizari. Ages ergo,

ut is cui nec Jovis cerebrum, nec Maingena petasus deesse cognoscimus. Nos domini papæ voluntatem, donante Deo, audiemus, in brevi, ipsoque vel jubente aderimus, vel remittente gratias exsolvemus. Optamus te valere tibi, et amicis, dum tibi bene est, vel saltem parcere.

EPISTOLA XLIII.

AD JOCELINUM SALESBERIENSEM EPISCOPUM.

Patri suo et domino, JOCELINO Salesberiensis Dei gratia episcopo, frater G. Glocestriæ dictus abbas, seipsum.

Hoc est, dilecte Pater, quod crebris litteris intendebam, ut de negotio quod inter nos est, mihi nec onus augetur, nec vobis honor aut reverentia debita ulla ex parte minueretur. Sed quoniam quod verebar accidit, et appellationis jam intercurrit auctoritas, precor ut de his quæ spectant ad vos negotium ipsum, si vobis placet, expeditis, et nos de remittenda appellatione apud dominum archiepiscopum, quod poterimus exsequamur. Requirit dominus Bernardus sibi cuncta restitui, quæ post denuntiatio vobis iter suum ad dominum papam amisit. Postulat ecclesiam de Simun Desberga sibi reddi, et monachos illos per quos sibi hæc est orta contentio, secundum mandatum domini archiepiscopi, ad claustra regularia transmitti, et in ecclesia Cern[eliæ], consilio et auxilio vestro, religione monachis condigna, juxta mandatum domini papæ reformari. Super his nobis velle vestrum rescribat, et in his quæ nobis benigne conceditis, nos humiles et obedientes et adjuutores habebitis. Valeat sanctitas vestra.

Litteras domini archiepiscopi, quæ vobis ad præsens mittuntur, ante appellationem factam datas esse noveritis.

EPISTOLA XLIV.

AD THEOBALDUM CANTUARIENSEM ARCHIEPISCOPUM.

Patri suo et domino Cantuariensi Dei gratia archiepiscopo, et totius Angliæ primati T., frater G. Glocestriæ dictus abbas.

Sustinuimus, domine, pacem et non venit; quævivimus bona, et ecce turbatio (*Jer. xiv*). Frater Joannes, Cerneliæ monachus, mandati vestri litteras ad comitem Glocestriæ deferrebat, sicut ipsi nostis, non continentes nisi quod ad pacem et utilitatem ejusdem pertinebat Ecclesiæ. Cum itaque Cern[elia] egressus, litteras ipsas deferens festinaret ad comitem, quidam filiorum Willelmi Scoti illius quondam abbatis Cern[eliæ], cum quibusdam aliis paratis ipsi occurrens insidiis, dejectum equo gravissimis afflixit verberibus, ipsoque semivivo relicto, se ad speluncam latronum Cern[elian] receptavit. Nec quidem illis in partibus cuiquam dubitare permittitur, quin pater Scotus filio Scoto, hujus operis incitamentum, occasio et materies exstiterit. Uude et hæc manifesta sunt, jamjam ad judicium præcedentia. Præterea jamjam dictus Willelmus, vestro plane rebellis imperio ecclesiasticam per omnia respuens disciplinam, Cern[eliæ] mo-

nasterio adhuc incubat, et in ipso sibi totius pleitudinem potestatis usurpat. Cumque toto orbe Britannico lateque patentibus insulis occidentis, Ecclesia Dei vestro se parere gloriatur imperio, una tantum est Cern[eliæ] ecclesia, quæ, contra vos calcaneum levans præsumptive exclamat: *Quæ nobis pars cum David, vel quæ hereditas in filio Jesse?* (*III Reg. xii.*) Filii alieni hi sunt, inveterati pessime, semper claudicantes a semitis bonis (*Psal. xvii*). Hi filii Belial quem sibi volunt abbatem constituunt, constitutum, cum volunt, ejiciunt, ejectum revocant cum volunt, et obediunt tantum cui volunt. Cumque ut jumenta pessima in suo jamdiu stercore compytuerint (*Joel. i*), nec solum incontinentiæ, et omnis turpitudinis fetorem ex se diu et abundanter emiserint, non fuit justus qui respiceret, vel qui ipsos viæ revocando eorundem animas ad lucrum reportare intenderet. Virgam igitur in manu vestra prophetica, virgam scilicet vigilantem videamus, et locum illum spurcitiarum et criminum quem non incorrectum solum, sed et neglectum penitus obsolevisse cognovimus, ad honorem Dei et vestrum, ad decorem domus Dei et totius ordinis monastici reverentiam purgatum de Ur Chaldeorum cripi (*Gen. xv*), et in faciem condignam religioni restitui et reparari gaudeamus. Forma vero reparationis, si placet, hæc est. Si in prædicti sceleris patratore et consocios sententiam condignam dederitis, et illam domino Salesberiensis denuntiaveritis, si comiti Glocestriæ ex obedientia injunxeritis, ut prædictum Scotum amoveat, et si vobis placet, curæ et custodiæ nostræ committat, si Roberto de Arundel, et Rogero filio ejus, et Roberto de Nicole, sub anathemate præceperitis, ne Scoti ipsius stultitiam amplius foveant, nec terras Cerneliæ occupando, Bernardum vestrum impendant, si Willelmum filium comitis, de hoc ipso commonueritis, si benedictionem vestram scripto publico adjutoribus Bernardi abbatis concesseritis et malefactores ejus sententia maledicti terueritis. Si zelum etiam domini Salesberiensis suscitaveritis, ut adversus hujusmodi incandescat, et reprimendo contumaces, in domini Bernardi auxilio non tepescat. Unctio vero sancta edocet vos de omnibus.

EPISTOLA XLV.

AD UCTREDUM LANDAVIENSEM EPISCOPUM.

Patri suo et domino UCTREDO Landaviensi Dei gratia episcopo, frater G. ecclesiæ beati Petri Glocestriæ dictus abbas, salutem et debitam Patri charitatem.

Rogamus benevolentiam vestram et expertam nobis toties animi vestri moderationem, ut causam hanc quam adversus fratres nostros de corpore sororis domini Mauricii, jam movistis, sic deducalis, ut nec charitatem minuatis in nos, nec privilegium domini papæ contraire tentetis. Habetur enim privilegium, quod vobis opportuno etiam tempore presentabimus, quo nobis apostolica concedit auctoritas, ut quorumcunque liberorum hominum corpora,

qui extrema se voluntate locis nostris in sepulchram concesserunt, absque alicujus præjudicio apostolica auctoritate sepelienda suscipiamus. Rogamus itaque dilectionem vestram ne occasionem queratis adversus nos, quominus serviamus vobis, et ab ea quam hactenus erga vos habuimus charitate deservemus. Parati enim sumus vobis omni loco et tempore tanquam domino deservire, dum vestra tamen thronum justitiæ apostolicæ viderimus auctoritati obedire. Valete.

EPISTOLA XLVI.

AD THEOBALDUM CANTUARIENSEM ARCHIEPISCOPUM.

Patri suo et domino Cantuariensi Dei gratia archiepiscopo et totius Angliæ primati T., frater G. Glocestriæ dictus abbas, pie velle quæ Dei sunt, et actu semper implere.

Sublimitati vestræ, domine, pro amicis supplicare compellimur, qui nec pro nobis audiri digni satis invenimur. Plus tamen eligimus apud Patrem de pietate corripri, quam apud fratres de sprete charitate damnari. Ad vestram vocatus audientiam dominus Landaviensis, multiplicibus se causis excusat, hinc difficultatem itineris, inde suspectas adversantium insidias, et præ cæteris, sui corporis infirma prætextens. Inde vero nuper redeuntes fratres nostri, de quorum fide et veritate non ambigimus, de ipsius infirmitate contestantur. Delecto itaque ægritudinis suæ tum etiam per nos supplicando postulati, ut causæ præsentis actio usque ad vestrum reditum differatur, sic tamen ut res ipsa quæ in controversia est, a fratribus de Goldclive, interim inconcusse possideatur. Qua in re, si nec majestatem vestram minui, nec fratrum vestrorum justitiam impediri videritis, petitioni huic annuendo, nos sicut in cæteris omnibus, sic et in hoc ipso per omnia gratiæ debitores efficeretis. Glorificetur in vobis Deus, vestrique corona meriti semper augeatur, in Domino Jesu Christo dilecte Pater.

EPISTOLA XLVII.

AD UCTREDUM LANDAVIENSEM EPISCOPUM.

Patri suo et domino venerabili Landaviensi Dei gratia episcopo, frater G. Glocestriæ dictus abbas, salutem et dilectionem.

De vestra erga nos benignitate certo rerum argumendo non dubium, si gratiam mentis non æquamus, tamen in quo possumus, vobis obsequi parati sumus. Litteras itaque domini archiepiscopi vobis mittimus, ut attendatis ex his quid vobis factu opus sit, et quod agendum videritis, prudenti cura adimplentis. Oportet enim, sicut scripsistis, ut possessionem, de qua contenditis, monachis de Goldclive usque ad reditum domini archiepiscopi inconcusse dimittatis, eisque pacem interim de cætero observetis. Sique faciendo, et judicem poteritis habere propitium, et cum ad causam accingi oportuerit, melius poterit reformari negotium. Valete.

EPISTOLA XLVIII.

AD PRIOREM ET FRATRES DE GOLDCLIVE.

Frater G. Glocestriæ dictus abbas, dilectis in Chri-

sto fratribus domino priori de Goldclive, cæterisque fratribus, salutem et dilectionem.

Paci vestræ et quieti sollicitie providens dominus archiepiscopus, vobis istud per me denuntiat, ut prosequende causæ, quam adversus dominum Landaviensem habetis, hac vice operam non detis. Placuit enim serenitati ejus, ut actio ipsa usque ad octavas Epiphaniæ, vel ad reditum ejus deinceps differatur, sic tamen ut possessio quæ in controversia est, a vobis interim inconcusse possideatur. Dominus enim Landaviensis, sicut scripto suo testatur, hoc idem annuit, et vobis interim pacem se per omnia servaturum (*Isai. xxvi*), compromittit. Valete, et paternæ circa vos gratias reddentes affectioni, ejus per omnia consiliis acquiescite.

EPISTOLA XLIX.

AD SIMONEM WIGORNIENSEM EPISCOPUM.

Patri suo et domino S. Wigornensi Dei gratia episcopo, frater G. Glocestriæ dictus abbas, salutem, et si quem potest, ex charitate famulatum.

Rogat nos Radulphus de Wirecestria, ut apud sublimitatem vestram pro ipso interveniamus. Sed in re ista petere nil audemus, nisi quod honori vestro et saluti ejus utile iudicamus. Scimus enim non dimitti peccatum, nisi restituatur ablatum. Sed hoc in his verum est, quibus facultas suppetit, qua possint ablata restitui. Quæ si forte defuere, licet quod ablatum est ex impossibilitate non redditur, tamen cordi contrito et humiliato venia non negatur (*Psal. i*). Unde penitentem hunc si vestra adverterit discretio, debet quidem ad ipsum absolvendum prudens admitti dispensatio, ut quod minus est in ablato restitutione, abundet in severitate penitentiae. Ideo quantum licet, vestræ supplicamus benevolentiae, ut memor illius calamum quassatum non conteras, et linum fumans non exstinguas (*Isai. xlii*), accepta securitate non redeundi ad vomitum, et juncta simul penitentia eum in spiritu lenitatis revocetis, et erroneam ovem, si fieri potest, ad causas Domini pio humero reportetis (*Luc. xv*). Valete.

EPISTOLA L.

AD ROBERTUM HEREFORDIENSEM EPISCOPUM.

Patri suo et domino ROBERTO Herefordiensi gratia Dei episcopo, frater G. Glocestriæ dictus abbas, salutis gaudium, et obedientiæ famulatum.

Instanti necessitate compellimur, ut de negotio quod vobis præ manibus est, a dominis et amicis nostris ad dominum papam subsidii litteras expetamus. Rogamus itaque benevolentiam vestram, ea qua de vobis charitate confidimus, ut nobis litteras vestras ad dominum papam concedatis, quibus fratri nostro Bernardo abbati Cerneliæ testimonium quale vel de ipso forsitan audistis, vel a religiosis fratribus audire potuistis, præbeat. Quem enim tam doctrina, quam vita dignum commendatione cognovimus, ab amicis veritatis in ipsa sponsi presentia commendari cum fiducia postulamus. Et quoniam ipsi adversus aliquot fratres Cernelienses causa est, rogamus ut et de electione ipsius, et ex-

pulsione, et de ipsa Cerneliensis ecclesiæ dissolutione, quod in ore omnium est, et quod ipsi verum esse et causæ nostræ prodesse cognoveritis, adjiciatis. A domino et amico magna exposcimus, cui in magnis etiam et arduis obedire et obsequi non recusamus. Vos Deo denique valere optamus, in Christo dilecte Pater.

EPISTOLA LI.

AD JOCELINUM SARISBERIENSEM EPISCOPUM.

Patri suo et domino J. Saresberienſi episcopo, frater G. Glocestriæ dictus abbas, miseris non plus irasci quam satis est.

Stilus humilis est, et submissa materia, exorare pro jam mortuo, ut, ipso agente satis, et Patre tandem miserante, quoquomodo revocetur ad vitam. Gladio spiritus, quod est verbum Dei (*Ephes. vi*). B præcidisti Alardum jamdiu a vita, quod utinam non meruisset, aut si meruit, spiritum apud vos utinam condigne satisfaciens invenisset! Quod actum quia nondum est, pulsamus ad ostium non amici solum, sed et Patris et domini, si quomodo tandem aperiat nobis, et audiat clamor noster in intimis, ubi in cubili conscientiae bonæ amicus idem et dominus cum pueris suis, qui sunt purificati jam animi, deleatur et opime requiescit. Speramus enim quod in necessitate recurrenti ad vos, nec pro pane lapidem, quod est repulsa durissima, nec pro pisce serpentem quæ laboriosa est, et in dolo protractio, nec pro ovo scorpionis novissima porrigetis (*Luc. xi*). Dignum est e manu pontificis alia longe donativa splendescere. Quorumdam gloria est, sed non apud Deum, miserorum plus lætari casu quam de reditu gloriari. Longe monet aliter, qui redeunti in amplexus occurrit. Rogamus itaque, dilectissime in Domino, ut injuriarum paulisper immemor ad se redeat ille vester in nullo unquam degener sanguis, et se tum demum victum æstimet, cum sibi jam supplicat a victis. *Quem persequeris, rex Israel? quem persequeris? Canem mortuum et pulicem vitium* (*I Reg. xxiv*). Si de libertate Ecclesiæ quæ sancta sunt in corde vestro dispositis, si fratres et coepiscopos nostros in ecclesiis de manu laicorum emendis, ut nec eis personas præsentare liceat, omnes anteire proponitis, totum hoc quidem laudabile est, ut religio semper collocetur in summo, sed, D quæso, non tam aspere requiri a minimis quod nondum attentatur in summis. Scitis equidem quam sit periculosa desperatio. Quid si immoderate persequentem Asahelem lancea Abner exceperit? (*I Reg. ii, 23*.) Videte, ne de manu vestra sanguis, utriusque requiratur (*Ezech. iii*). Consuetudinis, ususque longævi non vilis est auctoritas, et ubi non peccatur in Deum, tolerabile est, ut radicibus suis antiquitas inconcussa permaneat. Si nobis indulgetis, quod omnes coepiscopos vestros suis omnibus indulgere notissimum est, quis unquam, obsecro, reprehendet? Scio apud quem mihi sermo est, apud Patrem et dominum, cui innata bonitas animi, totum quod laudabile est, persuadet. Alardum quacunque invol-

A vatis amaritudine, dum sibi tantum personam præsentare liceat, quæ in ecclesia de Finchamestude, vestris per omnia mandatis obediat et acquiescat. Valete.

EPISTOLA LII.

AD MATILDEM IMPERATRICEM.

Venerabili et illustri dominæ M. imperatrici, regis Henrici filix, frater G. Glocestriæ dictus abbas, in decore virtutum summo Regi complacere.

Super his, quæ vestra mihi mandavit excellentia, meum, si placet, responsum æquanimiter audiat. De religione domini Nivardi, fratris dilectissimi Patris nostri domini abbatis Clarevallensis, ita mihi certus sum, quod si ea quæ inter nos et Cernelienses acta sunt plenius agnovisset, non solum mihi querelam non movisset, sed quæ, dictante æquitate et domino papa statuente, gesta sunt, firma manere voluisset, et vobis tenenda suasisset. Cernelienses enim monachi dominum papam adeuntes, causæ quam adversus abbatem suum intendebant, sibi iudices in Anglia statui petierunt, et ad hoc episcopos quatuor impetraverunt. Ad hos itaque litteras domini papæ afferentes, juxta earumdem litterarum tenorem, die constituta solemniter auditi sunt, et per omnia deficientes iudicio publico condemnati. Præterea non solum sacerdotio privati sunt, sed etiam infames in perpetuum iudicati, et custodiæ claustrorum regularium, et scripto et præcepto domini papæ mancipati. Cum itaque quosdam eorum domini papæ auctoritate suscepimus, ipsos nisi eadem auctoritate remittere, nec possumus, nec debemus. Non turbetur ergo vestra serenitas, si apostolico mandato obedimus, a cujus voluntate resiliere, instar sacrilegii iudicamus. In his vero quæ possumus et debemus, mandatis vestris acquiescere parati sumus. Verum in quo Ecclesiæ auctoritas offenditur, plena nobis excusatio est, si quod non debemus, exigimur. Valeat in perpetuum sublimitas vestra.

EPISTOLA LIII.

AD JOCELINUM SARISBERIENSEM EPISCOPUM.

Patri suo et domino J. Saresberienſi Dei gratia Ecclesiæ episcopo, frater G. Glocestriæ dictus abbas, salutem et servitium.

Urget me importuna Alardi lamentantis improbitas, ut quod forte negandum esset temeritati, negari nequeat improbitati. Unde preces sublimitati vestræ solita confidentia porrigo, ut quam in Alardum intendisti vel jam delisti sententiam, ea qua filios consolari oportet sobrietate levigetis, ut nec quassatam confringatis arundinem, nec linum fumans exstinguatis (*Math. xii*). De rebus presbyteri quas juste petitis, si quid minime restitutum est, plenius sub juramenti taxatione restituat. Si in dignitate vestram quoquomodo præsumptum est, misericordiæ vestræ condigne satisfaciet. Unum tamen rogamus humiliter, ut quod nulli parochiano vestro hactenus negare consuevistis, ipsi in ecclesia de Finchamstude concedatis, ut personam vobis præsentet idoneam, quam in præfata ecclesia mi-

nistrare permittatis. Justum tamen foret sicut donationem ecclesiarum, ita et præsentationem personarum laicorum non esse, sed quod in regno isto nondum in consuetudinem inductum est, a minimis inchoari non oportet, nec a minoribus exigi, quod a majoribus nequeat extorqueri. Si igitur antiquitatem suis aliquatenus vultis convelli radicibus, inchoandum erit a capite, ut inde in barbam descendens unguentum Domini, oram etiam vestimenti attingat (*Psalm. xxxii*), et sic totum corpus Ecclesiæ tanto mellus, quanto diffusius, suæ fragrantiae suavitate perfundat. Petitioni meæ assensum dari, non alia fiducia deprecor, nisi ut quia semper audistis immeritum, audiat adhuc, et non ingratum. Valete.

EPISTOLA LIV.

AD WILLELMUM DE CHEISNEIA.

G. Dei gratia abbas Glocestriæ, WILLELMO de Cheisneia, salutem

Gratias tibi ago de omnibus bonis quæ mihi fecisti, bene sperantes de te, ut semper de bonis in meliora procedas. Nam si dure ad præsens respondisti mihi, necessitatem quæ te urget, culpæ possum, sed te culpæ non possum. Scio quod amicus amico, nepoti avunculus libenter parceret, si necessitas instans hoc permetteret. Et quidem hoc bonum esset mihi, sed multo melius tibi. Nam si tu nos in temporalibus adjuvas, nos tibi spiritualia nostra non negamus. Si omni die apud nos omnes, ibi tui memoria agitur, ubi patri filius immolatur. Sed hoc fortasse quid sit ignoras, vel si bene nosti, non curas. Nec permittit instans necessitas, ut multum inter amicos et alios discernas. Ideo quindecim marcas argenti tibi mittimus rogantes, ut sicut eas bona voluntate mittimus, ita et eas bona voluntate suscipias, ne si nimis spiras ad censum, illorum qui pro te sunt ad Dominum, erga te minuas affectum. Memento, quod vita tua fumus exiguus est, et tota tua gloria pulvis et vermis. Hodie es, et cras non eris; vel si cras eris, nescis si eris post. Et si exieris de corpore, de gloria tua nihil tecum portabis. Castella tua stabunt hic, et habebit ea qui nullas tibi gratiasaget, et in labore tuo forsitan gloriabitur extraneus. Solummodo peccata tua te sequuntur, et nondum tibi videtur, quod satis peccator sis, sed tunc velles quod hic minus peccasses. Ea die, cum miseriam respexeris, et ululatum viduarum, et pauperum gemitum, et orphanorum planctum, querelas Ecclesiarum, super te videris, quis tibi sensus erit, ad quem respicies? Quis omnium sanctorum est, quem non offenderis? Quis pauperum Dei circa te est, quem non læseris? Nisi, dum potes, tibi provideris, tam vehementer coram Deo accusabunt te opera tua, ut nec in hac vita te diu possit tolerare justitia ejus, nec in futura aliquatenus misereri. De propinquo te monuit Dominus, charos tuos de medio tulit, virga ejus jam nunc est extensa in te. Aperiat ipse cor tuum, et infundat ei gratiam suam, ut ante

A tuum diem novissimum bonum opus germinet ex te, in quo possit Dominus salvare te. Valete.

EPISTOLA LV.

AD F. RADINGENSEM ABBATEM.

Patri suo charissimo F. Radingensi Dei gratia abbati, omnibusque Radingensi Ecclesiæ filiis, frater G. Glocestriæ dictus abbas, et hi, quorum ipse ministerio deputatus est, salutem et dilectionem.

Pervenit ad nos, charissimi, magistrum Serlonem de Arundel, crebra vos prece sollicitare, ut de ecclesia de Berchelaie, contractum aliquem cum eo ineatis, et quædam quæ inter vos nominata sunt, sibi concedendo prædictam ecclesiam amodo habeatis. Asserit etiam, ut audimus, se quædam possidere, quæ non possidet, et ostensione quarundam chartarum quas prædicit, vos in credulitatem eorum quæ affirmat, inducit. Unde vestram præmonemus dilectionem, ut sic dictis ejus acquiescat, ne inconsiderata quadam commutatione damnum, quod facile reformari nequeat, incurrat. Certum enim habeatis nos ecclesia de Camme, et ecclesia de Herlingeham, et omnibus quæ ad eam pertinent, apostolica auctoritate investitos esse, et vos nec commutatione aliqua, nec ullo domini Serlonis dono, vel cujuscunque assensu aliquid in eis, nisi cum summa nostri injuria, vindicare aliquatenus posse. Præterea et illud noveritis, clericum nostrum Reginaldum in ecclesia de Berchelaie præbendam unam habere, et Serloni in nullo subjectum esse. Unde si de ecclesia, in qua iste parem Serloni personatum habet, ipso non solum nolente, imo et reclamante, commutationem feceritis, vestrum magis libitum quam quidquam juri congruum facietis; nam quæ publici juris sunt, nullius numerantur in bonis, nec contractus unius transferre potest in re communi dominium. Vos nequaquam latere volumus, prædictum Reginaldum anno præterito, cum eum Serlo de his quæ a nobis modo vindicat, fatigaret, ad dominum papam appellasse, et seipsum in statuto die præsentasse, et cum dominus Serlo nec apparuerit, investitum suis cum gratia domini papæ, ad propria remeasse. Ut vero quod summum est non taceam, certum vobis esse non dubito quod ecclesiam obtinere contractus illicitus est. Unde preces sedulo discretioni vestræ porrigimus, ut in re ista sic omnia moderetis, ut nec religioni vestræ notam inferatis, nec habitam hactenus inter nos charitatem emolumento facile minuatis. Valete.

EPISTOLA LVI.

AD OCTREDUM LANDAVIENSEM EPISCOPUM.

Patri suo et domino U. Landaviensi Dei gratia episcopo, frater G. Glocestriæ dictus abbas, quoniam dies mali sunt, virtutem in infirmitate perficere (*II Cor. xii*).>

Testis mihi, Pater dilecte, veritas est, et quæ mihi non mentitur de me conscientia, quam puro corde et charitate non ficta (*I Tim. i*), vos a prima vestri cognitione dilexerim, et honori vestro simul

et commodo, sicubi quidquam potui, sollicita circumspicione coadjutor semper et cooperor exstiterim. Quod licet ad vos forte non pervenerit, attamen istos non latuit, dominum scilicet Cantuariensem, dominum etiam papam, et qui de latere ejus sunt, in quorum præsentia cum ipse adessem, si de vobis aliquid sinistrum quandoque ventilatum est, me et reclamante, et aliqua vehementia resistente, non solum suppressum resedit, sed velut quædam mendacii nubes prorsus evanuit. Ut verum fatear, equidem si non vobis in multo servivimus, attamen conciliavimus vobis potentum animos, et bona quæ de vobis speramus, nequaquam reticendo, sed palam edicendo, vos in ipsorum gratiam, nec modicam, nec quidem contemnendam induximus. *Charitas enim nunquam excidit* (I Cor. xiii), et ipsa enim cum perfecta est prorsus nescimus. Hæc vero est quæ facile nobis persuadet bene de vobis sperare per omnia, et in quibus nobis jurisdictio vestra necessaria est, æquitatem et justitiam quædam confidentia postulare. Preces itaque sublimitati vestræ porrigimus, ut nostra de vobis non fraudetur spes, et ut litteræ contestantur, super decimis, quas a domino Leofrico juste requirimus, ea diligentia terminetis, ne nobis in Ecclesiæ nostræ detrimento, turpi quadam mutilatione gravamen inferatur, et ut vobis tanquam Patri et Domino, non solum a me, sed a toto etiam nostro collegio gratiarum actio, et debiti honoris exhibitio referatur. Judicium æquæ libræ non recusamus, ne tamen offendantur qui amici sunt, rem magis honesta transactione finire vellemus. Valete, semper in Christo Domino dilecte Pater

EPISTOLA LVII.

AD EUNDEN.

Patri suo et domino U. Landaviensi Dei gratia episcopo, G. dictus abbas Glocestriæ, Deo jure meritum complacere.

Gratum munus æstimo quod me, dilecte Pater, litterarum commonitorio provocas ad virtutem. Nihil est enim quod pater filio vel utilis suadere, vel intimare possit honestius. Nam sola est virtus, quæ Domini virtutum dignum præstat obsequium, et totum exosa quod præterit, affectare præsumit æterna. Virtus est, quæ animos evehit, et totum fugiens, quo turbamur in infimis, locum sibi quaerit et invenit in supernis. Species ejus amabilis est et concupiscibilis forma (Psal. xlv), « quæ, » ut ait Sapiens, « si corporalibus ad plenum intuenda daretur oculis, omnium in se appetitus excitaret non modicos. » Gratias itaque paternæ diligentia refero, quæ mentem meam ad eam quam commendo virtutem, non mediocriter incitavit. Nam quod meæ commissa sollicitudini tractare me diligenter edoces et hortaris, ad prudentiæ me fines applicas, et ea quæ in omni officio pernecessaria est, plenitudine me discretionis informas. Unde si dilectæ mihi benevolentia tuæ, frater, quem in partes illas direxi, reverentiæ minus impendit, offensam profecto gemit

navit in me, quod non solum offendit episcopum, sed et dominum, imo et Patrem experimentis quamplurimis amicissimum. Precor itaque ut correctum suscipias et admonitum, et hanc nobis donando injuriam vestra nobis cumulare beneficia, et gratia super gratiam addita coronare non desistas. Partem vero tibi, quam juste repetis, in integrum reddi præcepi et præcipio, et quædam tibi mandata secretius usque ad adventum Radulphi clerici nostri, ad præsens omitto. Valete.

EPISTOLA LVIII.

AD HENRICUM WINTONIENSEM EPISCOPUM.

Patri suo et domino H. Wintoniensi Dei gratia episcopo, frater G. ecclesiæ beati Petri Glocestriæ dictus abbas, pie miserando misericordiam promereri.

Compellit me charitas serenitatem vestram, in Christo dilecte Pater, humiliter implorare, ut quemdam militem nomine Rogerum Foliot, quem homines vestri apud Merendune incarcerationum tenent, gratia vestra et petitione nostra, ad redemptionem mitti jubeatis. Qua in re sublimitati vestræ præsumendo devotus supplico, ut furcos et superflua verba Willelmi de Cheisnei non admittatis, nec secundum voluntatem ejus illum gravari permittatis, nec verbis eum odientium de ipso fidem habeatis. Noverit enim sanctitas vestra quod pater ejus nunquam nisi dimidiam bidam terræ habuit, ipse prorsus nihil, nisi quod usu militiæ acquisivit. Ad donativum enim domino Brientio servivit hactenus, et jam nunc equos et arma amittendo, totum quod habebat, semel et simul perdidit. In pauperem itaque rogamus ut respiciant oculi vestri (Psal. x), et vincium de carcere educendo (Psal. lxxvii), ab eo qui solvit compeditos (Psal. cxlv) gratiam obtineatis, et me, si quid possum, gratiæ debitorem habeatis. Valete.

EPISTOLA LIX.

AD GAUFRIDUM PRIOREM WINTONIE.

G. Dei gratia abbas Glocestriæ, venerabili domino suo et amico charissimo, GAUFRIDO priori Wintoniæ, salutem et dilectionem.

Gratias benevolentia vestræ habeo referre multimodas, quia parenti meo Rogero Foliot benigne subvenistis, et in necessitatibus suis sibi benevole providistis. Sed quia inter amicos præteritorum bonorum exhibitio, certa est futurorum expectatio, rogamus ut non tepescat charitas vestra, quatenus hoc a vobis deserviat humilitas nostra. Rogamus itaque ut apud dominum Wintoniensem pro ipso interveniatis, quatenus eum de carcere educi faciat, et ad redemptionem mitti præcipiat. Ignominiose enim tenetur in carcere, et jam extrema afflictus est egestate. Unde precor obnixè ut præsentī negotio intendatis, quatenus si quid possumus, nos gratiæ debitores habeatis. Valete.

EPISTOLA LX.

AD EPISCOPUM.

Lætatus sum in his quæ dicta sunt mihi (Psal.

cxxij); nuper de te, fama divulgante, cognovi. A Audio præsulem digna præsule cogitasse, et illicitæ præsumptioni sanctitatis animo restitisse. Est aliquando profecta sententia, ut sub tributum Christi sponsa redigatur. Sed in te cura pastoralis evigilat, ut quod animo præsumptum est, nequaquam opere compleatur. Arguis, obsecras, increpas (II Tim. iv), et defendis, et quos fomento non prævalet præcisionis ferro curare non pertimescis. Pectus sane commendabile quod mansuetis exhibet gratiam, et contumacibus disciplinam. Cum manna virgam in sanctuario divina reponit auctoritas, sic plenitudinem pastoris erudiens, ut et de pectore gratiarum bonis exhibeat totum quod dulce est, et contumaciam reprimat disciplina. Gratulor equidem te pastorem regulam perspicaciter attendisse, et quod exsequendum noveras, ut decebat episcopum, non minus fortiter quam prudenter adimplere. Sane in ipso virtutis opere, tota mihi virtus elucescit. Est namque prudentia nosse quid deceat, justitia cuique exhibere quod oporteat, fortitudo hominem non timere, quia caro est, et in virtute spiritus totum audere quod sanctum est. Temperantiæ est, non ex ira quidpiam vel ex commotæ voluntatis impulsu fuisse gestum, sed solo virtutis amore ad summi Regis ulciscendas injurias igne Spiritus incanduisse. Ages ergo cum fiducia. Valet.

EPISTOLA LXI.

AD UCTREDUM LANDAVIENSEM EPISCOPUM.

Patri suo et domino U. Landaviensi Dei gratia episcopo, frater G. Glocestriæ dictus abbas, salutem.

Importunus effectus sum, sed vos me coegistis; petivi, sed non accepi; pulsavi, sed nondum aperuistis mihi; spero tamen quod pulsanti amico Pater tandem affectu aperiens (*Luc. xi*), non panem petenti lapidem, vel piscem aut ovum postulanti, serpentem porrigetis aut scorpionem (*ibid.*). Pacem a filio pacis et Patre et domino, et multis rerum experimentis amico postulamus. Laeta mihi dies non erit, qua contra vos in iudicio sistere, urgente etiam necessitate, compellar. Agat ergo pontifex digna pontifice, et si quid inter filios suos litis aut controversiæ motum est, ad pacis statum redigat universa. Decimas a domino Leofrico repetimus, quibus investita fuit ecclesia nostra, et absque iudicio spoliata. Jactura gravior est omittere quæ justitia repetit manifesta. Cætera juxta quod dixit vobis dominus Jocelinus, beneplacito vestro commitemus. Vigilet hæc circa Patris et pastoris affectum, ut a filiis condigno merito, et gratiam reportet et servitium. Valet.

EPISTOLA LXII.

AD JOCELINUM SALESBERIENSEM EPISCOPUM.

Patri suo et domino J. Salesberiensis Dei gratia episcopo, frater G. dictus abbas Glocestriæ, et humilis ecclesiæ beati Petri conventus, id modicum quod sunt, et devotionis obsequia, si qua possunt.

Ad vos, dilecte domine, jamdiu nostra querela

perlata est: cui si nondum subvenit pietas, a vestra tamen benevolentia nostra non desperat humilitas. Unde angariati et afflicti plurimum, ad vos iterato recurrimus, nostris opem ferri poscentes incommodis, et juvamen detrimentis. Nam quia vobis conquesti sumus, solito magis affligimur, et quia nos de conquestione nostra nihil aut parum considerant profecisse, ipsa impunitate sua armati, nos velut expositos arbitrantur, et sibi cuncta licere in nos, velut a vobis quadam data licentia gloriantur. Unde rogamus humiliter, ego, quod quidem parum est, et omnes fratres nostri, quod equidem magnum est, ut nostras, si placet, non parvipendas injurias, sed nobis exhibendo justitiam, vestrum, ut dignum est, ministerium honoretis, et nos si quid possumus, gratiæ debitores habeatis. Valet.

EPISTOLA LXIII.

AD EUNDEM.

Patri suo et domino J. Salesberiensis Dei gratia episcopo, frater G. ecclesiæ beati Petri dictus abbas, penitenti veniam non negare.

Justus in exordio sermonis sui aecnsator est sui. Quia ergo justitiæ conformari desidero, meipsum inprimis arguo. Quantum enim fuit in me majestatem vestram et honorem meum in parte minui, cum occurrunt mihi humilitati vestræ et mansuetudini, amplexu gratissimo et corde humillimo non occurri. Cur tamen supersederim, si vestro mihi daretur frui alloquio, ipse dicendo quam scribendo melius intimarem. Si quæ ergo pristinæ charitatis erga nos supersunt usquequaque reliquæ, si juxta mandatum Domini penitenti pectus episcopale non clauditur (*Ezech. xxxiii*), precor ut in proximo cum iter meum ad dominum archiepiscopum dirigetur, vestri mihi colloquii facultas non negetur. Quia vero locum diemque colloquii vobis statuendo nuper excessi, præsumptive reus non id amplius ago, sed vestræ totum voluntati committo. Quid super hoc vestro sedeat arbitrio, parce memor irarum, si placet, mihi rescribatis. Triduum vero antequam vos ad locum destinatum venire oporteat, nuntium item meum habebitis. Quod si Abendune vel Redingis locum dederitis, meo plurimum labori parceretis. Valet.

EPISTOLA LXIV.

AD ROBERTUM HEREFORDIENSEM EPISCOPUM.

Patri suo et domino R. Dei gratia Herefordiæ episcopo, frater G. Glocestriæ dictus abbas, die quotidie bene prosperari in gratiam.

Ad synodum quam, dilecte Pater, celebratis, iter ipse arripueram, sed domini Wigornensis litteræ nos ipsum hac die lunæ Glocestriæ præstolari obedientiæ et charitatis imperio compulerunt. Ideo quod ad præsens non possumus, dilectæ nobis sanctitatis vestræ scripto supplicamus, ut de Wallensibus, de Herchenefeld, Idel, et Chenedin, et eorum complicitibus, nobis justitiam exhibeatis: ipsi enim in nos immeritos suas ulciscuntur injurias, et cum eis in nullo nocuerim, plusquam sexaginta marcarum damnum nobis intulerunt, et totum [quod] in Bran-

tonia laboravimus diu, uno impetu et incursu abstulerunt. Speramus quod damna nostra et incommoda tanquam pensabitis et quod opem quam nulli juste petenti subtrahitis, filiorum justæ postulationi non negabitis. Notum præterea sanctitati vestræ facimus, quia clericus vester Gunni de Stantuna in novissimis agens, a vobis ut Patre et pastore animæ suæ, sanctorum orationum vestrarum suffragium expetit, ut vestro interventu communitus, jamjam exiturus, Domini misericordiam possit securius expectare. Rerum vero suarum dispositio hæc est, quam in conscriptorum testium præsentia ipse subscripsit. Quantum annonæ in domo sua est, hæc servantibus suis et his quibus aliquo debito obligatus est concedit. Reliquorum omnium tertiam vobis legavit, et ecclesiæ nostræ, in qua habitum monasticum suscepit, duas reliquas consignavit. Hujus extremæ voluntatis suæ testes hi sunt, Nicolaus sacrista, Grimpater, Walterus. Et quia nihil magis debetur humanitati quam quod extremæ voluntatis liber sit stilus, et licitum quod ultra non redit arbitrium, suppliciter petit, ut quod a se pietatis intuitu actum est, auctoritate vestra stabilis, vel si vobis aliter visum fuerit, voluntati vestræ sua non præjudicet. Valete.

EPISTOLA LXV.

SIMONIS WIGORN. EPISC. EP. AD UNIVERSOS S. MAT. ECCLESIE FILIOS.

Dilectis in Christo fratribus universis sanctæ matris Ecclesiæ filiis, S. Wigornensis Dei gratia episcopus, perpetuam in Domino salutem.

Ad pacem Ecclesiæ tutius in aliqua parte muniendam, vestræ notum facimus diligentiz, quod controversiam illam, quæ inter filios nostros monachos scilicet Glocestriæ et canonicos Lantonix, de corpore domini Milonis comitis Herefordiæ, in præsentia nostra nuper exorta est, illam biduo actam, hoc tandem sine utriusque partis assensu terminavimus. Canonici corpus ipsum, quod monachi in ecclesia sua humandum esse, multis attestantibus asserebant, tum parochiali jure, tum gratuita donatione, quam ipse comes ecclesiæ eorum de se fecerat, antequam se Lantoniensi concessisset Ecclesiæ, illud corpus canonici liberum et quietum, nil de jure reclamantes, dimiserunt. Monachi vero precibus venerabilis fratris nostri Roberti Herefordensis episcopi, et nostris, domini etiam Rogeri filii comitis, et multorum baronum et militum, corpus ipsum in ecclesia Lantoniensi, in qua allatum fuerat, sepulture tradi concesserunt. Hac tamen conditione, quod ipsi dominum Robertum filium comitis, et uxorem ejus, et omnes hæredes in perpetuum, et dominum castelli Glocestriæ, quicumque unquam futurus sit, ecclesiæ Beati Petri liberum et quietum absque omni reclamazione concesserunt. Ad cujus rei confirmationem, ego Simon Wigorniensis episcopus, dominum Robertum filium comitis manu accipiens per manum filii nostri Gilberti abbatis Glocestriæ, ipsum et successores ejus ecclesiæ beati

A Petri attulavi, et ubicunque terrarum obierint, in illa ecclesia sepeliendos et humandos, episcopali auctoritate constitui. Valete

EPISTOLA LXVI.

AD SIMONEM WIGORNIENSEM EPISCOPUM.

Patri suo et domino S. Wigornensi Dei gratia episcopo, frater G. Glocestriæ dictus abbas, et ecclesiæ Sancti Petri conventus humilis, salutem et obedientiam.

Quæ sint ea, domine, quæ a domino Willelmo de Bellocampo tandiu sustinimus, fratrum nostrorum relatu plenius agnosceatis. Nam, ut omittamus quæ retro sunt, non diu quod tres et quadraginta summas bene purgati tritici, quæ ad usum fratrum nostrorum deferebantur, per eum amisimus et earundem recuperationem usque adhuc spe promissæ pacis, dolo capti distulimus. Singulis præterea mensibus in procuracione servantium suorum, tres solidos dare jamdiu cogimur, et unoquoque ad utramque sementem, sexaginta jugera terræ suæ arare, serere, et illi metere compellimur. Sunt præter ista quotidianæ servitutis operum innumera, quibus homines nostros angariare, et usque ad extremam miseriam persequi et affligere non cessat, et quo majori erga eum patientia sumus, tanto minus se jure in nos et totum quodlibet facere formidat. Flagrat ecce recens maleficium ejus, et hæc hebdomada ad bene inchoanda jejunia sua, domos nostros confregit, annonam excussit et asportavit, et de cætero pejora promittit. Unde preces sublimitati vestræ porrigimus, ut hanc ejus audaciam compescatis, et nobis justitiam exhibere ulterius non differatis. Voluntate quidem nostra justitia in eum non differetur ulterius, nisi nobis ablata non promisso sed facto restituerit, et amodo in tota terra Beati Petri injustas exactiones istas abjurerit. Vocatus ter in ecclesia nostra hæc proxima Dominica, licentia vestra excommunicabitur. Valete.

EPISTOLA LXVII.

AD JOCELINUM SALESBERIENSEM EPISCOPUM.

Patri suo et domino J. Salesberiensi Dei gratia episcopo, frater G. Glocestriæ dictus abbas, in meditatione cordis, et oris eloquio, Domino complacere.

D Quoniam scripsistis bene, rogamus ut faciatis et bene, opem quam nobis verbo promittitis, opere compleatis. Incubus ille Cerneliæ, quod alieni juris est, audacter occupat; qui inde violenter excussus est, ad aliena limina solo justitiæ defectu mendicat. Ad vestræ igitur sanctitatis genua provoluti suppliciter exoramus, ut tam nostris fatigationibus quam extremis Ecclesiæ desolationibus charitas vestra compatiatur, et subveniat, et adversus contumacem, inobedientem, et rebellem, non suspectæ nobis justitiæ vestræ zelus incandescat. Non est vobis adversus postulationes nostras excusatio. Potestis enim quod petimus, et debetis; anathematis itaque sententia in ipsum et ejus complices, qui manifeste digni sunt proferatis, et animas nostras

ne diutius suspensas teneatis. Litteras domini archiepiscopi vobis mittimus, cui nisi plene obedieritis, jam solus unus superest, quem pro justitie defectu requiramus. Valete.

EPISTOLA LXVIII.

AD BERNARDUM CLAREVALLENSSEM ABBATEM.

Adjutori Domini fidelissimo Bernardo Clareval-
lensi abbati, frater G. Glocestriæ dictus abbas,
orationum utinam vestrarum participem me fieri.

Dignum est apud filios lucis, si quid forte noctis
intervenit, ut plenius illucescente claritate non
solum dispareat, sed etiam potius evanescat. Unde
quod apud nos nulli fere dubium est, serenitati ve-
stræ significamus, ne forte in his quæ novimus,
veritatem in præsentia vestra obscurari permitta-
mus. Scimus enim Willelmum quondam abbatem
Tinterniæ, locum de Chingeswude, quem nondum
quisquam monachorum inhabitaverat, ab ejusdem
loci advocato Willelmo Berchelai, assensu præsi-
dentium potestatum, imperatrici videlicet et Milo-
nis de Glocestria, nullo reclamante, suscepisse,
ædificasse, et de ipsa domo Tinterniæ conventum
in loco ipso instaurasse, et jam statuto conventu
abbatem de eadem domo sua, Thomam videlicet
Tinterniæ priorem præfuisse. Deinde processu
temporis prædictus abbas Willelmus Tinterniæ, ad-
hibito sibi charissimo fratre nostro Hamone abbate
Bordesleie, prædictum etiam Thomam domino Wi-
gorniensi præsentavit, et ut in abbatem benedicere-
tur obtinuit, et ipsi deinceps ut filio domini
etiam de Chingeswude tanquam unicæ filiæ provi-
dit in pluribus et subvenit. Cum itaque juri suo
renuntiare cuique liberum sit, videat Tinternensis
Ecclesia si juri suo renuntiavit, si quod obtinebat
abiecit, et a se quod susceperat alienavit. Ætatem
habet, loquatur ipsa de se. Nos quod apud nos
celebre est, et in ore ut dicam omnium, vobis ma-
nifestare curavimus. Incolumitatem vestram sibi in
longa tempora profuturam, conservet omnipotens
Dominus, in Christo dilecte Pater.

EPISTOLA LXIX.

AD THEOBALDUM CANTUARIENSEM ARCHIEPISCOPUM.

Patri suo et domino Cantuariensi Dei gratia ar-
chiepiscopo, et totius Angliæ primati, T. frater G.
Glocestriæ dictus abbas, delicias regibus in pane
pinguissimo ministrare.

Officiosum mihi, domine, munus existimo, totum
quod animæ meæ memoriam vestri repræsentat,
aut suggerit. Unde præsentium hunc latorem trans-
misimus ad vos, ut per eum directis litteris de statu
nos vestro simul et voluntate certificetis. Nostra
enim hujusmodi sunt. Infestant nos quamplurimi,
et non solum nostram, sed omnes circa nos Eccle-
sia multiplicatis angariis inquietant. Quos si per-
cutimus in gladio, aurem Malchi, Domino manum
extendente, cito sanari considerant (*Matth. xxvi*),
et ab hoc imperterriti peccant. Unde vestræ nobis
litteræ ad dominum Wigornensem, et ad dominum
Herefordensem necessariae sunt, ut Ecclesiæ nostræ

A protectioni invigilent, e quo nos abesse contigerit,
eo sibi consilii manum et auxilium propensius im-
pendant. Nos vero itineri accincti sumus, et ad
jussionem vestram, Domino annuente, parati aderi-
mus. Adversantur nobis quamplurima, sed amor
offendicula prorsus ignorat. Valeat in longa tem-
pora vestra sublimitas, in Christo dilecte Pater.

EPISTOLA LXX.

SIMONIS WIGORN. EPISC. EP. AD PAROCHIANOS.

Simon Wigorniensis Dei gratia episcopus, dilectis
sibi in Domino omnibus filiis et parochianis suis,
salutem, benedictionem et gratiam.

Quoniam multis et magnis frequenter occupari
negotiis, singulorum necessitatibus prout vellemus
vacare non possumus, ideo dilecto fratri nostro G.
abbati Glocestriæ, auctoritate nostra benevola chari-
tate concessimus, ut si persona aliqua in episcopatu
nostro sibi et ecclesiæ suæ ecclesiam aliquam sive
beneficium aliquod ecclesiasticum personæ tamen
alteri vel ecclesiæ violentiam vel injuriam nequaquam
inferendo concesserit, licet absentes simus, quod pia
sibi largitione conceditur suscipere non omitat, dum
tamen archidiaconum nostrum, vel si ipsum abesse
contigerit, decanum nostrum qui partibus illis præ-
erit adeat, et per ejus manum investituram accipiat.
Hoc quia vobis notum, et illi firmum esse volumus,
vobis notificare, et illi præsentī scripto confirmare
curavimus. Valete.

EPISTOLA LXXI.

AD UCTREDUM LANDAV. EPISCOPUM.

Patri suo et domino U. Landavensi Dei gratia epi-
scopo, frater G. Glocestriæ dictus abbas, salutem.

Quoniam habitio mandato comparatur, dilecte no-
bis excellentiæ vestræ præsentī scripto notificamus
quod, sicut nullam Radulfo clerico nostro adversus
Teochesberiam hactenus calumniam injuste movere
mandavimus, ita nunc si injustitia sua pertinax in-
venitur, id quantum nostra interest aliquatenus ra-
tum habemus. Nam cum præcepta juris hæc sint,
honeste vivere, alterum non ledere, jus suum cui-
que tribuere, sicut ea quæ nostri juris sunt nobis il-
læsa manere volumus, sic quæ competunt aliis nul-
lam nostrā opera læsionem aut detrimentum susti-
nere desideramus. Paternitatis itaque vestræ noti-
tiam latere nolo, quod dominus abbas de Teoches-
beria, decimam de terra R. Foliot, mihi volens
satisfacere, pro tribus solidis uno anno dimisit,
decimam dico quam prædictus R. reclamabat juris
esse ecclesiæ de Lancarwan. Prudentiæ itaque vestræ
palam volo esse, hoc modo ad illum ejusdem deci-
mæ investituram devolutam esse. Quapropter cha-
ritatem vestram diligenter et obnixè precor, ne oc-
casione mei, vel prædicti R. præfatum abbatem su-
per hoc in aliquo gravetis vel gravari permittatis.
Alienum contra justitiam et Patrum decreta omnino
nolo, quia non debeo affectare aut possidere. Valete.

EPISTOLA LXXII.

AD R. EXONIENSEM EPISCOPUM.

Patri suo et domino R. Exoniensi Dei gratia epi-

scopo, frater G. Glocestriæ dictus abbas, salutis A
gaudium et obedientiæ famulatum.

Quanta, domine, debeatur apostolicæ majestati
reverentia, quæ etiam mandatis ejus obedientia,
vestra satis novit discretio, ejus non minus ad do-
ctrinam scientia, quam ad honestatem et omnem gra-
tiam mores exuberant. Preces itaque serenitati
vestræ porrigimus ne vos Cernelliensium dissuasio
possit avertere, quo vos minus domino papæ contin-
gat obedire. Adest dies actioni causæ domini Ber-
nardi abbatis et monachorum Cernelliensium con-
stitutæ, dies scilicet Dominica post Ascensionem
Domini, quo cæteri omnes Bathoniæ aderunt, quibus
una vobiscum ejusdem est causæ cognitio, a do-
mino papa delegata. Unde si vos abesse contigerit,
dabitur prædictis monachis occasio subterfugendi
judicium, si aliquem abesse viderint judicium assi-
gnatorum. Quod quidem nobis non solum laboris
esset continuatio, sed et iteratio, et coæcervata gra-
vaminum multiplicatio. Provideat itaque, si placet,
vestra discretio, ne absentia vestra tam causam
nostræ sit detrimentum, quam fatigationibus nostris
præbeat incrementum. Uno enim adventu vestro do-
mino papæ obedietis, et nos humiles amicos vestros
amplioris vobis gratiæ debitores statuētis. Valete.

EPISTOLA LXXIII.

AD EUGENIUM PAPAM.

Patri suo et domino summo pontifici frater G.
dictus abbas, dies utinam bonos, et in longum beata
tempora.

Sublimitati vestræ, dilecte Pater, rem notam
facimus, quam Ecclesiæ necessitati profuturam, ju-
vante Domino, vestra in hoc favente gratia confidi-
mus. Nam cum filio vestro domino et Patre nostro
charissimo domino Cantuariensi, diebus exsilii sui
commorantes, utpote selem certam aut locum pro-
prium non habentes, sed negotiorum necessitate de
loco ad locum demigrantes, Atrebatum Julio mense
pervenimus. Ubi desiderio mirabili totius fere cleri
et populi concordia vota reperimus in electione di-
lecti fratris nostri Hugonis, ipsius Atrebatensis Ec-
clesiæ archidiaconi. Quem, ab ineunte ætate, tota fere
vita nostra cognitum primo conversationis honestæ
discipulum, post nota satis auctoritate magistrum,
in publicas gratulationes susceptum, ad ultimum
Ecclesiæ Atrebatensis archidiaconum, illasam bonæ
opinionis famam continuasse scimus, et scripto præ-
senti secure testificamur, in quod multorum religio-
sorum testimonia concordare non ambigimus. Unde,
quantum audeat apud majestatem vestram charam
nobis et semper honorandam parvitas nostra præ-
sumere, rogamus ut quem in humilitate sua respexit
Dominus, vos ea, qua vobis omnes anteire datum
est, benigne respiciatis, et data vobis auctoritate
a Domino virtutem in ipso remuneretis, eatenus ut
unius exemplo in religionis amorem cultumque vir-
tutis quamplurimos attendatis. Inexpugnabili muro
suo circumcingat vos Dominus, et armis suæ poten-
tiæ protegat semper, in ipso dilecte Pater. Valete.

EPISTOLA LXXIV.

AD ROBERTUM HEREFORDIENSEM EPISCOPUM.

Patri suo et domino R. Herefordiensi Dei gratia
episcopo, frater G. Glocestriæ dictus abbas, salutem
et obedientiam.

Salutationem domini papæ, totius etiam curiæ
congratulationem, quorundam etiam suorum solilo-
quia libenter vobis seorsum posita conquestione
nuntiarem, sed nos ad præsens ad querimoniam
injuriarum compelli atrocitas, ut postquam multa su-
stinuimus, seram saltem querelam apud justitiam
vestram deponamus. Scēvit in nos domini Badoronis
et uxoris ejus plus justo severa potentia, et cum
eos nulla ex parte læserimus, contractionibus et
verberibus, hominum etiam nostrorum incarcerationi-
bus, rerumque direptionibus, quod non rapimus
multiplici servitute exsolvere compellimur. Quoniam
itaque manifesta sunt hæc jamjamque ad judicium
præcedentia, rogamus, si placet, ut nobis justitiam
super his exhibeatis, ipsamque exhibendo a peccato
ipsos, nos ab incommodo defendatis. Valete.

EPISTOLA LXXV.

AD HIENARDUM, JOANNEM ET CAPIT. S. DAVID.

Frater G. gratia Dei Glocestriæ dictus abbas,
amicis suis HIENARDO sacristæ ecclesiæ Sancti David,
et magistro JOANNI, et toto capitulo, salutem et di-
lectionem.

Speramus vestram non latere prudentiam, quod
mandatum mandatoris more finitur. Unde si man-
datum aliquod a domino et Patre vestro bonæ me-
moræ episcopo Bernardo, super causa quæ de
ecclesia Sancti Ismaelis, inter nos et monachos de
Cerneleia ventilatur, constat illud, re adhuc ma-
nente integra, episcopi ejusdem decessu expirasse.
Nos itaque cum vos adeundi super hoc nulla rogat
necessitas, monet tamen voluntas et suadet amicitia,
vestrum super eadem causa judicium, si vobis
tantum injunctum est, aut ad vestram spectat offi-
cium, non declinare. Sed quia confecto nuper fati-
gati sumus itinere, et negotiis domini papæ, non
solum magnis imo et multis occupamur, rogamus
ut ob ipsius reverentiam nos et nostra in presenti
pace esse permittatis, et præsentem actionem usque
ad episcopi in Ecclesia vestra substitutionem diffe-
ratis. Valete, et amicum justam postulanti audire
non omittite.

EPISTOLA LXXVI.

AD ROBERTUM LINCOLNIENSEM ARCHIDIACONUM.

Roberto Lincolnensi archidiacono charissimo
suo, suus G. veram et valituram in tempora prospe-
ritatem.

Actio causæ nostræ usque ad adventum domini
Eboracensis in Angliam consilio domini Claraval-
lensis, et domini papæ voluntate dilata est. Omnibus
itaque in integritate manentibus, sani pariter et
alacres Domino per omnia bene juvante redimus,
domino Eboracensi post quadragesimum ab adventu
suo diem, si sibi placuerit, in præsentia et curia
domini regis responsuri. Dunelmensis, Wicorrien-

sis, Bathoniensis, Exoniensis, et præcipue Wintoniensi ab omni officio episcopali suspensi sunt, gratiam fortassis in posterum per bonos nuntios habituri. Dominus Cantuariensis et alii quamplures episcopi, et nos omnes pro domino Wintoniensi supplicantes, in nullo prorsus auditi sumus, sed, quod nos minus potuimus, comes Theobaldus instantia nuntiorum episcopi sperat obtinere. Dominus papa super his quæ ad Ecclesiam vestram spectant, domino Wintoniensi in nullo penitus acquiescens, plenitudinem potestatis in consulendo Ecclesiæ vestræ domino Cantuariensi concessit, ut in omnibus, quæ ad id spectant, domino Cantuariensi, tanquam domino papæ obediatis. Litteras domini papæ super his Robertus Foliot ante discessum nostrum jam impetrans, vobis allaturus est. Agatis itaque cum fiducia. Quod enim domino Wintoniensi super hac re magis placuerit, hoc domino papæ per omnia displicebit. Fiscamensem, Hulmensem, illum de Westmister illum depulsat dominus papa, jam nunc multa cum indignatione, et severitate reprobat (31). Valete.

EPISTOLA LXXVII.

AD ROBERTUM BATHONIENSEM EPISCOPUM.

Venerabili domino fratrique charissimo ROBERTO Bathoniensi Dei gratia episcopo, frater G. Glocestræ dictus abbas, salutem.

Præveniente nos in multis gratia vestra, juste se vobis offerunt et presentant servitia nostra. Si quid enim sumus, aut scimus, aut possumus, hoc honori vestro esse, et scire, et posse desideramus. Prompto igitur ac libenti animo notificamus vobis, quod commodo vestro et honori profuturum speramus. A domino papa domino Cantuariensi creditum est et commissum, ut juxta quod inter eos dispensatum est, non solum abbates, sed et episcopos terræ istius, possit ab ea qua tenentur apostolica sententia relaxare. In quo vobis a Domino provisum esse confidimus, ne maris, et montium, et exterarum regionum discrimina experiri oporteat, cui remedium opportunum in ipso domini archiepiscopi adventu, Domino sic disponente, accelerat. Dilectioni vestræ, suggerente charitate, istud notificandum duximus, ut sic et vobis juxta hoc provideatis, et id si placet, domino Exoniensi, domino et amico nostro charissimo nuntietis. Valete, et me vestros precor inter amicos habete et reputate.

EPISTOLA LXXVIII.

AD CANONICOS ECCLESIE HEREFORDIENSIS.

G. gratia Dei abbas, et Herefordiensis Ecclesiæ, mandato domini papæ vicarius, dilectis fratribus suis, omnibus Herefordiensis Ecclesiæ canonicis, salutem et dilectionem.

Quoniam, dilectissimi, comitem Herefordiæ semel et iterum, tertioque commonitum, ab errore viæ suæ pessimæ revocare non possumus, hoc solum vobis restat ut ipsius audaciam ecclesiastica justitia

A compescamus. Unde vobis, auctoritate domini papæ et domini Cantuariensis, injungimus ut statim ex quo litteras nostras suscepistis, a divinis officiis, excepto baptismo et confessione et viatico, cessetis; et quia, lugente matre, filias gaudere non oportet, mandamus vobis ut sententiam eandem in tota parochia vestra denuntietis, et firmiter teneri faciatis. Valete.

EPISTOLA LXXIX.

AD BRIENTUM FILIUM COMITIS.

Dominio et amico suo charissimo BRIENTO filio comitis frater G. e. b. P. Glocestræ dictus abbas, bene currendo fructu non privari iustitiæ.

Quosdam pertrahit in stuporem quod cum litteras non didiceris, librum nihilominus edidisti. Verum scias id mihi non fuisse miraculo, cum quod artis tibi negabat industria, vehementiam amoris in te ex parte didicissem cognoverim. Amor enim non accipit ex impossibilitate solatium, vel ex difficultate remedium. Semper enim operatur magna si eci, vel si operari renuit, amor non est. Hinc est quod cum litteras non didiceris, in campum tamen litterarum non mediocriter impegisti. Hæreat animo tuo divi regis Henrici honore digna memoria, cujus dies bonos et aurea quondam sæcula patriæ gens orbatâ deplorat, et rubigo præsentis ætatis frequenti sæd tristi recordatione commemorat. Non est tibi elapsus memoria, quod te promovit a puero, quod juvenem educavit et donatum militiæ cingulo, donis et honoribus ampliavit. Verum hinc est quod te sui memorem fecit et recenti memoria vivit apud te: quoniam obisse sibi totius Angliæ facies admodum desolata crebra miseriarum inundatione recognoscit. Ab illo enim degenerans amor tuus propagatur in stirpem regiam unicam ejus filiam et regni ipsius hæredem, cujus causam non solum armis, sed ut audivimus et jam vidimus, eloqui venustate simul et veritate sustines et defendis. Totum namque brevi complexis argumento, quod hactenus veritatis ignaros in favorem suæ partis alliciat et jamdiu veritatis conscios vel confirmet si amici sunt, vel obtundat, ut reliberet inimicos. Ipsam tamen de qua tibi sermo est in nullius commendes injuriam. Ea quæ regis Henrici fuerant, unice ejus filix, et legitimo matrimonio procreata asseris jure deberi. Videtur ad id quod asseris juris cujusque regula coaptari. Est enim divinum jus, et naturale est et humanum. Ex jure divino Dominum in Evangelio audivimus, dicente sibi matre sua: *Fili, quid fecisti nobis sic?* respondit ei Dominus: *Quid est quod me quærebatis? nesciebatis quia in his quæ Patris mei sunt, oportet me esse?* (Luc II.) Magnus est Dominus ad compassionem ancillæ, et magna est cælestis hæreditas, temporali comparata et transitoria. Sic tamen loquitur Dominus, ac si neminem dubitare oporteat, quin ea quæ patris sunt naturali ejus filio jure debeantur. Sed qui nullam

prætermittit occasionem, si sibi oblata fuerint. A
 quia tua dicta remordeat, non filium, sed filiam
 de qua agimus esse contendet, et quæ filio magis
 competunt non debere filix regalia sceptrâ addici.
 Quid contra istud lex divina respondeat, audiamus.
 In libro Numeri, capitulo ultimo, super hoc aliquid
 invenies : Salphaad homo erat Judæus, de tribu
 Manassæ : huic filix tantum erant et nullus fi-
 lius. Visum est quibusdam ob sexus imbecillitatem,
 non debere eas in bona patris admitti. De hoc re-
 quisitus Dominus legem promulgavit, ut filiabus
 Salphaad totum cederet integrum quod fuerat ab
 earum patre possessum (Num. xxxvi). Eant qui vo-
 lunt ; ponant in cælum os suum, astris si placet
 machinentur insidias. Nobis fixum erit quod æterna
 lege sancitum est. Si vero jus naturale percurras,
 causæ huic non mediocri firmamentum et robor
 invenies. Jus enim naturale est quod natura non
 tantum nosse omnia animalia docuit, secundum
 quod singula juxta genus suum amorem sibi quem-
 dam conciliant, fetus propagant, propagatos dili-
 gent et conservant. Si te ex tenore hujus juris in-
 terroges, quid rebus hujusmodi sit natura propin-
 quius, recte respondeas, id esse quibusque natura pro-
 pinquius, ad quod ea naturalis plus trahit affectus.
 Sed volo dicas manifestius : Singulorum ad id ma-
 gis affectus trahitur, quod ex iisdem quodam velut
 carnis et sanguinis participatio procreatur. Attende
 igitur ut vel homines a natura secernas, vel ideam
 in his esse debere naturali jure concedas. A patre
 et matre prima est in filium filiamve progressio.
 Nepotem statue vel quemlibet alterum in sanguinis
 linea gradum. Jam languet amor et tepescit affe-
 ctus, et sanguis ipse cursu quodammodo longiore
 defervit. Est ergo in filium et filiam æque serventur
 amor, affectus promptior et natura convinctior.
 Sed dices hæc omnia quæ de naturali jure diximus,
 ad interioris habitus qualitatem, non ad possessionis
 spectare successionem. Non ita est. Quem enim
 reputas natura proximam, restat ut ab eo quod
 possidetur minus æstimes alienum. Vide quid te
 natura perdoceat. Tractus maris et sinus littorum
 pisces inhabitant, in quibus eos naturalis partus
 effudit. In quibus educatæ sunt, saltus feræ non des-
 sinunt. Silvas aviculæ, in quibus concreatæ sunt,
 suis implent organulis, et natura in singulis, non
 solum intime trajicit qualitatis affectum, sed ipsi
 successivæ suæ soboli exteriora quæ possidet, quo
 potest jure largitur. Vide naturam ne expellas a
 te, prudenter ejus acquiesce judicio. Regis Henrici
 condignam sobolem, unicam ejus filiam, legibus
 editam et educatam, regis ipsius heredem incon-
 cussa ratione pronuntia. Hoc divinum, hoc jus na-
 turale suadet ; hoc juris humani sanctio protestatur.
 Nam jus humanum partim civile, partim jus gentium
 appellatur. Civile est quod observandum sibi civi-
 tas unaquæque constituit. Jus gentium est quod non
 civitas una sed unaquæque gens sibi censuit obser-
 vandum. Sed et civili et jure gentium caute decre-

tum est, ne liceat cuicumque patrifamilias filium fi-
 liamve legitimo procreatum matrimonio, nisi certis
 intercurrentibus causis abdicare. Causæ vero hu-
 jusmodi sunt ; ut si quis patri manum injecerit,
 vel ejus mortem iudicii manifestis optaverit, vel
 beneficiis ingratus exsulerit et quæ hujusmodi sunt,
 quibus intervenientibus culpis, lex etiam liberos
 abdicare permittit. Sed nihil horum in præsentī
 causa reperies. Illa enim, cujus causam tam solli-
 cita cura perstringis, quando patri rebellis exsiliit ?
 Quando ingrata beneficiis ? Audivimus eam ad patris
 consilium tentasse maria, transcendere Alpes, igno-
 tas adiisse regiones, nupsisse ibidem ad patris im-
 perium, et in ipso rerum fastigio et imperii cul-
 mine, honeste sancteque tam diu perstitisse, donec,
 B post viri decessum, non necessitate urgente, vel im-
 petu femineæ voluntatis leviter impellente, sed pa-
 tre, qui miserat, revocante, ad ipsum reversa est.
 Et licet in ipso culmine rerum, ut dictum est, per-
 stitisset, ut regina Romani orbis et diceretur et
 esset, nequaquam supercilio elata est, sed ad omnem
 patris nutum ipsius subdita voluntati, ejus item
 consilio secundis potita nuptiis, viro nubens fortis,
 sicut audivimus, et strenuo, Andegavensium, Ce-
 nomannensium, Turonensium domino, Normanno-
 rum etiam tunc triumphatori, ut audivimus, sere-
 nissimo. In his omnibus, quæ dicta sunt, non inve-
 nies cur exheredari vel abdicari a patre deberit.
 Ne quidem abdicata, sed pio prudentique consilio
 potius est in totius Angliæ et Normanniæ domina-
 tionem, episcoporum omnium et totius regni hujus
 nobilium juramento firmata. Eorum namque qui
 C statuto consilio patris, ut dicitur, consueverant
 appellari nominibus, nemo plane relictus est, qui
 non ei consilium de obtinendo et tuendo post regis
 obitum regno Angliæ et ducatu Normanniæ sub
 juramenti religione promitteret. O tempora digna
 taceri ! Reminisci pudet communis opprobrii nomen
 quod opprobrio duxerim ? id quemque jurasse quod
 oportuit, sed ab eo quod sancte juratum est, cito
 leviterque recessisse. Quis infatnavit Angliam ?
 Miserum dico caput, quisquis ille est, in quem tot
 redundant perjuria, homicidia, incendia, flagitia,
 desolationes et scandala. Quando sibi securus eris
 D qui contaminavit regnum, polluit sacerdotium, et
 non solum præsentī ætati sed futuræ posteritati
 grave infixit opprobrium ? Vere hæreditas ad quam
 festinatur in principio, in fine benedictione carebit.
 Quis jam Angliæ clades enumeret ? Vetus habet
 historia, quod Alexandro mortuo pueri ejus impo-
 suerunt sibi diademata et regnare ceperunt, unus-
 quisque in loco suo, et multiplicata sunt mala in
 terris. Sic sic multiplicata sunt et hodie. In aures
 amici deploro quod sentio. Tot reges patimur quot
 nuptiis angustamur. In luto servimus et latere, et
 solam libertatis umbram habemus, jam nihil agendo
 libere sed servis, qui increverunt hodie, tanquam
 voluntarie obsequendo. Nam.

..... levius sit patientia
 Quidquid corrigere

non est fas. Et quid erit finis miseræ? Dicam quod sentio. Dum stabit abominatio, deesse non poterit desolatio. In Deum graviter offensum est et contra insensatos pro ipso pugnat orbis terrarum. Revoce-
 A tur ad justitiam status; bona principia laudabilis exitus prosequatur. Inter cætera quæ dixisti, laudabiliter et hoc positum est. Non ex toto in perniciem vadit, qui de medio male viæ revertitur. Reversus quidem es, nec reversus solum, sed conversus. Audisti peccasse multitudinem, et ad horam impetum multitudinis es secutus. Ore magis peccasti quam corde. Et quidquid ore promitteres fidem corde servabas. Filii Israel quandoque commisi sunt inter gentes, et didicerunt opera eorum et servierunt sculptilibus eorum (Psalm. cv). Tu quoque in pronum corrente multitudine, non ad primos impetus restitisti. Nec contra torrentem brachia inutiliter vaneque jactasti. Nactus opportunitatem quod corde forebas apud te, illud opere demonstrasti: sed qui te amulo livore persequitur, geminati perjurii calumnias fortassis opponet. Semel pejerasse malum est, iterasse perjurium multo pejus. Magis igitur his quam semel perjuros a justitia recessisse, quid si cum rege stetisses, semel quidem pejerasses, perjurium tamen non iterasses, ideoque melius fecisses. Ne te siliqua vana perterreat, fidelitatem uni, fidelitatem promisti et alteri; primo cui debebas, postmodum cui non debebas. Primo non pejerasses, nisi secundo aberrasses. Ab hoc errore declinasti, et sic omnia sanasti: hos evasisti laqueos, sed alios fortassis incurres. Tibi regis obiectatur electio, ut te jure repellat Ecclesia, cujus instituta despicias et sacramenta contempnis. Sed nunquid ad justitiam te sacramenta perducent? Sacra suos operentur effectus. Sanctificent nos potius quam a proposito sanctitatis averiant. Non potius mundatos peccato iustificent quam crimine irretitos, manibus ligatis et pedibus, in inferna demergant. Male de sacramento præsumitur, si per ipsum non laxatur culpa, sed reus augetur. Nostro quidem iudicio nihil in his est quo te jure premat Ecclesia, si causam tamen hanc iudex æquilibrium examinet. Nisi si forte rubore suffunditur, quod ei viam qua ire oporteat, quasi præviis ostendisti. Volo tamen attendas quid in parte hæc audierim vehementius jaculatum. Non diu est quod audisti dominum papam Innocentium convocasse Ecclesiam et Romæ conventum celebrem habuisse. Magno illi conventui cum domino et patre nostro domino abbate Cluniacensi, interfui et ego Cluniacensis minimus. Ibi causa hæc in medium deducta est, et aliquandiu ventilata. Stabat ab imperatrice dominus Andegavensis episcopus, qui cum causam ejus diligenti percurrisset oratione, contra ipsum quasi sub voce præconia in communi audientia declamatum est. Et quia dominus Andegavensis duo inducebat præcipue, jus scilicet hereditarium et factum imperatrici juramentum, contra hæc duo in hæc verba responsum est. Oportet in causis omnibus, quæ multiplici jure nituntur, hoc considerare

A præcipue, quid sit jus principale in causa, quo causa ipsa principaliter innititur, quod vero secundarium sit et ab ipso principali dependens. Sublato enim fibre principali, necessario tollitur et secundarium. In hæc igitur causa principale est, quod dominus Andegavensis de hereditate inducit et ab hoc totum illud dependet, quod de juramento subjungitur. Imperatrici namque sicut heredi juramentum factum fuisse pronuntiat. Totum igitur quod de juramento inducitur, exinaniri necesse est, si de ipso hereditario jure non consluerit. Ipsum vero sic infringitur. Imperatricem, de qua loquitur, non de legitimo matrimonio ortam denuntiamus. Deviauit a legitimo tramite Henricus rex, et quam non licebat, sibi junxit matrimonio, unde istius sunt natalitia propagata: quare illam patri in heredem non debere succedere, et sacra denuntiant. Hoc in communi audientia multorum vociferatione declamatum est, et nihil omnino ab altera parte responsum. Rogo, mihi in parte ista respondeas. Interim dicam ipse quod sentio. Majores natu, personas religiosas et sanctas, sæpius de re ista conveni. Audio illius matrimonii copulam sancto Anselmo archiepiscopo ministrante celebratam. Ipsum enim non aliter quam sanctum audeam appellare. Nam cum frater quidam dubitaret utrum sanctus appellari debuisset, ei divinitus hæc facta est revelatio. Dum oraret et ab oratione in mentis raperetur excessum, liber ei in manibus datus est cujus dum primas revolveret paginas, nihil scriptum nisi sanctus Anselmus invenit. Et cum cætera quæque percurreret, nihil reperit nisi sanctus Anselmus. Unde certum est non placere divinitati ipsum aliter appellari quam sanctum. Certum est perfectam huic non defuisse charitatem quæ foras mittit timorem (1 Joan. iv). Mirabile namque de ipso testimonium a sanctis audivimus. Manus autem sibi præcidi permisisset, quam eas ad opus illicitum extendisset. Longe sit igitur ab intellectu bonorum, abradatur a cordibus omnium, ut a sapientissimo rege et summe sanctitatis episcopo, quidquam nisi legitime et sancte fuisse credatur admissum. Nec Romanas unquam aures pulset amplius tale ludibrium, quod omnium bonorum attestatione constat esse mendosum. Verum de ipsa matre imperatricis sanctorum quorundam relatu cognovimus, ipsam a cunabulis ipsis in dignitatem regiam, ostenso divinitus oraculo præsignatam. Nam dum ipsam reginam Mathildis, regis Willielmi sponsa, de sacro fonte levaret, puella ipsa injecta manu velamentum quod capiti reginæ supererat, apprehendit, suumque caput involvit. Quod quidam quorum tunc etiam vita superstes est, alius attendentes, signum quod præostensum est exponentes, dignitatem regiam, in quam postmodum sublimata est, manifeste sunt prælocuti. In longum se extendit epistola, eo quod materiam magnam attigimus, etsi non plene explicuimus. Et tu per verba quæ per militem tuum mandasti mihi, excitasti me, et cum currere cœpissem, augebat mihi stimulos iosa tui memoria, ut ab opusculo

quod mihi tui præsentabat memoriam vix avelli potuerim, sed me fere in tedium lectoris extenderim. Unde in fine teneas, ut memor sis finis, et in Ecclesiam Dei et pauperes ejus charitatem benevolæ mentis exerceas. Memor esto matris tuæ quæ diripitur, et conculcatur ab omnibus, et quos in diebus angustiae suæ deberet filios experiri charissimos, hostes reperit infestissimos. Nec adversus eam tuus inde zelus accendatur, si in causa præsentis non ea qua oportuit libertate vocis usa est, cum eam præsentis auctoritas non solum impedit, sed quasi ligatam vinculis in hoc ipso velut immobilem fecerit. Sed jam nunc, Deo propitio, et favente parti huic domino papa Coelestino, vincula solventur, quæ muta fuere loquentur. Vale. Et biduo saltem ores pro me, quia biduo mihi est intermissa oratio ut litteras dictare ad te.

EPISTOLA LXXX.

AD NICELLUM ELIENSEM EPISCOPUM.

Venerabili domino fratrique charissimo N. Eliensi Dei gratia episcopo, frater G. Herefordiensis Ecclesiae minister, « sic currere ut comprehendant (1 Cor. ix). »

Virtus et scientia quanto rarior, eo pretiosior est; quanto quoque scientiæ et virtuti paucos admodum operam dare cernimus, eo studiosos earumdem ampliori reverentia dignos æstimare debemus. Inde est quod magistrum Robertum de Clare, cujus et honestas vitæ et scientiæ claritas jamdiu nobis innotuit, benevolentiae vestrae commendamus attentius; si quid possumus apud vos rogantes, ut ecclesiam, quam sub tuitione vestra possidet, sibi illasam imperturbatamque patrocinio conservetis. Nam, si placet, eliditis e facili totum quod obijciunt qui de possessione eadem jamdiu cum illo transegerunt. Nam sicut rei judicatæ, sic et transactioni standum esse certissimum est. Apud judicem non præsumo docentis officium, verum ex primo postulantis affectum; pro amico postulo, sed si apud amicum, fatear si obtinere meruerō.

EPISTOLA LXXXI.

AD RADULFUM DECANUM HEREFORDIÆ.

Pater Venerabilis Gilbertus Hereford. episcopus epistolam hanc domino Radulpho decano Hereford. transmisit.

A te longe positi tuas non de longe contumelias experimur, ipso doloris transverberati gladio quo te scimus vulneratum. Directa est manus persequentis in te sed unum omnibus infligit vulnus quibus te non fictæ diligentia charitatis astrinxerat. Exsul et profugus ab ecclesia tua et civitate expelleris: et tanquam sacra læseris omnia, gladios in te male juratus miles exacuit, nil tamen habens quod obijciat, nisi quod ejus audaciæ in sanctitate et justitia restitisti. Restitisti quidem, et gaudemus: expulsus es, et dolemus. Dolemus, inquam, magis irruentium in te ignominiam, quam tuæ laudis honorem et gloriam. Scimus enim quod venali illi turbæ et in om-

PATROL. CXC.

nem in quam condicatur impietatem promptissimæ, de cælis ira revelatur, sed humilitati tuæ et patientiæ gloria in perpetuum reservatur. Gaude, dilecte mi, gaude et attende. Attende, inquam, quam pio voto te bonorum omnium turba prosequitur, dum portas in corpore tuo stigmata Christi Jesu, dum crucem ejus bajulas, dum pro justitia et Ecclesiæ libertate in agone decertas. Non delicatus miles in Domini bella venisti. Pedes nudi, vestis lanea, vexillum crucis in manibus summi Regis expriment armaturam. Quod cantavimus hactenus, jam videmus in te illud summi confessoris elogium: Ego signo crucis non clypeo protectus aut galea, hostium cuneos penetrabo securus. Hæc est framea Christi, et baculus peregrinationis ejus, quo contrivit portas æreas, et vectes ferreos confregit (Psalm. cvi). Tu quoque sapienti consilio, cornu crucis inimicōs tuos ventilasti, et insurgentes in te magnanimi nobilitate contempsisti (Psalm. xliii). Quæ de te audio lætam resonant cuncta victoriam; insidiantium laqueos, etsi nudus, expeditus tamen et alacer evasisti. Expulsus quidem es ab ecclesia tua, sed quam gratulabunda occurrit tibi Ecclesia sancta mater tua. Hæc ab ora vestimenti sui cui decenter inhærebas, te sustollit, tibi sinum aperit, te intus colligit, tenet, demulcet et nutrit (Ephes. v). A sponsæ tuæ amplexibus ad tempus avelleris, sed matris gremio confoveris. Insultant tamen pessimi, quod et domum et urbem egressus es. Es quidem egressus: sed cogita antiquos dies. Nunquid David a facie filii fugiens insultantem sibi et dicentem: *Egrederere, vir sanguinum, egredere* (11 Reg. xvi), cum modestia non sustinuit? Vos etsi persona dispares, æstimo tamen pares in causa. Domesticis utamur exemplis. Nosti quia Dominus a facie Pilati egressus est in ludibrium sui, coronatus spinis, et indutus purpura (Matth. xxvii). Novissime etiam quasi repurgium quo pollui posset civitas, ipse extra portam passus est (Hebr. xiii); ultimam passus injuriam, ne mundus ulterius injuriam pateretur. Hæc nos aritari cogitatione oportet, ut ipsum extra castra sequentes, improprium ipsius semper in capite nostro portemus (ibid.). Felix tua egressio, qua sanctorum collegio denominaris. Sed impropere quod fugisti.

D Nec fugisti quidem, sed te ad dimicandum acrius pro justitia reservasti. Paulus tamen Damasci in sporta demissus effugit, nec istud scribens robore suffunditur, sed hoc ipso gloriatur (11 Cor. xi). Nisi enim fugisset, frementem mundi bestiam non confudisset, nec in ipso fastigio imperii vexillum Domini statuisset. Docet nos magister bonus: Si persecuti vos fuerint in civitate una, fugite in alteram (Matth. x). Fuge ergo, dilecte mi, hoc usus imperio, fuge de Ur Chaldæorum in Jerusalem (Gen. xv), ut habeat in quo pugnet Ecclesia, habeat quem reservet sibi in tempus hostis et belli. Stabis adhuc pro matre filiis, in eam fortassis acrius insurgente Leviathan. Jam nos odore bono respersisti, et tuæ virtute constantiæ bene fragrat Ecclesia, qui dignatus es humiliari

principi, et genu curvare ante Baal. Datur optio confessori, ut abjuret quod sancte fecerat, vel cedat his quæ possidebat. Vilescit animo tuo temporale stipendium, et subito factus inops, quanta animi serenitate decantas : *Ego vero egenus et pauper sum : Dominus adjutus me* (Psalm. LXXIX). Davidicos hymnos decantamus et nos, sed quæ canimus tu legis in te, et laudabilia sanctorum quæ extollimus sacrum et elucubratum plenius tuæ tibi volumen conscientiæ repræsentat. Percurre psalmos; resonent ab ore tuo illa Spiritus sancti plena suavitatis instrumenta; quod pietatis, quod justitiæ, quod fortitudinis, in his laudabile decantatur, totum habes in te. Vere beatus philosophus, qui tua tibi bona collocasti, unde ea nec manus avidi raptoris eripiat. Jamdudum in scholis positi, de paupertate spiritus diversi adversis audivimus. Jam nunc ipsa tibi de propinquo respondeat utpote quæ tecum tuæ domus limen egressa est, te in itinere comitata de regni cælorum promissione uberius consulatur. Nam quantum est quod obtrahant? apostolicum illud opponunt : *Omnia anima potestatibus sublimioribus subdita sit; et qui potestati resistit, ordinationi Dei resistit* (Rom. XIII). Verum quidem hoc est. Sed habet sæcularis potestas legem qua teneatur, habet statutos terminos intra quos ipsi obediatur. Scilicet si legem servaverit, si mandata custodierit, si in Deum nulla animi temeritate præsumpserit. Quod si in summi Regis injuriam impudenter excesserit, non potest ejus uti privilegio, ejus jura contemnit. Jam quod reliquum est circa prudentiæ discretionisque partes insudant. Aiunt discreti viri esse, in culpis levibus non toto zelo accendi. Verum si profunde peccatur? totus fervor inardescat. Ideo levem principis offensam de muri quadam parte diruta fuisse militi vindicandam. Ista pulchre componuntur. Sed juxta sapientiam, qui minima contemnit paulatim atteritur. Omitto prosequi quanta sit indurati cordis audacia, loca sancta non solum vilipendere, sed vastare. Festino ad hæc quæ te virtutis amatorem non solum non accusent, sed potenter excusent. Magnum æstimo virtutis indicium nascentia vitiorum germina suffocare. Serpens ubi caput immiserit, facile totus illabitur. Hæc tu considerans ad primos impetus restitisti. Quid ni? Nisi restitisses, jam forsitan ad templi fastigium rabies inchoata ascendisset. Sed ascendisti ex adverso, et objecisti te murum pro muro domus Israel. Licet ex minimis magna conicere. Quid si tibi pro fide pro sacramentis Ecclesiæ decertare contingeret, ad crucem Petro, Paulo comes ad gladium constanter assistens? Eat satelles, stricto pugione tibi funestus occurrat. Si sacrum atrectaverit corpus, cælo victor exciperis. Si pepercit tibi, nil minus est gloriæ. Jugi ergo inter nos bonorum laude donaberis. Tu enim tempora nostra virtutum meritis exornasti : tu nos in melius exemplo tui reformati, tu virile robur, et constantiam martyrum in tempora tepida revocasti. Percussor enim tibi defuit; non tu virtuti. Vives ergo clarus gloria,

A quam meruisti. Vives, inquam, sed felix qui pro justitia mori decrevist.

EPISTOLA LXXXII.

AD HENRICUM EBORACENSEM ARCHIEPISCOPUM.

Patri suo et domino H. Eboracensi, Dei gratia archiepiscopo, frater G. Herefordiæ dictus episcopus, sincere diligentis affectum, et gratanter obsequentis officium.

B Charitas quandoque presumptuosa est, et quod alteri facile rogata concederet, hoc apud dominum et amicum impetrare non desperat. De ipsa itaque, quæ intra cordis vestri dominatur, charitate plurimum confidentes, preces sublimitati vestræ porrigimus, ut communi amico et canonico vestro Gilberto, Ecclesiæ vestræ præcentori, vos benignum et misericordem exhibeatis, et si quid adversum vos ab aliquo suorum, ipso ignorante et nolente, commissum est, in clericum vestrum et in quantum potest, amicum, commissi culpam non refundatis. Ipse enim et vos et diligentes vos diligit, et si quis suorum adversatur vobis, aut extollitur contra vos, hunc, quicumque ipse est, et abdicare et eliminare paratus est. Si itaque sibi non sua, sed alterius culpa ablata restitueretis, justitiæ non excideretis spes, et tam comes Herefordiæ, quam nos, qui pro illo pariter excellentiæ vestræ supplicamus, vobis amplioris gratiæ debitores efficeretis. More nihilominus ipsius ambo rogamus veniam, ut in hoc aculeos severitatis vestræ non sentiat, in quo voluntatis suæ non difficultas solum, verum impossibilitas ipsa præjudicat. Adjuvante Domino, et itineris sibi securitatem providente, in proximo veniet ad vos, per omnia vobis tanquam Patri et domino libentissime pariturus. Valete, et ab amicorum vestrorum petitione faciem nolite avertere, et ne sæpe pro amico rogare oporteat, diem adventus ejus Natale Domini constituite.

EPISTOLA LXXXIII.

AD THEOBALDUM CANTUARIENSEM ARCHIEPISCOPUM.

Patri suo et domino Cantuariensi Dei gratia archiepiscopo et totius Angliæ primate, T. suus G. Herefordiensis Ecclesiæ minister, in tribulatione non deficere.

D Expectans expectavi jamdiu dominum meum, sperans a vestra sublimitate nuntium aliquem delegari, qui mihi prospera vel adversa nuntiando, vel de adversis tristem redderet, vel de lætis exhilararet. Nam si ea charitatis est plenitudo, ut cum fratre quolibet infirmante infirmari, vel cum quis scandalizatur uri oporteat, cum Patrem nostrum et dominum, imo nostrum in Christo caput concuti, fatigari, turbari cernimus, quid jam restat nisi non tantum infirmari aut uri, verum intus intimi flamma zeli medullitus concremari? Si itaque nondum surrexit Dominus ut ventis imperet et mari, si procella vestra nondum in auram statuta est, summo ut mihi videtur opere necessarium est, ut sacrum pectus vestrum omnis armatura fortium muniat, et hostis quanto insurgit acrior, eo vos acriorem et

sancti Spiritus ferventorem igneus inveniat. Non enim novum est aut insolitum Ægyptios Israel, Chaldaeos Jerusalem infestare. Ait Christus in Apostolo: *Omnes qui volunt pie in Christo vivere, persecutionem patientur (II Tim. iii)*. Sed per eundem ipse loquitur: *Quod leve est aut momentaneum tribulationis nostræ supra modum æternæ gloriæ pondus operatur in nobis (II Cor. iv)*. Persecutionem patienti propter justitiam, non leve aliquid, sed regnum cælorum repromittitur. Amicitur Elias pallio, dum persequentium declinat rabiem, et stans in spelunca hostis, gloriā Domini speculatur (*III Reg. xix*). Vobis quoque corona gloriæ repromittitur, quam reddet vobis in illa die justus iudex (*II Tim. iv*). Impatiens mei factus sum, desiderans videre vos et alloqui, vel aliquid audire a vobis, quo de his quæ circa vos sunt certior efficerer. Parati sunt principes nostri, præsto sunt et Ecclesiæ nostræ vos, si sic opus est, non solum suscipere, sed et in amplexu vobis gratanter occurrere, et de suis quidquid potuerint, ministrare. Nolle tamen hoc, sed si necesse est, benevolos et ad omnia paratos habebitis. Obsecro, dilecte Pater, mihi litteras vestras non negari, et in aliquo voluntatem vestram et statum, et consilium aperiri. Valere vos optamus in Domino, et ipsi per omnia complacere.

EPISTOLA LXXXIV.

AD EUGENIUM PAPAM.

Patri suo et domino, summo Dei gratia pontifici, EUGENIO, G. Herefordiensis Ecclesiæ minister, obedientiam humilem et debitam patri charitatem.

Cum parvitati nostræ, dilecte Pater, Ecclesia Dei aliqua sui portione, Domino sic operante, commissa sit, ejusdem providere et invigilare commodis ipsa nobis a Domino concedita dispensatio compellit. Quoniam vero quæ statuuntur a nobis, nisi apostolica auctoritate fulciantur, minus firma sunt, sublimitati vestræ preces humili devotione porrigimus, ut quod ad honorem Dei et cultum ejus ampliandum de ecclesia Sancti Guthlaci de Herefordia a nobis actum est, hoc auctoritas vestra corroboret, suoque confirmet privilegio. Ecclesiam enim illam de manu laica multo tandem labore eruimus, et quia in eadem minus officiose Domino serviebatur, ipsam dilecto filio nostro Hamelino, abbati Glocestriæ, et ecclesiæ Sancti Petri, qui eadem præesse dignoscitur, assensu clericorum ejusdem ecclesiæ, capitulo etiam nostro id consentiente et volente, concessimus, et tam ipsam quam ecclesiam Sancti Petri de Herefordia, diu ante a prædictis monachis habitam, in corpus unum adunare curavimus, et conventum monachorum ibidem devote ministrantium Domino, jamjam instauravimus. Quod quia Domino credimus placere, audemus serenitatis vestræ supplicare, ut quod a nobis intentione recta actum est, soloque pietatis intuitu, hoc serenitas vestra stabiliat, et ecclesiæ Sancti Petri de Glocestria in perpetuum confirmet. Glorificetur Deus in vobis,

vestrique corona meriti semper angeatur in Domino, in Christo dilecte Pater.

EPISTOLA LXXXV.

AD JOANNEM DE DINAN.

Gilbertus, Dei gratia Herefordiensis episcopus, amico suo J. de Dinan, salutem et dilectionem.

Audi, charissime, quæ tibi mando, et monitis meis si ex Deo sunt, acquiescere non despicias. Habes a multis testimonium bonum, quod Deum et Ecclesiam ejus hactenus in magna reverentia habuisti, et clericos et alios quosque religiosi ordinis viros diligentius honorasti. Pauperes etiam, qui tuo famulatu obnoxii sunt, non oppressisti, sed magis affectu paterno fovisti, et illæsos servasti. Hanc tuam justitiam et animi bonitatem respexit Deus, et nunc aliquantulum misertus tui, in futuro amplius miserabitur. Audio a multis, aliquos conspirasse adversus te, et te nesciente et absente, in detrimentum tui pessima quædam præparasse. Eorum autem consilium, ut dicitur, dissipavit Dominus et denudavit, et te, qui illum illæsum in membris suis servasti, ipse quoque illæsum servavit. Hoc, charissime, tibi non attribuas, sed magis illi gratiarum referas actionem. Si itaque ad Ecclesiam ejus et bona ecclesiastica in Stanlune, manum male extendisti, auctoritate ipsius, et ab ipso nobis injuncto, officio te moneo ut ante synodum cuncta Ecclesiæ ipsi in nullo immunita restituas, ne ab ea quam prædixi, gratia gravi separatione cadas. Scias enim pro certo, et hoc ultimum firmiter teneas, quod res ecclesiasticæ cujuscunque fidei-jussione, nisi præsentis et favente episcopo, alicui mortalium obligari non possunt. Plegium quod in ecclesiasticis de R. furtis me nesciente cepisti, tibi non tenetur, sed omni auctoritate liberum esse decernitur. Obedientem te nostris monitis conservet omnipotens Deus.

EPISTOLA LXXXVI.

AD RO. DE BURNHAM.

Gilbertus Dei gratia episcopus Herefordiensis, amico suo Ro. de Burnham, salutem et dilectionem.

Quanto erga vos charitate ampliori affecti sumus, tanto nobis et famæ vestræ consultius quantum spectat ad nos providere, ipsa quam prædiximus charitate suggerente, commonemur. Verbis oris vestri multorumque relatu didicimus, vos a transactione inter nos habita super ecclesia de Wire-desberia resilire velle, et ecclesiam de Glocestria super sibi promisso celebriter a vobis annuo censu velle defraudare. Qua in re moneo ut rerum exitus attendatis, ne forte si aliter actum fuerit, malefactum penitentia consequatur. Causa enim hæc, etsi principaliter non spectat ad nos, spectat tamen secundario. Primum in causis locum actor obtinet, secundarium testis. Si ergo testis in causa hac productus fuero, ecclesiæ, cui tota plenitudine charitatis astrictus sum, in testimonio veritatis, deesse non potero. Astiterunt et nobis in transactione

eadem viri religiosi quamplurimi, qui si quid negare cœperitis, in lucem acta producent. Retractetis itaque, si placet, consilium vestrum, et quod, fide interveniente, sub multorum præsentia pepigistis, fideliter observetis, ne si forte aberrare cœperitis, multorum convictis testimonio, non solum ecclesiastici beneficii, sed ordinis vestri periculum incurratis. Attendens illud Sapientis: Melior est amici increpatio, quam oscula blandientis inimici (*Prov. xxvii*), amico dura proposui, quem ab eo quod sibi inutile et inhonestum revocare curavi. Valete, et in omni emolumento temporali honestatem præponite.

EPISTOLA LXXXVII.

AD EUGENIUM PAPAN.

Patri suo et domino summo pontifici EUGENIO, G. Herefordiensis Ecclesiæ minister, pedibus sanctis conculcato Satan, triumphare semper in Domino.

Sicut domino meo placuit, ita factum est, et ad jussionem vestram mihi manus est consecrationis imposita, et Herefordiensis Ecclesiæ cura commissa. Inde est, quod attentius spectant oculi nostri ad vos, a vestra sublimitate sperantes, et expectantes auxilium, unde habuimus honoris et ordinis incrementum. Clamat et conqueritur Ecclesia nostra prædecessorem nostrum bonæ memoriæ dominum Robertum episcopum quatuor præbendas suas ad ecclesiam Lantoniam transtulisse, et præ nimietate amoris quo erga Lantoniam, ut ipsos ampliaret tenebatur, proprios clericos eisdem quatuor præbendis spoliassse. Unde serenitati vestræ supplicamus humiliter, si majestatem vestram prædicti Lantonienenses adierint, ne vestra auctoritate eis firmetur quod clerici nostri sibi fuisse injuste ablata conquerrunt. Duo etiam castella Ecclesiæ nostræ idem prædecessor noster nobilissimis viris comiti de Melent et Hugoni de Mortemer, magno Ecclesiæ ipsius incommodo et detrimento concessit. Quæ quia male districta sunt, et quantum ad nos, quasi ad desperationem alienata sunt, vestra petimus auctoritate revocentur. Quod vero ad Lincolnensem Ecclesiam spectat, utpote quod audivimus et vidimus, secure loquimur et testificamur. Ejusdem enim Ecclesiæ clerus et populus religiosarum episcopatus personarum unanimi consensu, nullo prorsus contradicente, dominum Robertum ejusdem Ecclesiæ archidiaconum sibi in episcopum elegerunt, et electionem domino Cantuariensi præsentantes, propter multas et necessarias causas obtinuerunt. Quod vestro petimus cumulari examine, quatenus ei manum gratiæ porrigendo, ipsum in quo positus est stabilitatis, et de cætero fidelem filium, et ad omnem Patris sui voluntatem promptissimum habeatis. Illæsa nobis et inoffensa majestas vestra servetur in sæcula, in Christo dilecte Pater.

EPISTOLA LXXXVIII.

AD EUMDEM.

Patri suo et domino summo pontifici EUGENIO,

A G. Herefordiensis Ecclesiæ minister, devotum et debitum totius obedientiæ famulatum.

Quia charitati, dilecte Pater, plurimum expedit obedire, ideo petitioni Lincolnienensis Ecclesiæ negare non possumus, quin ea quæ de negotio ejus ipsi præsentibus vidimus et audivimus, sublimitati vestræ notificemus. Cum enim Londoniæ cum Patre nostro domino Cantuariensi et fratribus et coepiscopis nostris quam plurimis essemus, vidimus decanum et cantorem et archidiaconum, omnes etiam ipsius Lincolnienensis Ecclesiæ canonicos, cum religiosarum personarum ejusdem episcopatus non modica multitudine, omnes in hoc instantissime perseverare, ut liceret eis concilio domini Cantuariensis, Robertum archidiaconum Leicestræ, in Patrem et episcopum sibi eligere. Cumque dominus Cantuariensis in ipsum omnium concurrere vota conspiceret, nolens prædictam Ecclesiam turbari amplius, aut magis atteri, petitioni eorum episcoporum consilio, assensum præbuit, et prædictum archidiaconum ingenti postulantiū gratia et favore, episcopum consecravit. Cujus et doctrinæ et vitæ et intus et foris, testimonium bonum est, et in officio quo ministravit hactenus conspicua gratia. Unde vestram, reverende Pater, precamur benignitatem, ut quod ei, sola suffragante justitia, debetur, id nostræ parvitatibus precibus facilius et benignius assequatur. Valeat sanctitas vestra, in Christo dilecte Pater.

EPISTOLA LXXXIX.

AD UNIVERSOS S. MATRIS ECCLESIE FILIOS.

Dilectis sibi in Christo fratribus, universis sanctæ matris Ecclesiæ filiis, frater G. Herefordiensis Ecclesiæ dictus episcopus, salutem et dilectionem in Domino.

Charitati vestræ præsentī scripto notificamus, nos certo religiosarum personarum cognovisse testimonio, præsentium latorem Benedictum, coram justitia prædecessoris nostri, bonæ memoriæ R[oberti] episcopi, septima sacerdotum manu jurasse, fratrem suum, de cujus morte suspectus fuerat, machinatione sua aut consensu, aut voluntate, nunquam mortem incurrisse. Qui, ut plene innocentiam suam super hoc facto ostenderet, in præsentia nostra multis nobiscum assidentibus, in hunc etiam modum juravit: « Parentes mei, qui de morte fratris mei suspecti hactenus sunt habiti, mortem ipsi non intulerunt. Nemo etiam mei causa mortem ipsi machinatus est, sic me Deus adjuvet, et hæc sancta. » Quod juramentum duodecim illico sacerdotes in hunc modum confirmaverunt. Benedictum hunc super hac re verum jurasse, nobis certum est, sic nos Deus adjuvet et hæc sancta. Quod cum in præsentia nostra sic actum est, ne solita deinceps innotescentia ipsius prematur infamia, quod vidimus, hoc testamur, et rem gestam præsentī vobis scripto et sigilli nostri impressione declaramus. Valete.

EPISTOLA XC.

AD ROBERTUM LINCOLNIENSEM EPISCOPUM.

Domino suo fratrique charissimo R. Lincolnensi Dei gratia episcopo, G. Herefordiensis Ecclesie minister, hæc gustare et sapere quæ paravit in dulcedine sua pauperi Deus.

Si bene valetis, sic est ut volumus, et nostrum inde gaudium ad perfectum adducitur, et ad omnem lætitiā cumulat. Digestam corrigi et glossari præcipitis, et ecce Ambrosius vester labrare non desinit in tritura. Cætera quæ mandastis, dante Domino, non differunt. Causæ nostræ cum potestatibus nostris, fata adhuc ambigua sunt, et quæ sunt in pendulo, quam cito stabiliri cœperint, illico currente chartula cognoscetis. Usque ad diem Palmarum nobis a domino Henrico concessæ sunt, sed eas prorogari ulterius misso nuntio nondumque reverso postulamus. Experiemur in his finem quem concesserit Dominus, de ipso sperantes bona nobis tribui, qui reprobatur cogitationes populorum, et dissipat consilia principum. Optamus vos in Domino valere, et in ipso de die in diem renovari et proficere, in Domino charissime.

EPISTOLA XCI.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, G. Herefordiensis Ecclesie minister, post iram misericordie reminisci.

Si adversus dominum Landaviensem aliquantulum mota est tranquillitas vestra, tanto sublimitati vestræ humiliter supplicandum est, quanto adversus prædictum episcopum iustiore causa motam esse cognoscimus. Sufficiebat enim ad sublevandam causam suam contra adversarium suum appellatio, et si vobis per omnia debitam observasset reverentiam. Quod si minus factum est, improbitati procul dubio Landaviensium clericorum, non ipsius episcopi malitiæ aut ingratitude imputandum est. Opus enim manuum vestrarum ipse est, et plantatio vestra, quem si de justa forte causa conteritis, opus quidem manuum vestrarum conteretis et quem plantavit dextera vestra, evelletis. Absit hoc a vestra gloria, nec tale sortiatur laus vestra dispendium, ut quem semel inter amicos ascripsistis, ab aditu gratiæ vestræ eliminatum tam facile proscribatis. Venit quidem ad vos in humilitate et mansuetudine, nil sapiens altum adversum vos, sed quidquid actum sit a vobis tantum totum quod bonum dominum, quod pium Patrem decet, expetens et expectans. Absit autem ut dies mentis vestræ sic convertatur in tenebras, ut ira in vobis aut gratiæ præiudicet, aut naturam evacuet, quin in paterno pectore sit intus apud vos, qui pro filio pulset et exoret, et exaudiatur affectus. Si quid igitur apud vos nostra potest supplicatio, si quod tristes dicimus a corde vestro propter inanem causam non prorsus excidimus, episcopum vestrum suscipiatis in gratia, et paci et honori ejus provideatis, ne Patrem alibi querere compellatur, sed totum quod pium est, quod modestum se apud vos

A reperisse gloriatur. Ad pedes vestros in prece hac corde prosternimur, quos supplicando libentius ipsi manibus amplectimur. Provideat itaque, si placet, vestra discretio, ne nobis postulata negando, preces nostras amodo muto claudatis silentio. Bene valere vos optamus in longa tempora, in Christo dilecte Pater.

EPISTOLA XCII.

AD EUGENIUM PAPAM.

Patri suo et domino summo pontifici Eugenio, G. Herefordiensis Ecclesie minister, salutis gaudium et debitum obedientiæ famulatum.

Quoniam, dilecte Pater, amici veritatis esse cupimus, ideo quod de causa domini Bernardi Cerneliensis abbatis ipsi præsentem vidimus et audivimus, in præsentia vestra cum fiducia contestamur. Vidimus enim ipsum Cerneliæ priorem quampluresque ejusdem Ecclesie personas, ad pedes domini Hiemari Tusculani episcopi, eo tempore apud nos legati, prostratos et provolutos, humiliter postulare, ut eis prædictum Bernardum, Glocestriensis Ecclesie tunc priorem, in abbatem concederet, et ipsum concedendo tam eorum quam totius conventus sui petitioni satisfaceret. Scimus etiam dominum Hiemarum ad eorum postulationem prædicto fratri Bernardo, rennenti licet et invito, ea quæ præerat auctoritate in-junxisse, ut onus Cerneliensis Ecclesie regendæ susciperet, eique per omnia prout competeret abbati provideret. Scimus nihilominus conventum Cerneliæ eum gratuito solemnī processione suscepisse, et dominum Salesberiensem eorumdem postea petitione episcopali benedictione ipsum in abbatem confirmasse. Quem quia tam vita quam doctrina multa dignum commendatione cognovimus, pro ipso preces sublimati vestræ porrigimus, ut eum in suis justis postulationibus audiat, et Cernelienses monachos adversus eum injuste et improbe contumaces, apostolica auctoritate reprimatis. Domus enim illa Cerneliæ est, cui ut publica fama est, honestas sola jamdiu displicuit, nihil quod non religioni contrarium foret et ordini, potuit complacere. Quorum emendandæ potius quam in præsentia vestra commemorandæ dissolutioni, quia prædictus frater Bernardus, quo potuit vigore restitit, eorumdem violentia quasi profanus expulsus est, et ab eorum communione sequestratus. Non nobis itaque, Domine, non nobis sed nomini vestro gloriam (Psalm. cxiii) donetis, ut improborum audaciam reprimendo, culpam similem in aliis compescatis, bonosque condigne munerando, virtutis studium in compluribus augeatis. Sibi vos in longa tempora conservet incolumem omnipotens Dominus, in Christo dilecte Pater.

EPISTOLA XCIII.

AD EUNDE.

Patri suo et domino sanctissimo papæ E. frater G. Herefordiensis Ecclesie minister, pie salutantis affectum, et humiliter obsequentis officium.

Sublimitati vestræ, dilecte Pater, pro Lennensi

Ecclesia eo confidentius supplicamus, quo totum A quod pium est, quod honestum, vestrae complacere serenitati non ambigimus. Prædicta siquidem Ecclesia inter Ecclesias Angliæ tam firma ordinis observantia quam perfectæ charitatis opibus in tantum irradiat, ut occidentis nostri tenebras luce quadam honestæ conversationis et cultu defæcatæ religionis expellat. Hæc mater pauperum, mæstorumque solatium præclara meritorum gratia eam se omnibus exhibet, ut in publicas jamdudum gratulationes suscepta quasi speculum quoddam in ultimis terræ sinibus et singulare sanctitatis exemplar niteat. Unde preces excellentiæ vestrae affectuose porrigimus, ut iustas ejus postulationes paterna mansuetudine audiat, ipsamque in his in quibus prædecessorum vestrorum tempore fundata feliciter et B aucta est, nequaquam minui permittatis. Quod eo faciet circumspectio vestra securius, quia quod Ecclesiæ uni indulgebitis, id non solum monachorum magno cuidam et probabili collegio, sed et immensæ pauperum, peregrinantium, naufragorum debiliusque multitudini erogabitis. Ut si quid in hoc facto decretorum juri derogatum fuerit, id apud summum iudicem charitatis Christi membris latissime subministrans, potenter excuset. Valeat dominus meus et Pater in Christo charissimus.

EPISTOLA XCIV.

AD EUNDEM.

Patri suo et domino summo pontifici Eugenio frater G. Herefordiensis Ecclesiæ minister, humilis obedientiæ famulatus.

Scimus, Pater in Christo charissime, scimus, quod apostolicæ non obedire jussioni, apostatare est, et instar vere sacrilegii, vestrae contraire voluntati. Absit hoc a fidei, absit a Catholico, absit potissimum a filio beneficiis a munificentia nostra exhibitis, obligato multipliciter et obnoxio. Londoniensis nimirum episcopus adeo manuum vestrarum opus est et creatio, ut ei recte in faciem possit obijci: Tu quid habes, nisi quod a domino papa accepisti? Nam qualiter illum contra vota et conjurationes principum virtus apostolica sublimaverit, nullus apud nos qui ignoret, nemo fere qui nesciat. Inde est ut apud serenitatem vestram pro ipso illa recte competere videatur allegatio, operi manuum tuarum porriges dexteram. Quid enim vas etsi formatum optime, quid acturum est, si illud in virga ferrea decreverit suus auctor elidere? Absit hoc a vestra gloria, nec tale sortiatur laus vestra dispendium, ut quem semel intra fines gratiæ suscepistis, ab ipsius aditu eliminatis inmeritum, aut innoxium excludatis. Archidiaconatum enim quem liberalitate laudabili domino Joanni Cantuariensi donantium mandastis, ante concessum alteri fuisse, vestram credimus ignorare prudentiam. In cuius rei testimonia dominum Lincolnensem a vero nec in modico deviare confidentissime dicimus. Ipsum vero Londoniensem, nec totius episcopatus sui jacturam perpetuam perjurio velle redimere scimus equidem et

A constanter asserimus. Ipse quidem Lincolnensis testatur, et jurare paratus est, dominum Londoniensem antequam voluntatem vestram aut scripto aut aliquo referente cognoverit, prædictum archidiaconatum magistro Radulpho Diotecoensi, cui et ad doctrinam scientia, et ad honestatem mores exuberant, concessisse. Est equidem in omni gratiarum amplectendum actione, quod honestatem et scientiam in Joanne remunerare decernitis. Sed hoc apostolico culmini factu leve est, ita ut episcopum quem singulari prævenistis gratia non offendatis. Preces in hoc porrigimus, in hoc paternæ charitati supplicamus, ut intus apud Patrem sit qui pro filio et episcopo pulset, et eatenus exoret affectus, ne plus fortasse diligens minus admittatur, et ad obsequendum B longe promptior minus exaudiatur. Valeat dominus meus et Pater in Christo charissimus.

EPISTOLA XCV.

AD EUNDEM.

Patri suo et domino summo pontifici. E. frater G. Herefordiensis Ecclesiæ minister, devotum et debitum obedientiæ famulatus.

Cum debitorem universis divina vos, Pater, munificentia constituerit, commune debitum hi propensius exigunt, qui vestrae se per omnia tuitioni alacriori et ampliori devotione submitunt. Unde plurimum honori vestro conducit et gloriæ, ut Londoniensi Ecclesiæ ea qua ad præsens tempestate concutitur, manum auxilii porrigatis, et causam quam multo sudore perstringit, benignitate consilii sublevando, ipsam allidi scopulis, aut fluctibus obrui non sinatis. Quæ cum in Anglorum Ecclesia multa meritorum et dignitatum luce profulgeat, ad præsens tamen egregiæ laudis titulo hoc ipso nobilitata est, quod post Patris et pastoris sui decessum, inter minas principum ipsosque frementium gladios, Deum contemplata non hominem, immobilis imperterritaque constituit, et se periculis audacter obijciens honorem Dei et libertatem Ecclesiæ in aliquo minui dignata, Patrem sibi et pastorem idoneum consensu unanimi non minus sancte quam prudenter elegerit. Quod cum ipsa eligentium fortitudo mentiumque constantia dignum laude constituat, persona quæ electa est gratia cumulat et honore, ut totum sit favore dignissimum, et quod ob honorem D et libertatem Ecclesiæ fortiter actum est, et quod in hujusmodi persona laudabili circumspectione provisum. Nota namque secure scribimus, et quæ scimus, loquimur cum fiducia. Londoniensem archidiaconum R. de Bealmeis, quantum in humanis oculis est, vita honestum, laudabilem scientia, liberalitas amabilem, et ab ipsa reddit origine stirps generosa clarissimum. Quem cum ad sui regimen diligenter et vocet et exspectet Ecclesia, si, quod absit! iste repellitur, injuriam hanc læsa virtus erubescet, et querela dicentium: *Sine causa justificavi cor meum, et lavi inter innocentes manus meas* (Psal. lxxii), non modicum sumet incrementum. Agat itaque apostolica sublimitas, agat Pater, unde sibi

Anglorum congratuletur et applaudat Ecclesia; A
fine bono bonum consummet initium. Honoret honore dignissimum, ut in presenti sibi laus, in futuro reponatur et præmium, et sciant quia manus tua hæc, et tu, Domine, fecisti eam (Psal. cviii). In longum vestra conservetur incolumitas, in Christo dilecte Pater.

EPISTOLA XCVI.

AD EUNDEM.

Patri suo et domino summo pontifici E. frater G. Herefordiensis Ecclesiæ minister, pie salutantis affectum, et humiliter obsequentis officium.

A tribulatione malorum et dolore ad vestram Pater serenitatem Ecclesia Radingensis confugit. Inde sibi sperans expectansque remedium ubi læsi quique sibi gloriantur non deesse solatium. Hæc in ipso diversarum regni nostri partium limite constituta, utriusque in alteram jamdiu sustinuit impetus, et ab ipsis bellorum initiis per ejus fines exstitit utriusque in alterum transitus et regressus. Unde tam incendiis quam cæde suorum debilitata, direptione rerum tam mobilium quam immobilium imminuta, cum jam multa in medicos nil agentes erogaverit, ad vestri fimbriam vestimenti properat et decurrit, sperans inde remedia, unde virtus exit quæ curata aliena. Unde preces sublimitati vestræ humili devotione porrigimus, quatenus devotæ filiæ erigendo lapsa, solidando contracta subveniatis, et suggerente pietate justitiæque in vobis semper efficaciter agente, amissa restitui faciatis, ut quæ, decedente fundatore suo, sibi mortua sunt, feliciter in rebus agente Patre, sibi placide reviviscant. Valeat dominus meus et Pater in Christo charissimus.

EPISTOLA XCVII.

AD EUNDEM.

Patri suo et domino summo pontifici E. frater G. Herefordiensis Ecclesiæ minister, obedientiam et debitam Patri charitatem.

Id modicum, dilecte Pater, quod sumus, amicorum nostrorum charitati negare non possumus, ut alter alterius onera portantes (Galat. vi), opem nobis vicariam consilii simul et auxilii impendamus. Unde licet apud vestram majestatem nulla nos merita nostra commendent, nec penes vos gratiam nobis ullam servitia nec impensa locaverint, ex charitate tamen audemus, ut qui nec pro nobis digni audiri sumus, ad paternam misericordiam pro alio interpellari præsumendo irrumpamus. Clericus enim dilecti filii vestri domini Cantuariensis archiepiscopi, magister Rogerus de Ponte episcopi, vestrum, urgente necessitate, remedium, ad tuenda ea quæ canonice possidet, a vestra implorat serenitate patrocinium. Rogamus itaque ad genua sanctitatis vestræ corde prostrati, ut de fonte justitiæ procedat et pietas, et eum quem apud apostolicam majestatem commendari tam vita quam scientia dignum credimus, suscipiatis in gratia, et in justis postulationibus suis exauditus clementer remittatis. Sublimitatem vestram diu sibi suisque conservet incolumem excelsa majestas. Amen.

EPISTOLA XCVIII.

AD EUNDEM.

Domino et Patri suo summo pontifici E. frater Herefordiensis Ecclesiæ minister, æternæ vitæ gloriam feliciter adipisci.

Necessitati, dilecte Pater in Domino, reluctari non possumus, quin ea charitate quæ nobis de fraternis cordibus potenter imperat, obediamus. Hæc est quæ nos magis delitescere cupientes, product in medium, ut ad audientiam vestram, cui ad præsens assistere non valemus, veritatis saltem verba mitamus. Hinc est quod viro illustri et honesto Scripturarum tam divinarum quam sæcularium apprime erudito, magistro scilicet Godefrido, deesse nequimus, quin sublimitati vestræ quæ de ejus negotio vidimus et audivimus, testemur. Willelmo itaque Cumin, multis exigentibus causis, vinculis anathematis irretito, cum jam plus anno integro sub eodem vinculo perstitisset, cumque eum omni ecclesiastico beneficio generalis concilii jurisdictione spoliasset, dominus Wigorniensis consilio religiosorum virorum, prædictum Godefridum archidiaconatu suo investivit Ecclesiæque suæ archidiaconem religiosa devotione constituit. Scimus eum in eodem officio religiose perstitisse, et quæ ad curam ejus spectabant, prudenter et discrete ministrasse. Scimus etiam ipsum eidem Ecclesiæ fore necessarium, et in eo non solum imo et multo amplius salvum esse beneficium. Detur [igitur] in hoc consideratio, ut semper habeat incrementum gloria vestra, concipiantque bonam spem, qui recurrunt ad vos, obtinendi consilium pariter et auxilium in his, unde recurrunt ad vos. In longitudinem dierum vos protegat omnipotens Dominus, dilecte Pater. Amen.

(Epistolæ 97 et 98 eadem sunt cum 17 et 18: sed propter inscriptionis diversitatem iterum eas exhibemus.)

EPISTOLA XCIX.

AD EUNDEM.

Patri suo et domino summo pontifici E. G. Herefordiensis Ecclesiæ minister, debitum dilectionis et obedientiæ famulatum.

Clericum hunc latorem præsentium, dilecte Pater, ad sublimitatem vestram scripto titulo causæ suæ transmisimus, ut qui Satanæ jaculis pene confossus fuerat, ad vitam solatio gratiæ vestræ reducatur. Hic quemdam decanum nostrum, sacerdotem honestum in agendis et sustinendis Ecclesiæ negotiis per omnia strenuum, scientiæ vitæque merito in publicas jam gratulationes susceptum, non aliis ejus meritis, nisi quod ecclesiam quamdam quæ Patris istius exstiterat, dono bonæ memoriæ prædecessoris nostri domini Roberti episcopi susceperat, et in ipsa ministrabat; ob hanc causam excommunicatus publice, post longam afflictionem, et in edium absolvi meruit, juramento in hunc modum præstito, quod vita comite, necessario casu non obsistente, sublimitatem vestram sub præscripta sibi lege penitentiae adibit, jussioni vestræ, quæcunque fuerit,

ob culpæ veniam pariturus. Qua in re juxta datam vobis a Domino sapientiam et gratiam peccatori providebitis, et ut culpa condigne puniatur, et qui de triumpho lapsus est antiquus hostis minime gloriatur. Sublimitas vestra in longa tempora conservetur illæsa et incolumis.

EPISTOLA C.

AD ELIAM DE SAI.

Gilbertus Dei gratia Herefordiensis episcopus, amico suo Helix de Sai, salutem.

Noſti, chariſſime, quam conſtanter amorem mihi et Eccleſiæ quæ circa vos eſt honorem et pacem promiſiſti, quod utinam ſic ſervasses, ut nec querimonia de te perferretur ad nos, nec a nobis tibi quidquam, niſi pacificum et amicabile ſcribi oportuiſſet. Multum quidem de multis mirarer, ſed de te multo amplius miror, quod ſacerdotem noſtrum et decanum ad judicium curiæ tuæ trahas, et hanc tibi poteſtatem contra Eccleſiam vindices, quam multo ſudore et labore reges et imperatores adverſus eam uſque hodie obtinere nequiverunt. Unde vobis mandamus, chariſſime, ut ſinas judicari a nobis clericos noſtros, et hunc præcipue et alios nequaquam judicare præſumas, ſed juxta ordinem ſibi conceſſum ipſos Domino in pace ſervire permiſſas. Si nos minus audieris, quameunque poterimus ſententiam in te et tua, etiam nolentes dare non tardabimus. Quod ſi quid adverſus dominum Walterum habes, plenariam de ipſo juſtitiam offerimus. Valere te et benefaciendo Domino placere optamus.

EPISTOLA CL.

AD

Non queritur Walterus clericus noſter duplex damnum ſe incurriſſe. Nam nomine Hugo de Cluna, Gilberto Angli pecuniam quam ab Hugone ipſi deberi putabat, reddidit, et cum Hugo ſe prædicto Gilberto nihil debuiffe aſſerat, item cum Hugone data pecunia tranſegit. Vobis itaque mandando precor, ut tribus hiſ ſtatuto die evocatis, Walterum pecuniam redditam, quæ tamen, ut aſſerit, Gilberto debebatur, repetentem, ad plenum audiat, et Hugonem de Cluna de re iſta veritatem teſtari, ex parte noſtra commoneatis. Si quæ prædictum militem in debitum recepiſſe a Waltero conſtiterit, ipſi quantum accepit reſtituere compellatur. Quod ſi miles pecuniam hanc Hugonem ſibi debuiffe probaverit, cauſam inter Hugonem et Walterum nobis reſervabit.

EPISTOLA CII.

AD PHILIPPUM DE SARNEFELD.

Amico ſuo et parochiano Philippo de Sarnefeld, ſalutem.

Audire in curia domini abbatis Radingenſis, tibi legem adjudicatam eſſe, ut manu duodecima jures, te nunquam vel prædeceſſores tuos de terra de Sarnefeld, eccleſiæ de Lumin' quinque ſolidos, quos a te quaerit, reddidiſſe. Certa autem recordatione ſanctæ Eccleſiæ recognosco cauſam hanc in præſentia bonæ memoriæ domini Roberti epiſcopi, et

agitam fuiſſe, et ipſius conſilio definitam. Unde quia in lege hac faciendâ, quædam tuæ et tuorum ſaluti contraria mihi videor intelligere, mandamus tibi, et ſuper Chriſtianitatem tuam præcipimus ne juramentum hoc aut ipſe facias, aut aliquem tuorum facere permiſſas, quouſque nobiſcum locutus fueris, et ſuper hac ipſa re conſilium plenius habueris. Supplico enim domino abbati per litteras meas, ne propter expectationem hanc, cauſæ tuæ aliquod detrimentum incurras. Valete.

EPISTOLA CIII.

AD G. ARCHIDIACONUM WIGORNIENSEM.

Gilbertus Dei gratia episcopus Herefordiensis, caro suo magistro G. archidiacono Wigorniensis, salutem.

Scitis, chariſſime, ſcitis, quod paſſifici in prærogativâ filiorum Dei adoptati ſunt. Unde proximorum paci eo diligentius attendendum eſt, quo majus eſt quod ex hoc opere a Domino ſperamus et exſpectamus. Rogamus igitur ut hac ſpe benevolentia veſtra facilem ſe nobis præſtet et exorabilem, ut dominum Wigornienſem a perſecutione fratrum noſtrorum, monachorum ſcilicet Eweſham, revocetis, et paci inter ipſos reformandæ operam impendatis. Ad quod ſi vos preces noſtræ non impellerent, reverentia tamen domini papæ jamdiu traxiſſe et compuliſſe debuerat. Ad ipſum namque appellatione facta, pacem omnem et ſecuritatem appellatoribus obſervari juſtum eſſet. Audivimus tamen a multis dominum Wigornienſem prædictos fratres poſtquam ad dominum papam appellaverunt, non ſolum ſuis ordinibus ſuſpenſiſſe, ſed ad hoc operam dare, ut eos de monaſterio ſuo ejiciat, et ne dominum papam adire poſſint, cuſtodia carcerali cohibeat. Quod ſi fecerit, de gravi in dominum papam offeſſa excuſari non poterit. Igitur domini papæ reverentia, charitas etiam domino Wigornienſi debita, preces quoque noſtræ vos moveant, ut aut paci hinc reformandæ ſtudeatis, aut hiſ qui in archidiaconatu veſtro ad nomen domini papæ confugiunt, conſilium veſtrum et auxilium non negetis, nec eos manu quacunque laica extrahi et affligi, aut quæ eorum ſunt diſtrahi permiſſatis. Vobis hæc ex charitate ſcribimus, ne conſequenti cum agente par reatus involvat. Conſenſus enim eſt non reſiſtere cum poſſis aut debeas. Quia in re manifeſta conſluſio vobis aut conſenſum ingerit, aut monachis deſenſionem. Valete.

EPISTOLA CIV.

AD ROBERTUM EXONIENSEM EPISCOPUM.

Domino ſuo dilecto fratrique chariſſimo, R. Exoniensi, Dei gratia epiſcopo, frater G. Herefordienſis Eccleſiæ miniſter, ſalutem et dilectionem.

Ubi multa eſt confidentia, multa eſt et ſæpe præſumptio. Inde eſt, quod amabili et amandæ nobis ſemper benignitati veſtræ preces multa ſecuritate porrigimus, ut nobis in quibusdam quæ ad vos ſpectant, in ea quæ nobis ad præſens orta eſt neceſſitate, ſubveniatis. Implevit jamdiu querelis aures

omnium canonicus quidem Hugo de Cotes, asserens A se a nobis ecclesia de Stanleia violenter ejectum, et rebus suis injuste spoliatum. In plenam etiam nostri suggillationem, ad dominum papam querelam eandem protulit, et ad dominum legatum litteras hujus rei cognoscendæ reportavit. Quia vero vestram non latet prudentiam, qualiter prædictus Hugo in partibus vestris aliquandiu conversatus sit, cujusmodi etiam religioni addictus, rogamus ut litteras nobis hujus rei indices concedatis, et nos vobis in omnibus amplioris gratiæ debitores efficiatis. Quem arctioris observantiæ gratia si se constat inclusisse, constat etiam his quæ ante possederat renuntiassse. Quod quia de ipso audivimus, ab amico veritatis testimonium expectamus. Et quia ad multorum correctionem religionis amatoribus inbonesta (fre- B quenter honestissime proferuntur, si quid vulgo notum est, quod adversarii nostri faciem confundat, petimus ut et hoc litteris ipsis elucescat. Valete.

EPISTOLA CV.

ROBERTI EXONIENSIS EPISCOPI AD EUGENIUM III. PAPAM.

De clerico incontinenti.

Rogatu venerabilis, etc. *Vide inter variorum ad Eugenium epistolas, Patrologiæ t. CLXXX.*

EPISTOLA CVI.

[AD HENRICUM NORMANNORUM DUCEM.]

Regiæ nobilitatis et indolis, ut audivimus, egregiæ, H. comitis Andegavensis filio, Normannorum duci, et regni Anglorum pro magna portione domino, G. Dei gratia Herefordiensis episcopus, salutem et servitium.

Placuit vobis litteris commonere me, ut cito venire ad vos, facturus id quod in manu domini abbatis Bord', promiseram. Ut promissa complere quam citius potui, promptus accurri, et quia processeratis ulterius, Herefordiæ reditum vestrum biduo expectavi. Auctoritate vero obedientiæ me non solum vocante et monente, sed urgente et trahente ad aliud, diutius expectare non potui. Precor itaque, si placet, ut me hac vice excusatum habeatis, et absentiam meam æquanimitèr sustinendo hac vice, me vobis gratiæ debitorem efficiatis. Si qui vero sunt æmuli aut malevoli mei, qui ob mei odium vos in injuriam Dei et Ecclesiæ detrimentum, suggestionem maligna trahant, bonum est vobis timorem Dei consiliis malignantium opponere, et illud sapientis elogium memoriter retinere: *Beatus vir qui non abiit in consilio impiorum (Psal. 1).* Omnium enim sententia ex Deo procedit, quem si in initiis non bonis offenderis, exitus vestri cum honore esse non poterunt. Det vobis intellectum et modestiam Dominus, ut et pro vobis orent Ecclesiæ, et dominationem vestram in longum expetant plebes subjectæ. Valete.

EPISTOLA CVII.

[AD THEOBALDUM CANTUARIENSEM ARCHIEPISCOPUM.]

Patri suo et domino Cantuariensi archiepiscopo T. frater G. Herefordiensis Ecclesiæ minister, salutem et obedientiam.

Ex quo litteras vestras suscepimus, fructus nostri laboris hic est. Rogerum subpriorem, virum bonum, dominum David, G. R. et eorum complices in partem nostram convertimus. Nicolaitæ vero, sicut ab initio, sic vobis adversantur adhuc, et quæ itineri suo necessaria sunt, hic acquirere et præparare modis omnibus moluntur. Unde nisi vobis videtur aliud, consilium fore æstimo, ut dominus Ricardus prior et dominus Samson iter ad dominum papam quam citius arripiant. Indignum est enim illos tanquam conscientia bona se curiæ præsentare, nostros autem qui viam Domini gradiuntur in veritate, tanquam male conscios delitescere. Unde opus est, ut litteras communes prælatis ecclesiarum et conventibus, qui in partibus nostris sunt, dirigatis, ut juxta conscientiam suam litteris suis ad dominum papam testentur juxta ista, pars illa conventus Eveshamensis, quæ in electione domini Willelmi est, quam longe et numero amplior, et merito purissimo sanior habeatur. Cætera vero quæ negotio necessaria sunt, vobis dominus Reginaldus aperiet, qui ad præsentiam vestram, et ad videndam electi sui faciem, toto festinat desiderio. Valete.

EPISTOLA CVIII.

[AD EUMDEM.]

Patri suo et domino Cantuariensi Dei gratia archiepiscopo T. G. episcopus Herefordiensis, dilectionis et obedientiæ famulatum.

C Quorundam, Domine, relatu cognovimus, W. priorem Sanctæ Bar'. in causa de Stanleia suas quodammodo partes interponere, et jus sibi in ecclesia sancti Leonardi, contra ecclesiam Glocestriæ vindicare. Quod quam legitime faciat, hinc potestis, si placet, advertere. Prædicta quippe ecclesia petitione domini Salesberiensis, et eorum quos ibidem secum habebat, Walteri scilicet et Rogeri atque Henrici, de manu domini Wigorniensis a nobis suscepta, dominus prior illico adversus nos apud dominum Wigorniensem querelam deposuit, et nos de prædicta ecclesia responsuros in jus vocari fecit. Cumque jam statuto die in præsentia jam dicti episcopi foret inter nos aliquandiu actio ventilata, et idem episcopus in sæpe dicta ecclesia priori nihil se unquam concessisse assereret, dominus prior adversus nos die certo audientiam vestram appellavit. Cumque appellationem prosequenti vestro nos præsentaremus conspectui, auditis omnibus quæ de ecclesia Sancti Leonardi prior contra nos allegaverat, responsioni nos obtulimus judicium in nullo recusantes. Ipse vero nos præveniens, ante omnem responsum nostrum in audientia vestra liti renuntiavit in totum, seque in prædicta ecclesia nil vindicaturum ulterius, sub multorum testimonio proclamavit. Unde vestra discernat æquitas, cum liti de prædicta ecclesia motæ sponte renuntiaverit, si ipsam litem instaurare satis desiderat. Nos enim quæ veram novimus, testificamur, et ea

opportuno loco et tempore probare parati sumus. A
Valete.

EPISTOLA CIX.

[AD ROGERIUM EBORACENSEM ARCHIEPISCOPUM.]

Patri suo et domino R. Dei gratia Eboracensi
archiepiscopo, frater G. Herefordiensis Ecclesie
minister, salutem et servitium.

Si nos admitteret solite jam dilectionis arcanum,
secreta signo clauderemus, nec ad Patrem directa,
multorum oculis intuenda committeremus. Sed quia
nos exclusos novimus, ideo non jam intus positas,
sed foris vix habentes litteras mittimus, ut veniam
postulent, et suo gratiam domino, si quomodo
possint, apud vos redintegrando concilient. Quod
tamen trementi chartule factu facile non speramus,
ad quam nec manum porrigi, nec vestros facile
converti oculos posse æstimamus. Unde si nos de-
dignatio justa repulerit, volumus saltem alios non
latere quod querimus, quia vestram non ferentes
ultra iracundiam, veniam excessui postulamus.
Nam, si quid in vos diximus, hoc ipsum palinodiam
in nos manu propria conscribendo recantamus, et
si vestrum vel modicum movimus animum, ipso
culpam fateamur ore, quominus caute prorumpendo,
id nullo vestro exigente merito, in dominum offen-
dimus et amicum. Cum charitate quidem stetimus
in Ecclesie causa quam fovemus, et si ferrum de
manubrio nobis inconsiderate moderantibus elapsum
est, quid superest consilii, nisi ut ad magnum
illum Eliseum cum poenitentia et lamento recurra-
mus? Magna spes est, ut poenitentem præco poe-
nitentie non repellat, et ingemiscientem altius, ipse
gemituum prædicator non abiciat. Poteramus equi-
dem debitum charitati pensum prudenter et honeste
persolvere, et disceptatione ecclesiastica, juxta juris
formam, etiam Domino non in hoc indignante, re-
sistere. Sed quid ad nos extendere digitum, brachia
contorquere in vos, et tanquam alicujus essemus
momenti, ore misero non solum spumantia verba,
sed et tumida jactitare? Quo nobis ea die pudor,
honestas, ecclesiastica disciplina, et ipsa bonæ
mentis affectanda sobrietas abierunt? Quam male
statim in momento omnia nobis elapsa sunt, ut nu-
dati bonis, intrinsecus statim efficeremur dignis-
simi ut a gratia caderemus. Sed qui cadit, nunquid
non adjicit ut resurgat? (Amos 1.) Nos an sic un-
dique premit iniquitas, ut nobis ad gratiam nullus
sit aditus? An si modestia nobis excideret, misericor-
dia quoque vobis elapsa est? Et si præcincti fune in
peccati legem abducimur, zona illa aurea vobis a
manillis avulsa est? Absit, ut qui sibi quotidie re-
mitti supplicat, supplicanti conservo debitum non
remittat, et abstersa Pater iracundie nebula, non in
serenitatem solitam mens sese vestra reciperet, acces-
sum nobis ad veniam utique non obseraret. Nam
quantulum est quod deliquimus, nisi quia summi
quodlibet offensa culminis magna quidem habenda
est? Verbum verbo subjunximus, et ut in discepta-

tionem nos est, simili simile coaptavimus. Nam cum
dixissetis quia nobis eo usque pepercideratis, respon-
dimus quia multa habebamus in quibus sublimitati
vestræ pepercimus et nos. Quia verborum in-
fausta clausula, nunquid incompositos vitæ nostræ
mores, aut animi, quod absit! vitia, cynica rabie
mordendo perstrinximus? Absit, ut in mentem ve-
stram hæc subrepat opinio, ut suspitione hujusmodi
confundatis innoxium. Testor inaccesibilem illam
lucem, quæ bonarum occulta mentium penetrat et
illustrat, illam quoque communem spem quam san-
ctorum est amplexa devotio, nos verbis illis nil aliud
intellexisse, nisi quod multa ad corpus causæ spe-
ctantia, ob reverentiam vestri tacuimus, et penes nos
compressa tenuimus. Nam cum de litteris corruptis
ageretur, poterant in hoc articulo multa durius objici,
et per rhetoricam auxesin, ut satis ipsi nostis, ampli-
ficari. Cumque eisdem litteris et jus et spoliatio in-
nueretur, non in celum os nostrum posuimus, ut
prezum falsitatem vel in modico arguere præsume-
remus. Cum juris habeat formula, ut etsi sacrum
oraculum hujusmodi precator attulerit, careat peni-
tus impetratis. Hæc frivola sunt et his similia, in
quibus vobis pepercimus, ad quæ mentis oculum
dum tumide loquebamur habuimus. Nam si ad tem-
pus, urgente charitate, stulti facti sumus ob fratres,
sed non insani tamen, ut probra diceremus in vos,
quem præ cæteris huc usque dileximus, quemque
laudum titulis in multorum invidiam frequenter ex-
tulimus. De vestris, Pater, occultis nulli rectius quam
nobis fidem habebitis: nam quis novit occulta homi-
nis, nisi spiritus hominis qui est in ipso? (I Cor. 11.)
Ecce coram Deo quod non mentior. Nil amaritudinis
habuimus intus adversum vos, nisi quod interprete
præsentis scripto confessi sumus. Unde et acerbior
quam ipsa res expebat nosmetipsos accusavimus, eo
quod indignationem vestram in nos quantulumcun-
que etiam molestissime sustinemus. Opinabitur quis-
piam ex animo non dici quod dicimus, sed ut ve-
strum demulcendo animum factæ in nos appellatio-
nis onus aliquatenus evitemus. Non hic noster est
oculus, si Christi sumus, ipsius vicario confidenter
astabimus. Suo currant fata curriculo, provisos sibi
quæque sortiantur eventus. Elapæ potius amicitie
damna plangimus, quam imminetia timeamus. Va-
lete, et moveat vos utinam spiritus ille pietatis, ut
amico revertenti etiam dum longe est in amplexum
occurratis.

EPISTOLA CX.

[ROGERII EBORAC. ARCHIEPISCOPI EPIST. AD GILBERTUM.]

Venerabili fratri et utinam amico, G. Dei gratia
Herefordiensi episcopo, R. Eboracensis Dei gratia
archiepiscopus salutem.

Susceptam de manu dilecti filii H. quam dicitis
palinodiam vestram, priusquam alicui ipsius copia
fieret, diligenter inspexi, verius in primis ne vivæ
vocis vestræ, ut salva pace vestra dixerim, ardorem,
missi litterarum apices exprimerent. Resedissent

utique apud nos, et in manibus nostris illud deperisset arcanum, et vaga in publicum exeundi negaretur licentia, ne geminata injuria omnem reconciliationis viam excluderet. Fateor quidem me his, quæ vobis calor animi ministravit, aliquatenus commotum, non tamen ut aut in me fraternæ scissura facta sit charitatis, aut sol justitiæ super iracundiæ meæ affectionem obscuratus. Habeo enim ex pristina consuetudine, ut cor ita et labia maxime erga amicum circumcisa, quæ arctiori lege conclusit singulare exemplar patientiæ Christus, ex quo lubricos animi mei motus per gratiam suam cingulo sacerdotali voluit astringi. Non enim mihi a pectore excidere potest, quod sacerdotali ex lege datum est in mandatis, ut cum turturem vel hujusmodi caput ad pennulas reflectat, et quod in descriptione templi mensarum labia intrinsecus reflexa dicuntur per circuitum, quoniam verbi seminator divini ex omni parte circumspectus, ad cor debet revocare sermonem, audire quæ dicit, operari quæ prædicat, ne si intenderit arcum, et sagittis sacræ Scripturæ vitia percusserit auditorum, convertatur in die belli, et avertatur adjutorium gladii ejus, nec auxilietur ei in bello (*Psal. lxxxviii, 44*). Miror valde, nec satis admirari possum, unde sanctitas vestra tantæ me simplicitatis esse crediderit, ut quia voces meas mihi reddidistis, putetis offensum. Quibus in verbis, teste Deo et conscientia mea, nullam me tunc arbitratus sum, sed neque nunc opinor acceperisse injuriam, præsertim cum hujusmodi ad iram mitigandam et conciliandam amicorum gratiam proferri soleant. Si vero sub eorum ambiguitate meam in aliquo gravari crederem opinionem piculari me subicerem flagitio, qui tantum amicum prior ad hanc provocassem contumeliam. Gravius aliquid extra causam dictum est, cujus tanta est et fuit admistione personæ ad quam spectare videtur acerbitas, ut contra cæterarum injuriarum naturam dissimulatione minime potuerit aboleri. Sed de his pauca. Nam quantumlibet in parte ista oratio succincta odiosa nobis quam periculosa. Ideoque ad priora redeamus. Occurrit ille epistolæ vestræ locus, ubi dicitis, leviora ad gratiam nostri allegata, gravioribus deductis. Quæ etiam tam vere quam eleganter frivola nominastis. Sed secus se habere facies negotii facile declarabit. Nonne in medium deducta est accusatio falsi? Nunquid vobis durius actum fuisse videretur, si precum falsitas argueretur? Utinam omnia proposuissetis, facile iudicibus violentæ spoliationis non solum testibus, verum argumentis et instrumentis quibus abundamus, fides facta fuisset! Hæc et his similia allegare quæ causa nostri suppressistis, ad officium spectant advocati, cujus est agere quod causa desiderat, ut tamen temperet ab injuria. Et vos quidem vel duriora dicere absque adversæ partis injuria potuissetis, nisi vos a causæ hujus pratrocinio leges pariter et canones excluderent. Scitis enim quam diligenter hujus negotii secreta non solum antequam iter ad dominum papam arripuissem, verum post

A reditum meum Wigorniam aperuerim. Facta vobis est litterarum copia, quas super hoc negotio a sede apostolica impetraveram. De his quæ super transactione posueram, nihil omnino vobis est absconditum. Quare manum ad vestra jura porrigere non audeo, ne forte gravius amicum lædam quam ipse læsus fuerim. Et mihi satius est quædam cum detrimento causæ tacere, quam verecundiæ dicere. Nam quod ad auxesim spectat, quam rhetoricam dicitis, quæ potius oratorum est, certum est quia ei nullus ad causam istam patebat accessus, cum ipsa videlicet in ultimis duntaxat et quæstione comprobaret locum elegerit. Ideo si interposita fuisset, non tam in nostram quam juris redundaret injuriam. Sed quid plura? Nunquid epistola vestra tot sacræ Scripturæ vallata præsidii, tot gravibus onerata sententiis, tanto rethoricæ exornationis decorata fulgore, in vanum laborasse et inanis ad dominum suum redire poterit? Absit! Sed veniam petenti venia dabitur, si tamen cum vestri copiam Deus dederit, animus vester ab oratione non discrepet. Ecce jam in occursum vestrum vetus festinat amicus. Jam in domo patris mei auditur symphonia et chorus, exsultant famuli, occiditur vitulus saginatus, stola vobis paratur et annulus (*Luc. xv*). Expedit ergo ut utrique vitulum in ostio tabernaculi pro peccato pariter immolemus, quatenus aqua sanctuarii lotis pedibus, veste competenti iterum induti, epulemur simul et exsultemus, ne glorientur de nobis fratres, qui discordias seminant, et exsultant in rebus pessimis (*Prov. ii*), sed confundantur et pereant cum his qui perdere cuncta festinant. Valete.

EPISTOLA CXI.

[AD ROGERIUM EBORACENSEM ARCHIEPISCOPUM.]

Patri suo et domino R. Dei gratia Eboracensi archiepiscopo, frater G. Herefordiensis Ecclesiæ minister, salutem et servitium.

Spirat delectabiliter hortus aromatum, et fragrantiam suavem dat odorum multorum in unum sibi juncta suavitas. Tale, pater, quiddam vestra mihi pagina contulit, quam sæpe jam lectam dum repeto, horto plane quodam mihi videor inesse deliciarum. Hinc enim favorabilis illa venustus eloqui, inde sententiarum mihi spirat alta profunditas, ut dum delectat pariter et ædificat, alligatum nexu gemino totum rapiat in se suum pagina jam dicta lectorem. Ad Patrem verba transmiseram, et placidam mentis vestræ tranquillitatem, me quam parum libet attentasse mæstus ac sollicitus deplanxeram. Sed ecce plantum mihi convertisti in gaudium (*Psal. cxix*), et beate me deliquisse confiteor, qui in peccati vicissitudinem non penam quam suspicari poteram, sed munus reporto quod desperabam. Munus enim mihi grande reputo, descendens de monte Moysi faciem vel a longe contemplari (*Exod. xix*), et claritatem vultus ejus, quam infirmus vix capit oculus, objecti saltem velaminis quibusdam quasi rarecentibus filiis aliquatenus intueri. Transmissa namque nube et caligine. in ipso mentis vertice qui sacer

vere mons est, cum ipsa luce quam sanctæ mentes inhabitant, soliloquia sancta tractastis, ubi de fonte lucis hauriens, multa in paginam quæ nos docendo corrigerent, et occidentis nostri tenebras gratiosa sui plenitudine luminis illustrarent. Hinc habitum mihi bene circa vos dispositæ mentis ostenditis, ut in virtutis appetitum mentem meam vel coram posito virtutis speculo provocetis. Sic sua sancti bona frequenter intimant, non ut sese laudibus efferant, sed ut aliis in se quod salubriter imitentur ostendant. Hinc ad mentem mihi cordis illa circa vos simulque labiorum circumcisio sancta proponitur, ut intus apud me de cætero quid vel cui vel quando dicendum sit, apto rationis moderamine dispensetur, et internus ille calor animi sic erumpat in medium, ut igne illo foris vox ardeat, quem venit Dominus in terram mittere (*Luc. xii*), non quem studet a gehenna semper hostis inflammare. Purgata sunt prophetæ labia, ad desper allati carbonis attactum, et oris mei poterunt purgari superflua, ad patris et domini pie commententis exemplum. Patientiæ vero quid memorem quam mihi sancte proponitis, ut hanc mihi præsentando meæ me possessorem animæ vel de cætero faciatis? quæ nimirum anima dum rationi rebellis est, dum repugnat spiritui, dum læsa remurmurat, et in ultionem sese stimulat, et inflamat, nondum quidem possidetur. Ad Christum vero conversa et in melius commutata cum ipsius exemplo, suas remittit injurias, adversa jam jucunde sustinet, jam iam loris alligata patientiæ, ab omni inordinatæ voluntatis impetu cohibetur, et subjecta rationis imperio, pleno jam domino possidetur, attestante veritate, quæ ait: *In patientia vestra possidebitis animas vestras* (*Luc. xxi*). Persuadet idem mihi turtur ille mysticus, non abruptum habens in sacrificia, sed retortium caput ad pennulas, hoc mihi clamans, hoc prædicans, ut si quid horum quæ turtur ipse figuraliter exprimit in me Domino sacrificem, non inanem gloriam sectando vel gratiam, a vero Christi corpore quod est Ecclesia fuco me quodam simulationis abruptam, sed principale mentis, quod interioris hominis vere caput est, ad veras virtutum pennulas, et ad illas quibus volatur in cælum duas alas charitatis sincera veritate retorqueam. Nec minus illa me mensa cœlestis lætificat, quæ dum labia reflectit in se, sicut sancte scribitis, divinæ doctorem legis erudit, ut in his quæ docet et loquitur, consideratione semper sedula recurrat ad se, ne verbo vita dissentiat, ne verbo quos ædificat subvertat exemplo, juxta quod in laude bonorum scriptum est: *Sagitta Jonathæ nunquam abiit retrorsum, et gladius Saulis nunquam reversus est inanis* (*II Reg. i*). Verbum quippe Dei et gladius et sagitta est. Gladius, quia percutit, et eo sagitta quod pungit. Qui nimirum gladius inanis revertitur, cum prolatus sermo nec vitia resecat, nec ad frugem virtutis erigit audientem. At Jonathan, qui *dans columbam*, vel *donum columbæ* dicitur, sagitta reflexa non percutit, quia spiritalis quisque doctor, qui a Christo

A dona gratiæ percipit, et hæc eadem fideliter ministrare non omittit, reflectit labium prudenter in se, dum sapienter et sancte vivit. Hæc mihi de paginæ vestræ collecta sunt gremio, dum per eam quasi vitæ quadam pascua, qua possum mentis exercitatione, discuro. Quibus nimirum oblectamentis, si quid forte coheret asperum, id gratum habeo, velut ejus admistione totum mihi sit quasi quodam sale conditum. Ut ab hujus me causæ patrocinio repellatis, adnectitis, quod ejusdem secreta mihi sunt per vos Wigornia revelata. Sed, ut pace vestra dixerim, si mecum secreta quandoque gratia contulistis solum quid vobis de transactione placuerit, et quas a domino papa litteras acceperitis, ostendistis, et ipsas quidem litteras non multo post episcoporum commissas manibus, omnium indifferenter communicari notitiæ vidi pariter et intellexi. Quid enim Brugie quasi triviatum divulgabatur, nisi dominum Lincolnensem et Eliensem hoc accepisse in mandatis, ut causas vestram audirent, et appellatione remota dirimerent? Unde vero causæ vestræ fundetur intentio, quibus nititur adminiculis, probata sit testium vestrorum an improbabilis opinio, sufficiens neque numerum eorumdem, possessionis vestræ facilis an implicita probatio, et omnino quod obesse vel prodesse causæ quacunque ex parte potuerit, nec mihi in minimo patefactum est. Assertionibus itaque partium cum merita pandantur causarum, mihi de secreto hujus causæ quid recte valet objici, cui C nunquam horum nihil contigit aperi? De cætero, sicut orationem qua declamat orator rhetoricam dicimus, locos etiam et colores rhetoricos, unde illud: «Non est rhetoricus quem facit ira color,» sic et eam quam sugillatis auxesim, licet oratorum sit rhetoricam nihilominus convenienter assero, eo quod hanc rhetor edocet, cum orator eadem quod oportet, amplificet. Quæ cum questione probata locum habeat, potuit in hac questione competenter interseri, ex quo cepit oculata fide de litterarum deductionum in medio corruptione, non ambigi. Sed quid ista? An ad Ciceronis me dogmata transfero, et ad salutata jamdudum et velut antiqua mihi studia, notabili quadam mentis levitate respicio? Absint ista hinc. In Paris et domini suspiro gratiam, ob D mihi reconciliandam chartulæ continuavi jam chartulam, etsi plena dignitate currenti minus digne responderim, cum cyathum phiala propinanti porrexerim.

EPISTOLA CXII.

[AD WILLELMUM DE HINET'.]

Gilbertus Dei gratia Herefordiensis episcopus dilecto fratri Wilhelmo de Hinet', consecrata Domino tirocinia, beato perseverante fine concludere.

Auditus quæ circa te sunt exsultavi totus in Domino, illi gratiarum referens actionem, qui meritum omne præveniens, gratiarum suis dona benigne distribuit. Audita tamen mutatione tam subita, paulisper obstupui, quousque reversus ad cor illud præ oculis habui, quod velociter currit sermo Do-

nini quo vult (*Psal. cxlvii*), et ipsius dextera potenter immutat quem vult. Hic ad te sermo factus est, hæc te dextera apprehendit, hic tibi sermo consilium, hæc manus auxilium ministravit, hic velle bonum formavit in te, hæc ad effectum operis ipsum velle perduxit. Hic sermo cor tuum tangens cœlitus et illuminans, quod in spiritu consilii conceperas, potenter in spiritu fortitudinis roboravit. Hic in tenebris latenti tibi viam qua progredieris ostendit, hæc te pariter quo ostendat tibi salutare Dei jam deduxit. Intueri mihi videor illum superni scribæ calamus, cordis tui tabulas exarantem, et vocationem qua sponsus et sponsa dicunt: *Veni* (*Cant. iv*), eisdem fortiter imprimentem, quam, ut audio, non tu, frater tepide, non segniter advertisti, sed dilecti pulsantis ad ostium, vocem prudenter audiens et intelligens, ut ostii tui pessulum ipsi statim aperires (*Matth. vii*), illico surrexisti, dicens: Vox dilecti pulsantis (*Cant. v*). Usus consilio sane laudabili, qui auctori vitæ domicilium, non solum in te, sed et teipsum præparasti. Experiris illud tute, quod Apostolo de supernis innouit: Durum est tibi contra stimulos calcitrare (*Act. xxvi*). Nam quidam vitæ stimulus est, et quidam mortis. Et mortis quidem stimulus peccatum est (*I Cor. xv*). Nam ut pecus urgetur stimulo, ut irrumpat et impingat quo vult ipse qui stimulat, sic peccatum quem pungit, urget, et impingit indubitanter ad mortem. Stipendia namque peccati mors (*Rom. vi*). Longè mentem aliter stimulus amoris exagitat. Vitæ namque stimulus est, et amantem fortiter urget ad vitam. Contra quem calcitrare, tam durum est quam charitati reluctari difficile. Nam fortis est ut mors dilectio (*Cant. viii*). Separat a carne mors, a mundo dividit, sic et amor sanctus etsi longe nobilior, a mundo tamen et a carne sequestrat. Illo trahit unde est, non a mundo est, non a carne, non ex sanguinibus, neque a voluntate carnis, neque ex voluntate viri, sed ex Deo natus est (*Joan. i*). Ad ipsum trahat, ipse finis amoris est. De quo David: *Omnis consummationis vidi finem* (*Psal. cxviii*). In hunc finem tendit amor, nec est vagus amor ille qui sanctus est. Habet præ se quem diligit, illud corde dicens, illud ore decantans: *Oculi mei semper ad Dominum* (*Psal. xxiv*). In hunc oculum defixisti, in ipso tibi complacuit, cui speramus etiam complacuisse in te. Hunc per viam arctam et arduam secutus es, et amoris te trahente funiculo, non ad dexteram vel ad sinistram declinasti. Non respexistis ad prospera, et adversa formidare dedignatus es. Crucifixum crucem ejus bajulando prosequeris, crucem exprimis habitu, crucem mente pertractas. Hæc sursum caput elevans, jam cœlis imperat, inferna deorsum premit, ipsius affixi manibus totam mundi latitudinem hinc et inde complectens, his manibus apprehensus es, nunc portans improperium Domini, Jesu, ut sis quandoque particeps et coronæ. Ipsius stigmata portabis ad modicum, et in tua clavos ejus carne deliges. Vestis horrida, cibus

A imparior, lectisternia dura, labor manuum, disciplina gravitas, iuge silentium, ipsos qui te pungant in te clavos exprimunt Salvatoris. Habes et instar lanceæ quæ lateri ejus infixa est, ipsum charitatis aculeum, qui tuo semper pectori iuge vulnus infligat. In hunc modum vulnerat, qui charitatem format in nobis, ille spiritus unus et summus. Hoc languet vulnere, quæ dicebat: *Fulcite me floribus, stipate me malis, quia amore langueo* (*Cant. ii*). O vulnus bonum, et languor suavissimus, quem mors illa comitatur, de qua scriptum est: *Pretiosa mors sanctorum in conspectu Domini* (*Psal. cxv*). Attolle jam non solum mentis oculos, sed et corporis. Vineam Domini jam saltus omnes occupat, implevit deserta, et sanctorum pugna cum spinis est. Posunt prava in directa, et aspera in vias planas (*Luc. iii*), et quod intus angust spiritus corporis exercitio foris insinuant. Intus enim vitiorum sentes exstirpant, annosa peccati robora charitatis igne conflagrant. Tumoris alta deficiunt, terram desertam, in aquosam, et inviam, virtutum reddunt copias abundantem, peccato mortui simul et mundo, ut se Christo sanctificent, præter ipsum omnia contemnentes. Mors ista sanctorum est, quam esse propheta memorat in conspectu Domini pretiosam. Nam quid Christo charius, quid in nobis ipsi pretiosius quam ut ipsum imitando mortem morte superemus? Et quæ tanta mors animæ est, quam vitiorum sædat congeries? Hæc vero morte qua mundo morimur, hæc ipsa vincitur et enecatur, juxta illud Prophetæ: *Persequar inimicos meos et contra illos et non convertar donec deficiant, confringam illos, nec poterunt stare; cadent subtus pedes meos* (*Psal. xvii*). Primis parentibus dictum est: *Morte moriemini* (*Gen. iii*). Mors enim peccati vere mortis æternæ ministra est. Obedientiæ vero filiis Apostolus ait: *Mortui estis, et vita vestra cum Christo abscondita est* (*Coloss. iii*). Vere beata mors quæ vitæ illius quæ cum Christo est, causa simul est et ministra! Ilanc tibi mortem vulnus amoris ingerit, ut de jure tibi quod dictum est vindicare jam possis: *Fulcite me floribus, stipate me malis, quia amore langueo* (*Cant. ii*). Quid enim floribus nisi sanctorum recens conversio, quid malis nisi eorumdem in virtute jam solidata consummatio intelligitur? Odor quippe bonus, et futuri fructus in flore spes est, hunc odorem spirat Ecclesiæ sanctorum conversio, in quibus in virum perfectum jam formatis fructus vitæ produciuntur et maturatur. His igitur jam languens anima fulciri postulat, stipari desiderat, ut exemplis sanctorum sibi propositis in suæ conversionis initio beatæ serveat, et propectu proficiat, et in exitu fortiter inardescat. Unde mihi flores, unde mala quibus te, charissime, fulciam, tunc quibus animæ in Domino Jesu jam languenti satisfaciam? Sed a me quid exigas quæ penes te sunt, quæ liberis jam palam conspectibus intueris? Cisterciensis Ecclesia per orbem late effloruit, quæ flores mundi gratissimos undequaque decerpens, ipsos transtulit in se, et in

quosdam paradisi flores cœlesti quadam mutatione transformavit. Ipsos mente conspicias, ut novellas olivarum in ipsius mense circuitu pullulantes. In ipsorum optime curres odorem, qui velut adolescentulæ, quarum non est numerus, in odorem sponsi currere non desistent. Quod si poma post flores exigit, ipsa quoque est, quæ cœlesti sponso quadam prærogativa decantat: *Omnia poma nova et vetera, dilecte mi, reservavi tibi (Cant. xiii)*. In ipsa grex tonsarum est, qui deposito peccati vellere, de pœnitentiæ lavacro noviter ascenderunt. In ipsa grex fetarum est, quæ in pascuis Bethel jam commoratae diutius, virtutum lanis decentissime vestiuntur. In ipsa et oves emeritæ, quæ post sobolem numerosam jamjam parere desinentes, ad caulas illas superuorum civium boni pastoris humero transferri desiderant. O quis ego sum, qui pastorem illum sanctum ovemque fecundissimam, Clarævallensem abbatem clarissimum digne commemorem? Quis mihi stylus aut quæ facundia, ut virtutis ejus vel in modico culmen attingam? Vir scientia clarus, sanctitate notissimus, sine fūco sanctissimus, scriptor insignis, prædicator egregius, ordinis speculum, Ecclesiæ dilatatio, sui temporis sol, nebulae dissipatio, abjectus sibi, mundo Christoque charissimus, sacerdos magnus, qui diebus suis Deo placeat et justus inventus, iracundiæ tempore in ipso mirabiliter operante Domino Jesu, dissidentium factus est reconciliatio. Vir squaloribus horridus, ejus consumptis carnibus, ossibus undique cutis adhaeret, ejus nec ventris crapulam, nec os delicias præterquam spirituales sapiebat. Quem cum corporalis intuebatur oculus, mundo despicibilis habebatur. Cum spiritualis attendebat nostri temporis hominem, longe virtutum meritis anteibat. Quis ejus labores digne referat? Sociatam sibi Thamar nunquam repulit, sed ejus amara toto vitæ curriculo protrahens, intus virtutum delicias, foris spinas portabat. Doctus agricola plantabat undique fortiter, affluenter rigabat, et plantationibus ejus innumeris abundanter Dominus incrementa præstabat. Unde non tibi Paulos, frater, non Antonios, non Ililariones, non Arsenios, non antiquarum arborum paradisi vetustos fructus in tui recreationem spiritus anteponam. Hic ecce præsens est, ejus recens auctoritas, quem oculis ipse conspiciere quemque docentem, ut arbitror, audire meruisti. A nobis equidem ad superna translatus est, et est apud Dominum merces illius. Porro nomen ejus vivit in sæcula, et ejus ab Ecclesiæ memoria non recedit (*Eccli. xxxix*). Hoc paradisi lignum prudenter his diebus a Domino in oculis Ecclesiæ plantatum est, ut virtutum gradus quisquis attentare voluerit, exemplares in illo virtutes quas imitetur omnes inveniat. Tu quoque, qui malis stipari postulas, hinc tibi quot voles, ipse decerpas. Hoc tamen scribens non statim attentare summa suadeo. Nemo repente fit optimus. Pecunia servatur optime, quæ paulatim collecta manu reponitur. Suis incrementis

A et gradibus virtus unaquæque perficitur. Ipse etiam virtutum chorus in mente bene disposita, certa ratione distinguitur. Ut ædificium spirituale prudenter erigas, prima tibi jaciatur humilitas, et mentis ei benignitas adhibeatur. His adhæreat obedientia, quam suo patientia vigore corroboret. Has omnes perseverantia sancta disciplinæ cibo reficiat. Sic in virum perfectum dispositus, in lata charitatis regna pervenies. Quo cum lætus intraveris, virum statim mutatus in alterum, nova omnia novus ipse in te miraberis. Deinceps in via Domini nil durum tibi reputabis aut asperum, totum quod horret caro tua, tibi spiritus in virtute dulcescit. Hinc virtutum pasceres in liliis, donec eternitatis aspiret dies, quo Dominum Jesum quem mente secutus es, feliciter apprehendas. In quo vale memor mei, charissime.

EPISTOLA CXIII.

AD A. PAPAM.

Patri suo et domino summo pontifici A. frater G. Herefordiensis Ecclesiæ minister, debitum charitatis et obedientiæ famulatum.

Quo fratrum corda plus amor connectat vinculo, nemo vobis, Pater, altius inspicit, penes quem virtutum magistra charitas principatum nobiliter obtinens, virtutem condigne remunerante Domino, vos totius Israel curram aurigamque constituit. Hac nobis plurimum imperante, dilecto fratri nostro præsentium latori, Nicolao compatimur, et lugenti collacrymantes, pro ipso sublimitati vestræ etsi nulla spe meriti, benignitatis tamen apostolicæ confisi gratia, supplicamus. Absens enim innoxius et ignorans, archidiaconatu quem et juste possidebat, et ministrabat sobrie, nulla juris aut ordinis observatione spoliatus est. Qua de re, cum suum jam frequenter episcopum multorum etiam interventu convenerit, nil inveniens solatii, nil omnino remedium, ad oppressorum confugit speciale subsidium, ubi facit Dominus judicium inopi, et afflictæ causam viduæ intra sui penetrale conclavis admittit. Quem, cum id exigente justitia, et agente misericordia, clementer exaudieritis, multos id desiderii et orationis ad Dominum inflammabitis, ut in longa tempora feliciter disponatis et judicetis Israel, qui causas ejus non ex personarum acceptione, sed æquitate summa discernitis. Valeat dominus meus et Pater in Christo charissimus.

EPISTOLA CXIV.

AD EUNDEM.

Patri suo et domino pontifici A. frater G. Herefordiensis Ecclesiæ minister, debitum humilitatis et obedientiæ famulatum.

Cum spectat ad judicem singulorum causas diligenter attendere, specialius tamen attendendæ sunt quæ in filiorum innocentiam sub annotatione criminis intenduntur. Funestæ namque voces et clamoræ præcludendæ sunt his, qui vitam innocentium persequentes et sanam, quorum non probant culpam, hos tamen invidiosa malitia trahere moliantur

ad poenam. Causæ quidem ejus quæ inter Osbertum A Eboracensem archidiaconum, et S. clericum vertitur initium, prosecutio et finis, appellatione ille suspensus est, quem ex litteris legati vestri domini Cantuariensis archiepiscopi, plena potest veritatis læe sublimitas vestra cognoscere. Has quidem et diligenter inspeximus, et omnes causæ ipsius articulos in eum processisse modum, quo litteris designantur eisdem, plane testificamur. S. enim prædictum archidiaconum super morte Willelmo archiepiscopo veneno, ut dicebat, illata, et quibusdam criminibus aliis impetens, in ipsum vinculum inscriptionis arripere, et coram iudice ecclesiastico agere recusabat. Cumque in tanta multitudine parentum et amicorum archiepiscopi defuncti solus ipse staret, et nullis fulta testimoniis verba funderet, lamen candentis ferri in prædictum archiepiscopum eo tutius offerebat, quo Ecclesia Dei probationem hujusmodi nullatenus admissuram attendebat. Ipsumque ad regis audientiam eo confidentius provocabat, quo ad iudicium hoc apud cinctum iudicem de jure celebrare non posse avertebat. Cumque iudicis animum in eo non oporteat verum quemquam moveri, quod non potest ostendi, pro jam dicto archidiacono preces sublimitati vestræ porrigimus, ne apud vos incurrat iram, quem et multa liberalitas...

Desunt nonnulla.

EPISTOLA CXV.

[AD HENRICUM REGEM.]

Domino serenissimo et præcellentissimo principi, illustri Anglorum regi, H. frater G. Herefordiensis Ecclesiæ minister, pedibus sanctis conculcato Satan, in Christo triumphare feliciter.

Te, domine dilectissime, ob id divina bonitas multorum prætulit regimini populorum, ut multis per te subveniat, et his quibus præes, dono multiplici per te gratiæ suæ munus impendat. Quod quidem in gente nostra impletum novimus, cui te sic dominum geris, ut et Patrem exhibeas, elatos sic reprimis, ut mansuetos et humiles mansuete disponere, regere et suscitare non dimittas. Te Ecclesiæ protectorem, pupilli patrem, viduæ consolatorem, et omnes injuriam passi propitium iudicem, ipsis rerum experiuntur indicis. Et cum omnes alta pace gaudeamus, per te arva solummodo dudum herbis floribusque depicta, se in omnem jam frugum exuberantiam exerceri, nocte dieque ligonibus aratrisque sauciari secure tuo sub imperio conqueri posse videntur. A Domino in te caput regni, et a te in omnes ejus oras, oleum gratiæ diffusum exuberat. Quod ad genua sublimitatis tuæ corde prostratus exoptulo, ut et latiori presentium nuper orphanum, vestri quondam fidelis Radulphi de Wirecestre, filio primogenito, munus apud te gratiæ miserantis obtineat. Incolumem te et potentem in longa tempora majestas divina conservet, in Christo domine dilectissime.

EPISTOLA CXVI.

[AD B. LEICESTRIÆ ARCHIDIACONUM.]

G. Dei gratia Herefordiensis episcopus, venerabili fratri et amico suo charissimo. B. Leicestriæ archidiacono, bene prosperari semper in Domino.

Quid in nobis obedientia sibi vindicet, prudentiam vestram charissime ad plenum scire non ambigimus, quem in castris obedientiæ laudabiliter agere, Deo devotis obsequiis militare bonæ vestræ opinionis ad nos pertingentis odore cognovimus. Inde est quod dilectæ nobis in Domino fraternitati vestræ preces affectuose porrigimus, quatenus clericis vestris, quos ad agendum et testificandum apostolica auctoritate citavimus, quod synodum quam celebrastis minime interfuerint remittatis, et amico pulsanti veniam hanc apostolicæ etiam auctoritatis intuitu concedatis. Nam quia qui occasionem damni dat, damnum quoque dare videtur, si ob culpam hanc, in eorum damnum zelus vester incanduerit, si absentiae suæ multam exegerit, nobis id poterit imputari, qui delegata nobis potestate, non plene forsitan utentes, eorum cautius invigilare debuimus impunitati. Valere vos optamus in Domino.

EPISTOLA CXVII.

[AD MATTHÆUM ARCHIDIACONUM GLOCESTRIÆ.]

G. Dei gratia Herefordiensis episcopus, amico suo Matthæo archidiacono Glocestriæ, salutem.

Veniens ad nos jamdiu hic lator præsentium, U. de Pedeure, conquestus est vos eum iusta nequaquam interveniente causa suspendisse, et decanum vestrum sententiam quam in eum dederat, auctoritate vestra promulgasse. Nunc vero ad nos iterato recurrens, se aliter quam se res habet, opinatum fuisse fatetur, et quicquid decanus vester in eum præcipitanter egerit, ipsum hoc absque vestra conscientia fecisse profitetur. Unde quantum aures vestras velut ignarus facti tunc replevit querimoniis, tantum etiam æquitatem vestram nunc extollit præconiis. Unde cum error facti nulli ad damnum esse debeat, preces benignitati vestræ porrigimus, quatenus benevolum benevole suscipiatis, et pristina sibi restituta gratia, modicum quod intercessit deflcti, prece nostra remittatis. Valet.

EPISTOLA CXVIII.

[AD A. COMITISSAM LEICESTRIÆ.]

G. Dei gratia Herefordiensis episcopus dilectæ sibi et diligendæ semper in Domino A Leicestriæ venerabili comitissæ, salutem quæ nunc est, et quam speramus in Domino.

Audito, charissima, eo quem de te ama circumquaque plangit eventu, confestim corde concussus sum, et menti meæ si quid jucunditatis aut hilaritatis insederat, hoc ad diri casus auditum anxius repente dolor exstinxit. Audimus enim te lecto doloris decubuisse graviter, et viam pene carnis ingressam in te totum quod homini minari potest mors carnis, propemodum excepsisse. Sed quem regis lacrymæ, dum prope mors pulsaret, ut annos sibi ter quinos adderet, ad miserendum inflexerunt,

ipse sanctorum pulsatus lacrymis, multorum motus singultibus te ipsum mente et spiritu desiderantem, te in beatam patriam affectione tota tendentem, tuis ut letus audio benigne restituit, et velut in exitu constitutam ad nos clementissime revocavit. Flores, ut æstimo, patriæ cœlestis odorare jam cœperas, et prægratata fortasse gaudia tibi jam differri conquerendo deploras. Patienter, obsecro, dilectissima, sustine Dominum, qui quod differt non aufert, quod suspendit ad tempus postmodum cumulatim reddit in gloria. Non est in paradiso qui ad profectum sui bonorum indigere possit exemplis. Ubi non est perfectio, opus esse constat exemplo. Exemplo tui multas profectisse cognoscimus, qui te subtracta de medio, ne in incertum currant, habent unde gratias agant, te virtutis exemplar retinent, quod præ oculis habendo, virtuti sese conformare intendant. Age ergo, dilectissima, et quam magno Dei munere restitutam suscepimus, curam adhibe, ne per tui incuriam amittamus. Patres emeritos habes circa te, tibi fideliter assistentes, te eadem qua seipsos charitate amplectentes. Horum, obsecro, pare monitis, acquiesce consiliis, defectu nimio caro tua viribus evacuata est, utpote quæ cum morte luctata nisi opem ferente Domino non evasiaset. Te vero virtutem semper zelare non ambigo, unde et de his quæ nunc instant jejuniis pertimesco. Obsecro ne quod scribo exhorreas; salubribus interim monitis acquiescas; defectam, quæso, carnem carnis esu sustentens, et modicum quo reficis in suis Domino pauperibus largiter recompenses. Fratres qui circa te sunt, in hoc mecum sentire æstimo, quatenus usque ad isti sunt dies (2^a), debilia membra tua vitamque velut supremis in labiis constitutam, carnis sustentari patiaris edulio, et victu et vestitu tredecim interim fratribus erogato, tu tibi a defectu provideas, ipsorumque necessitati benigna charitate subvenias. Vale, dilectissima, et exauditu pio amici mentem supplicantis exhilara.

EPISTOLA CXIX.

AD HENRICUM REGEM.

Dominum suo præ cunctis sibi charissimo, illustri Anglorum regi H. frater G. Herefordiensis Ecclesiæ minister, omni die ad Dominum devotæ mentis obsequium.

Obsecro ne irascatur dominus meus, si clementiæ suæ paucis supplicaverit humilis amicus ejus. Sollicitat me dominus cancellarius, ut curam Londoniæ episcopatus suscipiam, et ex parte reddituum episcopatus, episcopum ipsum et domum ejus exhibeam, reliquum vero domino meo regi, prout sibi spiritus Dei suggererit, erogandum conservem. Quod quia periculosum mihi est, et in multum animæ meæ dispendium, ad pedes sublimitatis vestræ corde prostratus expostulo, quatenus huic oneri me eximat vestra sublimitas, et auram hanc alii cui placuerit administrandam committat. Confido de misericordia Domini, ut ad petitionem meam cor domini mei regis inclinet, et me pia exauditione vestra læ-

(2^a) Hic aliquid videtur deesse.

et tunc, ut mihi redditus Deo devotius intendam, et ipsum pro salute vestra tanto purius, quanto expeditius, totis animæ meæ viribus interpellem. Muro suo inexpugnabili circumcingat vos Dominus, et armis potentiae suæ protegat vos semper, domine in Christo dilectissime.

EPISTOLA CXX.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, frater G. Herefordiensis minister, ex affectu amoris intimi fidele munus obsequii.

Quod ad præsens dilectæ nobis et diligentiæ semper in Domino sublimitati vestræ scribimus, hæc causa est, ut virum venerabilem Hugonem Londoniensem decanum, damno imminente, quoad possumus, eximamus, ne forte occasione damni data, sibi etiam hoc ipso damnum dedisse videamur. Dilectus quidem noster bonæ memoriæ Ricardus Londoniensis dudum episcopus, cum extrema laboraret ægitudine, et omnes quos promoverat, quosque sibi beneficiis obligaverat, rerum suarum administrationem suscipere, ob plures quas prædebant causas pertimescerent, dominus Lincolnensis et nos, cum ejus visitandi gratia advenissemus, in hoc consilium dedimus ne domum suam ulterius incerto statu fluctuare permitteret, sed suarum rerum administrationem et curam jam dicto decano et Nicolao archidiacono, ipsos ad hoc vi obedientiæ compellendo committeret. Qui nimirum onus attendentes negotii, mandatum hoc multa supplicatione declinasent, nisi tandem in hoc domini Lincolnensis nostrisque precibus et monitis acquievisset. Unde quia pactum contractus cujusque naturam auget et minuit, factoque cuilibet suæ dant formam circumstantiæ, sublimitati vestræ preces affectuose porrigimus, quatenus actionem quam jam dicti episcopi creditores adversus jam dictum decanum occasione procurationis hujus instituunt, quousque vobis valeamus assistere differatis, ut qualiter et quo pacto procurationem hanc susceperit, relatione nostra simul et testimonio cognoscatis. Ipsum enim onus debitorum episcopi in se nequaquam suscepisse, nec administrationem hanc aliter subisse noveritis, nisi ut rerum curam ageret, ipsumque et domum suam fideliter exhiberent. Et si quid ex rebus ipsis et obventionibus annuis reliquum foret, hoc ubi necessitas debiti plus urgeret, non prout creditor vellet, sed ut res esset exsolveret. Quod ob id sanctitati vestræ notificare curavimus, ne clericum vestrum quod non rapuit exsolvere compellatis, nec ipsum pietatis officium injustis solutionibus aliquatenus affligi permittendo, reliquos filios vestros a patre suo de cætero, quod absit! obsequiis absterceatis. Valere vos optamus, in Christo Pater charissime.

EPISTOLA CXXI.

AD EUNDEM.

Patri suo et domino T. Cantuariensi Dei gratia

archiepiscopo, frater G. Herefordiensis Ecclesiæ minister, sic utinam pugnare, ut vincat.

Latorem hunc, domine, præsentium familiarem nostrum Ecclesiæ nostræ canonicum, suis quidem commendabilem meritis dilectæ nobis in Domino sublimitati vestræ commendamus attentius, preces affectuose porrigentes, quatenus amore Dei et petitione nostra causam ejus quantum nititur justitia foveatis, nec adversariorum suorum calliditate jus suum opprimi, aut in vestra deperire præsentia permittatis. Quod adversantes ei multa licet nube falsitatis involvant, de vestra speramus æquitate judicii ut cito coram vobis falsitas evanescat, ad vestri lucem examinis iniquitatis tenebræ facile dissipentur. Illum igitur optamus in vobis spiritu convalescere, qui dudum in propheta sanguinem salvavit innoxium, ut cum clericum nostrum ab his quæ adversus eum malignose conflictata sunt, in spiritu discretionis eripueritis, nos gratiæ debitores, ipsamque servitiū semper obnoxium habeatis. Valere vos optamus, in Christo Pater charissime.

EPISTOLA CXXII.

AD UNIVERSOS S. MATRIS ECCLESIAE FILIOS.

Dilectis sibi in Domino universis sanctæ matris Ecclesiæ filiis, frater G. Herefordiensis Ecclesiæ minister, in Christo dilectionem et salutem perpetuam.

Consensu contrahentium inita pacta stabile tunc demum robor accipiunt, cum eorum quorum hæc firmare potest auctoritas excipiuntur litteris et firmantur sigillis. Inde est, quod conventionem inter Herebertum canonicum nostrum, et Willelmum capellanum domini T. Cantuariensis archiepiscopi, habitam super ecclesia de Hinteberga, scripto commendare curavimus, ut in hoc quod inter eos interposita fide compromissum est, obligatum utrumque alteri etiam scripto rem gestam fideliter interpretante teneamus. Herebertus ei in quamdam partem præbendæ suæ, ecclesiam scilicet de Hinteberga, cum capella sancti Laurentii, et aliis omnibus ad eandem ecclesiam pertinentibus, jam dicto Willelmo in perpetua vicaria et elemosyna, annua triginta solidorum pensione tenendam habendamque concessit, et eum in nostra et capituli nostri præsentia investivit. Quia vero canonico de præbenda sua ultra diem functionis suæ disponere de jure non licet, ego et tota capituli nostri plenitudo conventionem eandem in totam jam dicti Willelmi vitam extendimus; hoc unanimi consensu concedentes et statuantes ut, si Willelmus Hereberto superstes exstiterit, ei qui Hereberto in præbenda eadem fuerit substitutus, in eadem et non ampliorem, si id forte voluerit, summam teneatur, sed jam dictam pensionem solvendo, nostra et capituli nostri auctoritate, securitate plenissima potiat. Post diem vero Willelmi, libera sit facultas canonico nostro, quicunque tunc fuerit, super eadem ecclesia disponendo, ut eam vel ipse teneat, vel cui voluerit ampliori pensione concedat. Quod quia firmum inconcussum-

PATROL. CXC.

A que discernimus, ego et capitulum nostrum, præsentis scripto et sigillorum nostrorum appositione firmamus. Testibus. . . (*Cætera absunt.*)

EPISTOLA CXXIII.

ROBERTI HEREFORD. EPISC. AD EOSDEM.

Dilectis in Christo fratribus universis sanctæ matris Ecclesiæ filiis, R. Herefordiensis Dei gratia episcopus, Dominum exspectare sollicitè, et ventientem gratulanter amplecti.

Quia Ecclesiam Dei regendam et in aliqua sui portione administrandam, Domino permittente, suscepimus, ejus commoditati quoad possumus consulere et providere credita nobis dispensatione debemus. Quod ita recte fieri arbitramur, si contracta B solidando et quæ dissipata sunt in corpus unum redigendo, tam incolumitati ejus quam ampliando divino cultui studuerimus deservire. Quoniam igitur omnibus pie credentibus manifestum habetur, nec forum religioni convenire, nec castellum, qui tumultus et sanguinum locus est, servientium Domino paci congruere, ecclesiam Beati Petri in foro Herefordiæ sitam, et ecclesiam Sancti Guthlaci intra ambitum castelli illius importune positam, et omnes possessiones et parochias et dignitates earum, in unius Ecclesiæ corpus redeimus, et eam ecclesiam apostolorum Petri et Pauli, et Sancti Guthlaci, quam extra civitatem ipsam in loco religioni aptissimo ædificari fecimus, ad serviendum Domino in perpetuum episcopali auctoritate sancimus. Et ne C auctoritate nostra gravare quæpiam, aut juri cuiuspiam præjudicare videamur, tam his qui sunt, quam filiis qui nascuntur et exsurgent post nos, præsentis scripto notum facimus, Rogerum de Porti, qui ecclesiam Sancti Guthlaci diu injuste, utpote laicus tenuerat, et possessiones ejus indigne distribuerat peccatum hoc grande cognovisse, et in præsentia mea, et fratris Radulphi decani nostri, et canonicorum nostrorum Hugonis de Clifford, et aliorum tam clericorum quam laicorum quamplurimum, ecclesiam ipsam ut divinis officiis plenius assignaretur, in manu nostra penitus refutasse. Ipso itaque Rogero devote supplicante, venerabili etiam D fratre nostro abbate Glocestriæ et conventu ipsius benigne annuente, prædictas ecclesias in unum conjunximus, et hanc illarum possessionibus, dignitatibus et pertinentiis omnibus fundatam et dotatam, perpetuæ apostolorum Petri et Pauli et Sancti Guthlaci venerationi designavimus. Et quia conventum ibidem fratrum Deo servientium et ibidem regulariter viventium, per manum prædicti abbatis Glocestriæ, Deo disponente, suscepi sumus, hanc ipsam apostolorum et Sancti Guthlaci ecclesiam præfati abbatis, omniumque successorum ejus obedientiæ, et ecclesiæ beati Petri Glocestriæ custodiæ et subjectioni, capitulo Ecclesiæ nostræ in his omnibus unanimiter assentiente, commisimus. Quicunque ergo hoc pietatis opus pie attenderint, manumque auxiliaricem ad hoc confirmandum cum

fideli devotione porrexerint, perpetuam quæ inibi agentur orationum communionem, episcopalem a me qualicumque ecclesiæ ministro benedictionem, a summo autem pontifice Christo æternam consequantur retributionem. Amen.

EPISTOLA CXXIV.

AD A. (ADRIANUM PAPAM.)

Patri suo et domino summo pontifici A., frater G. Herefordiensis Ecclesiæ minister, apostolicæ sublimitati debitam reverentiam et charitatem.

Quod beatitudini vestræ super causa pauperis et honesti clerici, præsentium scilicet latoris, Simonis Lichfeldensis canonici, scribimus: hæc, domine, causa est, quod illatam sibi injuriam in creditæ vobis dispensationis culmen redundantem utique cum molestia sustinemus. Qui, cum adversus priorem Coventrensem et fratres ejus eum a parte quadam præbendæ suæ, ecclesia scilicet de Hunilton, expellere nitescentes, ad audientiam vestram appellasset, postea cum dominus Cestrensis et ego, ob Ecclesiæ negotia, Wigorniam convenissemus, appellationem suam præsentibus nobis innovavit, et in sui rerumque suarum protectionem et patrocinium, priorem ipsum præsentem ad sublimitatem vestram ad *Lactare Jerusalem* appellavit. Cui, cum ob vestræ celsitudinis eminentiam in tuto jam omnia esse oporteret, manus tamen sacrilega prorupit in audaciam, ut ipsius decimas et præsentis fructus anni multo sibi labore collectos intra cimiterii septa invaderet, et hinc ablatos asportaret. Quod sive sciente sive nesciente priore actum sit, ab ejus tamen hominibus perpetratum esse non ambigimus. Unde zelum nostrum temperare non possumus, quin sanctitati vestræ super hac corrigenda temeritate supplicemus, ut injuriam suam ob corrigendos alios manus apostolica juste puniat, et misericorditer egeno laboranti subveniat. Chartas enim domini Rogeri, dudum Cestrensis episcopi, et dilecti Patris nostri domini Cantuariensis Theobaldi inspeximus, quibus ecclesiam hanc in præbendam sibi collatam fuisse ante transactionem inter Cestrensem et Coventrensem Ecclesiam, per manum sanctæ memoriæ papæ Eugenii initam pro certo cognovimus. Valeat in domino sanctitas vestra, domine Pater.

EPISTOLA CXXV.

AD PAROCHIANOS HEREFORDIENSIS ECCLESIE.

GILBERTUS Dei gratia Herefordiensis episcopus, dilectis sibi in Domino universis ejusdem Ecclesiæ parochianis et filiis, salutem, gratiam et benedictionem.

Quod a prædecessore nostro bonæ memoriæ, domino Roberto episcopo, ad honorem Dei et Ecclesiæ sanctæ decorem pariter et utilitatem salubriter actum est et statutum, nos ejus iniatu vestigia, ea quæ nobis a Deo concessa est auctoritate concedimus et confirmamus. Quoniam itaque jam dictus prædecessor noster ecclesiam Beati Petri in foro Herefordiæ sitam, et ecclesiam Sancti Guthlaci intra castellum Herefordiæ ambitum fundatam, in corpus unum redigere, et unam beatorum apostolorum

A Petri et Pauli et Sancti Guthlaci ex jam dictarum ecclesiarum possessionibus constituere, et in loco religioni aptissimo extra civitatem ædificare, et in ea monachorum conventum instaurare decrevit, nos hoc ipsum ratum habentes, annuimus, et jam dictæ ecclesiæ beatorum Petri et Pauli et Sancti Guthlaci omnes possessiones et dignitates et libertates, a jam dictis duabus ecclesiis retroactis temporibus habitas, et sibi a jam dicto prædecessore nostro confirmatas concedimus, et præsentibus scripto et sigilli nostri attestatione, ut in perpetuum sibi firma permaneant. In his vero hæc propriis duximus exprimenda vocabulis. (*Desiderantur reliqua.*)

EPISTOLA CXXVI.

AD FRATRES TECHESBERIE.

B G. Dei gratia Herefordiensis Ecclesiæ minister, dilectis sibi in Domino fratribus Techesberie domino famulatum exhibentibus, salutem.

Sapiens docetur e facili, et qui doctrinis affluunt, hæc satis est succincta brevitate commoneri. Si libertati vestræ quam circa Patris electionem, apostolica vobis concedit et confirmat auctoritas, in magnum, quod absit! Ecclesiæ vestræ præjudicium sponte renuntiatis, judicium utique justum est, ut ea de cætero careatis, et quod ex arbitrio susceptis jugum illud diu sustineatis. Quod quia vobis capiosum, imo summe periculosum est, mandamus vobis et fraterna charitate consulimus, quatenus libertati vestræ conservandæ unanimiter intendatis, ne si ob cujuscunque favorem aliud fortasse feceritis, Ecclesiæ vestræ detrimentum cum id jam emendare non poteritis, sera et infructuosa pœnitentia luceatis. Valeat charitas vestra, dilectissimi.

EPISTOLA CXXVII.

AD R. COMITEM LEICESTRIÆ.

Venerabili domino et amico in Christo charissimo comiti R. Leicestrie, frater G. Herefordiensis Ecclesiæ minister, salutem et gratiam, et a manu Patris excelsi benedictionem perpetuam.

In iis, charissime, quæ mea potest sedulitas adimplere, debetis non uti prece, sed jussione. Est enim vobis, eritque apud me semper jubendi plena auctoritas, mihi vero nec deest, nec unquam deerit prompta vobis obsequendi voluntas. Vestras nimirum preces pariter et præcepta sic ratio distribuit, ornata honestas, modestia semper comes moderatur, ut valentibus quod honestum est, ea recusare sit difficillimum. In eo siquidem negotio, super quo mandatum sublimitatis vestræ nuper accepi, in negotio videlicet fratrum de Techesberia, promptius quidem et longe expeditius illis consilio pariter et auxilio profuissem, si die quo me urgens mandatum domini Cantuariensis et injunctæ vis obedientiæ illuc venire, et de facta electione inquirere coegit, saltem mihi vel verbo communicasset; a quibus non admissus non potui invitis beneficium præstare, quod nunc quidem pro amore Dei, et pro reverentia mandati vestri, non negabo vel ingratius. Honestatem namque

electæ personæ approbo et commendo; et si me cum A negotium ipsum tractabitur, interesse contigerit, de ipsius promotione ad honorem et utilitatem fratrum et monasterii de Teochesberia, quantum potero, salva pace prælatorum, vestra prece communitus, operam dabo. Valete.

EPISTOLA CXXVIII.

AD ROBERTUM LINCOLNIENSEM EPISCOPUM.

Venerabili domino fratrique charissimo R. Lincolnien- si Dei gratia episcopo, frater G. Herefordiensis Ecclesiæ minister, Christum portando in se ambulare sapienter et sobrie.

Susceptis litteris quibus diligentia nos vestra la- tificare dignata est, solito gratior et consueto sere- nior illico nobis dies illuxit. Auditis enim rerum eventibus, et perplexa quadam ingenii subtili- tate, pace jam sublata de medio nec fracta cito re- dintegrari, nec dissidentes admodum regum animos facile sibi conciliari posse speravimus. Sed qui ven- tis imperat et mari procellam cito in auram statuit, et quæ turbata sunt, ad pacis bonum statim ut vult amota nube discordiæ imperiosa qua præest pote- state convertit. Unde cum pax nostra a domini no- stri regis pace dependeat, spes ipsa pacis quam an- nuntiatione jam bona concepimus, ecclesiæ pariter et regno Angliæ preparatorium quoddam gaudii , juvante Domino, exultationis inducit. Quod vero speciale est ad nos, sospitati vestræ quam directa declarat epistola, intimis congratulamur affectibus ob conservatam vobis incolumitatem, illi gratias re- ferentes, qui cum suis benigne graditur, et iter et actus ipsorum, angelo comitante, prosequitur. Ad vestrum vero jam suspensi tenemur reditum, quia cupienti animo nunquam satis festinat, moram ipsam cum molestia sustinentes, et ut optatos occur- ramus in amplexus, adventus vestri nuntium de die in diem sperantes pariter et expectantes. Valeat dominus meus et frater in Christo charissimus.

EPISTOLA CXXIX.

AD UNIVERSOS S. MAT. ECCL. FILIOS.

Dilectis sibi in Domino universis sanctæ matris Ecclesiæ filiis, frater G. Herefordiensis Ecclesiæ minister, salutem quæ nunc est et quam speramus a Domino.

Quæ liti inquietudine quandoque turbata sunt, D ipsius sopito fomite, denuo revocantur ad pacem. Quæ nimirum inter aliquos reformata, ne facile qui- busdam emergentibus causis evanescat, ut pactis le- gitimis firmanda est, sic et excipienda scripto, et in perpetuum sui soliditatem litterarum memoria testificanda pariter est et roboranda. Noscat itaque vestra discretio causam, quæ inter Joannem cleri- cum et Reginaldum de Pagabam super ecclesia de Credintune diu agitata est, quæ etiam a Patre no- stro domino papa Alexandro nobis delegata est, ut ipsam diligenter audiremus, et rationibus partium hinc inde diligenter auditis et cognitis, ipsam; remoto appellationis obstaculo, mediante iustitia, decidere- mus, in hunc tandem modum conquiesse. Nam,

cum Joannes adducta testium copia, jam dictam ec- clesiam in integrum sibi restitui postulasset, Regi- naldus esse sciens ambigua facta causarum, antici- pando iudicium in integram medietatem jam dictæ ecclesiæ Joanni per omnia concessit, sique cum eo transigendo liti finem imposuit. Elegit enim Joannes oblatam sibi ecclesiæ portionem potius in pace sus- cipere, quam testes suos probationibus et jura- mentis onerare. Tactis igitur Evangelis utrinque juratum est ut, neuter alterum sua de cætero por- tione fraudei, sed uterque alteri jus suum integrum illibatamque conservet. Sane aliquo ipsorum altero tamen superstitie decedente, jure suo sibi in partis alterius recuperatore, salvo per omnia permanente. Quod quia coram nobis actum est, nos ad finem pacis cuncta redigi cupientes approbavimus, et trans- actioni in hunc modum initæ assensum præbimus, ipsam ut in perpetuum convalescat, præsentī scripto et sigilli nostri appositione testificando confirmavi- mus.

EPISTOLA CXXX.

AD RICARDUM LONDONIENSEM EPISCOPUM.

Venerabili domino fratrique charissimo R. Lon- donien- si Dei gratia episcopo, frater G. Herefor- diensis Ecclesiæ minister, salutem et dilectionem.

Scriptum nosti, charissime, justo quidquid acci- derit, id ipsum inminime perturbare. Illud enim Apo- stoli cordis oculis intuetur, bonis in bonum cuncta cooperari (Rom. viii). Unde prospera si affluant prophetæ concinit dicens : *Cantabo Domino qui bona tribuit mihi (Psal. xii)*. Adversa si obviunt, illud cordis labiis modulatur : *Obumbrasti caput meum in die belli (Psal. cxxxix)*. Hæc, charissime, dum me- cum reputo, in te nullius impetum fortunæ perhor- resco. Quæ leta si venerit, mansuete suscipitur; adversa si proruat, haud timetur. Hujusmodi mihi de te facile persuadent mentis tuæ constantia et viarum tuarum jamdiu nota perfectio. Quæ si quam firme speramus radicem suam solo mentis tuæ in- serunt, te quidem non in luto aquarum multarum vento agitatam arundinem, sed in virtutum Libano cedrum firme radicatam, tentationis flatus inveniet. Nec quidem ista profero, quasi adversum aliquid in te mihi tuæ tenor epistolæ nuntiaverit. Nuntiat qui- dem adversum te appellatum et jam factæ donatio- nis tuæ celebrationem solemnem ad dominum pa- pam interposita appellatione suspensam. In hoc vero quid advertitur, nisi quod animi tui tepor aut torpor excitatur, aut excutitur? Nam qui hominem juxta cor tuum inveneras, te in melius gratia pro- movente, ipsum quidem debueras non tantum me- lius dico, sed et in te alterum promovisse. Jam fere sera in fundo parcimonia est, nisi quod expedit equidem et necesse est ut et corporis fatigatione aliquantula torporem redimas tuum, et quod retro minus actum est exercente se et seipsam strepe exercente animi virtute perficias. Qua in re non est quod triste repute. Ad tempus enim a regni hujus tempestate semotus, donante Domino, quietum car-

pes iter et placidum; et virtutum fultus adminiculis summi pontificis faciem videbis intrepidus, et senatorum curæ utique gratus assistes. Nec te moveat adversarii tui in publicas jamdiu gratulationes suscepta facies. Inde enim spem concipio, unde desperationem forsitan aliquis comminatur. Nam si bene morigeratus et litteratus juvenis inter deos audiri meruit, et placere, quid non minus ornato moribus, aut munito litteris episcopo subtrahet gratiam, quin et ipse quidem ordine longe sublimior, fortunaque potentior inter bonos sibi possit gratiam collocare? Favorabilis enim reus non de luero captando sed de damno evitando contendis. Quod ante susceptas domini papæ litteras in personam omnium testimonio idoneam procuratoris beneficio contulisti, ratum manere desideras. Novi templum illud justitiæ, pectus scilicet apostolicum, unde ad omnes emanat æquitas, modeste omnia dispensare. Qui potuit alteri quod tui juris est non negare, impensa sibi reverentia debita, non magni quidem æstimabit tibi quod tuum est restituere. Honesta et utilia tibi providentur a Domino, et quod in contumeliam adversarii tibi machinatur improbitas, commutabit in gloriam honorum oratione propitiata Divinitas. Me vero ad præsens adeo ducis Normanorum oppressit adventus, ut ad iter istud facultas non suppetat, etsi voluntas illud omnino suadeat. Ibis ergo sine me, animæ dimidium meæ, et qualitate sui quam præferent suspensum ad te animum vela quæ reportabis afficient. Quia vero post episcopatum domino papæ et curæ in nullo serviri, illis verba militre formidavi. Quid enim aut in quem modum scribam nescio, et præsentia vestra scriptum meum modicum conferre non ignoro. Itineri autem tuo in eo quod mandasti, et in eo quod interius amor suadet amplius, jucundissime providebo. Interim autem si honesta se obtulit transactio, ipsi stari rogo simul et consulo. Valeat dilectus meus.

EPISTOLA CXXXI.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, Anglorum primati et sanctæ sedis apostolicæ legato, frater G. Herefordiensis Ecclesiæ minister, salutem et obedientiam.

Scire quæ circa vos sunt, et ad posse nostrum vobis in omnibus obedire cupientes, ad vos præsentium latorem dirigimus, ut de transfretatione vestra, de mora etiam citra vel trans mare rescripto vestro certum aliquid intelligamus: adjuvante namque Domino, non in incertum curremus, cum de vobis certa noverimus. De cætero rogamus, si placet, ut causam quæ inter comitem Herefordiæ, et G. de Laci vertitur, breviter advertatis. Conquestus est nobis G. de Laci, comitem Herefordiæ quemdam militem suum Ricardum scilicet Britonem in quodam cœmeterio cepisse. Cujus rei probationem miles de carcere quo tenebatur, directis ad nos nuntiis offerebat, supplicans officio nostro liberam sibi sui facultatem ad tempus concedi, ut pro se stare posset

A in jure, et si qua in sui liberationem haberet, hæc allegare. Quod æquitati concordare judicantes, hæc comiti ex sententia injunximus, ut statuto die prædicto militi sui copiam concederet; quatenus et in jure, ut dictum est, stare, et pro se agere posset, cautione tamen interposita, ut nisi eum Ecclesiæ liberaret, idem comiti se redderet. Comes vero se gravari asserens, diem proximam post festum beati Laurentii statuens, ad vestram audientiam appellavit. Quia vero inhumanum videtur prædictum militem appellatione in longinqua protrahi, et tamen in carcere et vinculis detineri, preces super hoc sublimitati vestrae porrigimus, ut comiti injungatis ut prædictum militem coram vobis statuta die exhibeat; omni tamen securitate interposita, nisi eum sententia vestra liberaverit, in sua vincula revertendi. Hoc enim æquum arbitramur et bonum, et vestra ad quam appellatus est auctoritate dignissimum, et non solum in hoc honori vestro, sed et paci nostræ quamplurimum providebitis. Unum enim superest quod advertere consultissimam prudentiam vestram obnixè deposcimus. Comes Herefordiæ excommunicato vestro Willelmo de Bellocampo, per omnia communicat. Qua in re summe necessarium est ut districto tam ipsum quam nos mandato urgeatis, ut aut ejus communione et societate absteineat, aut ipsum par anathematis sententia involvat. Vilescit enim anathematis auctoritas, nisi et communicantes excommunicatis corripit digna severitas. Unde si vestrum circa hæc zelum exerceri placuerit, nisi a prædictis cessaverit, excommunicatum eum publice denuntiari oportebit. Valeat dominus meus charissimus.

EPISTOLA CXXXII.

AD

Pie salutantis affectum, et sincere diligentis officium.

Incolumitati vestrae, dilecte frater in Domino, quam quorundam relatu cognovimus, affectu pleno congratulamur, et vos apostolorum limina visitasse, summoque pontifici et curiæ sanctæ gratiosè assistisse, et bene consummatis negotiis domum remeasse feliciter, animi applausu intimo gaudemus. Unde cum rogatu quorundam scribendi vobis se præstaret occasio, vobis animi affectionem nostri significare dignum duximus, quatenus si quid erga nos vestra complacuerit charitati non supplicatione utatur, aut preces porrigat, sed in amici partes se potenter extendens, suo potius utatur imperio, quam aliquatenus precis oblatæ blandiatur officio. Hinc quoque spem impetrandi concipimus, si benignitati vestrae nostrum aut amici nostri desiderium exponamus. Est autem apud vos quidam familiaris noster, Petrus videlicet clericus Rogeri de Mand', quem tuitioni vestrae et patrocinio devotio nostra commendat, supplicans, ut liberalitatem quam in eum dominus suus in ecclesiis quibusdam conferre disposuit, auctoritate vestra quantum permittet ratio stabilialis. Quatenus ipsum servitio semper

obnoxium, et nos gratiæ debitores habeatis. Va-
lete.

EPISTOLA CXXXIII.

AD RICARDUM LONDONIENSEM EPISCOPUM.

Venerabili domino fratrique charissimo R. Londoniensi Dei gratia episcopo, frater G. Herefordiensis Ecclesiæ minister, salutem et dilectionem.

De negotio vestro mihi non ad præsens aliud occurrit, nisi ut si honesta se obtulerit transactio, stetut illi. Tu autem, propositum iter arripiatis, et adversantes vobis in campo Martio, juvante Domino, cornu justitiæ ventilatis. Lividorum latratum Seyllas undique erumpentes audimus; omni aura sancti Spiritus flante, prospere enavigabitis. Si necessitas expetat, bonum est in stuporem etiam et miraculum domino papæ servire, quam in certamine cæpto succumbere. Dura dicimus, cum longe meliora speremus. Quia et dura scripsit dominus papa, quæ tamen omnia præsentibus et pulsantibus nobis apostolica mansuetudine temperanda pro certo credimus. Valet, state in fide, viriliter agite (1 Cor. xvi); et Deus pacis conterat omne Satan sub pedibus vestris velociter. Amen. Monachum nostrum ad vos mittimus, ut status vestri certitudinem recipiamus.

EPISTOLA CXXXIV.

AD ROBERTUM COMITEM GLOCESTRIÆ.

G. Dei gratia Herefordiensis episcopus, ROBERTO Glocestrie illustri comiti, pacis et justitiæ comitatum.

Inter meriti vestri laudabiles titulos id, dilecte comes, speciali quadam lampade puræ lucis irradiat, quod in locis vestræ potestatis Ecclesiam Dei benigne fovetis ac protegitis, et pacem servitium Deo, non vili rubiginosi æris conductus pretio, sed liberalitate mentis purissima conservatis. Quia vero *datum optimum et omne donum perfectum desursum est, descendens a Patre luminum* (Jac. i), hoc procul dubio beneficium, non vobis de terra deorsum, sed de cælo sursum collatum est, quod unus inter regni hujus potentes et nobiles, sapientia, moribus, honestate præfulgetis, et ipsi auctori vitæ vestræ condignos, ut audimus, fructus eundo semper in melius ubertim exhibetis. Hoc quia thesauri celestis est donum, eo conservandum est diligentius et obsequandum. Equidem mihi gratulor et congaudeo Dominum Jesum sub bysso et purpura sibi apud vos domicillum invenisse, et hominem licet ætate juvenem, sensu tamen maturum, inter regni hujus male corruptos principes absque vitii corruptela incessisse, et paci potius et sapientiæ quam ludibriis juvenilibus sollicitam operam laudabiliter impendisse. Hoc est, dilecte comes, quod vobis apud Deum gratia collocat, quod vobis religiosarum mentium vota conciliat, quod vobis Deo famulantium non orationes solum, sed etiam soliloquia sancta communicat. Optamus itaque, ut qui bene currere incœpistis, cursum optime consummetis, et ab

A inspectore corum et largitore gratiarum tolles sibi et Ecclesiæ suæ exhibitæ reverentiæ condigna præmia in illa die reportetis. De cætero supplicat vobis per nos pauperula Winchelcumbensis Ecclesiæ, ut apud ædium vestrum, Petrum de Saltemareis, per vos gratiam inveniat, et paci ejus apud ipsum pietas vestra provideat. Quam si exaudieritis, tam ipsos obnoxios servitio quam nos gratiæ debitores efficietis. Valet.

EPISTOLA CXXXV.

AD R. DE WIRECESTRIÆ.

G. Dei gratia Herefordiensis episcopus, charissimo amico suo R. de Wirecestria, salutem.

Quod laboranti famæ meæ amicali condoletis affectu, multimoda gratiarum actione remunero, solamen infortunii reputans eam quam in vobis experior amicitie veritatem. Veruntamen vos eum esse cupio, qui dolenda doleat, non dolenda æquanimiter ferat. Uno namque raptantur errore quamplurimi, ut nisi voluntati suæ quæcunque fuerit pareatur, sibi justitiam fieri nullatenus arbitrentur. Illi mihi si detrahant, si famam meam, quæcunque est, lividis latratibus mordendo dilanient, æquanimiter sero et dum mecum ratio faciat, dum juris forma concordet, omnes hos, velut æ quadam rationis et intelligentiæ superioris arte despicio. Non enim quam multis displiceam, sed quilibus attendo. Vos quoque difficilem habere volo aurem ad crimina. « Ad penitendum properat cito qui judicat. » Si minus quam oportuerit egi; si excessi, ipsi judicate; ipsi, quæso, decernite. Cum pervenit ad me, comitem Herefordiæ milites vestros in ecclesia Eveshamensi cepisse, sperabam me Wigorniensis Ecclesiæ vicarium et nostrum super hæc spectari et exspectari debere judicium. Inde est, quod diem personatibus statui, ipse quoque in medio, ut sperabam, cogniturus et judicatorus resedi. Meis ibidem e manibus judiciaria potestas sublata est, et Wigorniensis archidiaconus plenitudinem potestatis hujus adeo ad se pertinere protestatus est, ut inter ipsum et dominum Cantuariensem nullum omnino medium admitteret, omnesque personas quæ convenerant, conjurando et contestando a me prorsus averteret. Sic dominum Wigornensem in suo discessu statuisset, sic plena auctoritate sanxisse, multorum testimonio affirmabat. Quid mihi inter hæc? Me sibi, in judicandis Ecclesiæ causis, inferiori quodam gradu inferiorem submittere episcopalis dignitas non ferebat. Pari vero aut superiori consistere commissa sibi potestas et gloria non sinebat. Damnum vestrum et militum vestrorum R. advertitis, sed si mihi prædictus archidiaconus in faciem conspuat, illud plane negligitis. Jam judicate, jam decernite quid mihi agendum supererat? Nunquid in ipsa Ecclesia judicandi, quæ nec me judicem agnoscebat, nec mihi causas judicandas committebat? Culpa quippe est immisceri negotio ad se non pertinenti. Sed hic fortassis objicies, quidquid archidiaconus ille proclamaret, Wigorniensis tamen Ecclesiæ vicarius eras, et si

quid inordinate ab ipso etiam pronuntiatum fuerat, in ipso vindicare et punire deberas. Bella mihi R. moves. Plane tibi illud respondeo, non est mihi tibia tanti. Onus mihi, non honorem æstimo alienis implicari negotiis. Obsequium mihi præstitit, qui me huic curæ subduxit. Agant magna sua quibus commissa sunt, mihi pauca mea sufficient, felices illos sua sequantur præconia; mihi semper animo sedeat, aut nullis aut veris laudibus delectari. Age ergo et me lacerantium dentibus jam, si placet, eripias, et qui mali nil merui, detrahentium verbis suffocari non permittas. Habent tui quem sequantur, a quo suas exposcant injurias, qui vigore justitiæ peccata puniat, lapsa reparet, amissa restauret, quem suis extollant præconiis, si bene fecerit, sin autem male hæc et inveniet. Volo tamen, ut quod actum est, intelligas. Dies comiti Herefordiæ a domino archidiacono statuta est, et, auditis allegationibus partium, sententia dicta est. Sententiæ comes paruit, et a iudice absolutus discessit. Quid tibi iudicium illud contulerit, satis nosti. Ego unum scio, quia litteris domini legati, quas misisti, in comitis præsentia perlectis, comes statim ad ipsum legatum appellavit, se nimium gravari asserens, eo quod causa super qua iudicio Wigorniensis archidiaconi et ecclesiæ stilet, per omnia paruit, denuo adversus eum instauratur, et rediviva suscitatur. Habet præ manibus quod scriptum est: impetrata rescripta non placet admitti, si decise semel causæ fuerint iudiciali sententia, quam provocatio nulla suspendit, sed eos qui talia scripta meruerint etiam a limine iudiciorum expelli. Sed jam item inflammaberis, et nisi post factam appellationem in comitem, quem iudex vester absolverit, interdicti aut anathematis sententiam tulero, me, me justitiæ ecclesiasticæ contempnorem, me tuorum causam damnorum, non tuo quidem, sed tuorum iudicio reputabis. Quod si feceris, patientiam mihi, molestiam tibi necessariam æstimo. Verumtamen inter molestiæ fines, te laudabiliter, quæso, contineas. Si quidem militari me crederem usquequaque negotio, quia te in huiusmodi satis expertum non ambigo, consilium in hoc tuum omni iucunditate complecterer. Tu quoque quia in campum litterarum et causarum ecclesiasticarum non medio-criter impegisti, amici, quæso, consilium ne despicias. Nam quia in rebus huiusmodi meam, ut ita dicam, ætatem consumpsi, mihi aliqua saltem magisterium hoc jure quodam videor vindicare. Scriptum noveris charissime: « Novum quod postulas, non est, quod etsi rescripti mei auctoritas interces-serit, provocandi tamén facultas non denegetur. » Hinc quidem patet post susceptas domini legati li-teras, me comitem ab appellatione prohibere non potuisse. Item loco post illum proximo scriptum no-veris: « Appellatione interposita, licet ab iudice repudiata sit, in præjudicium deliberationis nihil fieri debere, et in eo statu omnia esse quo tempore pronuntiationis fuerunt sæpissime constitutum est. »

A Unde manifeste cognoscitur post appellationem factam, mihi quidquam circa statum appellantis, aut interdicto aut anathemate innovare non licuisse. Sed id fortasse a sententia, non ab executione sententiæ appellanti non attribuisse. Sed scriptum noveris; quia iudicati executio suspendi solet, si falsis allegationibus circumventam esse religionem judicantis, is contra quem iudicatum constat esse promiserit. Quod quia comes die proximo post festum beati Laurentii se facturum asserit, nos ut a nostra ad præsens jurisdictione elapsum inconcussum dimittimus, et ipsum una cum litteris nostris ordinem rei gestæ continentibus, domino legato juxta legum et canonum auctoritatem committimus. Valete.

EPISTOLA CXXXVI.

AD A. LINCOLNIENSEM EPISCOPUM.

Venerabili domino fratrique charissimo A. Lincolniensi, Dei gratia, episcopo, frater G. Herefordiensis Ecclesiæ minister, salutem.

Spe fruendæ visionis et allocutionis optatæ cur-rentes Preteberiam jam veneramus. Suspendit desiderium nostrum fatalis adversitas, et vos alias trahente necessitate, allisus ad eam nostri cursus impetus contra vultum et velle nostrum cohibetur. Scribimus autem vobis in amoris experimentum, imo omnium amicitiarum gratiam, quatenus co-gnatum nostrum et amicum G. Foliot, in causa quæ supra Ecclesia sua adversus eum instituitur, sustentetis, et vestro et vestrorum consilio eatenus sustentari faciatis; quatenus absentiam nostram vestra illi præsentia suppleat, et an quidquam pos-simus apud vos, impensa sibi benignitate et gratia, recognoscat. Ad pedes vestros, quos ipsi manibus libentius amplecteremur, quia hoc ad præsens non possumus, deprecatorias has supplicando deponi-mus, habituri de exauditione gloriam, aut de re-pulsa confusionem non modicam. De cætero, si nobis secretum aliquod scriptorum non communicandum consilio intimare placuerit, antiquorum reminisci studiorum, et scholam vel ad momentum repetere, et propria exarare manu non tædeat, ad quod sen-sus nostri tenuitas re alii non communicata respon-deat. Valete.

EPISTOLA CXXXVII.

AD RICARDUM LONDONIENSEM EPISCOPUM.

Venerabili domino fratrique charissimo R. Lon-doniensi, Dei gratia, episcopo, frater G. Herefor-diensis Ecclesiæ minister, salutem.

Paci vestræ congratulor quæ cum Joanne refor-mata est. Opto autem, ut quæ nuper exorta sunt, discretæ alicujus interveniente prudentia, pacifien-tur. Contristor autem et totas consternor animo, quod talia adversus vos permisistis erumpere, quæ omnia suffocasse mediocris quidem dum tamen pro-vida circumspectio potuisset. Nam licet falsa sint quæ dicuntur, quæ tam jactantur in vulgus malam orationis fabulam per multorum aures disseminant. Æstimo vero necessariam domini Lincolnæ indu-striam, ut ipse quocunque poterit modo Henricum

ad se evocet, et negotio incumbat eatenus, ut quæ motus iracundia protulit, conversus ad cor et deservat, et a proposita intentione simul et appellatione discedat. Quod equidem obtinere sapienti non erit difficile, qui lapidem noverit omnem movere. [Dicere namque leve est, sed episcopum aut honestum clericum in huiusmodi convincere, ejus certe viribus impossibile. Formidandum sibi equidem ne poena quam in alternum intentat, in semetipsum obruat et involvat. Quidquid tamen egerit, vobis dominum papam adire necesse est, quod multo honestius faceretis, oblitteratis quæ objecta sunt confessione penitentis. De cætero vobis ad colloquium occurrere apud Oxfordiam die Mercurii proxima post Assumptionem beatæ Virginis paratus sum. Sed ad iter quod exigitis, omnino certe imparatus. Nam etsi in pace sunt quæ possideo, ipsi tamen conservandæ necessariam meam omnino præsentiam intelligo. Quam etsi, me absente, non turbari contingeret, residuum tamen locustæ apud nos bruceus adeo comederet, ut post bruceum quod comedit eruca jam non inveniat. Valet, et colloquio nostro si fuerit, dominum Lincolnensem vocare.]

EPISTOLA CXXXVIII

AD GILBERTUM DE LACI.

G. Dei gratia Herefordiensis episcopus, domino Gilberto de Laci, agendo bene commoda salutis oblinere.

Mandavit mihi dominus meus rex ut canonicam vobis justitiam facerem de comite Herefordiæ, qui milites vestros in ecclesia et cimiterio captos, dicitur ad redemptionem compellere. Qua in re sciatis, quod in quantum, salvo ordine meo, potero, præceptioni regis libenter parebo. Sed juxta statuta legum, juxta auctoritatem sacrorum canonum, mihi in re ista nihil amplius licet facere, quam quod ante susceptas litteras constat a me factum esse. Diem enim causæ huic statui, partium altercationem [audivi], super auditis judicavi; et quia neminem ab appellatione prohibere possum aut potui, appellationem comitis adversus rem judicatam audivi. Facta appellatione, hoc justum est, hoc canonicum, ut nulla audacia me amplius de causa hac intromittam, nisi ut litteras totam fere seriem continentes, ad judicem, ad quem appellatum est, per partem utramque transmittam. Has vero litteras quæ etiam apostoli vocantur, post appellationem statim tam comiti quam militibus vestris obtuli, quas quia non suscepistis, in ipsa appellationis die minus forsitan obtinebitis. Ultra hoc non mihi de hoc licet, quam minimo clerico episcopatus mei. Testor autem ipsam veritatem, quæ Deus est, quod nisi me comes per appellationem interpositam impedisset, nec amore, nec odio, nec ulla omnino gratia sententia in eum dilata fuisset. Quod vero contra appellationem nihil possim, si mihi non creditis, ipsum ecce canonem audiat: « Si quis, spreta judicis auctoritate ad quem appellatum est, rem a se

etiam legitime judicatam, nihilominus exsequendo impleverit, ipsa qua fulgebat judiciaria potestate se eximit. » Item alibi scriptum est: « Appellatione interposita, licet et ab iudice repudiata in præjudicium deliberationis, nihil fieri debere et in eo statu omnia esse, quo tempore pronuntiationis fuerunt, sæpissime constitutum est. Unde manifeste cognoscitur post appellationem factam, » etc. Si enim oves, aut boves, aut cætera huiusmodi amittimus, dante Domino, recuperare poterimus. Quod si per inscientiam, fatuitatem aut contumacem inobedientiam ab episcopatu et ordine semel dejecti fuerimus, qui alium nobis det, non facile inveniemus. Unde nobis melius in huiusmodi rebus quantamcunque jacturam pati, quam circa ordinem periclitari. Quod si meum vobis placeret audire consilium, non occasionem quereretis adversum me, quia ego Deo gratias ad omnem fortunam et prosperam et adversam paratus sum; et quanto minus habeo, minus certe timebo, et, adjuvante Domino, plus potero. Si litteras quas supradixi acciperetis a me, et diem statutum expectaretis, et armigeros R. Britonis, et milites captos ad archiepiscopum mitteretis; quia, juvante Domino, ipsum ibi facta probatione liberare poteritis, et qui ex parte mea aderunt, ad hoc utique non nocebunt. De hoc quod mandat mihi rex, ut ad memoriam reducam de duobus bobus quid in ejus præsentia actum sit, bene utique in memoria habeo. Quia causam quam habebam adversum vos, ipso etiam postulante non remisî, sed archiepiscopo se postea intromittente in bonum respectum posui. De hoc mandato archiepiscopi hoc respondebo, quod si appellationem ad se factam cognovisset, nihil utique de re ista præcepisset. Hoc itaque est ipsi obedire rei ipsius seriem aliquid innovetur, ipsi in omnibus aperire quidquid in nos dixeritis. Vos tamen valere optamus.

EPISTOLA CXXXIX.

AD DAVID MENEVENSEM EPISCOPUM.

G. Dei gratia Herefordiensis episcopus, venerabili fratri et amico David, Menevensi episcopo, salutem et dilectionem.

Quam jucundum, quam sit utile pacis et concordie bonum facile dignoscitur, si ex contentione et discordia quanta damna proveniant, diligentius attendamus. Nam si motus varios, et quæ nos premunt undique bella attendimus, patet liquido quam sit periculosum Ecclesiæ onus super onus assumere; et præter externa quæ premunt, intestina sibi prælia commovere. Inde est, quod si placet vobis consiliis nostris acquiescere, sollicitè daremus operam inter vos et dominum Landaviensem, pacis modum aliquem invenire. Quod quia facile non est nisi in locum simul tres conveniremus, precamur locum nobis designari, quo convenientibus nobis possit inter nos de vestra pace tractari. Quod si ad hoc Herefordiam delegeritis, die quacunque ad hoc statueris, aderimus, nec apud dominum Landaviensem cessabunt preces nostræ, quousque et ipsum adesse faciamus.

Noverit autem dilectio vestra nos in eundem hunc modum domino Landaviensi scripsisse, et placitum utriusque vestrum et rescriptum exspectare. Valete.

EPISTOLA CXL.

AD WILLELMUM ARCHIDIACONUM LONDONIENSEM.

G. Dei gratia Herefordiensis episcopus, dilectis suis Willelmo Londoniensi archidiacono et magistro Henrico, salutem.

Juxta illud Salomonis, multi assistunt coram faciem principum, sed omnium sententia ex Deo procedit. In ejus manu corda sunt regum; et ipse ea, cum vult, ad omne quod disponit inflectit (*Prov. xxi*). Inde est, quod si negotio, quod viriliter assumpsistis, suum dominus rex nondum præbet assensum, non tamen desperandum vel a proposito en.... resillendum est, cum sit facillimum Deo, cor ejus et animum ad id quod sibi placitum fuerit, inclinare. Quod in negotio summum est, jam compestis; obsecro ne cura minima deficiatis. Canonice celebrata electio, defectu vestro ne deficiat, quæ cito plenum robur habitura est, si ipsi nequaquam defeceritis. Quo enim vobis major vel apud Deum gratia, vel apud homines gloria, causam Dei, postpositis omnibus, viriliter inchoasse, eo abundantior secutura est confusio; si, quod absit! fortitudinis spiritu destituti, ab eo quod vobis domini papæ, et omnium fere conciliat corda, recedatis. Confortetur itaque cor vestrum in Domino (*Psal. xxx*) charissime, et juxta vias quas vobis aperiet Dominus, quod cepistis explete, et de nobis in quantum facere possumus, in negotio amici confidite. Valete.

EPISTOLA CXLI.

AD THEOBALDUM CANTUARIENSEM ARCHIEPISCOPUM.

Patri suo et domino T. Cantuariensi Dei gratia archiepiscopo, et Anglorum primati, et sedis apostolicæ legato, frater G. Herefordiensis Ecclesiæ minister, salutem et obedientiam.

Mandastis nobis, ob querelam abbatis et monachorum Combremarum, quatenus Herebertum de castello Halgod conveniremus, et ut prædictis monachis locum qui dicitur Prena, restitueret, et omnia in eodem loco sibi ablata redderet, commoneremus. Quod cum perlatum fuisset ad nos, monachis mandati latoribus persuasimus, ne litem hanc absente abbate suo inchoarent, et exspectato de transmarinis partibus ejus reditu, actionem, ipso præsentem, instituerent. Ipsi itaque huic consilio acquiescentibus, rem ipsorum consensu distulimus. Nuper vero cum apud Ledele ob quædam negotia sederemus, Dobremarum, de cujus reditu nihil ante noveramus, interfuit. Qui, cum ibidem adversus priorem de Weneloc conquestus fuisset, quod prior ipse monachos suos de loco qui Prena dicitur.... et non solum ipsorum pecora, sed et calices, et libros, et vestimenta, totamque domus eorum suppellectilem abstulisset; prior dilatoriam opponens exceptionem, sibi litem hanc nequaquam editam, neque se super hoc ad responsionem citatum fuisse, respon-

A dit. Cumque omnium sententia con [sentiente] decerneretur, æquum juriq[ue] fore consentaneum utrique parti diem statui, remque sufficienter auditam judicio terminari, abbas conquerens non illico sibi quæ petebat restitui, ad appellationem convolvit. Si quid igitur in sic data sententia corrigendum noveritis, ipsi juxta datam vobis sapientiam corrigetis, vestroque parituris mandato, quod libuerit injungetis. Valeat dominus meus et Pater in Christo charissimus.

EPISTOLA CXLIH.

AD EUNDEM.

Patri suo et domino T. Dei gratia Cantuariensi archiepiscopo, Anglorum primati, et sanctæ sedis apostolicæ legato, frater G. Herefordiensis Ecclesiæ minister, salutem et obedientiam.

Causam, Pater, actam apud nos, et facta ad vos appellatione suspensam, sublimitati vestræ notifico. Quatuor milites Roberti de Laci adversus comitem Herefordiæ hoc apud nos in querelam deduxerunt, quod ipse comes eos in cœmeterio quodam, ad quod ejus timore confugerunt, violenter captos ad redemptionem compulerit, supplicantes officio vestro sibi ablata restitui, seque ut ab ostio evulsos ecclesiæ de manu comitis liberari. Comes vero se eos extra cœmeterium cepisse, et ob hoc ad redemptionem legitime compulisse respondebat, ut sibi in insidiis positos. Excommunicationi etiam qua pacis [sanctarum] dierum violatores tenentur obnoxios, qui pace non servata Ecclesiæ ipsa sancti Pentecostes hebdomada, sub sacro IV Temporum jejuniis nocte ad quamdam domum ejus capiendam venerant, et in opere suo comprehensi tunc [in] manus ipsius inciderant. Præterea quo dictis ejus fidem certius haberemus, comes se testium idoneorum assertionem probaturum, quod dictum est, adiciebat. Hanc quoque probationem quod eos extra cœmeterium, scilicet in maleficio quod sibi moliebantur cepisset, sponte semel et sæpius offerebat. Scientes utique de manifestis et occultis aliter atque aliter judicandum, tam clericos quam laicos ejusdem loci adjurantes nil potuimus reperire vestigii, quo nobis veritas elucesceret. Congruerat namque tempus mysterio, et sub noctis conticinio fuerat opus perpetratum. Attendentes etiam quia agenti incumbit probatio, et quod is qui agit, probationes afferre debeat, quibus id probet quod intendit, et ob hoc a militibus sciscitantes quam ejus quam intendebant in comitem probationem afferant, nihil aliud invenimus, nisi quod tres eorum mutuis volentes uti testimoniis, singuli duos ejusdem litis consortes testes in suæ intentionis assertionem producebant, de quanto nihil adjicientes, nisi quod eum non in cœmeterio, sed per cœmeterium duci conspexerant. Cumque super hoc testimonio fuisset aliquandiu disputatum, ipsum tandem minus conveniens reputavimus, tum propter suspectam mutui beneficii vicissitudinem, tum quia unusquisque in causa hac adversus comitem actorem

se pariter exhibebat et testem. Et quia frequenter impunita foret ex lege malitia, si d in flagitio honesta de se commincentibus, multis in hunc modum testimoniis uti concederetur. His itaque circa probationem deficientibus, nobisque eorum probationem nil certum indagare valentibus, comiti probationem, quam in jure obtulerat, adjudicavimus, ut sic finem controversiæ poneremus. Hæc sententia est quam tulimus, cujus executioni priusquam lata foret, se comes obtulit. Postquam lata est ad audientiam vestram post octo [dies] appellavit. Hanc itaque juxta datam vobis sapientiam, aut corrigetis, si placuerit, aut si de jure quoque modo stare potest, roborabit. Noster enim potest oculus caligasse, at tamen sorde corrupti vel gratia nihil judicavimus, sed in eundem modum multa a Patribus judicata non ambigimus: ut actore circa probationem vacillante, reo juramentum vel obpurgationem, vel causam aliquam nocivam detulerint, sicque jurgiis [finem] imposuerunt. Scriptum tamen novimus: « Actore non probante, reus, etsi nihil præstiterit, obtineat. » Inde quoque prosequimur, quia si reus nihil præstans obtinet, multo magis multorum probationem præstans obtinebit. Iudex quoque ratione motus, reo sæpius defert juramentum. Nos quoque et ad hæc commovit hæc ratio, flagrabat adhuc sacrilegium a comite in ecclesia Eveshamensi perpetratum. Crescebat et scandalum, apud Leonis monasterium ob similem comitis excessum. Quorundam etiam qui capiendis ipsis una cum comite adfuerunt, secreta confessione querimoniam militum veritate niti cognovimus. Quibus omnibus moti, comitem probatione jam dicta oneravimus, qui militum probationem adversus eum, si ipsa forma juris admitteret, libentius suscepissimus. Valeat dominus meus et Pater in [Christo] charissimus.

EPISTOLA CXLIII.

AD R. LINCOLNIENSEM EPISCOPUM.

Venerabili domino fratrique charissimo R. Lincolnensi episcopo, G. Herefordiensis Ecclesiæ minister, gaudia pacis et salutis.

Jejunantes et abstemii conspectu vestro, charissime Pater, et alloquio, quinque jam mensium intervallo caruimus. Unde si bene valetis aut secus est, significari nobis petimus, ut aut gaudium communicetur ex prosperis, aut si res aliter est, alterutro quoad possumus humerum supponamus adversis. Læta quippe nobis dies cæterisque serenior illucescit, qua vobis successisse cognoscimus. Adversa vero quæ nuntiat caligine nos obducit, et involvit amaritudine. Præstetur igitur animo desideranti solatium et referatur ad nos chartula de statu et incolumitate vestra, reportans utinam verbum bonum, de nobis vero nisi qualia sunt nuntiare non possumus. Capitis infirmitate continua laboramus, commonitorium habentes a Domino, ut advertamus non esse perpetuum quod interna pulsantis manu jamjam constat esse commotum. De cætero magno

frequentique commonemur imperio, duci Normannorum assistere, et sibi placitis obtemperare. Quod si hucusque distulimus, incolumi tamen statu ultra Dominicam invocavit me, amplius declinare non possumus. Assistemus igitur imperanti, et quod rerum experimento noverimus, vobis significare non tardabimus. De cætero, quia semel cepti, loquar ad dominum meum, nec, quæso, indignemini, si loquar. Gilbertus Foliot summam gerit animi devotionem, ut vestro sese mancipet omnino servitio, et in vestro famulatu expendat, quæ nunc viam consumit otio. Unde supplicat adhibita multorum prece, preces pro ipso porrigi, ut ipsum suscipiatis, et in vestris eum obsequiis suis expensis exerceatis, ut si ipsum idoneum et juxta cor vestrum inveneritis, vestris omnino connumeretis. Quod ipsi licet honori foret, vobis tamen esse nollemus oneri. Ubi namque multæ divitiæ sunt, sunt et multi qui eas comedunt. Unde et ipsum circa vos suis vellemus militare stipendiis, ut emolumentum hoc de labore percipiat vestri dominium et notitiam, etsi vobis eum complacuisse noverimus, a vobis impetrandi majora fiduciam habeamus. Valete.

EPISTOLA CXLIV.

AD W. CESTRENSIEM EPISCOPUM.

Venerabili domino fratrique charissimo W. Cestrensi Dei gratia episcopo, frater G. Herefordiæ Ecclesiæ minister, salutem et dilectionem.

Queritis an appellationi locus sit, cum mandatum domini legati susceperitis, ut Ingenulfo monacho, remota appellatione, respondeatis. Qui forsitan Ingenulfus causam quæ vertitur inter vos, domino papæ non adeo diligenter exposuit, ut quod a vobis in ipsum actum est, apostolica gestum auctoritate declararet. Unde si palliata humilitate et innocentia simulata judicem ad pietatem commovendo rescriptum impetravit, quod vestram non solum gravet, sed puniat obedientiam præscriptione mendaciorum opposita, intentionem, si placuerit, eliditis. Vestram enim non latet prudentiam quod super hoc in primo codicis in hunc modum continetur: « Præscriptione mendaciorum opposita, si non in juris narratione mendacium reperiatur, si non in facti, si non in taceendi fraude pro tenore veritatis, non deprecantis affirmatione datum judicem cognoscere, et sententiam ferre oportet. » Unde et consequenter adjicitur: Puniri iudices universos jubemus, qui vetuerint pretium argui falsitatem; et illico: « Et si non cognitio, sed executio mandatur, de veritate precum inquire oportet, ut si fraus intervenit, de omni negotio cognoscatur. » Quarto quoque loco subiungitur: « Etsi legibus quid consentaneum mendax precator attulerit, careat penitus impetratis, et veritati subiaceat judicantis. » Litteras itaque domini papæ sæpius audiri et diligenter inspicere bonum est, ut si quid ex his adverteritis, unde precum falsitatem arguere possitis, arguendæ falsitati insistatis, et per leges jam propositas judicem secundum vos pronuntiare compellatis. Quod si ad appellatio-

nein confugere necessitas extrema decreverit, super hoc aliud non occurrit, nisi quod in septimo codicis invenimus, quia et in maioribus et in minoribus negotiis omnibus, quique lege excipiuntur appellandi facultas est. Unde et in eodem codicis Alexander Augustus: « Novum quod postulas, non est, quod etsi rescripti mei auctoritas intercesserit, provocandi tamen facultas nec denegetur. » Nos tamen nec os ponentes in celum, nec scriptum domini papae iudicare praesumentes, non quid de iure agendum sit ad praesens, sed quod in huiusmodi casu ageremus exposuimus. Leges certe promulgatae sunt, quorum et in quibus casibus, appellationes recipi non oporteat. Quorum non cum nulla tangeret aut notaret, ad ipsum utique appellaremus, quem omni suscipiendae appellationi, quae lege non excipitur, debitorem utique non ambigimus. Valeat, et in spiritu consilii videat quod agendum est, dominus meus in Christo charissimus.

EPISTOLA CXLV.

T[ROMÆ] CANT. ARCH. EPIST. AD GILBERTUM.

THOMAS Dei gratia Cantuariensis Ecclesiae humilis minister, venerabili fratri G. eadem gratia Herefordiensi episcopo, salutem.

Quam sit nobilis et famosa prae ceteris regni huius civitatibus civitas Londoniae, nulli nostrum incognitum est; in qua videlicet ob publica regni negotia et domini regis conversatio et procerum regni soleat frequentior esse conventus. Inde est, quod Ecclesia Londoniensis suo iamdudum orbata pastore, talem sibi desiderat episcopum subrogari, qui civitatis ipsius excellentiae honestae vite merito, litterarum scientia, rerum quoque prudentia saecularium adequetur. Magna itaque super hoc deliberatione habita, convenerunt in hoc unanimis cleri postulatio, voluntas domini regis et nostra, ordinatio quoque apostolica, ut ob communem regni utilitatem et Ecclesiae necessitatem, ad Ecclesiae Londoniensis regimen transferri, et in ea curam et sollicitudinem pastorem gerere debeatis. Suscepto igitur in hoc domini papae mandato, ipsius vobis auctoritate iungimus, quatenus postulationi Londoniensis Ecclesiae, quae de vestra ad eam translatione in praesentia domini regis et nostra unanimi totius cleri assensu celebrata est, assensum praebere non differatis, et ad ejus regimen tanto devotius et maturius accedatis, quanto ipsa tantae personae consilio et gubernatione dignoscitur indigere. Ad hoc fraternitatem vestram commonemus attentius, ut ad quod trahit vos obedientiae necessitas, nostrae quoque dilectionis contemplatio affectuosius invitet, ut quem nobis sinceræ dilectionis conjungit affectus, loci quoque vicinia ad nostras et Ecclesiae Dei necessitates commodius valeat exhibere. Valete.

EPISTOLA CXLVI.

ALEXANDRI PAPE AD GILBERTUM.

Alexander episcopus servus servorum Dei, venerabili fratri G. Herefordiensi episcopo, salutem et apostolicam benedictionem.

Ex litteris charissimi in Christo filii nostri Henrici illustris Anglorum regis, et venerabilis fratris nostri T[home] Cantuariensis archiepiscopi, etc. Vide in Alexandro III, an. 1159-81.

EPISTOLA CXLVII.

HENRICI REGIS AD GILBERTUM.

H. rex Angliæ et dux Normanniæ et Aquitaniæ, et comes Andegaviæ, G. Dei gratiæ Herefordiensi episcopo, salutem.

Mentis vestrae tantis institutæ virtutibus soliditas simul et honesti corporis integritas indemnitas, vestram mihi commendavit, commendabilemque reddit excellentiam. Nec mihi solum, verum omnibus ad quos vestri nominis fama pervenit; mihi tamen prae ceteris experimento fides facta est, qui saepius animæ salubre consilium a cordis vestri procedens examine datum est. De personæ etiam propriæ dignitate, de regni statu, de gerendis in regno negotiis, saepius et saepius sanum et efficax adhibuistis consilium. Hinc itaque vestram corporis et mentis vicinitatem assiduam si possibilitas admitteret desiderans, et mihi et hæredibus meis et regno meo, tam honoris quam utilitatis conservationi et augmento profuturam considerans, obnixè deprecor, quatenus Londoniensis Ecclesiae petitionem in vestram collatam personam, secundum domini papae mandatum executioni mandare non differatis, mihi in hoc plurimum obsecuturi et eo amplius favorem meum et amoris augmentum, si erga vos augeri possit, et omnium baronum meorum consecuturi. Ibi quippe cum negatur assiduitas, quatenus licet iterata saepius mentem meam simul et corpus vestra fovebit visitatio. Ibi quoties in regno meo de magnis aliquid agendum occurrit, concilia celebranda sunt, et consilia sumenda. Eo barones pro negotiis suis consilio fulciendis, confluent. Ut igitur latius vestrae bonitatis et virtutis immensæ diffundatur et pateat magnitudo, non immerito vobis ut Londoniensis Ecclesiae sollicitudinem et curam pastorem suscipiatis, dominus papa mandare curavit, Ecclesiae illi tali indigenti pastore satisfaciens, mihi et hæredibus meis et regno meo non mediocriter providens. Festinantiam ergo vestram nullum retardet negotium, nulla præpediat occasio, verum omnis procul amoveatur dilatio, ut citius mandatum domini papae et nostra omnium voluntas cum vestri et honoris et utilitatis expediatur incremento. Teste Theobaldo archiepiscopo. Apud Windlesoram.

EPISTOLA CXLVIII.

AD ALEXANDRUM PAPAM.

Patri suo et domino summo pontifici A., frater G. Herefordiensis Ecclesiae minister, devotum et debitum charitatis et obedientiae famulatum.

Qui nabe tristitiae nuper obducti matre nostra gravischismatis errore concussa, altius ingemiscendo doluimus, luce veritatis bonorum cordibus illucescente, tota gaudii plenitudine, in Christo dilecte Pater, exsultavimus, cum munere divino procella nobis in auram statuta est, et post noctem dies no-

his tam profecto grata quam serena resplenduit. Movebat quidem multos illud celebratum, Papiæ quod dicebant concilium, cuius actionem quidam ab Ecclesia nomine peregrinus et re, oratione quidem in audientium gratiam, quibusdam quasi verborum phaleris adumbrata plurimum et ornata conscripsit. Quæ cum perlata fuisset ad nos, et Ecclesia præsentem perlecta, quæ mente sinistra dictata sunt, quibusdam, quorum erat in lævam, oculis utique placuerunt. Alii vero bestiam quæ a nequam spiritu nefande conceperat evomentem, alta quadam et in Christo nobili mente contempserunt, habentes præ manibus sacros vestri nominis apices, quos ad universalem Ecclesiam sancte dictavit et direxit auctoritas, et huic velut columnæ in loco caliginoso lucenti, et plenum veritatis testimonium intra se continens, firmiter innitentes, conventum illum sacrilegum vere synagogam Satanæ reputantes, et hinc velut a Pilati prætorio, in quo misere declamatum est : *Non hunc, sed Barabbam* (Joan. xviii). *Tolle, tolle, crucifige eum; sanguis ejus super nos et filios nostros* (Joan. xix), mente promptissima declinantes, totum quod ab his profane statutum est, sanæ mentis judicio reprobandum per omnia censuerunt. Lumini vero quasi lumen accessit, cum sacram vestram pragmaticam episcoporum, presbyterorum, diaconorum, cardinalium sancte prosecuta est; et provide plena veritatis epistola, hoc mundo clamans, hoc vociferans, ad quos apostolica spectat electio, hos quidem omnes apostolatui vestro communi voto, assensu unanimi, sincera charitatis integritate per omnia consensisse et suæ devotionis obsequium in hoc Christo pia fidelitate præstitisse. Nam si de numero pontificum unus exivit, ejus in hoc reminisci oportuit, quo de numero apostolorum exeunte, veritas in hunc modum testificata est : *Nunc clarificatus est Filius hominis, et nunc clarificabitur* (Joan. xiii). Duobus etiam fratribus in partem alteram sentientibus, nunquid ad hoc totam inclinari oportuit Ecclesiæ plenitudinem, cum id clamet auctoritas, ut paucorum absentia sive necessaria, sive fortuita, quod a majore parte ordinis statutum est salubriter, non debilitet? Et item : *« Duæ partes ordinis in urbe positæ, totius ordinis instar exhibent. »* Et alibi : *« Quod majoris partis assensus probaverit, solemnis hoc firmet auctoritas. »* Si quid vero tantorum luminum præclaris potuit superandi fulgoribus, id fidelis vestri domini Lexoviensis episcopi, plena suavitatis gratia et prudentiæ, ad plenum cumulavit epistola. In qua, dum ipsius fidei puritas, et obedientiæ virtus omnibus in commune residentibus patenter emicuit, micantes in rebus dubiis multorum animos, ne de cætero velut arundo vento agitata moverentur (Luc. vii), quasi coram posito virtutis speculo, et tanquam Domini spiritu per eum plenius exhortante, perfectissime solidavit. Novissime vero consummans omnia sacra legatorum vestrorum attestatio, beato fine cuncta complevit, adeo ut Ecclesia sancta quod

A in aure prius audierat, super tecta secure jam prædicet, et apostolatam vestrum piissimus rex noster humili devotione suscipiat, et anglorum vobis et Gallicana simul Ecclesia non in occulto jam loquens, sed in omnibus suis finibus jam patenter obediat. Vos itaque, Pater in Christo charissime, in Patrem et pastorem animarum nostrarum suscipimus, vocem vestram audivimus et agnoscimus, alienum non sequimur, sed qui Christi tunicam, quæ nec in passione scissa est, misere considerunt Satanæ in carnis interitum, in Spiritus sancti virtute tradimus (I Cor. v). Divinitus itaque collato vobis honori, Pater, ut Anglorum plenius applaudat Ecclesia in uno devotissime in beatis his auspiciis vestris postulat exaudiri, ut beati regis Edwardi corpus liceat fidelissimo filio vestro Westmonasteriensi abbati Laurentio, prout ejus expetit sanctitas honorare, et a terra levatum, et condigna theca repositum, in publicas totius populi gratulationes in Ecclesia sublimare, quam a fundamentis erectam constituit, et amplissime dotatam, omnibus quæ ad decorem domus Dei sunt, in honorem Dei et beati Petri nobilitatam beatissime consummavit. Hoc quidem corpus, ut ab his quibus fides, ut credimus, habenda est, frequenter audivimus, a centum jam annis usque nunc integrum incorruptumque cum visitaretur inventum est, et qui licet in conjugio positus animi tamen summa virtute toto vitæ suæ curriculo, ut prædicatur, ab omnibus virgo permansit, et post mortem etiam beata sui corporis incorruptione donatus est. C Hunc prophetiæ spiritum habuisse, et in carne degentem futura Domino revelante, prædixisse constanter affirmant, mitem et misericordem et mansuetum super omnes, et beato Petro tam devotum fuisse commemorant, ut diem qua ipsius Ecclesiæ nihil contulerat, se prorsus amisisse deploraret. Ejus adhuc leges apud nos judicia temperant, et regni sui pauperes usque hodie in multis illis provida ipsius circumspectione conservant. Honorem vero qui sanctis exhibetur, quia Domino placere non ambigimus, in hoc communi voto serenitati vestræ supplicamus, ut regnum Angliæ apostolicæ semper sublimitati devotissimum honoretis, et fidelem populum, regi suo quem ob multa quæ epistolaris non capit angustia, vere sanctum existimant, debitum sanctis honorem et reverentiam exhibere concedatis. Conservet vos incolumem in longa tempora divina virtus, in Christo dilecte Pater.

EPISTOLA CXLIX.

AD EUMDEN.

Patri suo et domino summo pontifici A., frater G. Londoniensis Ecclesiæ minister, debitum apostolicæ reverentiæ charitatis et obedientiæ famulatum.

Ut ostium cardine, sic sanctæ sedis apostolicæ moderamine sacro omnes quidem Ecclesiæ, Domino sic disponente, et Ecclesiæ suæ sanctæ pie per omnia providente, reguntur. Quæ cum judicialis æquitatem censuræ omnibus exhibeat, jus suum unicui-

que sancte et intemerate conservat. Sic iras mitigat, ac fomitem reprimat jurgiorum, sic charitatem solidat, et per omnes Ecclesie partes pacem, si forte inimico homine superseminante zizania (*Matth. xiii*), in aliquo turbata est, sancta summeque laudabili circumspectione reformat. Inde est quod dilectæ nobis et diligendæ semper in Domino sanctitati vestræ tota mente totoque hominis interioris affectu preces supplicando porrigimus, quatenus erga illam sanctæ Romanæ Ecclesiæ specialem et devotissimam filiam, Cantuariensem videlicet Ecclesiam, sereni cordis et benevolæ mentis oculos habeatis; et qui jus suum cuique defenditis, ob beati Gregorii et sancti fundatoris ejus Augustini merita, ipsam vestri, quod absit! apostolatus tempore, nec opprimi, nec injustis oppressionibus ab antiqua dignitatum suarum luce obscurari permittatis. Nam si paternis est fides habenda traditionibus, ut a sancta Romana Ecclesia Cantuariensis fide illuminata est, sic est Eboracensis per Cantuariensem ad fidem procul dubio conversa. Est enim ex historiis notissimum, beati Augustini successorem Laurentium ad hoc Paulinum direxisse, ipsiusque ministerio civitatem Eboracæ ab infidelitatis tenebris eruisse, et in ipsam primatus dignitatem et gloriam hoc ipso digne promeruisse. Quem quidem primatus honorem multis prædecessorum vestrorum temporibus Ecclesia Cantuariensis obtinuit, et in Eboracensem Ecclesiam modis pluribus factisque memoria dignis exercuit. Unde sublimitati vestræ Cantuariensis Ecclesiæ tota supplicat plenitudo, ne filiam adversus matrem suam levare calcaneum, et in ejus paritatem efficaciter aspirare permittatis, neve insigne gestandæ crucis, quod soli Cantuariensi concessum esse testatur antiquitas, in scandalum, quod absit! Ecclesiæ Anglorum et stuporem regni, Eboracensis ille in aliena ulterius provincia circumferat, auctoritate apostolica provideatis. Si enim bene meritis beneficiis ampliare dignum est, Cantuariensi procul dubio Ecclesiæ non solum antiqua convenit privilegia conservare, verum etiam novis eam semper dignitatibus insignire consequens est, quæ nimirum sedi semper apostolicæ se in quibus potuit obnoxiam devotissime recognovit.

EPISTOLA CL.

AD EUNDEM.

Patri suo et domino summo pontifici A. frater G. Londoniensis Ecclesiæ minister, devotum et debitum charitatis et obedientiæ famulatum.

nunctam nobis de colligendo censu beati Petri sollicitudinem quanta possumus acceleramus diligentia, quem licet nondum plene collectum habeamus, qua tamen via collectum transvehere quæve cautela salvum transmittere valeamus, juxta anxiam nobiscum disquisitione investigamus. In quo, quia nostra nobis non plene succurrunt consilia, vestram super hoc sublimitatem duximus consulendam. Non enim nobis tutum est per ignotos populos et regna incognita jam dietam deferre pecuniam, nisi quate-

nus reverentia pacis et protectionis domini nostri regis Anglorum noscitur dilatari. Non nostros in hoc, teste conscientia, loquimur labores, aut causamur expensas, sed ipsa rerum pericula formidamus. Inde est quod vestræ supplicamus sanctitati, ut vestri, si placet, nuntii circiter Kalendas Octobris, nostris apud Rothomagum nuntiis occurrant, qui aut delatam per nos illuc pecuniam ad vos usque, eam ea qua providebitis securitate perferendam suscipiant, aut eam ipsam alicui fidelium vestrorum prout vestra decernet auctoritas, exsequendam injungant.

EPISTOLA CLI.

AD EUNDEM.

Patri suo et domino summo pontifici A., frater G. Londoniensis Ecclesiæ minister, debitum dilectionis et obedientiæ famulatum.

Cum ex vestri, domine, forma mandati magistro Matthæo illustris Anglorum regis cancellario, diem adversus R. priorem Monem [utensis] super ecclesia de Langaran statuissimus, ipse eodem die in præsentia vestra adversus jam dictum priorem experiens, ecclesiam jam dictam cum adjacente sibi parochia injuste sibi ab ipso detineri conquestus est. Asserens eandem ecclesiam cum tota sua parochia ad jus ecclesiæ suæ de Langaran pertinere, ipsamque ecclesiam de Langaran hanc de qua agitur, multo tempore possedissem, nec eam aliquatenus judicio, sed sola Monem, ecclesiæ violentia amissem. Quod cum coram positis testibus probare paratus esset, prior illico exceptionem sibi peremptoriam obiciens respondit, se super eadem ecclesia in nostra jamdudum præsentia, cum adversus eum magister Matthæus intenderet, ad audientiam apostolicam appellasse, seque ad sedem ipsam apostolicam instructum venisse. Ubi cum magistri Matthæi diu præstolatus fuisset adventum, nec ipso nec pro se aliquo comparente, apostolico tandem judicio hanc ipsam, ut asserit, ecclesiam de Langaran ad jus Monem [utensis] ecclesiæ pertinere, instrumentis testium et juramentis sufficienter ostendit, et super hac lite victoriam bonæ memoriæ domini papæ Adriani sententia reportavit. In cujus probationis suæ et secundum eum latæ sententiæ testimonium, privilegium ejusdem domini papæ Adriani ostendit.

D Hanc ipsam probationem testificans, et ecclesiam de Lanruac, ecclesiæ Monem [utensis] confirmans. Magister vero Matthæus adversum se absentem et indefensum sententiam latam fuisse audiens, priorem hoc falsa suggestionem [obtinuisse] asseruit. Quod ut in vestra probet præsentia, ad audientiam vestram ad festum Omnium Sanctorum appellavit. Valeat dominus meus et Pater in Christo charissimus.

EPISTOLA CLII.

AD EUNDEM.

Patri suo et domino summo pontifici A., frater G. Londoniensis Ecclesiæ minister, devotum charitatis et obedientiæ famulatum.

Cum instaret apud nos Godefridus de Luci, archidiaconus Derbi, ut super quibusdam decimis ad

suam, ut asserit, præbendam pertinentibus, adversus Thomam clericum, juxta vestri formam mandati justitiam consequeretur, Thomam illico nostrum intendit declinare judicium, ostendens post directas ad nos litteras vestras aliud a sublimitate vestra ad dominum Wintoniensem emanasse mandatum, ut causam nobis ante delegatam, ipse evocatis partibus et audiret et terminaret. Cum itaque litteras vestras super hoc ipse præ manibus haberet et ostenderet, nos negotium ipsum suspensum tenere curavimus, donec nobis per vos plenius elucescat, quem nostrum liti finem dare oportet. Valeat dominus meus et Pater in Christo charissimus.

EPISTOLA CLIII.

AD EUMDEM.

Patri suo et domino summo pontifici A., frater G. Londoniensis Ecclesiæ minister, debitum dilectionis et obedientiæ famulatum.

Esi rem grandem dixisset mihi dominus meus, per omnia quidem obedire debueram, quanto magis, cum sibi a me tapetum pedum humile substratorium mitti mandaverit. Mitto itaque super quo scripsit, non tamen quale descripsit vestra sublimitas, optans ut munus exiguum mittentis affectus amplifcet, et si deest formæ rotunditas, id quæ penes nos est penuria artificis tale quid in hunc modum aptare scientis excuset. Non enim conduntur apud nos tapeta, sed a transmarinis partibus advehuntur. Quibus in tota civitate nostra diligenti scrutinio perspectis, quod melius invenire potui, dilectæ mihi in Domino sanctitati vestræ transmittere, multa mentis alacritate curavi. Muro suo inexpugnabili circumcingat vos Dominus, et armis suæ potentie protegat semper, in Christo dilecte Pater.

EPISTOLA CLIV.

AD EUMDEM.

Patri suo et domino summo pontifici ALEXANDRO, frater G. Londoniensis Ecclesiæ minister, totum quod in se potest humilis et ad obediendum prompta devotio.

Dilecte mihi Pater, et diligende semper in Domino, sanctitati vestræ gratiarum refero totis animæ meæ viribus actiones, quod apostolica mihi viscera clementer aperiens, et in necessitate summa anxietati meæ pie compatiens, oculos in me misericordiæ reduxistis, et cui mortis injuste nectebat laqueos adversantis mihi potestatis austeritas in vitam me respirare paternam tandem charitate voluistis in ira, si qua fuit memor misericordiæ, totum tamen quod oportuit justitiæ reservans et disciplinæ. Quod profecto beneficium eo mihi gratius, longeque reputatur acceptabilius, quod non ad preces regias, non ad multorum in id porrecta suffragia, non ad opum oblata pondera seu promissa, sed de fonte charitatis lucidissimo, pectore scilicet apostolico, in illum pietate progressa, non meis meritis exhibitum, sed omne præveniente meritum, sola totum gratia misericorditer indultum est. Unde quod obsequii possum, Pater, et quod honoris, vestræ circa me munificentia

A fateor in omnibus obligatum, adeo ut me velle quod volueritis, totum subire quod injunxeritis compellat pariter et suadeat non solum sedis cui præsidetis auctoritas, sed ex impensi etiam magnitudine beneficii inuata, siquidem et jamdiu super hoc concepta voluntas. Suis itaque circa me sibi que placitis vestra sanctitas utetur imperiis, in omnibus quæ meæ possibilitati responderunt, patri filius, domino servus obediet, nec durum reputando nec asperum, quod apostolicæ circa me novero mansuetudine complacere. Sciat enim dominus meus, et certum teneat, me a tempestatis hujus qua jamdiu quassamur initio id semper voluntatis, id habuisse propositi, ut vobis occasione quacunque assisterem, et vobis coram positus, anxietatis mei cordis exponerem, ut a sublimitate vestra impetrata clementer ejus cui asstringor officii absolutione, ab his quibus obruior fluctibus saltem nudus evaderem, et cum multorum nequeam, saluti saltem meæ aliquatenus providerem. Omnes enim ab Angliæ finibus ad vos usque decurrentes, ut quibusdam non certe placeant, me seminarium discordiæ, subversorem Ecclesiæ, incentivum malorum, fomitem litis et odiorum omnium sinistre denuntiant; et quæ nec vera sunt, nec unquam, juvante Domino, probari poterunt, sanctis vestris auribus adversum me quorundam promissis et precibus instillare non omittunt. Et ecce, Pater, morior, cum nil horum fecerim, cum horum in nullo conscius sim. Dantur in me sententiæ nec confessum, nec convictum, sed nec quidem commonitum. Formatur et conflagitur notorium, et ut grassanti nihil desit invidiæ, quod nulli notum est, audacter asserunt esse notissimum. De manu mea sanguis quem non effudi requiritur (*Ezech. iii.*), et injustissime quæ non rapui cogor exsolvere (*Psal. lxxviii.*). Quæ nimirum omnia in me recasura metuens, omnem præveniendū sententiam apostolicam jamdudum appellavi præsentiam, ei super his optans assistere, quem in jure certum est non errare. Quam nimirum appellationem si minime prosecutus sum, hæc causa exstitit, quod legatis ad dominum nostrum regem a latere vestro directis, eis omnium quæ inter dominum Cantuariensem vertebatur et nos, cognitionem pariter et diffinitionem commisistis, litteris destinatis ad nos, ut nos eis præsentem exhiberemus, et quod auditis partibus, statuerent in nos, firmiter observaremus. Quibus rem minime prosequentibus, cum ob imminens periculum in eorum denuo præsentia una cum fratribus nostris appellaverim, hujus etiam appellationis prosecutio nobis a vestra gratia domini regis interventu remissa est. Testantur hoc litteræ quæ penes nos sunt apostolico signo communizæ. Cum vero judicem moveri non oporteat, si cum de gravamine suspectus est ad superiorem provocetur, offensus tamen dominus Cantuariensis, eo quod ad vestram appellaverim audientiam, meum caput impetere, me non servato ordine proposuit excommunicando suffocare. Cujus rei præscius, sententiam præveniens, ad vestram item appellavi cle-

mentiam, ejus examen expetens, qui merita causarum recte ponderans, suum unicuique jus æqua ratione conservat. Quod enim legitur ne in una eademque causa tertio appelletur, non eo spectat ut quoties episcopus se a metropolitano suo gravandum putaverit, libere non appellet, sed eo potius, ut a sententia a tribus gradatim iudicibus post appellationem approbata, qui victus est appellare non debeat. Quod quidem non solem facibus adjuvando dicimus, sed ut his qui de crebra nos appellatione redarguunt vel paucis respondeamus. Ad culmen igitur apostolicum sic appellavi, sperans id subsidio futurum mihi, ne ante liam appellationi præfixum, meus posset status ab eo contra quem appellatum est aliquatenus interverti. Sedis enim apostolicæ soliditas illa est, de qua mari dictum est: *Huc usque venies, et hic confringes tumentes fluctus tuos* (Job xxxviii), ad quam appellando alius iudicis cuiusque sententia jam lata suspenditur, si fuerit præappellatum, lata postmodum viribus omnino caret, ut tam re quam nomine prorsus nulla reputetur, habenda magis irrita, quam aliqua extrinsecus solemnitate irritanda. Quia tamen populus juris apices et canonum occulta non percipit, lata in me postmodum post appellationem sententia, a doctis de humilitate culpam, quam divina celebrando de ausu quasi sacrilego a multitudine reprehendi, me sic habens, sic in omnibus exhibens, ac si me teneret sententia, quam ab ipso suæ pronuntiationis initio apostolica sublimitas elidebat, ad quam præmissa appellatio sententiam ne quid posset omnino potentissime reprimerebat. Qui nimirum articulus cum posset in partem hanc, Patrum auctoritate suffragante, plurimum disputari, inspectis tamen litteris, quibus me vestra charitas instruere et consolari dignata est, altercationem respuì, et juxta vestri formam consilii absolute suscepi, præsentem Evangelio me vobis in id quod vestra mihi sanctitas dederit in mandatis obligavi, vestro per omnia pariturus imperio pro possibilitate, non recessurus a promisso. Temperet, obsecro, charitas paterna mandatum, quousque meum in jure deprehenderit actore aliquo et idoneo teste peccatum. Si meritis gratiam referri distuli, æstivus calor, difficultas itineris, deprædationis metus et carceris, id fecere differri. Si progressus in itinere ad vos usque non processì, exploratorum insidiis impeditus sum, et a nuntiis domini regis a vestra sublimitate reversis, sub multa interminatione revocatus. Obsecro per misericordiam Jesu Christi Domini nostri, ut Pater iram filio de corde remittat, et in sua protectione susceptum, totum de cætero ad omne posse meum et si suum velle possideat. Conservet incolumitatem vestram Dominus, in Christo dilecte Pater.

EPISTOLA CLV.

AD EUMDEM, POST PASSIONEM DOMINI CANTUARIENSIS.

Patri suo et domino summo pontifici A., frater G. Londoniensis Ecclesiæ minister, debitum omnino subjectionis et obedientiæ famulatum.

A Ad vestram, Pater, indignationem exhausta fletibus, et ærumna corporis mei jamdiu virtus elanguit, et obnoxia quæque sensibus officiis indevota suis, innata doloris intimi pene fecit immensitas. Ad vestram enim aversionem factus illico sum plebis abjectio, notis meis opprobrium, et amicis plena confusionis occasio (*Psal. xxi*). Et nisi pia clementis medici cura languentis vulnere vel in modico lanuginem obduxisset, in salutis desperatæ cicatricem mora profusior ulcera patientis indurasset. Nunc autem, Pater, cum ex his quæ paterna filio indulsit pietas aliquam mihi liceat sperare salutem, reviviscit spiritus meus, exultat anima, et pro mansuetudine benignius exhibita, ad gratiarum actiones mens tota resurgit, et ad sancitatis vestræ provoluta pedes, totis supplicare viribus, totis anhelat exorare desideriis, ut post mordentia austeritatis vina, piæ lenitatis oleum meis infundatur ulceribus, et paternæ correptionis asperitas maternæ tandem circa me pietatis uberibus excipiatur. Intus jam apud Patrem sit, qui pro filio pulset et exoret affectus, ut punitum jam satis suscipiat in gratiam, et correctum graviter vestris devotum firmiter obsequiis habeatis. Intra castra revocatum pietas paterna promoveat, et prælibatam mihi gratiam ad perfectum manus apostolica justa tandem miseratione perducatur, ne in luctu et miseria dies meos transigere, et me dierum meorum paucitatem quæ superest, in amaritudine finire compellat. Conservet incolumitatem vestram Dominus Ecclesiæ suæ multis profuturam temporibus, in Christo dilecte Pater.

EPISTOLA CLVI.

AD EUMDEM.

Patri suo et domino summo pontifici A., frater G. Londoniensis Ecclesiæ minister, salutem et debitum honoris et obedientiæ famulatum.

Benignitati vestræ, Pater, mihi jam frequenter exhibitæ corde provolutus et corpore gratias humillime refero, quod onus a me quo premebar anxie, prævalente tandem gratia submovistis, et a mœstitiæ me tenebris in quamdam optatæ spei serenitatem intus apud Patrem pulsante pro filio pietatis affectu, misericorditer induxistis. Unde soluto vinculo quo tenebar, nil, Pater, est quod optem amplius, quod desiderantius affectem, quam sanctitati vestræ præsens assistere, præsentem me totum vobis exponere, et hanc dierum meorum paucitatem relictam a tumultibus et turbinibus abstractam, vestri moderamine consilii totam Domino mancipare. Unde meis graviter accrescit infortuniis, quidquid obstaculo mihi quo minus optata peragere, et labores meos diutinos et diu continuata lædia optato tandem fipe concludam.

Hinc mihi dolor insidet, et meum undequaque spiritum involvit anxietas, dum ex causis plurimis emergunt plurima, quæ me avocant a proposito, et non occasione quadam, sed necessitate multiplici retrahunt ab incepto. Et quidem in causis illa

prima est et præcipua, quod exivit in aures omnium jamdiu a celsitudine vestra in me latam sententiam, cum collata mihi pro parte gratia vix adhuc paucis innotuerit. Hinc omnium qui vias obident, qui calles directos ad vos ut formicæ circumquaque discurrentes obambulant, furor accensus est, ut nec Deum verentes nec homines, impune sibi in me cuncta licere judicent, obsequium Domino præstare se reputent, si mihi injectis manibus damnis me pariter et contumeliis afficiant, et carcerali mancipatum custodiæ, hominem a summo condemnatum et reprobatum pontifice, ad exactam usque stipis ultimæ redemptionem, exquisita poenarum adhibitione compellant. Stratas omnes hic adversus me jam rumor implevit. Hac transiturus ille est, quem manus apostolica cunctis exposuit, quem *B* *Egyptum* spoliare, suffocare, modis omnibus affligere bonus odor sacrificii Deo, et apud Ecclesiam consummata laus est. Aptate manus, adhibete custodiam, ne sub larva, aut quoquomodo subornatus evadat. Londoniæ vobis opes in januis ecce sunt. Inopes vos de cætero negligentia sola constituat. Illic Pater adversum me murus erectus est, hæc undique difficultas objecta, quam, etsi juvante Domino, transcendere quoquomodo contingeret, ætas tamen ultima, quæ a pluribus me jam annis excepit, impedimento mihi est, ne aut iter istud arripere, aut in paribus sibi viribus laborem hunc aut possim aut audeam aliquatenus attentare. Hæc mihi jam tot invexit incommoda quot enumerare longum *C* est, et quæ magis suppressere quam scripto propalare compellit erubescencia.

EPISTOLA CLVII.

AD EUMDEM.

Patri suo et domino summo pontifici A., frater G. Londoniensis Ecclesiæ minister, humilem et debitum charitatis et obedientiæ famulatum.

Venerabilis et charissimi fratris nostri, domini Norwicensis episcopi, præclara ab ineunte ætate usque in senectutem bonam ad id plenum exigunt merita, ut quos delectat honestas vitæ, quibus religio cordi est ipsum digne commendare, et apud sanctitatem vestram cum supplicante debeant affectione promptissima supplicare. Notum quippe satis est ipsum ab ipsis fere cunabulis per omnes ætatum *D* gradus honeste conversatum in Ecclesia ut dicitur ad senectam jam nunc uberem pervenisse, ipsumque in Ecclesia cui præsidet, et in episcopatu quem disponit, in publicas adeo gratulationes susceptum esse, ut quod sibi impenderitis honoris et gratiæ, id tota ipsius Ecclesiæ plenitudo cum summa gratiarum susceptura sit actione. Cum sit itaque Patris in bonis filiis delectari, apostolicæ supplicamus clementiæ, quatenus in necessitate præsentis, de qua per directos nuntios recurrit ad vos, oculos in ipsum misericordiæ habeatis, et eos qui sibi adversantur inique apostolica severitate reprimendo, ipsum diem suum cum pace claudere, et a vobis ad Patrem omnium cum pace velitis emigrare. Alioquin

lesam se virtus erubescet, et justitiam supergressa iniquitas in multorum prævalebit perniciem; et quæ nunc alia pace sopita sunt, horum exemplo facta securior atque perturbabit. Valete vos.

EPISTOLA CLVIII.

AD EUMDEM.

Patri suo et domino summo pontifici A., frater G. Londoniensis Ecclesiæ minister, veræ dilectionis affectum, et humilis obedientiæ famulatum.

Lux, domine, post tenebras gratius illucescit, et post mæroris nubilum restituta lætitia, mens quam dolor afflixerat jucundius hilarescit. Sic Anglicana, Pater, Ecclesia, quæ suis destituta pastoribus longo jam tractu temporis luctum continuavit et lachrymas, ubi vestra sollicitudine, quam filiorum communis studiose semper impenditis, per directos a latere vestro viros venerabiles Albertum et Theodwinum sedis apostolicæ legatos in eligendis pastoribus et prælatis gloriam libertatis obtinuit, quanto eam dolor gravius afflixerat, tanto uberiori perfusa gaudio intus in spiritu abundantius exsultavit. Datus ei fuerat juxta prophetam, pro zona funiculus, pro crispanti crine calvitium, et pro fascia pectorali iuge cilicium. Quæ omnia, Domino potenter virtutem operante per vos, sibi jam longe projecta sunt, et electionum sibi concessa libertate, jam quasi vestibus induta gloriæ sponso suo et regi quam gloriose tam et confidenter assistit, hac usa libertate quam Domino gratiam ministrante per vos assecuta est.

C Sancta Cantuariensis Ecclesia illa sanctæ Romanæ Ecclesiæ filia spiritualis et devotissima, convocatis episcopis suis suffraganeis, et cæteris ipsius provinciæ personis, in eligendo sibi Patrem et archiepiscopum sanctorum statutus canonum diligenter observatis, cum apud se inveniret idoneum, ad sui regimen accersire noluit alienum. Habens igitur præ oculis quod scriptum est: « Habeat unusquisque fructum suæ militiæ in Ecclesia, in qua suam per omnia transegit ætatem, in aliena minime stipendia alter obrepat, nec alii debitam alter sibi audeat vindicare mercedem, juxta illud Prophete dicentis: *Pro patribus tuis nati sunt tibi filii (Psalm. XLIV)*, filium quem nutrierat, quem regularis observantiæ sacris jamdiu imbuerat institutis, Ricardum priorem ejusdem Ecclesiæ monachum, virtutum meritis commendabilem, Deo ut credimus et hominibus acceptabilem, utpote cui ad doctrinam scientiæ, et ad honestatem mores exuberant, totius conventus sui et episcoporum, cæterarumque personarum in hoc concurrentibus votis, in Patrem sibi et archiepiscopum celebrata solemniter electione suscepit, ipsumque ad hoc in sublime rapiens, Deo laudes et gloriam cum multa gratiarum actione populi que totius applausu gratanter exsolvit. » Ad cujus consecrationem sequenti Dominica post octavas Pentecostes cum suffraganei convenissent episcopi, nuntiosque suos et rati-habitionis litteras qui ex necessitate aberant destinassent, ex inspecto litteræ sub nomine regis junioris conceptæ, in

medium prolatae et porrectae sunt, appellationem continentes adversus electiones quae in regno suo nequaquam celebrarentur assensu. Cui cum Patre superstitie nihil a quoquam debeatur in regno nisi salva Patris sui fidelitate, licetque litterae porrectae multis ex causis quas enumerare longum est, suspectae nobis viderentur, maiestati tamen vestrae debita cum veneratione deferentes, et honorem vestrum integre cupientes servare, a consecratione abstinuimus, et rem vestrae delegandam notitiae omnes in commune decrevimus. Unde sanctitati vestrae omnes in commune preces affectuose porrigimus, ne citharam nostram in luctum, et organum in vocem flentium convertatis, sed opera manuum vestrarum benigne dexteram porrigatis. Ut sciant omnes, domine, quia manus tua haec, et tu, domine, fecisti eam (*Psalm. cxxviii*), et totam Cantuariensis Ecclesiae plenitudinem vobis uberioriorem obligatis ad gratiam.

EPISTOLA CLIX.

AD EUNDEM.

Patri suo et domino summo pontifici A., frater G. Londoniensis Ecclesiae minister, debitum charitatis et obedientiae famulatum.

Qua confidentia, qua facie domino meo Patrique charissimo pro alio supplicaturus assistam, cum ad conciliandam mihi penes vos gratiam ipse potissimum advocato, ut famam late divulgat, indigeam? Non enim est mediator idoneus, quem constat in ejus oculis displicere, quem sese medium constituendo placatum quis debuit exhibere. Attamen, in Christo dilectissime Pater, dum meipsum considero, dum totum me mihi non parcendo discuto, utique non juvenis, mihi nullatenus occurrit animo, ob quod me commissisae quidpiam a facie vestra proferat, et a sacratissimo vestrae benignitatis aditu me justum sit eliminare. Vestris enim obsequiis me paratum semper exhibui, nec a fidelitate ulla unquam potero varietate casus avelli. Qui vos oderunt, illos, Pater, odio habui, et ut in libertate spiritus aliquid audeam, vestro resistentes honori, constanter aliquando repuli pariter et confudi certus.

EPISTOLA CLX.

AD EUNDEM.

Patri suo et domino summo pontifici A., frater G. Londoniensis ecclesiae minister, sinceræ et veræ dilectionis affectum, et humilis obedientiae famulatum.

In exsolvendis, Pater, sanctitati vestrae gratiarum actionibus, nostra plane succumbit humilitas, eo quod Ecclesia Dei multis apud nos retro temporibus iugo servitutis oppressa, omnique recuperandae libertatis spe vacua, vestra tandem sollicitudine quam commissi vobis gregis utilitati vigilanter impenditis, suis restituta natalibus, statum ejus Domino commutante in melius, desiderata plurimum libertate jam nunc ex insperato donata est. Legatorum enim quos ad Ecclesiae perquirenda remedia in partes nostras circumspectione laudabili vestra direxit auctoritas, hoc tandem cura prudenter et potenter obtinuit, ut in regno Angliæ suis jamdiu

A viduatæ pastoribus Ecclesiae ad sui regimen idoneas eligendi personas liberam in omnibus habeant facultatem. Inde est quod apud nos quamplures Ecclesiae suis gratulantur electis, de vestra confidentes misericordia, ut hi quos concorditer elegerunt, dono vestrae gratiae promoti in melius consecrationis etiam munus valeant obtinere. Inter has Bathoniensis Ecclesia in venerabilem fratrem nostrum Ragnaldum Salesberiensem archidiaconum sua vota porrexit, ipsum concorditer expetens, et, nullo reclamante, aut contradictionem in aliquo movente, solemniter eligens, eique sui curam et regimen tota animi voluntate committens. Quem apud sanctitatem vestram laudum commendare titulus ideo superaddendum credimus, quod ejus litteraturam, mores, et industriam, et in agendis Ecclesiae negotiis efficaciam, ipsis rerum ut credimus agnovistis indicibus, utpote quem vestra donatum gratia et apud nos ex vestra magnificentium notitia, in id gratiae culmen erexit; ut quæ ipsum elegit Ecclesia non modicam ex hoc ipso speret apud sanctitatem vestram gratiam collocari. Quem quia, juvante Domino, in domo Domini cooperatorem bonum futurum credimus, fraterna charitate movente, et in hoc audaciam præstante petimus, ut operi manuum vestrarum benigne porrigatis dexteram, et consecrationem ejus accelerando vobis ipsum et propterea ipsum plurimos arctius obligetis ad gratiam.

EPISTOLA CLXI.

AD EUNDEM.

Patri suo et domino summo pontifici A., frater G. Londoniensis Ecclesiae minister, debitum charitatis et obedientiae famulatum.

Conquestus est apud nos, domine, praesentium lator Ricardus, se ecclesia de Bardintuna injuste spoliari, et eam a Waltero clerico injuste sibi detineri, asserens se ut jam dictam recuperaret ecclesiam jamdudum bonae memoriae dominum papam Adrianum adisse, et ad venerabilem fratrem nostrum dominum Cicestrensem episcopum, mandatum retulisse, ut super eadem causa cognosceret, et ipsam sine debito terminaret. Jam dicto itaque episcopo suas in hoc partes interponente juxta assertionem Ricardi, Adam clericus dictae ecclesiae, eo tempore detentor, cum eo in hunc modum composuit, ut viginti solidos annuatim, nomine ipsius ecclesiae sibi solveret, et hos solvendo, ecclesiam ipsam vitae suae tempore retineret. Ipso vero postmodum in hac solutione cessante, Ricardus se dominum papam item adisse, et jam dictam ecclesiam sibi ab eo adjudicatam fuisse, sequae sententiae hujus executionem ad dominum Cicestrensem detulisse et jam dictum Adam secum denuo in hunc modum transegisse asseruit, ut quinquaginta solidos annuatim sibi redderet, haecque solutione ecclesiam retineret. Innitens itaque auctoritati apostolicae, quae sibi ecclesia jam dicta adjudicata est, cum ejus nomine jam nec viginti nec quinquaginta, nec aliquid omnino sibi solvatur, petebat ecclesiam sibi

restitui, et apostolicæ sententiæ reverentiam debitam exhiberi. Walterus vero res inter alios actas et iudicatas, aliis nec obesse nec prodesse debere asserens, se jam dictam ecclesiam canonicè adeptum, seque a prædecessore nostro bonæ memoriæ Roberto episcopo, ante litis memoratæ tempora, in ea personam constitutum fuisse respondit. Cumque postmodum in Galliis studiorum causa demoraretur, si inter Ricardum et Adam rei suæ procuratorem, ipso absente et ignorante, super ecclesia sua lis acuita et transactio interposita est, ipsam absenti sibi et ignoranti præjudicium afferre non posse, notissimi juris esse asseruit. Qui reversus a studiis, et in propria veniens, ecclesiam quam legitime natus est, jure suo possedit, nec pactiones Adæ super re sua, ipso ignorante, initas aut ratas habuit, aut ratas habere disponit. Volentes vero jus Ricardi, si quod erat, plenius intelligere, quis eum in jam dicta ecclesia personam constituerit, diligenter inquisivimus. Ipse vero prædecessorem nostrum dominum Ricardum seniore ecclesiam hanc sibi concessisse respondens, scriptis aut testibus, aut aliis quibuscunque adminiculis assertioni huic fidem facere, nec tunc quidem potuit, nec de cætero se facturum repromisit. Inquisitis vero, an hoc probare sufficeret, Adam scilicet tempore quo cum ipso transegit ecclesiam ipsam suo nomine possedis, aut Walterum quod inter ipsos gestum fuerat ratum postmodum habuisse, horum etiam probatione omnino se carere respondit. Unde cum causam ejus veritate niti non liqueret, reverentiam tamen debitam domini papæ literis exhibentes, W. ab ejus decisione non absolvimus, sed rem in diem alterum quo sibi Ricardus providere posset uberius, differendam æstimavimus. Ricardus vero denuo penes nos exquiri renuens rem distulit ad sanitatem vestram, ad festum sancti Ægidii appellavit. Valere vos optamus in Domino, Pater in Christo charissime.

EPISTOLA CLXII.

AD EUMDEN.

Patri suo et domino summo pontifici A., frater G. Londoniensis Ecclesiæ minister, devotum charitatis et obedientiæ famulatum.

Perlato, Pater, ad nos mandato vestro super comite Hugone et Willelmo de Vaus, debitaque veneratione suscepto, comes Hugo nuntiis illico directis ad nos, anxie conquestus est fratres de Panteneia in læsionem suam vestram circumvenisse excellentiam, et falsa suggestionem hanc, quæ ad præsens in eum lata est, sententiam obtinuisse. Negotium vero quod inter canonicos et ipsum vertitur, asserit eo quem consequenter ostendimus, ordine processisse. Villam de Panteneia de feudo comitis Hugonis esse penes nos, fere nullus ignorat, quam se canonicis de Panteneia nunquam dedisse, nunquam scripto confirmasse, jurat, et modis omnibus asseverat. Annis vero jam duobus emensis fatetur se Willelmum de Vaus, qui villam jam dictam suo ascribebat patrimonio, et tunc sibi compe-

tere dicebat hereditario, quemque et Patrem suum jam dicti canonici possessionis quam in villa ipsa habent, auctores laudant, solemnè curia convocata in jus vocasse, et villam hanc adversus eum, utpote Patri suo nunquam donatam, nunquam hereditario jure concessam, coram omnibus solemniter evicisse, seque post evictionem hanc curiæ suæ iudicio, ad villam ipsam manus extendisse, ipsamque ut suam seu sperabat sibi aliquandiu possedisse. Prædicti vero fratres super hac necessitate recurrentes ad vos, mandatum ad nos pertulerunt, ut prædictum comitem districtè conveniremus, et nisi auctoritate vestra per nos admonitis, eis villam jam dictam et omnia ablata in integrum restitueret, terram ejus totam sub interdico ponere, et nisi vel sic satisfaceret, excommunicationis in eum ferre sententiam non differemus. Nobis itaque mandatum vestrum multo labore complentibus, domino nostro rego manum efficaciter apponente, villa ipsa canonicis reidita est, et quæcunque sibi ablata fuerant, eis juxta juramentum et probationem suorum, per nos integerrime restituta sunt. Vestræ si quid aliter excellentiæ suggestum est, sic processisse negotium venerabilis fratris nostri domini Norwicensis episcopi, aliarumque ejusdem diocesis personarum testimoniis poteritis evidenter agnoscere. Deinde processu temporis, cum ad dominum nostrum regem Oxenefordie convenissemus, quia super villa hac quam sibi comes Hugo vindicat, lis diu protracta est, et in longum sunt protelata certamina, in ipsa domini regis præsentia super hoc tractatum est, ut canonici rem ipsam litigiosam comiti cederent, et aliam ipso donante susciperent, in qua cum pace degere, et in pace Domino deservirent. Quia in re, etsi prior domus ipsius assensum daret, rege tamen sic consulente, provisum est, nil ulterius fieri, negotium effectu non compleri, quousque totius conventus Panteneiæ super hoc sciretur voluntas, et communiter haberetur assensus. Conventum vero non approbante, verum improbante, negotium non ultra processum est, nec eis quidquam per dominum nostrum regem aut comitem, aut quemquam suorum commutatum est, aut allatum, aut aliquatenus ut asserunt, imminutum. Verum quod ad possessiones, in eo sibi statu permanent universas, quo vestrorum exstabant tempore prædecessorum, cum ipsorum auctoritate inter ipsos et Willelmum de Vaus lis diu protracta sopita est et finita controversia. Comes itaque primum per nuntios, deinde per se, precum arguens falsitatem, ad vestram appellavit audientiam, ostensurus, ut asserit, se nec possessiones eorum zusu ut dicunt temerario occupasse, nec locum suum aut villam, aut quidquam quod eorum sit, commutatione quæ non processit obtinuisse nec datam in se sententiam quam multa humilitate sustinet et patientia, promississe. Porro appellationi suæ terminum diem Ascensionis Dominicæ constituit, et quia sive cognitio suæ causæ mandetur executio, precum semper

convenit argui falsitatem, has, appellationis suæ A
testes, a nobis litteras impetravit. Qua in re, ne
per ignorantiam facti pars adversa caperetur, sæpe
dictis fratribus de Panteneia et formam et causam
factæ appellationis, per litteras et per nuntios fide-
les denuntiari curavimus. Valere vos optamus in
Domino, Pater in Christo charissime.

EPISTOLA CLXIII.

AD EUNDEM.

Patri suo et domino summo pontifici A., frater G.
Londoniensis Ecclesiæ minister, salutem et humilis
obedientiæ devotionem.

Ad vos, Pater, referri convenit quæ ad sublimitatem vestram penes nos appellatio facta suspendit. Monachis itaque Sancti Ulmari decimationes quasdam a milite quodam parochiano nostro, qui Baldewino Norwicensi archidiacono affinitate conjunctus est in præsentia nostra repetentibus, idem miles jam dictum archidiaconum earundem decimationum tandem laudavit auctorem. Abbate vero Sancti Ulmari et ipso archidiacono, statuto die in præsentia nostra super eisdem decimationibus adversum se experientibus, archidiaconus ipse ad Patrem nostrum dominum Cantuariensem appellavit, quibus in ipsius præsentia constitutis, abbas a domino Cantuariensi ad audientiam vestram rem appellando suspendit. Prosequentes appellationem monachi a sublimitate vestra litteras ad dominum Cicestrensem retulerunt, ut super causa cognosceret, litterasque cognoscendo dirimeret. Evocatis ad ipsum partibus, ut ex ipsius litteris accepimus, res hunc finem sortita est. Decimationes jam dictæ monachis adjudicatæ sunt, et easdem sæpeditus miles abjuravit. Directæ sunt ad nos litteræ domini Cicestrensis testificantes hoc, et auctoritate vestra injungentes, ut jam dictos monachos in corporalem earundem decimationum possessionem induceremus. Sic monachi possessionem nacti sunt. Emenso anno, cum jam messes colligerentur, servientes suos direxit archidiaconus, ut jam dictas decimationes susciperent, et ejus nomine aptarent, et in tuto reponerent. Quibus pars altera incontinenti resistens, adjudicatis sibi auctoritate vestra decimationes asportari, minime passa est. Verum vim inferre volentes repulit, suumque sibi detinuit. Querelam ad nos referens super hoc dominus archidiaconus, cum statuto die earundem decimationum restitutionem sibi fieri, tanquam vim passus exigeret, auctoritas rei judicate sibi objecta est. Qui rem inter alios judicatam, aliis obesse non debere asserens, se judicio domini Cicestrensis nequaquam interfuisse, ideoque sententiam ab eo obesse sibi non debere respondit. Aliis possessioni sibi auctoritate nostra adjudicatæ innitentibus, ipsamque convelli non debere asserentibus, archidiaconus se gravari conquerens, ad vestram appellavit audientiam, et has appellationis suæ testes litteras impetravit. Valere vos optamus in Domino, Pater in Christo dilecte.

EPISTOLA CLXIV.

AD EUNDEM.

Patri suo et domino summo pontifici A., frater G.
Londoniensis Ecclesiæ minister, debitum charitatis et obedientiæ famulatum.

Ad vestram, Pater, justum est referri notitiam, quæ facta ad vos appellatione suspensa, vestræ sublimitatis expetunt in sui decisione sententiam. Unde vestræ notificamus excellentiæ, nos ob instantem querelam parentum comitis Alberici, diem constituisse, et tam comitem ipsum quam comitissam uxorem ejus in præsentiam nostram evocasse, ut quæ inter ipsos vertuntur audiremus, et fide veri plenius habita, mediante justitia decideremus. Partibus itaque coram positis, parentes comitis proposuerunt copulam comitis et comitissæ nequaquam fore legitimam, eo quod priusquam comes illam duxisset uxorem, frater ipsius comitis, Galfridus scilicet de Ver, super ea in uxorem ducenda cum patre ipsius comitissæ fide interposita pepigisset. Asserebant etiam catenus processisse negotium, ut pater comitissæ ipsam cum trium jam esset annorum, prædicto Gaufrido, utpote futuram suam tradiderit, et Gaufridus eam fratri suo comiti Alberico sibi custodiendam commiserit, et cum jam sex compleret annos, susceptam de manu comitis, in domum propriam duxerit, sibi que venerationem omnem tanquam futuræ uxori suæ, tam per se quam per suos, in omnibus excepta tori communionem, usque ad annum duodecimum jam fere completum exhiberit. His igitur inter patrem comitissæ et Gaufridum fratrem comitis, interposita fide, firmatis, asserebant Gaufridi et comitissæ firmata fuisse sponsalia, et quæ fratris sponsa fuerat, alteri postmodum fratri legitime non nupsisse. Adjiciebant etiam contractum hunc ipso comitissæ consensu fuisse firmatum, cum ad ætatem jam dictam pervenerit, et toto hoc annorum curriculo nunquam his quæ agebantur vel momento contradixerit. Comitissa vero, quæ a patre suo gesta sunt, cum trium tantum esset annorum, ætate nondum admittente consensum, se penitus ignorasse respondit. Et si pater suus cum Gaufrido contraxit, ut dictum est, id se nec tunc scisse, nec postmodum approbasse, nec his quæ inter eos gesta sunt assensum unquam præbuisse constanter asseruit. Unde cum in contrahendis sponsalibus eorum requirendus sit consensus, de quorum futuris nuptiis agitur, ipsa Gaufridi sponsam se nunquam fuisse ait, quæ nunquam de conjugali copula cum eo subeunda, a quoquam requisita est, nec in hoc unquam animi voluntate consensit. Si itaque a patre suo Gaufrido tradita, de manu Gaufridi a comite suscepta, si postmodum a comite Gaufrido reddita et ab ipso in domum propriam ducta est, et ibidem annis aliquot conversata in his omnibus necessitati paruit, cum Gaufrido nunquam in conjugale vinculum, aut opere aut voluntate consensit. Quod ut manifestis declararet iudiciis, adjecit se cum jam aliquantulum excrevisset, patri suo litteras direxisse, et se con-

nubio Gaufridi nunquam præbituram assensum evidentem ostendisse. Parentes vero comitis patriam potestatem ostendentes in sobolem, objecerunt, patrem posse filie maritum eligere, quem nisi vel de generem vel indignum elegerit, ipsam ejus voluntati dissentire non posse. Partibus itaque sic experientibus alterutro, cum jam tertio sedissemus, comitissa conquesta est advocatos suos ob metum comitis et suorum, causæ suæ patrocinium suum, quo minus tute eo minus diligenter exhibere. In quo se gravari asserens, ad « Lætare Jerusalem, » ad vestram appellavit audientiam, et rem continentes ut gesta est, has a nobis litteras impetravit. Valere vos optamus in Domino, Pater in Christo charissime.

EPISTOLA CLXV.

AD EUNDEN.

Patri suo et domino summo pontifici A., frater G. Londoniensis Ecclesiæ minister, ad omne patris imperium humilis obedientiæ famulatum.

Sublimitatis vestræ mandata debita domine veneratione suscipimus, et exsequendis his, operam quam possumus et diligentiam reverenter adhibemus. Quæ si quando non statim ad ipsa conquerentium vota peragimus, non ideo negligenter aut tepide quæ nobis sunt injuncta prosequimur, cum res cito decidere, aliqua procul dubio juris aut facti necessitate præpediamur. Unde si causam Herlewinii clerici adversus virum venerabilem abbatem de Ibreio aliquantula mora protraximus, id causæ exstitit, ut sub indulta mora verbis et ambagibus involuta veritas erueretur, et lis in longum protracta, sine tandem legitimo sopiretur. Eo vero processit inquisitio, ut statutis diebus pluribus, et partibus in se invicem experientibus, domino Wintoniensi et nobis et instrumentis et testibus liquido claresceret, decimationes ipsas quas modis omnibus extorquere nititur Herlewinus, ad ecclesias de Docchinges, quam jam dicto abbati vestra jamdiu adjudicavit auctoritas, jure plenissimo pertinere, et easdem Herlewino nullo prorsus jure competere. Factum enim quo nititur Herlewinus hoc est. Tempore belli, cum in Anglorum regno licebat fere totum cuique quod poterat, ecclesiam jam dictam quidam Willelmus nomine adeptus est. Hunc Herlewinus, ob quod ecclesiam ipsam patruus suus quidam, videlicet sacerdos ante possederat infestans plurimum, in hoc tandem induxit, ut decimationes ecclesiæ suæ solum auctoritate annuo sibi censu tenendas concederet, ut Herlewinus vel sic ab ejus infestatione conquiesceret. Qui nimirum Willelmus non multo post ad frugem melloris vitæ se transferens, ecclesiam cum omnibus ad ipsam pertinentibus, in manum domini Norwicensis refutavit, ut eam ipse disponderet, et personam jam vacanti provideret. Ecclesia sic vacante Willelmus de Ibreio fundi ipsius dominus, abbatem de Ibreio domino Norwicensi præsentans, in supplicando obtinuit, ut cum in ecclesia ipsa personam constitueret, eamque cum omnibus ad ipsam perti-

nentibus monasterio suo pia et in perpetuum valitura donatione concederet. Herlewinus vero ex pacto cum Willelmo inito, nulli nunquam episcopali auctoritate firmato abbatem ad præstandas sibi decimationes jam dictas teneri æstimans, ipsas petere non desistit, quas tamen sibi competere, nulla ratione juris ostendit. Ipso itaque in his jus suum nullum penitus ostendente, et cum has sibi episcopali auctoritate fuisse concessas quandoque diceret, in hujus etiam rei probatione prorsus deficiente, abbatem ab ejus petitione absolvimus, et domino Norwicensi ut decimationes jam dictas sibi restitueret, et ejus de cætero paci provideret, apostolica auctoritate injunxerimus. Quod totum Herlewinus evacuare moliens falso vestræ suggessit excellentiæ,

B nos causæ quam infra duo menses terminandam suscepimus, nonnisi post undecim hebdomadas diem constituisse, et nos a vestri forma mandati taliter recessisse. Qua in re quod actum est aperimus, ut si in jure erravimus, edocti per vos in obscuritatibus hujusmodi, de cætero cautius ambulemus. Mandatum quidem causam intra duos menses terminandi suscepimus, et infra eundem terminum causæ diem constituendo, Londoniæ die ipso dominus Wintoniensis et ego convenimus. Dominus vero Wintoniensis cum ipsum in curiam regis urgentissima eodem die causa pertraheret, attendens mandate sibi jurisdictionis diem cedere, seque ob temporis angustias negotio vacare non posse, erga Herlewino haberi se voluit excusatum. Herlewino vero instante plurimum, et in hoc abbate præbente consensum, ultra præfixum nobis terminum diem constituimus, et eo quo dictum est causam sine decidimus. Diu tamen super hoc disceptatum est, asserentibus quibusdam id non licere, et hæc ea lege probantibus, qua dictum est: « Cum non eo die quo præses provincie præcepit, judex ab eo datus pronuntiaverit, sed ductis diebus alieniore tempore sententiam dederit, præses ex integro rem cognoscat. » Aliis vero asserentibus, a similibus ad similia judicem procedere, et jus dicere sic debere de judice dato, ad certam summam illud inducebant. « Judex qui usque ad certam summam judicare visus est, etiam de re majore judicare potest, si inter litigatores hoc convenerit, quod ad simile pertrahentes inferebant, ad certum tempus judicem datum, si partes consentiant, ulteriore quoque tempore posse cognoscere. » Hoc ipsum lege de arbitro comprobantes, qui licet de proferendo die cautum non sit, compromissi diem proferre potest, si partes eam sententiam ferre consentiant. Mandatum itaque vestrum in modum hunc interpretantes, et quod ob favorem alicujus indultum est, in ejus læsionem retorqueri non debere existimantes, juxta quod apud nos in mandatis hujusmodi consuevit Ecclesia, in negotio dicto jam modo processimus, id præcipuo secuti, quod in libro Digestorum expressum taliter invenimus: « Si judex ad tempus datus et omnes litigatores consenserint, nisi specialiter principali jussione prorogatio fuerit inhibita, possunt tempora

intra quæ visus est litem dirimere, prorogari. > A
Valere vos....

EPISTOLA CLXLV.

AD EUNDEM.

Patri suo et domino summo pontifici A., frater G. Londoniensis Ecclesiæ minister, totum quod obedientiæ et obsequii valet humilis et prompta devotio.

Ad vestram, Pater, justum est referri notitiam, quæ facta ad vos appellatione suspensa, vestre sublimitatis expetunt in sui decisione sententiam. Cum igitur assertionem partium merita pandantur eorum, causam inter dilectum filium et canonicum nostrum, Henricum et Willelmum de Pontefracto agitatam apud nos, et facta ad vos appellatione suspensam, sublimitati vestre directis his apicibus aperimus. Conquerabatur Henricus, dum studiis scholaribus occupatus abesset, jam dictum Willelmum intra fines parochiæ sue de Stinbeheia, capellam erexisse, ibique in injuriam et dispendium ipsius matris ecclesiæ, divina celebrari fecisse, et ipsius occasione capellæ, ipsi matri ecclesiæ decimationes, et alias obventiones ecclesiasticas iniuste diu subtraxisse. Capellam itaque in parochia sua clam se constructam dirui, et rem in statum pristinum redigi, et sibi iniuste subtrata officio nostro restitui proposita ad hoc et rationum et auctoritatum multiplici copia postulabat. Willelmus vero novum opus inficiens, capellam ipsam in fundo suo antiquitus exstitisse, ipsamque se jure suo ad præsens innovasse, sequi in ea in nullius injuriam aut dispendium divina communicasse respondit. Adjiiciens, se decimationes terræ suæ juxta pacta inter suos et Henrici prædecessores inita et firmata, matri ecclesiæ persolverisse, et annuatim earum nomine quatuor solidos, ut comprehensum fuerat pacto, reddidisse, et cum ad evacuandum pactum hoc ad dominum Cantuariensem aliquando appellatum fuisset, se ab intentione contra pactum proposita, sententialiter absolutum exstitisse. Quæ cum taliter allegaret Willelmus, nulla tamen instrumentorum aut testium assertionem roborabat. Henricus vero coram domino archiepiscopo de decimis tantum illius anni, quo causa tunc agebatur, absolutorium fuisse judicium assererat, adjiciens, se hanc etiam sententiam ad vestram audientiam appellatione interposita suspendisse, vestramque sublimitatem domino Wintoniensi totius causæ cognitionem delegasse, se tamen causam hanc aliis præpeditum negotiis prosecutum non fuisse. Instante itaque Henrico, et in jam dictis decimis ecclesiæ suæ jux numerosa testimonium copia declaravit, se etiam eandem percepisse, viva voce testium ostendente, et ea quæ possederat sibi restitui postulante, Willelmus nostræ declinationis jurisdictionis examen, ad vestre sublimitatis audientiam appellavit, et appellationi diem festum Omnium Sanctorum constituit. Valere vos optamus in Domino, Pater in Christo charissime.

EPISTOLA CLXVII.

AD EUNDEM.

Patri suo et domino summo pontifici A., frater G. Londoniensis Ecclesiæ minister, pedibus sanctis, conculcato Satan, in Christo triumphare feliciter.

Cum ad vestram, Pater in Christo dilecte, sublimitatem omnium, sic disponente Domino, spectet Ecclesiarum sollicitudo, ad eas tamen oculos misericordiæ reducere benignius æquum est, quos amplior commendat charitas, et ad omnes obsequii devoti propensior in charitate benignitas. Quod quia in Fiscamensi Ecclesia diu viguisse ipsa rerum edocet experientia, ad sanctitatem vestram, cui sancta placere studia luce clarius enitescit, in ea qua laborat ad præsens necessitate recurrit cum fiducia, inde proventurum sibi sperans auxilium, unde quippe referunt optatum, misericordia sibi laudabiliter compatiens, remedium. Quæ nimirum hoste generis humani fidelium semper invidente successibus casuali nuper incendio concremata ad hoc miseriæ perducta est, ut quæ nobilissimi dudum fuerat conventus habitaculum pauperum, peregrinorum, et hospitali gratia indigentium quorumcunque refugium, jam non habeat ubi caput reclinet (*Matth. viii*), ubi divina celebret, ubi conservet ordinem, adventantium ubi relevet necessitatem. Unde cum supplicante petimus, cum exorante sublimitati vestre preces affectuose porrigimus, ut sibi litterarum vestrarum subveniat indulta pie benignitas, ut quod, machinante maligno, dirisime conflagratum est, in ejus ignominiam Christique perennem gloriam vestra reformet auctoritas, ut ope vestra dissipatus ordo convaleat, charitas antiqua refloreat, et statuto vobis memoriali quodam æterno præ oculis semper habeat conventus ille fratrum, unde sanctitati vestre gratias indesinenter exsolvat. Conserve in columinitatem Dominus vestram, in Christo dilecte Pater.

EPISTOLA CLXVIII.

AD EUNDEM.

Patri suo et domino summo pontifici A., frater G. Londoniensis Ecclesiæ minister, totum quod ex se valet humilis et ad obediendum prompta devotio.

Suspirat Pater ad vos Wintoniensis Ecclesia et quia spectat ad vos Ecclesiarum omnium sollicitudo, sua coram vobis anxie deplorat incommoda. Orbata Patre, aliunde jamdiu sibi emendicavit suffragia, et de longinquis finibus evocavit episcopos, ut commissis sibi populis statuta cunctis administrarent sacramenta. Hæc etiam, vivente Patre suo, Patre jamdiu caruit, quem ab administrandis his quibus et fundatur et erigitur, et ad perfectum adducitur Ecclesia Dei, ipsa sui corporis imbecillitas multo quidem tempore præpedit. Quæ suis jam finem gaudebat provenisse suspiriis, et in electo suo quem votis omnibus exoptaverat, et in Patrem sibi pastoremque nullo penitus contradicente vel reclamante solemniter elegerat, multa animi jucunditate respi-

rabat. Audiens vero sua vota differri et electi sui consecrationem in longum protrahi, nubilo jam nunc mœroris obducitur et quia spes quæ differtur, affligit animam, amicos suos undequaque sollicitat et vicinos, ut sua vobis vota proferant, sanctitati vestræ preces cum supplicante porrigant, ut ejus, si placet, anxietati condescendere velitis et compati, et in negotio hoc ob multiplicem Ecclesiæ necessitatem, si qua valet admitti dispensatio, suum concedatis electum, cujus et honestas et conversationis integritas digne commendabilis est, absque dilatione consecrari. Est lignum vitæ desiderium veniens. Unde si preces in causa hac sublimitati vestræ supplicantium, admiseritis, Wintoniensi Ecclesiæ non in modico subvenietis, et omnes nos in omnem quam posumus gratiam, vobis, Pater, obligatos habebitis. Conservet vos in longa tempora Dominus, in Christo dilecte Pater.

EPISTOLA CLXIX.

AD EUNDEM PRO HEREFORDIENSI ELECTO.

Domino papæ dominus Londoniensis, pro Herefordiensi electo.

Herefordiensem, Pater, Ecclesiam gratum Domino præstitisse speramus obsequium, quæ eligendi Patris sibi libertate concessa, ut communis habet opinio, ad sui regimen pastorem elegit idoneum virum, ut commune probat arbitrium, Deo et hominibus acceptum. Quantis enim virtutum insignibus Herefordiensis electus effulgeat, fama loquitur, probat opinio, una in ore omnium testatur assertio, qui Robertum Oxoniensem archidiaconum omnes retatis suæ gradus adeo innocenter et honeste percurrisse denuntiant, ut ei vel in modico nunquam fama detraxerit, conversationem ejus sinister rumor nullatenus obfuscare potuerit, aut pravitatis eloquio denigrare. Hunc, pater in Christo charissime, sanctitati vestræ commendamus ad gratiam, preces affectuose porrigentes, ut decurrentis ad vos Herefordiensi Ecclesiæ petitionem, quam justam vere credimus, admittatis, et ut ejus consecratur electus, paterna, si placet, gratia provideatis, ne si repulsam sustinuerit, læsa virtus erubescat, et alios in appetitum sui et cultum de cætero minus accendat.

EPISTOLA CLXX.

AD EUNDEM.

Domino papæ dominus Londoniensis.

Sanctitati vestræ scribere, et fratrum nostrorum, id exigente necessitate, preces affectuose porrigere, charitas nos Pater imperiosa compellit. Hujus enim lege constringimur, eos ut nos ipsos diligere, et negotia sua nostra reputando, quod in necessitate simili nobis exhiberi vellemus, ipsis procul dubio non negare. Venerabilem itaque fratrem nostrum Gaufridum, Ecclesiæ Cantuariensis archidiaconum, virum prudentem testificamur et strenuum; providum in consilio, discretum et ornatum eloquio, agendis Ecclesiæ negotiis et ipsius necessitatibus sublevandis et sustinendis aptissimum. Cui cum ad doctrinam scientia, et ad honestatem, ut credimus, mores exu-

berent, ipsum sibi Eliensis Ecclesia per manum nostram susceptis legatorum vestrorum litteris, quibus de eligendo sibi episcopo, auctoritate apostolica commonebatur, in Patrem et pastorem expetiit, ipsum concordiam omnium voto, nullo reclamante aut contradictionem in aliquo movente, ad Eliensis episcopatus regimen convenientiam in hoc præstante principe facta celebriter electione suscepit. Quem quia Ecclesiæ ipsi ad quem vocatus est, opem et gratiam præstante Domino, in multis credimus profuturum, et omnem vobis et sanctæ Romanæ Ecclesiæ devotionem in quibuscunque poterit exhibiturum, apud sanctitatem vestram cum Ecclesia pulsante pulsamus, cum postulante preces affectuose porrigimus, ut quod actum est, ea qua præstatis et potestis auctoritate roboratis, et negotio huic manum supremam imponendo, et ipsius consecrationem paterna pietate maturando, et eum et commissam Ecclesiam vobis in omnem gratiarum actionem et charitatis plenitudinem arctius obligetis, ut Ecclesiæ per vos in regno Angliæ nuper indulta libertas in suis coalescat initiis et gratiam augente Domino, fortiter ipso tractu temporis convalescat.

EPISTOLA CLXXI.

AD EUNDEM.

Patri suo et domino summo pontifici A., frater G. Londoniensis Ecclesiæ minister, pie salutantis affectum, et devotæ subjectionis obsequium.

Anglicana, Pater, Ecclesia in omnem gratiarum actionem sanctitati vestræ se fatetur obnoxiam, eo, Pater, quod præsentatas sublimitati vestræ fratrum nostrorum electiones placide suscepistis, et eandem Patris nostri domini Cantuariensis officio confirmari, et electos ipsos ejus manu consecrari pia et paterna gratia concedistis. Quia in re Juges lacrymas quas a multis diutius jam dolor extorserat, pietatis apostolicæ manus extersit, et Ecclesiam regni in statum dignitatis pristinae sublimiter erexit et potentissime reformavit. Per vos enim gratiam, ministrante Domino, sancta sedes Cantuariæ vacuata dudum et diu vacua, suum jam in se recognoscit antistitem, et Wintoniæ clerus cum populo electi sui sibi consecratione concessa, voti sui plenissime compos gratulatur et exultat in Domino, Ecclesiæ vero Bathoniensis, Herefordiensis, Cicestrensis, Eliensis, suis in his quos elegerant dono vestro gratiæ jam potius desideriis, in gratiarum actionem diem celebrant solemnitatis insignem. Sola, domine, superest Lincolnensis Ecclesia, quæ cum in Ecclesiis aliis undique laudes resonent, undequaque pulsantur tympana gloriæ, gemitum pro cantu habet, et spiritum mœroris trahens, tota lamentis afficitur. Audiuntur in domo Patris undique symphonia et chorus, sed hæc foris stans, non ingreditur, et repulsam passa senel, ad Patrem ingredi pertimescit. Charitatis tamen affluentiam considerans, quæ de fonte pectoris apostolici indesinenter emanans, civitatem Dei circumquaque lætificat et evangelicum illud ad mentem revocans: *Omnis qui petit, accipit; et qui qua-*

rit, invenit, et pulsanti aperiatur (*Matth. vii*), spem concipit, ut meroris sui nubilum serenitatis vestrae candor evacuet, et in electi sui susceptione pariter et promotione preces filiae devotissime supplicantis plus Pater exaudiat. Scit tamen apud nos supra dorsum ejus quosdam fabricasse plurima, et odii sermonibus ejus innocentiam circumdedit (*Paal. cxxviii*), et in hoc eatenus praevaluisse, ut ab eo clementiae vestrae facies, ut dicitur, aliquantulum aversa sit, et a pluribus in eum sinistra jam sit concepta opinio. Sed si placet advertere, super ejus conversatione et vita his potissimum fides habenda est, quibus a primis annis innotuit, sub quorum oculis, ut certissime testantur, innocenter exerevit, et ad annum tricesimum, ut assunt, jam perductus, primam aetatis suae vigiliam sub multorum testimonio et honeste et innocenter complevit, de quo spem bonam Lincolnienis Ecclesiae, devota filia vestra concipiens, et ipsius prudentiam in eo quem administravit archidiaconatu contemplans et approbans, sperans quod ejus promotio multis ex causis, quas enumerare longum est, sibi plurimum profutura sit, ipsum in Patrem elegit concorditer, et ut hoc ejus desiderium a vestra sibi gratia compleantur, instanter exposcit. Spem igitur habentes in Domino, quod ejus et honestas et prudentia ad honorem Dei et Ecclesiae de die in diem habitura sit incrementum, ipsumque in sublevandis Ecclesiae necessitatibus cooperatorem fore strenuum, preces sanctitati vestrae cum Ecclesia supplicante porrigimus, ut ei manum gratiae porrigatis, et sibi concedendo quod postulat, Anglorum Ecclesiae quod adhuc deest gaudii supplicatis, et omnes nos ex hoc sublimitati vestrae gratiae debitores efficiatis. Conservet incolunitatem vestram Dominus, in Christo dilecte Pater.

EPISTOLA CLXXII.

AD EUNDEM.

Patri suo et domino summo pontifici ALEXANDRO, frater GILBERTUS Londoniensis Ecclesiae minister, devotum et debitum totius obedientiae famulatum.

In colligendo denarium beati Petri, quantum potuimus sollicitudinem et diligentiam adhibere curavimus; dilectique in Christo fratres nostri et coepiscopi, quorum episcopatus conditioni huic constat esse obnoxios, a nobis juxta tenorem et continentiam scriptorum quae in scriniis Cantuariensis Ecclesiae studiosae requisita reperimus, vestra super hoc auctoritate commoniti debitam penitus omnes quidem agnoverunt et exsolverunt quantitatem: excepto venerabili fratre nostro et coepiscopo domino Exoniensi, qui nimirum summam suae dioecesi ascriptam minime recognoscens, quia minus quam de ratione scripta exigeretur obtulit, totum quod obtulerat insolutum reportavit: sicque licet saepe et saepe commonitus, hucusque tamen penitus a solutione cessavit. Universam vero summam reliquam ducentas videlicet libras, exceptis novem libris et quinque solidis, quae a praedicto fratre solvi de-

buerant abbati Sancti Bertini, juxta mandatum vestrum per fratrem ab ipso transmissum ad nos, per quemdam fidelem nostrum destinare curavimus. De caetero quid super hac portione reliqua quae solvenda superest fieri oporteat, vestra cum voluerit sanctitas providebit. Nos enim intra fines jussionis vestrae nostrum cohibentes officium, nec minus offerentem admittimus: nec solvere cessantem ulla coercionem ferimus. Valeat sanctitas vestra.

EPISTOLA CLXXIII.

AD EUNDEM.

Patri suo et domino summo pontifici A., frater G. Londoniensis Ecclesiae minister, seipsum et, si quid potest, obedientiae et humilitatis obsequium.

Ad vestram, Pater, audientiam jamdiu ob mandata Patris nostri domini Cantuariensis mihi gravamen non modicum inferentia appellavi, et audito legatorum vestrorum in Normanniam adventu, ipsis festinanter occurri, paratus in eorum praesentia appellationis ad vos factae causas ostendere, et eorum sententiae in omnibus humiliter obedire. Quibus in causa hac suas minime partes interponentibus ob evitanda pericula quae imminabant, ad vestram de novo sanctitatem appellare multa procul dubio necessitate compulsus sum. Quia vero ad iter hoc arripendum ad vos me in Angliam remeare et itineri necessaria providere ipsa propositi necessitas exigebat, non occasione dilationis quaerenda sed legitima provisionis intuitu appellationi terminum in diem transitus beati Martini constitui. Unde si pietatis oculos bonitas in me divina reduxerit et iter ad vos pervium mihi clementer indulerit, statuto die vita, comite Dominoque juvante, sanctitati vestrae obstabo, quae mihi obijciuntur auditurus, vestraeque per omnia sententiae vel consilio devotissime pariturus. Testis est mihi enim inspector Deus, me in his omnibus quae apud nos acta sunt nec adulationi, nec elationi, nec ambitioni vel in modico deservisse, sed vestrae sanctaeque Romanae Ecclesiae fidelitati et totius Anglicanae Ecclesiae utilitati juxta modicum quod sum et sapienter fideliter prospexisse. Hinc enim Patrem habens hinc dominum, inter duos gladios positus, hinc in materialem timens impingere, hinc spiritualem formidans, sola vestri nominis protectus auctoritate vix haereo, et finem, quem his cladibus Dominus daturus est, multo jam ante tadio affectus exspecto. Affectioni itaque qua filiis suis et compati et condescendere pietas apostolica consuevit, devotissime supplico ne appellationem ad vos honesta causa et justissima interposita irritam habeatis, ne caput meum quod injusto odio Pater meus dominus Cantuariensis dire persequitur, ei penitus exponatis: sed causam quam praestringimus, ut postulat aequitas ipse vel audiat, vel si hoc difficultas non permittat itineris, legatis vestris qui penes vos sunt cognoscendam et terminandam committatis. Quaedam nuntio meo sanctitati vestrae secretius intimanda commisi, quibus si misericorditer praeberis assensum, ad nutum vestrum . . . hoc condigne

remunerabit obsequium. Valere vos opto in Domino, A
Pater in Christo charissime.

EPISTOLA CLXXIV.

AD EUMDEM.

Patri suo et domino summo pontifici A., frater
G. Londoniensis Ecclesiæ minister, debitum sinceræ
charitatis et humilis obedientiæ famulatum.

Mandatum vestrum, Pater in Christo charissime,
debita veneratione suscipientes, illico filium ve-
strum, dominumque nostrum charissimum, illustrem
regem Anglorum, etsi in ipsis jam Walliæ finibus
agentem exercitum adimus, et adjuncto nobis ve-
nerabili fratre nostro Roberto Herefordiensi epi-
scopo, juxta vestri formam mandati diligenter et
intente convenimus. Cui singula quæ vestris litteris
sunt nobis expressa, ante oculos ponentes, ipsum
obsecrando, et quantum regiam decebat majestatem,
arguendo, constanter et iustanter hortati sumus, ut
de propositis sibi satisfaceret, et si a rationis tra-
mite deviaverat, ad viam veritatis et justitiæ redire
vestra per nos revocatus admonitione non tardaret :
a Patre pie communitus a pravis actibus omnino
desisteret, et Dominum puro corde diligeret, et
matrem suam sanctam Romanam Ecclesiam solita
veneratione respiceret, nec eam visitare volentes
inhiberet, appellationes ad eam factas non impedi-
ret, et Patrem nostrum dominum Cantuariensem
benigne revocans et reducens, in beati Petri ac
vestra reverentia firmus immobilisque persisteret,
et pietatis intendens operibus Ecclesias et eccle-
siasticas personas, tam regni quam terræ suæ, nec
gravaret per se, nec per alium gravari permetteret,
sed ipsas diligens regia protectione conservaret, ut
ille, per quem reges regnant, temporale sibi regnum
conservaret in terris, et æternum largiretur in cœ-
lis. Alioquin nisi monitis salutaribus acquiesce-
ret, sanctitas vestra, quæ huc usque patienter susti-
nuit, ulterius in patientia sustinere non posset. Ad
hæc adjecimus timendum sibi fore, ne si errata non
corrigeret, iram cito omnipotentis Dei incurreret,
ut nec regnum ejus diu stare, nec suos prosperari
permitteret, sed qui humilem exaltaverat, jamjam
exaltatum ab ipso regni culmine durius allidendo
deiceret.

Ipse vero correptionem vestram multa gratiarum D
actione suscipiens, multa animi temperantia, mul-
taque modestia consequenter respondit ad singula.
In primis asserens mentem suam a vobis nullatenus
se avertisse, nec id unquam propositi mente conce-
pisse. Quin dum paternam sibi gratiam exhibue-
ritis, vos ut Patrem diligit, et sanctam Romanam
Ecclesiam ut matrem veneretur et foveat, et sacris
jussionibus vestris, salva sibi sua regni sui dig-
nitate, humiliter obtemperet et obediat. Quod si
vos jam aliquandiu solita reverentia non respexit
hanc hujus rei causam asserit, quod cum vobis in
necessitate toto corde, tota mente, totis viribus
astiterit, sibi postmodum per nuntios in necessitate
recurrenti ad vos digne pro meritis sanctitas vestra

non respondit, sed in omn. fere petitione sua se
repulsam sustinuisse conqueritur et erubescit. De
paterna tamen confusus gratia, quæ filium cum volet
exandiet, vultus sperans et expectans lætiores, in
beati Petri ac vestra, ut dictum est, fidelitate immo-
bili constantia perseverat. Inde est quod sanctitatem
vestram visitare volentem, nullum prorsus impe-
diat, sed nec hactenus, ut asserit, impedivit.

In appellationibus ex antiqua regni sui constitu-
tione id sibi vindicat honoris et oneris, ut ob ei-
vilem causam nullus clericorum regni sui ejusdem
regnifines exeat, nisi an ipsius auctoritate et man-
dato jus suum obtinere queat, prius experiendo
cognoscat. Quod si nec sic obtinuerit, ad excellen-
tiam vestram, ipso in nullo reclamante, cum volet
quilibet appellabit. In quo si juri vel honori vestro
præjudicatur in aliquo, id se totius Ecclesiæ regni
sui consilio correcturum in proximo, juvante Do-
mino, pollicetur.

Imperatorem illum, etsi schismaticum noverit, a
vobis tamen excommunicatum esse usque hodie non
rescivit. Quod si denuntiatione vestra rescierit, si
fœdus illicitum cum ipso aut alio quolibet inivit, et
hoc Ecclesiæ regni sui judicio simul et consilio se
correcturum promittit.

Patrem nostrum dominum Cantuariensem suo se
regno nequaquam expulisse asserit. Unde, sicut
abscessit ultroneus, sic ad Ecclesiam suam, cum
sibi sederit animo, plena pace reverti, sibi libitum
erit : dum tamen in satisfaciendo sibi super his,
unde conqueritur, regias sibi, et in quas ipse jura-
tus est, velit dignitates integre conservari.

Si qua vero Ecclesia vel ecclesiastica persona ab
ipso vel a suis se gravatam ostenderit, satisfactioni
plenæ totius Ecclesiæ judicio paratus erit.

Hæc a domino nostro rege in responsis accepimus,
qui utinam ad omnem voluntatem vestram uberius
aliquid accepissemus. Eadem vero sublimitati vestræ
notificanda duximus, ut ex ipsius responsis advertat
vestra discretio, quo negotium hoc fine concludat.
Causam namque suam dominus rex plurimum sibi
justificare videtur, cum in omnibus quæ dicta sunt,
Ecclesiæ regni sui consilio simul et judicio se pari-
turum, et Patris nostri domini Cantuariensis redi-
tum, juxta quod dictum est, se nullatenus impedi-
turum pollicetur. Unde vestræ supplicandum æsti-
mavimus excellentiæ, quatenus illud præ oculis
habentes : *Calamum quassatum non conteret, et
linum fumigans non extinguet (Isa. XLII),* zelum
illum sanctum, quid ad ulciscendam omnem, quæ
Ecclesiæ Dei irrogatur, injuriam laudabiliter igne
divini Spiritus accensus est, si placet, ad tempus
intra fines modestiæ cohibeatis, ne vel interdicti
sententiam, vel ultimum illud præcisionis elogium
proferendo, ecclesias universas subverti misere do-
leatis, et tam regem ipsum quem innumeros cum
eo populos a vestra, quod absit ! obedientia irre-
vocabiliter avertatis. Bonum est membrum capiti
coherere vel saucium, quam a corpore sequestrari

jam præcitur. Redeunt ad sanitatem saucia, sed corpori vix coalescunt jam præcisa. Adducit desperationem præcisio, restituit sanitatem sepe medicantis operatio. Quid enim si sermo vester nondum plene capit aut capitur? Nunquid divina desperanda est gratia, quin cito, cum volet, et capiat et capiatur? Nunquid abbreviata est manus Domini, ut salvare nequeat, aut auris ejus aggravata, ut non exaudiat? (Isa. LIX.) Currens ille sermo Domini velociter (Psal. CXLVII), statim cum vult, immutat omnia, et sanctorum precibus dat inasperata. Sanguis regius tum se demum permittit vinci, cum vicerit; nec verecundatur cedere, cum superaverit. Mansuetudine tolerandus est, monitis et patientia superandus. Quid enim si jacturam quamdam temporalium invehit exhibita in tempus patientia? Non enim est dubium severitati detrahendum fore, cum strages imminet populorum: et cum tempestas ingruit, in mare debere tota profici, ut ad portum valeat navis salva perduc.

Inspicienter, attamen in charitate non ficta sic loquimur, si sic rei finis exstiterit, ut amissis suis dominus Cantuariensis exsilium jure sustineat, et vestris, quod absit! mandatis ulterius Anglia non obediat, fuisse satius patienter in tempus sustinuisse, quam tanto zelo severitati deservisse? Quid? Etiam si plures e nobis ab obedientia vestra persecutio separare non poterit, non deerit tamen, qui genua curvet ante Baal, et de manu idoli pallium Cantuariæ non habito religionis aut justitiæ delectu suscipiat. Ne deerunt qui sedes nostras occupantes, et cathedras insidentes, ipsi tota devotione mentis obediant. Jam multi præinascantur ad talia, optantes ut veniant scandala, et directa ponantur in prava. Unde non propria, Pater, plangimus aut ploramus incommoda, sed nisi in his malis occurreritis, scdam Ecclesiæ Dei subversionem imminere cernentes pertimescimus, ne citius ob vitæ tedium optemus peritisse diem, qua ad hujusmodi spectacula nati sumus.

De cætero arper censu beati Petri nemo nobis in regno vel de modico respondisset, nisi dominus rex mandatum super hoc in commune dedisset. Ejus vero mandato, statuto antiquius termino colligetur, et sanctitati vestræ per manum nostram, juvante Domino, transmittetur.

EPISTOLA CLXXV.

AD EUMDEM.

ALEXANDRO PAPÆ, GILBERTUS Londoniensis episcopus, humilem ad omnia in quo mea valet parvitas obedientiam.

Severitate, domine, Patris nostri domini Cantuariensis archiepiscopi ex quibusdam auditis et agnitis recte suspectam habens, ne indebitæ poenæ nexibus me arctaret et laqueis, ad vestram circa initium Quadragesimæ appellavi clementiam, et appellationi diem, octavas purificationis beatæ Mariæ constitui, ut iram, qua me injuste persequitur, vestra

declinarem protectione, et nexus, quibus immeritum parabat involvere, usque ad diem cognitioni causæ in præsentia vestra constitutum, objectu vestri nominis aliquatenus evitarem. Unde, dilecte mihi in Domino Pater, sanctitati vestræ toto prostratus spiritu supplico, ne indultum oppressis omnibus commune remedium mihi, si placet, subtrahatis. Ne me tanquam reprobum a vestri protectione tutaminis abjiciatis. Sed facta ad vos appellatione suscepta, si qua præter modum est in me lata sententia, ipsam, ut justum est, aut habeatis irritam, aut tenentis suspensionem, ut in die qua, juvante Domino, sublimitati vestræ paratus sum assistere, juxta quod merui statutis in me, et vel convictum abjiciatis, vel innocentem, si sic visum fuerit, absolvatis. Nam culpa mea, si qua est, hæc utique est, quod mandatorum pondere, quæ utique aut declinare necesse mihi fuerat, aut cum defectu et omni miseria suscipere, me gravatum sentiens, ad apostolicam ausus sum audientiam appellare, ut vestro me per omnia consilio committerem, et consultis vobis aut a regno discederem, aut alleviato mandatorum onere in commissis mihi Ecclesiis residerem. Nam, ut brevi complectar quod verum est, dum inter dominum regem et dominum Cantuariensem res in hunc modum vertitur, impossibile est me, aut alium regni ipsius episcopum unius mandatum suscipere, et alterius iram importabilem declinare. Agat itaque, si placet, paterna pietas, ut si in me, nec confessum, nec convictum, nec citatum, nec illo modo conventum, post interpositam etiam appellationem ad sublimitatem vestram, ulla est præpropere vel præpostere lata sententia, hanc viribus, ut justum est, evacuetis. Et si vestram ex sanctitate remittatis, injuriam saltem beati Petri, et sanctæ sedis ejus ad animum revocetis, et me ad omne, quod jusseritis, obsequium utique promptissimum invenietis. Conservet vos incolumem in longa tempora Dominus, in Christo dilectissime Pater.

EPISTOLA CLXXVI.

AD WILLELMUM PAPIENSEM CARDINALEM.

Venerabili domino et amico W. Papiensi sanctæ Romanæ Ecclesiæ cardinali sibi charissimo, frater G. Londoniensis Ecclesiæ minister, salutem et debiti munus obsequii.

Verborum facile suadet paucitas, cum ad exaudiendum prona est ipsius, ad quem scribitur amica benignitas. Quod quia de vestra sinceritate confidimus, paucis negotium, in quo nobis a benevolentia vestra subveniri petimus, aperimus. Mandatum domini papæ suscepimus, quatenus Hugonem comitem de Norfolkia districte conveniremus, et nisi canonicis de Panteneia villam ipsam de Panteneia, et cætera quæ sibi ablata queruntur, admonitus restitueret, ipsum, et totam terram suam interdicto subjiceremus, et nisi vel sic infra quadraginta dies resipisceret, eum excommunicationis innotare sententia non differremus. In hoc vero nobis regia se graviter

opponit auctoritas, asserens ad summam regni sui A spectare dignitatem, ut dum cuique adversus comitem vel baronem suum super terris aut feudis querelam habent, plenam paratus fuerit exhibere justitiam, ipsum nec archiepiscopus, nec aliquis regni sui episcopus aut interdicto preuat, aut excommunicationi subijciat. Hanc prædecessores suos assensu Romanorum pontificum usque nunc obtinuisse affirmat, et nos omnes regni sui episcopos id sibi iuramento firmasse commemorat, exigens ut antiquitati stemus, et regni sui privilegia nequaquam sibi minuentes, ab his quæ sibi a nobis sub iuris iurandi religione sunt promissa, non recedamus. Unde gravi nobis interminatione interdicitur, quod auctoritate præcipitur. Sic nobis in arcto res est, ut nisi suum temperet apostolica mansuetudo mandatum, subire nobis necesse sit, aut hinc inobedientiæ, quod absit! periculum, aut apud domipum regem perjurii et non observatæ fidelitatis opprobrium. Mallet episcopus non fuisse, quam horum alterutrum incurrisse. Gladius uterque gravis est, quorum unus animam, alter corpus occidit. Ille quidem gravior, attamen iste gravior. Et domino meo charissimo domino papæ, quæ utilitas futura est in sanguine meo (*Psal. xxi*), si descendendo in correptionem hanc, aut perjurus ropter, aut inobediens, quod semper absit! existam? Si domino meo non parvero, mors mihi est; et si parvero, solum superest, ut emigrem a regno, cuius leges non suscipio, a cuius regis fidelitate recedo. Si causa quidem esset ejusmodi pro qua dignum foret poenam subire mortis aut exsilii, gauderem utique in proscriptione mea vel morte, obsequium me domino gratum exhibere. Sed nunquid sex fratrum in Panteneia miserrime et absque omni et regulæ et ordinis observatione victitantium causa tanti est, ut ob his restituenda pauca agri jugera, inter summum pontificem et sibi quondam amicum, et adhuc, dante Deo, futurum amicissimum dominum nostrum regem Angliæ quæstionem oporteat super suarum eminentia dignitatum agitari? Præsertim cum in expedito sit in causa hac Jus suum unicuique reddere, et quæ turbata sunt ad pacem et debitum justitiæ finem pacifice revocare? Si domino regi permissum fuerit, causam hanc episcoporum et aliorum virorum prudentium consiliis illico terminabit. Si causam dominus papa iudicibus delegaverit, ipsorum stare sententiæ comes Hugo non recusabit. Ipsum quippe districte convenimus, intendendo sibi sententiam domini papæ litteris designatam. Quas cum audisset, precum statim arguit falsitatem, asserens se Pantenelam jam dictis canonicis nunquam concessisse, nec scriptum quod super hoc ejus nomine præferunt et ostendunt, ipsis tradidisse, aut ut confiteretur, assensum præbuisse. Unde cum falsi arguerent instrumentum quo nituntur, attendat prudentia vestra, si adeo in expedito res est, ut convictione non egeat, nec in iudicium deduci debeat, cum etsi non causæ convictio sed executio sententiæ mandetur, de precum tamen veritate inquiri oporteat.

EPISTOLA CLXXVII.

AD EUNDEM.

Venerabili domino et amico charissimo WILLELMO Papiensi sacrosanctæ Romanæ Ecclesiæ cardinali presbytero, frater G. Londoniensis Ecclesiæ minister, salutem quæ nunc est, et quam speramus a Domino.

Nostis, domine, quod et orbi satis innotuit, quid animadversionis jamdiu, quid pænæ quoque id modo pertulerim, qui priusquam mihi culpæ modus innotesceret, enormitates pænæ gravioris excepi. Ad unius quidem ut audio Wallensis vocem, licet præclaræ dignitatis honore non fulgeat, non citatus, non commonitus, nec notorii quidem criminis reprehensioni obnoxius condemnationis sinistram reportavi calculum, et a sacerdote nec inspecta lepra mea, nec cognita, extra tamen Ecclesiæ castra projectus sum. Sed quia nec in cælum os ponere fas est, et majorum acta discutere sacrilegii constat instar obtinere, ad medentis opem tutius est confugere, quam in querelæ vocem impudenter erumpere. Assueti vero moris est, cum quem sua lædit conditio, ut ad eum recurrat potius, cuius promptiorem sibi fore gratiam arbitratur afflictus. Confidens itaque de vestræ dilectionis excellentia, cuius sinceritatem et fidem rerum certior edocuit experientia, instante necessitatis articulo, a vobis opem postulo, ut prælibato mihi per vos gratia vestro ad profectum studio deducatur, et quod ad mei executionem officii mihi deesse cognoscitis, vestra mihi sollicitudine, juvante Domino, restituatur. Dat postulandi fiduciam, quod manum mihi jam gratiæ porrexistis, et onus quo premebar anxie, piæ precis instantia submovistis, et exemptus a confusionis ignominia, ut intra castra collocer Ecclesiæ, prudenter obtinuistis. Unde vobis ad gratiarum actiones eo magis devotus obligor, quod propriæ voluntatis instinctu absentis amici negotia commodissime procurastis. Movit vos in hunc pietatis affectum lunata bonitas, nullisque meis meritis præventa gratia, sed quod non merui, mereri desidero, et non meruisse pœnitet, nimisque sero voluisse, quod primis attentatum fuisse stultis oportuisset. Agat itaque si placet et peragat id gratia quod suum est, et quem mereri jam cœpit totum D sibi reddat obnoxium, et restitutum me mihi, tam sibi quam suis in solidum de cætero pleno jure possideat. Valere vos optamus in Domino.

EPISTOLA CLXXVIII.

AD EUNDEM PRO WINTONIENSI ELECTO.

Domino WILLELMO Papiensi, pro Wintoniensi electo, seipsum, et si quid potest, devotæ mentis obsequium. Suadet e facili verborum paucitas, cum ad exaudiendum prona est ipsius ad quem scribitur, amica benignitas. Unde quia de vestra in nos benevolentia non nostris quidem meritis, sed vestra solum gratia nobis clementer indulta et potenter exhibitâ plene confidimus, sublimitati vestræ preces affectuose porrigimus, quatenus negotium amici nostri et cognati charissimi, domini Wintoniensis

electi, sustinendo foveatis, et quia vos et consilio A magnam et interventu strenuum non ambigimus, ut ejus maturetur consecratio, data vobis a Domino sapientia et industria procuretis. A sapiente dispensatio solet admitti. Postulat Ecclesie multiplicata necessitas sibi tandem subveniri. Sacramenta si prosunt, si in his animarum salus ulla consiuit, detrimentum tamen est non modicum et periculum, tot populis ea subtrahere, tot ea requirentibus ob pontificum penuriam, vel sero vel nullatenus administrari. Wintoniensis Ecclesia sub veste lugubri et habitu viduali tria jam fere lustra percurrit, episcopalem benedictionem, absolutionem, manus impositionem, clericorum in ordine promotionem, chrismatis apud se innovationem, ecclesiarum consecrationem, et cetera vitæ spirituali necessaria, his diu carendo jam fere dedidit. Silet verbum Dei, medium tenent cuncta silentium, et multis modis, quos enumerare longum est, lucra depereunt animarum. His ope vestra periculis subveniri deposcimus, ut electo Wintoniensi consecrato per vos, in Domino cum ipsa ejus Ecclesia gaudeamus, et exhibitum nobis honorem et beneficium alta semper in posterum memoria teneamus. Valere vos optamus in Domino.

EPISTOLA CLXXIX.

AD JOANNEM NEAPOLITANUM CARDINALEM.

Venerabili domino fratrique charissimo JOANNI Neapolitano, sacrosanctæ Romanæ Ecclesie cardinali presbytero, frater G. Londoniensis Ecclesie minister, votivis cum salute frui successibus.

In officiis gratius impensa suscipimus, quæ non extorsit necessitas, sed sola gratiæ sincerioris procuravit affectio. Approbati quidem moris est, ut his arctius teneamur obnoxii, qui meram exercentes liberalitatem, ultronea in nos conferunt beneficia, quam quos ad id ipsum præcedentis meriti provocavit administratio. Unde nos obsequio vestro id fortius obligat, quod prævenistis nos in benedictionibus et certis rerum experimentis fructum vestræ dilectionis ante sensimus, quam affectionis vicariæ vobis innotesceret argumentum. Quod impendistis est gratuitum, quod diligendo rependimus dispar habet meritum. Illius favorem simplex augeat liberalitas, hujus remissionem gratiam præventa facit meritis et beneficiis excita voluntas. Hæc nos omnia ad uberores invitant gratiarum actiones, quas ut vota gerimus, utinam opere compleamus, personam siquidem nostram et facultates vobis offerimus, cum Deus opportunitatem dederit effectum verba probaturi. Super sollicitudine vestra negotiis nostris exhibita et honore clericis nostris impenso, pro gratiarum actione nos vobis et ipsos devovimus, supplicantes attentius, ut quod ex parte prospere gestum est, ad perfectum vestræ discretionis industria pertrahatur. Juxta vestri vero formam consilii, iter ad vos arripere tentassemus, nisi pacis inter dominum papam et regem spes jam uberior

appareret, et certiora devotionis ejus argumenta clarescerent. Præterea et id duximus metuendum, ne legati nostri discessum nostrum in eorum contemptum et injuriam fieri aliquatenus æstimarent, et in causæ nostræ desperationem fugam interpretarentur. Unde nostris visum est non expedire ut, eis inconsultis, aliquo divertamus, cum propter nos, ut dicitur, eos a latere suo dominus papa transmisserit. Terret nos quoque difficultas itineris, et quæ peregrinantibus imminent pericula nos in re ista plurimum vacillare compellunt. Conceptum tamen desiderium curam omnem timoris excluderet, si laborem hunc quoquomodo mei corporis imbecillitas infirmitas sustinere sufficeret. Nil enim est quod optem amplius, quod desiderantius affectem, quam domino papæ præsens assistere ipsoque et curia sancta præsentem mihi detrahentes, et falsa suggerentes adversum me, in ejus qui veritas est virtute refellere. Quod effectui mancipare crebro sperantes, semper tamen necessitatis alicujus objectu substitimus, nunc vero senectuti sociata compellit infirmitas, ut licet optemus judicem, ipsi tamen assistere necessitate multiplice desperemus. Unde vestram instantius exoramus sollicitudinem, ut ope vestra et opera plenam nobis gratiam dominus papa imperpetui, et prælibatum beneficium ad perfectum nobis apostolica tandem mansuetudine simul et miseratione perducat. Nuntio vero nostro quadam vobis intimanda commisimus, quem precor attentius audiat, et fidem his quæ proposuerit habeatis. Valere vos in Domino optamus charissime.

EPISTOLA CLXXX.

AD J. CARDINALEM DIACONUM.

Venerabili domino et amico charissimo J., sanctæ Romanæ Ecclesie cardinali diacono, frater G. Londoniensis Ecclesie minister, affectum pium, et si quem potest charitas officiosa famulatum.

Amantium se mutuo sibi corda loquuntur, et affectione quadam insolubili mentes amicorum, etsi locali distent spatio, potenter tamen intus operante virtute, firmæ sibi connexæ sunt. Præsentem enim exhibet amor sibi, quem diligit, et unicum sibi quod amodo charitas abesse non sinit. Hinc est quod non obstantibus locis, ut præsentem sibi in necessitate subveniunt, et Christi legem adimplendo, sua vicissim opera sustinere non omittunt. Hac suggerente charitate, charissime, et de vestra nobis benevolentia plurimum suadente, dilectæ nobis in Domino preces sublimitati vestræ porrigimus, quatenus præsentium latoris et fratrum ejus, monachorum de Waledene causam diligenter attendatis et ipsis amore Dei nostraque prece, prout eorum expedire videritis necessitati, provideatis. Quanta enim opprimantur injustitia, ex litteris dilecti fratris nostri domini Exoniensis intelligitis, et juxta datam a Domino vobis sapientiam oppressis pie subveniendo, remuneratorem ut speramus Dominum, et nos gratiæ et servitii debitores habebitis. Valete.

EPISTOLA CLXXXI.

AD UNIVERSOS S. MAT. ECCLESIAE FILIOS.

Dilectis sibi in Domino universis sanctæ matris Ecclesiæ filiis, ad quos litteræ istæ pervenerint, frater G. Londoniensis Ecclesiæ minister, salutem in Christo.

Per apostolica scripta in mandatis accepimus, quatenus abbate de Grestene, et latore præsentium Joanne, in nostra convocatis præsentia, quidquid Joanni post appellationem ad sedem apostolicam adversus abbatem factam, per ipsum videlicet abbatem, sive per snos, ablatum aut subtractum comperiremus, sibi omni occasione et excusatione postposita, omnique remedio appellationis sublato cum integritate restitui, et eidem de damnis et injuriis illatis congruam taceremus satisfactionem exhiberi. Restitutione autem facta et satisfactione exhibita causam quæ inter eos super capella de Cherlechestone vertebatur, cessante nihilominus appellatione decideremus. Quam nos quidem formam sequentes, quia de appellatione Joannis, utpote coram nobis publice facta, plenam habebamus certamque notitiam, de illata sibi postmodum a monachis de Grestene violentia, de ejectione ejus a domo sua, de damnis per invasionem datis, per legitimam idoneorum testium assertionem, fide veri diligenter et districte inquisita, ecclesiam ipsam de Ferles, cum omni integritate et pertinentiis suis omnibus, memorato Joanni restitui debere, de fratrium consilio et motu animi nostri, apostolica in hoc freti auctoritate pronuntiavimus, et de illatis sibi damnis sub nostra taxatione juratis, abbatem illi in summam decem et octo marcarum argenti condemnavimus. De cætero, in causa quam sæpe dictus Joannes super capella de Cherlechestone diutius intentarat adversus Henricum presbyterum et memoratum abbatem de Grestene, quem sibi idem Henricus in causa illa laudaverat auctorem, juxta continentiam rescripti, hoc tenore processum est. Petebat siquidem Joannes capellam illam nomine matris ecclesiæ suæ de Ferles, sibi restitui, utpote intra parochiales ejusdem ut dicebat terminos ecclesiæ fundatam, et ab ipsa sui fundatione filiali sibi subjectione obnoxiam.

Allegabat ad hæc, quod cum personatum et investituram matris ecclesiæ de Ferles per manum Cicestrensis episcopi, præsentatione abbatis de Grestene, sicut idem episcopus tam viva voce quam scripto nobis insinuavit, olim reciperet, ipsam quoque capellam una cum majore ecclesia habendam recepit, eamque tandiu plene et pacifice possedit, donec mota sibi ab Henrico controversia, monachus quidam de Grestene, qui tunc in Anglia vices agebat abbatis, inita cum Henrico transactione, capellam illi cedere, eamque ipso reclamante, et auctoritate domini papæ ne id fieret inhibente, contra justitiam et juri ordinem alienare præsumpsit. Abbas vero quem sibi Henricus acciverat, capellam illam ad matricem quidem ecclesiam de Ferles pertinere,

A Joannemque ipsam diutius possedisse, publice et in jure confessus est. Hoc tamen illi in præjudicium petitionis suæ, in modum exceptionis objecit, quod transactioni cum Henrico habitæ interfuit, eamque suo assensu comprobavit. Cum autem super hoc articulo controversia plurimum verteretur, abbate tandem in probatione adhibiti consensus penitus deficiente, testes factæ reclamationis, quos Joannes perduxit, diligenter examinatos et concordatos inventos, utpote fide dignos admisimus, sicque ex eorum assertionem et confessionem partis adversæ, sæpe dicto Joanni præfate capellæ plenam restitutionem adjudicavimus, æstimatisque damnis medii temporis, et sub nostra taxatione probatis, Henricum illi in summam duodecim marcarum argenti per sententiam condemnavimus. Quæ quia de commissione domini papæ nostro sunt officio celebrata, ne in dubium de cætero, aut in irritum queat revocari, universitati vestræ notificare, et ea qua fungimur auctoritate confirmare curavimus. His testibus, H. decano Sancti Pauli, Nicolao archidivcono Londoniensi, magistro W.

EPISTOLA CLXXXII.

AD EOSDEM.

G. Dei gratia Londoniensis episcopus, dilectis sibi in Domino universis sanctæ matris Ecclesiæ filiis, ad quos litteræ istæ pervenerint, salutem in Christo.

Noverit dilectio vestra, latorem præsentium H. divina benedictione, et nostræ manus impositione, ad sacerdotii gradum esse promotum. Quod quia in dubium nolumus posse revocari, præsentis scripto universitati vestræ id notificare curavimus, vestram orantes et exhortantes in Domino dilectionem, quatenus pro amore Dei et reverentia ordinis sui, ipsum in executione officii sui benigne recipiatis, et debitum illi honorem propter Deum exhibeatis. Valete.

EPISTOLA CLXXXIII.

AD EOSDEM.

Dilectis sibi in Domino universis sanctæ matris Ecclesiæ filiis, frater G. Londoniensis Ecclesiæ minister, salutem, gratiam et benedictionem.

D Quæ donantur Domino, charissimi, donanti nequaquam perunt, sed ei a quo donata sunt, in perpetuum utique reservantur. Inde est quod charitatem vestram commonemus in Domino, quatenus latore præsentium R., qui ob amorem Dei et salutem animæ suæ ad reficiendum pontem de Londonia operam præbet, de facultatibus vestris, pront vobis Dominus inspiraverit, aliquod auxilium conferatis, ut a Deo ob ipsum collata die illa in centuplum recipiatis. Omnibus autem qui ei ad prædictum opus perficiendum aliquod beneficium præstiterint, orationum et beneficiorum ecclesiæ nostræ partem concedimus, et insuper de Domini confisi misericordia, confessis de poenitentia sua viginti dies relaxamus. Valete.

EPISTOLA CLXXIV

AD EOSDEM.

G. Dei gratia Londoniensis episcopus, dilectis sibi in Domino universis sanctæ matris Ecclesiæ filiis, ad quos litteræ istæ pervenerint, salutem in Christo.

Cum venerabilis frater noster Robertus abbas de [lb]reio, et Herlewinus clericus de Dochinge pro causa, quæ inter eos super decimis de Dochinge vertebatur, in præsentis domini Wintoniensis et nostra, quibus ex mandato domini papæ, ejusdem causæ cognitio delegata fuit, ambo pariter essent constituti, nos ex allegationibus et rationibus memorati abbatis liquido cognoscentes [prædictas decimas] ad jus ecclesiæ suæ de Dochinge pertinere, easdem abbati, et per eum ecclesiæ suæ, de motu animi nostri et de communi fratrum nostrorum consilio, in perpetuum adjudicavimus, ipsumque et ecclesiam suam a petitione Herlewini, qui easdem vindicans declinationes in probatione penitus defecit, per sententiam absolvimus. Quod quia in dubium nolumus aut in irritum de cætero posse revocari, præsentî scripto universitatî vestræ id notificare, et ea qua fungimur auctoritatē confirmare curavimus.

EPISTOLA CLXXXV.

AD EOSDEM.

GILBERTUS Dei gratia Londoniensis episcopus, omnibus sanctæ matris Ecclesiæ filiis, salutem.

Universitatî vestræ notum esse volumus, quod Calfridus filius Baldewini, et mater ejus Beatrix de Bollers, ut ex chartis ipsorum perspeximus, et ex eorumdem viva voce probavimus, concesserunt et dederunt Dei et fratribus hospitalis Jerusalem advocationem ecclesiæ de Herefelde, cum omnibus pertinentiis suis in perpetuum elemosynam, nobisque præsentaverunt fratrem Ricardum Turcum, in Anglia priorem, ut per eum de personatu præfatæ ecclesiæ prædictum hospitale quantum ad jus episcopale pertinet, investiremus. Cum igitur in eis quæ necessariis pauperum usibus destinantur, promptum deceat et hilarem adesse consensum, nos ejusdem hospitalis religionem præsertim et necessitatem attendentes, dictam concessionem grate suscepimus, facileque probavimus, et cum R. presbyter tunc temporis ejusdem ecclesiæ persona, liberam eam in manus nostras sponte refuisset, mox Ricardo priori tradidimus, et per eum hospitali suo personatum ejusdem concessimus. Quod quia ratum et indubitabile deinceps manere volumus. (*Desunt quedam.*)

EPISTOLA CLXXXVI.

AD EOSDEM.

G. Dei gratia Londoniensis episcopus, dilectis sibi in Domino universis sanctæ matris Londoniensis Ecclesiæ filiis, salutem, gratiam et benedictionem.

Providendum nobis est, ne coram nobis decise controversiæ, iterum reviviscantur in litem. No-

A verit itaque dilectio vestra, causam quæ inter iragistrum Godefridum et Ernaldum patrum ejus super ecclesia de Castello diutius agitata est, hoc tandem fine conquisivisse. Ernaldus in jam dicta ecclesia nepotis sui jus recognoscens, illam in manu nostra per textum deposuit, quam nos Godefrido similiter per textum restituentes, ipsum in ea personam constituimus. Deinde petitione Godefridi, Ernaldum in eadem ecclesia vicarium suscepimus, hac interveniente pactione, ut Ernaldus jam dictam ecclesiam quandiu superstes fuerit, teneat sub annua pensione dimidiæ marcæ, Godefrido ab ipso, ipsius ecclesiæ nomine annualim solvende, ita ut medietas debite pensionis in media Quadragesimæ, altera vero medietas in festo sancti Michaelis solvatur. Quod quia plena utriusque partis consensu sub nostra gestum est præsentia, et juramenti religione utriusque firmatum, ne in dubium de cætero, vel in irritum possit revocari, præsentî scripto universitatî vestræ rerum gestarum seriem significare, et utriusque quod suum est, sigilli nostri auctoritate confirmare curavimus. His testibus Radulpho decano, Petro archidiacono, Waltero archidiacono, magistro Ranulpho, Henrico fratre comitis, Ivone thesaurario, Radulpho de Ledebria, magistro Calfrido de Cliforde, magistro Waltero de Ardep'. Rogero de Burkell', Rogero filio Mauricii, Radulpho scriptore.

EPISTOLA CLXXXVII.

AD EOSDEM.

G. Dei gratia Londoniensis episcopus, dilectis sibi in Domino fratribus universis sanctæ matris Ecclesiæ filiis, salutem, gratiam et benedictionem.

Lites amicabili fine sopitas, tunc demum plene constat extingui, cum pactiones ob pacem inter partes initæ et utrinque concessæ, eorum, quorum id de jure firmat auctoritas, excipiantur litteris, et sigillis roborantur appositis. Unde transactionem inter venerabilem fratrem nostrum R. Pic', archidiaconum et A. clericum super ecclesia de Mideltona, coram nobis initam et utrinque concessam, notitiæ communi præsentî scripto delegare curavimus, et redivivæ litis in posterum, occasionem inter eos omnem penitus amputemus. Alexander itaque qui ad possessionem ecclesiæ de Mideltona recuperandam auctoritate litterarum domini papæ possessorium intendebat, intentionem hanc coram nobis omittebat, ecclesiam ipsam de Mideltona, quæ ad præbendam venerabilis fratris nostri jam dicti archidiaconi quam in ecclesia Lincolnensi habere dignoscitur indubitate pertinet, ejus se de cætero nomine quindecim marcarum pensione ipsi archidiacono quandiu prænominatæ præbendæ canonicus extiterit, annualim solvenda et suscipere, et tenere consensit, in præsentia nostra tactis jurans Evangelis, se nunquam de cætero ipsi archidiacono, dum ejusdem erit præbendæ canonicus, super ipsam ecclesiam de Mideltona, litem aut fatigationem, aut inquietudinem omnino moturum et se

pactionem super memorata jam pensione ei et legitime ad fideliter observandum, jure tamen si quod ad petendam vel repetendam ipsam possidere desiderit, ipsum superesse contigerit. Quod quia in nostra et in capituli nostri presentia sic gestum est, nos cui a domino papa ejusdem causæ fuerat delegata cognitio, et ratum habuimus, et pagine presentis inscriptione et sigilli nostri attestatione roborare curavimus.

EPISTOLA CLXXXVIII.

AD EOSDEM.

Dilectis sibi in Domino, universis sanctæ matris Ecclesiæ filiis, frater G. Londoniensis Ecclesiæ minister, salutem, gratiam et benedictionem.

Quæ donantur Domino, charissimi, dona nequam pereunt, sed ei a quo donata sunt, in perpetuum utique reservantur. Inde est quod charitatem vestram commoneamus in Domino, quatenus latiori presentium R. qui ob amorem Dei et salutem animæ suæ, ad reficiendum pontem et calcedam de Stretforde operam præbet, de facultatibus vestris prout vobis Dominus inspiraverit, aliquod auxilium conferatis, ut a Deo ob ipsum collata die illa in centuplum recipiatis. Omnibus autem qui ei ad prædictum opus perficiendum aliquod beneficium præstiterint, orationum et beneficiorum ecclesiæ nostræ partem concedimus, et insuper de Domini confisi misericordia, confessis de penitentia sua, 20 dies relaxamus. Valet in Christo.

EPISTOLA CLXXXIX.

AD EOSDEM.

G. Dei gratia Londoniensis episcopus, dilectis sibi in Domino, universis sanctæ matris Ecclesiæ filiis, salutem in Domino.

Notum vestræ facimus charitati, latorem presentium R. a prædecessore nostro bonæ memoriæ R. Londoniensis quondam episcopo, ad gradum sacerdotii promotum, in ipso episcopatu diu ministrasse, et prout sacerdotali congruit officio, digne conversatum fuisse. Quem cum in partes externas trahat ad presens oborta necessitas, has sibi dimissorias ordinationis et honestatis suæ, datæ etiam sibi a nobis decedendi licentiæ testes concessimus; dilectæ nobis in Domino benevolentie vestræ preces affectuose porrigentes, quatenus ob divini reverentiam ordinis ipsum in quo locorum venerit inter vos in charitate suscipiatis, et honorem quem Domini ministris exhibere justum est, sibi misericorditer impendatis. Valere vos optamus in Domino.

EPISTOLA CXC.

AD EOSDEM.

G. Dei gratia Londoniensis episcopus, universis Ecclesiæ filiis, salutem, gratiam et benedictionem.

Quæ semel rite finita sunt, ne rediviva suscitentur in jurgia, propensiori cura prospicere convenit, in his præsertim quæ fidei firmat religio, ne illi citra usurpatione convellantur. Unde vestræ innocentiam universitati, T. clericum querelæ quam coram nobis adversus venerabilem fratrem nostrum

A Norwicensem episcopum super violentiam jam secundo instituere desinaverant, in capitulo Londoniæ nobis ad super eadem causâ cognoscendum residentibus, in multorum presentia renuntiassent, et se fide interposita id se in perpetuum observandum firmasse. Quod ut in posterum liquidum fiat, presentis scripti patrocinio et sigilli nostri appositione communimus. Valet.

EPISTOLA CXCI.

AD EOSDEM.

Dilectis sibi in Domino universis sanctæ matris Ecclesiæ filiis, frater G. Londoniensis Ecclesiæ minister, salutem, gratiam et benedictionem.

Controversias amicabili pactione sopitas, firmitatis tunc demum robor perpetuum accipere constat, cum eorum quorum hæc firmare potest auctoritas, et litteris consignantur et appositis muniuntur sigillis. Unde transactionem inter venerabilem fratrem nostrum [Walterum] Norwicensem episcopum, una cum ejusdem loci monachis, et Herbertum clericum de Marisco, super questione muri, et aliis querelis inter eos habitis, presentis scripto in lucem redigere curavimus, ut rediviva liis in posterum iniqua penitus auferatur occasio. Herbertus itaque nobis ad super eadem liæ cognoscendum, ex mandato domini papæ residentibus, productum in medium authenticum domini Norwicensis episcopi instrumento, tactis sacrosanctis Evangelii juravit, se omnia quæ concepta fuerant in instrumento, bona fide etiam inviolabiliter observaturum, seque omnibus querelis inter eum et prædictas personas hætenus habitis renuntiare, viva voce proposuit. Nos itaque, id exigente juris ordine, tam dominum episcopum quam monachos a jam dicti H. petitione penitus absolvimus. His testibus....

EPISTOLA CXCI.

AD EOSDEM.

Dilectis sibi in Domino, universis sanctæ matris Ecclesiæ filiis, frater G. Londoniensis Ecclesiæ minister, salutem, gratiam et benedictionem.

Quæ sententiali finita sunt calculo, aut amicabili sopita pactione, ne iterum rediviva suscitentur in jurgia, nos pacis amatores decet attentius providere. Eapropter, controversia super ecclesia de Hattona inter R. de Warewic, et W. clericum diu agitata, et ad de ea cognoscendum apostolica auctoritate nobis delegata, quæ tandem sine quieverit, utriusque partis mutuo in id concurrente voto, scripto commendare dignum duximus. R. itaque ecclesiam de Hattona quam prius petierat, tenere debet quandiu vixerit, solvendo prætaxato W. marcam argenti annuam infra oclavas sancti Michaelis, prænominate ecclesiæ jure integro utrolibet eorum decedente, superstili reservato. Hanc pactionem uterque se bona fide observaturum, interposita sacramenti religione promisit. Hoc autem tam solemniter actum, ut firmitatem in posterum obtineat, presentis scripti testificatione confirmamus, et sigilli nostri appositione communimus. His testibus....

EPISTOLA CXIII.

AD THOMAM CANTUARIENSEM ARCHIEPISCOPUM.

Patri suo et domino T. Cantuariensi, Dei gratia, archiepiscopo, frater G. Londoniensis Ecclesie minister, apto rationis moderamine semper sibi credita dispensare.

Docet nos magister bonus petere, docet et querere, et ut aperiatur nobis docet ad ostium cordis ejus cui supplicatur, non opportune solum, sed importune pulsare (Apoc. iii). Hoc auctore petimus et pulsamus, quatenus apud excellentiam vestram nobis, si placet, ad gratiam pandatur aditus, et ad id quod justum est non negetur accessus. Clamat post nos clericus Beati Pauli Hubertus, asserens iustam adversus Baldricum clericum sibi competere exceptionem, ut ad solvendum viginti quæ ab eo posulat Baldricus, ipse de jure compelli non debeat. Unde sibi audientiam præberi supplicat, ut Baldricum ab intentione hac, sacra legum et canonum auctoritate repellat. Quod quia juri consentaneum credimus, preces precibus anteverentes supplicamus, quatenus in re ista quod æquum est decernatis, et in clericum Beati Pauli non imperium ad præsens in ligando, sed æquitatem potius in judicando exerceatis. Cum enim illi se offerat ut impetentis se intentionem potenter elidat, vel si circa hoc defecerit, non id solum quod petitur, sed in expensis etiam, si justum fuerit, condemnationem subeat, sibi diem statui, ipsumque in hac audiri oportere quis ignorat? Nam quod objicitur, acta agi non debere, et esse varii et inconstantis hominis contra sua pacta venire, quæ etiam sententia vel amicabili conventiones finita sunt, in litem revocanda non esse, quale quidem sit, vestra plene novit auctoritas. Non enim quod actum est illud agitur, sed ex transactione viginti de novo petens exceptione repellitur, ex cujus probatione nova in illum lis inchoatur. Quid enim? si debitum hoc vel jam solvit Hubertus, vel remisit forte Baldricus, vel de non petendo pepigit, vel extra naturam contractus hujus cum sit juris stricti transactio, auctoritatem si ad evincendum ageretur se præstiturum repromisit, horum quodcumque probetur, Hubertus plane non tenetur. Hujus itaque residui petitionem cum, ut sibi confidit Hubertus, plane repellat exceptio, intimo sublimitati vestræ supplicamus affectu, quatenus sententiam qua clericum nostrum teneri præcipitis, amore justitiæ nostraque prece relaxetis, et causam quæ inter clericos de novo constituitur, suo inter eos Marte currere permittatis. Quod si nostra non meretur supplicatio, obtinuisse tamen debuerat ad dominum papam, et ante sententiam sub certo testium numero facta appellatio. Non enim hæc causa est quam appellatione remota apostolica, terminare jussit auctoritas. Nam in qua aliud intenditur et aliud respondetur, et sententia prorsus alia desideratur alia procul dubio causa esse dignoscitur. Agit itaque, si placet vestra modestia, ut relaxatione hac amicam vestram humilem exaudiat, et honorem debitum et firme, ut æstimo,

A promissum domino pape exhibeat, et jus Baldrici, si quod habet, et si in tempus dilatum recte, in nullo tamen minuatis, et sic a tramite legitimo in nullius offensam vel in modico recedendo, universa jucundo fine compleatis. Valete.

EPISTOLA CXIV.

AD THOMAM CANTUARIENSEM ARCHIEPISCOPUM.

Venerabili domino et Patri in Christo THOMÆ Cantuariensi archiepiscopo, GILBERTUS Londoniensis Ecclesie minister, salutem.

Multiplicem nobis et diffusam late materiam profunde Pater et copiose rescribendo proponitis, et nos licet super appellatione ad dominum papam prosequenda sollicitos, vestræ tamen sublimitati rescribere, gravi quidem et nos graviter urgente necessitate compellitis. Emissis enim sparsim elogiis nos de toto fratrum nostrorum collegio seorsum ponitis ad convitia, ut singulariter in nos, etsi immeritis, ignominiosa congeratis et probra. Sobrii sensus hominem gravitatis reverentæ personam, magistrum ratione prælationis et dogmatis veritati reverenter obnoxium, mirum est ad verba veritatis exarsisse tam graviter et velut evocatum ad coleras, innocentiam filii pie patri consulentem, non solum non admisisse, sed et ipsius opinionem nota quadam malitiæ cujus sibi minime conscius est, ejus non id exigente merito respersisse: unde cum Ecclesiam Dei subvertere, fas nefasque confundere, montem illum qui Ecclesia et columna Dei viventis est, non sano capite velle dejicere, ad ea quæ vestra sunt ambisse, et quod ab his obtinendis repulsi fuerimus, ob id vestram Ecclesieque Dei pacem temere perturbasse, in bello Domini terga dedisse, emissis scriptis publice denotemur, difficile est ut sileamus, ut hanc adversum nos opinionem, vel a præsentibus admitti, vel indefensam futuræ posteritati transmitti, confessionem innuente silentio permittamus. Cum sit itaque malorum radix et origo cupiditas, ne nos hujus suspectos habeant quibus prava suadentur et facili, nos hinc ipsa jubet necessitas exordiri. Ait Apostolus: *Quis scit hominum occulta hominis, nisi spiritus hominis, qui est in ipso?* (I Cor. ii.) Latent quidem homines occulta hominum, et abyssum cordium de cælo Dominus intuetur. Ipsum ignota non transeunt, occulta non fallunt. *Est enim sermo Dei virtus et efficax, penetrabiliorque omni gladio ancipiti; nec est ulla creatura invisibilis in conspectu illius* (Hebr. iv). Ipsi et coram ipso loquimur; sub ipsius examine non vana aut ficta, sed quæ veritate conscientie subnixæ sunt, confidenter et libere respondemus, asserentes utique quoniam ad ea quæ vestra sunt ambitionis stimulos nunquam vel momento sensimus. Honorem hunc nulli unquam invidimus. Nulli ad hanc gratiam munere vel obsequio, gratia vel favore deservivimus, ut ad hujus fastigia culminis accessum nobis sacrilegum quibuscumque modis aut adminiculis aptaremus. Quis hoc melius Pater quam vos, quis poterit liquidius æstimare, quem ipsius

Ecclesiæ tunc temporis archidiaconum, et domini nostri regis electum, e millibus non consiliarium solummodo, sed cor fuisse constat et consilium, sine quo non quidem facile, sed non erat possibile ob hæc omnino quempiam obtinere progressum? nobis itaque quam apud vos gratiam collocauimus, num per nos aut per alium vestram unquam gratiam xeniis aut obsequiis attentauimus, ut ad quod nisi per vos attingi non poterat, in id ope vestra subleuaremur? hinc nostram, Pater, justum est metiri prudentiam, quales nos aliis exhibuerimus, qui nec vestræ celsitudini quam rerum summa sequebatur ad turpe supplicare compendium, nec aliqua favoris gratia unquam vel in modico blandiri curauimus. Rem hoc sine concludimus, hoc nobis onus ipsi confidenter imponimus, ut sit nobis illa die repositum, si nos hujus culpæ conscios in aliquo reprehendit cor nostrum (*I Joan. III*). Non nostram itaque, Pater, non nostram in vestra promotione repulsam planximus. Illo quidem die non nostra querere, sed quæ Domini nostri Jesu Christi, non nobis, sed ejus nomini in omnibus gloriam (*Psal. cxiii*) exhiberi toto cordis affectu desiderauimus, attendentes rem secus fieri condoluimus. Cernentes jus Ecclesiæ subverti, fas nefasque confundi, montis illius magni quem dicitis deorsum cacumen inflecti, sponsam Christi libertate pristina, sibi semper usque tunc observata reuerenter, et exhibita inuerecunde privari, altis utique in Domino suspiriis ingemui- mus, et dolorum quos nunc experimur assidue, prælibationes et præsentia certa quadam divini Spiritus insinuatione, multi quidam in Ecclesia Dei præsen- simus. Oportebat equidem ejus tunc meminisse quod scriptum est: « Difficile est ut bono peragantur exitu, quæ malis fuerint inchoata principis; » ad ipsa quidem si recurramus initia, quis toto orbe nostro, quis ignorat, quis tam resupinus ut nesciat vos certa licitatione proposita cancellariam illam dignitatem multis marcarum millibus obinuisse, et aaræ hujus impulsu in portum Cantuariensis Ecclesiæ illapsam ad ejus tandem sic regimen acces- sisse, quam pie, quam sancte, quam canonicè, quo vitæ merito id exigente, multis quidem notum est, et stylo quodam doloris intimi bonorum est cordi- bus exaratam. Diem suum clauserat ille bonus et bonæ memoriæ Pater noster Theobaldus Ecclesiæ Cantuariensis dudum archiepiscopus, et vos qui cor- dis oculos in casum hunc pervigiles minime clau- debatis, confestim a Normannia celeres in Angliam reditus habuistis. Ex intervallo directus est a do- mini nostri regis latere vir magnus et sapiens mo- derator regni Ricardus de Luci, quem laqueis ana- thematis innodatum hodie digne sic merito honora- stis, regis hic ad omnes habebat imperium, ut Cantuarienses monachi et Ecclesiæ ipsius suffraga- nei episcopi vos expeterent, vos eligerent, vos in Patrem et pastorem negotium nulla deliberationum mora protrahentes assumerent, alioquin iram re- giam non utique declinarent, verum se regis hostes

A et suorum procul dubio ipsis rerum argumentis agnoscerent.

Quod loquimur expertonovimus, attendentes enim Ecclesiam Dei suffocari graviter, ob quod in ejus libertatem, quodam modo proclamavimus, verbum illico proscriptionis audivimus, et exilio crudeliter addicti sumus, nec solum persona nostra, sed et domus patris mei, et conjuncta nobis affinitas, et cognatio tota. Hoc quidem calice, et aliis propina- tum est. Scriptum vero est: *Leo rugiet, quis non timebit* (*Amos III*). Et illud: *Ut rugitus leonis, sit terror regis* (*Prov. xx*). Quod tantæ voluntatis impetu præcipiebat rex, quod effectu compleri tanto nuntio perurgebat, in quod cordis oculos vos omnes injecisse noverant, in quod omnes vestri minis et terro- ribus, promissis et blanditiis vigilanter instabant, quis negaret? torrenti huic voluntatis et præcepti regii qui resisteret? Stabat regni gladius in manu vestra, si in quem torvos oculos habebatis, terri- bilis in hunc et importabilis iræ quodam velut igne coruscans. Ille quidem gladius quem in sanctæ ma- tris Ecclesiæ viscera vestra manus paulo ante im- merserat, cum ad trajiciendum in Tolosam exerci- tum tot ipsam marcarum millibus aporiastis. Qui ne limatus denuo per vos aptaretur ad vulnera, jussis obtemperavit Ecclesia, et declinando quæ metuit, simulavit se velle, quod noluit. O quam longe erant omnium corda bonorum ab hoc ipso, quam dissidentia vota! Motu tamen est et impres- sione completum, quod interminatione dirissima fuerat imperatum. Sic in ovile ovium non utique per ostium, sed ascendens aliunde introistis (*Joan. x*), et hoc, Pater, introitu libertatem Ecclesiæ tot sibi temporum conservatam curriculum, adenistis, quæ si ejus vita est, ut scribitis, ipsam utique exa- nimem reddidistis. Deus bone, quis horror illa die, quis omnes horror invasit, cum prognosticum illud de more conspectum, et circumstantium oculis est oblatum! illud, inquam, prognosticum quod in futuri casus indicium evangelista Matthæo quasi vaticinante prolatus est: ait enim Dominus fl- culneæ non habenti fructum, nunquam ex te fructus nascatur in sempiternum, et arefacta est continuo (*Matth. xxi*). Oportuisset igitur illa die non recta mandanti principi respondisse, quod oportet *Deo obedire magis quam hominibus* (*Act. v*). Illo utinam die corda nostra plene timor ejus occupasset, qui potest animam in gehennam perdere, et non solum corpus occidere! (*Matth. x*). Quod quia secus actum est, parit nobis enormitas hæc erubescen- tiam, erubescen- tia confusionem, confusio pœnitentiam quæ condignam inferet opem, ferente Domino satisfactionem, adeo ut in maxillis nostris juges lacry- mæ perseverent donec convertat Dominus captivi- tatem Sion (*Psal. cxxv*), et consoletur mœrentes in Jerusalem, et clementiæ reducat oculos in desolatos Jerusalem.

Interim ut quod actum est corrente stylo prose-

quamur, sublimationis vestrae quis fructus exstiterit, audiamus. A pio rege nostro suscepto regni gubernaculo ad illum usque diem Ecclesia quidem sancta alta pace floruerat, excepto quod, ut diximus ad instaurandum in Tolosam exercitum manus vestras jam nimis in se graves agnoverat, de cætero, sub bono principe cuncta gaudebant, jucundissime letabantur universa. Regnum sacerdotio devotum sancte præstabat obsequium, et sacerdotio firmissime fulebatur ad bonum omne regis imperium. Exercebantur in Ecclesia gladii duo, devoto Domino Jesu famulantes obsequio. Nec sibi stabant ex adverso, nec tendentes in contraria repugnabant alterutro. « Unus erat populus et, » ut scriptum est, « unius labii, studens peccata persequi, gaudens vitia fortiter eradicari. » Hæc regni fuit et Ecclesie pax, alterna sic gratia fovebantur et unanimi voluntate jungebantur. In vestra vero promotione gratiarum sperabamus et expectabamus augmenta, et ecce peccatis exigentibus illico turbata sunt universa. Virtus est peccato cum exsurgit occurrere, mentisque sinistros fetus ad petram quæ Christus est, statim cum nascentur allidere. Oportebat itaque vestram providisse prudentiam, ne dissensiones inter regnum et vos paululum exsurgentes in immensum excrescerent, ne de scintilla tenui in multorum perniciem tantis ignis exsurgeret. Actum secus est, et ob causas quas enumerare longum est, dissensiones adauctæ sunt, inflammata est ira, et odium fortiter obfirmatum. Hæc causa fuit, hinc emersit occasio, cur ad requirandas dignitates regias, et in commune commemorandas suum dominus noster rex animum applicaverit et consilium, quarum observatio cum a vobis et a suffraganeis Ecclesie vestrae exigeretur episcopis, eo quod in quibusdam earum Ecclesie Dei videbatur libertas opprimi, assensum dare recusavimus præterquam his quæ salvo honore Dei et ordine nostro poterant observari. Exigebat instanter dominus noster rex observationes earum absolute sibi a nobis repromitti, sed quod libertati repugnabat Ecclesie, et domini papæ fidei, a nobis nequaquam potuit obtineri. Ob causam hanc coacti sunt cœtus, et convocata concilia. Quid meminisse opus est, quæ sunt acta Londoniis? quæ denno Oxenefordiae? Quæ gesta sunt Clarendonia, ad memoriam revocemus. Ubi continuato tri-duo id solum actum est, ut observandarum regni consuetudinum et dignitatum a nobis fieret absoluta promissio. Ibi quippe vobis vobiscum stetimus, quem in domini Spiritu stare fortiter aestimabamus. Stetimus quidem immobiles, stetimus imperterriti. Stetimus in fortunarum dispendium, in cruciatum corporum, in subeundum exilium, subeundum quoque, si sic Dominus permisisset, et gladium. Quis unquam pater filios in sua plus habuit confessione concordēs? quis unquam plus unanimes? inclusi eramus omnes conclavi uno die vero tertio cum jam regni principes et omnes quidem nobiles

A in summas coleras exarsissent, facto quidem fremitu, et strepitu conclave quo sedebamus ingressi rejectis palliis, exertisque brachiis nos taliter allocuti sunt: « Attendite qui regni statuta contemnitis, qui regis Jussa non suscipitis. — Non nostræ sunt manus istæ quas cernitis, non nostra brachia, non hæc demum corpora nostra, verum domini nostri regis Henrici sunt ad omnem ejus nutum, ad omnem ejus ulciscendam injuriam, ad omnem ejus voluntatem quæcunque fuerit, jam nunc applicari promptissima. Ipsius mandatum quodcunque fuerit ex sola nobis voluntate ejus erit justissimum; revocate consilium, inclinate animos ad præceptum, ut declinetis, dum fas est, quod jam non poterit evitari periculum. — Quid ad hæc? quis fugit? quis terga verit? quis animo fractus est? vestra nobis exprobratur epistola, quod in die belli conversi sumus (*Psalm. LXXVII*), quod ex adverso non ascendimus, quod nos murum pro domo Domini non opposuimus. Judicet Dominus inter nos, ipse judicet ob quem stetimus, ob quem ad minas principum flecti nequivimus, judicet ipse quis fugerit, quis in bello desertor exstiterit, stetit procul dubio vir nobilis, et spiritus in Domino constantissimi Wintoniensis Henricus, stetit Eliensis Nigellus, stetit Lincolnensis Robertus, Cicesterensis Hilarius, Salesberiensis Jocelinus, Exoniensis Bartholomæus, Cestrensis Ricardus, Wigorniensis Rogerus, Herefordiensis Robertus, Londoniensis Gillebertus. His omnibus percussor defuit, non ii virtuti; ii quoque temporalia reputantes ut stercora pro Christo et Ecclesia exposuerunt se et sua. » Dicatur itaque quod verum est, fiat sub sole quod præsentibus nobis et cernentibus actum est, terga dedit dux militiæ ipse, campi ductor aufugit, a fratrum suorum collegio simul et consilio dominus Cantuariensis abscessit, et tractatu seorsum habito ex intervallo reversus ad nos, in hæc verba prorupit: « Est domini mei voluntas, ut perjurem, et ad præsens subeo et incurrō perjurium, ut potero penitentiam acturus in posterum. »

Audit his obstupuius et mutis hærendo conspectibus ad lapsum hunc a summo ut aestimabamus virtutis et constantiæ viro suspirantes ingemulimus. Non est apud dominum est et non, nec ejus sperabamus sic moveri posse discipulum. Languente capite, languent cito cætera membra, et ipsius infirmitas ad cætera statim membra dilabitur. Ipse quod exigebatur annuens, et dignitates regias, et antiquas regni consuetudines antiquorum memoria in commune propositas, et scripto commendatas, de cætero se domino nostro regi fideliter observaturum, in verbo veritatis absolute promittens, in vi nobis obedientiæ adjunxit, sponsione simili nos obligare. Sopita est hoc sine contentio, sacerdotii sic est pax conciliata cum regno. Descendit Israel in Ægyptum, unde cum multa gloria legitur postmodum ascendisse. Nobis quoque spes magna resederat, in quod dominus noster rex ad tempus ira motus exegerat, sedato ipsius animo

ad Dei gloriam et ipsius honorem in bonum denno
esse reformandum. Invidit paci teneræ pacis ille
turbator pristinus. Et qui procellis enavigatis spe-
rabamus tenere jam portum, aquilonis ecce flatibus
compellimur in profundum. Recens erat illa in verbo
veritatis regi facta promissio, vós nisi ab eo impe-
trata licentia non discessurum a regno. Scriptum
est: Verba sacerdotis comitem semper habeant ve-
ritatem (*Malac. ii*); illud quoque, quod quis dicit
veritati debet, et quod promittit, fidei. Emensis ta-
men diebus paucis ventis vela commisit, et
egressum a regno rem rege penitus ignorante pro-
curastis; quo audito, nemo regē plus stupuit, nemo
plus doluit, stupuit non esse completam, quod
fuerat a pontifice quasi juramento promissum. Do-
luit in se grave sciens scandalum suscitari, et illa-
sam hactenus opinionem suam ex fuga hac apud
gentes et regna gravissime lacerari. Quid enim ve-
ritatis ignari, quid poterant ex his aliud suspicari,
quam regem regni pietatis immendorem in tyranni
rabiem exarsisse, et odio Christi ministrum ejus a
regno suo et dominationis suæ finibus expulisse?
Mallet in carne sua manu vestra vulnus gravissi-
mum excepsisse, quam hoc famæ suæ dispendium
toto orbe Christiano per vós et vestros incurrisse.
Quid plura? aquilone vela perflante completa fuisset
jam navigatio, nisi flatu meliore cœptis auster obsti-
tisset, quo flante prospere navis ad litus unde cœpit
navigare perducta est. In manus itaque regis cum
vos rei deduxisset eventus, nunquid iram secutus
aut potentiam in vos, aut excessit opere, aut est
quidquam locutus aspere? Absit! At benigne sus-
ceptum et veneratione qua decuit honoratum remisit
ad propria; et vos in regno manere, commissam vo-
bis Ecclesiam regere, animi vestri dilectionem et
dulcedinem sibi rebus ipsis ostendere, humiliter et
benigne supplicando commovit. Vix auster deto-
nuerat et jam circius fulminabat; motus animorum
vix utrinque resederant, et ecce de novo emersit
unde ferventius ebullirent. Perlatum est ad vos
mandatum regium, ut cuidam regi nobilium super
prædio quod a vestra vindicabat Ecclesia, quod ju-
stum foret exhiberetis.

Qui post statutos dies ad regem reversus, asseruit
se penes vós justitiam assequi nequivisse, et se id
ipsum juxta regni statuta coram vobis suo congruo-
que testium juramento comprobasse: quo regem
prosequente diutius, et super exhibendâ sibi justitiâ
quotidie supplicante, domini nostri regis ad vos est
emissa citatio, ut statuto die se vestra sublimitas sibi
exhiberet, ut quod ipso mandante non egerat, eo
cognoscente litemque judicio dirimente compleret.
Non est a vobis hæc admissa citatio, verum vos in
hoc sibi minime paritum declaravit a vobis ad
ipsum delegata responsio. Arbitratus hoc ipso do-
minus rex juri suo detrahi graviter et potestati,
Ecclesiam regni jussit ad consilium Northamptonium
convocari. Convenit populus ut vir unus, et assi-
dentibus sibi quorum id dignitati congruebat et or-

PATROL. CXc.

A dini, quod dictum est super exsperto mandato suo
in querelam adversus vos usus qua decuit modestia
et venustate proposuit. Porro quod intendit, fratrum
vestrorum non expectato vel expetito consilio, ve-
stra incontinenti confessio confirmavit, adjiciens vos
ob id non paruisse mandato, quod Joannes ille qui
regis ad vos mandatum pertulerat, in vestra præsen-
tia non Evangelio sed tropario quodam proposito
juravisset. Est itaque dictum in commune, causam
non eam esse ob quam mandatum regium oportuis-
set omisisse, regnique fore consuetudinem in offen-
sis hujusmodi multa pecuniaria suam rem taxante
misericordia placari regem; paruit sublimitas ve-
stra sententiæ ad plenum cavens super judicati solu-
tione, vestram tamen non latebat prudentiam decre-
tum illud apostolicum, quod in hunc modum expres-
sum est: « Nullus episcopus, neque pro civili, neque
pro criminali causa apud quemvis judicem, sive ci-
vilem, sive militare producat, vel exhibeatur. »
Et illud: « Clericus apud sæcularem judicem, si
pulsatus fuerit, non respondeat aut proponat. » Et
illud Gelasii papæ ad Hlepidium episcopum: « Quo
ausu, qua temeritate rescribis ad Ravennam te paratū
prohiscisci, cum canones evidentier præcipiant nullum
omnino pontificem nisi nobis ante visis aut consultis
ad comitatum debere contendere? » Sed hæc altiori
forte scientia et spiritu clariore discernitis, et quia
regem unctio divina sanctificat, unguntur ei manus
in sanctitatem operum, brachiorum nexus in casti-
tatem complexum, pectus in cordis munditiam,
scapulæ in laboris pro Christo tolerantiam. Chri-
smate caput infunditur, ut secundum Christum a quo
chrisma dictum est, et ejus nomine consecratum;
apto semper moderamine studeat sibi credita dis-
pensare, ipsum a ceteris æternitatis, et judicem non
sæcularem solummodo, sed et ecclesiasticum repu-
tatis, ad quod roborandum id fortasse proponitis,
quod imperiali judicio papa Leo quartus emendare
voluit, si quid in subditis injuste commisit, Ludo-
vico Augusto sic scribens: « Nos si incompetentem
aliquid egimus, et in subditis justæ legis iramitem
non conservavimus, vestro aut missorum vestrorum
cuncta volumus emendari judicio, ut eorum legitimo
cuncta terminentur examine, ne sit in posterum
quod indiscretum valeat permanere. » Si vobis
mens ista est, discretioni vestræ quamplurimum in
hoc consentit opinio, ut ob sacramenti reverentiam
regem æstiment, non omnes, sed quas distinguunt
Ecclesiæ et personarum Ecclesiæ causas oportere dis-
cutere, et regni jurisdictionis examine terminare:
habet enim Ecclesia quædam divino tantum jure,
quædam ut testantur humano. Gradus ecclesiasti-
cos, ordines sacros, et dignitates his coherentes et
potestates divino tantum jure sortitur. Unde si
baptizat aut consecrat, solvit aut ligat, prædicat et
informat, hæc tantum spiritualia sunt, collata desup-
per ab homine in hominem, nec hominis dono, sed
divino intus operante Spiritu propagata, hunc sibi
nemo sumit honorem, sed qui vocatur a Deo tan-

quam Aaron (*Hebr. v*); affectaverunt hæc Core, A Dathan et Abiron a Domino non vocati et inaudita morte perierunt (*Num. xvi*). Immiscentes se sacrificiis Jeroboam et Ozias, alter manus ariditate, alter lepra percussi sunt (*Zach. xi*).

Est igitur in his omnibus sacerdos quilibet ut pater, ut pastor, omni rege superior, rex ut filius, ut discipulus, longe inferior æstimatur. Si itaque rex delinquat in Deum, imitando Theodosium conciliari studeat opera sacerdotum. Si sacerdotes se accusent alterutro, hæc suo rex non usurpet iudicio, sed ne Patrum verenda conspiciat, incedens retrorsum causam hujusmodi pallio laudis operiat. Sunt et Ecclesiæ corporalia quædam divino tantum jure possessa; in his decimæ numerantur oblationes et primitivæ, quæ segregando sibi sanctificavit Dominus, et in usus sibi ministrantium æterna lege sancivit; quæ quia divino tantum jure præcipit, ad cognoscendum super his potestas se regia non extendit, humano vero jure multa possidet quæ sola sibi sunt hominum donatione concessa, non id præcipiente Domino vel legem super hoc statuente, ut jam non leviticæ solum portione limitata sit, verum donis eximiis et possessionibus ampliata; transtulerunt ad eam ampla sua patrimonialia reges, transtulerunt electi principes, ut jam sit etiam corporaliter impletum quod de filiis Ecclesiæ dudum est propheta vaticinante prædictum: *Fortitudinem gentium comeditis et in gloria eorum superbiatis* (*Isai. Lxi*), et illud: *Ut det illis hereditatem gentium* (*Psal. cx*); item *Isaias*: *Dilata tentorium tuum, longos fac funiculos tuos, ad dextram et ad lævam dilataberis* (*Isai. Lxiv*). Vetus quidem habet historia in opus illud tabernaculi antiquum, illum populum ea devotione contulisse donaria, ut compulsi artifices dicerent Moysi: *Plus offert populus quam necesse est* (*Exod. xxxvi*), quorum quantacunque devotio filiis tamen gratiæ non æquatur. Quibus sæpenumero non satis est donare singula, nisi supererogent universa. Est vero cuique liberum cum transfert donando quod suum est, donationi conditionem quam velit adnectere, quantum nec legibus nec bonis consistat moribus obviare; hæc itaque donationi regum conditionem annexam æstimant, hoc consuetudine tot temporum obtinente curriulis affirmant, ut regibus Ecclesiæ militaria et annexa prædiis alia quædam persolvant obsequia, et possessiones ipsas a regibus personæ suæ principalis hominio et fidelitate præsentie Evangelio promissa recognoscant. Sic igitur Ecclesiæ geminata potestas est, ut hinc regi cœlesti serviat, hinc terreno principi quod ad eos spectat exhibeat, ejusque ministros efficit potestas, hinc a Deo collata pontifices, hinc a rege suscepti comites aut barones. Potestas hæc est, qua magnum in palatio obtinet Ecclesia principatum, cum in omnibus regni judiciis, præterquam si de vitæ periculo tractetur aut sanguine, locum habeat ipsa præcipuum: hæc regi nos obligat, ut affirmant, ut ab ipso citati debeamus assistere, et singulorum causas

A universi discutere et judicare. Nam qui in his quæ ad Deum sunt gradu quodam distinguuntur, ut superiores quidam, inferiores alii reputemur, et simus, nos in hoc pares æstimant, ut si de fundis ad Ecclesiam libertate regia devolutis, inter nos aut in nos fuerit oborta contentio, apud regem quæ spectant ad singulos universorum definit pronuntiatio. Nec mirum, si patrem teneat a filio lata sententia, cum ipsum qui est filius patris sui dominum fore convincat ratio manifestata, et cum hominio fidelitas reverenter exhibita.

Cum sit ergo a Deo gemina potestas, hinc sacerdotalis, hinc regia, utrumque secundum quid præesse alteri, et ab altera secundum quid posse judicari, Patrum auctoritate confirmant, ut sit regum et præsulum vicissitudo hæc qua se vicissim judicant, et judicantur a se, forte quoddam charitatis vinulum, reverentiæ debitum, et utique necessitudo quædam conservandæ pacis ad alterum; hæc et his altiora considerans regem quasi præcellentem (*I Petr. ii*), prout monet Apostolus, honoratis et ejus parendo sententiæ recte judicem agnovistis, sibi servando quod suum est, ipsum in his quæ ad Deum sunt vestræ parere sublimitati prudenter et provide monistis. Omni humanæ creaturæ propter Deum sancta se submittit humilitas, et quo se dejicit inferius, eo juxta verbum Domini meretur altius et gloriosius exaltari. Atque in his utinam humilitatis finibus res ipsa tota resedisset, et cum a vobis quædam debita reposceret Dominus noster rex, cum de summa pecuniæ quam in manu vestra ex caducis quibusdam excrevisse memorabat, quod jus dictaret, id sibi solum peteret exhiberi, ad declinandum regalis curiæ iudicium, tunc se vester minime zelus erexisset. Nam quid poterat inferre periculi danda super hæc petitione sententia? Ad regimen Ecclesiæ vos a curia transferri voluit, et ab ipsius nexibus hoc ipso vos ut plures opinantur absolvit; quod si ad debita minime referendum est, ut evecus loco sic absolva-
tur a debito, poterat negotium per exceptionem in rem versum plurimum expediri, et si quid compoto nequisset includi, irate magis repenti sua quam avide, de reliquo poterat satis dari, et civilis hæc causa absque hoc rerum turbine pace poterat honestissima terminari. Sed inauditum dicitis, ut in regis curia Cantuariensis unquam compelleretur ad talia, et id dixeritis inauditum, officialem curiæ repentinò transitu ad illam sic Ecclesiam unquam hactenus sic ascendisse, ut hodie quis curiam, cras dispensaret Ecclesiam, ab avibus et canibus cæterisque curiæ jucundis usibus cito quis astaret altaribus, et episcopis totius regni spiritualia ministraret et sacerdotibus. Usus igitur in diversa tendente consilio, domum regiam crucem gestans in manibus introistis, et execrandæ cujusdam malitiæ suspectum regem omnibus illico reddidistis. At ejus innocentiam summis offerendam præconiis patientia declaravit; illationem crucis adversum se, et molestie tulerit, fines tamen regis modestiæ non exces-

sit. Non ira motus efferebuit, non verbo malignatus aut opere; causam quam sua repetens intenderat sine studuit iustitiæ debito terminare. At declinando iudicium ad dominum papam appellastis, et sicut in ingressu, sic in egressu vestro summam regis mansuetudinem et tolerantiam vobis observatæ pacis iudiciis agnovistis. Nam ut in Absalonem prodeunte exercitu paterna pietas exclamavit: *Servate mihi puerum Absalon* (II Reg. xviii), sic ejus mandato voce statim præconaria cunctis innotuit, ut si quis vobis aut e vestris cuiquam molestus existeret, ultore gladio deperiret.

Addidistis ad hæc, et tanquam vitæ vestræ vel sanguini machinaretur insidias, fuga nocte inita, mutato habitu post latitationem aliquantulum, a regno clam transieastis, et nemine persequente, nullo vos expellente extra dominationis suæ loca in regno vobis altero ad tempus sedem elegistis. Inde, navem gubernare disponitis, quam in fluctibus et tempestate subducto remige reliquistis; hinc nos vestra jubet et hortatur auctoritas ut convertamur ad vos, et salvi simus, ut vestris inhærendo vestigiis pro Christo mortem subeamus, et pro liberanda ipsius Ecclesia animas ponere non metuamus. Et utique si attendamus quanta nobis promittantur in cælis, debeant animo vilesce quæcunque possidentur in terris. Nam nec lingua dicere nec intellectus capere valet, illa supernæ civitatis quanta sint gaudia angelorum choris interesse, cum beatissimis spiritibus gloriæ Conditoris assistere, præsentem Dei vultum cernere, nullo metu mortis affici, incorruptionis suæ munere perpetuo gloriari. Passiones hujus temporis minime cōdignæ sunt ad futuram gloriam quæ revelabitur in sanctis. Et quod modo leve est et momentaneum tribulationis, supra omnem modum æternæ gloriæ pondus operabitur in electis (II Cor. iv), hæc nostris jamdiu sensibus insederunt; nostra jamdiu studia hæc post se promissa traxerunt. Caput utinam quod mihi scapulis insidet, lictoris gladius projecisset in medium, dum tamen legitime Deoque placito certamine decertassem! At martyrem non pœna facit, sed causa, dura sancte perpeti gloria est, improbe, pertinaciter, ignominia. Pro Christo subire gladium consummata laus est et victoria, hunc in se temere provocare late patens insania, et si vestra, Pater, non solum dicta verum facta pensemus, in mortem nec temere, nec leviter impingemus. Nam genu Clarendoniæ curvando, fugam Northamtoniæ ineundo, mutato ad tempus habitu delitescendo, a regni finibus clam emigrando, quid actum est? quid hæc agendo præcurastis? nisi quod mortem quam nemo dignabatur inferre, tam sollicitè declinastis? Nos igitur ad mortem qua fronte, Pater, invitastis, quam vos et formidasse et fugisse iudiciis tam manifestis toti mundo luce clarius ostendistis. Quæ vos suadet charitas, nobis onus imponere, quod abiecastis? Gladius nobis imminet, quem fugistis, in quem funda jacere non dimicare cominus elegistis. Ad similem forte fugam nos invitastis.

A At nobis mare clausum est, et post digressum vestrum, naves nobis sunt omnes et portus inhibiti. Insulæ terrarum claustra regum fortissima sunt, unde vix evadere vel se quis valet expedire. Si nobis pugnandum est, de proximo contendemus. Si cum rege pugna conseritur, unde percussiemus gladio, nos ibi gladius repercussus inveniet, unde vulnus infligimus, vulnera declinare nequibimus. Et annui vestri reditus nunquid vobis tanti sunt ut fratrum vestrorum sanguine vobis hos velitis acquiri? At Juda reportante pecuniam hanc Judæi respuerunt quam sanguinis esse pretium agnoverunt. Sed aliam nobis causam fortasse proponitis. Paululum itaque diver-tamus, ut mortis nobis suadendæ causam plenius attendamus. Gratias Domino, nulla penes nos est de fide contentio, de sacramentis nulla, nulla de moribus, viget recta fides in principe, viget in prælati, viget in subditis. Omnes fidei articulos regni hujus Ecclesia sane complectitur. A summi pontificis obedientia præsentis schismatis insania nemo dividitur, Ecclesie sacramenta venerantur omnes et excolunt, suscipiunt in se et aliis pie sanctique communicant.

Quod ad mores, in multis quidem offendimus omnes (Jac. iii). Errorem tamen suum nullus prædicat aut defendit, verum pœnitentiæ remedio sperat posse dilui quod admittit. Tota igitur in regem est, et de rege contentio ob quasdam consuetudines suis prædecessoribus observatas, ut asserit, et exhibitas quas sibi vult et expetit observari. Super hoc a vestra sublimitate commonitus non desisit a proposito, non renuñtiat iis quæ firmavit antiquitas et longa regni consuetudo. Hæc causa est cur ad arma decurritis, et in sanctum caput et nobile gladium librare contenditis, in quo refert plurimum quod has ipse non statuit, sed ut tota regni testatur antiquitas, sic eas reperit institutas. Nam difficilior evellitur quod altius radicitur, hæret planta tenacius quæ suas in altum jamdiu radices immiserit. Quam si quis transferre desiderat, non viribus evellenda est, ne protinus exarescat. Circumfodienda prius est et humus est ejicienda, denudanda radix undique, ut sic prudens expleat diligentia quod vis commodè non expleret incompetenter adhibita. A bonis exempla sumenda sunt, et cum tractantur hujusmodi, ipsorum sunt opera diligentius attendenda. Prædecessor vester ille Pater Augustinus multa a regno hoc extirpavit enormia, et ipsum regem fide illuminans pravas ab eo consuetudines, non quidem paucas eliminavit, non maledictis equidem, sed benedicendo potius et prædicando, exhortando salubriter, et potentum animos ad bonum fortiter inclinando. Cremensis ille Joannes diebus nostris in partes has a sancta Romana directus Ecclesia, regni consuetudines in quibus jam senuerat, immutavit! Quod non maledictis aut minis, sed doctrina sana et exhortationibus sanctis obtinuit. Benedicendo seminavit, de benedictionibus et messem fecit. Illi si ad arma decurrissent, nihil

aut parum profecissent. A pio Francorum rege optata diu prole sibi jam concessa divinitus, nuper illi regno multa sunt remissa gravamina, quæ firmaverat antiquitas hæcenus inconcussa, hæc suggerente, ut andivinus, Ecclesia, et monente, non in electum principem minas impetente sublata sunt. Quæ denique quantæve dignitates, libertates, immunitates, possessiones Ecclesiæ Dei a piis regibus orbe toto pietate sola, non maledicti necessitate collata sint, quis valeat explicare? utique tempus id volentem explicare deficit, hæc namque regum est laude digna nobilitas. Ab ipsis supplex obtinet quod erectus in minas nullis unquam conatibus obtineret, ipsis minimi pretium tam reputatur vile quam exiguum, quod sibi vi subripere quisque violenter intenderet, magnos in re modica rei suæ defensores spe cito frustratus agnosceret.

Hæc itaque non fervore novitio, sed maturo fuerant attendenda consilio; erant fratrum vestrorum et aliorum plurimum in his exquirenda consilia, attendenda Patrum prudentum opera, cum incommoda Ecclesiæ pensanda commoda, et hæc tunc item danda forte sententia, cum jam non foret spes ulla superesse remedia, quo profecto cum datur juxta sacrorum formam canonum attendendum est in quem detur, cur detur, quomodo detur, an expediat Ecclesiæ quod detur, et obfuturum sibi si non detur. Is vero quem impetistis, ut nota vobis referamus, nunquid non ipse est quem dulcissima pignora, nobilissima conjux et honesta, subiecta sibi regna quamplurima, amicorum cætus et suis obsequentium nutibus tot populorum agmina, mundi quæque pretiosa vix detinent, vix blandiendo persuadent, quin apertis oculibus post crucem suam portantem Dominum Jesum nudus exeat, et paupertatem contemplando quam subiit, id facto studeat implere quod docuit ipse, dicens: *Qui non bajulat crucem suam et venit post me, non est me dignus* (Luc. xiv); hæc mentis ejus obstinatio est, hæc maledictis opprimenda crudelitas, hæc in Ecclesia Dei toto orbe declamata malignitas; in hunc si maledicta congesseritis, partem sui nobilissimam suis lædi jaculis Ecclesia recte condolebit, ipso namque vulnerato læsam se non filiorum paucitas, sed populorum ampla numerositas ingemiscet. In hoc vero sacra sic docet auctoritas in ejusmodi causis, ubi per graves dissensionum scissuras, non hujus aut illius est hominis periculum, sed populorum strages jacent; detrahendum est aliquid severitati, ut majoribus malis sanandis charitas sincera subveniat; et iterum: «Non potest esse salubris a multis correctio, nisi cum ille corripitur, qui non habet sociam multitudinem.» Medico namque quis ascribat industriæ ut vulnus unum sanet, aliud longe majus, longe periculosius infligat? discretionis quis attribuat ob quædam quæ poterunt et levius et expeditius obtineri, Ecclesiam sic deserere, in principem exurgere et Ecclesiæ totius regni concussa pace animam in subditis corporumque pericula non

A curare? Agris cessit Ambrosius, Ecclesiam deserere non approbavit. Nam quid a bono principe vestra, Pater, prudentia poterat non sperare, quem divino compunctum spiritu in Christum a Deo noverat anhelare? Illæ consuetudines temporales commodi nil prorsus sibi conferentes, quanti sibi sunt, cum ipsa mundi gloria quantam se cumque offerat jam tota fere vilioit, et a cordis sui desiderio tam procul est, ut Domino loquens sapius id dicat, quod scriptum est: «Insigne mei capitis odi, o Domine, tu scis.» Nunquid non hic fovendus erat, et in ipso nidificanti columbæ sanctæ dimittendus, donec plene formatus in ipso Christus ocula ejus in lucem traheret, produceret, et libertates Ecclesiæ non tantum has de quibus agitur, sed et longe propensiores ipse quasi manu propria distribueret?

In his quidem quod scimus loquimur, quod novimus id confidenter asserimus. Consuetudines in quas plus exeadescitis, dominus noster rex jam pridem punitus exsprevisset, si non hoc propositum duo graviter impedissent. Unum quod sibi timeat esse dedecori a Patribus ad se devoluto regno diebus suis subtrahi quidquam vel imminui. Alterum, si quid remittat ob Dominum, erubescit ut hoc sibi vi reputetur extortum. Primum tamen illud jam sanctitatis pede calcaverat, et ipsum in hoc Dei timor, innata bonitas, domini papæ sancta monitio, multorumque in hoc supplicatio continuata produxerant, ut ob ejus reverentiam per quem ultra omnes suos Patres longe magnificatus est, Ecclesiam Dei convocare, et regni consuetudines quæ gravamen sibi noscerentur inferre multa devotione spiritus immutare vellet ultroque corrigere. Et si penes vos cepta perseverasset humilitas, Ecclesiam Dei in regno exhilarasset jam diffusa late jucunditas. Nam finem in quem tenditis evicerat jam supplicatio, cum male totum impedivit a vobis orta recens turbatio: nam cum suis nondum Britannia titulis accessisset, et levaret in eum usque tunc indomita gens illa calcaneum, cum produceret in turbatores pacis exercitum, terribiles in illum literas devotionem Patris, modestiam pontificis, minime redolentes emisistis, et quod summi pontificis admonitio multorumque elaboraverat supplex et intenta devotio, suspirando minas illico sustulistis, et tam regem quam regnum in scandalum cunctis retractis fere gravius impulistis. Avertat Deus finem quem negotio sic procedente metuimus, qui ne nostris erumpat temporibus ob honorem Dei et sanctæ Ecclesiæ reverentiam, ob vestrum, si placet, commodum, ob pacis commune bonum, ob minuenda scandala, et quæ turbata sunt ad pacem, juvante Domino, revocanda, ad dominum papam appellavimus, ut vestri cursus impetum vos in regem prone rapientis et regnum, ad tempus saltem cohibeamus. Qua in re bonum est ut intra fines modestiæ vestre se velit zelus cohibere, ne ut regum jura subvertere, sic quoque debitam domino papæ reverentiam, appellationes ad ipsum interpositas

non admittendo, nimis e sublimi studeat exinanire. Quod si placeret advertere ad Zachæum non divertisse Dominum, nisi cum de sycomoro jam descendisset (*Luc. xix*), descenderetis forsitan et quem minis exasperastis verbis alloquendo pacificis mitigare studeretis non solum exigendo, sed et satisfactionem humilem, etsi forte injuriarum passua, offerendo. Puerum apostolis proposuit exemplo Dominus qui læsus non irascitur, injuriarum cito non meminit, nec quidquam malitiose moliens dum magna non affectat sibi, totum hoc innocentis vite remedio viteque jucunditate plenissima recompensat (*Luc. ix*). Singulare virtutis exemplar ipse est qui se crucifigentes absolvit, qui lata charitate persequentes et odientes amari præcipit, et si peccet frater in nos veniam non solum septies, sed et septuagies septies imperat impertiri (*Matth. xviii*). Ista quid non posset humilitas apud dominum nostrum regem, quid non obtineret variarum ista perfectio? Callis iste rectus est, ad pacem recte perducens; quem, Pater, cum intraveritis pacem illico apprehenditis, et dispersis tristitiarum nebulis cuncta pace, gaudio cuncta replebitis, et a rege piissimo dominoque nostro charissimo non solum quæ ad præsens petitis, sed et longe majora his Domini Spiritu cor ejus accendente, et in amorem suum semper dilatante feliciter obtinere poteritis.

EPISTOLA CXCV.

AD EUNDEM.

THOMÆ Cantuariensi archiepiscopo, GILBERTUS C Londoniensis episcopus, apto rationis moderamine sibi credita dispensare.

Severitatem vestram, Pater, dominus Salesheriensis, et ego, alique fratres nostri ex retroactis et agnitis non immerito suspectam habentes, pertinimus ne in dominum nostrum regem Angliæ, aut in regnum ejus, vel in nos Cantuariensis Ecclesiæ suffraganeos episcopos, aut commissas nobis ecclesias maledicti aut interdicti sententiam ferendam esse decerneretis, et nos indefensos, juri tamen semper stare promptissimos, jam dicte pœnæ nexibus involveretis. Quod ne vobis omnino foret liberum, ad clementiam domini papæ juxta Quadragesimæ initium appellavimus, et appellationi diem, octavas Purificationis beate Mariæ, constituentes hoc vobis scripto præsentî significare curavimus, ut si quid habetis in nos, quod judicio prosequi libeat, in ejus tunc præsentia, juvante Domino, respondeamus, et ejus per omnia sententiæ humiliter et devotissime pareamus. Avertat iram suam Dominus, ne quod proponitis optato fine concludatis.

EPISTOLA CXCVI.

AD SUFFRAGANEOS CANTUARIENSIS ECCLESIAE.

G. dei gratia Londoniensis episcopus, universis Ecclesiæ Cantuariensis suffraganeis, salutem et debitum fraternæ charitatis obsequium.

Pervenit ad Patrem nostrum dominum Cantua-

riensem archiepiscopum, eos, quos necessitas pro compendio pœnitentiæ vel causæ remedio aut visitationis debito compellit ad dominum papam iter arripere in regno hoc, ab itinere suo præpediri, spoliari, tractari atrociter, et a transfretatione prohiberi, vel ab his qui occasiones querunt ut faciant mala, vel coacti illicita de præpediendis clericis vel pœnitentibus præsterunt sacramenta. Unde nobis omnibus apostolica auctoritate in virtute obedientiæ et in periculo ordinis nostri injungit, quatenus hoc de cætero fieri inhibeamus, et in eos, qui in clericos violentas manus injiciunt, qui appellantes, vel pœnitentes ad dominum papam, vel ad ipsum tendentes, vel ab ipso redeuntes impediunt, publice excommunicatos denuntiemus, et per episcopatus nostros denunciari faciamus, tam facientes hoc quam hoc facere compellentes. Quod quia nobis districte injungitur, mandare vobis et denunciare curavimus, ut mandantis imperio prout justum est pareamus. Valere vos optamus in Domino.

(2) EPISTOLA CXCVI bis.

AD SUFFRAGANEOS CANTUARIENSIS ECCLESIAE DE ELECTIONE URBANI PAPE.

Venerabilibus fratribus et amicis in Christo charissimis sanctæ Cantuariensis Ecclesiæ suffraganeis, G. Dei gratia Londoniensis Ecclesiæ minister, salutem in Domino.

Exemplum litterarum domini et papæ nostri Urbani papæ, quas transmittente nobis domino Cantuariensi nuper recepimus, fraternitati vestræ ex officii nostri debito direximus, ut ejus continentia diligentius inspecta, vos de cætero non lateat quo pastore divina provisio Romanam de novo insituerit Ecclesiam, et in quantum ejusdem pastoris gratia venerabilis Patris nostri Cantuariensis archiepiscopi auxerit dignitatem. (*Epistola Urbani de qua hic agitur, infra est in ordine suo collocata sub num. 381.*)

EPISTOLA CXCVII.

AD G. CANTUARIENSEM ARCHIDIACONUM.

GILBERTUS, Dei gratia Londoniensis episcopus, venerabili fratri et amico charissimo G. eadem gratia Cantuariensi archidiacono, salutem et sinceræ dilectionis affectum.

Talentum vobis, charissime, commissum est, quod augere, et in multorum commoditates expendere, discretionî vestræ necessarium est, ut cum istud multorum subveniendo necessitatibus adduxeritis, mercedem in centuplum a Domino in illa die reportetis (*Matth. xix*). Talentum hoc domini nostri regis est vobis a Domino concessa familiaritas, quam si quis auro compararet pretiosior est, et recte quantacunque pecunia longe charior æstimatur. Talentum hoc ut fideliter erogetis, opus est ut ipsum de sublevanda oppressorum miseria frequenter et sollicitè commoneatis, et in hoc non opportuna solum, sed inopportuna, si id pietas exigat, instantia perseveretis, ut et ipsi meritum apud Dominum.

colloceatur, et apud Deum et homines gratia vobis non modica ex studiis huiusmodi cumuletur. Hæc ideo prælibavimus, quia lator præsentium Rogerus de Derneford ea nobis affinitate conjunctus est, ut ei deesse nequeamus, quin apud hos, de quorum gratia nos et charitate confidimus, ipsius id exigente necessitate, supplicemus. In hunc vero dominus abbas Westmonasterii manus in tantum aggravat, ut ab hæreditate, quæ sibi prædecessoris sui et totius capituli charta confirmata est, et insuper domine imperatricis matris domini nostri regis charta roborata, severe nimis extirpare intendat. Unde benevolentie vestre preces quanta possumus affectione porrigimus, quatenus hujus servitium suscipiatis, et ut dominus noster rex matris sue donationem, sibi ea quam ipse laudabilis servitii taxatione moderata confirmet, obtineatis, ut et ipsum servitii semper obnoxium, et me ad placitum vestrum et servitii et gratiæ debitorem habeatis. Valere vos optamus in Domino, charissime.

In codice legitur: « Quod si quis dixerit imperatorem perfidum, atrocem, injustum, vel quid simile profuderit, si ex levitate processerit, contemnendum: lubricum enim lingue ad pœnam facile trahendum non est; si ex insania, furoris vivine rabie, miseratione dignum; si ab injuria, ad nos transmittendum. » Ideo ex personis hominum penemus dictum tale debere puniri, impositumve relinqui.

EPISTOLA CXCVIII.

AD MAURITIUM PARIISIENSEM ARCHIEPISCOPUM.

Venerabili domino fratrique in Christo charissimo M. Parisiensi Dei gratia episcopo, frater G. Londoniensis Ecclesiæ minister, salutem et sinceræ dilectionis affectum.

Notum sit charitati vestre quod nos secuti fidem mandati vestri, simul et auctoritatem scripti vestri authentici, quod vestro penes nos residet sigillo insignitum, burgensibus Parisiensibus pro quibus nobis scripsistis, creditoribus videlicet Wilhelmi de Beaumont, quanta potuimus et debuimus diligentia, ad indemnitatem prospeximus. Porro in præsentia missorum vestrorum per idoneos et sufficientes fidejussores pro Wilhelmo cautum est, quod ad instantem festivitatem sancti Laurentii, octo marcæ argenti prædictis creditoribus in solutionem reddentur. Infra quindecim vero dies post sequentem Sancti Michaelis festivitatem, item octo marcæ. Consequenter autem infra 15 dies post proximum Pascha, quod residuum fuerit, usque ad summam sexaginta quatuor libras Parisienses et decem solidos persolvetur. Quod quia pro inopia creditoris promptius expediri non poterat, (*Hæc epistola imperfecta est.*)

EPISTOLA CXCIX.

AD R. PICTAVIENSEM ARCHIEPISCOPUM.

G. Dei gratia Londoniensis episcopus, cognato et amico suo charissimo, R. Pictaviensi archiepiscopo, ceterisque domini regis justitiis, fructus operando justitiæ mercedem justî reportare.

A Regium, dilectissimi, gladium circumfertis ad tempus, quem, quia in vindictam malorum laudemque honorum consecratus est, sic opto de manu vestra experiantur mali, ne, quod absit! eo puniantur et boni, sic putrida recidantur, ne membra quæ sana sunt morboque carentia plagis et cruciatibus attententur. Audistis piacularæ flagitium, honestum scilicet clericum ad malorum insidias non vulneratum solummodo, sed et plagis impositis relictum misere semivivum (*Luc. x*). Cujus quidem perpetratores sceleris in proxime celebrata synodo Satanæ tradidimus, in suæ carnis interitum, ut quem instigatorem admiserunt, commissi sceleris, urgente Domino, sentiant et experiantur ultorem. Ex his quosdam, ut audio, apprehendistis, eosque juris laqueis ut potestatis judicariæ severitas expetit innodantes, legitimos in nullo tramites excessistis. Lando vos et commissam vobis sollicitudinem laudabiliter exercere totus applaudo. Quorum ne vel in modico decoloretur administratio, rogans supplico, quatenus diaconum illum et acolythum quos ob causam hanc includit fecistis ob reverentiam Domini Jesu, cujus sunt signati caractere, cujus similitudinem gestant coronæ, mihi si quid adversus eos habet accusator ecclesiastica coercendos jurisdictione restituatis. Ne si Dominum Jesum in membris suis inclusum carere, audaci, quod absit! securitate detinueritis, ipsum vobis in illa die jannam vitæ claudere, divini id exigente iustitia, compellatis. Valere vos optamus in Domino, charissimi

EPISTOLA CC.

AD ROTROGUM ROTHOMAGENSEM ARCHIEPISCOPUM.

Venerabili domino Patrique charissimo R. Rothomagensi Dei gratia archiepiscopo, frater G. Londoniensis Ecclesiæ minister, salutem et sinceræ dilectionis affectum.

Gratiarum Domino tota mentis alacritate referimus actiones, quod in vobis congesta virtutum bona produxit in medium, et vos altiori superpositum candelabro, in totius ædificationem Ecclesiæ, solito voluit eminentius elucere. Nos vero veterem sed nullatenus inveteratam vobis amicitiam servare volentes, de benevolentia vestra confidimus, ut qui de

D collata nobis gratia congaudemus, amplioris etiam gratiæ apud vos locum obtineamus. Inde est, quod dilectæ nobis in Domino bonitati vestre preces affectuose porrigimus, quatenus dilecto nostro, magistro Ranulfo filio Erchem beneficii ecclesiæ Sancti Amari quod sibi prædecessor vester sub nostro et multorum testimonio tanquam ejusdem ecclesiæ personæ restituit, salvum fore concedatis; et vicarium et fraudatorem suum Rogerium, aut a vicaria ipsa, si justum fuerit, amoveatis, aut firmatis fide interposita pactis stare compellatis. Agat oblata precis exauditio, ut et magistrum Randolphum obnoxium servitio, et nos amplioris gratiæ debitores habeatis. Valere vos optamus in Domino, Pater in Christo charissime.

EPISTOLA CCI.

AD ROGERIUM EBORACENSEM ARCHIEPISCOPUM.

Venerabili domino et amico charissimo R. Dei gratia Eboracensi archiepiscopo, frater G. Londoniensis Ecclesiæ minister, salutem.

Litteras dilectionis vestræ suscepimus, quæ nos tanto verius gaudio refecerunt, quanto certius de statu vestro, de prospero reditu, de adventu ad partes nostras, et nostris ad votum desideriis responderunt. Vobis itaque, ne nostra longius vota remoremur, dante Domino, occurreremus, ut proxima die Dominica post Purificationem beatæ Mariæ gloriosæ [virginis] venientes constituti, in crastino, vestro si placet (*Cætera desiderantur*).

EPISTOLA CCII.

AD EUNDEM.

Venerabili domino Patrique charissimo R. Eboracensi Dei gratia archiepiscopo, frater G. Londoniensis Ecclesiæ minister, apta quæque salutis, et si quid ipsi possumus, honoris et servitii.

Verborum facile suadet paucitas, cum ad exaudiendum prompta est ipsis ad quem scribitur, amica benignitas. Unde quia de vestra in nos benevolentia fiduciam jamdiu multam ipsarum exhibitione concepimus, ex præteritis futura conjicientes, de vestra ad omnes modestia per omnia bene sperantes, preces excellentiæ vestræ, quanta scimus et possumus affectione porrigimus, ut clericum vestrum et cognatum nostrum W. Foliot, quem minus benigno jamdiu perstrinxistis oculo, clementius respiciatis, et in solitam, si placet, gratiam admittatis. Satis est, si placet, quod immeritum affixistis jamdiu, et patienter omnia sustinentem humiliastis. Excessum ejus nullum fortassis, aut certe modicum, severe corripuistis, et in omnibus his filium sapienter erudistis. Unde cum jam vulneri vinum abundanter infuderitis, obsecramus ut oleum de cætero admittatis, ut clerico vestro subtracta sibi plene restituendo, et ipsum et nos, et nostra si placet, ad libitum habeatis. Valete.

EPISTOLA CCIII.

AD J. DECANUM AUGIENSEM.

GILBERTUS, Dei gratia Londoniensis episcopus, J. decano de Augy, salutem.

Audivimus et pro certo accepimus, quod quidam sacerdotes sive diaconi de decanatu vestro, sprete penitus et abjecta admonitione nostra, interdicta sibi feminarum consortia nequaquam devitant, sed assueta concubinarum suarum contubernia tam impudenter adhuc etiam quam irreverenter fovent et frequentant. Unde ne patientia nostra, quam tanto sunt abusi tempore, trahatur ad consensum, per præsentia vobis scripta in vi obedientiæ præcipiendo mandamus, quatenus omnes prædicti ordinis personas in vestro decanatu constitutas, quæ tam infami societate et familiaritate, tam illicite irretitæ noscuntur, et adhuc illaqueatæ, auctoritate Dei et nostra a sacerdotali et a levitico suspendatis officio, et tan-

A diu suspensos teneatis, donec condigna satisfactione restitutionis gratiam a nobis obtinnerint. Valete.

EPISTOLA CCIV.

AD CESTRENSEM EPISCOPUM.

Dominus Londoniensis domino Cestrensi, salutis gaudium, et cum omni hilaritate promptæ devotionis obsequium.

Quos nobis, domine, reddit natura conjunctos, non sinit a nobis ratio charitatis esse disjunctos. Unde est ut eorum negotiis, quantum cum Deo et justitia possumus, nos conveniat intendere, et quo nostra diligentia ad optatum perducere debeant effectum, modis omnibus laborare. Quoniam igitur sæpius experimento vestri gratia didicimus quid apud benevolentiam vestram in nostris et nostrorum negotiis efficere possimus, certa quodammodo spes nobis promittitur ex præterito, quod innata vobis liberalitas refrigerare nesciat in futuro. Devotissimas itaque litteras preces vestras, charissime frater et domine, affectu quo solebatis, si placet, accipite, et in R. cognato nostro qui sanctitati vestræ, sicut audivimus, ad Ecclesiam de Idlesham præsentatus est, ipsam sibi conferendo, non remorata munus institutionis quod petimus adimplete. Nostis namque quantæ soleant in talibus occasiones ex mora reperiri, quæ præsuli plerumque auctoritatem instituendi adimant, et ne instituendus beneficio quod sibi juste conferri potuisset gaudeat, iniqua quorundam calliditate præpediant. Divina ergo misericordia viscera pietatis vestræ commoveat, quæ nobis est ad vos dilectio simul et devotio; in cumulum charitatis accedat, quatenus præfatum R. in præscripto negotio dignemini promovere, et ob indultam sibi gratiam tam nos quam cæteros amicos suos vestris velitis obsequiis arctius obligare. Valere vos optamus in Domino, charissime.

EPISTOLA CCV.

AD HILARIUM CICESTRENSEM EPISCOPUM.

Venerabili domino fratrique charissimo HILARIO Cicestrensi Dei gratia episcopo, frater G. Londoniensis Ecclesiæ minister, salutem et sinceræ dilectionis affectum.

Quod in causa Joannis cognitoris partes sustinimus, obedientia fuit. Quod pro eo adversus abbatem de Geresten pronuntiavimus, juris et legum observantia fuit. Quod citra conscientiam vestram per officialem vestrum, decanum videlicet de Beddig', sententiam executioni mandaverim, temporis procul dubio necessitas effecit. Eramus enim nos sicut et vos, ex mandato domini regis prociuncti ad peregrinandum, proxima quarta feria post latam sententiam apud Duur' ex conducto conventuri, et inde ad dominum papam, quam citius profecturi. Unde ne protracta in longum negotia occasione protectionis vestræ in dispendium pauperis clerici differrentur ulterius, decano vestro, qui in ipso tunc temporis opportunus advenit, nos cum multa quidem confidentia dilectionis vestræ, auctoritate sedis apostolicæ hujus rei executionem injunximus, in

quo, si mansuetudo vestra adversum eam aliquatenus exasperata est, hanc nobis pro reverentia domini papæ veniam dari, ipsumque in gradum et gratiam pristinam restitui quanta possumus devotione supplicamus, ne in nostram, quod absit! confusionem desitutus, de vestra, quod absit! benevolentia nos minus soliti sperare compellat; peteremus adhuc instantius, et preces precibus accumularemus attentius, nisi quia quoddam quasi diffidentis animi iudicium hoc est, et de fraternâ charitate minus præsumendis. Valete.

EPISTOLA CCVI.

AD HUGONEM DUNELMENSEM EPISCOPUM.

Venerabili domino fratrique charissimo, H. Dunelmensi Dei gratia episcopo, frater G. Londoniensis Ecclesiæ minister, salutem et sinceræ charitatis affectum.

Usu celeberrimum esse solet, ut quoties honesta deponit occasio, cum obtinendi fiducia his de quorum dilectione spes nobis est uberior, affectuosas preces porrigamus. Cum itaque amicis nostris et his præcipue quos naturæ nobis unit ratio, in suis negotiis deesse, nec debemus nec possumus, de strenuitate vestra magis quam de merito confidentes, vestram attentius exoramus benignitatem, quatenus quod in propectu vestrorum scilicet W. et H. laudabiliter cepistis, feliciori fine consummetis, ut apud vos preces nostras sibi profuisse sentiant, et nos gratiarum debitores, ipsos autem servitii habeatis. Valete.

EPISTOLA CCVII.

AD BARTHOLOMÆUM EXONIENSEM EPISCOPUM.

Venerabili domino fratrique charissimo B. Exoniensi Dei gratia episcopo, frater G. Londoniensis Ecclesiæ minister, salutem et debitum fraternæ charitatis obsequium.

Amicis nostris et benevolis negare non possumus, quin apud hos de quorum in nos charitate confidimus ipsorum vel suorum id exigente necessitate supplicemus. Unde quia presentium lator amicorum rostrorum familiaris et amicus est, dilectæ nobis in Domino benevolentiae vestræ preces benigne porrigimus, quatenus ipsis negotium, quod penes vos est, quantum permittit æquitas promoveatis, et ejus providendo indemnitati ipsum vobis obnoxium servitio et nos gratiæ debitores efficiatis. Valere vos optamus in Domino, Pater in Christo charissime.

EPISTOLA CCVIII.

AD ROBERTUM OXENFORDENSEM ARCHIDIACONUM, POSTEA HEREF. EPISCOPUM.

G. Dei gratia Londoniensis episcopus, R. Oxenfordensi archidiacono, salutis gaudium, et quem naturæ gratia superaddidit affectum.

Multorum prece commonitus benevolentiae vestrae preces offero, ne a pactis, quæ inter vos et magistrum Adam de Longa villa firmata sunt, quocumque suadente vos aliquatenus aut interpellante recedatis, sed ecclesiam quam ejus nomine annua ut asserit pensione tenetis, ipse in manu vestra habeatis, ne si per vos aliter in illam irrepsit, post vestram,

A Domino donante, promotionem aut ad humilioris vitæ studio, inspirante Domino, translationem, aut diem forte quem nullus evadet extremum ipsum rem suam nancisci denuo suis, ut fieri assolet, implicata difficultas impediatur. Quia vero quod æquum est vos libenter observare non ambigo, preces una cum obtinendi fiducia porrigo quatenus quod eratis me non supplicante facturus, oblati a me precibus compleatis alacrius. Valere vos in Domino optamus.

EPISTOLA CCIX.

AD EUNDEM.

GILBERTUS, Dei gratia Londoniensis episcopus, R. Oxenfordensi archidiacono, multiplicem ex accepta consolatione gratiarum actionem.

B Multis curarum oppressus operibus, quid amico rescribam promptum non habeo, nisi propheticum illud solummodo, quod cum sæpe decantaverim, nunc in amaritudine positus experiri compellor ut dicam: *Tota die verecundia mea coram me est, et confusio faciei meæ cooperuit me (Psalm. xliii).* Spectaculum factus sum mundo et hominibus (*I Cor. iv*) quia fortiter afflixi me inimicus (*Psalm. xli*): *manus Domini tetigit me (Job xix)*, quæ me multum elevans tandem graviter allisit me. Ad miseriarum accedit cumulum quod in promptu non est unde queat expeiri vel sperari remedium. Mare mihi clausum est et portus omnes circumquaque prohibiti. Inter amicos et notos commemorari mors mihi est; alia his elongari penitus impossibile. Unde nuntium ad dominum regem quanta potui festinatione transmisimus, ut impetrata transfretandi licentia dominum papam adeam et penes eum causam meam vel defendam si possibile est, vel inflicto vulnere, si sic est, ab eo medicamenta requiram. Vestrum vero plurimum exopto colloquium, obsecrans ut Sabbato Pentecostes vestri copiam Londoniæ habeam, ut quid mihi in conventu illo expediat vestro fratrumque meorum consilio instructus intelligam. Valere vos exopto, charissime!

EPISTOLA CCX.

AD ROBERTUM HEREFORDIENSEM ELECTUM.

GILBERTUS, Dei gratia Londoniensis episcopus, dilectis in Domino sibi Roberto eadem gratia Herefordiensi electo, totique ejusdem Ecclesiæ capitulo, salutem.

Quæ ad pacem Ecclesiæ stabilendam seu tutius muniendam pertinere dignoscimus, iis diligentius assensum dare, et ut in perpetuum valitura permaneant, hæc scriptis et munimentis aliis roborare charitate id procul dubio suggerente debemus. Ea propter fraternitati vestræ præsentis scripto notificamus causam, quæ inter venerabilem fratrem nostrum Rogerum priorem Malvernæ, et Rogerum sacerdotem de Lenhale super ecclesiam de Lenhale diu ventilata est, et ob varios eventus rerum tractata plurimum, super qua mandatum apostolicum accepimus, ut ei aut finem amicabili compositione imponeremus, aut ipsam auditis utrinque partibus, canonico fine decideremus, in præsentia vestra hoc

tandem conquiescisse, et finem paci congruum accepisse. Prædictus siquidem Rogerus de Lenhale jus ecclesiæ de Malvernia in sæpedita ecclesia de Lenhale recognoscens, ipsam in manu nostra resignavit, et priorem ecclesiæ de Malvernia per manum nostram apostolica auctoritate eadem investiri concessit. Quo debita solemnitate peracto, prior totius capituli sui assensu eandem ecclesiam ipsi Rogero per manum nostram apostolica interveniente auctoritate, annua dimidiæ marcæ pensione in Pascha solvenda tota vita sua tenendam concessit. Hoc etiam in charitatis augmentum totius capituli sui conventui annuens, ut cum prædictus Rogerus aut vita decesserit, aut se ad frugem melioris vitæ transtulerit, Walterus presbyter de Daubo, qui in eadem ecclesia nomine Rogeri aliquandiu ministravit, in eadem nomine prioris et ecclesiæ de Malvernia ministret, et usque vel decesserit vel sæculari vitæ renuntiaverit, annua marcæ unius pensione in Pascha solvendæ annuatim perpetuus in ea vicarius perseveret. Nominato vero Waltero vel obeunte, vel se ad religionis habitum transferente, ecclesia de Lenhale cum omni integritate sua Malvernensis Ecclesiæ bonis accrescat, ipsamque Malvernensem Ecclesiam de cætero plene possideat. Quod quia salvo jure Herefordiensis Ecclesiæ ratum inconculsumque manere decernimus, scripti presentis adnotatione et sigilli nostri appositione confirmamus. His testibus, Roberto de Broi, Mauricio de Sabricetwde, Rogero de Herefordia, Ricardo de Salesberia, Ludovico, Waltero elemosynario, magistro Willelmo de Bernes, Hugone capellano de Hedam, Samsone clerico prioris, Reginaldo camerario, Waltero Foliot, Ricardo Brudle, Jocelino, Alano.

EPISTOLA CCXI.

AD EUNDEM.

GILBERTUS, gratia Dei Londoniensis episcopus, venerabili fratri dominoque charissimo R. Herefordiensis Ecclesiæ eadem gratia electo, salutem et optatos in Domino semper ad vota successus.

Verborum facile suadeat paucitas, cum ad exaudiendum prona est ipsius ad quem scribitur amica benignitas. Inde est quod dilectæ nobis in Domino benevolentiae vestrae preces affectuose porrigimus, ut ecclesiam de Lideberi amore Dei nostræque petitionis intuitu, ob sedem episcopalem quam jamdiu obtinuit, et ob sanctorum episcoporum reverentiam, quorum ibidem corpora requiescunt, tam in capite quam in capellis ad eam pertinentibus in ea conservetis integritate, qua tam nostro quam decessorum nostrorum tempore stabilita fuisse dignoscitur, ut cum nostras in hoc preces exaudieritis, Deum inde vobis propitium et nos vobis amplioris gratiæ debitores habeatis.

EPISTOLA CCXII.

AD EUNDEM.

Præfatio ad Comment. in Cantica canticorum.

Dominus et amico suo charissimo ROBERTO DEI gratia Herefordiensis episcopus, frater GILBERTUS, Lon-

doniensis Ecclesiæ minister, humiliter in his exerceri quæ Dei sunt, et in iisdem sine beatissimo consummari.

Ne tunc, domine, jussionis vana mihi aut vili videretur auctoritas, tibi illico direxi librum quem postulasti; librum siquidem, quem in Cantica canticorum, juvante Domino, nuper edidi, etc. Vide *Opera exegetica Gilberti, inter Patrologia tomis proxime edendos.* EDIT. PATR.

EPISTOLA CCXIII.

AD EUNDEM.

Venerabili fratri R. Herefordiensis Dei gratia episcopo, frater G. Londoniensis Ecclesiæ minister, salutem.

Si verba postulavimus, satisfactum est, si rem non adeo. Verum quod tam honorifice, quod tam eleganti repulsa, vota nostra reprobastis, vobis et notariis vestris quantas debemus gratias referimus, ipsas, annuente Domino, cum res erit gratiarum actiones relaturi. Quod autem preces nostras quas pro dejectorum nostrorum restitutione vestrae porreximus fraternitati, juxta intelligentiam vestram nequaquam admittendas scribitis, ne in Ecclesiam Dei et sacros canones graviter, quod absit! committatis, non satis admirari sufficimus. Cum prima hæc sint tam divini quam humani juris elementa, nulli permissum esse sibi jus dicere, vi pulsos ad omnem causam debere restitui, prædonibus etiam violentisque possessoribus adversus veros dominos per interdictum subveniri, et multa in hunc modum quæ leges affirmant, confirmant decreta et optima utrorumque interpret consuetudo commendat, quæ licet in nostram fortasse dissimulentur injuriam, vestram tamen prudentiam scimus non ignorare. Nunc vero quia nihil quod amico possitis concedere, nobis, ut vestra conclusit oratio, vultis illatenus negare, quod nec inimico negandum est, diem videlicet, locum, et audientiam dejectis nostris petimus exhiberi.

EPISTOLA CCXIV.

AD EUNDEM.

Dominus Londoniensis domino Herefordiensis, salutem et debitum veræ dilectionis affectum.

Vereor ad amicum molestus precator accedere, et ab eo quidquam unde vel in modico moveatur exigere. Verum cum digne commendabilem illam vestrae mentis attendo modestiam, spem mente concipio, ut benigne sustineatis amicum, etsi magna petentem, vos tamen ad petitiones ejusmodi sibi offerendas et cum Dominus opportunitatem dederit, ab ipso alacriter exaudiendas, ipsa precis audacia provocantem. Quorundam relatione didici Radulphum de Lideberi, clericum vestrum id habere mentis et propositi, ut præbendam quam habet in ecclesia de Herefordia, in manu vestra resignare desideret, si spem tamen habuerit ut eam in Henricum nepotem meum conferre benevolentia vestra placuerit. Hoc itaque est quod postulo, quod in affectionis experimentum et charitatis augmentum

nohis exhiberi desidero. Quod si vobis in aliquo molestum intellexero, ab ipsa prorsus postulatione recedo. Valeat dominus et amicus in Christo charissimus.

Quidquid in hoc mundo constat esse felicius, et in futuro præstantius, sincere postulatio voluntatis effectu debet prosequente compleri, ut devotionis sinceritas laudabiliter enitescat, et res postulata vires indubitanter assumat. Quocirca excellentiæ vestræ gratias et gratiarum actiones.

Quantum mei cordis affectus de vestra dilectione delectetur, nec vox nec scribentis calamus potest intimare. Tamen ut multa paucis concludam, scitote me pro posse meo vestræ semper voluntati esse obnoxium. Hoc utique vestra probabit dilectio, cum aliquid a me fieri optaverit.

EPISTOLA CCXV.

AD EPISCOPOS HEREFORDIENSEM ET WIGORNIENSEM.

Sibi dilectis electis domino Herefordiensi, et Wigornensi, frater G. Londoniensis Ecclesiæ minister, salutis gaudium, et si quem potest in Domino charitas officiosa, famulatum.

Vestram acimus non latere prudentiam, quod facili sæpius ignorantia juris ignorantiam parit, et frequenter in controversiis cum minus apparet quid actum sit, quid etiam sit statnendum non instructus iudex minus plene intelligit. Inde est quod de causa quæ inter Robertum et Henricum ad præsens vertitur, præsentī vobis scripto notificamus, quod vidimus, quod audivimus, imo quod ipsi formam legum secuti et canonum multis nobis assistentibus et iudicavimus, et iudicatum executioni legitimæ mandare curavimus. Defuncto namque Ricardo, qui in ecclesia de Witeburne multo jam tempore ministraverat, nos ipsum usque ad diem decessionis suæ, personatum ipsius ecclesiæ habuisse, sive in ea nomine ministrasse existimantes, a Roberto fraude tacendi quod noverat circumventi, multaque precum ejus instantia tandem moti, ecclesiam jam dictam ipsi concessimus, ipsumque ea etsi juris alieni conscientiam habentem, hoc quidem ignorantes investivimus. Quo agnito, Walterus de Broward Herefordiensis Ecclesiæ canonicus, præsentiam nostram adiens, ecclesiam jam dictam sui juris esse, ipsamque sibi a prædecessore nostro bonæ memoriæ Roberto episcopo canonice concessam fuisse asseruit, postulans sibi ad id probandum diem constitui, et Robertum super hoc in jus evocari. Statuto itaque die duobus Lidebirie convocatis capitulis, Walterus, præsentē Roberto, ecclesiam de Witeburne, ut jam dictum est, sibi de jure competere asseruit, et ipsam a Richewardo in manu domini Roberti episcopi refutatam, in se canonice ab eodem episcopo collatam fuisse, sufficienti idoneorum testium copia juramentis super hoc corporaliter exhibitis, plenissime comprobavit. Unde ecclesiam eandem Roberto abjudicatam, jam dicto Waltero ex sententia restituvimus, et post ipsius decessum, ipsam alii

A eundem clerico vestro Rogero concessimus, quam ab eo postmodum refutatam, latori præsentium Henrico, omni vacantem persona et possessore donavimus. Quorum quis in jure potior habendus sit, discernentis e facili qui jure celebrata, an qui donatione nititur, ex sententia retractata. Valere vos optamus in Domino, fratres in Christo charissimi.

EPISTOLA CCXVI.

AD G. DECANUM ET CAPIT. HEREFORDIÆ.

G. Dei gratia Londoniensis episcopus dilectis sibi in Domino G. Herefordiensi decano totique capitulo, salutem et sinceræ dilectionis affectum.

Usu celebre est, ut a quibus repulsa non metuitur, et de quorum charitate fides habetur certior, his cum indubitata obtinendi quæ cupimus fiducia D preces uberius offeramus. Cum itaque præteritorum exhibitio in postulandis nos tutiores efficiat, cum universis singulis affectuose rogamus, quatenus certa negotia R. Colec'... ad fidem et canonici vestri divinæ pietatis et nostræ petitionis intuitu misericorditer agatis, ut dum in scholis moratur portionis quæ cum contingit non sentiat dispendium. Pium est enim his subvenire quos amor scientiæ facit exules. Nec certe trahendum est ad consequentiam si quid impiis causis fiat extra ordinem. Gratus ut nostis fieri solet accipienti postulatum dum offertur, quam cum ab invito iudicii calculis emungit, et utinam necessitatem facienda voluntas antecedit, et coercionem mera liberalitas præveniat! C Scitis etenim quid nobis datum sit in mandatis, quod exsequi supersedimus, laboribus vestris et expensis parcere cupientes, sub spe certissima id expectantes, ut voto et necessitati jam dicti Ricardi, magis voluntate quam sententia satis fiat, quod adhuc futurum speramus preces precibus adjungentes, quatenus apud vos nostras sibi profuisse preces res ipsa declaret, et ipsum servitii nos gratiarum debitores habeatis.

EPISTOLA CCXVII.

AD EOSDEM.

G. decano et toti capitulo Herefordiensis Ecclesiæ, salutem in Domino.

Magna quadam securitate benevolentiam vestram et gratiam semper vindicamus, ideoque cum nostra seu nostrorum necessitas efflagitat amicorum, confidenter ad vos ingredimur, cum omni spe impetrandi quidquid amico potest et debet amicorum charitas indulgere. R. siquidem nepos noster, vesterque canonicus, de proposito suo et consilio nostro, per Dei gratiam studiorum causa nuper transfreturus est. Proinde dilectæ nobis et diligendæ semper in Domino universitati vestræ preces obnixè porrigimus, quatenus intuitu tam favorabilis propositi, nostræque si placet petitionis interventu, unam hanc nobis licentiam indulgeatis, sine diminutione beneficiorum præbendæ suæ, suamque interim absentiam cum sui si placet indemnitate excusam habeatis, ut et ipsum vestris devotiorem obsequiis et nos vobis pro ipso amplioris gratiæ debitores effici-

ciatis. donec valeant singuli, bene valeant et universi.

EPISTOLA CCXVIII.

AD UBTREDUM LANDAVIENSEM EPISCOPUM.

Venerabili domino fratrique in Christo charissimo UBTREDO Dei gratia [Landaviensi] episcopo, frater G. Londoniensis Ecclesiæ minister, salutem in Domino.

Veniens ad nos quædam parochiana nostra, Mathildis nomine, lacrymabili nobis sæpe questione monstravit, quod quidam Jacobus nomine, Lebrandi filius, vester natione, et nunc conversatione parochianus, qui eam solemniter, ut asserit, matrimonio et cum sacerdotali benedictione in suam accepit et duxit uxorem, ipsam postmodum absque B iudicio et conscientia Ecclesiæ, per totum jam septennium desertam, et contra fidem tori et legem Christi, tam nefarie quam irreverenter altera superducta, virili prorsus destitutam solatio, dereliquit. Super quo, ut vera vobis scribere, et certa secure significare possemus, per archidiaconum, per sacerdotem ipsius ministrum et auctorem matrimonii, per laicos etiam quamplures, graves et honestos viros, fide veri districte et diligenter inquisita, verum esse manifeste deprehendimus, quod nobis memorata Mathildis de contractis cum Jacobo nuptiis, plus lacrymis quam verbis sæpenumero persuaserat. Unde quia prædictus J. in jurisdictione vestra, et in vestro, ut dicitur, territorio apud Grenping' commoratur, fraternitati vestræ preces affectuose porrigimus, supplicantes et obsecrantes in Domino, quatenus illum ob reverentiam Dei, canonica severitate corripatis, et ut uxori debitum provideat, et præstet subsidium, ecclesiasticæ distributioni iustitiæ compellatis, ut sciat eundem esse tam vobis quam nobis zelum legis Christi, et sentiat utrinque adversus prævaricatores ejus non desesse ultores. Valet.

EPISTOLA CCXIX.

AD NICOLAUM LANDAVIENSEM EPISCOPUM.

Venerabili domino fratrique charissimo NICOLAO Landaviensi episcopo, frater G. Londoniensis Ecclesiæ minister, salutem et debitum fraternæ charitatis obsequium.

Esse me sanum et incolumem noveris, tuumque affectuose desiderare colloquium, ut percipiam ex amici præsentia quod affectat plurimum anima solatium. Quod quia variis rerum impeditur eventibus, quod corporalis alterutro nobis absentia subtrahit, id, quæro, charitas illa suppleat, quæ nescit absentiam, quæque ipsum quem diligit, sibi semper in spiritu novit exhibere præsentem. De cætero, Willelmi filii R. prece pulsatus, benevolentia vestræ preces offerre compellor, quatenus B. clericum ipsius ad diaconatus ordinem promotum jamdiu, ad sacerdotium promovere velis. Quod amore Dei meæque petitionis intuitu complendo, et ipsum orationis obnoxium, Deo meque tibi gratiæ, ut in

A omnibus, debitorem exhibebis. Valeas in Christo, charissime.

EPISTOLA CCXX.

AD ROBERTUM LINCOLNIENSEM EPISCOPUM.

Venerabili domino fratrique charissimo R. Lincolnensi episcopo, frater G. Londoniensis Ecclesiæ minister, in senecta uberi pie Christo famulari.

Quæ sint opes loci qui dicitur Haliwelle, divulgante fama, notum forsitan habuistis. Angustus quidem locus est et exiguus, adeo ut trium agri jugerum spatio totus plene limitetur. Locum hunc inhabitant viginti sorores velatæ et consecratæ Domino, divinis jugiter insistentes laudibus, et Domino regulariter obsequentes. Temporalem his victum et vestitum ministrat ecclesia de Dunt' ipsis a præsentium latore magistro Rogero pie collata, et misericorditer a gratia vestra confirmata. Hac deducta, locus quem prædictæ sorores inhabitant, ipsis quidem ad sepulcrum, ad victum vero nullo modo sufficit. Mentem itaque vestram moveat precor illa calamitas, in quam jam dictæ sorores procul dubio casuræ sunt, si iudicii severitate, quod absit! jam dicta ecclesia fuerint destituta. Interponat itaque se pastoralis illa clementia, quæ usque in diem hanc collato beneficio Domini paruit et vestivit ancillas, ne totum ipsis quod sub cælo possident abjudicando, ipsas desolatas reddat, et omni penitus auxilio et consilio destitutas. Canonice, si placet, eis induciæ concedantur; dilationes eis legitimæ non negentur; provideatur advocati suffragium, ut pectus in vobis sentiant quantum permiserit æquitas paupertati suæ compatiens, et religionis amicum. Si causæ id exegerit arcta necessitas, transigatur potius quam ovili Domini vellus ad cutem usque judiciali sententia detrahatur. Latorem præsentium magistrum R. de Duntone fraternitati vestræ commendamus attentius, quem jam dictæ sorores in præsentem causam sub testimonio nostro procuratorem sibi constituunt, eo quod vehiculum quo subvehantur ad vos inopia præpediente non inveniunt. Valere vos optamus in Domino, frater in Christo charissime.

EPISTOLA CCXXI.

AD EUNDEM.

Venerabili domino fratrique charissimo R. Lincolnensi Dei gratia episcopo, frater G. Londoniensis Ecclesiæ minister, salutem quam sibi.

Amicus et affinis noster R. Brito, talem se exhibet, et tam strenuum in quibus potest negotiis, ut in illis necessitatibus quæ suam transcendunt facultatem, suorum videatur amicorum auxilio non indignus. Qui, largiente Domino, in cujus manu corda sunt regum (Prov. xxi), tantam in conspectu regis gratiam obtinuit, quod idem dominus noster rex baroniam Willelmi Gulafre, quæ in suam reciderat manum, cum filia et hærede ejusdem Willelmi, primogenito filio suo dotalem concessit, filiam quoque suam honorifice maritare, nobileque marito et grandi maritaggio, regia liberalitate nobilitare curavit. Qua in re et regis non inmerito laudatur

munificentia, et Patris nihilominus diligentia comprobatur. Quia qui bene meretur et qui bene remuneratur, uterque laudandus est. Superest adhuc filius alter, quem litteris erudire, quem Deo dedere, quem ecclesiastico ordini mancipare destinavit. Ad cujus promotionem quia paterna non possunt, nec debent obsequia suffragari, una post Deum spe, specialiter ad nos duos suspensus est, quod curam ejus habere, ipsique propter Deum providere debeamus. Ob hanc igitur causam mea ad vos legatione fungitur, ut gratiam quam non desperat ex se, mea tamen promptius apud vos obineat intercessionem. Pater itaque pro filio, ego pro nepote, ambo pro nostro vobis abnepote supplicamus, ut quæ paterna devotio divinis deputavit obsequiis, vestræ, si placeat, Ecclesiæ titulis ascribatur, et in hæreditatem sanctam et in ecclesiasticam familiam præstatione præsentis seu futuri promissione beneficii, asciscatur, ut sollicitudo Patris, quæ tota resedit in filio, re ipsa vel spe saltem exhilarata respiret. Quæ in re, si mea vobis improba videtur et onerosa petitio, scitote quia vobis fratrique vestro, domino Willelmo de Caineto id potius imputare debetis. Ego namque Britanniam nesciebam, Britones non noveram, R. Britonis neque notitia, neque nomen ad me pervenerat, quin vos duo illum mihi commendastis ad gratiam, multaque diligentia in amicitiam et affinitatem gentis nostræ induxistis, eaque mihi necessitudine confederastis, ut non jam improbitas æstimari debeat, sed officii magis necessitas pro ipso vestræ supplicare dilectioni. Præter hæc autem et super hæc multa mihi suggerit audacia orandi et exorandi fiducia, dominus R. de Almari, qui in hoc ipso, ut dicitur, negotio, suas ad vos partes audacter interponit, et more curialium imperioso cuncta disponit. Non enim in ea possum apud vos causa desperare, quam hinc majestas curiæ inde mea et aliorum humilitas amicorum apud vestram nititur benevolentiam in tam honesto desiderio perorare. Valete.

EPISTOLA CCXXII.

AD EUNDEN.

Venerabili domino fratrique charissimo R. Linc. Dei gratia episcopo, frater G. Londoniensis Ecclesiæ minister, salutem.

Vobis loquimur sicut et nobis, nec volunt alii secreta committi. Super causa quam nobis intimare curastis, ad præsens illud in primis occurrit, quod certam promulgastis super re incerta sententiam. Et cum de facto non constaret, pronuntiare tamen sic curastis, ac si de facto constiterit. Nam cum actioni nostræ adversarium pariat ipsa possessio, non ante sententiam solum, sed in ipso litis ingressu oportebat constare quis possideret, a quo petitor ipso quod sui dicebat juris esse, repeteret. Nunc vero Ricardo de Ambli in possessione posito, et per negotii gestorem rem sui juris esse protestante, non inter petitorum et ipsam in possessione positum, sed magis alios extra possessionem constitutos, non

A quidem cognitum, sed judicatum est. Vobis enim notionem ferre non valuit, monachorum de se vel archidiaconi vestri, vel decani, super altero nulla exhibitæ probatione confessio. Unde palam est, Ricardo de Ambli sententia sic lata quid officiat, cum aliis res inter alios judicata non noceat. Advertat itaque prudentia vestra, quid domino papæ scripseritis, cui ut litterarum ipsius tenor exprimit, causam inter Rogerum et Ricardum ventilatam et judicio terminatam esse scripsistis. Quod si sic actum est, sicut factum ipsum, sic improbanus et scriptum. Si vero non, sed ut frequenter humanus caligat oculus, negotium secus quam gestum aut scriptum est, dominus papa concepit, videtur nobis illorum admittenda exceptio, qui precis oblatæ et suggestæ rei arguunt falsitatem. Hæc enim non quæcunque falsitas est, sed quæ totam perimit causæ substantiam. Quæ ipsi possessionem admittit, qui nunquam citatus est. Adversus quem nec actitatum in jure, nec unquam pronuntiatum est. Inter quem et Rogerum latam sententiam qui confirmat, cum hæc nulla sit, nullam confirmare videtur. Mandatum vero domini papæ si differtis, non omittitis, nec frustratoria dilatio illa habenda est, quæ veritate simul et ratione subnixæ est. Erit itaque, si placet, domino papæ rescribendum, et ipsius mandatum, quæ causa quantaque ratione distuleritis, aperiendum. Quod cum ex suggestis pendeat, ipsis derogata fide diffrendum esse nullus ignorat. Pauperi vero extraordinarie et in alterius injuriam subvenire, non æquum ducimus, cum super hoc divina lex habeat: « Non misereberis pauperis in judicio, » et judicem calamitosis illacrymari non debere, Justinianus ipso decernat. Valete, et saniores præferre sententiam non omittite.

EPISTOLA CCXXIII.

AD R. LINCOLNIENSEM ARCHIDIACONUM.

G. Dei gratia Londoniensis episcopus, R. Lincolnensi archidiacono, salutem.

Diem tibi ad causam quæ inter te et R. sacerdotem vertitur, apostolica auctoritate constituimus, ad quem ob purgandam domino papæ sanctæque Romanæ Ecclesiæ a te, ut dicitur, illatam injuriam, nec venisti, nec responsalem mittere procurasti.

D Diem igitur alterum et hunc peremptorium constituimus, mandantes et apostolica auctoritate tibi iungentes, ut nisi jam dictum R. sacerdotem a sententia interdicti prorsus absolutum susceperis, et ei obvolutiones Ecclesiæ suæ dum appellationem suam ad dominum papam subtractas, prosequeretur, plene reddi feceris, tuam nobis præsentiam xi Kalendas Septembris apud Windeleshores exhibeas, ut mandato domini papæ super memorata causa prout jus dictabit obedias. Qui vero excipienti incumbit id probare quod excipit, si pronuntiationem illam quam contra statuta canonum adversum me in domini papæ et sanctæ Romanæ Ecclesiæ injuriam, dominus Cantuariensis instituit, me tenere et ligare et ab apostolici executione mandati repellere.

et præpedire intendis, cum exceptionem hanc in A
jure probaveris, nostrum tunc recte iudicium de-
clinabis. Vale.

EPISTOLA CCXXIV.

AD PAROCHIANOS LONDONIENSIS ECCLESIE.

G. Dei gratia Londoniensis Ecclesie minister,
dilectis sibi in Domino universis ejusdem Ecclesie pa-
rochianis et filiis, salutem, gratiam et benedictionem.

Est apud nos in castello de Storteford locus reve-
rendæ venustatis, locus olim sanctuario Dei et divi-
nis deputatus obsequiis, quem etiam nunc post
ruinas, ob ea quæ ibi crebro apparuisse dicuntur
sanctitatis indicia, fidelis populus cum multa venerat-
ur et reveretur devotione. Nos igitur ob amorem
Dei et sacri loci reverentiam, in statum pristinum
rem reformare, et basilicam ibidem Deo reedificare
disponentes, propositum pii laboris charitati ve-
stræ denuntiamus, optantes ut et vos pii nobiscum
operis adjuutores, debique fructus et dignæ mer-
cedis simul participes efficiamus. Hinc est quod
vestram oramus et exhortamur in Domino dile-
ctionem, quatenus pietatis intuitu sancto operi huic
opem et operam impendatis, et ut ad complementum
incepta perveniant, ad reparandam domum Domini
qui omnia contulit, aliqua de bonis vestris confera-
tis, scituris his qui nostris in hoc monitis acquie-
scent, quod orationum et beneficiorum sanctæ
Londoniensis Ecclesie, eos specialiter constituimus
esse participes. Pœnitentibus autem et peccata confes-
sis, qui in opus hoc ad honorem Dei aliquid
charitative impertierint, de injuncta sibi satisfac-
tione misericorditer viginti dies relaxamus.

EPISTOLA CCXXV.

AD EOSDEM.

GILBERTUS, Dei gratia Londoniensis episcopus,
dilectis sibi in Domino universis sanctæ Londonien-
sis Ecclesie parochianis et filiis, salutem, gratiam
et benedictionem.

Particeps mercedis efficitur, quicumque se bono-
rum operum adiutorem exhibet, nec irremuneratum
relinquitur, quod in pietatis usus fuerit intuitu pau-
perum erogatum, dicente Domino: *Quod uni ex
minimis meis fecistis, mihi fecistis* (Matth. xxv). Inde
est quod universitatem vestram monemus attentius,
et rogamus, et in peccatorum vestrorum remis-
sionem injungimus, quatenus ad construendum
xenodochium, quod in honore Dei et beati Thomæ
martyris Londoniæ apud Suthwercam, ad pauperum
et infirmorum susceptionem pariter et sustentatio-
nem de novo est inchoatum, amore Dei et pietatis
intuitu, manum auxilii misericorditer porrigatis,
et ad pauperum refectionem pariter et sustentatio-
nem de concessis vobis a Domino facultatibus
impertientes, Deum ob collatam sibi in membris
suis gratiam, remuneratorem et vitæ vobis æternæ
largitorem habeatis, et orationum et beneficiorum
quæ in jam dicto sicut xenodochio participes vos
constituatis. Omnibus vero qui ad prædictum pie-
tatis opus manum auxilii porrexerint, et ejusdem

loci pauperibus vel in modico subvenerint, de
Domini confisi misericordia viginti de injuncta sibi
pœnitentia dies relaxamus, et orationum et beno-
ficiorum quæ in nostra sicut Ecclesia eos participes
esse concedimus.

EPISTOLA CCXXVI.

AD EOSDEM.

GILBERTUS, Dei gratia Londoniensis episcopus, dile-
ctis sibi in Domino archidiaconis, decanis, et omni-
bus qui in episcopatu Londoniæ consistunt, eccle-
siarum prælatis, salutem, gratiam et benedictionem.

Officii nostri nos admonet et hortatur auctori-
tas, ut beneficia quæ in nostra diocesi fidelium
devotio pauperibus Christi in charitate contulit, aut
collatura est, in posterum ipsis confirmare et per-
petua stabilitate communire curemus. Proinde
ecclesiam de Standona cum pertinentiis suis, et
ecclesiam de Chingeshoria cum suis itidem perti-
nentis, et ecclesiam de Chauria cum omnibus ad
ipsam pertinentibus, quas earumdem fundatores
et advocati ecclesiarum, sicut ex authenticis eorum
scriptis agnovimus, Deo et sancto Joanni, et fratri-
bus Hospitalis Jerusalem, pro sua et suorum salute,
in perpetuam destinantur elemosynam, concessa
nobis a Domino episcopali auctoritate, memora-
tis fratribus Hospitalis concedimus, et sub hujus
scripti testimonio in perpetuum confirmamus. His
testibus, Hugone decano Sancti Pauli, Ricardo ar-
chidiacono Oxenefordie, Ricardo archidiacono
Colecestrie, magistro Nicolao, magistro Waltero,
Willelmo de Norhala, canonicis Sancti Pauli,
Willelmo de Piro, Henrico Pictore, Roberto Hus-
charle, Roberto de Fuleham, Alfredo Bechet,
Willelmo de Ver, et cæteris. Valeat.

EPISTOLA CCXXVII.

AD EOSDEM.

GILBERTUS, Dei gratia [Londoniensis] episcopus,
dilectis sibi in Domino universis ejusdem Ecclesie
parochianis et filiis, salutem, gratiam et benedi-
ctionem.

Qui Domino devotius obsequuntur digne ab ipsis
fidelibus in petitionibus suis justis exaudiuntur.
Inde est quod universitati vestræ præsentis scripto
notificamus, nos dilectis fratribus monachis scilicet
Cluniaci et nominatim priori de Rumuli et ipsius
loci conventui omnes ecclesias et ecclesiastica bene-
ficia concessisse, quæ sibi a comite Eustachio donata
et concessa sunt, et ipsius charta quam inspeximus
confirmata et ab ipsis multis jam ante annorum
curriculis quiete et inconcusse possessa. In his
vero hæc ex propriis duximus exprimenda vocabu-
lis, ecclesiam de Stanford, et ecclesiam de Angra,
ecclesiam de Lahaphara, et Lagaphara parva,
ecclesiam de Cogeshala, ecclesiam de Orteia, ec-
clesiam de Langahou, et quidquid ad eas pertinet
in capellis, in terris, et decimis, videlicet de por-
cis, de agnis, de lana, de caseis, de vitulis, de
pullis equorum, de pasnagio, de feno et lino. Has
jam dictas ecclesias cum omnibus ad ipsas perti-

nentibus, jam dictis fratribus concedimus, et episcopali auctoritate confirmamus, et hanc donationem nostram sigilli nostri attestazione corroboramus. Testibus Ricardo archidiacono . . .

EPISTOLA CCXXVIII.

AD EOSDEM.

GILBERTUS, Dei gratia Londoniensis episcopus, dilectis sibi in Domino, universis sanctæ Londoniensis Ecclesiæ parochianis et filiis, salutem, gratiam et benedictionem.

Cogit nos charitatis affectio pro indigentia fratrum de Priten' universitati vestræ supplicare. Qui nimirum iacobitam ecclesiæ suæ fabricam suis non sufficiunt impendiis consummare, nisi devotio fidelium votis eorum misericorditer subveniat. Proinde laiores præsentium nuntios et procuratores paupertatis suæ, sub nostrarum testimonio litterarum vobis commendamus ad gratiam, orantes et exhortantes in Domino, et in remissionem vobis injungentes delictorum, quatenus eos pro comuni fratrum necessitate pie laborantes, propter Deum benigne suscipiatis et de collatis vobis a Domino facultatibus, ad exstruendam prædictæ fabricæ ecclesiæ, eleemosynas et beneficia vestra misericorditer impendatis, ut domum Domini in terris ædificando, permansura vobis ædificia præparetis in cælo. Clericis vero, presbyteris et personis ecclesiarum, per nostram constitutis parochiam specialiter supplicamus, ut illis suscipiendis, exhibendis et honorandis sollicitius intendant, et ad commissas sibi plebes devota eos exoracione commendent. Scituris omnibus, qui eos hospitio seu beneficio quolibet honoraverint, quod eos orationum et beneficiorum sanctæ Londoniensis Ecclesiæ constituimus fore participes. Pœnitentibus etiam et peccatis confessis, sub nostro scilicet constitutis sacerdotio, quia majori indigent remedio, majorem adjicimus misericordiam, et si in septem annorum vel supra pœnitentia fuerint, viginti, si minus, decem, de adjuncta sibi satisfactione dies relaxamus.

EPISTOLA CCXXIX.

AD EOSDEM.

G., Dei gratia Londoniensis episcopus, dilectis sibi in Domino universis ejusdem Ecclesiæ parochianis et filiis, salutem, gratiam et benedictionem.

Quo magis, dilectissimi, inter charitatis opera lucet eleemosynarum largitio, eo propensius earum erogationi insistere vos exhortamur in Domino. Si enim opera misericordiæ in hujus sæculi peregrinatione seminiatis, multiplicato fructu, vitam æternam metetis in cælo. Unde rogamus et monemus vos attentius, quatenus inopiæ fratrum de Cwella qui pro defectis facultatibus Ecclesiam suæ religioni congruam construere non possunt, compatiamini, et pia ducti compassione, eis optata subsidia æternorum intuitu præbeat, ut vestris adjuti suffragiis oratorio sibi constructo ferventissime legi mandatorum Dei inhærere possint. Nos vero his qui de suis facultatibus eidem loco quid-

am largiti fuerint, de Dei misericordia confisi, de eorum pœnitentia decem dies relaxamus, et bonorum omnium quæ in nostra sunt Ecclesia, adjacente Domino, eos participes constituimus. Valete.

EPISTOLA CCXXX.

AD EOSDEM.

G., Dei gratia Londoniensis episcopus, dilectis sibi in Domino episcopis, archidiaconis, clericis, per episcopatum Londoniensem constitutis, salutem, gratiam et benedictionem.

Quæ in usus pauperum misericorditer impenduntur, donantibus non pereunt, imo ad æternæ retributionis gloriam conservantur, et temporalium pia largitio vitam æternam operatur. Unde nos de salutis vestræ profectu solliciti, propensius charitatem vestram exhortamur in Domino, quatenus piis operationibus providere indulgeatis, ut de bonis vobis, permittente Domino, concessis, dum tempus habetis, dum licet, æternitatis fructum mereamini. Nos itaque ancillarum Christi, Deo et beatissimæ Mariæ de Northantonia jugiter servientium, egestati compatiens, rogamus, monemus, et vos exhortamur in Domino ut, cum ad vos venerint suam proponentes miseriam, eas benignius suscipiatis, et de facultatumstrarum copia earum relevetis inopiam, ut bonorum quæ tam in nostra quam sua sunt Ecclesia auctore Domino sitis participes. Valete.

EPISTOLA CCXXXI.

AD EOSDEM.

G., Dei gratia Londoniensis episcopus, dilectis sibi in Domino archidiaconis, decanis, et omnibus, qui in episcopatu Londoniensi consistunt, ecclesiarum prælati, salutem, gratiam et benedictionem.

Noverit dilectio vestra, quod R. clericus de Ardel', ecclesiam de Ardel' in manus nostras tam spontaneæ quam absolute resignavit, seque quod nihil in ea juris ulterius esset repetiturus, interposita juramenti religione, obligavit. Quam nos petitione quidem et præsentatione advocati, dilecti nostro G. de Sur', cum omni integritate sua perpetuo habendam et canonice possidendam concessimus, ipsumque in ea personam debita solemnitate constituimus. Quod quia in dubium nolumus, aut in irritum de cætero posse revocari, præsentis scripto universitati vestræ id notificare, et episcopali auctoritate confirmare curavimus. His testibus....

EPISTOLA CCXXXII.

AD EOSDEM.

G., Dei gratia Londoniensis episcopus, omnibus sanctæ matris Ecclesiæ ministris, nec non et universis Christianæ professionis in sua diocesi commorantibus, ad quos literæ istæ pervenerint, compassionis abundare visceribus.

Capiat in nobis, fratres charissimi, evangelicæ doctrinæ frequens et quotidiana admonitio, qua instruimur et informamur opis indigentibus manus misericordiæ alacriter porrigere, et oppressorum necessitatibus cæli remedio occurrendo subvenire.

Scriptum namque est : *Alter alterius onera portate, et sic adimplebimus legem Christi (Galat. vi).* Et iterum : *Hilarem datorem diligit Deus (II Cor. ix).* Et alibi : *Date et dabitur vobis (Luc. vi).* Et iterum : *Charitas operit multitudinem peccatorum (I Petr. iv).* Et alibi : *Charitas nunquam excedit (I Cor. xiii).* Nos igitur ecclesie Sancte Virginis N. et fratribus in Christi servitio ibidem commorantibus alacriter succurrentes, unusquisque juxta facultatis suæ mensuram imminenti paupertatis aggravationem misericorditer supportemus, et ad reedificationem ecclesie, ignis incendio vastatæ, aliquid de beneficiis nobis a Deo collatis, cum cordis hilaritate largiamur. Omnibus autem qui ad præfatum opus misericordie, ea devotionis intentione qua oportet manum auxiliatricem porrexerint, de Domini gratia et meritis tantæ virginis confisi, duodecim dies de penitentia sua relaxamus, et honorum omnium quæ in nostra sunt Ecclesia, adjuvante Domino, eos participes constituimus.

EPISTOLA CCXXXIII.

AD EOSDEM.

G., Dei gratia Londoniensis episcopus, dilectis sibi in Domino archidiaconis, decanis, et omnibus Ecclesiarum personis per episcopatum Londoniensem constitutis, salutem, gratiam et benedictionem.

Quæ religiosis locis divinæ contemplationis intuitu collata sunt, episcopali justum est auctoritate firmari, ne valeant in posterum rerum facili mobilitate convelli. Inde est quod authenticum instrumentum illustris viri Walteri filii Roberti sequentes, quo ecclesie Sancti Neoti et monachis ibi Deo servientibus, jus divini et advocacy quod habuerat in ecclesia de Wimbis et in ecclesia Sancti Andree infra muros Londoniæ confirmat; nos quoque id ipsum eisdem concedimus, et ut sibi de cætero firmiter et inconvulsum permaneat, episcopali eis auctoritate et sigilli nostri attestatione corroboramus. Valete.

EPISTOLA CCXXXIV.

AD EOSDEM.

G., Dei gratia Londoniensis episcopus, dilectis sibi in Domino universis ejusdem Ecclesie parochianis et filiis, salutem, gratiam et benedictionem.

Vestram spero, charissimi, non latere prudentiam, quam sit utilis multorumque necessaria commodis hospitalis illa domus quæ prope ecclesiam Beati Bartholomæi Londoniæ constructa est, in qua misericordie deservitur operibus; nos pauperum Christi necessitas assidue multo studio, multaue diligentia sublevatur. Quæ cum actis retro temporibus studiis hujusmodi vigilanter intenderit, ad præsens tamen Domino gratiam ministrante, solito clarius enitescit, et studio bonorum fratrum, Ade videlicet, G. et G. qui se nuper ejusdem domus pro Christo mancipaverunt et subdiderunt obsequiis, uberius solito pietatis opera omnibus ad eam divertentibus exhibendo, odoris boni fragrantia jamjam plenius ex se circumquaque diffundit. Illi nimirum

cum jam sibi gloria plurimum arderet, et rerum temporalium affluentia satis responderet ad votum, totum quod sibi vel jure patrimonii a parentibus obvenerat, vel quod laboribus anxii terra marique perquisierant pro Christo relinquentes, id ipsum in usus Christi pauperum contulerunt, et ut holocaustum Domino acceptabile plenius exhiberent, pro sua seipsos eorumdem obsequiis humillimè devoverunt. Qui cibum esurientibus, potum sitientibus, nudis operimenta, fatigatis lecti lectique requiem, uberem ægrotis misericordiam sollicitè subministrantes, laboris et obsequii sui mercedem sperant et expectant a Domino, ipsam utique quam repromisit ipse diligentibus se. Quorum conversationem et opera, quia Domino placere non ambigimus, universitati vestre preces affectuose porrigimus, ut domum illam in qua Domino jugiter obsequuntur, affectuosius diligatis, et elemosynas vestras per manus illorum in commune bonum pauperum Christi fideliter erogandas sibi, vel his quos destinaverint, ad vos fidentissime committatis. Omnibus vero qui de suis facultatibus eidem domui ad opera misericordie sustentanda quidquam, inspirante Domino, largiti fuerint, de Domini misericordia confisi, de injuncta sibi penitentia 20 dies relaxamus, et orationum et honorum quæ tam in nostra quam sua sunt ecclesia, participes in hoc, fiduciam, subministrante Domino, constituimus. Valete.

EPISTOLA CCXXXV.

AD EOSDEM.

G., Dei gratia Londoniensis episcopus, dilectis sibi in Domino archidiaconis, decanis, presbyteris et omnibus ejusdem Ecclesie parochianis et filiis, salutem et omnis gratiæ plenitudinem.

Cum loca sanctorum omnium in quibus eorumdem reliquiæ sancta fidelium devotione repositæ, beatam præstolantur octavam, venerari, sublimare, et piis bonorum largitionibus reverenter ampliare oporteat, nulli dubium relinquitur, illum præcipue locum, qui in vallis Josaphat medio inter montem Sion et montem Oliveti sepulture beatæ matris Domini donatus est, et ad humanitatis ejus obsequium ab æterno provisos, summæ devotionis ejus obsequiis debere celebriter excoli, et ob ejus memoriam quæ manibus angelorum inde in cælum corporaliter etiam ut credimus erecta est, modis omnibus honorari. Agatis itaque, dilectissimi; monitis salutaribus acquiescite, et nuntios beatæ matris Domini velut ab ejus latere directos, jucunda mente suscipite, et de eorum gaudentes adventu, de his quæ vobis a Domino collata sunt, ut hilares decet datores in eorum manus confidenter reponite, quod per eos beatæ matri Domini digne mittatis, quo ejus sepulturam exornetis, et locum quem prævidit sibi filius, ejus Dominus Jesus ut ad se inde ascenderet collatis beneficiis infidelium repellendo rabiem defendatis. His vero qui nostris acquiescentes montis, in causam hanc aliquid de suo contulerint, de beatæ

matris Domini confisi patrocinio, si in pœnitentia septem vel amplius annorum sunt, 20 dies relaxamus, si pauciori tenentur numero, dies decem remittimus. Valet in Christo.

EPISTOLA CCXXXVI.

AD EOSDEM.

G., Dei gratia Londoniensis episcopus, dilectis sibi in Domino universis ejusdem Ecclesiæ parochianis et filiis, salutem, gratiam et benedictionem.

Latores hi præsentium, nuntii sunt infirmorum de Bercceram, qui per ipsos suam vobis ostendentes inopiam, devote supplicant, ut ob Dei reverentiam sibi subveniatis, et de his quæ vobis divina contulit misericordia, ad eorum sublevandam inedium beneficium aliquod prout vobis Dominus inspiraverit, impertiat. Quorum precibus nos quoque preces adjicimus, rogantes et exhortantes in Domino, ut corda vestra Christi pauperibus aperiat, et dum potestis et vobis vita superstes est, Dominum in membris suis honorando, illud ad memoriam revocetis, quod suis in fine dicturus est: *Quod uni ex minimis meis qui in me credunt fecisti, mihi fecisti* (Matth. xxv), et hoc præ oculis habendo et opere complendo, quod hic pauperibus Christi ob ejus reverentiam erogaveritis, in futura vita in centuplum recipiat (Matth. xix). Qui vero nostris acquiescendo moniti, eis in aliquo ad vitæ sustentationem pro Christo subvenerint, de ejus confisi misericordia, de injuncta sibi pœnitentia decem dies relaxamus.

EPISTOLA CCXXXVII.

AD EOSDEM.

G., Dei gratia Londoniensis episcopus, dilectis sibi in Domino archidiaconis, decanis, et omnibus in Londoniensi diœcesi constitutis ecclesiarum prælati, salutem, gratiam et benedictionem.

In luce lucerna opus non est, et cum quid sui per se natura elarescit, id testibus aut testimoniis evincere citra necessitatem est. Quanta siquidem charitatis studia, quanta suffragia pietatis, quanta denique totius humanitatis obsequia peregrinis pauperibus Christi et omnibus necessitate patientibus impendat sanctum xenodochium Jerosolymitanum, sancta scilicet domus Hospitalis, ipsis jam olim re-
tum indicis orbi innotuit, ut non jam nostro super hoc testimonio, sed pervulgatæ magis veritati fides debeatur. Qui nimirum locus venerabilis ob meritum insignia nonnullis meruit a regno simul et sacerdotio privilegiis insigniri. Nos igitur Patrum et prælatorum nostrorum vestigia debita veneratione subsequentes, latores præsentium nuntios et procuratores illius religiose domus, cum testimonio litterarum nostrarum destinamus ad vos, et quanta possumus devotione commendamus ad gratiam, orantes et exhortantes in Domino, et in remissionem vobis injungentes delictorum, quatenus cum ad vos colligendis fidelium elemosynis eos declinare contigerit, ipsos pii ministros operis, pietatis intuitu beni-

gne recipiat, ope et opera misericorditer promoveatis, et juxta commonitionem domini papæ, et indulta sibi privilegia, debitam in omnibus reverentiam exhibeat. Subjectos quoque vestros eorum fraternitatem suscipere, susceptamque ad finem usque fideliter observare, sedulo commonere satagatis, scientes quoniam non possunt fructus non esse participes, qui bonorum se operum exhibent adjuutores. Omnes autem qui ob contemplationem Dei et pauperum Christi, fraternitati huic se addixerint, eamque annua, ut moris est, observatione compleverint, orationum et omnium beneficiorum commissæ nobis a Deo Ecclesiæ participes statuimus. Parochianis vero nostris, quibus præcipue debiores existimus, pœnitentibus videlicet et peccata confessis, qui hanc societatem debita devotione servaverint, si in septem aut eo amplius annorum pœnitentia fuerint constituti, quadraginta; si minus, viginti de injuncta sibi satisfactione dies misericorditer relaxamus.

EPISTOLA CCXXXVIII.

AD PAROCHIANOS S. PAULI.

G., Dei gratia Londoniensis episcopus, dilectis sibi in Domino universis ecclesiæ Beati Pauli apostoli parochianis et filiis, clericis et laicis, salutem, gratiam et benedictionem.

Scribentes charitati vestræ, dilectissimi, vobis ad memoriam beatum illico Paulum apostolum hæc mente reducimus, ut ob Domini nostri Jesu Christi et ejus Apostoli reverentiam et gratiam, ad ipsius Ecclesiam respiciatis, et ejus necessitati, quæ satis omnibus innotuit, prout vobis Dominus inspiraverit, benigna devotione subveniatis. Quæ a multo jam tempore fundata, et vestris eleemosynis magna jam sui parte constructa, tot sumptus exigit et haurit expensas, quod quia per nos subministrare non possumus, nisi ferat opem vestra benignitas, de cæterò providere recusando desperabimus. Quia vero quod inutiliter conatur unitas, hoc sæpius efficaciter adimplere universitas, si vos adjuutores habuerimus, spem bonam concipimus, ut in diebus vestris diu protractum opus, Domino per vos manum misericorditer apponente, completum videatis. Agatis itaque, et patrono vestro et advocato optimo, beato videlicet Paulo, devotum præstetis obsequium, ut ei domum construendo in terris, beatam ejus inter-
venit mansionem obtineatis in cælis. Id, quæso, præ oculis habeatis, quod patronus vester et apostolus Paulus plus omnibus apostolis laboravit, qui ut mundum infidelitatis purgaret errore, semel ob Christum lapidatus est, quinquies flagellatus, ter virgis cæsus, et post innumera pericula quæ terra marique sustinuit, Romæ tandem pro Christo gloriosam sustinens passionem, gladio consummatus est (II Cor. xi). Hoc vobis patrono gaudendum est, sub tanto gratulandum advocato. Qui licet ecclesiæ orbe toto plantaverit, fide mundum illum inaverit, sedes sibi æmen episcopalis nusquam, ut audivimus; in terris posita est, præterquam hic inter vos, ubi

in ipsius venerationem et sempiternam memoriam fundata est Ecclesia, et episcopali dignitate, Domino vobis hoc misericorditer et specialiter prævidente, sublimata. Habetis itaque beatum Paulum apostolum episcopum animarum vestrarum, qui de manu Domini id specialiter suscepit officii, ut in carne viventes, vos oratione sua sancta muniat et defendat et cum exuti carne fueritis, vos perducatur ad thronum Patris. Utar ad vos ipsius verbis. Ait enim: *Noli errare: Deus non irridetur. Quæ enim seminauerit homo, hæc et metet (Galat. vi).* Audite magistrum vestrum, audite sanum et suscipite consilium: « Seminare nunc potestis, quod in æterna vita suscipiatis. Nunc hiems est, tempus sementis jaciendæ nunc est, hora vobis oculis extrema si clauserit, non jam seminandi tempus erit. Cum januum post se clauserit sponsus, fatuarum jam virginum clamor inanis erit. » Audiamus igitur episcopum nostrum sic exhortantem: « *Ergo dum tempus habemus operemur bonum ad omnes (ibid.).* Misericordiæ tempus quod nunc est, injustitiæ tempus impingit. Qui misericordiam in præsentem non exhibet, a Domino justitiam tunc expectet. Ad vos itaque recurrentes, charissimi, vestrum attendatis initium, consideretis cursum, prospiciatis et exitum. Materni vos uteri primo conclusit angustia, postmodum nudos et in hunc mundum nihil præter peccatum inferentes, excepit hæc vita arcta sepulcri, deinceps coarctabit mansio, ad ultimum suscipiet procul dubio aut inferni, quod absit! latitudo, aut cæli altitudo. Indicibitis est homini in hac vita, tam inferni deorsum miseria, quam quæ sursum est in cælis beata gloria. Supra linguam est, quod electis et reprobis utrumque paratum est. » Agat ergo discretio vestra, charissimi, ut juxta quod monet episcopus vester et apostolus Paulus, viam declinetis inferni, et juste et sancte vivendo pertingatis ad gaudia cæli. Monet vos per nos episcopus vester, ut corporum vestrorum vasa munda et honesta custodiatis, ne sanctum a vobis Spiritum qui hæc sibi in templum vindicat, vivendo turpiter abigatis. Misericordiæ partibus insistatis, ne his, quod absit! omissis, a Domino judicium sine misericordia in verbo nimis aspero die illa sentiat (Jac. ii). Ad ecclesiam beati Pauli Patris et episcopi vestri, pietatis oculos habeatis, et ei et annua et ultima in fine vestro beneficia singuli conferentes ipsum vobis arctissime beneficiis præstitis obligetis, ut protectioni vestræ et salutis invigilet, et pauca quæ nunc datis in tempore, a summo largitore Domino Jesu, vobis in centuplum restitui impetret in æternitate. Omnibus vero qui ecclesiæ beati Pauli apostoli edificandæ et conservandæ, de suo quidquam annuatim et in fine suo contulerint, si septem vel amplius annorum poenitentia onerati sunt, nos de misericordia Salvatoris Jesu Christi, et ipsius beati apostoli confidentes, annis singulis 40 sibi dies relaxamus et intra parietes ecclesiæ divinis interesse concedimus, excepto quod una Quadragesima in singulis septem

PATROL. CXG.

annis foris sint, et sic jejunia compleant. Quia vero in missarum celebratione sancta nobis summa salvatio est, totius synodi nostræ consensu et firma et certa promissione statuimus, ut pro omnibus qui fraternitatem hanc susceperint et servaverint, ab uno quoque sacerdote totius episcopatus beati Pauli, triginta missæ cantentur, pro his qui adhuc in carne sunt, quindecim, et pro his quindecim qui decesserunt. In ipsa etiam ecclesia beati Pauli, singulis septimanis missas duas, unam pro vivis, alteram pro fratribus jam defunctis celebrari, totius capituli nostri consensu statuimus. Adjicientes etiam, ut si quis fratrum ecclesiæ beati Pauli, ut exigentibus peccatis saepe contingit, morte præventus in eum casum inciderit, pro quo defunctis in locis sacris sepultura negari solet, nihilominus tamen, tanquam frater et adjutor ecclesiæ beati Pauli suscipiatur, in loco sacro sepeliatur. Ne vero liberalitatem vestram et gratuitam hanc donationem vobis in necessitatem quandoque redigendam suspicetis, omnes a quidquam dandi necessitate et consuetudine præsentem scripto absolvimus, ne quid hujusmodi a vobis quasi debitum exigatur; sed gratuito præstitum a Domino vobis in illa die in centuplum retribuatur. Amen.

EPISTOLA CCXXXIX.

AD EOSDEM.

G. Dei gratia Londoniensis episcopus, dilectis sibi in Domino universis Ecclesiæ beati Pauli parochianis et filiis, salutem, gratiam et benedictionem.

C. Clamat ad vos, charissimi, sancta civitas illa Jerusalem, in qua vos a morte perpetua Dominus noster Jesus Christus sua morte liberavit. Clamat ad vos sepulcrum Domini, locus ille sanctissimus, a quo Dominus Jesus die tertia, morte superata resurgens, nos in fide et spe resurrectionis et salutis æternæ confirmavit. Clamant ad vos sancta loca illa omnia quæ jamdudum Dominus præsentia sua corporali frequentans, ad nos ab infidelitatis errore revocandos, ea signis et virtutibus mirabiliter illustravit. Hæc fidelium Christi labore magnifica a paganorum jamdiu potestate liberata et eruta, in eorundem manus et potestatem iterato recidere perhorrescunt. Plorant loca sancta principum suorum lamentabilem casum, quorum aliis gladio cæsis, aliis in servitutem deductis, terra illa sancta propugnatore jam carens, tanquam præda infidelibus et inimicis crucis Christi, nisi cito manum Dominus apposuerit, exposita est. Onus istud sustinent fratres nostri charissimi et milites Templi, qui ob locorum sanctorum et in his manentium fidelium Christianorum defensionem, omnibus se periculis exponere, mortem etiam ipsam pro Christo et fratrum salute subire parati sunt. Quibus ad repellendam multitudinem illam infinitam quantis opus sit, discretio vestra non ignorat. Unde pietati vestræ tota supplicat orientalis Ecclesia, ut qui sibi præsentia corporali subvenire non potestis, facta sibi rerum vestrarum largitione, per manum defensorum suorum, milium scilicet Templi subve-

30

niatis, et imminetia sibi pericula fraternæ charitatis ope submoveatis. Hortatur in hoc charitatem vestram dominus papa, hortamur et nos, in Christo charissimi, omnibus qui eorundem fraternitatem susceperint, et eis annuatim et in fine suo quod sibi Dominus inspiraverit, prece et admonitione nostra contulerint, orationum Ecclesiæ nostræ suffragia concedentes, et de injuncta sibi pœnitentia dum in eadem fraternitate permanserint, quadraginta dies annis singulis concessa nobis a Domino potestate relaxantes. Valere vos optamus, in Domino charissimi.

EPISTOLA CCXL.

AD ROBERTUM ARCHIDIACONUM ESSEXIE.

GILBERTUS Dei gratia Londoniensis episcopus, dilecto suo ROBERTO archidiacono Essexiæ, salutem, et gratiam et benedictionem.

Attendas, queso, charissime, in quam longinqua migraveris, quantum etiam laborem quantumque tedium solo litterarum amore subieris, et des operam sollicitè, ut laboris tanti condignos fructus ad nos quandoque valeas, cooperante gratia, reportare. Non effluant tibi dies, dum potes, et ætas permittit. Monca, disce quod postmodum deceas, et in sinum mentis collige, quod, exigente necessitate, suo queas tempore pluribus erogare. Nihil est quod idonee tuam possit industriam excusare, corpus tibi, donante Domino, sanum est et incolume, ætas habilis, facultas suppetens, locus abundans mercibus quas optasti, magistrorum copia, sociorum grata frequentia. Adsit amor studii et mentis applicatio voluntaria, de die poteris in diem proficere, et longe teipso effectus melior, tuis jucundissime laboribus arridere. Attende quid sit moram fecisse Bononiæ, et ea quibus jam dicta civitas insignis effecta est, turpiter ignorare? Hæc altera jam Caribhat sepher, quod est *civitas litterarum*, digne meruit appellari, quæ summi subtilitate ingenii hebetem tot temporibus mundum exacuit, legum thesauros aperuit, et abdita sapientiæ summi tandem vigore studii in lucem potentissime protraxit. Hinc te litterarum, quod absit! insecum, sensus inopem reverti, charissime, deprecor, erubescas, ne quod cunctis fere rexit ad gloriam, in opprobrium tibi cedat et ignominiam. Ricardum archidiaconum revoco, quem si diutius moram fecerit, de medio subtrahi pertimesco, te ejus onera sustinere necesse est, quæ statim cum venerit, juvante Domino, levigabimus. Valere te et omnimodis proficere desideramus, charissime.

EPISTOLA CCXLI.

AD P. NIVERNENSEM EPISCOPUM.

P. Dei gratia Niverniensis episcopo, frater G. Londoniensis Ecclesiæ minister, si non expressum schedula, conceptum tamen corde piæ salutationis affectum.

Ex relatione dilecti fratris Ebroicensis episcopi acceperamus ego et dominus Saresburiensis episcopus, abbatem Pontiniacensem in Galliam remeasse. Cupientes itaque in nobis adimpleri negotium de

A absolutione nostra, vobis et prædicto abbati a domino papa commissum, cum festinatione ad vos labores arripueramus itineris, jamjamque Cenomanum propinquantes, festini nostri a domino papa reditu revocati sumus, afferentis ejus rescriptum continens vobis et domino Belvacensi episcopo sollicitudinem absolutionis nostræ esse injunctam. Quia igitur personæ vobis adjunctæ mutatio vestrum immutari poscebat consilium, incontinenti nuntios nostros ad prædictum episcopum direximus, domini papæ rescriptum ei deferentes, et diem et locum nobis designatum a vobis intimantes. Sed quoniam casus fortuiti qui provideri nequeunt, diligentissimis etiam sæpius adversantur, incerti ubi aut qualiter se habens prædictus inveniat episcopus, benevolentia vestre cui in multis tenemur obnoxii preces affectuose porrigimus, ut duorum vel trium dierum spatio ultra quam in proposito habuistis, Senonis nuntios nostros expectetis, reportaturos vobis prædicti episcopi responsum, si mora tamen adventus eorum id fieri postulaverit. Omnem enim daturi sumus operam, ut moram hanc præveniamus, et statuto nobis die et loco vobis, juvante Domino, occurramus.

EPISTOLA CCXLII.

AD WALTERUM NORWICENSEM.

Scitis, charissime, jacula quæ prævidentur obesse minus, et quod tempore longo melius sit occurrere, quam vulnerata causa de querendo remedio jam nimis sero deliberare. Unde considerantes Patrem nostrum Cantuariensem ad maledictionem promptissimum et potestatem quam in ædificationem et non destructionem Ecclesiæ suscepisse debuerat, in dominum nostrum regem et regnum ejus, in nos et commissas nobis Ecclesias, contra forinam sacrorum canonum exercere paratum, et ad apostolicam jamdiu audientiam appellavimus et ad datos nobis judices appellationem hanc prosequendo tempestatem hanc qua concuti metuebamus, administrante gratiam Domino, usque . . .

EPISTOLA CCXLIII.

AD JOCELINUM EPISCOPUM SALESBERIENSEM.

Dominus Cantuariensis cum adversus rempublicam regni hujus mala hæc machinetur quanta potest, præcipue tamen nos duos, sicut dicitur, scorsum ponit ad sagittam, in quos primos effundat impetus et potestatem exerceat in malo quam non me beneficio meminisse vel sensisse. Ille namque, ut dicitur, emissis de novo vocationibus nos duos in Gallias ex nomine vocavit, comminans et protestans publice se in nos excommunicationis latum ire sententiam, si non in Galliis suæ quam citius assistamus presentia. In quo quia me pregravari sentio, adversus hoc ad sedem apostolicam publice jam appellavi, quod et per litteras ei per nuntium unum videlicet ex clericis meis proximo die Veneris, juvante Deo, profecturum, domino Cantuariensi denuntiare disposui. Super quæ vestram quoque dilectionem certificare curavi, ut si ejusdem placet uti consiliis,

aliquis clericorum vestrorum missus a latere vestro simul iter arripiat ut mutuis uti consiliis et societate mutua possint consolari. Si quid certius accepistis super hac re, significare nobis, si placet, apud Londoniam, ubi moram facere disposui a sexta feria præsentis hebdomadæ usque ad quartam feriam septimanæ sequentis. Vale.

EPISTOLA CCXLIV.

AD EUMDEM.

[G.] Dei gratia Londoniensis episcopus, venerabili fratri J. Salesberiensis eadem gratia episcopo, salutem quæ nunc est, et quam speramus a Domino.

Quoniam in Ecclesia regni hujus vitia pullulant, et in vinea Domini sarmenta succrescunt, consultius falce iudicii succidenda, visum est Patri nostro Riccardo Cantuariensi Dei gratia episcopo, totius Angliæ primati, et sedis apostolicæ legato, secundum antiquam Patrum consuetudinem, fratres et coepiscopos suos, et alios Ecclesiarum prælatos ad concilium convocare, ut quæ corrigenda fuerint, communicati censura consilii, vel omnino damnentur, vel in melius, Domino gratiam ministrante, reformationem. Quia vero ad sollicitudinem nostram pertinere dignoscitur fratres et coepiscopos nostros ad concilium convocare, ab ipso ut id faciamus in mandatis accepimus. Inde est, quod fraternitati vestræ ipsius auctoritate mandamus, et in vi obedientiæ injungimus, ut Dominica qua cantatur: *Cantate Domino canticum novum* (Psal. xcvi), ob causam memoratam assessuri sibi Londoniæ sitis, et medio tempore cum omni cautela et diligentia excessus quibus diocesis vestra laborat inquiratis, ut in medium deducti, correctioni subjaceant et censuræ. Ipsius etiam vobis auctoritate injungimus, ut diocesis vestræ abbatibus, archidiaconis, prioribus et decanis locorum conventualium verbum hoc notificetis, et eos ut designato loco et tempore in concilio domino legato præsentiam exhibeant, ipsius auctoritate citetis. Valete.

EPISTOLA CCXLV.

AD EUMDEM.

Venerabili domino fratrique charissimo J. Salesberiensis Dei gratia episcopo, frater GILBERTUS Londoniensis [episcopus], salutem.

Lætatur evangelica mulier, quæ drachmam reperit quam amisit (Luc. xv). Nobis quoque gaudendum est, quia quos in longinqua direximus, et quasi perdidimus, lividorum latratuum Scyllis tandem enavigatis sanos et incolumes et prospera nuntiantes, Domino cuncta pie disponente, recepimus. Unde mihi videtur rem fore consilii, ut ad locum quem assignavit dominus rex, scilicet Argentoratum mora minime pertrahente concurramus, ut ibi domini regis aut præstolemur adventum, aut si nos ad se venire jusserit, expeditorem habeamus hinc ad ulteriora progressum. Hoc domino Cicestrensi communicabitis, qui si quid aliter senserit, hoc mihi, si placet, recurrente cursore, ne panem comedat

otiosus signare velitis. Valere vos opto in Domino, charissime.

EPISTOLA CCXLVI.

AD EUMDEM.

Venerabili domino fratrique charissimo J. Salesberiensis Dei gratia episcopo, frater G. Londoniensis Ecclesiæ minister salutem et debitam domino dilectionem.

Suadet et facili verborum paucitas, cum ad exaudiendum prona est ipsius ad quem scribitur amica benignitas, quam quia de vestra gratia spem plene concipimus, dilectæ nobis in Domino benevolentiae vestræ preces affectuose porrigimus, ut viginti solidorum beneficium quod nepoti meo in ecclesia de Chiltuna concessistis, integrum ipsi manere velitis, ne si rei modicæ quidpiam detraxeritis, rem ipsam mutilatam quodammodo suo indignam donatore reddatis. Vestram vero volumus celsitudinem non latere, nepoti meo et ipsius clerico W. pacto rem firmante sic convenisse, ut W. sibi annuos viginti solvat et ipsius Ecclesiæ onera omnia quæ vestra vel archidiaconi vestri imponet modestia, in se suscipiendo sustineat. Unde preces iterato porrigimus ut si juxta quod moris vellus ovi detraxeritis, agno . . . adhuc anniculo, quousque lanis vestiatur uberius, gratia miserante, parcat. Valere vos optamus in Domino, frater in Christo charissime.

EPISTOLA CCXLVII.

AD EUMDEM.

Venerabili domino fratrique charissimo J. Salesberiensis Dei gratia episcopo, frater G. Londoniensis Ecclesiæ minister, munus quod penes se maximum reputat, seipsum.

Evangelicum, ut audio, paradigma complectis, et saginato vitulo, occisis altilibus, reverso filio gaudia debita celebrastis. Superest, ut cum stola prima calceamenta sibi provideatis et annulum, ne quid ex Evangelio deesse sibi sentiat ad perfectum. De cætero quia Cenomanis orgia celebrare disponitis cum mandatum vobis regium insonnerit, me, si placet, a Sagio a Cerealibus evocetis. Valere vos optamus in Domino, charissime.

EPISTOLA CCXLVIII.

AD ROGERIUM WIGORNIENSEM EPISCOPUM. PRO PRIORE MALVERNIE.

Dominus Londoniensis domino Wigorniensis, in gratiarum plenitudine virtutum Domino complacere.

De naturali bonitatis vestræ præsumens privilegio, quoties opus est, et id fieri res exigit, confidenter ad vestram decurro benevolentiam, et repulsæ nescius munus statim gratiæ ad votum mihi respondentis excipio. Quod quia sæpenumero ipsis jam rerum argumentis expertus sum, in consuetæ mihi gratiæ limina confidenter irrumpo, postulans ut fratrem W. cui ad doctrinam scientia, et ad honestatem mores exuberant, quemque, ut audio, in gratiam jam, admissis, et electione fratrum Malvernæ priorem constituistis, amore Dei meaque petitionis intuitu, de charo chariorem habeatis, ipsumque, prout honori

vestro congruit et ejus expedit humilitati, protegendo et honorando, et ipsum et me, pluresque nobiscum amplioris ex hoc et gratiæ et servitii debitores habeatis. Diu valeat et in Domino perseveret incolumis vestra benignitas, dilectissime.

EPISTOLA CCLXIX.

AD EUNDEM.

Venerabili fratri et amico charissimo R. Wigornensi Dei gratia episcopo, frater G. Londoniensis Ecclesiæ minister, salutem cum intimo dilectionis affectu.

Ad tuam, frater charissime, consultationem in charitate respondeo quod mihi charitas super hoc requisita respondet, deprehensus a te et in tua comprehensos parochia textores de quibusdam, ut asseris, fidei nostræ articulis male sentientes, quos non tantum nuda blasphemie protestatio verum etiam constans assertio et propositi pertinacia hæreticos esse demonstrat, sub arcta consulo cautaque custodia detineri, donec aliquo locorum ob Ecclesiæ necessitatem aut negotium regni celeberrimus sacerdotum cæterorumque fidelium conventus, ubi invocata sancti Spiritus gratia, de communi negotio communis exeratur sententia, quæ quid super hoc agi oporteat, et secure et sincere possit diffinire. Illis vero interim seorsum constitutis, ne mutuis se possint in malum obstruere colloquiis, bonos viros et graves, viros probatæ fidei, divinæ legis et litterarum peritos, eorum curæ convenit et custodiæ deputari, qui eos visitent in verbo prædicationis sanctæ, monitis emolliant, minis et metu poenarum exterream, flagris interdum et flagellis cum moderata severitate coerceant, et ad Ecclesiæ unitatem omnimodis, prout charitas suggeret, revocare procurent. Hæc namque et hujusmodi ecclesiasticæ correctionis medicamenta, quæ nobis exempla sanctorum proponunt, cum de salute agitur subjectorum, in charitate nos convenit experiri, qui in populo Patris nomen et pastoris officium obtinemus, ne vel perniciem aut periculum fraternæ salutis aliquid unquam præperere statuamus. Sæpe enim quos verba non movent, verbera promonent, et quod metus poenæ non efficit, ipsa poenarum experientia nonnunquam extorquet, bona est necessitas quæ vel a malis prohibet, vel ad meliora compellit. Utrumque per Dei gratiam hac nobis via sperandum est, si nec poenitendi illis tempus admittitur, nec ulla relinquitur facultas malignandi. Utinam votis tuis sanctiori succurrat consilio, quos altius imbuat, quos ampliori gratia Spiritus infundat. Valete.

EPISTOLA CCL.

AD EUNDEM.

Venerabili domino fratrique charissimo R. Wigornensi Dei gratia episcopo, frater G. Londoniensis Ecclesiæ minister, salutem et affectus intimi dilectionem.

Moris solet esse prudentum, etiam in non dubiis efflagitare consilium. Quod et vestra discretio prudenter observans, a nobis sciscitari voluit, quid super

his textoribus sentiamus, qui vestram nuper ingressi diocesium telis aranearum quas misere texuerant, ipsam operire moliti sunt et involvere, et nisi sanctus per vos eis Spiritus restitisset, nequiter superseminatis zizanitis infatuare. Qui corde conceptas hæreses in vulgus spargendo prædicant, et in jure conventi et commoniti, easdem attrita fronte defendere non formidant. Quorum sermo, ne canceris in modum in imis serpat, et errore simili quamplures involvat, ipsos arcta consulimus custodia cohiberi, et ne pietas desit officio, per honestiores et prudentiores clericos vestros visitari sæpius, et ut ad poenitentiam et Ecclesiæ unitatem revocent animos, et corda committent, diligentius admoneri. Est sermo Dei vivus et efficax, qui per idoneum ministratorem cito vertit imperium, et suscitât illico peccatorem. Quia vero corrumpunt mores bonos colloquia prava, seorsum constitutis singulos, ne si invicem sibi misceant verba, animentur in pertinacia, et respuant consilia sana. Quod si nec vexatio sancta nec pie exhibitæ commonitio dederit intellectum auditui, questionem hanc ultimam de poena, an scilicet plectendi sint, quæ poena plectendi, quo etiam judicante vel eos ad poenam tradente puniendi sint, communi fratrum nostrorum et coepiscoporum conventu consulimus reservari. Grandis enim hæc questio est, et a sanctis Patribus et Ecclesiæ doctoribus non mediocriter agitata, quibusdam Ecclesiæ mansuetudinem et clementiam prædicantibus, juxta quod dictum est: *C Lex clementiæ in lingua ejus (Prov. xxxi); et illud Domini: Nec ego te condemnabo (Joan. viii);* aliis, ne multi pereant, in talium poenam sancti procul dubio zeli pietate ferventibus. Hi filium phreneticum vinculis arcandum, sicque custodiendum commemorant. Alii quod in religionem divinam committitur, in omnium ferri injuriam protestantes, in crimen hoc publicum legem Juliam majestatis intentant. Alii exemplis judicantes hujusmodi, cremandos judicant. Alii severitatem hanc beati Augustini sententia temperant, qui Donatistas non interfici, sed flagellis et suppliciis exorat emendari. Unde quia scriptum est quod: *ad poenitendum properat cito, qui judicat,* questionem hanc communi fratrum nostrorum conventu reservari consulimus, ut sicut est in regno hoc, donante Deo, Ecclesia una, sic sit et in talibus eadem omnium sententia et actio non divisa. Sententiæ non præjudicamus saniori, qui vos semper cupimus potiora sectari. Valere vos optamus in Domino, frater in Christo charissime.

EPISTOLA CCLII.

AD EUNDEM.

Venerabili fratri et amico ROGERO Wigornensi Dei gratia episcopo, frater GILBERTUS Londoniensis Ecclesiæ minister, salutem et affectus intimi dilectionem.

Dilectus filius noster, lator presentium Willmus de Northal, quadam magna se asserit spe suspensum ad vos, quam de promissione vestræ liberalitatis et gratiæ dudum concepit. Verbum namque

nec irritum debet nec vacuum reputare, quod vestra sibi constat sponione firmatum. Proinde nos cum ipso et pro ipso vestræ supplicamus benevolentie, quatenus propositam promissamque beneficentiam, data vobis a Domino opportunitate, et sui contemplatione, et nostra, si placet, promptius petitione, ea benignitate compleatis in illo, ut et voto ejus et veritati vestræ satisfaciatis, scientes quia quod dicimus, veritati debemus, quod promittimus, fidei. Valete.

EPISTOLA CCLH.

AD EUMDEM.

Venerabili fratri et amico R. Wigornensi Dei gratia episcopo, frater G. Londoniensis Ecclesie minister, salutem et dilectionem.

Gratum habemus, quod magister From' eam apud vos gratiam invenit, qua ex scripto vestro, sed ex sua certius relatione cognovimus. Desideratis enim, sicut eodem assertur scripto, per nos instrui de beneficio quod prior et canonici de Stodlege in eum contulisse dicuntur, quid illi scilicet et quantum in nostra fuerit assignatum presentia. Desideramus et nos suam in omnibus justitiam pro hominibus abundare instrumentis, ne qua possit unquam falsitate subverti. Verum nos tantus circumstrepit negotiorum tumultus, ut vix nostra possimus curare negotia, nedum aliena, quæ et loco et tempore tam remota existunt, ad eam quam exigitis distinctionem recolligere. At si testes non desunt, quibus plusquam testimoniis credi oportet, si prior et canonici, de quorum facto agitur beneficium non revocant, si cætera causæ necessaria domi succurrunt et suffragantur, ut quid nostra requiritur attestatio, ut quid ad supervacua sudatur? Rogamus igitur ne sit scrupulosa adversus eum conscientia vestra, eo quod nostrum non reportat testimonium, quia si forte factum tenemus, non tamen ipsas facti circumstantias, quas scripturæ forma requireret, ad memoriam revocamus. De cætero, dictum nostrum dilectioni vestræ commendamus, ut quem sui merito in notitiam admisistis, et gratiam, nostra, si placet, petitione commendatum habeatis, et sua illi jura per vestram integrè justitiam conservetis, ut et ipsum vestris exinde devotum obsequiis, et nos vobis pro ipso amplioris gratia: debitores efficiatis. Valete.

EPISTOLA CCLIII.

AD EUMDEM.

Venerabili fratri R. Wigornensi Dei gratia episcopo, frater G. Londoniensis Ecclesie minister, salutem.

Insuperatas quidem et plenas ingratitudine gratias, vestræ mihi literæ retulerunt, quas super capella Sancti Michaelis, per manus improbissimi portitoris novissime suscepi. Quid namque merui ut adversus me vestra debeat fraternitas exandescere, ut in meam personam vestra prorumpat appellatio, ut ad lites provoker et ad labores? Nunquid has mihi referitis gratias, quia me partes vestras benigne su-

stinuisse meministis? Nunquid mediatoris nostri, imo mentitoris vestri id de me persuadere potuit oratio, ut aut vestri quod juris est occupem, aut occupanti velim, quod absit! ullatenus assentire? Non est sanctum de moribus amici tam cito perperam sentire. Vester ille missus et procurator causæ, quam vestrum dicitis, adversus me et adversus Ecclesiam meam pariter appellavit. Vos autem eandem, ut scribitis et scripto asseritis appellationem prosecuturi, indultam nobis ab ipso prius appellatore dilationem, usque ad *Quasimodo*, vestra revocatis auctoritate, et ad *Invocavit* me, appellationi terminum coarctatis. Quod quia in gravamen et præjudicium partis nostræ redundat, petimus si placet, desistatis. Sin autem persistitis, ne teneat illa coarctatio appellationis, ut verbo prius, ita etiam nunc scripto appellavimus, diem Ascensionis nostræ constituentes terminum appellationis. Apostolos quoque postulatis me. Quæ est ista rerum confusio? Judicem agnoscitis, a quo petitis apostolos, sed adversarium eligitis, in quem libellos editis appellationis. Nosse autem debuerat prudentia vestra, neminem sibi in testamento neque in apostolis, neque in publicis instrumentis scribere debere; nemo enim sibi iudex, aut testis, aut publica potest sibi esse persona. Petit is etiam ut pro debito officii mei memoratæ capellæ statum reformem. In quo me prius instrui necesse est, an iudicis officium in eo debeam exercere negotio, quod jam per appellationem a mea penitus est jurisdictione exemptum, præsertim cum me super hoc tanquam adversarium provocatis, quem nihilominus ut iudicem interpellatis. Denique supplicat vobis Londoniensis Ecclesia, supplicamus et nos pariter, ut non tanti sit apud vos mentientis improbitas, ut scissuram inter nos fraterna charitas patiat. Certum namque teneatis, quod sicut non possumus nec volumus vestro in aliquo juri derogare. In quo si nostro non creditis testimonio, veritati credite, quæ certius inquisita, vobis attestabitur. Si vero contentiosum funem trahere necesse est, dicimus quod olim Hannibal dixisse legitur: « Suscipio, inquit Hannibal, pacem peto. Ex quo si insolescis, utrinque ferrum, utrinque corpora humana erunt. » Valere vos optamus in Domino, frater charissime.

EPISTOLA CCLIV.

AD PRIOREM ET CONVENTUM CHARITATIS.

G. Dei gratia Londoniensis episcopus, venerabili fratri et amico priori Charitatis, et toti conventui, salutem, et sinceræ dilectionis affectum.

Quanta, fratres in Christo dilectissimi, charitatis plenitudine vos et vestram domum amplectamur, nec verba explicant, nec operis argumenta declarant. Si quid tamen vestrum est apud nos, a nostra id sollicitudine non reputamus alienum, læta vestra læte suscipimus. Si quid, quod absit! secus accidit, non id vobis tantum incumbit, quod et nos non aliena mentis afflictione pariter sustinemus. Vestræ si quid vel eorum in quibus vos promoveri certum est, pro-

motionis opportunitas, si quando nobis occurrit, non eam negligere, non eam nos otiose præterire permittit illa procul dubio, qua vobis astringimur, devotio charitatis. Unde cum conventu fratrum et coepiscoporum nostrorum, nec non et aliorum religiosorum virorum, qui ad expedienda negotia ecclesiastica Cantuariæ conveniant, de electione abbatis Eveshamiæ tractaretur, vestro quidem consilio, licet alii quamplures aliorum tenderent, ad hoc tandem omnium inclinata est voluntas, ut specialem filium Ecclesiæ vestræ, priorem Bermundesheye, illi quorum erat electio, eligerent; alii vero, quorum in hoc expectabatur assensus unanimiter assentirent. De quo licet morum merita et honesta ejus apud nos conversatio sancte et laudabiliter enuntiarent, in hoc non parum gavisi sumus, nobis tam favorabiliter fuisse applausum, quod de vestræ schola disciplinæ prodeuntem, tanti nominis discipuli pastoralis magisterio culminis dignum diceremus. Jam vota nostra concurrunt. Quod nos probamus, dominus noster rex Angliæ approbat, dominus Cantuariensis idem sua auctoritate confirmat. Jam ad vos omnium nostrum spectat intentio, ut supremam manum adhibeatis; hujus enim operis consummatio a vestra dependet sententia. Inde est, quod dilectæ nobis fraternitati vestræ pro desolata jamdiu ecclesia Eveshamiæ, quæ suum expetit et expectat electum, preces affectuose porrigimus, quatenus suæ electioni vestrum præbentes assensum, quem sibi elegit pastorem concedatis, et quod ad honorem Dei et sanctæ utilitatem Ecclesiæ, pia devotione inchoavimus, benigno favore mancipetis effectui. Valete.

EPISTOLA CCLV.

AD A. ABBATEM ET CAPIT. CIRECESTRÆ.

G. Dei gratia Londoniensis episcopus, venerabili fratri et amico in Christo charissimo, A. Cirecestræ eadem gratia abbati, et toti ejusdem loci conventui, salutem et sinceram in Domino dilectionem.

Præsentium lator frater A. jamdudum recessit a vobis, spiritu fortasse non bono instigante. Revertitur autem nunc, sancto ut speramus Spiritu revocante, pulsatur ad ostium misericordiæ vestræ, et in subsidium miserabilis et meticulosæ causæ quam agit, nostra ad vos fungitur advocacy, ut gratiam quam diffidit ex se, nostro queat interventu promptius obtinere. Difficultatem ordinis vestri jamdiu expertus exhorruit, et se tanto oneri et tam arctis observantiis imparem esse agnovit. Idcirco pulsatur et postulat, et ut pro ipso pariter supplicemus lacrymis nos invitat, et ad hoc inclinat uberrimis, ut cum licentia vestra in obedientia fratrum Hospitalis, immunis possit et absolutus de cætero ministrare. Hoc ipsi fratres Hospitalis amplius expetunt et exoptant, qui nimirum jam dictum fratrem vestræ licet professioni inæqualem, suis tamen usibus utilem jam olim experti sunt. In quo et nos quoque, si ultra locus est, vobis supplicamus, ut de fratris infirmitate compassionem habentes, etsi non sit sublime

A quod petimus, pium tamen pro fratre desiderium nostrum exaudiat, et datis dimissoris, iis quibus expedit, liberum et absolutum assignetis, ne cum nostra, quod absit! omnium repulsa simplicitate, ipsius malo desperationis confundatis. Valete.

EPISTOLA CCLVI.

AD EOSDEM

G. Dei gratia Londoniensis episcopus, venerabili fratri et amico charissimo A. abbati Cirecestræ totique ejusdem Ecclesiæ capitulo, salutem, gratiam et benedictionem.

Ex injuncto nobis officio Ecclesiæ Dei, quam ipsius permissu aliqua sui portione regendam suscepimus, ad ejus honorem cui desponsata est debita sollicitudine providere compellimur. Unde quia vestræ conversationis opinio ipsa meriti sanctitate ad omnes longe lateque diffusa est, insedit Ecclesiæ sanctæ Trinitatis Londoniæ, Domino ut credimus id inspirante, et Ecclesia cui præsidemus assentiente consilium, ut priorem Ecclesiæ vestræ, magistrum videlicet Osbernum, cui ad doctrinam scientia, et ad honestatem mores exuberant, sibi in priorem unanimiter eligerent, ipsumque sibi in Patrem et pastorem concedi concorditer omnes exoptarent. Quia vero juvanda sunt et promovenda semper honesta consilia, dilectæ nobis in Domino benevolentia vestræ affectuose preces porrigimus, quatenus jam dictorum fratrum desideriis effectum respondeatis, et ipsum ad honorem Dei et Ecclesiæ vestræ ab obedientia vestra regulariter absolutum, et Londoniensis Ecclesiæ de cætero obediturum, prædictis fratribus ad domus suæ curam suscipiendam et agendam non interveniente dilatione quæ periculum infert sæpe negotiis, prompte et libere concedatis, ut totam Londoniensis Ecclesiæ plenitudinem obsequiis amodo vestris obnoxiam habeatis. Valere vos in Domino optamus, charissimi.

EPISTOLA CCLVII.

AD STEPHANUM CLUNIACENSEM ABBATEM.

Venerabili domino patrique charissimo STEPHANO Cluniacensi Dei gratia abbati, frater G. Londoniensis Ecclesiæ minister, salutis gaudium, et si quem potest apud se charitas officiosa famulatum.

Exsultavi, charissime, totus in Domino et spirituali jucunditate perfusus sum, audiens matrem nostram Cluniacensem Ecclesiam tandem respirasse in te, et in Patrem et dominum te sibi quam provide tam, ut spero, salubriter et feliciter elegisse. Te enim eustode commisso tibi gregi, pabula vitæ deesse non poterunt, qui pectus tuum Domino, ut sic dicam, Scripturarum sanctarum apothecam et aromaticam virtutum cellulam a puero fere consecrast. Non ejulabit clamans terra tua post te, quæ doctrinæ fluentis affluenter irrigabitur, et ut virtutum frugi plene respondent, in te propositum virtutum exemplis incessanter ad ea quæ sancta et summa sunt, provocabitur. Beatum collegium, cuius id virtutum debebatur meritis ut a tribulatione malorum et dolore tanti Patris respiraret so-

latio, et procellam quam jamdiu sustinuerat, in auram sibi verteret boni Patris familias circumspicienda sollicitudo. Fateor, in Christo charissime, fateor, datum mihi cœlitus conspectum tuum, et alloquium mihi non mediocriter incitamentum exstitisse virtutis, ut ex hoc beatos æstimem, qui tibi semper assistunt, qui te comitantur assidue, quibus hoc virtutis speculum quo semper in meliora proficiant, habere concessum est. Annuntiant de homine, ut Scriptura commemorat, vultus ejus, incessus, et habitus, quæ tui attendentes in te in virum facile poterunt transformari perfectum. Quæ quidem menti meæ, etsi ad momentum inspecta, tamen altius insederunt, adeo ut tui quandoque contemplatione in novum quemdam hominem transiens meipsum mihi videar quodammodo transilisse. Inde est quod totis ulnis charitatis amplector absentem, quem præsentem videre, et devotis et debitis venerari obsequiis intime concupisco. Quia vero præsumptuosum quandoque charitas efficit, postulationem hanc finis epistolæ continebit, quatenus fratrem nostrum dominum Thomam, priorem Lantonia super absolutione sua pro qua plurimum instat, clementer exaudiat, et substitui sibi fratre nostro, Roberto de Broi, ipsum servitii et me amplioris, si fieri potest, gratiæ tuæ debitorem sanctitati constituitis. Valeat dominus meus, et Pater in Christo charissimus.

EPISTOLA CCLVIII.

AD R. ARCHIDIACONUM COLECESTRIE.

GILBERTUS Dei gratia Londoniensis episcopus, dilecto sno R. archidiacono Colecestrensi, salutem, gratiam et benedictionem.

Directas a te mihi literas multa gaudii alacritate suscepti, inspectas tamen paululum, ægra procul dubio mente percurri. Læta mihi nuntianda sperabam, et ecce gravem ingerunt mihi nuntiata tristitia. Doleo super juvene nobilissimo, qui præmature sati munus implevit. Casum circa te similem metuens, quem morbus, ut audio, modis jam pluribus attentavit. Unde tibi mando, mandansque præcipio, quatenus occasione postposita, si statum Bononiæ tibi suspectum tuæque adversum valetudini vel in modico senseris, ad salvandam animam tuam ocius exeat et fugias, et tuum ad nos reditum maturare non omittas. Responde vero in quibus te impeditum noveris, obliges, et ad nos cito veniens ipsum expedire et debitis exonerare festines. Me vero noveris in Normannia adhuc moram facere, et tuum ad me reditum præstolari pariter et optare. Vale, charissime.

EPISTOLA CCLIX.

AD H. ABBATEM SANCTI EDMUNDI.

G. Dei gratia Londoniensis episcopus, venerabili fratri et amico H. sancti Edmundi abbati et conventui, salutem.

Quæ in nostra geruntur presentia, tali volumus firmitate roborari, ne prudentius ordinata, aliqua malignantium perversitate possint convelli. Unde

A vestræ innotescimus universitati, nos sub multorum presentia Reginaldo clerico de Cotona instrumentum authenticum exposuisse, quo inter vos pactio super ecclesia de Cotona continetur inserta. Requirentes igitur coram omnibus ab eodem R. si quæ scripta fuerant omnibus præbuisset assensum, accepimus ab ejus responso, secundum instrumenti tenorem sibi omnia complacuisse. Et ad cautelam abundantem iurandum tactis sacrosanctis Evangeliiis, eodem H. petente, suscepimus, quod bona fide secundum quod convenerat et scripto fuerat insertum, inviolabiliter observaret. Ne hoc igitur tam solemniter actum in dubium revocetur in posterum, præsentis scripti attestatione et sigilli nostri appositione communimus. His testibus....

EPISTOLA CCLX.

AD H. ABBATEM GLOCESTRIE.

GILBERTUS Dei gratia Londoniensis episcopus, venerabili fratri et amico suo charissimo H. eadem gratia abbati Glocestræ, salutem et debitum fraternæ charitatis obsequium.

Decessum chari nostri magistri Walteri, sine lacrymis ad memoriam non revocamus. Habemus in ejus ocaseu, quod communiter doleamus, qui communiter clericum et amicum fidelissimum, manum in nos aggravante Domino, in ipso flore gratissimæ suæ juventutis amisimus. Quæ vero bona cum ipso nobis sublata sint, quot sancta subtracta solatia, experiri quidem possumus, paucis explicare non valeamus. Ipsi vestra, quæsumus, et fratrum nostrorum sancta suffragetur oratio, quatenus sublatum nobis, suorum velit Dominus admitti collegio. Ipse vero in extremis agens, superstitem fratrem suum unicum, præsentium hunc latorem Wigodum, per nos vestræ commendare benevolentiae supplicavit. Unde dilectæ nobis in Domino benignitati vestræ preces affectuose porrigimus, quatenus amore Dei nostræque petitionis obtentu, et amici in extrema voluntate supplicantis intuitu, ipsum in protectione vestra suscipiatis, nec status sui conditionem in aliquo aggravari permittatis. Sed quod ad præsens incurrit damnum, vestræ sibi suppleat misericordia et charitatis augmentum. Valere vos optamus in Domino, charissime.

EPISTOLA CCLXI.

AD MATTHEUM GLOCESTRENS. ARCHIDIACONUM.

MATTHEO Glocestrensi archidiacono, salutem.

Hæc quæstio est quam formatis, cui ut respondeatur exigitis. An mulierem, de qua agitur, ad iuramentum, ut sibi iudicatum est, debeatis admittere, an laminam candentis ferri subeat, prout viro sibi mortem minitante spopondit, oporteat vos de jure permittere. Et casus quidem varii frequenter emergunt, et mulier in opere quandoque deprehenditur, non deprehensa quoque quandoque suspecta tamen rea postulatur. Deprehensam lex Moysi lapidabat (*Levit. xx*), suspectam lex zelotypiæ examinabat (*Num. v*). Aquas enim amarissimas in quas sacerdos maledicta congesserat suspecta mulier

hauriebat, quæ quidem innocentem non lædebant, A
et ream sceleris illico dirumpebant. Adulterum et
adulteram lex principum puniebat, et miseris mor-
talibus quorum in lubrico status est, pœna multi-
pliciter imminebat. Gratias Domino Jesu qui cuncta
novando mutavit in melius, et aquis Maram lignum
crucis admiscendo, dura legis et amara temperavit,
hic deprehensam et ream sceleris adductam ad se
liberavit, et duos legis lapides illos commutavit.
De quibus dictum est: *Quoniam placuerunt servis
tuis lapides ejus* (Psal. ci). Nostri namque lapides
hi sunt, increpatio, correptio, peccatoris ad lacry-
mas, ad gemitus, ad confessionem et satisfactionem
multimodam provocatio. Quibus bene lapidatur adul-
tera cum peccato moritur, et illo intus vivificante
qui ait: *Nec ego te condemnabo, vade et amplius
noli peccare*. (Joan. viii). A morte animæ quam
incurrerat in novitatem vitæ suscitatur. Quo nimi-
rum modo cum uxorem suam vir bonus lapidari
conspicit, debet ipse morienti commori, lugenti
collacrymari, largiri suam ut ad manum pœnitens
habeat quod peccatum redimendo necessitatem pa-
tientis subveniat, ut duo non tantum in carne una,
sed et in uno spiritu inveniantur. Quod si suspecta
solum est, ut suspicio perimatur, ut pax viro con-
cilietur, taxatum juramentum sufficiet, cum omnis
controversiæ finem juramentum Paulus esse com-
memorat (Hebr. vi). Nam si quid coacta spon-
dit, absit ut hoc iudex ecclesiasticus admittat, quod
 sæculi iudices reprobare non ignorat. Nam quod
C vi melius causa factum vel dictum est, ratum non
habet, et juxta papam Alexandrum, si quid ab ali-
quo per vim, per metum, aut fraudem extortum
est, ad nullum ejus præjudicium vel nocumentum
valet. Valet.

EPISTOLA CCLXII.

AD WILLELMUM ABBATEM RADINGENSEM.

G. Dei gratia Londoniensis episcopus, venerabili
fratri et amico W. eadem gratia abbati Radingensi,
salutem et dilectionem.

Gratias ago benevolentiae vestrae quæ non solum
mihi prospicere, et meis non desistit utilitatibus ex-
cubare, verum super his quæ maligne fabricantur
adversum me, fraterna me charitate præmonere
curavit et præmunire. Remedium vero, quod adver-
sus extraordinaria quælibet gravamina unicum om-
nibus særi suggerunt canones, adversus emissas
jam ut dicitur vocationes, adversus propositas do-
mini Cantuariensis insidias, appellationis subsidium
publice jam proposui. Et ne quid circa personam
meam aut possessionem meam, ne quid circa ordi-
nem aut honorem meum præjudicii fiat, invocata
auctoritate sedis apostolicæ me communire curavi,
de divina quidem gratia et de clementia sanctæ Ro-
mance Ecclesiæ penitus confidens, quod si quid su-
per hæc enormiter in nos actum fuerit, illi patius
ad confusionem quam nobis ad pœnam redundabit.
Valet.

EPISTOLA CCLXIII.

AD EUNDEM.

G. Dei gratia Londoniensis episcopus, venerabili
fratri et amico WILLELMO eadem gratia abbati
Radingensi, salutem et sinceræ dilectionis affec-
tum.

Suscipimus litteras dilectionis vestrae, quæ nos
tanto verius gaudio perfunderunt, quanto de statu et
salute vestra, nostræ certius sollicitudini responde-
runt. Prodigia namque verborum fama, quæ ves-
trum ad nos nuntium prævolaret, de protectione ve-
stra, de statione in litore, de procella, de periculis,
multa varie inconstanterque nuntiabat. Unde pes-
simus in dubiis augur timor anxie distrahebat nos
scienties quidem et expertos toties, quod navigatio
B sæpe periculosa est semper aut incerta. Nunc au-
tem accepto nuntio salutis et incolumitatis vestrae,
pro vobis divinæ gratiæ gratias referimus, quæ vos
in tantis periculis periclitari non permisit. Ves-
trum autem colloquium summopere desideramus,
sed ante diem adventum vobis occurrere, nos ad
illud trahente necessitate, non valemus. Tunc vero
Londoniis esse disponimus, et si usque Fuleham
procedere fuerit opportunum et placitum, nobis id
recurrente nuntio quam citius significari postu-
lamus. Valere vos optamus in Domino, charissime.

EPISTOLA CCLXIV.

AD ABBATEM RIEVALLENSSEM.

Dominus Londoniensis abbati Rievallensi.

Quanto vestra domusque vestra fama prædicatur
hilarior, tanto magis vobis observandum est, ut quod
communis habet opinio, nullius fratrum vestrorum
consilio denigretur aut facto. Conqueruntur pluri-
mum filii Brithmeri de Tantiuna, dudum fratris et
benefactoris vestri, quod summam magnam pecuniæ
patri suo debitam, sibi super hoc jam sæpe requisiti
reddere contradicitis, nec patris sui meritis juxta
quod vestram deceret religionem, opere respondetis.
Qui super hoc a domino rege jamdiu litteras ad vos
expetiissent, nisi ob vestram domusque vestrae reve-
rentiam, nostra eos sollicitudo retardasset. Unde
benevolentiae vestrae preces affectuose porrigimus,
quatenus amore justitiæ nostræque petitionis in-
nitui, eis aut quod postulant juste solvatis, aut si
D repetunt indebitum, hoc in jure declarare, moleste
ne feratis.

EPISTOLA CCLXV.

AD F. SALMURENSEM ABBATEM.

G. Dei gratia Londoniensis episcopus, venerabili
domino fratrique charissimo F. Salmurensi eadem
gratia abbati, salutem et sinceræ charitatis affectum.

Vestra, frater charissime, multa animi benignitate
salutamus auspicia, optantes laudabile illud vestrae
promotionis initium, felici semper cursu dirigi et,
Domino manum misericorditer apponente, beato tan-
dem fine compleri. Gratulamur equidem et plena
mentis jucunditate perfundimur, attendentes manum
Domini multa gloria deducentem vos et a bonis ad
meliora continuo pertrahentem. Hæc enim est, quæ

vos a mundi, huius avulsit illecebris, quæ vos per gradus virtutum deducens, sobrie ab humili quem elegeratis loco, suis utens verbis quibus humiles ut superius ascendunt affari consuevit, ad pastorale tandem jam culmen, multa bonorum conniventia, et unanimi fratrum vestrorum, ut audimus, electione sublimavit. In quo prævenienti gratiæ gratias reddimus, subsequenti, preces porrigimus, ut in sublimi positus, in domo Domini, tanquam virtutis speculum eluceatis, et virtutis iter hoc honeste conversando, virtutis amatoribus, ut dux ad vitam vere prævius, ostendatis. Agit hoc ille qui suos quo levat altius dignitate, eo firmat et fundat solidius humilitate, et ad perfectum adducit ea quæ per ipsius Spiritum ad omnes diffunditur charitate. Liberet in hunc modum fraternitati vestræ plura suggerere, sed confisi de ea, quæ vos intus ad plenum edocet unctione, illi vela vestra committimus, quem suos ad portum perducere enavigata mundi huius tempestate, suavi sancti Spiritus aura sinus mentium feliciter implente, certa veritate cognovimus. Ad illum styllum veritatis, pro quo vobis ad præsens scribendi necessitatem suscepimus. Tria in petitione proponimus, in quibus a serenitate vestra exaudiri, toto mentis affectu, tanta animæ pulsantis instantia postulamus, tres pro tribus ad præsens quasi legatione fungimur. Hi sunt dilectus filius noster Baderun de Munemne... Ecclesiæ vestræ benefactor, et amicus noster in Christo charissimus, Robertus [de Castro novo] de Casteilhun-arco, amicus vester humilis et devotus. Luget enim Baderun pristina parentum suorum, et sua postmodum erga Ecclesiam beneficia in irritum adeo devocari, ut a corde non solum quasi mortuus occiderit, sed et iram vestram nullis suis, ut sperat, meritis, unde totus turbatur incurrerit. Si quid vult, vos illud nolle conqueritur; si quid postulat, vos avertere faciem erubescit. Mallet cum domo vestra amicitias non iniisse, quam multis acquisitas meritis taliter amisisse. Unde si quid est, quod serenitatem vestram adversus ipsum obnubilet, donari nobis hanc veniam, et nubilum hoc flante sancti Spiritus aura, prorsus evacuari, postulamus, et in plenam gratiam magnum vestræ domus amicum suscipi et blandis et honestis responsionibus foveri postulamus, mandamus atque præcipimus. Expedit enim Ecclesiæ vestræ non... quemque ab ejus alienari gratia, cujus liberalitas eidem ampla contulerit beneficia. Priorem nostrum virtutum meritis in publicis jam diutius domus vestra ad nos non intercedente dilatione remittit, rogans et nobis ut amico, de quo per omnia bene. Hinc ad fratrem charissimum Robertum de Castro novo nostræ cursus orationis illabitur. Cujus dum reminiscimur, animo in diversa distrahimur. Nam si amicus est, ejus a nobis elongari præsentiam tantopere cur optamus? Sed amicum magis absentem vivere quam præsentem mori optandum est. Sub arcetophylace, sub arcto, sub axe boreali, cuncta sibi infesta sunt. Aer frigidus, æterna glacies, aqua inutilis et coctione potabilis, febri,

A qua fatigatur assidue, plenam præstant causam atque materiam. Iude est, quod dilectæ nobis benignitati vestræ preces porrigimus, ut cum quasi postliminio reversum, cum gratia suscipiatis, et ne iugo pressus obedientiæ tristius ingemiscendo deficiat, vobis commanentem, suis stellis et origine piis hausit aere frui permittatis. Confidenter in amici castra migravimus, et si multa, tamen ut credimus inoffensa vestri postulantes. In quibus nos exaudiens, gratia vestra, non antiqua solum familiaritate, sed et beneficio recenti, nostra sibi secure vendicabit servitia. Incolumitatem vestram et successus conservet Dominus.

EPISTOLA CCLXVI.

AD LAURENTIUM ABBATEM WESTMONASTERIENSEM.

B G. Dei gratia Londoniensis episcopus, venerabili fratri et amico L. Westmonasteriensi eadem gratia abbati, et dilecto sibi in Domino ejusdem Ecclesiæ conventui, bene semper sapere, et intelligere ac novissima providere.

Quorumdam, fratres, relatione didici, quod priusquam majori communicetur audientiæ ad vestram per me referri notitiam tam utilio quam humile reputavi. Inter ecclesiam beati Pauli et nos novæ litis est, ut dicitur, accensa scintilla, quæ si non extincta citius in flammam eruperit, in partem utriusque dispendium sese procul dubio dilatabit. Solent enim causæ modicæ dissensionis gravissimæ fomitem ministrare, quæ nisi in ipsa reprimantur initis, studio partium tractuque temporis adeo sæpius invalescunt, ut post sumptus plurimos et labores immensus admodum sit difficile diffidentes alibi diu partes in pacis pristina serenitatem aliquatenus revocare. Unde quia rerum meliori solet exitus inspectio prudens, dilectam mihi in Domino fraternitatem vestram porrecta prece convenio, paternam quoque charitate consilium do, ne adversus matrem et fratres occasionem queratis discordiæ, ne a suæ matris amplexibus filiam studeatis avellere, sed solitam debitamque sibi reverentiam exhibendo, paucitatem hanc dierum nobiscum velitis in pace et charitatis unitate transigere, sancta quadam animi nobilitate dedignant, ob quæstum modicum et ignobilem a bono pacis, quod inter commissas nobis Ecclesias perseveravit hætenus, inconsiderata quadam animi præsumptione resilire. Ecclesiam quippe Sanctæ Margarietæ, super qua recens hæc est orta dissensio, a primis suis fundamentis usque ad dies hos episcopis Londoniensibus et eorum archidiaconis sine contradictione et reclamazione fuisse subjectam consensum totius undique vicinæ testimonium clamat, et hanc meo quoque tempore R. archidiacono debitum et consuetum cathedraicum exsolvisse in illis fere partibus nullus ignorat. Si itaque matri vestræ annuos XII subtraxeritis, in modico grave sibi dedecus inferetis, et emolumentum communi mense certe permodicum in summa modica conferetis. Utilibus igitur acquiescendo monitis, meum sustinete, si placet, hac vice consilium, ut appellationibus

hinc inde remissis, laxatis si quæ datæ sunt in quæcunque sententiis, memoratos jam nummos archidiacono solvi permittatis, et in eo statu quo in discessu meo fuerant stare cuncta permittatis, nec ob leve compendium a matris vestræ gratia recedendo dulce reputetis et sapidum, quod in ejus injuriam vestra sibi fuerit usurpatione detentum. Sic inter nos gratiam conciliare poteritis, sic ad obsequium me vestrum promptum et paratum habebitis, sic ob depressionem meam vos ad Ecclesiæ mihi commissæ depressionem minime prosiluisse ipsa vestri operis evidentia luce clarius ostenditis. *Sufficit dei malitia sua (Matth., vi).* Satis oneratus sum ea quæ me premit injuria. Si dolori dolorem injuriæ injuriam addideritis, vos meo parum compati. Infortunio nulli dubium relinquitis. In quantum possumus nobis decem non possumus, et si ceptis stare contenditis, omnes nos et nostros ad propulsandam pro viribus injuriam fortiter exacnetis. Valere vos et nobis in tribulatione parcere desideramus, charissimi.

EPISTOLA CCLXVII.

AD HENRICUM REGEM.

Domino suo charissimo illustri Anglorum regi H., frater G. Londoniensis Ecclesiæ minister, salutem quæ nunc est, et quam speramus a Domino.

Vestra nos, domine, fovente præsentia, omnis a nobis alte conquievit injuria. In abcessu vero vestro pacis nostræ detrimentum illatis illico experituri sumus. Novit enim excellentia vestra, quod cum Herefordensi adhuc deserviremus Ecclesiæ, essarta quædam Malvernæ ad coronam vestram pertinentia, nobis munificentia regia et liberalitate sola concessis. Illa vero quatuor servientibus nostris, qui in ipsius Ecclesiæ negotiis nobiscum fideliter aliquandiu laboraverant, tenui quidem servitii sui remuneratione donavimus, et vestrum in hoc assensum et confirmationem a gratia vestra impetravimus. Venerabilis vero frater noster dominus Herefordiensis episcopus, post vestrum statim transitum, ipsos eisdem possessiunculis expulit, et requisitus super hoc, nec chartæ vestræ reverentia, nec prece nostra motus in aliqua, in omnibus sese nobis inexorabilem exhibuit. Inde est quod ad nota præsidia clementiæ vestræ recurrentes, humili [vobis] supplicamus affectu, quatenus collata nobis tot bona, hæc etiam, si placet, gratia cumuletis. Willelmum Folet, in quem modicam donationem contulimus, etiam dictos servientes nostros his quibus post transitum vestrum absque audientia et judicio spoliati sunt, usque ad redditum vestrum resaisiri præcipiatis, et cum in regnum vestrum gratia vos divina reduxerit, quæ a nobis gesta sunt præsentibus nobis audiat, et quæ corrigenda videritis, regia, prout placuerit, æquitate corrigatis. Summa quam restitui petimus, non x plene marcarum est, cum sit tamen ejus Ecclesiæ, donatione quidem vestra, nostroque labore, tempore quo in ea ministravimus, centum plene marcarum redditu, melior facta conditio. Incolumi-

tatem vestram conservet in longa tempora Deus, in Christo dilecte domine.

EPISTOLA CCLXVIII.

AD EUMDEM.

Domino suo charissimo illustri Anglorum regi H. frater G. Londoniensis Ecclesiæ minister salutem et debitum devotæ fidelitatis obsequium.

Vestram, domine, credimus excellentiam non latere, qualiter in me et quosdam alios fideles vestros manum suam dominus Cantuariensis aggravaverit, et quoad potuit, gladium in nos spirituale in juris publici lacionem dextera iniquitatis intorserit. Canon namque notissimus hic est, ut nemo præpropere vel præpostere, id est non commonitus neque convictus judicetur, nec episcopus omnino quemquam excommunicet, donec causa probetur, super qua reus impellitur. Unde cum a jure exorbitaverit, de Domino confidimus, ut in nos vibrando gladium aerem potius verberaverit, quam aut corpore aut anima spirituale nobis vulnus inflixerit. Ictus enim ejus ad dominum papam appellando prævenimus, et in initio Quadragesimæ facta appellatio, sententiam die Palmarum latam plene viribus evacuavit. Sixtus enim papa sic statuit: « Quoties episcopus se a suo metropolitano putaverit prægravari, vel eum suspectum habuerit, mox Romanam appellet sedem, a qua dum se audiri poposcerit, nullus eum excommunicet, antequam causa summi pontificis auctoritate finiat, quod si aliter præsumptum fuerit, nihil erit, sed viribus omnino carebit. »

EPISTOLA CCLXIX.

AD EUMDEM.

Domino regi dominus Londoniensis, salutem et amoris intimam de ipsis cordis sui medullis affectionem.

Vestræ, domine, celsitudini scribere tardavi, quia quæ de Ecclesiis regni vestri gesta sunt, vobis priusquam possem scribere, per nuntios justitiæ vestræ manifestata fuisse cognovi. Nunc autem scribo vel sero, et ob Dei misericordiam supplex obsecro ne mihi detrahentibus acquiescatis, ne monachis Cantuariæ in his quæ maligna loquuntur adversum me, fidem aliquatenus habeatis. Aiunt enim me ad archiepiscopatum Cantuariensem ambire, et ob hoc electiones quas de aliis faciunt, modis omnibus impedire. Novit ipse qui Veritas est nullum horum verum esse. In promotione mea prima Cluniaci prior quidem sum constitutus in ordine, dehinc prior albatii Villæ. Hinc abbas Glocestriæ, post episcopus Herefordiensis. Hinc translatus Londoniæ, confidenter assero, quod ad nullum horum ambivi, quorum tamen unumquodque, permittente Deo, consequenter obtinui. In secretis itaque cordis mei dico Domino Deo meo, quod sufficit mihi gratia sua; dico et vobis domino meo charissimo, quod sufficienter mihi in his indulta a vobis benignissime gratia vestra. Avertat a me Dominus, hanc cupiditatem. Avertat a vobis Omnipotens assensum in hoc præbendi omnimodo voluntatem. Si vero electiones suas aliqua-

tenus impedivi, hinc potestis advertere. Primo de domino Bajocensi actum est. Quod episcopis regni vestri licet grave videretur, omnes tamen opem ferente Domino, ad hoc induxi, ut in ipsum assentirent, ipsumque suscipere parati essent. Soli monachi respuerunt, quod vos præcipue velle cognoverint. De Beccensi postmodum actum est. Quod licet gravissimum omnibus regni episcopis videretur, multa tamen instantia et industria obtinui, ut in ipsum assentiendo suæ præjudicarent voluntati. Ad ultimum, ad abbatem de Cereiseo decursum est. Quod licet et episcopis et omnibus terræ vestræ abbatibus, omnibusque regni vestri personis non solum grave videretur, verum et indignissimum, ego tamen, ne pax Ecclesiæ turbaretur, nec quam desiderabatis, electio ulterius differretur, etsi cum multa ira et indignatione omnium, tandem tamen obtinui, ut si monachi Cantuariæ in electionis pronuntiatione episcopis regni vestri vel modicam exhibere voluissent reverentiam, in ipsum acquiescerent, et ne vester adversus eos turbaretur animus, rem hoc fine terminare permitterent. Verum hi sibi omnia usurpantes, et episcopos omnes a consilio et electione, et electionis pronuntiatione severius excludentes, quod cum aliquantula modestia agentes tunc obtinere potuerunt, nimia utentes obstinatio, ulterius differri compulerunt. Qua in re, si placet, honori vestro consulite, diligenter attendentes quid vobis magis expediat, an monachis totum ascribere, qui vobis nec hominio tenentur affectu nec fidelitate, aut in eligenda maxima persona regni vestri, reverentiam aliquam episcopis attribueret, qui vobis aut hominio aut fidelitate obligati, honorem vestrum in Deo conservare duplici necessitate tenentur obnoxii. Bonum est itaque si placet, ut rigorem monachorum, quæ tot de humilitate vestra concipiunt, ea qua scitis modestia et sapientia temperetis, et ad aliquam, si placet, regni vestri personam ipsorum consilium revocetis, et salvo jure utriusque partis, in posterum de prima voce in electione habenda, cum de eo agi fuerit opportunum, electionem ipsam per priorem et aliquem episcoporum simul aut alio quocunque modo, quod Deus vobis et consilio vestro revelaverit, pronuntiari faciatis, ut per sapientiam vestram pacificato statu Ecclesiæ, nebulam quæ ex dissensione hac regno vestro adhuc impendit, gratiam præstante Domino, prorsus evacuetis.

EPISTOLA CCLXX.

AD EUNDEM HENRICUM REGEM.

Domino regi dominus Londoniensis, salutem et devotum debite fidelitatis obsequium.

Vestra, domine, dignos speramus gratia, quos in Ecclesia Dei et litteratura commendat et vita. Inde est, quod apud excellentiam vestram clericum nostrum ecclesiæ Beati Pauli archidiaconum Radulphum de Biceto, eo securius commendamus, quod ei et scientiam ad doctrinam et ad honestatem mores exuberare jamdiu experientia rerum certa cognovimus. Accedit ad hæc amor integer et affectionis

A ejus erga vos plena devotio, ut vos ulnis charitatis corde complectens, honori vestro gloriæque congratulans, felices vobis in Domino successus semper exoptet, et sibi commissos ut a summo rege vobis id impetrent cum se præstat opportunitas, indesinenter admoneat. Quem in oborta sibi necessitate recurrentem ad vos, nilque nisi quod juri debetur et æquitati postulantem, cordis intimo supplicamus affectu, quatenus ob Dei reverentiam nostræque petitionis et honestatis ejus, et exhibitæ vobis et semper exhibendæ fidelitatis intuitu, clementer exaudiat, et ut præbendæ suæ portio quam sibi et apostolica et regia vestra concedit et confirmat auctoritas, ipsi in integrum restituatur, juxta datam vobis a Domino sapientiam, tam juste quam misericorditer efficiatis.

EPISTOLA CCLXXI.

AD EUNDEM.

Domino suo charissimo illustri Anglorum regi HENRICO, frater GILBERTUS Londoniensis Ecclesiæ minister, pedibus sanctis conculcato Satan, in Christo triumphare feliciter.

Mandatum domini papæ, domine, nuper accepimus, quo nobis injungitur ut censum beati Petri a fratribus et coepiscopis nostris suscipiamus, et per nuntios quos direxit ad nos, ipsi cito transmittamus. Quod quia de vestra totum pendet misericordia, nec potest effectu compleri nisi per vos, vestræ id notificamus excellentiæ, ut vestris si placet justitiariis super hoc scribatis, et quod vestræ voluntati placuerit, id fieri præcipiat. Optamus autem ut cor vestrum divinitus sancta possideat et actus vestros omnes sic disponat et dirigat, ut nec in Deum offendatis, nec adversum vos aut regnum vestrum domino papæ, quem vos plurimum dilexisse novimus, justam querelæ causam et materiam præbeatis. De cætero dies instat, quem appellationi ad dominum papam factæ præfiximus: de qua prosequenda necesse est nobis, ut voluntatem vestram et consilium amodo certius agnoscamus. Nam, cum minus lædant jacula quæ prævidentur, timendum nobis est ne, si ad momentum temporis omnia reserventur, singula quo præscita minus et minus prætractata fuerint, eo minus commode quam exigit expediantur. Inscribat cordi vestro digitus Dei quid fieri expediat et nos manus ejus ubique protegat atque custodiat, domine in Christo dilectissime.

EPISTOLA CCLXXII.

AD EUNDEM, DE CENSU SANCTI PETRI.

Censum, domine, beati Petri suscepimus, exceptis quadraginta duabus libris quas de Lincolnienſi episcopatu et centum solidos quos de Eliensi episcopatu nondum habuimus. Nuntios vero domini papæ, octo scilicet mercatores Flandriæ, qui sibi iterentur marcas argenti Romæ mutuo præstiterunt, sperantes se summam eandem de manu misericordiæ vestræ suscepturos, apud nos jamdiu detinuiſimus, sperantes a sublimitate vestra verbum aliquod audire per decanum de Waltham quod et dominum

papam et nuntios ejus possit exhilarare. Quod quia nonandum actum est, ipsos ulterius detinere non possumus. Sed quod revertuntur inanes, posse causae vestrae plurimum obesse pertimescimus. Qua in re discretio vestra providebit utiliter quid expediat: quid honorem vestrum deceat; quid animae vestrae salutis proficiat. Fideles vero vestri, qui penes vos sunt, qui vices vestras per omnia prosperari desiderant, vellent vestrum in re ista mutari consilium, ut domino papae reddendo suum ipsum ad negotia vestra non adversarium, sed per omnia benevolum haberetis et obnoxium. Illuminet Dominus vultum suum super vos et vestra semper negotia bono fine concludat, in Christo domine dilectissime.

EPISTOLA CCLXXIII.

AD EUNDEM.

HENRICO regi Angliae GILBERTUS Londoniensis episcopus, pie salutationis affectum et fideliter obsequentis officium

Venerabilem fratrem nostrum dominum Saresburiensem episcopum vestrae, domine, sublimitati digne duximus commendandum. Quem vobis utique fidelem novimus, et charitate non ficta vestros per omnia desiderare successus, indubitanter agnovimus. Unde majestati regiae honori procul dubio cedet et gloriae, ut in ipsum clementer respiciatis, et regiae pietatis oculos in ipsum attentius habeatis. Fidelem quippe clericum vestrum transmittet ad vos, ut quam pie dominus Cantuariensis sit circa ipsum sollicitus, et verbis ejus et scriptis, quae praemanibus habet, agnoscatis. Onus siquidem suspensionis ad praesens sustinet, et jam citatus, juste sive injuste, excommunicationis sententiam, ut ex scriptis perpendimus, et retroactis manifeste conjicimus, nisi per vos in proximo non evadet. Quam si contigerit in ipsum dari, erit utique sibi dedecori, et omnibus regni vestri personis concussioni pariter et timori. Quem si vestra benignitas evocaret ad se, iter acceleraret ad vos, et imminens hoc periculum ope vestra fretus, juvante Domino, optime declinaret. Unde cum petente petimus; cum supplicante supplicamus, quatenus suspiranti in hoc fideli vestro accessum ad vos ad praesens, si placet, concedatis, et ipsum conatus ejus, qui vobis adversatur in omnibus, et appellationibus et modis aliis, quos revelabit Dominus, usque ad legatorum vestrorum adventum elidere permittatis. Hoc siquidem vobis honori, securitati vero nobis omnibus futurum credimus, qui vices nostras in protectionem vestram fratri nostro fidelissimo committere sane poterimus, ut amoveat abundans cautela, si quid in regnum vestrum male machinari voluerit potestas, quod absit, indiscreta. Valere vos optamus in Domino, diuque regnare feliciter, in Christo dilectissime.

EPISTOLA CCLXXIV.

AD EUNDEM.

HENRICO regi Angliae, GILBERTUS Londoniensis episcopus, salutem eam non est et quam speramus a Domino.

Placuit excellentiae vestrae, quod ecclesiae clericorum archiepiscopi, quae in episcopatu Londoniensi, sive in Cantia consistunt, sub nostra essent custodia constituta. Quod quia pietatis affectu vobis intelleximus inspiratum, ne per manus scilicet laicas dispensarentur res ecclesiasticae, oblationes scilicet fidelium, eleemosynae pauperum, et decimationes populorum aliter quam fas est tractarentur, nos cum multa et mera, Deus acit, charitate libenter onus illud suscepimus, ut et vos a peccato in parte hac mundum et immunem servaremus, et clericos nihilominus, si quando debita humilitate vestram recuperarent gratiam, indemnes pariter conservaremus. Archiepiscopus autem, qui quasi sedens in insidiis, adversus meam specialiter personam occasiones quaerit, inde mihi nocere nititur, unde aliis prodesse studebam. Qui directis litteris mihi nuper junxit in vi obedientiae et in virtute Spiritus sancti, ut quidquid ex iisdem recepissem ecclesiis, infra quadraginta dies post litterarum susceptionem sibi suisque clericis restituere non omitterem. Ego vero invocata Spiritus sancti gratia, obiectoque appellationis remedio mandatum, quo meam injuste gravare volebat innocentiam, usque ad audientiam domini papae suspendi, suspensumque declinavi ad tempus, certus quidem quod haec et graviora his supra dorsum meum fabricantur ab eo, et illi assistentibus. Hinc est quod vestrae sublimitati supplico in ea fiducia, qua me semper audire consuevistis, ut custodiam praedictarum ecclesiarum alii, cui honeste praevideritis, committatis, et me, si placet, hoc onere exemptis, et alia quae mihi parantur opera fortius sustinere, et promptius possim expedire in Domino. Pecuniam quoque, quam exinde recepi et consanguavi, ad summam centum octo libras et quatuordecim solidos et sex denarios, peto, si placet, liceat mihi cum gratia et permissione vestra in tuto deponere penes quamcunque personam ecclesiasticam, eamque, licet ingratum, his quorum gratia sit, adhuc consignatam salvamque conservare, donec Dominus judicaverit ad quem finem debeat res ista pervenire.

Superest adhuc aliud, in quo tota vobis nobiscum supplicat Anglorum Ecclesia, et illi praecipue, qui salutem vestram et vestrum honorem maxime diligunt et amplexantur. Durius enim, quam vestrae expediat magnificentiae, agitur apud vos cum illis, quos dominus domesticos suos esse constituit, quos in privatam ascivit familiam, quos mensae suae dispensatores ordinavit. Cum sacerdotibus videlicet, qui in regno Angliae nec laica fruantur libertate, nec judiciis tractantur ecclesiasticis. In quo si omnes tacent, ego non tacebo; si omnes desperant, sed non ego. Absens igitur corpore, sed spiritu praesens oro et obseoro vos per salutem vestram et propter salutem vestram, ut Willelmum, quondam capellanum archiepiscopi, et quampures clericos per Angliam, quos nec confessos nec convictos vestri prius praesumunt, quam judicent, punire mi-

nistri, Ecclesiæ Dei, cujus sunt obsequiis deputati, A restitui jubeatis. Vale.

EPISTOLA CCLXXV.

AD EUMDEM.

Tanta nos, domine, mandati moles ad præsens opprimat, tanta se nobis auctoritas opponit, ut consilium pariter et auxilium a vobis expetere a summa compellamur necessitate. Nam quod auctoritas apostolica præcipit, hoc appellatio non suspendit. Nec adversus ejus mandatum potest nullum esse remedium, cum quod præcipitur implere necesse sit, aut inobedientiæ reatum incurrere. Die namque beati Pauli, cum Londoniis ad altare consistere-
mus, litteras domini papæ de manu cujusdam nobis penitus ignoti suscepimus, quibus legatio in totam Angliam, excepto Eboracensi episcopatu, domino Cantuariensi conceditur, et apostolica auctoritate confirmatur. Omnibus etiam nobis ipsius regni episcopis eadem auctoritate injungitur, quatenus ei, tanquam apostolicæ sedis legato, humiliter obediamus, et ad ejus vocationem absque contradictione conveniamus, et super his quæ ad nostrum spectant officium, ei plene respondeamus, et quæ statuerit, firmiter observanda suscipiamus. Adjicitur etiam, ut omnes, qui beneficia clericorum archiepiscopi in eorum absentia mandato vestro perceperunt, ad plenam eorum infra duos menses restitutionem anathematis sententia, omni appellatione remota, compellamus. Denarium etiam beati Petri a fratribus et coepiscopis nostris præcipimur exigere, et nuntiis destinatis ad nos integre consignare. C Litteras etiam legationis jam dictæ, et litteras archiepiscopi, quas ad plures transmittit epis-
pos, ipsis aut mittere aut præsentare præcipimur, si in nostri status et ordinis integritate ulterius perseverare curamus. Ad pedes itaque sublimitatis vestræ corde prostrati deposcimus, ne ob magna negotia, quæ cura regia subministrat, respicere desinatis in nos, sed ne in summam nostri ignominiam ex toto redigamur in nihilum, pietate regia provideatis. Quod quidem bene facietis, si nos mandatis apostolicis pace vestra obedire concesseritis, et reddito denario beati Petri, et clericis quæ sua sunt in misericordia vestra restitutos, episcopis omnibus mandaveritis, ut si in litteris archiepiscopi adversus regni consuetudines gravamen aliquod intellexerint, ad dominum papam statim, vel ad legatos, qui diriguntur ad vos, confiderenter appellent. Sic enim opus misericordiæ perficietis, et nos ab inobedientiæ reatu conservabitis, et causæ vestræ, ne in aliquo detrimentum accipiat, communi omnium appellatione providebitis. Doceat vos Dominus facere voluntatem suam, et eam sublevare moneat, quam ad præsens experimur, angustiam. Valeat dominus meus in Christo charissimus.

EPISTOLA CCLXXVI.

AD EUMDEM.

HENRICO regi Angliæ, GILBERTUS Londoniensis episcopus, devotæ fidelitatis obsequium.

Vestram, domine, credimus non intere excellentiam, qualiter in me, et quosdam alios fideles vestros manum suam dominus Cantuariensis aggravaverit, et quod potuit, gladium in nos spiritualem, in juris publici læsionem, dextera iniquitatis intorsit. Canon namque potissimus hic est, ut nemo præpropere vel præpostere, id est non commonitus, neque convictus judicetur, nec episcopus omnino quemquam excommunicet, donec causa probeur, super qua reus impetitur. Unde cum a jure exorbitaverit, de Domino confidimus, ut in nos vibrando gladium, aerem potius verberaverit, quam aut corpore aut anima spirituale nobis vulnus inflixerit. Ictus enim ejus ad dominum papam appellando prævenimus, et in initio Quadragesimæ facta appellatione sententiam in die Palmarum latam plene viribus evacuavit. Sixtus enim papa sic constituit: « Quoties episcopus se a suo metropolitano putaverit prægravari, vel eum suspectum habuerit, mox Romanam appellet sedem, a qua dum se audiri poposcerit, nullus cum excommunicet, antequam causa summi pontificis auctoritate finiatur. Quod si aliter præsumptum fuerit, nihil erit, sed viribus omnino carebit. »

EPISTOLA CCLXXVII.

AD EUMDEM.

Mittimus ad vos, domine, familiarem clericum nostrum magistrum H. . . . utique fidem vestrum, quanto possumus affectu supplicantes, ut ipsum in petitionibus nostris benigne, si placet, audiat, et nobis in summa necessitate nostra regia clementia subveniat. Quod bene quidem facietis, si domino papæ pro nobis aliquantulum affectuose scripseritis, ut appellationem, quam ad ipsum fecimus, ut juris dictat æquitas, admittat, et post appellationem in nos latam sententiam, ea qua potest et debet, æquitate suspendat, donec causam nostram audiat, et digna meritis cuique retribuatur. Ad cardinales etiam amicos vestros litteras, si placet, exposcimus, ut ad hoc dominum papam inflectant, et super admit-
tenda appellatione nostra indultum omnibus oppressis beneficium prece vestra nobis obtineant. Sixtus enim papa sic statuit: « Quoties episcopus se a suo metropolitano senserit prægravari, vel eum suspectum habuerit, mox Romanam appellet sedem, a qua dum se audiri poposcerit, nullus cum excommunicet, antequam causa summi pontificis finiatur auctoritate. Quod si aliter præsumptum fuerit, nil erit, sed viribus omnino carebit. » De cætero quia crebra allocutione frui vestra summopere nobis necesse est et consilio, excellentiæ vestræ devotissime supplicamus, ut nobis transfretandi licentiam concedatis, et in partibus transmarinis nuntios, quos ad dominum papam mittimus, nos expectare permittatis. Conservet incolumitatem vestram in longa tempora omnipotens Dominus

EPISTOLA CCLXXVIII.

AD M. REGEM SCOTIÆ.

Domino suo clarissimo illustri regi Scotiæ M.,

frater G. Londoniensis Ecclesiæ minister, per quem A reges regnant diu regnare feliciter.

Sublimitati vestræ, charissime domine, hac confidentia scribimus, quia vos sincero cordis affectu diligimus, et in omnibus habemus acceptum si gratum vobis in aliquo præstaremus obsequium. Speramus etiam ipsa manu Spiritus sancti plantatam esse in corde vestro radicem æquitatis et iudicii iusti, et ideo in causis subditorum vestrorum mentem vestram posse bonorum precibus ad id quod justum est facile inclinari. Scriptum enim est : *Beati qui custodiunt iudicium et faciunt iustitiam in omni tempore (Psal. cv).* Et Sapientia ait : *Tolle rubiginem de argento et exibat vas purissimum. Tolle iniustitiam de corde regis, et iustitia firmabitur thronus ejus (Psal. xxv).* Inde est quod regis nobilitati vestræ pro præsentium latore, Helia proximo cognato nostro, preces affectuose porrigimus, quatenus pro amore Dei et petitione nostra ejus servitium accipiat, et de hereditate sua ipsum exaudiat, et nos et multos nobiscum gratiæ vobis et servitii debitores efficiat. Si gratiam in oculis vestris invenerit, ad servitium vestrum multos adiutores inveniet, quorum sibi quisque de suo libenter subveniet. Istud vero postulare nequaquam præsumeremus, si patrem ejus perfide se aut maligne adversum vos et patres vestros habuisse cognosceremus, sed ipsum pro fidelitate patris vestri exheredatum audivimus, et speramus de misericordia vestra ne quem patri vestro fideliter ad posse suum servisse cognoscitis, ejus unquam canos cum mœnore ad inferos deducatis. Valeat dominus meus charissimus et cor ejus Spiritus Dei repleat atque possideat.

EPISTOLA CCLXXXIX.

AD ROBERTUM COMITEM LEICESTRIÆ.

Venerabili domino et amico suo charissimo Roberto comiti Leicestræ, frater G. Londoniensis Ecclesiæ minister, consecrata Domino tirocinia beatæ perseverantiæ fine concludere.

Cum sit vitis et divitis admodum grata societas, gratulor et mihi totus applaudo, charissime, divitias in te quadam singulari gratia deservire virtuti. Audisti divitem illum purpura et bysso vestitum, epulantem quotidie splendide, miserabiliter ad inferna deductum, ubi cum flammis anxius aestuaret, in linguæ suæ refrigerium nec aquæ guttam valuit impetrare. Audisti et in Evangelio, divitem, ejus uberes fructus ager attulit, dicentem intra se : *Destruam horrea mea et majora faciam, et illuc congregabo omnia quæ nata sunt mihi bona, et dicam animæ meæ : Anima, habes multa bona posita in annos plurimos, requiesce, comede, bibe, et epulare (Luc. xii).* Cui divinitus dictum est : *Stulte, hac nocte animam tuam repetent a te. Quæ autem parasti, cujus erunt? (Ibid.)* Et si mentis oculos in mundi plenitudinem, Dei Spiritu lucem ministrante, circumquaque reducimus, divitibus hujus mundi mundum abundare cognoscimus, quibus suæ divi-

tiæ fomento vitiorum sunt non incremento virtutum, cum magis possideantur ab his quam eas quadam animi sancti nobilitate possideant. Divites hujusmodi, ait Dominus, non facile regnum Dei adepturos, et camelum per foramen acus intrare posse facilius, quam ipsos in regnum cælorum. Tremenda vox, et divitibus hujusmodi exhorrenda. Gratulor, et totus mihi applaudo, charissime, quod istorum abhorres semitas, horum jamdiu vestigia declinasti. Gaudeo te tua cogitare novissima, et illud Psalmistæ mentis oculis intueri : *Dormierunt somnum suum, et nihil invenerunt omnium viri divitiarum in manibus suis (Psal. lxxv).* Qui sibi credita si fideliter erogassent, evigilantes illa die a somno mortis suis hæc in manibus invenissent. Divina voce dictum est : *Non apparebis vacuus ante conspectum Domini Dei tui (Deut. xvi).* Totum quod Ecclesiæ Dei, quod pauperibus ad præsens erogas, illa die paratum invenies, et quod modo larga miseratione distribuis, illa die Domino cum fiducia præsentabis. Beati multi sunt et sapientes, hos tamen tantum beatos iudico, hos solummodo sapientes, qui mansura semper bona crebra meditatione considerant, in his mentem occupant, his invigilant, et hæc ut queant apprehendere tota animi ratione pertractant. Credo, charissime, Patri complacuisse in te. Spero columbam sanctam quæ super Dominum in Jordane apparuit jam nidificasse in te. Curre post Spiritum qui trahit te, qui suis intus bonis ornabit te et amore Christi perfecto ditabit te. Cujus amor verus si tangit te, si rapit te, si absorbet te, levabit te juxta prophetam super te, quia super altitudinem extollet te. Scribendi tibi nactus occasionem, vix me cohibeo, charissime.

EPISTOLA CCLXXX.

AD EUNDEN.

Venerabili domino et amico charissimo, R. comiti Leicestræ, frater G. Londoniensis Ecclesiæ minister, salutem quæ nunc est, et quam speramus a Domino.

Verborum facile suadet paucitas, cum ad exaudiendum prompta est ipsius ad quem scribitur amica benignitas. De vobis itaque per omnia sperantes optine, charitate sic exhortante confidimus, ut unde recurrimus ad vos, in hoc repulsam minime sentiamus. A sublimitate vestra ad quemdam canonicum nostrum et amicum Baldwinum nomine, litteræ vestræ citationis emissæ sunt, ut apud Oxenefordam in conventu proximo, præsentem se vobis exhibeat, et cuidam homini suo et fere rustico, de non observata pactione quadam inter ipsos, ut asserit, chirographo confirmata respondeat. Res exilis est, causa permodica, dimidia virgata terræ est, de qua agitur, duodecim pumorum census, qui annuatim exsolvitur. Unde si inter clericum beati Pauli et ipsius hominem super fundo ecclesiæ suæ pertinenti, lis aliqua aborta est, spectat ad nos, si placet, audire quod gestum est, et conquerenti justitiam in omnibus exhibere. Qui cum partes nostras despiciat, et ad sublimitatem ve-

stram non transiliendo prosiliat, petimus, beato Paulo et nobis, si placet, hanc reverentiam exhiberi, ut de conservanda Ecclesiæ Dei dignitate sua mentem vestram et animum ad nos remissus, per vos etiam quod justum fuerit plene responsurus intelligat. Ad vos litteras citationis vestræ remissionis, eo quod in his notariorum vestrorum stylum minime recognoscimus. Valere vos optamus in Domino, et sua Cæsari sic reddere, ut quæ Dei sunt, reddatis et Deo.

EPISTOLA CCLXXXI.

AD A. COMITISSAM LEICESTRIÆ.

G. Dei gratia Londoniensis Ecclesiæ minister, A. venerabili comitissæ Leicestræ, quod petit accipere, quo tendit pie tandem completo cursu pertinere.

Dilectioni vestræ, dilectissima, rogatus litteras mitto, quas quidem misisse debueram non rogatus. Quod si omisi jam aliquandiu, hæc causa exstitit, quod de die in diem meum ad te nuntium ipse præire et prævenire existimabam. Et quia spes dubio vultu nos semper protrahit in cras, et quod non feci, cras, ait, efficiam, sperabam me finem dare negotiis, et sopitis aliquandiu causis et curis omissis, ocius transmeare ad te, et optatæ mihi allocationis tuæ jucundæ solatio recreari. Sed opportunitatem quo plus appeto, minus invenio, et quibusdam amputatis capitibus, cum mundi bestiam exstinxisse me reputo, ad capita multipliciter renascentia totus illico perhorresco. Curarum siquidem nullus est finis, et mundus in dies parturit, unde miseras affligat animas, et a piæ proposito intentionis avertat. O mihi quid memorem soliloquia sancta, quæ cum sponso suo anima quondam mea, dum eam claustris silentia tegerent et tenerent, in spiritum elevata permiscebat! Dum sæcularium nescia in montem quodammodo cum Moyse conscendebat, subitus se nubem relinquebat et nebulam, et mundo posthabito, in ignem illum quem Deus inhabitat, nihil nisi illum appetens tota tendebat. Unde cum ipsam sua revocasset infirmitas, non abscedens longe, non foras exiens, ad ipsos pedes Domini mente residebat attentius, et annos suos præteritos in amaritudine recogitans, excessus pristinos ipsius suarum lacrymarum fluentis abluibat. Nunc me rei familiaris hinc cura distrahit, hinc causarum sæcularium pondus involvit. Nunc timor opprimit, nunc protrahit spes, nunc levans prospera, nunc adversa dejiciunt, ut quantis miseriorum cumulis misera subijciatur humanitas, ipsis pene rerum argumentis experiar. Quid tibi ergo, dilectissima, meus poterit dictare jam spiritus, quæ puritatem mentis inhabitas, et spiritui tuo delicato nihil in refectionem nisi delicias spirituales appetis et exoptas. Nidificavit in te columba illa quæ super Christum in Jordane volitans, ipsum cum omni gratiarum plenitudine semper inhabitat. Et de hac quidem plenitudine quantum ipse tribuit accepisti, et ejus dona quanto gustas uberius, tanto et uberius ministrari tibi avida spiritualium mente desideras.

A Intueri mihi videor tuam illam animam in sui fervore spiritus, hoc declamantem et cantantem: *Falcite me floribus, stipate me malis, quia amore languo* (Cant. II). Unde mihi flores, charissima, quos tuo subministrem spiritui, ut ardens plus accendatur et tendens in superna avidius illic rapiatur? Illi flores paradisi sunt, quos tibi sancti communicant, qui nescientes et respuentes quæ mundi sunt, sacratæ quodammodo paradisi mentis inhabitant. Quos tua, quæso, prece mihi concilies, ut sub curarum gemitum pondere, ipsorum me apud Dominum interventu subleves et sustentas. Id enim modicum quod habeo, tibi ab amicitiarum nostrarum exordiis in Domino communicare, nec destiti, nec omitto. Valere te in Christo opto, charissima.

EPISTOLA CCLXXXII.

AD COMITEM ALBERICUM.

GILBERTUS Dei gratia Londoniensis episcopus, venerabili viro comiti ALBERICO, salutem, gratiam et benedictionem.

Pervenit ad audientiam nostram, quod occasione controversiæ, quæ inter vos et comitissam aliquandiu ventilata est, et ad sedem apostolicam tandem per appellationem suspensa, eam districte supra modum teneatis inclusam, ut nec causam instruere nec parti suæ defensorem possit ullatenus procurare. Sed nec ecclesiam frequentare, nec in publicum, ut dicitur, prodire permittitur, ut non jam custodia deputata, sed carcere potius damnata videatur. Cuius quoque corporis et colloqui vestri, omni sibi jam olim copia negata dicitur, ut quos Ecclesiæ conjunxit auctoritas, vestra quodammodo disjunxisse videatur voluntas. Quæ si vera sunt, ut accepimus, quam citius vobis emendanda denuntiamus. Alioquin valde vobis timendum est ne provocetis iram et indignationem Dei adversus vos, quæ quanto serius advenit, tanto severius affligit. Recolite quanta reverentia dignum sit sacramentum conjugii, quod Dominus ab origine mundi primum introduxit et sua benedictione confirmavit, quod et ipse in Cana Galiliæ sua corporali sanctificavit presentia, quod et apud omnes gentes tam fideles quam infideles, cum summa veneratione mandatur observandum. Certum est enim et per historias simul et exempla notissimum, quod prævaricatores sacramenti hujus, non solum ultimæ reservantur ultioni, ut a terra viventium, quæ est paradisi Dei proscribantur, sed et in hac quoque terra morientium, in se aut in sua successione frequenter exheredantur, ut hæreditas eorum transferatur ad externos, et in labores suos introeant alieni. Proinde episcopali vobis auctoritate mandamus, orantes et exhortantes in Domino, et consulentes in charitate, et in remissionem vobis injungentes delictorum, quatenus propter Deum et propter reverentiam legis Christianæ, modestius et mitius agatis cum uxore vestra, quæ est pars corporis vestri, amotoque prædictæ districtiōis excessu, ipsam sibi ad debitam libertatem et vos ipsi ad societatem et solatium, sicut decet sponsum

sponsæ, benigne restituatis, ne sine iudicio Ecclesiæ maritali privetur contubernio, quod sibi teste Ecclesiæ, sub solemnī fide sponsaliorum promissistis. In quo si nobis non creditis, Apostolo credite, qui ait: *Viri, diligite uxores vestras, sicut et Christus dilexit Ecclesiam (Ephes. v).* Et iterum: *Alligatus es uxori, noli quærere solutionem (I Cor. vii).* Charitas cogit nos et necessitas officii, hæc et huiusmodi vestræ suggerere dilectioni. Unde quia spes nobis est de vobis in Domino, quod nostris sicut debetis sic et velitis in his quæ ad Deum sunt consiliis acquiescere, consilium vobis damus in charitate, ut legem et conditionem conjugatorum, cui subiecistis vos legitime, et sine simulatione observare studeatis, ne incidatis in manus iudicis qui non irridetur, cuius non potestis iudicium declinare reus prævaricationis legis suæ, quod avertat omnipotens Dominus. Amen.

EPISTOLA CCLXXXII.

AD MAGISTRUM DAVID.

GILBERTUS, Dei gratia Londoniensis episcopus, dilecto suo magistro DAVID, salutem et optatos ad vota successus.

Inspectis litteris a tua mihi diligentia directis, palam datur advertere, te et commotionis et iræ fomitem, inter nos aliquo discordiam seminante, concepisse. Quem quicumque ille est de cætero minus audias, nec ejus commentis, obsecro, fidem ulterius adhibeas. Amicorum namque sæpe confundit animos lingua tertia, digna confundi, quam iræ et odiorum incentiva portantem, a nobis obsecro non admitti. Nil enim de te sinistrum concipio, nil intus adversum te corde foveo, sed admissum semel in gratiam mihi et gratiæ et benevolentiae vicissitudinem observare depono. De cætero, quia sales vestros abunde jam diu lambit Italia, bonum est, ut eosdem amodo cum tamen liberit, experiat et Anglia. Vale, charissime.

EPISTOLA CCLXXXIV.

AD WILLELMUM DE MALA PALUDE.

G. Dei gratia Londoniensis Ecclesiæ minister, amico suo charissimo WILLELMO de Mala Palude, salutem et sinceram dilectionem.

Cum me vobis in multis obliget benigna jam diu servitiorum exhibitio, hoc tamen in consummatam amicitiam me præcipue vobis reddit obnoxium, quod fratri meo et nepoti in necessitate sua subvenistis, et eis consilium et auxilium, prout res exigebat, impendistis. Precor autem ut si item urgente necessitate recurrerint ad vos, non ipsis, sed mihi et ipsis propter me de vestro quod opus fuerit tradatis, ut me servitii et gratiæ debitorem habeatis. Illico vero cum ad nos reversi fuerint, nuntium nostrum habebitis, et si quid erga nos volueritis, per ipsos nobis mandabitis, et obtinebitis. Valeat amicus meus charissimus.

EPISTOLA CCLXXXV.

AD H. COMITEM NORFOLCIE.

G. Dei gratia Londoniensis episcopus, venerabili

A domino et amico suo charissimo H. comiti Norfolciæ, salutem et dilectionem.

Responsum canonicorum de Panteneia, nuntio ad nos redeunte, et litteras capituli sui sigillo impressas afferente, suscepimus, quo vos certificari postulant, quod nec pecuniam, nec terram, nec quidquam aliud a vobis accepturi sunt, ut vobis Panteneiam concedant, et ab ea quam adversus vos intendunt, petitione recedant. Exsilium subire et adversa ut asserunt quæque perpeti magis eligunt, quam locum Domino consecratum, et divinis usibus apostolica toties auctoritate confirmatum, cuiquam cedere, et ab Ecclesia alienare consentiant. Inde est quod a nobis instanter exigunt, ut effectui mandatum domini papæ mancipemus, et quod nobis injunctum est super eis exhibenda justitia, ulterius non differamus. Inde est quod familiarem vestrum et amicū, dominum Stephanum canonicū Sanctæ Osiyhe, ad vos destinare curavimus, ut quod nolumus scripto committere, per ipsum vobis aperiamus. Scitis quidem necessitatem hanc nobis incumbere, ut aut sententiam proferamus in vos, aut causam qua præpedimur domino papæ denuntiemus. Quod cum existerit, in proximo futurum est ut quod a nobis ad præsens omisum est, ab ipso procul dubio compleatur, et sententia quam ad præsens forte differimus, tanto periculosius in vos, quanto a iudice longe sanctiore, longeque sublimiore proferatur. Unde quia rerum exitus prudens metuit, magis quidem ob commodum vestrum quam ob vitandum periculum nostrum discretioni vestræ supplicamus, quatenus non tantum cum his qui terrena sapiunt, sed cum viris sapientibus Deumque timentibus consilium super hoc habeatis, et illum per quem vivitis, per quem spiritum trahitis, per quem bona multa possidetis, qui vos inter adversa servavit, adversus hostes protegit, qui spiritum vestrum cum volet auferet, qui omnia opera vestra in iudicium deducet, coram oculis habeatis. Hodie estis, et cras fortasse non eritis, et inferni miseria sicut et cæli gloria sine fine mansura est. Illa quippe die qua hinc erunt accusantia peccata, inde terrens justitia, foris ardens mundus, intus urens conscientia, subitus patens horridum chaos inferni, desuper iratus iudex, parum procul dubio cuique videbitur, quod Domino dum hic vivitur exhibetur. Tangat itaque cor vestrum Spiritus Dei, ut in præsentī negotio bonorum sic consiliis acquiescat, ne sententiam, quod absit! apostolica in vos experiendo, confusionem longe quam ad præsens æstimetis graviorem sentiat. Sapere et intelligere, et novissima providere vos optamus, charissime.

EPISTOLA CCLXXXVI.

AD R. DE S. WALERICO.

G. Dei gratia Londoniæ episcopus, amico suo charissimo R. de Sancto Walerico, virtute meriti promissam bonis gloriam feliciter adipisci.

Tua, charissime, munificentia, tua liberalitas in

me adeo jam multis innotuit, ut in negotiis quæ habent ad te se sperent alicui meis posse precibus apud te si pro se porrigantur adjuvari. Unde quos in Christo diligo, de quorum bona in Domino conversatione non ambigo, tuæ confidentius charitati commendo, affectuose supplicans, quatinus ob beatam illam spem qua in Deum tendimus, qua bene sperando post Christum currimus, humilibus fratribus de Oseneio misericordiæ tandem sinum aperias, et eorum compatiendo doloribus ipsorum fatigationibus finem pietatis imponas. Memorare, charissime, quantis sit meriti loca sancta construere, mansionem Domino, qua usque in adventum suum sine fine laudetur, honoretur, et adoretur ædificare, considera quantum sit bona spiritualia non solum non impedire, sed ut in Dei gloriam exuberent his opportunitatem et causam de tuis etiam exhibere. Memento, charissime, quod bella Domini strenue gesseris, quod tuis etiam stipendiis pro ipso militaveris, quod infideles et incredulos te ipsum opponendo et velut in holocaustum offerendo repuleris, et qui rebelles Domino confudisti in Asia, ejus servos humiles obsecro ne confundas in Anglia. Sed ut bene consummes omnia, cum capite Domino caudam etiam hostiæ offeras, ut cum bono tuæ satisfactionis initio, finem etiam laudabilem addideris, a magna manu Domini cuncta quæ servis ejus pro ipso impenderis, in illa die centies multiplicata recipias. Opto ut valeas, et pro quibus supplico, tui apud Dominum memores pie miserando constituas. Valete.

EPISTOLA CCLXXXVII.

AD.....

Filius regis supernæ Jerusalem cœlestis egressus est ut contempleretur regna Patris sui inferiora. Qui circumspiciens omnibus regressus ad Patrem, ait: « Pater, omnia terrarum regna circuivi, et quæ in omnibus agerentur diligenter inspexi; clamorem etiam Sodomorum, qui ad te ascenderat, verum esse comperi, et ultione condigna punivi. Sed jam tempus est, ut in futurum mihi prospiciam, uxorem ducam, filios procreem, familiam jam per me regam. Sponsam quam mihi habendam complacuit, in domo regis Babylonicæ vidi, quam rex ille captivam tenet, et e quis sic valeat cognosci, vili-
bus ac sordidis vestibus eam induit. » Ad hæc Pater ad Filium: « Absit a te », inquit, « ut rem istam facias, cœterne et consubstantialis mihi unice fili. Æthiopissa illa, de qua dicis, non est condigna tuo generi, vel tuæ immensitati. » Ad quem Filius: « Fixum, » inquit, « habeo, et me uxorem velle ducere, et nullam nisi hanc mihi velle conjugere. » « Si ita est, » inquit Pater, « tu cœternus et consubstantialis, et eomnipotens mihi, in manu habes et eam de captivitate Babylonica liberare, et prout vis tibi sponsam assumere. » Statim adfuit innumera multitudo angelorum et cœlestium agminum, in his nuptiis Filio summi Regis ministrare sese parantium. E quibus unum, scilicet Gabrielem,

A qui paranymphus ejus Geret, elegit. Gabriel electus Filius summi regis ait: « En fortitudo tua sum, illam quam tibi quæris, de media Babylonia rapere vi si imperas, et valeo et paratus sum. » « Non ita agendum est, » inquit Filius æterni Regis, « violentia nulla Babylonico regi inferenda est, consiliis occultis et sapientia quæ mihi jungenda est de captivitate Babylonica, est eripienda. Ad Mariam virginem de stirpe David mysterium consilii mei, O Gabriel, est occulte deferendum; apud eam in thalamo suo convivium nuptiarum mearum est initiandum et celebrandum. Ad Mariam Gabriel descendit, quod sibi injunctum fuerat fideliter peregit. Sed qui eum miserat, antequam nuntiaretur, jam ad virginem venerat. Initium est ibi, ibi celebratum est sanctissimum nuptiarum convivium. Sed nunquid tantus ac talis iste sponsus ad sponsam suam vacua manu veniet? Nequaquam. Sed donativa detulit, delata erogavit. Et quia hiemis tempore venit, hiemales vestes primo sponsæ suæ dedit, agniam videlicet pelliciam et cappam, quod utrumque sit de agno. Sed alterum sine dolore agni, scilicet lana, de qua sit cappa, sumitur, alterum, videlicet pellicia, unde pellicia, absque dolore gravi ab agno non accipitur. Sponsus iste Agnus est, sicut Scriptura testatur: *Quasi ovis ad occisionem ductus est* (Joan. 1. 19), et cætera. Et alibi: *Ecce Agnus Dei* (Joan. 1), et cætera. Agnus iste de lana sua cappam sponsæ fecit, cum humilitatem verbis docuit, dicens: *Discite a me, quia mitis sum*, etc. (Matth. 23). Pelliciam dedit, cum jeuniis, et orationibus, et vigiliis, et aliis carnis suæ afflictionibus ad ultimum passionem crucis mortificationem carnis sponsæ ostendit. Cappa itaque, qua indutus est, absconditur. Significat humilitatem, quia qui sponsa Christi est, latitat, et a sæculo cognosci refugit, pelliciaque de mortuis animalibus facta mortificationem carnis insinuat. Hæc autem hiemis tempore. Paschali vero tempore dedit ei arminiam pelliciam circa collum, et circa manus, rubeis gulis preparatam. Pellicia hæc sunt sancti prædicatores, albi propter resurrectionem quam in Christo factam annuntiant et in sponsam futuram prædicant. Qui cum passionem Christi annuntiant, robeam gulam circa collum portant. Sed quia quidam prædicationem Christi prædicant, quam corde non sentiunt, de quibus dicit apostolus Paulus: *Quidam annuntiant Christum, non sincere existimantes se suscitare tribulationem vinculis meis; oportet ut quod ore dicunt, corde sentiant* (Philip. 2). Nam minus decenter ornata esset, si tantum circa collum et non usque ad pectus decentes gulas pellicia haberet. Circa manus etiam prædicatores gulas habent, cum in operibus suis, passionibus Christi communicant. Igitur pellicia sponsæ de arminio fit, quando candidum est in significatione lætitiæ spiritualiter, ob spem resurrectionis, circa collum et usque ad pectus, et circa manus gulis rubeis ornata est, quia passionem Christi quam ore prædicat, corde sentit, et operibus

attestatur. Dedit etiam Christus paschali tempore sponsæ suæ cordubanos suos, qui significant duo Testamenta, quibus affectus sponsæ ne terram tangant muniantur, vel continentiam et charitatem, quæ duos affectus, quorum alterum ad carnem suam, alterum ad vitia sponsa olim habuit, calciat. Equibus ille qui ad carnem est, continentia sive distinctione disciplinæ munitur, ille qui est ad vitia, charitate exstinguitur. Sed hi cordubani nisi professione et obedientia ligentur, et pedibus elabuntur. Multos enim vidimus, qui continentia carnis ex charitate habuerunt, vel secundum duo Testamenta vivere disposuerunt, sed quoniam sub obedientia et professione sese non religaverunt, graviter lapsi sunt. Cordubani itaque sunt vel duo Testamenta, vel continentia et charitas. Ligaturæ, professio et obedientia. Dedit etiam Christus sponsæ suæ duas chirothecas: manus sponsæ sunt operatio et contemplatio, et quamvis per lævam alibi accipiat operatio activa, per dextram contemplativa vita, ut est illud: *Lava ejus sub capite* (Cant., ii), et cætera, hinc tamen per sinistram contemplatio, per dextram operatio designatur, hac similitudine, quia sinistram frequentius sub vestimento tenemus absconditam, dextram vero sæpius ad operandum exponimus. Igitur manus dextra, id est operatio, habet chirothecam in quinque folliculis ad quinque digitos recipiendos divisam, quia bonum opus debet esse rectum, voluntarium, purum, discretum, et firmum. Rectum intentione, voluntarium, ut nec fiat timore nec aliqua coactione; purum, ut dum fit aliqua aura vanitas non inanescat; discretum ut non ultra modum tendatur; firmum, ut perseveret. Sinistra autem habet chirothecam similiter in quinque divisam. Nam in contemplatione quinque sunt, scilicet consideratio peccatorum et gehennæ, contemptus præsentium et futurorum, et regnum, status corporis post resurrectionem, et glorificatio spiritus humani, et æternitas, cum qua vivendus est. Qui enim contemplatur optimum, considerat peccata sua, qualia et quanta perpetravit, quæ considerare non multum prodesset, si non pro illis puniri in gehenna metueret, et ideo considerationi peccatorum recte adjungitur consideratio gehennæ. Item, si consideraretur quæ et quanta sunt tormenta gehennæ, et nulla peccatorum memoria haberetur, secunda forsitan mens gehennam consideraret, cum nulla eam recordatio peccatorum contereret. Hac de causa in mente contemplatoris utrumque, id est peccata et gehenna conjunguntur, ut ex utroque terror incutiatur, sed in mente sic perterrita statim suboritur contemptus præsentium, cui adjuncta est spes futurorum. Sed ne spes mentem dissolutam reddat, restringatur per judicium, quia considerat ad ea quæ speravit transeundum esse per illum horrendum et districtum judicium. Sed terrorem de judicio consolatur regnum, et ideo subjunctum est judicio regnum, in quo consideratur regno quid erimus, et primus status corporis quod erit immortale et impassibile,

deinde glorificatio quod erit ineffabilis pulchritudinis, et præfulgidum, sicut scriptum est: *Fulgurent justi sicut sol* (Matth. xxi). Post hæc consideratur beatitudo animæ, scilicet ipsa anima, et Deus cui vivenda est, quod est ultimum, et consummatio omnium. Hæc autem quinque quæ in consideratione contemplavimus, per quinque fenestras videntur. Christus vero est ex humanitate, quasi pariete et divinitate inter humanitatem lucente. Itaque Christus fenestra est, imo fenestræ quinque in eo considerantur. Id est incarnatio, conversatio, doctrina ejus, resurrectio, ascensio, per quæ illa quinque de contemplatione dicta sunt. Nam per incarnationem Christi multis manifesta sunt peccata et gehenna, quæ prius non attendebantur. Conversatio ejus aperte docuit præsentia contemnere, et ad futuram spem dirigere. In doctrina ejus satis agitur de judicio et regno. In resurrectione ejus ostensus est, corporalis status et glorificatio, quia qualis ipse, tales et sui pro modulo futuri sunt. In ascensione autem quantumcunque revelatum est, quomodo spiritus noster cum Deo vivendus est. Homo enim ille quomodo sine omni vehiculo absque omni alienius creaturæ adminiculo elevari et transferri potuit, nisi per divinitatem sibi unitam? Itaque chirothecæ sponsæ sunt in manu dextra, id est actione quod ipsum sit rectum, voluntarium, purum, discretum et firmum. In sinistra manu, id est contemplatione, quod primum considerarentur peccata, et gehenna, deinde sequatur contemptus præsentium et spes futurorum, post judicium et regnum, subsequatur status corporis, et glorificatio, ad ultimum unio nostri cum Deo. Christus ascendens hæc omnia in sponsa sua consummavit, et eam conservandam apostolis commisit, et ne ab Hierosolymis discederet præcepit, donec induerentur virtute ex alto. Post dies decem ipso die, scilicet Pentecosten, exercitum magnum et fortem misit e cælo, id est Spiritum sanctum, qui contulit eis pacem, gaudium, et cæteros fructus spiritus quos enumerat Apostolus. Quibus facti constantes et fortes hostiles cuneos aggrediuntur, et Petrus una die quinque millia hominum, alia die tria millia hominum de Judæis ad Christum convertit. Quibus gestis, aiunt apostolis: « Absit ut domina nostra Christi sponsa pedes amplius gradiatur! Queramus ei animal, quo subvehente, celerius et honestius, quocunque eundum ei est, deferatur: Sed hic non erit equus, qui animal superbix et discordix est, nec asinus, quia fatuus et immandus, sed mulus, quia firmiter et mature graditur. » Mulus itaque sponsæ datur, quia populus ex Judæis et gentibus ad finem conversus est. Sicut enim mulus ex diversis animalibus nascitur, sic primitiva Ecclesia ex diversis populis collecta est, videlicet ex Judæis et gentibus, ex presumentibus vel desperantibus. Christus enim diversis et contrariis infirmitatibus laborantes miro modo sanavit, et uno medicamine, id est cruce suæ; nimis confidentes et desperantes fuerunt, et adhuc sunt qui dicunt, « re mea conceptus sum, » et « nulli nunquam per vim rapui, » et similia, et

« quid est quare de vita desperem et gehennam timeam? » Sed si attendant quod Christus, qui peccata non fecit, nec inventus est dolum, et cætera, morte tamen turpissima, id est cruce vitam finivit, deficient a superbia sua, et timore contriti, ad humilitatem et ad communicandum passionibus Christi convertuntur. Sed iterum qui tot et tantis facinoribus sunt inquinati, ut sibi indulgeri diffident. Sed si isti attendant quod Christus non pro se, sed pro peccatoribus sustinuit, spiritum sumunt, et a desperatione sanantur. Itaque Christus cruce sua et præsumentes sanat, quia innocens passus est, et desperantes, quia pro peccatoribus sustinuit. Et ex his diversis peccatorum generibus Ecclesia congregata mulus est, quem apostoli præparant sponsæ, et ei in talibus quiescenti et per eos ad diversa progredienti, dat calcar unum, scilicet amorem sponsi, quo suos proficere compellat. Datum et flagellum, quo retro percutiat, quia pro perpetratis iniquitatibus anxiantur. Multiplicata et dilata sancta Ecclesia apostoli peracto agone sui certaminis de vita discedentes eam martyribus regendam committunt. Illi autem pro ea viriliter decertantes et in defensione ejus sanguinem fundentes, dicunt: « Apostoli dominam nostram mulo uno donantes, æquum est et nos in ornatum ejus et decorem aliquid conferre, et quia jam ætas incaluit, grossioribus indumentis non est oneranda, novum aliquid facimus ei decorum, et subtile varium scilicet mantellum rubea purpura coopertum. » Varium istud mantellum sunt martyres sancti, ex parte virgines, quod significat album varii, ex parte vidui vel conjugati, qui significantur medio colore varii, rubeum supponitur, quia pro Christo trucidati, sanguine asperguntur. Et hi suis temporibus rexerunt viriliter Ecclesiam, provexerunt et multiplicaverunt. Quibus discedentibus, successerunt sancti doctores et magnifici confessores, Ambrosius, Hilarius, Augustinus, et similes. Videns autem diabolus aperto bello quod contra Ecclesiam tempore apostolorum et martyrum gesserat, se nihil profecisse, sed jam tribulationibus magis crevisse et profecisse, ad fraudulentas et occultas persecutiones convertitur, sed ut aliquos ex membris ejus seducat, per quos negotium suæ malitiæ tanto efficacius quanto occultius peragit. Instruxit itaque suis artibus Arium, Pelagium Fotinum, et his similes, qui ministros Christi se simulant, sponsam ejus longe in devium ducunt. Quod percipientes sancti doctores occurrunt, disputationibus configunt, confutant hæreticos, et dominam suam ad viam veritatis reducant. Cui reductæ, quia dum per deserta Arii et devia Pelagii graditur, vestes ejus aliquantulum atritiæ erant, paludamentum de famis faciunt, id est vita sua pudica et honestis moribus eam adornant. Ecce jam victus est hostis et in apertis persecutionibus et in occultis hæreticorum seductionibus, nam sponsa nulla contra occurrente, cum multo comitatu graditur. Adhuc tamen coluber tortuosus eam spoliare conatur, et cum in via non possit, juxta viam laqueos suos parat, ibi

A tentoria sua erigit, et hic quidem trapezitas suos cum multo auro et argento posito sedere facit, illic autem vestivit cum multo et vario apparatu diversorum ornamentorum, alibi vendentes cibos omnium generum collocat, alibi vendentium vina et omnium potionum genera tabernas disposuit, alibi triumphales arcus gloriantium in pompa sæculari erigit, choreas puellarum, et omnia libidinum incitamenta ostendit. Qui sapiens est, cum sponsa graditur, sponsæ recta via gradienti adhærere, fatui et vecordes viam deserunt, et in tabernaculis diaboli jucundantur, et ad sponsam amplius non redeunt. Et revera multi hodie viam deserunt, et in tabernaculis diaboli esse jucundantur. Nam quicumque argentum diligit, auri specie capitur, et hæc Christo præponitur, in tentorio diaboli demoratur. Similiter qui veste pretiosa, qui cibus lautioribus, qui vino mellito et aliis potionum pretiosarum generibus, qui in mulieribus, qui in jocis et sæculi cantionibus delectantur, et hæc Christo præponunt, in tabernaculis diaboli est. Quid etiam dicam de illis qui cum Ecclesiam Dei regere debent, egredientes via, ea quæ in tentoriis diaboli admirantes circumpiciunt et concupiscunt, et non habentes unde cupita comparent, ornamenta sponsæ diripiunt, et in explendis malis concupiscentiis suis turpiter insunt. Ita undique lacerata circa humeros, vix parum quid de amictu, id est paucos monachos, in quibus non est perfecta religio, et paucos regulares canonicos, de aliis fere hominum generibus fere nullos retineat eum. Hæc sponsa patiat. B

EPISTOLA CCLXXXVIII.

AD

Post iram misericordiæ reminisci.

Veniens ad nos præsentium lator H. lacrymabili nobis planetu monstravit se mentis vestræ tranquillitatem offensa gravi perturbasse, et iracundiæ calore motum se vobis non solum verbo restituisse, verum et calcaneum adversum vos irreverenter erexisse. Unde tactus dolore cordis intrinsecus, disciplinam regularem quam ipse decreveritis subire paratus est, et vobis humili devotione satisfacere, et de cætero vobis ut patri charissimo in omnibus obedire. Quia vero dignos poenitentiae fructus offerentem nunquam repellit Dominus, sed et angelis Dei gaudium super peccatore poenitentiam agente, et singulare virtutis exemplar dans poenitenti et revertenti filio in amplexus occurrit et osculum, rogamus ut ob ejus reverentiam nostræque petitionis intuitu quem repulistis aversum, conversum suscipiatis, et quia perierat mundus nisi iram finisset misericordia, iram ei remittendo, H. abbati litteris vestris significetis, qui ut quorundam testimonio didicimus, eum si vobis reconciliatum noverit, fratrum collegio aggregabit. C

EPISTOLA CCLXXXIX.

AD

Jucunditas mihi et exultatio exuberat quoties obsequio famæ vos bene valere et vigere cognosco. Etenim solemne mihi est, vos ut dominum colere.

vos amplecti, vestramque promotionem et hospitalem inter meos assignare successus. Inde est ut mihi ad plenitudinem gaudii cedant, quæ circa vos prospera sunt, ad cumulum vero vos esse incolumem. Mendacii arguar si frustra postulatis a me, quod possit et expediat amico erogari. Interim rogo ut ad me vestra transferatur pagina, qua mysterium vestræ voluntatis et salutis agnoscam.

EPISTOLA CCXC.

AD

Hospitium in se Domino laudabiliter exhibere.

Benevolentiae vestrae, frater charissime, gratias affectuose referimus, quod petitionem nostram quocunque processerit tramite, benigne tamen exaudire voluistis. Nos tamen nostram perscrutantes undequaque conscientiam, in nobis adversum vos nihil penitus odii, nil amaritudinis aut simulationis, aut versutæ duplicitationis, Deo teste reperimus. Sed simpliciter ambulantes, quod vobis, quod domui vestrae honestum sperabamus et utile, nulla mentis elatione, nullo prælationis fastigio aut exactione aliqua, sed fraterna solum charitate postulare curavimus. Equidem fratrem vestrum R. dileximus, et in negotiis vestris quæ sedule gessit apud nos, sustinimus, attendentes quod ejus opera Dominus benigne dirigeret. Hoc ipso gavisi sumus. Quod si faciem vestram altiore fortasse consilio a nostra petitione averteritis, nos, quia charitas alligari non potest, ipsum quocunque eum traxerit obedientia, amore saltem prosequemur.

EPISTOLA CCXCI.

AD

Dum vices agimus Wigorniensis Ecclesiae, dum onus ejus, etsi iuviti sustinemus, utique Domino delinquimus, nisi parochianos ejus et filios super his quæ ad salutem sibi sunt, cum id expetit ratio, commoneamus. Inde est quod celsitudinem vestram diligenter obsecramus et commonemus in Domino, quatenus ecclesiam vestram de Teochesberia, quæ pro salute vestra et vestrorum manus omni die levat ad Dominum, libere sibi patrem et pastorem eligere permittatis, et libertatem quam sibi apostolica confirmat auctoritas, quamque et avi vestri et patris vestri benigna hucusque sibi conservavit pietas, nullatenus impediatis. Hoc enim vobis tam periculosum est et vestrae saluti contrarium. Ex eorum namque privilegiis intelleximus quod omnes qui libertatem hanc vi aut metu aut machinatione quocunque impediunt, apostolica ligat auctoritas durissime, et eos Satanæ in interitum carnis traditos a corpore et a sanguine Domini nostri Jesu Christi, nisi condigne poeniteant, prorsus reddit alienos. Quod ne unquam devolvatur in vos rogamus et monemus et vera utique charitate consulimus, quatenus offensam habeat iram declinando, Deo quæ Dei sunt reddatis, et quæ divina sunt divinius administrari permittatis. Ut cum debitam Deo reverentiam et in hoc et in aliis exhibueritis, ipse vos et in temporalis vite hujus cursu conser-

A ver, et post hujus elapsam vite una cum suis debita obedientia et pietati mercede remuneret.

EPISTOLA CCXII.

AD

Talentum vobis, charissime, commissum est quod augere et in multorum commoditates expendere discretioni vestrae necessarium est, ut cum illud multorum subveniundo necessitatibus adauxeritis, mercedem in centuplum a Domino in illa die reportetis. Talentum hoc, id est domini nostri regis vobis a Domino concessa familiaritas quam si quis auro comparet, pretiosior est, et recte quantacunque pecunia longe carior aestimatur; — talentum hoc ut fideliter erogetis opus est, ut ipsum de sublevanda oppressorum miseria frequenter et sollicitè commoneatis, et in hoc non opportuna solum, sed et importuna si id pietas exigit, instantia perseveretis, ut et ipsi meritum apud Dominum collocetur, et apud homines gratia vobis non modica ex studiis hujusmodi cumuletur.

EPISTOLA CCXIII.

AD

Esse me sanum noveris et incolumem tuumque affectuose desiderare colloquium, ut percipiam ex amici præsentia quod affectat plurimum anima mea. Solatium, quod variis rerum perpenditur eventibus quod corporalis alterutro nobis absentia subtrahit, id queso charitas illa suppleat quæ nescit absentiam, quæque ipsum quem diligit sibi semper in spiritu novit exhibere præsentem. De cætero, Wilhelmi filii R. prece pulsus benevolentia in B. preces offerre compellor, quatenus B. ad diaconatus ordinem promotum tandiu ad sacerdotium promoveri velis. Quod amore Dei et petitionis meæ complendo, et ipsum orationis obnoxium meque tibi gratia et in omnibus exhibebis.

EPISTOLA CCXCIV.

AD

Moris esse solet amantium, ut rei dilectæ mentionem nunquam audire fastidiant, qui, potius ex ipsa confabulandi frequentia, humanus affectus circa rem quam diligit, amplius inardescat.

Quæ ad honorem Dei et utilitatem sanctæ Ecclesiae in usus pauperum devotione fidelium collata sunt, eis nequaquam cuiquam temeritate sunt auferenda, sed eis potius observanda sunt et augenda.

Ex quo vestrae personæ notitiam habuimus, vobis propensiori charitate adhaesimus, et ad vestrum honorem quoties se opportunitas obtulit, attenta sollicitudine operam dedimus. Inde est, quod ea quæ litteraturæ et honestati vestrae honores accumulare videntur, discretioni vestrae confidenter suggerimus. Rogamus itaque omnifarie et monemus diligenter, quatenus D. diligatis, et ad ipsius profectum totis viribus intendatis. Siquidem plurimum commendationis et favoris vestra consequetur honestas, si tantæ honestatis et tam profundæ litteraturæ virum, quem eloquentiæ pulchritudo ve-

nustat Ecclesia Londoniensis acceptum habet, et A
valde commendat, charum habueritis et studueritis
exaltare. Provideatis ergo ei quemadmodum deceat
dantem et accipientem, ne forte si ejus tam lauda-
bilia merita irremunerata remanent, famæ vestræ
inde merito detrahi posset.

EPISTOLA CCXCV.

AD

Cum hactenus apud clementiam vestram facilem
votorum nostrorum obtinuerimus effectum, eviden-
ter conijcimus ex præteritis, quod sperare debeamus
de futuris. Hinc est quia de benignitate vestra
simul et dilectione confisi, liberalitati vestræ devo-
tissime supplicamus, quatenus pro amore Dei et
nostræ si placet precis intuitu, opere complere velitis
quod ore promissistis. Exsultat siquidem spiritus B
noster in Deo salutari nostro quia respexit et visi-
tavit vos Oriens ex alto. Cui gratias ago quod zelum
pœnitentiæ inspirare vobis sua dignata est clemen-
tia. Impulsus eratis machinatione diaboli ut cade-
retis, et per Spiritum sanctum suscepit vos dextera
Domini.

EPISTOLA CCXCVI.

AD

Notum sit tam præsentibus quam futuris, quod
ego Gilbertus Londoniensis episcopus dedi Willelmo
Coquo, servienti meo, pro servitio suo, totam illam
terram de antiquo managio apud Fuleham, quæ
jacet circa ecclesiam, sicut illa divisa est per fossa-
tam, hinc a virgulto episcopi, inde a via publica, C
quæ descendit in Tamisiam. Hanc autem dedi illi
tenendam de me et successoribus meis libere et
hæreditabiliter, pro una libra piperis annuatim, ad
festum Sancti Michaelis exinde solvenda. Quod,
quia firmum et inconvulsum manere volo, præsentem
scripto et sigilli mei attestatione confirmo. His te-
stibus...

EPISTOLA CCXCVII.

AD

G. Dei gratia Londoniensis episcopus. (*Linea se-
quens in litura est.*)

Audite te Sculas, frater, olfecisse divitias, fulvi-
que metalli nuper afflatum aura, in externas non
jam animo solum, sed et corpore tendere nationes.
Qua in re quis sis quamve turpiter ambias, eviden-
ter ostendis, qui fractus animo vel pertæsus inediae D
divitias tibi, ipso vel animæ tuæ dispendio misere
comparare disponis. Fortunam Crassi legisti, qui
bibendo quod sitiit, ignominiosa morte male satur,
occubuit. Tu quoque non ditescere, sed statim dives
esse desiderans, mavis in mortem dives impingere,
quam momento temporis quod desideras id non esse.
Unde ne in mortem insalutatus ex eas, nolenti jam
salutem verbum tibi solvationis emisi, si quo tan-
dem modo respicias, si memor affectionum, si me-
mor patriæ, si parentum, si societatis et gratiæ,
oculi cæcutientis ophthalmium manu tandem dis-
cretionis abstergas, et desperationis foveam, in
quam ignavia te pertrahente corruisti, tam pruden-

ter quam fortiter exiens, de bono Jesu qui dat om-
nibus affluenter, et non improperat, nihil hæsitans,
cum magna spei certitudine ad nos reditum matu-
rare contendas.

EPISTOLA CCXCVIII.

AD

Pro litteratis et honestis viris attentius interve-
nire, et eorum commodis diligenter intendere,
sacerdotalis officii cura nos admonet, et debitum
exigit charitatis. Inde est quod dilectionem vestram
de qua plurimum confidimus, cum omni sedulitate
rogamus, quatenus R. archidiacono jamdudum cle-
rico et amico nostro, ecclesiam Sancti Joannis,
quam sibi a Lamberto cessam esse accepimus, con-
cedatis, et inde vobis eum clericum devotum et B
fidelem,strarum precum interventu constituere
procuretis, ut de vestræ dilectionis effectu, cum
ampliori præsumptione de cætero possimus confi-
dere et eam exinde debeamus ex meritis comen-
dare. Quidquid enim humanitatis et gratiæ nostræ
præsertim petitionis obtentu, ei a vobis impensum
fore noverimus, non aliter quam nobis impensum
gratum habebimus et acceptum. Valete.

EPISTOLA CCXCIX.

AD

Inter mundi hujus varietates, illic dirigere mentis
intuitum, ubi nullum est varietatis periculum.

Quos honestas vitæ commendat ad gratiam, et
piis meritis jam diu declarata religio, his apud se-
renitatem vestram et conversationis honestæ testi-
monium perhibere justum est, et ut in justis peti-
tionibus suis a vestra gratia elementer exaudiantur,
devote porrectis precibus exorare. Ecclesia squi-
dem Sanctæ Trinitatis, quæ a bonæ memoriæ Ma-
thilde, dudum Angliæ regina, Londoniæ ædificata est,
et honesto canonicorum regularium conventu no-
bilitate instituta, ab ipsa sua fundatione usque nunc
et plenitudine charitatis et suscepti a se ordinis ob-
servantia, late claruit, et odoris boni suavitatem
emittendo ex se, cæteris sui ordinis ecclesiis velut
speculum quoddam et defecatæ religionis exemplar
emicuit. Quæ cum ad præsens in oborta sibi neces-
sitate, interposita appellatione confugerit ad vos,
cum postulante petimus, cum supplicante postula-
mus, ut directum ad sanctitatem vestram ejus nun-
tium benigne suscipiatis, et ne possessionis suæ
qua multorum necessitati subvenit, detrimentum
sustineat, quantum permiserit iustitia, paterna, si
placet, gratia provideatis.

EPISTOLA CCC.

AD

Salutem et debitum cum omni devotione famu-
latum.

Dilectio, dilectissime, et honoris exhibitio, quam
a multis retro annis mihi impendere non destitit
excellencia vestra, eam in vos affectionem meam
promoverunt, ut et quæcunque vestris seu ve-
strorum commodis aut honori credimus expedire,
omni studio et conamine tanquam propria negotia

merito debeam procurare. Inde siquidem est, quod si dominus abbas sollicitudinem vestram circa negotium hoc affectuosam compererit, nec volet, ut credo, nec audebit vestræ contrarie voluntati. Eo etiam studiosius huic negotio insistere debeatis, quod alij istius exemplis incitati, libentius se vestris consiliis committent, qui istum viderint in jus suum vestro iuvamine esse promotum. Valete.

EPISTOLA CCCI.

AD.....

Quo penes vestram, dilectissime, celsitudinem nostra fere nulla sunt merita, eo beneficium gratius aestimabitur, quod munificentia vestra solis inclinata precibus exhibebit. Lator hic præsentium, affinis et familiaris noster, tuitioni vestræ per nos commendari desiderat, sperans sibi successum optime, si vobis obsequium cum numero velit ascribere, et eum vero multa et animi liberalitas, et litterarum copia commendat ad gratiam, ut quod alio petente cupit assequi, in id sit ipse propter se dignus admitti. Quem cum prece nostra iuveritis opemque sibi in necessitate contuleritis, et ipsum servitio obnoxium, et nos vobis amplioris gratiæ debitores efficietis.

EPISTOLA CCCII.

AD.....

Si de vestra in nos benevolentia confidimus, nostra non id exigunt erga vos merita, sed operatur sola vestra liberalitas et gratia. Vos tamen id pro certo nosse volumus, quod servitio vestro animo promptissimo parati sumus. Idem vero de gratia vestra sperantes, affectuose rogamus, ut negotium amici nostri, præsentium latoris, R. diligenter audiat, et illud per servitium suum apud D. regem promovendo, nos et servitii et gratiæ debitores habeatis. Valete.

EPISTOLA CCCIII.

AD.....

Quoniam generatio transit, et generatio advenit, et quod a transeuntibus geritur a succedentibus, nisi certis indicis elucescat, ratum non tenetur, utile duximus rerum gestarum series litterarum testimonio et sigilli impressione confirmare. Sciant ergo universi:

Infortunio pauperum amicorum affectu pietatis condescendere;

Sacro proposito firmiter adhærere;

Perfectam dilectionem cum debita subiectione; Magis sperare in Domino quam in homine.

Apud Deum adoptari in filium.

Satagendum nobis est et procurandum sollicite, ne lites in nostra decisæ præsentia, ulla possint iterum occasione in controversia denuo suscitari.

EPISTOLA CCCIV.

AD.....

Lator præsentium A. honeste apud nos conversatus, a nobis susceptus est in clerum, et ad diaconatus gradum canonicè promotus. Quem quidem

A litterarum studia ad vestram usque provinciam sectum, vestræ, ut asserit, mores gentis et amicitia sancta eatenus devinxerunt, ut natale solum tanta cupiat compensare dulcedine, et ibidem nostra cum licentia conversando, vitæ consummare curricula. Illius ergo votis et precibus tandem acquiescentes, ad sublimitatem vestram cum hujus scripti testimonio eum transmittimus, rogantes quatenus ob amorem Dei et reverentiam suscepti ordinis, ipsum benigne recipiat, et in ordine suo apud vos ministrare permittat, et si vitæ honestas meruerit, ad ulteriora velit promovere, quem liberum et a nostra de cætero subiectione absolutum, vestræ, si placet, obedientiæ deservire permittimus. Valete.

EPISTOLA CCCV.

AD CLER. ET LAIC. LOND.

G. Dei gratia Londoniensis episcopus, dilectis sibi in Domino, clericis et laicis per episcopatum Londoniensem constitutis, salutem, gratiam et benedictionem.

Pium est, fratres charissimi, operibus misericordiae ad propositum charitatis sic properare stadium, ut tempore missionis æternæ, salutis optatæ bravium comprehendamus, sic dum vivitur seminare, ut multiplicato fructu expectatæ jucunditatis stolam excipiamus. Unde vos attentius exhortamur in Domino, quatenus promissæ remunerationis fiducia, cura propensiori piis actibus indulgeatis, inter quos eleemosynarum lucet largitio quæ peccatorum delet offensa, quæ dilectionis Dei et proximi nobis lumen infundit. Cum itaque leprosi Sancti Leonardi de Northamptonia, non solum corporis intolerabili torqueantur cruciatu, verum extrema laborare dignoscuntur inedia, pro eis universati vestræ supplicare, pietatis affectio nos impellit, quatenus per hunc latorem præsentium, eorum nuntium, de facultatibus vestris aliquam portionem ad eos mittentes, eorum relevetis miseriam, et quod propriis non possunt, vestris impendiis adjuti, quod ad miserabilem victum sufficiat, per vos habere se gaudeant. Nos vero de Dei confusi misericordia, his qui saltem modicum jam dictis fratribus erogaverint, viginti dies relaxamus, et bonorum omnium quæ in nostra sunt Ecclesia, participes constituimus. Valete in Christo.

EPISTOLA CCCVI.

AD.....

Pastoralis officii nos admonet auctoritas, singulari cura prospicere, ne lites coram nobis transactione sopitas, in jurgia suscitent litigantium perversitas, et quod utiliter est ordinatum, iterato revocetur in dubium. Ut igitur plenum robur obtineat compositio inter M. et A. mutuo consensu inita, nos eam litteris mandare decrevimus, quæ in præsentia nostra tandem hoc fine conquievit. Nos itaque hanc conventionem non solum injuncta nobis auctoritate approbamus, verum etiam sigilli nostri appositione communimus, fraternitatem vestram

rogantes attentius, ut vestrum in his assensum A
præbeatis et auctoritatem.

(*Multa in hac epistola desunt.*)

EPISTOLA CCCVII.

AD.....

Qui ad cœlestem patriam pervenire desiderant, opus est ut misericordiæ operibus diligenter intendant, et de facultatibus sibi a Deo collatis, pauperibus, et præcipue piis locis ignis incendio vastatis, eleemosynas largiantur. Unde nos de salutis vestræ profectu, ut iustum est, solliciti, universitatem vestram rogamus, monemus et exhortamur in Domino, quatenus operationi ecclesiæ Sancti N. aliquod auxilium conferatis, ut tam per hæc quam per alia bona quæ in hac vita feceritis, ad gaudia æterna B
feliciter pertingere valeatis. Valet.

EPISTOLA CCCVIII.

AD.....

Vir honestæ eruditionis et illibatæ opinionis lator præsentium R. nostris apud benevolentiam vestram se postulat precibus adjuvari. Cui cum in petitione probabili deesse nec possumus nec debemus, liberalitatem vestram exoratum habere desideramus, pro eo et cum eo rogantes, quatenus pietatis intuitu et precumstrarum interventu eum in petitione sua exaudiat, et negotium ejus quod penes vos est, charitative promoveatis, ut ipsum vobis obnoxium servitio, et nos gratiæ debitores constituatis.

EPISTOLA CCCIX.

AD.....

Salutem et gaudere semper in Domino.

Licet omnibus quos fidei Catholicæ commendat religio, benefacere debitores sumus, his tamen propensius intendere pietas hortatur, qui, Judæorum sprete perfidia, sacra baptismatis unda renati, Jesu Christi fidem nudi plus eligunt, quam ut caducam habentes opulentiam occidentem legis litteram seciari velint. Et ne rectitudinis zelum in bonæ voluntatis voto quotidianæ necessitatis turbet instantia, eo solertius providendum, quo timetur justius, ne in neophitis eruditionis novæ planta marcescat citius, quam in manentem charitatis radicem so'ldetur. Unde vestram, in Christo dilecti, exhortamur charitatem, ut in latorem præsentium ad fidem D
Christi Londoniæ noviter conversum, oculos misericordiæ et pietatis viscera benignius intendatis, quatenus fraternæ charitatis in eum exhibita devotio eum tam novellum adhuc ad susceptæ gratiæ summam fortius augeat, et ad idem alios invitet. Nos autem his qui remunerationis æternæ intuitu, huic Nicolao aliquam de facultatibus suis portionem, ad relevandam ejus tenuitatem dederint, de Dei misericordia et apostolorum Petri et Pauli intercessionem confisi, de injuncta sibi pœnitentia viginti dies relaxamus, et orationum et beneficiorum quæ in nostra sunt Ecclesia, participes constituimus. Valet in Christo.

EPISTOLA CCCX.

AD.....

.....Et ut conventio hæc inter eos illæsa conservetur, eam præsentî scripto et sigilli nostri appositione confirmamus.

EPISTOLA CCCXI.

AD.....

Gratum mihi, Pater charissime, munus existimo, quoties directis a sancritate vestra litteris, quæ circa vos sunt, statu perseverare incolumi, recognosco. Exultat siquidem spiritus meus, et diem sibi festum agit homo meus ille interior, cum amicum meum dominumque charissimum sanum et incolumem, et in cunctis agentem prospere litteris aut nuntio de vobis læta referente intelligo. Agit B
hoc illa charitas in virtutibus obtinens principatum, quæ amicorum mentes insolubili sibi lege confœderans, locali distantes spatio unit spiritu, affectione conjungit, et absentes sibi præsentem assidue potenter intus operante virtute, constituit. Hæc a memoriæ meæ pagina deleri non poterit, hanc nulla rerum vicissitudo perturbabit, quin vestris maneam et devotus obsequiis et promptus obedire mandatis. Valet.

EPISTOLA CCCXII.

AD.....

Quæ ad honorem Dei et utilitatem sanctæ geruntur Ecclesiæ, justum est firma consistere, et suis radicibus inconcussa permanere. Inde est quod conventionem inter A. abbatem Sanctæ Osythæ et ejusdem Ecclesiæ conventum, et G. Londoniensis Ecclesiæ thesaurarium, super Ecclesia de Simin habitam, nos quia Deo placidam et Ecclesiæ sanctæ commodam attendimus, sicut chirographo inter eos conscripto, et sigillis eorum utrinque firmato, concepta est, approbamus, et concessa nobis a Deo auctoritate roboratam, ut in posteris inconcussa permaneat, sigilli nostri attestatione firmamus. C

EPISTOLA CCCXIII.

AD.....

Salutem, et honoris debiti reverentiam.

Justis postulantiis desideriis assensum præbere justum est, quoties petentium vota a rationis tramite non discordant. Religiosam itaque fratrum de Dunestaple attendentes affectionem, circa personam dilecti filii nostri canonicique vestri, domini T. cujus mores honestatem redolent, et prudentia virtutem sapit, benignum eorum petitioni assensum præbuimus, ipsumque ab ea qua nobis tenebatur obedientia absolutum, in ministerium ad quod a Domino concordî fratrum electione vocatus est, liberum concedimus, ut Ecclesiæ Lincolnensi de cætero pareat, et ejus mandatis et monitis, ut justum fuerit, acquiescat. Unde ne a vestro, quod absit! capite recedatis, ne in communem etiam legem fraternæ charitatis offendatis, mandamus vobis, et consulimus, et quæ nobis a Domino commissa est, episcopali auctoritate injungimus ut quod a nobis actum est ratum habeatis, ipsumque

ab ea qua vobis tenet obedientia absolutum, pie postulantis concedatis, ut a Domino gratiam et debita charitatis præmia percipiat.

EPISTOLA CCCXIV.

AD.....

Quæ donantur Domino, charissimi, donanti nequaquam pereunt, sed juxta vocem Domini, ei a quo donata sunt amplissime remuneranda conservantur, [et] mensuram bonam et confertam et coagitatam et superfluentem conferent in sinum vestrum. Nos itaque de salutis vestræ profectu solliciti, charitatem vestram commonemus in Domino, quatenus [ad repar]ationem ecclesiæ Beati Ivonis, et ad refficiendum] ejusdem villæ pontem et calcedam, ubi disjunctus admodum est comineantium transitus de [facul]tatibus vestris aliquod auxilium conferatis, et [Deum in] sanctis suis honorando, divinam vobis [gratiam] et peccatorum veniam acquiratis. Omnibus vero [qui ad præ]taxatum opus aliquid ob Deum hortat.... contulerint, de Domini confisi misericordia, de in[juncta] sibi pœnitentia, decem dies relaxamus, [et] bonorum omnium quæ in nostra sunt Ecclesia [et orat]ionum participes constituimus. Valete.

EPISTOLA CCCXV.

AD.....

Noverit dilectio vestra, charissime, me in omnibus vestro gratanter pariturum servitio, et si [quid] forte immineret, sponsioni respon[debit de]vota operis exhibitio.

EPISTOLA CCCXVI.

AD.....

De benignitate vestra simul et dilectione paternitati vestræ pro latore præsentium N. pref[ces hu]miles et devotas porrigimus, impense rog[antes,] ut eum amore Dei et ob reverentiam beati.... nostræ si placet precis intuitu benigne [suscipiat] et] clementer exaudiat. Quidquid autem in oculis vestris] gratiæ et benignitatis invenit, nobis indultum [reputetis].

EPISTOLA CCCXVII.

AD.....

Lator hic præsentium, zelum ut fatetur habens aliquando sine scientia, patrem quondam suum Simonem secutus, a cœtu vestro, quod modo lacrymabiliter deplorat, minus considerate discessit. Qui modo compunctus et conversus ad cor, rerum edoctus experientia quam grave sit a fratrum unitate sejungi, pulsatur et suspirat ad vos, supplicans, et totis animæ viribus expetens ut misericordiæ sibi januas aperiatis, et ipsum utpote de cætero prudentius et perfectius obediturum, intra numerum vestram admittatis. Unde quia revertenti nunquam sinum claudit Ecclesia, magis super uno gaudens converso ad pœnitentiam, quam super multis qui pœnitentia non indigent, cum pulsante pulsamus, cum supplicante preces effundimus, quatenus amore Dei, fraternæque charitatis intuitu, iram si qua adversus eum concepta est, de corde sibi remittatis,

A et petitionem tam ejus quam nostram, si absque læsione ordinis vestri fieri potest, et sine scandalo, clementer exaudiat. Valote.

EPISTOLA CCCXVIII.

AD.....

Salutem et prout devotæ fidelitatis obsequium.

Vetus est et antiquum: Qui confidenter diligit, loquitur confidenter, nec de ejus affectu hæsitare qui potest, cujus sincera dilectio omnem suspicionis læcem eliminat. Inde est quia preces vestras negare non possumus, præsertim ubi vos vincit instantia, et magna intercedit auctoritas et dilectio.

EPISTOLA CCCXIX.

AD.....

B De vestra, domine, confisus liberalitate, obnixæ vestræ supplico paternitati, quatenus ut vobis in omnibus ex devoto devotior existam, ad ecclesiæ vestræ beneficium aliquod vestra me vocare dignetur excellentia, quod vobis honestum sit dare, et mihi a vestra suscipere largitate.

EPISTOLA CCCXX.

AD.....

Quod aliquid a bonitate vestra postulare præsumo non præcedentium confidentia meritum, sed vestræ benignitatis facit intuitus.

EPISTOLA CCCXXI.

AD.....

C Graviter, ut audio, delinquis, qui manus tuas ad decimas ecclesiæ quæ ad solum jus divinum pertinent, manum mittere non formidas. Unde tibi mando, et super Christianitatem tuam injungo, quatenus decimas ad ecclesiam de Fuleham pertinentes, sibi sine dilatione restitui facias, ne si eas injuste detinueris, iram ex hoc Dei incurras, et sententiam in te quam mereris excipias.

EPISTOLA CCCXXII.

AD.....

Cum singulæ virtutes, charissimi, acceptentur in conspectu Dei, nulla magis Deo placere legitur quam eleemosyna. Scriptum namque est: *Dato eleemosynam, dicit Dominus, et omnia munda sunt vobis* (Luc. xi). Quicunque igitur Deo placere desiderat, ex beneficiis sibi divinitus collatis, pauperibus erogare alienis necessitatibus subvenire intendat, ut a Domino ob ipsos collata, die illa in centuplum recipere valeat. Unde quia ex injuncto nobis officio vestri curam gerimus, vestram studiosius fraternitatem commonemus, quatinus ut et eleemosyna vestra pluribus in exemplum boni operis pateat attendatis.

EPISTOLA CCCXXIII.

AD.....

Nonnulli innotuisse credimus, quanto foveantur solatio pauperes Christi divertentes ad hospitale juxta Sanctum Bartholomæum in Londonia, et quantis egeat domus illa, quæ tot millibus singulis diebus est necessaria et solatium ministrat universis. Hujus ergo tam religiosæ domus intuitu, uni-

versitatem vestram hortamur attentius, rogantes et obsecrantes in Domino, et in remissionem vobis injungentes delictorum, quatenus latores presentium, nuntios et procuratores illius venerabilis loci, benigne inter vos ad seminandum Dei verbum recipiatis, et fratribus qui ibidem sunt, divinis mancipati obsequiis, per vos et per commissos vobis populos, beneficia et eleemosynarum largitione misericorditer subveniatis. Nos quoque de divina confisi misericordia, omnibus qui pro a [more] Dei aliquid illi domui beneficium contulerint, omnium orationum et beneficiorum Londoniensis Ecclesiæ concedimus participationem. Valete.

EPISTOLA CCCXXIV.

AD

Gloria et honore in perpetuum coronari.

Latorem presentium, filium nostrum B. honeste quod ad conscientiam nostram conversatum apud nos, charitati vestre commendamus attentius, preces in hoc devote porrigentes, ut eum tanquam devotum filium cum gratia suscipiatis, et nostræ petitionis intuitu de chariore chariorem habeatis, ut nos ex hoc et dilectionis et amplioris gratiæ debitores habeatis.

EPISTOLA CCCXXV.

AD

Universitati vestre presenti scripto notifico me ecclesiam de Wicham cum capella sua, ecclesia videlicet de Langeforde, cæterisque omnibus ad eam pertinentibus, H. clerico in eleemosynam concessisse, ipsumque in eisdem ecclesiis personam, ea quæ nobis a Deo concessa est auctoritate constituisse. Quod ne revocari possit in dubium, paginæ presentis inscriptione, et sigilli mei appositione testificari pariter et confirmare curavi.

EPISTOLA CCCXXVI.

AD

Quia piis desideriis prout adhibere debemus assensum, universitati vestre presenti scripto notificamus, nos ex concessione nobilis femine, Cecilie, videlicet Talbot, ecclesiam de Feenges, quæ in ejus patrimonio sita est, ecclesiæ Beati Jacobi supra montem Rothomagi et fratribus et infirmis in eadem commanentibus, et jugem Domino famulatum exhibentibus, ea qua permittente Domino fungimur auctoritate, in perpetuam eleemosynam concessisse, et venerabilem fratrem nostrum Herbertum

A ipsius ecclesiæ Sancti Jacobi priorem, in ea personam ipsius ecclesiæ Sancti Jacobi nomine, debita solemnitate constituisse. Quod ne deinceps revocari possit in dubium, aut aliqua forte machinatione convelli, presenti scripto confirmamus, et sigilli nostri appositione corroboramus, et qui funiculus triplex non facile rumpitur, donationem hanc primo jam dictæ ecclesiæ, deinde nostra, postmodum sancti Thomæ dudum Cantuariensis archiepiscopi charta, firmatam in perpetuum valituram, Domino juvante, confidimus. His testibus.

EPISTOLA CCCXXVII.

AD

B Infirmorum apud Colecestriam diuturna ægritudine laborantium egestati condolentes, dilectam nobis in Domino benignitatem vestram rogamus, et attentius exhortamur in Domino, quatinus amore Dei et pietatis intuitu, nuntios et procuratores eorum, cum ad vos declinaverint, ob animarum vestrarum remedium benigne recipiatis, et eorum paupertatem de eleemosynarum vestrarum largitione prout vobis Deus inspiraverit, sublevetis. Omnibus vero qui de peccatis suis confessi fuerint, et eis manum misericordiæ in aliquo impenderint, de Domini confisi misericordia, de injuncta sibi penitentia xx dies relaxamus, et orationum et beneficiorum ecclesiæ nostræ participes esse concedimus.

EPISTOLA CCCXXVIII.

AD

C Tutum, fratres, reputamus et utile, litterarum monumentis excipere, quæ paci inter personas ecclesiasticas reformanda, vel firmius in posterum conservanda certum fuerit expedire, ne quæ convenientia iudicium et assensu partium transactione vel amicali compositione ad pacem redacta fuerint, a memoria, tractu temporis evanescere, aut in litem redivivam iterato contingat exsurgere. Hinc quod controversia. . . . Cætera desunt.

EPISTOLA CCCXXIX.

AD

Præfatio in librum Homiliarum.

D naves, frater, quod optasti, quod pulsanti jam diutius charitas ultra negare non potuit. Intus enim positus, etc. Vide Opera exegetica Gilberti, inter Patrologiæ tomos proxime edendos. EDIT. PAT.

Gilberti epistolam CCCXXX, ad suffraganeos Cantuariensis Ecclesiæ, de electione Urbani III papæ, quæ in editione De Gilles loco suo exciderat, sub num. 196 bis supra reposuimus. EDIT.

EPISTOLÆ CCCXXXI—CCCLXXX.

ALEXANDRI III papæ ad Willelmum et Ottonem cardinales epistolæ tres, ad Albertum et Theodwinum cardinales, de reconciliatione Cantuariensis Ecclesiæ; ad eosdem, ad Bituricensem archiepiscopum et Nivernensem episcopum, ad Thomam Cantuariensem archiep., de canonizatione Anselmi; ad eundem, ad universos suffraganeos Cantuariensis Ecclesiæ, ad Cantuar. archiep. et suffraganeos epistolæ quinque, ad Cantuar. archiep. et Gilbertum, ad monachos et canonicos Cantuar., ad W. priorem et capitulum Cantuar., ad Ricardum Cantuar. archiep., ad Rogerium Eliorac. archiep., ad eundem, ad... de dignitate Ecclesiæ Eboracensis; ad Rotrocum Rothomagensis archiep., ad episcopos Angliæ, ad Aurelianensem episcopum, ad Bartholomæum Exoniensem episc., ad eundem et Simonem abbatem, ad Lincolniensem archidiaconum, ad Gilbertum London. episc., ad eundem, ad eundem et R. archidiacon., ad eundem epistolæ quatuor, ad Willelmum Norwicensem episcopum, ad eundem, ad Rogerum Wigornensem episc.,

ad eundem epistolæ tres, ad Simonem abbatem S. Albani, ad abbatem et monachos S. Andree, ad abbates et fratres Cisterc. in Anglia constitutos, ad Rogerum abbatem monasterii de Ibreio, ad monachos S. Mariæ de Laurentio, ad abbatem et fratres de Neubothe, ad Henricum regem, de *Thoma Becouet* (apuria); ad eundem, ad Ludovicum Franc. reg.

(Vide in ALEXANDRO III, an. 1159—1181.

EPISTOLA CCCLXXXI.

URBANI III PAPÆ AD B. CANTUARIENSEM ARCHIEPISCOPUM
ET OMNES EPISCOPOS IN ANGLIA CONSTITUTOS.

De electione sua.

URBANUS episcopus, etc.

Cœlestis altitudo consilii, etc. Vide in Urbano III papa, an 1185-87.

EPISTOLA CCCLXXXII.

MONACHI TERTII PAPÆ EPISTOLA AD UNIVERSOS CHRISTIANOS
NOS PER ANGLIAM CONSTITUTOS, DE TRANSLATIONE
BEATI THOMÆ.

HONORIUS episcopus, servus servorum Dei, universis Christi fidelibus, nobilibus et aliis per Angliam constitutis, salutem et apostolicam benedictionem.

Rex cœlestis, Dominus angelorum, regnum Angliæ cæteris aliis nostris temporibus honoravit, et speciali quadam prærogativa gentem Anglicam insignivit, dum mundo posito in maligno, et malitia hominum excrecente, virum sibi exinde sine macula prælegit, qui non solum in tempore iracundiæ reconciliatio factus est ut sacerdos, verum etiam ad cœleste convivium invitatus, illum saporare meruit, quem biberat Dominus calicem passionis. Et quia inventus dignus Deo, coronavit eum gloria et honore, coronam ipsius capiti superponens de lapide pretioso, ut sic unus ex Anglicis inter angelos super opera manuum Domini constitutus, pro peccatis populorum omnium fieret intercessor. Cantet igitur novum Domino canticum felix Cantuariensis Ecclesia, cujus aram suo purpuravit pretioso sanguine martyr Thomas. Quinimo civitas ipsa tota potest et debet in exultationis voce non immerito jubilare, quæ cruore roseo sui martyris rubricata, pulchra facta est et apparuit speciosa. Unde diversarum multitudinem gentium ex omni fere, quæ sub cœlo est, natione celebritatem ipsius summopere venerante, quondam quasi felici præsentio suum videtur esse sortita vocabulum ex eventu, ac si dicatur expresse Cantuaria cantusare.

Vos, inquam, si diligenter attenditis hunc honorem, gratiarum actiones assiduas largitori bonorum omnium exsolvere debetis, cui vos ex impensæ benedictionis gratia terræ vestræ cognoscere potestis debitores, ut ingratitude vitetis vitium, et possitis devoti filii nuncupari. Et quidem omni tempore puro corde benedicere ac honorare Dominum debeatis, isto tamen præcipue vos oportet vestes induere nuptiales, et cum iuventute in laudes vestro assurgere Creatori, cum venturæ festivitatis solemnitas id exposcat. Sane a venerabili fratre nostro Stephano Cantuariensi archiepiscopo, sanctæ Romanæ Ecclesiæ cardinali, nuper accepimus, intimante quod idem volens ostendere in effectu, quanto devotionis fervore martyris supradicti memoriam

A veneretur, sacratissimum corpus ejus sublevare proponit de terra, ipsumque translatum honorabilibus collocare, cum dignum sibi et condecens videatur, illum quantum in eo est, exaltare in terra quem in cœlo Dominus exaltavit. Nos igitur pium et laudabile archiepiscopi memorati propositum acceptantes, universitatem vestram monendam duximus et hortandam, per apostolica vobis scripta mandantes, quatenus pacem mutuam et concordiam in charitatis vinculo conservantes, vestras conscientias cunctis perversitatibus expietis, et sic vos in bonis siudeatis operibus exercere, ut cum dies ipsius solemnitatis advenerit, in occursum vestri sanctissimi martyris et patroni ipsum possitis honorificentia debita taliter venerari, quod doceatis alios per exemplum, quantum esse debeat celebris per diversa mundi climata præfati martyris memoria gloriosa.

Data Laterani viii Kalendas Februarii, pontificatus nostri anno tertio.

EPISTOLA CCCLXXXIII.

EJUSDEM AD W. PRIOREM ET CONVENTUM CANTUARIENSEM.

HONORIUS papa, etc. dulcissimis filiis priori et conventui Ecclesiæ Christi Cantuariensis, salutem et apostolicam benedictionem.

Ecclesiæ vestræ, quam venerabilis martyr Thomas reddidit sui corporis sanguine decoratam, illum nos decet impartiri favorem, ut sicut inter alias nominis est majoris et famæ, sic apud nos Romanam effectam Ecclesiam prærogativam reparat gratiæ specialis: cum igitur sicut vobis referentibus intelleximus, archiepiscopi et episcopi qui ex diversis locis ad translationem corporis ipsius martyris convenierint, accessuris infra quintum decimum diem ad translationis solemnitatem ejusdem diversas remissiones duxerint faciendas, iisdem nos ipsi dies relaxamus quadraginta de injunctis iis penitentis, vestris vero precibus inclinati quod super hoc a vobis et ipsis factum est decrevimus ad unius anni et prædictorum quadraginta dierum remissionem perpetuis temporibus valiturum. Nulli ergo omnino hominum liceat hanc paginam nostræ concessionis infringere, vel ei ausu temerario contraire. Si quis autem hoc attentare præsumperit, indignationem omnipotentis Dei et beatorum Petri et Pauli apostolorum ejus se noverit incursum.

Dat. Laterani xv Kal. Januar. pontificatus nostri anno quinto.

EPISTOLA CCCLXXXIV.

ALBERTI CARDINALIS EP. AD THOMAM CANTUARIENSEM.

THOMÆ Cantuariensi archiepiscopo ALBERTUS cardinalis.

Gavisus est dominus papa, gavisus sunt cum eo et fratres, quod pacem vobis et Cantuariensi Ecclesiæ redditam audierunt. Et ego ipse, unus expectan-

tium et gaudium, nisi quod gaudium meum hæsitatio quædam de adversariorum tergiversatione proveniens suspendebat: supervenientibus autem litteris vestris, et intellecto quod plus vobis in accidentibus quam in substantia sit exhibitum, magis adhuc cepimus hæsitare: et intelleximus, quod non facile mutat Æthiops pellem suam, aut pardus varietatem suam. Nunc autem quia sicut homo non est laudandus in vita sua, ita nec judicandus ante tempus, quemadmodum non sumus sine gaudio de hoc quod audivimus, ita nec possumus plene gaudere propter id quod timemus. Fluctuantes igitur inter spem et timorem suspiravimus ad eum, qui potens est superabundantius facere quam petimus aut speramus, ut ipse adimpleat gaudium nostrum, et gaudium istud nemo tollat a nobis.

EPISTOLA CCCLXXXV.

EJUSDEM ET THEODWINI AD HENRICUM REGEM.

HENRICO Dei gratia regi Angliæ, A. dignatione divina tituli Sancti Laurentii in Lucina et T. Sancti Vitalis presbyteri cardinales et apostolicæ sedis legati, salutem in eo qui dat salutem regibus.

Ne in dubium veniant quæ geruntur, et usus habet, et communis consideratio utilitatis exposcit, ut scripturæ serie debeant adnotari. Inde siquidem est, quod nos mandatum illud in scriptum duximus redigendum, quod vobis pro eo facimus, quia malefactores illos, qui sanctæ memoriæ Thomam quondam Cantuariensem archiepiscopum occiderunt occasione motus et turbationis, quam viderunt in vobis ad illud facinus processisse timetis. Super quo tamen facto purgationem in nostra præsentia de voluntate propria præstitistis, quod videlicet, nec præcepistis, nec voluistis ut occideretur, et quando pervenit ad vos rumor, plurimum doluistis. Ab instanti siquidem Pentecostes usque ad annum tantam pecuniam dabitis, unde ad arbitrium fratrum templi ducenti milites valeant ad defensionem Hierosolymitanæ terræ spatio unius anni teneri. Vos autem, a sequenti Domini nativitate usque ad terminum, crucem accipietis, proxima tunc æstate illuc in propria persona ducente Domino profecturi, nisi remanserit per dominum papam vel catholicum successorem ejus. Sane si contra Soracenos in Hispaniam pro urgenti necessitate profecti fueritis, quantum temporis fuerit ex quo arripueritis iter, tantumdem supradictum Hierosolymitanæ protectionis poteritis prolongare. Appellationes nec impedietis, nec permittetis impediri, quin libere fiant in ecclesiasticis causis ad Romanam Ecclesiam: bona fide, et absque fraude et malo ingenio, ut per Romanum pontificem causæ tractentur, et suum consequantur effectum. Sic tamen, ut si vobis suspecti fuerint aliqui, securitatem faciant, quod malum vestrum vel regni vestri non quærent. Consuetudines, quæ inductæ sunt contra ecclesias terræ vestræ, tempore vestro penitus dimittetis, nec ab episcopis amplius exigitis. Possessiones Cantuariensis Ecclesiæ, si quæ ablatae sunt, plene restituetis, sicut habuit uno

A anno antequam archiepiscopus de Anglia egredere-
tur. Clericis præterea et laicis utriusque sexus, pacem vestram et gratiam, et possessiones suas restituetis, qui occasione prænominati archiepiscopi destituti fuerint. Hoc autem vobis auctoritate domini papæ in remissionem omnium peccatorum vestrorum injungimus, et præcipimus observare bona fide absque fraude et malo ingenio.

Juravit hoc rex, juravit et de consuetudinibus novis dimittendis filius ejus: et juraverunt ambo quod a vobis et successoribus vestris non recederent, quandiu eos sicut Christianos reges et catholicos habueritis.

EPISTOLA CCCLXXXVI.

EORUNDEN AD CONVENTUM CANTUARIE.

ALBERTUS ET THEODWINUS cardinales conventui Cantuarie.

Lætatur nos, lætatur et quæ audit congregatio universa iustorum, quod mortem sanctæ memoriæ Thomæ, quondam archiepiscopi vestri ita in conspectu suo Deus pretiosam ostendit, et venerandam ejus memoriam tot miraculis illustravit, ut odor unguentorum ipsius jam fere per totum corpus Ecclesiæ se diffundat, et virtus ejus in Oriente et Occidente communiter prædicetur. Ita ut qui felicitibus illius actibus, dum viveret, invidebant, nunc casibus humanis eo exemplo, et ad supernorum societatem, ut credimus, fide ac zelo sacerdotali promerente translato, venerentur virtutem ipsius, et ei qui facit mirabilia magna solus, gratiarum referant actiones. Quia igitur videtur idoneum, ut cum magnalia, quæ facta sunt apud vos, populorum turba decantet, et gratiarum actio et vox laudis resonet in commune, Ecclesia vestra, quam tanto munere gratia divina donavit, sub atrocitatis obtentu diutius non debeat a Conditoris laude cessare, reddentes nobis mutua salutationis alloquium, et petitioni vestræ devoto concurrentes assensu, fraternitati vestræ mandamus, quatenus convocatis episcopis et abbatibus provincie vestræ, qui vobis ad hoc idonei visi fuerint, cum solemnitate congrua, adhibito, sicut majoribus visum fuit, moderamine, denuo ecclesiam vestram consecretis. Si quid minus fuerit solemnitate, divinorum miraculorum poterit illustratione suppleri. Nos sane si aliquid fuerit, quod ad profectum vestrum et ecclesiæ vestræ facere valeamus, quantum cum Deo poterimus, libenti animo faciemus. *Te Deum laudamus.*

EPISTOLA CCCLXXXVII.

EORUNDEN AD WILHELMUM SENONENSEM ARCHIEPISCOPUM.

Venerabili fratri et in Christi visceribus amplectendo semper amico W. Dei gratia Senonensi episcopo apostolicæ sedis legato, ALBERTUS dignatione divina tituli Sancti Laurentii in Lucina, et THEODWINUS tituli Sancti Vitalis, presbyteri cardinales, apostolicæ sedis legati, quod promisit Deus diligentibus se.

Quoniam expectare vos credimus, ut de statu

nostro et injecti nobis promotione negotii aliquid audialis, idcirco qualiter nobiscum et per ministerium mediocritatis nostrae Deus egerit his diebus, fraternitati vestrae praesenti scripto duximus indicandum. Noveritis ergo quod postquam illustris Anglorum rex venisse nos in regnum suum in veritate cognovit, totius obstaculo tarditatis amoto, de Hibernia in Angliam, incumbentibus sibi negotiis praetermissis, de Anglia vero in Normanniae partes accessit, atque incontinenti plures ad nos nuntios et honorabiles destinavit, inquirens a nobis in quo loco potius convenire cum eo et loqui vellemus. Placuit tandem ad Saviniacense monasterium pro colloquio habendo concurrere, ubi religiosorum virorum possemus orationibus adjuvari. Convenimus illuc, convenerunt et multae personae utriusque ordinis de regno ipsius, et tractavimus diligentia qua potuimus, quod ad salutem ipsius et injectam nobis obedientiam pertinebat. Cum autem non possemus in omnibus convenire, recessit ipse a nobis velut in Angliam profecturus, et nos exspectavimus sequenti die ad Abrincas civitatem ituri, postero autem die venerunt ad nos Lexoviensis episcopus et duo archidiaconi, et concessio quod petebamus, ad praedictam processimus civitatem, ad quam Dominica, qua cantatur *Vocem jucunditatis*, convenimus cum personis plurimis et ipse nobiscum, et cum tanta humilitate quod fuerat conductum implevit, ut illius existisse opus sine dubitatione credatur, qui respicit terram et facit eam tremere, qui tangit montes et fumigant. Sane quam timoratum Deo, quam obedientem ecclesiae se curaverit exhibere, non est opus praesenti abbreviatione referre. Satis enim ipsius opera manifestant et manifestabunt adhuc plenius, sicut et nobis spes data est in futurum.

Primum itaque super mortem sanctae memoriae Thomae quondam Cantuariensis archiepiscopi non de nostra exactione, sed de propria voluntate, tactis sacrosanctis Evangelis, suam conscientiam expurgavit, jurans videlicet quod nec praecipit nec voluit, et quando audivit, doluit vehementer. Quia vero quod factum fuerat ex sua occasione factum esse timebat, de satisfactione praestanda tale praestitit juramentum. Primo quidem juravit quod a domino nostro papa Alexandro et ejus catholicis successoribus non recedet, quandiu eum sicut catholicum regem et Christianum habuerint, et hoc ipsum fecit jurare filium suum majorem. Juravit etiam quod usque ad annum tantam pecuniam dabit templariis, unde ad defensionem terrae Hierosolymitanae ducenti milites valeant retineri. Ab instanti vero nativitate Domini usque ad triennium crucem accipiet sequenti aestate, Hierosolymam profecturus, nisi per dominum papam steterit vel ejus catholicos successores. Si vero interim pro necessitate contra Saracenos in Hispaniam iverit, quantum temporis in illo itinere consumpserit, tantumdem praedictum spatium prolongare poterit. Abjuravit etiam omnes consuetudines quae contra

ecclesias regni sui tempore suo introductae videntur. Appellationes ecclesiasticarum causarum ad dominum papam libere sinet fieri, et tractari per eum causas et suo fine concludi. Si quis tamen ei suspectus fuerit, securitatem ei faciet quod damnum ejus et regni sui non quaerat. Possessiones Cantuariensis Ecclesiae, si quae sint ablatæ, restituet, sicut habuit primo anno quando archiepiscopus de terra exiret. Id ipsum faciet et de personis quae causa ipsius exisse videntur. Quibus etiam gratiam suam et bonam reddidit voluntatem, et hoc quidem sub juramento. Promisit autem et alia de libera voluntate gerenda, quae non oportet scripturae serie denotare. Haec autem scripsimus, ut agnoscat eum obedientem Ecclesiae atque ad divinum obsequium multo amplius quam adhuc fuerit animatum. Noveritis adhuc filium ejus de praedictis consuetudinibus dimittendis pariter cum eo jurasse. Sane quod ibi factum est, iterato adhuc, ne dubitationis locus alicui remaneret, apud Cadomum in majori frequentia personarum publice statuit se acturum. Relaxavit praeterea episcopos de promissione, quam ei fecerant de consuetudinibus et promisit quod non exigit in futurum.

EPISTOLA CCCLXXXVIII.

eorumdem ad Gilbertum RAVENNENSEM ARCHIEPISCOPUM.

Venerabili in Christo et dilecto fratri GILBERTO, Dei grata RAVENNENSI archiepiscopo, ALBERTUS dignatione divina tituli S. Laurentii in Lucina et THEODWINUS tituli S. Vitalis, presbyteri cardinales, apostolicae sedis legati, quod promisit Deus diligentibus se.

Quoniam desiderare vos credimus, ut de statu nostro, etc. (*Eadem quae in epistola superiori usque ad :*) Et hoc ipsum jurare fecit filium suum majorem in charta absolutionis pro morte beati Thomae. Juravit etiam et alia, clero et populo valde necessaria, quae omnia diligenter et per ordinem, sicut ea juraverat, in absolutionis ejus charta pernotavimus. Promisit etiam et alia de libera voluntate gerenda, quae non oportet scripturae serie denotare. Haec autem scripsimus, ut cognoscatis ipsum obedientem Deo atque ad divinum obsequium multo amplius quam adhuc fuerit animatum. Noveritis ad hoc filium suum de praedictis consuetudinibus pariter cum eo jurasse. Sane quod ibi factum est, iterato adhuc, ne dubitationis locus alicui remaneret, apud Cadomum in majori frequentia personarum publice statuit se acturum. Relaxavit praeterea episcopos de promissione, quam ei fecerant de consuetudinibus conservandis, et promisit quod non exigit in futurum. In crastino autem praedicti cardinales ibidem celebraverunt magnum concilium cum archiepiscopo et episcopis et clero Normanniae, et ibi haec decreta suscripta statuerunt, et universis firmiter et inviolabiliter injunxerunt.

EPISTOLA CCCLXXXIX.

A

EPISTOLA CCCXCI.

BERNARDI PORTUENSIS EPISCOPI AD THOMAM CANTUARIENSEM.

THOMÆ Cantuariensi archiepiscopo, BERNARDUS Portuensis episcopus.

Quoniam sub uno capite Christo sumus invicem membra, non debet vestra dilectio ambigere, quin vestra tanquam propria negotia nostra curemus, maxime cum in vestra causa res nostra profecto agatur. Unde si aliquid aliquando nos agere contingat, quod actum in parte vobis fortasse displiceat, redire sub rationem displicentia debent, ut minus moleste feratis, quod pro nobis ad modicum temporis dispensamus, eo nimirum libentius quia vobis totum militat, quidquid est quod in vestro negotio vobis etiam contraire videtur. In hoc siquidem quod dominus papa quasi contra suum propositum regi Angliæ scribit, hoc agit, ut si forte, quod non credimus, hac vice non resipuerit, non possit etiam sibi ipsi videri injusta fore super se lata sententia. Eapropter vestram fraternitatem, quantum possumus, in Domino exhortamur, ut sicut cœpistis, et hactenus laudabiliter perseverastis, sitis et fortis et patiens, scientes quod si modo non se correxerit, nequaquam amplius manus suas mater Ecclesia continebit, sed eo fortius eum feriet, quo ipsum in majori patientia sustinuit. Nam jam adeo in aperto contra Ecclesiam ejus malitia se erexit, ut jam non inveniatur, qui ejus dolos feriri non velit. Valetet semper in Domino, et spiritus consilii et fortitudinis maneat semper cum omnibus nobis. Amen.

EPISTOLA CCCXC.

GRATIANI AD GAUFREDUM RIDEL ET ALIOS.

GRATIANUS sanctæ Romanæ Ecclesiæ subdiaconus, et domini papæ notarius, GAUFREDO Cantuariensi archidiacono, et NIGELLO de Saccavilla, et THOMÆ filio Bernardi, sic transire per bona temporalia, ut non amittant æterna.

A vestra non debet excidisse memoria, qualiter a vobis accepto juramento vos in spe pacis promissæ fecerimus absolvi. Et quia pax, ut sperabatur, secuta non est, vobis per venerabiles viros, Rothomagensensem et Burdigalensem archiepiscopos, denunciavimus, ut nisi infra tunc imminens festum Beati Michaelis pax reformata esset, nequaquam exinde collatæ absolutionis beneficio frueremini, sed sententiam, quam Cantuariensis archiepiscopus in vos ferret, sine fraude et malo ingenio firmiter servaretis. Quia ergo pax secuta non est, et vos præfatus Cantuariensis in sententiam excommunicationis publice reposuit, vobis in virtute præstiti juramenti præcipimus, quatenus sententiam ipsam, donec absolvi mereamini, inviolabiliter observetis. Det vobis Deus cor, ut colatis eum, et magis faciatis ipsius, quam hominis voluntatem.

Similiter scripsit Vivianus.

EJUSDEM AD THOMAM CANTUARIENSEM.

Charissimo in Christo ac reverendo Patri THOMÆ Dei gratia Cantuariensi archiepiscopo, fortissimo atque invictissimo Dei athletæ GRATIANUS sanctæ Romanæ Ecclesiæ subdiaconus, salutem et gloriosam post agonem cum optata pace victoriam.

Quod de mea sinceritate, sicut ex litteris et nuntiis vestris intelligo, indubitatam spem et fiduciam tenetis, gratum habeo modis omnibus et acceptum, vestræque paternitati ex hoc ipso devotior ac fidelior persevero. In proposito siquidem meæ ad vos devotionis ac fidei, et causæ vestræ defensione constanti eadem, quæ induxerunt, causæ me retinent: timor videlicet Dei, amor honesti, zelus et fervor ecclesiasticæ libertatis. Accedit ad hæc personæ vestræ virtus et gratia, quæ me jam in eo, quod ante probaveram, stimulo quodam sollicitudinis urget arctius et instigat, concurrentibus ad idem et virtutis studio, et amoris ac diligentiae filialis officio. Confidite igitur de me, sicut facitis, et sperate quia spes ista vos, Deo propitio, non frustrabit, nec mea unquam fides aut charitas in vestro poterit refrigerare negotio vel tepere. Puto autem quod et res ipsa fidem faciet his, quæ dico, et in hujus rei testimonium cum amicis vestris inimici conveniant.

Et quidem in hoc, si venisset homo, contra quem devotionem meam sollicitudo vestra præmonuit, non discordaret a cæteris ejusdem malitiæ satellitibus et præambulis Antichristi. Verum cum ille non venerit, in eo quod reliquum erat, et expedire putavi, mea sollicitudo non tepuit, et quotidiana apud dominum papam instantia non quievit, donec litteras, quas cum his, Deo dante, videbitis, per domini papæ gratiam indultas obtinui. Quas quidem credo, credetis autem et vos, ni fallor, efficaces ad rem, et negotio utiles adfuturas. Agite itaque confidenter, et quod ad vos pertinet, causam nostram Domino commendate, qui non deserit sperantes in se, et per quem diligentibus eum omnia cooperantur in bonum. Ego autem quod amici et fidelis est, cum res postulaverit, exsequi non cessabo. De cætero quod in litteris vestris miseria consuevit exsilio copulari, discretionem vestram, ut audacter salva reverentia loquar, emendare voverim: cum sicut arbitror, miseros vocari non deceat, qui a Domino beati dicuntur, juxta illud Evangelii: *Beati qui persecutionem patiuntur propter justitiam (Matth. v)*. Det vobis Dominus pacem in proximo, et in futuro consortium et gloriam beatorum.

EPISTOLA CCCXCH.

HUMBALDI OSTIENSIS EPISCOPI AD THOMAM CANTUARIENSEM.

THOMÆ Cantuariensi archiepiscopo, Ostiensis episcopus.

Quando paternitatis vestræ litteræ nobis allatæ sunt tanta corporis infirmitate laborabamus, quod a medicis de vita nostra desperabatur. Verum, quia vo-

bis in vestris persecutionibus et angustiis, etiam in infirmitate nostra non immerito compatimur et condolemus, per quosdam de fratribus nostris et domesticis etiam nostros instantes et frequentes preces domino papæ porreximus, ut tantæ iniquitati Eboracensis et suorum complicitum obviaret, et ipsorum dolositatibus et malitiis finem imponeret. Ipse vero, sicut quem pluribus respondere oportet, huic vestro negotio tantum intendere distulit, quod Deo desuper faciente vobis aliquantulum melius fuit. Cumque super his a fratribus suis episcopis et cardinalibus consilium expetisset, plures pro vobis inventi sunt, quam contra vos, ita quod a Domino factum credimus, eos pro vobis in hac parte locutos fore, qui consueverant vestris commodis obviare. Nostrum autem consilium per quosdam de fratribus nostris idem dominus noster expetit, et nos de pura conscientia iam dictum Eboracensem deponendum, et suos complices excommunicandos, per eosdem fratres nostros sibi respondimus. In cuius litteris recognoscere poteritis quid super hoc ab eo statutum sit. Rogamus autem discretionem vestram, ut id requanimit et patienter sustineatis. Causam quidem Dei et Ecclesiæ agitis, unde pacem vos in proximo habituros et confidimus et speramus. Præterea noveritis nos domino Bituricensi misisse, ut septem marcas argenti et quadraginta quinque marobotos vobis transmitteret. Quod si factum est, placet nobis. Alioquin significare nobis curetis, ut id faciamus effectui mancipare.

EPISTOLA CCCXCIII.

HYACINTHI AD THOMAM CANTUARIENSEM.

THOMÆ Cantuariensi archiepiscopo HYACINTHUS cardinalis.

Quam ferventi affectu pacem vestram desideravimus, non est necesse litteris exprimere, quia nobis tacentibus in mente vestra legitis quanta dilectione vobis astringamur. Unde audit et vestrarum litterarum tenore cognito, quod ille, in cuius manu corda regum existunt, animum principis vestri inclinaverit, ut vobis gratiam suam restitueret, ultra quam loqui possimus in hilaritate jucundati sumus, gratias exsolventes illi qui vestræ constantiæ humilitatem dignatus est respicere, quem rogamus, ut quod incepit, ita dignetur perficere, quod honor Ecclesiæ inde augmentari valeat, et quidquid reatus dictus princeps ex culpa contraxit, sequens satisfactio diluat. Verum si corpus quod corrumpitur, non sinit eum ad hunc rectitudinis locum mentem revocare, consulimus modis omnibus et monemus, ut eum in spiritu lenitatis studeas instruere, ut quod ad satisfactionem deest, perficere curet, et ad pristinum amorem revocatus, et ad mentem reversus vobis debitam gratiam firmiter exhibeat, et malitiæ inimicorum vestrorum pro voluntate vestra respondeat. Hæc enim via vestræ discretionis incedendum putamus, ut hominis animositas reprimatur, et vestrorum inimicorum perversitas destruat: ne forte si severitatis viam iterum velitis aggredi, cum

nondum illius animus in hoc sit solidatus, quod debet, de facili relaberetur in hoc quod non debet, et ita esset novissimus error pejor priore, quoniam Omnipotentis virtus avertat. Nos autem pro vestris petitionibus promovendis solliciti fuimus, et dominus papa quod potuit, libenti animo nobis fecit. Sæpe statum vestrum nobis significetis, quod tanquam fratri charissimo, vestro desiderio respondere cupientes, vobis concordabimus.

EPISTOLA CCCXCIV.

JOANNIS NEAPOLITANI AD THOMAM CANTUARIENSEM.

Reverendissimo et in Christo plurimum diligendo fratri THOMÆ Dei gratia Cant. arch. charissimo amico suo JOANNES eadem gratia Sanctorum Joannis et Pauli presbyter cardinalis omnimodam salutem et pacem pæque perpetua gaudere.

Redditæ sunt nobis dignationis vestræ litteræ variaz a diversis exsiliis vestri et nostræ fluctuationis temporibus, ex quarum complexione intelleximus animum vestrum, pulsatum simulationibus amulantium, secreta cordis nostri, et sacramenta sermonis penitus ignorantium, adversum nos vehementer esse commotum. Et usque adeo invaluit suggillatio, ut non solum vos in suspicionem nostram, sed usque ad damnationem nostram moveret. Non miramur, si vester animus detractionibus et falsis rumoribus moveri potuit; sed miramur, si fides vestra, innumeris charitatis nostræ argumentis et officiis firmata, vel ad modicum vacillare debuit. Nondum enim nobis firmato in Ecclesia Romana, et adhuc quasi cereo impressa est, et quasi sculpta imago Cantuariensis Ecclesiæ, quam indelebiter servavimus, et servare cum vita proposuimus contra omnes impetus fortuitos. Sane si aliquid in causa, quam contra regem Angliæ habetis, dispensative diximus, et sermonem nostrum temporaliter temperavimus, testis sit Deus, ut iratum et irati animi mitigaremus, sicutque quasi placida manu eum ad pacem traheremus, id fecimus. Pro certo id ipsum et gratiæ, quod offert, non severitati ecclesiasticæ, sed mansuetis consiliis nostris ascribitur. Decet præterea sacerdotalem gravitatem et honestatem, ut passibus humilitatis, patientiæ et moderationis prosequatur pacem tanti principis, quam, etsi non juxta desiderium vestrum et nostrum plenarie oblatam, rogamus et consulimus in Domino conscientia pura, quatenus nullatenus aspernemini, sed ea mansuetudine et affectione suscipiatis, ut dulcedine vestra eum ad reliqua mollire debeatis. Solet enim debile principium meliorem comitari fortuna. Et principes, præsertim hoc tempore, leniendi potius sunt, quam exacerbandi.

EPISTOLA CCCXV.

EJUSDEN AD HENRICUM REGEM.

Illustissimo domino HENRICO Dei gratia regi Angliæ, duci Normanniæ et Aquitaniz, et comiti Andegavensi Jo. NEAPOLITANUS indignus presbyter cardinalis, salutem, et votivos semper obtinere successus.

Placet nobis plurimum, et per omnia gratum A
ducimus et acceptum, quod ad executionem vo-
luntatis vestræ nostra studia promptius advocastis.
Nos quidem licet absque submonitione etiam vestra
quotiescunque opportunitas se offert, studiosi sem-
per simus et sollicitius elaboramus, quæcunque
vobis utilia sive ad honorem vestrum cognoscimus
proventura, sicut nobis possibile est, perficere et
promovere, et contraria propensius depellere et lon-
gus propulsare : cum tamen magnitudinis vestræ
litteris sollicitamur, tanto fortius accingimur et ad
complementum petitionis vestræ accuratius præ-
paramur, quanto et ipsa submonitio vestra et sol-
licitatio plurimum placet, et voti atque desiderii
nostri est ut quidquid possumus totum ad vestræ
voluntatis arbitrium omnimodis exponamus. Ve-
nientes igitur ad Ecclesiam Romanam honorabiles
nuntios vestros, abbatem videlicet Sancti Augus-
tini, archidiaconum Salesberiensem, magistrum
Simonem de Carcere et magistrum Henricum
cum litteris vestris quas excellentia vestra per
ipsos nobis transmisit, honorifice et læti suscepimus.
Attente atque sollicite vestra beneplacita et signi-
ficata intelleximus, dedimusque cum eis operam
studiosam et exactam diligentiam adhibuimus quod
Dominus noster primam petitionem vestram vel sal-
tem secundam executioni mandaret. At ubi omnis
conatus noster omneque studium et argumentosa
sollicitudo casso labore defecit, nihilque obtinere
potuit de his quæ juxta petitionis vestræ tenorem
postulavit, visum nobis est et complacuit quod ad
aliud remedium nostra studia converterentur. Ro-
gavimus ergo et licet cum multa instantia, impe-
travimus tamen tales litteras a domino papa per
quas temeraria presumptio et indiscreta audacia
Cantuariensis archiepiscopi repressa et conculcata
creditur et vobis aliquatenus cognoscitur pro qua-
litate temporis satisfactum. Præfati vero nuntii ve-
stri qui sicut industrii et probi viri vobisque fide-
lissimi circa executionem mandati vestri studio-
sissimi exstiterunt : cum pro certo novissent quod
nullo modo aliquam de petitionibus vestris obti-
nere valerent, ad consilium et exhortationem no-
stram et quasi compulsionem receperunt litteras il-
las quas dominus papa per eos vobis mittit. Quam-
vis enim plurimum pertimerent et formidarent ip-
sas recipere ; quia hoc de mandato vestro non ha-
bebant, inducti tamen et compulsi a nobis, sicut
diximus, qui liquido cognovimus nullatenus expe-
dire quod his temporibus litteras tales dimitterent,
assensum præbuerunt admonitioni nostræ. Nos
itaque, qui honorem vestrum puro corde et animo
diligimus et voluntati vestræ in omnibus pro posse
nostro obtemperare desideramus, laudamus vobis
atque consulimus quatenus recipientes recipiatis
et gratum ducatis quod dominus papa ad præsens
vobis concedit, scientes et nullatenus dubitantes,
quod, si credideritis suggestioni nostræ quam per
præfatos nuntios vestros vobis aperimus, Cantua-

riensis ille videns se omni destitutum auxilio et
cognoscens certissime quod ad regimen Cantua-
riensis Ecclesiæ non valeat ulterius aliqua ratione
redire, et ipsi spontaneus abrenuntiabit et in alia
ecclesia, ubi vivere possit, sibi provideri suppliciter
exorabit.

EPISTOLA CCCXCVI.

OTTONIS DIACONI CARDINALIS S. NICOLAI DE CARCERE
TULLIANO, EP. AD ALEXANDRUM PAPAM PRO GILBERTO
LONDONIENSI EPISCOPO.

Venerabilis frater noster Londoniensis episcopus,
etc. *Vide in Alexandro III papa, an. 1159-1181.*

EPISTOLA CCCXCVII.

EJUSDEM AD THOMAM CANTUARIENSEM.

THOMÆ Cantuariensi archiepiscopo OTTO cardina-
lis.

Significamus vobis dominum papam, curiam to-
tam, et nos bene per Dei gratiam valere. Litteræ
nuper venerunt ad curiam de Janua. Dicunt quia
Guido Cremensis Pisis receptus est. Archiepiscopus
recessit, clerus aufugit, totus populus ipsum
Guidonem contemnit. Dominus papa mandaverat
Januæ pro galeis ; et quidem Januenses ipsi fide-
les et devoti sunt domino papæ et curiæ : sed quia
putant et timent imperatorem cum Pisanis pro re-
ceptione Guidonis Cremensis magnas conventiones
et promissiones fecisse, dubitant adhuc. Unde,
quod vobis soli confitemur, hoc ex litteris perpen-
dimus, quod si civitates Longobardiæ confederate
fuerint contra imperatorem, et galeas et alia obse-
quia exhibebunt ; sin autem, subsistere videntur.
Confederationem autem, si futura est, in proximo
audiemus. Electus Moguntinus, qui nuper recessit
a domino papa et curia, nuntium Guidonis ad se
venientem de terra sua ejecit, et comminatus est
ei quod si ipse vel alius nuntius ex parte schisma-
ticorum ad se ulterius perveniret, ei oculos erui
faceret. Nomen domini papæ manifeste prædicat.
Hoc novit imperator, et multum dolet. Et quasi
certum habetur in terra, quo prædictus Moguntinus
ad pedes domini papæ accesserit. Eidem Moguntino
concordant per omnia Treverensis, et Salisbur-
gensis, et fere reliqui principes omnes, sicut dicunt,
tam sæculares quam Ecclesiastici, excepto impera-
tore, et Coloniensi, et duce Saxoniarum. Maghebur-
gensis nuper rediit de Hierosolyma, et captus a
Saracenis vocit quod si liberaretur, domino papæ
manifeste adhaereret. Et ita manifeste facit.

EPISTOLA CCCXCVIII.

EJUSDEM AD EUNDEM.

Amabili Patri et fratri charissimo THOMÆ, Dei
gratia Cantuariensi archiepiscopo, OTTO eadem gra-
tia sanctæ Romanæ Ecclesiæ diaconus cardinalis,
et apostolicæ sedis legatus, salutem.

Notificamus, charissime, dilectioni vestræ, quod
ex mandato domini papæ procedentes per insidiosa
et plurimum periculosa loca, usque ad Venetiam,
Domino ducente, pervenimus, inimicis nostris un-
dique in insidiis excubantibus : eorum laquei Do-

mino faciente contriti sunt, et nos liberati sumus. A Venetia autem, non clam, sed manifeste cum plurimo gaudio et amicorum nostrorum multo solatio, per Mantuam, et per Veronam, per patriam nostram Brixiam, ubi plurimum fuimus commorati, per Pergamum, per Mediolanum, juxta Novariam, per Vercellas, juxta Taurinum, transeuntes usque ad sanctum Michaellem de Clusa, et exinde per provinciam usque ad Sanctum Ægidium incolumes et illæsi pervenimus, inde ad montem Pessulanum transiuri. Veniente domino W. . . amico vestro, ad alias partes, sicut credimus, prout vos novistis, quem dominus papa destinavit, profecturi, mittimus ad vos clericum nostrum præsentium latorem, cui super his quæ vobis ex parte nostra dixerit, tanquam nobis ipsis firmiter credatis, et quod nobis significare volueritis, tanquam per vosmetipsam indubitanter renuntiatis.

EPISTOLA CCCXCIX.

PETRI CARDINALIS DIACONI AD THOMAM
CANTUARIENSEM.

Petrus cardinalis diaconus archiepiscopo Cantuariensi.

Vestræ discretionis prudentiam non credimus ignorare, quod ecclesia Beatæ Mariæ quæ Sassonorum dicitur, Romæ posita, ad receptionem Anglorum, limina apostolorum visitantium, a Romanis pontificibus provida consideratione spiritualiter sit deputata; in qua post varios et diversos labores solatia consolationis et stipendia charitatis, tanquam in propria domo, invenirent et recipere. Quæ, peccatis nostris exigentibus, ad tantam devenit paupertatem, ut vix pauci clerici et fere nulli laici, ad obsequium ejusdem ecclesiæ et peregrinorum consolationem, inibi inveniantur. Cujus paupertati et miserix dominus noster summus pontifex Alexander compatiens, litteras exhortatorias in Angliam eidem ecclesiæ indulsit; quarum tenorem ipsi videre poteritis. Quia igitur probitatem vestram circa ea quæ ad cultum religionis et pietatis pertinere noscuntur, pronam et benevolam recognoscimus, fraternitatem vestram, de qua plurimum confidimus, in Domino exoramus, quatenus latorem præsentium Nicolaum prædictæ ecclesiæ canonicum benigne recipiatis et juxta formam litterarum domini papæ, vestras eisdem litteras pro reverentia Dei genitricis precum nostrarum intuitu indulgere dignemini. Valete in Domino.

EPISTOLA CCCC.

EJUSDEM AD EUNDEM.

Thomæ Cantuariensi archiepiscopo, Petrus presbyter cardinalis.

Per Gunterium fidelem nuntium vestrum quod melius nobis et salubrius visum fuit, sollicitudini vestræ nuper rescripsimus. Nunc autem visis sanctitatis vestræ litteris, licet adhuc in solis verbis consolatio vestra videatur pendere, placet tamen nobis humilitatis via quam incepistis, et consilii vestri propositum collaudamus, ut videlicet in causa

vestra cum omni mansuetudine ac patientia procedatis, quatenus hoc modo feritas hominis auctore Domino mansuescat, et ad meliora ejus animus inducatur. Duris enim mentibus auferre simul omnia valde est difficile, et

quod natura negat reddere nemo potest.

De cætero noveritis propositi nostri esse causam vestram, imo Dei, quantum possumus promovere, et in acie Christi, eo auxiliante, vobiscum viriliter stare. Noveritis præterea quod litteris vestris in audientia fratrum, perlectis, de communi consilio dominus papa suum vobis remittit responsum.

EPISTOLA CCCC.

THEODWINI AD EUNDEM.

Thomæ Cantuariensi archiepiscopo, Theodwinus cardinalis.

Licet de verbo pacis vestræ, quod audivimus, plurimum dubitaverimus, attendentes eorum malitiam, qui regi assistant, et lingua loqui et circumvenire rectos corde consueverunt, confidimus tamen in Domino, quod infatuato eorum iniquo consilio et denudata ipsorum malitia, pacis abundantiam nostra expectatio, quæ patienter hactenus expectavi, sperato citius, favente Domino, obtinebit. Ea vero, pro quibus ad curiam misistis, ut effectui mandarentur pro voto efficaciter laboravimus, et ecce per Dei gratiam propriis oculis cernere, quod referimus, jam valeatis.

EPISTOLA CCCCII.

Thomæ Cantuariensi archiepiscopo, Theodwinus cardinalis titulo Sancti Vitalis.

Cognito et pro vero habito, quod ejus præeunte gratia, qui superis reconciliavit mortales, inter vos et dominum regem Angliæ pax sit plenarie reformata, indicibili gaudio et lætitia exultavimus, et intimis visceribus illi gratias referentes, qui fecit vobiscum misericordiam et dedit etiam cum exultatione proventum, eidem pariter preces continuis offerentes, ut qui reformare dignatus est, illibatam conservet et augeat, sicut expedit, in æternum. Et licet magis videatur idoneum et conveniens a vobis nos doceri, et admoneri debere, de sincera tamen dilectione præsumentes aliorum arma induimur, et paternitati vestræ, aliqua suadere tentamus. Rogamus igitur et affectuose suggerimus, quatenus misericordiam, non judicium in eos qui peccaverunt in vobis, exerceatis; non ultionem, sed veniæ fontem reis et persecutoribus aperiatis, quatenus verbo et opere imitatore Christum, vos in conspectu hominum ostendentes, quæ docetis, facere, prout expedit, vestra sanctitas agnoscatur, et non immerito ab omnibus commendetur. Ex hoc enim et adversarii vestri in suis cordibus confunduntur, et amici plurimum vultu et animo gloriabuntur. Nos enim in his et aliis successibus vestris charitatis vestræ modis omnibus congaudentes, tam ut præteritæ petitiones vestræ mandarentur effectui, quam etiam ut munus nostræ dilectionis liberalitas vestra susciperet, gratanter effecimus, et

per harum latorem viridis coloris examictum, quem inter alios ipse elegit, vobis mittimus, reliquos pannos sericos. Et quæcumque apud nos sunt vestrae prudentiae exponentes, parati semper pro vobis efficere quæ vestrae sint fraternitati accepta.

(Vide et epistolas duas ad Albertum et Theodwinum directas.)

EPISTOLA CCCCH.

WILLELMI PAPIENSIS AD ALEXANDRUM.

Domino papæ WILLELMUS Papiensis.

Expedit, beatissime Pater, etc. Vide inter epist. diversor. ad Alexandrum III.

EPISTOLA CCCCV.

EJUSDEM ET OTTONIS AD EUMDEM

Beatissimo Patri ac domino, Dei gratia summo pontifici, WILLELMUS et OTTO, eadem gratia cardinales, salutem et subjectionis obsequia, tam devota, quam debita.

Venientes ad terram illustrissimi regis Anglorum, etc. Vide *ibid.*

EPISTOLA CCCCV.

EJUSDEM WILLELMI AD THOMAM CANTUARIENSEM.

Illum circa personam vestram sinceri amoris fervorem concepimus, ut omnia negotia vestra tanquam propria suscipere incommutabiliter proposuerimus et fovere atque ad vestrum honorem diligentiori studio omnimodis promovere, malentes in propriis quam in vestris pigri vel negligentes aliquatenus inveniri. Inde est quod excellentiæ vestrae litteras læta plurimum manu recepimus, et ea quæ continebant sollicitius considerantes efficacem studium adhibere curam, ut vota vestra congruum sortirentur effectum. De cætero autem paternitatem vestram amicali exoramus consideratione, quatenus de nobis omnem confidentiam obtinentes, diligentia vestra quæcumque discretionis vestrae complacuerit securissime imponentis, quoniam in his quæ honori et profectibus vestris cognoverimus consonare, diligentissime curabimus semper intendere et cooperari.

EPISTOLA CCCCVI.

EJUSDEM AD EUMDEM.

THOMÆ Cantuariensi archiepiscopo WILLELMUS Papiensis.

Licet temporum qualitate variata, ne Romana Ecclesia schismate laborans graviora detrimenta incurreret, in varia erga vos juxta quorundam opinionem videamur declinasse proposita, novit tamen, qui inspector est cordium, dilectionem vestri nostro in pectore continuo resedisse. Sicut autem vigilantia vestra sæpe nos recolimus intimasse, suspicionem domini regis Angliæ, quatenus licuit, vitare curavimus, ut procedente tempore inter vos et ipsum amica interventione efficacius mediare possemus, et tanti principis devotionem sedi apostolicæ conservare. Nunc autem ad quæstiones, quæ inter vos et ipsum vertuntur, sicut Ecclesiæ Dei magis expedire viderimus, terminandas in terram suam una cum venerabili fratre nostro Ottone

PATROL. CX.

A cardinale diacono destinati, vigilantiam vestram exhortamur et suademus attentius, quatenus his, quæ amplioris dissidii causas generare solent, quantum in vobis est, evitatis, ad ea, quæ concordia cooperari valeant, studiosius curetis intendere. Nos enim et paci, et profectibus vestris, quatenus gratia divina indulserit, remota personarum acceptione, studebimus cooperari, nihil studii relicturi, sicut auctore Domino rerum argumenta monstrabunt, quod ad honorem Dei et Ecclesiæ suæ valeamus impendere.

EPISTOLA CCCCVII.

EJUSDEM ET OTTONIS AD EUMDEM.

THOMÆ Cantuariensi archiepiscopo WILLELMUS et OTTO cardinales.

Nuntium vestrum recepimus benigne, et litteras inspeximus sollicitè. Nuntio itaque et litteris fidem adhibentes, et transcripta litterarum domini papæ diligenter considerantes, quantum in deliberatione consilii nostri invenire potuimus, non videntur ista modo posse utiliter attentari, cum exinde correctionis vel emendationis spes minime videatur posse haberi. Bona enim et res clericorum fratrum vestrorum, qui vobiscum sunt, sicut et vos, ut credimus, bene novistis, mandato regio detinentur: cujus animus, et cor, et voluntas, ita a vobis et ab ipsis aversa sunt, ut nec a quolibet verbum reconciliationis valeat sustinere. Et ideo, sicut per nuntios nostros vobis nuper significavimus, opportunum videtur ad præsens ista differre, donec vel viam pacis quolibet modo Deus ipse aperiat, vel ampliori deliberatione, si inveniri non poterit, quid vel qualiter in prædicto negotio statuendum sit, dominus papa præcipiat. Quantum enim nobis videtur, brevi sarculo et modica fossione magnam possemus scissuram et profundam præparare foveam, a quo saltem usque ad conscientiam domini papæ tutius est abstinere.

EPISTOLA CCCCVIII.

EJUSDEM AD EUMDEM.

Venerabili et dilectissimo fratri THOMÆ, Cantuariensi archiepiscopo cardinales, salutem.

Innotuit regi quid super concordia, quid etiam super causa, si contra vos agere vellet, respondistis, et cum prius satis, sicut aiebat, ex præcedentibus actibus vestris, et supra quam satis fuisset commotus, ampliori et vehementiori fuit nunc indignatione commotus, vestri cordis altitudinem et domini papæ injuriam erga ipsum indubitanter accusans. Episcopi vero et abbates regni Anglorum audientes, quia vos nihil cum eis agere, neque nostro judicio vos supponere velletis, in nostra præsentia litteras domini papæ, quibus vobis mandasse se dicit, ne vos regnum Anglorum interdicto supponatis, nobis coram perlegerunt. Requisierunt etiam a nobis, si ab utroque nostrum, vel altero accepta legatione in Anglia possent a vestris gravaminibus defendi. Cum autem respondissemus, nos de negotiis regni Anglorum nullatenus habere

potestatem, ibidem incontinenti, tam pro se ipsis, A quam pro toto regno ad dominum papam appellaverunt, in protectione domini papæ, et nostra se ipsos, et regnum ponentes, diem quoque ad festum Sancti Martini constituentes. Unde mandamus dilectioni vestræ, et ex parte domini papæ et nostra præcipimus, quatenus deferentes appellationi prædictæ, inhibitionem etiam, quam dominus papa se vobis fecisse testatur, attendentes nullum interdictum, nullam excommunicationem in regno Anglorum intendatis, quousque apostolica præsentia adeatur, et quid domino papæ et Romanæ Ecclesiæ super his placeat, agnoscat. Ipsi quoque episcopi et abbates nuntios proprios ad vos transmittunt, qui appellationem in nostra præsentia factam, et diem vobis denuntient.

EPISTOLA CCCCIX.

EJUSDEM AD GILBERTUM LONDONIENSEM.

Domino Londoniensi WILLELMUS Papiensis cardinalis.

Illius siquidem dilectionis intuitus, quam olim inter nos grata societas amicali relatione contraxit, ad omnia quæ honori vestro consonant, diligenti studio prosequenda, nostram jugiter intentionem animat et inducit, nec nostrum, auspice Deo, poterit in hac parte mutari propositum, quin semper eam curam vestris impendamus negotiis, quam in propriis adhiberi vellemus, et fere circa nos etiam desides mallems inveniri. Hujus igitur amoris consideratione permoti, eos quos vobis fideles cognoscimus ac devotos, discretioni vestræ, cum expedit, commendare tenemur, ne forte qui fideliter operantur, propter silentium aut ignorantiam a suo defraudentur servitio. Novimus igitur quod egregius vir, et quem multiplex litteratura magnificat, magister D., occasione vestri venit ad curiam, et in vestris adeo constanter et provide studuit perorare negotiis, et pro vobis eatenus militare, quod si patris sui res ageretur in medio, nequaquam posset exstitisse fidelior. Quia vero in conspectu summi pontificis et totius Ecclesiæ Romanæ, et præcipue coram nobis jam dicti magistri scientia pariter et honestas, necnon et eruditio comprobata abundanter complacuit et gratiam meruit obtinere, vos qui acutius fraternitatem vestram amplectimur, epistolari mediante commercio suadere vobis audemus atque consulere, quatenus sæpeditum D. sic curetis, sicut tam prudentem virum decet honestius venerari, et ad ejus promotionem et commoda ita semper intendere, ut ipse vobis fiat ex devoto devotior, et nos vestram merito commendare debeamus industriam, cum tam utilem personam elegerit, quæ in multis poterit necessitatibus suffragari. Si autem, sicut frequenti casu contingit, alicujus in eum attentaverit æmulatio novercari, et immunem dente livido lacerare, nullam fidem adhibeat vestra sagacitas, quoniam ipsum vobis fidelissimum esse comperimus.

EPISTOLA CCCCX.

EJUSDEM AD EUMDEM.

WILLELMUS Papiensis cardinalis GILBERTO Londoniensi episcopo.

Amicitie ratio, qua vobis astringimur et illustrissimo regi Angliæ, serviendi diligendique propositum nullatenus immutandum plurimum persuadet, ut his quæ honori suo ac vestro consona videantur, facilem præbeamus assensum. Inde est quod ea, quæ nobis per litteras intimastis, quatenus facultas indulsit, diligenti sollicitudine studuimus promovere. Sicut enim ex quo domini regis notitiam fuimus assecuti, vigili opera elaboravimus efficere, ut eum Ecclesiæ Romanæ materno sinu specialiter amplecteretur et extolleret, ita ex quo perturbationes emergerunt, cum omni sedulitate curavimus suadere, ut tolerantia præjudicium severitati faceret et regis dignitatis inspectio, servitiique innumeram ampliore sibi locum, quam imminuta devotio et reverentia postmodum forte subtracta apud apostolicam mansuetudinem vindicarent. Nihil itaque, labore nostro vigilique cura interveniente, adhuc est ulionis seu severitatis adhibitum nihilque de cætero preventurum, quod absit! nos auctore Domino speramus effecturos, donec per misericordiam Dei aperiatur plenæ pacis via, et pristinus amor inter Ecclesiam et ipsum penitus reformetur. Vale.

EPISTOLA CCCCXI.

EJUSDEM ET OTTONIS AD NORWICENSEM ET CICESTRENSIEM EPISCOPOS.

WILLELMUS et OTTO, Dei gratia cardinales et apost. sed. legati, vener. et dilectis fratribus Norwicensi et Cicestrensi episcopis.

Discretioni vestræ præsentī significatione mandamus, quatenus personas illas, quæ a Cantuariensi archiepiscopo excommunicationis vinculis dictæ sunt innodate, in manu vestra promissione recepta quod nostro debeant stare mandato, postquam istas videritis litteras, absolvatis, et sic præstita securitate, singulis injungatis quod vobis moderatum videbitur. Hoc autem occasione proposita prosequi studeat et adimplere quicunque vestrum apices istos primus receperit; et ex quo vestrum receperint mandatum, significetis eos juramento præstito absolutos.

EPISTOLA CCCCXII.

T. CANTUARIENSIS ARCHIEPISCOPI AD GILBERTUM LONDONIENSEM.

T. Dei gratia Cantuariensis Ecclesiæ minister humilis, venerabili fratri GILBERTO quondam Dei gratia Herefordiensi, nunc vero eadem gratia Londoniensi episcopo, salutem.

Noli graviter ferre, dilecte in Domino frater, quod tibi majus onus imposuimus, quod te ad majoris Ecclesiæ curam vocavimus, confidentes id divina miseratione salubriter fuisse provisum. Hoc mores tui, hoc nota religio, hoc sapientia data desuper, hoc opus bonum, quod in Herefordiensi Ecclesia operatus es promeruerunt, ut dicatur tibi: Amice, ascende superius: super paucā fuiti fidelis, merito

supra multa constitueris (Matth., xxv). Non homini rudi et inexplerto navigationis sicut ex humilitate scribis, navim Petri commisimus, verum illi qui jamdiu exercitatus in flumine, amodo debet eandem in alto gubernare. Lucerna accensa, quæ quasi sub modio abscondebatur, jam super candelabrum posita est, ut longe lateque luceat in domo Domini. Cantuariensis Ecclesiæ, quæ in regno Anglorum est sicut caput in corpore, Londoniensis familiariter adhæret præ cæteris, ad quam te Deo auctore transtulimus, ut e vicino matris tuæ Cantuariensis Ecclesiæ, cui debes omne quod potes, nobiscum possis onera sustinere. Præterea cum dominus papa tibi specialiter curam animæ domini nostri regis commiserit, ubi te sedere magis decet quam in regia urbe, quo crebrius propter negotia publica veniens, frequenter tuis instruat colloquiis et consiliis solidetur? Venire ergo ne formides, quo virtus tua te vocat, quo dominus præcipit, de ope nostra et auxilio, quanta debetur amico et coadjutori, consolationem percipiturus. Credimus siquidem hanc esse mutationem dexteræ Excelsi, eamque a divinæ dispositionis fonte emanare, non modo ut Ecclesia Cantuariensis in negotiis suis fortius tanto nitatur auxilio, verum etiam ut imperfectum nostrum, quod in multis videmus, tua beatitudine suppleatur. Utinam, si fieri posset, priori die Dominico Londoniam venisses, ut tuum adventum digno suscipereamus honore, ubi tunc præsentibus aderamus. Nunc autem quoniam negotia nostra illinc nos avulserunt, archidiacono nostro vias nostras commisimus, adjuncto etiam illi domino Rossensi, si præsens adesse poterit. Valeat in Christo fraternitas tua, dilectissime frater.

EPISTOLA CCCCXIII.

THEOBALDI, ut videtur, AD.

Snscepimus litteras domini regis, quibus queritur Willelmum abbatem ecclesiæ suæ de Lislehula a vobis male tractatum esse, petens causam, quam inter vos et jam dictum abbatem vertitur, a nobis sine canonico terminari, et nisi velitis acquiescere, non patietur, quod jam dictæ ecclesiæ aliquid amodo habeatis. Nos autem jam dicto abbati persuasimus ut appellationi omni renuntiet, si ei vos renuntiare volueritis, et nostrum subire judicium, et jam sub hac conditione renuntiavit appellationi et factæ et faciendæ. Inde est quod vobis, si conditionem hanc admiseritis, diem præfigimus Dominicam, qua cantabitur : *Misericordia Domini* : tunc, auctore Domino, quod in abbatem statuistis, si justum apparuerit, roborabimus, evacuabimus si fuerit injustum. Nobis autem merita causarum facilius clarescent, poteruntque partes sine vexatione justitiam consequi, religionis cultus in Ecclesia reformari, si partium assertionem veritas innoverit. Et hoc modo regium, qui pernecessarius est, poteritis retinere favorem, quem amittetis omnino, si ecclesiam suam aliqua improbitate volueritis conculcare. Si vero memorata die, conditione præscripta, adesse placuerit, nobis, si placet, sine mora rescribite, aut si

A conditio displicuerit : indecens enim est, si aut nos deludimur ab amicis, aut alios deludimus.

EPISTOLA CCCCXIV.

EJUSDEM AD HENRICUM REGEM.

T. Cantuariensis regi Anglorum.

Etsi propriis et privatis urgeamur angustiis, procellis tamen publicis magis affligimur, fortius cruciamur. Nos enim in propria persona manus Domini visitavit, in flagello clementiæ suæ, de longa et gravi infirmitate aliquantulum jam erexit. Verumtamen omni infirmitate gravior est animæ nostræ procella discordiæ, quæ Domino permittente scidit Ecclesiam, regnaque collidens et principatus, a populo Domini securitatem excussit et pacem. Hæc est afflictio nostra quotidiana, hic omnium bonorum justissimus dolor, amarissimus gemitus, et quidem eo amarior, quod in absentia vestra incerti sumus quid sperare oporteat, quid timere. Inde est quod serenitati vestræ affectuosius supplicamus, ut nos de statu vestro sollicitos certiorare dignemini. Si enim res vestre prosperæ fuerint, speramus in Domino, quia nos Ecclesia Domini, quæ apud nos est, prosperabitur. Nam in unitate consistit, et Domino auctore nunquam schismaticis adhærebit. Ecclesia vero Gallicana, sicut nobis veridica relatione innotuit, recepit Alexandrum, ab Octaviano recessit. Quod autem ad humanum spectat examen, meliori, saniori parti videtur adhæsisse, cum omnibus constet quod persona Alexandri honestior est, prudentior, litteratior, eloquentior : causa ejus ab omnibus inde venientibus sincerior, justior prædicetur. Et quamvis neutrius illorum adhuc nuntium aut scriptum viderimus, scimus tamen quia omnes nostrates, si vester consensus adfuerit, promiores sunt in partem Alexandri. Audivimus autem quod imperator vos in partem Octaviani trahere conetur : sed absit ut in tanto periculo Ecclesiæ pro amore et honore hominis faciatis nisi quod crederetis Domino placitum, nec decet majestatem vestram, si placet, ut in tota Ecclesia regni vestri superponatis hominem, qui sine electione, ut publice dicitur, sine gratia Domini, per favorem unius imperatoris tantum honorem ausus est occupare. Nam tota fere Ecclesia Romana in parte Alexandri est. Incredibile autem est, quod pars illa possit obtinere, prævalere per hominem cui justitia deest, cui Dominus adversatur : eos vero in humili casu prævaluisse, crebra recolimus lectione quos Gallicana recepit et fovit Ecclesia, et infelicem exitum eorum quos tentationis impetus introduxit. Sic obtinuerunt temporibus nostris Innocentius adversus Petrum, Calixtus adversus Burdinum, Urbanus adversus Wibertum, Paschalis adversus tres, Albertum, Maginulfum, Theodoricum, et multi similiter in diebus Patrum. Nobis ergo provident dignatio vestra, vestrumque in partem illam Deus declinet assensum, quæ justitiæ veritati innititur, Christo propitio triumphabit, et, si vobis placet, in tanto periculo totius Ecclesiæ Domini, utendum est

vobis consilio regni vestri, nihilque in præjudicium A
ejus statuendum est sine consilio cleri vestri.

EPISTOLA CCCCXV.

EJUSDEM AD EUNDEN.

Salutem ab eo qui dat salutem regibus.

Qua devotione vobis servierim, verbis enarrare
superfluum duco, cum mihi multorum temporum
manifesta opera attestentur et fidei meæ tesis in
cælo sit, et conscientię conscius in excelso. Attrita
est caro mea, et tam ætate quam laboribus perfati-
gati sunt artus, et ægritudo gravis et diuturna die-
rum meorum finem in brevi adesse denuntiat. Desi-
deratam diu faciẽm vestram videre sperabam, an-
tequam moriar, et eos quos meæ custodię in regno
vestro commendaveram Deo, ipso inspectore et
teste vobis præsentialiter decreveram commendare.
Sed, quia ad ejus examen citius vocor, ante cujus
tribunal in brevi stabimus omnes, serenitatem ves-
tram, regios corde provolutus ad pedes, litteris
coram Deo iudice omnium præsentibus alloquor,
attentius supplicans, ut fidelem vestrum, cujus in
vos nunquam devotio tepuit, agentem in extremis
dignemini exaudire. Exaudite, quæso, ut vos in ex-
tremis vestris exaudiat Deus. Exaudite me pro domo
Domini et pro parvulis ejus, quos humano destitu-
tos solatio derelinquo, ut domum vestram tueatur
Altissimus, et parvulos vestros et filios vestros in
ærum consoletur. Transmitto vobis et semini ves-
tro benedictionem a Domino Jesu Christo; et vos,
si placet, destitutis meis majestatis vestrę solatium
mittite. Commendo vobis sanctam Cantuariensem
Ecclesiam, de cujus manu per ministerium meum
regni gubernaculum accepistis; ut eam, si placet, ab
incursu pravorum tueamini; et mihi qui eam, licet
indignus, disponente Domino, hactenus ut potui et
scivi, rexi, talem studeatis subrogare pastorem qui
tanta sede non videatur indignus, cui religio placeat
et qui virtutum meritis placere credatur Altissimo.
Fidelis vester sum. Vobis consilium debeo, et ecce
coram Deo et omnibus sanctis ejus consilium do.
Non queratis in hac re quę vestra sunt, sed quę
Dei. Quia ego pro eo spondeo vobis quod si causam
ejus fideliter procuraveritis, et ipse vestram utilis-
sime promovebit. Post multas vexationes, auctore
Deo, in Ecclesia Cantuariensi reformavimus pacem:
religionis promovimus cultum; idoneos ex conscien-
tia nostra custodes præfecimus ordini: ne quis eo-
rum cujusquam temeritate mutetur, antequam ar-
chiepiscopus subrogetur, prohibeat dignatio vestra
eosque cohibeat, qui scissuras et nova molimina
molientur, quoniam et nos hoc sub anathemate in-
hibuimus et eos excommunicavimus, qui dispositione
ordinis, quam fecimus, præsumunt immutare.
Præterea, alumnos nostros clericos et laicos, quos
nostri et sæpe vestri obsequii ministros habuimus,
vestrę committimus protectioni, rogantes ut quę iis
contulimus, misericorditer conservetis nec eos pa-
tiamini alicujus opportunitate vexari. Audiat adhuc
Dominus meus clementissimus verbum unum et

egredientem animam meam lætificet. Residuum bo-
norum nostrorum mobilium et quę usque ad exi-
tum pro incerto vitę et diuturnitate ægritudinis in
usus domesticos visa fuerant conservanda, sicut
Deus inspiravit, post exitum meum præcepi pauperi-
bus erogari; illos, qui fraudem committent, aut qui
quominus pro salute mea et vestra et liberorum ve-
strorum erogentur, impellent, anathemate jam pro-
mulgato, condemnans. Ratam habete, si placet, dis-
positionem meam, et eam transmissis ad officiales
vestros patentibus litteris confirmate. Neque enim
quidquam auri superest aut argenti, sed victualium
tantum, et quę magno damno poterunt esse amissa
pauperibus, et vobis nullo erunt emolumento. Valeat
in æternum serenitas vestra.

EPISTOLA CCCCXVI.

EJUSDEM AD

Gravati sumus plus quam tibi et aliis dicere pos-
sumus, et nondum bene evasimus. Spes tamen nobis
est evadendi salubriter, quia nobis, auctore Domino,
propositum est satisfacere flagellanti. Flagellum
æternum declinare castigatione præsentis: neque
certiores sumus de venia, quo gravius affligimur
præsentis corporis pena. Flagellat enim Dominus
omnem filium quem recipit. Parati ergo sumus pa-
tienter et læto animo amara suscipere de manu Do-
mini, qui dulcia toties in usum accepimus. Itaque
sive vivimus, sive morimur, Domini sumus. Nihil
enim aliud desideramus in vita, licet aliquid propo-
siti differamus, donec domini regis, tuo utamur con-
silio. Interim domui nostrę, animę nostrę dispo-
nemus, pro consilio religionum, amosum præstante
Domino, efficacius disponemus. Est autem quod tam
de consilio religionis, quam de proprio concepimus
spiritu, ut omnes malas consuetudines quę nostris
temporibus per nos ortę sunt in archiepiscopatu,
emendemus ante exitum nostrum. Unde cum in ex-
tremis agere videremur, Domino votivius inter cæ-
tera, quod consuetudinem de secundis auxiliis, quam
frater noster archidiaconus ecclesiis imposuit, de-
strueremus, ab ea relaxantes, liberantes ecclesias:
sub anathemate prohibuimus, ne ulterius ab aliquo
exigantur. Et, ne hoc nostrum beneficium, aut potius
debitum in posterum valeat infirmari, hoc ipsum
scripto nostro confirmavimus. Tu quoque, si præ-
sens nostras vidisses angustias, gratum haberes
quidquid fieri videres pro nostra salute, nostram
malles animam liberari, quam de peccatis, damna-
tione nostra, pecuniam, divitias infinitas acquirere.
Inde est quod te ad præsens in vexatione hujus auxi-
lii audire non possumus, sine læsione voti, salutis
nostrę periculo. Sed, si Deus nobis vitam dederit,
sanitatem quam nondum bene adepti sumus, spera-
mus quod adhuc ita tibi per manum nostram Do-
minus providebit, quod talibus non egebis auxiliis.
gratias ages Domino, quod a mala consuetudine
suam temporibus vestris liberaverit Ecclesiam. Ro-
gamus itaque, quod fecimus gratum habeas, quę

nobis parum prodesset totus mundus, si animam A
perderemus.

EPISTOLA CCCCXVII.

EJUSDEM AD

Cansam, quæ inter dilectos filios nostros canonicos Meritonenses et monachos de Messa vertebatur super possessione loci qui dicitur Acchab. et B. et damnis quæ sibi canonici querebantur illata, ex mandato domini papæ decedentes, monachos canonicis condemnavimus, in restitutionem præfati loci, ad damna sibi resarcienda. Quarum summam cum illi ad octoginta marcas, servata veritate, adhibita moderatione extenderent, nos partibus nostris interpositis eam ad xl. marcarum reduximus quantitatem. Vestræ itaque fraternitati mandamus, domini papæ auctoritate præcipimus, ut præfatos monachos B memoratis fratribus, jam dictum locum, pecuniam præfata, omni occasione postposita restituere compellatis, ne in executione mandati apostolici negligentia vos quisquam arguere possit obnoxios. Hoc autem monachis non debet suffragari, quod præscriptum fundum advocato illius, sicut nobis confessi sunt, tradiderunt, cum ille qui dolo desiit possidere pro possessore damnetur: unde locum incontinenti restituant, pecuniam infra instantem festivitatem Omnium Sanctorum persolvant. Quod si dominus fundi vobis quacunque occasione se opposuerit, eum severitate ecclesiastica, adhibita diligentia, coercere non differatis.

EPISTOLA CCCCXVIII.

EJUSDEM, ut videtur, AD

Nos super re non ambigua consulistis, et quam præsertim a sapientibus expediti potius oportuerat, quam differri. Siquidem rerum turpium nulla deliberatio est, turpitudinis dilata repulsa quamdam consensus inhonesti prætendit imaginem. Quid autem turpius est quam, totius divine legis auctoritate contempta, in Sancta sanctorum impudenter irrure, et impellente avaritia, contra jus et fas, jus hæreditarium in rebus ecclesiasticis, imo in ipso altari vindicare. Quis, nisi profanus, patienter audiat, nedum petat, quod tam manifeste sacri canonici exhibent, quod utriusque Testamenti tam expresse condemnat auctoritas? Revolvite canones, quoniam in hac parte latissime patent, plane videbitis petitionum talia improbatam esse petitionem, et eorum qui tales audiunt, durissime plectendum esse assensum. Non relictus nobis dissimulandi locus, quia in concilio Lateranensi, cui nos et vos, frater episcopo, interfuimus, domino Innocentio præsidente audivimus, vota talia promulgato canone condemnari. Sed forte regia vos urget auctoritas, recte quidem nisi sciretis Dominum homini præferendum, nisi religio principis possit circumveniri, nisi per subreptionem ab eo nonnulla esse extorta jam fuisset experti. Summa ergo consilii nostri hæc est, ut legi Domini et sacris canonibus juxta professionem vestram obtemperetis: quoties vos tales angustiae presserint, incidere in manus hominum quam Do-

mini viventis, tutius judicetis. Sed est forsitan unde merueritis super successione hujusmodi vexari, eo quod in fraudem canonum ad cessiones et substitutiones illicitas nimium proni estis.

EPISTOLA CCCCXIX.

THEOBALDI CANTUARIENSIS ARCHIEPISCOPI TESTAMENTUM.

Supremis deficientium voluntatibus suum accommodant jura favorem, et ipse velut inhumanus provocat iram Domini, qui piis eorum desideriis obviis contradicit. Nostra quidem voluntas est et quæ Domino auctore nunquam mutabitur, ut residuum bonorum nostrorum mobilium, quæ propter necessitates domesticas, et diuturnitatem langnoris usque ad exitum vitæ duximus conservando, in usus pauperum omnino cedant, secundum quod nobis Dominus B inspiravit, sicut dedimus in mandatis venerabili fratri nostro Waltero Roffensi episcopo, fidelibus nostris, Philippo cancellario nostro, magistro R [adulfo] Lexoviensi, et Joanni de Saresberia quos elemosynæ nostræ dispensandæ præfecimus: et omnibus ministris et fidelibus nostris per fidem quam nobis debent, injunximus, ut istis obtemperent, et eis omnia nostra exponant, amicos cleri omnes suppliciter exoramus, ut pro misericordia Domini omnipotentis, eis auxilium et consilium præbeant. Omnes autem qui in præfatis pauperum rebus committent, aut qui, quo minus dispositio nostra procedat, impediant, anathematis sententia condemnavimus, ipsique C officiales regis, si se dispositioni perturbandæ immiscuerint, se fidelium communione noverint esse privatos, tanquam sacrilegi, excommunicati, ab introitu omnium ecclesiarum abstineant. Omnibus autem dispositionis nostræ adiutoribus, benedictionem Domini et nostram damus, ipsos beneficiorum Cantuariensis Ecclesiæ participes constituimus, eisque de injuncta sibi penitentia quadraginta dierum indulgentiam facimus. Præterea ex parte omnipotentis Domini sub anathemate interdiciamus, ne quis officialium domini regis ad res, quæ propriis monachorum Cantuariensis Ecclesiæ usibus dicatæ sunt, temerariam manum prætendat extendere, sed habeant omnes res suas in ea integritate, libertate, qua easdem ipsis domini papæ et nostro privilegio fecimus confirmari. Ad hæc sub eodem anathemate, D terrarum, quæ ad archiepiscopum pertinent, omnem alienationem fieri prohibemus, et excidia, et damna nemorum, donec nobis successor subrogetur, nisi quantum necessarius Ecclesiæ exigit usus, vel dominus rex proprio ore præceperit, vel misericordia discreta cum moderatione, pauperum hominum necessitati indulserit. Sub eadem quoque interminatione clericis episcopatus nostri prohibemus indebitis actionibus et injustis vexationibus opprimi: eis omnes libertates et consuetudines justas, quas habuerunt tempore Willelmi, bonæ memoriæ decessoris nostri, præcipimus observari.

EPISTOLA CCCCXX.

PRIORIS ET CONVENTUS CANTUAR. AD ALEX. PAPAN.

Domino papæ, prior Cantuariensis et conventus.

Eos vobis securus commendamus, etc. *Vide in A*
ter epistolas eariorum ad Alexandrum III papam.

EPISTOLA CCCCXXI.

ODONIS PRIORIS ET CONV. CANT. AD ALEX. PAPAM.

Dominio papæ Odo prior et conventus Cant.

Calamitates quas Ecclesia nostra pleno decennio
 jam sustinuit, etc. *Vide ibid.*

EPISTOLA CCCCXXII.

EJUSDEM, ut videtur, AD RICARDUM PICTAVIENSEM
 ARCHIDIACONUM.

Venerabili domino et amico suo RICARDO, Picta-
 viensi archidiacono, frater Odo, æternam in Christo
 salutem.

Licet abjectio paupertatis meæ tanti viri familia-
 ritate judicari possit indigna, prudens tamen excel-
 lentia tua spirituales divitias temporalibus antepo-
 nens, quam humiliter mihi in familiaritate per cha-
 ritatem et orationum gratiam conjungi postulare
 dignata sit, credo quod nondum oblivioni tradiderit.
 Unde, quoniam juxta dignationem voluntatis tuæ,
 per charitatis tibi vinculum teneor, et me tibi in
 his quæ Dei sunt, obnoxium esse confiteor, non
 modicam tibi scribendi habere fiduciam debeo. Nec
 si, pro avertendo ecclesiæ meæ periculo, tibi per li-
 teras supplico, nimis præsumptuosum existimo. Vi-
 dens igitur in appellatione episcoporum, cui per ju-
 stitias regis consentire compellimur, æternum Eccle-
 siæ nostræ imminere periculum, et sempiternum op-
 probrium, in magno pro hoc cum universo conventu
 nostro mœrore constitutus, ad pedes pietatis tuæ me
 corpore et mente prosterno. Et illud tibi evangeli-
 cum cum clamore valido et lacrymis offero : *Domine*
ne, si quid potes, adjuva nos (Marc. ix). Utinam hoc
 quod ibi responsum est, et tu mihi respondeas : *Si*
potes credere, omnia possibilia sunt credenti (ibid).
 Huic responso statim subinfero : *Credo, Domine (ibid).*
 Nec illud adjicio : *Adjuva incredulitatem meam (ibid).*
 Perfecte etenim credo, et certissime scio, quia si
 volueris, ab imminenti periculo cum omni facilitate
 liberare nos poteris. Videtur enim mihi, rem dili-
 genter consideranti, quod sententia ista ex ore do-
 mini regis minime processit, quæ nos adversus archie-
 piscopum nostrum, contra æquum et bonum,
 appellationem facere compellit. Si enim ore ipsius
 dictata fuisset, hoc nimirum ordine procederet, ut
 primum episcopi omnes, deinde abbates omnes,
 postea priores, quicunque alicujus auctoritatis sunt,
 omnes archidiaconi quoque et decani omnes ad hoc
 faciendum vocarentur, quorum interest jura eccle-
 siastica defendere, et pro eis appellationes facere.
 Ad postremum vero, si necesse esset, monachi claus-
 trales, præsertim hi qui abbate et priore carent, ad
 appellationis supplementum humiliter rogarentur,
 non violenter compellerentur : maxime cum ad eos
 hujusmodi negotia minime pertinere noseantur.
 Nunc vero, transitis abbatibus multis, prioribus
 etiam tam monachorum quam canonicorum, magnæ
 auctoritatis viris præteritis universis, archidiaconis
 quoque et decanis cum suis synodis et capitulis ple-

risque dimissis, quid est quod monachi simpliciter
 claustrales, abbate et priore carentes, ad hanc
 quietis nostræ perturbationem specialiter præ cæte-
 ris evocamur, et ad rem nobis tam illicitam, tam
 periculosam, et in omnibus post futuris sæculis cum
 maximo nobis opprobrio semper obijciendam, tam
 violenter compellimur? Quid dico, violenter? Imo
 cum tanto et cum tam inevitabili periculo hoc fa-
 cere compellimur, ut si periculum, quod ab ira
 regia nobis imminet, si ei inobedientes fuerimus,
 per consensum appellationis declinare tentemus,
 majus hinc periculum statim incurramus, quod im-
 minet nobis a Deo in damnationem, a domino papa
 et ab archiepiscopo præsertim in excommunica-
 tionem, vel certe in ordinis nostri destructionem,
 ab omnibus archiepiscopis futuris in æternam odii
 et depressionis occasionem, ab universo mundo,
 ubique hoc auditum fuerit, in sempiterni oppro-
 brii confusionem.

O angustia! o violentia undique periculosa! Absit
 hoc, absit a domini nostri regis pietate atque pruden-
 tia, ut tam periculose contra nos dictaverit,
 qui nos ab omni humano solatio destitutos in sua
 cura suscepit. Qui nobis loco archiepiscopi et loco
 prioris se futurum fideliter proposuit. Et hactenus
 misericorditer fuit. Quem solum post Deum et san-
 ctos ejus in terra patronum habemus, et a quo
 solo solatium, consilium et auxilium speramus.
 Certus sum quod sententia ista a domino nostro rege
 contra nos filios suos, sibi semper et ubique fidelis-
 simos, minime processit, sed justitias ejus excom-
 municatorum calliditas circumvenit, ut nos, qui in
 capite regni sumus, secum appellationem facere
 cogant, per quam et causam archiepiscopi maxime
 deprimerendam, et suam e contrario plurimum robo-
 randam fore existimant. Sed utrum ex appellatione
 nostra aliquis profectus illis subvenire possit, ambi-
 guum est. Nobis autem tam a Deo quam ab homi-
 nibus inde maximum imminere periculum, certissi-
 mum est. Sed neque apud dominum nostrum re-
 gem tutum nobis esse potest, ut vel absque speciali
 ejus mandato, vel proprii oris imperio hoc faciamus,
 præsertim cum in ipsius consilio ex toto positi
 simus. Scio neque ipsum neque suos in aliquo vel
 modicum dubitare de nobis, quo necesse sit hujus-
 modi rem periculosam a nobis exigere. Sciat enim
 dilectio tua, sciat tecum sociorum tuorum, id est
 justitiarum regis prudentia, sciat vobiscum universa
 terra, quod dominum nostrum regem præ omnibus
 hominibus, qui sunt in terra, in veritate diligimus,
 et honorem ipsius in omnibus, et per omnia pro
 modulo nostro servamus, et servare volumus.

Hujus veritatis testes sunt orationes nostræ, quas
 Deo pro salute ipsius et hæredum ejus, et pro in-
 columitate totius regni ejus, specialius quam pro
 ullo hominum, die ac nocte affectuosa charitate
 offerimus. Quod ut quiete, sicut hactenus fecimus,
 semper facere possimus, si vere et Ecclesiæ nostræ
 et regis amicus es, imo vero, quia es, nos ad im-

minens evadendum periculum, in quantum potes, A
 providere, et socios tuos, regis iustitias et amicos
 a similitur providendum omnibus modis allicere
 debes. Ut igitur Christum, cui in Ecclesia ipsius
 devotè servimus, in maxima necessitate tua non
 aversum a te, sicut in visione vidisti, sed ad te
 conversum, sicut iterum vidisti, tibi què propitium
 invenias, et ut beatum Dunstanum omnesque san-
 ctos, quorum reliquie in nostra continentur eccle-
 sia, non contra te coram Deo accusatores, sed pro
 te apud Deum semper intercessores efficias, ecce
 e. o. o domine venerabilis et amice clarissime, in
 persona totius conventus ad pedes pietatis tuæ sup-
 plex et humilis jaceo, gemitibus et lacrymis insi-
 tam tibi bonitatem postulans, ut nobis, de tuo con-
 silio et auxilio plurimum confidentibus, in hac
 periculosa necessitate subvenias, et ita nos ab hac
 angustia secundum datam tibi a Deo potestatem
 atque sapientiam absolute liberes, ut nec domini
 regis indignationem, appellationem subterfegientes,
 incurramus, nec appellationem facientes universo
 nundo sempiternum opprobrium efficiamur. Credo
 in Christo, et de tua bonitate confido, quod in hac
 necessitate nostra illud proverbium in te verum
 experiemur: « In necessitate probatur amicus. » Puta
 ipsum Christum pro hac necessitate ecclesiæ suæ
 tibi supplicare, et omnes sanctos, quorum in ea
 reliquie continentur, tuum pro loco sepulture suæ
 patrocinium postulare. Vale, domine mi et amice
 ch. rissime, pro certo sciens quod si nos ab immi-
 nenti periculo liberaveris, totam ecclesiam nostram
 in perpetua charitatis servitute tibi semper obnoxiam
 habebis. Adjuvet Dominus Jesus Christus in libe-
 ratione Ecclesiæ suæ. Amen.

EPISTOLA CCCCXXIII.

WILLELMI PRIORIS ET CONVENTUS ECL. CHRISTI
 CANTUAR. AD UNIV. CHRISTI FIDELES.

Universis Christi fidelibus præsentis litteras in-
 specturis W. prior humilisque conventus Ecclesiæ
 Christi Cantuariæ, æternam in Dominum salutem.

Decens credendum est et honestum quod auribus
 denuntientur singulorum, quæ ad gloriosi martyris
 Thomæ devotionem cedunt et honorem, et quæ fide-
 lium respiciunt salutem animarum. Ea propter uni-
 versis ac singulis innotescat dominum papam Hono-
 rium ob reverentiam jam dicti martyris, accessuris
 intra quintum decimum diem ad solemnitatem
 translationis ejusdem remissiones indulsisse et con-
 f. m. s. e. sub hac forma: *Honorius papa, etc., dul-*
cissimis filiis priori et conventui Ecclesiæ Christi
Cantuariensis, salutem, etc. (Vide epistolam Honorii
 ante in loco suo insertam).

EPISTOLA CCCCXXIV.

ROGERI EBORAC. ARCHIEP. AD ALEXANDRUM PAPAM.

Si mihi præsto esset facundia, etc. Vide inter
 epistolas variorum ad Alexandrum III papam, post
 ipsius Regesta.

EPISTOLA CCCCXXV.

EJUSDEM AD HUGONEM DUNELMENSEM EPISCOPUM
 ET ALIOS.

ROGERIUS, Dei gratia Eboracensis archiepiscopus
 et apostolicæ sedis legatus, venerabili fratri Hugoni
 Dei gratia Dunelmensi episcopo, et dilectis filiis
 R. decano et WILLELMO Cantuariensi et universo
 capitulo Eboracensi omnibusque canonicis Sanctæ
 Mariæ de Sudewelle, Sanctique Wilfridi de Ripun,
 Sanctique Joannis de Beverleia abbatibus, priori-
 bus, clero et universo populo per Eboracensem
 provinciam constituto, salutem et gratiam.

Non ignorat dilectio vestra, quanta pro dignitate
 Ecclesiæ nostræ hac tempestate sustinuerim, in
 qua tantum invidiæ mandari adversum me licuit,
 B ut vix aliquis locus veritati relinqueretur. Familiare
 est omnibus iniquis, quoties nancisci possunt oca-
 sionem, maledictis eos quibus invident inurere et
 venenatis verborum jaculis figere innocentem. Feca-
 runt hoc qui jampridem sederunt mihi in insidiis.
 Et quidem primo paraverunt laqueum suspensionis,
 quo dominus papa plus eorum falsas suggestiones
 quam juris ordinem secutus me innodavit. Deinde,
 ne quoquomodo solvi posset, iniquitatem iniquitati
 addentes, hinc maximorum virorum libellos arte
 multiplici, sicut jam pluribus retro annis instructi
 fuerant, conquirebant, inde peregrinorum et qui
 me nunquam viderant multitudinem subornabant,
 ut ea quæ non noverant mentientes, apud summum
 pontificem et curiam Romanam, quocunque modo
 famam onerarent. Absens eram, et qui ex parte
 mea in curia pauci tantæ multitudinî vix resistere
 poterant, tam exquisitis pressi mendaciis, maxime
 cum quidam solo habitu religiosi videntes illos
 prosperari in iniquitatibus suis cum illis currebant,
 et neglecto Dei timore ad eversionem dignitatis
 Ecclesiæ nostræ una cum meretricibus suis quas
 secum duxerant, ne quis sexus persecutioni me-
 decisset, multa dixerunt. Hi omnes in unum con-
 venientes, proposuerunt in cordibus suis gigantes ini-
 tari, parietem ex maximis quasi quibusdam lapidi-
 bus et multis mendaciis fictis ad tempus inspiriis
 et gemitibus, non solum domos, sed et plateas re-
 plentes diurno et nocturno ululatu, eundemque
 D ipsum parietem tanquam quodam indissolubili bitu-
 mine, vim naturæ facientes, simulatis lacrymis
 linierunt, sperantes hoc modo cælum se claudere
 posse, et veritatem perpetuo carceri deputare. Quid
 plura? Idem Pharaon illorum ille spiritualis, cujus
 ipsi membra sunt, in tali equitatu incedere videba-
 tur cum corona, et ego misere cophini servituti
 deputatus, respiciebam ad auxilium hominû et
 non erat. Cuti enim meæ consumptis carnibus os
 meum adhæserat. Levavi ergo ad cælum oculos et
 in angustia spiritus mei ad Dominum clamavi, et
 intercedentibus meritis et orationibus vestris, exau-
 divit me pro sua reverentia. Qui malleo bonitatis
 suæ innatæ prædicto pariete confracto et in nihili-
 um reducto, fugientibus Babiloniis, quæ clausa

tenebatur veritatem eduxit, et squalore carcerali deterso, liberam in publicum exire præcepit. Quæ simul ac suæ redditæ est libertati, ad me velociter evolavit, et in præsentia dominorum Rotrodi Rothomagensis et eorum quos episcopus Ambianensis vice sua delegaverat, quibus negotium meum a domino papa commissum erat, necnon et episcopi Ebroicensis multorumque religiosorum tam abbatum quam priorum a dextris mihi luce liquidior astat. Cujus faciem gravem et fulgentem prædicti archiepiscopus et viri religiosi a domino Ambianensi destinati intuentes, gavisī sunt gaudio magno valde et nullam moram sustinentes, juxta formam quam iis dominus papa præscripserat, incontinenti me a suspensione qua tenebar absolverunt, universis qui aderant benedicientibus Dominum, qui superbos humiliat, qui sapientes in astutia sua comprehendit, qui de misericordia sua præsumentes liberat et vinctos educit in fortitudine. Ipsi gloria et nunc et per immortalia sæcula sæculorum. Amen.

Veniam autem ad vos, Domino volente, in proximo, ut gaudium meum in vobis impleatur. Quos ego ultra quam diu possit videre desidero. Benedictio Dei Patris et Filii et Spiritus sancti super vos descendat pro nobis orantes.

Facta sunt hæc secunda feria post Dominicam, qua cantatur : *Gaudete ; die festo Sanctæ Lucie apud Albemariam.*

EPISTOLA CCCCXXVI.

ARCHIEPISCOPI REMENSIS AD ALEX. PAPAM.

ALEXANDRO papæ Remensis archiepiscopus.

Venerabilis frater et amicus noster, etc. *Vide in Alexandro III, an. 1159-81.*

EPISTOLA CCCCXXVII.

CANONICORUM REMENSIVM AD ALEX. PAPAM.

ALEXANDRO papæ canonici Remenses.

Invalescent, Pater, scandala temporibus nostris, etc. *Vide ibid.*

EPISTOLA CCCCXXVIII.

ROTHODI ROTHOMAGENSIS AD ALEX. PAPAM.

Evocati a domino nostro rege cum venissemus ad curiam, etc. *Vide ibid.*

EPISTOLA CCCCXXIX.

EJUSDEM AD EUMDEM.

ALEXANDRO papæ, ROTRODUS Rothomagensis archiepiscopus, obedientiam et reverentiæ plenitudinem.

Perseverans in corde nostro desiderium videndi optatam serenitatis vestræ præsentiam, etc. *Vide ibid.*

EPISTOLA CCCCXXX.

EJUSDEM AD HENRICUM PISANUM CARDINALEM.

ROTRODUS Rothomagensis archiepiscopus, HENRICO presbytero cardinali.

Pro domino rege Anglorum omnem exhibemus securitatem, quod imperatori nec per se, nec per nuntios juramentum præstitit, aut promissionem quod schismatico adherere velit, Ecclesiam relicturus : imo certi sumus quod in illis qualibuscunque de matrimonio nationibus, licet Teutonicis

A super hoc laborarent per triduum, nihil unquam concedere voluit, nisi præeunte in omnibus fidelitate domini papæ, et Ecclesiæ, et regis Franciæ. Ipsi vero litteris vestris mandavimus domina imperatrix et nos, ut ab hac nota quam citius se excuset. Nos quidem cum Rothomagi essemus et illie essent nuntii imperatoris, de illis audivimus, sed eos non vidimus. Domina imperatrix, cum eam videre summpere requirerent, respondit quod propter episcopos non auderet. Nec eam viderunt. De ea nulla apud vos habetur dubitatio, quod aliquo modo vacillaverit. Imo fortitudine accincta de hujusmodi verbis satis admiratur. Nuntium, quem ad nos direxistis, ad eam direximus : ipse vobis referet quæ audivit. Postquam autem nuntii domini regis ab imperatore reversi fuerint, omnem rerum veritatem sollicitè inquisitam vobis significare non differemus. Ex verborum tenore perpendere potestis dictorum falsitatem, quia quinquaginta episcopos, quos exhiberet, rex non habet. Nos vero detrimentum Ecclesiæ nec sustinere, quantum in nobis est, possemus, nec videre. Super his domino papæ, quod vobis videbitur, significabit.

EPISTOLA CCCCXXXI.

EJUSDEM AD THOMAM CANTUARIENSEM.

THOMÆ Cantuariensi archiepiscopo, ROTRODUS Rothomagensis archiepiscopus.

Cum in mente haberemus devote pro parte vestra laborare, accessit desiderio nostro mandatum, et exhortatio domini papæ, qui dominæ nostræ imperatrici et nobis mandavit, ut ad pacificandum vos domino regi operam diligentem adhiberemus. Unde ipsa et nos, prout melius novimus et potuimus, scripsimus ei, prædicando, consulendo, admonendo ex parte domini papæ et nostræ. Ipse autem litteris, quibus rescripsit asserens vos non expulsi, nec exire cogeris, de vobis conquestus est hoc modo : Liquido cognoscitur quod inique contra me et regnum meum egerit ; quam pomposus, quam rebellis et seditiosus adversum me semper exstiterit ; et quam nequissime nomen meum et bonam opinionem infamare, et dignitates regni mei, in quantum potuit, diminuerè attentaverit. Videte si super his idoneam excusationem habetis, et recogitate in qua humilitate et dilectione ei præsentare possitis.

EPISTOLA CCCCXXXII.

EJUSDEM AD EUMDEM.

THOMÆ Cantuariensi archiepiscopo, Rothomagensis archiepiscopus.

Scimus prudentiæ vestræ notum esse quod melior est obedientia quam victimæ, et quod idololatriæ scelus est nolle acquiescere, ei præsertim cui debetur omnis obedientia in Ecclesia præsentī. Et qui cogendi habet potestatem dominus papa, nobis et venerabili fratri nostro Nivernensi episcopo certam præscripsit formam, juxta quam absolveremus venerabilem fratrem nostrum Londoniensem episcopum. Et mandato additum est quod si uterque

nostrum adesse non posset, alter nihilominus ab eo requisitus eum absolveret. Nos itaque requisiti, ab eo die Paschæ, juxta formam mandati eum absolvimus, auctoritate domini papæ vobis injungentes, quatenus hoc ita penes vos secretum observetur, sicut ex rescripto litterarum domini papæ, quod vobis mittimus, discretioni vestræ manifestius apparebit. Valete.

EPISTOLA CCCCXXXIII.

EJUSDEM AD CLERUM ET POPULUM ANGLIÆ.

ROTHODUS, Rothomagensis Dei gratia archiepiscopus, dilectis sibi in Domino universis per Angliam constitutis episcopis, abbatibus et clericis cæterisque Christi fidelibus, salutem, gratiam et benedictionem.

Si, ut mōnet Apostolus, legem charitatis admittimus, alterius invicem et congratulari commodis et compati debemus adversis. Unde, sicut venerabili fratri nostro Gilberto Londoniensi episcopo ob sententiam a domino Cantuariensi in eum quocunque modo latam intime condoluimus; sic ad indulgentiam sibi nunc a domino papa benignitatem et gratiam tota cordium alacritate congaudemus. Noverit enim fraternitas vestra nos a summo pontifice id in mandatis accepisse, ut eum a jam dicta sententia apostolica auctoritate absolveremus, sic quidem ut ob eandem sententiam nullam penitus infamiae notam sustineat nec honoris, dignitatis aut ordinis detrimentum ullum omnino incurrat. Quod, ut nobis injunctum est, habentes mandato operis effectu complere curavimus: et jam dictum fratrem nostrum a lata in eum sententia, summi pontificis auctoritate a nobis solemniter absolutum, dilectæ nobis in Domino universitati vestræ præsentium testificatione commendamus. Valere vos optamus in Domino, charissimi.

EPISTOLA CCCCXXXIV.

EJUSDEM AD CLERUM ET POPULUM LONDONIENSEM.

ROTHODUS, Dei gratia Rothomagensis archiepiscopus, dilectis in Christo fratribus, clero et populo Londoniensi episcopatus, salutem, gratiam et benedictionem.

Universitati vestræ notum facimus quod venerabilem fratrem nostrum Gilbertum, episcopum vestrum, a sententia quam in eum protulerat excommunicationis Cantuariensis archiepiscopus, mandato domini papæ absolvimus, de mandato ejus hoc habentes, ut pro eo quod excommunicatus fueri, nec honoris nec officii detrimentum nec infamiae notam sustineat. Unde auctoritate domini papæ vobis præcipimus quatenus ei, tanquam a domino papa absoluto, communicare non dubitetis, solitam et debitam obedientiam et reverentiam ei exhibentes. Valete.

EPISTOLA CCCCXXXV.

EJUSDEM AD HENRICUM REGEM.

Reverendo domino suo H. ill. Anglorum regi, ROTHODUS Rothomagensis archiepiscopus.

Formam verborum quam reliquistis nobis, a le-

gatis nequivimus impetrare propter determinationes quæ tam a vobis quam ab ipsis hinc inde multiplices et ambiguae ponebantur. Eos autem abrupte, et sine spe pacis recedere, nec honori vestro nec utilitati congruere videbatur. Cum igitur inter nos plurima tractarentur, verbum incidit, in quo dignitati vestræ et honori vestro non derogatur in aliquo, nec Cantuariensi aliqua in futurum litigii materia comparatur. Est autem verbum hujusmodi, ut concedatis pro amore Dei et domini papæ archiepiscopum redire in Angliam, et archiepiscopatum suum ita integre habere faciatis, sicut habuit antequam exiret, et illis qui cum eo vel propter eum egressi sunt, similiter sua. Placuit autem nobis brevitatis et simplicitatis hujus verbi, quia nullis artibus aut suspicionibus videbatur involutum. Unde vobis consulimus et laudamus, ut vestrum ad hoc accommodare non dubitetis assensum.

EPISTOLA CCCCXXXVI.

ECCLESIE ANGLICANÆ AD THOMAM CANTUARIENSEM.

Venerabili Patri et domino THOMÆ, Dei gratia Cantuariensi archiepiscopo, suffraganei ejusdem Ecclesiæ episcopi, et personæ per eorundem dioceses locis variis constituta, debitam subjectionem et obedientiam.

Quæ vestro, Pater, in longinqua discessu, inopinata rei ipsius novitate turbata sunt, vestra sperabamus humilitate et prudentia in pacis pristina serenitatem, cooperante Dei gratia, revocari. Erat quidem nobis solatio, quod post discessum vestrum ad omnes illico fama divulgante pervenit, vos solum et in transmarinis agentem nil altum sapere, vos in dominum nostrum regem aut regnum ejus nulla machinatione insurgere, sed sponte susceptum paupertatis onus cum modestia sustinere, lectioni et orationi insistere, præteritorumque jacturam temporum jejuniis, vigiliis, lacrymisque redimere, et spiritualibus occupatum studiis ad perfectionis apicem beatis virtutum incrementis ascendere. Ad pacis bona reformanda vos studiis hujusmodi gaudebamus insistere, ex quibus spes erat vos in cor domini nostri regis hanc posse gratiam desuper evocare, ut vobis iram regia pietate remitteret, et illatas in discessu et ex discessu vestro injurias ad cor de cætero non revocaret. Erat amicis vestris et benevolis ad ipsum aliquis, dum hæc de vobis audirentur, accessus, et ob conciliandam vobis gratiam supplicantes benigne quandoque sustinuit. Jam vero quorundam relatione didicimus, quod ad memoriam anxie revocamus, vos scilicet in eum comminatorium emisisse, quo salutationem omittitis, quo non ad obtentum gratiæ consilium precesse porrigitis, quo non amicum quid sentitis aut scribitis, sed intentatis minis interdictum aut præcisionis elogium in eum jam dicendum fore multa severitate proponitis. Quod si quam dure dictum est, tam fuerit severe completum, quæ turbata sunt non jam speramus ad pacem redigi, sed in perenne quoddam odium et

inexorabile pertimescimus inflammari. Rerum vero A
finem prudentia sancta considerat, dans operam sol-
licite ut quod prudenter inchoat bono quoque fine
concludat. Advertat itaque, si placet, discretio vestra
quo tendat, an conatibus huiusmodi queat finem
obtinere quem optat. Nos quidem, his ausis, a spe
magna cecidimus, et qui pacis obtinendæ spem
quandoque concepimus, ab ipsis jam spei liminibus
gravi quadam desperatione repellimur. Et dum vel-
ut extracto gladio pugna conseritur, pro vobis sup-
plicandi locus utique non invenitur. Unde Patri
scribimus ex charitate consilium, ne labores labori-
bus, injurias superaddat injuriis, sed omissis minis
patientiæ et humilitati inserviat, causam suam divi-
næ clementiæ Dominiq[ue] sui gratiæ misericordi
committat, et sic agendo carbonis ignis in multo-
rum capita coacervet et congerat. Accenderetur
hoc modo charitas, et quod minæ non poterant, in-
spirante Domino, bonorumque suadente consilio, sola
fortasse pietas obtineret. Bonum erat de paupertate
voluntaria gloriose laudare, quam de beneficii ingra-
titudine ab omnibus in commune notari.

Insedit alte cunctorum mentibus, quam benignus
vobis dominus noster rex exstiterit, in quam vos
gloriam ab exili provexerit, et in familiarem gratiam
tam lata vos mente suscepit, ut dominationis suæ
loca, quæ a boreali Oceano ad Pyrenæum usque por-
tercia sunt, adeo potestati vestræ cuncta subjecerit,
ut in his solum hos beatos reputaret opinio, qui in
vestris poterant oculis complacere. Et ne vestram
gloriam mobilitas posset mundana concutere, vos in
his quæ Dei sunt voluit immobiliter radicare. Et
disuadente matre sua, regno reclamante, Ecclesia
Dei, quoad licuit suspirante et ingemiscente, vos in
eam, qua præstis, dignitatem modis omnibus stu-
duit sublimare, sperans se de cætero regnare felici-
ter, et ope vestra et consilio summa securitate gau-
dere. Si ergo securim accipit, unde securitatem
sperabat, quæ de vobis erit in cunctorum ore nar-
ratio? Quæ retributionis hactenus inauditiæ reme-
moratio? Parcatis ergo, si placet, famæ vestræ,
parcatis et gloriæ, et humilitate dominum, filium-
que vestrum charitate vincere studeatis. Ad quod
si nostra vos monita movere nequeunt, debet saltem
summi pontificis sanctæque Ecclesiæ Romanæ dilec-
tio et fidelitas inclinare. Vobis enim suaderi debet
et facili, ne quid attentare velitis quod laboranti
jamdiu matri vestræ labores augeat, quoque multo-
rum inobedientiam deploranti in eorum, qui obe-
diunt, amissionem dolor accrescat. Quid enim si ve-
stra, quod absit! exacerbatione et opera dominus no-
ster rex, quem largiente Domino populi sequuntur et
regna, a domino papa recesserit, ipsumque sibi for-
tassis adversum vos solatia denegantem sequi de
cætero declinaverit: ipsum namque in hoc quæ
supplicationes, quæ dona, quot quantave promissa
solicitant? In petra tamen firmus huc usque per-
stitit, et totum quod mundus offerre potest, vi-
ctor alta mente calcavit. Ucum nobis timori est,

ne quem oblatæ divitiæ, et totum quod in homi-
num gloria pretiosum est, flectere nequiverunt,
animi sui valeat indignatio sola subvertere. Quod
si per vos acciderit, in threnos lotus ire poteritis,
et lacrymarum fontem oculis vestris de cætero
negare nulla quidem ratione poteritis. Revocetis
itaque, si placet sublimitati vestræ, consilium,
domino quidem papæ, sanctæque Romanæ Eccle-
siæ, vobisque, si placet advertere, modis omnibus,
si processerit, obfuturum. Sed qui penes vos alta
sapiunt, vos hac forte via progredi non permittunt.
Hortantur experiri quis sitis in dominum nostrum
regem, et omnia quæ sua sunt, potestatem exercere
qua præstis. Quæ nimirum potestas peccanti ti-
menda est, satisfacere nolenti formidanda. Domi-
num vero regem non quidem nunquam peccasse
dicimus, sed semper Domino paratum satisfacere
confidenter dicimus et prædicamus. Rex a Domino
constitutus paci providet per omnia subditorum. Et
ut hanc conservet ecclesiis et commissis sibi populis,
dignitates regibus ante se debitas et exhibitas sibi
vult ac exigit exhiberi. In quo, si inter ipsam et
vos aliqua est oborta contentio, a summo super hoc
pontifice paterna gratia per venerabiles fratres no-
stros Londoniensem et Herefordensem episcopos coh-
ventus et commonitus, non in cælum os suum po-
suit, sed de omnibus in quibus vel Ecclesia, vel ec-
clesiastica quæcunque persona se gravatam osten-
derit, se non alienum quærere, sed Ecclesiæ regni
sui paritum iudicio, humiliter et mansuete respon-
dit. Quod quidem et factis implere paratus est. Et
dulce reputat obsequium, cum monetur ut corrigat,
si quid offendant in Deum. Nec solum satisfacere,
sed etiam, si jus exigit, in hoc satis dare paratus est.
Igitur satis dare et satisfacere volentem, Ecclesiæque
se iudicio in his quæ sunt Ecclesiæ, nec in modico
subtrahentem, colla Christi iugo subdentem, quo
jure, qua lege, quoque canone aut interdicto grava-
bitis, aut securi, quod absit! evangelica præcidetis?
Non impetu quidem ferri, sed iudicio prudenti regi
laudabile est. Unde nostrum omnium una est in
commune petitio, nec consilio præcipiti mactare per-
gatis et perdere, sed commissis vobis ovibus, ut vi-
tam, ut pacem, ut securitatem habeant, paterna
studeatis gratia providere.

Movet quidem omnes nos, quod in fratrem no-
strum dominum Saresburiensem episcopum, et de-
canum ejusdem, præpostere, ut quidam existimant,
nuper actum audivimus: in quos suspensionis aut
damnationis poenam ante motam de culpa contro-
versiam, calorem, ut videtur, iracundiæ, plus quam
justitiæ secutus tramitem, intorsistis. Ordo iudicio-
rum novus hic est, hucusque legibus et canonibus,
ut sperabamus, incognitus: damnare primum, et de
culpa postremo cognoscere. Quem ne in dominum
nostrum regem et regnum ejus, ne in nos et com-
missas nobis Ecclesias et parochias, in domini pa-
pæ damnum sanctæque Romanæ Ecclesiæ dedecus
et detrimentum, nostræque confusionis augmen-

tum non modicum, exercere tentetis et extendere, remedium vobis appellationis opponimus. Et qui contra metum gravaminum in facie Ecclesiæ viva jamdudum voce ad dominum papam appellavimus, iterato jam nunc ad ipsum scripto etiam appellamus, et appellationi terminum diem Ascensionis Dominicæ designamus, quanta quidem possumus devotione supplicantes ut inito salubriori consilio vestris ac nostris laboribus, expensisque parcatis, causamque vestram in hoc, ut remedium habere queat, ponere studeatis. Valere vos optamus in Domino, Pater.

EPISTOLA CCCCXXXVII.

EORUMDEM AD ALEXANDRUM III.

Patri suo et domino, summo pontifici ALEXANDRO, provinciæ Cantuariensis episcopi, et personæ per eorumdem diœceses locis pluribus constitutæ, domino patrique debitum charitatis et obedientiæ famulatum.

Vestram, Pater, meminisse credimus excellentiam, etc. *Vide in Alexandro III, an. 1159-81.*

EPISTOLA CCCCXXXVIII.

EORUMDEM AD EUNDEM.

Patri suo et domino, summo pontifici ALEXANDRO, Anglicanæ Ecclesiæ devotum et debitum charitatis et obedientiæ famulatum.

Sublimitati vestræ, Pater reverende, venerande, gratias affectuose referimus, etc. *Vide inter epistolas diversorum ad Alexandrum III papam, post ipsius Regesta.*

EPISTOLA CCCCXXXIX.

CLERI NORMANNIÆ AD EUNDEM.

Dominio papæ ALEXANDRO, episcopi et clerus Normanniæ salutem et obedientiam.

Nuntios et litteras vestras dominus noster rex, etc. *Vide ibid.*

EPISTOLA CCCCXL.

CLERICORUM QUORUNDAM AD REGEM HENRICUM.

Charissimo domino suo HENRICO illustri Anglorum regi, duci Normanniæ et Aquitanie, et comiti Andegavensi R, abbas Wallatiæ, REGINALDUS Saresberiensis archidiaconus, R Lexoviensis archidiaconus, RICARDUS BARRE, et magister HENRICUS salutem, et fidele in omnibus et ubique obsequium.

Noverit majestas vestra, quod cum Ricardus Barre nos præcessisset, et cum multo periculo et gravamine nos ad curiam domini papæ prævenisset, nos quatuor, cum duobus episcopis et decano Ebroicensi, et magistro Henrico, cum multa difficultate venimus usque Senas. Ibi diebus aliquot detenti fuimus. Comes enim Macharius sic ex omni parte vias obsidebat, quod nulli patebat egressus. Cum vero nos quatuor cum episcopis, qui plurimum exire desiderabant, non potuissemus, in maxima animi angustia positi ex communi consilio media nocte occulte et fraudulenter exivimus, et sic per abrupta montium, et per loca fere invia, sub magno timore et periculo tandem venimus Tuscu-

lanum. Ibi Ricardum Barre, de vestro honore, sicut decebat, sollicitum et ad vestram utilitatem prudenter et instanter laborantem invenimus, multum tamen contristatum et confusum, quia nec dominus papa eum receperat, nec alii benignos et humanos se illi exhibuerant. Nos autem venientes dominus papa nec videre, nec ad osculum, nec ad pedem voluit admittere. Vix enim plerique cardinalium dignati sunt nos recipere vel in verbo. Diu ergo in amaritudine spirituum nostrorum anxie conturbati, his qui vos fidelius diligebant, omnimode supplicavimus, ut eorum interventu dominus papa nobis quocunque modo audientiam indulgeret. Ad eorum instantiam recepti sunt dominus abbas de Wallatiæ et R archidiaconus Lexoviensis, qui minus habebantur suspecti. Ipsi autem cum nomen vestrum tanquam devotissimi filii Romanæ Ecclesiæ in salutatione ex vestra parte proponerent, acclamavit tota curia: Sustinete, sustinete, tanquam domino papæ abominabile esset audire nomen vestrum. Sic a curia venientes sero redierunt ad dominum papam, ei de nostro communi consilio exponentes quod nobis fuerat a vestra majestate injunctum, referentes etiam seriatim singula beneficia, quæ contuleratis Cantuariensi, et singulos excessus, et inopportunitates quas contra vestram commiserat dignitatem, totumque hoc primo secreto, postea, coram domino papa et omnibus cardinalibus, contententibus etiam contra eos Alexandro Wallensi et Gunterio Flandrensi, clericis Cantuariensis. Instante vero quinta feria ante Pascha, in qua de consuetudine Romanæ Ecclesiæ solet dominus papa publice absolvere vel publice excommunicare, cum certi essemus quod de vestro et regni vestri gravamine tanquam ad hoc prout diutissime tractassent, consulimus eos, quos majestati vestræ fideiores cognovimus, scilicet dominum Portuensem, dominum Hyacinthum, dominum Papiensem, dominum Tusculanum, dominum Petrum de Mirso, dominus Joannes Neapolitanus aberat, cum omni studio et instantia exorantes, ut nobis animum domini papæ, et quod circa vos statuere proponeret, aperirent. Ipsius vero nihil nisi sinistrum et vestræ celsitudini ignominiosum reportantibus, ex singultuosa eorum et fratris Franci fidelis vestri relatione præsensimus, quod ea die immutabiliter disposuerat dominus papa in vos nominatim, et in totam terram vestram cismarinam et transmarinam de communi fratrum consilio interdicti ferre sententiam, et eam, quæ in ipsos lata fuerat, confirmare. Positi ergo in arctissimo, omni studio attentavimus per cardinales, et per illos de sociis nostris, qui ad illum habebant accessum, et per familiares suos, ut cessaret ab hoc proposito, vel saltem differret usque ad adventum episcoporum vestrorum. Quod cum nullo modo fieri posset, nos, sicut decet et sicut debitores vobis sumus, personæ vestræ dedecus, et totius terræ vestræ gravamen sustinere non valentes, nec debentes, tandem convocatis

sociis nostris coram quibusdam cardinalibus viam invenimus salutem vestre et honori bonam et securam, et universæ terræ vestræ utilem, et episcopis necessariam, pro qua a vobis et a terra vestra et ab episcopis vestris dedecus et periculum quod imminebat, avertimus, et nos ipsos pro hac liberatione toti periculo exposuimus, credentes et certam spem habentes quod totum negotium procederet secundum quod credimus vos velle et secundum quod credimus vos velle debere. Timore namque perterriti iisdem cardinalibus intercedentibus, significavimus domino papæ, nos accepisse in mandatis a vobis, quod juraremus in præsentia ejus, quod vos stabitis mandato suo, et hoc jurabitis in propria persona. Eadem ergo die Jovis fere circa horam nonam, vocati sunt nuntii, tam vestri quam episcoporum, et in generali consistorio juravimus, abbas scilicet de Wallatia et Saresberiensis ex Lexoviensis archidiaconi, et magister Henricus, et Ricardus Barre, quod vos stabitis mandato papæ, et ad præceptum ejus hoc jurabitis. Nuntii vero archiepiscopi Eboracensis, Londoniensis et Saresberiensis episcoporum juraverunt similiter, quod domini sui stabunt præcepto ejus, et hoc jurabunt. Ipsa die tamen generaliter excommunicavit interfectores Cantuariensis, et omnes qui consilium, vel auxilium vel assensum præbuerunt, et omnes qui in terram suam eos scienter receperint aut foverint. Dominus Wigornensis, et dominus Ebroicensis episcopi, et Robertus de Novo Burgo, Ebroicensis et magister Henricus in proximo venturi erant: et eos quidem dimisimus ultra modum anxios et turbatos, quia pro explendo negotio vestro pro velle suo venire non poterant. Fuitque de consilio eorum et nostro, quod nos quocunque modo præcederemus eos, ut dedecus et malum, quod parabant nobis adversarii nostri impedire possemus. Certi enim eramus quod vestrum gravamen in curia præparabatur et timuimus illius diei consuetudinem. De nuntiiis quos ad dominum imperatorem misistis, nihil postea audivimus. De vestro, quod mihi per Reginaldum misistis secreto, coram Wilhelmo filio Hamonis et postmodum abbate de Wallace spem bonam concepimus quod fiet. Valeat et diu vigeat sublimitas vestra. Confortamini in Domino, et exsulet cor vestrum, quoniam præsens nubilum ad gloriam vestram sequetur serenum. Die Sabbati ante Ramos palmarum ad curiam venimus, et lator præsentium die Paschæ recessit a nobis.

EPISTOLA CCCXXI.

ECCLESIAE ANGLICANÆ AD THOMAM CANTUARIENSEM.

Ecclesia Anglicana Cantuariensi archiepiscopo, salutem et debitam charitatem.

Vestram scimus non latere prudentiam, nos anno jam præterito ad dominum papam appellasse, et directis ad vos literis id ipsum vobis significasse. Appellationis hujus causas, si dissimulare non vultis, scitis esse justissimas. Nullum enim excommunicari justum est juri se offerentem, se et causam suam divinis per omnia legibus submittentem. Vos

A tamen in dominum nostrum regem, a summo pontifice causæ suæ judices petentem pariter et expectantem, excommunicationis ferre sententiam et in regnum ejus interdicti pœnam statuere severitate, si placet attendere, non recte quidem moderata proposuistis. Quo nimirum modo si processisset negotium, domino nostro papæ sanctæque Romanæ Ecclesiæ magnum ex hoc non ambigimus jamjam provenisse dispendium. Unde ne facto vestro vestem Christi scindi, inconsutilem ejus tunicam male dissui taciturnitate nostra et indiscreta quadam conventientia sineremus, ad dominum papam appellavimus, et debitam sibi fidelitatem, ad ipsum appellando, conservavimus. Appellationis hujus dilata siquidem prosecutio non fuisset, nisi pietatis in nos oculos apostolica clementia reduxisset. Qui nobis et vobis affectu paterno compatiens laboribus nostris et expensis, ut scribens ipse testatur, misericorditer parcens, viros sapientes et honestos, peritos juris et æquitate probatissimos de latere suo transmisit ad nos ut causam hanc plene cognoscerent et ipsam suscepta potestatis plenitudine terminando, finem laboribus jamdiu protractis imponerent. Litteras in hoc domini papæ suscepimus, quibus nobis apostolica auctoritate injungitur ut ipsis assistere appellationis nostræ causas apud eos exponere, eorum parere sententiæ et reverentiam judicariæ potestati debitam in omnibus exhibere non omittamus. Ipsis itaque nostram una cum domino nostro rege præsentiam exhibere curavimus, optantes pariter et expectantes omnia quæ inter dominum nostrum regem vertuntur et vos, simul et ea quæ nos contingunt sub sole fieri, et juxta apostolici formam mandati diffinitiva eorum sententia terminari. Constat itaque non subterfugisse judicium quos ad judicium subeundum suis se constat judicibus obtulisse. Data vero opera procurasse, ne qui ob pacem venerant, pacis fungerentur officio, quid est aliud nisi turbationem Ecclesiæ protelasse et ejus Spiritui qui ait: *Habete sal in vobis et pacem habete inter vos* (Marc. ix), animositate forte nimia restitisse? Ad judices ex mandato properavimus et ecce qui nos audiant non habemus. Unde ne apprehendant nos mala, appellationis remedio hactenus evitata, ne potestatem quam in ædificationem Ecclesiæ et non destructionem suscepisse debueratis, minus canonice exerceatis in nos, vestram attendentes prudentiam statuta Patrum non observare, si quid habetis in subditos defensionis eis locum et tempus non concedere, suspendere statim nec citare, reputare notoria quæ nec nota sunt nec subnixi veritate, mandatis vestris in discrimen eorum quibus scribitis sarcinas graves imponere, contra suspectas nobis sententias vestras, adversus mandata vestra omnia domino nostro regi et regno ejus, nobis etiam et commissis nobis ecclesiis et parochiis gravamen aliquod importantia, ad eum cujus declinari nequit examen, dominum scilicet papam appellamus et appellationi terminum diem obitus beati Martini constituimus.

EPISTOLA CCCCXLII.

WALTERI ALBANENSIS EPISCOPI AD GILBERTUM.

WALTERUS Dei gratia Albanensis episcopus, et domini papæ vicarius, venerabili et in Christo [dilecto] fratri G. eadem gratia Londoniensi episcopo, et dilectis in domino filiis, capitulo Huredi de Rocheforde, salutem et omnium plenitudinem gaudiorum.

Veniens ad apostolicæ sedis clementiam Petrus subdiaconus lator præsentium, coram domino papa et nobis humili et lacrymabili confessione narravit se, instigante humani generis inimico, quendam subdiaconum interfecisse. Unde nos de mandato summi pontificis eum vinculo excommunicationis a quo tenebatur absolvimus, talem sibi pœnitentiam injungentes, ut usque ad quindecim annos quartam feriam in cibo quadragesimali, sextam in pane et aqua jejunet, secundam vero feriam si voluerit legendo psalterium vel pascendo pauperem redimat, quadragesimam ante nativitatem Domini sicut majorem observet, præter orationes, eleemosynas et alia pietatis opera, quibus sollicite invigilet. Et, quia non judicat Deus his in idipsum, licet idem Petrus perpetrato crimine non in subdiaconatu, sed in acolythatu, deinceps Deo et Ecclesiæ servire valeat: tamen ex dispensatione et benignitate sacrosanctæ Romanæ sedis, concessit ei dominus noster ecclesiasticum beneficium integrum retinere, discretionis vestræ mandans quatenus ipsum absolutum in pace manere et beneficium ecclesiasticum, quod hactenus habuit, libere et quiete possidere permittatis, nec eum super hoc ulla ratione de cætero vexetis.

EPISTOLA CCCCXLIII.

WILLELMI ALTISSODORENSIS EPISCOPI AD ALEXANDRUM PAPAM.

ALEXANDRO papæ, WILLELMUS Alti ssiodorensis episcopus.

Si unum patitur membrum, etc. *Vide in Alexandro III, an. 1159-81.*

EPISTOLA CCCCXLIV

BANGORENSIS ARCHID. AD THOMAM CANTUARIENSEM.

Quanta mentis exultatione, quanta animi jucunditate nostra privetur Ecclesia, tam pii Patris orbata præsentia, nec stylo notare nec verbis exprimere valemus; sic quippe cuncta in vobis relaxabat misericordia, quod nihil inultum omitteret justitia, et licet omnes de vestro damnum patiantur exilio, nos tamen majori super omnes affigimur incommodo: præsentibus quippe nos pio mentis affectu venerabimini et inimicorum insidias in absentes illatas frustabamini. Deus autem pro his vos abunde remuneret, cum nostræ imbecillitati digna retribuendi sit ablata facultas. Quod nisi locorum distantia nos a jucunditate vestræ præsentiae sejungeret, nostri erga vos animi affectum clarius sentiretis, tum nostri copiam vobis exhibendo, tum nostram vobis,

A ut Domino, substantiam offerendo. De hoc autem, quod nobis indignis ecclesiarum regimen dignum estis remittere, Deum super hoc trahimus in testimonium nos omnem, quam potuimus, adhibuisse diligentiam, et vestris in omnibus obediisse præceptis; quod et de cætero faciemus, et quod vestræ de Ecclesia regenda sollicitudini visum fuerit, nobis litteris vestris remandate.

EPISTOLA CCCCXLV.

BITURICENSIS ARCHIDIACONI AD EUNDEN.

Dilectissimo Patri et spirituali domino T., Dei gratia Cantuariensi archiepiscopo, V... saus Bituricensis archidiaconus, quidquid est et quidquid potest.

Litteras sublimitatis vestræ suscepi, continentes vos admirari quoniam de adventu cardinalium nihil per me vobis innotuit. Qui nisi ita subitus esset, quod præscire non poterim, quam libentius et jucundius vobis significarem, novit ille qui corda scrutatur et renes. Ego autem, ut amicum decet, pro vobis sollicitus, quamvis alio itinere præpeditus fuisset, apud castrum Radulphi obviam eis occurri, diligenti ab eis perquirens studio, tum seorsim, tum communiter, quam pro vobis aut contra vos potestatem in mandatis accepissent. Denique, sicut unius relatu conjeci, et ex litteris legal onis utriusque oculata fide percepi, nihil prorsus contra vos, sed potius pro vobis eis permissum est. Præterea inde tamen occasione accepta cœpi suggerere eis, ut omnimodis præcaverint ne in dominum regem Francorum, aut in regnum ejus, vel etiam in vobis aliquid molirentur, reducendo eis ad memoriam quam ægre dominus rex tulerit absolutionem illius Joannis de Oxenford. Cui misso a rege Anglorum cum Reginaldo archidiacono, in introitu ipsius curiæ cum forte obviarem; ipsi, inquam, prætendenti osculum prius denegavi, querendo in publico an excommunicatus esset. Sed quid mirum, si erubuerit versus in cachinnum? Tandem ab ipsis legatis, dum recederent accepi, quod etiam si contra vos, quod absit, potestatem acceperissent, promptum animum, in quantum fas esset, et devotam stare pro vobis gererent voluntatem. De cætero quod vobis placuerit, per præsentium latorem resignate mihi, in omnibus et per omnia parate obedire.

EPISTOLA CCCCXLVI.

WILLELMI CARNOTENSIS ELECTI AD ALEX. PAPAM.

ALEXANDRO papæ Carnotensis electus.

Ecclesiæ Romanæ filius, etc. *Vide in Alexandro III.*

EPISTOLA CCCCXLVII.

EJUNDEN AD EUNDEN.

ALEXANDRO papæ, WILLELMUS Carnotensis electus.

Vigor sensuum membris omnibus manat a capite, etc. *Vide ibid.*

EPISTOLA CCCCXLVIII.

ÆGIDII EBROICENSIS AD EUNDEN.

ALEXANDRO papæ, Ægidii Ebroicensis episcopus. Circa mee vocationis initia, etc. *Vide ibid.*

EPISTOLA CCCCXLIX.

GILBERTI [OXONIENSIS ARCHIEP.] POSTEA HEREFORDIENSIS
EPISCOPI.

R. archidiaconus Oxnefordiensis, postea episcopus Herefordiensis GILBERTO, Londoniensi episcopo.

Non potest mihi tranquillitas esse animi status, cum vestra tranquillitatis perturbationem jugi meditatione reminiscor. Verumtamen non modicum in hoc consolationis accipio, quod animo meo studiose perscrutanti non occurrit præcedentis in vobis culpæ meritum quod præsentis causam tribulationis induxerit. Quod si ita est, tanto amplius debet in vobis clarescere fortitudinis virtus, quanto abundantius innocentia testimonium reddit vobis justissimus arbiter bene sibi conscius animus. Quapropter, si per tribulationem huius sæculi is qui foris est homo vester corrumpitur, is qui intus est renovari debet de die in diem, sicut olim in prosperis ad temperantiam, ita nunc in adversis ad patientiæ probationem. Scriptum est enim: *Tribulatio patientiam operatur; patientia probationem, probatio vero spem* (Rom. v). In hoc ergo multa mihi spes est, quod innocentia simul et humilis patientia vestra meritis ad gloriam et honorem vestri liberabit vos Deus de manibus persequentium vos, qui *superbis resistitis, humilibus autem dat gratiam* (Jacob. iv). Unde votis indesinentibus omnipotentem Deum implorare satago, quatenus consuetæ discretionis vestrae oculum nullo latens aliqua subrepentis indignationis macula involvat, ne, quod absit, offensam quam nondum in puritate conscientia habuistis, ex novo contumaciae criminis contrahatis. Bonum est humiliari, ut gloriosius exaltemur. Bona est humilitas, quæ superni iudicis favorem invitat et consilia dissipat superbiorum. Humiliatus in carcere est in compedibus Joseph, et postmodum nihilominus eloquio Domini inflammante super omnem terram Ægypti est constitutus et a venditoribus sanguinis sui præpositus fratribus adoratur. Humiliatus est David ad prophetiam obijurationem, et postmodum Deo placens ad prophetalis spiritus gratiam est reparatus. Humiliata est et Maria ad cælestis annuntiationis oraculum et ad conceptionem Altissimi, Spiritus sancti virtute, meruit obumbrari. Humiliavit etiam semetipsum Christus; propter quod et Deus exaltavit illum et donavit illi nomen quod est super omne nomen. Si ergo ab aliquo facta est nobis data in vos sententiæ denuntiatio, circumspicienda deliberatione utendum est, ne vel eam contumeliose observetis, vel, quod fortassis videri potest, superbe et periculose contemnatis. Non hæc dico quod aliquo presumptionis typo putaverim a mea parvitate vestram posse instrui prudentiam in cunctis canonum distinctionibus circa hos articulos sufficienter edoctam. Sed qualem circa honorem vestrum affectionem habeam subicere non possum: hoc certe pro meo parvitalis modulo suggerens, ut morbo adhuc recenti festina remedia procuretis, ne forte inveteratus difficiliore cura opus habeat. Timendum enim

A est ne majoris auctoritatis robore quod factum est fulciatur. Quamquam et hoc timere certe impietate plenum sit, ne dicam sacrilegium. Quis enim putare audeat adeo eversum esse ecclesiasticæ petrae fundamentum ut apostolica auctoritate non solum apostolicorum canonum regula confringatur, verum etiam ordo ille evangelicus ipsius Dominici oris constitutione consecratus, humanæ presumptionis imutatione, ut ita dicam, profanetur, ipso Domino dicente: *Non est servus major domino suo, nec apostolus major eo qui misit illum* (Joan. xiii). Unde mihi nulla ratione persuaderi potest, apostolica auctoritate quamlibet modicum Christi corporis membrum, nedum episcopum orthodoxum non communitum, non regulariter citatum, inauditum, indefensum, et in nullo contumacem, aut notorii criminis reprehensioni obnoxium ab ipsius Christi corpore abscondi licere. Omnipotens Deus corroboret spiritum sapientiæ suæ cor vestrum, actus quoque vestros muniat spiritu consilii et fortitudinis, ut præsentium tentationum impulsibus tam prudenter quam fortiter resistere valeatis. Ego certe quantulacunque portio creationis vestrae non tantum sumptus meos, sed etiam meipsum, si jusseritis, impendere pro honore vestro paratus ero. Bene valeat in Christo dominus meus.

EPISTOLA CCCCL.

HENRICI DECANI ET CAPITULI S. PAULI LONDON. AD
ALEXANDRUM PAPAM.

Postquam dominus noster archiepiscopus Cantuariensis occasionem sibi reperit de terra nostra exeundi, etc. *Vide inter variorum ad Alexandrum III epistolæ, post ipsius Regesta.*

EPISTOLA CCCCLI.

STEPHANI MELDENSIIS AD ALEXANDRUM PAPAM.

ALEXANDRO PAPÆ STEPHANUS Meldensis episcopus. Licet non sit discipulus super magistrum, etc. *Vide ibid.*

EPISTOLA CCCCLII.

EJUSDEM AD EUNDEM.

ALEXANDRO PAPÆ, STEPHANUS Meldensis episcopus. Crebrescunt, Pater, scandala temporibus nostris, etc. *Vide ibid.*

EPISTOLA CCCCLIII.

EJUSDEM AD EUNDEM.

Domino PAPÆ, episcopus Meldensis. Licet præsentis negotii magnitudo, etc. *Vide ibid.*

EPISTOLA CCCCLIV.

MILONIS MORINORUM EPISCOPI AD ALEXANDRUM PAPAM.

Sauctissimo domino et Patri charissimo, ALEXANDRO DEI gratia summo pontifici, MILO Morinorum episcopus, salutem et devotam in omnibus obedientiam.

Impudentiæ mater ambitio, etc. *Vide ibid.*

EPISTOLA CCCCLV.

BERNARDI NIVERNENSIS EPISCOPI AD ALEX. PAPAM.

ALEXANDRO PAPÆ, BERNARDUS Nivernensis episcopus.

Post nuntiorum vestrorum a domino rege disces-
sum, etc. *Vide ibid.*

EPISTOLA CCCCLVI.

WILLELMI NORWICENSIS AD THOMAM CANTUAR.

THOMÆ Cantuariensi archiepiscopo, WILLELMUS
Norwicensis episcopus.

Secundum formam mandati vestræ sanctitatis cle-
ricos de terra comitis Hugonis, qui post interdictum
domini papæ in terra ipsius divina celebrare præ-
sumpserunt, accepto ab iis sacramento quod vestro
mandato stabunt, absolvimus, interdicentes iis ne
divina celebrarent. De quorum numero latores præ-
sentium, Gilbertus et Baldwinus presbyteri sunt,
quos ad pedes vestræ sanctitatis suspensos cum lit-
terarum nostrarum testimonio dirigimus, quia ipsi
miserabiliter ad nos accedentes id a nobis impetra-
verunt, sperantes misericordiam vestram præve-
nire potius quam expectare iudicium. Semper va-
lete.

EPISTOLA CCCCLVII.

BALDWINI NOVIOMENSIS AD ALEX. PAPAM.

ALEXANDRO papæ BALDWINUS Noviomensis episco-
pus.

Ferreum pectus est aut lapideum, etc. *Vide in
Alexandro, an. 1159-81.*

EPISTOLA CCCCLVIII.

EJUSDEM ET MAURICII PARIS. AD EUNDEM.

ALEXANDRO papæ, BERNARDUS Noviomensis et MAU-
RICIUS Parisiensis episcopi.

Nos sanctitati vestræ pro Ecclesia Anglicana et
venerabili viro Cantuariensi archiepiscopo preces
sæpius porrexisse meminimus, etc. *Vide ibid.*

EPISTOLA CCCCLIX.

PETRI PAPIENSIS AD THOMAM CANTUAR.

THOMÆ Cantuariensi archiepiscopo, PETRUS Pa-
piensis episcopus, salutem et omne bonum.

Loquitur Sapiens ita dicens: *Aqua frigida animæ
sitiens, et nuntius bonus de terra longinqua* (Prov.
xxv). Quam vera sit ista sententia, benignitatis ve-
stræ dignatio experiri me fecit. Benedictione etenim
et salutatione, quam de terra longinqua in signum
eximie dilectionis misistis ad me, revera non mo-
dice refrigeravistis animam meam sitientem ad vos
ex illa die, quæ nosse et videre vos, et recipi merui
inter vestræ familiaritatis arcanum. Igitur tantæ di-
gnationi humilitas nostra, etsi quas debet, certe
quas valet, gratias reddit. Oro etiam ut ille vobis
gratiam retribuat pro me, pro cuius amore, licet in-
dignum, tanto me affectu et amatis et honoratis. De
cætero, reverende Pater, filiali præsumptione obse-
cro vos ut patrem, moneo ut amicum, ne deficiatis
in tribulationibus, quæ invenerunt vos nimis, maxi-
me cum ista sit via, qua itur ad Deum. Cum enim,
iuxta Apostolum, diligentibus Deum omnia coope-
rentur in bonum, per prospera et adversa in hoc
mundiali stadio per patientiam Christi miles, tan-
quam aurum in fornace, probatur. Denique, sicut
electis tribulatio patientiam operatur, patientia pro-
bationem, probatio spem, quæ nec confunditur nec

A confundit, cum a charitate fulciatur; sic e contrario
reprobis tribulatio impatientiam, impatientia pusil-
lanimitatem, pusillanimitas tristitiam parit, et illa
interimit, cum per eam animus in desperationem
absorbeat. Igitur viriliter agite, confortetur cor
vestrum, nec ullius vos, quod absit! suasio, quasi
cedere debeat, educat, quin potius agite quod agi-
tis, et tenete quod tenetis, ut a summo pastore de
commissio grege mercedem plenam recipiatis. Hoc
tam fideliter, quam amicitabiliter consulo vobis. Hoc
utinam persuadere possim et mihi. Hoc salubre no-
bis, hoc imitabile nobis commissis, ut bene agendo
et sustinendo quod voluerit, et quandiu voluerit
Deus, et ejus inhærendo vestigiis honorificemus mi-
nisterium nostrum. Quod autem parvitas nostræ
B precibus vos attentius commendatis, merita quidem
propria metiendo, confundor, sed devotionem ve-
stram suspiciendo amplector. Quidquid igitur amoris
et obsequii pro vobis efficere possum apud Deum et
homines, vestrum esse scatis cunctis diebus.
Atque utinam se offerat locus et tempus, quo
palam liceat experiri quam pure diligam vos,
non tam verbo et lingua, quam opere et veritate.
Valete.

EPISTOLA CCCCLX.

MAURICII PARISIENSIS AD ALEXANDRUM PAPAM.

Sanctissimo Patri et domino ALEXANDRO, Dei
gratia summo pontifici et universali papæ, MAU-
RICIUS, eadem gratia Parisiensis Ecclesiæ humilis
minister, obedientiæ, servitutis et devotionis pleni-
tudinem.

Noverit celsitudo vestra, serenissime Pater, quod
nuper prope Parisios de pace inter regem Angliæ et
dominum Cantuariensem reformanda tractatum est
etc. *Vide in Alexandro III, an. 1159-81.*

EPISTOLA CCCCLXI.

EJUSDEM AD EUNDEM.

ALEXANDRO papæ, MAURICIUS Parisiensis episcopus.

Parit et alit culpas licentia delinquendi, et in
augmenta facinorum prosilitur, dum secunda impu-
nitate peccatur. Latuit aliquandiu Londoniensis
ille episcopus, etc. *Vide ibid.*

EPISTOLA CCCCLXII.

JOANNIS PICTAVIENSIS AD THOMAM CANTUARIENSEM.

D Reverendissimo domino et patri, beatissimo
THOMÆ, Dei gratia Cantuariensi archiepiscopo, suus
JOANNES, eadem gratia Pictaviensis Ecclesiæ hu-
milis sacerdos, salutem et sanctæ perseverantiæ
virtutem.

Vix mihi, domine, vel unum diem in itineris
procinctum indulsi post litterarum vestrarum su-
sceptionem, imo et omnis mihi etiam unius horæ
morula odiosa erat post illarum perfectionem litte-
rarum, quæ nihil continebant nisi solam obtusa-
tionem, ut tam necessario negotio, absque cuius im-
petratione non erit, sicut proponitis, absque scrupulo
conscientia vestra, meum prestarem obsequium.
Fateor, domine, excussisse mihi lacrymas litterulas
illas quarum tam sedula, et sub tali imprecatione

obsecratio nescio quam circa fidem amici dubitationem importare videbatur. Malo tamen, ut salva pace domini mei loquar, vos juxta nominis nostri proprietatem parum credulum, quam me minus devotum inveniri. Et, quamvis, sicut præcepistis, in hujus itineris arreptione Pictaviensium meorum contempserim loquacitatem, volui tamen, salva gerendi negotii fide, ipsorum declinare nugacitatem. Iude fuit quod palam proposui me episcopo Ebroicensi, Ricardo de Humet constabulario, Willelmo filio Hamonis, cæterisque regis officialibus Turonis occurrurum, qui eisdem diebus ibi convenire debebant, ut super pace comitum Arvernensium tractarent. Consilii siquidem illorum fidem explorare necesse habebam propter novorum mandatorum inauditam duritiam, quæ mihi luseus noster, cujus et mentis oculum penitus excæcavit Deus, et cum illo Simon de Turnebu conestabularius Toarcensis, ex parte regis apportaverant. Illi enim, paucis diebus post natalem Apostolorum, Pictavium venerant, et solum tunc in partem traxerant, tanquam secreta habentes ad me mandata; adhibito tamen secum Henrico Panetario, quasi legationis sibi injunctæ fideliter peractæ, si necesse foret, teste futuro. Cumque plurimum insistere, ut vel unum mecum adhibere possem, sive abbatem, quia plerosque ibi mecum habebam, sive quancunque Ecclesiæ meæ personam, sive saltem canonicum, id mihi concessum non est, eo quod mandata ad me tantum, non etiam ad illos perferenda accepissent. Inhibuerunt itaque mihi sub districta interminatione, ne aliquid ad regis dignitatem pertinens mihi usurparem. Cui mandato cum me libenter paritulum respondissem, ad specialia tandem descenderunt, prohibentes ne ad querelas viduarum, vel orphanorum, vel clericorum, aliquem parochianorum meorum in causam trahere præsumerem super quacunque possessione immobili, donec ministeriales regis, vel dominorum, ad quorum feudum res controversiæ pertineret, in facienda justitia eis defecissent. Deinde, ne super accusatione senioris quemquam audirem. Præterea, ne in aliquem baronem, ipsis inconsultis, imo donec ipsi illum mihi, in quibus deberent, ad justitiam offerrent, anathematis sententiam promulgarem. Hæc enim fere erant, in quibus contra regiam agere dicebar dignitatem. Et præcipue clericos circa, quorum patrimonialia ad ipsos quocunque titulo devoluta a sordidorum et personalium munerum præstatione irreverenter defendere dicebar. Pœna quoque his omnibus subjecta est, si hæc de cætero mihi usurparem. Quamvis enim circa personam meam, ut aiebant, duriora illis injuncta fuissent, mihi tamen etiam cum periculo suo parcentes, indictam sibi ad alios pœnam extenderent, ita scilicet ut si quis ad citationem meam veniret, prædictis privilegiatis personis responsurus, omnia illius bona confiscarentur, id est, eo quod coram nobis respondisset, publico carceri dejecto. In accusatione vero feneratorum eidem quoque pœnæ subicerentur, tam accusator

A qui nos adisset, quam accusatus qui coram nobis respondisset. Quod si vel in istos, eo quod coram nobis respondere nolent, vel in alios quoslibet a rege possidentes principaliter, ipsis inconsultis, excommunicationis sententiam dictarem, scirent exinde excommunicati illi regi non displiciturum, si vel in personam meam manum extenderent, vel in bona mea grassarentur, vel in personas vel in bona clericorum meorum, qui sententias ex mandato meo promulgarent, aut promulgatas observarent.

Ad hæc ego illis et reverenter et humiliter respondi, oportere me omnia hæc, licet solus audissem, ad Ecclesiæ meæ referre conscientiam, cujus erant libertates illæ, quibus hactenus usus eram, et nunc uti prohibebam. Quibus omnibus si ipsis inconsultis renuntiasset, nihil actum esset, nisi quod in capitis mei periculum redundare posset. Verum, cum communicato cum ecclesiæ nostræ prosecutione perseveraturum cognovissent, primo coram plerisque baronibus Pictaviensium, deinde coram nostris civibus sua publice promulgaverunt edicta. Hinc mihi, sicut supradixi, Turonis proficiscendi, et cæterorum ministerialium regis consilium explorandi occasionem accepi. Adjeci etiam, quod si forte apud eos certi mihi consilii certa forma non appareret, illud Senonis secretario domini papæ explorare non esset utile. Sub hujus consultationis obtentu cum Turonis pervenissem inveni supra nominatos regis officiales, jam firmato consilio quod in Arverniam proficiscerentur, ipso die ad castrum, quod Luchæ nominatur, profectos esse. Quos ego continuato diplomate usque ad idem castrum profectus, ibidem Willelmum filium Hamonis et Hugonem de Cleers reperi. Cæteri jam ab ante auroram ad castrum Radulphi iter arripuerant. Apud quos cum nihil consilii fere, quod ad negotium Ecclesiæ meæ atinebat, invenissem, gaudio tamen gavisus sum, quod opportunitatem accepi conveniendi ipsum Hugonem de Cleers super litteris, quas ei mittebatis. Cumque præsensissem, quod G. clericus ejus ibidem præsens non esset, adjeci ne in mandatis acceperis a vobis, quod ego, si ille abesset, et in litteris legendis, et in eisdem, postquam lectæ essent, communicandis, et etiam in rescribendo vobis, si quid rescribere vellet, absentis locum supplerem. Et, quoniam spatium illi ad ea, quæ rescribere volebat, non suppetebat, impetrauit a me, ut litteras, quas G. suo mittebatis, ipse in manu sua fideliter reciperet, et illas, quas ipsi prælegeram, sub fidei suæ pollicitatione donec ad eas rescripsisset conservaret, nullius oculo nisi prædicti G. illas inspecturo. Et is quantum mihi videtur, compatitur injuriis quæ Ecclesiæ Dei irrogantur, et si non usquequaque forsitan contemplatione divina, respectu tamen, ut existimo, affectionis domini sui, cui, quantum animadvertere possum, timet, ne forte in his, quæ agit, a Deo, quem offendere videtur, percutiatur. Ego vero do-

minum Ebroicensem, et illos qui cum eo præibant, literis tantum prosecutus, in cæpto itinere institi, et ab eodem castro, id est a Luchiis, præsentium latorem ad vos remisit. Præmissi autem cursorem, per quem abbatem Pontiniacensem, ut mihi in curia occurrat, invito, qui Clarevallensi, et de Fossanova, ordinis sui abbatibus, in negotio vestro nobiscum cooperetur, si illos forte in curia invenerimus. Quibus, prout Deus permiserit, expletis, nuntium ad vos dirigere curabimus, per quem omnia ad vos vel ad nos pertinentia, quæ cognitione vestra digna existimabimus, vobis significare studebimus. De cætero, paternitati vestræ supplico pro clerico vestro, amico meo, Turstano de Burins, ut gratia vestra ad me vel semel videndum venire permittat, quem, si obsequio vestro necessarius est, vobis continuo remitteremus. Bene valete.

EPISTOLA CCCCLXIII.

EJUSDEM AD EUMEM.

Reverendissimo domino ac Patri sanctissimo THOME, Dei gratia Cantuariensis archiepiscopo, SUUS JOANNES, Pictaviensis Ecclesiæ humilis sacerdos, salutem et spiritum fortitudinis.

Prævenisset tarditatem meam in litterarumstrarum benedictione diligentia, nisi præsentium latorem diuturna, sicut nobis proponebat, detinuisset infirmitas. Hujus itaque ægritudinis beneficio, debeo, quod meum apud vos excusare possum aulentium: imo quod mea manifeste non est deprehensa negligentia. Verum, ut verius dicam, et salva majestatis vestræ reverentia licentius atque liberius loquar, neuter nostrum recte excusabilis apparet, dum nescio quæ non timenda timemus, et negligentiam nostram cautelæ nomine velamus, tanquam exeuntibus a vobis ad nos tendantur insidie, vel contra. Non recipit hujusmodi excusationes amicitia illius necessitudo, qua nos usque in hunc diem absque intermissione devinxit mutæ charitatis affectio, a primis ineuntis adolescentiæ annis usque ad omnium sortis nostræ vel conditionis invidiam. Nunc vero aut locorum distantia, aut dignitatum inæqualitas affectionis pristinae titulum aliquatenus obscurasse videbitur, si intercurrentium cursorum parcamus laboribus; si non alterius alteri plenissime innotescat sollicitudo, in tantum ut omnem detraxisse videamur localis separationis injuriam. Sileat igitur, obsecro, serenissime domine, de cætero hujusmodi excusationis prætextus, et quod vocibus negatum est, chartulis concedamus. Quod verbis non possumus, litteris exprimamus. Illarum inventoribus non existamus ingrati, quorum merito aliquid detraxisse videbitur, quisquis ex minus, evidenti necessitate illorum uti cessaverit beneficio. Nec prætermittendum, quod de deprehensionis injuria nullus per Dei gratiam internuntiorum nostrorum adhuc conqueri potest. Esto tamen, et, quod absit! deprehensum aliquem interim penam, quis recte indignari poterit si illas, quæ Ecclesiæ Dei et nobis fiunt, ad

PATROL. CXI.

A alterutrum deploramus injurias? Quis vapulantes et injusta passos flere prohibebit? Nunquid in maxillas nostras lacrymæ nostræ impune descendant? Denique etiam nobis omnino cessantibus, et nec voce nec scripto aliquid interloquentibus imponitur, quod et nos vestro, et vos nostro omnia consilio peragatis. Quod ita verum est, si idem spiritus consilii utrique inspirat, ut impressiones quas peccatis nostris exigentibus, nobis et Ecclesiæ Dei inferri videmus, æquanimiter non sustineamus. Si enim Dei ministri sumus, hæc utique communi, id est divino pertractamus consilio, qui demolientes vineam Domini Sabaoth siccis oculis non videmus, qui ruinam domus Israel saltem lacrymantes prosequimur. Licet enim nos non illa, qua certe deberemus, perseverantia opposuerimus, licet nondum usque ad sanguinem restiterimus, licet multa pro temporis incommoditate, et matris nostræ sanctæ Romanæ Ecclesiæ scissura dissimulaverimus, nemo tamen per gratiam Dei dicere poterit, quod eorum adhuc comminationibus cesserimus, aut impietatis consiliis consenserimus, quin accepta temporis opportunitate, quæ secus acta sunt, et evacuari possint, ad eadem evacuanda libere nos interponere valeamus. Deo enim incessanter gratias refero, quod, sicut ex aliorum fida relatione et nunc ex testimonii vestri fide certissime teneo, detestabiles illas profanasque consuetudines, quæ diebus nostris sub innovationis obtentu promulgatæ sunt, non absolute, sicut earum innovator gloriatur, observandas promissistis, neque, ut cæteri, scripti vestri munimento roborastis.

Verum de legatione Angliæ concedenda non est quod vereri quidquam debeatis, si verbis apostolicis fides aliqua haberi potest. Gravi enim rediit penitentia illam qualem qualem, quam Eboracensi fecerat, concessionem. Nec moleste ferat dominus meus quod a domini papæ et curiæ frequentiori visitatione abstineo. De industria etenim declino, quoad possim, Pictaviensium nostrorum detractores, qui quoties illuc accedebam, regi scribere non cessabant, quod in ipsius suggillationem, et institutionum suarum læsionem pleraque in curia machinabar. Consultius itaque credidi personis discretis et religiosis tam vestra quam mea negotia credere, et earum in parte ista opera uti. Quod et nunc paucis diebus ante litterarumstrarum receptionem feceram, sub eo videlicet tempore, quo paganum cognatum meum ad vos misi. Nactus enim opportunitatem viri venerabilis, et sanctitatis incomparabilis, domini abbatis Pontiniacensis, qui forte cum amore nostri, tum gratia visitationis abbatiarum, quas in nostro episcopatu habet, in partes nostras descenderat, ipsius industria pleraque, tam ad vos, quam ad me pertinentia, ad dominum papam securius perferenda commisi; specialiter autem super verbo legationis, et Sancti Augustini. Qualiter enim litteræ legationis sub indignatione conviciis permista domino papæ restitutæ fuissent, et quomodo

33

ad instantiam quorundam cardinalium quasi ad placandam regis indignationem districtiores vobis litteræ pro benedicendo abbate Sancti Augustini directæ sint, per communem amicum nostrum dominum Henricum Pisanum mihi plenius innouerat.

Quamvis autem præfatus abbas et discretionis suæ, et religionis intuitu, nec non et obsequii, in quo illis frequens deservit, in curia plurimum possit, si tamen præceperitis, et expedire magis vobis videatur, nec tibi detrahentium linguas, nec ejus, apud quem detrahitur, molestias vereor, nec sic aut laborem corporis declinare, aut sumptibus parcere quero, quin ad mandati vestri imperium in persona propria ad illos ascendam, nihil difficile ad laborem existimans, in quo matris meæ sanctæ Cantuariensis Ecclesiæ utilitatibus deservire possim. Nec est, ut mihi videtur, quod de urgenti domini papæ mandato circa benedicendum Sancti Augustini abbatem supra modum conqueri debeatis; maxime cum adjectum sit, sicut accepi, quod si illi ulterius benedicere cessaveritis, ipse ei ad se venienti benedicturus sit. Aut igitur vobis ad prosecutionem juris vestri patebit exeundi libertas, aut si tam manifeste negata fuerit, quidquid sub tam manifesta impressione fiet, tempore accepto pro infecto haberi poterit. Commoneo autem sanctitatem vestram, ut cum supradicto abbate Pontificalensi vel in persona vestra, si sub prætextu causæ vestræ in partes Galliarum veneritis, vel certe per litteras vestras, si exeundi facultatem non acceperitis, ulteriorem ineatis familiaritatem: quamvis tam ego, quam communis amicus noster, abbas videlicet de Stella Isaac, ut continuam vestri habeat sanctissimus ille conventus Pontificalensis in orationibus suis memoriam, recte procuravimus. Invenietis quoque et eandem domum utilitatibus vestris etiam temporalibus deservire paratam, si necesse fuerit. Industria enim et sanctitate supradicti abbatis sui omnibus Cisterciensis ordinis abbatibus plus potest. Et hic mihi, ut tutis auribus loquar, exilii sedem elegi, cum tortoris nostri molestias ulterius sustinere non potero.

Quod vero scribitis, ut negotia vestra nemini credam, nisi soli summo pontifici, et Pisano nostro, adjecisse, nisi fallor, debueratis etiam cardinalem Sancti Laurentii magistrum Albertum, [quem profectibus vestris deservire existimo, non tam personæ vestræ, quam negotii intuitu, quia vos non vestram, sed Ecclesiæ causam suscepisse et protestatur et agnoscit. Ego tamen interim, nisi novo a vobis suscepto mandato, fines mihi præscriptos non transgrediar. Scripsissem vobis de Octaviani decessu miserabili, et Guidonis Cremensis substitutione execrabili, nisi quia nostros, qui in curia morantur, hæc omnia plenius scire scio, per quos vobis fidelius innotescere debent. Et hujusmodi nova nonnisi ab ipsis, et per ipsos ad nos usque derivantur. Familiaris autem status meus, quem Dei

A gratia vobis describi jubetis, post discessum pagani nostri, per quem vobis viva voce omnia intimari præcepi, in nullo innovatus est, quia Luscus noster, qui licet in plenitudine potestatis, non tamen in plenitudine luminis ad nos reversus est, nondum sua promulgavit edicta. Exercitum solummodo Aquitaniarum submonuit, ut regi Francorum, si in Arverniam, ut destinabat, proficisci perseveraverit, in manu valida occurrant. Missi tamen sunt ad regem quærendæ pacis procuratores, sicut nosse vos credo, dominus Ebroicensis, et Ricardus de Humez. Nondum vero ad nos pervenerat, quid perfecterint. Cætera, cum nobis innotuerint, et fidelem invenerimus nuntium, vobis significare non differemus. Obsecro autem, ut per puerum illum, quem sæpe dictus paganus meus ad me in brevi mittere debet, omnia, quæ cognitu mihi necessaria duxeritis, rescribere non differatis. Bene valeat dominus meus.

B Præsentium latorem una tantum nocte mecum retinui, ut adventus sui moram celeritate reditus sui purgare possit, quem tamen, sicut asserit, infirmitas excusat: et ne aliud vobis suggerere posset, in festo Sancti Albani animæ discessit. Vereor, domine, ne charta hæc plus vobis in legendo, quam mihi in scribendo tædii importet. Veniam tamen meretur, qui prolixitate sua omnes retroacti temporis negligentias redimere debet. Cui tamen sub hac clausula finem impono, ut cum tempus acceperitis, devotissimi vestri, communis amici nostri, magistri Joannis Saresberiensis memineritis, sæpius ad animum revocando, quod relegationis pœnam primus ob hoc sustineat, quod necessitatibus ecclesiæ vestræ, et vestris utiliter ac fideliter deservire credebatur. Iterum et semper valete, memor nostri, in orationibus vestris.

EPISTOLA CCCCLXIV.

EJUSDEM AD EUNDEN.

C Venerabili domino et Patri sanctissimo THOMÆ, Dei gratia Cantuariensi archiepiscopo, suus et suorum suus [JOANNES Pictaviensis episcopus] salutem et spiritum consolationis.

D Excitatus præcurrentis famæ celebritate, et nominis vestri præconio, antequam nuntium vestrum viderem, ad curiam festinavi: sed, priusquam vel ipse illuc pervenissem, jam omnibus omnia innouerant, et plena erat omnis terra gloria Domini, et magnificabat omnis auditor, quod inventus est qui coram principibus terræ loqueretur prudentiam. Quamvis igitur patriarchatus vestri sedes amplissima suæ dignitatis nobilitate præfulgeat, vestro tamen per gratiam Dei merito plurimum illi honoris accessit, ut quod loci illius antistitibus familiare videbatur, nunc per vos in ea perpetuatum esse credatur. Et nunc quidem tanto gloriosius, quanto sæculi illius principes modestius incedebant, et iidem decessores vestri principibus suis minus putarentur obnoxii: præsertim cum et mater nostra sacrosancta Romana Ecclesia nullam eo tempore

integritatis suæ pateretur divisionem. Qui ergo vobis deest incipiendi audaciam, dabit et in perseverando constantiam. Dabit et in boni operis perseverantia proventum : aut illum utique, quem desideramus, aut certe fructuosiorē. Nam quod ad humanum auxilium attinet, nihil est quod de curia in aliquo, quod regem offendere debeat, expectetis. Cum enim tam nos, quam nuntius a latere vestro transmissus circa porrectas a nobis petitiones per multos dies laboraverimus, vix in una obtinuimus. Et illa quidem tam trepide consummatur, ut nihil scripturæ committatur, sed tantum vivæ vocis responsali credatur. Asseverabat tamen adhuc dominus Henricus Pisanus se ad extorquendam domini Londoniensis professionem laboraturum. Timeo ne incassum; quoniam omnia, quæ pro ea obtinenda mihi proponi posse videbantur, allegaveram. Primum, quod eum translatio ab omni obligatione liberasse videbatur. Neque enim in hujus Ecclesiæ episcopum recipi posset, nisi alterius Ecclesiæ episcopus esse desineret. Quod si episcopus esse desiit, desiit et Ecclesiæ Cantuariensi obligatus esse. Ad hæc, quid si in aliam transisset provinciam, nunquid non suo prosteretur metropolitano? Ubi manifestum est, quod illum translatio a prius facta professione liberat. Causam quoque non tacebamus, quare etiam Romanæ Ecclesiæ expedire posset, ut fieret, eo quod in nuper celebrato conventu sic se habuisset, tanquam sibi liber esse videretur. Consuetudinem quoque vulgarem prætendebamus: quod si quis novum feudum ab eodem domino recipiat, hominum quasi ex nova causa iterato facere compellitur. Ad quæ omnia hoc mihi responsum est, quod professio semel facta sic obligat personam, ut nulla status sui mutatione liberari possit, donec in alterius transeat jurisdictionem: nec eam aliqua ratione a vobis peti posse, nisi forte de consuetudine Ecclesiæ vestræ esset, quod solius archiepiscopi personæ, qui illam consecrasset, professio facta esset, et non ipsi atque successoribus suis canonice substituendis. Quod si ita esset, tunc quidem illam a vobis jure exigi posse, non utique suæ, sed vestræ ratione personæ.

De cætero, quod ad benedictionem abbatis Sancti Augustini pertinet, frustra aliquid solatii expectatis. Quod igitur agitis, dilectissime Pater et domine, solius Dei, et illius, cui Deo auctore præsidetis, Ecclesiæ libertatem conservandarum intuitu faciatis, et ab eo solo laboris hujus et consolationem et retributionem expectetis. Ego, sicut a multis mihi proponitur, non modo similem, sed duriorē calculum expecto. Utinam exsilii vestri particeps futurus aut prævius. Nec utique nobis inglorium erit, ut qui pro vanitatibus et sæculi delectationibus, multis sæpe mundi prosperis abusi sumus, nunc, si necesse fuerit, pro retributione cælesti adversa simul sustinere non formidemus. Laborat tamen Pisanus noster, ut mihi in loco tutiori prospiciatur. Et id ipsum se vobis per abbatem de Eleemosyna intimasse asse-

verat. Ego Pontiniacum proficiscor, ut illius religionis devotioni tam vestram quam nostram commendem intentionem. Nam ibi divinum implorandum est auxilium, ubi humanum deesse videtur. Orationibus Clarevallensium per ipsum papam vos commendari fecimus. Bene valeat dominus meus.

EPISTOLA CCCCLXV.

EJUSDEM AD EUMDEM.

THOMÆ Cantuariensi archiepiscopo, JOANNES Pictaviensis episcopus, salutem et in adversis patientiam.

Paternitatis vestræ litteras, quas novissime nobis attulit frater Simon, devote suscipientes multum consolationis ex ipsis percepinus. Quas etiam quasi quoddam remedium eorum, quæ contra volum nostrum nobis prænuntiata erant, habuimus. Congruo quoque loco litteras vestras consolatorias; Genomanni scilicet, præsentē domino illius sedis, recepinus. Qui et ille vir Catholicus, sanctæ Ecclesiæ tribulationi compatiens, ex eisdem litteris ærimum, ex sinistris prænuntiatis non modice afflictum, consolatus est. Spem etenim nobis inde concipere licet, quod si vera sunt, quæ nunc proponuntur, imperator ille, pluribus occupatus, tyrannidi suæ in Ecclesiam exercendæ minus vacare poterit. Est autem super quo miramur, litteris vestris non fuisse expressum, quid actum sit in colloquio, quod dominus rex Francorum Altisiodori habuit in Octavis apostolorum. Consultum vero nobis videtur, quod beneficia, quæ idem rex Francorum et comes Henricus vobis obtulisse dicuntur, reciperetis, quibus patientius exsilium vestrum, donec dominus ad propria vobis reditum parari, supportare possitis. Dominus etiam rex prædictus secretius et securius consilia sua discretioni vestræ concrederet, si quo beneficio vos sibi obligatiorem et obnoxioiorem speraret. Sed et multo sollicitior fieret, ut vobis, vacante aliquo episcopatu vel archiepiscopatu, in reditum perceptione provideret, si quid de dominio suo in usus vestros contulisset, ut sic propria sua ad se redirent. Necesse quidem habetis, secundum quod præsens temporis status nobis dat conjicere, fortunæ vestræ, quibuscunque nodis poteritis, consulere, ut inimicis vestris ad suam confusionem videamini ad quantamcunque hujus exsilii patientiam esse paratus. Unde, ut sæpius discretionem vestram diligenter commovimus, adhuc etiam persuadere intendimus, ut his, quibus carere poteritis, vos exoneretis, ad temporis malitiam respicientes, quæ vobis ad propria facilem vel citum reditum minime repromittit. Scire autem vestra debet prudentia, quod nemo est qui vobis ad ignominiam reputet, si præsentī statui vos conformantes, sed et domui religiosæ, quæ vos exhibet, condescendentes, moderato et necessario tam equitatarum, quam personarum numero contenti esse velitis. Nosse autem vos volumus, quoniam a regina nec auxilium nec consilium sperare potestis, maxime cum totum consilium suum

In Radulphum de Faia, qui vos non minus solito persequitur, contulerit. Singulisque diebus multæ succrescant præsumptiones, quibus fidem fieri posse videtur, quod infamia, cujus alias meminimus, veritati accedat. De cætero, de rumoribus, quos ab Angliâ referent ad reginam a rege commeantes, qui partem suam magnificare videntur, vobis communicare possumus hos: scilicet quod dominus rex jam secundo cum Wallensibus congressus, sed, ut gloriântur, eos aggressus, illos confudit, et innumeram de eisdem multitudinem interfecit. Regem vero aiunt de suis paucos amisisse. Litterarum vero, quas rex matri suæ destinavit, transcriptum vobis mittimus. Scriptum quoque, quod magister Hugo, clericus Ricardi de Iwelcestre, vobis direxit, per manum latoris præsentium recipietis. Quid vero in colloquio de Salesberi actum sit, nos nescimus, præterquam quod dominus rex episcopos, quos illuc vocaverat, emunxit, et eos statim dimisit, eorumque familias secum retinuit. Si qua alia vestræ cognitioni expedire cognoverimus, vobis manifestare curabimus. Vos quoque nobis vicem rependere dignemini. Valete.

EPISTOLA CCCCLXVI.

EJUSDEM AD EUNDEN.

Domino et Patri reverendo Tuome, Dei gratia venerabili Cantuariensi archiepiscopo, suus J. eadem gratia Pictaviensis Ecclesiæ humilis sacerdos salutem, et juges in Domino successus.

Ipsa die Purificationis Beatæ Mariæ, quo litteras vestras recepi, locutus fui cum Joanne Cumin, et Radulpho de Tamewurde, qui præcedente die Turonum ingressi sunt, a curia domini papæ in continenti revertentes. A quibus cum multa, tam super statu quam super agendis suis explorare in voto haberem, in paucis per eos certiorari potui, tantquam a me omnia occultando, domino suo se crederent obsequium præstare. Verumtamen ab eis vel pauca, vel invitis extorsi, nonnulla a decano Beati Mauricii, in cujus hospitio recepti erant, accepi. Aliqua etiam per clericum quemdam Santonensem, qui in comitatu eorum aliquandiu venerat, addidici. Retulit siquidem mihi idem clericus, quod dominus Papiensis multiplicibus et instantissimis precibus regis Angliæ sollicitatus, et a domini papæ simili sollicitudine et instantia impetratus, procul dubio legatus venit in omnem terram prædicti regis. Et creditur, quod cum omni plenitudine potestatis veniat, ut cognoscat, judicet, plantet et evellat: maxime ut inter regem sive alios, et vos super universis querelis vestris potenter decernat, et irrefragabiliter pronuntiet, remoto omnis appellationis obstaculo. Ita quod non multum vobis prodesse possit decretum repetendæ restitutionis vestræ, præsertim ut tanto tempore habeatis possessionem, quanto passus estis ejectionem ante principalis causæ constitutionem. Omni enim exceptioni, omni decreto, ut dicitur, præjudicium afferret, præfati legati plena potestas. Sed et huic ad-

A junctus esse narratur dominus Otto, diaconus cardinelis de carcere Tulliano. Et utinam! Stellæ namque unius malitiam, si non exstinguat, temperat tamen et attenuat sibi adjuncta magis propitia stella, et benevola. Illi siquidem duo urbe egressi sunt in Kalendis Januarii, ad partes nostras properantes. Illud autem verbum, quod mihi significastis, clericum quemdam vestrum a curia redeuntem vobis attulisse, non facile mihi persuaderi potest, quod sub tali conditione absolutus sit Joannes de Oxeneford, nec quod consuetudines illas domino papæ abjuraverit, sive de mandato regis, sive alio modo. Hoc autem dicitur, quod persona ipsius Joannis erepta est a potestate vestra, quantum ad excommunicationis innodationem. Namque, sicut referunt isti, qui nunc redierunt, Joannes Cumin, et Radulphus de Tamwurde, Joannes de Oxeneford plus gratiæ et favoris in oculis domini papæ promeruit ex hoc, quod suggessit ei, pacem inter regem et vos posse reformari, si esset, qui de ea fideliter tractaret: promisitque se ad hoc omnimodam operam daturum. Unde prædicti Joannes et Radulphus illum Joannem de Oxeneford regis proditorem vocant, et prædicant; qui, quod rex habet pro impossibili, se facturum pollicitus est, ut in propriis negotiis melius procederet. In hunc modum ipsi Joanni de Oxeneford in operibus suis omnibus detrahunt isti duo Joannes et Radulphus. Dicunt quoque, sicut a decano Beati Mauricii, qui fideliter ab eis hæc omnia exploravit, accepi, quod omnes litteras, quas domino papæ contra regem direxistis vel alii pro vobis, et petitiones vestras omnes regi apportant. Inter quas multum mirantur se invenisse litteras domini Bituricensis, de quo rex nihil tale suspicabatur. Sed et quorundam episcoporum litteras de terra regis, imo etiam quorundam de domo regis, contra ipsum pro vobis scribentium, dicunt se habere. Verum qui essent, vel episcopi, vel illi de domo regis, noluerunt aliqua ratione revelare, nisi ipsi regi. Jactabat autem Joannes Cumin se domino papæ improperasse, quod ei litteras contra regem misissetis. Et ne hoc posset inficiari, principium litterarum dixit tale esse: « Satis superque, domine reverende, sustinui. » Sequens ipsarum continentia erat, quod vos in personam regis sententiam ferretis. Litteras vero istas dixit se Viterbis acquisisse, ubi quidam nuntius vester eas deferens dicitur fuisse deprehensus. At verisimilius est, quod eas in cancellaria habuit. Ab ipsis Joanne et Radulpho didici, quod alii excommunicati vestri missi sunt ad absolvendum quibusdam in partibus vestris, sed qui illi essent, per illos scire non potui. Creditur autem quod Joannes de Oxeneford in Angliam profectus sit, ut testes et accusatores contra vos cum consilio eorum, qui sanguinem vestrum sitiunt, præparet, et instruat, et adducat. Quorum machinationibus duris et diris, dum tempus habetis, consulo, quocumque modo potestis, occurratis. Magna enim et multa in vos parati sunt tentare:

innocentiam vestram super criminibus gravibus accusare. Verum ille nullam consolationem recepit, nec aliquam fiduciam de promissionibus regis concipit. Medicis autem querentibus ab eo ægritudinis ejus causam et occasionem, respondet quod, si qua medicina rancorem et indignationem animi tollere potest, tunc ipse, et non aliter, curari poterit. Ad hæc isti, qui modo a curia redierunt, multum vobis nuntiant, eo quod in litteris vestris, quas domino papæ direxistis, et quas modo regi reportant, regem malitiosum tyrannum nominastis, et sæpius malitiam ejus repetistis. Bene valete, et spiritus consilii vobiscum sit, et in quantum famam ejus conservaverim, magister scholaris noster vobis scribit.

EPISTOLA CCCCLXVII.

EJUSDEM AD EUNDEM.

Reverendissimo Patri ac domino THOMÆ, Dei gratia Cantuariensi archiepiscopo, suus JOANNES, eadem gratia Pictaviensis Ecclesiæ humilis sacerdos, salutem et consilii spiritum.

Supra vires meas esse fateor, serenissime Pater et domine, in re tam ardua consilium dare. Quia tamen novi quod ex affectione potius ad nostræ parvitatis consultationem omnia contulistis, quam quod nos in re tam incerta certam præsumamus præscribere formam, dicam quod sentio. In primis, in his quæ dominus papa vobis consulendo scribit, suam potius quam vestram causam agit. Licet enim sua omnium nostrum causa sit, illud tamen prima facie tractat, ut, quocunque libertatum Ecclesiæ vestræ pro quibus exsulatis dispendio, in sua interim quasi fidelitate et vel simulata obedientia regem retineat. Quanquam mihi certus esse videar, quod et illi et toti quæ ad ipsum respicit Ecclesiæ, plurimum expedit, ut ab initio post commotiones canonicas secundum justitiæ tramites adversus regem constituisset. Verum ut, omissis his quæ nec domino papæ nec dominis nostris cardinalibus aliqua ratione persuaderi potuerunt, illa tractemus quæ possumus, quantum ad securitatem eundi, morandi, et, si necesse fuerit, revertendi, sufficere debere credimus, si tres illæ personæ, quarum in litteris vestris meministis, vos in fidem suam repperint. Quibus tamen et fratres Templi, si fieri potest, adjici desiderarem, de quorum consilio nunc plurimum rex pendere dicitur, tanquam nescio quid secretum cum iis tractans, cum tamen ipsum omnia in dolo et dicere et facere arbitretur, sicut in negotio vestro quod per eosdem fratres tractabatur, ipsum ambulasse vobis in aliis litteris significavimus. Si mihi nuntii nostri vera nobis reportaverint, clerici domini Rothomagensis Dan[iel] scilicet et frater ejus magister T. non illam quam desiderabant redditus vestri securitatem adhuc sub reditu nostro receperant, imo prædictus Dan[iel] quia fortius ad securitatis firmitatem instabat, molesta a rege verba recepit. Verum, si vos imperatrix et dominus Rothomagensis ad suum invitaverint colloquium, confidenter accedetis, sed, quantum mihi videtur,

A non dico paucis, sed paucissimis comitatus, ut faciem exsultantis ipsa quoque paucitate exprimat. Magis enim omnes ad compassionem movebit paucitas illa, quam si centum post vos de coexsulibus vestris traheretis. Quis enim sine multo cordis dolore videre poterit illum quondam regis cancellarium, et nunc in tantæ dignitatis fastigio constitutum, qui tanto iam utroque statu incedebat, tot stipatus ordinibus, pro Ecclesiæ suæ libertate ad extremam deductum paupertatem, ut vix aut duos aut tres religiosos post se trahat? Præterea Ecclesiæ obiter constitutæ, vos in eundo et redeundo exhibere sine onere poterant, ad quas non solum declinandorum sumptuum, sed magis orationum gratia divertetis. Circa hæc plurima allegare possem, nisi quia ad cætera festino. Quantum perpendere possum, hi qui de pace vestra tractant hoc solum prima fronte loquuntur, quatenus cum securitate et pace ad Ecclesiam vestram redire possint. De modo et forma redditus vestri nemo agit. Ubinam, quæso, et quando hæc discutientur? An postquam in Angliam redieritis? Ubi scilicet nec imperatrix nec comes Flandriæ præsentis esse poterunt, solus forsitan Rothomagensis ad id prosequendum veniet. Nostis quomodo ibi omnes ea tantum loquuntur, quæ regi placitura existiment. Certe vereor ne sub quocunque justitiæ prætextu, denuo vos exsulare oporteret, et fierent novissima pejora prioribus, omnibus contra vos tum in curia domini papæ, tum in præsentia regis Francorum, et verbo et scripto attestantibus. Nemo igitur hoc vobis persuadeat, ne forte nisi sub certa et penitus eliminata forma redire tentetis, nisi omnia ad vos pertinentia in regis arbitrium conferre velitis, quod vobis persuadere non audeam. Quod si ista ante reditum vestrum procurari debent, cujus diligentia atque discursu animi vestri in unum poterunt consensum trahi, dum ipse in Anglia aget et vos in Burgundia exsulabitis? anni unius revolutio huic discursui non sufficeret. Non video quomodo ista recte discutiantur, nisi illum necessitas aliqua in partes cismarinas traxerit, aut vos ad angustius mare versus Flandriam scilicet descenderitis.

Verum ut ad ipsam tandem pacis formam veniamus, sive per vos ipsos, sive per interpositas personas tractetur; ex his quæ nobis proposuistis capitulis, nec omnia nec nulla nobis objicienda videntur. In primis de feodo W. de Ros interim silendum esse arbitror, non quod in judicio possessorio facile obtinere non possetis, ubi ex æquo contenderetis, verum in petitorio timendum vobis esset, et dolo petere videtur, qui id petit quod statim restitutus est. Plane spoliatio sine judicio facta restitutionem vobis pollicetur. Auctor vero donationis, aut ut verius dicam venditionis, causam proprietatis non recte tuebitur. Verbum quoque ad terras II. de Essexia pertinet, sub dissimulatione tantisper prætermittatur: quanquam manifestus ibi injuriator rex adversus vos. Sed injuria hæc magis ad regalia

vestra respicit, quam ad ecclesiasticæ libertatis diminutionem, pro cuius nunc exsulatis defensione. Illud vero nulla ratione dissimulare poteritis, quin statim ab initio repetatis quæ vobis ablata sunt, et multo fortius quæ personis maxime ecclesiasticis vobiscum exsulantibus, tam cismarinis quam transmarinis violentis sunt adempta, quarum innocentia omnibus nota est et causam vestram non parum iustificavit. In hoc capitulo nihil indulgendum puto etiam temporis malitiæ. In hanc rationem cadit et pecunia illa quam post egressum vestrum a fideiussoribus vestris extorsit. Inter quos dominum Salesberiensem in tantum prægravasse dicitur, ut nec uno bove hodie dominium Ecclesiæ Salesberienensis extollatur. Hujus capituli in litteris vestris non meministis. Illud quoque omittendum non est, quia Ecclesiam Cantuariensem in eo statu libertatum suarum permansuram concedatur, in quo vos eam suscepistis, quamvis clausula hæc speciem honestatis in facie hominum magis præferat, quam aliquid utilitatis vobis conferat et sub obtentu iustitiæ litigii semper causam non præcidat, sed inducat. In summa dicam quod sentio. Si hæc et alia quæ discussionis necessitatem exigere videntur inter vos tractari cœperint, intelligere non possum, quomodo tanta animorum et causarum diversitas, huc certe adversitas in unum trahatur consensus. Una mihi via pacis et compendiosissima et tam vobis quam regi honestissima videretur, ut certarum et paucarum staretis arbitrio personarum; quarum illæ quæ ex parte vestra essent de regno vel potestate ipsius non essent. Alioquin nisi in digito Dei non possum harum tot et tam multiplicium exitum metiri difficultatum. Sub hujus autem pacis prætextu, possetis statim cum honestate reverti, et arbitratorum sententiam in ecclesia vestra expectare. Hujus vero ingressus vestri multas mihi videre videor utilitates etiamsi res optatum non sortiretur effectum. Inter cætera quidam quod coexsules vestros, quos semel introduxissetis, iterum expellere confunderetur, licet vos iusta qualibet causa excluderet. Ut enim asserunt qui de ejus conscientia hoc dicere videntur: de illorum magis quam de vestra eliminatione confunditur. Vos enim tanquam sponte, ut asserit, existis; illi nolentes in-

D viti et absque causæ cognitione expulsi sunt. Præterea quia forsitan illi jam vexatio intellectum dedit: gratiam vobis in oculis ejus ingressus iste pacificus, quique illi inhonestus non esset, pararet et pareret. Dicitur enim sæpius conqueri, quod omni certo firmoque consilio destitutus sit, quodque super his, quæ in Wallia ei acciderunt, supra modum confusus, jam de substitutione filii sui cogitet. Circa hunc articulum cum modo Turon. venirem, Hugo mihi de Sancta Maura pleraque secretius dixit: quæ præsentium latori auribus tantum vestris instillanda commisi, sicut et pleraque alia; tum quia non per omnia verbis illis fidem habeo: tum quia scripti prolixitas et negotiorum multipli-

A citas nos omnia scribere prohibebant: et utinam hujusmodi nuntios ad nos mittatis! quia et absque aspersione vobis loqui possunt et de illorum fide dubitare non est necesse. Bene valete!

Si ad colloquium in Normanniam transieritis, magistrum Joannem Saresberiensem, si fieri potest, vobiscum ducatis: tum quia homo bonæ fidei est, et alti consilii, tum quia apud religiosos et viros bonos magni nominis est: tum quia et imperatrix et dominus Rothomagensis bene illi cupiunt et de illo bene sentiunt. Iterum et semper valete! Coexsules vestros nomine nostro salutate; inemor nostri in orationibus vestris.

EPISTOLA CCCCLXVIII.

EJUSDEM AD GILBERTUM LONDONIENSEM.

B Venerabili domino et amico G. Dei gratia Londoniensi episcopo, J. eadem gratia Pictaviensis Ecclesiæ humilis sacerdos, salutem et patriæ cœlestis jucunditatem.

In ulteriorem vestræ sinceritatis gratiam me fuisse admissum, et gaudeo plurimum, et grates vobis habeo. Id profecto ipse rerum effectus præsentem docuit, et absentem dubitare non permittit. Quantus enim honor a vobis mihi sit habitus, dum adhuc essem in solo natali constitutus, nec alios latet, nec ego possum esse immemor. Postquam vero dispositione divina civitatis ignotæ sum factus incolæ, lator quoque præsentium nepos noster vestræ dilectionis certissima cœpit argumenta. Pro quo vobis oblata petitiones tam facili benignitate sunt exceptæ, ut in parte nulla sunt illi repulsa damno, vel mihi verecundia. Igitur, ut vota nostra vestris cumulentur beneficiis petimus, quatenus data opportunitate, non solum per oblationem precum obtineat ut paginæ divinæ lectioni det operam, verum ut hoc fiat, pateant audire mereatur admonitionem, et sicut ipsum ad hoc specialiter deputo, ut vestris vigilantibus obsequiis inhæreat, totaque insudet devotione, pro modulo suo vices nostras acturus, ita in laboris et fidei devotæ præmium, charitatis nobis exhibitæ sentiat et lætetur se esse participem. Valete.

EPISTOLA CCCCLXIX.

RICARDI PICTAVIENSIS ARCHIDIAconi.

Pictaviensis archidiaconi.

D Qui fuerint primi nuntii regis, et qui secundi, et quid tam hi, quam illi postulaverint, et quomodo a curia recesserint, sub ea qua potero brevitate perstringam. Primi missi sunt Joannes Cumin, et magister David ad petendum absolutionem et relaxationem episcoporum. Sed Joannes Cumin prius venit ad curiam, et fere quindecim diebus in ea, antequam David veniret, et post multam instantiam suam prius facta promissione quingentarum marcarum auditus est, astantibus cum eo et plurimum allegantibus ad excusationem episcoporum clericis Eboracensis archiepiscopi, et nuntio Dunelmensis. Et credo quod reportassent absolutionem nisi supervenisset rumor de morte archiepiscopi, qui omnia denigravit. Ita enim perturbatus est dominus papa, quod nec etiam

sui fere per octo dies cum eo potuerunt habere colloquium. Et generaliter interdictum est, ne Anglici ad eum haberent accessum. Et suspensa sunt omnia eorum negotia. Secundi nuntii fuerunt episcopi Wigornensis et Ebroicensis, et abbas de Wallace, et archidiaconi Saresberiensis, et Lexoviensis, et dominus Robertus de Novo Burgo, et Ricardus Barre, et magister Henricus Pinchun et quidam Templarius. missi ad excusandum regem, quod nec ejus mandato, nec voluntate interfectus esset Cantuariensis. Hoc autem non est negatum, quin ipse dedisset causam mortis suæ, et quin aliquid dixisset, unde interfectores illi occasionem interficiendi sumpserunt. Sed nec isti secundi nuntii simul ad curiam venerunt, et a domino papa non sunt admissi, nec in conspectu ejus apparere potuerunt. Deinde ad preces quorundam cardinalium recepti sunt abbas et Lexoviensis archidiaconus. Appropinquante die Jovis, proxima ante Pascha generaliter dicebatur in curia, quod dominus papa illa die daturus erat sententiam excommunicationis in regem et regnum. Unde nuntii timore perterriti quibusdam cardinalibus intercedentibus significaverunt domino papæ se accepisse in mandatis a domino rege, quod jurarent in præsentia ejus, quod rex stabit mandato suo, et hoc jurabit in propria persona sua. Eadem die Jovis fere circa horam nonam vocati sunt tam nuntii regis, quam nuntii episcoporum, et in generali consistorio juraverunt nuntii regis, scilicet abbas de Wallace, et duo archidiaconi prædicti, et Henricus, et Ricardus Barre, quod rex stabit iudicio domini papæ. et ad præceptum ejus hoc jurabit. Nuntii vero Eboracensis archiepiscopi, et Londoniensis et Saresberiensis episcoporum juraverunt similiter quod domini sui stabunt præcepto ejus, et hoc jurabunt. Eadem tamen die excommunicavit generaliter interfectores Cantuariensis et omnes qui consilium, vel auxilium, vel assensum præbuerunt, et omnes qui eos in terra sua receperint aut foverint. Post Pascha venerunt Wigorniensis et Ebroicensis episcopi, et Robertus de Novo Burgo, et utrum illud juramentum ab eis exactum sit, nescio : sed scio quod non juraverunt. Et cum stetissent in curia per quindecim dies, et eo amplius, vocati sunt ad audiendum responsum suum. Nam illi cum aliis concordabant, tam in excusatione regis, quam in accusatione, secundum quod dictum est. Et cum crederetur dextrum calculum reportaturos, confirmavit dominus papa sententiam interdicti, quam dominus Senonensis dederat in terram regis cismarinam, et sententiam excommunicationis et suspensionis, quæ data erat in episcopos Angliæ. Præcepit etiam quod rex temperaret ab ingressu ecclesiæ, et subjunxit, quod ipse mittet legatos suos ad regem, ut videant et cognoscant ejus humilitatem. Deinde post multam nuntiorum instantiam, et interventu quorundam cardinalium, et magnæ pecuniæ etiam, sic dicitur, hoc impetratum est, quod dominus papa scribit Bithuricensi archiepiscopo, quod si infra mensem post

A adventum nuntiorum in Normanniam non audierit legatos transalpinasse, quod tunc absolvat Londoniensem et Saresberiensensem ab excommunicatione, præstito prius juramento, quod stabunt mandato domini papæ, tam illis quam aliis in suspensione manentibus. Sic recesserunt nuntii domini regis a curia, nec aliud reportant. Quando autem venturi sint, vel qui, nondum credimus cardinalibus innotuisse. Sed nunc non oportet vos timere interdictum in Anglia, sicut credo, si rex legatis parere voluerit. Et dominus papa scribit ei, et invitat eum ad humilitatem. Sed vix fuit impetratum, ut ei scriberet.

EPISTOLA CCCCLXX.

JOCELINI SARESBERIENSIS AD THOMAM CANTUAR.

B THOMÆ, Cantuariensi archiepiscopo, JOCELINUS, Saresberiensis episcopus.

Veniens ad nos monachus quidam ex parte vestra, ut asserebat, sua nobis relatione indicavit, quod vestra sublimitas nos gravissime arguebat de Joanne de Oxeneford, clerico et fideli domini nostri regis, in decanatum Saresberiensensem admissio, quem quidem communi voto et unanimi assensu capituli nostri canonice electum suscepimus, et secundum Deum et juxta consuetudinem Ecclesiæ confirmavimus, attendentes ex hoc ipso majorem inchoatæ dilectionis firmitatem inter dominum papam et dominum nostrum regem provenituram; vestræ nihilominus commoditati prospicientes, ut exinde ad gratiam domini nostri regis promerendam facilius sanctitati vestræ pateret accessus; non minus quidem de vestra, quam de Ecclesiæ Saresberiensis pace reformanda, et libertate conservanda diligentes et solliciti. Quia vero præfatus monachus inauditam suspensionis sententiam, tam ab omni sacerdotali, quam episcopali officio in nos proposuit, ne tanto gravamine innocentes opprimeremur, absentes, non citati, indefensi, non confessi, neque convicti, ad sedem appellavimus apostolicam. Et, sicut tunc verbo, ita et nunc scripto in vestra præsentia appellamus, tam personas quam totam Ecclesiam nostram protectioni beati Petri et domini papæ submittentem. Noverit sanctitas vestra non modica nos admiratione moveri, cæterosque hujus rei auditores, tam subito motu, tam severo iudicio, non dico præcipiti voluntate, patrem in filium irruisse innocentem, immeritum, non contumacem, non tertio, non secundo, sed nec semel citatum, ut prædictum est, absentem, indefensum, non confessum, non convictum condemnasse, ut vestram prudentiam præteritis videatur illud Gregorii : « Sepe in solvendis ac ligandis subditis suæ voluntatis motus, non autem causarum merita sequitur pastor, sicque ipsa ligandi atque solvendi potestate se privat, qui hanc pro sua voluntate, non pro subditorum moribus exercet, qui erga quemlibet proximum odio vel gratia movetur. » Considerandum erat, quod subjectos magno moderamine pastores solvere debeant vel ligare. Dignum erat memoria illud Au-

gustini : « Cœpisti habere fratrem tuum tanquam publicanum, ligas eum in terra, sed ut justo alliges, vide. Nam injusta vincula dirumpunt justitiam. Scitis quia qui dicit justum injustum, aut qui injustum, justum, abominabilis uterque est. » Avertat Dominus a Patre meo et domino, ne quid sibi de Phariseorum assumat supercilio, ut vel damnet innocentem, vel solvere noxium arbitretur. Legit sanctitas vestra de leprosis præceptum esse, ut se ostendant sacerdotibus : et, si lepram habuerint, tunc a sacerdote mundi fiant. Prius habenda erat notitia delictorum, audienda varietas peccatorum, exinde ligandum aut solvendum. Nemo enim, ut ait Gregorius, præpropere vel præpostere, scilicet non commonitus neque convictus, est judicandus, dicente Sixto papa : Incerta nemo unquam pontificum judicare præsumat, et quamvis vera sint, non tamen credenda sunt, nisi quæ certis indicis comprobantur, nisi quæ manifeste convincuntur, nisi quæ judicario ordine publicantur. Denique, Pater venerande, ne factam appellationem prosequi compellamur, qua possumus et debemus humilitate sanctitati vestræ devotius supplicamus, ut nostri gratia, paterna molis miseratione, sententiæ rigorem in nos, et in Joannem decanum Saresberiensem, et ecclesiam nostram factæ misericorditer relaxetis : et quæ in nobis corrigenda videritis pro loco et tempore, juxta statuta Patrum et formam canonum, cum debita veneratione corrigatis.

Inter hæc, venerande Pater, unum est, quo admodum movemur, nec vos minus tangere debet : quod a vobis, tantæ auctoritatis viro, tantæ maturitatis persona, tanto patre ac pastore, tantæ facilitatis processerit verbum, ut dominum et papam nostrum, sive alium nobis prælatum abjuraremus vel abnegaremus. Absit ut nos adeo derelinquat Dominus et confundat ! Deum testamur et veritatem, quæ Deus est, quia nec ex ore nostro processit hoc verbum, nec ex corde propositum, nec quidquam a nobis actum est, vel etiam exactum, quod adversus Ecclesiam Dei fuerit, vel quod dominum papam vel prælatos nostros in aliquo debuerit offendere. Unde testes invocamus Cicestrensem, et Exoniensem, et Lincolnensem episcopos, qui in omnibus, quæ diximus et fecimus, interfuerunt, ubi Dei gratia remissa est nobis et ecclesiæ nostræ regis indignatio. Valeat et vigeat chara nobis vestra paternitas !

EPISTOLA CCCCLXXI.

EJUSDEM AD GILBERTUM.

Venerabili domino Patrique charissimo G. Londoniensi Dei gratia episcopo, JOCELINUS, Saresberienensis Ecclesiæ humilis minister, salutem et modicum munus, se ipsum.)

Exsultat pater evangelicus cui restitutus est filius in longinqua profectus. Exsultavimus Dei gratia et nos reverso filio evangelico qui perierat et inventus est. Occurrimus ei in tympano et choro usque ad

A ostia. Occidimus ei vitulum saginatum, et altitia præparavimus, quibus utinam et vestra reficerentur jejunia. Prospera nobis nuntiant Dei gratia nuntii nostri ad dominum nostrum regem properantes, quorum in reditu vel mandato, et nostra pendet expectatio, et domini nostri regis responsio, quid nos agere disposuerit. Proinde Cenomannis eligimus moram facere, donec nos mandatum regium alias trahat, quod forte Andegavis erit, cum civitas illa a via qua reversurus est dominus rex non longe distet. Si vero descenderemus Argentonium, et longior forsitan nobis via restaret, et pincerna pro vino meracissimo, quo abundamus, turbatoris subere cervisiam, generosis invisam, etiam parcius propinaret. Hoc etiam est domini Cicestrensis consilium, qui minus consiliolum ducit certum pro incerto domicilium mutare, et Baccho Libero, ancillam festuæ filiam maritare. Valeat charissima nobis vestra dilectio.

EPISTOLA CCCCLXXII.

CAPITULI SARESB. AD THOMAM CANTUAR.

THOMÆ Cantuariensi archiepiscopo, capitulum Saresberienense.

Ad nos usque pervenit discretionem vestram in episcopum nostrum gravaminis non modici dedisse sententiam, et graviolem in decanum nostrum vos daturus proposuisse. Quoniam ergo prælatorum nostrorum gravamen nostrum reputamus, statim hoc audito ad sedem Romanam appellavimus, et in vestra præsentia appellamus, protectioni beati Petri et domini papæ nos et ecclesiam nostram submittentem. Valeat et vigeat paternitas vestra.

EPISTOLA CCCCLXXIII.

MATTHÆI TRECENTIS AD ALEX. PAPAM.

ALEXANDRO PAPÆ MATTHÆUS Trecentis episcopus. Apud dominum meum fiducialius agō, etc. Vide inter variorum ad Alexandrum III epistolas, post ipsius Regesta.

EPISTOLA CCCCLXXIV.

ROGERII WIGORNIENSIS AD CAPITULUM CANTUARIENSE.

HENRICUS Wigorniensis episcopus capitulo Cantuariensi.

Acta nostrorum paucis dilectioni vestræ perstringo. Siquidem nostrates metu interdicti in partibus nostris divulgati, deliberatione habita, et episcopis nostris accitis, concione contracta sciscitanti sunt a singulis, utrum personas suas et ecclesias sibi commissas sub illa vellent appellatione includi, quæ dudum ab episcopis nostris in initio Quadragesimæ, scilicet ad terminum Purificationis, facta fuit : quam et communi consilio proposuerant in octava Pentecostes innovare. Requisitus ergo Dunelmensis episcopus, sicut sedebat primus, respondit quod illi appellationi non interfuerat, neque mandatum commonitorium inde aliquod in scriptis vel sine scriptis audierat, deliberaturum se cum metropolitano suo super hoc, et quidquid liceret, salvo ordine Dei et suo, se consulte facturum. Meruit autem tali delusione favorem audientium, et dila-

tionem. Post hæc Exoniensis requisitus, quid inde censeret, respondit eo inconsulto coepiscopos suos facile ad illam appellationem convolasse, non posse pariter et illa appellatione inniti, et excommunicatorum consortium declinare, periculum autem imminere, si summi pontificis sententia interdictum illud corroboret, cui discrimini nulla se vellet ratione committere. Si tamen Ecclesiæ Dei consulere expedire, et prosecutionem ei regius favor indulgeret, ut mox regno posset excedere, de novo appellaret a gravamine, non illato, sed formidato, licet impetrari posset adversus omnem appellationem speciale subsidium: quod si ei innosceret, et pastoris sui sententia illum percelleret, obedienter illam suscipere. Hoc dicto Londoniensis religionem ejus ridiculam fecit, et Exoniensis deinceps extra synagogam fuit. Accitus est dominus Wintoniensis per responsales suos, ut apud Northamptonam super illa questione coepiscopis suis proposita responderet. Rescripsit itaque dominus Wintoniensis sic: Lex divina præscribit, quod appellatus ad majorem judicem, ad inferiorem appellare non potest. Quilibet autem qui appellat, appellationi prosequendæ sese ex necessitate astringit. Inde est, quod quia morbo senioque fatigatus a Domino appellor, sæculari et forensi appellationi faciendæ idoneus non existo. Unde dilectionem vestram exoratum esse volo, quatenus me in illas appellationis angustias parcatis intrudere, ubi maledictionis jaculum debeam formidare. Hanc vero responsionis formam, licet auditores suspicionis arguerint, maluit dominus Wintoniensis offensas hominum mereri, quam offendere legem Dei. Quod et palam fecit, quando denuntiationem excommunicationis sibi insinuatæ publicavit, et exinde consortium excommunicatorum attentius evitavit. Suggestur autem nobis quod Reginaldus archidiaconus Wiltesire patri suo reconciliationem impetraverit, et quod dominus papa sententiæ latæ prorsus ignarus existiterit. Unde et fingitur quod Londoniensi et Saresberiensi causæ ejusdam cognitionem cum apostolica benedictione deleget, estque data rescripti post diem latæ sententiæ. Super hoc vero cavillantur maligni, quod excommunicatos illos dominus papa reputet absolutos. Super his omnibus, quæ dilectioni vestræ scribere studui, cum in scholis vestris, causidicorum more, themata inde eliceritis, et juxta oratoriam vel legitimam institutionem Quintilianum vel Papinianum fueritis in argumentis et allegationibus imitati, merita causarum, ex incude et malleis vestris exsiliunt, nobis tanquam desideratum antidotum renuntiate, recepturi postmodum gratiora, et quæ vestram plurimum debeant spem alere, et fiduciam erigere, ut ex illis vobis fides fiat, quia vicistis mundum.

EPISTOLA CCCCLXXV.

HENRICI WINT. AD PRIOREM ET CONV. S. MARIE WIGORNIENSIS.

HENRICUS, Dei gratia Wintoniensis episcopus et

A apostolicæ sedis legatus, priori et conventui Sanctæ Mariæ Wigorniensis Ecclesiæ, salutem.

Miramur multum quod denarium sancti Petri de ecclesia et parochia ecclesiæ vestræ nondum reddidistis, cum ab omnibus episcopis secundum conductum iis terminum jam eum receperimus. Unde mandamus vobis et apostolica auctoritate præcipimus, ut, visis litteris istis, infra quindecim dies eundem beati Petri denarium Wintoniam mittatis, aut ne exinde in ecclesia vel parochia vestra divinum fiat officium, interdicimus, excepto viatico et baptisterio. Episcopo enim vestro et archiepiscopo absentibus, non habemus nisi vos quibus de hac rescribere debeamus. Valete.

EPISTOLA CCCCLXXVI.

B FRATRUM CARTHUSIANORUM AD HENRICUM REGEM.

Excellentissimo et in Christi visceribus amplectendo regi Anglorum strenuissimo, fratres Carthusiæ, utinam pauperes spiritu, sic in præsentem sæculo regnare. ut in futuro valeat coronari!

Cum sanctus Job sederet quasi rex circumstante exercitu, erat tamen mœrentium consolator. Rex regum et Dominus dominantium aperuit manuum suam, et habenas regni vestri multipliciter dilatavit. Oportet ergo ut semper ante oculos vestros habeatis illam terribilem sacrosanctæ Scripturæ comminationem, qua dicitur: *Potentes poterit tormenta patientur, et fortioribus fortior innotat cruciatus* (Sap. vi). Et illud Psalmistæ: *Terribili et ei qui aufert spiritum principum, terribili apud reges terræ* (Psal. lxxv). Divulgatum est ab Oriente usque in Occidentem, quod Ecclesias regni vestri intolerabiliter affligitis, et exigitis ab eis inaudita quædam et inconsueta, quæ si quæsierint, quærere tamen non debuissent antiqui reges. Potest autem fieri, ut in tempore vestro, quoniam multam contulit vobis Deus sapientiam, tanta afflictio utenque tolerari possit, sed forsitan post decessum vestrum tales regnaturi sunt, qui devorabunt Ecclesiam toto ore, et indurati cum Pharaone dicent: *Nescio Dominum, et Israel non dimittam* (Exod. v). Parcite, quæsumus, parcite dignitati vestræ, parcite nobilitati, parcite generi, parcite et famoso nomini vestro; et qui plenus ac potentissimus estis, formam compressionis futuris non dimittat. Mœrorem et ærumnam sanctæ Ecclesiæ, quæ fere ubique conculcatur, clementi oculo respicite, et regia consolatione eam fovere, ac tueri indesinenter et infatigabiliter studete.

EPISTOLA CCCCLXXVII.

A. CERTESIENSIS AD ALEX. PAPAM.

Venerando et charissimo Patri suo et domino ALEXANDRO Dei gratia summo pontifici et universali papæ, frater A. indignus Certesiensis minister, sinceræ dilectionis reverentiam ac debitam cum omnibus fidelibus obedientiam.

Vestræ majestati, charissime Pater et domine, etc. Vide in Alexandro III, an. 1159-81.

EPISTOLA CCCCLXXVIII.

H. CLUNIACENSIS ABBATIS AD GILBERTUM.

Venerabili domino et Patri, domino G. Dei gratia Londoniensi episcopo, frater humilis Cluniacensis abbas, salutem in Domino et quidquid potest obsequii et amoris.

Vidimus litteras vestras plenas dulcedinis et amoris, quæ humilitatem nostram tantis præconiis efferrunt, ut ad tantam lucem laudis infirmi nostri cordis oculi potius hebetentur et delitescant, quam tantum jubar acie pati irreverberata sufficiant. Nihil enim tale in nobis nostra conscientia recognoscit. Sed fortasse altiori consilio ideo facere voluistis, ut nos immerito commendando, stimulum pudoris suggeratis nobis, et audiendo quales esse debemus, nitamur coram Deo apparere quod dicimur. In his omnibus innotescit nobis erga nos animi vestri sinceritas, quia profecto nisi plurimum diligeretis nos, non possetis tam sincerus et tam verax, licet indigne de nobis talia profiteri. Quod superest, licet in magnum honoris apicem divina vos dignatio evocaverit, nihilominus tamen unum de specialibus Cluniacensis Ecclesiæ filiis vos esse præsumimus. Unde, quia nullo pacto vos erubescere credimus ad nomen matris quæ vos in Domino per Evangelium genuit, rogamus ut tam apud dominum regem Anglorum quam apud alios primores regni pro ejus negotiis sollicitus intendatis. Venerabilis frater noster dominus Arn[oldus], lator præsentium, vir utique quantum credimus religiosus et strenuus, cetera quæ dicenda supersunt venerationi vestræ plenius intimabit. Ipsum apud vos sollicitius esse volumus commendatum. Compatimini matri vestræ et erga ipsam pietatis viscera non claudatis, quæ multis ex causis a longo tempore tantis incommodis detrita est, ut vix jam valeat respirare. De fratre Roberto Eroi fecimus quod rogastis.

EPISTOLA CCCCLXXIX.

EJUSDEM AD EUNDEM.

Venerabili et charissimo fratri suo, magistro G. Dei gratia Londoniensi episcopo, excelso in verbo gloriæ, frater H. humilis Cluniacensis abbas, salutem et sincerum amorem.

Cum religio, sapientia et eloquentia, qua persona vestra ornata est, Ecclesiæ Dei honor sit, illi tamen specialis est gloria, quæ in Christo vos genuit, et uberibus suis lactavit. Felix, inquam, Cluniacensis Ecclesia, quæ meruit talem habere filium, qui easet flos doctorum, religionis speculum, et præsentis sæculi decus. In quo natura, gratia Dei præveniente et subsequente, omnia laudanda sic perfecit, ut vix aliqua reprehendenda reliquerit. De quo dubium est utrum malit virtutibus ornari quam emundari vitii. In quo scientia multarum artium vitiorum fuit interitus, non cumulus. Qui mundanum philosophum, vero Christo philosopho sic mutavit, ut istius veritatem retineret, illius astutiam non abjiceret. Qui magistrum scholarum sic dimisit, ut discipulatum idiotarum Christi devotus ad-

A diceret. Quem non necessitas, sed sola charitas traxit ad Christum; non miseria, sed solius perfectionis intentio alienavit a mundo. Cui multiplex scientia humilitatem accumulavit, humilitas constantiam adjecit. Qui tantum honesta diligere, otiosum odire, turpia timere, ut in voluntate habuerit, ostendit. Cui fuit injuria pro honestate, injuriis non affici, labor in requie esse pro justitia, requies in labore vivere pro veritate. Qui factus monachus, de clerico præter ordinem nil sibi retinuit; abbas constitutus, opera monachi non deseruit; elevatus in magnum pontificem, idem qui antea permansit. Quot gradus accesserunt, tot virtutes successerunt. Per multiplicem curam impositam, virtutes sibi auxit, non minuit. Monachum reservavit in opere, in sollicitudine nil perdidit de abbate, in observantia mandatorum Dei episcopum honoravit et extulit. A Domino factum est istud, et est mirabile in oculis nostris. Novit hæc Gallicana Ecclesia tota, et fere Latina, et laudant Cluniacensem Ecclesiam in hujusmodi filio. Scit hoc Cluniacensis et propter hoc, plurimum in Domino exultat. Audistis, charissime, quod in partem Octaviani declinaveramus, et conturbata sunt viscera vestra. Sed non turbetur cor vestrum, quoniam nunquam ei adhesimus. Nec ad preces, nec ad promissa terrores et blandimenta imperatoris, vel ad modicum acquievimus. Concilio ejus quod celebravit Papæ, nec propter amorem imperialem interesse volumus. In confinio regni et imperii sumus, Alemannia, Hungaria, Rossia, Lotharingia, Burgundia, trans Ararim provincia, Italia ex maxima parte, Lugdunensis provincia, cum imperatore obediunt domino O. Minatur imperator, se nobis ablaturum omnia quæ habemus in imperio ejus, nisi consentiamus ei. Comes Matiscon', qui juravit in verba imperatoris, et in cujus sumus potestate, extantum tenet gladium suum super cervices nostras. Lugdunensis cum suffraganeis suis suum parat jaculari anathema in caput nostrum. Domini cardinales qui sunt in regno maledictionem suam, non benedictionem, nobis promittunt. Reges Franciæ et Angliæ minantur se exterminaturos omnia nostra in regnis eorum posita, nisi domino papæ A. obediamus. Ex duabus integralibus partibus constat corpus Cluniacensis Ecclesiæ. Altera est in imperio, altera in regnis. Quamlibet amittamus, vix nobis, angustia nobis undique quemadmodum et Susanna. Credimus divino miraculo liberari, quemadmodum et ipsa. Omnipotens dextera non est impotens ad salvandum nos. Si decrevit liberare nos, continuo salvabimur. Adhuc in medio sumus, et regia via incedere deliberavimus. Vos igitur, qui pater noster estis per ætatem, frater per amorem, filius per gratiam, ne obliviscamini nostri, qui in omni charitate vobis conjuncti sumus. Ne obliviscamini matri vestræ, quæ, etsi jam in Christo vos parituri, adhuc tamen in visceribus suis portat, vobis congaudens, vobis condolens, vestra omnia prospera et adversa sua reputans. Alia quædam

dicenda, quæ epistola non loquitur, præsentium A illis, quos habuerunt in episcopatu tuo, nisi per
lator noster et vester monachus, vice nostra vobis
loquetur pro ipso et pro Ecclesia de Lenton,
cujus, ut audivimus, specialis estis defensor et
adjutor in causis, dilectionem vestram affectuose
rogamus, quatenus in ejus dilectionem et protec-
tionem, sicut cœpistis, dignanter invigiletis causa
Dei et Ecclesiæ Cluniacensis.

EPISTOLA CCCCLXXX.

PHILIPPI ABB. DE ELEMOSYNA AD THOMAM CANTUAR.

Reverendo in Christo Patri et domino THOMÆ,
Dei gratia venerabili Cantuariensium archiepiscopo,
frater PHILIPPUS de Eleemosyna et fr. L. de Curia
Dei, salutem et sinceræ dilectionis affectum.

A nostris utilitatibus non recedit, quod utiliter
accrescit usibus amicorum. Hoc enim habet amicitia
B proprium, ut sit ei suavis et jucunda possessio quid-
quid a suis professoribus possidetur. In sinum gra-
tiæ vestræ dilatato corde et affectu prompto magi-
strum Girardum benignius collegistis: vicissitudi-
nem quam potuit retulit, amicus fidelis inventus
est, factus est strenuus propugnator justitiæ vestræ,
allegator insignis, assertor providus causæ vestræ,
et operum vestrorum præconator eximius; nec sibi
pepercit nec suis ut vobis proficeret, et totum se
sic vestris impendit usibus et gratiam rependit pro
gratia, ut nihil sibi letum proponeret nisi quod
honori vestro militaret et nomini. Si a fructu magno
circa vos fidelem ejus operam torrens iniquitatis
absorbuit, non est minori dignus amplexu si quod
C voluit implere non valuit; quia, quantum potuit,
utilis esse non destitit. Nunc igitur, si in conspectu
principis illius magnorum suffragantibus meritis
pacem potuit invenire, esse non debet a cordis ve-
stri conspectibus alienum; sed, ut credimus, in
mente vestra debet florere cum gratia, si apud eum
gratiam receperit, cum quo familiaris et fidelis
honoris et pacis vestræ possit inire commercium.
Qui enim amicus est, omni tempore diligit, et
amicitia certa nulla vi, nulla necessitate excluditur.
Rogamus ergo dilectam nobis in Christo charitatem
vestram et benevola persuasione consulimus, ut
fidele vestro nullius conditionis apponatur dura ne-
cessitas; quia, sicut ait Ovidius:

Lenis alit flammam, grandior aura necat,

et æterna sapientia, quæ attingit a fine usque ad
finem fortiter, suaviter disponit omnia et cum magna
reverentia disponit nos. Bene valeat semper in Do-
mino vestra sinceritas.

EPISTOLA CCCCLXXXI.

HENRICI II REGIS ANGLIÆ AD EPISCOPOS ANGLIÆ.

Has litteras misit HENRICUS rex Angliæ singulis
episcopis Angliæ.

Nosti quam male Thomas Cantuariensis archiepi-
scopus operatus est adversum me et regnum meum,
et quam male recesserit: et ideo tibi mando, quod
clerici sui, qui circa ipsum fuerunt post fugam
suam, et alii clerici, qui detraxerunt honori meo
et honori regni, non percipiant aliquid de redditibus

illis, quos habuerunt in episcopatu tuo, nisi per
me, nec habeant aliquod auxilium vel consilium a te.

Teste Ricardo de Luci, apud Merleberg.

EPISTOLA CCCCLXXXII.

EJUSDEM AD VICECOMITES.

Has litteras misit HENRICUS rex Angliæ singulis
vicecomitibus Angliæ, in principio persecutionis
sancti Thomæ.

Præcipio tibi quod, si aliquis clericus vel laicus
in bailia tua Romanam curiam appellaverit, eum
capias, et firmiter custodias, donec voluntatem meam
percipias; et omnes redditus et possessiones cleri-
corum archiepiscopi saisias in manum meam, sicut
Randolphus de Broc, et alii ministri mei tibi dixe-
runt: et omnium clericorum, qui cum archiepisco-
po sunt, patres et matres, fratres et sorores, nepotes
et neptes ponas per salvos plegios, et catalla eorum,
donec voluntatem meam inde percipias, et hoc
breve tecum afferas, cum submonitus fueris.

EPISTOLA CCCCLXXXIII.

EJUSDEM AD REGINALDUM COLONIENSEM.

HENRICUS rex Angliæ REGINALDO schismatico Co-
loniensi.

Diu desideravi justam habere occasionem rece-
dendi a papa Alexandro, et a perfidis cardinalibus
ejus, qui proditorem meum Thomam, quondam
Cantuariensem archiepiscopum, contra me manute-
nere præsumunt. Unde cum consilio omnium baro-
num meorum, et cum consensu cleri, magnos viros
de regno meo, scilicet Eboracensem, Londoniensem,
archidiaconum Pictaviensem, Joannem de Oxene-
ford, Ricardum de Luci, Romam missurus sum,
qui publice et manifeste ex parte mea, et totius
regni mei, et omnium aliarum terrarum, quas ha-
beo, proponent et denuntiabunt papa Alexandro et
cardinalibus ejus, ne ulterius proditorem meum
manuteneant, sed ita liberent me ab eo, ut illum
cum consilio cleri in Ecclesia Cantuariensi possim
institui. Denuntiabunt etiam, quod quidquid Tho-
mas fecit, in irritum revocent. Hoc etiam postula-
bunt, quod coram eis papa jurari faciat publice, quod
ipse et successores sui et mihi et omnibus succe-
soribus meis regias consuetudines Henrici, avi mei,
inconcussas et inviolatas, quantum ad se, conserva-
D bunt in perpetuum. Quod si forte alicui petitionum
meorum contradicere voluerint, neque ego, neque
barones mei, neque clerus meus aliquam eis alterius
servabimus obedientiam, imo manifeste eum et om-
nes suos impugnabimus. Et quicumque in terra mea
inventus fuerit, qui ei post adherere voluerit, ex-
pelletur. Eapropter rogamus vos, sicut charissimum
amicum, quatenus fratrem Ernoldum, vel fratrem
Radulphum, hospitalarium, omni occasione remota,
cito ad me mittatis, qui ex parte imperatoris et
vestra prædictis nuntiis meis ducatum præbeat,
eundo et redeundo per terram imperatoris.

Visis litteris istis consuluit Coloniensis impera-
torem, quid regi Angliæ sit respondendum. Rescripsit
imperator voluntati regis Angliæ esse annuendum.

Quia quanto solemnius ista fieri, si consenserit papa Alexander, tanto maior ejus erit confusio. Et forte in occulto per alium templarium, vel hospitalarium, vel aliquem alium, a quo caveri non possit, rex Angliæ pro pecunia sua idem obtineret. Missus itaque est frater Radulfus hospitalarius ad regem Angliæ qui nuntiis, quos rex ad curiam mittere disponit, ducatum præbuit per terram imperatoris.

EPISTOLA CCCCLXXXIV.

EJUSDEM AD QUEMDAM CARDINALEM.

Rex Angliæ cuidam cardinali, vel cæui cardinalium.

Super his, quæ dominus papa vobis significavit, scilicet quod ab amore et devotione Romanæ Ecclesiæ mentem et animum averteramus, in primis respondemus, quod prudentia vestra plenissime cognovit, quam sincero affectu Ecclesiam Romanam, et personam domini papæ semper dilexerimus, et quanta pro eo fecerimus, et sustinuerimus. Siquidem, ut cætera silentio prætereamus, cum de ipsius susceptione controversia haberetur, ipsum non tracti recepimus, sed ad eum recipiendum alios, licet invitos, traximus et compulimus. Nec nos animum nostrum a dilectionis elongavimus plenitudine, sed ipse, qui, ut vobis liquet, a retroactis temporibus nobis præter modum molestus extitit, sicut operum in quamplurimis declaravit executio, et nunc maxime verbo et opere, scripto etiam nostram, quod summopere principum lædit animos, non desistit infamare personam, cum scripto suo et verbo nos Ecclesiæ persecutorem nominet, et gravatorem appellet. Attendat autem dominus papa, quam paterne erga nos egerit, qui nobis significavit, quod summa principum debet esse cautela et sollicitudo, famam suam conservare illæsam, nec paternum circa nos gerere videtur affectum, qui famæ nostræ adeo, opere et sermone derogat. Universitati utique vestræ constare volumus, quod quidquid honoris, celsitudinis et potestatis habemus, regnum etiam, et cætera, quæ nostro commissa regimini, singula a Domino et Creatore nostro nobis collata scimus et prosterimur, et ipsi soli non quantas debemus, quoniam ad id non sufficimus, sed quas possumus, gratiarum referimus actiones. Et utinam dominus papa pro nobis Dominum deprecetur, ut Domino et Creatori nostro debitam exhibere possimus et sciamus devotionem et reverentiam, et ut ipsi servire, et ipsum diligere, in tertia saltem quam debemus portione, valeamus! Sane licet, quantum ex debito tenemur, ipsum diligere et venerari non possimus, affectum tamen et devotionem habemus ipsi in singulis deservire, in omnibus obsequi, in universis obedire. In integritate autem gratiæ, et dilectionis domini papæ libenter perseverare volumus, et affectuamus, si nobis et regno nostro eundem honorem, et honoris et dignitatis conservationem observaverit, quam sancti et honesti Romani pontifices viris nobilibus et potentibus prædecessoribus nostris exhibuerunt. Verumtamen appellationes, quas pro-

ponit nos prohibuisse, et ne quis de regno nostro curiam Romanam visitaret, nos asserit inhibuisse, vestram nolumus latere prudentiam, quod nec appellationes nec visitationes aliquatenus impedivimus, quin eo modo, ea ratione, eo ordine fiant, quo temporibus prædecessorum nostrorum, virorum illustrium, juxta regni nostri consuetudines et dignitates solebant fieri; et sicut antiquiores et prudentiores regni nostri, tam clerici quam laici, recolunt et retractant. Quod vero confederationis factæ cum excommunicatis nos arguit, in hoc non æstimamus nos Deum offendisse, nec obviasse rationi, quia, sicut ex ore domini papæ accepimus, ipsum dominum Fredericum Romanorum imperatorem nunquam pro excommunicato habuit, nec postea ipsum excommunicatum fuisse alicui relatione cognovimus. Verum, etsi filiam nostram filio imperatoris in matrimonio concesserimus, nec in minimo nos deliquisse credimus, sed id nobis licitum esse non dubitamus, quoniam, ut a simili sumamus exempla, idem excellentissimo et potentissimo regi Henrico avo nostro licuisse recolimus, qui filiam suam Henrico bonæ memoriæ Romano imperatori matrimonio copulavit. Nos etiam a prædecessoribus nostris sumpta ratione, communicato consilio prudentum et discretorum virorum regni nostri, matrimonium inter filium imperatoris et filiam nostram contrahi concessimus.

Præterea, quod nobis scripsit, ut Cantuariensem archiepiscopum, quem a regno nostro nos asserit expulisse, in statum, a quo recessit, revocemus, et ad sedem suam reducamus, evidentissime novimus universitati vestræ liquido constare, quod ipsum nunquam expulimus, nec a regno nostro exire coegimus. Sed ipse, suæ magis levitatis et pravitatis impulsu, quam aliqua ratione ad hoc ipsum inducente, fugam arripuit, in eutione et proposito adversum nos malignandi, et nobis et famæ nostræ, quod nequaquam, ut omnibus liquet, promerueramus, maligne derogandi. Si autem idem archiepiscopus, sicut ex propria voluntate aufugit, eodem modo voluntarie reverti voluerit, et nobis fecerit, quod domino et principi facere debuit, nos eidem juxta clericorum et laicorum consilium, tam regni nostri quam transmarinarum, quod debemus exsequemur. Verum ipsum per nos revocandum non censemus, quem a regno nostro exire non coegimus.

Itaque, si vobis constiterit nos in aliquo deliquisse, et excessisse, consilio clerici et baronum nostrorum juxta consuetudines, et dignitates, et celsitudines regni nostri, quidquid debuerimus, animo libenti faciemus. Si vero aliquis iura, et consuetudines, et dignitates regni nostri impedire attentaverit, seu diminuerit, ipsum publicum hostem, et manifestum nominis nostri, et honoris, et regni æstimabimus inimicum, et nos vita comite dignitatum et consuetudinum regni nostri diminutionem nullatenus sustinebimus, quas illustres viri prædecessores nostri habuerunt, et tenuerunt temporibus sanctorum Ro-

manorum pontificum. De cætero, quod mandavit A per vos nobis insinuandum, ne scilicet ecclesias, vel personas ecclesiasticas regni et terræ nostræ gravaremus, vel gravari permitteremus, Deus vobis testis est, et mera conscientia, quod id usque in hodiernum diem nec a nobis actum est, nec permissum.

EPISTOLA CCCCLXXXV.

EJUSDEM AD ABBATEM CISTERCIENSEM.

HENRICUS rex Angliæ abbatem Cisterciensem.

Quando dominus Willelmus Papiensis et vos nostram apud Rothomagum adiistis præsentiam, con-questi sumus vobis quod quidam monachi ordinis vestri, quos in terra nostra præter voluntatem et assensum omnium fere baronum et hominum nostrorum cum omni honore et reverentia manu tene-ramus hæcenus, et promoveramus, quædam verba et mandata adversariorum nostrorum amaritudinis plena nobis deferebant, et quædam discordiæ semi-naria, et iræ, et odii incentiva, quæ a nullo probo viro aliquo modo essent proferenda. Promisit itaque nobis dilectio vestra quod illud corrigeretis, et monachos vestros a talium mandatorum delatione coerceretis. Post promissionem vero illam abbas vester de Criscampo scriptum quoddam Thomæ, qui fuit cancellarius noster, ex parte ejusdem nobis attulit, et ore suo legit, in quo nos arguebat et de fidei læsione, et de schismate nos videbatur accu-sare, et alia continebat scripti illius series indigna-tionis et superbiæ verba, quæ nostro derogabant honori et personæ. Inde est, quod vobis mandando at-tentius rogamus, quatenus injuriam nostram digna emendatione ita corrigere non omittatis, et honorem nostrum, et etiam ordinis vestri conservetis. Nove-ritis autem quod, si excessus monachorum vestro-rum non correxeritis, ulterius sustinere non poterimus, quin injuriarum nostrarum quæramus reme-dium, teste Jocelino de Baille apud Canon.

EPISTOLA CCCCLXXXVI.

EJUSDEM AD WILLELMUM SENONENSEM.

HENRICUS rex Angliæ WILLELMO Senonensi episcopo.

Quos ad me misistis ordinis Cisterciensis viros reli-giosos et venerabiles, sicut decuit, honorifice suscepi, attente audiui, diligenter inspexi. Verbum au-tem, quod ex parte vestra mihi intimaverunt, be-nigne secundum quod vos acceperis ex domini papæ mandato mihi significaverunt, ut mecum de pace reformanda inter me et archiepiscopum Cantuarien-sem loqueremini, admisi. Placet itaque mihi, quatenus super hoc mecum loquamini. Vobis enim ex magna parte innotuit causa, quæ inter nos vertitur, sicut præsens audistis, ubi in præsentia domini regis Franciæ inter nos inde sermo haberetur. Ipse cau-sam præstitit discordiæ, ab ipso concordia debet causa procedere: ipse vulnus impressit, ipse sanare studeat.

Per ipsum morbus invaluit, in ipso est ut sanitare reddita morbus evacuetur. Ego neque causam mali neque executionem excitavi vel implevi. In quo itaque loco utrique nostrum, donec convenire possi-

mus, significetis. Confido autem de fidelitatis vestra integritate et constantia, quod causæ hujus veritati favorem inclinabitis. Ideoque affectuosius accipio, ut vestra discretio diligentius meam circa hoc volunta-tem et æquitatem attendat. Præterea ad vos dirigo meam conquestionem super hoc, quod dominus meus rex Franciæ nuper æquum excedens, mihi in meis fecit injuriam. Vestra namque mediatione, et comitis Theobaldi fratris vestri, posthabito meorum consilio, super hoc quod prædecessores mei nunquam fece-runt, pro bono pacis me totum nuper exposui volun-tati domini regis Franciæ vestro acquiescens consilio. Vos autem non credo latere, quomodo mihi nuper injuriatus est. Vobis autem conqueror, ut quod in præjudicium pacis inter nos statuta præsumpsit, transgressio vobis displiceat, et eum ad satisfactio-nem justam deducere satagatis, quo auctore ipsa facta est.

EPISTOLA CCCCLXXXVII.

EJUSDEM AD EUNDEM.

HENRICUS rex Angliæ WILLELMO Senonensi archi-episcopo.

Venientes ad me nuntii domini papæ pro ne-gotio, quod inter me et archiepiscopum Cantuariensem vertitur, licet aspera et omni honori meo portarent contraria, pro domini papæ reverentia, et sanctæ Romanæ Ecclesiæ debita devotione, honorifice suscepi, et qua decuit benignitate audiui, mandatum domini papæ modeste admodum admittens, quod ipsi deferebant, licet me in meis gravatum sentirem, quos ipsi excommunicatos habebant, extraordinarie præci-pitata in illos sententia, magis ex impetu animi et motu mentis, quam ex rationis librata æquitate vel deliberationis consilio. Cum autem super hoc diu-tius sermo duceretur, petii ut absolventur, quos ipsi sic ligatos habebant. Ipsi vero se illos absolu-turos promittebant, si illis securitas juratoria præsta-retur ab eisdem, quod absoluti ipsorum parerent ar-bitrio. Hinc autem motus vehementius, juravi quod nullatenus sacramentum inde præstarent, sed, si vel- lent, a laicis fidei interpositione, a clericis in verbo veritatis promissione eis securitatem fieri facerem, ut mererentur absolvi. Ipsi autem esse hoc extraneum a consuetudine asserentes, et a sibi injuncto tenore alienum affirmantes dixerunt, quod ad hoc vestrum habere vellent consilium, qui et archiepiscopus et apostolicæ sedis legatus estis, ut, si hoc ex vestro haberent consilio, pro excusatione eis sufficeret, si aliquando transgressionis propter hoc arguerentur. Mittunt itaque ad vos, et ego mitto et precor, quod honori meo et commodo consulentes, ad hoc consi-lium vestrum applicetis. Confido autem constanter de vobis, quem pro summo amico amplector cum abundantissima devotione, quod in hoc et aliis nego-tiis meis et gratiam uberem, et diligentiam vigilan-tem, et firmissimam fidelitatem exhibebitis. Desi-derio meo plurimum successisse reputarem, si vobis-cum loqui possem, sed aliorum negotiorum instantia hoc ad præsens fieri prohibet. Peto itaque quatenus

aliquem de vestris ad me mittatis, per quem plenius A
vestra mihi voluntas innotescat, et mea vobis pariter
noscitur.

EPISTOLA CCCCLXXXVIII.

HENRICI REGIS EPIST. AD ALEXANDRUM PAPAM.

Venerabili Patri summoque pontifici ALEXANDRO,
HENRICUS rex Angliæ, dux Normanniæ et Aquitaniæ
et comes Andegaviæ, salutem et debitam venera-
tionem.

Si devotionis meæ, Pater, erga sanctitatem ve-
stram experimentum quaeritis, etc. *Vide inter vario-
rum ad Alexandrum III epistolas, post ipsius Re-
gesta.*

EPISTOLA CCCCLXXXIX.

EJUSDEM AD EUNDEM.

Domino papæ dominus rex.

Novit Ecclesia Romana ex longo temporis tractu,
etc. *Vide ibid.*

EPISTOLA CCCXC.

EJUSDEM AD EUNDEM.

ALEXANDRO PAPÆ HENRICUS rex Angliæ.

Episcopos nuntios nostros ad pedes paternitatis
vestræ direximus, etc. *Vide ibid.*

EPISTOLA CCCXCXI.

EJUSDEM AD EUNDEM.

ALEXANDRO PAPÆ HENRICUS rex Angliæ, omnino
subjectionis debitæ obsequium.

Vestræ satis innotescit serenitati, etc. *Vide ibid.*

EPISTOLA CCCXCII.

EJUSDEM AD GILBERTUM.

H. Dei gratia rex Angliæ, Patri suo charissimo
G. Londoniensi episcopo, salutem et dilectionem.

Quoniam personam meam vestri gratia speciali
sinceræ dilectionis affectu vos semper dilexisse ex-
pertus sum, de statu mei et incolumitate vos velle
certificari, et de successibus meis gratulari indubi-
tantly scio. Unde mitto ad vos charissimum et fa-
miliarem meum episcopum Bathoniensem, per quem
vobis secreta mea secure significo, et insupervolun-
tatem meam et quæ mihi Deo cooperante acciderunt
beneficia postquam ab Anglia recessi. Vos itaque
fidem adhibeatis his quæ ipse vobis dixerit ex parte
mea, et ipsum episcopum dilectissimum et familiarem
meum, qui in negotiis meis expediendis pronus et
devotus semper assistit, charum habeatis et diligatis,
et honorem exhibeatis. Vestræ etiam paternitatis
solicitudinem de qua non minimum confido, at-
tentius et devote exoptulo, quatenus negotiis meis
summam operam et diligentiam adhibeatis, et paci
et defensioni regni mei pro facultate vestra provi-
dere studeatis. Teste H. Baiocensi episcopo, apud
Chivill'.

EPISTOLA CCCXCIII.

EJUSDEM AD EUNDEM.

HENRICUS rex Angliæ GILBERTO Londoniensi epi-
scopo.

Audivi gravamen, quod ille Thomas proditor et
adversarius meus intulit in te, et in alias personas
regni mei, quod non minus ægre fero de persona

tua quam si in meam propriam personam virus
suum evomisset. Et ideo pro certo seias, quod
ego omnem operam dabo, per dominum papam, et
per regem Francorum, et per omnes amicos meos,
quod de cætero non nobis nec regno nostro nocere
poterit. Unde volo et consulo, quod tu interim
nullo modo in animo tuo turberis, sed tibi viriliter
provideas, utrum magis tibi et mihi expediat, quod
ad me in Normanniam venias, vel quod in Anglia
remaneas. Hoc enim totum tuæ committo dispo-
sitioni, pro certo sciturus, quod si ad me veneris, et
Romam adire volueris, omnia necessaria ad viam
de meo tibi honorabiliter et sufficienter inveniam.
Teste G. . . clerico apud S. Macharium in Gua-
sconia.

B

EPISTOLA CCCXCIV.

EJUSDEM AD ABBADES CISTERCIENSES.

HENRICUS rex Angliæ et dux Norm. et Aquit. et
com. Andeg., viris ven. abbati Cisterciensi et om-
nibus abbatibus Cisterciensis ordinis, qui ad capi-
tulum Cisterciensem conveniunt, salutem et sinceræ
dilectionis affectum.

De vestra sinceritate et religione plenius confi-
dens, et constantius præsumens, universitati vestræ
devote supplico, humiliter petens, quatenus mei et
heredum meorum memoriam habeatis, nec non et
fidelium meorum, quatenus precibus vestris propen-
sibus mihi inclinetur divina clementia, nobisque
miserationem ejus propitiâ facere studeatis, ut

C

cum pace solida et continua nos dirigat, et regnum
meum et alias terras mihi subditas conservet. Præ-
terea vobis innotescere volo, quod nuntios domini
papæ, viros venerabiles, Gratianum domini papæ
notarium, et magistrum Vivianum S. Romane Ec-
clesiæ advocatum, quos pro negotio archiepiscopi
Cantuariensis ad me transmisit, honorifice suscipere,
petitionem ejus per eosdem mihi porrectam devote,
sicut decuit, audire curavi. Eidem autem petitioni,
adhibito consilio archiepiscoporum, episcoporum et
abbatum plurium, benigne et sufficienter respondere
cum prædictorum nuntiorum consensu studui, sicut
vos subscripta docebunt, ut domino papæ omnimo-
dam videam in hoc negotio exhibuisse reverentiam,
licet semper juri stare, et quod inter nos jus statue-
ret, subire petissem a primordiis hujus causæ: et
sæpius postulassem, ut a latere domini papæ trans-
mitterentur, qui de ista causa plenius cognoscentes
illam æquitatis fine concluderent. Archiepiscopus
Cantuariensis, sicut ad remotiores finium nostro-
rum partes fama discurrere divulgatum est, sine mea
licentia et conscientia exivit ab Anglia, et post exitum
ejus me apud religiosos viros crudelitatis nota-
bilem haberi voluit, in me vota principum et cleri-
corum provocans, et odium gentium exterarum. Pro
petitione tamen, et reverentia, et amore domini
papæ, licet mihi gravissimum esset, et voluntati meæ
admodum repugnans, et mihi molestissimum vide-
retur, concedo quod ipse redeat in Angliam, et ha-
beat archiepiscopatum suum cum ea integritate,

cum qua illum habuit, quando illum dimisit : et sui similiter sua habeant. Et ipse et sui pacem habeant ad honorem Dei et mei, salvis dignitatibus regni mei. Quod autem breviter vobis de presenti negotio, quam solemniter, quibus presentibus actum sit, ex litteris datur intelligi, vobis diligentius et plenius intimabunt venerabiles fratres vestri qui aderant : frater Gaufridus de Altisiodoro, abbas de Mortuomari, abbas de Bellet, abbas de Rievall, quibus, ut decet, fidem habebitis. Universitati autem vestræ dissuasum esse desidero, ne de cætero tam facilem adhibeatis credulitatem, si quis in perniciem me de vobis sinistra prædicare et persuadere voluerit. Præterea dilectioni vestræ grates uberes exsolvo, quod ad petitionem meam fratrem Gaufridum mihi misistis. Et nunc iterum diligenter peto, quatenus eundem quam citius mihi remittatis. Necessary enim mihi ejus intelligo discretionem et prudentiam, ut mihi præsens adsit, et aliquandiu propinqua mihi ejus sit conversatio. Teste G. archidiacono apud Rurum.

EPISTOLA CCCCXCIV.

EJUSDEM AD ROTRODUM ROTHOMAGENSEM.

Rex Angliæ Rotrodo Rothomagensi archiepiscopo. De vestro, aliorumque fidelium baronum meorum consilio, pacis reformandæ inter me et archiepiscopum Cantuariensem, susceptam formam domino papæ, nuntiis et litteris meis insinuavi. Ipse, sicut per suas mihi litteras significavit, eam cum tenore, quo a vestro prodiiit consilio, eique ex parte vestra fuerat significata, suscepit cum gratiarum actione plurima, mandans, monens, supplicans et suadens attentius ut illam exsequar mediatione vestra et Niuernensis episcopi. Illam itaque vobis mediantibus plene et libenter complebo, nullatenus declinaturus formam vestro consilio propositam, teste Ricardo de Luci, apud Westmonasterium.

EPISTOLA CCCCXCV.

EJUSDEM DE PACE REDDITA CANTUARIENSI.

Pro amore Dei et domini papæ, pro salute nostra et hæredum meorum, remitto Cantuarleusi archiepiscopo et suis qui cum eo et pro eo exsulant, iram meam et offensam, et eidem remitto omnes querelas præcedentes si quas habebam adversus eum, et concedo ei et suis veram pacem et firmam securitatem de me et meis, et reddo ei Ecclesiam Cantuariensem, in ea plenitudine in qua eam habuit, cum factus est archiepiscopus, et omnes possessiones, quas habuit et tenuit Ecclesia et ipse, ad tenendum et habendum ita libere et honorifice, sicut melius et honorificentius eas habuerunt et tenuerunt ipse et sui, et omnes ecclesias et præbendas ad archiepiscopatum pertinentes, quæ cœperunt vacare, postquam ipse Cantuariensis exivit de terra, ut faciat de iis sicut de suis, prout ei placuerit, reddo ei similiter, salvo honore regni mei.

EPISTOLA CCCCXCVI.

EJUSDEM AD FILIUM SUUM.

HENRICUS rex Angliæ regi filio suo salutem.

A Sciatis quod Thomas Cantuariensis archiepiscopus pacem mecum fecit ad voluntatem meam. Et ideo præcipio quod ipse et omnes sui pacem habeant; et faciatis habere ipsi archiepiscopo, et omnibus suis, qui pro eo exierunt ab Anglia, res suas bene et in pace, et honorifice sicut habuerunt tribus mensibus antequam ipse archiepiscopus exiret ab Anglia, et faciatis venire coram vobis de melioribus et antiquioribus militibus de honore de Saltwude, et eorum sacramento faciatis recognosci quid ibi habentur de feudo archiepiscopatus Cantuariensis, et quod recognitum fuerit de feudo ejus esse, ipsi archiepiscopo habere faciatis. Teste Rotrodo archiepiscopo Rothomagensi, apud Chinum.

EPISTOLA CCCCXCVIII.

EJUSDEM AD THOMAM CANTUARIENSEM.

THOMÆ Cantuariensi archiepiscopo HENRICUS rex Angliæ.

Sciatis quod obviam vobis Rothomagum venire non potui ad terminum, quem prælocuti fuimus inter nos, quia significatum mihi fuit ab amicis meis Franciæ, regem Francorum præparare se ad eundem in Alverniam super homines meos et ad male faciendum ipsis et terræ meæ. Ipsi autem homines Alvernæ idem mihi significaverunt, rogantes ut eis succurrerem. Quapropter ad terminum quem statui inter nos ad vos Rothomagum venire non potui. Sed mitto vobis Joannem decanum Saresberiensem, familiarem clericum meum, vobiscum in Angliam iturum, per quem significo Henrico regi Anglorum filio meo, ut bene, et in pace, et honorifice habeatis omnes res vestras : qui etiam emendari faciat, si quid minus actum est, quod oportuerit, de his quæ ad vos spectant. Et quoniam mihi et filio meo plura referuntur de mora vestra quam facitis, quæ forsitan vera non sunt, vobis, ut credo, expediret, ne ire in Angliam diutius differretis. Teste rege ipso apud Lokchas.

EPISTOLA CCCCXCIX.

MATILDIS IMPERATRICIS AD THOMAM CANT.

THOMÆ Cantuariensi archiepiscopo MATILDIS imperatrix.

D Mandavit mihi dominus papa, et in remissionem peccatorum meorum injunxit, quatenus de pace et concordia inter filium meum regem et vos reformanda intromitterem, et vos ipsum eidem reconciliari satagerem. Inde etiam, sicut scitis, me requisistis. Unde majore affectione tam pro honore Dei, quam pro honore sanctæ Ecclesiæ rem istam incipere, et tractare curavi. Sed multum grave videtur regi, et baronibus suis, atque consilio, sicut vos dilexit, et honoravit, atque dominum totius regni sui, et omnium terrarum suarum constituit, et in majorem tandem honorem, quem habebat in tota terra sua, vos sublimavit, ut de cætero vobis securius debeat credere, præcipue cum asserant quod totum suum regnum, quantum potuistis, adversus eum turbastis, nec remansit in vobis, quin ad eum exheredandum pro viribus intenderitis. Eapropter mitto

vobis fidelem et familiarem nostrum Laurentium archidiaconum, ut per eum aciam voluntatem vestram super his omnibus, et cujusmodi animum vos habetis erga filium meum, et qualiter vos continere volueritis, si contigerit, quod petitionem meam, et precem de vobis ad plenum exaudire voluerit. Unum quoque vobis veraciter dico, quia nisi per humilitatem magnam, et moderationem evidentissimam, gratiam regis recuperare non poteritis. Verumtamen quid super hoc facere volueritis, nuntio proprio, et litteris vestris mihi significate.

EPISTOLA D.

OWENI WALLENSIS AD THOMAM CANTUAR.

Religiosissimo Dei gratia sanctæ Cantuariensis Ecclesiæ archiepiscopo THOMÆ suo Patri spirituali O. Walliarum rex suus spiritualis in Domino filius, debitam ac voluntariam in Christo obedientiam.

Vestræ, Pater mi venerande, discretionis auribus insonuit, quanta sui juris detrimenta post mortem episcopi nostri Mauricii nostra passa fuerit Ecclesia. Unde et magno timore percussi trepidamus, ne, quia nobis incumbit necessitas curam et sollicitudinem hujus Ecclesiæ gerendi, Deus nostræ negligentiae ista impatet. Nostis quoque, quantum nos immeritos oderit rex Angliæ, ita ut nostro honori et in ecclesiasticis et secularibus negotiis pro posse derogeret, in quo vestri exilii damnosam sentimus absentiam. Sed, quoniam in tali statu non estis, quo super hac re nostræ indigentiae consulere valeatis, vestram deprecamur obnixæ clementiam, quatenus cum sic amodo esse nequeamus, nostrum alibi episcopum ordinandi licentiam tribuatis, tali tamen interveniente conditione, quod sanctæ Cantuariensis Ecclesiæ et vobis exhibeat obedientiam, ac si vestræ manus impositione consecratus fuisset. Et bene nostræ petitioni debetis satisfacere, quia non juxta aliud nos cogit vobis subjici, sed voluntas, quæ semper durabit immobilis, nisi in vobis remanserit, quo minus perseveret. Quod si nos de obedientia, si hoc contigerit, suspectos habueritis, securitatem faciemus quam velitis. Et sicut archidiaconus noster David vestra in omnibus præcepta sequitur, sic et nos omnes faciemus. At unum tamen sciatis, quod amplius sic esse non valemus. Voluntatem itaque vestram super his mihi litteris vestris renuntiatis.

EPISTOLA DI.

ANONYMI AD ALEXANDRUM PAPAM.

Eram magnificentiae vestræ quædam cum tranquillitate mentis intimaturus, etc. *Vide in Alexandro III, an. 1159-81.*

EPISTOLA DII.

LUDOVICI AD EUNDEM.

ALEXANDRO papæ LUDOVICUS rex Franciæ.

Pro archiepiscopo Cantuariensi, etc. *Vide ibid.*

EPISTOLA DIII.

EJUSDEM AD EUNDEM.

ALEXANDRO Dei gratia summo pontifici, LUDOVICUS

cus eadem gratia Francorum rex, salutem et debitam reverentiam.

Ab humanæ pietatis lege recedit filius, etc. *Vide ibid.*

EPISTOLA DIV.

EJUSDEM AD EUNDEM.

LUDOVICI reg. Fr. ad ALEXANDRUM papam.

Potestis recolere, etc. *Vide ibid.*

EPISTOLA DV.

EJUSDEM AD EUNDEM.

ALEXANDRO papæ LUDOVICUS rex Franciæ.

Tenemus firmiter et recolimus, etc. *Vide ibid.*

EPISTOLA DVI.

EJUSDEM AD THOMAM CANTUARIENSEM.

THOMÆ Cantuariensi archiepiscopo LUDOVICUS rex Franciæ.

Jam diu sanctitati vestræ obtulimus, ut apud nos mansionem faceretis. Id ipsum nunc vobis offerimus ex grandi animo. Et hoc recipere nobis esset ad gaudium magnum. A nobis frequenter non habetis nuntios, quia sumus adhuc in expectatione: et alias res, et alios rumores vellemus audisse, quibus vos lætificare nobis esset gratissimum. Sed nondum res est secundum desiderium nostrum. Valete.

EPISTOLA DVII.

EJUSDEM AD MANUELEM IMPERATOREM.

MANUELI Dei gratia illustri et glorioso Romanorum imperatori semper augusto, venerabili fratri et amico charissimo LUDOVICUS, eadem gratia rex Francorum, salutem et ei fideliter et feliciter adherere qui regna largitur et transfert imperia.

Honor quem nobis in Domino peregrinantibus apud vos exhibuistis, Deo auctore a memoria nostra nunquam excidet. Et licet nos maria et intersectorum regnorum interstitia separent, nulla tamen vis meritis vestris debitam nobis excusiet charitatem. Inde est quod de vestra prosperitate lætamur ut nostra et æmulis vestris quod nostris optamus evenire promptum gerentes animum, si Deus opportunitatem dederit, vestram in Domino implere voluntatem et gloriam dilatare; ut autem vos de nostro et nos de vestro statu faciat certiores, latori præsentium Theobaldo, venerabili priori Crispiacensis Ecclesiæ dedimus in mandatis, ut imperialem adeat majestatem et ad thronum celsitudinis vestræ secreta perferat, quæ potius fidei ejus quam litteris censuimus imprimenda. Est enim vir litteris eruditus, morum sanctitate conspicuus, præclari nominis, et nobis admodum familiaris. Unde præ cæteris qui in ordine suo perfecti habebantur, electus est procurare necessitates Ecclesiæ Cluniacensis, quæ non modo monasteriorum regni nostri caput exstitit a diebus antiquis, sed in toto orbe Latino monasticæ religionis præ cæteris omnibus obtinuit gloriam. Imperatoriam ergo clementiam imploramus, ut tantum virum cōdecēter admittat, verba nostra quæ posuimus in ore ejus,

audiat diligenter et misericorditer exaudiat preces A
ejus et respiciat Ecclesiæ necessitates.

EPISTOLA DVIII.

EJUSDEM AD WILLELMUM REGEM SICILIÆ.

LUDOVICUS Dei gratia rex Francorum, illustri regi
Siculorum WILLELMO venerabili fratri et amico suo
charissimo, salutem et ei jugiter adharere qui dat
salutem regibus.

Honor, quem nobis magnificus avus vester in
obsequio Dei peregrinantibus exhibuit : liberalitas,
quam in nos et comperegrinantes exercuit ; conso-
lato multiplex, quam fessis et laborantibus devotus
impendit, a memoria nostra recedere nequeunt, sed
animum nostrum indesinenter accendunt. Utinam
devotio, quam habemus ad vos, possit operis exhi-
bitione clarescere, et effectus meriti conspicuum
testimonium reddat affectui promerendi. Gratus
enim esset nunc si opportunitas divinitus aperiretur
obsequium vobis rependere, quam fuerit tunc illud a
vestris progenitoribus accepisse. Magnique mune-
ris instar erit si decreveritis imperare, quod desi-
derio nostro præstaret materiam obsequendi. Licet
enim nos interjacentium terrarum spatia separent,
et obsequiorum vicissitudines intercludant, ferven-
tissimam tamen a pectore nostro nequeunt exclu-
dere charitatem, quin prosperis vestris congaudea-
mus ut nostris, et adversa quoties audiuntur, fera-
mus ut nostra. Proinde quod honori vestro et gloriæ
credimus inservire, secure petimus et sincera consu-
lupimus charitate sicut preces vestras admittere
prompti sumus et similiter expedienti consilio obe-
dire. Nobilis vir Stephanus quem familiaritatis ve-
stræ honore sublimastis, caro et sanguis noster est,
et clarissimos procures regni Francorum cognomine
vel affinitate contingit. Qualiter autem ad ignomi-
niam generis et gentis suæ dejectus sit et ejectus,
prudencia vestra tanto certius recollit, quanto quæ
circa eum gesta sunt, insidiantium fraude, clarius
per præsentiam intellexit. Rogamus ergo affectu-
osius nobilitatem vestram, ut eam ad gloriam nomi-
nis vestri et regni Francorum consolationem
curetis maturius revocare, eumque restitueris in
integrum amoris, familiaritatis, honoris et dignitatis.
Ob hanc causam et alias quas scripto non duximus
committendas, latorem præsentium Theobaldum
venerabilem Crispiacensis Ecclesiæ priorem ad
excellentiæ vestram fiducialiter destinavimus cui
in his quæ vobis ex parte nostra dixerit credi
postulamus ut nobis. Est enim vir fide plenus, re-
verendus titulo sanctitatis, litterarum eruditione
præclarus, nobis admodum familiaris charus et ac-
ceptus regno Francorum. Procurat autem necessi-
tates nobilis Ecclesiæ Cluniacensis in Oriente; in
quibus eum a vestra sublimitate petimus benignius
exaudiri et efficacius promoveri. Gloriam vestram
ad honorem suum in longa tempora promoveat et
tueatur Rex regum et dominantium Dominus.

PATROL. CXC.

EPISTOLA DIX.

A. . . . REGINÆ FRANCORUM AD ALEX. PAPAM.

Sanctissimo domino et Patri charissimo ALEXAN-
dro, Dei gratia summo pontifici, humilis et devota
filia ejus A. . . . regina Francorum, salutem, et
cum sinceritate cordis devotum obsequium.

Vobis sicut Patri loquar et domino, etc. *Vide in
Alexandro III, an. 1159-81.*

EPISTOLA DX.

FREDERICI IMP. AD HENRICUM REGEM.

FREDERICUS Dei gratia Romanus imperator et sem-
per augustus, dilectissimo amico suo H. illustri
Anglorum regi, salutem et indissolubilem intimæ di-
lectionis affectum.

Cum Christus Ecclesiam suam quam pretioso san-
guine redemit, unicam et indivisam beato Petro
præ cæteris apostolis singulari et speciali privilegio
gubernandam commiserit, constare videtur quod
unus in Romana Ecclesia pontifex esse debeat, qui
unius Dei et Petri vicarius, unius et universalis
Ecclesiæ gubernator existat. Unde nos qui unita-
tem colimus, et omnes unum corpus sumus Eccle-
siæ, nonne dolere debemus quod scissa illa tunica
inconsutili, unitatis scilicet Ecclesiæ, duos aposto-
licos in Romana Ecclesia videmur habere? De-
functo enim Adriano papa in Kalendis Septembris,
cardinales, qui columnæ immobiles esse videban-
tur, quibus sancta et catholica inuiteretur Ecclesia,
non quæ Dei sunt, sed sua querentes et unitatem
Ecclesiæ scindentes, duos pontifices elegerunt. Pro
tanta namque et tam perniciose Ecclesiæ jactura
tota Italica Ecclesia conturbatur, et dissensiones
schismatis ortæ in capite, jam in inferiora membra
defluxissent, et totum corpus Ecclesiæ commacul-
lassent, nisi nos consilio et auxilio religiosorum
virorum qui Spiritu Dei aguntur, tam impudice
iniquitati, justitiæ rigorem opposuissimus. Ne ita-
que in tantæ discrimine discordiæ universalis Ec-
clesia possit periclitari, Romanum imperium quod
ad remedium tam perniciosi morbi divina clemen-
tia providit, universorum salutem debet sollicitè pro-
videre, et ne tanta mala in Ecclesia Dei præmi-
neant, futuris solerter obviare. Coadunatis etenim
in unum omnibus episcopis, tam Italicis quam
Teutonicis, cæterisque principibus ac viris religio-
sis, qui zelum Dei et Ecclesiæ habere videbantur,
quid facto opus esset, diligenter investigavimus. De
decretis pontificum Romanorum, et statutis Ecclē-
siæ veraciter accipientes, quod exorto schismate
in Romana Ecclesia ex duorum apostolicorum ele-
ctione ambos vocare, et secundum sententiam et
consilium orthodoxorum litem decidere deberemus.
Ex consilio itaque omnium qui aderant, episcopo-
rum scilicet, cæterorumque principum curiam solem-
nem, et generalem conventum omnium ecclesia-
sticorum virorum, in octavis Epiphaniæ Papiæ ce-
lebrandum indiximus. Ad quam ambos qui sedicunt

pontifices Romanos, omnesque episcopos imperii nostri vocavimus. Sane cum sis unum de principibus Ecclesie membris, ac sine cuius consilio et auxilio tam arduum tamque necessarium negotium salutarem effectum sortiri nec debet nec potest, si fieri posset, pro reformanda unitate Ecclesie, etiam tuæ personæ sublimitas insudare deberet. Sed quia hoc jam diu desiderabile votum nostrum necessariæ causæ præpediunt, dilectionem tuam modis quibus possumus exoratam esse cupimus, quatenus de venerabili collegio episcoporum regni tui et abbatum, aliorumque orthodoxorum quorum sapientia et religione Anglorum præfulget Ecclesia, quotquot potes, nobis transmittas, et prædicto sacro conventui interesse facias, ut eorum cæterorumque ecclesiasticorum virorum salubri dictante consilio unitas Romanæ Ecclesie, Deo mediante, qui facit utraque unum, reformetur, et status ecclesiarum nullo deinceps dissensionum turbine collisus, nostris temporibus incolumis in sua possit tranquillitate permanere. Interim autem, in neutram partem prædictæ scissuræ assensum tuum declines, nec

[desunt nonnulla.]

rationabiles aliquatenus recipias.

EPISTOLA DXI.

EJUSDEM AD CUNCTOS POPULOS.

FREDERICUS Dei gratia Romanorum imperator et semper augustus, cunctis populis quos clementiæ nostræ regit imperium.

Jam dudum innotuisse credimus, qualiter exorta quondam inter Ecclesie Romanæ cardinales de apostolatu discordia in reges et regna impetu pestifero est diffusa. Pro qua ad optabile bonum pacis revocanda quantos post beatæ memoriæ papæ Victoris electionem et confirmationem Catholicam Papæ, Mediolani, Laone, atque in diversis imperii finibus, in corpore nostro labores, tam nos quam invicti principes nostri peritulerimus, quantas rerum copias zelo justitiæ impenderimus, in extremis quoque mundi partibus jam auditum non dubitamus. Denique beatissimo papa Victore ad paradisi gaudia feliciter assumpto, et in ejus locum ab episcopis et cardinalibus almæ sedis apostolicæ domino Paschali, viro Christianissimo, in præsentia episcoporum et religiosorum Lombardiæ ac Tusciæ, illustris quoque urbis Romæ præfecti ac multorum nobilium Romanorum, catholice substituto, ipsum etiam dominum Paschalem ex Ecclesie ac principum imperii judicio atque consilio in papam et Patrem Catholicum solemniter recepimus, debitoque honore venerari semper intendimus. Proinde obstinata schismaticorum perfidia, mortem viri justi suis successibus aperta fronte ascribens, Sirenis suis blanditiis quorundam fidelium nostrorum animos adeo molita est denuo immutare, ut nisi novis morbis nova maturius remedia objicerentur, pars nostrorum non modica videretur ex fiducia nostræ lenitatis seducenda. Igitur zelo reformandi decoris

A domus Dei ardentius accensi, cum regem Francorum, qui nulla nostra culpa præeunte, una cum Rolando, imperii nostri hoste publico, ejusque sequentibus, imperialem nostrum honorem manifeste molitur auferre, post multos nostros admonitus irrevocabilem persensissemus, universis imperii principibus in sancto Pentecoste curiam Wichebuch generalem indiximus. Quorum cœtu celeberrimo ibidem solemniter præsidente, Ecclesie Dei statum ac domini papæ Paschalis negotium serio ac magnifice duximus roborandum. Invocata igitur devotissime Spiritus sancti gratia, et universorum qui aderant consilio altius communicato, ad removendam pro parte nostra omnem prorsus ambiguitatem, ipsi nos manu propria super sanctorum reliquias B juramentum publice præstitimus, quod Rolandum schismaticum, vel ejus successorem, quem ipsius pars elegerit, in papam nunquam recipimus, nec ad eum recipiendum unquam alicui assensum præbebimus. Nulli etiam fautorum ejus gratiam nostram unquam reddemus, nisi ab errore viæ suæ ad unitatem Ecclesie fuerit conversus. Dominum vero papam Paschalem manutenebimus semper et promovebimus, eique tanquam Patri catholico et universali pontifici obedientiam, honorem et reverentiam exhibebimus: et ab ipso, ejusque parte, vita comite, nunquam recedemus. Electos quoque, qui sub eo aut ejus successore, quem pars ipsius elegerit, consecrationem receperunt, vel adhuc receperint, honore aut ordinibus suis per ejus obedientiam privari nunquam permittemus. Et hujus absolutionem sacramenti nunquam requiremus, nec oblatam recipimus. Præterea noster in imperio successor, quem principes universi elegerint, hunc honorem Ecclesie Dei et imperii, et hanc partem nostram sub eodem juramento tuebitur semper atque tenebit. Idem quoque juramentum archiepiscopi et episcopi omnes, atque electi qui interfuerunt numero quadraginta, super sancta Dei Evangelia propria manu unusquisque sub stola sua præstiterunt et publice firmaverunt. Nihilominus universi principes sæculares, dux videlicet Saxonum, et Bavoro marchio Albertus senior, Conradus palatinus de Rheno, et Ludovicus Landgravius, et reliqui omnes, super sanctorum reliquias id ipsum D juraverunt. Repente autem Spiritus sanctus mentes omnium adeo unius effecit voluntatis, quod electi omnes in Sabbato quatuor temporum ad laudem Dei, et honorem imperii sacros ordines devotissime susceperunt. Firmiter quoque a nobis et ab universis decretum est, ut quicumque supersunt ordinandi, in primis quatuor temporibus similiter exsequantur: alioquin dignitatis, ad quam electi sunt, honore, omni remota dilatione, priventur. Ac hæc honorabiles legati illustris amici nostri Henrici gloriosi Anglorum regis, ad nos ab ipso transmissi, in totius curiæ nostræ præsentia super sanctorum reliquias ex parte regis Angliæ publice juraverunt nobis, quod rex ipse cum toto regno

suo in parte nostra fideliter stabit; dominum Paschalem, quem nos tenemus, nobiscum semper tenebit. De Rolando autem schismatico manutenendo nullatenus se de cætero intromittet. Quia vero iustitiæ, quam hostes Ecclesiæ Dei et nostri, sive ex superbia, sive ex causæ diffidentia devitarunt, nos semper hactenus stare parati, nunc tandem ad insolita sacramenta ex eorum manifesta obstinatione sumus impulsī. A schismaticorum communione omnis homo, omnisque ordo caveat. Furor enim eorum, etsi hactenus aliquo modo visus est venialis, in posterum prorsus erit irremissibilis. Ad perfectum quoque hujus negotii firmamentum ex totius Herbipolensis consilii decreto firmissime præcipimus, ut si quis ad sui mandatum antistitis sacramentum supra scriptum non præstiterit, si clericus sit aut monachus, ecclesiastico privetur honore ac beneficio; si laicus, alodia et beneficia quæcunque possidet, nostra ipsi auctoritate a suo iudice vel domino prorsus adimantur.

Data Wicheburch, Kalendis Julii.

EPISTOLA DXII.

EJUSDEM AD STABLAUNENSEM ABBATEM.

FREDERICUS imperator Stablaunensi abbati.

Sicut novit dilectio tua, ad curiam Wicheburch, quam in Pentecosten indiximus, nos una cum principibus universis, tam sæcularibus quam ecclesiasticis, gloriose convenimus. Ubi inter cætera sanctæ Ecclesiæ statutum est præcipue de negotio domini Paschalis papæ, quod in cordibus multorum dubium habebatur, communicato universorum consilio, principum videlicet, et omnium clericorum atque laicorum, qui aderant, feliciter et magnifice roboravimus: invocata enim sancti Spiritus gratia, dominum papam Paschalem, et ejus honorem in hunc modum stabilivimus et confirmavimus, quod nos propria manu nostra super sanctorum reliquias publice juramentum fecimus, quod de cætero Rolandum schismaticum nequaquam pro papa recipiemus. Et si ipse decesserit, ejus successorem, quem pars adversa substituet, similiter nunquam recipiemus. Dominum vero Paschalem papam de cætero, sicut universalem et Catholicum Patrem, cum obedientia, et honore, et reverentia habebimus et tenebimus, et ab ipso ac ejus parte nunquam recedemus, quando ipse vivet, et nos vivemus. Si autem ab hac via nos decedere contigerit, noster successor, quem principes universi substituent, hunc honorem imperii et hanc partem nostram sub eodem juramento tenebitur semper atque tenebit. Hoc idem juramentum omnes archiepiscopi et episcopi nostri et electi, qui interfuerunt numero quadraginta, super sancta Dei Evangelia manu propria unusquisque sub stola sua fecerunt, et publice firmaverunt. Et ad removendam pro parte nostra omnem ambiguitatem omnes electi, primus Coloniensis, deinde cæteri, sacros ordines in Sabbato quatuor temporum

A ad audem et honorem imperii apud Witzeburgh cum omni devotione susceperunt. Similiter universi principes sæculares, dux Saxonie, et Albertus marchio senior, et palatinus comes de Rheno, landgravius, et reliqui omnes super sanctorum reliquias publice juraverunt. Honorabiles quoque legati regis Anglici, amici nostri, ab ipso ad nos transmissi, in præsentia totius curiæ nostræ super sanctorum reliquias ex parte regis Anglici et baronum ejus juramentum apud Witzeburgh juraverunt, quod et ipse rex Anglicus cum toto regno suo in parte nostra fideliter stabit, et dominum papam Paschalem, quem nos tenemus, et ipse tenebit, et nostram partem manutenebit. Et de Rolando schismatico, vel ejus parte amplius de cætero se non intromittet. Nos itaque de tua dilectione et fidelitate confidentes, et plurimam fiduciam habentes, mandamus tibi attentius monentes ac præcipientes, ut prædictum juramentum, quod nos propria manu nostra coram principibus juravimus, et ipsi principes juraverunt et firmaverunt, ipse cum omnibus ecclesiæ tuæ fidelibus publice jures et observes, et singulis Dominicis diebus et festis in publica missa, sicut editum est et sancitum a nobis et a principibus, publicam orationem pro domino papa Paschali nominatim et assidue, intus et foris, præcipias recitari.

C Edictum quoque est et statutum, ut hæc omnia juramenta infra sex hebdomadas ab omnibus compleantur. Quod si aliquis monachorum, clericorum, laicorum in imperio nostro huic confirmationi et edicto nostro, aliquo modo se opponendo contraxerit, certum sit apud te, quod sicut publicis hostis imperii, absque omni spe recuperationis, judicatus est et damnatus, et ab omni officio et honore et beneficio destitutus. Litteras quidem vocationis tibi transmisimus, et quia secundum prudentiam tuam nobis necessarius valde fuisses, quod litteræ nostræ ad te non pervenerint, valde dolemus. Interim in partibus tuis præsentiam nostram præstolaberis: ibi cum viciniore erimus, si quid iustitiæ defuerit, per omnia complebimus.

EPISTOLA DXIII.

REGIS SICIL. AD REGEM ANGLIÆ.

Regi Angliæ rex Siciliæ.

In receptione litterarum specialissimæ dilectionis vestræ cognovimus, quod quidem sine admiratione maxima proferre non valeamus, videlicet quod ordine humanitatis obliio, et naturæ legē soluta insurrexit filius in parentem, in genitorem genitus. Commota sunt viscera ad bellum intestinum, irruerunt ad arma præcordia, et quod novum prodigium est, et nostris temporibus inauditum, caro defervit in sanguinem, et se ipsum querit sanguis effundere, et quoniam ad tanti furoris impetum compescendum, potentiae vestræ auxilium loci commoditas non admittit, eo quo possumus charitatis affectu, quem locorum spatia non con-

cludunt, personam et honorem vestrum devotius amplectentes, dolori vestro compatimur, persecutionem vestram moleste ducimus, et quasi propriam reputamus. Confidimus autem et speramus in Domino, cujus iudicio regum judicia terminantur, quod non diutius permittet filium vestrum tentari, supra id quod debet, et qui factus est obediens usque ad mortem, ipse in eo filialis lumen obedientiae inspirabit, per quod memorabitur quia caro et sanguis vester est, et relictis hostilitatis erroribus agnoscat se filium, reddat ad patrem, naturae solidabit incommodum, et debitae dilectionis foedera ordo pristinus continebit. Valete et gaudete in Domino.

EPISTOLA DXVI.

PHILIPPI COMITIS FLANDRENSIS AD ALEX. PAPAM.

ALEXANDRO PAPAE PHILIPPUS comes Flandriae.

Multas sanctitati vestrae refero gratias, etc. *Vide inter epistolas variorum ad Alexandrum III papam, post ipsius Regesta.*

EPISTOLA DXV.

RANULFI DE TURRI EPIS. AD GILBERTUM.

Domino Londoniensi RANULPHUS de Turri, semel semperque suus, misericordiae abundare visceribus.

Quamvis spontanea beneficia incitamenta non exigant, instinctu erga vos charitatis praecipitur pie petitionis. Venit ad misericordiae vestrae janua J. filius A. magistri quondam vestri, procuratoris vestri, tutoris vestri, vestri dicam an nostri? Sed ut verius fatear, et vestri dicam et nostri. Venit ille, qui ut ad vos veniat, non modo est invitandus, sed trahendus. Venit, inquam, non voluntate ductus, non voluptate corruptus, sed impetu necessitatis inductus. Onerant enim eum supra modum reddituum angustiae, debitorum paternorum sarcinae, amicorum raritas, fratrum sororumque pluralitas et reliquae sarcinae parentelae. Haereat animo sanctitatis vestrae illa magistri Adae circa vos curarum gravitas, alimoniae secunditas, diligentia doctrinae, specialis impensa benevolentiae. Quis hodie proprios liberos regit providentius, educat uberius, instruit attentius, diligit ferventius? Sic pene amor ille modum excessit, ut vos diligeret non quasi excellenter, sed

quasi singulariter. Absit ab episcopi pietate tot et tanta talis tantique magistri merita non attendere, et ejus non compati liberis, qui vos aliquando pro filio adoptavit. Det ergo Deus vobis angelum magni consilii, quatenus portitorem praesentium, qua decet honestate suscipiatis, et qua abundantis pietate reficiatis, et qua praeminetis potestate promoveatis. Si autem se sanctitas vestra magis ad fratres suos qui minus, imo nihil nisi per ipsum habent, inclinat, confiteor coram Deo, praedicabilius atque salubrius esse ad hujusmodi inopes respicere, quam quosdam vicatim cibaria quaerentes rescire. Cum autem religionis vestrae benignitas se passim ad omnes conatur extendere, his potissimum debet subvenire,

A qui in bonis vestris aliquid juris videntur habere, qui fodere non norunt, mendicare erubescunt, quibus si supernum quod modicum est subtrahatur auxilium, nullum vivendi relinquit adjutorium. Non praesumo docere sapientiam vestram, sed exhortor charitatem vestram, ad honorificentiam et salutem vestram. Denique pepigit gratia vestra aliquem de alumnis magistri Adae suscipere, alere, promovere. Quod nondum solutum, rationis dicitur ordo solvendum, et misericordia praecipit ad implendum. In his et omnibus repleat cor vestrum Deus spiritu consilii, et fortitudinis, et pietatis. Valete semper in Domino.

EPISTOLA DXVI.

B Super appellationis denuntiatione vestrae satis provide et prudenter egistis. Sed dominus rex consultius in hac parte providerat vobis et aliis sua gratia, cum statim postea convenit regem Francorum de conventionem facta inter eos fide interposita, quod neuter eorum alterius invasorem in terra sua retineret, aut infestatorem quemcumque reciperet aut manuteneret qui sui domini curam stare nolle iudicio. Obiciebat enim guerram archiepiscopi Cantuariensis gravissimam et omnimodo inordinatam. Ad hoc itaque tandem ventum est quod propositum est archiepiscopo utrum mallet Galliam exire aut ab excommunicationibus suis temperare et insuper omnes illos absolvere quos excommunicaverat. Praeterea inpraesentiarum nuntiorum litterarum abierunt in Franciam dominus Sagiensis et archidiaconus Cantuariensis pro magna utilitate et unitate et pace Ecclesiae Anglorum. Item Raginaldus archidiaconus Saresberiensis in reditu est, peractis omnibus domini regis ad voluntatem suam et suorum, adducens secum duos clericos familiares a latere domini papae, videlicet Gratianum subdiaconum, nepotem Eugenii papae, magistrum notariorum, et Vivianum advocatum curiae Romanae, ad quid vel qualiter nondum scimus, sed omnia bona speramus, sicut a quibusdam accepimus quod nuper auditis.

EPISTOLA DXVII.

..... EP. AD GILBERTUM.

Domino Londoniensi salutem praesentem et futuram.

Sicut tradit quaedam eloquentiae persona sublimis, ingratus est qui negat se beneficium accepisse, ingrator, qui dissimulat, ingratisimus omnium, qui oblitus est. Ne igitur famae vestrae nitor egregius ingratitudinis huius vel illius videatur carbone nigrescere, tangat memoriam vestram illa magistri Adae circa vos curarum gravitas, doctrinae profunditas, alimoniae ubertas, postremo servens, imo ardens charitas. Haereat animo vestro quanta cura, quali amplexu, quam speciali privilegio, illa doctoris vestri, procuratoris, tutoris, diligens vigilantia, vos non modo supra familiares, verum supra quos-

libet mortales adoptaverit, qualiterque ejus spiritus in vestro ut ita dicam, spiritu quieverit. Tantorum ergo et plurium contemplatione meritum et mearum interventione precum, J. latorem presentium gratia vestra eo benevolentiae respiciat intuitu, quæ vestræ congruat sanctitati, et paternæ respondeat sollicitudini, quatenus filius utilitate sentiat, quod pater labore promeruit. Pater enim ejus cum sati munus impleret, filiam reliquit ære alieno gravatum, fratrum numerositate impeditum, redituum angustis constrictum, et quibusdam aliis nexibus intricatum. Decet erga dilectissimam religionem vestram, quæ etiam aliorum prævenit merita, hujus devotissimi vestri attendere necessaria, et filio sublimitatis vestræ sinum aperire misericordiae. Valeat sanctitas vestra in Domino charissima.

EPISTOLA DXVIII.

R. . . . AD THOMAM CANTUARIENSEM.

Suo suus, domino servus, THOMÆ archiepiscopo Cantuariensi R. . . . quidquid in vita jucundius et saluti conducibilis.

Quod vobis rarius scripsi non absque delicto arbitror. Peccavi equidem, sed contenti parere novit clementia. Minus etenim diligens hactenus extitit in his quæ ad vestræ dispensationis curam pertinere noseuntur. Totius quippe Ecclesiæ nostræ dispensatio et sollicitudo vobis incumbit. Vobis namque omnia commissa sunt et universa vestro consilio constituere vel arbitrio immutare, bona in melius promovere et perversa de confusione in ordinem revocare permissum est. Se et sua vestræ dispositioni tradita sancta Dorobernensis gaudet mater Ecclesia : quem sibi patrem, pastorem, ducem, cura, sollicitudine et consideratione ordinata unanimi voluntate præfecit. Interior siquidem et exterior omnium cura imposita vos ad vigilantiam excitat. Grandis honor : onus grave : et cuius importabile, si non sustentetur divino miseramine. Sollicitudo, ni fallor, multa, et labor plurimus incumbit. Vane igitur in his præsumit humana præsumptio, ubi totum perficit divina miseratio. Diligentia igitur plurima opus est et gravis sarcina plurimorum participatione sublevanda. Quod itaque ab uno minus potest, a multis supportetur. Sed viros discretos et industrios talis imperitio exigit : qui et exteriora prudenter administrare et interioribus zelo Dei armati secundum scientiam præesse vigilanter noverint : qui communia propriis præferentes, non sua sed quæ Jesu Christi quærentes, discrete sciunt, humiliter velint et utiliter possint assignatorum sibi curam gerere : qui non carni obsequentes aut sanguini, maxime domesticis fidei bona noverint providere ; qui non Ecclesiæ substantiam in propinquorum locupletationem distrahant ; qui non panem filiorum canibus mittant, ut domesticos attenuent, dum alienos saginant, quos nimis tenacitatis nævus non inficiat, aut prodiga effusio non infamet ; qui non in deliciis carnis curam habeant, sed spiritui servire contendant, quos

A non aut edulio crapula aut vino gravel somnulentia : quibus jucundior sit hymnorum aut psalmorum modulatio quam vel diurna vagatio vel nocturna dormitio, quibus magis cordi sit animarum cura quam corporum ; qui et speciosæ Rachel amplexus desiderant et Liam propter fecunditatem tolerare non recusent ; qui contemplationem Mariæ ardentius sitiunt et laborantis Marthæ sollicitudinem non omittant ; qui alterna se vicissitudine, nunc ad interiora nunc ad exteriora, discrete se habentes, ut cætera se ipsis adjiciantur et primum regnum Dei quærentes, spiritualia carnalibus, divina humanis anteponant. Tales enim oportet episcopum habere ministros, quibus secure ea quæ propter aliarum Ecclesiarum sibi etiam commissarum sollicitudinem minus ipse sustinere post onera imperiatur. Sana enim hæc est, ut arbitror, consultatio, quæ virum honestum et discretum commendat. Succenseat adversus me forsitan alius et dicat : Quid pergis vel Minervam docere vel Apollinis aptare digitos citharæ?

*Quid cum principibus tibi vix popularibus apto?
Vix terra dignus quid super astra facis?*

Ut ab his cessem laudant ; attendam sortem meam consulat et professionis meæ conscius, loqui erubescam. Oppilare os suadent propter monachum, mortui enim, ut aiunt, sumus et nihilominus nobis cum exteriorum cura qui mundo renuntiavimus. Sit ita, ut aiunt. Sed, queso, dent mihi aliquem qui in mundo sice mundanis possit vivere. Sunt enim in mundo sed de mundo qui mundo tanquam non utantur utentes, soli Deo in omnibus placere quærent. Si quis, quod absit ! se palliat vivens aliter, videat ipse : mea etenim nil interest. Sed utinam non morderet a conscientia mea. Si quis est gloriosus iste, qui quasi nesciens quid loquatur infrunita fronte obloquitur. Nunquid non obsequium præstandum est ? Sed quid majus, quid melius, quid utilius obsequium aut honestius præstari poterit, quam ut amicitie vinculum indissolubile conservetur ? Nunquid, ut omittam cætera, domini et episcopi mei periculum mihi parvipendendum ? Nonne in quo et ipse periclitatur et ego ? Quæ enim navis naufragio gubernatore evasit ? Quisve negare audeat etiam maxima minimis interdum posse juvari ? Sæpenumero vidimus et audivimus id accidisse. A Domino constitutus Israelitici populi Moyses iudex consilio Jethro in omnibus usus est : fessum in itinere Amalechitam puerum David inventum refecit, et eo duce eosdem qui captivos ipsius uxores et prædā abduxerant comprehensos Amalechitas interfecit. Judicium quoque Daniel etiam in Babylone adversus seniores iudices qui videbantur regere populum suscepit : et eos condigna pœna exterminavit. Sed quid indignantur minus discreti reprehensores mei ? Nunquid et hic in Ecclesia Christi non licet fieri, in qua ea quæ a sapientibus abscondita sunt, Pater cœli et terræ parvulis revelat ? Quis spiritum divini consilii fra-

terna charitate non suscipiat cum fas sit et ab hoste doceri. Non ambigo, non ignoro virum prudentem tanto regimini deputatum, sed nihil nimis vel consilii talis providentiæ in tantarum rerum administratione unquam legitur fuisse. Sibi ipse sufficit: sed affectus meus volo ei innotescat. Mereri libet. Gratum etenim mihi est si quid ex me in illius usus emanat. Non est: ipse enim noviter ab heri vel nudius tertius nostræ familiaritatis contracta gratia, quæ ab ipsius ætatis pene exordio traxit originem, et quam processu temporis succedentibus sibi invicem meritis usque in hæc tempora conservatam et uberius auctam arbitror. Jucundum mihi et quam maxime gratum quod talem sortitus sum, si talem conservare meruerim. Quod si in aliquo aberravi, ignorantia, queso, non malitiæ ascribatur. Scio tamen quod superest mihi adhuc prior affectus et ex dispositione in habitum usus perseverat: licet in ostensione minor fuerit effectus. Duret utinam iste et inviolatus permaneat usque in finem non habiturus incrementi modum. Amo quidem amo, et si parum est, amem oro validius. Stat tamen immotum apud me quod nemo filiorum vestrorum me uberius, jucundius aut dulcius vos diligere queat, parum licet vobis mea dilectio conferre possit, minus utique est quam vellem, sed imperfectum meum omnipotentis Dei miseratio suppleat. Excessi epistolarem in scribendo modum, dum parum mihi est, qua parte licet scheda magis quam lingua vobiscum loqui. Pareat tamen mihi benigna patientia, si hoc unum adjecero ne vel nimis supra modum terreamini vel blanditiis turbamini. Veritatis amatorem sentiat adulator et assentatoris lingua in præsentia vestra obmutescat. Erectus sit vestræ constantiæ status; flecti vel frangi nesciat. Turbabitur forsitan mundus, sed exaltatam procellam sedare ac deprimere potens est Dominus. In manu Domini corda sunt regum quibus vel in misericordia vel in iudicio utitur miserator et justus Dominus. State igitur in fide; viriliter agite; confortamini in Domino et omnia vestra in charitate fiant, et Deus pacis et dilectionis erit et sit vobiscum. Amen.

EPISTOLA DXIX.

De nobilitatis vestræ gratia certam obtinentes fiduciam, amicos nostros quoties expedit, et maxime quos domino papæ et toti Ecclesiæ Dei fideles cognoscimus et devotos, vobis fiducialiter commenda-

mus, procul dubio attendentes, quod tanto nostris debeatis partibus inclinari, quantum apud nos vestræ possent efficere. Proinde venerabilem fratrem nostrum Londoniensem episcopum quem Romano pontifici et Ecclesiæ indubitanter comperimus esse fidelem, serenitati vestræ commendamus attentius, transmissis affectibus admodum exorantes, quatenus ipsius nuntios venientes ad curiam sublimitas vestra benigne recipiat, et eorum petitionibus, quas ex parte memorati serunt episcopi, amicabiliter cooperari studeat et efficaciter promovere. Si autem aliquid apud curiam domini papæ de prædicto episcopo sinisterum aliquid fuerit intimatum, unde eum credimus esse immunem, vestra curet id ita delere solertia, ut prælati nuntii a summo pontifice benignius exaudiantur et in iis exhibeatur gratia dirigenti. Vale.

EPISTOLA DXX.

Venturi sunt, ut dicitur, magister Otho Tusculanus episcopus, et dominus Albertus presbyter cardinalis; et si dominus rex mandato domini stare voluerit, tunc creditur eos venturos in Angliam. Dominus Jacinthus transit ad Hispaniam, functurus ibidem officio legationis. Abbas Clarevallensis fuit Placentiæ prima die Dominica post Ascensionem Domini transiturus ad dominum papam, et modum pacis sicut et imperator et rex Francorum concordæ effecti sunt domino papæ et curiæ representabit. Nuntii nostri transitum habuerunt prope Romam datis senatoribus viginti libris, et idem nuntii fuerunt Bononiæ in reditu primo die Dominica post Ascensionem. Vigorniensis tamen episcopus et Reginaldus archidiaconus non ausi sunt se committere fidei senatorum. Robertus de Novo-Burgo transit in Siciliam, visitaturus regem et parentes suos. Præterea sciatis quod dominus rex omnia castella Widomari de Leun subvertit in Britannia, exceptis tribus quæ dominus rex habet in manu sua. Plana terra Widomari concessa. Quod autem Widomarus occupavit de feudis vicinorum suorum reddet, vel super hoc stabit in iudicio coram rege, quod occupavit de feudis hominum suorum reddet, vel eis plenum rectum tenebit in curia sua, si dominus rex præceperit per breve suum. Bituricensis archiepiscopus his diebus rebus est humanis exemplis, in cuius loco substitutus est consensu clerici et populi Meldensis episcopus, scilicet dominus Stephanus frater Adæ quondam camerarii regis Francorum.

HERBERTI DE BOSEHAM

S. THOMÆ CANTUARIENSIS CLERICI A SECRETIS

OPERA QUÆ EXSTANT OMNIA

Nunc primum edidit J. A. GILES, LL. D. presbyter Eccl. Angl. et collegii Corp. Christi Oxon. nuper socius. (Oxonii et Londini, 1845, 8°, 2 vol.)

EPISTOLA DEDICATORIA.

Amicissimo fratri suo Jacobo NORRIS S. T. P. collegii Corporis Christi præsidi, cæterisque viris amicissimis et bonis fratribus suis, ejusdem collegii sociis et discipulis, frater eorum et quondam consocius Joannes ALLEN GILES, salutem et in bonis litteris optimo frui successu.

In pæcibus transmarinis mihi diu peregrinanti et totum fere Occidentem pervagato, quantum gaudii dederit, quod tandem exemplare vetus Herberti de Bosham in Bibliotheca Atrabatensi nactus sim, fraternitas vestra dubitare non potest. Is enim Herbertus, sancti Thomæ archiepiscopi per tot annos comes individuus, ea quæ ipse viderat, quorum ipse pars magna fuerat, stylo, ut tunc temporis putabatur, immoderato et ultra legem evagante, descripsit. At Hercle, quæ ante quingentos annos præ nimio scribendi labore Patrum nostrorum diligentiam penitus everserunt, his temporibus, post præclaram typographi artem inventam, diutius in codicibus suis latere, nemo non dolebit. At libri istius Atrabatensis, quem (quantum scirem) solum superesse putabam, decimum quodque folium, ignominiosus quidam bibliothecarius, cujus nomen perii, memoria adhuc vivit, ut inde paucorum assium membranam vendendo lucrum faceret, sacrilega manu excerpserat! Quo factum est ut per totum librum hiatus plurimi valde deflendi, legentium studium interrumpant. Ita monitus de parte quæ supererat similem casum evenire posse, totum codicem transcribi feci atque in his tomis publici juris facio.

Sed non hiatus isti omnes in meis libris apparent. Id quidem Providentia divina quæ mihi in hac re arripuit, nec ulla cura mea effecit. Nam in bibliotheca fraternitatis vestræ, imo nostræ, superest adhuc codex qui aureum hoc opus, tribus tantum libris prioribus exceptis continet. De quo suspicio quidem mihi olim incidit; sed quia codices qui in collegio nostro servantur, ex confusione tanta laborabant, ut libri qui quærentur viz ulla diligentia inveniri possent, istum codicem nunquam videram, nec si vidissem, faciliter recognovissem, quia nullius auctoris nomen præ se fert, nec initium quidem mutilus et imperfectus habet.

Cum itaque res ita sit, fratres mei hanc primam editionem Herberti de Bosham libelli de Vita sancti Thomæ Cantuariensis ad pedes vestros depono, memor quidem illius temporis, quo apud vos, nullis mundi rebus implicatus, omni cura temporalium solutus, verum quærere, fontes ipsos adire, et inde hausus divinos copiose imbibere pura et simplici mente satagebam.

Fraternitatem vestram precor obnixiusque supplicor ut Herbertus meus favore et patrocinio vestro sultus in lucem prodeat, et ut liceat mihi iisdem verbis eum ad vos commendare quibus Horatius amicum Septimium Neroni commendavit:

Scribe tui gregis hunc et fortem crede bonumque.

Kal. Dec. 1845.

J. A. G.

J. A. GILES PRÆFATIO IN TOM. I

Vitam S. Thomæ complectentem.

Cum sanctus Thomas Cantuariensis archiepiscopus id merito jure obtinuerit, ut multos haberet vitæ suæ scriptores, eosque coævos, nullum sane nactus est quem majori cum voluptate, ne dicam amore, excipias, præter hunc nostrum Herbertum de Bosham. Qui enim propter hoc tantummodo apud nos celebratur, quod arcetissimis amicitiae vinculis præsulī suo adhærebat, ita ut ne ulla quidem memoria Herberti ejusdem hodie foret, nisi eo cum nomine sanctissimi præsulī posteritati committeretur. Accipimus autem tam ex ipsis quam cæterorum scriptis hunc esse gentē Anglū, natumque Bosham seu, ut vulgo dicitur, Sussexiacorum Bosham: quod antiquitus dominium Cantuariensi sedi ascriptum, vicissim deinde in diversorum manus, Cantianorum scilicet comitum, Guillelmi Marshall et domus Berkeley devenit. Idem vero statura procerus, venustus forma, adeo inter omnes eminebat ut militiam potius quam sacerdotium redoleret ac singulari virtutis acie immanique virium suarum copia natus ad hæc, sicut re compertum est, suscipienda videretur, quæ nimirum, imminetibus undique periculis, audacissimum quemque requirebant.

Thomæ causam amplexus est cum nullo adhuc ille, nisi cancellarii, fungeretur officio: cui consecrando testis adduxit, quem prosecutus est postea ad Clarendonense concilium; cui vero usque adeo consensit in hac famosissima Northamptonensis castri curia, ut dum nefandam istam per noctem, velutiurbationum omnium inverecundeque tyrannidis fomitem, aufugerat præsul, aufugerit et ipse per eandem noctem, Cantuariam reversus. Qui igitur, collecta ibi, ut ei præceptum erat, nummorum, ex auro argentoque vasorum et omnis suppellectilis maxima quam potuit copia, cito transiens mare, in sanctum Audoinarum, ubi post septem vel octo dies dominum suum erat recepturus, pervenit. Jussu inde qui legatos quosdam emungeret, quos Henricus ad Alexandrum papam direxerat, non multo post regem ipsum ad colloquendum aggressus est. Ibi autem, cum Henricus suum cuique et omnibus gratiam, dummodo archiepiscopi partes relinquerent, sese redditurum dictitaret ac polliceretur, nihil omnino concessit noster, nisi quod liberius viriliusque, fortasse procacius, se ipsum patefaceret. Et sic deinceps, multa peregrisse dicitur, quibus

tantum fidei sejus conereleghatur quantum et ipse periculis sese devoverat : quippe cui, non favente easo certissima regis ira imminerebat, adeo atrox ut inimici ejusque devicti oculos erueret et alia corporis membra truculenter succideret. Attamen Thomas, comitante Herberto, Cantuariam suam recuperavit. Quem nihilominus tam cito, tam miserabiliter oppressum suismet oculis non visurus erat Herbertus; quandoquidem ipse, pridie hujus sceleratissimi diei urbem, imo et Angliam, ad Francos delegatus, reliquerat. Ex quibus sane (licet ex adverso), dubitatur utrum si tam præceps et audax adfuisset ille vir, tanto timori fuisset occisoribus, ut scelus suum minime perpetrare potuissent, an potius ille ipse multo peioris etiam interuccionis, etsi invitus et reluctans, infanda tamen causa futurus exstitisset. Nec plura, Thoma defuncto, de Herberto legimus, nisi quod, elapsis annis post parricidium quatuordecim, suis ut satisfaceret amicis, magni hujus viri vitam enarrare aggressus fuerit, quem ipse tot annos adeo persecutus erat, ut omnes suos in hunc unicum reponeret affectus et quasi in deum, ut ita dicam, cultum idololatriæ suæ.

Opus in septem libris digestum est, in quo breve de Vita pontificis continetur compendium. Sequitur alias seu *Melorum liber*, ejus argumentum in plurimas inter Christi vitam et Thomæ, prout auctoris ingenio libuerit, similitudines versatur. Quem tertio, id est ultimo loco excipit historia alia, de rebus gestis videlicet post mortem archiepiscopi. Hactenus hæc. Quæ sint enim hujusdem auctoris opera si inquiras, videre est tom. II in præf. (5), ubi cætera omnia, quæ hic desunt, habent quæque peculiarem suam et congruam satis explanationem.

Et nunc quid restat, nisi ostendam qua ardua via, ut huncce librum tanti pretii typis excuderem, ad summam fere totius argumenti pervenerim. Equidem Epistolis a Lupo [Wolf] Bruxellensi editis Vita Thomæ præmittitur, in qua exstant larga sane fragmenta, tam ex nostro quam ex variis excerpta. Quorum ego fontes, et si non Herberti ipsius autographum ejusdem librorum exemplaria quædam, vel unum per totius Britannicæ collectiones quam requirerem, frustra conatus sum. Et jam in desperationem venire inceperam, et post omnes gentium bibliothecas ire, quas aliquando utique Anglici ejusdem operis unicum forsitan exemplar habere videres, dum nescit quidem opus quoddam esse Anglia illa nostra. Tunc Atrebatenses, qui primum inter Gallorum Flandriæ gentes locum sibi vindicant, Deo favente, applicui ubi, inter non pauca magni momenti opera, pulcherrimum Herberti de Bosham ms. codicem inveni, sed eheu! parte fere quarta descriptum. Et quis sacrilega, dices? Bibliothecarius quidam, cupidissimus vere nec non ineptissimus, membranam obtinendi seu vendendi causa, opus sic dilaceravit!

Inde cum ad Anglos remeassem, Rev. H. O. Coxæ consilium me fecit sibi, dum catalogo recenseret *Corporis Christi collegii* mss. codices, exemplar quoddam Herberti occurrisset, quod equidem superesse antea noverant, sed ubinam lateret hucusque ignorabant. Quid plura? Maximo mihi in his excutendis adiutorio fuit illud exemplar. Insunt enim ei quatuor ultimi libri quæ in Atrebatensi desiderantur; ideoque quasi ad integrum totum opus reductum est, paucis tantum foliis omissis, quæ utique ad scripturam priorum librorum pertinent, sed ad rem ipsam medicoriter, ut videtur.

Quod si codex alius, redacto a nobis in primitivam quasi seu formam opere illo, tertius ordine et admodum integer accederet, tales volumem admittit intercapedines, ut cuncta desiderata in hoc etiam libro, suum quæque vacantem locum facillime invenire ac supplere possent.

Pax ergo Manibus Herberti de Bosham! Pax animæ ejus! Et si unquam illi datum est in hæc versari cogitationes, per quas ultimos deguerit vitæ suæ annos, tunc consoletur et exsulet! Ecce enim hoc opus, suum inquam, quod ipse ne dissiparetur, cum fletu contestatus est, ecce reparatur, confirmatur et vivet, ut spero, in perpetuum.

(5) Præfationi tom. I quæ ad tom. II præfatus est D. Giles, subjecimus. EDIT.

PRAEFATIO IN TOM. II

Herberti de Boseham opuscula et epistolas complectentem.

In præstanti admodum quam de Vita S. Thomæ scripsit elucubratione Boshamensis, non semel operi cui adhaeserat invitum se inquit valde dicere. Quod nusquam magis patet quam cum, post narratam archiepiscopi necem, jamjam scribenti materia deficeret. Cujus tamen defectum ut suppleret, quasdam subjecit *consonantias*, ut ait, in quibus sanctum archiepiscopum ut belli spirituales militem, Christum ut imperatorem inducit. Inde *liber Melorum* seu melodiarum, mera quidem et male digesta farrago, quæ licet segregatim considerata parum luce digna videatur, nonnulla tamen exhibet notata haud indigna, ubi scilicet auctor semetipsum cum Henrico II colloquentem inducit. Ex rerum post Becqueti necem gestarum narratione in Herberti Vitam, cum jam senex ageret, lux aliqua affulget. Mortuo magistro in Anglia degisse videtur. Quod autem Herbertum purpuram cardinalium indutum aliqui narrant, hoc nonnisi ex textu *Catalogi eruditorum* mirum in modum in elitione Lupi corrupto fluxit.

Librum *Melorum* excipiunt : *homilia* in die festo S. Thomæ dicta, et *constitutiones Clarendonienses* quas, ut ait Boshamensis in prologo ad librum *Melorum*, ex funesto illo chirographo descripsit « quod prius exsilii nostri et postea martyrii causa fuit. »

His quatuor partibus constat monumentum quod in memoriam dilecti magistri sui exegit Herbertus. Permulta complectitur quæ hujus ævi historiam Anglorum illustrant, et non immerito inter majoris momenti scripta quibus tempus pepercit annumerandum est.

Exstat præterea Boshamensis, ineditum opusculum, *Commentarii* scilicet in *psalmos*, in bibliotheca Bodleiana asservati. Horum præfationem damus.

Eximie Herberti de Vita S. Thomæ elucubrationi æquiparandum opus sequens, de quo tamen, quod mireris, apud auctores qui de iisdem egerunt vix mentio extat; *Collectio* scilicet *epistolarum* quas in persona magistri sui scripsit Herbertus cum ei esset a secretis. Has epistolas jam senex collegisse videtur, cum res gestas in memoria retractaret, posteris consulens, quarum olim, cum juvenis ageret, pars magna fuerat. Harum epistolarum codex ms. in bibliotheca collegii Corporis Christi Cantabrigiensis asservatur, ex quo, exceptis quibusdam jam editis, in lucem hodie prodeunt.

Hæc sunt Herberti scripta hucusque comperta.

Accedunt Alani abbatis Tewkesburiensis epistolæ nonnullæ, hucusque ineditæ, quas suppediavit codex ms. bibliothecæ collegii Corporis Christi Cantabrigiensis.

Oxon. Dec. 1845.

VITA SANCTI THOMÆ

ARCHIEPISCOPI ET MARTYRIS.

AUCTORE HERBERTO DE BOSEHAM.

EPISTOLA

AD BALDEWINUM CANTUARIENSEM ARCHIEPISCOPUM ET AD EJUS CATHOLICOS
SUCCESSORES.

Beatissimo sanctæ Cantuariensis Ecclesiæ archiepiscopo BALDEWINO et successoribus suis quotquot canonice substituendis, sanctitatis suæ servorum minimus HERBERTUS DE BOSEHAM, salutem in Domino et debitam patribus reverentiam.

De vita et actibus gloriosi neomartyris nostri beati Thomæ, decessoris vestri, historiam exaravi: non quidem eo styli splendore, non ea dictionum solemnitate, quam dignitas materiæ exigit, sed prout desuper datum. « Grandes quippe materiæ, ait quidam, ingenia parva non sufferunt. » Verum, ne tam præclara tanti viri gesta per tam crebras, tam continuas temporum et generationum successiones, aut effuscaret vetustas aut deleret oblivio, oneri supra vires sciens et prudens supposui humeros; præsertim cum aliis, qui mecum viderunt passionem viri, consociis, confratribus meis, fere omnibus e mundo sublati et jam in Christo dormientibus, mihi adhuc superstiti specialiter incubnerit hoc. Et propterea manum apposui, malens, si forte necesse sic, imprudentiæ quam tarditatis seu negligentie incusari. Verum apud vestram paternitatem filialis me, nec dubito, excusabit devotio, qui quondam styli beneficio sublatum mundo exemplar restitui vobis desidero; exemplar quippe hoc vere incorruptum, secundum quod vivere, secundum quod regere, in quo et quotidie legere debeatis. Vobis enim præsertim exemplum dedit exemplaris iste vir, ut, quemadmodum fecit ipse, et vos similiter faciatis. Unde et per totam historiam hanc virum descripsi exemplarem, non quidem mirandum in signis, sed imitandum in operibus: signa enim propter infideles data, quæ alii viderunt et scripserunt, toto libello historico hoc taceo, prætereo; ea sola viri exemplaris signa operum prosequens, quæ fidelibus ad mirandum et ad imitandum data sunt. Et vobis præsertim a Deo vocatis et, si ausis, ni fallor tamen verentibus tanti athlete inire pugnam, subire curam, implere cathedram. Et præstet id vobis omnipotens, ut illius sortiamini zelum, cujus consecuti estis ministerium, illius virtutem, cujus vobis creditam habetis dispensationem, illius in omnibus curam, cujus impletis cathedram. Et ergo ovicula vestra, per avia et invia

A deserti multo tempore devia, humeris vestris ad gregem Dominicum oro reportari et opto.

In hanc martyris historiam argumentum.

Hanc historiam gloriosi martyris Thomæ in septem tomos partimur.

I. Primus tomus nativitatæ viri locum et parentum nomina et de primis vitæ suæ annis: breviter quidem et perfuncorie quasi in transitu tangit.

II. Secundus tomus de viri juventute et juventutis operibus agit diffusius, et de accessu ejus ad magni Patris Theobaldi tunc Cantuariensis archiepiscopi obsequium et de promotione ejus in archilevitam Cantuariensem, et causa promotionis: et postea qualiter ab archiepiscopo quasi ab ecclesia sit translatus ad aulam, videlicet ad illustris regis Henrici secundi in aula cancellariæ officium, ubi pariter docetur et qualis et quantus in aula fuerit.

III. Tertius tomus indicat qualiter ab aula post jam dicti Patris de mundo excessum reversus sit ad matrem suam ecclesiam, de Cantuariensi archilevita in Cantuariensem promotus archiepiscopus; ubi docetur quod quemadmodum sedis illius sublimitas solet exigere, qualem mox et quantum et apud Deum et homines archiepiscopum implere studuerit, ob id quot et quantæ, nec mora multa, ipsi tribulationes, angustiae, pressuræ, persecutiones sint obortæ: et quæ fuerit horum majorum omnium causa et qualiter excogitata per malitiam, ut ita inter tam magnam regem et tantum archiepiscopum profana oriretur dissensio, quorum sicut ante magna, imo maxima dilectionis fœdera, mundo vidente—sic et invidente.

IV. Quartus tomus docet archiepiscopum jam sic pressi, angustiatum, afflictum, et ne deterius quid fieret persecutionis fervorem declinantem, in exsilium suam, et exsilii non solum mala, sed et prospera, et exsilii tempus et locum describit.

V. Quintus tomus inter ipsum et regem demum reconciliationem, et reconciliationis modum refert et causam, et ita reversionem suam ab exilio in patriam, et postea adversus ipsum, instigantibus malitiosis non uno sed multis, regis iram iteratam et iteratæ causam.

VI. Sextus tomus post exsilii persecutionem sub-

Jungit martyrii agonem, ipsius describens modum et A constantiam et fortitudinem martyris.

VII. Septimus tomus eruditorum Thomæ, de quibus per historiam mentio fit, catalogum continet, et de hac historia non mutilanda et quare. In fine vero legentium hanc historiam orationibus se commendat: Et quem, etc.

Finita vero historia, libellum mox historiæ annectit, eo quod tota pene ipsius materia de historia pendet, quem a materia nomine *Melorum* inscribit. Siquldem libellus ille instar citharæ de tribus consonantiis tres quasi melos formans resonat. Quæ vero consonantiæ illæ sint de quibus formantur meli tres, præmissus libello prologus docet.

Libello vero melorum cum tribus melis suis consummato, adjicit adhuc homiliam suam unam de martyre quæ sic incipit: « Cantemus Domino, gloriose enim magnific. » In omnium vero calce scriptum illud funestum, chirographi instar confectum, postponitur, quod primo inter tantum regem et tantum archipræsulem, ut mundus vidit et invidit, tam magna et tam chara dissolvit fœdera, archipræsulis primo exsilii et demum martyrii causa. Et quoniam de septem tomis, quos distinximus, quidam prolixiores sunt, ut facilius inveniri possit quod queritur, etiam singulis tomis singula et propria capitula sua præmisimus.

INCIPIUNT CAPITULA PRIMI TOMI.

1. De consuetudine ecclesiastica qua sanctorum Patrum Vita describitur et quare.
2. 3. De multa Domini pietate super Thoma, ubi tangitur de natiuitatis suæ loco, et parentum nominibus, et viri pueritia et adolescentia tangit et per transitum quod viri adhuc pueri refert visionem et quod discipulus nihil pro testimonio de magistro scribebat quod non ipse viderit

Expliciunt capitula primi tomi.

INCIPIT

PRIMUS HISTORIÆ TOMUS.

DE VITA ET ACTIBUS BEATI THOMÆ MARTYRIS ET PONTIFICIS CANTUARIENSIS.

1. DE CONSUETUDINE ECCLESIASTICA QUA SS. PATRUM B VITA DESCRIBITUR, ET QUARE.

Ecclesiasticæ consuetudinis est præclaras sacrorum Patrum describere vitas, et ea quæ in mortali adhuc carne immortalia gesserint opera, perpetuis, ut dignum est, litterarum monumentis inserere, ut sic quodam styli remedio restituantur mundo quibus dignus non erat mundus. Et ita nos, qui adhuc vivimus, qui residui sumus adhuc in præsentis vitæ agone positi, ex ipsis per vocem, ad cursum animum ad pugnam et spe certa præstolemur victoriam. Et hoc est verbum illud in amoris cantico dilectæ ad dilectum, Sponsæ ad Sponsum, Ecclesiæ ad Christum: Omnia, inquit, poma nova et vetera Sponso a Sponsa servantur cum bonorum operum fructus nunc ab antiquis nunc vero a modernis Patribus tanquam arboribus tam salutaribus quam fructiferis decerptos in memoriali librorum apotheca recondit Ecclesia. Et inde quotidie ad Christianæ conversationis disciplinam, tanquam quotidianæ refectionis usum, Christi pauperibus ad gloriam et laudem Christi opera exemplarium Patrum et exemplaria operum hilariter et devote dispensantur.

Nos ergo, fratres, jam non solum cum Hebræorum pueris ad Christi laudem et gloriam ramos de arboribus cædentes, nec sacrorum Patrum dictatum, sed et facta recolentes, curramus nunc cum duobus charitatis geminæ pedibus ad arborem quamdam novam novum fructum nobis, nova poma ferentem, et juxta promissionem sponsæ cum veteribus Sponso nova poma servemus. Inter alias quippe tam salutaribus quam fructiferas paradisi Dei arbores una est, unde uberius diebus istis novum fructum colli-

gimus. Et unus est stans inter alios Ecclesiæ Dei principes qui præcesserunt et prævenerunt nos, post quorum adhuc tergum secundum Psalmistam psallimus, unus, inquam, singularis et insignis, cui diebus nostris non fuit similis qui pro lege Dei sui certaret. Hic, inquam, stat nunc inter principes qui prævenerunt conjunctus psallentibus, quem etsi non vultus vulnus tamen discernit. Stat enim martyr tripu-
C dians et triumphans toto lacero capite. Et adhuc, ne cui vestrum in dubium veniat quis iste sit, quem ita circumlocutorii sermonis colore depingimus, attollamus oculos, erigamus aures, et principem istum utpote patronum nostrum et patrem cognoscamus nomine: Thomas est nomen ejus. Iste certe ille Thomas qui quondam Cantuariorum antistes, sed nunc jam non urbis sed orbis primas est. Quin potius Dominatori universæ terræ nunc assistens non solum urbem, sed et urbem est iudicaturus et orbem.

2. DE DOMINI PIETATE SUPER THOMA.

O ineffabilia super te, Thoma, divinæ pietatis viscera! O incomprehensibilia divini arcana consilii! Te quippe Thomam vidimus hominem nostri similem passibilem, nostri comportorem oneris et nostræ comparticipem infirmitatis. Vidimus, inquam, te Londonia ortum nescio a quo Gilberto patre et a matre Matilde carnaliter procreatum. Et ecce quomodo nunc inter socios sors tua est et inter filios Dei computaris. Ecce quomodo nunc isti de longe veniunt! ecce illi ab aquilone et mari et isti de terra australi: vulnerati in sepulcro dormientis adhuc invocare merita, querere patrocinia et adorare vulnera, tanquam spirantia et ubique sparentia nescio

quem vividum miræ suavitatis odorem. Ipsius re- vera opus hoc qui suscitatur de terra inopem et stercore erigit pauperem ut sedeat cum principibus et solum gloriæ teneat.

3. DE VIRI PUERITIA ET ADOLESCENTIA.

Verum cum hujus viri gesta ipso opitulante breviter describenda suscepim, pueritiæ pariter et adolescentiæ ejus annos in præsentiarum pertranseo; solum ea de viro hoc pro testimonio relaturus, quæ ipse vidi et audiui, de quibus duntaxat verum testimonium est. Ita ut et mihi, etsi indigne vivent et insulse scribenti illud evangelistæ quoquo modo aptari valeat: *Hic est discipulus qui testimonium perhibet de his et vidit et scripsit hæc (Joan. xxi).* Verum illas pueritiæ et adolescentiæ hujus ætates

A nunc prætereo, nisi quia aliis referentibus qui ap- prime noverint id accepi, quod annos illos sicut il- lam decet ætatem bona simplicitate et puritate trans- egerit. Unum tamen est, quod ipsomet mihi refe- rente didici et hic interserere curavi. Puerum adhuc agens dum aliquo tempore febre corripere- tur, et ipsa invalescente ardens jam sensim per omne corpusculum ex intimis sudor erumperet, visa est ei domina quædam statura procera, vultu placido et aspectu decora, in lecto decumbenti astitisse, et puero de sanitae pollicita confortato duas claves aureas tradidisse sibi in manus in hæc verba: «Thoma,» inquit, «hæc sunt claves paradisi, quarum tu adhuc es habiturus custodiam.» Et his dictis disparuit.

CAPITULA SECUNDI TOMI.

1. Quomodo juvenis factus creverit sicut ætate et gratia apud homines apud Dominum non adeo.
2. De continentia ejus in juvenili ætate.
3. De viris sæcularibus quibus primis ætatis suæ annis obsequabatur.
4. De archipræsule Cantuariensi Theobaldo ad cujus se obsequium transtulit.
5. De gratia quam consecutus est in oculis domini sui et causa gratiæ.
6. De promotione ipsius in archilevitam Cantuariensem et causa promotionis.
7. Quod levita factus non mox humeros suos levitarum oneribus supposuerit.
8. Quomodo translatus ad aulam illustris regis Henrici secundi cancellarius sit effectus.
9. Qualiter pro tempore levitam exuerit, et cancellarium induerit.
10. Quibus gratiarum donis regis cito super omnes gratiam sit adeptus.
11. Qualis et quantus fuerit in cancellariæ officio et de quibusdam ipsius in hoc officio operibus strenuis, quæ tangendo exprimit, non exsequitur.
12. Qualiter coaulici magnam ipsius gratiam et gloriam cernentes, subito, sed latenter, invidere cœperunt.

TOMUS SECUNDUS.

1. Igitur vir iste cum pueritiæ et adolescentiæ suæ annos transegeret, crescente ætate, crevit et industria et gratia apud homines, sed apud Dominum non adeo quod ut videamus cur dixerim, duplicis gratiæ recordemur: duplex enim est in hominibus gratia: est quippe civilis quædam gratia, urbana, benigna, dulcis, socialis et ad sui dilectionem invi- tans qua homo plus placet sæculo sed Deo minus, utpote bonitate destituta adhuc, tanquam sæcularis quædam absque bonitate benignitas. Unde, etsi civilis et urbana bonitatem non habens comitem tanquam sæcularis fallax et vana gratia hæc. In qua tamen magis notari potest sola sæculi vanitas quam ulla operis turpitudine, ulla iniquitas. Verumtamen gratia hæc, etsi fallax et vana, a Deo tamen. Gratia quippe sæculi hæc, velut exterior carnis pulchritudo, quæ quidem a Deo, quanquam ipsa sit gratia fallax et vana. Juxta quod Sapiens: *Fallax, inquit, gratia et vana est pulchritudo (Prov. xxxvi).* Verumtamen gratia hæc benignitas optima benignitati huic bonitate adjuncta.

Est autem alia sæculi sed cœli duntaxat gratia, illi quam præmisimus plurimum ut videtur adversa. In priori quippe cum absque bonitate sola beni- gnitas, in hac vero cum absque benignitate sola bo- nitas. Gratia etenim hæc tristior, districtior, seve- rior, non ut prior omnibus omnia, sed sibi soli et Deo. Et hac homo plus placet Deo, sed minus sæ- culo, quæ semper qui tristis et austerior, non homi-

nes sæculi seu etiam eos ipsos, quorum assidue consortio jungitur, invitans aliqua sui dulcedine, sed potius quasi rugata fronte eis semper intentans. Spiritualis quidem saneta et bona hæc sed minus idonea et jucunda consortio. Et qui hac pollent boni certe, usque benigni non adeo, quod facit illa prior, gratia videlicet civilis et urbana. Unde duplici hac pollere potissimum, illis præsertim qui in sæculo sunt et inter sæculi homines commorantur, ut si boni sunt, sint et benigni. Et hi quidem utraque gratia præditi sic, etsi cives sint Jerusalem præ cæ- teris tamen magis sunt idonei qui civitatis utriusque, Jerusalem videlicet et Babylonis, negotia gerant. Unde et Joseph duplici hac gratia præditus, etsi esset civis Jerusalem administrabat sapienter et in- dustrie, Deo et hominibus gratosus, in Ægypto res Ægyptiorum. Similiter et Daniel in Babylone res Babyloniorum. Et ipse magister duplici hac præ- pollens omnibus omnia factus est. Quas ut nobis et in nobis conjungendas monstraret, post quindecim carnis opera innumerata inter duodecim fructus spiritus mox post bonitatem benignitatem ponit. Tunc enim non solum bona sed et jucunda bonitas si comitem habeat benignitatem, gratiam videlicet illam civilem et urbanam a qua cœpimus. Hac præ- facto in primis juventutis suæ annis Thomas hic noster pollebat etsi ea, quam inter fructus spiritus ipse præponit magister, bonitate destitutus adhuc. Verum Deus noster, sicut benignus et bonus, miram

et mundo insperatam postea huic bonitatem dedit et eum bonitate benignitatem auxit, ut gratia proficeret, sicut apud homines et apud Dominum. Solet quippe Dominus bonus et benignus hominis præ cæteris benignitatem respicere, non solum illam quæ bonitatem habet sociam, sed et illam quam etiam absque bonitate diximus. Solet, inquam, talem respicere bonitatem, ipsi sicut vult et quando vult adiungendo. Spiritus enim sicut ubi vult, ita et cum vult spirat, et qui novissimi veniunt his qui prævenerunt pares fiunt. Itaque is ab ineunte juventute juvenilia sequens, litteras quas in teneris adhuc annis in scholis didicerat, manum jam subducens ferulæ, fugit more Ephraim pascens ventos et sequens umbram. Unde et quod illi dulce et familiare solet esse ætati, juxta illud poetæ :

Gaudet equis canibusque et aprici gramine campi,

nugis curialibus intendebat : vagis et vanis studiis se occupabat. Et ut inter cæteros cæteris emineret, præ cæteris cultiores semper appetebat ornatus : cum tamen magister scurrilitatem quæ ad rem non pertinet inhibeat, et sapiens moneat in habitu nunquam gloriandum, qui quanto ambitiosior tanto magis suspicione non caret. Nec recta facit credi de se etiam si forte tota compositio hæc interdum non ex libidine pendeat, sed ex virtute. Verum iste popularis auræ, quam juvenis captabat, sequens spiritum, nec magistri curabat mandatum nec sapientis sequebatur consilium.

2. DE CONTINENTIA THOMÆ CUM JUVENIS.

De quo tamen hoc certiori certius, quod in hujus fervore ætatis et in hoc quo vivebat sæculi luxu juvenis amplexus præ honesto tamen, castitatis semper amator vehementissimus fuit, in hoc jam uni sanctorum similis de quo legitur quod, etsi superbus et vanus, castus tamen habebatur in corpore. Præterea labia mendacia et linguam semper detestabatur detrahentem, nam et misericors Deus prædestinatos suos sæpe et per crebro propter aliquas culpæ maculas juste in parte deserit, quibus tamen per aliqua gratiarum dona aliorum semper assistere non desistit. Et hinc quidem deserendo permittit cadere ut liberati magis sint obnoxii gratiæ, inde vero assistendo cadentes non permittit in profundum corruere, ne si peccator illuc venerit in contemptum veniat poenitentiae puteo super ipsum urgente et coronante os suum : quod, ni fallor, attendens propheta ita, videlicet in uno et eodem hinc aliquas maculas culpæ, inde vero nonnulla dona gratiæ, Dominus inquit, unam eandemque civitatem ex parte quidem compluit, sed ex parte aridam et incomplutam derelinquit. Et profecto cum proni sint ad lapsum gressus hominis, grande tamen in homine spei datur insigne, si quem videremus interdum labi per aliqua oblectamenta culpæ, retentum tamen ne ruat in profundum per aliqua adjutoria gratiæ Domino supponente manum et erigente elisum. Talis ergo

A Thomas hic noster, qui, etsi per virtutum virus inanem gloriam sicut juvenis adhuc minus cautus videretur infectus, nec tamen penitus omni virtutum gratia fuit destitutus. Castitatis amator, ut diximus, veritatis æmulus, fidem etiam quæ terrenis debetur dominis summa semper colens devotione.

3. DE SÆCULARIBUS QUIBUS OBSEQUEBATUR.

Terrenis quippe dominis, nobilibus quidem sed viri sæcularibus, in primis ætatis suæ annis aliquanto tempore obsequens, per fidem et prudentiam et obsequii sedulitatem devotam pro ætate et prout nostri officii professores inter tales proficere possunt, cito profecit. Verum quorum est diversa professio, diversa solet esse conversatio.

4. DE ARCHIPRÆSULE THEOBALDO AD QUEM SE TRANSTULIT.

Cernens itaque hic noster Thomas professionem professioni et sic conversationem conversationi contrariam, cogitavit a curiis sæcularium ad aliquem grandem virum ecclesiasticum se transferre. Et Domino sic inspirante et cooperante et cogitationem confirmante ad sanctæ recordationis Patris Theobaldi venerabilis tunc archipræsulis Cantuariensis obsequium se transtulit.

5. DE GRATIA QUAM CONSEQUITUR EST IN OBSEQIO.

Unde tunc temporis cum per aliquot juventutis annos eo plus gratum quo plus fidem et devotum pontifici impendisset obsequium, in oculis domini sui multam cito gratiam et familiaritatem obtinuit; culus etiam jam præ cæteris, qui et multi et industrii assistebant, crebriori et secretiori utebatur colloquio et consilio fruebatur.

6. QUOMODO ARCHILEVITA FACTUS.

Cernens itaque pontifex ex nova hac nostra arbore nova quedam tunc virtutum germina pullulare, hanc Domini plantationem inter poma convallium in horto sponsi plantare disposuit. Et ita inspiratus a Deo pontifex Theobaldus Thomam, quem prius secundum formam canonum ad alios inferiores ordines, postea in levitam, simul etiam et ecclesiæ suæ archilevitam in illa sancta et humili monachorum congregatione ordinavit; ordinavit, inquam, de futuro, quem pullulantia virtutum germina spondebant, fructu nihil hæsitans, etsi ipsa tenera utpote quæ pullulabant adhuc pestilens crebro sæcularis gloriæ aura eventilaret et niteretur corrumpere. Nihil tamen ob id hæsitans sed potius attendens, edoctus in hoc a Deo pontifex, quod præter alias quas jam supra numeravimus gratiarum dotes, etsi juvenis in aliis juvenili quadam levitate ad mundi pompam excesserit, strictis tamen semper habentis contra illius ætatis naturam et supra vires, mirabilis quidem in ea ætate et paucis imitabilis, continentia se semper freno coerceret. Unde juveniles illi excessus qui salva integritate corporis et salva fiebant continentia, naturæ magis quam culpæ et ætati potius quam errori, etiam apud sapientes et

qui illius ætatis idiomate sunt experti, imputandi videbantur, quem etiam jucunda illa juventutis inaniam præter illam carnis gratiam nonnulla alia, ut jam diximus, initialia in juvene virtutum dona excusabant, pro quibus certissima futuræ consummationis spes erat. Et profecto in juventutis primordiis vitia, ut sæpe accidit, copulata virtutibus solent vitia effugare virtutes, si non clypeus carnis castitas causam teneatur virtutum. Sed tunc certe sunt acies virtutum in tuto, si istius clypei fuerint defensatæ præsidio. In tuto dico, sicut in ætate tam lubrica et inter tot præsentis vitæ et vitæ laqueos quid potest esse in tuto. Magni autem cujusdam et præclari ruina hæc nostra testatur verba. Sed quid dico magni et præclari? Immo maximi et præclarissimi prophetarum eximii; ni fallor, David iste est, qui cum ab ineunte ætate multis gratiarum donis claresceret, tamen quia adhuc juvenis jam dicto carnis clypeo caruit: per luxuriam a muliere in carne prostratus occubuit, qui simul et per seditionem virum justum in carne prostravit. Habuit enim juvenis hic noster David multa dona gratiæ, isto tamen quo præditus fuit hic noster Thomas, solo continentię dono subtracto adhuc. David quippe juvenis quasi civitas illa prophetica, de qua supra tetigimus, ex parte a Domino completa, ex parte vero arida derelicta et incompleta. Verum quia in juventute hoc solo continentię dono caruit, per hujus virtutis adversariam incontinentiam, cæteris quæ habebat gratiarum donis spoliatus nudus remansit. Tali itaque civitati, tali juveni, qui hinc quasi a dextris habet aliqua gratiæ dona, inde vero quasi a sinistris quæ adversus militant, ut illa spoliarent juvenilis ætatis desideria, magna est, ne tollantur donorum gratiæ et virtutum, quas ex parte habet securitas, si carnis gratia castitas fuerit coadjutrix et conservatrix virtutum. Hæc quippe conservatrix fidissima, utpote ad spiritualia aromata reponenda, quoddam quasi integrum vas. Nam propter Dominum corporis pura castitas quid est nisi cujusdam præclari et pretiosi vasis solida quædam integritas, in quo donorum spiritualium charismata quasi quædam pretiosa sponsi et sponse aromata virtutum thesauro reponantur? Unde et Magister: *Hæc, inquit, voluntas Dei sanctificatio vestra ut abstineteis vos a fornicatione ut sciat unusquisque vestrum suum vas possidere in sanctificatione et honore (1 Thess. iv): non in passionibus desiderii, sicut et gentes quæ ignorant Dominum; pariter et hæc eadem castitas ad aromata hæc et virtutum thesauros conservandos, ne a furibus vel latronibus tollantur in via, sicut conservatrix fida et coadjutrix est fortissima. Solet quippe hæc fortiter et constanter, pulsus vitiis, virtutibus liberum quietum et pacificum habitaculum reddere: et ostio clauso, vitiis adhuc pulsantibus, incessanter ob stare et reverberare pulsantia, quæ tanquam minus impudentia ad ostia maxime juvenum, cito etiam priusquam pulsa fuerint iterum*

A pulsant. Sed ostiaria domus tanta quam diximus continentię virtus fortis et prompta, mox repellit tam crebro, tam importune et invere unde pulsantia. Ita quidem est, si hæc retenta fuerint in juvene vitia copulata virtutibus. Cujus ut breviter dicatur in juvene tanta virtus est et tanta securitas, ut propter Dominum habenti hanc juveni parum est quin dicere audeam: Habes castitatem: fac quidquid vis. Luxurioso vero seni contrarium omnino et adversum. Nec dicimus virtutes hic eas quibus recte vivitur, sed aliqua dona gratiæ etiam adhuc in justo data per quæ crebro in vitiis retentis quasi dormiens adhuc vocatur, movetur et trahitur ut plene excitetur. Talis quippe habens cum virtutibus vitia nequaquam profunde dormit, sed quasi dormitat, qui crebro caput inclinans quasi jam somno imminente conquiniscit. Molo per virtutum manus, quæ hinc velut a dextris, hinc a terrenis et carnalibus desideriis retrahitur, modo ex vitiis pondere quæ inde quasi a sinistris insidiantur illo revolvitur, vicissim inclinans caput jam jam nisi per quas habet virtutum manus retraheretur, imo nisi Domino manum suam apponente fortius traheretur, post dormitationem quasi lethargicus nimis profunde dormiturnus. Juxta quod præfatus juvenis noster rex David prius per aliquas gratiarum virtutes a Domino tactus, et postea plene excitatus: *Si dederò, inquit, somnum oculis meis et palpebris meis dormitationem (Psalm. cxlxi).* Ecce qui prius **C** adulter in adulteræ carnis fece obdormierat et obdormitus sic virum justum seditiose prostraverat, jam non dormitat neque dormit qui custodit rex Israel virtutibus, quas præhabuerat Domino manum suam apponente adhuc et obdormitum trahente jam fortius et procul amovente dormitationem etiam sicut et somnum. Et ita multi per aliqua gratiarum dona sibi prius collata, irahuntur primo sic ut postea plene excitati strenue currant, et ita post cursum perveniant et demum bravium gloriose comprehendant juxta illud Sponsæ ad Sponsum: *Trahe me, inquit, post te et curremus in odore unguentorum tuorum (Cant. i).* Et Sponsus ipse: *Nemo, inquit, potest venire ad me, nisi Pater meus traxerit eum (Joan. vi).* Et ita pudicus juvenis, Joseph alter, **D** Thomas noster primo per pudicitiam et alia gratiarum dona tractus ecurrit postea in odore virtutum, donec, sicut nunc cernimus, non jam in odore virtutum curreret, sed ipsum Dominum virtutum ipsum regem gloriæ comprehenderet.

7. QUALIS CUM ARCHILEVITA.

Sed leviticum, sicut præfati sumus, ordinem adeptus, needum currens sed tractus adhuc, qualiter ad cursum in odore virtutum venerit videamus, et sic demum finito cursu qualiter cursus bravium in fine sine fine comprehenderit. Nec enim levita factus mox supposuit humeros levitarum oneribus, sed levitatis potius et sæculi hujus operibus extunc magis operam dabat, omni jam quæ sacri maxime ordinis viris competit mediocritate despecta, adeo

quod suscepto ordine post modicum non cæterorum coaulicorum aulicos quinimo ipsos regios fastus assumeret et aulam ingressus cæteris coaulicis in omni magnificentia præfulgeret. Quod tamen qualiter acciderit sub quadam hic brevitate perstringendum.

8. QUOMODO TRANSLATUS ET CANCELLARIUS FACTUS.

Illustri Anglorum rege Henrico secundo regnum suum inchoante, cujus dominatio non solum in cismarinis, sed et extra regnum in transmarinis a Boreali oceano ad Pyrenæos usque montes tendebat, felici memorie præfatus archiepiscopus Theobaldus, qui ipsum in regem unxerat, id post modicum procurat ut Thomas hic noster, juvenis adhuc et archilevita novus, regis novi et pariter adhuc juvenis intret aulam et in aula aulico se officio mancipet. Cernebat quippe pontifex juvenem, cujus mores et industriam in variis jam rerum eventibus expertus fuerat, in agendis strenuum, in consiliis fidum, in dubiis securum, in adversis magnanimum, in apparatu magnificum, in largiendo munificum, ad jussa promptum, et in obsequio sedulum, in omni denique opere providum et circumspectum: unde et talem aula dignum et aulæ gratum futurum nec immerito arbitratur, sperans exinde nihilominus istius opere et opera inter regnum et sacerdotium deinceps pacis gratiam et imitatis vinculum firmitus. Agente ergo et procurante pontifice Theobaldo, Thomas aulam ingreditur et tribuente rege in aula aulicum officium suscipit, quod vulgo nunc cancellaria dicitur, officium certe ia regia honorum præ se onerosum plurimum, quod illius officii optime norunt experti.

9. QUALITER PRO TEMPORE LEVITAM EXUERIT.

Levita ergo hic noster aulam ingressus, et in aula cancellariæ mancipatus officio, levitam pro tempore exiit et cancellarium induit. O quam magna, quam admirabilis in aulæ ingressu nostri juvenis condita discretione industria! o singulare in virtutibus et operibus discretionis officium! hæc quippe auriga virtutum dissimulatrix operum oculis intentionum citius denique sapientiæ et scientiæ condimentum, qua plerumque non minus sapienter quam scienter dissimulatur quod agitur, et agi putatur quod non agitur, et non agi quod agitur. Qua etiam instruyente persæpe fit ut ex charitate contra charitatem, contra legem pro lege et contra pietatem pro pietate fiat. Unde et illa multarum facierum persona egregius ille gentium magister Synagogæ alumnus Judæorum advocatus secundum datam sibi discretionem ex charitate contra charitatem pro fratribus a Christo anathema esse optavit et contra legem pro lege in templo se purificavit et totondit, contra pietatem vero pro pietate Timotheum jam adolescentem circumcidit. David pariter insanum se simulavit ut evaderet, et Judith se meretricem ut Jerusalem salvaret, pariter et hic levita noster, quem, etsi non nostra verba, tantorum tamen operum excusant exempla, ingressus aulam mox levitam deponit

A pro tempore, tempori magis quam rationi et potius vanitati quam veritati industrie parens, tanquam si ad consodales suos coaulicos quotidie illam elogii apostolici pericopen audiat clamare: *Insipiens factus sum, vos me coegistis* (II Cor. xii). Nec tamen ob id dico quin illius officii viris regum cancellariis inter coaulicos serica et holoserica et alii ambitiosi insignes et præclari apparatus non deceant, si quidem qui mollibus vestiuntur in domibus regum sunt, sed ob id dico quod, nisi subesset causa, levitam sicut ne aulicum esse nec aulicus apparatus decuisset. Verum in levita nostro causa quam jam præfati sumus suberat ut aulam intraret. Qua etiam mira divini dispensatione iudicii postea per martyrium modicum subtractus mundo, non sublatus magis quam in hac carne vivus, sicut hodie cernitur et sacerdotio profuturus erat et regno.

10. QUIBUS GRATIARUM DONIS REGIS GRATIAM SIT ADEPTUS.

Thomas itaque noster, levita jam quasi deposito, cancellarium agens cancellarii per omnia strenue portabat onus et industrie opus exsequebatur. Quem juxta jam sæpe dicti pontificis opinionem et votum, rex pro ætate sapiens et argutus præter alia gratiarum dona quotidie fidum experitur in consiliis et discretum, in dubiis providum et intrepidum, fortem vero in asperis et magnanimum: quæ profecto aspera et dubia grandem semper potentiam comitantur. Cujus, etsi vita brevis, curæ tamen immortales sunt et innumere; et grandi fortunæ semper quasi sedentes in insidiis et tendentes laqueos ambigui et adversi humanarum rerum subito et ex insperato quotidie emergentes eventus. Unde contra dubia et aspera, quæ tam crebro eveniunt maxime in grandi fortuna, forti consilio tanquam rumpenti laqueos et eludenti tendiculas quotidie opus est. Juxta quod ait quidam: « In dubiis et asperis fortia quæque consilia fore optima. » Hanc consilii fortitudinem et discretionem et fidem rex industrius in isto experiebatur in dies.

11. QUANTUS IN CANCELLARIA FUERIT.

Rege vero tantam cum prudentia cancellarii sui cernente magnificentiam, cancellarius apud regem gratia proficiebat in dies, et ut breviter dicam, in brevi, sicut magnificentia ante omnes, ita et gratia super omnes apud regem eminuit. In tantum quod omnium iudicio etiam quotquot ante ipsum venerunt primi facti sunt novissimi. Et merito quidem sic: quotquot enim strenua ipsius in cancellaria opera hic enumerare yix sufficerem; qualiter videlicet et quam industrie munitiones quinque munitissimas, in Franciæ et Normanniæ sitas confinio, domino suo regi, ad cujus tamen jus ab antiquo spectare dignoscebantur, a rege Francorum per matrimonium sine ferro, sine gladio, absque lancea, absque pugna, in omni regum dilectione et pace revocaverit, Gizortium scilicet castrum munitissimum et alia quatuor. Et quod majus adhuc, quam audacter, quam strenue ultra Guasconiam in partibus Tolo-

maris cum pauca manu militari sidenter remanserit, domino suo rege ob causas Tolosæ obsidionem, quæ ut asserebat omni jure debebat sibi esse subiecta, differente tunc. Quam per beati Exuperii patrocinia semper credibile est defensari. Verum rege obsidionem civitatis differente sic et cum grandi exercitu suo reverso, cancellarius post illum in terra illa rebellis relictus est qui a rege captus in terra munitiones conservaret. Verum qualiter illas conservaverit et alias strenue in manu militari acquisiverit, et hæc et alia multa ipsius et cancellaria opera strenua quæ mundus novit hic pertranseo. Ut ergo, omissis his, ad ipsius adhuc reveriar magnificentiam, ipse certe supra suscepti officii debitum, cujus sicut norunt experti onus grande, sed ipse etiam supra debitum munificus, omnibus dapillis supra omnes et præ omnibus apparebat magnificus sicut magnus corde, magnus et corpore, magnus et apparatu. Nihil circa eum nisi magnum, nihil nisi magnificentia. Et si quando vacaret, nunc in civibus cœli ludens aucupium, nunc bestiis terræ dominans venaticum exercebat. His allecti, sicut tale solet hominum genus, confluebant ad ipsum jam catervæ equitum, stipabant undique novellæ et generosæ generosorum propagines, magnati magnatum filii tanquam novellæ olivarum in circuitum mensæ ejus. Hinc inde vero ministrorum examina pullulabant. Et quia, ut diximus, clericum pro tempore quædam discretionis cautela deposuerat, erant quidem clerici de familia, sed seorsum. Videres totam domum ipso tanquam stella matutina, cæteris vero tanquam stellis micantibus circumseptam illustrari. Tandem vero cum tantis et talibus apud regem summum gratiæ gradum attigisset, jam quasi rerum summam ipsi committens, filii sui Henrici universorum hæredis tutorem facit et patrem, ut reputet ipse filium per gratiam, quem rex ipse genuit per naturam. Et cancellarii quidem gratia apud regem sic erat.

12. DE AULICORUM INVIDIA.

Verum crescente gratia viri et gloria, ex his jam in aula conceptus crevit aulicorum vermis, per aulam serpens jam sed adhuc latens invidia.

Vermis quippe hic potissimum in aulis inter aulicos confovetur et coalescit per aulas jugiter sed latenter serpens et serpentine latens. Qui holoseri-catos purpuratos etiam ipsos et gemmis bibentes, eo latentius quo interius pungit et corrodit. Qui, etsi forte ipsi non pungunt quia summi, ab his tamen quibus sunt superiores quasi serpente pedibus calcato punguntur. Exeat ergo aula necesse est, qui hujus serpentis aulici virus metuit, qui toxicam

A fugit. Quia si forte non pungit ipse, ab alio tamen punctus inficitur : et eo quidem periculosius quo latentius quo ignoratur quis punxerit. Unde et in aulis maxime a quo caveatur nescitur : juxta illud in Psalmo : *Si inimicus meus maledixisset mihi, sustinuissem utique : et, si is qui oderat me super me magna locutus fuisset, abscondissem me forsitan ab eo (Psalm. LIV).* Verum in aula quis quem evitet aut a quo abscondet se? Omnes enim amici et omnes inimici; applaudunt omnes et omnes pungunt; omnes extollunt et omnibus detrahunt; osculantur in publico et produnt in oculto...

(Codicis Atrabatenensis unum hic deest folium, quod finem secundi et initium tertii libri, vel paginas 23 et 24 editionis nostræ, continebat.)

pervenerunt et de concilio quod rex convocavit, ubi rex ab archipræsule et fratribus suis coepiscopis postulat, ut exactorati clerici etiam corporaliter puniantur, et de causa et controversia, quæ super hoc inter regem et archipræsulem ore ad os ventilatur, uno allegante pro pace populi altero vero pro libertate clerici; et de regiarum consuetudinum a rege exacta observantia, et qualiter ab archipræsule et coepiscopis simul tunc omnibus concorditer sit responsum se observaturos has, salvo ordine suo, et quomodo ex adjectione hac rex offensus fuerit.

19. De munitionibus, quas rex ab archipræsule repetit et de episcopis qui archipræsulem sum deserentes : regi adhæserunt, et quomodo archipræsul postea a multis persussus adjectionem illam, videlicet salvo ordine, promissit se mutaturum.

20. De concilio apud regiam illam mansionem quæ Clarendune dicitur convocato, ubi archipræsul et coepiscopi mutaverunt adjectionem verbi præfatam et de consuetudinibus quæ regiæ vocabantur, ad quas observandas archipræsul et episcopi jussuando se obligaverunt mox ibi expressis.

21. De archipræsulis a concilio hoc revertentis meditatione in via, et allocutus quid responderit, et quod ex verbis discipuli nonnulla consolatio est archipræsuli, qui ab altaris officio circiter per dies quadraginta semetipsum suspendit, donec a viro apostolico et consolationis et absolutionis gratiam obtinisset, et de fuga ipsius his attentata, sed non proficiens quomodo ad regem sit reversus, et qualiter exceptus a rege, et de pontificalibus ipsius operibus cum ipsi necdum fugere licuisset, et vocatione archipræsulis ad causam apud regiam illud castrum quod dicitur Norhamtune, et de ipsius ibi pœna et pugno, et demum de fuga et causa fuge.

INCIPIT TOMUS TERTIUS.

1. His itaque se habentibus, Thoma nostro in aula summa augustali gratia et gloria cæteris longe præfulgente, et ipso jam velut rerum summam gerente,

sepe nominatus Cantuariorum antistes Pater Theobaldus, vir omni sanctitate et religione perspicuus, qui Thomæ nostri currus exsultat et auriga, cum

Cantuariensem Ecclesiam per annos viginti duos strenue et prudenter rexisset, senex jam et plenus dierum decretam universæ carnis ingreditur viam. Quod cum statim ad regem et ad aulicos pervenisset, suspicantur mox omnes, submurmurant hi, asserunt illi cancellarium archipræsulis defuncti successorem futurum; et id ipsi præconizabat et populus. Verum rex omnino dissimulat; nisi quod archiepiscopatus, sicut et episcopatus et etiam vacantes abbatiae solent, curæ cancellarii et custodiæ traditur. Cancellarius vero, qui quasi præsagii quibusdam et conjecturis jam de regis voluntate præsumebat, tamen sicut et rex dissimulans, rem tacitus considerabat. Rege autem tunc in transmarinis extra regnum agente et cancellario cum eo, propter crebras Wallensium infestationes et alia quædam regni negotia cancellarium rex in Angliam mittere disposuit; et quia plurimæ et magnæ erant causæ, cancellario, nemine suorum ad magna sic idoneo, injungit legationem, qui cum jam suscepta per dies legationis forma, in ipso profectionis articulo ingressus aulam apud castrum illud in Normannia quod Faleise dicitur, ut rege duntaxat salutato mox conficeret iter, vocato eo, seorsum rex instillat secretum: « Necdum, » inquit, « plene nosti tuæ causam legationis. » Et adjecit: « Mæx, » inquit, « voluntatis est te Cantuariensem archipræsulem fore. » Cui cancellarius schemata quædam risibilia quibus tunc inductus subridendo ostendens et quasi oculis ingerens: « Quam religiosum, » inquit, « virum, quam sanctum in tam sancta sede et super tam celebrem et tam sanctum monachorum conventum constitui desideras! sciturus certissime quod si, Domino disponente, acciderit sic citissime a me avertes animum et gratiam, quæ nunc inter nos tanta est, in atrocissimum odium convertendam. Novi quippe te nonnulla exacturum et etiam in ecclesiasticis te jam multa præsumere quæ ego æquo animo sustinere non possem. Et ita occasione nacta interponent se invidi, qui extincta gratia perpetuum inter nos odium suscitabunt. »

O mira viri magnificentia domino suo comminantis sic; in cujus manu erat adhuc ipsi comminanti, honorem conferre vel adimere! O sincera animi puritas non honorem ambientis, nec respicientis tamen, sed cum honore propter honorem humeros suos ad honoris onus portandum se mox parantis! Mox, inquam, in primo honoris illius auditu, utpote qui expertus optime novit quantum honor ille oneris habeat cum honore. O quam magnum, quam certum pastoris boni Ecclesiæ profuturi verbum hoc præsagium erat, ipsomet contestante ante illum recessus sui a rege articulum quod ipse nec per se nec per alium regi nec rex ipsi vel etiam verbum unum prælocutus fuisset. Verum rex nihil motus ex cancellarii sui quasi dilectionis comminatorio hoc, sed in proposito manens mox in ipsa cancellarii præsentia magnis et industriis viris legationis ipsius in Angliam comitibus hoc votum suum et desi-

derium super cancellarii promotione, sacro metropolitanæ ecclesiæ conventui et regni sui clero intinandum, sedulo et opere injunxit. Et ad unum inter legatos præcipuum specialiter sermonem dirigens (Ricardus dictus cognomento de Luci hic erat), « Ricarde, » inquit, « nonne, si mortuus jacerem in sandapila, intenderes ut primogenitus meus Henricus in regem sublimaretur? » Et ille: « Etiam, domine, pro posse. » Et rex illi: « Adeo volo intendas ad cancellarii in sede Cantuariensi promotionem. » In quo certe, sicut in priori cancellarii magnificentia et animi absque ambitione puritas, ita et in hoc perspicue videre possumus constantem regis gratiam et rege magnificentiae gloriam. Eo ipso, ni fallor, sicut et rerum cito post probavit exitus, ad cancellarii sui promotionem ferventior quo ipsum magnifice sic locutum audierat et quo minus ambitiosum pensabat. Sed super omnia et præ ceteris intueri hinc libet vere regum corda in manu Dei esse et dispositionibus Altissimi nihil posse resistere. Hanc historiae pericopen ab ipsomet pontifice postea in exilio, propter verbi sui quasi cujusdam vaticinii finem tunc impletum, sæpius rememorante didici. Unde et pericopen hanc eo promptior quo verior ipsa, et ab ipso mihi edocta pontifice, historiae huic curavi hic interserere: et eo præsertim quod ex hac utriusque tam regis quam cancellarii virtutum hinc inde magnificentia adverti possit. Et ita rex cancellarium suum in hæc dimisit, qui post dies paucos in Angliam applicuit.

2. QUALITER CANCELLARIUS ELECTUS.

Regis autem voluntate et petitione cito post cancellarii adventum in sancto illo et religioso sanctæ Cantuariensis Ecclesiæ conventu et episcoporum quibusdam accitis super cancellarii promotione declarata, mox ut solet varia diversorum fertur sententia. Et præsertim in sacro illo monachorum conventu utpote quos præ ceteris contingebat negotium: asserentibus his quod hoc fieri bonum, aliis vero contra imo malum. Illi regis gratiam allegabant et per hoc tam gratioso inter regnum et sacerdotium mediatore Ecclesiæ deinceps pacem futuram sicut securam ita et prosperam; aliis vero e diverso illam regis gratiam non profuturam, sed plurimum eo ipso Ecclesiæ obsuturam opponentibus; eo quod officiales Augusti et præsertim quotquot aulici, pontifice non de ecclesiæ sed de aula assumpto, in Ecclesiæ bona liberius grassarentur: et præterea quod nimis foret absonum et omni divino juri adversum hominem militari potius cingulo quam clericali officio mancipatum, canum sectatorem et pastorem avium, ovium constituere pastorem; præsertim super tam sanctum monachorum conventum et super tam grandem et tam numerosum, qui per totam Angliam diffunditur, Dominicum gregem: hunc profecto aulica cupiditate et voracitate quadam lupina totius gregis dissipatorem potius et voratorem quam pastorem, certissime præsumendum; et qui propter popularis auræ statum universa eventilet et aulico fastu expompet.

O quam multos in facto hoc supplantavit suspicio et in vanitate detinuit sensus eorum! Cernebant hominis vanitatem, de futura quam necdum videbant veritate diffusi. O divina judicia, et si terribilia in consiliis super filios hominum, nihilominus tamen et jucunda! O temeraria hominum judicia quæ, etsi quando probabilia, fallentia tamen! Ita quidem mundi homines de mundi homine, secundum mundi judicium judicabant, sed longe secus et satius et jucundius de mundi homine, non secundum mundi temerarium sed secundum jucundum Dei judicium accidit. Unde et rex ille et Propheta: *Amputa*, inquit, *opprobrium meum quod suspicatus sum, quia judicia tua jucunda* (Psal. cxviii). Vere jucunda Dei judicia contra mundi spem, contra omnem mundi suspensionem, educuntis mel de petra, oleumque de saxo durissimo et de lapidibus istis suscitantis filios Abrahamæ [auferentis etiam et amputantis opprobrium servi sui.] *Amputa*, inquit, *opprobrium meum quod suspicatus sum*. Quis enim crederet nisi suspicione ab ipso Deo amputata, quis asserenti se non apponeret, canum, ut aiebant, sectatorem et pastorem avium, futurum ovium tam bonum et tam fidum pastorem? Quid tamen hoc facto non solum satius, sed et jucundius et inter Dei opera Deo dignius? Eo quidem Deo dignius quo clementius et quo illo mirabilior Deus. In tanta quippe potestate, etsi omnia ineffabiliter admiranda, nihil tamen tam stupore tam admiratione dignum quam quod in tanta potestate sit clementia tanta. Propterea ex qua causa monet Sapiens ne ante mortem hominem laudes, ita et ne vituperes ante mortem. Quis enim scit si convertatur et ignoscat Deus et relinquant post se benedictionem? Unde et Magister: *Nolite*, inquit, *ante tempus judicare* (Joan. v). Omnium igitur inpræsentiarum suspicione amputata et alteratione ommissa, divinæ, cui cuncta militant, dispensationi pariter et in hoc regio quoque voto militante et episcoporum provincialium et conventus sanctæ Cantuariensis Ecclesiæ communi omnium consensu et unanimi Thomas ejusdem Ecclesiæ archilevita in archipræsulem Londoniæ in regio illo et præclaro monasterio quod dicitur Westmunstier eligitur. Eligitur, inquam, jam in aula annis quinque cancellariæ functus officio, ætatis vero annum vitæ circiter agens quadragesimum quartum. Et mox filio regis regni hæredi Henrico adhuc puero, et quem de eximia regis gratia cancellarius quasi in filium et alumnum, sicut jam præfati sumus, susceperat, præsentatur regis patris sui de mandato, patris in hoc vices gerenti. Et electioni Ecclesiæ regia conniventia accedente, auctoritate quoque regia ab omnibus curiæ nexibus absolutus, liber Anglicanæ Ecclesiæ redditur et in ea libertate ab Ecclesia in hymnis et canticis spiritualibus sicut solet cum summa jucunditate suscipitur.

3. QUALITER ELECTUS AD SE SIT REVERSUS.

Thomas ergo noster, non jam aulæ cancellarius sed Ecclesiæ electus et ab omnibus curiæ nexibus

A absolutus, mox quasi homo de gravi somno vigilans, quis jam diu fuisset et qualis deinceps futurus esse debuisset, cum corde suo meditabatur. In aula aliquandiu quasi lethargicus sui ut videbatur passus oblivionem. Sed nunc rediens ad eor cum corde suo meditabatur. Et ex meditatione hac concaluit cor, et sensim cœpit ignis exardescere, quo novus qui extinctus putabatur homo totus et coactitus cœpit paulatim coalescere, sed necdum erigere caput. Qui tamen novus homo, sicut jam supra diximus, quadam discretionis cautela veteris hominis habitu magis fuit opertus, quam oppressus a veteri, nisi quia ipsa opertio quasi oppressio erat. Verum nunc mox in ipsa mutationis suæ novitate novus homo et relegari appetit et se diutius opprimi non permittit. Electus vero noster Londonia sicut ortus, sic ibi et electus cum multorum et magnorum comitatu cito post electionem metropolim Cantuariam propter consecrationis gratiam proficiens inter itinerandum, non in agrum deflectens, sed in ipsa via solum discipulum qui scripsit hæc accersivit, ipsi secreto inquires se in visu eadem nocte vidisse venerabilem quandam personam ipsi assitisse et decem tradidisse talenta. Cujus quidem interpretationem discipulus minime tunc advertens de somnii conjectura hæsitabat. Quam tamen mox post expletam de homine, quæ tunc non putabatur, dispositionem Altissimi, servus ille evangelicus qui acceptis in sorte quinque talentis alia quinque præter sortem negotiando super lucratus est, absque hesitatione omni et ænigmate nunc apertissime solvit. Adhuc autem eundem discipulum secretius alloquens pariter et in via mox subjicit: « Hoc volo, hoc tibi injungo de cætero, quem homines me esse dixerint confidentius mihi et secreto edicto, etsi quoque vitio laborantem, tibi, inquam, injungo ut mihi libere hoc et confidenter sed secreto edice [edicas]. Multa quippe amodo de me quæ non mihi dicentur, quemadmodum et de aliis et præsertim divitibus, plurima passim in vulgo de ipsis et pauca ullius nulla ipsis. Pariter et excessum indica, si quo tu ipse videris et judicaveris excedentem, » et in calce sermonis adjiciens, « circumspectus quippe, » inquit, « et clarius quatuor quam duo oculi vident. » Quod D mihi tunc credo quia forte ni fallor et aliis et alias me satisfactoribus et circumspectioribus nisi quia ego minime talis, idem pariter injunxisse.

O prudentia viri! O forma jam in necdum episcopo episcopalis, certe omnibus sed præsertim episcopis et admiranda et imitanda! O propheticum! o videns et videntis oculatum animal! quod ne in distortæ et anfractuosæ viæ et vitæ hujus nocte offendant ullatenus et ante et retro jam sibi oculis coaptabat. Jam profecto illius compastor et compastoris discipulus, qui compastoribus et discipulis suis dans formam: *Quem*, inquit, *dicunt homines esse Filium hominis?* (Matth. xvi.) Formam, inquam, dans ut hi qui lux sunt mundi et electi et gentibus in lucem dati, nequaquam contemnant sed crebro et sedulo de se

a suis vulgi inquirant opinionem. Ne videlicet ipsis A
nescientibus lucis suæ radios aut squalida et atra
detractionis nubes subobscoret aut adversus aliquis
sinistri rumoris flatus eventilet: tunc quippe, quod
absit! de luce mundi, de lucerna verbi, de candelabro
templi magis fumus quam illuminatio. emitteretur,
quod ne accidat vulgi de se a suis opinionem pastor
ille pastorum forma sciscitatur, in hac etiam
sciscitatione id notans multa dici et sinistra de nobis
quæ non nobis. Unde et plerumque in rebus
humanis illud lacrymabile accidit, ut etiam qui sibi
nihil conscius est, forte tamen ob aliquam mali
speciem in populo habeatur famosus, ipso tamen quæ
de ipso sinistra dicuntur penitus ignorante. Habens
quidem oculos ante sed retro carens, quid de se,
nec per se, quia non potest, nec per alium, quia
negligit aut contemnit, sed solum quid ipsi dicatur
attendens.

4. QUAM MAGNIFICE FUERIT CONSEQUITUS.

Verum electus noster, necdum episcopus, episcopalem tamen jam formam induens: vix adhuc etiam electus, mox elegit quibus istam quasi propriam propriæ visitationis suæ curam injungeret. Moti ergo Londonia, ubi electio, Cantuariam venimus, in qua tanquam metropoli secundum morem et canonum formam metropolitani consecratio celebranda. Ad quam jam consecrationem ob consecrandi reverentiam totum fere regnum confluxerat. Clerus quidem ut ex debito, proceres vero regni et magnates ut regi, cui opus adeo complacebat, pariter et electo, qui de aula prodierat, honoris impenderent gratiam et obsequium. Igitur in sacramentali illo tempore in illis tam miræ quam mirificæ unctionis diebus in hebdomada Pentecostes, in hebdomadæ Sabbato, temporis et ordinis ut mox clauit consonantibus sacramentis, archilevita Ecclesiæ electus in sacerdotem ordinatur, in crastino Dominicæ diei in antistitem consecrandus. Verum ordinato jam sacerdote, quis pontificum provincialium in consecratione primam manum habere debeat, deliberatur mox inter pontifices. Londoniæ quippe episcopali sede, ad quam id pertinere dignoscitur, tunc vacante, Wintoniensi, qui absentis aut non superstitis Londoniensis vices in provincia gerit, id ad se omnimodis pertinere asserebat. At e contra Rophensis eo quod ab ecclesiæ suæ fundatione et jure specialiter peculiari archipræsulis capellanus sit, id suum esse et non alterius contendebat. Tandem vero ob quedam quæ in præsentiarum hic interserere prætermitto, salvo in hac parte jure Rophensis ecclesiæ, de Rophensis consensu venerabili viro sicut generositate ita et sanctitate præclaro Henrico Wintoniensi episcopo archipræsulis consecratio est delata, et in crastino Dominico die in octavis Pentecostes festivæ supra modum et magnifice sicut futurum tantum decebat antistitem consummata. Cujus profecto consecrationi, præter procerum et nobilium regni tanquam turbam innumeram, quibus et egregius ille adhuc puer Henricus regis filius et

regni hæres præminebat, quatuordecim con-provinciales episcopi interfuerunt, ipso, ni fallor, qui consecrabat archipræsule quinto decimo. Et electi quidem nostri in archipræsule consecratio sic erat, ipso tunc circiter quadragesimum quartum, ut supra diximus, ætatis suæ annum agente.

Nuntii vero ad felicis memoriæ Alexandrum tertium Romanæ sedis pontificem confestim directi sunt, qui de novo propter schisma quod in Romana tunc Ecclesia erat, apud Montem Pessulanum applicuerat et ibidem per aliquod tempus moram fecerat. Qui vero missi fuerant, viri religiosi literati et honesti, insigne illud metropolitani quod pallium dicitur, instantes sicut decebat et fortiter postulantes, tum quia favorabiles in se qui petebant, et præcipue quia ea persona favorabilis ad cujus hoc usum petebatur, citius et facilius pallium a sede apostolica obtinuerunt et in brevi cum pallio lætabundi et prospere sunt reversi. Et ita Thômas hic noster cum summa devotione suscepto pallio de episcopo archiepiscopus factus est.

5. QUARE VEREATUR DISCIPULUS CONSECRATI VIRTUTES.

Verum enim hucusque imaginem terreni, hominem sæculi, per sæculi prospera, tanquam cymbam per æquoris placida regens, qualiscunque pictor quoquo modo depinxerim, superest nunc imaginem cælestis, hominem Dei, Christi pontificem per sæculi prospera et adversa transeuntem depingere; quod jam non est cymbam in aura per æquoris plana ducere: sed potius suspensio velo, artemone erecto, laxatis funibus in altum maris descendere, et per tot rupes et scopulos, per Syrtis et Scyllæos canes, navem institoris gubernare. Jam quippe Thomas noster, non officialis aulæ sed antistes Ecclesiæ, descendit mare in navibus ut faciat operationem in aquis multis. Propterea ego vetus, stylum non habens præter quam tenuem et exsanguem, et materiæ novitatem et magnitudinem pensans, in ipso limine cum stylo meo tam tenui nunc sto et hæsito dubius admodum quomodo fœdus pictor et ignarus, non jam in homine sæculi imaginem terreni, sed in novo et tanto Christi pontifice cælestis digne valeam imaginis lineamenta depingere, et illam institoris navem, tot et tam pretiosis refertam mercibus, inter tot maris pericula ad salutis portum, ad quem semper velificabat, describendo perducere. Quærite eui facile; mihi certe fateor hoc difficile. Qui enim de terra est de terra loquitur et terrenam terreni quoquo modo formare potest imaginem, utpote qui format, formatæ similis, qualis enim terrenus tales et terreni. Verum qui de terra est terrenus, imo qui terra est et in brevi reversurus in terram, quomodo digne poterit ullius, etiam alicujus cælestium explicare imaginem? Qualis enim cælestis tales et cælestes. Unde et cælestis imago cælestem pictorem exigit, non terrenum, non luteum. Accedit etiam oneri quod non quamvis cælestem cælestis imaginem sat sit nunc ad

formandum, quin potius, quod de cætero materiæ novitas, dignitas et magnitudo exigeret, nova et supercælestis ipsius pontificis Christi pontificalis forma velut interiori quodam et diligenti intuitu excogitata et discreta, humano generi in sæculorum fines intuenda aut depingenda nunc, aut silendum est penitus. Certe Moyses, ipse, vita tantus et scientia, seorsum a populo in montis cacumen ducitur, et ibi condendi tabernaculi cum utensilibus ministrorum, et ministrorum formam, et ministrandi ritum et ordinem, in præstenso exemplari contemplatur. Cui Dominus : « Vide, inquit, exemplar. » Cui et inter cætera, et ni fallor præ cæteris, legalis pontificis et ministrantium ei formæ in exemplari præostenditur. Et ecce plus quam legalis pontifex hic. Legalis quippe ille, evangelicus hic. Attamen miser ego, peccator magis fœdus quam pictor fidus, cum hujus formam describendam susceperimus, nec seorsum a populo in montis cacumen cum Moyse, nec etiam cum Josue in ullam ductus montis devexitatem, sed in valle lacrymarum, in medio populi mei culpa et pœna mei similis habito. Et propterea ego vetus ad novum jam hominem accessurus, ad materiæ novitatem stupet animus et ad magnitudinem stylus qui velut hucusque tenuis et inanis hominem sæculi per inania transeuntem exarando descripserat, exhauritur : et ad materiæ dignitatem velut ob eximiam splendoris materiæ claritatem repercussus reverberatur et quasi obducitur. Verumtamen ego visu qualicunque adjutus, me non sicut sciolum sed humiliter incisum, plasmatore hominum et formatore sicut solet tales erudiente per gratiam cœlestem, cœlestis imaginem et pontificalem in Christi pontifice formam mei nunc temporis hominibus et omnibus post futuris sæculis intuendam et admirandam, et præsertim pontificibus imitandam, stylo prout datum fuerit immutato qualitercunque describam, qui tamen stibio magis depingendus quam stylo describendus fuisset. Describam tamen : describam, inquam, visu qualicunque adjutus. Nam si gloriari oportet, imo quia oportet et sic expedit nunc, et mihi exemplar non quidem in monte sed in hac lacrymarum valle præostensum : vidi quippe ego, et secutus sum per totum tempus usque ad ultimi exitus sui diem per multas et varias tentationes obsecutus pontifici : et quia gloriari nunc expedit, multa per totum id temporis familiaritatis ipsius gratia decoratus, ita ut in hac parte gloriæ nulli secundum fuisse me credam. Unde et ni fallor, secreta quadam dispositione Altissimi, cæteris jam fere omnibus de mundo sublati qui mecum viderunt et comministraverunt pontifici, mihi quasi soli adhuc reservato hoc reservatur ut juxta exemplar quod præ cæteris multis, pontifici similiter obsequentibus diligentius et familiarius intuebar, præsentis et post futuri sæculi hominibus cœlestem cœlestis imaginem explicem : præsertim cum a viri hujus de hoc mndo excessu jam quartus decimus annus sit quos scribo hæc, Altissimo certe, ni fallor, sine cujus consilio nec folium cadit de ar-

A bore, disponente sic, et me per annos scribere procrastinante. Et bene quidem sic; possum quippe nunc, docente Domino, ad sæcula post futura scribendo transmittere de viro hoc non solum illa quæ vidi de vita ipsius in carne hæc, sed et de his quæ post mortem et per mortem ejus sicut pretiosam et triumphalem acciderunt. Sed ad cœptam historici hujus cantici seriem revertamur.

6. QUOMODO EXUTO VETERI NOVUM HOMINEM INDUERIT.

Thomas ergo noster, non jam officialis aula, non electus Ecclesiæ, sed jam Ecclesiæ consecratus, omnino supra omnium spem mox deposito cancellario, antistitem vivens in spiritus de cœlo subito advenientis vehementia quo in illis unctionis diebus unctus unctus mox fuit repletus, totum veterem hominem adeo concussit, excussit, et expulit ut jam vetustatis nec compareret vestigium. Unde et novus quidam homo, quem supra pro tempore veteris hominis habitu opertum magis quam oppressum a veteri diximus, discooperitus, et in unctione dati spiritus magis robur accipiens, mox totum se exerit et haud segniter strenue se accingit ad opera, ea præsertim quæ novum tunc decebant pontificem. Unde et pontifex jam non tractus, sed sacra delibutus unctione, cursor levis, non ut prius operio adhuc novo homine in virtutum odore, sed jam in forti et strenua virtutum operatione celer currebat, non ut prius virtutes odorans sed fortiter operans. Et qui supra electus cum corde suo meditabatur quasi deliberans, jam consecratus, in sacra illa unctione unctus Domini, ab unctionis spiritu consilium habuit, quo sicut corpore sic et corde aulam exiret, purpuram deponeret et cilicium sumeret. Unde et mox, tanquam veteris hominis indumento rejecta purpura, sicut corpore sic et mente exivit aulam, exivit purpuram, et cilicium induit, novum novi hominis habitum, indumentum novum, sed inusitatum aulicis et peregrinum ab aula. Ecce Thomas noster alter in spiritu et virtute Eliæ pilis camelorum vestitus! Ecce virgo alter electus a Domino, qui relicta sindone, cilicio super nudo amictus, viros sanguinum inimicos crucis Christi fugiens, novi regis vexillum novus tiro in cilicio sequitur; illius novi regis jam tiro novus, cujus vox in Psalmo : *Ego autem, cum mihi molesti essent induebar cilicio* (Psal. xxxiv); et item : *Posui, inquit, vestimentum meum cilicium et factus sum illis in parabolam* (Psal. lxxviii).

O Thomas, et Thomas jam non Thomas et tamen vere Thomas! jam non holosericus, non purpuratus Thomas, sed alter Thomas, qui jam toto, tam delicato, tam tenero corpore inter Cresi opes Darii divitias et Sardanapali delicias enutritus, nunc sacco cilicino obvolvitur, infirmioribus etiam corporis hac circumdatis asperitate. O quanta et quam omni admiratione digna super te Thoma dextere Excelsi mutatio, qui in palatio inter augustales divitias et delicias educatus, et inter Palatinos sicut gratia eximior sic et cultu præclarior, totum palatium illustrare videbatur, nunc totus fœdi et hirsuti animalis pilis obvo-

lutus, assumens saccum pro socco, cilicium pro holoserico et pro pallis cinerem! Sed quid? Vere novi regis jam tiro novus, cui jam vetera transierunt et ecce facta sunt omnia nova. Novus enim rex, nova lex, novus grex, amictus novus, novus et ipse. Ecce jam omnia nova, novus rex Christus, nova lex amor Christi, novus grex Christi Ecclesia, amictus novus cilicium, novus et ipse Christi tiro novus. Unde et hæc inter initia tirocinii nova sunt nostri arma tirohis, quibus indutus exterius pugnaturus erat ad bestias. Hoc militari schemate in illo sacramentali tempore Pentecostes, quo consecratus et cum apostolis vir apostolicus virtute ex alto indutus, induitur: et hoc fuit primum et inter initia in illis unctionis diebus uncto Domini unctionis magistra edocente cœlitus datum consilium: et hoc initium operum.

Verum qui manum mittunt ad fortia, inter initia spiritu ferventes, processu temporis quasi fatigati ex cursu seu pressu nimis sub onere, solent sensim in dies tepescere, donec tandem sancti officii suscepti debito inimica semper oblivio superveniens, per seducibiles carnis illecebras, per quotidiana vitæ hujus oblectamenta et occupationes varias, spiritum inter initia adeo fervidum in fine penitus exstinguat: turpi quadam et fœda mutatione de spiritibus tam ferventibus, in fine tanquam ut corpora seu potius cadavera quasi insensibilia et exanimata conversi, seu cum misera illa muliere humana in eis effigie abolita quasi transsubstantiati in statuam, illi cada-verosæ seu infatuatæ, aut ut novo utar verbo in-statuatæ animæ similes, quæ secundum prophetica prius in croceis nutrita postea stercora amplexat. De quibus Magister: *Sic, inquit, stulti estis ut cum spiritu caperitis nunc carne consummemini (Gal. iii).* Quod oculatum animal hoc, Thomas scilicet, opereose attendens et studiosè præcavens, quodam sacerdotis ordinis insigni quod stola seu orarium dicitur, mox ut sacerdos utrumque quod sacerdotum est humerum ambebat et hoc quotidie et continue in omnium visu gestabat. Juxta quod Dominus in lege de decem legis verborum signo habens orarium hoc quasi jugiter appensum ante oculos suos et ligatum quasi signum in manu sua. Orario itaque hoc evangelico legalium fimbriarum quæ Domino ipso jubente sunt introductæ, in sacerdote hoc evangelico formæ instar: quæ profecto fimbriæ per angulos palliorum filiorum Israel ut fierent, a Domino præceptum est, ut cum illas vidissent memores fierent mandatorum Domini, ne sequerentur cogitationes suos et oculos per res varias fornicantes. Tale quid et post legales fimbrias in evangelico orario hoc, ut per hoc sacerdos hic evangelicus, quod jam susceperat, evangelicum jugiter recolat jugum, et utrumque humerum orario ambiens hoc, ni fallor, insigni cœlitus in signum accepto; quasi visibiliter iam prophetizans quod sicut bona susceperat de manu Domini, ita et mala foret perpessus pro Domino. Et hic esset utriusque humeri ambitus, bona videlicet hinc, mala inde, alia etiam et digna

A de causa hoc sic assidue gestans, ut ad confirmationis sacramentum celebrius peragendum semper foret pacator, ad quod præ cæteris omni tempore pronptissimus et devotissimus fuit. Duo itaque quæ gestat pontifex velut Domino insignia tenemus in pontifice, cilicium et orarium: primum cilicii insigne in signum Christi militis; alterum vero orarii insigne in signum Christi sacerdotis, quasi adhuc multum pro populo et pro sancta civitate oraturi. Primo unctus advertit se Christi militem, sed quo ambitur secundo Christi sacerdotem. His ornatus pontifex quotidie procedebat in publicum, nisi quod cilicium juxta nominis sui rationem et religionis veritatem tenendam, velabatur admodum in oculo, nemine præterquam aliquo sine quo tale quid geri non poterat conscio. Unde et istud sui insigne tirocinii deinceps toto tempore non deposuit, donec gloriosi certaminis sui consummasset triumphum. Verum alterum illud, quod orarium diximus et gestabat in publico, in exilium exturbatus mox deposuit, eo quod jam exsulem in alienis provinciis non deceret. Ob id etiam et merito illo sacerdotis exutus insigni, quod exturbatus sicut vere exsul, sic et quodammodo exsacerdos. Et quidem de novi nostri pontificis insignibus hæc: verum in reliqua veste quotidiana et communi, toto quidem anno primo more suo clarus et nitidus, sed cleri postmodum præsertim in habitu mediocritatem est secutus, ita ut juxta quod ait quidam nec essent exquisitæ sordes nec affectatæ deliciæ. Clausæ ipsius vestes, pullæ et poderes, et pelles non quidem pretiosæ, sed agniæ. Unde et nonnulli eum ob similitudinem vestium suspicati sunt fuisse, sicut vulgo dicitur, regularem canonicum, cum tamen sola devotione, quod et omnium vere fidelium commune est, canonicus fuerit sed professione nequaquam. Et vestes quidem pontificis, quo emptæ vilius, eo sicut solet crebrius mutabantur, ut eo ipso Christi nudus imo Christus ipse in nudo operiretur frequentius his ipsis vestibus quibus operiebatur ipse Domini christus. Et hæc pro certo universis Domini Christi pontificibus Christi forma ab hoc tanto Christi accepta pontifice maxime observanda, ut quo ipsimet vestiuntur in nudo suo vestiatur et Christus; nec hi nec illi his ipsis quibus Christus Domini præterquam solus et nudus Christus induatur qui ipsis ovium suarum lac et lanam commisit et vellera. Ad illius quippe, necdum etiam pontificis, opus exemplare pontificibus præsertim recurrendum, qui cum nihil præterquam chlamidem qua indutus erat, haberet cum paupere tamen nudo illam dimidiat. Unde et mox nocte in secuta ad Angelorum circumstantium multitudinem audit Jesum voce clara dicentem: « Martinus adhuc catechumenus hac me veste contextit. » Videat ergo quid faciat episcopus si fecit sic iste etiam adhuc catechumenus. Videat, inquam, episcopus quid faciat inter tot vestium mutatoria, de vestibus suis jam attritis, cum catechumenus hic de unica hac

quam habebat chlamide et se sic operiret et pauperem, imo teste Christo Christum ipsum in paupere. Nec enim ut illud in propheta statu Veteris Legis breve pallium hoc, sed in Evangelio sub lege gratiæ ex charitate latissimum illud qui cælum et terram implet et operit operiens et Martinum. Sed hoc Martini, imo et Christi pallio jam ipsis communi intermisso, ad pontificis nostri novi, novi tironis Christi novum schema revertamur; cujus quidem corporale et visibile corporis schema ut jam descripsimus sic erat.

Sed fuit adhuc longe aliud longeque spectabilius, non quidem corporale et visibile, sed sicut spirituale et invisibile, novum novi schema tironis, eo certe fortius quo interiorius, quo non patebat accessui; de quo militiæ tribunus magister: *Induite, inquit, vos armaturam Dei (Ephes. v),* lorica justitiæ, scutum fidei, galeam salutis et gladium spiritus, calceati pedes, Ecce Dominica novi Domini militis armatura nova, in qua lorica justitiæ sicut in hoc Dominico milite præminuit ita et præponitur a magistro. Attamen lorica hæc reponenda adhuc tempore quidem suo assumenda: *Omnia enim tempus habent; tempus dilectionis et tempus odii; tempus belli et tempus pacis (Eccle. iii).* Hæc itaque reposita servatur adhuc.

7. DE PRIMA PONTIFICIS MENSA CORPORALI, QUOD EST MANDATUM NOVUM.

Et interim videamus nova quæ circa pontificem novum. Et post pontificis habitum, quem præscribendo perstrinximus, ad pontificis mensam accedamus ipsius vitam quemadmodum et habitum intuentes. Nec enim fideliter cujusquam vita describitur, si quo vivitur, vel qualiter ipse vixerit, omittatur; præsertim cum nova ista pontificis novi mensa tam pontificalis sit tam opulenta tam splendida, magis certe pietatis operibus quam dapum corporalium, quibus tamen uberrime abundabat, repleta varietate. Ad hanc itaque omnes sed vos præsertim pontifices invitandi. Et certe ad hanc confrater vester novus ipse pontifex universos vos invitat, et ut accedatis sicut dignum et justissimum est; in hac quippe mensa magnus ille paterfamilias pastor pastorum et magister discumbit. Primus in capite et post ipsum ex ordine et cum ipso sui duodecim. Et in hac mensa nova novus pontifex, tanquam Domini dispensator novus, ponens vestimenta sua et præcings se, Domino cum suis discumbenti ministrat. Ante Dominum discumbentem in cilicio suo stans et orario regi suo novo ministrans, in his tanquam novi dispensatoris insignibus miles ipse novus novi regis Christi et sacerdos. Hoc est mandatum novum quod ipse jam instituit novus. Si quidem diebus singulis post synaxim decantatam quam cito post gallicinium sub profunda nocte decantare consueverat, mox clam in conclavi aliquo subintroducebantur fratres tredecim quibus ipse positis vestimentis suis et se præcings discumbentibus ministrabat [singulis quatuor argen-

A teos largiens.] Et hoc ita mandatum turpium magis quam for verus, per singulas noctes faciebat; veritus nec immerito ne si sub luce faceret, illud ex visu hominum virtutum virus inanis inficeret gloria quo ut supra tetigimus, ipse dum adhuc juvenis, quasi incurabiliter videbatur infectus. Unde et quo secretius, eo fiebat et securius.... (*De hoc hiatu vide infra, col. 354.*)

(*Deest unum folium codicis Atrabatensis.*)

sicut prioribus parum aut nihil damnationis est, qui non solum potentiam sed et una probabiliter quidem inducti, aut ut durius loquar seducti, etiam opus potentiæ ad salutem suam, quod tamen forte non subest, consuntur. Inprimis quippe qui non credit pro impenso beneficio quod non credunt beneficiorum uredo ingratitudo est. In secundis vero qui credunt pro beneficio non impenso quod tamen impensum credunt, dulcis quædam et grata obnoxietas est. Quos, etsi forte aliqua poena maneant, quia credunt falsum, minime tamen ut nunc sentio, erit eis exinde æternum in morte supplicium: quin potius ipsorum forte remunerabitur devotio, quam habuerunt pie et devote credendo aliquid Dominum pro salute sua misericorditer fecisse, etsi illud non fecerit. Nemo autem illud Magistri hic mihi objiciat: Si autem, inquit, Christus non surrexit, inanis est prædicatio nostra, inanis est et fides vestra (I Cor. xv). Nemo, inquam, illud magistri nunc mihi objiciat.

De apostolis quippe proprie ibi sermo est, unde et mox subjicit: *Invenimur autem et falsi testes Dei quoniam testimonium diximus adversus Dominum quod et suscitavit Jesum Christum, quem non suscitavit si mortui non resurgunt (ibid.).* Nec solum de apostolis sed et de illis etiam et pro illis potest videri magister dicere, qui mendacis assentatoriis, tanquam si deliniri et demulceri possit sicut homo Deus, Dominum honorant et extollunt. Contra quod ait doctorum unus perhorrendum fore aliquid falsi de Deo dicere, etiam si ad laudem ipsius videatur pertinere, quia non minori sed majori fortassis scelere in Deo laudatur falsitas quam vituperetur veritas. Ecce doctoris verba: « Unde et mihi et Dei hujusmodi assentatoribus modo nihil, sicut nec ipsis et Deo. » Hoc est enim quod ego longe ab eis diversus imo penitus adversus, dico quod ego existimo, quod ego sentio, videlicet quod si quis pie devote et ex probabilibus ad suam salutem crederet Christum resurrexisse, etiam, etsi non resurrexerit nihil aut parum damnationis fore huic, qui crederet sic de Christo Jesu. Sed forte ex præmissis mihi quis sic objiciet: Quid igitur si ex Scripturis et ex probabilibus multis signis et prodigiis et virtutibus crederet Ecclesia Dominum ad salutem suam jam misericorditer incarnatum, et tamen necdum incarnatus fuisset; quemadmodum et errans Synagoga Messiam necdum venisse credit sed venturum adhuc, quæ tamen Dominum in carne venturum diffitetur, futurum Messiam purum hominem tradens; unde nihil nunc nobis et illis, qui

nec præsens nec etiam futuræ incarnationis fidem habent? quid igitur si Ecclesia crederet Dominum sic incarnatum et tamen necdum incarnatus fuisset? Sentiant certe plerique et non irrationabiliter forte, quod si Ecclesia crederet sic, Ecclesiam ob fidem hanc damnabilem minime. Ita tamen si in reliquis fidei articulis et præsertim in unum et trinum Deum fides fuisset integra; quemadmodum e diverso et Cornelius mox minime damnabilis fuit, et si non crederet Christum incarnatum qui tamen antequam id crederet incarnatus jam erat. Cui etiam, antequam Christum jam incarnatum crederet incarnatum, dictum est illud per angelum: Orationes tuæ et elemosynæ tuæ ascenderunt in memoriam in conspectu Dei. Et illud etiam ante de illo, quod religiosus erat et timens Deum. Verum solum hoc tacto et, quia nunc locus non est, sermone nostro non minime protracto super hoc, ut ad superiora redeam, certe quidquid absque assertionem nostram nunc de præacta incarnationis sit fide, hoc certe evidens, quod etiam etsi præfata illa sicut fide certa tota credit catholica panis et vini in corpus Christi et sanguinem non fieret sacramentalis conversio, tamen quod ad se miro meo (sic) esset sicut munda et clara, simplex, sincera et devota in puro pane et vino secundum ordinem Melchisedech matris nostræ catholicæ oblatio hæc. Mundior, inquam, et sincerior magis quam de mille taurorum, hircorum arietumve pinguum mactatis carnibus et spurcitiis sanguinum. Mundior revera et simplicior evangelica hæc Ecclesiæ oblatio quam fuerit Synagoga. Et ut videri potest, carnificum potius quam sacerdotum statu legis non tam pia oblatio, quam velut dira quedam et inhumana bestiarum, et in mane et in vespere quotidiana occisio. Ubi quotidie oves tot, tot boves, tot tauri, tot hirci, tot agni, tot vituli, tot verveculi mactabantur. A qua etiam mactatione nec simplicitas columbarum nec castitas turturum tuebatur. Verum hoc nostrum hoc matris nostræ Ecclesiæ pro nobis evangelicum sacrificium merum, sicut videtur, duntaxat sacrificium laudis, non dilaniatarum carnum, non erutorum viscerum, non fœtulentum intestinorum, non fumii, non stercoreis, in nullo sicut videtur sacrificium iniqui et peccatoris. Juxta quod in hymnidico cantico Dominus: Nunquid, inquit, manducabo carnes taurorum aut sanguinem hircorum potabo? (Psal. XLIX.) Et postea hoc nostrum evangelicum quasi a legali illo distinguens sacrificium, subdit: Immola, inquit, Deo sacrificium laudis (ibid.); et in fine cantici: Sacrificium, inquit, laudis honorificabit me (ibid.). Unde et hoc laudis sacrificium, quo plus honorum, plus sincerum, plus saluiferum, plus pacificum et tanquam sacrificium iustitiæ, quo plus Domino acceptum eo exterminator angelus hujus hora sacrificii, sicut et magis subdolas et acriores et crebriores facit immissiones. Ut si prævalere sic potest absque defensore, sine dilatione, absque miseratione ulla, fidem ipsam primogenitam hic præ virtutibus cæte-

ris pressa ratione triumphante percutiat et si potest sic in perenne exstinguat. Nemo autem opinetur, suspicetur nemo, me ex diffidentia aut hæsitatione vel modica de tam glorioso, tam salubri totius salutis nostræ sacramento, quidquam scripsisse hic. De quo tamen cum ego aliquando quasi hæsitans cogitare cœpissem, nocte sequenti visa est mei hostia hæc et illac in calice, quasi in motu continuo et citissimo circumagere se et circumferre. Quod cum in crastino domino meo archipræsuli secreto retulissem, et qualiter quasi hæsitans præcogitaveram, respondit mox archipræsul hostiæ motum in calice fluctuationem meam indicare quæ præcepit in mente. Unde et in hujus sacramenti fide per Domini gratiam semper firmior sto et deinceps devotior. Sed revertamur ad præactas malas mali angeli immissiones.

Quod si forte fidem adultam et adeo robustam et solidam reperit ut nec valeat, non dico ipsam perimere, sed nec ullis incredulitatis stimulis vel in modico pungere, alias et alterius modi facit immissiones, quas nos experimur quotidie, utinam ab illis, quos præmisimus, et incredulitatis stimulis liberi. Ad alia itaque se convertit is cui mille nomina et mille nocendi artes, ut vel sic cor in fide firmum et solidum, quod incredulitatis stimulis non perforat, vel emolliat. Et cogitationes vagas et vanas, fluxas et fluidas in cor mittit, sicut de illo: Et cœna, inquit, facta cum diabolus jam misisset in cor ut traderet eum Judas (Joan. xiii). Ecce missio seu immissio prius a propheta, post ab ipso evangelista, qui de ipso pectore sapientiæ recumbens hauserat evidenter expressa. In cor epim missio quid aliud est nisi immissio? Misisset, inquit, in cor; verum ut humilitatis magister majestatis Dominus tradatur, ut illudatur, ut flagelletur, ut conspuatur, ut habeatur quæstui, ut habeatur ostentui, ut demum linguis et manibus crucifigatur: hujusmodi duras immissiones seu immissionibus duris quotidie operatur erroris spiritus in diffidentia filiis, ipso Domino, sicut jam propheta testatus est, immissiones has pro meritis perditorum faciente per angelos suos malos. Sed istas immissiones, de quibus nunc quotidie operatur idem erroris spiritus, non solum in diffidentia sed etiam in devotis Ecclesiæ filiis, et etiam in ipsis Ecclesiæ primogenitis, in ipsis dico Domini christis, sacerdotibus Christi. Et ibi præsertim, ubi sacerdotii exhibent officium et sacrificii peragunt ritum. Ea hora potissimum quotidie vagas has et vanas fluxas et fluidas, fluentes et refluentes cogitationes immittens, quæ tanquam muscæ tabidæ in tam suave olenti sacrificio totum perdant mox tantæ suavitatis odorem; hora præsertim sacrificii glomeratim irruentes, nisi confestim per sacrarii ostiariam fidem, circumspectam videlicet devotionem, et promptam Spiritus sancti flabello repellantur.

Igitur ut omnes has, tam videlicet illas quæ perforant, quam et illas quæ cor emolliunt, immissio-

nes præveniens declinaret sacerdos noster, pontifex. A noster novus, pro quo totus hic sermo textitur, Agnum immaculatum, sicut reverenter pariter et ob reverentiam ad legis mandatum festinanter, semper edere consueverat. Per totam hanc Domini mensam, sicut in mystico et sacerdotali ornatu festinus, ita et in edendo festinus et sicut jam supradiximus in orando brevissimus. Totum tamen devote et ce-
lebriter etsi ob supradictas causas celeriter agens. Quin potius eo ipso devotius quo celerius.

Quia in sibilu duntaxat auræ tenuis Eliæ a spelunca sua egresso et in speluncæ suæ ostio stanti, solum in transitu loquitur Dominus. Solum quippe per speculum et in ænigmatibus quasi in sibilu auræ tenuis his qui corporis sui domos luteas egrediuntur, et egressi in ostio hujus luteæ speluncæ suæ stant, cupientes dissolvi et esse cum Christo animæ suæ ut moriantur jam petentes, his, inquam, solum et tamen non nisi solum in transitu loquitur Dominus. His quidem frequentes fiunt, sed semper breves et citissime disparentes theophaniæ, sanctorum revelantur splendores et exultationes Dei in cordibus eorum : quæ animam ad cœlestia pio desiderio suspirantem crebro quidem, etsi non reficiant, refo-
cillant tamen et illustrant. Sed brevis hora hic et parva mora, quandiu in luteæ speluncæ suæ ostio Elias steterit, donec a lutea spelunca sua penitus egressus fuerit. *Corpus enim, ait Sapiens, quod corrumpitur aggravat animam et terrena inhabitatio deprimit sensum multa cogitantem* (Sap. ix). Et vere in theophaniis his brevis quidem hora et parva mora. Hinc est enim quod in sancti amoris cantico Sponsa Sponsum suum tam crebro tam sedulo tam officiose et in tam multis querit suspiriis. Et quærens et suspirans nunc invenit, nunc perdit, nunc avolat, nunc declinat, nunc ad ostium pulsat, nunc tenet, nunc elabatur, nunc revertitur, nunc vocata tacet, nunc vocans alloquitur. Unde et Sponsum suum Sponsa, capræ hinnuloque cervorum in montibus salienti et colles transilienti assimilat. Et ipsa Sponsa id crebro experta, nos hac sua parabola docens, ut opera illa et sacramenta eo fiant celerius, quo necesse est ut peragantur devotius. Et propterea noster sacerdos novus, novus noster pontifex illud, de quo jam aliquandiu egimus, altaris sacramentum eo quidem celerius celebrabat quo illud peragere et consummare devotius peroptabat. Unde tanti sacerdotis exemplo plerique arguuntur sacerdotum, qui ut devoti habeantur aut forte quia sunt, hoc altaris sacramentum verbis admodum paucis abbreviatum et consummatum et hoc speciale orationis genus breve, quod et debet esse brevissimum et si non in catechumenorum, saltem in missa sacramentorum arguuntur, inquam, exemplo hujus, qui sic differunt, ita trahunt, sic protrahunt. Me, qui intersum et audio et deberem intendere interim super vanum et citum cogitationum mearum vehiculum, scendente et ab Oriente in Occidentem usque avolante, et per viam, vicos, munitiones et civi-

tates salva mea et aliena pecunia absque omni sumptu et labore exstruente, et interdum prout fert spiritus impetus me interim multa constituyente bella absque omni sanguinis effusione aliavie frivola et otiosa commentante; et pro me loquar, ego interim sic vado, sic venio, sic operor, sic commentor. Sic et, ni fallor, de missæ auditoribus et de aliis aliqui. Et mirum si ille tanquam homo adhuc nostris similis, sacerdos dico noster, qui commune salutis nostræ sacrificium est oblaturus pro nobis, ad missam se parans, vel etiam in missa ipsa, interdum in se ita non sentiat; aut si non sentit, deberet saltem tanquam sacerdos noster consentire nobis et condescendere, ut ita, juxta quod magister de pontifice gloriatur, haberemus sacerdotem, qui posset compati infirmitatibus nostris. Unde dico quia istius, de quo nunc loquimur, sacerdotis in missa sic morosi aut est hypocrisis manifesta aut religio inscia. Verum, ut deinceps compatiatur nobis sacerdotes hi et vos universi sacerdotes præinvitati ad mensam, qui cum novo sacerdote, novo nostro pontifice jam discubuitis, scitote et vos similia debere parare. Exemplum enim dedit vobis ut quemadmodum ipse fecit et vos similiter faciatis. Post spiritualium mensarum discubitu juxta supra dispositum ordinem et nostrum supra promissum nunc deinceps ad corpoream mensam accederemus, nisi tamen quia necdum hora est discumbendi præsertim pontifici, quem tam multiplices tam varæ et sæculares et ecclesiasticæ occupationes et causæ tra-
hunt et necdum sit nisi circa diem sextam.

9. QUALIS FUERIT IN AUDITORIO.

Missæ itaque celebritate consummata, Pontifex egressus ecclesiam, mox auditorium intrat, et sedet ut judicet quasi de sede ad sedem de cathedra ad tribunal ascendens. Et sicut prius ad mensam, ita nunc ad auditorium hoc fratres suos universos et præsertim comprovinciales suos episcopos vocat, ut sibi assideant et secum jura decernant. Nunc enim sedet ut judicet. Et quia de formandis judiciis et accipiendis muneribus, quæ judicia solent pervertere, loquendi nunc locus est, primo qualis in ipsis fuerit persona novi judicis, novi nostri pontificis, intuendum. Et in primis quidem novus hic judex, novus noster pontifex interim excutiebat manus suas præsertim a suspectis muneribus ut ab his, quos causas habere nosset, nec obolum nec etiam valens acciperet. Nisi forte aliquid esculentum et poculentum aliquid offerretur quod decenter respuere non valeret. Et quia de muneribus accipiendis sermo in præsentiarum se obtulit, ut ad novi nostri judicis laudem magnificam et civilem industriam evagemur licentius, qualis fuerit in accipiendis muneribus videamus. Illorum certe semper munera recusare consueverat, quibus credebatur accipere necesse magis quam dare. Imo etiam assuetissimus erat semper et promptissimus ut talibus daret et his præsertim inter tales qui petere confundebantur. Ab illis etiam, et si aliquando, raro

tamen accipiens, quibus ob causam fuisset offensus, etiamsi abundantes forent hi, quasi cum Domino spernens Cain et munera ejus, et respiciens solum propter Abel ad Abel munera, non propter munera ad Abel. Verum ab aliis cum multa gratiarum actione accipiebat, quos sibi amicos et hilariter dare noverat, nec post donum detrimentum passuros; decenter edoctus quod in dandis accipiendisque muneribus magno praesertim viro multa debeat esse cum cautela discretio. Juxta quod etiam ille in gentiliū ethica morum censor: « Videto, inquit, cui des. » Et hoc quidem paternum consilium est et pro dante. Pro accipiente vero sapiens: *Datus, inquit, insipientis non erit utilis tibi (Eccli. xx)*, quasi sicut supra morum ille censor dantem, ita et hic sapiens accipientem erudiat. Ut sicut ille danti dixerat: *Videto cui des*, ita et hic accipienti: *Videto a quo accipias*, juxta quod et Dominus: *Non accipiam, inquit, de domo tua vitulos neque de gregibus tuis hircos (Psalm. xlii)*. Nec enim, ut testatur idem sapiens, *dona iniquorum probat Altissimus (Eccli. xxiv)*, quorum per multa Scripturae loca semper ea legitur respuisse; id tamen pro testimonio dico quia novus hic judex noster nil unquam, me qui scripsi haec seu etiam me familiariori, sicut credo, sciente, si tamen hac gratia me magis praeditus quis, nil inquam ab aliquo ipsomet postulante, cum adhuc libere et quiete ageret in ecclesiastico potentatu suo, acceperit. Ita ut illud prophetae a diversis varie interpretatum, novus hic judex noster ipso tunc opere nobis certa quidem et evidenti expositione interpretaretur ut doceret. Si quidem prophetarum unus principum cupiditati improperando: *Princeps, inquit, postulat*, et postea mox subdit: *Et judex in reddendo est (Mich. vii)*. Hoc quasi unum et primum et per se censitum ponit cupidi principis vitium dicens: *Princeps postulat*. Quid enim est subdito intimata principis postulatio, nisi a subdito quasi quaedam violenta exactio aut quasi ab invito dura quaedam extorsio? Deinde aggravando subdit sicut cupidi jam pariter et dolosi principis vitium alterum: *Et judex, inquit, in reddendo est*. Ac si dicat propheta cupiditati principis sic improperans, quod videlicet si forte princeps postulans non exauditur, nec obtinet a subdito quod desiderat, aut incontinenti aut ut occultius tegatur fraus processu temporis, sive per se sive per alium, subdito sibi, a quo repulsam passus, aliquam super illa aliave quacunque re questionem movet, tanquam rei postulate molesto detentatori; ut sic ipsemet eam sibi per qualemcunque sententiam, quod prius postulans non potuit obtinere per gratiam; et ita qui prius fuerat princeps postulans sed minime obtinens, postea ipsemet efficitur judex rem postulatam per calumniam obtinens. Et sic ipsemet eam sibi per calumniosum judicium reddens, seu ipso per tale judicium principi reddere compulso, qui prius postulatum postulanti gratis praebere recusavit. Est

A igitur grande in principe cupiditatis vitium solum etiam postulare a subdito, etiam etsi ab altero, quod a propheta subditur, vitio immunis sit, videlicet post rei postulate repulsam nihil contra rennientem moliendo. Ipsum quippe principem a subdito postulare, etsi aliud malum non subsequatur, nihil parumve distat ab exactione turpi et molesta seu extorsione invita. Hanc nostram super illud prophetae interpretationem prius Naboth et postea Achab vinea roborat. Achab enim princeps Naboth vineam postulabat: ecce primum cupidi principis vitium: sed repulsam passus ipsomet per Jezabel dominatricem judex fuit in reddendo; ecce quod priori longe deterius est vitium alterum: lege sacram eo loci historiam et liquido mox videbis quod sic. Hanc pariter interpretationem et nunc novus noster judex, novus noster princeps ecclesiasticus, ipso novo opere suo sed ex contrario roborat, utrumque pariter, tanquam si ab exactione neutrum discrepet, sicut extorquere et postulare semper devitans. Nam quemadmodum ab ipsomet testante sic frequenter accepi, in eo maxime confundebatur cum ex aliqua causa etiam valde urgenti, sicut interdum solet accidere, oporteret ipsum rem alterius petere, etiam si devote et prompte se exaudiendum sperasset, sicut difficile accipiens et adhuc multo difficilius postulans memor verbi Domini qui dixit: *Beatius est magis dare quam accipere*. Ita ergo novus hic judex noster a muneribus manus suas excusserat, ut cum universi Israelis sancto propheta et aequissimo iudice posset et ipse, pariter gloriose immunis, sciscitari a subditis utrum bovem cujusquam tulisset, an asinum, si quempiam calumniatus, si oppresserit aliquem, si de manu cujusquam munus acceperit; pariter et cum magistro sicut aequo gentium iudice et egregio doctore, gloriari quod nullius argentum et aurum aut vestimentum concupiverit. Apprime inter initia novus judex noster, magistra unctione edoctus, utpote in illis unctionis diebus, sicut supra ostendimus, quo principes ecclesiarum mundi contemtores iudices uncti et ipse unctus, apprime, inquam, edoctus illud legislatoris quod munera exerceant oculos sapientum et vim auctoritatis inclinant. Cui et consonat illud sapientis: *Quia xenia, inquit, et dona exaccant oculos iudicum et quasi mutus in ore avertit correptiones eorum (Eccli. xx)*. Et illud item hic non tacendum, quod ignis devorabit tabernacula eorum qui munera libenter accipiunt. Ecce quam incorruptus quam etiam incorruptibilis erat hic noster judex novus in se.

Avaritiam etiam, tanquam iudicum corruptelam pestiferam et iudiciorum velut quoddam lethale toxicum, non solum a se sed et a suis tam longe projiciens, tam excutens, et tam evitans, ut ipsam a domo sua penitus eliminaret. Idololatria quippe in templo, avaritia in pontificis domo. Unde et novus hic judex noster nunc clam sigillatim singulis, nunc publice communiter universis inhibebat districtis

sime, non solum ne exigant, sed ne etiam oblata a litigantibus accipiant nec aliorum vexationes suas facerent prædas, solum tamen advocatis non recolo si indulta salaria. Sed hoc scio quod alii accipere omnino sunt inhibiti.

Unde et tunc temporis accidit ut abbatum unus intraret curiam et habens negotium, aliquot aureos nunc his nunc illis qui in judiciis poterant offerebat. Sed cum omnes respuerent, abbas negotium peregit, aurum retulit, et recedens: « Curiam, inquit, repperi supra quam auream, quæ non solum post aurum non abit, sed aurum abjicit, aurum spernit, aurum calcat. » Et quidem de domo pontificis abbas hoc gloriosum præconium. Adeo etiam amore justitiæ et compassionis affectu et in avaritiæ odium negotia habentibus pontifex condescendens, ut in domo hac nihil pretio, sed omnia gratis fierent. Nihil hic a sigillifero nihil a signatore accipitur a notario nihil: nihil hic venditur, nihil emitur, nihil distrahitur nec cera nec chartulæ nec sigillum. Cujus enim imago hæc vel superscriptio in sigillo ut vendi debeat vel distrahi? Nequaquam Cæsaris sed pontificis. Revera domus hæc novi judicis nostri, novi pontificis, nequaquam fuit domus negotiationis, sed domus veri et æqui judicis, domus sancti pontificis et vere domus orationis.

Hujus profecto sancti pontificis et justi judicis præ cæteris et ante cætera debent esse tria hæc; amare continentiam sanctimoniam, colere justitiam et calcare pecuniam. Unde et apud nos nec imago pontificis nec instrumentum justitiæ sigillum vendebatur nec aliquis inde quæstus. An enim licitus sit quæstus hic in pontificis domo, vestra, Patres sancti coepiscopi qui novo metropolitano nostro assidetis, consideratio hæc, vos decernite: videbitur forte hoc magis inter gratuita quam debita, inter oblata magis quam exacta numerandum, de quibus supra aliquantisper peregrinamus; unum pro certo scio, quod si licet sic acquirere, non tamen expedit, præsertim in pontificis domo, unde et, ni fallor, multo magis melius et pontifici gloriosius, justitiæ instrumentum sigillum gratis exhibere, et propriam speciem ceræ vel sigillo impressam erogare pauperibus, qui etiam pro ipsis tenetur adhuc et semetipsum super impendere. Sic itaque omni a domo pontificis avaritiæ eliminata spurcitia, nullus qui obediret pecuniæ, sola in domo pontificis imperante justitia. Et hæc est quam supra diximus Christi Domini novi Christi tironis lorica justitiæ nova, immissos omnes cupiditatis stimulos in se mox retundens et repellens a se. Cujus tamen adhuc fortitudo major suo tempore revelabitur, quin jam non stimulis sed lanceis et gladiis decertabitur. Sed interim talis nunc sufficit. Ob hunc autem tam singularem et tam ferventem justitiæ zelum, inter alia multiplicia dona Spiritus, et hoc sibi abunde datum a Spiritu, ut haberet spiritum judicandi inter virum et virum. Nec enim ex magistri hominis eruditione hoc illi, magis autem ex unctione magistra,

A juxta quod ille præ participibus suis exunctus: *Habenti, inquit, dabitur et abundabit (Matth. xiii)*. Et justissime quidem et sincerissime sine omni acceptione personarum absque ullo interveniunt nummorum cum suo quem supra commendavimus eruditorum catalogo assessoribus suis jurisdictionem ecclesiasticam exercebat: ita ut profecto cerneret tantum in tribunali judicem quantum modo videras in altari sacerdotem. Vos igitur ad assidendum comprovinciales vocati, metropolitani vestri jam, ni fallor, in judiciis advertitis scientiam, tenetis formam et jam quantum habuerit justitiæ zelum, quantum et perniciæ contemptum cernitis. Utinam et vos apprehendat æmulatio ut illius similem sortiamini zelum cujus simile consecuti estis ministerium.

His vero omnibus in quibusdam aliquantisper immorati sumus, et in Dei mensis discubitis et in sæculi causis discussionibus rite expletis, circa diei novam pontifex, a tribunali exsurgens, mox thalamum ingreditur, et ad corporalis alimonia se discubitu parat. Et ad hanc quidem mensam sicut et ad alias invitandi forent pontifices, nisi quia in mensa hac bestialis duntaxat ut videtur et corporum non spirituum hæc refectio: verumtamen deest et expedit sic, ut etiam invitentur et ad hanc utpote quos ex auditis et visis spero accessuros libentius. Invitentur igitur et si placet accedant ut quemadmodum fratris sui noverunt ha. . . .

(deest unum solum.)

C rabat quid sicut mensæ opulentia. Unde et ipse semper in discubitu creberrime super totas mensas oculos consueverat circumducere. Ita ut et paropsidi propriæ posset videri minus fore intentus. Etiam ut hic oculatum animal se probaret, non quidem notabili sed modesto quodam modo et civiliter erudito nec vagi more vel attoniti sed circumspice oculos circumducens per totum ut videret discumbentium ordinem, et exhiberet cui honorem honorem. Et si forte inter tot novissimum teneret locum qui præsidere debuisset, huic profecto tunc honoratiorem locum crebris calicis proprii et ferculorum exeniis recompensans, videret pariter et notaret qualiter qui ministeriis præerant quisque pro suo gradu et officio ministraret, quod si forte perperam, acriter ab ipso archipræsule loco et tempore corripiebatur incurius. Verumtamen ministri novi hujus nostri patrisfamilias in mensa morem quotidianum experti quisque pro officio suo erat circa ministerium sollicitior. In mensa quippe super universos qui discumbebant et super singulos et super dispensatores ipsos et ministros ita provide, ita circumspice spargebat oculos ut diceret hos solum mensæ oculos ad solius corporalis mensæ civilem quamdam et domesticam custodiam deputatos, quod si de eruditis suis forte aliquis deforet. Et suo ex aliqua causa mutato in inferiori loco discumberet, mox providus et urbanus novus hic noster paterfamilias hoc advertibat.

Juxta quod et Saul rex inscius in hoc tamen urbane edoctus cum in mensa sedens locum David vacuum adverteret: *Curr, inquit, non venit filius Isai nec heri nec hodie ad vescendum?* (1 Reg. xx.) Pariter et hoc noster paterfamilias mox de suis advertebat etiam et sciscitari solitus pro absente. Cui quidem loco suo mutato, sic mittendo et remittendo ipsi honorem exhibere non cessabat, ita ut et posset sibi ipsi videri primus qui in discubitu se novissimum fecerat. Aut etiam si quis alius quem honorare voluisset forte vel ad thalamum vel ad aliquem domatis angulum, eo quod ut aliis cederet vel quod non esset ei in triclinio locus, divertisset, et hoc quidem advertebat citissime: et istum tanquam si inter tot discumbentes per medios iugiter intueretur parietes crebris ferculorum visitationibus honorabat. Ita profecto oculis quos a natura amplos habuit et clarissimos totum quasi penetrans, illustrans, et amœnans discubitu. Nihil modo istis et illis oculis, quos supra diximus lacrymarum exitus deduxisse, alia quippe mensa hæc illa alia; illa mensa Dei hæc mensa sæculi: ibi alimonia spirituum sed hic corporum epulæ apponuntur, inter quas ingerere lacrymas sicut importunum et incivile. Nihil ergo modo hic istis et illis oculis. Nihil huic triclinio et furtivo illi de nocte mandato, in quo ut supra monstravimus, pauperibus discumbentibus pontifex in cilicio ministrabat: longe quidem distant opulentia hæc et abjectio illa.

Sed quorsum hæc? quo tendit apparatus hic tam magnificus, et tam augustalis mensæ descriptio? Mensa hæc videtur potius mensa Cæsaris quam pontificis. Et talis et tantæ ad pauperis Christi mensam nulla penitus videtur communicatio. Nihil apparatus huic et spicis illis quas discipuli vellicantes et manibus confricantes edebant, seu etiam conviviis illis evangelicis, ubi pisces tantum et hordeum, seu ubi pars piscis et favi mellis. Christus etiam jam resurgens a mortuis quærit duntaxat pulmentarium non leopham, non aprum, non capream, non capreolum, non damulam, non cervum, non phasides aves, non gallinacium, sed solum hoc est quod sicut quærit videtur et appetere pulmentarium: verum videtur mensa hæc, quam describere cœpimus, potius Augusti quam Christi vel christi Domini. Sed quisquis et qui sic cogitas, sta hic, ne procedas, ne judices, sed vide et admirare et imitare, si potes, multorum oculorum animal et multarum facierum personam. Vide discipulum ad magistri formam omnibus omnia factum; gaudentem cum gaudentibus, flentem cum flentibus, redentem quæ sunt sæculi sæculo et quæ sunt Dei Deo; modo cum sancto sanctum, modo cum perverso perversum, modo cum ethnico ethnicum, modo cum Judæo Judæum, modo cum servis servum, modo cum liberis liberum, modo cum jucundis jucundum, modo cum infirmis infirmum. Nam juxta illud Sapientis et quasi in mundi specula constituti verbum: *Omnia tempus habent; tempus*

flendi et tempus ridendi, tempus plangendi et tempus saltandi, tempus amplexandi et tempus continendi ab amplexibus (Eccle. iii); omnia, inquit, tempus habent, quod et præsertim pontificis est, ut temporari pareat, temporari indulgeat et conformet se temporari. Alioquin non erit multorum oculorum animal nec multarum facierum persona. Alioquin non habebit gratiam apud Dominum et apud homines; quod præsertim requiritur a pontifice, qui nec soli Deo propter sæculum potest vacare nec sæculum propter Dominum debet deserere, ut placeat Deo, placeat et sæculo. Placeat, inquit magister, per omnia omnibus, ut propter hoc merito et illud de pontifice pontificum qui pontificum est sicut forma et gloria scriptum sit: *Proficiebat, inquit, sapientia et gratia apud Deum et homines* (Luc. ii). Sic et iste pontifex noster novus Deo dilectus et hominibus, totus Dei, totus sæculi, suus nunquam, nisi quia exinde plus suus totus. Talem quippe decet esse pontificem, qui nunquam suus sit, nunquam sibi vivat, sed sciat se Deo natum et patriæ, non sibi, parentem omnium, foventem omnes et sub alarum suarum umbra protegentem. Sic, inquam, iste multorum oculorum animal et multarum facierum persona, factus omnia omnibus, modo cum cilicio in discubitu ministrans pauperibus, modo cum orario in altari ministrans fidelibus; modo cum lorica justitiæ in tribunali finem imponens litibus, modo cum temperantia in convivio congaudentes epulantibus.

11. DE SOBRIETATE PONTIFICIS.

Verum cum qua temperantia, quod nondum dictum, dicendum est, ut quemadmodum jam de habitu, pariter et in hac tanta mensæ opulentia, inter tot epulantes et tantas epularum delicias, de proprio quoque ejus victu juxta quod supra sumus polliciti, cognoscamus. Revera inter tot et tantas delicias in nullo penitus Sardanapalum sed solum episcopum sapiebat, nullius ut notari posset avidus, nec super ullam omnino escam se effundens. Juxta quod ille sapiens et urbanus: *Noli, inquit, avidus esse in omni epulatione et non te effundas super omnem escam* (Eccle. xxxvii). In tanta igitur affluentia nullatenus ipsius in ulla epulationis aviditate vel modicus poterat denotari excessus. Unde et cum in omnibus sobrius, virtuti etiam sobrietatis quadam civilitate adjuncta, ipsam sobrietatis virtutem colorabat, non solum religiose quod ad Deum, sed etiam quod ad sæculum civiliter sobrius. Unde sicut et in cæteris ita et in hac præsertim sobrietatis virtute, quasi mensæ virtute propria, sicut Deo et hominibus complacebat; nam cum sobrietatis virtus sociam semper habeat abstinentiam, ipsam tamen abstinentiam, propter simul discumbentes, quadam civili dissimulatione in mensa occultare consueverat, ut sicut congaudere gaudentibus ita et cœpulari epulantibus videretur. Occultabat quidem nunc crebris hic et illic ferculorum exeniis, nunc interserta quadam de Scripturis cum eruditis suis, qui a dextris ejus discumbebant, collatione non quidem

tædiosa sed moderata pro tempore. In hac quippe mensa non audiuntur tibicines, non cornicines, non lyra, non fistula, non citharædus, non choraula, quod inter cætera luxurianti populo per prophetarum unum impropèrat Dominus: *Tympanum, inquit, et lyra et cithara in conviviis vestris (Isa. v)*. In hac quippe mensa præterquam mundam splendidam et inundantem epularum opulentiam, nulla gula nulla lascivix et nulla penitus luxuriæ incitamenta. Sed sicut instrumentis et incitamentis aliis submotis, ex sacra lectione solius Spiritus sancti organum, sicut supra jam diximus, ab initio usque in finem discubitus grata quadam et interpolata pro tempore vicissitudine personabat. Sic ergo comes sobrietatis abstinèntia relevatur nunc ad hos, nunc ad illos, crebris ut diximus ferculorum exoniis nunc collatione interposita de Scripturis. Sed super omnia placido vultu et facie hilari totam abstinèntiam obumbrabat quo et totum jucundabat discubium. Verum et ipsa ejus abstinèntia Deo grata, gravis nulli; quæ, ut diximus, propter simul discumbentes civili quadam dissimulatione velata vix etiam notari valuisset.

Et expressius adhuc audiamus abstinèntiæ modum et quibus uti consueverit. Tria namque sobrietas exigit, videlicet quid, quando et quantum sumamus; ne quid prohibitum, ne quid citra horam, ne quid ultra mensuram: unde et Adam, qui primus comedit vetitum, confestim proscribitur: Jonathas, qui citra horam, maledicatur; Israel vero, qui ultra mensuram mox punitur. Adhuc enim esca eorum in ore ipsorum et ira Dei ascendit super eos. Verum hujus triclirii princeps pontifex in sobrietatis virtute præstans, et longe distans ab his, de hora et mensura questione nulla hic sicut nec opus est habita, solum quibus ipse uti consueverit audiamus, ne in hoc quod facile nimis justis et indiscrete religiosis videri posset, videatur in aliquo vel in modico tam claram tam speciosam et tam mundam, quam de eo prædicamus, sobrietatis, decolorasse virtutem. Multa quidem offerebantur, apponebantur multa et varia, sed inter plurima pauca ad usum et esum proprium retinebat, verumtamen inter oblata ea quibus ipse utebatur et delicatiora quidem et pretiosiora hæc, quæ, etsi non sint prohibita, a sobrietatis tamen perfectione et a perfecte sobrio his præsertim quos diximus, nimis justis videri possent aliena. Tanquam et sicut illis rudibus adhuc discipulis, sicut illi Christo, sic et isti insultent Christo Domini, et clament, Ut quid perditio hæc? potuit enim venundari et dari pauperibus: unde et cum unus justorum talium super hoc inter discumbendam semel ipsum quasi subridendo notaret pontificem, aliquantisper zelo motus pontifex ei sic respondit: « Certe, inquit, frater, ni fallor, cum aviditate majori tu tuam sumis fabam quam ego appositam mihi phasidem avem. » Et erat tunc avis hæc ante præsulem in paropside. Et frater ille aliquandiu inter nos conversatus, deliciosa non quærens, utpote

A qui ad hæc consuetudinem non habuerat, revera avidus erat comedo grossiorum. Et bonum quidem et prudens pontificis hoc et pro fratris consuetudine et pro veritate responsum. Nec enim refert, ut tradunt animarum medici Patres orthodoxi, quid quantumve quis sumat, si solum necessitati et valetudini suæ non voluptati indulgeat: unde et primus omnium parens non propter esum cervi vel caprei sed propter gustum pomi vetiti de paradiso ejectus exiit. Et Esau non propter gallinacium, sed vilis lentis edulium primogenita perdidit. Et David aquam nimis concupitam metuens bibere, in terram fudit et Iliias mane et vespere allatas carnes comedit. Adeo non refert quid pro valitudine seu quantum pro necessitate sumatur; sola quæ virtuti sobrietatis semper in insidiis sedet relegetur concupiscentia, cui semper parum est quod necessitati sat est. « Est enim, ait quidam, natura humana contenta modico. » Nihil ergo refert quid quantumve sumatur, valitudini duntaxat aut necessitati hoc et non concupiscentiæ militet; verum et magister: *Non est, inquit, regnum Dei esca et potus sed justitia et pax et gaudium in Spiritu sancto (Rom. xiv)*.

Hujus itaque nostri princeps triclirii, quia grossiora non poterat utpote minime enutritus in his, deliciosa quidem sed parce admodum sumebat et sobrie. Nam juxta quod et de se ait quodam, jumentum suum hordeo non pascabatur quod fuerat in deliciis enutritum: a puero. Cui et consonat illud Sapientis: *Qui nutrierit, inquit, servum suum in deliciis a pueritia, postea sentiet eum contumacem (Prov. xxix)*. Et quidem indiscrete omnino et contra religionis veritatem sit, si anima nutrita in croceis grossiora compellatur amplecti, et jumentum a pabulis arceatur consuetis. Alioquin si diutius areatur, sic et cito in via deficiet et prope interitum est, cui sic subtractis consuetis apponuntur nova. Quod non aliud quam si detur hordeum, cui non nisi triticum sapit, aut pro faba vicia aut pro avena lentacula: tale etiam et hoc, tanquam si det quis pro pane lapidem aut pro pisce porrigat scorpionem. Et quidem omnino irrationabiliter hoc; verum et Magister de castigatione corporum agens inter cætera: *Rationabile, inquit, obsequium vestrum (Rom. xii)*. Rationabile, inquit, ut videlicet corporis tui castigatio et mortificatio carnis cum discretione fiat, ut si forte spiritus promptus sit, tamen juxta vulgatum illud Græci proverbium: « Ne quid nimis. » Sed discretione magistra, omnium auriga virtutum et moderatrice operum, carnis infirmitati condescendatur et consueta non omnino negentur: ne si jumento debilitato pabula subtrahantur, contingat ipsum prius sub fasce ruere quam fascem portare et deficere prius quam currere. Sapiens dominus rationabile quærit obsequium ut, si est zelus, in obsequio sit et scientia, et zeli fervorem scientia temperet: unde et Magister, quasi de apostolo conversus in medicum, discipulo corporis sui immoderato castigatori aquam prohibet et modici vini

indulget bibere propter stomachum suum et frequentes suas infirmitates. Et quale quidem in discipulo hoc, tale et in hoc Magistri condiscipulo presentis triclunii principe. Cui similiter et ex causa simili propter stomachum, quem semper a natura frigidissimum habuit, aquæ potus supra modum nocivus, unde et juxta admonitionem magistri et medici ad discipulum, et iste condiscipulus aqua nunquam raro sincera sed vino duntaxat utebatur, modice quidem sumpto et ad sobrietatem, sobrietatem certe supra quam commendabilem et admirandam et cuius sacerdoti sed præsertim pontificibus imitandam: sicut enim ante mensam et in mensa et post mensam ita semper æqualis ut nec in facie nec in lingua, an sitibundus foret an potus, potuisset discerni. Et adhuc quod et miraculo accedit et gaudio, sicut ex secreta confessione quidam religiosi ipsius familiares id noverunt secretius, non magis cibatus quam jejunus, nec post vina plus quam ante ullam, vix sentiens carnis rebellionem. Revera, miraculosum hoc et singulare privilegium gratiæ inter vina et epulas et in carne concupiscentiæ nec dum maturioris ætatis exhauste beneficio tantæ et tam angelicæ vivere puritatis ut ne dicam opus sequi vel consensum, sed rara et sæpius nulla spiritui a carne moveatur rebellio.

Audivimus jam de presentis nostri triclunii principe, in triclinio hoc quam magnificus, in mensa hæc quam immensus, quam erudite circumspectus, quam curialiter eruditus, quam magnifice discumbens, quam gratiose distribuens, et quam civiliter sobrius quod ad sæculum, et quam religiose quod ad Deum. In utraque revera mensa magnus et immensus: magnus in mensa Dei, magnus in mensa sæculi. In altari sacerdos devotissimus, in triclinio paterfamilias providissimus, et si adhuc adjiciamus tertium quod supra posuimus medium, judex in tribunali æquissimus. Verum omnibus quæ mensæ sunt celebriter jam et festive expletis, tempus est ut surgamus de mensa. Si quidem hymno dicto pontifex cum eruditis suis exit jam et ingreditur thalamum. Et ut quod semel dicendum est, semel hic sufficiat dictum, cum per historiam hanc archipræsulem cum eruditis suis hoc vel illud fecisse crebro audieris, ideo dictum noveris quia in agendis sive his quæ ad Dominum sive his quæ ad sæculum, non admittebatur extraneus, præter quam soli eruditi sui et consiliarii forte alii, quales erant æconomi: vix etiam adventans clericus in discubitu in propria archipræsulis mensa inter eruditos hos, sed honorifice quidem et decenter in aliqua mensarum discumbebatur seorsum, crebris tunc ab archipræsule mensalibus visitatus exeniis. Non admittebatur, inquam, inter eruditos in discubitu quis, nisi forte is esset quem archipræsul ex nomine vocans multum honorare decrevisset, magis semper sanctæ conversationis vel scientiæ quam dignitatis vel officii merito. Et ob id maxime hoc, ne in mensa in qua archipræ-

A sul ipse inter eruditos suos discumbebatur, aliquod forte verbum, sicut tunc solet, elaboretur et præsertim coram extraneo quod tacuisse melius. Sic admodum suos honorans in mensa et sibi prospiciebat et suis. Et ut memoratorum gratia addam adhuc, antiquus decessorum suorum mos fuit, et sic ipse proposuerat patres sequens, ut in domo sua non retineret clericum et maxime qui consiliis interesset, quem nosset regibus hominibus seu fidelitatis juramento obnoxium. Et ob id, ut ab ipso archipræsule accepi, sanctorum decessorum suorum vetus mos hic, quod soleat ab hoc jam ab antiquo inter reges et archipræsules profana nimis crebro suboriri dissensio; verum et archipræsulis de domo et familia clericus regi obligatus, ut diximus, dissensionis tempore quasi inter malleum et incudem erat positus, aut regi aut archipræsuli male fidus aut saltem suspectus, unde obsequens et obligatus sic non poterat nec etiam innocens, facile, aut hinc aut inde, famæ suæ saltem non sustinere dispendium, plerumque etiam cum enormi rerum jactura, quod attendentes sancti illi Patres, qui semper quasi in motu erant et accincti, et sibi et aliis prospexerunt in hoc, juxta illud Sapientiæ verbum quod nemo possit duobus dominis servire; sed ad historiæ ordinem revertamur. Itaque finito mensæ hymno, ut diximus, pontifex cum eruditis suis a mensa surgens, thalamum ingreditur, ubi aut in Scripturarum collatione est aut in agendorum consiliis. Et quidem quotidie sic, nisi forte pro tempore modico somno indulgeat; vos autem invitati pontifices qui sedistis ad mensam, scitote et vos similia debere parare.

12. QUALIS FUERIT IN ORDINIBUS.

Verum necesse ut vos, præsertim comprovinciales, tempore statuto et congruo et hoc in brevi, ad novum metropolitanum vestrum revertamini. Si quidem in instanti septimi mensis solemnibus jejunio, dispensatores in Dei mensa ordiari et constituere disposuit; et vos ad hoc necessarii, ut quales ministros in Dei mensa ordinare et constituere novus pontifex debeat, aut docendo deitis formam aut discendo a metropolitano vestro capiat exemplum. Et profecto ut disposuit accidit. Nam post consecrationem propriam, quam in octavis Pentecostes tam festive tam celebriter factam supra diximus, in sequenti quatuor temporum septimi mensis jejunio ordines celebravit: eo quidem maturius, quod jam aliquandiu metropolitana sedes vacasset; et revera ut verum fatear et revera verum, supra cætera et præ cæteris in hoc præsertim pastoris officio pavidus admodum fuit et sollicitus. Legerat quippe illud magistri ad discipulum: Manus cito nemini imposueris neque communicaveris peccatis alienis. Ex his quasi terribili quodam tonitruo sono et ipsis præsertim tonitruis filiis metuendo toto corde concutiebatur et corpore. Illud supra modum, quod in calce terribilis sermonis illius adjicitur, veritus: *Neque, inquit, communicaveris peccatis alienis* (1 Tim. v), unde et in exhortatorio quodam sermone,

quem ipsemet tunc ad ordinandos fecit, inter cætera sermonis et ipse hoc interpretatus est verbum : non tamen novam inducens nec a veteri orthodoxorum interpretatione dissidens. Cujus, ad multorum præstante Domino instructionem, interpretationis suæ hic propria verba interserere curavi quæ ipse tunc ad ordinandos habuit ad ipsos loquens sic :

« Obsecro vos, fratres, per misericordiam Dei, ne manus meas cito vobis imponi patiamini, præterquam illis qui secundum officii sui gradum in Ecclesia Dei digne ministrare disposuerint, ne peccatis alienis communicem qui propriorum multitudine nimis sentio me gravari. Certo enim certius est quod qui indignum scienter vel absque multa probatione ordinat, etiamsi ordinatus postea corrigatur, graviter Deum offendat : quod si ordinatus non corrigatur, ordinans ordinati peccatis se maculat, his maxime quæ post ordinationis suæ diem ordinatus perpetrat. Verum Apostolus Timotheo præcipit dicens : *Manus nemini cito imposueris neque communicaveris peccatis alienis* (ibid.) ; vobis ergo, fratres, ex parte omnipotentis Dei et nostra interdiximus, ne quis jugum Domini a nobis sibi imponi permittat, si se minus sufficientem attendat. Stet potius in bono, quandiu non convalescit ad melius. »

Hæc inter cætera in sermone illo ad ordinandos verba ipsius propria : vide ex his si non exterritus, si non tremebundus, si non sollicitus, verum et in ordinandorum discussione indagator erat acerrimus : primum, ut ecclesiastica habet institutio, si vita dignus, secundo si scientia ornatus, pro gradu tamen quem quærebat, tertio si vitæ et scientiæ et gradu quem quæreretur, ecclesiæ beneficium competens : ne postquam promoti palantes et vagi seu conductitii, sacros ordines non religioni sed potius quæstui haberent et ostentui. Et tria quidem hæc jam non secundum canonis sed potius secundum ipsius summi formam Christi sacerdotis. Cujus in altaris mensa omnes isti sic ordinati ministri sunt : qui primum quidem cœpit facere et docere et in usum suum et suorum et pauperum loculos habuit. Ecce tria hæc, vita, scientia, beneficium. Audis enim et vides Christi loculum et Christi in Ecclesia accipe beneficium. Non canonicam super canonicam, non ecclesiam super ecclesiam, non beneficium super beneficium, ut si hoc mammonæ cumulus, sed aliquod ecclesiæ beneficium competens, ut hoc Christi sit loculus ; non superabundans sed sufficiens. Tale quippe et solum tale Christi loculus est, apostolorum divitiæ : *Habentes inquit, alimenta et quibus tegamur ; his contenti sumus* (I Tim. vi). Tria igitur hæc noster pontifex, ordinator novus ad illius magni pontificis Christi formam in his primis quos celebravit ordinibus in Christi ministris expetebat : verum horum adeo indagator acerbus ut vix ulli absque se ipso hanc indaginem crederet. In tantum veritus ne, ut ipsemet jam prædixit, alienis peccatis communicaret. Vel ne pro templi ministris in templo Dei idola erigeret,

A vel ne tanquam trapezita subdolis summi Regis nummum adulteraret.

Nam profecto contemptibilis vitæ et scientiæ homines regalis ministerii insignire caractere, hoc revera est Regis summi nummum quem creditum sibi habent pontifices, adulterare. Et non auro vel argento, sed horum vice stanno potius vel ære vel plumbo signaculum regis imprimere ; unde et magni Regis falsarii hi exhaeredandi et tradendi patibulo.

B Quid ergo de his qui absque multa Ecclesiæ necessitate clericos suos, necdum in his quos jam susceperunt ordinibus canonice statuto tempore probatos, mox ad ordines superiores cogunt et crescere compellunt invitos ? Hi, ut videtur, aut dominari in clero appetunt aut reddunt se de turpi exactione suspectos, cum ob id accipere ut ordinatio procedat vel subsistat par scelus sit et Simonie crimine censeatur : Sed de hoc alias, vos autem qui ad hos ordines accessistis, supra convocati pontifices, videte si non in novo ordinatore hoc ordinandi canonica forma sit hæc, scio nec dubito quia canonica judicabitur. Verum et Ecclesiæ expedit ut si novo ordinatori huic non præformastis, vel nunc a metropolitano vestro novo deinceps teneatis formam hanc, ordinantium quippe creber valde in hoc et enormis excessus. Et eo quidem periculosior quod juxta quod ait doctorum unus vir apostolicus, judicari non potest semel ordinatus, verum et tanto subtilius prius examinandus est quanto ordinatus deinceps judicari non poterit.

C Verum unum erat quod nec sine causa plurimum movebat novum nostrum archipræsulum nostrum, novum ordinatorem. Cernebat enim et in sua et in provinciis aliis, proli dolor ! his diebus nimis frequens, paucos a Deo vocatos tanquam Aaron, sed fere quotquot sola regum hominumve gratia ad apicem pontificalem ascendere ; et deferri hic non vitæ, non scientiæ meritis, sed sanguinis generositati, pecuniæ, gratiæ, et potissimum principum obsequiis seu acclamationibus sæculi. Et hoc certe malum illud quod rex sapiens vidit sub sole, quasi per errorem egrediens a facie principis, positum videlicet stultum in dignitate sublimi et divites sedere deorsum ; servos in equis et principes ambulantes quasi servos super terram. De quo et alibi idem rex sapiens : *Sicut qui mittit lapidem in acervum mercurii, ita qui tribuit insipienti honorem* (Prov. xxvi). Super quo ejusdem regis sapientis successor sed illegitimus et primus regum schismaticus Jeroboam qui primus et sicut regnum sibi et sacerdotium usurpavit, inter prima schismatici regni sui initia creberrime per prophetas arguitur, quod super populos quæ populus adoraret constituerit idola et fecerit fana in excelsis et sacerdotes de extremis populi. Et ita rex ille schismaticus sacerdotium sibi usurpando et quæ populus adoraret super populum idola constituit, et post qui idolis ministrarent de novissimis populi sacerdotes fecit : verum quia in

figura nostri omnia contingebant illis, scripta sunt autem propter nos, o quot reges nostri post umbram illam futurorum sacerdotium sibi usurparunt et quotidie usurpant adhuc. Lege historias nostras, lege libros temporum, lege annales, qui de his, et vix inter reges reperies qui de anathemate non tulerit, qui de sacerdotio non usurpaverit, qui ad arcam manum non miserit, qui de templo non asportaverit, qui in vasis templi non hiberit, aut de templi vasis non contrectaverit, tanquam si eis regnum non sufficiat, nisi et sacerdotio se immisceant; verum tanquam veteribus omisissis his ut ad nova revertamur, et nostra quæ de præfato illo primo rege schismatico vetus, eadem nunc nostri temporis nova querimonia est; pro illis certe regibus, qui nunc super populos post illa inveierata priorum similia quasi nova fabricando idola constituunt et qui ministrent idolis priorum similes quasi novo sacerdotes de extremis populi faciant, quid enim? sunt pro regum voto et nutu pontifices stulti et inscii, hic et ibi super populos constituti in Ecclesia, nisi Jeroboam in Dan et in Bethel idola? juxta quod prophetarum unus: *O pastor*, inquit, *et idolum* (Zach. xi). Et quid qui ministrant his idolis de extremis populi sacerdotes, nisi illi qui nunc his subsunt pontificibus, sacerdotio fungentes, extremæ vitæ homines. Quos quidem sicut tales pontifices pariter et reges, tales faciunt sacerdotes. Non quidem ipsis manum imponendo sed tales præficiendo, qui tales faciant, qui talibus facile manus imponant. Tales, inquam, faciunt similes illis qui faciunt ea. Tanquam dii falsi et simulacra gentium sicut hi et illi dii minores hi magni illi. O quam cavenda regibus et in sublimitate positus sacerdotii usurpatione, sicut ambitiosa et profana! Cavenda, inquam, ne Abiam suum perdat cum ambitioso Jeroboam; ne dividantur cum improvviso Oza, et ne lepra percutiantur in fronte cum temerario Ozia; frontem nunc dico illam, quam in sacerdote auri lamina venustando operit in propheta tau litteræ impressio ab occisoribus protegit, et quam ad procacis et provocantis allophyli interitum fundæ lapidis ictus conquassavit. Prætereo nunc immensum illud propheticum deserti maris onus. Tantum videlicet Babyloniorum destructum imperium, eo solo quod ab aliis prius asportatis, in templi vasis principes Babyloniorum bibere et ea irreverenter attricare præsumperunt. Verum hoc præsentem sermonem rex vel princeps non tangitur, qui cum rege sancto David et propheta, diligens decorem domus Dei, optat, operatur et studet, ut in domo Dei ad decorem domus et ecclesiæ portandam fabricam excisæ et fortes columnæ sint, et ut tales ad regimen populorum assumantur ex clero si forte reperiantur quæsiti. Nec enim tales se ingerunt quos sacra Scriptura commendat quos disponit, quos ordinat, et huic præsertim tam sancto officio deputat; cum revera tales et soli tales sint digni, alii etenim indigni penitus nostri officii viri; illi præsertim qui de bonis ecclesiæ divites contra formam omnem ec-

clesiasticam die noctuque castra laboriose sequentes solum ut crescant adhuc, ecclesiasticos et præsertim pontificales honores pro beneficiis quærent; verum si objeceris talem quem Scriptura describit et quærit in clero nunc columnam nullam, eo quod sicut olim prædictum et nunc adimpletum, ætas nostra virorum sic inops sit, respondeo: Utinam vel assumerentur potiores ex clero eo religiosius quo et studiosius inquisiti! Nec enim, ut jam diximus, tales ad honores se ingerunt; sed aut in scholis aut in claustris aut potius in montibus aut in speluncis aut in cavernis terræ a mundi contributione et contradictione se abscondunt.

Sed ut ad id propter quod digressi revertamur, cernimus quidem hodie multos sola regum gratia, utinam absque Regis regum offensa, aut quia non sine offensa utinam non sine venia, ad culmen pontificale ascendere: verum ut et dicam quod ego nunc sentio super his, in his metropolitanorum potius quam principum sicut videtur culpa gravior, ita et adversus metropolitanos instat querimonia acrior, quantum distat inter volentem et facientem seu inter voluntatem et opus. Principes quippe solum volunt, sed metropolitani et volunt et faciunt, qui talium prius electionem roborant et postea manus imponunt. Quorum etiam ipse scrutiniorum liber, quem ordinarium suum vocant, sacrilegam impudentiam manifestans apertissime damnat. Si igitur hoc noster ordinator novus, hic noster archipræsul novus, hæc cernens vereatur, nec mirandum. Tales enim primo sibi oblatos, ut talium talem qualem electionem primum roboraret et confirmet, et demum quod adhuc majus est, manum imponat et consecret, repellere videtur omnino injustum, cum in facie Ecclesiæ nec super crimine aliove convicti sint vel confessi, quo sint minus idonei, nec sit aliquod crimen notorium consecrandi. Econtra tale admittere admodum periculosum, utpote quibus pastoralis officio vita ante acta non consonat, aut si forte consonat, omnium tamen iudicio minime visa est consonasse: cum tamen jure divino et omnium testimonio solus sit ille assumendus ut dignior, cujus videatur conversatio sanctior. Verum ut in præsentiarum de conversatione omittamus et vita, hanc enim eo melius quo interius Deus quam homo videt, quod statim in evidenti est scientia minime sufficit. Hujus dico consecrandi, seu ut consecraretur electi, qui totam vitam per vana et otiosa sæculi ducens, necdum discipulus, non ut in scholis velut aliquis arbitrarius, sed in ecclesiis vere ordinarius Scripturarum quærit esse magister. Novus itaque archipræsul noster arctabatur ex his, eo quod, ut ostendimus, et tales admittere foret periculosum et tamen tales respuere videretur injustum. Et præ cæteris archipræsul arctatus ex eo quod Magister ad discipulum, et apostolicus, imo verius magnus apostolus quasi ad metropolitanorum suorum unum hoc inter cætera scripserit: «Hujus, inquiens, rei gratia relinqui te Crete, ut ea quæ desunt corrigas, et constituas per civitates presbyteros sicut ego

te disposui; quales autem constituendos dispenserit mox subiungit: « Si quis sine crimine est, » et cætera quæ in illo pontificalium virtutum catalogo sancto apostolica series seriatim contextit, juxta sanctorum orthodoxorum interpretationem nomine presbyterorum episcopos hic intelligens: in nomine ætatis nomen officii. Arctabatur itaque et maxime ex his salutaribus magistri monitis noster hic archipræsul, ordinator novus. Talis enim et solus vere et plene dignus, quem sic describendo pulchre depingit magister, pictor et ipse pulcher. Sed ut humanum adhuc dicam propter torporem et teporem nostri temporis, et si consecrandus omnino talis non sit, necesse tamen ut in horum nonnullis catalogi pontificalis gratiarum donis is qui consecrari querit præfulgeat et hoc ipsum cernere consecratorem. Alioquin certe indigne et in proprium suum judicium consecrat nisi virtutum consecrandi ipse potissimum qui consecrat certis aliquibus argumentis bene conscius fuerit: et reclamante conscientia, alienis peccatis communicans cui cito nimis manus imponit. Itaque per magistrum, tanquam divini juris præconem, promulgata sunt in duo simul cœlestis imperatoris edicta mox incidens. Quorum primum illud edixerat: *Omne quod non est ex fide peccatum est* (Rom. xiv), et hoc secundo: *Manus cito nemini imponeris neque communicaveris peccatis alienis* (I Tim. v). In hoc ipso tamen periculosa dispensatio, si potiori neglecto præferatur inferior, juxta illud prophetæ: *Maledictus dolosus qui habet in grege suo masculum et votum faciens immolat debile Domino* (Malach. i). Et ita in magnis sacerdotibus grande quidem et quod vix vitari possit periculum. Minores quippe sacerdotes eo minus periculosius, quo liberius possunt et in vita examinari et in scientia, differri, repelli, ejici, amoveri: sed istos tales et tantos, quanto majores et indigniores, fugere aut effugare quis audeat aut potest? Aut supersticiosus aut temerarius haberetur qui de novo hoc attentaret. Adeo jam a multo tempore invaluerunt tales et multiplicati sunt super numerum. Pontifex itaque noster novus non sine causa arctabatur et his: et arctatus sic in primis sui ipsius accusator erat acerrimus, eo videlicet quod ipse sicut se accusabat, talium quos descripsimus similis, homo vanus et superbus contra omnem juris formam ab aula ad ecclesiam sicut deformiter et enormiter sic fuisset assumptus. Cui cum tunc eruditorum suorum aliquis in medium exemplatum proponeret multos ab aula et alios multos a sæculo ad pastorale culmen assumptos, et frequenter multos simplices, inscios et Scripturarum ignaros, sancte tamen et strenue curam pastorem implese, et ibi etiam maxime abundasse gratiam ubi superabundavit peccatum, respondit mox, ad illum de eruditis suis qui sic locutus fuerat specialiter verbum dirigens: « Frater, inquit, et hæc quidem quæ tu recolis miserentis Dei miracula sunt ad consequentiam minime trahenda: alioquin juxta illa, quæ tu inducis exempla

A passim et sine delectu eligatur in Ecclesia, sicut justus et impius, sicut mundus et immundus, et cum docto indoctus, et videamus si adhuc potens sit Deus, et si est virtus in Excelso: et spreto judicio ecclesiastico totum divino committamus miraculo, cum possit Altissimus de lapidibus istis suscitare filios Abrahæ; et sæpe, ut tu per exempla tua indicas, fecerit sic. » Et in finem: « Unum, inquit, certissime statui, quod conscientia mea reclamante si, Domino disponente, sic evenerit, nec destinati pontificis oblatam meam electionem confirmabo nec consecrabo electum, unde et suppliciter Altissimum invoco ut hoc meum propositum et desiderium, quod justum esse non dubito, ipse misericors et miserator Dominus in dies augeat, roboret et confirmet. »

B Et quidem novum nostrum archipræsulem, sacerdotum, ut præostendimus, ordinatorem tam districtum et episcoporum ut ex jam dictis patet, consecratorem tam timoratum, exaditum a Domino evidenter quidem et cito historiæ hujus declarabunt sequentia.

13. CUR IN DESCRIBENDIS OPERIBUS PONTIFICIS MORETUR.

Hucusque prosecuti sumus, prout datum, quantus Thomas hic noster fuerit in aula et quantus post ceperit esse in Ecclesia, mox adepto pontificii gradu; quam strenue prius Henrico illustri regi Anglorum et quam gloriose post militare ceperit Christo summo regi Anglorum; in aula reddens quæ sunt Caesaris Cesari et in Ecclesia Deo quæ sunt Dei: verum in his pontificis operibus exsequendis, sicut supra quod verebar non tacui, et hic iterum propter obtrectatores quos vereor non iterare non possum. In his, inquam, pontificis exsequendis operibus forte nimis morosus videor et in ipsorum commendatione operum tædians inculcor verborum, et potius theologice adificationi quam gestorum viri historicæ explanationi insistere, et ita nimis theologum, historicum vero parum sapere: verum quivis notans nos sic saltem non judicat, sed advertat prius nos non solum pontificis opera sed et causas operum, quod et supra jam nos dixisse meminimus, explicare: quasi non solum facta, sed et animum facientis quem ab ipso sic accepi factore. Unde et factorum causas eo diligentius prosequor, quo ea ab ipso auctore sic acceperim, et factorum causas prosequens ideo in describendis ipsis sum morosior. Curramus enim per singula quæ jam descripsimus opera et liquido videbitur quod sic. Curramus, inquam, per singula, primo ad novi tironis cilicium, ad novi sacerdotis orarium, ad dispensatoris furtivum de nocte mandatum, ad solemnem illum in altari festinanter comestum agnum anniculum, ad judicem in tribunali indeclinabiliter æquum, ad patremfamilias in mensa tam civiliter et tam religiose sobrium, ad magistrum in schola discipulorum examinatore tam districtum. Curramus, inquam, per singula hæc, et horum omnium pervidebis vel quam ipsomet didici vel quam per me ipsum indubitanter accepi, causam quidem evidenter et ob id minus

breviter historiae huic insertam. Et propterea quia tanti pontificis facta et causas factorum inseruimus tam ampla et tam digna, sicut infra molestam brevitatem concludere non valui, ita et elaborata brevitatem tam clara et tam spectabilia obscurare et coarctare formidavi. Igitur quia post descripta pontificis opera et ipsorum operum causas, mox subscribendo conscripsimus, patet profecto quod ex his ædificatio fructuosior, instructio perfectior, et proinde necesse ut per verborum fila prolixioris sermonis tela texeretur extensior. Et ob idem forte historiae legem excedens plus theologum sapio: nec enim absque theologia, absque Dei sermone, Dei operum virtus declarari potest aut debet.

Igitur, si excessi in hoc, me ad id virtus operum compulsi. Et si quis forte est, excusabit excessum; aut si non est, angebit meritum et uberiores ædificationis faciet fructum.

Et quidem ad operandum multum est ut qui divina operans operum suorum causam et virtutem intelligat; verum et propheta ad operandum operum querit intellectum, ut non solum sciat quid facere debeat, sed et cum facit, cur faciat. *Da mihi, inquit, intellectum et scrutabor legem tuam et custodiam illam (Psalm. cxviii).* Ecce quod ante practicum et sanctarum operationum theoreticam postulat, ut quemadmodum medici corporum salutem corporis, ita et hic salutem spiritus secundum præventis theoriæ operetur intellectum. Sancta quippe operatio, quanto plus intellecta tanto ædificat fructuosius et vivificat fortius et pro tempore vel agitur vel dissimulatur securius. Siquidem opus absque scientia corpus sine anima, terra sine aqua, et velut sicca absque pluvia nubes, unde etiam et charitas quæ cum scientia habetur alii omni supereminet charitati. Quod discipulos scire inter cetera optat Magister eis scribens sic: *Scire etiam supereminentem scientiæ charitatem Christi (Ephes. iii).* Quodvis enim bonum, si diligatur, tanto diligitur affectuosius, quanto scitur perfectius. Quod si forte tentationis alicujus vehementia amittitur, is qui scientiæ spiritum habet, tanto illud iterum facilius recipit quanto pro amisso pœnitere fructuosius et modum et viam ut ad illud revertatur novit perfectius, juxta quod rex ille sapiens: Qui apponit, inquit, scientiam, apponit dolorem. Ille enim profecto de virtutis bono amisso cum pœnitet acrius dolet qui scientiam habet. Quod enim est acetum saporis, quod oleum igni, quod ligna pyra, quod diagridium medicinae, hoc est scientia pœnitentiæ. Alioquin quod magister obsecrat, non erit obsequium rationabile obsequii causa incognita. Nam, sicut melius est Domini mandatum facere quam nosse, ita prius est nosse quam facere; facere enim et ignorare cum facias, sicut non perfectæ cognitionis, non perfectæ obedientiæ est: cui ignorantia detrahit et minus reddit devotam, unde et prophetarum unus: Et tu, Israel, noli ignorare. Et Magister: *Propterea nolite fieri imprudentes sed*

A intelligentes quæ sit voluntas Dei (Ephes. v), quam profecto cum feceris et causam noveris faciendi, tunc quod magister optat discipulis in omnem plenitudinem Dei impleberis. Sed ut ad priora redeamus, sicut jam diximus, in novis his novi pontificis virtutum operibus cum ipsis operibus causas et virtutem ostendimus operum; et ideo prolixiores sumus in exsequendis his, verum prolixitas hæc, sicut ædificationi cedit, et laudi. Nam quicumque hæc qualitercunque exarata et qualicunque excepta calamo ob tanti pontificis devotionem et memoriam legere dignabuntur, non solum opera sed et virtutum operum suorum dicent et magnitudinem ejus narrabunt.

14. DE PRÆDIIS QUÆ REPETEBAT A LAICIS.

B Verum ab his, quibus tam gloriose vitam suam instituit pontifex, sicut mihi datum utcumque expeditis, cum pontifice procedendum ad alia. Jam enim qui hucusque in portu ecclesiæ navigarat sæculi mare ingredi incipit et sæcularia attrahere. Quod persæpe necesse pontifici, sed sapienti pontifici dulce nunquam. Jam quibusdam regni magnatibus viris magnis et potentibus, de prædiis per prædecessorum suorum impotentiam seu incuriam ecclesiæ suæ abbatis, quæstionem movet, quædam repetendo, nonnulla vero ubi manifesta videbatur injuria absque quæstione revocando, quæ erant illa prædia, quæ vulgo in terra dicuntur firmæ feudales; quas omnes archipræsul, tanquam ad mensam suam propriam pertinentes, mox inter pontificii initia, illis qui firmarii dicuntur exclusis, ad proprium suum dominium revocat, nullo fiscali iudice requisito. Conventus vero quare hoc faceret respondit nullo modo se litigaturum super his, quæ ad dominium suum pertinere fuisset notissimum, etsi quocumque titulo injuste alienata. Et ita prædia illa pro voluntate sua ordinavit et tenuit, donec exturbatus et hæc et alia propter justitiam proscriptus perdidisset; quod plenius enarrabant sequentia. Et præterea instantissime repetebat feudum illud, quod dicebatur Willelmi de Ros, feudum, ni fallor, septem militum, quod defuncto archipræsule Patre Theobaldo mox fuerat confiscatum, verum archipræsul mota duntaxat super feodo hoc quæstione substitit hic, regis qui tunc extra regnum agebat adventum suslinens. De quo tamen feodo, propter alia quæ emergerunt, nec tunc in proximo regis adventu verbum movit sed distulit. Erat etiam inter archipræsulem et nobilem virum comitem de Clare dura tunc contentio, eo quod archipræsul exigeret super castro illo, quod dicitur de Tunebrige, et omni territorio quod castri est sibi hominum fieri; et præsertim super omni eo quod infra leugam castro circumjacentem est, quæ vulgo *banleuga* dicitur, sive ut dicatur Latinius *bannum leuga*. Comes vero hominum obtulit, sed super quo, quod quærebat archipræsul, exprimere recusavit. Præterea repetebat turris Rophensis custodiam, quam et de Ecclesiæ suæ jure protestabatur.

super hoc instrumentum publicum, chartam videlicet diuæ recordationis Willelmi illustris quondam Anglorum regis, qui regnum strenue in manu forti certamine bellico acquisierat, producens. His itaque et hujuscemodi motis quæstionibus et prædiorum revocatis his, repetitis illis, oriuntur pontifici mox contentiones et lites et adversarii multi, sed propter regis metum occultiores, eximiam illam, ut supra ostendimus, quam pontifex habebat adhuc, regis gratiam sicut reverentes et verentes, et ob hanc pontificis non modicum metuentes offensam. Verumtamen qui se læsos sentiebant aut lædendos verebantur, regem extra regnum agentem adhuc nonnulli adeunt, et querentes exponunt aliqui se passos, alii vero se passuros injuriam per pontificem, nisi regia clementia iustitiæ adhibeat manum. Et constantem regis ad pontificem gratiam vel in aliquo labefactare attentantes, addunt quod nimia regis gratia cornua daret pontifici ad excedendum. Sed rex, qui opere et veritate eum diligebat, nihil motus ex his, a talibus avertiebat auditum : et quia in articulo erat transfretandi, in adventum suum in Angliam querentes distulit.

Et ecce quia post modicum crebro, sicut decet et solet, ante prænuntiatum rex apud australem portum, qui dicitur Suthamtune, nuntiatum applicuisse. Applicuit autem rex primo anno consecrationis pontificis, ni fallor, cito post Salvatoris natalitius dies. Cui confestim archipræsul una cum egregio illo puero, quem jam sæpe nominavimus, Henrico, regis filio et regni hærede, obviam venit, utpote qui regis jam ante per aliquot dies mari appropinquans prope præstolabatur adventum. Et ecce una cum regis filio regis hospitium ingrediente pontifice, rege, et universis occurrentibus per totam aulam gaudium magnum et exultatio : rege et pontifice in mutuæ ruerentibus oscula et amplexus et sese invicem honore prævenientibus, imo et contententibus prævenire : ita ut videretur quia rex pro filio parum, sed totum se pro pontifice effunderet, et in pontificem, et in omne se gaudium dilaret, utpote qui nunc primo suum quondam aulæ Thomam videret pontificem : sed maxime et supra alia in gaudio dilatatus ob hoc, quod de sanctitate pontificis ex aula sua sic assumpti tot et tanta, quæ supra descripsimus, secreto jam et pro certo acceperat. Pontifex vero regi ex maris fatigatione et tædio condescendens cito post salutationem mutuam et invicem sic concelebratum gaudium abscedit et in hospitium, quod prope erat, se recipit. Et mane convenientes diei crastinæ simul conficiunt iter, toto itinere soli duo, cæteris amotis omnibus, familiariter et secreto colloquentes et sibi invicem applaudentes. Cum vero per dies aliquot sic fuissent, pontifex cum præfato alumno suo regis filio a rege in gratia summa abscedit. Præfati vero queruli, videntes et audientes sic abscondunt se et querelas dissimulant.

15. DE PROFECTIONE EJUS AD CONCILIUM TURONENSE.

Etece quia post modicum felicitis memoriæ tertius PATROL. CXC.

Alexander papa per universam catholicorum Ecclesiam, erat quippe in Romana Ecclesia tunc schisma, concilium convocavit : verum et archipræsul noster, in omnibus magnus, magnificentissime quidem ad transfretandum se parat. Et rege, quem tanquam dominum et supra hominem diligebat, adito, alumnum suum regi patri restituit : et inter ipsum et regem per dies dulci et familiari colloquio habito, rege salutato, in Cantia in proprio pago suo, qui dicitur Rumenel, supra mare sito auram expectat præseperam. Qua post paucos dies data, mare ingreditur et in Flandria, in portu qui dicitur Graveshende, applicuit prospere, cum magno quidem et magnifico apparatu. Cui mox in ipsa maris ripa nobilis Flandriæ et Viromandiæ comes Philippus et in crastino terræ illius B proceres et nobiles occurrerunt, omnem honorem exhibentes et certatim et sua et quæ poterant offerentes. Deinde vere per Normanniam et Cenomanniam transiens, in omni illustris regis Anglorum ditione, per civitates, per castella et vicos adeo honorifice quidem tanquam si rex ipse excipitur. Turonis vero jam appropinquans tertio, ni fallor, die ante celebrandum concilium civitatem ingressus. Audito archipræsulis Cantuariensis adventu mox universa civitas commovebatur et obviam exeunt universi, non solum rives et indigenæ, sed et personæ ecclesiasticæ quæ ad concilium jam fere omnes conveniant, diversarum nationum archipræsules et pontifices. Et quod minime tacendum, præter Romanæ Ecclesiæ inorem, domini Patres et rectores Ecclesiæ, cardinales universi, longe priusquam civitatem ingrederetur, C occurrunt : præterquam duo tantum qui domino papæ, ne in tam celebri frequentia absque lateribus esset, considebant. Tanta vero fuit sequentium turba ut, archipræsule ad dominum papam ingrediente palatium, ipse papa, quasi ex necessitate ne comprimeretur, in quo erat exiret thalamum et ingrederetur palatium. Quasi prophetiæ spiritu impellente, ipse papa, qui nemini vix assurgit, archipræsuli quasi obviam veniens et jam quasi in occursum reverentiam exhibens. Totus quippe occursum hic, ut videtur, sicut honoris et propheticus et in Christo Domini quasi alter Domini Ypapanti tanquam vaticinium futurorum. Quod et nos hodie impletum cernimus, D quando jam ab universo Ecclesiarum orbe, et ab Oriente et ab Occidente per multas difficultates ad ipsum veniunt et adorant magis quam occurrant. Et dominus quidem papa archipræsulem benignissime tunc suscepit. Et eo quidem benignius, quod ex multo tempore cupiens erat videre eum et jam multa bona audierat de eo. Et ut videbatur super itinere ei compassus, cito dimisit eum et in hæc verba : « Vade, inquit, frater, quiesce ; necessaria est quies post laborem. » Et ita tunc recessimus, et in arcem regis, quæ prope papæ palatium erat, hospitio nos recepimus.

Videres mox in crastino ad hospitium hoc confluere multitudines. Nam, sicut audientes, sic videntes qui conveniant pontificis magnificentiam

quotquot diebus confluebant ad ipsum diversorum regnorum personæ ecclesiasticæ, gratiam et familiaritatem querentes et offerentes. Præterea nobiles terræ et potentes crebro euntes et revertentes ad nos, et hi præsertim qui regiam jurisdictionem exercebant, scientes pontificem in summa regis gratia, assidui circa nos aut parati ad obsequendum aut obsequentes. Et quod cæteris majus adhuc, Romana Ecclesia nostrum archipræsulem, tanquam ex multis qui convenerant primogenitum, quodam quasi primogeniti honore et cultu honestabat præ cæteris. Jam vero per aliquot dies celebrato concilio, ad archipræsulis nostri petitionem nonnullis Ecclesiæ suæ privilegiis renovatis, vir apostolicus in osculo pacis dimisit [eum cum benedictione sua et gratia. Et quidam æquore et aere faventibus, in Angliam cito cum gaudio reversus est, secundo jam anno consecrationis suæ. Et a rege, pro more et debito, tanquam pater a filio in omni gaudio suscipitur].

[Illic intervenit in cod. Atrab. hiatus unius folii cujus initium et finis ita ex Quadrilogo suppleri posse videntur :

De consecratione episcoporum Wigornensis et Herefordiensis.

His diebus duæ vacabant sedes episcopales in provincia, Wigorniensis videlicet et Herefordiensis, prioris sedis pontifice jam mortuo, sed altero ab Herefordiensi ad Londoniensem sedem translato. Translatus Gilbertus Folioth vocatus erat nomine proprio, cognomento Folioth.]

.....operiatur alterum, aut si nudetur unus pauperum, aut nudus alter vestiatur. Quia juxta Scripturam redemptio animæ viri divitiæ propriæ. Euntes enim ibant et flebant, non aliena sed semina sua mittentes. Juxta quod et legimus Dominum de tuis justis laboribus honorandum. Alioquin juxta Sapientem : Qui offert sacrificium ex substantia pauperum quid aliud agit quam in patris conspectu victimare filium? (Ecclesi. xxxiv.) Et ut majora addamus adhuc toto tempore, quo occupatæ ecclesiæ vacant, sic perit opus, perit opera, perit penitus cura pastoralis et pastorale officium. Et sic totius gregis salus in periculo. Quod si monasterium occupatum sic, perit in monasterio sine patre coercitio, perit sine doctore eruditio, perit sine chamo districtio, perit sine virga disciplina, perit sine prælato obedientia. Et sic quasi per libertatem noxiam emancipata in claustris perniciose dissolutio imperat. Qui prius sancte et districte monasticæ regulæ servi fuerant factis ejusdem regulæ liberis. Et profecto pro his gravis et præsertim in archipræsules querimonia, quorum provisioni et sollicitudini tota provincialis Ecclesia commissa. Quorum dissimulationibus reges plerumque transeunt in tyrannos : quos, proh dolor ! ipsi archipræsules palpant, demulcent, et delinunt, quibus potius tanquam patres filiis imperare debuissent. Unde et magister ad metropolitanorum

A suorum unum : *Argue*, inquit, cum omni imperio (Tit. ii) ; verum ut taceam nunc de metu seu negligentia aut forte imprudentia magistrorum, horum et Patrum sunt nonnulli, qui ex sola mansuetudine, ne dicam nunc remissione, ab hujusmodi correptionibus retardantur. Qui profecto minorem quam oporteret exhibent justitiæ libertatem, dum amicitia verentur exasperare dulcedinem. Sic Adam peccavit cum conjugē, et Heli cum sobole profana. In quo et se et alios quos diligunt, cum multa etiam interdum populorum strage lædunt, dum, ne amicitiam offendant, errorem libere non produnt, et reprehendenda pro auctoritate qua funguntur imperiose non arguunt. Et ita dum uni sic parent, multi corrumpunt. Isti certe sic demulcentes, sic dissimulantes, sic B correptionem suspendentes, non patribus diligentibus, seu pastoribus sollicitis comparandi, sed, et ait doctorum unus, potius furibus qui seducendo avertendis pecoribus spargunt pabulum, non comminando errantibus ut revocentur intentant flagellum : quod bene attendit sapiens ille, qui olim jam dixerat utillores esse plerumque inimicos jurgantes, quam amicos objurgare metuentes. Illi enim, dum rixantur, crimina nostra sæpe produnt quæ credebamus occulta, unde et magis confundimur ; isti vero dum tacent, in nostris nos criminibus magis foveant, eo longius quo liberius, absque coercitionis freno, pro voluntate in invio et nos in via currentes. Interdum in invio hoc visa nobis via recta, cujus tamen novissima ad mortem ducunt : interdum etiam viam C pravam et scientes et prudentes carpentes, minime tamen arbitantes quod tam vicina, tam directa sit ad præcipitium, unde et quemadmodum juxta prophetiam : *Cultus justitiæ est silentium* (Isa. xxxii), ita et juxta eundem et ipsum idem silentium justitiæ interdum est præcipitium : *Væ*, inquit, *michi quia tacui* (Isa. vi). Prophetica hic *væ* sibi intentat, *væ* metuuit, et præsertim ob id quod Achab regem imperiose et libere qua decuit auctoritate non corripuerit, propter quod etiam et labia polluta contraxisse se accusat. Hæc ergo omnia archipræsul noster novus ad se reversus recolens et attendens id sui esse officii, regem quem snpra hominem diligebat, nunc rogabat, nunc supplicabat, nunc monebat, ut sedes D diu vacantes ordinari permitteret, nunc vero amice corripiebat, objurgans quod eas vacantes tam diu occuparet, et in temporalibus et in spiritualibus quæ inde incresecebant mala non tæcens : et præsertim motus ob duas illas pontificales cathedras, quas tunc temporis jam supra vacuas diximus.

46. DE DUOBUS ELECTIS IN PONTIFICES.

Et rex tandem ad multam archipræsulis instantiam pontifices fieri annuit. Et ita ad duas sedes prænominatas pontifices sunt electi, viri certe omni sancitate perspicui ; ad primam quam diximus sedem Wigornensem quidam est electus ætate juvenis, sed moribus et gravitate senex, nomine Rogerus, magnatus hic, magni viri Roberti quondam Glauconensis comitis filius ; cujus adhuc virtus insi-

guior sanguinis generositatem superabat. O si mihi nunc liceret et cęptę historię lex sic permitteret, virum istum pro virtutum suarum meritis condignis efferre pręconis! Certe totam hanc martyris historiam quasi cęlestis firmamenti stella matutina illustraret, aut velut carbunculus aliquis ardentissimus in his pręsentis vitę nōstrę tenebris prę cęteris ardens et lucens; quem quoties ad mentem revoco, et alterum mihi effligo Simonem, Onię filium, sacerdotem magnum, qui in vita sua suffulsit domum, et in diebus suis corroboravit templum: qui quasi arcus effulgens inter nebulas, et quasi lilia quę sunt in transitu aquę, et quasi flos rosarum in diebus veris, quasi thus in igne ardens et vas auri solidum, vas pretiosum, vas sanctificatum in honore et vere utile in domo Domini. Verum pręsentis materię meę proposito reclamante, per amena virtutum ipsius prata stylo nostro effodiente, nequaquam nunc rivus, sed nec etiam rivulus ducendus est, nec tanquam amœnans et speciosa florum gratiarum suarum varietas depingenda: quantę videlicet fuerit puritatis lilium, quantę vercundię rosa, quam cęlestis conversationis viola; quam jucundę societatis musica; et super omnia quanta justitię columna, et ad cęterorum pręsidium quam infrangibilis constantię adamas.

His ergo solum sic tactis, quia nec modo locus est ut moremur in his, hic ætate juvenis, sed moribus grandævus et virtutibus, communi omnium ad quos id spectabat voto electus, primus fuit quem noster novus archipręsul in episcopum Wigorniensem consecravit. Qui postea et in prosperis et in adversis ipsi semper obediens etiam usque ad damna, usque ad proscriptionem et pericula multa: turpe judicans si imperator in castris, miles domi, quasi inter mulierum colos seu calathos puellarum, balnearum et unguentorum uteretur fomentis. Sed quia pręsentis historię sequentia nos compellunt, ad pręsens pertranseamus de hoc.

Accedamus ad alium Robertum nomine, cognomento de Meleduno et secularium et sacrarum litterarum in scholis magistrum pręclarum, in vita etiam quam in scientia multo magis adhuc pręclariorem. Cujus et ille sacerdos magnus, de quo proxime sermo, prius consecratus in scholis discipulus fuerat. Hic quippe doctor magnus tam vita quam scientia, tanquam luminare magnum per universum ecclesiarum orbem erat rutilans, et discipulorum multitudinem eruditam tanquam varios per orbem lucis suę radios a se emittens. Hic secundus et etiam novissimus quem novus archipręsul noster cum cleri et populi unanimi totius universitatis assensu in Herefordiensem episcopum consecravit. Et ita in duobus his consecratis pontificibus omni, sicut mundus novit, sanctitate conspicuis, pręter quos novus consecrator noster alios non consecravit, ipsius quod supra in historia hac jam testati sumus, et propositum stetit firmum et ab Altissimo desiderium est expletum, quo, ut supra

A ostendimus, disposuerat, quo Altissimo supplicans postulaverat ut, archipręsulatus sui tempore contra conscientiam suam nemini pręterquam digno consecrationis pręsertim imponeret manum.

Post modicum verò archipręsul, plerisque com-provincialibus episcopis convocatis, nobile illud et regale monasterium de Redinges, in quo divę recordationis Henricus, quondam Anglorum rex, secundi Henrici nunc illustris regis nostri avus in mausoleo gloriose quiescit, cujus et ipse fundator; magnifice dedicavit, rege volente sic et pręsente. Et eodem etiam anno Londonię apud monasterium pręclarum pariter et regale quod dicitur Westmuntier, gloriosi et vere sancti regis Edwardi corpus, tanquam clorum admodum et pretiosum perfectę vas continentię, de terrę pulvere extulit et ob multa et pręclara regię vitę merita solemniter quidem et sublimiter ibidem in Ecclesia inter sanctorum corpora collocavit, rege itidem volente sic et pręsente. Et erat, sicut pręlocuti sumus, illustris regis et sancti pontificis cor unum et anima una in Deo, regno per hoc et sacerdotio in summa pace et tranquillitate concurrentibus, Deo pacis et dilectionis sic agente.

Sed, prohi dolor et vere dolor! nihil in humanis diuturnum, nihil permanens, sed juxta dictum Sapientis et id optime experti: *Omnia tempus habent, et suis spatiis transeunt universa sub celo: tempus flendi et tempus ridendi; tempus dilectionis et tempus odii; tempus belli et tempus pacis: omnia tempus habent (Eccle. iii)*. Magna certe nomina et chara fœdera tanti regis et tanti pontificis. Revera tantum regem et tantum pontificem in alio mundi regno inveniri simul difficile esset et tantam inter tantos concordiam. Grandis quidem concordia, sed brevis hora. In brevi quippe extrema concordię dissensio occupat, nec per alium quam per totius pacis et dilectionis inimicum misere et infelicitur istud tantum et tam firmum concordię vinculum dissolutum, ad regni et sacerdotii unitatem solidandam tam necessarium.

Sed quid nomino vinculum? siquidem in moribundis mortalium cordibus, sicut in nobismet quotidie experimur, per tot cogitationum inaniam, per tot curas et causas, per occupationes tot in semet-ipsis divisas, dilaceratis, discissis et divulsis, quę bilinguium et susurronum stimulis et suspicionum aculeis adeo pervia sunt, firmum, ut nunc experio probatum, ad alterum amicitię vinculum omnino videtur nullum. Potest quidem talis qualis esse quasi lutea seu parietina et ruinosa quędam conjunctio, mox mox ad primam et modicam aquarum inundationem, seu ad primum et brevem aquilonis flatum dissolvenda. Quomodo enim deinceps manebit hoc inter alios, cum inter tantum regem et tantum archipręsulem amicitię vinculum contra omnem mundi spem sic sic ex insperato sit solum? Quisve deinceps non metuat inimicum sibi futurum adhuc quantumcunque alter alteri amicissimus

sit? Quibus quantumcunque se amantibus, si regis Henrici et archipræsulis Thomæ meminerint, non formidanda aut suspecta saltem aliquo adhuc tempore futura inimica dissensio? vere, etsi alicubi quod hoc ipsum et raro, nusquam tamen nec unquam in aula, præsertim inter tot assentatores, tot invidos interbilingues, tot et susurrone et suspiciones tot, secunda nunquam dilectio, sed inter mortales et in aula potissimum sicut infida et instabilis semper et incerta, vanitati ut videtur cum reliqua creatura subjecta? Quæ et præsertim inter potentes qui velut quædam vitrea dilectionis vasa sunt, si modicum impingat, ex modico læditur, ex modico offensa frangitur. Et in potentibus delicata et tenera ex modico sauciatur et in brevi expirat. O inter cætera et præ cæteris misera hæc et miseranda in mortalibus humanarum rerum conditio! Hodie in dilectionis dulcedine delectatur, cras in amaritudine odii moratur spiritus meus. Hodie tu mihi quasi cor meum, cras quasi ulcus aut vulnus lethale mihi: vere tentatio est vita humana super terram.

O sicut incredibilis et vere tristis regis et archipræsulis tantæ amicitiae in inimicitias tantas, ut cito monstrabunt sequentia, sæva et cita et dira nimis et dura conversio! Sicut certe incredibile, sic et admodum triste conversionis hujus miraculum hoc. O quondam amicitia quæ sic modo emortua, tamen luctus et doloris et regno et sacerdotio ingessisti, quantum adhuc dum superstes exultatione circumdedisti et lætitia! Nam ut anticipem hic, et nunc quia locus aliquantulum sic exigit in posterum loco suo plenius dicenda præveniam; o quot et quanta ex dissensione hac regis et pontificis acciderunt et regno et sacerdotio mala! Nam, ut cætera taceam, quæ jam forte regno nobis ignorantibus acciderunt, a quibus et ab aliis in futurum regnum incolume conservare dignetur Omnipotens et immune; profecto ex dissensione hac, ut sequentia declarabunt, egregii illius pueri quem jam sæpe nominavimus, Henrici regis nostri Henrici filii et regni hæredis, accelerata est unctio in regem immatura: et postea bis inter regem patrem et regem filium gravis subsecuta et nefanda rebellio. Et demum, ni fallor, ob rebellionis peccatum in patrem regis filii cita mors nimis et festina. Et quidem regni proprie malum hoc ex dissensione hac. Inde etiam et in sacerdotio mala multa et pericula. Et in primis quidem cleri totius per regnum desolata misera et miseranda per Ecclesiæ inimicos, ejusdem cleri absque defensore oppressio miserabilis per annos vacantium ecclesiarum destitutio, archipræsule peregrinante. Et quod adhuc gravius quæ ad omnium salutem, omni tunc sacramentorum usu cessante, utpote in vacantibus ecclesiis deficiente omni pastoralis officii cura. Juxta quod celebre illud Christi floribus quondam vernaui Ægypti desertum monachorum multitudine per cellulas, tanquam mellificantium apium examinibus per alvearia circumseptum, imo et Ægyptius tota

A quondam religione florente, tanquam paradisus pomorum omnium et plena Spiritus sancti apotheca, demum tamen ex defectu pastorum in paganismum reversa traditur, in defectum canum sic grassantibus lupis. Et ut ad prænumerala prædictæ dissensionis mala addam adhuc, demum ex dissensione hac inimica et omnibus post futuris sæculis destanda processit ipsius archipræsulis mors: quæ, etsi universus ecclesiarum orbis concelebrat, pretiosa in se et toti sicut nunc cernimus fructuosa Ecclesiæ, in multorum tamen et magnorum ignominiam cessit et perniciem. Ecce quantum, quam detestabile in sacerdotio ex dissensione hac malum; quæ tanquam lethalis quædam pestis nocifera et per regnum et per sacerdotium longum nimis et circumplexum traxit post se funem malorum.

Nos autem qui, præsentem, vidimus et audivimus; sed et qui superstites adhuc nec audierunt nec viderunt et potissimum qui post nos futuri sunt, dissensionis hic causam legant. Et fuit hoc quidem quod nunc dicemus dissensionis initium, sed necdum finis.

17. DE INITIO DISSENSIONIS INTER REGEM ET ARCHIPRÆULEM.

Contigit ut quidam operarii diabulici, nomine duntaxat clerici, sed de sorte Satanæ, de maleficiis accusati et capti tenerentur in vinculis, talibus ut crebro solet in regno enormia patrantibus flagitia et violentibus pacem. Inter quos sacerdos unus de homicidio infamis et accusatus a propinquis defuncti. Iste ob privilegium ordinis ad diocesanum episcopum Salesberiensem captus dirigitur, regis officialibus et propinquis defuncti qui accusabant acriter instantibus ut episcopus exhiberet justificationem. Sed sacerdote constanter inficiente, cum non posset super homicidio per accusatores convinci, canonica indicitur purgatio accusato, accusatoribus præsertim fama consentiente et ipsis etiam probabiliter arguentibus accusatum. Sed eo in purgatione deficiente, mittit episcopus ad archipræsulem de jure consulens, et ut in exsequenda pœna procedat securus. Archipræsul vero consultus præmandavit ut omni privatus beneficio ecclesiastico exauctoraretur et in monasterio ad agenda perpetuam vitæ districtissimæ pœnitentiam perpetuo recluderetur. Et pœna hæc in defectum per sententiam adjudicatæ purgationis quæ ac si in convictum eadem. Et quidem clerici in hunc modum super maleficiis accusati et convicti vel deprehensi vel etiam infames et in purgatione adjudicata deficientes, absque omni mutilatione vel deformatione membrorum ex decreto archipræsulis pristinis authenticorum canonum sanctionibus roborato, hujusmodi spirituali absque omni corporali pœna per provinciam percellabantur: pœna tamen exasperata et emollita pro qualitate flagitii pro gradu etiam et ordine delinquentis et modo et causa delinquendi. Illud etiam minime prætereundum quod circa idem tempus Philippus quidam, cognomento de Brois, in sede

episcopali Lincolnensi canonici, iustitias regis, quæ vniuerso errantes in terra dicuntur, probrosis quibusdam affecerat contumeliis. Propter quod rex, non solum adversus ipsum, sed potius adversus totum regni clerum, exasperatus videbatur. Solet quippe mox in totam cuiusvis officii professionem conferri si quid forte turpiter vel enormiter ab aliquibus de professione admittatur. Sed revera iræ seu invidiæ sicut citum nimis et inconsideratum iudicium hoc, tanquam si in aliqua vel exigua corporis particula macula reperta fuerit, et ob id mox totum corpus navorum sorde iudicetur respersum. Et in contumeliis illis et probris constat quidem clericum deliquisse non modicum, verum querela ad archipræsulem delata, citatus clericus etiam supra modum delicti ut vel sic regis facilius quiesceret indignatio, punitus est: publica virgarum disciplina clerico adjudicata et ipso per annos, quot tamen non recorder, ab omni ecclesiastico beneficio quod in regno habebat suspensus; verum regi irato necdum etiam plene pro irati voto satisfactum in hoc. Istud enim est quartum illud quod inter alia enumerat Sapiens, quod donec penitus exstinguatur, videlicet iræ ignis, nunquam dicit sufficit; verum cum regi non sufficeret hoc, videbatur rex potius reum clericum ad aliquam pœnam corporalem deponere, sed verebatur hoc exprimere, jam advertens archipræsulis rigorem non posse flecti ad hoc. Arctabatur itaque rex, arctabatur et pontifex. Rex etenim populi sui pacem, sicut archipræsul cleri sui zelans libertatem, audiens sic et videns et ad multorum relationes et querimonias accipiens per huiuscemodi castigationes talium clericorum, imo verius caracterizatorum dæmonum, flagitia non reprimi, sed potius in dies per regnum deterius fieri, archipræsulem et comprovinciales pontifices et reliquum regni clerum Londoniæ apud Westmunstier celebriter convocat.

18. QUALITER REX ALLEGAT PRO POPULI SUI PACE.

Rex autem, causa vocationis exposita, mox instantanter exigit ut deprehensi vel pro convictis habiti in tam enormibus flagitiis clerici lictoribus suis, Ecclesiæ præsidio destituti, exponantur: ad nocendum promptiores fore adiciens nisi post pœnam spiritualem corporali pœnæ subdantur, et parum curare de ordinis amissione, qui contemplatione ordinis a tam enormibus manus continere non verentur; et tanto deteriores esse in scelere, quanto sunt cæteris ordinis privilegio digniores; unde et severioribus coercendi vindictis, quando reperiuntur in scelere: hoc ergo rex, quorundam fretus consilio, utriusque juris se habere peritiam ostentantium, instantissime postulat ut tales mox submoti a clero curiæ tradantur, quod non solum jus humanum, sed et ipsius divini juris canonica sanxit auctoritas: unde et de talibus sæpe reperitur in canone: « Tradatur curiæ, » unde et qui pro rege, ob regium favorem, ut videbatur, scienter inducti, allegabant tales nequaquam exsilio vel monasterio,

A sed canonibus sanctientibus sic potius tradendos curiæ, deinceps futuros curiæ servos, curiæ perpetuo servituros, seu alia quam adjudicaret curia pœna percellendos. Et hoc esse tradi curiæ, iudici videlicet seculari relinqui ab eo puniendos, unde et bene in canone sequitur: « Et recipiat quod inique gessit. » Et quidquid dicitur de monasterio, asserebant constanter exsilium nequaquam iudicium esse sacerdotis, sed Cæsaris: cuius enim terra est ejus est extorrem facere, relegare, deportare, expellere, quemadmodum cuius est ecclesia et ejus est anathematizare, suspendere, ab altari arcere, et hoc quidem pontificis, cuius est ecclesia, sed alterum Cæsaris cuius est terra. Hoc autem ob id hic intersero de exsilio, quia jam archipræsul sacerdotem quemdam propter flagitium degradatum terram abjurare compulerat, unde et inter cætera motus rex. Addebant et adhuc quod sub lege illa sancta per Moysen data transgressores, nulla habitus gradus seu ordinis exceptione, corporaliter puniebantur, pro qualitate maleficii, reddentes animam pro anima, oculum pro oculo, et in aliis sic talionem semper recipientes, sicut populus ita et sacerdos, secundum Dei iustitiam, flagitio ad se tuendum nullo tunc ordinis vel dignitatis privilegio indulto: quin potius ordine seu prælatione potioribus, si transgressores hi, durius quidem fiebat iudicium et cruciatus fortior. Miram autem hanc esse nunc legis novitatem et vere sanctitatem novam, si possunt per privilegia sic se tueri flagitia quibus regnorum turbatur pax, regum violatur iustitia, et denique sanctitas omnis profanatur.

Qualiter archipræsul contra allegat pro cleri sui libertate.

Verum post modicum archipræsul una cum fratribus suis comprovincialibus episcopis et cum præfatis eruditis suis librato consilio, regi sic ad hæc: « Domine, inquit, mi rex, sacrosancta Ecclesia, omnium mater et regum et sacerdotum, duos habet reges, duas leges, duas jurisdictiones et duas coerciones. Duo reges, celestis rex Christus et rex terrenus, duæ leges, humana et divina, duæ jurisdictiones, sacerdotalis et legalis, duæ coerciones, spiritualis et corporalis: *Ecce duo gladii hic: Satis est (Luc. xxii),* inquit Dominus. Neuter superabundans et sufficient hi, hujus vero professionis viri dicti clerici ordinis ratione et officii proprie solum Christum regem habent, ipsi quodam proprio qui capiti superponitur assignati caractere, quasi per hoc a gentium nationibus segregati et proprie et peculiariter ad Domini opus assumpti, unde privilegio ordinis et officii terrenis regibus non subsumunt sed præsumunt, utpote qui reges constituunt, a quo et rex militiæ cingulum et gladii materialis accipit potestatem: unde et regi nulla jurisdictio in his, ratione dico professionis et ordinis, sed ipso potius regum sunt iudices. Isti enim, etsi in sæculo infirmi, contemptibiles, et imbelles nostri officii viri, tamen, juxta quod de ipsis prænuuntiavit

rex quidam magnus et propheta, alligant reges gentium in compedibus et nobiles sæculi in manicis ferreis, unde et non sub regibus sæculi, sed sub proprio suo rege, sub rege cœli, propria lege reguntur, et si transgressores, propria lege puniuntur, quæ suam propriam habet coercionem. Nec est ista lex quam nunc dicimus illa publica et communis quæ omnium pie in Christo viventium est, sed cum illa, non præter illam, privata quædam et propria, propter istam edita professionem, clericos dico. Hæc sunt sanctorum Patrum constituta quædam edita propter nos, quæ bene agentes etiam in præsentī Ecclesia remunerant, secus vero agentes damnant: verum et sicut proprius ipsorum rex cœlestis, lex spiritualis, et jurisdictio in spiritualibus, ita et in peculiari Dei portione et spirituali coercitio spiritualis seorsum per se et a sæculari coercitione separata. Et inde est quod absque membrorum mutilatione et sine omni deformatione corporis est. Spiritualis est enim. Adeo etiam quod ordinis privilegium excludat canterium; quam tamen pœnam communiter inter homines etiam jus forense damnat, ne videlicet in nomine Dei imago deformetur.

In his etiam constitutis nostris regum provisum est majestati et clementiæ. Turpe enim valde et indecens, si crudele et abominabile regia clementia videat, ut manus Deo consecratæ et quæ paulo ante Regis crucifixi, mundi Salvatoris, in altari effligaverunt imaginem, nunc, post tergum ligata, publicum latronem effligent. Et plecta collo circumligata pendeat in ignominioso patibulo caput sacræ chrismatis unctione delibutum, ad cuius paulo ante pedes regia se inclinavit majestas, gratiam quærens et veniam. Adiciebat etiam archipræsul quod nec regiam deceret magnificentiam nec clementiam regiam, ut manus illæ, a quibus modo accepit ipse rex divinæ gratiæ et benedictionis cœlestis beneficium, ab ipso mox suscipiant ignominiosum supplicium, carnicum securi suppositæ, seu alias sicut deformiter et enormiter mutilatæ. Et adjecit qui regi loquebatur archipræsul: « Pariter, inquit, domine mi rex, dico et de his, qui in sacris ordinibus sunt, clericis qui sacerdotum Altissimi in altari coadjutores sunt, quorum tanquam coadjutorum ministerio et reges terræ cœlestis regis benedictionem assequuntur, verum tamen si qui noster fuit exactoratus et curiæ traditus, deinceps ex nova causa hæc sustineat et dictante sæculari iudice pœnam corporalem subeat, æquum fore hoc et dignum non negamus et de coercitione vel coercendo deinceps nostra nil interest. Curie enim traditus est regiæ et sæculari jurisditioni suppositus, curiæ perpetuo serviturus. Hoc est enim quod canon dicit: « Tradendum curiæ, » quod ex historiis unum verbum hoc sumitur manifestum: verum et postquam sic traditus, nobis et illi jam curiæ servo nihil. Et ideo si qua deinceps pœna infligitur, jam non erit pœna nostri

A tanquam alienius de clero, sed erit pœna vestri tanquam unius de populo. Quod autem adjicitis etiam nostros extorres facere non nostrum esse sed vestrum, cum terra vestra sit non nostra, et pœnam hanc non ecclesiasticam fore sed civilem, breviter respondemus nos illius gerere vices qui supra omnes reges est, cuius est terra et plenitudo ejus: verum et juxta quod sacri sanciant canones, illius regis auctoritate cuius terra est et cuius legatione in terra fungimur, interdum et exsiliis et bonorum suorum proscriptionibus nostros condemnamus judicatos pro modo delinquendi et pro qualitate flagitii. Nec enim illius regis cuius infinita est potentia, limitatæ sunt pœnæ. Nisi tamen quod nobis iudicio sanguinis nec etiam licet interesse, quod vestrum est, qui alterum portatis, ferri dico, non verbi gladium, qui noster est; sicut ille ferri vester: *Ecce enim duo gladii hi (Luc. xxi)*, sub quibus omnis coercitio non quidem, quod absit! rebelles inter se, sed coadjuvantes ad invicem ut quod unus non valet, alter quasi coadjutorius exsequatur et suppleat; unde: *Satis est (ibid.)*, inquit. Et non solum etiam nostros, sed et vestros vestræ propriæ regiæ jurisditioni suppositos sæculares, dico nobiles sive ignobiles, cum Dei gratia præventi de his quæ in hoc sæculo flagitiis admiserunt penituerint, terram nativitatis suæ egredi et loca illa deserere in quibus eis facilius causa et materia delinquendi est et peregre proficisci summi regis auctoritate compellimus, et persæpe Hierosolymam in templo aut in hospitalario aliave vitæ districtioris loca religiosa et longinqua temporaliter vel perpetuo peregrinatos ibi destinamus; hoc modo summi regis mandato quasi relegantes eos aut deportantes, totum tamen pro qualitate flagitiorum admissorum et pro salute penitentium de flagitiis.

« Si autem, ut dicitis, nostri proniores sunt et promptiores ad maleficia, quia corporalis pœna spirituale non sequitur, potest quidem esse quod in aliquibus sic: nec in his animum, quod solius Dei est, sed manum a maleficiis, quantum licet et possumus, cohibemus, monasterio seu etiam alii loco districto sub arctissima custodia deputantes damnatum, cum viderimus expedire sic: nec progredimur.

Nostræ siquidem pœnæ, sic etiam et vestræ limitatæ sunt ultra quod progredi transgredi est. Et nos si quominus, rex noster proprius nostrum in suorum pœnis supplebit imperfectum, qui dicit: *Mihi vindictam et ego retribuam (Hebr. x)*. De sacerdotibus vero veteris Testamenti et levitis, qui legis transgredientes mandata corporaliter puniebantur, ad præsens nihil de his: in nova enim lege censura nova, verum et quia nova hic lex, novus rex, novum hic reformatur iudicium, non solum in pœnis, sed et in sacramentis, in sacrificiis et in operibus et oneribus novis. Vetera enim transierunt, et ecce quia facta sunt omnia nova, novus rex, nova lex, novus grex, nova sacramenta, nova sacrificia, nova

opera et nova onera, et sic coercitiones novæ et pænæ novæ.

Hincque regem audivimus et archipræsulem, qui in hunc modum, unus pro populi sui pace, alter vero pro cleri sui libertate conferebant, quinimo contentiosum jam funem trahebant, cum archipræsule confratribus suis coepiscopis unanimiter tunc stantibus et constanter, ita ut videretur tanquam quædam castrorum acies ordinata quæ penetrarî non posset. *Hic est discipulus qui testimonium perhibet de his et audivit et scripsit hæc (Joan. XXI).* Scripsit, inquam, et si non eadem verba hinc inde, tamen dictorum virtus et materia hæc quæ hic scripta.

O rex et o pontifex, quorum utrumque Dei apprehendit æmulatio! hic zelat populi sui pacem, alter vero cleri sui libertatem. O quantus in clero pontifex, quanta devotione amplectendus a clero qui pro cleri libertate tanti regis perdidit gratiam et postposituit gloriam! Jam enim contentio magna, jam dissensio manifesta. Quanta igitur hic devotione colendus a clero, qui proposito sibi gaudio pro clero sustinuit crucem, confusione contempta, magis eligens affligi pro clero Dei quam regie augustalis habere jucunditatem! Nec tamen adhuc pro clero nisi solum dissensionis initium hoc et prima causa dissensionis. His majora et ampliores his dissensionis materiam sequentia declarabunt. Et o quantus in populo rex, quantum ei a populo exsultandum et quam devote, quam fideliter serviendum cum tremore, qui mox pro populi pace a tam dilecto sibi et tam fido se avertit pontifice, cui et ipse ut præostendimus tanto animo præoptaverat pontificium! O zelus regis et zelus pontificis! o zelus et zelus, quam durum, quam lacrymabile, quod zelantes hos scientiæ spiritus non conjunxit; sed qui semper disjungit, intermiscuit se spiritus vertiginis et erroris! Certo enim certius quod uterque Dei habuerit æmulationem, unus pro populo, alter vero pro clero; utrius tamen eorum fuerit cum scientia zelus, non hominis, qui cito fallitur, sed scientiarum Domini, qui in fine declarabit judicium, verumtamen archipræsul in calce suæ supra scriptæ responsionis cum omni devotione regiam obsecrabat clementiam ne sub novo rege Christo, et sub nova Christi lege in nova et peculiari Domini sorte contra sanctorum Patrum statuta novam per regnum suum induceret coercitionem.

Et hoc quidem pro se et pro regni sui stabilitate obsecrans humiliter, obsecrans et frequenter; crebro interadjiciens se hoc sicut nec debere sustinere nec posse; verum rex, nihil motus ad hæc, sed eo amplius, ut videbatur, commotus, quod cernebat archipræsulem et coepiscopos adversus ipsum ut reputabat unanimis, sic et constantes, sciscitatur mox an consuetudines suas regias forent observaturi. Ad quod archipræsul, præhabito tamen cum fratribus suis consilio, illas respondit se et fratres suos observaturos, salvo ordine suo. Et id ipsum etiam ex ordine responderunt singulatim singuli per

A se a rege interrogati pontifices, nisi quod in musica hæc una vocum duntaxat dissonabat; episcoporum videlicet unus, qui audiens ob hanc unam omnium vocem regem magis exacerbatum, archipræsule et coepiscopis inconsultis, mutavit verbum: et profecto pro bono, ut reor, ut regis videlicet sedaret animum, dicens se observaturos regias consuetudines bona fide. Bonæ memoriæ Hilarius tunc Ciceretensis episcopus hic erat. Sed rex nihil mitigatus ob id ipsum quibusdam affectum contumeliis sprexit; et ad archipræsulem et coepiscopos se convertens, omnium sic una et ea lem voce audita, dicebat aciem firmatam contra se et captiosum esse et venenum verbo illi inesse, scilicet salvo ordine, unde et petebat et repetebat ut absolute et absque adjectione regias consuetudines se observaturos compromitterent. Archipræsul respondit ad hæc quod fidelitatem ei juraverant, vitam scilicet membrum et honorem terrenum, salvo ordine suo, et quod in honore terreno regie fuissent consuetudines comprehensæ; et ad earum observationem se minime in alia forma obligaturos nisi in qua prius juraverant, adjiciens quod per universum Ecclesiarum orbem non solum pontificibus, sed et minoribus clericis hæc esse jurisjurandi forma a sanctis Patribus introducta, nunc vero communis et usitata, unde nec ab hac tutum recedere, præsertim cum ut allegabat per adjectionem hanc cleri non taceat privilegium; unde et addebat qui hujus sunt professionis cum terrenis potestatibus fidelitatem jurant, eo ipso quod ordinem suum non tacent, eisdem ipsis quibus jurejurando se obligant privilegio ordinis superiores se indicant, ipsis tamen propter temporalia aliasve justas causas obnoxii, pro quibus et eis fidelitates tenentur jurejurando præstare: et archipræsulis quidem responsum hoc. Cum vero multum inclinatus esset jam dies, imo jam circa diei et noctis crepusculum, tota die rex vexatus, insalutatis pontificibus, in ira et indignatione multa, subito recedit ab aula. Pariter et pontifices tota die vexati recedunt et in hospitia se recipiunt. In recessu vero episcopus ille, quem supra diximus, ab archipræsule acriter est objurgatus, quod et se et coepiscopis inconsultis commune omnium verbum mutare præsumpisset.

19. DE MUNITIONIBUS QUAS REX AB ARCHIPRÆSULE REPETIT ET EPISCOPIS EUM DESERENTIBUS.

In crastino vero rex munitiones et honores quæ archipræsul a rege jam a tempore cancellariæ in custodia habuerat repetita recepit. Et nec salutans nec salutatus a pontificibus, imo et nescientibus ipsis, clam et antelucanus Londonia recedit. Et quidem hoc grandis iræ et indignationis argumentum existit. Nonnulli vero episcoporum videntes sic et exterriti, regem mox sunt secuti, regis etiam, sicut præter archipræsulis sui conviventiam et conscientiam cum quo, ut supradiximus, prius steterant, in omnibus voluntati parentes, si id bene, habent modo ipsi quotquot mortui judicem suum Deum

viventem : videat ipse et iudicet. Nec enim mensuræ mez nec mez congruit parvitati de tantis nostri officii viris sinistri quidpiam dicere : unum sc'o grave esse in falsis fratribus periculum ; quod quidem ab initio coepit et usque ad sæculi finem non desinet. Cætera quippe pericula quiescere possunt, sed hoc minime. Quod inter præsentis vitæ tentationes et agones, illos, qui secundum propositum vocati sunt sancti, exercet Jugiter. Quod enim fornax auro, quod flagellum grano, quod lima ferro, hoc falsus frater est iusto, quo velut eraditur donec ad veritatis acumen perveniat. Juxta quod doctorum unus Abel, inquit, esse non valet quem Cain malitia non exercet.

Quomodo episcopi archipræsulem deseruerint.

Reliquis itaque tanquam paleam a grano eventulatis et excussis soli remansimus, soli sedimus, paucis de episcopis jam nobiscum, aliis subtrahentibus se a nobis in dies. Et hi tamen pauci qui nobiscum propter metum occulti. Per dies itaque quam plures soli sic sedimus, regis tamen gratiam sperantes in dies et præstolantes, donec per vacationem regis indignationis deferbuisset incendium, et ira sedata causam indignationis suæ rex industrius et clemens adverteret et rediret ad se. Interim vero multi et magni videntes sic et condolentes, crebro inter nos et regem commeantes multimodis archipræsulem ad regis gratiam exhortantur, nunc familiaritatem pristinam, nunc impensos honores, nunc collata beneficia, hinc quantum pacis bonum, inde vero quantum dissensionis malum proponentes; adicientes etiam quanta foret insipientia unius verbuli contentiosi occasione bonorum tantorum ingratitude incurrere notam, tam diligentis et tam dilecti tantam perdere gratiam, et tot et tantorum malorum radicem fovere dissensionem, et hoc totum unius verbuli regem scandalizantis contentione. Hoc enim solum agebatur tunc ut verbum illud, scilicet salvo ordine, quod, ut supra diximus, regem offenderat, aut supprimeret archipræsul in regiarum consuetudinum obligatione, quam sibi fieri petebat rex, aut mutaret. Et præ cæteris suadebat quibus sciebat modis et impellebat archipræsulem ad verbi hujus immutationem episcopus ille, quem supradiximus, inconsulto archipræsule et coepiscopis, auctoritate propria hoc mutasse, vir certe multum pectoris habens et sermone potens. Siudent igitur hi, suadent illi, sed super omnia quam archipræsul ad regem habebat urget charitas. Charitas enim vera, sicut magister docet, omnia credit, omnia sperat, omnia sustinet; unde et persuasus tandem archipræsul, sed super omnia charitate urgente, apud nobile illud et regium castrum quod dicitur Oxeneford, ad regem accessit et verbum quod regi scandalo erat se mutaturum promisit; unde et rex jam aliquantisper sedatus, archipræsuli vultum exhibet sereniorum, necdum tamen ut solito. Dicebat autem rex obligationem de regis consuetudinibus observandis velle sibi fieri in forma hac in episco-

porum et procerum regni conspectu et audientia publica. Accesserunt et quidam archipræsulis ex multo tempore æmuli, sapientes ut facerent mala. Et hi suaserunt clam regi ut mox facta obligatione regiarum consuetudinum faceret expressionem. Unde et persuasus rex adiciebat pariter se velle ut per regni magnates et antiquiores qui noverunt, regis consuetudines recenserentur, ne de cætero, ut aiebat, fieret aliquid inter regnum et sacerdotium schisma, clero quæ regis sunt usurpante, aut rege quæ cleri sunt. Et qui tunc aderant præsules et proceres hominum hoc testabantur. Et videbatur quidem verbum hoc superficie tenus bonum, quod tamen in veritate pessimum erat, et inter regem et archipræsulem perpetui schismatis fomes. Quod apprimè noverunt sapientes illi ad faciendâ mala, dantes pro melle fel, pro consilio virus.

De sapientibus ut mala faciant.

Talia enim solent esse consilia talium qui juxta prophetam sapientes sunt ut mala faciant, quia juxta eundem aureus calix Babylon ut qui videt aurum non timeat venenum, quod etiam dari non solet nisi melle circumlitum. Isti igitur ut mala facerent sapientes in ore quidem mel, sed vere ut scorpionum fratres gestabant in corde fel, et in cauda aculeum ut sagittent in oculis immaculatum. Quod manifestius in fine rerum declarabit eventus. Et vera isti propinantes pro melle fel, pro dulcedine pacis amaritudinem dissensionis; habent enim regna universa, ut universi norunt, consuetudines bonas quas Ecclesia approbat, habent et alias malas quas Ecclesia tolerat; quibus etsi forte expressis compellatur ut auctoritatem præbeat et assensum non cedit, tolerat tamen. Nam juxta legisperiti dictum: « Expressa nocent. » Et ut Sapiens ait: *Qui vehementer emungit sanguinem elicit (Prov. xxx),* verum ut bonis consuetudinibus et aliis expressis indistincte ab Ecclesia præstaretur auctoritas, molebantur viperei consiliarii hi, quod si non, perpetuum fieret inter regnum et sacerdotium schisma.

O invidiæ temeritas semper summa feriens! O Satanæ calliditas semper sancta persequens! Revera invidia Satanæ advocata alumna schismatis, mater contentionis, et detractionis inextinguibilis fomes, mœsta in prosperis, congratulans pro adversis, quam pax turbat, sedat turbatio, amœnat tristitia, depressio elevat, jucundat dolor et aliena semper infelicitas pascit. Hæc nunc Satanæ calliditate adjuncta sub adumbrata pacis specie inter regnum et sacerdotium pessima perpetui schismatis zizania seminare jam inchoat.

20. DE VOCATIONE ARCHIPRÆSULIS APUD CLARENDUNE.

Verum rex regni et sacerdotii pacem ut videbatur zelans, sed et sibi et archipræsuli suo minus in hoc prævidens, nec ullum deprehendens in hoc malitiæ fucum, mox apud quamdam nobilem et præclaram regis propriam mansionem, quæ ex re nomen habet Clarendune regnum convocat universum, præsules regni et proceres. Et infra dies paucos conveniunt

universi, ubi in omnium conspectu et primus ante omnes archipræsul in præacta forma se obligat, quod videlicet regias consuetudines foret observaturus bona fide, verbo illo suppresso, scilicet salvo ordine; et quasi juratoriam adjiciens cautionem hoc se facturum in verbo veritatis confirmavit. Et id ipsum et in eadem forma sigillatim universi pontifices. Cum vero multorum et magnorum suasionibus et consiliis, quidquid prius apud præfatum illud castellum, videlicet Oxeneford spopondisset, vix inductus fuisset ad obligationem hanc, hæc tamen ut induceretur potissima causa fuit, charitas videlicet fraterna et compatiens, quibusdam enim fratrum suorum coepiscoporum fraterne compatiabatur, illis metuens magis quam sibi, gloriosæ videlicet memoriæ generoso viro Henrico tunc Winioniensi et Jocelino tunc Salesburiensi episcopis: quibus nisi fieret sic, tum ex antiquo odio, tum quia in præsentem propter ecclesiæ negotium habebantur suspecti, aut captio aut quod deterius imminere videbatur. Et quidem archipræsulis et pontificum ad regias et ut nominabantur avitas consuetudines observandas in genere obligatio talis. Et incontinenti facta obligatione in forma hac, per quosdam regni proceres, qui has nosse debuerant, facta est regiarum consuetudinum recognitio, et sicut publice ita et expressim recensentur. Verum cum pleræque jam fuissent expressæ et multo plures ut videbatur forent exprimentæ adhuc, archipræsul interlocutus est se nec esse de antiquioribus regni, ut pristinas regum consuetudines sciret, nec in archipræsulatu diu fuisse, unde et dicebat se nescire de his; et præterea, quia inclinata esset jam dies, tantum negotium differendum in crastinum. Placuit sermo et in sua se receperunt hospitia, in crastino revertentes in id ipsum. Et quæ pridie intermissæ fuerant consuetudines regis recognitæ sunt et expressæ et in scriptum chirographi modo confectum relictæ, et regiarum consuetudinum nomine censitæ. Quarum tamen multæ, ut perhibebant multi, nequaquam regis, sed, ut jam dicere cœpimus, odio archipræsulis ad ancillandam Ecclesiam evomitum emulationis et invidiæ virus; ipso etiam rege ignorante quod inimici homines sic inter ipsum et archipræsulem suum hac astutia dissensionis zizania seminare intenderent. Nec enim rex, qui adhuc juvenis, sicut nec archipræsul suus novus, pristinas regni consuetudines nisi ex aliorum relatu cognoscebat.

De consuetudinibus exactis.

Et ut illarum consuetudinum seu libertatum vel dignitatum, quas regias vocabant et quæ tunc proposuit nobis, interseramus ut aliquas, prima, ut, decreti funesti chirographi propriis utar verbis, fuit hæc:

« I. De advocacione et præsentatione Ecclesiarum si controversia emerit inter laicos, vel inter laicos et clericos, vel inter clericos, in curia domini regis tractetur et terminetur. » Sic mox in primis respon-

dit archipræsul evidentissime clericos ad secularia judicia pertrahi, et ecclesiasticam jurisdictionem in seculari converti. Advocatio quippe ecclesiarum juri spirituali, quo is qui vulgo Ecclesiæ persona dicitur curam spirituales et regimen animarum adipiscitur, accedit et innititur, unde cujus est de jure principali cognoscere, et de accessorio, cum unum de altero pendeat et sibi invicem innexa sint et adnexa. Alioquin si istud quod perniciose quorundam adinventione jus advocacionis nominatur, merum sæculare jus et hæreditarium est: vendatur, ematur, et etiam aliarum instar sæcularium in monomachiam deducatur. Dupliciter igitur arguebat archipræsul funestum adinventum hoc, tum quia clericos trahabant ante judicem non suum, tum quia id unum controversia non de cognitione sæcularis, sed potius judicis ecclesiastici est.

Huic vero funesto aliud, non tamen continuo sed tertium in chirographo, decretum subjungebatur profanum, cujus sunt hæc verba et talis sanctio:

« Clerici retati vel accusati de quacunque re, submoniti a justitia regis venient in curiam ipsius sponsari ibidem de hoc, unde videbitur curiæ regis quod sit ibi respondendum et in curia ecclesiastica unde videbitur quod ibi sit respondendum: ita quod justitia regis mittet in curiam sanctæ Ecclesiæ ad videndum qua ratione res ibi tractabitur. Etsi clericus convictus vel confessus fuerit, non debet de cætero eum Ecclesia tueri. » Hac, ut nominabant, consuetudine sic in scriptum redacta, advertit mox archipræsul et certius magis intellexit quam et priori propinari sibi serpentinæ æmulationis virus; et mox testatus est totius funesti chirographi ipsa verba sicut insipidiæ elegantiz, sic plena malitiæ et plane libertatis cleri subversionem, adjiciens: « Ecce, inquit, quia juxta funestum canonem hunc clerici tam in criminali quam in civili causa ad sæculare judicium pertrahuntur. Et de novo judicatur Christus ante Pilatum præsidem. Et quod adhuc penalis servitutis accedit cumulo, contra Domini in propheta mandatum clerici his judicabuntur in id ipsum et duplex eorum consurget tribulatio. Quod si sic omnium sceleratorum excedet adhuc deterior clericorum conditio. » Huic vero subsequens erat funesti chirographi decretum alter:

« Archiepiscopis, episcopis et personis regni non licet exire de regno absque licentia domini regis. Et si exierint, si regi placuerit assecrurabunt quod nec in eundo nec in moram faciendo, quærent malum vel damnum regi vel regno. »

Archipræsul vero objecit huic quod hujus promissiones edicto cessarent ad loca sancta peregrinationis et vota et etiam evacuetur obedientia, et quod maxime personis regni regnum præclarum carcer fieret, et sic deterior personarum regni conditio quam privatorum. Quid enim si aliqua personarum peregre proficisci se voverit, aliave sorte justa causa et honesta traxerit ad transmarina? Quid si forte, sicuti interdum solet inter viros apostolicos et

Anglorum reges simultas aborta, ad concilium A aliasve Ecclesie necessitates expediendas vocat hic, inhibet ille. Nonne oportet obedire magis huic quam illi? Christi vicario quam regi terreno? Oportet quidem: quanto magis Deo quam homini. Verum personis ecclesiasticis regibus obligatis sic et votum et obediencia secundum obligationis hujus formam de regum penderet arbitrio; unde ut archipræsul interloquendo subiecit: «Decens quidem est et congruit sic ut quævis personarum regni, si ob causam exire regnum disposuerit, a rege prius licentia recedat; sed juratoria cautione se obligare ad hoc, ne absque licentia exeat, sicut irreligiosum et indecens.»

His vero consequens erat adhuc chirographi decretum septimum:

«Nullus qui de rege teneat in capite, vel aliquis domesticorum ministrorum ejus excommunicetur, nec terræ alicujus eorum sub interdicto ponantur, nisi prius rex, si in terra fuerit, conveniatur, vel justitia ejus, si extra regnum fuerit, ut rectum de ipso faciat. Et ita ut quod pertinebit ad curiam regiam ibidem terminetur et de eo quod spectabit ad curiam ecclesiasticam ad eandem mittatur ut ubi tractetur.»

Hoc chirographi decreto perhibebat archipræsul plane exauctorari Ecclesiam, et sacerdotes in præsentia Domini Sabaoth, velut selecti quidam aliorum duces et principes, militiæ suæ privari cingulo, qui a summo omnium principe et qui omnium principum aufert spiritum, acceperunt gladium et liberam habent ligandi et solvendi potestatem super reges ipsos et principes. Juxta quod rex ipse et propheta: *Ad alligandos, inquit, reges eorum in compedibus et nobiles eorum in manicis ferreis (Psalm. cxlix).* Exauctorarentur, inquam, Christianæ militiæ duces sacerdotes sic, quorum est discernere inter sanctum et profanum, inter pollutum et mundum, et ad quorum qui leprosus fuerit separatur arbitrium.

Huic vero mox subsequens chirographi decretum octavum:

«De appellationibus, si emergerint, ab archidiacono debent procedere ad episcopum, et ab ipso ad archiepiscopum. Et si archiepiscopus defecerit in justitia exhibenda, postremo ad regem est perveniendum ut præcepto ipsius in curia archiepiscopi controversia terminetur, ita quod non debet alterius procedere absque assensu regis.»

Huic in prima facie cervice erecta archipræsul se opposuit proclamans, huic promulgato sic, ipsos archipræsules, si consenserint, manifeste perjurii reos, qui in susceptione pallii inter cætera de appellationibus deferendis Romano pontifici expressum juraverunt: addiciens etiam dire et funeste tolli hic omnium refugium oppressorum, quibus tanquam ad matrem omnium Romanam Ecclesiam libere recurrere prohibetur.

Post hoc inter pleraque alia supponitur chirographi decretum duodecimum:

«Cum vacaverit archiepiscopatus, vel episcopatus, vel abbatia, vel prioratus de dominio regis, debet esse in manu ejus, et inde percipiet omnes redditus et exitus sicut dominicos.»

Huic mox respondit archipræsul breviter, res pauperum fisco minime applicandas, et hoc forte, sicut contra clementiam et magnificentiam regiam, quæ etiam tanquam alienæ divitiæ nequaquam sunt redemptio animæ principis, quod, etsi illorum qui præcesserunt nos temporibus aliquando sic, minime tamen tanquam sacrilegium hereditarium hoc trahendum ad consequentiam. Sed Ecclesie semper clamandum, semper obviandum, et quatenus potest resistendum; et si sustineatur quod corrigi non potest, tamen consentiendum nunquam.

Sequitur vero in eodem irregulari canone: «Et cum ventum fuerit ad consulendum Ecclesie, debet dominus rex mandare potiores personas Ecclesie, et in capella regis fiet electio.» Et quidem archipræsul, tanquam validus canonicæ electionis patronus, præhabito cum eruditis suis consilio, sicut in aliis et in hoc, mox respondit, sicut canonem novum et novam ex ipso electionis formam introductam, apostolicarum sanctionum priscis jam et usitatis institutis sicut penitus diversam et adversam; nec licere sibi absque viri apostolici, seu potius totius universalis Ecclesie auctoritate, novitati tam singulari et singularitati tam novæ, præsertim super tantis personis ecclesiasticis constituendis in insulana credita sibi Ecclesia, novam auctoritatem præstare, vel assensum, etiam etsi Ecclesie plurimum expediret sic. Hoc enim esset jam velut particulare quoddam schisma in Ecclesia facere ex suo sensu et suo spiritu, a generalibus aut jam usitatis sanctorum Patrum sanctionibus sic recedere: addens quod hæc electionis forma nova in Anglia, velut quædam in corde maris scintilla, mox per universum Ecclesiarum orbem incendium grande de facili ex se posset producere. Nam si ad votum suum et natum hanc electionis formam adinvenit in regno suo rex Anglorum, quidni similiter facturi in regnis suis audientes hoc et reges cæteri? Addens etiam quod novus canon hic plane canonicæ electionis libertati et honori plurimum derogaret: cum nisi urgentissima ratio interveniat, eo in loco eligendus sit antistes, ad quem consecrandus est, non quidem in præsentia principis, etsi de principali conniventia et assensu. Quis enim principis præsentiam non paveat? Quis non exhorrescat? Quis nominabit libere, nisi quem desideraverit ac quem postulaverit princeps? Quod sancti Patres religiose et sapienter providentes statuerunt, ut nec in curia nec in aula seu camera, nec etiam in principum capella seu oratorio pontificum aut fieret aut confirmaretur electio.

Adjiciebat etiam decere minime ut ecclesiastici principes, personæ tam celebres, tam magnificæ,

quibus tot populorum regimen, tot animarum cura, et tot Ecclesiarum sollicitudo credita est, in talibus et talium præsertim locis quæ quorumlibet laicorum seu etiam regum deputata sunt obsequiis aut eligantur aut confirmantur electi. Et objectis sibi mox respondit, quia etsi in hoc Anglorum regno ab aliquorum regum retro temporibus sit factum sic, magis hoc tyrannice usurpatum quam constitutum legitime. Adjecit tandem de variis electionum figuris, de quibus per utriusque Testamenti paginam ecclesiasticæ nos historiæ edocent, ex quibus in Ecclesia primitiva Catholicos sæculi principes ecclesiasticis electionibus et negotiis nonnunquam interfuisse manifestum, verum secundum profectum fidei et varias circa Ecclesiarum rerum vicissitudines varia sanctorum Patrum super electionum figuris dispensatio invenitur. In quibus aliter statutum reperitur inter Ecclesiæ nascentis primordia, aliter verò nunc, quando juxta prophetæ vaticinium posita est in superbiam sæculorum; unde et ab hac electionis forma, quam nunc universalis Ecclesia suscepit, approbat et observat, absque Ecclesiæ auctoritate recedere tutum minime. Et quidem archipræsuli responsum ad hæc sic :

Ex istis itaque constitutis funestis, quæ jam expressimus, odio archipræsulis ad ecclesiasticæ libertatis oppressionem ab Ecclesiæ inimicis fabricatis, sic quisque mox videre potest quam manifesta, quam jura archipræsulis nostri primo exilii et deum martyrii causa fuerit. Quod alicujus martyrum causa justior fuerit aut apertior, ego nec adivi, nec legi : qui potest doceat, cum tamen et de illis pleraque alia restent adhuc funesto illi decreti chirographo inserta formæ et sanctionis consimilia.

Verum non est meum, non est meæ mensura, non parvitas meæ, ad regias seu ecclesiasticas consuetudines dignitatesve aut libertates se extendere. Nihil parvitas meæ et dignitatibus illis; nec meæ mensuræ est vel scientiæ probare illas vel improbare : ipsorum potius regum et pontificum consideratio hæc. Solum quod audiivi, quod vidi, hic testor. Unum scio quia hæc quæ jam expressimus et alia nonnulla similia his, numero, ni fallor, quasi decreta capitulatum distincta sexdecim, præfato inserta chirographo, plena jam erant inter regem et archipræsule dissensionis materia. Et hoc decreti chirographum, ab ipso originali mutatum, favente Domino, in historici hujus voluminis fine integre postponemus ut cunctis martyris hujus historiæ lectoribus liquido pateat, etiam præter ea quæ jam posita, quam clara, quam aperta, quam perspicua primo exilii et postea martyrii fuerit archipræsulis causa. Domino quidem omnium iudice mirabiliter quidem, sed æquissime disponente, ut ejus fuerant odio introductæ et quibus senet ipsum accusans videbatur quodammodo consensisse, per eundem ipsum postea in proprio ipsius cruore sint abolitæ, defensæ sic hoc, quod adversum

A nos erat decreti per chirographum quod erat contrarium nobis, palam etiam triumphans principatus et potestates in semetipso. Nam ut de aliis nunc præteream, ipsius regis advertentis se et corde toto et corpore ad archipræsulem suum in fine reversi, huic de quo nunc agitur præsentî decreti chirographo renuntiavit, renuit et vim ejus omnem et auctoritatem expolit : quod plane liber, quem Melorum inscripsi, quem historiæ huic subjunxi, edocet. Quod si mihi objeceris multa de iniquis statutis illis per regnum observari adhuc, breviter respondeo et certissime regem ipsis, ut diximus, renuntiassæ et Christi sponsam Ecclesiam in sanguine martyris Christi triumphali evicisse.

Si rex pœnitens et renuntians perseveraverit, Deus novit, Deus velit, rex ipse viderit. Et si, ut mihi objicis, funesti illius chirographi consuetudines aliquæ vim habent, et tanquam de stirpe noxia de nocuis amputatis nonnulla quasi spuria vitulamina male excrescant, adhuc sperandum quod ad archipræsulum martyris successorum instantiam, per regum elementiam, cum crebro et devote martyris et martyrii causæ extiterint memores, imperfectum supplebitur, et plene a facie Ecclesiæ computrescet servitutis ecclesiasticæ jugum. Aut si non habebunt, Altissimo disponente, sic martyris successores archipræsules his diebus carnis suæ exercendæ probandæque virtutis materiam, — sed quasi præoccupantes, necdum est de his quæ nunc hic tangimus locus, revertamur ad hoc quod in præsentî agitur, jam propositam plenam et, ni fallor, solum ex his quæ præterigimus, præter alia quæ hic præterimus, totius Ecclesiæ judicio justissimam dissensionis causam et materiam. Quam totius Ecclesiæ primas vir apostolicus sua quæ omni præest auctoritate justificavit confirmans, sicut sequentia declarabunt. Revertamur, inquam, ad plenam jam dissensionis causam. Jam enim plana, jam ampla dissensionis materia, post modicum exilii, et postmodum martyrii causa.

O æmulum inveterata iniquitas ! o legum profana novitas, ad malum nimis efficaces ! Quæ tantum regem et tantum pontificem tam necessario, tam commendabili charitatis conjunctos vinculo, tam irreparabiliter disjunxerunt ; vae illis prophetico et æternum, qui leges has novas condiderunt ! Ipsius profecto diabolice æmulationis adinventiones hæc. O æmulatio quæ in vilis et contemptibilis vitæ hominibus tugurium habens, regum solia et doctorum cathedras peti ! Vere quidem dictum et vere nimis verum, quod

Summa petat livor, perflect altissima venti.

Cui et illud consonat Sapientis : *Stellio manibus nititur et moratur in adibus regum* (Prov. xxx). O quam dira, quam dura et quam inhumana æmulatio hæc, tam dulcia, tam clara et mundo tam clara, tantæ dilectionis, dulcedinis tantæ dissolvens fœdera ! quæ charitati ex directo opposita, ut jam supra nos dixisse meminimus, et dolor iterare nunc

urget, semper de pace turbatur, de concordia dissi-
det, de incolunitate tabescit, de felicitate torque-
tur, de successu tristiis, de dolore hilaris, cum gau-
dentibus flens, et cum flentibus gaudens. Sed apertis
his pacis inimicis, operariis Satanæ, revertamur et
exsequamur proposita.

Scripto vero expressas, ut jam diximus, consue-
tudines continente ad chirographi formam confecto
et propalato, postulat rex ab archipræsule et coepi-
scopis, ut ad cautionem majorem et firmitatem si-
gilla sua appendentes apponant: verum archipræsul,
etsi vehementer motus et contristatus, dissimulat
tamen, regem exacerbare tunc volens. Et caute
quidem non de plano negat, sed differendum di-
cebat adhuc. Etsi paratos ad faciendum, adjiciebat
tamen propter negotii magnitudinem decere dilatio-
nem vel modicam, cum juxta Sapientem absque con-
silio nihil faciendum sit grave, et exinde post deli-
berationem aliquantulam, ipsum et episcopos alios
super hoc decentius requirendos. Scriptum tamen
dictas consuetudines continens recipit, præmedi-
tate quidem et provide ut causam videlicet suam
secum scriptam haberet. Alteram vero scripti par-
tem suscepit Eboracensis archiepiscopus: rex vero
ipse tertiam, in regum archivis reponendam. Et sic
a curia recessimus, versus civitatem Wintoniam
proficiscentes.

21. DE ARCHIPRÆSULIS MŒSTITIA ET PLANCTU.

Verum archipræsul in via supra modum contur-
batus videbatur et contristatus, contra solitum ne-
minem suorum alloquens in via, nec ipsum aliquis;
neminem vocavit, nullus accessit, sed solus et seor-
sum equitabat per viam, solus in via meditans.
Deprehendimus mox id nos, itineris comites, confe-
rentes et condolentes, et jam aliquantulum suspi-
cantes quid hoc. Tandem vero discipulus, qui scri-
psit hæc, præsumpsit accedere: « Domine, inquit,
contra solitum quare vultus tuus sic concidit? Nec
enim eam ostendis faciem, quam heri et nudius-
tertius, nec in via, ut solito, cum illis aut consilium
habes aut collationem? » Cui archipræsul: « Nec
ultram, inquit, [videre enim jam mihi videor, quod
per me, peccatis meis exigentibus, debeat ancillari
Anglicana Ecclesia, quam mei prædecessores inter
tot et tanta, quæ mundus novit, pericula rezerunt
tam prudenter: pro qua et inter hostes ejus militarunt
tam fortiter, et triumphaverunt tam potenter: et quæ
apte me exstitit domina, nunc per me miserum vide-
tur ancillanda: qui utinam consumptus essem, ne
oculus me videret: et Ecclesia quidem merito passura
hæc est per me, et meo tempore, qui non, sicut præ-
decessores mei, de Ecclesia, sed de aula assumptus
sum ad hoc officium. Non de clauistro, nec de loco
religionis aliquo, nec de schola Salvatoris, sed potius
de satellitio Cæsaris, superbus et vanus, de pastore
ovium factus sum pastor ovium; dudum fautor hi-
strionum, et canum sectator, tot animarum pastor.
posuerunt enim me nescio qui custodem in vineis, qui
meam propriam non custodiri, sed neglexi; longe

A certe a salute Ecclesie anteacta vita mea: et nunc
hæc opera mea: unde et plane video me jam a Deo
derelictum, et a sede sancta, in qua locatus sum,
jam abjici dignum. » Dum igitur dolor eum sic ur-
geret, exitus aquarum deduxerunt oculi ejus, ita
ut inter continuas lacrymas singultibus crebro erum-
pentibus, compelleretur magis rumpere sermonem,
quam finire.] (Hæc ex Quadril. Hiatus un.
fol.) novissimo in novissimo in die ab auditione
mala non timebit. Et compatiens discipulus sic, la-
crymis prout poterat repressis et singultibus, ita
magistrum est adorsus: « Domine, inquit, scri-
ptum est quod diligentibus Deum omnia cooperantur
in bonum his qui secundum propositum vocati sunt
sancti: adeo etiam quod si indistoria et anfractuosa
via et vita hæc deviant et exorbitant et currant in
invio et non in via, hoc ipsum invium ipsis sit tan-
quam quoddam compendium ad salutis viam, ad
veram patriam, eo ipso quod sic deviant, duce suo,
rectore suo Deo ipsos mirabiliter dirigente; unde
et mirabilis Deus in sanctis suis deducens eos in via
mirabili, adeo mirabili ut ipsum invium via fiat eis
ad salutem, via ad patriam. Confide igitur, domine
mi, quia si cecidisti, Domino manum supponente,
resurges fortior: si alio impellente corruisti, resur-
ges cautior: si vero motu proprio resurges humilior.
Ita et apostolorum princeps, pastorum forma, Pe-
trus præsumens se prius moriturum quam negaret
magistrum, primo ad ancillæ vocem negavit, et
postea ductus ante reges et præsides non cessit
deinceps, ex præsumptione factus doctior et humi-
lior, ex apostasia fidelior, ex negatione constantior.
Sic novit Omnipotens sapientiæ spiritus ex malis
elicere bona, tanquam si ex arida violam, ex rosa
spinam, mel de petra, oleumque de saxo durissimo.
Ad hoc igitur deinceps summo elaborandum studio,
ut quemadmodum in apostolorum principe et pasto-
rum forma, fiat similiter et in te. Si verbo offen-
disti ut Petrus, Petri instar opere ne offendas. Regias
quidem bonas consuetudines observare bonum et
justum. Si quæ vero aliæ, ut dicis, novæ tui od o
in Ecclesiæ detrimentum ab æmulis adinventæ, satis
notum quid agendum de his: quas profecto, sicut
credibile, nec rex exigere si novas fore adverteret
et inductas ab æmulis: profana enim legum novi-
tates evitandæ, quorum adinventoribus propheta,
imo Dominus ipse per prophetam suum væ inten-
tat, Væ, inquit, qui condunt leges novas (Isa. x)
Quas profecto novas et malas Christianorum regum
elementia ad Christi honorem non solet inducere,
vel inductas exigere, sed potius abolere. Sic enim
crevit Ecclesiæ libertas, sic decus cleri. Sed ut jam
de alio, de quo tam lacrymabiliter planxisti, adne-
ctam, de vita anteacta dico, unum pro certo scias
quam, sicut te ipsum accusas, officio huic in quo
nunc es, vita anteacta non consonat. Nihil deliciis
et divitiis illis Augusti et sarcinæ huic pastoralis;
unde et, ni fallor, ostendet tibi Deus quanta pro
ipso oporteat te pati, qui non de ecclesia, sed de

aula assumptus, ad sedem hanc gradum-hunc tamen ascendere præsumpsisti. Igitur quod solum superest, si, ut dicis, cecidisti turpiter, fortiter resurge et decenter, et exerce te, si filius excussor es, imo quia es, et viriliter age et confortetur cor tuum, ne tristitia te absorbeat, sed potius iustitia erigat, viriliter, inquam, age et confortare, et esto deinceps catus, fortis et robustus. Et scias pro certo quia Dominus erit tecum, adiutor fortis, sicut legitur fuisse cum David rege et propheta, prius tamen adultero et proditore, et cum eo, quem jam diximus, apostolorum principe, prius apostante, et cum sancta illa et apostolica peccatrice, et demum cum egregio illo gentium doctore, prius et supra omnes Ecclesiæ persecutores: fuisti quidem et tu, ut videbatur tunc et dicebatur sic; aliquando Saulus. Quod si nunc Paulus esse desideras, squamis oculorum tuorum abstersis palam ipso opere ostendet tibi Jesus tuus, quanta te oporteat pati pro nomine ejus.

His dictis, tantæ quam supra descripsimus mœstitiæ aliquantulum consolationis videbatur infusum. Magis etenim quam ad verborum virtutem, respexit ad exhortantis dilectionem et fidem. Et ecce episcopus ille, cujus suasionem et impulsu supra diximus verbum illud suppressum, scilicet salvo ordine, subito nuntiatur nos sequi. Et archipræsul convertens sermonem ad discipulum qui proxime locutus adhuc cum eo fuerat: « Sequatur, inquit, et vadat retro me Satanas. »

Quomodo archipræsul a viro apostolico sit absolutus.

Post paucos vero dies eo quod ex gestis cauteriatam gereret conscientiam, archipræsul cum multa festinatione ad Romanum mittit pontificem utpote cujus est sanare contritos corde et alligare contritiones eorum. Igitur sicut absens per scripta poterat, vulnus detegit, medicinam querit, interim toto tempore videlicet circiter quadraginta dies ab altari se arcens, donec reverso nuntio a pontifice, super his quibus se accusabat per apostolicum scriptum absolutionis gratiam obtinisset, nuntio quidem in tam brevi reverso eo quod summus pontifex tunc in nobili et regia Galliarum civitate Senonis propter schisma moraretur. A quo et præter absolutionis beneficium multam per apostolica scripta consolationem accepit, quibus ut et pastorem sarcinam fortiter et alacriter sustineret, et strenue ad opera pastoralia se accingeret, paterno exhortabatur affectu. Verum et apostolicum ipse mandatum hoc tanquam hostiam cœlitus sibi missam in omni jucunditate suscepit, sicut et qui spiritu ferventissimus erat; in omni, inquam, jucunditate et alacritate, hinc per apostolicæ absolutionis gratiam, inde vero per apostolicam epistolam exhortatoriam, tanquam duo materni pectoris ubera, plene jam ipsius spritu recreato: verum, quia, ut diximus, dominus papa erat prope, et confessionis saluberrimus usus per apostolicæ absolutionis gratiam, videns etiam quia propter ea quæ supra diximus, in populo suo vix faceret fructum, in propria persona

A summum pontificem adire disposuit, unde et sua etiam ignorantibus præterquam duobus tribusve quos secum ducebat noctu clam transfretare attentavit. Nec enim si palam vellet, pateret egressus. Inter cæteras quippe præscriptas consuetudines fuit et hæc, quod nemo pontificum vel personarum regni absque licentia regis vel justitiarum ejus terram egrediretur; unde et archipræsul clam egredi attentavit, his quidem mare ingressus, sed quoties ingressus et repulsus, tanquam Deo per elementa sua ipsi in facto hoc resistente. Sicut enim omnia tempus habent, sic et tempus occurrendi et tempus fugiendi, fuge vero hujus necdum tempus. Quæ eisi clam destinata, citissime tamen divulgatum per terram quod archipræsul sic transfretare attentasset; unde et stupet populus, proceres admirantur, pontifices turbantur, rex plurimum motus est, eo maxime, ut credebatur, quod archipræsul tam cito et subito contra statuta sua agere præsumpsisset.

Archipræsul vero intelligens Deo minime placere quod attentavit, audiens etiam certissime et aciens regem exacerbatum ex hoc, et propterea mœstus, qui adeo regem diligebat quod eo exacerbato latus et hilaris esse nequisset, apud regiam illam mansionem quæ dicitur Wodestoeche acceleratim accessit ad regem. Rex vero venienti ad se archipræsuli honore, non tamen quem solebat, exhibito dissimulavit audita; quod tamen minime archipræsul et qui cum eo erant arbitrantur: dissimulavit, inquam, nisi quia velut jocando impropertavit archipræsuli quare terram suam deserere voluisset, tanquam si ipsos duos simul capere non posset; verum jam deprehendit archipræsul, qui regem ex multo tempore et familiaritate eximia noverat, cor regis elongatum ab eo, et qui in aula id ipsum jam prædicabant; unde et quantocius licentiatu a rege discedens et intelligens apprimè ab ipso cui mare et venti obediunt, egressum de terra inhibuit, cogitabat jam intra se, et secreto etiam suis expressit, deinceps aut cedendum turpiter aut certandum viriliter: verum et fultus apostolica auctoritate et exhortatione, sicut erat spiritus fervens, mox excussit se filius excussorum, cum prophetico sarculo evellens, destruens, dissipans et eradicans quidquid in horto Domini male plantatum reperisset. Non quiescebat manus, non parcebat oculus. Quidquid etiam prævum, quidquid asperum, quidquid distortum, non jam cum prophetico sarculo, sed in evangelica securi dejiciens; regias quidem et ecclesiasticas consuetudines bonas observans; alias vero in Ecclesiæ detrimentum et cleri dedecus introductas, tanquam spuria quædam vitulamina rescans, ne mitterent radices altas. Et tanquam de salebri nimis silva et veprosa, sic nitelatur pro viribus, quidquid asperum, incompotum, indecorum, obviumve foret, lotum de populo suo delere et exturbare, ut faceret prava in directa et aspera in vias planas.

Sed heu! grandis quidem opera, sed parva mora. Jam enim eo ipso suscitantur et adversarii a dextris

et a sinistris : ita ut prophetatum de capite huic illius capitis membro aptari possit, quod videlicet positus sit in ruinam et in resurrectionem multorum et in signum cui contradicetur. Currunt hinc quotidie ad regem rumigeruli, accusantes quod consuetudines regias, quas se observaturum juraverat, non observaret, inde vero pulsant queruli plangentes quod de nimio regie gratiæ favore confisus eos exheredasset. Sed super omnes æmulī aulici pungunt et instigant, improperrantes jam manifeste tot et tantorum bonorum ingratitudinem. Jam enim serpens ille tabidus, quem circa operis hujus initium diximus latenter per aulam et angulatum serpsisse, manifeste exerit caput. Et hæc certe, ut dicit Sapiens, lingua tertia, quæ multos commovit et dispersit de gente ad gentem. Tres igitur hi rumigeruli, queruli et æmulī aulici; primi ut sciniphes, secundi ut apes, tertii vero scorpiones; omnes hi jam virum depungentes et regem jugiter instigantes, ita ut vox illa de capite congruat et huic illius capitis membro : *Sicut apes, inquit, circumdederunt me, et exarsērunt sicut ignis in spinis (Psal. cxvii)*. Convenerunt igitur omnes hi archipræsulem pungentes et regem contra archipræsulem suum instigantes, nec igitur mirum, si ad instigationes has tanquam ad aculeos tot cor regis expungatur et in iræ et indignationis flammam ebulliat. Unde et ex his, quæ quotidie colliguntur, stipulis, rex magis ac magis accenditur, et ira, repressæ adhuc intus, exerescit in dies, quæ et tandem erumpit. *Si enim sufflaveris, inquit Sapiens, quasi ignis exardebit (Eccli. xxiv)*. Et in primis quidem ad dictorum querulorum instantiam archipræsul citatur ad causam, ut super quibusdam abbatibus sibi, ut dicebant prædiis ipsis veniat responsurus.

De citatione archipræsulis apud Norhamtunæ.

Verum quia ad citationem primam in propria persona se non exhibuit, misso tamen procuratore secundo citatur, et præter tempus locus etiam determinatur, nobile videlicet illud et regium castrum quod dicitur Norhamtune. Tempus, ni fallor, mensis October, hebdomadæ feria quinta, sexta ante beati Calixti papæ et martyris natalitium. Ad diem et locum hunc ex edito regio regni pontifices universi et proceres districtissime convocantur.

Sed quæ hætenus stetit in littore, nunc navis in altum trabenda. Nam, qui hucusque navigavimus in portu, in mare deinceps magnum et spatiosum velificare nos oportet, et inter Scyllæos canes et Charybdis, inter Syries et periculosas alias multas maris voragines navis nostra ducenda. O voragines maris! o pericula sæculi! Omnia excelsa tua et fluctus tui super nos transierunt. Dixit enim et stetit spiritus procelle et exaltati sunt fluctus ejus.

De opere primæ diei quo ad concilium venit.

Vocatus, ut diximus, ad causam, imo potius ad luctam, statuto tempore et loco supra determinato Domini palæstrita accessit. Et in primis quidem supra dicti queruli, sicut apes, christum Domini, pontificem Christi circumdederunt. Et acerrime qui-

dem in ipsum tanquam tot pungentes aculei, civiles questionēs intentantur. Et cognito hoc quod, sicut jam diximus, ad primam regis citationem in propria se persona non exhibuerit, etsi, ut e contra allegabat, responsalem sufficientem miserit, nihilominus tamen omnium et procerum et etiam pontificum judicio, ipsius mox bona omnia mobilia sunt confiscata, nisi forte regia clementia velle temperare judicium, quod est, sicut vulgo in terra dicitur, de omni mobili suo in regis misericordia judicatus est. Cum vero audisset se jam judicatum sic : « Qualis, inquit, sit sententia hæc, quale judicium hoc, cujusvis sive scripti sive consuetudinarii juris peritis omnibus patet : me contra hanc dicere quidquam non oportebit; me tacente, sæcula post futura non tacebunt. » Nova quippe judiciorum forma hæc, forte secundum novos canones proxime apud Clarendune promulgatos. Verum de judicio præteriens sic protestabatur hucusque inauditum a sæculo, Cantuarienses in curia regum Anglorum pro qualicunque causa judicatos, tum propter dignitatem Ecclesiæ, tum propter auctoritatem personæ. Eo videlicet quod Cantuariensis et regis et omnium qui in regno sunt, spiritalis sit omnium parens; unde et ob id et a regibus et a proceribus regni archipræsuli suo semper delatum. Verumtamen multo magis quam de judicio seu proceribus judicantibus, de confratribus suis suffraganeis coepiscopis querebatur, novam d'cens formam hanc et ordinem judiciorum novum, ut archipræsul a suis suffraganeis, pater a filiis, judicaret. Minus fore malum adjiciens verenda patris de re de deridere, quam patris ipsius personam judicare. Nam, ut aiebat, professionis et obedientiæ vinculum ita arctum est et adeo ligat, quin potius professos præposito suo, tanquam membra capiti, sic conjungit et unit, quod, etsi ratione temporalium regibus obnoxii sint, præpositos tamen suos pro temporalibus nec etiam civiliter judicare possunt aut debent, præsertim inhibiti. Cum obedientiæ virtus tanta sit, quod non solum temporalia deserere, sed et propter ipsam semetipsos super impendere teneantur. Supra omnes etiam causabatur pontifices quod talem sententiam tulerint. Quod tamen nequaquam vel nomen meretur sententiæ, sed meri potius odii conflatorium fuit. Unde et hæc ita gesta nullum libertatis præjudicium successoribus suis parere verebatur, nec post futuris temporibus ad consequentiam trabenda. Et quidem, ut asserebat secretius, pontifices suum sic archipræsulem judicantes, quin potius linguas in archipræsulem suum sic debacchantes suspensionis interdicto mox ligasset, nisi quia Christi athleta ad majorem se adhuc parabat conflictum. Et hæc sententia, sic lata in archipræsulem feria quinta, prima fuit concilii actio.

De opere secundæ diei.

Die vero sequenti rex ipse exigit ab archipræsule pecuniam quam, ut asserebat, cancellarius tunc a se acceperat mutuum, argenteorum videlicet libras quingentas. Quod audiens archipræsul, quasi in

stuporem mox versus, incivile inquit, regie præsertim magnificentiæ, donata repetere: « Nec inficior quidem tempore cancellariæ eam, quam nunc, ut audio, repetis, numeratam mihi pecuniam non mutuaui, sed donatam: et, si placeret, in officio illo qualem me obsequio vestro exhibuerim, magis nunc ad memoriam revocandum, quam ex indignatione adversum me, ut sentio, concepta, sic in me nunc, per inter nos gesta tunc, vindicandum. » Verum rex ad verba non respiciens iudicium postulat, et præfati illi parati ad iudicandum, tam pontifices nostri quam proceres, petitam pecuniam solvendam iudicant, eo quod archipræsul pecuniam illam, eisi donationis titulo quem tamen tunc probare non poterat, confessus est se recepisse. Adjudicata vero sibi pecunia exigit rex cautionem: sed respondit archipræsul ad hoc, se in regno habere quod pecunia adjudicata multo pluris esset, nec decere si esset de regis beneplacito ut aliam cautionem exhiberet, seu etiam ut rex exigeret. Sed objectum est quod de mobili nec etiam haberet tantum, eo quod die hesternæ universa bona mobilia sua per iudicium confiscata fuissent. Instatur ergo et cautio petitur, et ibidem acerrime dictum ei in faciem quod aut caveret aut remaneret: qui comminabatur corporis captionem sic innuens, verum nonnulli, rege ex directo jam adversante, videntes archipræsulem destitutum, qui nec etiam a suffraganeis suis suffragium, sed naufragium potius incipiebat jam pati, videntes, inquam, sic et commoti, sponte eorum aliqui se obtulerunt et fidejusserunt pro eo. Et erant fidejussores quinque singuli pro libris centum. Et hæc pecunia, sic exacta ab archipræsule feria sexta, secunda fuit concilii actio.

De opere tertiæ diei.

In crastino vero, Sabbati videlicet die, non nobis Sabbati dies illuxit, sed dies operis et afflictionis, utpote rege ipso, ut jam diximus, ex directo nobis se opponente. In hoc igitur Sabbati die rex ab archipræsule super omnibus quæ de regis mandato tempore cancellariæ in custodia habuerat, ratiocinia exigit, episcopatibus dico tunc vacantibus et abbatis, baronibus etiam et honoribus multis et magnis quorum omnium cancellarius tunc custodiam habuerat: horum omnium, ut dicebat rex, ratiociniis hucusque sicut nec exactis nec præstitis. Et reddendæ ratiocinationis summa taxata, videlicet circa triginta marearum millia. In palatio vero et alii qui ad concilium venerant universi jam audientes hoc obtupescent. Et jam sparsim submurmurant solam captionem archipræsuli superesse. Alii vero etiam graviora suspicabantur et hoc quidem jam passim. Archipræsul vero, qui, ut supra diximus, mare in castro hoc inchoavit descendere, et maris sæculi periculosas attentare voragines, subito et ex inopinato exacta ratiocinatione hac turbatus est, motus sicut ebrius et omnis sapientia ejus devorata est. De quolibet Psalmista: *Turbati, inquit, sunt, moti sicut ebrius et omnis sapientia eorum devorata*

A (*Psal. cvi*): verumtamen convocatis pontificibus post deliberationem multam quid respondendum agendumve ad hæc, sanctæ recordationis Henricus, tunc Wintoniensis episcopus, qui quidem archipræsuli favit, sed propter metum occultus, tandem recordatus est quod in electione archipræsulis tunc Cantuariensis archidiaconi et regis cancellarii, ab omnibus curiæ nexibus Anglicanæ Ecclesiæ redditus fuerit absolutus. Quod et nos supra dixisse meminimus cum de archipræsulis electione ageretur. Et quidem tam evidenti hujus testimonio reliqui episcopi deesse non poterant; unde et demum communiter universi episcopi coram rege et concilio verbo huic testimonium perhibebant, et ita circa vesperam Sabbati dimissi. Sed necdum tamen sic propter verbum hoc divissi sumus in pace; verumtamen ratiocinatio sic exacta ab archipræsule in Sabbato tertia fuit concilii actio.

B Crastino vero, Dominica videlicet die, propter diem quievimus, in secundam feriam quæ vulgo dies Lunæ dicitur citati et expectati ad agnomen. Verum archipræsul ea die, in ipsa etiam nocte dici, gravissime illa quæ iliaca dicitur percussus est passione. Sed rex et qui in aula, fictum hoc non veram infirmitatem arbitantes de majoribus regni proceribus, qui convenerant, ad archipræsulem, mittunt ut explorent quid hoc. Quibus archipræsul: « Hodie, inquit, sicut ipsi cernitis a Deo gravi præventus valetudine, ad curiam venire nequeo: sed pro certe sciatis favente Domino cras exhibiturum me curiæ, et nisi aliter datum in lectica vehendum. » Verum aliter desuper datum, et favente Domino, sicut athleta Christi optavit, accidit, nocte superveniente plene convaleuit.

De opere diei ultimi.

In crastino vero, tertia videlicet feria, quæ vulgo dies Martis dicitur, quæ et nobis vere dies Martis illuxit, curiam intravit non quidem ut clinicus in lectica vectus, sed velut turris in Jerusalem directo sita contra Damascum, vnum antequam intraret curiam, summo mane conveniunt ad eum pontifices attoniti quidem et exterriti. Si quidem jam sermo exiit passim quidem in palatio et sparsim in concilio, minime tamen palam adhuc, archipræsuli ea die solam imminere captionem aut quod deterius. Secreto etiam id ipsum per quosdam aulicorum archipræsulis auribus instillatum, qui ipsum ob beneficia et honores pridem sibi impensos diligebant adhuc: unde et pontifices, non aperte propter enormitatem, sed sub quadam insinuationis specie, artificiose suadebant ut archipræsul de omnibus, etiam de ipso archipræsulatu, regis se per omnia voluntati subiceret et arbitrio, si forte vel sic posset regis ira sedari et indignatio: adicientes etiam quod nisi fieret sic, jam audiret in curia perjurii sibi crimen imponi, et tanquam proditorem iudicandum, eo quod terreno domino honorem terrenum fidelitatis jramento comprehensum non servaret, regias videlicet ipsius consuetudines non observans; ad quas etiam

specialiter observandas nova jurisjurandi obligatione se astrinxerat : dicentibus his, contestantibus illis, parum prodesse regis indignationem habere et archipræsulem esse; hoc regni et sacerdotii magis turbationem esse quam pacem, grande detrimentum et fructum nullum : quin potius ipsum episcopatum verius patibulum esse quam episcopatum. Et quidem in consilio hoc pontifices convenerunt in unum adversus Dominum et adversus Christum ejus.

Ecce quia jam non solum præacti sciniphes, apes et scorpiones, sed et tauri pingues Christi athletam circumdederunt : ita ut vox illa de passione capitis huic jam patienti illius capitis membro coaptari possit : *Circumdederunt me*, inquit, *vituli multi; tauri pingues obsederunt me* (Paal. xxi). Tauri quidem pingues tales pontifices, vituli vero multi talium sequaces, quorum omnium unum fuit consilium, ut ex toto regis arbitrio se supponeret. Et quidem per quotidianas pulsationes has, per has singulorum dierum pressuras nitebantur ad hoc, ut genua videlicet curvaret et succumberet, et ut pressus, imo oppressus, sic quos pastoralis sarcinæ jam supposuerat humeros terrenæ potestati submitteret. Verum columna Ecclesiæ, sicut excisa et fortis, semel quidem, ut supra diximus, mota, sed nunc eo ipso immobiliior : in charitate radicata, et supra firmam petram fundata, in petra firmiter stans, hoste impellente firma, fortis a casu : unde et principalis columna hæc, quasi columna columnarum princeps, videlicet episcoporum ex insinuatibus fratrum suorum deprehendens jam votum et consilium, ipsos allocutus est sic :

Oratio archipræsulis ad episcopos.

« Fratres, inquit, sicut jam cernitis, fremit contra me mundus, insurgit inimicus : sed quod plango lacrymabilis, quia cæteris est detestabilis, filii matris meæ pugnant contra me. Etsi enim ego tacuero, sæcula post futura enarrabunt qualiter me solum in certamine deserueritis, qualiter me archipræsulem vestrum et patrem, quantuscunque sim peccator, per duos continuos dies bis jam judicaveritis, facti mihi clavi in oculo et lancea in latere, qui mecum adversus malignantes consurgere et simul stare debuissetis. Et adhuc conjicio ex his quæ dicitis, nos non solum in civili, sed et in criminali causa in foro sæculari judicare me paratos : verum communiter vobis omnibus in virtute obedientiæ, sub ordinis vestri periculo hoc inhihero, ne deinceps intersitis iudicio quo mea persona judicetur. Quod etiam ne faciatis, matrem nostram omnium refugium oppressorum Romanam Ecclesiam appello. Et si, ut rumor jam in vulgo est, fiat hoc et sæculares in me injecerint manus, vobis itidem in virtute obedientiæ præcipimus, ut pro patre vestro et archipræsule quam decet ecclesiasticam exerceatis censuram. Unum autem sciatis, quia fremat mundus, insurgat inimicus, tremat corpus, caro quippe infirma, ego tamen, favente Domino, nec turpiter

cedam, nec creditum mihi gregem enormiter derelinquam. »

His breviter dictis, ab illo archipræsulis præcepto, videlicet ut si in ipsum judicatum sæculares injicerent manus, ecclesiasticam exercere censuram episcopi non differrent, episcoporum unus confestim appellavit : Gilbertus Londoniensis episcopus hic erat. Et post hæc archipræsulis verba pontifices discesserunt, properantes ad curiam præterquam duo qui archipræsulis thalamum, ubi pontifices convenerant, tardius egredientes, secreto confortabant et animabant archipræsulem ; sanctæ videlicet memoriæ jam sæpeditus Henricus Wintoniensis episcopus, qui ut supra jam retulimus archipræsulem consecraverat, unde et amplius compatiebatur afflicto ; alter vero Jocelinus Salesberiensis episcopus ; et hi tamen propter metum occulti. Archipræsul vero quasi ad extremum jam in curia processurus agonem, ubi exspectabatur solus, quia eertabatur contra solum, parat se ad palæstram. Et post episcoporum discessum cito ecclesiam intrat et ad ejusmodi canonici sicut habitu et affectu regularis, missam ipsemet de beato protomartyre Stephano celebrat. Et erat missæ introitus : *Etenim sederunt principes et adversum me loquebantur*. Et hæc quidem missam eo die, quia festus non erat, cum pallio celebravit, nisi quia beati Calixti papæ et martyris natalitium fuit. (Ministeriales vero regis, qui ibi forte tunc aderant, id tacite considerabant, quibus visum est rem ipsam aliquid prætereendere.)

Quanta in missa hæc celebrantis erat devotio, quanta cordis punctio et totius hominis exterioris et interioris commotio ! Quot et quanta suspiria inter aquarum exitus quos oculi ejus deducebant. Ita ut inter orandum crebro compelleretur collectæ facere finem, ubi finis non erat, vix rediens et revertens in id quod cœperat. Missa vero tandem, sicut potuit, præ lacrymarum abundantia et singultuum crebris eructibus vix finita, eam statim quam in missa habuerat, deponit faciem, faciem videlicet humilitatis, faciem hominis assumens, faciem leonis, prophetici illis animalibus imo potius evangelicis a propheta descriptis simillimus : quibus inter cæteras erat facies hominis et facies leonis. Et quidem in mysticis illis et sacerdotalibus indumentis, pallio etiam insignitus, sicut ibidem tunc missam celebraverat, perrexisset ad curiam, nisi quidam Templares milites magni et religiosi viri, quos jam pridem familiares habuerat, obstitissent. Dicebat enim se velle ut curia videret et intelligeret quem jam bis judicasset, et quem prius adhuc condemnare ; attamen ad dictorum instantiam, sacrum quod diximus schema deposuit : verumtamen, eo quod multi et magni credebant jam et verebantur ipsi ea die aut captionem aut quid deterius imminere, quod et ipsimet a quibusdam aulicorum secretius instillatum, secum ipsemet, sed clam, ecclesiasticæ communionis portabat vitium, eucharistiam scilicet ; verum jam audacior

factus et securior, tanquam si ad prædam, leo noster evangelicus ad curiam properat. Ad quam jam pontifices et proceres convenerant, archipræsulis adventum et rei finem expectantes. Archipræsul vero, ut aulam ingreditur, a crucis bajulo ante ipsum crucem mox accipit, et palam in omnium conspectu crucem ipsemet bajulavit, tanquam in prælio Domini, signifer Domini, vexillum Domini erigens: illud etiam Domini non solum spiritualiter, sed et figuraliter implens: *Si quis, inquit, vult meus esse discipulus, abneget semetipsum, tollat crucem suam et sequatur me (Matth. xvi)*. Revera mysticum opus futuræ crucis suæ præsignum fuit. Videntes vero hoc stupent universi, anguntur pontifices, indignantur proceres. Rex autem, qui in cœnaculo seorsum, audiens sic quasi factus extra se; unus vero episcoporum qui archipræsuli aulam ingredienti confestim occurrit, videns hoc et velut stupidus effectus, attentavit mox a manibus archipræsulis avellere crucem, sed non valuit. Magister Robertus de Melundino, quem archipræsul in sacerdotem ordinaverat et in Herefordensem episcopum consecraverat, hic erat. Alter vero episcoporum, qui similiter occurrerat ex altera parte crucis, objurgans convitiabatur: « Si rex, » inquit, « suum exerit gladium, ut tu nunc tuum exeruisti, quæ poterit esse de cætero inter vos reformandæ spes pacis? verum qui semper fatuus, tua in te hodie apparebit fatuitas. » Ecce contumelia, ne videlicet discipulus jam in cruce in parte hac magistri in cruce pendens titulo defraudaretur. Jam supradictus Gilbertus Londoniensis episcopus hic erat. Sed discipulus in cruce sequens magistrum, qui cum malediceretur non remaledixit, contumeliam dissimulans, procedit crucem bajulans, donec ab aula in aliam domum interiorem ingrederetur et sedens inter pontifices crucem tenebat in manibus. O spectaculum cernere Thomam, olim quidem in aula tam multiplici præclararum peregrinarum vestium schemate, nunc vero in cilicio et in cruce! olim quidem quacunq; per aulam tot et tam spectabilius corona circumseptum, ad quem præterquam solis magnatis vix pateret accessus, nunc vero ita singularem et solum, ad quem vix quis velit accedere, omnibus se jam ab eo elongantibus, ita ut discipulo vox illa magistri aptari posset: *Elongasti a me amicum et proximum et notos meos a miseria (Psal. lxxxvii)*. Et illud prophete: *Sedebit solitarius et tacebit, quia levavit se supra se (Thren. iii)*: vere in spectaculo hoc Dei judicium etsi terribile jucundum tamen, cernere Thomam in aula crucis bajulum in qua tot deliciis et divitiis aliquando superaffluens omni specie vanitatis expomparavit; justo quidem Dei judicio solvere jam inchoans abjectionis pœnam, ubi tantæ adhuc in sæculo sumpserat elationis materiam. Et quidem verum illud Sapientis dictum: *Fili, inquit, accedens ad servitutem Dei sta in justitia et timore et præpara animam tuam ad temptationem (Eccli. ii)*. Mox autem convocatis præconis voce

PATROL. CXC.

A pontificibus et proceribus universis gravem et grandem rex deponit querimoniam, quod archipræsul in ignominiam ejus et regni sic intraverit curiam, non tanquam regis sed proditoris, se de proditiōe sic notabilem reddens: inauditum a sæculo in curia alicujus regis Christianæ professionis hoc factum. Quotquot vero regis verbo testimonium perhibentes dicebant illum vanum semper et superbum exstitisse, et ignominiam hanc non in solum regem, sed in regnum totum, in ipsos omnes redundare, et hoc nunc merito regi accidisse, qui talem fecerit secundum sibi in regno cui subessent omnes et par nullus. Omnes igitur passim et manifeste proditorem clamabant, quasi domino suo et regi, a quo tot et tanta acceperat, non jam honorem terrenum sicut juraverat servasset, sed potius in facto hoc et regi et regno perpetuam proditiōis maculam impressisset; et propterea in eum tanquam in regis perjurum et proditorem animadvertendum. Et super hoc clamor invalescebat, unde et audientes hæc per totam aulam tremore et horrore concutiebantur, adeo etiam, quod cum aliqui de cœnaculo, in quo rex cum suis erat, ad inferiorem domum in qua nos eramus descendissent, et archipræsul et nos quotquot in domo manus levantes crucis nos signaculo muniebamus. Archipræsulem vero alloquebatur vulgus, nec ipse aliquem præterquam discipulum qui scripsit hæc qui ad pedes tenentis crucem sedebat.

Cum vero semel aliqui aulicorum qui ut videbatur ostiariorum in aula habebant officium, cum virgis et baculis de sæpe jam dicto cœnaculo in magno impetu descendissent, et vultu minaci et digitis extensis versus archipræsulem et discipulum ad pedes sedentem respexissent, quotquot in domo erant crucis signaculo se signantibus, archipræsul inclinato capite sedenti ad pedes discipulo: « Timeo, » inquit, « jam tibi; verumtamen tu non timeas; adhuc enim coronæ meæ particeps eris. » Cui mox discipulus: « Nec tibi, » inquit, « timendum nec mihi: existi enim nobile illud et triumphale vexillum omni potestati sanctum et terribile, in quo multi multa bella vicerunt. Et inter alios hæc nostra verba sanctæ et divæ recordationis Constantini magni docent et confirmant exemplaria prælia. In quo etiam crucis vexillo tam inclyto non solum terrenæ, sed et aeris potestates triumphatæ et expoliatæ sunt, mundo per ipsum et in ipso et inferno pariter subjugatis. » Et adiecit qui loquebatur discipulus: « Memento, » inquit, « quondam te exstitisse regis Anglorum signiferum inexpugnabilem, nunc vero si signifer regis angelorum expugnaris, turpissimus. » Dum vero magister et discipulus sic in aure colloquerentur, pontifices de licentia regis separati a proceribus per se seorsum inierunt consilium. Res enim in arcto erat, siquidem pontifices aut regis indignationem incurrerent aut una cum proceribus archipræsulem suum super causa criminis in curia condemnarent. Quod quidem propter nimis manifestam sanctorum sanctionum prævaricationem non audebant.

37

Nec enim qui sapientes sunt ut mala faciant, ad A
quævis mala manus semper apponunt, sed ad ea
duntaxat, quæ commentitia et concinnata fraude
tegi valent. De qualibus in Psalmo: *Narraverunt*,
inquit, *ut abacerent laqueos, dixerunt: Quis vide-*
bit eos? (Psal. LXXII.) Talium quippe velut mulieris
adulteræ via quæ juxta sapientis dictum comedit,
et tergens os suum dicit, Non sum operata malum.
Alioquin nec essent sapientes ut mala facerent, si
evidenter et absque tergiversatione omni posset
malitia deprehendi. Unde et in arcto hoc volunt
pontifices et revolvunt quid agendum, qualiter hæc
evadenda necessitas. Et demum de communi om-
nium consilio hoc concinnatum, quod archipræsulem
suum ad Romanam sedem de perjurii crimine
appellarent, et regi se obligarent in verbo veritatis
promittentes, se omne opus et operam ad archipræ-
sulis sui depositionem pro viribus adhibuituros, sub
hac conditione, ut rex eos de beneplacito suo ab
hoc quod nunc imminabat archipræsulis absolveret
judicio. Regi igitur ita se obligantes et archipræ-
sulem super crimine ad Romanam audientiam ap-
pellantes expressim, et personas suas et ecclesias
suas et officium sub appellatione concluderunt. Et
ita de regis beneplacito semoti a proceribus, appel-
latione facta, juxta archipræsulem sederunt unus-
quisque in ordine suo.

Jam vero terror et horror plus quam prius uni-
versos pervasit. Rege enim cum principibus, ponti-
ficibus subtractis, jam pro tribunali sedente, certis-
sime putabatur mox captio aut quod durius archi-
præsuli imminere. Extunc siquidem principes et
quotquot regni majores aperuerunt ora sua, sicut
leo rapiens et rugiens, et perjurum et proditorem
archipræsulem, ut postea nobis intimatum, judica-
runt. Quid tamen judicatum, magis quam scire,
ruspiciari potuimus, sicut mox ostendetur. Igitur
cum pronuntiandum foret, rege cum paucis rema-
nente et universis quotquot erant de cœnaculo ad
domum inferiorem, in qua nos eramus, descenden-
tibus, ut pronuntiarent coram archipræsule stete-
runt. Quibus descenditibus cum archipræsul
vellet assurgere, discipulus qui ad pedes crucis
sedebat, instillavit secretius, nequaquam decere, ut
in tali articulo pater assurgeret filiis, præsertim
dum tanti regis vexillum propriis manibus sic tene-
ret. Acquievit archipræsul, nec coram ipso astan-
tibus assurgens, nec in gestu seu verbo vel opere
ullum in ipso pusillanimitatis vel inertis trepidatio-
nis argumentum poterat deprehendi. Nobilis vero
vir Robertus tunc Leicestre comes inter honoratos
honorati, in cujus ore verbum positum fuerat,
loqui exorsus est. Primo autem memoravit in quam
familiarem regis gratiam admissus fuerat; quot et
quanta de manu regis acceperat, et quomodo nunc
horum omnium immemor videbatur et ingratus,
mala pro bonis tribuens, et pro gratia et gloria
odium et ignominiam. Et quia comes hic vir ma-
gnus et generosus archipræsulem, a tempore can-

cellariæ, semper quidem pure et sincere, sed nun-
propter metum occulte diligebat, mœstus et com-
patiens ut liquido adverti poterat, verba protrahere
veritus pronuntiare. Quod cum archipræsul cito
adverteret, comitis verba interrumpens omnibus
qui coram astabant in virtute obedientiæ et sub
Christi ideo, quam profitebantur, tanquam pater
filiis inhibuit ne tale pronuntiarent judicium, quo
persona sua judicaretur. Verum comes, etsi invi-
tus, ut adverti poterat, nihilominus processit, trac-
tim tamen et morose ad pronuntiandum. Cum vero
ad hoc ventum quod archipræsulem de reatu per-
jurii tangeret, volens jam, ut adverti poterat, pro-
nuntiare perjurum et forte ut conjectabatur et
proditorem, præsentiens hoc archipræsul mox, non
exspectato judicio, surgit protestans non eorum
esse archipræsulem suum judicare de crimine: B
unde nec pro certo novimus quid judicatum. Ve-
rum mox impropertum et conclamatum a nonnul-
lis, qui ut judicium redderent astiterunt, quod tan-
quam perjurus et proditor a curia discederet. Ipse
vero ad impropertantes sic se vertens et torvo vultu
respicens, respondit quod nisi ordo sacerdotalis
obstaret, et si sibi fas esset, in armis bellicis a per-
jurio et prodicione se contra ipsos defenderet. Et
ita discessimus a concilio: *Hic est discipulus qui*
testimonium perhibet de his et vidit et scripsit hæc
(Joan. XXI). Qui et in eo articulo solus extra do-
mum interiorem, donec aulam intraremus, archi-
præsulem crucis suæ bajulum secutus est: facti-
que sumus ea die spectaculum mundo, angelis et
hominibus.

Verum egressus a curia, cum jam essemus in
equis, archipræsul vix poterat equum regere, cru-
cem portare et benedictionem dare poscentibus,
tanta erat benedictionem poscentium populi mul-
tudo. Nam quasi futurorum præsagium, egresso
a curia et cruce bajulanti, per vicos et plateas
populi se multitudo prostrabat, adorans et benedic-
tionem petens. Cum vero ad hospitium ventum, ec-
clesiam videlicet Sancti Andreæ religiosorum mo-
nachorum monasterium conventuale, mensæ con-
festim positæ et sicut solet magnus erat et præcla-
rus apparatus, verum mox multi de familia nostra,
equites præsertim et generosi pueri, propter regis
metum dimitti petentes, licentiam in anxietate et
amaritudine multa a nobis discesserunt: illud jam
in nostris sapientis experti elogium: Est, inquit,
amicus socius mensæ et non permanet in die ne-
cessitatis. Attamen excusabiles hi quia laici, regiam
ob id nec immerito indignationem formidantes. Sed
erant inter deserentes nos nonnulli nostri officii
viri, clericos dico, qui minus excusabiles et plus
in culpa. Qui mox ut inter regem et archipræsulem
futuri temporis nubilum præsenferunt, tanquam
hirundine homines, futuræ hiemis metu, mox sen-
sim avolarunt a nobis. Hirundine vere hi et arun-
dine, qui in primo venti impulsu mox cesserunt.
Tales revera, filii auræ, amici, fortunæ, solum præ-

dam sequentes et quærentes quæ sua sunt. Sed non pergo nunc ulterius istorum exagitare verecundiam; solum sufficit tetigisse; præsertim cum ipsi postea rerum cernentes exitum, se errasse humiliter confessi sint et graviter pœnituisse, quod pastorem suum et patrem sic deseruerint. Decuit tamen tetigisse hoc, ut de cætero hi, qui sunt nostri officii viri, pastorem suum et patrem sequentes minime retro respiciant et in angustiis derelinquant. Nam juxta Sapientis dictum: *Omni tempore diligit qui amicus est, et frater in angustiis comprobatur* (Psal. xvi). Omissis igitur his qui exierunt a nobis, sed non erant ex nobis, gestorum ordinem prosequamur; hoc solo ad gloriam tanti archipræsulis inserto, quod subtrahentibus se his, discedentibus illis, vir ille virtutum constantiæ firmiter subnixus, columna cui tota virtutum innititur fabrica, sine qua etiam nec per momentum stare posset, sed funditus rueret, animi fortitudine universa dissimulat.

Magna quippe anima, quidquid in tempore prosperi acciderit vel adversi, pro exiguo reputare consuevit, attendens quod, sicut quidam ait, Nec prosperitas diuturna nec ærumna sit pertinax. Igitur quoniam in recessu nostro a curia diei vespera erat, finito vespertino officio, confestim archipræsul cum suis quos tunc habuit discubuit et inter perendum in ecclesiastica Historia Tripartita de persecutione Liberii episcopi lectio fuit, ubi cum illud Evangelii, scilicet: *Si vos persecuti fuerint in ista civitate, fugite in aliam* (Matth. x), interpositum audiremus, respexit archipræsul discipulum qui scripsit hæc, jam ut conjectabam, et sicut mox exitus probabit, evangelicam in animo concipiens fugam. Hymno vero dicto archipræsul, surgens a mensa, confestim Rogerum tunc Wigorniensem et magistrum Robertum de Melunduno tunc Herefordensem episcopos, quos sacerdotes ordinaverat et episcopos consecraverat, nec enim alios præter hos duos antea vel post consecravit, et item Rophensem episcopum proprium capellanum suum convocavit, et ad regem mittit, postulans ab eo securum de terra sua egressum. Qui vero missi fuerant cito revertentes retulerunt regem respondisse quod in crastino ad consilium hoc differret.

De inita archipræsulis fuga.

Interim vero a consilii regalium secretorum secreto mandatur et consulitur archipræsuli, ut et regi et sibi provideat: unde et archipræsul eadem nocte parum ante gallicinium in quatuor tantum equis clam destinatum inivit fugam, paucis admodum consiliis, duntaxat discipulo qui scripsit hæc et capellanis suis, et cubiculariis sine quorum conscientia hoc geri non poterat. Discipulo vero injunxit ut eadem nocte Cantuariam proficisceretur. Et quia eo tempore ratio redituus et totius archiepiscopatus generalis pensio fiebat, præcepit ut exculperem si quid possem, et ad transinaria, ad castrum videlicet illud opinatissimum Sancti Au-

domari in Flandria accelerarem, et in nobili et omni religione prospicio monasterio Sancti Bertini ipsius certissime præstolarer adventum; illic, favente Domino, sine occasione venturum se asseverans, nisi aut captio aut mors ipsa impediret. Adjecit vero quod curavi hic interserere, rogans ut cujusdam libri sui curam haberem. ne cæteris suis post fugam ut videbatur diripiendis periret. In quo notari potest quantus fuerit cum occuit possessorum contemptor, qui in tanta tam varia suppellectile et ambitiosa quam reliquit, unius erat duntaxat codicelli memor. Et sic archipræsul recessit et discipulum post eum ejulantem et clamantem dereliquit. Eadem vero nocte quidam de sociis nostris fugæ istius ignari, in thalamo quodam seorsum dormierunt. A quorum uno, ut ipse mihi post et aliis retulit, in somnio sonus vocis manifeste auditur duos illos psalmigraphi versus decantantis: *Anima nostra sicut passer erepta est de laqueo venantium; laqueus contritus est, et nos liberati sumus* (Psal. cxxiii). Et in hac quidem tertia feria tanti regis et tanti archipræsulis pernicioosa dissensio et capitis et membrorum, metropolitani videlicet et suffraganeorum, profana divisio. et denique regni totius et sacerdotii turbatio et nostri exilii totis sex annis usque ad martyrium duraturi inchoatio, quarta fuit concilii actio.

O maledicta dies! o malignum concilium! O diei et concilii actio omnibus post futuris sæculis detestanda, per quam tanti regis et tanti pontificis tam clara fœdera tam irreparabiliter sunt soluta, de cætero nunquam rege et archipræsule se in regno revisuris. O quanta ex his gestis et regno et sacerdotio incommoda pervenerunt! Unde et quod vidi, quod audiui, et quod ipse sensi, hoc testor, quam profanum est, quam pestiferum, quam funestum inter regnum et sacerdotium discordiam seminare vel schisma, nisi forte et manifestissima justitiæ causa sacerdotalis æmulatio provocetur. Nam propter Dei veritatem, inter reges et sacerdotes ortum schisma vel scandalum non tam est schisma vel scandalum quam ecclesiasticæ pacis et libertatis fomentum: verum multi sacerdotum quibus potestas data sub obumbratæ religionis obtentu transeunt, tacent et dissimulant, cleri libertate in ipsorum oculis periclitante pro bono pacis ecclesiasticæ, ut aiunt et suadent sibi, inter regnum et sacerdotum schisma suscitare nolentes. Quorum tamen nonnulli verius ob id dissimulant quod vident, et laborem et dolorem considerant si aggrediantur hæc: hi præsertim dissimulatores optimi et omnia propter Cæsarem sustinentes, quorum ad sublimiora promotionem aut concessit de facili aut interdum Cæsar ipse etiam ultra quam licuit procuravit. Verum hic noster Thomas, etsi ut præstendimus de regia assumptus, et tanta regis gratia præditus, et rege sic volente et procurante promotus, tamen cum tempus accepit et causa suberat, præteritorum oblitus, in anteriora se extendit, et se pro cleri

decore et pro ecclesiastica libertate quam tuendam suscepit, homini, quem supra hominem diligebat, nec minus tunc dilectus, regi se opponit. Non ut vetus ille sacerdos in Evangelio, non ut levita, carnalium minister, pertransiit, non præteriiit, non dissimulavit, unde tamen multa et minime hic enarranda et regno et sacerdotio incommoda ex schismate hoc et dissensione hac provenerunt. Quod et ipse tanquam vir in omnibus providus ante malorum eventum prædixerat, verum, ut addebat, minime periclitantis iustitiæ causa deserenda aut etiam dissimulanda ob id. Arduos quippe aggressus et facta grandia visus subsequi aut comitari iactura; verum et ipse virtutis aggressus, et

ipsamet virtus demum sic probata, sicut perfectior et commendabilior redditur. Virtus enim, inquit Magister, in infirmitate perficitur (11 Cor. xii). Quæ autem et quanta hinc inde et regno et sacerdotio incommoda ex dissensione hac provenerint, sequens ex parte historiæ ordo declarabit. Quæ et nos supra in hujus operis textu tetigisse meminimus. Quæ qui plenius nosse desiderat, legat epistolas nostras a nobis in exilio nostro confectas aut directas ad nos vel pro nobis. Ex omnibus quippe his compactis confectum est grande unum corpus epistolæ, ad quod recurrendum. Plurima enim ex his, quia in epistolis continentur, per sequentis historiæ textum brevitatis causa præterimus

INCIPIUNT CAPITULA TOMI QUARTI.

1. Quod deposito orario Thomas fugerit, et quod fuga evangelica fuerit; ubi tangit de fuga pastorum duplici, corporali et spirituali.
2. Quid sit gestum in curia cognita in crastino archipræsulis fuga.
3. Quale fuerit itinerarium Thomæ, ad humilitatis exemplum describit.
4. Qualiter cum applicuit sero cum recubisset ab hospite suo in fractione panis agnitus sit.
5. Quare in transmarinis applicatus absconderit etiam se adhuc.
6. Quo in loco discipulus qui scripsit hæc, ad dominum et magistrum suum archipræsulem jam in transmarinis sit reversus, et de mutua ipsorum collatione.
7. Qualiter regis nuntii contra archipræsulem ad virum apostolicum directi applicuerint, et de nuntiis archipræsulis similiter ad apostolicum virum, et qualiter et hi et illi per Ludovicum Francorum regem transierint.
8. Qualiter regis nuntii et archipræsulis a viro apostolico sint excepti, et quid ab eo petiit et quid actum.
9. Qualiter in Angliam reversi qui a rege missi fuerant, et quomodo archipræsul in Franciam veniens a rege Francorum sit exceptus.
10. Qualiter archipræsul Senonis veniens a viro apostolico susceptus sit et qualiter archipræsul in audientia ipsius et cardinalium totiusurbationis suæ causam exposuerit, et pariter qualiter lapsus fuerit confitens, et de furesco chirographo ibidem expando et lecto et a viro apostolico reprobato, et qualiter ea die a curia recessimus.
11. Qualiter archipræsul a cardinalibus arguitur, quod tempore schismatis contra regem se erexerit, et quid archipræsul ad objecta responderit.
12. Qualiter archipræsul ad quoddam monasterium Cisterciensium, quod Pontiniacum dicitur, ibi peregrinaturus advenerit, et qualiter ibi exceptus et quam spiritualibus studiis ibi intenderit.
13. De ejectione et proscriptione propinquorum archipræsulis et suorum, qui eum in exilio sunt secuti, et de maestitia archipræsulis pro expulsis, et de consolatorio sermone quo ipsum eruditus sui coexules consolantur, et archipræsul quid responderit, et qualiter dispensante Domino et miserante nostrorum provisorum sit multitudini exsulum.
14. Qualiter aggravato exilio suo præ multitudine exsulum, archipræsul vitam capere arctiorem, et qualiter præ nimia carnis mortificatione valetudine in brevi gravatus, a discipulo qui scripsit hæc conventus sit et correptus, et qualiter mox correptus temperaverit abstinentiam et cum suis totum se scripturis dederit.
15. Qualiter secundo peregrinationis suæ anno apprehenderit archipræsulem iustitiæ zelus sermone quodam deliberatorio suos super hoc alloquens.
16. Qualiter primo sit rex conventus et qualiter secundo.
17. Qualiter arctabatur archipræsul ad mandata sua cernens regem non corrigi, et de comminatorio edicto quod publice emisit in regem, et comminatorii loco, et quod cito hoc pervenit ad regem.
18. Quod rex ad archipræsulem appellatores miserit et quod appellationi sit delatum.
19. Qualiter et rex et archipræsul ad sedem miserint apostolicam, et qualiter rex a Pontiniaco archipræsulem amoverit, et qualiter archipræsul et eruditus sui in arcto positi deliberaverint inter se super hoc quid agendum.
20. Qualiter archipræsul, a Pontiniaco proponens recedere, miserit ad regem Francorum Ludovicum, et qualiter et quo loco ad peregrinandum archipræsul a rege sit exceptus et de somnio in recessu suo a Pontiniaco.
21. Quanta humanitas et benignitas archipræsuli et suis a Francis sit exhibita.
22. Qualiter præfacti Romipetæ archipræsulis sint reversi, et de adventu cardinalium ad pacem inter regem et archipræsulem reformandam, et de archipræsulis somnio, et qualiter a nonnullis personis regni appellatione interposita cardinales infecta pace sunt reversi.
23. Qualiter archipræsul deinceps, appellationi non deferens, multos de aulicis anathemati tradidit, ad eruditorum suorum supplicationem sola regis persona intacta adhuc.
24. Qualiter rex motus, audiens appellationi non delatum, sed suos potius excommunicatos, ad virum apostolicum miserit et archipræsul similiter.
25. Qualiter arctabatur Romanus pontifex pro regis et archipræsulis nuntiis sibi adversantibus, et qualiter arctatus nunc hos illos pacis inter regem et archipræsulem consuevit mediatores.
26. Qualiter rex Francorum, mediatorum unus, ad unum colloquiorum, quod erat inter ipsum et regem Anglorum, nos vocaverit, et qualiter ibi in conspectu regum archipræsul suasus pulsus et impulsus fuerit, volens se regis voluntati subjicere, nisi hoc adjecto, saltem videlicet honore Dei et qualiter a colloquio recesserit amodo tunc apertus, et derelictus, et multis affectus contumeliis.

27. Qualiter archipræsul cum suis, ut videbatur vehementer afflictus, confortaverit suos in via, et qualiter post dies paucos archipræsuli cesserit ad gloriam, quod in priori regum colloquio mundus ipsi repulaverat in ignominiam.
28. Qualiter archipræsul tertio miserit ad Romanum pontificem, et quomodo ipse pro archipræsulis pacem iterum arctatur et de sero missis a latere Romani pontificis propter pacem.
29. Qualiter pro solo pacis osculo pax archipræsulis in alio quodam regum colloquio steterit, et qualiter archipræsul convenitur a suis et arguitur, quo pro solo pacis osculo sic dimiserit pacem, et animatur ad pacem, osculo pacis contempto, et de archipræsule irriso.
30. Qualiter archipræsul quarto ad Romanum pontificem miserit, et de coronatione Henrici filii regis adhuc pueri, et de Romipetis nostris, et qualiter motus vir apostolicus in episcopos, qui contra archipræsulem coronationi interfuerunt, suspensionis eorum litteras, quorundam etiam anathematis, archipræsuli dirigens et qualiter rex ex urgenti mandato apostolico sic arctatur ad pacem

INCIPIT TOMUS QUARTUS.

1. DE FUGA THOMÆ ET QUOD EVANGELICA FUERIT.

A De fuga spirituali, qua non pastor fugit, sed mercenarius.

Deposito igitur orario, quod in memoriam suscepti jugi sacerdotalis publice et assidue, ut superius ostendimus, supra humeros gestare consueverat, fugit Thomas, eo ipso quasi jam indicans posse se jam minime in pressura tanta sacerdotio libere fungi. Fugit itaque deposito orario, nihil secum præterquam insigne illud metropolitano, quod pallium dicitur, et sigillum suum in via portans, non peram, non panem, non in zona æs, sed solum cilicio amictus super nudo secutus est Jesum. Secutus, inquam, Jesum fugientem prius, sed postea intrepide occurrentem. Nam, ut formam daret suis fugiendi pro tempore, fugit pastor pastorem Jesus; fugit et post magistrum magister magistrorum Paulus; et, si antiquiores adhuc querimus fugitivos, fugit Jacob, fugit Moyses, fugit et Elias, quotquot illud Domini de fuga adimplentes mandatum: Si vos, inquit, persecuti fuerint in una civitate, fugite in aliam (Matth. x). Fugit igitur Thomas, ut Domini adimpleret mandatum, in fuga providens regi quem adeo diligebat, et sibi, ut regis videlicet indignationis declinaret fervorem et manus servaret innoxias. Indignatio enim regis, ait Sapiens, nuntius mortis, et vir sapiens placabit eum (Prov. xvi). Nec igitur de fuga hac opus est sermonem apologeticum texere, quæ non mercenarii fuit, sed pastoris qui videbatur personaliter queri. Fugit etiam eo quod remanendo et opponendo se magis morti fructificaret quam vitæ, dolore super dolorem apposito. Qualiter et Apollo magistri discipulus, quem et Corinthiorum episcopum ordinaverat, ipsos, quibus nuper prælatus erat, fugiendo deseruit, quia sedere nequisset, adeo quod etiam multum rogatus a magistro ad eos reverti, tunc noluisse, metuens ne propter obfirmatos non faceret fructum. De quo illis Magister: De Apollo, inquit, fratre notum vobis facio quoniam multum rogati ut veniret ad vos; et utique non fuit voluntas ut nunc veniret (1 Cor. xvi). Sic et ex causa simili, crebro multi alii pastores et boni aut penitus sine grege deseruerunt gregem sibi commissum, aut de grege ad gregem translati, ubi curam utiliorum impenderent. Non itaque pro fuga hac apologia necessaria; illorum potius, provincialium videlicet episcoporum, inexcusabilis fuga qui remanserunt.

Et certe fugerunt qui remanserunt. Nemo enim qui ipsos fugisse diffiteatur, qui archipræsulem suum militiæ suæ ducem in die belli deserentes, in partem transierunt adversam: fugerunt revera tanquam filii Ephrem, qui intendentes et mittentes arcum, videlicet se ante bellum ad bellum præparantes et promittentes auxilium, conversi sunt in die belli; corpore quidem remanentes et amplectentes quæ carnis sunt, mente fugerunt, sub timoris modio militiæ suæ arma et veritatis lucernam abscondentes, cum deberent contra principes et potestates mundi hujus ex adverso ascendere et pro domo Israel stare in prælio in die Domini. Alioquin Dominicus miles sine causa gladium portat: imo, ut jam diximus, sub timoris modio gladium suum abscondit et fugit, etsi non corpore, spiritu tamen. Hæc quippe fuga non corporis, sed spiritus est, semper inexcusabilis, quam mundi terror aut amor in mercenariis facit; qui in templis auro micantibus et inter deaurata altaria quotidie psallunt et legunt, et tamen fugiunt: qui in auro quotidie et gemmis inter ministrorum examina splendide epulantur et bibunt, et tamen fugiunt: qui sub fletu et vinea sua secure dormiunt, et tamen fugiunt, sic enim fugiendo principum gratiam et mundi gloriam consequuntur. Væ generationi nostræ, ministros loquor altaris, a fermento hoc, a fuga hac! Nec est enim jam qui se opponat qui ex adverso ascendat. Psalmos quidem psalmis, orationes orationibus et missas missis copulant, et quotidie satis regulariter audiunt: et pauperibus quidem et egenis manus abunde aperiunt; sed hæc quidem omnibus Christianis communia; Judæi quippe et ethnici faciunt hæc, sed episcopi illud principum nominis episcopalis, longe supra avolat a privatorum conversatione communi. Hoc quippe in episcoporum declaratur nomine, quod ab illis exigitur in operationis virtute. Quorum est jugiter arguere, increpare instare opportune, importune, contra diem resistere, terrenis potestatibus se opponere. Hic est enim clivus arduus et hæc est propria sarcina pastoralis. Et hoc est illud episcopi nominis episcopalis principum, hoc episcoporum fastigium, hoc tam præcellentis in ecclesia gradus privilegium, quo privatos excedere et supra nos avolare debent, qui supra nos sunt, qui præsent nobis,

ni quidem, ut jam diximus, in jejuniis, in vigiliis, in dandis, in erogandis, et orationibus et reliquis pietatis seu religionis operibus cæteris, se inferioribus comparticipant, utpote quæ non episcoporum propria, sed Christianorum omnium communia sunt. Sed, proh dolor! quotquot hi? et si hæc quæ non oportet omittere faciunt, tamen diebus his militiæ suæ arma abscondunt, qui dum terrenis commodis inhiant, dum honores cevent, aut per ambitionis spiritum sublimiora appetunt, opponere se renuunt, ne perdant quæ diligunt, aut ad id non perveniant, ad quod tendunt unde et plane illo Domini comminatio per prophetam præsens feritur ecclesia, *Auferam, inquit, a Juda et Jerusalem validum et fortem (Isa. iii)*. Quod et in Threnis suis in persona synagogæ alter luxit propheta; luxit quidem non murorum seu lapidum templi jacturam, sed virorum inopiam. *Abstulit, inquit, omnes magnificos meos a me (Thren. i)*. Olm quidem prædictum, sed nunc impletum admodum hodie in Juda et Jerusalem: Pauci magnifici, validi, pauci et fortes: omnes quippe terga vertentes, fugientes omnes; qui fugiendo sic ea assequuntur quæ Thomas fugiendo contempsit, quorum certe fuga periit a Thoma fugiente, ita ut fugiens vere possit illam in Psalmo versiculi pericopen decantare per viam: *Periit fuga a me et non est qui requirit animam meam (Psal. cxi)*. Cernens enim quod omni tempus sit, et quod tempus sit fugiendi et quod tempus occurrendi, fugit prius sed postea occurrit, quemadmodum finis istius operis et finis hominis declarabunt. Unde et commendabilis hæc Thomæ fuga et magna fides fugientis, nihil cogitantis de crastino, nihil secum in via præter crucifixi fidem et pauperitatem portantis, cum tamen fuisset, ut satis supra ostensum, in Augustalibus cælicis enutritus. Toto igitur Britannico orbe Thomas profugus agitur Oceano, omni ex parte circumseptus, unde et egressus difficilis, præsertim cum omnia suspecta essent fugienti, utpote qui ubique publici hostis nomine censeretur: verum de itinerrario fugientis et egressu calamum ad modicum suspendamus, dicturi prius quale in crastino, quarta videlicet feria, cognita jam fuga, inierint consilium principes et pontifices adversus Dominum et adversus christum ejus.

2. QUID SIT GESTUM IN CURIA, COGNITA ARCHIPRÆSULIS FUGA.

Mane quidem facto, fuga jam cognita, pontifices et principes convenerunt in unum; rex vero turbatus sciscitatur quid agendum: et commune quidem consilium ut majores natu episcoporum, maxime qui, ut supra diximus, regi se obligaverant, Romanum adirent pontificem, deurbatione pacis et regis et sacerdotii et reatu perjurii archipræsulem suum accusaturi, et in interim omnia ipsius in pace essent, donec quid Romanus pontifex judicaret reportarent: unde et mox regis edicto præconis voce proclamatum, ne quis homines archiepiscopi molestaret aut possessiones, seu de ejus quidquam auferret, sed

universa ipsius pacem haberent. Et hoc quidem sapientes illi, ut mala facerent, dederunt consilium, ut ita commodius causam suam justificarent, archipræsulis vero deprimerent: quod videlicet cum tenere et ignominiose regem exacerbasset, regni et sacerdotii pacem inconsulte turbasset, et fatue et indiscrete ecclesiam suam noctu fugiendo reliquisset, ipse tamen post omnia hæc ex regia clementia regis pacis bono frueretur immeritus. Ita pontifices cum divitiis in oculis paraverunt laqueum fugienti; et ita confestim arripiunt iter Rogerus tunc Eboracensis archiepiscopus, Gilbertus tunc Londoniensis, Rogerus Wigorniensis, Hilarius tunc Cicerstrensis, Bartholomæus Exoniensis episcopi. Præter hos vero et cum istis nonnulli aulici et alii quidem honorati viri et magni ab ipso latere regis missi in testimonium illis, per quos rex scripto suo pie recordationis Ludovico tunc regi Francorum, et nobili comiti Flandriæ Philippo, conquerendo intimavit, Thomam quondam Cantuariensem archiepiscopum, talis quippe erat scripti conceptio, a regno suo tanquam proditorem fugisse, et ne eum in terra sua reciperet. Proficiscuntur igitur hi; sed ante alia fugientis Thomæ itinerarium ad humilitatis exemplum memorandum.

3. DE ITINERARIO THOMÆ FUGIENTIS.

Ut diximus, noctu clam fugiens, fratrem unum de ordine de Semplingeham secum habens viæ ducem, versus Aquilonem ad nobilem illam civitatem, quæ Lincolnia dicitur, tendebat, sciens et prudens, in viam carpens et non viam, ut ita cautius qui post mitterentur persecutores effugeret et declinaret insidias. Et ea nocte venit ad pagum qui dicitur Graham, viginti quinque circiter milliariibus a Northamptonne distantem; ubi postquam modico indulsit somno, in crastino arripiens iter venit Lincolniam, iterum circiter viginti quinque millia, hospitatus in civitate in domo cujusdam fullonis. Et ibi aquam quæ fluit per civitatem intrans, ad locum quemdam solitarium in medio aquarum situm, qui dicitur Hermitorium et pertinet ad sanctam illam sanctimonialium congregationem de Semplingeham, per aquam venit millia circiter quadraginta; ubi propter loci solitudinem, et propter difficultatem accessus, eo quod in medio aquarum sit, per tres dies securus latuit, ad iter quod restabat vires reparans. Una vero diurnum cum fratre, qui ipsi ministrabat, videret solum sedentem in mensa et pulmentariis vesci, compunctus lacrymas continere non potuit; et continuo exivit ne inter sacras epulas Dei virum lacrymæ effusæ perturbarent.

De hermitorio venit ad sanctum Botulfum decem milliaria: et inde per aquam venit ad locum qui dicitur Haverol, ad prædictam sanctimonialium congregationem itidem pertinentem. Deinceps vero nocte solum proficiscebatur, veritus deprehendi. Jam siquidem orientem versus ad Cantiam tendebat, ubi a populo terre facie magis cognitus erat. Nocte itaque ibat et die latitabat octo noctibus die-

rum conficiens iter, Jonec in Cantia perveniret ad pagum supra mare situm qui dicitur Estrei; ubi transfretare disposuit. Ibi quidem eo cautius quo securius, eo quod pagus ille esset proprius de mensa sacri conventus sedis suæ metropolitanæ, a Cantuaria octo tantum milliariis distans. Latuit autem lux mundi futura in pago hoc usque ad diem Animarum diebus octo. Die vero Animarum qui fuit tertia feria, quintus decimus dies ab illa tertia feria, ab illo die Martis, quo apud Northampton pugnarat ad bestias, nocte parum ante diem absque omni vectura in scapha intravit mare, et circa vesperam applicuit in quodam maris latere quod a vulgo terræ dicitur Die in Bolonia, per unam leugam distans a portu qui dicitur Graveninges. Et ivit vir Dei pedes quantum potuit, sed parum potuit, eo quod cum modicum vas marinum intrasset, scapham, ut diximus, per crebros et profundos maris factus non parum fuisset ex mari fatigatus. Unde et post modicum iter reclinavit in terra, non valens procedere, et dixit fratribus qui cum eo erant: « Hinc non recedam nisi vehar a vobis aut queratis mihi vecturam. » Et quæsierunt ei jumentum pro uno argenteo: et jumentum hoc non frenum sed tantum prolectam circa collum habebat. Et posuerunt vestimenta sua supra dorsum, et eum desuper sedere fecerunt.

O spectaculum cernere Thomam, quondam in curibus et in equis, super jumentum nunc sedentem, pro freno solam prolectam circa collum habens, et pro sella super dorsum fratrum pauperum et conversorum panniculos! O quam magna super te, Thoma, rerum mutatio! ubinam sunt quondam tot equi aut tot equites tui et tam divites et tam ambitiose phaleræ tuæ. Ecce nunc quod omnia hæc ad jumentum unum et ad prolectam unam redacta: nec tamen jumentum tuum vel prolecta tua, sed alterius est. Te revera transeunte, transierunt et tua, vetera enim tua transierunt et facta sunt omnia nova. Vere mirabilis Deus in sanctis suis, deducens eos in via mirabili, de tribulatione lætificans, de pressura dilatans, de tentatione probans; destruendo ædificans, percutiundo sanans, occidendo vivificans. Quod quidem inter cæteros et in Thoma hoc nostro liquidissimum. Et quidem ad supradictum portum Graveninges venit, sic supra jumentum sedens. Tertia itaque feria, quæ dies Animarum fuit, qui vulgo dies Martis dicitur, qui fuit, ut supra jam diximus, quintus decimus ab eo die quo apud Northampton in supra descripto discrimine fuit, in transmarina applicuit. Nescio quippe quo rerum præsignio, si tamen præsignium magis quam eventus, tertia feria fugam iniit, tertia feria in transmarina applicuit, tertia a marinis recessit, et tertia iterum revertens in Angliam applicuit, et tertia demum feria gladio occubuit, ab eo die, quo revertens, applicuit, mense solum exacto, ut ita quæ fuit dies Martis, fieret et martyris; in qua velut quodam futurorum præsignio ter quater sic parabatur ad martyrium. Tertia itaque

A feria, quæ dies Animarum fuit, in transmarina applicuit, et in vespera Graveninges venit.

4. QUOMODO THOMAS FUGIENS IN FRACTIONE PANIS AB HOSPITE SUO AGNITUS SIT.

Et cum sero recubisset una cum tribus fratribus viæ sociis, ab hospite suo in fractione panis agnitus est: cum tamen in mensa non magis ipsi quam alii deferretur, imo minus, utpote qui in mensa primum nequaquam teneret locum, sed extremum. Qui etiam per totum hoc itinerarium suum sicut habitu ita et nomine mutato, a confratribus suis viæ sociis frater Christianus vocabatur, nomen Christiani sortitus pro proprio, totum ob id ne potuisset agnoscere. Verum cautus hic hospes notavit quod præ cæteris recumbentibus singularem haberet vescendi modum et in distributione affectum. De illo siquidem modico quod ipsi in mensa apponebatur, parvulus et aliis qui in domo singulis dispergebat et dabat.

De corporali archipresulis forma.

Præterea ad certius conceptæ jam agnitionis argumentum, totius hominis compositionem intuebatur et gestum, corporis videlicet proceritatem egregiam, frontem amplam et aspectum severum, faciem oblongam et venustam formam manuum oblongarum et articulorum in manibus congruam et quasi exquisitam his protensionem. Videns itaque hominem in modo edendi, in corporis qualitate et gestu cæteris longe dissimilem, existimavit mox se magnum aliquem virum in hospitio suo suscepisse, et pro certo suspicabatur Cantuariensem hunc esse archiepiscopum, eo quod jam densus in terra circumquaque percrebruerat rumor Cantuariensem sic a Northampton clam recessisse, et jam in partes illas aut applicuisse aut in proximo applicandum fore. Hospes igitur confestim rusticam suam seorsum vocavit, et instillavit secretius Cantuariensem esse quem hospitio suscepit. At illa impatiens, vix verbo exaudito, ad mensam properat et post modicum intuitum mox rediens et subridens: « Certe, » inquit, « bone vir, ipse est. » Rustica igitur mox sollicitior circa ministerium, discurrit, festinat, et nunc nuces, nunc poma, nunc caseolum, ante fratrem Christianum apponit. Frater vero Christianus suspiciens se jam ex aliquibus indicibus deprehensum, carere mallet his quæ rustica affectuose apponebat, et tamen dissimulat.

Cœna autem facta, hospes cum nova vultus hilaritate accedit propius. Quem cum frater Christianus supra sedem juxta se ponere voluisset, hospes constanter renuit, in terra secus ipsius pedes sedens. Et post modicum: « Domine, » inquit, « gratias ago Deo quod dignus fui ut sub tectum meum intrares. » Cui mox frater Christianus: « Quis ergo sum ego? nonne ego quidam pauper frater sum et Christianus dicor? » Et hospes: « Certe, » inquit, « quidquid dicaris, scio te magnum virum esse et Cantuariensem archiepiscopum. » Igitur cum frater Christianus nullis verborum involucris ab hospite suo se potuisset evolvere, quin horum alterutrum necesse haberet, aut de se veritatem fateri constanter aut diffiniri

mendaciter, confessus est quod ipse est, et non negavit. Et ne se proderet, hospitem suum blandis demulcens secum duxit in crastino. Ecce quam longa viri Dei pericula qui etiam jam in portu periclitabatur.

5. QUARE JAM IN TRANSMARINIS SE ADHUC
ABSCONDERIT.

Rex quippe nobili comiti Flandriæ Philippo germano suo et amicis suis magnatibus terræ scripto jam et verbo disseminarat Thomam quondam Cantuariensem archiepiscopum (talis enim erat scripti conceptio) de regno suo tanquam proditorem suum fugisse: unde et quam longa manus regia, tam longa pericula regiam manum fugientis, et ideo omnia plena suspicionibus et securitas nulla. Causa etiam qua in illis partibus prodi metuerat erat, eo quod domino regi Anglorum procurante Mathæus frater comitis Flandrensis Philippi, tunc Bononiæ comes cum abbatissa quadam filia Stephani quondam regis Anglorum matrimonium profanum et omnibus post futuris sæculis detestandum contraxerat, archipræsule tunc regis cancellario propter facti enormitatem contradicente, et quoad potuit reclamante; unde et comes Bononiæ extunc perfecto eum odio oderat. Erat quidem sic: verebatur itaque ipse, nec igitur sine causa in partibus illis manifestari se voluit; unde propter crastinæ dietæ longitudinem et viæ difficultatem et insidias quas verebatur, in crastino summo difuculo arripuit iter, et de Graveningæ pedes ivit vir Dei tota ea die, via admodum lutosā et lubrica, C tempore præsertim hiemali, et circa noctem venit ad monasterium de sancto illo ordine Cisterciensi, quod in terra dicitur Clermareis, ad supputationem indigenarum iter duodecim leugarum terræ ea die conficiens. Est autem monasterium hoc situm prope illud castrum nobile, quod supra nominavimus, Sancti Audomari.

6. DE LOCO UBI DISCIPULUS REVERSUS EST AD
MAGISTRUM.

In hoc autem monasterio discipulus, qui scripsit hæc, circiter quatuor quinque dies præveniens, sicut supra diximus, sibi injectum, domini sui præstolabatur adventum, in nobili videlicet et omni sanctitate præclara abbatis Sancti Bertini. Unde mox in adventu domini nuntio accepto, eadem nocte veni et quidem gavisus sum, viso domino, nihilominus et compassus audiens ipso videlicet mihi referente tunc itineris sui difficultates et pericula; qualiter nocte ambulans die latitaverit, qualiter pedes incesserit et qualiter colobio assumpto in quo tunc eum cernebam, cum habitu et nomen mutaverit, a sociis viæ, ut supra tetigimus, nomine tanquam proprio Christianus appellatus. Et in tanto labore quanta fuerit victus inassucta asperitas, ita ut tanquam alterum electionis vas probatum sit periculis in via, periculis in mari, periculis ex gentibus, periculis in falsis fratribus, in labore, in ærumna, in vigiliis, in fame et siti, in jejuniis, in frigore, in colobio et in cilicio. Et ego quidem qui scripsi hæc, audiens et videns sic, toto

A corde et corpore concussus sum et convulsus: ita tamen ut in dolore ipso dispositionibus Altissimi omnia interiora mea laudem germinarent et gratiam. Cujus est humiliare dum allevat, et allevare dum humiliat. Et magna profecto Altissimi laus et gratia de cœlitus data constantia et æquanimitate tolerantis, illud dum mecum loqueretur patientis elogium replicantis: « Si bona, » inquit, « suscepimus de manu Domini, mala quare non recipimus? » (Job 11, 10.) Unde ego mox de Sapientis verbo cogitabam vere dicentis quod *Iustum non contristabit quidquid ei acciderit.* (Prov. xii.) Et post hæc cum de mea vicissim quereretur protectione et qualiter mandatum suum implere potuerim, quod, ut supra dixi, in articulo recessus sui a Northampton mihi injunxerat, enarravi. Et quod quædam vasa sua argentea mecum detulerim et de redditibus suis solum centum marcas, quas velut de incendio vix e terra ejicere potui. Et adjecti qualiter mox cognito ipsius recessu sapientium malo consilio regio fuisset edicto proclamatum ut omnia ipsius in pace forent: et qualiter quod promalo suo molitum in bonum cesserit, et mentita est iniquitas sibi Altissimo secum disponente et semper resistente iniquitati: alioquin enim, nisi sic regio fuisset edicto proclamatum, a terra quidem omnino vacuus exissem, si tamen exissem, nobis etiam et nostris omnibus prædæ et direptioni expositis.

Archipræsul vero audiens factum sic, Deo gratias retulit, qui mundi sapientes infatuat, et in astutia sua comprehendit. Et priorum oblitus penitus, confortatus est, ut videbatur, nihil de crastino cogitans, cum tantum dietæ solum centum marcarum et vasa quædam pauca argentea solum et totum fuerit nostræ peregrinationis longioris plus annis sex duraturæ viaticum.

7. QUALITER NAUFRAGANTIBUS ADVERSARIIS ARCHIPRÆSUL APPLICUERIT.

Eadem vero nocte, qua et archipræsul, tægas nuntii præfati cum multo et magno apparatu mare intrantes, subito procella suborta, in multa difficultate et periculo vix applicuerunt: cum tamen archipræsuli et suis in scapha mare pacatissimum foret. Testati sunt sic fratres, qui cum archipræsule in scapha, et alii ex parte adversa qui in navibus transierunt: illius revera opus, cui venti et mare obediunt, qui cum vult mare, et cum vult sonum fluctuum mitigat, quod et in Ægyptiacarum plagarum catalogo illius Ægyptiorum plagæ septimæ persimillimum, qua Moysæ virgam in cœlum extendente, Dominus dedit tonitrua ac discurrentia fulgura super terram, pluens grandinem super terram, et grando et mista pariter ferebantur: tantum in terra Gessen, ubi erant filii Israel, grando non cecidit. Juxta quod similiter et in eorumdem plagæ nona factæ sunt tenebræ horribiles in universa terra Ægyptia. Ubique autem habitabant filii Israel lux erat. Idem quippe fortissimus Deus Israel tunc et nunc discernens sic et in merito et in flagello iustum ab impio, et timoratum a contempitore.

Eadem itaque nocte qua et archipræsul, dicti A regis nuntii mare intraverunt, et eadem die qua et archipræsul ad castrum Sancti Audomari venerunt. Et quia celebre erat in terra quod Cantuariensis archiepiscopus ad monasterium illud de Clermareis, ad quod jam venit, adventare proposuerat, eadem nocte post nocturnam synaxim decantatam, intravit stagnum quoddam grande et spatiosum, supra quod monasterium illud situm est, et in scapha venit ad locum quemdam aditum, aquis septum, qui ab incolis dicitur Eldeminster, quondam hermitorium beati et gloriosi confessoris Bertini. Verebatur quippe, si in monasterio illo usque in crastinum moraretur, forte ad aliquorum indicia indigenis et præsertim regis nuntiis revelari in crastino, qui forte ad videndum eum diverterent, et videntes eum sic, fieret opprobrium abundantibus et despectio superbis, et insultarent de facili, quod fatue et inconsulte de tanta quondam fortuna ad tantam nunc miseriam devenisset. Unde et eadem nocte se subtraxit et in dicto hermitorio per tres latuit dies : et in quarto ad petitionem sanctæ memoriæ Godescalli tunc abbatis et conventus loci, ad abbatiam Sancti Bertini venit, et tanquam diebus nubes et caliginis aliquantulum serenatis, veri solis radius mundo jam sensim oriens et se ostendens.

Qualiter nuntii regis et post nuntii archipræsulis ad regem Francorum venerint, et qualiter excepti.

Sed archipræsulem in dicto Sancti Bertini monasterio apud Sanctum Audomarum dimittentem adhuc, prius viam et actus nuntiorum prosequamur. Qui mox in crastino sui adventus a Sancto Audomaro recedentes tertio quartove die per piæ recordationis Ludovicum tunc Francorum regem transitum fecerunt, quem apud castrum regium quod Compendium nominatur reperierunt. Et salutato rege litteras ipsis nomine regis Anglorum porrexerunt, quarum forma illis similis quas supra diximus comiti Flandrensi directas, quod videlicet Thomas quondam Cantuariensis archiepiscopus de regno suo tanquam proditor fugerit : unde et ne ipsum in terra sua reciperet, tanquam dominum precabatur. Verum ut audivit de litterarum initio : « Thomas quondam archiepiscopus, » regem sicut ecclesiæ filium devotissimum statim apprehendit æmulatio, et plurimum ex verbo D motus est : verbum quippe insolens offensionem generat, et juxta Sapientis dictum : *Qui moderatur sermones suos, doctus et prudens est (Prov. xvii).* Et rex mox, quis eum deposuisset, iterum et iterum sciscitabatur, et adjecit : « Certe, » inquit, « sicut rex Anglorum, ita et ego rex sum : verumtamen minimum de clericis regni mei ego deponere non vale-rem. » Et ita qui missi fuerant, nec ad regis quæstionem prudens reddere responsum poterant, nec ad petitionem suam responsum pro voto reulerunt. Discipulus vero qui scripsit hæc et quidam alius de archipræsulis societate, cautus quidem et eruditus, de consilio archipræsulis et præcepto, nuntios quo-

tidie nescientibus ipsis e vestigio sequebantur : ita tamen quod nos sequentes una semper die præcesserunt. Et quidem ex consilio et industrie factum sic, ut ita cautius et certius ipsorum verba et molimina adversus nos exploraremus. Cum vero ad Christianum illum Francorum regem, a quo nuntii proxima die recesserant, venissemus, ipsum mox ut accessum habere potuimus, nomine archipræsulis, quem a tempore cancellariæ propter hominis magnificentiam, probitatem et industriam reputabat strenuum et habebat acceptum, devote quidem et humiliter salutavimus. Et quia ante eramus ipsi incogniti, more suo erebro, an de archipræsulis domo fuissetmus et familia, sciscitabatur : quo cognito, mox nos suscepit in osculo et benigne audivit. Cui cum B juxta domini nostri archipræsulis mandatum lacrymabilem historiam nostram et labores et pericula exposuissemus, regiæ clementiæ viscera vehementer commota sunt ; et nobis ibidem referre dignatus est, qualiter et in qua forma contra archipræsulem rex ipsi scripserit et quid ipse responderit. Et adjecit : « Debuisset quidem dominus rex Anglorum, si ipsi placuisset, antequam tantum amicum suum archipræsulem et personam tantam tam dure sic, et tam dire tractaret, illius versiculi fuisse recordatus : *Trascimini et nolite peccare (Psal. iv).* » Et supradictus, qui mecum erat, viæ comes et nuntii, comice mox respondit : « Domine, » inquit, « et forte illius recordatus fuisset versiculi, si illum tam frequenter ut nos in hora illa regulari audivisset, » et subrisit rex. In crastino vero antequam recederemus, cum hominibus suis quos secum habebat, consilio accepto, ad petitionem archipræsulis per nos factam archipræsuli in regno suo pacem et securitatem concessit : et quidem adjecit, hoc de pristina dignitate diadematis regum Francorum fore, ut exsules, et præsertim personæ ecclesiasticæ regum et regni pace et securitate fruantur et a persecutorum defendantur injuria : verumtamen quod contra Anglorum regem, Normannorum et Aquitanorum ducem et Andegavensium comitem, quod, inquam, contra potestatem tantam et tot et tam magnos, ut supra ostendimus et honoratos nuntios verbo et scripto supplicantes, nos duo duntaxat homines contemptibiles et ignobiles tam cito et tam facile pacem regiam et securitatem obtinuissemus, sicut delectabile et mirabile fuit monachis nostris ; illi totum ascribentes hoc, in cujus manu corda regum sunt, et quocunque voluerit, inclinat illa : ubi pariter et si cursim intuendum quanta sint sanctorum merita quorum virtute etiam imperfecta terrenarum potestatum corda ad ipsorum vota inclinentur. Contestantur et hoc, quæ non necesse enumerare hic, Patrum exempla multorum. Sed hic inter alios, sicut evidenter in libro experientiæ vidimus, sancti archipræsulis Thomæ jam exsulis innocentia et justitiæ causa. Verum de his plenius alias : cœnium historiæ ordinem prosequamur

8. QULMODO NUNTII ARCHIPRÆSULIS AD VIRUM APOSTOLICUM VENERINT, ET QUALITER EXCEPTI.

Itaque regis pacis dono et securitate fruente, in exultatione et letitia Christianus ille rex licentiatos nos dimisit in pace: verum nos non statim ad archipræsulem revertentes, nec quidquid nuntiantes de hoc, quia cito nos reversuros sperabamus, prout nobis injunctum, ad dominum papam accelerabamus, et venimus Senonis, quo nuntii proxima die quæ præcessit nos prævenerant. Eadem vero die in vespera ad dominum papam habentes accessum, ipsum nomine archipræsulis tanquam patrem et dominum qua decebat devotione et humilitate salutavimus: dicentes quod nos duo tantum eramus, qui evasimus de calore domus Rochab, et ad sanctitatis suæ pedes venimus ut nuntiaremus quod filius suus Joseph adhuc viveret, sed non dominaretur in terra Ægypti; quin potius ab Ægyptiis oppressus, fere fuisset extinctus. Enarravimus itaque, libenter audienti et paterno compatiendi affectu, filii sui archipræsulis pressuras, angustias et dolores, pericula in pugna illa apud Northampton ad bestias, pericula in falsis fratribus, pericula in fuga, pericula in via, pericula in mari et in ipso portu pericula, laborem, egestatem et ærumnam, et ad declinandas insidias habitus sui et nominis mutationem. Et audiens hæc patrum ovium pater, commota sunt paternæ pietatis viscera super filio, et paternum non valens dissimulare affectum lacrymans est, et ita compunctus ad nos, qui loquebamur, verbum dirigens: « Dominus, » inquit, « vester in carne adhuc vivit ut dicitis: magis tamen jam sibi in carne vivens privilegium martyrii vindicat. » Et quia jam valde sero erat, et nos ex itinere fatigati, data nobis benedictione et consolatione apostolica, ad hospitium citius non remisit, reversuros in crastinum.

Quæ obijciant archipræsuli regis nuntii coram viro apostolico.

In crastino vero dominus papa una cum fratribus suis venerabilibus cardinalibus, qui tunc fere omnes in curia præsentibus aderant, consistorium intrans, audivit nuntios: qui in primis dominum papam nomine regis officiose salutantes, causam adventus sui exponunt. Et in primis quidem archipræsuli suo, quod pacem regni et sacerdotii, tanquam pacis inimicus turbasset, obijciunt, quod crucem manibus propriis in curia regis bajulasset, quod missam de beato Stephano protomartyre celebrasset et demum fugam clandestinam fatue nimis et turpiter ecclesiam suam deserens iniisset: et quidem omnia hæc in regis ignominiam et contemptum et totius Ecclesiæ Anglicanæ et potissimum suæ provincie. Verum qui inter hos eloquentioris et elegantioris eloquii habebantur, et præsertim magister Gilbertus Foliot, Londoniensis, et magister Hilarius Cicestrensis episcopi, turbati sunt in dicendo, et dicendi ordinem et etiam recte accentuandi pronuntiationem in nonnullis dictionibus perdi-

derunt, juxta Sapientis dictum: *Propter similitudinem lingue lapsus quasi in pavimento cadentes* (Eccli. xx). Quod totum illius est ascriptum tunc et vere ascribendum operi et virtuti qui ora multorum aperit et disertorum linguas infatuat. Vir vero apostolicus, qui non solum ex nostris, sed aliorum multorum fida sed secreta relatione, causam dissensionis inter regem et archipræsulem et gestorum veritatem cognoverat, criminatioribus non adhibuit fidem, potius in consistorio publice hortabatur episcopos ut in archipræsulem suum parcius agerent. Unde et qui missi fuerant, videntes sic, fortiter et instanter regis nomine postulant ut archipræsulem in Angliam remitteret, pariter et a latere suo legatum, qui remota appellatione causam ibi inter regem et archipræsulem audiret et inter ipsos vel componeret vel causam per sententiam terminaret; ubi, sicut adiciebant, gestorum veritas verius et commodius agnosci poterat. Verum Romanus pontifex, necdum petitionem hanc vel concedens vel renuens, hortabatur attentius ut archipræsuli ad curiam expectarent adventum, et jam obiecta eo præsentem intendant, aut nihil obijcientes suam facerent petitionem, adjiciens in absentia ejus nil in eum statuendum, nec ipsos in forma illa quam petebant exaudiendos; at illi expectare nolentes, eo quod, ut aiebant, ultra terminum a rege sibi præfixum in curia moram facere non audebant, crebro postulant et instanter dictam regis petitionem adimpleri. Arctabatur itaque Romanus pontifex certuens regis juventutem et dominationem amplam, et durum illud et durum quod tunc erat in Dei Ecclesia schisma: metuebat quod si rex pateretur repulsam præsertim per tam magnos et honoratos factæ petitionis, major in ecclesia scissura fieret: quod et ipsi qui missi, præsertim laici, minabantur. Inde vero verebatur archipræsulem in insulam, in qua jam velut publicus hostis habebatur, et a qua cum tanta difficultate et tot periculis, quasi, ipso Domino educente, jam exierat, sua auctoritate remittere: ne sic archipræsulis innocentia, et causa opprimeretur justitiæ, unde et in se Dei provocare iudicium, et toti Ecclesiæ scandalum foret. Forte etiam et ob istud in insulam remittere verebatur. Sic enim est in insula contra regem insularum contendere, tanquam si vinculus in carcere contra magistrum et dominum carceris dimicet. Vir itaque apostolicus coarctabatur, præsertim plerisque fratrum suorum cardinalibus, illis maxime qui ut principibus et magnatibus placeant studere solent, adjudicantibus regis petitionem fieri debere, aliis vero renitentibus. Attamen librato demum consilio, et consilii ac fortitudinis desuper accepto spiritu, Pater patrum dissimulare non potuit, et dictam regis petitionem, in gravamen et oppressionem archiepiscopi conceptam, non adimplendam decrevit, nisi forte archipræsuli ad curiam expectarent adventum; alioquin in ipsius absentia nihil agendum contra ipsum. At illi expectare nolentes, voto et

causa frustrati, in Angliam non cum benedictione apostolica, sed potius, ut credendum verius, cum maledictione paterna reversi sunt, et in se et in semine suo maledicti, qui patris sui verenda non operuerunt, sed potius frontose detegere nequaquam veriti sunt. Et quidem eo festinantius acceleraverunt, reveriti quod ipsis secreto nuntiatum fuisset, nonnullos de militibus terræ, favore archipræsulis, et ipsorum odio, sarcinis suis, in quibus non modicum argenti sperabatur, per viam paravisse insidias. Unde festinanter et subito Franciam exeunt, multos ibi ad eorum spolia paratissimos, archipræsulis, ut diximus, favore, fugientes. Miro siquidem modo et incredibili, mox ut de archipræsule per universum ecclesiarum orbem innotuit sic, omnium dedit ei Dominus gratiam et favorem: in adversantes vero e diverso omnium odia concitavit. Illo profecto faciente sic, cui populus quem non cognovit servivit, et in auditu auris obedivit. Vix enim est ut non omnibus placeat, qui omnium placet auctori et cui omnium auctor, juxta quod de uno sanctorum legitur: « Quod quem perfuderat Deus gratia, ab omnibus amabatur; » adeo quod etiam nominis Christiani persecutores illos quos variis et exquisitis suppliciis peremerunt, ex virtutibus tamen quas cernebant commendarent. Sed de hoc plenius alias: ceptum historiæ ordinem prosequamur.

9. QUALITER NUNTII REGIS IN ANGLIAM REVERSI, ET ARCHIPRÆSUL A REGE FRANCORUM SIT EXCEPTUS.

Itaque non expectato in curia archipræsule, infecto negotio et proposito et voto suo frustrati, revertuntur in Angliam qui missi fuerant. Archipræsul vero, quem supra in Flandria adhuc, apud Sanctum Audomarum in præclara et religiosa Sancti Bertini abbatis dimisimus, propter terræ, quas, ut supra diximus, verebatur, insidias paucos ibi faciens dies, noctu Flandriam egreditur, sed in equis et comitatu multorum. Siquidem bonæ memoriæ Milo tunc Teruanensis episcopus, et supra nominatus Sancti Bertini tunc abbas, ipsum propter viæ securitatem comitati, eduxerunt de terra; et ad inclytam illam Galliarum civitatem Suessionem perduxerunt. Ad quam Domino procurante sic, et in crastino sui adventus, dominus rex Francorum venit. Et quidem Christianus ille rex, quem inter cætera virtutum ornamenta in regali fastigio perfectæ humilitatis decoravit insigne, mox ut Cantuariensem archiepiscopum in civitate audivit, ad hospitium suum descendit, et in salutatione prævenit ipsum in omni alacritate et exultatione excipiens; ex regia quidem clementia vexationi suæ et labori compatiens, ex regia magnificentia pacem et securitatem donans, et ex regia munificentia ad necessarios de fisco sumptus quandiu exsularet accipiendos compellens: ita quidem ut jam multi dicerent: Dominus dedit, Dominus abstulit: Dominus archipræsuli Cantuariensi regem Anglorum abstulit; Dominus regem Francorum

A dedit. Et quidem jam, ut superius diximus, pacem archipræsuli et securitatem per nuntios suos concesserat: verum rex prius in civitate hac supranominata visus est ab archipræsule quam nuntii pacis ad archipræsulem reverterentur, illos mox, ut supra diximus, e vestigio secuti Anglorum nuntios; qui contra archipræsulem Senonis ad dominum papam acceleraverunt. Archipræsul vero videns ita cor regis erga se, Deo et regi devotas gratias retulit, illum præsertim et corde et ore summa prosequens gratiarum actione, in ejus manu cercla regum sunt. Sed etiam memorandum hic quod cum archipræsul jam inde in longa quæ restabat peregrinationis suæ via et ver. . . datum, ut supra diximus, sibi et suis haberet viaticum, sumptus tamen de fide regis tam munifice et tam liberaliter a rege ipso oblatos accipere renuit, nipte qui ad dandum potius quam ad accipiendum semper paratus fuerat; juxta quod ipse Dominus dicere consueverat, beatus esse magis dare quam accipere. Verumtamen archipræsul a rege oblata non omnino renuit, sed regi gratias referens dicebat necdum fore tempus accipiendi nec necessitatem urgere adhuc. Et ita dominus rex et archipræsul per aliquot dies in civitate commorantes, recessit in multa gratia archipræsul a rege Senonis ad dominum papam properans. Cui rex statim de ministerialibus suis, qui ipsum per viam necessaria ministrando procurarent et ducerent, commisit.

C 10. QUALITER EXCEPTUS ARCHIPRÆSUL A VIRE APOSTOLICO ET DE EXSILII SUI CAUSA.

Itaque ad dominum papam Senonis venimus, qui venientem quidem ad se paterna suscepit benignitate, super vexatione ipsius multimoda et peregrinatione tam periculosa et dura paterne compatiens. Post aliquot vero dies placuit archipræsuli de suo et suorum consilio totius dissensionis inter regem et ipsum in Anglia et exitus sui a terra causam domino papæ et cardinalibus exponere. Nec enim dominus papa adhuc hoc ab ipso requisierat, expectans forte quod archipræsul tanquam providus non requisitus hoc faceret. Placuit itaque archipræsuli sic: nam, etsi per proprios nuntios fuisset prius significata totius mali origo et causa, et sparsim per alios hinc inde commeantes relata, consultius tamen videbatur, ut ipsemet causæ suæ merita exponeret et gestorum referret veritatem, et quas in ipsum præfati Angliæ nuntii imprimere conati sunt, ipsemet per se ipsum dilueret notas. Igitur post aliquot dies adventus nostri ad curiam domini papæ, venerabilibus viris cardinalibus præsentibus, non quidem publice in consistorio, sed in thalamo secretius, totam gestorum seriem et exitus sui causam, grata quadam et succincta brevitate enarravit. Grata, inquam, utpote cujus eloquentia modesta erat et elegans et lingua semper inoffensa. Et in concessione illarum consuetudinum quas supra apud Clarendune fabricatas et in scriptum reductas diximus, qualiter ipse lapsus fuerit mani-

teste confessus est et non negavit, et ex quibus ad lapsum inductus fuerit, quæ nos supra cum de his ageretur ostendimus. Et ibidem mox allata est expansa funesta illa scriptura secundum chirographi formam confecta, de qua supra satis meminimus, quam ante nunc nec papa, nec cardinales, etsi de ipsa non tamen ipsam audierant : unde et statim in audientia domini papæ et cardinalium omnia lecta sunt, consuetudines videlicet numero sedecim. Quam profecto scripturam, etsi forte hic esset locus, non tamen curavi hic, in hac videlicet libelli historici serie interserere, tum propter nimiam illic verborum inurbanitatem et indecentiam, tum propter historici hujus libelli, qui nunc in manibus est, prolixitatem evitandam : cum tamen ea scriptura exsilii nostri et martyrii causam contineat, quin potius favente Domino finito historico libello hoc scribetur in fine. Pariter et ab omni qui historicum libellum hunc transcribere voluerit, et scriptura illa semper in fine transcribatur, et legatur e nescientibus qui tam gloriosi martyris Thomæ exsilii et martyrii causam nosse desiderant.

Omnibus vero quæ in Scriptura continebantur perfectis, quibusdam etiam in ea lectis et relectis et diligenter et attente singulis auditis et cognitis, dominus papa acerrime motus statim excanduit in archipræsulem, arguens eum et dure increpans quod in illarum, ut aiebat papa, non consuetudinum sed tyrannicarum usurpationum assensu et ipse et qui cum eo erant episcopi sacerdotio suo renuntiaverint, et Dei Ecclesiam ancillaverint, adiciens multo satius omne sustinuisse discrimen quam tantis legis Dei subversionibus præbuisse assensum : recolens de Machabæis fratribus septem sanctam illam historiam, mirabilem quidem omnibus sed imitabilem paucis. Et improprians quod illi, cum non essent sacerdotes evangelici nec etiam legales sed Judæi, juvenes et privati, nec quidem pro lege evangelica, sed pro lege patria, pro lege porcina, varia et exquisita supplicia animo prompto et devoto passi sunt, et adjecit : « Verumtamen, » inquit, « inter abominabilia hæc, quæ in præsentia nostra hic lecta sunt et ex vobis audita, nulla quidem bona sed quedam tolerabilia sunt. Quæ utcumque potest Ecclesia tolerare, sed horum major pars reprobata et ab antiquis quidem et authenticis damnata conciliis, utpote directo sacris sanctionibus adversa. » Quæ vero hæc, quæve illa nos nunc distinguere non oportet ; quod liquet etiam his qui vel tenuiter sacrorum canonum experientiam habent.

Verumtamen vir apostolicus easdem prænomintas consuetudines, quas et archipræsul, et ob easdem causas breviter quidem, sed admodum indignanter mox ibidem in audientia cardinalium, nobis præsentibus, reprobavit et ab ecclesia in posterum damnandas censuit. Et demum ad archipræsulem se convertens : « Verumtamen, » inquit, « frater, etsi

tuus et fratrum tuorum coepiscoporum grandia fuerit excessus et enormis, tecum tamen agendum parcius ; qui etsi, ut confiteris ipse, cecidisti. mox post casum resurgere conatus es, propter casum multa jam gravia et dura perpressus. Et statim u cecideras, cum adhuc esses in Anglia, a nobis quæsisisti et meruisti de clementia nostra per litteras nostras absolutionis beneficium : et quasi hæc non sufficerent adhuc, eo quod confessio fieri per nuntium vel per scriptum non solet, nunc dextrum apostolicam sedem casum tuum devote et humiliter confitens in labore plurimo et variis adiisti periculis ; unde et dignum est et nos tibi hoc indulgemus ut in tuis adversis clementiæ nostræ consolationem et gratiam præ cæteris personis ecclesiasticis tanto plenius et affectuosius sentias, quanto pro libertate Ecclesiæ et pro fide et devotione nostra majora reliquisti et graviora perpressus es. » Et ita vir apostolicus archipræsulem primo paterna severitate objurgans, et maternæ post consolationis dulcedine reparans tunc dimisit. Et apostolica sic consolatione accepta, jucundi in hospitia nos ecepinus.

11. QUALITER CORREPTUS A CARDINALIBUS QUO TEMPORE SCHISMATIS CONTRA REGEM SE EXERERIT.

Verum in crastino, a quibusdam cardinalium et plerisque aliis de curia viris magnis et eruditis qui in scripturis multum poterant, talibus quippe curia abundare et florere consuevit, archipræsul tanquam familiaribus suis et faventibus sibi benigna quadam et amabili est asperitate objurgatus, quod diebus illis tam malis, tempore videlicet schismatis et inter ruinas Ecclesiæ, contra principem suum, contra potestatem tantam se exerexit ; parendum potius tempori et sustinendum dicebant, cum hora esset tunc et potestas tenebrarum, quin Petrus gladium suum non exerere sed jubetur reponere. Et, sicut addebant, zizania ab inimico homine superseminata, ab evangelicis servis nequaquam tunc colligenda, ne forte eradicando ea eradicarent simul et triticum : unde et juxta patrisfamilias præceptum usque ad tempus utraque simul sinuntur crescere. Quod et idem ipsum est magistri consilium, qui propter dierum malitiam tempus redimendum suadet : *Redimentes*, inquit, *tempus quoniam dies mali sunt* (Ephes. v). Et propheta similiter : *Ideo*, inquit, *prudens in tempore illo tacebit, quia tempus malum est* (Prov. xi). Adiciebant etiam hi quod fortes Ecclesiæ columnæ ad Ecclesiæ fabricam diuturnius et validius supportandam, interdum, discretionis manu adhibita, etiam quasi in fragiles et tennes calamos transformantur pro tempore ; quibus ad vehementem procellæ spiritum aliquantis per inclinari et cedere satius quam frangi supra vires resistendo. Quod et magister secundum sapientiam sibi datam, quemadmodum docuit et fecit. Cum enim illius veteris legis abolitionem prædicaret, tamen et ipse tempore cedens legem in se ipso implevit, cujus abolitionem docebat ; caput ex lege

condens et purificatus secundum legem, templum intrans et hostias offerens, Timotheum etiam circumcidens. Et demum cum esset magister gentium, Judæorum advocatus, et inter magnos theodorum maximus, utpote qui non ab homine neque per hominem evangelium didicisset, post omnia tamen hæc terrenæ potestati se subdidit Cæsarem appellando, ita censens per omnia hæc, cum tempus sic exigit, cedendum tempori et tempus redimendum pro tempore.

Qualiter archipræsul cardinalibus ad objecta responderit.

Auditis vero his archipræsul, qui tanquam privatus a magnis et sapientibus curiæ hæc sibi in euria obijcienda arbitrabatur, verum et cum suis prætractaverat super hoc, et sermones suos in iudicio jam disposuerat, secundum sapientiam et gratiam sibi datam mox respondit: « Fratres, » inquit, « non disiteor quin sicut vos viri tam edocti et eruditi dicitis, pro tempore tempori cedendum sit, et multa sustinenda pro tempore; fateor, inquam, et in hora hac et potestate tenebrarum, tanto videlicet imperatore Frederico et tanto antipapa Octaviano, schismaticis tam insignibus in catholicos principes qui ab Ecclesia non recesserunt sed perstiterunt, etiam multum delinquentes, nequaquam Petri gladium exercendum fateor, sed reponendum, ut dicitis, ne forte in Ecclesia Dei scissura deterior fiat, præsertim cum divisionis malitia plures semper quærat habere consortes. Tanta siquidem temporis potest esse malitia ut ecclesiæ solum gemitus et dolor restet et ad Dominum clamor, et dormiet tunc ecclesiasticæ disciplinæ severitas, ecclesia tunc per solum *ta* propheticum consecutura salutem. Et hoc est tempus malum quando videlicet malorum nulla spes restat correctionis, sed solum Deo vindicta, sicut ipse Dominus: *Mihi, inquit, vindictam* (Hebr. x). De quo et supra per prophetam dictum meministis: *Ideo prudens in tempore illo tacebit quia tempus malum est* (Prov. xi). Et tunc profecto juxta Sapientis consilium: Vindictæ Altissimi dandus locus. Est et aliud tempus quando videlicet correctionis malorum spes est. Et tunc quidem expectandum, sustinendum et orandum pro sustentatis. Alioquin sicut per Sapientem dicitur: *Vae his qui sustentiam perdididerunt* (Eccli. ii). Prius quidem tempus tenebrorum, et hora tunc et potestas tenebrarum, et tunc juxta Domini verbum gladius Petri reponendus. Secundum vero tempus quasi nubilum et tunc gladius Petri suspendendus, resumendus in tempore. Et secundum hæc tempora, de vindicta ecclesiastica seu de Petri evangelico gladio varie Scriptura loquitur: nunc videlicet de eo exercendo, nunc de reponendo, interdum vero suspendendo et resumendo pro tempore. Et hæc quidem, fratres, nostis me multo melius, utpote qui in tanta schola totius Ecclesiæ doctoris quotidie discitis aut docetis. Verum in audientia vestra deo dicimus hæc, non ut discipulos magistros do-

ceat, sed ne suspicemini quod ego gladium hunc contra principem meum dominum meum Anglorum regem, et si durius adversum me actum sit, exerci adhuc postulem vel desiderem. Sustinendum prius et regia clementia cum expectatione expectanda, juxta Sapientis consilium: *Fili, inquit, in mansuetudine opera tua perfee et super hominum gloriam diligeris* (Eccli. iii). Peragit enim interdum tranquillitas, quod non potest violentia, unde est et illud poetæ ethnici:

*Peragit tranquilla potestas
Quod violenta nequit.*

Et doctorum unus: « Sæpe, » inquit, « flectit humanitas quos nec virtus potuit superare, nec ratio. » Et ideo non ut arguitis me, non pareo, imo pareo, et libenti animo pareo tempori et non prævenio tempus, sustinens et sustinere paratus, donec favente domino domini mei regis iram indulgentia subsequatur: adeo quod et si in eum gladium exertum cernerem, me interponerem et occurrerem pro me in ipsum exerto. Prius enim tempus sustententiæ, tempus misericordiæ et justitiæ postea, ut ita misericordiam et iudicium cantemus Domino. Verumtamen, sicut jam tetigimus, ut tamen nihil contra decreta apostolica seu in veritatis præjudicium audeam, nec indistincte nec usquequaque verum quod diebus malis seu tempore schismatis in principes vel in eos qui sociam multitudinem habent, ecclesiastica non sit exercenda vindicta vel Petri gladius exerendus. Siquidem tempore schismatis qui ab Ecclesia non recesserunt sed perstiterunt, principes populorum adeo possent tam dire tam dure matris suæ Ecclesiæ pacem ipsius turbando concutere latera et excutere viscera, quod ipsos tanquam abortivos a se rejiceret et fierent velut ethnici et publicani; unde et magister in tenera adhuc novellæ ecclesiæ plantatione non solum in concutientes ejus latera et effundentes viscera, sicut illi sunt qui personas ecclesiasticas opprimunt et pacem ejus perturbant, sed in eos etiam, qui per varias criminum maculas ecclesiæ facièm deturpant, gladium evangelicum exerit. Si is, inquit, qui frater nominatur, est fornicator, aut avarus, aut idolis serviens, aut maledicus, aut ebriosus, aut rapax, cum ejusmodi nec cibum sumere (I Cor. v). Et alibi, Si quis, inquit, non obedierit verbo nostro per epistolam, hunc notate et ne commisceamini cum illo ut confundatur (II Thess. iii). Ecce quia tenera adhuc ecclesia et novella, quando etiam parvulæ in ipsis natiuitatis suæ cunabulis manus jam omnium contra ipsam, fiducialiter tamen et intrepide magister gladium exerit, ut sponso gloriosam sponsam exhiberet, non habentem maculam, aut rugam, aut aliquid ejusmodi sed esset sancta et immaculata. Si ergo magister gentium in tenera adhuc et novella ecclesia audet sic, multo minus trepidandum nunc, quando ad prophetæ vaticinium ecclesia posita est in superbiam omnium sæculorum. Alibi etiam magister discipulis, quos inter nascentis ecclesiæ primordia

prælatos ordinaverat, impropere sic: *Sustinetis*, inquit, *si quis vos in servitutem redigit, si quis devorat, si quis accipit, si quis in faciem vos cecidit* (II Cor. xi). Ecce magistri in discipulos, quos super novellam adhuc ecclesiam prælatos creaverat, pro ecclesiasticæ servitutis sustentia improprium. Et si servitus hæc minime sustinenda tunc, quando, ut jam diximus, ipsa parvula adhuc et manus omnium contra ipsam, multo minus nunc. Nam etsi schisma nunc sit, sicut frequentius in Romana Ecclesia accidit, attamen qui schismatici habentur Christianæ sunt fidei professores, ecclesiam quidem vulnerantes, perimentes minime, miserante Domino ad Romanæ Ecclesiæ obedientiam reversuri in brevi. Et si ecclesiastica non sufficiunt, vel ab ethnicis exempla sumamus. Inter quos unus poetarum gentilium alium quemdam metricè commendat pariter ethnicum, quod sub duro principe et temporibus malis bonus, hoc est liber, esse auderet, ad ipsum quem commendat loquens sic:

*Laudari debes quoniam sub principe duro,
Temporibusque malis ausus es esse bonus.*

Bonus, inquit, id est liber, generale boni vocabulum sic specificans. Et profecto nisi in pacis ecclesiasticæ violatores ecclesia libere et intrepide gladium exerat, ecclesiasticus iudex sine causa gladium portat. Et quidem pax ecclesiastica hæc non solum per schismaticos et hæreticos, sed et sæpe per tyrannos Ecclesiæ filios perturbatur. Qui, ut supra teligimus, matris suæ concutientes latera, excutunt viscera, personas ecclesiasticas opprimunt, expellunt, leges novas condunt, et cleri libertatem, quæ Ecclesiæ decus et virtus est, adimunt; ita Ecclesiam in superbiam sæculorum positam ancillantes ut sit sicut populus et sacerdos. Et in tales quidem etiam tempore schismatis, tempore hæreseos, quemadmodum in schismaticos et hæreticos, ecclesiastica censura exercenda, et Petri gladius exerendus. Alioquin vicarius Christi successor Petri sine causa, ut jam diximus, hunc portat gladium, quem sicut iners et trepidus tempore belli non exerit sed abscondit, et Ecclesiæ virtus in adversitate non perficitur sed infirmatur. Quod rex et Propheta elugebat: *Infirmata est*, inquit, *in paupertate mea virtus mea* (Psal. xxx). Sed e contra Magister in infirmitate de potentia sua gloriatur: *Quando infirmor*, inquit, *tunc potens sum* (II Cor. xii). Et alibi ad discipulum: *Memor esto*, inquit, *Dominum Jesum Christum resurrexisse a mortuis secundum evangelium meum, in quo laboro usque ad vincula, quasi male operans, sed verbum Dei non est alligatum* (II Tim. ii). Ita et ad Magistri exemplum, Ecclesiæ in infirmitate sua de potentia sua gloriandum, unde nec verbum Dei gladius spiritus alligandus, sed multo magis inter vincula gloriosius tunc exeritur. Nec enim est quod Ecclesia hæsitare habeat aut timere, cujus, ut ait doctorum illustrium unus: « Proprie proprium est, ut tunc intelligat, cum arguitur, tunc vincat cum læditur, tunc obtineat cum deseritur. » — Et quæ, ut itidem alius

A doctorum ait, « de adversitate lætatur, angustia di-
« lætatur, tristitia erigitur, fletibus pascitur, sanguine
« rigatur, mortibus secundatur, quæ semper novit
« triumphare mundi cladibus ingravata, et inde crescit
« unde mundus deficit. » Arca enim est quæ quanto
fortius mundi fluctibus tunditur, tanto altius erigitur. Nec igitur est, ut vos, fratres, quadam mihi verborum insinuatione innuitis, quod etiam hoc tempore schismatis Ecclesiæ timendum sit aut pro Ecclesia, quo minus vicarius Christi successor Petri in ecclesiasticæ pacis violatores Petri gladium exerat. Non est, inquam, Ecclesiæ timendum aut pro Ecclesia. Nam ut firmissimum et quod infirmari non potest testimonium inducamus, adhuc juxta ipsius veritatis in Evangelio verbum, ecclesia hæc domus illa est sapientis viri supra firmam petram ædificata, quod ibi ventorum non debeat formidare injurias nec inundationum. Si quidem in petra exaltata, in petra secura, in petra firmiter stans, secura ab hoste, fortis a casu. Et, si adhuc petra non sufficit, *In sole*, inquit, *posuit tabernaculum suum* (Psal. xviii), in sole iustitiæ Christo fundata ecclesia; unde et Magister: Fundamentum, inquit, positum est quod nemo mutare potest, quod est Christus Jesus. Nos igitur, fratres, simul stemus, qui retrorsum non abivimus, et in hac paupertate, in hac diminutione nostra, in hoc schismatis tempore virtus nostra non infirmetur; sed cum tempus exegerit, non mundani timoris servi sed iustitiæ simus ministri. Scriptum est enim quod: *Iustitia et pax osculatæ sunt* (Psal. lxxxiv). Bene, inquit, osculatæ, confederatæ videlicet et concordēs. Iustitia quippe pacem generat, alit, et ne violetur, protegit. Et ideo dux hæc, tanquam mater et filia, nutrix et alumna, et velut tutrix et pupilla mutuis quasi delectantur oculis et continuis se amplexibus fovēt. Adeo videlicet confederatæ inter se et concordēs ut neutra absque altera sit, unde et de harum confederatione et concordia illustrium Ecclesiæ doctorum unus: « Amant, » inquit, « se dux hæc, adeo ut qui fecerit iustitiam in- » venit pacem et non aliter. » Nec igitur diebus malis tempore schismatis vel hæreseos, seu tyrannis vim Ecclesiæ inferentibus et Ecclesiæ perturbantibus pacem, arma iustitiæ reponenda, sed verius, ut tamen nihil contra apostolica statuta seu in veritatis præjudicium audeam, arbitror secundum Magistri documenta pariter et hortamenta sanctorum indistincte in quoslibet ecclesiasticæ pacis violatores a iustitiæ ministris libere et intrepide iustitiæ arma exercenda, ut ita in die bellorum Domini in captivandæ pacis auxilium vexilla iustitiæ prodeant. Nam sicut vulgo dicitur, arma pacem ferunt: et iustitia quidem armata, pax vero laureata et inermis describitur utpote quæ per athletam iustitiam vincit. Violatæ igitur seu captivæ pacis tempore turpe valde et indecens, si iustitia se occultet, quia nisi vel paci captivæ vel captivandæ mox iustitia subveniret, iustitia pacem pacis osculo proderet, iustitia enim et pax osculatæ sunt. Et certe, fratres, ut non

parcens veritatem dicam, tantis quas modo supra in allocutione vestra innuistis, dissimulationibus addentes inter cætera quod fortes Ecclesiæ columnæ etiam in fragiles et tenues calamos debeant transformari pro tempore, tantis revera dissimulationibus peccatoribus dantur cornua et reges transeunt in tyrannos. Et præcipui Ecclesiæ filii præcipui Ecclesiæ sunt inimici, ipsis in matrem suam Ecclesiam libere debacchantibus ecclesiasticæ disciplinæ severitate torpente. Ita ut tolerabilior sit foris infidelium gladius, quam intus filiorum rebellio, et plangat cum rege illo sancto: *Ecce*, inquit, *in pace amaritudo mea amarissima* (Isa. xxxviii). Prima enim amaritudo amara pati ab inimicis; secunda amarior sustinere a proximis; tertia vero amarissima impugnari a filiis; hoc enim est tanquam si viscera propria convertantur in ulcera. Propter quod Sapiens: *Fili, inquit, tibi sunt, erudi et curva illos a pueritia illorum* (Eccli. vii). Verum, fratres, ut in insipientia vobis loquar, vos enim cogitis, queritis, ut video, vertere mihi in culpam quod, ni fallor, ad gloriam mihi summam et immortalem convertendum. Ecce enim quod ad arcam sanctificationis inclinatam, ad ipsam erigendam, pro officii mei debito, et pro viribus jam apposui manum et supposui humeros inter ruinas Ecclesiæ, Ecclesiæ ruinas quantum datur erigendo, et inter ruinas ejus fere jam obrutus, ne ipsa obrueretur. Et si gloriari oportet quod quidem oportet, quia etiam expedit nunc sic, inter Romanæ Ecclesiæ schismata quasi ruente orbe, patres mei decessores, Cantuarienses archipræsules, quasi cervice erecta semper stare inflexibiles consueverunt, tanquam firmissimæ domus Dei columnæ et fortissimæ: vœtum ut unum vobis, etsi timide, utinam non temere dixerim, etsi vos in præsentem ex qualicunque causa tam gravis schismatis scandalo ruitis, ego tamen inter vestras quasi orbis ruinâs, Domino manum suam supponente, non ruam; vos tanquam domini nostri et patres quod bonum in oculis vestris videbitur facietis. Ego summi pastoris vester qualiscunque coepiscopus, et ejusdem Domini servus, tantorum patrum meorum, successor, licet indignus, adorabo vestigia. Quos, etsi non possim consequi, desidero tamen utcumque æqui, unde et ego sicut nunc cernitis, quod et scio, Domino sic disponente, accidisse, cui, non vobis, teneor commissa mihi talenta cum fenore solvere; ego, inquam, nunc proposito mihi gaudio pro Ecclesia sustineo crucem confusione contempta, et velit nolit, probet vel improbet mundus, sustinebo, in flagella paratus quousque juste judicantis Domini manus super me nunc extenta se retrahere velit. Certe eo usque in flagella paratissimus et magis eligens affligi pro Ecclesia Dei quam peccati temporalis et aulæ Augustalis habere jucunditatem. Novit enim clerus, novit populus, novit mundus, quantus in aula fuerim, et de aula ad Ecclesiam assumptum quanta me gloria sequeretur, si domini mei regis in omnibus voluntati obsequer. Qui duplicis re-

A vera gloriæ stola insignier tunc, sicut sacerdotali et regia. Sed certe, ut verum fateor, mihi nunc pro minimo est ut in facto hoc ab humano die judicet, solum in præsentem gloria mea sit conscientiæ meæ testimonium. Et si prudenter et pie scriptum illud, quod dominus papa hinc in publica vestra audientia sic damnavit, velitis advertere, obedientia vestra præsentisurbationis nostræ non modica causa est.

« Quod autem tacite arguendo me dicitis quod ad Magistri consilium tempus redimere debuissim, super prudentia vestra satis admirari non possum. Si quidem ad Magistri consilium me redemisse hoc arbitrator. Et si super illo Magistri verbo sanctorum interpretatio, sicut generalis et necessaria, ita vera est, jam non arbitrator sed certissime scio me tempus hoc redemisse. Nec enim Magister ibi docet temporis redemptionem, ubi ecclesiasticæ libertatis dispendium vertitur, unde et sicut jam supra diximus, et hic iterare necessarium, discipulus quos super rudem adhuc et novellam ecclesiam prælatos constituerat, sustinentiam servitutis improperat: *Sustinets*, inquit, *si quis vos in servitutem redigit, si quis devorat, si quis accipit, si quis in faciem vos cecidit* (II Cor. xi). Ecce quod Magister qui alibi hortatur ad temporis redemptionem cum dies mali sunt, minime intelligit temporis redemptionem ubi servitute introducta ecclesiasticæ libertatis deperit honor, verius quippe ibi quam temporis redemptio, temporis perditio, et Ecclesiæ ignominiosa abjectio est. Nam juxta sanctorum conventiam quid est secundum Magistri consilium tempus redimere? Certe, ut de meo nihil afferam hic, nec enim mea doctrina mea est, sed sanctorum, quod tempus sit redimendum multi consulunt, sed pauci norunt, pauciores vero agunt et aggrediuntur quod norunt. Nam juxta Magistri consilium et interpretationem sanctorum, quid est tempus redimere? Dare quidem et accipere temporalia, dare et accipere tempus, opportunitatem videlicet serviendi Deo et vacandi divinis. A quæ temporalia, temporales videlicet et terrenæ occupationes et curæ, nos avertunt. Ut igitur tempus acquiramus, temporalia danda sunt pro tempore, et sic tempus redimimus. Unde et Magister magistrorum in Evangelio, de quo hoc magistri verbum videtur sumpsisse originem: *Si quis, inquit, vult iudicio tecum contendere et tunicam tollere, dimitte ei palium* (Matth. v). Ac si dicat: Noli propter temporalia damna seu curas temporales et causas cordis tui pacem et quietem amittere, quo minus habeas tempus vacandi Deo tuo. Alioquin non juxta Magistri consilium tempus redimes, sed tempus perdes. Huic etiam doctrinæ evangelicæ ethnicorum tritum et antiquum proverbium consonat: « Nummum, » inquit, « querit pestilentia: duos illi da et ducat se. » Videte itaque, fratres, si placet, et attendite si non fecerim sic, si non redemerim tempus, qui temporalia dedi pro tempore; qui Ecclesiæ Cantuariensis divitias et honorem, quæ inter occidentalis orbis ecclesias præfulgens est, pariter et domini mei

regis gratiam et gloriam pro mea et cleri mihi crediti libertate et pace dereliqui, favente Domino gratiam pro gratia et gloriam pro gloria mihi et Ecclesie recepturus adhuc, præter causas alias, ideo præsertim terram fugiendo egrediens quod in præsentibus ibi fructum facere nequavissem. Qualiter etiam et Apollo ille magistri discipulus, quem Corinthiorum episcopum ordinaverat, ipsos fugiendo deseruit, quia sedare nequavisset. Ita quod etiam multum rogatus a Magistro, reverti ad eos tunc nollet, meturus ne propter incorrectos non faceret fructum. De quo Magister ad discipulos: *De Apollo, inquit, fratre notum vobis facio quam multum rogavi eum, ut veniret ad vos cum fratribus, et utique non fuit voluntas ut tunc veniret (I Cor. xvi).* Sic et alii pastores multi et boni ob causam similem aut penitus sine grege semel commissum sibi gregem deserentes, aut de grege ad gregem translati ubi utilius impenderent curæ pastoralis officium. Sic igitur nec pro illorum, sicut existimo, nec pro mea fuga apologiam necessarium texere. Præsertim cum ego non solum desperatæ correctionis causa, sed ideo etiam me subtraxerim, ne remanendo magis morti fructificarem quam vitæ. Remanendo quippe in terra et me in tanto regie iræ fervore opponendo cum multo ecclesiasticæ libertatis dispendio dolorem super dolorem apposuissem de facili. Nam juxta Sapientis dictum: *Sicut rugitus leonis, sic ira regis (Prov. xx).* Ira enim non habet misericordiam nec erumpens furor, et impetum concitati ferre quis poterit? unde et tunc cedere consultius. Alioquin non animarum rectori, sed potius videri posset insano et temerario similis, qui sciens et prudens leoni rugienti occurrit aut qui contra rapidissimum torrentis impetum nititur. Quod Sapiens expressim inhibet: *Noli, inquit, resistere contra faciem potentis, nec coneris contra ictum fluvii (Eccli. iv).* Quod ego secutus cessi. Siquidem cor principis, quod ut novit mundus aliquando in manibus meis sic erat, peccatis meis exigentibus sic, obfirmatum nunc contra me, unde et, ut jam dixi, elongavi fugiens, fuga mea inductam nuper in Anglicanam Ecclesiam servitutem non auctoritate roborans, quin potius ipsius sic fortius demum favente Domino et apponente manum suam jugum excussurus omnino. Et quidem major, sicut ex dictis ni fallor liquet, me fugiente, quam si me tunc temere opposuisset, servitutis hujus concussio, eo ipso quod fugi sic me opponens. Nec enim ob id dico hæc vel fugi sic, quod successoribus meis fugiendi præstare velim exemplum, nisi forte expediat sic, et id urgentissima rerum ratio postulet; sed hoc dico quia Cantuariensis contra principem suum, gloriose quidem si causam habet, sed nihilominus semper periculose decertat. Sic enim est cum metropolitano in insula regi insulano se opponit, tanquam si tentus in vinculis et in tenebris carceris abditis carcerarium provocet. Et hoc quidem periculum decessorum mei fere omnes experti sunt. Hæc est enim omnium vere Cantuariensium archipræsulum, et

A semper fuit dura et periculosa concertatio, videlicet ut aut in insula se opponant, aut inita fuga si forte magis expedit sic ab insula per multos insidiarum laqueos et angustias exeant.

« Et unum vobis proponam, proximum decessorem Patrem meum et dominum felicitis memoriæ Theobaldum archipræsulem, cujus et ego, sicut et in aliis periculis multis et angustis, et in hoc opere quod nunc rememoratus sum, comes eram tunc individuus. Contigit, ut plerumque solet, inter virum apostolicum sanctæ recordationis Eugenium et Anglorum regem tunc Stephanum simultas; archipræsule et personis regni, contra mandatum apostolicum, ad Remense concilium quod convocabatur tunc a rege transfretare inhibitis, verum archipræsul omnimodis obedire attentans, noctu furtive et periculose admodum, duobus tribusve secum maris parum scitis, in scapha modica et tenui oceani undis se commisit et ventis; et quasi absque nauclero et remigio Remis venit sic. Qui cum in concilio se præsentaret, et vir apostolicus jam ipsius viæ didicisset periculum, publice mox et in omni audientia dixit in concilio: « Hic est, » inquit, « venerabilis frater » noster Cantuariensis archiepiscopus, et magis nando quam remigando, ad nos veniret oceanum transmeavit. » Et ita Pater meus hic ob causam fugit tunc, sicut et nunc ego. Alioquin cum causa subest, si neutrum horum fecerit, a patribus suis degenerans, non ut legitimus sed nothus, Cantuariensis non erit; nam is forte talis extra disciplinam est, cujus omnes Patres sui participes facti sunt. » His dictis, nonnulli audientes sic archipræsulis zelum necessarium a terra egressum commendabant, et alii ex auditu minime persuasi, eadem quæ prius criminabant, tali tempore in terra remansisse et sustinuisse dicentes satius. Verum dominus papa hoc solum, ut supra diximus, arguit quod præfatis consuetudinibus quacunque ex causa præbuisset assensum. Unde et tantum habentes egressus nostri fautorem, aliis qui derogabant in præsentiarum omissis, ceptum historiæ ordinem prosequamur.

12. QUALITER ARCHIPRÆSUL FONTINIACUM AD PERGRINANDUM ELEGERIT.

Cum vero jam aliquot dies fecissemus in curia, D archipræsul cum suis deliberat et pensat aliquem de locis religiosis, quo declinando commodius possemus et honestius provium a Deo peregrinationis nostræ præstolari eventum. Et cum nobis, qui Ecclesiæ causam agebamus, ad aliquod de monasteriis declinare religionis intuitu videretur consultius, præ cæteris in aliquo monasteriorum de sancto illo ordine Cisterciensi peregrinari prælegimus, tum propter ordinis religionem insignem, cum propter magnam ordinis quietem et pacem, eo quod sicut corde, ita et corpore sunt remoti a sæculo ordinis illius professores. Et inter cætera ordinis monasteria unum prælegimus in Burgundia situm, quod Pontiniacum nominatur: insignis vero et præclara illius monasterii religio habebatur. Quod et præfate

civitati Senonis, in qua dominus papa propter A schisma morabatur tunc, vicinum erat, solum per duodecim leugas distans. Et adhuc quia amplæ erant et abundantes monasterii facultates et multa charitas in erogando.

Vir igitur apostolicus ad petitionem nostram ablatem loci et potiores de fratribus vocat : et cum abbas et fratres ex ipsius domini papæ relatione et quod tamen prius ex multa famæ celebritate audierant, archipræsulis probitatem et virtutem et præsertim causam Ecclesiæ quam agebat certius cognovisset, Domino statim gratias agunt devotissimas, quod inspirante, palæstrita suus talem locum, velut quamdam agonis sui palæstram, elegerit. Unde et cum ab adventu nostro circiter septimanas tres in curia fecissemus, apostolica licentia et benedictione accepta Pontiniacum venimus, a toto conventu cum tanta alacritate et jucunditate tanquam hostia cœlitus missa accepti. Qui omnes nobis humanitatem exhibentes, præter institutionem ordinis et esum carniū et alia quædam animo prompto et voluntario indulserunt. Et quidem supra quam dicere nunc tempus sit, apparuerunt benignitas et humanitas ordinis circa nos. Tertio vero quartove adventus nostri die, archipræsul capitulum ingrediens, causam Ecclesiæ quam agebat, Domino et ipsorum orationibus commendavit. Et compositis sarcinulis nostris, vicinas sed divisas infra septa monasterii mansiones accipientes, nos quotquot id officii erat, sacrarum litterarum lectioni cœpimus mox studiose intendere.

Archipræsul vero, post tantas quas supra ostendimus ipsius turbationes, quasi post densum tempus et nubilum, ad serenitatem et tranquillitatem divinæ lucis cœpit se mox tota mente convertere, lectioni, orationi et meditationi se dans totum. Hoc vero erat tempus, quod ab initio promotionis suæ in archipræsulem, quod etiam tempore cancellariæ, sicut ab ipsomet accepi, inter mundi vanitates præoptaverat, sciens quod sicut juxta Sapientis dictum : Sapientia in otio scribitur, ita et discitur et docetur. Fuit igitur illud monasterium nostrum nobis sicut certaminis palæstra, qua exercitabamur, pariter et quædam virtutum schola qua erudiebamur ad prælium, ita ut quotidie diceremus Domino : Bonum nobis quod humiliasti nos, ut disceremus justificationes tuas.

De expulsiis ab Anglia et proscriptis pro archipræsule.

Verum dum multa quiete et otio erudiremur et exercitaremur sic, venit post dies aliquot quidam ab Anglia duri nuntii hajulus, nuntians quod in prælatorum nuntiorum adventu a domino papa, eo quod, ut supra ostendimus, voto suo frustrati et petitione inexplata rediissent, ex regis edicto archipræsulis et suorum, qui cum eo, bona omnia tam mobilia quam immobilia confiscata, ac si nuntiet Job alteri : *Ecce Sabæi, qui irruentes tulerunt omnia* (Job 1); verum et hoc quidem gaudentes sustinui-

PATROL. CXC.

mus, bonorum nostrorum rapinam suscipientes eum gaudio, forti illi athletæ conclamantes : Dominus dedit, Dominus abstulit, sicut Domino placuit ita factum est. Verum is qui venerat adjecit, unde plurimum patiebamur, quia compassi patientibus, videlicet quod archipræsulis tota cognatio et qui familiares existerant, aut etiam qui ab ipso aliquod susceperant clientelæ officium, ejecti omnes et proscripti terram abjuraverint; hoc etiam in juramento contentum, nullo modo se moraturos per viam, donec, ubicunque reperiretur, archipræsulis se offerrent conspectui, ut archipræsule eo amplius exacerbato ira cresceret cum dolore. Et adhuc in ipsorum etiam, qui archipræsulem extra terram secuti fuerant, cognationem par et similis furor debacchavit. Ejecti sunt itaque et proscripti et hi et illi, cognatio et cognatio. Et omnes terram nativitatæ suæ abjurantes, nisi forte aliqui essent, qui multæ pecuniariæ interventu se redimere potuissent. Quod tamen admodum paucis concessum, unde et ad edictum hoc turba magna, bonis suis omnibus confiscatis, in egestate multa et angustia terrarum egressa est, viri et uxores, juvenes et virgines, senes cum junioribus, servi et ancillæ, parvuli etiam in cunabulis et ad matrum adhuc pendentes ubera. Non parcebatur sexui, non deferbatur ætati, non æstimabatur conditio, acsi iterum Job alteri nuntietur : *Ecce ventus a regione deserti, qui concussit domum, quæ corruens liberos tuos oppressit* (ibid.). His vero omnibus confiscatis et huic executioni pœnali, quidam aulicorum satellitum mero archipræsulis odio præfectus est : qui inveterato odio archipræsulem oderat, ad exsequendum malitiæ opus talis præelectus, ut archipræsul eo amplius exacerbaretur, et de quo satis fidebatur, quod nec unum pœnalem mandatorum iota præteriret. Rannulfus cognomento de Broc hic erat, qui etiam de suo superadjecisse creditur ultra mandatum, dolorem super dolorem apponendo. Malitia quippe, etsi interdum parvas habeat vires, multos tamen semper habet conatus, unde et occasione aliqua a superiore concessis ad malum viribus, semper in immensum se extendit et ad male faciendum fines datos excedit.

Quæ profecto malitia et adhuc ad quiddam insauditum, eo magis impium quo plus profanum, se extendit. Nam cum quotidie ab ecclesia pro archipræsule suo jam peregrinante oratio fieret, publico quidem edicto per terram inhibuit ne de cætero fieret. Et sic quidem a tam communi, a tam generali ecclesiæ suffragio, tanquam aqua et igni velut hostes publici interdicimus. Quod etiam ad hæreticos, ad Judæos, ad ethnicos, ad ipsos etiam Christi crucifixores extendit, diligentis et miserantis Domini latum mandatum nimis. Verum hic patre peregrinante et quasi periclitante jam, ne dum manibus audeant, filiorum etiam ora clauduntur, ne patri periclitanti subveniant, vel sic verendum, ni fallor, Deo vero et justo disponente, ne aliquo tempore accidat ut qua-

mensura nobis mensum, et eis remetiatur qui nobis sunt metiti sic: Filii insurgant adversus patrem, et pater adversus filios, et duo in tres et tres in duo dividantur, et de divisione demum fiat consumptio. O malitia, quam viva, quam efficax, quam penetrabilis tu, quæ ipsam Dei imaginem hominem, non jam penetrando, sed magis perforando, sic vulneras, et ab homine quasi fonte pietatis nativo omnem humanitatis dulcedinem sic exsiccas, ut etiam patri negetur a filiis, quod et ipsi debent persequentibus et calumniantibus se! Homo quippe sicut ex natura homo, et ex natura humanus: imo ut expressius et non emphatice loquar sed proprie, ipse homo, misericordiam et pietatem quasi quædam primordialia semina suæ ex ipsa origine habens inserta naturæ; quæ quidem velut quædam naturæ divinæ privilegia ab initio sibi soli reservavit Altissimus. Quibus tamen idem sapiens et solus pius et misericors, summus omnium opifex, suam in creatione hominis venustavit et ornavit imaginem; nisi quia, prohi dolor! cito ex inobedientia per vindicem iuste iudicantis Domini iram navorum maculæ super induta sunt. Verum cum per miserantis opificis manum imago ipsius denigrata reformatur, in nullo magis hostis ille antiquus a Dei imagine hac effugatur et fugit, quam si pietate et misericordia, velut quibusdam coloribus pretiosissimis, ipsam intueatur decratam et ornatam. Mox siquidem tanquam tetro et horrendo sibi imaginis splendore reperiussus, illa tenebrarum potestas effugatur et fugit et veretur recedere. Verum in hoc facto sæculis omnibus detestando malitia iram pessimam consultricem habens, contra naturam naturæ hominis, hominis hic captivavit naturam, ita ut homo, si tamen homo, omnium bestiarum sævitiam hic excederet. Nam ut plangendo iterem, quod et iterando plangendum et plangendo iterandum est, quid facto hoc inhumanus, imo ut adhuc loquar expressius in homine, quid inhominus quidve ignominiosus? Hinc matres miserae cum parvulis suis ad ubera adhuc pendentes ejiciuntur, proscribuntur: hinc vero quod in communi debetur omnibus, etiam patri ipsi a filiis commune omnium suffragium tollitur, et pro patre periclitante filiorum ad Deum orantium ora obstruuntur, volve et revolve omnem historię seriem, et lege et vide si a sæculo auditum in persecutione seu proscriptione ulla, hujusmodi factum sit. De sermone exhortatorio quo eruditi archipræsulis ipsum sunt allocuti.

Archipræsul vero primo audiens et postea videns hæc gesta sic cœpit sollicitus et mœstus esse, nec eam foris ostendit faciem, quam heri et nudius tertius. Unde et archipræsulis eruditi, peregrinationis suæ socii, advertentes hoc, quædam exhortatorii pariter et consolatorii sermonis allocutione ipsum adoriuntur sic: « Domine, » inquit, « quare in auditu novi nuntii hujus ab Anglia, facies tua sic concidit et vultus sic est in diversa mutatus? Nos nunc alloquentes te si placet vel medicum sustine. Tibi quippe

et nobis, qui secuti sumus te, communis est causa, communis pœna, communis pugna, favente Domino et communis erit victoria et communis corona. » Hæc vero quæ nunc de novo superaddita est, ejecutorum et proscriptorum pœna, tibi et nobis communis, si pœna est, medicinalis est. Si pœna est ideo dicimus, eo quod magis ut nobis videtur censenda sit nomine medicinæ quam pœnæ, super alia velut mordax quoddam epithema a cœlesti medico super apposita peccatorum nostrorum vulneribus. Nec igitur per impatientiam repellamus a nobis curantis medici manum, nec fatigemur; dum a patre arguimur, si pater super dorsa filiorum addat flagella flagellis. Nec, inquam, fatigemur nec ploremus propter flagella, sed cantemus cum Propheta penitente et flagellato, dicentes singuli: *Quoniam ego in flagella paratus sum (Psal. xxxvii)*: si forte vel sic omnium injuriarum malefactorum omnium ultor Dominus in omnes adinventiones nostras ulciscatur. Propter quod et per eundem Prophetam Deus Moysi, Aaron et Samueli propitius fuisse dicitur; quod in omnes eorum adinventiones ulciscetur: *Deus, inquit, tu propitius fuisti eis et ulciscens in omnes adinventiones eorum (Psal. xcvi)*. Magna quippe ira Dei impunita nequitia. Unde et Propheta prius prosperatus et flagellatus, postea: *Non, inquit, æmulari in homine qui prosperatur in via sua (Psal. xxxvi)*; eo quod sicut per prophetam alium ipso Domino dicente: *Iste talis quasi pecus occisionis est, quod saginatum ad victimam ducitur. Domino ad prophetam respondente, sciscitatur propheta a Domino: Quare, inquit, via impiorum prosperatur, bene est omnibus qui prævaricantur, inique agunt? (Jer. xii).* Cui Dominus: *Congrega, inquit, eos quasi gregem ad victimam et sanctifica eos in die occisionis (ibid.)*: ac si dicat propheta: Prædic et prænuntia prophetali spiritu eos congregandos quasi gregem ad victimam. Et revera talis et tanta vitæ hujus prosperitas absque omni obstaculo sine omni flagello, Dei quidem miseratio est: sed talis certe Dei miseratio omnem Dei iram excedit. Misericordia enim hæc juxta prophetarum unum: *Quasi nubes matutina et quasi ros mane pertransiens, quasi spuma super faciem aquæ, aut sicut pulvis a turbine raptus ex area, et sicut fumus de fumario (Ose. xiii)*. Unde et quo sic miseretur Dominus, eo plus iratus peccanti Synagogæ. *Recessit, inquit, zelus meus a te, ultra non irascar tibi. Et alibi per Prophetam alium: Dimisi, inquit, eos secundum desideria cordis eorum, ibunt in adinventionibus suis (Psal. lxxx).* Ecce sæculi hujus, ecce vitæ hujus prosperitas quæ quasi amurea fluit per plateas, oleo in torculari presso et postea reposita in cellaria. Et tu, Domine, ut tamen absque Domini loquar offensa, Dei quippe sermones loquimur, tu quidem aliquanto tempore amurea fuisti per plateas fluens, omnibus absque omni obstaculo tibi ad nutum et votum succedentibus. Sed videtur nunc quod amuream convertere velit in oleum qui convertit aquam in vinum. Si ergo oleum

esse desideras, torcularis pressuram sustineas necesse est, donec ex torculari in apothecam defluas. Verum pro novo hoc tam atrocis facti auditu, de sollicitudine et mœstitia quam ostendis, conturbamur plurimum. Sperabamus quippe quod in solitudine hac, qua secuti sumus te, alterum te nobis Moysen exhiberes, et sub tali duce fiducialiter Domini bella committere. Sed si necdum te talem exhibuisti, vel nunc exhibeas necesse est, cum te turba in solitudinem jam incipiat sequi. Non igitur dolore tabescas, non labore deficias, non pavore elangneas, non impatientia dissolvat, non sollicitudo distrahat, non eviscerent curæ, potius in turba sine turbatione et inter curas quasi sine cura versare te oportet, tuos in solitudinis hujus discrimine et exemplo provocans et verbo roborans: ut ita, dum superbiunt impii, pauperes qui te sequuntur, hinc cœlestis verbi igne admoto, inde vero superbiæ seu elationis vento agitati incenduntur. Incendantur, inquam, tanquam aurum in fornace, ut probati purgentur et tanquam ferrum in igne, ut omni ex parte accendantur ad amorem. Et hunc quidem elationis ventum, qui nunc nobis sic contrarius est, et ejectorum et proscriptorum pauperum turbam ab insula nativitatis suæ de corde maris eventilat; hunc, inquam, superbiæ et elationis ventum, et tu ipse, cum adhuc in sæculo inter filios superbiæ versareris, seminasti; et ideo quidem justum ut nunc turbinem metas. Ex tali quippe semine fructus talis, juxta quod de Israele per nimiam elationem schismatico prophetarum unus: *Seminabunt, inquit, ventum et turbinem mentem* (Ose. viii). Verum et si istud, quod sic nuper in Anglia in nostram oppressionem gestum est, quidam superbiæ et elationis turbo sit, pauperum turbam de corde maris exturbans et eventilans, nos tamen qui secuti sumus te, turbo hic confortante nos Domino et regente, minime exturbare potest aut debet; si te quem secuti sumus exturbare potest tu videris: nos nec potest nec debet, quin potius turbo hic nos magis sedat quam turbet, hunc quippe turbineum auram reputamus, qua melius et commodius velificemus ad portum; illo quidem mirabiliter dispensante sic, qui cum, ut ait Psalmista: *Mirabiles sint elationes maris, et diverso mirabilis est in altis Dominus* (Psalm. xci); qui juxta eundem: *Statuit turbinem in tranquillitatem et procellam in auram* (Psalm. cvi). Et revera, etsi non sentiamus, adhuc sentiemus in brevi quod turbo hic novus nobis in tranquillitatem et procella hæc in auram, Domino sic mirabiliter operante, statuatur. Quod etiam parvæ intelligentiæ hominibus liquere potest de facili. Siquidem nunc primo ex facto hoc nostra nobilitatur peregrinatio, roboratur infirmitas, virtus datur sustinendi, et Ecclesiæ causa in tuto, et contra mundi principem ad nos mundi favor inclinabitur, adeo detestabitur mundus facti hujus atrocitatem.

Sed, ut interim taceamus de hoc, in brevi quippe videbunt oculi nostri, sic et gaudebit cor nostrum; nostra si quidem nunc primo, ut jam dicere cœpi-

mus, nobilitatur peregrinatio, et deinceps ex hoc Ecclesiæ causa quam suscepimus in tuto est. Siquidem præter alios ex omni ætate, omni sexu, omni conditione, tot meruimus habere innocentes, parvulos dico et ad matrum adhuc pendentes ubera, nostræ peregrinationis consortes, nobis nunc associati, et nobiscum novi coram omnium iudice ecclesiasticæ causæ advocati. Quorum profecto vagitus jurisperitorum omni allegationum robore et nitore in auribus Domini Sabaoth delectabilis et persuasibilis sonat. Nobis ergo ex facto hoc solum superest gaudium et exultatio, quod videlicet coram terribili et eo qui aufert spiritum principum, tot et talium tanta nobis accreverint patrocinia: unde et, si fidem habemus, nequaquam hæsitandum, quod etsi laboriose certemus, siquidem lites laboriosæ sunt, præsertim contra adversarium tam potentem, tam durum, causæ nostræ exitus exinde multo erit felicior. « Tu igitur, domine, pro ejectis nostris et proscriptis, qui, ut jam ostendimus, tam necessarij nobis adveniunt, omni sollicitudine et mœstitia omni deposita, exspecta Dominum et viriliter age et confortetur cor tuum. Hic enim inter ligna silvarum, inter petras et solitarios hos, nobis in solitudine hac velut quadam certaminis nostri palestra aut cedendum cum ignominia aut dimicandum cum gloria. Quod autem a communi ecclesiæ suffragio interdiciatur, si Deus cordis nostri nobiscum, et suorum corda pariter et eo magis corda quod ora clauduntur sic. Et certe oris oratione sic inhibita, eo magis nunc cordis oratio quasi duplicata clamabit intensius, supplicabit devotius, pulsabit securius, et ab Altissimo exaudietur facilius. »

Responsum archipræsulis ad eruditos suos.

Archipræsul vero attente audiens verba suorum hæc, interposito parum silentio, flebilis et compunctus sic suis respondit: « Benedictus Dominus, qui vestra eruditione manus meas docet ad prælium, et posuit ut arcum æreum brachia mea, tam infatigabiles, tam eruditos et tam strenuos certaminis mei mihi socios dans. Jam quippe vos video me, quem dominum et ducem vestrum nominatis, multo magis in agone fortiores. Unde et illum devota prosequor actione gratiarum, cujus muneris est quod tales et tantos habeo coadjutores, quos ut ego sequar tutius est quam quod me ipsi. Ego etenim, fratres, sicut dicitis, amurca multo tempore per latas et spatiosas vitæ hujus vias excurri, ad nutum et votum vanis et voluptuosis vitæ hujus succedentibus mihi. Et ita secundum mea dimissus desideria, quasi indomitus et effrenis per sæculi devia excurri, efflui, erravi in invio et non in via; unde et nunc in hoc tanto quod imminet discrimine, in solitudine hac me sequi non tutum. Sed ego vos tanquam eruditos et in his quæ Dei exercitatos, tanquam duces meos et rectores quocunque ieritis sequar. Ita ut a die hoc, ab hora hac, Ecclesiæ causam mihi et vobis, sicut dicitis et verum est, communem, vestris fovendam consiliis, tutandam viri-

bus, vestris commendo manibus. Et ego vestro provocatus exemplo et roboratus verbo, vos, ut dixi, jam sequar, et favente Domino et dilatante sic gressus meos subter me usque in finem, tali mei non deficient vos sequendo. Et quidem, ut dicitis, amurca fui, sed desidero nunc, si forte dignaretur mirabiliter operari sic Dominus, converti in oleum. Unde et amodo vestri consilii et auxilii adjutus viribus, proposui fortius sustinere et valitius torcularis pressuram. si forte vel sic misericordiarum Pater virtutum Dominus de lacu miserie et de luto facias me educere velit. Verumtamen vos, fratres mei, tam strenui, tam necessarii presentis agonis Christi coadjutores, si super his quæ nunc acciderunt moveor, misereor et compungor, nec mirandum. Ecce enim, ut a vobis sumam initium, qui secuti estis me, nihil quidem adhuc acceperitis a me, et jam omnia perdidistis propter me. Pro me, inquam, retribuente vobis pro bono malum, pro obsequio proscriptionem et exsilium, vobis ejectis et proscriptis mecum et pro me. Nec jam vos solum et vestra, sed et vestri, vestra omnis cognatio ejecta simul et proscripta; in nullo quidem propter ipsos, sed propter me et vos, imo totum propter me: ita ut emortua veteris legis vetus parabola illa et querimonia, quasi de novo rediviva videatur iterum verit nunc posse in proverbium: *Patres comedunt uvam acerbam et dentes filiorum obstupescunt* (*Ezech. xviii*). Ego quippe solus peccavi, ego solus recidi, ego solus iram Domini portare debui. Nam, ut cæteros taceam, grex iste parvulorum sugentium adhuc matrum ubera, quod fecit? quid commeruit? Et hi præsertim, qui de mea non sunt cognatione, et tamen et hi et illi, ejecti et proscripti propter me, jam maris pericula et viarum difficultates propter me sentientes quibus etiam necdum est sensus, imo neque vox, neque sensus, utpote quorum nonnulli adhuc in matrum utero ante peregrinantur quam noscantur, peregrini et proscripti priusquam nati. Et hi de vobis qui secuti estis me, vestra quidem cognatio. De mea quidem propria cognatione ejecta et proscripta, cum omni modestia et patientia sustinerem, cum tamen nullius illorum famosorum criminum conscius sim, pro quibus humana lex hoc fieri jubeat, de mea tamen cognatione patienter tolerarem hoc, sed pro vestra quomodo compassionem dissimulare possum et dolorem? Verumtamen sermo vester, imo Dei potius cujus supra fuistis organum, vivus quidem et efficax non parum in me energie habuit. Ex ipso admodum confortatus et consolatus, ita ut secundum multitudinem dolorem meorum in corde meo consolationes vestre lætificaverint animam meam. Manifeste quippe ex auditis jam cognosco, vos sequendo me magis Deum sequi quam hominem, magis æternitatem quam tempus et justitiæ causam magis quam temporalium prædam. Quin potius ejecti jam, proscripti, deprædati, et vos et vestri bonorum vestrorum rapinam cum gaudio susceperitis, unde apertissime adverto vos mere Dei causam sequi, non prædam,

A et quia, sicut dicitis, causa communis est, poenam pariter acceptare communem. Video quem sic et non modicum gaudeo, propter vos. Gaudeo, inquam, quod cernam vos cum scientiæ ornameto pariter virtutis patientiæ roboratos. Video quippe quod patientia vestram humiliet scientiam, ut paupertatis oneri voluntarie se subjiciat: scientia vero instruit patientiam ut ex corde sub tali onere gaudeat. Et solet quidem sic patientia comitem habens scientiam semper gaudere in adversis, sicut et scientia comitem habens patientiam semper fortiter sustinere adversa. Juxta quod vos secundum scientiam et patientiam vobis datam supra docuistis in nova hæc ejectionum et proscriptorum nostrorum super apposta poena solum nobis gaudendum et exultandum B sapienter ostendentes, quod quia *superabundavit malitia, superabundabit et gratia* (*Rom. v*). Et eo ipso amplior ad compatiendum nobis et succurrendum mundi inclinabitur favor. Et quidem accidere solet sic, ut semper omnis malitiæ abundantia, eo ipso quod superabundans est, suis maxime auctoribus et fautoribus noceat. Arcus enim pravus malitia superabundans sic, quæ non eminens jaculatur, sed in se ipsam retorquet spicula, ut illis convertatur in augmentum gratiæ contra quos excessum est in finibus pænæ. Adeo ubique modus, ubique modestia, ubique moderamen necessarium et in suppliciis maxime. In quo tamen ira et invidia, sicut nos videmus nunc et sentimus, semper solent excedere pessime potentatum consultrices; unde et Scriptura: *Ira, inquit, viri justitiam Domini non operatur* (*Jac. i*). Propter quod etiam Christianus ille imperator Theodosius, sicut vos me multo melius nostis, absque regali fastigio poenitentia publica publice et patienter expleta, leges sanxit in posterum ut sententiæ principum super animadversione prolata in diem tricesimum ab executoribus differrentur, quo locus misericordiæ vel si res tulisset poenitentia non periret. Unde etsi juxta legem naturalem liceat vim vi repellere, ethnici tamen principes cum moderamine faciendum sic decreverunt, dicentes quidem licere hoc, sed tamen cum moderamine inculpatae tutelæ, pænis etiam aliis, sicut statuunt, molliendis semper magis quam exasperandis. Unde etiam manifestum quod etiam D apud ethnicos principes misericordia superexaltabat judicio, juxta illud apud Græcos tritum proverbium: « Ne quid nimis. » Verum, fratres, sentimus nunc nostri dumtaxat odio misericordiæ et judicio per iram et invidiam meram sævitiam superpositam: ita quod etiam innocentes adducuntur in crimen, et in quibus princeps mundi hujus nihil habent, a mundi tamen principe proscribuntur per iram et invidiam potentatum, ut diximus, pessimas consultrices; unde et super omnia et præ omnibus lugeo dominum meum regem meum, quem sicut cor meum, sicut animam meam diligebam, et a cujus etiam charitate adhuc nec tribulatio, nec angustia nec persecutio separare me potest. Ipse

solus est quem plango, quem lugeo; pro ipso tristitia est mihi magna et continuus dolor cordi meo : quem mei æmuli, sui ipsius regis dico amici ficti et inimici veri, regem tam Christianum, tam illustrem faciunt transire in tyrannum, et Herodiana quadam impietate consulunt et compellunt deservire in parvulos, eo quod in me ipsum modo plus nequeant. Quis igitur cum propheta dabit nunc capiti meo aquam et oculis meis fontem lacrymarum et plorabo ? Plorabo, inquam, non me, non vos, non ejectos nostros et proscriptos, non damna rerum, non desolationem ecclesiarum, sed plorabo tam magnum dominum, regem tam præclarum, qui ad pravorum suggestionem novam in regno suo pœnam, et sibi met tam ignominiosam induxit, nova excogitata, ut præter alia novum nobis inferret dolorem, et eo amplius exacerbaret afflictos, et eo acerbiores, quo plus communem, quo etiam extensam in innocentes, ubi nulli misertum sexui, nulli delatum ætati, non æstimata conditio. Salvo domino nostro, salvo christo Domini rege nostro, sit illis vix perpetuum per quos factum sic, per quos nova pœna hæc introducta novum scandalum venit : fiat via illorum tenebræ et lubricum qui innocentibus, prægnantibus et nutritibus per terras ignotas, per maria inexplorata, vias tam difficiles, tam periculosas indixerunt. Ita quod juxta Domini plantum vix prægnantibus et nutritibus his diebus, quorum fuga hieme facta, ut sit supra modum sævitia sæviens, quam præter alia circa tam miserales personas et tam infirmas non perpensa, augeat inclementia temporis. Cum judicati fuerint exeant condemnati, qui ita sine misericordia judicaverunt. Et fiat illis judicium sine misericordia qui judicando misericordiam non fecerunt. Sed esto : hoc certe opus eorum, qui detrahebant mihi, qui in aula mei æmuli erant. Tunc quidem latenter serpentes per timore, sed manifeste exerunt nunc caput et virus eromunt. Atamen, sicut vulgo dicitur et verum est, male dolorem suum vindicat qui augeat. Isti vero, ut vos supra docuistis, non nostrum in facto hoc, sicut sperant, dolorem auxerunt, sed suum verius. Nam ut iram Dei in præsentiarum taceam, quæ jam pervenit super illos, certe super dolorem et iram quam habent in nos in hoc facto perpetuam sibi ignominiam cumularunt. Quia, ut cognoscat tam atrox factum generatio subsequens, filii qui nascentur et exsurgent enarrabunt filiis suis. Verum debuissent profecto pravi illi, qui in facto hoc non consilium dederunt, sed infuderunt potius pro consilio virus, debuissent, inquam, prius advertisse quod omnes et regii præsertim potentatus semper sit vita brevis, sed sequitur ipsum post vitam aut gloriöse famæ vita immortalis, aut vulnera famæ læsæ incurabilia. Unde et regio maxime potentatui nil tam decens, tam necessarium, quam consilii et scientiæ spiritus, quo is qui præest omnibus super omnes et in omnibus modum teneat, non transgrediens, non excedens, non se super se extendens etsi major :

A unde et ante omnia necesse quod qui indomitum est baculus, contumacium clavus, malleus superbiorum et omnium denique hostilium nationum debellator, rex dico, qui totus suum esse debet et totos omnium, necesse, inquam, primo et ante omnia, ut iram suam in manibus suis habeat et dicere semper possit : Ira mea in manibus meis semper, ut si irascatur, nec enim in regis etiam potestate est non irasci, non tamen peccet. Alioquin si iratus peccaverit, ira est manibus ejus elapsa, jam in manibus ejus non est, sed ipse potius in manu iræ, ira victus, non victor sui vel iræ : unde et ex nimis vehementi iræ impetu scientiæ et consilii exsufflato spiritu qui ex eo datur, perit modus, et quæ ex modo quasi ex matre soboles procreantur, justitia qua firmatur, et clementia qua venustatur thronus, occumbunt pariter. Per quæ duo regibus per vitam hanc beatæ famæ et jucundæ vita immortalis comparatur. Adeo ut exempti a mundo quodam immortalis famæ beneficio restituantur mundo et sancte et feliciter in præsentī Ecclesia vivant etiam post mortem, qui hic dum adhuc in carne viverent tenuerunt in regimine modum, justitiam et misericordiam observantes. Unde et solus ille rex beatus legitur qui non abiit in consilio impiorum. Quod si abierit, scientiæ et consilii spiritu destitutus, jam non populorum rex, sed fœx potius, nec christus Domini, sed idolum christi, unctum idolum rector populorum constituitur, vel juxta sapientis regis dictum, sicut lapis est in acervo mercurii. Sed esto

C ejiciant, expellant, proseribant, pungant, expungant, instigent et insaniant : tempus sustinendi est, patientes erimus et in flagella parati. Et retribuemus interim bona pro malis, dilectionem pro odio, orationem pro maledicto, tanquam vero magistri illius discipuli, qui : « Pro eo, inquit, quod diligebam, adversabatur mihi, ego autem orabam. »

His vero dictis et mutua exhortatorii sermonis nostri allocutione invicem collata, sic exhilarati et animæ quiores facti in illas, quas, ut supra tetigimus, infra septa monasterii sortiti sumus, mansiunculas nostras nos recepimus. Quotidie autem ad nos nova exsulum multiudo confluebat, nisi quod plerique a præfacto juramento auctoritate apostolica absoluti in Flandria remanserunt, hi præsertim, qui propter ætatis vel sexus infirmitatem et multam quæ tunc erat inclementiam temporis, absque multo sui dispendio ad archipræsulem, quemadmodum juraverant proficisci non valebant. Cæteri vero quotidie glomeratim veniebant ad nos, ejulantes et plangentis quod essent sic a natali solo ad ignotas nationes expulsi, bonis suis proscripti, et ab amicis suis et proximis elongati. Et ita quotidie pauperes et egeni, ad misericordiæ Altissimi pulsantes januam, archipræsulem movebant. Nec enim poterat non moveri, nec debet non totis pietatis visceribus concuti super talium clamoribus querulis, qui pro ipso ejecti sic. Movebatur quidem, sed velut aroma aliquod pretiosum, quod quanto plus movetur, tanto

plus redolet; seu quasi aliquid sinapis granum, quod cum quis fortius terit, eo virtutem validius exerit, et tanquam vere argentea tuba, quæ quanto fortius tunditur, eo amplius producit et formatur. Qui etiam repente totus visus est in oleum meracissimum defecisse ad torcularis pressuram, facie ejus adeo exhilarata in oleo, ut semper tam æqualis, tam compositi, tam erecti animi esset, ut in omni pressura sua vix adverti posset ullam se sentire pressuram, Juxta quod propheta de capite præconizat: *Nunquam tristis neque turbulentus, sed semper hilaris, semper jucundus, jucundus mente, jucundus facie, jucundus semper et æqualis.* (Isa. iv.) Sapiens enim inquit: *Sapiens ut sol permanet, stultus vero ut luna mutatur* (Eccli. xxvii). Sic igitur iste omni tempore tam in adversis quam in prosperis permanens, qualis in prosperis talis et in adversis. Quem sicut nec sol per diem, neque luna urebat per noctem. Implens opportune apostolicum illud mandatum in se; *Omne, inquit, gaudium existimate, fratres, cum in variis tentationes incideritis* (Jac. i). Et Magister ad discipulos: *Semper, inquit, gaudete* (Philipp. iv). Nam ut Magister ad alios discipulos docendo loquitur: *Sæculi tristitia mortem operatur* (II Cor. vii). Cui consonat illud Sapiens: *Tristitiam, inquit, non des anime tuæ, multos enim occidit tristitia* (Eccli. xxx). Verum et rex Sapiens: *Omnes, inquit, dies pauperis mali, secunda vero mens quasi iuge convivium* (Prov. xv): Talis vero hujus agonothetæ nostri mens quasi in iuge convivio, in continuo gaudio, unde et ipso quasi quodam experientia libro certissime didici illam Magistri sententiam veracissimam, quod videlicet fructus spiritus sit sicut charitas, ita et gaudium. *Fructus, inquit, Spiritus charitas, gaudium* (Gal. v); unde et qui spiritum non habent, non solum secundum Magistrum, sed et secundum Prophetam et fructu hoc spiritus carent impii. Nec enim est gaudere impiis, sicut per prophetam dicit Dominus; verum de hoc ad tanti archipræsulis laudem et gloriam solum hic tetigisse sufficiat, et servato historiæ ordine, ad parvulos nostros et alios ejectos et proscriptos revertendum.

Vir itaque apostolicus et terrarum potentatus nationes et regna audientes de ejectis nostris et proscriptis sic, mox in primo obstupuerunt auditu et factum admodum profanantes quotquot archipræsuli et tantæ et tali ejectorum turbæ totis pietatis visceribus compassi sunt. Ita ut archipræsul, quod prius a suis compromissum audierat, mox impletum cerneret, videlicet ex facto hoc, Deo mirabiliter dispensante sic, contra mundi principem mundi ad nos inclinatum favorem. Unde et archipræsul, eo quod tantam turbam secum ferre non posset, ipsos per diversas provincias, per nationes varias, ad diversa etiam regna, quosdam ad personas ecclesiasticas, alios vero ad potentes terrarum cum suis supplicatoriis destinavit. Et quidem qui missi omnes ab eis, ad quos missi, tum tantæ malitiæ odio, tum favore mittentis benigne suscepti sunt. Ita quod in sua-

ceptione hac etiam populus quem non cognovit servavit ei, tantus jam ipsius erat in populo favor et miseratio pro expulsis. Sed quid? Ejectis omnibus sic, præstante Domino, provisum in brevi ut inter ipsos egens nullus et plurimi etiam felices in exsilio quam in patria degerent. Unde et felix exsiliū et revera felix; felix propter justitiæ causam, felix propter mundi favorem, felix propter magnam exsulum virtutem et constantiam, felix etiam innocentie titulo, virginitatis gloria, viduitatis gratia et conjugali honestate insignitum. Per tale revera et tam felix exsiliū non nisi ad patriam tenebatur.

14. QUALITER ARCHIPRÆSUL CŒPIT ARCTIUS VIVERE

Verum, etsi ejectis nostris Deo miserante provisum sic, archipræsul tamen attendens in tanta ejectorum et proscriptorum multitudinis nostrum aggravatum exsiliū et pœnam exasperatam, disposuit una et pœnitentiæ suæ aggravare districtiōnem, ut præter illud quod jugiter portabat cilicium, et crebras quas flagellatus furtivas accipiebat disciplinas, et ipse quoque plus solito districtius viveret. Unde et uni fratrum, qui ipsi in mensa ministrare consueverat, una dierum instillavit secretius ut inter alios lautiores cibos suos, quibus uti solitus erat, caute quidem ita ut nullus adverteret, quotidie conventualem sibi apponeret cibum, quibus solis uti disposuerat. Quod et ut cautius fieret et secretius, mensam ipsi soli seorsum a nobis ponebatur quotidie. Et ita quidem per aliquot dies solis pulmentariis aridis et insipidis, juxta quod Cisterciensis ordinis regularis institutio habet vescabatur, cum tamen ut et nos supra scripsisse meminimus, cum de mensa ipsius corporali et modo victitandi ageremus, in deliciis a primæva ætate fuerit enutritus, propter quod et grossiora non poterat. Verumtamen, quia, ut diximus, ex ejectorum et proscriptorum multitudine peregrinationis suæ aucta est pœna, ideo et præter alia ipsius in vivendi districtiōne aggravata est pœnitentia: verum per aliquod tempus sic se mortificans, sic districtè contra solitum vivens, post dies aliquot gravi correptus valetudine decubuit. Discipulus vero qui scripsit hæc cum juxta quotidianum morem ad sacram lectionem manicaret ut, sicut sibi D injunctum fuerat, cum archipræsule de sacris litteris conferret, et ab ipso, sicut quotidie consueverat, vel disceret vel doceret, dolens reperit accidisse sic. Et confestim accedens propius sciscitabar, quæ posset esse tam subitæ valetudinis causa. At ille, sicut mox adverti, causam indicare declinans, alias retorquebat sermonem: verumtamen opportune importune instare ceppi, prout tamen audebam. Qui mihi tandem causam revelavit ad importunitatem instantis, sic tamen ut tenerem secretum. Nec tamen asserebat, sed dicebat se suspicari, valetudinem accidisse sibi sic propter austriorem illam abstinentiam et insuetam.

Exhortatio discipuli ad archipræsulem.

Et ego mox ipsi, « domine, » inquires, « si placeat

paulisper attende. Nec enim humana quidem, sed A potius diabolica videtur tentatio hæc. Qui quos non potest subvertere per gulam, subvertere querit per immoderatam abstinentiam vel per insuetam. Contra quod Magister, non ignorans illius versuti astutias, agens de castigatione corporum, de mortificatione carnis : *Obsecro*, inquit, *vos, fratres, per mitem ricordiam Dei, ut exhibentis corpora vestra hostiam viam, sanctam, Deo, placentem* (Rom. xii); et adjecit : *Rationabile*, inquit, *obsequium vestrum* (ibid.); quasi dicat, in hac corporum castigatione est adhibenda discretio : unde rationabile, inquit, scilicet cum discretione, videlicet ne quid ultra, ne quid citra mensuram. Rationabile, inquit, ut æstimetur naturæ possibilitas, non voluntas abstinentis. Rationabile, inquit, ut et ætas æstimetur et conditio, et aptetur cuique congrua. Si ergo, domine, id desideras ut in corporis tui castigatione rationabile sit obsequium, necesse ut in abstinendo ratio comitetur obsequium et voluntatem tuam regat, et non voluntatis tuæ te trahat impetus, qui nimis vehementer ad bonum videtur intensus. Juxta quod ait Sapiens : *Noli*, inquit, *nimis esse justus* (Eccl. vii). Et item : *Noli plus sapiens esse quam oportet* (ibid.). Sicut igitur nec nimis justus, nec nimis sapiens, pariter et noli esse nimis abstinens. Per pauca quippe quæ expressa, dat Sapiens et multa intelligere quæ non exprimit. Nam, sicut dicitur, paucis sapiens innotescit. Nolumus ergo aliquid nimis, nam, sicut ait quidam : « Omne quod est nimium vertitur in vitium. » Unde et sicut juxta Sapientem : *Est justus qui perit in justitia sua, ita est et abstinens qui perit in abstinence sua* (Eccl. ix). In abstinendo quippe æstimanda est carnis infirmitas, naturæ possibilitas, et diutinæ consuetudinis usus. Sæpissime quippe accidit hoc ut spiritus promptus sit, sed caro infirma, natura impotens et consuetudo rebellis. Unde necesse tunc ut temperato rigore his condescendatur. Nam juxta quod ait Sapiens : *Qui servum suum enutrierit in deliciis a pueritia, postea sentiet eum contumacem* (Prov. xxix). Tu vero es qui fecisti sic, qui corpus tuum semper a puero in deliciis enutristi, nunc vero quia has ipsi subtrahis, ipsum tibi rebelle sentis, unde, quia Dei voluntas sic, placeat tibi deinceps, ut, quia austeriora non potes, congruis tibi alimentis utaris. Et ut mea doctrina non mea sit, audias si placet quid super his doctorum unus, de escis corporalibus loquens sic : « In omnibus, » inquit, « talibus non usus rerum, sed libido in culpa est. » Fieri enim potest ut sapiens sine omni vitio pretiosissimo utatur cibo : insipiens vero foedissima gulæ flamma in vilissimum inardescat. Et sanius quisque maluerit more Domini pisce vesci quam lenticula ut Esau, an hordeo more jumentorum. Nec enim propterea continentiores nobis sunt pleræque bestię, quia villioribus utuntur cibis. In hujuscemodi enim non ex rerum natura quibus utimur, sed ex causa utendi vel appetendi modo vel probandum est vel improbandum quod

agimus. Ecce, domine, quia mea doctrina non mea, sed orthodoxorum potius doctrina est. »

Archipræsul vero ex paucis his statim advertit quid ægendum, juxta quod Sapiens : *Da*, inquit, *occasionem sapienti, et sapientior erit* (Prov. ix). Unde, Domino favente, in brevi restitutus incolumis semper et in omnibus mira quidem et supra modum admirabili, quam supra cum de mensa ipsius corporali ageremus breviter ostendimus, sobrietate comite congruis sibi deinceps alimentis utebatur. Hoc autem de spiritu sancti et devoti pontificis tam prompto et carne ipsius infirma ad legentium ædificationem hic interserto, deinceps ceptum historiæ ordinem prosequamur.

Sicut dicere cœpimus, ejectis nostris et proscriptis, miserante Domino, solatis, sic Pontiniaci in solitudine inter petras et monachos solitarii nos delitescentes a sæculo jam remoti, eo liberius quo quietius, et eo fructuosius quo secretius, tota mente spiritualibus intendebamus. Archipræsul vero super omnes miro discendi ferebatur ardore, qui tanquam luminare magnum in firmamento cœli sacræ Scripturæ jugiter inhærebat, apostolicis institutionibus, sed theologiæ præsertim summam operam dans. Hoc enim erat tempus quod, ut supra diximus, semper præoptaverat, quo jam dudum perditorum dierum repararet facturam, ut qui electus erat ad regimen animarum, aliquo tempore, etsi sero, scientiam sibi regendi eas compararet. C Unde et tantus erat Scripturarum amator, quod post horas regulares quotidie sacri codices per totum diem vix de manu ejus discederent : præsertim sacri illi duo libri, Psalterii videlicet et Epistolarum, tanquam duo spirituales oculi, mysticus et moralis. Horum quippe uno, ut dicebat, perfecte ethicam, altero vero theoriæ præcipue docebatur. Ex amore vero hoc Scripturarum et opera adeo in brevi profecit, ut sæpissime in scrupulosis et nodosis Scripturarum, etiam super docentes se intelligeret. Et quidem mansio nostra Pontiniaci sic erat.

15. QUALITER SECUNDO PEREGRINATIONIS SUÆ ANNO APPREHENDERIT ARCHIPRÆSULEM JUSTITIÆ ZELUS.

Secundo vero peregrinationis nostræ anno cernens pontifex inimicorum nostrorum induratum cor nec pro tantis in nos excessibus ulla in eis penitentię signa, quin potius apponentes peccare adhuc quod jam manu non poterant, nos elongatos et in solitudine manentes linguis detrahentibus persequentes ; cernens, inquam, pontifex sic cœpit cogitare intra se et meditari cum corde suo, et in meditatione hac ignis exardescere, ignis certe non livoris, sed amoris. Videbat quippe filios proprios, etsi in hostem conversos, quotidie ire in interitum et in præcipitum ruere. Et quia pater est, amplius dissimulare non potuit. Nam, etsi illi jam filialem subtraxerint, nequaquam tamen pontificalis perfectionis erat illis paternum affectum subtrahere. Unde et pro pereuntibus filiis concaluit cor ejus.

intra eum, et eum meditatione sua hac ignis exarsit, non quidem zelo vindictæ, sed ex zelo iustitiæ propter filios et paterno compassionis affectu. Unde et quomodo pater miseretur filiorum et ipse illis misereri desiderat, ut videlicet visitet in virga iniquitates eorum, et in verberibus peccata eorum. Itaque apprehendit eum, hinc quod maxime sacerdotibus congruit ardens propter contumaces iustitiæ zelus, inde vero quod maxime patrum est intensus propter errantes filios compassionis affectus. Et ita qui hucusque siluit, qui hucusque in omni patientia sustinuit, videns et attendens patientiam suam in superbia et abusione calcatam, jam deinceps non patiens, non dormiens, sed surgens et excutiens se, tanquam verus excussorum filius, confestim cum suis deliberare inchoat quid agendum. Ad illud Domini comminatorii in propheta ad prophetam quasi subito motus et commotus: *Et tu, fili hominis, speculatorem dedi te domui Israel (Ezech. xxxiii)*. Quod si non fueris locutus ut custodiat se impius a via sua mala, ipse impius in iniquitate sua morietur, sanguinem autem ejus de manu tua requiram. Nos itaque certaminis sui socios in primis quodam deliberatorii sermonis elogio alloquitur sic.

Deliberatorius archipræsulis sermo ad suos.

« Viri fratres, » inquit, « in causa Ecclesiæ mecum Christi coadjutores, scitis et nostis quidem, me multo melius, quod omnia tempus habent, tempus sustinendi et tempus rebellandi, tempus miserendi et tempus judicandi: Cum accepero, inquit, tempus, ego iustitias iudicabo (Psalm. lxxiv). Et Magister ad discipulos: *Tempori, inquit, servientes*. Nos vero hucusque tempori servivimus, hucusque sustinimus, hucusque peccatores supra dorsum Ecclesiæ fabricantes portavimus, patientes ad omnes; sed ipsi iniquitatem suam prolongantes, nostra in die bonitatis abutuntur et patientia, et peccata peccatis cumulantes solum sibi iram non misericordiam thesaurizant; cum Dominus per prophetam de indurato et non resipiente, sed apponente semper peccare adhuc: *Nonne, inquit, in tribus et quatuor impietatibus adversabor eum?* Proinde, fratres, ineamis consilium, videte quid deinceps nobis agendum. Nunquid enim quia hucusque tacuimus, semper sic tacebimus? *Vae mihi, ait propheta, quia taci (Isa. vi)*. Nunquid igitur exterriti per prophetam tacebimus tamen sic? Et qui in solitudine hac inter petras has, et monachos hos hucusque dormivimus, non adjiciemus ut resurgamus? Bonum quidem et delectabile nos esse hic, dormire sic et dulcibus jamdudum concupitæ Rachelis amplexibus frui. Bonum quidem hoc et juvenndum; sed tamen ut nihil inpræsentiarum in sanioris consilii præjudicium asseram, mihi certe videtur nunc quod amodo ad operandum necessarium nos sponsæ negotium trahat et officii nostri debitum urgeat, cura videlicet quam suscepimus pastoralis. Ecce enim

A quia vulpes demoluntur vineas et lupi manifeste in caulis ovium grassari non desistunt. Et super omnia hæc non sunt inter prævaricatores qui revertantur ad cor, qui forte reverterentur si percussi. Alioquin nisi impos arceat pastor, sine causa baculum, et iudex, nisi transgressores reprimat, sine causa gladium portat. Et nisi indignos ejiciat sacerdos, sine causa accepit Ecclesiæ claves. Et nunc maxime vobis, fratres, loquor hæc quia patrati contra nos facti atrocitas in ejectis dico nostris et proscriptis in adversarios iustitiæ acceperat opus. Solet quippe et iustum sic ut diutius toleretur infirmitas vel negligentia quam malitia sæviens. Igitur pro officii nostri debito, sic modo mihi videre videor amodo operandum nobis, non dormiendum, ut una cum sponsa capiamus vulpes, quæ demoluntur vineas et una cum dilecto surgamus a lecto, egrediamur in agrum, commoremur in villis, et operemur in vineis. Juxta quod sponsa: *Veni, inquit, dilecte mi, egrediamur in agrum, commoremur in villis, synergamus ad vineas (Cant. vii)*. Perit enim nec valet sponsæ opus vel opera, si non ferat opem dilectus. Nos ergo, dilecti, si vobis videtur sic, surgamus, egrediamur et operemur cum prophetico sarculo, evelentes, destruentes et dissipantes noxia, ne per nostram desidiam vel negligentiam crescant adeo et proficiant, ut totum Dominicum hortum operiant, et nos sic a Domino horti, tanquam hortulani pigri seu negligentes, desidie vel negligentie condemnemur. Faciamus ergo juxta quod injunxit horti Dominus cuidam de hortulanis, cui horti sui curam commiserat: *Ecce, ego hodie constitui te super gentes et regna, ut evelas, et destruas, et disperdas, et dissipas, et ædifices, et plantes (Jer. i)*. Verum, fratres, vos tanquam in Scripturis exercitati et multorum Patrum exemplis, in his et talibus quid agendum nostis me multo melius. Ego tamen, conscientia mea mihi dictante sic, dico vobis quod sentio. Verumtamen, ut jam dictis addam adhuc, mihi et hoc videtur inter cætera, si illius volumus imitatores esse cujus et discipuli sumus, quod instar Samaritani evangelici custodis veri et curatoris, ad peccatorum curanda vulnera prius infundendum sit oleum, et vinum postea, si tamen postea necesse hoc. Prius igitur quod maxime potentum vulneribus mederi solet, suavissimum lenitatis oleum iufundatur. Et in primis dominus noster rex in omni lenitate et humilitate conveniatur, si forte vel sic ira et indignatione malis nostris saturatus nunc in humilitate nostra nos respiciat clementia regia.

Et quidem verbo hoc ab archipræsule proposito, nobis sic placuit verbum, nobis quoque propositum pariter et consilium commendantibus.

16. QUALITER REX PRIMO SIT COKVENTUS.

Missus est itaque unus abbatum ordinis Cisterciensis ad monasterium Pontiniacense pertinens speciali quodam jure subjectionis. Abbas hic Urba-

nus nomine et vere urbanus; Urbanus nomine, A urbanus et re, urbanus et in sermone. Solus quippe Is Monens ut tali fungeretur legatione. Is itaque missus, qui secum ad dominum regem nomine archipræsulis suavissimas litteras detulit, supplicationem ~~salutem~~ ^{conventionem} vero nullam vel modicam continentes. Quæsierat enim archipræsul verba utilia, suavia et pacifica, et conscripsit sermones lenissimos, quibus vel sic regis leniretur cor. Verum qui missus fuerat post dies aliquot ad nos reversus, pro nostris suavis, pro nostris lenibus et pacificis, non nisi amaritudinem, asperitatem et turbationem maiorem reportavit regis corde sic obfirmato contra nos.

Qualiter secundo sit conventus.

Attamen non destitit archipræsul regem adhuc secundo per eundem convenire. Cui et vice hac non adeo suavia ut prius, sed et duriora legati viva voce dicenda injunxit et litteras aliquantulum austeritatis continentes destinavit, quibus archipræsul regem corripuit, sed in misericordia et in spiritu lenitatis adhuc. Verum eo in brevi iterum reverso qui missus fuerat, reportavit et iterum quod neque vox esset neque sensus adhuc. Archipræsul vero audiens sic, et certissime jam considerans quod hac misericordiae et lenitatis via non proficeret, in spiritu iudicii et ardoris, sicut spiritu servens auster, tertio jam conscripsit sermones sed asperos et austos, jam non, sicut prius, regem in misericordia corripiens, sed dure increpans, et sicut tunc decebat, episcopum cum omni imperio arguens, tanquam veri Samaritani discipulus prius infundens oleum et vinum postea. Et tanquam figuratum in propheta verum evangelicum animal, habens ante faciem hominis et faciem leonis, juxta in hoc ipso et Magistrum sequens: Si quis, inquit Magister, *præoccupatus fuerit in aliquo delicto, vos qui spirituales estis, instruite hujusmodi in spiritu lenitatis (Gal. vi).* Et alibi ad discipulum de episcopali ipsum officio instruens: *Servum, inquit, Domini litigare non oportet; sed mansuetum esse cum modestia corripientem eos qui resistunt veritati (II Tim. ii).* Ecce lenitatis et modestiae spiritum. Et tamen idem ipse ad discipulum alibi: *Quam ob causam, inquit, increpa illos dure, ut sani sint in fide (Tit. i).* Ecce lenitas et modestia, ecce et increpatio dura! hoc est Samaritani oleum et vinum; hæc in propheta evangelicæ facies, facies hominis et facies leonis. Et revera ecclesiastica disciplina hæc et juris ecclesiastici ordo, ut qui fomenta non sentit, ferro abscidatur superbiæ tumor, unde et Ecclesiæ doctor hic noster, archipræsul dico, hac incedens via, hoc procedit ordine. Ad hoc vero durius jam nuntium peragendum quidam approbata religionis vir electus est, ob favorem religionis præcipuum et fervorem pannosus et miser, omni tempore exerecens nudipedalia: unde et cognomento vocabatur discalceatus, Girardus nomine proprio, vir certe jugiter habens mortem in desiderio et vitam in patientia; cujus semper summa fuerat sollicitudo ad pacem revocare discordes. Solus ergo talis idoneus, qui fungeretur

legatione hac. In talibus quippe et fiducialiter loquendi Dei verba et operandi grandia multa solet esse libertas, utpote in quibus Domini Spiritus. Is itaque missus; in cujus ore, præter litteras quas detulit, et archipræsul verba sua posuit. Missus est et alius qui tam religiosus cum eo. Et hi missi sic fiducialiter quidem egerunt, sed nec hic quidquam profecerunt. Quin potius dura propinantes, dura pro duris, imo multo plus duriora prioribus reportarunt.

17. QUALITER ARCTETUR ARCHIPRÆSUL REGE ADHUC INCORRECTO.

Archipræsul igitur audiens sic cœpit sollicitus et mœstus esse, cernens jam nec sic nec sic cor regis erga se emollitum: quod etiam emollire et pacem et gratiam inter regem et archipræsulem reformare Christianus ille rex Ludovicus et multi terrarum principes sæpe et sæpius jam studuerant; sed nec magni illi viri nec proprii hi archipræsulis nuntii, nunc blanda nunc austeriora bajulantes, poterunt proficere; quin potius superbia eorum qui oderunt nos ascendit semper. Archipræsul itaque turbatus intra se cœpit intentius clamare ad Dominum, orare frequentius, refecti parcius et continue lugere regem, cernens eum adeo ad omnia hæc insensibilem. Vicens itaque tantam Ecclesiæ turbationem et regis animum jam obfirmatum sic, coarctabatur e duobus, hinc cupiens solvi a cura et pastoralis officio, inde vero propter Ecclesiæ causam, quam tuendam susceperat, permanere. Et post multam intra se animi sui fluctuationem demum super hoc eruditus suos convenit. Qui mox de episcopatu deserendo vix verbo proposito, in primo auditu scandalizati, conclamabant ipsum jam delicere prius quam currere, et in Dominica acie ante jam occumbere quam pugnare: tanquam viri in divinis exercitiis, causas multiplices distinguentes, propter quas interdum episcopo liceat de sede ad sedem transire, seu etiam plerumque penitus derelinquere. Verum ut contestabatur nulla talis causa hic; imo potius perniciosum hoc et omnibus post futuris sæculis detestabile, tanquam si prœteta quis consternatus et pavidus in procellaturbinibus navem oneratam in mediis fluctibus derelinquat; aut tanquam princeps vecors ad bellandum profectus, videns hostium cuneos, mox exterritus, ut solum se salvet fugiat, et quam cum ipso fortiter stare proposuerat aciem castrorum perdat. Igitur, ut eruditi nostri universi constanter exhortabantur et salubriter, nequaquam tunc tempus fugiendi sed occurrendi, præsertim cum ab Ecclesiæ inimicis solum Ecclesiæ salus quaereretur, decus cleri deformaretur et impugnaretur libertas. Et quoniam archipræsul regem sic conventum sed incorrectum supra modum lugebat, suorum hoc erat consilium ut adhuc sustinens diutinae passionis suæ exemplo cor regis emollire attentaret quod exhortationis sermone necdum potuerat immutare, cum nihil adeo cor irati soleat immutare et ad amorem convertere, quam pro irati voto diutius sustinere et pati. Archipræsul vero ex

eruditum suorum viva et salubri exhortatione persuasus, jam nihil cogitabat de cura pastoralis deserenda, sed potius deinceps fortius quam prius et viriliter exercenda. Attrahens enim spiritum et assumens cor, jam nihil de fuga, nihil de otio, nihil de quiete, sed solum de cura et pugna cogitans, intra se cogitando censuit post omnia hæc regi baculo pastoralis comminandum, qui leviores virgæ castigationem non senserat. Intra se itaque cogitavit et censuit, eruditus suis nequaquam hoc exprimens vel deducens in consilium. Et quidem caute et industrie hoc, suis parcens in hoc, ne videlicet qui eum sequendo magnam jam ob id regis iram incurrerant, in majus et perpetuum sorte inducerentur odium, si tale contra regem darent consilium, quod forte etsi non regis voluntati, utilitati tamen militaret. Cogitavit itaque sic intra se, cum suis super hoc non prætractans, non prædeliberans, regi suum et filium baculo, ut diximus, severioris castigationis percellere, qui fuerat hucusque ad virgæ tactum insensibilis, si forte percussus baculo devians reverteretur vel sic. Cogitavit, inquam, sic intra se, dubius tamen admodum et anceps super hoc quid agendum. Nec enim, ut diximus, voluit propter prædictam causam deducere hoc in collationem cum suis, vel suorum consilium quærere. Itaque cum se solo deliberans aliquandiu intra semetipsum fluctuabat, stans et hæsitans. Legerat quippe illud in lege: *Principi populi tui non maledices* (Act. xxiii); et illud regis peccatoris: *Tibi*, inquit, *solī peccavi* (Psal. l.). Et rex vere soli Deo peccat. Nam sicut super locum docet doctorum et Ecclesiæ rectorum unus: « Si quis de populo erraverit, et Deo peccat et regi: rex vero non habet hominem qui sua facta dijudicet. » Legerat quidem in lege et in Psalmista sic; legerat et multa alia quæ eruditi et exercitati Ecclesiæ rectores statuerunt de his. Quorum unus: « Non potest, » inquit, « salubris esse a multis correptio, nisi cum ille corripitur qui sociam non habet multitudinem. » Et item: « Cum quisque fratrum in aliquo tali peccato fuerit, ut anathemate dignus habeatur, fiat hoc ubi periculum schismatis nullum est. » Legerat quidem hæc et alia in modum hunc. In Romana vero Ecclesia, ut supra jam diximus, durum schisma tunc erat, tanto imperatore Frederico et tam generoso viro Octaviano antipapa tunc divisus ab Ecclesia et facientibus schisma, unde nec sine causa magna videbatur tunc majoris adhuc et durioris schismatis causa, si in tantam potestatem Anglorum, regem dico, ætate juvenem et in cismarinis et transmarinis tam late et tam magnifice dominantem, gladio verbi exerto ab Ecclesia separaretur, ne forte rege juvene et tam potente ob id commoto, facile ad partes Ecclesiæ inimicas transiret. Super omnia etiam vebatur ne apostolicæ sedis auctoritas propter hoc gravius schismatis periculum, quod, ut diximus, facile posset accidere, quidquid absque ejus consilio seu conniventia statueret ipse, totum ipsa irritaret. Hæc igitur et hu-

A Juxta modum ut gladium suum reponeret nec baculo suo percuteret hortabantur.

At e diverso his alia obloquebantur, quæ et impellebant ut gladium amodo non prohiberet a sanguine et ut percuteret baculo. Nam, sicut in lege audierat quod supra posuimus, videlicet: Principi populi tui non maledices, ita legerat et in lege tam principes Synagogæ quam etiam alios pro qualitate excessus immundos reputari et extra Synagoram fieri, quod nequaquam erat maledicere principi; hoc in lege prohibitum, sed talis potius excommunicatio coercitio erat quedam disciplinalis, et sicut tunc, ita et nunc principem anathematizare non est principi maledicere, quod lex prohibet, sed principem tanquam Ecclesiæ filium disciplinaliter coercere. Et tanquam a latronibus vulneratum per Samaritani curam medicinaliter secare, ut ferro abscedatur vulnus quod fomentum non sentit. Legerat et in propheta: *Væ mihi*, inquit, *quia tacui* (Isa. vi). Sibi ipsi propheta: *Væ dicit*, eo videlicet quod regem Achab ea auctoritate qua debuit non corripuit, nec pro data sibi potestate coercuerit. Quod enim, ut supra induximus, rex adulter et homicida Deo dixerat: *Tibi soli peccavi* (Psal. l.), non ideo dixit quod prophetis tunc et Synagogæ sacerdotibus in reges adimeretur coercitio, unde et propheta pro peccato mox regem corripuit, sed ideo dixit: *Tibi soli*, Deo loquens quia sacerdotes et prophetæ vices Domini tunc gerebant. Et erant ipsi quasi ipse Dominus, cujus ipsi vicarii, unde et quem ipsi puniebant Dei hæc solius punitio ipsorum inflicta ministerio. Et sicut tunc, ita et nunc, si Ecclesia, si sacerdos regem punit, solus tamen Deus punire dicitur. Ille enim punit qui in terra Domini fungitur vice, qui et in terra quasi Deus populo datus est. Juxta quod Dominus ad Moysen: *Ecce*, inquit, *constitui te deum Pharaoni* (Exod. vii). Et sacerdotes deos vocari in Scriptura invenire creberrimum. Legerat itaque in lege et in propheta sic, et similiter de regibus corripiendis per varia Scripturarum loca. Et, ut jam non tantum divinis legibus, sed et orthodoxorum Patrum et discretorum Ecclesiæ rectorum agamus exemplis, audierat itidem et legerat rectorem illum Ecclesiæ tam eruditum, tam discretum, et tam præclarum doctorem Ambrosium, Theodosium magnum imperatorem excommunicasse et ab Ecclesiæ penitus exclusisse ingressu. Et ne etiam longe exempla petantur, audierat felicis memoriæ Ivonem Carnotensem episcopum, qui velut quoddam Scripturarum armarium modernis temporibus pastoribus magnum scientiæ lumen effudit, et spectabilem se ipsum formam dedit, audierat, inquam, ipsum Francorum regem Philippum excommunicasse et ab Ecclesia omnino prohibuisse. Legerat itaque archipræsul et audierat et hæc et illa, unde et coarctabatur ex his et illis, hinc super omnia metuens quod si taceret vix sibi, si vero loqueretur, dissensionis periculum. Nec enim quæ supra contra hoc inducta sunt adeo vebatur, utpote Scripturas intelligens, sed hoc quidem præ cæteris metuebat gravius, videlicet

dissensionis periculum: verumtamen et hæc et illa in corde suo volvens sic, et tandem cogitans regem suum filium suum et dominum, quem ex diutina et familiari conversatione verius et interius noverat, nequaquam fore filium dissensionis sed pacis, et quod quiddid exacerbatus verbo comminaretur, nequaquam tamen matris suæ Ecclesiæ ut se ejiceret, dirumperet uterum; cogitans, Inquam, sic, firmiter in corde suo statuit ipsum baculo pastoralis percellere, si forte devians et justitiæ transgrediens iramtem reverteretur velsic: verebatur tamen ne, ut supra diximus, Romana Ecclesia sua, quæ omni præest auctoritate, evacuaret penitus quod ipse fecisset omne justitiæ opus, verebatur quidem hoc, at tamen quiddid faceret Romana Ecclesia tanquam mater et domina, satius judicavit officii sui debitum esse quam ipso muto et dissimulante malitiam relinquere impunitam et fovere transgressionem: arbitrans nec immerito sanguinem impiorum de manu sua minime requirendum tunc, etsi forte potestas major superveniens ab eo factum immutaret justitiæ opus. Suadente igitur conscientia, imo sicut ab ipsomet accepi urgente eum ad hoc, illam quam diximus in regem coercionem ecclesiasticam in corde suo firmissimam tenuit. Alioquin sibi visum quod pastor evangelicus sine causa baculum et iudex ecclesiasticus sine causa gladium, et quod sacerdos Dominicus sine causa claves Ecclesiæ accepisset, nisi quemadmodum auctoritatem ita et haberet virtutem, sicut introducendi, ita et excludendi ab Ecclesia quos deberet.

Et quoniam quod faciendum statuerat non sub lecto, non clam, sed publice et solemniter judicavit faciendum, sicut et causa nostra et partis adversæ noxa publica erat toto jam ecclesiarum orbe notissima, accessit ad locum celebrem et tempore celebri, Vizeliacum scilicet, instante festivo præ cæteris illius ecclesiæ die, die videlicet festo beatæ Mariæ Magdalene in cujus honore ecclesia loci fundata, cujus et ibi corpus gloriose requiescit, unde et ad diem festum ex diversis regnis concurrunt nationes plurimæ. Tempore itaque celebri tam festivo accessimus ad tam celebrem locum distantem a mansionem nostra Pontiniacensi monasterio per diætam. Accessimus itaque et venimus proxima ante festum die, nobis qui sequebamur accessus sui causam ignorantibus, nec enim propter hoc quod supra diximus nobis hoc indicavit, et credentibus quod solum propter diem festum accessisset. In crastino vero, festo videlicet die, ad petitionem abbatis et conventus, publicam missam faciens, finito Evangelio ascendit pulpitum, et elegantem et fructuosum sermonem ad populum habuit. Demum vero in audientia hominum causam dissensionis inter ipsum et regem exponens, et quam dure et dire secum et cum suis actum, qualiter etiam rex toties conventus et non misertus, sed eo amplius induratus, Ecclesiæ causam et se et suos ipsorum orationibus commendavit: et confestim, omnibus audientibus et constu-

pentibus, miro modo compunctus, voce quidem flebili et intentissimo compassionis affectu in ipsum Anglorum regem Henricum nominative comminatorium emisit edictum. Et nos quidem certaminis suis socii, ex inopinato audientes sic, mox obstupimus, eo quod nobis inconsultis fecisset sic. Qui quidem, sicut cito post nobis ipsemet indicavit, sciens et prudens hoc a nobis celavit, per supradictam causam se excusans quod nobis Inconsultis hoc fecisset. Factum vero hoc ex plurimis et variis nationibus, quæ ad diem festum convenerant et ita propriis audierant auribus mox divulgatum per terras citissime ad aures regis pervenit: unde et rex nec sine causa, supra quam nunc dicere aut scribere tempus ait, motus est et turbatus et qui cum eo universi.

18. DE APPELLATIONE REGIS AD ROMANUM PONTIFICEM.

Convenit igitur multitudo et mente confusa est, quam certissime jam audierunt sic. Convenit itaque Ecclesia Anglorum in cismarinis; convenit et Ecclesia Normannorum in transmarinis hinc inde, quid facto opus inter se acerrime deliberantes, summo opere providere curantes, ne videlicet in regem sententia, cujus jam processit comminatorium, ad perfectum procederet, seu in regnum vel personas regni aut ecclesias aliquod ecclesiasticæ districtiōis gravamen. Consternati etiam jam et tremefacti, non solum ob id quod jam de rege audierant, sed et quia archipræsul Jocelinum Saresberiensem episcopum ob manifestam inobedientiam jam suspendisset: eo videlicet quod decanatum Saresberienis ecclesiæ contra interdictum domini papæ et suum inconsultis quibusdam ejusdem ecclesiæ canonicis, qui tunc cum ipso peregrinabantur, quorum erat cum aliis confratribus decanum suum eligere, eundem de anlicis clericis ad regis voluntatem contulisset. Qui etiam et eumdem anlicum clericum, propter quasdam conventiones et obligationes illitas, quas in Alemannia cum schismaticis fecerat, anathematis vinculo jam innodaverat. Quas tamen conventiones et obligationes a rege missus de regis mandato ipse fecisse dicebatur. Personæ igitur regni metuentes sibi ex his et quæ futura sibi accidere possent gravamina prævenire molientes, solliciti quidem attentissime deliberant quid agendum.

Nam tua res agitur paries cum proximus ardet, ait quidam. Commodius autem sibi non repperunt remedium quam ut ad appellationes convolarent. Et regi placuit, Deo quidem, in subsannationem et (derisum) novi legislatoris et novarum legum, quas supra apud regiam illam mansionem quæ Clarendune dicitur fabricatas, et in scriptum redactas ostendimus, juste quidem operante nunc sic. Nam cum legibus illis appellationes ad Romanam Ecclesiam inhibita forent, nunc tamen ad regis et regni tuitionem ad ipsas recurrere necesse. Personæ itaque regni, quia remotiores erant, pro rege, pro regno, pro se et pro suis ecclesiis, scripto appellaverunt, et per eruditos nuntios libellum appellatu-

rium in ea forma conceptum archipræsuli ad solitudinem nostram Pontiniacum transmiserunt. Et quia rex extra regnum erat tunc transmarinus, magnas quidem et venerabiles personas Ecclesie Normannorum pro se ipse rex destinavit, videlicet pie memorie Rotherot tunc Rothomagensis archiepiscopus et Ernulfum tunc Lexoviensem episcopum, et cum eis alios plerosque viros magnos et eruditos, qui quidem Pontiniacum venientes nequaquam nos invenerunt. Siquidem a quodam familiari suo, qui tunc in regis curia erat, de mittendis sic nuntiis archipræsul præmunitus se subtraxit. Igitur præfati nuntii, propter nos Pontiniacum venientes, sed minime nos reperientes, mox recesserunt: prius tamen secundum formam juris Pontiniaci, ubi quasi domicilium habere videbamur, appellationem suam edentes, nec tamen ut docet civile ius scribentes eam pro foribus, sed viva voce appellantes. Subtraximus autem nos, non quasi juris ignari, quin apprime sciremus ratione domicilii, vel quasi appellandis absentibus seu absentantibus se, appellationes posse fieri, sed ideo in adventu nuntiorum nos subtraximus quia illorum colloquia vitabamus. Et quemadmodum appellationes interpositæ, ita et ad regni tuitionem iuramenta quædam illicita et sacrilega per totum regnum exacta sunt in civitatibus, in castellis, in pagis, per comitatus regni singulos, quotquot a quindecim annis et supra jurantibus, quod domini papæ nuntios seu literas et archipræsulis pariter, aut in captione detinerent si possent, aut proderent illis qui non possent hoc. Quam vero sacrilegum, quam profanum iuramentum hoc, lippi vident et tonsores. Juxta quod ait: *Videns quia peccatum ariolandi est repugnare et quasi æcelus idololatriæ nolle acquiescere (I Reg. xv)*, verum omisso tanquam sacrilego facto hoc, quod non regni tuitio, est sed potius contaminatio, ad appellationes nostros revertamur.

Qualiter archipræsul cum suis deliberat an sit appellationi deferendum.

Nos vero Pontiniacum cito post appellatorum horum recessum reversi, deliberare mox cepimus quid agendum, utrum videlicet tali fuisset appellationi deferendum, plerisque nostrum asserentibus deferendum, et ad docendum hoc tanquam eruditi et exercitati in iure, tam ex divino iure quam humano plurima allegaverunt; aliis vero de nostris contradicentibus et nequaquam deferendum contendentibus, e diverso validis et variis rationibus suam fundantes intentionem. Eo præsertim, ut prudenter astruebant, tam iniquæ appellationi minime deferendum quod videlicet esset ipsa non ad oppressorum remedium, sed potius ad opprimentium prolongandam malitiam excogitatum fomentum; in quorum manibus evidenter et in omnium ecclesie spolia et dextera rapinis repleta. Itaque coram archipræsule ab eruditis suis diversa sentientibus super appellatione collatum, ipso, ut moris sui erat, partes suas interponente, et nunc hos, nunc illos

A de iure crebro sciscitante et opponente. Et quidem inductas tunc hinc inde super appellatione allegationes huic interseruissem historiae, nisi quia non paterentur se molesta brevitate arctari. Et præsertim sicut et de plerisque aliis, ita et in libello hoc supersedemus ab his, eo quod in corpore quodam epistolari multa continentur de his: de quo epistolari corpore mox loquemur. Collatum igitur est et allegatum hinc inde, verum archipræsul, etsi forte contra tam manifestos malefactores, quorum maleficia et lapides in parietibus et tigna in domibus jam accusabant, in ecclesiastica severitate de iure procedere potuisset, substitit tamen adhuc iuxta Sapientis consilium: *Qui patiens, inquit, est, multa gubernatur prudentia (Prov. xiv)*. Substitit igitur adhuc, non processit, differre ad tempus satius iudicans, donec super hoc Romanam Ecclesiam jam consultasset: super omnia, ut supra jam diximus, veritus ne, quidquid ea inconsulta et tali præsertim tempore ipse statueret, totum ipsa evacuet. Ad supradictum vero libellum appellatorium, nomine personarum regni ad ipsum destinatum, sensu suo proprio conceptam et proprio stylo exaratam remisit epistolam elegantem satis et sufficienter responsalem. In qua, inter alia, de appellationibus factis, si juste vel injuste, quod sibi visum interseruit. Quæ nos in libello historico hoc, eo quod in ea epistola sint inserta, sicut etiam supradiximus, hic causa brevitalis præterimus. Exstat enim epistola illa inter cæteras epistolas suas, quas vel ipsemet scripsit, vel aliqui de eruditis suis de ipsius mandato sub ejus nomine. Ex epistolis quippe a nobis vel propter nos in exsilio nostro confectis, grande compactum est corpus epistolare, de quo supra nos hic dicturos promissimus. Compactum est, inquam, corpus ex his multis in se epistolas continens; quas etiam secundum ordinem historiae venerabilis prior sanctæ Cantuariensis Ecclesie Alanus laboriose quidem et studiose digessit. In quibus de exsilio nostri laboriosa historia perplurima continentur; unde et eo quod in epistolis illis diligentius conscribantur, multa in libello hoc brevitalis causa præterivimus, præsertim quia liber ille epistolarius a multis personis et a multis ecclesiis jam habetur. Verum et qui sufficienter archipræsulis verba et opera in exsilio, conatus et actus, agones et sudores pastorales nosse desiderat, ad illum recurrat, ut post libellum historicum hunc legat et illum librum epistolarem. In quo, etsi in plerisque epistolarum desunt dictionum solemnina, pro materia tamen satis commodus est. Quo nos amodo in historia facilius contexenda adjuti, de cætero brevius cæptum historiae ordinem prosequamur.

19. QUALITER ARCHIPRÆSUL ET REX AD VIRUM APOSTOLICUM MITTUNT.

Appellatione itaque interposita et ecclesiastica disciplina suspensa sic, parantur, mittuntur nuntii ad apostolicam sedem. Mittit rex, mittunt et personæ regni, mittit et archipræsul. Sed multum quidem

inter nuntios hos, illi quippe per viam argento et auro suffarcinati; nostri vero expediti et vacui secum in via vix viaticum portantes. Illi in curia his et illis massas aureas et argenteas aut dantes aut certissime pollicentes, nostri vero nuda solum verba apostolicæ clementiæ offerentes. Nec tamen fuit hæc nostra prima ad Romanam Ecclesiam missio. Prius quidem quosdam de eruditis nostris ad sedem apostolicam misimus, per quos a viro apostolico apostolicæ sedis legationem jam super Angliam obtinuimus. Et quidem ad cautelam a nobis factum sic, ut videlicet firmior et magis authentica ecclesiastica quævis sententia haberetur, si deinceps ab archipræsule aut in regnum aut in regni personas ferretur, unde et cum archipræsul Vizeliaci, sicut supra ostendimus, comminatorium in regem emisit, apostolicæ sedis legatus jam erat etsi impeditus legationis suæ fines intrare non possent. Verum ad Romipetas nostros revertamur.

Qualiter archipræsul amotus est a Pontiniaco.

Hoc tamen prius intersero antequam plura de his, videlicet quod ipsis cito post supradictum diem festum beatæ Mariæ Magdalene ad apostolicam sedem profectis, dominus rex Anglorum ad generale illud capitulum Cisterciense, quod in Septembri proximo die Sanctæ Crucis, ut mos est, celebrabatur, litteras quasdam destinavit, significans quod quemdam de inimicis suis suscepissent et secum haberent, Thomam videlicet Cantuariensem archiepiscopum. Unde et mandavit quod, sicut charum habebant quidquid in terra sua aut cismarina aut transmarina possidebant, ne eum amplius tenerent secum. Tribus itaque diebus exactis, quibus capitulum celebrari moris est, veniendi ad nos Pontiniacum arripiunt iter: abbas ipse Cisterciensis Gilbertus nomine episcopus Papiensis, ordinis illius quondam monachus, et ordinis abbates quidam cum iis, et venerunt festinantes archipræsuli nomine capituli nuntiantes se tales regis litteras et tale in iis suscepisse mandatum. Verumtamen et sermonem ad archipræsulem convertentes: « Domine, » inquit, « capitulum propter mandatum tale nec fugat nec expellit te a se nec licentiat, sed tibi et prudenti tuo consilio hoc significat, ut post tale mandatum videas et attendas quid agendum. Scit quippe totum capitulum certissime, et nos qui modo huc venimus, pariter novimus universi, vos adeo nostrum diligere ordinem quod ordinis providebitis indemnitati, ne vestri occasione sicut nec in spiritualibus nec in temporalibus diminutionem aliquam aliquodve detrimentum patiatur. »

Archipræsul vero et consiliarii ejus multa experti et exercitati in plurimis, mittentium et missorum corda conjecerunt et adverterunt mox quid agendum. Unde et incontinenti cum suis consilio habito, mox respondit archipræsul nulla ratione se velle quod sui occasione ordo læsionem ullam seu vel modicum aliquid damni incurreret, qui in tam arcto et ipsi et suis tantam exhibuisset humanita-

tem. Eo addidit quod quocunque diverteret, ubicunque caput suum reclinaret, ab iis se citissime amoveret. « Domino, » inquit, « si placet, mihi et coexulibus meis providente, qui volucres cœli pascit et vestit lilia. » Et archipræsul quidem breviter sic, multorum vero et præsertim abbatibus et fratribus nostrorum Pontiniaciensium, qui, ut supra ostendimus, tam læti, tam devoti nos susceperant, qui aderant et audierant verbum superarchipræsule et suis, pietatis viscera commota sunt cum fletu domum egredientes. Nam ut quod vidimus, quod audivimus, hoc testemur, sanctæ memoriæ Garino de Galardim tunc abbate loci et fratribus invitatis ipsis quoad licuit contradicentibus, propositum fuit recessus nostri verbum hoc. Audito vero archipræsulis responso hoc, sanctus abbas Cisterciensis et qui cum eo, in crastino recesserunt.

De deliberatorio archipræsulis sermone cum suis.

Archipræsul vero cum suis consilium habens quid agendum mox deliberat suprenis suos alloquens sic: « Fratres, » inquit, « mecum coram Domino in causa Ecclesiæ advocati, ecce quomodo Satanas expetit eribrare nos sicut triticum, nos et nostros expellens, proscribens, deficiens et impellens, ut evineat nos et cedamus. Ecce quod, ut nos persecutus est mundus, fugimus ad solitudinem hanc ejecti et proscripti, ad hos sæculi mortuos declinantes, sperantes nos saltem in solitudine hac, inter hos sæculi mortuos, abscondi a conturbatione hominum, a contradictione linguarum. Sed ecce quia princeps mundi plurimum potestatis hic habet, qui etiam usque huc nos persequitur, hinc dejicit, et deinceps hic peregrinari non permittit. Quid ergo faciemus, viri fratres? Quo ibimus? Quo divertemus? Siquidem solitudines interdiciuntur, nec etiam inter mortuos sæculi nobis jam conceditur locus. Non ædificium nobis nec domicilium, non aurum, non argentum, non pecunia, nec possessio ulla: elongati sumus ab amicis et proximis: vix etiam qui compati audeat, nedum suscipere nos vel subvenire. Quis enim qui hoc audeat, quæ ecclesia, quis ordo, quodve monasterium nobis, a tam spectabili, tam approbato ordine, quem inter peregrinationis nostræ initia adeo præoptavimus, quem prælegimus ejectis sic? Certe tum quia postpositis aliis prælegimus peregrinari hic, tum propter timorem mundi et mundanæ potestatis minas, non est qui nos suscipiat, non ecclesia, non persona ecclesiastica, non ordo ullus, seu etiam solitudo ulla, multo minus sæcularium quis. Ad quos tamen, si qui forte essent, divertere, tum propter causam quam agimus, tum propter religionem quam ab initio usque incoluimus, nec religiosum nobis nec honestum. Nec tamen ob id, fratres, loquor hæc, quasi contra boni patrisfamilias inhibitum adeo sollicitus de crastino. Spero quippe quod qui in monte vidit Dominus, ipse et in solitudine hac nos mundum deserentes et a mundo et ab his etiam qui mundum deseruerunt, jam desertos ipse consuetæ pietatis suæ oculis nos

respiciet. Spero, inquam, et certissime spero, quod A in arcto hoc misericors et miserator Dominus angustiae nostrae et inopiae suam amplissime aperiturus sit manum et benedictione implebit. Verumtamen mihi necdum aperta est via, qua velit nos Dominus ab hac solitudine educere et providere eductis. Quod quidem admodum nunc desidero, ne videlicet, post propositum nobis de recessu nostro verbum, deinceps faciamus hic moram. Turpe enim nobis hoc et indecens. Provideat ergo nobis nunc Dominus praeter quem aliud refugium non habemus. »

De responso discipuli.

Discipulus vero qui scripsit haec, inter ceteros audiens domini sui archipræsulis querulos sermones hos, ante ceteros mox erupit in vocem; « Domine, » inquit, « recordare, si placet, quod dominus rex Francorum vobis civitate Suessionis tam magnifice, tam liberaliter, obtulerit se, videlicet vobis et vestris in qua velletis vel urbe vel oppido aliove ditionis suae loco quem elegeritis, de fiscali amplissime provisurum. Et quidem solum distulistis tunc, donec videlicet foret necesse hoc, non renuistis omnino. » Et archipræsul: « Recordor, » inquit, et ad eum qui sibi loquebatur singulariter sermonem dirigens: « Sed videor mihi nunc, frater, » inquit, « quod aulicos iterum apparatus et urbanas delicias quæras, quæ temporis hujus est nos deserere qui tenemur in Evangelii vinculis. Satiùs et multo religiosius esset et honestius tempore hoc ad ecclesiam aliquam vel solitudinem, quam ad aulam vel urbem nos divertere, ubi eo fiducialius quo humilior salutare Dei præstolaremur cum silentio et prævisum a Domino nostræ peregrinationis eventum. »

Alii vero de eruditissimis suis, qui consilio intererant, audientes hæc contestabantur religiosius quidem, honestius et humilior hoc; sed hoc, inquit, minime in nostra optione vel potestate nunc positum, nobis jam non qua vellemus, sed qua possumus declinare necesse habentibus: ita ut oporteat nos illud comici sequi: « Ibant, » inquit, « qua poterant et qua non poterant non ibant. » Unde et commune suorum omnium consilium fuit, ut de necessitate virtutem faceret, et quia ad interdictas jam sibi solitudines non poterat, ad aulam vel urbem declinaret si et hoc posset. Adjicientes: « Domine, inquit, in aula vel urbe potest quis per gratiam vitam solitariam ducere et Deo vacare, sicut e diverso potest quis in solitudine aulicis luxibus perfluere. Probat hæc nostra verba Israelitarum vetus historia et notissima, qui ad petitionem suam manducaverunt et saturi sunt nimis; verum adhuc escæ eorum in ore ipsorum, et ira Dei ascendit super eos. Et quidem in solitudine accidit sic, cum e diverso legamus pudicos illōs et sapientes juvenes Joseph et Daniele, res fiscales agentes, unum in Aegypto et alterum in Babylone, vixisse continentissime et ipsos jam cives Jerusalem, nihilominus tamen tunc res Aegyptiacas et Babylonicas ministrasse in tam numerosa quidem turba sine turba-

tionem, versantes et quasi manentes in solitudine. Unde et rex ille debellator et manu fortis, etsi semper in acie, semper in agone, semper in multitudine, in solitudine tamen optatis sibi columbae pennis gloriatur se mansisse. *Ecce, inquit, elongavi fugiens et mansi in solitudine (Psal. lrv).* Quod eorum qui praesunt maxime proprium est, ut versentur sine turbatione in turbis, et maneant semper in solitudine inter multos; aliorum semper, raro sui, nisi quia quando aliorum propter Deum, tunc magis sui. Unde et Magister, cum liber esset ex omnibus, omnium se fecit servum: his qui sub lege quasi sub lege, his qui sine lege tanquam sine lege, Judæis Judæis, ethnicis ethnicis, infirmis infirmis, omnia omnibus, ut salvaret sic omnes (I Cor. ix). Sic ergo nos, Pater sancte, qui urbem non appetimus, quin potius expulsi a solitudine, velimus nolimus, oportet nunc urbem ingredi, poterimus, operante Domino, viciitare in urbe, tanquam in solitudine commorantes. Si quis autem ad Latinas, Græcas et barbaras historias recurrere velit ad hoc ostendendum, grandem habebit testimonium nubem; adeo sicut nec habitum nec loca, sed vitam solum merita Deus accipit. Nam ut adhuc recurramus ad nostra, Loth noster, qui in ipsa civitate immunda fuit mundus, in monte immundus fit. Et ut majora inducamus adhuc, primus homo de paradiso, et primus angelus de caelo cecidit, et Job noster in sterquilinio stetit. »

C 20. QUALITER ARCHIPRÆSUL A PONTINIAO RECEDENS SENONIS AD PEREGRINANDUM A REGE FRANCORUM SIT EXCEPTUS.

Archipræsul itaque persuasus ex his, ad Christinum illum et gloriosum Francorum regem Ludovicum, cujus memoria in benedictione æterna est, discipulum qui scripsit hæc mittere non distulit, qui de recessu nostro a Pontiniaco et causa recessus regi cuncta nuntiaret. Quod cum audisset rex, non parum est admiratus, et mox itineris sui socios convocans, erat quippe in via cum ipsi referrentur hæc, totum ipsemet eis retulit. Et iterando sic audientibus omnibus: « O, inquit, religio! o religio, ubi es? Ecce enim quos credebamus sæculo mortuos, sæculi minas timent; et pro rebus perituris et caducis, quas se propter Deum contempsisse profitentur, a Dei opere quod cœperant jam convertuntur retrorsum, Dei causam et pro Dei causa exsulem ejicientes a se. » Et convertens rex sermonem ad illum qui missus fuerat: « Saluta, » inquit, « dominum tuum archipræsulem et fiducialiter ipsi meo nomine nunties, quod etsi mundus et etiam qui videntur mundo mortui eum deserant, ego tamen eum non deseram. Sed quantacunque rex Anglorum, etsi dominicus homo meus sit, adversus ipsum molliatur et exerceat, ego tamen suscipiam propter Deum et propter justitiam patientem. Nuntiet ergo nobis sive ad civitatem sive ad castellum aliumve ditionis nostræ locum divertere maverit, et paratum inveniet. »

In brevi ergo reverso eo qui missus fuerat, archipræsuli nomine regis reportata sunt hæc.

Nos vero supra alia loca regia ad complendum peregrinationis nostræ residuum præclaram illam et regiam civitatem Senonis præelegimus, a solitudine nostra Pontiniaco quam incolere cœpinus, ut supra nos dixisse meminimus, solum per duodecim terræleugas distantem. Civitatem, inquam, illam præelegimus ex indigenarum consilio, eo videlicet quod, sicut ipsi testabantur, et nos hoc ipsum fide sculata deprehendimus, multa essent civitatis illius commoda, utpote frumento, vino et oleo stabilita, silvis circumnixa, pratis amœnata; scatent fontes, fluunt amnes, et denique autumnī serenitas suas in omnibus exhibet ubertates. Terra certe illius similis, de qua nuntiatur quod fuerit terra habitores suos devorans. Sed super omnia et præ cæteris ad civitatem allexerunt nos civitensium mores; magis, inquam, allexit nos in clero et populo civitatis morum edocta liberalitas, quam descripta civitatis commoditas seu agrorum fertilitas ulla. Erant enim et in clero et in populo civitatis, sicut et jam eramus præexpertī, viri munifici liberales, dapsiles, advenis præsertim et inquilinis honorem exhibentes, affabiles, sociales, sua communicantes et facile tribuentes. Unde et potissimum inter tales præelegimus peregrinationis nostræ consummare residuum. Est autem prope civitatem quasi per stadium nobilis abbatia et regia, ubi gloriœ virginis et matris sanctæ Columbæ corpus requiescit, et monasterium ad ejus honorem dedicatum, tam commode situm ut facile possit civitatis habere commoda et evitare tumultus. Ad hoc archipræsul cum suis, tum propter loci religionem, tum propter civitatis tumultus facilius evitandos, declinare statuit. Quod quidem et mox, ut præfatio illi Christianissimo regi innotuit et regi complacuit sic.

Biennio igitur jam peregrinationis nostræ Pontiniaci expleto a Pontiniaco discedimus. Die vero recessus nostri videres fratres mœstos et ejulantes, post archipræsulem currere, discurrere, festinare, salutantes et resalutantes et benedictionem iterum et iterum postulantes, et iterum et iterum videre et alloqui cupientes recedentem, interdum conclamantes: « Pater, cur nos deseris, aut cui desolatos nos relinquis? » Ego autem videns sic verissima fore justi verba illa recordabar: *Qui timent, inquit, te, videbunt me et lætabuntur* (Psal. cxviii); fratres igitur isti ita timentes ita discurrebant, ita se invicem prævenire contendebant, ut vel modicum viderent adhuc et lætarentur. Nec quidem præceptum abbatīs nec hora regularis ipsos revocare poterat, archipræsulem et suos diu et longe extra monasterii portam prosequentes: adeo quisque alium absque omni ordine prævenire contendens, salutationem ultimam et ultimam benedictionem alii contendebat eripere. Sed quam plus certe, quam ordinatus, irregularis et inordinatus horum incessus et excessus hic, ad quem eximie charita-

tis violentia impulit. In hac itaque fratrum pace et dilectione a Pontiniaco discessimus.

De somnio archipræsulis in recessu a Pontiniaco.

Verum die recessus nostri inter itinerandum archipræsul, qui in via maxime solebat esse comes facundissimus et jucundissimus, cœpit admodum tristis et mœstus esse contra morem suum, neminem suorum in via alloquens, nec ipsum suorum aliquis; nobis viæ sociis opinantibus ipsum tristari sic eo quod a fratribus tam diligentibus et tam dilectis recessisset. Abbas vero noster Pontiniacensis, comes tunc noster per viam, vir edoctus et religionis approbatæ, videns sic et compatiens, accessit propius sciscitans ab eo secretius quare sic vultus ipsius concidisset. Et hoc ipsum iterum et iterum sciscitabatur, donec sibi archipræsul aperiret causam ad amicam importunitatem sciscitantis. « Domine abbas, » inquit, « nec mirum, si animo meo turbato vultus meus sic conciderit: verumtamen causam, et si familiaris meus sis, non prius edisseram nisi eo pacto, ut secreto eam teneas quoad vixero ego. » Et abbas mox pepigit se facturum sic. Et ipse: « Domine abbas, » inquit, « hac nocte vidi somnium, et visiones capitis mei conturbaverunt me. Jam quippe per Dei, ni fallor, revelationem accepi quod morte dura, sed spero quod pretiosa de hoc mundo sim transiturus. Nocte quippe hac mihi visum, quod in ecclesia, nescio tamen qua, contra dominum regem Anglorum in auditorio domini papæ et cardinalium pro Ecclesiæ causa contenderim, domino quidem papa parti meæ favente, sed cardinalibus adversantibus pro rege contra me, cum ecce subito quatuor supervenerunt milites, qui mox rapientes me ab auditorio, in eadem ecclesia capitis mei summitatem, ubi coronæ meæ locus est, exco-
raverunt, adeo ut mihi videbatur angustius quod videbar mihi defecisse. Et ex revelatione hac, scio quippe revelationem esse hoc, non vanum somnium, conturbor sic et contristor: non quidem propter revelationem, pro qua potius Altissimo quantas valeo gratias ago, qui parvitati meæ aperire dignatus est de hoc mundo mei exitus modum, sed propter eos maxime doleo, qui secuti sunt me et tot et tanta sustinuerunt propter me. Qui certissime scio quod me percusso dispergentur, quasi oves non habentes pastorem. » Hanc eandem visionem paucis post diebus exactis et euidam alii abbati ordinis Cisterciensis, amico itidem suo et familiari, pacto simili ne videlicet eam cuiquam, donec visionis videret exitum, revelaret, secreto similiter retulit: de Valle Lucente dictus abbas hic erat. Visionem itaque duobus his abbatibus retulit, ut ita ipso eo modo quo ex revelatione præmunitus fuerat de hoc mundo sublato, in ore duorum staret verbum revelationis hoc. Quod quidem, ut eisdem abbatibus dixit, nemini suorum indicare voluit, ne forte passionis suæ socios eo amplius contristaret. Et quidem sicut prævidit et prædixit, eo modo et de mundo transivit, quemadmodum sequens histo-

riæ ordo declarabit. In hoc et uni sanctorum similis qui similiter de præsentis cursus sui fine revelationem accepit; cui nocte visum quod ipse totus igne cremaretur; et ipse quidem postea ita igne crematus et per ignem transiens in refrigerium est eductus. Nihil fallor, beatus Polycarpus hic erat. Dicti vero abbates relatum sibi archipræsulis visionem omni tempore siluerunt, donec ipsam in cursu nostri sine fine ipse confirmaret. Sed hoc de visione interserto, deinceps ad historię ordinem revertamur.

21. QUALITER ARCHIPRÆSUL SENONIS A FRANCIS SIT EXCEPTUS.

Profecti itaque a Pontiniaco Senonis venimus, a piæ memoriæ Hugone Senonensi tunc archiepiscopo et a clero et a populo civitatis, in omni gaudio et alacritate suscepti, de fisco ad usum nostrum necessaria percipientes amplissime. Rex vero omni tempore quo ad civitatem veniret, sicut ubique moris sui erat, primo quidem ad ecclesiam et confestim, nisi maior causa detineret, ad archipræsulem visendum accelerare consueverat. Cujus tunc prolixiori eloquio et in magnis consilio, tanquam viri exercitati et experti negotia regia, fruebatur. Sed quid? Suscepti jam a Francis, et de ipsius regis mensa jam eramus, inter ipsos non ut exsules sed cives, non quasi advenæ sed indigenæ; et etiam plus quam ipsis indigenis nobilibus et generosis, nobis a magnatibus et principibus terræ honor amplior impendebatur, ita ut oblivioni datæ essent augustiæ nostræ priores, nec essent jam priora in memoria quæ transierunt.

De commendatione Francorum.

Unde et, sicut vetus habet historia, quod Gallia semper viris fortissimis et eloquentissimis abundaverit, ita et illi veteri hoc novæ historiæ copulamur nunc, addentes quod viris munificentissimis et honoratissimis abundantissima sit, ad illos maxime tales se semper exhibentes qui advenæ sunt et oppressi. Quod vidimus, quod audivimus, quod etiam nos ipsi sensimus, hoc testamur de Francis, unde et merito ab antiquo dulcis Francia dicta est. Dulcis certe propter terræ fructus, qui præcellentissimi sunt, dulcis etiam propter aerem, qui ibi clementissimus est, sed verius dulcis propter terrigenarum ingeniosos mores, suaves et jucundos, et jucunda consortia. Etsi igitur forte ex alia causa dulcis dicta sit, nos tamen inpræsentiarum et ea causa dulcem prædicamus, quia ejus dulcedinem sensimus, adeo ut peregrini nos angustiat et afflicti præ ipsius dulcedine non recordamur malorum. Propria quippe gens nostra nos calice mœroris, calice amaritudinis epotavit, sed ista venientes ad se calice suæ dulcedinis nos inebriavit: adeo ut præ dulcedine propinata prius amaritudinis non recordamur malorum. Dulcis itaque Francia et vere dulcis; dulcis, inquam, ut jam diximus, et adhuc iterare urget amor, dulcis. Dulcis revera propter fructuum gratiam, propter aeris clementiam: sed vere dulcis

A et adhuc dulcior propter eximiam gentis humanitatem et inolitam principum terræ benignitatem. Dulcissima vero propter cœlitus datam regibus terræ mansuetudinem. Bonum quippe proprie desuper datum in tanta potestate mansuetudo tanta. Siquidem Francorum reges, ut ex gestis habetur antiquis, viri semper fuerunt bellicosi, tyranni vero vix aut nunquam. Dulcis itaque Francia dulcior et dulcissima est. De cujus dulcedine quia nos gustavimus, imo plene inebriati sumus, inebriati de ipsa nunc, cum tempus est non eructuare non possumus. Et quidem ad laudem et gloriam gentis illius, de ipsius dulcedine plenius nunc eructuassem, nisi quia amodo tempus est et historia exigit, ut intermissum supra historiæ ordinem retexamus. Ad supra missos itaque Romipetas nostros revertendum.

22. DE ROMIPETIS ARCHIPRÆSULIS REVERSIIS ET ADVENTU CARDINALIUM AD PACEM.

Nec enim multos dies Senonis fecimus, cum ecce Romipetæ nostri revertuntur, nuntiantes quod dominus papa, cardinales a latere suo in brevi missurus foret, qui inter regem et archipræsulem de pace tractarent et reformarent pro posse: interim vero omnia debere esse in suspensio, nec aliquid ecclesiasticæ disciplinæ exercendum; hoc ipsum viro apostolico per reversos nostros signatis apicibus suis archipræsuli mandante et consulente sic. Sedimus itaque per dies plurimos adventum cardinalium præstolantes. Qui tandem venientes Senonis, per nos primo venerunt; ideo prius ad nos quam ad regem, quia viæ ipsorum ductus sic se habuit. Fuerunt autem qui missi venerant, quod ad ipsos, pacis reconciliatores idonei, utpote viri multum pectoris et multum oris habentes. Quorum unus dictus est Willelmus de Papia, alter vero Otho, presbyteri cardinales. Isti itaque primo venientes ad nos, causam nobis sui exposuerunt adventus. Et nobis quidem placuit et devotè ut ad Dei honorem et salva Ecclesiæ libertate inter dominum regem et nos componerent. Ipsi vero, sic ad regem profecti in Normanniam, erat quippe rex in transmarinis extra regnum tunc, cum rege moram fecerunt non modicam, ad nos nec revertentes nec nuntiantes quid. Hoc quippe solum quærebat rex, ut dicebatur, quod et postea rerum probavit exitus, ut videlicet tempus solummodo protelaret, pacem nostram minime volens, etsi velle se simulans. Verumtamen cardinales, ne frustra venisse viderentur, sæpe et sæpius regem de pace convenerunt, sedulo et attente de pace tractantes, pacem inquirentes, sed viam pacis non invenerunt. Verum ne frustra venisse et nihil egisse viderentur, denique nos ad colloquium vocant. Fuit autem colloquium inter nos et ipsos in confinio Franciæ et Normanniæ inter duo illa castra Trie videlicet et Gisors.

De secundo archipræsulis somnio.

Nocte vero proxima ante colloquium archipræsul vidit somnium, sicut ipse nobis mane ad colloquium

cunctibus retulit, quod videlicet propinaretur ei venenum in calice aureo. Et quidem accidit sic. Alter quippe cardinalium, præfatus videlicet Willelmus de Papia vir elegantis eloqui, et verba habens persuasibilia pacis quidem suaves et blandos sermones nobis obtulit. Et videbantur in superficie bona verba et pacifica, quæ tamen si quis interius aspiceret, ecclesiasticæ paci et libertati non modicum derogabant. Et ita nos audientes illa et pensantes relatæ nobis prius visionis nocturnæ, mox advertimus conjecturam. Unde et singula fere quæ a cardinalibus de pace proponebantur, nobis suspecta erant, metuens capi in sermonibus, qui molliti et melliti erant, et tamen ipsi nihilominus jacula. Et ut ibi prolixius dicta breviter hic et in summa dicantur, summum fuit cardinalium consilium et omnimodis nitebantur ad hoc, ut nulla expressione facta inter regem et archipræsulem de consuetudinibus, quas supra in scriptum redactas diximus, ob quarum contradictionem et nos peregrinabamur, archipræsul ad suam reverteretur ecclesiam, si tamen et hoc a rege posset obtineri vel sic. Dicebant etenim quod nocerent expressa et pacis processui fieret sic offendiculum. Nam sicut adiciebant, turpe esset regi et indecens, ita manifeste et expressim consuetudinibus illis renuntiare, quæ per antiquiores et majores regni et etiam per ipsos episcopos, etiam et per nos ad regiam dignitatem pertinere, et ad coronam suam spectare recognitum est. « Si vero rex pacem, ut aiebant, vobis concesserit de consuetudinibus sive tenendis sive abolendis nulla habita mentione, eo ipso evacuatæ intelliguntur et abolitæ; præsertim cum super his inter vos et regem tam dura quæstio mota, et tota sint hæ dissensionis materia. Unde si vobis pacem concesserit rex, vobis tamen non concedentibus has nec ad tenendas has vos obligantibus, eo ipso intelliguntur evacuatæ et vos obtinuisse in causa. Rex etenim sic, etsi non expressim, tacite tamen intelligitur abolitioni consensisse. » Et addebant exempla, quemadmodum, ut aiebant, si episcopus quemquam ad sacros ordines promoverit, etsi expressus non fuerit, tacitus tamen de continentia fuit consensus. Et ad hoc ipsum quidem probandum, tanquam viri et in divino et in humano jure periti, pleraque alia induxerunt exempla; juxta quod

utrumque jus loquitur de consensu interdum expresso, interdum vero tacito et non expresso.

Nos vero e diverso expressam petebamus consuetudinum abolitionem, et ut expressum illud de quo satis supradictum chirographum decreti evacuaretur. Alioquin minime in tuto fore nostram vel Ecclesiæ pacem, nisi totius turbationis et dissensionis prima et summa causa velut totius mali radix extirparetur. Præsertim cum, ut supra ostendimus, archipræsul circumventus et seductus assensum illis præbuerit. Unde si, nulla vel in specie vel in genere consuetudinum habita mentione, cum rege componeret, priorem illum de consuetudinibus assensum ratum habere videretur, et quæ perperam gesta

A confirmare juxta illam civilis juris regulam Rati habitio retro trahitur et quæ sunt gesia confirmat. Addebamus et quod eadem, quæ inducebant contra regem propter nos, potius pro rege contra nos facerent, de consensu videlicet tacito et non expresso. Taciturnitas enim, ut dicebamus, non aboleret sed potius eo amplius ad pravarum illarum consuetudinum observationem archipræsulem obligaret, ad quas aliquo tempore male et illicite se obligaverat per apostolicæ absolutionis gratiam, per contradictionem acerbam, et per exilium grave, rupta penitus illicita illa obligatione et dissoluta. Unde si in ecclesiasticæ pacis reformatione talis sit taciturnitas, et a tali qui contradicendi habet personam, ita ut de consuetudinibus illis evacuandis nec in specie nec vel in genere ulla fiat mentio, manifestus videretur consensus, et prior illa quæ jam expiravit obligatio illicita revivisceret. In quo casu multi loquuntur canones: quorum unus: « Qui non obviat, inquit, cum potest, consentire probatur: et nec caret scrupulo consensionis occultæ, qui manifesto facinori desinit obviare. » Et multi alii canones in modum hunc tunc ibi inducti, et exempla multa: verum et canonibus ibi inductis et exemplis pariter, brevitatis hic causa supersedemus, præsertim cum hæc modicam etiam habentibus juris experientiam notissima sint.

Præterea ablatorum nobis, imo Ecclesiæ, potius restitutionem bonorum, tam mobilium quam immobilium, instantissime petebamus illam divini juris regularem crebrius iterantes, videlicet non remitti peccatum, nisi restituatur ablatum. Eteo certe majora petebamus et talia quæ certissime sciebamus per ipsos apud regem impleri non posse, quia per quosdam aulicos amicos nostros sed occultos secreto præmuniti eramus, et nos deprehendimus sic, quod nec etiam hoc ipsum quod nobis offerebant impetrasset a rege. Jam enim rex certissime proposuerat et etiam publice juraverat, archipræsulem ipso regnante ad ecclesiam suam non reversurum. Verum cardinales, quorum alter regi per omnia favit, pacis qualiscunque verbum nobis proposuerant, ut ita quoquo modo regem excusarent, quasi per ipsum non staret quo minus pax fieret, et, ut jam diximus, ne ipsi frustra venisse et nihil egisse viderentur. Unde et infecta pace, imo etiam absque omni spe pacis per ipsos deinceps faciendæ, discessimus ab eis sic, ipsis ad regem confestim revertentibus.

In Cenomannia vero in civitate ipsa Cenomannis nonnullæ regni personæ jam convenerant; et videntes sic pacem nequaquam per cardinales possi fieri, in audientia cardinalium suas appellationes renovarunt pro rege, pro regno, pro personis propriis, et pro ecclesiis suis, ad sedem apostolicam reappellantes. Post aliquantulum vero temporis cardinales, multum a rege honorati, et ambitiosis onerati exeniis, nostra et Ecclesiæ pace infecta, ad Romanam revertuntur Ecclesiam.

Nos vero de secunda appellatione hac an ei deferendum, mox inquirere cepimus. Quoniam enim jus indistincte loquatur et dicat, appellatione interposita, sive recepta sit sive non, nihil innovandum, ne videlicet cognitionali deliberationi præjudicium fiat et secundum utrumque jus ejus esse de appellatione cognoscere, ad quem appellatum fuerit; eruditi tamen nostri nequaquam hoc passim et sine distinctione, verum prudenter et erudite, tanquam viri exercitati in his docuerunt, multa inducentes ad docendum, quomodo intelligendum sit jus, quod de appellatione loquitur sic. A quibus tunc inductis hic causa brevitatis supersedemus, præsertim cum talia viris peritis sint notissima. Nos itaque appellationi jam dictæ, tanquam ad justitiam eludendam et in oppressorum oppressionem manifestissime factæ, ab inferiori iudice minime deferendum judicavimus. Quotquot tamen nos domino nostro archipræsuli supplicavimus, monuimus, consulimus ut sola regis persona adhuc remaneret intacta.

23. QUALITER ARCHIPRÆSUL MULTOS DE AULICIS ANATHEMATIZAVIT.

Igitur archipræsul, sciens a propheta maledictum qui gladium suum a sanguine prohibuerit et qui Dei opus negligenter facit, accinxit se. Et in primis quosdam de aulicis clericis, qui ratione ordinis seu beneficii ecclesiastici obligati sibi fuerant et obedientiam exhibere tenebantur, districtissime citavit, ut ad ipsum venire non postponerent nec differrent. Quibusdam etiam in virtute obedientiæ, sub ordinis sui et beneficii periculo, nonnulla præcepit, at nec venerunt hi nec paruerunt illi. Unde et archipræsul appellationi non deferens, ipsos gladio verbi Dei percussit et publice anathematis vinculo innodavit, et ut præcipiunt canones, quantum permisit malitia temporis, quo debuit paragonata sua mittens, anathematizatos denuntiavit. Et de aulicis clericis sic; pariter et de aulicis laicis et ob causas varias: quosdam, quia invasores, quosdam tanquam rerum ecclesiasticarum violentos detentatores, quosdam quia tempore peregrinationis suæ prædia Cantuariensis Ecclesiæ, non ab ipso, sed a rege acceperant. Omnes denique qui prædia et possessiones archiepiscopatus Cantuariensis vel suorum, qui peregrinabantur cum ipso, auctoritate regis ad custodiendum susceperant anathemate percussit. Et non solum ex his et illis, sed et aliquos etiam de ipsis episcopis propter inobedientiam manifestam, et maxime quia inter regem et ipsum totius dissensionis incoctores exstitissent, quam et fovere in dies non desisterent. De anathematizatis sic Gilbertus cognomento Folioth episcopus Londoniensis unus erat. Et hi quidem anathematizati ex aulicis de magis familiaribus et consiliariis regis. Unde et ferejam quotquot in aula aut nominative excommunicati sic, aut saltem excommunicati denominative excommunicatorum participio, quos evitare nec poterant nec licebat. Adeo ut vix in capella regis qui in missa pacis illud

A osculum sacramentale regi offerret nisi excommunicatus vel ex nomine vel ex participio. Excommunicati igitur hi, excommunicati et illi. Nec enim archipræsul sustinere potuit aut voluit amplius, unde non destitit, non pepercit, nec his, nec illis. Non sustinuit, inquam, non pepercit, etsi vir apostolicus auctoritate sua quæ omni præstat quosdam jam solvisset quos ipse ligaverat: præfatum videlicet Saresberiensem episcopum et aulicum illum clericum quem supradiximus cum schismaticis in Teutonica illicite contra Ecclesiæ pacem et contra virum apostolicum contraxisse.

24. QUALITER SECUNDO REX ET ARCHIPRÆSUL AD VIRUM APOSTOLICUM MITTUNT.

Audiens vero rex motus et turbatus et pars omnia B adversa, sic videlicet nec aulicis deferri propter regem, nec appellationi propter sedem apostolicam, ad virum apostolicum mittunt cum omni festinatione et remittunt. Currunt, festinant, accelerant nuntii et nuntii, et post iterum nuntii, qui hæc viro apostolico nuntient. Mittimus quidem et nos. Sed quia aurum et argentum non erat nobis, mittimus nos iterum, sicut prius, nuda solum verba tetra et atramento scripta. Illi vero aurea et argentea ex abundanti et multo plus plura prioribus. Verumtamen pius noster rex Francorum, de cujus quasi aula jam eram, quia de ejus mensa, ad virum apostolicum et ad familiares suos dominos cardinales pias preces sacris apicibus suis mittit, propter nos mittens et remittens, mandans et remandans, quod qui tangeret nos tangeret pupillam oculi sui: super omnia mandans et rogans, ne vir apostolicus solveret, quos tam venerabiles, tam sanctus archipræsul tam juste ligasset, nec evacuet quæ ipse fecisset contra Ecclesiæ inimicos justitiæ opera. Id ipsum etiam et pontifices et principes terræ Romano pontifici et venerabilibus cardinalibus cum omni devotione et affectu monentes supplicaverunt. Jam ergo et per nostros et ab adversariis teruntur in dies apostolorum limina: discurrent, festinant, accelerant et hi et illi. Moriuntur obiter tam hi quam illi, sed succedunt alii et succrescunt et ex his et ex illis. Nam ut de nostris loquar, de multitudine nostrorum exsulum erat nobis copia nuntiorum, unde et sicut supra satis ostendimus, sic dispensante Altissimo, sicut in aliis ita et in hoc causa nostræ, etsi nescius, multam opem tulit qui nobis coexsulum tantam multitudinem expellendo sociavit: qui virorum tam eruditorum, tam prudentium et consilium nobis contulit et contra se ipsum pro nobis tam fideles nuntios præparavit. Sed quid? videres certe a paupere archipræsule et coexsulis suis pannosis et miseris, adversum cives, adversum reges, adversum purpuratos et divites strenue, varie et valide concertatum. Unde nec est, ut ex parte tunc didici, quod vir strenuus eruditus etsi pauper argento vel auro valeat comparari. Talis enim incomparabilis; unde et de sapientia Sapiens. Venerunt mihi, inquit, omnia bona pariter cum illa

(Sup. vii). Non quidem de potentia, non de divitiis sic : *Vae potius terræ cujus rex puer est !* (Eccl. x.) Et divites, inquit Psalmista, egerunt et esurierunt (Psalm. xiii), unde et sapiens sapientiam præposuit his et hæc ei adjecta. Talis enim, ut diximus, et iterare non piget, incomparabilis : talis quippe semper abundans, semper gaudens, egens vel tristis nunquam. *Quasi nihil habentes, inquit, et omnia possidentes ; quasi tristes, semper autem gaudentes* (II Cor. vi). Juxta quod philosophorum unus, cujuslibet animam ipsius dicebat esse fortunam. Et orthodoxorum unus : « Nunquam, ait, parvus est census, cui magnus est animus. » Unde et Sapiens : *Cogitationes, inquit, robusti semper in abundantia* (Prov. xxi). Talis semper dimicans, semper triumphans, evictus nunquam vel deficiens. Juxta quod magister ille agnostheta : *Quando, inquit, infirmor, tunc potens sum* (II Cor. xii). Et Sapiens : *Vidisti, inquit, virum velocem in opere suo coram regibus stabit nec erit ante ignobiles* (Prov. xxii). Talis hic Thomas noster, magna anima et robusta semper abundans, semper in pugna, semper in palma, utpote de forte illo et sancto fortium et sanctorum catalogo, qui occidi poterant et flecti non poterant. Quod melius in historiæ hujus calce declarabitur : hoc interim hic adjecto, quod nec mirum si Thomas hic noster prædicetur hic magnus qui semper magnus ; magnus in aula, magnus in ecclesia, magnus quando civis in Anglia, magnus quando exsul in Francia, sed incomparabiliter magnus et majore C maximus hodie : qui modico nunc clausus tumulto sumpsit sibi pennas diluculo et a nobis jam super pennas ventorum avolans, totum mundum trahit post se. Sed hæc docebunt sequentia melius. Interim ad proseguendum historiæ ordinem revertamur. Itaque ut dicere cepimus, plurimæ fiunt et contrariæ missiones ad virum apostolicum.

25. QUALITER ARCTABATUR ROMANUS PONTIFEX PRÆ NUNTII REGIS ET ARCHIPRÆSULIS SIBI ADVERSANTIBUS.

Arctabatur itaque Romanus pontifex quippe neque quod nos fecimus irritaret, sed potius ut ipse apprehensus apostolico zelo nobiscum adversus malignantes consurgeret, urgebant tum justitiæ causa quam fovebamus, tum mundi favor qui nobiscum, tum pii regis nostri Ludovici et suorum desideria et postulationes tam affectuosæ pro nobis. Inde vero obsistebant regis Anglorum juvenis adhuc, ut supra diximus, et tam potentis et suorum postulationes contrariæ. Considerabat etiam vir apostolicus archipræsulem nostrum virum velocem in opere suo et sicut videbat ipse et ab aliis jam acceperat, deinceps nec revocari posse, nec desistere velle a justitiæ opere, quin videlicet gladium suum exerceret et occideret et mactaret illos quos in tam atrocibus tamdiu et tam patienter supportaverat hactenus. Considerabat igitur vir Apostolicus sic, archipræsulis æmulationem tam accensam et adversariorum obstinationem tam duram : unde et

A turpe et irreligiosum et forte damnable sibi, si archipræsulem ex tam justa causa sacerdotali zelo accensum, ab officio suo suspenderet, seu ab ipso facta irritaret justitiæ opera, ex quo universæ Ecclesiæ grande et grave scandalum generaret, et regis Francorum et regni incurreret indignationem non modicam. Igitur quod solum videtur superesse, Romanus pontifex inter regem et archipræsulem paci amicabiliter reformandæ adhuc studere necessarium duxit. Sacros itaque apices suos ad dominum regem Francorum sæpe et sæpius mittit, mandans, monens et rogans regem, ut pacis nostræ mediatorem se interponat. Mittit etiam nunc ad hos, nunc ad illos, ad eos maxime qui credebantur a domino rege Anglorum libentius audiri et benignius, et quorum opere et industria sperabatur verbum pacis posse melius et efficacius promoveri. Mittit et ad viros religiosos, viros pacificos, quorum in reformatione pacis et in dissidentium reconciliatione solet esse diligens opera et efficax gratia. Mittit itaque Romanus pontifex et remittit, mandat et remandat. Pleraque vero de scriptis illis apostolicis exstant adhuc, in illud, de quo supra meminimus, corpus epistolare redacta, ad quod recurrat, si quis hæc legere et nosse desiderat.

26. DE QUODAM REGUM COLLOQUIO, UBI PAX NOSTRA STETIT PRO HOC ADJECTO, SCILICET SALVO HONORE DEI.

Dominus itaque rex Francorum, videns dominum papam de pace nostra sic sollicitum, tanquam filius pacis et obediens apostolico viro, opere et attente partes suas interposuit. Unde et ad pleraque colloquia, quæ inter ipsum et dominum regem Anglorum erant, vos vocavit, pacis nostræ in iis se mediatorem interponens. Inter quæ unum colloquium fuit, quod ad laudem et gloriam tanti archipræsulis ego hic tacere non debui. Contigit, ut Pictavi et Britones, ortis quibusdam simultatibus adversum dominum regem Anglorum moverunt arma : et, ut fortius rebellarent et securius, cum illustri rege Francorum confederati sunt, qui et tunc pariter cum Anglorum rege inimicitias habuit. Verum post multa dies colloquii statutus, pax reformata inter omnes, donec tandem ventum ad nos, qui similiter pacem inquirentes colloquio interfuimus. Accedunt autem multæ et magnæ personæ ecclesiasticæ et alii viri multi et magni : omnes hi inter regem et archipræsulem mediatores. Rex vero quibusdam ex mediatoribus his, quos archipræsuli magis favere suspicabatur, quos et archipræsul amississimos habebat, jam secreto dixerat velle se crucem facere et Hierosolymis proficisci, facta solum prius pace ad honorem suum inter ipsum et archipræsulem suum : et addebat se de pace hac in hoc colloquio in præsentia regis Francorum et aliorum solum querere honorem, saltem verbo tenus. Habito igitur prolixiori verbo de pace nostra in communi omnium mediatorum, seorsum tamen a regibus, isti quos diximus inter ceteros archipræsuli magis familiares, quibus et rex

verbum illud crucis et de pace nostra sic instillaverat, archipræsulem a communi illa mediatorum corona seorsum trahunt, et secretius proponunt ei verbum regis, quod a rege secreto acceperant sic, nec tamen ipsi hoc nomine regis nuntiantes, sed verissime asserentes se a rege accepisse hoc. Unde et summum ipsorum consilium fuit et summopere laborabant ad hoc, ut archipræsul, et de tota causa et de ablatis tam sibi quam suis, regis ibi per omnia miserationi et voluntati se supponeret; quod est sicut vulgo dicitur, ut poneret se de tota quæ inter ipsos vertebatur querela in misericordia regis, et absolute sic, absque omni additamento. Siquidem archipræsul ad instantiam et ad consilium mediatorum urgentium ipsum ad hoc, jam in communi mediatorum omnium audientia concesserat se facturum sic, adjecto tamen hoc: Salvo honore Dei; verum isti inter mediatores archipræsuli magis familiares, viri fideles et exercitati in consiliis, de quibus et tanquam de se archipræsul fidebat, adjectum illud nitebantur adimere, videlicet salvo honore Dei, eo quod, ut dicebant, in verbo illo scandalizaretur rex. Unde et ut absolute super tota controversia regis se supponeret voluntati et arbitrio, summo nisu et studio consulebant; et sic coram omnibus regi daret gloriam et honorem et hoc regi satisfaceret et hoc regi sufficeret: et rex vicissim ipsi restitueret integram gratiam suam et pacem. Et hoc quidem verbum illi simile quod prius, dum adhuc essemus in Anglia, de regis consuetudinibus observandis adjectum. Dicebat enim archipræsul se regias consuetudines observaturum salvo videlicet ordine suo, quod in libello historico hoc supra non præterivimus. Illa igitur adjectio huic similis. Ibi salvo ordine, hic vero salvo Dei honore. Eisdem itaque suasionibus et allegationibus, quibus illi pacis mediatores tunc in Angliæ, illud adjectum salvo ordine, et isti nunc in Francia hoc adjectum illi simile salvo honore Dei attentaverunt adimere. Et quidem primam illam adjectionem ordinis, archipræsul expressisset nunc iterum hic, nisi quia, ut supra ostendimus, ex adjecto illo scandalizabatur tunc rex, quemadmodum et nunc ex hoc, salvo videlicet Dei honore, scandalizabitur ut mox dicetur. Sed quid? Denique adeo suusus, tractus, pulsus et impulsus est ut persuasus videretur. Cumque tandem cum eruditis suis familiaribus et seorsum breviter, prout tunc licuit et tempus erat, loqueretur, et eis quæ a mediatoribus illis amicissimis sibi secreto acceperat singula proposuisset, ipsorum fuit omnis sapientia devorata; videbant quippe huic pacis bonum, et gratiam regis desideratissimam, inde vero turpe et irreligiosum et ignominiosum Ecclesiæ videri posse, si ita super causa ecclesiastica archipræsul laice personæ voluntati et arbitrio se supponeret, ut nulla videlicet de libertate Ecclesiæ seu Dei honore fieret expressio; præsertim cum de Dei honore habita fuisset mentio et jam quæstio mota. Quod tamen propter bonum Ecclesiæ et nostrum, quod certissime sperabant et

A assererebant subsecuturum, urgentissime consulebant et eam omni querebant instantia mediatores, et maxime inter ipsos viri fideles et religiosi, qui et in consiliis exercitatissimi et archipræsuli amicissimi erant. Et ideo eruditi nostri quotquot hæsitabant, et consilium dare verebantur, ne vel per ipsos impediretur pax vel ne forte per ipsos Ecclesiæ causa quam agebant periclitaretur. In hoc igitur casu omnes quotquot siluerunt et ab eruditis nostris omne consilium periit, et ipsorum sapientia inutilis facta est, tanquam ultra sapientia non reperta in Themam. Periit, inquam, ab eruditis nostris sapientia et consilium, nisi quod quidam submurmuraverunt minime tutum in tali casu Dei honorem, seu libertatem ecclesiasticam, pro gratia terrena acquirenda ita supprimere seu subticere; quod non esset aliud, ut dicebant, quam lucernam sub modio ponere quemadmodum et in hoc libello supra ostensum est, cum similis illa adjectio, salvo videlicet ordine, in Anglia similiter pro bono pacis est adempta. In arcto itaque hoc periit sapientia et consilium. Igitur, quod solum nobis in articulo tam arcto restare videbamus, clamavimus ad Dominum supplicantes ut daret nobis consilii et scientiæ spiritum. Sed quid? Nobis ita consilium suspendentibus et hæsitantibus quid agendum, a pacis mediatoribus, multis et magnis viris, et præsertim qui inter ipsos, a viris religiosis et aliis archipræsuli amicissimis et familiarissimis, adeo sicut et supra diximus, suusus, tractus et impulsus est, ut haberetur persuasus.

C Itaque cum a pacis mediatoribus et aliis hinc stipatus jam duceretur ad reges, erant quippe duo reges simul adhuc pacis nostræ finem expectantes, cum, inquam, duceretur, sic ingressit se, difficile tamen inter tot et tantos, discipulus qui scripsit hæc: et breviter et citissime, nec enim aliter potuit, tunc instillavit et in aures: Domine, inquit, videto quomodo caute ambules. Unum tibi dico certissime, de conscientia loquens, quod si in compromissione hac regi adjectionem illam subticueris, salvo videlicet honore Dei, præsertim cum totum hoc nunc agatur ut pro regis gratia subticteatur hoc, quemadmodum et suppressisti illud in Anglia salvo ordine tuo; cum tunc de regis consuetudinibus observandis ageretur, sicut tunc ita et nunc dolor tuus renovabitur, eo quod a bonis obmutueris et silueris, unde et illud Psalmi lugens recordaberis jugiter: *Obmutui et humiliatus sum, et silui a bonis et dolor meus renovatus est (Psal. xxxviii)*. Et eo amplius renovabitur dolor, quod tunc percussus ob silentium simile, alihue disciplinam non receperis.

D Vix dictis his et ipso solum me respiciente et respondere non valente, tanta quippe erat ipsum complimentum turba et quærentium alloqui eum, ecce ductus sic ante reges venit. Sciens autem quod humilitas præ cæteris soleat corda indurata emollire, quæ etiam præ cæteris virtutibus ipsis superbis et elatis gratior est, adeo etiam ut per ipsam

superbia ipsa se sustineat vinci, sciens, inquam, hoc mox archipræsul inter initia ad pedes regis se prostravit. Et cum ipso ad honorem ipsius venerabilis et omni laude prædicandus Willhelmus filius magni et præclari divæ recordationis comitis Theobaldi, tunc Senonensis archiepiscopus, illo jam defuncto quem supra in historia hac nominavimus, qui et in primo adventu nostro Senonis superstes erat, sanctæ recordationis Hugone. Rex vero archipræsule vix ad pedes ipsius prostrato ipsum confestim apprehendit et erexit.

Archipræsul vero erectus et stans ante reges humiliter et devote pro Anglicana Ecclesia, sibi ut dicebat licet indigno et peccatori commissa, regiam cœpit interpellare clementiam, se ut justus mos est in principio sermonis sui accusans, et solum suis meritis tantam ascribens Ecclesiæ turbationem et afflictionem tam duram. Et in sermonis sui calce adjecit: « Ego igitur, inquit, domine mi, super tota quæ inter vos et me vertitur hodie causa, vestræ clementiæ et arbitrio in præsentia domini nostri regis Francorum et pontificum et principum et aliorum qui hic astant me nunc subjicio, » sed mox adjecit, quod nec rex nec pacis mediatores, nec alii vel etiam sui proprii æstinaverunt ut adjiceret, vi licet « salvo honore Dei. » Hoc quippe, ut supra satis dictum, agebant pacis mediatores, ne tale adjiceret verbum quod regi scandalum et pacis sic fieret impedimentum. Et ideo existimabant archipræsulem persuasum, ne hoc adjiceret, quod scandalum generando pacem posset impedire.

Et profecto accidit sic. Tali quippe adjectione audita, rex mox vehementer scandalizatus in archipræsulem excaudit, multis ipsum contumeliis afficiens, multa improprians, plurima exprobrans, arguens eum et increpans tanquam superbum, elatum et regiæ munificentiae circa ipsum impensæ immemorem et ingratum. Et quia archipræsulis persona, ut circa historiæ hujus initia diximus, etiam ab ineunte ætate talis erat et tam honesta, de qua etiam mendaces et detractores propter famæ integritatem falsa dicere verebantur, hoc solum rex expressim pro crimine ei objecit, quod cum cancellarius adhuc esset, ab hominibus suis et cismarinis et transmarinis passim, et a majoribus et a minoribus, homini cepit et fidelitatis juramenta, ea sicut dicebat de causa, ut dominum suum et regem, qui tanta ei contulerat, exheredaret et fieret ipse dominus universorum: unde etiam, ut exprobrando adjiciebat, tempore cancellariæ tam magnificum se faciebat et tam munificum.

Archipræsul vero, in omni patientia audiens hæc, in nullo ut videbatur perturbatus vel confusus exprobranti sibi mox respondit; et modeste quidem verbum humilitatis omnis et modestiæ, in respondendo ita verbum temperans ut neque rigidus appareret nec remissus: post alia quæ prius breviter dixerat subjiciens mox et ad il respondens, quod de cancellaria rex ei objecerat: « Domine mi, inquit,

A quod ex ira mihi exprobramini nunc de in cancellaria gestis, hoc ut videtur iratus quæritis mihi vertere in culpam, quo tuam perpetuo gratiam promeruisse debuisses. Nec decet nunc nec oportet illius temporis a me in obsequio vestro gesta et fidem vobis tunc servatam ad laudem meam nunc recolere. Novit enim dominus noster rex Francorum, qui hic, norunt et hi qui astant, novit et mundus, et testantur opera, cum adhuc essem in aula, qualem me in illo officio aulico ad vestram utilitatem et honorem exhibuerim. Turpe esset et indecens præstiti obsequii exprobrando recolere beneficia, quæ mundus vidit et novit impensa. »

Rex autem ultra non sustinens, sed cito ab ore ipsius verbum rapiens, et ad dominum regem Francorum se convertens: « Domine mi, inquit, attende si placet quam fatue, quam superbe, iste ecclesiam suam deseruerit, quem quidem nec ego nec alius a regno meo expulit, sed ipse noctu clandestinam fugam iniit, nemine expellente. Nunc autem vobis suadet, quod causam Ecclesiæ agat, et propter justitiam patiatur, et ex hoc multis et magnos circumvenit. Ego quippe semper volui et concessi, et volo et concedo adhuc, ut Ecclesiam cui præest teneat et regat in omni ea libertate, in qua aliquis decessorum suorum sanctorum eam melius et liberior habuit et rexit. »

Rex vero Francorum, quasi aliquantulum motus contra archipræsulem et favens regi propter verbum quod dixerat sanctos decessores suos nominando, archipræsuli breviter ait: « Domine archiepiscope, inquit, nunquid quæris esse plus quam sanctus? » Et verbum hoc, a rege Francorum velut insultando archipræsuli dictum, sic regi et parti suæ non modicum placuit: cujus erat semper studium et opera apud omnes et præsertim apud regem Francorum suam justificare causam et deprimere nostram, ut ita cor regis, qui præstante Domino in tanta turbatione nostra totum et tutum erat refugium nostrum, alienaret a nobis.

Archipræsul vero nec propter reges ut videbatur adversantes jam sibi, in ullo ut deprehendi posset turbatus vel motus, sed sicut ante animi compositi et æqualis, respondit mox regibus se quidem libenti et prono animo Ecclesiam sibi commissam recipere velle in eis libertatibus in quibus sancti decessores sui eam rexerunt: sed alias novas consuetudines in ecclesiasticæ libertatis dispendium introductas recipere nolle, sed tanquam sanctorum Patrum institutis adversantes abjicere et damnare. Cum vero de fuga, quam rex clam et noctu temere arreptam impropieraverat, archipræsul se excusare cœpisset et justam fuisse causam allegare voluisset, qui pacis mediatores exstiterant multi, ut supra diximus, et magni viri, confestim archipræsulem ab auditorio regum adhuc seorsum trahunt, prudenter advertentes ex verbis his et illis, quæ inter regem et archipræsulem, non pacem sed majorem potius dissensionem orituram confestim: unde et trahentes

eum seorsum, suadent hi, suadent illi, vocant et revocant, pellunt et impellunt quotquot concludentes: « Da gloriam regi, et verbum illud, quod regem scandalizat, supprimatur, taceatur, et absolute regis voluntati et arbitrio te subicias, præsertim cum nunc sit tempus pacis opportunissimum, domino rege et primis Francorum præsentibus et omnibus jam in pace præterquam te et tuis. » Ad hoc impellebant archipræsulem multi, ut jam diximus, et magni, tam principes sæculi quam pontifices, Franci, Angli, Normanni, Britones et Pictavi, nonnulli etiam religiosi, qui specialiter propter nos et ex mandato apostolici viri pacis nostræ mediatores, propter pacis nostræ reformandæ meliorem et firmiorem spem, ad colloquium venerant; hoc solum universi postulantes, consulentes, suadentes, ut illud tantillum verbi de compromissione tolleretur, taceret, salvo videlicet honore Dei, et sic consequeretur mox et ipse et sui pacem ad honorem et gloriam in conspectu regum et principum.

Videres certe archipræsulem velut hostiam stantem, alios vero ut carnifices, non ferro sed linguis armatos, circumstantes et quærentes honorem Dei extinguere, arbitantes tamen se et in hoc obsequium præstare Deo: sed post modicum circumventos se et deceptos palam et passim quotquot se accusabant ut docebant sequentia. Sed nunc interim quod cœpimus proseguamus.

Igitur archipræsule stante sic et vere stante, tanquam firmissima turre directo sita et respiciente contra Damascum, a tot et tantis impulsus est sed eversus non est, jugiter nunc ad hos, nunc ad illos facturum se ut suadebant asserens: « Salvo honore Dei. » Dicebat etenim minime decere, ut sacerdos et pontifex terreni hominis arbitrio se supponeret aliter, præsertim super ecclesiasticæ libertatis causa et maxime mota questione super verbo hoc: et magnum quidem esse et debere sufficere, si vel fieret sic et etiam plus justo hoc, nisi ecclesiasticæ pacis bonum facto causam præberet.

Et vere juxta Psalmistam: *Justus manus suas lavat in sanguine peccatoris* (Psal. lvn). Et ut sapientis contestatur elogium, pestilente flagellato sapiens sapientior erit, quemadmodum et vulgo dicitur quod elixatus aquam timet. In Anglia quippe ob verbum, quod et supra posuimus simile huic, salvo videlicet ordine, rex ut supra in historia hac docuimus scandalizatus est. Quod archipræsul, regis sic sperans sibi restitui gratiam, ad quorundam consilia tacuit: verum postea ex hoc nec regis est gratiam consecutus, sed a bonis obmutescens dolor ejus plus multo quam prius auctus est, et renovatus, unde et vereretur nunc quod tunc accidit. Stetit igitur iste, inter tot et tantos pellentes et impellentes, immobilis quasi domus supra firmam petram ædificata, quasi civitas immobilis supra montem posita, quasi columna ferrea, et quasi murus æreus super terram, regibus, principibus et pontificibus illud corde, ore et opere, quasi in medio castrorum ut videbatur, cantans:

A Deus qui præcinxisti me virtute ad bellum, et posuisti ut arcum areum brachia mea (Psal. xxi). Tunc certe illius legislatoris non immemor: *Non sequaris*, inquit, *turbam ad faciendum malum, nec in judicio plurimorum acquiesces sententiæ, ut a vero devies* (Exod. xxiii). Juxta quod etiam et philosophorum unus: « Et magis, inquit, eligendum quod pauci. »

Pacis ergo mediatores videntes sic immobilem et inflexibilem, mox universi disparuerunt ab eo et remansit solus. Solus, inquam, qui solus portaverat torcularis pressuram: portaverat fortiter et victorose calcaverat. Pacis igitur mediatores, ut diximus, disparentes ab eo, et athletam Altissimi in campo velut quadam palæstræ area relinquentes solum, erat quippe in quadam campi planitie colloquium, hominis pertinaciam nuntiaverunt mox regibus, magnam viri constantiam pertinaciam interpretantes. Et reges quidem festinantissime in equis, nox quippe jam diremit colloquium, nec salutantes nec ab archipræsule salutati recesserunt. Quin potius rex Anglorum adhuc in recessu, etsi non in faciem archipræsulis, a conviciis non cessavit, insultando dicens inter alia quod ea die de suo fuisset ultus proditore. Pariter et aulici et qui pacis mediatores exstiterant, in recessu multa etiam in faciem archipræsuli objecerunt, quod videlicet fuisset semper superbus, elatus, sapiens in oculis suis, propriæ semper sectator voluntatis et sententiæ: adjicientes grande fuisse hoc malum et enorme Ecclesiæ damnum et periculum, quod ipse unquam rector Ecclesiæ constitutus fuisset, et quod per ipsum ex parte jam destructa, penitus cito destrueretur.

Sed archipræsul ponens ori suo custodiam, eum peccatores sic adversus eum consisterent, illud Psalmistæ ruminare videbatur et dicere Domino: *Susceptor meus es et refugium meum, quoniam liberaisti me a laqueo venantium et a verbo aspero* (Psal. xc): et illud: *O Domine, libera animam meam a labiis iniquis et a lingua dolosa* (Psal. cxix). Factus est igitur ad exprobrantes et insultantes sibi, quasi non audiens et non habens in ore suo redargutiones, nisi quod uni de Ecclesiæ destructione sibi exprobranti humiliter quidem et mansuete respondit—hic erat unus pontificum, nomine Joannes natione Anglus, episcopus tunc Pictaviensis, ipsi ex diutina conversatione et societate familiaris admodum, charus et acceptus—respondit, inquam, sic: « Frater, inquit, cave ne destruat Ecclesia Dei per te, per me favente Domino non destruetur. » Ita huic solum hoc respondit modestæ et mansuetudinis verbum, in colloquio hoc probris et contumeliis pleno, sicut supra diximus, ad omnes sermones suos moderans, ut nec de elatione posset argui nec de remissione subsannari juxta quod Psalmista gloriatur se expectasse eum qui salvum se fecit a pusillanimitate spiritus et tempestate (Psal. liv). Quoniam archipræsul noster in colloquio hoc pariter expectavit, qui et illum salvum sic fecit, verum et ut supra os-

tendimus, a rege durius objurgatus, cum rege tamen non contendit, sequens illud Psalmistæ consilium : *Noli, inquit, contendere adversus eum, qui proficit in via sua, adversus virum qui facit quæ cogitat.* Pariter et illud Sapientis : *Non litiges, inquit, cum homine potente, ne forte iucas in manus illius.* Ab aliis etiam conviciatus non reconviabatur, illius profecto discipulus, qui cum malediceretur non remaledixit, cum pateretur non comminabatur.

Deus bone, quanta passus est in colloquio pro hoc honore tuo bellator tuus! quantum vexatus, quibus affectus contumeliis, quibus lacessitus injuriis! Et loquebatur semper honorem tuum in conspectu regum et non confundebatur. Nam etsi ipse factus fuerit prodigium multis, tu adjutor fortis : unde etsi tractus, pulsus et impulsus, non est tamen eversus, non evictus, non cessit, sed ut cito rerum probabit exitus et docebunt sequentia, omnium etiam inimicorum iudicio gloriose triumphavit. Quid enim ni triumpharet Domini miles, Dominica sic inductus armatura? Ipse quippe in colloquio hoc velut quodam amphitheatro, verborum spiculis, loricae justitiæ, linguis lanceatis scutum patientiæ, et terrenæ felicitatis promissionibus galeam salutis æternæ opposebat, illud cum strenno illo rege bellatore concinens : *Si exsurgant adversum me castra, non timebit cor meum, si exsurgat adversum me prælium, in hoc ego sperabo (Psal. xxvi).* Ita ergo recessit a colloquio gaudens revera et gaudetissimus, quod dignus esset pro honore Dei contumeliam pati. Ibat, inquam, ipse gaudens; ibant et sui, non gaudentes tamen sicut ipse, sed tristes aliquantulum et solliciti, eo quod vel in forma illa quam suaserant omnes verbum pacis nostræ non processerit. Pauci inter nos quibus non displiceret, quod ad tot et tantorum consilium verbum illud, scilicet salvo honore Dei, non fuit suppressum aut saltem mutatum.

De verbo discipuli in recessu ad magistrum.

Verumtamen discipulus, qui scripsit hæc, mox in recessu quam cito accessum habere potuit, ad dominum suum et magistrum : « Domine, inquit, gratiæ summæ Omnipotenti a vobis et a vestris agentibus, in cuius manu mors et vita, qui hodie linguam tuam ita moderavit, sic rexit ut ab ore tuo nec elata prodirent nec remissa : sed in hujus diei tanto tumultu tot et tantis in te irruentibus, tot et tantis contumeliis affectum et injuriis lacessitum, salvavit te et servavit custos Dominus a pusillanimitate spiritus et tempestate, linguam in udo positam, et tam facile labilem, quasi in quodam viæ regie medio regens ita ut in responso tuo nec deprehendi posset pusillanimitas nec notari elatio. Et profecto oculo ad oculum videbit mundus adhuc quod Altissimus honorificabit te in conspectu mundi, qui in tam arcto propter mundum honorem Altissimi nec etiam verbotenus suppressisti, sed tam fortiter, tam constanter es confessus. Et juxta promissionem suam ipse, a te confessus, te confitebitur et hono-

riticabit, quod honorificantibus ipsum sic promittit : *Qui honorificaverit me honorificabo eum (Joan. v).*

Sic igitur recessimus a colloquio nunc in Francia, sicut prius in Anglia apud Northamptone, ut supra in historico libello hoc satis ostendimus, facti opprobrium abundantibus et despectio superbis.

Et nos ita recedentes dominum regem Francorum sequebamur : cujus erant præparata hospitio in castro, quod Mons Mirabilis dicitur, situm in confinio Carnotusæ et Cenomanniæ, in quo confinio ea die inter reges colloquium fuerat, sicut et ibi interdum colloqui solent. Eramus et nos in castro hoc pariter hospitati cum rege ipso semper per clientes aulicos nobis abundanter ministrante viaticum. Nos ergo prius quam rex, sero tamen jam sub noctis crepusculo, ad hospitium venimus, colloquii negotiis multis et magnis et maxime pacis nostræ verbo sic per totam diem usque ad noctem fere protractis. Rex autem, qui posterius venit, non declinavit, quemadmodum in aliis colloquiis consueverat, ut archipræsulem in hospitio suo videret; unde et mox conjecimus cor suum non ita nobiscum sicut heri et nudius tertius. Nihilominus tamen archipræsul hilarem et jucundum se exhibuit ut consuevit, nec deprehendi poterat vultus ejus in diversa mutatus ob hoc. In quo adverti potest magna viri constantia, fortitudo animi invincibilis, qui mundo jam sibi contrario nec ullam vel etiam modicam turbati ex hoc vel solliciti ostendit speciem. Et quidem si sui solam curam haberet et providentiam, non ita spectabile, non ita admirabile hoc : verum, ut satis supra ostensum, coexsulum suorum multam habuit sequelam. Inter quos multi nescientes quid inter dexteram et sinistram : qui omnes tanquam de matris suæ uberibus de ipsius pendebant cura et providentia. Et tamen mundo jam sibi adversante in nullo turbatus nihil sollicitus videbatur. Sed revera juxta Sapientis elogium : *Justus sicut leo confidit (Prov. xxviii),* cui etsi mundus totus contrarius sit et adversetur, ipsi tamen etiam tunc totus mundus divitiarum est. Juxta quod magister athleta qui mundum persequabatur, et mundus ipsum, quibusdam quos in fide genuerat : Omnia, inquit, vestra sunt, sive vita sive mors, sive præsentia sive futura. Justo igitur omnia sunt : et velit nolit mundus, totus mundus ipsi divitiarum est, etiam si ipsi totus mundus contrarius sit et adversetur. Quin potius eo amplius suus quo magis ipsi contrarius, eo plus obsequens quo plus adversans. Mundus quippe, etsi nescius, nihilominus tamen quasi inter malleum et incudem, inter mala videlicet pœnalibus quæ inferi, et patientiæ virtutem quæ sustinet, justo coronam fabricat æternam, unde et justo plus servit mundus contrarius et offensus quam placatus. Et melius obsequitur si sic rebellet, quam si pareat, cujus ut experimur quotidie extrema gaudii luctus occupat; unde juxta Sapientis dictum : *Non constristat justum quicquid ei acciderit (Prov. xii).* Nam exaltatus a terra, omnia trahit ad se. Prospera et adversa

mundi æque militant ei. Sicut tenebræ ejus ita et lumen ejus, nisi quia ut hic pro tempore docuimus breviter justo mundi adversa plus servire. Thomas igitur hic noster, exaltatus a terra, cui et terræ jam nihil, omnia traxit ad se, unde et mundo jam sibi contrario nec tristior effectus est nec sollicitior sed æqualis permansit.

27. QUALITER ARCHIPRÆSUL CONFORTAYERIT SUOS IN VIA.

In crastino vero rege ex colloquio proximæ diei fatigato et pausante adhuc, nos mane summo recedentes a castro Carnotum venimus Senonis propereantes: Inter itinerandum vero archipræsul, qui jam adverterat plerisque de eruditissimis suis displicere, quod verbum pacis nostræ ut hesterni mediatores consulerant non processerit, ipsos allocutus est sic: « Fratres, inquit, et mecum Christi commilitones, heri fuimus in militia, heri in lucta, heri in palestra, facti spectaculum mundo et angelicis et hominibus. Et mundus jam subsannat nos et irridet: quod sicut protervi et fatui pacem Ecclesiæ et nostram sic distulerimus. Quin potius credit et prædicat pacem deinceps nobis magis ablatam quam dilatatam; verum, sicut vos, fratres, juxta legis præceptum tanquam legem scientes me nostis melius, non est acquiescendum iudicio multorum, quod quidem in exemplo evidentissimum, ut puta veritatis et paupertatis, quæ inter se semper amica sunt, amici sunt pauci, cum e diverso vanitatis et divitiarum mundus semper amicus sit, et vanitas veritati, et divitiæ paupertati omnium fere iudicio præferantur. Nam etsi qui forte his veritatem et paupertatem verbis præferant, factis tamen negant, divitias potius et vanitates sequentes. Verum, quia nos jam veritatem et paupertatem propter justitiæ causam præelegimus et de illa sumus amicorum paucitate, qui veritatem et paupertatem charius amplectuntur, ne acquiescamus multitudini nec credamus nos mundo sicut nec mundus se nobis. Nam eo ipso quod jam irridet et subsannat nos mundus, causa nostra, cui mundus non communicat, pretiosior est et purior nobis æstimanda, veritatis luce quam pauci sequuntur eo amplius illustrata: quasi lux quæ in tenebris lucet et tenebræ eam non comprehenderunt (Joan. i), et quasi hortus conclusus et fons signatus (Cant. iv). Signatus, inquam, et singularis fons noster, cui alienus non communicat. Videamus etenim nunc et attendamus si non causa nostra ab heri purior, justior, planior et evidentior facta sit. Prius si quidem agebamus causam Ecclesiæ, ecclesiasticam libertatem protestantes et quod adversarii tyrannice collo ejus nituntur imponere jugum servitutis, concutientes, illud quando Domino et sicut Domino placuerit excussuri. Nunc præter Ecclesiæ causam expressim ipsius etiam Dei causam agendam suscepimus, ejus honorem nec propter mundi sapientiam, nec propter consilium, nec propter metum, nec propter gratiam subicimus nec favente Domino subicebimus. Causa itaque causæ adjecta est, causa Ecclesiæ causa Dei,

A causa Sponsæ causa Sponsi, causa capitis causa corporis. Et ita nunc primo causa nostra, quam tuendam suscepimus, integra, Dei videlicet et Ecclesiæ, Sponsi et Sponsæ, capitis et corporis. Videamus ergo et nos, ut eo amplius et plus quam prius, simus deinceps bellatores strenui, constantes et integri, ut sicut causa integra et nos integri. Integri dico ne separemur, ne dividamur, sed simul stemus, et item integri, ne videlicet paucitatis nostræ aciem hucusque fortem, sed Domino vires deinceps nostras augente, ejus nunc propria causa super adjecta est, fortiores, mundi irruentis irrumpat fragor, ut vel frangat metus, vel emolliat gratia. Ista etenim mundi duo fortia spicula sunt, sed obtunduntur hæc et resiliunt, nec perforabunt, nec etiam nocebunt vel modicum, si, ut cœpimus, fortiter in acie stantes loriceam justitiæ induerimus, quam ad hæc mundi spicula opponamus. Et ecce quia induimus hanc, hæc jam ex omni parte protecti. Habemus enim nunc arma justitiæ a dextris et a sinistris; justam causam Dei et Ecclesiæ justam; justam causam regnantis in cælis et justam reginæ causam militantis adhuc et peregrinantis in terris. Unde et bene nobiscum agitur, quia et de cælo et de terra veniret auxilium nobis. Orabit quippe Ecclesia, exaudiet Dominus, ejus pariter honoris causam nos jam tuendam suscepimus, sicut et libertatis illius. Et ecce quia paucitatem nostram et paupertatem tantæ potestati adhuc resistentem, potestate potestati et rege confederato jam regi, mundus eo amplius intuetur et admiratur et stultitiam prædicat. Et dicunt de nobis nunc, confederatis sic regibus: « Miseri illi quo devenient, quo divertent, quo fugient? » Nesciuntne tam magnis regibus manus esse longissimas? Si regis mandato ita pulsati sunt a Pontiniano, nonne amicis nunc et confederatis regibus citius pellentur a rege, imo etiam et a mundo? Scio quidem et vos pariter mundum libere de nobis loqui nunc sic. Et quidem quod præ cæteris gravius nos omnes pariter jam advertimus, domini nostri regis Francorum ex confederatione hac, etsi necdum penitus exhaustam, gratiam tamen et benignitatem extenuatam erga nos. Sed quid? Certe velit noli mundus, detrahat, arguat, obsecret, increpet, et si exsurgant adversum nos castra, et mundi prælium, auxiliante Domino simul stabimus, non abibimus retro, non cedemus. Quin potius eo nunc fortius agendum, et virilius, quo causa nostra nunc justior, et mundus nunc acrior contra nos, ut mundus videns paucitatis nostræ et pauperiatis constantiam vel in fine assumat inde pro nobis materiam laudis, unde nunc habet detractionis. Si enim Deus pro nobis, quis contra nos? (Rom. viii.) qui perdit sapientiam sapientum et mundi sapientes infatuat, et sæpe et sæpius hoc convertit in optimum, quod mundus judicat pessimum; et hoc trahit ad virtutis meritum, quod ille ad peccati stipendium, ad damnationis supplicium. Unde et Magister docet sa-

pientiam hujus mundi stultitiam esse apud Deum. Quod enim mundus secundum suam sapientiam judicat malum vel ad malum, hoc ipsum Deus secundum suam ipso opere judicat mundo fuisse bonum, et convertit ad bonum, quod mundus totus judicabat ad malum. Sic itaque est et de bonis et de malis, et de his quæ ad bona et quæ ad mala, cum et de his et de illis judicet mundus, judicet et Deus. Sed ludit Deus et illuditur mundus, cum secus et directo in contrarium evenierit quam judicaverit ipse. Probant hæc nostra verba infinita exempla. Inter quæ illud de Joseph exemplum celeberrimum, quem fratres sui vendiderunt ne adorarent, et postea quia vendiderunt adoraverunt, et mentita est sibi sapientia mundi. Pariter et Judæi Christum crucifixerunt ne locum perderent et gentem: postea tamen quia crucifixerunt, perdidit et mentita est item sibi sapientia mundi. Multa super hujuscemodi exempla suppetunt et quotidie crebra succrescunt, illuso mundo et Deo sic in humanis ludente. Juxta quod poetarum unus:

Ludit in humanis divina potentia rebus.

Sed vos hæc, tanquam viri et in Scripturis et in operum exemplis exercitati, nostis me melius. Verumtamen in præsentiarum induximus hæc, ut in præsentii consolatione recipientes unum præsciatis certissime, quod ego nunc prædico vobis, quod verbum illud, quo in conspectu regum Dei honorem tacendo non suppressimus, nobis a mundo ipso et in brevi vertetur in honorem et gloriam, qui illud nunc nobis vertit in ignominiam, et in nostrum et causæ nostræ detrimentum. Et ipse mundus nobis dabit inde virtutis cumulum, unde assumit nunc contra nos tantæ detractionis fomentum. Quippe, ut moris est, erit sic ipse sibi metipsi contrarius de ipso sic illuso divina potentia, sicut et consuevit, volente ludere vos. Itaque, fratres mei et Christi mecum coadjutores, consolamini in verbis istis.

Auditis igitur his quotquot anipæquiores facti. Et qui de nostris, ut supra diximus, eo quod verbum pacis nostræ ad consilium mediatorum non processisset, aliquantisper fuerant desolati, ex his consolationem receperunt non modicam. Novimus quippe omnes dominum nostrum archipræsulem virum valde industrium in multis exercitatum et expertum multa, a quo etiam prædicta evenerunt sapissime.

Recedentes itaque a præfato castro, quod Mons Mirabilis nominavimus, et venientes ex die Carnotum, plerique qui ut mos est populi occurrerunt ut transeuntes viderent, quærebant quis esset qui transiret. Et cum cognovissent quod archipræsul hic esset Cantuariensis et quis ipse, ipsum mox digito notaverunt aliis qui ignorabant ipsum, indicantes et dicentes invicem, submurmurando tamen: « Ecce archipræsul ille qui in hesterno colloquio Deum propter reges negare noluit nec Dei honorem subticere. » Jam quippe ex celebri fama de colloquio inter alia audierant sic. Archipræsul vero in-

teraudiens hæc et motus et compunctus ex his, qui tunc prope ipsum erat respexit discipulum qui scripsit hæc. Postea etiam sapissime cum iter per Franciam faceremus multi in populo de archipræsule eadem prædicaverunt. In ipso etiam recessu a colloquio nonnulli qui aliter suaserant, redeuntes ad se et penitentia moti viri constantiam et justitiæ causam laudibus et præconis extulerunt, se et alios quotquot qui contraria suaserant condemnantes. Sed hæc mox melius et plenius sequens historie ordo explicabit.

A Carnoto vero recedentes quantocius potuimus Senonis venimus, per duorum videlicet dierum iter. Senonis itaque redeuntes ibi per dies solitarii sedimus et tacuimus, solius Dei salutare præstolantes, summo in terris pacis nostræ mediatore domino nostro rege Francorum et plerisque aliis, qui, ut diximus, ex mandato viri apostolici pro pace nostra partes suas interposuerant, universis jam desistentibus utpote pace nostra jam ab omnibus desperata, et dicentibus nos nequaquam filios pacis nec cogitare quæ pacis essent, sed per nos ipsos potius impeditum iri quo minus fieret. Sedimus itaque sic per tempus, sustinimus, tacuimus et expectavimus. Expectantes, inquam, expectavimus et Dominus intendit nobis.

Qualiter archipræsul cesserit ad gloriam quod mundus reputaverat in ignominiam.

Nam ecce post aliquot decursos dies omnino in terra auditum est, pacem illam inter Anglorum regem et Pictavos et Britones, quæ in præfato colloquio in præsentia regis Francorum et per ipsum facta fuerat et firmata, alias etiam conventiones firmatas inter reges, per Anglorum regem contra pactum, contra fidem enormiter et crudeliter violatas, nihil ibi factum quod nunc non esset infectum, nullis obligationibus, nullis conventionibus observatis; de pacificatis quibusdam possessionibus suis spoliatis, aliis ejectis et proscriptis, nonnullis vero captis et in carcerem coniectis et in vincula. Inter quos captus sic erat nobilis unus Pictavorum dictus Robertus de Siliaco. Audiens itaque rex Francorum et per proprios ipsorum nuntios cum quibus sit actum verissime accipiens factum sic, supra omnem modum turbatus plangebat quod nobiles illos per ipsum sic pacificatos prodidisset ipse, et non de alia quam de sua manu ipsorum sanguinem requirendum. Et plangendo sic crebro interponebat: « O quam prudens, inquam, quam discretus, quam providus Cantuariensis ille archiepiscopus, qui ita omnibus nobis tam constanter obstitit, tam viriliter omnibus reluctabatur, ne faceret pacem quam volebant, cum suadebant omnes. Ipsius certe in colloquio debuissimus quæsisse et acquievisse consilio, qui regis illius mores novit et animum. » Id ipsum etiam jam universa terra prædicabat, magnum videlicet fore virum providum et discretum Cantuariensem, nec ejus in terra similem, qui contra tot et tantos tam fortiter, tam constanter, tam viriliter

steterat, qui solus evasit, ubi omnes alii præter ipsum capti sunt et circumventi. Super omnes vero extollebant nos illi qui in colloquio pacis nostræ exstiterunt mediatores, quorum nonnulli ex mandato apostolico, ut supra diximus, mediabant. Inter quos unus ore proprio confessus est discipulo qui scripsit hæc: « Certe, inquit, mallem mihi pedem fuisse abscisum, quam dominus vester archiepiscopus pacem illam fecisset in colloquio, quam ego et alii quotquot consulimus. » Frater quidam de Magno Monte dignus Bernardus de Corileto hic erat, vir religiosus et in negotiis exercitatus et prudens, qui et alius quidam cum eo de ordine Carthusiensi prior videlicet tunc de Monte Dei, vir nominatæ religionis et scientiæ, ex mandato apostolico tunc inter regem et archipræsulem mediabant. Rex vero postquam hæc sic acciderant paucis diebus exactis, Senonis veniens, et nunc sicut prius consueverat archipræsulem visitans, mox inter sermonis sui initia archipræsulem et suos miro modo commendavit et extulit. Et erant deinceps rex et archipræsul familiares et amici multo plus quam prius. Tota etiam terra nos magis ac magis commendando ampliorem honorem et reverentiam exhibebat in dies. Et ita citissime archipræsulis verbum impletum, quo ut supra ostendimus, in recessu a colloquio prædixerat, hoc nobis in brevi convertendum in gloriam, quod tunc convertebatur in ignominiam. Et discipulus, qui scripsit hæc, cum archipræsule sæpe recordabatur de veritate illius sententiæ, qua Dominus ipse dixit iustus et verax: *Qui honorificaverit, inquit, me, honorificabo illum* (Joan. v). Hoc est verbum illud quod discipulus magistro, supra in arcto illo, videlicet in recessu a colloquio rememoraverat: et fuit revera pro honore Deo in colloquio exhibito quædam nunc archipræsuli in terris honoris recompensatio, sed non nisi modica inchoatio hæc honoris, consummatione incomparabiliter majori et feliciore futuræ viri consummationi reservata, sicut historiæ finis declarabit. Sed interim recompensatus hic honor nonnulla consolatio præsentis erat afflictionis.

Videntes itaque archipræsul et sui eor regis sic reversum ad se, Deo, in cujus manu corda sunt regum, summas et devotas gratias agunt, tanquam summo pauperum adjutori in opportunitatibus in tribulatione: archipræsul vero videns nunc tempus opportunum regi supplicavit utpote qui ad apostolicas preces mediator noster jam fuerat, ut viro apostolico scribat pacem nostram non processisse, et qualiter hoc et quomodo steterat. Postulat et hoc ipsum a pontificibus et principibus et præsertim ab his qui colloquio interfuerant, ut rescribant, et ipsi et hi etiam qui ex mandato apostolico pacis nostræ mediatores exstiterant. Annuit rex, scribit, scribunt et hi, scribunt et illi, et multo nunc quam unquam prius affectuosius, acrius et instantius apostolicæ clementiæ aures pulsantes contra partem adversam. Quod si quis plenius nosse desiderat, ad jam sæpe dictum corpus epistolare recurat,

A 28. QUALITER REX ET ARCHIPRÆSUL TERTIO MITTUNT AD VIRUM APOSTOLICUM ET DE A LATERE SUO MISSIS AD PACEM.

Rege itaque scribente, scribentibus et his, scribentibus et illis, et scriptis omnium et precibus et mandatis a viro apostolico susceptis, adeo affectuose, adeo acriter, adeo instantè ad apostolicæ pietatis et justitiæ pulsantibus januam et miserationis apostolicæ concutientibus viscera: arctabatur item non modicum et etiam multo plus quam prius Romanus pontifex. Arctabatur, inquam, hinc cernens per mediatores pacem non posse procedere, inde vero quod sicut supra satis ostendimus, tempore tam diri et tam duri schismatis, in eum qui sociam habebat multitudinem ecclesiasticæ disciplinæ exercere severitatem foret periculosum. Quod tamen tam gravis et tam enormis in nos excessus et justitiæ causa quam agebamus deposcebant. Quam profecto causam vir apostolicus et per scripta et per nuntios, auditis his quæ in præfato regum colloquio gesta fuerant, multo plus iustificavit. Quem præsertim angebant tanti et tam instantes acriter pro nobis interpellatores: quibus non modico fieret scandalo toti etiam Ecclesiæ pariter, nisi demceps aut justitia aut amicabili compositione medianne pax archipræsuli et suis et ecclesiæ sibi commissæ redderetur.

Vir itaque apostolicus, arctatus sic et videns hæc, secundo adhuc juxta formam canonum regem citare disposuit, monendo, exhortando, consulendo, et præcipiendo ut Ecclesiam vexare et perturbare desistat, et archipræsuli et suis pacem suam restituat. Et quidem non cardinales a latere suo, quod, ut supra ostendimus, jam fecerat, sed alios quosdam viros eruditos et industrios speciales suos de curia, qui essent apostolici mandati executores, destinavit. Quorum unus dictus Gratianus felicis memoriæ, Eugenii papæ quondam nepos; alter vero unus in curia de causarum patronis, Vivianus dictus. Et isti quidem cito et expedite venientes, nec enim sicut cardinales tot secum circumducentes impedimenta, nec tot ornati faleris, nec tot sarcinularum onerati trossulis, mox inter initia nobis hec dum visis regem adierunt. Quem sæpe et sæpius, nunc in omni lenitate monendo et exhortando, nunc arguendo et increpando durius, juxta injunctum sibi apostolicum mandatum super Ecclesiæ pace et nostra convenerunt. Et alter legatorum præsertim non palpavit, non detulit, non pepercit, quin potius apostolicæ legationis auctoritate cum omni imperio arguens et increpans regem, et statuens contra faciem suam. Gratianus hic erat, comite legationis Viviano vivacior, acrior et instantior, unde et vere Gratianus, sicut nomine Gratianus, et re. Qui omnimodis studebat gratiam regis et pacem Ecclesiæ et nobis restituere, qui et ex mediatione hac multam adeptus est coram Deo et hominibus gratiam. Qui etiam ne injuncte sibi legationis apostolicæ ullam imprimeret notam, a rege, non aurum, non argen-

tum, quibus præsertim solet rex pervertere corda A et per quæ maxime etiam cordati everti solent, nec ullam etiam muneris oblatam speciem accipiens, sed tanquam lutum argentum calcavit et aurum et respuat universa. Sic etenim sancte et religiose proposuerat nihil se accepturum, nisi forte pace reformata, ad quod venerat. Itaque nihil concupivit, nil accepit.

Cum tamen juxta ipsius legislatoris testimonium munera excæcent oculos sapientum, sed iste quidem sancte et religiose et prudenter cogitans propter hoc quod sequitur verebatur accipere; nam mox subdit: « Et vim auctoritatis inclinant. » Et bene et exquisitè hoc; nam juxta unius doctorum interpretationem, si ab eo acciperet quem arguere venerat, auctoritatem magisterii inclinaret. Non enim potest B instanter argui a quo accipitur, maxime cum ille promptus sit ad dandum, ut sibi humiliet præpositum. Non igitur accepit iste, ne ex hoc apostolicæ legationis torpesceret vigor. In hoc et Magistrum sequens, qui etiam a licitis abstinebat, ne si acciperet, evangelicæ legationis in arguendo, in increpando, in coercendo, evacuaretur vel saltem extenuaretur auctoritas. Unde et ipse: « Omnia, inquit, mihi licent, sed non omnia expediunt. Omnia mihi licent, sed ego sub potestate nullius redigar; » quasi diceret: Nolo accipere, quia nolo subjectus esse, quia nolo libertatem meam ancillare. Omnis enim qui accipit, et præsertim qui magisterio fungitur, dante sibi quodammodo inferior est, et quædam infimi ratione contractus suo obligatus datori, adeo ut nequaquam habeat postmodum eam in arguendo, in increpando, in animadverendo, libertatem quam prius habuerat, ipsa tamen non evacuata, sed violata et extenuata ex parte. Unde et bene legislator qui præmiserat: *Munera*, inquit, *excæcant oculos* (Deut. xvi), mox vigilantè adjecit, et vim auctoritatis inclinant. Non quidem, ut jam diximus, auctoritatem evacuant, sed instantiam arguendi et coercendi virtutem, quæ vis auctoritatis est, extenuando humiliant et inclinant. Unde et sicut juxta Domini proverbium: « Beatius est semper magis dare quam accipere, » ita semper et gloriosius et magnificentius hoc. Dominorum quippe et dominari quærentium est dare, subjectorum vero D et minorum accipere, qui eo ipso minorem se ostendit quia accipit. Unde et magister supra licere quidem sibi accipere dixit, sed tamen inquit: *Ego non accipio, quia sub nullius potestatem me redigere volo* (I Cor. vi). O quam magnus, o quam liber, et quam vere Christi legatus hic, nihil accipiens et respuens universa, ne suam extenuando auctoritatem vel libertatem violando ulla sit obligationis ratione inferior eo quem corripere habet. Unde et sicut ipse scribit: *Sed non usi sumus*, inquit, *hac potestate, sed omnia sustinemus, ne quod offendiculum demus Evangelio Christi* (I Cor. ix). Et adjecit bonum es e, inquit, mihi magis mori quam ut gloriam meam quis evacuet.

Pariter et hic legatus noster Gratianus, ad ejus laudem et ut imitentur cæteri, jam aliquantisper sumus digressi, omnia respuat ne quod daret offendiculum apostolicæ legationi, satius iudicans universa respuere sic, et ad sedem apostolicam reverti vacuum quam ut gloriam suam quis evacuet. Cujus eo amplius aucta est gloria, quod cum Romanus esset, post aurum tamen non abiit. Utinam quotquot apostolicæ sedis legati istius similes, qui libere arguendo, increpando et coercendo, sub nullius potestatem se redigerent, nihil quærerent, nihil acciperent, oblata etiam respuerent, nisi tunc demum, arguto videlicet et increpato se sic forte convertente ad melius, ut ita ad Abel et ad munera ejus respuerent, a Cain vero et a muneribus ejus se averterent, et abominarent a sceleratis oblata, cum et juxta Scripturarum testimonia talium dona Altissimus non probet, sed abominetur et reprobet. Quæ pariter nec probare deberent, sed potius tanquam abominanda reprobare et respuere qui in terris et vicis gerunt et tenent Altissimi locum, quod iste quidem legatus noster laudabiliter fecit. Tandem vero et ipse et dictus legationis suæ comes, rege prius sæpe et sæpius super pace convento, venientes ad nos retulerunt se in omni negotii articulo ad quod venerant regem reperisse tergiversatorem, versipellem, tortuosum et ejus quod agebatur dissimulatorem, quærentem semper per quasdam ambages, per involucria, et per quasdam exquisitas et excogitatas astutias pacis negotium, ad quod venerant, protegere et summopere molientem partem suam justificare, nostram vero deprimere. Et Gratianus præsertim hic erat, qui a nobis hoc non celavit, non siluit, non abscondit. Unde et jam certissime advertens quod salvo honore Dei et Ecclesiæ nec per ipsos nec forte per alios mediatores pax processum habere posset, deinceps nec per verborum ambages detentus, nec promissionibus illectus, nec auro argenteove suffarcinatus, cito et expedite ad Romanam Ecclesiam ad virum apostolicum est reversus; reversus, inquam, tanquam legatus fidelis, nuntians viro apostolico plene et perfecte quæ viderat, quæ audierat. Ille, inquam, cito et expedite sic est reversus, illo altero qui itineris et legationis exstiterat comes, nobiscum Cisalpino remanente adhuc. Insulæ quippe nostræ occidentalis, ut dicebatur, veneno infectus et argento nostro suffarcinatus, minime tam cito poterat, tam expedite reverti.

Videns itaque rex Gratianum reversum sic tanquam legatum fidelem, non quæ sua quærentem et offensam et gratiam in negotio ad quod venerat æqua libra ponderantem, cogitare cœpit deliberans quid agendum. Cogitabat quippe, nec sine causa, quod ille sic reversus ad dominum papam causam suam deprimeret, nostram vero justificaret. Cogitabat etiam quod Francorum rex, pro præfata nobilitate qui ipsi adhæserant pace violata motus, dominum papam propensius moveret contra ipsum propter nos. Et ita studebat quæ posset arte regem turbatum

sedare et censuram ecclesiasticam quam jam ne-
tuebat aut penitus tollere aut suspendere. Hæc
igitur eo cogitante, in primis statuit regem aliqua
humilitatis specie placare, sciens hominem mitem
et mansuetum facile vinci humilitate quæ etiam et
superbis gratissima. Dixit itaque se ad gloriosum
illum martyrem Dionysium Francorum apostolum
perire profecturum, sic se visurum, quem nunquam
prius viderat, novum dominum suum regis filium,
qui puer tunc erat. Hic est desideratus ille puer,
regi post multos regni sui annos, imo toti populo,
præter omnium spem a Deo datus, unicus patris
sui, Philippus nomine, qui patri postea successit in
regnum et nunc regnat, et per annos et tempora fel-
liciter regnet et potenter.

29. QUALITER ANGLORUM REX VENIT IN FRANCIAM, ET
QUALITER TUNC PAX ARCHIPRÆSULIS STETIT PRO
PACIS OSCULO NEGATO.

Igitur post dies paucos jam dictus rex, sicut ex
inopinato et improvise, intrat Franciam nec ullum
inter se et regem colloquium querit; sciebat enim
quod rex turbatus vitaret hoc, sed sub specie pere-
grini ad gloriosum illum martyrem Francorum apo-
stolum Dionysium venit, sperans certissime quod
rex audito adventu suo in terram mox occurreret:
pariter et sperans quod et Cantuariensis ad ipsum
properaret, et pro pace sicut semper consueverat
supplicaret. Jam enim poenituit eam, ut pro certo
accepimus, quod in supra descripto colloquio proximo
nos de pace etiam in forma et adjectione præfata,
scilicet salvo honore Dei, non audierat.

Et profecto sicut præcogitaverat rex, sic et acci-
dit. Occurrit ipse dominus rex Francorum, occur-
rimus et nos ad locum illum declinantes, qui inter
Parisios et Sanctum Dionysium vulgo Sanctum
Martyrium appellatur, ad capellam videlicet quam-
dam sitam in pede montis qui Mons Martis vel ut
alii Mons Martyris dicitur. Capella vero illa ob id,
ut dicunt, Sanctum Martyrium dicta, quod ibi dictus
gloriosus martyr Dionysius decalvatus fuisset. Ad
illum itaque Sancti Martyrii locum ad capellam illam
declinavimus. Reges vero, qui jam convenerant et
desiderato puero, quem prænomina vimus, foris Pa-
risios eis obviam delato occurrerant, et nos præve-
nerant, extra capellam in quadam campi planitie
nostrum præstolabantur adventum. Et cum unus
archipræsulem maturaret ad iter, dicens reges solum
ipsum nunc expectare respondit non decere sacer-
dotem nisi cum gravitate incedere. Eramus ita-
que nos in Sancto Martyrio, reges vero extra. Alter
vero legatorum apostolicæ sedis, quem Gratiano
reverso supra diximus remansisse, cernens nunc
opportunitatem sic agendi, cœpit per dominum re-
gem Francorum et per alios magnos et per se pro
pace nostra, ob quam venerat, dominum regem An-
glorum instanter sollicitare. Et eo quidem instantius
quod comite una parisi mediatore jam reverso solus
ipse remansisset; desiderans, si forte Dominus daret
sic, quod per ipsum mediatorem ad majorem glo-

riam suam pax fieret. Hæc si quidem in humanis
eo major quo singularior gloria est, si in magnis et
strenuis actibus nec parem habeat nec consortem.
Mansuetus itaque rex Francorum, principes pariter
et pontifices, qui interfuerant, operose et attente
partes suas interponunt diligentissime exsequentes
quæ pacis erant. Unde et tanquam mediatores solli-
citi, sæpe et sæpius inter regem et archipræsulem
eunt et redeunt, veniunt et revertuntur. Sed quid?
Post multa hinc inde objecta, post suasionem multas,
nunc in aure, nunc in audientia, die jam ex majore
parte decursa, omnia complanata et ad pacis tran-
quillum perducta sunt. Et consuetudines omnes
malæ non expressim tamen, sed ita in genere, vide-
licet quibus ancillaretur Ecclesia, a rege sunt abdi-
cate: et libertates ad Ecclesiæ honorem et cleri
decus a rege benigne ut videbatur susceptæ, nulla
tamen de his vel illis hinc vel inde facta expres-
sione. Hic enim, ut asserebant universi, nocerent
expressa, utpote quæ pacis jam ordinatæ totum
perturbarent tranquillum. De verbo vero illo adjecto,
scilicet salvo honore Dei, de quo in colloquio pro-
ximo tota fuerat contentio, tanta lucta, nulla re-
cordatio, nulla mentio hic. Nec necesse. Quia nec
hoc agebatur nunc ut archipræsul super ecclesia-
stica causa aliove regis voluntati et arbitrio se sup-
poneret. Hoc solum dicebat rex, ut archipræsul
terram ingrederetur, a qua tamen, ut dicebat, ip-
sum non expulerat, et ageret ibi quæ archipræsulis
essent, et in consuetudinibus et in aliis regi tan-
quam regi suo deferret, nec usurparet prætextu
Ecclesiæ quæ non essent sed regis, ipso e diverso
non usurpato quæ non essent regis sed Ecclesiæ.

De restitutione ablatorum postulata a rege.

Archipræsul vero inter cætera domino regi Fran-
corum et aliis pacis mediatoribus de ablatis sibi
et suis urgentissime loquebatur, regulam illam di-
vini juris lingua communi, sicut ad literatos et ad
laicos, frequenter iterans, non remitti peccatum
nisi restitutus ablatum: adiciens nequaquam re-
giam decere magnificentiam res pauperum seu ec-
clesiæ bona confiscata in usum suum convertere,
aut licere ex alieno erogare: quod perinde esset
tanquam si ut unum altare cooperiret, discooperi-
ret alterum, aut si quis crucifigeret Paulum, ut re-
dimeret Petrum. Ablatæ autem sibi et suis pecuniæ
taxabat summam triginta videlicet marcarum millia.
Sed ad hæc respondit dominus rex Francorum et
alii pariter, nec honestum id nec decere pro pecunia,
et regno et sacerdotio tam necessariam, tam desi-
deratam, pacem impediri; præsertim inter tantum
regem et archipræsulem tantum. Et inter suaden-
dum veteris inter eos amicitia recordabantur et
mutuo hinc inde obsequia et beneficia collata non
tacebant. Adiciebant præterea nequaquam hoc justum
et pii pastoris fore, ut omnibus jam complanatis et
libertate Ecclesiæ restituta, ipse Ecclesiam suam,
sponsam suam oblatam sibi respuerit, et propter
causam pecuniariam exsularet. Debere potius spon-

sam suam, etsi nudatam, etsi dilaceratam et con-
salam, ambobus dilectionis brachiis gratulanter ex-
cipere, et tanquam spiritualis sponsæ reddere po-
scenti quæ spiritualis sponsæ sunt. Verumtamen
dicebant mediatores conventuros se regem libenter
et diligenter super hoc. Et ita conventus rex respon-
dit, quod nota per procuratores suos et comprehensa
ablatorum summa, prudentum et religiosorum consi-
lio se ad restitutionem paratum. Et quia archipræsul
tam de immobilibus quam mobilibus moverat quæ-
stionem, adiecit rex quod et de immobilibus pariter
tempore suo loqueretur.

De cautione pacis postulata a rege.

Igitur cum post multas et varias procellarum vo-
ragines, sicut videbatur et sperabatur ab omnibus
ducti essemus jam quasi ad ipsum portus ingressum,
archipræsul a rege per mediatores oblata pacis cau-
tionem expostulat, adjiciens se tamen in hac parte
nil sinistri suspicari de rege, sed potius homines
regis propter tantas quæ præcesserunt inimicitias
non sine causa fore in suspecto; præsertim nisi ali-
qua cautionis species interveniret, quæ esset refor-
mate pacis et restitutæ gratiæ signum evidens. Et
ipse quidem, tanquam vir providus, ante per dies
plurimos virum apostolicum consultaverat quid sibi
agendum, quæ pacis cautio exigenda, si forte post
tantas inimicitias regi reconciliatus terram ingredi
permitteretur et ad suam reverti ecclesiam. Ad cons-
ultationem vero hanc respondit apostolicus vir, mi-
nime decere sacerdotem in tali causa et articulo fi-
dejussoriam seu pignoratitiam aut juratoriam etiam
cautionem a rege suo exigere, unde nec apostolici
viri consilium fuit ut archipræsul exigeret has. Et
quidem adiciebat vir apostolicus quod causa quam
agebat causa esset justitiæ, causa Ecclesiæ, pariter
et pax si fieret Ecclesiæ et justitiæ pax; pro qua
etiam pace facta, sicut et infecta mori pretiosum et
securum, et eo quidem securius quo pretiosius.
Unde et dictarum cautionum nullam a sacerdote in
eo casu et ea causa exigendam respondit Romanus
pontifex. A mundanis et sæcularibus potius quam
a personis ecclesiasticis, a sacerdotibus videlicet et
pontificibus, exigenda hæc, quibus si justitiæ habent
causam, vivere detrimentum est et mori lucrum.
Scripsit itaque apostolicus vir archipræsuli ut si forte
præstante Domino inter ipsum et regem daretur pax,
solum esset contentus pacis osculo, nulla alia sæcu-
lari cautione exacta. Hanc solam, videlicet pacis
osculum, sacerdoti justitiæ causam agenti debere
sufficere, nec decere aliam, nisi forte spontanee
oblata, non exactam suscepit.

Archipræsul igitur habens consultationem hanc,
omnibus tandem cum multa difficultate et opera quæ
ad pacem consummatis, in fine omnium ad apostoli-
ci viri consilium, in signum pacis et gratiæ inter
ipsum et regem, solum cautionem illam expostulat,
pacis videlicet osculum, dicens se post tantas ini-
micitias inter tam longas regis manus eo solo con-
tentum, quod, cum per dominum regem Francorum

A et mediatores alios regi intimatum fuisset, se qui-
dem hoc libenter facturum respondit, nisi quia ira-
tus juraverat publice se archipræsuli pacis nunquam
daturum osculum, etiam etsi ei forte processu tem-
poris pacem et gratiam suam restitueret, nec ob aliud
se nunc negare osculum, nisi quia juraverat sic,
non propterea in corde iram ullam retentam vel
rancorem.

Dominus autem rex Francorum et perique me-
diatorum, audientes sic, mox suspicati sunt sub mel-
litis sermonibus qui præcesserant occulte venenum
sibi propinatum fuisse. Et ipsi ad archipræsulem
confestim revertentes, qui in præfata capella quæ
Martyrium dicitur reversuros expectabat, regis re-
nuntiaverunt responsum. Qui tanquam viri timorati,
et quibus jam omnia suspecta fuerant, nihil hinc
nihil inde suadebant aut dissuadebant, solum et nu-
dum regis responsum referentes.

Archipræsul vero inter cautos cautissimus, tan-
quam vir multa expertus, in primo auditu sicut et
alii in suspicionem mox incidit. Et ex his quæ caute
et aperte interloquebatur videri jam poterat futuro-
rum sibi præsagus. Nec responsum suum ad consi-
lium distulit, sed mox absolute et præcise respondet
se in præsentiarum cum rege pacem non facturum,
nisi ad apostolici viri consilium, dato videlicet in si-
gnum pacis osculo. Et responsum sic absolutum cum
nocte quæ jam imminabat colloquium diremit, cum
regibus tamen grandis via restaret adhuc, Mantuæ,
quæ a Parisiis duodecim leugis terræ distat, ipso-
rum præparatis hospitibus.

Rex vero Anglorum tota die fatigatus, cui et ad-
huc noctis restabat iter, inter itinerandum archi-
præsuli sæpe et sapius maledicebat, recolens in via
et repetens labores, vexationes et tædia quæ jam
per eum sustinuerat. Nos in regum recessu in tem-
plariorum domum quæ Templum nominatur prope
extra Parisios, in qua hospitati eramus, confestim
nos recepimus. In ipso vero recessu a capella,
quæ Martyrium dicitur, in qua, ut jam diximus, ea
die de pace nostra fuerat actitatum, accessit unus
nostrum ad archipræsulem: « Hodie, inquit, de
pace Ecclesiæ tractatum est in Martyrio et credo
quod solum per tuum martyrium Ecclesia consecu-
tura sit pacem. » Archipræsul vero ad loquentem
sibi se retorquens breviter sic: « Utinam, inquit, vel
meo sanguine liberaretur! »

Sermo eruditorum archipræsulis ad ipsum.

Eadem vero nocte post decantatum nocturnum, ple-
rique de eruditis nostris convenerunt archipræsulem
alloquentes sic: « Domine, inquit, intende nobis,
necesse enim est, et Ecclesiæ Dei et nobis qui secuti
sumus te, ut videamus quomodo caute ambulemus,
intelligentes quæ sit voluntas Dei bona et beneplacens,
et non feramur impetu sed regamur judicio. Ecce
quia jam sextus annus peregrinationis nostræ est.
Et toto tempore hoc multa et regum et principum
secuti sumus colloquia, semper qualibet opportu-
nitate data pacem inquirentes et persequentes eam.

Verum necdum consequentes eam nec proficientes adhuc, causam tamen nostram favente Domino nec in modico lasimus : sed spiritui consilii nobis de super dato sanam et integram inter tot tentationes et laqueos, inter tot impulsores et subversores reportamus. Et quæ nos consolantur in omnibus, paupertatis et peregrinationis nostræ veritas et iustitia comites individui sunt. Quin potius causa nostra, tanquam lux oriens, in dies mundo magis ac magis claruit, ipsorum etiam testimonio inimicorum illustrata quæ etiam in proximo illo quod hesternum præcessit colloquio, ut tu consolando tuos sapientes edocuisti, a Deo clarificata est, ut non solum nunc iustificetur a filiis suis, sed et ab alienis, qui veritatis nostræ lucem extinguere nisi sunt. Et ita hucusque magnifice fecit Deus nobiscum. Comprehendit enim mundum in astutia sua, ipso vellet nollet mundus per mundum ipsum Ecclesiæ negotium, quod agimus, clarificante in dies : et nos itidem mundo clarificavit, mundo sicut claros ita et charos reddens et acceptos interim, ut nec nobis qui secuti te nec ejectis propter nos quidquam defuerit. Verum in hesterno colloquio videamus diligenter et discutiamus quid dictum, quid actum sit, in quo articulo pax Ecclesiæ et nostra steterit, et qua ex causa non processerit. Ut nobis videtur inter nos et regem heri omnia fuerunt complacata, plana omnia præter quam quod in solo pacis osculo non dato pax stetit. Hoc solum non datum pacis, quæ usque ad hoc bene processerat, fuit obstaculum. Unde profecto liquet hoc solum, quod Ecclesiæ et nostram impeditit pacem, illud duntaxat nunc esse nostri exsilii causam : et ita qui prius propter solum et manifestissimam iustitiæ causam sustinuimus, nunc propter solum negatum osculum exsulamus. Nec enim consuetudines ullæ, bonæ seu malæ, aut Dei honor tacitus, vel expressus, exsilii nostri nunc causa est ; siquidem ab heri omnia complanata et aspera redacta in vias planas. Unde et hoc solum nostrum nunc facit exsilium quod solum pacis nostræ fuit impedimentum, pacis videlicet negatum osculum. Igitur si propter solum negatum osculum debeat sacerdos suam vel deserere vel recusare Ecclesiam, alias reversurus ad ipsam et persecutiones et exsilia pati duntaxat propter hoc, vos videritis, nobis minime videtur. Præsertim cum ex sacerdotis absentia commune sit multorum discrimen. Et ecce, Domine, quia sexto, jam ut diximus, anno peregrinationis nostræ multæ interim in archipræsulatu vestro sub cura vestra episcopales sedes vacantes, multæ dioceses suis pastoribus destitutæ. Inter ea perit cura, perit opera, perit opus et officium pastorale. Non sunt qui doceant, non sunt qui sacramenta in Dei Ecclesia celebrent : verum et juxta planctum prophete grex ille Dominicus non inveniens pascua, abiit absque fortitudine ante faciem subsequentis, tanquam grex absque pastore, oves errantes in invio et non in via. Nec est enim qui exterreat, qui lupos arceat ab ovili, sed fiunt in defectum pastorum aulici sa-

telles ecclesiarum custodes. Et bona ecclesiarum instituta ad subsidia pauperum convertuntur in fiscum. Et ita ex absentia tua grande in Ecclesia et in spiritualibus et in temporalibus detrimentum, enorme damnum et commune periculum. Hucusque certe absentiae et exsilii vestri causa iustissima ; verum nunc in communi periculo hoc et generali discrimine nec absentia nec exsilii causa iusta poterit esse vel excusabilis, sed revera damnabilis et damnabili damnabilior. Præsertim cum personalis, ob quam fugisti, cessit nunc persecutio, regem ecclesiam tuam tibi in omni securitate et pace publice offerente, quidquid disponat ipse, quidquid molietur interius. Cessat igitur nunc ea quæ præcessit persecutio personalis, cui ut jam ostendimus generalis successit, in qua bonus pastor tenetur non se absentare, non fugere, sed ex adverso ascendere, se opponere et inter gladios etiam nudos et exertos se ingerere, et ita si necesse fuerit, animam suam pro ovibus suis ponere. Unde et viro sacerdotali sicut tempus fugiendi ita et tempus est occurrendi, fugæ tempus cum persona quæritur, juxta quod Dominus : Si vos, inquit, persecuti fuerint in una civitate, fugite in aliam (Matth. x) ; occurrenti vero tempus cum Ecclesia periclitatur, de quo et Scriptura : Occurrit, inquit, tanquam leo, contemnit pavorem nec cedit gladiis (Job xxxix). Sic et magister prius per sportam fugit, sed postea occurrit. Cui cum propheta suum prædixisset excessum : Virum, inquiens, cujus hæc zona est sic alligari oportet (Act. xxi), respondit mox : Ego, inquit, non solum alligari, sed et mori vado in Jerusalem, nec facio animam meam pretiosiores quam me (ibid.). Et quidem prius Magister magistrorum Pastor, pastorum, forma et exemplar ; primo dum adhuc infans et tenellus in Ægyptum fugit, sed adultus postea fortis et robustus occurrit. Unde qui prius suis quasi tenellis et in lacu matris adhuc dixerat : Si vos persecuti fuerint in una civitate, fugite in aliam (Matth. x), postea sicut opere sic et sermone suos jam robustos docuit ut occurrerent : Ecce, inquiens, mitto vos sicut oves in medio luporum : Ite (ibid.). Illi igitur euntes in orbem et vehementi afflati Spiritu in hostes irruentes non quæsierunt osculum sed gladium. Tu ergo, Domine, si illorum quæris imitari zelum, quorum sortitus es ministerium, illorum virtutem quorum creditam habes dispensationem, vade et fac similiter. Non ad terreni pulveris uno flatu facile dispergendi anheles osculum, nec metuas gladium. Ecclesiam tuam potius, non sub osculo sed sub gladio, si necesse sic etsi nuatam, et spoliatam, etsi convulsam et evulsam, non recuses, sed maritali zelo cum debita affectione et devotione suscipias. Non te, quæ forte jam tibi tenduntur dolosorum retiacula, retrahant, non minæ revocent, non gladii metus emolliat, non denique etiam ultimum mortis te retardet periculum. Regredere igitur et nos tecum, et per eam confidentiam antea præsens qua ausus es absens, ut cum

prophético sarculo fortiter et viriliter evellas, destruas, disperdas, et dissipes, quæ in horto Domini per absentiam tuam male jam excreverunt. Verum quod supra tetigimus de causa metus et periculis si forte terram ingrederemur, nequaquam ideo dicimus quod de tanto rege nostro et tam illustri suspicemur sinistri quidpiam. Nec enim tanta et mundo tam clara et tam gloriosa potestas tanti doli posset esse vel insidiarum ulla latebra. A tanta altitudine longe semotum tam dolosæ simulationis latibulum, unde et credibile minime quod molietur quidquam, præsertim adversum te sacerdotem priorem suum in Deo, et propter Deum, seu etiam adversum nos, inerme hominum genus, præsertim ab ipsomet publice pace et securitate donata. Non est igitur, Domine, quod redditum tuum ad ecclesiam tuam, si sic fieri poterit, amodo protrahas aut procrastines, sed in forma pacis oblata mature confidenter et absque omni conscientie scrupulo revertamur, illum summa gratiarum actione et laude prosequentes in ejus fortitudine revertemur. Juravit siquidem rex publice coram multis pontificibus et principibus regni, regnante ipso nunquam te reversurum. Nunc vero ipse est qui pacem offert, securitatem spondet, malas consuetudines damnat, bonas probat. Quod revera a Domino factum est cujus infirmum etiam regibus fortius est. Qui ut solus fortis appareret mundo, infirma mundi elegit ut confundat fortia. Et ne ad jam præterita recurramus exempla, vides, domine, in præsentiarum pusillum hunc gregem tuum nos videlicet qui secuti sumus te, quos ut sequeremur te Dei vocatione vocasti, non quidem nobiles, non potentes, sed ignobilia mundi et contemptibilia. Et tamen ut solus ipse victor prædicetur, te duce, te rectore, vincit Deus per hos, ita ut victoris summa devotione cantare debeamus *Alleluia* reversionis. Mox etenim quasi reversi censerī possumus, cum nobis a rege tanto, a potestate tanta quæ prius in contrarium juraverat, pax publice datur et indulgetur reversio; etiam si per nos staret quo minus reverteremur, non ob id minus in causa nostra jam vicimus, imo Christus vincit, Christus regnat, Christus imperat.

Archipræsulis responsum ad suos.

Archipræsul vero suorum suasibiles sermones hos diligenter audiens et attente mox respondit. Et ad suos sermonem dirigens : « Vos, inquit, tanquam viri eruditi locuti estis quibus est et cum consilii spiritu sapientia et scientia sanctorum collata. Et responderem ad singula, nisi quod approbo universa. Unum vero sciatis quod pacem a rege sic oblata non renuissem, nisi quia viri apostolici secutus sum consilium. Alioquin pax pro osculo negato non stetisset. Verum quia nunc adeo processum est in negotio, quod simpliciter absque conditione et obligatione omni pax nobis offertur, quæ tamen ad domini papæ consilium conformari non potest, qui ad pacis firmitatem postulandum pacis consuluit osculum, in præsentiarum mihi visum est, nescio si

et vobis, ut ad ipsum papam, de cujus singulari primatu, tanquam de capite membra tota, dependet Ecclesia, totum quod gestum est referatur, videlicet et quatenus processum et in quibus finibus nostrum et Ecclesiæ negotium stet, præsertim cum jam in arcto simus, in tuto minime, pace sic concessa, sed signo pacis negato, pro quo tamen negato ut vos me prudenti eloquio vestro animastis, nec ecclesiam pacifice mihi oblata respiciam nec periclitantur, ut dicitis, salutem animarum contemnam. Quin potius priusquam clara Deo et mundo justitiæ causa quam agimus deformetur, auctore Domino paratus ero, ut vos suadetis, et in carcerem et in mortem ire. Alioquin inanis labor noster et ridiculus, si deinceps daremus maculam in gloriam nostram. Gloria autem nostra hæc est, veritas causæ nostræ; veritas, inquam, et justitia, ut supra jam dixisse vos memini pauperiatem nostræ huc usque comites fuerunt individui. Igitur si vobis bonum videtur sic, necessarium in primis et videtur consultius ad virum apostolicum mittere, ne quidquid acciderit ipsius videamur contempsisse consilium, et ut ipsius auctoritate et conscientia, si forte Dominus sic providerit et permiserit, revertamur et regrediamur in terram, licentia prius apostolica et benedictione et absolutione accepta, paruri pro Ecclesia, quidquid Dominus ibi nos passuros decreverit. Et Dominus quidem sic introitum nostrum melius custodiet et securius.

Et quidem archipræsul ad nos sic. Nos autem, qui prælocuti, audientes virum pro causa justitiæ, pro Ecclesia, de excessu suo tam fortiter, tam constanter loquentem, et ut vilebatur absque omni suasionem pro justitia, si oporteret, antequam cederet, etiam ad mortem paratissimum, non modicum moti sumus et compassi. Et plerique nostrum in tacitas, quas volebant sed non valebant reprimere, lacrymas eruperunt : et ipsius sermonem et de mittendo ad dominum papam consilium commendavimus.

30. QUALITER ARCHIPRÆSUL QUINTO AD ROMANUM PONTIFICEM MISERIT.

Itaque a Parisiis cum omni festinatione Senonis venimus; et post dies paucos nuntii parati. Qui cum essent jam in articulo perfectionis, crebro jam in terra disseminabatur, puero illi regis Anglorum primogenito Henrico, qui ut supra in historia hæc interserimus, domini nostri archiepiscopi alumnus fuerat, diadema impositum, ungente eum in ecclesia Beatri Petri Londoniæ apud Westmunster Rogero tunc Eboracensi archiepiscopo, suffraganeis Ecclesiæ Cantuariensis assistentibus et ministerium præbentibus. Rex siquidem cito post supra dictum colloquium, in quo nobis negatum pacis osculum fuit, transfretavit, et odio archipræsulis in læsionem dignitatis Cantuariensis Ecclesiæ ab alieno metropolitano et in aliena provincia filium suum, quem diximus, ungi fecit in regem. Et hoc quidem in læsionem personæ Cantuariensis Ecclesiæ, ad cujus dignitatem et jus regum Anglorum coronatio ab an-

tiquo pertinere dignoscitur. Quod audiens archipræsul in primis vix credidit. Ipse siquidem tanquam vir providus, et cui de adversariis suis suspecta omnia, a Romano pontifice litteras impetraverat, ad Eboracensem archiepiscopum et alios Anglorum episcoporum jam ante coronationem directas, quibus auctoritate apostolica in virtute obedientiae erant inhibiti, ne in præjudicium archiepiscopi Cantuariensis, qui propter justitiam exsulabat, regis filio diadema imponerent. Et directas has sibi litteras quidam episcoporum ante coronationem receperunt; alii vero de mandato præmuniti recipere noluerunt. Unde et contra inhibitionem apostolicam quotquot consecrationi pontificale ministerium præbuerunt.

Sed modicum attendere libeat quam profana unctio, quam odiosa, quam inimica consecratio hæc, si tamen consecratio magis quam execratio dici debeat: apostolica benedictione destituta, imo in transgressione contra virum apostolicum facta. Quæ etiam ex mero odio, ira et indignatione processit, odio Patris spiritualis, in luctu matris spiritualis, a patre carnali excogitata. Omnia hic profana, omnia vere hic a fano aliena, aliena et alicnata, aliena provincia, alienus consecrator, alienus et rex puer consecratus, lusu adhuc magis quam populorum regimini aptior: et qui consecrari fecit rex pater alienus et alienatus a patre et matre sua spirituali. Probat hæc nostra verba lugubres et omnibus post futuris sæculis detestandi, qui ex hac consecratione provenerunt eventus. Et in primis quidem provenit ex hac ejus qui consecravit et eorum qui interfuerunt episcoporum, apostolici viri auctoritate generalis suspensio, eo quod, ut jam diximus, ejus super hoc præcesserit inhibiti, sed contempta; quibusdam etiam episcoporum pro hac et aliis quibusdam causis anathematis vinculo innodatis. Et deinde illius pretiosæ mortis domini nostri archipræsulis unctio hæc non dico plenam causam sed multam tamen et citiorem præbuit occasionem. Et hæc quidem planius et plenius sequens historiæ ordo declarabit. Tercio vero temporis processu et unctione hæc contigit inter regem patrem et regem filium dura et nefanda rebellio: et demum egregii illius pueri jam adolescentis ex immatura illa unctione misera rebellione adversus patrem cita et nimis matura mors. Ecce quam abominanda, quam execranda ex consecratione hæc mala provenerunt; sacerdotum videlicet suspensio, anathematizatio, occisio, semel et iterum inter patrem et filium rebellio, et in fine egregii illius pueri consecrati sic mors in adolescentia, præsentibus et omnibus post futuris sæculis detestanda. Unde et plangendum, clamandum et exclamandum: « O mors tua, Henrice, o mors, quam dira, quam dura, et quam amara memoria tua, quæ talem et tantam mundi gloriam, dum adhuc ordiretur, succidisti! quam inconsiderata, quam inhumana, quæ tam certam, ut putabatur, mundi spem, dum adhuc fructus in flore esset tam præclaro, uno et brevi flatu tui vehementia

exsufflavit! Sit mors tua ille qui mors mortis est, ut vel per te transeat ad vitam, qui non sibi, sed mundo speratur victurus. Et quidem egregium puerum hunc, tanquam lilium totum hortum venustans, et hic et alibi crebro jam his oræ huic quasi quadam campi planitie inserui, quo et ipsa ex insitione hac clarior sit et venustior.

Verum de morte pueri hujus domino nostro archipræsuli spiritualiter, nec dubium est, præstensa, hic tacere non possum. Cum essemus in Gallia Senonis civitate peregrinationis nostræ apud monasterium beatæ virginis Columbæ, noctium una post decantatum nocturnum dominus noster archipræsul, ut pausaret, in lectum suum se recepit. Verum, sicut ab ipsius ore discipulus, qui scripsit hæc, accipit, curis et cogitationibus se tunc ut solent ingredientibus, somno indulgere non potuit. Inter alia vero de domino rege Anglorum, de ejus magnitudine, de ejus prosperitate et in filiis et in divitiis et latis potentatibus, cogitatio subit. Super his diutius cogitans, et præsertim de filiis et inter filios potissimum de primogenito ipsius Henrico quem præ cæteris diligebat, et de quodam aliorum; in crastino tamen, sicut referebat, se pro certo scire nesciebat de quo aliorum cogitasset tunc, an de Ricardo post Henricum defunctum regis nunc hærede et comite Pictavorum, an de Gaufrido nunc Britannicæ comite. Cum ergo de rege patre et de filiis cogitaret sic, desiderabat se scire, quid futurum de his et quales circa hos dispositiones Altissimi. Et cum aliquandiu cogitaret sic desiderans, inter cogitandum hæc cepit quasi dormitare, et ecce facta est ad eum vox, per ipsam vocem versus quodam hexametro sibi expresso; versus autem hic erat:

Sors tulit una duos, tulit altera, sed male patrem.
Ecce versus: nec arbitretur quis versum hunc quasi a dormitante aliquo casu compositum, quem etiam vigilantem non componeret, utpote qui versificandi nec etiam sub scholari disciplina artem attigisset, vel in modico. Hoc autem scio quod versum auditum sic in crastino retulit discipulo qui scripsit hæc; et gemebundus adiecit: « Proh dolor! inquit, Henricus noster, antequam pater vel fratres sui, præmoriatur. » Sic quidem archipræsul locutus discipulo qui scripsit hæc. Et vere in morte Henrici, proh dolor! et unde dolor, archipræsul vaticinii sui fine nimis verus propheta probatus est. Pariter et in Gaufridi morte, dum adhuc hanc historiam scriberem, archipræsulis vaticinium adimpletum post Henrici mortem quinto sextove anno ante patrem mortuo, sicut hoc, et illo. Et quod accedit miraculo, vaticinium plus commendans: « Mors tulit una duos, » vere una mors, quia eadem mortis spes ambobus fratribus his, morbo dysenterico interemptis, bene quidem et sancte sublati, ut qui interfuerunt testati sunt. Demum vero, secundum vaticinii ordinem quarto quintove anno a Gaufridi morte, pater ipse mortuus

est. Qualiter vero, me tacente, novit Ecclesia et mundus prædicat. Nec igitur pergo nunc ulterius mortis ejus exagitare modum: solum hic tetigisse sufficiat, ob id solum ut vir Dei propheta verus vaticinii sui fine comprobetur. Et certe plura de actibus hujus Henrici nostri, etsi ætas tenera, strenuis tamen, et de modo exitus ejus a vita inseruissem hic, nisi quia quam describendam suscepimus lex historiæ obviat. Raptum igitur in via puerum et ad patriam reversum nos, qui adhuc in via, salutantes ad ceptum historiæ iter revertamur. Archipræsul itaque sciens tandem pro certo coronationem factam sic, per nuntios nostros quos supra diximus in articulo fuisse Romanæ profectionis, cum in primis audirentur hæc, quatenus pax nostra processerit et in quibus finibus steterit, et de coronatione facta sic Romano pontifici totum et verbo et scripto intimavit, humillime et lacrymabiliter supplicans, ut vel nunc excuteret se excussorum filius, et maxime in falsos fratres adverteret, qui in læsionem patris sui, propter ipsos exsilium et proseripcionem sustinentis et matris suæ Cantuariensis Ecclesiæ tam manifesti jam erant etiam apostolici mandati transgressores. Et ita profecti sunt nuntii.

Vir autem apostolicus audiens universa et quæ et qualiter fuissent gesta, et in regem et in episcopos vehementer motus est. Et archipræsuli et suis, etiam multo plus quam hucusque fuisset, paterno compassu affectu: unde et in missorum nostrorum reversione quos miseris nostri diu detinere noluit, ut apostolicæ consolationis citius reciperemus remedium, nobis oppressis, tanquam pater pius compatiens, apostolicis scriptis propinavit dulcia, aliis vero amarissima. Scripsit siquidem præ memoriæ Rotherici tunc Rothomagensis archiepiscopo et Bernardo tunc episcopo Nivernensi, mandans ipsis et in virtute obedientiæ præcipientes ut regem Anglorum pro pace nostra districtissime convenirent, adjiciens quod si ipse in obstinatione perdurans adhuc pacem nollet, tota ipsius terra, tam transmarina quam cismarina, sub interdicto poneretur, omni ecclesiæ cessante officio præter baptismum parvulorum et poenitentias morientium. Eboracensi vero archiepiscopo et aliis quotquot episcopis qui consecrationi inter-

A fuerant litteras direxit suspensionis, scripto dure eos increpans et objurgans et improprians, quod turpiter et enormiter pro vili lentis edulio primogenita sua vendidissent. Quosdam etiam episcoporum, et ob id quod coronationi interfuerant, et ob causas alias, anathematizavit. Et hæc suspensionis et anathematis litteræ per nuntios nostros nobis destinatæ et traditæ, ut illis loco suo et tempore uteremur. Has et alias apostolicas litteras ad nos vel pro nobis missas si quis nosse et legere desiderat, ad illud de quo in hac historia supra tetigisse me memini corpus epistolare recurat. Quæ quia ibi insertæ, cum loquendi de his per hanc historiam occasio se obtulerit, breviter transimus de his. Scripto vero consolatorio archipræsuli directo, vir apostolicus archipræsulis fortitudinem et constantiam congratulando commendabat; præsertim quod absque cautione et absque pacis osculo, si non posset aliter, in terram tanquam ovis in medio luporum paratus esset reverti; illius verbi quod Altissimi verbum ad suos dicit non immemor: *Ecce, inquit, mitto vos sicut oves in medio luporum* (Matth. x). Unde et sicut benedictionem apostolicam, sic et absolutionem scriptam, quidquid ipsi in terram ingresso accideret, a viro apostolico obtinere tunc meruit. Hæc igitur apostolica scripta, vel pro nobis ad adversarios nostros vel ad nos directa, gratanter suscepimus, misericordiam et judicium cantantes Domini.

C Et in primis quidem dictus Rothomagensis archiepiscopus et episcopus Nivernensis ad apostolicum mandatum regem pro pace nostra sæpe et sæpius convenerunt, et nisi interveniret pax, censuram ecclesiasticam et sibi et terræ suæ imminere in brevi inferebant, apostolico viro præcipientes sic. Adjicientes nec minis, nec blanditiis, nec aliquibus verborum ambagibus seu tergiversationibus ullius censuram hanc, nisi solum data pace, aut adim posse aut suspendi, apostolici viri animo obfirmato nunc sic: addentes etiam se nullatenus audere a Romano pontifice statutum terminum præterire, quin mandatum sibi coercionem exsequerentur nisi pax interveniret.

INCIPIUNT CAPITULA TOMI QUINTI.

14. De pace inter regem et archipræsulem reformata.
2. De nuntiis ab archipræsule ad regem missis et quare.
3. De primo accessu archipræsulis post pacem ad regem et quare.
4. De secundo accessu archipræsulis ad regem post pacem et quare.
5. De præparatione reversionis nostræ ad patriam et de gestis nostris in Anglia per nuntios ante reversionem, et de his quæ audivimus in ipso jam quasi articulo reversionis, et de verbis discipuli qui scripsit hæc ad archipræsulem et de archipræsulis responso.
6. De ingressu archipræsulis in mare et qualiter applicuerit et a populo terræ qualiter exceptus.
7. De his quæ in initio ingressus archipræsulis in terram gesta.
8. De episcopis regem contra archipræsulem iterum commoventibus et causa.
9. De verbis et gestis archipræsulis die natalis Domini.
10. De recessu discipuli qui scripsit hæc, ab archipræsule et causa recessus.
11. De ira regis in archipræsulem iterata et de carnificibus illis militibus venientibus

TOMUS QUINTUS.

1. Videns itaque rex rem jam in tam arcto certissime promisit pacem. Unde ad quoddam regum quod imminabat colloquium vocati recessimus. Finito vero die tertia regum colloquio, et Christiano illo rege Francorum jam in recessu, in continenti de pace nostrâ acitatur, et per magnos quidem mediatores, quibus dominus rex Francorum in recessu suo nos commiserat, ut de pace nostra tractarent, nec enim ipsemet potuit seu voluit interesse tunc. Sed quid protraheremus? Ibi pax nostra reformata, osculum vero prius in alio, sicut diximus, colloquio queratum sed negatum, nec archipræsul nunc quæsiuit nec rex obtulit vel negavit. Nulla quippe ibi facta de osculo mentione, rex publice coram pontificibus et principibus qui aderant, archipræsuli et suis pacem et securitatem concessit. In consuetudinibus et in ablatis tam mobilibus quam immobilibus aliisve, ea forma pacis observata nunc et concessa, quam supra in alio regum colloquio præostendimus, ubi solum pro pacis negato osculo pax nostra tunc stetit. At nunc fortis Christi athleta, pacis cupidus, non mortis timidus, non exacto pacis osculo, ne vel forte sic impediretur pax, sciens et prudens pacem talem qualem suscepit, revera amore pacis victus, timore mortis evacuato, quem amor ille plus quam mors fortis jam foras miserat. Facta est autem pax die beatæ Mariæ Magdalenz prope ubi duorum regum colloquium pridie fuerat, videlicet in confinio Carnotusiz et Cenomannis, inter duo castella quorum unum nominatur Viefui et alterum Freteval; et ibi in prato quodam amoenissimo, quod tamen sicut multo post accepimus dicitur ab incolis ex antiquo Pratum Proditorum. Et quidem pax nostra sic erat.

Rex autem et archipræsul soli duo seorsum se in equis in quamdam planitiem deflexerunt secreto colloquentes; ubi inter alia archipræsul regi supplicabat ut injuriam, quam sibi et Ecclesiæ suffraganei sui episcopi una cum Eboracensi archiepiscopo in coronatione Henrici filii sui fecerant, secundum censuram ecclesiasticam sine ipsius offensa punire sibi liberef. Et annuit rex. Unde et gratias agens de concessione, confestim in oculis omnium se ab equo demisit et humiliter se ad regis pedes inclinavit. Cum vero archipræsul equum suum reascenderet, rex ascendenti ascensorium aptavit et tenuit, omnibus qui circumvallabant cernentibus sic et mirantibus, sed nescientibus causam donec archipræsul in recessu suis hoc secretius retulisset; cerneret quidem tunc ex multis cordibus cogitationes revelari et præsertim inter aulicos, congratulantibus his, aliis vero mœstis et confusis, qui prius seditionis et discordiæ evomuerant virus. Alii vero nec mœsti nec confusi suspicantes simulationem in his et quod extrema pacis dissensio luctus

A et dolor occuparet. Et in hoc minime ocepti hi sicut sequens historiæ ordo declarabit.

2. DE NUNTIIS EJUS AD REGEM MISSIS.

Facti igitur, ut videbatur, ea die rex et archipræsul amici, amicabilem tunc invicem recesserunt. Et post dies paucos nuntii nostri in Angliam cum litteris regis missi sunt, quibus rex ministerialibus suis, quos in terra justitias regis vocant, de pace facta mandavit præcipiens ut archipræsulem et suos ad sua in omni pace et securitate restituant. Nos vero in Franciam ad civitatem peregrinationis nostræ Senonis remeantes ad repatriandum nos parabamus. Decevit autem archipræsul alios adhuc, priusquam intraret ipse, nuntios præmissis majores et plus industrios in Angliam mittere qui testimonio fame caute explorarent, qui starent pro nobis, qui contra nos, et si qua occulta molirentur adversum nos; et in possessionibus nostris confiscatis quem mandaverit rex faciendæ restitutionis modum. Archipræsul itaque decreverat sic, ob id etiam maxime quod dominus rex pepigisset se quædam prædia de feodo Cantuariensis Ecclesiæ redditurum, feodum videlicet ejusdam nobilis qui dicebatur Willelmus de Ros, et castrum quoddam prope Cantuariam quod Salvude dicitur, quod Henricus quidam vir magnus de orientali Saxonia, seu, ut vulgo dicitur, de Essexæ cognominatus, ante duellum quoddam quo evictus fuerat, ab archipræsule tenebat. Et præter hæc turris Rophensis custodiam, quem de ecclesiæ suæ jure fore archipræsul jam sæpe et sæpius constantissime et acerrime fuerat protestatus. Et hæc quidem, quæ hic expressimus, erant quæ archipræsul inter alia acrius et instantius repetebat, quæ et rex ipsi redditurum promiserat, cum in Normanniam revertisset. Misit itaque dominus noster ad hoc sanctæ recordationis magistrum Joannem Saresberiensem postea Carnotensem episcopum pariter et discipulum qui scripsit hæc, injungens etiam nobis ut in Angliam ob dictam causam procederemus, si forte rex promissam restitutionem compleret, alias non, sed mature ad ipsum reverteremur. Et nos ita proficiscentes regem in Normannia reperimus; verum propter febris tertianæ valetudinem, quæ jam regi supervenerat, in curia ultra quam crederemus fecimus moram. Cum autem convalesceret rex, ipsum nomine archipræsulis super dictorum promissa restitutione convenimus. Conventus autem more suo distulit, distulit et redistulit: sed tandem ad instantiam nostram nos absolvit, ad magistrum Joannem qui loquebatur et nomine archipræsulis repetebat, specialiter sermonem dirigens: «O Joannes, inquit, nullatenus vobis castellum tradam, nisi videro prius aliter vos gerere erga me quam hucusque gesseritis.» Et ita absoluti et apprimè intelligentes minime nos tunc

proficere posse, infecto negotio, in Angliam, juxta quod nobis injunctum fuit, non procedentes ad dominum nostrum in Franciam reversi sumus. Audiens autem archipræsul sic plurimum motus est, vanas et semper deceptorias hominis promissiones detestans.

3. DE PRIMO ACCESSU EJUS POST PACEM AD REGEM.

Et cum novimus inter regem et nobilem virum Bliesensem comitem Theobaldum colloquium futurum in proximo, accessimus ad colloquium. Sed archipræsul pridie ante colloquium Turonis ad regem processit. Colloquium quippe prope Turonis in confinio Carnotus et Turonis statutum fuit. Audiens autem rex archipræsulis adventum, quosdam de aulicis in occursum præmisit et demum ipsemet civitatem exiit et occurrit. At cum convenirent, non oculi, sed vultus regis, sicut notari poterat, super eum: unde et quod multum notabamus nocte illa in hospitio nostro nec rex respexit nos nec suorum aliquis; quin potius rex summo mane in capella sua missam celebrari fecit pro defunctis, suspiciens, ut aiebant, ne si forte archipræsul alii missæ interesset, in missa osculum sibi pacis offerret, quod ibi negare non esset Christiani; sed plane inimici Christi. Et missa celebrata mox rex civitatem exiit ad colloquium properans. Archipræsul pariter sed tardius secutus est, et ante colloquium consecutus est regem. Qui inter viandum mutuo se invicem objurgantes, uterque vieissim alter alteri collata priorem beneficia et exhibita obsequia impropavit. Cum autem venissent ad colloquium, post diem multum decursam, propter quæ ad colloquium venerant, inter regem et comitem sedatis omnibus, archipræsule etiam inter ipsos sedulo cum aliis et efficaci mediatore, tandem archipræsul regem super dictarum possessionum promissa sed non adimpleta restitutione, acriter quidem et instanti convenit, frequenter tamen ex obliquo assuetam hominis arguens levitatem in verbo et usitatas deceptiones in promissis.

Videres certe tunc sacerdotalem in pontifice zelum. Et vere zelum qui in ipsa pacis novitate et a tanto principe vel invito, in cujus manu pax nostra et non pax, imo et vita nostra et mors, ecclesiæ suæ jura tam viriliter tam constanter repetebat: revera spiritu justitiæ vehemens et in sacerdote zelus domus Dei ardens. Sed quid? Jam dicto comite et aliis nobilibus interponentibus se, a rege iterum restitutio jam sæpe dictorum certissime repromissa. Volebat tamen rex ut ante restitutionem ad ecclesiam suam reverteretur, sicut aiebat, prius videre desiderans qualem se regno exhiberet. Et hic colloquii finis.

4. DE SECUNDO ACCESSU EJUS AD REGEM.

Post aliquot vero dies archipræsul in castro, quod Calvus mons dicitur, prope Blies, regem qui illo tunc venerat revisere profectus est: non quidem ut quidquam exigeret vel repeteret, sed solum ut regem videret, et si posset fieri sic antiquam familia-

ritatem et amicitiam, quatenus Dominus permitteret, repararet. Et quidem rex ipsum venientem sic honorifice nimis ut decebat, et ut videri poterat gratanter plurimum et affectuose excepit. Qui cum familiariter colloquerentur et jucundius, inter alia dixit rex: «O, inquit, quid est quod voluntatem meam non facis? Et certe omnia traderem in manus tuas.» Et post dies archipræsul hoc regis verbum retulit discipulo qui scripsit hæc; adjiciens: «Et cum rex.» inquit «mihi dixisset sic, recordatus sum mox verbi illius in Evangelio: *Hæc omnia tibi dabo si cadens adoraveris me* (Matth. iv.). Hæc et hujusmodi de viro hoc historiæ huic sæpe et sæpius curavi interserere, ut quemadmodum, sicut paulo ante præmisimus, deprehendi sacerdotis potuit zelus, ita et nunc audiri possit purus in sacerdote fuisse ab omni cupiditatis labe affectus: quem nec inficere poterat, etsi paupertate jam diu tolerata, divitiarum etiam Augustalium virus. Nec arbitretur quis hæc et hujusmodi contra brevitatæ regulam superflue et sine fructu inserta, pauca enim vel nulla hucusque interservisse me memini, quæ non pertineant, etsi non exprimator, vel ad ædificationem proximi vel ad præconium viri: si ad utrumque, et hoc multo magis melius est.

5. DE PREPARATIONE EJUS AD PATRIAM.

In crastino vero licentiatum a rege, a castro illo recedentes, ad civitatem peregrinationis nostræ Senonis remeavimus, et mature prout adhuc pauperes et exsules potuimus, nostrum ad repatriandum iter maturabamus. Nec ob id pauperes memino, quin archipræsul cum suis in magno et præclaro apparatu revertisset, plus, si fallor, quam cum equitaturis centum repatrians. Quod ideo memoro hic, ut ubique et in omni statu suo probetur magnus. Et revera semper et ubique magnus; magnus in palatio, magnus in sacerdotio, magnus in aula, magnus in ecclesia, magnus in peregrinatione, magnus in peregrinationis reversione, maximus vero in peregrinationis consummatione. Sed de hoc exspectemus adhuc per modicum. Siquidem melius hoc viri et historiæ hujus consummatio declarabit.

Igitur domino rege Francorum et principibus terræ, qui deserente nos mundo tam benigne tam magnifice nos susceperant, salutatis, licentiatum ab eis repatriantes venimus in Bolonensi territorio ad portum qui dicitur Wissant. Archipræsul vero hinc antequam naves ascenderet viri apostolici præmisit litteras quæ, ut supra diximus, erant de generali episcoporum per Angliam suspensione et quorundam anathemate. Has itaque festinanter præmisit litteras episcopis per Angliam ante suum adventum porrigendas. Quorum aliqui in ipso portu transfretare volentes reperti sunt, suspicientes forte quod eis ex inopinato mox accideret: Rogerus videlicet Eboracensis archiepiscopus qui in ipso portu suspensus est, Gilbertus cognomento Foliot Londoniensis, et Jocelinus Saresberiensis episcopi, qui pariter in

portu pso anathematis sui litteras receperunt. Et mox quidem suscepto mandato paritum est, illo auctoritate apostolica gerente se suspensum, aliis vero se anathematizatos. Et cum nos his præmissis auram adhuc sereniorē expectaremus, nuntiatum est factum sic. Quod cum audiret archipræsul, gaudio magno gavisus est, lætante iusto eo quod vindictam desideratam jam vidisset.

Una vero dierum exiit archipræsul, suis et multis aliis comitatus, ut naves suas in quibus transfretaturi erant videret. Et ecce vidimus jam prope terram navem quamdam ab Anglia ad portum nostrum velificantem. Quæ cum cito applicuisset, a nautis rumores quærivimus et quid in Anglia de reditu archipræsulis diceretur. Et responderunt, hoc quidem fore gratum valde et toti terræ acceptum. Verum unus eorum, videbatur mihi quod præteta, seorsum me qui scripsi hæc secretius traxit: « Miseri, » inquit, « quid quæritis? quid agitis? quo properatis? Certe in mortem vestram; sic pro certo dicunt qui noverunt, id ipsum in terra suspicantur omnes: et ecce quia multi milites in portu quo applicare quæritis, certe sicut dicitur ut in archipræsulem et suos mox cum applicuerint injiciant manus. Commota est siquidem terra, exasperata adversum vos, et præsertim regis fideles eo quod in primo adventu vestro in terram commovistis et conturbastis eam anathematizando episcopos terræ et suspendendo; præsertim ut religiosi et sapientes dicunt in Domini adventu qui nunc est, qui mundo fuit tam fructuosus, tam gratus, tam acceptus, vester nunc pariter in terram adventus tranquillitatis deberet esse et pacis. Sed vos e contrario in vestro turbastis omnia. » Illis dictis, gratias retuli referenti; et hoc ipsum quod retulit mihi ipse, alii jam densim submurmurabant.

Post paululum vero vocans archipræsulem a turba seorsum dixi ei secretius: « Sic et sic mihi locutus est navis hujus quæ nunc applicuit gubernator. » Et cum dominus archipræsul et ego conferremus de his, de sociis nostris ingressit se unus, bonæ memoriæ Gunterius nomine, homo simplex et timens Dominum. Qui cum audisset super quo conatalissemus, non requisitus mox dixit satius fore et consultius subtrahere se adhuc donec procella hæc et turbatione terræ pro episcoporum suspensione sedata, gratius reverteremur et securius, adjiciens quod « si terra, » inquit, « jam sic mota est, quid erit cum rex audierit. » Et dissuasit in Angliam tunc reverti.

Responsum discipuli consulti a magistro.

Et archipræsul cito post dirigens verbum ad discipulum qui scripsit hæc, qui ea quæ audierat a præteta prænarraverat: « Et tu, » inquit, « quid dicis? » Et discipulus: « Domine, » inquit, « res in arcto est: Istius consilii magnitudo parvitatē meæ excedit mensuram; et consilium magis anceps, eo præsertim quod eruditi tui nunc absint, quibusdam adhuc in Francia, aliis vero in Angliam a te præmis-

s. Verumtamen dicam, si placet, te iubente. quod sentio. In primis quidem videtur mihi hoc, quod si in Flandriam seu in peregrinationis nostræ terram regredimur, veretur id nobis in confusionem et ignominiam, et erimus oneri qui hucusque fuimus honori: præsertim ad ingrediendum et in patriam revertendum apostolica licentia benedictione et absolute jam percepta; terra etiam peregrinationis nostræ salutata et pace publice concessa et accepta. Igitur aut regrediendum turpiter aut procedendum audacter et agendum viriliter. Alioquin profecto dicetur: Ecce quia Cantuariensis qui primo a Norhamtune, nunc etiam secundo antequam dimicet fugit, qui tamen tam constanter firmaverat quod pro Ecclesia tam fortiter staret, tam viriliter ageret? Et erimus de meticulis illis filiis, qui intendentes et mittentes arcum conversi sunt in die belli. Unum tamen est, quod si in hac pace nostra dolus est, quod quidem suspicabile et multi asserunt, sic grave certe periculum hoc et inevitabile, cum vis et dolus consociata cooperentur et malitia conatus suos per potentiam perficere potest, quando jam est potestas malitiosa et malitia potens. Cui pesti nil obviare potest, nil resistere. Malitia quippe suggerit, potentia socia et cooperans efficit. Et nos quidem potuimus prius leonem utnunque evitare sævientem, verum draconis nunc evitare fraudulentiam difficillimum. Omnis quippe potestas magis metuenda cum fallit quam cum sævit. Unde et pro magno illud de Salvatore præconizatum: *Et conculcabis, inquit, leonem et draconem* (Psal. ix), leonis videlicet vim, draconis dolum: quæ erit in novissimis diebus novissima Ecclesiæ persecutio, quam adeo gravis non præcessit, videlicet ex vi et fraude composita. O igitur quam felix, quam gloriosa exsilii nostri consummatio, si novissima persecutio hæc, qua in fine sæculorum probabuntur iusti, a nobis in quos fines sæculorum deveniunt inchoaverit. Quam felix, domine, exsilium, si post exsilium daretur desuper ut non solum martyr, sed et novissimorum martyrum primitiæ fieres. In quo etiam potissimum Domini tui regis crucifixi mortis titulum humiliter recognosce, proditione forte moriturus, sicut et ipse proditus pro Ecclesia mortuus est. In quo pastor ille pastorum pastoribus formam dedit, ut si hostes suos occultos evitare non valent tolerant, etiāsi videant sibi per ipsos vitæ affuturum discrimen, verum inter sævum et hypocritam principem, qui et leo et draco est, et inter bonum pastorem periculosa quidem semper sed victoriosa conditio. Sæviat quippe ille sive fallat, semper paratus sit pastor bonus pro ovibus suis animam ponere. Qui etsi forte a violento, non tamen est quod a dracone, quod ab hypocrita videlicet tueri se possit. Juxta quod vulgo dicitur neminem posse se a proditione tueri, quandoquidem ipsa pax efficacior sit ad prodendum. Non est igitur, domine mi, ut mihi pro sensus mei parvitate videtur, nunc ut deinceps, sicut prius de Norhamtune, secunda competat fuga,

nec etiam auquatenus te subtrahere, quod provide tanquam fugere est. Non subtractio, inquam, non fuga competens esset, sicut primo, nec excusabilis. Super te quippe jam septem mutata sunt tempora. Ecce enim quia sex anni jam exacti, et septimus hic annus est peregrinationis nostræ, septimus exsilii nostri. Et toto tempore hoc supra dorsum tuum fabricaverunt peccatores iniquitatem suam prolongantes, qui, etsi nescientes, toto tempore hoc coronam fabricaverunt tibi incorruptam. Unde et quia septimus hic annus requietionis est, non est de cætero lima necessaria, jam parata corona. Non scalp pro opus, pelle pro pelle data. Non scelte opus vel incisorio, lapide tanto tempore cæso et jam effigiato et exciso. Non ignis fornax necessaria auro jam probato in tornace, in qua et veteris hominis ossa sicut cremium aruerunt. Adeo ut vetus homo in te penitus debilitatus vel potius plene exstinctus videatur. Viro igitur sic probato, quid hæsitandum, quid metuendum verendumve? Imo quid est quod non aggrediatur, quod non valeat? quod non audeat? Terram igitur tuam nunc vides, ecclesiam tuam fiducialiter intres, illius sequax si necesse sic, qui corpus suum dedit percutientibus et genas suas velentibus. Intremus, inquam, fiducialiter et potentes, et erimus illis dii qui nos nunc terrere videntur. Intremus, inquam, ne nobis hoc nunc desuper dato exprobetur forte alias quia cum potuistis noluisse, cum volueritis non poteritis. Et quidem Moysi tanto Dei amico de terra promissa dictum videbis et non intrabis. Caveamus igitur ne et tu, Moyse longe inferior, pœna simili vel forte majori perecellaris, si forte terram non intraveris quam tamen videre nunc datum.

His dictis, archipræsul breviter sic: «Fidelis,» inquit, «ut videtur sermo tuus, sed durus, et quis implebit illum?» Ad ipsum vero qui prælocutus fuerat et in Angliam tunc processum dissuaserat, specialiter sermonem dirigens et nomen ipsius proprium exprimens: «Certe,» inquit, «Gunteri, terram video, et favente Domino terram intrabo, sciens tamen certissime quod ibi mihi immineat passio.» Et hoc quidem cum dixisset, illius verbi Domini ad Petrum memoratus sum: *Vade post me, Satana, scandalum es mihi, quia non sapis ea quæ Dei sunt, sed ea quæ hominum* (Matth. xvi). Et post hæc jam in noctis crepusculo ad hospitium revertimur.

6. DE INGRESSU EJUS IN MARE.

Et post modicum duobus tribusve diebus exactis, post festum Beati Andræ apostoli secundo tertiove die, in Domini adventu, noctu mare intravimus et ad votum aura prospera propter insidiarum, quæ nobis, sicut audivimus, jam parabantur, suspicionem, non in sinu maris Doroberniæ, ut putabatur, sed in alio maris sinu qui vocatur Sandwiz prospere applicuimus; eo quidem securius quod homines supra sinum illum maris habitantes, proprium dominum archipræsulem habuerint utpote de proprio Cantuariensis Ecclesiæ feodo. In nave vero archipræsulis vexillo

A crucis, cum ad situs appropinquaret, erecto, quod archipræsules Cantuarienses, tanquam totius Angliæ primates, coram se semper bajulare consueverunt, hoc, inquam, signo erecto, per quod archipræsulis navis ab aliis discerni poterat, videres mox pauperum turbam quæ convenerat in occursum, hos succinctos ut prævenirent et patrem suum applicantem exciperent, et benedictionem præriperent, alios vero humi se humiliter prosternentes, ejulantes hos, plorantes illos præ gaudio, et omnes conclamantes: *Benedictus qui venit in nomine Domini*, pater orphanorum et iudex viduarum! Et pauperes quidem sic.

7. DE HIS QUÆ IN INITIO INGRESSUS EJUS IN TERRAM GESTA.

B Verum milites, qui, ut supra diximus, in alio maris sinu nos applicaturos fore speraverunt, ad nos præpropere accelerantes, vix salutato archipræsule, animose sciscitabantur quare in primo adventu suo in terra, qui tranquillitatis deberet esse et pacis, mox etiam nequum ingressus episcopos regis suspendisset, excommunicasset. Et adicientes comminabantur mox cum innotesceret regis futuramurbationem non modicam, unde jam regnum turbatum esset et sacerdotium.

C Archipræsul vero mansuete respondit regem non offensurum ob id, nec se ex hoc quidquam vel contra regem fecisse vel regnum, sed absque regis et regni injuria, de ipsius regis permissione sic factum, ita injuria, quam sibi et ecclesiæ suæ in coronatione filii regis episcopi fecerant, impunita non remaneret, ne tanta usurpatione de cætero traheretur ad consequentiam. Dum igitur audirent regem de facto laudari auctorem, modestius locuti sunt, et tamen instantanter postulantes, ut episcopos excommunicatos vel suspensos absolveret quod archipræsul ad consilium distulit: donec in crastino Cantuariam veniret, et ita recesserunt tunc milites.

D Archipræsul vero in crastino a sinu illo quo applicuit, distante a Cantuaria circiter sex milliaria, Cantuariam proficiscens, a pauperibus terræ, sicut jam supra tetigimus, tanquam hostia cœlitus missa, tanquam ipse Dei angelus, tam grænter tam ovanter exceptus est. Sed quid dico ovanter? Quin potius, si tamen de pauperibus competi dicere sic, pauperes Christi christo Domini triumphanti laureatum magis exhibuerunt quam ovatum. Itaque quacunque archipræsul transibat, turbæ pauperum, parvuli et magni, senes cum junioribus, glomeratim occurrebant, hi prosternentes se in via, illi vero exuentes vestimenta sua et sternentes per viam, illud frequenter iterantes et conclamantes: *Benedictus qui venit in nomine Domini!* Sacerdotes etiam parochiani cum parochianis, ordinata processione cum crucibus transeunti obviam exierunt, et patrem suum salutantes et benedictionem postulantes, crebro illud jam sæpe dictum sæpius interserebant: *Benedictus qui venit in nomine Domini*. Sed quid? Diceres profecto si videres, Dominum secundo ad passionem appropinquare et imminente passione in pueris et

lactantibus et pauperibus secunoum Domino præparatum occursum, et venire iterum moriturum pro Anglicana Ecclesia Cantuariæ qui Hierosolymis pro totius mundi salute semel mortuus est. Cum vero, etsi via brevis, inter tot turbas occurrentes et comprimentes Cantuariam vis ea die perveniret, in sonitu campanarum, in organis, in hymnis et canticis spiritualibus a Christi pauperibus, filiis suis, sacro videlicet conventu suo, debita patri devotione et veneratione susceptus est.

O qualem videres tunc in primo ecclesiæ ingressu hominis faciem, quod nonnulli videntes notaverunt et mirabantur, sicut ignitum cor, ignita et facies videbatur: facie revera exhilarata in oleo, omnibus grata, omnibus gratiosa, et ut plus addam adhuc, ego quidem arbitror resplenduisse exterius faciem corporis ex interiori abundantia cordis, imo claritatis in corde tantam flammam in se continere non valente, quin erumperet. Et, ni fallor, hæc in ipso Ecclesiæ Salvatoris ingressu tanta faciei gratia roseo sic subito perfusa et venustata colore, in ipsa Salvatoris ecclesia martyrii mox consummandi, quasi quoddam cælestis oraculi præsigium fuit. Discipulus vero qui scripsit hæc, fide oculata cernens sic et ad visa notando stupens et stupendo notans, Moysis mox recordatus est. Cujus tamen gloria vultus evacuata, et in aquis contradictionis extincta; unde nec repromissam patriam intrare meruit, extra in exsilio mortuus. Quod iste minime, qui post multa certamina demum evicit, patriam obtinuit; et post modicum in ipsa Jerusalem palmarum suarum coronam accepit immarcescibilem. Unde nec gloria vultus ejus evacuata nec flamma claritatis extincta, sed ad aquas contradictionis probata potius quam extincta, utpote inter populos frementes et frendentes in eum ardens semper et lucens, quod sequens rerum exitus plane, et Domino præstante fructuose edocebit.

Stans autem archipræsul in sedili suo episcopali singulos fratrum in osculo pacis recepit inter osculandum multis hinc inde ejulantibus, erumpentibus et emanantibus lacrymis. Et dum staret, sic accessit discipulus qui scripsit hæc: «Domine,» inquit, «nunc nos curare non oportet qua hora de hoc mundo excesseris, quandoquidem hodie in te vicit sponsa Christi Ecclesia, imo Christus vincit, Christus regnat, Christus imperat.»

Et nil respondens solum respexit dicentem sibi hæc. Omnibus itaque ea die in ecclesia celebriter peractis et solemniter, archipræsul in palatium suum se recepit totam diem lætam ducens et solemnem.

In crastino vero præfati milites suum super hiesterna petitione querentes responsum reversi sunt. Venerunt et cum eis prænominatorum trium episcoporum, qui adhuc in præfato sinu maris expectabant, clerici ad nos missi nomine episcoporum dominis suis episcopis absolutionem postulantes. Respondit vero archipræsul et illos tres et

A alios episcopos auctoritate dominæ, quosdam anathematizatos, quosdam vero suspensos, nec ipsius esse a tanto iudice ligatos, nisi forte per ipsum, posse solvere. Cum vero clerici et milites urgentissime instarent consilio præhabito, tandem archipræsul respondit quod de domini papæ clementia sisus pro bono pacis in hoc articulo usurparet quæ domini papæ erant, præstita tamen cautione canonica quod super quibus excommunicati erant vel suspensi, Ecclesiæ iudicio parerent, alioquin nullatenus se facturum hoc, præciæ et absolute respondit. Et hi quidem et illi audientes hæc indignanter recesserunt; in recessu multa in superbia et in abusione loquentes. Inter quos unus, quem supra in historia hæc tetigisse me memini, dictus Randulfus de Broc, linguam suam superexaltabat. Sed archipræsul vir admodum patiens, inter eos factus est sicut homo non audiens et non habens in ore suo redargutiones. Clerici vero, quos a tribus episcopis missos diximus, revertentes dominis suis quod ab archipræsule super petitione sua acceperant retulerunt. Et, ut dicebatur, duo episcoporum anathematizatorum, videlicet Londoniensis et Saresberiensis, exactam ab archipræsule cautionem præstitissent nisi tertius ille Eboracensis obstitisset; vere enim scriptum quia lingua tertia multos commovet.

8. DE EPISCOPIS REGEM ITERUM CONTRA ARCHIPRÆSULEM INSTIGANTIBUS.

At ille tertius duos sic commovit ut confestim transfretantes regem adirent: quem in Normannia prope civitatem, quæ Bajocis dicitur, in regia quadam mansione quæ vocatur Bur repperunt. Et hoc paucis diebus ante Natalem Domini. Qui, rege salutato, ad regis se pedes mox prostraverunt, pro regno, pro sacerdotio, et pro semetipsis regiam clementiam et iustitiam pariter interpellantes, unam contestantem ipsum debere læsis, lædenti alteram. Quæculo itaque et exacerbativo sermone mox enarrant quam præcipitanter, quam temere, quam superbe Cantuariensis archiepiscopus in adventus sui initio regnum turbaverit et sacerdotium, pace de regia miseratione concessa sibi et suis abutens. Unde et totam Anglicanam Ecclesiam in luctu esse addebant universis per Angliam episcopis suspensis, semetipsis etiam excommunicatis et suspensis. Et totam hanc factam eis confusionem addebant, pro causa tam regia, tam magnifica, tam necessaria, tam honesta, quod videlicet filium suum primogenitum regni hæredem coronassent. Per hæc et his similia et majora his diatim per se et per complices suos regem in archipræsulem instigant sic. Verum qualiter et quantum rex commotus, imo in qualem et quantum furorem et insaniam instigantibus his conversus fuerit, intermitto nunc; sequens id loco suo historie ordo declarabit. Et interim ad archipræsulem nostrum historie stylus retorqueatur et præostendamus qualiter post adventum suum se in Angliam gesserit. Itaque, ut præfati sumus, Cantuariam veniens post paucos adventus sui dies misit ad jam sæpe

dictum egregium illum puerum Henricum regis filium, tunc regem a jam suspensis episcopis coronatum. Misit autem bonæ memoriæ et utinam bonæ Ricardum tunc priorem Sancti Martini de Dorobernia, virum satis eloquentem et industrium, postea in sede metropolitana domini nostri successorem. Qui ad regem veniens ipsum nomine archipræsulis officiose salutavit et ejus adventum in terram nuntiavit, ipsum de episcoporum suspensione sicut injunctum fuerat excusans, et quod de permissione regis patris sui factum fuisset sic : adjiciens quod ad ipsum tanquam ad dominum venire in brevi archipræsul se pararet. Verum puer ille rex nec nuntium nec nuntii verba acceptare videbatur : et hoc quidem, ut pro certo accepimus, non de voluntate pueri, sed quia aliter pro rege patre non audebat nec pro aulicis ipsius pædagogis, quibus filium suum rex commiserat, qui plus patrem quam filium verebantur. Unde et missus noster nec ab his nec ab illis in aula benigne exceptus est pro rege patre non audentibus aliter.

Missus itaque noster ad nos in brevi reversus, utpote, sicut diximus, puero regi minus acceptus, certum nobis non reportavit responsum, sed in adventu suo ad curiam retulit nobis aulæ fastum, vulum et supercilium. Archipræsul vero, tanquam constantiæ vir, nihilominus se parabat ad iter, volens in primis sicut disposuit, quem necdum viderat, alumnus suum puerum videre regem, et postea provinciam a qua tam diu absens fuerat circuire, properans et anhelans ad discurrendum ubique ut explantaret et eradicaret quæ in absentia sua in horto Domini distorte et incomposite excreverunt. Itaque post dies paucos a Cantuaria profecti in multo comitatu Londoniam venimus; milites vero aliquot nobiscum, quia ut dicebatur, in via absconderunt superbi laqueum nobis. Cum vero civitati appropinquaremus, universa civitas commota præ gaudio et civitatenses quotquot archipræsuli occurrerunt, ipsum cum gaudio et exultatione multa excipientes.

In crastino vero, cum jam pararemus nos ad procedendum, ecce in mane regis junioris nuntii, nomine regis archipræsuli inhibentes ne procederet, sed ad ecclesiam suam reverteretur. Nec tamen arbitretur quis hoc de regis junioris animo provenisse, sed potius de aulicorum consilio, sub quorum custodia erat ipse, arbitrantium se sic regi patri præstaturus obsequium. Archipræsul vero, tanquam qui spiritu fervens, mox respondit se nullatenus propter inhibitionem hanc regressurum, nisi quia tunc jam festus tam sollemnis urgebat dies, videlicet Natalis Domini, quo ecclesiæ suæ abesse noluit. Et ita non procedens Cantuariam reversus est.

Audientes itaque sic ne procederet inimici ejus extulerunt caput, et ipsius jam capiti minabantur. Et præsertim progenies illa viperarum quæ dicitur de Brocheis turpibus et ignominiosis injuriis lacescebant. Inter quos unus erat de funesta illa progenie, dictus Robertus de Broc clericus, ut aiebant.

A Illic in ignominiam et contemptum archipræsulis jumentum quoddam, quod quædam culinæ nostræ necessaria vehebat, cui forte obviavit in via, excurtavit. Jumentum hoc mutilatum sic ante archipræsulem ductum est. His et hujusmodi probrobus domus illa exasperans diatim nos exacerbat, existimans apprimere regi patri qui nobiscum pacem fecerat gratum se ex contumeliis et injuriis nostris obsequium dare.

Sed quid? Exsilium quidem felix, sed pax secuta infelicior, quia in pace amaritudo nostra amarissima. Quod igitur faceret athleta Domini? quo iret? quo se verteret? Cedere quippe torpe, certare periculosum. Circumdederunt apes, tauri pingues obsederunt, in corde maris circumsepiebat oceanus. Sed certe, ut verum fatear, fortis ille athleta Domini arietem Dominici gregis se recognoscens, non cogitabat de fuga sed de pugna, jam intelligens se non ad homines, sed ad bestias pugnaturum ovis suis sic conversis in lupos.

9. DE GESTIS EJUS IN DIE NATALIS.

Die vero Natalis Domini, qui ab adventu nostro in Angliam, ni fallor, circiter vicesimus septimus erat, archipræsul ascendens pulpitem sermonem fecit ad populum, prædicens post alia in calce sermonis, quod instaret tempus dissolutionis suæ, et in brevi se migraturum ab iis. Et quidem cum hæc de excessu suo prædiceret, lacrymarum exitus magis erumpebant quam verba. Pariter et auditorum corda supra modum commota sunt et contrita, ita ut cerneret et audires per totam ecclesiam ejulatus et lacrymarum exitus emanare et inter se submurmurare : *Pater, cur tam cito nos deseris, aut cui desolatos relinquis?* nec enim lupi erant, sed oves hæc, quæ sic pastoris sui vocem agnoverunt, et compatiebantur auditis, pastoris sui in brevi sic de mundo excessum audientes, sed quando aut ubi aut quomodo deberet accidere sic ignorantes. Tandem vero post multum sermonem et de edificatione, et de excessu suo ad populum præbabitum, non jam plangens, non lacrymans, sed ut audiri poterat et videri, post priores lacrymas tam ferus, tam indignabundus, tam ardens, tam audens nominatim jam et expressim in cervicosos terræ et spurcos invehiit, nec jam, ut videbatur, cum his qui oderant pacem pacificus, gladium in medio inimicorum non reponit, sed audacter et fiducialiter exerit, et plerosque de aulicis regi patri magis familiaribus, et præsertim domum illam exasperantem, de qua supra tetigimus, in spiritu judicii et spiritu ardoris anathemate percussit. Et inter alios nominative prænominatum Radulphum de Broc, et illum supra dictum Robertum, qui in contemptum archipræsulis, sicut supra diximus, jumentum mutilaverat, perpetuo anathemati tradidit.

Certe si hæc cerneret, diceret mox te propheti cum illud animal, cui erat facies hominis et facies leonis, oculo ad oculum audisse et vidisse. His itaque peractis, per totam alteram diem archipræsule

in mensa Dei se devotum et post in mensa sæculi more suo se jucundum exhibuit, ita etiam quod ea die, quæ sexta feria erat, et Natalis Domini, tunc carnibus sicut et aliter vesceretur, eas tali die sumere quam abstinere religiosius indicans.

O. DE RECESSU DISCIPULI AB EO.

Jam vero per quosdam et aulicos et alios amicos suos sed occultos, densim sed occulto ipsi significabatur quod de morte sua, sicut seditiosi et studiosi tractaretur, et sic quidem per multos significatum et a multis consulentibus ut provideret sibi et præveniret insidias. Archipræsul itaque terram adversum se commotam fide oculata manifeste cernens, et ex multis amicorum et familiarium suorum secretis, ut prætetigimus, nuntiis laqueos sibi in mortem præparari jam credens, in crastino Natalis Domini, die videlicet beati protomartyris Stephani, discipulum qui scripsit hæc, vocavit secretius: «Ego,» inquit, «jam disposui te ad dominum nostrum regem Francorum et ad venerabilem fratrem nostrum Senonensem archiepiscopum et ad alios terræ principes transmittere, ut iis nunties quod de pace nostra auditis et videtis, videlicet qualiter nobis sit pax pax et non sit pax, sed turbatio.»

Cui mox discipulus, lacrymas continere non valens: «Pater sancte,» inquit, «cur ita disposuisti, cur facis sic? scio quippe et certus sum me de cetero te in carne ista non visurum. Ego quidem proposui vobiscum fideliter stare: verumtamen, ut mihi videtur, fructu consummationis tuæ defraudare me quæris, qui hucusque tecum in tentationibus tuis permansi, nec ero, sicut nunc video, socius gloriæ, qui fui socius poenæ.»

Cui archipræsul cum lacrymis jam erumpentibus: «Non sic,» inquit, «filii mi, non sic: fructu non fraudaberis, qui patris præceptum imple et consilium sequeris. Verumtamen quod dicis et plangis verum quidem, quia revera amodo me in carne ista non videbis; et tamen volo ut recedas, præsertim quia rex habeat te in causa Ecclesiæ cæteris suspectiorum.»

Tertio itaque Natalis Domini die, videlicet die Beati Joannis evangelistæ, obscura nocte eo quod in via suspectæ forent insidiæ, in multo ejulatu, emanantibus lacrymis, iterum et iterum licentia et paterna benedictione accepta, a patre meo recessi, quem, sicut ipse prædixerat, deinceps in carne ista nec vidi nec visurus sum. Unde et cum historiæ hujus finem, id toto corde, tota anima et totis viribus deprecor, ut quem deinceps non sum visurus in tempore, videre merear in æternitate, et fieri particeps in corona, qui socius fui in pugna.

Hucusque non quæ accepi ab aliis, sed quæ vidi ipse et audiui, præsentibus et post futuris sæculis, ad Ecclesiæ Dei ædificationem, de tanta Ecclesiæ columna in libello historico hoc fidelius et constantius enarravi. Verum quia amodo non quæ vidi ipse, sed ut hæc de sancto viro historia consummetur, quæ ab aliis accepi referendo, aliquantulum

A incipiunt jam obrigescere digiti, et calamus quidem tardius et trepidius figitur, eo quidem trepidius quo quis ab aliis non a se audita vel visa magis hæsitans refert. Verumtamen multis et sanctis viris, qui audierunt et viderunt, a quibus et nos accepi-mus, indubitanter credendum, ne forte incredulitatem nostram nobis exprobet Dominus, sicut et exprobravit incredulitatem illorum et duritiam cordis, qui his viderant eum resurrexisse a mortuis non crediderant.

11. DE IRA REGIS ITERATA ET ADVENTU CARNIFICUM.

Igitur ut ad id quod supra internisi, sicut ibi pollicitus sum, revertar: rex, ut prædiximus, a tribus excommunicatis episcopis instigantibus eum in furorem omnibus post futuris sæculis detestandum B accensus est quasi clibanus accensus a coquentibus: adeo ut flammam jam continere non valens, manifeste coram omnibus et maxime coram suis in aula, quos enutrierat et quibus honores et bona multa contulerat, de archipræsule tanquam de hoste conquereretur. Et sæpe et sæpius ex ira inflammatus, in funestam vocem erumpens, omnes quos enutrierat, qui familiaritatis gratia et beneficiorum collatione sibi obnoxii fuerant maledixit, quod ipsum de sacerdote uno non vindicaret, qui ipsum et regnum suum sic turbabat et suis dignitatibus exaltorare et exheredare quærebat. Quod sæpe et sæpius in furore suo replicantem, de aulicis cubiculariis suis quatuor milites audientes, de verbo C audito sic dicentis votum conceperunt, certissime jam arbitantes gratissimum se in hoc regi præstituros obsequium si archipræsule interficerent: et ita conjuraverunt in archipræsulis necem. Quorum nomina, ut in æterna maledictione sint, historiæ huic curavi hic interserere: Hugo videlicet de Morevilla, Reginaldus filius Ursi, Willelmus de Traci et quartus Ricardus Brito. Et isti quidem milites aulici regis cubicularii etsi tandem degenerantes, viri certe generosi, honoribus præclari et inter majores magni. Isti quatuor conjurati confestim in Angliam profecti sunt.

Et in protectione horum quatuor hoc quasi novum, imo miraculosum contigit, videlicet ut cum in hieme inter tam crebras aeris et maris mutationes et diversos portuum situs, mare non simul omnes in eodem portu, sed in divisim intrarent, omnes tamen eadem die applicantes, eadem die, imo fere ejusdem diei eadem hora ad locum, quem statuerant convenerunt, ad castellum videlicet illud quod supradiximus nominatum Saltwude, distans a Cantuaria per sex millia, quod de feodo Cantuariensis Ecclesiæ rex, ut supra tetigimus, archipræsuli se restitutum promiserat, Domino quidem, cui venti et mare obediunt, ut videri potest, sacerdotis sui imo ipsum sacerdotem suum quasi gratam sibi viciniam accelerante sic. Tota vero nocte illa de nece archipræsulis in castello illo contrectantes in crastino qui fuit quartus Natalis Domini dies, videlicet in Sanctorum Innocentium die cum complicitibus

suis Cantuariam veniunt, secum nihil præter arma sua militaria et insaniam maudita portantes. Alii vero cum gladiis et fustibus venerunt oculis tamen his omnibus adhuc, ne forte christus Domini fugeret et absconderet se ab eis. Qui tamen, ut supra diximus, et rei mox probabit exitus, magis de pugna quam de fuga cogitabat.

In primis itaque quatuor præfati milites fastuose ad archipræsulem in thalamo, quo sedebat, circa diei vesperam accedentes, nec suo vel regis nomine ipsum salutantes, utpote a quibus longe erat salus, mors et perditio prope, ipsum superbe adoriantur, sciscitantes si episcopos regis suspensos et excommunicatos absolveret. Quo mansuete respondente se, auctoritate domini papæ ligatos, sua nec posse

A solvere nec debere, illi spiritu furibundo frendentes in eum, continuo exierunt ab eo. Et statim prope hortum collegerunt cohortem, se ipsos jam diabolica armatura sua induentes.

Verum quia jam materia grandescere incipit, deinceps immutandus foret et stylus, ut litteris non tetrus, sed velut quibusdam filis roseis in syllabarum figuras aureas liquescentibus, et quibusdam dictionum solemnibus exquisitis innucentis conummationis viri gloria exaranda. Nec enim linguis hominum, sed angelorum potius eloquenda quæ ab homine supra hominem gesta sunt, et hæc deinceps describenda. Videamus igitur in primis et attendamus quæ gesta, et judicemus postea si non ita.

INCIPIUNT CAPITULA TOMI SEXTI.

1. *De militibus armatis collecta cohorte irruentibus in palatium, et de ingressu athletæ Domini in ecclesiam et de carnificum verbis.*
2. *De occurssu athletæ Domini ad carnifices, et quid egerit ipsos alloquens.*
3. *De excusatione quæ se discipulus, qui hæc scripsit, excusat si forte in describendo tanti athletæ certamine morosus videatur.*
4. *De athleta et martyrii modo, ubi et de clerico quodam interponit, qui brachium suum inter gladium venientem et athletæ caput interponit.*
5. *De athletæ imperiosa inhibitione sub anathemate, ne quemquam suorum carnifices laderent, et de tanti et tam gloriosi martyrii præconio.*
6. *De iterata discipuli excusatione, si forte in describendo martyrii agone videntur prolixior.*
7. *De eo quod discipulus voluntarius, etsi tamen contra voluntatem, ad describendum ultimum martirii finem intritus accedat.*
8. *De ultima viri consummatione et de carnificum militum numero cum cohorte.*
9. *De virtute patientiæ viri admiranda et de flagitii immanitate inaudita.*
10. *De spoliis et vestimentis pontificis quæ inter se milites diviserunt et ciliiciis viri quæ reppererunt rejectis; quorum tamen nonnulli percutientes pectora sua tacite loquebantur sibi: Vere hic homo iustus erat.*
11. *De martyrio infra dies quindecim a consummatione ipsius cognito per sanctam terram Jerusalem et cognitionis modo.*
12. *De convenientia mortis Christi et christi Domini breviter tangit, promittens quod in fine hujus historici cantici convenientia hæc plenius audietur et attendens.*
13. *De his quæ post martyrium sunt gesta proseguitur.*
14. *De forma et compositione jam exanimis corporis consummato martyrio.*
15. *De gestis in crastino post martyrium cum corpus adhuc esset inhumatum et quomodo, sicut monachalis mos est, ut lavarent corpus, prima tollentes vestimenta, reppererunt interius totum corpus ciliiciis cooperitum, et de sepultura et sepeliendi modo et loco, et ab Incarnatione Domini et ætatis vitæ ipsius unno quoto.*

TOMUS SEXTUS.

1. Militibus itaque armatis et collecta cohorte cum gladiis et fustibus per fenestras palatii coacervati jam cœperunt irruere, a quibusdam de familia nostra ostiis jam clausis præ timore. Illi vero qui in thalamo cum archipræsule consederunt, audientes tumultum exterius et fragorem, et jam advenientes quid hoc, non sine causa exterriti sunt, monentes jam archipræsulem ut in locum sanctiorem et tutiorem, ecclesiam videlicet, se reciperet. Quo iterum et iterum renuente tanquam mortis intrepido, vix tandem coegerunt ut ad ecclesiam pergeret, gratia vultus ejus etiam in articulo hoc nec vel in modico immutata: adeo, sicut nec in vultu, sic nec in gestu nullum parebat trepidationis vestigium. Cum vero paululum processisset, nec crucem videret quam ante se bajulare consueverat, acito crucis bajulo substitit crucem expectans ut præcederet: revera, ni fallor, Domini sui non inmemor, qui cum cruce properavit ad crucem.

Cum autem intrasset ecclesiam, quotquot sui præ timore mox dispersi sunt, fugerunt hi, fugerunt et illi, et per cryptas ecclesiæ et sub altaribus absconderunt se ab eo; ita ut illud capiti hoc capitis membrum conclamare posset et plangere: *Sicut aqua effusus sum et dispersa sunt omnia ossa mea (Psal. xxi).* Et illud: *Elongasti a me amicum et proximum et notos meos a miseria (Psal. lxxxvii).* Solus quippe calcaturus erat torcular ut in eo arcto non alteri, sed gloria daretur soli. Nam si et alteri gloriam, extenuaretur solius. Unde ad sui athletæ gloriam Deo providente sic singulariter erat donec transiret. Quidam tamen de suis, cum ecclesiam intrasset ipse, ecclesiæ fores clausit mox et seravit. Illi vero carnifices milites cum cohorte, cum armis et gladiis et fustibus, archipræsulem pedatim sequentes, et jam ad ecclesiæ fores venientes, terribiliter et clamore intonabant ut cito sibi aperirentur fores.

Quod quia aliquantisper dilatatum, quibusdam præ-

parais terreis machinis fores dejicere et irruere sic A intentabant. Quorum fragorem et clamorem ad ecclesie valvas mox futura Christi victima, christus Domini exaudiens, precepit ut confestim aperirentur, addens decere minime incastellari ecclesiam. Valvis vero apertis mox irruentes carnifices clamabat unus : « Ubi est, » inquit, « seductor ille ? » Sed christus Domini ad hoc nihil. Alter vero subsequenter clamans : « Ubi est, » inquit, « archiepiscopus ? » Et christus Domini : « Ego sum : Quid vultis ? » Et ille intonando : « Ut moriaris, » inquit, « nec ullatenus vives. » Et ille : « Et ego, » inquit, « pro Deo meo et pro Ecclesie libertate paratus animam ponere. »

2. DE OCCURSÙ ATHLETÆ DOMINI.

Sed quod mirum dictu, iste tam fortis Domini agonotheta singulariter magnus et magnifice singularis, qui antequam lanistæ illi intrassent ecclesiam versus chorum ecclesie pergens, ad quem per gradus ascenditur, septem octavo gradus jam conscenderat, mox ut gladios in ecclesia exertos vidit festinanter occurrit. Non ipsum duræ mortis suæ nuntium, non lethale verbum, non extractum in necem ejus ferrum, revocare potuit quo minus occurreret. Et quod adhuc majori admirationi et stupori accedit, gladiatores cum omni imperio arguens, quod tam inordinate, tam profane matrem suam ecclesiam introissent, unum eorum, cui prius appropinquaverat, manu mox apprehendens, per lorica tam valide excussit, quod ipsum fere ad pavementum usque prostravit. Wilhelmus de Traci hic erat, sicut ipsemet postea de se confessus est.

O quam admiranda tam ardens sacerdotis æmulatio, domum Dei tam ferventer zelantis, qui solus et inermis tot et tam vesanis in necem ejus jam armatis, tam audens, tam fidens, tam pronus, tam promptus, tam intrepidus, et tam paratus occurrerit, quos et de templo Salvatoris Salvatore suum imitans non formidavit ejicere. Salvatore dico suum et imperatorem in hoc sequens, nisi quod tam strenuus summi imperatoris miles hic non jam nummularios et columbarum venditores, sed gladiatores ipsos in necem ipsius sic jam debacchantes, nihil, ut videbatur, expavescens, nihil trepidans attentavit ejicere. Unde et in hoc et tali certe articulo mirandus occursum hic, miranda et oburgatio hæc, sed et admirabilis attentata expulsio, quibus tam funeste in mortem suam jam exacerbatos amplius adhuc exacerbare non verebatur. Non quidem querens gratiam, non orans veniam, nec petens dilationem, sed zelo sacerdotali accensus amore justitiæ exacerbatorum iram jam magis provocans quam placans.

O athlete audentis manum validam, o viri virtutem, o martyris constantiam, o animi puritatem ? Stat imperiose inter carnifices idem sacerdos et victima. Stat hic et gladiis exertis circumstant illi. Et in medio sacerdos sacerdotis implet officium non lanistas palps, non se humilians, sed, ut jam diximus, cum omni imperia arguens et obliurgans.

Ecce Samson noster intrepidus ad occurrendum ; ecce Paulus noster promptus ad arguendum ; ecce noster christus Domini fortis ad expellendum. Cujus os in oculo factum jam non est occultatum, etsi substantia sit in inferioribus terræ. Sed quid dico substantiam in inferioribus terræ ? Sed potius jam in cœlorum superioribus substantia carnis, non jam velut carne, sed potius velut admirabili quadam mutatione transsubstantiata in cœlum. Quæ enim caro mortem non horreat ? Quæ exterum super se gladium non metuat ? Quæve gladiatorem ad necem ejus paratum pulset et contemnat. O homo non homo, o caro non caro. O caro Adam, o caro Thomæ. Fortior Thomas inter gladios, in sterquilinio, quam Adam inter ligna fructifera in paradiso : utpote qui præter quasdam mortis exuvias jam jam exuendas quidquid a primo Adam vetus contraxerat deposuerit ; cui a secundo Adam nunc totum. O Adam et Adam. O primi Adam filii, o secundi, qui post primam ex primo Adam nativitatem moribundam jam non ex sanguinibus neque ex voluntate carnis, sed ex secundo Adam secundo nati sunt. Unde et ex secundo patre hoc, tanquam filii generosi non degeneres, non carnis infirma et infirma idiomata, sed spiritus desuper charismata fortia, tanquam spiritualiter generati, sortiuntur constantiam, fortitudinem, et reliquas animi virtutes contrahentes ex patre hoc. Unde etsi cædantur gladiis, gladiis non cedunt, sed contemnunt. De quibus : « Occidi possunt, sed flecti nequeunt. » Quin potius occisi isti mors mortis sunt tanquam mortis victores. Et ut loquamur in exemplo : *Ubi est nunc, o mors, stimulus tuus, ubi victoria tua ?* (I Cor. xv.) Quæ Adam vicisti in paradiso tuo, hodie a Thoma victa es in sterquilinio tuo. Quæ Adam oppressisti in exuviis suis, tuas hodie Thomas exuens in propriis exuviis tuis te oppressit, exuviis tuis se exuens, qui tibi etiam exuviis adhuc cooperatus quasi exprobare et insultare non trepidat. O si scirem, sed nescio quod os occultum faciat Dominus, et qua interna firmitate suos sic roboret. Pacis quidem tempore occultum os hoc, occulta infirmitas hæc. Sed minime occultatur cum manifestæ tentationis tempus irruerit. Utinam de oculo osse hoc tanquam esca vere solida gustassem ego. Libenter aliis eructarem, sed quia non gustavi, scio me necdum Dominicum canem, verum quod gustavit hoc de osse, imo quo tanquam vere canis Dominicus saginatus abunde erucat, jam nobis indicat noster Thomas jam non reponens, non occultans os suum. Juxta quod fortis rex ille et Propheta : *Non es, inquit, occultatum os meum quod fecisti in occulto* (Psal. cxxxviii). Pariter et nostri Thomæ os in oculo factum jam non occultatur. Qui non jam caro de carne, sed os ex ossibus est in exercitu Domini Sabaoth inter robustos robustissimus. Unde et qui cum puero Jesu aliquando fugit, cum eodem adultu modo occurrit, modo exit, modo se exerit. Et, v jam diximus, et ad laudem ossei nostri iterare non

piget, medium meonis se gladiis ingerit, tanquam totus osseus, gladiorum ictus non metuens, sed contemns. Cujus os hucusque quasi occultum jam inter mortis et vitæ non occultatur confinia : sciens et tunc apprime memorans quia mors hæc caduca, mors carnis, mors brevis, mors mortis sit et porta vitæ : et ut non enumerando singula breviter concludam universa, tantus fuit in viro hoc, sicut dixerunt qui viderunt, mortis contemptus et in pugna securitas, ut adhuc pugnans videri jam posset quasi vincere, et jam vincens quasi adhuc pugnare.

3. DE EXCUSATIONE DISCIPULI QUOD IN DESCRIBENDO CERTAMINE SIT PROLIXIOR.

Nemo autem miretur, calumniatur nemo, si in nostri David monomachia describenda forte prolixior videar. Vetus quippe illa inermis filii Jesse et pusilli contra Goliath monomachia miranda quidem. Sed hæc novæ hominis, novæ legis, et novæ regis filii monomachia incomparabiliter mirabilior. Hic si quidem non suavis, non coactus, non missus, sed in spiritus sui ardore et inaudita virtute, solus et inermis sola voluntate ad certamen procedens, carnis immemor nec, ut videri poterat, hominem se de filii Adam recognoscens, mortis non pavulus, sed avidus, mediis se gladiis ingerit et Goliath sicut talem decebat athletam, non gladio ferri sed verbi, nec lapide fundæ sed lingue percussit. Et gladius enim in labiis ejus cum quis audit : hoc enim et in auditu auris mirabilissimum. Nemo itaque calumniatur et legentem non tædeat, si in tam singulari et tam inaudito certamine describendo ego nimis videar, quod mundo spectaculum Ecclesiæ exemplum et angelis gaudium prebet. Nemo etiam subsannet, nemo detrahat, si contra recte scribentium regulam sæpe et sæpius idem volvem et revolvem identidem, nec si juxta poetæ dogma non statim festinem in medias res. Sicut enim varii sunt animi affectus, sic et voces variant, quibus se exprimunt, ut amor voces habet dulces, timor meticulosas, gaudium jucundas, dolor vero et compassio gemitivas, quas non quidem juxta regulam scribentium, sed more lugentium sæpe et sæpius iterant. Lugenti enim scribendi lex minime posita est. Nec igitur mirum si scribendi regulam non sequantur, qui scribendo patiuntur et dolent. Quemadmodum enim musica in luctu importuna narratio, ita scribendi et lugendi nulla prorsus convenientia. Ego vero, etsi congaudeam, domino tamen meo, quem in ætate juvenili secutus, in vinculis Evangelii ministravi, cum quo steti, cum quo cucurri, ut potui, Deus scit, si non adeo prudenter obsecutus, tamen fideliter; ego, inquam, etsi congaudeam propter certantis fortitudinem, certanti tamen et jam caput suum et corpus incircumcisorum et immundorum gladiis exponenti, non compati, non condolere non possum : imo verius non condoleo, sed solum doleo ipse; hæc quippe doluisse non videtur. Itaque inter scribendum hæc solus doleo, et inter dolendum solus scribo; præsertim cum singulariter mihi et speciaiter incumbat scribendi onus et opus

A hoc. Ecce enim quintus decimus annus hic ex quo gesta sunt quæ nunc scribuntur, et jam fratres mei quondam passionis socii qui mecum audierunt et viderunt fere quotquot ab humanis rebus exempti in Christo dormiunt. Ipsi quidem transierunt, me perclitante adhuc et in mediis ignibus et fluctibus derelicto. Unde singulariter mihi, qui adhuc superstes, scribendi de tanto viro domino meo et alumno quæ vidi vel audiui reservatum opus et opera hæc. Ne, si taceo, tanquam nescium vel pigrum vel meticulosum vel invidum os meum condemnet me, et mea taciturnitas super me propheticum illud vœ inducat : *Væ mihi, inquit, quia taciui* (Isa. vi). Verumtamen quoniam paterni certaminis recordatio mihi dulcis, invitatus ad finem accedo. Nam dum adhuc certantem describo, styli gratum beneficium, quasi oculo ad oculum certantis mihi personam effigiat, et est modicum mecum adhuc. Verum cum jam triumphans ignitum currum suum conscendit, discipulus absque magistri pallio nudus derelictus, si magistrum quærat nescit ubi, nescit quippe quo veniat aut quo vadat. Primus quippe Elias subvectus est in paradisum, secundus descendit in infernum; sed iste tertius cum jam rapietur, super pennas ventorum volabit confestim et evolabit a nobis. Evolabit, inquam, in patriam peregrinam nobis et longinquam, utpote peregrinantibus adhuc. Evolabit, inquam, in locum quem *oculus non vidit, nec auris audit, nec in cor hominis ascendit* (I Cor. ii). Unde nec mirum si invitatus vel a certante patre et magistro avellar; et tamen jam avelli me oportet quia jam tolletur a me. Nam quod totis compunctus et concussus visceribus, dicere necesse est, finis venit, venit finis : nec ergo ultra est quod verbis protrahere valeam, brevem sed fortem pugnam, citam sed gloriosam palmam et coronam triumphantis athlete immarcescibilem.

4. DE MARTYRIO ET MARTYRII MODO.

Igitur ut prætetigimus, mox ut illum carnificum militum quem prænominavimus noster osseus hic Christi athleta apprehendit, ut supra diximus, et tam valide excussit, ipse gladium exaltans ira vires augente fortiter christi Domini caput percutere nisus est : quod tamen necdum vim ictus in se excepit, clerico quodam qui proxime ad videndum pontificem venerat et eum de prope sequebatur ut videret finem, brachium suum inter gladium venientem et pontificis caput interponente, et exponente brachium suæ carnis ut de se ipso vel sic aptaret pontifici scutum protectionis, protectionem salutis, eo quidem adolescenti qui reliquit sindonem similis, quod secutus est Dominum, sed eo longe dissimilis, quod non fugit, imo quod fortius, quod fiducialius, quod audentius se exposuit et inchoatæ jam immolationis primus primum participium habuit; cujus memoria ut in benedictione sit, nomen hic intersero; dictus videlicet nomine proprio Edwardus cognomento Grim, castello illo in Anglia quod dicitur Cantebrige oriundus. Clericus

Itaque hic gravior caesus pondus ictus sustinere cepit. Verumtamen illo, cum se caesum sentiret et pondus ictus sustinere non posset, confestim brachium retrahente, reliquum ictus in se pontificis caput excepit. Et jam sacer ille sanguis cepit emanare per faciem. Sentiens itaque sacerdos ille Altissimi, semetipsum Altissimo immolans, immolationem jam inchoatam, confestim quod supra caput gestare consueverat abjecto pileo, attollens in Caelum oculos, genu flexo et orantis modo junctis ante se manibus, in templo ante altare sacerdos obtulit se ipsum hostiam vivam Deo. Et vere hostiam vivam sanctam, immaculatam, Deo placentem. Extendit itaque collum, exponit caput, se et Ecclesiae causam Deo et beatae Dei genitrici Mariae et sanctis Cantuariensis Ecclesiae advocatis, et beato Dionysio Francorum apostolo commendans, ut illi inter martyres potissimum Deo inspirante sic commendaretur Ecclesiae causa, cui ipse in Ecclesia per martyrium simile jam assimilabitur, in poena isto sicut et illo decalvato. Se itaque exposito mox causam Ecclesiae quam egerat patronis commendavit et pro suis oravit.

5. DE ATHLETAE INHIBITIONE IMPERIOSA.

Sed quid dico oravit? Quin potius, etsi inter lanistarum manus, jam etiam in sanguine suo volutari inciperet, tamen super lanistas suos sacerdotalis officii auctoritate fungens adhuc, ex parte omnipotentis Dei et sub anathemate imperiose inhibuit ne quem suorum tangerent, ne quem laederent: *revera*, ni fallor, verbi Domini sui in passione memor: *Si me, inquit, queritis, sinite hos abire* (Joan. xviii) nisi quia hic non tam oratio quam imperium est et coercitio. Nec etiam tam orabat ut parcerent, quam anathematizabat eos si non parcerent.

Et quod dictum mirum et auditu, sed opus ipsum mirabilius quis potest hic dissimulare, quis pertransire, nisi forte invidus vel nescius sit? quis tacere verbum? quis tanti potest sacerdotis hic sublevere praconium? Jam sanguis manat a caeso et tamen inter cadentium manus sacerdotalis officii nec in modico cedit auctoritas, potius inter gladios, non ut ignavus et trepidus gladium suum reponit, sed audacter et viriliter exerit. *Ecce enim duo gladii hic* (Luc. xxi); inter gladios ferri gladius verbi. In hoc tanto discrimine, in hac hora tenebrarum, hunc Petri gladium athleta hic noster prompte et fiducialiter exerit, et hoc sicut sacerdotem decuit suos defendit. Qui revera gladio ferri et se et suos defendisse potuisset, nisi quia legerat Petrum in passione Dominica objurgatum a Domino quod ad defensionem ejus gladium ferri exeruisset et servi absidisset auriculam. Unde et ad abscedentis verecundiam restituta auricula, jussus est ipse reponere gladium in vaginam, Domino terribile illud subjungente: *Omnia, inquit, qui gladium acceperit gladio peribit* (Matth. xxvi). Neutro vero gladiatorum in passione sua Dominus usus est: non gladio ferri, eo ipse Ecclesiae indicans quod ecclesiasticis non competat hic, cui tamen servire debet

A ad votum et praeceptum, non quidem in manu propria, sed aliena, cum viderit expedire sic. Nec etiam, cum esset et ipse verbum, vel gladio verbi usus est, eo ipso informans Ecclesiam minime ab Ecclesia judicandos eos qui foris sunt. Juxta quod Magister hujus magistri magistrorum discipulus: *Quid enim, inquit, mihi de his qui foris sunt? Nonne de his qui intus sunt vos judicatis?* (I Cor. v.) Unde et hic Thomas noster nunc in agone hoc, plus quam Petrus tunc doctior, edoctus tamen per Petrum a Domino, a magistro etiam illo gladiatore, tutore gentium, apprime adinstructus arma sacerdotum non esse carnalia sed spiritualia, Deo et eos qui intus sunt a sacerdotibus judicandos non qui foris, primum gladium contemnit, et eum solum, qui Petrus et sibi tanquam Petri successori competit super profanam illam cohortem, quae solo nomine, sed non numine; solo numero, non merito intus erat, audacter exerit. viriliter percuit: miro modo et stupendo quidem gladio hoc non se, sed solum suos defensans, et se exponens pro suis, nec gladio hoc repercutiens si ferrent se, sed solum si suos.

O pastor pius et vere pius, qui mox ut percussus, jam non alius quam ovium suarum jamjam dispergendarum sic meminerit. O fons sanguinis et pietatis eximius, in domo David recenter jam ortus, qui inter lanistarum fontem erumpentium manus sicut fluxu sanguinis, ita et profluvio pietatis emanare non destitit, ut sicut pastor ovium, ita et pater orphanorum probaretur. O ineffabilia pietatis viscera, o pingue, o holocaustum medullatum, suos defensans, se ipsum non defensans, sed indefensum exponens, idem sacerdos et victima, in templo ante altare se ipsum pro se et pro suis immolans; immolans, inquam, nescio in quem vivificum coram Deo et mundo mirae suavitatis odorem. Tu itaque, Pater sancte, pastor piissime, Altissimi sacerdos magne, Christi athleta audacissime, in defensando tuos patrem te probasti et pastorem. In immolando te pro tuis summi omnium sacerdotis secutus formam, expressisti effligem; in exponendo te evangelicam etiam super adimplens perfectionem. *Si quis, inquit, percusserit te in unam maxillam praebe ei et alteram* (Matth. v). Tu vero percussus in capite mox totum caput et corpus et te exposuisti totum.

O quam magna, quam inaudita super te, Thomas, divina dispensatio pietatis, qua te talem tuis et te tibi talem pro tuis exhibuisti. Jam usque ad sanguinem percussus non pro te gladio tibi credito repercutis, sed duntaxat pro tuis; ne si pro te minus evangelicus videreris quasi propriam vindicando injuriam, aut si tuorum dissimulare, non pastor, sed potius mercenarius videreris. O perfectionem evangelicam! O virum evangelice perfectum, etsi plus quam perfectos non viderimus uoi in tanta amantissime tam superabundans est tantae suavitatis abundantia, tam fervida, tam rigida, tam districta sacerdotali emulatione adjuncta, tanquam si suavissimo oleo vinum ferventissimum adjungatur. Revera

misericordia et veritas obviaverunt sibi in palaestra hae, in certamine hoc. Thomas si quidem hic noster nunc in agone corporis, sed ut videtur in excessu mentis, exitu suo de mundo jam imminente, quasi sui ipsius immemor, pro suis punit, pro se parcit, et gladium suspendit ut se solo exposito sui servarentur illasi. Sui, inquam, qui in tribulationibus suis, in pressuris, in tentationibus variis per dura exilii et aspera ipsum secuti fuerant viriliter et obsecanti fideliter. O quam jucunda memoria, quam dulcis recordatio tantæ et tam superabundantiæ suavitatis abundantiae. *Memoriam, inquit, abundantiae suavitatis suæ eructabunt (Psal. CXLIV).* Sed quis dabit capiti meo aquam et oculis meis fontem lacrymarum et plorabo? (*Jer. ix.*) non me quidem in mediis ignibus et fluctibus peregrinantem et periclitantem adhuc, non fratres meos oneris pastoralis mecum quondam comportatores et passionis consocios, jam de mundo sublato, sed plorabo quod ego tantæ suavitatis abundantiam eructare non possum, vix etiam tenuiter ructans quod accepi ab aliis, quomodo enim eructarem quod non gustavi? Si quidem, ut supra memoravi, a domino meo et patre volente et jubente sic, pridie quam certaret dimissus, non præsens fui, non vidi, interesse non merui. Sed miser ego defraudatus sum, ne viderem patris mei et magistri dimicantis tantum in certamine robur, tantam constantiæ firmitatem, tantam et tam suavem de pietatis visceribus affluentiam, qua se ipsum exponens dimicavit pro suis. O si interesse mihi desuper datum, fuisset saltem a longe secutus ut viderem finem. Quæ etiam postea in somnis mihi apprens dicit mihi in visu voluisse se ut interfuissem tunc. Et ego ipsi: « Domine, » inquit, « quia homo peccator sum, perissem quidem si fuisset occisus. » Et ille: « Non, » inquit, « quia in meo sanguine baptizatus fuisses. » Quoties igitur visionis hujus recordor, confundor et compungor in æruina mea, et exitus aquarum deducunt oculi mei, quod qui in tentationibus permansi, in fine tanquam repulsus et reprobatus filius patris consummationi interesse non merui. O si interfuissem, de tam virtuosa, de tam suavi et tam fructuosa certantis plenitudine, aliis plenius eructarem et fructuosius quod nunc exsanguis et titubante stylo per venam tenuem vix distillo!

6. DE ITERATA DISCIPULI EXCUSATIONE.

Sed jam forte videor contra promissum meum in patris certantis descriptione prolixior. Verum cui videor sic, cogitet tantam in certamine hoc fuisse in certando fortitudinem, in resistendo constantiam, in contradicendo auctoritatem, in compatiendo pietatem, et tantam denique in singulis totius Christianæ militiæ formam, ut non perfunctorie citum styli exarantis transitum, sed singula potius studiose et cum mora scribentis calami tractatum prolixiorem desideret. Præterea, sicut jam supradixi, et hoc non iterare non possum, invitus ad finem venio, finem invitus dolens et gemens recolo. Jucundis quippe mihi et fructuosius cernere Thomam cer-

tantem magis quam referre regnantem, Thomæ quippe certamen etsi non sit de mundo, tamen adhuc in mundo est et mecum est et illud video, verum Thomæ vincens regnum, sicut nec de mundo est, nec in mundo est, nec mecum est, nec illud video. Verum in certamine stat tanquam adhuc inter nos invictus Thomas, et manibus exertis dimicans, omnes nos ad bellum provocat et manus nostras docet ad prælium. In regno vero manibus jam quietis sedens super solium deinceps ad bellum non provocat, sed bellantibus potius patrocinium præstat. Qualiter tamen aut quibus patrocinetur et quomodo, non novimus, non videmus, nec scimus adhuc, nec puto nos posse scire antequam videamus. Sed quid? velim nolim, etsi plorans et ejulans, etsi ascendentem patrem oculis sursum post eum penditibus aspiciam, prohi dolor! avelli me oportet et credere regnantem, quem certantem oculata fide descripsi. Et faciam vel ego Christianus quod fecit quidam sacrificans ethnicus, qui inter sacrificandum, cum audisset filium in bello occisum, mox coronam deposuit, verum cum in continentem audisset quod in bello viriliter egisset, capiti eandem requisitam mox reposuit. Quid igitur moror? quid hæsito? quid athlete Domini tam gloriose, tam strenue in acie stantis et dimicantis, tam gloriosum triumphum differo? Quid tam jucundum tripudium protraho? Quid, inquam, differo? quid prolixius traho spem populi et salutem, cleri libertatem et decus, imo et universæ Ecclesiæ patrocinium, et patrem et denique mundi totius futurum judicem? vincat fides, triumphet affectus, nec tam compatiatur patienti quam congaudeamus regnanti. Et tamen nos illi non compati, non condolere non possumus. Nos, inquam, et præsertim nostri officii viri, clericos dico, huic certe non condolere non possunt aut non debent, qui non pro se sed solum pro cleri libertate tam dura, tam dira, tam probrosa, prius in exilio, nunc vero in martyrio, inter tam scelesorum, tam sceleratorum et sacrilegorum manus passus est.

7. QUOD DISCIPULUS FINEM MARTYRII INVITUS DESCRIBAT.

Quid igitur? Os meum aperiam et attraham spiritum, ut voluntarius, etsi tamen contra voluntatem, deinceps certaminis finem et ultimum certantis describam exitum, et in fine ejus qui sine fine est ego faciam finem, ubi tamen non est finis. Post certantis triumphum ipso jam in gloria deinceps mutus, nihil ex tunc locuturus de regno suo, quod nec oculus vidit, nec auris audivit, nec in cor hominis ascendit (*I Cor. ii.*), unde nec verbo nec stylo subiacet. Illa quippe æternitatis et indeficientis claritatis materia omnem temporalis et moribundæ linguæ obundit sonum, obducit stylum, dictionum etiam proprietates absorbet, utpote sicut inaudita et invisæ, sic et inexcogitata materia. Unde tacito hoc quod omnem et scribendi et loquendi modum excedit, consummationis viri finis, qui etiam præ nimia claritate sui et dignitate materiæ ingenioli

mei stylum obfuscando reverberat, mox describens. Ad quem profecto finem eo jucundius accedo et ardentius, nescio tamen quo retardatus affectu, quod in fine certaminis athletæ certantis non finitur, sed magis ac magis et ineffabiliter magis augeatur praerogium. Et adhuc eo etiam plus voluntarius ad finem propero, quod finis hic etsi non omnis consummationis finis sit, quod est solius capitis consummationi reservatum, miræ tamen consummationis hic finis sanguis effusus hic. In quo latebat tunc tanquam in rosa medicamentum, in cortice balsamum; latebat, inquam, in sanguine tunc, sed manifesta nunc salus populi, decus cleri totius, denique ecclesiarum orbis patrocinium et ipsius corona immarcescibilis, quam gladiatores ferro super capitis et carnis ejus coronam tanquam super aliquam incudem eudentes ipsi fabricaverunt pro corona coronam. Nec igitur est quod de cætero debeam ad tantæ consummationis finem properare invitatus: unde siccatis lacrymis attracto spiritu amodo in fine historię super fine viri os meum aperiam. Et Dominus labia mea aperiat ut ad Domini gloriam gloriosi neomartyris sui in fine laudem digne annuntiem, ut juxta illud dictum antiquum ipsi omnis laus in fine cantetur. Habet enim pretiosus finis grande privilegium laudis: adeo etiam quod etsi quis ante mortem laude dignus sit, monet tamen sapiens neminem ante mortem laudandum unde et oporteret, si forte datum desuper sic, in ampliore tam pretiosi finis laudem nos deinceps super extendere, cum juxta sapientem pretiosus hominis finis totius laudis sibi privilegium vindicet. Quod igitur supra oravi et hoc nunc iterum oro, Dominus labia mea aperiat ut ad gloriam suam gloriosi neomartyris sui laudem os meum digne annuntiet.

8. DE ULTIMA VIRI CONSUMMATIONE.

Itaque, ut jam supra diximus collo extento, capite exposito, orantis instar junctis manibus et flexis genibus, lictores, quod sine exuberante lacrymarum fonte inter singultus et suspiria tam crebro erumpentia vix dicere valeo; lictores, inquam, hinc inde feriunt et referiunt; feriunt, inquam, et referiunt, donec coronam capitis separarunt a capite. Et ita christus Domini, unctus Domini ibi est immolatus, ubi unctus, sacro oleo unctionis succedente et cedente gladio occisionis. Nam sancto illo corpore in reliquis intacto et illæso, in sola illa corporis particula, qua sacerdotii et pontificii eminebat privilegium, inauditum illud sacrilegium admissum est. Et ita a lictoribus decalvatus decoratus est: et quidem non a tergo, sed qui usque in finem in anteriora se semper extenderat, patronus semper recti, recto corpore super ecclesiæ pavimentum jam moriens ante faciem cecidit. Et hic est consummationis viri finis. Et milites quidem hæc fecerunt quatuor cum cohorte in hac passione Christi Domini, sicut et in passione ipsius Christi, qui cum profana cohorte sua ecclesiam vix egressi, mirabantur si jam obisset. Et unus de cohorte revertens

A accessit propius. Qui et ut certissime nuntiaret mortuum, qui tamen jam mortuus erat, cuspe gladii fixit et sancti capitis cerebrum extraxit et super ecclesiæ pavimentum effudit; ut dicebatur, de præfata illa viperarum progenie, videlicet Robertus de Broc hic erat. Ecce Robertus hic, Longinus alter, nisi quia certe Longinus ille ab isto iustificatus est. Ille quippe ethnicus lancea Christi latus aperuit et sanguis exivit, iste vero Christianus christi Domini capiti gladium infixit et cerebrum extraxit et super ecclesiæ pavimentum effudit illud, quasi vile lutum aut pulverem ad calcandum exponens, illis etiam in immanitate sceleris longe supereminens, qui Christi crura, quem obisse jam viderant, non frugerunt.

9. DE VIRTUTE PATIENTIÆ VIRI.

O vos omnes qui transitis per viam, attendite et videte si ab initio nascentis Ecclesiæ vel etiam a prima sæculi origine fuerit dolor sicut dolor iste. Sto hic et hæsito, ultra progredi non possum, singultus et suspiria erumpunt magis quam verba. Stupet animus, plorat oculus, tremit manus, hæret stylus, et adhuc sto hic et hæsito, dubius admodum quo dictionis genere tantam in carne mortis patientiæ virtutem et tantam e diverso inter Christianos patrati flagitii immanitatem exprimere valeam. Debetur huic commendatio in sæcula sicut ineffabilis et inscriptibilis. Illi vero profanatio sempiterna, quæ similiter nec verbis exprimi nec stylo valet describi. C Nam ut prius de tanta patientis viri virtute dicamus in hac decalvatione in decoratione hac, in hac tam dura, tam dira capitis tonsione, ubi testa capitis cum corona unctionis separatur a capite, quod mirum dictu est et vix credibile, nec murmur resonat nec querimonia. Cæteri quidem martyrum si mox decollati non murmurarunt, mirum quidem sed non adeo. Verum hic noster in tam dura capitis tonsione, tanquam ovis coram tondente se, non aperuit os suum. Et bene et vere tondente: quid enim hæc capitis tonsio est, nisi dura et dira coronæ tonsio, ubi testa capitis cum corona unctionis separatur a capite: vere tanquam ovis coram tondente et tondente; et vere tanquam ovis non quidem ducta, sed se ipsam ad occisionem ducens? Oblatus D est enim quia voluit.

De gladio præco.

Et cum gladiatores hinc inde percenterent et reppererent mortem viri accelerantes, super testam capitis unius gladiatorum gladius frangitur. Frangit quidem et frangitur, frangitur gladius et frangit os exterius, interiori quidem osse quod supra diximus in occulto factum a Domino infrangibili, frangitur quippe gladius, sed Thomæ non frangitur animus. O os et os, os de primo Adam, os de secundo. Os quidem de primo Adam os ex ossibus est, de carne caro, sed de secundo os quidem ex ossibus est, sed non de carne caro sed de spiritu spiritus, de fortitudine virtus, de constantia firmitas, de patientia gaudium, de charitate mors. O osseus athletæ nostri

os jam non occultum, nec occultatum, vere a Domino factum. Quod etsi tenui quadam et tenera pellicea mortis tunica sit obvolutum, ferro tamen fortius, ferro firmitus, ferro durius est, quod in palæstra hæc ferrum fregit, se illæso.

De trucidati corporis compositione in ipso martyrii articulo.

Et ut adhuc, quod non solum ad virtutem sed et ad ornatum attinet, et velut ad privilegiatum quoddam martyrii decus, quadam decenti exteriorum membrorum compositione exterioris hominis, patronus hic noster paratum sibi decoravit martyrium, quasi indecens pro Christo mori judicans, nisi etiam decenter moreretur pro Christo. Nam donec consummaretur totum et inchoata perficeretur oblatio, sic immobiliter, sic uniformiter, et sicut æquanimiter, sic æqualiter, flexis genibus, junctis, ut diximus, manibus collum semper extendit et caput exposuit, ut ipsa corporis compositio oraret Dominum, et ipsa pariter gladiatores invitaret ad ictum. Contra ictum super se venientium vim nil opponit, nil obicit, de membris suis nullum subtrahit, nullum trahit vel retrahit, non manus conjunctas dissolvit, non hac vel illac inclinat caput vel declinat, quominus vim ictuum in caput suum excipiat. Cujus, ut jam diximus, ipsa exterior compositio corporis tam immobilis erat, tam uniformis, tam æqualis, ut gladiatores ad ferendum invitaret. O in tam arcto artuum exterioris hominis compositio hæc inaudita, qua et oraret cælorum Dominum et gladiatores pariter invitaret ad ictum. Mira revera et admiranda interioris hominis tam constans fortitudo et constantia tam fortis, quæ exterioris hominis actus sic componebat et artus, adeo quod etiam jam moriens non a tergo, ut supra diximus, sed ante faciem suam cecidisset, et prostratus orantis modo super ecclesie pavimentum patronus recti recto se corpore prostrans, in ipso casu mortis decentem totius exterioris hominis compositionem observans. Ecce quanta, quam inaudita, quam stupenda in interiori homine in martyrio suo patientie virtus, quam etiam totam tam decens, tam ornata totius exterioris hominis compositio sicut decorabat et declarabat; virtus quidem cum decore suo omnibus post futuris sæculis admirabilis, sed imitabilis paucis; utrum vero cuiquam, nescio. Eo quidem admirabilior virtus hæc, quod etsi in nostro tempore hæc non tamen nostri temporis est vel teporis, quo homines se ipsos amantes et solum quærentes quæ sua sunt.

De enormitate sacrilegii.

Verum quo patientis virtus plus admiranda et gloriosior, eo sacrilegorum factum detestabilius et ignominiosius est. Hoc quippe sacrilegii opus si quis attendat et inspiciat, omnem Diocletiani, Herodis, Maximini aliorumque hostium Christi excedit debæchantiam, omnem Antiochi profanationem, omnem Juliani perfidiam et Herodis sævitiam, omnibus his justificatis ex sacrilego facto hoc. Isti quippe in fidei suæ adversarios aut quos hostes jam habebant

A vel suspicabantur futuros sæviebant. Sed longe aliter hic. Longe, inquam, aliter, si sacrilegorum horum fides, professio, pax data, gradus, locus pensetur et tempus. Nam si de fide quæritur, Christiani sunt reputati; si de professione; subjecti hi tam quam filii patri; si de pace, pax publice data et scripta; si de gradu, sacerdos, sacerdotum princeps; si de loco, Ecclesia Salvatoris, aliarum in regno mater ecclesiarum; in ipso etiam loculo sacræ unctionis infixo gladio occisionis, si de tempore, Salvatoris fuit natalis. Ecce quot tituli tam nobiles, tam novi, et ad hæc tempora inauditi, novi nostri martyris tam pretiosi, tam gloriosi martyrii triumphum illustrantes, e diverso sacrilegii facti augendo scelus profanant. Sacrilegi quippe hi et fidei et professionis suæ omnino oblitii nec datæ pacis foederi, nec tam alti gradus nec tam sancti loci, nec tam celebris temporis privilegio detulerunt, illis incomparabiliter immaniores qui Christum extra Jerusalem, ne quasi ex eo locus macularetur, in loco qui Calvaria dicebatur, crucifixerunt. Verum isti nil curantes, sive macularetur sive purificaretur vel sanctificaretur, locus, in ipsa Jerusalem Christum Domini decalvarunt, de ipsa civitate tam sancta Salvatoris Ecclesia et matre omnium in terra ecclesiarum Calvarie locum facientes, filii plus quam sanguinarii matris suæ, sponsæ sponsum et patrem suum in ipso matris suæ utero decalvantes. Si hæc et alia quæ circumstant circumscripta pensentur, quis audivit unquam tale aut quis vidit simile? Transite et videte, intrate et considerate vehementer, si factum est hujuscemodi. Quis enim audivit? quis unquam vidit? quis fecit? ut in loco consecrationis in ipso etiam loco sacræ et sacræ chris-matis unctionis a Christianis et filiis gladius inflingeretur occisionis, ibi quidem et non alio, et jam mortui cum cruore et ossibus comminutis super tam sacri loci pavimentum spargeretur cerebrum capitis, aliis etiam quæ supra numerata sunt, augmentibus tanti sceleris proditionem, tam inauditi sacrilegii nefas? Cæli certe obstupescunt super hoc, et quod valde omnibus metuendum, ne tota terra aliquo adhuc tempore desoletur vehementer, in qua patratum tam scelestè hoc, ut bibat et ipsa de hoc calice passionis, quæ tamen nec consors fuit nec conscia criminis, quemadmodum et in diluvio multi perierunt, qui non commisissent, et in illo quinque civitatum Sodomitico igne multi concremati qui non corrupti. David quoque numeravit et gladius deservit in populum; Achar peccavit et populus corruit; Heli filii comederunt et Israelis obstupuerunt dentes. Hæc sunt enim Domini judicia terribilia super filios hominum; et multa abundant exempla super his, quæ et longum esset nec hujus temporis est nunc proferre. Sed utinam ego non sim vir habens spiritum et potius nunc mendacium præloquar. Siquidem genti meæ, nec oro nec opto nec voluntarius propheto malum. Absit potius, Domine, absit in die furoris tui, suspende gladium et in

spiritu iudicii discerne, tuum distingue flagellum A
ne pro impio justus cum impio conculcetur: gens
tua, gens Anglorum, quæ dictum tam devote neo-
martyris tui victoris novi colit martyrium, non vi-
deat gladium, non sentiat ictum, non ferat flagel-
lum, sed sit potius immunis a pœna quæ immunis
est a culpa. Quod si in illicitis juramentis contra
patrem suum et patronum se illicite obligavit,
allisve secus egerit, sicut supra in libello histo-
rico hoc, cum exsili nostri describeretur asperi-
tas, memoravimus, vis quidem fuit hæc, non con-
sensus. Soli ergo illi, Domine, ultionis tuæ bra-
chium sentiant, qui tam inauditi sacrilegii nefas
fecerunt soli, aut qui consenserunt facientibus,
quibus tamen et ego qui scribo hæc, etsi dominum
meum tulerint et abstulerint, sic oro et opto ut
Dominus eos in iudicio non in furore suo corripiat
et corripiendo convertat magis quam conterat, ita
tamen ut orbis universus ex tam scelesti horum
facto profanatus, et quasi quodam maculatus in-
cestu, manus suas in sanguinem ipsorum lavet. Ve-
runtamen de his conversis vel contritis in fine li-
bellus quem a materia Melorum nomine inscriptum
huius historie mox adnexuimus edocebit. Præsen-
tis siquidem loci et temporis est, et sicut historia
ordo exigit, nos jam cospinus sic sacrilegii hujus
in primis exaggerare culpam et sequentem ex hac
postea describere pœnam. Siquidem peccati vesti-
gium pœna est quæ indicat præcessisse peccatum.
Primus igitur agendum de peccato; de pœna vero
tanquam ejus sequela postea; et quidem necessa-
rium sic, ut omnes, videlicet qui legerunt vel au-
dierunt, apprehendat stupor, et ipsos sacrilegos
dolor, et omnibus denique post futuris sæculis, ne
de cætero attentent hujusmodi, inentiaur terror.

Itaque, ut prætetigimus, ex sacrilegis his omnium,
qui foris vel fuerunt vel sunt, sceleratorum scelera
justificata sunt: nihil his et illis, non est respectus
culpæ ad culpam, non pœnæ quæ debeatur ad pœ-
nam, non est, inquam, respectus, non coequatio,
non comparatio ulla: longe quippe alia culpa et
pœna alia civium qui civitatem produnt, alia vero
hostium qui debacchantur exterius.

Unus vero carnificum militum, poenitens quod
egisset sic, diocesisno episcopo suo confitens secre-
tius revelavit, quod cum ipsi prius ardenti animo
et quasi cum quodam accidenti tripudio ad sancti
viri accelerarent occisionem, mox peracto flagitio
in recessu suo, quasi tremulis jam et tremebundis
videbatur singulis, quibus incedebant, passibus
terra quasi aperta, et quasi parata ad ipsos vivos
absorbendum. Episcopus, cui sic facta confessio,
bonæ memoriæ Bartholomæus Exoniensis episco-
pus erat; miles vero carnifex et confessus jam supra
nominatus Wilhelmus de Traci erat. Sed nunc ad
cœptum passionis ordinem et sacrilegorum amplius
debacchantium adhuc præsumptionem inordinatam
describendam revertamur.

10. DE SPOLIIS ET VESTIMENTIS QUÆ PARTITI SUNT INTER SE.

Confestim vero cum athleta hic noster, e cæsian
patronus et cleri pater de mundo sic transisset ad
Patrem; confestim, inquam, sacrilegi illi cucurre-
runt ad spolia et arcas et scrinia et clittas et
caphnios confregerunt et christi Domini inter se
vestimenta dividerunt; et milites quidem hæc fece-
runt ita ut illud de Christo huic christo Domini
coaptari valeat: *Partiti sunt, inquam, vestimenta
mea sibi (Joan. xix)*; et cum inter alia duo inve-
nissent cilicia, quæ quasi quædam vestium imita-
toria athleta ille Christi super nudo induere con-
sueverat, non sunt partiti illa inter se, sed nec
sortiti, cujus essent, sed illa tanquam vilia et sibi
inofficiosa abjecerunt: admodum tamen jam con-
sternati et stupefacti, quod tam grande, tam evi-
dens obumbratæ religionis cernerent argumentum.
Unde et mox plerique de cohorte, cum Centurione
illo evangelico, tacite tamen præ timore, loque-
bantur sibi: *Vere homo iste justus erat (Luc. xxiii)*.
Et percutientes pectora sic revertebantur. Et quidem
finis patroni nostri, christi Domini, sic erat, de
quo fine circa historici libelli hujus finem nec præ-
terire debeo, nec subtere de visione quadam vere
prophetica, quæ sicut miraculosa ita et certissima
est, cum tamen per totam historiam hanc prophe-
ticas de viro hoc revelationes innumeras et signa
propter infideles data, quibus omnibus mundo, et
præsertim incredulis, viri probatur sanctitas; hæc,
inquam, quæ alii viderunt et scripserunt, per totum
libellum hunc prætermittam, solam tamen illam,
quæ mox subdetur, revelationem vere prophetica
hic interserens, cum propter nimiam rerum certi-
tudinem, tum propter referentis auctoritatem, solet
quippe plurimum augere fidem referentis aucto-
ritas, tum etiam præcipue propter ædificationem
nostram, propter quam etiam scripsimus quæcun-
que per totam historiam de viro hoc scripta sunt.
Visionis autem hujus certitudo sic omnino audita
et sic pervenit ad nos.

11. DE MARTYRIO COGNITO IN JERUSALEM INFRA DIES QUINDECIM.

Patriarcha Hierosolymitanus, sicut notum est,
de Ecclesiæ columnis nobilioribus, qui nunc super-
stes est, Heraclius nomine, vitæ sanctitate non in-
ferior, propter illius sanctæ terræ crebros et intole-
rabiles ethnicorum hostiles incursus partes petens
cisalpinas demum in Angliam applicuit, a rege et
ex militibus regni militaris manus auxilium postu-
lans. Et cum de beato Thoma et de ejus conversa-
tione et vita tam sancta et fine tam glorioso crebro
sermo haberetur ad ipsum et ad alios, ipse inter
cætera assertione firmavit certissima sibi in Jeru-
salem infra dies xv a martyrio martyris finem cer-
tissime cognitum et per totum etiam regnum illud
ipsum divulgatum. Et ut referebat, erat cœnitum
sic.

Est in terra illa cœnobium, de cujus fratribus A unus ab ineunte ætate et puritatis magnæ et conversationis sanctissimæ in die illo quo beatus Thomas passus est, infirmitatem patiebatur extremam. Et cum jam quasi extremum traheret spiritum, pater cœnobii accessit ad fratrem quem, pro sanctitatis suæ prærogativa, præ cæteris dilexerat et eo magis familiaritatis cum eo contraxerat gratiam. Unde et magis compatiebatur infirmo. Cum vero eum jam in extremis laborantem cerneret, paterne et cum lacrymis supplicabat ut cum migrasset a sæculo ipsum quem adeo in vita dilexerat, et a quo tam dilectus fuerat, de statu suo certificaret si tamen Dominus permitteret sic. Annuit frater: obiit, et infra dies paucos juxta promissionem suam ad patrem cœnobii reversus lætabundus se Deum B videre et æternæ salutis sibi jam præmium redditum nuntiavit. « Quod, inquit, ut scias certissime in nullo hæsitans, scito quia cito post ut egressus a corpore ab angelis deportatus vidi Dominum; cito, inquam, post venit magnus quidam et supereminens cum processione ineffabiliter admiranda, sequente ipsum et hinc inde stipante et dacente, quam nemo dinumerare posset, angelorum multitudine, patriarcharum pariter et prophetarum laudabili numero, cum glorioso apostolorum choro, et innumerabili sanctorum martyrum purpurato et candidato confessorum exercitu. Stabat autem ille ante Dominum quasi martyr toto lacero capite, C cruore, ut videbatur, sensim distillante per vulnerum ripas. Cui Dominus: *Thoma, inquit, sic decet te intrare in curiam Domini tui. Et adjecit: Quantam gloriam donavi Petro nec tibi minorem dabo.* Et accepit mox Dominus miræ magnitudinis coronam auream et capiti ejus convulso et dilacerato imposuit. » Et adjecit, qui loquebatur frater mortuus: « Scito igitur certissime, quia Thomas hic magnus Cantuariorum antistes in his diebus occisus est et sic migravit ad Dominum. Et tu interim hæc tibi dicta nota, signa tempora. Modico quippe elapso tempore ex multorum comœtantium relatu fido vera probabuntur hæc. Et tu per gloriosi martyris completum jam exitum tibi nunc prophetatum per me, deinceps de salute mea non dubites: præsertim cum et per alios cito sis accepturus, ut ego nunc tibi propheto completum sic. » Et his dictis mox disparuit qui sicut vere et vere propheticæ loquebatur sic frater.

Et revera vere propheticæ et omnia prophetica hic, ipse etiam locus propheticus hic, hoc per locum ipsum significante jam Spiritu sancto, videlicet neomartyris gloriam tam cito in tam sancto et tam celebri loco evangelizatam per quatuor mundi climata citissime prædicandam, ut in omnem terram exiret sonus tam gloriose triumphantis. Militis siquidem a sæculo egressi in medio terræ, ubi Dominus operatus est salutem, ibi mox evangelizata palma, ut inde quasi a mundi umbilico ad reliquas

A circumquaque nationes gloriæ suæ nomen cito diffunderetur. In umbilico, inquam, juxta quod Dominus in propheta de Jerusalem: *In medio, inquit, gentium posui eam et in circuitu ejus terras* (Ezech. v).

Pater vero cœnobii, de morte fratris post revelationem sibi factam sic, non modicam consolationem accipiens, exhilaratus jam dictum venerabilem patriarcham citus adiit, et cuncta pandit ex ordine, quemadmodum, supra diximus, nobis ipse patriarcha ore proprio enarravit.

Unde libet hinc intueri quam sit singulariter magnus, quam magnifice singularis, ejus gloriam frater ille jam angelorum concivis effectus primum terris evangelizavit, priusquam aliis mundi partibus, B terræ sanctæ primum. Ibi christus Domini, vero sequela Christi, post mortem suam primum evangelizatus, ubi et ipse Christus primum est evangelizatus post mortem. Et quemadmodum mors Christi mox mundo est declarata per solem, ita et mors christi Domini, jubente Domino, declaratur mox mundo, non quidem per alium, sed per angelorum concivem. Veri quippe solis Christi occasus mundo evangelizatur per temporalis solis obscurum, mors vero christi Domini per æterni concivis sui datæ salutis et concessæ claritatis æternum.

12. DE CONVENIENTIA MORTIS CHRISTI ET CHRISTI DOMINI.

O mors Christi, o mors christi Domini! Exemplar est hæc, exemplum illa. Et vere sic, si quis attendat et inspiciat quam magna convenientia, quam mira consonantia, quam concors, quam dulcis melodia sit pœnæ Christi ad pœnam christi Domini, oblationis ad oblationem, passionis ad passionem, mortis ad mortem. Concors quidem melodia et ad audiendum dulcis, etsi ad respondendum gravis. Hoc est enim in propheta canticum illud pro Melech ad respondendum succinentis et subsequents chori Christo præcentore. Et quidem chori hujus et præcentoris concors quidem melodia et dulce admodum canticum. Cum quadam tamen amaritudine dulce propter compassionem, nisi quia dulcescunt mox omnia propter fructum palmæ delectationem obtentam. Verum in libelli hujus historici sine plenius, attentius et commodius audietur concors melodia hæc, et tam dulce quam suave canticum hoc. Adhuc enim canticum hujus materiæ superaddendum ipsius necdum penitus contexta materia. Interim vero patroni nostri et patris, ad patriam suam jam reversi, sanctum corpus quod ex nobis et nobiscum adhuc, quod ascendens mortis suæ exivias, nobis vero quasi legatum pretiosum dereliquit; hoc, inquam, sanctum corpus inhumatum adhuc debitis humanitatis officiis prosequamur ad tumulum.

13. DE GESTIS POST MARTYRIUM.

Breviter tamen prætangendum, quod mox audita per civitatem illa prius inaudita tam scelesti, tam profana facti novitate, universa civitas consternata

obstupefacta et commota est, pectora sua tundentes et manus super genua et manum ad manum præ stupore et dolore ferientes. Et patrem suum et patronum querentes et conquerentes confestim ad ecclesiam concurrerunt. Sed ut omitamus divites, soli pauperes acceleraverunt ad summi imperatoris militem trucidatum sic, utpote qui dum militaret adhuc pauperum fuerat sustentamentum, pater orphanorum, pupillorum adjutor, iudex viduarum et mœrentium consolator. Tale hominum genus, et certe soli tales divitibus jam arescentibus præ timore et prementibus se; tales, inquam, et soli tales currunt, accelerant, festinant: festinant omnes, festinat quisque quemque prævenire, ejulantes, querentes et clamantes, quo pater eorum et patronus devenisset.

Respicamus ad passionem Christi et videamus si non sic in hac passione christi Domini, sicut in passione ipsius Christi, si non in passione militis, sicut et in passione imperatoris. Ibi piscatores, ibi mulieres, soli duntaxat pauperes hi cæteris occultis similiter propter metum. Nec immorandum hic, nec plus quam necesse capitis et membri sui conferre et coaptare passiones. Legentibus et scientibus hanc et illam solum hic sufficit tetigisse. Unde et omissis cæteris ad pauperes nostros revertamur, qui sicut Christi pauperes ad Christi monumentum tunc, ita isti nunc ad ecclesiæ pavementum cucurrerunt, super quod sanctum illud corpus adhuc jacebat, exanime, necdum in monumentum positum. Quod pauperes currentes et præcurrentes mox devote adorant, et cum summa reverentia manus deosculantur et pedes. Hi vero pitacia, alii mapulas in sacro illo fonte sanguinis, qui ubertim super ecclesiæ pavementum emanabat, tinxerunt, devotionem et reverentiam neomartyri exhibendam et gloriam ipsius in brevi per mundum ampliandam jam velut quodam futurorum præsignio prophetantes.

Denum vero circa noctem, vespera quippe erat cum opus illud tenebrarum ageretur, testa capitis cum corona unctionis, quæ in modum disci dependebat a capite, per cutis modicum fronti hærens adhuc, capiti resolidatur et coaptatur ut potuit, et sicut jacebat super pavementum, nec exuto adhuc nec loto corpore, ut monachalis præsertim mos est sepelire defunctos, corpus illud sanctum choro ante altare majus monachorum infertur humeris.

14. DE FORMA JAM EXANIMIS CORPORIS.

Tota vero nocte illa, post grande profluvium sanguinis quod super ecclesiæ pavementum jam emanaverat, sanguis sansim per rimas vulnere capite resolidato distillabat. Unde et quod dictu mirum et grande ipsius virtutis Domini miraculum grata admiratione dignum, post cædem tam acerbam, post gladiatorum percussiones tam duras, ubi testa capitis cum corona unctionis separatur a capite, post tantum profluvium sanguinis et demum post tam densas tota nocte sanguinis stillas, post omnia

A hæc non facies pallidior, non macrior, non frontem sulcabant rugæ densiores, non oculorum orbes contractiores, non oculi plus reconditi [non humor ab ore profluens aut naribus], non collum plus exesum, non humerus demissior, non digitus rigidior, non cutis laxior est. Denique in nulla corporis parte ulla poterat extenuatio seu exinanitio deprehendi; ipsa corporis mortui viva compositione probante hanc sancti viri ultimam exanationem non exanationem fuisse. Et revera decuit, ut qui moriens tam decentem, tam decoram ut præscripsimus Domino corporis sui compositionem servaverat, quam nec atra mors imminens potuit deformare, decuit, inquam, ut ipsi mortuo, quia jam non poterat ipse, Dominus retribuere simile. Et retribuit quidem,

B hæc enim, quam descripsimus, stibio depingenda, potius quam tetrīs calami litteris describenda, hæc, inquam, fuit gratia, hic decor exanimis corporis in capite sic tūsi et tōsi sic. Quod certe erat magis quam mortuo placide dormienti similis, ita ut hæsitarent nonnulli etiam si obisset adhuc. Hæc, inquam, fuit gratia, hic decor totius corporis, hæc faciei vivacitas, hæc jucunditas, hæc hilaritas exhilarati, imo jam impinguati in oleo. Hæc, ut supra nos dixisse meminimus, hæc fuit gloria vultus ejus reversi ab exilio in primo ecclesiæ suæ ingressu inchoata, nunc vero in egressu repatriante ipso consummata: quam non vehemens mortis spiritus exsufflare potuit, sed magis de claritate in claritatem transformavit tanquam a Domini Spiritu. Sed quid? Certo certius et luce clarius, quod tam decora, tam jucunda compositio corporis mox quasi præco fuit prædicatrix et nuntia æternæ suæ jucunditatis, ut quam præfatus ille frater angelorum concivis in visione spiritualiter, hic in præsentī oculo ad oculum corporaliter probaretur, ut sic inter exitus sui initia quasi in ore duorum gloriæ suæ testimonium staret. Jacuit itaque in lectica nocte illa tota sancti viri corpus ante altare ecclesiæ majus, qui tamen jam introivit ad altare Dei, ad Deum qui lætificabat dolorem ejus. Jacuit autem corpus, sicut nec lotum, nec exutum adhuc.

15. QUALITER SANCTI VIRI CORPUS SIT DEDUCTUM AD TUNULUM.

D In crastino vero reaccedentes viperae, de jam sæpēdicta progenie viperea, virus suum per linguam suam lanceatam evomentes, terribiliter intonant, si corpus seductoris illius super terram foret adhuc; adicientes quod nisi citissime ab hominum oculis amotum absconderetur sub terra, illud per totam civitatem equis distrahendū aut suspendendū patibulo: inhībentes etiam ne corpus seductoris inter sanctorum pontificum sarcophaga poneretur.

Mox vero quidam fratrum monachorum præ tam horrida tam sacrilega comminatione stupefacti et exterriti, accelerantes; a lectica in qua jacebat deposito corpore primo ipsius cœperunt vestimenta tollere et post, ut moris est monachalis præsertim,

lavare corpus. Verum prima tollentes vestimenta, quibus ad oculos hominum utebatur, interius omnia invenerunt dissimilia, juxta illud Sapientis: Frons, inquit, tua populo conveniat, intus vero omnia dissimilia sint. Quod quidem in isto: invenerunt quippe mox interius atrum quoddam colobium absque caputo tamen. Quod ipsi mox cucullam monachalem interpretati sunt. Quo exuto intus repperunt totum corpus cilicinis coopertum. Cilicium in humero, cilicium in brachio, cilicium in dorso, cilicium in tibiis, viri toto corpore cilicinis quasi obsuto. Hæc erat poderis, hæc talaris vestis Joseph: hanc, ut circa historię hujus initium nos dixisse meminimus, ex quo in sacerdotium promotus mox induit, usque ad martyrii sui consummationem non exiit; fratres vero, in quorum manibus sanctum illud corpus erat, præter spem suam, imo supra mundi æstimationem videntes sic, cum magno tripudio, imo cum quodam mentis jubilo confestim alios de fratribus convocarunt. Et quia

A inter ipsos plerique, quemadmodum, et mundi homines, de viri sanctitate dubitaverunt, videntes nunc sic, terribiliter stupefacti et salubriter contriti, immobiliter confirmati sunt. Et quasi viso terræmotu et vere ipsius terræmotu carne tam delicata, tam fragili adeo mota, imo immutata sic, viso, inquam, terræmotu hoc quasi evangelico illi centurioni mox conclamantes succinerunt, dicentes: Vere Filius Dei erat iste! (Matth. xviii.) Igitur postquam exutum fuit, postquam lotum, acceperunt mox corpus Thomæ et aliis induerunt vestimentis, sicut mos est pontifices sepelire. Erat autem in crypta ecclesię monumentum novum, excisum de petra a multis diebus quasi ad hoc adeo præparatum, in quo nondum quisquam positus fuerat. Et propter metum in ecclesię crypta illud quasi abscondentes posuerunt corpus Thomæ in hoc monumento novo, quod erat excisum de petra, anno ab Incarnatione Domini 1171, vitæ vero ipsius anno circiter quinquagesimo tertio.

INCIPIUNT CAPITULA TOMI SEPTIMI.

1. De catalogo eruditorum Thomæ.

2. De hac martyria historia non mutilanda.

3. De supplicatione qua meritis et orationibus legentium hanc historiam se commendat.

TOMUS SEPTIMUS.

I. DE CATALOGO ERUDITORUM THOMÆ.

Et quoniam in historia hac de eruditio Thomæ nunc domini et gloriosi neomartyris nostri crebro mentio facta est, ut ipsorum nomina in æterna benedictione sint, qui in tanta tempestate inter tot maris voragines patri laboriose nihilominus et periculose navem suam ducenti navigii coadjutores exstiterant; ipsorum, inquam, tanquam virorum illustrium, nomina in historiæ hujus calce exprimere commendabile duxi.

1. In primis igitur et supra omnes eruditos hos omnium eruditior ipse Thomas: sicut eruditior, ita et insignior, roseus et rubicundus, lavans in vino stolam suam et in sanguine uvæ pallium suum. Qui imperatoris sui instar torcular calcavit solus, et de Edom tinctis vestibus de Bosra cælum ascendit.

2. Inter eruditos vero Thomæ eruditissimus præclarus quidam, sicut natione et nomine Lombardus, de præclara civitate Placentia oriundus. Ille, ad duo matris suæ sponsæ ubera diutissime dependens, tandem ablactatus a lacte, appulsus ab uberibus, in sapientia et scientia magnus effectus est. Hic discipulus tempore, quo vacabat, quietis et otii magistrum in exilio canones docuit. Ad eujus etiam docentis pedes quotidie sedebat discipulus qui scripsit hæc. Nobiscum semper erat comes individuus, quousque tandem ob præclara ipsius merita ad Ro-

C manam Ecclesiam ab exsilio vocatus et sanctæ Romanæ Ecclesiæ cardinalis effectus, demum per Romanum pontificem in Beneventanum archipræsulem promotus est.

3. Post hunc Joannes dictus cognomento de Sarsberia natione Anglus; qui ex re nomen habens per Dei gratiam duos sibi in capite sponsæ oculos coaptarat, sermone sapientiæ et sermone scientiæ abunde sibi dato, per spiritum. Hic cum neomartyre nostro in tentationibus ipsius strenue et viriliter ad finem usque permansit. Qui ob præclara, non ut reputabat sua, sed potius neomartyris nostri merita gloriosa, cito post domini nostri martyrium a patria sua Dei vocatione evocatus in Senonensi provincia, in qua nobiscum exsulaverat prius, in Carnotensem episcopum promotus est.

4. Post hunc Robertus, cognomento Folioth, natione Anglus, tunc archilevita Oxenefordensis, in gratiis et virtutibus multarum facierum persona. Cujus si vitam et actus cerneret, in duabus sororibus sibi maritaliter copulatis alterum Laban socerum judicaret. Verumtamen hic patrem suum de terra egredientem et peregrinantem ob quasdam causas secutus non est, ut non sequeretur paternam prius licentia et benedictione accepta. Hic postea, ob præclara ipsius merita, in Herefordensem episcopum promotus est.

5. Post hunc, Reginaldus natione Anglus, sed sicut educatione et cognomento Lombardus, pro ætate prudens et industrius, animosus et efficax in agendis, qui extra patriam aliquanto tempore nobiscum fortiter stans, cito doloris nostri fuit principium: ob causam tamen propter quam a nostro agone et paupertate ad aulam confestim se transtulit ut ibi militans principi fortius præliaretur contra nos. Iste tamen in domini nostri morte sicut pretiosa et triumphali, salubriter præstante Altissimo, ad quondam dominum suum et patrem conversus est et reversus. Qui etiam postea, industria et probitate ipsius promerente, ab aula ad Ecclesiam assumptus, in Bathoniensem episcopum promotus est.

6. Post hunc nomine et fama celebris, Girardus nomine proprio, cognomento Puella, natione Anglus. Iste post longos potus turbidarum aquarum Sior, hausit sibi tandem purissimas de fontibus Siloe. Quem dux noster et pater, priusquam peregrinaretur, primus in ordinem clericatus promovit, et primus ei beneficium ecclesiasticum contulit. Qui cum tota die cucurrisset nobiscum, tandem circa diem vesperam in cursu remissior querens requiem aliquantulum a nobis divertit. Qui tamen postea post domini nostri de hoc mundo transitum, bonæ mansuetæ et honestæ conversationis suæ et scientiæ meritis in Conventrensem episcopum promotus est.

7. Post hunc Hugo, cognomento de Nunant, natione Normannus, tunc archilevita Lexoviensis, pro juventutis suæ annis tunc in consiliis discretus, in agendis providus, et strenuus in exsequendis: verum peregrinatione nostra necdum finita, reconciliatus principi de patris nostri licentia est reversus. Qui per annos a principe fidus repertus, et strenuus, sive ab aula sive ab Ecclesia nescio, sed hoc scio quia illo de quo proxime locuti sumus felicitis memorie Girardo decretam universæ carnis viam ingresso, ad eandem sedem pontificalem promotus est.

8. Post hunc Gilbertus, cognomento de Glanville, natione Anglus, formam habens conversationis bonæ et honestæ, et omnium inter quos conversabatur bonorum moribus se conformans, et in utroque jure scientiam commendabilem assecutus. Hic postquam nobis semel adhæsit, nos deinceps non deseruit; verumtamen vocatione omnium novissimus fuit. Et tamen, Altissimo disponente sic, qui fuerat vocatione novissimus, factus est patri nostro dignitatis loco proximior, jam quippe cum scriberem hæc, in episcopum Rophensem electus.

9. Et ut mox de societate nostra non quidem episcopos, sed alios privatos, viros tamen magnos et industrios enumerem, post hunc erat Radulfus, cognomento de Serra [natione Anglus, vir mitis, mansuetus et socialis], qui, etsi non episcopus, vitæ tamen sanctitate et scientiæ plenitudine adimplebat episcopum. Hujus, cum uvam acerbam non gustas-

A set, obstupuerunt dentes, quia cum nec fuisset de familia nec de archipræsulis domo, cum parentibus suis jam magis sepulcro quam exilio aptis, exturbatus est et proscriptus. Qui postea, ob præclara viri merita, Remis in metropolitane ecclesiæ decanum promotus est.

10. Post erat Jordanus, vel, ut alii nominant, Gordianus, cognomento de Meleburna, natione Anglus, tunc Cicestrensis archilevita, ejusdem ecclesiæ decanus postea, vir pro ætate et pro tempore quo litteris operam dederat non mediocrem scientiam assecutus, verum quia villam emit, excusavit se et patrem peregrinantem secutus non est.

11. Post hunc Matthæus natione Anglus, sicut natione et cognomine Cicestrensis, juvenis ingenio acer, probus et industrius. Qui cum jam commodè profecisset in litteris, curiarum et curarum sæcularium nexibus a litteris retractus est, cum hæc scriberem jam Cicestrensis decanus. Hic vero, quia minime vocatus, patrem peregrinantem secutus non est.

12. Post hunc Gervasius, similiter sicut natione et cognomine Cicestrensis, juvenis certe tunc sicut in moribus et in litterarum scientia commendabilis, verum et iste cum nec vocaretur, patriam egressus non est.

13. Post hunc Joannes, cognomento de Tilleberia, natione Anglus, vir multum habens pectoris et multum oris. Qui tanquam scriba doctus et velox, mox cum necesse de cordis sui thesauro nova et vetera proferebat; verum ipse corpore jam gravis et annosus, quod patrem peregre proficiscentem non est secutus excusatur.

14. Post hunc Philippus, cognomento de Caune, natione Anglus, vir lenis et simplex. Qui corporis et mentis vires in humani juris studio jam exhauserat plurimum patrem suum peregrinantem secutus. Sed cum aliquantisper supposuisset humeros suos, sed minime sufficeret tanto tempore ad onus paupertatis portandum, vidit requiem quod esset bona et repatriavit, prius tamen paterna licentia et benedictione accepta.

15. Post hunc Hervæus, cognomento de Londonia, unde et oriundus. Hic mutuatis vasis aureis et argenteis ab Ægyptiis in deserto manate saturari optabat. Sed a patre nostro ad virum apostolicum missus obiter morte præventus est.

16. Post hunc Gunterius, cognomento de Wintonia, unde et oriundus; homo simplex et rectus, timoratus et sine querela. Cui quod defuit in scientia, commodius ipsi desuper est suppletum in vita, ipso cum Zacchæo statura pusillo, super sycomorum ascendente ut vel sic transeuntem videret Jesum. Hic cum magistro in tentationibus usque in finem fideliter permansit et constanter.

17. Post hunc Alexander, lingua paterna vocatus Cuellin, sicut natione et cognomento Gualensis. Edoctus quidem in litteris, jucundus in verbis et in verbis jucundis multus. Cujus tamen non omnis

virtus in ore ipsius; quin potius sicut nec lingua nec ei defuit manus. Cum patre nostro et pro patre nunc ultroneus, nunc iussus, nunc vero missus, crebro inter multa pericula caute quidem et fortiter operans et constanter, et quod in natione illa valde pretiosum, sicut operans ita semper et ubique domino suo fidem servans.

18. Fuerunt adhuc et duo, unus dictus Rothlandus, alter, vero Harialdus, natione Lombardi, viri quidem industrii et præpotentes in litteris. Quos pater noster jam peregrinans vocavit ad se. Quibus intuitu litteraturæ suæ et prudentiæ, cum pauca haberent, de sua paupertate communicabat, per annos singulos primo quem prænominavimus marcas decem, alteri vero centum argenteorum solidos, singulis peregrinationis suæ annis largiendo.

19. Superest de hac nostra domini nostri beati martyris societate unus adhuc domino nostro charus admodum et acceptus. Quem quidem pono per se, quasi singulariter inagnum et magnifice singulararem, et etiam quia vocatione inter novissimos. Ille est Humbertus nomine proprio, natione Lombardus, de inclita illa civitate quæ Mediolanum dicitur oriundus, vir opere plurimum potens et sermone. Qui sicut de virtute ad virtutem, pariter et per ecclesiasticos ascendens gradus, cum adhuc exsularem, primo fuit Bituricensis archidiaconus, et tunc a domino nostro vocatus, de nostra societate factus est quasi unus ex nobis. Postea vero ob præclara ipsius merita in Mediolanensem archipræsulem, unde et ortus fuerat, est promotus. Et exinde primo secundoque hujus promotionis suæ anno in omnium patrem et patronum est conversus, de archipræsule in summum Romanæ sedis pontificem sublimatus, hodie totius Ecclesiæ rector, sicut re et nomine Urbanus tertius.

20. Ex isto igitur, quem posuimus, tam prudenti, tam forti felicitatis catalogo, æstimare possumus quam magnanimus, quam magnificus et quam munificus fuerit dominus noster gloriosus martyr hic, qui, etsi omnibus nudatus et proscriptus causæ Dei et Ecclesiæ tales secum et tantos patronos consecutiv.

21. Fuerunt tamen et alii nonnulli inter hos, quos etsi eruditos et strenuos hic non exprimo, domino quidem suo nihilominus fidem servantes et cum eo cursus agonem usque ad metam debitam strenue et viriliter consummantes. Inter quos, auctore Domino, quasi abortivus et eruditorum minimus discipulus qui scripsit hæc, Herbertus nomine proprio, natione Anglus, et sicut natione et cognomine de Boseham.

22. Et ne illum, de quo sermo tam celebris est, de quo etiam in historia hac supra per loco tetigisse me memini, clericum illum videlicet in agone martyris brachio vulneratum præteream, ipse quidem nomine proprio Edwardus, cognomento Grim, natione Anglus, quem hic per se ab aliis seorsum pono, quia ipse etsi de provincia, de archipræsulis tamen propria familia non erat: sed casu sic ad ar-

A chipræsulem suum nuper tunc reversum ab exilio visendum venerat. Unde ipsum in historia hac in archipræsulis eruditorum catalogo hoc nequaquam pono. Qui tamen jam a rebus humanis exemptus, sicut sperandum, ab Altissimo in supercælesti sanctorum suorum catalogo jam positus est.

23. De his autem, quos in istorum eruditorum pono catalogo, ut supra singulos enumerando notavimus, quidam nobiscum ad prælii pondus sustinendum audaces, robusti, strenui et constantes paupertatis amici permanserunt, pauci abierunt retro. Et in hoc etiam miles suo conformis imperatori. Nam ut nunc de aliis præteream, nec enim eorum quisque, quos imperator ipse ad apostolatam elegit, permansit, et ut omnium eruditorum nostrorum nunc concludam catalogum, omnes viginti.

24. Nemo autem miretur, calumniatur nemo, si inter alios in isto eruditorum catalogo enumeraverim aliquos qui patrem suum peregrinantem secuti non sunt. Hi inter illos, ut videri potest, amicos potius numerandi, qui cum sint socii mensæ minime tamen permanent in die necessitatis. Aut etiamsi aliquos horum nominaverim, qui patrem quidem peregrinantem secuti, sed tamen, necdum peregrinationis labore finito, sunt reversi. Qui nihilominus fragili illi et seducibili mulieri possunt videri similes, quæ retro respiciens in statuam est conversa, sive illi qui manum suam misit ad aratrum, sed et similiter retro respiciens regno se ineptum reddidit. Si inter alios, inquam, eruditos et hos et illos hic enumeraverim, nemini mirandum calumniandumve hoc. Sciat potius universa mater nostra catholica, quia et illi qui patrem peregrinantem secuti non sunt, sive qui secuti et reversi, fere quotquot paterna prius licentia et benedictione accepta sunt reversi. Et compassione paterna quotquot hi absoluti a patre. Et præterea unum etiam adhuc scimus omnes et mundus videt sic. Unde nec sermo noster apologeticus pro ipsis necessarius nunc, quia et illi qui non secuti, et qui seculi nec tamen permanserunt, si quo contra patrem suum gesserint, si quo offenderint modo, salubriter sunt conversi: et totis cordis visceribus in summa mentis devotione, quicquid prius gesserint, per mortem et post mortem patris tam pretiosam, tam triumphalem, coram patre suo humiliati et ad ipsum amantissime sunt reversi.

Tu igitur, pater sancte, martyr gloriose, qui prius in campo una cum imperatore tuo athleta fortissimus, nunc vero in solio triumphator es gloriosissimus, qui per mortem tuam et mortem ipsam et ipsum pariter vicisti, qui super te mortis imperium habuit, serva eos qui tecum in tuis tentationibus permanserunt, ut mereantur fieri socii consolationis, qui socii fuerunt passionis. Serva, inquam, domine, omnes quos in nomine suo tibi Dominus dedit, illius non immemor qui cum dilexisset suos, usque in finem dilexit eos. Serva et omnes qui tibi fideliter sunt obsecuti sive secuti sint et reversi, sive qui a te non reversi, quia

te ex licentia paterna non sunt secuti. Et mihi A discipulo tuo tali quali nunc historiographo tuo, per avia et invia deserti erranti et te querenti, de tuo duplici spiritu vel modicum quid impertiri digneris. Non quod ego, peccator homunculus, Elisei prophetae tam eximii mihi usurpem quid, sed quia Elias es tu, quod mundo et spiritus et virtus et ne quid deesset, etiam ipse habitus indicavit. Mihi ergo puero tuo, quid tibi in vinculis Evangelii ministrare consueveram, vel de filo prophetici subtegmis tui, ne inter deserti hujus frigora nudus peream, tu ascendens huc projice. Nec enim credendum quod, etsi ignitum currum tuum jam conscenderis, te in tanta gaudiorum abyso sempiterni illi inaccessibilis claritatis et dilectionis Spiritus sancti ardores sic absorbuerint: quin peregrinantium et periclitantium adhuc filiorum tuorum sis memor; quin potius eo ipso ad subveniendum promptior, sicut credibile nunc, es et potentior, quanto nunc ipso indeficienti aeternae pietatis fonte debriatus, per mortem tuam triumphalem amplius confirmatus est principatus tuus. Sed ne quis vindicet proprium quod totius Ecclesiae commune beneficium et gaudium est, sentiat sicut sperat in sanguine tuo, gloriose martyr, populus salutem, clerus libertatem et universus ecclesiarum orbis patrociniū, ut sicut tibi pax, ita sit et quondam coadjutoribus tuis pax et peregrinis tuis pax et Ecclesiae tuae et universo Ecclesiarum orbi in sanguine tuo pax; et sit clero necdum plene, etsi ex parte, jam adepta per sanguinem tuum libertas plena, pro quo novo modo et inaudito fortiter constiteri et constanter forti tu te ipsum offerre voluisti.

II. NE QUIS HANC MARTYRIS HISTORIAM MUTILET DEPRECATUR.

Hoc autem circa historiae istius finem oro, opto, et sicut audeo, ipsius etiam martyris nomine inhibeo, ne quis lectorum hanc martyris historiam, etiamsi cui forte videatur prolixior, ullo unquam tempore aut mutilet aut excurtet; prolixior dico, quia et ego ipse prolixiā fateor, quam tamen absque multorum offensa et magnorum, quorum ego hujus historici operis eram debitor, non potui evitare aut licuit: qui non solum tanti viri opera, sed et causas operum, pariter et quae ipsis inerat aedificationis virtutem instantissime a me describi postulabant. Quod totum molesta verborum brevitate stringi non poterat, tam ampla operum et virtutum magnificentia dilatatum. Et inde sunt crebrae, quas per historiam fecimus aedificationis gratia evagando, digressiones.

(Ex omni hoc libello quinque solum deficiunt plagulae sive paginae decem. In duobus tribus locis inserta sunt pauca ex Quadrilogo desumpta et uncinis inclusa. Vide plura de hoc in Quadrilogo secundo, Vit. S. Thom. supra.)

Quod si forte calumniatur quis hoc contra legem historiae, si placet indulgeat, recolens factum sic non ex multiloquio meo, sed pro voto amicorum. Nec tamen, si quis bene historiarum inspexerit schemata, hoc contra historiae legem, imo verius secundum legem. De quo tamen alias. Verumtamen etsi liber historicus hic etiam contra historiae legem sic exereverit, oro tamen et opto ne ipsum quis mutilet aut excurtet, nisi forte velit invidie tanti viri operum extenuare virtutem aut deprimere gloriam. Non, inquam, mutilet, nisi forte aliquid excipiat, quod dignum iudicet publicae in ecclesia legi, praesertim in festivo martyris natalitio die. Si novit melius, corrigat. Hoc quidem placet; sed hoc oro, ne mutilet. Pro multis dico qui de alieno et veteri suum quasi novum eudentes, persaepe, quae magis necessaria tanquam superflua resecant, aut ipsa superflua tanquam plus necessaria retinent; persaepe etiam in originali inventa juxta sensum suum interpretando et mutilando corrumpentes; nec in ipsis auctoris verbis auctoris mentem sequentes, sed ipsa ad propriam suam trabentes. Hujuscemodi quidem mutilatores, arborum et vitium, in ramis et palmis luxuriantibus resecandis, incautis putatoribus similes; qui persaepe magis fructuosa et plus necessaria resecant, dum putant se arida vel spuria tanquam superflua resecasse. Tu igitur, quisquis es, si librum historicum aliumve nosti condere, condere tuum, non facias de meo veteri et a me elaborato tuum illaborate novum: aut si non nosti condere tuum, quomodo corrigendo meum et quae tibi non videntur superflua et forte magis necessaria resecando de meo queris facere tuum? Si potes, me ipsum conveni ut me corrigam: sin autem, meo intacto, tuum novum compone: unum dico, quod utinam absque mutilatorum offensa dixerim, sive historicus sive alius liber mutilatus nunquam mihi usquequaque fidus erit, nec ego ipsi. Etiam et si ipse plauerit, semper tamen mihi suspectus est, nec unquam plenam ipsi adhibiturus sum fidem.

III. LEGENTIUM HANC HISTORIAM ORATIONIBUS SE COMMENDAT.

In hujus vero historici libelli calce ultimo id oro et supplico, ut quisquis in peregrinatione mea hanc seu finita ipsa historicum hoc martyris canticum audire desideraverit, mihi tali quali historiographo orationum et meritorum suffragiis fraternae unitatis intuitu communicare dignetur et semper derelicti sit memor. Amen.

HERBERTI DE BOSEHAM

LIBER MELORUM.

INCIPIT PROLOGUS LIBRI MELORUM.

Finita sancti viri historia velut quodam præmisso cantico, mox sicut citharizantium mos est, ad laudem martyris tres subijcimus consonantias, ex quibus formati sunt meli tres. Prima consonantia est de consimilitudine seu concordia visibilis pugnae martyris militis ad visibilem pugnam Christi imperatoris; et inde formatur melus primus. Secunda consonantia est de concordia visibilis palmae militis ad visibilem palmam imperatoris; et inde formatur melus secundus. Tertia vero consonantia est de concordia invisibilis palmae militis ad invisibilem palmam

A imperatoris; et inde formatur melus tertius: unde et libellum consonantias has citharæ instar resonantem nomine melorum inscripsimus. In quo nonnulla de post martyrium gestis continentur. Cujus quia tota pene materia de præmissa martyris pendet historia, libello historico istum melorum mox adnectimus. Finito vero isto melorum libello, adjicio in volumine hoc homiliam unam de martyris natalitio die. Et in fine voluminis postponitur funestum illud chirographi scriptum, quod prius exsilii nostri et postea martyrii causa fuit.

CAPITULA IN LIBRUM MELORUM.

1. De consonantia visibilis pugnae militis ad visibilem pugnam imperatoris: ecce melus primus.
2. De consonantia visibilis palmae militis ad visibilem palmam imperatoris: ecce melus secundus.
3. De consonantia invisibilis palmae militis ad invisibilem palmam imperatoris: ecce melus tertius.

Explicient capitula in librum Melorum.

Libello vero melorum cum tribus melis suis consummato adjicit homiliam suam unam de martyre, quæ sic incipit: *Cantemus Domine*. In omnium vero calce scriptum illud funestum chirographi instar confectum postponitur quod primo, ut mundus vidit et invidit, archipræsulis exsilii et demum martyrii causa fuit.

PRIMUS HIC MELUS

DE VISIBILI ET CONFORMI PUGNA MILITIS AD CONSIMILEM PUGNAM IMPERATORIS.

INCIPIT LIBER MELORUM

Finita vero de sancti viri vita et actibus historia hac, quasi quodam de tanti Christi athleta præmisso cantico, post quaecunque canticum hoc tempus nunc exigit, ut deinceps, post tam difficilem pugnam et tam gloriosam victoriam, ad ejusdem laudem utramque moveamus manum, utrasque pulse mus chordas, et humilis et manu fortis David tangamus citharam: ut juxta promissionem nostram supra in historico cantico hoc, quam consors, quam consonans, quam concinens harmonia sit pugnae militis ad pugnam imperatoris, agonis ad agonem, sudoris ad sudorem, poenæ ad poenam, occursum ad occursum, oblationis ad oblationem, audientiae ad audientiam, passionis ad passionem, mortis ad mortem, sub quodam melo brevi, etsi in gravibus chordis citharæ dulci tamen resonemus. Nec arbitretur quis me sudores et agones

B imperatoris et militis, seu palmae hinc inde gloriam coequare velle aut attentare hoc, sed solum conferre agonem militis cum agone imperatoris, tam sedulo, tam fortiter, tam viriliter, tam e vestigio imperatorem suum etsi non consequentis, subsequens tamen, et tam concorditer succinentis et respondentis in choro imperatore ipso Christo præcentore. Nemo autem meli hujus auditorum expectet quod de pugna interiori et invisibili quidquam resonet melus hic, cum tamen duplex pugna sit, quibus quisque militum exagitur, solo imperatore excepto. Cujus solum fuit pugna exterior, non intra se, in ipso solo carne nunquam concupiscente adversus spiritum neque spiritu adversus carnem. Verum modo nihil mihi et pugnae illi, qua sicut duntaxat homo exagitabatur miles, sed imperator Deus homo nunquam, unde interiorem illam spiritus et carnis pugnam nunc pertranseo. Et præsertim cum nunc duntaxat proposuerim conformitatem ostendere pugnae militis ad pugnam imperatoris, visibilis solum et exterioris ad interiorem et visibilem, nequaquam pugnae interioris et pugnae utpote sine qua imperator.

Et quidem in primis inter primi meli hujus initia quasi primas Davidicæ hujus citharæ chordas pulsantes altius repetamus, ut harmoniæ melus eo suavior et dulciôr etsi longior sit.

PRIMI MELI PRIMA NOTULA.

Imperator igitur mox inter prima secundum

carnem nativitatis suæ initia, cum mundo apparere inciperet, et ad mundi et inferni potestates debellandas descendisset: mox, inquam, fugit, latuit et abscondit se, exsul factus et extorris cum patre suo et matre. Et miles quidem similiter sic, mox cum se ad imperatoris tirocinium transtulit, quasi recens natus, quia novus factus ex veteri; mox, inquam, fugit, latuit se abscondens, exsul similiter et extorris et cum eo tota ejus cognatio. Rememoremus nunc præmissi historici cantici pericopen hanc.

2 NOTULA.

Imperator anno septimo ad patriam suam, ad regnum suum revertitur inimico rege jam defuncto. Et miles similiter septimo, rege persequente salubriter ut crederetur subverso et contrito.

3 NOTULA.

Imperator ab exilio reversus in septimo, annis viginti sex præsens et non fugiens, fortiter et viriliter in patria sua, in regno suo omnipotentis patris qui prælia dimicat. Et miles similiter ab exilio reversus in septimo, in patria sua, in ecclesiastico principatu suo, diebus viginti sex, ut dies detur militi sicut annus imperatori, diebus, inquam, solum viginti sex, quia ultra non licuit, nec imperator plus voluit, imperatoris prælia strenue fortiter et acriter instauravit. Cui imperator tanquam alii cuidam commilitoni suo viro prophetico diem pro anno dedit.

4 NOTULA.

Imperatori, appropinquante passione, Hierosolymam ascendenti, cum processione magna occurrit pauperum turba plurima, benedictionem illi prophetice decantantes. Similiter et militi Cantuariam appropinquanti passione sua jam imminente. Rememoremus nunc de præmisso historico cantico pericopen hanc.

5 NOTULA.

Imperator, passione sua appropinquante, ingressus templum cepit ejicere vendentes et ementes. Et miles similiter, appropinquante sua, ingressus ecclesiam, gladiatores et lanistas attentavit ejicere.

6 NOTULA.

Imperator a commilitone, magister a discipulo, ad mortem proditur; et miles similiter, non quidem ab uno, sed a multis, proditione sicut ibi et hic sacrilegio et hoc et illo, Judæis tunc suum et Christianis suum nunc pontificem occidentibus.

7 NOTULA.

Imperatoris et sacerdotis judicium mortis principes sacerdotum formaverunt, et militis similiter sacerdotis principes sacerdotum imo verius principes sacerdotes. Rememoremus et hic de præmisso historico cantico hoc pericopas has.

8 NOTULA.

Imperator, cum jam tempus appropinquaret ut de mundo transiret ad Patrem, audacter occurrit, ultro-neus se obtulit: et miles quidem quam audacter,

A quam ultro-neus hoc ipsum imperatorem suum hic e vestigio sequens paulo antedictum excidisse non arbitror.

9 NOTULA.

Imperator gladium ferri cohibuit, et miles similiter contempsit hunc, etsi alterum pro tempore et pro militie suæ debito gladium verbi exerens exercebat.

10 NOTULA.

Imperator pro suis commilitonibus oravit, et miles similiter, cum omni etiam imperio arguens, et suos, etsi non de gladio suo quo ab imperatore ipso accinctus erat, defensans.

11 NOTULA.

Imperator semetipso tradente se captus, et mox ipsius milites dispersi: et miles similiter ipso se tradente.

12 NOTULA.

Imperatore percusso dispersi prius milites reversi sunt ad propria: similiter et sui militis, percusso milite, pro corona carnis corona spiritus immarcescibilis.

13 NOTULA.

Imperator coram tondente se tanquam ovis obtulit: et miles similiter coram tondente se et coronam capitis etiam abscedente a capite: et certe dura tonsura hæc.

14 NOTULA.

Imperator corona spinea coronatus est, sed pro corona corona datur, pro corona spinea corona gloriæ: et militi quidem corona tollitur, sed pro corona corona redditur, pro corona carnis corona spiritus immarcescibilis.

15 NOTULA.

Imperator pergens ad crucem, crucem suam bajulavit: et miles similiter cum accederet suam imperatoris.

16 NOTULA.

Imperator, ab eo dispersis commilitonibus, torcular calcavit solus; miles similiter dispersit suos.

17 NOTULA.

Imperatore mortuo, commilitones sui per sacerdotum principes extra synagogam facti sunt: similiter et milite mortuo sui extra communionem quibus nostri sacerdotum principes vix etiam audent communicare adhuc. Huic pericopæ ego qui hæc scribo testimonium perhibeo, quia hoc video ipse et sentio, aliis passionis meæ sociis jam de mundo sublati, me absque patre et confratribus quasi orphano derelicto.

18 NOTULA.

Imperatoris mors, quasi veri solis occasus, mox mundo declaratur per temporalem hunc solem: et militis quidem mors quasi angelorum gaudium mox mundo evangelizatur per angelorum concivem.

19 NOTULA.

Imperator a quatuor militibus crucifigitur: et miles similiter a quatuor decalvatur.

20 NOTULA.

Imperatore jam mortuo, milites quatuor ipsius sunt in quatuor vestimenta partiti : et similiter militis.

21 NOTULA.

Imperatoris tunica, eo quod inconsutilis indivisa : et militis similiter cilicia, eo quod vilia et inutilia.

22 NOTULA.

Imperator prope Jerusalem in loco Calvarie crucifigitur : et miles in ipsa Jerusalem civitate sancta ipsius Salvatoris ecclesia decalvatur.

23 NOTULA.

Imperatoris sepulti monumentum mox pauperes et soli pauperes adeunt : et similiter ad inhumati adhuc militis pavementum cucurrerunt, cum adhuc ei pro monumento pavementum fuisset.

24 NOTULA.

Imperatore jam sepulto, etiam adhuc oculi divites propter metum : similiter et milite etiam jam occiso et insepulto.

25 NOTULA.

Imperatore mortuo, viso terræmotu et cæteris quæ fiebant, mox Filius Dei creditur et vere justus fuisse prædicatur : et mortui militis exuto mox corpore similiter miles ab incredulis et Dei filius et vere justus fuisse evangelizatur.

26 NOTULA.

Imperatoris corpus in monumento novo in petra excisa ponitur : et militis similiter in excisa petra in monumento novo, in quo nondum quisquam positus fuerat.

27 NOTULA.

Imperator post mortem suam titulo non gloriose inglorio, sed inglorie glorioso seductor vocatur : et miles similiter etiam eodem post mortem gloriat, a suis gladiatoribus, seductor etiam post mortem appellatus, sicut Imperator a crucifixoribus suis, id etiam addentes de militis corpore quod, nisi citissime a visu hominum absconderetur sub terra, mox foret illud aut equis distrahendum, aut suspendendum patibulo. Rememoremur circa istius historici cantici hujus finem quasi jam extremam pericopen hanc, et ut in fine meli quasi ab Ω ad A , a fine videlicet ad principium revertamur, Imperator siquidem iste quem miles sequitur sicut A est sic et Ω , igitur ut ad A revertamur, ipso tempore quo Imperator natus et miles renatus, imo verius sicut et Imperator natus, tunc enim martyr vere nascitur et quasi tunc primum ad esse prodit, cum ad illud quod verum esse est pervenit, quod solum esse est, præter quod non est esse quod est, et hæc sunt quæ mater colit Ecclesia natalitia martyrum vera, videlicet quæ ipsi adepti sunt vere stabilia et æterna gaudia æternorum ; tunc primo, tanquam si prius non fuissent, incipientes esse ut sint cum primo ad illud quod verum esse est sic pervenerint. Itaque quando imperator et miles natus ille in carne, hic in spiritu.

A

28 NOTULA.

Imperator quidem natus in plenitudine temporis. Et miles similiter tunc, nec solum in plenitudine temporis, sed et æternitatis. Et ut adhuc addam expressius quid, quod, ni fallor, fuit oraculum et quasi quoddam præsagium futurorum, ipsa etiam in carne nativitas militis fuit prope diem natalem secundum carnem imperatoris.

29 NOTULA.

Imperator igitur bis natus, semel ante sæcula ex Deo Deus, et in tempore plenitudinis ex homine homo. Sic et miles in eadem temporis plenitudine, prius in carne natus, post in spiritu, gemina sibi in hac temporis plenitudine ab imperatore suo nativitate concessa, sicut et imperator ipse bis natus, ut jam diximus, semel ante sæcula ex patre sine matre, postea in fine sæculorum cum temporis plenitudo venisset, natus de matre sine patre ; imperatore quidem ipso sine socio sine exemplo vindicante sibi privilegium in utraque nativitate hac. Et quidem ut jam tetigimus, similiter duplex fuit nativitas militis, et hoc in his natalitiis diebus imperatoris. Militis siquidem quemadmodum et cæterorum filiorum Adam prima carnis nativitas ex patre carnali et matre, sed secunda revera sine patre, sine matre carnali, dico, non spirituali. Sed profecto gemina hæc nativitas militis fuit in his diebus natalitiis imperatoris, his duabus nativitatibus et duobus his militis diebus natalibus quasi stipantibus et ex æquo mediantibus ipsam imperatoris secundum carnem nativitatem, et ipsius quasi medium natalitium diem. Festo quippe Beati Thomæ apostolici miles hic noctu natus a Thoma Thomas est nominatus. Itaque ante imperatoris secundum carnem natalem diem quinto die miles in carne natus, post etiam die quinto iterum, sed in spiritu nascitur. Ecce quomodo gemina nativitas militis ex æquo quasi circumstet et limitet ipsum imperatoris natalem diem, ipsam ejus nativitatem secundum carnem. Quasi in ipso et ex ipso nativitatis suæ imo nativitatum suarum, sicut et imperatoris duæ sunt, et ex ipso, inquam, nativitatum suarum tempore imperatoris commilito conformis admodum futurus et sequela consimillima præstensus et ut Thomas Thomæ patrinus filiolo adjungatur, duo isti, patrinus videlicet et filiulus, imo verius jam plene adultus filius, duo, inquam, isti Thomæ nativitatis Dominicæ et Domini in carne nati, quasi quædam destinatæ ad hoc cælestes excubiæ sunt. Quorum dies pro utriusque natalitiis tam celebres, tam solemnes, ipsum Dominicæ nativitatis diem, et ante et post, sic quasi ex æquo circumdant, ut quasi inter duos hos commilitones suos ex directo et æquo medius eorum stare videatur ipse imperator eorum, Jesus Christus. Et quod adhuc novum nec minus auditu delectabile, si tamen ad multorum assertivam relationem præ certo sic, sicut tempus Dominicæ nativitatis, sic quasi ex æquo limitatur a Thoma et Thoma, et locus Dominicæ passionis.

B

C

D

Jerusalem, quæ quasi centrum a Thoma in India et a Thoma in Anglia ex æquo distare experto dicitur. Et si ita in mundo hoc, quanto magis in regno illo communior, imo unior, imo unus cum Thoma et Thoma Christus Jesus imperator hic.

Cum nemo dubitet hæc quæ in mundo hoc visibili ab Altissimo disponuntur, figuras esse aut velut umbras quasdam et oracula eorum, quæ in mundo invisibili et principali academicorum, videlicet archetypo sub luce indeficienti et vera et veritate geruntur immobili. Ubi omnia quæ facta sunt per ipsum in ipso vita sunt. Sed de his alias. Ad præpositos citharæ melos resonandos revertamur.

**PRIMUS MELUS FINITUR HIC, ET MODULATUR
DEINCEPS NUNC CITHARAM DAVIDICAM AD
SECUNDUM**

Ecce quia præmisso historici cantici verbo, mox sicut promisimus hucusque audivimus in humilis et manu fortis regis cithara pugnae militis ad pugnam Imperatoris, quam sicut concors, quam consona, quam concinens melodia. Ecce quale canticum in nullo absonum, in nullo dissonum, pugnae videlicet Imperatoris et pugnae militis quoddam velut alternum canticum. Imperatoris dico præcedentis et præcipientis et militis imperatorem suum, etsi non consequentis, subsequentis tamen, et concorditer respondentis in choro præcentori. Hoc quippe est illud prophetae canticum pro Melech ad respondendum. Sed melus totus lugubris hic, et velut raucum et amarum totum canticum hoc, utpote in inferioribus citharæ chordis decantatum. Siquidem juxta musicæ artis legem sunt et in cithara hac sicut graves chordæ et acutæ; et graves quidem quasi raucum et spissum resonant, sed tinnunt acutæ. Graves quidem resonant cum imperatoris et militis pronuntiantur humana, ex quibus dolor et mœror, multiplex videlicet poena, et crebra et laboriosa in multis pugna et demum ipsa mors. Ecce raucus sonus et spissus. Et de his lugubris in cithara hac melus. Verum acutæ citharæ hujus chordæ tinnunt, cum imperatoris et militis prædicantur divina, ex quibus gaudium, tripudium et jubilatio, palma et palmæ corona, incorruptio ipsa et immortalitas. Ecce clarus sonus et purus, et melus de his jucundissimus in cithara hac. Et unum quidem in cithara hac, prout edocti a rege citharædo artifice manu citharizavimus melum, mœstum quidem et lugubrem et solum in gravibus citharæ chordis resonantem: utpote de tam varia et multiplici poena, et tam frequenti quam difficili pugna, et demum de tam dura, tam dira morte imperatoris et morte militis. Lugubris et gravis melus hic. Nam ut alia multa dura gravia et probrosa taceam, quid imperatoris cruce gravior? quid ignominiosius? Et item quid tali militis decalvatione durius? quid profanius? Tolerabilis tamen lugubris melus de his. Siquidem etsi compatiendum pro auditu, congruendum tamen auditui. Quia

A postea juxta musicæ artis legem; post graves citharæ chordas quæ in hujus lugubris meli modulatione inferius resonant, ascenditur et subsequitur in cithara in acutis ipsius chordis suavissimus certe melus et jucundissimus. Adeo etiam ut citharæ quæ, sicut jam audivimus, hæc usque resonabat ad luctum, postea convertatur in jubilum: unde et magistri citharædi ipsius regis veri David in hac cithara sua citharizantis vox hæc: *Ecce, inquit, ascendimus Hierosolymam et Filius hominis tradetur principibus sacerdotum et Scribis, et condemnabunt eum morte, et tradent eum gentibus ad illudendum et flagellandum et crucifigendum (Marc. x).* Ecce luctuosus in hac David cithara melus, ipso David eam in gravioribus chordis tangente et modulante sic. Sed quæ modo sic resonabat ad luctum, mox vertitur in gaudium: *Et tertia, inquit, die resurget (ibid.).* Pariter et discipulus citharædus, citharizans in cithara hac et Magistrum sequens, mox postquam doloris et luctus melum in gravioribus et inferioribus citharæ chordis citharizaverat, mox flexo plectro et eo dulciores quo acutiores citharæ chordas superiores tangens, et alterius modi melum in cithara modulans jucunde et velut cum tripudio decantabat in cithara. *Propter quod, inquit, exaltavit illum Deus et donavit illi nomen quod est super omne nomen (Philipp. n).* Ecce quia post tam luctuosum melum quam dulcis, quam jucundus, quam plenus gaudio et tripudio, mox alter et alterius modi melus ad crucifixi imperatoris gloriam et præconium inauditum mox adnectitur, qui post crucem et per crucem adeo exaltatur, cui nomen et nomen quod est super omne nomen datur, ut per tam ignominiosam poenam etiam esset sibi gratiæ quod et naturæ. Cui velut omnium monarcho ejusdem poenæ merito, ut in eodem præfacto discipuli citharædi melo subsequitur trium sæculorum mundorumque trium omne genu curvatur, angelorum videlicet, hominum, demonum. Cui et omnium credentium lingua confitetur quod post tantam ignominiam crucis ipse sit in coæquali et coeterna gloria omnipotentis Patris. Et quidem meli hujus notulæ consimiles his imperatoris similiter ad gloriam et laudem militis in hac cithara, etsi non in tam altis, tam acutis citharæ chordis resonandæ. Ecce enim quia sicut imperatori post crucem, ita et militi post decalvationem nomen maximum per universa orbis climata datur. Cui nec dubitandum a cœlestibus, terrestribus et infernalibus exhibetur reverentia et conclamatur victoria. Cui et omnis lingua confitetur quod post tam duram, tam diram capitis tusionem ipse sit in gloria Dei Patris, in gloria sui imperatoris. Unde et jam ab Oriente et ab Occidente et a finibus terræ veniunt in sepulcro dormientis adhuc adorare vulnera, invocare patrocinia et supplicare suffragia.

Igitur nunc per modicum hic expectandum, ut interim cithara nostra, quæ prius in inferioribus et gravioribus ipsius chordis de poena et pugna, de sudore imperatoris et sudore militis et morte

melum mœstum et lugubrem), etsi concordem et consonum resonabat deinceps ad superiores et acutiores chordas, quasi plectro reflexo ad alterius modi moduletur melum, ut eo dulcius quo quid altius resonet. Ut juxta promissum nostrum supra post pœnam et pugnam, post sudores et agones, post mortem imperatoris et mortem militis subsequenter nunc visibilis palma mortis militis visibili palmæ mortis imperatoris, etsi non cœquetur, assimiletur tamen. Et erunt sic juxta promissum nostrum meli subsequents notæ de his. Quas sicut Magister citharædus rex nos edocuerit, deinceps in cithara sua citharizabimus. Verum melus hic, sicut nec in gravibus, sic nec in acutioribus citharæ chordis modulandus, sed duntaxat in mediis. Nam in mediis quo intelligibilis et tutius resonabimus.

Verum unum hic istorum melorum auditores propter ea quæ sequuntur præmoneo nunc et præmunio, quod quemadmodum prior melus in cithara nostra præsonuit de imperatoris et militis in carne hac pugna visibili, ita et de visibili palma mortis imperatoris et mortis militis totus hic subsequens melus resonabit. Siquidem sicut imperatoris, sic et mortis militis duplex palma. Una quæ sub sole in terris obtinetur quæ nobis adhuc in carne militantis ex parte ostenditur, per quam invitamur ad simile. Et hanc visibilem palmam dicimus. Alteram vero palmam, quæ supra solem, quæ et omnem excedit sensum, ejus gloriam soli qui jam triumphant vident et sentiunt, invisibilem imperatoris et militis palmam dicimus. Ut igitur ad sequentia declaranda inter duas palmas has, visibilem scilicet et invisibilem, evidentissime distinguamus, imperatoris visibilem palmam mortis dicimus, quicquid sub sole in carne et per carnem triumphaliter gessit, sive ab homine corporaliter visum, sive non, totum tamen id de imperatoris visibili palma mortis reputandum, eo quod sub sole factum et in carne et per carnem et propter carnem. Et quod dico de hac imperatoris palma visibili, simile dico et de militis: quicquid videlicet ipse sub sole triumphaliter gesserit, aut potius imperator propter ipsum similiter, ad visibilem mortis militis palmam pertinere. Verum admiranda illa et inexcogitabilis supra omnem solem et supra omnem sensum, in cœlis cœlorum imperatoris gloria, per mortis obedientiam obtemperans de imperatoris mortis palma invisibili est. Et quod dico de invisibili palma mortis imperatoris, similiter dico et de militis. Qui sicut imperator per mortem, et ipse similiter per mortem imperatoris sui obtinuit gloriam. Sed quidem ante alia de visibili palma mortis militis ad visibilem palmam mortis imperatoris, post primum melum de pugna visibili eorundem et consimili, sicut ordo desiderat, subsequenter melus hic in cithara nostra Davidica resonabit.

Et profecto consequens et ordo exigeret sic, ut subsequenter post melum hunc secundum de visibili et consimili palma mortis militis ad mortem imperatoris, de palma mortis eorundem invisibili et

A consimili melus tertius formaretur. Ut ita in calce post graves et inferiores citharæ chordas, in quibus jam melus primus utcumque formatus est, et post medias ejusdem citharæ nostræ chordas, in quibus secundus melus prout rex magister citharædus edocebit, jam formabitur, in acutioribus et subtilioribus citharæ chordis melus tertius resonaret. Hoc profecto consequens et ordo exigeret sic: si quis tamen adeo edoctus in supercœlesti musica didicisset, juxta quod ipsius meli consonantia et concors harmonia deposceret in Davidica cithara formare ipsum. Quod quidem, ni fallor, sub sole nemo. De hoc quippe melo sunt arcana illa verba, quæ non licet homini loqui. Etiam si angelus norit formare hunc nescio. Melus enim adeo suavis, adeo dulcis, subtilis adeo, quod sensum omnem exsuperat. Verumtamen si verus rex noster David, magister ipse citharista, vel in modico prout dignabitur ipse edocuerit, cum ad hoc ventum fuerit, attentabo movere manus, aptare digitos, cavillas erigere, torquere plectrum; et sic pro scientiæ datis viribus conabor utcumque pulsare citharam ad resonandum et formandum hunc, illius saltem similis qui, etsi non aliis canat, dulciter canit sibi. Attentabo, inquam, utcumque formare hunc, præsertim cum, ut jam diximus, præacti ordinis ratio exigit sic. Sed in primis nunc ordine prædisposito procedentis modulata jam cithara nostra sic in mediis citharæ chordis secundum melum hunc pro scientiæ nostræ modulo resonabimus: ante alia decantantes nunc, quanta fuerit visibilis palmæ gloria in victoriosa morte imperatoris, et mox similiter quanta in militis, imperatorem suum, etsi non consequentis, e vestigio tamen subsequents et adorantis

SECUNDUS MELUS

HIC INCIPIT CUJUS EST HÆC PRIMA NOTULA.

Imperatoris igitur in primis visibilis palma mortis fuit mors mortis. *Ero*, inquit, *mors tua, o mors* (*Ose. xiii*). Similiter et visibilis palma mortis militis mundi jam quasi mortui devotio torpens, et fides velut jam mortua per militis mortem triumphalem suscitata. Super quo et inimici sunt iudices.

2 NOTULA.

Imperatoris visibilis palma mortis salus mundi. Similiter et militis salus Ecclesiæ. Super quo, ut jam dixi, et hic præ gaudio non iterare non possum, etiam et inimici sunt iudices.

3 NOTULA.

Imperatoris visibilis palma mortis et carne et spiritu mortuorum est resurrectio. Similiter et militis et carne mortuorum et spiritu. Quia et ipse, quod nostris diebus inauditum, per mortis suæ triumphanti carne mortuos visibiliter suscitavit.

4 NOTULA.

Imperatoris visibilis palma mortis in victorioso sanguine suo, de lacu in quo non erat aqua eduxit victos, in fortitudine obligatos pœnæ. Similiter et

miles in victorioso suo obligatos culpæ. Sed ut audiamus qualiter hoc, meli hujus notula decantanda morosus. De lacu quippe non aquæ sed miseræ et de luto facis eduxit vinctos, sicut imperatoris et militis victoriosus sanguis hic. Nec enim ab inventionem protomartyris Stephani tam certa, tam fide præclara plena, tam gloriose, tam miraculose gesta, quanta ad laudem et gloriam neomartyris hujus nostri novissimi. Et quidem omnia hæc ad Ecclesiæ roborandam fidem, ad peccatorum agendam poenitentiam et fidelium suscitandam devotionem; ut ita in victorioso sanguine martyris disruptis peccatorum vinculis educantur vincti in fortitudine: similiter et qui exasperant qui habitant in sepulcris. Et vere multa et miraculose gesta, quæ qui nosse desiderat, legat librum signorum editum de his; librum, inquam, signorum de his editum, et his quasi quibusdam recentium virtutum vernantem floribus, virtutibus et prodigiis insignitum.

Deus omnipotens quanta gratia sanitatum, quanta operatio virtutum tam victoriosæ mortis signa sunt: imo triumphus martyris demonstratio oculata. Et hæc quidem ex parte scripta. Nam si omnia quæ per universum Ecclesiarum orbem gesta sunt in scriptum redigerentur per singula juxta quod de magistro discipulus perhibet, nec ipsum arbitror mundum capere eos qui scriberentur libros.

5 DE POENITENTIA SACRILEGORUM MILITUM.

Verumtamen in victoriosæ mortis hujus palma visibili, inter ipsius visibiles virtutes cæteras, magnas quidem et admiratione dignas, una est quam discerno studiosius, intueor attentius et amplector devotius. Una est, inquam, illa utpote præ cæteris miræ, mirificæ et inaudite pietatis eximie plena. Quam ego jubilans et tacere non debeo, et tamen exprimere non sufficio. Nam cum martyr hic in sanguine suo victorioso diaboli vinctos, ut jam ostendimus, eduxerit, adhuc quod supra quam dici possit aut capi pietatis superabundantis plenum est, virtus effusi sanguinis ipsos suos effusores sacrilegii tam inauditi patratores tetigit et lavit eos virtus sanguinis. Lavit, inquam, eos virtus sanguinis, ut videtur, a sanguine, ipso sanguine loti quo prius adeo maculati. Et in hoc sanguine effuso imperatoris consimilis effusus sanguis militis. Siquidem ut nonnulli tradiderunt effusus sanguis imperatoris crucifixores milites tetigit, lavit et mundavit a crimine. De quorum uno tradentes hoc certius testimonium perhibent de illo qui latus Christi aperuit et continuo sanguis et aqua exivit. Cujus cum fere caligassent oculi, sanguine ab imperatoris latere emanante, casu oculos suos tetigit et clare mox vidit: hunc dicunt nominatum Longinum. Verum nos certa incertis præponentes, in hoc quod jam subdemus certissime videmus visibili palmæ mortis Imperatoris visibilem palmam mortis militis, etsi non cœquatam, assimilata tamen: imperator siquidem in victoriosa morte sua principatus et potestates exspoliavit, traducens confidenter et palam

A triumphans illos in semetipso. Similiter et miles in mortis suæ victoria. Nam ut de mundi per triumphalem martyris mortem suscitata fide et devotione, de quo præmissum, nunc taceam, in propriis præcipue occisoribus suis principatus et potestates tenebrarum exspoliavit quæ tenebant eos, eos confidenter traducens et a longe trahens. A regione dissimilitudinis quo jam procul abierant ad illam poenitudinis solitudinem cujus rex poenitens mansionem optabat. In qua et regionem dissimilitudinis fugiens elongatus manebat. *Ecce*, inquit, *elongavi fugiens et mansi in solitudine* (Psal. LIV). Et miles quidem, sicut et Imperator, potestates has palam triumphans in semetipso. In semetipso quidem, quia non in alio, sed in sanguine proprio. Et quidem palam hoc sicut et Imperator: adeo etiam palam quod cum in sæculo magni et generosi fuissent sacrilegi occisores hi multarum possessionum domini et in ætate illa inter ætates florida magis et lubrica, cito tamen post patratum sacrilegium relictis omnibus Hierosolymam profecti publicam egerunt poenitentiam. *Ecce* quia in his, sicut confidenter traducti, et palam triumphati principatus et potestates tenebrarum.

6 DE MORTE EORUMDEM.

Et quod quidem nec dubium miraculose accidisse, cum essent, ut diximus, milites strenui probi in militiæ suæ arte edocti et probati, et in ætate sua robustiori, quotquot tamen infra triennium a patrato sacrilegio rebus humanis sunt exempti, in vera et fructuosa, sicut creditur et qui præsentis fuerunt contestantur, poenitentia; præ horrore facti et sceleris immanitate, quod semper et in vita et in mortis suæ articulo ante oculos suos quasi appensum cernentes ponderabant, toto corpore et toto corde semper quasi attoniti, stupidi, dilacerati et convulsi; ab illo semper inter peccatorum patronos specialiter et incessanter, et in vita et præsertim in mortis articulo supplicantes veniam et invocantes patrocinium, in quem tantum admiserant sacrilegium

O quam sanctum, quam verum, et quam eximie pietatis plenum illud magni et vera docentis magistri dogma, quod videlicet diligentibus Deum omnia cooperentur in bonum his qui secundum propositum vocati sunt sancti: adeo ut eis etiam proficiat ad salutem in deteriora profectus et ipsum devium ipsos quodam modo ad viam ducat; et quo corruunt profundius, eo ipso multo virtutum conamine resurgunt fortius, stant viriliter et ascendunt post altius. Quibus, Altissimo mirabiliter disponente, sic ipsa, qua cæteros peccatores longe antecedunt et transcendunt, quanto abominabilior enormitas culpæ, eo ipso ipsis vertitur in majus augmentum coronæ. De talibus enim, non de communibus peccatoribus nobis nunc sermo, qui videlicet peccatores alios quadam enormitate flagitii et quadam quasi singularis peccati horrore excedentes supereminet cæteris. Quales fuerunt quatuor sacrilegi milites hi, pro quibus nunc totus sermo hic. De talibus, inquam, peccato-

ribus, non de communibus, nobis nunc sermo, ut in talibus Omnipotentis virtus illustretur gloriosius, amplexetur devotius et mirabilis prædicetur. Nam cum in omnibus sanctis suis sit mirabilis, certe in huiusmodi peccatoribus suis multo mirabilior Deus, quanto virtuosius et misericordius est tam fortia talium peccatorum dirumpere vincula. Qui profecto dum quotidiana et consueta hominum peccata cæteris peccatoribus similes, etsi gravia et grandia perpetrent, dissimulant tamen, pertranscunt, non advertunt, non ad se redeunt, non se evigilant quasi ea admittentes quæ et cæteri hominum, nec ipsi abominantes alios, nec abominati ab aliis; quin potius eo ipso peccatores peccatoribus confederati magis utpote peccatores peccatoribus similes. Verum cum forte hi, humani generis inimico instigante sic, cæteros peccatores, quibus ante similes fuerant, novi et inusitati alicujus excessu transcendunt, quasi communem et usitatam peccandi regulam spatiosam excedentes, ipsis etiam sui prius similibus peccatoribus abominabiles fiunt. Et ita inusitati peccati profana novitas, præ abominatione et horrore flagitii, novis his profanis peccatoribus terrorem pariter incutit et dolorem. Unde et sæpe fit, ut ad se redeant et præ novi horrore et confusione flagitii vitam suam etiam ante actam ante se ponant; et in his quæ ante, cum cæteris essent peccatoribus similes, ipsi admiserant, quæ tamen, ut diximus, prius dissimulaverant, graviter se offendisse recognoscant, sanguine juxta prophetam tangente sanguinem sic, et Deo quidem divitiarum virtutum Domino in huiusmodi peccatoribus peccatissimis tam potentialiter quam mirabiliter operante sic ut sanguis sanguinem tangat, et sic novo quodam modo quia velut quadam pietate sæva seu sævitia pia sanguinis abstergat sanguinem, ita in gratia sua admirabili et virtute multa Altissimo qui solus mirabilis, quia solus facit mirabilia, per peccatum peccatum, tanquam regno Satanæ in se diviso, per Satanam Satanam expellente. In quo et in nullo magis a potestate lucis potestas tenebrarum debellata eluditur. Videlicet ut cum prædo ille gentium totam acquisisse videatur sibi prædam, tunc perdat totam. Nemo autem subcogitet, submurmuret nemo, a potestate tenebrarum potestatem lucis e diverso debellari interdum et eludi similiter, ex diverso obijciens ipsos inter Domini agmina robustiores milites in charitate radicos et fundatos, per potestatis adversæ virtutem dolosam seu potius dolum virtuosum, de ipsius Domini Sabaoth exercitu plerumque quasi vi raptos captivos duci et tanquam lucis potestate in his evicta in adversæ potestatis transire satellitium. Nemo, inquam, sic cogitet, nemo obijciat hoc, quasi valeat hoc in contrario simile, nec enim valet. Longe quippe hic ratio alia reformans judicium aliud. Sed de hoc alias. Interim ad sacrilegos nostros, unde meli nostri jam aliquandiu notulas nescio quot in cithara nostra resonavimus, quasi digitis et plectro citharæ reflexis revertamur. Præfacta quippe ma-

teria de pugna potestatis lucis et potestatis tenebrarum alium desiderat melum isto forte sicut acutorem et longiorem. Ad sacrilegos ergo Deo volente et Deus velit sic Deo nunc reconciliatos revertendum. Quorum certe peregrinatio Hierosolymitana, quorum pœnitentia publica, quorum et mors tam cita, ut hucusque decantavimus, sic erat.

Quorum tamen unus quorundam pravorum consiliis moras in dies nectens nec quam cito alii Hierosolymitanum iter arripiens, in cismarinis acturum se pœnitentiam sperans, cum in regno regis Siculi apud præclaram illam civitatem quæ Consentia dicitur in infirmitatem decubisset extremam, infirmo mox etiam ante mortem cœperunt corporis membra computrescere, ita ut cum tabe caro ipsa quæ nervos tegebat et ossa, ab ipso infirmo frustatim dilacerata et convulsa projiceretur in aræ medium nervis ac discooptis et ossibus. Et præsertim brachiorum et manuum caro ossibus et nervis vix adhærens, et quasi separationem desiderans, de facili ut videbatur et absque difficultate, a funesto illo carnifice militæ, utinam tamen vere pœnitente, projiciebatur quasi sponte sua resolvens se sic; ipsa ut videri poterat, quasi gemebunda, quasi indignata et verecunda, quod post tantum nefas manu hominis et brachiorum ministerio perpetratum deinceps in compositione humani corporis foret. Miser tamen ille, dum ita se ipsum vivens discerperet, convelleret, dilaceraret et projiceret sic, pii et gloriosi neomartyris indulgentiam, suffragium et patrocinium cum summa contritione gemitibus et suspiriis inenarrabilibus incessanter implorabat. Jam supra nominatus in historia hac, Willelmus de Traci, hic erat, Deo ultionum Domino clamantem ad se militis sui sanguinem justissime ulciscente in isto præsertim sic; utpote qui, sicut supra in libello hoc diximus, alios provocare audens primus et ante alios super christi Domini caput gladium vibrans ad ictum tam profane, tam impie ferire nequaquam verius est: unde et justissimo Omnipotentis judicio factum sic, ut ipsi contra naturæ legem, etiam vivo adhuc, computresceret quæ vibraverat gladium et manus simul et brachium. Et quidem jam supradictæ civitatis episcopus certissime retulit sic, Willelmi illius in hac infirmitate confessor. Et ut ad alios præfatos sacrilegii complices, unde cepimus, revertamur, ipsorum quotquot et talium, ut diximus, miranda, quia certe miraculosa, nec dubium corporum mors per tam modici temporis intervallum, triennii videlicet, sicut jam supra diximus, sic erat in tam brevi, ut nec unus quidem ex eis superfuisset. Altissimi super eos sicut creditur, etsi forte quod ipse velit, miserante clementia, ad terrorem tamen et miraculosam militis sui ultionem justitia omnes in brevi prosternente sic, ut viri hi sanguinum etsi pœnitentes, ut descripsimus, tamen juxta verbum Domini dies suos non dimidiarent. Unde et super his duplex calcantium celeuma in medio hoc citharæ melo concinendum in medio. Juxta quod hi

virī sanguinum et in conversione sunt contriti et in contritione conversi corde, contriti corpore.

O Deus ultionum Dominus! O Domine nihilominus misericordiarum Pater! Quis novit prae timore tuo iram tuam dinumerare? Aut item quis potest pro bonitate tua misericordiam tuam mensurare? Qui sic convertis ut conteras et sic conteris ut convettas, misericordiae et veritati sic quasi aequa lance servans utrique quod suum est. Et ecce quia per vulnera tui martyris super ipsos vulneratores viscera tuae miserationis effudisti. Et item propter vulnera tui martyris vulneratos ipsos ira indignationis tuae confregisti. Hoc est celeuma duplex in cithara nostra concinendum. Hoc profecto modulati nunc in hac cithara meli duae notulae concerpandae. Grata certa melodia super misericordia tua et veritate tua, Domine, gravibus nunc citharae nostrae chordis et amoenis intermistum alternantibus sonum. Graves quidem resonant propter eam quae decantatur tibi veritatem iustitiae, acutae vero et amoenae propter benignitatem misericordiae tuae. Illic enim in corde conversis ad te misratio tua pia: inde vero in eisdem corpore contritis a te indignatio tua iusta: ut ita in melo hoc misericordiam et iudicium cantemus tibi, Domine.

Jam quidem de potestatibus tenebrarum et principatibus per visibilem palmam mortis militis, sicut et per visibilem imperatoris triumphalis, et qualiter melius hic noster propter ipsius hic notas prolixiores aliquandiu productus est, verumtamen de visibili palma mortis militis ad visibilem palmam mortis imperatoris in hoc eodem melo decantemus adhuc expressius quid.

7 NOTULA.

Imperatoris certe visibilis palma mortis, sicut potestates aeras et terrenas debellavit, leges et statuta subvertit. Similiter et visibilis palma mortis militis, sicut aeras, ut jam ostendimus, et terrenas debellavit, ut nunc ostendemus. Ecce enim quia reges mundi et principes aut per se ipsos, aut si curis terrarum occupati ipsimet nequeunt, per legatos suos ab universo ecclesiarum orbe circumquaque veniunt, vulneratum sepultum visitant, adorant vulnera, offerunt munera, implorant suffragia, et sperant patrocinia, cortissime fidentes quod per aperta vulnera martyris effundantur ipsis viscera divinae miserationis, aperiatur janua salutis, et omnipotentis protectionis manus non claudatur. Et ut de vulnerati corpore et de occisi vulneribus, et de praetactis etiam ciliicis quae totum agonothetae militis corpus obtegebant, nunc praeteream: certe novit mundus et jam videt quia mundi reges et reginae in sericis suis et holosericis in veste sua peregrina in hyacinthinis suis involucris et polimitis principes et quotquot aulici purpurati et amicti auro primo gaudent, et cum summa etiam suscipiunt devotione, si forte vel de semicinctis viri, sanguine ejus vel etiam sudore infectis modico, seu etiam si corpus quocunque modo tetigerint, sibi

acquirere valeant. In quarum etiam acquisitione eriguntur altaria in auro et lapidibus pretiosis constantur scrinia, quinimo et lata et spatiosa fundantur monasteria; dotantur et ditantur oppidariae per universum ecclesiarum orbem ecclesiae multae. Nam quod necdum audivi, nec legi, ego non arbitror aliquem praeslantem in toto exercitu Domini Sabaoth, post triumphum suum in mundo hoc, per mundum universum, tantam et tam citam gloriam consecutum. Doceat nos alter qui aliter aut audivit aut legit de his. Adeo quippe cita, imo adeo citissime, mundo gloria neomartyris declarata, ut a penultima orbis insula in occidentali oceano cita per ipsum angelorum concivem, in tam brevi, sicut in historia docuimus, terrae sanctae nostrae habitabilis, vel, ut tradunt, mundi totius umbilico confestum sit evangelizata, mox volans sic super pennas ventorum. Et vere sicut magna et cita gloria. Thomas quippe nudius tertius homo erat similis nobis passibilis; et ecce quia hodie quadam dexterae Dei mutatione admiranda vulnerati in sepulcro dormientis adhuc mundus adorat vulnera, et etiam in semicinctis gloriatur quae utcumque occisi corpus tetigerint.

Revera ex saevitia illa inaudita et sacrilegi facti horrore motus Omnipotens et tam fortiter, tam humiliter tolerantis militis ineffabili compassione evictus, et illos tam subito contrivit et istum tam cito exaltavit; nec iram suam, nec in ira sua miserationes suas ultra aut dissimulare valens aut continere, miserator et justus Dominus. Siquidem in humana illa supra homines saevitia citam vindictam et diverso inaudita illa in homine patientia citam palmae gloriam accelerabant.

O imperator bone Jesu, quam mirabilis es tu in militantium tibi sanctorum tuorum exercitu, sed adhuc amplius in tuis et tuorum poenis quas in agone hoc militari tolerasti mirabilior, nisi quia in te ipso et tuis totum tolerasti et adhuc quotidie toleras ob id solum ut sanctifices tuos; adeo etiam sanctifices, ut non solum per tuas et tuorum poenas similiter tuas sancti tui sanctificati sint, sed etiam ipsa poena sancta, mors ipsa sancta et pretiosa, quae interimit sanctum. Sancta quidem mors ipsa et pretiosa quae tamen et poena peccati est et peccati stipendium. Stipendium enim peccati mors (Rom. vi), ait Magister. Verum imperatore in commilitonibus suis mirabiliter et potentialiter operante sic, hoc peccati stipendium transit in arma suorum militum non quidem carnalia sed potentia Deo. Et fit eis ad palmae meritum quod propter peccatum humano generi est indictum supplicium. Poena culpa fit eis porta iustitiae. Et haec quidem porta Domini. Etenim Domini Domini exitus mortis, et justus Domini intrant per eandem utpote quae iustitiae porta est, per quam justus intrant ad gloriam. *Aperite mihi, inquit, portas iustitiae, et ingressus in ea confitebor Domino (Psal. cxvii).* Et addidit: *Haec, inquit, porta Domini, justus intrabunt in eam (ibid.).* Sed imperator tam clemens, in cujus maiestate tanta clementia

commendabilis, eo quidem commendabilior quod in tanta potestate sit; quid dico de poena, quid de morte vel tuorum vel tua, per te sic sancta et sanctificata sic, cum etiam loca ipsa et tempora et ipsa etiam instrumenta malorum ad tuorum gloriam tu una cum tuis sanctifices, sed ut adhuc etiam plus adjiciam quidquid sanctum tetigerit aut fuerit circa sanctum, sit aut vestis aliudve, sanctificatum habeatur? Quod memoro ista sanata probat simbriae Dominicae tactu. Si quidem imperatoris simbriae tactus etiam ante exitum suum de mundo sanavit infirmam. Similiter et semicintiarum militis tactu sanati multi et infirmi et infirmæ post excessum suum de mundo. Et quod etiam præ cæteris et gaudium pariter parit et cum jucunditate miraculum, sanctificatur etiam sancti corporis transeuntis umbra transiens. Cujus veritatem dicti transeuntis Petri infirmos obumbrans umbra demonstrative oculo ad oculum probat. Sed de hujusmodi sanctificationibus et sanctificationum causis plenius alias. Ad potestates terrenas per visibilem palmam mortis militis visibiliter triumphatus revertamur: creptam meli istius notulam super his consummare desiderantes, plenius videlicet expressius et nominative in aliquibus potestatibus terrenis id ipsum quod cœpimus demonstrando.

Sunt quippe duæ inter cæteras mundi potestates magnæ et præclaræ, duo videlicet reges magni et illustres nominative hic exprimendi.

DE CHRISTIANISSIMO FRANCORUM REGE PEREGRE PROFICISCENTE AD MARTYREM.

Primus inter cæteros et præ cæteris piissimus ille et Christianissimus divæ recordationis rex Francorum Ludovicus, sæpe et sæpius, ut dignum est, in historia nominatus, ex cujus etiam et Deo et mundo tam sancti, tam clari et grati crebra insertione nominis totam historiam sacratorem reputo, et eo amplius illustratam post futuris etiam sæculis gratiore futuram non dubito. Qui, ut in libello historico satis supra ostendimus, quod tamen ad tanti regis clementiam et gloriam immortalem satis ostendere non sufficimus, inter reges rex ipse singularis, cum nos jam exsulantes vagos et profugos et quasi locum in mundo non habentes mundus non abjecisset, solus ipse regia motus clementia in augustali tam magnificentia quam munificentia nos excepit. Demum vero post martyris de mundo excessum, mundo cito post propter signa virtutum et prodigia quæ fiebant tropæum martyris prædicante, rex ille pius exinde motus, mox quod inauditum est, reges videlicet Francorum transisse maria, nisi forte ad externas seu fidei inimicas nationes debellandas, ipse tamen tam potens rex, solo pietatis amore tractus et evictus, exivit regnum, ventis se commisit et undis et insulam in corde maris sitam intravit: ob id solum ut eum quem exceperat et exhibuerat exulem adoraret vulneratum, in sepulcro dormientem adhuc: et adorans ea quæ talem et tantum regem decebant obtulit mu-

nera, vinum videlicet et aurum; aureum scilicet calicem et vini centum modios perpetuo ad natalitium diem martyris singulis annis celebrandum in lætitia; in hoc pius ille rex sive in vita sive in morte sua pro se et pro regno suo beato martyri quasi annum tributum solvens.

Et talem profecto regem talis oblatio decuit, vini dico cum calice aureo. Et revera, ni fallor, mystica oblatio hæc etsi rex ipse qui offerebat forte ignoraret mysterium. Revera mysterium illi offerre vinum et aurum qui propter justitiæ veritatem calicem salutaris accepit. Et in hoc etiam carnis natalitio imperatoris militis martyris spiritus natalitium simile.

8 NOTULA.

Imperatori quippe mox nato in carne aurum, thus et myrrha a regibus offeruntur in mysterio. Et similiter militi jam vere nato in spiritu a regia potestate dona mystica.

9-14 NOTULÆ.

Imperatori offeruntur ad declarandum natalitium suum carnis: et similiter militi ad illustrandum suum natalitium spiritus.

O magna opera Domini! O opera inexquisite exquisita in omnes voluntates ejus! Quis crederet visui nostro, regem videlicet tantum exisse regnum, transisse maria, nescio quorum humilium parentum occisi filii adorans vulnera, offerens munera, et tam humiliter, tam devote pro se et pro regno quærens patrocina! vere non est similis tui in diis, Domine, non est secundum opera tua, qui solus mirabilis, solus facis mirabilia. Unde et merito in propheta specialiter vindicæ admirabilis nomen proprium tibi: *Et vocabitur, inquit, nomen ejus Admirabilis (Isa. ix):* qui humilis lignum sublime et exaltas lignum humile: qui siccas lignum viride, et lignum aridum facis frondere. Tu, Domine, locutus es et facis sic.

DE ILLUSTRATI ANGLORUM REGE TRIUMPHATO PER MARTYREM.

Sed quid? De quadam alia mundi potestate inclyta et immensa in victorioso martyris sanguine triumphata, consequens nunc meli nostri notula in cithara nostra resonabit, nisi quia prior illa de mundi potestatibus, de qua in proxime præcedenti meli notula decantavimus, non tam triumphata, quam sponte humiliata prædicatur: verum potestas hæc, de qua nunc meli hujus notula resonabit, ad omnipotentis imperatoris gloriam et commilitonis martyris sui palmam illustrandam, et ad ipsius triumphatæ potestatis Deo favente coronam immarcescibilem per visibilem palmam mortis militis palmam est triumphata. Quæ profecto potestas mundo tam clara ne silentio meo obumbretur diutius, hæc tantæ et tam magna potestas palmæ, et tam fructuose, quam gloriose triumphata. Henricus illustris rex Anglorum est magni illius Henrici quondam Anglorum regis nepos. Quem quidem et præsens et sæcula post futura perpetuo jubilent,

et in orbe Britannico regem quasi unicum et singularem et ceteris qui ante ipsum incomparabilem conclamarent, si non tamen nescio quo Dei iudicio, ira pessima consultrice et pravis instigantibus sic, ex profano illo facto patrato in martyrem maculam dedisse judicaretur in hanc tantam gloriam suam. Iste quippe Henricus, gentis firmamentum, stabilimentum populi, fulcimentum infirmorum, pauperum tutor, superbiorum baculus, malleus tyrannorum, rex pacis et columna iustitiæ; quem crescere fecit Excelsus quasi terræ pulverem et ut stellæ exaltare semen ejus et hereditari illos a mari usque ad mare; cujus profecto ut novit mundus et contestatur adhuc hic imperatoris excelsi singulariter miles et martyr, dum adhuc in carne, in floridis juventutis suæ annis militaret, tantam, sicut in libello historico supra satis ostendimus, adeptus fuerat familiaris dilectionis gratiam, ut in aulico cancellariæ officio quasi co-Augustus coregnaret Augusto. Sic erat inter duos quasi regum unum, quia cor unum et anima una. Verum, ut longiora nunc brevius percurram, utpote quæ in historia prolixius præstensa sunt, multis aulicorum et aliis multis et præsertim nostri cæciliæ virtis, clericis dico et pontificibus, mutua illius dilectionis et pacis, pacis totius et dilectionis inimico instigante sic; istud quod indissolubile videbatur unitatis vineulum ruptum est, rege tam diligente et tam dilecto adeo adversus tam charum suum, tam dilectam suam, succensio quasi clibano a coquentibus, ut a pravis male consultum animi sui calorem intra se coquina non posset; quin potius coram præfatis illis militibus carnificibus et aliis etiam aulicis palam, in vehementi iræ suæ impetu, tam dura, tam aspera adversus tantum dilectum suum et tam charum intonuit, ut auditores milites concussi ex his morte eum tollerent et occiderent, arbitantes se ex hoc gratum regi obsequium præstitisse; quod tamen ut pervenit ad regem, sicut qui præsentem fuerunt contestantur, non potest excogitare cor, non lingua proferre, non os effari, quantum mox ex horrore facti fuerit stupidus et attonitus, quam perturbatus, quam totis intimis concussus visceribus et excussus, se quasi dilacerans et dilanians, adeo etiam stupidus et attonitus ut qui viderunt secretus et familiaris sic, ne verteretur in maniam aliterve a tristitia absorberetur, vehementer formidarent. Inter alios, qui tunc regi familiariter astiterunt, vir omni sanctitate præclarus, venerabilis episcopus Bajocensis Henricus, mihi, qui hæc scripsi, retulit sic:

QUOD PER TOTAM HISTORIAM AUT METU AUT GRATIA NIHIL PRÆTERMITTAT DISCIPULUS QUI SCRIPSIT HÆC.

Et, ut hic semel hoc interserendo dicam, et semel hoc dixisse sufficiat, præsertim cum de rege gentis meæ nunc sermo sit, teste mihi Deo et martyre suo, quibus servire desidero in calamo meo hoc, de tota martyris historia, prout desuper datum, exarata, nihil est quod ut plerisque moris est,

A aut meticolose excurtem, aut metu subiceam, aut gratia demulceam, aut assentatione deliniam. Turpe quippe, periculosum et ignominiosum admodum, discipulo præsertim magistri martyris, aut martyri debita veritatis præconia subicere aut ejus inimicis exquisita assentationis blandimenta consuere, quibus suam sævitiam tegant: turpe, inquam, et ignominiosum discipulo martyris consuere hæc, in illa præsertim historia quæ de ipso textitur: ubi relegato omni metu et assentatione fallaci et vana gratia, sola contineri debent veritatis martyria, sicut et ipse pro veritate martyr est. Sed ad regem nostrum revertamur, cujus certe nec per gratiam, etsi rex meus et dominus sit, nec pro martyris iidem domini mei et magistri testimonio subornato, sciens et prudens contra conscientiam meam, per totam hanc martyris historiam, aut mendacium profero aut metu veritatem abscondo quod esset sub modio lucernam ponere, quam profecto veritatis lucernam ab initio, cum martyris ordiri cœpissem historiam, non proposui quidem sub modio ponere, sed super candelabrum, ut omnibus luceret qui in domo Ecclesie sunt.

Sed ad regem nostrum revertendum adhuc, cujus revera famæ expedit immortalis, ut a martyris discipulo scribantur hæc: qui alias forte in sæculis post futuris mortem directo præcepisse judicaretur et super hoc poenitentiam non egisse. Solent quippe in humano genere detrahentium linguæ toxicatæ ex quocunque mali seminario multum mox per totum corpus effundere virus et inficere totum. Sed rex profecto super eo quo excessisse se accusabat, ut jam docebunt sequentia, humiliter et supra omnium fidem devote poenituit, non, ut ipse rex mihi martyris discipulo qui scripsi hæc confiteri dignatus est, quod martyris mortem directo præcepisset, quod absit a tanta mundi potestate et mundo tam clara, sed quia etsi non per ipsum, pro ipso tamen et pro ejus favore mors hæc. Ego quippe discipulus qui scripsi hæc, quadam semel nacta et loci et temporis occasione, zelo iustitiæ attrahens spiritum et audens sic, domino regi secreto inter nos tantum prius obsecraui quod videlicet mors hæc domini mei pro ipso fuisset et per ipsum. Ipse vero, in nullo ut notari posset motus, in omni tranquillitate respondit, et ut ipsius verbis ejus utar: « Tuum, » inquit, pro « dolens concedo, sed tuum per audacter renuo. » Et mihi quidem rex sic. Solus Deus et ipse novit. Si solum excesserit sic, (et hoc velit Deus, ne amplius!) nimis quidem et proli dolor! quod etiam sic. Et adjectit tamen qui mihi super hoc loqui dignatus est rex, etiam quodammodo per ipsum fuisse mortem hanc, utpote qui in ira sua coram aulicis et concubiculariis militibus suis tam dura tam dira locutus fuerat, ex quibus citæ mortis viri dederit occasionem. Tanta potestas meæ parvitati accusabat se sic, non excusabat: sed intermittamus nunc de hoc, id in primis totis cordis nostri visceribus intimis supplicantes, quod si forte præcipit fieri sic,

quod a tanto rege absit nec est credibile, Deus A ignoscat. Si vero absque præcepto qualitercunque causam dederit, fructuosam ei poenitentiam Deus inspiret. Cujus poenitentiae actionem, de qua jam coepimus, amodo juxta superius promissum nostrum, prosequemur.

Et ut jam supra tetigimus, mox ut tam lethalis facti verbum ad regem pervenit, afflictus est afflictione magna. Et in nominatissimo illo Normanniae oppido, quod Argenteon dicitur, in quo primum accepit hoc, per dies quadraginta sedit moriens, quo toto illo poenitentiali dierum numero acerbiorum multo plusquam mortuorum luctum fecit. Lugentium cibos comedit, equum non ascendit, nulla jurgantium causa, nulla agendorum consultatio, nulla pulsantium querela ingrediebatur ad eum, nulla tot terrarum regendarum sibi cura proponebatur, omnia tunc quasi postponenti præ dolore. Sedebat quippe solitarius, super hoc quod acciderat ingemiscens semper et dolens, et sæpe et sæpius iterans heu heu accideris sic!

DE IRA REGUM.

O quem pestiferum malum et ipsis regibus et toti genti inimica regum ira, non se reprimens, sed mox erumpens in furorem! Cujus concitati sic impetum etiam rex ipse ad se reversus cohibere desideravit, persæpe tamen quasi acceleratim per longas regum manus volans irrevocabilis est, rege etiam jam poenitente et ut revocaretur volente. Multi quippe et fere quotquot in mundo sive per fas sive nefas, qui regum quasi cujusdam generis deorum terrigenarum non capteant gratiam, non vereantur offensam; adeo etiam quod inter hos multi qui etiam non jussi, mox cum regis beneplacitum vel ex modico aliquo suspicionis signo conjectant, sive bonum sive malum, parere accelerant et quisque alterum prævenire in parendo; interdum etiam atrociora non jussi, quasi jussi, committentes, arbitantes se in his gratum obsequium præstatuuros. Verbi causa nimis vicina est. Tales quippe sacrilegi nostri occisores, qui tam temere, tam præpropere, tam præsumptuose et tam perverse regis verba indignabunda interpretantes tantæ et mundo tam clare potestatis nomini notam, tantum ruinæ scandalum et tantam doloris materiam ingesserunt.

REPETIT DE IRA REGUM.

O quam cavendum, quam caute agendum, potissimum regibus, ut tunc maxime cum irati, nec enim est ut non irascantur, eo frequentius quo sublimius positi sunt, tunc, inquam, maxime teneant se, reprimant se, ut qui sunt capita gentium et rectores populorum, tunc præsertim se ipsos regant, ne qui omnium est dominus iræ servus effectus regnet tamen super omnes. Hoc est enim juxta sapientem de tribus unum per quæ terra movetur, quod etiam inter tria quasi pessimum primum ponit: *Per tria*, inquit, *movetur terra, per servum cum regnaverit, per stultum cum satiatu fuerit cibo, per odiosam mulierem, cum in matrimonio fuerit assumpta* (Prov.

xxx). *Per servum*, inquit, *cum regnaverit*, hoc est unum inter tria quod et primum ponit; et ideo primum quia, ut diximus, pessimum, quasi præ ceteris inter gentes pressuræ primatum tenens: *Per servum*, inquit, *cum regnaverit*: profecto per servum, sed servum dico hic non tam glebæ quam iræ. de illa quippe terrena seu nativa glebæ servitute nil curandum, sive regnet sive serviat. *Servus*, inquit, *Magister, vocatus es, non sit tibi curæ* (1 Cor vii); summo igitur cavendum opere, præsertim regibus, ut tunc maxime cum irati, nec enim in regum potestate est ut non irascantur; tunc, inquam, maxime cum irati, sic irascantur ut non peccent. Unde et regum unus: *Irascimini*, inquit, *et nolite peccare* (Psal. iv); quasi dicat, quia etiam in regum potestate non est non irasci, sic tamen irasci permittitur, ut iram peccatum non sequatur, videlicet ut interioris illius calor ex mortis pœna coalescentis et nati non exterius flamma exeat, non furor erumpat.

Æstimet potius rex mox, cum indignationis suæ flamma exierit, mox totum regnum incensum. Et hoc est quod jam tetigimus et hic iterare non superfluit, regis mansueti dogma sæpe et sæpius vim iræ experti: *Irascimini*, inquit, *et nolite peccare*; quasi ne iræ servi efficiamini et sic etiam servi peccati, et peccatis post iram. Quia sic regnabit iræ et peccati servus, si rex peccet post iram. Per quem, profecto regem servum terra movetur, ut docet sapiens, et quotidie videmus sic et patimur hoc. Et vere profecto scriptum, quod et ipsa quotidiana experientia docet, quia secundum ligna servæ sic ignis exardescit, et secundum virtutem hominis, sic iracundia illius erit, et secundum substantiam suam exaltabit iram suam.

O quanta mala ex regis nostri iræ, toxicatis invidorum linguis stimulantibus, sicut per totam historiam liquet, et regno et sacerdotio pervenerunt! Ita enim, sicut verissime scriptum est: *Justitiam Dei non operatur* (Jac. i). Sed misericors et miserator Dominus ab hac regis servi sui iræ suam iram avertat, et iræ illius excessum omnem indulgeat.

DE NUNTIIS AD ROMANAM ECCLESIAM A REGE MISSIS POST MARTYRIUM.

Et quidem poenitentis regis hæc erat salutis providentia. Rex per totos quadraginta dies solitarius, ut præstendinus, sedens et moriens sic, confestim in primo sacrilegii auditu viros magnos et industrios ad Romanum pontificem Alexandrum tertium destinavit, ab ipso tanquam summo Ecclesiæ patrono et Patre omnium consulens quid agendum, et sicut credibile, humiliter, in quo excesserit confitens. Verum quia confessio, sicut nec per scripta nec per personas interpositas fieri solet aut debet, et viva vox confitentis quo plus augeat devotionem, eo plus habet virtutis, vir apostolicus a latere suo duos cardinales direxit, piæ memoriæ magistrum Theodinum Portuensem episcopum cardinalem, et qui adhuc superstes est Albertum sanctæ Romanæ Ecclesiæ cancellarium, viros certe omni religionis san-

etitate et scientia præditos; qui et episcopus regni ob supra huic insertas historiarum causas anathematizatos vel suspensos canonice absolverent, et regis postulantis saluti providerent. Itaque ad regis et totius Ecclesiarum consolationem hi missi. In quorum adventu episcopi absolutionem quidem, quam non meruerant, de clementia viri apostolici et eorum qui missi fuerant obtinuerunt. Rex autem id, super quo in morte martyris se excessisse accusabat, devote et humiliter confitens in facie Ecclesiarum emendatas iuravit postea se infra triennium erucem faciendum et Hierosolymam profecturum, nisi per dominum papam staret aut per ejus catholicos successores. Et quidem regis poenitentia sic erat tam devota tunc et tam humilis, ut ipsi cardinales videntes sic illius in psalmigrapho veritatem versiculi missis paragrammatibus contestarentur: *Qui respicit, inquit, terram et facit eam tremere, qui tangit montes et fumigant (Psalm. ciii).*

DE PRIMA DISSENSIONE ORTA INTER REGEM PATREM ET REGEM FILIUM.

Verum modico exacto tempore, quarto, ni fallor, quintove circiter anno a martyrio et a poenitentia regis hac, inter regem patrem et regem filium suum, qui, ut supra in historia ostendimus, per regni episcopos in injuriam metropolitani sui tunc exsultantis, rege patre sic volente, in regem unctus est, profana seditio et bellum nimis intestinum est exortum, adeo ut adversus regem patrem et sui fere quotquot, et etiam alieni, Francorum videlicet rex, in potentatu suo magno cum filio rege foedus jungentes insurrexerint. Regis terræ et regna et nationes et populi tam sui, ut diximus, quam alieni, adversus solum regem patrem arma moverunt.

DE PRIMA PEREGRINATIONE REGIS AD MARTYREM ET CAUSA PEREGRINATIONIS.

Igitur rex pater quid faceret? quo se verteret? ad quos declinaret? Nusquam fides tuta, imo nulla, quia periit. Et foris pugnae et intus timores. Quod igitur solum tunc supererat, humano deficiente, rex solum ad divinum consilium et auxilium se convertit. Audiens quippe in dies et certissime credens, mundo jam contestante et cum admiratione conclamante, virtutes, signa et prodigia quæ Cantuariæ fiebant per martyrem, de mutua inter ipsum et martyrem jam pridem gratia, sicut spero, non immemor, eo etiam fiducialior quod de excessu suo in martyrem gauderet et speraret se poenitentiam egisse, a Normannia exivit. In qua tamen tunc potissimum quasi totus erat fervor debacchantis rebellionis. A Normannia, inquam, exivit tunc, et illam, sicut et alias dominationes et principatus suos transmarinos, quasi in solius protegentis Dei et martyris sui manu relinquens omnia, confestim sola divinæ protectionis spe adversus hostes suos armatus transivit maria, et, omni occasione et dilacione postposita, Cantuariam venit.

QUALITER REX PEREGRINUS CANTUARIAM INTRAYERIT. Et incredibiliter humiliatus et devotus, mox, an-

A tequam civitatem intraret, ut ipsam vidit et metropolitanam ecclesiam in qua martyr requiescit, mox, inquam, se exinanivit, et potestas tanta pauperrimi servi mox formam induit, nudis pedibus et toto etiam nudato corpore, præterquam vili quadam tunica super nudo amictus. Et pedes et nudus sic palam in die et in omnium conspectu civitatem intravit. Et per vicos et plateas civitatis luteas, tanquam de plebis vilissimorum unus, abjecte sic incessit. Ecce David alter, qui tam dilecto filio suo quasi Absalone altero ob peccatum ipsum persequente, nudis plantis, sicut primus David civitatem exivit, et iste secundus ingreditur. Et ita in suspiriis et gemitibus, tot gentibus et nationibus tremebundus, ipse timens et tremens, martyr adit sepulturam.

B Ubi tota illa adventus sui die et nocte sequenti jejunus et pervigil ante martyrem pernoctavit. Ni fallor, nec enim dubito, sicut gemebundas et piæ ante martyrem, quem adeo dilexerat et a quo tantum dilectus, orationibus et patrociniis in tam arcto toto cordis affectu se commendans; quod mox rerum exitus demonstrabit. Et ibidem etiam coram martyris sepultura, quasi coram ipso martyre sancto illo et venerabili fratrum cætu convocato, a singulis fratrum virgæ disciplinalis percussiones singulas velut quasdam secundas quadragenas apostolicas, imo regias, novas et sicut arbitror usque tunc inauditas accepit.

C QUOD REX CONSUETUDINES ILLAS MALAS QUI EXSILII ET MARTYRII CAUSA FUERUNT ABDICAVERIT.

Consuetudines vero illas in scriptum redactas, quæ inter martyrem et ipsum totius fuerunt dissensionis materia, et postea in exsilio confessoris et demum in morte martyris causa, rex tanquam vere poenitens et justificatus jam abdicavit malas et iniquas, deletis sic pro martyris devotione per virtutem martyrii quod adversum nos erat, clerum dico, chirographo decreti quod erat contrarium nobis. De quo satis supra in historia. Bonas vero solum observandas sanxit in posterum. Quarum tamen abdicatarum sic nonnullæ ab Ecclesia damnatæ per regnum observantur adhuc. Quod si rege sciente et approbante rex ipse viderit; Deus noli. Hæc autem prima regis ad martyrem peregrinatio et coram martyre humiliatio sic est.

D Ad te igitur, Domine, ad te faciem meam nunc convertio, ad te oculos meos levo ut eruant labia mea hymnum. In tantum etenim jam plenus sum, quod ultra continere non possum quin laudis tuæ præconia annuntiem et enarrem mirabilia tua. Ecce enim quia Paulum etiam plus quam de Saulo perfecisti. Eo quidem Saulo major, quo rex tantus et ad bonum et ad malum faciendum sit potentior. Et ecce quomodo quasi totius regis suæ sublimitatis oblitus humiliaverit se. Et quod accedit, imo quod facit cum jucunditate ex virtute miraculum, imo quod totum illustrat et jucundat tam profundum Dei iudicium, rex ille tantus ad illum sic convertitur,

revertitur et coram illo sic humiliatur, quem, ut supra in historia descripsimus, adeo in mundo humiliaverat, ut nec ipse nec sui in mundo inter homines quasi locum haberent, verum admiranda quadam vere Dei dextera mutatione, rex tam potens, omni nunc regali insigni rejecto, pedes et nudis plantis, totus etiam nudatus præterquam sola vili tunica super nudo amictus, illum abjectus sic adorando adit, quem cum suis paulo ante denudavit et proseripsit, et quod licuit perpetuavit exilium. Illius nunc devote petit suffragia, suppliciter invocat merita, et humiliter quærit patrocinia, cui paulo ante oratio fuit interdicta, ne foret ab Ecclesia oratio ad Deum pro eo. Illius etiam rex infantium more gradiens nunc super manus et pedes, et sæpe et sæpius deosculatur nescio quem superpositum Thomæ tumulo lapillum, cujus paulo ante ore ad os pernegaverat osculum.

O quam admiranda in nostra ætate hac tantarum rerum mutatio! Vere quam admiranda, Domine, sicut et terribilia et profunda, nihilominus et jucunda judicia tua! Tu vere omnipotens super omnia opera tua. Quantumcunque potuerit homo et enisus fuerit, tu tamen supervalebis. Et quidquid hominis fallax et vana cogitatio ordinans mentiatu sibi, totum ut æterna voluntas tua fiat, in contrarium vertit admirabilis magnificentia tua, Domine. Quod vidimus, quod audivimus, quod non sperabamus, hoc testamur nunc et scribimus. Gratias tibi, Omnipotens, quod et Patre meo et domino et confratribus meis ejusdem oneris comportatoribus jam a rebus humanis exemptis et in Christo quiescentibus, ego jam quasi solus superstes adhuc et exsilii nostri exitum et martyrii gloriam non solum merui videre, sed et scripto ad sæcula post futura transmittere. Unde et laudabo Dominum in vita mea, psallam Deo meo quandiu fuero. Unde et Domini facta hæc, quæ gaudens recolo, devote iterò. O Domine, quam magnus es tu, et quam præclarus virtute et quem superare nemo potest! Quin potius juxta quod mulier triumphalis præconizat, montes per te a fundamentis movebuntur, cum aquis, et petrae sicut cera liquecent ante faciem tuam. Qui enim timent te, magni erunt apud te per omnia. Et ecce quia juxta quod præconizatum tunc, et nunc impletum cernimus, ut præconio præconium nostrum copuletur. Ecce enim regis cor quod vere scriptum quod in manu Dei sit; ecce, inquam, cor regis paulo ante sic pertinacissime obduratum, amaricatum et elevatum sic, quomodo nunc mollium, quomodo indulcoratum et humiliatum sit. Mons revera a fundamento suo motus et hoc cum aquis populorum multis circa martyris tumulum circumfluentibus et affluentibus toto die. Mons etiam hic noster, hic rex noster, mons mobilior cæteris. Qui quoties a transmarinis in regnum revertitur, mox antequam alias divertat, ante alia regni negotia, mox martyris sui amici nunc et domini visitat sepulturam cum propriis aquis suis motis similiter. Populi quippe multi et

nationes, quibus præest, et ipsius præcipue antici præ cæteris mundi nationibus, si devotius nescio, Deus scit, sed hoc scio, quia martyris tanquam specialis patris et patroni sui tumulum frequentius adeunt. Benedicentes ergo laudemus Dominum pro regis nostri peregrinatione hac, pro conversione tam devota pro reversione tam grata et pro humiliatione tam gloriose abjecta. Laudemus, inquam, benedicentes quod cor filii conversum est ad patrem et cor patris ad filium, quod reversus est dilectus ad dilectum, quod elatus est humiliatus ad excelsum. Hymnum igitur iterum et iterum in isto citharæ nostræ melo resonemus Domino, hymnum novum resonemus Deo nostro. Hymnum, inquam, novum pro regis nostri hac peregrinatione prima, pro conversione nova, pro reversione tam jucunda et pro humiliatione tam insperata, et pro tam novo, tam glorioso et tam pleno per martyrium triumpho. Cujus tam triumphato quam triumphanti communis gloria est; cui vero eorum sit gloriosior nescio; unum scio quod triumphato fructuosior sit. Martyri quippe triumphanti video quod solum sit ad gloriam; sed regi triumphato video quidem quod sit ad gloriam et sperandum quod sit ad coronam, ut de corona transeat ad coronam, de corona regni terreni corruptibili ad cælestis regni coronam immarcescibilem: solum in eo quod coeperat perseveret. Et de hac quidem tam triumphati quam triumphantis nova gloria hymnum novum cantare bonum quidem et jucundum. Eo certe tam bonum, tam jucundum, quod tam amplius, tam plenus sit triumphus hic, quod ipse utrique tam martyri videlicet quam regi sit communis; qui et martyri triumphanti gloriam et regi triumphato apud Dominum et homines et gloriam pariter et gratiam. De ipsis etiam inimicis suis eo quod sit triumphatus, sic continuo triumphaturus, ut finita peregrinatione hac mox docebitur.

ITERAT HIC SE PER HISTORIAM HANC PROSEQUI VERITATEM OMNI GRATIA ASSENTATIONE ET METU OMNI POSTPOSITO.

Nemo autem arbitretur, aut suspicetur nemo, quodam me assentationis velamento pro regis mei gratia vel favore, eo videlicet quod rex gentis meæ sit, ut supradiximus, et hic iterare non piget; aut pro martyris, eo quod pater et dominus meus sit et fuerit, laude exquisita, laxis aliquando linguæ habenis veritatis excedere metam; cum multi adhuc supersint, qui ex tanta potestate sic triumphata tantam triumphantis gloriam et tantam triumphatæ potestatis, sicut descripsimus humiliationis gloriam pariter et gratiam, quam et viderunt, utpote cui et interfuerunt, ipsi contestentur. Nihil enim per totam martyris historiam, Deus scit, ut jam semel testatus sum et contestor nunc iterum, aut hominis metu de corpore veritatis mutilo aut adversus veritatem propter hominis gratiam amplifico, aut ut homini placeam assentatione veritatis seductrice interverto, aut propter popularis auræ flatum intersero vel

omitto. Sed ad gloriosam potestatem nostram nunc certe gloriosior, imo quasi nunc primo gloriosam, cum sit gloriose sic triumphata, revertamur adhuc, ut tam gloriose, tam devote peregrinationis cœptum iter consummetur. De qua meli hujus non jam notula, sed potius nota, in cithara nostra quia dulcius et diutius resonavit, utpote victoriae hujus tam celebris sicut triumphantis et triumphati communi gloriæ festive et solemni *Alleluia* reversionis decantantes; reversionis, inquam, peregrini novi ad novum angelorum concivem, filii ad patrem et patris ad filium, et dilecti ad dilectum. Sed circa magnum hunc et insignem peregrinum nostrum immoremur paulisper adhuc; et exinde ex peregrinationis hujus humilitate et devotione quid cito post acciderit non tacendum.

QUALITER REX PEREGRINATIONE REVERTENS CANTUARIAM EXIIT.

Omnibus itaque in tanta, ut jam descripsimus, humilitate et devotione consummatis, rex jam vere rex et peregrinus tam devotus, in crastino post missam ante martyris sepulturam celebratam de martyre, maculatis sic pedibus ut humiliter coram martyre venerat, nec etiam refocillatis, in spe multa patrocini per martyrem in brevi sibi futuri reesensit.

DE HOSTIBUS A REGE POST PEREGRINATIONEM SUAM CITO TRIUMPHATIS PER MARTYREM.

Et quod dictu mirum, et ad martyris gloriam et regis penitentialem devotionem commendandam non tacendum, spes regem non confudit, siquidem ipso eodem die, quod mundus novit et mihi etiam discipulo qui scripsi hæc rex ipse fateri dignatus est; ipso, inquam, die quo ante martyris sepulturam missam de martyre humiliter admodum et devote audierat, martyre affectuose salutato et quasi a martyre benigne licentiatu post recedens, erat autem Sabbatum; eodem, inquam, die, eadem etiam diei hora, qua missæ interfuerat incessanter martyris patrocina invocans, princeps Scottorum captus est. Magnus profecto princeps hic, et inter multos et magnos regis inimicos ipse tunc maximus aut de maximis. Et a militibus quibusdam et paucis et medix manus hominibus, qui inter regis fautores tunc paucos regi favebant adhuc, interceptus, tanquam gladio non extracto nec illato vulnere, sed sicut sine pugna et sine plaga captus est; sicut accepi, quodam casu fortuito sed nescio quo, ab exercitu suo grandi quem collegerat, parum deflexus, Altissimo quidem, in cujus ditione cuncta sunt posita, volente eum tradi sic.

Sed quid per singula? Post regis tam humilem, tam devotam supra descriptam peregrinationem, sensim in dies, nec longa mora, et cismarini et transmarini præsertim fideles sui, sed eo ipso jam infideles quoque rebelles, in retiaculum quod ipsi domino suo regi tetenderant, ipsimet peccatores ceciderunt. Revera peccatores, domino suo et regi suo fidem non servantes: videntes autem alii cum rege

A jam subito Domini manum tam valida siluerunt universi: et ita supra mundi assertionem et spem, sicut ex inspirato et subito; *siluit omnis terra in conspectu ejus* (*Malach. xi, 52*). Et factum est in pace regnum ejus Domino super iram inimicorum suorum sic manum suam extendente. Et ita ut supra de die breviter tetigimus, rege orante et super inimicis suis exaudito revera Sabbatum erat, Sabbatum revera temporis regi portendens auram in brevi futuræ sibi tranquillitatis et pacis, ut ita ex Sabbato speraret Sabbatum ex Sabbato temporis Sabbatum quietis. Juxta quod Israeli in propheta Dominus pollicetur: *Et erit, inquit, mensis ex mense Sabbatum ex Sabbato* (*Isa. LXVI*). Itaque relinquatur sabbatismus regi humiliato sic. Hunc vero super inimicos suos successum suum et pacem tantam et tam perfectam, eo plus miraculosam quo tam citam, omnium sic animis obfirmatis adversus se, rex totam ascriptit Domino et glorioso martyri sancto ejus, cui certissime ascribenda.

DE SOMNIO MARTYRI ADHUC EXSILI PROPHETICE OSTENSO QUASI REBELLIONIS HUIUS ET PACIS PROPHETIA.

Hoc quippe, quod martyri adhuc exsili super ista de qua jam locuti sumus rebellionem et post rebellionem pace tam cita accidit, propheticum quoddam somnium et vere propheticum, evidentissime probat, ipso domino meo tunc exsule, somnium illud mihi discipulo qui hæc scripsi ore proprio indicante sic: *Aspicebam, inquit, in visione noctis* (*Dan. vii*). Et ecce quia ego super montem valde exclusus eram et dominus rex deorsum in infimo. Et ecce quia subito universæ cœli volucres adversus regem conveniunt, ipsum cum unguibus suis et rostris in subito et cito alarum suarum quasi turbinis vehementis spiritu impetentes. Ibi omnis generis volucres, maxime quæ ex rapto vivunt: ibi aquilæ, ibi griphes, ibi alieti, ibi vultures; ibi nilvi, ibi accipitres, ibi larii, ibi herodii. Sed quid per singula? Singula mihi visa erant ibi volucrum genera in genere suo regem quotquot impetentes. Cujus vestimentis per volucrum unguæ et rostra citissime panniculatim dilaceratis, rex mox solius camisæ tenui schemate vix opertus, quasi jam nudus volucris expositus est. Et jam tantum in modum turbinis vehementis volantium, et rostris et unguibus impetentium impetum sustinere non valens, hinc inde impellebatur. Et ipse sensim quod licuit regrediebatur et retrahebat se, ut vim impetus, etsi non declinaret omnino, extenuaret tamen. Erat autem a tergo regis non respicientis, quia nec conclusus sic respicere potuit; erat, inquam, teterum præcipitum et profundissimum, a rege utpote a tergo improvisum. Cui cum appropinquasset jam rex, sic retrahens se, et quoad poterat evitans impetentium vim, unus de aulicis regis familiarissimis, de quo tanquam de se altero rex fidebat utpote quem et honoribus et divitiis inter regis primos rex illustraverat; hic, inquam, torvo torrior, etsi plus quam inhumanus, in volucrum accessit adiutorium,

camisia, qua sola super nudo rex vix amictus erat, A sic notata. » Et ita rex ipse sic primo et per diem regem spoliare violenter attentans, et cum volucrum impetu ipse pariter regem cepit pellere in præcipitum. Rege vero jam ruituro, commota sunt pietatis eximie viscera mea super rege, qui in monte sedebam excelso cernens hæc. Et pristinae gratiae et familiaritatis mutuae inter regem et me recolens, etsi mihi modo offensum, non potui tamen in offensa hac miserationem meam continere; quin potius, sicut visum mihi, de montis tam excelsi vertice quo sedeham tam citus descendi, tanquam si in ictu oculi: periculo jam sic imminente et compactione multa quasi alas tribuentibus mihi et ad velocem me succursum impellentibus. Et sic quasi in momento regi astiti. Et mox framea longa et acutissima, nescio tamen quo casu in ea posita, in manu mea refulsit. Qua velut subito et momentanee mihi visus sum universas illas coeli volucres dissipatas dispersisse, dissipasse et dispersas; et regem liberatum sic continuo insignibus suis regis gloriose et decentissime indui, illum aulicum oburgans acerrime qui, ut diximus, in volucrum adjutorium sic transierat, addens regem ab ipso non meruisse hoc.

Hoc somnium vere futurum vaticinium dominus meus, ut diximus, in exsilio tunc viva voce mihi, qui jam scripsi hoc, retulit sic, et etiam aulici nomen indicavit. Pro quo aulico exire potest in proverbium, cum quivis complices habens male versatur contra domini fidem, ut de eo proverbialiter dicatur, et iste in volucrum adjutorium transiit. Verumtamen cæteris, quæ ad visionem hanc, non omis- C aulicum tamen hunc in historia hac nominare prætermitto, ne forte ejus, qui jam superstes non est, decretam universæ carnis viam ingressi, et presentibus et post futuris sæculis nomen odiosius fieret, et ne etiam posteri ejus, qui non meruerunt, vel ex suspitione proditiis nota ulla inurantur et paterni delicti confundantur opprobrio. Et quidem relato somnio dominus meus mihi loquens adhuc brevibus sic, quasi somnium interpretans, adjecit se in arcto aliquo regi subventurum adhuc; hæc ipsa interpretatione tam brevi somnium vere propheticum indicans. Et ego, qui nunc scripsi, cum semel visionem hanc nacto loco et tempore domino regi, finita, ut diximus, rebellionem, et pace sic desuper data, retulisset, rex ipsemet mox interpretatus est super ea rebellionem, et super ejusdem rebellionis tam felici, tam glorioso et pacifico et vere miraculoso exitu, hujus visionis veritatem evidentissime completam iri, hujus relata visionis occasione adjiciens, qui super hoc loqui mihi dignatus est rex, quod et ego supra non tacui: « Et eodem, inquit, die, videlicet die Sabbati, eadem etiam hora diei, qua ante martyrem missam audiens devotius martyris patrocinia invocabam, a quibusdam militibus meis, et quidem paucis et etiam hominibus satis mediocribus his, princeps Scottorum, de maximis inimicis meis ipse maximorum unus, captus est ab his qui eum ceperunt, sicut die, ita et hora captionis ejus

et per diei horam facti, me edocuit et prædixit miraculum. Quod ego quidem eo devotius quo certius huic melorum libello interserui. Et eo etiam jucundius quo in historia hujus pericope hac ipsum Augustum magistrum habui facti relatores certissimum, et miraculi sicut testem et prædicatorem. Factus est enim nobis sic in mira Dei virtute de quondam Saulo nunc Paulus, ipsius potente Dei mutatione modo prædicator, cujus Paulo ante tantus fuerat persecutor. Unde et historia hujus pericope hæc eo amplius inter cæteras illustrata quo ipso Augusto quondam tanto persecutore, nunc vero ad martyris gloriam magistro prædicatore edita est. Verumtamen cum rex dieti aulici, qui, ut prædiximus, in volucrum adjutorium transierat, nomen proprium sæpe et sæpius instanter sciscitaretur, quærens ipsum sibi designari ex nomine, ego tamen propter jam supradictas causas nominatum ipsum exprimere constanter renui.

Ut igitur redeamus ad priora, et singula discutiamus, videamus si non gloriose triumphata tanta potestas hæc, sic quidem triumphata quod humiliata, et sic humiliata quod triumphata. Quam bonus triumphus martyris qui sic humiliat, et quam bona regis humiliatio quæ de inimiciis suis sic triumphat? Pœnitentialem humilitatem hanc regi nostro Deus in dies augeat, Deus perficiat et conservet ut in finem usque perseveret.

C QUOD REGUM PœNITENTIALIS PERSEVERANTIA RARA SIT ET DIFFICILIS.

Verumtamen in fugitiva vita hac laqueis et tentationibus et aversionibus plena, omni quidem carni sed regibus præsertim difficillimum in pœnitentiali humilitate permanere sic. Regibus certe præsertim difficillimum hoc, qui tot terrarum distracti curis, tot occupati causis, tot implicati negotiis vix est ut in cogitatu uno in proposito ullo stare possint immobiles, mente divisa et dilacerata sic: utpote quos omnium mortalium premunt curæ, urgent causæ et querelæ sollicitant. Rex enim velut quidam humani generis currus est, idem ipse et auriga et jaculum. Omnes vehit, omnes regit, premit ipse omnes, idem ipse omnibus timor et stimulus. Omnes erigit, omnes ducit, et agitat ipse omnes. Et qui gloriatur, inquit, in jaculo stimulo boves agitat (Eccli. xxxviii). Et præter curas has et occupationes et implemента hæc quæ mentem dilacerant, dividunt et avertunt, extollit ipsam gloria mundialis. Et inter tot Cresi opes et Sardanapali delicias, in regum thalamis, in stratis hyacinthinis purpuratis et polimitis carnis suave nutritur illecebra, quam nec etiam curæ effugare possunt aut effugere. Ecce cura, ecce gloria, ecce illecebra, tria hæc, quæ alta sine periculo stare non permittunt. Ecce onus, ecce honor, ecce honoris macula, carnis, ut diximus, illecebra, quæ honoris gloriæ insidiatur e latere, ut in eam maculam det, et velut per aliquam auram pestilentem violet, seu quasi per vile lutum contaminet ip-

sam et defœdet. Et ita alta nunquam sine periculo A
quæ semper præ nimia sui altitudine ruinam mi-
nantur. Et ipsis quasi in se ipsis ex ipsa sui altitu-
dine nimia fractis nec stant diutius et quanto ab
altiori ruunt gravius. Unde, et ut nostris sanctæ
historiæ utamur exemplis, reges Israel, ni fallor,
triginta sex quotquot mali. Pariter et reges Judæ
viginti et unus, ni fallor, omnes, ut scriptum testatur,
præter David Ezechiam et Josiam commiserunt pecca-
tum. Nam, ut in ea mox subditur, reliquerunt legem
potentes reges Judæ et contempserunt timorem Dei.
Ecce quod certissimum est, de tot et tantis regibus
et his et illis, qui aut cœperunt aut si cœperunt
non persisterunt. In regum profecto pœnitentia tam
rara est perseverantia, tam difficilis. Quorum, ut
de perseverantia taceam, etiam inchoata pœniten-
tia rara est et si forte est in ipsa rara est mora
parva. Igitur, si in exemplaribus scripturæ nostræ
regibus sic, quid de tanta qui fuerunt et sunt exem-
platorum regum multitudine, quorum nec vita nec
gesta nec in annalibus nec etiam in ullis indicibus sunt
descripta? pro rege igitur nostro, in cuius manu tot
nationum, tot et tantarum gentium et vita et pax
est, orandum instantius, ut in quo eum sæpissime
jam proxime descripsimus, stet in bono et profici-
endo quotidie convalescat in melius et demum, sicut
tam gloriosam potestatem decet, in glorioso fine
consummetur.

PRÆCEDENTIS MELI NOTULAS HIC BREVITER ITERAT UT
ADJICIAT.

Et quoniam de ipso hic rege nostro sic gloriose
triumphato meli nostri non tam jam notula quam
prolixa nota, quo dulcius et delectabilius eo diu-
tius protracta, in cithara nostra resonavit, conso-
nantiam illam tam consonam, tam concordem vi-
sibilis palmæ triumphalis mortis imperatoris et
visibilis palmæ triumphalis mortis militis, jam ali-
quantisper intermissam repetamus, intermissam
dico, nisi quia quod interpositum est minime fuit
intermissio sed potius cœptæ illi consonantiæ ad
decorem adjectio. Unde et, ut adhuc addamus alia,
quo visibilis palmæ triumphalis mortis imperatoris
ad visibilem palmam triumphalis mortis militis
prolixior et concordior consonantiæ cœptus hic me-
lus audiat, notulas illas, quas supra prolixius ci-
tharam nostram pulsantes resonavimus, resonemus
adhuc, et sic quo dulcius eo melius, et quo bre-
vius eo ad meli notulas distinguendum recinen-
damve commodius, quasi sub uno spiritu et velut
sub pausa una, sub quadam brevitate compendio-
siori resonemus adhuc : ut ita sit succincta sic
brevitas, sicut ad innovandum et reparandum audi-
tum melodia melodiæ et consonantiæ consonantiæ
continue nullo intermisso, sed absque omni in-
tervallo copulata : in primis igitur a primo nunc
altius repetendum.

PRIMA NOTULA REPETITA.

Imperatoris visibilis palma mortis mors mortis

fuit ut præcimus : similiter et palma mortis mili-
tis, ut ostendimus.

Imperatoris visibilis palma mortis mortuos sus-
citavit : similiter et palma mortis militis, et hoc
docuimus.

Imperatoris visibilis palma mortis salus mundi :
similiter et militis salus Ecclesiæ, quod et supra
jam dictum quotidie experimur et cernimus.

Imperatoris visibilis palma mortis vinctos eduxit
ab inferis : similiter et mortis militis, et hoc pro-
bavimus.

Imperatoris visibilis palma mortis crucifixores
suos milites salvavit : sicut a multis creditur : si-
militer et mortis militis milites suos carnifices,
quod universi qui viderunt contestantur, et hoc
præmisimus.

Imperatoris visibilis palma mortis principatus et
potestates exspoliavit : similiter et mortis militis,
quod et præstendimus.

Imperatoris visibilis palma mortis principatus et
potestates triumphavit in semetipso : similiter et
mortis militis, quod et supra non tacuimus.

Imperatoris visibilis palma mortis confidenter
traduxit suos principibus et potestatibus trium-
phatis sic similiter : et mortis militis, et hoc præ-
dictum.

Imperatoris visibilis palma mortis delevit quod
adversum nos erat chirographum decreti, quod erat
contrarium nobis : similiter et mortis militis chiro-
graphum quod erat nobis, clero dico, contrarium :
et hoc præmisimus.

Imperatoris visibilis palma mortis illud decreti
chirographum de medio tollens affixit cruci : simi-
liter et mortis militis affixit illud capiti ut tolle-
retur illud capite toto exposito et lacerato toto.

Imperatoris visibilis palma mortis sicut aeris et
potestates terrenas debellavit : similiter et mortis
militis sicut aereas et terrenas, quod et jam proxime
fide oculata evidentissime ostensum excidisse non
arbitror.

Imperatoris visibilis palma mortis in brevi omnia
ad se traxit : similiter et mortis militis citissime ad
se mundum convertit : et hoc inter cætera non ta-
cuimus.

Imperatoris visibilis palma mortis est omnis po-
testas ei in cælo et in terra data : similiter et mili-
tis magna claret potestas data sicut hic et ibi : hoc
solum supra tacitum hic superaddimus.

INTERSERIT HIC ADDENDO DE VEXILLO CRUCIS ET DE
VEXILLO VASIS, QUOD GESTANT PEREGRINI MILITIS
SICUT ILLUD CRUCIS PEREGRINI IMPERATORIS.

Sed istis quas jam audivimus meli hujus impera-
toris et militis notulis novas quasdam adjiciemus
adhuc quibus ablato fastidio et reparato auditore
renovetur auditus.

Imperatoris igitur visibilis palma triumphalis
mortis vexillum est crucis quod etiam vitæ suæ in
carne signum est et imago : similiter et triumphalis

lis mortis militis vexillum est vas aquæ et sanguinis, et idem ipsum etiam vitæ suæ in carne hac signum et imago pariter: quod et qualiter hoc ut audiamus dulcius in hac quasi ultima meli istius notula cithara nostra nunc pulsanda est, sicut attentius et morosius.

PRIMO DE CRUCIS MYSTERIO QUOD PEREGRINI
IMPERATORIS PALAM GESTANT.

Et prius quidem qualiter crucis vexillum imperatoris vitæ in carne imago sit et signum et idem triumphalis mortis suæ vexillum, prout mihi præcentor ipse noster imperator vocem et vocis mentem ministraverit, decantandum. Et idem ipse imperator, sicut virtutum et omnium scientiarum Dominus, ipsius crucis suæ clavis propositum nunc nobis crucis suæ mysterium reseret. Deinde de vexillo vasis aquæ et sanguinis, qualiter imperatoris instar vitæ militis in carne hac ipsum imago sit et signum, et idem triumphalis mortis suæ vexillum succinendum, prout idem ipse imperator verbum Dei vocem ministrabit et verba.

Ut igitur primo de Dominicæ crucis vexillo, qualiter videlicet ipsum imperatoris vitæ signum sit et imago, audiamus, ecce quia crucis quatuor sunt dimensiones. Lata est et longa, sublimis est et profunda. Harum quatuor dimensionum imperatoris fuit in carne vita quasi vita ejus quadrata, videlicet in charitate latissima, in perseverantia longissima, in contemplatione sublimissima et in Dei timore seu reverentia profundissima. Imperator siquidem in vita sua Deum præ omnibus reveritus est. Unde et magister exauditum eum docet pro sua reverentia, loquens de eo sic: *Qui, inquit, in diebus carnis suæ preces supplicationesque ad eum qui potuit salvum illum a morte facere cum clamore valido et lacrymis offerens, exauditus est pro sua reverentia* (Hebr. v). Ecce imperatoris vita instar crucis, quatuor habens dimensiones et quasi quadrata seu quadriperita vita hæc. Et ita evidentissime quatuor dimensiones crucis sunt in vita crucifixi, imperatoris. Unde, ni fallor, non immerito crucis vexillum vitæ imperatoris vere dicitur et expresse est et imago et signum. Pariter et idem crucis vexillum sive crux eadem vexillaris imperatoris in carne mortem indicat triumphalem. Talem quippe vitam quam crucis instar quatuor dimensionum fecimus, tanquam quadratam seu quadripartitam mors sine dubio sequitur triumphalis. Et ita evidenter una et eadem crux vitæ imperatoris in carne est imago et signum et eadem triumphalis mortis suæ vexillum. Et ut adhuc addamus his quod fuit crux ipsi imperatori Christo, hoc ipsa eadem est commilitonibus suis Christianis, vitæ videlicet ipsorum in carne hac, quatuor habentis dimensiones, imago prius et signum, et postea mortis triumphalis vexillum, quæ profecto triumphalis mors vitam instar crucis quatuor dimensiones habentem semper sequitur. Et hæc sunt in spirituali vita Christiani commilitonis imperatoris Christi

A quatuor ille spirituales Dominicæ crucis dimensiones ad quas Magister hortatur discipulos: *In charitate, inquit, radicati et fundati, ut possitis comprehendere cum omnibus sanctis, quæ sit latitudo, longitudo et sublimitas et profundum* (Ephes. iii). Quorum certe dimensionum, si in vita commilitonis Christi una defuerit, jam mors triumphalis non erit. Ad cuius triumphum denotandum ante fidelium defunctorum corpora præcedit crucis vexillum triumphale, ut partes adversæ per vitam instar crucis velut quadratam quasi per crucis signum triumphatæ sic mox fugiant crucis vexillum triumphale cernentes. Juxta illud: *Ecce, inquit, crux Domini, fugite partes adversæ*, et ita crux, quæ vitæ commilitonum Christi prius fuerat signum, postea in morte erigitur quasi mortis ipsius triumphalis vexillum, ex vita Christiani, cuius ipsa crux ante fuerat signum, mortem triumphalem subsequens demonstrans.

ADAPTARE INCIPIT MYSTICE SIGNUM MILITIS SIGNO
IMPERATORIS.

Ni fallor, quod de crucis signo vexillove proposuimus, et in imperatore et etiam in imperatoris quovis commilitone jam liquet. Restat ut juxta promissum nostrum doceamus qualiter imperatoris instar [de hoc vase alibi] vas aquæ et sanguinis vitæ militis sit imago et signum et idem triumphalis mortis suæ vexillum; simile nunc docturi de militis vase et milite quod supra docuimus de imperatore et imperatoris cruce. Verum in primis, ne cui in dubium veniat quod sit istud vas quod aquæ et sanguinis, semel jam et nunc iterum nomino, de quo deinceps quasi in ultima meli istius notula decantandum, hoc profecto vas est quod abque omni concione celebrata, non congregatione coadunata, nec etiam conventiculo, nullo promulgato edicto, nec ullo etiam arcuatus præcepto, sed solo nec dubium Spiritus sancti instinctu mundus, sicut unanimiter et communiter ad martyris gloriam et in peregrinationis suæ signum quasi se insignivit. Hoc videlicet est vas illud plumbeum gestatorium, quo specialiter beati martyris peregrini se signant. In quo aqua continetur et sanguis, aqua videlicet ex tactu sanguinis sanctificata per sanguinem. Hoc, inquam, vas est, non quidem hominum vanum commentitium, neque ab homine neque per hominem, sed, sicut qui interius vident verius judicant, solo veritatis, non vanitatis spiritu commendatum hominibus. Quo sicut communiter, ut videmus et unanimiter afflati universi bajulant hoc gestatorium vas quo se glorioso martyri devote obnoxios ei se speciales ipsius servos peregrinos visibili signo contestantur. Hoc igitur est vas peregrinationis, vas illud videlicet aquæ et sanguinis, quod supra nominando tetigimus, et de quo deinceps sermo noster texetur, ut hoc vas militis vitæ signum et mortis vexillum aptemus militi, juxta quod supra crucis signum et vexillum aptavimus imperatori. Utinam imperator etiam nunc clavis suæ crucis

aperire nobis dignetur, et hoc vas ad laudem et gloriam militis sui et martyris, ut ita signo et vexillo imperatoris in huius vasis apertione consonet et concordet signum et vexillum sui militis. Dicam igitur de vase hoc, non quidem vase pastoris stulti, sed vere boni; dicam, inquam, quod sentio, et in Domino confido quod non de meo ipso mihi servo suo de suo quantum sibi placuerit multo magis mihi revelante.

DE VASIS MYSTERIO QUOD MARTYRIS PEREGRINI
GESTANT.

Vide igitur et attende, quia in isto vasis signo tria sunt, sicut supra in crucis signo quatuor distinximus. Sed in hoc signo tria plumbum videlicet aqua et sanguis, quia aqua tactu sanguinis sanctificata in sanguine. Tria hæc, tria mystica, in plumbo quippe gravitas, in aqua puritas, in sanguine vero mortis virtus et forma per martyrium. In plumbo itaque vetustas, in aqua novitas, in sanguine vero martyrii fortitudo exprimitur. Ecce vetus homo et gravis, ecce novus homo et purus, ecce martyr fortis et strenuus. Et hæc sunt, sicut ex historia præcedentibus aperte liquet, tres viri vite, tres videlicet ipsius vivendi modi in vita carnis hæc. Primus vite modus, quasi primus homo vetus in aula; secundus vite modus quasi secundus homo novus in Ecclesia; tertius vero vite modus iam quasi tertius homo fortis in palæstra. Cujus tertii hominis fortitudo non solum tunc cepit, quo exiguo illo tempore quod supra descripsimus animam suam exposuit, sed potius ex quo ad exponendum paratus fuit. Ecce viri vite tres. Inter quas vita vetus gravis et plumbea sicut prægravat et præponitur cæteris. *Præius siquidem*, ut ait Magister, *non quod spirituale est sed quod animale, deinde quod spirituale est* (1 Cor. xv). Et vere deinde quod spirituale. Subsequitur quippe mox homo spiritualis, homo novus, aquis videlicet lota vita munda exuta vetustate nova expedita plumbea iniquitatis gravitate deposita. Quæ profecto iniquitas merito in propheta super plumbum talenti sedere legitur. Deinde vero novo homine sensim in dies proficiente, transit in virum perfectum; occurrens in mensuram ætatis plenitudinis Christi iam plenæ ætatis et perfecti roboris. Sicut imperator Christus et quivis miles Christianus ita ut in acie imperatoris Christi etiam usque ad sanguinem resistat, si ut interdum solet accidere expediat sic.

Hæc sunt itaque tres viri vite per has ordinate et gradatim quasi de virtute ad virtutem, de vita ad vitam ascendentes. Quarum, sicut ex jam dictis, nihil, evidenter liquet, gestatorum peregrinationis vas, de quo nunc totus sermo est, imago et signum evidentissimum est. Solum in vase hoc intueri velis plumbum, aquam et sanguinem, tria hæc. Vas itaque hoc cum per tria hæc triplicis vite militis sit imago et signum nihilominus crucis instar idem ipsum triumphalis mortis militis est vexillum. Quam

etiam mortem triumphalem ipsius vexillaris vasis cælatura exterior mundo palam præconizat. In qua scriptum est: *Mortui resurgunt, leprosi mundantur* (Luc. vii). Ut quisque quotidie in ea legat, videat, invocet et laudet tantum ecclesiasticæ libertatis assertorem.

Et adhuc, ut inter vexillum imperatoris et vexillum militis similitudo monstraretur expressior, quo et meli huius hæc notula auditui dulcior et consonantior sit quod vas istud est Christi militi, hoc est idem ipsum contubernalis et commilitonibus suis Christianis, vite videlicet ipsorum tripertitæ, ut supra distinximus, signum et postea mortis ipsorum triumphalis vexillum. Quam profecto vitam tripertitam, quemadmodum et supra de quadrata seu quadripartita diximus, cum de crucis mysterio ageretur mors subsequitur triumphalis, ut quod nunc videmus in Christi milite, sperent hoc ipsum commilitones Christi et desiderant. Hanc quippe nec dubium tripertitam vitam cum triumpho mors sequitur: ita quod sine tripertita hac, sicut et supra de crucis quadripartita ostendimus, nemo imperatoris militum qui cum tripudio moriatur aut triumpho. Ecce enim quia primo vita plumbea, vita onerosa et gravis, sine qua nec unius diei infans. Quin potius ex sola hac incipit. In qua etiam si aquis nostris non lotus moriatur, non triumphans sed potius triumphatus moritur, in partes cedens adversas. Ita post plumbum nostrum aqua nostra quam necessaria. Lotus vero jam aqua et mundatus omni vigilantia, necesse ut circumspectat se, ne in nocte ambulans offendant, cadat et luto quod sub pedibus maculetur in casu. Unde et oportet et expedit sic, ut in imperatoris sui acie fortiter stet nec cadens, nec cedens, sed usque ad sanguinem resistens, si forte necesse sic. Ecce post plumbum nostrum et aquam nostram, tertio nunc sanguis noster. Et ita quæ vas nostrum signum militis vexillare in se continet quotquot militibus contubernalibus qui post pugnam in fine palmam quaerunt, necessaria tria hæc, plumbum videlicet, aqua et sanguis. Nec murmuret quis si etiam plumbum nostrum nobis necessarium dixerim. Tanto quippe gloriosius et quidem melius, commodius, si plumbum nostrum in argentum vertatur, aut si ipso expurgato omnino, solum purum argentum examinatum refulgeat, minime alias in magni regis thesauro reponi dignum. Tria igitur nobis necessaria hæc, tam plumbum videlicet quam aqua et sanguis, quæ etiam duo tantum profecto usum non haberent si plumbi omnino fuisset expertes. Nunc vero manent nobis tria hæc; et commode quidem inter tria hæc plumbum, quia non nisi per plumbum emundatur argentum. Inter quæ, si quis neomartyris nostri instar ordinate et gradatim, ut de vita ad vitam transeat, caute et virtuose incesserit triumphale vas nostri militis quod ipse habet triplicis vite suæ signum certissime rehabebit, et ipse idem ipsum vas; sed spirituale triumphalis mortis suæ vexillum, ut ei de mundo victorioso sublatò

pro plumbo suo quo bene usus pro aqua sua, qua munde lotus et pro sanguine suo, quo in pugna probatus quod triumphale vas militis in figura prædicat ipse apud Deum et apud homines simile ex re ipsa et in ipsa consequatur præconium.

Jam ex parte audivimus conformitatem ut mihi visum sic multam signi ad signum vexilli ad vexillum, signi et vexilli crucis imperatoris ad signum et vexillum vasis militis.

QUOD MYSTICUM SIT SIGNUM ET VEXILLUM MILITIS
SICUT ET IMPERATORIS MONSTRAT.

Nemo autem secum judicet aut cogitet intra se hæc in morte et post mortem militis acritate et ut ipsius meritis scientiarum Dominus revelare dignatur, a nobis scribuntur sic, quæ et tam celebriter veneratur Ecclesia et tam communiter adorat mundus, aut fortuito accidisse sic aut humani sensus commento excogitata hæc, et vane et frivole calamo nostro sic exarata. Potius cæcæ mentis qui sic judicat aut cogitat a propheta invitatus veniat et videat opera Domini, prodigia quæ posuit super terram; et sic non judicet aut cogitet nec submurmuret, sed clare et aperte cantet in viis Domini quam magna est gloria ejus consiteatur Domino et notas faciat in populis adventiones ejus. Nam juxta sapientis testimonium nihil sine causa factum etsi facti mundus ignoret mysterium. *Nec enim, ut ait ipsa, inveniet homo opus quod operatus est Deus ab initio usque ad finem (Eccl. iii).* Verumtamen a propheta invitati veniant hic et videant in his quæ in militis triumphali morte et post mortem acciderunt non casum fortuitum nec vanum vanorum filiorum hominum in his fuisse commentum, sed potius illud et illius consilium, sine quo nec etiam de arbore cadit folium. Si igitur absque consilio hoc nec folium cadit de arbore, nunquid sine hoc quidquam geritur in Christi corpore? Alioquin ipsum Altissimi consilium quod Christus est curans de arborum foliis proprii corporis sui curam negligeret. Unde et certissime credendum sicut in passione Christi capitis absque causa mysterii nihil gestum ita, nec in toto ipsius corpore triumphalem mortem sicut et ipse tolerante nec quidquam sine aliqua mysterii causa geri. Inter corporis tamen hujus membra, prout dignum et justum fuerit, in aliis plus in aliis minus. Ita ut Christus integer, caput videlicet cum membris, totus mysticus sit, etsi nos ut vani filii hominum et insuli ignoremus mysterium. Unde et ut ad propositum redeam, inter cætera his certe potissimum: quæ in morte et post militis nostri mortem tam triumphalem quæ universus Ecclesiarum orbis tam grate, tam devote et tam pie amplexatur, eo quidem operosius intendo, quo certissime credam tanto athlete et viro tam triumphali, sive in morte sive post mortem, absque aliqua causa mysterii etsi abdita nec unum iota accidisse, hoc sentiens de milite quod et de imperatore. De cujus in mundo conversatione, quam totam mysticam arbitror ut sileam nunc, præsertim

A quidquid in ipsius passione, resurrectione etiam vel ascensione a se homine vel alio in tempore qualicumque seu loco gestum est, scio quidem gestum, sed et credo aliud significare gerendum. Gesta quippe quasi gravis hæc, sicut corpus extra interioribus habentia spiritum qui vivificent. Totum quippe hic sicut mirificum et mysterium et mysterium admirabile: adeo etiam quod et loca ipsa et tempora mystica. Sicut ipse imperator non solum homo totus mysticus, sed et ipse verbum et patris sui et omnis creaturæ mysterium est. Quia si consilium, et mysterium. His igitur potissimum quæ sive in morte sive post mortem militis acciderunt, eo libentius intendo et operosius, quo in eis scio hoc quod quero latere mysterium thesaurum fodientis instar qui ibi libentissime et totis viribus suis fodit ubi certissime thesaurum novit absconditum. Unde et quia mihi pro minimo est ut domini mei neomartyris opus hoc ab homine aut ab humano die judicetur, solum illum in hoc opere quero habere fautorem, quo intolerabili ardore animi inflammatus operis hujus habui præceptorem, et illum pariter aut per se aut per suos eruditiores me constituo correctorem. Sed ad notulam de signis et vexillis imperatoris et militis inchoatam concordius adhuc terminandam redeamus.

igitur ut præcecinimus in vase militis triumphalia tria sunt. Et hæc quidem tria sunt quæ in terra militi testimonium dant. Plumbum videlicet, aqua et sanguis. Ita quidem tria militi sicut et tria imperatori.

15 NOTULA.

Imperatori quippe tres sunt qui testimonium dant in terra: spiritus, sanguis et aqua. Similiter et tres militi: plumbum sanguis et aqua. Et vere imperatoris tres testes in terra. In ipso etiam crucis signo vexillari cum adhuc in cruce ipsa penderet ipse, tres ipsius testes hi. Siquidem de ipsis latere lanceato in cruce sua pendens adhuc continuo exivit sanguis et aqua. Qui prius sicut clamans voce alta, sic et in potestate magna emittens spiritum, ait: *Pater, in manus tuas commendo spiritum meum (Luc. xxiii).* Ecce in terra et in ipso etiam crucis patibulo imperatore in ipso pendente adhuc admirandi tres testes hi, spiritus aqua et sanguis. Et inter cæteros testes et præ cæteris, quorum tamen unum fuit consonum et concors testimonium, sed præ cæteris, inquam, spiritus sicut clamose, sic et potestative emissus, sic traditus, sic in Patris sui manibus commendatus testificatur quam imperator Christus est veritas. Sed longe secus hic in milite quam in imperatore. Unde et melius hic inter imperatorem et militem hucusque tam consonans, tam concordans solum in hac notula discordare videtur plurimum. Siquidem primus testium militis plumbum videlicet testificatur quod imperatoris miles hic fuerit vanitas cum e diverso imperatoris primus testium, spiritus scilicet testificetur pro imperatore quod ipse sit veritas. Longè diversa imo penitus adversa testimonia hæc.

Quantum distat Oriens ab Occidente, veritas a vanitate, Deus ab homine, imperator Christus a Christiano milite. Verumtamen veritas excussit vanitatem et sic imperator suum liberavit militem. Et liberatus sic et aque mundantis se habens testimonium et præter hoc per certius adhuc et evidentius testimonium sanguinis obtinuit per sententiam gloriam sui imperatoris. In ore quippe duorum, ne dicam trium, cum tamen hic tres sint, nisi quia, ut ostendimus inter tres, primus duobus non consonat, in ore, inquam, duorum stat omnis sententiæ verbum.

Sed adiciamus adhuc quo signum signo, vexillum vexillo, adhuc monstretur conformius, ut de signis his et vexillis meli nostri notula quo concordius eo dulcius resonet. Vexillum imperatoris, non in angulo, non sub tecto, sed palam mundo ostenditur. Et a Hierosolymipetis crucis signum aut coram gestatur in pectore aut in humero utrumque congruit.

QUARE CRUX GESTETUR IN PECTORE.

In pectore quidem, ut quisquis habens quid pectoris incessanter recolat memoriam Dominicæ passionis. Sagaciter etiam attendat quatuor dimensiones habentem imperatoris vitam, cujus crux est signum pariter et triumphalis mortis suæ exitum, cujus ipsa eadem est vexillum, ut ita vitæ quatuor habenti dimensiones se conformet et ex ipsa post ipsam similiter mortem triumphalem speret.

QUARE CRUX AFFIGATUR HUMERO.

Quod etiam crucis signum affigitur humero congruit pariter et causa in evidenti est. Nam juxta prophetam: *Factus est principatus ejus super humerum ejus (Isa. ix)*, ipso videlicet imperatore cum ad locum passionis duceretur super humeros suos crucem suam in qua triumphando principatum acquisivit bajulante. Debet quippe quisque humeros suos crucis supponere oneri, qui imperatoris querit se conformare passioni et communicare honori. Quia, ut docet Magister, *si compatimur et conregnabimus (II Tim. ii)*. Itaque tum pro exemplo facti, tum pro causa mysticæ humero interdum hoc crucis signum affigitur.

QUARE CRUCIS SIGNUM ANTE FACIEM ROMANI PONTIFICIS SIMILITER ET METROPOLITANORUM GESTETUR SEMPER ERECTUM.

Interdum etiam signum hoc non quidem in pectore, non in humero, sed palam ante faciem erigitur. Quod et Romanus pontifex quasi imperator, utpote qui in terris imperatoris vices gerit, tanquam imperialis majestatis suæ vexillum quocunque pergat semper erigit ante se. Et nonnulli pariter quarundam ecclesiarum principes, metropolitani scilicet quasi contubernales imperatoris milites ante faciem suam erectum sic semper bajulant: ipsis Ecclesiarum principibus potioribus signum illud erigentibus sic, sicut imperatoris vitæ signum, ita ipsis et mortis ejus triumphalis vexillum. Et totum ob id ut præsertim ipse qui imperatoris a mundo sublato primatum quasi primogeniti filii inter alios hereditate possident et vices in terra gerunt; ipsi, inquam, præsertim

A sicut ipse pater eorum imperator vixit et ipsi vivant; et sicut ipse in carne adhuc dimicavit, et ipsi dimicent, ut postea sicut ipse et ipsi triumphant. Et hoc profecto imperatoris crucis signum et vexillum miles hic noster cum adhuc in terris imperatoris sui vices gereret, et prælia dimicaret, ut supra in historia ostendimus, apud Northamptone pugnaturus ad bestias; hoc, inquam, signum contra partes erexit adversus principatus et potestates in hoc imperatoris sui vexillo tunc triumphans. Ita ut illud antiquum prophetarum de imperatore post imperatorem similiter completum sit, et in milite facto similiter principatu imperatoris super humerum militis. Etenim miles tunc, quod supra in historia relatum hic iterum, crucem Christi, sicut et ipse Christus, in propria persona visibiliter bajulavit, principatu crucis facto sic communi sicut imperatori et militi; milite quidem tunc in hoc principatus et potestates triumphante sicut et imperator triumphaverat. Unde et, ut hoc breviter interseram hic, nec in hoc falli me arbitror, eo certe quod miles in terra erexit ex multa fiducia imperatoris in pugna ipsius imperatoris vexillum crucis in præsidium et imperator nunc in terra donat militi vexillum simile suo proprio, vexillum videlicet prædescripti vasis simile, ut jam ostendimus, vexillo crucis et totum hoc in præconium militis. Sed quid? ut ad superiora redeam, hoc crucis signum, sive in humero, sive in pectore, sive coram gestetur in facie, palam semper humani generis exterioribus oculis præponitur, ut vitam quadrupertitam, cujus ipsa signum est, et mortem triumphalem, cujus ipsa eadem est vexillum, homo jugiter interioribus mentis suæ oculis contemplando imitetur.

QUARE VEXILLARE VAS MILITIS SICUT ET VEXILLUM IMPERATORIS PALAM GESTETUR ET IN PECTORE.

Videmus jam cur et quomodo crucis imperatoris signum et vexillum mundo palam semper ostendatur. Similiter et vasis signum et vexillum militis mundo palam semper proponitur, et non in angulo, non sub tecto absconditum nec a tergo, sed coram et in facie gestatur in pectore. In quo tanta est consonantia signi ad signum, vexilli ad vexillum, ut hoc ipsum sub eisdem etiam pene dictionibus aptando sic pos-
D simus dicere de signo et vexillo militis, quod jam diximus de signo et vexillo imperatoris; quod militis signum et vexillum, sicut de imperatoris diximus, ideo gestatur in pectore, ut quisquis habens quid pectoris recolat jugiter memoriam passionis militis. Sapienter etiam inspiciat primo et attendat triper- titam quam supra distinximus vitam militis, cujus vexillare vas est signum et deinde triumphalis mor- tis ipsius exitum, cujus idem est vexillum. Ut ita quisquis vitæ hujus triper- titæ militis vigilans æmulator fuerit, ex ipsa post ipsam mortem similiter triumphalem præstoleatur, Domino, ut videri potest, hoc præcipiente de duobus his signis et vexillis im- peratoris et militis; quod et de verbis ipsius legis: *Ponite, inquit, hæc verba mea in cordibus et in ani-*

mis vestris et suspendite in signo in manibus et inter oculos vestros collocare; quando sederis in domo tua et ambulaveris in via, et accubueris atque surrexeris, scribes ea super postes et januas domus tuæ (Deut. xi). » Similiter et alibi in lege et ob idem præcepit Dominus, ut simbræ per palliorum angulos fierent, in quibus vitæ hyacinthinæ ponerentur, quas cum viderent filii Israel, recordarentur mandatorum Domini. Unde et Pharisei legis præ cæteris æmulatores in pitaciis scribebant Decalogum ut illum semper quasi ante oculos haberent appensum. Sed ad signa nostra et vexilla redeamus.

Ecce enim imperatoris et militis signorum consonantia quasi in una pugna. Ecce vexillorum conjunctio quasi in una palma, unde et in multis ecclesiis sæpe videri potest conjunctio hæc, vas videlicet cum cruce et circa crucem et itidem crux crucifixi imperatoris conjunctim cum vase decalvati pro imperatore militis. Imperatore inter se et militem suum in signis suis et vexillis, etsi per nescientes quid operentur operante mysterium.

O cum video in ecclesia signa et vexilla conjuncta sic quanti se mihi mox gaudii claritas ingerit per omnes fenestras meas mox intrans ex solo visu! cum video, inquam, præ cæterorum, qui in exercitu Domini Sabaoth militaverunt, triumphantium hujus militis domini mei signum et vexillum cum imperatoris familiaribus sic conjunctum. Et revera imperatoris et militis in via et vita hac conformiter viventium, et jam in morte conformiter triumphantium, conformem nunc eorum in patria conjunctionem, imo quod eo verius quo expressius unitatem nunc quasi indivisam indicat signorum et vexillorum ipsorum in Ecclesia conjunctio hæc. In superioribus quippe quid agatur invisibiliter nobis in hac lacrymarum valle inferiora hæc indicant. Juxta quod ait supermundanus illi et vere insignis theologus, quam pulchre divina et cælestia etiam per dissimilia symbola manifestari. Et vere manifestantur, etsi pauci sint qui veniant et videant opera Domini quæ posuit prodigia super terram. O quoties cum adhuc in carne militaret imperatoris miles hic Dominus meus ea ipsi ore ad os prædixi de ipso eventura, quæ nunc de ipso cerno completa, si tamen, ut adjiciebam, ipsi loquens imperatoris sui prælia fortiter, viriliter et constanter dimicaret! O quoties imperatoris crucis signum et vexillum, quod ut metropolitana illius ecclesiæ mos est semper ante ipsum erigebatur, quod et tam assidue corporaliter cernebat! ego tamen nacto loco et tempore etiam mentis suæ oculis ingerere non desistebam, discipulus magistrum erudiens quale et quare signum crucis esset hoc et vexillum; et quare sic et in via et in ecclesia non a tergo quidem, nec in humero, seu etiam in pectore, sed quod majus, semper ante faciem suam portaretur erectum; semper Deus scit, instanter exhortans ut ipsa potissimum operum virtute recoleret signum illud imperatoris sui et vexillum, quod ita quasi opportune et importune negotiis suis, curis, causis

A et consiliis tota die se ingerebat. O quoties cum virum ad fortia animarem sic, hanc etsi non tantam pollicebar ipsi gloriam, quam nunc video, imo quam et mundus videt et exhibet, et etiam lapis clamat de pariete! Unde, ut verum fatear, sub sole gaudium mihi majus non est, sed nec tantum. Non modicam apud Altissimum fiduciam habens per tantum patrem hunc et patronum, per quem et pro quo gaudium meum diutius crescit. Ita ut secundum eam quæ præcessit multitudinem dolorum meorum consolationes hodie multiplices lætificent animam meam. Crescente quippe in dies viri gloria, et ipse mihi gaudium in dies auget. Quo mihi orphano derelicto, et confratribus meis quondam passionis sociis a mundo jam sublatus consolatur et lætificat animam meam; ut cantem quotidie in misera mea peregrinatione hac quam magna est gloria ejus. Verumtamen, ut paulo ante præmissa repetam, quo jam proxime diximus me peccatorem hominicum tam citum, tam expeditum Christi athletam, dum adhuc certaret inter nos, animasse ad fortia quod, inquam, dixi, sic nemo arbitretur ob id dictum quasi multum necesse tam citum, tam strenuum præsentis hujus viæ et vitæ cursorem aliquibus sermonum stimulis urgere ad cursum, vel etiam movere ad currendum, utpote ex quo semel cepit spiritus semper ferventissimum. Non, inquam, opus sermonum stimulis urgere ad cursum quemadmodum nec opus balsamum unguentis delineare aut solem facibus adjuvare aut aquilæ ad visam et concupitam prædam aptare pennas. Attamen interdum loquebar ego, quasi mulier loquax nens in domo, sed ipse operabatur. Verum ad signa nostra revertamur.

DECURRIT BREVITER QUÆ DE SIGNORUM CONFORMITATE PROLIXIUS DICTA SUNT NOVA QUÆDAM ADJICIENS.

Et quoniam præsentis meli nostri ultimæ de signis et vexillis notulæ adeo jam productæ finem desiderant, ne juxta quod vulgo dicitur etiam amœna cantica vertantur in tedium, quod supra nos fecisse meminimus de aliis et de alterius modi ejusdem istius meli notulis, similiter faciamus et nunc. Videlicet ut notulæ hæc de conformitate vexillarum signorum imperatoris et militis quas ob causam sparsim confuse et ordinate minus in cithara nostra resonavimus, deinceps breviter continue et ordinate absque mora et sine pausa, quæ in psalterio quidem interponi solet, sed in cithara minime, siquidem contra musicæ artis legem hoc; notulas, inquam, illas breviter continue et ordinate resonemus. Ut quo brevior, eo gratior, et quo distinctior, eo clarior et concordior, harum de vexillaribus signis notularum in auditu auris pateat harmonia. Et quo reparato auditore innovetur auditus illis, quas jam præmisimus novas aliquas notulas de vexillis his adjiciamus adhuc. Quot et similiter supra jam in aliis præsentis hujus meli notulis nos fecisse meminimus. Igitur ut compendiarii repetamus a primo.

D

11 NOTULA.

Imperatoris itaque vexillum vexillorum omnium primum et præcipuum et signum pariter est et vexillum. Similiter et vexillum militis rei consimilis signum pariter et vexillum. Et hoc prolixius præstentum nunc pertranseo.

HÆC EST QUASI PARS NOTULÆ PRÆCEDENTIS.

Imperatoris vexillum primum signum crucis. Similiter et alterum militis vas sanguinis. Et in hoc a præmisso dissonantiam non audio. Ibi crux hic sanguis.

15 NOTULA.

Imperatori in vexillo suæ crucis tria sunt, quæ testimonium dant in terra: spiritus sanguis, et aqua. Similiter et militi in vexillo sui vasis tria: plumbum, sanguis et aqua. Et hoc quidem præstentum.

16 NOTULA.

Imperatoris vexillum crucis inventum est Spiritu sancto revelante. Similiter et vexillum vasis militis eodem Spiritu inspirante. Et hoc quidem præmisimus de vase militis, quod constat mundo et palam est de vexillo crucis imperatoris reperto ab augusta Helena sicut istud ab universali matre Ecclesia.

17 NOTULA.

Imperatoris vexillum crucis a servis suis peregrinis aut ante pectus ponitur aut humero affigitur. Similiter et militis vexillum vasis a suis ante pectus. Quod supra etiam mystice ostensum aperuimus.

18 NOTULA.

Imperatoris vexillum crucis ad ædificationem mystice palam mundo semper proponitur. Similiter et militis vexillum alterum ob mysterium simile. Et hoc quidem jam explicavimus.

19 NOTULA.

Imperatoris vexillum crucis in ecclesia supra altare in eminentiori ponitur. Similiter et militis vexillum vasis nunc juxta, nunc subtus vexillum crucis imperatoris ad pugnam imperatoris et militis et palmæ visibilis similitudinem nobis indicandam vexillis his mystice, ni fallor, visibiliter sic conjunctis.

20 NOTULA.

Imperatoris per vexillum crucis gratia sanitatum et operatio virtutum. Similiter et per vexillum vasis militis. Lege librum signorum militis editum de his, de quo supra tetigimus et liquido videbis quod sit. Et hoc prius minime dictum quasi novum hic adjicimus.

21 NOTULA.

Imperatoris vexillum crucis suos tutatur bajulos. Similiter et vexillum vasis militis, adeo ut natio illa quæ Gualensium nominatur, in inimicos suos inexorabilis et sævissima etiam inimicis vexillaris vasis hujus gestatoribus deferat. Et hoc prius omissum hic iterum quasi novum et post alia fere omnium novissimum superaddimus. Et ut ultima præsentis istius meli nostri notula breviter in fine concludatur.

A

22 NOTULA.

Imperatoris certe vexillum crucis portatur peregre, sed ad imperatoris martyrium. Similiter et vexillum vasis militis portatur peregre, sed a martyrio militis sicut illud ad martyrium imperatoris. In quo, etsi in modico dissonare videatur notula hæc imperatoris et militis, nec tamen certe sine causa hoc. Quæ quia nunc præter rem dicenda minime. Et peregrinationis signum tam hoc quam illud, Hierosolymitanæ hoc ubi sepultura imperatoris, Cantuariensis illud ubi sepultura militis.

RECAPITULAT BREVITER PRÆMISSA, TRANSITURUS AD ALIA.

Satis jam, ni fallor, quanta sit inter signorum et vexillorum imperatoris et militis consonantiam, quam concors harmonia, citharam nostram morosius pulsantes et attentius resonavimus. Ex quibus quanta inter imperatorem et militem in vita hæc militari concordia et quanta in morte triumphali conformitas evidentissime præsumendum. His igitur pro sensus mei tarditate, prout desuper datum exsecutis, spero quia ipsius jam imperatoris viribus sed meis manibus etsi indignis juxta quod supra supplicavimus signiferæ et vexillaris crucis suæ, clavis ad militis sui gloriam vas prius clausum militis signum pariter, et vexillum nobis reseratum. Et nos prout permissum de vase hoc effudimus et propinavimus aliis. Propinavimus, inquam, novum quid etsi modicum de vase hoc quod et si alii, nescio; ego tamen ipse, qui propinavi, non gustavi prius; hæc quippe ipsius imperatoris eruditio nova sui militis vas clausum et signatum ipsis crucis suæ clavis nobis reserantis. Ut ita quasi per ipsum signum et vexillum imperatoris alterum consonum sibi et concors mundo declaretur signum et vexillum militis. Prius quippe mundus in vase hoc triumphali, quod in peregrinationis suæ signum ad martyris gloriam gestat non ponderabat quod gestabat. Quotidie palam ante oculos in pectore ipso mysterium portabat et tamen quod portabat ignorabat. Nam illud etiam quod inter cætera primum et gravius est, ipsum plumbum portabat et plumbum non ponderabat. Et quæ similiter ponderosa aquam cum plumbo et in plumbo portabat, sed sicut nec plumbum nec aquam ponderabat. Portabat, inquam, non ponderabat, non credens plumbum nisi plumbum, nec aquam nisi aquam. Nonne aliquis aliquando ad se et ad signum quod portabat reversus, intra se cogitabat sic. Quare sic porto quod ponderosius est plumbum et non potius qui levior est calculus? Similiter quare porto aquam et non potius vinum vel siceram quæ peregrinantibus commodiora essent per viam? Duo ergo illa, quæ mundus portabat, non ponderabat. Sed quid? Fere a memoria excidit quiddam de vase hoc quod sicut verissime et miraculosissime contigit? Et quod istius de quo jam aliquandiu locuti vasis mysterium evidentissime probat.

DE PIXIDIBUS PRIUS GESTATIS.

Siquidem commune dicitur et indubium hoc quod inter initia martyris peregrini novelli in peregrinationis suæ signum vacuas quasdam gestabant pixides. Quæ quantumcunque solidatæ aquam dictam martyris sanctificatam sanguine continere non poterant. Quin imo quanto magis infundebant, tanto magis illæ stillatim evacuabantur. Unde et vase illo miraculose reprobato sic successit alterum hoc. Multi qui viderunt de pixidibus sic rejectis contestantur quod dicimus. Etiam et quædam pixides sic rejectæ in signum miraculi super ipsum martyris sepulcrum videri possunt suspensæ adhuc. Unde sicut videtur ad maiorem istius quod nunc gestatur vasis peregrinatorii commendationem et ipsius efficacius comprobandum mysterium, prius sic per Spiritum sanctum sicut evidentissimum miraculose rejectum est. Quis tamen hominum primus hoc conflasset, aut primus bajulaverit, nescitur, nisi quia, sicut videtur, Spiritu sancto sic inspirante, non unus sed simul omnes, omnibus subito ab universo Ecclesiarum orbe in peregrinationis suæ signum hoc consimile bajulantibus. In quo duo sunt, plumbum et aqua, et hæc quidem ut jam aperimus mystica. Quæ ultimam deinceps mundus sicut devote portat in pectore, sic et sapienter et æque ponderet illa in mente! Mysticum quippe tam hoc quam illud, videlicet tam plumbum quam aqua, et tam aqua quam plumbum. De tertio trium taceo, mundo forte inter alia solum pensante sanguinem et mystice interpretante, propter tam evidens quod in sanguine liquet omnibus martyrii signum. Sed mysterium in reliquis duobus occultius. Quæ tamen duo, ut jam ostensum nec aliquem super hoc hæsitare jam arbitror, sicut et illud tertium, mystica sunt. Quare etenim tertium mysticum erit, si non primum et secundum? Aut quare non tertium, si primum et secundum? Sed scientiarum Domino in dictis, in scriptis et factis, sicut mysterii auctore pariter et doctore ordinante sic, ideo, ni fallor, post duo illa plumbi et aquæ tertium illud sanguinis signum positum est, ut per ipsum inter tria evidentiùs signum in sanctuarium Dei intrantes, quasi per ostium invitaret nos ad quærendum primi et secundi abstrusius mysterium.

Sunt enim quædam in dictis, in scriptis et in factis, in visionibus etiam et in somniis, quæ omnia interdum prophetica sunt; in his, inquam, omnibus quædam interdum sunt, in quibus mox et quasi ante faciem mysticus sensus parum etiam attendenti se ingerit, per quæ quasi quædam mysteriorum ostia intrantes ad alia quæ occultiora sunt invitamur, et per illa sic aperta facilius datur etiam spes et quasi initium intrandi alia etsi difficilior, sed sunt certe alia, in quibus eo subtilius quo profundius mysterium latet. Unde et eo acutiori oculo opus est, quo ipsum subtilius, et eo quasi laboriosiori manu quo ipsum profundius ut erutum extrahatur. Sic quippe est in prophetico abyssis ut

A extrahatur mysterium, quemadmodum in quibusdam terrarum venis, ut eruatur aurum. Sunt etiam quædam terrarum venæ, in quibus aurum mox in ipsa superficie etiam rudi, ad quærendum continuo et absque ulla difficultate quasi se offerat; sed sunt alia, in quibus cum labore multo et sudore terra eversa crebrius et effossa profundius, quasi in ipsis intimis terræ visceribus etiam operose fodienti et exercitato in hoc interius tamen aurum se abscondat. Unde et persæpe accidit, ut etsi operose fodiant, aurum tamen quod ibi latet non extrahant, nimis siquidem profundum est; quemadmodum et ipsi patriarchæ non semper aquam quam sitibundi puteos fodientes quærebant invenire poterant, aqua plerumque sicut et auro nimis in profundo: et quod in aqua et auro simile et in prophetico mysterio: hæc quippe est aqua illa prophetica, quæ per viam transeuntis primo venit usque ad talos, exinde usque ad genua, et exinde post usque ad renes, et demum usque in torrentem intumescens a transeunte per viam pertransiri non potuit. Hoc quippe non via, sed patria sibi privilegium vindicat, ut non jam transitor in ea, sed pertransitor torrente voluntatis divinæ epotetur et æternæ cognitionis plenitudine satiatur, et quod in templi aquis simile et in templi locis. Unde et in prophetis accidit, ut quædam sint aperta etiam in vulgo, et hæc sunt circa templum quasi vulgi loca, atria videlicet templi communia, alia vero interiora templi quasi solis levitæ et sacerdotibus patentia, alio intima quasi Sancta sanctorum quæ solus et summus sacerdos intrare permittitur. In primis igitur recurramus ad Moysi tabernaculum; secundo contemplemur Salomonis templum, et tertio illud Ezechielis templum alterum; sed umbratile tot et jam additis obumbratum miraculis ænigmatice recolamus et hæc certe tam excelsa, tam gloriosa, tam ampla et tam mystica ædificia his per quæ nunc pro tempore breviter tactis strictim ingredior amplum nobis dicendorum permittent ingressum. Et ea quæ de mysteriorum idiomatibus jam tetigimus confirmabunt solus Ezechiel etsi pulsemus, ab ingressu forte nos repellet, cum interius ad templi sui portam venerimus per quam solus princeps ingreditur et egreditur: ad cuius portæ ostium forte cum populo terræ adorare, poterimus intrare minime. Sed quorsum tendo? Videri jam possum quod per aliquod de sanctuarii Dei ostis seu atris templi ingressus exire aut nolim aut nesciam et revera invitus exeo non tamen quasi exire nesciens, sed ut de puero dici solet, et nolens et volens, et quidem nolens verius. Sed tamen ad exeundum tertii meli de ea quam non videmus sed certissime scimus invisibili et consimili palma imperatoris et militis seu palmæ gloria resonandi desiderium pariter et propositum me compellit, quem tamen melum mox cum citharam pulsans inchoa-vero, oportebit me mox, si tamen ostium templi interius dignatione principis et ipso principe aperiente, apertum sic in sanctuarium Dei reintrare et

etiam si tamen princeps primus me post se traxerit, sic adeo procedere necessarium ut ipsa Sancta sanctorum, etsi non intrem, hoc quippe nec auderem, nec dignus sum, quod solius sacerdotis et summi non nisi semel in anno privilegium est, necesse tamen ut sancta illa interiora, etsi non plene intrem, per aliquam tamen riniam inter ipsa et exteriora sancta, quam mihi dux meus Dominus ostendere dignatus fuerit, quid in interioribus agatur vel tenuiter inspicere.

SECUNDUS MELUS FINITUR HIC ET MODULATUR CITHARAM AD TERTIUM.

In primis igitur rememorando tangenda prænissa modicum, ut post prænissa ad hunc melum tertium ab auditoribus ordine congruo judicemur accessisse. Siquidem post primum et ante omnia prænissum de martyre historicum canticum Christo præcentore prout placuit et vocem et verba ministrante, post canticum, inquam, historicum in cithara Davidica prout ab ipso reor citharædo edocti ipsam pulsantes duos jam in ipsa citharizavimus melos. In primo quidem melo qui fuit de visibili et conformi pugna militis ad pugnam imperatoris, ni fallor, etsi nunc rememoremur, sic clara, magna et manifesta audita est consonantia. In secundo vero melo, qui fuit de visibili et consimili palma triumphalis mortis militis ad visibilem palmam triumphalis mortis imperatoris, audita est pariter consonantia et arbitrator quod non minor, si major nescio. Unum tamen scio, consonantiam hanc in melo hoc dulcissime resonasse, si manus artificis et in cælestis musica melius edoctæ longiores et subtiliores digitus pulsassent citharam. Verum ignoscat auditor si offendatur auditus. Siquidem prout edocti et quemadmodum didici, cum manus meæ, etsi grossioribus digitis et minus aptis ad imperatoris et militis visibilis et consimilis pugnae, et ad eorumdem visibilis et consimilis palmæ laudem et gloriam pulsavi citharam, ex cithara tamen qualitercunque pulsata sic liquere potest, quanta sit, quam grata, et quam jucunda visibilis pugnae ad visibilem et palmæ visibilis ad visibilem consonantia quam consona melodia, quam harmonia concors, eo certe dulcior quo concordior.

O quam humanus, quam benignus, quam socialis, quam clemens imperator hic, qui et in pugna sua et in palma milites suos sibi met ipsi assimilat sic! Assimilat dico, non coëquat: nec enim est quod rivulus fonti, stilla mari, atomus monti, aut lucerna soli, imo, ut dicam expressius, non est quod geminæ naturæ giganti miles homunculus valeat coæquari. Qualiscunque consimilitudo potest esse non coëquatio. Sed et est ipsa consimilitudo admiranda. O quantam nunc credo inter imperatorem et militem post tantam in præsentī visibilis ipsorum pugnae et visibilis palmæ conformitatem dulcem admodum velot quamdam consonantissimam harmoniam in gloria ipsorum invisibili, ne jam dicam consimili-

itudinem seu conformitatem, sed potius quasi unitatem indivisam sicut gratiæ sic et naturæ. Quam profecto unitatem hinc dilectionis tam vehementis vinculum nobis in vita hac tam multiplici, tam distracta inexpertum et inde pacis quæ omnem sensum exsuperat perennis securitas nunc in patria solidant. Et profecto sicut meli duo de subsolaris et visibilis pugnae et de subsolaris et visibilis similiter palmæ imperatoris et militis conformi consimilitudine et conformitate consimili sunt prænissi, ita nunc deinceps de unitate incomparabiliter plus omnibus admiranda inter imperatorem et militem aut de his quæ unitatem ipsam probant et indicant, totus hic melus tertius resonabit. Si enim in vita hac subsolari, tam multiplici, tam varia, tam diversa et adversa in hac subsolari pugna et subsolari palma inter imperatorem et militem tanta fuit conformitas in regno illo dilectionis et pacis, imo quod non nisi pax et dilectio est, quid erit inter imperatorem et militem nisi unitas? Et si inter ipsos hic tanta conformitas, ubi non nisi distrahens vanitas, ibi quid erit inter ipsos ubi non nisi solidans veritas? Et certo certius inter imperatorem et quosquos milites suos nulla erit in patria unitas, nisi in via præcesserit inter ipsos conformitas. Nulla ibi capitū et membrorum unio, nisi hic ante fuerit viæ et vitæ similitudo et conjunctio. Debet enim miles, sicut imperator ambulavit, et ipse ambulare. In primis igitur constat et consequens est, et ex superiori promisso teneor sic, ut post subsolarem et visibilem pugnam militis ad subsolarem similiter et visibilem imperatoris pugnam conformatam quasi post melum primum et post subsolarem et visibilem triumphalis mortis militis ad subsolarem et visibilem imperatoris palmam itidem conformatam, quasi post melum secundum deinceps et subsequenter nunc ad suprasolaris et invisibilis triumphalis mortis palmæ militis ad suprasolarem similiter et invisibilem palmam triumphalis mortis imperatoris audiendam consonantiam hic quasi jam tertius melus formetur. Quæ tamen huius meli tertii consonantia mira quidem et mortalium auribus inaudita, tam uniformis, imo tam unita est, ut magis quam reddat consonantiam, resonet unitatem. De qua melus hic tertius erit ultimus. Melus revera hic magis quam consonantiam resonaturus unitatem. Utpote post sudores et labores, post pressuras et angustias, post persecutiones et contradictiones, post pugnas et palmas, sponso jam in lecto et amica in amplexu. De supra solari igitur et invisibili imperatoris et militis palmæ gloria, quod est tanquam de particulari quodam sponsi et sponsæ epithalamico, melus hic.

Verum nunc stupet animus, tremit manus, obrescit digitus, revera sicut sentio, multo plus quam prius grossior nunc et rigidior ad modulandum et formandum tertium melum hunc. De quo ante ipsius modulationem, inno mox cum etiam præmeditor et ad quid cithara nostra nunc modulanda sit

recolo et adverto, stupor confestim mihi incutitur. A Et ad palmam illam suprasolarem et invisibilem et in ea unitatem indivisam qua nunc sponso in lecto sponsa unitur in amplexu, ad hæc, inquam, mentis meæ attollens oculos nescio quæ umbratiliū phantasmatum anigmata mentis meæ mox oculisse ingerunt, et vicissim densa etiam obscurant caligine. Juxta prophetam tanquam cæcus palpians ad parietem domus. Qua via etiam ad interiorē imperatoris et militis simuljam quiescentium thalamum tendam ignorans. Et hoc est quod jam me in historia testatum memini cum militis certantis adhuc monomachiam describerem, videlicet quod invitus avellerer a certante, eo quod post certantis triumphum, ipso jam in gloria deinceps mutus fierem, de cætero de regno suo nil dicturus quod nec oculus vidit, nec auris audivit, nec in cor hominis ascendit (I Cor. II). Verum quidquid dixerim ego, sive in via, sive in patria, sive in morte, sive in vita, sive in pugna, sive in palma, a tanto domino meo et alumno patre avellor invitus. Nec mirum hoc cum ego quasi orphanus relictus solus, domino etiam meo et patre tam gloriose in mundo de mundo, sicut et ipse mundus videt et præconizat, triumphante, vix tamen mihi adhuc audeat communicare mundus, etsi mundo etiam jam per patrem meum et dominum triumphato sic. Unde nec mirum si, quemadmodum prius a visibili ipsius pugna et palma quam sermone saltem protraxi ut potui, nunc multo magis ab invisibili ipsius palmæ gloria invisibili ego nunc sic solus relictus invitus avellar. De qua tamen tam victoriosa gloria eo meticulosius, eo etiam periculosius facio verbum, attolle præconium, indulgeo animum, figo calamus, moveo manum, apto digitum, et formabo melum, quo mihi invisibilior palmæ hujus gloria utpote suprasolari et visibili nemini. Quid igitur dicam mihi peccatori homunculo, jamjam uno levi et brevi statu in pulviculum tenuem dispergendo invisibilem hanc? Imo patriarchis, prophetis, apostolis etiam et quotquot peregrinantibus adhuc peregrina et hæc ipsis. Quorum unus: *Oculus, inquit, Deus, non vidit absque te quæ præparasti expectantibus te (Isa. LXIV)*. Verumtamen poterit ipse nunc ad citharæ nostræ ingenioli mei plectro torquendos superiores clavos ad modulandas chordas, ad movendum manus, ad aptandos digitos ad pulsandum citharam, ut melus hic tertius quo acutius formetur et subtilius conatui meo huic interiores sensus mei augere nunc vires fortius, quanto nunc amplius confirmatus est principatus ejus. Et certe ordinis exigeret consequentia et decens admodum, si quis tamen didicisset sic post visibilis pugne imperatoris et militis melum primum et post eorundem visibilis palmæ melum secundum de invisibilis et suprasolaris palmæ ipsorum gloria quasi melum tertium resonare. Cujus profecto meli remedio plenius restitueretur mundo quo dignus non erat mundus et historia libelli hujus. Verum melus hic in citharæ

chordis acutioribus et subtilioribus terreni et carnalis spiritus sensibus spissis omnino subductus modulationem desiderat. Alioquin totum absonum, totum dissonum, consonum nihil, auditui nihil nec etiam ejus ipsius qui pulsaverit citharam delectabile. Cum tamen juxta illud velus proverbii: « Et qui dulce non canit tamen sibi dulce canat. » Mei autem, sicut jam supra et hic iterum fateor, ad has citharæ chordas tam acutas, tam subtiles, quæ tamen solæ, ut melus hic dulciter et concorditer resonet in cithara, pulsandæ sunt, digiti certe mei grossi nimis et rigidi, spissi nimis et turgidi. Terreni quippe et carnalis hominis digiti hi, inno terrei et de terra. Quin potius terra ipsa jam jam in lutum vile et putridum, nec etiam ut pedibus conculetur dignum, reversura. Cum tamen, ut melus hic in cithara digne et apte formetur, nullius præterquam solius Dei digitus expectandus. Spiritus quippe sapientiæ, sicut multiplex, ita et ipse solus simplex, acutus, subtilis et mobilis est, omnibus etiam mobilibus mobilior: adeo quod attingit a fine usque ad finem fortiter et disponit omnia suaviter. Unde et ipsius solius digitus ad melum hunc formandum aptus est. Et propterea solus hic qui talis spiritus et qui omnia suaviter disponit sic, solus quidem hic novit melum hunc suaviter citharizare, et solus ipse potest suaviter melum hunc citharizantes docere; qui videlicet habeant spiritum sui similem, simplicem, acutum, subtilem et mobilem. Ego tamen tanquam gradæ testudineo sequax, ut solem comprehendam Domini cæli gloriam de tam profunda hac lacrymarum valle suspiciens, velim nolim, possim non possim, animo utrumque et calamo, prout datum desuper, prosequar. Et qualibuscunque manibus et digitis utramque pulsabo citharam, formabo melum. Urget enim me, ut jam supra tetigi, charitas: verum, quia tanta et tota gloriæ materia hæc quæ quotquot ante nos fuerunt vel sunt, quantumcunque præclara ingenia præ nimio sui fulgore, utpote suprasolaris et invisibilis reverberat, de ipsa tamen ipso qui jam in ipsa est, Domino meo juvante aliquantisper locuturus faciam vel quod infantes solent utpote infans hic. Faciam, inquam, quod infantes, qui conantes loqui verba magis præcident aut dimittant quam forment. Et ego vel sic formabo melum, quasi dans sine mente sonum: jubilans et tamen jubilationem nesciens. Quam non peregrinus in via, sed solus beatus populus sibi in patria vindicat. Juxta quod edocti illius citharædi et id experti vox in cithara: *Beatus, inquit, populus qui scit jubilationem (Psal. LXXXVIII)*.

DE VERBORUM PROTRACTIONE SE EXCUSAT.

Quod autem ad inchoandum melum hunc sic moror, sic traho, sic protraho, sic me retraho, sic differo et me excuso, nemo calumniatur, miretur nemo. Nec enim calumniandum mirandumve, si bestia montem tangere, si plebeius Sancta sanctorum intrare, aut si plumbæ gravedinis animal intame-

ascantium aquarum torrentem intrare vereatur, quem nec ipse propheta ipsius Salvatoris effigiata imago, primo per aquam transductus usque ad talos, post usque ad genna, demum usque ad renes, verum cum jam profundius usque ad hunc aquarum torrentem pervenisset, pertransire non potuit, quoniam, ut testatur ipse, intumuerant aquae profundae torrentis quae non poterant transvadari. Verumtamen quoniam ex promisso teneor, et ne temere vereor torrentem hunc, etsi transvadare non possim, hoc quippe nemo, intrabo tamen non quidem propheta audacior, sed quod minime dubito, temerarius; nisi quia si minus fidei habens praesumptionis plurimum mergi corpero, ad imperatorem et triumphatorem militem mox clamabo ne peream. Quoniam etsi praesumptuosus et temerarius propter ipsorum tamen gloriae palmam annuntiandam periclitor. Unde, etsi culpeter praesumptio, spero tamen quia apud ipsos subveniet mihi et me excusabit devotio.

Ut igitur superius promissum, devotionis meae nunc solvam debitum, post duos melos de conformitate similis seu de similitudine conformi visibilis pugnae imperatoris et militis et visibilis similiter eorundem palmae, prout desuper edoctus, praeformatis, jam de ipsorum non tam conformitate seu consimilitudine, quam de quasi individua et sempiterna eorumdem unitate melus hic tertius lormandus est. Et erunt ita post historicum canticum ad laudem et gloriam imperatoris et militis meli tres. Primus melus fuit de imperatoris et militis consimili pugna; secundus, de imperatoris et militis consimili palma, sed subsolari et visibili; tertius vero hic itidem erit de imperatoris et militis, non dicam jam consimili, sed quasi una et eadem palmae gloria, sed suprasolari et invisibili. Et primus quidem melus de visibili pugna imperatoris et militis fuit ad luctum propter compassionem; secundus de visibili palma imperatoris et militis fuit ad gaudium propter victoriam; tertius vero hic de invisibili invisibilis palmae imperatoris et militis gloria quasi de quodam sponsi et sponsae particulari epithalamico erit ad jubilum propter amoris vebementiam quam tacere non possumus, et tamen exprimere non valeamus.

INCIPIT HIC MELUS TERTIUS

SED NONDEM IN SUPERIORIBUS CITRARE CHORDIS.

NOTULA.

In primis igitur ad conformis gloriae imperatoris et militis plenitudinem demonstrandam post signa et vexilla imperatoris et militis non est tacendum de eorumdem corona.

QUOD DUPLEX SIT CORONA MILITIS SICUT
ET IMPERATORIS.

Imperatoris siquidem est corona duplex: similiter et duplex militis. Duplex quidem militis corona, quia duplex victoria. Exspeciemus per modicum donec audierimus. Sed de coronis imperatoris praedicendum.

DE PRIMA IMPERATORIS CORONA. -- TERTH MELI
PRIMA NOTULA.

Imperator ab aeterno natus, ab aeterno coronatus, et ab aeterno haeres universorum est constitutus. Haec imperatoris corona aeterna illa est quam habet cum Patre et a Patre una majestas et aeterna, una potentia, una gloria. Et haec est imperatoris corona prima, sicut sine fine, ita et quod adhuc magis implicitum fidei involucrum est et absque initio. Hoc profecto mirum supra omne mirum, sed humiliter et devote praebemus auditum quia fides ex auditu. Et haec quidem, quam nunc dicimus, corona est prima et aeterna corona imperatoris Dei, non ejus hominis corona. Ejus, inquam, non hominis imperatoris, sed ejus imperatoris Dei corona haec ante omnem creaturam prius quam crearetur homo.

DE SECUNDA IMPERATORIS CORONA. -- 2 NOTULA

Hanc tamen coronam suam primam, qua pater suus Adonai coronavit ipsum ante saecula, propter hominem in fine saeculorum quasi deposuit et aliam incomparabiliter inferiorem assumpsit, tanquam exuens soccum et induens saccum. Unde ipse: *Conscidisti, inquit, saccum meum (Psalm. xxix)*. Qui si in prima illa et aeterna corona sua propria et proprio socco mundo apparuisset, non jam rex videor sed potius angelorum, imo etiam plus quam archangelorum imperator cognosceretur, imo nec cognosceretur quem nec totus mundus sustinere sic posset. Quis enim, quae caro, quod animal, quod corruptibile posset etiam appropinquare, nedum habitare cum illo devorante igne, cum ardoribus sempiternis? Imperator igitur noster ad nos descendens, talem inter nos et ex nobis coronam assumpsit et talem soccum induit, qualem ad Judaeos, propter quos specialiter ad nos venit tunc decuit, saccum tamen revera magis quam soccum. Alioquin nisi iudicio nobis incomprehensibili talem soccum induisset, non fuisset saccus ejus conscissus nec ipse laetitia circumdatus. Et ne diutius immorer his, ex superiori charitatis promisso ad alia properans de hac secunda imperatoris corona sub brevitate nunc dicendum expressius.

Imperator patris sui sicut unicus et primogenitus quemadmodum a Patre suo primam aeternae Deitatis suae coronam ab aeterno habuit, sic et a matre sua Virgine in tempore humanitatis nostrae coronam assumpsit. Haec profecto corona, diadema illud est quo rex sapiens imperatorem hunc a matre sua coronatum praenotavit: *Egredimini, inquit, filiae Sion, et videte regem Salomonem in diademate quo coronavit eum mater sua (Cant. iii)*. Et ecce Salomon hic, imo etiam plus quam Salomon hic. Et ecce Salomonis corona haec, qua benedicitur mater sua ipsam coronasse potius quam induisse. In hac quippe nostrae humanitatis et humilitatis carne videmus eum nunc sicut terrenas et aeras potestates triumphasse. Nam obedientiae merito, qua factus est obediens Patri usque ad mortem, mortem autem crucis, Pater hanc Filii sui coronam exaltavit, quin caro ejus re-

floruit, et sic devicta morte de nobis triumphavit. Et ita corona hæc in cruce tanquam in fornace per ignem passionis examinata et omni sic vetustatis excocta rubigine tota resplenduit, quia totus homo refluuit. Et ut videri potest in quadam velut sanguinis tinctura presso et calcato sacco et in soccum converso. Unde propheta : *Quis est iste qui venit de Edom tinctis vestibus de Bosra? Iste formosus in stola sua, gradiens in multitudine fortitudinis suæ* (Isa. LXIII). Etiam in hac matris suæ corona adeo gloriosus, formosus et fortis ut quem paulo ante vidimus angelis minoratum cernamus nunc adorari ab angelis super angelos et super omnem creaturam exaltatum; unde et Magister : *Eum qui modico quam angeli minoratus est videmus Jesum propter passionem mortis gloria et honore coronatum* (Hebr. II). Ecce duplex corona imperatoris : prima qua pater suus ipsum coronavit, et hæc est corona omnipotentiae; secunda qua mater sua ipsum magis coronavit quam induerit : et hæc est corona gloriæ sacco sic in soccum converso. Ecce enim quem sacco obvolutum vidimus, in quo quasi absconditus vultus ejus et despectus; unde nec reputavimus eum, ecce, inquam, magnus imperator hic duplicem coronam gestans, tanquam gigas geminæ substantiæ biformisque naturæ, ex prima sui et æterna natura secundum quam patrem habet et non matrem gestans coronam omnipotentiae; secundam alteram vero sui naturam, secundum quam matrem habet et non patrem, secundum illam gestans coronam gloriæ. Taceo nunc de tertia imperatoris nostri corona, corona videlicet illa spinea qua post patrem suum et matrem coronavit eum noverca sua Synagoga. De illa, inquam, taceo utpote quæ nunc a reliquis imperatoribus duabus coronis quasi absorpta nec potentiae fuit corona, nec gloriæ, sed ignominiae, per quam tamen secundæ illius quam a matre habuit acquisivit gloriam palmæ. In prima corona imperatoris nostri majestas est incomprehensibilis. In secunda ipsius gloria admirabilis, sicut in tertia ipsius fuerat humilitas despicibilis, in qua nec species ei nec decor. Nec enim decoris sed potius dedecoris corona hæc. Unde post istam sic exaltato imperatore nihil modo imperatori et coronæ illi, sicut nec illis qui imperatorem tunc suum nunc nostrum coronaverunt sic.

DE DUPLICI CORONA MILITIS.

Ecce quia jam audivimus quod duplex sit corona imperatoris. Similiter est et duplex militis. Duplex certe corona, quia duplex victoria. In præmisso siquidem de milite historico cantico, si revocemus nunc, nec enim arbitror excidisse hoc, nisi forte totum canticum tam cito jam a memoria exciderit; revocemus, inquam, nunc quod supra cantatum, nunc tangimus de hæc militis victoria duplici. Satis siquidem supra et cantatum et recantatum, quanta fuerit tolerantis virtus in exilio. Et iterum quanta fuerit pugnantis constantia in martyrio. Et sic miles hic prius vicit per exilium et hæc est palma confes-

A soris. Secundo vero per martyrium et hæc est palma martyris. Unde et corona debetur palmæ huic; debetur et illi : una confessori, sacerdoti, altera vero neomartyri militi. Quas et jam scio redditas a retributore cito et justo debitore. Ut sit super communem auream confessorum et altera corona aureola martyrum juxta ipsius in lege formam exemplarem a summo omnium aurifice et ipsius largitore fabricata. Charismatum videlicet varietate multiplici in terra silis et distincta et quatuor præsertim expressis et impressis virtutibus principalibus, quasi quatuor ipsius Spiritus sancti fabricatoris digitis alta. Aureola quidem dicta non pro parvitate aut diminutione coronæ, sed potius pro perfectorum quibus solis danda est paucitate. Hæc duplex militis triumphatoris corona illa, ni fallor, miræ magnitudinis corona est, quam sicut supra in historia interseruimus, frater Hierosolymitanus post mortem angelorum concivis effectus, capiti martyris dilacerato et convulso ab ipso Domino vidit impositam. Rememoremur superiorem historiæ pericopen hanc. Ecce Thomas quem vidimus hominem passibilem, nostri similem, nostri comportorem oneris, et nostræ comparticipem infirmitatis, quam magnus triumphator nunc, duplicem coronam gestans, ut confessor unam, ut martyr alteram, ut ita congruat militi quod et imperatori; et quemadmodum supra de tertia corona imperatoris sic pertransimus, nunc et de tertia militis. Illam vero nunc dico militis coronam tertiam, quam a capite abscisam in agone martyrii perdidit, per quam tamen miles per martyrii palmam duas quas ostendimus acquisivit. Ita iste per suam carnis coronam corruptibilem et infirmam obtinens coronam duplicem, sicut et imperator humanitati suæ per suam contemptibilem et ludibricam coronam spineam. Verumtamen, sicut supra de illa ludibrica imperatoris, ita de hac infirma corona militis, pertranseo nunc. Nihil quippe modo coronæ illi et militi triumphatori, utpote quæ sicut marcescibilis versa nunc in corruptionem carnis fuit non spiritus.

O quam magnus triumphator miles hic, imperatoris sui gigantis geminæ substantiæ biformisque naturæ sicut in aliis, etiam et in coronis, suo modo conformis sequela et consimilis! Sicut imperator suus gigas geminam substantiam, et iste duplicem personam gerens, confessoris unam, martyris alteram. Sed hæc quæ de coronis imperatoris et militis in tertio melo hoc jam inchoato citharam nostram pulsantes resonavimus de imperatoris et militis invisibilis palmæ conformitate, magis quam de ipsorum proposita et promissa invisibilis palmæ unitate resonata sunt. Verumtamen et de hæc inter imperatorem et militem invisibilis palmæ conformitate in patria, sicut et alia multa quæ de ipsorum visibilis pugnæ et visibilis palmæ in via conformitate præmissa sunt, hic tacendum non erat. Siquidem inter imperatorem et militem et in via, et sicut jam ostendimus de coronis et in patria tam evidens et

tam admiranda conformitas, magnam et nobis ineffabilem inter eosdem unitatem nunc in patria et portendunt et probant. Quin potius hæc quæ expressim de imperatore et milite præmissa sunt, totius capitis et corporis unitatem commendant nobis et probant. Nam quod dico et expressim doceo de militis ad imperatorem suum in via conformitate, quasi de uno capitis membro ad caput, sic quidem etsi non sit scripto expressa, et in singulis capitis hujus membris magna est et decentissima ad idem caput suum conformitas, et aliqua cujusque membri ad caput suum conformis gratia, quæ non alterius juxta varia gratiarum dona a capite ad membra descendenda. Juxta quod caput corpori sponsæ videlicet sponsus pollicetur: *Murenulas, inquit, aureas faciemus tibi, vermiculatas argento (Cant. i).* Et idem aliter: *Quid faciemus sorori nostræ in die quando alloquenda est? Si murus est, ædificemus super eum propugnacula; si ostium est, compingamus illud tabulis cedrinis (Cant. viii).* Itaque, etsi non sit scripto expressa quemadmodum nunc de imperatore et milite, nihilominus tamen magna præcessit in via singulorum membrorum corporis ad caput suum conformitas. Alioquin non sequeretur nec esset capitis et corporis sicut nec decens nec conjunctio congrua.

Igitur post imperatoris et militis non solum visibilis pugnx et visibilis palmæ in via, sed etiam et palmæ invisibilis in coronis ipsorum in patria conformitatem expressim edoctam, quod adhuc multo majus acutius, subtilius et difficilius est, utpote melo hoc tertio amodo in superioribus et acutioribus citharæ chordis formando deinceps sumus de eorumdem quæ jam in patria est unitate dicturi. Et quidem in primis de generali totius capitis et corporis sponsi et sponsæ Christi et Ecclesiæ in patria, unitate ex parte jam inchoata in cithara nostra resonabimus. Quia admodum dulcis consonus et concors melus hic in parte hac; in quo decet maxime nihil audiri dissonum, nihil absonum, utpote non tam de conformitate quam de unitate ipsa. Sed in melo ultimo ad imperatorem et militem reversuri nunc in primis inchoabimus a genere. Quia hoc ipsum sperandum et expectandum in fine omnium in toto capite et corpore, quod nunc de capitis et corporis unitate in cithara nostra resonabimus pro imperatore et milite. Nisi quod quædam corporis membra quo capiti plus vicina, eo etiam digniora et capiti conjunctiora sunt quasi unum cum capite. Juxta quod magister docet stellam a stella in claritate differre, et magister magistrorum in domo patris sui mansiones multas paratas esse.

HIC PRIMO IN SUPERIORIBUS CITHARÆ CORDIS MELUS
HIC TERTIUS FORMARI INCIPIT. 3 NOTULA.

Igitur de imperatoris et militis per palmam suam invisibilem unitate in patria tertium melum hunc in ipsorum coronis jam inchoatum subtilius deinceps et acutius, prout subtilis ipse et acutus sapientiæ spiritus edocere dignabitur, formaturi in primis et

ante alia tres vanitatum species seu unitates tres nobis sunt distinguende; ut ita liquido appareat, quæ sit illa unitatum inter tres quam inter imperatorem et militem tanta in via et prout docuimus tam diligenter ostensa conformitas probat. Juxta quod supra sic argumentando processimus. Quia si inter imperatorem et militem in via, ubi tanta varietas, tanta diversitas et adversitas, tanta distractio, tanta dilaceratio est, tanta fuit conformitas, in patria illa unitatis et pacis imo quæ non nisi pax et unitas est, quid erit nisi admiranda quædam et admirabilis unitas? Ecce quia argumentando sic processimus, donec de conformitate ad unitatem demum nunc pervenimus. Unde et tres hic vanitates distinguimus, ut quæ sit illa imperatoris et militis nunc in patria unitas, quam prius inter ipsos in via tanta probavit conformitas doceamus.

DISTINGUIT UNITATES TRES. 4 NOTULA.

Sunt itaque, ut jam distinguere cœpimus, tres unitates hæ. Prima unitas est unitas solius naturæ; secunda solius gratiæ; tertia vero unitas est et naturæ et gratiæ. Prima unitas solius naturæ in Deo inter tres; secunda solius gratiæ in Deo inter Dominum et hominem singulariter assumptum in unitatem personæ non naturæ; tertia vero et naturæ et gratiæ inter Dominum sponsum et Ecclesiam sponsam. Ecce tres unitates hæ et in Deo hæ tres qui est prima et summa et principalis unitas. Et ita tres unitates hæ in ipsa prima et summa et principali unitate. Prima unitas est trium personarum. Hæc est illa quam diximus solius naturæ. Secunda unitas duarum est naturarum. Hæc est quam diximus solius gratiæ. Tertia vero est omnium spirituum: omnium dico quotquot ab initio præciti et prædestinati sunt conformes fieri imaginis Filii sui. Et hæc est illa, quam diximus, unitas et naturæ et gratiæ. Et cum de gratia evidens sit, ideo dico eam et naturæ quia nostra prima et principalis unitas omnium Deus verus et solus, cum ab æterno fuisset solum naturæ suæ nunc per gratiam incomprehensibilem uniendo sibi hominem factus est in tempore naturæ nostræ. Et ita ei unimur, nunc non solum per gratiam sed et per naturam. Et hæc est quam nunc dicimus unitas naturæ et gratiæ inter solum hominem et Deum, non inter Deum et angelum. Nusquam enim, ait Magister, angelos apprehendit. Nec etiam dico unitatem hanc inter Deum et hominem assumptum, quæ est solius gratiæ, sed illam quæ est inter Deum et hominem, sponsum videlicet et sponsam, Christum et Ecclesiam, et nunc inter imperatorem et militem triumphatorem, de qua principalis nostra intentio est, et propter quam de aliis nunc interserimus. Hæc quippe nostra unitas specialis et propria, non angelica sed humana, utpote quam nos, qui in corpore mortis hujus peregrinamur adhuc, per patientiam expectamus, et in qua triumphator miles noster et imperator nunc sunt. Prima unitatis species, quæ est solius naturæ, inter tres imo tres et tres ipsa sicut incom-

prehensibilis et ineffabilis est. De qua tamen propter nostram tertiam quæ est naturæ et gratiæ aliquantisper fari nos oportet. Similiter et post de secunda, quæ est solius gratiæ propter eandem tertiam. Tertia siquidem hæc nostra quæ est naturæ et gratiæ, quasi de duabus illis est, quarum prima est solius naturæ, altera vero solius gratiæ. Unde et de prima dicendum primo. Præsertim cum hæc tertia sicut et secunda in prima unitate sint, utpote sicut prima et principali. Imo sint hæc unitates tres, quasi una illa prima et principalis unitas, ut docebunt sequentia, et illa prima sit summa causa et prima sicut secundæ unitatis et tertiæ.

PRIMO HIC DE PRIMA ET PRINCIPALI UNITATE AGIT.

De prima igitur et principali unitate hæc dicturi, amodo primas et superiores citharæ nostræ chordas nos jam tangere necesse est. Id in primis primæ illi et principali unitati supplicantes, ut pro ipsa et de ipsa citharam ego qualiscunque puer suus citharædus pulsaturus revelet oculos meos, ut resonare sciam vel aliquid de ipsa quo nobis manifestetur, quod est ipsa et postea secundum analogiæ nostræ possibilitatem, quid sit ipsa. Igitur juxta quod et magister ille citharædus orabat, revelet oculos nostros ut consideremus de principalis hujus unitatis lege mirabilia. Oculos dicit non oculum: siquidem et oculi hi multi sunt. Est enim oculus corporis, est oculus cordis seu rationis, est et oculus contemplationis. Oculus corporis apertus est et clare videns; oculus cordis infirmus et lippiens. Oculus vero contemplationis caliginosus et excutiens. Primo oculo videt homo quæ extra se; secundo quæ intra se; tertio quæ supra se. Primo oculo videt homo corpora et quæ in corporibus per speciem; secundo oculo videt homo spiritus et quæ in spiritibus per experientiam; tertio vero videt homo primam et principalem unitatem, sed in imagine per obscuram ænigmati similitudinem. Primus corporis oculus ad viam trahit et quasi dormitantem cordis oculum excitat; secundus cordis oculus jam viantem ducit et viam monstrat; tertius vero contemplationis oculus patriam a longe nunc aspicit et salutet. Et videamus quomodo.

PRIMA PRIMÆ ET PRINCIPALIS UNITATIS MANIFESTATIO PER PRIMUM OCULUM CORPORIS ET PER SECUNDUM RATIONIS IN PRIMO EXEMPLARI NATURÆ. 5 NOTULA.

Homine mundum et quæ in mundo corporaliter cernente, et nec mundum nec in mundo quidquam quod non creatum non factum, sicut et ipse homo qui in creaturis præcellit factus est, ipsius excitatur mox cordis seu rationis oculus, ut per corporaliter visam creaturam cogitet mox aliquem ipsius esse quem non videt Creatorem. Et ita per varias creaturarum species nunc visibiles, nunc invisibiles, nunc intimas, nunc medias, nunc supremas meditando currens quasi per scalam aliquam variis distinctam intercalaribus, Creatorem investigando conatur ascendere. Et tandem ductu rationalis oculi unum invenit omnium Creatorem, primam videlicet

A et principalem unitatem nostram, omnium quæ sunt primam et summam causam, excitato sic oculo cordis per oculum corporis et investigantis ascensiones dirigente. Et hæc est prima primæ et principalis unitatis nostræ manifestatio, ipsius videlicet per creaturas suas prima cognitio. Unde et Magister: *Quod notum, inquit, est Dei manifestum est in illis; Deus enim illis manifestavit (Rom. 1)*, unde et cordis hic oculus, etsi infirmus et lippiens, tamen quoad manifestationem hanc ductu suo est sufficiens. Ita quod sicut Magister docet, illi sint inexcusabiles qui veritatem Dei in injustitiâ detinebant. Quia cum cognovissent Deum, non sicut Deum glorificaverunt. Prima igitur primæ unitatis nostræ manifestatio est per opera. Et hoc qui diffiteatur nemo, qui hos duos oculos habeat. Hoc quippe jam quasi oculo ad oculum videri potest, per oculum corporis excitato oculo cordis, et nos peregrinantes adhuc per rectam hanc intelligentiæ viam dirigente. Verum de prima manifestatione hæc cursim impræsentiarum pertranseo, utpote quæ non solum a catholicorum theologis, quorum sublimior speculatio est, sed et a philosophis gentium solum naturæ exemplaria sequentium et non gratiæ crebra valde et acerba est quæsitæ et inventa indagine. Qui et nobis super hoc præ excellentis ingenii sui monumenta reliquerunt et posteris legenda tradiderunt. In quibus super Deo vivo et vero, quidquid veri acutiori humanæ rationis oculo in primo quod diximus naturæ exemplari legentes subtilius inspicere poterant, et profundius, studiosissime sunt prosecuti. Nec enim in parte hac Deus sapientiam mundi hujus stultam fecit, seu sapientiam sapientium perdidit, aut prudentiam prudentium reprobavit. Sed stultam fecit, reprobavit et perdidit, quia in solo naturæ exemplari suo humanæ rationis oculo studiose nimis inspicientes, eo solo plenam sibi posse comparare sapientiam arbitrati sunt, et præter istam quasi visibilem et mundanam sapientiam quæ quidem a Deo Dei nullam absconditam arbitrantur. Unde et visibile naturæ exemplar ad sapientiam sibi sufficere arbitrantur, et nullum etiam esse ad hanc præter hoc alterum, quod jam diximus gratiæ exemplar, quasi vile et humile contempserunt. Et ne cui in dubium veniat quæ sint exemplaria hæc quorum unum nomino sic exemplar naturæ, alterum vero exemplar gratiæ, sicut prius tres distinxisimus oculos, ita et oculorum trium tria distinguemus exemplaria, in quibus jugiter tres illi inspiciunt oculi. Primum itaque inter tria hæc est exemplar naturæ; secundum exemplar gratiæ; tertium vero exemplar vitæ. Quod et alibi in sacro eloquio ab ipsa sapientia liber vitæ nominatur. Primum dico exemplar naturæ mundum et quæ in mundo sunt creationis opera. Secundum gratiæ sacra eloquia et quæ in ipsa a sæculis sunt abscondita humanæ reparationis et divinæ cognitionis secretiora mysteria. Nec enim loquor nunc de sacris eloquiis secundum illam eorum partem, quam capit parvulus, sed

secundum illam quam sapit etiam lux in lege Dei exercitatus et perfectus. De qua Magister: *Sapientiam, inquam, loquimur inter perfectos (I Cor. II)*. Sapientiam vero non huius sæculi neque principium huius sæculi, qui destruuntur, sed loquimur Dei sapientiam in mysterio, quæ abscondita est, quam nemo principum huius sæculi cognovit. Quin potius etiam hanc tanquam vilem et humilem sæculi huius principes contempserunt, philosophi videlicet gentium, qui scientiæ et nominis præminentia cæteris quasi principari videbantur; tertium vero dico exemplar vitæ librum prædestinationis æternæ. In quo sunt ab æterno scripti hi, qui secundum propositum vocati sunt sancti, quotquot ante sæcula præsciti sunt conformes fieri imaginis Filii sui, verbum videlicet in principio apud Patrem, quamdam velut omnipotentis Dei artem et sapientiam, et quæ cum ipso sunt, et in ipso divinæ suæ incomprehensibilia sapientiæ. Et in primo quidem quod dicitur hic naturæ exemplari duo potissimum inspicunt oculi. Primo inspicit quem supra primum posuimus, oculus corporis et secundo oculus rationis. Sed oculus corporis sola visibilia, oculus vero rationis per visibilia legit et videt in eo invisibilem in creatura Creatorem. In reliquis vero duobus, quorum unum diximus exemplar gratiæ, alterum vero vitæ, tertius ille et solus quem contemplationis oculum diximus intuetur: utpote quæ in exemplaribus his scripta longe nimis remota ab oculo rationis et multo longius adhuc ab oculo corporis. Nec enim quæ in duobus his exemplaribus sunt Dei nota sunt. In quibus sola invisibilium fides, non visibilis creatura, non ratio tertium hunc nostrum contemplationis oculum juvat. Unde et prima illa primæ et principalis unitatis per opera manifestatio, quæ in primo legitur et videtur naturæ exemplari, etsi sit prima et philosophica, etsi etiam gemino studiose et acute inspecta oculo, ad tam invisibilia tamen et tam incomprehensibilia quæ in reliquis duobus exemplaribus scripta sunt, sicut peregrina et invalida nimis manifestatio hæc: nec etiam quanta sit pupilla oculi aut lucerna lychni mundum illuminanti solis claritati comparetur. Et his præsertim quæ in tertio exemplari, quod liber vitæ dicitur, scripta sunt per creaturas est prima ista invalida nimis primæ unitatis manifestatio. Nam ex formationibus et similitudinibus his creatis et naturis sensibilibus, magis quid non sit quam quid sit hæc prima nostra unitas demonstratur. Neque enim dicitur id neque secundo id, sed est totum supra id, et omnino extra quam id per quod probatur. Unde et si forte hæc ipsa quæ sicut incircumscriptibilis et indescriptibilis est, ut vel aliqua ipsius notitia comparetur quoquo modo describitur magis quam per quid sit, per quid non sit necesse ut describatur; ut ad sciendum de ipsa quid sit ipsa, sufficiat nunc nobis scire quid non sit ipsa. Et removeatur ab ipsa quidquid fecit, ut vel sic sciatur hoc solum esse ipsa quod non fecit. Quasi omnino diversa, omnino alia superessentialis quædam essentia. Nam ut

A intelligentiæ gratia e multis unum ponamus, hic cum de increata unitate hac dicitur, quod ipsa est, et de quovis creato quod ipsum est, per idem verbum aut idem aut saltem simile vel commune, quid de increata et creato videtur dici. Sed dicto revera omnino dissidens et prædicationis ratio hinc inde omnino incompacta et dissonans, quod etiam parum theologis patens. Prædicatio revera omnino dissonans inter hæc non minus quam et inter hæc alia, ut si diceretur: *Aper est ferus, homo est justus*. Tanta est essendi distantia inter creatricem unitatem, cui nihil aliud est esse quam vitam esse, et inter creaturam, cui nihil aliud est esse quam corruptivam esse. Unde et in cor hominis non ascendit huius increatæ unitatis superessentialis essentia. Quia neque illa est nec in illis nec secundum illa quæ sapere vel cogitare potest cor humanum. Et ideo sicut nec oculo corporis nec oculo cordis hæc percipitur qui non videt, nisi vel ea quæ novit vel secundum ea quæ novit. De ipsa igitur prima et principali unitate, prout ab ipsa datum, nunc loquens, hoc solum nunc in primis de ipsa demonstrare proposui, quod ipsa est et hoc per primum corporis oculum secundum rationis oculum excitantem. Quia dixit insipiens in corde suo: *Non est Deus (Psal. XIII)*. Et maxime quia hoc nostrum propositum juvat. Ut ita præsteno quod ipsa sit, consequenter demonstratur, quod nec in ipsa nec cum ipsa sicut nec aliqua contrarietas sit vel adversitas, sic nec diversitas vel multiplicitas, sed sola unitas. Juxta quod magistorum unus: *Apud quem, inquit, non est transmutatio nec vicissitudinis obumbratio (Jacob. I)*. Non dixit quod non in illo, sed quod nec etiam apud illum sit. Hoc etenim pariter si non excidit et ad propositum attinet, quod juxta superius promissum nostrum post multipliciter supra demonstratam imperatoris et militis conformitatem in via, ipsorum tenemur a modo unitatem demonstrare in patria. Quod tamen paucis explicari non potest. Unde etsi in tertio melo hoc forinando fio morosior, non reprehendat auditor, sed indulgeat, quia tam grandes materiæ, et sine quibus propositum non efficitur, brevibus explicari non possunt. Propter hoc ipsum supra distinximus unitates tres, primo ut videbar congruere de prima et principali unitate, nunc loquens de ipsa per ea quæ ab ipsa facta sunt ostendere desiderans, quod ipsa sit, quod potest esse manifestum et ad propositum attinet. Verum licet secundo sic nobis demonstrante cordis oculo per primam creationis suæ revelationem manifestari sic possit, necesse tamen ut post modum eundem hunc nostrum cordis oculum, etsi, ut diximus, lippum et infirmum eonemur aperire adhuc; quo visus ipsius vis et virtus amplius dilatetur ad videndum aliquid adhuc et manifestandum nobis de prima nostra unitate hac.

PRIMA PRIMÆ UNITATIS MANIFESTATIO.

De prima igitur primæ unitatis nostræ manifestatione, quæ procreata est, hoc præmittimus, quod cum variae sint species creaturarum, nihil tamen

omnino creatum, quod non manifestando probet et probando manifestet creatricem unitatem hanc: tanquam radii solem, sic creaturæ singulæ hanc suam creatricem. Nec aliquid existimo creatum vel creari posse, quod a creatore suo sicut haberet substantiam, sic aliquam non traheret convenientiam. Convenientiam dico aliquam etsi nobis absconditam, per quam creatura omnis suo in aliquo convenit Creatori. Siquidem omne quod factum est sicut ei, a quo factum, omnino non potest esse æquale, ita et ei, a quo factum, omnino non potest esse dissimile, factura a factore suo aliquam ex necessitate convenientiam contrahente, quemadmodum a radice fructus semper aliquem sorem trahere necesse est. Si enim juxta Scripturæ testimonium *cuncta quæ fecerat Deus, erant valde bona* (Gen. 1), nihil in universitate est quod sicut a bono summo non habet essentiam, ita non trahat et boni participationem, ac per hoc convenientiam et similitudinem. Ex qua boni participatione est quod nihil omnino creatum est, quod non aliquid possit et ad aliquid prosit. Nec etiam arbitror aliquid creari posse, quod ad aliquid prodesse non possit, tanta est bonitas Creatoris. Cum igitur nihil sit quod a summo bono non trahat boni participationem, consequitur mox nihil esse quod cum summo bono non habeat convenientiam et similitudinem aliquam. Ex qua profecto participandi similitudine bonum increatum et summum per bonum creatum et infimum in omni creato aliquatenus intelligi potest et cognosci. Nihil igitur, sicut nec super cælum, nec sub cælo creatum, quod non aliquatenus manifestet creatricem suam unitatem hanc; ut sit juxta prophetam confessio ejus sicut super cælum et terram. Nec enim solum hanc consistuntur et probant cum omni cæli militia ignis, aer, aqua, terra, cameli, elephantes, pardi, ursi et leones, sed et muscæ sciniphes, culices et scarabones. Juxta quod egregius ille ex philosopho theologus: « Quam pulchre, inquit, divina et cælestia etiam per dissimilia symbola manifestantur. » Quod propheta considerans omnia sic tam infima quam et suprema, quasi voce una Creatorem suum confiteri et contestari sic admirando ad ipsum omnium Creatorem exclamat: *Mirabilia testimonia tua; ideo scrutata est ea anima mea!* (Psal. cxviii.) Unde et inter universa in hymnidico cantico etiam minima et quæ contemptibilia ad ipsius Creatoris sui laudem invitat: *Bestiæ, inquit, et universa pecora, serpentes et volucres pennatæ* (Psal. cxlviii). Sic enim non solum cæli gloriam Dei enarrant, sed opus operi clare et manifeste tanquam dies diei verbum illud, per quod omnia facta sunt, eructat, singulis quasi quibusdam verbis hoc unum verbum quod semel loquitur, credens de creatorum plenitudine plene evangelizantibus, ut sic mundus totus verbi illius, per quod omnia in mundo facta sunt, velut quoddam evangelium corporale et visibile omnibus quæ facta sunt sicut festive, ita et varie factorem suum bene annuntiantibus, et quidem varie, nam ex creatorum

A perpetuitate æternus, ex magnitudine potens et immensus, ex virtute robustus, ex splendore luminosus, et ex specie speciosus et ipse declaratur. Unde et magister propheta taliter dicit Dei invisibilia per ea quæ facta sunt conspici, et propheta noster omnia hæc considerans: *Dilexisti me*, inquit, *Domine, in factura tua* (Psal. xci). Ex his igitur, quæ præmisimus, liquidissimum est quod per creata docemur oculo rationis sic demonstrante quod prima nostra et principalis unitas sit, et nec solum etiam quod ipsa sit, sed et aliquatenus quid ipsa sit.

SECUNDA MANIFESTATIO PER CREATORIS GUBERNATIONEM.

G NOTULA.

Verum juxta quod supra præmisimus, idem hic noster rationis oculus ad videndum amplius dilatur adhuc, nec enim ex sola creatione, sed ex creatorum gubernatione, quod hæc unitas nostra sit et etiam aliquatenus quid sit ipsa demonstrabile. Unde sicut ea quæ facta sunt invisibilia Dei per sui creationem, ita et eadem ex sui gubernatione Dei ostendunt virtutem; propter quod et Magister mox subdit: *Sempiterna quoque virtus ejus, id docens quod sicut invisibilia Dei conspiciuntur per ea quæ facta sunt, similiter et virtus ejus per eadem et vera virtus. Est enim virtus Dei hæc admiranda, quod sicut ea quæ facta sunt semel creavit, ita et postquam facta indesinenter regit. Unde et ex creatione quæ prima et ex gubernatione quæ postea creantis et gubernantis, divinitas quam tertio magister ponit est manifestata. Et multo quidem quam de creatione, adhuc de gubernatione manifestior: fide enim sola tenemus creationem, nisi quia fides in parte hæc aliquantisper oculo rationis adjuvatur. Unde et Magister: *Fide, inquit, intelligimus aptata esse sæcula verbo Dei, ut ex invisibilibus visibilia fierent* (Hebr. xi): fide itaque tenemus creationem: sed ipsa rerum experientia mundanorum gubernationem quotidianæ et sentimus et corporaliter cernimus: ecce enim quia manet sollemnis quidam et statutus omnium ordo mundanorum. Labitur enim annus per menses, mensis per septimanas, septimana per dies et noctes, et iisdem vicissitudinibus redit solis et lunæ conversionis lex statuta cunctis scilicet diebus terræ sementis et messis, juxta quod ad Noe Dominus: *Cunctis, inquit, diebus terræ sementis et messis, frigus et æstus, æstus et hiems, nox et dies non requiescent* (Gen. viii): similiter oceani quotidianus fluxus certus et refluxus, et quidem omnia hæc quotidie cernimus et experimur. Sed quid enumerem singula? omnium quotquot sive viventium seu vitæ non habentium lex semel statuta immobilis perseverat et gubernatio pro rerum specie ac varietate competens sibi et indifferens, ut sicut nihil est sine causa, ita et nihil sine gubernationis lege nec sine ordine aliquid, sed a quo gubernatio hæc aut quis hic qui ordinat et gubernat sic: indicibile enim ut quilibet se ipsum vel a se ipso gubernetur sic: nam ut de creatoris cæteris digniori et præ cæteris rationis judicio prædita exemplum dem,*

homine, dico nec ipse est in sua cujus manu sit gubernatio, cujus, ut pertranseam cætera, ipsomet nesciente sit conceptio et in conceptione culpa, postea nativitas, et in nascendo pœna; exinde continue in labore vita et demum ex necessitate mors, qui profecto se aliter gubernaret si ipsimet propria sui gubernatio crederetur: nec enim loquor nunc de illa hominis gubernatione propria quam ob peccatum homo plerumque a Deo dimittatur et in suis adinventionibus ambulat, nec de illa etiam qua dum in præsentis vitæ captivitate homo militat injustus quotidie adversus justum prævalet et devorat justiorum se ad unius prophetarum querimoniam factis hominibus, quasi piscibus maris, et quasi reptilibus non habentibus principem; nec de hac, inquam, nec de illa hominis gubernatione loquor nunc, sed de quadam alia qua creata singula, secundum legem a natura sibi impositam, certum ut præteligimus ordinem tenent: duæ quippe seu potius tres sunt hominis gubernationes istæ priores quidem ex culpa Deo sic juste permittente, sed ista de qua nunc loquor a natura Deo ipsius ab initio per bonitatem suam auctore. Hujus igitur gubernationis naturæ in omnibus si prima et summa quærat causa, demum ad aliquod principium, quod totam mundanam molem hanc sicut continet et gubernat, recurrere necessarium, quod est quam nunc per creatorum gubernationem manifestare quærimus, prima et principalis unitas nostra, ut sicut prius ex mundi creatione, sic secundo nunc ex ejusdem gubernatione liquido clareat de hac prima unitate nostra, quod ipsa sit, cujus nihilominus in gubernando fortitudo monstratur, ex tantæ molis continentia, ex dispositione sapientia, ex frequenti quæ accidit mundanorum commotione justitia et ex assidua reparatione misericordia; quibus tanquam præclarissimis titulis gubernantis virtus indesinens illustratur, pariter et ex ipsis, sicut prius ex creatione, sic et nunc ex gubernatione non solum quod sic sed etiam et quod sit aliquatenus elucescit.

7 NOTULA.

Verum unitatis nostræ adversarius *insipiens*, qui dicit in corde suo, *Non est Deus* (Psal. xli), forte ad omnia quæ præmisimus, et quibus tam quam urgentioribus vinculis ipsum videmur stringere, subsannabit asserens, sicut nec Deum esse, nec creaturam ullam. Nec enim ea quæ corporaliter cernimus, creata, sed asserit potius quod sicut apostolorum Princeps tantæ insipientiæ errorem doctrinæ suæ interserendo tangit, ab initio omnia sic perseverant: et ita sicut nec Creatorem, nec creatum aliquid, et si quidem forte dederit aliqua facta, sed creata nulla. Quod et nonnulli inter gentium philosophos præclariore tradiderunt, dicentes tamen non cum insipiente Deum non esse, sed esse unum Deum; verum illum nequaquam asserentes creatorem sed opificem, et de materia Deo cœterna mundum a Deo factum sed non creatum, cum creare sit ex nihilo aliquid facere. Verum insipiens dicit nec etiam esse Deum.

A TERTIA UNITATIS PRIMÆ PER SOLEM RATIONIS OCULUM MANIFESTATIO.

In primis igitur ab isto sciscitor an hujus mundi sensilis, quem sic ab initio perseverasse contendit, aliqua sit prima et summa causa vel nulla. Dicit forte nullam existentiam ipsius causam; quia ab æterno est, et a se non aliunde est. Aliis igitur in præsentiarum intermissis, quæram an illa, quæ in ipso vivunt, qualia sunt animata, vitam habeant a se ipsis vel ab ipso mundo. Quod a se ipsis non arbitrortam extremæ insipientiæ quemquam qui dicat. Quare necesse ut ab ipso mundo vitam habeant, quæ in ipso vivunt, quia quod aliunde dici non posset cum ipse mundus non aliunde sed a se ipso sit. Similiter et quæ rationis habent judicium et voluntatis arbitrium, qualia sunt rationalia, cum a se ipsis non habeant, hæc necesse ut ab ipso mundo. Cum igitur mundus hic sensilis æternus sit, et a se non aliunde sit, dans vitam et cum vita rationis judicium et voluntatis arbitrium, irrefragabiliter secundum insipientem Dei habet naturam. Et ita insipiens qui in corde suo sic fingit etsi diffiteatur nesciens in corde suo Deum, facit et ipsum mundum Deum, cui sic attribuit Divinitatis naturam. Quam quia negat esse, restat ut, etsi dicat mundum æternum, aliquam necesse ut ipsius dei causam et ipsam æternam, cum et ipse mundus cujus ipsa est causa sit æternus. Cum igitur causa ista mundi æterna sit et prima ipsius causa et summa, quæro an ista causa sit vita vel vita participans aut penitus vita carens. Sed quis adeo insipiens ut dicat quod penitus vita careat a qua tot in mundo vitam habent, et cum vita rationis judicium et voluntatis arbitrium. Præterea quod nihil carens vita melius sit seu adeo bonum, ut illud quod est vita vel vitam habens, quia nihil vita carens posset frui beatitudine quare nec beatum posset esse quod carens vita. Hæc vero prima et summa, de qua nunc loquor mundi causa, necesse ut omni eo quod vitam habet, sicut potentior, sit etiam et melior, utpote a qua mundus hic sensilis est et quidquid in ipso vivit. Igitur, si causa hæc non caret vita, quod quidem necesse, consequitur ut aut causa ista tam magnifica sit ipsa vita aut vita participans. Quod si vita participans, aliqua erit causa participii. Nihil enim bono ullo participat, cujus non sit causa major, plenior et superior a qua descendit quod participat. Sed secundum hoc jam non esset hæc prima causa et summa, quod jam datum est, sed adhuc major et superior alia. Et sic etiam in infinitum extenderetur inquisitio, donec aliqua reperiretur causa, in qua vita non esset participium, sed potius apud ipsum fons vitæ. Restat igitur ut prima nostra et sensilis mundi causa, cum nec vita carere possit, nec vita participare, ut ostensum quod ipsa sit vita ipsa. Et cum vita nemo adeo insipiens, qui beatam diffiteatur, et non aliunde beatam sed a se. Quare et hanc Deum esse etiam insipientem confiteri, qui dicit in corde suo non esse Deum, necesse est.

8 NOTULA. QUARTA PRIME UNITATIS MANIFESTATIO.

Præterea cum mundus hic sensibilis semper in motu sit, nec aliquid ipsius sit quod non in aliquam motus cadat speciem, quæri ab insipiente nostro potest, a quo sit omnis motus hic. Nec enim motum esse vel esse posse, nisi ab aliquo immobili, a philosophis jam pridem multipliciter et etiam apodeictice esse comprobatum: adeo ut in omni eo quod orbiculariter movetur, centrum semper immobile ab ipsis demonstratum sit. Quare et juxta philosophorum demonstrationem certissimam, necesse ut ab aliquo immobili omnis hic sensibilis mundi procedat motus. Quibus et theosophorum nostrorum unus de sapientiæ spiritu loquendo consonat: « Est, inquit, spiritus intellectus securus, stabilis et qui omnes capiat spiritus subtilis, mobilis, » et mox subdit: « Omnibus enim mobilibus mobilior est sapientia. » Ecce quod quem prius dixerat stabilem, postea dicit mobilem sapientiæ spiritum et etiam omnibus mobilibus mobiliorem. Quod ego maxime ob id dictum æstimo, quod hic sapientiæ spiritus, qui omnes capit spiritus prima et summa causa est sicut omnis actus et omnis motus, juxta quod scriptum alibi quod manens immobilis dat cuncta moveri. Ut ita sit iste tam immensus spiritus, qui omnes spiritus capit, a quo et motus omnis omnium cælestium, terrestrium et infernorum se movetium, velut centrum quoddam immobile omni eo quod immobile videtur immobilius.

9 NOTULA. QUINTA MANIFESTATIO.

Præterea etsi ab æterno nulla fuerit, ut insipiens asserit, futurorum scientia seu præscientia, de futuris tamen vera erunt scibilia et ita sciri tunc poterant et præsciri. Quæro igitur ab insipiente, in quo foret sciendi vel præsciendi futura potentia hæc. Tunc enim fuit potentia hæc et ut inesset necessarium. Quæro igitur in quo, et quid illud tunc fuerit, quod futura aut præscire posset vel scire.

10 NOTULA. SEXTA MANIFESTATIO.

Prætereo multa nunc sicut philosophica et etiam theologica, splendore pariter et acumine sensuum his, quæ pro sensus mei tarditate induxi, incomparabiliter majora. Hæc, inquam, prætereo, eo quod sint aliena magis quam nostra, quæ ad manifestandam primam et principalem unitatem nostram, unum videlicet principium sine principio, induci solent et efficaciter possunt: quibus inter cætera in infinitatis abyssum unius hujus principii contradictores demerguntur; juxta quod argumentari sic solent, aut aliquod est principium sine principio aut nullum. Sed nullum est principium sine principio; quare nihil fuit primum ante quod aliud prius non fuerit. Et ita rerum seu causarum invicem præcedentium se et subsequendum erit infinitas et sine principio, quare et ab æterno. Et ita ex præmissis quasi duo jam tenemus præcedentium et subsequendum infinitatem et ab æterno ipsam, quare cum infinitate æternitatem, et cum æternitate infinitatem jam habemus, et ita aliquod principium

A sine principio, quia æternitatem. Et præterea rerum præcedentium et subsequendum infinitatem. Quod omni etiam parum intendenti sicut absonum videri potest et impossibile. Et cum hujuscemodi multa et circa hæc induci possint, nunquam satis sit humanæ menti, nec quiescit donec unum omnium principium sine principio inveniat, quasi et hoc sit ipsi ex natura insitum, ut tunc primum desinat et quiescat, cum illum ratiocinando repererit, qui suum et omnium sicut finis est et principium.

11 NOTULA. SEPTIMA MANIFESTATIO.

Verum hic noster rationis oculus quid tam longe tam late per ætherea et aëria, per cælestia et terrestria sic evagatur? In nobismet est quod quærimus, in nobis ipsis præ cæteris est, unde hæc prima nostra unitas nobis manifestari possit, et quod est et etiam ex parte aliqua quid ipsa sit. In nobis, inquam, qui præ cæteris ad ipsius sumum imaginem et similitudinem conditi. Unde et nobis ex nobis ipsis et in nobis familiarior cognitio hæc. Nostrum igitur rationis oculum retorqueamus in nos ipsos. Ecce enim quia mens nostra rationalis rationis habet judicium ad discernendum, voluntatis arbitrium ad eligendum, et memoriæ thesaurum ad reponendum. Hoc quod nunc dicimus rationis nostræ oculo videmus et experimur in nobis. Nihilominus etiam quod non a nobis hæc nostra nobis sunt sed ab alio. Quid enim habes quod non acceperis? Unde corpus tuum et quæ corporis? vide et spiritum tuum et quæ spiritus, nihil in utraque hæc natura te habere quod non acceperis, et ipsa ratio tua tibi dictat et ipsa docet certissima experientia. Vides ergo jam aperte quod accepisti: vide et exinde a quo acceperis. Dices forte quod a parentibus qui te genuerint. Sed illi a quo? Revera in infinitatis abyssum jam præcipitaberis, nisi aliquod primum et summum repereris principium, a quo velut prima summa et principalis causa etsi per gradus multos et descensus hæc acceperis. Verumtamen et adhuc sciscitor a quo acceperis omnia hæc, quæ habes et quæ te constat accepisse. Nec enim prius illud responsum tuum approbo, quo te dicis totum a parentibus accepisse. Nunquid enim, etsi a progenitoribus carnis tuæ acceperis carnem, pariter et animam accepisti? Sed esto quod et animam: propter multos hoc dico et magnos, qui animam ex traduce descendisse docuerunt. Nunquid quæ in anima sunt rationis videlicet judicium, voluntatis arbitrium, et memoriæ thesaurum, quæ crebro in filiis quam in parentibus plus vigent, accepisti ab his? Sed esto quod et hæc sicut animam ab ipsis pariter et ipsius naturales vires seu potentias animæ. Sed nunquid de gratuitis sic. Si a parentibus carnis sunt dona naturæ, nunquid similiter et dona gratiæ? Nunquid pater infidelis, fornicator, gastrimargus, omnium denique vitiorum sordibus pollutissimus, pio filio contulit fidei gratiam, continentiae munditiam, sobrietatis mensuram, et totius

denique honestatis et sanctitatis virtutem? Constat enim iniqui patris pium filium hæc habere. Ut igitur dimittam nunc dona naturæ, dicas mihi: O insipiens, a quo habeat pius iniqui filius hæc dona gratiæ? Non quidem a parentibus, quia hi iniqui non a natura propria, quia de massa iniquitatis hæc, et de radice apostatica fructus hic; de iniquis videlicet parentibus et avis et proavis et adhuc supra iniquis si vis. Sto igitur hic et insipientem pulso, ut me doceat unde hæc tanta gratiarum dona huc. Et quia ille fateri confunditur, ego proferam. Ab illo certe, a quo omne datum optimum, et omne donum perfectum, descendens a Patre luminum.

12 NOTULA. OCTAVA MANIFESTATIO.

Et ut nostrum rationis oculum aperiamus adhuc, quo adversus insipientem alia nobis necessaria et propositum nostrum juvantia documenta demonstramus, quero ab insipiente an aliquid sit adeo potens quo sit nihil potentius. Quod si non dederit, erit jam potentium et potentiarum infinitas. Si enim cum multa potentia sunt, nihil est adeo potens quo adhuc non sit aliud potentius; ergo potentium invicem se præcedentium et subsequentium erit infinitas, ita quod nullus erit primus, nullus ultimus. Quod quia manifestissime insipientiæ est, restat ut aliquid sit adeo potens quo nihil sit potentius. Et cum nihil sit eo potentius, mox sciscitor an aliquid possit esse eo potentius. Quod si dederit aliquid posse esse eo potentius, quo tamen nunc nihil potentius, hæc mox infero, aliquam esse causam tam validam, tam potentem, quæ hoc possit efficere. Et ita aliqua causa est tam potens, tam valida, quæ possit efficere aliquid potentius eo quo nunc nihil potentius est. Quare et ipsa causa hæc fortior est, validior et potentior, eo ipso quo tu dicis nunc nihil esse potentius. Si enim causa est tam potens, quæ eo quo nunc nihil potentius est possit efficere adhuc potentius, et ipsa procul dubio potentior est eo quo tu dicis nunc potentius nihil esse. Et ita secundum concessionem tuam, jam tuum illud quod dixisti nunc, nihil esse potentius, habebit supra se aliud eo potentius; causam videlicet tam potentem, quæ possit efficere aliquid etiam potentius illo potenti tuo, quo dixisti nunc nihil esse potentius. Et ita illud potens tuum non erit adeo potens ut dixisti. Restat itaque quod si aliquid est, quo nihil est potentius, quod quidem necesse, alioquin potentium se invicem præcedentium et subsequentium sequeretur infinitas, ut jam præmonstratum, restat, inquam, quod si aliquid est quo nihil est potentius, consequenter et illud idem esse quo etiam nihil possit esse potentius juxta proxime præstensum ratiocinationis progressum. Dato itaque quod aliquid sit quo nihil est potentius, consequens mox est ut aliquid sit quo nihil possit esse potentius. Nihil enim posset esse illud potens quo nihil posset esse potentius, nisi per illud quod jam est et quod jam potens est, et quo nihil potentius est.

Cum igitur aliquid sit quo nihil est potentius,

nec aliquid eo potentius possit esse, addo adhuc et tertium, et quero an isto quo nihil est potentius, et quo nihil potest esse potentius, possit esse aliquid aliud quod sit adeo potens. Quod si dederit, isto videlicet quo nihil est potentius, et quo nihil potest esse potentius, nihil etiam posse esse adeo potens consequenter mox videbitur, quod idem ipsum sit omnipotens. Concurrent enim tria hæc, videlicet quod nihil sit eo potentius et quod nihil possit esse potentius, et tertium hoc quod etiam nihil possit esse adeo potens. Quod si non dederit sed asseveraverit isto quo nihil potentius et quo nihil potest esse potentius, aliquid aliud esse posse quod sit adeo potens, jam ex opposito consequens erit quod isto, quo ut jam dedit nihil est potentius, nec esse potest aliquid potentius sit, causa videlicet tam potens tam valida, quæ potest efficere potestatem aliam isti potestati, qua nihil potest esse potentius, parem. Causa enim quæ potest efficere potestatem aliam isti potestati, qua modo nihil est potentius nec esse potest, parem illa potestate, quæ si esset huic par, esset major, esset et potentior. Quare et ipsa eadem causa nunc superior est et potentior potestate ista, de qua tamen jam datum quod nihil sit ea potentius nec esse possit. Unde jam liquet quia demonstrato quod aliquid sit, quo nihil sit potentius, et quod ipso nihil possit esse potentius, consequenter habebitur quod nihil possit esse adeo potens. Ex primo enim, videlicet eo quod aliquid sit quo nihil est potentius, quod supra demonstratum, necessario mox consequitur, ut præstendimus, quod illud idem sit quo nihil possit esse potentius. Et ex hoc secundo, videlicet quod aliquid sit quo nihil possit esse potentius, necessario mox consequitur et hoc tertium, videlicet quod illud idem sit adeo potens quo nihil possit esse adeo potens. Et conformis est in his ratiocinationis progressus: qualis inter primum et secundum talis postea inter secundum et tertium. Cum igitur in uno concurrant tria hæc, videlicet quod aliquid sit quo nihil est potentius, et quod ipsum sit quo nihil potest esse potentius, et adhuc quod idem ipsum sit quod nihil possit esse adeo potens, consequens erit quod idem ipsum sit omnipotens potens super omnia, et ita velit nolit insipiens quod sit Deus.

BREVITER RECAPITULANDO PRÆMISSA OSTENDIT DE-
INCEPS, QUALITER UNITAS PRIMA PER TERTIUM CON-
TEMPLATIONIS OCULUM MANIFESTETUR. 13 NOTULA.

Ex præmissis igitur tum per primum oculum corporis rationis oculum excitantem, tum per solum et secundum rationis oculum aliquantisper jam ostensum, de prima nostra et principali unitate quod ipsa sit. Et hoc quidem multipliciter, primo per rerum creationem, secundo per earundem gubernationem, et per alia quidem hinc inde inducta varie. Restat amodo et ordo prædispositus exigeret sic, si tamen desuper datum hoc, ut post duos filios corporis et cordis oculos, quibus mentis nostræ gressus dirigentibus in primo naturæ exemplari

quod nos supra dixisse meminimus mundum esse et quæ in mundo, hucusque legimus, per quod et jam aliquatenus manifestatum quod prima nostra unitas sit, deinceps quod sit ipsa et qualiter per tertium contemplationis oculum manifestari. Ad hoc enim, sicut nec ille corporis, nec ille qui cordis est sufficit, sed solus ille qui contemplationis dicitur necessarius. Unde et post primum exemplar naturæ quod mundus est et quæ in mundo, ad secundum exemplar gratiæ, quod supra eloquia sacra esse diximus; et quæ in ipsis sunt divinæ cognitionis mysteria procedendum. Demum vero ad tertium, quod itidem supra nominavimus exemplar vitæ, et quæ in ipso sunt divinæ incomprehensibilia maiestatis. In duobus quippe exemplaribus his tertius potissimum, qui contemplationis oculus dicitur, intuetur. De quo contemplationis oculo ad sponsam sponsus: Corde, inquit, me cepisti uno ex oculis tuis. Uno, inquit, ex oculis tuis qui in corde tuo sunt me cepisti. Uterque enim oculus, sicut ille cordis, sic et ille contemplationis in corde. Sed unus duntaxat cordis seu rationis, alter vero etsi in corde, non tamen cordis sed contemplationis dicitur, quo sponsus a sponsa capitur, quo incomprehensibilis tenetur, infinitus comprehenditur, et inaccessible attingitur. Unde et præexcellenter contemplationis dicitur oculus hic. Ille enim tanquam sol nubi species ipsa fidei umbræ adjungitur, ratione solum tanquam attonita et stupente ad tantam visionem hanc omni ipsius in parte hac evacuato officio.

QUOD DUPLEX SIT MANIFESTATIONIS MODUS PER TERTIUM CONTEMPLATIONIS OCULUM DOCET. 14 NOTULA.

Verumtamen juxta duo quæ prædiximus exemplaria, duplex est sanctæ manifestationis hujus modus. Quorum utroque iste quem dicimus contemplationis oculus intuetur, unus per sacra eloquia eruditio, et hic est per secundum exemplar gratiæ; alter vero per invisibiliter illuminantem spiritum inspiratio, et hic est per tertium exemplar vitæ. Si quidem duobus his modis primam unitatem nostram quis contemplatur? videlicet aut eruditus aut inspiratus. Habent tamen multa in se sacra eloquia, ad quæ tanquam apertiora capienda solus rationis oculus sufficit, et est in his theologiæ pars prima quæ dici potest mundana. Habet et secretiora et magis abscondita, in quibus capiendis mox rationis oculus deficit. Juxta quod Propheta noster: *Defecerunt, inquit, oculi mei in eloquium tuum (Psal. cxviii)*. Et est in his theologiæ pars secunda, quæ dici potest supercælestis vel mystica. Unde et ad hæc is qui acutior contemplationis oculus nobis nunc necessarius. Qui, cum unus sit, duobus modis contemplatur: aut per Scripturarum eruditionem mysticam aut per inspirationem internam. Contemplatur dico non solum hoc, quod prima et principalis unitas nostra est, ad hoc quippe prioris oculi revelatio sufficit, sed pro humanæ conditionis ana-

logia mortali, etiam quid et qualiter ipsa sit. Et de horum primo, qui est per eruditionem, manifestationis modo Propheta noster: *Declaratio, inquit, sermonum tuorum illuminat (ibid.)*. Secundus vero sanctæ manifestationis modus in obedientia est mandatorum, quando non solum sciuntur sed et fiunt mandata. De quo manifestationis modo item Propheta noster: *A mandatis, inquit, tuis intellexi (ibid.)*. Nec enim dixit se intellexisse mandata, sed se intellexisse a mandatis, a custodia scilicet mandatorum. Juxta quod et Sapiens: *Concupisti, inquit, sapientiam, serva mandata et Dominus illam præbet tibi (Eccli. i)*. Et prior quidem manifestationis modus per Scripturarum eruditionem a Deo, sed mediate quia per hominem, per theologos videlicet mysticos, qui nobis sicut Scripturas et Scripturarum eruditionem mysticam ministrarunt. Quorum nonnulli, qui majores, immediate ab ipso sapientiæ spiritu sacra eloquia edocti sunt. Unde et ipsi theodocti sunt appellati, quorum unus quod non ab homine neque per hominem evangelium acceperit gloriatur, sed per revelationem Jesu Christi. Secundus vero manifestationis modus, qui per inspirationem internam semper immediate ab ipso Deo, non ab homine neque per hominem. Unde et multo dignior, multo sublimior et acutior sanctæ manifestationis modus hic, quantum distat a figura veritas, ab umbra claritas, et ab imagine corpus ipsum. Sacra quippe Scriptura ipsa quasi figura veritatis, quasi umbra lucis, et quasi resultantis imaginis speculum. Per parabolas enim, per figuras et ænigmata in mysticis Scripturarum eloquiis, quasi imaginibus quibusdam in speculo, veritas nobis resultat. Unde et tanquam imago in speculo, Deus in eloquio sacro, et ipsa sacra eloquia Scripturæ dicuntur imaginariæ, in quibus resultat nobis velut quædam veritatis imago magis quam ipsa veritas. Propterea et nobis, qui in umbra fidei vivimus, et in imagine pertransimus, iste qui per imaginarias scripturas fit manifestationis modus, multo nobis familiarior est, utpote sicut bonis et etiam malis communis, altero illo qui per inspirationem fit bonorum duntaxat non malorum.

PRIMO DE MANIFESTATIONIS MODO QUI FIT PER SCRIPTURAM. 15 NOTULA.

Ut igitur ad istius manifestationis modum, qui per Scripturas fit, a Scripturis et ab ipsis etiam mandatis Domini sumamus initium, a quibus idem sanctuarium Dominus hujus manifestationis intellectum nobis det: *Audi, inquit Scriptura, quia Dominus Deus tuus Deus unus est (Deut. vi)*. Ecce quia cælestium mandatorum initium ab uno inchoat, unum indicat, et unum nobis commendat. *Audi, inquit, Dominus Deus tuus Deus unus est*. Et vero unus est ille unus, quem patriarcha omnium pater credentium, videns tres, unum adoravit. Et hic etiam unus est illud unum de quo a patre alius sed unum cum patre: *Ego, inquit, et Pater unum sumus (Joan. x)*. In quo uno, etsi sint tres, non tantum

ternarius quia nullus numerus, nec enim quoties nominibus utimur numerabilibus, consequens statim ut ibi numerus. Quomodo ipsas unitates numeramus et formas, quæ tamen, quia formæ sunt, subjectæ esse non possunt. Similiter et nomina numeramus et vera vel falsa enuntiabilia et multa in hunc modum, quibus tamen non inest numerus. Ut igitur ab infimis his ascendamus superius, cum de Deo loquentes tres personas dicimus, non ternarius sed trinitas intelligitur, et solitudo removetur. Et est hoc quod dicitur trinitas, tanquam si diceretur trium unitas. Et dicitur tres vel trium propter distinctionem solum, non propter numerum. Unde et orthodoxorum unus: « Hoc, inquit, vere est quod unum est in quo nullus numerus, nullum in eo aliud præterquam id quod est. » Neque enim subjectum fieri potest, forma enim est, formæ vero subjectæ esse non possunt. De qua forma Magister: *Qui cum, inquit, in forma Dei esset (Philip. ii)*, nihil ergo in forma ista quod non sit ipsa. Cui nihil adsit, nihil absit, quia accidit nihil. Unde et personales illæ proprietates, quibus inter se distinguuntur personæ tres, non juxta quorundam dogma fatuum divinæ usiæ adsunt, sed magis insunt. Propter quod et mater nostra catholica, sicut in essentia unitatem et in maiestate æqualitatem, ita et in personis proprietatem adoratur. Juxta quod in illo speciali orationis genere, quod missa dicitur, celebriter canit. Ut in confessione veræ sempiternæque deitatis et in personis proprietatis et in essentia unitas et in maiestate adoretur æqualitas. Proprietas ergo in personis adoratur, non aliqua tamen quæ sit tribus personis communis: tunc enim jam non esset proprietas sed communio, sed singularum personarum sua proprietas et dividua. Et erit hoc quod dicitur, ut in confessione veræ sempiternæque deitatis in personis adoratur proprietas, in qualibet videlicet personarum proprietas sua. Licet orthodoxorum nonnulli totum quod dicitur interpretentur sic, in personis proprietatis, et in essentia unitas, et in maiestate adoretur æqualitas, id est personæ distinctæ essentia una et maiestas æqualis: verum ut revertamur ad nostra, in hac tam superexcellenti essentia, omne quod habet ipsa inest ipsi, nihil adest, nihil abest, cuius omne quod est ipsa est: unde et cum de ipsa participativis nominibus loquimur substantivè potius et essentialiter intelligenda sunt etsi participativè quid dicatur. Et quæ de ipsa participativè dicuntur ipsam esse plenam eorum naturam quæ de ipsa dicuntur, mox significant. Ut juxta illam logicorum regulam talia sint prædicata, qualia subjecta esse permiserint. Unde et cum de hac tanta materia loquimur, mox pro materiæ profunditate omnium dictionumstrarum absorbetur vis et exhauritur proprietas. De qua etiam semel quid dicere totum quod ipsa est, sub uno verbo dixisse est. Upote cuius veritas, ipsius est æternitas, æternitas bonitas, cuius et bonitas, ipsius immutabilitas. Et hæc ipsius sapientia et hæc

essentia. Cujus similiter quodvis numerus, et ita vicissim quodlibet suorum erit alterum, imo nec unum nec alterum, sed simplicissima et individua unitas et non alteritas: adeo etiam quod sicut nec in ipsa similiter nec cum ipsa ulla sit pluralitas, vel diversitas, seu multiplicitas ulla. Unde et vigilanter magistrorum unus: *Apud quem, inquit, non est transmutatio nec vicissitudinis obumbratio (Jac. i)*. Non dixit in quo, sed quod etiam apud ipsum non sit, eo ipso apertissime indicans, quod in ipso multo minus sit, cum nec etiam apud ipsum esse possit. Unde et in fine seculorum omnibus ad primam hanc nostram et principalem unitatem redactis et membris adhuc dispersis quotquot tunc unitis capiti et Christo integro jam nulla penitus erit tunc apud ipsum sicut nec adversitas, nec diversitas, sed quam supra tertiam numeravimus, naturæ et gratiæ in æternum indivisa et indissolubilis unitas. Quod melius et suo loco competentiùs indicabunt sequentia. Liqueat igitur ex præmissis quia cum dicitur Deus potens, Deus sapiens, Deus bonus et similia; sic ejusdem quidem repetitio est, non numeratio diversorum tanquam si de una eademque armatura dicatur sic: Hæc armatura est ens, hæc est gladius, hæc est mucro. Aut si de persona una: Iste homo est Simon, iste Petrus, iste est Cephas. Verumtamen æterna illa natura et omnipotens sic multipliciter dicitur propter varios, quos in rebus visibilibus ostendit effectus, et virtutes effectuum: sicut cum potens dicitur propter suorum quæ cernimus magnitudinem operum. Similiter et misericors propter ea quæ nobis impendit misericordiæ opera. Et in aliis similiter sic: quemadmodum dicitur sol in æstate calidior et in hieme minus calidus, cum tamen in se sol in calore nec intensior sit nec remissior, sed propter varios suos quos secundum varietatem temporis videmus et sentimus effectus; similiter et una persona plerumque seu res quævis binomia vel trinomia ex causis variis variis sic nominibus censita, cum tamen non nisi una persona sit. Verum omnis comparatio terrenorum ad Deum impotens valde et dissimilis. Attamen loquendi causa de ineffabilibus, ut aliquo modo fari possimus quod nullo modo effari possumus, ad visibilia nostra et nobis usitata recurrere intelligentiæ nostræ nos cogit infirmitas, ut vel figuris et similitudinibus nobis notis veritatis lux inaccessibilis obumbrata nos illuminet; quemadmodum infirmi oculi solis lumen nube tectum liberius conspiciunt, quod coruscum intueri non possent.

Deus itaque multipliciter dicitur. Unde et a theosophorum uno describitur inter alia spiritus sapientiæ multiplex et tamen idem ipse simplex, quemadmodum ab eodem describitur idem ipse sapientiæ spiritus mobilis et tamen idem ipse stabilis, quod nos supra exposuisse jam meminimus. Dicitur itaque sapientiæ spiritus multiplex, tum quia multiplicia sortitur nomina, tum quia dona partitur multiplicia, et præsertim quia multa in se

habere dicitur, ut puta æternitatem, bonitatem, potestatem, sapientiam et alia multa in modum hunc; et tamen idem ipse simplex describitur, quia etsi multa in se habere dicatur, non aliud tamen habet ipse quam quod est ipse. Deo enim non alia est essentia, ut sit et alia potestas, ut possit, seu alia sapientia qua sapit; sed ejus essentia est quidquid ejus est et omne quod ejus est Deus. Unde et sicut vere et ex necessitate consequitur quod sit simplicissima essentia Deus, cum nihil sit ejus quod non sit ipse, nullo enim participat, ecce exemplaris gratiæ quam alta, quam addita, quam humanæ rationis oculo incomprehensibilia divinæ cognitionis mysteria! ad quæ utcumque intuenda tertius et solus contemplationis oculus necessarius: ecce in quam acutis, in quam subtilibus citharæ nostræ chordis cum omni sacrorum eloquiorum consonantia moves manum, pulso citharam; nec enim de meo quidquam auditur hic, sed quem a mandatis tuis intellexi, Domine, tuorum eloquiorum et orthodoxorum tuorum sonus solum et sensus: qui profecto omnes unanimiter et concorditer juxta sibi datum sacrorum eloquiorum intellectum de omni creatricis et gubernatricis omni unitate simplicissima concinunt, quod nos de ipsa hucusque in cithara nostra resonavimus.

Veruntamen ego peccator homuncio, etsi moveam manum, pulsem citharam, et audiam sonum, mihi ipsi tamen qui hoc loquor barbatus sum factus velut æsonans aut cymbalum tinniens dans sine mente sonum; corpus enim quod corrumpitur deprimit sensum et contrahit intellectum; sanctæ quidem fidei et sanctorum verba profero, quibus non solum quod prima nostra et principalis unitas sit, sed et quid et qualiter sit erudimur; sed qui in his sanæ fidei verbis sanctis et abditis latet intellectus procul elongatur a me tanquam famelicus portans per viam panem infractum in testa nucleum et in osse medullam.

O gloriosa unitas, te ipsam testem invoco, quia eredo, imo si peregrinus adhuc auderem in via fidem præcedere scio deesse hæc; scio, inquam, te potestatem in se viventem, quæ nusquam non adsit nec unquam desit: æternitatem quæ nec cœpit nec desinit: veritatem quæ nec falli potest, nec fallit: sapientiam quæ nec quærit nec minuit; scio te sine qualitate bonam, sine quantitate magnam, absque situ presidentem, et sine motu regentem omnia et continentem. Scio item te ante omnia ut principium, supra omnia ut fastigium, intra omnia ut remedium, sub omnibus ut fundamentum, extra omnia ut non habens consortium, et post omnia ut novissimum, juxta illud de te sacrum eloquium tuum: *Ego alpha et omega, ego primus et ego novissimus* (Apoc. xx). Unde et scio te sicut sine ternario trinitatem, et sine unico incommunicabilem, sine poudere incomparabilem, et sine mensura inestimabilem; cum tamen tu sola sis sine numero, pondere et mensura, in numero, pondere et

A mensura consideras omnia. Hæc secundum Scripturas tuas scio te et hæc de te scio, nihilominus nihil tuum quod non sis tu, utpote sicut superessentialem essentiam et simplicissimam sine gradu, sine differentia, absque diversitate, absque numero nullo participantem, subjectam nulli; hæc, inquam, secundum Scripturarum tuarum eruditionem sanctam scio te esse, hæc de te. Verum in prolongata peregrinatione mea hæc multum quasi dilacerata et dissuta hæc etiam mea qui, etsi per Scripturas tuas sciam quod sis hæc, parum aut nihil intelligo quomodo qualiterve sis hæc, imo unum hoc imo domina mea et creatrix qualiter sis prima et principalis et simplicissima unitas hæc; deficient enim oculi mei in eloquium hoc quod tuum et de te est:

B adeo mirabilis facta est scientia tua ex te supra me. Verum domina mea et creatrix mihi prædulcis et præclara unitas, da mihi qualicumque citharædo puero tuo de te in hac cithara tua sic audire vocis sonum, ut et sensus vel aliquem tribuas intellectum: tunc erit et mihi, qui prout ipsa dicere dignaris de te ipsa et per te pulso nunc citharam, melius hic dulcior, imo vere dulcissimus sono vocis vel aliquo sensus intellectu concordante et matri meæ Ecclesiæ, si forte, et ipsi aliquo tempore audire placuerit, auditui suo melus hic et gratior erit et prædulcior.

Et quidem, ut votum meum hoc assequar, me ipsa sacra eloquia docent quæ mihi quidam in loco loquuntur sic: Fili, concupisti sapientiam, serva mandata et Dominus illam præbet tibi (Eccli. 1), et erit ita non per solam et nudam Scripturarum scientiam, de qua jam nonnulla induximus, sed potius per mandatorum obedientiam hæc primæ et principalis unitatis nostræ manifestatio; verum, quia videor mihi jam de exemplari ad exemplar procedendum, de exemplari gratiæ ad exemplar vitæ, in transitu repetendum quod primi simile, constat enim, ni fallor, et ex his quæ induximus patentissimum, quia per exemplar gratiæ non solum quod prima nostra et principalis unitas sit, sed et quid et qualiter sit, aliquatenus pro humanæ conditionis possibilitate erudimur, et quod ad ea quæ in exemplari hoc gratiæ continentur divinæ commendationis mysteria capienda, sicut nec corporis nec etiam rationis sufficiat oculus, sed solius contemplationis oculi inspectio hæc: nunc itaque de secundo exemplari gratiæ ad tertium exemplar vitæ accedendum, in quo, ut præmisimus, sicut et in exemplari gratiæ, tertius et solus noster contemplationis oculus intuetur.

PRIMÆ ET PRINCIPALIS UNITATIS MANIFESTATIO PER TERTIUM CONTEMPLATIONIS OCULUM IN TERTIO EXEMPLARI VITÆ. 16 NOTULA.

Est autem, ut nos jam supra dixisse meminimus, exemplar vitæ liber prædestinationis æternæ, in quo sicut scripti quicumque sunt ad vitam prædestinati, de quo ipsa Veritas: Gaudete, inquit, inquit, quia nomina vestra scripta sunt in libro vitæ; et Propheta noster: *Et in libro, inquit, tuo omnes*

scribentur, dies formabuntur, et nemo in eis (Psal. cxxxviii); scribentur dicit, qui tamen ante sæcula scripti sunt; tunc enim videntur quasi primo scribi cum incipiunt operari: et exinde dies formantur, quando de virtute ad virtutem, quasi de claritate ad claritatem sensim ascendentes, a sole justitiæ plene illuminantur, et de corruptæ humanæ tenebris educti efficiuntur lux mundi, transformati in dies qui prius erant filii tenebrarum, filii hominum, homines, de carne caro. Unde et bene sequitur: *Et nemo in eis*, sic quippe in libro vitæ scripti, sic dies formati magis jam dicendi sunt dii vel dies quam homines, juxta illud ejusdem Prophetæ nostri: *Ego dixi: Dii estis et filii Excelsi omnes* (Psal. lxxxi): vos autem sicut omnes moriemini: in hoc ergo vitæ exemplari, in quo sunt omnes scripti, quotquot ad vitam præordinati attente legunt, cum salutis suæ operibus jugiter intendunt, et in ipso tunc student, cum intelligere elaborant quæ sit voluntas Dei bona, beneplacens et perfecta: et ita in hoc exemplari tertio per tertium contemplationis oculum manifestatur justis prima nostra et principalis unitas per inspirationem internam, sicut edoctis in priori exemplari gratiæ eodem contemplationis oculo demonstrante per eruditionem intellectum; sed in priori gratiæ exemplari sit manifestatio hæc quasi per solam et nudam mandatorum scientiam, sed in hoc vitæ exemplari sit manifestatio eadem per de super inspiratam mandatorum obedientiam, juxta quod supra posuimus et hic repetimus, paternum sapientis consilium: *Concupisti, inquit, sapientiam, serva mandata, Dominus illam præbet tibi* (Eccl. i); serva, inquit, mandata, multo quippe quam per sacræ legis scientiam per ipsius obedientiam sanctior, dignior et familiarior cognitio hæc alia, quippe sine hac velut peregrina quædam et remota notitia est. Unde et tanquam qui remoti et qui a longe noscunt et ipsi a longe cognoscuntur, et alta, inquit, a longe cognoscit, et ipsi quidem alti per scientiam etsi remoti per inobedientiam. Unde et a longe tanquam advenæ, non tanquam sanctorum concives et domestici Dei, cognoscunt: adeo etiam sine illa quæ obedientia mandatorum est peregrina notitia hæc, ut ipsa sacra eloquia, per quæ noscunt, testentur etiam eos non nosse, juxta quod magistrorum unus: *Qui dicit se nosse eum et mandata ejus non custodit, mendax est* (I Joan. ii); et illud: *Omnis qui peccat non vidit eum, nec cognovit eum* (I Joan. iii), et qui non diligit non novit Deum, cum tamen sacra eloquia Dei haberi notitiam absque mandatorum custodia et Dei dilectione, crebro et aperte contestentur. Unde et Magister: *Etsi noverim, inquit, omnia mysteria, et omnem scientiam, charitatem autem non habeam, factus sum velut æs sonans aut cymbalum tinniens* (I Cor. xiii): ecce quia potest quis Deum nosse et charitatem non habere. Unde inter Dei notitiam et notitiam, de quibus Scriptura sic diverse et ut videtur adverse loquitur, distinguendum: quantum enim distant a fructu fo-

lia, tantum inter notitias Dei has: in illa enim Dei notitia quæ est in exemplari gratiæ per Scripturarum scientiam sunt sapientiæ dicta; sed in ista quæ est in exemplari vitæ per mandatorum obedientiam sunt ipsa opera: prior illa ad ornatum sed ista ad fructum est. Unde et prior illa sibi non sufficit absque ista sed ista sibi absque illa. Unde et multi in solitudinibus vere et sancte vixerunt, sine codicibus solam habentes charitatem qua legis mandata compleverunt, et ita quo interius eo quidem familiarius Dei notitiam habuerunt, juxta quod ipsa in Evangelio Veritas: *Qui diligit, inquit, me, diligetur a Patre meo; et ego diligam eum, et manifestabo ei me ipsum* (Joan. xiv): nec est enim tam videns, tam efficax, Ecclesiæ veritatis manifestatio quam ipsius interius de corde puro et conscientia et fide non ficta et radicata dilectio; ipsum enim diligere velut quidam ignis cœlestis radius de corde diligentis ad summum illud quod solum vere diligendum est ascendit, et unit cum eo quod diligit quod profecto absque delectabili quadam manifestatione non est, juxta quod dilectus supra: *Et manifestabo, inquit, ei me ipsum*, nec enim de futura quam expectamus manifestatione hoc intelligendum, sicut nec quod præmisit de dilectione in futuro et hanc quidem manifestationem factam quia est per dilectionem interius datam. Unde est et obedientia mandatorum per inspirationem internam fieri diximus et est manifestatio hæc bonorum duntaxat et omnium. Uniuersum tamen sicut Deus divisit mensuram fidei, cum prior illa per Scripturarum eruditionem bonorum et malorum sit communis.

Verum tunc est primæ nostræ unitatis manifestatio hæc perfecta scientiæ operatione adjuncta: tunc etenim ad manifestandam hanc duo conveniunt exemplaria, exemplar gratiæ et exemplar vitæ contemplationis oculo hinc inde factæ mentis gressus dirigente: hinc enim scientia facta ab exemplari gratiæ, inde vero operatio justa ab exemplari vitæ, et erit hæc tunc primæ unitatis nostræ intellectualis manifestatio: jam enim primo intelligis, quia jam primo in te legis quod nosti magis in tuo corde quam in codice; scientia tua tunc primo in intellectum transeunte, alioquin si legis in me non in te, non erit in te lectus et ita nec intellectus, Domine, timor: et inde est quod sancti in eloquiis sacris intellectum sibi dari tam devote desiderant, tam crebro postulant. Unde est illud Prophetæ nostri in psalmo: *Da mihi intellectum et scrutabor legem tuam et custodiam illam in toto corde meo* (Psal. cxviii); quasi dicat: Dato mihi intellectu hæc duo consequar, et legis scientiam et mandatorum custodiam; et alibi: *Da mihi intellectum et vivam* (Psal. lxxiii), quod si in sola scientia intellectus consisteret, non ex ipso jam vita esset, et ita utrumque quia primæ unitatis nostræ manifestationem intellectus comprehendit, et illam quæ ex secundo gratiæ exemplari est per scientiam, et illam alteram quæ ex tertio vitæ ex

emplari est per operationem justam. Et erunt ita primæ et principalis unitatis nostræ, quas ab initio hucusque prosecuti sumus manifestationes tres : prima quasi corporalis ex creaturis, et hæc per primum oculum corporis secundum rationis oculum excitantem; secunda spiritualis ex rationibus menti rationali a natura insertis, et hæc per secundum et solum oculum rationis; tertia vero est manifestatio intellectualis ad cognoscendum scientia et operatione conjunctis; quod si sola scientia fuerit, jam non erit per intellectum manifestatio, sed per solum Scripturarum eruditionem et nudam. Sin autem sola fuerit operatio, itidem jam non erit per intellectum manifestatio, sed per solam et unicam inspirationem internam.

DE ILLO MANIFESTATIONIS GENERE QUOD THEOPHANIA DICITUR TANGIT ET PERTRANSIT.

Prætereo nunc de illo manifestationis genere, quod præexcellenter theophania dicitur, nec enim est ista bonorum omnium sed perfectorum solum et etiam paucorum inter hos. Unde et infelix ego luteam domum inhabitans, de tam suavi tam excellentis manifestationis dulcedine quod ego non gustavi, aliis eructare non possum. Verumtamen de hoc manifestationis genere ab aliis instructus accepi ego phamas has animæ omnino a terrenis suspensæ et æternorum desiderio adeo inflammatae, ut quasi a se deficiat sicut frequentes supervenire et improvisas qualis erit illa perfecta anima quæ per psalmos qui de charitate sunt æstuando sic conquirerit : *Quemadmodum, inquit, desiderat cervus ad fontes aquarum, ita desiderat anima mea ad te, Deus. Sitivit anima mea ad Deum fontem vivum : quando veniam et apparebo ante faciem Dei (Psalm. xli).* Et in alio itidem decantante Psalmo : *Quam dilecta tabernacula tua, Domine virtutum ! concupiscit et deficit anima mea in atria Domini (Psalm. lxxxiii)* : talium, ut didici, et solum talium sunt divinæ istæ apparitiones, quæ theophaniæ dicuntur, quæ animam tam vehementi desiderio anxiam crebro refocillant, et adeo etiam ad horam illuminant, ut miro quodam secreto et singulari modo etiam quod ignotum est Dei manifestum sit in illa. Verum, etsi ut talium quos diximus sit hæc frequens gratia sed parva mora, juxta quod in Amoris cantico : Sponsa sponsum tam sollicitæ, tam assidue querere introducit, quæ ad sponsum suum querendum nunc de nocte surgit, nunc civitatem circuit, nunc it, nunc redit, nunc querit de illo, nunc querit illum; ille vero nunc se ingerit, nunc se subtrahit, nunc occurrit, nunc salit, nunc transilit, nunc tenetur, nunc elabitur, nunc revertitur, nunc alloquitur. Istæ vero inter sponsum et sponsam inquisitiones, quæstiones, allocutiones, occursus, saltus, discursus et recursus, avolationes, reversiones tot et elapsus, quid inter ipsos sunt nisi quedam suavia suavis et jucundi amoris signa delectabilia quæ quotidie hujuscemodi, quem diximus, perfecta anima delectabiliter experitur in se

A secundum quod et sponsum ipse quodam loco perhibet delicias suas esse cum filiis hominum et quidem miro modo, sed mihi sicut inexperto et ineffabilis his manifestationibus sponsa delectatur cum adfuit, sed admodum affligitur cum recedunt et ad votum non revertuntur. Verumtamen etsi quævis beata anima quancumque sibi in via hæc indulto divinæ manifestationis privilegio illustretur, multo tamen sublimius, plenius et multo delectabilius, quia beatius in patria lucis in illa infinita luminis abyso istius tantæ manifestationis claritas revelabitur : hujuscemodi enim manifestationis divinas semper per signa aliqua vel per similitudines mediate fieri existimandum : patria illa lucis sibi illam Dei manifestationem quæ solum immediate fit vindicante. Unde et Magister usque ad tertium cælum raptus qui comprehendisse videri poterat : *Fratres, inquit, ego me arbitror comprehendisse (Philip. iii)*, et quid sit illud quod non comprehenderit, mox subjungit : Unum autem; quasi dicat : illud quod me comprehendisse non arbitror, illud est quod unum est quasi hoc illud est, quod sicut singulariter et præexcellenter unum dicitur, prima videlicet nostra et principalis unitas hæc.

Videor mihi jam quod ab initio de prima et principali unitate nostra proposui me executum : primo siquidem per oculum corporis, cordis seu rationis oculum excitantem demonstratum est quod ipsa est : quod quia per facta visibilia est ostensum dici potest hæc visibilis seu corporalis primæ unitatis manifestatio; secundo per solum rationis oculum itidem quod ipsa est multipliciter quidem et varie comprobatur, quod quia de moris visibilibus rationibus solum hinc inde conquisitis est ostensum, dici potest hæc spiritualis primæ unitatis manifestatio; præstenso ergo de prima unitate quod ipsa est, subsequenter per tertium contemplationis oculum quatenus datum monstravimus quid et qualiter ipsa sit, et hoc quidem dupliciter : primo per Scripturarum eruditionem, qua docemur de prima et principali unitate, non solum quod sit, sed et quid et qualiter sit, et hæc primæ et principalis unitatis nostræ manifestationi bonis et malis communem diximus; secundo vero per inspirationem internam et manifestationem hanc solum bonorum rem et omnium, sed tunc plenioris scientiæ Scripturarum sancta operatione adjuncta, tunc enim scientiam in intellectum transire diximus. Unde et, ut præmisimus, dici potest intellectualis manifestatio hæc : adhuc de inspiratione interna diximus esse quasdam primæ et principalis unitatis manifestationes præexcellentes, quæ sicut singulariter et præexcellenter theophaniæ dicuntur, ad tertiam illam manifestationis speciem, quæ intellectualis jam dicta est, recte pertinentes; et ita erunt primæ et principales unitatis nostræ manifestationes tres : prima ipsius manifestatio visibilis vel corporalis, secunda spiritualis, tertia vero naturalis.

Verum etsi principalis hæc unitas a nobis sic sit

pro sensus nostri angustia multipliciter manifestata, eo ut verum fatear, quodammodo cognitione mihi incomprehensibilior facta est: illud prophetæ nostri jam expertus in me quia homine accedente ad cor altum tanto magis exaltatur ab homine Deus, hoc tamen quod fideliter et humiliter homo de Deo dicit, Deus tolerat ut sic de Deo homo loquens in Deo suo delectetur, et gratia fidei figuras verborum, quibus de veritate loquitur homo Deus, pius ac si veras acceptat, cum tamen supra omne et extra omne quod dicitur sit ipse veritas et unitas Deus. Verum, etsi tam gloriosa, tam principalis nostra unitas hæc omnium operatrix virtutum, fides, spes, salus et virtus omnium tamen comprehensibiliter tanta sit, ad ipsius tamen manifestationem tantam et tam sanctam, parva, nostram induximus calumnia: forte ab aliquibus quod per ipsam nunc hæc induxerim. Verum si placet benigne ignorent hi, nec enim excessisse me arbitror: hæc quippe non deviant, non obviant, imo potius meum juvant et juvabunt propositum, quæ a nobis de hac prima et principali unitate inducta sunt; de qua ego peccator homuncio, pavidè quidem, sed sicut nec contra fidem, quod absit! nec præter rem loquens propter illas quas supra post eam distinximus unitates duas de ipsa et pro ipsa hæc induximus, et præsertim propter illam imperatoris et militis unitatem tertiam, propter quam et ad primam hanc compulsus a tertia accedere ausus sum et ad secundam. Unde et ego inter tot et tantas et tam varias viæ et vitæ hujus tentationes, et laqueos, et curas distrahentes, incola et peregrinus versans, adhuc nihilominus tamen de ipsa prima et principali unitate etsi catholice temere tamen vereor loqui præsumpsi. Unde et ipsius hic faciens finem quæ infinita est ab ipsamet veniam deprecor, si excessi et de reliquis duabus unitatibus locuturus adhuc ipsi tam gloriose principali et tam principaliter gloriose æternæ unitati, quæ fides mea, salus mea et tota spes mea est, me commendo, et ea salutata nunc et adorata ipsamet si placet puerum suum per vias incognitas ducat et doceat, quasi deinceps de sanctuario ad sanctuarium, imo quasi de ipsius creatricis et imperatricis unitatis incomprehensibiliter immenso palatio ad sponsi et sponsæ thalamum transiturum: nam de duabus unitatibus reliquis amodo prout edocti desuper meli nostri notitæ formabuntur: de hujus quidem primæ et principalis unitatis trinitate nihil in præsentiarum in cithara nostra resonantes: tum quia sicut in Testamento Veteri singulis fere paginis commendatur unitas, sic pene singulis Novi Testamenti syllabis prædicatur unitatis trinitas, tum etiam quia multo magis quam in unitate, in unitatis trinitate, fidei magis implicitum involucre est. Sed præ cæteris de unitatis, a qua certe invitatus avellor, trinitate nil hic intersero, quia ne etiam per materiæ granditatem me excusem, nullatenus præsens propositi mei hoc materia exigit qui etsi de unitate quasi dispu-

tando modicum quid interseruerim, quod et forte quis quasi ad propositum non attinens calumniabitur, sciat pro certo priusquam calumnietur is de ipsa præter alia, ob id maxime ex parte sermonem me fecisse prolixius, et de ipsa disputando probasse et improbasse, ut ego ipse proprius ipsius disputator et probator, etsi non errorem, quod absit! meam tamen de ipsa et circa ipsam ignorantiam hic confiterer: nam etsi scientiam ipsam et aliquatenus quid sit ipsa, admodum tamen minimum est, quod mihi datum sit scire de ipsa vel circa ipsam: fides quippe cuius implicitissimo involucre similis tam de unitate quæ commendatur in veteri quam de unitatis trinitate, quæ in nova lege prædicatur, totum quasi involvit et obvolvitur et operit totum, cuius tamen beneficio omnia certe creïto, sed nihil video nisi forte speculariter et in ænigmate, quod tamen ipsum non ego non mei similes usurpamus, sed soli forte in charitate radicati et fundati sibi specialiter vindicant, fide, ut ita diximus, totum operiente et involvente totum. Unde et illud est, quod ego supra sic planxi, ita protraxi, ita distuli, timens et tremens in sanctuarium Dei intrare, quod fidei involucrem totum involvit, totum nobis tegit et operit, hoc quippe fidei tabernaculum circa quo l'excubamus, dum in deserto militamus adhuc, tot est symbolicis demonstrationibus adumbratum, tot videlicet arietinis pellicibus, tot hyacinthinis, tot saccis cilicinis, et tot cortinis opertum totum, verum, ut videtur, nunc militiæ nostræ immemor, quasi tabernaculum militantibus non sufficiat, in ipsum prophetæ templum supercæleste, in quo jam concives sanctorum sunt, præsumo sicut videri potest ascendere, in quo portæ tot, in quo et tot atria, tot atriola, tot gazophylacia, tot vestibula, tot domus, tot ædificia, tot cœnacula, tot ostia, tot ostiola, tot viæ, tot plateæ, tot semitæ, tot loca, tot sanctuaria, et thalami tot, cuius dum recorder, ipsius Salvatoris in Evangelio mox efficior memor. *In domo*, inquit, *Patris mei mansiones multe sunt* (Joan. xiv). Quod tamen propheta in prophetici voluminis sui fine, non jam jam domum vel etiam templum, sed civitatem nominat et nomen iniquiens civitatis ex illa die dictus ibidem mutato sic nomine, totum a se mystice dictum nobis apertissime indicans. Unde et propter templi hujus seu potius civitatis quæ supra distinximus loca et mansiones tam varias, periculosus ingressus est: quod quis intrans, etsi, quod absit! non erret in via fidei, errare tamen facile poterit procedendo nimis, et perscrutando investigans abdita sanctuarii. Unde et qui prius primæ et principalis unitatis investigabile intrare præsumpsi sanctuarium, retrahere mihi nunc tutius, ne quo ulterius eo interius procedam incautius, cum tamen de sanctuario ad sanctuarium imo quasi de palatio ad unum de palatii thalamis, mox mihi sit divertendum, de unitate videlicet ad unitatem, de unitate solius naturæ, quæ est in Deo trino inter tres, ad unitatem solius gratiæ quæ solum est inter

verbum et carnem, inter Deum et hominem, de ejus unitatis causa et origine præsentis hujus meli nostri, qui tertius est, xvii jam formabitur notula: nec enim secunda unitas hæc solius gratiæ, ut illa prima et principalis est æterna, sed ab ipsa prima et principali unitate solius naturæ in fine sæculorum in plenitudine temporis facta est ista solius gratiæ, et hoc inter se ipsam et primam et principalem et humanitatem nostram: de ipsius itaque causa et origine ante alia cithara nostra, prout desuper datum, resonabit.

TERTIUS MELUS DE UNITATE SOLIUS GRATIÆ NUNC INCIPIT, ET PRIMO DE IPSIUS CAUSA. 17 NOTULA.

Homine in paradiso per tentatoris violentiam a prima et principali unitate, sicut seditiose et tyrannice separato et avulso, mox ipse homo in se ipso divisus est; divisus, inquam, dilaceratus, distractus et sibi ipsi rebellis, quasi de uno partitus in duos, utpote qui ab eo quod vere unum est, imo sicut in præcedenti melo jam audivimus, quod vera, quod simplex, quod æterna unitas est et indivisa, divisus; quæ sola solum vere est, a qua etiam quod ab ea divisum est habet quidem esse, sed tale quale esse quod est, tale quale dico esse, esse videlicet multiplex quasi habens non unum esse sed multa diversa inter se et adversa homine per spiritus sui afflictiones diversas et dissidentes et per cogitationes varias, vanas, assiduas et importunas et item per corporis sui dispositiones multiplices et contrarias, et per tam crebras, tam continuas temporum vicissitudines et locorum mutationes, quo multiplicius et miserabilius distracto, dilacerato et convulso: ita ut jam non Dei imaginem, ad quam fuit conditus, sed potius nescio cujus monstruosi Protei poetice commentatam effigiem homo sic se unitatis et sic mutabilis repræsentaret, adeo etiam, prohi dolor! nimis pressus, sic oppressus, et sic divisus, ut crebro nec sui esset memor, nec nosceret se. Sed quid dico crebro? adhuc quippe admodum paucorum est nosse se, etsi forte corde, minime tamen opere recolentes quid fuerint, quid sint et quid erant; juxta quod unus cuidam simul et semel breviter interroganti quid fuisset, quid esset, quid futurum esset, mox eleganter et simul breviter singulis singula respondisse legitur: « Vile, inquit, sperma, vas stercorum et cibus vermium, » in schismate igitur hominis hoc vix est rarus qui se nosceret; qui etiam ad propriam in semetipso unitatem revertetur, homine quidem sic distracto et diviso, et in tam duro, tam diro schismate jam non solum inter Deum et ipsum, sed et in se ipso homine etiam adversus se ipsum hominem facto schismate in semetipso, imo ut dicam, nunc sic schismaticus sui ipsius factus, duro profecto et diro schismate confestim ut ab unitate se dividit inter animam suam propriam et propriam carnem suam exorto, concupiscente ista quod non illa et illa quod non ista, sed et illa et ista etiam in se ipsis omnino inter se con-

traria, et sic tota vita hominis schisma erat in homine, et mirum quidem et inauditum schisma hoc homine facto non solum Deo sed et sibi ipsi contrario, et sibimetipsi gravi, juxta illud plangentis hoc hominis dolentis et querentis: *Quare, inquit, posuisti me contrarium tibi et factus sum mihi meti ipsi gravis? (Job vii.)* Similiter et Propheta interplangens: *Cor, inquit, meum dereliquit me (Psal. xxxix),* et item anima mea impleta est illusionibus, nec hoc quidem mirum, si homini sic acciderit, qui se sic tam temere, tam fatue, tam presumptuose, a prima et principali unitate divisit: certo quippe certius et luce clarius, quod tamen quo familiarius et melius norunt experti, nullum cor vere jucundum, nullum vere quietum, nullum pacificum, imo omnino dilaceratum, divulgum et sibimet contrarium, et schismaticum, nisi fuerit ipsum huic primæ nostræ et principali unitati conjunctum: adeo naturale est humano cordi esse cum unitate naturæ hæc, ad cujus imaginem ipsum naturaliter conditum est. Unde apprimè expertus hoc et reversus a schismate: *Deus, inquit, cordis mei (Psal. lxxxi);* et iterum: *Mihi, inquit, adherere Deo bonum est (ibid.);* hoc est illud sub sole solum et unicum illud unum in quo habitare cui adherere bonum et jucundum. Verum infelix fatuus et miser homo factus schismaticus, et ab ipsa prima et principali unitate sic divisus, mox ab Ecclesia triumphante, a congregatione justorum, ab angelorum consortio est expulsus, et ita ad partes veteris illius et schismatici Luciferi, qui Ecclesiam triumphantem jam perturbaverat et in multorum ruinam jam grande schisma fecerat, quasi inseparabilis et individuus schismatis comes ipsi adjunctus est.

O quam infelix, quam infortunatam, quam vile schisma, prius quidem in cælo natum inter Deum et angelum, postea vero in paradiso renatum inter Deum et hominem! Sed prius a cælo, post a paradiso expulsum, nunc in fine ad hoc sterquilinum est devolutum sæpe et sæpius militantem hanc turbans ecclesiam, quod ab initio dilaceravit et conturbavit triumphantem, persæpe etiam domesticam cujusvis privati familiam commovens et perturbans, ubi non nisi duo sunt congregati vel tres, ita quod pace perturbata non secundum Christi Evangelium, sed potius secundum Luciferi immissum dissidium, duo in tres et tres in duo dividantur: adeo est Luciferi amicum schisma et dissensio. O quam maledicta, quam profana, quam viperea soboles hæc, cujus mater est ambitio et Luciferi pater, cujus et inter carnis opera soror pessima hæresis! heu, heu, igitur miser homo quid faceret, quo se verteret, quomodo ad unitatem rediret? primum et principale schisma erat inter ipsam primam et principalem unitatem et ipsum, et exinde inter ipsum et angelum et etiam inter ipsum et creaturam universam propter ipsum conditam et hoc propter omnium creaturæ unitatem, a qua tam fatue, tam temere, tam presumptuose se sic diviserat, et quod adhuc inau-

ditum, tam durum videlicet, tam durum schisma, et homo in semetipso schismaticus, sicut irrevocabilia et implacabilis ipsomet facto contrario sibi et sibi-
metipsi gravi. Quomodo ergo redire, quomodo re-
verti, quis revocare ad unitatem ab unitate sic di-
visum vel auderet vel posset: unitas quippe ipsa
prima et principalis Deus ipse unus et summus
ipsum a consortio justorum, ab Ecclesia triumphante
propter schisma expulerat, angelus propter schisma
expulso non communicabat, Lucifer, ne conschi-
smaticus suus, quem ad satellitum suum jam al-
lexerat, reconciliationi obstabat, nec etiam homo
ipse pro reconciliatione supplicabat, imo magis ac
magis efferebatur in dies, tota vita sua de Luciferi
satellitio gaudens, donec in fine extrema gaudii lu-
ctus occuparet. Sic etiam misero homine multipli-
cato et adhuc in dies crescente super terram, multis
sæculis per invia deserti hujus et avia currebat
semper pascens ventos et sequens umbram, et beatum
se in desiderii animæ suæ clamans, donec juxta
prophetam miser hic, qui tota vita sua ventum se-
minaverat, turbinem meteret; sic et juxta illud
sapientis ante grandinem præibat coruscatio et ante
verecundiam gratia, sic et ante ruinam exaltabatur
cor, sed post exaltationem ruina hominis irrevoca-
bilis: quidquid enim de humano genere post fugi-
tivam et umbratilem vitam suam hanc sine misera-
tione ætatis, sine distinctione sexus, nec conditione
æstimata, quotquot sine miseratione, sine patrocinio,
sine remedio, sine suffragio in mortis abyssum
insatiabilem præcipitabantur, Introeuntes hi quot-
quot in progenies conschismaticorum spirituum an-
gelorum apostatarum, ubi sine fine vita in labore
et tenebris, et ita miserum hominum genus ad in-
signis illius schismatici Luciferi gloriam juxta votum
rejus et mandatum conculcabatur in dies, et hoc ipsum
quidem, sicut ad creati et seducti hominis miseriam,
sic et in ipsius creatricis unitatis injuriam et etiam
ignominiam videri poterat redundare: cui seditiosus
ille schismaticus sicut creaturam suam sibi injuste
et dolose prius subtraxerat, sic eam tunc quasi in
creatricis ignominiam et contemptum pro voto suo
et desiderio sæve nimis et tyrannice conculcabat.

DE UNITATE MISERANTE HOMINIS OPPRESSIONEM ET
COGITANTE DE EREPTIONIS MODO. 18. NOTULA.

Prima itaque et principalis et omnipotens ipsa
unitas misericordie fons natus et verus, imo re-
vera æternum superabundans et indeficiens pietatis
profluvium, quod super omnia opera sua non segni-
ter, sed abunde et indesinenter emanat, videns mi-
seram creaturam suam sic oppressam et miseram,
cogitabat de ereptionis modo: verumtamen in mi-
serantis unitatis cogitatione hac, misericordia et
veritas sibi invicem visæ sunt obviasse, juxta quod
rex ille propheta: *Misericordia, inquit, et veritas
obviaverunt sibi* (Psal. LXXXIV): misericordia si-
quidem pro homine sic damnato supplicabat, sed
veritas obviabat pulsanti misericordie, ne exaudi

A retur obstans, eo quod homo juste sic damnatus in
veritate non stetisset, cum tamen nihil in eo esset
quod ipsum a via veritatis retraheret.

DE SENTENTIA LATA PRO EREPTIONE HOMINIS.

At velut tertia mox justitia se interposuit pro
pace et reconciliatione hominis misericordie coad-
jutrix, et quidem non jam supplicans, sed manifeste
ostendens hominem a tali possessore jure omni
tollendum. Unde et justitia, cujus natura sapientia,
quæ et genitam habet sapientiam, in primis pacis
hominis patrona in causa hac mox et ante alia alli-
gat illum omnimodis injustum fore hominis posses-
sorem, qui hominem sic dolose, sic seditiose cir-
cumvenerat et communi, utriusque vero domino
servum suum sic subtraxerat. Unde et quem ille
vindica-verat sibi per iniquitatem omni jure sibi
adimi posse per justitiam et ipsum quondam Domino
debere restitui, etiam si servus inscius et impro-
vidus se circumveniri passus sit, et ne, inquam,
justitiam rem tam patentem diutius protraham, non
jam supplicante misericordia tanquam patronæ
pacis fungar officio; sed quod mihi licet utpote
justitiæ sicut præcise indico sic pronuntio, ut servo
injusto possessori adempto ab ipso liber et per ju-
diciū absolutus ad quondam dominum suum re-
vertatur et quoniam justitia et veritas semper
amica sunt, judicio consensit veritas, et quæ prius
supplicaverat applaudet misericordia impetrans.
Unde et ipsius justitiæ judicio submotis omnino
quod ad Deum inimicitias, quæ inter Deum et homi-
nem præcesserant, justitia et pax osculatæ sunt, et
ita illata pro homine sententia, sic quatuor hæc
convenerunt, misericordia et veritas, quæ prius
obviaverunt sibi et justitia et pax quæ se sunt oscu-
latæ adinvicem. Sed tamen re indicata sic cogita-
bat mox ipsa quæ sententiam tulerat omnipotens et
æterna justitia qualiter et quo tempore commodius
sententia sic lata dari posset executioni et manci-
pari effectui: adhuc enim etiam lata sententia fu-
giebat verum dominum suum servus, cujus in judi-
cio absentiam misericordie replevit præsentia et in
ecclesiam, a qua propter schisma expulsus fuerat,
minime admittebatur, adhuc Luciferi etiam paci et
reconciliationi obstante, nisi quia latam sic senten-
tiam et præsertim latæ sententiæ executionem et
executionis modum, de quo jam dicitur, penitus
ignorabat. Si enim, ut Magister docet, cognovisset,
nunquam Deum gloriæ crucifixisset; cogitabat, in-
quam, justitia de latæ sententiæ executione et exe-
cutionis modo; nec enim placebat illi etsi Omni-
potens servum juste quidem damnatum et propter
schisma a consortio justorum expulsum, a violento
ipsius et injusto possessore potestative auferre,
quod tamen, sicut potestative etiam et injuste po-
tuisset: cogitabat ergo vera illa et summa justitia,
quomodo et qua via sententia pro pace servi a se lata
iustius, efficacius, servo fructuosius et ad majorem
violenti possessoris confusionem executioni dare ur.

DE LATÆ SENTENTIÆ EXECUTIONIS MODO BREVITER
HIC TANGIT ET POST DE IPSO EXECUTORE.

Videns autem in miro illo et incomprehensibili sapientiæ et scientiæ suæ thesauro nihil sic justum, nihil sic efficax commodumve sic nec per aliquid tantam futuram tyranno confusionem, hoc ordinavit, hoc disposuit, ut servus ille fugitivus schismaticus per unitatem ad unitatem revocaretur. Unde et unitatem quandam novam a sæculis inauditam et incognitam, imo omnium sæculorum sæculis reverentissime admirandam et obstupendam, in fine sæculorum instauravit et opportune quidem et ordinate tunc in fine sæculorum cum temporis plenitudo advenisset, primo quidem data lege naturæ, quæ ad hominis pacem invalida erat et inefficax, quia cum legis naturalis tres partes sint, ex omni parte ad hominis pacem inefficax erat, nec enim sufficiebat Dei Creatoris agnitio, quæ est legis naturalis pars prima, nec secundum Dei agnitionem vita bene instituta, quæ est legis naturalis pars secunda. Unde etiam et qui secundum Dei voluntatem vitam agebant, quotquot tamen ad inferos descendebant, nec sufficiebat etiam, cum vita bona bene vivendi exemplum cæteris dare, quæ est legis naturalis pars tertia; nulla igitur naturalis legis pars nec ipsa tota ad hominis pacem sufficiens; quia nec prima quæ potest dici theosebia propter unius Dei cultum, nec secunda quæ potest dici ethica propter vitam bonis moribus institutam, nec tertia quæ potest doctrinalis, propter docendi exemplum ad Dei cultum in operibus bonis, et sicut lex naturæ, ita et quæ postea subintravit, pariter invalida et insufficiens erat, per Moysen data lex litteræ; quin potius lex ista factorum seu litteræ non solum inter Deum et hominem non componebat, sed etiam magis turbabat, imo verius, sicut docet Magister, accidebat transgressionem augendo et abundare faciendo supra modum peccans peccatum. Unde primo lege naturæ, et postea lege litteræ, per multa sæculorum sæcula sic currentibus, et utraque inter Deum et hominem ad componendum invalida, in fine temporum successit novissime duabus aliis lex tertia, lex solius misericordiæ post primam illam naturæ, et post illam secundam litteræ, quam induxit illa, de qua et propter quam totus hic noster sermo est, nova et inaudita hæc solius gratiæ unitas, juxta illud Magistri: *At ubi, inquit, venit plenitudo temporis, misit Deus Filium suum* (Gal. iv): ecce plenitudo temporis præstitæ videlicet et præordinatæ a Deo inter Deum et hominem tempus plenæ reconciliationis, et bene tempus plenitudinis, tempus inter Dominum et hominem abundantiae pacis, in hoc tempore plenitudinis completo illo longe ante promisso, orietur in diebus ejus justitia et abundantia pacis, et vere juxta prophetæ nostri sicut desiderium et vaticinium, diebus ejus pacis abundantia inter Deum et hominem orta: quis enim audivit unquam tale, aut quis vidit simile? quis credidit auditui nostro? aut cui vere Omnipotentis et miserantis justitiæ pro pace hominis judicantis

PATROL. CXG.

A factum hoc revelatum? Ecce enim novum quod fecit æterna illa et summa justitia, prima et principalis unitas nostra; ecce, inquam, novum quod fecit super terram: vis audire novum et novum inauditum imo omni virtute, omni signo et prodigio incomparabiliter plus admirandum? Ipsa justitia vera et summa ipsa prima et principalis unitas æterna sic adversum, sic aversum, sic fugitivum univit sibi schismaticum hominem; et sic sibi univit ipsum quod fuit ipse: revera non potuit excogitari dulcior pax sen confederatio inter Deum et hominem, quam ut Deus fieret homo.

O quam admirabilis et vere admirabilis, imo vere plus quam admirabilis unitas hæc primæ et æternæ unitatis et fugitivi et schismatici hominis! non quidem naturæ unitas hæc, sed solius et ineffabiliter incomprehensibilis gratiæ, qua lumen in testa, verbum in carne, Deus in homine et homo Deus, interverso sic ordine naturæ, ut liberior via fieret cursui gratiæ, ita ut jam rejecto illo vetustatis canticum qualis terrenus tales et terreni, canticum novum canticum præ bonitate canticum admirabile cantemus admirabili quales cœlestes tales et terreni, quale cœlum talis et terra, quia etiam cœlum terra Verbum caro. Et vere canticum novum, canticum admirabile: nec enim juxta quosdam tantæ unitatis inepacium dogmata a virtute, potestate, vel adoptione, seu habitatione, Verbum in carne, sed quod est præ nimia admiratione obstupescibile et præ dignatione incomprehensibili amplexabile, sic est Verbum in carne, quod sicut vere et plene et perfecte Verbum caro, idem ipse sicut æternus Deus et temporalis homo, se major et se minor, sui dominus et sui servus, salvus tamen super verbis his orthodoxorum Patrum et sanctorum conciliorum dogmatibus. Manens enim quod erat factus est, quod non erat, idem ipse et dominus et servus, quod profecto soli commissum est fidei, ipsa per nullam creatorum similitudinem ad hoc adjuncta ad manifestandam quippe unitatem hanc omnis similitudo deficit et impossibilis est, ubi sola dominatur fides et cum omni virtute sua tota succumbit ratio.

DE ILLIS QUI DICUNT DEUM HOMINEM FACTUM HABITU,

D Plerique tamen nostri temporis hujus mentem tantæ unitatis inter Deum assumptum et assummentem hominem tam humile et eo magis gratuitum vinculum, velut de morticino nostro calciatæ divinitatis cortigiam conantes solvere, sola illius habitus ratione, Deum hominem prædicant, de quo Magister dicit quod habitu inventus sit ut homo, et isti quidem non essentialiter Deum tradunt hominem, sed juxta Magistrum habitu duntaxat non essentia: absurdum quippe videtur his et omnino veritati adversum fateri quod Deo esse hominem sit Deo esse, cui nihil aliud est esse quam videre, quam sapere, quam posse, et quam esse beatum, quam esse æternum, et esse Deum. Item detestantur hi aliquid recens; fateri Deum, et in aliquid credere statim novæ legis, in quod non crediderunt patres veteris, nec

ipse Abraham, qui omnium est credentium pater. Itæc quippe et similia his qui Deum hominem factum solo habitu non essentia docent, obijciunt illis qui essentialiter Deum hominem dogmatizant, ex quorum assertione videntur necessario consequi quæ præmissa sunt.

DE ILLIS QUI DICUNT DEUM HOMINEM FACTUM
JESSENTIA.

Sed et e diverso illis qui essentialiter Deum hominem tradunt videntur priores illi per habitus rationem, qua Deum hominem prædicant, sicut nimis insipide et minus gratiose tantæ unitatis inter Deum et hominem extenuare gratiam, laxare vinculum, et huic Altissimi tam miraculoso operi, tam admirabiliter singulari et tam singulariter admirabili derogare simmiste magni illius concionatoris nuntii promisso manifeste adversi installantis sic virginis: *Quod nascetur, inquit, ex te sanctum vocabitur Filius Dei (Luc. 1)*. Et adjiciunt isti hoc esse illud omnibus sæculis et generationibus admirabile sacramentum et absconditum ad quod omnis similitudo inducta mox reperienda dissidet et impotens est. Hoc, inquam, illud est quod æternus ille Deus omnium Creator et Dominus manens, quod erat sic quiddam temporale, quiddam passibile, quiddam creatum factus est, quod ante non erat ipse, absque omni sui vicissitudine seu vicissitudinis obumbratione ulla.

Verum in præsentiarum hujuscemodi assertiones varias sicut nec probo, nec improbo, cum eadem incarnationis fides sit apud hos et apud illos, etsi ex causis fidei et circa fidem ipsam varie moveantur forte tanti mysterii scrutatores magis temerarii et curiosi magis quam necesse. Unde ut omissis his ad propositum tam ineffabilis, tam incomprehensibilis, tam incomparabilis unitatis revertamur mysterium hujus certe tantæ unitatis vinculum et tam miræ, tam novæ tam præclaræ unitatis gratiam deridet Judæus, non credit ethnicus, nec capit philosophus. Hic etiam periclitatur et Christianus, qui Scripturas perperam intelligendo errans aut errantem sequens circa hoc veritatis et unitatis gratiæ sacramentum male sentiendo vel in modico deviat. Qui et si forte propter fundamentum salutem consequetur sic tamen salvus erit quasi per ignem. Quales forte illi de quibus paulo ante dictum. Unde et tutissimum sicut nec ab ipsa fide, sic nec a verbis fidei, quæ in orthodoxorum Patrum tractatibus seu sanctorum conciliorum sanctionibus reperiuntur, recedere; qui nunc astruendo nunc destruendo verbis fidei competentibus sufficienter satis et commode uti sunt. Ab his ergo recedere periculum, ne sub exquisita aliqua novitate verborum aut sequamur veterem, aut novum gignamus errorem. Quid enim non in periculo, cum reatus hic non solum ex rea mente oriatur, sed et lingua, et non sensus, sed et sermo sit in crimine? Unum certe audeo, quia non erit plene sancta et sana doctrina, nisi etiam sanctis et authenticis sanctorum verbis fuerit ministrata credentibus. Fides quippe sicut fidelium, ita et scien-

tia qua erudiuntur ad fidem non horum vel illorum, sed duntaxat scientia sanctorum est nobis jam plene per sanctorum verba ministrata.

Sed ut ad præmissa revertamur, et ad opus illud novum, quo æternum Deum temporale hominem verum et perfectum prædicamus, ecce certe nova illa et inaudita a summa et æterna justitiæ ante omnia sæcula præcogitata latæ sententiæ pro pace hominis executio. Ecce executor novus, sicut re et nomine admirabilis. Quod profecto nomen juxta prophetam sibi ex re tanquam proprium vindicat. *Et vocabitur, inquit, nomen ejus admirabilis (Isa. 1x)*. Revera sententiæ pro homine latæ executor novus et admirabilis, Deus homo, homo Deus. Nam, ut audacter jam loquar, ne temere avertat Dominus, stupor quippe et tremor quæ pro facti novitate apprehenderunt ne sic compellunt nihil in tam incomprehensibili et tam immensa operum Altissimi potentia, nihil in tam arcanis, tam profundis sapientiæ et scientiæ suæ thesauris, sicut videre mihi videor, posset reperiri, quod ita esset efficax ad servum fugitivum revocandum, quod ita commodum ad servum acquisitum retinendum, quod ita justum ad tyrannum illum triumphandum, quod ita foret idoneum ad triumphatum omnibus sæculis confundendum. Quomodo vero hoc quisquis in sacris litteris, etiam vel mediocriter exercitatus, si simplici et puro inspicat oculo, cito videbit quod sic? Quæ tamen ego solum nunc tangens non prosequor. Nec enim esset præsentis operis prosequi omnia hæc quæ singula propria et singula sua efflagitarent volumina. Unde omissis nunc his, ad illam unitatem qua prima et principalis unitas schismaticum sibi univit hominem, de qua nunc in hujus meli parte tota nostra cithara resonat, revertamur. Quod autem dico unitum schismaticum hominem, hoc dico sic propter schismatici hominis unitam primæ unitati naturam, in ipso quidem homine specialiter et personaliter unito, in unione ipsa omni sedato schismate et nulla jam in ipso spiritu et carnis rebellionem. Et sic erat homini spiritus sui et carnis unitas in paradiso pridem perditam in privilegiato homine hoc jam ex parte restituta. Et hoc quidem per ipsam unitatem principalem et primam quæ veteri exuto, sed necdum extincto, penitus novum hominem univit sibi sic.

IN HOMINE ASSUMPTO DEAS DISTINGUIT UNITATES.

Et ita in unito sic homine duplex unitas est, ut a quidem inter ipsam unitatem principalem et unitum sibi sic hominem non quidem naturæ, sed potius contra naturam, imo verius supra naturam, solius gratiæ; cætera vero unitas in unito sibi homine inter spiritum et carnem uniti sibi sic hominis, nec spiritu adversus carnem, nec carne concupiscente adversus spiritum, quale fuit hominis ante peccatum idioma; et hæc quidem in novo homine novæ gloriæ unitas; nec enim loquor nunc de naturali illa in assumpto homine spiritus et carnis unione cæteris similiter hominibus ex natura communi, sed de gratuita facta jam plena et perfecta pace absque omni schismate absque rebellionem inter carnem assum-

plam et spiritum. In hoc ergo de genere nostro assumpto homine, tanquam nostri generis privilegio, pax inter Deum et hominem reformata et quasi in scriptum est redacta, cujus libri est membranula pellis ovina et mortuina, caro videlicet a nobis assumpta humano sanguine quasi holocausto, et ossibus et nervis quasi calamo exarata, absque schismate, absque contradictione, sine omni rebellionem pacem in se hominis continens, scripta autem est hæc pax hominis in libro et etiam in ipso libri capite. Unde et propheta noster ex persona servi fugitivi sed reversi : In capite, inquit, libri scriptum est de me ut faciam voluntatem tuam, Deus : liber iste est homo assumptus ; ipse enim liber est humani generis qui hominem exemplo operis et doctrina instruit veritatis, cujus omnis sermo et omnis actio Christiani est lectio, caput vero libri Deus, non solum igitur in libro, sed in libri capite scriptum est de me dicit generalis homo scriptum dicit, id est firmum et fixum sicut quod in scriptum redigitur, et quid sit de eo scriptum, id est firmum et fixum mox subjungit ut faciam voluntatem tuam, Deus, quod proinde ac si diceret de me ibi est scriptum idem immutabiliter statutum ut fiat pax inter me et te, o Deus, quod profecto erit tunc cum tuam fecero voluntatem, ac si diceret, ut fiat pax inter me et te, Deus : idem igitur est ut faciam voluntatem tuam, Deus, quam profecto Dei voluntatem firmiter fecit et inviolabiliter homo ille beatus quem Deus elegit et assumpsit juxta quod et ipse de se : *Non veni, inquit, facere voluntatem meam, sed voluntatem ejus qui misit me (Joan. v)*, et sic homo Dei voluntatem in ipso fecit postea per ipsum auctus et multiplicatus super numerum : pax itaque hominis multa scripta in hoc capite libri, in libro vitæ et in isto sicut hominis pax multa et multiplex, quia pax hominis ad Deum, pax ad angelum, pax ad proximum, pax et ad se ipsum, ecce iterum pacis abundantis juxta prophetæ nostri vaticinium et desiderium indesiderans diebus desiderati orta et in nostro novo homine Deo tanquam novo quodam privilegio glorioso et insigni confirmata : per istum mediatorem Dei et hominum inter Deum et hominem omni contradictione, omni rebellionem et omni procul amoto imo potius extincto jam schismate, præterquam jam inter solum hominem et Luciferum solum, a quo prius seductus ejus conschismaticus fuerat ; pax itaque hominis, sicut multa et multiplex scripta in libri capite, in libro vitæ, in libro sapientiæ.

DE LATÆ SENTENTIÆ EXECUTIONIS MODO PER UNITATEM SOLIUS GRATIÆ.

Et quoniam latæ sententiæ executionem jam tenemus, sicut re et nomine admirabilem, de executionis modo, quod supra breviter, hic attentius audiamus, qualiter videlicet fugitivum servum ad dominum suum revocaverit, qualiter schismaticum reconciliaverit et exterminato qualiter reformaverit pacem et restituerit patriam ; tu igitur, homo, audi et attende præ nimis dignationis admirationem

A obstupescibilis de hoc executionis modo propter te ut ad unitatem revertaris ; audi, inquam, quæ et prophetia et evangelium, duo testes verissimi, contestantur de modo hoc. Mirus vere et vere mirus et novus executionis modus hic quo non solum unum multiplex ; sed et ipsa prima et principalis unitas facta est velut misera et misere distracta, dilacerata, et convulsa multipliciter personaliter sibi uniens formam servi et servi miseri et desperati nec speciem habentis nec decorem ; servo quippe huic juxta prophetam nec erat aspectus sed despectus et virorum et novissimus, vir dolorum et sciens infirmitatem ; quasi absconditur nec reputatur languores nostros ferens, dolores portans, quasi leprosus a Deo percussus et humiliatus et super eum pacis nostræ disciplina livorum sanitas et pmi iniquitas oblati quasi voluit ovis ad occisionem agnus coram tondente de angustia et de judicio sublatus, generationis inenarrabilis, abscisus de terra, propter scelus percussus, dans impios pro sepultura sua pro morte divites, in cujus manu non fuit iniquitas, non dolus in ore, cum sceleratis reputatus, et pro transgressoribus orans : idem ipse prophetice pro me nunc leo, nunc vermis, nunc aper, nunc ovis, nunc taurus, nunc hircus, nunc cervus, nunc biunulus, nunc capra, nunc capreolus, nunc agnus, nunc vitulus, nunc passer, nunc herodius, nunc turtur, nunc aquila, nunc serpens, nunc columba, nunc petra, nunc vinea, nunc lilium convallium, nunc campi flos, nunc oliva, nunc palma, nunc rosa, nunc myrrha, nunc candelabrum, nunc lucerna, nunc aqua, nunc arida, nunc mons, nunc fons, nunc sagitta, nunc framea, nunc panis, nunc piscis, nunc ignis, nunc unguentum, nunc lignum, nunc vinum, nunc oleum, nunc aurum, nunc cælum, nunc dies, nunc sol, nunc fundamentum, nunc templum, nunc columna, nunc corona, nunc dominus, nunc apicille filius.

Et ut Evangelium prophetiam contestando declarat quasi basi columna supposita, prima hæc et principalis unitas, ut prophetia jam prænuntiavit, vere sibi univit formam servi, servi passibilis et mortalis, decem mensium fastidia in utero sustinentis et omnium se principium profitentis.

HÆC AD INCARNATIONEM.

D Idem ipse operarii et quæstuarie filius et splendor gloriæ et figura substantiæ Dei Patris.

Idem ipse nunc in brutorum præsepio involutus, nunc per astrorum indicia a regibus adoratus.

Idem ipse nunc parentibus se subjiciens nunc a ventis et mari imperans.

Idem ipse nunc quadraginta diebus et quadraginta noctibus jejunans, nunc potator et vorax publicanorum et meretricum conviva.

Idem ipse nunc tentatus a diabolo, nunc angelorum circumvallatus obsequio.

Idem ipse nunc assumptus per diabolum, nunc demonum legiones mittens in abyssum.

Idem ipse nunc ubi caput suum reclinat non habens, nunc omnia quæ Patris sunt possidens.

Idem ipse nunc putalia pocula postulans, nunc A
sitiensibus aquae vive meatus perenniter largiens.

Idem ipse nunc rube fragili aequora transiens,
nunc eadem siccis vestigio pedes terens.

Idem ipse nunc quidquam a se facere non potens,
nunc omnia quae Pater facit et ipse faciens.

Idem ipse nunc duobus discipulis sedes se dare
non posse testans; nunc duodecim sedium cum duo-
decim iudicandi potestatem tribuens.

Idem ipse nunc esuriens, nunc ex paucis panibus
millia hominum satians.

Idem ipse nunc sitiens, nunc aquam in vinum
convertens.

Idem ipse nunc Sabbatum profanans, nunc in
veritate viam Dei docens.

Idem ipse nunc verax, nunc seductor.

Idem ipse nunc diem iudicii ignorans, nunc cer-
tissime iudicii futuri argumenta denuntians.

HÆC AD PASSIONEM.

Idem ipse nunc sanans auriculam, nunc discissus
per lanceam.

Idem ipse nunc mortem timens, nunc morti illudens.

Idem ipse nunc mortis timore captus, nunc redu-
cens captivos.

Idem ipse nunc cum sceleratis reputatus in morte,
nunc mortis victor.

Idem ipse nunc in cruce pendens, nunc in ipsa
omnia commovens.

Idem ipse nunc in cruce derelictum se conque-
rens, nunc in ipsa paradisi deliciarum latroni C
pendens.

Idem ipse nunc in cruce solaris claritatis vim
tenebrosis obducens, nunc tenebrosa inferni pleni
lumine corusco illuminans.

Idem ipse nunc suscitator mortuorum, nunc
crucis maledictum.

HÆC AD SEPULTURAM.

Idem ipse nunc in monumento sepultus, nunc
reserans sepulcra mortuorum.

Idem ipse nunc in tumulo jacens sub lapide pres-
sus, nunc inter mortuos liber a mortuis surrexisse
nuntiatus.

HÆC AD RESURRECTIONEM.

Idem ipse nunc inter suorum manus ipsis se pal-
pabilem præbens, nunc subito evanescens.

Idem ipse nunc ad januam pulsans, nunc clausis
jannis suis inopinatus assistens.

HOC AD ASCENSIONEM.

Idem ipse nunc velut animalis corporis cum suis
piscis et mellis favo se reficiens, nunc velut ætherei
a suis elevatus, supra sidera scandens. Ecce ipsius
principalis et æternæ unitatis in homine propter
hominem schismaticum ad unitatem revocandum,
quanta distractio, quanta dilaceratio, multiplicitas
et divisio quanta, quanta humiliatio, quanta con-
fusio, et ignominia quanta. Stupet coelum, terra
miratur, quaerit angelus, offenditur Judæus, non
credit ethnicus, et rimatur philosophus, et quale et
quare opus hoc et qualis et quare pro homine late
sententiæ executionis modus sit hic.

O gloriosa, o beata, o principalis unitas! O Deus
bone, o imperator magne Christe Jesu, quam mira-
bilis imo juxta nomen proprium tuum quam admi-
rabilis es tu in viæ et vitæ hujus pœnis tuis! Adhuc
etiam multo plus quam in sanctis tuis mirabilior,
nisi quia solum ut sanctifices tuos hæc pœnæ tuæ; et
veræ sicut verendæ et reverendæ et admirandæ hæc
pœnæ tuæ. Sic quippe visum quasi non posset dari
tuis gloria tua sine pugna, et pœna tua tanquam si
militum pœna et pugna non sufficiat ad obtinendam
palmam, nisi in ipso campo imperator ipse pugnet
et sudet pro suis. Nec aliter posse schismaticum
hominem ad unitatem revocari, et tyrannicæ servi-
tutis excutere jugum, nisi ipsa unitate principali
exinanita, in forma servi per unitatem solius gratiæ

B
mediaret sic. Hoc quippe grande spectaculum et
mirabile in oculis nostris, quod ne videant synagogæ
velantur oculi ethnicorum bruta infatuantur corda
in quo etiam philosophorum omnium sensus omnis
obtunditur sola sponsa, cui sponsus ob amoris pri-
vilegiati signum de nomine suo nomen dedit, a Chri-
sto Christiana vocata, sponsum suum imperatorem
pro se in campo dimicantem recognoscit. Sed ut
de hac unitate solius gratiæ de hoc executionis
modo tam admirabili hic interseram quid, et uti-
nam non de meo, hoc quippe vereor, certe cum in-
terdum cogito admirans, et plus quam admirans,
inter Deum et hominem reconciliationis modum
hunc et hominem hoc modo liberatum et ereptum
de manu fortiorum ejus, suggerere mihi mox solet
conscientia mea aliquid esse nobis tam occultatum
adhuc inter potestatem lucis et potestatem tenebra-
rum. Inter quos homo quasi litigiosa possessio in
viæ et vitæ hujus campo ponitur et velut monoma-
chia inter principem cœli et principem mundi hujus
instauratur. Hominem quasi prædam suam vindicat
hic, vindicat et ille; acquirit hic, acquirit et ille;
protegit hic, rapit ille; ita ut etiam humani generis
parvuli quotquot a mundi principe tollerentur, nisi
ipse cœli princeps pro ipsis solvisset et luisset. Sed
quid dico de parvulis? Imo etiam sub potestate te-
nebrarum totum humanum genus captivum, justus
pariter sicut et injustus, nec suis virtutibus nec vir-
tutum operibus liberatum, nisi per ipsius potestatis
lucis pœnam et pugnam. Scio tamen et legi quid
orthodoxi nostri scripserint super his. Vera quidem
sed si plene de his Deus novit, ipsi viderint. Ego
quidem non arbitror sic, certissime tamen arbitrans
quod vere sed minime tamen, quod plene, quod per-
fecte disseruerint super his. Nec enim arbitror eos
comprehendisse, adeo occulta sunt hæc. Præsertim
cum nec in Veteris nec in Novi instrumenti cantico
horum plena causa audiat, tam Veteris quam
Novi Testamenti patribus conclamantibus universis
cum Magistro: *O altitudo divitiarum sapientiæ et
scientiæ Dei, quam incomprehensibilia sunt judicia
ejus et investigabiles viæ ejus. Quis enim cognovit
sensus Domini, aut quis consiliarius ejus fuit? (Rom.
xi.)* O si nobis desuper datum scire vehementem
illam Dei ad hominem secreti amoris vim. O si da-

tum intelligere quæ esset illa plus quam mors fortis dilectio, quæ sic vicit invincibilem etiam ipsum mortis victorem, quæ sic exinanivit Omnipotentem, temporavit æternitatem, infirmavit virtutem, ligavit insuperabilem, vulneravit impassibilem et demum occidit immortalem. O amor, amor, quam fortis es tu et quam vehemens etiam inter homines, non solum in Deo homine. Te dico vehementem et fortem, ubi vere tu et non nisi tu, procedens de corde puro et conscientia bona et fide non ficta. Sed amor hic talis solius Dei est et admodum paucorum hominum, et horum tamen non nisi a Deo; sed tanto quidem in Creatore, quam in creatura sincerior, purior et fortior amor hic, quo nihil potest illum amoris fontem turbare quia ipse est Deus; nisi quia ipsemet ex nimia amoris vehementia et ex superabundantia multa, tanquam ex superabundantia aliqua videtur semetipsum amoris fontem turbasse, amore sic ipsum compellente ut non solum vellet esse æternus Deus, sed et temporalis homo, homo cum hominibus propter hominem; tot infirma, tot probrosa, tot injurias, tot tentationes, tot pressuras, tot angustias, tot difficultates propter hominem sustinens et demum ipsam ignominiam crucis. Hæc in homine sibi unito prima et principalis unitas nostra propter hominem passa, ut ita hominem per varias poenarum suarum species, quas pro homine pertulit, ad sui dilectionem invitans, ad illam tertiam naturæ et gratiæ unitatem de qua principaliter intendimus et propter quam de duabus aliis interseruimus, post se trahendo revocaret.

TERTII MELI NOTULA 21.

TERTIUS MELUS FINITUR HIC DE UNITATE SOLIUS GRATIÆ, QUI ET DEINCEPS DE UNITATE NATURÆ ET GRATIÆ RESONABIT.

Restat igitur amodo, et propositum nostrum et promissum exigit sic, ut de illa unitate tertia ci-thara nostra Davidica resonet. Primo si quidem præcessit melus hic tertius de unitate solius naturæ. Secundo de unitate solius gratiæ. Tertio vero idem ipse melus erit deinceps de unitate naturæ et gratiæ. Hoc tamen hic nunc præmisso quod cum sermo de unitate solius naturæ præcessisset intra Sancta sanctorum quasi per rimam angustam et visu quasi disgregato propitiatorium super arcam vix discernere potui utpote obumbratum. Deinde cum sermo esset de unitate solius gratiæ intra eadem sancta, quasi per rimam paulominus angustam arcam sanctificationis modicum superficie tenuis sum intuitus. At vero nunc tertio cum sermo proponatur de unitate naturæ et gratiæ intra eadem Sancta sanctorum aliquantulum liberius video Cherubin hinc inde stantes circa propitiatorium qui sedato nunc schismate et pace reformata inter Deum et hominem jam concives nostri effecti et domestici liberorem nobis nunc quantum tamen licet, permittunt nos ad se habere accessum. Et hoc idem est quod etsi verbis aliis supra jam dixisse me memini cum primo de prima et principali omnipotenti et omnia continente unitate loquerer, et postea ad unitatem

A solius gratiæ quæ inter Deum et hominem, descendissem, me quasi de incomprehensibiliter immenso palatio ad sponsi et sponsæ transisse thalamum. Sed angustus adinodum thalamus hic utpote in quo solum Patris Verbum et sola et unica Verbi anima cum carne assumpta. Verum cum nunc tertio de tertia unitate naturæ et gratiæ deinceps tertius hic noster formandus et consummandus sit melus, ad ampliorem sponsi et sponsæ thalamum nobis nunc divertendum. In hoc enim sponsa jam plenæ pubertatis cum sponso est in amplexu, regina in vestitu suo deaurato, hominum et angelorum varietate circumdata. De hac itaque unitate naturæ et gratiæ amodo meli nostri sequentia formabuntur; ut ita, quemadmodum supra polliciti sumus, quæ unitatis species sit hæc quæ non est unitas solius naturæ nec unitas solius gratiæ, sed sicut conjunximus unitas naturæ et gratiæ, liquido manifestetur. Quod ex præmissis de facili etiam tardos comprehensuros non dubito. Siquidem, ut præostensum, prima et principalis illa unitas solius naturæ dignata est consors fieri naturæ nostræ. Et ita nos et illa unius sumus jam communis naturæ. Unde cum nos illi unimur, imaginis Filii Dei conformes effecti, quod solum per ipsius est gratiam, jam cui peris uniti eramus per naturam a nobis assumptam postea unimur per gratiam ab ea nobis collatam. Et ita erit, sicut nunc evidentissimum, hæc nostra tertia ad primam illam et principalem unitatem non solum unitas naturæ, sed et gratiæ. Et hæc est illa propter quam alias duas induximus et de qua principaliter proposuimus tertia unitatis species seu unitas tertia.

O quanta et quam palam omnibus et angelis et hominibus hominis hic sicut gratia et gloria manifestata! Qui profecto quondam tam miser, tam oppressus, adeo obfirmatus in schismate supercelestibus angelorum spiritibus unitur, solum per gratiam, sed ipsi angelorum, imo omnium Creatori spirituum, non solum nunc per gratiam, sed etiam unitur et per naturam. O felix schisma et votivum post quod ad tam gloriosam unitatem homo schismaticus revocari debuerat. O omnipotentis unitatis quanta cum discretione clementia et selitosi Luciferi quanta cum fatuitate malitia. Hoc quippe totum Domino sapienter disponente sic cessit homini ad insperatam gloriam, quod ille machinatus fuerat ad ruinam hominis irreparabilem. Et ita sicut solet mentita est iniquitas sibi, imo mentita est et Deo, mentita est et angelo, mentita est et homini, mentita est etiam et sibi ipsi, et quidem aperte sibi ipsi mentita Deo sapiente et forti et justo iniquitatis semper et malitiæ deprehendente laqueos, retiacula dissipante, eludente tendiculas, et machinamenta frustrante. Ita omnes iniquitatis et malitiæ cogitationes et astutias tam ebreo vertente in contrarium, ut merito propheta noster hoc ipsum crebro expertus dicat, quia mentita est iniquitas sibi. Quod quidem et nos in quotidianis operibus nostris quotidie cernimus, sed in hoc tam

singulariter glorioso et tam gloriose singulari et tam præclaro opere hoc evidentissimum. Primo quippe per iniquitatem a congregatione justorum, ab angelorum consortio, a triumphante Ecclesia propter schisma homine expulso, iustitia opus iniquitatis in contrarium convertente, ipso nunc eo amplius super universos angelorum ordines gloria et honore coronato. Deus enim noster et vere noster nusquam, sicut docet Magister, angelos sed semen Abraham quasi fugitivum, quia schismaticum apprehendit, et sicut supra satis ostendimus per solam et incomprehensibilem gratiam personaliter sibi univit. Verum sicut et ex prima solius naturæ, ita et ex hac secunda solius gratiæ processit hæc tertia unitas et naturæ et gratiæ, qua unitur Ecclesia Deo et per naturam, quam ab ea assumpsit et per gratiam quam ei superabunde donavit. Unde et sicut corporis ad caput, ita et corporis membra singula hæc eadem naturæ et gratiæ unitate uniantur inter se propter eandem, qua participant, conformitatem naturæ et communionem gratiæ. Hæc itaque tercia unitas naturæ et gratiæ unitas est totius universalis Ecclesiæ, cujus pars adhuc militat in terris, pars vero jam triumphat in cælis. Verumtamen hæc unitas naturæ et gratiæ, quam et militantis et triumphantis Ecclesiæ communem imo quasi unam et eandem dicimus in triumphante quidem, quo incomprehensibiliter major, eo melior et jucundior, quis beatior est. Hæc quippe militantis Ecclesiæ unitas sibi ipsi qualis et quanta ipsa eadem in triumphante Ecclesia est comparata, non jam unitas sed verius quam unitas, talis qualis potest appellari conjunctio, aut si unitas, dilacerata quidem unitas et convulsa. Ut sit hæc quasi peregrina quædam unitas et militaris, illa vero supercælestis Ecclesiæ verè civis et triumphalis.

TERTIUS, MELIUS DE UNITATE NATURÆ ET GRATIÆ NIC PLENE RESONAT, QUAM PRIMO BIPERTIT IN UNITATEM MILITAREM ET TRIUMPHALEM ET PRIUS DOCET DE MILITARI 22 NOTULA.

Est itaque jam quasi bipertita unitas hæc naturæ et gratiæ, cum amen non sit nisi velut una Ecclesiæ militantis et triumphantis. Sicut una charitas et una unitas, tamen quasi bipertita hæc, eo quod in triumpho plus quam in militia unitas sicut et charitas incomparabiliter major, melior et jucundior sit. Militans enim Ecclesia hæc in hac sua militia, ubi sic abundat malitia inter tot labores et sudores, inter tam diversa et adversa pericula, cui sicut pœna, sic ei quotidie est et pugna ex corde, ex carne, ex mundo, ex inimico, inter impedimenta, inquam, tot, inter tentationes tam varias, inter tot sibi carnis ignitas rebelliones, inter tot sicut carnis et mundi terrena desideria, quomodo potest esse una sic divisa, sic distracta, sic dilacerata, sic convulsa? Et ut de propheta addam, pauperula tempestate convulsa absque consolatione, quomodo potest stare in unitate? Et tamen eo quod ad unitatem tendat in patria talem qualem unitatem tenet in via, alioquin, sicut ipsa novit, ad illam

A patriæ unitatem minime perventura. Cuius in hoc militiae suæ agone talis et tanta est ejus unitas, qualis et quanta est ejus charitas, vulnerata quidem charitas et vulnerata et quasi diruta unitas; semiplena charitas, semiplena et unitas, æquis passibus ambulans. Et si tertium addam adhuc, non excedam; nam sicut quanta charitas, tanta unitas, tanta et pax. Et vicissim convertitur inter tria hæc. Tria æqualia hæc, tria similia et cœva tria. Et hæc quidem militaris unitas etsi triumphali unitati comparata, in præsentii militia velut quædam scissura sit, miræ tamen fortitudinis est et virtutis, quæ universum Ecclesiarum orbem per tam varios gradus et ordines tenet et continet. De qua Propheta noster: *Ponite, inquit, corda vestra in virtute ejus* (Psalm. XLVII), in unitate nostra scilicet quæ civitatis Dei de qua ibi propheta loquitur: Virtus est quam nihil vincit, nemo dissolvit, tunica enim est Domini inconsutilis. Quantum enim charitas, tantum potest ex charitate et cum charitate hæc charitatis unitas. Amicissimæ quippe inter se sunt hæc duæ, unitas et charitas, imo et tria hæc, pax, unitas, charitas. Quam felix, quam bona, quam jucunda in via, quasi peregrinans adhuc et subsolaris trinitas, trinitas hæc charitatis, unitatis et pacis, quorum singula sunt in singulis, unum in omnibus et unum omnia. Quam desiderabilis, quam utilis, quam necessaria Trinitas hæc subsolaris in via, ad viam, ad illam supra solarem viam rectissima Trinitatem tendens, quæ est in patria, ubi est æterna unitas, æterna pax et charitas, sicut omnipotens et cœterna, Pater unitas, pax Filius, charitas vero Spiritus sanctus. Et hæc sunt tria illa, quæ Magister discipulis orat et exoptat: *Gratin, inquit, Domini nostri Jesu Christi et charitas Dei et communicatio sancti Spiritus sit semper cum omnibus nobis* (II Cor. XII). Gratia ista Jesu Christi, quam primo ponit, pax est quæ præexcellenter gratia dicitur. Omnis enim intentionis et operis finis pax est. Et quia ipse proprie, sicut ipse Magister docet, pax nostra est qui fecit utraque unum. Et charitas Dei, charitas videlicet, qua diligamus Deum et quæ non nisi a Deo. Et communicatio sancti Spiritus, id est communio quam facit in nobis charitas sive amor qui proprie Spiritus sanctus est. Hæc communio seu communicatio unitas est, quam sola communiter habita charitas facit, unde et Magister vigilanter dicit: *Communicatio sancti Spiritus*. Alioquin nisi communiter habeatur charitas, ut nos diligamus ad invicem, non erit Spiritus sancti communicatio vel communio, sed potius quasi singularitas vel solitudo, isto diligente et non illo. Et ita in isto qui diligit et in illo qui non diligit, jam non erit opus charitatis unitas, sed erit singularis et solitaria charitas. Propter quod Magister inter fratres desiderans unitatem orat eis et optat Spiritus sancti, id est charitas communionem. Ita verbis suis deprecatoriis tria nostra, pacem videlicet, charitatem et unitatem, comprehendens: ecce militaris nostra unitas comites secum habens charitatem et pacem.

Quæ etsi suavis, bona et jucunda, semper tamen A dum hic militat in sollicitudine est et pavore : juxta Magistrum de hac secundum animalis corporis similitudinem sic loquentem : Si quid, inquit, patitur unum membrum compatiuntur omnia membra ; sive gloriatur unum membrum congratulentur omnia membra (I Cor. xii). Ita et in spiritualis corporis Christi membris hoc quotidie experientissimum. Unde et Magister ipse hujus corporis membrum tam robustum, tam forte : Quis, inquit, infirmatur et ego non infirmor ? Quis scandalizatur et ego non uror ? (II Cor. xi.) Eo quippe spiritualis hujus corporis membrum compatiens magis et sollicitum, quo ipsum fortius et robustius fuerit. Alioquin, ut idem Magister docet, schisma erit in corpore, si non id ipsum pro invicem sollicita sint membra (I Cor. xii). B Unde et jam non erit unitas membrorum in corpore, nisi, quandiu ipsa hic militaverit, in sollicitudine sit et pavore. Et quoniam propter tertiam hanc naturæ et gratiæ unitatem de charitate et pace interseruimus, ut secundum charitatis mensuram et pacis et unitatis, mensura in hac subsolari Ecclesia monstraretur, amodo omissis aliis solum de hac eadem unitate plenius prosequendum. Et postquam jam ex parte docuimus, qualis et quanta si hæc unitas naturæ et gratiæ in militante, superest qualis ipsa et quanta sit in triumphante Ecclesia demonstrare. Et hoc magis quam per experientiam nostram secundum Scripturarum testimonia. Hujus quippe unitatis bonum et jucundum, imo et beatum cunctum sensum nostrum excedit. De qua tamen prout datum de super dicendum nunc, cum ista sit illa triumphalis Ecclesiæ unitas propter quam universa præmissa inducta sunt. In hæc quippe triumphali unitate miles triumphator ad ejus laudem et gloriam, omni jam ex parte cithara nostra resonat cum imperatore suo triumphante est. Quorum quemadmodum præstensa est, et in pugna et in palma in via conformitas sic secundum propositum nostrum et promissum, tandem debet vel nunc eorandem in patria monstrari unitas.

ITEM MILITAREM UNITATEM BIPERTIT IN COMMUNEM OMNIUM JUSTORUM ET IN PRIVATAM PERFECTORUM ET PRIMO DOCEAT DE COMMUNI. 23 NOTULA.

Verumtamen antequam procedamus, hoc minime C tacendum quia hæc militiæ nostræ militaris unitas inter nos hic quasi bipertita est. Est enim una communiter omnium imperatoris militum in præsentis vitæ agone in fide, spe et charitate solidata. De qua Magister : Obsecro, inquit, vos ego vinctus in Domino, ut digne ambuletis vocatione qua vocati estis, cum omni humilitate et mansuetudine, cum patientia supportantes invicem in charitate, solliciti servare unitatem spiritus in vinculo pacis ; unum corpus et unus Spiritus, sicut vocati estis in una spe vocationis vestræ (Ephes. iv). Et Magister magistrorum : Ubi, inquit, duo vel tres congregati fuerint in nomine meo, ibi sum in medio eorum (Matth. xviii, 20). Et hæc quidem unitas omnium fidelium est communis.

DE PRIVATA UNITATE PERFECTORUM MILITARI, etc.

Est autem alia unitas militaris, imo verius eadem sed quasi altera, eo magis decora et perfectior, quo triumphali unitati et supercœlesti, de qua in sequentibus dicturi principaliter intendimus, est conformior. De qua Propheta noster : Ecce quam bonum et quam jucundum habitare, fratres, in unum (Psalm. cxxxii). Sunt enim quidam imperatores militum, qui omnia sua vendunt, omnia distribuunt, omnia deserunt et omni visibilibus proprietati renuntiant, ita spoliantes se ut nudi vitæ hujus viam eo tutius, quo nihil secum portantes currant et eo expeditius quo sola Dei armatura induti certent. Inter milites hos omni proprietate sublata tanta unitas, quod nihil meum vel tuum, et tamen totum meum et totum tuum. B Vita quippe militum hæc in via, imago est et exemplar supercœlestis vitæ triumphatorum in patria. Et unitas hæc militaris unitatis illius triumphalis, prout in via potest, similitudo est effigiatim expressa. Et hæc certe unitatis apostolicæ forma est et illorum primitivorum militum, de quibus scriptum, quia multitudinis credentium erat cor unum et anima una, nec quisquam eorum quæ possidebat suum aliquid esse dicebat, sed erant illis omnia communia. Nec tamen, ut jam diximus, et præsentis Ecclesiæ nostræ militia inter imperatorem et milites duas facimus unitates, sed unam, tamen quasi bipertitam hanc, utpote ipsa a quibusdam illustrium militum eo amplius decorata et illustrata, quo isti in imperatoris acie tanquam cæteris nobiliores et plus insignes et præ cæteris, sicut magnifici et munifici, nihil dignantur habere proprium, sed commune totum.

Taceo in præsentiarum de illa unitate, quæ inter sæculi homines est. Hæc quippe non semper virtutes comites habet, sed velut secularis quædam et terrena unitas, qua sapientes sæculi hujus domibus suis bene præesse norunt, habentes domum disciplinam, quietam familiam, servos dominum suum sicut verentes et reverentes, ad pugnam vero paratos vel ad jurgium, aut plagas cedunt aut si incorrigibiles tanquam animalia inquieta in junctura a carro, ita et istos a domo sua ejiciunt, ne domus suæ unitatis bonum et jucundum perturbant. Adeo unitas semper et ubique necessaria, sive cum virtutibus sit in Deo et tunc fructuosa et optima, sive etiam absque virtutibus cum quietis moribus in sæculo et tunc etiam sicut utilis et jucunda. Et hæc sæculi unitas breviter tacta sic solum ut reminisceretur, absque unitate sicut nec in Deo nec in sæculo bonum quid vel jucundum.

In illa vero illustrium militum unitate, qui non dignantur habere proprium, sed sunt omnia communia, libenter et devote immorarer de ea, in præsentem meli notula plurima in cithara nostra resonaturus adhuc, nisi quia hæc ipsa eadem naturæ et gratiæ unitas quantumcunque in præsentem militia decora sit, jucunda et perfecta in patria tamen ipsa eadem incomparabiliter major, melior, et jucundior, et perfectior est. Unde et ad hanc ejus perfectionem

et plenitudinem tantam ipsamet festinare me compellit. Hanc quippe peregrinationis nostrae unitatem semipleam supra jam ostendisse me memini. Unde et quia ipsa hic adeo imperfecta est, de ipsa hic nihil plene docebitur nisi ad alia transeat. Cum etiam solum et totum ad hoc principalis nostra intentio fuerit, propter quod et praemissa quasi incidenter inducta sunt, ut de hujus tertiae unitatis plenitudine, prout aeterna et principalis unitas, ejus ista est opus nos edocere dignaretur aliquid a nobis diceretur. Et quidem, nisi propter multa interposita propositum et promissum nostrum forte exciderit, de hac tertia triumphali unitate naturae et gratiae nostra certe intentio principalis. Si enim, ut supra satis ostendimus et sic argumentando praemisimus, inter imperatorem et militem in via et vita haec tam varia, tam diversa, tam multiplex et invisibili pugna et invisibili palma, tanta fuit conformitas in invisibili palma, quanta erit inter ipsos in patria unitas. Unde et de hac militantis ad triumphantis Ecclesiae unitatem, quasi de exteriori sanctuario ad interius, et etiam quasi ad interiorem sponsi et sponsae thalamum, in quo post pœnas et pugnas, post sudores et labores, Imperator et miles conquiescunt, prout peregrinis et advenis permissum fuerit, amodo nobis appropinquandum.

Verum antequam versus thalamum moveamus pedem, ne ad thalamum inverecunde pulsantes vel temere turpem patiamur repulsam, sponsi et sponsae cubiculariam totius amoris praecursoriam, tanquam concionatricem omnium consciam, et nobis a primis annis aliquantulum familiarem interpellemus, prophetiam nominatam quae viae nostrae versus thalamum dux nostra et secreta praebula sit. Ni fallor, ipsa utpote ab annis familiaris mea et amica, etsi liberum non possit vel audeat concedere introitum, tamen prope post se ducendo contiguum quoad licerit, indulgebit accessum.

DE ILLA TRIUMPHALI UNITATE NATURAE ET GRATIAE
DE QUAE PRINCIPALITER INTENDIT PLENE AGIT TERTIO
MELO DE IPSA JAM CLARE ET APERTE RESONANTE.
24 NOTULA.

Et ut de Scripturis prophetiis unam eligam sponsi et sponsae familiariorem cubiculariam, sicut totius amoris concionatricem et consciam, haec est illa cubicularia per quam sponsus, imo propter unitatem tantam nescio sive sponsus sive sponsa sic loquitur. Sicut sponso alligavit mihi mitram et sicut sponsam ornavit me ornamentis. Ecce quia splendor ille gloriae et figura paterne substantiae et vitae aeternae candor. Haeres universorum qui sponsus est ob praecipui et incomprehensibilis amoris unitatem se sponsum et etiam se sponsam nominat. Cui etiam in tantae unitatis et privilegiati amoris signum sponsae suae a nomine suo impertit nomen, a Christo vocata Christiana. Et hoc non solum in via, sed et in patria in illa mille millium angelorum multitudine non quidem angelica sed Christiana, hoc tanquam nomine proprio agnita et

A distincta ab angelis summo regis filio sponso suo unita sic, sicut in una carne et in uno corde, et sicut in uno nomine et in una voce; omnibus sanctorum spiritibus tunc quasi uno sancto Spiritu; omnibus quippe ad illum vere sicut ineffabiliter et inexcogitabiliter grandem spiritum per incomprehensibiliter gratiam, jucundam et indeficientem naturae et gratiae unitatem tunc unitis. Inde jam procul semota omni loci distantia, omni intervallo temporis, omni objectu corporis, omni etiam schismate cogitationis vel operis. Prima et principali unitate simile per hanc naturae et gratiae unitatem, tunc inter caput et corpus, inter sponsum et sponsam, Christum et Ecclesiam, operante per gratiam, quod ipsa ab aeterno est inter Patrem et Filium et

B Spiritum sanctum per naturam; ut sint quasi unum tunc caput et corpus, sponsa et sponsus, Ecclesia et Christus. Huic etiam naturae et gratiae unitati prima illa et principalis adeo familiaris, amica, et adeo eam desiderans, quod ut consociaret hanc sibi, semetipsam exinanivit per illam secundam, quam praestendimus, solius gratiae istam in semetipsa operans et per se ipsam. Unde, ni fallor, forte cogitabit jam quis istam tertiam naturae et gratiae inter sponsum et sponsam unitatem aut digniorem aut saltem condignam secundae illi quae est solius gratiae qua Verbum caro factum est, Deus in homine, et homo Deus. Cogitabit, inquam, sic quandoquidem illa propter istam: illa videlicet quae est solius gratiae propter istam quae gratiae est et naturae. Verum quis hoc audeat diffinire, quisve discutere, quis audeat praeferre aut etiam coequare sponsi et sponsae unitatem ipsius Verbi Altissimi unientis et unitae sibi carnis unitati? Aut e diverso, si non praeferre, quis postponere audeat? Quandoquidem illud, Verbi et carnis propter istam sponsi et sponsae unitatem: et etiam cum hoc constet, quod mystica imperatoris caro et invisibilis quae est fidelium unitas visibili illa Christi carne gravi et corpulenta, quam de Virgine traxit multo sit dignior et multo charior ipsi imperatori. Et inter causas illas haec ut videtur potissimarum una, quia propter hanc carnem suam mysticam et invisibilem visibilem illam assumpsit et univit sibi. Et propter hanc illam probris, contumeliis, flagellis, sputis et colaphis, et multiplici miseriae et ignominiae exposuit, per totos triginta tres annos hanc invisibilem et propter hanc in carne sua visibili operans et laborans. Et haec quidem et similia his ad praefendam aut quia praeferre forte nemo qui audeat, saltem ad coequandam unitatem unitati induci possunt.

Verum nemo nostrum ad hunc sponsi et sponsae thalamum appropinquans, ubi sponsus in lecto est, et sponsa in tanto unitatis amplexu; nemo, inquam, nostrum clamat, nemo obstrepet, nemo procaciter pulset. Amica illa nostra et familiaris praenominata sponsi et sponsae cubicularia viae nostrae versus thalamum huc usque dux nostra et praebula hic stare jubet. Illic quiescere nobis insusurrat: *Secretum*,

inquit, meum mihi, secretum meum mihi (Isa. xxiv). Et illud etiam quasi comminando instillat: *Qui dat*, inquit, *secretorum scrutatores, quasi non sint, et iudices terræ velut innu fecit* (Isa. xl). Unde et hoc bonum et decet sic, ut quisque nostrum versus thalamum tendens linguam suam reprimat, verbis parcat, et solum intra se cogitet quid voluerit, et qualiter ad præmissa moveatur: utinam juxta quod principalis unitas utriusque amica unitatis sibi revelare digna fuerit. Unum tamen est quod quia video audeo quod inter verbum uniens et unitam sibi carnem, cum sit quædam privilegiata nova inaudita et singularis unitas, videri tamen potest quod etsi illa sui singularitate sit admirabilior, tertia tamen hæc pro sui communione sit fructuosior, qua universa capitis membra capiti uniuntur, ut per eam sit Christus integer caput cum membris. Sed quid sic distinguo inter duas unitates has, illam quasi prædicans admirabiliorem, sed istam fructuosiorē videri posse. Nisi amicam illam meam ego versus sponsi et sponsæ thalamum tendens viæ ducem præhaberem et præambulam per facile errare posse in invio et non in via. Prior quippe illa Verbi et carnis unitas solius gratiæ revera sicut admirabilior, sic etiam si quis velit attendere et fructuosior est. Totius quippe istius tertiæ unitatis nostræ fructus per illam est et ex illa. Verum et ut hic ad superiora respondeam, quibus videri poteram, istam unitatem naturæ et gratiæ illi secundæ solius gratiæ unitati præferre velle aut saltem coæquare id, sicut nunc breviter dico et absolute, quia etsi secunda illa Verbi et carnis unitas propter hanc tertiam sponsi et sponsæ unitatem sit facta, multo tamen sicut mihi visum dignior illa secunda, quam hæc tertia, quia sic facta est illa secunda propter hanc tertiam, ut et hæc tertia facta sit per secundum. Et ita secunda illa et causa et operatrix est istius tertiæ imo cooperatrix. Prima, siquidem et principalis unitas operata est secundam propter tertiam, et postea eadem prima et principalis unitas operata est tertiam per secundam. De mystica tamen Christi carne et illa quidem quam traxit de Virgine, de qua tam hac quam illa supra tetigimus secus. Longe quippe alia ratio hic aliam reformat censuram. Sed de hoc alias. Unde, ut ad proxima redeam, etsi unitatem hanc nostram tertiam illi unitati solius gratiæ similiter nostræ præferre aut etiam coæquare, non audeam tamen pro tertiæ hujus unitatis nostræ dignitate cui etsi in mortalis vitæ hujus via sic multipliciter nunc distractus, dilaceratus sim, et convulsus, saltem per mortem per incinerationem, et per ignem spero me adjungendum adhuc; pro hujus, inquam, tertiæ nostræ unitatis dignitate unum audeo et allegabo nunc unum. Nam id profecto verum et nemo dubitet, hoc quippe jam ostendetur, hujus tertiæ unitatis nostræ secunda illa Verbi et carnis unitas præclarum gloriosum et exquisitissimum exemplar est. Unde et qualis nunc est inter Verbum et carnem, talem in regno illo unitatis et pacis inter sponsum et sponsam unitatem expectamus. Hoc significante nobis Spiritu sancto per Ver-

bum Patris sic sibi uniens, hominem consimilem fieri posse, et etiam nos sperare debere unitatem inter dilectum et dilectam Christum dico et Ecclesiam. Unde et quemadmodum pluries cum corde meo meditor, qui ab æterno omnia præcivit, talem hominem condidit cujus natura ut uniretur Divinitati congrueret, et quam Divinitas ipsa non delignaretur nec abhorreret, sed potius quasi affectaret ad unendum sibi. Quod tam dignum, tam inauditum naturæ humanæ privilegium nec naturæ angelicæ nec alii omnino naturæ arbitror in ipsa sui creatione insertum, ut Divinitas affectaret naturæ alterius præterquam solius hominis unire sibi naturam. Utrum etiam aliam sicut nec univit an etiam unire sibi posset sicut nec asserere nec negare nunc præsumo. Unde et omittentes nunc hoc ad gloriosum illud et expressum unitatis nostræ exemplar recurramus. Talem etenim speramus nobis inter sponsum et sponsam naturæ nostræ et gratiæ unitatem futuram, qualem jam videmus præcessisse solius gratiæ unitatem inter Deum solum et solum et unum et unicum hominem Christum Jesum. Talem dico nec tamen omnino talem, sed expressissime quidem talem. Nam quis credit fidei nostræ? Quis nostræ tam novæ tam inaudite mutationi? Sed quid dico, mutationi: imo transmutationi, imo quid etiam hic de mutatione seu transmutatione vel fiat mentio. Transsubstantiatio videtur potius hic quam mutatio ulla vel transmutatio, homine tunc quasi transsubstantiatio in Deum, et hominis natura quasi in unam deitatis naturam. Primis etiam animi motibus in hac velut quadam transsubstantiatione absorptis, beata tunc anima præ tanta gratia et gloria, per amoris spiritum vehementem velut in sempiternam transsubstantiata ardorem. Ardorem nomino, quia amica mea et familiaris viæ meæ versus thalamum dux et præambula inter viandum suggessit mihi nunc sic. Quæ de thalamo prælocuta hoc ipsum ardoris nomen quodam loco posuerat querens quis dignus foret habitare in thalamo hoc. *Quis*, inquit, *poterit habitare ex vobis cum igne devorante? quis habitabit ex vobis cum ardoribus sempiternis?* (Isa. xxxiii.). Et responsum mox subjicit: *Qui ambulat*, inquit, *in justitiis et loquitur veritatem. Qui projicit avaritiam ex calumnia et excutit manus suas* ab omni munere (ibid.), ecce quia homo justus cum Deo, homo cum igne devorante, homo cum sempiterno ardore, juxta quod et alibi legitur quod *Deus noster ignis consumens est* (Deut. iv). Sed ignis quidem hic Deus est consumens in via, qui idem ipse est consummans in patria; in via quippe hic ignis Deus noster suos multipliciter probat et examinat, quos ipse in patria vane quidem multisque modis glorificat et illuminat. Deus igitur noster; in via est ignis consumens, suos sic probans et examinans ut vetustæ rubiginis, nec aliquid in iis possit deprehendi vestigium et demum sic transferantur ad regnum, quemadmodum oleo purissime eliquato nihil amuræ residet et ita mittitur in cellarium, et in argento septuplum purgato nihil remanet scorie et sic

transfertur in thesaurum, et similiter grano pure
 eventitato avolant palæ, et sic reponitur in grana-
 rium; et hæc quidem et alia ad id quod proposui-
 mus exempla juvare quidem possunt; sed vultum
 sufficit: posset aliquid argentum quantumcunque
 purgatum iterum corrumpi per scoriæ, sicut et
 oleum purissime eliquatum per amurcam. Verum ut
 semel corruptibile hoc incorruptionem et mortale
 hoc immortalitatem induerit, minime de cætero po-
 terit mori deinceps aut corrumpi. Unde et ad plene
 ostendendum hoc creatum sub sole exemplum, etsi
 juvat, nec tamen sufficit, solum illud prænominatum
 suprasolare præclarum gloriosum et incorruptum
 ad hanc, tertiam sponsi et sponse unitatem decla-
 randam, Dei videlicet assumptis et humanitatis
 assumptæ unitatis exemplar valet et sufficit, et
 etiam sufficiente sufficientius est: homo quippe ille
 assumptus etiam nostro mortali nostra corruptibili
 pelle adhuc in via circumdatus, inter tot viæ et vitæ
 hujus vana et fallacia, quod quidem sicut dictum
 mirum et grande fidei virtutis meritum est, nec in
 ulla vel pertranseunte vani alicujus vel otiosi cogi-
 tatione aut peccavit aut etiam peccare potuit, et
 hoc profecto magnum fidei meritum nobis ita cre-
 dere, talem videlicet vestræ naturæ hominem, nec
 etiam in via peccare posse, cum sicut in nobismet
 experimur impossibile sit nos similiter homines vix
 per momentum posse sine peccato pertransire: ad
 ergo hujus exemplaris formam, quid mirum, etsi
 mortis jam absorpta in victoria, et nobis jam novo
 immortalis et incorruptibilis schemate indutis in pa-
 tria et ab omni vanitate liberatis, et solo et puro
 post incinerationem et ignem veritatis fonte ine-
 briatis, quid, inquam, mirum, si de cætero, sicut
 nec peccabimus nec etiam peccare possimus, quid igitur
 mirum et tamen hoc ipsum sicut miraculosum et
 mirum, miraculosa quippe Dei potentia hæc in exem-
 plo; sed exemplaris forma multo mirabilior, adeo qui-
 dem mirabilior ut ad illius collationem nec hoc videatur
 mirabile. Unde et exemplaris forma exempli sicut
 verissima et plenissima certitudo est. Verum tamen hoc
 in exemplo magis quam in exemplari mirabilis quod
 etsi anima tot concupiscentias, tot tentationes, tot
 illecebras, tot otiosa, tot vana sit hic experta, quin
 potius totis carnis suæ diebus ne dicam experta,
 sed aurita per hæc, ibi tamen nec in his, quemad-
 modum non peccabit, nec peccare volet, nec etiam
 peccare valebit, nam juxta eruditionem amice et
 familiaris hujus ducis nostræ interiorum thalami
 consciæ creato cælo novo et terra nova, jam non
 erunt in memoria priora, nec ascendent super cor
 sponso super sponsam suam in æternum gaudente
 et spiritus quidem hominis sic stabit in æternum,
 qui velit nolit homo sine peccato vix hic stare
 potest vel per momentum. Unde si quis operose
 inspicat, revera mox intelliget per gratiam naturæ
 et gratiæ unitatem hominis velut quamdam tran-
 substantiationem magis quam transfigurationem vel
 transmutationem in patria tanquam homine in ali-
 quam Deitatis naturam tunc converso, ita ut sermo

A ille tunc quasi primo impleatur, qui per Prophetam
 prædictus est: *Ego dixi: Dii estis et filii Excelsi
 omnes (Psal. lxxx).*

Et quidem Magister, qui usque ad tertium cælum
 raptus, cui tanquam cælestis sponsi et sponse pa-
 ranympho multa interiorum thalami ostensa sunt,
 qui etiam ad interiora thalami admissus audivit ar-
 cana verba, quæ non licet homini loqui: ipse, in-
 quam, per plura Evangelii sui loca de hac nostra
 naturæ et gratiæ unitate non tacuit. Verum inter
 cætera hoc est unum quod discerno, quod præeligo,
 utpote quod magis ad propositum nostrum est, cum
 autem, inquit, *subjecta illi fuerint omnia, tunc ipse
 Filius subjectus erit illi qui sibi subjecit omnia, ut sit
 Deus omnia in omnibus (I Cor. xv)*, de hac quidem
 subiectione dubius et hæsitans pro sensus mei tar-
 ditate invita solebam cogitare, pauca dicere, nihil
 scribere et modo præsertim nihil de ea scribendum
 vel dicendum, quia non de subiectione sed de uni-
 tate nunc agitur. Unde et Magistri verbis versiculi
 ultimis quæ ad propositum sunt hæreo, *ut sit, inquit,
 Deus omnia in omnibus*; hæreo quidem hic, quia non
 hæsito, hanc, de qua nunc totus sermo est, nostram
 tertiam naturæ et gratiæ unitatem paucis his a Ma-
 gistro commendatam sic: *Deus, inquit, omnia in
 omnibus*, itaque secundum Magistrum Deus omnia
 et in omnibus Deus. Notemus Magistri verbum: Qui
 ad thalami interiora admissus audivit etiam arcane,
 quæ non licet homini loqui (*II Cor. xii*). Unde et
 illud nunc quod nobis hominibus loqui licuit, tha-
 lami verbum notandum est, quod et eo notandum
 est attentius, quo scimus ipsum quasi thalami pa-
 ranymphum, sic hoc locutum pensemus, inquam,
 et notemus verbum, ut ita unitatis nostræ vel per
 ænigma aliquod magis pateat vinculum, et tamen
 sicut indissolubile unitatis hujus vinculum reputo
 et hoc tarditati meæ interpretabile verbum, nisi
 forte si tamen et hoc desuper datum sit, speculariter
 et ænigmaticè videatur et hoc et illud: *Deus, in-
 quit, omnia in omnibus*. Igitur per istam vestram
 ineffabiliter inventam unitatem secundum Magistri
 doctrinam, omnia tunc quasi una natura quasi unus
 spiritus, unus Deus tunc primo quasi integro, eum
 membra, quæ modo per viam quasi frustatim dis-
 persa sunt, demum in patria capiti unita fuerint,
 hæc omnibus nunc in peregrinatione hac ad hanc
 patriæ unitatem tendentibus, in unitate tunc imo
 quasi quædam simplex vera et prima et principalis
 unitas omnia tunc: cum tamen non dicat Magister
 ut sit Deus quasi omnia sed absque quasi inquit
 Deus omnia: videtur docere Magister qui usque ad
 tertium cælum raptus thalami secretiora noverat;
 videtur, inquam, docere ex increato et creatis spiri-
 tibus qui tamen ab æterno in Dei æterna mente
 fuerunt æterna quamdam plenam perfectam et con-
 summatam unitatem omnibus tunc quasi transub-
 stantiatibus beatorum spiritibus et duabus unitatibus
 nostris tunc ad unam, secunda videlicet et tertia ad
 primam illam et principalem redactis, propter quod
 forte sponus: *Nemo, inquit, ascendit in cælum*

nisi qui descendit de caelo, Filius hominis qui est in caelo (Joan. III); et item: Ego primus et ego novissimus, Alpha tunc ad Omēga reverso, et Omēga ad Alpha, omnibus videlicet tunc ut jam dicere cœpimus, quæ primam nunc tenent et ad ipsam tendunt redactis unitatem. Sed qualiter redactis audiamus; nec enim arbitror, nec credendum, absit hoc, quod secundum essentiam sed secundum incomprehensibilem nobis et ineffabilem emphasim, ut quemadmodum est trium personarum Trinitas et tamen earundem una prima et principalis unitas, ita sit et trium unitatum nostrarum trinitas et tamen earundem sit una prima et principalis unitas; non audeo tamen dicere quod illarum sit unitas secundum essentiam sed secundum privilegiatam quādam emphasim nobis incomprehensivam, cum tamen non emphatice, sed potius substantive videatur Magister docere Deum omnia quasi tunc in Deo omnia sint pertinentiam in patria quæ nunc in ipso per coherentiam sunt in via, tanquam inentia sit privilegium patriæ quo civēs feliciter gaudeant, sicut adhærentia est bonum viæ quo peregrini validius ambulent ne in via deficiant, juxta quod ille Propheta noster: Sed peregrinus adhuc mihi inquit adhærere Deo bonum est (Psalm. LXXII), credo tamen ad ineffabilem et nobis incomprehensibilem sponsi et sponsæ unitatem insumendam Magistrum locutum sic ut sit inquit Deus omnia. Quasi profecto unitatem tantam, tam gloriosam, tam præcellentem, pariter cum Magistro omnis Scriptura conclamat, ita ut nec velit ipsa vel possit aut intellecta legi vel lecta intelligi, nisi legatur in ea et intelligatur unitas hæc; sic sponsus et sponsa sicut nunc in carne una, ita etiam dum adhuc in campo nebula in lecto, similiter etiam unum sunt et in voce una, adeo ut per crebra Scripturæ loca sæpe et sæpius ambiguum sit an hic loquatur an hæc. Hoc etiam in presenti per sacra eloquia sua significante nobis Spiritu sancto tantæ et tam excellentis ad quam nunc tendimus inter sponsum et sponsam in futuri amicæ unitatis hujus privilegium, nec necesse nunc ad istam inter sponsum et sponsam probandum in eadem voce unitatem de Scriptura exempla subdere, utpote quibus tam ingens tam numerosa Scripturarum silva copiose referta est.

Ni fallor, jam ex parte videmus inter sponsum et sponsam in thalamo tantam et tam amicam et tam incomprehensibilem unitatem, quam præfata viæ nostræ dux et præambula inter viandum primo nobis suggessit, et Magister postea quantum placuit et forte quantum licuit sibi eo certius et fidelius, quo ipse in raptu suo empirico interiora thalami ingressus fuerat, etsi more suo paucis multa tamen patefecit ex quibus non solum hic noster melius formari sed et multa et præclara volumina, tanquam ex præclara et quasi gravida et gravi materia, subtiliter et eleganter possent confici.

Et quoniam tertius hic unitatis imo unitatum melius, qui nunc post alias ultimo de tertia unitate nostra formatur, finem desiderat, et quia etiam dum

A qualibuscumque digitis in acutioribus et subtilioribus chordis eam aliquandiu pulsans citharam defatigat, ut melius citius finiam et concordius de præmissis hoc breviter repetam, ut quemadmodum est trium personarum Trinitas, et tamen unitas sic est et suo modo nostrarum tamen unitatum trinitas et tamen trium prima et principalis unitas, nec enim aliud est, ut nos supra docuisse meminimus, trinitas quam trium unitas est itaque trium unitatum trinitas, quia una est trium unitas prima et principalis. Quin potius istæ unitates tres sunt una hæc unitas prima et principalis, quæ in assumpto homine operata est per solam gratiam. Unde et dicta est unitas solius gratiæ. In unione vero sponsi et sponsæ operatur per naturam et gratiam. Unde et dicitur hæc eadem unitas naturæ et gratiæ, et hoc est quod Magister docet, ut sic, inquit Deus, omnia, quia si Deus omnia jam nihil erit quod non sit Deus et sic dux nostræ unitates: quia una prima et principalis unitas et sic Deus. Videamus et si non sic in homine siquidem assumpto Deus, quia hic etiam Deus homo et homo Deus, et hæc est secunda unitas solius gratiæ et hæc Deus est sic per solam gratiam vivens. Similiter et in corpore capiti unito Deus quia etiam hic integer Christus caput cum corpore plenus et perfectus Deus, et hæc est nostra terna unitas naturæ et gratiæ, et hæc quidem similiter si quis attendat, prima est et principalis unitas, Deus sic per naturam et gratiam unius; nec enim quod unitur sed solum id quod vere et proprie unit hæc unitas est, est tamen in se sicut in priori unitate solius gratiæ, ita et in hac unitate naturæ et gratiæ quædam creata unitas seu verius unio. Verum sive ibi unitas seu unio creata sit modo mihi et illi nihil. Sed hoc nunc secundum Scripturas sicut fideliter loquor et fidenter, quod in fine omnium jam consummato iudicio Christus integer caput cum corpore plenus erit Deus et perfectus, juxta ipsum testem in caelo fidelem luna tunc in æternum perfecta; nec enim erit qui diffiteatur caput cum corpore esse Deum, et etiam plenum tunc et perfectum Deum, nisi forte velit asserere tanquam somnians quod solum caput sit Deus, et non admitteus quod caput cum corpore Christus videlicet integer sit verus et perfectus Deus; sed sicut non hæsitandum nec morandum in his, non quidem quod capitis corpus sit Deus, sed caput cum corpore Christus videlicet integer plenus sit et non nisi verus et perfectus Deus tunc quasi per unitatem victoriosam absorpta cum schismate omni etiam diversitate et differentia, quæ schismatis semper sequelæ sunt, sic et numero juxta quod ipsum corporis hujus caput: Nemo, inquit, ascendit in celum, nisi qui descendit de caelo Filius hominis qui in caelo est (Joan. III). Unde et quemadmodum adoratur nunc a nobis unus humanatus Deus, quod facit secunda unitas solius gratiæ similiter cum mundi hujus figura præterit, peracto iudicio sine fine laudabitur idem ipse, gloriosa Ecclesia sua quam sine macula et ruga sibi exhibuit, quasi vestitu suo destinato indutus Deus, quod facit hæc tertia nostra unitas

naturæ et gratiæ Domino nostro sicut nunc humanato, ita et tunc non solum humanato, sed et gloriose induto, quando astabit regina a dextris ejus et ipse tunc hominum et angelorum varietate circumdabitur, unitate tamen hac fortius et firmitus unitata hominem Deo quasi Deo angelus uniatur aut nunc aut tunc, inter Deum quippe et angelum unitas est gratiæ duntaxat et non naturæ, sed inter Deum et hominem et naturæ et gratiæ eo certe, ni fallor, dulcior, gratior et firmitus inter Deum et hominem in patria, quod in via hac per tot labores et dolores, per tentationes tam varias, per tot et tantas tribulationes et agones, et demum per mortem et incarcerationem difficillime ad ipsum sic pervenerit.

INTERSERIT HIC PRIMO DE QUODAM SPONSI NOMINE, QUOD VALET AD UNITATEM HANC TERTIAM COMMENDANDAM, SED PRÆSENTIM IN VIA.

Sed ad Christum nostrum plenum, perfectum et integrum revertamur; qui quidem necdum plenus dum adhuc nobiscum et propter nos in persecutione est et labore, juxta quod familiaris inest viæ meæ ad thalamum præambula inter viandum de nomine sponsi indicavit mihi sic quasi secreto instillans quod ipse sponsus, etsi non videretur, clam nobiscum in via nos comitaretur: Scis, inquit, nomen sponsi ad cujus te duco thalamum; *nomen*, inquit, *ipsius vocatur Emmanuel (Matth. i)*, et ego mox illi: Gratias tibi, domina mea et amica, nunc primo indicato nomine adverte, nunc scio; iste quippe vere et proprie noster Emmanuel necdum fugiter cum sponsa in thalamo, sed quotidie adhuc nobiscum in campo, et vere in via hac qua ambulamus nobiscum nunc, iste quippe vere noster Emmanuel, vere *nobiscum Deus*, et Deus et nobiscum, Deus et vere nobiscum, sicut in nostra carne et in nostro corde, nobiscum in persecutione, nobiscum et in labore, nobiscum in angustia, nobiscum in pressura, nobiscum in pœna, nobiscum in pugna, nobiscum in tentatione, nobiscum in peregrinatione, nobiscum in via, nobiscum in patria, nobiscum in morte, nobiscum in consummatione, nobiscum juxta nostrum desiderium, nobiscum juxta suum promissum. Unde et tu, domina mea, familiaris mea et amica bene et proprie vocasti eum sic, quia, ut diximus, nobiscum facit sic et in miseræ peregrinationis solatium promisit se sic facturum: *Ecce*, inquit, *nobiscum sum usque ad consummationem sæculi (Matth. xxviii)*; quotidie quippe adimplet et continue ea quæ desunt adhuc passionum ejus in corpore suo quod nos sumus quod est Ecclesia, et hoc quidem tertiæ hujus unitatis nostræ opus est, quæ Emanuelelem nostrum sic etiam nobis unit in via sic et sic laborantem nobiscum usque ad consummationem sæculi Christus omni tempore hoc imperfectus et non integer. Sic et similiter in labore in fine omni sicut in consummatione, sic erit ipse tunc in plena et in beatissima requie.

A SECUNDO INTERSERIT DE SPONSÆ NOMINE QUOD SIMILITER AD TERTIÆ HUIUS UNITATIS COMMENDATIONEM EST, SED PRÆSENTIM IN PATRIA.

Sponsæ vero nomine ad hujus unitatis nostræ commendationem juxta votum nostrum sicut præmisimus declarato, continue a duce mea et nomen sponsæ sciscitatus sum, sperans quod et hoc pariter proposito meo proliferet; et ipsa mox ad me reversa: « Vides, inquit, quod hoc dominæ meæ et sponsæ nomen, quod tu quæris, ad id quod intendis spectet admodum. » Verumtamen hoc quod tu nunc quæris sponsæ nomen, novum est quod os ipsius sponsi nominavit et in insigne mutui amoris privilegium donavit ipsi a sponso sic vocata voluntas mea in ea, et ego mox interni duci meæ: « Vere,

B inquit, dux mea et dulcis vere quam novum, quam inauditum nomen hoc; » revera nomen novum quod satis credibile ipsius sponsi os nominasse et ab ipso sponso sponsam vocatam sic et revera nomen novum et nescio cujus nomen amoris novi miro modo et stupendo et desideratissimo privilegiati ex nomine Deus, bone Deus clemens et misericors, quæ prius et re et nomine deserta et derelicta nunc ab ipso Deo, ab ipso domino et sponso vocatur ob inauditi amoris privilegium nomine suo proprio, voluntas mea in ea, indicans revera ex ipso novo nomine et quod ipsum os Domini nominavit quod in re ipsa est, cujus nominis minime nec iota unum nec etiam dimidium iotæ vacare arbitror;

C nihil quippe superfluum, nihil quod vacet a mysterio quod careat amoris privilegio in novo nomine hoc, cujus singulos quasi ipso amore ignitos apices sentio. Unde dux mea sponsi et sponsæ cubicularia familiarissima merito ipsum et novum dicit et etiam ipsum os Domini nominasse, quod sponsum sicut dictionum numero exterius ita et interius earumdem dictionum significationibus expressissime indicat. Ut igitur aliis intermissis quæ dici possent, id solum nunc dixerim quod mea nunc interest hoc in primis attendo, quod sint in hoc uno sponsæ nomine plura nomina et hæc plura nomina hoc unum nomen, nomen hoc quasi triplex et tamen unum, tale profecto nomen illi sponsæ conveniens, quæ unius Dei et trini sponsa est et non solum, ut nos supra dixisse meminimus in nomine Christianæ quod supra diximus sponsæ nomen solus Christus sed in isto novo nomine sponsus sic suus plenius Deus videlicet unus designatur et trinus primo qui loquitur Patri sic dicens: Voluntas mea in ea; ecce Filius voluntas Patris, nisi forte illud Evangelii nobis exciderit: *Hic est*, inquit, *Filius meus, in quo mihi bene complacui (Matth. xvi)*: subdens vero in ea amor exprimitur, qui in ipsis cordis medullis est: ecce Spiritus sanctus. Unde et quod attendendum est non dicit: Voluntas mea ex ea vel per eam, sed in ea, ut ipse amor cum omni vi sua sic vocetur expressius et ita ex hoc sponsæ nomine novo quod ipsius sponsi os nominavit totus et plenus verus et æternus sponsus sponsam declaravit, Pater videlicet et Filius et Spiritus sanctus et quemadmodum spon-

D

sus trinus, ita et in hoc novo nomine declaratur et A
unus, siquidem tria hic nomina unum sponsæ novum nomen.

QUOD PRIMUM SPONSI NOMEN UNITATEM HANC TERTIAM
COMMENDET SED IN VIA : SECUNDUM VERO SPONSÆ
EAMDEM PARITER COMMENDET, SED IN PATRIA.

Habemus jam duo sponsi et sponsæ nomina, hanc
nostram tertiam naturæ et gratiæ unitatem com-
mendantia, et prius quidem sponsæ nomen, quod
est Emmanuel, unitatem hanc commendat nobis in
via, nomen vero sponsæ eamdem nobis commendat,
sed in patria, ut ita sponsa habens sponsum suum
in via individuum comitem, quod indicat nomen
primum, facilius currat ad unitatem illam in patria
quam exprimit nomen secundum : est enim nomen
illud sponsi quod est Emmanuel nomen viæ, nomen
vero sponsæ, quod est voluntas mea in ea, nomen
patriæ, ita ut ipsum nomen sponsæ et qualem hanc
sponsum sibi in via indicet, et ut ad patriam sicut
fortius currat et Deus tuis invitet et primum quidem
sponsi nomen quasi in campo quasi in bello,
quia, ut jam diximus, hoc est nomen viæ, sed sec-
undum sponsæ quasi in thalamo, quasi in lecto,
quia hoc nomen est patriæ.

DE SECUNDO SPONSI NOMINE QUOD NON HABET IN VIA
SED IN PATRIA ET QUANTUM CONSONET HOC SPONSÆ
PATRIO NOMINI.

Verumtamen sponsus, sicut habet nomen viæ,
habet et nomen patriæ, quod miro modo sponsæ
novo et patrio nomini consonat, quod cum quære-
rem, Magister sponsæ paranympus mihi nunc in
via hac versus thalamum suggerit, non tamen hoc
quasi novum, sed jam supra nominatum, et nunc
quia sic expedit repetendum hoc est illud quod
Magister nos supra docuit, *Deus*, inquit, *omnia in*
omnibus (I Cor. xv), ut scit hoc Deus scilicet om-
nia in omnibus, quasi unum sponsi nomen in patria
sicut et ibidem nomen sponsæ est voluntas mea in
ea; attollamus igitur oculos, erigamus aures et toto
corde accendamus duo hæc sponsi et sponsæ no-
mina in patria, quam congrua, quam consona, quam
concordia sint; et ipsa etiam nominum compositio
exterior, quam concors sit trium duntaxat dictionum,
sicut hoc et illud eademque interponitur quasi quæ-
dam amoris propositio, et hic et ibi hæc profecto
nomina sicut nobis in experta et inexcogitata, [in
amoris expressa, quasi amore inflammata et ignita,
tota nobis incomprehensibilem hanc nostram na-
turæ et gratiæ unitatem commendant, et unum sic
consonat alteri quod utrumque infert alterum,
nam si Deus in omnibus omnia, jam erit con-
sequens quod Dei voluntas et sola Dei voluntas
in ea, proprio quippe nomine ab ipso Deo mi-
nime vocaretur, sic scilicet voluntas mea in ea.
Si alia præterquam solius Dei voluntas in ea
foret nec jam esset Deus omnia in omnibus, quare
si solius Dei voluntas in ea, jam nulla sunt
ejus propria; sed omnia in ea Deus et sic Deus
omnia in omnibus et vicissim ut jam ostensum,
si Deus omnia in omnibus et... *[Dequint pauca]*.

TERTII MELI TRICESIMA NOTULA, QUÆ ET ULTIMA.

..... [Hic, ut malo casu contigit, explicit codex
C.C.C., duobus aut etiam pluribus foliis ad finem
libri amissis. Eodem loco et codex Atrabatenensis im-
perfectus est, quocirca hiatus hic sed valde brevis in-
tervenit.].....ra præclara magis sunt et decora, quo
corporis capiti affinnora et conjunctiora sunt. Differt
enim membrum a membro in decore, ut stella a
stella in claritate, et in imperatoris discubitu miles
a milite. Et similiter in unitatis regno spiritus a
spiritu in unitate. O quantum fide certa video nunc
inter imperatorem et militem in illo unitatis regno
unitatem, quorum in vita hæc tam dilacerata, tam
discissa, tam dissuta, in conversatione, in opere, in
pœna, in pugna, et in palma tantam prius vidi con-
formitatem. Clamemus ergo pulsando et iterum cla-
mando pulsemus ad imperatorem et militem suum
triumphantorem; ejulantes et post eos clamantes, si
forte ipsi vel sic peregrinantibus nobis et periculanti-
bus inter tot viæ et vitæ hujus tentationes et varie-
tates, inter tot carnis stimulos, tot vitiorum spinas,
et tribulationum aculeos, dilaceratis et distractis
unitatis, in qua jam ipsi sunt nobis viam hic osten-
dant et ad ipsam post se trahant, ut, quo tota mar-
tyris historia impleta est, curramus in ipsorum odore
virtutum; curramus, inquit, quousque ad illam
sponsi et sponsæ, imperatoris et militis unitatem
perducamur, in quo sicut nec corporaliter dissolvi,
sic nec spiritualiter per operum seu etiam cogita-
tionum schismata poterimus deinceps dilacerari aut
distrahi. Et quoniam triumphator miles cum impe-
ratore suo jam in palma est, de imperatoris sui
conformitate in via ad ipsius imperatoris præclaris-
simam unitatem perductus in patria, ubi jam sponsus
in lecto est et amica in amplexu, tertius nunc, qui
et ultimus, unitatis triplicis finitur hic melus. Si-
quidem ad laudem gloriam et imperatoris et militis
in cithara Davidica tres utcumque jam formavimus
melos. Primus quidem melus de visibili et conformi
pugna imperatoris et militis, et hic quidem melus ad
luctum. Secundus melus de visibili et conformi
palma imperatoris et militis, et hic quidem melus ad
gaudium. Tertius vero melus hic, qui et ultimus, de
invisibili et conformi palma imperatoris et militis.
Et hic quidem melus ad jubilum. Cujus tota quidem
materia est de his, quæ oculus non vidit, nec auris
audivit, nec in cor hominis ascenderunt. Unde et
melus hic bene finitur hic, ad imperatoris et militis
triumphatoris gloriosum finem deductus, ubi finis
est sine fine.

Et est quidem melus iste tertius, eo productior,
quod citharizantis manibus corpulentis nimis et
gravibus et digitis ad tam dignam meli materiam
resonandam minus aptis, in superioribus et acutioribus
citharæ chordis etsi non formose, utcumque
tamen vel deformiter formatus sit forma quidem
meli citharædi imperitam peritam indicante.

Eo etiam, ut verum fatear, prolixior quod ego a
domino meo, sive in via, sive in patria, sive in
pugna, sive in palma, sive in campo, sive in lecto,

admodum invitus avellor. Et tamen avelli me jam oportet. Periclitor enim et peregrinor adhuc. Sublato mihi domino meo, sine socio, sine solatio, sine adiutorio in peregrinatione mea hæc etiam adeo solus derelictus, ut orbis Britannicus, in quo, dum hanc martyris historiam scriberem, aliquandiu sum moratus, mihi communicare vix velit, nescio si aut dignetur aut audeat. Et de pontificibus terræ mea præserim querimonia hæc. Nescio si forte ob primam in me regis nostri iram ipsi adhuc exterriti sint, et mihi communicare aut non dignentur aut metuant; aut iterum nescio si suam reputent injuriam, quod patri meo et domino decessori suo per tot labores, per difficultates tot, per tot damna, per tot pericula, impenderim tam devotum, sicut mundus novit, et tam fidele obsequium. Et quod mirum admodum, patris mei et domini similiter ut perhibent patris sui et patroni, mortui corporis et in corruptionem descenditis, mortuos quotidie adorant reliquias et vivas spernunt. Mira quidem devotio hæc: si fructuosa, Deus novit, ipsi viderint. Dignius certe videretur et devotius, ut per vulnera mortui corporis super patroni sui vivas adhuc reliquias effunderent viscera suæ miserationis. Verumtamen de duobus jam domini mei in sede metropolitana successoris quos ipse vidi, dum adhuc martyris historiam scriberem, nulla mihi nunc quæstio, querimonia nulla. Quibus duntaxat tanquam matris meæ

A sanctæ Cantuariensis Ecclesiæ sponsis debeo reverentiam, non quæstionem ullam movere vel querimoniam. Quid deceat norunt ipsi, et quid fecerint ipsi viderint. Ut verum fatear, contemptus hic mihi quidem pro minimo ab his vel illis seu ab humano die. Mea quippe gloria si domino meo et magistro mihi sublato et curram suum ignitum scandente, ego discipulus peregrinans adhuc adimpleam ea quæ desunt passionum ejus in me; cantans illud cum Propheta: *Parvulus sum ego et contemptus, justificationes tuas non sum oblitus* (Psal. cxviii). Et item illud: *Redime me a calumniis hominum, ut custodiam mandata tua* (ibid.). Siquidem dominus meus post ipsius de mundo excessum, cito mihi in visione apparens istius versiculi tanquam ejusdani antidoti contra toxicatas calumniantium linguas injenxit memoriam jugem. Adjiciens etiam inter psalmigraphi versus hunc præcellere. Oro igitur et iterum oro ut redimat me Dominus a calumniis hominum, ut custodiam mandata ejus.

B
EXPLICIT MELUS TERTIUS.

Tribus vero melis juxta promissum nostrum ad laudem et gloriam imperatoris et militis in cithara Davidica, prout desuper edocti, jam consummatis, subsequitur juxta superius similiter promissum nostrum qualiscunque homilia nostra de natalitio martyris die, quæ sic incipit: *Cantemus Domino.*

HOMILIA HERBERTI DE BOSEHAM

DISCIPULI HISTORIOGRAPHI MARTYRIS

DE NATALITIO MARTYRIS DIE.

Cantemus Domino, gloriose enim magnificatus est, aquam et ascensorem projecit in mare (Exod. xv).

Novimus, fratres, novimus omnes canticum istud canticum Hebræorum esse; illorum profecto canticum qui per ignem et aquam transierunt. Verum sicut Hebræorum synagoga tunc, ita Hebræorum ecclesia nunc istud sibi usurpat, imo potius mutuatur canticum: *Cantemus, inquit, Domino.* Nos quippe qui veri Israëlitarum sumus et Dei Ecclesiæ dicimur, sicut et fratres nostri Hebræi, qui jam nos præcesserunt in via et prævenerunt in patriam, per ignem et aquam transivimus. Sed ubi salvantur filii, per eunt inimici, submerguntur ascensores et equi, pro quo est causa et de quo est materia cantici. Cantemus igitur et nos Domino. Verum in primis advertendum quod tria sint filiorum Israel genera canticorum. Et hoc, inquam, in primis advertendum, ut ita liquido appareat an ad singula an ad aliquod singulorum trium specialiter hymnizans nos hodie invitet Ecclesia, *Cantemus, inquit, Domino.* Est itaque triplex filiorum Israel canticum. Primum canticum canticum est mæroris; secundum laudis;

C tertium vero jubilationis. Primum cantatur in Agypto; secundum in deserto; tertium vero in regno. Primum canticum est in vetustate culpæ; secundum in novitate vitæ; tertium in excessu lætitiæ. Primum quasi sine spe in miseria sæculi; secundum in consolatione spei; tertium in visione speciei. Primi gemendo cantant et manus habent erectas supplicantes pro vana; secundi laborando cantant et manus habent exertas, vigilantes pro pugna; tertii triumphando cantant et manus habent quietas jam secari pro palma. Primum canticum est redeuntium ad se et ad cursum se præparantium; hi jugiter dicunt lamentum et væ. Secundum est jam currentium: in ore istorum jugiter canticum novum carmen Deo nostro. Tertium vero canticum est pervenientium. Sed hujus cantici sonos lingua adhuc moribunda non exprimit, quia in spiritualium gaudiorum aperture, vox humana faucescit, quia non sunt æterna gaudia angelorum ut transitoria istæ festivitates hominum. Hæc enim sunt quæ non vidit oculus, quia sunt abscondita, nec auris audivit quia sunt in pace quietissima, vix

in cor hominis ascenderunt, quia sunt incomprehensibilia. Primum canticum Deum invocet et indulgentiam postulat; secundum Deum placat et auxilium flagitat; tertium vero Deum lætificat et gaudium monstrat. Istud est enim canticum super cæleste, canticum admirabile, canticum præconiale quod exprimi non valet et taceri non potest. Istud quippe canticum Canticum canticorum est, canticum epithalamicum, quando jam sponsa in lecto est et sponsus in amplexu. Verum, fratres, forte jam aliqui vestrum ite notant, quod non legantur filii Israel in Ægypto cantasse Domino sed potius clamasse ad Dominum. Sed profecto clamor ille in auribus Domini Sabaoth canticum erat. Nec solum dicam jam canticum quin potius et sacrificium. Quid enim nisi sacrificium, ubi tanta afflictio carnis et contritio cordis? Cum enim absque afflictione carnis solum cor contritum et humiliatum non despiciat Deus. Cor contritum, inquit, et humiliatum Deus non despiciet.

Tria jam, fratres, filiorum Israel distinximus cantica. Verum de primo quod mœroris esse diximus et in Ægypto cantari, advertendum quod triplicem habeat causam et materiam. Celebrem videlicet illam et notissimam triplicem illius triplicis servitutis sub Pharaone inter Ægyptios oppressionem, luti videlicet lateris et paleæ. Et illi quidem fratres nostri Hebræi tunc corporaliter, nos vero nunc, confratres eorum et conservi, eodem sed spiritualiter spirituali spiritualis servitutis opprimimur jugo; tanto certe nunc gravius et molestius quanto in illis tunc sola servitutis figura, in nobis vero nunc significatæ servitutis completio est. Et hoc profecto servitutis vi, servitutis jugo, pariter et exactore tantarum servitutatum extincto. Pro hac pace, fratres, quæ in filiorum salute et inimicorum ultione consummatur, laus est, et de hac pace secundi cantici, quod canticum laudis jam sæpe diximus, est materia: unde et pro hac pace tota militans Ecclesia ad hoc laudis canticum specialiter his dictis nos invitat: *Cantemus, inquit, Domino, gloriose enim magnificatus est, equum et ascensorem projecit in mare.* Invitat, inquam, et singulariter ad hoc per quemdam diebus nostris singularem athletam Christi, christum Domini, prius quidem viriliter dimicantem sed nostris diebus feliciter triumphantem. Quin potius ipse christus Domini athleta Christi totam Christi Ecclesiam hoc tempore ad hoc laudis canticum provocat per exemplum et in laude confirmat per triumphum. Et ne cui in dubium veniat, quis iste sit, quem ita tango sed necdum nomino, attendite, fratres, levate manus, attollite oculos, erigite aures, et ducem proprie vestrum, athletam hunc Christi, christum Domini, vestrum specialiter ducem cognoscatis ex nomine. Iste certe athleta Christi, christus Domini, gloriosus Christi neomartyr, Thomas Cantuariorum antistes et totius Angliæ nunc absque contradictione primas est, qui in medio nostrum stat, quem utinam et cognoscereamus. Et utique cognoscibilis, quia etsi

A non vultus, vulnus eum discernit. Stat enim martyr pro nobis et inter nos tripudians et triumphans toto lacero capite. Stat, inquam, martyr fortior inter ictus gladiorum in exilio quam Adam inter poma deliciarum in paradiso. Stat, inquam, martyr inter gladiatores, sicut intrepidus et invictus. Stat, inquam, orans et supplicans non pro se sed pro nobis pro his qui sibi crediti sunt.

O pretiosa, o spectabilis hostia, quo rarior eo spectabilior, ubi idem hostia et sacerdos. In hoc Domini sui martyrum principis titulum gerens. Accedit et spectaculo quod ibi immolatus ubi consecratus; et adhuc quod alias penitus tam sancto sancti intacto corpore, in ipsa summitate, in ipso vertice capitis, in ipso loco pontificalis unctionis, cum pœna vulneris martyrii palmam est adeptus, coronam perdens sed coronam recipiens, pro corona coronam, pro carnis corona corruptibili spiritus coronam immarcescibilem: imo mox, ni fallor, pro una et simplici corona recipiens duplicem, auream videlicet et aureolam. O vere salutaris hostia, in natalibus Salvatoris et in Salvatoris Ecclesia pro salute Ecclesiæ immolata. Et quidem immolata non inter templum et altare, nec in angulis templi seu abditis tanquam carnifices fugiens sed inter cornua altaris templi ante beati videlicet Benedicti abbatis aram se exponens: ita Deo ad martyris sui gloriam mirabiliter dispensante, ut et tempus immolationis et locus non solum salutis et benedictionis gratia, sed horum etiam nomina tanquam præclaris et selectis salutis et benedictionis titulis expressissime insignirentur. Hic enim Salvatoris Ecclesia, hic Salvatoris natalitia. Et ne quid desit ad hostiam, hic beati Benedicti ara. Ecce quia sicut loca et tempora salutis et benedictionis plena, sic etiam et locorum et temporum nomine salutem et benedictionem sunt exprimentia. O si videremus, et si nobis videre datum, in locis et temporibus his pontificem, hostiam vere vivam stantem inter carnifices ferro armatis manibus circumstantes diceremus profecto Phinees zelantem hinc, inde vero Moysen in omni mansuetudine viro Dei assistere. Stat enim ut Phinees sine pontifici sui jam appropinquante nequaquam se pontificem immemor cum omni imperio inter gladios gladiatores ipsos pontificali arguens auctoritate, gladio sacerdotali non se defendens, sed suos et se exponens pro suis sub perpetuo anathemate sicut districtissime et imperiosissime inhibens ne quem suorum læderent, ne quem tangerent. Stat et ut alter Moyses orans pro populo et universa sancta civitate; stat, inquam, martyr tanquam alter Moyses orans et supplicans. Orans dico et supplicans tanquam pastor et Anglicanæ Ecclesiæ dux specialis et patronus. Qui propter ipsam proposito sibi gaudio sustinuit crucem confusione contempta, magis eligens affligi pro fratribus suis, quam temporalis peccati habere jucunditatem; in hoc etiam certe alterum se nobis Moysen exhibens. Cum esset quippe in regia contubernalis Augustorum, quin potius tanquam coaugustus Augusto,

mox et ex insperato ut a Deo vocatus est, exiit purpuram, et cilicium induit. Quo quasi novus Christi tiro accingitur ad spirituale certamen pugnaturus ad bestias. Contra quas, sicut mundus novit, dimicans tam viriliter hodie, sicut universus Ecclesiarum orbis celebrat, triumphat tam potenter. Quis enim unquam audivit Tale aut quis vidit simile, aut cui revelatum factum hoc? Aliquis martyrum pro persecutoribus suis exoravit se exponens. Sed quis et in simul gladium suum exeruit, non se sed suos tam districte tam imperiose inter gladios sic defensans? Vere in martyre isto novo nostro novum et inauditum hoc. Unde et universum Ecclesiarum orbem ad novum et inauditum præconiale laudis canticum tam singularis, tam novus, tam præclarus triumphator invitat: *Cantemus, inquit, Domino*. Verum etsi hoc triumphali tempore ius potissimum debeat triumphanti, non solum ad hoc, sed ad alia quæ jam supra distinximus cantica, istius exemplo provocamur et utinam meritis adjuvemur. Cantica dico quæ prior ipse nobis relinquens exemplum cecinit et fine beato consummavit; quæ ut ipsi hic aptaremus, supra distincta sunt. Primum quod supra ordinavimus, canticum fuit mæroris; hoc iste cecinit in exilio. Secundum laudis; hoc iste cecinit in martyrio. Tunc enim persecutor victus est eo ipso per quod vicisse videri poterat. Tertium diximus canticum jubilationis: et hoc est præclarum illud et insigne canticum, quod nunc canit in regno. Primum quidem canticum grave; secundum forte; sed tertium nunc suave est, omni profecto delectabili delectabilius.

Et hæc tria, sicut profecto credibile est, cantica quæ prior ipse explevit in se, peregrinorum suorum ad ipsum ex universo ecclesiarum orbe confluentium, quæ gestant in pectore triumphii sui insignia notant, plumbum scilicet, sanguis, et aqua, aqua videlicet sanguine rubricata. Nec enim absque divini provisione consilii, sine quo nec etiam folium cadit ab arbore, factum esse credendum est, ut ita ab omni natione et lingua, uno more et corde, quasi commune inter se edictum fecerint, nova novi martyris vexilla triumphalia prodeant. Ego mysterium magis puto esse quam casum, et utinam vobis mysterium loquerer. Dicam vero quod sentio, utinam quod revelaverit Dominus. Plumbum vetus bono est; de hoc est canticum mæroris. Sanguis martyrum est; de hoc est canticum laudis. Nec tunc solum martyrium intelligo, quando animam posuit, sed mox ut exposuit, mox etiam ut ad martyrium paratus fuit. Aqua fluminis impetus est, qui reficit civitatem Dei, et de hoc est tertium canticum, canticum jubilationis. Signa vero hæc vel vexilla, non in fronte, non in humero, non a tergo, vel a latere, sed palam gestantur in pectore, ut videlicet vitam ipsius triplicem, tanquam triplicem Hebræi nostri viam, secundum datam nobis a Deo sapientiam et gratiam semper habeamus præ oculis et miremur, prout desuper datum fuerit imitantes. Ipsi quippe via et vita mundo sicut admirationi

ita et diebus his novissimis imitationi proposita est. Siquidem qui in aliis sanctis suis et mirabilis, in isto sancto suo admirabilis fuit, ovens istum in via non solum mirabili sed et admirabili. Videte si non admirabili. Siquidem in his diebus novissimis, in hoc tempore torporis nostri et teporis, quo olim prædictum nunc impletum est quod abundaret iniquitas et homines forent semetipsos amantes, egressus Hebræi istius et aggressus admirabilis. Videamus egressum. Egressus ejus a purpura ad cilicium, a cilicio ad exsilium, ab exilio ad martyrium, a martyrio ad regnum. Aggressus vero nihilominus admirabilis. Contra illum quippe se pro Christo accinxit, quo jubente et ipsi secundus, imo quasi comprimis extiterat in regno et quo cooperante post primatum obtinebat in clero. Et tamen a Christo vocatus, contra istum se pro Christo erexit fide intelligens Deo nihil præponendum. Ecce breviter insinuat Hebræi nostri aggressus et egressus. Aggressus quidem fortis, verum egressus ejus, viæ ejus, etsi admirabiles sint, etsi duræ, pulchræ tamen. Quam pulchri, inquit, gressus tui in calceamentis, filia principis. Istæ tres Hebræi nostri viæ, hæc tria in viis cantica, per tria illa quæ jam distinguere cæpimus, visibilibus figurari conjecto, quæ sunt plumbum, sanguis et aqua. Est enim plumbum, ut jam dicere cæpimus, vetus homo depositus in exilio; sanguis novus sacerdos immolatus in templo; aqua vero fons vitæ et torrens voluptatis in celo. Et Hebræi quidem nostri tres viæ hæc et in viis hæc cantica, nisi quod tertium non jam Hebræus in via, sed angelorum nunc concepis canit in patria.

Verum Ægyptiorum cantica, quæ in præsentiarum non sine causa vel tangere convenit, his quæ jam sæpe diximus Hebræorum canticis multum dissona sunt, utpote ipsis per antithesim ordinatis et compositis. Inchoant quippe Ægyptiorum hæc cantica a voce elationis. Juxta quod ipsorum præcentor princeps: *Ponam, inquit, sedem meam ab aquilone et ero similis Altissimo (Isa. xiv)*. Descendunt deinde ad vocem voluptatis provocantes se invicem et cantantes: *Manducemus et bibamus, cras enim moriemur (I Cor. xv)*. Sed finiunt in voce confusionis, illud in fine cum erubescencia et confusione replicantes: Quid, inquit, profuit nobis superbia, et jactantia divitiarum quid contulit nobis? Transierunt omnia velut umbra. Ecce istæ sunt tres illæ voces, ex quibus in diaboli musica conficiuntur Ægyptiaca cantica. Quarum prima inchoavit in celo; secunda in paradiso; tertia vero in inferno. Sed hæc cantica solum hic tetigisse sufficiat: ob id solum quod dux noster hodiernus et præcentor dulcissimus, quem tria beato fine cantica supra jam diximus consummasse, istos Ægyptiorum melos in diaboli confectos musica virtute mirabili, et Dei voluntate misericordie interrupit: fuit quippe et ipse aliquandiu inter Ægyptios adeo gratus Augusto quod etiam damnabatur in tota terra Ægypti; in hoc tamen multum a Joseph distans, quod fratres

suos in Ægyptiorum ergastulo laborantes necdum agnosceret. Unde nec compatiebatur super contritione Joseph quin potius præfectis operum erat ipse præfectus. Ad cuius ordinationem et nutum cuncta gerebantur in Ægypto. Et tunc quidem inter Ægyptios ad Ægyptiorum morem Ægyptiorum canticis se conformans inchoaverat in musica diaboli a voce elationis et crebro dissolvebatur ad canticum voluptatis, quod ollas carniū et allia sapiebat et pepones.

Verum, cum miserante Domino audiret demum et adverteret tertiam illam, quæ sequitur, vocem confusionis, interrupt mox diabolicæ musicæ melum. Et quod dictū mirabile est et auditū incredibile, nisi quia nos, fratres, qui nunc vobis loquimur, quod vidimus hoc testamur, mox ut a Deo vocatus est et illuminatus, ita ut tactu oculi fratres suos agnosceret et videret tempus dimicandi pro fratribus; mox, inquam, et ex insperato, ut jam diximus, et præ novitate et raritate operis crebrius repetendum exivit, aulicam exiit purpuram et cilicium induit. O dextera Domini faciens virtutem tantam, et tam superbum peccatorem convertens, quasi de dracone virgam iterum faciens, et aquam denuo in vinum mutans. O dextera Domini faciens virtutem, superbo inspirans humilitatem, quasi educens mel de petra, oleumque de saxo durissimo. O potentia Domini suscitans de lapide isto filium Abraham!

Fratres, plus stupeo ad Thomæ conversionem quam Thomæ creationem. Creatus est enim Thomas ut universi. Quid igitur dico ad Thomæ creationem? Plus quippe stupendum et admiratione dignior Thomæ conversio, imo multo plus quam mundi totius creatio. Quanto fortius est opus gratiæ quam naturæ. In mundi quippe creatione potentia fuit naturæ creantis naturam, et dixit et factum est. Sed hic virtus gratiæ ne dicam immutantis, imo quodam modo transsubstantiantis naturam dicentis: Vive tu, jam non tu. Viro, inquit Magister, jam non ego (Gal. ii). Et hæc quidem verba hic sermo gratiæ in isto et ad istum, quem nunc loquimur, vivus fuit et efficax, et penetrabilior omni gladio ancipiti: quod veterem in eo hominem concussit adeo et excussit, et demum frustatim et minutatim ita concidit, ut perempto veteri novus quidam homo, qui secundum Deum creatus est, reviviscat ex veteri, in tantum ut abnegans semetipsam caro fiat, non caro, sed spiritus, homo non homo, non jam quasi ab humo, sed a cælo, ut oblii jam et rejecto trito illo vetustatis cantico: *Qualis, inquit, terrenus tales et terreni* (I Cor. xv), cantemus in hoc solemnī, in triumphali hac die tam miræ, tam sanctæ conversionis memores, canticum novum, canticum misericordiæ, canticum gratiæ, canticum præconiale, quales cælestes, tales et terreni. Nunquid enim carnis, nunquid hominis fuit proposita, imo jam tenta Augustorum relinquere gaudia, et pro fratribus suis damnatorum crucem sustinere confusione contempta? Nunquid, inquam, fuit hoc aut hominis hujus

A temporis aut hujus temporis opus? Certe nec hujus temporis nec moderni teporis hoc. Verumtamen Thomas hic noster, nostri nec temporis nec teporis sortitus spiritum, in spiritu vehementi omnibus et sæculi et carnis ruptis illecebrarum vinculis, maluit sustinere crucem et pro populo Dei sibi credito affligi, quam temporalis peccati habere jucunditatem, in hoc, sicut jam diximus, et hic iterare non displicet, alterum se nobis Moysen exhibens nisi quia plus quam Moyses hic. Moyses quippe aulæ proposita sibi gaudia, sed iste jam habita dereliquit, elongans se et fugiens, et cum David manens in solitudine. In qua juxta prophetæ consilium sedens, ut perseverans, et tacens, ut discens, levavit se supra se. In hac quippe solitudine tanquam debita sibi virtutis schola haud segniter in divinis exercebatur. Et inter alia divinæ pietatis opera, præsertim in lege Domini meditabatur, sacras ibi litteras, quas dum adhuc inter Ægyptios sæcularem duceret vitam, nondum dederat, discens. Discens quidem, non tam doctore homine quam unctione magistra, illius persæpe versiculi agendo gratias recolens: *Bonum mihi, Domine, quod humiliasti me, ut dicam justificationes tuas* (Psal. cxviii). Et ipse quidem et in hoc et in aliis divinæ pietatis se exercebat operibus, et ipsum etiam alii, alieni tamen magis dicendi quam alii exercebant. *Filii, inquam, alieni, qui mentiti sunt ei; filii, inquam, alieni qui inveteraverunt et claudicaverunt a semitis tuis* (Psal. xvii). Claudicaverunt, dico, volentes partim Mammonæ deservire cum juxta Veritatis dictum nemo possit Deo servire et Mammonæ. Verum filii isti alieni claudicantes et divisi sedentem in solitudine miris et incredibilibus aggressibus exercebant, sedentis in solitudine et salutare Dei cum silentio præstolantis quotidie rumpentes silentium et turbantes quietem. Ipsorum quippe adversus ipsum vere miri aggressus et incredibiles. Quis enim digne exprimat in quantum ab ipsis vexatus sit, quibus sit affectus contumeliis, quibus injuriis lacessitus? O Jesu bone, quanta passus est pro nomine tuo, a filiis alienis, a fratribus sceleratis, quanta sustinuit ab his ipsis, quibus et pro quibus laborabat et operabatur bona. Qui etiam cum per se non posset duriora inferre, faciebant immissiones per angelos malos, orbem sollicitantes ut pelleretur ab orbe, qui propter ipsos pastorale subiit et sustinuit onus.

Certe, fratres, ego ipse qui nunc loquor, alio referente vix crederem, nisi in illo discipulorum et coexulum suorum comitatu fuissem expertus ipse, vel ex parte, quæ loquor. Unde, quia tunc fui socius passionis, earundem passionum nunc ego testis sum nec repellar a testimonio. Quod epim vidimus, quod audivimus, quod etiam ex parte sensimus, hoc testamur. Et illi quidem, sicut jam diximus, filii alieni fratres scelerati ita. Attamen is cum his qui oderunt pacem pacificus erat, instans nihilominus opportune et importune. Deus enim, qui juxta prophetam ipsum fortitudine accinxit, pariter et ut

arcum æreum brachia ejus composuit. Et istud quidem primum est canticum mœroris, quod conversus ad Dominum Domino in exilio in Christi musica præcinit illi Ægyptiorum cantico, quod, sicut jam supra diximus, inter Ægyptios cantare consueverat, per antithesim inchoatum. Illud quippe in musica diaboli a voce elationis, sed istud in Christi musica a gravi sono mœroris inchoat a voce humilitatis. Sic enim et magister in hac musica suos discipulos instituit: *Discite*, inquit, *a me, quia mitis sum et humilis corde* (Matth. xi). Et in prædicationis suæ quasi primæ in musica sua cantilenæ initio: *Agite*, inquit, *pœnitentiam, appropinquat enim regnum cœlorum* (Matth. iv). Et ita juxta morem hunc Hebræorum cantica a magistro ordinata sunt et composita, ut primo a cantico mœroris, a voce humili inchoent, et ita sensim ad altiora procedant, ad cantica videlicet exultationis et laudis et demum in summo vox altissima et acutissima jubilus. Unde et prima, quæ primo Hebræis proponuntur cantica a gemitu quidem incipiunt, sed in laude terminantur. Vide igitur unum, quia simile in reliquis est. *Domine*, inquit, *ne in furore tuo arguas me* (Psal. vi), et cætera. Et post aliquantis interpositis, quæ gemitus sunt in musica hac, sensim ad sonum dulciorem, ad vocem suaviorem et sublimiorem progredimur. *Discedite*, inquit, *a me, omnes qui operamini iniquitatem, quoniam exaudivit Dominus vocem fletus mei* (ibid.). Sic et in aliis Hebræorum canticis reliquis, videlicet pœnitentialibus psalmis, qui primo Hebræis proponuntur ad cantandum, in quibus omnibus a lacrymis quidem incipitur, sed in gaudio finis est. Et ista quidem Hebræorum cantica sic cum versa vice Ægyptiorum cantica a voce altissima, ut supra diximus, et acutissima, sed in absona valde et infima voce terminantur. Ante ruinam enim exaltatur cor. Iste igitur Hebræus dux noster et præceptor, dum adhuc Hebræus esset, per ignem et aquam transiens, in musica Christi a cantico mœroris inchoavit et per varios et multiplices hujus meli, qui mœroris dicitur, modos, per tentationes videlicet varias et multiplices, sensim ad canticum sublimius ductus est, ad secundum videlicet quod jam sæpe nominavimus canticum laudis. Ad quod in hoc triumphali die nos invitans: *Cantemus*, inquit, *Domino*.

Et mox causam cantici subjicit: *Gloriose enim magnificatus est*. Et tam gloriøse magnificentie hujus causam mox adnectit: *Quia equum et ascensorem projecit in mare*. Unde in primis standum et pensandum, quod non absolute magnificentiam vel magnum, sed gloriøse magnificentiam dicit. Nam, sicut vehementer, ita et multipliciter ex operibus suis magnificatur Dominus. Aliquando magnificatur per opera potentie, ut ex mundi creatione; aliquando per opera misericordie, ut ex mundi creati reparatione; aliquando per opera justitie, ut ex remuneratione bonorum et damnatione impiorum; aliquando magnificatur miraculose, ut cum aliqua operatur motu iræ seu gratie interverso ordine na-

A turæ. Et his quidem et multis modis aliis varie et multipliciter, unde et in hoc triumphali martyris die ecclesia merito agit gratias: *Eripuit me*, inquit, *de inimicis meis fortissimis et ab his qui oderunt me, cum confortati sunt super me* (Psal. xvii). Verumtamen jam pridem Ecclesia in se hoc ipsum experta ex novo novi martyris sui triumpho novas nunc refert gratias. Nam eo ipso Ecclesia semper consuevit crescere, unde mundus novit deficere. Quo exinanitur ille, examinatur ista, et quo ille succumbit hæc triumphat. Fossa quippe plagis et putata martyris eo magis extenditur tanquam cælestis agricolæ vinea, et tunc tribulationum flagellis eo magis producit, tanquam cælestis opificis tuba. Et tyrannorum persecutionibus tanquam maris elationibus pulsa eo magis levatur in sublime, tanquam refugii cælestis arca. Et hæc sunt quæ juxta Psalmistam rectores Ecclesiarum vident, *opera Domini et mirabilia ejus in profundo* (Psal. cvi). Unde et in Psalmo alibi: *Mirabiles*, inquit, *elationes maris, mirabilis in altis Dominus* (Psal. xcii). Et ut evangelii adjiciamus quid, hæc quippe mater nostra Ecclesia evangelici illius grani fructus est, quod nisi cadens in terram mortuum fuisset ipsum solum maneret. Quale certe granum et fructus talis. Et aliis nunc omissis, videamus si non sit in evangelici istius grani fructu novo, in martyre videlicet nostro novo nunc sic. In quo plene nunc cernimus adimpleta quæ de Ecclesiæ virtute sunt præmissa. Vivum Thomam sola Anglia habebat, occisum vero nunc omnes gentes. Notus enim in Anglia Thomas, sed nunc in orbe magnum nomen ejus. Dominus enim qui extendit cælum sicut pellem, versa nunc vice pellem militis sui occisi vulneratam et morticinam extendit, sicut cælum in tam amplam educens eam latitudinem. Juxta quod post præmissam de ereptione sua gratiarum actionem adjungit mater nostra Ecclesia: *Et eduxit me in latitudinem, salvum me fecit cum voluit me* (Psal. xvii).

Erigant se igitur ad istud Ecclesiæ de ereptione sua canticum Ecclesiarum rectores, ut ita spe certissima consolati eo ipso congratulentur se mox ereptos quam viderint inimicos suos fortissimos confortatos super se. Et desuper data Ecclesiæ virtute propria non desperent. Aspiciant et in confratrem suum Ecclesiæ quondam rectorem Thomam ut ipsi in ipso videant opera Domini et mirabilia ejus in profundo. In ipso, inquam, videant ipsi opera Domini et mirabilia ejus, qui in profundo maris istius sæculi creditam sibi Petri naviculam in tanta tempestatis procella, inter tot scopulos et tam periculosas maris voragines, rexit tam fortiter, rexit et tam prudenter; adeo etiam fortiter et viriliter adeo, ut quod inauditum a sæculo, demum ipsomet in medium procellæ ultro se exponit, in proprio sanguine suo navicula sibi credita fluctuaret et curreret. Ut ita sicut tutius et velocius a procella maris sæculi hujus quasi avolando velificaret ad patriam.

Et tu, Domine, igitur qui hodie in tam glorioso^A martyris tui Ecclesiæ tuæ ducis et patroni exitu ab *Egypto* secundum magnitudinem brachii tui tam gloriose magnificatus es, equis et ascensoribus in mare projectis, sicut Hebræorum Synagoga tunc, ita et fidelium tuorum Ecclesiam tuam nunc salva semper et libera; ut sit salva et libera per te semper liberata a iugo servitutis et oppressionis tribulantis; auxiliante jugiter ipsi ipsius duce speciali et patrono, qui ut ipsam liberaret animam suam posuit, gloriosus martyr tuus Thomas, qui tecum eum gloria venturus est iudicare vivos et mortuos et sæculum per ignem. Amen.

EXPLICIT HOMILIA DE MARTYRE.

Huic vero cantico laudis subsequitur mox longe aliud et alterius modi canticum, canticum mœroris, canticum tribulationis et angustiae: funestum videlicet illud et famosum decreti chirographum, de quo per totam martyris historiam percrebro mentio facta est, continens capitula sedecim.

Quod juxta superius promissum nostrum, ideo in omnium calce hic postponimus, ut legant sæcula post futura, et hinc cognoscant, quam justa, quam perspicua fuerit gloriosi neomartyris nostri, primo exilii et postea martyrii causa. Quorum capitulorum hoc est primum. De advocacionibus etc.

CAUSA EXSILII ET MARTYRII BEATI THOMÆ

MARTYRIS ET PONTIFICIS CANTUARIENSIS.

PRIMUM HOC DAMNAVIT SANCTA ROMANA ECCLESIA SUB
PAPA ALEXANDRO TERTIO.

De advocacione et presentatione Ecclesiarum si controversia emergerit inter laicos, vel inter clericos et laicos, vel inter clericos. in curia domini regis tractetur et terminetur.

SECUNDUM HOC TOLERAVIT.

Ecclesiæ de feodo regis non possunt in perpetuum dari absque assensu et concessione ipsius.

HOC TOLERAVIT.

Clerici retati et accusati de quacunque re, submoniti a iustitia regis venient in curiam ipsius, responsuri ibidem de hoc, unde videbitur curiæ regis quid sit ibi respondendum, et in curia ecclesiastica, unde videbitur quod sit ibi respondendum; ita quod iustitia regis mittet in curiam sanctæ Ecclesiæ ad videndum qua ratione res ibi tractabitur. Et si clericus convictus vel confessus fuerit, de cætero non debet eum Ecclesia tueri.

NOTULA 4. HOC DAMNAVIT.

Archiepiscopis, episcopis et personis regni non licet exire de regno absque licentia regis; et si exierint, si regi placuerit, assecrabitur quod nec in eundo nec in moram faciendo perquirent malum vel damnum regi vel regno.

NOTULA 5. HOC DAMNAVIT.

Excommunicati non debent dare vadium ad remanens, nec prestare juramentum, sed tantum vadium et plegium standi iudicio Ecclesiæ ut absolvantur.

NOTULA 6. HOC TOLERAVIT.

Laici non debent accusari, nisi per certas et legales accusatores et testes in præsentia archiepiscopi vel episcopi, ita quod archidiaconus non per-

Dat jus suum, nec quidquam quod inde habere debeat. Et si tales fuerint qui culpantur, quod non velit vel non audeat eos aliquis accusare, vicecomes requisitus ad id facit jurare duodecim legales homines de visneto seu de villa coram episcopo, quod inde veritatem secundum conscientiam suam manifestabunt.

NOTULA 7. HOC DAMNAVIT.

Nullus qui de rege teneat in capite, vel aliquis dominicorum ministrorum ejus excommunicetur nec terræ alicujus eorum sub interdicto ponantur, nisi prius rex, si in terra fuerit, conveniatur, vel iustitia ejus, si extra regnum fuerit, ut rectum de ipso faciat, et ita ut quod pertinebat ad curiam regiam ibidem terminetur, et de eo quod spectabit ad ecclesiasticam curiam ad eandem mittatur ut ibidem terminetur.

NOTULA 8. HOC DAMNAVIT.

De appellationibus, si emergerint, ab archidiacono debent procedere ad episcopum et ab episcopo ad archiepiscopum; et si archiepiscopus defuerit in iustitia exhibenda, postremo ad regem est perveniendum, ut præcepto ipsius in curia archiepiscopi controversia terminetur, ita quod non debet ulterius procedere absque assensu regis.

NOTULA 9. HOC DAMNAVIT.

Si calumnia emergerit inter clericum et laicum, vel econverso de ullo tenemento, quod clericus velit ad eleemosynam attrahere, laicus vero ad laicum feudum, recognitione duodecim legalium hominum per capitalis iustitiæ regis consuetudinem terminabunt, utrum tenementum sit pertinens ad eleemosynam sive ad laicum feudum, coram ipsa iustitia regis. Et si recognitum fuerit ad eleemosynam per-

tinere, placitum erit in curia ecclesiastica. Si vero ad laicum feudum, nisi ambo de eodem episcopo vel barone advocaverint, in curia regis erit placitum. Sed, si uterque advocaverit de feodo illo eundem episcopum vel baronem, erit placitum in curia ipsius, ita quod propter factam recognitionem saisinam non amittat, qui prius saisitus fuerat, donec per placitum disratiocinatum fuerit.

NOTULA 10. HOC DAMNAVIT.

Qui de civitate, vel castello, vel burgo, vel dominico manerio regis fuerit, si ab archidiacono vel episcopo de aliquo delicto citatus fuerit, unde debeat eis respondere, et ad citationes eorum satisfacere noluerit, bene licet eum sub interdicto ponere, sed non debet excommunicari, priusquam capitalis minister regis loci illius conveniatur, ut iustitiet eum ad satisfactionem venire. Et si minister regis inde defecerit, ipse erit in misericordia regis, et exinde poterit episcopus ipsum accusatum ecclesiastica iustitia coercere.

NOTULA 11. HOC TOLERAVIT.

Archiepiscopi, episcopi, et universæ personæ regni, qui de rege tenent in capite, habeant possessiones suas de rege, sicut baroniam, et inde respondeant iustitiis regis et ministris, et sequantur et faciant omnes rectitudines et consuetudines regias; et sicut cæteri barones debent interesse iudiciis curiæ regis cum baronibus, usquequo perveniatur in iudicio ad diminutionem membrorum vel ad mortem.

NOTULA 12. HOC DAMNAVIT

Cum vacaverit archiepiscopatus, vel episcopatus, vel abbatia, vel prioratus de dominio regis, debet esse in manu ejus et inde percipiet omnes redditus et exitus sicut dominicos. Et cum ventum fuerit ad consulendum Ecclesiæ, debet dominus rex mandare potiores personas Ecclesiæ, et in capella ipsius debet electio fieri assensu regis, et consilio personarum regni, quas ad hoc faciendum vocaverit. Et ibidem

A faciet electus homagium et fidelitatem domino regi, sicut ligio domino de vita sua, et membris, et de honore suo terreno, salvo ordine suo, prius quam sit consecratus.

NOTULA 13. HOC TOLERAVIT.

Si quisquam de proceribus regni diffortiaverit archiepiscopo vel episcopo, vel archidiacono de se vel de suis iustitiis exhibere, rex debet iustitiare. Et si forte aliquis diffortiaret domino regi rectitudinem suam, archiepiscopi et episcopi et archidiaconi debent eum iustitiare, ut regi satisfaciatur.

NOTULA 14. HOC TOLERAVIT.

Catalla eorum, qui sunt in regis forisfacto, non delineat ecclesia vel cæmeterium contra iustitiam regis, quia ipsius regis sunt, sive in ecclesiis, sive extra fuerint inventa.

NOTULA 15. HOC DAMNAVIT.

Placita de debitis, quæ fide interposita debentur, vel absque interpositione fidei, sint in curia regis.

NOTULA 16. HOC TOLERAVIT.

Filii rusticorum non debent ordinari absque assensu domini, de cujus terra nati esse dignoscuntur.

Singulis vero damnatis his mox singulas damnationis suæ causas subjecissem, nisi quia cuius vel modicam sacrorum canonum habenti experientiam statim in primo auditu notissimæ sunt.

Facta est autem prædictarum consuetudinum et dignitatum regiarum recordatio ab archiepiscopis, episcopis, comitibus, baronibus, nobilioribus et antiquioribus regni, apud Clarendunam, quarto die ante Purificationem sanctæ Mariæ Virginis, domino Henrico filio regis cum patre suo ibidem præsentem.]...

Hæc ultima, uncinis inclusa, ex quadrilogo addidi: nam codex Atrabatenensis imperfectus est post voces « archiepiscopi et episcopi. » At codex collegii Corporis Christi ne librum quidem Melorum ad finem perducit, sicut in initio, ita et in fine mutilus et laceratus.

EPISTOLÆ HERBERTI DE BOSEHAM

IN PERSONA S. THOMÆ CANTUARIENSIS ET ALIORUM SCRIPTÆ.

EPISTOLA PRIMA [AD.....]

[Deest initium, uno aut pluribus foliis e cod. C.C.C. Cantabrig. amissis]..... [dis]cretio tua, serenissime consul. Detraeto igitur huic epistolæ solemnii illo rhetoricorum ornatu, in hoc tenui sim-

Dplicis eloquii schemate me gloriæ tuæ oculis præsumpsi ingerere, præsertim cum talia referantur, quæ tuum sicut spero delectabunt auditum. Nam, cum sæcularium et maxime divinarum historiarum utriusque legis multam tibi scientiarum

Dominus dederit peritiam, certus sum evangelicæ historiæ veritatem eo devotius te amplexaturum auditam, quo ipsum Evangelium cæteris omnibus Scripturarum scientiis præmineat. Ego tamen recolo, sed dubius an a pectore claritudinis tuæ exciderit, me de instituta materia, videlicet super Anna quæ dicitur trinuba et supernomine Salomæ quod Marcus ponit, cum hoc anno tecum facerem iter, nonnulla quidem, sed breviter et intercise ut inter viandum fieri solet contulisse, et quia sensum meum quem interloquebar tibi satis tunc sedere conieci, ex tunc sacrarum litterarum tractatores, præcipue illos quibus præpositi veritas amplius clarescere debuit conquisivi legi, et ut res dubia patelleret testimoniorum hinc inde carptis prout præsens epistola edocet desloravi. Et præterea veniens ad nos dilectus socius noster magister Joannes Saresberiensis, notus tibi ut arbitror, quamdam schedulam ex parte ejusdam fratris magistri Wilhelmi Londoniensis viri, ut scitis, litterati et, ut creditur, religiosi, qui apud Sanctum Dionysium monachus est, detulit, quæ Claudii super Mattheum prætitulabatur; ubi continebatur Claudium illum juxta Origenis suspicionem opinari illam, quam Mattheus dicit matrem filiorum Zebedæi, a Marco Salome proprio nomine vocitari, quoniam ob id schedulam dictus frater mihi facta operose expositionum indagatione transmisit, quia sciens illum aliquam in litteris habere virtutem, super nomine Salomæ hoc anno sollicitaveram. Cum enim me sedulo interrogante Salomæ juxta nostrorum fabulam tertium fuisse Annæ virum contenderet, ego qua id Scripturæ auctoritate defenderet sæpe et sæpius sicut mos est sciscitabar. Et, ne inter verborum pignas ad Hieronymum in epistola contra Heliodium, ut cæteri solent, proclamaret, citius obstruxi viam, rem optime expertam asseverans, quod in tota epistola nulla seu Annæ seu aliqujus Annæ viri etiam mentio habeatur, nec etiam novum Salomæ reperiri. Videtur potius in ea epistola Hieronymus non astruere, sed adimere istam de tribus Annæ viris assertionem. Ait enim quod Maria quæ Jacobi minoris scribitur mater, fuerit uxor Alphæi et soror Mariæ matris Domini, quam Mariam Cleophae Joannes evangelista cognominat: A patre, inquit, sive a gentilitate familiæ aut quacunque alia causa ei nomen imponens. Pariter et Beda cernens ubi vetulus bos scilicet Hieronymus altius pedem figere metuit, titubando sequens articulatō incedit gradu, super evangelistas in explanationibus suis dicens Mariam illam uxorem Alphæi ideo a Joanne Mariam Cleophae cognominatam, quia vel idem Alphæus etiam Cleophas dictus sit, vel quod ipsa Maria defuncto post natum Jacobum Alphæo Cleophae nupserit. Ecce quia Beda Hieronymum secutus nil præsumit asserere; alias tamen quam Hieronymus ponens cognominis Cleophae conjecturas. Et altera quidem quam subjicit opinio assertioni de tribus illis Annæ viris invenitur multum adversa. Quoniam

A Cleophas, quem illi asserunt virum Annæ et patrem Mariæ, juxta hanc quam Beda ponit conjecturam, vir ejusdem Mariæ æstimatur. Unde, si vera est contrariorum assertio, non possum admirari quomodo tanti doctores, tanti etiam historiarum indagatores, et qui explanandi studio super evangelistas adeo desudarunt, evangelicam historiam, quam moderni sciunt, veteres ignorarint, quinimo opinionones veritati historiæ tam absurde dissonas perpetuis garrularum litterarum mandaverint monumentis: vix possem credere nos animales et carnos super evangelica præsertim historia didicisse, quod præcipuos illos et primos illos doctores Ecclesiæ latuisset: qui nec etiam legere sufficimus quanta illi scripserunt. Hos igitur Annæ trinubæ assertores velut aliquorum apocryphorum deliramenta sectantes omittamus: et diligentius intueamur quod illi præfati doctores Hieronymus et Beda non asserant Mariam Cleophae sic cognominatam a patre, sed ambigui scilicet et stylo verecunde parentes, verebantur rem incertam infra certæ definitionis fines concludere. Miror igitur admodum unde tam inverecundus error acciderit, ut ad rei incertæ assertionem librati tanti viri dogmati, Hieronymi dico, calumnia strueretur, et ut Hispanæ neniæ authenticæ fiant ecclesiastici falso provocatur auctoritas. Arbitror tamen quod his diebus erroris maxime invaluerit, occasione magistri mei suavis recordationis Petri Pariensis episcopi, qui, cum in epistola ad Galatas super locum illum: *Alium autem apostolorum neminem vidi nisi Jacobum fratrem Domini (Gal. 1)*, vulgatam illam Annule (sic) trinubæ edisserat historiam, seorsim in margine nomen Hieronymi minio colore signavit; at si illam Annæ historiam Hieronymus in epistola contra Heliodium eisdem verborum filis contexerat, cum tamen illi historiæ Hieronymus, sicut jam diximus et experti novimus, nec in uno apice auctoritatem testimonii conferat; nunquid igitur magister Petrus, ut Scripturarum calumniator notatus, in causa erit erroris et culpa? Non fatebor: malo in præsentiarum lubricam scriptoris manum notare et imperitiam quam tantum doctorem calumniæ causari vel erroris. Verum excusatus hinc excusabitur inde, quod super præfatum epistolæ ad Galatas locum celebrem illam Annæ historiæ nullam, ut videtur, Scripturæ secutus auctoritatem non tardo et titubante ambigui sermonis gradu, sed constanti et concito absque ullo hæitationis scrupulo prosequatur: adeo etiam ut si apocryphorum deliramenta sectaretur, nec ubi sic relatum sit facile reperiat, cum nec etiam in apocrypho illo qui de infantia Salvatoris inscribitur, ulla de tribus Annæ viris mentio fiat nisi duntaxat Joatham. Verum nec ob id præfato doctóri, qui modernis temporibus in ecclesiasticis dogmatibus parem non habuit, audeo in præsentiarum temeritatis vel ignorantie impingere notam, nec in quoquam accusare præsumo: ne quis tamen hinc æstimet me adeo in doctorum meorum laude

procacem ut ipsorum velim sequi vitia seu penitus A ignorantiam tollere vel tueri errantes. Sed scio valde periculosum esse et non facile veniam de servo alterius, nedum de magistro proprio iudicare, præsertim cum ille tanta et tam studiose legerit, quæ nos epicura animalia Pelusiote et torpore glires vix perfunctorie transcurrimus, imò quorum multa nec etiam vidimus. Semoveatur igitur nunc ab hac præsentii collatione nostra tanti doctoris auctoritas, qui profecto nec dubito, si adviveret, variis et validis Scripturarum testimoniis valde militiæ suæ armis scripta sua fortius contra amulos suos defenderet, qui tamen in præsentiarum in relatione præfata quem secutus fuerit auctorem ignoratur. Hujus igitur auctoritate remota, quem in præsentii nec penitus excuso, nec ut jam dixi temere accusare præsumo, certa præponamus incertis, et nomen Salomæ quod Marcus ponit mulieris ibi esse nomen non viri, non disputatione lubrica, sed firmis Scripturarum testimoniis defendamus. Accedat primus maximus ille et antiquissimus Scripturarum interpres : Origenem dico, qui sicut historiæ fide celebre est, centum et quinquaginta annis et amplius adhuc ante Ambrosium, Hieronymum, Augustinum et reliquos sacrarum litterarum interpretes, die noctuque in divinarum legum explanationibus desudavit, et primus absque exemplo et solus sine socio quantum litteris illis potuisset edocuit, quem utinam tam Catholicum suscepissemus dogmatistam quam fidum admiramur interpretem. Hic, inquam, accedat primus, qui eo magis veritatem evangelicæ historiæ et Domini in carne conversantis consortes cognoscere debuit, quo et primis illis nascentis Ecclesiæ temporibus vicinior fuit : prius itaque evangelistæ verba ponamus : *Erant autem* inquit Matthæus, *ibi mulieres videntes a longe, quæ secutæ fuerant Jesum a Galilæa ministrantes ei, inter quas erat Maria Magdalene et Maria Jacobi et Joseph mater et mater filiorum Zebedæi* (Matth. xxvii). Ecce verba evangelistæ, super quem in commentario suo Origenes inter alia sic edisserit : « Si autem, inquit, oportet opinari et dicere etiam nomen matris filiorum Zebedæi, dico quoniam hæc ipsa fuerat Salome *pacifica* appellata. Opinatus sum autem hoc videns apud Matthæum et Marcum tres præcipuas mulieres nominatas, de quibus præsens sermo habetur; et duas quidem esse præsens evangelista exponit Mariam Magdalenam et Mariam Jacobi, tertiam autem dicit matrem filiorum Zebedæi; apud Marcum autem tertia illa Salome appellatur. » Et infra : « Et hoc observo, quoniam superius duæ istæ Mariæ et mater filiorum Zebedæi quam æstinamus Salomen, de longe spectabant mirabilia quæ in passione fiebant, et corpus ejus suspensum in ligno. » Audivimus Origenem; cui et super eundem evangelistæ locum in explanatione sua super eundem evangelistam Claudius consonat, post supraposita evangelistæ verba ita inquires : « De his mulieribus magna quam sæpe ambiguitas nascitur, sicut in hoc loco, ubi Matthæus dicit matrem

filiorum Zebedæi fuisse cum reliquis duabus. » Marcus Salomen illam fuisse commemorat. Nec igitur mirum, cum utrique eorum, licet tres nominaverint, plures fuisse insinuent, quæ fuerant eum secutæ a Galilæa et erant aspicientes de longe, inter quas erant istæ tres, de quibus Matthæus dicit, et Marcus similiter nominat, nisi quia pro matre filiorum Zebedæi Salomen ac si alteram ponit. Poterat enim esse ut illa esset quæ de his multis a Marco tertia poneretur. Nihil enim interest ad veritatem, quas mulieres idem pariter quas singuli ex his omnibus nominaverint. Suspiciatur tamen Origenes eandem Salomen fuisse matrem filiorum Zebedæi quæ mater ita vocatur, et post pauca idem Claudius. Unde liceat opinari et dicere nomen matris filiorum Zebedæi quod ipsa sit quæ a Marco Salome vocatur. Quoniam utrasque præcipuas absque dubio inter cæteras uterque evangelista ex nomine designavit, et ideo forte Salome vocatur, quia Salome *pacifica* interpretatur. Unde, quia reliquæ duæ magni meriti erant, non immerito suspicor et hæc tertiam ipsam esse matrem filiorum Zebedæi, quæ et apud Marcum et ipsa tertia Salome vocatur. Joannes etiam Chrysostomus in homilia quadam de passione Domini super Matthæum nomen Salome, quod Marcus ponit, proprium fuisse filiorum Zebedæi, cæteris fortius et expressius, non lubrico, sed rotundo sermone asseverat. Cujus [verba] huic epistolæ non inserui, quia inter scribendum hæc Senonis reperire non potui. Item in martyrologio quod in Ecclesia Dei per totum anni circulum legitur, in capitulo cui xi Kal. Novemb. inscribitur, sic habetur : Apud Adrianopolim Thraciæ, natalis sanctorum martyrum Philippi episcopi, Eusebii, Hermetis, » et infra : « item sanctæ Salomæ quæ in Evangelio legitur circa Domini sepulturam sollicita. » Ex his omnibus luce clarius liquet per nomen Salomæ, quod Marcus ponit, mulierem illam quæ a Matthæo mater filiorum Zebedæi dicitur a Marco sic tanquam nomine proprio designari. Item aliunde docemur manifeste quod Salome nomen mulieris sit. Unde Hieronymus in libro Hebraicorum nominum dicit quod Salome *pacifica* interpretatur et in libro antiquitatum Josephi filia Herodis ubique dicitur Salome utpote quæ sic suo nomine D appelletur. Cum autem, ut jam dixi, apud Sanctum Dionysium essem et præfatum magistrum Willelmum Londoniensem non quidem procaciter, sed sedulo tamen et instanter super jam sæpe dicto nomine Salomæ convenirem, inter modestas verborum pugnas quidam alius frater magister Willelmus nomine, quondam officio medicus, nunc vero ut speratur sicut habitum monachi et animum gerens, supervenit, qui ut alterationis causam advertit, audientia postulata, aiebat se inter Syros aliquanto tempore conversatum, et ibi esse Ecclesiam in honore trium Mariarum dedicatam quam Syri summa venerantur devotione, adjiciens quod sicut juxta populi terræ traditionem acceperat, una sit Maria Magdalena, secunda Maria Jacobi et Joseph mater,

tertia mater filiorum Zebedæi, quæ et Maria juxta Syros sit appellata, et tunc ad me verbum specialiter dirigens: Potuit, inquit, et hæc eadem, sicut tu secundum majorum testimonia probabiliter disputas, et Salome appellari. — « Esto, dixi, in hac parte contentiosum funem non traho, dummodo constet nomen Salomæ a Marco in designatione mulieris poni. » In hoc, inquam, contentiosus non ero. Siquidem didici Scripturæ consuetudinem eundem hominem diversis nominibus appellare, quod tamen in feminis multo rarius obtinet. Verumtamen quod mulier illa evangelica, de qua jam multum sermonem serui, non solum Salome sed et Maria dicta sit, probabilem hinc sumo conjecturam: solent siquidem multæ Ecclesiæ ab antiquo per singulos anni circulos in dilucuo resurrectionis Dominicæ ad devotionis augmentum, trium Mariarum Dominum in sepulcro operose et devote cum unguentis quærentium, non irreligiosas ostentare præstigias, et quæ sunt hæc tres Mariæ, verius, ut arbitror, non intinabunt, quam si una dicatur Maria Magdalena, altera Maria Jacobi et Joseph mater, et tertia Maria quæ et Salome, mater filiorum Zebedæi. Verum, ut jam diximus, in hac parte contentiosus non ero; duntaxat Salome nomen mulieris fuisse in Marco obtentum fuerit. Verum ab hac assertionem, non dico opinione, poterit nos aliquantisper amovere illud quod de his mulieribus in quadam homilia Paschali legitur, quam vidi Gregorii inscriptam: *Maria Magdalene*; inquit Marcus evangelista, et *Maria Jacobi emerunt aromata, ut venientes ungerent Jesum* (Marc. xvi, 1), etc. Commendat, inquit Gregorius, lectio evangelica sanctarum mulierum devotionem, et infra: *Maria Magdalene*, inquit, ipsa soror Lazari, quæ unxit Dominum unguento (Joan. xi, 2). Maria Jacobi mater est Jacobi junioris et Joseph et soror matris Domini. Maria Salome a viro vel avito dicta est. Tradunt enim eam duos viros habuisse, Cleopham scilicet et Salomam, ipsam quoque volunt esse, quæ alibi Maria Cleophæ appellatur. Ecce verba homiliæ quam Gregorii præscriptam legi, cujus tamen procul dubio non est, potius inter apocrypha computatur, quæ tamen, sicut intulatur, si esset Gregorii vel cujusvis ecclesiastici, nec sic pro Annæ trinubæ assertoribus faceret, sed potius obviat, refert siquidem opinionem secundum quam Cleophas quem isti novæ historiæ assertores faciunt virum Annæ et patrem Mariæ, ipsius Mariæ conjux æstimatur. Sentio, domine in Christo mihi amantissime, dum proptere Scripturas hinc inde pro viribus meis spoliarem ut ipsarum testimoniis quomodovis propositis veritas magis ac magis ornata claresceret, me subito sermonis impetu velut effreni equo evectum, regulares epistolæ metas excessisse, adeo ut nec videar epistolæ nec multiplicibus occupationibus tuis pepercisse. Sed advertat dominus meus, quia cum sim canis mortuus et pulex unus contra magnos et modernos novæ historiæ imo inveteratæ fabulæ assertores novæ su-

A sereperim disputationis gressum. Unde et necesse fuit singula diligentius prosequi, et non disputationis lubrico, sed evidentibus et irrefragabilibus majorum testimoniis falsitatem convellere. Id autem in calce sermonis adjicio, quod sicut nunc et alias tibi de his, quæ me in Scripturis persæpe torquent, persæpe scriberem, nisi vererer me inquietudinem magis præstare quam officium, inter tam magna et multiplicia negotia quæ tibi rara hora deesse possunt aut desunt, utpote cui totum debeo modicum id quod sum, siquidem præsentem mei et meorum in exsilio quod adhuc tam juste pressuram magnifica et celebris liberalitas vestra mitigavit. Ad quam sicut celebre est, nemo confugiens confusus abiit, ob id etiam potissimum ascribendum persæpe vix contineo stylum, quod non solum modernos principes, sed et multos et nominatos hujus officii viros in amore litterarum et adepto ipsarum culmine excesseris. Porro, si Pythagoras adviveret, ob amorem istum præcipuum et ob alias si attendimus naturæ bene institutæ dotes, divæ recordationis Constantini magni spiritum in vos descendisse proclamaret. Sed non pergo nunc gratiarum nostrarum ulterius dona prosequi. Sufficit quæ universi norunt tetigisse: præsertim ne videar in præsentiarum non propter propositum, sed potius propter enumerationem gratiarum vestrarum catalogum cœptum instituisse sermonem, id in fine orans, quod si forte nuntii domini regis Anglorum in celsitudinis tuæ conspectu opinionem domini Cantuariensis seu parvitatæ meæ labiis detrahentibus gravare attentaverint, ne adhibeat fidem prudentia tua. Nam, licet demus pœnas pro meritis, collocati in obscuris sicut mortui sæculi, in nos tamen quotidie psallunt qui vinum bibunt, et me persertim hominem exsulem et obscurum, quod modo manibus nequeunt, linguis suis ubique consecantur, objicientes mihi quod anno præterito domino regi Angliæ nescio quæ Andegavis in superbia et in abusione locutus fuerim, quæ tamen illa fuerint, credo me tibi (nescio si prudentia tua nunc recolat) fideliter retulisse. Sed esto; David mansuetudinem deprecabor, et Semei non verebor opprobrium; eo ipso potius peccatorum meorum vulnera curabuntur, et ponens interim ori meo custodiam in necessariam misericordiæ vocem erumpam: *Miserere mei, Domine, miserere mei, quia repletus sum despectione, factus opprobrium abundantibus et despectio superbis* (Psal. cxlii).

EPISTOLA II

EPISTOLA HERBERTI IN PERSONA THOMÆ CANTUARIENSIS ARCHIEPISCOPI EXSULANTIS AD ALEXANDRUM PAPAM CONTRA GILBERTUM LONDONIENSEM EPISCOPUM JAM EXCOMMUNICATUM.

Amantissimo sibi in Christo Patri et domino ALEXANDRO, Dei gratia summo pontifici. THOMAS Cantuariorum Ecclesiæ exsul miserabilis, debitam cum omni devotione obedientiam.

Quod tam crebris et querulis vocibus tanta ma-

jestatis me presentia ingero, non quidem irreverentia in causa est, sed et pressura quæ et nunc cogit ut non lenta, sed de more luctuosa currat oratio, et eo nunc luctuosius, quo periclitor gravius a malo utique domestico et intestino. Ecce enim illam justissimi ut creditur anathematis censuram in fratrem, et utinam vere fratrem! Londoniensem episcopum promulgatam, quam ceteri fratres nostri provinciales episcopi exaudito litterarum nostrarum tenore, ut vere justam approbarunt, solus ipse contemnet, solus et totus in ira et disceptatione positus, totum per contentionem agens furor ei sicut jam dicitur secundum similitudinem serpentis, sicut aspidis surdæ et obturantis aures suas, ne vocem sapientis incantantis exaudiat. Et quod adhuc plango lacrymosius quia cæteris detestabilior est, isto furoris sui et impatientiæ spiritu rumpit professionis et obedientiæ vincula, matris suæ latera concutit et se excutit foras. Inter cætera siquidem ad infirmandum in ipsum latam sententiam convocato ad id universo civitatis clero, multis quoque astantibus et audientibus publice attestatus est se neque ratione personæ suæ neque Ecclesiæ nunc sibi creditæ, metropoli Ecclesiæ seu metropolitani personæ ullõ professionis aut obedientiæ vinculo astringi. Ratione personæ non teneri se asserit, quia facta est translatio personæ absque nova professionis vel obedientiæ exhibitione. Et inclinavit profecto ex hoc in hoc utinam exinanita fuisset sex ejus. « Pariter et Ecclesia ad quam translatus est ipsum liberat penitus, inquit, quia et ipsa ab antiquis ut refert paganorum temporibus, ab omni Cantuariensis Ecclesiæ subjectione libera fuit. » Unde et se de jure archipræsulem debere fieri publice contendebat et archipræsulatum sibi frontose nimis vindicare non erubuit. Hæc autem non in angulo, sed universo, ut jam dixi, ad id ipsum convocato civitatis clero, multis quoque de populo astantibus et audientibus gesta sunt. Unde, sicut jam diu clamavit mundus, manifeste nunc testantur opera. Prodit enim quasi ex adipe diu operum iniquitas, nec amplius tegi poterat, ira et impatientia pessimis usa consultoribus. Accedit autem malorum cumulo quod hanc tam detestandam contensionem et tam execrabilia manifestæ Inobedientiæ verba sub alarum vestrarum velamento coalitura existimat. Qui ut accepit me sacerdotio meo posse libere fungi, mox nescio ad quod ut dicit provocationis non refugium, sed suffugium convolvavit, necdum profecto in ullo gravatus, sed gravare intendens, nisi quod forte suum reputabat gravamen, si non me in priora conjecto vincula militiæ meæ arma ademisset. Quin potius in nullo gravatus non modicum gravavit appellans. Nam eo ipso pacis ecclesiasticæ auram, quæ etiam a pacis inimicis et ipsam diu desperantibus putabatur, statuit in procellam et fluctus aliquantisper sedatos superbiæ suæ vento amplius excitavit. Evigilet

A se igitur, pater clemens et juste iudex, consideratio vestra. Evigilet se ad tam iniquæ appellationis abusionem, ne ad invocationem tanti et tam sancti nominis tui, quasi sub alarum vestrarum umbra extinguatur obedientia et foveatur iniquitas. Excutiat se potius excussorum filius, moveatur miseratio, moveatur et indignatio vestra: alteram quippe debetis laso, alteram lædenti, ne in potestate tanta periclitetur aut clementiæ pietas aut zeli rectitudo. Non enim erit quis innocens, si aut puniat illum cui parcendum est, aut parcat ei qui fuerat puniendus. Proinde moveat vos, clementissime Pater, hinc censura justitiæ, inde compassio misericordiæ, ut ita in vicario Christi et Christo Domini justitia et pax osculentur se invicem. « Amant enim se duo hæc, ait quidam, ut qui facit justitiam inveniat pacem, et non aliter. » Moveat igitur vos mea meorumque pressura et causa pressuræ et præ cæteris naufragium naviculæ, in qua te jubente ascendi in altum, ut retia laxarem in capturam. Eam siquidem vosmet meo credidistis regimini, quam tamen meis manibus sine vestris viribus præsertim inter tantas seditionum et dissensionum tempestates nequaquam gubernare sufficio. Advertat etiam miseratio vestra quantis fuerit navicula hæc ab antiquis illis parentum nostrorum temporibus jactata fluctibus, tonsa quidem persæpe sed fracta nunquam, quinimo semper liberam de medio petrarum dabat vocem, non ut confracta sed solida. Siquidem quæ nunc in tanta pressura cernitur Cantuariensis Ecclesia, ab apostolicæ sedis obedientia, cui vos nunc Domino Ecclesiam suam miserante presidetis non dico recessit, sed nec etiam in modico, etsi in corde maris sita, nullo terrenarum potestatum metu seu gratia titubavit. Pro ipsa igitur apostolatui vestro ad hos dies adeo devota et a vobismet mihi credita, totis animi viribus et genibus provolutus ego et passionis meæ socii supplicamus, quatenus rectore ipsius filii etiam periclitantibus ipsa saltem in singulari vestri primatus fortitudine in statu suo et gradu pristino integra conservetur. In line autem præsentium intimamus quod circa ipsorum finem accepimus, moveri videlicet quam plurimos plurimum eo quod nuntius domini regis Anglorum Reginaldus Saresburiensis archidiaconus a vobis revertens, et per nostri exsili civitatem transitum faciens, multa, ut dicitur, in superbia et in abusione locutus est, addens inter alia et de se loquens, quod etsi ipse non esset Cantuariensis archiepiscopus ipse tamen Cantuariensis archiepiscopi victos anathemate solveret et adhuc rerum Cantuariensis Ecclesiæ invasores ab omni ablatorum, tam mobilium quam immobilium, restitutione ex toto liberaret, in verbi sui testimonium nescio quos mercatores secum ductos velut digito ostentans, quibus vestro nomine se pecuniam soluturum divulgabat his aliis aliquid, nihil autem mihi et verbis his: nec confundor enim nec moveor, quia, velit, nolit mundus, si quid possem ad gloriam, verum ad Ecclesiæ ignominiam vel detri-

mentum miserante Domino facturus sum nihil, nec unquam res sive vasa templi sanguine Christi elaborata et dicata pauperibus ipsius etiam Christi deputata obsequiis Balthasar, me assentiente, in lascivie suæ usus convertet : quin potius calamitosæ, et exularis vitæ meæ residuum juvante et jubente te vicario Christi et christo Domini superimpendere paratus sum.

EPISTOLA III.

EPISTOLA HERBERTI IN PERSONA THOMÆ CANTUARIENSIS
ARCHIEPI-SKOPI CONTRA EUNDEM.

Reverendissimo Patri et dom'no ALEXANDRO, Dei gratia summo pontifici, THOMAS, miseræ Cantuariensis Ecclesiæ minister humilis et miserabilis exsul, salutem et omnem cum summa devotione obedientiam.

Cum ego pauper et dolens tantæ majestatis regiam clamoribus querulis ad omnia et sæpe urgentia præsentis agonis mei pericula crebro nimis et importune pulsaverim, nunc eo instantius quo urgeor gravius, ad solitum præsidium recurrimus. Pulsa igitur verecundia et quodammodo majestatem non pensans, nudum et omni ope destitutum humana tantæ majestatis me oculis ingero, qui potius in hoc paupere et tenui membranulæ schemate quotquot sumus coloris et migrationis filii, pietatis tantæ pedibus advolvimur, regiam illam clementiam quadam lacrymarum nostrarum dextra et diuturna jam vitæ nostræ miseria pulsantes, ut misericordiæ vestræ januas miserabilis ingreditur oratio nostra : nunc præsertim cum allophytus ille nunc demum revelatus corporis sui mole parvitatem meam despiciens universum Israellem singulari certamine provocet, ut ita in se summam belli et totius prælii pondus excipiens Philistæa omnis victoria et ipse præ cæteris victoriæ gloria ponatur. Sed quid? Goliath significo, utinam vel solum se Goliath exhibuisset, quin potius periculosior est. Nam sicut clamat mundus, testantur opera, filium adversus patrem quibus potest consiliis instruit, ut idem sit nobis Achitophel in abscondito et Goliath in aperto. Et attendat paulisper discretio vestra, si non ipsius opera testimonium his quæ de ipso dicuntur perhibeant.

Prima objectio. Primo in Anglia apud Northampton, cum in tanto versarer discrimine adeo ut ipsi et aliis fratribus et coepiscopis nostris a divinis districtæ præciperem cessare officiis, si propriæ meæ personæ violentiæ quod multi tunc juste intuebantur, mitterentur manus, multis qui tunc aderant coepiscopis nostris audientibus, clericis etiam nonnullis, iste confestim appellavit, quasi ex eo gravaretur, si non mihi vincula fuissent injecta. Quam iniqua fuerit hæc appellatio, et quantam adversus appellantem faciat præsumptionem, vestra, si placeat, consideratio hæc.

Secunda objectio. Præterea Senonis in sublimitatis vestræ præsentia advocans quantum adversus parvitatem meam linguam suam acuerit, et nisi cohibuisset miseratio vestra, quantis probris et contumeliis lacerasset ipsum patrem suum jam exsu-

A lantem et absentem, excidisse non arbitror. Unde et eo solo maledici meruit quod patris sui pudenda revelare attentavit.

Tertia objectio. Præterea me Senonis a vexationibus meis et angustiis ad clementiæ vestræ sinum properante, nec a jam sæpe dicto fratre et utinam vero fratre expectatum idem tempore in terram reversus una cum cæteris, nisi quia inter cæteros major necdum accepto super hoc regis mandato spoliavit et universa Ecclesiæ bona fecit confiscari.

Quarta objectio. Præterea hoc nulla commentitia et concinnata fraude valebit, seu in tantæ majestatis oculis audebit tegere : quin sciens et prudens ante propriam sui excommunicationem ex nomine meis excommunicatis communicaverit. Illud etiam anathematis vinculum quo in præsentiarum innodatus est, ut certissime mei persuasum est, solvit ecclesiam intrans ipsis etiam missarum assistens solemnibus.

Quinta objectio. Qualiter etiam sacros vestræ excellentiæ apices suppresserit et parvitatibus meæ mandata contempserit, omnino auditum est.

Sexta objectio. Quoties vero et ob quas causas super hisdem negotii articulis appellaverit, et idiotæ et plebei per vicos et plateas garrunt, sperant quod ad invocationem sancti nominis tui quasi sub alarum tuarum regimine persequentium nos iniquitas et injustitia coalescere potuissent.

Septima objectio. Novissime etiam dum consueto hoc non refugio uteretur sed suffugio, quod cæteris omnibus longe cœlestibus iudico, non clam sed coram populo, cubile patris attentavit ascendere, et se de jure metropolitanum esse publice contendere non erubuit ; adjiciens etiam quia inclinavit ex hoc in hoc ex Herefordia Londoniensis factus, Cantuariensi vero metropolitano nullo astringi professionis seu obedientiæ vinculo, cum in sui translatione hæc exacta non fuerint. De quibus tamen memini me alias vestræ plenius charitati scripsisse. Ipsa igitur Cantuariensis Ecclesia tam multiplices illecebrosæ artis nexus ultra non sustinens, illius caput contrivit, cujus toties calcaneo fuerat insidiatus. Sed non pergo nunc alterius illius exagitare excessus : sufficiat tetigisse. Præteritis enim multis ea duntaxat recolere quæ lapides et marmora clamant. Horum etiam multa ex multorum revelatione ad vos commentantium effugisse non arbitror. In omnibus enim his coram populo processit in campum armatus ut Philistis bella dimicare. Verum Goliath in campo, in conclavi Achitophel erat, adeo etiam ut nuntiis domini regis proxime a sanctitate vestra revertentibus, Ricardo videlicet Barre et Radulfo archidiacono, verbum pacis, quod tunc sedulo quidem et officiose tractabatur, una cum archidiabolo illo Galfrido Ridel concilii sui nisibus ruperit. In cujus etiam spe verbi ego cum coexulibus meis conscientia regis et voluntate Pontisæram jam usque processeram, apud Calvum montem cum venerabili fratre nostro domino Rotomagensi habiturus colloquium ;

deinde juxta eventum colloqui ad regem qui ob id propius se accessurum disposuerat processurus. Verum in eo articulo jam dicti regis nuntiis adventantibus, sicut a Chusi fideliter accepi, omnis ille apparatus frustratus est consilio Achitophel forsitan a nuntiis aliquo in mee depressionis augmentum et restitutionis suæ spem certam accipiens. Sed esto : *Dominus mihi adjutor (Psal. cxvii), non timebo quid faciat mihi caro (Psal. lv)*. Spero etiam certissime quod, te duce, te rectore, procella mea statuatur in auram et tempestas erumpens super caput impii veniet. Unde ego sicut ipsorum minimus ita hodie et miserrimus et quoque passionis istius socii sunt, sanctitatis vestræ genibus provolutis et manibus expansis supplicamus et quantas audemus majestati tantæ porrigimus preces : Dissipa, Domine, concilium Achitophel et percute caput de domo impii. Et sicut inde David vice fungeris opus id probet; singulari solertia et fortitudine tua Goliath alter prosterneatur et caput amittat, quod, ut jam supra monstravimus, in tam multas ares vertit et fraudes. Nam tu solus in militia tanto certamini habilis æstimaris. Et tunc profecto in decem millibus juvenularum psallentium testimonio triumphabis. Nam posuissent pereunte alii manus suas lavabunt in sanguine peccatoris, juxta quod unus sanctorum ait : « Melius esse ut paucorum damnatione plurimi liberentur quam eorum absolutione plures periclitentur. » Alioquin certe injusta misericordia est. Consulte ergo, Eliæ zelum et gladius Phineas a cordis vestri ne excidat manibus; et videte quo zelo dignus sit qui operatus est sic, qui patrem suum retrusit in carcerem, nudavit et adhuc tenet in vinculis, et quod plango lacrymosius, quia cæteris detestabilius est, patris sui sponsam zelatus est sibi, et non in conclavi hoc, sed, ut supra diximus, publice cubile patris violare attentavit, protestans, populo et clero civitatis suæ audiente, se jure debere metropolim obtinere, nec Cantuariensi ullo astringi professionis seu obedientie vinculo. Igitur an absolutionem seu condemnationem meruerit tam malitiosa operatus, tam superba locutus, singularis primatus vestri consideratio hæc. Et, si forsitan secundum ecclesiasticum morem anathematis absolutionem impetravit, an in hoc ipso parvitate meæ, quam adeo contumaciter contempsit, quin potius an matri suæ Ecclesiæ, cujus publice et tam impudenter rupit professionis et obedientie vincula, debeat reservari auctoritas; vestra itidem consideratio hæc : et ut tantæ majestati non tam temere quam timide hæc loquor, singulis studiose oppressis in hanc spem non esset absonum et pro certo ad Ecclesiæ pacem fieret expeditior via, si qualis accedit talis reverteretur. Alioquin scitote et ego certus sum, quod sicut jam sæpe accidit, curabitur contritio nostra cum ignominia. Dicent enim : *Pax, pax, et non est pax (Ezech. xxi)*. Hæc idcirco adeo et confidens dixerim, quod ex solo justitiæ metu humiliatio erit et ad pacem accessus, quam sola justitia poterit, juxta quod egre-

gius ille doctor pariter et rector : « Amant, inquit, se hæc duo, » etc. etc., etc. Videar forte in suggillationem personæ Londoniensis nimius, et odio potius quam ex judicio tam dura tam amara scripsisse. Sed testis est mihi is cui omnis voluntas loquitur, et cui nunc sermo in vinculis meis quomodo cupiam eum in visceribus Christi Jesu, qui etsi mihi filialem, ego tamen illi, Dominus scit, affectum patris non subtraxi : id magis et magis inter vincula mea desiderans ut digne ambulassemus vocatione qua vocati sumus, cum omni humilitate et mansuetudine alter alterius onera portantes. Adverto me jam in tanta sermonis longitudine epistolarem omnem brevitate excessisse. Unde vereor tantæ majestatis offendisse auditum, ad alia tam magna et tam multiplicia mortalis vitæ hujus negotia intentum. Sed spero quod qui tam paterno tam materno etiam affectu compatitur meis afflictionibus, facile indulgentiam tribuat verborum excessibus : præsertim cum brevi non potuisset stringi sermone quod sensibus et doloribus dilatatum est. Præterea aliq̃ breviores, quas etiam præter has vestræ transmitto sanctitati, jam scripseram litteras, cum ecce subito cursor intraret qui profectionem Londoniensis ad curiam et alia pleraque hic contenta nuntiaret. Unde tantis novis supervenientibus nova scribere necessarium et post priorum litterarum finem harum inchoare principium. Spiritus consilii et scientiæ doceat vos de omnibus, charissime mihi Pater.

EPISTOLA IV.

EPISTOLA HERBERTI IN PERSONA STEPHANI MELDENSI
EPISCOPI AD ALEXANDRUM PAPAM PRO THOMA CAN-
TUARIENSI ARCHIEPISCOPO EXSULANTE.

Ei tibi, Pater sancte, omnium sollicitudo Ecclesiarum de singulari primatus tui excellentia sit commissa, specialius tamen illi Ecclesiæ filii a te consolationem et protectionem demerentur, qui ex adverso ascendere non metuunt et terrenis potestatibus, ne quod Ecclesiæ est usurper, libere contradicunt. Proinde est quod ego episcoporum minimus pro venerabili fratre nostro filio tuo Thoma Cantuariensi archiepiscopo viro, ut creditur, Deo amabili, et matri nostræ sanctæ Romanæ Ecclesiæ fideli genibus provolutus, quantas valeo et audeo majestati tantæ porrigo preces, qui pro tuo nomine et Ecclesiæ tuitione, sicut novit Ecclesiarum orbis, tam gravia passus est, et supra spem omnium, cum esset nutritus in palatiis, contubernalis et condiscipulus Augustorum, contempta principis gratia et universa gloria domus ejus, solus pastorales sudores aggressus est, et ob id torcular calcavit solus, nisi quia effusus est furor juxta plancum prophete : *Super parvulum foris et super concilium juvenum simul. Vir etiam cum uxore expulsus est et senes cum pleno dierum : transierunt domus eorum ad alteros, agri et uxores pariter (Jer. vi)*. Respicias igitur, amantissime Pater, super filios tuos, qui cum ipso tam dire tam inhumane proscripti sunt et ejecti. Respicias,

pastor bone, super oves pascuæ tuæ: exturba et dissipa, iudex sancte, tuam dissipantes hæreditatem, ne potestas tanta sine causa gladium portet, nunc præsertim cum in Christum Malchus et in vasa templi Balthasar manus extendit. Et quia Christi vicarius es, opus id probet, leva manus tuas in superbias eorum qui malignantur in sancto. Increpa feras arundinis, confringe in die iræ tuæ reges et in nationibus iudica, ut quemadmodum es pater misericordiarum, sis et dominus ultionum iudex justus et fortis, terribilis et auferens spiritum principum, terribilis apud reges terræ, ut sicut Christi te scimus vicarium sic Christi ministerium impleas.

Oro igitur et iterum oro: vicarius Christi christus Domini Christi injuriam amodo ne dissimulet. Verumtamen verbum illud tritum jam et commune nobis scriptum est, quod sapientibus nostris caro revelavit et sanguis: Expecta, inquit, reexpecta, non est tempus vindictæ sed sustinentiæ in tanta, inquit, multitudine inimicorum Ecclesiæ. Oro, Pater, sustine paulisper, et supporta me tantæ majestati, non tam temere quam timide hæc loquentem: mira certe inno monstruosa sapientia hæc ut tunc sine causa portetur gladius sacerdotii quia multi sunt adversarii Christi, quasi athletis Christi ad tempus cedere, curvare genua, solvere manus, et gladium in vaginam convertere tutius sit adversariorum multitudine territis. O cæca mundi sapientia supina nimis et crassa, enervans omnem fortitudinem fidei, suffocans censuram judicii et quæ lucernam justitiæ ponat sub modio. Pro quibus propheta: *Aperi, Domine, oculos eorum, ut videant, quia plures nobiscum sunt* (I Reg. vi). Non dissimuleo tamen persæpe parendum tempori, interdum aliqua dissimulanda, sustinenda multa: dispensanda vero nonnulla, at id quidem bene fieri si salva justitia fiat. Sed ut taceam tam dirum et Christianorum principum temporibus inauditum exsilium, ubi unius percussione tot et tanti mulctantur: quomodo erit salva justitia ubi secundo vincitus ducitur Christus ante præsidem, et Petro adimitur sui apostolatus officium, Anglorum vero Ecclesia sicut jam omnino auditum est exauctorata, passim trahuntur clerici ad judicia sæculi, sacerdotes ligandi et solvendi potestatem exercere non audent? Age igitur, homo Dei, quorum tenes hæreditatem, induere fortitudinem: excute te, fili excussorum, ut sis disciplinatorum virga, inereditorum baculus, superbiorum malleus et oppressorum levamen. Et quia semel cœpi, loquar ad dominum meum, cum sim pulvis et cinis. Non infirmetur in tribulatione virtus tua, alioquin verendum ne una scintilla quæ in occidente in corde maris exorta est, nisi citius oppressa fuerit, totum Ecclesiarum orbem populetur. Angelus magni consilii tecum sit.

EPISTOLA V.

EPISTOLA HERBERTI EXSULANTIS AD WILLELMUM SENONENSEM ARCHIEPISCOPUM JAM ROMAM PROPECTUM.

Quibus nunc potest vehiculum parvitas mea subli-

mitatis tuæ se præsentie ingerit, quin potius tecum litterarum schemate quotquot sumus migrationis illi pedibus tuæ pietatis advolvimur, regiam illam clementiæ tuæ pulsantes ut ostium misericordiæ tuæ ingrediatur oratio nostra, cuius si non audis clamorem vocis exaudias vel clamorem sanguinis; ad te enim clamat sanguis noster, nunc præsertim validius quo tentamur periculosius. Siquidem in specie peregrini absconderunt nunc superbi laqueum nobis. Ille, ille nempe ad nos in specie peregrini accessit. Peregrinus quidem accessit, sed peregrinus diu non latuit. Simulans enim se cogitare cogitationes pacis, pacis nostræ, admittatur benigne loquens et ipse pariter quæ pacis erant. Unde et speciem tam bonam cernentes, multorum oculi tenebantur, fiducialiter pacifica præstolantes. Sed denum verborum aucupis oculos suos deprædatis querebantur. Nam, cum jam ab omnibus consummationis totius finis speraretur, peregrinus noster per quosdam sibi bene notos anfractus a via recta deflexerat et deprehensus est devotus ille non quidem cogitationes pacis, sed potius afflictionis cogitasse. Quippe cum prius pacem offerret, postea pacis osculum pernegabat. Quo audito, hærent circumstantes, hæsitant mediatores, stupet populus, admirantur universi, et frustrantur spes omnium. Quibusdam proclamantibus illum non solum ecclesiastici, sed et totius humani moris subversorem, quin potius ipsam naturæ legem offendere, quæ dilectionis signum et pacis noscitur homines docuisse ut in illo præcipue membro appareat signum concordie, unde rixa et jurgia oriri consueverunt. Alii non istud oportet in corde seductionis manifeste speciem declarare testabantur, diabolicam etiam excedere præsumptionem, qua non dignaretur homo communicare homini quod homini exhibuerit Dominus, et ipse enim in signum reconciliationis et pacis osculatus est me osculo oris sui. Ego vero ut domino meo secretius loquar, rem tacitus considerans, æstimo non sine causa, quin potius divino nutu pacis osculum nobis fuisse denegatum, quod videlicet illius pax, quam quærimus, et nostra justitia quam fovemus, convenire non possint, illius regnum et sacerdotium nostrum. Alias quippe legimus pacis et justitiæ osculum: *Justitia, inquit, et pax osculatur* (Psal. lxxxiv). Utinam tamen juxta quod propheta de se optat essem vir non habens spiritum et mendacium loquerer. Præterea scriptam domini Cantuariensis petitionem pacis nostræ formam continentem et prudentium arbitrio moderate satis et discrete conceptam, oblatam sibi et perlectam primo quidem videbatur admittere: sed postea, ut mos hominis est, nescio quibus utens mollitis sermonibus scriptæ petitionis variavit sententiam, ita ut juxta quod consuevit perfidia nihil faciens, totum fecisse videretur. Et sic frustrati discessimus nihil præter quam nostras angustias reportantes. Age ergo, homo Dei, para te, superbiorum baculum, tyrannorum malleum et oppressorum levamen, ut quorum

sortitus es ministerium, sortiaris et zelum, et alterum nobis Mattathiam exhibeas adversus Antiochi sacrilegia : ignito eloquio tuo frigida Israelitarum corda excitando sollicite provideas, ne flabris leprosum extinguatur. Nam quod nunc solum residuum est, ad te sunt oculi nostri, quin potius tota Anglicana Ecclesia, cujus tu adhuc parvulus suxisti ubera, ad te suspirat et hostias expectat pacificas, nunc præsertim cum per te ipsum introieris in sancta. Quod præfatus ille peregrinus noster metuens, miro modo consternatus est, qui ex solo tuæ protectionis metu, dolo et calliditate quadam ut jam diximus, humilitatem prætendit et etiam peregrinum simulavit : in qua profecto peregrinatione ex tui absentia occasione captata Gallicanos fluvios multa jam ex parte videtur absorbuisse, adeo etiam ut Jordanis ipse in os ejus dicatur influxisse, hac arte et nos absorbere attentans, ni fallor : scit quid dicam prudentia tua. Unde necesse est in brevi medicinalis occurrat virtus consilii tui, ne non solum partem terræ quam petit et in spe certa jam obtinere videtur, sed totam, quod absit, terram absorbeat. Id autem in calce sermonis ego et passionis meæ socii provoluti tunc genibus tuæ supplicamus discretioni, ne unquam te volente, te assentiente damna patrimonio Christi sanguine elaborato et viduæ doti illata superiori auctoritate compellamur remittere. Quippe hoc esset exemplum perniciosum inducere et nos ipso de indebito contaminare consensu ; justificare etiam manifesti sacrilegii reum, præsertim cum regula divini juris sit non remitti peccatum, nisi restituatur ablatum, et iterum : Veram poenitentiam non agi, sed simulari potius, quandiu penes furem rapto remve res ablata constitit, nisi forte arcatus excusetur inopia. Præterea ne excommunicati nostri præterquam præstita juxta morem ecclesiasticum cautione absolvantur, vestra item sollicitudo et consideratio hæc, ne quod semel bisve secus actum est, ad Ecclesiæ lesionem possit converti. Unde expressum super hoc Romani pontificis multum acceptaremus mandatum. Audivimus proxime aliquos in nostri suggillationem pro persona Londoniensi scriptis suis testimonia in curia perhibuituros, quorum unus cismarinus in Normannia, ut dicitur, episcopus est, qui tamen an episcopus sit, licet in episcopis jam senuerit, ignoratur, imo quod verius est, si quis Christum bene recogitet, non dico episcopum sed nec etiam Christianum vere profitebimur, nisi forte verba non opera faciant Christianum, cujus profecto omnis virtus in ore est, lingua aurea, et ferreum cor, cujus epistolare eloquium quod proxime vidimus, contra nos operose sed viperæ nimis conceptum, nimio candore deformis mentitur idolum, quin potius verum idolum est, quia falsum est quod conflavit, et spiritus non est in eo. Is est qui in ore suo pacem nobiscum loquebatur et nunc occulte ponit insidias, unde periculosior est de quibuslibet propheta dicit. *Sagitta vulnerans linguarum : dolum locutus est* (Jer. ix). Verum non pergo

A nunc ulterius istius exagitare ignominiam : sufficit tetigisse, præsertim cum sciam nec dubitem, me tacente, ex jam dictis personæ circumstantiis personam ipsam cum universis idiomatibus suis, menti tuæ mox occurrissæ : sed speramus quod hi et horum similes nobis sine causa adversantes tua majestate præsentē, præstantē Domino, revertentur confusi. Inter quos etiam nonnulli muleti dicuntur, ut nobis potius quam vobis obsistant cum Domino suo somniantes vos in terra ipsorum cismarina nescio quam legationem petiturum. Verum parum eorum somnia curantes cum universa Ecclesia et nos pariter inter monachos et petras delitescentes in nostra oramus pressura, ut veniens venias cum exultatione prosequentes, de cujus munere venit B quod tanti pontificis ministerio visitavit plebem suam : qui pro filii captivitatis legatione fungatur, qui ad justitiam majorum nostrorum nobis corda conciliet et vota intimet miserorum. Angelus magni consilii sit nobiscum, qui apert nos in omni bono, ut intelligatis quæ recta sunt et opere semper complentis.

EPISTOLA VI

EPISTOLA HERBERTI ELSULANTIS AD EUNDEN CONTRA LONDONIENSEM EPISCOPUM ROMAN JAM PROFICISCENTEM.

Reverendissimo Patri et domino suo in Christo amantissimo W. Dei gratia Senonensi archiepiscopo et apostolicæ sedis legato suus HERBERTUS miserabilis nunc et exsul, modicum id quod nunc C potest.

Etsi tanta cui scribitur jusserit silere auctoritas, rupit tamen silentium charitas ; quæ ut mors valida est et plerumque majestatem pensare non novit, juxta quod etiam ait gentilis ille poeta :

Non bene conveniunt nec in una sede morantur

Majestas et amor :

unde et subjectam membranulam totam jam charitatis igne accenderem, si non me instantium curarum aliorum premeret et urgens necessitas ad alia calamum detorqueret. Ecce enim draco ille magnus, serpens antiquus, gladio verbi Dei vulneratus, vel demum nunc de fovea lubrici erroris exire cogitur. Scimus vero quod de malo ad malum egreditur, ut qui prius fraudulenter incessit, amodo fiat manifestus fratrum suorum accusator, et induet arma calumnias multo plus graviora quam pugnae. Unde quam citius sive in solitudine sive in urbe sive viatorum sive stationarium oppressorum clamor clementiæ vestræ aures attigerit, necesse est ut subveniat miseratione vestra, ut militiæ vestræ armis collidas vasa iniquitatis bellantia. Sic enim congregatio hypocritarum sterilis erit, cum ignis vester devoraverit tabernacula eorum qui munera libenter accipiunt. Illa tamen leprosum flaba huic sancto inimica igni semper mihi suspecta sunt ; cernunt, omine mihi, locutio hæc. Ut autem sublimitati vestræ non tam temere quam timide, quod negotio proficeret, eloquar : si forte nos viatorem reperimus, expedit ut vestrum aliquis una cum nostris remittatur, alioquin

profecto nisi illi dominatores nostri vereantur faciem vestram, veremur nos ne absorbeamur a dracone et illi repleant ventrem suum de teneritudine nostra. Ni fallor, scit et nunc quid verbis propheticiis significem prudentia vestra. Verum, ne sanctitatis vestræ auditum insipientiæ meæ verbis diutius morer, id in calce sermonis adjicio, quantum omnis Ecclesia in miserationibus domino Cantuariensi, nunc præsertim in hac protectione nostra exhibitis, vestram supra modum charitatem concelebrat et pacem nobis opera vestra, favente Domino, redditam seu etiam justitiam, si pacem præcesserit, in miserationumstrarum catalogo audio jam et gaudeo numerari. Unum autem est, quod celare non possum, falsiloquos quosdam regis Anglorum nuntios, revertentes a curia, ventosis verbis totam terram implevisse, qui causam vestræ protectionis et negotii intima cuicunque disseminabant et auditoribus etiam sibilabant invitis. Ricardus autem Barre erat princeps prophetiæ. Unum scio quod iis si consilia vestra credidistis, proditores sunt; si vero non credidistis, mendaces. Vestrorum tamen nonnulli ad credendum leviores, ad ventum hunc moti sunt. Plurimi vero ut domino meo verum dicens non parcam, justius conqueruntur quod nullam videlicet absentiae vestræ tam longe per proprios nuntios vestros seu litteras consolationem meruerunt, et ut in hoc audeam justa omnino querimonia hæc. Verum excessus hi veniam facile impetrabunt, si absentiae desolatio cito præsentiae vestræ lætitiâ compensetur, quod nobis præstet magnus ille dux itineris vestri qui sicut operatur, prosperum faciet vobis iter, Deus salutarium nostrorum.

EPISTOLA VII.

EPISTOLA HERBERTI EXULANTIS AD EUNDEN PRO EODEM.

Qua verborum facundia quibusve linguæ præconiis tot et tantas miserationes vestras ab initio passionum nobis exhibitas condigne efferamus, invenire non possumus; sed nunc præsertim cum amplior miserendi præstaretur occasio, ad nostra sananda vulnera omnibus patuerunt viscera misericordiæ vestræ. Omnes a minimo usque maximum cognoverunt, et apostolicum virum prædicant, qui onus nostrum tanta charitate supportaverit. Unde divina miseratione tribuente merces erit operi vestro et spes novissimis vestris. Nos autem non solum confratres et amici, sed ego et passionis meæ socii scabellum facti sumus pedum vestrorum. Verum per rickitantibus adhuc servis necessarium est, domine mi, auxilii vestri porrigere manus, maxime his qui domi manus pessimorum confortavit, conversus sit nunc demum ad cursum suum, et quasi equus impetu vadat ad prælium capite forte David absentia ut libere exprobrat Israel, cum non sit qui ejus possit vel audeat ludere impetum. Hic est Londoniensis, qui jam cœpit mendacii conficere iter. Unde nos leonis metuentes violentiam qui draconis jam pridem experti sumus insidias, ad alarum ve-

A strarum suffugimus velamentum: ut si forte vos in diversorio invenerimus, Davidicam adhibeatis solertiam et fortitudinem, ne ad prælium procederetis contra Israellem prævaleat impetus. Potius in hostem retorqueatur totius plebis opprobrium. Spiritus consilii et scientiæ vobiscum sit, qui pro pueris nostris huic certamini minus idoneis, doceat manus ad prælium et digitos nostros ad bellum.

EPISTOLA VIII.

EPISTOLA HÆC IN PERSONA TH. CANT. ARCH. AD UNIVERSOS TOTIUS ANGLIÆ CLERICOS ET LAICOS ABSOLVENS EOS A JURAMENTO QUOD CONTRA DOMINUM PAPAM ET IPSUM FECERANT, VIDELICET QUOD NEC NUNTIIUM NEC LITTERAS IPSORUM RECIPERENT ET RECIPIENTES PRODERENT.

B Scitis, charissimi, quod ex multa tribulatione, etc. Impressa est inter epistolas S. Th. sub num. 78.

EPISTOLA IX.

EPISTOLA HERBERTI IN PERSONA THOMÆ CANTUARIENSIS ARCHIEPISCOPI AD UNIVERSOS ANGLIÆ EPISCOPOS ET ABBATES COMMUNENS NE FALSIS NUNTIIORUM REGIS ANGLIÆ RUMORIBUS CREDANT QUOS DE IP SO CIRCUMQUAQUE DISSEMINABANT ET NE NOVA REGI EXHIBEANT JURAMENTA VEL OBLIGATIONEM ALIAM NOVAM.

Thomas, Dei gratia Cant. Ecc. min. hum. et ap. sed. leg. ven. fra. suo H. Winton. ep. et reliquis om. confr. et coop. suis, abba. etiam per prov. constit. nec non et ven. fra. suo Hug. Dunel. ep. C viriliter agere et confortari in Domino.

Gratias ago Domino meo cui nunc servo. Vide inter epp. S. Thomæ, ep. 79.

EPISTOLA X.

EPISTOLA HÆC IN PERSONA THOMÆ CANT. ARCH. AD ROGERIUM WIGORNIENSEM EPISCOPUM.

Thomas, Dei gratia Cantuariensis Ecclesiæ minister humilis, venerabili fratri suo ROGERO Wigorniensis episcopo, quod bene incepit meliori fine concludere.

Quid nobis de vestra transfretatione placeat enarrati vestræ nos sæpius scripsisse meminimus et de vestra non minimum gaudemus obedientia. Verum, quoniam districtiora credimus tempora imminere, et inimicorum castigationem crudelem, adhuc iteramus mandatum firmiter injungentes et in virtute obedientiæ præcipientes ne ullo modo transfretare attentetis, donec super Ecclesiæ negotio domini papæ et nostrum mandatum receperitis. In eadem etiam virtute obedientiæ præcipimus ne contra matris vestræ Cantuariensis Ecclesiæ dignitatem ad filium domini regis coronandum ullo unquam tempore metu cujusquam seu gratia præbeatis assensum. Quin potius si tantam Ecclesiæ libertatem periclitari seu etiam vacillare noveritis, sicut decet tantum filium viriliter vos opponatis. Et quia scio nuntios domini regis a curia proxime revertentes, linguas habere latas et in ventum multa seminasse, illum quem non dubito gestarum rerum versi-

intem quam peroptime novit relaturum fideliter, qui et ipse posterior a curia recessit, ad vos destinare curavimus, ut consolationes nostræ laxificent quoque animam vestram. Præterea desideramus vos monitum fore ut rescriptum litterarum, quas vobis dirigimus, confratribus et coepiscopis nostris mittere curetis, domino videlicet Wintoniensi et domino Exoniensi, scripto etiam proprio consolans eos et hortans, ut nobis pariter stent Domini prælia strenue dimicando, et tunc præsertim ut Dominici gregis arietes se opponant, si super coronando regis filio nostra auctoritate seclusa conveniantur. Angelus magni consilii et nostra benedictio vobiscum sit, fili mi charissime.

EPISTOLA XI.

PISTOLA HERBERTI IN PERSONA THOMÆ CANT. ARCHIEPISCOPI AD ROBERTUM SANCTI AUDOMARI PRÆPOSITUM.

THOMAS, Dei gratia Cantuariensis Ecclesiæ minister humilis, dilecto et dilectori amico suo R. Sancti Audomari præposito, sic transire per bona temporalia, ut non amittat æterna.

Quod nec tanta inæqualitate temporis, nec ullo sortis nostræ lubrico nostræ ille charitatis fervor refrigerit ipsa operum attestatione novimus et tenemus, et totius charitatis largitori devotas gratias agimus de cujus id munere venit, ut vel unum mihi adversitatis inter tot prosperitatis amicos reservaverit. Si igitur sub tanti temporis lapsu vobis minime scriperim oblivioni nequaquam imputandum est vel desidiæ. Ob id siquidem intercurrentis suspendi mandatum, quia super verbo illo quod conversus noster ad vos destinatus detulit, vestrum in dies expectabam responsum. Quod ut promoveatis officio adhuc desideramus et postulamus affectu. Quod autem litteris charitatis vestræ insecuris rumores super negotio nostro non secundum cor vestrum acceperis, quod significare volueritis nequaquam mihi admodum liquet, nam illo miserante qui etiam in ira sua miserationes suas continere non potest, pro rerum condicione et statu temporis prospere erga nos universa geruntur. Adversa etenim nostra sic modificat medicinalis sapientia Dei, ut faciat patienter et æquo animo percelli per quæ promittitur cælestis janua aperiri; adeo ut ipsum reputetur Dei medicina, quod est sæculi plaga et quod est persequentis flagellum sit patientis solatium. Verum, dum huc ille evolve-rem quid præacti verbi contineret involucrum, suspicabar forte vos moveri pro litteris quibusdam a Romano pontifice obtentis: quibus videtur dominum Anglorum regem et personas regni et regnum a nostro eximere pontificio. Sed intendere debet prudentia vestra quod huiusmodi valeat in brevi expirare mandatum. Unde nec nos ipsi in aliquo impræsentiarum adversus dominum papam moti sumus nec causamur injuriam. Verum, nolit, velit mundus, contra mundum magnum, tribuente Do-

mino, certabimus agonem supernæ vocationis palmam in anteriora sectantes. Sed hæc hactenus. Cæterum, ut cum fiducia diligenti loquar, non possum satis admirari quod in facto istorum regum ad gloriam Domini vestri mihi in Christo amantissime et vestram non intendatis industrius. Nostis siquidem omne consilium fore reprobum quod nota comitatur vel sequitur, quam profecto jam contra nos buccinat orbis et videtur non nova attestatio operis. Unde vos tanquam prædilectis dilectiorem exhortamur in Domino ut videatis quomodo caute ambuletis, nec adeo uni vos præbeatis benevolam, ut gloriæ nominis vestri sustineatis detrimentum et alter vos perpetuo odiat: potius consideratione adhibita ambo obnoxii sint. Intelligenti dictum est satis. Pro causa Ecclesiæ et nostræ jam sæpe rogatum rogamus adhuc, utpote cui post Deum debemus modicum id quod nunc scimus et quidquid unquam poterimus, prout expedire noveritis, diligentem et citam adhibere vos curam. Valeat et viget erga nos, charissime mi in Christo, vestra dilectio.

EPISTOLA XII.

EPISTOLA HERBERTI AD NICOLAUM PRIOREM INFIRMORUM DE MONTE ROTOMAGI.

Dilecto sibi in Christo, N. homini Dei, H. THOMÆ Cantuariorum archiepiscopi miserabilis nunc et insignis exsulis socius, modicum id quod potest.

Suscepi charitatis tuæ litteras, quibus si bene recolere monuisti, ut ego quibus possem modis efficerem, ne Cantuariensis ille a cæpto fervore desisteret. Sed non est opus unguentis balsamum vel solem facibus adjuvare nec est necesse ad cursum anhelos urgere calcaribus. Cerno athletam Christi dimicare fortiter et quovis hortatore suo fortio-rem, nec in cursu certaminis verborum stimulis indigere. Cerno, inquam, unicum diebus nostris ac verum athletam Christi doctum ab illo, unctum de illo, venditum cum illo, fugisse ut ille, sed gloriosum in illo, adversus quem amici sui et proximi appropinquaverunt, fremuerunt gentes, asiterunt reges et principes convenerunt, per omnis illius factus imitator qui fide et patientia hæreditavit promissiones. Unde et contra mundum in theatro huius mundi spectaculum factus et angelis et hominibus legitime magnum certat agonem et palmam supernæ vocationis in anteriora sectatur, ad quam ut perseverando perveniat non mea hominis peccatoris exhortatione, sed gregis tui potius infirmi corpore et spiritu fortioris et tuæ propriæ orationis fortitudine indiget. Scripsissem plurima nisi ex scripti tui brevitate tuas quotidianas necessitates didicissem. Unde et ego sollicitudinis tuæ circa plurima non immemor et scribendi non vivendi quidem a te ipso formam accipiens, paucis pauca respondi, magis tamen plura scribens tibi quam scriperis, reddens cum senore quæ accepi, sed id pro certo noveris, mi charissime, pars animæ meæ, et alter Nicolaus, mihi in

præsentis exsili mei naufragio, quod quæ nunc A accipis volo ut tu reddas cum senore, et quoniam, ut æstimo, magnum gestas in pectore inferiorem non sentiam in sermone. Valeat pauper Christi in Domino.

EPISTOLA XIII.

EPISTOLA HERBERTI AD PRIOREM WIBERTUM CANTUARIENSIS ECCLESIE ET AD TOTUM CONVENTUM.

Dilectis sibi in Christo priori Sanctæ Trinitatis et reliquis ejusdem loci fratribus Deo devotis, H. THOMÆ Cant. archiepiscopi miserabilis nunc et insignis exsulis socius lacrymis et oratione pugnare.

Cum ego arripere stylum ut præsentis paginæ opus exararem, hæsitavit mox animus, tremuit manus, et revocato dolore, oculi lacrymis implebantur, vestræ admodum desolationi compatiens, B quibus jam lugubre illud sponsæ canticum competit: *Percusserunt me et vulneraverunt me; tulerunt vallum meum custodes murorum* (Cant. v). Pallium nempe decoris vestri ablatum est et vos confusionem et mœrorem induistis; lugetis Jonam devoratum et Joseph venditum, nec potestis æquo animo patris vestri miseria et matris vestræ injurias tolerare. Nunc autem contra luctum consolationis arma sumenda sunt, ut spes vestra possit habere victoriam. Igitur inter nascentis mundi exordia videamus Abel in campo, Noe in diluvio, Job in sterquilinio, Daniele in lacu, et quia longum esset singulas justorum generationes percurrere, quorum profecto tot sunt flagellati quot just; familiarius et attentius Salvatoris nostri labores, contumelias, et injurias cernimus, cujus civitatem pater hic noster indignus admodum regeret, si imperatoris sui sudores bellicos et militiæ agones recusaret: summus itaque nobis exemplum ab homine et auxilium a potente: exeuntes cum eo extra castra et imperium ejus portantes. Adjicitur etiam consolationi, quia peculiare vestrum est patres vestros per miseria hujusmodi et passionibus transire et tribulationis igne examinari, exinaniri nequaquam. Unde et ego jam vobis consolationem super consolationem adjiciam, et ut fidenter aliquid eloquar, vocem illam vobis aptare audeo: *Quia transivimus per ignem et aquam, et educti sumus in refrigerium* (Psal. LXXV). Jonas quidem devoratus jam de visceribus belluæ eductus est, et Joseph a fratribus suis venditus vivit profecto et dominatur. Verumtamen tunicam polymitam cruentam patri suo ostenderunt, dicentes quia fera pessima devoraverit eum. Nam qui fuerant missi nostro Joseph varia crimina obicere attentarunt, vocantes eum hominem flagitiosum, pacis regni et Ecclesiæ turbatorem: sed omnes in astutia sua comprehensi sunt, nec est creditum verbis eorum, quorum unus qui abstemius est, cum sitiret sanguinem innocentis et domini Cantuariensis personam lædere adhuc in pluribus attentaret, imperatum est a summo patrum patre, ut parcius ageret, cujus cum tam brevi interlocutione diu præmeditata intercederet narratio, non currendo ut prius, sed in narrando gradu

testudineo incedebat, vix tria verba simul, non enuntians, sed singulians. Alius vero qui maxime gloriari solet de humanæ sapientiæ verbis, mox ut est locutus, nec vox erat ei nec sensus, sic loquens, ut qui pueriles litteras et primas dictionum juncturas ignoraret. Unde quamplurimi stupebant et mirabantur, totum id illi tribuentes qui linguas prudentum disertas facit et disertorum infatuat. Ego neminem nominabo, arbitror etenim quia ex jam dictis etiam non dicta sitis perfacile percepturi. Adhuc alia et de aliis scriberem, nisi quod singula prosequi angustiam excederet epistolarem et unius lucubratiunculæ opus. Ut igitur brevitate servata omnia semel et in summa dicantur, sicut vidimus et sicut audivimus, cum pudore et confusione revertuntur qui quærebant animas nostras, et quibus, ut jam diximus, Deus subtraxit vocem, ut vix possent audiri, exauditi non sunt. Consolamini itaque, consolamini in verbis istis, in nullo hesitantes, sed scientes pro certo quia magnus ille Deus Hebræorum qui Joseph vestrum eduxit de carcere, adhuc modicum et magnum faciet eum in terra.

Vos autem interim viriliter agite et confortetur cor vestrum pro civitate vestra tam sancta et civitatis custode lacrymis dimicite et psalmis, memores quia ad Ezechielis lacrymas centum octoginta quinque millia Assyriorum ab uno angelo una nocte deleta sunt. Joseph itidem laudes concinebat Domino et Dominus pro laudante superabat. Moyses contra Amalech non gladio, sed oratione pugnabat. Vigilate itaque nunc et orate eo nunc instantius quo gravius ipsam matrem vestram affligi conspiciatis, ab ipsis quidem domesticis ejus et filiis, providentes præ omnibus pauperi Jesu Christi pastori dico vestro et patri, qui ut omnis lingua testatur magni illius prophete discipulus reliquit domum suam, dimisit hereditatem suam, qui amore justitiæ postposuit gratiam principum, minas etiam sprexit et demum exsili aspera et paupertatis onera non abhorruit, potius amplexatur devotus, nec dubitavit humeros suos supponere virorum oneribus et pastorales sustinere sudores cum fuisset ad hæc tempora in domibus regum nutritus et tot et tantum ut mundus prædicat filius deliciarum: nunc D vero non habet ubi caput suum reclinet, nisi quod in ipso principes alieni et gentes, ad quas sumus expulsi, non hominem se putant venerari sed Deum. Decet vero famam sanctitatis vestræ ipsius per omnia et super omnes sollicitudinem gerere, ipsi jugi die ac nocte in spiritualibus, in temporalibus vero frequenter et supra etiam possibilitatis vestræ modum cum omni hilaritate providentes. Valeant orationes vestre.

EPISTOLA XIV.

EPISTOLA EPISCOPORUM CANTUARIENSIS PROVINCIÆ ET ALIARUM PERSONARUM, QUÆ PER EANDEN PROVINCIAM VARIIS LOCIS CONSTITUTÆ SUNT, MISSA AD TH. CANT. ARCHIEPISCOPUM, CUM ADHUC IN EXSILIO PONTINIACI

MORARETUR IN QUA ET IPSORUM APPELLATIO INSE-
RUITUR.

Ven. Patri et domino, etc

Quæ, Pater, in longinquo, etc. [*eadem est cum epistola 436 inter Epistolas Gil. Fol.*]

EPISTOLA XV.

EPISTOLA HERBERTI AD UNIVERSOS CANTUARIENSIS PROVIN-
CIÆ EPISCOPOS ET RELIQUAS PER EANDEM PROVINCIAM
PERSONAS VARIIS LOCIS CONSTITUTAS, EDITA IN PER-
SONA TH. CANT. ARCHIEPISCOPI ET CONTINENS RE-
SPONSIONEM AD LIBELLUM EORUMDEM EPISCOPORUM
APPELLATORIUM.

THOMAS, Dei gratia Cantuariensis Ecclesiæ mini-
ster humilis, dilectis sibi in Christo fratribus ejus-
dem Ecclesiæ filiis coepiscopis suis et reliquis
ecclesiarum Dei ministris per provinciam consti-
tutis, quæ recta sunt intelligere ac novissima pro-
videre.

Expectans expectavi in dies si quis de amicis
meis et notis super me intelligeret, hominem no-
vissimum et tanquam morti destinatum, sperans me
a vobis saltem, fratres, aliquam vel sero consolati-
onem recepturum in hoc magno certamine pas-
sionum. Et ecce mihi in eremo Pontiniaci commo-
ranti scripta vestra demum perlata sunt quæ vide-
bantur et amorem sonare pariter et querelam :
amorem, quia ut longiora percurram brevius scrip-
sisstis esse solatio me post discessum meum fama
celebri perhibente nil altum sapere, etc. . . .

Sed, ut ad appellationem a vobis factam revertamur, C
ex jam dictis liquido vobis constare debet, etsi non
ore, conscientia tamen vestra mihi testimonium per-
hibente, quam iniqua sit appellatio hæc. Præterea,
sicut vos ipsi scribitis, jam dudum super eodem in
facie Ecclesiæ appellastis, si super alio vos videritis.
Sed illius appellationis prosequendæ tempus, quod
etiam non nisi urgentissima ratione conceditur, jam
fere exactum est. Biennium enim est : quare nec
cum infra tantum tempus, quod non nisi urgentis-
sima de causa indultum est, appellationem prosecuti
non sitis, appellatio ista vetus nunc innovata nullum
appellatoribus remedium pariter, præsertim cum
judicis copiam haberetis, etc.

[*Hæc ex epistola proluxa excerpta sufficiant : nam
nihil est nisi rhetoricus libellus a bono Herberto no-
stro concinnatus. Epistola quam revera sanctus Tho-
mas ad episcopos Angliæ remisit, jam inter epistolas
S. Thomæ sub n. 75 edita est.*]

EPISTOLA XVI.

EPISTOLA LUMBARDI IN PERSONA CANTUARIENSIS ARCHI-
EPISCOPI RESPONSALIS AD APPELLATIONEM EPISCOPO-
RUM ANGLIÆ SCRIPTO FACTAM.

Vestræ fraternitatis litteras benigne suscepi dili-
genterque inspexi, in quibus quod injuriis dominum
meum regem affecisse, quibus ipsum et ejus regnum
turbaverim dicor, me vehementer turbat. Injurias
intulisse siquidem mihi conscius non sum, sed atro-
ces me pertulisse scio ac per reges et regna divul-

gatum plurimum doleo. Nam injuriari nemo dicitur,
cui non est injuriandi animus, nisi quis minus pru-
denter injuriam interpretari velit, quod minis qui-
bus terrebar serpentinis suggestionibus et fraudu-
lentis suasionibus quibus ad renuntiandum Cantua-
riensis Ecclesiæ administrationi callide inducebar,
nequaquam cessi nec acquievi, quod quidem nec
debui nec potui. Sicut enim dominari ambientes
tenere impudenterque ad regiminis locum præpro-
pere festinantes Patrum instituta repellunt, princi-
pum quoque edicta severissime puniunt, ita a Do-
mino vocato atque canonica electione promoti su-
sceptum onus recusare eorumdem inhihentibus san-
ctionibus minime licet. Proinde, si non cessi, juri
parui, nemini injuriam intuli. Nemo etenim boni
viri arbitrato injuriam fecisse dicitur, quem in facto
quo super arguitur canonum mandatis obtempe-
rasse, liquido claret. In discessu quoque meo vel ex
eo nulli me injuriam intulisse arbitror. Discessi
quidem atque doctorem nostrum Christianæ religio-
nis institutorem, cujus omnis actio nostræ vitæ
debet esse institutio ac morum informatio, ejus
quoque discipulos doctores nostros imitatus, fratri-
bus filiisque matris meæ persequentibus me fugi;
fugi, inquam, nulla animi infacilitate ductus, sed eo
metu qui inconstantissimum hominem caderet actus,
nonnullis quorum consilio talia geri constabat, in
faciem dicentibus mihi non modicum gaudendum,
si necdum archiepiscopus sed Thomas remanere
possem. Horum in me debacchantium furorem et
animi domini mei regis notum magis suggestum
quam innatum declinare volens discessi. Fuga itaque
mea rationabilem, justam, urgentissimam quoque
habuit causam. Eapropter non ut pavidus, meticulosus,
facilis, levis, et inconstantis hominis, sicut Assur
sine causa calumniatus est, fuga mea fuit, sed ut
constantis et providi, etsi non constantis et providi.
In quo si totius negotii circumstantia et ea quæ pro-
babiliter metuebantur, (nam prudenter timetur quod
facile contingere potest,) diligenter attendantur
attentiusque considerentur, domini mei regis famæ
plurimum fuisse provisum luce clarius constabat.
Qui sapiens est intelligat et vos prudentes estis ut
quæ loquor facile intelligatis. Et quidem post disces-
sum meum ne verius dixerim ejectionem, solitudinem
petii, mensam quam Dominus in conspectu nostro
adversus eos qui tribulant nos paravit ante me pro-
posui, orationi vacans, lectioni insistens; si quo-
modo deperdita tempora reparare et diebus quibus
vidi et operatus sum mala bona videre et operari
valerem. Cumque de proposito in silentio et humili-
tate perseveranter hæc agerem, Cantuariensis Ec-
clesiæ filiorumque ejus redemptionem sperans, nun-
tium est Job domum ruisse, in ruina filios oppres-
sos exspirasse : nuntiatum est et mihi Cantuariensis
Ecclesiæ et pauperum bona occupata atque invasa,
monachos et clericos crudelius quam prius vexari.
Silui tamen patientibus compatiens, pro excedenti-
bus gemens, exitus aquarum uberrimos oculis meis

educantibus, quia non custodiebant legem tuam. **A** Domine. Expectans adhuc eram, spem aliquam habens atque consolationem suscipiens, virga et baculo Domini consolantibus me, sed qui matrem suam persequantur apposuerunt et adhuc peccare, passim omnis ordinis clericos ad sæcnaria judicia trahentes. Si qui vero fori præscriptionem opponere velint, vel ad appellationis remedium confugere desiderent, lacerantur quæstionibus, et exquisitis suppliciis, quasi in principis animam cogitaverint, subijciuntur, ecclesiasticis etiam iudiciis sicut fertur id interdum fieri decernentibus. His contingentibus mihi silere jam non licuit, ne in conquestionem illam quandoque prorumpere cogerer: *Væ mihi, quia tacui et silui a bonis (Isa. vi); ideoque dolor meus renovatus est (Psal. xxxviii).* Propterea domino meo regi in omni humilitate consilium exhibendo scripsi, quatenus tam enormiter delinquentes coerceret. Suggesti quidem suasique, sed, *væ mihi*, non persuasi; commonitorium emisi, sed non admisit; comminatorium proponendo sibi quam horrendum sit in manus Dei viventis incidere edixi, sed repulit; in quibus salutationis officia non omisi, sed cum omni devotione in viis Domini eum prosperari desideravi.

In his omnibus nihil odiose, nil indevote, et omnino nihil nisi quod fidelis domino, pater filio, mandavi, eo intuitu eoque sine desiderato, ut ab his in quibus deviare dignoscitur revocetur. Cur ergo a spe reconciliationis meæ ac domini mei si tamen eam conceptistis decideritis, non intelligo: quave de causa extracto gladio pugna conseri dicatur, ubi fidelis ad dominum tam sincera auditur devotio, non intelligo. Sane magis erat ut me sui æmulum animæ suæ inimicum, atque mei officii contemptorem de silentio conjectaret, cum de optimo probatoque consilio omnino, quod Deus avertat! fidelem suum repelleret pastorem contemneretque. Enimvero si dominum meum ad quod debui fideliter admonui, si divinum iudicium sibi verendum beneficiorum collatorum contemplatione atque pro officii mihi injuncti debito proposui, jam non est unde mihi indignetur potius quam gratificetur. In id universa studia mea conferam, laboribus labores addam, me quoque ipsum si oportuerit superimpendam, quatenus ad meliora dominus meus reformetur. **D** Ad bonum ergo admonitio, a malo ut revocetur correctio, pro pertinacia increpatio, gloriam et famam mihi in Christo comparant, eademque a turpi ingratitude nota me pariter tuentur. A quo ne securim et regni inquietationem excipiant etiam si possem frustra quis timeret, cum ne Christi Ecclesiæ statum per quem reges feliciter et in pace regnant, deformari patiantur: sed in melius reformare studeat, opportune et importune instare.

Obsecrabo igitur, argum, increpabo dominum meum severiter, sed et clementer, quatenus ipsum in Christo magis promerear exinde sibi futurus gravior.

Hæc domino meo, qui me ad digniora erexit,

PATROL. CXG.

ad ejus beneficiis collatis ac dignitate mihi concessa ad ejus correctionem non ad confusionem retribuo. Quæ nequaquam retribuere nisi in Christi visceribus eum amplecti desiderarem. Corripit enim pater filium quem diligit, et juxta Sapientis eloquium: *Meliora sunt vulnera diligentis, quam fraudulenta oscula odientis (Prov. xxvii).* Eli sacerdos quia filios non corripuit, repente interire meruit. Si ingratitude reus dominum meum odire possem, ab his omnino silerem, oleo peccatoris ejus caput perungerem. Parietem quem ædificavit, non destruerem, sed linirem. Itaque erga eum mea sincera devotio et mihi credita dispensatio efficiunt alterum, ut eum a viis Domini declinare nolim, alterum ut in declinantem iudicis severitate quandoque fungar. Suedetis mihi, fratres, patientiam, ut in ea obtineam quod in forti manu, sicut dicitis, obtineri non potest. Scriptum revera quoniam doctrina viri per patientiam dignoscitur. Cæterum Scripturæ sacræ iudicio tacere et non pro persona quam quis gerit delinquentium excessus corrumpere, nullo pacto patientia, sed plectibilis probatur negligentia. Non enim caret scrupulo societatis occultæ qui manifesto facinori desinit obviare, et error cui non resistitur, approbatur, veritas cum minime defensatur opprimitur: formidandum est nobis, ut multis videatur, ne patientia hæc officium cælestis prætoris terribiliter contra nos inducat. Quæ autem ad patientiam, sicut plurimorum habet opinio, plectendam magis quam admittendam persuadendum validiora inducitis, in domini mei regis confusionem et si diligenter advertitis in notam indelebilem, apud graves et maturos viros redundat. Nonquid enim regis majestatis vox hæc esse potest, ut apostatet, a lege Dei declinet, ipsamque violet et profanet, seseque schismaticorum hæreticorum sacrilegis cæstibus immisceat, nisi enormiter delinquere et omnino irreligiose excedere patienter feratur. Quos velut schismaticos et hæreticos, Alexandrum papam in patrem et dominum non minus devote quam sponte suscipiens, prorsus abjuravit. Quos oraculis suis insectari debet severissimis edictis subjungere, in eorum profanum collegium migrabit, si devote admonetur, si juste corripitur. Videte quid de paucis multa conjicientibus segregaveritis. Consultius tacita hæc essent quam publicata scripto: legi atque in conjecturam rei dispendiose retorqueri absit quod in mente domini mei regis illustris discreti ac providi principis, cui regna obediunt et populorum millia obsequuntur, cuique divinitus datum est victoriosissime de hostibus triumphare! Absit, inquam, ut hos conatus hasque minas conceperit! Prope est ut talia prætendere sit in hæresim labi fratres, nolite, quæso, nolite cum dispendio famæ domini nostri regis, et sub prætextu metus, qui in virum probum venire non debet, procurare et quidquam contra religionem sanctamque Romanam Ecclesiam matrem nostram moliri: frustra jacitur rete ante oculos pennatorum. Ab hujus-

modi ad inventionem suspicione alios apud nos ita immunes esse vellem, sicut apostasie criminis similiumque vos insontes fore religio deposcit et ego desidero. Sin vero justus est conceptus metus, lapsus, et præcipue domini nostri regis, quod Deus sua clementissima pietate avertat, occurrere ut amici, sed Christi, ut iudices, sed Moysi vestigiis inherentes, non palpantes delinquentem, sed divino iudicio terrentes respiscere nolentem. Palpare enim hoc est mortificare, non animas curare. Arguere enim et increpare, id est curare. Illic est labor meus, hæc est gloria, hæc est fama, cujus in Christo cupidus sum, ut dominum meum arguam, increpem, quatenus curare ac sanare ipsumque a proposito minus justo revocare valeam. Quem nedum satisfacientem sed etiam satisfacere volentem mater sua Cantuariensis Ecclesia expansis brachiis suscipere et in sinu suo velut charissimum filium fovere, parata invenitur et ego in ea de cætero ipsius omnes in Christo voluntates secundum scientiam atque possibilitatem meam sequi promptissimus reperiar. Verum, exigentibus peccatis meis, nec satisfactionem obtulisse nec satisfacere voluisse a quoque accepi. Etenim satisfacere aut satisfacere vellem nequaquam dicitur, qui ad nutum suum ea exhibere offert. Nempe satisfacere dominis sicut satisfacere. Satisfacere vero quis ei dicitur, cujus desiderium legitime implet. Qui ergo eorum iudicio cavere atque satisfacere offert, quos jus omne ab ejus iudicio contra satisfaciendum qui agit prorsus coercet aut interveniens causa jure inducta ut suspicio tantisper a iudicandi officio suspendit minus legitime satisfacere ac satisfacere idcirco quia nec satisfacere nec satisfacere desiderat. Nam quoties minus legitime cautum vel satisfactum est, non videtur cautum aut satisfactum ut satisfactio non facti duntaxat, sed et juris nomen sit. Vos siquidem cum Ecclesie Cantuariensis et nostri filii sitis, sanctorum Patrum decreta et consiliorum instituta meos iudices esse non patiuntur. Quæ prælatos minorum deliberationibus submitti præcise inhihent, eundemque ad superioris iudicis examen, querelis adversus episcopos emergentibus decernunt. Eapropter cum minus canonice objecta reverentia patri debita, me pastorem, etsi peccatorem, prælatum quanquam indignum olim iudicare præsumperitis, alias etiam legitimi iudices meritissima causa facti estis suspecti. Quos omnis ratio omniaque jura tam a iudicio longe faciunt: quam arbitrio præcui repelli permittunt. Ex his attente considerantibus nedum satisfacere voluisse sed contempsisse, præsertim cum in dies manus suas contra Cantuariensem Ecclesiam matrem suam aggregaverit, perspicuum fore haud hæsit. Porro satisfacere atque facere contemnentem, sepe sæpiusque admonitum diutius quidem expectatum, nec parentem velut contumacem universa jura condemnari deerevere. Unde dominus justissimus legislator noster eum qui tertio admonitus sacerdoti et Eccle-

sia non paret, sicut ethnicum et publicanum, mandatum haberi. Quod Romani pontifices sicut Dei mandatum firmiter observari censuerunt. Principem quoque ternis litteris, aut uno edicto pro omnibus peremptorio citatum, siquæ præsentiam minime exhibentem condemnari sauxerunt. Ejusmodi comminari qui omni jure posset condemnari non est impetu ferri, sed indulgenti ratione duci. Itaque satisfacere satisfacereque contemnentis condemnationem, nedum comminatio omni jure subnixi si procedat firmissime obtinebit. Vos tamen cum sanctum canibus datum, margaritas porcis expositas, lapides sanctuarii in platearum capitibus dispersos cernatis, etiam de comminatione et quod longe minus est de admonitione, adversus me indignamini.

B Fratres, nolite errare, Deus non irridetur, cujus increpatio super me et super vos dicentis: *Canes muti non valentes latrare (Isa. lvi)*: et item prophetæ: *Tui viderunt tibi falsa et stulta, nec aperiebant tibi iniquitatem tuam (Thren. ii)*. Quod quamvis subditis dicatur in prælatorum increpationem retorquetur. Amoveamus ergo silentium; delinquentibus scelera nuntiemus, ne divinum incurramus iudicium et gehennæ æternæ incidamus supplicium. Constituti enim sunt sacerdotes iudices super gentes et regna, ut evellant et destruant, disperdant et dissipent et leges iniquas evacuent, quatenus ædificent et plantent, et leges æquiores inducant. *Labia siquidem sacerdotis custodiunt scientiam et legem requirent ex ore ejus (Malac. ii)*; non ipsi de ore principis. Legem utique a sacerdote requirunt terrarum populi, principes Christiani. Quorum est ecclesiasticis institutis parere, non leges iniquas sacerdotibus et Dei ministris indicare. Non his dissensit Justinianus, piissimus princeps, dicens: *Nostræ leges non dedignantur imitari sacros canones. Væ his qui condunt leges iniquas (Isa. x)* iniquis iudiciis suis Dei iudicia subvertentes. Væ assclis et eorum imitatoribus. Legem nobis posuit Dominus, legem sanctam et immaculatam, animas convertentem, Evangelii legem loquor, apostolorum instituta, Romani pontificis decreta: quibus cum ligandi solvendi que potestatem tam reges et principes quam populos universos contulerit, condendi quoque leges quibus arctarentur omnes auctoritatem concessit. Quam Romanam Ecclesiam obtinere incunctanter scimus. Cujus institutionibus his qui contrarias sancit non solum ut contumax, sed velut hæreticus si canonicis scriptis creditur, justissime coercetur. Proinde ne silentio meo præsumeretur consensus, de consensu procederet reatus, consuetudines quas avitas dicitis, sanctæ Romanæ Ecclesie matris nostræ sanctionibus contrarias cum auctoribus observatoribus et defensoribus anathematizavit; quas ut anathematizatas habeatis, vobis præcipiendo mandavi et mando; alioquin metuendum et vobis ne Dominus accinctus fortitudine apprehensis scuto et armis terribilibus exsurgat in adiutorium legis suæ, perdatque universos legem

sibi contrariam statuente observantes pariter et defendentes. Consuetudines vero regni legitimas observandas omnique devotione amplectendas censeo, quas velit nolit inimicus homo reverenter observabo. Duo quidem iudiciorum more solito canonum et legum tramite custodito operatus sum. De utroque me lapidare queritis, et antequam vobis qualiter quibusve ex causis ea fecerim innotuerit de sententia inique lata et iudicio perverso mihi insultastis. Verum iustissimo Dei iudicio contra vos actum existimo, ut in laqueum quem mihi parabatis, incideritis. Cum enim, quo pacto et quatenus ea fecerim, ignari essetis, sicut vestro significatis scripto, dicentes primo mihi fuisse de re cognoscendum, deinde super re cognita ferendam sententiam, nihilominus tamen super eo quod iustissime factum est me condemnastis, in eodem vos ipsos condemnantes. Nam in fratrem nostrum Saresburiensem episcopum pro eo quod contra domini papæ mandatum et contra nostrum prohibitionem sub excommunicationis pœna emissam, Joannem de Oxenfordia ipso jure excommunicatum in decanum promovit, potius decernentibus canonibus deponendum, suspensionis sententiam ejus inobedientia mihi prius cognita de ipsius confessione non post iudicium cognoscenda rationabiliter tuli. Cujus in præsentiarum non prosequimur delictum, ne ipsius cogamur augere supplicium. Joannes vero de Oxenfordia pro vulgatissimo crimine, quod si vellet inficiari patrati scelæris flagrantisque adhuc maleficii evidèntia ipsum convincente non auderet, excommunicatum denuntiavi et anathematizavi. Notum est enim et notorium quomodo minister vinculi iniquitatis atque colligationis impietatis fuerit, cujus ministerio ope et consilio schisma fere sopitum excitatum manifestissime cognoscitur. Ex quo non minus hæreticus quam schismaticus esse convincitur. Nam hæretici iustissima interpretatione probantur, qui vel levi argumento a tramite catholice religionis, vel unitate Romanæ Ecclesiæ deviasse deteguntur. Leve autem non est, sed validissimum argumentum hæreseos criminis in conspectu regis Teutonicorum et in populorum præsentia commissi. Cujus fere per universum orbem distraxerunt programmata iniquitatis vinculum Joannis ministerio colligatum continentia. Quem nec domini mandatum a crimine excusat cum etiam servis in his quæ habent facinoris atrocitatem dominis obsequium præstantibus minime ignoscatur. Commisit ergo Joannes piaculare flagitium quod nulla penitentia perpetuo eum comitante infamia obliterari potest. Lapsus est enim in hæresim et schisma damnatum, de participio et damnatorum consortio excommunicatus ideoque Romani pontificis sententia illaqueatus, a cujus vinculo quemquam præter Romanum pontificem, aut citra ejus mandatum eum absolvere posse, non est mihi liquidum. Nam quicumque erroris vel schismatis semel damnati contagio se maculaverit, principis sententia damnationis obstrictum fore canones censuerunt. In quem non

A nova scita promulgata sed in auctorem jam prolata exercenda sunt : scilicet ne iudex eum quasi non damnatum damnet, sed damnatum pronuntiet. Quia ergo jura delicti genere damnatum et excommunicatum declarant, nec non deponendum sanciant, hunc si excommunicatum denuntiavi et velut anathematizatum abstinere mandare ausus sum, mirando succensetis. Potius de silentio contra me iustissime indignaremini qui de canonum observantia in me scandalizari videmini. Cavete a fermento Joannis, ne, quod absit ! de ipsius participatione commaculemini, cui nostrum nullus communicare debet etiam si inconsulto animi calore ut me calumniemini ipsum excommunicassem. Si forte veneranda consilia nobis observare licet in quibus ei quem episcopus etiam iracundus cito et aspere commotus excommunicavit, antequam legitime examinetur et plene cognoscatur utrum excommunicari meruerit, neminem communicare debere sancitum perspicue patet, fortius a Joanne cum ipsum jure mandante velut anathematizatum abstinere mandaverim vobis abstinendum est. Ut enim canonica decernit sanctio, excommunicato absque sui ordinis periculo scienter nemo communicat. Hæc si quis studiosius attendat, fratrem nostrum Saresburiensem episcopum ad tempus juste suspensum, Joannem Oxenford, anathematizatum fore et ejusmodi non irrationabiliter denuntiatum esse advertet. Propterea si appellationis obstaculum ne, sicut dictante justitia et jure mandante, in præfatos animadveriti vos aut vobis forte subditi procaciter resistentes publice ac pertinaciter delinquentes corripiam, opponitis, videritis vos ipsi utrum appellatio ne contra inobedientes et publice delinquentes judiciarius vigor exerceatur emissã sit admittenda. Perfecto ut versuti juris et appellationis subornatæ præstigia delinquentium ultionem excludant, ac sic delinquendi libertatem inducant, periniquum videtur. Sin vero ne vos injuste condemnem, sicut illos nostrum quidam me corripuisse opinantur, quod tamen secus esse sapienter persuasum est, appellando intelligitis more suo et jure optimo, procedit appellatio, eamque promptus exaudio. Absit a me ut contemptis Patrum institutionibus in vos quidquam statuere præsumam ! Quod autem ne in dominum nostrum regem, sicut summa deposcit justitia, animadvertam appellastis, satis mirari nequeo. Cum appellationi a me celebriter exhibitæ reverentia debita omnino contempta, ipsum me expoliasse eosque quibus Cantuariensis Ecclesiæ et pauperum bona administranda commiseram repulisse, elei meis ecclesias suas contra omne jus et fas abstulisse, senes cum junioribus, lactentes cum lactentibus proscriptisse, nobis, et utinam non universo fœderi orbi, manifestissime notum sit ! Non enim ignoratis, fratres, eum legis beneficio indignum, qui in eam committere non desistit, præsertim ejus legis cujus observantiam in alterius contempsit jacturam. Jure siquidem gentium approbata est æquitas in paribus causis, paria jura desiderans. Sane indignari nemo

debet id in se quandoque pati, quod in alterius persona æquum fore crediderit. Quare prius est ut dominus meus rex ecclesiastica jura observet, non conculcet, ab Ecclesiæ Cantuariensis et mea meorumque injuria desistat, si appellationis remedium imploratum, si tamen imploret, aut sibi ab aliis implorari placeat, juste obtinere velit. Incognita est juri jurisque peritis appellatio ne qui ecclesiarum et pauperum bona usurpaverunt, usurpata quo pacto volunt consumunt, corripiantur exhibita. Appellationis enim beneficium non rerum ecclesiasticarum invasoribus aliosque opprimentibus, sed oppressis et injuste gravatis legum et canonum clementia in remedium contulit. Quo jure, qui appellationis jura subvertit, appellat? Quo canone, qui canonicis sanctionibus sua proponit instituta perversa, canonum invocat auxilia? Qua lege, qui leges iniquas in subversionem Ecclesiæ Dei et ministrorum ejus oppressionem condit, legum implorat remedium? Fratres, quæ scribitis quæque ipse mecum sollicitus revolve et anxius, me adeo angunt, ne quid mihi et Cantuariensis Ecclesiæ magis expediat, plene discernere valeam.

EPISTOLA XVII.

EPISTOLA CANTUARIENSIS THOMÆ ARCHIEPISCOPI EXSULANTIS, RESPONSALIS AD APPELLATIONEM EPISCOPORUM ANGLIÆ SCRIPTO FACTAM ET AD QUÆDAM ALIA SIBI AB IISDEM OBJECTA.

THOMAS D. g., etc.

Fraternitatis vestræ scriptum quod tamen, etc. [Vide Epist. S. Thomæ, infra, sub num. 75.]

EPISTOLA XVIII

EPISTOLA HERBERTI EXSULANTIS AD WILLELMUM CARNOTENSEM ELECTUM.

Cum ergo arriperem calamum ut verborum filis epistolaris eloquii talarem fulgidam et polymitam vestem texerem, in quo et charitatis mutuae præstarem officium, subito cecidit manus, obriguerunt digiti et stylus ipse quasi esset dolentis animi conscius obducitur situ; objurgans et dehortans, ne dictionum solemnitas et verborum lenocinia quærerem: nam qui quotidie cogor amara bibere, dulcia mihi amantissime quando possum tibi propinare. Dicit siquidem Scriptura quod musica in luctu importuna narratio est; cithara vero mea in luctum versa est, organum meum in vocem flentium, nam ut reliquam exsulantium multitudinem taceam, quæ tam injusta unius percussione multatur et exulare compellitur, ubi nulli parciatur sexui, nulli deferatur ætati, in me tamen præcæteris confirmatæ sunt iræ et Anglorum regis irruit furor, qui me in meo jam confirmavit exilio et eo regnum agente omnem mihi spem reversionis ademit, sed benedictus Dominus Pater misericordiarum et Deus totius consolationis, qui consolatur nos in omni tribulatione nostra, eo enim ipso me juxta Evangelii vocem beatum pronuntio, siquidem persecutionem patiens et socius propter justitiam patientis. Memor etiam quia tyrannus omnis cælestis opificis malleus est et modico tempore sinitur

A malignari. Præterea Dominus mihi in tribulatione hac auxilium dedit certum spei meæ refugium, tu enim solus post Deum refugium meum es a tribulatione quæ circumdedit me, sed hæc cursim et succincte pertranseo, ne in adversitate positus pro præteritæ dilectionis munere tua potius quam te videar quæsisisse. Scias etiam, amantissime mihi in Christo, veram esse illam de Romanis sententiam quam condiximus, cum mutuis aliquando et secretis foveremur alloquiis, qui ponunt lucem tenebras et tenebras lucem: quorum dextra repleta est muneribus, et quantum æstimant pietatem; solum quæ sua sunt quæridentes, non quæ Jesu Christi, et utinam quæ sua, si ab alienis cor manusque continerent! Fratres est profecto juxta prophetam Ephraim quasi columba non habens cor, arietes non invenientes pascua, abierunt absque fortitudine, ante faciem subsequens, sapienti dictum est satis. Ut tamen aliquid apertius eloquar, illi qui se faciunt summos Christianæ militiæ duces nullatenus audent ex adverso ascendere, murum se opponere pro domo Dei, sed jam terga præbuerunt et lucernam justitiæ posuerunt sub modio, plus regem illum Anglorum quam angelorum Dominum metuentes, et certe nisi me angustia temporis, etiam styli verecundia prohiberent, tanta de iis modo ingererem, quod ne dicam brevem, sed etiam omnem epistolarem excederem modum. Attamen de ipsorum insufficientia imo potius de consummata malitia disserens cogor finem facere ubi finis non est.

EPISTOLA XIX.

EPISTOLA HERBERTI JAM EXSULANTIS AD GREGORIUM ABBATEM DE MALMESBERIA.

Amantissimo sibi in Christo abbati de Malmesberia, suus H., miserabilis nunc et exsul, gaudere cum gaudentibus et cum flentibus flere.

Quod mihi vel nunc ut tuæ charitatis scripta destinarem, sera sed optata diu occasio obtulit, omne mihi gaudium est. Supplicavi horum bajulus ut alicui de amicis meis in Angliā scriptas porrigerem preces: annui cito et arripui calamum quo aptato vix formato primi characteris apice mox tremuit manus, hæsitavit animus, dehortans mihi ne scriberem, eo quo vix unus adversitatis amicus cum tam multi prosperitatis sint, et ut illum Cant. insignem a nobis vero elongati sunt amici et proximi et noti nostri a miseria. Scio etenim fama celebri divulgante jam ad aures vestras pervenisse, de his quæ his diebus facta sunt, quot et quanta videlicet propter justitiam sustinuerit opprobria Cantuariensis noster, cujus passionum ego socius sum, verum sicut abundant passiones Christi in nobis, ita et per Jesum Christum abundat consolatio nostra. Compatiuntur enim nobis et reges et regna, compatiuntur etiam nec hasito, supernæ illius civitatis concives, utpote quorum multi per easdem passiones et miseras transierunt. Siquidem ipsorum in Psalmo vox est: *Transivimus per ignem et aquam* (Psal. Lxv), et horum permulti transierunt, qui eandem Salvatoris civitatem, sa-

crossanctam loquor Cantuariensem Ecclesiam, dum adhuc in tabernaculo carnis militarent, inter pericula rexerunt tam prudenter, contra hostes dimicaverunt tam fortiter et triumphaverunt tam potenter, et ut quod dicimus certius doceatur exemplis, inter alios quamplures ex his qui de terra Ægypti sunt et qui civitatem jam dictam inter præsentis vitæ rexerunt pericula, quorum revera omnium enarrare gregatim catalogum epistolæ eloquii brevitate offenderet: sufficit interim tres in medium revocare, Dunstanum videlicet, Elphegum et Anselmum, quorum memoria in benedictione est et nomina scripta in libro vitæ. Jungamus ergo et tolerantiam earundem passionum ac miseriarum, in quibus nos adhuc pro tempore versamur, et in quibus et ipsi dum adhuc in carne essent versati sunt, nec est ambiguum inter quot et quanta pericula hanc quam domus Salvatoris ecclesiam rexerint pro qua etiam usque ad sanguinem restiterunt: levemus oculos et respiciamus prænominatos tres vigiles, medium si non vultus vulnus tamen discernit. Medius enim eorum stat quem nos scimus roseus et super dilectos rubicundus, stat enim martyr tripudians et triumphans toto lacero corpore: ni fallor, Elphegus est iste cuius vulnera vestra testantur verba, adeo ut et in ipsius corpore vulnere adhuc exsistent cicatrices crudi, aspersio sanguinis et verberum livor, imperatoris sui characterem gerens et pro civitate sibi credita quæ sustinerit summo omnium Patri representans, eo ipso Salvatoris sui imago et Crucifixi sequela; et puto veniente die Domini hujuscemodi commilitones Christi una cum Christo tali corporis schemate apparebunt et videbunt tunc in quem pupugerunt, roseum illum martyrum chorum saucium caput cum membris, imperatorem cum suis, illam agni familiam occisi ab origine mundi. Sed transeamus nunc sociam illam ovium occisionis multitudinem; Elphegus in ore est qui fortior stetit inter ictus lapidum in exsilio, quam Adam inter ligna deliciarum in paradiso, fortior fuit inter lapides quam Adam inter poma. Adam odore pomi olfacto mox cecidit et vincitur. At inter lapides stetit Elphegus immobilis. O quoties, ut arbitror, inter lapides pro suis exsecutoribus exorabat ut et in hoc se alterum nobis Stephanum exhiberet! Quoties omnis ad ictus prostratus vel genua curvans tam piis precibus tam devotis pulsabat cælos, et penetrasse non diffido precibus certe sanguine respersis et lacrymis orans et ingeminans: « Pater sancte, non pro mundo rogo, sed pro his quos dedisti mihi, pro civitate tua sancta quam mihi indigno commisisti! » Id ipsum etiam in præsentis vitæ naufragio inter tabellas suas, Dunstanum pariter et Anselmum orasse non dubium est, qui, etsi calicem non ex integro cum Elphego, guttas tamen ejusdem amarissimas ebiberunt, quorum uterque proscriptus his exulare adactus est, terram in corde maris sitam multa cum difficultate egressi, persæpe etiam

urgente principum commotione incerto se navigio commiserunt, sustinuerunt injurias pelagi propter justitiam, nihil secum portantes. Horum præconis ego totus jam devotus insisterem, nisi quod nec nova referre ignoranti nec tanta materia epistolari angustia pateretur arctari. Ut igitur morem geram epistolæ legentibus auribus parcam, aliquid tamen de præfatis vigilibus addens eo quod ab ipsorum recordatione inter præsentis angustias avellar invitus. Nam potissimum hos tres vigiles in sancta summæ Trinitatis ecclesia, tanquam civitate regis magni cernimus esse constitutos, qui eam speramus protegant die ac nocte, id est in vita et morte sua. Nec enim eos tam inhumanos fore arbitrandum est ut cuius fuerunt in vita rectores ac principes, ejus sint in morte contemptores, quin etiam credibilius tanto in morte hunc ipsorum potentius protegant, quanto amplius post ipsam confirmatus est principatus eorum. Cui namque posset venire in dubium ipsam, quam adhuc peregrini inter pericula rexerunt tam prudenter, pro qua et inter hostes militaverunt tam fortiter et de hostibus triumphaverunt tam potenter, nunc facti cives et domestici Dei deserant tam crudeliter, prætereant tam ingratanter, pro qua tanquam boni vigiles sæpe in orationibus pernoctantes tam crebras, tam devotas fuderunt orationes, furtivis frequenter respersas lacrymis et ejulatibus interruptas, eo magis lucidas quo magis absconditas et eo puriores quo secretiores. Denique et eorum sepulcra sunt apud nos gloriosa; in honore corpora et in magnificentia spiritus. Quæro ergo, nihilne nobis amplius miserebuntur? qui et se per easdem passiones et miseras transisse meminerunt quod Cantuariensi nostro causam suam commiserunt et sedem. Quid ergo, ipsi per ignem transierunt et aquam et nos in mediis ignibus et fluctibus delinquant nec saltem manum apponent periclitantibus filiis? Non est ita, bene tecum agitur, o Salvatoris, o magni regis civitas! O mater nostra Cantuariensis Ecclesia, de cælo et de terra veniet auxilium tibi: qui custodiunt te non dormitant neque dormiunt, custodes tui angeli sancti: vigiles tui spiritus et animæ iustorum sunt: de tuo utero sunt egressi a quibus auxilium flagitas. Vigiles etiam tui sanctum est Ecclesiæ Cantuariensis collegium et quotquot sacri sunt in ecclesia Anglorum conventus, qui die nocteque psalmis et hymnis et canticis instant spiritualibus, qui pro nostræ imo Salvatoris domus defensione frequenter in lacrymis et orationibus pernoctantur. In his spem nostram ponentes, celebre nobis inter mala solatium est nec absorbemur a tristitia, potius ut verum fatear lætatur et exultat anima mea. Lætatur certe et exultat, quia est nobis auxilium in patria, est et in via, habemus arma a dextris et a sinistris. Lætatur, inquit, et exultamus, quia cælestis illa curia ex nobis habet quibus sit cura nostri, qui nos suis protegant meritis informant exemplis et confirmant miraculis: lætamur quod

angelii nostri ascenderunt ad cives suos, qui pro filiis captivitatis legatione fungantur, corda nobis concilient beatorum, vota illis intiment miserorum. Benedictus Dominus Deus Israel, qui tantorum pontificum ministerio visitavit plebem suam, et nunc assumptus iis in sanctam civitatem nostram non desinunt consolari civitatem captivam.

EPISTOLA XX.

EPISTOLA HERBERTI AD ALEXANDRUM PAPAM IN PERSONA TH. CANT. ARCHIE. IN EXSILIO POSITI.

Domino et Patri suo A. Dei gratia summo pontifici, ejus filius T. Cantuariæ dictus episcopus, abundare fortitudinis spiritu.

Omne gaudium existimo, dilecte Pater, eo quod tribulationum vestrarum ego particeps esse meruerim, sperans quoniam sicut fui socius passionis, sic ero et consolationis. In Christo namque Jesu cooperante confido et bonam nobiscum spem reporto, quia eo duce pervenimus ad bravium qui nos movit ad cursum, et eo jubente sub regimine vestro pervenimus ad portum qui movit procellæ spiritum. *Dixit enim et stetit spiritus procellæ et exaltati sunt fluctus ejus. Ascendunt usque ad cælos (Psalm. cvi).* Sed quid? Post usque abyssos descendunt (*ibid.*); nam fluctus maris sunt, et ecce qui ecclesiasticæ pacis auram turbaverunt, turbati sunt et moti sunt sicut ebrius, et omnis sapientia eorum devorata est (*ibid.*). Effusa est contentio super principes et erraverunt in invio et non in via. Nam sicut verbum celebre est et litteris mihi significatum accepi, insignis ille schismaticus qui singularem quærit in mundo principatum, multos vero in errore consortes, animo mirabiliter consternatus est, conquerens se ab homine, sicut dicit, iniquo et doloso deceptum Anglorum rege, eo quod secum in veritate non steterit, præsertim cum stauerit quod absque occasione post festum Beati Michaelis ad octo dies venire ad colloquium suum et jurare faceret sexaginta episcopos antipapæ illi Guidoni Cremensi: nunc vero occasionem quam amovit prætendat guerram videlicet quam in Wallia habet. Hinc, sicut aiunt, dissolvetur omnino amicitia: fœdus quod constat in Christi morte contractum. Squama siquidem squamæ conjuncta est, sed spiraculum vitæ non ingreditur per eas. Nam Dominus est qui dissipat consilia gentium et reprobatur consilia principum, et adhuc litteræ multum constanter asserebant, quod Trevensis et Magdeburgensis et Saxeburgensis cum quibusdam suffraganeis suis, et filius regis Conradi, et dux Orientis avunculus ejus, et dux Bertolphus de Ciringia, et dux Welfo et Frædericus frater domini Moguntini, et alii quam plures fautores juraverunt de novo imperatore faciendæ, nisi iste de parte Ecclesiæ et libertate Alemanniæ ad eorum arbitrium steterit. Præterea ille alius, qui parvitatem meam imo in me celsitudinem vestram tam pertinaciter et tam gravi persequitur plaga, confusione duntaxat et pudore induitur, eo quod in abundantia virtutis suæ adversus inerme hominum genus ex-

A braccatum et pannosum prævalere non possit, quem et gravant multiplices suorum defectus nec minus sumptus quotidiani, utpote qui in gente inculta et tenui nequaquam alia valeat invenire spolia præterquam hostium capita. Unde et periculosa congressio ubi redemptio corporis non nisi anima est, et grandis sollicitudo ubi dies singuli cum mortibus quotidianis expectantur et sumptibus. Nudius tertius ad Christianum illum Francorum regem Ludovicum venerabilis frater noster Rotomagensis archiepiscopus destinatus venit. Quem admonitione sedula, crebra prece et persuasione multa de consederatione faciendâ cum Anglorum rege in aure sollicitans, convocatis omnibus qui tunc intererant, palam responsum tulit dicente rege quod Anglorum rex satis ei fuerat obligatus, et adjiciens quod de cætero nunquam cum eo novum amicitia: fœdus contraheret, si non prius quodcumque imperatori juraverat id totum objuraret. Rex ita coram omnibus quasi pro jam facto hominem deridens, et ad perjuriam facilem notans; Rotomagensis vero respondit Anglorum regem imperatori nil contra Francorum regem seu regni ipsius coronam jurasse, et in hunc modum discessit. Hæc omnia mihi ipse rex Francorum significavit. Intimatum etiam mihi est quod jam dictus frater Rotomagensis litteras a rege Angliæ recepit, quibus contineatur regem velle ut revertatur in Angliam, si tamen judicio episcoporum terræ et aliorum quos vocaturus sit me super his quæ objiciet supponere velim. Præterea de consuetudinibus, imo de subversionibus illis quas redegit in scriptum, nullam, sicut asserit, arbitratu iniquam seu legi Dei adversam. Si qua tamen fuerit, id quorundam fratrum nostrorum coepiscoporum, quos jam ipse selegit et designat, committet examini, videlicet Eboracensis archiepiscopi, Londoniensis episcopi, Wigorniensis episcopi, Herefordiensis, aliis citra mare adjunctis Rotomagensi archiepiscopo, et episcopo Baiocensi; appellationes vero ad vos omnino diffusetur inhibitas; has etiam regis litteras Rotomagensi cum suis propriis ut mihi relatum est vestræ jam sanctitati transmisit. Quia certe factum præsumitur rege conscio et volente. Accepi etiam fratrem nostrum Londoniensem itidem vestræ beatitudine litteras quasdam destinasse, quibus doceatur regem sicut dicit nequaquam me coegisse ut terram exirem, et potius velle nunc reditum meum, si tamen judicio paream super his, sicut jam diximus, quæ mihi objecturus sit. Id etiam demum in litteris supplicat, ne terra sub interdicto ponatur, et ideo nunc, Pater sancte, evigile discretio vestra, nam singula verba hæc reſta sunt, quæ frustra ante oculos pennatorum jaciuntur. Quale est enim quod inter præfatos episcopos, illos iniquarum legum quærit examinatores qui fuerunt auctores, præterea cum non sit minorum judicum discussio hæc, quorum super ecclesiasticis nulla sanctio nullave interpretatio, dispensatio vero in paucis commissa est. At vestra in his singularis conside-

ratio est. Quod vero appellationes diffidetur inhibitas, lingua certe æquitati favet, sed manus multum adversa est. Nec est enim qui auderet ob appellationis suffragium, singularis primatus tui nomen confiteri in terra. Trahantur passim omnes ad curiam sicut populus ita et sacerdotes, et Christus a Pilato judicatur adhuc. Quod vero de reversione mea significat, interposita conditione præfata, oculi ejus in pauperem respiciunt, sed insidiatur quasi leo in spelunca sua. Insidiatur certe ut rapiat pauperem dum attrahit eum. Evigilet se igitur patris mei sapientia ad istos qui mihi tenduntur laqueos, et attendat quanta sit persecutio mea violenta et fraudulenta, ubi vis et dolus comparantur, ubi malitia potentiam sociam habet. Unde et vereor sciens et prudens mihi injicere compedes, B intercipi laqueis, incidere foveam. Vereor me secundo in flammam mittere. Transivi semel per ignem et aquam; secundo jam opus erit ut pro incerto vel nullo commodo certis me opponam periculis, præsertim cum in illo conventu nequaquam liceret mihi dicere veritatem impune qui pro jam dicta veritate et apostolicæ sedis obedientia, tantam jam sentio severitatem, ut a filiis Ephrem qui mecum ærcum intenderunt sed sine me in die belli conversi sunt, arguar perjurium incurrisse et majestatem regiam minuisse. At satis impudenter militem in prælio d'nicantem objurgat mulier manens in domo. Quod vero dicit dominus rex, me minime coegisse ad exitum, spero non esse opus nunc quasi de novo exitus mei astruere causas, allegare metus argumenta et fugæ meæ apologeticum scribere. Nec enim reor, benigne Pater, a memoria vestra excidisse quot et quanta sustinuerim in profundo pericula, ex quo jubente te remigavi in altum ut retia laxarem in capturam, in tam gravi vitæ meæ naufragio, ut relicta sindone nudus vix evasem, demum in laboribus plurimis, ad sinum misericordiæ vestræ velut ad portum voluntatis deductus. Quod etsi ego siluero, mundus clamat. Forte et dum ista recolo et quæ mundus novit loquenti vestra compatitur mihi clemens paternitas. Qui cum essem nutritus in palatio contubernalis et condiscipulus Augustorum, solus tamen pastorales sudores aggressus sum, solus attentavi resistere, solus Christi injurias propulsare, solus patris mei nomen confiteri in terra, et ideo torcular calcavi solus. Præterea nulla ratione nisi prius præstita impunitate corporis mei reverterer ad gentem quæ querit animam meam, facta etiam ex integro mihi et spoliatis pro me ablatorum restitutione. Nam recolat, quæso, discretio vestra, quanta rerum damna tempore istius regis sustinuerit Anglorum Ecclesia in episcoporum expulsionibus, prius expulso sanctæ recordationis Joanne Wigornienensi episcopo post venerabili fratre meo filio vestro Henrico Wintonienensi qui sine omni restitutione plus quam tria marcarum millia perdidit. Unde et usque adhuc facilitas veniæ tribuit securitatem dolinquendi. Sed faciant cum domino rege adversus

A parvitatem meam, quantum Deo permittente libuerit et licuerit, includant, excludant, proseribant : ego certe, Dei gratia inspirante et persequente, decrevi pati pro lege Dei mei, nec, ullo cogente metu seu favore aliquo eorum, unquam ero consentaneus in culpa, quorum nolo esse consors in pœna. Decrevi etiam satius in exilio mori, quam tribuere hoc exemplum grassandi in dotem viduæ et patrimonium Crucifixi. Tu vero de cætero, sancte Pater, memento quia pater es cujus est misereri semper et parcere. Nec attendas flagellum meum quia homo valde peccator sum. Sed si manns Domini tetigit me et adhuc extenta est super me, permittit me solum ebibere calicem miseræ meæ. Respice super filios tuos, qui mecum sine causa tam dire tam inhumane proscripti sunt et ejecti, quia licet sint feliciter miseri, quos constat non meruisse quæ perferunt, ipsorum tamen tribulatio meam miseriam cumulat. Respicias igitur, pastor bone, super oves pascuæ tuæ. Vestrum enim est oves errantes et dissipatas per nebulas et avia deserti quærere et ad pascua reducere. Quia Christi vicarius es, opus id probet. Leva manus in superbias eorum qui malignantur in sancto. Increpa feras arundinis; dissipa gentes quæ bella volunt; confringe in die iræ tuæ reges et in nationibus judica, ut quemadmodum es Pater misericordiarum, sis et dominus ultionum, judex justus et fortis, terribilis et auferens spiritum principum, terribilis apud reges terræ, ut sicut Christi te scimus vicarium Christi ministerium impleas. Oro igitur et iterum oro, vicarius Christi, christus Domini, Christi injuriam amodo ne dissimulet. Verum verbum illud tritum jam et commune mihi suspectum est quod sapientibus nostris caro revelavit et sanguis : *Expecta*, inquit, *reexpecta* (Isa. xxviii), non est tempus vindictæ sed sustententiæ in tanta, inquit, multitudine inimicorum Ecclesiæ. Oro, Pater, sustine paulisper et supporta me tantæ majestati non tam temere quam timide hæc loquentem : mira certe, imo monstruosa sapientia hæc ut tunc sine causa portetur gladius sacerdotii, quia multi sunt adversarii Christi, quasi athletis Christi ad tempus cedere, curvare genua, solvere manus, et gladium in D vaginam convertere tutius sit adversariorum multitudine territis. O cæca mundi sapientia supina nimis et crassa, enervans omnem fortitudinem fidei, suffocans censuram judicii et quæ lucernam justitiæ ponat sub modio. Pro quibus propheta : *Aperi, Domine, oculos eorum, ut videant, quia plures nobiscum sunt* (IV Reg. vi). Non difficile tamen persæpe parendum tempori, interdum aliqua dissimulanda sustinenda multa : dispensanda vero nonnulla, at id quidem bene fieri si salva justitia fiat. Sed ut taceam tam dirum et Christianorum principum temporibus inauditum exstium, ubi unius percussione tot et tanti mutantur, et multa alia enormia quæ in Anglorum sunt Ecclesia, quomodo erit salva justitia, ubi secundo victus ducitur Christus ante

præsidentem, ubi et Petro adimitur sui apostolatus officium. Nam passim trahuntur clerici ad iudicia sæculi, sacerdotes ligandi et solvendi potestatem libere exercere non audent. Age igitur, homo Dei, quorum tenes hereditatem induere fortitudinem: excute te, filii excussorum, accingere gladio tuo super femur tuum; exturba et dissipa tuam hereditatem dissipantes, ne potestas tanta sine causa gladium portet, nunc præsertim cum in Christum Malcus et in vasa templi Balthasar manus extenderit. Nam confido in Domino quia ut viderit gladium venientem super terram buccina insonante, inimicus ille convertetur in fugam, qui eo quod ex adverso non ascenderimus gloriarier nos terga præbuisse et linguas taurorum abscessisse, sicut propheta suus Merlinus inter cetera istud longe ante de eo sicut gloriatur vaticinatus est et linguas, inquit, taurorum abscedet. Qui tamen nunc ex solo metu, et tuæ majestatis offensa dolo et caliditate quadam se humiliat. Nam viri callidi et dolosi proprium esse solet tunc humilitatem prætere, cum metus in causa est vel aliquid obtinere voluerit. De qualibus Scriptura dicit: *Est qui humiliatur nequiter et interiora ejus sunt plena dolo* (Eccli. xix). Tu igitur princeps Christianæ militiæ expergiscere, gladium tuum amodo non recondas, sed exseras, præsertim cum alter ejus immineat gladius, non verbi dico sed ferri, ut ita uterque Ecclesiæ serviat. Nam propterea irritavit te, Domine, quia dixit in corde suo: *Non requies* (Psal. ix), imo quod verius non audebit, inquit, requirere. Sed *exsurge*, Domine, *in ira tua* (Psal. vii) et retribue abundanter facientibus superbiam et murmur universæ terræ pro sanguine meo, adversum te ulterius ne dissimules, aut si murmur terræ non audis exaudias clamorem sanguinis. Clamavit enim sanguis meus ad te de terra. Age ergo, vindica sanguinem servorum tuorum, non unius dico sed multorum. Memento, quia brevis est dies tuus, ideo operare, dum in die es, dum in via es, dum adhuc in pugna es, non differas ultionem quia tempus justitiæ est. Non recondas gladium, quia tempus belli est. Non abjicias sarculum, quia tempus putationis est, ut tanquam prophetarum filius facias opus prophetæ, evellas et destruas et dissipas et ædifices et plantes, si quo minus sanguis meus ab omnium iudice de manibus tuis requiretur. Hæc prædico tibi et iterum prædico, ad justitiæ ostium pulsans, ne si forte ab hac luce ad regnum tuum migraveris, improperetur tibi a cœlesti militia, quod filium tuum in profundo in tam gravi naufragio ad te clamantem dereliqueris, nec periclitanti pro te apposueris manum. Ubi et interrogabit te summus omnium iudex cur non posueris animam tuam pro me qui ipsius exemplo meam jam semel posui pro te, ipse vero pro me et te. Ubi etiam interrogabit te summus ille omnium iudex quare justitiam et veritatem tuam absconderis, vel ad tempus etiam conculcari sustinueris, quasi impotens sit primos et graves adversantium sibi

A impetus sustinere, nisi ipse in primis conculcetur qui et justitia et veritas est. Nisi fallor nullus erit tunc locus dissimulationis in causa liquido iudicio veritatis, ubi ipsa veritas iudex. Dispensatio quidem seu dissimulatio, in cæteris quidem utilis est si non violetur justitia, alioquin plurimum timoris habet modicum fidei fortitudinis nihil. Unde et quidam ait: « Agnosce vocem ejus quia de parentibus tuis est. » Verbum Dei non est alligatum, noluit dispensare, noluit dissimulare, donec carcerales evasisset angustias, donec solveretur a catena, sed cum omni fiducia operabatur in vinculis, non dico ne periclitaretur, sed ne etiam minus dilataretur justitia. O quam felicia illa apostolorum tempora, quando nec purpurati nec insulati, nec deaurati incedebant, non micabant gemmis, non florebant sericis, non pennis coronabantur, non auro argenteo suffarcinati, non stipati mitratorum corona nec erant examine ministrorum. Tunc absque velamine inde se nudos contemplantur quod homines nati essent ad laborem, non ad honorem, ad miseriam non ad gloriam. Memor esto, sancte Pater, hujus tam sanctæ cognationis tuæ quæ fuit ab initio. Consideres opera; opera Adriani, Anastasii, Eugenii, sed præ cæteris Petri et Pauli, et aliorum in istorum catalogo, a quibus tota tua emanavit tam generosa posteritas, ut in auro intextis et sericis agnoscas te excussorum filium et piscatorum hæredem. Puto si isti parentes tui mecum adhuc in carne viverent, adjuvarent et naufraganti filio apponerent manum. Nec ob id ista locutus sum quin sperem te facturum similiter, qui tibi tam nobile genus vindicas constantia animi, fortitudine fidei et præclara morum hereditate. Spero quidem nec hæsito, quin te duce, te rectore, navicula mihi credita in portu voluptatis deducatur, et procella mea statuatur in auram.

EPISTOLA XXI.

EPISTOLA HERBERTI EXSULANTIS AD HENRICUM BAIONENSEM EPISCOPUM IN NOVITATE PROMOTIONIS EJUS: IN QUA EPISTOLA NONNULLA SUMPTA SUNT EX TRACTATU BERNARDI CLAREVALLENSIS QUEM FECIT AD PRECES PAPE EUGENII.

Inter scribendum hæc, imo priusquam scriberem, mox steti et hæsi et cum styllum et tabulas arripuerim, necdum exaratis aliquibus præsentis eloqui notis suspendi organa mea, dubius admodum quo dictionis genere ego loquerer nunc ad dominum meum. Nam diversos etiam et adversos scribendi characteres imperabant hinc clara et gloriosa mutatio nominis tui, inde vero dura et aspera sors exsili mei.....

[*Hortatoria, quæ sequuntur usque ad finem epistolæ, nec ad sancti Thomæ historiam spectantia, nec aliter unius assis æstimanda, omitto*].....

EPISTOLA XXII.

EPISTOLA B. ABBATIS SANCTI CRISPINI SUESSIONENSIS AD HERBERTUM.

Charissimo et præcordiali amico suo magistro

H., frater ille sanctorum ecclesiæ martyrum Crispini et Crispiani minister humilis, viam veritatis eligere.

Expectans expectavi promissi terminum et nihil accepi. Quod si tibi a languescenti memoria vel promissum vel promissi terminus fortassis excidit, neutrum in nostra periisse pro certo noveris. De synodis et ad populum sermones termino statuto transmittendos vel a te ipso deferendos mihi promissisti. Terminus præterit, promissum infra præteritum adhuc languescit. Sine itaque ut quod penes te inclusum est et intra terminum a te valeat promissum egredi et ad me cui promissum debetur ingredi, ne videaris veritatem amplius transgredi. Si a veritatis via scienter aut ignoranter aberrasti, tibi licet adhuc ad eam regredi. Viam ergo veritatis festinanter eligere, dum liceat, libeat, neque quod processit de labiis tuis omnino irritum facias. Et si me ad tempus ab expectatione mea confusum doleo, latori præsentium secure potes committere quod cum acceptum legero, confusionis dolorem penitus expellit ab animo. Votis itaque meis et precibus, magister optime, magistrorum mihi charissime, satisfacere festina, ita ut nunquam portitorem nostrum vacuum ad nos remittendi occasionem perquiras. Excellentissimum et dilectissimum dominum Cantuariensem archiepiscopum ex parte nostra officiosissime salutare non differas, cujus ad obsequium nostra paratus sum exponere omnia cum corpore simul et anima. Valeas et tu ipse non pro merito, sed ut desidero. Auferet enim a te salutem meritum, eandem vero mediante Jesu Christo conferet nostrum in bonis desiderium. Quam etiam ut desiderem affectuosius, efficiat precor in suo reditu præsentium bajulus mihi sic inquitens: « Hoc vobis mittit magister Herbertus amicus vester fidelis et veracissimus. » Vale iterum. Suppono vobis et vale tertium. Tu siquidem nosti triplicem difficile rumpi funiculum. Cave ne alii publices quod præsens pagella continet.

EPISTOLA XXIII.

EPISTOLA HERBERTI EXSULANTIS AD B. ABBATEM SANCTI CRISPINI MAGNI SUESSIONENSIS.

Domino charissimo et honorando in Christo B. abbati, H., in Domino salutem.

Lectus dignationis tuæ sermo hinc mihi præstitit gratiam hinc incussit timorem: inculcat me hinc, blanditur inde. Nam, ut litteræ tuæ sonant, æstimas me juste arguendum tanquam promissi mei immemorem, sed mox velut charitatis consilio tribuis indulgentiam ad illius quod promissum est solutionem invitans. Videris etiam me levitatis arguere quod juxta promissum tempus non venerim. Sed meminisse debueras quia non est hominis via ejus nec viri est ut ambulet et dirigat gressus suos, præsertim cum ego sim homo sub potestate constitutus, cui si dicitur: « Vade, et vado et dominiis meis obtempero. » Verum cum essem apud te, sperabam me in modico reversurum et promisi ut

A credidi. Cum ergo non venerim nunquid levitate usus sum ut sit apud me. Est et non? æstimo quia judicio beatitudinis tuæ non solum qui verum sed et is qui falsum dicit quod putat verum, liber a mendacio sit; aliòquin apostolus pariter arguatur qui juxta promissum nequaquam ad Corinthios venerit. At vera amicitia quod sentit dissimulare non debet. Proinde est quod correptionem tuam acceptavi eo ipso indicans, quia trahere velis ut invitum ut veniam et videam te. Spero autem et adhuc quod proficiscens in Flandriam factorus sum transitum per vos et sine dilatazione. Interim vero pollicitationis meæ pignus accipias, aliquas videlicet schedulas vel paucas quas per hunc bajulum destino, quas a nobis elaboratas dignatus es postulare, qui in urbe ut videtur similavi fastidians et pretiosis epulis saturatus cibarii panis nostri et rusticani oleris alimenta desideras: quibus nunc in solitudine Pontiniaci pauper vita mea ne in via deficiat sustentatur. Hæc igitur accipe non tuam sed potius turbæ discumbentis refectionem, in quibus tamen si qua forte fragmenta quæ tuum quærant refocillare spiritum repereris, gratiæ non mihi sed patrifamiliæ referantur, de cujus plenitudine quæ dispensatur accepta sunt. Scripsissem plurima nisi quia me urgebat subita et inopinata profectio, ut vix una lucubratiuncula exaraverim, unde si juxta amantis votum parvæ et incomptæ sint litterulæ hæc, ne mireris. Scis enim ipse non omnino bene fieri quod præpropere vel occupato animo fiat: præterea memento quam paucioribus tuis ista redduntur, cum tamen tu totus in libris sis. Nunc omnia super omnia, quæso, ut impensas ad Dominum fundas preces quo possit dominus Cantuariensis et qui tribulationis tuæ socii sunt in isto certamine victoriam consequi. Simulque ut omnes fratres qui tecum sunt meo nomine salutentur, impendio precor, et ut memoriam tribulationis nostræ in orationibus suis habeant, moveatis affectuose.

EPISTOLA XXIV.

EPISTOLA HERBERTI AD ALEXANDRUM PAPAM IN PERSONA HENRICI COMITIS TRECENTIS.

Unico et summo Dei gratia Romano pontifici A., filius suus H. Trecarum comes Palatinus, quæ vera sunt intelligere ac novissima providere.

Quod in præsentiarum aures clementiæ vestræ pulso et filialis dilectio monuit, et generalis quædam Ecclesiæ necessitas compulsi; nam gloria nominis vestri quæ usque ad hos dies toto orbe admirabilis claruit, jam facta est subsannatio et illusio his qui in circuitu nostro sunt multis in opprobium versa. Quoniam ecce inimici vestri sonuerunt et qui oderunt vos extulerunt caput, nuntios dico Anglorum regis, qui revertentes de curia ad ignominiam magnifici viri et omni laude digni archiepiscopi Cantuariensis, imo verius ad sanctæ Ecclesiæ depressionem, omnes petitiones suas impletas esse gloriantur et circumquaque divulgant, videlicet quod famosas illas consuetudines, imo verius Ecclesiæ

Dei subversiones, ob quas dominus Cantuariensis exulare dignoscitur, suscepitis, ut sit ab omni episcopali jurisdictione exemptus, ipsum etiam Anglorum regem suis legibus cleri privilegia solventem tanto honoraveritis privilegio, ut sit ab omni episcopali jurisdictione exemptus, factus præ cæteris regibus specialiter vester filius qui præ cæteris vestram iram et indignationem promeruit. Adjiciunt etiam quod omnem domini Cantuariensis auctoritatem suspenderitis quousque e latere vestro nescio quos cardinales miseritis, qui plenam jurisdictionem habentes causam quæ inter sæpe dictum archiepiscopum et Anglorum regem vertitur dirimant. Inter hos etiam vulgatissimus ille schismaticus, cujus etsi nomen taceo ex perjurio ad singularis primatus vestri diminutionem tam enormiter perpetrato notissimus est, tanto præ cæteris est elevatus, quanto amplius est exaltatus; quia sicut jactitat vix adhuc absolutus mox vestra manu propria per annulum aureum in decanum restitutus est, et post etiam, quod præ cæteris stuporem auget, ipsum sicut regem suum in specialem filium suscepitis, nulli, sicut gloriatur, juri episcopali subjectos. His auditis, Pater sancte, commota est terra et conturbata; rex ipse noster obstupescit, principes admirantur, irascuntur populi, et sacerdotes confusi sunt: omnes vero compatiuntur et condolent tum propter ecclesiæ subversionem quam metuunt, tum propter etiam viri amabilis Deo et hominibus desolationem præsentem, qui cum esset in domibus regum nutritus et tantam, sicut novit orbis, haberet gloriam sæculi et favorem, non recusavit tamen humeros suos virorum oneribus supponere, et omnia mundi pretiosa pro justitia Christi alta mente calcare. Ego etiam, qui non modicum honorem vestrum et gloriam et diligebam et diligo, admodum contristatus sum et conturbatus, anceps tamen et dubius an si ut linguosi illi disseminant confRACTA sit virga fortis, baculus gloriosus, et terra de qua panis oriebatur tam subito igne subversa sit; necdum tamen plene acquiesco auditis. Proinde, Pater sancte, filii tui non spernatis sermonem prudentiæ et fidelis tuis consilium. Parcite gloriæ vestræ, parcite et famæ, parcite Ecclesiæ Dei, parcite athletæ Christi juxta illius inclyti decessoris vestri formam, quanto infirmior, estote fortior et potentior. Exsurge igitur, Domine, in ira tua, et disperse linguas magniloquas, ut labor labiorum ipsorum operiat eas. Alioquin profecto sciatis, et in brevi est, quod principes terræ super populum vestrum malignabunt consilium et adversus electos vestros cogitabunt.

EPISTOLA XXV.

EPISTOLA HERBERTI AD A. PAPAM IN PERSONA MATTHÆI PRÆCENTORIS SENONENSIS.

Unico et summo Dei gratia sanctæ sedis apostolicæ pontifici A., filius suus M. Senonensis Ecclesiæ minimus, in omnibus subjectionem et fidem.

Quia semel cœpi, loquar ad dominum meum, cum sim pulvis et cinis, nam hinc zelans hæc suasit

A charitas, inde vero instans urget necessitas. Vox enim auditionis ecce venit et terra commota est; perit cor regis et cor principum, sacerdotes obstupuerunt et dissolutæ sunt omnium manus; celebris siquidem est et in ore omnium vox, quod inter tot Ecclesiæ inimicos in propria viscera convertitis manus, quia Christi hostibus traditus sit unicus ille et singularis diebus nostris Christi athleta; filius dico vester Cantuariensis archiepiscopus, qui propter gloriam nominis vestri sicut omnis Ecclesiarum orbis prædicat sprevit gratiam principum, confusionem sustinuit et improprium, dimisit denique domum suam, reliquit hæreditatem suam. Auget etiam malorum scandalum quod vulgatissimus ille schismaticus Joannes de Oxenforde vestra quæ omni præest auctoritate absolutus Saresberienensis decanatus tam facile restitutionem meruerit, quasi sit ei in justitiam reputatum publicum illud perjurium schismatis quod, sicut mundus novit clamat, tam enormiter in Alemannia perpetravit, cujus occasione insignem illum schismaticum qui singularem quarit in mundo principatum: multos vero in errore consortes ad gloriæ vestræ depressionem suscitavit. Quin et Joannes iste et alii regis Anglorum nuntii a curia revertentes dilataverunt os suum et adversus Cantuariensem nostrum, vel ut Interpretemur verius ad Ecclesiæ Dei oppressionem, cuncta se impetrasse gloriantur, et ex hoc, ut multi nomini vestro sancto detrahant, multam causam viri isti linguosi præbuerunt. Et hinc est quod universam Ecclesiæ faciem confusio operit. Timor enim et tremor venerunt super nos, quoniam in auditu hoc dii fortes terræ vehementer elevati sunt, expectantes in dies quod si in stadio præfatus Christi athleta defecerit, ipsi sint bravium accepturi vestrum humiliando populum et patrum vestrorum se immiscendo hæreditati. Quia igitur semel cœpi, loquar ad dominum meum cum sim pulvis et cinis. Non infirmetur in tribulatione virtus vestra, sed præcipita, Domine, et divide linguas eorum, ut sciat universa terra quia locuti sunt adversus justum iniquitatem in superbia et in abusione, et fiat manus tua super filium dexterae tuæ et muta fiant labia dolosa. Alioquin tanta jam præsens est turbatio quantam huic scripto horruì credere, et tamen devotus vester et fidelis vestre sanctitati non debuit penitus subticere. Tribuat vobis Deus, summe Pater, secundum cor vestrum et omne consilium vestrum confirmet.

EPISTOLA XXVI.

EPISTOLA HERBERTI AD REIMUNDUM DIACONUM CARDINALEM ROMANÆ ECCLESIE IN PERSONA TH. CANTUARIENSIS.

Ven. Patri suo et fratri in Christo charissimo magistro REIMUNDO Romanæ Ecclesiæ Dei gratia diacono cardinali de Sancta Maria inviolata, T. Cant. Ecclesiæ minister humilis miserabilis nunc et exsul, modicum id quod nunc potest.

Qui quotidie cogor amara bibere, dulcia vobis, sancte Pater et amantissime mihi frater in Christo,

propinare non possum. Superstitiosi potius est inter ejulatus et lacrymarum sordes velle sibi comparare gloriam de specie exquisiti sermonis. Et idem est, chare mihi in Christo, quod in presentiarum nolui me de potestate labiorum jactare qui in presentibus miseriis vix subsisto, nolui, inquam, me loquacitate extollere, quem pro facinoribus suis sicut mortuum sæculi in obscuris collocavit Altissimus. Venio igitur ad vos non indoctis humanæ sapientiæ verbis sed in verbo crucis, quod quidem pereuntibus stultitia est; his autem qui salvi fiunt, id est nobis, virtus Dei est, nos etenim sumus qui Christum crucifixum prædicamus. Qui proposito vobis gaudio, etc..... Audivimus enim famam et inimici Ecclesiæ missi ad curiam in omni loco jactitant, quod contempserunt nos principes vestri, quinimo tradiderunt nos in manum inimicorum nostrorum, etc..... oro ut pro presenti tribulatione nostra et Ecclesiæ causa precibus et exhortationibus scripto directis, sicut optime nosti, apud Romanum pontificem et confratres vestros intercedatis, etc.....

EPISTOLA XXVII.

EPISTOLA HERBERTI AD CHRISTIANUM FRANCORUM REGEM LUDOVICUM IN PERSONA TH. CANTUARIENSIS ARCHIEPISCOPI.

Christianissimo et illustri Francorum regi L., T. Cant. Eccles. minister humilis miserabilis nunc et exsul insignis, coronam vitæ immarcescibilis.

Gloria in excelsis Deo qui in istis diebus tam fortem, tam excisam columnam in domo sua constituit, qui et inter tenebrosas procellas Ecclesiæ suæ naufragantis, fecit luminare magnum in firmamento cœli, etc..... Inter cætera quia memor nostri Pontifici in solitudine exsultantis, etc.....

EPISTOLA XXVIII.

EPISTOLA HERBERTI AD WALDEMARUM REGEM DACORUM IN PERSONA THOMÆ CANTUARIENSIS ARCHIEPISCOPI.

Nobili et illustri Dei gratia Dacorum regi WALDEMARO, T. eadem gratia Cant. archiepiscopus et apostolicæ sedis legatus, sic uti bonis transitoriis frui ut mereatur æternis.

Ex aliorum relatione gloriæ vestræ credidimus intimatum quanta et nobis et nostris rex Anglorum intulerit mala ex eo tempore quo ad pontificii dignitatem vocavit nos Deus, ira et inclementia quæ nequaquam regem decent, pessimis usus consultoribus, qui etiam nos adhuc persequi non desistit, sed benedictus Deus quia non habet tantas vires ad nocendum, quantos habet conatus. His siquidem in ejus manu corda sunt regum Christianum Francorum regem Ludovicum et principes regni sui et magnates ut omnem nobis honorem et reverentiam summam exhibeant convertit. Verum quoniam magnitudo nominis vestri et æquitas regia qua vos Rex regum decoravit ex fama celebri nobis innotuit, volumus quoque ut excellentiæ vestræ ex proprio mandato nostro nostra innotescat persecutio, quatenus majorem in oculis vestris inveniamus gratiam. Et si

ita fortassis decreverit Deus, consilii et auxilii vestri munimine contra inimicos nostros roborati felicitatis vestræ et pacis in Christo mereamur participes fieri, pro ejus gloria nunc opprobria, delicta omnia sustinemus. Nam me tacente satis novit mundus quam fideliter, quam magnifice jam dicto Anglorum regi servierimus ante promotionem nostram, cum adhuc mundo militarem. Supplicamus igitur excellentiæ vestræ, rex illustris, ut nobis vestrum significetis beneplacitum, et his quæ hic non scripsimus sed per venerabilem fratrem nostrum intimamus, aures clementiæ vestræ benigne accommodetis, et tanquam a nobismet dictis fidem omnem adhibeatis. Ille vos custodiat et augeat qui regibus salutem dat.

EPISTOLA XXIX.

EPISTOLA HERBERTI AD WILLELMUM VIZELIACENSEM AD-BATAM CONSULTANTEM SUPER QUIBUSDAM HÆRETICIS DEPREHENSIS QUI VULGO DICUNTUR DAGENEIS SEU DEONAS.

Litteras charitatis vestræ gratanter suscepimus: nunc itaque super ea quibus consulistis, ut charissimo fratri benigne consilium dare utinam tantæ foret discretionis quantæ charitatis est! Delegavit nobis pia mansuetudo vestra quid de his hæreticis qui apud vos Deonas appellantur, deprehensis et palam etiam convictis agendum sit. Ad hæc nos divinum jus consulentes in hujuscemodi hæreticos pœnam expressim scripto jure latam nequaquam reperire valuimus. Siquidem inimicæ potestatis soboles nuper exortæ sunt et in angelis Christum lacerant et quos possunt labe occulta inficiunt: negotium enim in tenebris perambulans est. Verum quoniam totum hujus capitis corpus, etsi diversæ facies, in posterioribus tamen non discrepat, sed igne corrumpente quem omnes concorditer caudis trahunt, alienigenarum messes incendunt. Unde quorum est vanitas una, pœna dispar non erit. Similis enim culpæ et pœnæ individua contubernia sunt. Proinde per juris consequentiam quia pœna in alios prodita est ordinaria et canonica et in hos similis juris rigor exercendus. De pœna vero hæreticorum Liberius papa indistincte loquens sic ait: « Qui contra pacem Ecclesiæ, etc., si dignitatem aut cingulum militiæ habent nudentur iis; si autem privati, si quidem nobiles sunt, suarum substantiarum proscriptionem patiantur, si autem ignobiles, non solum corpore verberentur, sed exilio perpetuo castigentur. » Sunt et multa alia juris vincula, quibus hujuscemodi vesanæ bestię ne terræ et mari noceant constringuntur, ne lubrici evolvant, rerum damnis coerciti et exiliis. Sed est admodum lubricum draconem in ancistro tenere ne effugere valeat. Unde isti super quibus requisitis angulosi veritatis exsufflatores et ipsius corporis quietem sibilis suis et aculeis perturbantes tuendi solius capitis causa reliquum forte corpus concisioni et injuriæ exponunt vel etiam jam exposuerunt in rerum proscriptione, nihil damni arbitantes potius ob hoc etsi non apostolico gaudio, apo-

stolorum tamen more gaudentes ea duntaxat parte sui a periculo libera quæ venenatas in se continet linguas. Quibus igitur sunt stringendi vinculis, qualiter serpentes isti proterendi ne habitu suo pestifero temperatum fidei nostræ inficiant aerem? Quid juris est? nudi sunt et exui non possunt, præterea Ecclesia carcerem exsiliorum non habet, potius totus hic mundus corporis Christi carcer est exsulantis adhuc, exsiliorum insulæ Angusti sunt, non crucifixi. Præterea si veteris legis quæreremus censuram, ius quæstionem non haberet, nam cadunt in ore gladii. Item si ius Romanum accedat, et ipsum erit in expedito, nam supplicium ultimum sequitur. Sed nos qui novis supervenientibus projecimus vetera, quibus et novus rex et nova lex est, zizania prohibemur colligere, ne simul cum iis eradicemus et triticum, in hos serpentes novos quosdam juris novos aculeos dirigemus quibus mitis ac mansueti Domini mortis sacramenta dispensantibus iudicium sanguinis agitare non licet, nec etiam truncationes membrorum quibuslibet personis aut per nos inferre aut inferendas præcipere, præsertim cum corporali pœnæ veteris legis successerit spiritualis in novo cuius nos ministri sumus, nisi quod quædam modica corporalis coercitio nobis credita est, modica adeo ut non queat dici ultio delicti sed disciplina magistri : hoc est per verbera sola castigatio corporis, mortis corporalis seu cuiuslibet membri truncatione semota. Igitur isti, quia præterquam in ipsis forte in quo puniuntur non habent restat ut velut infames cædibus publicis deputentur. Verum quoniam in villa vestra sæculare vos habere jurisdictionem allegatis, non arbitror vos juris ordinem convertere si jam dictos vestro tradatis defensori, non dico ut corporaliter puniat sed ut coram se eos audiri faciat et terminum causæ legibus suis humanis consentaneum imponat. Præ cæteris tamen mihi videtur consultius ut ad clementissimum principem Christianissimum videlicet Francorum regem sub digna custodia dirigantur, præsertim si in errore permanserint incorrigibiles. Utpote qui de communi jure ecclesiarum omnium regni defensor sit jure et præsummus et præcipuus custos, quod sicut recolo non negatis et ne istud quod dico de meo asferre videar, audiamus quid Pelagius papa Narsæ patricio scripserit. Noli, inquit, dubitare hujuscemodi homines principali auctoritate deprimere, quia Regule Patrum hoc specialiter constituerunt, ut si qua ecclesiastici officii persona cui subjectus resisterit, vel seorsum collegerit aut aliud altare erexerit seu schisma fecerit, iste excommunicetur atque damnetur. Quod si forte et hic contempserit et permanserit divisiones et schismata faciendo, per potestates publicas opprimatur. Ecce verba patris nostri sanctæ memoriæ Pelagii. Quare si ecclesiasticæ personæ in errore permanentes et incorrigibiles, per publicas potestates debent opprimi certius et privari. Angelus magni consilii sit vobiscum ut intelligatis quæ recta sunt et opere faciatis.

EPISTOLA XXX.

EPISTOLA HERBERTI AD BARTHOLOMÆUM EXONIENSEM
EPISCOPUM.

Dilecto et dilectori magistro et patri suo Exoniensi episcopo, suus H. miserabilis nunc et exsul, modicum id quod nunc potest.

Qui quotidie cogor amara bibere dulcia vobis, Pater sancte, propinare non possum. Superstitiosi potius est inter ejulatus et lacrymarum sordes velle sibi gloriam comparare de specie exquisiti sermonis. Inde est quod in præsentiarum nolui me de potestate labiorum jactare qui in præsentibus miseriis vix subsisto; nolui, inquam, me loquacitate extollere, quem pro suis facinoribus sicut mortuum sæculi in obscuris collocavit Altissimus. Sed sanctitati vestræ inde absque fucati tinctione eloquii perpauca mentem meam expono. Hæsitans tamen et dubius, nam sicut clamat mundus testantur opera quod urna videlicet sortis nostræ sinistra quotquot nobis erant ad dextram prostrati sunt. Consideramus enim ad dextram et videmus sed non cognoscimus. Verum pristinae charitatis non immemor, quæ nec vetustate temporis nec sortis lubrico solet excidere, confortatus sum et confirmatus. Bajulus horum juvenis probus et discretus, et tam domino meo archiepiscopo quam mihi charus admodum et acceptus, ad nos de Anglia veniens sollicitavit me ut pro ipso alicui amicorum meorum in Anglia scriberem, cui instanti dum sæpe et sæpius me in terra illa oblivionis amicum non habere replicarem, secus sperans de vobis vestri demum recordatus est, cum omni instantia rogans ut vobis pro ipso scriberem, cujus tandem misertus ut nostri aliquando miseretur Deus, preces quantas in præsentiarum audeo et valeo sanctitati vestræ porrigo : quatenus ipsum pietatis intuitu et precum mearum intervntu in vestro retineatis obsequio saltem ad modicum tempus, vel si hoc nullo modo placet alicui de amicis vestris officiose et cum affectu commendetis et id profecto discretio vestra noverit quod minister officiosus est et alicujus probi obsequio vehementer idoneus, cui nisi provideatis, revertetur ad nos, nec enim nostræ esset onerosus paupertati nisi quia dulcedine natalis soli attrahitur. De his quæ geruntur circa nos istorum lator plene vos instruere poterit. Siquidem satius judicavi celanda hinc in aure quam oculis in scriptura committere, quæ quibuscunque loquatur quidquid in se habuerit sub ipsa oculorum luce manifestat.

EPISTOLA XXXI.

EPISTOLA HERBERTI AD BALDEWINUM EXONIENSEM
ARCHIDIACONUM.

Dilecto sibi in Christo et, ut spero, diligentissimo magistro B. Exoniensi archidiacono suus, H. miserabilis nunc et exsul, modicum id quod nunc potest.

Charissime mihi in Christo, venio ad vos non in sublimitate sermonis aut in persuasibilibus humanæ sapientiæ verbis, sed in verbo crucis, quod quidem pereuntibus stultitia est, his autem qui salvi sunt,

id est nobis, virtus Dei. Nos etenim sumus qui Christum crucifixum prædicamus, qui proposito nobis gaudio sustinemus crucem, confusione contempta, malentes cum populo Dei affligi quam temporalis peccati habere jucunditatem. Unde et inculca oratio duram scribentis sortem absque ulla elegantia et dictionum solemnibus indicat. Satis namque indecens inter ructus et singultus fletuum festivis rhetoricorum membris et articulis in dictionibus lascivire. Verum inter uberes et secularium et divinarum litterarum divitias tuas, in hoc tenui schemate amicum tuum de longinquo venientem excipias, virum certe dolorum, qui non habet decorem nec faciem. Verumtamen non ut te contristem hæc scribo, sed ne in his diebus nubis et caliginis oblivionis me umbra operiat: facti enim sumus tanquam vas perditum et oblivioni dati tanquam mortui a corde.

EPISTOLA XXXII.

EPISTOLA HERBERTI AD ALEXANDRUM PAPAM IN
PERSONA A. SILVANECTENSIS EPISCOPI.

ALEXANDRO summo Dei gratia sanctæ Romanæ Ecclesiæ pontifici, A. Silvanectensis dictus episcopus, salutem in Christo et debitam patri obedientiam.

Etsi vobis, Pater sancte, omnium Ecclesiarum sollicitudo commissa sit, specialius tamen illi Ecclesiæ filii a vobis consolationem et protectionis auxilium demercentur, qui ex adverso ascendere non metuunt, et terrenis potestatibus, ne quod ecclesiæ est usurpent, libere contradicunt. Proinde est quod ego pro filio vestro fratre nostro T. Cantuariensi archiepiscopo, viro, sicut scitur, religioso et matri nostræ sanctæ Romanæ Ecclesiæ fideli, ego episcoporum minimus quantas audeo et valeo sanctitati, etc., etc., etc.....

[Cætera hujus epistolæ in epp. 24, 25, non iisdem verbis sed in eundem modum expressa invenio.]

EPISTOLA XXXIII.

EPISTOLA HERBERTI IN PERSONA WILLELMI SENONENSIS
ARCHIEPISCOPI AD ALEXANDRUM PAPAM CONTRA IN-
TERFECTORES SANCTI THOMÆ CANTUARIENSIS ARCHIEPISCOPI ET MARTYRIS.

Inter scribendum hæc, imo priusquam, etc

[Vide Epistol. S. Thom.]

EPISTOLA XXXIV.

EPISTOLA HERBERTI EXSULTANTIS POST SANCTI TH. MARTYRIUM AD ALEXANDRUM PAPAM CONQUERENS QUOD DOMINO SUO IN GLORIA ET SOCIIS IN PACE SOLUS ESSET IN CERTAMINE.

Quod tantæ majestatis oculis parvitas mea non minus impudenter quam irreverenter se ingerit, quæso, Pater, ne causimini præsumptionem quia urget pressura. Pudor sane reclamat et reverentia, sed dolor superat, cujus plerumque vis nec præstolari iudicium nec temperare consilio, nec pudore frenari, nec rationi subijci solet. Vim ergo patiens, domine, ad te vociferor. Ecce enim Robertus ille in conspectu Domini venator, qui proprium patrem suum in mortem venatus est et ipsius sanguine in-

A crassatus, extendit adhuc rete suum ut reliquias etiam interfecti patris congreget, et incorporetur sibi. Illos siquidem qui tam fortis athletæ prius exsulis, nunc vero martyris in exsilio onera tam fortiter quidem sicut mundus rogit comportarunt, nunc quærit in spiritu interficere forte postea in carne perempturus. Nam qui hostes reputari noluerint, compellit ad juramenta, si licita, vos videritis. Juramenti vero forma hæc est: «Ego enim juro domino regi Anglorum, tam patri quam filio, quod pacem ipsius servabo, et quod nullum detrimentum suorum regaliū per me sustinebit et quod non egrediar de terra ipsius absque ipsius licentia, neque litteras ultra mare mittam.» Et, ut cætera taceam, quid in hoc juramento regaliū nomine intelligere velit etiam tardioribus manifestum. Ad tale juramentum plerosque jam de nostris compulsi; magistrum videlicet Joannem de Saresberia, dominum Gunterium et alios. Veram si ita jurantes celsitudini vestræ in aliquo videntur excessisse, profecto non modicam habent excusationem de peccato, qui inter crudelissimas manus et in corde maris sunt inclusi. At certe longe aliud esset de parvitate mea iudicium si, quod absit! proprio ductus arbitrio ita juraturus accederem: præsertim cum proxima ante excessum martyris die nobis nihil tam horrendum suspicari audentibus, volente ipso martyre Dei et jubente, una cum dilecto socio nostro magistro Alexandro terram egressus sim et ita favens Dominus, cujus oculi semper prospiciunt super fidem, me incontaminatum huic negotio per gratiam suam reservavi, nec exsiliū mei gloriam ignominie infici nævo sustinuit. Sed quid nomino exsiliū gloriam qui martyrii palmam videre non merui? Quin potius torcular calcavit solus et de gentibus non erat nisi cum eo. Hinc est quod quoties ipsius ante mentis meæ oculos exsiliū pono, meum toties exsiliū plango. Vereor nempe cum forti illo athleta frustra me in tentationibus suis laborasse, perseverasse non dico, cum consummationi interesse fuerit denegatum. Unde et mihi nunc est duplex incendium tribulationis. Me quippe lugeo discessisse, decessisse illum. Verum in discessu meo video infirmitati meæ Domino miserante prospectum, quia in tanto malorum metu fugissem forsitan et abscondissem me ab eo. Sed nec etiam sic consolationem recipio, quin potius ingemiseo, sicut homo sine adjutorio. En enim imbecillitatis meæ iunxus baculo currebam ut potui, cum Isachar illo forti pro viribus portabam onera et cum altero Jeroboam communia Israelis pericula prout datum erat propulsabam. Sed præcessit velocior et fortior jam bravium apprehendit: ego vero jam sensim in cursu deficio utpote imbecillitatis meæ baculo destitutus. Gemo nunc sub sarcina illius humeris subductis, qui totus totum portabat, et qui mihi totum erat. Quæso, Pater sancte, ne indignetur majestas tanta, si paululum ante ipsam tribulationem meam pronuntio. Pudet certe præsumptio-

nis quam altum sapere videor et audere plus forte quam expediat. Audeo sane pietatis memor, immemor majestatis. Præterea doloris vis educit spiritum meum et alternatim nunc verborum, nunc lacrymarum fila extrahit ab invito. Exeat enim foras necesse est ignis flamma quo intus triste pectus adurit et interiora depascitur. Exeat sane necesse est ad oculos tam pii patris qui sciens quam injustus sit dolor meus planctum humanius aestimet, dulcius consoletur. Recordabitur forte filii sui domini mei et mihi multus erit ad miserandum nunc præsertim cum ipso vero Christi martyre post pugnam tam gloriose triumphante, in me, adhuc ipsum affligant in me, etc., etc. Oro igitur, clementissime Pater, oro tam litteris quam lacrymis et a tanta majestate non quidem tam temere quam timide supplico, quid liceat expediatve parvitati meæ significare non indignemini, ne si forte diutius exsulare contigerit errori, id verius quam prudentiæ et superbæ potius quam justitiæ imputetur, etc. Super hoc ipso etiam adjectis si placet gratiarum actionibus domino Senonensi scribitis necesse est: ipsius enim charitatis viscera mihi per filii vestri vulnera patuerunt, etc. Juxta quod uni ex fratribus de Pontiniaco, sicut pro certo creditur tam affectu quam habitu monacho, rubris indutus et crucem suam bajulans, sciscitanti quomodo se haberet, respondit: « Dic fratribus meis quod ego vici mundum, » et deinde vulnerum ei monstravit cicatrices, etc. [*Sequuntur pauca de virtute miraculosa S. Thomæ, inutilia.*]

EPISTOLA XXXV.

EPISTOLA HERBERTI EXSULANTIS POST SANCTI THOMÆ MARTYRIUM AD JOANNEM SÆRESBERIENSEM.

Quoties vel membranula litterarum vestrarum ad me usque pervenerit, sic est mihi ipsa in hoc tribulationis tempore quasi nubes in tempore siccitatis. Siquidem in æstu præsentis hujus meæ pressuræ grande mihi præstat refrigerium litteratoria confabulatio tua, ubi absentem corpore spiritu intueor præsentissimum, etc., etc., etc. Nec enim sicut scribis dominum archidiaconum Cantuariensem asserere, absentia mea propriæ voluntati debet ascribi ut de cætero non debeam exsulem gerere. Cujus profecto assertio nequaquam malevolentis sicut reor calumniam, sed sicut certissime scio, veritatis ignorantiam habet. Exsillii quippe mei causa justa est, quæ etiam etsi in se justa non fuisset, justificata est superioris auctoritatis accedente mandato. Hoc tamen in brevi scribo, non tam totum proferens quam ex modico ostendens quid taceam. Sic enim arbitror expedire adhuc, præsertim cum sapiens ex paucis multa conficiat.

EPISTOLA XXXVI.

EPISTOLA HERBERTI POST SANCTI TH. MARTYRIUM AD GUNTARIUM QUENDAM SOCIUM SUUM.

Gloria in excelsis Deo, cujus dono inenarrabili tristitia vestra incredibilis in totius mundi gaudium versa est, adeo quod cum persecutionis

A auctores consolationis nostræ sint participes, quia aperuit Dominus manum suam: et implet omne animal ubertate, vulnerati cujusdam et in sepulcro dormientis odore suavi et vivifico trahens et attrahens universos. Unde et jam præsentialiter et visibiliter sententiæ illius veritatem experimur, quod stultum est Dei sapientius est hominibus, et quia stultus factus est omnis homo a scientia. Verum circa hoc immorari non oportet, quæ tu fidelius et, etc., etc. . .

EPISTOLA XXXVII.

EPISTOLA IN PERSONA WILLELMI ARCHIEPISCOPI AD VIZELIACENSEM ABBATEM.

WILLELMUS D. gra. Senon. arch. apost. sedis legatus, venerabili fratri G. Vizel. abbati et dilectis filiis suis ejusdem loci conventui, salutem et gloriam quam dabit Dominus.

Nos qui teneros humeros virorum oneribus supposuimus, pastoralis sarcinæ in nullo commodius possumus prævidere quam si ad comportandam Ecclesiæ fabricam tales in ea instituamus personas, quæ scientia litterarum et morum honestate præfulgeant, et quarum virtutes eidem ecclesiæ magis videantur conferre quam sibi de collato beneficio accrevisse. Tunc enim domus Domini procul dubio decoratur, cum in ordinatione illius ab eo qui præest secundum scientiam zelus Dei accenditur, quod non caro, aut sanguis, aut triplex illa munerum famosa acceptio aut generis nobilitas, sed potius merita personaliter pensantur. Proinde et quod nos inspirante Domino personæ duntaxat causam judicantes et dilecti filii vestri fratris nostri domini G. prioris de Vilmostir scientiam commendantes et vitam, monasterio sanctæ Columbæ senis in abbatem et Patrem Domino, sicut credimus, revelante fratrum quoque loci omnium unanimiter accedentibus votis decrevimus preferendum. Et ut invocatione ista eo sancta quo consona sanctorum canonum limitemur et formam, rogamus te dominum abbatem et exhortamur in Domino quatenus illum ad nos cum omni celeritate mittatis, ab omni quo non tibi tenetur professionis et obediencie vinculo absolutum et liberum, ut ita emancipato filio et converso in multarum gentium patrem primogenitorum jure benedictionem hæreditet. Unde et patri dabit gloriam et confratribus gratiam super gratiam cumulabit.

EPISTOLA XXXVIII.

EPISTOLA HERBERTI EXSULANTIS POST SANCTI THOMÆ MARTYRIUM AD JOANNEM PICTAVIENSEM EPISCOPUM.

Omnes novimus quod omnes vidimus, veram in adversis charitatem non deseri. Hujus veritas sententiæ visibiliter quidem in te et sensualiter experta est. Quod et ego inter adversa mea sæpe et sæpius recolens calamum adhuc reprimere volui, sed nequaquam diutius valui. Unde et tetros hos atramenti trames et inclytos litterularum præsentium sulcos me quodammodo invito et reclamante exaravit. Verebar quippe me tam multis occupationibus tuis importunum ingerere. Verum tamen vel nunc silentium rumpere hinc suasit charitas, inde vero præ-

sentis infirmitatis meæ necessitas compulsi. Existimo enim tanto te nunc mihi affectuosius compati quanto nunc amplius his diligitur pro quo patior adhuc. Quanto etiam plaga mea crudelior. Videris q., etc., etc.... Fortis ille athleta, etc.... astitit mihi in visu et confortavit me et consolatione quidem plus quam dici queat perfecta. Multa quidem et alia sæpe et sapius referuntur, quæ si cognovisses et tu, gaudium pariter præberent et miraculum, etc.... viri etiam mihi pacifici mandant et remandant, scribunt et consulunt ut revertar; adjiciunt fatue me gerere exsulem cum mihi pax regis et patriæ cinis offeratur....

Dominos etiam cardinales, sicut spero, multum mihi benignos vivi sermonis tui hortatus faciat, si placet, benigniores.

Proxime venit ad nos serviens quidam Cantia oriundus in domo domini mei aliquanto tempore conversatus, homo certe peccati et totius mendacii et dolositatis habitaculum, qui hoc anno et totam Franciam circumvit, et de sanguine gloriosi martyris nostri partem non modicam, pileum etiam in quo noster passus est habere se undique disseminavit, volens sic sibi hominum gratiam et pecuniam comparare, cujus nomen indicabit præsentium portior, si forte ad vos venerit, quia sic se dicebat venturum, talem sicut talem excipite, et quia novi vos nostris satis benignum, volo vos esse præmunitum et ab ipsius cavere fermento. Dominos etiam cardinales super hoc ipso præmuniatis si placet. Scio enim quod ad ipsos cum plena falsitatum crumena sit accessurus.

EPISTOLA XXXIX.

EPISTOLA HERBERTI EXSULANTIS POST SANCTI THOMÆ MARTYRIUM AD DUOS CARDINALES ALBERTUM ET THEODWINUM AD CURANDAM TANTÆ ECCLESIE PLAGAM MISSOS, QUO TEMPORE REX ANGLORUM IN HIBERNIAM PROPECTUS EST, SE UT DICEBATUR ABSENTANS.

Id in primis scribo quod nocte et die in cavernula mea latitans abundantius oro et desidero, videlicet ut de expectatione vestra tam diutina multam et diutinam sentiat Ecclesia commoditatem. Quod tamen, sicut videtur, nequaquam ille desiderat qui ad mundi extrema a facie Ecclesie fugisse dicitur, vestram sanctam sicut adhuc indicio est, volens sic frustrare intentionem et Ecclesie laborantis protelare pressuram. Nescio tamen an faciem Dei ita fugiens manus Dei omnino evaserit qui ibidem dicitur variis et crebris angustiis subiacere, etc....

Sunt per vicos et plateas garrientes quod uterini vestri vobiscum fraudulenter incedant et multa super dorsum vestrum fabricet, quibus causam Ecclesie quam fovendam suscepistis, tam contentiose quam invidiose omnino quærunt extinguere, ut ita negotium inter manus vestras pereat, etc.... Unde et, sicut aiunt, ut in his regionibus amplius vos odibiles et in legationis vestre partibus magis contemptibiles redderent, Aquilonaris ille Satanas sui

consilii viribus solutus est ex quo certe omnium inimicorum Ecclesie cornua non parum sunt exaltata, et illi præsertim unicorni nostro omnis nec dubito pœnitentiæ excidit timor. Quis enim teneri in vinculis metuat vel vinciri cum ille ita a vinculis sit solutus? Hoc certe opus est, unde sancti regis nostri cor, sicut ipse mihi secreto testatus est, omnino sicut dicit Romano pontifici periit. Hoc est unde obstupescunt sacerdotes, consternantur principes et dissolutæ sunt omnium manus. Et hoc certe est unde apud nos et minus estis amabiles, et in legationis vestre partibus minus terribiles credo. Qualiter tamen et per quos id actum sit existimo sancti Patres prudentiam vestram me multo verius nosse. Unum autem scio, quod ego latere vos nolo.

Quidam proxime a curia rediens mihi olim familiaris vir testimonii boni et in litteris etiam potens, inter cætera mihi retulit se a famosissimo illo sacrilego parricida Wilhelmo videlicet de Tracy, sicut dicitur pœnitentiæ causa in hoc anno ad dominum papam profecto, secretissima legationis verba accepisse duntaxat domino regi Angliæ intimata. Ego vero horum sollicitus indagator cum multa hinc inde, sicut mos est, arcana scrutantium volverem et revolverem, demum a detestando illo regi significatum conjeci ne aliquo modo contra honorem suum seu etiam animum vestris obsecundet mandatis, significans dominum papam et cardinales omnes domino regi multum et supra quam credi possit propitios, adjiciens inter signum quod in oppido quodam Normanniæ quod Argentium dicitur, in domo regia pileum super caput suum rex posnerit. Subjecit etiam his qui mecum loquebatur mandatum hoc de aliquibus fratrum nostrorum processisse, qui sicut jam multi buccinant Ecclesie negotium ut supra tetigimus nolent in manibus vestris prosperari. Adhuc sacrilegus ille insignis super mandato illo flagitio regem quantum poterat excusare nititur. Unde a multis de industria missus et aubernatus ad curiam venisse æstimatur. Videte igitur Patres sancti et discreti, videte quomodo caute ambuletis, intelligentes tempus pessimum esse, quia omnis frater fratrem supplantans supplantabitur, et omnis amicus fraudulenter incedet. A minimo enim usque ad maximum omnes avaritiæ student, et a propheta usque ad sacerdotem cuncti faciunt dolum. Unde et sanant contritionem Ecclesie ad ignominiam vivificantes animas quæ non vivunt et mortificantes quæ non moriuntur. Ego vero in obscuris sicut mortuus sæculi collocatus et ea quæ desunt passionum domini mei Christi martyris in me ipso adimplens, in calce sermonis oro et opto vos spiritu consilii et scientiæ abundante in omnibus, et cum acceperitis tempus pressuræ meæ memores fore. Volo autem prudentiam vestram scire quod proxime audiivi auditum a domino, cujus mandato arctatus sum, ne regredi valeam etsi velim, quod et dilecto socio meo Gunthario nuper reverso ut vestra id indicet sanctitati inunctum est.

EPISTOLA XL.

PETITIO EXSULANTIS HERBERTI POST DOMINI SUI SANCTI THOMÆ MARTYRIUM AD ALEXANDRUM PAPAM POSTULANS UT ILLIUS SANCTI MARTYRIS SOLEMNITATEM OMNI ECCLESiarUM ORBE MANDET CELEBRARI, COMPROBANS QUOD NEQUAQUAM MARTYRIUM, SICUT A ROMANO DEBERI CANONIZARI PONTIFICE, SED NULLO EXPECTATO MANDATO MOX MARTYRIS PALMAM GLORIA SEQUI DEBEAT.

Ego Herbertus sanctitatis vestræ servus vinctus Jesu Christi totis mentis meæ genibus majestatis tantæ pedibus advolvor, orans, etc.....

Præsertim cum jam nonnulli de latere vestro revertentes vestrum super me bene placitum varie testificati sint. Alia vero præsentī scripto non inserta quæ per dominum Meldensem electum sanctitati vestræ eo commodius quo secretius necessarium duxi intimare, etc., etc.....

EPISTOLA XLI.

EPISTOLA ALEXANDRI PAPÆ CONSOLATORIA AD HERBERTUM POST DOMINI SUI SANCTI THOMÆ MARTYRIUM EXSULANTEM.

ALEXANDER episcopus, servus servorum Dei, dilecto filio magistro HERBERTO, salutem et apostolicam benedictionem.

Devotionis tuæ litteras paterna benignitate recepimus, et intellectis anxietatibus et angustiis, molestiis et pressuris, quas æquo animo toleras, tibi tanquam devoto et speciali Ecclesiæ filio sincera mentis affectione compatiuntur et libenter in quibus possumus gratæ consolationis solatium impertimur. Sane quod sanctæ recordationis Thomæ, quondam Cantuariensi archiepiscopo, ita constanti animo adhæsisisti ut eum in exilio suæ persecutionis nolueris dimittere, et nunc tenaciter verbo et opere memoriam ejus observes, gratum gerimus et acceptum, et devotionis tuæ constantiam in hac parte prout convenit dignis in Domino laudibus commendamus, firmi gerentes propositum et voluntatem te sicut honestum et litteratum virum arctiori charitate diligere; et de incremento et utilitate tua vigili studio et sollicitudine cogitare. Unde pro statu tuo vigiles admodum et solliciti existentes, dilectis filiis nostris Alberto titulo Sancti Laurentii in Lucina et Theodwino titulo Sancti Vitalis, presbyteris cardinalibus apostolicæ sedis legatis, firmiter dedimus in mandatis, ut tibi et aliis clericis ac laicis præfati archiepiscopi gratiam et pacem regis Anglorum acquirant et nos in terra faciant reduci et ibidem secure manere. Si autem forte secundum desiderium nostrum non potuerint apud præfatum proficere regem et tibi ejus pacem et gratiam invenire, tua intererit nobis significare, qualiter tuæ possimus provisioni commodius intendere et in quo tibi honeste valeamus et utiliter providere. Nos enim necessitatibus tuis libenti animo intendere cupimus, et tibi tanquam speciali et devoto Ecclesiæ filio efficaciter in eo quod nos decuerit et expedire viderimus, auctore Domino curabimus providere. Tu ergo confortare in Domino et in eo spem tuam et fi-

A duciam ponas, qui non derelinquit sperantes in se, sed et post nubilum faciat tranquillum et cum tentatione proventum.

Datum Tusculani viii Kal. Julii.

EPISTOLA XLII.

EPISTOLA HERBERTI EXSULANTIS POST SANCTI THOMÆ MARTYRIUM AD HUGONEM DUNELMENSEM EPISCOPUM.

Venerabili Patri et domino in Christo amantissimo II. Dei gratia Dunelmensi episcopo, HERBERTUS suus exsul adhuc miserabilis, modicum id quod nunc potest.

Cognito quod horum bajulus ad vos usque haberet protectionem, per tenue hoc litterularum nuntium intercurrentis parvitatē meæ memoriam excellentiæ me vestræ ingerere duxi necessarium, ne me in obscuris sicut mortuum sæculi collocatum et ea quæ desunt passionum gloriosi nunc martyris Christi in me ipso adimplentem, in his diebus nubis et caliginis oblivionis verbum operiat, præsertim cum noverim vos præ cæteris nostræ tam diutinæ condoluisset afflictionē, et adhuc certi sumus quod quemadmodum martyris nostri gaudetis gloriæ ita et compatimini vinculis. Vinctus est enim adhuc, vinctus revera, cum nec Ecclesia in sanguine pro ipsa fuso servitutis adhuc eraserit jugum nec ullum libertatis redemptæ consecuta sit præmium. Unde qualiter nunc licet et audeat inter pressuras et suspiria novi redemptoris sui gloriam præconizat hymnizans pariter et plorans; vacuis etiam adhuc sedibus quas translati de sæculo qui præcesserunt nos patres reliquerunt, Balthasar omnibus templi utensilibus abutente. In me ipso etiam qui loquor, imo corporis hujus membro eo miserabilius quo innocentius afflictus videbitur adhuc et proscriptus, si Scripturæ testimonium et pii Patris pensemus affectum, etc. etc.

EPISTOLA XLIII.

EPISTOLA CARDINALIUM MISSORUM A LATERE DOMINI PAPÆ AD REGEM ANGLIÆ CONTINENS FORMAM PACIS INTER ECCLESIAM ET IPSUM FACTAM POST MORTEM SANCTI THOMÆ CANTUARIENSIS ARCHIEPISCOPI ET MARTYRIS.

HENRICO Dei gratia illustri Anglorum regi, duci Normanniæ et Aquitaniæ et comiti Andegaviæ, ALBERTUS dignatione divina titulo Sancti Laurentii in Lucina et Theodwinus titulo Sancti Vitalis presbyteri cardinales, apostolicæ sedis legati, salutem in eo qui dat salutem regibus.

Ne in dubium, etc. [*Hæc epistola inter Epp. Gil. Fol. No. 385 impressa est, sed hæc pauca, quæ sequuntur, ad finem adjecta habet.*]

Hoc sane coram multitudine personarum juravistis vos pro divinæ reverentia majestatis. Juravit et filius vester, excepto eo quod personam vestram specialiter contingebat. Et juravistis ambo quod a domino papa Alexandro et cath[olicis] ejus successoribus. . . .

[*Post vocem dimidiam cath, quæ ad imam paginam est, videtur excidisse folium, nam quæ sequuntur et finem epistolæ faciunt, minime coherent cum*

superioribus. | A paternitatis vestræ scripto mihi nescio quo in
 vobis velitis quam citius exhibere, nam per ipsam
 ab adversitatis nostræ crebris anxietatibus procul
 dubio nos possetis liberare. Teste me ipso apud
 Turre. xxiii die Julii.

EPISTOLA XLIV.

EPISTOLA RESPONSALIS AD EUNDEM.

Domino suo suus. Celsitudinis vestræ qua debuit
 devotione parvitas mea suscepit litteras. Quibus in-
 spectis et perfectis anima mea sicut ex susceptione
 est exhilarata, ita et mox ex perfectis est perturbata.
 Scribitis enim vos non posse non mirari quod in
 persecutionibus nostris litteras nostræ consolationis,
 postquam ultimam mihi rescripsistis non receperitis,
 « quæ nostræ severitatem fortunæ delinirent. » Ita scri-
 ptum vidi, legi et relegi. Et eo ipso in me ipso magis
 ac magis conturbabar, suspicatus ex hoc et veritus
 nullas penitus litteras parvitatæ meæ nomine ad
 beatitudinem vestram devenisse, præsertim cum
 nec in prioribus nec in posterioribus dignationis
 vestræ litteris ullam de receptis meis feceritis men-
 tionem. Quod quidem necessarium propter bajulo-
 rum negligentias qui de facili spondent bajulandi
 officium sed eadem levitate calce averso flocci
 pendunt. Scio, certe scio me omne dignationis vestræ
 scriptum, nisi forte bajuli incuria fuerit, litterato-
 rio officio prævenisse et sicut justum erat necdum
 salutatum salutasse; et sanctitati vestræ sicut in
 hac forma et in hæc verba scripsisse: « *Domino suo*
suus. Inter scribendum hæc, imo priusquam scribe-
 rem, mox steti et hæsi, dubius admodum quo dictio-
 nis genere vestram alloquerer paternitatem. Verum
 si interioris hominis vestri statum cognoscerem,
 nec hæsitantis fluctuaret animus, nec scribentis
 erraret calamus. » Et cætera quæ in eodem scripto
 continentur. Quod si scriptum tale in sanctitatis
 vestræ manus devenerit, gaudeo. Sin autem, non
 meæ tarditati seu negligentia, sed bajuli culpæ ascri-
 bendum; et earum bajulorum charissimi mei thesauri
 vestri servientem Gaufridum nomine de suppres-
 sione, quin potius de suffocatione interpello. Et quod
 de mentione litterarum per longa terrarum et maris
 spatia destinatarum omissa supra tetigimus, magis
 quam reprehensione deinceps, correctione propter
 bajulorum incuriam indiget. De his igitur hactenus.
 Et amodo beatitudinis vestræ litteris respondendum.
 Quibus verbum insertum est quod inter legendum
 plus notavi, in quo plus steti et hæsi. Siquidem in
 eo et verbum persecutionis insertum reperi et vestræ
 severitatem fortunæ, etc., etc.

A paternitatis vestræ scripto mihi nescio quo in
 aure quasi dulci quodam susurrio instillante.

Nit mihi rescribas, attamen ipse veni.

Super quo celsitudini vestræ genibus advolutis gra-
 tias et item gratias ago. Et quidem opusculo super
 psalmos ab Hebraica veritate a Patre Hieronymo
 translato completo, in quo jam per annos desulavi,
 spero me volente Domino vos visurum et vel in
 transitu tam desiderato vestro colloquio frui.

EPISTOLA XLV.

EPISTOLA WILLELMI ELIENSIS AD HERBERTUM.

WILLELMUS Dei gratia Eliensis episcopus, aposto-
 licæ sedis legatus, et domini regis cancellarius, di-
 lectissimo suo magistro H. DE BOSEHAM, salutem et
 absentis amici memoria non carere.

B Gratissima vestræ consolationis verba animo gra-
 tulanti suscepimus, quæ tanto fortiolem nobis in
 adversitatibus vestris animum recrearunt, quanto
 vos cognovimus incommoda fortunæ temporales
 viriliter superasse. Quis enim tam dulce sola-
 tium in tanta sortis tempestate nobis præbere po-
 tuisset, nisi qui ejusdem sortis modum et exitum
 cognovisset? Epistolaris igitur dulcedo vestræ ma-
 gnitudinis mentem nobis hilarem reddit, spem tri-
 buit resurgendi, et materiam doloris et tristitiæ,
 quæ non meritis nostris sed sola malignantium in-
 vidia nos oppressit, pro parte maxima moderatur.
 Unde gratias quantas possumus et sufficimus vestræ
 referimus dilectioni. Cæterum favente Deo noviter
 venturum esse credimus, quem exspectamus, quem
 desideramus, cujus adventus nobis et omnibus ami-
 cis nostris plenum sed plenissimum gaudium propi-
 nabit, pro quo et tanta et tam gravia sustinuisse
 ad gloriam nostram magis quam ad dispendium repu-
 tamus. Nec vos gravat conscientia quam sanam
 esse cognovimus, nisi tantummodo quod tanta in-
 humanitas, tanta etiam immoderata persecutio et
 crudelitas, quæ contra dominum regem et nos fa-
 ctæ sunt, tam lento pede debitum sibi finem sortiun-
 tur. Et præterea noveritis quod desiderio intimo de-
 sideravimus ut opusculum super psalmos ab Hebraica
 veritate a Patre Hieronymo translato vestra discre-
 tio complevisset, ut impedimento non esset quid-
 quam ulterius, quin vestra præsentia et optatis
 colloquiis uteremur.

EPISTOLA XLVI.

EPISTOLA HERNULFI LUXOVIENSIS EPISCOPI AD THOMAM
 CANTUARIENSEM ARCHIEPISCOPUM EXSULANTEM.

Magnam mihi, etc. *Exstat sub num. 34 inter epi-
 stolas Arnulfi Luxoviensis mox edendi.*

GLOSSA IN PSALTERIUM.

[*Glossa in primam partem periisse videtur.*]

GLOSSA IN PSALTERII SECUNDAM ET TERTIAM PARTES.

PRÆFATIO HEBBERTI AD WILLELNUM SENONENSEM
ARCHIEPISCOPUM.

Cum liber Psalmorum unus sit et non plures, ipsum tamen præter morem quidem sed non præter causam, in duos secavimus tomos. Idipsum etiam et in libro fecimus epistolarum, quem, cum non nisi unus sit, partiti sumus in duos, hoc facientes in libris quod in oneribus fieri solet. Ad continendum quippe et contractandum habiliora et aptiora sunt singula, quam si simul omnia uno sint pressa volumine. Et etiam quia simul et sæpe plus

A plurium poterit lectioni prodesse hujusmodi in libris partialis divisio. Tu igitur, beatissime præsul, sectiones has quatuor simul suscipe, divisim lege; et si forte ad transcribendas has librarii vestri apposuerint manum, ut concordantiæ et notulæ extravagantes suis decenter aptentur locis, curiose observetur: ne, ut sæpe fit, per librariorum imperitiam seu negligentiam opus emendare quam scribere sit difficilius, præsertim cum novi corruptor operis non alius quam frater sit destructoris.

ALANI PRIORIS CANTUARIENSIS

POSTEA ABBATIS TEWKESBERIENSIS

EPISTOLÆ.

EPISTOLA PRIMA.

AD PHILIPPUM REGEM FRANCIE.

PHILIPPO, Dei gratia illustri Francorum regi, cum ætatis incremento augmentum gloriæ et gratiæ apud Altissimum.

Pix recordationis Ludovici, patris vestri et nostri benefactoris, nec debemus nec volumus ullo unquam tempore esse immemores; sed magis ut tenemur in nostro est voto et affectu, ut ejus beneficiis et honori, quæ beato martyri Thomæ in suo exsilio, et post gloriosam ejus victoriam in propria persona Cantuariæ exhibuit, possimus vel in aliquo respondere. Ipsius itaque animam, quod nunc licet, devotis prosequimur orationibus, ut qui, dum vixit, id apud Ecclesiam Cantuariensem plene promeruit, jam sentiat ipsius martyris et suorum devotionem sibi prodesse, qui eidem martyri et suis in tribulationibus et angustiis exstitit tam devotus. In hoc etiam excellentiæ vestræ sumus obligati, ut non minus pro vestra salute quam sua simus solliciti. Nimirum vestram magnificentiam nobis, sicut et multis, ad profectum non solum coronæ et regni, sed etiam fidei et devotionis reliquit heredem, ut,

B sicut ipse præcessit in spiritu mansuetudinis ad dirigendos sibi subditos in viam pacis et tranquillitatis, ita et vestra serenitas ejus sequatur vestigia, superadjiciens, quod et ipse superadjecit, hoc ad coronam regiæ dignitatis jure hæreditario spectare præcipue, quod omnes afflicti, et maxime pro justitia exsultantes, ad se summum debeant habere refugium. In quo et nos indubitatam spem concepimus, si ea tamen necessitas nobis ingruerit, quod debeamus et nos in nostra parvitate invenire apud clementiam vestram, quod majores nostri in eodem vel consimili casu dicuntur promeruisse. Cum vero regiæ celsitudini vestræ placuerit super his nos certiores fieri, tunc demum firmiores erimus ad id quod quidam minantur acrius, fortius proferendum. Si vero sublimitatis vestræ rescriptum super his de gratia vestra ad nos reverteretur, in angustiis ipsis quibus urgemur non modicum, maximum nobis credimus et optamus conferri solatium.

EPISTOLA II.

AD PRIOREM WINTONIE.

ALANUS prior Ecclesiæ Christi Cantuariæ priori Wintoniæ, quam sibi salutem.

Mutue societatis affectus, quo sub ipsa paupertate sed tolerabili pridem fuimus ad invicem con-
nexus, nos pro certo docet qualiter sub ipsis hujus
mundi deliciis et rerum affluentia debeamus con-
versari; dum patenter perpendi potest, si plenius
id inquiratur, qualiter nobis illa rei familiaris In-
opia tunc dederit notitiam de temporalium abundan-
tia, cujus possessores credebamus plurimum felices,
quos jam constat denudata vanitate et discussa, va-
cuos esse et inanes. Quid tibi, amice, videtur, si
præteritas illas scholares angustias cum his quas
nunc patimur compares anxietatibus? Nunquid ama-
ritudinem illam amariorem dices isto melle, quod
in ardore et æstu tribulationis dierum istorum nunc
de spinis et tribulis elicimus? Tunc quidem aliqua-
tenus sufficit dei malitia sua, nunc autem miseria-
rum cumulus, qui ex ipsa nascitur opulentia, suam
ita demum aggravat acerbitatem, quod etiam vita
ipsa quandoque vertitur in tædium. Unde a solli-
citudine et cura suffocati, cum temporum damno
quæ retrorsum non habent recurrere, omnibus modis
incurrimus salutis dispendium. Nec est aliquid
in quo reperitur solatium sine graviore discrimine.
Quacunque enim te verteris, occurrit salutis ob-
staculum. Illis in me ipso repertis, anxietas animi
motum mentis non sinit esse securum, donec aspi-
raverit dies quam daturus est Dominus in utriusque
nostrum consolationem, ut possimus revera pro no-
bis dicere quia *beati pauperes spiritu, quoniam ipsorum
est regnum cælorum.* (Matth. v) Ex mea vero tuam
tribulationem dimetior, et ideo tibi sicut mihi ex
cordis affectu hactenus hæc aggressus sum loqui, vo-
tum et desiderium habens non modicum de statu
domini episcopi et tuo pleniorē habere notitiam,
quia si quid penes conscientiam tuam movetur,
unde debeat amicus tuus pro te moveri, id secu-
rius mihi tanquam tibi committere poteris, quon-
iam tuum profectum sicut et meum omnino affe-
ctat anima mea. Valeat amicus meus et vivat in
Christo.

EPISTOLA III.

AD BALDWINUM ARCHIEPISCOPUM.

Reverendo Patri et domino B. Dei gratia Cant.
archiepiscopo totius Angliæ primati, A. prior et
conventus Ecclesiæ Christi Cant., debitam et devo-
tam in Domino reverentiam.

Vobiscum quam plurimum congratulamur in Do-
mino, cujus misericordia regiam excitavit excellen-
tiam, ut prior fieret ad ea quæ vestræ novit pla-
cuisset voluntati. Oblata itaque, si placet, utendum
est occasione, ne si ommissa fuerit quæ præ
manibus est opportunitas, sera sit pœnitentia, si alias id
fieri non potuerit, cujus præsto est et præsens fa-
cultas ad effectum. Roffensis igitur Ecclesia, si ad
cor rediret, utique recognosceret in quibus offen-
dit; nunc autem superest ut vestra discretio manum
apponat, quatenus quod præsumptum est in Can-
tuariensis Ecclesiæ dispendium, in pristinum debiti
honoris statum reformetur. In Cantuariensis Eccle-

A siæ capitulo ex antiqua consuetudine Roffensis Ec-
clesiæ electio solet celebrari, ibique electus con-
suevit de manu archiepiscopi sui et spiritualia et
temporalia recipere, fidelitatem proinde jurare, quod
plene observatum est usque ad tempus Waleranni,
et quod de eo secus actum fuit, eo redeunte a Nor-
mannia ubi et consecratus est, in melius est refor-
matum. In hujusmodi vero dignitatis signum Rof-
fensis Ecclesia, obeunte pastore suo, baculum
pastoralem debet ad Ecclesiam Cantuariensem por-
tare, et super altare Christi deponere. Hunc autem
baculum per subreptionem cum Walterio bonæ me-
morie quondam Roffensi episcopo consepulsum, et
inde per manum piæ recordationis Ricardi tunc
temporis archiepiscopi extractum, monachi Rof-
fenses denuo cum Waleranno episcopo sepelierunt.
Quocirca paternitatem vestram rogamus attentius,
ut vestra velit discretio his et aliis mentem appo-
nere, et quæ præsumpta sunt ita demum reformare,
quatenus commissarum vobis ovium universitas de-
beat et possit pariter nobiscum in operibus vestris
Deum glorificare.

Sane de Landaviensi electo id adjicimus, quia
primus est per vos consecrandus, hujus consecratio
in ipsa sede celebrari, si fieri posset, gratum esset
nobis et acceptum. Verum ubi necessitas ipsa in-
ducit dispensationem, vestræ erit discretionis id
prospicere.

Porro super translatione beati martyris Thomæ
et ejus termino, certius quid determinari oporteret,
ut nationibus universis quæ id desiderant possit
innotescere, qualiter et quando ad gloriam illius so-
lemnitatis valeant pervenire. Ad hæc quia undique
pulsamur et plurimis vexamur angustias, præci-
puumque ad vestram paternitatem speramus nos
habere refugium; ideo priorē nostrum ad ves-
tram benignitatem quantocius Deo auctore desti-
nabimus, obnixius supplicantes, quatenus in his quæ
ipse ex sua parte et nostra vobis suggererit, vestra
velit pietas benigniorem aurem inclinare. Et pro
certo, si in his temporibus sub vestra potestate co-
gamur per quoscunque humiliari: his qui etiam
bona sinistre solent interpretari dabitur apertior
nobis insultandi occasio. Sed et qui capiti nostro
congressit contumelias nisi invenerit obviantem, a
læsione membrorum non desistet. Modicum quidem
vos honorat qui nos spernit, nisi forte et in hoc
crediderit se quis vobis præstare obsequium. Et
procul dubio, ut credimus, reverentiæ vestræ et
honestati non modicum conferet, si manifestis ap-
pareat indicibus, quod injuria filius illata patri omnino
displaceat. Valete.

EPISTOLA IV.

AD HENRICUM REGEN.

HENRICO regi Anglorum, ALANUS prior Ecclesiæ
Christi Cantuariæ, salutem.

Quanto desiderio nobiscum universus desiderat
orbis, ut corpus beati martyris Thomæ decentiori
loco cum debito honore collocetur, etiam barbarum

nationes non ignoant. Præmatura vero mors quondam Patri nostri Ricardi id ipsum impedivit ad tempus, cum ad hoc pridem vestram promptiorem invenissemus voluntatem. Nunc autem per Dei gratiam parata sunt ea, quibus res ipsa videbatur maxime indigere: si tamen id sederit vestro beneplacito, ut sequenti anno (1) circa medium Maii tantum negotium possit terminari. Oportet enim ad ejus executionem plurima præparari. Nihilominus expedit his, qui longius absunt, hujus festivitatis tempus ita denuntiari, quod ad id, sicut desiderant, possint competentiùs pervenire. Placeat itaque serenitati vestræ domino et Patri nostro Baldwino Cantuariensi archiepiscopo et nobis voluntatem vestram significare. Id namque expectamus ut de consilio et auxilio vestro desiderium nostrum, imo omnium Christianorum, in hac parte possit compleri. Valete.

EPISTOLA V.

AD BENEDICTUM ABBATEM DE BURGO.

BENEDICTO abbati de Burgo, ALANUS prior Ecclesiæ Christi Cantuariensis, salutem.

Licet is qui præest ex hominibus assumptus sit a Domino in correctionem subditorum, nihilominus tamen cum aliorum errata corripit, habet sibi prospicere, quoniam et ipse circumdatus est infirmitate: et cum innoverit ei quoniam et ipse cum cæteris infirmatur, pro certo in hoc admonetur aliorum compati infirmitati, cum ipsa pœna docente, discat in propriis qualiter alienis debeat mederi vulneribus. Nolu itaque divina dispensatio infirmitatis expertem quemquam inveniri, ut in eo quod infirmus præfertur infirmis nullus gloriatur, sed magis qui suo prægravatur pondere, in se humiliatus subditorum sarcinas ferventiori affectu studeat humiliter supportare, et dum errantem respicit, meminerit se ipsum quandoque errasse. Errans erravit ovis de grege vestro, et in deserto solitudinis perierat, sed inventa est, et revertitur ad ovile; aperite ei, si placet, ostium, ne amplius erret, et error ejus ei imputetur, qui noluit eam ab errore redeuntem recipere. Non excusat, sed fatetur se errasse; promittit emendationem, expostulat non judicium sed misericordiam. Date veniam et recreate dolentem: forte cecidit ut fortior resurgat,

(1) In margine codicis C.C.C. adnotatum est: « Sequens annus erat 1182: sed translatus non est usque ad annum Domini 1208 per Stephanum Langton. » In transcripto ejusdem codicis, quod fecit James, [Bodl. James 17, p. 134] habetur adnotatio hæc: « Hic annus, inquit nota marginis, erat 1182, sed translatus non est usque ad annum Domini 1208, per Stephanum Langton. De festivitate autem ejus sic Giraldus in Vita Baldewini, ad quem etiam super translatione Thomæ scribunt fidem prior et conventus. Cum, inquit, festo Beati Thomæ fuerat quod apud Cantuariam publice celebratum fuerat, biennio videlicet post martyrium jam elapso, cni et Deo dante intereram, multi barones regni illius devotione confluiscent, in audientia communi, cum post prandium in cameram intrassent,

A et qui de se amplius quam oportuit confidebat docetur in se humiliari, ne amplius evagetur; et sic qui factus fuit indomitus et effrenis, dabit manum correctioni et fiet docibilis, quatenus ejus salutis pastoralis sollicitudo debeat congratulari, cujus perditionem prius potuit et debuit deplorare. Hæc ad instantiam et postulationem confratrum nostrorum, qui vestrum utique affectant honorem, ad vos duimus exarare, ut quali et pro quo in hac parte movemur affectu; harum tenore inspecto plenius innotescat. Et si bene meminimus, vestra bonitate docente didicimus, præsentium latoris excessum et recessum vestræ pietati omnino displicuisse. Valete.

EPISTOLA VI.

AD ROBERTUM DE HARDRES.

ALANUS prior Ecclesiæ Christi Cantuariensis, ROBERTO de Hardres, salutem et in futura sibi prospicere.

Eo usque divina et me et te extulit gratia, et in id ætatis jam devenimus, quod de cætero debemus, si sapimus, ei uberiores gratiarum actiones referre, qui utrumque nostrum, supra quam aliquis de genere nostro ausus est sperare, dignatus est provehere. Quocirca tenemur propensiori studio præcavere, ne ingratitude nota insigniti videamur saltem velle matrem nostram aliquatenus impugnare, a cujus uberibus coaluimus et tantam recepimus sub extrema ignominia et ultima paupertate consolationem, ut tot et tantis viris non merito nostro, sed gratia Dei id agente præferamus, quorum si ad genus vel vitam et conversationem respicias, nec digni erimus corrigiam calcreamenti solvere. Si ergo eo admonente qui dedit affluenter finem cupiditati non imponimus, pro certo timendum est ne culpis exigentibus permittamur eatenus pervagari, donec dicatur: *Ecce homo qui non posuit Deum adiutorem suum, sed speravit in multitudine divitiarum suarum et prævaluit in vanitate sua* (Psal. 11), qui cum in honore esset non intellexit: idcirco comparatus est jumentis insipientibus et similia factus est illis (Psal. XLVIII). Memento insuper quia cum interieris, non sumes omnia, neque descendet tecum gloria tua. Vita nostra brevis est et ad instar puncti. Unde quod reliquum est si perdidimus, quod Deus avertat, quis nobis in die illa et ætatis et temporis damna

D conquestus est archiepiscopus de publice potestatis officialibus et ministris sibi et suis contra Ecclesiæ suæ dignitatem nimis præter solitum nuper injuriantibus, dicens et jurans se nullatenus hæc passurum, manum quoque ad caput extendens, se prius hoc gladiis exposuram, quam hoc pateretur juramento firmavit. Respondens autem vir nobilis et magnanimus, qui cum aliis advenerat, Hugo de Laci. Non oportet, inquit, o archiepiscopo, quod caput ad hoc vel etiam pedem ponatis; secure jus vestrum tueri et ecclesiasticam justitiam exercere potestis: tantum operatus est Deus pro martyre sancto decessore vestro, quod non inveniret rex ribaldum aliquem in terra sua, etiam si vellet, qui ausus esset in vos manum extendere. Finitum est bellum: manuteneat si vultis, quod martyr evicit.

restituere? Ad hæc si veritati etiam niteretur quærela quam proponis, et recenter posses probare tibi in hac parte debitum jus competere, citius eligeres, me tibi fideliter consulente, hujusmodi quærelæ ad tempus supersedere, quam tot sanctos quibus astrictus es fide et devotione molestare. Nunc autem occasione tantum rotulæ Wintoniæ possessionem nostram antiquam ad te niteris revocare: in quo procul dubio, quantum in te est, statum Anglicanæ Ecclesiæ exempli pernicio omnino subvertis, quia si omnia jura illius antiquitatis juxta rotulam illam debeant ad pristinum statum revocari, necesse erit munimenta, privilegia totius Anglicanæ Ecclesiæ a sua stabilitate turbari. Sane si nec devotione sanctorum nec dilectione conventus nostri moveris, saltem id tibi in mentem subeat, ne occasione familiaritatis tuæ suspectus habeatur, quasi de consensu meo id agas quod cepisti. Id autem tibi certum sit, quia dum vitalis spiritus in meo duraverit corpore, quantum in me erit, mater mea non amittet vel passum pedis de omnibus his possessionibus quas inveni eo tempore quo credita est mihi, quam gero, administratio, maxime ubi ipsa se potest de jure tueri et defendere. Et cum hactenus jura illius integra et illæsa servaverim, acriter insistam, ne vel te ipso auctore mater mea debeat in aliqua sui parte pati diminutionem. Valete.

EPISTOLA VII.

AD BENEDICTUM ABBATEM DE BURGO.

BENEDICTO abbati de Burgo, ALANUS prior Ecclesiæ Christi Cantuariensis, salutem et se ipsum.

Sicut vestræ plenius innotuit discretioni longe aliud est corripere, aliud deprimere. Et pro certo qui nimis emungit, ipsum aliquando elicit sanguinem: nec bene sibi consulti, qui ex impetu vel obstinacia damna multiplicat. Hoc tamen non dicimus quod velimus cujusque errorem fovere, sed ne eum, cui tenemini ex debito naturæ et officii prospicere, immoderata castigatio debeat vel possit in ultimum desperationis vel erroris calculum detrudere. Castigans denique castigat Dominus quem diligit, sed quem castigat, nunquid morti tradit vel errori deputat? Sane qui verbera patris habet matris uberibus carere non debet. Et licet caro propria nobis continuam indicat pugnam, nunquid propterea potestis eam abjicere? Imo tenemini ei vel necessaria ministrare. Qui igitur de se hujusmodi non potest habere victoriam, non habet ultra modum molestari super alieno excessu. Se ipsum enim habet exemplum qualiter debeat se habere circa proximum. Ad hæc frater utique vester, licet inconsultius hactenus egerit, tamen in hoc aliquatenus vestram debuit gratiam promeruisse, quod studio et disciplinæ cum familiari angustia diligentius vacavit, ne cum damnis rerum incurreret et damna temporum. Non ergo totam substantiam suam cum meretricibus dissipavit, qui non solum alteram, sed et multo meliorem partem sibi retinuit. Verum si permiseritis fratrem vestrum discurrere et usuras

A procurare, cum demum necessario oportebit eidem consulere, et damna rerum accrescent, et non minuentur damna temporum. Denique reditus quos habet citra auctoritatem vestram nemini poterit obligare: quia nemo credit ei quidquam, et si id fecerit compelleretur iterato mendicare. Sustinete igitur, si placet, vos vel semel vinci, ut idem frater vester, quia jam ætatem habet, ex abundantiori gratia vestra teneatur se ipsum vincere. Quid, cui et a quali amico dictum sit intelligenti satis innotescet. Valete.

EPISTOLA VIII.

AD EUNDEM.

BENEDICTO abbati de Burgo, ALANUS prior Ecclesiæ Christi Cantuariensis, salutem et se ipsum.

B Ab incæptis non duximus subsistendum, licet desiderio nostro, utinam non honori vestro, hactenus restiterit vestræ dilectionis ut plerisque videtur minus benigna severitas. Et pro certo, ubi id persuaserit mansueta discretio: ad tutelam non solum conscientiæ, sed etiam famæ conservandæ plurimum detrahendum est severitati pro tempore, ne si curam domesticorum abjecerimus, quibus utique pro naturæ debito tenemur prospicere, videamur hominem exuisse et legibus naturæ quantum in nobis abrogare vigorem. De his autem qui suorum et maxime domesticorum curam non habent, quæ sit Apostoli sententia vos nec potest nec debet latere. Alias hæc scripsimus, sed eo usque non exauditi, quod non promeruimus inde vel responsum recipere, unde satius nobis esset subsistere pro rubore. Sed procul dubio ipsum ruborem vicit affectio, qua astringimur vobis et vestris contra omnem fortunam assistere, ne per nos videatur stetisse quo minus paternitati vestræ debitus honor ubique integer permaneat. Denique vester sed et noster in Christo frater Ricardus in mœrore et angustia affligit animam suam, nec in se vel modicam recipit consolationem, fatetur errorem, promittit correctionem, inclinat se et suam ad vestram voluntatem. Desideratis eum monachi, acquiescit ipse, tantummodo de loco non sit contentio. Cantuariensem Ecclesiam sibi eligit in locum habitationis et requiem, quantum ad nos pertinet, patet ingressus. Superest igitur, quia sic expedit, ut per vos domini archiepiscopi requiratur assensus, familiares et amicos vestros in ecclesia nostra conveniatis, si placet, ut nos quasi ignaros inde sollicitent, et nos partes nostras interponemus, ut res sortiatur effectum. Revertatur etiam præsentium lator cum litteris vestram voluntatem continentibus ante synodum nostram, ut per vos instruamur et amici vestri qualiter debeat res ipsa procedere. Verumtamen si visum vobis fuerit, per idoneum nuntium ex parte vestra expediret hæc fieri: vel quod magis affectamus per vestram personam, si hujus rei gratia seu ut visitetis dominum archiepiscopum placet vobis ad nos usque descendere, et hoc ipsum credimus, si fieri posset et vobis et nobis utiliter profuturum. Quo affectu, qua intentione hæc agi-

mus qui inspector est cordium ipse novit. Valeat in A
Christo vestra mihi prædilecta paternitas.

EPISTOLA IX.

JOANNIS PRIORIS S. SWITHINI WINTON. AD ALANUM.

Domino et amico in Christo charissimo ALANO
Cantuariensi priori venerabili, suus JOANNES Eccle-
siae Sancti Swithini Wintoniae dictus prior, salutem
in omnium salutari.

Ad litteras consolationis vestrae revisit spiritus
meus, et ex iis mihi duplex eliciens remedium di-
lectioni vestrae gratias retuli. Ex earum procul du-
bio sinceritate duo mihi humilitatis ac patientiae
promanarunt documenta. Quorum unum ad custo-
diam, alterum ad virtutis ornatum mihi vestri gra-
tiam procurastis: unum a superbo Moab declinan-
dum, alterum percussum Job induendum commo-
nuit. Praecipuum, ut aestimo, humilitatis mercamen-
tum est praeteritae paupertatis reminisci: quod etiam
inter ipsas delicias laudem praecinit earum largi-
tori; cujus tam extollenda quam admiranda est
dispensatio. Nihil enim praesentium numerum tam
efficit ingratum quam conditionem sui non agnoscere,
praeteritorum oblivisci. Nihil interea adeo mentem
roborat quam in hujus vitae procillis amplecti pa-
tientiam; quam non immerito prolem humilitatis
nominaverim. Et ipsa quidem optimae genitricis
partus non deterior. Ad istarum itaque considera-
tionem virtutum amicum provocastis, pigrum susci-
tastis, de communi non tam sollicitus quam pertur-
batus naufragio. Quidquid animo turbulentum inse-
derat, quidquid desperationis praecipitium minitave-
rat, sic aura consolationis vestrae funditus abegit ut
mihi videretur aspirasse dies et umbra declinasse.
Quid certe serenius verborum sinceritate? Quid
efficacius dilecti et domini consolatione? Quid ju-
cundius in adversorum torculari posito, quam a
doloris compendio aeternitatis repromissio? Itaque
non sunt condignae passionibus hujus temporis ad
futuram gloriam quae revelabitur in *his qui secun-
dum propositum vocati sunt sancti*, ut ait Apostolus
(Rom. viii): nullatenus igitur murmurandum si se-
cat aut urat Dominus, quia sive morimur sive vivi-
mus Domini sumus, per quem omnia nobis coope-
rantur in bonum. Tantum fides non dormiat, sus-
tinentia non deficiat. Memoria sanctorum in cordibus
vestris vigeat. Ad quorum nimirum exempla caro
cum suis desideris, mundus cum suis illecebris
calcantur. Denique quidquid ingeritur eliditur. Et
si sint qui Sabbathum vestrum inquietent, impos-
sibile tamen est ut exturbent; et hoc quidem salu-
briter provisum ut nunquam desit pugnandi mate-
ria: quibus restat evincantibus corona. Stemus
igitur simul in Domino mutuam observantes chari-
tatem, malitiam dierum istorum patienter toleran-
tes. Transeant dies et dies, anni et anni.

.....dabit Deus his quoque finem.

Certe quod honoris mihi est oneri est, non tamen
abjiciendum credo: cum melior dicatur vir male-
faciens quam mulier domi sedens et nens, et in

A paucos fidelem servum super multa legimus consti-
tuendum. Obedientiam igitur praetatis, subditiis fa-
mulatum exhibentes; pacem cum omnibus habentes.
studeamus insimul, domine charissime, cordis Sab-
batum observare, culices undecunque venientes,
discretionis flagello propellere, et crebris, si placet,
epularum consolationibus alterutrum confortare.
Salutatus ex parte vestra dominus meus Winto-
niensis vos per me ut suum dilectissimum resa-
lutat, quem noveritis auctore Deo quoad salutem
animae et corporis melioratum et confortatum; et
in summo positum desiderio, beati Thomae martyris
vestri adeundi memoriam: Valete semper in Do-
mino.

EPISTOLA X.

ALANI AD ASINUM DE BURGO.

ASINO illi Sancti Petri de Burgo, suus ille sibi in
agone consimilis, salutem in tribus rasoriis, hoc
est in patientia, discretionem et charitate, quibus
radi oportet et eradicari non solum superflua, sed
etiam quae imminet omnino adversa.

O beate Asine, si tamen sub Petri indumento, id
est mentis puritate et operis exhibitione, ad crucis
ignominiam in corpore tuo Christum portaveris, ubi
sub vexillo fidei parum tibi nocere poterit Neronis
immanitas. Insurgat scilicet ad tempus invidorum
malitia et perversitatis procella alius intumescat.
Navicula Petri concutitur, sed etiam portae inferi
non praevalent adversus eam; multo minus Neronis
audacia, etsi innovaretur cum eo Herodis versutia.
C Liqueat itaque quod usque ad haec tempora desi-
navit et Judas proditorem Pilatus judicem, sed et
Nero malignitatis heredem, ita quod nunc etiam
iterato postuletur Christus crucifigi, ut dimittantur
qui rei sunt seditionis et homicidii. Simon ille:

.....adhuc magicas sub Nerone edocet artes.

Sunt et qui sequuntur ejus doctrinam, nec tamen
Petrus asinum synagogae vel pullum gentilium ti-
mide reliquit, sed cum suis instat fortius, ne vel sub
gladio pereat libertas spiritus qui diffunditur in
cordibus nostris. Igitur ut expeditius in stadio cur-
rens citius et certius apprehendas et bravium, no-
vacula patientiae rade penitus inconsultos animi ca-
lores, in virga directionis sub examine pende et praë-
pondera quid juris rigor dictet, quid suadeat aequi-
tas, quid inducat iniquitas. Dirime et dirumpe im-
pietatis fasciculos; quo magis plana per te via pro-
gradietur ipsa justitia, cujus acumine peracuto possis
radere si quid ærginis conscientiae intrinsecus
adhæserit, seu de foris in ambiguis quid contigerit
discutiendum. Ferventiori vero charitatis affectu
sicubi inveneris odium vel invidiam, zelum et con-
tentionem, protinus id ipsum erue et longius pro-
jice: quatenus inveniaris paratus ad onera tritici,
si quando de asino dominus opus habuerit, ut cum
eductus fueris e vinculis et castello tribulationis
quo detineris, animam tuam asinam subjugalem ad
vitem ligans et pullum suum carnem indomitam ad
vineam, laves cum Christo in vino stolam tuam,

et in sanguine uvæ pallium tuum. Tibi itaque asino **A** onus et virga, ut si tepescis sub onere te excitet virga comminationis. Ne æmuleris pigrum asini sed mansuetudinem, quia non nisi in mansueto sedet ille mansuetus. O quam leve jugum et onus suave quod oneratum exonerat, depressum sublevat; tristitiam mutat et vertit in gaudium, quod nemo tollet! Libenter igitur ad horam sustine insipientes, quibus ad purgationem eorum qui hæreditatem capient filiorum Dei permissa est potestas tenebrarum, ut ambulent in circuitu non habentes requiem; donec lætatus fuerit justus, cum viderit vindictam et laverit manus suas in sanguine peccatorum. Eia, bone asine, confortare et esto robustus et noli ponere firmamentum tuum formidinem, ne timeas a facie eorum qui exsultant in rebus pessimis, quorum gaudium quasi nebula, et ad instar puncti descendunt ad inferos. Vir insipiens non agnosceret, et stultus non intelliget hæc. Verumtamen cum exorti fuerint peccatores et apparuerint sicut fenem ut intereant in sæculum sæculi, tunc demum eructabit cor justi verbum bonum, quia si utique est fructus justus, utique est Deus judicans eos in terra. Interim expedit sub silentio expectare salutem Dei et ambulare simpliciter in semitis justitiæ, quia vir ingrediens duas vias non habebit requiem. Idcirco pone super Dominum curam tuam et ipse te enutriet, nec cum cecideris, collideris, dum ipse supposuerit manum suam. Ne graveris ergo sub onere tibi imposito, dum ambulaveris in semita recta, quia in æternum non dabit Dominus fluctuationem justo. Rade itaque mordaces mortaliū curas cum earum matre ambitione vel avaritia, et ne dederis locum tineæ vel ærugini in arca conscientiæ tuæ, et parum pertimescas ne fures fodiant vel furentur depositum tibi repositæ coronæ, quia non accedet ad te malum, cum apud Altissimum fuerit refugium tuum. Hæc tecum loquere et ad hæc te ipsum exhortare in Christo Jesu, quo auctore et teste in patientia tua possidebis animam tuam. Amen. Denique suggestionem istam non tam ad doctrinam quam ad utriusque nostrum consolationem spectare credideris, cum eas, quas de utriusque nostrum sorte intus patior animi angustias, unico amico communicans vel ex parte possim securius eructare, ne si suppressa fauce ab hujusmodi amaritudine amplius intumescat, dirumpantur ab his quibus conglutinator est venter meus. Idcirco tibi singulari amico ego tuus ut credo singularis amicus singulariter sum locutus, ne videar de uno inter te: millia vix invento vero amico plures confingere, secundum quod adulatrix lingua consuevit ad quemvis unum cuius velit sibi favorem allicere, non simplicem sed pluralem sermonem dirigere. Valet!

EPISTOLA XI.

AP JOANNEM ARCHIEPISCOPUM LUGDUNENSEM.

JOANNI Dei gratia Lugdunensi archiepiscopo,
ALANUS prior Cant. Eccl., salutem.

A Inter eos quos adhuc superstites filios enutrivit et exaltavit, Lugdunensem archiepiscopum præcipuum habet et reputat mater Britanniarum sancta Cantuariensis Ecclesia. In suis quidem angustiis et perturbationibus, quibus continue affligi compellitur, hujus filii toties experta fidem, devotionem et efficacem industriam, de cætero habet certiorari talem et tantum filium immemorem esse non posse illius dulcedinis quam a maternis diutius suxit uberibus, inter quæ etiam a cunis coaluit. Absit igitur, absit a fide et devotione tanti alumni, qui se toties certis objecit periculis pro defensione matris suæ, ut vel suspicetur de eo quod velit partem ponere cum his, qui ipsa a quibus egressi sunt materna perturbant viscera, præcipue ubi id permodica suadet occasio, quod etsi quoquo modo licuerit minus tamen expedit, **B** omnino autem non decet. Quamvis enim is apud quem summa rerum consistit, quasi licite auctoritate qua præminet sub titulo adhuc ignoto et a canonum forma aliquatenus alieno possit non solum assignare, sed potius transferre beneficium Cantuariensis Ecclesiæ ad episcopum alienæ provinciæ et minus egentem, id tamen viderit benigna filii discretio, utrum expediat in matris confusionem ecclesiam de Elnisford tanto tempore injuste ablatam et demum non sine multo labore et angustia mediante justitia evictam, a debito sui statu perturbari. Quam utique ecclesiam mater vestra monachorum deliciis non applicuit, sed usibus pauperum pio deputavit affectu. In subversione itaque pauperum Christi quos ipsa suscepit alendos, si contigerit matrem filii improbitate, quod Deus avertat, acerbius molestari, ex hujusmodi arboris radice qualis poterit fructus exoriri, perpendet citius si advertere voluerit discretia filii devotio, cum ea sola proponitur causa, quare debeant pauperes Christi spoliari, quatenus præpotens filius matrem pertransiens, cum id evenit, quod vix semel in ista ætate poterit contingere, proprium habeat domicilium, ubi forte non plus una nocte seorsim a matre caput inclinet. Et certe pia mater vestra nondum eosque vestram dilectionem emancipatam habet. Quod nec velit nec debeat eam quam admodum charam habet et acceptam, vestri reverentiam in paratioribus materni pectoris sinus recipere, cum suum sit votum et desiderium diem illum videre, quo vestri præsentia perfruens et consilio possit ab his quibus arctatur angustis aliquatenus respirare. Sane opinionem vestram quid deceat non minus inspiciendum, cum id quod vir tantæ auctoritatis posteris in exemplum reliquerit, de jure debeat ad consimilia vires resumere. Utrum vero deceat Lugdunensem archiepiscopum Cantuariensis Ecclesiæ filium et alumnus pro tantillo beneficio et tali titulo vel intentione acquirendo, seu matri suæ seu Christi pauperibus et infirmis hujusmodi molestiam inferre, id videat et provideat vestræ sanctitatis prudentia, cuius interest et suam apud Deum conscientiam et apud homines famam conservare illasam. Plane nec

id ignoramus sed plenius recognoscimus, quia et A vobis et vestris meritis exigentibus constituimur debitores. Et licet hæc quæ ad præsens inter nos agitur questio abierit in abyssum, non minus tamen tenemur his adesse quibus et vos tenemini, vel debito naturæ vel gratia obsequii. Idcirco ut in aliquo et affectui et operi vestro respondeamus, in proposito habemus alicui de vestris sicut vobis placuerit, dare annuatim de thesauraria nostra centum solidos, donec eidem in æque valens vel amplius alias possimus providere. Quid autem super hic vobis placuerit fieri, nobis significate.

EPISTOLA XII.

AD EUNDEN.

JOANNI Lugdunensi archiepiscopo, A. prior Cantuariensis Ecclesiæ, salutem.

Si charissima mihi est vestræ sanctitatis reverentia, id agitur apud me in quo debitor sum vobis obligatus, qui pro ea quæ in vobis est sanctitate et gratia communiter cum cæteris, specialiter autem pro liberalitate illa quam apud vos egens et extraneus non modicam inveni, teneor pro viribus honori vestro debitum et devotum præstare obsequium. In quo quidem magis sollicitor si quo modo daretur opportunitas, ut juxta illum quem gero affectum possim benignitati vestræ vel in aliquo respondere. Si quo minus autem id videatur factum quoad ecclesiam de Einesford, ignoret filio si placet paternitas vestra, si tamen in hac parte debeam de jure argui negligentia, qui unus et solus sum inter multos, quorum sicut voluntas varia est et diversa, ita et sententia, maxime ubi juri et rationi videtur inniti quod intendunt. Loquor intelligenti quid sit multorum moribus deservire. Quid prætendunt quominus fieri debeat quod per vos ab iis repetitur, conventus nostri litterarum tenore inspecto, facilius poterit perpendi. Si vero parvitatibus meæ consilium acceptaverit vestra prudentia, cum saniori dixerim conscientia, satius esse et honestius aut eo modo qui vobis significatur, aut alio probatori si inveniri poterit cum conventu nostro pacifice convenire, quam populo scandalum generari et matrem vestram plus quam creditur contristari. Insuper si verbis domini regis Angliæ creditur, in vita sua non sustinebit quod Lugdunensis archiepiscopus ecclesiam D de Einesford quoquo modo possideat. Provideat igitur, si placet, discretio vestra, qualiter res ipsa planius et melius ad debitum possit finem pertinere, et quantum in me erit, nulla executionis erit retractatio. Valet.

EPISTOLA XIII

AD MAGISTRUM G. CARDINALEM

Magistro G. cardinali, A. prior Ecclesiæ Christi Cant., salutem.

Quam nobis admodum utilem et necessariam in curia Romana consuevimus habere vestram dilectionem, in tribulationibus et angustiis quibus urgemur non modicum doluimus et dolemus nimis esse remotam. Et licet locorum distantia separemur ab invicem, animi tamen nostri affectus quo individue vestræ adhæremus reverentiæ, a vobis nullatenus potest separari. Sane pro nepote vestro in partibus nostris quoad potuimus fecimus, inde magis anxii quod in causa sua juxta quod desideravimus, non est magis profectum. Quoniam excepta etiam ea affectione qua vobis astringimur, idem ipse suo nomine promeruit et in dies promeretur, ut qui viderit ejus vitam et conversationem, debeat affectuosius ejus profectibus invigilare. Placeat ergo paternitati B vestræ ipsum clementiori oculo respicere, quatenus in stadio quo in agone contendit possit expeditius currere et ad ejus cui addictus est disciplinæ profectum debeat alacriori animo pervenire. Quantum vero in nobis erit et opportunitas data fuerit, ejus necessitatibus propensiorum curam impendemus.

EPISTOLA XIV.

AD CANTUARIENSEM ARCHIEPISCOPUM.

Domino Cantuariensi, suus A., salutem.

Innotuit nobis vestræ placuisse paternitati talem in cellerarii officium subrogari, in quem omnium nostrum vota communiter concurrissent. Unde, sicut tenemur, ita et affectuose vestræ bonitati obsecro proinde agimus gratiarum actiones. Vestræ C itaque si placet innotescat benignitati quod nostra communis est postulatio, ut frater Honorius vobis utique ex sua conversatione interim notus hujus officii in se pondus suscipiat. Hujus siquidem prudentiam et fidelitatem et in confratres suos compassionem aliquatenus experti scimus, de cujus benevolentia quoad officium illud non modicum speramus. Et licet ejus obsequio sine molestia ad præsens non possitis carere, experimento tamen didicimus vestram prudentiam plus velle publicæ quam privatæ consulere utilitati. Quocirca eum confidentius reposcimus, id tamen adjicientes ut si in hac parte aliquatenus moleste fuerimus de eo substituendo qui huic debeat succedere, voluntati vestræ, sicut placuerit, ita fiet. Præsentium igitur latorem dilectum in Christo fratrem nostrum R. eleemosynarium in id negotii duximus destinandum, ut ejus præsentia sub litterarum nostrarum testimonio apud vos impetret, quod vestra intentis communiter postulare ad communem utilitatem propensius studuit. Valet.

Hucusque dedi omnia quæ in codice C. C. C. Cantab. inveniuntur, octodecim paginis comprehensa. Utrum plura olim fuerint folia in isto codice quibus aliæ epistolæ Alani continerentur, difficile est dictu.

ALANI VITA S. THOMÆ.

(Vide supra col. 194.)

TABULA EPISTOLARUM GILBERTI FOLIOT,

Secundum litteram initialem ordinata.

Quæ in hoc tomo sub nomine Gilberti continentur epistolæ, partim ipsius sunt Gilberti, partim aliæ quæ ad eandem historiam, scilicet vel ad ipsum Gilbertum vel ad sanctum Thomam, spectant. At lectori, si recte scire velit de iis quæ in his epistolis describuntur, adire necesse est epistolæ sancti Thomæ, Arnulphi Lexoviensis et Joannis Saresburiensis. Cæterum hujus editionis Gilberti Foliot fons et fundamentum est eximius ille codex qui in bibliotheca Bodleiana sub siglo e Mus. 249 continetur, quique circiter 440 epistolæ habet; quæ omnes vel in hac editione vel in aliis istis tomis de quibus mentio supra facta est, continentur. Hoc factum est quia scriptoris in singulis collectionibus, non codicibus, ratio habita est. Quod iterum atque iterum lectorem monendum duximus, ne editiones nostræ imperfectæ quodammodo censerentur.

Tabula quæ sequitur ordinem epistolarum exhibebit. Litteræ et numeri suffixi indicant illæ codices hi ordinem epistolarum quæ in codicibus occurrunt. Codicum ipsorum plenior notitia in tabula ad epistolæ S. Thomæ invenitur.

Primus numerus, nulla littera præfixa, editionis nostræ ordinem indicat.

A¹, A², cod. MS. Bodl. [Douce 287] in 2 par. div.

B cod. Bodl. secundi [509]

C¹, C², C³, C⁴, cod. Bodl. tertii [937].

D cod. Bodl. quarti a Caveo donati [e Mus. 249].

E epist. S. Thomæ a Lupo edit.

F epist. J. Saresb. edit. Paris.

G cod. Lambethiani.

H cod. Paris [5520].

I cod. Paris, secundi, [5372].

K cod. Paris, tertii, [8562] epist. Jo. Sares.

L cod. Paris, quarti, [8625] ejusdem Jo. Sares.

M cod. Mus. Brit. Coll. Claud B. II.

N Arnulphi epp. in coll. S. J. Bap. Ox. serv.

O Whartonii Angliæ Sacræ.

P Cotton. Vesp. E IV.

Q Bouquet, *Hist. de France*.

R Lambeth No. 577.

S. Bodl. 603.

T Stapletoni, *Tres Thomæ*.

U Arundel, 27.

V cod. C.C.C. Cant.

W cod. Coll. Trin. Cant. 5 toms

X cod. Bodl. 868.

Y Arund. 219.

Z cod. Reg. 2. D xxxu.

AA Vesp. E. x.

BB Vitel. C. xii.

CC Reg. 2 E, vii

A

Ab hum. piet., 503, C³ 113, D 193, E 5, 78, G 121, I 226.

Acta nos., 474, C³ 203, E 5, 91, G 199.

Actio cau., 76, D 90.

Ad agend., 23, D 23.

Ad aud. nos., 562, D 214 et 288

Ad aures nos., 548, M 5, 103, W 5

Ad aures nos. perl., 370, D 232.

Ad hoc in be., 541, D 249.

Adhuc eti. dom. 38, D 40.

Ad nos. u., 472, C³ 86, E 1, 103, G 278, H 71.

Ad pacem eccl., 65, D 78.

Ad presentiam nos., 358, D 234.

Ad synodum, 64, D 77.

Ad tuam, fr. car., 249, D 27

Ad vestram, 164, D 360.

Ad vestram. pa. jus., 166, D 376.

Ad vestram, pa. aud., 175, A¹ 58, D 161

Ad vestram, pa., ind., 133, D 200.

Ad vos, dil., 62, D 73.

Ad vos, pa., 163, D 338.

Amantium se, 180, D 133.

A mem. vest., 349, M 1, 182, W.

Amici nos., 207, D 335.

Amicitia, An. 410, A¹ 41, C³ 34, E 1, 132, G 326 II 92.

Amicus et aff., 221, D 363.

Anglicana, 171, D 397.

A nostris ut., 480, Q v. 16, p. 276, T p. 106.

Antiquam Ebor., 531, M 1, 183.

Apud dom., 475, C³ 210, E 5, 89, G 204.

A te longe postulat., 81, D 1.

A tribul. mal., 96, D 314.

Attendas, 240, D 379.

Audi, charissime, quæ, D 53.

Audio in cur, 102, D 93.

Audio te Sic., 297, D 364.

Auditus quæ cir., 112, D 103.

Audito, caris., 118, D 111.

Audivi gr., 493, A¹ 1, A² 56, C³ 38, E 3, 47, G 281, I 166.

Audivimus et, 203, D 339.

Audivimus qu., C. c. 376, D 233

A vestra, 390, C³ 219, E 5, 57, G 210.

B

Benevolentia, 290, D 214.

Benignitati, 136, D 201.

C

Calamitates, 421, I 166.

Capiat in, 232, D 413.

Causam, pa., 142, D 323.

Causam, q. 417, F 50, L 50.

Censum dom., 272, A² 50, D 561.

Charitas quandoque præsump., 82, D 50.

Charitati ves. præ. sc. not., 89, D 59.

Circa m. v., 448, C³ 320, E 5, 77.

Clamat ad vos, il., 239, D 122.

Clericum hunc, 99, D 324.

Cœlestis al., 381, N.

Cogit nos car., 227, D 353.

Cognito et, 402, B 76, C³ 77, E 5, 62, G 83, I 212.

Commissæ no., d. 543, D 232.

Communi, 14, D 15.

Compellit me car., 4, D 4.

Compellit me car. ser., 58, D 69.

Confusus de, 10, D 11.

Conquestus est, 161, D 346.

Consensu cont., 122, D 113.

Constitutus ol., 337, O par. 2, p. 177.

Consultationibus sin., 372, D 241.

Controversias amic., 191, D 406.

Crebrescent, l., 452, C³ 168, E 4, 20, G 164, I 125.

Cum ad, 167, D 377.

Cum Christus, 510, D 163.

Cum debitorem, 93, D 311.

Cum deceat, 346, D 235.

Cum ex ves., 131, D 131.

Cum hactenus, 295, D 284.

Cum in m., 431, B 36, C³ 36, E 2, 44, G 44.

Cum in, 36, D 33.

Cum inst., 132, D 132.

Cum me, 284, D 140.

Cum lo., 235, D 441.

Cum n., 371, D 235.

Cum n., 359, M 2, 102.

Cum parvitati, 84, D 52.

Comitem, 575, C² 154, E i, 25, G 1, H 15, M i, 19.
 Commissa, 289, C² 22.
 Considerantibus, 187, O xvi, 124.
 Consolationis, 35, C² 93 et 171, E u, 57, G 101, I 120.
 Consoletur, 100, C² 173, E iv, 15, G 99 I 122.
 Cui pl., 190, C² 212, G 206.
 Cum ecc., 77, FFI 38.
 Cum ap., 549, A² 89, D 192.
 Cum hi, 258, A² 77, C² 216, D 283, E v, 71, G 263.
 Cum il., 514, C² 517, E i, 59, G 321, H 57, M i, 33.
 Cum in cel., 218, C² 179, E u, 111.
 Cum ve, 335, C² 113, E i, 166, H 115, I 97, M i, 166.
 Cum n. t., 230, C² 157, E m, 24, G 140 et 546.
 Curam et, 207, C² 91, E i, 114.
 Cura p., 271, C² 279, E v, 32.

D

Decet, 245, C² 12, C² 114, E i, 78, G 122 et 257, H 32, I 147, M i, 75.
 Desiderio, 179, A² 5, B 2, C² 2, D 548, E i, 64, G 8, H 42, I 62, M i, 60.
 Desiderio des., 540, C² 185, E iv, 11, G 178.
 Desiderio m., 101, B 22, C² 22, G 28.
 Devotionis, 286, C² 315, E i, 112, G 252, H 73, M i, 107.
 De v. sin., 60, C² 126, C² 298, E u, 15, G 300.
 Difficile., 575, C² 8.
 Dilecti ii, 507, B 53, C² 54, E v, 1, G 60, I 193.
 Dilectionis, 158, C² 189, E m, 75, G 183.
 Dilectioni, 139, C² 287, E m, 97, G 356.
 Dilectioni, 587, C² 174, E iv, 22, G 168.
 Dilectus, 274, H i, 60, E 38, M i, 56.
 Dirigat, 140, C² 249, E v, 12, G 244, I 199.
 Oiscretio, 94, C² 240, E iv, 46, G 260, I 202.
 Discretioni, 54, C² 153, E u, 71, G 152.
 Dominum, 567, C² 74, E i, 87, H 59, I 22, M i, 184.
 Dominus, 585, C² 147, E m, 52, G 144.
 Duplicis, 177, C² 52, C² 26, E i, 48, G 317, H 29, M i, 41.

E

Ecclesie mol., 55, C² 15, E m, 76, G 301.
 Ecclesie pa., 15, C² 218, E m, 92, G 209.
 Ecclesie per., 18, C² 163, E iv, 15, G 161, I 119.
 Ecclesiam An., 50, C² 151, E i, 135, G 148, H 94, I 84, M i, 152.
 Ei cons., 591, C² 248, E v, 23, G 245.
 Est u. r., 565, C² 51, E i, 9, H 7, I 9, M 9.
 Et ipsa loci, 259, C² 286, D 195, E v, 85.
 Et naturali, 501, A² 66, C² 109, E m, 2, G 117, I 178.
 Et ra. ju., 124, C² 84, E i, 117, G 89, H 77, I 51, M i, 112.
 Eisi adv., 217, C² 515, E u, 94, G 247, I 118.
 Eisi cir., 298, A² 45, B 82, C² 100, D 151, E i, 42, G 108, H 26, I 5, M i, 58.
 Eisi p. an., 198, B 49, C² 50, E i, 4, G 56, H 1, I 10, M i, 4.
 Evocati, 522, C² 134, E m, 21, G 152.
 Excellentia, 505, A² 42, B 50, C² 51, D 219, E iv, 3, G 57, I 112.
 Excessus, 155, C² 105, E m, 59, G 115, I 153.
 Ex com., 224, C² 9, E iv, 45, G 258.
 Exhortationis, 121, C² 263, G 295, M v, 56.
 Ex inj. n., 270, A² 29, C² 111, D 217, E i, 116, G 119, et 275, H 76, I 48, M i, 111.
 Ex lit., 212, E i, 148, G 287.
 Ex litteris, 225, C² 195, C² 514, E iv, 17, G 249, M i, 148.
 Ex lit ves., 66, B 25, C² 25, E n, 12, G 51, H 126.
 Expectabam, 194, B 12, C² 12, E i, 54, G 18, H 21, I 57, M i, 50.
 Expectans exp., 180, A² 75, B 5, C² 5, D 185, E i, 65, G 11, H 45, I 61, M i, 61.
 Expectativimus, 86, B 11, C² 11, E i, 98, G 17, H 63, I 151, M i, 95.
 Experientiam, 41, B 59, C² 60, E v, 47, G 66, I 206.
 Ex quo p. 26, B 64, C² 65, E v, 52, G 71, I 215.
 Ex res. lit. 215, C² 8, E i, 149, G 288, I 77, M i, 149.

F

Facti su., 354.
 Ferventis, 580, C² 1, C² 22, E i, 158, G 510, H 107, I 1, 158.
 Festinat ad, 68, C² 229, E m, 57, G 220.
 Fidel et de, 295, C² 70, E i, 81, H 55, I 79, M i, 78.
 Formam, 521, A, 72, C² 5, D 180, E m, 15, G 545.
 Fraternitatem, A. e 57, C² 252, E m, 60, G 225.

Fraternitatem, 161, C² 558, E v, 56, G 341.
 Fraternitatis, 291, X.
 Fraternitatis, 74, A² 17, B 16, C² 18, C² 16, E i, 127, G 22, H 88, I 75 et 258, M i, 125.
 Fraternitati, 261, A² 92, D 226.
 Fratres, 75, A² 10, B 8, C² 8, D 155, E 96, G 14, H 65, I 67, M i, 95.

G

Gaudendum, 257, C² 153, D 245, E v, 92, G 359.
 Gilbertus, 386, E m, 55, G 507.
 Grate sus, 115, C² 161, E, u, 81.
 Gratias ag., 145.
 Gratias agi., 59, C² 172, E u, 53, G 167.
 Gratias ag., 188, C² 89, E i, 52, G 95, I 59, M i, 48.
 Gratias v. pl., 189, C² 160, E u, 80.
 Gratias ag. di., 107, C² 245, E v, 19, G 258.
 Gratias ag. dil. v., 45, C² 201, E m, 84, G 195.
 Gratias ago D. 79, C² 512, E iv, 55, G 290, I 162.
 Gratias ha. be. 59, C² 24, E m, 74, G 302.
 Gratias ha. di. 63, B 25, C² 25, E u, 11, G 29, H 125.
 Gratias, non qu. 62, C² 163, G 139, I 135.
 Gratias, q. p. 145, C² 258, E m, 14, G 229.

H

Habita r. le., 175, B 29, C² 29, E m, 10, G 35.
 Hac e. f., 584, C² 510, Em, 7, G 511.
 Hoc pet., 184, A² 7, A² 75, D 181.
 Hortatur, 54, C² 58, E i, 20, H 13, I 5, M i, 16.
 Humanitas, 150, C² 178, E i, 58, G 172, H 56, M i, 54.

I

...us dig., 244, A² 71, B 48, C² 49, D 179, G 55.
 Illustri Fl., 252, C² 253, G 292, M iv, 61.
 Illustris r., 219, C² 180, E m, 1, I, 177.
 Imperator q., 579, C² 65, D 167, E i, 72, I 65, M i, 69.
 Impiorum mo., 58, C² 256, E m, 64, G 227.
 Impossibile est ut, 109, C² 253, E m, 61, G 224, I 187.
 In adm. du., 525, C² 18, E m, 51, G 516 et 549.
 In die a. b., 585, C² 311, E m, 6, G 312.
 Indubitanter, 37, C² 154, E i, 156, G 151, H 95, I 83, M i, 157.
 Infirma, 196, C² 250, E v, 70, G 558.
 In f. i. q., 568, C² 27, E i, 5, M i, 5.
 Inspectis lit., p. 154, C² 204, E m, 87, G 198, I 163.
 Inter cast. 511, C² 142, E u, 45, I 100.
 Inter cast. d. op. 315, E i, 61, H 39, I 52, M i, 57.
 Inter cast. d. op. 250, Q xv, 849.
 Interemptorum, 52, 52 et 65, C² 228, E m, 76, G 219, I 184.
 Inter mul., 250, C² 211, E v, 65, I 218.
 Inter opt., 99, B 20, C² 151, C² 20, E u, 21, G 26, I 96.
 Inter scr., 550, C² 324, E v, 80, I, 227.
 Inundaverunt, 49, C² 39, E i, 22, H 15, M i, 18.

J

Iustus pet., 518, C² 21.
 Justum e., 71, B 62, C² 65, E v, 50, G 69.
 Justum est, 88, C² 193, E m, 69, G 189.
 Juxta mand., 559, C² 186, E iv, 10, G 179.
 Juxta t. l., 566, C² 55, E i, 50, M i, 46.

L

Lamentatissimus, 84 et 166, E m, 54, G 215, I 190.
 Lectis ca., 195, C² 215, E v, 74.
 Legitur Con., 371, A² 8, C² 50, E i, 8, H 6, I 8, M i, 8.
 Licet com., 249, A² 78, B 69, C² 70, D 185, E v, 67, G 76, I 221.
 Licet vide Lectis.
 Licet f. v., 192, C² 177, E i, 57, G 171, H 33, I 28, M i, 55.
 Licet in p., 288, A² 95, D 599.
 Licet st. v., 155, C² 211, E m, 95, G 205.
 Licet t. j., 129, B 4, C² 4, E i, 68, G 10, H 46, I 54, M i, 64.
 Licet v. d., 588, C² 199, E iv, 48, F 52.
 Licet v. e., 294, E i, 82, H 56, I 80, M i, 79.
 Littere cons., 1, C² 57, E i, 18, I 2, M i, 14.
 Litteras cel., 64, C² 295, E u, 10, G 505, H 124.
 Litteras, q. n. s., 262, C² 275, E v, 26, G 289.
 Litteras q. n. t., 200, A² 27, C² 56, D 295, E i, 17, G 6, H 11, I 16, M i, 15.
 Longanimitatis, C² 162, E iv, 6, G 138, I 135.

Loqui de., 178, A³ 1, B 1, C³ 1, D 294, E 1, 65, G 7, H 41, I 60, M 1, 59.

M

Magnam de., 351, C³ 148, E 1, 162, G 143, M 1, 162.
Magnificentie, 302, B 52, C³ 55, E m, 5, G 59.
Magnificentie t. n. v., 309, A³ 15, C³ 112, D 218, G 120, I 88, M u, 4.
Magnificentie t. p., 299, B 58, C³ 59, E u, 2, G 65, H 119, I 102, M u, 5.
Mandatum d. p., 167, C³ 299, E iv, 9, G 55, M 1, 121.
Mandatum v. j., 394, C³ 209, E v, 55, I 214.
Mater t. Ban., 112, C³ 215, M u, 25.
Medicine, 576, A³ 14, C³ 45, D 170, E 1, 29, G 4, H 18, I 18, M 1, 25.
Meminimus, 152, C³ 85, E 1, 122, G 89, H 82.
Meminisse, 174, C³ 180, E 1, 174, G 175, M 1, 174.
Meminit, 103, C³ 220, E m, 56, G, 211.
Merito di., 158, C³ 185, E m, 15.
Mirabile, 519, C³ 272, E iv, 51.
Miramur, 279, C³ 47, E 1, 59, H 25, I 42, M 1, 55.
Mirandum et., 150, A³ 16, B 81, C³ 101, D 150, E 1, 108.
Miseranda, 354, A³ 82, D 189.
Misericordie, 25, C³ 505, E v, 45, G 552, I 205.
Misericordiam, 7, C³ 156, E u, 50, G 153, I 105.
Misero, 14, C³ 14, E u, 46, G 20, I 116.
Mistum, 87, B 19, C³ 19, E 1, 99, G 25, H 66, M 1, 96.
Missi sunt ad., 36, C³ 231, E m, 59, G 222, I 185.
Mittimus ad v. l. pr. p. el. q., 173, C³ 25, E iv, 28, G 505.
Mittimus sa. v. la. pr. fi., 10, B 24, C³ 24, E u, 47, H 105.
Mittimus sa. v. la. pr. p. co., 9, B 18, C³ 18, E u, 45, G 24 et 50, I 90.
Mittimus v. l. d. 151, C³ 149, E 1, 121, G 146 et 274, H 81, I 55, M 1, 116.
Molestie, 345, C³ 51, E 1, 46, I 41, M 1, 42.
Molestias et., 265, C³ 280, E v, 51, I 216.
Multam, 151, C³ 92, E u, 56, G 97.

N

Nil no., 50, C³ 296, E 1, 21, H 14, I 4, M 1, 17.
Nobis in., 69, C³ 198, E m, 81, G 192.
Noll g., 129, D 238.
Non cred., 67, B 15, C³ 15, E u, 19, G 19, H 129.
Nonne, 341, A³ 88.
Non ipsi: presentes, etc. Vide Sanctis, etc., 352.
Non ob., 199, B 54, C³ 55, E 1, 5, G 61, H 2, I 11, M 1, 5.
Non t., 170, C³ 187, E u, 72, G 180.
Nos, C³ 94, E u, 58, G 102, I 121.
Noscat, 176, C³ 184, E m, 18, G 98.
Nos v. al., 171, C³ 159, E u, 69, G 153, I 56.
Noverit d. q., 147, A³ 54.
Noverit d. v., 256, A³ 67, C³ 274, E v, 15, G 256.
Noverit in. v., 240, B 58, C³ 58, E v, 7, G 44, I 195.
Noverit in. v., 264, B 40, C³ 40, E v, 10, G 46, M v, 10.
Noverit in. v. q. n., 248, B 59, C³ 59, E v, 8, G 45.
Noverit un. v., 80, C³ 196, E m, 68, G 190.
Noverit v. f. q., 120, C³ 152, E m, 71, G 187.
Noverit v. p., 370, C³ 29, E 1, 7, H 5, M 1, 7.
Novit d. v. qu., 82, C³ 260, E v, 58, G 545.
Novit fr. t., 168, C³ 319, E 1, 157, F 156, G 557, H 96, K 5, M 1, 7.
Novit in c. an., 185, B 65, C³ 66, E v, 54, G 72, I 224.
Novit in c. et., 191, C³ 208, G 202.
Novit v. dis. pro., 81, C³ 186, C³ 225, E m, 55, G 214.
Nullus pr., 40, C³ 244, E v, 21, G 240, I 198.
Nuntium, 578, C³ 49, E 1, 41, M 1, 40.

O

Omnia nost., 98, C³ 86, G 90.
Omnino no., 290, C³ 275, E iv, 52, G 527.
Omnis q., 352, C³ 170, E iv, 21, G 166, I 126.
Oportuerat, 272, A³ 79, B 68, C³ 212, C³ 69, D 186, E v, 66, G 75, I 222.
Operam om., 361, C³ 234, E m, 62, G 225.
Otiosum e., 110, B 60, C³ 61, E v, 48, G 67.

P

Perlatum est ad., 211, C³ 9, E 1, 142, G 286, H 100, M 142.
Perlatum e. ad., 114, C³ 165, E u, 85.
Per m. D., 369, C³ 28, E 1, 6, H 1, I 15, M 1, 6.

Per ven. f., 1, 225, C³ 6, E v, 17.
Pervenit ad aud. n., 254, C³ 140, M u, 86.
Pervenit ad au. no., 125, C³ 98, E 1, 144, H³ 12, M 1 141.
Pervenit ad a. n. re., 197, DD.
Præteritum ca. tem., 72, EE p. 54, FF p. 58.
Probabile qu. est., 193, C³ 91, E 1, 56, G 96, H 54, 29, M 1, 52.
Pro d. r., 320, C³ 85, E 1, 102, M 1, 99.
Pro il. an., 242, C³ 55, E 1, 11, G 255, M 1, 11.
Proxima, 581, C³ 135, E u, 6.

Q

Quæ a. su., 15, C³ 189, E m, 66, I 186.
Quæ in c. 92, C³ 257, E m, 65, G 228.
Qualiter j. p., 216, C³ 124, E u, 7, H 123, I 111.
Qualiter in., 528, C³ 175, E iv, 7, G 169, I 153.
Quam gr., 265, C³ 506, E v, 56, G 555, I 210.
Quam jus., 27, A³ 80, B 79, C³ 81 et 95, D 187, E v, 75, G 86, H 1, I 225.
Quam pat., 306, A³ 46, B 51, D 162 et 220, E iv, 4, G 58, I 152.
Quam sit n., 128, D 145.
Quamvis c., 275, B 77, C³ 215, C³ 78, E v, 68, G 84, I 225.
Quamvis c. p., 285, B 78, C³ 214, C³ 79, E v, 69, G 85.
Quantæ auc., 246, C³ 11, E iv, 41, I 146.
Quantæ co., 546, C³ 55, E 1, 55, I 40, M 1, 49.
Quantæ m., 251, C³ 7 et 202, E 1, 90, H 60, I 117, M 87.
Quantæ m., 28, C³ 262, G 294, M v, 76, W.
Quantis tr., 545, A³ 86, D 191.
Quantis calam., 93, C³ 256, E v, 50, G 559.
Quanto m., 165, C³ 224, D 222, E m, 58, G 215.
Quanto m., 51, C³ 502, E u, 14, G 506, H 127, I 94.
Quanto p., 245, C³ 10, G 250.
Quanto p., 305, C³ 82, E m, 11, G 87, I 145.
Quanto p., 241, C³ 52, E 1, 10, G 255, M 1, 10.
Quantum p., 562, C³ 255, E m, 63, G 226.
Quanto sin., 516, C³ 57, E 1, 55, H 55, I 21, M 1, 51.
Quanto s. R., 164, C³ 261, E v, 59, G 544.
Quanto v. c., 156, B 6, C³ 6, E 1, 115, G 12, H 74, I 58, M 1, 108.
Quantum te f., 172, C³ 508.
Quantum s. in., 590, C³ 247, E v, 22, G 242.
Quem fo., p. 353.
Querimonias, 205, C³ 68, E 1, 79, G 256, H 53, M 1, 76.
Quia d., 117, C³ 99, E 1, 145, H 103, M 1, 145.
Quia ecc., 115, C³ 214, G 207.
Quia ex d., 276, C³ 10, C³ 142.
Quia n. e., 260, C³ 285, E v, 86.
Quia te s., 582, C³ 118, E m, 27, G 126.
Quia v. b., 275, C³ 522, E v, 94, G 561, I 256.
Quid m. g., 357, D 269.
Quod c. ea q., 285, A³ 8, C³ 99, D 148, E 1, 41, G 107, H 25, M 1, 57.
Quod ju., 209, C³ 95, E 1, 118, H 78, I 78, M 1, 115.
Quod mi., 205, B 47, C³ 48, E 1, 49, G 54, H 30, I 17, M 1, 45.
Quod no., 142, C³ 216, E v, 75.
Quod st. n., 560, C³ 153, E m, 27, G 158, I 181.
Quod p., 215, B 55, C³ 122, C³ 56, E u, 1, G 62, H 118, I 101, M u, 2.
Quod sup., 517, C³ 17.
Quod u., 280, A³ 68, D 225.
Quomodo de., 90, C³ 112, E 1, 165, H 112, I 93, M 1, 165.
Quoniam ad., 247, C³ 217, E iv, 42, G 264, I 206.
Quoniam ad o. cu., 210, B 45, C³ 46, E 1, 119, G 82, H 79, I 49, M 1, 114.
Quoniam ad o. c. p., 259, B 46, C³ 47, E iv, 120, G 53, H 80, M 1, 115.
Quoniam de p., 287, B 41, C³ 41, F v, 6, G 47.
Quoniam de p. t., 252, B 42, C³ 42, E v, 2, G 48.
Quoniam de v. d., 254, B 55, C³ 55, E v, 4, G 59, I 191.
Quoniam di., 202, C³ 48, E 1, 45, H 27, M 1, 59.
Quoniam ecc., 255, C³ 122, G 150, M u, 129.
Quoniam en., 229, C³ 282, E v, 41, G 555.
Quoniam in., 253, B 57, C³ 57, E v, 5, G 45.
Quoniam in c., 102, C³ 42, E 1, 47, H 28, I 50, M 1, 45.
Quoniam nobilis, 281.
Quoniam D., 555, D 285.
Quot et qu., 83, C³ 259, E v, 57, G 543.
Quot ang., 20, C³ 201, E iv, 50.
Quot et qu., 83, C³ 126, E m, 17, G 154, I 116.
Quoties o. 512, C³ 6, E m 51, I 169.
Quum. Vide Cum.

R

- Receptis l., 201, C² 56, E i, 51, H 52, I 57, M i, 50.
 Rediens ad., 89, C² 65, E i, 75, H 49, M i, 72.
 Redit nun., 90, C² 66, E i, 76, G 100, H 50, M i, 75.
 Redolet, 266, C² 328, D 246, E v, 95, G 360, H 2 et 5, I 235.
 Regie s. c., 512, C² 516, E iv, 51, G 245, I 150.
 Regia, 182, C² 289, E iv, 5, G 530.
 Relatum, 163, C, 162, E n, 82, I 57.
 Hemittimus, 11, B 26, C² 26, E ii, 54, G 32, I 115.
 Rex, p., 389, C² 204, E v, 11, G 268.

S

- Sacrorum can., 106, C² 194, E m, 70, G 188, I 153.
 Sacrorum c. d., 122, C² 108, E iii, 45, G 416.
 Sacrosancta, 208, C² 92, C² 277, E i, 115, G 272, H 73, I 47, M i, 110.
 Saepe n., 284, C² 43, E i, 74, G 51, H 48, M i, 1.
 Saepo qu., 47, C² 197, E iii, 79, G 191, I 171.
 Saluti re., 515, C² 276, E v, 27.
 Sancta Can., 58, C² 250, E iii, 58, G 221.
 Sanctis v. s., 552, C² 27, E iv, 25, G 533, I 140.
 Sanctitati, 44, C² 297, E i, 19, G 12, M i, 15.
 Satis su., 5, C² 2, E i, 158, H 97, I 69, M i, 159.
 Satis su., 97, C² 5, E i, 159, H 28.
 Scelerum, 327, C² 209, E m, 88, G 203, I 173.
 Sciatis, 78, C² 14, E iv, 47, G 291, I 191.
 Sciatis h. e., 372, C² 5, E i, 14, H 9.
 Scimus pr., 325, C² 294, E v, 16, G 237.
 Scripseramus, 119, M iii, 99, W.
 Scriptum e., 537, A² 90.
 Secutus, 111, C² 242, E iv, 58, G 232.
 Se ips., 141, A² 4, C² 107, D 172, E iii, 44, G 115, I 156.
 Segnius i. a., 593, C² 11, E v, 46, G 537.
 Si cau. no., 17, C² 185, E iv, 12, G 176, I 156.
 Sicut ad lo., 48, B 61, C² 62, E v, 49, G 68, I 204.
 Sicut no. v., 104, C² 4, E i, 145, H 101, I 68, M i, 145.
 Si cu., 74, A² 52, B 9, C² 9, E i, 97, G 15, H, 64, 156, M i, 64.
 Si enorm., 226, C² 278, E v, 28.
 Significatum e. n. et ex. p. t. m., 214, C² 265, E i, 175, G 297, H 115, M i, 175.
 Significatum e. n. et c. re. mo., 278, C² 49.
 Significatum e. n. q., 6, 310, C² 267, E i, 177, G 299, M i, 177.
 Significatum e. n. q. q. m. t. in 500, C² 154, E n, 75.
 Significavit no. v. i., 238, C² 41, E i, 27, G 348, I 143, M i, 23.
 Significavit n. v. s., 524, C² 17, E m, 50, G 515.
 Si gr. i., 169, B 17, C² 17, E i, 155, G 25, M i, 135.

(2) Nota quod tres quatuorve epistolarum, quæ in hac tabula occurrunt, nullum numerum affixum habent. Hoc inde factum est, quod casibus fortuitis, quibus omnes

- Si labor., 53, B 65, C² 64, E v, 51, G 70, I 205.
 Si lit. nos., 125, A² 5, B 7, C² 7, D 350, E i, 40, G 13, H 24, I 53, M i, 36.
 Sinceritati 158, C² 206, E m, 93, G, 200.
 Si quanta d. et in. ec., 277, C² 14, C² 145, M u, 87.
 Si qu. det. et in. ex B. ec. cl., 232, C² 13, C² 141.
 Si v. e., 162, C² 152, E n, 86, G 149.
 Si vo., 42, C² 87, E n, 75, G 91, M i, 151.
 Solliciti de 6, B 21, C² 21, E n, 22, G, 27, I 93.
 Solliciti es., 93, C² 190, E m, 67, G 267.
 Sollicito re., 335.
 Stylum eo., 536, C² 153, E n, 100, G 150.
 Super be., 296, C² 58, E i, 62, H 40, I 53, M i, 58.
 Super his 377, C² 46, E i, 36, M i, 52.
 Super n., 344, C² 50, E i, 45, M i, 41.
 Super pr., 149, B 10, C² 82, C² 10, E i, 101, G 16, H 68, M i, 88.
 Super rel., 256, C² 71, E i, 85, H 57, I 148, M i, 88.
 Suscepit et 185, Q xvi, 106.

T

- Tanquam ex 267, B 44, C² 44, E i, 160, G 50, H 108, I 44.
 Testatur v., 24, C² 254, E v, 24, G n, 63, I 196.
 Transacta 392, C² 207, E v, 33.
 Treccensis co., 21, C² 264, G 241

U

- Universis op., 281, A² 28, B 45, C² 45, D 216, E i, 53, G 49, H 20, I 50, M i, 28.
 Ut cum, 358, E m, 4, G 509.
 Utinam, 51, C² 245, E v, 20, G 239, I 197.
 Ut d. v., 564, E m, 41, C² 188, G 350.
 Ut al. s., 160, C² 239, E iv, 45, G 239.
 Ut quid. Vide Charissime.

V

- Vehementer gavis, 347, C² 100, E i, 146, H 104, M i, 146.
 Venerabilis, G, n. 25, C² 295.
 Venerande, 5, C² 67, E i, 77, G 254, H 51, M i, 74.
 Verbum evan., 53, B 50, C² 50, E n, 99, G 56.
 Veritas ob., 70, C² 184, E iv, 26, G 177, I 154.
 Veritatis 565, C² 8, E m, 50, G 255.
 Vestra de., 154, C² 187, E m, 40, G 181.
 Vest. dis., 157, C² 225, E m, 52, G 216, I 188.
 Vestræ, 356, C² 151, D 196, E v, 81, I 228.
 Vestra fr., 137, G 186, M i, 164.
 Vestram la., 157, F m, 45.
 Vestro apostolatu, 531, C² 120, E v, 82, I 231.
 Vir. ill. Ro., 133, C² 231, E iv, 40, G 261.
 Virtutis et h., 228, C² 281, E v, 54, G 269, I 208.
 Vobis d. fr., 116, 118, et 128 (2).

res humane subjacent, numerus intercidit. At certum est omnes has epistolas, nullis exceptis, in istis codicibus inesse.

TABULA SECUNDA IN EPIST. S. THOMÆ,

Secundum editionem Lupi, quæ in quinque libros distributa est. ordinata.

ORDO EPISTOLARUM LIBRI I.

i, GF, 462. — ii, GF, 463. — iii, 568. — iv, 198. — v, 199. — vi, 569. — vii, 570. — viii, 571. — ix, 565. — x, 241. — xi, 242, xii, — xiii, GF, 481. — xiv, 572. — xv, GF, 482. — xvi, — xvii, 200. — xviii, 1. — xix, 44. —

xx, 54. — xxi, 50. — xxii, 49. — xxiii, 575. — xxiv, JS. — xxv, GF, 464. — xxvi, 201. — xxvii, 258. — xxviii, A, 35. — xxix, 576. — xxx, 2. — xxxi, JS. — xxxii, 281. — xxxiii, JS. — xxxiv, 191. — xxxv, GF, 463. — xxxvi, 577. — xxxvii, 282. — xxxviii, GF, 174. — xxxix, 279. — xl, 125. — xli, 285. — xlii, 298. — xliii, 202. — xliiv,

Primus numerus indicat ordinem epistolarum Lupi, secundus ordinem nostrum: ubi interseruntur litteræ A. GF. JS. intelligas epistolas Arnulfi, Gil. Foliot, et Joannis Saresb. necesse est. At quoniam epistolas hujus Joannis nondum edidimus, numeros inserere impossibile prorsus fuit. Asteriscus indicat non recte epistolam vocari, et proinde in alio libro, quem de Vita S. Thomæ edimus, inter historica documenta collocatam esse.

378. — XLV, 344. — XLVI, 343. — XLVII, 102. — XLVIII, 177. — XLIX, 203. — L, 366. — LI, GF, 397. — LII, 188. — LIII, 346. — LIV, 204. — LV, 316. — LVI, 193. — LVII, 192. — LVIII, 150. — LIX, 314. — LX, 274. — LXI, 313. — LXII, 296. — LXIII, 178. — LXIV, 179. — LXV, 180. — LXVI, 181. — LXVII, GF, 365. — LXVIII, 129. — LXIX, GF, 483. — LXX, GF, 511. — LXXI, GF, 512. — LXXII, 379. — LXXIII, JS. — LXXIV, 284. — LXXV, 89. — LXXVI, 90. — LXXVII, 3. — LXXVIII, 243. — LXXIX, 205. — LXXX, 292. — LXXXI, 293. — LXXXII, 294. — LXXXIII, 236. — LXXXIV, GF, 506. — LXXXV, A, 34. — LXXXVI, A, 36. — LXXXVII, 567. — LXXXVIII, JS. — LXXXIX, GF, 439. — XC, 231. — XCI, 206. — XCII, 293. — XCIII, JS. — XCIV, JS. — XCV, JS. — XCVI, 73. — XCVII, 74. — XCVIII, 86. — XCIX, 87. — C, 146. — CI, 149. — CII, 320. — CIII, GF, 450. — CIV, JS. — CV, GF, 470. — CVI, GF, 472. — CVII, GF, 273. — CVIII, JS. — CIX, 150. — CX, JS. — CXI, JS. — CXII, 286. — CXIII, 156. — CXIV, 207. — CXV, 208. — CXVI, 270. — CXVII, 124. — CXVIII, 209. — CXIX, 210. — CXX, 239. — CXXI, 151. — CXXII, 152. — CXXIII, GF, 274. — CXXIV, GF, 193. — CXXV, GF, 173. — CXXVI, GF, 456. — CXXVII, 74. — CXXVIII, GF, 437. — CXXIX, 4. — CXXX, JS. — CXXXI, GF, 273. — CXXXII, GF, 410. — CXXXIII, JS. — CXXXIV, GF, 394. — CXXXV, 50. — CXXXVI, 37. — CXXXVII, 168. — CXXXVIII, 5. — CXXXIX, 97. — CXL, JS. — CXLI, JS. — CXLII, 211. — CXLIII, 104. — CXLIV, 123. — CXLV, 117. — CXLVI, 347. — CXLVII, JS. — CXLVIII, 212. — CXLIX, 213. — CL, JS. — CLI, JS. — CLII, JS. — CLIII, JS. — CLIV, JS. — CLV, JS. — CLVI, 169. — CLVII, JS. — CLVIII, JS. — CLIX, 580. — CLX, JS. — CLXI, 267. — CLXII, JS. — CLXIII, 351. — CLXIV, JS. — CLXV, GF, 466. — CLXVI, 90. — CLXVII, 333. — CLXVIII, JS. — CLXIX, JS. — CLXX, JS. — CLXXI, JS. — CLXXII, JS. — CLXXIII, JS. — CLXXIV, 174. — CLXXV, 214. — CLXXVI, * — CLXXVII, 310. — CLXXVIII, A, 37. — CLXXIX, JS.

LIB. II.

I, 213. — II, 299. — III, 268. — IV, GF, 398. — V, GF, 443. — VI, 381. — VII, 216. — VIII, JS. — IX, GF, 406. — X, 64. — XI, 65. — XII, 66. — XIII, 60. — XIV, 51. — XV, JS. — XVI, JS. — XVII, JS. — XVIII, 61. — XIX, 67. — XX, JS. — XXI, 99. — XXII, 6. — XXIII, GF, 331. — XXIV, GF, 407. — XXV, JS. — XXVI, JS. — XXVII, 582. — XXVIII, GF, 404. — XXIX, GF, 408. — XXX, 7. — XXXI, JS. — XXXII, JS. — XXXIII, GF, 438. — XXXIV, GF, 333. — XXXV, 8. — XXXVI, JS. — XXXVII, JS. — XXXVIII, JS. — XXXIX, JS. — XL, JS. — XLI, GF, 484. — XLII, GF, 499. — XLIII, 511. — XLIV, GF, 431. — XLV, 9. — XLVI, 29. — XLVII, 10. — XLVIII, JS. — XLIX, JS. — L, JS. — LI, JS. — LII, JS. — LIII, JS. — LIV, 11. — LV, 39. — LVI, 151. — LVII, 33. — LVIII, 43. — LIX, GF, 302. — LX, JS. — LXI, JS. — LXII, GF, 446. — LXIII, JS. — LXIV, JS. — LXV, JS. — LXVI, JS. — LXVII, JS. — LXVIII, GF, 334. — LXIX, 171. — LXX, GF, 476. — LXXI, 54. — LXXII, 170. — LXXIII, 42. — LXXIV, GF, 447. — LXXV, 300. — LXXVI, JS. — LXXVII, JS. — LXXVIII, JS. — LXXIX, GF, 500. — LXXX, 189. — LXXXI, 113. — LXXXII, 163. — LXXXIII, 114. — LXXXIV, GF, 483. — LXXXV, JS. — LXXXVI, 162. — LXXXVII, 103. — LXXXVIII, 132. — LXXXIX, JS. — XC, JS. — CXI, JS. — CXII, JS. — CXIII, JS. — CXIV, 217. — CXV, JS. — CXVI, JS. — CXVII, GF, 403. — CXVIII, GF, 396. — CXIX, 53. — C, 336. — CI, GF, 411. — CII, JS. — CIII, JS. — CIV, GF, 332. — CV, JS. — CVI, JS. — CVII, JS. — CVIII, JS. — CIX, 91. — CX, JS. — CXI, 218.

LIB. III.

I, 219. — II, 501. — III, 502. — IV, 338. — V, JS. — VI, 383. — VII, 384. — VIII, GF, 486. — IX, 339. — X, 173. — XI, 503. — XII, JS. — XIII, 321. — XIV, GF, 333. — XV, 143. — XVI, 138. — XVII, GF, 434. — XVIII, 85. — XIX, 176. — XX, JS. — XXI, GF, 490. — XXII, 322. — XXIII, GF, 428. — XXIV, GF, 433. — XXV, GF, 439. — XXVI, 220. — XXVII, 221. — XXVIII, 431.

GF, 487. — XXIX, 360. — XXX, GF, 460. — XXXI, GF, 494. — XXXII, 324. — XXXIII, 323. — XXXIV, 383. — XXXV, 81. — XXXVI, 84 et 166. — XXXVII, 138. — XXXVIII, 103. — XXXIX, GF, 390. — XL, 163. — XLI, 133. — XLII, 134. — XLIII, 361. — XLIV, GF, 268 et 276. — XLV, 137. — XLVI, 141. — XLVII, 122. — XLVIII, GF, 277. — XLIX, GF, 493. — L, XLVIII, GF, 491. — LI, XLIX, GF, 429. — LII, 363. — LIII, 342. — LIV, 157. — LV, 386. — LVI, 12. — LVII, 46. — LVIII, 32. — LVIX, 63. — LX, 68. — LXI, 58. — LXII, 36. — LXIII, 57. — LXIV, 109. — LXV, 361. — LXVI, 362. — LXVII, 58. — LXVIII, 92. — LXIX, 13. — LXX, 93. — LXXI, 80. — LXXII, 88. — LXXIII, 106. — LXXIV, 120. — LXXV, 116, 118 et 128. — LXXVI, 133. — LXXVII, 39. — LXXVIII, 14. — LXXIX, 33. — LXXX, GF, 391. — LXXXI, 326. — LXXXII, 47. — LXXXIII, JS. — LXXXIV, 69. — LXXXV, GF, 437. — LXXXVI, 38. — LXXXVII, 43. — LXXXVIII, GF, 443. — LXXXIX, GF, 461. — LXXXX, 154. — LXXXXI, 327. — LXXXXII, GF, 473. — XC, GF, 422. — XCI, GF, 474. — XCII, 13. — XCIII, 138. — XCIV, 139. — XCV, 133. — XCVI, GF, 514. — XCVII, 139. — XCVIII, GF, 431.

LIB. IV.

I, 297. — II, 304. — III, 503. — IV, 306. — V, 182. — VI, 16. — VII, 328. — VIII, 358. — IX, 167. — X, 339. — XI, 340. — XII, 17. — XIII, 18. — XIV, 19. — XV, 100. — XVI, 222. — XVII, 223. — XVIII, GF, 503. — XIX, GF, 509. — XX, GF, 432. — XXI, 332. — XXII, 387. — XXIII, GF, 437. — XXIV, GF, 426. — XXV, 332. — XXVI, 70. — XXVII, GF, 389. — XXVIII, 173. — XXIX, JS. — XXX, 269. — XXXI, 319. — XXXII, 290. — XXXIII, 79. — XXXIV, JS. — XXXV, JS. — XXXVI, JS. — XXXVII, GF, 438. — XXXVIII, 111. — XXXIX, JS. — XL, 133. — XLI, 246. — XLII, 247. — XLIII, 224. — XLIV, 76. — XLV, 160. — XLVI, 94. — XLVII, 78. — XLVIII, 388. — XLIX, JS. — L, 20. — LI, 312.

LIB. V.

I, 307. — II, 232. — III, 233. — IV, 234. — V, 233. — VI, 297. — VII, 240. — VIII, 218. — IX, 144. — X, 261. — XI, 389. — XII, 140. — XIII, JS. — XIV, GF, 493. — XV, 236. — XVI, 323. — XVII, 223. — XVIII, JS. — XIX, 107. — XX, 51. — XXI, 40. — XXII, 390. — XXIII, 391. — XXIV, 24. — XXV, 329. — XXVI, 262. — XXVII, 313. — XXVIII, 226. — XXIX, 227. — XXX, 93. — XXXI, 263. — XXXII, 271. — XXXIII, 392. — XXXIV, 223. — XXXV, 156 et 148. — XXXVI, 161. — XXXVII, 83. — XXXVIII, 82. — XXXIX, 161. — XL, 257. — XLI, 229. — XLII, JS. — XLIII, GF, 497. — XLIV, GF, 498. — XLV, 23. — XLVI, 393. — XLVII, 41. — XLVIII, 110. — XLIX, 48. — L, 71. — LI, 53. — LII, 26. — LIII, 394. — LIV, 183. — LV, 50. — LVI, 263. — LVII, GF, 384. — LVIII, GF, 401. — LIX, GF, 400. — LX, GF, 393. — LXI, GF, 392. — LXII, GF, 402. — LXIII, JS. — LXIV, 273. — LXV, 250. — LXVI, 272. — LXVII, 249. — LXVIII, 273. — LXIX, 283. — LXX, 196. — LXXI, 238. — LXXII, JS. — LXXIII, 27. — LXXIV, 193. — LXXV, 142. — LXXVI, GF, 436. — LXXVII, GF, 448. — LXXVIII, * — 503. — LXXIX, A, 53. — LXXX, 330. — LXXXI, 236. — LXXXII, 531. — LXXXIII, GF, 440. — LXXXIV, GF, 469. — LXXXV, 239. — LXXXVI, 260. — LXXXVII, GF, 424. — LXXXVIII, * — LXXXIX, GF, 383. — XC, GF, 422. — XCI, JS. — XCII, 237. — XCIII, 266. — XCIV, 273. — XCV, GF, 334. — XCVI, GF, 386. — XCVII, GF, 382. — XCVIII, *

In his duobus tomis 39 epistolae sunt, quae in editione Lupi non occurrunt: eae sunt 21, 23, 28, 62, 77, 98, 101, 112, 113, 119, 121, 126, 127, 128, 129, 143, 147, 172, 184, 185, 186, 187, 190, 191, 197, 232, 253, 255, 244, 243, 250, 261, 276, 277, 278, 280, 281, 288, 289, 291, 309, 317, 318, 333, 334, 335, 337, 340, 341, 343, 348, 349, 350, 353, 354, 357, 373, 374.

In aliis istis tomis, qui epist. Gil. Fol. continent, 426 epistolae novae insunt, quae apud Lupum non habentur.

TABULA EPISTOLARUM S. THOMÆ CANTUAR.

Secundum litteram initialem ordinata

Epistolarum sancti Thomæ Cantuariensis editio a Lupo
 vulgata, Brux. 2 tomis 4. 1682, epistolas omnino 536 habet,
 inter quas circiter 110 sunt quæ Arnulfum Lexoviensem et
 Joannem Saresberiensem habent auctores. Eas nunc om-
 nino ab epistolis sancti Thomæ separavimus, Arnulfi qui-
 dem, quia nuper omnia ejus opera in vol. 53 hujus editio-
 nis Patrum Ecclesiæ Anglicanæ edidimus, Joannis vero
 Saresberiensis, quia ejus quoque opera omnia quæ exstant,
 Deo volente, brevi sumus in lucem daturi. Restant circi-
 ter 426, quas damus vel in his qui sancti Thomæ vel in
 illis qui Gilberti Foliot epistolas continent. Nam in duas
 partes melius visum est hæc documenta partiri, eo quod
 exstant in bibliotheca Bodleiana epistolæ tot et tantæ
 quæ Gilberti Foliot præ se nomen ferunt, ut illi locum se-
 paratum ascribere et in sua sibi editione vulgare melius
 videretur. Ex eadem causa factum est ut pro 426 epistolis,
 quas præter Arnulfum et Joh. Saresb. editio Lupi habet,
 nos jam in editione hac usque ad mille (!), majorem par-
 tem ineditas, publici juris faciamus. Quod quomodo factum
 sit, quibusque præsidis usi simus, ex inspectione tabulæ
 quæ sequitur, lectori manifestum fiet.

Numerus qui nullam litteram præfixam habet ordinem
 designat epistolarem in hac nostra editione servatum.

A cod. ms. qui in Bibl. Bodl. servatur, sub numero 287
 in collectione Douciana. Iste liber in duas partes divi-
 sus est, quarum prior Vitam S. Thomæ, auctoribus
 Wil. G. Stephani et Joanne Saresb. continet, inter-
 sertis paucis epistolis, sex aut septem, fortasse non
 amplius, quas minoribus numeris (!) litteræ postpo-
 sitis indicavimus. Altera pars (!) codicis epistolas cir-
 citer 95 habet, quarum triginta amplius hactenus inedi-
 tæ aut in his tomis aut in Gil. Fol. nunc primum
 prodeunt. Codex iste circiter annum 1200 scriptus
 fuit.

B cod. ms. Bodl. 509, circiter A. D. 1200 scriptus, epi-
 stolas 80 habet, necnon alia quæ ad epistolas S. Tho-
 mæ non spectant.

C cod. ms. Bodl. 957, præcedentibus non recentior,
 liber cujusvis pretii, nam quasi index est libelli Alani
 de Vita S. Thomæ et tractatus Joannis Saresberien-
 sis de eadem re recte inter se ordinandorum. In qua-
 tuor partes distributas epistolas habet circiter 600 :
 quocirca notulas affiximus (!!!) ut sciat lector in qua
 parte voluminis singulæ epistolæ requirendæ sint.

D cod. ms. Bodl. e Mus. 249 qui epistolas amplius
 400 habet. Quarum non multas in his tomis damus :
 multo majorem partem in aliis istis tomis antedictis,
 qui epistolas Gilberti Foliot habet, daturi.

E indicat editionem Lupi in 5 libros distributam.

F epistolas Joannis Saresberiensis, Parisiis editas anno
 1611.

G cod. ms. Lambeth. sec. xiii-iv, circiter 530 epistolas
 habet.

H cod. ms. Paris. num. 5320.

I cod. ms. Paris. num. 5372 qui epistolas habet circ.
 270 in Vita S. Thomæ (auctore Rogerio Croyland.)
 insertas.

K cod. ms. epistol. Joan. Saresb. Paris. num. 8562.

L cod. ms. epistol. Joan. Saresb. Paris. num. 8625. Isti
 duo codices eandem habent epistolas quæ in editis
 continentur, eodem quoque ordine servato, sed tamen
 ut ubi alter terminetur alter incipiat, et ita una effi-
 ciunt eundem numerum epistolarum: quod posthac,
 cum de Joanne Saresberienensi edendo agetur, clarius
 videbimus. Nam in præsentis paucas admodum ex
 istis rodicibus epistolas excerptimus.

M cod. ms. magnificum et omni pretio æstimandum, qui
 in Museo Britannico sub siglo Cott. Claud. B. II, ser-
 vatur. Codex iste circiter 500 epistolas habet, in 5
 libros distributas. Ordo plerumque idem est quem
 Lupus habet, additis paucis epistolis, quas omnes ex-

cerptimus et nunc in lucem damus. Non multarum
 istius codicis epistolarum numerum dedimus, quia
 editio nostra, jam tot codicum ope lunisa, novorum
 librorum ope indigere haud adeo videbatur.

Q Bouquet, *Hist. de France*.

W cod. ms. Coll. S. Trin. Cant. 5 tomis.

X cod. Bodl. 868.

AA Vesp. F. xii.

EE Galba A. iii.

FF Galba A. iv.

A

Abutitur, 4, C² 150, E i, 129, G 147, H. 89, I 82,
 L 129.

Ad aud. n., 295, C² 78, E i, 92, H 62, M i, 89.

Ad au. n. f., 201, C² 2, C² 284, E i, 26, H. 16, I i,
 M 22.

Ad au. n. v., 268, A² 36, C² 264, D 215, E ii, 3, G 296,
 H 120, I 86, M ii, 4.

Ad aud. n. c., 269, C² 271, D 240, E iv, 30, G 534,
 I 144.

Ad aud. tu., 2, A² 15, C² 44, D 169, E i, 50, G 3, H 19,
 I 19, M i, 26.

Ad aur. n., 255, C² 144, G 145.

Ad dis tu., 222, C² 270, E iv, 16, G 246, I 129.

Ad hoc po., 206, C² 77, E i, 91, H 61, I 6, M 88.

Adhuc 326, C² 190, E ii, 78, G 184, I 152.

Ad ill. re., 558, C² 164, E iv, 8, G 160, I 139.

Ad nos it., 76, C² 252, E iv, 44, G 262, I 201.

Ad pe. ma., 12, C² 226, E ii, 54, G 217, I 170.

Ad san. gl., 159, C² 207, E ii, 94, G 201, I 161.

Ad tu. dis., 221, E ii, 25.

Ad res. cr. Gra., 108, C² 158, E ii, 58, G 141.

Ad v. di., 297, C² 268, E iv, 1, G. 329, I 128.

Ad v. se., 186, Q xvi, 108.

A mem. t. n. 152, C² 290, E², 88.

A mem. t. n., 282, A² 6, C² 96, E i, 57, G 104, H 22, I
 15, M i, 33.

Anima m. pa., C² 169, E iv, 14, G 165, et 218, I 114.

Antecessorum, 292, C² 69, E i, 80, H 54, I 45, M i, 77.

Ante dis., 91, C² 177, E ii, 109.

Anxietate, 227, C² 505, E v, 29, G 534, I 217.

Apostolica, 550, A² 61.

Apostolica s., 14, C² 191, E ii, 75, G 185, I 131.

Apostolicis, 126, C² 515, G 208.

Apostolo, 548, A² 60.

A reg. su., 504, C² 269, E iv, 2, G 521, I 113.

Audiat, sa., 529, C² 255, E v, 25, G 266.

Audita pr., 105, C² 158, E ii, 87, G 153.

Audito adv., C² 90, E ii, 18, G. 95, H 128.

Audito et, 257, C² 507, E v, 40, G 536.

Audivit ecc., 58, C² 200, E ii, 85, G 194.

B

Benedictus D., 359, C² 288, E. ii, 9, G, 351

Benedictus D. q., 574, C² 500.

Breviloquio, 181, B 27, et 51, C² 27 et 51, E i, 66, G
 53 et 57, H 41, I 58, M i, 62.

C

Calamitates, 156 et 148, C² 257, E v, 35, F 299, G. 540.
 Celebre pro. 146, A² 1, B 3, C² 3, D 295, E i, 100, G 9,
 H 67, M i, 97.

Celebre prov., 28, C² 28, E ii, 35, G 54.

Charissime, 144, C² 205, E v, 9, W.

Charissimus, 235, B 52, C² 52, E v, 5, G 58, I 192.

Clarissimi, 46, C² 227, E ii, 55, G 218, I 185.

Cognito, 50, 8, C² 501, E v, 35, G. 533, I 209.

Cum r. s., 479, D 571.
Cum s., 476, C² 160, E 2, 70, G 157.
Cum sin., 522, D 453.
Cum sit, 279, D 141.
Cum spectat, 114, D 107.
Cum susp., 41, D 57.
Cum ven., 184, D 556.
Curæ et lab. ves., 21, D 21.
Curam et sollic., 344, D, 265, H 75.

D

De benign. ves., 516, D 429.
Decens cr. est et, 423, P p. 239.
Decessum ca. Wa., 260, D 552.
De naturali bonit., 248, D 214.
De negotio, 133, D 510.
De n. v. g., 519, A² 63.
De vestra, dom., 519, D 431.
De vestra erga nos, 47, D 46.
De vestra s., 494 C² 292, E 3, 29, G 324 et 347.
De vestro al., 495, C² 128, E 5, 14, G 136.
Diem ti., 225, D 266.
Dignum est ap., 68, D 81.
Dilectæ mi, 154, D 194.
Dilecti fil. nos., 577, D 234.
Dilectio, dil., 500, D 409.
Dilectioni ves., 8, D 8.
Dilectioni v. dil., 281, D 158.
Dilectus fil. n., 533, C² 25.
Dilectus fil. nos. lat., 281, D 558.
Directas a te, 238, D 282 et 580.
Directis lit., 26, D 26.
Discretioni, v. q. p. l., 411, A² 22, C² 52, E 2, 101.
G 525.
Diu d. j., 485, C² 59 et 60, E 1, 69, G 2, 164, M 65.
Docet nos, 193, D 124.
Dominus Cant., 245, A² 53, D 153.
Dum, vices agim., 291, D 276.

E

Ecclesiæ R. f., 446, C² 166, E 2, 62, G 162, I 125.
Ecclesiæ v. q. d., 583, V.
Eos vo. s., 420, F 296, K 165.
Eram m., 501, P f. 190.
Episcopos n. n., 490, C² 125, E 3, 20, G 151, I 179.
Esse me, 219 et 293, D 281 et 578.
Est apud nos in, 224, D 125.
Et ut conventio, 510, D 422.
Etsi prop. et p., 414, F 48, L 48.
Etsi rem gran., 155, D 157.
Evangelicum, ut, 247, D 265.
Evocati a dom., 428, C² 124, E 2, 21, G 152.
Ex crebris, 540, B 218.
Excitatus, 464, C² 40, E 1, 23, 17.
Exemplum, 550, N.
Ex inj. no., 256, D 273.
Ex quo lit., 107, D 100.
Ex lit. car., 146, D 142.
Experta mi., 9, D 9.
Expectans expectavi jamdiu, 85, D 51.
Expedit, 405, A² 62, C² 116, D 158, E 2, 97, G 124.
Ex relatione, 211, D 204.
Exsultat, 471, D 264.
Exsultavi, 257, D 150.
Exsultavit, 35, D 53.
Ex ten. l. l., 567, D 280 et 571.

F

Ferreum, 457, C² 199, E 3, 82, G 193.
Fidelis an., 5, D 5.
Filius re., 287, D 163.
Formam, 455, A² 72, C² 5, D 180, E 3, 15, G 545.
Fortunam ves., 1, D 82.
Fraternitatem, 350, D 250.
Fraternitati Th., 556, A² 92, D 226.

G

Gavissus e., 584, B 71, C² 72, E 5, 57, G 78, I 211.
Gratiarum Dom., 200, D 562.
Gratiarum dil., 27, D 27.
Gratias ago, 6, D 6.
Gratias ago ben. ves. qu., 262, D 156.
Gratias ben. ves. hab., 59, D 70.
Gratias ti. ago, 84, D 65.

Gratum mu., 57, D 68.
Gratum ha., 252.
Gratum m., 511, D 425.
Gravati su., 416, F 49.
Graviter ut, 521, D 455.

H

Habes, fr., 529, Z f. 138.
Habui, 7, D 7.
Hæc qu., 261, D 270.
Herefordiensem, 169, D 595.
Hoc est, 45, D 41.
Honor q. n., 507, C² 161, M 1, 180.
Honor q. n. m., D 508, C² 179, M 1, 181.
Humilitatem, 51, D 51.

I

Id modic. dil. pa., 17 et 97, D 18 et 516.
Illius siq., 409, D 459.
Illum cl., 405, B 70, C² 71, G 77.
Importunus, 61, D 72.
Impudentia, 454, C² 127, E 3, 16, G 135, I 175.
In beati P., 345, D 572.
In colligendo den., 172, A² 9, D 351.
Incolunitati ves., 152, D 509.
In iis, car., quæ mea, 127, D 119.
In exsolvendis, 160, D 505.
Infirmorum, 527, D 444.
Injunctam no., 150, D 129.
In luce lu., 257, D 445.
Innotuit re, 408, C² 103, E 2, 29, G 111, I 104.
In officiis g., 179, D 205.
In receptione, 513, D 207.
Inspectis, 285, D 581.
Inspiratas, 255, D 351.
Instanti nec., 50, D 49.
Instanti pa., 16, D 17.
Inter c. sol. 368, D 228.
Inter mer., 154, D 512.
Invalescunt, 427, C² 181, E 4, 23, G 174.
In ulteriorem, 468, D 264.
Ipsa die, 466, C² 111, E 1, 161, H 111, M 1, 161.

J

Jamdiu, 506, C² 72, E 1, 84, H 58, I 81, M 81.
Jamdudum, 511, C² 61, D 166, E 1 70, I 66, M 67.
Jeiunantes et, 145, D 325.
Jucunditas, f. 289, D 215.
Justis pos., 515, C² 21, D 426.
Justus in exor., 65, D 76.
Juxta ill., 140, D 521.

L

Lætatur n. l. j., 586, C² 5, C² 41, E 3, 96, G 563, I 253.
Lætatur ev., 245, D 261.
Lætatus sum in his, 60, D 71.
Lator p., 504.
Lator, 517, D 456.
Latorem hu., 121, D 114.
Latorem pr., 524, D 457.
Latorem hi, 256, D 442.
Libentius vos, 35, D 56.
Licet p. n., 455, D 197.
Licet de, 401, B 72, C² 71, E 3, 58, G 79.
Licet ab., 422, C² 129, E 3, 90, G 137.
Licet om., 509, D 421.
Licet t. q., 406, C² 291, E 2, 9, G 304, I 92.
Licet n. s., 451, C² 29, E 3, 98, G 319.
Litteras vo., 19 D 19.
Litteras dil. quæ, 201, D 568.
Litteras dig. Sa., 37, D 58.
Litteras s. v., 445, C² 20, E 2, 5, G 508, H 122, M 2, 7.
Lites amic., 187, D 582.
Loquitur s. l., 459, C² 76, E 1, 89, I 21, M 1, 86.
Lux, dom. ill., 158, D 297.

M

Magna qua, 217, D 549.
Mandamus v., 554, C² 527, E 3, 93, G 562.
Mandastis no., 141, D 522.
Mandatum ves., 174, A² 7, C² 97, D 147, E 1, 56, G 103, I 46, M 1, 54.
Mandatum do. q., 271 A² 20, D 555.
Mandavit mi., 158, C² 55, D 519, G 41.

Mandavit m. d., 499, B 33, E 2, 42.
 Meminimus n., 329, D 229
 Memor. tu., 12, D 13.
 Mentis ves., 147, D 144.
 Miramur mul., 473, P f. 235.
 Mittimus ad v. H. u., 277, A² 54, C² 38, D 386, E 3,
 46, G 283, I 160.
 Moneo te, fili, 29, D 29.
 Moris so., 250, D 327.
 Moris es., 291, D 282.
 Movet nos aliqu., 32, D 32.
 Multas s. v., 314, C² 28, E 5, 96, G 318
 Multiplicem, 194, A² 18, D 447.
 Multis cur., 209, A² 33, D 389.
 Multorum pre. v., 208, D 279

N

Necessitati, 18 et 98, D 19 et 317.
 Ne in d. v., 385, C² 218, E 3, 89, I 232.
 Ne tua, dom., 212, CC.
 Nobilis mu., 365, D 500.
 Noli gr. fe., 412, D 258.
 Non ig. di., 425, F 288, K 123, M 3, 92.
 Nonnullis, 393, D 456
 Non potest m., 449, A 53, D 388.
 Non quer., 101, D 94.
 Nos sa. v., 438, C² 241, E 4, 57, G 231.
 Nos su., re, 418, F 56.
 Nosti, car., 100, D 93.
 Nosti q., 481, E 1, 13, H 8, I 26.
 Nostis, dom., 177, D 202.
 Notificamus, 398, C² 146, E 2, 4, G 121, M 2, 6
 Notum ves., 189, D 404.
 Notum sit car., 198, D 128.
 Notum sit t. p., 295, D 541.
 Noverit c. v., 460, C² 139, E 3, 28, G 142.
 Noverit dil. ves. la., 182, D 332
 Noverit di. v. q., 231, D 408.
 Noverit di. v. c., 315, D 428.
 Noverit m. v., 440, A² 85, C² 217, D 190, E 5, 83.
 Novit ecc. Ro., 489, D 298.
 Nuntios et l., 439, C² 110, E 3, 23, G 118, I 180.
 Nuntium v. re., 407, E 2, 24, G 134.

O

Obsecro ne, 119, D 112.
 Offici nos., 226, D 534 et 542.
 Officiosum mi., 69, D 83.

P

Paci ves. et qui., 48, D 47.
 Paci ves. cong., 157, D 318.
 Parit et a. l., 461, C² 203, E 3, 86, G 197, I 174
 Particeps mer. eff. 225, D 299 et 445.
 Pastoralis off., 306, D 418.
 Paternitatis v., 463, C² 43, E 1, 53.
 Per apostolica scr., 481, D 350.
 Per Gunterium, 400, B 75, C² 74, E 3, 39, G 80.
 Perlatio, 162, D 547.
 Perseverans in, 429, A² 58, C² 2, D 174, E 3, 49, G
 234, I 168.
 Personas ec. 366, D 233.
 Pervenit ad nos, 53, D 66.
 Pervenit ad n., 342, D 250.
 Pervenit ad au. n. 282, D 339.
 Pervenit ad pat., 196, A² 33, D 277.
 Plum e. fr., 305, D 417.
 Placet n. pl., 393, A² 40, C² 33, G 325, I 115, W.
 Placuit subl. ves., 28, D 28.
 Placuit exc., 274, A² 19, C² 50, D 168, E 1, 123, G 276,
 H 83, I 35.
 Placuit vo. lit., 106, D 99.
 Post d. v. g., 331, B 56, C² 37, E 2, 23, G 65, I 98
 Post n. v., 453, C² 125, E 3, 22, G 153.
 Postquam C. oc. s., 450, A² 59, D 173
 Poteram me cohib., 2, D 2.
 Potestis re., 304, I 172, Q xvi, 269
 Principio t. q., 482, E 1, 13, H 10, I 27.
 Præsentium la., 235, D 120.
 Præveniente nos in, 77, D 91.
 Prævenisset, 463, C² 26, E 1, 2, 112, M 2
 Pro amore D., 496, A² 5, A² 74, D 182
 Pro anim. mi. res est et, 40, D 57.
 Pro d. r., 430, C² 83, E 1, 102, M 1, 99.

Pro litteratis et 298, D 363.
 Pro ar. f. an., 302, C² 95, E 2, 39, G 103, I 123
 Providendum no., 186, D 373.

Q

Quæ ad h. D., 312, D 423.
 Quæ contid., 159, D 501
 Quæ dev., 413, F 54, R.
 Quæ ad pa., 210, D 296.
 Quæ don., 314, D 427.
 Quæ don. Londonia, 183, D 335.
 Quæ don. Sretforde, 188, D 403.
 Quæ in us., 230, D 402.
 Quæ li. inq., 129, D 272.
 Quæ rel., 233, D 424.
 Quæ in nos., 259, D 414.
 Quæ senten., 192, D 407
 Quæ sem., 190 D 405.
 Quæ sint ea, 66, D 79.
 Quæ sint opes, 220, D 121
 Quæritis an, 114, D 326.
 Quæ vestro, 436, A² 12, B 13, C² 13, D 149, E 1, 136,
 G 21, H 86, I 70 et 237, M 1, 123.
 Qualiter v. in, 380, Q v, xv, p. 841.
 Quam pia. Vide Qua d.
 Quam sit, 143, D 145
 Quam fer., 393, B 74, C² 73, D 7, E 3, 60, G 81 I
 215.
 Quam jac., 159, B 51, C² 52, D 820
 Quamvis s. b., 315, 211.
 Quamvis n. de m., 323, S fo 43.
 Quando d. W., 483, C² 318, E 2, 84, G 322.
 Quando p. v., 392, B 75, C² 76, E 5, 61, G 82.
 Quanta, do., 72, D 86.
 Quanta m., 444, M 2, 82.
 Quanta fr., 234, D 370.
 Quanta un., 333, C² 104, E 2, 34, G 112, 199.
 Quantis mis., 11, D 12.
 Quanto m., 339, D 222.
 Quanto ves., 264, D 210.
 Quanto erga, 86, D 34.
 Qui ad c., 307, D 419.
 Qui Domino, 227, D 333
 Qui nube, 148, D 139.
 Qui a pi., 326, D 440.
 Quia charit., 88, D 56.
 Quia Eccles., 123, D 116.
 Quia fortis est ut, 39, D 42.
 Quid in nob., 116.
 Qui fuerint primi, 469, A² 83, C² 326, E 3, 84.
 Quod beat., 124, D 267.
 Quod in cau, 205, D 329.
 Quo frat., 115, D 106.
 Quo ma., 229, D 401.
 Quo pe., 301, D 410.
 Quod mis. pa., 25, D 23.
 Quod al., 320, D 432.
 Quod ad, 120, D 113.
 Quod a præ, 125, D 117.
 Quod de, 391, C² 191, E 3, 77.
 Quod imit., 42, D 39.
 Quod lab., 133, D 513.
 Quod pal., 34, D 54.
 Quod v. r., 318, C² 24.
 Quoniam de, 364, A² 2 et 26, D 113
 Quoniam, dil., 78, D 92.
 Quoniam dis., Ch., 5, D 3.
 Quoniam gene., 303, D 416
 Quoniam hab., 71, D 83.
 Quoniam in ec., 244, D 208.
 Quoniam qu., 333, D. 206, 242 et 501
 Quoniam, dil., 92, D 74.
 Quoniam mul., 70, D 84.
 Quoniam e. v., 387, AA f., 238, BB.
 Quoniam d. v., 388, W uol. 3, Q xvi, 486.
 Quoniam s. u., 389, C² 23, E 4, 27, G 250.
 Quoniam p. m., 492, D 400.
 Quoniam scrip., 67, D 80.
 Quoniam te, 363, A² 43, C² 283, D 221, E 1, 67, H 43,
 M, 1, 63.
 Quorumdam, dom., 108, D 101.
 Quorumdam fra., 266, D 203.
 Quos no., 204, D 257.
 Quos ho., 399, D 290.
 Quos ad me, 486, C² 13, E 5, 8, G 313
 Quosdam pert., 79, D 10.
 Quum. Vide Cum.

R

Redditus, 394, C^a 309, E 1, 134, G 231, H 93.
Regium, 199, D 133, M 3, 100.
Relatum, 338, M.
Relatum, 374, D 231, M 3, 101.
Responsum can. de Pan. n. a., 283, D 123.
Rex c. D., 382, E 3, 97.
Robertus de B., 337, D 236
Rogati, 13, D 14.
Rogamus, 22, D 22.
Rogamus, 43, D 44.
Rogat nos, 49, D 48 et 75.
Rogatu ven. 103 D 98.

S

Sæpe. *Vide Spe.*
Sæpius nuntios. *Vide Episcopos.*
Salutationem, 74, D 88.
Sancta et, 378, O par. 2, pag. 171
Sanctitati, 170, D 394.
Sapiens, 126, D 118.
Sciat vest., 50, D 30.
Sciatis quod, 498, B 67, C^a 68, E 3, 44, G 74, I 219.
Sciatis, 497, A^a 6, A^a 76, B 66, C^a 67, D 184, E 3, 43, G 73, I 207.
Scimus, 94, D 308.
Scimus pr., 432.
Scribentes, 238, D 366.
Scriptum, 130, D 305.
Scire, 131, D 307.
Scitis, 103, D 96.
Scitis, car., 242, A^a 39, D 383.
Secundum, 456, C^a 301, E 3, 76.
Severitatem, 175, A^a 52, C^a 37, D 384, E 1, 23, G 281, H 83, I 139, M 1, 122.
Severitatem ves., 195, A^a 47, D 292 et 383, E 1, 124, G 279, H 84, I 138, M 1, 120.
Si adv., 91, D 61.
Si bene, 90, D 60.
Sicut dig. g., 356, D 231, M 3, 104.
Sicut dom., 87, D 53.
Sicut R. D., 352, D 237.
Sicut t. q., 517, D 209.
Sicut no., 512, C^a 62, E 1, 71.
Sicut. *Vide Si ut, etc.*
Si de, 373, D 236.
Si de v., 302, D 411.
Si d. m., 488, D 198.
Significamus, 397, C^a 34, E 1 31.
Significatum, 361, D 243 et 287.
Si unum, 443, C^a 202, E 3, 83, G 196, I 175.
Si mihi, 424, C^a 7, E 5, 87.
Singulis, 20, D 20.
Si nos, 109, D 102.
Si ut, 433, D 223.
Si verba, 213, D 330.
Spe fruendæ, 136, D 313.
Speramus, 73, D 89.
Spirat, 111, D 104.
Silius, 51, D 62.
Suadet, 246, D 262.
Suadet, etc. *Vide Verborum, D 392.*
Sublimitati, 46, D 43
Sublimitati, 73, D 87.
Sublimitati, 278, D 275 et 373.
Sublimitati, 438, A^a 25, C^a 113, D 160, E 2, 33, G 123, I 106.
Sublimitati, 93, D 306.
Sublimitatis, 163, D 367.
Suggestum T. C., 332, C^a 120, E 2, 104, G 128.
Super ap., 516, A^a 65, D 178.
Super dis., 334, A^a 44, C^a 121, E 2, 68, G 129
Super his, 484, B 34, C^a 34, E 2, 41, G 40.
Super his quæ, 52, D 63.
Supra vires, 467, W... Y 186.
Supremis, 419, F 37, L 37.
Suscepimus W. a. e., 413, F 47, L 47.
Susceimus, 263, D 337.

Susceptam, 110, D 103.
Susceptis lit., 129, D 260.
Suspirat, 168, D 391.
Sustinuimus, 44, D 43.

T

Talentum vo., 197, D 278 et 387.
Tanta nos., 275, A^a 31, C^a 4, D 182, E 1, 131, G 278, H 91, I 34.
Te, Domine, 113, D 108.
Tenemus, D 305, B 57, C^a 58, E 418, G 64 H 89.
Testis mi., 56, D 67.
Tua, ca., 286, D 136.
Tutum, fr., 328, D 446.

U

Ubi multa est, 104, D 97.
Universalis, D. g. p., 360, D 238.
Universitati, 325, D 438.
Universitati, 183, D 334.
Universitati, 434, A^a 70, D 234
Urget me, 53, D 64.
Usu celeber, 206, D 413.
Usu cel., 216, D 274
Ut ost. card., 149, D 126.

V

Venerabilem, 273, A^a 21, C^a 31, D 337, E 1, 106, G 282
Venerabiles et, 373, D 239.
Venerabilis, 396, C^a 417, D 139, E 2, 98, G 123.
Venerabilis do., 137, D 286 et 336.
Venerabilis, 426, C^a 182, E 4, 24, G 173, I 137
Venerabilis, 317, V.
Veniens ad a., 442, D 239.
Veniens ad nos, 218, D 328.
Veniens ad n., 379, C^a 20.
Veniens ad n., 288, D 212.
Veniens ad nos, 117, D 110.
Veniens ad n., 470, C^a 85, E 1, 104, G 277, H 72.
Venientes ad., 404, A^a 24, C^a 102, D 137, E 2, 23, G 110, I 107.
Venientes ad., 487, C^a 16, E 3, 26, G 314.
Venturis. O. T. ep., 320, A^a 84.
Verbi s. *Vide Vobis*
Verborum f. s. p., etc. Unde, etc., *ad.*, 202, D 412.
Verborum f. s. p., etc. Inde est 211, D 302.
Verborum f. s. pau., etc. De vo., 280, D 343.
Verborum f. su. pau., etc. Unde 178, D 392.
Verborum fa. su. pau. qu. ad, etc. Quod 176, D 127.
Vereor ad., 214, D 398.
Vestra, dom. dig. s. g. qu. in ecc. Dei, 270, D 396.
Vestra fra., 263, D 369.
Vestra nos, 267, D 343.
Vestram, 269, D 393.
Vestram ma., 477 A^a 87.
Vestram p., 300, C^a 139, E 2, 79.
Vestram dis., 399, C^a 143.
Vestram s., 491, A^a 37, C^a 1, D 173, E 3, 48, G 233 et 283, I 167.
Vestram, 268 et 276, A^a 51, C^a 36, D 290, E 3, 42, G 280 et 331, I 137.
Vestram sp., 234, D 434.
Vestram p. m., 437, A^a 11, B80, C^a 98, D 134, E 1, 128, G 106, H 71.
Vestram sc., 441, A^a 37, D 160.
Vestram sc., 245, D 134.
Vetus e., 318.
Vidimus l. v., 478, D 291.
Vigor sensuum, 447, C^a 88, E 2, 74, G 92, H 83.
Vir hon., 308, D 420.
Viri bo., 13, D 16.
Virtus et scientia, 80, D 38.
Vix m., 463, C^a 23, E 1, 1, I 1.
Vobis loq., 222, D 374.
Vobis sc., 24, D 24.
Vobis sic., 309, C^a 167, E 4, 19, G 163, I 124.

ORDO CHRONOLOGICUS

EPISTOLARUM S. THOMÆ, GILBERTI FOLIOT,

ET ALIORUM.

N. B. Plurimæ sunt epistolæ quas in ordinem secundum chronologiam redigere prorsus impossibile est. Sunt etiam pleræque quæ ad historiam S. Thomæ omnino non spectant. Sed nec gloriari licet illas quidem quæ revera de Sancto Thoma scriptæ fuerunt, epistolas ordinando me scopum semper attigisse; hoc enim etiam post Baronium, Bouquet et Froudium omnino difficile manet. GF indicat tomos qui Gilb. Fol. epistolas continent.

Epistolæ Theobaldi ante annum 1161, scriptæ.
GF 413, GF 414, GF 415, GF 416, GF 417, GF 418, GF 419.

1159 vel 1160.

Petri Cellensis epistola 533.

1165.

128, 129, 241 O. 44, 54, 50, 49. GF 462, GF 461, 575, 245. N. 89, 90, 5, 212.

1164.

J. 203, 183, 186. F. 198, 199, 206. A. 201, 571, 563. J. GF 465, 568, 569, 570. O. 200. D. GF 481, 572. GF 482, 576, 2.

1163.

J. 103, 177, 203, 250, 516, 193, 192, 150, 567, 514, 274, 515, 75, 296, 566, 194. GF 483. GF 511. J. GF 512, 579. GF 465, 577, 292, 283. GF 174, 285. A. GF 563, 187, 298, 284, 202. O. 208.

1166.

J. 267. GF 597, 188, 546, 567. GF 459, 178, 180, 179, 129, 232. F. 233. A. 270. M. 281, 251. 74. J. 168, 5, 97, 75, 146, 149, 520. GF 470. GF 572, 211, 104, 125, 117. J. 547, 212, 215, 125. GF 456, 457, 74. GF 194, 150. GF 274, 286, 156, 207, 531, 279, 124, 152, 209, 210, 1239, 151, 86, 87, 162, 578, 544. GF 484. GF 800. GF 504, 189, 115, 165, 114, 295, 291. GF 485, 295, 256. GF 506. O. 4, 42, 50, 57. GF 447, 500. GF 410, 580. GF 594, 509. GF 595. D. 215, 299, 268, 511. GF 499, 541, 217, 169. GF 275, 171, 172.

1167.

J. GF 275. F. GF 466, 90, 9, 29, 99. GF 476, 54, 535. GF 505. N. GF 531. GF 480, 155, 152. GF 598. GF 445, 61. GF 406, 64, 65, 51, 6. GF 555, 66, 60. D. 7, 582, 581, et GF 453. GF 404. GF 458, 10, 62, 67, 556.

1168.

276. GF 411. GF 532. GF 407, 91, 258. GF 403. GF 596, 218. A. GF 554, 151. GF 502, 587. GF 509. GF 432, 532, 175, 11, 59, 35, 45, 504, 290, 235, 204. GF 589, 512, 297, 506, 584, 144. GF 427. GF 426, 505. GF 493, 538, 167, 182, 17. F. 559, 540, 16. GF 486, 528, 70, 269, 532, 519. GF 195. GF 175, 502, 153. A. 154, 586, 157, 141, 122, 170, 80, 88, 106, 120, 153, 59, 14, 33, 526, 219. M. 301, 565, 542. GF 268 et 276. GF 277. GF 495. GF 491, 564. GF 429. J. 220, 47, 69. GF 457, 58, 45. GF 445. GF 461, 154, 527. GF 475. GF 454. GF 422. GF 474, 15, 158, 159, 79, 225. GF 505. GF 509, 53. GF 487, 521, 525, 585, 583, 560. GF 490, 522 et GF 428. GF 453. GF 459. GF, 495, 158, 81, 84 et 166, 188, 105. GF 590, 165, 157, 116 et 118 et 128, 12, 46, 52 et 52 et 65, 28, 277.

1169.

62, 68, 56, 56, 57, 557, 541, 545, 548, 549, 550, 555, 557, 559, 175, 181. N. 109, 561, 562, 58, 92, 15, 93, 159. GF 451. GF 591, 176. GF 458, 111, 145, 153, 8.

1170.

J. 255, 507, 252, 287, 253. F. 280, 240, 248, 264, 155, 246, 247, 231, 76, 160, 94, 19, 140, 225, 78, 588, 256. A. 525, 107, 244, 245, 51, 40, 590, 591, 25, 251. J. 589. J. 592, 529, 262, 515, 228, 95, 158 et 148, 161, 83, 82, 164. GF 497, 25, 593, 41, 110, 48, 71, 55, 195, 142, 50, 265. GF 402. GF 584. GF 401. GF 400. GF 595. GF 592, 228, 258. S. 250, 272, 249.

1171.

O. 257, 229, 226, 265, 594. GF 402, 227, 271, 273, 285. GF 498, 196, 27. GF 456. GF 448. GF 505, 550, 556, 551. GF 440. GF 469, 259, 260. GF 585. GF 422.

1172.

GF 424, 257, 261, 266, 275. GF 554, GF 586.

ORDO RERUM

QUÆ IN HOC TOMO CONTINENTUR.

SANCTUS THOMAS CANTUARIENSIS ARCHIEPISCOPUS.

Præfatio D. J. A. Giles.	1
VITA PRIMA THOMÆ, AUCTORE EDUARDO GRIM.	
Prologus.	1
Incipit vita.	5
De visione matris suæ.	3
De consuetudinibus quas rex voluit conscribere fisco.	15
De conspatione episcoporum contra archiepiscopum.	25

De concilio Northamptoniæ.	724
De ingressione archiepiscopi	26
De commoratione Sancti apud Pontinacum.	55
Quomodo rex amovit eum a Pontinacum.	56
Quomodo rex tentavit circumvenire Sanctum.	57
Quomodo Saluator bono Thomæ apparuit.	59
Quomodo rex Franciæ voluit reformare pacem inter regem et archiepiscopum.	59
De desiderio loquendi cum rege Angliæ.	59
De reversione beati viri ad Cantuariam.	40

Miraculum primum.	49
Explicit passio sancti Thomæ martyris.	50
VITA THOMÆ SECUNDA, AUCTORE ROGERIO DE PORTINACIO.	
Prologus.	53
Incipit vita.	56
VITA THOMÆ TERTIA, AUCTORE WILLELMO.	
Prologus.	103
Descriptio nobilissimæ civitatis Londoniæ.	106
De dispositione urbis.	106
De ludis.	108
Incipit vita.	111
De pueritia ejus.	111
Quomodo venit ad curam Theobaldi archiepiscopi.	112
De nobilitate clericorum curiæ.	112
De persecutione Rogerii postea archiepiscopi.	112
De statura illius et moralitate.	113
Qualiter primum crevit in rebus.	113
Qualiter factus est cancellarius.	113
De pace reddita Angliæ, ejectione Flandrensibus.	114
De honore et mensa domus cancellarii.	115
Qualiter nutrebat filios nobilium.	116
Qualiter cancellarius regi servierit in sua guerra de Tolosa.	122
Item qualiter se habuit in guerra Francorum.	122
De electione cancellarii in archiepiscopum.	123
De tentatione diaboli per malos et injustos homines facta.	126
De concilio apud Clarendone habito.	131
De concilio apud Northampton habito.	133
VITA SANCTI THOMÆ QUARTA ET QUINTA, AUCTORIBUS JOHANNES DECANO SALISBURIENSIS, ET ALANO ABBATE TEWKESBURIENSIS.	
Prologus Alani.	193
Prologus Joannis Salisburiensis.	193
Incipit vita auctore Joanne Salisburiensi.	193
Incipit vita auctore Alano.	207
VITA SANCTI THOMÆ SEXTA, AUCTORE WILLELMO CANTUARIENSIS.	
Incipit vita.	234
VITA SANCTI THOMÆ SEPTIMA, AUCTORE E. DE EYESHAM.	
Prologus.	253
Incipit translatio beati Thomæ martyris.	253
VITA SANCTI THOMÆ OCTAVA, AUCTORIBUS HENRICO ABBATE ET ROGERIO MONACHO CROYLANDIÆ.	
Epistola Henrici abbatis ad Stephanum Langton cantuariæ archiepiscopum.	257
Epistola Rogerii, sive prologus in vitam S. Thomæ.	259
VITA SANCTI THOMÆ NONA, AUCTORE ANONYMO.	
Incipit vita.	263
VITA SANCTI THOMÆ DECIMA, AUCTORE BENEDICTO ABBATE.	
Incipit vita.	267
PASSIO SANCTI THOMÆ, AUCTORE ANONYMO LAMBETHIENSIS.	
Prologus.	277
I. — Qualiter ortus sit.	278
II. — Præsignum ortus ejus.	279
III. — De primitiva ejus nativitate.	279
IV. — Qualiter factus sit Cantuariensis archidiaconus.	279
V. — Qualiter factus sit regis cancellarius.	280
VI. — Qualiter factus sit Cantuariensis archiepiscopus.	280
VII. — Facti reprehensio.	280
VIII. — Apologia ejus.	281
IX. — Qualiter vixerit in episcopatu.	283
X. — Qualiter primo blanditiis eum subvertere tentaverit diabolus.	285
XI. — Qualiter diabolus eum injuriis postea aggressus sit.	287
XII. — De ortu contentions inter ipsum et regem.	289
XIII. — Qualiter debuit sedata esse contentio.	289
XIV. — Invectio in episcopos.	290
XV. — De contentions resuscitatione.	291
XVI. — De lapsu archiepiscopi.	292
XVII. — De penitentia ejus.	292
XVIII. — De causa fugæ ejus.	293
XIX. — De fuga ejus et excusatione fugæ.	293
XX. — Qualiter diabolus eum post hæc dejicere nisus sit.	294
XXI. — De afflictione ejus per regem.	295
XXII. — De solatio ejus per Deum.	295
XXIII. — De indulgentia domini papæ circa eum.	296
XXIV. — Contra quorundam reprehensionem ejus excusatio.	296
XXV. — De zelo ejus.	296
XXVI. — De prima coercionis ejus.	297
XXVII. — De cohibitione coercionis et causa cohibitionis.	297
XXVIII. — De ratione coercionis.	298

XXIX. — Qualiter sæpe laboratum est ad pacis reformationem.	298
XXX. — Qualiter et qua fiducia coercitio denuo secuta est.	299
XXXI. — Quod canonica et justa coercitio.	299
XXXII. — Quod durior potuisset esse de jure coercitio.	300
XXXIII. — Qualiter adversus quorundam detractationes excusetur archiepiscopus.	301
XXXIV. — De profectu ejus in diebus exsili.	301
XXXV. — De afflictione per regem aucta.	302
XXXVI. — De pacis demum per dominum papam reformatione.	302
XXXVII. — De media quadam injuria archiepiscopi.	302
XXXVIII. — De reditu ejus et reditus necessitate.	305
XXXIX. — De tempore reditus ejus et de causa novæurbationis.	304
XL. — Qualiter de temeritate notatus sit.	304
XLI. — De novaurbatione.	305
XLII. — De receptione ejus et æstimatione.	305
XLIII. — Excusatio ejus.	305
XLIV. — De constantia ejus.	306
XLV. — Qualiter reprehensa sit ejus constantia et qualiter excusetur.	306
XLVI. — De passionis ejus causa et modo.	307
XLVII. — Invectio in carnifices.	310
XLVIII. — Detestatio facti.	310
XLIX. — Exaggeratio sceleris.	311
L. — Quare mox debuit martyr judicari.	311
LI. — De contrario malevolorum judicio.	312
LII. — Quid verius judicandum fuerit.	313
LIII. — Quomodo vere martyr apparuerit.	314
PASSIO SANCTI THOMÆ, AUCTORE ANONYMO.	
Incipit passio prima.	317
Passio alia secunda.	323
Passio tertia.	327
Passio quarta.	329
Passio quinta.	335
VITA ET PASSIO SANCTI THOMÆ, AUCTORE ANONYMO.	
Prologus.	345
CAP. I. — De vita et moribus parentum sancti Thomæ.	346
CAP. II. — De ortu mirabili beati Thomæ.	346
CAP. III. — De visionibus matris ejus.	350
CAP. IV. — Qualiter se habuerit in juventute.	350
VITA SANCTI THOMÆ, AUCTORE ANONYMO.	
Incipit vita.	351
FRAGMENTA LANSDOWNIANÆ VITÆ S. THOMÆ.	
Prologus.	363
Incipit vita.	363
HYMNUS DE SANCTO THOMA.	369
DOCUMENTA HISTORICA DE SANCTO THOMA.	
I. — Causa inter Cantuariensem archiepiscopum et episcopum Londoniensem.	371
II. — Capitula concilii Alexandri tertii habiti Turonis.	389
III. — Juramentum magistri Girardi Pucelle et aliorum a schismate redeuntium.	391
IV. — Narratio Thomæ archiepiscopi Cantuariensis de ampulla olei sancti, quo reges Angliæ ungi debent in coronatione, sibi divinitus ostensa.	392
V. — Colloquium inter cardinales et archiepiscopum.	395
VI. — Summa causæ inter regem et Thomam.	395
VII. — De juramentis contra Romanam et Cantuariensem Ecclesiam publice per Angliam præstitis.	401
VIII. — Fragmentum ad fiscum pertinens.	402
IX. — De schismatis innovatione.	405
X. — Gradus cognationis inter regem et reginam.	405
XI. — Revocatio articulorum quos rex Henricus secundus voluit Ecclesiæ Anglicanam observare.	406
XII. — Capitula purgationis quam præstitit Eboracensis quarta manu juratorum, quorum unus fuit magister Vacarius.	407
XIII. — Stephani Langton archiepiscopi Cantuariensis tractatus de translatione beati Thomæ.	408
XIV. — Tractatus de promissione beati Thomæ martyris videlicet quod talis esset sibi successurus, qui Ecclesiæ Pontificiensi recompensaret pro liberalitatibus sibi tempore sui exsiliis impensis.	425
XV. — Excerptum e codice regio musæi Britannicæ.	435
EPISTOLÆ THOMÆ.	
Epist. I. — Ad papam Alexandrum.	435
Epist. II. — Ad eundem. — Causa Thomæ ante dominum papam.	437

Epist. III. — Ad eundem.	438	Epist. LXXIX. — Ad omnes suffraganeos suos.	531
Epist. IV. — Ad eundem.	439	Epist. LXXX. — Ad clericos et laicos Cantie.	533
Epist. V. — Ad eundem.	441	Epist. LXXXI. — Ad clericos Cantie.	533
Epist. VI. — Ad eundem.	443	Epist. LXXXII. — Ad decanos Cantie.	534
Epist. VII. — Ad eundem.	445	Epist. LXXXIII. — Ad Willelmum subpriorem et conventum Cantuariensem.	534
Epist. VIII. — Ad eundem.	450	Epist. LXXXIV. — Ad eosdem.	538
Epist. IX. — Ad eundem.	451	Epist. LXXXV. — Ad eosdem.	539
Epist. X. — Ad eundem.	452	Epist. LXXXVI. — Ad Guafredum Ridel archidiaconum Cantuariensem.	560
Epist. XI. — Ad eundem.	454	Epist. LXXXVII. — Ad eundem.	560
Epist. XII. — Ad eundem.	455	Epist. LXXXVIII. — Ad eundem.	560
Epist. XIII. — Ad eundem.	458	Epist. LXXXIX. — Ad Guntherium.	561
Epist. XIV. — Ad eundem.	460	Epist. XC. — Ad Joannem Cantuariensem clericum suum.	562
Epist. XV. — Ad eundem.	461	Epist. CXI. — Ad Alexandrum et Joannem fideles suos.	564
Epist. XVI. — Ad eundem.	463	Epist. XCII. — Ad eosdem.	565
Epist. XVII. — Ad eundem.	464	Epist. XCIII. — Ad eosdem.	569
Epist. XVIII. — Ad eundem.	465	Epist. XCIV. — Ad Rogerium Eboracensem archiepiscopum.	570
Epist. XIX. — Ad eundem.	469	Epist. XCV. — Ad eundem.	570
Epist. XX. — Ad eundem.	470	Epist. XCVI. — Ad Conradum Moguntinum archiepiscopum electum.	571
Epist. XXI. — Ad eundem.	471	Epist. XCVII. — Ad eundem et Sabinum, Hyacinthum et Henricum cardinales.	572
Epist. XXII. — Ad eundem.	472	Epist. XCVIII. — Ad eundem.	573
Epist. XXIII. — Ad eundem.	473	Epist. XCIX. — Ad eundem.	574
Epist. XXIV. — Ad eundem.	475	Epist. C. — Ad eundem.	576
Epist. XXV. — Ad eundem.	474	Epist. CI. — Ad eundem.	577
Epist. XXVI. — Ad eundem.	481	Epist. CII. — Ad Fulconem decanum et capitulum Remense.	578
Epist. XXVII. — Ad eundem.	484	Epist. CIII. — Ad eundem Fulconem.	579
Epist. XXVIII. — Ad eundem.	487	Epist. CIV. — Ad Rotrodum Rothomagensis archiepiscopum.	580
Epist. XXIX. — Ad omnes cardinales.	488	Epist. CV. — Ad eundem.	581
Epist. XXX. — Ad Albertum presbyterum.	492	Epist. CVI. — Ad eundem.	581
Epist. XXXI. — Ad eundem.	492	Epist. CVII. — Ad eundem.	582
Epist. XXXII. — Ad eundem.	495	Epist. CVIII. — Ad capitulum Rothomagensis.	585
Epist. XXXIII. — Ad eundem et Theodwinum.	494	Epist. CIX. — Ad Willelmum Seonensem archiepiscopum.	584
Epist. XXXIV. — Ad Bernardum, Portuensem, episcopum.	493	Epist. CX. — Ad Walterum Albanensem episcopum.	588
Epist. XXXV. — Ad eundem.	493	Epist. CXI. — Ad Gaufredum Autissiodorensis episcopum.	588
Epist. XXXVI. — Ad eundem.	496	Epist. CXII. — Ad David Bangorensis archidiaconum.	589
Epist. XXXVII. — Ad Bosonem.	497	Epist. CXIII. — Ad eundem.	589
Epist. XXXVIII. — Ad Gratianum protonotarium.	498	Epist. CXIV. — Ad eundem et canonicos Bangorenses.	590
Epist. XXXIX. — Ad eundem.	499	Epist. CXV. — Ad eosdem canonicos.	590
Epist. XL. — Ad eundem.	500	Epist. CXVI. — Ad Bathoniensem clerum et populum.	591
Epist. XLI. — Ad eundem.	501	Epist. CXVII. — Ad Hilarium Cicestrensem episcopum.	591
Epist. XLII. — Ad Henricum Pisanum presbyterum.	503	Epist. CXVIII. — Ad clerum et populum Cicestrensem.	591
Epist. XLIII. — Ad Hugonem cardinalem de Bononia.	504	Epist. CXIX. — Ad Hugonem Dunelmensem episcopum.	594
Epist. XLIV. — Ad Humbaldum, Ostiensem episcopum.	504	Epist. CXX. — Ad Ricardum Conventrensem episcopum.	594
Epist. XLV. — Ad eundem et Hyacinthum.	504	Epist. CXXI. — Ad Oegidium Ebroicensem electum.	594
Epist. XLVI. — Ad eundem.	505	Epist. CXXII. — Ad Nigellum Eliensem episcopum et Ricum suum archidiaconum.	595
Epist. XLVII. — Ad eundem.	507	Epist. CXXIII. — Ad Robertum Herefordensem episcopum.	596
Epist. XLVIII. — Ad eundem.	511	Epist. CXXIV. — Ad eundem.	598
Epist. XLIX. — Ad Hyacinthum diaconum.	511	Epist. CXXV. — Ad eundem.	599
Epist. L. — Ad eundem.	512	Epist. CXXVI. — Ad Godefridum Landaviensem episcopum.	600
Epist. LI. — Ad eundem.	513	Epist. CXXVII. — Ad eundem.	600
Epist. LII. — Ad eundem.	514	Epist. CXXVIII. — Ad Lincolniensem clerum et populum.	601
Epist. LIII. — Ad eundem.	515	Epist. CXXVIII. — Ad Gilbertum Herefordensem postea Londoniensem.	601
Epist. LIV. — Ad Joannem cardinalem Joannis et Pauli.	516	Epist. CXXIX. — Ad Gilbertum Londoniensem.	601
Epist. LV. — Ad eundem.	517	Epist. CXXX. — Ad eundem.	602
Epist. LVI. — Ad eundem.	518	Epist. CXXXI. — Ad eundem.	603
Epist. LVII. — Ad eundem.	519	Epist. CXXXII. — Ad eundem Gilbertum et alios episcopos Anglie.	608
Epist. LVIII. — Ad eundem.	520	Epist. CXXXIII. — Ad eundem.	609
Epist. LIX. — Ad Mainfredum.	521	Epist. CXXXIV. — Ad eundem.	610
Epist. LX. — Ad Ottonem titule Sancti Nicolai de Carcere Tulliano diaconum.	521	Epist. CXXXV. — Ad eundem.	611
Epist. LXI. — Ad eundem.	522	Epist. CXXXVI. — Ad eundem.	612
Epist. LXII. — Ad eundem.	523		
Epist. LXIII. — Ad Theodwinum.	524		
Epist. LXIV. — Ad Willelmum Papiensem.	524		
Epist. LXV. — Ad eundem.	524		
Epist. LXVI. — Ad eundem.	525		
Epist. LXVII. — Ad eundem.	526		
Epist. LXVIII. — Ad eundem.	527		
Epist. LXIX. — Ad eundem.	528		
Epist. LXX. — Ad eundem.	528		
Epist. LXXI. — Ad eundem.	529		
Epist. LXXII. — Ad universos Ecclesie filios. — Charta protectionis et libertatis Ecclesie Christi Cantuariensi concessa.	529		
Epist. LXXIII. — Ad suffraganeos Cantie provincie.	531		
Epist. LXXIV. — Ad eosdem.	533		
Epist. LXXV. — Ad eosdem.	536		
Epist. LXXVI. — Ad omnes episcopos Anglie.	548		
Epist. LXXVII. — Ad filios Ecclesie per Cantiam constitutos. — Charta de libertatibus Ecclesie.	549		
Epist. LXXVIII. — Ad omnes qui contra D. papam iuraverunt.	550		

Epist. CXXXVIII. — Ad Stephanum Meldensem episcopum.	612
Epist. CXXXIX. — Ad eundem.	614
Epist. CXL. — Ad Nivernensem episcopum.	614
Epist. CXLI. — Ad Willelmum Norwicensem episcopum.	619
Epist. CXLII. — Ad eundem.	619
Epist. CXLIII. — Ad eundem.	620
Epist. CXLIV. — Ad Joannem Pictaviensem episcopum.	620
Epist. CXLV. — Ad Frogerium Sagiensem episcopum.	621
Epist. CXLVI. — Ad Jocellum Saresberiensem episcopum.	622
Epist. CXLVII. — Ad eundem.	623
Epist. CXLVIII. — Ad eundem.	623
Epist. CXLIX. — Ad capitulum Saresberiense.	624
Epist. CL. — Ad Ricardum Syracusanum electum.	624
Epist. CLI. — Ad eundem.	625
Epist. CLII. — Ad Rogerium Wicoricensem episcopum.	625
Epist. CLIII. — Ad eundem.	626
Epist. CLIV. — Ad eundem.	629
Epist. CLV. — Ad eundem.	630
Epist. CLVI. — Ad Henricum Wintoniensem episcopum.	632
Epist. CLVII. — Ad eundem.	633
Epist. CLVIII. — Ad eundem.	634
Epist. CLIX. — Ad eundem.	635
Epist. CLX. — Ad eundem.	637
Epist. CLXI. — Ad eundem.	638
Epist. CLXII. — Ad Robertum præpositum Arcensem.	639
Epist. CLXIII. — Ad Clerembaldum electum et fratres S. Augustini.	639
Epist. CLXIV. — Ad eosdem.	640
Epist. CLXV. — Ad Arthurum de Burgis et complices ejus.	640
Epist. CLXVI. — Ad Ricardum priorem et capitulum de Dovera.	641
Epist. CLXVII. — Ad Simonem priorem de Monte Dei, et Bernardum de Corilo.	641
Epist. CLXVIII. — Ad fratrem Nicolaum de Monte Rothomagensi.	641
Epist. CLXIX. — Ad Silvestrum Lexoviensem thesaurarium.	645
Epist. CLXX. — Ad canonicos Pantaneie.	644
Epist. CLXXI. — Ad Gilbertum de Sempingham.	644
Epist. CLXXII. — Ad eundem.	645
Epist. CLXXIII. — Ad magistrum Vivianum.	646
Epist. CLXXIV. — Ad R. abbatem et Willelmum priorem de Valle.	647
Epist. CLXXV. — Ad magistrum Lombardum.	648
Epist. CLXXVI. — Ad quemdam amicum.	648
Epist. CLXXVII. — Ad Henricum II, regem Angliæ.	648
Epist. CLXXVIII. — Ad eundem.	649
Epist. CLXXIX. — Ad eundem.	651
Epist. CLXXX. — Ad eundem.	653
Epist. CLXXXI. — Ad eundem.	657
Epist. CLXXXII. — Ad eundem Henricum II.	659
Epist. CLXXXIII. — Ad eundem Henricum II.	659
Epist. CLXXXIV. — Ad eundem.	660
Epist. CLXXXV. — Ad Ludovicum regem Francorum.	661
Epist. CLXXXVI. — Ad eundem.	661
Epist. CLXXXVII. — Ad eundem.	662
Epist. CLXXXVIII. — Ad Mathildem imperatricem.	665
Epist. CLXXXIX. — Ad Owenum regem Walliæ.	664
Epist. CXC. — Ad eundem.	664
Epist. CXCI. — Ad eundem.	665
Epist. CXCH. — Ad Mathildem Sicularum reginam.	666
Epist. CXCH. — Ad Stephanum cancellarium regis Stelliæ.	667
Epist. CXCH. — Ad Robertum comitem Leicesteræ.	668
Epist. CXCV. — Ad Hugonem comitem.	669
Epist. CXCVI. — Ad dilectam filiam suam Idoneam.	670
Epist. CXCVII. — Ad comitissam Warene.	672
EPISTOLÆ VARIORUM AD S. THOMAM ET AD ALIOS.	671, 673
Epist. CXCIII-CCXIX.	671, 673
Epist. CCCXX. — Rotrodi Rothomagensis archiepiscopi ad Henricum presbyterum cardinalem.	671
Epist. CCCXXI. — Ejusdem ad regem Angliæ.	673
Epist. CCCXXII. — Ejusdem ad Alexandrum papam.	675

Epist. CCCXXIII. — Ejusdem ad Thomam Cantuariensem.	675
Epist. CCCXXIV. — Willelmi Senonensis ad regem Angliæ.	674
Epist. CCCXXV. — Ejusdem ad Gratianum et Vivianum.	674
Epist. CCCXXVI. — Ejusdem ad Alexandrum papam.	675
Epist. CCCXXVII. — Ejusdem ad eundem.	675
Epist. CCCXXVIII. — Ejusdem ad eundem.	675
Epist. CCCXXIX. — Ejusdem ad eundem.	675
Epist. CCCXXX. — Ejusdem ad eundem.	675
Epist. CCCXXXI. — Ejusdem ad eundem.	675
Epist. CCCXXXII. — Mathæi Senonensis thesaurarii ad eundem.	675
Epist. CCCXXXIII. — Petri Cellensis postea abbatis S. Remigii ad Thomam cancellarium.	675
Epist. CCCXXXIV. — Ejusdem ad eundem.	676
Epist. CCCXXXV. — Ejusdem ad eundem.	676
Epist. CCCXXXVI. — Ejusdem ad Alexandrum papam.	678
Epist. CCCXXXVII. — C. Lantoniensis presbyteri ad Alexandrum papam.	678
Epist. CCCXXXVIII. — Simonis prioris de Monte Dei et Engelberti prioris de Valle S. Petri ad Alexandrum papam.	678
Epist. CCCXXXIX. — Eorundem ad eundem.	678
Epist. CCCXL. — Ejusdem Simonis ad Albertum cardinalem.	678
Epist. CCCXLI. — A. Sanctæ Osithæ ministri ad Alexandrum papam.	679
Epist. CCCXLII. — Abbatis Ramesiensis ad Alexandrum papam.	679
Epist. CCCXLIII. — Willelmi Ramesiensis ad Alexandrum papam.	679
Epist. CCCXLIV. — Nicolai de Monte Rothomagensi ad Thomam Cantuariensem.	679
Epist. CCCXLV. — Ejusdem ad eundem.	680
Epist. CCCXLVI. — Ejusdem ad eundem.	681
Epist. CCCXLVII. — Ejusdem ad eundem.	684
Epist. CCCXLVIII. — Henrici abbatis Stratfordensis ad Alexandrum papam.	686
Epist. CCCXLIX. — S. Ecclesiæ Trinitatis Londoniensis ad Alexandrum papam.	686
Epist. CCL. — Willelmi ecclesiæ S. Trinitatis Londoniensis prioris ad eundem.	687
Epist. CCLI. — Erisii abbatis et R. prioris S. Victoris Parisiensis ad Robertum Herefordiensem.	687
Epist. CCLII. — Prioris S. Victoris Parisiensis et R. abbatis S. Augustini ad Alexandrum papam.	688
Epist. CCLIII. — Willelmi Radingiensis abbatis ad Alexandrum papam.	688
Epist. CCLIV. — Willelmi ad Hugonem Dunelmensem.	688
Epist. CCLV. — Lombardi ad Alexandrum papam.	689
Epist. CCLVI. — Theobaldi Blesensis ad eundem.	689
Epist. CCLVII. — W. monachi ep. ad Gilbertum.	689
Epist. CCLVIII. — Magistri Viviani ad Thomam Cantuariensem.	690
Epist. CCLIX. — Ejusdem ad eundem.	691
Epist. CCLX. — Ejusdem ad Alexandrum papam.	691
Epist. CCLXI. — Ejusdem ad eundem.	692
Epist. CCLXII. — Ejusdem ad Henricum regem.	692
Epist. CCLXIII. — Laurentii abbatis Westmonasteriensis ad Alexandrum papam.	692
Epist. CCLXIV. — Magistri Willelmi ad Thomam Cantuariensem.	692
Epist. CCLXV. — Hervei clerici ad Thomam Cantuariensem.	694
Epist. CCLXVI. — Ejusdem ad eundem.	697
Epist. CCLXVII. — Hugonis ad eundem Thomam.	698
Epist. CCLXVIII. — Nuntii sui ad eundem.	699
Epist. CCLXIX. — Nuntii sui ad eundem.	701
Epist. CCLXX. — Nuntii sui ad eundem.	702
Epist. CCLXXI. — Amici sui ad eundem.	704
Epist. CCLXXII. — Amici sui ad eundem.	707
Epist. CCLXXIII.	707
Epist. CCLXXIV. — Fratris R. ad fratres G. et R.	707
Epist. CCLXXV. — Nuntii sui ad Thomam Cantuariensem.	709
Epist. CCLXXVI. — Inimicorum Thomæ ad papam et cardinales.	711
Epist. CCLXXVII. — Amici ejusdem ad Thomam Cantuariensem.	711

Epist. CCCLXXXVIII. — Amici cujusdam ad eundem.	712
Epist. CCCLXXXIX. — Amici sui ad papam.	714
Epist. CCCLXXX. — Amici cujusdam ad Thomam Cantuariensem.	714
Epist. CCCLXXXI. — Cujusdam familiaris ad eundem.	715
Epist. CCCLXXXII. — Amici ad amicum.	717
Epist. CCCLXXXIII. — Cujusdam amici ad Thomam.	720
Epist. CCCLXXXIV. — Cujusdam amici ad eundem.	723
Epist. CCCLXXXV. — Amici ad amicum.	723
Epist. CCCLXXXVI. — Amici ad amicum.	724
Epist. CCCLXXXVII. — Ludovici ad Humbaldum et Hyacinthum cardinalis.	725
Epist. CCCLXXXVIII. — Amici cujusdam ad Thomam Cantuariensem.	725
Epist. CCCLXXXIX. — Amici cujusdam ad eundem.	726
Epist. CCCXC. — Coesulum beati Thomæ ad Albertum cardinalem.	728
Epist. CCCXCI. — Eorundem ad Gratianum.	731
Epist. CCCXCII. — Fidelis cujusdam ad Thomam Cantuariensem.	733
Epist. CCCXCIII. — Amici cujusdam ad Joannem Salesberiensem.	734
Epist. CCCXCIV. — Nuntii sui ad Thomam Cantuariensem.	737
GILBERTUS FOLIOT EX ABBATE EPISCOPUS PRIMUM HEREFORDIENSIS, DEINDE LONDONIENSIS.	
Præfatio.	739
Catalogus regum et pontificum Gilberti contemporaneorum.	743
EPISTOLÆ GILBERTI FOLIOT.	
Epist. I. — Ad B. Cerneliensem abbatem.	743
Epist. II. — Ad	743
Epist. III. — Ad Henricum Wintoniensem episcopum, A. S. legatum.	747
Epist. IV. — Ad Simonem Wigorniensem episcopum.	748
Epist. V. — Ad Celestinum papam.	749
Epist. VI. — Ad Theobaldum Cantuariensem archiepiscopum.	750
Epist. VII. — Ad eundem.	750
Epist. VIII. — Ad Uctredum Landaviensem episcopum.	751
Epist. IX. — Ad Robertum Herefordiensem episcopum.	751
Epist. X. — Ad R. priorem et fratres Malvernæ.	754
Epist. XI. — Ad Lucium papam.	755
Epist. XII. — Ad Hamonem Bordesleie.	756
Epist. XIII. — Ad Jocelinum Salesberiensem episcopum.	757
Epist. XIV. — Ad eundem Jocelinum.	757
Epist. XV. — Ad B. Cernelie abbatem.	758
Epist. XVI. — Ad J. apostolicæ sedis legatum.	759
Epist. XVII. — Ad Eugenium papam.	760
Epist. XVIII. — Ad eundem.	760
Epist. XIX. — Ad Joannem priorem S. Michaelis.	761
Epist. XX. — Ad B. Cernelie abbatem.	761
Epist. XXI. — Ad Uctredum Landaviensem episcopum.	761
Epist. XXII. — Ad Theobaldum Cantuariensem episcopum.	762
Epist. XXIII. — Ad eundem.	762
Epist. XXIV. — Ad Simonem Wigorniensem episcopum.	763
Epist. XXV. — Ad Eugenium papam.	764
Epist. XXVI. — Ad Simonem Wigorniensem episcopum.	764
Epist. XXVII. — Ad Theobaldum Cantuariensem archiepiscopum.	765
Epist. XXVIII. — Ad eundem.	765
Epist. XXIX. — Ad Osbernum.	766
Epist. XXX. — Ad Jocelinum Salesberiensem episcopum.	767
Epist. XXXI. — Ad Theobaldum Cantuariensem archiepiscopum.	767
Epist. XXXII. — Ad R. priorem et fratres Cernelie.	768
Epist. XXXIII. — Ad Robertum S. S. apostolicæ cellarium.	770
Epist. XXXIV. — Ad Simonem Wigorniensem episcopum.	771

Epist. XXXV. — Ad G. priorem et conventum Herefordiensem.	772
Epist. XXXVI. — Ad Eugenium III papam.	772
Epist. XXXVII. — Ad J. legatum.	773
Epist. XXXVIII. — Ad Theobaldum Cantuariensem archiepiscopum.	773
Epist. XXXIX. — Ad eundem.	774
Epist. XL. — Ad Robertum Lincolnensem episcopum.	774
Epist. XLI. — Ad Eugenium papam.	775
Epist. XLII. — Ad Joannem de Cant.	775
Epist. XLIII. — Ad Jocelinum Salesberiensem episcopum.	777
Epist. XLIV. — Ad Theobaldum Cantuariensem archiepiscopum.	777
Epist. XLV. — Ad Uctredum Landaviensem episcopum.	778
Epist. XLVI. — Ad Theobaldum Cantuariensem archiepiscopum.	779
Epist. XLVII. — Ad Uctredum Landaviensem episcopum.	779
Epist. XLVIII. — Ad priorem et fratres de Goldclive.	779
Epist. XLIX. — Ad Simonem Wigorniensem episcopum.	780
Epist. L. — Ad Robertum Herefordiensem episcopum.	780
Epist. LI. — Ad Jocelinum Salesberiensem episcopum.	781
Epist. LII. — Ad Mathildem imperatricem.	782
Epist. LIII. — Ad Jocelinum Salesberiensem episcopum.	782
Epist. LIV. — Ad Willelmum de Cheinsia.	783
Epist. LV. — Ad F. Radingensem abbatem.	784
Epist. LVI. — Ad Uctredum Landaviensem episcopum.	784
Epist. LVII. — Ad eundem.	785
Epist. LVIII. — Ad Henricum Wintoniensem episcopum.	786
Epist. LIX. — Ad Gaufridum priorem Wintoniæ.	786
Epist. LX. — Ad episcopum.	786
Epist. LXI. — Ad Uctredum Landaviensem episcopum.	787
Epist. LXII. — Ad Jocelinum Salesberiensem episcopum.	787
Epist. LXIII. — Ad eundem.	788
Epist. LXIV. — Ad Robertum Herefordiensem episcopum.	788
Epist. LXV. — Simonis Wigorn. episcopus ad universos S. Mat. ecclesiæ filios.	789
Epist. LXVI. — Ad Simonem Wigorniensem episcopum.	790
Epist. LXVII. — Ad Jocelinum Salesberiensem episcopum.	790
Epist. LXVIII. — Ad Bernardum Clarevallensem abbatem.	791
Epist. LXIX. — Ad Theobaldum Cantuariensem archiepiscopum.	791
Epist. LXX. — Simonis Wigorniensis ad parochianos.	792
Epist. LXXI. — Ad Uctredum Landaviensem episcopum.	792
Epist. LXXII. — Ad R. Exoniensem episcopum.	793
Epist. LXXIII. — Ad Eugenium papam.	793
Epist. LXXIV. — Ad Robertum Herefordiensem episcopum.	794
Epist. LXXV. — Ad Hienardum, Joannem et capitulum S. David.	794
Epist. LXXVI. — Ad Robertum Lincolnensem archiepiscopum.	794
Epist. LXXVII. — Ad Robertum Bathoniensem episcopum.	795
Epist. LXXVIII. — Ad canonicos ecclesiæ Herefordiensis.	795
Epist. LXXIX. — Ad Brientium filium comitis.	796
Epist. LXXX. — Ad Nigellum Eliensem episcopum.	801
Epist. LXXXI. — Ad Radulfum decanum Herefordiæ.	801
Epist. LXXXII. — Ad Henricum Eboracensem archiepiscopum.	804
Epist. LXXXIII. — Ad Theobaldum Cantuariensem archiepiscopum.	804
Epist. LXXXIV. — Ad Eugenium papam.	805
Epist. LXXXV. — Ad Joannem de Dinan.	806
Epist. LXXXVI. — Ad Ro. de Burnham.	806
Epist. LXXXVII. — Ad Eugenium papam.	807

Epist. LXXXVIII. — Ad eundem.	807	Epist. CXLVI. — Alexandri papæ ad Gilbertum.	831
Epist. LXXXIX. — Ad universas S. matris Ecclesiæ filios.	808	Epist. CXLVII. — Henrici regis ad Gilbertum.	832
Epist. XC. — Ad Robertum Lincolnensem episcopum.	809	Epist. CXLVIII. — Ad Alexandrum papam.	833
Epist. XCI. — Ad Theobaldum Cantuariensem archiepiscopum.	809	Epist. CXLIX. — Ad eundem.	834
Epist. XCI. — Ad Eugenium papam.	810	Epist. CL. — Ad eundem.	835
Epist. XCIII. — Ad eundem.	810	Epist. CLI. — Ad eundem.	836
Epist. XCIV. — Ad eundem.	811	Epist. CLII. — Ad eundem.	836
Epist. XCV. — Ad Eugenium papam.	812	Epist. CLIII. — Ad eundem.	837
Epist. XCVI. — Ad eundem Eugenium.	813	Epist. CLIV. — Ad eundem.	837
Epist. XCVII. — Ad eundem.	813	Epist. CLV. — Ad eundem, post passionem Domini Cantuariensis.	839
Epist. XCVIII. — Ad eundem.	814	Epist. CLVI. — Ad eundem.	860
Epist. XCIX. — Ad eundem.	814	Epist. CLVII. — Ad eundem.	861
Epist. C. — Ad Eliam de Sai.	815	Epist. CLVIII. — Ad eundem.	863
Epist. CI. — Ad...	815	Epist. CLIX. — Ad eundem.	863
Epist. CII. — Ad Philippum de Sarnefeld.	815	Epist. CLX. — Ad eundem.	863
Epist. CIII. — Ad G. archidiaconum Wigornensem.	816	Epist. CLXI. — Ad eundem.	864
Epist. CIV. — Ad Robertum Exoniensem episcopum.	816	Epist. CLXII. — Ad eundem.	865
Epist. CV. — Roberti Exoniensis episcopi ad Eugenium papam III.	817	Epist. CLXIII. — Ad eundem.	867
Epist. CVI. — Ad Henricum Normannorum ducem.	817	Epist. CLXIV. — Ad eundem.	868
Epist. CVII. — Ad Theobaldum Cantuariensem archiepiscopum.	817	Epist. CLXV. — Ad eundem.	869
Epist. CVIII. — Ad eundem.	818	Epist. CLXVI. — Ad eundem.	871
Epist. CIX. — Ad Rogerium Eboracensem archiepiscopum.	819	Epist. CLXVII. — Ad eundem.	872
Epist. CX. — Rogerii Eboracensis archiepiscopi ad Gilbertum.	820	Epist. CLXVIII. — Ad eundem.	873
Epist. CXI. — Ad Rogerium Eboracensem archidiaconum.	822	Epist. CLXIX. — Ad eundem pro Herefordiensi episcopo electo.	873
Epist. CXII. — Ad Willelmum de Hinet.	824	Epist. CLXX. — Ad eundem.	873
Epist. CXIII. — Ad A. papam.	828	Epist. CLXXI. — Ad eundem.	874
Epist. CXIV. — Ad eundem.	828	Epist. CLXXII. — Ad eundem.	875
Epist. CXV. — Ad Henricum regem.	829	Epist. CLXXIII. — Ad eundem.	876
Epist. CXVI. — Ad R. Leicesteræ archidiaconum.	830	Epist. CLXXIV. — Ad eundem.	877
Epist. CXVII. — Ad Mathæum archidiaconum Glocestrie.	830	Epist. CLXXV. — Ad eundem.	879
Epist. CXVIII. — Ad A. comitissam Leicesteræ.	830	Epist. CLXXVI. — Ad Willelmum Papiensem cardinalem.	880
Epist. CXIX. — Ad Henricum regem.	831	Epist. CLXXVII. — Ad eundem.	882
Epist. CXX. — Ad Theobaldum Cantuariensem archiepiscopum.	832	Epist. CLXXVIII. — Ad eundem, pro Wintoniensi electo.	882
Epist. CXXI. — Ad eundem.	832	Epist. CLXXIX. — Ad Joannem Neapolitanum cardinalem.	883
Epist. CXXII. — Ad universos S. matris Ecclesiæ filios.	833	Epist. CLXXX. — Ad J. cardinalem diaconum.	884
Epist. CXXIII. — Roberti Herefordiensis episcopi ad eosdem.	834	Epist. CLXXXI. — Ad universos S. Mat. Ecclesiæ filios.	885
Epist. CXXIV. — Ad Adrianum papam.	835	Epist. CLXXXII. — Ad eosdem.	886
Epist. CXXV. — Ad parochianos Herefordiensis ecclesiæ.	835	Epist. CLXXXIII. — Ad eosdem.	886
Epist. CXXVI. — Ad fratres Theochesberie.	836	Epist. CLXXXIV. — Ad eosdem.	887
Epist. CXXVII. — Ad R. comitem Leicesteræ.	836	Epist. CLXXXV. — Ad eosdem.	887
Epist. CXXVIII. — Ad Robertum Lincolnensem episcopum.	837	Epist. CLXXXVI. — Ad eosdem.	888
Epist. CXXIX. — Ad universos S. matris Ecclesiæ filios.	837	Epist. CLXXXVII. — Ad eosdem.	889
Epist. CXXX. — Ad Ricardum Londoniensem episcopum.	838	Epist. CLXXXVIII. — Ad eosdem.	889
Epist. CXXXI. — Ad Theobaldum Cantuariensem archiepiscopum.	839	Epist. CLXXXIX. — Ad eosdem.	889
Epist. CXXXII. — Ad...	840	Epist. CXC. — Ad eosdem.	889
Epist. CXXXIII. — Ad Ricardum Londoniensem episcopum.	841	Epist. CXCI. — Ad eosdem.	890
Epist. CXXXIV. — Ad Robertum comitem Glocestrie.	841	Epist. CXCI. — Ad eosdem.	890
Epist. CXXXV. — Ad R. de Wirecestrie.	842	Epist. CXCI. — Ad Thomam Cantuariensem archiepiscopum.	891
Epist. CXXXVI. — Ad A. Lincolnensem episcopum.	844	Epist. CXCI. — Ad Thomam Cantuariensem archiepiscopum.	892
Epist. CXXXVII. — Ad Ricardum Londoniensem episcopum.	844	Epist. CXCV. — Ad eundem.	903
Epist. CXXXVIII. — Ad Gilbertum de Laci.	845	Epist. CXCVI. — Ad suffraganeos Cantuariensis Ecclesiæ.	905
Epist. CXXXIX. — Ad David Menevensem episcopum.	846	Epist. CXCVI bis. — Ad eosdem, de electione Urbani papæ.	906
Epist. CXL. — Ad Willelmum archidiaconum Londoniensem.	847	Epist. CXCVII. — Ad G. Cantuariensem archidiaconum.	906
Epist. CXLI. — Ad Theobaldum Cantuariensem archiepiscopum.	847	Epist. CXCVIII. — Ad Mauritium Parisiensem archiepiscopum.	907
Epist. CXLI. — Ad eundem.	848	Epist. CXCI. — Ad R. Pictaviensem archiepiscopum.	907
Epist. CXLI. — Ad R. Lincolnensem episcopum.	849	Epist. CC. — Ad Rojrocom Rothomagensis archiepiscopum.	908
Epist. CXLI. — Ad W. Cestrensem episcopum.	850	Epist. CCI. — Ad Rogerium Eboracensem archiepiscopum.	909
Epist. CXLI. — Thomæ Cant. archiepiscopi ad Gilbertum.	851	Epist. CCII. — Ad eundem.	909
		Epist. CCIII. — Ad J. decanum Angiehsem.	909
		Epist. CCIV. — Ad Cestrensem episcopum.	910
		Epist. CCV. — Ad Hilarium Cestrensem episcopum.	910
		Epist. CCVI. — Ad Hugonem Dunelmensem episcopum.	911
		Epist. CCVII. — Ad Bartholomæum Exoniensem episcopum.	911
		Epist. CCVIII. — Ad Robertum Oxenfordensem archidiaconum.	911
		Epist. CCIX. — Ad eundem.	912
		Epist. CCX. — Ad Robertum Herefordiensem electum.	912
		Epist. CCXI. — Ad eundem.	913

- EPIST. CCXII. — Ad eundem. 913
 EPIST. CCXIII. — Ad eundem. 914
 EPIST. CCXIV. — Ad eundem. 914
 EPIST. CCXV. — Ad episcopos Herefordiensem et Wigorniensem. 915
 EPIST. CCXVI. — Ad G. decanum, et capitulum Herefordiæ. 916
 EPIST. CCXVII. — Ad eosdem. 916
 EPIST. CCXVIII. — Ad Uctredum Langaviensem episcopum. 917
 EPIST. CCXIX. — Ad Nicolaum Landaviensem episcopum. 917
 EPIST. CCXX. — Ad Robertum Lincolnensem episcopum. 918
 EPIST. CCXXI. — Ad eundem. 918
 EPIST. CCXXII. — Ad eundem. 919
 EPIST. CCXXIII. — Ad R. Lincolnensem archidiaconum. 920
 EPIST. CCXXIV. — Ad parochianos Londoniensis ecclesiæ. 921
 EPIST. CCXXV. — Ad eosdem. 921
 EPIST. CCXXVI. — Ad eosdem. 922
 EPIST. CCXXVII. — Ad eosdem. 922
 EPIST. CCXXVIII. — Ad eosdem. 923
 EPIST. CCXXIX. — Ad eosdem. 923
 EPIST. CCXXX. — Ad eosdem. 924
 EPIST. CCXXXI. — Ad eosdem. 924
 EPIST. CCXXXII. — Ad eosdem. 925
 EPIST. CCXXXIII. — Ad eosdem. 925
 EPIST. CCXXXIV. — Ad eosdem. 926
 EPIST. CCXXXV. — Ad eosdem. 927
 EPIST. CCXXXVI. — Ad eosdem. 927
 EPIST. CCXXXVII. — Ad eosdem. 928
 EPIST. CCXXXVIII. — Ad parochianos Sancti Pauli. 928
 EPIST. CCXXXIX. — Ad eosdem. 930
 EPIST. CCXL. — Ad Robertum archidiaconum Essexiæ. 931
 EPIST. CCXLI. — Ad P. Nivernensem episcopum. 931
 EPIST. CCXLII. — Ad Walterum Norwicensem. 932
 EPIST. CCXLIII. — Ad Jocelinum episcopum Salesberiensem. 932
 EPIST. CCXLIV. — Ad eundem. 933
 EPIST. CCXLV. — Ad eundem. 933
 EPIST. CCXLVI. — Ad eundem. 934
 EPIST. CCXLVII. — Ad eundem. 934
 EPIST. CCXLVIII. — Ad Rogerium Wigorniensem episcopum, pro priore Malverniæ. 934
 EPIST. CCXLIX. — Ad eundem. 935
 EPIST. CCL. — Ad eundem. 935
 EPIST. CCLI. — Ad eundem. 936
 EPIST. CCLII. — Ad eundem. 937
 EPIST. CCLIII. — Ad eundem. 937
 EPIST. CCLIV. — Ad priorem et conventum Charitatis. 938
 EPIST. CCLV. — Ad A. abbatem et capitulum Cirencestriæ. 939
 EPIST. CCLVI. — Ad eosdem. 940
 EPIST. CCLVII. — Ad Stephanum Cluniacensem abbatem. 940
 EPIST. CCLVIII. — Ad R. archidiaconum Colecestriæ. 941
 EPIST. CCLIX. — Ad H. abbatem Sancti Edmundi. 941
 EPIST. CCLX. — Ad H. abbatem Glocestriæ. 942
 EPIST. CCLXI. — Ad Mathæum Glocestrensem archidiaconum. 942
 EPIST. CCLXII. — Ad Willelmum abbatem Radingensem. 943
 EPIST. CCLXIII. — Ad eundem. 944
 EPIST. CCLXIV. — Ad abbatem Rievallensem. 944
 EPIST. CCLXV. — Ad F. Salmurensis abbatem. 944
 EPIST. CCLXVI. — Ad Laurentium abbatem Westmonasteriensem. 946
 EPIST. CCLXVII. — Ad Henricum regem. 947
 EPIST. CCLXVIII. — Ad eundem. 948
 EPIST. CCLXIX. — Ad eundem. 948
 EPIST. CCLXX. — Ad eundem Henricum regem. 949
 EPIST. CCLXXI. — Ad eundem. 950
 EPIST. CCLXXII. — Ad eundem, de censu Sancti Petri. 950
 EPIST. CCLXXIII. — Ad eundem. 951
 EPIST. CCLXXIV. — Ad eundem. 951
 EPIST. CCLXXV. — Ad eundem. 953
 EPIST. CCLXXVI. — Ad eundem. 953
 EPIST. CCLXXVII. — Ad eundem. 954
 EPIST. CCLXXVIII. — Ad M. regem Scotiæ. 954
 EPIST. CCLXXIX. — Ad Robertum comitem Leicestriæ. 955
 EPIST. CCLXXX. — Ad eundem. 956
 EPIST. CCLXXXI. — Ad A. comitissam Leicestriæ. 957
 EPIST. CCLXXXII. — Ad comitem Albericum. 958
 EPIST. CCLXXXIII. — Ad magistrum David. 959
 EPIST. CCLXXXIV. — Ad Willelmum de Mala Palude. 959
 EPIST. CCLXXXV. — Ad H. comitem Norfolkiam. 960
 EPIST. CCLXXXVI. — Ad R. de Sancto Walerico. 960
 EPIST. CCLXXXVII. — Ad 961
 EPIST. CCLXXXVIII ad CCCCXX. — Ad varios non cognitos. a 966 ad 977
 EPISTOLÆ VARIORUM AD GILBERTUM ET ALIOS. 977
 EPIST. CCLXXXI ad CCLXXX. — Alexandri III papæ ad varios. 977
 EPIST. CCLXXXI. — Urbani III papæ ad B. Cantuariensem archiepiscopum, et omnes episcopos in Angliā constitutos. 979
 EPIST. CCLXXXII. — Honorii III papæ ad universos Christianos per Angliam constitutos, de translatione Beati Thomæ. 980
 EPIST. CCLXXXIII. — Ejusdem ad W. priorem et conventum Cantuariensem. 980
 EPIST. CCLXXXIV. — Alberti cardinalis ad Thomam Cantuariensem. 980
 EPIST. CCLXXXV. — Ejusdem et Theodwini ad Henricum regem. 981
 EPIST. CCLXXXVI. — Eorundem ad conventum Cantuariæ. 982
 EPIST. CCLXXXVII. — Eorundem ad Willelmum Senonensem archiepiscopum. 982
 EPIST. CCLXXXVIII. — Eorundem ad Gilbertum Ravenensem archiepiscopum. 984
 EPIST. CCLXXXIX. — Bernardi Portuensis episcopi ad Thomam Cantuariensem. 985
 EPIST. CCCXC. — Gratiani ad Gaufridum Ridel et alios. 985
 EPIST. CCCXCI. — Ejusdem ad Thomam Cantuariensem. 986
 EPIST. CCCXCII. — Humbaldi Ostiensis episcopi ad Thomam Cantuariensem. 986
 EPIST. CCCXCIII. — Hyacinthi ad Thomam Cantuariensem. 987
 EPIST. CCCXCIV. — Joannis Neapolitani ad Thomam Cantuariensem. 988
 EPIST. CCCXCV. — Ejusdem ad Henricum regem. 988
 EPIST. CCCXCVI. — Ottonis diaconi cardinalis S. Nicolai de Carcere Tulliano, ad Alexandrum papam pro Gilberto Londoniensi episcopo. 990
 EPIST. CCCXCVII. — Ejusdem ad Thomam Cantuariensem. 991
 EPIST. CCCXCVIII. — Ejusdem ad eundem. 991
 EPIST. CCCXCIX. — Petri cardinalis diaconi ad Thomam Cantuariensem. 991
 EPIST. CD. — Ejusdem ad eundem. 991
 EPIST. CDI. — Theodwini ad eundem. 992
 EPIST. CDII. — Ejusdem ad eundem. 992
 EPIST. CDIII. — Willelmi Papiensis ad Alexandrum papam. 995
 EPIST. CDIV. — Ejusdem et Ottonis ad eundem. 995
 EPIST. CDV. — Ejusdem Willelmi ad Thomam Cantuariensem. 995
 EPIST. CDVI. — Ejusdem ad eundem. 995
 EPIST. CDVII. — Ejusdem et Ottonis ad eundem. 994
 EPIST. CDVIII. — Eorundem ad eundem. 994
 EPIST. CDIX. — Ejusdem Willelmi ad Gilbertum Londoniensem. 995
 EPIST. CDX. — Ejusdem ad eundem. 996
 EPIST. CDXI. — Ejusdem et Ottonis ad Norwicensem et Cicestrensem episcopos. 996
 EPIST. CDXII. — T. Cantuariensis archiepiscopi ad Gilbertum London. 996
 EPIST. CDXIII. — Theobaldi ad 997
 EPIST. CDXIV. — Ejusdem ad Henricum regem. 998
 EPIST. CDXV. — Ejusdem ad eundem. 999
 EPIST. CDXVI. — Ejusdem ad 1000
 EPIST. CDXVII. — Ejusdem ad 1001
 EPIST. CDXVIII. — Ejusdem ad 1001
 EPIST. CDXIX. — Theobaldi Cantuariensis archiepiscopi testamentum. 1002
 EPIST. CDXX. — Prioris et conventus Cantuariensis ad Alexandrum papam. 1002
 EPIST. CDXXI. — Odonis prioris et conventus Cantuar. ad Alexandrum papam. 1003
 EPIST. CDXXII. — Ejusdem ad Ricardum Pictaviensem archidiaconum. 1003
 EPIST. CDXXIII. — Willelmi prioris et conventus ecclesiæ Christi Cantuariensis ad universos Christi fideles. 1003
 EPIST. CDXXIV. — Rogeri Eborac. archiepi. ad Alexan-

drum papam.	1005
Epist. CDXXV. — Ejusdem ad Hugonem Dunelmensem	1006
episcop. et alios	1006
Epist. CDXXVI. — Archiepiscopi Remensis ad Alexandrum papam.	1007
Epist. CDXXVII. — Canonicorum Remensium ad eundem.	1007
Epist. CDXXVIII. — Rotrodi Rothomagensis ad eundem papam.	1007
Epist. CDXXIX. — Ejusdem ad eundem.	1007
Epist. CDXXX. — Ejusdem ad Henricum Pisanum cardinalem.	1007
Epist. CDXXXI. — Ejusdem ad Thomam Cantuariensem.	1008
Epist. CDXXXII. — Ejusdem ad eundem.	1008
Epist. CDXXXIII. — Ejusdem ad clerum et populum Angliæ.	1009
Epist. CDXXXIV. — Ejusdem ad clerum et populum Londoniensem.	1009
Epist. CDXXXV. — Ejusdem ad Henricum regem.	1009
Epist. CDXXXVI. — Ecclesiæ Anglicanæ ad Thomam Cantuariensem.	1100
Epist. CDXXXVII. — Eorundem ad Alexandrum III papam.	1015
Epist. CDXXXVIII. — Eorundem ad eundem.	1015
Epist. CDXXXIX. — Cleri Normanniæ ad eundem.	1015
Epist. CDXL. — Clericorum quorundam ad regem Henricum.	1013
Epist. CDXLI. — Ecclesiæ Anglicanæ ad Thomam Cantuariensem.	1015
Epist. CDXLII. — Walteri Albanensis episcopi ad Gilbertum.	1017
Epist. CDXLIII. — Willelmi Altissiodorensis episcopi ad Alexandrum papam.	1017
Epist. CDXLIV. — Bangorensis archidiaconi ad Thomam Cantuariensem.	1017
Epist. CDXLV. — Bituricensis archidiaconi ad eundem.	1018
Epist. CDXLVI. — Willelmi Carnotensis electi ad Alexandrum papam.	1018
Epist. CDXLVII. — Ejusdem ad eundem.	1018
Epist. CDXLVIII. — Ogidii Ebroicensis ad eundem.	1018
Epist. CDXLIX. — Roberti Herefordiensis episcopi ad Gilbertum.	1019
Epist. CDL. — Henrici decani et capituli S. Pauli Londoniensis ad Alexandrum papam.	1020
Epist. CDLI. — Stephani Meldensis ad Alexandrum papam.	1020
Epist. CDLII. — Ejusdem ad eundem.	1020
Epist. CDLIII. — Ejusdem ad eundem.	1020
Epist. CDLIV. — Milonis Morinorum episcopi ad Alexandrum papam.	1020
Epist. CDLV. — Bernardi Nivernensis episcopi ad Alexandrum papam.	1020
Epist. CDLVI. — Willelmi Norwicensis ad Thomam Cantuariensem.	1021
Epist. CDLVII. — Baldwini Noviomensis ad Alexandrum papam.	1021
Epist. CDLVIII. — Ejusdem et Maurici Parisiensis ad eundem.	1021
Epist. CDLIX. — Petri Papiensis ad Thomam Cantuariensem.	1021
Epist. CDLX. — Maurici Parisiensis ad Alexandrum papam.	1022
Epist. CDLXI. — Ejusdem ad eundem.	1022
Epist. CDLXII. — Joannis Pictaviensis ad Thomam Cantuariensem.	1022
Epist. CDLXIII. — Ejusdem ad eundem.	1025
Epist. CDLXIV. — Ejusdem ad eundem.	1028
Epist. CDLXV. — Ejusdem ad eundem.	1050
Epist. CDLXVI. — Ejusdem ad eundem.	1051
Epist. CDLXVII. — Ejusdem ad eundem.	1053
Epist. CDLXVIII. — Ejusdem ad Gilbertum Londoniensem.	1056
Epist. CDLXIX. — Ricardi Pictaviensis archidiaconi.	1056
Epist. CDLXX. — Jocelini Salesberiensis ad Thomam Cantuariensem.	1058
Epist. CDLXXI. — Ejusdem ad Gilbertum.	1059
Epist. CDLXXII. — Capituli Salesberiensis ad Thomam Cantuariensem.	1040
Epist. CDLXXIII. — Matthæi Trecentis ad Alexandrum papam.	1040
Epist. CDLXXIV. — Rogerii Wigorniensis ad capitulum Cantuariensem.	1040
Epist. CDLXXV. — Henrici Wintoniensis ad priorem	

et conventum S. Mariæ Wigorniensis.	1041
Epist. CDLXXVI. — Fratrum Carthusianorum ad Henricum regem.	1043
Epist. CDLXXVII. — A. Certesiensis ad Alexandrum papam.	1043
Epist. CDLXXVIII. — H. Cluniacensis abbatis ad Gilbertum.	1043
Epist. CDLXXIX. — Ejusdem ad eundem.	1043
Epist. CDLXXX. — Philippi abbatis de Eleemosyna ad Thomam Cantuar.	1045
Epist. CDLXXXI. — Henrici II regis Angliæ ad episcopos Angliæ.	1045
Epist. CDLXXXII. — Ejusdem ad vicecomites.	1046
Epist. CDLXXXIII. — Ejusdem ad Reginaldum Coloniensem.	1046
Epist. CDLXXXIV. — Ejusdem ad quemdam cardinalem.	1047
Epist. CDLXXXV. — Ejusdem ad abbatem Cisterciensem.	1049
Epist. CDLXXXVI. — Ejusdem ad Willelmum Senonensem.	1049
Epist. CDLXXXVII. — Ejusdem ad eundem.	1050
Epist. CDLXXXVIII. — Henrici regis ad Alexandrum papam.	1051
Epist. CDLXXXIX. — Ejusdem ad eundem.	1051
Epist. CDXC. — Ejusdem ad eundem.	1051
Epist. CDXCI. — Ejusdem ad eundem.	1051
Epist. CDXCII. — Ejusdem ad Gilbertum.	1051
Epist. CDXCIII. — Ejusdem ad eundem.	1051
Epist. CDXCIV. — Ejusdem ad abbates Cistercienses.	1052
Epist. CDXCV. — Ejusdem ad Rotrodum Rothomagensis.	1053
Epist. CDXCVI. — Ejusdem de pace reddita Cantuariensi.	1053
Epist. CDXCVII. — Ejusdem ad filium suum.	1053
Epist. CDXCVIII. — Ejusdem ad Thomam Cantuariensem.	1054
Epist. CDXCIX. — Mathildis imperatricis ad Thomam Cantuariensem.	1054
Epist. D. — Oweni Wallensis ad Thomam Cantuariensem.	1053
Epist. DI. — Anonymi ad Alexandrum papam.	1053
Epist. DII. — Ludovici Franciæ regis ad eundem.	1053
Epist. DIII. — Ejusdem ad eundem.	1053
Epist. DIV. — Ejusdem ad eundem.	1056
Epist. DV. — Ejusdem ad eundem.	1056
Epist. DVI. — Ejusdem ad Thomam Cantuariensem.	1056
Epist. DVII. — Ejusdem ad Manuelem imperatorem.	1056
Epist. DVIII. — Ejusdem ad Willelmum regem Siciliæ.	1057
Epist. DIX. — A reginæ Francorum ad Alexandrum papam.	1058
Epist. DX. — Frederici imperatoris ad Henricum regem.	1058
Epist. DXI. — Ejusdem ad cunctos populos.	1059
Epist. DXII. — Ejusdem ad Stablaunensem abbatem.	1061
Epist. DXIII. — Regis Siciliæ ad regem Angliæ.	1062
Epist. DXIV. — Philippi comitis Flandrensis ad Alexandrum papam.	1063
Epist. DXV. — Ranulfi de Turri ad Gilbertum.	1063
Epist. DXVI. — Ad...	1064
Epist. DXVII. — ... episcopi, ad Gilbertum.	1064
Epist. DXVIII. — R... ad Thomam Cantuariensem.	1065
Epist. DXIX, DXX.	1067
HERBERTUS DE BOSEHAM S. THOMÆ CLERICI A SECRETIS.	
Epistola dedicatoria.	1068
Prefatio J. A. Giles.	1069
VITA SANCTI THOMÆ ARCHIEPISCOPI ET MARTYRIS.	
Epistola ad Baldwinum archiepiscopum Cantuariensem et ad ejus successores catholicos.	1075
LIBER PRIMUS.	
I. — De consuetudine ecclesiastica qua SS. Patrum vita describitur, et quare.	1075
II. — De Domini pietate super Thoma.	1076
III. — De viri pueritia et adolescentia.	1077
LIBER SECUNDUS.	
I. — Quod juvenis factus creverit ætate et gratia.	1077
II. — De continentia Thomæ cum juvenis esset.	1079
III. — De sæcularibus quibus obsequabatur.	1080
IV. — De archipræsule Theobaldo ad quem se tulit.	1080

- V. — De gratia quam consecutus est in obsequio. 1080
- VI. — Quomodo archilevita factus. 1080
- VII. — Qualis cum fuerit archilevita. 1082
- VIII. — Quomodo translatus et cancellarius factus. 1083
- IX. — Qualiter pro tempore levitam exuerit. 1083
- X. — Quibus gratiarum donis regis gratiam sit adeptus. 1084
- XI. — Quantus in cancellaria fuerit. 1084
- XII. — De aulicorum invidia. 1083
- LIBER TERTIUS.**
- I. — Cantuariorum archiepiscopatus a rege proponitur. 1083
- II. — Qualiter cancellarius electus. 1088
- III. — Qualiter electus ad se sit reversus. 1089
- IV. — Quam magnifice fuerit consecutus. 1091
- V. — Quare vereatur discipulus consecrati virtutes. 1092
- VI. — Quomodo exuto veteri novum hominem induit. 1094
- VII. — De prima pontificis mensa corporali, quod est mandatum novum. 1097
- IX. — Qualis fuerit in auditorio. 1102
- XI. — De sobrietate pontificis. 1108
- XII. — Qualis fuerit in ordinibus. 1112
- XIII. — Cur in describendis operibus pontificis moretur. 1118
- XIV. — De praeiis quae repetebat a laicis. 1120
- XVI. — De duobus electis in pontifices. 1124
- XVII. — De initio dissensionis inter regem et archiepiscopum. 1128
- XVIII. — Qualiter rex allegat pro populi sui pace. 1129
- XIX. — De munitionibus quas rex ab archiepiscopulo repetit et episcopis eum deserentibus. 1134
- XX. — De vocatione archiepiscopuli apud Clarendum. 1136
- XXI. — De archiepiscopuli maestitia et planctu. 1143
- LIBER QUARTUS.**
- I. — De fuga Thomae et quod evangelica fuerit. 1161
- II. — Quod sit gestum in curia, cognita archiepiscopuli fuga. 1163
- III. — De itinerario Thomae fugientis. 1164
- IV. — Quomodo Thomas fugiens in fractione panis ab hospite suo agnitus fuerit. 1166
- V. — Quare jam in transmarinis se adhuc absconderit. 1167
- VI. — De loco ubi discipulus reversus est ad magistrum. 1167
- VII. — Qualiter naufragantibus adversariis archiepiscopul applicuerit. 1168
- VIII. — Quomodo nuntii archiepiscopuli ad virum apostolicum venerit, et qualiter excepti. 1171
- IX. — Qualiter nuntii regis in Angliam reversi, et archiepiscopul a rege Francorum sit exceptus. 1173
- X. — Qualiter exceptus archiepiscopul a viro apostolico et de sui exsilii causa. 1174
- XI. — Qualiter correptus a cardinalibus quod tempore schismatis contra regem se erexerit. 1176
- XII. — Qualiter archiepiscopul Pontiniacum ad peregrinandum elegerit. 1184
- XIV. — Qualiter archiepiscopul cepit arctius vivere. 1196
- XVI. — Qualiter rex primo sit conventus. 1200
- XVII. — Qualiter arctetur archiepiscopul rege adhuc incorrecto. 1202
- XVIII. — De appellatione regis ad Romanum pontificem. 1206
- XIX. — Qualiter archiepiscopul et rex ad virum apostolicum mittunt. 1208
- XX. — Qualiter archiepiscopul a Pontiniaco recedens Senonis ad peregrinandum a rege Francorum sit exceptus. 1212
- XXI. — Qualiter archiepiscopul Senonis a Francis sit exceptus. 1215
- XXII. — De Romipetis archiepiscopuli reversis et adventu cardinalium ad pacem. 1216
- XXIII. — Qualiter archiepiscopul multos de aulicis anathematizavit. 1219
- XXIV. — Qualiter secundo rex et archiepiscopul ad virum apostolicum mittunt. 1220
- XXV. — Qualiter aretatur Romanus pontifex prae nuntiis regis et archiepiscopuli sibi adversantibus. 1221
- XXVI. — De quodam regum colloquio, ubi pax nostra stetit pro hoc adjecto, scilicet salvo honore Dei. 1222
- XXVII. — Qualiter archiepiscopul confortaverit suos in via. 1231
- XXVIII. — Qualiter rex et archiepiscopul mittunt ad virum apostolicum et de a latere suo missis ad pacem. 1236
- XXIX. — Qualiter Anglorum rex venit in Franciam, et qualiter tunc pax archiepiscopuli stetit pro pacis osculo negato. 1239
- XXX. — Qualiter archiepiscopul quinto ad Romanum pontificem miserit. 1246
- LIBER QUINTUS.**
- I. — De pace inter regem et archiepiscopulem reformata. 1251
- II. — De nuntiis ejus ad regem missis. 1252
- I. — De primo accessu ejus post pacem ad regem. 1253
- IV. — De secundo accessu ejus ad regem. 1253
- V. — De preparatione ejus ad patriam. 1254
- VI. — De ingressu ejus in mare. 1257
- VII. — De his quae in initio ingressus ejus in terram gesta. 1258
- VIII. — De episcopis regem iterum contra archiepiscopulem instigantibus. 1260
- IX. — De gestis ejus in die natalis. 1262
- X. — De recessu discipuli ab eo. 1263
- XI. — De ira regis et adventu carnificum. 1264
- LIBER SEXTUS.**
- I. — De militibus in palatium irruentibus. 1265
- II. — De occursu athletae Domini. 1267
- III. — De excusatione discipuli quod in describendo certamine sit prolixior. 1269
- IV. — De martyrio et martyrii modo. 1270
- V. — De athleta inhibitione imperiosa. 1271
- VI. — De iterata discipuli excusatione. 1273
- VII. — Quod discipulus finem martyrii invitus describat. 1274
- VIII. — De ultima viri consummatione. 1275
- IX. — De virtute patientiae viri. 1276
- X. — De spoliis et vestimentis quae partiti sunt inter eos. 1280
- XI. — De martyrio cognito in Jerusalem infra dies quindecim. 1280
- XII. — De convenientia mortis Christi, et Christi Domini. 1283
- XIII. — De gestis post martyrium. 1283
- XIV. — De forma jam exanimis corporis. 1285
- XV. — Qualiter sancti viri corpus sit deductum ad tumulum. 1284
- LIBER SEPTIMUS.**
- I. — De catalogo eruditorum Thomae. 1285
- II. — Ne quis hanc martyris historiam mutilet deprecatur. 1291
- III. — Legentium hanc historiam orationibus se commendat. 1292
- LIBER MEJORUM.**
- Prologus. 1293
- MELUS PRIMUS.** — De visibili et conformi pugna militis ad consimilem pugnam imperatoris. 1293
- MELUS SECUNDUS.** — De consonantia visibilis palmae militis ad visibilem palmam imperatoris. 1302
- De penitentia sacrilegorum militum. 1303
- De morte eorumdem. 1304
- De christianissimo Francorum rege peregre proficisciente ad martyrem. 1309
- De illustri Anglorum rege triumphato per martyrem. 1310
- De ira regum. 1313
- De nuntiis ad Romanam Ecclesiam a rege missis post martyrium. 1314
- De prima dissensione orta inter regem patrem et regem filium. 1315
- De prima peregrinatione regis ad martyrem et causa peregrinationis. 1318
- Qualiter rex peregrinus Cantuariam intraverit. 1315
- Quod rex consuetudines illas malas quae exsilii et martyrii causa fuerunt abdicaverit. 1316
- Iterat hic se per historiam hanc prosequi veritatem omni gratia assentatione et metu omni postposito. 1318
- Qualiter rex peregrinatione revertens Cantuaria exierit. 1319
- De hostibus a rege post peregrinationem suam cito triumphatis per martyrem. 1319
- De somnio martyri adhuc exsuli propheticæ ostenso quasi rebellionis hujus et pacis prophetia. 1320
- Quod regum penitentialis perseverantia rara sit et difficilis. 1322
- Praecedentis meli notulas hic breviter iterat ut adjiciat. 1323

- Interserit hic addendo de vexillo crucis et de vexillo vasis, quod gestant peregrini militis sicut illud crucis peregrini imperatoris. 1324
- Primo de crucis mysterio quod peregrini imperatoris palam gestant. 1323
- Adaptare incipit mystice signum militis signo imperatoris. 1326
- De vasis mysterio quod martyris peregrini gestant. 1327
- Quod mysticum sit signum et vexillum militis sicut et imperatoris monstrat. 1329
- Quare crux gestetur in pectore. 1331
- Quare crux affigatur in humero. 1331
- Quare crucis signum ante faciem Romani pontificis similiter et metropolitanorum gestetur semper erectum. 1331
- Quare vexillare vas militis sicut et vexillum imperatoris palam gestetur et in pectore. 1332
- Decurrit brevier quæ de signorum conformitate vrolitius dicta sunt nova quædam adiciens. 1334
- Recapitulat brevier præmissa, transiturus ad alia. 1336
- De pixidibus prius gestatis. 1337
- Modulatur citharam ad melum tertium. 1339
- De verborum protractione se excusat. 1343
- MELUS TERTIUS. — De consonantia invisibilis palmarum militis ad invisibilem palmarum imperatoris. 1345
- Quod duplex sit corona militis sicut et imperatoris. 1345
- De prima imperatoris corona. 1344
- De secunda imperatoris corona. 1344
- De duplici corona militis. 1345
- Hic primo in superioribus citharæ cordis melus tertius formari incipit. 1347
- Distinguit unitates tres. 1348
- Primo hic de prima et principali unitate agit. 1349
- Manifestatio prima primæ et principalis unitatis. 1349
- Manifestatio secunda per Creatoris gubernationem. 1354
- Manifestatio tertia per solum rationis oculum. 1356
- Manifestatio quarta primæ unitatis. 1357
- Manifestatio quinta et sexta. 1357
- Manifestatio septima. 1358
- Manifestatio octava. 1359
- Qualiter unitas prima per tertium contemplationis oculum manifestetur. 1360
- Quod duplex sit manifestationis modus per tertium contemplationis oculum. 1361
- Primo de manifestatione modo qui fit per Scripturam. 1362
- Primæ et principalis unitatis manifestatio per tertium contemplationis oculum in tertio exemplari vitæ. 1366
- De illo manifestationis genere quod dicitur Theophrastus. 1369
- De unitate solius gratiæ, et primo de ipsius causa. 1373
- De unitate miserante hominis oppressionem et cogitante de ereptionis modo. 1375
- De sententia lata pro ereptione hominis. 1376
- De latæ sententiæ executionis modo et de ipso exsecutore. 1377
- De illis qui dicunt Deum hominem factum habitu. 1378
- De illis qui dicunt Deum hominem factum essentia. 1379
- In homine assumpto duas distinguit unitates. 1380
- De latæ sententiæ executionis modo per unitatem solius gratiæ. 1381
- Tertius melus finitur hic de unitate solius gratiæ, qui et deinceps de unitate naturæ et gratiæ resonabit. 1385
- Tertius melus de unitate gratiæ et naturæ hic plane resonat, quam primo bipertit in unitatem militarem et triumphalem, et prius docet de militari. 1387
- Militarem unitatem bipertit in communem omnium iustorum et in privatam perfectorum, et primo docet de communi. 1389
- De illa triumphali unitate naturæ et gratiæ de qua principaliter intendit plene agit tertio melo de ipsa jam clara et aperte resonante. 1391
- Interserit hic primo de quodam sponsi nomine, quod valet ad unitatem hanc tertiam commendandam, sed præsertim in via. 1399
- De sponsæ nomine quod similiter ad tertiam hujus unitatis commendationem est, sed præsertim in patria

- Quod primum sponsi nomen unitatem hanc tertiam commendat, sed in via; secundum vero sponsam eandem pariter commendat, sed in patria. 1401
- De secundo sponsi nomine quod non habet in via sed in patria, et quantum consonet hoc sponsæ patrio nomine. 1401

HOMILIA in festo sancti Thomæ.

Causa exsili et martyrii beati Thomæ Cantuariensis. 1413

EPISTOLÆ HERBERTI.

- Epist. I. — Ad . . . 1415
- Epist. II. — In persona Thomæ Cantuariensis exsulantis ad Alexandrum papam contra Gilbertum Londoniensem episcopum jam excommunicatum. 1423
- Epist. III. — In persona ejusdem Thomæ ad Alexandrum papam contra eundem Gilbertum. 1425
- Epist. IV. — In persona Stephani Meidensis episcopi ad Alexandrum papam pro Thoma Cantuariensi exsulante. 1428
- Epist. V. — Herberti exsulantis ad Willelmum Senonensem archiepiscopum jam Romam profectum. 1429
- Epist. VI. — Herberti exsulantis ad eundem contra Londoniensem episcopum Romam jam proliciscentem. 1433
- Epist. VII. — Ejusdem ad eundem pro eodem. 1433
- Epist. VIII. — In persona Thomæ Cantuariensis ad universos Angliæ clericos et laicos. 1434
- Epist. IX. — In persona Thomæ ad universos Angliæ episcopos et abbates. 1434
- Epist. X. — In persona Thomæ ad Rogerium Wigornensem episcopum. 1434
- Epist. XI. — Ejusdem in persona Thomæ ad Robertum Sancti Audomari præpositum. 1438
- Epist. XII. — Ejusdem ad Nicolaum priorem infirmorum de Monte Rothomagi. 1436
- Epist. XIII. — Ejusdem ad priorem Wibertum Cantuariensis ecclesiæ et ad totum conventum. 1437
- Epist. XIV. — Episcoporum Cantuariensis provincie et aliarum personarum, quæ per eandem provinciam variis locis constitutæ sunt, missa ad Thomam Cantuar. cum in exsilio Pontiniaci moraretur. 1438
- Epist. XV. — Herberti ad universos Cantuariensis provincie episcopos et personas variis locis constitutas, edita in personam Thomæ, et continens responsum ad libellum eorumdem appellationum. 1439
- Epist. XVI. — Lombardi in persona Thomæ Cantuar. archiepisc. responsalis ad appellationem episcoporum Angliæ scripto factam. 1439
- Epist. XVII. — Thomæ Cantuar. archiep. exsulantis responsalis ad appellationem episcoporum Angliæ, et ad quædam alia sibi ab iisdem objecta. 1447
- Epist. XVIII. — Herberti exsulantis ad Willelmum Carnotensem electum. 1447
- Epist. XIX. — Ejusdem ad Gregorium abbatem de Malmesberia. 1448
- Epist. XX. — Ejusdem ad Alexandrum papam in persona Thomæ. 1451
- Epist. XXI. — Ejusdem ad Henricum Bajocensem episcopum. 1456
- Epist. XXII. — B. abbas S. Crispini Suessionensis ad Herbertum. 1456
- Epist. XXIII. — Herberti exsulantis ad B. abbatem S. Crispini Suessionensis. 1457
- Epist. XXIV. — Ejusdem ad Alexandrum papam in persona Henrici comitis Trecentis. 1458
- Epist. XXV. — Ejusdem ad A. papam in persona Mathæi præcentoris Senonensis. 1459
- Epist. XXVI. — Ejusdem ad Reimundum diaconum cardinalem R. Ecclesiæ in persona Thomæ Cantuariensis. 1460
- Epist. XXVII. — Ejusdem ad christianum Francorum regem Ludovicum in persona Thomæ Cantuariensis archiepiscopi. 1461
- Epist. XXVIII. — Ejusdem ad Waldemarum regem Dacorum in persona Thomæ Cantuariensis archiepiscopi. 1461
- Epist. XXIX. — Ejusdem ad Willelmum Vizellacensem abbatem consultantem super quibusdam hæreticis deprehensis qui vulgo dicuntur Dagenis seu Deonas. 1463
- Epist. XXX. — Ejusdem ad Bartholomæum Exoniensem episcopum. 1464
- Epist. XXXI. — Ejusdem ad Baldwinum Exoniensem archidiaconum. 1464
- Epist. XXXII. — Ejusdem ad Alexandrum papam in persona A. Silvanectensis episcopi. 1465
- Epist. XXXIII. — Ejusdem in persona Willelmi Seno-

nensis archiepiscopi ad Alexandrum papam contra interfectores sancti Thomæ. 1463

Epist. XXXIV. — Ejusdem post S. Thomæ martyrium ad Alexandrum papam, conquerens quod domino suo in gloria et sociis in pace, solus esset in certamine. 1463

Epist. XXXV. — Ejusdem post S. Thomæ martyrium ad Joannem Salesberiensem. 1467

Epist. XXXVI. — Ejusdem post S. Thomæ martyrium ad Gontherium quemdam socium suum. 1467

Epist. XXXVII. — Ejusdem in persona Willelmi archiepiscopi ad abbatem Vizellacensem. 1468

Epist. XXXVIII. — Ejusdem post S. Thomæ martyrium ad Joannem Pictaviensem episcopum. 1468

Epist. XXXIX. — Ejusdem post S. Thomæ martyrium ad duos cardinales Albertum et Theodwinum ad curandam tantæ Ecclesiæ plagam missos, quo tempore rex Anglorum in Hiberniam profectus est, se, ut dicebatur, absentans. 1469

Epist. XL. — Petitio Herberti exsulantis post domini sui sancti Thomæ martyrium ad Alexandrum, papam postulans ut illius sancti martyris solemnitate omni Ecclesiæ orbe mandet celebrari. 1474

Epist. XLI. — Alexandri papæ consolatoria ad Herbertum post domini sui Sancti Thomæ martyrium exsulantem. 1471

Epist. XLII. — Herberti exsulantis post S. Thomæ martyrium ad Hugonem Dunelmensem episcopum. 1472

Epist. XLIII. — Cardinalium missorum a latere domni papæ ad regem Angliæ, continens formam pacis inter Ecclesiam et ipsum factam post mortem S. Thomæ Cantuariensis. 1472

Epist. XLIV. — Responsalis ad eundem. 1473

Epist. XLV. — Willelmi Eliensis ad Herbertum. 1474

Epist. XLVI. — Hernalfi Luxoviensis episcopi ad Thomam Cantuariensem archiepiscopum exsulantem. 1474

GLOSSA IN PSALTERIUM.
Præfatio Herberti ad Willelmum Senonensem episcopum. 1473

ALANUS PRIOR CANTUARIENSIS, POSTEA
ABBAS TEWKESBERIENSIS.

EPISTOLÆ ALANI.

Epist. I. — Ad Philippum regem Franciæ. 1473

Epist. II. — Ad priorem Wintoniæ. 1476

Epist. III. — Ad Baldwinum archiepiscopum. 1477

Epist. IV. — Ad Henricum regem. 1478

Epist. V. — Ad Benedictum abbatem de Burgo. 1479

Epist. VI. — Ad Robertum de Hardres. 1480

Epist. VII. — Ad Benedictum abbatem de Burgo. 1481

Epist. VIII. — Ad eundem. 1483

Epist. IX. — Joannis prioris S. Swithini Wintoniæ ad Alanum. 1483

Epist. X. — Alani ad Asinum de Burgo. 1484

Epist. XI. — Ad Joannem archiepiscopum Lugdunensem. 1483

Epist. XII. — Ad eundem. 1487

Epist. XIII. — Ad magistrum G. cardinalem. 1487

Epist. XIV. — Ad Cantuariensem archiepiscopum. 1488

VITA SANCTI THOMÆ. 1488

Indices in epistolas S. Thomæ. 1489

Indices in epistolas Gilberti Foliot. 1497

FINIS TOMI CENTESIMI NONAGESIMI.



28
73
74
0-
74

0-
73

3
6
7
8
9
0
1
3
3
5
4
-
3
7
3
9

Y